


# Awajún [Aguaruna]



Aguaruna: Awajún [Aguaruna] (Bible)

# Awajún [Aguaruna] Aguaruna: Awajún [Aguaruna] (Bible)

copyright © 2020 Wycliffe Bible Translators, Inc.

Language: Aguaruna

Translation by: Wycliffe Bible Translators

Contributor: Wycliffe Bible Translators, Inc.

Aguaruna

agr

Peru

## Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Aguaruna

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-04-26

---

PDF generated using Haiola and XeLaTeX on 25 Apr 2025 from source files dated 26 Apr 2025  
83ecbfbd-5af5-5abb-945b-1213bf2b2b18

## Contents

Génesis . . . . .	1
Éxodo . . . . .	71
Levítico . . . . .	104
Números . . . . .	110
Deuteronomio . . . . .	125
Josué . . . . .	150
Jueces . . . . .	160
Rut . . . . .	178
1 Samuel . . . . .	183
2 Samuel . . . . .	216
1 Reyes . . . . .	240
2 Reyes . . . . .	264
Esdras . . . . .	283
Nehemías . . . . .	288
Job . . . . .	295
Salmos . . . . .	318
Proverbios . . . . .	381
Eclesiastés . . . . .	395
Isaías . . . . .	398
Jeremías . . . . .	448
Ezequiel . . . . .	476
Daniel . . . . .	486
Oseas . . . . .	501
Joel . . . . .	511
Amós . . . . .	517
Jonás . . . . .	529
Miqueas . . . . .	532
Habacuc . . . . .	539
Zacarías . . . . .	544
Malaquías . . . . .	545
Mateo . . . . .	549
Marcos . . . . .	597
Lucas . . . . .	626
Juan . . . . .	675
Takasbau . . . . .	710
Romanos . . . . .	752
1 Corintios . . . . .	773
2 Corintios . . . . .	791
Gálatas . . . . .	803
Efesios . . . . .	810
Filipenses . . . . .	817
Colosenses . . . . .	822
1 Tesalonicenses . . . . .	826
2 Tesalonicenses . . . . .	830
1 Timoteo . . . . .	833
2 Timoteo . . . . .	838
Tito . . . . .	842
Filemón . . . . .	845
Hebreos . . . . .	846
Santiago . . . . .	860

1 Pedro . . . . .	865
2 Pedro . . . . .	870
1 Juan . . . . .	873
2 Juan . . . . .	878
3 Juan . . . . .	879
Judas . . . . .	880
Iwainakbau . . . . .	882

## Nagkamnamu Génesis

Génesis tawa nunak “nagkamnamu” taku tawai. Apajuí chichame yama nagkamchaku agagbau Génesis tawa nuwi augmatui nayaimpish, nugkash, aentsush, tuja ashí tikich waji aidau ii wainainag dusha wajuk najaneakukita nuna. Israel aents aidaush tuwiya jijnjauwaita nunashkam augmatui.

Juju yama nagkamchaku agagbauwa juwi dekaji Apajuí aentsun najanauwa nujash wajuk antugdainuk ayi. Tuja wajuk nagkamdaukita pegkegchau takatash dushakam juwi agagbauwai. Apajuí chichamen umigtsuk dita wakegamun takasu asagmatai, waitut nagkamnamu.

Nunik dita pegkegchau takamsamujin senchi waituidau asagmatai, Apajuí aentsun agkanmitkatatus nagkamauwai.

Aents aidau Apajuín umigtsuk shiig pegkegchaun takaidau asagmatai, Apajuí nugkanum yumin yutumtikag aentsun kuntin aidaujai ijinak Noék Apajuí wakegamun takau asamtai, niina nuwen, uchiji aidaun, uchiji nuwe aidaun, niina aatus uwentikjauwai.

Dutikamshakam aents aidauk nuna deokayatak ima Apajuínak umigtsuk, ataktu nagkamawag pegkegchaun takainak makichik kumpin muuntan najaniagtai, Apajuí dita anentain dekaju asa nuna kumpinan tsaikui. Dutika aents aidaun suwimkan suwak maki makichik chichamtin antugdaimainchau emakui.

Aatus Apajuí yama nagkamchak ashí waji aidaun najankauwa nuna pachis augmatui, dutika nuigtushkam Apajuík niina aentsji aidaunak kajimakig idaisashtina nuna pachis augmatus inagnawai.

### *Yama nagkamchaku najankamu*

<sup>1</sup> Yama nagkamchakug, Apajuík nayaimpin nugkajai najanauwai.

<sup>2</sup> Nugka niimeg atsau, ayatak nayants kuna, suwe ijiamu aajakui. Nuna awanken Apajuín Wakani\* buchitu au.

<sup>3</sup> Nuadui Apajuí chichaak: “iTsaptin weti!” tusa tamawaik, tsaptin wajasui.

<sup>4</sup> Nuna Apajuí diis “tsaptin aku ima pegkejai”, tusa tsaptinun suwenmayan akankauwai.

<sup>5</sup> Duwi tsaptinun adaikauwai “tsawai”, tuja suwen adaikauwai “kashi” juna takas ejeyuwai makichik tsawantan.

<sup>6</sup> Nuigtu Apajuí chichaak: “Agkaju múun wajasti, nuniak yumin akanjati”, tiuwai. Tamawaik imanisag uminkauwai.

<sup>7</sup> Dutika Apajuí agkajun najana, yumi nugkaya atinun tuja yakiya atinjai akankauwai.

<sup>8</sup> Dutika Apajuí agkajua nuna adaikauwai “nayaim”. Juna umik kintamag tsawak jimag tsawantan ejeyuwai.

<sup>9</sup> Nuna ashimak Apajuí chichaak: “Nayaimpi nugkaan yumi ayá juka makichik ijunbaunmag ijunjati, nunitai buku wantinkati”, tiuwai. Tamawaik imanisag uminkauwai.

<sup>10</sup> Yumi makichik ijunbaunmak ijunjamtai buku juwakua nuna Apajuí adaikauwai “nugka”, untsu yumi piyajua nuna adaikauwai “nayants”. Nuna Apajuí shiig pegkeg diisui.

<sup>11</sup> Nuna umika Apajuí chichaak: “Ashí nugkanum dekas ajak aidau, dupa nejen aidaush, nuigtush numi nejen aidaushkam tsapakti”, tiuwai. Tamawaik imanisag uminkauwai.

<sup>12</sup> Nugkanmak ashí ajak aidau tsapakui, dupa nejen aidaush antsag numi nejen aidaushkam, nejenak mantamsawag ijuntsauwai. Nuna Apajuí shiig pegkeg diisui.

<sup>13</sup> Juna aatus kpatum tsawanta duwi umikui.

<sup>14</sup> Tuja nuigtushkam Apajuí chichaak: “Agkaju múun wigka weaja juiyash, etsantug nugkan tsapmitkau aidau aitnune, nunú etsantak akankati tsaptinun suwenmayan, dutikam tsawan, nantu, mijan aina nunú dekaapatina iwainau agtinun.

<sup>15</sup> Nunú nayaimpin agkajujin nanamsag etsantuinak ashí nugkan tsapmitkau agtinme”, tiuwai. Tamawaik imanisag uminkauwai.

\* **1:2** “Apajuín Wakani” tawa nunak “Wakani Pegkejin” taku tawai. Duwi Nuevo Testamentonmak tutupnik Wakani Pegkeji tawai. Tuja Wakani Pegkejiya duka Apajuyai.

<sup>16</sup> Nuadui Apajúí dekas jimag etsantin agtinun najanauwai: Tsawai etsanjatnun ima muuntan najanak, kashi etsanjatnunak yaijan najanauwai. Nuigtushkam kaya aidaunashkam najankauwai.

<sup>17-18</sup> Dutika Apajúí nugkan tsawai kashijai tsaapmitkatnun, etsantin aina nuna apusauwai agkaju múun wigka weaja nuwi. Nuna Apajúí shiig pegkeg diisui.

<sup>19</sup> Juna taka takakua kintamag, ipak usumta juu tsawantan ejeyuwai.

<sup>20</sup> Nuna ashí umiku asa, Apajúí chichaak: “Namaka batsamsatin aidaush ditashkam yujaktinme, nuniagtai nugka awanken, nayaimpin agkajuji aina juwi yujasagtin aidaushkam, chigki wegantu aidaush yujaktinme”, tiuwai. Tamawaik imanisag uminkauwai.

<sup>21</sup> Nuigtushkam Apajúí najankauwai nayantsanmaya kuntin dekas múun aina nuna, nuigtushkam tikich namak yaig aidaun nagkamas ashí najankauwai. Chigki wegantu aidaunashkam imatiksag najankauwai. Nuna Apajúí shiig pegkeg diisui.

<sup>22</sup> Juna najanak Apajúí pegkegnun yumigkiak: “Yujaktajum imaniakjum nayantsanum piaktajum, tuja chigki wegantu aidautigmeshkam imanisjumek yujaktajum, imaniakjum ashí nugka jamagtajum” tiuwai.

<sup>23</sup> Makichik uwejan amua tsawanta duwi junak najanauwai.

<sup>24</sup> Nuigtushkam Apajúí chichaak: “Nugkanmashkam yujakti kuntin maki makichik niimtin aina nunú, kuntin tagkumtai aida, tagkumchatai aidaui, tuja tikich kuntin japiinas yujau aidaushkam”, tiuwai. Tamawaik imanisag uminkauwai.

<sup>25</sup> Apajúí juu kuntin aidaun najankauwa nunak, ashí pegkeg diisui.

<sup>26</sup> Ashí juna umik chichaak: “Yamai aents iina niimejai betek najanami, nii nugkanum pujusmatai, namak nayantsanmaya aidaush, nanamtin aidaush, kuntin aidaush, kuntin japiinas yujau aina dushakam ima niinak umigtinme” tiuwai.

<sup>27</sup> Apajúí aentsun najadauwa nunak niina niimejai betek, aishmagkun nuwajai najanauwai.

<sup>28</sup> Dutika pegkegnun yumigkiak:

“Yujaktajum, nuniakjum nugkak ashí jamagtajum, tuja nayantsanmaya namak aidaik ashí atum kuitamkatajum, tuja agkajunum chigki nanamin aidaush, kuntin wegantu nugkanum yujaka dushakam ashí atumin umigtamtinme”, tiuwai.

<sup>29</sup> Tusa Apajúí chichaak: “Yamai atum shiig antuktajum; ashí ajak juu nugkanmaya nejen aina nunak, numi neje yujutai aina nujai, atum yuwatnun umigkajime.

<sup>30</sup> Unstu, ashí kuntin nugkanum ayá nunash, chigki wegantu aidaunashkam, japiinas yujau aina nujai, ashí pujutji ajamu aina nunak, ashí dupa samekbau aina nuna dita yuwatnujin umigkajai”, tiuwai.

Tamawaik imanisag uminkauwai.

<sup>31</sup> Apajúí ashí nii najankamujin ijumag diis tiki pegkeg wakejumain diisui. Juna najanak ashimak juinia uwejan makichik ijuk tsawantan ejeyuwai.

## 2

<sup>1</sup> Juna Apajúí aatus nayaimpin, ashí nayaimpinum ayá nujai najana, nugkanash ashí nugkanum ayá nujai najanak ashimkauwai.

<sup>2</sup> Ashí najanak umik, tsawan sieteya juwi Apajúik ayamjauwai.

<sup>3</sup> Nuadui nunú tsawantan Apajúí etegkauwai, tsawan pegkejam tuke takashtai, ayamtai atin ati tusa.

<sup>4</sup> Jujuwai Apajúí nayaimpin nugkajai najanamua nunú pachisa aughattsamu.

*Nugka pegkeg Edén tutainum Apajúí aentsun apusamu*

Apajúí nayaimpin nugkajai najanauwa nunú tsawantai,

<sup>5</sup> makichik numikesh, dupagkesh tsapaichu aajakui. Wagki eke Apajúí yumin yutumtikchau asamtai. Nuigtushkam aents nuna takai ajakmamainkesh atsujakui.

<sup>6</sup> Ayatak nugka initkenia yumi bukuiti jiinki nugkan ukatujakui.

<sup>7</sup> Nuwiyau Apajúí, nugka yukukuntun juki aentsun najanauwai. Dutika najana aepes, dujinum umpua mayain egketuk, aents iwaku ema inankiuwai.

<sup>8</sup> Nuna dutika, Apajúí etsa minitaijiya atú Edén nugkanum yujagken ajatuuwai, dutika nuwi nii aents najanamujin apusauwai.

<sup>9</sup> Apajúí ashí numi pegkeg aidaun yujág yutai aidaunash uyujkauwai. Untsu nuna ejapeen ajatuuwai jimag ajakan. Makichik ajak nuna neje yuwakuik tuke jachatai tabaun, tikich ajakan neje yujuai, pegkejash pegkegchaujai dekatai tabujai.

<sup>10</sup> Nunú nugka Edégnum makichik namak jiiniuwai ajak aidaun ukatkatin. Nunik nuwiya ipak usumta imajin namak tsegkejui.

<sup>11</sup> Makichik tsegkeakun daaji Pisón tutai aajakui. Nunú namakak nugka Havilá tutai dekas oro pujamua nuna tentea apajakui.

<sup>12</sup> Nuiya oro ima shiig pegkejai. Nuanuig ayawai numi bedelio daagtin puwaji kugkuin, tuja kaya ónice tutaishkam ayawai.

<sup>13</sup> Tuja tikich tsegkeakbaun daajiyai Guihón tutai. Nunú Cus nugkan ashí tentea apajakui.

<sup>14</sup> Kampatuma nunuwai namaka daaji Tigris. Duka Asiria nugka, etsa minitaiya nuni awa aatus nagkaemakui. Untsu ipak usumta nuna daajiyai namak Eufrates.

<sup>15</sup> Apajuí aentsun Edégnum: "Juwi pujusam takakum ajakmata, dutikakjum kuita-mkata ashí wi najankag juka", tusa apusauwai.

<sup>16</sup> Dutika chichajak: "Ashí yujág juju ajanum ayá juka yuwata.

<sup>17</sup> Untsu yujág pegkeg, pegkegchaujai dekatai ajá ejapeen waja duka yuwawaipa, nunú yuwakmek dekas jakattame", tiuwai.

<sup>18</sup> Nuna tusa Apajuí chichaak: Aishmag ima nigki pujakug pegkegchauwai, dekas nijai tsanias pujusa yainimainun najanatjai, tiuwai.

<sup>19</sup> Apajuí ashí nugkanmaya kuntin aidaun najankauwai, ashí chigki wegantu aidau-nashkam najanak aentsun juki itan awajus: Ame maki makichik kuntin aina juna daajig adaijata, tusa tima nii imatiksag adaijauwai.

<sup>20</sup> Ashí kuntu daaji aidaunak, chigki wegantu aina nunashkam nii adaijamua nunisag juajui. Nuna aents dutika takak pujakushkam, nijai atuesa yainimainjinak igkugchauwai.

<sup>21</sup> Nuadui Apajuí aishmagkun kaján ipatuk senchi ikanag niina pagaen makichik jujukiuwai, dutika agkau tepeamtai nigki esantikauwai.

<sup>22</sup> Nunú aishmagkun pagae jujukbauwai Apajuí nuwan najanauwai, dutika aish-magkun ejetiuwai.

<sup>23</sup> Nuna wainak aishmag chichaak:

"Juka mina iyashjuiya pagae juki najanamui, nuadui niina daajig nuwa tutai atatu, wagki Apajuí aishmagnumian juki najadau asamtai."

<sup>24</sup> Nuadui aishmag nuwenkug makichik iyashik weawai. Nuniau asa apajinak niina dukujijai ukuak ima niina nuwejaig pujumainai.

<sup>25</sup> Aishmagkuk, niina nuwejai mai wisu batsamajaku ainawai, tujash nuniakush datsaamájakchaju ainawai.

### 3

#### *Adán Evajai Apajuí chichame intimjukiagbau*

<sup>1</sup> Apajuí ashí kuntin tagkumchatai aidaun najankauwa nuwiya, dapi ima senchi kajinkachu, tsanumtan yacha asa, nuwan tajua iniak:

"¿Apajuish wajinjutpagmae, juju yujág aina duka makichikish yuwawaigpajum tujamiagmaka?" tau.

<sup>2</sup> Tama nuwa ayaak:

"Yujagkek ashí yumainitji.

<sup>3</sup> Untsu Apajuí iina chichagtamak, tikich yujág ejapeen waja auna nejeg yuwawaigpa, antiitkesh antigkaigpa, auna neje yuwakjumek jakattajume, tusa tujamaji" tau.

<sup>4</sup> Tutai dapi nuwan chichajak:

"Auk wainak tujamne, jakashtajume.

<sup>5</sup> Apajuí shiig dekawai, au yujág yuwakjumek, atum wajukua ainagme nunú wainmamkajum Apajuíjai betek wajasum, pegkeg, pegkegchaujai dekamainaitjum nuadui aunak tubabiugme", tiuwai.

<sup>6</sup> Tama nuwa yujagken diistakama shiig senchi wakejukui. Nuniak dekas yuwatjai, nunikan Apajuí wainbau yacha iman atajai tusa, akaka juki yuwauwai. Nunik aishinashkam susam, niishkam juki yuwauwai.

<sup>7</sup> Nuna yuwawag wajanbauwaik, mai wisu wajamun wainmamkajui, nunikag makichik ajak higuera tutaya nuna dukeen apajag itipjuawajui.

<sup>8</sup> Nunikag batsatai aagkú dase dasenbaunum Apajuí wekagun antukag, waipakai tusag tupikakiag numi ijunbaunum uumkajui.

<sup>9</sup> Tujash Apajuí aishmagkun untsuka iniak:

"¿Tuiw amesh pujame?" tau.

<sup>10</sup> Tama nii ayaak:

“Wika ame minamun antukan ishankajame, núnikan wisu pujau asan uumjukjame”, tau.

<sup>11</sup> Tutai Apajuí aishmagkun chichajak:

“¿Ya ame wisu pujamunash dekamtijamame? ¿Wagka wi amina yujág yuwawaipa timajam dusha yuwamume?”

<sup>12</sup> Tama aishmag Apajuín ayaak:

“Ame wijai tsaniasa pujusa yainikti tusam nuwa sujusmaum nunú yujagken sujusmatai, wika yuwamjai” tau.

<sup>13</sup> Tutai Apajuí nuwan iniak:

“¿Amesh wagka dutikamume?”

Tama nuwa ayaak:

“Minak dapi tsanujamtai, yujagken yuwamjai”, tiuwai.

<sup>14</sup> Timatai Apajuí dapin chichajak:

“Amek juju dutikau asam, ashí kuntin aidaun nagkaesau tikima shiig pegkegchau atinaitme. Yamai nagkamsamek japiintsam wekaesam nugka yukukuntu yuu wekaetinaitme.

<sup>15</sup> Amek yamai nagkamsamek nuwajaig tuke shiwag atinaitme, nuadui amina uchijum wegantu agtina dusha, nuwa uchiji wegantu agtina nujaish tuke shiwajak agtina. Nuwiya makichik amina buukmin dekenjamkatnai, tujash amek ayatak niina sagkani esattinaitme”, tiuwai.

<sup>16</sup> Nuna tusa nuwan chichajak:

“Amek ejapjukmesh najaimakum senchi waittsam uchigbau atinaitme. Imanika waitiakmesh tuke amina aishjumjai pujutak waketinaitme, nuniakmeshkam amina aishjum tabau tuke umigtinaitme”, tiuwai.

<sup>17</sup> Tusa aishmagnashkam chichajak:

“¿Wagka nuwemin chichame antugkumesh, wi juju yujág yuwawaipa tusa timajam dusha yuwamume? Ame umishtaimin yamai nagkamsag nugkak shiig pegkegchau wajastatui. Amek nuwiya waittsam ajakmam yuwatnaitme, ima imaniakuam ame jakum ukuktinaitme.

<sup>18</sup> Nugkanmak jagki, ashí numi, dupa jagkigtin aidaush yujaktatui. Imanikmatai ikamia ajak aidaun yutinaitme.

<sup>19</sup> Amina senchigmin takasa yuwa pujusam ataktu nugka najaneakum ukuktinaitme, wagki amek nugka najanamu asam. Nuadui ame jakmeshkam nugka juki najanamu asam, nunismek nugka najaneatnaitme”, tiuwai.

<sup>20</sup> Tusa tima Adán niina nuwe daajin adaikauwai Eva: Nii ashí aentsun dukuji atin asamtai.

<sup>21</sup> Tuja Apajuí dita nugkujagtinun kuntu duwapen najatua anujauwai.

<sup>22</sup> Dutika Apajuí chichaak: “Yamaik aentsuk jutii ainag nujai betekmamtin wajasaje, iman asag ditashkam pegkejan pegkegchaujai dekinawai. Nuniau asag yamai nagkamsag yujág pujutan sukagtina auna yuwawag, tuke jatsuk pujusainum tajai”, tiuwai.

<sup>23</sup> Nuadui Apajuí aentsun Edégnum pujaun jiiki juki yamaik nugka najanamua juwi takasa yuwa pujustinme tusa apusauwai.

<sup>24</sup> Dutika jiiki ajapeak, Apajuí niina aentsjin querubin aidaun etsa minitaiya aatuni awaantauwai. Dutikak yujág pujuta sukagtina nuna waya yuwawainum tusa puyag kegaun apujtusui. Nunú Edégkan tentea apajakui.

## 4

### *Caín Abeljai pachisa augmattsamu*

<sup>1</sup> Adánka nuwe Eva ejapjukui, nunik pujus tsawanji jegajim aishmagkun uchigmakui, nunik adaikauwai Caín. Nunak: “Makichik uchin aishmagkun uchigmakjai, junak Apajuí minak sujuse”, taku tiuwai.

<sup>2</sup> Duwi pujus Eva tikichin uchin Abelan Caígka yachin uchigmakui. Abelak uwijan kuitamajakui, untsu Caín ajakan ajakbau aajakui.

<sup>3</sup> Kuashat tsawan nagkaemakui ai, makichik tsawantai, Caín Apajuí anentag susatnun ajaka nejen juuka juki ejentauwai.

<sup>4</sup> Tuja Abelchakam makichik uwig yama nagkamchak petsakbau shiig duwegman achika juki Apajuín emematak ejetiuwai. Dutikamtai Apajuí Abelnak shiig anenjauwai, nuadui Abeldaunak shiig anentus jukiuwai.

<sup>5</sup> Untsu Caígnak shiig anenjachui, tuja nii anentag susamunashkam shiig anentsag jujukchauwai. Dutikam Caín senchi kajekui, nunik kajekbautak wekagu.



<sup>6</sup> Nunitaman Apajuí chichajak: “¿Wagka imanika kajekmesh wekaeme?”

<sup>7</sup> Amesh pegkeg takakmek, shiig aneam wekaemaitme, amek nuiatsum duwi amina tudaujum wagagtamkittak awagtamui. Tujash amek tudauwa duka depet-mainaitme”, tiuwai.

<sup>8</sup> Makichik tsawantai Caín yachin chichajak: “Ajanum wemi” tusa yachin juki weuwai. Nunik atushat akanak yachi Abelan mauwai.

<sup>9</sup> Dutika yachin maamtai, Apajuí Caígkan chichajak:

“¿Dusha amina yatsum Abelash wajukame?” tusa tama, Caín ayaak: “Achah, wikaitag mina yatsuju kuitamnun”, tiuwai.

<sup>10</sup> Tutai Apajuí chichajak:

“¿Wagka yatsumesh aikaume? Ame yatsum maakum numpe nugkanum ukagbauwa nunú mina untsujui, suwimak susata tusa.

<sup>11</sup> Nuadui amek shiig pegkegchaunum juwaktatme, juju nugka yatsumi numpe ukagbaun uwaja nunú nugkanmak amek pujuschattame.

<sup>12</sup> Ajakak ajattame, tujash tsapaishatui. Emetnaja pujamugmek atsugtamtinai, ayatak wainkam tikich nugkanum wekaetinaitme, imaniakmesh ame pujusa ayamainuk igkugchatnaitme”, tiuwai.

<sup>13</sup> Tusa tama Caín Apajuín ayaak:

“Mina suwimkajuk shiig katsunmainchawap atatua.

<sup>14</sup> Yamaik juju nugkanmak ajapjame, nuadui wi amijai pujamunak idaikun, tikich nugkanum machikish ayamtsuk wainkan wekaetatjai, nuni wekagai mina yaki igkunkat nunú minak mantuatin ati”, tiuwai.

<sup>15</sup> Tutai Apajuí chichajak:

“Aents amina mantamuk, sieteya imania suwimkan jukiagtinai”, tiuwai.

Nuna tusa Apajuí Caígka iyashin maam amainchau apujtus akupkauwai.

<sup>16</sup> Dutikam nii pujusa Apajujai chichasbaunak ukuak Nod nugkanum wee pujusui. Nod nugkak Edégnum wajasa diismak etsa minitaiya nuni aajakui.

#### *Caín wegantu aidau*

<sup>17</sup> Caígka nuwe ejajjuk aishmagkun uchigmakui, dutika Enoc adaikauwai. Dutikamtai Caín nuwi yaaktan najana niina uchiji daajin Enoc adaikauwai.

<sup>18</sup> Tuja Enoc akiauwai Irad. Irad akiauwai Mehujael, Mehujael akiauwai Metusael, Metusael akiauwai Lámeç.

<sup>19</sup> Lámeç jimag nuwan: Adá daagtinun, Silá daagtinjai nuwatkauwai.

<sup>20</sup> Adá uchigmakui Jabalan. Tuja Jabal wegantu aidauk aakchinum batsamin, tagkun kuitamin aajaku ainawai.

<sup>21</sup> Jabala yachi aajakui Jubal. Nuna uchiji wegantu aidauk arpan awatin, pigkui umpuin aajaku ainawai.

<sup>22</sup> Siláshkam uchigmakui Tubal-caín. Nigka jiju bronce, hierro aina nuna najanajaku aidaun apaji aajakui. Tubal-caígka umayi aajakui Naamá.

<sup>23</sup> Lámeç niina nuwe aidaun chichajak:

“Mina duwag aidauwah, antuktajum:

Makichik aents mantuatag tusa ijutkui wi maamjai.

<sup>24</sup> Caígka mauk sieteya imania suwimka jukitnai tibauwai.

Tuja mina mantaug setenta y sieteya imania

suwimkanak jukitnai”, tiuwai.

#### *Adán niina nuwe Evayai uchiji kempatuma nuna akiamu*

<sup>25</sup> Adánka nuwe ataku ejajjuk uchi aishmagkun uchigmakui, dutika adaikauwai Set. Nunak: “Mina uchig Abelan Caín mauwa duwi minak juna Apajuí sujuse”, taku tiuwai.

<sup>26</sup> Setchakam makichik uchin akia adaikauwai Enós. Duwi nagkamas aents aidauk Apajuín emematuinak niina daajin adaitus segajaku ainawai.

## 5

#### *Adán wegantu aidau*

*(1 Cr. 1.1-4)*

<sup>1</sup> Juju ainawai Adán wegantu aidaun daaji agatkamua duka. Apajuí yama nagkamas aentsun najankug niina niimejai betekmamtinun najanauwai.

<sup>2</sup> Aishmagkun nuwajai najanauwai. Dutika yama najanbauwaik shiig yumi yumigkis juna daajig aents ainawai, tuu adaikauwai.

<sup>3</sup> Dutikam Adán ciento treinta mijan ejeyi pujus akiauwai Set, niijai betekmamtinun.

<sup>4</sup> Nuna akia pujusui ochocientos mijan, tuja nuigtushkam tikich uchiji aishmag aidaun, nuwa aidaujui akigkui.

<sup>5</sup> Ashí ijumjamak novecientos treinta mijan pujus jakauwai.

<sup>6</sup> Set ciento cinco mijan ejeyi pujus uchiji aishmagkun Enósan akiauwai.

<sup>7</sup> Nuna akia pujusui ochocientos siete mijan, tuja nuigtushkam uchiji aishmag aidaun, nuwa aidaujui akigkui.

<sup>8</sup> Ashí ijumjamak, novecientos doce mijan pujus jakauwai.

<sup>9</sup> Enós noventa mijan ejeyi pujus uchiji aishmagkun Cainágkan akiauwai.

<sup>10</sup> Nuna akia pujusui ochocientos quince mijan, tuja nuigtushkam tikich uchiji aishmag aidaun, nuwa aidaujui akigkui.

<sup>11</sup> Ashí ijumjamak, novecientos cinco mijan pujus jakauwai.

<sup>12</sup> Cainán setenta mijan ejeyi pujus uchiji aishmagkun Mahalaleelan akiauwai.

<sup>13</sup> Nuna akia pujusui ochocientos cuarenta mijan, tuja nuigtushkam tikich uchiji aishmag aidaun, nuwa aidaujui akigkui.

<sup>14</sup> Ashí ijumjamak novecientos diez mijan ejeyi pujus jakauwai.

<sup>15</sup> Mahalaleel sesenta y cinco mijan ejeyi pujus uchiji aishmagkun Jéredtan akiauwai.

<sup>16</sup> Nuna akia pujusui ochocientos treinta mijan, tuja nuigtushkam tikich uchiji aishmag aidaun, nuwa aidaujui akigkui.

<sup>17</sup> Ashí ijumjamak ochocientos noventa y cinco mijan ejeyi pujus jakauwai.

<sup>18</sup> Jéredtak ciento sesenta y dos mijan ejeyi pujus uchiji aishmagkun Enokan akiauwai.

<sup>19</sup> Nuna akia pujusui ochocientos mijan, tuja nuigtushkam tikich uchiji aishmag aidaun, nuwa aidaujui akigkui.

<sup>20</sup> Ashí ijumjamak novecientos sesenta y dos mijan ejeyi pujus jakauwai.

<sup>21</sup> Enoc sesenta y cinco mijan ejeyi pujus uchiji aishmagkun Matusalégkan akiauwai.

<sup>22</sup> Nuna akia pujus Enoc trescientos mijan Apajuí wakegamun takajak pujusui. Tuja nuigtushkam tikich uchiji aishmag aidaun, nuwa aidaujui akigkui.

<sup>23</sup> Ashí ijumjamak trescientos sesenta y cinco mijan pujusui.

<sup>24</sup> Enokak Apajuí wakegamun takak pujau, makichik tsawantai ayatak megkaekauwai. Apajuí niinak jukiuwai.

<sup>25</sup> Matusalén ciento ochenta y siete mijan ejeyi pujus uchiji aishmagkun Lámekan akiauwai.

<sup>26</sup> Nuna akia pujusui setecientos ochenta y dos mijan, tuja nuigtushkam tikich uchiji aishmag aidaun, nuwa aidaujui akigkui.

<sup>27</sup> Ashí ijumjamak novecientos sesenta y nueve mijan ejeyi pujus jakauwai.

<sup>28</sup> Lámec ciento ochenta y dos mijan ejeyi pujus makichik uchiji aishmagkun akiauwai.

<sup>29</sup> Dutika adaikauwai Noé. Nunak: “Apajuí nugkan pegkegchaunum yumigjau asantai, shiig senchi takainaku waituinag nunak, juju uchi ayamtjamjattawai”, taku tiuwai.

<sup>30</sup> Noé akiinamtai nuigtushkam Lámec pujusui quinientos noventa y cinco mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>31</sup> Ashí ijumjamak setecientos setenta y siete mijan ejeyi pujus, jakauwai.

<sup>32</sup> Noék niina uchiji: Sem, Cam Jafet aatus aajaku aina nunak quinientos mijanan ejeyi pujus akigkui.

## 6

### *Aents aidau ayatak pegkegchaunak takajaku aidau*

<sup>1</sup> Aents ashí nugkanum kuashat kaweaagtai, nawanji aidaushkam akiinkauwai.

<sup>2</sup> Nunú nuwa shigmauch aidaun, Apajuín uchiji aidau nuna diisag etegkeg dita wakejamun nuwatkaju ainawai.

<sup>3</sup> Nuniagtai Apajuí chichaak: “Aentsuk ayatak tudauk asag yamai nagkamsag tuke pujuschatin ainawai, ayatak ciento veinte mijan pujusa jagtinai”, tiuwai.

<sup>4</sup> Tuja Apajuí uchiji aidau, aentsu nawanji aidaun nuwatuk uchi akiamu aidau gigante senchi maanin wajasu aajaku ainawai.

<sup>5</sup> Aents aidau nugkanum batsamas senchi tunamainak, ima pegkegchaunak anentaimtus yujajuidaun Apajuí wainkauwai.

<sup>6</sup> Imaniagtai Apajuí wake besemag anentaimak, najanmainchaunas najanawabiagtailh, tusa awake anentaimjauwai.

<sup>7</sup> Nuna tusa Apajuí chichaak: “Ashí aents aidaun wi najanawaitag nunak, aentsnum nagkamsan, kuntinnash, tuja japiinas yujau aina nunash, chigkinash ashí betekmasan ijinatjai. Najanmainchaunas najanawabiagtai, tusan awake anentaimjai”, tiuwai.

<sup>8</sup> Tujash Apajuík Noénak ima nigki puyatjusa umigbau asa, shiig anenjauwai.

*Noé arca najanamu*

<sup>9</sup> Jujuwai Noé pachisa augmattsamu. Noé aajakui aents shiig pegkeg, ima Apajui wakejamunak takajaku, tuja tikich aents batsamajakua nujai ijumjamash niig dekas pegkejam aajakui.

<sup>10</sup> Noé akiauwai kampfatum uchiji aishmagkun, duka: Sem, Cam, Jafet aatus aajakui.

<sup>11</sup> Tujash nugkanmak Apajui diismak ayatak tudauk, pegkegchau takat aina duke piyak aajakui.

<sup>12</sup> Ashí aents aidauk ayatak pegkegchaunak taka batsatun Apajui wainkauwai.

<sup>13</sup> Nunik Apajui Noén chichajak: “Yamaik ashí nugkanum aents batsata nunak ijinatasan anentaimtugjai. Ditá pegkegchaujin kuashat maaniumu ayawai. Duwi ditanak ashí tikich nugkanum ayá nujai ijinattajai.

<sup>14</sup> Nuadui numi puwagtin aina nunú dakajam arca najanata, dutikam tesaka umikta. Tuja nuigtushkam yumi wayawai arca tuntupe, tuja initkenishkam ashí pegkaejata.

<sup>15</sup> Arca najankumek jujai betek dekapam najanata: Esanti ciento treinta y cinco dekapamu atatuí, untsu wegkanti veintidos dekapamu nuigtu jimaituk atatuí, antsag yakintig trece dekapamu nuigtu jimaituk atatuí.

<sup>16</sup> Tuja kampfatumma imajin ekenim najanata. Untsu arcan jeega nuna nugkaan jimaituk dekapam makichik niimtai ujaitame, aikasmek nuna yantamen makichik waiti ujaita.

<sup>17</sup> Wi yumin yutumtijattajai, dutika ai nunú ashí nugkanum piyagtatuí, nuniak nugkanum pujutji ajamu batsataina nunak ashí ijinattawai.

<sup>18</sup> Tujash amejajig chichaman umiktatjai. Tuja amek, amina nuwem, uchijum aidau, uchigmi nuwe aidau, aatsajum arcanmak chimpimattagme.

<sup>19</sup> Tuja kuntin ashí nugkanmaya aidau, aishmag nuwajai arcanum chimpiattame, ditashkam jinutsuk amejai betek uwemkatnume.

<sup>20</sup> Ashí chigki wegantu aina duka, kuntin tagkumtai wegantu aina dushakam, japiinas yujau aina nujai, jima jimagchik apatdayas amejai arcanum chimpimattawai. Ame uwemtai ditashkam uwemjatnume.

<sup>21</sup> Nuigtushkam ashí yutai aidau juukam ijumjata, nuna kuntinush yuwatnume, tuja atumshakam nuwiyag yuwattagme”, tiuwai.

<sup>22</sup> Tusa tima Noé Apajui tibaunak imatiksag umikui.

**7***Yumi yutug dujajua ashí nugkanum piyagbau*

<sup>1</sup> Apajui Noén chichajak: “Ashí tikich aents aidaujai diismash, amek ima wi wakegamua duke umiakum pujame. Nuadui ame amina pataim uchijum aidaujai arcanum egkematajum.

<sup>2</sup> Nuniakjum kuntin pegkeg aina nunú siete aishmag, siete nuwa aajam yajuakam chimpiaata, untsu kuntin yuchatai aina duka makichik aishmag, makichik nuwa aajam egkeattame.

<sup>3</sup> Nuigtushkam chigki wegantu aina dushakam jinaa megkaejai siete aishmag, siete nuwa aaja yajuakam chimpiaata.

<sup>4</sup> Siete tsawan asan yumin yutumtijattajai. Duka cuarenta tsawan, nuigtu cuarenta kashi yutugtatuí. Wi najankamu aidau nugká batsata nunak ashí ijinattajai”, tiuwai.

<sup>5</sup> Tusa tima Apajui tibaunak imatiksag Noé umikui.

<sup>6</sup> Yumi ashí nugka utuja piyajua nunak Noénak seiscientos mijanji ajai nunikui.

<sup>7</sup> Tsawan yumi yutugtin jegamtai, nujagken uwemtugtasag Noé, niina nuwe, uchiji aidau, uchiji nuwe aidau aatus arcanum chimpimauwai.

<sup>8</sup> Nunitai kuntin pegkeg aidaush, kuntin yuchatai aidaujai, tuja chigki aidaushkam, nugká japiinas yujau aidaujai,

<sup>9</sup> Noé egkemamtai ditashkam nunisag Apajui tibaunak imanisag jima jimagchik arcanum aishmag nuwajai chimpimauwai.

<sup>10</sup> Arcanum chimpima siete tsawan wegai, nagkamdauwai yumi yutug dujajua nugkanum pimutan.

<sup>11</sup> Noé seiscientos mijan ejeyu ai, jimag nantu taka, diesisiete tsawan wegai, yumi nagkamna nayaimpinmaya senchi yutau. Imaniai, initkanmaya yumi piyag teenak aushkam, ashí nugkanum pukuni shiig múun jijnajui.

<sup>12</sup> Nunik cuarenta tsawan, nuigtu cuarenta kashi tuke yutuu au.

<sup>13</sup> Nunú tsawantinig Noé niina uchiji Sem, Cam, Jafet aatus aajakua nujai, tuja niina nuwe, nuigtu kampfatum niina uchiji nuwe aidau aatus arcanum egkemawajui.

<sup>14</sup> Nuigtushkam kuntin tagkumtai aidau, kuntin tagkumchatai aidau, japiinas yujau aidau, chigki wegantu aidau aatus ditajai betek chimpimauwai.

<sup>15</sup> Tuja Noé arcanum egkemtai, ashí kuintin aina duka ditashkam jimag apa apatdayas chimpimauwai.

<sup>16</sup> Ashí kuintin aidauk aishmag nuwajai apatdayas chimpimamtai, Apajuí Noén dutikata tusa tibaunak imatiksag umikui. Nunik ashí chimpimamtai Apajuí arca waitijin epeniuwai.

<sup>17</sup> Nunikmatai, yumi nagkamna cuarenta tsawan, cuarenta kashi mijamtsuk tuke yutuu au. Imaniau asa nujag dujajua nugkanum pimak, arca kukag tepaun inanmiuwai.

<sup>18</sup> Nujagkek neetsuk ayatak dujaju au. Imanik dujajak arcanak aan yakí takuiniuwai.

<sup>19</sup> Imanik dujajiu asa, ashí nugkanum muja tsakaku aidaunak yutua emegkakui.

<sup>20</sup> Ashí yutua emegkak, nuigtushkam sieteya imajin yakintin ewagak piyajui.

<sup>21</sup> Imaniku asantai aents nugkanum batsatuk ashí jinawajui, tuja chigki wegantu, kuintin tagkumtai wegantu, kuintin tagkumchatai aidaushkam, kuintin japiinas yujau aidaujai ashí jinauwai.

<sup>22</sup> Pujutji ajamu aidau nugkanum batsatuk ashí jinauwai.

<sup>23</sup> Ima Noék, tikich nijjai arcanum chimpimau aina nujag uwemjauwai. Untsu arcanum egkemachaju aina duka ashí jinauwai. Aents, kuintin tagkumtai wegantu, chigki wegantu aidaushkam, kuintin japiinas yujau aina nujai ashí jinauwai.

<sup>24</sup> Nujagkek ashí nugkanum piyag kuyutsuk ciento cincuenta tsawan asauwai.

## 8

### *Abau mijaakbau*

<sup>1</sup> Imanik tsawan atai, Apajuí Noén ashí kuintin nijjai arcanum chimpijaidaujai wait anenjauwai. Nuadui Apajuí abau kuyuati tusa dasen nugká ajunjauwai, dutikam nunú umpuam kuyutan nagkamdauwai.

<sup>2</sup> Tuja nugkanum waa múun ujanjamtai, yumi initkanmaya jiinaidaushkam ashí epennajui. Antsag nayaimpinmaya yumi senchi yutaushkam ashí mijaakui.

<sup>3</sup> Nunikmatai duwi diipas kuyutan nagkamdauwai. Nunik ciento cincuenta tsawan ejegak nuni senchi kuyúau.

<sup>4</sup> Nunik siete nantu taka nuigtu diecisiete tsawan wegai, muja Araratnum arca patamiuwai.

<sup>5</sup> Tuja nujagkek tuke kuyu aig, diez nantu taka nuigtu makichik tsawan tsawaju ai, muja shiig múun aidaun titiji wantinjauwai.

<sup>6</sup> Tuja cuarenta tsawan nagkaemai, arcanum egkema niimtain Noé ujainiuwai.

<sup>7</sup> Dutika cuervon juki akupkauwai, tujash ekemainji atsau asantai, kuyuati tusa dakak ayatak nanaak wainak wekagu.

<sup>8</sup> Nuna dutika duwi pujus, kuyua buku weatsuash tusa dekatatus makichik pauman akupkauwai.

<sup>9</sup> Tujash nuggak eke buku wantinchau asantai, paumak nii ekema ayamainjin wainkachu asa wakitki arcanum tauwai. Nunikmatai Noé uwejen awentun pauman juki arcanum awayauwai.

<sup>10</sup> Dutika ataktu siete tsawan dakasui, nunik awentsag pauman akupkauwai.

<sup>11</sup> Dutikamu etsa akagai, olivo dukeen tsujig apas tauwai. Nunikmatai Noé aentaimas, dekas nuggak bukuap weawa tiuwai.

<sup>12</sup> Tuja nuigtushkam siete tsawan dakasui, nunik awentsag pauman akupkauwai; tujash paumak ataktu wakitkig tachui.

<sup>13</sup> Tuja nujag kuyua buku wajasua nunak Noék mijanjinak seiscientos ejeyi nuigtu makichik mijanan achiku ai nunikui. Mijan nagkamnamu yama nagkamchak nantu taka makichik tsawan tsawaju ai, Noé arca jeen chigkainiuwai. Dutika diikma kuyua nugka buku wajasun wainkauwai.

<sup>14</sup> Tuja jimag nantua nuna achika veinti siete tsawan wegai, namakak shiig kuyua buku wajasui.

### *Noé arcanum egketu jiinkimu*

<sup>15</sup> Ashí kuyua buku wajasmatai Apajuí Noén chichajak:

<sup>16</sup> "Arcanum ame, amina nuwem, uchijum aidau, uchigmin nuwe aidaujai chimpigjum nunú ashí jiinjatajum.

<sup>17</sup> Tuja ashí kuintin: chigki aidau, kuintin tagkumtai aidau, kuintin japiinas yujau aidau amejai chimpija dushakam ashí jiigta. Dutikawamin ashí yantamnum shiyaktinme, nunik yujaktinme, nuniak ashí nugkanum piyaktinme", tiuwai.

<sup>18</sup> Tusa tima Noé jiinak niina nuwen, niina uchiji aidaun, tuja uchijin nuwe aidaun aatus ashí jiiui.

<sup>19</sup> Tuja ashí kuintin aidaushkam, tuja kuintin tagkumtai aidaush, tagkumchatai aidaujui, kuintin japiinas yujau aidaushkam, chigki aidaushkam ashí jijnjauwai.

<sup>20</sup> Noé arcanmaya jiinki kuintin patasa apeaku Apajuí ememattinun kaya ekenag najanauwai.\* Dutika kuintin aidaun, chigki aidaujui Apajuí diisam pegkeg aidaun yajuak nuna nejen ashí apeak† Apajuín emematiuwai.

<sup>21</sup> Nunú Apajuín shiig awagmakui. Nuadui Apajuí chichaak: “Yamai nagkamsanuk aents aidaun tudajinig nugkanak ataktuk pegkegchaunmak yumigjashatjai, wagki aents aidauk yama datsameamuik pegkegchau takatnak anentaimtin ainawai. Tuja nuigtushkam ataktu awagkinuk yamai ijinag aikanuk pujutji ajamu aina nunak ijinashtinaitjai.

<sup>22</sup> “Juju nugka awa junisag aigkik, ajakma yutak tuke atinai, tuja nimpain, tsetsek, yumi tepeau, esat, tsawai, kashi aina duka ashí imanisag atinai”, tiuwai.

## 9

### *Apajuí Noéjai chichaman umikbau*

<sup>1</sup> Apajuí Noén niina uchiji aidaujui pegkegnum yumigkiak aatus tiuwai: “Yujaktajum, imaniakjum nugka pampankajum pimutkatajum.

<sup>2</sup> Ashí kuintin nugkanum batsamin aidauk atumin ishamjamainak kujaitin ainawai. Chigki wegantush, kuintin aidaush, nayantsanmaya aidaushkam atumnak ashí umigtamiagtinai.

<sup>3</sup> Nuadui atumek ashí kuintin aidaun, nuigtu dupa duke yujutai aina dushakam atum wakegamu yutinaitjume. Nunú aidaunak wi atumin ashí amaajime.

<sup>4</sup> Untsu kuintin maa yuwakjumes numpe yuwawaigpajum, wagki numpanum pujut au asamtai.

<sup>5</sup> Aentsnak aishmagnash, tuja nuwanash wijai betekmamtinun najanauwaitjai. Nuadui makichik aentskesh tikich aentsun maunak niinashkam dutiksag maawagtinai, tuja kuntinkesh atumin mantamuk dushakam dutiksaik maam agtinai.

<sup>6</sup> “Tuja makichkikesh tikich aentsun maunak, niinashkam dutiksag maatin ainawai, wagki aentsuk wijai betekmamtin najanamu asamtai.

<sup>7</sup> Tujash atumek uchi akigjum yujaktajum, nuniakjum ditajai ashí nugkanum piyaktajum”, tiuwai.

<sup>8</sup> Tuja nuigtushkam Apajuí Noén niina uchiji aidaujui chichajak:

<sup>9</sup> “Wi yamai atumjai chichaman umiktatag duka, atakea duish atumi uchijum wegantu agtina nujaishkam tuke asatnun umiktatjai.

<sup>10</sup> Nunak ashí kuintin atumjai arcanum chimpiju jijnjau aidaun: Chigki wegantu, kuintin tagkumtai aidaun, kuintin tagkumchatai aidaun, ashí kuintin nugkanmaya aidaujaiish umiajai.

<sup>11</sup> Atumjai wi chichaman umikag duka makichkish yapajinashtinai, nuadui atak awagkinuk aentsnak, tuja kuintin aina nunashkam yumin yutumtijanuk ijinashtinaitjai. Atakea duish yumi yutujag nugkanmayanak ijinashtinai”, tiuwai.

<sup>12</sup> Tusa Apajuí chichaak: “Jujuwai chicham tuke atinun, wi atumjai, tuja kuintin aidaujaiishkam umikbau iwainamua nunú.

<sup>13</sup> Yujagminum apusajai arco iris\*, juju diisum adeagtinaitjume wi chichaman nugkanmaya aidaujui umikag duka.

<sup>14</sup> Wi nugkan yujagkim ematai, nuwi arco iris wantintinai.

<sup>15</sup> Nuna wainkun wi atumjai, tuja kuintin aidaujaiishkam chichaman umikag nuna tuke aneetnaitjai. Nuadui ataktu awenag yumi yutug piyajag ijipachagtinai.

<sup>16</sup> Nunú arco iris yujagminum wantinkui, wi wantinaitjai, nuniakun ashí aents aidaujui, tuja kuintin ashí nugkanum batsatina nujaishkam chicham tuke atinun umikag nuna tuke aneasnuke atinaitjai.

<sup>17</sup> Chicham tuke atinun ashí aents aidaujui, tuja kuintin aidaun nugkanum batsatina nujaishkam umikag, nunú iwainamuk arco irisa jujuwai”, tusa aatus Apajuí Noéjai chichasui.

\* **8:20** “Kaya ekenag najanauwai” tawa nunak apach chichamnum “altar” tawa nuna tawai. † **8:20** “Ashí apeak” tawa nunak “holocauston” taku tawai. Holocausto tawa nunak kuintinu maawag ampujin jujuki nejenak ashí apejaku ainawai. \* **9:13** “Arco iris” tawa nunak jutii muunji “pagki wajae” tuwama nuna taku tawai.

*Noé uchiji aidau*

<sup>18</sup> Noé uchiji arcanmaya jijnjau aina duka: Sem, Cam, Jafet aatus aajakui. Cam aajakui Canaágka apaji.

<sup>19</sup> Juju kampakuma nunú aajaku ainawai Noé uchiji aidau. Juna uchiji wegantu aidau atak nagkamawag dita ashí nugkan pampantuk batsamsau ainawai.

<sup>20</sup> Noé ataktu ajakmatan nagkama uva numijin ajakui.

<sup>21</sup> Tuja makichik tsawantai, Noé uva yumiji najanamun vinon uwag nampekui. Nunik niina aakji ejapeen wisu iyan kanag tepesui.

<sup>22</sup> Nunik wisu tepettaman, Cam Canaágka apaji aajakua nunú wainak ukuak, weuwai yachi jimag agá batsatun ujaktatus. Tusa ujakam,

<sup>23</sup> Sem Jafetjai, nugkutaijin yakayin awagkek, apaji wisu tepaun wainkaig tusa, ukunmataik jegangtag apajin dukukajui.

<sup>24</sup> Dutika ukukim tepa tepakua nampekbaugin sakapag shintaag, niina uchiji ekeu Cam dutika ukukbaun dekauwai.

<sup>25</sup> Nuna dekaa pegkegchaunum yumigkiak:

“Canaágkak yachi jimaja nuna inake atinai”, tiuwai.

<sup>26</sup> Tusa nuigtu chichaak:

“Semnak mina Apajujuua nunú shiig anentinai.

Dutikamu asa nii inatnai Canaágnak.

<sup>27</sup> Apajuí Jafetan shiig kuashat nugkentin emati, dutikam nigka tajimtamea Sem aakmagbaunum pujú atatuí.

Untsu Canaán niina inake atinai”, tiuwai.

<sup>28</sup> Tuja yumi yutug aentsun ijinauwa duwi nagkamas Noé trescientos cincuenta mijan pujusui.

<sup>29</sup> Aatus ashí ijumjamak novecientos cincuenta mijan pujus jakauwai.

**10***Noé wegantu aidau*

(1 Cr. 1.5-23)

<sup>1</sup> Noé uchiji, Sem, Cam, Jafet aina nunú, yumi yutug nugkanum piyag aentsun ijinauwa duwi pujus uchin akigkaju aina nuna daaji aidauk juju ainawai:

<sup>2</sup> Jafeta uchiji aidauk: Gómer, Magog, Madai, Javán, Tubal, Mésec, Tirás, aatus aajakui.

<sup>3</sup> Gómeran uchiji aidauhkam: Asquenaz, Rifat, Togarmá, aatus aajakui.

<sup>4</sup> Javánka uchiji aidauhkam: Elisa, Tarsis, Quitim, Rodanim, aatus aajakui.

<sup>5</sup> Juu aajaku ainawai Jafeta uchiji wegantu aidau, juka maki makichik tikich chichaman chichaku aajakajui. Nunidau asag dita patayi aidaujaig etegdayag, nayantsa pakajin nugka muunnum, tuja ajuntainmashkam batsamsaju ainawai.

<sup>6</sup> Cam aajakua nuna uchiji juju aajaku ainawai: Cus, Mizraim, Fut, Canaán aatus.

<sup>7</sup> Cus aajakua nuna uchiji aidauhkam: Sebá, Havilá, Sabta, Raamá, Sabteca aatus aajaku ainawai. Untsu Raamá uchiji aajakui Sebá, Dedán aatus.

<sup>8</sup> Cusak nuigtushkam uchijin Nimrotan akiauwai. Duka apu ashí nugkanum nigki wagaku aajakui.

<sup>9</sup> Nimrotak Apajuí yayamu asa senchi kuntu main aajakui. Nuwiya chicham jinkun chichainak: “Nimrod Apajuí yayasam, kuntu main wajasu aajakua imanai”, tinu ainawai.

<sup>10</sup> Nii apu pujusmataig yaaktak juju aajaku ainawai: Babel, Erec, Acad, Calné aatus. Juju yaakat aina juka Sinar nugkanum aajaku ainawai.

<sup>11</sup> Nunú nugkanum pujau juwaki, Asiria nugkanum weuwai. Nunik jegaa nuwi yaaktan najankauwai. Nuna daaji aidauk: Nínive, Rehobot-ir, Quélah aatus aajakui.

<sup>12</sup> Nuigtushkam najanauwai yaakat dekas múun, Resen tutaya nuna. Duka yaakat Nínive Quélahjai niniaku aajakua nuna ejapeen aajakui.

<sup>13</sup> Untsu Misraím aents wegantunmaya jijnjauwai: ludeo aidau, anameo aidau, lehabita aidau, naftuhíta aidau,

<sup>14</sup> patruseo aidau, casluhíta aidau, caftorita aidau. Untsu juwiya jijnjauwai filisteo aidau.

<sup>15</sup> Untsu Canaán niina uchiji aishmagkun iwain Sidógkan akiauwai, duwi pujus Het aajakua nuna akiauwai.

<sup>16</sup> Tuja Canaán wegantunmaya jijnjauwai: Jebús aents aidau, amorreo aidau, gergeseo aidau,

<sup>17</sup> heveo aidau, araceo aidau, sineo aidau,

<sup>18</sup> arvadeo aidau, semareo aidau, nuigtu amateo aidaushkam. Juju Canaán nugkanum aents aidau dita patayi aidaujai pampagkajui.

<sup>19</sup> Cananeo aents aidaun nugkeg yaakat Sidón nagkamna nugka Guerar tutaya nuni juwaki, yaakat Gazanum nagkatkau aajakui. Tuja nuwi nagkamna yaakat Sodoma, Gomorra, Admá, Seboím aatus aajakua, nuni juwaki yaakat Lesa tutaya imanui nagkatkau aajakui.

<sup>20</sup> Cam aajakua nuna uchiji wegantu aidauk juju ainawai. Ditak maki makichik nugkentin, nuigtushkam maki makichik chichamtin aajaku ainawai. Nuadui ditá patayi aidaujaig etegdayag batsamajaku ainawai.

<sup>21</sup> Jafetan yachi iwai Sem aajakua dushakam uchijinak akigkui. Tuja Heber aajakua nuna uchiji aidauk Sem wegantu aajaku ainawai.

<sup>22</sup> Seman uchiji aidauk: Elam, Asur, Arfaxad, Lud, Aram aatus aajakui.

<sup>23</sup> Araman uchiji aidauk: Us, Hul, Guéter, Mas aatus aajaku ainawai.

<sup>24</sup> Arfaxad aajakui Sélah apaji, utsu Sélah aajakui Heberan apaji.

<sup>25</sup> Heberak jimag uchijin akiauwai. Nuwiya makichik Péleg daagtin aajakui. Nunak nii pujusmatai, ashí aents aidau pampagkag maki makichik nugkentin wajasajua duwi tuu adaikau ainawai. Tuja niina yachig Joctán aajakui.

<sup>26</sup> Joctánkan uchiji aidauk: Almodad, Sélef, Hazar-Mavet, Jérah,

<sup>27</sup> Hadoram, Uzal, Diclá,

<sup>28</sup> Obal, Abimael, Sebá,

<sup>29</sup> Ofir, Havilá, Jobab aatus aajaku ainawai.

<sup>30</sup> Dita batsamsamu aidauk nugka Mesá tawa nuwi nagkamnas Sefar nugka aajakua imanui nagkatkau aajakui. Duka etsa minitaiya nuni nugka múun aajakua nuwiya ainawai

<sup>31</sup> Seman uchiji wegantu aidauk maki makichik nugkentin, maki makichik chichamtin aajaku ainawai. Nunidau asag ditá ditak patayi aidaujaig etegdayag batsamsaju ainawai.

<sup>32</sup> Juju adaijag nunú ainawai Apajuí yumin yutumtikag aentsun ijinawa duwi batsamas Noé uchiji wegantu akigbau aina duka. Nuniyatak ditash kanakag tikich nugkanum pampagkag batsamsaju ainawai.

## 11

### *Apajuí chichaman pachinkamu*

<sup>1</sup> Nunú tsawantín ashí aents batsamajaku aina duka makichik chichamnak chichajaku ainawai.

<sup>2</sup> Etsa minitaijiya nuni batsatu jünag shima shimakua Sinar nugka pakajin wainkag nuwi batsamsajui.

<sup>3</sup> Makichik tsawantai ditá ditak chichainak: “Ladrillo najanka jinum jiya inagkagmi”, tusag kayajai takamainnak idayinak ladrillon ekenag takainak, cemento pachimja takamain etsau asantai, pegkae jukiag nujai achimtikag ekenag takaidau.

<sup>4</sup> Dutikainak: “¡Kaunatajum yaakat najanawagmi, dutikaku kumpin jiika, nuwi eke ekenkawa nayaimpinum iwakmi! ¡Ibau umiku asaja, eme anentsa diitai atin amí! Tuja pampagka tikich nugkanmak shimutsuk juwig tuke batsamsatin agmi”, tuidau.

<sup>5</sup> Tujash Apajuí Tuke Pujuu nugkanum taa diikma aents aidau yaaktamawag, kumpin muuntan apujawag batsamtiagtatman wainkauwai.

<sup>6</sup> Nunik anentaimas: “Ditak makichik wegantu ainawai, antsag chichamnash makichik chichaman chichaaku ainawai, nuadui juna nagkama ijuntu jag takainawai, tuja juna idaimitkamainuk shiig atsawai, tusa,

<sup>7</sup> dekas akaetukmi, dutika ditá chichame pachimjukmi, dutika ajin pempeentunikiag antugdaimainchau wajastinme”, tiuwai.

<sup>8</sup> Aatus tusa, Tuke Pujuu chichaman pachimjuk, ashí nugkanum dapampaak ishiakui. Dutikamu asag yaakat najantanak idaisaju ainawai.

<sup>9</sup> Nuadui nunú yaaktanak Babel adaikau ainawai. Wagki nunú nugkanum Tuke Pujuu aents aidaun chichaman pachimjuk dapampaak ashí nugkanum ishiaku asantai.

### *Sem wegantu aidau*

*(1 Cr. 1.24-27)*

<sup>10</sup> Juju aajaku ainawai Sema uchiji wegantu aidau. Apajuí yumin yutumtikag aents aidaun ijinauwa nunú jimag mijan nagkaemai, Sem niina mijanjin cien ejeyi pujus akiauwai niina uchijin Arfaxad.

<sup>11</sup> Nuna akia nuigtushkam quinientos mijan pujusui. Tuja nuigtushkam uchiji aishmag aidaun, nuwa aidaujai akigkui.

<sup>12</sup> Arfaxad treinta y cinco mijanjin ejeyi pujus akiauwai Sélah.

<sup>13</sup> Nuna akia nuigtushkam cuatrocientos tres mijan pujusui. Tuja nuigtushkam tikich uchiji aishmag aidaun, nuwa aidaujui akigkui.

<sup>14</sup> Sélah treinta mijanjin ejeyi pujus akiauwai Heber.

<sup>15</sup> Nuna akia nuigtushkam cuatrocientos tres mijan pujusui. Tuja nuigtushkam tikich uchiji aishmag aidaun, nuwa aidaujui akigkui.

<sup>16</sup> Heber treinta y cuatro mijanjin ejeyi pujus akiauwai Péleg.

<sup>17</sup> Nuna akia nuigtushkam pujusui cuatrocientos treinta mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>18</sup> Péleg treinta mijanjin ejeyi pujus akiauwai uchiji aishmagkun Reú.

<sup>19</sup> Nuna akia nuigtushkam pujusui doscientos nueve mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>20</sup> Reú treinta y dos mijanjin ejeyi pujus akiauwai uchiji aishmagkun Serug.

<sup>21</sup> Nuna akia nuigtushkam pujusui doscientos siete mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>22</sup> Serug treinta mijanjin ejeyi pujus akiauwai uchiji aishmagkun Nacor.

<sup>23</sup> Nuna akia nuigtushkam pujusui doscientos mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>24</sup> Nacor veintinueve mijanjin ejeyi pujus akiauwai uchiji aishmagkun Téráh.

<sup>25</sup> Nuna akia nuigtushkam pujusui ciento diecinueve mijan. Tuja nuigtushkam tikich uchiji aishmag aidaun, nuwa aidaujui akigkui.

<sup>26</sup> Téráh uchiji aidauk: Abram, Nacor, Harán aatus aajakui. Junak sesenta mijanjin ejeyi pujus akigkui.

#### *Téráh wegantu aidaun*

<sup>27</sup> Juju aajaku ainawai Téráh uchiji wegantu aidauk: Téráh akiauwai Abram, Nacor, Harán aatus. Untsu Harán akiauwai Lotan.

<sup>28</sup> Harágkak Caldea nugkanum yaakat Ur tutai nii akiinamua nuwi pujus, apaji Téráh eke iwaku pujaig niyá jakauwai.

<sup>29</sup> Untsu Abram Sarain nuwatkauwai. Tuja Nacor nuwenauwai Milcájai. Milcák Harágkan nawanji iwai, Iscá tawa nuna kai aajakui.

<sup>30</sup> Untsu Saraik kaga asa uchigtuchu aajakui.

<sup>31</sup> Téráh caldeo aents aidaun nugken yaakat Ur tutainum pujau ukuki Canaán nugkanum weuwai. Nuwi weak uchiji Abragkan, niina tijai Lotjai ayauwai. Tuja nuigtushkam niina uchiji nuwen Sarain ayauwai. Tujash eke Canaán nugkanmak jegatsuk, yaakat Harán jegawag nuwi batsamsajui.

<sup>32</sup> Nuwig batsamas Téráh doscientos cinco mijanjin ejeyi pujus jakauwai.

## **Abraham pachisa augmattsamu**

### **12**

(12—50)

#### *Apajú Abragkan untsukbau*

<sup>1</sup> Makichik tsawantai Apajú Abragkan chichajak: “¡Amina nugkem, pataim aidaun, apa jeshkam ukukta, nunikam wi ame pujustinun nugkan inaktustatjam nuwi wetá!

<sup>2</sup> Ame uchijum wegantu aidaunak wi shiig kuashat uyujkatnaitjai, dutika ai shiig kuashat agtinai. Wi aminak pegkegnum yumigsattagme, tuja nuigtush eme anentsa chichagtai atatme, nuadui aminiyán tikich aidaush pegkeg yumigkin jukiagtinai.

<sup>3</sup> ¡Amina pegkegnum yumigtamaidaunak wishakam dutiksanuk pegkegnum yumigsagtinaítjai! ¡Untsu amina pegkegchaunum yumigtamunak wishakam dutiksanuk pegkegchaunum yumigjatnaitjai! Nuadui ashí nugka muunnumia aidaunash amina daagmin pegkegnum yumigsagtinaítjai”, tiuwai.

<sup>4</sup> Tusa tima nuna umiak Abragkak Harán pujau nuwi juwaki weuwai. Abram Canaán nugkanum weuwa nunak setenta y cinco mijanji ajujakui

<sup>5</sup> Nunik weak niina nuwe Sarain, nuigtu niina yachi uchijin Lotan ayauwai. Nunik shimuinak ashí ditá wajiji aidaunak tagkuji aidaujui yajuakajui. Tuja aents inataiji aidaun Harágnumia sumakbau aidaunashkam yajuakui. Nunik wea weakua Canaán nugkanum jegauwai.

<sup>6</sup> Nunik jegaa, nuwi juwaki tikich nugkan amaka nagkagag wea weakua yaakat Siquemnum jegaa Moré tutainum numi encina ayaunum amamak, canaágnumia aents aidaun batsatbaunmak niishkam nuwi pujusui.

<sup>7</sup> Nuwi pujaun Tuke Pujuu Abragkan wantintuk chichajak: “Amina uchijum wegantu aidaun juju nugkanak susagtinaítjai”, tiuwai.



Tusa tima Abram Tuke Pujuu emematku kuntin maa patasa apeatnun kaya ekenag najanauwai, wagki nuwi Tuke Pujuu wantintukbau asa.

<sup>8</sup> Nuwi juwaki muja tepaju yaakat Betel\* tutaya nuna yantamen etsa minitaijiya nuni shiyakajui. Nuwi jegaa niina aakjin aakmakui. Abram pujusua nuwi pujusa diyamak Betelak etsa akaetaijiya nuni aajakui, untsu yaakat Hai tawa nunú etsa jiintaijiya nuni aajakui. Tuja nuishkam kuntin maa patasa apeaku Apajuú ememattinun kaya ekenag ataku najanauwai. Dutika Tuke Pujuu daajin adaitus untsuka segauwai.

<sup>9</sup> Nunik nuwi pujau Néguev nugkanum wegak aakjin tegaja yajuak, diipas jintá kanag waja wajakua weuwai.

*Abram Egipto nugkanum webau*

<sup>10</sup> Nunú tsawantin ashí nugkanum senchi yapajut tepeauwai. Nuadui Abram niina patayi aidaujai Egipto nugkanum pujustatus weuwai, wagki nii pujamunmag makichik yumainkesh shiig atsau asamtai.

<sup>11</sup> Egipto nugkanum jegattak wesa, Abram niina nuwe Sarain chichajak: “Antukta nijah, anek nuwauch shigmauchitman nunak wika shiig dekajai,

<sup>12</sup> nuadui egiptunmaya aents waipakag chichainak: ‘Juka nuwak juna nuwegai’ tusag, mina mantuinak aminak jujamain ainawai.

<sup>13</sup> Nuadui amina inimpainakuish, wait aneasam mina ubajui tujutta, amina shigmatjumin mina mantuawainum, wisha utugchat atsaunum jegatjai”, tiuwai.

<sup>14</sup> Tusa Egipto nugkanum jegawagmatai, nuwiya aents aidau Sarai shigmauch wajaknun wainkajui.

<sup>15</sup> Antsag faraóghan atuwe aidashkam wainkajui, nunik nuwa shigmauch tae tusa faraóghan ujakagtatus wejajui. Dutika ujakag nuadui Sarain jukiajui faraóga jeen.

<sup>16</sup> Sarai shigmauch asamtai, faraón wakejuk juwak Abragkan shiig awagmakui. Dutikak susauwai uwig aidau, baka aidau, burro aidau, camello aidauashkam, tuja nuigtushkam inak aishmag aidau nuwa aidaujai susauwai.

<sup>17</sup> Tujash Sarai jukimunum Apajuú faraóghan ashí niina patayi aidaujai suwimkan suwak, jata ishamainun ajunjuwai.

<sup>18</sup> Dutikam waitiak, faraón Abragkan untsuka itan chichajak: “¿Wagka minash jusha jutijuaume? ¿Wagka juju nuwa jusha mina duwajui tusamesh tujutchamume?

<sup>19</sup> Ame chichaakum mina ubajui tichamkum, tau asamin wi jukin nuwatmain awajikashjak. Jujuwai nuwemek, ¡juju jukim wamak wetá!” tiuwai.

<sup>20</sup> Nuna aatus tusa faraón† niina aentsji aidau ishitkauwai, Abram nuwejai Egipto nugkanum puja duka, ashí niina wajiji aidaujai jiiki awematajum, weti tusa.

## 13

*Abram Lotjai kanakbau*

<sup>1</sup> Abram niina nuwejai Egipto nugkanum pujau Néguev nugkanum wakitkiuwai. Nuwi weak ashí niina wajijinak yajuak weuwai. Nunik weak niina yachi uchijin Lotan yauuwai.

<sup>2</sup> Abragkak shiig wiakuch aajakui. Niinak ajujakui oro, jiju plata tutai najanamu aidau, tuja nuigtushkam niina tagkuji aidauk ¡shiig kuashat! ajujakui.

<sup>3</sup> Néguev pujau wakitki diipas jintá kanag waja wajakua jegauwai yaakat Betelnun. Tuja nuwi juwaki yaunchuk nii pujujakbau yaakat Betelan nagkaiki, yaakat Hai tawa nuwi jegatsuk ejapeen aajakua nuwi weuwai.

<sup>4</sup> Nunú nugkanum yaunchuk Abram Apajuú emematak kuntin maa patasa apeatnun altaran najanauwai. Nuwi Apajuú daajin adaitus segauwai.

<sup>5</sup> Tuja Lotchakam antsag shiig wiakuch aajakui. Niina apaji yachi Abragjai betek ¡shiig kuashat! uwigji, bakajishkam imanisag, tuja niina inake aidashkam ¡shiig kuashat! ajujakui.

<sup>6</sup> Nuadui nugka dita batsatbaunmag kuntin piyakui, nuniak yutaiji ayugmain atsau asamtai, nuwig ijunja pujumainchau aajakui.

<sup>7</sup> Nuigtushkam aents Abragkan tagkujin kuitamin aidau, Lotan tagkujin kuitamin aidaujai maanijaku ainawai. Tuja canaágnunia aents aidash, ferezeo aents aidaujai nuwig ditashkam batsamajaku ainawai.

<sup>8</sup> Nuadui makichik tsawantai, Abram Lotan chichajak: “¡Amek mina yatsujun uchijiyaitme, nuadui iik pempeentunikik kajegdaimaitsuji! Tuja amina tagkugmin kuitamin aidash, mina tagkujun kuitamin aina nujaig kajegdaya yujamaitsui.

\* 12:8 “Betel” tawa nunak hebreo chichamnumak “Apajuú jee” taku tawai. † 12:20 “Faraón” tawa nunak egiptunmaya aents aidau chichamenig “apu” taku tawai.

<sup>9</sup> Juju nugka múun weaja nunú diisam ame wakegamu etegkam, wait aneasam kanakta. Ame tsumunum weakminig, wi nujinum wetajai. Untsu ame nujinum weakminig, wi tsumunum wetajai”, tiuwai.

<sup>10</sup> Tusa tama Lot namak Jordágkan pakaji weajun diikma pegkeg yumi kuashat ayau, nugka piipich Sóar tutai aajakua imanui jegaku, nugka Edén pegkeg aajakua iman, nuigtush Egipto nugka pegkeg aajakua nujai betekmamtinun wainkauwai. (Juka iman aajakui Apajuí yaakat Sodoman Gomorrajai eke tsayatsaig)

<sup>11</sup> Imanun Lot wainak ashí namak Jordágkan pakajinak nii etegkauwai. Dutikau asa dita batsatbaun ukuak etsa minitaijiya nuni weuwai. Aatus Abram Lotjai kanakajui.

<sup>12</sup> Abragkak Canaán nugkanum juwakui. Untsu Lot Jordágka pakajin yaakat Sodomanum jegattak pujusui.

<sup>13</sup> Nunú yaakat sodomanmaya aentsuk shiig pegkegchau, Tuke Pujuu dakitamun ayatak katsek aina nuna takajaku ainawai.

<sup>14</sup> Lot weu ai, Apajuí Abragkan chichajak: “Ame anú wajam nuwi nagkamam nujiya aatu, tsumunma aatu, etsa minitaijiya aatu, tuja etsa akaetaiya aatushkam shiig diista.

<sup>15</sup> Juju ashí nugka ame wainam junak wi amina amastatjai, juka aminu, tuja amina uchijum wegantu agtina nudau tuke atinai.

<sup>16</sup> Amina uchijum wegantu aidaunak nugka yukukuntujai betek awajsattajai. Nugka yukukuntu dekapamainchawa iman amina uchijum wegantushkam dekapamainchau agtina.

<sup>17</sup> ¡Wajakim weme juju nugka juna esanti wegkantijai ashí diista, junak ashí amina amastatjame!” tiuwai.

<sup>18</sup> Tusa tima Abram aakjin tegaja yajuak makichik aents Mamre daagtindau ikam encinar tutai, yaakat Hebrógnum jegattak awa nuwi pujusui. Nuwi pujus kuntin maa apeaku Tuke Pujuu ememattinun altaran najanauwai.

## 14

### *Abram Lotan ayamjuk awagkimu*

<sup>1</sup> Nunú tsawantín Amrafel aajakui Sinar nugka apuji, untsu Arioc aajakui Elasar nugka apuji, tuja Quedorlaómer aajakui Elam nugka apuji, nuigtushkam Tidal aajakui Goím nugka apuji.

<sup>2</sup> Nunú apu aidau: Bera Sodoman apuji, Birsá Gomorran apuji, Sinab Admán apuji, Seméber Seboíman apuji, Bela Sóar tuuta awagtaya nuna apuji aatus aajaku aina nujai maaniamun aepjuniauwajui.

<sup>3</sup> Makichik uwejan amua apu aina juju ashí dita suntaji aidaun nugka Sidiman pakajin nayants yapaku\* tutaiya nuwi ijumajajui.

<sup>4</sup> Tuja doce mijanai, apu Quedorlaómer ditan depetuk pujuju. Tujash trece mijan wegai, makichik uweja amua apu aidau ataktu apu Quedorlaómerjai maanitan nagkamawajui.

<sup>5</sup> Tikich mijanan achiak, apu Quedorlaómer niina suntajijai, nuigtu tikich kampatum apu nijai atunidau, nugka Astarot Carnaim tawa nuwi maaniauwagtatus shiyakajui. Nuwi refaita aents aidaun depetuk amukajui. Tuja nuigtushkam zuzita aents yaakat Ham tutaya nuwian depetkau ainawai. Tuja nuigtushkam emita aents aidaun nugka paka Save-quiriataim tawa nuwi batsatun depetkau ainawai.

<sup>6</sup> Untsu horeo aents aidaun muja Seírnum batsatun depetkau ainawai. Dutikawag pisgматаi pataetukag yaakat El-Parán tutai uwegshun ijus awa imanui wakajui.

<sup>7</sup> Nuwiya apu Quedorlaómer nii ijunja yujamujijai waketak, yaakat En-mispat tutai Cades tuuta awagmatia nuwi jegawajui. Nunik nuwi juwakiag wenak Amalec aents aidau batsamtainian, amorreo aents aidau batsamtainian, tuja Hasesón-tamar tawa nuna batsamtaijinianashkam ashí dita wainbaunak tsaikajui.

<sup>8</sup> Dutikiagtai Sodoma, Gomorra, Admá, Seboím, Bera Sóar tutaya nuwiya apu aidau ijunag chichaman umikag, Sidiman pakajin shiyakajui.

<sup>9</sup> Nuwi makichik uwejan amua apu aina nunú apu Quedorlaómerjai Elam nugka apuji, Tidal Goím nugka apuji, Amrafel Sinar nugka apuji, Arioc Elasar nugka apuji aina nujai maaniau ainawai.

<sup>10</sup> Dutika maaniamunum Sidima pakajin waa ayaunum nuwi pegkae pimasua weakunum Sodoman apuji Gomorran apujijai pisakma chimpimawajui. Nuniai tikich apu aidauk mujá pisajajui.

\* 14:3 “Nayants yapaku” tawa nunak apach chichamnum “Mar Muerto” tawa nuna taku tawai.

<sup>11</sup> Nunikagmatai, ipak usumat apu depetmakaju aidau ditá suntaji aidaujai, Sodomanmayan, Gomorranmayajai yutaiji aidau, wajiji aidaujai ashí yajutkag ukukiajui.

<sup>12</sup> Nuninak Abragka yachi uchiji Lotnashkam Sodomantum pujuttaman achikag ashí wajjinak tagkujjai jukiag shiyakajui.

<sup>13</sup> Lotan dutika jukiagmatai, makichik aents maaniamunum uwemjau Abragkan hebreo aentsua nuna jegajua ujakui. Abragkak Mamre nugke ikam encinas tutai, amorreo aentsu nugke aajakua nuwi pujujakui. Mamren yachi aidauk Escol, Aner aatus aajakui. Juju aidau Abraman atuidau.

<sup>14</sup> Abram niina yachi uchijin achika jukiagbaun dekaa, ashí niina inake niijai yujas akiidau kajittsa anentai aidau ipaa, trescientos dieciocho aentsun ijumjauwai. Dutika ditajai atuegak apu aidau pataetuk yaakat Dan tawa nuwi jegawajui.

<sup>15</sup> Nunikag kashi pachiachbau Abram niina aentsijjai jetekag ipisig yaakat Hobá tutai yaakat Damasco nujiin awa nuwi ejegawajui.

<sup>16</sup> Dutikainak ashí waji yajuakbaujinak awagtujajui. Aatus Abram Lotan ayamjuk agkanmitkauwai, dutika ashí niina wajiji aidau nak imatiksag awagtujui. Dutikak nuwa aidau nashkam ayamjukui. Tuja aikasag niina aentsji tikich aidau nashkam ayamjukui.

*Sacerdote Melquisedec Abragkan pegkegnum yumigjamu*

<sup>17</sup> Abram apu Quedorlaómeran tikich apu aidaujai ashí depetuk waketak, nugka paka Save tutai apu nugke tuuta awagmatia nuwi minittaman igkug kumpamatatus Sodomannmaya apu, jiiintukiuwai.

<sup>18</sup> Dutika igkug juki inimtatman Melquisedec yaakat Saleman apuji, sacerdote niig Apajui nayaimpinum pujuuwa nunú etegkamu pujau pagkan vinojai juki,

<sup>19</sup> Abragkan igkug pegkegnum yumigkiak aatus tiuwai:

“Abragkah, Apajui nayaimpinum pujuuwa nunú pegkegnum yumigtamsatin ati.

<sup>20</sup> Apajui nayaimpinum pujuuwa nunú amina shiwajumin depetmitkagmaka nunú tuke ememattai ati”, tiuwai.

Tusa tima Abram maania depetmak maki makichik waji yajuakbaunmayan diezmon susauwai.

<sup>21</sup> Dutikamtai Sodomannmaya apu Abragkan chichajak:

“Aents aina anka mina sjusta, untsu waji aina duka ame jukita”, tiuwai.

<sup>22</sup> Tusa tama Abram niina ayaak:

“Wika Tuke Pujuu yakí nayaimpinum pujuuwa nunú nayaimpin nugkajai najanauwa nuna wi dutikatnunun juní dutikattajai tusan ujakjai.

<sup>23</sup> Tiu asan aminunak makichik hilonakesh, sapat jigkataichinakesh ashí amina wajijum wegantunak jukishtatjai. Atakea duikish ame mina chichagtakmek: ‘Wi Abraqnak wiakchamtikawabaijai’, tusamek tujutchatnaitme.

<sup>24</sup> Wika wajjinak shiig dakitajai, untsu mina inakeg aidau yutain yuwawaja duka maake, untsu mina uyuntuidau Aner, Escol, Mamre aatus yuja nunú ditanu amainun jukiagtatui”, tiuwai.

## 15

*Apajui Abrajai chicham umikbau*

<sup>1</sup> Nunú ashí nagkaemaju ai, Apajui Abraqkan wakanmantun wajantun\* chichajak: “¡Abraqkah, ishambukaipa, witjai amina kuitamnunuk! Amek shiig kuashat wajigtin atatme”, tiuwai.

<sup>2-3</sup> Tusa tama Abram ayaak:

“Apu Tuke Pujuuwah, ¿wisha nunash itugkatnununak ibaunash waketaja? Amek, mina uchig atsugeta duka shiig dekame. Amek minak makichik uchikesh sujuschaume, nuadui ashí mina wajiiig aidau nak, nugkajai nagkamas, wi tsakapagbau Eliezer Damasconmayaya nudau atinai” tiuwai.

<sup>4</sup> Tutai Tuke Pujuu ayaak:

“Antukta nijah, juju ashí amina wajijum aina duka amina uchigminu atinai, tikich aents amina uchigmichuk jukishtatinai”, tiuwai.

<sup>5</sup> Nuna tusa Abraqkan agá jiiiki chichajak:

“Yamai nayaim shiig diista, dutikam yaya ayá nunú ame dekapamainaitkumek dekapagta. Juju dekapamainkait, iman atinai amina uchijum wegantu aidauk”, tiuwai.

\* 15:1 “Wakanmantun wajantun” tawa nunak juju versiculonum apach chichamnum “visión” tawa nuna taku tawai.

<sup>6</sup> Tusa tama Abragkak Tuke Pujuuwai kajinas anentaimu asa dekaskeap tujutua tiuwai. Nuadui Apajui Abragnak aents ima pegkegnak takauwa iman diisui.

<sup>7</sup> Tuja nuigtushkam chichajak:

“Witjai Tuke Pujunuk, wi aminak yaakat Urnum caldeo aents aidaujai pujaumin, juju nugkan ame wegantu agtina nudau tuke atinun amastasan jiikbaijame”, tiuwai.

<sup>8</sup> Tusa tama:

“Tujash, Apu Tuke Pujuuwah ¿wisha wajuk shiijash dekamainaitja, wi wegantu aidauwap juju nugkanum batsamsatin ainawa tusanush?” tusa aatus Abram aikui.

<sup>9</sup> Tusa tama nii ayaak:

“Makichik baka tsakat, makichik cabra, makichik uwig aishmag, kampfatum mijanji ajamu aidau, nuigtushkam makichik yampits, makichik paum tsakat aajam itagtuata”, tiuwai.

<sup>10</sup> Tusa tima Abram ashí nuna yajuak Apajuin ejetuauwai, dutika jimai jimaituk dakaja igkumtikjattak batsakui, untsu chigkinak dakagchauwai.

<sup>11</sup> Dutika pujai chuwag, kuntin dakaja batsasbaun kakeetiagtai, nuna yuwawai tusa Abram jiyaka ishimu.

<sup>12</sup> Dutika pujujai, etsa akaegak suwe wegau, nunitai Abram senchi kanag tepesui. Nuniaig shiig senchi suwe wajasmatai, senchi ishamkauwai.

<sup>13</sup> Imanik suwe wajasbaunum Tuke Pujuu Abragkan chichajak:

“Juju yamai shiig antukta, ame uchijum wegantu agtina duka nugken ukukiag, tikich nugkanum batsamas wainka inaku waitkam cuatrocientos mijan waitu batsamtin ainawai.

<sup>14</sup> Tujash tuu nugkanmayag nunash inakush waitkastin ainawa, nunak wi ditashkam suwimkan susatnaitjai, duwi ame uchijum wegantu aidauk waitu batsatu agkanmagawag, shiig wiakuch wajasag jijnagtina.

<sup>15</sup> Tuja untsu amek shiig muumpakim agkan pegkegnum jakattame. Nunikamin amina uchijum aidau ukugmasagtina.

<sup>16</sup> Tuja amina uchijum wegantu akiinak, nuna tijaji aidau, nuigtush nuna tijaji aidau akiinkatna nunú, juju nugka juwi waketug kaunatin ainawai. Wagki amorreo aents aidauhkam nunú tsawantinig tikima shiig katsekak achagtina”, tiuwai.

<sup>17</sup> Imanik suwe wajasu ai, ichinkanmaya jii bukuitau wantinkauwai, nunú wantina shiijikap ayai ekemakbauwa nunin kegak kuntin dakaja batsasbaunum ejapeena nagkaemattaman Abram wainkauwai.

<sup>18</sup> Nunú tsawantai, Tuke Pujuu Abragjai chichaman umikui. Nunak aatus tiuwai:

“Juju nugka junak amina uchijum wegantu aidau susatnaitjai. Tuja namak Egipto nugkanum awa nuwi nagkamsan, namak múun Efratesa aatsan susattajai.

<sup>19</sup> Tuja juju nugka juka quenita aents aidau, quenizita aents aidau, cadmoneo aents aidau,

<sup>20</sup> hitita aents aidau, ferezeo aents aidau, refaita aents aidau,

<sup>21</sup> amorreo aents aidau, cananeo aents aidau, gergeseo aents aidau, Jebús aents aidau nugke ainawai. Tujash wi nunak ashí amastatjame”, tiuwai.

## 16

### *Agar niina uchiji Ismaeljai*

<sup>1</sup> Sarai kaga asa niina aishi Abragkan uchijin ejapjumaichau aajakui, untsu niina jeen inake Egipto nugkanmaya nuwa Agar daagtin pujujakui.

<sup>2</sup> Nunik pujai Sarai Abraman chichajak:

“Nijah, amek Apajui mina uchigmachu ati tusa tujutiwa duka shiig dekame. Nuadui wait aneasam mina inakeg Agar puja au jukita. Nunikamin nuwi uchi akiinamtai, wi nuna jukin uchijimachainjash”, tiuwai. Tusa tama Abram niina nuwe tabaun antujus, ayu, tiuwai.

<sup>3</sup> Nunik pujus Sarai Agaran juki Abragkai sujukui. Nunak Canaán nugkanum jegawag diez mijan pujusua duwi dutikauwai.

<sup>4</sup> Abram Agaran juki pujus ejapmitkakui, dutikam pujus, Sarai ejapjuchu asamtai, dushikiak chichaman umigchau.

<sup>5</sup> Nunitai, Sarai Abragkan chichajak:

“¡Mina inakeg Agar dushiktak chichaman umigtatsu duka utugchatak aminui! Wi amina nuwem ati tusan amasbaijame, dutikamaitak, yamai amina uchigmin ejapjuk mina nagkaetasu ememawai. Tujash ima Apajuiya duke tujamti, yakita juna utugchatan apujush wiyashitag, atsa ameashitam”, tiuwai.

<sup>6</sup> Tusa tama Abram ayaak:

“Yamai nagkamsanuk amina inakminak amina idaitajame, ame itugkatag tame, dutikata”, tiuwai.

Tusa tima Sarai Agaran shiig senchi inak waitkau, imatika waitkam Agar tupikakiuwai.

<sup>7</sup> Nunik tupikaki Shur nugkanum wetainum uwegshunum jintá yumi pukuni jiin-baunum ayaumas pujuttaman, Apajuí ángela nunin wajas wantintukui.

<sup>8</sup> Dutika iniak:

“Agar Sarain inakegah, ¿amesh tuwiyamea miname? ¿Tuu weakmea aniname?” tau. Tama nii ayaak:

“Sarain wi takagnaitag nunú dakitjugmatai tupikajai”, tiuwai.

<sup>9</sup> Tusa tutai, Apajuí ángel tumain chichajak:

“Wakitkita amina takagtaigmin, nunika jegaam Saraiyai sumimkata”, tiuwai.

<sup>10</sup> Nuna tusa nuigtushkam chichajak:

“Amina uchijum wegantunash shiig kuashat ikauntuktinaitjame, dutika ai makichkish dekapamainchau atinai.

<sup>11</sup> Nijah, juju uchi ejapjukum nunú uchigmakam,

adaikattame Ismael,\* wagki ame wekaesa waitiakum wake besemag anentaima wekaegam nuna wi antugkajam duwi.

<sup>12</sup> Tuja niig kakajus yunumtukchamin, caballo unuinakchamua iman atinai, iman asa ashí aentsjai maanitnai, nunitai niina shiwaaji aidauk ima niijaig maaniagtinai. Niina yachi aidaujaishkam shiwag atinai, nuniau asa ima niina nugkenig pujustinai”, tiuwai.

<sup>13</sup> Tusa tima, Apajuíjai chichasu asa, dekas amek “Apajuí wainbauwaitme” tusa puyatuk nigki anentaimas: “¡Apajuínap wainkaja, imanun wainkanush jakachjapi, iwaakjapi!” tiuwai.

<sup>14</sup> Nuadui nuwi yumi piyag aajakua nuna “Iwaku pujuuwa nunú mina waita nunuwai” tuu adaikauwai. Nunú yumi piyajua duka yaakat Cades Béredjai niniaku awa nuna ejapeen awai.

<sup>15</sup> Agar tsawanji jegajim uchi aishmagkun Abragka uchijin uchigmakui, nunikmatai Abram uchi daajin Ismael adaikauwai.

<sup>16</sup> Agar niina uchiji Ismaelan uchigmakua nunak Abragnak ochenta y siete mijan ajujakui.

## 17

*Apajuí Abrajai ataktu chicham apakbaunum uchi aishmagkuch aidaun katiuchiji chuchuke tsupijatajum tibau\**

<sup>1</sup> Abragkan noventa y nueve mijanji ajai, Tuke Pujuu wantintuk chichajak:

“Antukta nijah, witjai Apajuí ashí senchigtinnuk. Nuadui amek mina emtijuig pegkegchau takamtsuk pujusta.

<sup>2</sup> Wi amijai yamajam chichaman umiktatjai. Tuja amina uchijum wegantunak shiig kuashat ikaugkatnaitjai”, tiuwai.

<sup>3</sup> Tusa tama Abram Apajuín eme aentus tsuntsuma nijayin nugkan antig pujusmatai, Apajuí chichajak:

<sup>4</sup> “Jujuwai wi amejai chichaman umiag duka. Amek kuashat aents aidaun muunji atinaitme.

<sup>5</sup> Nuadui amek Abram tamak achattame. Tuja yamai nagkamsamek Abraham tama atatme, wagki wi aminak kuashat aents aidaun muunji awajsatnaitjame.

<sup>6</sup> Amina uchijum wegantu aidaunak shiig kuashat ikaugkattajai. Nuadui ame wegantunmaya apu agtinai, tuja ame wegantu aidau kuashat aents nugka muunnum yujakgtinai.

<sup>7</sup> Nuadui wi amejai chichaman umikag duka ajumaya duish ame wegantu aidaujaish tuke atinai. Wika tuké amina Apajuíjum, tuja amina uchijum wegantu aidaunashkam Apajuí atinaitjai.

<sup>8</sup> Juju nugka Canaágka juwi ame pujam nunak ashí amina, nuigtu ame wegantu agtina nudaun tuke atinun amastatjai, tuja wi ditá Apajuíjig atinaitjai”, tiuwai.

<sup>9</sup> Tuja nuigtu Apajuí Abragkan chichajak:

\* **16:11** “Ismael” tawa nunak “Apajuí antugtamae” taku tawai. \* **17:** “Uchi aishmagchin katiuchiji chuchuke tsupijatajum tibau” tawa nunak apach chichamnum “circuncisión” tawa nunuwai.

“Juna wi chichaman umikag duka imatiksamek umikta, tuja amina uchijum wegantu agtina dushakam umikagtin atinme.

<sup>10</sup> Amejai chichaman umikag duka jujuwai: Ashí amina uchijum wegantu aidaush ima junak umikagtinai. Ashí aishmag aidau atumjai batsatup tsupigkamu agtatui.

<sup>11</sup> Tuja ashí atum aishmag aidautigminuk tsupimamainaitjume, nuni iwainmamkattagme wi atumjai chichaman umikag nunú.

<sup>12</sup> Yamai nagkamsagmek, ashí uchi aishmag aina duka ocho tsawan akiina wegauk katiuchiji chuchuke tsupigkattajume. Tuja amina wainka inataijum amina jemin akiinau aidaush, kuichik kayai tikich nugkanmaya sumakbaushkam tsupigkatajum.

<sup>13</sup> Ashí uchi aishmag aidauk makichkish idaitsuk tsupigkamu agtatui. Wi chichaman umikag nunú iwainamu aatus atumi iyashin juwaktatui tuke atinun.

<sup>14</sup> Tujash makichik aishmagkesh nuna tsupimatan dakitauk atumjai ijunjag pujumait-sui. Duka ayatak jiiki ajapeam atatui, wagki wi chicham umikbaun ajaantus diyachua asa”, tiuwai.

<sup>15</sup> Tuja nuigtushkam Apajuí Abrahaman chichajak:

“Amina nuwemi daajig Sarai tamak achattawai, yamai nagkamsag niina daajig Sara atatui.

<sup>16</sup> Niina pegkegnun yumigsattajai, dutikakun niyai makichik uchin amastatjai. Dekaskenun wi niinak pegkegnun yumigsattajai. Nuadui kuashat aents nugka múun aidaunmayan dukuji atinai. Tuja ame uchijum wegantushkam nugka múun aidaun apuji agtinai”, tiuwai.

<sup>17</sup> Tusa tama Abraham tsunsuma nijayin nugka antig pujus, niina anentainig chichas: “¿Aents cien mijanji ajamush uchinash akiimainashit? ¿Sarash noventa mijanji aja ibaush ejajumainkait?” tusa dushiau.

<sup>18</sup> Nuna tusa Abraham Apajuín chichajak:

“¡Untsu utusamek Ismael kajimatjutsuk ame pegkegnun yumigtugsam tajai!” tau.

<sup>19</sup> Tama Apajuí Abrahaman ayaak:

“Amina nuwem Sara uchigmin uchigmaktatui tusan timagme, nunikmatai ame niina daaji Isaac adaikattame. Nunú akiinamtai wi amina anagkuajam duka uminkattawai. Tuja nii uchiji wegantu agtina nujaiskam wi chicham umikbauwa nunak tuké yapajiashtinaitjai.

<sup>20</sup> Ame mina Ismael pachisam tujutam nunashkam antugkajame, nuniku asan wi pegkegnun yumigsattajai. Niina uchijish kuashat atinai, tuja niina uchiji wegantunmayanash kuashat uyujkatnaitjai. Ismaelak doce apu agtina nuna apaji atinai. Aatus nugka muunnum batsamsatin ainawai.

<sup>21</sup> Utsu wi chichaman umikag nunak amina nuwem Sara yamai nagkamas tikich mijan jegatta duwi Isaakan uchigmatjamkatta nujai umiktatjai”, tiuwai.

<sup>22</sup> Nuna aatus Apajuí Abrahamajai chichas ashimak, wakitkiuwai.

<sup>23</sup> Nunik Apajuí wakitkintai, nunú tsawanting Abraham niina uchiji Ismaelan juki, ashí niina inake nijjai batsamas akiinau aidaunash, tuja kuichik kayai sumakbau aidaujai, ashí aishmag niina aakjin batsamin aidaunak betekmas yajuak tsupijauwai, Apajuí tibaun imatiksag umiak.

<sup>24</sup> Abrahamak noventa y nueve mijanji ajamu asa tsupimakui.

<sup>25</sup> Utsu Ismaelnak trece mijanji ajamun tsupigkauwai.

<sup>26</sup> Aatus tsupimatai ati tibaun Abraham umiak, nunú tsawantaik niina uchiji Ismaeljai tsupimakajui.

<sup>27</sup> Ashí aishmag niina aakjin akiinkau aidauk, tikich nugkanmaya kuichik kayai sumakbau aidaujai, betekmasag tsupimajajui.

## 18

### *Tuke Pujuu Abrahaman uchi akiattame tibau*

<sup>1</sup> Makichik tsawantai Abraham Mamrenun ikam encinar tutainum niina aakji waitijin etsa tajiagai eketun Tuke Pujuu wantintukui.

<sup>2</sup> Abraham pagkas niimsatakama kampatum aents ijunun wainkauwai. Nunik wainmawaik wamak wejuwai igkug jukitatus. Nunik jegantun tikishmag nijayin nugkan antig pujusa,

<sup>3</sup> chichajak:

“Mina Apujuh, wi amina eme anentsan tajame, wait aneamam wamak wepa.

<sup>4</sup> Atumnash shiig awajtamkuig, yumi itagtuatajum tusan dawemin dijajatjime, dutikamtai numi wakenti bikintua juwi pujusjum machik ayamjatajum.

<sup>5</sup> Atumek dekas wi atumin inakmin pujag nuwi taugme. Nuniku asagmin atum yuwatnun wi amastajime. Nunú yuwajum ichichmamjajum wetajum”, tiuwai. Tama dita aínak:

“Ayu, ame tame duke ati”, tiajui.

<sup>6</sup> Tusa tiagmatai Abraham niina aakjin waya nuwe Saran chichajak:

“¡Harina pegkeg diisam veinte kilo jukim wamkesam pag najanata!” tiuwai.

<sup>7</sup> Tusa ukuak, tupikaki toro tsakat batsatun jegantun duwegman etegka, niina inake aidaun chichajak: “Juju maajum wamak inagtujuatajum”, tusa tima ditashkam imatiksag umikajui.

<sup>8</sup> Dutikawagmatai Abraham baka muntsuji ijugbaun, kantekujai, neje inajuamun aatus juki ejeentun apujtusui. Dutikam nuna numi wakentin pujusag yuwagtai, dakak pujau.

<sup>9</sup> Nuna yuwawag inagnakag Abrahaman iniinak:

“¿Amina nuwem Sarash tuwi pujawai?” tama Abraham ayaak: “Au aaka awi pujawai” tau.

<sup>10</sup> Tusa timatai nuwiya makichik chichaak:

“Tikich mijan atata duwi ataktu tajuan ijagsattajame, tujash nunú tsawantinig amina nuwem Sara uchiji ajittawai”, tiuwai. Tusa tutai Sara aaknum Abrahaman ukujin waitinum wajasa, antu wajau.

<sup>11</sup> Tuja Abrahamak Sarajaig shiig muumpakiaju ainawai, nuadui Sarak nantutin nuwauch jau aina nunash nagkankau aajakui.

<sup>12</sup> Nunin asa dita chichainamun Sara antuk, nigki anentaimas dushiak: “¿Wi mina aishjujai shiig múuntuch wajasag nunash, wajuk mina aishjujaish wakejunikan pujusnuk uchigmaktaja?” tau.

<sup>13</sup> Tusa tabaun Tuke Pujuu antuk Abrahaman chichajak:

“¿Wagka Sarash dushiawa? ¿Nigka dekaskeap tawa, tuja wi múuntuch ataih, Apajuíyap sujustatua tumainchauk dekapea?”

<sup>14</sup> ¿Apajuí makichik waji tujinka dutiktsuk idaimainush awak? Tikich mijan atata duwi amina ijagsatasan ataktu tajuattajame. Nunú tsawantin Sara uchiji ajittawai”, tiuwai.

<sup>15</sup> Tusa tutai nuna Sara antuk senchi ishankauwai, nuniak dekas tsanugtajai tusa chichaak:

“Wika dushigchamjai”, tau.

Tusa tutai Apajuí ayaak:

“Wika dekajai ame dushiamunak”, tiuwai.

*Aents pegkeg aidau Sodomannun batsatun ijinawai tusa Abraham Apajuín segau*

<sup>16</sup> Nuna tusag ijag aidau Sodomannun shimutai, Abrahamshakam ditan kumpama ishiaktatus uyuniuwai.

<sup>17</sup> Nunitai Tuke Pujuu anentaimas:

“Dekas wi dutikattag nuna pachisan Abrahaman ujaktajai,

<sup>18</sup> wagki niig dekas kuashat aents agtina nuna apaji atatu. Nuigtushkam wi niinak, aents ashí nugkanmaya aidaunmayash ima niinig pegkegnun yumigkiam atinme tusan anagkuawaitjai.

<sup>19</sup> Wi niinak etegkauwaitjai, ashí niina uchiji wegantu aidaunash mina chichamjun jintintuati, dutikam minák umigtuktinme, nuninak ima pegkeja nunak takastinme tusan. Nuna aatus uminakui, wi anagkuawaitag nunak imatiksannuk umiktatjai”, tiuwai.

<sup>20</sup> Nuna tusa Tuke Pujuu chichaak:

“Aents yaakat Sodomannun, nuigtu Gomorranmaya aidauk ayatak pegkegchauk tikima shiig katsek ainawai tabaun antajai.

<sup>21</sup> Nuadui wi yamai wejijtjai ditan, núnikan dekaatjai ditá pegkegchauji shiig múuntai tabau minai wajuta dusha dekaskeashit”, tau.

<sup>22</sup> Tusa jimag aents Sodomannun wejutai, Abraham Apajuíjai ukuunum juwakui.

<sup>23</sup> Nunik Apajuín jegantun iniak:

“¿Aents pegkegchaun takau aina nunú ijinkumesh, pegkejan takau aina nujai ijinattamek?”

<sup>24</sup> Tuja namputchawame cincuenta aents pegkegchaun takaschau aidau yaaktanun batsatkuish, ¿nunú batsataigkik yaaktash tsaitatam, atsa tsagkujashtatmek?”

<sup>25</sup> ¡Aents pegkegchaun takaschau aidauk, pegkegchau takasu aina nujai ijumjamek pegkegchaun takasua numamtukek ijinmaitsume! ¡Dekas wait aneamas dutikawaipa! Amek Apu chicham epegkin asam ashí nugkanmaya apu aina nuna Apujiyaitme, nuadui, ¿aents pegkegchaun takaschau aina duka ayamjukchattamek?” tiuwai.

<sup>26</sup> Tusa tama Tuke Pujuu Abrahaman ayaak:

“Cincuenta aents pegkeg yaakat Sodomanum pujaan wainkanuk, dita tsagkujakun ashí tikich aidanash tsagkujattajai”, tiuwai.

<sup>27</sup> Tusa timatai, ataktushkam Abraham Apajuín chichajak:

“¡Wait aneam tsagkugtugta! Amek Apajuíyaitme nuniaminig wika aents wainkau-chitkun juna iniajame.

<sup>28</sup> Tujash namputchawame cuarenta y cinco aents pegkejam akuish, ¿ashí yaaktash tsaiaktatmek?” tama Apajuí ayaak:

“Atsa, cuarenta y cinco aents pegkejam akuishkam ijinastatjai”, tiuwai.

<sup>29</sup> Awentsag Abraham Apajuín iniak:

“Namputchawame ¿ima cuarentak akuish itugkattame?” tau.

Tusa tama Apajuí ayaak:

“Atsa cuarenta pegkejam pujakuish tsaiachtattajai”, tiuwai.

<sup>30</sup> Tujash Abraham ataktu awentsag iniak:

“Apuh, wi kuashat iniimkuish, wait aneam kajegtukaipa. Tujash ¿treinta aentskesh pegkeg akuish, itugkattame?” tau. Tama nii ayaak:

“Treinta aents pegkeg yaaktanum pujakuishkam yaaktanak tsagkujattajai”, tiuwai.

<sup>31</sup> Tusa timatai nuigtushkam awentsag iniak:

“Mina Apujuh, wika aents wainkauchitkun aajan iniajame. Tujash, ¿ayatak veinte aents pegkeg akuish itugkattame, tsaiaktatmek?” tau. Tama nii ayaak:

“Veinte aents pegkeg akuishkam, yaaktanak tsaiachtattajai”, tiuwai.

<sup>32</sup> Tuja nuigtu iniak: “Mina apujuh, wait aneam kajegtukaipa, yamaik inagnamun iniastatjame, nuigtu awagkin iniaknuk waitkaschattajame. ¿Tujash ayatak diez aents pegkeg akuish itugkattame?” tau.

Tama nii ayaak:

“Diez aents pegkeg akuishkam, yaaktanak tsaiachtattajai”, tiuwai.

<sup>33</sup> Juna aatus Apajuí Abrahamjai chichas ukuak, weuwai. Nunikmatai Abrahamshakam niina aakjin wakitkiuwai.

## 19

### *Apajuí Sodomanmayan Gomorranmayajai jii ajuntug apea ijinamu*

<sup>1</sup> Etsa akagai Apajuín aentsji nayaimpinmaya jimag yaakat Sodomanum jegawajui. Tuja Lotchakam yaakat tentea apakbaunum nuna waitijin, aents ijunajaku aina nuwi eketu. Nunik eketu niimsatakama jimag aents minidaun wainkauwai. Nunik wajaki wejiuwai igkugtatus. Nunik jegantun tsuntsuma nijayin nugkan antig pujusui.

<sup>2</sup> Nunik chichaak:

“Mina apug aidauwah, wika atumin inakegaitjai, nuadui wait aneamsum mina jegajui wayatajum, nunikagmin wi dawemin dijajatjime, dutikantai mina jegajui kanagjum, kashin kashikmasjum wetajum” tau. Tama dita ayaak:

“Atsah, nunikchattaji, juwi agá pujusa tsawagtatji”, tuidau.

<sup>3</sup> Tusa tiagtaishkam: “Atsah, wait aneamsum tiigpa”, tusa imatjau niina jeen awayatatus. Tusa imatjam ayu tusag Lota jeen wayawajui. Nuwi wayawagmatai, Lot inamjamtai yutai pegkejan umikajui dita yuwatnun. Dutikak lewadurajai pachimtsuk pag inajuamun yuwawajui.

<sup>4</sup> Nuna yuwawag eke kajinatsaig, Sodomanmaya ashí aents aishmag aidau, datsa aidanum nagkamas múuntuch ai aidaujai, jeganak tenteawajui.

<sup>5</sup> Imanikag senchi pampaidau, imatuinak:

“¿Tuwi batsatua aents amina jemin utsaanama dusha? ¡Wamak jiikta! ¡Dita aikatasa wakegaji!” wajaidau.

<sup>6</sup> Tusa imatiagtai ditajai chichastatus Lot jiiintuki, waitin shiig epeni tuntupek wajas,

<sup>7</sup> ditan chichajak:

“Mina kumpag aidauh, wait aneamsum atum anentaimjum duka dutikawagpa, shiig pegkegchauwai.

<sup>8</sup> Juwi mina nawantug jimag aentsun takashtai pujawai, auna jiiigkitjime, dutikantai atum wakegamu umiktajum. Tujash juju aents aidauk aikawagpajum, wagki ditak wi ipaamu ainawai”, tau.

<sup>9</sup> Tusa tutai dita ainak:

“¡Amek menasta! Ame iina apuji najaneamek juka aikawagpa tusamek tikich nugkanmayayaitkumek tukagtumaitsume. ¡Yamaik, amina dita dutikmainaitag nuni senchi dutikattajame!” tusag Lotnak suwimaidau waitijin tegagkatag tusag.

<sup>10</sup> Imatiagiagtai jimag aents nayaimpinmaya Lota jeen waya pujau waitin ujainiag kuntujin etsaptiag Lotnak japiki waitin ujati awayak waitin epeniuwai.



<sup>11</sup> Dutika agá ijununak ashí datsa aidaunum nagkamas múuntuch aidaujai wain-machu emakui, dutikawajam waitin wainkatatus egai egainakua yawekajui.

<sup>12</sup> Nuna dutikawag, nunú ijag aidau Lotan chichajuinak:

“¿Tikich pataim aidaush juwish ajutjamtsumek? Nuniakuig amina uchijum aidau, nawanjum aidau, nuigtu nawanjumin aishi atin aidaushkam, ashí aminu aidau juju yaaktanum atsuak duka ashí yajuakam atushat tupikakta.

<sup>13</sup> Juju nugka juka tsaiktatji, juju yaaktanmaya aents aina juna pegkegchaujig shiig kuashtai, iman asamtai Tuke Pujuu awetamaji tsaiktajum tusa”, tiuwai.

<sup>14</sup> Tusa tima Lot niina nawanji aishi agtinun ujaktatus weuwai, nunik ditan chichajak:

“¡Wamak nantagjum juju yaaktanum pujutsuk jijnatajum, juju yaaktanak Apajui tsaiktatui!” tau. Tusa tamaitak, wainkas tuu wekagatai tuidau asag antugkachaju ainawai.

<sup>15</sup> Nuniaig tsawau asamtai, Apajui aentsji ángel nayaimpinmaya aidau Lotan chichajak:

“¡Wamkesam nantakim amina nuwem nuigtu jimag nawanjumea nujai jukita! Juju yaaktanmaya aidau suwimak suwaku tsayajin atumesh jakatag tachakjumek”, tau.

<sup>16</sup> Tusa tamaitak Lot emetnatai, ángel aidau, Tuke Pujuu niina wait anenjau asamtai, japikiag jiiikajui. Tuja nuwenashkam nawanji aidaujai jukiag jiiikajui, wagki yaaktan ukumtikiag uwemtijatag tau asag.

<sup>17</sup> Dutikawag yaaktan ukumtikiag makichik ángel chichajak:

“¡Wamak tupikakum uwemjata! Ukuujum diisaipa, tuja juju paka aina juigkik makichikish wajataash wajantaipa, ayatak mujanum wetá jakatasam wakegashkumek”, tiuwai.

<sup>18</sup> Tusa tama Lot chichaak:

“¡Atsah, mina apug aidauwah, tikima nunak nunikchattajai, wait aneasam antugtukta!

<sup>19</sup> Atum minak wait anenjugjum jakai tusajum jiiigkiugme, tujash wika tikima mujanmak wemaitsujai, wagki nuni wekagai juju yaakat tsayamu minash amaintuk mantuawai tajai.

<sup>20</sup> Untsu tikijua juwi yaakat piipich awa atú tupikaumainaitjai. ¡Wait aneasam ayu tujutta, yaakat piipichia awi pujusan uwemjatjai!” tau.

<sup>21</sup> Tusa tutai nuwiya makichik ángel ayaak:

“Ame segatam nunak antugkajame duka imanisag uminkati. Nuadui au yaaktanak tsaiachattajai.

<sup>22</sup> Tujash ¡wamak wetá! ¡Juwi pujutsuk ame tame nuwi wetá! Wagki ame eke jegatsminkik juju nugkanak tsaiachattajai”, tiuwai. Nuadui nunú yaaktan daajinak Sóar\* adaikauwai.

<sup>23</sup> Tuja tsawak etsa puwau jiiinai, Lot Sóarnum jegau ai,

<sup>24</sup> Tuke Pujuu nayaimpinmayan jii azufre tawa nujai pachimjamun yaakat Sodomannum Gomorranmashkam yutumtjauwai.

<sup>25</sup> Dutika, ashí aents nunú yaaktanum batsataidaunak ijinauwai, nuigtushkam nugka paka weajunum batsatun ashí ajak aidaujai ijinauwai.

<sup>26</sup> Untsu Lota nuweshkam niig wegayatak, ukujin ayampas diikma, wee najanea wajasui.

<sup>27</sup> Nuna Apajui tsaiku ai kashikmas Abraham nii Tuke Pujuuwai chichaaku wajasbaunum weuwai.

<sup>28</sup> Nunik nuwi jegan wajas Sodomannum Gomorrajai diistakama ashí nugka paka aidauk yaakat aidaujai nagkamas ekemaka tsaikebau asa, senchi bukuiti jiiinak yujagkim akijua atatman wainkauwai.

<sup>29</sup> Aatus Apajui yaakat nugka pakanum aajaku aina nuwi Lot pujujukua nunak ashí tsai kui. Tujash Apajui Abrahamnak kajimatkichui. Nuadui niina yachi uchiji Lotan jiiiki uwemtikjauwai.

*Lot niina nawanji aidaujai*

<sup>30</sup> Lot Sóarnum pujutan ishamak jiiinki mai nawanjin juki mujá weuwai. Nunik nuwi waa pagkakunum kampakta duka nunisag utsanawag batsamsauwai.

<sup>31</sup> Nuwi pujus makichik tsawantai Lota nawanji emkau kai ekeun chichajak:

“Iina apajig muumpakni, tuja tuke nunitai asamtai aishmag nuwan nuwatin aina dutika iina nuwatjamainuk juwig makichik aishmagkesh shiig atsawai.

<sup>32</sup> Nuniau asamtai dekass iina apaji enamkami, dutika enamka niijai ankami. Nunika iina apaji uchiji jukimi”, tiuwai.

\* 19:22 “Sóar” tawa duka “piipich” taku tawai.

<sup>33</sup> Nuadui nunú kashia duik apajin vinon aajag enampek aepes, nawanji emkau iyanti niina apajijag ankauiwai. Tujash apajig nawanji tepesa nantaki wegaunakesh machikish dekapjachui.

<sup>34</sup> Nunik tsawag, kai emkau ekeun chichajak:

“Wi yamai kashi iina apajijai ankamjai, tuja yamai kashia duwi ataktu enamkami, dutika ameshkam nijai ankata; aatsa mai iina apaji uchiji jukishpash”, tau.

<sup>35</sup> Tusag nunú kashia duwi ataktu enamkag aepes, nawanji ekeun iyanti niishkam niina apajijai anik ukukuiwai. Tujash Lotak nawanji tepes nantaki wegaunakesh machikish dekapjachui.

<sup>36</sup> Nunik batsamas Lota nawanji mai ejapjukui, niina apajinunak.

<sup>37</sup> Emkau uchigmakui uchi aishmagkun, dutika adaikauwai Moab. Nuwiya jijnauwai Moab aents aina duka.

<sup>38</sup> Tuja ekeushkam uchigmakui aishmagkun dutika adaikauwai Ben-amí. Nuwiya jijnauwai Amón aents aina nunú.

## 20

### *Abraham Abimelecjai*

<sup>1</sup> Abraham nii pujamun ukuak Néguev nugkanum weuwai. Nunik nuwi jegaa yaakat Cades, Shur nugkajai niinis awa nuwi ejapena yaakat Guerar tawa nuwi pujusui.

<sup>2</sup> Nuwi jegaa pujus niina nuwen, juka mina ubajui, tiuwai. Timatai Abimelec Guerar nugkan Apuji niina aentsjin awemauwai, Sara utugtitajum wi nuwatkatjai tusa.

<sup>3</sup> Tusa timatai itajuawajui, dutikawagmatai kanittaman kajanum Apajuí chichajak: “Anú nuwa jukium duka aishintin jukiume, nuadui amek jakattame”, tiuwai.

<sup>4</sup> Tusa tama eke nuwajaig tsanigchau asa, chichaak: “Mina Apujuh, ¿eke wi nuwan dutikachu aigkik mantuag tame?”

<sup>5</sup> Abraham chichaak juka mina ubajui tujutmae, nuwashkam dutiksag mina ubajui timae, nuadui uyumat aneakas wika jukimjai, tujash pegkegchaunak dutikachjai”, tiuwai.

<sup>6</sup> Tutai Apajuí kajanmak ayaak: “Wika shiig dekajai ame pegkegchau dutikachum nunak. Nuadui ame nuwa antigkam mina emtjui tunamajaim tusan wika aminak idaitsugme.

<sup>7</sup> Tujash yamaik, anú nuwak awagkim aishi susata, wagki niig mina etsegtugkati tusa etegkamui. Nuniau asa amina pachipas mina segatti jatsuk pujusminum. Untsu awagtutsuk pujakmek duka dekas ashí aents amina jemin batsata nujai jinattagme”, tiuwai.

<sup>8</sup> Tusa Apajuí ujakam, kashikmas Abimelec nantaki niina inake aidaun untuka ikaunman, niina kajanum tibaunak ashí ujakui. Nuna antukag senchi ishamkajui.

<sup>9</sup> Nuna etsejuk Abrahaman untuka itan chichajak:

“¿Amesh wagka jutikagtame? ¿Wisha aminash wajinma pegkegchau awajkam asamea mina jegajuish tudaush ibaush itagtuaume? Juka tikima jutikdaichatia”, tusa

<sup>10</sup> awentsag chichajak: “¿Waji anentaiyaiya jusha jutikagtame?” tau.

<sup>11</sup> Tama Abraham ayaak:

“Wika juiyag makichikish Apajuí nemagchous ainawa timajai. Tau asan ishamkag-takanuwa nuwajui tichamjai, wagki mina mantuainak duwajun jujutkinum tusan.

<sup>12</sup> Tujash auk dekas minak ubajui. Wagki niig mina apaju nawanji asa, tujash mina dukujuig akiinachui, nuadui wika nuwatkauwaitjai.

<sup>13</sup> Apajuí chichagtak: ‘Amina apa jeen pujam duka jiiinkim wetá’ tujutmatai, Saran chichagkun makichik yaaktanmakesh jegakuik mina ubajui tujutta tusan tiuwaitjai”, tiuwai.

<sup>14</sup> Tusa tutai, Abimelec Saran awagtuki susauwai. Dutikak nuigtushkam uwig aidaun, baka aidaun, aents wainka inatai aishmag aidaun, nuwa aidaui susauwai.

<sup>15</sup> Dutika chichajak:

“Nijah, juju nugka juka ashí mina nugkajui. Tuwi ame ima shiig pujumain dekaepeame, nunú etegkam nuwi pujusta”, tiuwai.

<sup>16</sup> Nuna tusa Saranashkam chichajak:

“Wi amina umaimin susag duka mil kuichik plata najanamu akikega imanun susajai. Nunuwai ii pegkegchou takaschamunum tikich aents aidaunmash ayamjumaktina duka. Tuja makichik aentskesh pegkegchaun chichagtamainuk atsutnai”, tiuwai.

<sup>17</sup> Nuadui Abraham Abimelekan pachis Apajuín tsagkujata tusa segauwai. Tusa tima Apajuí Abimelekan etsagag, niina nuween, nuigtushkam niina inake nuwa aidaun, nuwi batsatunak uchi uchigbau atinme tusa ashí etsagakui.

<sup>18</sup> Wagki Apajuí Sara jukimunum niina ayamjak, ashí nuwa Abimelekan jeen batsamin aidaunak uchin uchigmakchamin emaku asa, nunak etsagaak ataktu uchigbau emakui.

## 21

### *Isaac akiinamu*

<sup>1</sup> Apajuí Saran anagkuamunak imatiksag umikui.

<sup>2</sup> Nuadui Sara ejajjukui. Nunik muumpatnum Abrahaman uchijin aishmagkun uchigmatkauwai. Uchik Apajuí chichaak nunú tsawantin akiinattawai tibaunak imanisag akiinauwai.

<sup>3</sup> Nunikmatai Abraham uchiji daajin adaikauwai Isaac.

<sup>4</sup> Nunú uchi akiina ocho tsawan ejematai, Apajuí tibaun umiak uchiji katiuchijin chuchuken tsupigkauwai.

<sup>5</sup> Abragnak cien mijan ajamu ai niina uchiji Isaac akiinauwai.

<sup>6</sup> Nunikmatai Sara anentaimas: “Apajuí minak dushimtijuje shiig aneasti tusa, nuadui wi uchigmakbaun ashí aents aidau dekawajag shiig aneenak dushijagtin ainawai”, tiuwai.

<sup>7</sup> Tuja nuigtushkam Sara anentaimas: “Makichik aentskesh minak Abrahamnap uchin uchigmatkattawa tusa tujutiuk atsawai. Tujash yamaik muumpatnum uchigmatkajai, niishkam múuntuch wajasu ai”, tiuwai.

### *Agar niina uchiji Ismaeljai Abrahamaa aakjin pujaun jiiiki awemamu*

<sup>8</sup> Isaac muumpak muntsun tsujagkauwai. Nunikmatai Abraham yutain kuashat umika uchijin jüstamjuauwai.

<sup>9</sup> Nuna imatikiagtai, Abragkan uchiji egiptunmaya nuwanum akiinauwa nunú Isaakan kajejak, pegkegchaun chichajun Sara antukui.

<sup>10</sup> Nunik Abrahaman chichajak: “¡Juju nuwa inaka juka uchijijai jiiiki awemata! wagki uchi inaknum akiinauwa duka mina uchijua jujai betekak amina wajijum aina nunak jumaitsui”, tiuwai.

<sup>11</sup> Tusa tama Abraham senchi wake besemag anentaimsauwai, wagki dushakam niina uchiji asamtai.

<sup>12</sup> Tujash Apajuí niina chichajak: “Juju uchua nuig, tuja nuwa inaka anuishkam imanikmek anentaimsaipa. Sara tujama duke umikta, wagki amina uchijum Isaakai uchi akiinak weagtina nunú ame wegantuk agtinai.

<sup>13</sup> Tujash amina uchijum inaknum akiinauwa nuwiyashkam amina uchijum asamtai, kuashat ikauntuka ai yaakat múun wajastinai”, tiuwai.

<sup>14</sup> Tusa tima Abraham tsawag kashikmas, pagkan juki nuigtu duwap apagbaunum yumin aimjuk Agaran susauwai. Agaran aentsek, uchiji Ismaelnashkam susa kumpama, awemauwai. Dutikam Agarchakam niina uchijijai uwejush Beersheba nugka jega atsamunum wainak wagaka wegagu.

<sup>15</sup> Nuwi wekagas yumi jukumujin amuekamtai, uchijinak numi wakentin awayag aipkiuwai.

<sup>16</sup> Dutika aepeak, nigka tupaan ekemas anentaimas: Mina uchig jau waintanak dakitajai, tau. Nunik eketai uchijishkam buutu.

<sup>17</sup> Nunik uchi buutun Apajuí antugkauwai. Nunik Apajuí ángel tumain Agaran chichajak: “¿Wagka Agarah amesh aniame? Ishamkaipa, Apajuí uchi buutun antuke.

<sup>18</sup> Nuadui wamak weme uchi jukim akuptsuk takusta, wagki anú uchua anuiyan wi kuashat aentsun uyujkatnaitjai, dutika ai shiig kuashat agtinai”, tiuwai.

<sup>19</sup> Nuna tusa Apajuí Agaran yumi pukini jünun iwaintukui. Dutikam Agarchakam yumi aintai duwap apagbaun juwakug weji yumin aimak itanta, uchin aajui.

<sup>20-21</sup> Aatus Apajuí uchinak yaigkui. Dutikamu asa tsakaja uwegshunum nugka Parán tutaya nuwi pujusui. Nunik nunú uwegshunum pujaun niina dukuji egiptunmaya nuwan egatuk nuweauwai. Tuja nigka shigki apunbaunum shigki etsakamu ekenka nagkintain shiig yacha aajakui.

### *Abraham Abimelecjai dita dutikatnun chichasagbau*

<sup>22</sup> Nunú tsawan aajakua duwi Abimelec niina suntaji aidaun apuji Ficol aajakua nujai uyunis Abrahamjai chichastatus weuwai. Nunik jegawag Abimelec Abrahaman chichajak:

“Ame ashí takam nunak Apajuí yaimpa duka dekaji.

<sup>23</sup> Nuadui, Apajuísh antugtamaí minash tujutta. Juju nugka juwi mina uchig aidaush, ame uchijum wegantu aidaush wi amijai shiig awagdayag aiksamek shiig awajkatnujum pachisam tujutta”, tiuwai.

<sup>24</sup> Tusa tama Abraham ayaak:

“Ayu, Apajuish shiig waitui, wika ame tujutam nunak imatiksasuk umiktatjai.

<sup>25</sup> “Dutikatin asamtai ame amina inakem aidau yumigmatan jukiu aina nunú awagtugkita”, tusa tiuwai.

<sup>26</sup> Tama Abimelec ayaak:

“Achah, wika nunak makichkish dekatsjai, amek minak: Juka mina yumigmatjui, tusamkesh tujtchauwaitme. Wika yaki yumigmatnash jukiuwaita nunak yamaikish dekatsjai”, tiuwai.

<sup>27</sup> Timatai Abraham uwig aidau, baka aidaujai juki Abimelekan susauwai. Dutika nunú tsawantinig mai chichaman umikajui.

<sup>28</sup> Nuna umikag Abraham siete uwijan juki akanak awajsauwai.

<sup>29</sup> Nuna dutikantai Abimelec iniak:

“¿Wagka jusha siete uwig akankam ijumjaum dusha aikaume?” tau.

<sup>30</sup> Tama Abraham ayaak:

“Juju siete uwijan amaajam nunú jukim dekkattame wi juna yumigmatan tainiuwaitag duka”, tiuwai.

<sup>31</sup> Nuadui nunú dutikamunum nuna nugka daajin Bersheba adaikauwai, wagki nunú nugkanum chichaman umikaju asag.

<sup>32</sup> Dutika chichaman bershebanum umikag, Abimelec Ficoljai filisteo aents aidau nugken wakitkijai.

<sup>33</sup> Nunik wakitkiagmatai Abraham numi tamarisco tutain bershebanum ajauwai. Dutika nuwi Apajuí Tuke Pujuuwa nuna daajin adaitus emematiuwai.

<sup>34</sup> Aatus nuwi filisteo aents aidau nugken Abraham kuashat tsawan pujusui.

## 22

### *Apajuí Abrahaman anentuash tusa dekapsamu*

<sup>1</sup> Kuashat tsawan asa, Apajuí Abrahaman niyai kajinas anentaimak dekaskeapi tabajin dekapsatatus niina daajin adaitus untsukui. Tusa untsuam nii ayaak:

“Juwi pujajai”, tiuwai.

<sup>2</sup> Tutai Apajuí chichajak:

“¿Amina uchijum makichkiuch asamtai, senchi aneam nunú jukim niijai Moria nugkanum wetá! Nuwi jegan wi mujan iwaintuktatjam nuwi uchijum maa apeakum mina emematjita”, tiuwai.

<sup>3</sup> Tusa tima tsawak shiig kashikmas nantaki, nii ekemi wetinun burronum patai umika ukuak, chigkimin jigka umik nunú burronum pataja jukiag Apajuí nuwi wetá tibaunum niina uchiji Isaakan juki, nuigtu jimag inaken juki weuwai.

<sup>4</sup> Nunik we wenakua kempatuma juna tsawampag wesa diikma, atushat nii jegatnujin wainkauwai.

<sup>5</sup> Dutika nuna wainak, Abraham niina inake aidau chichajak:

“Atumek juwi burro kuitamkujum juwaktajum. Nuniagmin wi mina uchigjai wetajai, núnikan niijai Apajuín emematin ukuakun taatjai, nunikmatai wakitkiagmi”, tiuwai.

<sup>6</sup> Nuna tusa Abraham chigkimin niina uchijin aentsek tuja ekemaktinun jii akaamun kuchijjai nii juki, niina uchijjai weuwai.

<sup>7</sup> Nunik wesag, Isaac apajin iniak:

“¿Apawah!” tiuwai. Tama nii ayaak:

“¿Waji wakegame uchuchih?” tau. Tusa tama Isaac chichaak:

“Jii juki, chigkimish umika wegaji. Tujash ¿tuwi pujawa uwig aishmag tsakat maa apeaku Apajuí ememattinush?” tau.

<sup>8</sup> Tutai Abraham ayaak: “Apajuí uwig aishmag tsakatan sujamsattawai, nunú maa apeaku nigka ememattatji”, tiuwai.

Aatus tusa uchijjai tsanias wegaw.

<sup>9</sup> Nunik Apajuí tibaunum jegantag, nuwi Abraham kaya ekenag najanauwai kuntin patasa apeaku Apajuí ememattinun. Dutika chigkimin patag nuadui niina uchiji Isaakan achika jigkag juki patainiuwai. <sup>10</sup> Dutika patai uchijin maatatus kuchijjin jutatman,

<sup>11</sup> Apajuí ángel tumain nayaimpinum pujus untsuak:

“¿Abraham! ¿Abraham!” Tama nii ayaak:

“Juwi pujajai”, tiuwai.

<sup>12</sup> Tutai nii chichajak:

“Uchigmek makichkish antigkaipa. Ame Apajuí ima senchi umijam nunak yamaik dekajuajame, wagki, amina uchijum makichkiuch aigkish, sujimtsuk mina sujustasam umiku asamin”, tiuwai.

<sup>13</sup> Tusa tima niimsatakama, uwig tsakat aishmag numi kanawen niina kachujin tutinak wajaun wainkauwai. Nunik uchijin maatag tabaun idayak, nuna weji achika juki maa nuna nejen ashí apeak Apajuín emematiuwai.

<sup>14</sup> Nuna dutikau asa Abraham nunú nugka daajin: “Apajuík atsumamun sukagtawai” tuu adaikauwai. Nunú tibaunum yamayaukish: “Apajuík mujanum atsumamun sukagtawai”, tinu ainawai.

<sup>15</sup> Tuja awentsag Apajuí ángel tumain nayaimpinmaya Abrahaman untsuka,

<sup>16</sup> chichajak:

“Tuke Pujuu chichaak juna timae: ‘Ame wi tabau umiakum amina uchijum makichkiuch aigkish sujitjukchau asamin, wiki wi chicham umiktinjun tumamjai’ tujamui.

<sup>17</sup> Aminak dekas pegkegnum yumigsattajame: Ame uchijum wegantuk yaya nayaimpinum ayá iman, nuigtu kayam nayantsanum ayá iman agtinai. Ditak shiwaajinash tuke depetin agtinai.

<sup>18</sup> Aents ashí nugkanmaya aidauk ame uchijum wegantu agtina nuna daajin pegkegnum yumigkiam agtinai, wagki ame wi tabau intimjutsuk umiku asamin”, tiuwai.

<sup>19</sup> Tusa tima Abraham Isaakjai wakitkiuwai niina inake batsakbaunum. Nunik jegantang ditajai betek waketug bershebanum jegawajui. Nunik nuwi Abrahamak pujusui.

### *Nacoran uchiji aidau*

<sup>20</sup> Nuwi kuashat tsawan pujus, Abraham niina yachi Nacoran nuwe Milcá, niina aishinak kuashat uchin uchigmatkauwai tabaun dekauwai.

<sup>21</sup> Iwaijig Us daagtinai, nuwi patatkauwai Buz, nuwi patatkauk Quemuel, tuja nunuwai Araman apaji.

<sup>22</sup> Untsu Quemuelai patatkau aidauk Quésed, Hasó, Pildas, Idlaf, Betuel aatus ainawai.

<sup>23</sup> Betuelan nawanjiyai Rebeca. Juju ainawai Abrahaman yachi Nacor niina nuwe Milcáyai ocho uchin akiinkauwa nunú.

<sup>24</sup> Tuja nuigtushkam niina ikaa nuwe Reumá aajakua nuwishkam akiauwai: Teba, Gáham, Tahas, Maacá, aatus, tusa tabaun dekauwai.

## 23

### *Sara jakamtai ukusbau*

<sup>1</sup> Sara cientoventisiete mijan pujusui.

<sup>2</sup> Nunik yaakat Quiriat-arbá, Hebrón tuuta awagmatia nuwi Canaán nugkanum pujus jakauwai. Nunikmatai Abraham Saran aneak buutiuwai, nunik kuashat tsawan anentaimek pujusui.

<sup>3</sup> Nunik nuwe jakamtai aepes pujau ukuak, hitia aents aidaun apujijai chichastatus weuwai.

<sup>4</sup> Nunik jegaa ditajai chichaak:

“Wika atum wegantuchuitjai, nuniaigkish wait aneasjum makichik ukumatai sujustajum sumaktajai, dutikan nuwi mina duwajun ukustajai”, tiuwai.

<sup>5</sup> Tusa tama makichik nuwiya ayaak:

<sup>6</sup> “¡Apuh, wait aneasam antugkagtukta! Jutii ainag nuwiamek ametme dekas Apajuí etegkamumek. Nuadui iina ukumataiji dekas pegkeg aina nuwi nuwemik ukusta. Makichiksh jutii ainag juwiyag ukumatain sujitjamainuk shiig atsawai”, tiuwai.

<sup>7</sup> Tutai Abraham wajaki hitita aents aidau emtin ditan eme anentus tsunsuma wajas pagkainiuwai.

<sup>8</sup> Nunik chichaak:

“Atumesh mina duwag jaka nuna ukusti tusa wakegakjumek Efrón Sóharan uchijiya nuna ukumatai awa nunú segatjitajum.

<sup>9</sup> Tuja Macpelánum waa niina nugke nagkatkamunum awa nuna sujusti. Wi nuna akikenak ashí akiktajai. Dutikau asamtai, juju nugka juwi makichik waa ukumatai midaush ajuttí tajai”, tiuwai.

<sup>10</sup> Tutai Efrón hitita aents nii nuwi pachitkau asa, nii wegantu aidaush ijunbaunum, ashí aents yaaktan waitjin utsaanaidaush betek antuinamunum chichaak:

<sup>11</sup> “¡Atsah, mina apujuh, wait aneasam antugtukta! Wi yamaik ashí mina pataag aidaush antuinamunum tajame: Au nugkak ame jukita amina amaajame, tuja waaya aushkam aminu ati, nuwi amina nuwem ukusta”, tiuwai.

<sup>12</sup> Tusa tima Abraham aents nugkentin ijunbaunmanini ataktu tsunsuma pagkainiuwai,

<sup>13</sup> nunik dita emtin Efrórgan chichajak:

“¡Wait aneasam antugtukta! Wi kuichkin nugka akiken amaag duka wait aneasam jukita. Dutikawamin wisha anentang mina duwag jajutka nunash ukustajai”, tau.

<sup>14</sup> Tama Efrón Abrahaman ayaak:

<sup>15</sup> “¡Mina apujuh antugtukta! Nugkak akikai cuatrocientos plata najanamu. Tujash juna akikega duka chichamjuk pujuchmi. Dekas nuwem jaka duka ukusta”, tiuwai.

<sup>16</sup> Tima nunak antusag Abraham Efrón hitita aents aidaun emtin imaan akikai tibaunak imatiksag kuichkin juki akikmakui.

<sup>17</sup> Dutikau asa, Efrórgan nugke Macpelá Mamrenum etsa minitaiya nuni awa nunak ashí niinu emauwai. Tuja nuigtushkam nunú nugkanum waa aunak, ashí numi múun aidaujui,

<sup>18</sup> ashí Abrahamdauk wajasui. Tuja Abraham nugkan sumakua nunak hitita aents aidaun emtin nuigtushkam tikich aents nunú yaaktanun utsanaidaush antuinamunum sumakui.

<sup>19</sup> Nuna ashí umika, Abraham niina nuwe jakaun juki, Mamrenum wajasui diyam etsa minitainini Hebrón tutai Canaán nugkanum waa Macpelánun awa nuwi ukusui.

<sup>20</sup> Aatus nunú nugkak, waajai, hitita aentsun nugke aajakun, Abraham sumakua duka, niina ukumatai wajasui.

## 24

*Abraham niina inaken Isaaka nuwe atin egatkata tusa awemamu*

<sup>1</sup> Abrahamak shiig múuntuch wajasui. Tuke Pujuu niinak ashí pegkegnun yainkui.

<sup>2</sup> Makichik tsawantai Abraham niina inake chichintan, ashí niina wajiji aidaunash kuitamin atinaitme tusa tibaun untsuka chichajak:

“Amina uwejum mina bakuju wakentin yununkata, wagki ame chicham umiktinjum dekaskenun tujuttin asam,

<sup>3</sup> nunikam Tuke Pujuu Apajuí nayaimpinum nugkanmashkam inamna nunú antugta-mai, ame chicham umiakum mina uchig canaágnun wi pujag juwiya nuwan nuwatkai tusam kuitamkatnujuk pachisam tujutta.

<sup>4</sup> Juwiya nuwak egattsuk, mina nugkajui weme mina pataajuiya Isaaka nuwe atin egatkata”, tiuwai.

<sup>5</sup> Tusa tama niina inake ayaak:

“Ayu, tujash nuwa wijai minitan dakitakuish ¿wisha utugmainaitja? ¿Amina uchigmin jukinuap ame pujaum ukukiuwaitam nuwi eman nuweattaja?” tau.

<sup>6</sup> Tama Abraham ayaak:

“¡Atsah, mina uchijuk awi jukimek emaipa!

<sup>7</sup> Tuke Pujuu Apajuí nayaimpinmayaya nunú mina pataju nugkeen mina apaju jeen pujai jijjak, mina, tuja mina uchijun uchiji wegantu agtina nunú batsamsatnun susatjai tusa juju nugkan anagtuauwa nunú Apajuí niina aentsjin nayaimpinmayan emtikak awemattawai. Nuadui mina uchijun nuwe atinuk nii yaimpasmatai juki itaattame.

<sup>8</sup> Untsu nuwa amijai minitan dakitakuig, wi tajak duka amek agkan juwaktatme. Tujash ¡makichkish mina uchijuk awi jukimek emaipa!” tiuwai.

<sup>9</sup> Tusa tima nunú inak niina apuji Abrahaman bakui wakentin uwejen yununak pujus chichaak:

“Dekas ame mina tujutam nunak imatiksasuk umiktajai”, tiuwai.

<sup>10</sup> Nuna tusa niina apuji wajiji aidaunmayan, shiig pegkeg aidaun etegkeg nuwa susatnun, tuja nuwa patayi aidaun susatnunashkam jukiuwai. Dutikau nuigtushkam niina apuji tagkujinian diez camellon jukiuwai. Dutika juki Mesopotamia nugkanum Nacora yaaktajin weuwai.

<sup>11</sup> Nunik wea weakua yaaktanun jegauwai, tujash eke wayatsaig etsa akagu. Nuniai nuwiya nuwa aidaun yumin aimainak yumigmatnum shimuidau. Nuninai nunú inakshakam camello aidaun ayamtikak yumigmatnum ayaunas batsasui.

<sup>12</sup> Dutika nuwi wajas Apajuín aujak: “Mina apujun Abrahaman ememattai Apajuí Tuke Pujuuwah, wait aneasam yamai mina apug Abraham wait anenjata, dutikakum minash shiig pegkegnun wekaegas wakitkiti tusam yainkata.

<sup>13</sup> Tuja juwiya nuwauch aidaun yumin shikinak mininai, juju yumigmata juwi ayaamsan pujustajai.

<sup>14</sup> Nunikan pujai nuwauch yumin shikika waketkui: ‘Wait aneasam anú yumi aimka juki weam nunú apusam shikisam ajampusta uwagtajai’ tai, nii aijak: ‘Pai uwagta, nuniakmin amina camellojum aidaunash aaktajai, tusa tujuttata nunú, dekas Isaaka nuwe atin ame etegkamun ati. Nunú betek uminkamtai, ame mina apug wait anentamunak shiig wika dekattajai’ ”, tiuwai.

<sup>15</sup> Tusa Apajuí augbaun eke ashimtsaig, makichik nuwauch yumi aimentain yanas minaun wainkauwai. Duka Rebeca Betuela nawanji aajakui. Betuelak Abrahamama yachi Nacoran uchiji Milcáyai akiamu aajakui.

<sup>16</sup> Rebecak shigmauch, nuigtush makichik aentskesh takaschamu aajakui. Nunú nuwa yumi shikitaijin apujus yumi aimak wakitki wetatman,

<sup>17</sup> Abrahamama inakeshkam tupikatki jegantun chichajak:

“Wait aneasam, minash yumi machik ajampusta uwagtajai”, tiuwai.

<sup>18</sup> Tusa tama:

“Ayu uwagta apuh”, tiuwai. Nuna takug yumi aimentaijin apujus susauwai, dutikam niishkam uwajui.

<sup>19</sup> Nunikmatai Rebeca chichajak:

“Amina camellojum aidaunash yumin shikikan susatjai dita wakegamun uwagtinme” tiuwai.

<sup>20</sup> Tusa waujus yumi aimka takakbaujinak tagku amutainum yajatua ukuak, tupikaki kuashta yumin shíkika ashí tagku aidau umumainun aimjukui.

<sup>21</sup> Imanitai inakak takamtak wajas dii wajau, dekas juwashit Tuke Pujuu etegkamush tusa nuna ejetat.

<sup>22</sup> Camello yumin uwakgmatai, makichik oro dujinum nenatai najanamun seis gramu kijinji ajamun juki Rebecan detuauwai. Dutika nuigtushkam jimag kuntunum patakumtain oro najanamun cien gramu kijinji ajamun juki nunashkam susauwai.

<sup>23</sup> Nuna susa iniak:

“Wait aneasam tujutiah ¿amesh yana nawanjiyaitpa? ¿Amina apa jenish agkan-chaukai wi mina aentsug aidaujai kanumainush?” tau.

<sup>24</sup> Tusa tama nii ayaak:

“Wika Nacor Milcáyai Betuelan akiauwa nuna nawanjiyaitjai.

<sup>25</sup> Iina jenig atum kanumainuk awai, nuigtushkam chijichi camello yumainchakam kuasht awai”, tiuwai.

<sup>26</sup> Tusa timatai nii Apajuí segamunak ashí imanisag uminkamtaí, tikishmag pujus Tuke Pujuun emematak:

<sup>27</sup> “¡Tuke Pujuu mina apug Abrahamama Apajuíjig pegkegnum chichagtai atin ati! Dekas amek mina apug wait anentau asam anagkuamugmek umitskek idaisachume. Ame minashkam jinta inaktugsam, mina apug Abrahamama patayin itajuaume”, tiuwai.

<sup>28</sup> Aatus inak Apajuíjai chichaak pujai, Rebeca tupikaki niina dukuji jeen jegaa nuna pachis dukujin ashí ujakui.

<sup>29</sup> Tusa etsegkamtaí Rebeca umayi iwai Labán nunú aents yumi aimentainum ayaumas pujaun wainkatatus tupikaki weuwai,

<sup>30</sup> wagki niina umayi kuntunum patakumtain dujinum nenataijai ayatak orok najanamu susamun wainkau asa. Tuja nuigtushkam Rebeca chichaak: “Nunú aents minak aatus tujutmae”, tusa etsejun antuku asa, nunú aents yumi aimentainum ayaumas camellojin batsas pujaun shiig wainkatatus wejiuwai.

<sup>31</sup> Nunik jegantun, chichajak:

“¿Wagka agaash pujame? Amek Tuke Pujuu pegkegnum yumigjamuitme, anui pujutsuk wegajai mina jegajui wemi. ¡Wi ame kanumainnak amina camellojum batsamsatin aidaujai umikmajai!”, tiuwai.

<sup>32</sup> Tusa tima ayu tusa jega weuwai. Nunik jegamtaí, camellonum waji aidau pataja ejegamun ashí Labán akaja ijumag duwi camellon ayujauwai. Tuja nuigtushkam yumin shíkika nunú inakan, nijai yujaujai susauwai nawen nijaktinme tusa.

<sup>33</sup> Nuna dutika, yutain inajuk umika apujtusui. Dutikamtaí Abrahaman inake chichaak:

“Eke wi chichaman tumain ajuta nuna amina ujatskek yumaitsujai”, tiuwai. Tama:

“Ayu, waji tame tita”, tiuwai.

<sup>34</sup> Timatai inak chichaak:

“Wika Abrahaman inakegaitjai.

<sup>35</sup> Mina Apug Abrahamnak Tuke Pujuu shiig kuasht pegkegnum yaigkui. Dutikak uwijan, bakan, platanash, oronash, inak aishmag aidau, inak nuwa aidaujai, nuigtu camellon, burro aidau aatus ashí susa wiakuch awajsae.

<sup>36</sup> Tuja niina nuwe Sarashkam muumpatnum uchin uchigmatkabi. Mina apujuk niina wajiji aidaunak, juka mina uchigdau agtinai tiuwai.

<sup>37</sup> Nunú mina apug wi chicham umiktinun chichagtak: ‘Mina uchiju nuwe atinuk Canaán nugkanum wi pujag juwiya nuwak egatkaipa,

<sup>38</sup> juwiya egattsuk dekas mina apaju patayin wetá, nunikam nuwiya mina uchiju nuwe amainuk egatkata’, tusa tujutmae.

<sup>39</sup> Tujutkui wi ayaakun: ‘Mina apujuh, ¿tujash nuwa wijai minitan dakitakuish itugkattajah?’ timajai.

<sup>40</sup> Tusa tai nii mina aijak: ‘¡Apajuín wi emematkun umijag nunú, niina aentsji nayaimpinmayan emtika awemattawai, wagki nii uyuntamsantai pegkegnun wekaesamnum tusa! Duwi amek mina uchiju nuwe atinuk yupichu mina apaju patayinia jukittame.

<sup>41</sup> Untsu ame mina pataajui jegaam nuwa sumamin sutitjamkagmataig, wi ame chicham umiktinun tajam duka agkan juwaktatme’, tujutmae.

<sup>42</sup> “Tusa tujutui asamtai, yamai yumi aimentainum taa wajasan, Tuke Pujuu mina apujun Apajuujiya nuna augkun:

“ ‘¡Amesh dekas minash shiig pegkegnun wekagas nii dutikatag tabaunak betek umika wakitkiti tujutkumek yainkata!

<sup>43</sup> Tuja nunú betek uminkuig wi yamai juju yumi aimentainum wajag juwi wajasan, nuwach yumi shikik waketkui wi chichagkun: “Wait aneasam yumi shikikam machik ajampusta, uwagtajai”, tusan tai,

<sup>44</sup> nii aijak: “Ayu, uwagta, nunikamin camellojum uwagtinnash shikigkatjai”, tusa tujuttata nunú dekas ati ame mina apujun uchiji nuwe atin egatkamuk’, tusan timajai.

<sup>45</sup> Tusan Apajuujai chichamunak eke ashimtsaig, Rebeca yumi aimentajin yanaki midaun wainkamjai. Nunik yumi akaetuki shikika iwakmatai, wi niina chichagkun: ‘Minash wait aneasam yumi ajampusia uwagtajai’, timajai.

<sup>46</sup> Tusa tai ayu tusa, yumi aimka juwamujin akaki apujun chichagtak: ‘Amea uwagta, nunikamin amina camellojum aidaunash yumin shikigkan aaktajai’, tusa mina yumin sujus idaitak, mina camellog aidaunashkam dutiksag susame,

<sup>47</sup> dutikantai duwi wi niina iniakun: ‘¿Amesh yana nawanjiyaitpa?’ tusan tai nii aijak: ‘Wika Nacoran uchiji Betuel Milcáyai akiinauwa nuna nawanjiyaitjai’, tujutmae. Timatai niina nujiin nenatain detuamjai, tuja nuigtu jimajan kuntunum patakumtain patakuamjai.

<sup>48</sup> Nuna dutikan nuwig tikishmaja pujusan Tuke Pujun emematmajai, wagki Apajuí mina apug Abrahaman ememattaiya nunú minak jintan inaktujus, mina apug Abraham a uchiji nuwe atinun niina patayi nawanji pujamunum itajuau asamtai.

<sup>49</sup> Nuadui yamai atumesh dekaskenum tsanumtsuk mina apug Abraham tibaun uajim nunú tujuttajum. Untsu atsa dutikmaitisujai takugminig wi anentaimsatjai wajinak dutikatja”, tiuwai.

<sup>50</sup> Tutai Labán Betueljai niina ayaak:

“Juka ashí Tuke Pujuu wakegamua nunuwai, nuadui iik ayu tusaikish, nuniachkuish atsa tusaikish tumaitisui.

<sup>51</sup> Pai nijah, juwai Rebecak, juju jukijum wetajum. Amina apugmi uchijiya nuna nuwe ati. Tuke Pujuu wakegamua nunisag uminkati”, tiuwai.

<sup>52</sup> Tusa tutai Abrahaman inake tikishmag nijayin nugkan antig pujusui Tuke Pujun emematak.

<sup>53</sup> Apajuín ememati idayak, kuashat waji takatai akik aidaun, plata najanamu aidaun, oro najanamu aidaun, tuja jáanch nugkurai aidaunashkam juki Rebecan susauwai. Dutika nuigtushkam niina umayin niina dukujin aatus waji aidaun susauwai.

<sup>54</sup> Nuna dutikai aents nijai uyuunis yujauk betek ijuntujag yutain yuwawag, umutnash uwajag kajigkajui.

Nunik tsawainak nantakiag nunú inak chichaak:

“Wisha yamai wakitkitjai mina apuju pujutajin”, tiuwai.

<sup>55</sup> Tutai Rebeca umayi dukujijai chichainak:

“Eke yamaikik Rebecak jukipa, dakasta jutijai diez tsawan pujusti, nunik duwi atumjai weti”, tuidau.

<sup>56</sup> Tujash inak ditan ayaak:

“Nuigtuk minak emetjuawaigpajum. Tuke Pujuu minak pegkegnun wekaesati tusa tujutbaunum shiig umikjai, nuadui wika mina apuju pujutajin wakitkitag tajai”, tau.

<sup>57</sup> Tusa tutai dita ainak:

“Jasta, Rebeca untsuka dekajuami wajintig”, tuidau.

<sup>58</sup> Tusag Rebecan untsukag itan iniinak:

“¿Amesh juju aentsjai wetasamesh wakegamek?” tama, nii aimak:

“Ehe wetatjai”, tiuwai.

<sup>59</sup> Tusa timatai Abraham a inake shimamunum Rebecan, tuja nuwa nii uchuch asamtai kui kuitamkawa tsakapajua nujai akupkajui.

<sup>60</sup> Dutikainak, Rebecan pegkegnun yumiginak aatus tiajui:

“Tina umayi yamai akupkami: ‘Chah, ubajuh,



¡Amek shiig kuashat aentsun dukujimtai atin ata!  
 ¡Nuigtushkam amina uchijum wegantu aidauk,  
 ditá shiwaajin depetkatin atinme! tusa wakegaji”, tiajui.

<sup>61</sup> Aatsa pegkegnum yumigjam, Rebeca niina inake nuwa aidaujai camellonum pekamiag, Abrahaman inake wetai niijai shiyakajui. Aatus Abrahamana inake Rebecan juki wakitkiuwai.

<sup>62</sup> Tuja Isaakak Néguev nugkanum pujujakui. Nuniyatak makichik tsawantai yumigmat “Iwaku pujuuwa nunú minak waitui” tutainum weuwai.

<sup>63</sup> Nunak nunikui wagki tuke ayamak Apajuín aujak wekaesatatus. Nuwi wekagu pagkas niimsatakama camello miniagtatman wainkauwai.

<sup>64</sup> Tuja Rebecashkam niimkama wainkauwai Isaakan, nunik camellonum eketu akaikiuwai.

<sup>65</sup> Nunik akaiki inakan iniak:

“¿Aush yaita ikama awiya ii weamunmanini mina dusha?” Tusa iniam, inak ayaak:  
 “Auk mina apujui”, tiuwai.

Tima jáanchin juki dukumak yapiin ejaka wajasui.

<sup>66</sup> Nuniai inak Isaakan igkug nii wekaesa dutikamujinak ashí ujakui.

<sup>67</sup> Dutikam Isaac Rebecan juki niina dukuji aajakua nuna aakjin awayauwai, dutika nuwi nuwatkauwai. Aatus Isaakak dukuji jakamtai, wake besemag pujau Rebecan aneak anentain ichichiajui.

## 25

*Abraham Ceturayai uchín akigkua nunú wegantu aidau*

(1 Cr. 1.32-33)

<sup>1</sup> Abraham tikich nuwa Cetura daagtinun jukiuwai.

<sup>2</sup> Dutika nunú nuwanum imajin uchijin akigkui: Zimráam, Jocsán, Medán, Madián, Isbac, Súah, aatus.

<sup>3</sup> Jocsán akiauwai Sebánkan Dedánjai. Untsu Dedánkan uchiji wegantu aidauk: Asureo, letuseo, leumeo aatus aajakui.

<sup>4</sup> Tuja Madiágka uchijishkam: Efá, Éfer, Hanoc, Abidá, Eldaá aatus aajakui. Ashí juju aina juka Cetura uchiji wegantu aajakui.

<sup>5</sup> Tujash Abrahamak niina wajiji aidaunak ashí niina uchiji Isaakan susauwai.

<sup>6</sup> Tuja tikich nuwanum akigbau aidaunak ayatak anenjauch wajichin susa, Isaac pujamun ukumtiki atushat ishiakui. Tuja nigka nuwig pujayatak nugka etsa jiintaiya nuni ishiakui.

*Abraham jakamtai ukusbau*

<sup>7</sup> Abrahamak ashí ijumjamak ciento setenta y cinco mijan pujusui.

<sup>8</sup> Nunik shiig múuntuch wajas, jakauwai. Nunikmatai ukusaju ainawai.

<sup>9</sup> Nunik jakamtai, niina uchiji aidau Isaac Ismaeljai jukiag Efrógka nugke Macpelá Mamrenum etsa minitaiya nuni awa nuwi ukusajui.

<sup>10</sup> Nunú nugkanak Abraham hitita aents aidaun nugken sumakua nuwi niina nuwe Sara ukusbaunmak ayaunas ukusajui.

<sup>11</sup> Abraham jakamtai, niina uchiji Isaac yumigmatan daaji “iwaku pujuuwa nunú minak waitui” tutainum ayaumas pujaun, Apajuí pegkegnum yumigjauwai.

*Ismaelan uchiji wegantu aidau*

(1 Cr. 1.28-31)

<sup>12</sup> Sara inake egiptunmaya nuwa Agar aajakua nuwi Abraham Ismaelan akiauwai nuna uchiji wegantu aidauk:

<sup>13</sup> Nebaiot aajakui iwaiji, nuwi patatkau ainawai: Quedar, Adbeel, Mibsam,

<sup>14</sup> Misma, Duma, Masá,

<sup>15</sup> Hadar, Temá, Jetur, Nafis, Quedmá aatus.

<sup>16</sup> Juju ainawai Ismaelan uchiji doce aajakua duka. Juju aina juka maki makichik nugkentin aakan aakmajag yaaktamkajui. Dutikawag nunú yaakta daajinashkam dita daajinak adajiau ainawai. Dutikawag maki makichik dita yaaktajin apuji wajasaju ainawai.

<sup>17</sup> Ismaelak ciento treinta y siete mijan pujus, jakauwai, nunik jakamtai ukusajui.

<sup>18</sup> Nunikmatai nii wegantu aidauk nugka Havilá tutai, Shurjai niniaku awa nuna ejapeen, jinta asirianum juwaki Egipto wetaya nuwi ditá yachi aidau dakitamaitak batsamsajui.

*Jacob Esájai akiinamu*

<sup>19</sup> Jujuwai Abraham a uchiji Isaac pachisa augmattsamu.

<sup>20</sup> Isaac cuarenta mijanji ajamu asa, Betuela nawanji Rebeca Labágka umayi arameo aents aidau, Padán-aram batsamajaku aina nuwiyan nuwatkauwai.

<sup>21</sup> Rebeca kaga asantai, uchi akiatjai tusa Isaac Apajuín senchi segauwai. Tusa segam Apajuí Isaakan antugkauwai, nuadui Rebeca ejapjukui.

<sup>22</sup> Tuja jimag uchi asa inatak egkemsag maanidau. Imaniagtai Rebeca nigki anentaimas: “Juju imaninaku, wika iwaku pujtnak dakitajai. ¿Wágka minash jusha jutijawa?” tusa Apajuín iniasui.

<sup>23</sup> Tusa iniam Tuke Pujuu ayaak:

“Amina ampugminig jimag uchi egketui, nunú akiinawag atakea duwi yujakag maaniawagtina. Nuadui uchik eke akiintsuk inatak egkemsag maaninawai.

Tikichia nuna aentsji ima kuashat agtina.

Untsu iwaiya nunú yachi awanin umigtina.

Nuni kanakagtin asag imatijamainawai”, tiuwai.

<sup>24</sup> Tusa tima pujus tsawan nii uchigmaktin jegamtai jimajan uchigmakui.

<sup>25</sup> Yama nagkamchak uchi jiinkiuwa duka intashi kapantu uje wajakin akiinuwai. Nuna adaikauwai Esaú.\*

<sup>26</sup> Nuniai tikishchakam patatkau, niina yachi Esaú sagkanin achitkau akiinuwai. Nuniku asantai, nunak Jacob† adaikauwai. Juju uchi aidaun jimagma Rebeca uchigmakua nunak, Isaakan mijanji sesenta ai uchigmakui.

*Esaú nii iwai asa jumainun puyatjutsuk sujukbau*

<sup>27</sup> Nunú uchi aidauk mai muumpajajui. Esaú kuntin mautan yacha aajakui, untsu Jacob batajuch aajakui, niinak ayatak jega pujut shiig awagmajakui.

<sup>28</sup> Isaakak Esaún ima senchi anejakui, wagki egakbaun yuu asa, untsu Rebeca Jacopan ima senchi anejakui.

<sup>29</sup> Makichik tsawantai Jacob yutain inajak pujai, Esaú kuntinun maatatus weu pimpiki minau.

<sup>30</sup> Nunik minis Jacob inajak pujaun wainak chichajak:

“¡Wait aneasam minash anú yutai pachimjam kapantu emam inajam nunú ajamjusta, nujantai jajai!” tiuwai. Nuadui Esaú tawa nunak kapantu taku, tawai.

<sup>31</sup> Tusa segam Jacob Esaún chichajak:

“¡Kame amesh yapajakmek, eke yutain amatsaig ame iwai asam jumainaitam nunú mina ashí sujusta!” tiuwai.

<sup>32</sup> Tusa tama Esaú chichaak:

“¡Nijah, wi iwai asan jumainaitag dusha, waji pegkegnumak yainkati! ¡Nuna sujimknuk nujantai jakattag jama! ¡Duka dekas ame jukitin ata!” tiuwai.

<sup>33</sup> Timatai Jacob ayaak:

“Dekas takumek yamaikiuchia juwik ame tame nunú umiktinjum chichaakum: ‘Duka dekas ame jukitin ata’ tusam tujutta”, tau. Tusa tama Esaú chichaak:

“Nunak dekas tajai”, tiuwai. Nuni susauwai Jacopan ashí nii iwai asa jumain aidaunak.

<sup>34</sup> Tusa tima Jacob, Esaún pagkan lenteja pachimja inagkamujai susauwai. Dutikam nuna yuwa, umutainashkam uwag uminak weuwai. Tuja nii iwai asa jumainjinak puyatjachu asa, dutika sujuk niig wainak juwakui.

## 26

*Isaac yaakat Guerar webau*

<sup>1</sup> Yaunchuk Abraham iwaku pujai, yapajut tepeauwa nuna nagkaesau, Isaac pujus-mataishkam yapajut tepeauwai. Nunikmatai Isaac yaakat Guerar filisteo aents aidaun apuji, apu Abimelec pujamunum weuwai.

<sup>2</sup> Nuwi jegaa pujaun, Tuke Pujuu wantintuk chichajak: “Egiptunmak wepa, dekas wi amina titatjam nuwi weme pujusta.

<sup>3</sup> Tuja yamaikik juju nugka juwig pujusta, wi aminak kuitamkattagme. Wi aminak pegkegnum yumigsattagme. Tuja amina uchijum wegantu aidaun ashí juju nugka aina juna susattajai. Wi amina apa Abrahaman anagkuawaitag nunak, nuni umiktatjai.

<sup>4</sup> Amina uchijum wegantu aidaunak ayaimpinum yaya dekapamainchauwa iman awajsattajai. Dutikakun juju nugka junash ashí ditanak susattajai. Tuja nuigtushkam,

\* 25:25 “Esaú” tawa nunak hebreo chichamnumak “ujentin” taku tawai. † 25:26 “Jacob” tawa nunak hebreo chichamnumak “yachi sagkanin achitkau akiinau” taku tawai.

ashí tikich nugkanmaya aidaush amina uchijum wegantu aidaunum yunumas pegkeg yumigkin jukiagtinai.

<sup>5</sup> Nunak dutikattajai, wagki wi Abrahama minna chichameg, wi jintinjam jujai betek umikta tusa tibaunak imatiksag umigtuku asamtai”, tiuwai.

<sup>6</sup> Tusa tima Isaac Guerarnumak pujusui.

<sup>7</sup> Nunik pujaun nuwiya aents aidau Rebecan pachis: “¿Jusha yaita?” tusa inidau. Tusa iniam Isaac minna nuwajui tutan ishamak: “Mina ubajui”, tiuwai. Nunak tiuwai wagki Rebecak shigmauch asamtai niina shigmatin juinak mantuawainum tusa.

<sup>8</sup> Kuashat tsawan nagkaemai Abimelec makichik tsawantai niina jeen wajasa niim-tainum niimkama Isaac niina nuwe Rebecan achika wasugtatman wainkauwai.

<sup>9</sup> Dutika wainak Abimelec Isaakan untsuka itan chichajak:

“Dekas au nuwa amina nuwemiapih. Nuniaish, ¿wagka mina ubajui timaume?” tau.

Tama, Isaac ayaak:

“Niina juinak mantuawainum tusan timajai” tiuwai.

<sup>10</sup> Tutai Abimelec chichajak:

“¿Wagka jusha jutikagtame? Mina aentsug aina nuwiya makichkikesh amina nuwemin aikauwaitkuig, amek jutiik pegkegchau takasua iman ekagtumain awajkag-tukume”, tiuwai.

<sup>11</sup> Nuna tusa ashí niina aentsji aidaun chichajak:

“¡Juju aentsun waitkauk, tuja niina nuwenakesh waitkauk mantamnattawai!” tiuwai.

<sup>12</sup> Tuja nunú mijantin Isaac Guerar nugkanum pujas ajakan ajakbauwai, dutika Apajui yayasam ¡shiiig kuashat! juukui.

<sup>13</sup> Imatikau asa ¡shiiig kuashat wajigtin! wiakuch wajasui.

<sup>14</sup> Uwigjish, bakajish kuashat, nuigtush inake aidaush shiiig kuashat ajujukui, iman asamtai, filisteo aents aidau kajejuidau.

<sup>15</sup> Dutikaidau asag Abraham pujusmatai, niina inake aidau yumigmat aidaun taimu aina nuna yututkajui.

<sup>16</sup> Tuja Abimelecshakam Isaakan chichajak:

“¡Wetá juwi pujam duka, amek juti nagkaekagtasu shiiig wiakuch wajasume!” tiuwai.

<sup>17</sup> Tusa tima Isaac jinnag Guerar nugka pakajin shiyakag nuwi batsamsauwai.

<sup>18</sup> Nuwi niina apaji iwaku pujasa yumigmat aidaun tainiwa nuna apaji jakamtai, filisteo aents aidau yutukagbaun ataktu tai iwajauwai. Dutika iwajug, nii apaji adaikamu ajakunak dutiksag niishkam adaikauwai.

<sup>19</sup> Makichik tsawantai Isaaka inake aidau nugka pakanum yumigmatan tau bat-samkamá yumi pukuni jiiinun ejeyu ainawai.

<sup>20</sup> Tujash nuna wainkagmatai, Guerarnumia aents uwijan kuitamin aidau, Isaaka uwigin kuitamin aidajai: Juka yumik iinui tusag maanitkajui. Nuadui Isaac nuna adaikauwai “Esek”,\* wagki nuna maanitkaju asag.

<sup>21</sup> Nunikag Isaaka inake aidau, tikichin yumigmatan tainiajui, dutikawagmatai nunashkam dutiksag maanitkajui. Untsu Isaac nuna adaikauwai “Sitna”. Nunak “shiwagmagat” taku tawai.

<sup>22</sup> Dutika ukuak Isaac atushat weuwai, nunik nuwi tikich yumigmatan tainiajui. Tujash nunak maanitkachaju asag, adaikajui, “Rehobot”. Nunak “agkanmagamu” taku tawai. Nunak “yamaik Tuke Pujuu agkanmitkagmae juju nugka juwi takainak emkatnume” taku tuu adaikauwai.

<sup>23</sup> Nuna ashí umika nuwi pujau, Isaac bershebanum pujustatus weuwai.

<sup>24</sup> Tuja nunú kashia duik Tuke Pujuu Isaakan wantintuk chichajak:

“¡Witjai amina apa

Abrahama Apajuijinuk,

makichkish ishamkagtukaipa,

wi aminak kuitamjame!

Abraham minna chichamjun umigtukua duwi

aminash aikasnuk pegkegnum yumigsan,

amina uchigmin uchiji wegantu agtinashkam

ikauntuktajame”, tiuwai.

<sup>25</sup> Aatsa tima kuntin maa patasa apeaku Apajui ememattinun nuwi najanauwai, dutika nuwi Apajuin niina daajin adaitus emematiuwai. Dutika nuwi aakmag pujusajui. Tuja nuwi niina inake aidau tikich yumigmatan tainiajui.

*Isaac Abimelecejai chicham umikbau*

\* 26:20 “Esek” tawa nunak hebreo chichamnumak “maaniumu” taku tawai.

<sup>26</sup> Makichik tsawantai Abimelec Guerar pujau Isaakjai chichastatus weuwai. Nuwi wetai niina kumpaji Ahuzat, Ficol suntajan apuji aajakua nujai uyuuniajui.

<sup>27</sup> Nunik kaunawagmatai Isaac chichajak:

“Atum mina dakitjakjum, atumin nugkemin pujai jiigkijum ajapjuamujum dusha, ¿wagka wijai chichastasagmesh minagme?” tau.

<sup>28</sup> Tusa tama dita ainak:

“Iik dekaji Apajuú amina kuitamjama duka, nuadui anentaimsa dekas iish amijai mai ikdaisa chicham umigdaikatna nunú chichasmi tusa minaji. Tuja ii tabauk jujuwai:

<sup>29</sup> Amesh jutiish pegkegchau awajkagtukaipa, wagki iik amek waitkatsuk, ayatak pegkegnun kuitamka apusa jiyakuish utugchat atsaunum agkan jiiki awemabiagme. Tuja aminak yamai Apajuú pegkegnun yumigtamsae”, tiuwai.

<sup>30</sup> Tusa aatus chichasag, Isaac yutain umikmatai nuna yuwinak, umutain umuinak jüstamawajui.

<sup>31</sup> Nunik tsawajag kashikmas Isaac, ditajai mai ikdaikag chicham umigdaikagtinun chichasag umikajui. Dutika umikag Isaac ditan kumpamak awakjauwai.

<sup>32</sup> Tuja nunú tsawantinig Isaaka inake aidau yumigmatan tagak batsatu yumin chigkawag, yumi chigkaji tusag ujakatus kautuawajui.

<sup>33</sup> Nunikagmatai Isaac nunú yumigmata daajin Sebá† adaikauwai. Nuadui nunú yaakta daajig Beersheba tama awai.

<sup>34</sup> Esaú cuarenta mijanji ejeyi pujus, hitita aents Beerí aajakua nuna nawanjin Juditan nuwatkauwai. Nunik pujus tikich nuwa Basemat daagtin tikich hitita aents Elón aajakua nuna nawanjinashkam nuwatkauwai.

<sup>35</sup> Juju jimag nuwa aina nuna pujutji pegkegchau asagmatai nuna diisag, Isaac Rebecajai shiig pujuschamin wake besemag pujujakajui.

## 27

### *Isaac uchiji Jacopan Esaújai yumigjamu*

<sup>1</sup> Isaakak shiig muumpakui asa wainmatnash wainmamainchau wajas pujujakui. Nunik pujau makichik tsawantai niina uchiji iwain untsuka chichajak:

“¡Uchuchih!” tau. Tusa untsuam nii ayaak:

“Juwi pujajai apawah, waji tame, tujutta”, tiuwai.

<sup>2</sup> Tama nii ayaak:

“Nijah, wika yamaik shiig muumpakjai, pachiachbaunum jamainaitjai.

<sup>3</sup> ¡Nuadui kuntin mautaijum jukim ikam weme kuntin maam,

<sup>4</sup> shiig pachimjam, mina yutaijuama nunú yutai pegkeg inagkam itagtuata, yuwatjai! Nuna yuwakun wi eke jatsug duwik amina pegkegnun yumigsatjame”, tiuwai.

<sup>5</sup> Nuna aatus Isaac tabaun Rebeca antukui. Nunik Esaú apaji yuwatnun kuntinun egak wematai,

<sup>6</sup> uchiji ekeu Jacopan chichajak:

“Antukta nijah, amina apa yamai amina yatsumjai chichaak:

<sup>7</sup> ‘Kuntin maata, dutikam yutai pegkeg pachimja inagkam itagtuata, nuna yuwan, eke jatsuk Tuke Pujuush antai amina pegkegnun yumigsatjame’ taun antukmajai.

<sup>8</sup> Nuadui uchuchi wi titatjam nunú shiig antukta:

<sup>9</sup> Wamak tagku batsamtain weme, jimag chivo tsakat pegkeg jukim itagtuata, wi wamak maan amina apa yaitaijiyama nuna pachimjan inagtuktajai.

<sup>10</sup> Dutikamtai ame jukim ejetuata nuna yuwati, nuna yuwa nii dekas iwaaka awik, amina pegkegnun yumigtamsati”, tiuwai.

<sup>11</sup> Tusa tama Jacob dukujin ayaak:

“Tujash mina yatsug Esaún iyashig uje wajasuwe, wika aannuchitjai.

<sup>12</sup> Namputkama mina apag achigkama dekapjug, dushiktakpap jutijawa tusa, pegkegnun yumigtutsuk pegkegchaunum yumigtujai tajai”, tiuwai.

<sup>13</sup> Tusa tutai dukuji ayaak:

“¡Uchuchi amina pegkegchaunum yumigtamjamtaish duka minai juwakti! ¡Amek ayatak wi tajam duke umikta, nuniakum wamkesam weme, jimag chivo tsakat jukim itagtuata!” tau.

<sup>14</sup> Tusa tima ayu tusa weji, jimag chivo tsakatan juki dukujin itajuauwai. Dutika itajam nuna maa Isaakan yaitaijin imatiksag pachimjan yutai pegkejan inagtukui.

<sup>15</sup> Dutika umika, Esaú nugkutaiji jáanch dekas shiig pegkeg jegaa atatman juki, niina uchiji ekeun Jacopan anugajuwai.

† 26:33 “Sebá” tawa duka hebreo chichamnumak “chichasbau ewaetsuk umigdaikatin” taku tawai.

<sup>16</sup> Dutika nuigtushkam chivo duwapeñ juki, niina kuntujin pempenjauwai, dutikak, kuntujenchakam uje atsuju asamtai, nuwishkam anugjauwai.

<sup>17</sup> Dutika nii yutai pachimja pegkeg inagkamun pagjai juki apajin susati tusa susauwai.

<sup>18</sup> Dutikam nuna juki niina apaji pujamunum waya, chichajak:

“¡Apawah!” tiuwai.

Tama: “Juwi pujajai, ¿yaa uchijuitpa amesh?” tusa Isaac iniasui.

<sup>19</sup> Tusa iniam Jacob ayaak:

“Wika amina uchijum iwai Esaúwaitjai. Ame mina segatmaum nunak umikjai. ¡Wait aneasam nantakim juwi ekemsam yuwata wi kuntin maamua nunú, núnikam pegkegnum yumigtugta!” tiuwai.

<sup>20</sup> Tusa tama, Isaac uchijin iniak:

“¿Uchuchi itugsamea kuntinush wamkesmesh wakemkaume?” tau.

Tama Jacob ayaak:

“¡Tuke Pujuu Apajuí ame emematnum nunú minak yainkamtai, wamak igkugmajai!” tiuwai.

<sup>21</sup> Tujash Isaac niina chichajak:

“Ayu, ame dekas mina uchig Esaúwaitkumek adijtukta achikan dekapsatjame”, tiuwai.

<sup>22</sup> Tusa tama Jacob apajin jegaantauwai, achujuk dekapjusti tusa. Nuna achika dekapes, Isaac chichajak: “Chichamjumek Jacopan chichamejai betekai, tujash untsu kuntujum Esaún kuntujiyai”, tiuwai.

<sup>23</sup> Niina kuntujinig niina yachi Esaún kuntujijai betek uje wajakin asamtai, dekap-jachui. Tujash pegkegnum yumigjattak,

<sup>24</sup> ataktu awena iniak:

“¿Dekas amesh mina uchig Esaúkaitam?” tau. Tama nii ayaak:

“Ehe witjai, Esaúwaitjai”, tiuwai.

<sup>25</sup> Tusa tímatai niina apaji chichajak:

“¡Ayu uchuchih, ame kuntin maa inagkamú sujusta yuwatjai, nuna yuwan pegkegnum yumigsatjame!” tiuwai.

Tama Jacob ayu tusa yutai umikbaun juki apajin susauwai. Dutikak nuigtushkam umutai vino uva najanamun etetuauwai. Dutikam Isaac nuna yuwa umutainashkam uwajui.

<sup>26</sup> Nunik chichaak:

“¡Uchuchih, juwi tantam kugkuntsata!” tiuwai.

<sup>27</sup> Tama Jacob niina apajin kugkuastatus jegaantam, Isaac niina uchiji Esaún jáanchji kugkuntin dekapjuui. Nuna dekapjug pegkegnum yumigkiak:

“Juju juni kugkua juka mina uchig emkaun kugkuntiyai. Ikaman kugkuntijai betekai,

Tuke Pujuu aan yumigjamu asa.

<sup>28</sup> ¡Uchuchi aminak Apajuí yumi

nayaimpinmayan amasti,

dutijamamtai amek nugkanum ajakmamesh

trigo shiig kuashat juutnaitme,

tuja vinoshkam umumain kuashat ajutjamtinai!

<sup>29</sup> ¡Kuashat aents aidau aminak takagtamiagtinai,

nuigtushkam nugka muunnumia aidaush

ima aminak antugtamainak umigtamiagtinai!

¡Ame apu wajasamin, yatsumshakam amina umigtamtinai!

¡Amina pegkegchaunum yumigtamidauk,

ditashkam dutiksaik pegkegchaunum yumigkiam agtinai!

¡Untsu amina pegkegnum yumigtamidauk,

ditashkam dutiksaik pegkegnum yumigkiam agtinai!” tuu yumigjauwai.

<sup>30</sup> Tusa pegkegnum yumigjam Jacob apajin pujau jiinki wegaig, Esaúshkam kuntinun maatatus weu tauwai.

<sup>31</sup> Nunik niishkam apaji yaitaijin, yutai pegkejan pachimag inajuk, juki jegan apajin chichajak:

“¡Apawah, nantakim, wi kuntinun maa inagtukjam nunú yuwata, núnikam pegkegnum yumigtusta!” tiuwai.

<sup>32</sup> Tusa tama Isaac iniak:

“¿Yaitpa amesh?” Tama:

“Wika amina uchijum iwai Esaúwaitjai”, tiuwai.

<sup>33</sup> Tutai, Isaac anentai jegagchawai, nunik kujakjatun chichaak:

“Tujash ¿ya minash kuntinun maa yutain umikash itagtuame? Nuna wika ame eke tatsminig ashí yuwamjai. Dutikan niina ashí pegkegnum yumigjamjai. Nuadui nii yamaik pegkegnum yumigjamu juwake”, tiuwai.

<sup>34</sup> Tusa apaji tutai Esaú antuk, kajeka buutak:

“¡Apawah, minash wait aneasam pegkegnum yumigtujiah!” tau.

<sup>35</sup> Tusa tama Isaac ayaak:

“Amina yatsum tajutua, tsanujung aminu pegkeg yumig atinuwe nunak ashí jujut-jamkine”, tiu.

<sup>36</sup> Tutai Esaú chichaak:

“¡Awis niina daajinak Jacob adaikau ainatai! ¡Aniau asa jimajá tsanumag midau amainun atanjukne! Nagkamchakush wi iwai asa jumainun atanjukmae, tuja yamaish wi pegkegnum yumignamainjun nigki atanjukne. ¿Tujash mina yumigtumainuk makichkish ukugtuschaumek?” tau.

<sup>37</sup> Tama Isaac Esaún ayaak:

“Antukta nijah, wi Jacopan amina apujum ati tusan tijai, dutikakun ashí niina patayi aidaushkam niina umijin atinme, timajai. Nuigtushkam trigo aidaush, umutai vino aina nujai kuashat ajiti, timajai. ¿Tujash uchuchi yamaish aminash, itugkatjamki?” tau.

<sup>38</sup> Tusa tama Esaú atak awagki segaak:

“¿Apawah, makichkiuchikesh mina yumigtumainuk shiig atsugtamuak? ¡Minash apawah, pegkegnum yumigtujiah!” tusa senchi buutu.

<sup>39</sup> Imattai Isaac niina chichajak:

“¡Antukta nijah, amek atushat weme, juju nugka pegkeja juka ukuakum, nugka pegkegchaunum yumish yutachbaunum pujustinaitme!

<sup>40</sup> Amek amina puyaajumjai depetmasam pujakum amina yatsum umigtinaitme, tujash ame senchijinkum nii umiju pujaum agkanmagatnaitme”, tiuwai.

*Esaú maatag tama Jacob tupikakbau*

<sup>41</sup> Jacob kasagkamu asa, Esaú niina senchi kajegkawai, wagki nii yumignamainun, apaji Jacopan susau asamtai. Nunik anentaimas: “Mina apajuk jatanak namput wajaschae, nii jakamtai agkan wajasan mina yatsug Jacobnak maatjai”, tiuwai.

<sup>42</sup> Tusa chichaman umiamun Rebeca dekaa, Jacopan utsuka itan chichajak:

“Antukta nijah, amina yatsum Esaú mantamatag tawai, ame nii yumignamainji atankiu asamin.

<sup>43</sup> Nuadui uchuchi yamai antugtukta: Amek yamaik yaakat Harágnum tupikakta, núnikam mina ubag Labágka jeen jegata.

<sup>44</sup> Nunikam amina yatsum kajegtamka nuna sakapai, nuwi nijai pujusta.

<sup>45</sup> Ame atankim kajegtamka nuna tsagkugmatai, duwi wi chichaman akuptuktatjame, dutikamtai nunú dekaam wakitkim taamnum. ¡Dakitajai mina uchig maaninak mai jaka megkaekai! tusan”, tau.

<sup>46</sup> Nuna tii idayak, Rebeca Isaakan chichajak:

“Hitita nuwa, Esaún nuwe aina nuna pegkegchaujin shiig aneasan pujumainchau, jamain dekapeajai. Tuja juju hitita nuwa aidau Canaágnum pujuina juninjai Jacob nuwenkuig, wika jakatjastai”, tiuwai.

## 28

<sup>1</sup> Nuna aatus Rebeca timatai, Isaac Jacopan utsuka pegkegnum yumigkig, nii umiktinjin chichajak: “¡Juju nugka Canaágka juwiya nuwajaig makichkish nuwenatin aipa!

<sup>2</sup> Dekas Padán-aram amina apachjum Betuela jeen wetá. ¡Nunikam nuwi pujusam duku umayi iwai Labágka nawanji nuwatkata!

<sup>3</sup> Apajuí ashí senchigtina nunú pegkegnum yumigtamsati, dutijamak nigki ame uchijum wegantunash shiig kuashat uyujkati. Imatikam nugka múun aidaunum batsamsagtin atinme.

<sup>4</sup> Nuigtushkam Abrahaman pegkegnum yumigkiak anagkuauwa nuna amina amastí, tuja amina uchijum wegantu aidaunashkam dutiksag susati. Nuadui ii yamai juju nugkanum iina nugke ukuaku kauna batsatag juwig pujustin atinme, wagki Apajuí Abrahaman juju nugkan anagkuau asamtai”, tiuwai.

<sup>5</sup> Aatus Isaac Jacopan chichajuk nugka Padán-aramnum akupkauwai. Dutikam Jacob niina dukuji umayi Labán pujamunum atushat weuwai. Labágkak arameo aents Betuelan uchiji aajakui.

*Esau nuwenamu*

<sup>6</sup> Isaac Jacopan pegkegnum yumigkiak: Makichkish canaágnumia nuwajaig nuwenatin aipa, dekask Padán-aram weme nuwenata tusa tima,

<sup>7</sup> niina apaji dukujijai tibaun umiak Jacob Padán-aramnum webaun Esau dekauwai.

<sup>8</sup> Aatus Esau niina apaji canaágnumia nuwan dakitamun dekauwai.

<sup>9</sup> Nuadui Abrahamama uchiji Ismael pujamunum weuwai. Nunik nuwi jegaa, canaágnumia nuwa aidaun jimajan ayakiatak, Ismaela nawanji Mahalat Nebaiotan umayi aajakua nuna nuwatkauwai.

*Apajui Jacopan Betelnum kajanum wantintukbau*

<sup>10</sup> Jacob Beershebanum pujau jiiinki Harán nugkanum weuwai.

<sup>11</sup> Nunik wesa eke jegatsuk jintá etsa akaetai kanagtatus, kaya juki nuna atamjuk tepesui.

<sup>12</sup> Nunik kanukma kajanum, watai jigkaka najanamu nugkanum awaja juki nayaimpinum iwakbaunum, nuwi Apajui aentsji nayaimpinmaya aidau, nugka akagag, yaki wajag ataktu nugka akagag wajaidaun wainkauwai.

<sup>13</sup> Tuja apu Tuke Pujushkam niyai ayaumas wajaun wainkauwai. Nunik wajas chichajak: “iWitjai Tuke Pujuu, Apajui, amina apachjum Abraham, nuigtu amina apa Isaac emematujaku aina nunuwaitjai! iJuju nugka juwi ame tepam junak amina, tuja amina uchigmin uchiji wegantu agtina nudau atinun amastatjai!

<sup>14</sup> Dita aidauk kuashat yujakag, nugka yukukuntu dekapamainchawau iman agtinai. Iman asag ashí nugka pampankag etsa minitaiya aatus, etsa akaetaijiya ajashkam, tsumujiya aatus, nujinmaninishkam ashí yujakagtiin ainawai. Ashí aents nugkanum batsatuk aminí, nuigtu ame uchijum aidau wegantu agtina nuwishkam, pegkeg yumigkin jukiagtinai.

<sup>15</sup> Untsu wi amijaig pujajai. Nuniau asan tuwig wekaetam nuniakminish wi kuitamkattagme, dutikakun awagkin juju nugka juwi ittattajame. iMakichkish wi amina anagkuajam nunak umitskek idaisashtatjai!” tiuwai.

<sup>16</sup> Tusa Apajui tima Jacob shintaag, anentaimas: “iDekas Tuke Pujuu juimpap pujawa, nuniagkiap wika nunak dekachmaja!” tiuwai.

<sup>17</sup> Nuna tusa senchi ishankauwai, nunik anentaimas: “iJuju nugka juka Apajui etegkamu dekask shiig pegkegmai, juwi dekask Apajui jeeg awai! iJuwi dekask nayaimpin waitijiya duka awai!” tiuwai.

<sup>18</sup> Nunik kanag tsawak kashikmas nantaki, kaya nii atamjukbaujin juki inantai apujus, aceiten juki ukatuk, juka Apajui atin ati, tusa ukukuiwai.

<sup>19</sup> Nunú nugkanum aajakui yaakat Luz daagtin, nuna Jacob yapagtua Betel\* adayak ukukuiwai.

<sup>20</sup> Nunú nugkanum Jacob nii umiktinjin juna aatus tiuwai: “Apajui mina uyuuntakug, wi yamai wetatag duwish nigki kuitamjak, wi yuwatnunash sujus, wi nugkumainnashkam sujustatui.

<sup>21</sup> Tuja wi iwaku jatsuk pegkeg ataktu wakitkin mina apaju jeen taanuk, Apajuiya nuna emematkun umigkattajai.

<sup>22</sup> Wi juna kayan awajain apusag juka, atakea duwish Apajui jee tama atinai. Tuja Apajuijuh, ame mina sujustinaitam nuwiyanak aminu atinun diezmon tuke amasnuke atinaitjai”, tiuwai.

## 29

*Jacob yaakat Harán pujusbau*

<sup>1</sup> Jacob Betelnum pujau ukuki, etsa minitaiya nuni weuwai.

<sup>2</sup> Nunik wesa yumigmat taimunum ayaumas kempatum aents uwigjintin aidau, uwig nuwiyam yumin umin asagmatai, maki makichik ditá uwigi aidau ijumag ayamainak batsatun wainkauwai. Nunú yumigmatak kaya múuntai dukukbau aajakui.

<sup>3</sup> Tuja nuwi ashí uwig aidau tuwakmatai, uwijan kuitamin aidau nuna kayan ujakag yumin shikik dita uwigin aajag, nuadui ataktu kaya juki dukukag ukujaku ainawai.

<sup>4</sup> Nunú uwija kuitamin aidau nuwi batsatun Jacob wainak iniak:

“iMina kumpag aidauh, atumesh tuwiya ainagme?” tau. Tama dita ainak:

\* 28:19 “Betel” tawa nunak hebreo chichamnumak “Apajui jee” taku tawai.

“Jutiik yaakat Harágnúmia ainaji”, tuidau.

<sup>5</sup> Tiagtai Jacob ataktu ditan iniak:

“¿Atumesh Labán Nacoran uchijiya dusha wainchaukujum?” tau.

Tama nii ayaak:

“Ehe wainnuji”, tuidau.

<sup>6</sup> Tusa tiagtai Jacob ataktu iniak:

“¿Niish pegkejak puja?” tau.

Tama uwija kuitamin aidau:

“Ehe, Labágkak pegkeg pujawai. Nijah diisia, juwi Raquel niina nawanji uwijan yajuak minawai”, tiajui.

<sup>7</sup> Tiagtai Jacob chichaak:

“Etsa atushat awa nuniaigkik uwijak chimpia epenik ukumaitsui. ¿Wagka yumi aakjum duwi yajuakjum ataktu chijichin egakag yuwatnume tatsugme?” tau.

<sup>8</sup> Tama dita chichainak:

“Atsa dutikmaitsuji. Eke dakaji ashí uwig tuwakmatai, nuna kuitamin aidaushkam kaunamtai, duwi yumigmat kaya múuntai dukukmawa nunú ijuntuja shitaki ekeka, uwig yumi aaka nuadui shiyaktatji”, tuidau.

<sup>9</sup> Aatus Jacob ditajai chichaak ijunai, Raquel niina apaji uwigji aidaun kuitamjin asa, uwijan saas tantauwai.

<sup>10</sup> Nunik tatatman wainmawaik, Jacob yumigmatan jegantun, kaya múun apujtuam aun, shitaki etekuk, nigki yumi shikijuk niina dukuji umayi tagkujin aakui.

<sup>11</sup> Nuna dutika Jacob Raquelan jegantun niina yapiin kugkuas kumpama shiig aneamunum buutiuwai.

<sup>12</sup> Tuja Jacob chichaak: “Wika Rebeca uchiji Labágka awegaitjai”, tusa Raquelan ujakui. Tusa ujakam, Raquel tupikaki weuwai niina jeen apajin ujaktatus.

<sup>13</sup> Nuna Labán antuk, niina umayi Rebecan uchiji asamtai, tupikatki jiintukiuwai kumpamatatus, nunik igkug pagkuk yapinum kugkuas kumpama duwi niina jeen jukiuwai. Dutikam Jacob niina diichjin ashí nii wajukaya tupikaki wekaewa nunak betek ujakui.

<sup>14</sup> Dutika ashí ujakam Labán niina chichajak:

“Amek dekas minak shiig pataajuitme”, tiuwai.

*Jacob Raquelan Leajai jukitatus takasbau*

Jacob makichik nantu Labágkai pujusui.

<sup>15</sup> Nunik pujusmatai Labán Jacopan chichajak:

“Amek mina pataag akumesh, tikima wainkamek takagtuk pujumaitsume. ¿Wajupa akigkati tusamea wakegame? nunú tujutta”, tiuwai.

<sup>16</sup> Tuja Labágka nawanjig jimag aajakui: iwai daajig Lea aajakui, untsu ekeu daaji Raquel aajakui.

<sup>17</sup> Leak imanikag shigmachu aajakui, untsu Raquel ashí niina iyashijai shigmauch aajakui.

<sup>18</sup> Jacob Raquelan senchi wakejuku asa, chichaak:

“Wika amina nawanjum ekeuwa nuna jukitag tau asan, takagsatjame siete mijadai”, tiuwai.

<sup>19</sup> Tusa tutai Labán niina ayaak:

“Tikich aentsun sumainaitag nuna dekas amina amastajai. Amesh jutijai pujustin ata”, tiuwai.

<sup>20</sup> Tusa tima Jacob Raquelan jukitag tau asa siete mijan takasui. Tujash imaan mijan takakush niig Raquelan senchi wakegau asa, ujumchik tsawanta nunin diisui.

<sup>21</sup> Nuna mijanan ejeyi Jacob Labágkan chichajak:

“¿Yamai nawanjum sujusta, nuwatkatjai! Wi niina jukitasa imaan mijan takastajai tibaunak betek ejejai”, tiuwai.

<sup>22</sup> Tusa tima Labán ayu tusa, ashí aents nuwiya aidaun ipauwai nawanji aishinbaunum jiistamatag tusa.

<sup>23</sup> Tujash Labágkak kashi niina nawanji Lean juki ejetiuwai. Dutikam Jacob juki niijai kanajui.

<sup>24</sup> Dutika nuigtushkam niina inataiji aidaun makichik Zilpá daagtinun Lean susauwai niina yaigtinun.

<sup>25</sup> Nunik Jacob kanag tsawak, wainkauwai Leajai kanagbaun. Nuadui kajeka Labágkan chichajak:

“¿Wagka minash jutijame? ¿Wi Raquelan jukitag tau asan amina takagsachmakjam? Dutikamu ayatkumesh ¿Wagka minash tsanujaume?” tiuwai.



<sup>26</sup> Tusa tama Labán ayaak:

“Juwiya aidaulik iina nawanji iwai aishintsaigkik ekeuwa duka sujuchu ainaji.

<sup>27</sup> Kame ii nuwenku tuke nunitaiya nunú makichik semana ejeta. Nunikamin ame siete mijan nuigtushkam takastajai takuminig, Raquelnashkam amastajai”, tiuwai.

<sup>28</sup> Tusa tama Jacob ayu tusa makichik semanan ejeyuwai. Nunikmatai Labán Raquelnashkam susauwai.

<sup>29</sup> Dutika nawanji Raquelan sujuk, nii inagtinun nuwa Bilhá daagtinun susauwai, niina yaigtinun.

<sup>30</sup> Aatus Jacob Raquelan nuwatkauwai. Nunik niina ima senchi, Lean nagkesau aneau. Nunik pujus nuigtushkam siete mijan Raquel jukimunun Labágkan takajak pujusui.

### *Jacopan uchiji aidau*

<sup>31</sup> Jacob Lean imatikas aneachun Tuke Pujuu wainkauwai. Nuadui Leanak Apajuí uchi uchigbau awajsauwai, untsu Raquelan uchigmachu ema apusauwai.

<sup>32</sup> Tuja Lea ejajjuk aishmagkun uchigmakui. Dutika Rubén\* adaikauwai, wagki nuna uchigmak chichaak:

“Wi wake besemag pujamun Apajuí waitkau asa wait anenjuje. Nuadui yamaik mina aishjuk anentatui”, tiuwai.

<sup>33</sup> Nunik pujus ataktushkam patasag uchigmakui, dutika adaikauwai Simeón.† Nuna uchigmak chichaak:

“Tuke Pujuu mina dakitjuinamun dekau asa, minak tikich uchinash sujuse”, tiuwai.

<sup>34</sup> Tuja nuigtushkam ejajjuk uchigmakui, dutika adaikauwai Levi.‡ Nunak:

“Yamaik mina aishjuk wijai ijunag pujuttawai, wagki kampatum uchin uchigmatgag duwi”, taku tiuwai.

<sup>35</sup> Nuigtushkam ipak usumta nuna ejajjuk uchigmakui, dutika adaikauwai Judá.§ Nuna uchigmak chichaak:

“Yamaik Tuke Pujun ememattajai”, taku tiuwai. Tuja Leak nunák uchigmak nagkankauwai.

## 30

<sup>1</sup> Raquel Jacopa uchijin uchigmatchau asa, niina kai Lea uchigmatu asamtai kajeju-jakui, nuadui niina aishin chichajak:

“Minash uchi sujusta, sujachkuminig jakattajai”, tiuwai.

<sup>2</sup> Tusa tama Jacob Raquelan kajejuk chichajak:

“¿Wikaitag Apajuín? Apajuí aminak uchinak amatsui”, tiuwai.

<sup>3</sup> Tusa tama nii ayaak:

“Nijah, untsu mina inakeg Bilhá nuwatkata; dutikawamin nii uchigmakmatai, nuna wi uchigmakmawa dutikan uchijimatjai”, tiuwai.

<sup>4</sup> Tusa Raquel Jacopan niina inake Bilhájai nuweauwai, ikaa nuwe atinun. Dutikam Jacob Bilhán nuwatuk,

<sup>5</sup> pujus ejapmitkakui, dutikam pujus Jacopa uchijin uchigmakui.

<sup>6</sup> Nunikmatai Raquel chichaak: “Apajuín wi segamag nuna antugtuk pegkegchau takachbaun diigtus juna uchin midau atinun sujuse. Nuadui juju uchi daajig Dan atatui”, tiuwai.

<sup>7</sup> Tuja ataktushkam Bilhá ejajjuk jimaja juna Jacopan uchigmatkauwai.

<sup>8</sup> Nunikmatai Raquel chichaak: “Mina kaijun depetkatag tusan maa maaniakuan yamaik depetkajai, nuadui juju uchi Neftalí atatui”, tiuwai.

<sup>9</sup> Tuja Leashkam uchin uchigbauwaitak, uchigmamainchau dekapeak, niina inake Zilpán Jacopan susauwai, niina ikaa nuwe atinun.

<sup>10</sup> Dutikam pujus Zilpáshkam ejajjuk Jacopan uchigmatkauwai.

<sup>11</sup> Nunikmatai Lea chichaak:

“¡Yajau jukichjai! Nuadui juju uchi daajig Gad atatui”, tiuwai.

<sup>12</sup> Nuigtushkam tikichin uchin Jacopan uchigmatkauwai.

<sup>13</sup> Nunik uchigmakmatai Lea chichaak:

“¡Chah, shiig anejaji! Yamaik tikich nuwa aidau chichagtuinakush, Leak shiig aneas pujawai tujutiagtinaí. Nuadui juju uchi daajig Asher\* atatui”, tiuwai.

\* **29:32** “Rubén” tawa duka hebreo chichamnumak “wainkamu” taku tawai. † **29:33** “Simeón” tawa duka hebreo chichamnumak “antugkamu” taku tawai. ‡ **29:34** “Levi” tawa duka hebreo chichamnumak “wijai pujuttawai” tawai. § **29:35** “Judá” tawa duka hebreo chichamnumak “emematut” taku tawai. \* **30:13** “Asher” tawa nunak hebreo chichamnumak “dakunkut” taku tawai.

<sup>14</sup> Tsawan trigo juutai jegamunum, makichik tsawantai Rubén ikam weuwai, nunik nuwi wekagas yujág mandrágora tutain wainak juuka niina dukuji Lean itajuauwai. Nuna Raquel wainak Lean chichajak:

“Minash wait aneamam uchijum mandrágoran juuka itagtama nunú ajampusta”, tiuwai.

<sup>15</sup> Tusa tama Lea ayaak:

“Ame mina aishjuk atanjukmayum duke nagkanmainchawk, iyamaish mina uchig yujág mandrágoran juuka itaa dusha atanjuktag tame!” tau. Tama Raquel ayaak:

“Kame amina uchijum yujág mandrágoran juuka itaa anú minash sujusta, juju kashia duwi amesh Jacobjai kanagminum”, tiuwai.

<sup>16</sup> Tusa tima, nunú kashia duwi Jacob ikam weu wakitki minittaman, Lea jiintuki igkug chichajak:

“Yamaik amek wijai kanagtatme, wagki mina uchig mandrágoran juuka itagtuamtai nujai sumakjame”, tiuwai.

Tusa tima Jacob Leajai kanajui.

<sup>17</sup> Nunik nii Apajui segamunak betek antugkam asa ejajjuk, cinco uchua nuna uchigmakui.

<sup>18</sup> Nuna uchigmak Lea chichaak: “Juju uchua juna daajig Isacar<sup>†</sup> atatusi, wagki wi mina aishjun mina inakujai nuweamag, duwi minak Apajui juju uchin sujuse”, taku tiuwai.

<sup>19</sup> Tuja nuigtushkam Lea Jacopan seis uchua nuna uchigmatkauwai.

<sup>20</sup> Nunik chichaak:

“Junak Apajui minak shiig anenjush wainkauch sujuse. Nuadui yamai mina aishjuk ima shiig eme anenjittawai, wagki seis uchin uchigmatkag duwi. Nuadui juju uchua juka Sabulón<sup>‡</sup> atatusi”, tiuwai.

<sup>21</sup> Duwi pujus Lea inagnamun makichik nuwauchin uchigmakui, dutika Dina adaikauwai.

<sup>22</sup> Tujash Apajui Raquelnashkam kajimatki idaisachui, nuadui nii segamunashkam antugkau asa uchin susauwai.

<sup>23</sup> Dutikam uchigmachu pujau uchigmak chichaak:

“Uchi uchigmachkun datsaama wekaenuweg nunak datsannak Apajui emegkatjuka.

<sup>24</sup> Ataktush Tuke Pujuk tikich uchinash sujumainapi tajai”, tau. Nuadui uchi daajin José<sup>§</sup> adaikauwai.

### *Labán Jacopan tsanugbau*

<sup>25</sup> Raquel José<sup>n</sup> uchigmakmatai pujus. Jacob Labágkan chichajak:

“Minash wait aneamam agkan idaitusta, mina nugkajui wakitkitjai.

<sup>26</sup> Mina uchig aidau, tuja duwag aidaushkam sujusta, wika ditan jukitag tau asan amina takagsamjame, nuadui minash agkan idaitusta, wakitkitjai. Amek shiig dekame, wi wajuk amina takagsajame duka”, tiuwai.

<sup>27</sup> Tusa tama Labán ayaak:

“Wait aneamam wetsuk jutijaig pujusta. Ame pujau asamin, Tuke Pujuu minash pegkegnun yainkae, nunak wika makichik aents anentaimas dekamin tujutmatai dekajai”, tau.

<sup>28</sup> Tusa nuigtu chichajak: “Untsu tujutta wajupa akigkati tusamea wakegame, nuna akiktajame”, tiuwai.

<sup>29</sup> Tusa tama Jacob niina chichajak:

“Wi wajuk amina takagsajame, tuja nuigtush wajuk amina kuintinjumnash kuitamjukame dushakam amek shiig dekame.

<sup>30</sup> Tuja wi juwi tatsaigkik tagkugmek kuashtachu ayi, tujash wi taa pujusa kuitamam kuashat tagkujum kawenjamkae. Tuke Pujuu aminak yaimpake; tujash ¿wajutiya wisha mina uchigdau agtinnash takastatja?” tiuwai.

<sup>31</sup> Tutai nii ayaak:

“¿Tujash wajupa akigkati tusamea wakegame?” tusa ataktu awagki iniasui. Tama nii ayaak:

“Minak makichkish akigkaipa. Untsu wi amina titatjam nunú ayu takuminig, wisha amina uwigjumin kuitamjuktatjame.

<sup>†</sup> 30:18 “Isacar” tawa nunak hebreo chichamnumak “wainkauch susamu” taku tawai. <sup>‡</sup> 30:20 “Sabulón” tawa duka hebreo chichamnumak “wainkauch suwamu, eme anentamu” taku tawai. <sup>§</sup> 30:24 “José” tawa duka hebreo chichamnumak “Apajui aan kuashat susatin” taku tawai.

<sup>32</sup> Dutikatin asan wi ame takagsamunum akigmainaitam nuna dekas amina uwigjum batsata nuwi yamai wenu uwig tsakat aidaun, chivo tsakat aidaujui bukusea aidaun, tuja bukusea apujtugbau aidaunashkam, nuigtu utsak aidaujui ashí ijumjan jukitjai.

<sup>33</sup> Tuja wi nuna uwig tsakat bukusea aidaun, nuigtu chivo tsakat utsak aidaujui ijumjamtai, nunú diisam dekaskeapi tujuttatme, untsu nunú diikman, nuninchaukesh pachitkau wainkamek kasagtukeapi tujutta", tiuwai.

<sup>34</sup> Tusa tama Labán: "Ayu, ame tame duka nunisag ati", tiuwai.

<sup>35</sup> Tujash nunú tsawantaik Labán chivo painch aidaun, utsak aidaujui, nuigtushkam chivo nuwa utsak aidaunak, tuja bukusea apujtugbau aidaujui, nuigtu uwig bukusea aidaun aatus yajuak ijumag niina uchiji aidaun tinamkauwai kuitamkatajum, tusa.

<sup>36</sup> Nuna dutika idayak, niina uchiji aidaujui, Jacopak eke dekatsaig, ashí nuna yajuakag uumak jüinkiag, kumpatum tsawan atushat shiyakajui.

Nuna Labágkak dutikak wekagai, Jacopak tikich uwig Labágdau aidaun kuitamak pujau.

<sup>37</sup> Nunik pujus numi álamo, almendro, castaño kanawen tsupig yajuak, saepenak ashí pakatsuk, ayatak piipichin tsentsaja yajutkauwai painch wajasti tusa.

<sup>38-39</sup> Dutika umika kuintinun batsamtain nuwi yumi amutaiji aunum nuna ijus ajigkui. Dutikamunum nuwi entsamjunidau asagmatai, uchiji painch aidaun, bukusea apujtugbau aidaujui, nuigtu utsak aidaun aatus akiinaidau.

<sup>40</sup> Nunik Labágka uwigji petsainamu utsak aidaun, bukusea aidaun aatus akiinaidauunak Jacob yajuak niinu atinun akanak ijumjauwai. Dutika yajuak niishkam kuashat kuintinjintin wasasui. Nuadui Labágdaunash akanak ijumag, niinunashkam akanak ijumjauwai.

<sup>41</sup> Dutika nuigtushkam uwig dekas duwejam aidaun entsamjuniagtaik, nunú entsamjuninak wainkatnume tusa Jacob payagkun juki, uwig aidaun yumi umuinak ijuntaijin aepjujakui.

<sup>42</sup> Tujash uwig watsaju minitaik, payagnak aepjujakchauwai. Nuadui kuintin watsaku aidaun Labágdau aajaku ainawai, untsu kuintin duwejam aidaun Jacobdau aajaku ainawai.

<sup>43</sup> Dutika yaju yajumkawa Jacopak shiig wiakuch wasasui. Niig kuashat uwigjintin, tuja inake aishmag aidaunash, nuwa aidaunash shiig kuashat, tuja camellojishkam imanisag, burrojishkam ;shiig kuashat aajakui!

## 31

### *Jacob Labágkai pujau tupikakbau*

<sup>1</sup> Labágka uchiji aidaun Jacopan pachis augmatuinak: "Jacopak, iina apajinu aajakua nuna ashí yajuaku asa, imanik shiig wiakuch wajase" tusa chichaidau dekauwai.

<sup>2</sup> Tuja Jacobshakam Labán niina yaunchuk shiig anentujakua nunak, imanis shiig awagmachbaun wainkauwai.

<sup>3</sup> Nuadui Tuke Pujuu Jacopan chichajak: "Amina apa nugken pataim aidaun batsata nuwi wakitkita, wi aminak uyuntsattajame", tiuwai.

<sup>4</sup> Tusa tima Jacob niina inaken awemauwai Raquel, Leajai ujakam itagtuatajum, wi uwija kuitamkun pujag juwi kaunatnume tusa.

<sup>5</sup> Tusa timatai ujakam, nuwe aidaun kaunamtai chichajak:

"Atumin apa yaunchuk mina shiig anenjuya nuniachun wainjai; tujash mina apaju Apajuijya nunú tuke minak uyuntawai.

<sup>6</sup> Atumek shiig dekaajume, wi atumi apapun shiig kuitamsan pegkejan takagsauwaitag duka.

<sup>7</sup> Imatika takagmaitak, nii minak imaan akiktajame tujutbaunak tsanujug, nuna yapajia midau amainnak sujatsui. Tujash nii dutijutaishkam, Apajuijya duka minak tukek idaituscha, Labán pegkegchau awajkai tusa.

<sup>8</sup> Nuadui Labán chichaak: aminak kuintin bukusea apujtugbau aidaun petsagtata nuna akiktajame tusa tujuttaik, ashí kuintin nuwa aidaun imanisag bukusea apujtugbau petsagmayi; nuniagtai ataku yapajia chichaak: yamaik dekas kuintin painchin petsagtata nuna akiktajame tusa tujuttaishkam imanisag petsagmayi.

<sup>9</sup> Nunak Apajui Labágka kuintinjin atantug mina sujustatus dutikmayi.

<sup>10</sup> "Makichik tsawantai uwig entsamjunit jegamunum, kajanum wainkabiajai kuintin aishmag painch aidaun, bukusea apujtugbau aidaun, nuigtu utsak aidaun aatus uwig nuwa aidaun entsamjuidaun.

<sup>11</sup> Nuna dii wajai, Apajuí ángel tumain\* kajanum mina daajun adayak untsugkabi, tujutkui wi ayaakun: 'Juwi pujajai' tibaijai.

<sup>12</sup> "Tusan tai nunú ángel chichagtak: 'Yamai juu shiig diista, ashí kuntin aishmag nuwan entsamjuina duka bukusea apujtugbau aidau, painch aidau, nuigtu utsak aidau aatsam wainkattame. Wi junak amina Labán shiig akigmatsu nuna wainu asan jutikajai', tujutmayi. Tusa nuigtu chichagtak:

<sup>13</sup> 'Witjai Apajuí, amina Betelnum wantintukmaijam nunú, nuwi ame kaya jukim juka Apajuínu ati tusa timayume. Dutikakum ame umiktin aidaushkam anagtuabiume. ¡Wamkesam juu nugka juka ukuakum ame akiinamugmia nuwi wakitkita!' tusa tujutmae", tiuwai Jacob.

<sup>14</sup> Tusa tutai Raquel Leajai ayaak:

"Iik iina apaji jakush niinu aina aunakesh juu atumdau ati tusa ukugtamkimtaig jukishtin ainaji.

<sup>15</sup> Iina apajig tikich nugkanmaya nuwa amaina anin yamaik anenjamji. ¡Iina supupakush, waji akik sujutia dutika supupaku asa, ame takagsam niig pujawai!

<sup>16</sup> Nuadui dekas Apajuí ashí iina apajinun yajutuk amina amasa auk iinu ainawai, tuja iina uchijinu aidaujai, nuadui amina Apajuí wajinjutpame duka dutiksamek ashí umikta", tiajai.

### *Jacob Padán-aram pujau webau*

<sup>17-18</sup> Aatus nuwe aidau tiagmatai, duwi Jacob umintsauwai, niina apaji Isaac Canaán pujukua nuwi wakitkitatus. Nunik weak niina uchiji aidaun, nuwe aidaujai, camellonum pekainiuwai, tuja wajiji aidaunashkam ashí jukiuiwai, nunik Padán-aram pujusa takaku kuntin jukimu aidaun yajuak jintanum amanag ashí umikui wetatus.

<sup>19</sup> Tuja Labágkak tikich yantannum uwija ujen tsupijatatus weu ai, Raquel niina apaji apajuímtaiji dakumka najanamu atatman kasamak juki ukukuiwai.

<sup>20</sup> Aatus Jacopak Labán amorreo aents aajakua nuna wika tupikatsjai tusa tsanug ukukuiwai.

<sup>21</sup> Nunik weak ashí niina wajiji aidaunak yajuak tupikakuiwai. Nunik shiig wamak, namak Eufratesan nagkaiki muja Galaad tutaya nuni weuwai.

### *Labán Jacopan pataetukbau*

<sup>22</sup> Nunik Jacob tupikaki kempatum tsawan wegai Labán dekauwai.

<sup>23</sup> Nunik niina patayi aidaun ipaa pataetuk wea weakua siete tsawanta duwi muja Galaadnum batsamtatman amaigkauwai.

<sup>24</sup> Tujash nunú kashia duwi Apajuí kajanum Labán arameo aentsua nuna wantintuk chichajak: "¡Antukta nijah, Jacob augkumesh pegkegnum ausata, wainkam pegkegchauk chichagkaipa!" tusa tiuwai.

<sup>25</sup> Tusa tima wea weakua muja Galaadnum aakan aakmajag batsamtatman amaigkauwai. Dutika niishkam nuanuig ashí niina patayi aidaujai aakan aakmakag pujusajui.

<sup>26</sup> Nunik nuwi Labán Jacopan chichajak:

"¿Wagka amesh jusha juniame? ¿Wagka minash tsanujame? ¡Amek mina nawantug aidauk nuwa maaniaku bisatkama yajumtaya numamtuk awajkaume!

<sup>27</sup> ¿Wagka tsanujamesh uumjtkamesh mina aujtskesh tupikakiume? Wi dekauwait-kunuk, shiig anentsan kantamjukin tampujan arpajai awatuinaku, shiig jiiстамjuan akupmain awajkashjamek.

<sup>28</sup> Amek minak niish nawanjinash, niina tijaji aidaujai shiig kugkuas kumpama akupkati tusamesh dakagsachume. ¡Duka nunitsuk aents anentainkachu wajukmaina numamtuk wajakume!

<sup>29</sup> Nuadui wika atumnak pegkegchau awagmamainaitkun, amina apa Apajuíjiya nunú kajanum chichagtak: 'Jacob augkumesh shiig ausata, wainkam pegkegchau chichagkaipa' tujutma nuadui pegkegnum augjame.

<sup>30</sup> Amek yaunchuk nagkamsam amina apa jeen wakitkitasam wakemaum duwi miniume, tujash nunika minakmesh ¿wagka mina apajuímtaig aidaush kasagtukmesh miniume?" tau.

<sup>31</sup> Tusa tama Jacob Labágkan ayaak:

"Wika amina ujamainnash, namputchawame niina nawanjin japiki emetjutuawai tusan ishankagtakun ujakchamjame.

\* 31:11 "Apajuí ángel tumain" tawa duka apach chichamnum agagbau "ángel del Señor" tawa nunuwai. Tuja duka tikich ángelan tatsui, Apajuí nigki tumamiatak tawai.

<sup>32</sup> Untsu amina apajuímtaijum aidau kasamkaume tujutam dusha ya takakuk wainkatam, dutikawaminig duka, imantamnati! Iina patayi aidau ijunas waipainai, wisha wajina aminunash jujukjame nunú egakam jukita”, tiuwai. Nunak Jacopak Raquel niina apaji apajuímtaiji kasagkamunak dekachu asa tiuwai.

<sup>33</sup> Aatus Jacob timatai, Labán Jacopa aakji carpa aakmakbaunum waya egaka, nuigtu Lea aakjin waya egaka, tuja jimag nuwa inak aidau aakjinchakam ashí egakui. Tujash imatika egakush wainkachui. Nunik ashí egaka wainkacha Lea aakjin pujau jünki wayauwai Raquela aakjin.

<sup>34</sup> Nunik apaji waitai, Raquel dakumka najanamu jukimujin camello tuntupen patai nuwi waka nuna ekeemtuk ekemsauwai. Nunik eketai Labágkak ashí egakui, tujash makichkish wainkachui.

<sup>35</sup> Nuna egak wekagun Raquel chichajak:

“Apawah, kajekaipa, wi juwi eketag nuna akaikin kumpantsujam nunak, mina tsawanjuí jau asan aniajai”, tiuwai.

Tuja Labágkak imatika egakushkam niina apajuímtaijinak wainkachui.

<sup>36</sup> Nunikmatai Jacob kajeka niina chichajak:

“¿Wajina wisha pegkegchaunash dutikaja? ¿Tuna wisha pegkegchaunash takamsam-taiya imanikmesh wakeketash pataetugkaume?

<sup>37</sup> Ame mina aakjuí wayam mina wajiig aidau ashí diisum duwish, ¿amina wajijum aidau jukimush tuu wainkaume? ¡Nunú wainkamek amina pataim ijuna juna emtin juwi itantam aepsata, tuja mina pataag ijuna nuna emtinishkam! Nuna wainak dita titime yaki waitjawa, amesh waitjam, atsa wiyash waitjag nuna.

<sup>38</sup> “Wi amina veinte mijadai takagsamjam nuaduik, amina uwigjum aidauk tuja cabrajum aidaakesh makichkish uchijinak pegkegchaun petsakag ajapachui; tuja wikish makichik uwig tsakatchinakesh maanuk aminunak yuwachuitjai.

<sup>39</sup> Nuigtushkam makichik kuntinjumnakesh ikamyawa maamunak itajuachuitjame, tuja kuntin megkaekuish, nunak wi akiyajame; tuja tsawaigkish nuniachkush kashikesh kuntinun kasamkagmataish, mina segatkumin wi akiyajame.

<sup>40</sup> Tsawai takaknush etsayai jamain dekapiajai; tuja kashi takaknushkam tsetsekai waitajai, jimaniakun shiig aneasa kanumainchau dekapiajai!

<sup>41</sup> Imanikan waitiaknush veinte mijan amina jemin takakun pujusuitag duika ¿mina jutik akijam? Amina nawanjum jimaja juna jukitasan takagsawaitjame catorce mijadai; tuja amina kuntinjumin kuitamkunchakam seis mijan takagsawaitjame. Imaniaish amek imaan akiktage tusa anagtuawaitkum betek akigtsayume.

<sup>42</sup> Abrahamana Apajuíjin, mina apag Isaac emematia nunú mina yainchakuig, amek minak dekas wi takasbaunmak makichkish akigtsuk akupjumain awajtukume. Tujash wi senchi takaku wake besemag pujamun Apajuí waitjuku asa, aminak nii kajanum jiyapakume”, tiuwai.

*Jacob Labágjai chicham umikbau*

<sup>43</sup> Tusa tama Labán Jacopan ayaak:

“Juju jimag nuwa aina juka mina nawantug ainawai; tuja uchi aina jushakam mina tijagkig ainawai; tuja uwig aina jushakam midau ainawai, nuadui jame ashí juju wainam juka midau ainawai! Tujash ¿wisha mina nawantug ainakuish, nuigtu mina tijagkig ainakuish itugkatjaki? wika emetmaitsujai.

<sup>44</sup> Nuadui amesh taata, núnikamin juwi amejai chicham umikmi, ii umigdaikatna nunú”, tiuwai.

<sup>45</sup> Tusa timatai Jacob kaya juki inantai apujus,

<sup>46</sup> niina patayi aidaun chichajak: “¡Kaya juuktajum!” tusa tima kaya juukag ijumag tsakapiajai, dutikawag nunú kaya ijumja tsakapimunum ayaumas pujusag dita chicham umikbaun iwainainak yutain yuwawajui.

<sup>47</sup> Nunik nagkanainak Labán nunú nugka daajin adaikauwai niina chichamen “Jegar Sahadutá”, tuja Jacobshakam niina chichamen adaikauwai “Galaad”. Nunak kaya ijumjamu taku tiuwai.

<sup>48</sup> Nuna dutika inagnakag Labán chichaak:

“Ii yamai chicham umikag juka juju kaya ijumjamua nunú wainku tuke aneasaiki atinaitji”, tiuwai. Nuna taku nunú nugkanak Galaad adaikau ainawai.

<sup>49</sup> Tusa nuigtushkam “Mispá” ati tiuwai, wagki nunak Labán chichaak:

“ ‘Apajuí iina mai atushat pujajinchakam diigmaku ati’ taku tiuwai.

<sup>50</sup> Tuja ame mina nawantug shiig kuitamtsuk waitkamunash, nuniachkumesh dita ayakiatkum tikich nuwa aidaujai nuwenmin amina waipak etsegutmamain atsuataish,

ima Apajuíya duke nii waipau asa ame wajuk pujuttame nunak ashí nigki dekaatin ati”, tiuwai.

<sup>51</sup> Nuna tusa nuigtushkam ataktu awena Jacopan chichajak:

“Antukta nijah, juju kaya ijumjamu aina nunú, tuja tikichin kayan inantain apusag juju

<sup>52</sup> nagkaikimek amesh wayashtinaitme, tuja wishakam antsanuk juna nagkaikinuk wayashtinaitjai, nunú nuniakuik waitkanimain asamtai.

<sup>53</sup> Amina apachjum Abrahaman Apajuíyia nunú, nuigtu mina apachug Nacoran Apajuíyia nunú ii umikag nunak diistin atinme”, tiuwai. Tusa Labán timatai, Jacob niina apaji Isaac Apajuín emematujakua nuna pachis nii umiktinjin niishkam dutiksag: “Aatus ati”, tiuwai.

<sup>54</sup> Nuna umika, nuadui, Jacob kuntinun maa nunú mujanum nuna apeak Apajuín emematuiwai. Dutika nuna nejen ashí apeachu asa patayi aidaun ipaa ashí ijuntujag yuwawajui, nunikag nunú mujanmak kajigkajui.

<sup>55</sup> Nunik kajigkag tsawamunum, Labán kashikmas nantaki, niina nawanji aidaun tijaji aidaujui yapinum kugkuas kumpamak, pegkegnum yumigkig nuadui niina nugken wakitkiuwai.

## 32

*Jacob Esaújai igkunikbau*

<sup>1</sup> Nunik Labán wakitkintai Jacob nuwi nagkaemaki wegau. Nunik wetatman Apajuín aentsji ángel aidaun jiiuntujajui niina igkugtatus.

<sup>2</sup> Nunik minidaun Jacob wainak chichaak: “Juka Apajuín suntaji ainawai”, tiuwai. Nuadui nunú nugka daajin adaikauwai Mahanaim.\*

<sup>3</sup> Dutika ukuak nuwi juwaki wesa niina yachi Esaú nugka Seír tutai EDOM nugkanum awa nuwi pujuttaman, yatsum minawai tusajum ujatjuktajum tusa, niina aentsji chichama etsejin aidaun ishitkauwai.

<sup>4</sup> Dutika ishimak aatus akatmamjauwai:

“Wika nii tabaun umiktasan, kuashat tsawan Labágkai pujaun ukukin minajai.

<sup>5</sup> Tuja baka aidaun, burro aidaun, uwig aidaun, nuigtu iinak aishmag aidaun, nuwa aidaushkam kuashat ajutui, juna susatjai dutika ai mina apug wait anenjugmatai, nijjai kumpamdayatjai tajai”, tiuwai.

<sup>6</sup> Tusa akatja ishiakam chichama etsejin aidaushkam shimutuk Esaún ujaka ukuinak, waketug kaunawag, Jacopan chichajuinak: “Amina yatsum Esaúk ame akatmamjamum duka imatiksaik ujakmaji, dutika ujaka ajin, ayu igkugtajai tusa, cuatrocientos aentsun yajuak minitjamae”, tiauui.

<sup>7</sup> Tusa ujakam Jacob senchi ishamkauwai, nunik kuashat anentaimu. Nuniak aents nijjai yujaidaun jimajan akanak ijumjauwai, dutikak uwig aidaun, baka aidaun, camello aidaunashkam dutiksag akanag ijumjauwai.

<sup>8</sup> Nunak nii anentaimas: “Yaja aneas Esaú jetepataish, juju aents aidaun akanka ijumjamua nunú maaniaimpap, tikich aina au tupikakiag uwemain ainawa”, tusa dutikauwai.

<sup>9</sup> Nuna dutika Apajuín segaak:

“Tuke Pujuuwah, mina apachug Abrahaman, tuja mina apag Isaakan Apajuíyiah, ame mina chichagtakum, amina nugkemin pataim batsata nuwi wakitkita, wi yaigtatjame tujutmaume.

<sup>10</sup> Wika tikima wainkauch aig, ame minak wait anenjau asam yainkaume. Yaunchkek wika juju namak Jordágka junak ima mina ushujutagnak takusan katigkabajai, tujash yamaik ame yaointsamin kuashat aents aidaush ajutui, tuja kuntin aidaushkam imanisag ajutui, nuadui kuashat asamtai, jimajan akankan ijumjajai.

<sup>11</sup> ¡Wait aneasam agkanmitkajuata mina yatsug Esaú mantuawai! Wika ishamajai, mina jetetak ashí mina duwag aidaun, mina uchig aidaujui amutkai tusan, tajame.

<sup>12</sup> Ame chichaakum, wi aminak kuitamkattagme, dutikakun amina uchijum wegantunak nayantsa kamatkaji dekapamainchauwa iman awagsatnaitjai tujutmayume”, tiuwai.

<sup>13</sup> Jacob nuna aatus Apajuín segaa kiitai, nuwig tepes kanajui, nunik tsawag, niina tagkuji aidaunmayan akanjauwai yachi Esaú susatnun.

<sup>14</sup> Dutikak doscientos chivo nuwa aidaun, veinte chivo aishmag aidaun, doscientos uwijan, nuigtu veinte uwig tsakat aidaun,

\* 32:2 “Mahanaim” tawa nunak hebreo chichamnumak “jimaj aakmaja batsamsamu” taku tawai. Jacopan aakji aidaun, tuja Apajuí aentsji ángel aidaun aakji aatus aajakua nuna taku tawai.

<sup>15</sup> treinta camello nuwa yama petsaku aidaun ashí uchijjai, cuarenta baka, diez toro aidaun, veinte burro nuwa aidaun, nuigtu diez burro aishmag aidaun aatus akanag ijumjauwai.

<sup>16</sup> Dutika duwi niina inake aidaun, maki makichik kuntin akanjamun tinamkauwai, dutika chichajak:

“Atum emkatajum, tujash betek ijutkau wetsuk, makichik kuntinun ujuikimtai, duwi tikich kuntin aidaushkam saaktajum”, tiuwai.

<sup>17</sup> Nuna tusa aents eemak wetinun chichajak:

“Mina yatsug Esaú amina igkumpak: ‘¿Yaita amina apugmesh? ¿Tuja tuu weakmea aniname? ¿Juju tagku yajuaka minam jusha yanau ainawa?’”

<sup>18</sup> Tusa tujamkuig ame ayaakum:

“ ‘Apujuh Esaú, juju kuntin aina juka aminu ainawai, junak Jacob amina inakmea nunú awetugmame. Tuja niishkam iina ukujin minime’ tusam ujakta”, tiuwai.

<sup>19</sup> Nuna tusa, tikich aidau kuntinun yajuak wedaunashkam chichajak:

“Atumshakam Esaú igkumpakuig dutiksagmek chichaktajum.

<sup>20</sup> Tuja nuigtushkam: ‘Amina inakem Jacob iina ukujin minime’ tusajum titajum”, tiuwai. Nuna tiuwa nunak Jacob anentaimas, dekas kuntinun emtikan ishitkatjai dutikan nii kajekbaujin etsagan, nuadui wisha nijjai wainiaktajai. Namputchawame nuna wainkash shiig anenjus jujukchaintash, tusa dutikauwai.

<sup>21</sup> Aatus ashí emtika ishiak, nigka wetsuk niina aakjinig kanajui.

*Jacob ángeljai maanikbau*

<sup>22</sup> Nunú kashia duik, Jacob nantaki, niina nuwen mai juki tuja jimag nuwa inake aajakua nunashkam mai juki, uchiji once aajakua nujai ashí yajuak namak Jaboc tawa nuna amain ikatiajui.

<sup>23</sup> Dutikak, ashí niina wajiji aidaujai ijumag ikatiajui.

<sup>24</sup> Nuna ashí ikatiag nigki juwak pujai, makichik aents tajuam nijjai maa maaniakua tuke tsawampau;

<sup>25</sup> nunik tsawautai nunú aents Jacopan depetmainchau dekapeak, nantagnum awati manchamitkakui.

<sup>26</sup> Dutika chichajak:

“¡Akupjukta tsawawai!”, tau.

Tusa tama Jacob ayaak:

“¡Ame mina pegkegnum yumigtatsminigkik akupkashtatjame!” tiuwai. Tusa tama nunú aents Jacopan iniak:

<sup>27</sup> “¿Amina daagmesh yaita?” tau. Tama:

“Wika Jacopaitjai”, tiuwai.

<sup>28</sup> Tutai nunú aents chichajak:

“Amek yamai nagkamsamek Jacob tutaig achattame. Amina daagmek Israel atatui, wagki amek Apajuñjai maaniakmesh, tuja aentsjai maaniakmesh, depetmaku asam”, tiuwai.

<sup>29</sup> Tusa timatai Jacob niina iniak:

“¿Amina daagmesh yaita?” tau. Tusa iniam nunú aents ayaak:

“¿Wagka mina daag dekaatasamesh wakegame?” tau.

Aatus tusa nunú aents Jacopan pegkegnum yumigjauwai.

<sup>30</sup> Dutika ukukim, Jacob nunú nugka daajin Penuel† adaikauwai, nunak:

“Dekas Apajuñnak shiig paantap wainkaja, imanun wainkanush jakachjapi iwakuap pujaja” taku tiuwai.

<sup>31</sup> Tusa ukuak Penuelan nagkaiki wegai etsa jiiniuwai; tujash niina nantajen najaimak shutus wegau.

<sup>32</sup> Nuadui Israel wegantu aidauk yamaya juikish baku wajakbaunum neje achitka nunak yuchau ainawai, wagki nuwi Jacopan awati manchamitkakbau asamtai.

## 33

*Jacob Esaújai igkunikag chicham epegtuniamu*

<sup>1</sup> Nunik wesa Jacob wainkauwai niina yachi Esaú cuatrocientos aentsun yajuak minittaman. Nunik wainak niina uchiji aidaun yajuak, niina nuwe Leyai, Raquelai, nuigtu jimag nuwa inak aajakua nuwi aatus yununjauwai.

† 32:30 “Penuel” tawa nunak hebreo chichamnumak “Apajuñ niime” taku tawai.

<sup>2</sup> Dutika jimag nuwa inake aidaun uchiji aidaui emtikauwai, dutika nuna ukuujin Lean niina uchijijai awantauwai, untsu inagnamunum Lea ukujin Raquelan Joséjai awantauwai.

<sup>3</sup> Nuna dutika ijumag ukuak nii eemak wajan, sieteya imania tikishmag tsuntsuma nijayin nugka antig waja wakakua yachi midaun jegantauwai.

<sup>4</sup> Tujash Esaúk tupikaki yachin igkug kuntujen achik kajut pagkuk kugkuasui. Nunik wajasag eganijajui.

<sup>5</sup> Nunik Esaú niimkama nuwa aidaun uchijijai ijunun wainak Jacopan iniak:

“Jusha ¿ya ainawa?” tau.

Tutai nii ayaak:

“Aanka amina inakmin Apajuí uchin susauwa nunú ainawai”, tiuwai.

<sup>6</sup> Timatai nuwa inak aidaun uchijijai tikishmag tsuntsuma nijayin nugka antig pujusajui Esaún eme anentus.

<sup>7</sup> Nunikagmatai Leashkam niina uchiji aidaui Esaún jegantag ditashkam nunisag pujusajui. Nunú nuninai inagnamunum José Raqueljai jeganta ditashkam nunisag pujusajui.

<sup>8</sup> Nuniagtai Esaú Jacopan iniak:

“¿Wajuk anentaimesamea juju tagku aidaush emtikamesh ishiakmaume, dutikamunash wisha wai wainkawanush minaja?” tau.

Tutai nii ayaak:

“Juju aina juna juwak tsagkugtugti tusan ishitkamjame”, tiuwai.

<sup>9</sup> Tama Esaú chichaak: “¿Atsa yatsuju, minak kuashat tagkuk ajutui, aminu aina duka aantsag aminuk agtinme, sujusaipa!” tiuwai.

<sup>10</sup> Tutai Jacob ayaak:

“¿Atsa, tutsuk wait aneamam jukita. Wika ame shiig aneasa jujukiu asamin, Apajuí wainka anentaimeina iman dekafejai!

<sup>11</sup> Nuniau asantai, wait aneamam wi ikautuajam juka jukita, Apajuí minak yaintsamtai wiakuch wajasjai, nuaduik makichik atsumamukesh atsugtawai”, tiuwai.

Tusa imatjam Esaúshkam ayu tusa jukiuiwai.

<sup>12</sup> Nuna juki Esaú Jacopan chichajak:

“Ayu wemi, wi emkatjai”, tau.

<sup>13</sup> Tusa tama Jacob ayaak:

“Yatsuju mina aneetaijuh, amek shiig dekame uchi piipich aina juka kakakchau ainawai, tuja nuigtush uwig aidaun, baka aidaun yama petsaju asag uchiji piipichin saakuashe aina nuna puyatju wajajai; wagki wi senchi wetaik makichik tsawantaik uwig aidaun ashí jinumainai.

<sup>14</sup> Nunimain asantai mina apujuh, amek emkata, wika diipasan mina tagkug aidaun, mina uchig aina nujai saasan mina minakuan ame pujamunum Seirnum taatjai”, tiuwai.

<sup>15</sup> Tutai Esaú ayaak:

“Ayu dekas tame, untsu wi aentsun saakag juna akankan amina yaimpaktinun ukugkitjame”, tiuwai.

Tutai Jacob ayaak:

“¿Atsa, wait aneamam tsagkugtugta! Yamaik imanikmek puyatjutkaipa”, tiuwai.

<sup>16</sup> Tutai ayu tusa ukuak, nunú tsawantaik Esaú Seirnum wakitkiuwai.

<sup>17</sup> Yachi wakitkimtai Jacobshakam Seirnumak wetsuk, nugka Sucot tawa nuwi weuwai. Nunik nuwi jegaa niina jeen jegamak, nuigtushkam kuntin aidaun aakjinashkam aakmatjauwai. Nuna dutikau asa nunú nugka daajin Sucot<sup>\*</sup> adaikauwai.

<sup>18</sup> Jacob Padán-aram pujau wakitki Canaán nugkanum jegauwai pegkeg, jamamtuchu utugchat atsaunum, nunik nuwi yaakat Siquem tawa nujai niinis pujusui.

<sup>19</sup> Nuwi pujus Hamor Siquema apaji aajakua nuna uchiji aidaun nugken cien kuichik plata najanamun akikmak sumakui. Dutika nuwi niina jeen jegamag yaaktamauwai.

<sup>20</sup> Nuwi pujus, Apajuí emematku kuntin maa patasa apeatnun altaran najanauwai. Dutika adaikauwai El-elohé-Israel. Nunak Israelan Apajuji taku tiuwai.

## 34

*Dina pegkegchau awajkamunum ayamjaku amujatkamu*

<sup>1</sup> Jacob Leayai akiamu Dina, makichik tsawantai niina jeen pujau nunú yaaktanmaya nuwauch aidaun ijagsatatus weuwai.

\* 33:17 “Sucot” tawa nunak hebreo chichamnumak “aak” “numi kanawe tsupija aakmakbau” taku tawai.



<sup>2</sup> Nunnittaman nunú yaaktan apuji Hamor heveo aents aajakua nuna uchiji Siquem wainak dakimaunak waitkas achika juki niina jeen awaya nuwi ikanak pegkegchau awajkauwai.

<sup>3</sup> Dutikauwaitak senchi wakejuku asa, niina wakemitkaktatus shiig pegkegchin ausauwai.

<sup>4</sup> Dutika niina apaji Hamoran chichajak: “Juju nuwan nuwatkatasan wakegajai, ame weme sumagtukta”, tiuwai.

<sup>5</sup> Nuna Jacob niina nawanji Dinan Siquem pegkegchau awajkamun dekauwai. Dutika dekaayatak niina uchiji aidau tagkun kuitamainak ikam batsatu asamtai, dita kaunawagmatai chichastajai tusa pachikchauwai.

<sup>6</sup> Nunik pujai, Siquema apaji Hamor Jacobjai chichastatus weuwai.

<sup>7</sup> Nuniai Jacopa uchiji aidau tagkun kuitamak batsatu kaunkama, Siquem Jacopa nawanjin pegkegchau awajkae tabaun dekawajui. Nunik senchi kajekajui, wagki Israelan dushikiak Siquem makichkish nunimainchaun dutikau asamtai.

<sup>8</sup> Tuja Hamor ditajai chichaak:

“Mina uchig Siquem atumi umayin senchi wakejuke; nuniau asamtai segajime, wait aneasjum umaim sujimkaigpajum mina uchigjai aishinati.

<sup>9</sup> Nunik mina uchig nuwenamtaig atumesh jutii patayi waigtajum. Aatsa ii aidautish atumi nawanji aidaujai nuwenawagmi, tuja atumshakam iina nawanji aidaujai nuwenamnujum.

<sup>10</sup> Nuniakjum atumesh jutijai batsamsatajum. Nugkak atumdau atatu, nuwi pujusjum takasjum sujuktajum, nuniakjum atumdau nugka sumaktajum”, tiuwai.

<sup>11</sup> Tusa tutai, Siquemshakam Dina apajin, niina umayi aidaujai ijunun chichajak:

“Minash wi sumama nunú umigtuktajum, wisha atum wajig segattajum nunak imatiskanuk umigkatjime.

<sup>12</sup> Atum wi nuwan juwakui wajupa akigkati tujutmainaitjume, nunashkam imatiskanuk umiktajai, untsu nuwak idaitugsatajum wijai aishinati”, tau.

<sup>13</sup> Tusa tutai Jacopan uchiji aidau Siqueman niina apaji Hamorjai, umayi pegkegchau awajtukbau asa tsanuinak,

<sup>14</sup> juna aatus tiajui:

“Jutiik iina umayig aishmag tsupimakchau aidauk sumaitsuji, duka iniig shiig pegkegchau datsan amain asamtai.

<sup>15</sup> Untsu atumesh jutijai betek atag takugmek, ashí aishmag aidautijum tsupimagtatum.

<sup>16</sup> Nunikagmin duwi jutii nawanji aidauash atumjaish aishinmain ainawai, tuja ii aidautishkam atumi nawanjumjaish nuwenmain ainaji. Nunikaja dekas atumjaish nunú wegantu aidauk yaaktamawag ijunas batsamaina nunin amainaitji.

<sup>17</sup> Tuja atum nunú dakitakjuminig iina umayig juki yaja wetatji”, tiajui.

<sup>18</sup> Tusa tama Hamor niina uchiji Siquemjai chichainak: “Ayu, kame duke ati” tiajui.

<sup>19</sup> Tusa tiajam nunú datsauchik Jacopan nawanjin senchi wakejuku asa, waugtus tsupimakui. Niina apaji jenig Siquem aajakui dekas eme anentsa diitai.

<sup>20</sup> Nuna nunika niina apaji Hamorjai yaakta waitijin aents aidau ijunag chichatainum jegantag ditan chichajuinak:

<sup>21</sup> “Juju aents aina juka iina kumpaji ainawai, nunin asag ditak juju nugka juwi batsamas takasa nuwiyen jukiag sujiagtatui. Dita batsamainuk nugkak shiig múuntai, tuja ii aidauti dita nawanji aidau nuwatkgatjui, nuniajin ditashkam iina nawanji aidau nuwatkgatui.

<sup>22</sup> Nuigtushkam ditajai ijunja makichik yaaktakea nunin wajasa pujusmi tama ayu tuinawai. Nuniktin asajin dita chichainak ashí iinia aishmag aidauk, tsupimagtinme tujamainawai, dita wajuku ainawa nuninuk amí tusag.

<sup>23</sup> Tuja ditá wajiji aidauk kuntinji aina nujai iinu agtatui. Nuadui yamaikik nii segapamua duke umigkagmi, aatus ditashkam jutijai juwakag batsamsatnume”, tuidau.

<sup>24</sup> Tusa Hamor niina uchiji Siquemjai tiagtai, tikich aidauhkam, ayu duke ati tusag aimkajui. Tiagmatai ashí aishmag suntagbaemain aidauk tsupimajaju ainawai.

<sup>25</sup> Tujash kampatum tsawanta duwi, Jacopa uchiji Dina umayi aidau: Simeón Levíjai puyagjin jukiag yaaktanum wayawag ashí aents tsupimajaju aidau nuna najaimainak ayamjumamainchau wajas batsatun ashí kajekajui.

<sup>26</sup> Dutikainak Hamornashkam Siquemjai apatuk puyajai ijuag maawajui. Dutikawag Dina Siquema jeen pujuttaman juki ukukajui.

<sup>27</sup> Dutikawaju ai Jacopan uchiji tikich aidau kauna shimutuk aents jinaa batsatbaunum utsanawag dita umayi pegkegchau awajkamunum aents jinau aina nuna wajiji aidaukak ashí yajuakajui.

<sup>28</sup> Dutikainak nuigtushkam yaaktan ukuki aidaun, baka aidaun, burro aidaun aatus ashí tikich waji ayaunak yajuakajui.

<sup>29</sup> Tuja nuigtushkam waji jegaya aidaunash kasamkajui, dutikainak uchi aidaun nuwa aidaujai achija yajuakajui.

<sup>30</sup> Dutikawagmatai Jacob Simeógkan Levíjai chichajak:

“Atum minak utugchat itagtuagme. Nuadui yamai cananeo aents, ferezeo aents aina nunú minak kajegtukagtatui, dutiujinak mina aentsug aidauk kuashtachua duwi dita ijunag mina mantuainak mina uchig aidaujai mantumain ainawai”, tiuwai.

<sup>31</sup> Tutai dita aimainak:

“Tujash ¿wagka niish iina umayinash, nuwa wainka takatai itugmaina dutikae? Nuadui iishkam aikaji”, tiajui.

## 35

*Apajuí Jacopan Betel pujuttaman pegkegnum yumigjamu*

<sup>1</sup> Apajuí Jacopan chichajak:

“Wetá Betelnum, núnikam nuwi jegam pujusta. Nuwi pujusam amina yatsum Esáu mantamatag takui tupikamin, Apajuí wantintugmakua nunú emematku kuntin maa patasa apeatin altar najanata”, tiuwai.

<sup>2</sup> Tusa tima Jacob niina nuwe aidaun, uchiji aidaun, niina aentsji aidaujai ijumag chichajak:

“Atumi apajuímtaijum dakumka najanamu ajutjamaina duka ashí utsagtajum, dutikajum majiim tikich jáanch nugkugtajum.

<sup>3</sup> Nunikagmin wamak Betelnum shiyakagmi, nuwi jegaan, wi wake besemag wekagai, Apajuí mina yainkauwa nunú emematku kuntin maa patasa apeatnun altaran najanatai. Nii mina yaja wekagaish uyuuntusmatai wekaesauwaitag nuadui”, tiuwai.

<sup>4</sup> Tusa tiajam ditashkam ayu tusag, dakumka najanamu apajuímtai ajuinamunak, kuishnum akiitai aidaujai yajuakag ashí Jacopan susajui. Dutikam nii juki numi Encina tutai, Siguem nugkanum jegattak wajaunum nuna wajautin yutua ukukiuwai.

<sup>5</sup> Dutika ukuak jünag shimutai, nuwiya aents aidaun Apajuí senchi sapigmitkakui ditan pataetukainum tusa. Dutikamu asag Jacob niina uchiji aidaujai shimutaish pataetukchajui.

<sup>6</sup> Nunik we wenakua ashí nijai aents aidau yujaunak imanisag yaakat Almendro tutai tuja Betel tuuta awagmatia nunú Canaán nugkanum awa nuwi jegawajui.

<sup>7</sup> Nunik nuwi jegawag kuntin maa patasa apeaku Apajuí ememattinun altaran Jacob najanauwai. Dutika nunú nugkan El-Betel adaikauwai. Yachi maatag tama tupikaki wesa kanittaman Apajuí wantintukua nuwi.

<sup>8</sup> Nunú nugkanum Débora Rebecan kuitamajakua nunú jakauwai. Nunikmatai Betel jegattak numi Encina wakentin ukusajui. Dutika Jacob nunú nugkan, “Encinanum buutbau” adaikauwai.

<sup>9</sup> Tuja Jacob Padán-aram pujau wakettatman Apajuí ataktu wantintuk pegkegnum yumigjauwa nunak,

<sup>10</sup> aatus tiuwai:

“Amek Jacopaitme, tujash tuke Jacob tamak achattame; yamai nagkamsamek ‘Israel’ tutai atatme”, tiuwai.

Nuna tusa Jacopan daajin Apajuí yapagtua ataktushkam

<sup>11</sup> chichajak:

“Witjai dekas Apajuí ashí senchigtinnuk; amek kuashat uchigtin atatme, nuadui ame wegantu aidau imanisag agtinai.

Nuadui ame wegantu aidau nugka muuntan yaaktamawag batsamsagtinai.

Tuja ame uchijum wegantunmaya apu waigkagtin ainawai.

<sup>12</sup> Wi Abrahaman Isaakjai nugkan susauwaitag nunak amina yamaik amaajai, untsu ame jakamin amina uchijum wegantu aidaun susatnaitjai”, tiuwai.

<sup>13</sup> Aatus Apajuí Jacobjai chichas ukuak wakitkimtai,

<sup>14</sup> nuwig Jacob kayan juki inantai apujus aceiten vinojai juki ukatkauwai, juju nugkak Apajuínu atin ati tusa.

<sup>15</sup> Nuna dutika ashimak Jacob nunú nugkan Betel adaikauwai.

*Raquel jakamu*

<sup>16</sup> Jacob Betelnum pujau jiinki Efrata jegattak wegai, Raquel uchin najaima shiig senchi waitus uchigmakui.

<sup>17</sup> Nunik uchigmak ashí jaka tepaun, uchi uchigmitkau chichajak: "Ishamkaipa, jushakam aishmag uchigmakume", tau.

<sup>18</sup> Tusa tima ashí jaka tepes niina uchiji daajin Ben-oní adayak jakauwai. Dutika adaikamu aig, apaji dekas Benjamín ati tusa adaikauwai.

<sup>19</sup> Aatus Raquelak jakauwai. Nunik jakamtai Efrata jintanum yamai yaakat Belén taji nuwi ukusajui.

<sup>20</sup> Jacob nuwen ukusa pempeenak kaya muuntan juki eketi ukukiuwai. Nunú kaya eketi ukukmawa nunuwai yamaikish, juwi Raquelak ukusbauwai tutai awa nunú.

<sup>21</sup> Israel nuwen ukus ukuak jiinki, kumpin jiiikbau Eder tawa nuna ukuki weuwai. Nunik nuwi jeen jegamag pujusui.

<sup>22</sup> Nuwi Israel jegaa pujai, Rubén niina apaji awan nuwe Bilhájai ikagmakui. Nuna dekaa Israel senchi kajekui.

### *Jacopan uchiji aidau*

*(1 Cr. 2.1-2)*

Jacopa uchijig doce aajakui.

<sup>23</sup> Leayai akiamuk: Rubén aajakui iwai, nuigtu Simeón, Leví, Judá, Isacar, Sabulón aatus aajakui.

<sup>24</sup> Raquelai akiamuk: José Benjamíjgai aajakui.

<sup>25</sup> Raquela inake Bilhá aajakua nuwi akiamuk: Dan, Neftalíjai aajakui.

<sup>26</sup> Untsu Lea inake Zilpá aajakua nuwi akiamuk: Gad, Asher aatus aajakui. Juju ainawai Jacopan uchiji Padán-aramnum pujusa akigbau aidauk.

### *Isaac jakamu*

<sup>27</sup> Nuwi pujau niina apaji Isaakan Mamrenum yaakta daaji Arbá tuuta Hebrón tuuta awagmatia nuwi Abraham yaunchuk pujujakbaunum pujau asamtai, niina wainkatatus weuwai.

<sup>28</sup> Nuwi Isaakak ciento ochenta mijan ejeyi pujus jakauwai.

<sup>29</sup> Nunik shiig múuntuch wajas jakamtai, niina uchiji Esaú Jacobjai jukiag ukusajui.

## 36

### *Esaú uchiji wegantu aidau*

*(1 Cr. 1.34-54)*

<sup>1</sup> Juju aajaku ainawai Esaú, Edom tutaya nuna uchiji wegantu aidauk.

<sup>2</sup> Esaú jimag nuwan Canaán nugkanmaya aidaun nuwatkauwai. Jeteke aajakui Adá, hitita aents Elón aajakua nuna nawanji, untsu awan nuwe aajakui Oholibamá, Aná nawanji heveo aents Sibón aajakua nuna tijaji.

<sup>3</sup> Nuigtushkam Ismaela nawanjin Nabaiota umayi Basemat aajakua nuna nuwatkauwai.

<sup>4</sup> Adá Esaún uchigmatkauwai uchi aishmagkun Elifazan, untsu Basemat uchigmatkauwai uchi aishmagkun Reuel.

<sup>5</sup> Tuja Oholibamá uchigmatkauwai uchi aishmag aidaun: Jeús, Jaalam, Coré aatus. Juju aajaku ainawai Esaú uchiji nii Canaán pujusmatai akiinkaju aidau.

<sup>6</sup> Canaán pujau Esaú niina nuwe aidaun, uchiji aidaun, nawanji aidaujai ashí aents niina jeen batsamin aidaunashkam imatiksag yajuak weuwai tikich nugkanum niina yachi Jacobjai pujamun ukuki kanak pujustatus. Nuigtushkam niina tagkuji aidaun Canaán pujusa uyugkamunak wajijijai ashí yajuak weuwai.

<sup>7</sup> Ditak kuashat tagkugtin asag, nunú nugkanmakek mai pujumainchau aajakui; nuigtushkam nunú nugkanmak tagku ayugmainchakam atsujakui.

<sup>8</sup> Nuniau asamtai, Esaú Edom tutaya duka, nugka Seír tawa nuna mujajin pujustatus weuwai.

<sup>9</sup> Juju aajaku ainawai Esaú wegantu aidau, edomnumia aents aajaku aina nuna apaji. Ditak nugka Seír tawa nuna mujajin batsamajakajui.

<sup>10</sup> Tuja Esaú uchiji aajaku aina nuna daaji aidauk juju ainawai: Elifaz Adáyai akiidau, Reuel Basematai akiidau.

<sup>11</sup> Tuja Elifazan uchiji aidauk: Temán, Omar, Sefó, Gatam, Quenaz aatus aajaku ainawai.

<sup>12</sup> Elifaz tikichin ikaa nuwen Timná daagtinun nuwatkauwai. Dutika nuwi akiauwai makichik uchi aishmagkun dutika adaikauwai Amalec. Juju aajaku ainawai Esaún nuwe Adá aajakua nuna uchiji wegantu aidau.

<sup>13</sup> Untsu Reuelan uchiji aidauk: Náhat, Zérah, Shamá, Misá aatus aajaku. Tuja juju aina juka Esaún nuwe Basemat aajakua nuna uchiji wegantu ainawai.

<sup>14</sup> Tuja Esaún tikich nuwe Oholibamá Aná nawanji, Sibógkan tijaji aajakua nuwi uchi akiinkau aidauk: Jeús, Jaalam, Coré aatus aajaku.

<sup>15</sup> Tuja Esaún uchiji aidaunmaya apu aajaku aina duka juju ainawai: Esaú uchiji iwai Elifaza uchiji wegantu aidaunmaya apu aajaku aina duka juju ainawai: Temán, Omar, Sefón, Quenaz,

<sup>16</sup> Coré, Gatam, Amalec aatus. Juju aajaku ainawai Elifaz wegantunum akiinau aina nuna apuji, Edom nugkanum batsamajaku aina nunú. Juju aina juka ashí Adá wegantu ainawai.

<sup>17</sup> Untsu Esaún tikich uchiji Reuel aajakua nuna uchiji apu aidauk: Náhat, Zérah, Shamá, Misá, aatus aajaku. Juju ainawai Reuel wegantunum akiinau aina nuna apuji Edom nugkanmaya. Juju aina juka ashí Basemat wegantu aajaku.

<sup>18</sup> Untsu Esaú nuwe Oholibamá Aná nawanji aajakua nuna uchiji aidaun apujig: Jeús, Jaalam, Coré aatus aajaku.

<sup>19</sup> Esaú Edom tutaya nuna uchiji wegantu aidaun apuji aajaku aina duka juju ainawai.

<sup>20</sup> Tuja Seír horeo aents aajakua nuna uchiji aidauk: Lotán, Sobal, Sibón, Aná,

<sup>21</sup> Disón, Éser, Disán aatus aajaku. Juju aajaku ainawai Seíra uchiji wegantu aidau horeo aents wegaunum akiinau aina nuna apuji aidau Edom nugkanum batsamsau aina nunú.

<sup>22</sup> Tuja Lotánka uchiji aidauk: Horí, Hemamjai aajaku. Untsu Timná aajaku Lotánkan umayi.

<sup>23</sup> Tuja Sobala uchiji aidauk: Alván, Manáhat, Ebal, Sefó, Onam aatus aajaku.

<sup>24</sup> Sibógka uchiji aidauk: Aiá, Aná aatus aajaku. Nunú Aná mujanum niina apaji Sibógka burrojin kuitamak uwegshunum wekaekama yumi pukuni initkanmaya jiinun ejoyuwai.

<sup>25</sup> Aná uchijishkam: Disón, nuigtu nawanji Oholibamá aatus aajaku.

<sup>26</sup> Disónkan uchiji aidaushkam: Hemdán, Esbán, Itrán, Querán aatus aajaku.

<sup>27</sup> Tuja Ésera uchiji aidaushkam: Bilhán, Zaaván, Acán aatus aajaku.

<sup>28</sup> Disánka uchiji aidaushkam: Us, Aránjai aajaku.

<sup>29</sup> Tuja horeo aentsun apuji aidauk: Lotán, Sobal, Sibón, Aná,

<sup>30</sup> Disón, Éser, Disán aatus aajaku. Juju aajaku ainawai horeo aents aidaun apuji, maki makichik wegantu aidau Seír nugkanum batsamsau aina nunú.

<sup>31</sup> Nunú apu aajaku aina nuu, inamajaku ainawai Edom nugkanum, Israel aents\* aidaunmayag eke apu atsau asamtai.

<sup>32</sup> Beoran uchiji Bela aajaku Edoma apuji. Tuja niina yaaktajig Dinhaba aajaku.

<sup>33</sup> Bela jakamtai, Jobab Zérah uchiji yaakat Boshránmaya aajakua nunú apu wajas inamjauwai.

<sup>34</sup> Untsu Jobab jakamtai, Husam Temán nugkanmaya aajakua nunú apu wajas inamjauwai.

<sup>35</sup> Husam jakamtai, Hadad Bedatan uchiji madiágnunia aents aidaun Moabnum amukua nunú apu wajas inamjauwai. Nigka yaakat Avit tawa nuwiya aajaku.

<sup>36</sup> Hadad jakamtai, Samlá Masrecánmaya aajakua nunú apu wajas inamjauwai.

<sup>37</sup> Samlá jakamtai, Saúl yaakat Rehobot tutai namak Eufratesa ijus awa nuwiya apu wajas inamjauwai.

<sup>38</sup> Saúl jakamtai, Baal-hanán Acbora uchiji aajakua nunú apu wajas inamjauwai.

<sup>39</sup> Untsu Baal-hanán jakamtai, Hadad yaakat Pau tawa nuwiya apu wajas inamjauwai. Hadata nuwe aajaku Mehetabel, Matred aajakua nuna nawanji, tuja Mezaapa tijaji.

<sup>40</sup> Tuja Esaú wegantu aidau maki makichik daagtin patayi aidaujai juunik ditash nugkentin batsamsaju aina duka juju ainawai: Timná, Alvá, Jetet,

<sup>41</sup> Oholibamá, Elá, Pinón,

<sup>42</sup> Quenaz, Temán, Míbsar,

<sup>43</sup> Magdiel, Iram aatus. Tuja Esaún tikich daajig Edom aajaku. Juju ainawai Edoman apuji aajaku aidau, maki makichik ditash nugkentin batsamajaku aina nunisag apumeak inamjauwain.

## 37

<sup>1</sup> Jacopak niina apaji Canaán pujujaku nuwi pujusui.

\* **36:31** "Israel aents" tawa nunak apach chichamnum "israelita" tawa nunuwai. Israel aents tawa duka Jacopak tikich daaji Israel tawa nunú wegantu ainawai. Yaunchuk "Jacob" daagtin aajakua nuna Apajui yapagtua "Israel" adaikauwai.

<sup>2</sup> Juju agagbauwa juka Jacopan patayi aidau pachisa augmattsamui.

*José niina yachi aidaujai pachisa augmattsamu*

Josék diecisieta mijan ajamaitak, niina apaji ikaa nuwe aidau Bilhá Zilpájai aajakua nuwi niina yachi akiinau aidaujai ijunas uwijan kuitamajakui. Nuniau asa niina yachi aidau pegkegchau wajagtai apajin jegajua ujakujui.

<sup>3</sup> Tuja Israelak Josén ima senchi tikich yachi aidau nagkaesau anejakui, nii múuntuch wajas pujayatak akiau asa, José nugkugtinun jáanchin shiig pegkejan najatua susauwai.

<sup>4</sup> Tujash José yachi aidauk, iina apajig Josén ima senchi aneak iinak imatikas anempainatsji tuidau asag, kajejuinak makichkish kumpamainachu.

<sup>5</sup> Dutikam pujus José kajanum kajamjauwai. Nunik wagkanuk juni kanagja tusa yachi aidau ujakui. Dutika ujakam nuna antukag, nuni senchi kajejkajui.

<sup>6</sup> Dutikainam José ditan chichajak:

“¡Antuktajum, wi kajanum kajamjag nuna ujaktajime!

<sup>7</sup> Kajanum ii aidauti ashí ajá ejapeen trigo tsupija jigkaka ijumku batsamaji. Nuniajin wi jigka aepsamua nunú nantaki tutupit wajasmae; nunikmatai untsu atum jigkamu aidau nantajag nunú midau wajattaman tentea apakag eme anentuinak tsuntsuma ijuntsagmae”, tau.

<sup>8</sup> Tusa ujakam, yachi aidau niina chichajuinak:

“¿Amekaitam iina apuji wajasam inajajatnum?” tuidau.

Nuna tusag nuni senchi kajejkajui, wagki nii kajamjamujin imatiksag ujakajam.

<sup>9</sup> Dutikam pujus ataktushkam tikichin kajamjauwai, nunik nunashkam yachi aidau ujaak:

“Antuktajum tikichnashkam ataktu kajamjai. Kajanum wainkamjai etsan, nantun, nuigtu once yayan. Nunú aidau mina tententuawag eme anenjusag tsuntsumjutiagmae”, tau.

<sup>10</sup> Tusa niina apajin, yachi aidaujai ujakui, tusa uchiji ujaam apaji chichajak:

“¿Wajimpaya dusha nunin kajaabaush? ¿Wika amina dukujai, ashí yatsum aina nunú aatsan amina tikishmatjan ememattinaijtjam?” tiuwai.

<sup>11</sup> Nuadui niina yachi aidau senchi kajejuidau. Tujash niina apajig wajuk asag nunash nuni kajamjae tusa kuashat anentaimu.

*Josén niina yachiuchiji aidaukujukagbau*

<sup>12</sup> Makichik tsawantai José yachi aidau ditá apaji uwigi ayujatnun chijichin egainak Siquemnum shiyakajui.

<sup>13</sup> Nunik shiyakmatai pujusa Israel Josén chichajak:

“Amina yatsum aidau uwijan kuitamainak Siquem batsata nunú wejim diista”, tiuwai.

Tama José ayaak:

“Ayu apawah, ame tame nunak imatiksasuk umiktajai” tiuwai.

<sup>14</sup> Timatai Israel: “Ayu wetá, nunika jegaam yatsumesh wajuk batsatainawak nunú diista, nuniakum uwig aidauishkam diista. Dutikam ditash wajintuk chichainawa nunú minash taam ujatkata”, tiuwai.

Tusa, José Hebrógka pakajin pujaun Israel akupkauwai, dutika akupkam Siquem wekama,

<sup>15</sup> wagaka wainak wekaetatman makichik aents wekagu wainak iniak:

“¿Waji egakmea amesh wekaeme?” tiuwai.

Tama José ayaak:

<sup>16</sup> “Wika mina yatsug aidau egajai” tiuwai. Tusa nuna iniak: “Wait aneam minash ujatkata tuwi dekaskesh uwijan kuitamkush batsatua”, tau.

<sup>17</sup> Tama nunú aents ayaak:

“Amina yatsumik juwig atsuinawai, juwi batsatu ukuak shiyakmae, tuja dita chichainak, Dotágnum weagmi tuidau antukmajai”, tiuwai.

Tusa tima Joséshkam yachi aidau egak yaakat Dotágnum jegauwai, nunik nuwi yachi aidau batsatun wainkauwai.

<sup>18</sup> Nuwi jegattak wegaun, yachi aidau wainkag, maami tusag eke jegatsaig chichaman umigkaju ainawai.

<sup>19</sup> Dutika umigkaju asag chichainak:

“¡Diisjua au kajamkagtinuwe nunú minawai!” tuidau.

<sup>20</sup> Nuna tusag: “Kaunatajum maami, dutika waanum egkea ajapami. Dutika iina apaji jegaji ujakuishkam, ikamia kuintin yuwae timi. ¡Dutika ajinish nii kajamkagtugbauji aidaush wajuk uminkatig!” tuidau.

<sup>21</sup> Tusa tuidau Rubén antuk ayamjuktajai tusa chichaak:

“Dekas tikima mautak maachmi”, tau.

<sup>22</sup> Nuna tusa nuigtu chichaak: “Ayatak mautsuk, juju uwegshunum waa awa juwi egkeatajum, tujash makichkish awattsuk egkeatajum”, tiuwai. Rubén juna tiuwa nunak niina yachin uwemtikag juki apajin awagkitatau asa tiuwai.

<sup>23</sup> Tusa imatu batsatai Joséshkam niina yachi aidau batsatbaunum jegantui, nunittaman jáanch nugkuagbaujin awituk jujukiag,

<sup>24</sup> achika jukiag waa yumi atsamunum egkeawajui.

<sup>25</sup> Dutika waanum egkea idayinak, yutain yuwinak batsatu, nunik batsatu niimsatakama Ismael aents aidau Galaad nugkanmaya camelloji aidaunum kugkuin bálsamo tutain, kugkuin mirra tutai aidaun aatus yajuakag Egipto nugkanum shimuidaun wainkajui.

<sup>26</sup> Nuna wainak Judá niina yachi aidaun chichajak:

“¿Waji imana jukittaji iina yachi, maa uuka idaikuish?”

<sup>27</sup> Dekas ayatak juki Ismael aents shima au sumakta tusa sujukmi, dutikaku tikima mautak maachmi, iina yachiya jamah”, tiuwai.

Tusa tama tikich yachi aidaushkam duke ati tusag tiajui.

<sup>28</sup> Nuadui Madián aents waji sujín aidau nagkaemainai, José yachi aidau waanmayan jiiki jukiag diitai sujukajui veinte kuichik plata najanamun juwinak. Dutikawagmatai dita sumak jukiag Egipto nugkanum egawajui.

<sup>29</sup> Dutika sujuk awemaju ai, Rubén wakitki taa waanum José egkeamun jegantun diikma atsaun wainkauwai, nunik jáanchjin japiki ichigkui wake besemag dekaepamunum.

<sup>30</sup> Nunik wakitki yachi aidaun chichajak:

“¿Uchik atsawai! ¿Yamaish wisha wajukatjaki?” tau.

<sup>31</sup> Tusa tutaish pachitsuk idayinak, José jáanchji awitka jujukbaun jukiag, chivo tsakatan maawag nuna numpejai jáanchin numpeajajui.

<sup>32</sup> Nuna dutikawag ditá apajin akuptukajui, dutikamun juki ejetuawag chichajuinak:

“Juju wainkaji ame shiig diista, amina uchigmi jáanchjichuashit”, tiajui.

<sup>33</sup> Tama Jacob diistakama niina uchiji nugkutaijin wainkauwai, nunik chichaak:

“¿Ehe juju jáanchia juka mina uchigdauwai!” tiuwai. Tusa chichaak: “¿Kuntin kajen pegkegchau aina nunú yuwae imatika shiig ichiajana!” tau.

<sup>34</sup> Nuna tusa Jacob niina jáanchjin japiki ichigkui, nunik wake besemag dekapeaku nugkutain ngkujui. Nunik pujus uchijin aneak kuashat tsawantai tuke buutú pujau.

<sup>35</sup> Imani pujutai ashí niina uchiji aidau, nawanji aidaujai anentain ichichtuinak kautuawajui. Tujash nigka dakitau anentaijun ichichtujatnume tusag. Nuniau asa: “¿Wika tuke buu buutkawa jakan niijai wainiakun, duwi wake besemag dekaepamugnag nagkaankattajai!”, tiuwai.

<sup>36</sup> Tuja Madián aents aidauk dita sumaku ainayatak, Egipto nugkanum egawag suntag yaaktan utuawainum tusa kuitamin aidaun apuji faraógka atuwe Potifar aajakua nuwi sujukajui.

## 38

### *Judá Tamarjai pachisa augmattsamu*

<sup>1</sup> Tikich tsawantai Judá niina yachin ukuak weuwai makichik aents Hirá daagtin yaakat adulamnumia aajakua nuna jeen pujustatus

<sup>2</sup> Nuwi jegaa pujus canaágnnumia aents Súa aajakua nuna nawanjin wainak nujai nuwenauwai. Nunik pujusa,

<sup>3</sup> ejapmitkakui, dutikam pujus tsawanji jegajim aishmagkun uchigmakui. Nunikmatai Judá uchiji daajin Er adaikauwai.

<sup>4</sup> Nuna uchigmak pujus ataktu ejajjuk uchigmakmatai nunak Onán adaikauwai.

<sup>5</sup> Nuigtushkam ataktu ejajjuk uchigmak nuna untsu Selá adaikauwai. Nunak Judák yaakat Quezib pujai uchigmakui.

<sup>6</sup> Nuwi pujus Judá niina uchiji iwai Er aajakua nuna nuwa Tamar daagtinjai nuweauwai.

<sup>7</sup> Tujash Era pujutjig Apajuí emtinig shiig pegkegchau aajakui, nuniau asantai, Apajuí niina pujutjinak jujukiuwai.

<sup>8</sup> Dutika jujukim jakamtai Judá Onágkan chichajak:

“Ame yatsumin nuwe wajemea au jukim, yatsum uchi akiitsuk jaka nunú uchi akiintuata, dutikam aminiya niina uchiji wegantu aidaush yujakti”,\* tiuwai.

\* **38:8** Judío aents aidaunmak yachi jakamtaig, nuna nuwen tikich yachi juki uchi akiamua duka jakauwa nudau uchik aajakui.

<sup>9</sup> Tujash Onágkak nii uchi akiamua duka niinuchu agtinun dekau asa, yachi nuwe wajejai tsaniakush ejapmitkakaig tusa kuitamamajakui. Nunak nii akiamunmaya yachi uchiji wegantu aidau yujakai tusa dakitak nuníjakui.

<sup>10</sup> Nunittaman Apajui wainak shiig pegkegchau diisui, dutikau asa niinashkam dutiksag wamak pujutin jujukuiwai.

<sup>11</sup> Dutikam jakamtai, Judá niina uchiji nuwe Tamar aajakua nuna chichajak:

“Yamaik wajemeaume, junismek amina apa jeen weme pujusta, mina uchig Selá tsakagti”, tiuwai. Tusa tima Tamarshakam niina apaji jeen wee pujusui. Nunak Judá anentaimas tikich yachi aidau jakaja nunik jusha jakachaintash, tau asa tiuwai.

<sup>12</sup> Tuja kuashat tsawan nagkaemakui ai, Judá nuwe Súa nawanji aajakua nunú jakauwai. Nunik nuwe jakamtai wake besemag pujamun sakapag niina kumpaji Hirá adulam aents uyuuntsam yaakat Timnatnum niina uwigji ujen tsupijuinak batsatbaunum weuwai.

<sup>13</sup> Tuja Tamarchakam niina aishi aajakua nuna apaji yaakat Timnatnum niina uwigji ujen tsupijak wee tabaun dekauwai.

<sup>14</sup> Nunik dekaa waje nugkutai nugkuagbaujin awimak ukuak, waitkainum tusa jáanchin juki dukumak yapin ejak, jinta Timnat wetainum ayaumas yaakat Enaim awa nuna waitaijin ekemsauwai. Nunak Selá tsakaju aigkiap awi nemakta tsagkesh tujtchae tusa nunikui.

<sup>15</sup> Nunik ekematman Judá wainak, yapiin dukuka eketu asamtai, juka nuwak wainka takatai aina nuwapi tiuwai.

<sup>16</sup> Nuadui niina uchiji nuwe aajakua nuwapi tachau asa jegantun chichajak:

“¿Minash wi amijai aankatjai taish ayu tujutmainchaukaitam?” tiuwai.

Tusa tama nii ayaak: “¿Tujash ame mina dutijakmesh waji minash sujustatme?” tiuwai.

<sup>17</sup> Tusa tama Judá ayaak:

“Makichik chivo tsakatan awetijame”, tau.

Tama nuwa ayaak: “Ayu, dekas takumek makichik waji ukugtukta, ame nunú chivo tsakat awetujiamin nuna juwakun awagtuktagme”, tau.

<sup>18</sup> Tusa tama Judá iniak:

“¿Tujash wajina ukugtukti tusamea wakegame?” tau. Tama nuwa ayaak:

“Ame patakumtaijum, nugkutaijum, nuigtu numi amina ushujutaigmia nunú aatsa ukugtukta”, tiuwai.

Tama Judá ayu tusa ashí susa nuadui nijai tsanigkui, dutikam Judá uchijin ejapjukui.

<sup>19</sup> Nunik Tamar wakitki jeen jegaa, jáanch dukumakbaujin juki ukuak, wajemea nugkutain nugkug pujusui.

<sup>20</sup> Nunik pujai Judá niina kumpaji adulam aentsun chichajak:

“Ame makichik chivo tsakatan amasmatai jukim nuwa ejetuam suwakum, mina wajig aidan susan ukukmayag nunú segam itagtuata”, tusa awemauwai. Tusa tima niina kumpaji nuwan jegajua susatakama wainkachui.

<sup>21</sup> Dutika wainkacha nuwiya aents aidan iniak:

“¿Tuwi pujawa nuwa wainka takatai Enaimnumia jintá ayaumas pujuma dusha?” tau.

Tama dita ainak:

“Juwig nuwa wainka takataig makichkish shiig atsawai”, tiaju.

<sup>22</sup> Tusa tima Judá pujamunum wakitki jegaa chichajak:

“Nuwanak shiig wainkachmajai, awiya aents aidashkam juwig nuwa wainka takataig shiig atsuwe tujutiagmae”, tau.

<sup>23</sup> Tusa ujaam Judá ayaak:

“Nunú waji aidauk niini juwakti, tikima shiig dushikiam aig; wika chivo tsakatan amastajai tibaugnak awetijai, tujash amesh wainkachu asam susachume”, tusa idaisauwai.

<sup>24</sup> Nunik idayas pujus kampatum nantu nagkaemai, Judán kautuawag chichaman ujainak:

“Tamar amina uchigmi nuwe aajakua duka wainak aentsjai takama wekaekama ejapjuke”, tiaju.

Tusa tama Judá senchi untsamak chichaak:

“¿Nuwak jiiki jukijum apeatajum!” tiuwai.

<sup>25</sup> Tusa timatai jegaji juwam, niina aishi aajaku apajin chichaman akuptak: “Wika juju wajin takakag judaun ejapjukjai. ¿Amesh juju diisiah, jusha patakumtai, nugkutai, numi ushujutain wi takakag jusha yanawaita?” tiuwai.

<sup>26</sup> Nuna dekaa nuigtu niina wajijin wainak wajaka Judá chichaak:

“Niig dekas shiig anentaimui, midauwai utugchata duka, wagki wi mina uchig Selájai nuweachbau asa junak jutijuae”, tusa ayatak idaisauwai.

Nuadui ataktu awagkig nuwanak makichkish wejichui.

<sup>27</sup> Duwi pujus Tamar uchigmati jegamtai, jimag uchi aishmagkun uchigmakui.

<sup>28</sup> Dutika uchigmam makichik uchi uwejen eemtika jikuiwai. Dutikamtai uchi uchigmatkau uwegnum hilo kapantun tsujig juki jigkauwai. Dutika chichaak: “Juju dekatkauk akiinae”, tiuwai.

<sup>29</sup> Tujash nunú uchik niyá akiinachui ayatak kuntujin awagkiuwai, nuniai niina yachi tikich emak akiinauwai. Nunikmatai uchi uchigmatkau chichaak: “¿Amesh wajuk eteemamea jiinkiume?” taku nuna daajin Fares<sup>†</sup> adaikauwai.

<sup>30</sup> Nunú akinamtai uchi uwegnum jigkamushkam akiinauwai. Nunikmatai nunak Zérah<sup>‡</sup> adaikauwai.

## 39

*José apu Potifara nuwejai pachisa augmattsamu*

<sup>1</sup> Josén Ismael aents aidau sumakag Egipto nugkanum ejegawajui, dutikawagmatai nuwiya aents Potifar daagtin sumakui. Potifarak suntag yaakta utuawainum tusa kuitamin aidau apuji, faraógkan atuwe aajakui.

<sup>2</sup> Tujash Josénak Tuke Pujuu kuitamajakui. Dutikamu asa nii egiptunmaya aentsu jeen pujus takasua duwik pegkeg pujusu.

<sup>3</sup> Nuadui niina apujishkam anentaimas, Tuke Pujuuwap junak dekas yayawa dutikamu asampap takat susamash shiig umika emawa tiuwai.

<sup>4</sup> Nuadui Josék apu shiig anentam asauwai, duwi Josénak ame dekas mina jegajuiya aina nunú kuitamin ata tusa ashí niina wajiji aidaukan susa idaisauwai.

<sup>5</sup> Apu Potifar ashí niinu aidaukan Josén ame yamaik diista tusa susamunum nagkamas, Tuke Pujuu Potifaran pegkegnum yaigkui, dutikak niina jenianash, ajajinianashkam aikasag kuashat ikauntukui.

<sup>6</sup> Imatikamu asa, Potifarak shiig kajitus, Josénak ashí niinu aidaukan idaitusui. Dutikau asa niig ayatak yuwatnujinak anentaimtujaku.

Josék shiig iwajamu, yantsaptin wajakin aajakui.

<sup>7</sup> Iman asamtai, tikich tsawantai apu Potifaran nuwe Josén senchi wakejukui, nunik makichik tsawantai chichajak:

“¡Iijai kanagmi!”, tiuwai.

<sup>8</sup> Tujash Josék dakitau asa niina chichajak:

“Amesh anentaimsata, mina apug shiig kajitus ashí niina jenia aidaukan mina idaitugsau asa, nigka makichkish puyatjutsuk shiig aneas pujawai.

<sup>9</sup> Tuja juju jega juwig tikich aents mina nagkaetasuk atsawai; makichik wajigkesh wi takamainchauk atsawai, ima ameketme wi atimainchauk, wagki niina nuwe asam. Nunin aish, ¿wisha wajuakeknuk amejai kanaknush Apajuí emtinish pegkegchaunash takastaja?” tiuwai.

<sup>10</sup> Tusa tamashkam nuwak Josénak antugtsuk kashi kashinig iijai kanagmi tusa waitkau. Imatjamashkam Josék nuwa chichamenak antugkachui.

<sup>11</sup> Tujash makichik tsawantai José niina takatji aidaukan umiktatus jegaa wayauwai. Nunik wayaun makichik aentskesh nuwig atsau asamtai,

<sup>12</sup> nuwa Josén jáanchjin achika emetua chichajak:

“¡Iijai kanagmi!” tau. Tujash Josék dakitau asa tupikaki jiinak, niina jáanchjin awimak ukuiuwai.

<sup>13</sup> Dutika jáanchin awimak ukukmatai, nuwashkam nunú jáanchin juki wajan,

<sup>14</sup> nunú jeganum tikich inak aidau batsatun untsuka ikaunman chichajak:

“¡Diistajum atumesh, mina aishug hebreo aentsun juwi itagtamama nunú, iina dushiktamak mina jutijawai! Juwi tajutua iijai kanagmi tujutkui, wi dakitakun senchi untsumajai.

<sup>15</sup> Tusa imatai ¡tupikak jáanchjin awimak ukuak jiinki wemae!” tau.

<sup>16</sup> Tusa ashí etsejuk idayak, José jáanchjin juki ukus pujai niina aishi, José apuji aajakua nunú tauwai.

<sup>17</sup> Nunikmatai nii tikich aentsun ujaak chichakbaujinak, imatiksag aishinashkam ujaak:

<sup>†</sup> 38:29 “Fares” tawa duka hebreo chichamnumak “eteema jiinkiu” taku tawai. <sup>‡</sup> 38:30 “Zérah” tawa nunak hebreo chichamnumak “winchamtin” taku tawai.



"Ame hebreo aents\* inagtajai tusam itamum nunú mina kanutaijui wainjua waitkagsae.

<sup>18</sup> Tujash wi senchi jiika untsumai, tupikaki jiinak niina jáanchjin awimak juwi ukukmae.

<sup>19</sup> "Juna aatus amina inakem waitkagsae", tau. Tusa ujakam José apujishkam niina nuwe chichaak aatus waitkagsae tabaun dekaa senchi kajekui.

<sup>20</sup> Nunik kajeka Josén achik juki aents achika chimpitainum apu inake aidau achikam chimpijunum egkeauwai.

<sup>21</sup> Dutika egkeawagmataishkam Tuke Pujuu Josénak tuke kuitamu, nuadui achijatka chimpitai kuitamnun apujishkam niinak shiig anenjauwai.

<sup>22</sup> Dutikak aents achika chimpitainak, ashí aents achikam chimpijujai Josén ame ashí kuitamkata tusa idaitusui. Dutikamu asa nuwi chimpimas takajaku aina nunak José diijakui.

<sup>23</sup> Aents achika chimpitain apujig Josén ashí idaitusu asa, nigka nunak puyatju-jakchauwai. Wagki Josénak Tuke Pujuu kuitamajakui. Nuadui niina takatjig shiig pegkeg aajakui.

## 40

*José jimag aents kajamkagtugbaun ujakbau*

<sup>1</sup> José achikam pujai, faraón uwagtinun vinon shikika su aidau apuji, pagka najanin aidau apujijai faraógka chichamen betek umigkachajui.

<sup>2</sup> Nunikagmatai faraón uwagtinun shikika suu aidau apujin, pagka najanin aidau apujijai mai kajekuk,

<sup>3</sup> achika apu Potifara jeen aents achika chimpitainum, José achikam egketunum, nuwi ditanashkam chimpiauwei.

<sup>4</sup> Tuja aents achika chimpitain apuji Josén chichajak: "Apu faraógkan inake aidau achika egkeag juju ame ashí diista", tusa niina idaitusui. Dutikamu asag kuashat tsawan nuwi pujusajui.

<sup>5</sup> Nuwi pujusag, faraógkan umutain shikika suu aidau apuji, pagka najanin aidau apujijai mai kajamjajui maki makichik dita wajukawagtinuk ayanme nuna.

<sup>6</sup> Nunik kajamag tsawajag batsatai, José kashikmas weji diikma wake besek pekajun wainkauwai.

<sup>7</sup> Dutika wainak ditan iniak:

"¿Wagka wake besekjumesh pegagjume?" tau.

<sup>8</sup> Tusa tama dita aínak:

"Kajamkagtugji, nunika wajukatnuk aannush kajamjaji, yaki ujakainta tusa anen-taimku pegagji", tuidau.

Tiagtai José ayaak:

"¿Dekas Apajuichukai atum aan kajamjaujum nuna ujakamainuk? Wajuk atum kajamjaujme duka mina ujakatajum", tiuwai.

<sup>9</sup> Tusa tima apu uwagtinun shikika suu aidau apuji, nii kajamjamun ujaak:

"Wi kajanum makichik uva numiji uva numiji tsapai wajaun wainkamjai.

<sup>10</sup> Tuja nuna kanaweg kempatum ajime. Nunú kanawe aina nuwi jeeka yagkujime, nuniak niina yagkujiya duke neje najanea tsamame.

<sup>11</sup> Nuniai wi faraógka umutaijin takusa wajasan uvan juukan apu shikika sutainum nuna ijujan jukin wiki apu faraógkan sumajai", tusa ujakui.

<sup>12</sup> Tusa ujakam José chichajak:

"Ame kajanum kempatum kanawe wainkaum duka, kempatum tsawan atina nunú kajamjaume.

<sup>13</sup> Tuja kempatum tsawan asa, apu faraón atumin itugchatjumin diigtamsattawai, nunik aminak ame takataigminig ataktu awaintamattawai, dutijamantai ame yaunchuk apu faraón niina umutaiji umigkam suyum dutiksamesat sutatme.

<sup>14</sup> Tuja wi tajam nunú betek uminkamtaig, minash wait aneam anenjata kajimatkim idaitutsuk, nuniakum mina pachittsamesh faraón ujakta minash jügkiti.

<sup>15</sup> Wika hebreo aentsuitjai nuniaig minak kasamjukag imajui itajuawagmayi, duti-juawagmatai pujai, makichik pegkegchaunakesh takamsachu aig, juwi egketuawagmatai pujajai", tiuwai.

<sup>16</sup> Nuna aatus José tikichin betek ujakmatai, pagkan najannun apujishkam Josén nii kajamjamujin ujaak:

\* 39:17 "Hebreo aents" tawa nunak, hebreo chichaman chichau asagmatai timauwai.

“Wishakam kajanum kampatum chagkin yaignum pag puju aidau aimkamun ya-juakan mina buukeajui ekenjamjai.

<sup>17</sup> Nunú chagkin kampatum mina buukjui ekenbauwa nuwiya pag shiig pegkeg yumimitu najankamu faraógdau chimpijun chigki aidau kaunak yuwagmae”, tusa ujakuí.

<sup>18</sup> Tusa ujakam José ayaak:

“Ame kajanum kampatum chagkin yaijuch aidaun mina buukeajui ekenjai tame duka, kampatum tsawan atina nunú kajamjaume.

<sup>19</sup> Kampatum tsawan asa faraón amina itugchatjumin diigtamsattawai, nunik jiigmaki numi muunnum aminak jigka detama buukmin tsupigtamak mantamattawai, dutijamantai amina iyashminak chigki aidau yuwawagtatui”, tiuwai.

<sup>20</sup> Tusa ujakajam batsamas kampatum tsawantan ejegainai, faraón nii akiinamujj tsawan tsawagmatai, ipaama yutain umika yuwinak batsamas, ashí nii ipaamu aidau emtin makichik aentsun awemauwai nii uwagtinun shikika suu aidaun apuji, pagka najanin aidaun apujjai, achikam chimpija nunú jiikjum utitajum tusa. Tusa akupkam jegajua jiiki juki itajuauwai.

<sup>21</sup> Dutika itajuam nii uwagtinun shikika su aidaun apujinak ataktu yaunchuk takajakbaujning awayauwai. Dutikam niig faraógka shikijuk suwak wekagu.

<sup>22</sup> Untsu pagka najanin aidaun apujinak suwenum jigkajum numinum nenajum maatajum tusa tiuwai. Tusa timatai dutiksag maawajui, José tibaunak imatiksag.

<sup>23</sup> Tujash umutain shikika apun su aidaun apujig José akatjamunak kajimatki pachitsuk idaisauwai.

## 41

### *Faraón kajamkagtugbaun José ujakbau*

<sup>1</sup> Faraógka umutain shikijuk su aidaun apuji achikam pujaun jiikiajua duwi nagkamas jimag mijan wegai, makichik tsawantai, faraón niishkam kajanum namak Nilonum uwet wajamujin kajamjauwai.

<sup>2</sup> Nunú namakia siete baka duwejam pegkeg aidau jijnag chijichi namaka tugkitkenian yuwinak ijunun kajamjauwai.

<sup>3</sup> Nuniai tikich siete baka aidau watsaku pegkegchau tsumain aidau jijnag, tikich baka duwejam aidau chijichin yuwinak ijunbaunum jegantatak nuna ukujin namaka tugkitken ijuntsauwai.

<sup>4</sup> Tuja nunú siete baka watsaku pegkegchau tsumain aidau, tikich siete baka duwejam pegkeg aidau ijuntatman shiig wamak yuwa amukajui.

Nunú nunidaun faraón wainak shintajui.

<sup>5</sup> Nunik shintaag tepau ataktu kanukma tikichin kajamjauwai: Untsu duwi wainkauwai trigo makichik numitak sieteya imajin nejen nejeka mantamas wakemain wajas wajattaman.

<sup>6</sup> Tuja nuna ukujin tikich trigo sieteya imajin nejentin tujash dase umputai asa neje tsejgkush kagaku aidau jiiniajui.

<sup>7</sup> Nunik dasen umputai asa kagaku tsejgkush aidau, tikich trigo pegkeg siete nejen mantamas wajaun wamkes yuwa amukui. Dutiktatman dii pujau shintaag, kajanmap junikja tiuwai.

<sup>8</sup> Nunik nuna kajanum wainak puyatuk ane anentaimkawa tsawag kashikmas, Egipto nugkanmaya anentaimas dekamin aidaun yacha aidaujai untsuka ashí ikaunmauwai. Nunik kaunamtai faraón nii kajamjamujin ditan ashí ujakuí, tujash makichkish nunú nuniktin aan kanajume tusag ujakchaju ainawai.

<sup>9</sup> Dutika tujinkagmatai apu uwagtinun umijuk su aina nuna apuji, faraógan chichajak:

“Yamai wi umikchamujun adeajag nuna ujaktajame.

<sup>10</sup> Ame apuh, kajekam pagka najannun apuji wijai achigkam apu Potifara jeen aents achika chimpitainum mai egkejatuawamin pujusa,

<sup>11</sup> kanamunum pagka najanin aidaun apuji kajamkagtujabi, nuniai wishakam antsanuk nunú kashia duwik kajamkagtujamijai, nunú jimag kajamkagtugbauwa duka maki makichik nagkaemaktinji ajuyi.

<sup>12</sup> Nunika kajamja, yaki ujakpak tusa pujajin nuwi makichik datsauch hebreo aents, aents achika chimpitain kuitamin aidaun apuji inaku waitkatai aajakua nunú achikam pujau waipakmatai, nii ujakabijai. Dutika ajin wajukatnuk dusha aan kajamjabijai nuna nii betek ujakpakabi.

<sup>13</sup> Tuja nii tujabauk imanisag uminkabi, duwi wika ataktug mina takatug aajakunmak wayamiai. Untsu tikichnak suwenum jigka nená maawagmayi", tusa ujakuí.

<sup>14</sup> Tusa ujakam faraón chichaak:

"José utitajum" tusa awemauwai. Dutikam jegajua José achikam egketun wamkesag jiikiag awajajui. Dutikawag jáanch pegkejan yapagmamamtai jukiag faraógkai ejegawajui.

<sup>15</sup> Dutika ejegawagmatai faraón chichajak:

"Wi kajamkagtujan, wajukatnunik juni kajamkagtugja tusan ashí inimsajai, tujash makichkish ujatuinatsui. Nunika pujai amina au kajanmayan shiig etsegmayi tujamainakuí untsukjame", tiuwai.

<sup>16</sup> Tusa tama José ayaak:

"Apuh, wika wikik tumaitsujai, ¡Apajuí minai pujau asa nii dekaskea nuna ujakpakti!" tiuwai.

<sup>17</sup> Tusa tima faraón nii kajamjamujin José n ujaak:

"Kajanum namak Nilonum uwet wajamjai,

<sup>18</sup> nuniai nunú namakia siete baka dekas pegkeg duwejam aidau jiiinag namaka tugkitkenia chijichi ayaun yuwinak ijunun wainmajai.

<sup>19</sup> Nuniai tikich siete baka tsumain watsaku aidau jiiinag, nunú baka duwejam ijunbaunum nuna ukujin ijuntsame. ¡Wika yaunchkesh makichkish ashí Egipto nugka juwiyanak baka watsaju ibau tsumainnak wainkachuitjai!

<sup>20</sup> Nunú siete baka tsumain watsaku aidau, baka duwejam pegkeg aidaun wamkesag ashí yuwawag amukagmae.

<sup>21</sup> Dutika yuwawajash yuwachua nunik yama jiiinainak tsumain watsaku aajakbaunak nunisag ijuniagmae.

"Nuna wainkan paantapi tukaman shintagmajai.

<sup>22</sup> Untsu ataktug kanukman tikichin kajamkun, wainkamjai makichik trigonmayag sieteya imajin nejek nejen mantamas wakejumain wajas wajaun.

<sup>23</sup> Untsu tikich nuna ukuujin dushakam sieteya imajin nejekuwe, tujash dasen umputai asa neje tsejegkush kagaku aidau jiiinag asagmae.

<sup>24</sup> Nunú kagaku aidau tikich dekas pegkeg nejen mantamas wajaun wamkes yuwa amukagmae. Nuna pachisan dekamin aidaun ashí ujakmajai, tujash makichkish nunú nuniktin aan kajamjaume tusag ujatkachaje", tau.

<sup>25</sup> Tusa ujaam José faraógkan ayaak:

"Apuh, ame jiiinag kajamjaum duka makichkia duke. Nunak Apajuí nii dutikatnugin aminak iwaintugmake.

<sup>26</sup> Siete baka pegkeg duwejam aidau kajamjaum duka siete mijan atin kajamjaume, tuja siete trigo pegkeg kajamjaum dushakam nunisagke.

<sup>27</sup> Tuja siete baka watsaku tsumain aidau baka duwejam aidau ukujin jiiinag ijuntsau wainkaum dushakam siete mijan atin kajamjaume. Tuja makichik trigonmaya sieteya imajin nejentin tujash dasen umputai asa neje kagaku aidau wainkaum dushakam siete mijana nunuwai. Juwai siete mijanai nujan tepeatta nunú.

<sup>28</sup> "Tuja wi amina tijam nunak betek Apajuí nii dutikatnugin amina iwaintugmake.

<sup>29</sup> Siete mijanai ashí Egipto nugka juwig kuashat ajakma juwamu atatuí.

<sup>30</sup> Untsu nunú mijan nagkaemaig, nuigtushkam siete mijana imajin nujan tepeattawai. Nunikmatai nujantai senchi waitiamu atatuí. Nuniau asamtai, ashí Egipto nugkanum tajimat batsamajaku aidaush senchi waitiagtatuí, wagki ashí nugkanum yumain atsau asamtai.

<sup>31</sup> Imanik shiig senchi yapajut tepeau asamtai, yaunchuk ajakma yuujakbauwa duka shiig atsuttawai.

<sup>32</sup> Mina apujuh, ame mai numamtinuk kajamjaum nunak Apajuí nii umiktata nuna dekas aik iwaintugmake. ¡Duka imanisag shiig wamak uminkattawai!

<sup>33</sup> "Nunú nuniktin asamtai, mina apujuh, ame aents yacha shiig anentaimkau diisam etegkam Egipto nugka juwi apusata nuna diistin.

<sup>34</sup> Nuadui mina apujuh, ame juju aatsa umikta: Adaijata nugká apuji aidau, dutikam dita ashí Egipto nugkanum yujasag ajak juukbaunmayan cinco saco aimkamu ataik makichik, tuja dieznumian jimajan aatus yaju yajumainakua, jeganum utuaktinme siete mijana duwi.

<sup>35</sup> Trigo senchi nejet mijan atata nuadui juukag ashí yaakat aina nuwi ijumjatnume. Duka amina chichamjuminig kuitamkamu ati, yapajut tepeamtaish nuwiya juki aents aidau ayugnatin asamtai.

<sup>36</sup> Aatus trigo ijumjamu asamtai, Egipto nugkanum siete mijadai yapajut tepeamtaish nuwiya juki, juju nugka juwiya aents aidau ayugnati nujantai jinawainum", tiuwai.

*José Egipto nugkanum apu wajasa inamjamu*

<sup>37</sup> Tusa José timatai, faraón niina inake aidaujai nuna antukag shiig wakejukajui.

<sup>38</sup> Nunik faraón niina inake aidauun chichajak:

“¿Juju aentsun Apajuín Wakani aja imajush tikich aentsush igkumainkait?” tiuwai.

<sup>39</sup> Tusa Josén chichajak:

“Amina Apajuí yaimpasmatai yachaitam imanuk tikich aentsuk juwig shiig at-suinawai.

<sup>40</sup> Ame wi pujusa inamtaijui pujusa inamjata, nuniamin ashí mina aentsug aidauk ame tabaun umigtamkatnume. Untsu ima wiki apu ekemtaijin eketu asan amina wagagkau atatjai”, tiuwai.

<sup>41</sup> Nuna tusa: “¿Nijah, wi amina juju nugka Egiptua juna apuji ati tusan adaijame!” tiuwai.

<sup>42</sup> Nuna tusa apu faraón niina patakumtaijin juki Josén patakauwai. Dutika patakua chichaak: “¿Jáanch shiig pegkeg lino najanamu jukijum apegatajum!” tima dutiktag apegawajui. Dutikak nugkurai oro najanamunashkam anujajui.

<sup>43</sup> Dutikawagmatai niina tikich carrojin ekeniuiwai, dutika ekeni aents aidauun chichajak: “José eme anentakjum tikishmaja pujusjum senchi unsumkajum: ‘¿Yamaik iina apujig juwai!’ titajum”, tiuwai. Tusa tiam ashí aents aidauk tikishmag pujusag unsumaidau. Aatus faraón Josénak apu adaijauwai, dutikam nii Egipto nugkanum inamjauwai.

<sup>44</sup> Tuja duwi pujus faraón Josén chichajak:

“Witjai dekas apu faraón chichame antugtainuk, tujash yamaik ashí Egipto nugkan-maya aidauk amina chichamjumin antugtamiagtatui, makichik aentskesh intimjut-pakchagtatui”, tiuwai.

<sup>45</sup> Tusa faraón José daajin yapagtua amek yamaik Safenat-panéah ata tusa adaijauwai. Dutika sacerdote Potifera yaakat On tawa nuwiya aajakua nuna nawanji Asenat aajakua nujai nuweauwai. Dutikam nuadui José ashí Egipto nugkanum wekagas inamjauwai.

<sup>46</sup> Josén jukiag faraón pujamunum ejegawaju aina nunak treinta mijanji ajai dutikau ainawai. Dutika apu adaijam faraón pujamunum pujau jünki, Egipto nugkanum yaakat aidau diyak weuwai.

<sup>47</sup> Tuja siete mijanai ajak aidauk shiig kuashat nejeauwai,

<sup>48</sup> imaniku asantai, José ashí nugkanum trigo juukbau aidauun siete mijanai yaju yajumkawa maki makichik yaakat aidauunum ijumjauwai.

<sup>49</sup> Josék trigonak nayantsa kamatkajijai betek ijumjauwai. Imatikamu asa dekapamainchau asantai dekapachui.

<sup>50</sup> Tuja eke yapajut nagkamnatsaig José jimag uchin niina nuwe Asenatai akiauwai.

<sup>51</sup> Yama nagkamchaku akiamujinak Manasés adaijauwai “wi waitiamugnag Apajuí ashí mina pataag aidaujai sakapitkajuae” taku tuu adaijauwai.

<sup>52</sup> Untsu tikich uchiji ekeun Efraín adaijauwai. Nunak “juju nugka juwi pujusan waittsawaitag nunú nugkanmak pujaig, Apajuí minak jimag uchin sujuse” taku tuu adaijauwai.

<sup>53</sup> Tuja siete mijanai Egipto nugkanum ajak aidau kuashat nejek nagkaemakui ai,

<sup>54</sup> nuigtu siete mijanai nujan tepeattawai tusa José tibaunak imanisag uminkauwai. Nuadui ashí nugka aidauunmak nujan tepeauwai, untsu Egipto nugkanmak yumainuk aajakui.

<sup>55</sup> Tuja egiptunmaya aents aidauhkam dita yumainjin amukag faraórgan jegajiang yutain segaidau, dutikam ditan chichajak: “Joséyai wetajum, nunikjum nii wajinjutpatig duke umiktajum”, tiuwai.

<sup>56</sup> Ashí nugkanum yapajut tepeau asantai, aents aidauk senchi waituidau, imaniagtai José trigo ijumjamun ashí ujainiuiwai egiptunmaya aidau sumaktinme tusa, yapajut aan senchi tepea wegau asantai.

<sup>57</sup> Tuja ashí tikich nugkanmaya aents aidauhkam José trigo ijumjamu sumakmi tusag Egipto nugkanum shimujakui, wagki ashí tikich nugkanmakesh yutaig shiig atsau asantai.

## 42

*José yachi aidau yutain sumakagtatus Egipto nugkanum shiyakagbau*

<sup>1</sup> Egipto nugkanum trigo ayawai tabaun Jacob dekaa, niina uchiji aidauun chichajak:

“¿Atumesh wajuakeakjumea pempeentunikjumes ayatkesh niinish batsatjume?”

<sup>2</sup> Mina yamai ujatkaže Egipto nugkanum trigo kuashat ayawai tusa. Aan batsamtsuk atumesh wejum trigo sumakjum utitajum, dutikawagmin nunú, iish yuwami tikima nujantai jinawaig”, tiuwai.

<sup>3</sup> Tusa tima Josén yachi diez aajaku aina nunú Egipto nugkanum trigon sumakagtatus shiyakajui.

<sup>4</sup> Nunik shimiagtaish Jacopak Benjamín José yachi aajakua nunak akupkachui, wagki jusha José megkaekauwa antsag megkaekai tau asa.

<sup>5</sup> Tuja ashí Canaág nugkanmag nujan tepeau asantai, Israela uchiji aidauk tikich aents aidajui ijunag Egipto nugkanum trigon sumakagtatus shiyakajui.

<sup>6</sup> Josék Egipto nugka apuji aajakui, nuniau asa aents tikich nugkanmaya trigon sumaktatus kauntaik nii sujajakui. Nuna sujak pujai, niina yachi aidaushkam jegawajui, nunikag José emtin tikishmajag nijayin nugka antiğ pujusajui.

<sup>7</sup> Nuniagtai José diikma niina yachi aidau wainkauwai, dutika wainkayatak dekachu utugmaina numamtuk senchi chichajak:

“¿Atumesh tuwiyatigmea minagme?” tiuwai.

Tusa tama dita ainak:

“Iik canaágnumiati trigo sumaktasa mininaji”, tiajui.

<sup>8</sup> Tuja Josék niina yachi aidau nak shiig wainkauwai, untsu ditak juka mina yatsu-juapita tichajui.

<sup>9</sup> Nuadui José niina yachi aidau emematam atinun kajamjamun adeajui, nunik chichajak:

“Atumek dekamin ainagme, nunin asajum wajuk utuaik jetemainaita tusajum, dekamatasu yujagme”, tiuwai.

<sup>10</sup> Tama dita ainak:

“¡Atsa apuh! Ii amina inakem aidautik duka nuniatsji, ayatak trigo sumaktasa yujaji”, tiajui.

<sup>11</sup> Tusag: “Ashí ii ainag jutiik makichik aishmagkuk akiamu ainaji. Iik aents pegkeg ainaji, tuja dekamati tusa awemataigkesh ainatsji”, tuidau.

<sup>12</sup> Tiagtai José chichajak: “Atsa, wainkajum tajume, atumek wajuk utuaik jetemainaita tusajum dekamatasu yujagme”, tiuwai.

<sup>13</sup> Tusa tama dita aimainak:

“Jutii amina inakem aidautinak, iina apajig doce akimpakui, tuja iik Canaán nugkanum batsamin ainaji. Tuja makichik iina yachi ekeu iina apajijai juwakmae, untsu tikich iina yachi aajakua duka atsawai, jakauwai”, tuidau.

<sup>14</sup> Nuna aatus tiagtai José ataktu ditan chichajak:

“¡Nijah, juwi tajime! Atumek dekas dekamin ainagme,

<sup>15</sup> tuja yamai dekapsatjime atumesh dekaskeash chichajum: Junak faraógka daajin atum umiktinun tajime. Atum chichaakjum, yatsug ekeu pujawai tajum nunú tatsaigkik juwi pujajum duka shiyakchattagme.

<sup>16</sup> Yamai atum ainajum anuiya makichik akupkatajum, yatsum ekeun utiti. Untsu tikich aidautigmekek juwi achinkajum batsamsattajume, nuni dekaajuattajime atumesh dekaskeash chichajum nunak. Untsu nunú dekaskechuitkuig, dekamin aidauwap tuu yujawa titatjime. ¡Junak dekas faraógka daajin tajai!” tau.

<sup>17</sup> Nuna tusa aents achika chimpitainum chimpia kempatum tsawan batsasui.

<sup>18</sup> Dutika nunú kempatum tsawan nagkaemai ditan chichajak:

“Wika Apajuínak ishamajai, nuadui atumesh wi tajim nunú betek umiktajum, nunikagmin wishakam tsagkujan mausuk idaisattajime.

<sup>19</sup> Atum dekas aents pegkeg ainakjumekek, makichik atumi yatsum juwi ukuktajum, untsu tikich aidautigmekek trigo jukijum wetajum atumi patayi aidau yuwatnume.

<sup>20</sup> Nunikjum atumi yatsum ekeu pujawai tajum nunú itagtuatajum, dutikawagmin dekaskeash chichajum nunú dekaami. Untsu nunú dekaskechuitkuig atumek mantam-nattagme”, tiuwai.

Tusa tama ditashkam ayu duke ati tiajui.

<sup>21</sup> Nuna tusag diták pempeentunikiag chichagdayinak:

“Juka iik iina yachi sujukuitag nuadui jutikam aji. Iina yachi buutak, wait anenjgtajum tusa imatjupakuish, antugsuk sujukuitag nuadui juju utugchata juka igkuaji”, tuidau.

<sup>22</sup> Tiagtai Rubén ditan chichajak:

“Wika juna aneasan uchi maawaigpajum tusa tamaitkujum, minash antugtukchau ayugme; yamai nii maamunum jutika waitkam ainaji, nunú umiaku aatsa dekapjagmi”, tiuwai.

<sup>23</sup> Nuna tusa chichainakush Josék ii chichamunak antawapi tuinachu, wagki nii chichamunak tikich aents etsegtuidau asamtai.

<sup>24</sup> Aatus dita chichainamun antuk, Josék tikich yantamnum wee buutiuiwai. Nunik ataktu wakitki niina yachi batsatbaunum jeganta dita wainbaunum Simeórgan etegka juki egkeatajum tima egkea emetuauwai.

<sup>25</sup> Nuna dutika José niina aentsji aidaun inajui: “Tikich aina auk ditá costaljin trigo aimjgatajum, dutikakjum dita kuichkijishkam jukijum awagtukjum, dita trigo chimpia juwamujin egketuatajum. Tuja jintá wenak yuwawagtinchakam dutiksagmek susatajum”, tiuwai. Tusa inajam imatiksag umikajui.

<sup>26</sup> Dutika umigkam ditá burrojin trigo aimjamun patag jukiag shiyakajui.

<sup>27</sup> Nunik we wenakua dita kajigtinnum jegantag, makichik burrojin ayujatatus costaljin atia diikma wainkauwai trigo sumaku kuichik akikmakbauk imanisag awantak egkemtatman.

<sup>28</sup> Dutika wainak, yachi aidaun chichajak:

“¡Antuktajum, wi kuichkin akikmakmag nunak awagtugkine! ¡Nijah mina costaljui egketana!” tau.

Tutai ashí wainkag senchi puyatuk kujainak pempeentunikiag tudayinak:

“¿Wagka Apajuísh junash jutijamae?” tuidau.

<sup>29</sup> Nuna tusag we wenakua ditá apaji Canaán pujamunum jegawajui. Nunikag dita wekaesa wainkamujinak ashí ujakajui, nuna ujakag nuadui apajin chichajuinak:

<sup>30</sup> “Apu Egipto nugká apuji pujuma nunú iinak shiig senchi chichagtamkame, dutijamak: ‘Atumek dekamín ainagme’, tusa tujamae.

<sup>31</sup> Tusa tujamkui ii ayaaku: ‘Atsa, iik aents pegkeg ainaji, dekamnukesh ainatsji’, tusa timaji.

<sup>32</sup> Tuja nuigtushkam chichagku: ‘Jutiik ashí ijumjamak makichik aents akigbautik doce aayaji; nuniamu makichik megkaekauwai, untsu tikich ekeuwa duka amina aujai Canaágnum pujume’, timaji.

<sup>33</sup> “Tusa tajin nii chichagtamak: ‘Ayu, dekas aents pegkejash ainajum dekapstajime, juwi makichik yatsum ukuktajum nunikjum ujumak trigo jukijum atumi pataim yuwatin ejetuatajum.

<sup>34</sup> Tujash nunú susa ukuakjum atumi yatsum ekeu tajum nunú itagtuatajum. Dutikawagmin duwi wisha aents pegkejap ainawa titajime. Nunú itawagmin wainkan, juju yatsum ukuajum nunashkam jiiiktajai, dutikamtaí atumesh shiig agkan juju nugka juwish yujasminjum’ tujamae”, tuidau.

<sup>35</sup> Aatus apajin ujakag idayinak nuadui, maki makichik ditá costaljin atija diikma kuichik ijiamu aajakuk imanisag chimpimatman wainkajui. Dutika kuichkin wainkag ditá apajijai senchi ishankajui.

<sup>36</sup> Nuna wainak Jacob chichaak:

“Minak atumek shiig uchigtuchu ukugjume. Josésh megkaetugkauwai, Simeóghakam antsag wakitkig taache. ¡Yamai juju mina uchig Benjamín jujutkittagme! ¡Wika mina uchignak megkaejan wegag jama!” tau.

<sup>37</sup> Tutai Rubén apajin chichajak:

“Apawa mina idaitugsata, wi Benjamígnak ayan kuitamsan awagkin itajuatjame. Untsu wi awagki itachmataig, mina uchig jimaja au maata”, tiuwai.

<sup>38</sup> Tusa tama Jacob ayaak:

“Mina uchijuk atumjaig makichkish wechattawai. Niina yachi José jakamtaí ima nigki juwake. Namputchawame jintá weagmin mina uchig megkaekamtaí, wi múuntuch wajas pujag nuna wake besemag dekapeakun buu buutkawa jakuig, duka atumi utugchatji atatui”, tiuwai.

## 43

### *Benjamín juki Egipto nugkanum webau*

<sup>1</sup> Tuja aan nagkaemas nujan tepea wegau asamtai,

<sup>2</sup> yutai sumaka ikaunmamú ashí amuekamtaí, Jacob niina uchiji aidaun chichajak:

“Ataktu wejum trigo sumakjum utitajum, yumain atsugtamji”, tiuwai.

<sup>3</sup> Tutai Judá apajin ayaak:

“Tujash apu iina chichagtamak: ‘Atumi yatsum ekeu tajum nunú itachiatkugmek, juwi ataktu taagmek waitkaigpa’ tujamayi.

<sup>4</sup> Tujabiu asamtaí iina yachi ekeuwa anú jutijai akupeakminig, shiyaka trigo sumaka ikaunmamainaitji.

<sup>5</sup> Untsu ame iina yachi ekeuwa anú awemashkuminig, iishkam yutai sumakuik wechattaji. Apu iina chichagtamak yatsum ekeu itachiatkugmek, juwi ataktu taagmek waitkaigpa tusa tujamayi”, tau.

<sup>6</sup> Tusa tama Israel chichaak:

“¿Wagka minash ibau pegkegchaush itagtuaugme?”

“¿Wagka nunú apush, tikich iina yachi ekeu ajutjamji tusagmesh ujakmaiijume?” tiuwai.

<sup>7</sup> Tama dita ainak:

“Iishkam ujainchawaitku, nii iina patayi aidaun pachis inimpakui ujakmaiiji. Dutika ajin nii inimpak: ‘¿Atumin apash pujawak? tusa ataktu inimpak, ¿tikich yatsumish pujatsuak?’ tusa inimpakui, aus yatsum ekeu itaata tujamti tachau asa ujakmaiiji”, tijui.

<sup>8</sup> Nuna tusag Judá niina apaji Israelan chichajak:

“Apawah, uchik mina idaitugsata nii juki wegagmi, nuniashkuik ashí iina uchiji aidaujui nuigtu, ame aatsa nujantai jinattaji.

<sup>9</sup> Wi niinak kuitamkattajai. Tuja jintá weamunum utugchat nagkaemakmataish, wi nunak umiktajai. Wi juna tiuwaitkun awagkin juwi itashmataig, ashí nunú utugchatak minai juwakti.

<sup>10</sup> Ame sujimá pujachkuminig iik jimajakesh yutai sumaka ikaunmamain wajaji”, tiuwai.

<sup>11</sup> Tusa tama apaji ditan ayaak:

“Ayu, duka nunisag uminkati, tuja nuniktin asamtai, iina nugkenia dekas waji shiig pegkeg aina nunú apu susatin etegja jukitajum: Ujumak bálsamo, ujumak dapa yumiji, kugkuin mirra, nueces, almendra aaja tinamjajum jukitajum.

<sup>12</sup> Nuigtushkam jukitajum kuichik yama nagkamchaku jukibiujum nuni kuashat. Dutikajum kuichkin awagtugmakiagma nujai ijumjajum susatajum, namputchawame dewaka egkeachajiawash.

<sup>13</sup> ¡Ayu yamaik yatsum ekeuwa dushakam jukijum ataktu wetajum nunú aentsjai chichaakjum.

<sup>14</sup> Apajuí ashí senchigtina nunú atumnak yaimpaktinme, dutijamantai apu wait anenjamag yatsumin Simeóghan agkanmitka, yatsum Benjamígnash emettsuk awagkiti. Untsu namputchawame nuna awakeachkuish, wika uchigtuchukesh juwaktin atajai!” tiuwai.

<sup>15</sup> Aatus timatai Jacopa uchiji aidau waji apu susatin aidaun yajuakag nuigtushkam kuichkin yaunchuk jukimun nagkaesau jukiag, Benjamígnashkam jukiag Egipto nugkanum shiyakajui. Nunikag José pujamunum jegawagmatai,

<sup>16</sup> José Benjamíghan niina yachi aidaujui wajaun wainak, aents José jenian kuitamnun chichajak:

“Juju aents aina juju yajuakam mina jegajui ejegata, dutikam baka maam inagkata. Yamaik ditak etsa tutupit ai, wijai yujumkan yuwawagtatui”, tiuwai.

<sup>17</sup> Tusa tima niina inake waji kuitamnuk imatiksag umikui. Dutika nigki aents aidaunashkam yajuak José jeen emauwai.

<sup>18</sup> Tuja yajuaka José jeen emam senchi ishankajui nunik diták pempeentunikiag chichainak:

“¡Junak anagtamak aikagmawai! Ii kuichik akikmakbaun awagtugmakbau egketu wainkabiag nuadui jutijamji, niina inake etami, ashí iina tagkuji aidaujui waitkagmas-tatus”, tuidau.

<sup>19</sup> Nuna tusag jegaa eke waittsuk José wajijin kuitamnun jegaantajui nijai chichastatus.

<sup>20</sup> Nunik jegantag chichajuinak:

“¡Apujuh tsagkugtugta! Ii yaunchuk taamiag duka trigo sumaktasa taamijai.

<sup>21</sup> Tujash nunú sumaku kuichik akikmakmayag nunú ii kanagtinum jeganta costal atia diikma, kuichik ii akikmakbau aajakuk imanisag egketaidau wainkabiagi. Dutika wainkau asa yamaí awagkitasa itaaji.

<sup>22</sup> Tuja nuigtushkam trigo sumaktasa kuichik nuni kuashat itaaji. Untsu yaki kuichkinash awagkish egketjamayawa duka dekatsji”, tuidau.

<sup>23</sup> Tiagtai nunú inak ditan ayaak:

“Wainkajum puyatkaigpajum, aunak Apajuí atumi apa Apajujiya dutsu costaljuminig egketjamayatai, wi atum akikmakbaunak ashí jukimijai”, tiuwai.

Nuna tusa idayak Simeóghan jiiki juki dita batsatbaunum ejentauwai.

<sup>24</sup> Nuna dutika ashí yajuak José jeen utsauwai, dutika yumin juki susauwai nawen dijagtinme tusa, nuigtushkam dita burroji aidaunashkam yutain juki ayugtukui.

<sup>25</sup> Tuja etsa tutupit ai yujumkan yuwak José taatin asamtai, ditashkam nuwi yuwatnunak dekainau asag dakak batsamas niina anentag susatnun umikajui.

<sup>26</sup> Dutikau asag José taamtai, anentag susatin itaamu aidaun jukiag susajui. Nuna suwinak tikishmatjag tsuntsumawag nijayin nugkan antig pujusajui emematuinak.

<sup>27</sup> Nuniagtai José ditan iniak:

“¿Atumesh pegkejak yujajum?” tau. Tusa ataktu iniak:

“¿Atum chichaakjum iina apajig múuntuch wajas pujawai timaijum dusha pegkejak pujuma?” tau.

<sup>28</sup> Tusa iniam eme anentus tsuntsuma chichajainak:

“Iina apaji amina inakmea duka eke jatsui, pegkeg pujume”, tuidau.

<sup>29</sup> Tusa tiagtai José ditan diistakama niina yachi Benjamín nunú nuwanmak akiinawua nunú wajattaman wainak chichaak:

“¿Jukait atum chichaakjum iina yachi ekeu pujawai timaijum nunú?” tau. Tusa: “¡Uchuchih, Apaju! pegkegnum yumigtamsati!” tiuwai.

Juna aatus tusa,

<sup>30</sup> José niina yachin wainak senchi wake besemag buutmain dekapeak, ukuki niina kanutajin tupikaki waya buutiuwai.

<sup>31</sup> Nunik buuti nagkanak yumin juki yapin nijai ataktu jegan niina wajijin kuitamnun chichajak:

“¡Yutai pekastajum!” tusa inamjauwai.

<sup>32</sup> Tusa timatai inak aidaushkam Josénak makichik mesanum ekettsajui, dutikak Jacopa uchiji aidau yuwatnunashkam tikich mesanum ekettsajui. Tuja egiptunmaya aents aidaushkam aantsag ditash kanakag yuwidau. Wagki egiptunmaya aentsuk Hebreo aentsjaig tsanigkag yumainchau asamtai, dutikau ainawai.

<sup>33</sup> Tuja José yachi aidau mesanum pekamainakug iwaiyá ekemsamtai, ekeu aidaushkam nunisag ekemsag pekaamak tsakatnum nagkankauwai, José nuni pekamsati tibaunak imanisag. Nuwi pekamsag anentai jegashmin dekapenak pempeentunikiag niinidau.

<sup>34</sup> Yutai aidaunashkam dutiksag maki makichik pekattsauwai. Untsu Benjamígan ima kuashat tikich aidaun nagkaesau aimjuk ekettsauwai. Aatus ashí ijunas shiig yuwawag, umutnashkam uwajag, dakunkut nagkankajui.

## 44

### *José shikika umutajji*

<sup>1</sup> Nuna yuwawag, nuadui José niina inake niina wajijin kuitamnun juna aatus inajui: “Juju aents aidau jukiagtin dita costaljin trigo aimjugta, dutikam maki makichik dita costaljin awantak kuichik egketuata.

<sup>2</sup> Nunú dutikakum mina shikika umutaig plata najanamua nunú jukim, dita yachi ekeu trigon sumak kuichkin akikmakma nujai apatkam niina costaljin awantak egketuata”, tiuwai.

Tusa tima José jenia waji aidaun kuitamnushkam imatiksag umikui.

<sup>3</sup> Dutika ashí umigkagmatai, wetajum tusa José tima, kashikmas etsa yama jiiina burrojin yajuak shiyakajui.

<sup>4</sup> Nunik yaaktan ukukiag atushat kuwagainatsaig, José niina inaken chichajak:

“Aents shiyakagma nunú pataetuktajum, dutikajum amaigkajum, juju aatsa titajum: ‘¿Wagka atumesh shiig kuitamkamaitkugmesh pegkegchaunmash iikagtagme? ¿Wagka shikika umutai plata najanamush kasamkaugme

<sup>5</sup> mina apug duwi uumak dekamnuwe dusha? Juka atumek shiig pegkegchau ankaugme’, tusajum titajum”, tiuwai.

<sup>6</sup> Tusa tima Josén inake ditan pataetuk amainag, apu José tibaunak imatiksag tiuwai.

<sup>7</sup> Tusa tama dita aimainak:

“¿Wagka amesh ajamesh jutiish tukagtagme? ¡Iik makichkish kasamchau ainaji!” tuidau. Nuna tusag:

<sup>8</sup> “Iik kasachu asa iina costalji canaágnun jegaa ujaka diikma, kuichik chimpiju wainkaish juki awagtuki itajua sumag aikayatkuish, ¿wagkaik wainkaish iina apuji jeniash, kuichkish, orokesh kasamka jukish ukuktaji?

<sup>9</sup> Untsu ame inakem ainag juwiyash yana costaljin egketuk wainkatam duka mantam-nati, nunikmatai tikich aidautik apu inake wajasagmi”, tuidau.

<sup>10</sup> Tusa tiagtai inak ditan chichajak:

“Ayu, atum tajum duka nunisag uminkati. Tujash yana costaljin egketuk wainkatag duke mina inakjuk atatu. Untsu tikich aidautigmek agkan juwaktatjume”, tiuwai.



<sup>11</sup> Tusa timatai maki makichik ditá costaljin nugká apusag jigkakbaun atijag ijumjajui.

<sup>12</sup> Dutikawagmatai inak ditá yachi iwainum nagkama diya diyakua dekas ekeunum ejekama Benjamígka costaljin apu shikika umutajai egketun wainkauwai.

<sup>13</sup> Dutika wainkamtai, puyatkag wake besemag dekapeamunum jáanchjin japiki ichigkag\* ataktu dita costaljinak burrojin patag yajuakag waketug yaakat jegawajui.

<sup>14</sup> Nunik Judá niina yachi aidaujai waketug José niina jeen pujai jegawajui. Nunikag tikishmatjag nijayin nugka antig pujasajui.

<sup>15</sup> Nuniagtai José ditan chichajak:

“¿Wagka atumesh anish yujagme? ¿Atumek dekatsjumek aents witag juninuk anentaimas dekagmamaina duka?” tau.

<sup>16</sup> Tusa tutai Judá ayaak:

“¡Ii tumainuk makichkish atsugtamji! ¿Iik takamsachji takuish wajuk ejetajiki? Apajui iina pegkegchaujinak waitjamkaji. Nuadui ii aidautik ame shikika umutaigmin takaku wainnaka nujai, ashí amina inakem waigkagtaji”, tiuwai.

<sup>17</sup> Tusa tama José chichaak:

“¡Atsa duka makichkish nunikhattawai, ima mina shikika umutaijun takaku wainnaka duke mina inataijuk atatu! ¡Untsú tikich aidautigmek shiig aneasjum agkan atumi apa pujamunum shiyaktatjume, makichkish atumin waitkagmamainuk atsawai!” tiuwai.

### *Judá Benjamíkan ayamjak chichakbau*

<sup>18</sup> Tuja Judá Josén jegantun chichajak:

“Mina apujuh, wait aneasam kajegtukaipa, wisha makichik chichaman ima amek antamin titajame. Amek dekas faraógkajai betekaitme.

<sup>19</sup> Ame jutii inijatku, atumi apash pujawak, tuja tikich yatsumish atsuak tukagtakmin,

<sup>20</sup> ii ayaaku, iina apajig shiig muumpakui pujugtamji, tuja iina yachi tsakat pujawai iina apaji muumpakui ai akiinauwa nunú. Tuja nunak iina apajig shiig senchi aneenuwe, wagki nunú nuwanmak jimag akiinau tikich jakamtai, makichik juwaku asamtai, timaiji.

<sup>21</sup> Tusa tajin ame chichaakum: ‘Nunú itagtuatajum wainkatjai’ tusam segajatmayume,

<sup>22</sup> tusa takumin ii ayaaku: ‘Nunú uchik apajin ukukig minimaitsui, wagki ukuamak apaji jamain asamtai’, timaiji.

<sup>23</sup> Tujash ame chichagkagtakum: ‘Nunú yatsum ayasam minachkugminig, makichkish awayashtatjime’, tukagtibume.

<sup>24</sup> “Tusa tukagtiamin iina apaji jegajua juna aatus tujamaji tusa, ashí imatiksaik ujakmai.

<sup>25</sup> Nunika pujajin iina apaji chichagtamak: ‘Ataktush wejum trigo sumaka utitajum’, tusa tujamaji.

<sup>26</sup> Tusa tujamkui ii chichaaku: ‘Apawah, iina yachi ekeuwa nunú jutijai minachkuig iikik wemaitsuji, wagki nii minichmataig, nunú apua duka makichkish jegajuaik waimaitsuji’, timaiji.

<sup>27</sup> “Tusa tajin iina apaji chichagtamak: ‘Atumek dekagme mina duwag jimagchik uchin uchigmakua duka;

<sup>28</sup> nuwiya tikichia duka ayatak megkaekauwai, nuniku asamtai, yamaikish waintsujai. Wilka dekas kuntin ikamia kajenuap yuwawaita tiuwaitjai.

<sup>29</sup> Tuja juju niina yachi wijai puja nunú jukijum namputchawame megkaekamtaig duka atumi utugchatji atatu, wi muumpakin pujag nuna wake besemag anentaimkun buu buutkawan jataik’, tujutmayi.

<sup>30</sup> “Tusa tujutiu asamtai, juna uchin ukukin wiki jegamtaig, juju ima senchi aneetaiji asamtai,

<sup>31</sup> iina apajig uchijin wainkachag jamainai. Nunik jakamtaig ii utugchatji amainai, wagki múuntuch wajasu asa senchi ane anentaimkawa jamain asamtai.

<sup>32</sup> Nuadui wi mina apajun chichagkun: ‘Apawah, wi uchinak kuitamkan itatjai, wi juna tiuwaitkun awagkin juwi itashmataig, ashí nunú utugchatak minai juwakti’, tibaijai.

<sup>33</sup> “Nuadui apuh wi amina tajame, wait aneasam antugtukta juju uchía nunú amina inakem amaina nuna wi juwaktajai. Nuniai nigka tikich yatsug aidaujai wakitkiti.

<sup>34</sup> ¿Wagkanuk uchi ukuknush wikish mina apag pujamunmash jegatja? Wi uchi ukuki jega ai, mina apag anentaimak waitiakui diitan dakitajai”, tusa Josén tiuwai.

\* 44:13 “Jáanchjin japiki ichiijaku aina” nunak dita wake besemag dekapeamunum dutikajaku ainawai.

## 45

*José niina yachi aidaunum iwainmamkamu*

<sup>1</sup> José ugamamá pujumainchau dekapeak, niina inake aidaun emtin tumainchau asa, senchi untumak, tikich aidautigmek ashí jijnajum shiyaktajum tima, jijnag ukukiajui. Nunikagmatai niina yachi aidaun chichajak:

“¡Wika atumi yatsum Joséyaitjai!” tusa etsegtumaku.

<sup>2</sup> Nuna tusa Josék shiig senchi jiika buutu, imatu asamtai kuashat aents egiptunmaya aidaun antukajui, tuja faraógka pujusa inamtaijinchakam dekawajui.

<sup>3</sup> Tuja José niina yachi aidaun chichajak:

“¡Witjai Josénu! ¿Mina apajush iwakuk puja?” tau.

Tama ditak ishankag aimkashmin wajas ijuntsajui.

<sup>4</sup> Nuniagtai José ditan chichajak:

“¡Aantsuk wait aneasjum juwi minai kaunatajum!” tau.

Tusa tama jegantagmatai yachi aidaun chichajak:

“Witjai atumi yatsum Josénu, atum Egipto nugkanum sujutkauwaitjum nunú.

<sup>5</sup> Tujash wainkajum wake besemag anentaimkujum atumek pempeentunikjum kajejdaikaigpajum, mina sujutkauwaitjum duka atum dutijatsjuminig, Apajui pujutan ayamjuktin ati tusa juni awetiuiwai.

<sup>6</sup> Juju nugka juwig nujan tepea jimag mijan weawai, tuja nuigtushkam cinco mijana imajin ajak ajakmamash tsapaishtatui.

<sup>7</sup> Nuniktin asamtai Apajui juni akupkata tujamaidau asagmatai, minak atumek juni sujutkau ainagme. Nii yutai aidaun ijumjatin ati dutikamtai nuna yuwinak iwaku atum wegantush juju nugkanum batsamsatnume tau asa.

<sup>8</sup> “Atumchauwaitjume mina juju nugkanum awetiutigmek. Apajuiyai mina juwi itajua faraógka chichajin ema apujtusa duka, nuadui minak ashí niina jenia aina nunak amina chichamjumin batsasta dutikakum ashí Egipto nugkashkam amek kuitamkata jutuiuiwai.

<sup>9</sup> Yamaik wamkesjum mina apag pujamunum wetajum, nunika jegajum juju aatsa ujaktajum: Juna aatus amina uchijum tawai: Apajui minak ashí egiptunmaya aentsun apuji eti apujtuse. Dutijauu asamtai megkaetsuk wamkesam juwi taam waitkata.

<sup>10</sup> Núnikam nugka Gosén tutaya juwi ame uchijum aidaui, tijajum aidaun, tagkujum aidaun, nuigtu ashí amina wajijum aidaun yajuaka kaunam wi pujag juwi tikiju pujusta.

<sup>11</sup> Juwi pujusamin wi amina pataim aidaun tuja amejai aents yujau aidaush yuwawagtinun yutain amastajai nujantai waittsajum; nujan tepea nunak cinco mijan atatu, tijajum.

<sup>12</sup> “Tuja wi taja nunak mina yatsug Benjamíkgash atumjai wajas antamunum tajai.

<sup>13</sup> Juju aatsajum mina apag wi Egipto nugkanum apu wajasan pujag nunú ujaktajum, tuja nuigtu tikich juwiya wainkajum dushakam ujaktajum. ¡Wamak wejum mina apag utitajum!” tiuui.

<sup>14</sup> Nuna tusa yachi Benjamíkgan pagkuk buutu. Nunitai Benjamíghshakam Josénu pagkuk wajas buutiuiwai.

<sup>15</sup> Nunik duwi tikich yachi aidaunashkam pagkuk yapinum kugkuak buutiuiwai. Nunikag duwi José yachi aidaun niijai shiig chichasajui.

<sup>16</sup> Nunú José yachi aidaun kaunawaje tabau faraógka pujusa inamtaijin antuekauwai, nuna antuka faraón niina atuwe aidaui shiig aneasajui.

<sup>17</sup> Nunik faraón Josénu chichajak:

“Amina yatsum aidaun kauna nunú trigon aimjag burrojin pataja jukiag Canaan nugkanum wetinme,

<sup>18</sup> nunik jegawag dita apajin, patayi aidaui yajuakag juwi itatnume. Dutikawagmatai wi dekas dita pujustinnak nugka pegkeg Egipto nugkanum awa nuna susatjai, dutikawajam nuwi pujusag shiig yuwawag pujustinne, tajai.

<sup>19</sup> Ame juwiya carreta aidaun ishitkata, nuwi ditá nuwe aidaun uchiji aidaui yajumainak, atumi apanashkam jukiag itatnume.

<sup>20</sup> Dita wajiji aina nunak puyatjukainmegka, wagki egiptunmaya dekas waji pegkeg aina nunú ditanuk agtin asamtai”, tiuui.

<sup>21</sup> Tusa tima Israela uchiji aidaushkam, ayu duke ati tiaui. Tiagmatai José nii ishitkauwai carreta aidaun faraón tibanak imatiksag, dutikak nuigtu jintá weaku yuwatnujashkam susauwai.

<sup>22</sup> Nuigtushkam dita nugkugtinun maki makichik jáanchin tinamiuiwai. Untsu Benjamígan cinco jáanchin nugkutain susauwai, dutikak nuigtushkam trescientos kuichik plata najanamun susauwai.

<sup>23</sup> Tuja apajinashkam waji shiig pegkeg egiptunmaya aidaun etegkeg yajuak diez burronum patag akuptukui, nuigtu tikich diez burronum yutai trigon pagjai patatug nii jintá minisa yuwatnujin ishitkauwai.

<sup>24</sup> Dutika ashí susam nuna jukiag shimiagtai José niina yachi aidaun chichajak:

“¡Jinta wesajum wainkajum maani yujaigpajum!” tiuwai.

<sup>25</sup> Tusa tima egiptunmaya jiinkiag Canaán nugkanum ditá apaji Jacob pujamunum jegawajui.

<sup>26</sup> Nunik jegawag, Jacopan ujinak: “Josék yamaikish iwaku pujawai, nuniu asa nii Egipto nugkan apuji wajas pujume”, tusa ujaam pyuatuk anentaimak dekaskeash tujutuina tusa dita tuinamunak antugmainchau dekapjauwai.

<sup>27</sup> Nunitai dita Joséjai chichasbaunak imatiksag ujakajui. Tusa tamash utujumiatok, José carreta aidau niina jukiti tusa ishitkamun wainak shiig aneasui.

<sup>28</sup> Nunik Jacob chichaak: “¡Make yamaik mina uchig José iwaku pujamun dekjajai! ¡Nuniku asan wisha wenu iwaku pujag juajuik mina uchijun waipaktajai!” tiuwai.

## 46

### *Jacob Egipto nugkanum jegamu*

<sup>1</sup> Israel niina wajiji aidaun niina tagkuji aidaujai yajuak wea weakua bershebanum jegauwai, nuwi jegaa Apajui niina apaji Isaaka Apajujin emematak kuntinun maa nuna nejen ujumak apeauwai.\*

<sup>2</sup> Dutika nuwi kanittaman Apajui kajanum wantintuk niina daajin adaitus untsukui. Tusa untsuam nii ayaak:

“Juwi pujajai, Apujuh”, tiuwai.

<sup>3</sup> Tutai Apajui chichajak:

“Witjai Apajui amina apa Apajujinuk. Egipto nugkanum wetak ishamkaipa, awi pujusamin wi ame uchijum wegantunak shiig kuashat ikauntuktajame.

<sup>4</sup> Nuadui ame Egipto weam nunak wi uyuntsattajame, tuja wiki ame wegantu aidaunashkam Egipto batsatunak jiijan awagkitnaitjai. Tuja nuigtushkam ame eke jatsminig José kuitamjamkamtai pujusam jakattame”, tiuwai.

<sup>5</sup> Tusa tima kanag tsawag, Jacob bershebanmaya jiinki weuwai. Nunik wenak Israela uchiji aidau, niina apajin, ditá uchiji aidaun nuwe aidaujai aatus faraón carreta ditan yajuakti tusa ishitkamunum pekamiag shiyakajui.

<sup>6</sup> Nunik shimak Jacob ashí yajumakui, nuniak nuigtushkam baka aidaunash, uwig aidaujai Canaán pujusa uyujkamun aidaunak ashí yajuak Egipto nugkanum weuwai.

<sup>7</sup> Tuja niina uchiji aidaush, nawanjai aidaush, tijaji aishmag aidaush, nuigtu tijaji nuwa aidaushkam Jacob wetai ashí shiyakajui.

### *Jacob wegantu aidau Egipto nugkanum shiyakagbau*

<sup>8</sup> Juju ainawai Israel aents aidau Egipto nugkanum shiyakajua duka: Jacob niina uchiji aidaujai.

Tuja Rubén aajakui iwai.

<sup>9</sup> Untsu Rubénka uchiji aidauk: Hanoc, Falú, Hestrón, Carmí aatus aajakui.

<sup>10</sup> Tuja Simeógka uchiji aidauk: Jemuel, Jamín, Ohad, Jaquín, Sóhar, nuigtu Saúl canaágnunia nuwanum akiinauwa nunú aatus aajakui.

<sup>11</sup> Untsu Leví uchiji aidauk: Guersón, Quehat, Merarí aatus aajakui.

<sup>12</sup> Tuja Judá uchiji aidauk: Er, Onán, Selá, Fares, Zérah aatus aajakui. Tuja Er Onágjai Canaán nugkanum jakauwai. Untsu Faresa uchiji aidauk, Hestrón, Hamul aatus aajakui.

<sup>13</sup> Isacara uchiji aidauk: Tolá, Puvá, Job, Simrón aatus aajakui.

<sup>14</sup> Untsu Sabulógka uchiji aidauk: Séred, Elón, Jahleel aatus aajakui.

<sup>15</sup> Jacob niina nuwe Leayai Padán-aram nugkanum pujusa uchin akigkua duka, juju aajaku ainawai. Tuja niina nawanji Dinashkam. Nuwa aishmag aidaujai ashí ijumjamak, nii wegantu aidauk treinta y tres aents aajaku ainawai.

<sup>16</sup> Tuja Gad uchiji aidauk: Sefón, Haguí, Esbón Suní, Erí, Arodí, Arelí aatus aajakui.

<sup>17</sup> Untsu Asera uchiji aidauk: Imná, Isvá, Ishví, Berián nuigtu ditá umayi Sérah aatus aajakui. Untsu Bería uchiji aidauk: Heber, Malquiel, aatus aajakui.

<sup>18</sup> Tuja juju aajaku ainawai Jacob Zilpáyai uchi akigbau aina duka. Zilpá aajakui Labágka inake, nuna niina nawanji Lean susauwa nunú. Niina uchiji wegantu aidauk ashí ijumjamak dieciseis aajakui.

\* **46:1** “Kuntinun maa nuna nejen ujumak apeauwai” tawa nunak “sacrifici6n” taku tawai. Juna Israel aents aidau kuntinun maawag nuna nejen ujumak, tuja wiyajinashkam apeawag tikich nuna neje ampinjaun ijunag yuujakajua nuna taku tawai.

- <sup>19</sup> Jacob niina nuwe Raquelai uchi akiamu aidauk: José, Benjamín aatus aajakui.
- <sup>20</sup> José niina nuwe Asenatai Egipto nugkanum pujusa uchi akiamuk: Manasés, Efraín aatus aajakui. Asenatak aajakui sacerdote Potifera Onnumia aajakua nuna nawanji.
- <sup>21</sup> Tuja Benjamíngka uchiji aidauk: Bela, Béquer, Asbel, Guerá, Naamán, Ehi, Ros, Mupim, Hupim, Ard aatus aajakui.
- <sup>22</sup> Juju aajaku ainawai Jacob Raquelai akiamu aina nuna uchiji wegantu aidauk. Ashí ijumjamak catorce aajakui.
- <sup>23</sup> Untsu Danka uchiji aidauk: Husim aajakui.
- <sup>24</sup> Tuja Neftalí uchiji aidauk: Jahseel, Guní, Jezer, Silem aatus aajakui.
- <sup>25</sup> Juju aajaku ainawai Jacob Billháyai uchi akigbaw aajakua duka. Billhá aajakui Labágka inake, nuna niina nawanji Raquelan susauwa nunú. Niina uchiji wegantu aidau ashí ijumjamak, siete aents aajakui.
- <sup>26</sup> Ashí aents Egipto nugkanum Jacobjai ijunag kaunau aina nuwiya ditá nuwe aidau dekapatsuk, aishmag aidauk dekaapamak sesenta y seis aents aajakui, ima dita wegantu aidauk.
- <sup>27</sup> José Egipto nugkanum pujusa uchi akiamua duka jimagchik aajakui, tuja nujai ashí ijumjamak Jacob wegantu aidauk setenta aents Egipto nugkanmak jegawajui.
- <sup>28</sup> Nunik wesag Jacob, José ujakta nugka Goségnum pujai igkunkati tusa emtika Judán awemauwai. Nunik Goségnum jegawajun dekaa,
- <sup>29</sup> José niina inake aidaun inajui nii egkemja wetinjín carro umiktajum mina apajun igkugtajai tusa. Tusa tima umikagmatai, nuwi egkemag weuwai, nunik niina apajin minittaman igkugkui. Dutika igkug pagkuk wajas senchi butú wajau.
- <sup>30</sup> Imanitai Israel Joséen chichajak:  
 “¡Jakautskait tuwamjame, tujash iwaku pujamin paan wainkajame, nuniku asan yamaik jaknush maak anentaimsan jakatjai!” tiuwai.
- <sup>31</sup> Tusa tima José niina yachi aidaun niina apaji patayi aidaujai chichajak:  
 “Wika yamaik wenu faraógka jegajuan, mina yatsug aidau nuigtu mina apag niina patayi aidaujai Canaágnun batsatu wijai pujustag tusag kaunawaje.
- <sup>32</sup> Nunik mininak ditá uwigji aidaun baka aidaujai, ashí ditá wajiji aidaunak yajuakag kaunawaje, ditak tuke uwijan kuitamin, nuigtu baka tsakapau ainawai tusan ujaktajai.
- <sup>33</sup> Tusa ujaka ai faraón untsgumakag: ‘¿Atumesh waji takata takau ainagme?’ tusa inimpakuig:  
<sup>34</sup> ‘Ii aidaulik uwig tsakapau ainaji, iina apachjishkam tagku tsakapajaku asagmatai’, titajum. Nuadui atumesh juju nugka Goségka juwi batsamsamnujum, wagki egiptun-maya aents aidauk tagkun tsakapau aina nujai ijunja pujutnak dakitin ainawai”, tiuwai.

## 47

### *Jacob faraógjai igkunikbau*

- <sup>1</sup> Nuna tusa ukuak José faraógkan ujaktatus weuwai. Nunik jegaa faraógkan ujaak:  
 “Mina apag mina yatsug aidaujai Canaán nugkanum batsatu uwig aidaun, baka aidaun, nuigtu ashí tikich ditá wajiji aidaunashkam yajuakag, Gosén nugkanum kaunawaje”, tiuwai.
- <sup>2</sup> Tusa ujaka ukuak niina yachi aidaun cinco etegkeg juki, faraón wainkati tusa ejegauwai.
- <sup>3</sup> Dutikamtai faraón José yachi aidaun iniak:  
 “¿Atumesh waji takata takau ainagme?” tau.  
 Tusa tama dita aimainak:  
 “Jutii amina inakem aidaulik uwig kuitamin ainaji, iina apachji aajaku aidaush tuké tagkunak kuitamajaku asagmatai.
- <sup>4</sup> Tuja nujan tepeau asa canaágnunmak chijichi uwig ayugmainush atsau asamtai, juwi batsamsatasa kaunaji”, tuidau. Nuna tusag: “¡Apuh, wait aneamam nugka Gosén tutaya au sukagtusta, iish awi batsamsagmi!” tiajui.
- <sup>5</sup> Tusa tiagtai faraón Joséen chichajak:  
 “Amina apa, amina yatsum aidau amejai ijunag pujusagtatus kaunawaje.
- <sup>6</sup> Juju Egipto nugka juka ame diyame, nuniau asam amina apa yatsum aidaujai nugka pegkeg Goségka au susata, dutikam, nuwi batsamsatnume. Tuja dita aina awiwa tagku kuitamin yacha akuig, nunú jukim mina tagkuju kuitamjutuina nuna apuji adaikata”, tiuwai.
- <sup>7</sup> Tusa timatai, José niina apajinashkam juki faraón wainkati tusa ejentauwai. Dutikam Jacobshakam faraógkan eme anentus kumpamauwai.
- <sup>8</sup> Dutikam faraón Jacopan iniak:

“¿Aminash wajupa mijana ajutjamua?” tau.

<sup>9</sup> Tusa tama Jacob ayaak:

“Wika junika wekae wekaekawan ciento treinta mijan ejejai. Mina mijanjuk ujumchiki, wika mina apag batsamajakajua imaniknuk ezechajai”, tiuwai.

<sup>10</sup> Nuna tusa Jacob faraógkan kumpama ukuak jiinki weuwai.

<sup>11</sup> Nunikmatai José niina apajin niina yachi aidaujai faraón tibaunak imatiksag, nugka múun Ramsés tutai aajakua nuwi batsasui. Dutikam ditashkam nuwi nugkeenawag batsamsauwai.

<sup>12</sup> Tuja nuigtushkam José niina apaji, niina yachi aidaujai ashí ditá patayi aidaujai ijumag, yutai aidaun sujakuí nujantai waitsainum tusa.

*José nugkan trigojai yapajia yajuakbau*

<sup>13</sup> Ashí nugka aidaunmak makichik trigokesh atsujakuí, nuadui nujantak aan senchi wegau. Nuniau asamtai, egiptunmaya aents aidauk canaágnumia aidaushkam nujantai jinuidau.

<sup>14</sup> Tuja Josék egiptunmaya aents, canaágnumia aents aidaujai yutain sumagtai kuichkijai yapa yapajiakua dita kuichkijinak ashí yajutuk faraógka jeen ijumjauwai. Dutika yajutuk kuichkigtinchau emakuí.

<sup>15</sup> Dutikamu asa Egipto nugkanmash, Canaán nugkanmash kuichik shiig atsutai, wajiyaiak akikmakash yutainash sumaktinme nuninak egiptunmaya aents aidau Josén jegaji chichajuinak:

“¡Wait aneamam yutai sukagtusta! ¿Kuichik atsujui nujantai jinatnume tusamek idaikagtustatam?” tuidau.

<sup>16</sup> Tusa tama José ditan chichajak:

“Kuichkijum atsugtaminakuig atumi tagkujum itaatajum, dutikawagmin nuna juwakun trigon amastajime”, tiuwai.

<sup>17</sup> Tusa tima egiptunmaya aents aidauk ditá caballojin, uwigjin, bakajin, burrojin aatus yajuakag Josén ikautuawajui. Dutikawagmatai José nuna yajumak makichik mijadai trigon suu pujau.

<sup>18</sup> Tujash nunú mijan nagkaemakmatai, yutain amukag waituinak, ataktu Josén kautuawag chichajuinak:

“Apujuh, iik dekas kuichkik shiig ashimkaji, tuja iina tagkuji aidaushkam ashí aminu wajase. Ii tikich sujaku yutai yapagmainuk atsugtami, ima aentsti aidautik iina nugkejaig juwakji.

<sup>19</sup> Nuniau asamtai trigo sukagtakum dekas jutiishkam iina nugkejai sumajatkata, dutikagtuawamin iishkam faraógka inake wajasa iina nugkeenig nii takajainaku ajak sukagtusamin nunú ajakma nuwiya yuwawagmi. Tuja ¿amesh wagkamek jutiish dita nugken ajakma yutsuk batsamas jinaati tusamesh idaikagtustame?” tuidau.

<sup>20</sup> Tusa imatiagtai José nugka egiptunmaya aidaunak ashí sumakuí faraógdau atinun, nunak egiptunmaya aents aidau nujantai jinak dita nugken sujukajui. Dutikamuk duka ashí faraógdau juwakui.

<sup>21</sup> Nuna dutikawag egiptunmaya aents aidauk nugkenchau juwakag, apu inake wajasajui.

<sup>22</sup> Untsu ima sacerdote nugkenak sumakchauwai, ditak faraón trigo susam nuna yuwa batsatu asagmatai. Nuadui ditak nugkenak sujukchajui wagki faraón susam yuwa batsatu asag.

<sup>23</sup> Duwi pujus José aents aidaun chichajak:

“Wi atumnak sumakjime, dutikamu asajum atumek yamaik atumi nugkejai faraógdau wajasugme. Nuadui juju ajak ajakmatin jukitajum, dutikajum ajakmatajum.

<sup>24</sup> Tujash nunú ajakma juwakjumek ujumak akankajum faraón susatajum, dutikakjum ipak usumta imajin juwaktata duka ajaatin, nuigtu atum uchijum aidaujai yuwatin, tuja atumjai batsatu aidau yuwatnujai jukitajum”, tiuwai.

<sup>25</sup> Tama dita aimainak:

“Amek dekas jutiik shiig wait anenkagtame, nuniau asam ii nujantai jamainush uwemtikagtame. ¡Nuadui jutii aidautik faraógkan inake ami tuinaji!” tiajui.

<sup>26</sup> Juna aatus José chichaman umikuí. Nuadui ashí aents egiptunmaya aidauk ajakmamujinian ujumak akanak faraógka suu atinme tusa tiuwai. Nunú chicham umikbau aajakua duka yamaikish nunisag awai. Tuja untsu ima sacerdote aidauk dita nugkenak faraógkan susachaju asag, tuke akikmachu ainawai.

*Jacob inagnak Josén juju umigtukta tusa tibau*

<sup>27</sup> Israel aents aidauk Egipto nugka Goségnum batsamsajui. Nunik nuwi batsamas shiig kuashat yujakajui.

<sup>28</sup> Tuja Jocopak Egipto nugkanum jegag diecisiete mijan pujusui, nujai ijumjamak ciento cuarenta y siete mijan ejejuywai.

<sup>29</sup> Israel shiig muumpaki nii jakatnujin dekapmamag, niina uchiji Josén untuka chichajak:

“Wi titatjam nunú umigtuktinaitkumek, amina uwejum mina bakuju wakentin yununkata, dutikam dekas ame segatam nunak umiktatjai tusam tujutta. ¡Wait aneamas wi jakamtaig Egipto nugka juwigkik ukugsaiapa!

<sup>30</sup> Wi mina apag wegantu jinawajua núnikan jakamtaish, wi wegantu ukumasbau aina nuwig ukugsata”, tiuwai. Tusa tama, José ayaak:

“¡Apawah, ame tame nunak dutiksanuk umiktajai!” tiuwai.

<sup>31</sup> Tama Jacob uchijin chichajak:

“¡Dekas nunak umiktatjai! tusam yamaya juwik tujutta”, tiuwai. Tusa tama José ayaak:

“¡Nunak dekas umiktatjai!” tiuwai. Tusa timatai Israel niina pegakji chaiken tsuntsuma tepes, Josén see tusa Apajuín emematiuwai.

## 48

### *Jacob Efraíngkan Manasésjai pegkegnum yumigjamu*

<sup>1</sup> Nuna ti ukuki dukap tsawan pujatsaig, Josén tajuawag amina apak jamae tusag ujakajui. Tusa ujakam José weak niina uchiji Manasésan Efraíngjai juki weuwai.

<sup>2</sup> Nunik jegamtai uchijum José amina waipaktatus tae tusa Jacopan ujakajui, tusa ujakam niina pegakjin tepau katsuntus nantaki ekemsauwai.

<sup>3</sup> Nunik ekemas Josén chichajak:

“Apajuí ashí senchigтина nunú Canaán nugkanum yaakat Luz tutai awa nuwi mina wantintujuk, pegkegnum yumigtak,

<sup>4</sup> aatus tujutiabi: ‘Antukta nijah, wi aminak kuashat uchin uyujtuktatjame, dutika ai ame wegantu aidauk kuashat kawegkag nugka muunnum yaaktamak batsamsagtinai. Tuja nuigtushkam ame wegantu aidau juju nugkanak susatnaitjai. Nuadui ajumaish tuke ditanu atinai’.

<sup>5</sup> “Tuja, wi eke Egipto nugkanum taatsaig, amina uchijum Efraín Manasésjai akiinau aina duka mina uchig agtatui. Ditak mina shiig uchig Rubén Simeóggai aina nujai betek agtatui.

<sup>6</sup> Untsu nuwi nagkama wi juwi taa pujai akiinau aina nunú amina uchigmik agtatui, tuja dushakam Efraíngkan Manasésjai yachi asag, ditashkam wajinak nugkajai betek jukiagtin ainawai.

<sup>7</sup> “Wi Padán-aram pujaun wakitkin wegai canaágnum yaakat Efratanum jegattak amina duku Raquelak jakauwai, nunikmatai nunú jintanmak yamai Belén tutaya nuwi ukusan ukukiuwaitjai”, tiuwai.

<sup>8</sup> Tusa Israel José uchiji aidau wainak iniak:

“¿Jusha ya ainawa?” tau. Tusa iniam,

<sup>9</sup> José ayaak:

“Junak wi Egipto nugkanum pujai Apajuí uchin sujusua nunú ainawai” tau. Tusa tutai niina apaji chichajak:

“Wait aneamas juwi minai itanta, dutikawamin wi pegkegnum yumigsatjai”, tiuwai.

<sup>10</sup> Tuja Israelak múuntuch wajasu asa shiig wainmachu asamtai, José niina uchiji aidau juki apajin ejentuntui, dutikam pagkuk kugkuasui.

<sup>11</sup> Nuna dutika Israel Josén chichajak:

“Wika aminak jutikanus wainkatja tusankesh anentaimjachuitjai. Tujash Apajuí juni tiu asamtai wainkajame, dutikan amina uchijum aidauashkam wainkajai”, tiuwai.

<sup>12</sup> Tusa timatai José niina uchiji aidau juki emenaas awajak, niina apajin eme anentus tikishmatug tsuntsuma nijayin nugka antig pujusui.

<sup>13</sup> Nunik nagkanak, mai uchijin achikui. Efraíngkan untsugnum achiak, Manasésan menanum achikui, dutika niina apajin ejentuntui. Dutikamu asa Efraín Jacopa menajin juwatai untsu Manasés untsugnum juwaku.

<sup>14</sup> Tujash Israelak niina uweje untsuja duwi Efraíngka buuken achikui. Untsu menajiya duwi Manasés buuken achikui. Nunak nigka iwai aig, makichik anentaimtugbau au asamtai dutikauwai.

<sup>15</sup> Nuna dutika Josén pegkegnum yumigkiak aatus tiuwai:

“Mina apachug Abraham,

Isaac Apajuín umijujaku aina nunú

wi yama nagkamchakun akiinawaitag duwi nagkamas

yamaikish tuke kuitamja nunú,  
<sup>16</sup> tuja Apajuí ángel tumain nayaimpinmaya  
 pegkegchau aidaunmash ashí agkanmitkajuauwa  
 dushakam, ¡juju uchi aidaunak pegkegnum yumigsati!  
 ¡Nuadui mina daajush, mina apachug  
 aidau, Abraham, Isaakan daajish,  
 ditá daajin atakea duwish tuke pachitai atinme!  
 ¡Ditak kuashat uchigtin atinme,  
 nuninak shiig kuashat yujaktinme!”

<sup>17</sup> Tusa tutai José diikma Efraín ekeuwa nuna buuken untsujin achiaun wainak  
 makchau diisui, nuniak apaji uweje untsuja nuna achijuk juki uchiji emkau Manasésa  
 buuken achimtikatag tiuwai,

<sup>18</sup> Dutikak:

“¡Atsa apawah aikawaipa! ¡Juwai emkauwa duka, juna buuken uwejum untsugmea  
 nuadui achikta!” tiuwai.

<sup>19</sup> Tusa tamashkam apajig uchijinak antugtsuk chichajak:

“¡Ehe, uchuchih nunak dekajai! ¡Niishkam kuashat yujaka nugka muunnum  
 yaaktamak batsamsatnai! ¡Tujash, niina yachi ekeuwa nunú ima senchigtin atinai!  
 ¡Nuadui nii wegantu aidauk shiig kuashat agtinai!” tiuwai.

<sup>20</sup> Nuna tusa nunú tsawantaik Jacob ditan pegkegnum yumigkiak aatus tiuwai:

“Tikich aidaush pegkeg yumigkia nuna jukitag tusag atumin pachipasag:  
 “¡Apajuí Efraígnak Manasésjai  
 yaigkua dutika iinash yaimpakti  
 tiagtinai!” tau.

Nuna aatus tusa Israel Manasésan buuken niina uweje untsuja duwi achimainun  
 idayak Efraígnak buuken achikui.

<sup>21</sup> Nuna dutika Israel Josén chichajak:

“¡Antukta nijah, wika jakattajai; tujash Apajuí atumjai pujuttawai! Nuniau asa atumi  
 apachjumi nugkeenig awagtamiagtinai.

<sup>22</sup> Tuja aminak yatsum aina nuna nagkaesau pegkeg yumigkin amaajai: Wi amorreo  
 aents aidau depetka jujukbau, nugka Siquem tutaya nuna amaajai, nunú jukitin ata”,  
 tiuwai.

## 49

### *Jacob jakattak tepesa chichakbau*

<sup>1</sup> Nuna tusa ashimak niina uchiji aidaun untsuka ikaunman chichajak:

“Juwi tantatajum, nunikagmin  
 atakesh wajukatnuk ainagme  
 nuna pachisan ujaktajime:

<sup>2</sup> ¡Jacopan uchiji aidauwah,  
 juwi tanta ijuntsajum

atumin apa Israel tawa nunú antuktajum!

<sup>3</sup> “Rubénkah, ametme mina uchig iwaimek,  
 wi aminak nagkamchakun datsa asan akiauwaitjame,  
 nuadui amek ajantusa diitai senchigtin wajasuitme.

<sup>4</sup> Tujash imankek achatnaitme,  
 shiig emetja anentaimchau,  
 yumi tsukati waketama nujai betek asam,  
 tuja mina eme anenjusa diigchau asam,  
 mina duwagjaish ikagmakuitam nuadui.

<sup>5</sup> “Simeógnak niina yachi Levíjai  
 betek ajankachu ishamain ainawai.

<sup>6</sup> ¡Ajumaish wika atumjai ijunja pujutnak dakitajai!  
 wagki atumi kajetinig aents aidau maakjum,  
 kuntinu kagkajish kupijajum uku yujau aidau asagmin.

<sup>7</sup> ¡Atumek pegkegchau, dekas shiig pegkegchau!  
 Atumi kajetjumik kuntin ikamia kajena ibauwai.  
 ¡Nuadui wi atumnak ashí Israel nugkanum dapampaaktinaitjime!

<sup>8</sup> “Untsu Judá aminak, yatsum aidauk

perpeentugmakiag emematjamtin ainawai.  
 Nuadui yatsumin waitkaidaush  
 ame depetkam ayamjuktinaitme,  
 tuja amina yatsum aidau  
 emematjamainak tikishmatjamiagtinaí.

<sup>9</sup> ¡Judá, mina uchijuh!

Amek leónka uchijijai betekaitme.

León nejen yuwa ejemag wajas  
 tsuntsuma ayamak múuntsukaitai tumain  
 nugka tepegama numamtuk atinaitme.

¿Yaki aminash imanminash waitkagmasti?

<sup>10</sup> Makichkish Judá senchijinak atankichagtinaí,

tuja nii apu wee inabaujinashkam.

Untsu niina nagkaesau dekas apu taamtai,  
 nuna ashí aents aidau niina chichamen  
 umijuinak wedau asagmatai ukuktinaitme.

<sup>11</sup> Niina burrojinash uva numijin

tuja uva daekjinig jigkatnai, dutikak niina jáanchjinash  
 ¡vino uva yumiji najanamua duwik nijatnai!

<sup>12</sup> Niina jiig uva yumiji vino bukuseaya

aan nagkaemas bukuseayai; tuja niina naishkam  
 leche pujua aan nagkaemas pujui.\*

<sup>13</sup> “Sabulógkak nayantsanum uwet

dekas lancha múun aidau anumtaiji aidaunum pujustinaí.

Tuja niina nugke nagkatkamuk

Sidón nugka aatus atinaí.

<sup>14</sup> “Isacarak burro senchigtin kijinun yanau,

niina wenuken waya tepesa dakimakug  
 inanmainchawama numamtinaí.

<sup>15</sup> Niig nugka pegkeg ayamainjin wainak

nuna tsuntsumtitnai niina tuntupen kijinun patai jukitatus,  
 nuniak chichamjumatsuk tikima wainka  
 tikichi inatai atinaí.

<sup>16</sup> “Dagkak Israel wegantu aidaujai betek

nii wegantu aidaun apuji atinaí.

<sup>17</sup> Dagkak dapi jintá dakamak tepes

caballo minittaman sagkannum esai  
 ajiyama iman atinaí.

<sup>18</sup> “¡Chah Tuke Pujuuwah,

uwentijugti tusan amina dakajame!

<sup>19</sup> “Gaadnak shiwag aidau jetetnai,

tujash nii wajantak depetuk ipistinaí.

<sup>20</sup> “Asera nugkeg shiig pegkeg asamtai,

yutai aidauk pegkeg shiig kuashat ajitnai,  
 iman asamtai nuwiyán apunashkam tuké sutinaí.

<sup>21</sup> “Neftalík japa agkan wekagas

uchijin shiig pegkejuch aidaun petsama numamtinaí.

<sup>22</sup> “Josék numi namaka uwet wajas

shiig kagkapena kanawe múun waig  
 senchi nejegama imanai.

<sup>23</sup> Nagki akenin aidau kajejuinawai,

nuniak nagki aketuinawai,

\* **49:12** Juna aatus tiuwa nunak nii wegantu aidauk nugka pegkeg ajak shiig tsapaunum batsamas shiig wiakuch agtin asamtai tiuwai.



dutikainak tuké waitkainawai.

<sup>24</sup> Tujash José kuntujig senchi wajaknai,  
iman asa tuke depetmawai.

¡See kuashat Jacopa Apajuji senchigtinuh!

¡Apajuí Israelan kuitamna nuna daajin see kuashat!

<sup>25</sup> ¡See kuashat, Apajuí amina apa Apajujiya nunú yaimpakti;

Apajuí dekas ashí senchigtina nunú  
aminak pegkegnum yumigtamsatin ati!

¡Nayaimpinmaya pegkeg jutai aina nuwiyannah!

¡Nayantsa initkenia pegkeg jutai aina nuwiyannah!

Tuja ¡uchi akia shiig tsakapaktinnashkam,  
dutiksag yaimpakti!

<sup>26</sup> Mina apag pegkegnum yumigtujua  
nuna nagkaesan wika aminak pegkegnum yumigkiajame.

Wi yumigkiajam juka, nugka nain aidau

tuke megkaekashtina iman atinai.

Juju pegkeg yumigkia juka Josénu atinai,

wagki niyai yachi aina nuwiyannah

Apajuí etegkamua duka.

<sup>27</sup> “¡Benjamíggak lobo kajen yukagtin  
kashikmas neje yuwa ajum agkuintai  
ampinjaun tinamkagtina imanai!”

<sup>28</sup> Juju doce aina juwai Israela uchiji aidau. Juna aatus ditá apaji maki makichik  
yumigjauwai.

### *Jacob jakamu*

<sup>29</sup> Makichik tsawantai Jacob niina uchiji aidaun juna aatus tiuwai:

“Wi jakatnuk namput wajaschae. Wi jakamtaig mina apag ukusbau aina nuwi waa  
umikbau Efrógnum hitita aentsu nugken awa nuwi ukugsatajum.

<sup>30</sup> Canaán nugkanum waa Macpelá Mamrejai niinis awa nuna mina apachug Abraham  
ashí Efróggka nugken sumak, juka mina pataaju ukumatai ati tiuwa nuwi ukugsatajum.

<sup>31</sup> Nuwi ukusajui Abrahaman niina nuwe Sarajai, nuigtushkam nuwig ukusajui mina  
apag Isaakan niina nuwe Rebecajai, tuja wishakam nuwig Lean ukusuitjai.

<sup>32</sup> Nunú nugka duka, ashí waa aidaujai hitita aentsu nugke aajaku sumakbauwai.”

<sup>33</sup> Juna aatus Jacob niina uchiji aidau umikagtinun ujaka ashimak, pegajin ataktu  
tepesui, nunik nuwig jakauwai.

## 50

<sup>1</sup> Nunik niina apaji jakamtaí, José niina apajin pagkuk buutak kugkuasui.

<sup>2</sup> Nuna dutika ampijatín aidaun José chichajak: Ampí iyash kaushtaiyai ukatjajum  
umiktajum wamak kaujai, tiuwai. Tusa timatai imatiksag José apaji Israela iyashin  
ukatuk umikajui.

<sup>3</sup> Dutika uka ukatuinakua cuarenta tsawan ejeyajui, nunú dutikakuik tuke imaan  
tsawan umitai asamtaí.

Tuja egiptunmaya aents aidaushkam Israel jakamtaí, setenta tsawantai buutiaju  
ainawai.

<sup>4</sup> Nunú buutbaun mijaaakag, José faraóggka inake aidaun chichajak:

“Atumesh minash dekaskenum wait anenjajumek faraón jegajuajum ujatjuktajum:

<sup>5</sup> ‘Mina apag jakattak tepesa chichagtak: Juju makichkish ewaetsuk wi jakamtaig,  
Canaán nugkanum wi ukumastinjun waan tainiuwaitag nuwi ukugsatajum tujutiwua  
nuna imatiksasuk umiktatg tajai. Wait aneasam tsawan sujusta wisha nuwi wenu mina  
apajun ukusan ukuakun taatjai’, tujamui tusa ujakatjajum”, tiuwai.

<sup>6</sup> Tuja nuna faraón dekaa ditan ayaak:

“Dekas tawai, niina apaji wajintiuwaita nunak dutiksag ukusa ukuak taati”, tiuwai.

<sup>7</sup> Tusa tima José weuwai apajin ukustatus. Nunik wetai faraóggka atuwe chicham  
antugtai egiptunmaya aidauk ashí uyuniyajui.

<sup>8</sup> Nuniagtai José jenia aidauk ashí, tuja niina apaji jenia aidaushkam niina yachi  
aidaujai betekmasag shiyakajui. Nunik ashí shimak Goségnumak ima uchi aidaunak  
ditá tagkuji aidaujai ukukiajui.

<sup>9</sup> Nuigtushkam tikich aents aidaushkam carretanum, caballonum aatus José wetai uyunainak pataetukajui. Imanidau asag shiig kuashat aentsuk aajakui.

<sup>10</sup> Nunik shiyakag, namak Jordágka yantamen etsa minitaiya nuni nugka Goren-hatad awa nuwi jegawajui. Nuwi jegawag shiig kuashat tuwakag buutuidau, imadiagtai Joséshkam apaji jakamunum wake besemag dekepeak siete tsawan pujusui.

<sup>11</sup> Nunú imatuidau canaánumia aents nuwi batsamin aidau wainkag chichainak: “¡Aunak egiptunmaya aents aidau jakaun ukuinak imatuinawai!” tuidau. Nuadui nunú nugka Jordágka yantamen etsa minitaiya nuni awa nunak Abel-mizraim\* adaikajui.

<sup>12</sup> Jacopa uchiji aidauk niina apaji tibaunak imatiksag umijuinak,

<sup>13</sup> Canaán nugkanum ejegawag Macpelánun Efrón hitita aents aajakua nudau waa taimun Abraham sumak jaka iina ukumataiji ati tibau aajakua nuwi ukusajui. Nunú nugkak waa taimu aajakua nujai mai, Mamre nugkanum etsa minitaiya nuni awai.

<sup>14</sup> Dutika ukusa ukuak Josék niina yachi aidaujui, nuigtu tikich aents niina uyuniaju aidaujui ashí betek Egipto nugkanum waketajui.

*José jakattak pujusa yachi aidaujui chichasbau*

<sup>15</sup> Nunik Jacob jakamtai José yachi aidau diták anentaimas chichainak: “Nam-putchawame José kajegtamsuash, nuniakug ii pegkegchau awajkauwaitag duwi nuna umiak iina iiktamainai”, tusag

<sup>16</sup> aentsun akateg akuptuinak: “Amina apa eke jatsuk tepesa José ujaktajum tusa,

<sup>17</sup> juna aatus iina akaatamak: ‘¡Wi amina segajame, wait aneamas amina yatsum waitkagmasu aina nuna tudauji tsagkujata! tajame’ tujamayi. Aatus iina apaji tujabiu asantai, iishkam ataktu pataka sumaku: Iina pegkegchauji tsagkugtamtaji taji, wagki iik amina apa Apajujiya nuna inake aidau asaja”, tiajui.

Tusa akatja ishiakam, chichama etsejin aidau jegajua ujakajui dutikam José nuna antuk buutiuwai.

<sup>18</sup> Nuniai niina yachi aidaushkam kautuawag, niina emtin tikishmag nugkan nijayin antig pujusag chichajuinak:

“¡Juwi pujaji, yamaik iik amina inakem ainaji!” tuidau.

<sup>19</sup> Tujash José ditan ayaak:

“Ishamkagtukaigpajum, wika Apajuichuitjai atumin suwimkan amastinnuk.

<sup>20</sup> Atumek pegkegchau awajkami tujutiuwaitjume, tujash Apajuí nunú pegkegchauwa nunak pegkegnum yapajiauwei, yamai wainag juna jutikatin asantai, tuja aents aidau pujutjin uwemtikati tujutu asa.

<sup>21</sup> Nuadui ishamkagtukaigpajum. Wi atum yuwatnunak uchijum aidau yuwatnujai amastajtjime”, tiuwai. Aatus tusa anentain ichichtukui, dutikak shiig anentus ausauwai.

*José jakamu*

<sup>22</sup> Josék niina apaji patayi aidaujui betek ijunas Egipto nugkanum pujusui. José pujusui ciento diez mijan,

<sup>23</sup> imaan mijan pujau asa Efraín akiamua nuna uchiji akiinaunash, ama tijajinashkam wainkauwai. Manasésa uchiji Maquir aajakua nuna uchijinashkam nii yajuak tsakapakui.

<sup>24</sup> Makichik tsawantai José niina yachi aidau chichajak: “Wi jakatnuk namput wajaschae, tujash Apajuí atumnak tuke yaimpakagtatui. Dutijamak juju nugka juwi batsatjum nunashkam nigki jiigmaki Abrahaman, Isaakan, Jacopan aatus nugkan amastinaitjime tusa anagkuawa nuwi ejetamawagtin atinme”, tiuwai.

<sup>25</sup> Nuna tusa José Israela uchiji aidau umikagtinun chichajak: “Dekas tajime, atumnak Apajuí yaimpakagtinai. Dutijamainakuig mina ukunchjush juwi ukugtutsuk jukitin atajum”, tusa yachi aidau akatjauwai.

<sup>26</sup> Tuja Josék ciento diez mijanji ajamu Egipto nugkanum pujus jakauwai. Nunikmatai iyashi wamak kaujai tusa kugkuinai ukatuk, aents jakau egketainum egkeawag ukusajui.

\* 50:11 “Abel-mizraim” tawa nunak hebreo chichamnumak “egiptunmaya wake besemag pujamu” taku tawai.

## Jiinjamu Éxodo Israel aents aidau Egipto nugkanum waitkam batsamin agkanmagamu

(1.1—12.51)

*Israel aents aidau Egipto nugkanum waitkasagbau*

<sup>1</sup> Israel, tikich daaji Jacob aajakua nuna uchiji aidau maki makichik ashí ditá uchijijai Egipto nugkanum utsanawaju aina nuna daajig juju ainawai:

<sup>2</sup> Rubén, Simeón, Leví, Judá,

<sup>3</sup> Isacar, Sabulón, Benjamín,

<sup>4</sup> Dan, Neftalí, Gad, Asher aatus.

<sup>5</sup> Jacopan uchiji wegantu aidau ashí ijumjamak setenta aents aajakui. Tuja niina uchiji José Egipto nugkanum pujujakui.

<sup>6</sup> José niina yachi aidaujai, tikich aents aidau nunú tsawantin batsamajaku aina nujai nuwi batsamas ashí jinawaju ainawai.

<sup>7</sup> Nunikagmataish dita uchiji aidauk kuashat akiinak wedau asag, shiig kuashat yujakajui. Imaanidau asag ditash senchigtin wajasag nugka dita batsatbaunmak piyakajui.

<sup>8</sup> Imanikaju ai kuashat mijan asa Egipto nugka apuji yamajam, José niina patayi aidaun ayamjak dutikauwa nuna makichkish dekachu ekemiuwai. Nunú egiptunmaya aidaun chichajak:

<sup>9</sup> “Israela uchiji aidauk iina nagkaetamsau yujakaje, tuja ditak iina nagkaetamsau senchigtin ainawai.

<sup>10</sup> Nuadui, aan kuashat yujakainum tusaish utugmainaita nunú chicham umikagmi. Wagki namputchawame maaniamukesh ataik iina shiwaajijai atuekag jutiin pempeen-tugmakiag depetamak, juwi batsata nuna jiinag shiyakainum”, tiuwai.

<sup>11</sup> Nuna tusa Israel aents aidaun takat katsugmanum takamtikainak waitkasagtinun, apu aidaun adaitujajui. Dutikamu asag, faraón yutai aidaun ijumajakua nuna jimag yaaktan, Pitón, Ramsés aatus najanawajui.

<sup>12</sup> Tujash Israel aents aidauk imatika waitkainamash nuni senchi yujak wedau.

Imaanigtai egiptunmaya aidauk senchi ishamainak kajejuinau.

<sup>13</sup> Nuninak, Israel aents aidaunak ditá inake emakag shiig senchi inainak waitkajaku ainawai.

<sup>14</sup> Imatikainak takat katsugmanum nugka namukag ladrillon najankatnume tusag bat-sasajui, dutikainak ajanmash imatiksag takamtikainak tikima shiig senchi waitkaidau.

<sup>15</sup> Nuigtushkam hebreo nuwa aidaun uchigmatkau, Sifrá, Fúa aajakua nujai, faraón tutai chichajak:

<sup>16</sup> “¡Atum hebreo nuwa aidau\* uchigmatkajum diistajum wajukuk akiinat! ¡Tuja aishmag akiinkuig maatajum, untsu nuwaitkuig idaisatajum!” tiuwai.

<sup>17</sup> Tujash uchi uchigmatkau aidauk Apajuín ishamaidau asag, faraón tutai tibaunak umichajui. Nuadui aishmag akiintaish mautsuk idayinau.

<sup>18</sup> Nuniagtai Egipto nugka apuji ditan chichajak:

“¿Wagka uchi aishmag akiinush mautskesh idajume?” tau.

<sup>19</sup> Tama dita ainak:

“¡Hebrea nuwa aidauk egiptunmaya nuwajaig betekchau ainawai, ditak senchigtin aina ibau asag, eke ii jegatsjinig diták uchigmainawai!” tuidau.

<sup>20-21</sup> Dutika idaubau asag, Israel aidauk kuashat akiinak wedau. Imaanidau asag aan nagkaemas senchigtin wedau. Tuja uchigmatkagtin aidauk Apajuín ishamainak uchin maachaju asagmatai, Apajuí ditanashkam kuashat uchigtin atinme tusa yaigkui.

<sup>22</sup> Imanik Israel aents aidau kawedau asagmatai, Egipto nugka apuji ashí niina aentsji aidaun chichajak: “¡Yamai nagkamsagmek hebreo aents aidaun uchiji aishmag akiinuk ashí namaka utsaitajum, untsu nuwa akiinkuig idaisatajum!” tiuwai.

\* **1:16** “Hebrea nuwa aidau” tawa nunak ima Israel wegantu aina nunakek tatsui, tikich nuwa Israel wegantu-tushkam hebreo chichaman chichaaku aidaujai ijumag taku tawai.

## 2

*Moisés akiinamu*

<sup>1</sup> Makichik aents Leví wegantunmaya, tuja nuwashkam nunú wegantunmayajaig nuwenauwai.

<sup>2</sup> Tuja uchi aishmag aidauk mantamnati tusa apu umiku ai, nuna nuwe nunú tsawantin ejajuk uchi aishmagkun uchigmakui. Nunik uchigmak, uchi pegkejuch asantai, dukuji uuka kumpatum nantu apusauwai.

<sup>3</sup> Tujash dukap tsawan uuka pujumainchau dekapeak, chagkin kajis kanumá najanamun juki, yumi wayawai tusa pegkagag, nuwi uchin egkea dukuka namak Nilo tutainum ajug ukukiuwai.

<sup>4</sup> Nuna dutika, uchish wajukatig ikaa wajasa diyaku ata tusa, niina nawanjin akupkauwai.

<sup>5</sup> Dutikau ai faraógka nawanji maitatus namaka akaikiuwei. Tuja nuwa niina inake aidauk namaka uwet yujai nii maak pujau tugkitak kajis tsapaku ayaunum chagkin kajis najanamu nanatun wainkauwai. Dutika wainak, niina inaken makichik awemauwai utita tusa.

<sup>6</sup> Tusa tima weji juki itanmatai, ujaka diikma uchi buutu egketun wainak wait anenmain diisui. Nunik chichaak:

“Juka hebreo uchi”, tiuwai.

<sup>7</sup> Nuna dutiktai uchi umayi apu nawanjin jegantun chichajak:

“Amesh wakegakminig, hebreo nuwa yamá uchi uchigmaku puja nuna wi ujaktajai, nunú nii amuntsuak kuitamkati”, tiuwai.

<sup>8</sup> Tama nii ayaak:

“¡Ayu, untsu weme nunú nuwa ujakta!” tiuwai.

Tusa tima nuwachuk nunú uchi dukuji pujamunum weuwai.

<sup>9</sup> Nunik ujak itanmatai, faraógka nawanji nunú nuwan chichajak:

“¡Juju uchi amina jemin jukim tsakatpjugta, wi amina uchi kuitabaunum akikta-jame!” tiuwai.

Tusa tima uchinak niina dukujig juki kuitamak muumpitkajui.

<sup>10</sup> Nunik muumpagmatai apu nawanjin susauwai. Dutikam juki nii uchijima niina daajin Moisés\* adaikauwai. Nunak: “wi yuminmayan jikmai” taku tiuwai.

*Moisés Egipto nugkanum pujau tupikaki Madián nugkanum webau*

<sup>11</sup> Moisés tsakaja múun wajas pujau, makichik tsawantai nii wegantunmayan niina yachi aidaun ijagsatatus weuwai. Nunik jegakma takat shiig senchi katsugman takainak batsatun wainkauwai. Nunik diistakama egiptunmaya aents niina yachi hebreo aentsun suwimatman wainkauwai.

<sup>12</sup> Dutika wainak ashí ayampa niimas, makichik aentskesh atsutai, egiptunmaya aentsun maa kayamnum yutua, ukukiuwai.

<sup>13</sup> Nuna dutika kashinia duwi ataktushkam weuwai, nunik jegakma jimag aents mai Israel aentsuk pempeentunikiag maanidaun wainkauwai. Nunik wainak senchi suwimkagtaun chichajak:

“¿Wagka ame wegantukesh pempeentukmesh suwime?” tau.

<sup>14</sup> Tama nii ayaak:

“¿Ya aminash apu chichama epegkin ati tusash adaitamkash iniish apujtamsame? ¿Egiptunmaya aents maamun dutika minash mantuatag tusamek tujutam?” tau.

Tama Moisés nuna antuk senchi ishankauwai, nunik anentaimas, dekag egiptunmaya aentsun wi maamag nunak dekawajeapi, tiuwai.

<sup>15</sup> Tusa nii anentaimsamunak imatiksag faraón dekauwai. Nunik Moisés egakjum maatajum tusa inamjauwai. Tujash Moisésak tupikaki Madián nugkanum pujastatus weuwai. Nunik jegaa yumigmatnum ayaumas ekemsauwai.

<sup>16</sup> Nunik eketai Reuel, tikich daaji Jetro sacerdote† Madiágnumia aajakua nuna nawanji siete aajaku aina nunú, ditashkam nunú tsawantin kuntin amutai aidaunum yumi shikik aimkag ditá apaji uwigi aidaun aajagtatus yumigmatnum shiyakajui.

<sup>17</sup> Nunik jegawag batsatun tikich uwiya kuitamin aidau ujumak yumigmatnum kaunawag, nuwach aidaun shiyaktajum tusa ishimiagtai, Moisés nuwi eketu asa wajatki ayamjuk yumi shikika aimak uwig aidaun aakui.

\* 2:10 “Moisés” tawa nunak “yuminmaya jikmau” taku tawai. † 2:16 Sacerdotek aents aidau utugchatjin Apajuiyai epegtuatus kuntu maa apejaku ainawai. Tuja ima nunakek takajakchau ainawai tikichnashkam takajaku ainawai.

<sup>18</sup> Dutikamtai nuwauch aidau wamak waketug apaji pujamunum kaunamtai, apaji iniak:

“¿Wagka yamaish imanikjumesh wamkesh waketjaugme?” tau.

<sup>19</sup> Tama dita ainak:

“Uwija kuitamin aidau yumigmatnum kaunawag shiyaktajum tusa ajapjamiagtai, egiptunmaya aents nuwi eketu ayamjutpak yumin shikika uwig aidaunashkam aakmae”, tuidau.

<sup>20</sup> Tusa tiagtai Reuel niina nawanji aidaun chichajak:

“¿Tuwi dusha aentsush pujume? ¿Wagka nigkish ukukmaugme? ¿Wejum ujaktajum, taa yujumkan yuwati!” tiuwai.

<sup>21</sup> Tusa timatai wejag ujakajui, dutika ujakam jegaa taamtai, yujumak yuwamunum Jetro niina chichajak:

“Juwi pujusta jutijai”, tiuwai. Tusa tama Moisés ayu tusa pujusui. Nunik pujaun Jetro niina nawanji Séforajai nuweauwai.

<sup>22</sup> Nuna nuwana pujus niina nuwe Séforan ejapmitkakui, dutikam uchi aishmagkun uchigmakui, nunikmatai Moisés nunú uchi daajin Guersón adaikauwai. Nunak: “Wika juwiyachuitjai tikich nugkanmayayaitjai”, taku tuu adaikauwai.

<sup>23</sup> Tuja kuashat tsawan nagkaemai faraón jakauwai. Nunik jakamtaishkam Israel aents aidauk imanisag senchi waitu batsatu. Imaanik waituidau asa, yaki ayamjutpak agkanmitkagmawa wajaidau. Nuna tusa imatuidaun Apajuú antukui.

<sup>24</sup> Nunik Abrahamjai, Isaakjai, Jacobjai, nii chichaman umikua nuna adeajui.

<sup>25</sup> Nunik Israel aents aidau senchi waituinamun diijus wait anenjauwai.

### 3

#### *Apajuú Moisésan untsukbau*

<sup>1</sup> Moisésak niina wegaji sacerdote Madián nugkanmaya Jetro aajakua nuna uwigjin kuitamjin aajakui. Tuja makichik tsawantai Moisés uwijan yajuak uwegshun nagkaiki weuwai, nunik muja Horeb Apajuú mujaji tutainum wakauwai.

<sup>2</sup> Nuwi Apajuú ángela nunin wajas numi piipich zarza\* kegamunum nuna ejapeen wantintukui. Nuna Moisés shiig diikma numi piipich kegayatak esaka amuechaun wainkauwai.

<sup>3</sup> Nunik anentaimas: “¿Aush wajig aniawa? ¿Numi piipich kegayatak esaka amuetsu dusha wagkag aniawa, wejin diistajai!” tiuwai.

<sup>4</sup> Tusa nuna diistatus jegantattak wegaun Tuke Pujuu wainak, numi piipich kegamunmaya untsuak:

“¿Moisés! ¿Moisés!” tama, nii ayaak:

“Juwi pujajai”, tiuwai.

<sup>5</sup> Tutai, Apajuú chichajak:

“Imajuig tantaipa. Sapatjum ukuimakta, wagki ame wajam aanka dekas nugka Apajuú etegkamu pegkegmai”,

<sup>6</sup> tusa nuigtushkam chichajak:

“Witjai Apajuúnuk, amina apachjum Abraham, Isaac, Jacob aidau emematujaku aina nunuwaitjai”, tiuwai.

Tutai nuna antuk Moisés ishamak Apajuún diimainchau dekapeak, yapin dukukui.

<sup>7</sup> Tujash Tuke Pujuu ataktu chichajak:

“Wika mina aentsug aidau Egipto nugkanum batsamas senchi waituina nunak shiig wainjai. Tuja takata apuji aidau takat katsugmanum takamtikainam waituinak pampaina nunashkam antukjai. Tuja dita waituina nunashkam shiig dekajai.

<sup>8</sup> Nuadui egiptunmaya aents aidau waitkaina nuna uwemtikatasan juwi taajai. Wi ditanak jiija yajuakan nugka múun pegkeg ajak shiig tsapau, tagkush shiig muumpau, yumi aidaush ayaunum egegawagtajai. Nunú nugka duka Canaán aents, hitita aents, amorreo aents, ferezeo aents, heveo aents, Jebús aents aidaun batsamtai ainawai.

<sup>9</sup> Antukta nijah: Wika mina aentsug Israel ame wegantu aidau senchi waituinak pampaina nunak shiig antukjai, tuja egiptunmaya aents aidau shiig senchi waitkaina nunashkam wainjai.

<sup>10</sup> Nuadui umintsata, wi aminak Egipto apuji pujamunum jegaam, mina aentsug ame wegantu aidau batsata nunú jiigminum tusan akupeajame”, tiuwai.

<sup>11</sup> Tusa tama Moisés Apajuún ayaak:

\* 3:2 “Zarza” hebreo chichamnumash waji numi takug tawa duka shiig dekamaitsui.

“¿Wisha wainkauchitag juninnush Egipto apuji pujamunum jeganush, Israel aents wi wegantu aidau nuwi batsata nunash jii-mainkaitag?” tiuwai.

<sup>12</sup> Tutai Apajuí ayaak:

“Wi aminak uyuuntsattagme. Mina aentsug ame wegantu aidau Egipto nugkanum batsata nunú jiija yajuakam, ashí atum aidautijum juju muja juwi emematjtnaitjume. Nunú betek uminkui dekattame wi amina awemajam nunú”, tiuwai.

<sup>13</sup> Tutai Moisés Apajuín ayaak:

“Tujash wi jegaan ditá chichagkun: ‘Atumin apachjum Abraham, Isaac, Jacob Apajuín emematujaku aina nunú atumin agkanmitkatí tusa awetime’ tai dita mina aijuinak: ‘¿Dusha yaita daajish?’ tusa tujutainakuish, wisha ditanash ¿wajintu aikagatja?’ tiuwai.

<sup>14</sup> Tutai Apajuí ayaak:

“Mina daajuk: ‘Tuke Pujuuwai’<sup>†</sup> Juju mina aentsug aidau ujaakum: ‘Tuke Pujuu’ minak atuminig awetime, titatme”, tiuwai.

<sup>15</sup> Tuja nuigtushkam Apajuí Moisésan chichajak:

“Juju aatsa mina aentsug aidau ujakta. Wika Apajuí, Tuke Pujuu atumi apachjum Abraham, Isaac, Jacob emematujaku aina nunuwaitjai. Jujuwai mina daag yaunchkesh tuke asauwa nunú. Jujuwai mina daajun ajumaish tuke adaititin aina duka.

<sup>16</sup> Nuadui wetá nunika jegaam Israel aentsu apuji múun aidau ijumja chichagkun: ‘Apajuí, Tuke Pujuu tutaya nuna, atumi apachjum Abraham, Isaac, Jacob emematujaku aina nunú mina wantintujuk chichagtak: Wika ditanak kajimat Chau asan, egiptunmaya aents aidau waitkam batsata nunak wainjai.

<sup>17</sup> Nuadui Egipto nugkanum waitkam batsata nunak ankanmitkattajai dutikan Canaán aents, hitita aents, amorreo aents, ferezeo aents, Jebús aents, heveo aents aina nuna nugke nugka pegke ajak shiig tsapau, tagkush shiig muumpau, yumishkam imanisag ayá nuwi yajuakan ejegattajai tujamui’, titatme.

<sup>18</sup> “Tusa tamin Israel aentsu apuji múun aidau antugtamtakatui. Nunikagmatai ditajai faraón jegajua chichagkun: ‘Tuke Pujuu, Apajuí hebreo aents aidau Apajuí jutií aidauti emematin ainag nunú wantintugmakji. Nuniku asamtai idaikagtusta kampatum tsawan mujá shiyakaja, nuwi kuntin maa apeaku Tuke Pujuu iina Apajuíiya nunú emematmi taji’ titatme.

<sup>19</sup> “Tusa taminish, faraógkak shiyaktajum tujamchatta nunak shiig dekajai. Tujash wi niinak waitkastatjai, shiyaktajum tujamti tusan.

<sup>20</sup> Dutikakun wi mina senchigjai egiptunmaya aents aidau suwimka suwakun wainchatai ishain aidau iwainagatjai. Nuadui faraón atumnak shiyaktinme tusa idaitamsagtai.

<sup>21</sup> Nuigtushkam wi egiptunmaya aents aidau ditá wajiji aidau anentag shiig anenjamas amastinme titatjai. Nuadui atumek jiiinja shimakjumes uwegmatakim shimutsuk wajigtin wajasjum shiyaktatjume.

<sup>22</sup> Tuja Israel nuwa aina duka maki makichik egiptunmaya nuwa pujamunum ijus pujuidauk, nuniachkush pachiinak pujaushkam jiju plata tutayai dakumka najanamu aidau, orojai najanamu aidau, jáanch nugkurai aidau, aatus segagtai. Dutikawag nuna ditá uchiji aidau nawanji aidau anujagtai. Dutika ditá wajiji ashí yajutkam asag, egiptunmaya aidau makichkish wajigtuchu juwakagtai”, tiuwai.

## 4

<sup>1</sup> Tutai Moisés ayaak:

“Tujash minak dekaskeap tawa tujutchagtai, nuninak wi taishkam antugtutsuk Tuke Pujuu wantintugmak Chau aig, tuu wekaeme, tujutiagtai”, tiuwai.

<sup>2</sup> Tutai Tuke Pujuu niina chichajak:

“¿Waji aancha takakme?” tama:

“Ushujutaijun takakjai”, tau.

<sup>3</sup> Tutai: “¡Nugka aepsata!” tau.

Tama nugká aepsauwai. Dutikamuik dapi najaneauwai, nunikmatai Moisés nuna ishain tukupikau.

<sup>4</sup> Nunitai Tuke Pujuu Moisésan chichajak:

“Ujuknum achikta” tau. Tama Moisés achikui; dutikam ataktu ushujutai wajasui. Nunikmatai chichajak:

<sup>5</sup> “¡Amesh jutiksamak iwaintukta! Juna wainkag dekas iina muunji Abraham, Isaac, Jacob aajaku aina nuna Apajuíimpap wantintuke tujamiagtai”, tusa

<sup>†</sup> 3:14 “Tuke Pujuu” taji duka Apajuí daaji hebreo chichamnum “Yahvé” “Jehová” tawa nunú taji.

<sup>6</sup> ataktu chichajak: “¡Jáanchjum inuam detsepem achikta!”

Tama Moisés inua detsepem achikui. Nunik uwejen jiiki diikma jata lepra achikam shiig puju wajasun wainkauwai.

<sup>7</sup> Nunikmatai Apajuí chichajak:

“Ataktushkam dutiksamek detsepem achikta.”

Tama ataktushkam inua detsepem achikui, dutika uwejen jiiki diikma yaunchuk iyashi aajakbaunak imanuk pegkeg wajasui.

<sup>8</sup> Nunikmatai Tuke Pujuu chichajak:

“Yama nagkamchaku iwainamugmin dekaskeapi tusa antugtamainashkush, yamai iwaintukjam juju iwaintamin dekaskeap tawa tusag antugtamkagtatui.

<sup>9</sup> Tujash juju mai iwaintamash dekaskeapi tusa antugtamainashkuig, namakia yumi shikika jukim nugká ukagta, dutikam yumi ukagbauwa nunú numpa wajastatui”, tiuwai.

<sup>10</sup> Tama Moisés Tuke Pujuu ayaak:

“¡Chah, Tuke Pujuuwah! Wika shiig jintiaja chichamainchau dekapnujai, junak yaunchuk nagkamsan, yamai ame augtakminish nunisnuk chichajai”, tau.

<sup>11</sup> Tutai Tuke Pujuu ayaak:

“¿Ya aentsu weninash najatuawaita? ¿Ya najanauwaita chichachu, antuchu, wainmachu, wainbau aidaunash? ¿Wichaukaitag Tuke Pujuu, nuna dutiknununuk?”

<sup>12</sup> Nuadui wetá, wi aminak chichamtikattajame, wiki ame anentainja chichaktinnash jintintuattagme”, tiuwai.

<sup>13</sup> Tama Moisés ataktu chichaak:

“¡Chah, Tuke Pujuuwah, wait aneamam dekas tikich awemata!” tau.

<sup>14</sup> Tutai Tuke Pujuu Moisésan kajejuk chichajak:

“¡Awi amina yatsum Aarón Levi wegantu shiig chichau puja nuna wi wainag jamah! Nuigtushkam nii amina igkumpaktatus minawai. Tuja amina waipak shiig aneas jujamkittawai.

<sup>15</sup> Dutijamamtai nijai chichasta, nuniakum wi amina tajam nunú ashí ujakta, dutikam ame tumaina nuna nii Israel aents aidaun ujakti. Tuja wi niinak yaigtatjai, dutikakun atum dutikatnunashkam jintintuattajime.

<sup>16</sup> Ame Aarógakak wi tumainaitag aikasmek tita, tuja nii ame tumainaitam dutiksag aents aidaun ujakti.

<sup>17</sup> Tuja janú ushujutaijum jukim wetá, núnikam aanjai kuashat wainchatai aidau iwainagtatme!” tiuwai.

<sup>18</sup> Tusa tima Moisés wakitki niina wegaji Jetro jeen jegauwai, nunik chichaak:

“Wisha mina pataag Egipto nugkanum batsata nuwi wakitkitjai. Nunikan iwakuash batsata diistajai”, tau.

Tutai niina wegaji Jetro ayaak:

“¡Ayu, shiig kuitamamsam wetá!” tiuwai.

#### *Moisés Egipto nugkanum wakitkimu*

<sup>19</sup> Moisés eke Madián nugkanum pujuttaman Tuke Pujuu chichajak:

“¡Egipto nugkanum wakitkita, amina mantamatatus egapagmaya duka ashí jinawaje!” tiuwai.

<sup>20</sup> Tusa tima Moisés niina nuwen uchiji aidaujai burronum pekai, Egipto nugkanum wakitkiuwai. Nuniak ushujutaijin Tuke Pujuu, jujai wainchatai aidau iwainagtatme, tibaun juki weuwai.

<sup>21</sup> Nunik wetatman Tuke Pujuu Moisésan chichajak:

“¡Egipto nugkanum jegamek, Wi amina iwaintukjam duka faraógka emtinish imatiksamek mina senchiju amaag nujai iwaintukta! Wi niinak antakchau emattajai, dutikamu asa kakajus wetinme tujamchagtatui.

<sup>22</sup> Nuniakuish ame nii chichagkum: ‘Juna aatus Tuke Pujuu chichaak: Israel aents aidauk mina uchig iwai amaina numamtainai.

<sup>23</sup> Nunin asamtai, agkan idaitugsata mina uchig aidau jijnjag emematjitnume timajame, tusa tamash dakitau asamin, wi amina uchijum iwaiya nuna mantuattajame’, tujamui tusam tita”, tiuwai.

<sup>24</sup> Tusa tima wee wenakua jintá kajittaman Tuke Pujuu Moisésan wantintuk maatag tiuwai.

<sup>25</sup> Nunitai Séfora kuchii kaya najanamun juki, uchiji katiuchiji chuchuken tsupigkauwai. Dutika nuna juki Moisésa nawen antigkui, dutika chichajak: “¡Amek mina uchiju numpen yamaikish mina aishjuitme!” tiuwai.

<sup>26</sup> Nuna aatus nuwe dutikamtai, Tuke Pujushkam mauntsuk weti tusa idaisauwai. Nunikmatai Séfora chichaak: Moisésak mina uchiju numpen yamaikish mina aishjui, tiuwai.

<sup>27</sup> Nuna nuniai Tuke Pujuu Aarórgan chichajak:

“¡Uwegshunum weme Moisés igkugkam utita!” tiuwai. Tima niishkam weji “muja Tuke Pujuu etegkamu pegkejam” tutainum waka igkug kumpamak yapiin kugkuasui.

<sup>28</sup> Dutika igkugkam Tuke Pujuu titatme tibaunak imatiksag Moisés Aarórgan ashí ujaku. Tuja nunú dutikattame tusa Tuke Pujuu tibaunashkam imatiksag ujaku.

<sup>29</sup> Nuna dutika nuadui Moisés Aarórgan, Israel aentsu apuji múun aidau ijumjatatus wegajui.

<sup>30</sup> Dutika ijumag Tuke Pujuu Moisésan titatjume tibaunak Aarón imatiksag ashí ditan ujaku. Dutikamtai Moisés Tuke Pujuu senchijin wainchatai aidau iwainagta tibaunak imatiksag dita wainainamunum ashí iwainajui.

<sup>31</sup> Nuna waingak Israel aents aidauk: Dekas Tuke Pujuuwap awemae tiajui. Tuja Israel aents aidau waituina nunak wainjai, tuja waitkam batsata nunashkam dekaikai Tuke Pujuu timae tabaun antukag, tikishmag pujusag niina emematuidau.

## 5

### *Moisés Aarórgan Egipto nugka apuji faraón tutain ausatasa webau*

<sup>1</sup> Nuna dutika ukuinak Moisés niina yachi Aarórgan faraórgan jegajuawag chichajuinak:

“Israel aents aidauti emematin ainag nunú Apajuí, Tuke Pujuuwa nu chichaak:

“ ‘Mina aentsug aina nunú idaitugsata, dutikam uwegshunum shiyakag, awi ijunag mina emematjuinak jistamatnume’ tawai”, tuidau.

<sup>2</sup> Tutai faraón ayaak:

“¿Yaita dusha Tuke Pujush, wi niina chichamen antugkan, Israel aents aidau shiyaktajum tusa idaisatnunash? ¡Wika Tuke Pujuuinak wainchaujai, nuigtushkam Israel aents aidau shiyaktinme tusanuk idaisashtatjai!” tau.

<sup>3</sup> Tutai dita ainak:

“Apajuí, Tuke Pujuu tutai, hebreo aents aidauti emematin ainag nunú wantintugmakji. Nuniku asamtai, uwegshunum kumpatum tsawantai jegatainum wetatji. Nuwi jegaa kuntin maa apeaku Tuke Pujuu iina Apajuí emematiagmi taji. Tuja nunú ii nunishtaik niina suwimke, jatakesh jutiin iyanjamainai, nuniachkush shiwagkesh maaniamunum amupamainai”, tuidau.

<sup>4</sup> Tama faraón ditan ayaak:

“¿Wagka Moisésa amesh Aarórgan aents aidau takaidaush nunú takugmesh tsawantash emegkagme? Nunú tuu yujatsuk wakiktikum takastajum”, tau.

<sup>5</sup> Tuja nuigtushkam faraón ditan chichajak:

“Juju nugka juwi batsamas Israel aents aidau shiig kuashat yujakag takainak batsata nunidaik, takasaigpajum tusagmek tsawantak emegkaumaitusgme”, tiuwai.

<sup>6</sup> Nuna tusa nunú tsawantak faraón niina aentsji apu aidau, nuigtu Israel aents aidau takata takagtai diistin adaijamu aidaujai ijumag chichajak:

<sup>7</sup> “Yamai nagkamsagmek Israel aents aidau ladrillon pachimag najanatnume tusagmek trigo numiji tsupigbau susaigpajum, diták wejiag yajuaktinme.

<sup>8</sup> Tujash yaunchuk najanin agma imatiksag najanatnume tusajum inagtajum, machikish awagtukigpajum. Ditak daki asag mujá shiyakaja kuntin maa apeaku Tuke Pujuu emematni tusag imatunawai.

<sup>9</sup> Nuadui yamaik nuni senchi takamtiksatajum. Imaatikamu asag wait chicham antumainji tsawan atsugtinme”, tau.

<sup>10</sup> Tusa tiajam faraórgan aentsji apu aidau, Israel aents aidau takata takagtai diistin adaijamu aidaujai jünag Israel aents aidau ujinak:

“Faraón chichaak: ‘Yamai nagkamsagmek trigo tsupigbau susaigpajum tujabiu asamtai, yamaik amaschattaji!

<sup>11</sup> Atum tuwiya jumainaitjume nunú atumek wejijum jukitajum. ¡Tujash nuniakjumes najannujum duka imatiksagmek najanattagme!’ tujamui”, tuidau.

<sup>12</sup> Tusa tiajam Israel aents aidauk trigo tsupigbaujai pachimja ladrillon najanmain atsau asamtai, trigo tsupija yajumku ampigbau aidau yajuakag nujai ladrillon najanatag tuidau asag Egipto nugkanak ashí pampankag egaidau.

<sup>13</sup> Tuja kashi kashinig Egipto apuji niina aentsji apu aidau Israel aents aidau takata takagtai diistin adaijamu aidau chichajuinak: “¡Yaunchuk trigo tsupija suwamu



asajum makichik tsawantaik wajupa najanmajume duka imatiksagmek najanatajum!" tusag imatjuidau.

<sup>14</sup> Tuidau asag faraón niina aentsji apu adaijamu aidau Israel aents takata takagtai diistin adaijamu aidau asutidau. Dutikainak:

"Yaunchuk najanmajum imatiksagmekek yaug najanachmaugme, tuja yamaishkam nunisjumek umiatsjum dusha ¿wagka aniagme?" tuidau.

<sup>15</sup> Imatikainam Israel aents takata takagtai diistinme tusa adaijamu aidau, faraóghan jegajuawag chichajuinak:

"¿Wagka amina inakem ainajinish imatikagmesh waitkagkagtame?

<sup>16</sup> Nuigtushkam trigo tsupigbaunash amina aentsjum aidau amina inakem aidautinak sukagtuinatsui, nuninayatak: "¿Wamak ladrillo najanatajum!" tusa jiyajatuinawai. Nuigtushkam asutkagtuinawai. Ii wamak umiatsug duka amina aentsjum aina nuna utugchatjiyai", tuidau.

<sup>17</sup> Tusa tiagtai nii ayaak:

"Atumek daki ainagme, nunin asajum idaikagustajum imau wee kuntin maa apeaku Tuke Pujuu emematiagmi tuu yujagme.

<sup>18</sup> Tutsuk takakjum shiyaktajum, trigo tsupigbaun amainashkuish, yaunchuk trigo suwamu asajum najanmajum imatiksagmek ladrillo najantatjume", tu.

<sup>19</sup> Tusa tiam Israel aents aidau takata takaidau diistinme tusa adaijamu aidau shiig utugchat diisajui.

<sup>20</sup> Nuna aatus faraóghan aujus jiinkama, Moisés Aarógjai agá dakamainak batsatun wainkajui.

<sup>21</sup> Nunik ditan chichajuinak:

"Atumi utugchatjin ii waitiag duwi Tuke Pujuu atumnak suwimkan amastinme. Atumi tuu wekaetin faraón niina atueka takatai aidaujai shiig kajegtamkaje. Atumek tuke aneasjum egiptunmaya aidau wai waitkainakua ijinatneme tusajum jutikagtagme", tuidau.

*Moisés Tuke Pujuu ausamu*

<sup>22</sup> Tusa tiagtai Moisés Tuke Pujuu aujak:

"¿Apujuh, wagka juju amina aentsjum aidau pegkegchaunmash waitkame? ¿Wagka minash awetibiume jutika waitkastinaitkumesh?

<sup>23</sup> Wi yama nagkamchakun amina daagmin pachisan faraóghkajai chichasmayag duwi nagkamas yamaikish amina aentsjum aidau nuni senchi waitkainawai, ¡tujash amek amina aentsjum aidau eke agkanmitkachume!" tiuwai.

## 6

<sup>1</sup> Tusa tama Tuke Pujuu Moisésan ayaak:

"¡Yamai wi faraóghan itugkattaja nunú wainkattame! ¡Wi mina senchijun iwaintuktatjai, dutika ai nii dekas atumnak jijnjatajum tusa tujamiagtatui!" tiuwai.

*Tuke Pujuu Moisésan ataktu akateg awemamu*

<sup>2</sup> Tuja Tuke Pujuu Moisésan ataktu chichajak:

"Witjai Tuke Pujuuunik.

<sup>3</sup> Wika Abrahaman, Isaakan, Jacopan wantintukuitag nuaduik: 'Apajú ashí senchigtinaitjai' tuu iwainmamkauwaitjai. Tujash dekas mina daag 'Tuke Pujuu' tutaya nunak ujakchau ainajai.

<sup>4</sup> Nuigtushkam ditajai chichama umiakun: 'Nugka Canaághan amastajime' tiuwaitjai. Tujash ditak nuwig ijagka numamtin batsamsaju ainawai.

<sup>5</sup> Tuja Israel aents aidau Egipto nugkanum inaku waitkainam batsamas chichaina nuna yamai antukjai. Nunikan adeagjai ditá muunji aajaku aina nujai chichaman umikuitag nuna.

<sup>6</sup> "Nuadui Israel aents aidau tita: '¡Witjai Tuke Pujuuunik! Nuniau asan egiptunmaya aents aidau waitkainam batsatun nunak egiptunmaya aidau suwimka suwakun jigtatjime. Tuja takat katsugmanum takamtijamainakui waituinajum nunashkam dutiksanuk agkanmitkattajime. Wi mina senchigjai ayamjukan jigtatjime.

<sup>7</sup> Dutikan mina aentsug atinme titatjai, tuja wika Tuke Pujuu atumi ememattai atatjai. Duwi dekajuawagtinai, iina Apajúji Tuke Pujuu tutaya nunuwap egiptunmaya aents aidau inaku waitkatai batsatutin agkanmitkagbauwaita tusag.

<sup>8</sup> Nuadui wi Abrahaman, Isaakan, Jacopan chichagkun: "Nugka amastajime" tusan dekas umiktinjun anagkuawaitag nuwi ejegattajime, dutikan nuna amastajime atum-dau tuke atina nuna. Wi Tuke Pujuu tutayaitag imanun nunak tajai' tita", tiuwai.

<sup>9</sup> Tusa tima Moisés dutiksag Israel aents aidaun ataktu ujakui. Tujash ditak antugkachaju ainawai, wagki Moisésa tuu wekaetin shiig senchi takamtijamainak waitkagmainawai tuidau asag.

<sup>10</sup> Dutika antugchagtai, Tuke Pujuu Moisésan chichajak:

<sup>11</sup> “¡Wetá faraón pujamunum! núnikam Israel aents aidaun Egipto batsata duka, idaisata jijnjati, tita”, tiuwai.

<sup>12</sup> Tama Moisés Tuke Pujun ayaak:

“Israel aents aidaukesh mina antugtuinatsu nunash ¿wajuk faraókgash antugtuktigki wi shiig jintiaja chichatsug nuniaish?” tau.

<sup>13</sup> Tutai Tuke Pujuu Moisésan Aaróggjai akateak: “Israel aents aidaun faraóggjai chichagkujum: ‘¡Tuke Pujuu Israel aents aidaun jüigtinme!’ tujamae titajum”, tiuwai.

*Apajú Moisésan Aaróggjai ataktu ausamu*

<sup>28</sup> Tuke Pujuu Moisésan Egipto nugkanum ausauwa nunak,

<sup>29</sup> aatus tiuwai:

“Witjai Tuke Pujuu tutai. Wi amina titatjam duka ashí imatiksamek faraón ujakta”, tiuwai.

<sup>30</sup> Tusa tama Moisés Tuke Pujun ayaak:

“Tujash wi shiig jintiaja chichatsug nuniaish faraókgash ¿wajuk minash antugtuktigki?” tiuwai.

## 7

<sup>1</sup> Tutai Tuke Pujuu Moisésan chichajak:

“Amek faraóγκα emting wijai betek atame. Tuja amina yatsum Aarón ame chichamun etsegugmaktatui.

<sup>2</sup> Wi titatjam nunú ame Aarón ashí ujakta; dutikam nii faraóγκan chichajak: Israel aents aidaun juwi batsata duka idaisata jijnjatnume tusa titatui.

<sup>3</sup> Tujash wi faraóγκn antakchaujai betek emattajai, dutikakun mina senchigjai ashí Egipto nugkanmak kuashat wainchatai ishamain aidaun iwainagtatjai.

<sup>4</sup> Nuna wainkush faraóγκak antugtamakchagtatui. Tujash wi mina senchigjai egiptunmaya aidaun suwimka suwakun, mina aentsug Israel aents aidaun Egipto batsata nuna ayamjukan jüigtatjai.

<sup>5</sup> Dutikakun wi mina senchijun ashí Egipto nugkanum iwainakan Israel aents aidaun batsata nuna jüitai, egiptunmaya aidaun, wi Apajú Tuke Pujuu tutayaitag nuna dekajuawagtatui”, tiuwai.

<sup>6</sup> Tusa tima Moisés Aaróggjai Tuke Pujuu dutikatajum tibaunak imatiksag umikajui.

<sup>7</sup> Dita faraóggjai chichasaju aina nunú tsawantaik, Moisésnak ochenta mijan ajujakui. Untsu Aaróγκn ochenta y tres mijan ajujakui.

*Aaróγκa ushujutajji*

<sup>8</sup> Tuke Pujuu Moisésan, Aaróggjai chichajak:

<sup>9</sup> “Wainchatai iwainakta tusa faraón tujamkuig, amina ushujutajjum jukim Aarón susata, dutikawamin faraókgash wainai nугká aepsati, dutikam dapi najaneati”, tiuwai.

<sup>10</sup> Tusa tima Moisés Aaróggjai faraón pujamunum weajui. Nunikag Tuke Pujuu dutikatajum tibaunak imatiksag dutikawajui. Tuja faraón niina atueka takataiji aidaun wainainamunum Aarón ushujutain juki nугká aepsauwai, dutikam dapi najaneauwai.

<sup>11</sup> Nunikmatai faraóγκshakam tunchi aidaun untukui. Dutikam ditashkam dita dekamujijai dutiksag iwainakajui.

<sup>12</sup> Maki makichik ditá ushujutajjin nугká aepsajui, dutikam dushakam dapi najaneakui. Tujash Aaróγκa ushujutajji dapi najaneauwa nunú ditanunak ashí yuwa amukui.

<sup>13</sup> Dutikamtaish faraóγκak antakchau wajas ditanak antugkachajui, Tuke Pujuu nuniktatui tibaunak imaniasag.

*Nagkamchaku suwimak suwaku yumi numpa emamu*

<sup>14</sup> Nunikmatai Tuke Pujuu Moisésan chichajak:

“Faraóγκak antakchau wajasu asa, Israel aents aidaunak shiyaktinme tusag idaitsui.

<sup>15</sup> Tujash kashin kashikmasam nii namaka weakui wejita, núnikam namaka uwet wajasam dakasta. Nuwi weakum ushujutajjum dapi najaneama nunú jukita.

<sup>16</sup> Nuwi wajamin taamtai chichagkum:

“ ‘Hebreo aents aidaun Apajú Tuke Pujuu tutai emematin ainag nunú amina ujakti tusa awetine. Nuniak aatus tujamui: “Mina aentsug aidaun uwegshunum shiyakag mina emematitjnume agkan idaisata timagme. Tujash antugtatsme”, tujamui.

<sup>17</sup> Nuniau asamin juna aatus Tuke Pujuu chichaak:

“ ‘Yamai dekaattame wi Apajúi Tuke Pujuuwaitag nunú”, tujamui. Nuadui wi ushujutain takakag juwi namakan awattatjai, dutika ai yumi numpa wajastatui.

<sup>18</sup> Nunikmatai namak aidau jinaamtaí yumi mejettawai, nunitai egiptunmaya aidau nuna tsumainak yuminak uwagchagtatui’ tawai tita”, tiuwai.

<sup>19</sup> Nuna tusa ataktushkam Tuke Pujuu Moisésan chichajak:

“Aarón ujakta ushujutaijin juki namak aidau, entsa aidau, kucha aidau, yumi shikika aimtai cisterna aidau Egipto nugkanum ayá nuni, tuja ashí yumi piyaju aidau ayá aatus takui awentati, dutikam yumi aidauk numpa wajasti. ¡Aatus ashí yumi shikitai numi najanamu, nuigtu kaya najanamu aidanmashkam yumi piyag ayauk numpa waigtatui!” tiuwai.

<sup>20</sup> Tusa tima Moisés Aaróggjai Tuke Pujuu dutikatajum tibaunak imatiksag dutikawajui. Tuja faraón niijai atueka takatai aidaujai wainainamunum Aarón nii ushujutaiyai yumin awatiuwai; dutikam ashí yumi aidauk numpa wajasui.

<sup>21</sup> Imanikmatai namak aidauk jinauwai, nuniku asa yumi shiig senchi mejeau asamtaí, egiptunmaya aidauk yuminak umuinachu. Tuja Egipto nugkanum yumi ayauk ashí numpa wajasui.

<sup>22</sup> Tuja egiptunmaya tunchi aidaushkam dita dekamujijai yumin numpa awajsajui, nuna dutikawagmatai faraóggkak nuni senchi antakchau wajasui. Nuniau asa Moisés Aaróggjai tuinamunak antugchau, Tuke Pujuu nuniktatui tibaunak imanisag.

<sup>23</sup> Nuadui faraóggkak puyatjusagkesh diitsuk ukuak nii pujusa inamtaíjin wakitkiuwai.

<sup>24</sup> Imanik namak numpa wajasu asamtaí, ashí egiptunmaya aidauk yumi pegkeg piyagmatai uwagmi tusag namaka uwet yumigmatan taukajui. Wagki namakia yumik umumainchau asamtaí.

*Jimaja juju suwimak suwaku takash ishitkamu*

<sup>25</sup> Tuke Pujuu namakan numpa emauwa nunú siete tsawan nagkaemakui ai,

## 8

<sup>1</sup> Tuke Pujuu Moisésan chichajak:

“Faraón pujamunum wetá, nunika chichagkum:

“ ‘¡Mina aentsug aina nunú agkan idaitugsata, jiinag shiyakag mina emematjitnume! tujamui.

<sup>2</sup> Tusa ujamaikam ame jijnjati tusa idaichakminig, wi suwimka amaakun ashí Egipto nugkanum takashun ishitkattagme,

<sup>3</sup> dutika ai takash namakia jiinag ame pujusa inamtaigminig, kanutaigmin, pegakjuminish, amejai atueka takau aina nuna jenish, ashí amina aentsjum aina nuna jenishkam, tuja pag inagtaigminish, pag najanatasa namutainmash ashí utsaanagtatui.

<sup>4</sup> Imaanidau asag amina tuja ame atueka takataijum aina nuna, nuigtu amina aentsjum aina nunashkam ashí takash pemjujag waitkasagtatui’ tita”, tiuwai.

<sup>5</sup> Nuna tusa Tuke Pujuu Moisésan ataktu chichajak:

“Aarón ujakta ushujutaijin juki namakanini, entsa ayá nuni, kucha aidanmanini awentati, dutikam nuwiya takash jiinag ashí Egipto nugkanak akijuati”, tiuwai.

<sup>6</sup> Tusa tima Aarón egiptunmaya namak ayamunmanini awentau, dutikam takash jiinag ashí Egipto nugkanak pimitkau.

<sup>7</sup> Nunikmatai tunchi aidaushkam dutiksag dita dekamujijai takashun Egipto nugkanum ikaunmakajui.

<sup>8</sup> Imanikmatai, faraón Moisésan, Aaróggjai untsuka itan chichajak:

“Apajúi, Tuke Pujuu tutai, minash segatjitajum, takash mina, nuigtu mina aentsug aidanash waitkagmaina nuna emegkagti. Dutikamtaí wisha niina aentsji aidanash kuntinu maa apeanak Tuke Pujuu ememattinme tusan idaitustajai”, tiuwai.

<sup>9</sup> Tusa tutai Moisés niina ayaak:

“Amina, tuja amejai atuegak takau aina nuna, tuja amina aentsjum aina nujai takash aidau waitkagmaina nunú shiyakti, nunikag namaka utsaanatnume tusanush, wajutiya nunash segattatjame nunú ame tujutta”, tau.

<sup>10</sup> Tama nii ayaak:

“Kashin dutikata”, tiuwai. Tutai Moisés ayaak:

“Ame tame duka betek uminkattawai, nunikmatai amesh dekaata iina ememattai Apajúi, Tuke Pujuuwa, imanuk tikichik atsa nunú.

<sup>11</sup> Takash aidau amina waitkagmaina duka shiyaktatui, nunik namaka utsaanattawai. Nuadui aminak waitkagmaschattawai, tuja amejai atueka takataijum aidanash, tuja amina aentsjum aidanashkam ataktu awagkig waitkaschattawai”, tiuwai.

<sup>12</sup> Tusa Moisés Aaróggjai faraógka aujus ukuinak jiiinkiajuui. Nunik Moisés Tuke Pujuu segauwai, takash faraón ishikamua nuna awakeagti tusa.

<sup>13</sup> Tusa segam Tuke Pujuu Moisésan antugkauwai, nunik takash jegaa, agá, ajanum aatus ayaunak ashí jinauwai.

<sup>14</sup> Nunikmatai aents aidau takash jinaun yajuak iju ijuma emakajui, dutikam ashí nugkanum pegkegchau mejeg akijuuuwai.

<sup>15</sup> Tujash faraón nunú utugchatan agkan wajasa, ataktu antakchau wajas Israel aents aidau jiiinjainum tau asa awake dakitau. Nuniau asa Moisés Aaróggjai tabaunak antugkachui, Tuke Pujuu nuniktatui tibaunak imanisag.

*Kompatuma juju suwimak suwaku tetee ishikamu*

<sup>16</sup> Tuke Pujuu Moisésan chichajak: “Aarón niina ushujutaijiya duwi nugka yukukuntu awatta tita, dutikam tetee najaneak, ashí Egipto nugkanmak piyakti”, tau.

<sup>17</sup> Tusa tima nuna uminak Aarón ushujutaiyai nugka yukukuntun awatiuwai, dutikam ashí Egipto nugkanum nugka yukukuntu aidau ayauk tetee najaneak, Egipto nugkanak akijuuuwai. Imaniku asa aents aidaunak, kuntin aidaujai senchi waitkaidau.

<sup>18</sup> Nunitai tunchi aidaushkam dita dekamujin teteen najankatag tukama tujinkajui, nuninai teteeek aentsnak, kuntinnak shiig kuashat waitkaidau.

<sup>19</sup> Nunik tujinkag tunchi aidau faraógkan chichajuinak:

“Juka dekas Apajuí senchijiyai”, tuidau.

Tamashkam faraógkak antakchau wajas Moisés Aaróggjai tabaunak antugkachui, Tuke Pujuu nuniktatui tibaunak imaanisag.

*Ipak usumta nunú suwimak suwaku anchi ishikamu*

<sup>20</sup> Nunitai Tuke Pujuu Moisésan chichajak:

“Kashin kashikmas faraón namaka jegattawai, nuniktin asantai, ameshkam kashik-masa nantakim jegaaantata, núnikam Apajuí chichaak: ‘¡Mina aentsug aina nunak agkan idaitugsati, dutikam jiiinag mina emematjitime!’

<sup>21</sup> Tuja ame mina aentsug aidau jiiinjatnime tusa idaichakminig, wi aminak, amejai atuegak takau aina nuna, tuja amina aentsjum aina nunashkam anchi wegantu aidau ishikattagme. Dutika ai egiptunmaya aidau jenig, nugkeenish ayatak anchig piyaktatui.

<sup>22</sup> Tujash nunú imaniakuish, mina aentsug Egipto nugkanum Gosén batsata nunak wi kuitamkattajai, nuadui dita batsatbaunmak makichik anchigkesh atsuttawai. Nunú wainum dekaattame wi Apajuí Tuke Pujuu tutain mina senchigjai juju nugka juwi dutikag nunú.

<sup>23</sup> Wi mina aentsug aidaunak agkanmitkakun, amina aentsjum aidaunak suwimka susattajai. Tuja duka kashin uminkattawai’ tujamui, tita”, tiuwai.

<sup>24</sup> Aatus Tuke Pujuu anchi aidau faraógka pujusa inamtaijin, niijai atueka takatai aidau jenish ashí shiig kuashat anchin ishikauwai, dutikam ashí Egipto nugkanmak ayatak anchig piyakmatai pegkegchau wajas asauwai.

<sup>25</sup> Imanikmatai faraón Moisésan, Aaróggjai utsuka chichajak:

“Wetajum, tujash atushat wetsuk atum batsatjum nuwig kuntin maa apeakjum atumin Apajuji ememattajum”, tau.

<sup>26</sup> Tama Moisés ayaak:

“Juwi pujusa dutikamuk shiig awajtamtsuji. Nunú kuntin maa apeamua duka egiptunmaya diismak shiig pegkegchauwai. Nuadui ii kuntin maa apeaku Tuke Pujuu emematjin egiptunmaya aidau waipakag, ditak kuntinu emematin asag kayai tuku tukugmainakua mantamain ainawai.

<sup>27</sup> Nunin asantai iik kampatum tsawantai weaja uwegshunum jegaa kuntin maa apeaku nii tujamauwa dutiksaik iina Apajuji Tuke Pujuu tutaya nunú ememattag taji”, tau.

<sup>28</sup> Tusa tutai faraón chichaak:

“Untsu takugmek uwegshunum wejum Tuke Pujuu atum emematin ainajum nunú kuntin maa apeakjum ememattajum. ¡Nuniakjum mina pachittsagmesh segatjitatum! Tujash shiig atushtak shiyakaigpajum”, tau.

<sup>29</sup> Tusa tama Moisés ayaak:

“Israel aents aidau shiyakag kuntinun maa apeenak Tuke Pujuu ememattag tuina nunú wegpaum tusa tichatnaitkuminig, wi amijai juwi chichag nuna jiiinkin, Tuke Pujuu segattatjame amina jemin, ame atueka takataijum aidau jeen nuigt aentsjum aidau jenishkam anchi waitkagmaina duka kashin megkaejatnime tusan”, tiuwai.

<sup>30</sup> Nuna tusa Moisés faraógka jeen pujau agá jiiinki Tuke Pujuu segauwai.

<sup>31</sup> Tusa segam Tuke Pujuu Moisés sumamunak imatiksag umikui. Nuadui faraógka jeen, nii atueka takataiji aidau jenish, tuja ashí niina aentsji aidau jenishkam makichik anchigkesh atusui.

<sup>32</sup> Nunikmatai faraón antakchau wajas, Israel aents aidauk dekas jijnjashtinme tiuwai.

## 9

*Makichik uweja amua suwimak suwaku kuntin ijituamu*

<sup>1</sup> Nunikmatai Tuke Pujuu Moisésan chichajak:

“Faraón jegajua chichagkum: ‘Tuke Pujuu Apajui, Hebreo aents aidauti emematin ainag nunú chichaak: Mina aentsug aina nuna jiigti, dutikam mina emematjitnume’, tawai.

<sup>2</sup> Tusa tamaitkum jijnjatnume tutsuk ayatak eme emeteakua wegau asamin,

<sup>3</sup> amina tagkujum aidau ajagmin batsata nuna Tuke Pujuu niina senchijin jata ishamainun awetittawai. Dutikam caballo aidau, burro aidau, camello aidau, baka aidau, uwig aidau ashí jinattawai.

<sup>4</sup> Tujash Israel aents aidau tagkujig makichkish jakashti tusa Tuke Pujuu kuitamjuktatui, untsu egiptunmaya aidau tagkujinak ijituatawai.

<sup>5</sup> Nuigtushkam Tuke Pujuu tsawantan mamikia chichaak:

“ ‘Wi kashin nunak dutikattajai!’ tawai”, tiuwai.

<sup>6</sup> Nuna tusa idayas tsawamunum egiptunmaya aidaun tagkujinak Tuke Pujuu ashí ijituauwai. Tujash Israel aents aidau tagkujig makichkish jakachui.

<sup>7</sup> Nunikmatai faraón niina aentsji aidaun ishiakui Israel aents aidau tagkujish jinacheash diisa ukutajum tusa. Nunú waketug kauna Israel aents aidau tagkujig makichkish jakachmae tusa ukakajui. Nuna dekaash faraógkak antakchau wajas, Israel aents aidaunak jijnjatnume tichauwai.

*Seisa imania suwimak suwaku kuchap ajunjamu*

<sup>8</sup> Nunikmatai Tuke Pujuu Moisésan, Aaróggai chichajak:

“Pag inagtainum yuku awa nunú uwegmin atsaakijum jukitajum, dutikajum faraón wainai Moisésa ame yaki nagkimata.

<sup>9</sup> Dutikam nunú nugká iyaak yukukuntu najanea ashí Egipto nugkanum jamagti, nuniak ashí aents aidaunak tagku aidaujai kuchap amuati”, tiuwai.

<sup>10</sup> Tusa tima pag inagtainum yuku aun jukiag faraón pujamunum jegawajui, nuwi Moisés yukuun yaki nagkimauwai. Dutikam aents aidaunak, tagku aidaujai kuchap amauwai.

<sup>11</sup> Nuna tunchi aidaushkam achiimag tikich aents aidaujai betek jinuidau asag, ataktu awagkig makichkish Moisésjaig dekapdaimainchau wajasui.

<sup>12</sup> Tujash faraógnak Tuke Pujuu antakchau emauwai, nuadui Moisés Aaróggai tabaunak makichkish antugchau, Tuke Pujuu Moisésan chichajak nuniktatui tibaunak imanisag.

*Sieteya imania suwimak suwaku bicha akaketkamu*

<sup>13</sup> Nunikmatai Tuke Pujuu Moisésan chichajak:

“Kashin kashikmasa nantakim faraón pujamunum wetá, nunika chichagkum: ‘Tuke Pujuu, Apajui Hebreo aents aidauti emematin ainag nunú chichaak: Idaisati mina aentsug aina nuna; dutikam mina emematjitnume.

<sup>14</sup> Tuja nunú dutikachkuminig yamai nagkamsanuk mina suwimkajum amina, nuigtu amejai atueka takataijum aidaun, tuja ashí amina aentsjum egiptunmaya aina nuwishkam ishittattajame. Dutikamta dekaattame ashí nugkanmak tikich witag imajuk makichkish atsa nunú.

<sup>15</sup> Wika aminak, amina aentsjum aidaujai suwimka amaakun mina senchigjai yaunchuk ijinan juju nugka juwig emegkaumain awajakjime.

<sup>16</sup> Tujash dutikachjime wagki mina senchijun atumin iwaintuka ai, ashí tikich nugkanmaya aidaush dekajuatnume tau asan.

<sup>17</sup> “ ‘Dutika idaimaitkum mina aentsug aidau jijnjatnume tutsuk ayatak eme emeteakum weame.

<sup>18</sup> Nuadui kashin kashikmasan bicha múun aidaun yaunchuk nagkamsash imanuk Egipto nugkanmag wainajakchamun yutumtijattajai.

<sup>19</sup> Imaniktin asamtaí tagkujum ajanum batsatuk ashí yajuakjum jegá utsatajum, nunú dutikachaminig, bicha múun aidau kakegak ashí aents aidau ajanum batsatunak, kuntin aidaujai ijinattawai’ tawai Tuke Pujuu”, tiuwai.

<sup>20</sup> Tusa ujakam faraógka atuwe aidau Tuke Pujuu tibaun ishamaidauk, ditá inake aidau, tagkuji aidaujai jegaa utsawajui.

<sup>21</sup> Untsu tikich aidau Tuke Pujuu tibaun puyatjus anentaimtuinachuk, ditá inake aidau nak tagkuji aidaujaig jegag utsachajui.

<sup>22</sup> Nunik batsatai Tuke Pujuu Moisésan chichajak:

“¡Uwejum nayaimpinmanini takuita, dutikam bicha yutugti, nuniak ashí Egipto nugkanum kuntin aidau, aents aidau, ashí ajak aidau ashí ayá nuna ijinati!” tiuwai.

<sup>23</sup> Tusa tama Moisés niina kuntujin nayaimpinmanini takuiniuwai, dutikamtai Tuke Pujuu chaagpin, peeman ajunjauwai, dutikak bicha múun aidau ashí Egipto nugkanum yutumtjauwai.

<sup>24</sup> Tuja chaajip patauk, peem peetuk, bicha kakegush makichkish mijamtsuk tuke imani au; yaunchkesh Egipto nugkanmag ibau wainajakchamu wantinjauwai.

<sup>25</sup> Ibau kakegu asa Egipto nugkanum ayaunak ashí tsaikui: aents aidau, kuntin aidau, ajak aidaujai ashí ijinauwai, dutikak numi aidau kanawenak ashí kupijauwai.

<sup>26</sup> Nunú imaniakush nugka Gosén Israel aents aidau batsatbamak makichik bichakesh iyaagchauwai.

<sup>27</sup> Imanitai faraón Moisésan Aaróggai untsuka chichajak:

“Dekas wi pegkegchaun takasag nunak dekagmamjai. Juna imajun itugchata igkugka waitiag duka Tuke Pujuu itugchatjinigkish waitiatsjai, juka mina pegkegchaujui, nuigtu mina aentsug aina nuna pegkegchaujin waitiajai.

<sup>28</sup> Wait aneasjum jutiish Tuke Pujuu segatkagtajum, chaajip patak ishamain waja nunú, bicha yuta nujai mijaakti. Nunikmatai wisha atumnak emettsuk shiyaktajum tusan idaisatjime”, tau.

<sup>29</sup> Tusa tama Moisés ayaak:

“Wi juju yaaktanum pujag nuna jijnmawaik, mina uwejun takuin Tuke Pujun segat-tajai, dutikai chaagpik megkaekattawai, tuja bicha yuta dushakam megkaekattawai. Nunikmatai dekattame nugkak dekas Apajuínuapi tusam.

<sup>30</sup> Tujash iman ishamain wainkumesh amek, amina atueka takataijum aina nujai, Tuke Pujuu yamaikish ishamatsjum nunak wika shiig dekajai”, tau.

<sup>31</sup> Tuja bicha yutak ajak lino ajakbau yagkujuku aidau, nuigtu cebada ajakbau aidau nejekunak ashí ijinauwai.

<sup>32</sup> Untsu trigo aidau, centeno aidau ajakbauk makichkish wajukachajui eke tsapainachu asag.

<sup>33</sup> Moisés faraóggai chichasa yaaktanmaya jijnmawaik uwejen takui Tuke Pujun segauwai, dutikamuik wamak chaajip ishamain wajauk, bicha yutauk, yumi yu-taushkam mijaakui.

<sup>34</sup> Nunik mijakmatai faraóggak ataktushkam pegkegchaun takasui. Nuniak niijai atueka takataiji aidaujai anentainkachu wajasui.

<sup>35</sup> Nuniau asa Israel aents aidau nak jijnjatnume tusag idaisachui, Tuke Pujuu yaunchuk Moisésan ujaak nuniktatui tibaunak imaanisag.

## 10

### *Ochoa imania suwimak suwaku manchi ishitkamu*

<sup>1</sup> Tuke Pujuu Moisésan chichajak:

“¡Faraón pujamunum wetá! Wi niinak, niijai atueka takataiji aina nujai antakchau emattajai, wagki mina senchigjai wainchatai ishamain aidau iwaintuktag tau asan.

<sup>2</sup> Tuja nunú wainchatai ishamainun egiptunmaya aidau iwaintuktag nunú wainkau asajum, amina uchijum aidau, tijajum aidau nunú pachisa ujakminum tau asan dutikattajai. Nunú wainkau asajum wi Apajuí Tuke Pujuu tutayaitag nunú dekattagme”, tiuwai.

<sup>3</sup> Tusa tima Moisés Aaróggai faraógka jegajuawag chichajuinak:

“Tuke Pujuu Apajuí, Hebreo aents aidauti emematin ainag nunú aatus tawai: ‘¿Wajupa asamea emematjum idaikumesh wi tabaush umiktatme? Idaisata mina aentsug aidau, jijnjag mina emematjitnume.

<sup>4</sup> Tujash emeteakminig, kashin manchin ishitkattajame amina nugkemin.

<sup>5</sup> Nunú manchi nugkanak akijuattawai, imanikmatai nugka wainmainchaw wajastatui. Imanidau asag ajak bicha ijinam ujumak ampinjaunak amuktatui, tuja nuigtushkam numi aidau nashkam yuwa amuktatui.

<sup>6</sup> Imanidau asa ame pujusa inamtaigminig, amejai atueka takatai aidau jenish, ashí egiptunmaya aents aina juna jenish imanisag manchi piyaktatui. Duka amina apakesh,

apachjum aidaukesh nuniachkush yamaikish imanuk wainkachbau wainkattame' tujamui", tusa ujaka ukuak jiinkiuwai.

<sup>7</sup> Nuna tusa waketjamtai, faraógka atueka takataiji aidau niina jegantag tuidau:

"iAu aents aina duka kuashta utugchata apujtugmas waitkagmainawai! Nuniau asamtai, dekas shiyaktajum nunikjum atumi Apajui Tuke Pujuuwa nunú ememattajum, tita. ¿Amek waintumek Egipto nugka tsainak patamsa duka?" tuidau.

<sup>8</sup> Tusa tima faraón Moisésan Aaróggjai ataktu utsuka chichajak:

"iWetajum, nunikjum Apajui Tuke Pujuu atum emematin ainajum nunú ememattajum! Tujash eke wetsuk tujuttajum, ¿ya aidauwa miniagtatua?" tau.

<sup>9</sup> Tusa tama Moisés ayaak:

"iJutii aidautik ashí iina uchiji piipich aidau, múuntuch aidau, iina nawanji aidau, iina uchiji aishmag aidau aatsa ashí yajuaka, nuigtu iina uwigji, baka aidaujai yajuaka shiyaktatji! iNunú atatu dekas jutii Tuke Pujuu emematuinaku shiig aneasa jistamauiwa nunú!" tiuwai.

<sup>10</sup> Tusa tutai faraón ditan tuke aneas dushikiak:

"¿Ayu duka nuniktajum, atumi Apajuijum Tuke Pujuuwa nunú uyuntamsatnume tusa tujutchaintash tatsugmek? iWaitju yujagme! ¿Wi anentainchaukaitag uchijum yajuaka shiyaktajum tusa idaisatnun? Atumek duka pegkegchau anentaiyai tuu yujagme.

<sup>11</sup> Duka nunikhattagme. Ayatak aishmag múun aidautigmek wejum Apajui ememattajum, nunú nuniktasa wakegou asajum", tiuwai.

Nuna tusa juu wamak jiiki ishiaktajum tima jiiki ishiakajui.

<sup>12</sup> Dutikamtai Tuke Pujuu Moisésan chichajak:

"Uwejum takuita dutikawamin Egipto nugka juwi manchi kaunak ajak ayá nuna, tuja bicha ijinam ampinjau aina nujai amukti", tiuwai.

<sup>13</sup> Tima Moisés ushujutaijin juki Egipto nugkanum takuiniuwai, dutikam dase etsa minitaiya nuwiya shiig senchi tsawai, kashish dasenkau. Nunik tuke dase dasenkawa tsawak manchin ikaunmakui.

<sup>14</sup> Dutikam nunú manchi Egipto nugkanmak piyak asauwai, yaunchuk nagkamsash imanijakchamun tuja atakesh imani achatnun.

<sup>15</sup> Imanik manchik ashí nugkanum piyaku asa shuwin wajas asauwai. Imaniku asa bicha ijinam ajak ampinag juwaku aidaukesh ashí amukui. Dutika ashí amukbau asa makichik numi dukendukesh Egipto nugkanmak shiig atsusui.

<sup>16</sup> Imanitai faraón puyatuk wamkes Moisésan Aaróggjai utsuka chichajak:

"Atum Tuke Pujuu Apajui emematin ainajum nuna emtin, tuja atumi emtinishkam pegkegchaun takasjai.

<sup>17</sup> Tujash wait aneasjum mina tudaujush tsagkugtugtajum nuniakjum segatjitajum atumi Apajuijum Tuke Pujuu emematin ainajum nunú, dutikam manchi ajaka amuina nunú megkaejati", tau.

<sup>18</sup> Tusa tima Moisés faraógka jenia jiinki Tuke Pujuu segauwai.

<sup>19</sup> Tusa segam Tuke Pujuu dasen etsa akaetaiya nuwiyan awemauwai, dutikam shiig senchi dasentak manchinak tajak yajuak nayants kajis ain\* tutainum utsauwai. Makichik manchikesh Egipto nugkanmak juwakchauwai.

<sup>20</sup> Tujash Tuke Pujuu faraógnak antakchau awagsauwai, dutikamu asa Israel aents aidaukesh jiiinjati tsug idaisachui.

*Nueveya imania suwimak suwaku suwe awajsamu*

<sup>21</sup> Dutikamtai Tuke Pujuu Moisésan chichajak:

"iUwejum nayaimpinmanini takuita! Dutikam ashí Egipto nugkanmak shiig kanchi achikaish dekapmain wajasti", tau.

<sup>22</sup> Tama Moisés uwejen nayaimpinmanini takuiniuwai, dutikaig ashí Egipto nugkanmak shiig kanchi wajasui.

<sup>23</sup> Imaanikmatai, nii pujamu yantamen pujaujaish wainitsuk, nuigtush yajakesh wekaemainchau wajasag kumpatum tsawan nuwig batsatu. Tujash Israel aents batsatbaunmak tsawai au.

<sup>24</sup> Nunikmatai faraón Moisésan utsuka chichajak:

"Yamaik ashí uchijum aidaukesh yajuakjum wetajum, nunikjum atumi Apajuijum Tuke Pujuu ememattajum. Tujash uwigjum, bakajum aina duka ukuktatjume", tiuwai.

<sup>25</sup> Tusa tama Moisés ayaak:

"Duka makichkish nunikhattawai, atumetjume tagku sukagtumaintigmek.

\* **10:19** "Nayants kajis ain" tawa nunak "nayants kapantu" tutaya nuna taku tawai.

<sup>26</sup> Tuja nuigtushkam iina tagkuji aidauk ashí yajuaktatji, makichkish juwakchattawai, wagki nuwiya etegja juki maa apeaku iina Apajuji Tuke Pujuu emematta tuidau asaja. Tuja ii Apajuí ememattinnum eke jegaskek, Apajuí emematta takuish wajig atsumtaji duka dekamaitsui”, tau.

<sup>27</sup> Tujash Tuke Pujuu faraógnak antakchau awajsauwai, dutikamu asa Israel aents aidaunak jijnjati tusag idaisachui.

<sup>28</sup> Tuja nuigtushkam faraón kajeka Moisésan chichajak:

“¡Jiinkim wetá ataktu wakitkimek tajutuawaipa! ¡Ataktu wakitki juwi takminig maattajame!” tiuwai.

<sup>29</sup> Tama Moisés ayaak:

“¡Dekas tame, ataktuk makichkish tajuashtajame!” tiuwai.

## 11

*Uchi iwai aidau jinattawai tusa etsegkamu*

<sup>1</sup> Tuke Pujuu Moisésan chichajak:

“Faraógnak, niina aentsji egiptunmaya aina nujai tikich suwimkan awetittajai. Dutika ai atumnak wetajum tusa idaitamsattawai. ¡Tuja niina nugken batsatjum nunak ajumaish wakitki taashтинun jii pag ishipaktatui!

<sup>2</sup> Nuadui Israel aents aishmag aidau, nuwa aidau ashí ujakta umintsatnume, nuninak egiptunmaya aidau ditajai ijutkau batsata nuna jiju plata tutayai nugkutai, patakumtai najanamu aidaun, tuja orojai najanamu aidaunashkam segatnume”, tiuwai.

<sup>3</sup> Tuja egiptunmaya aidau Israel aents aidaun eme anentus diitnume tusa Tuke Pujuu tibau asamtai, ditanak eme anentus diidau. Tuja Moisésnashkam faraógka atuwe aidaushkam eme anentus diidau, antsg ashí egiptunmaya aidaushkam Moisésan eme anentujaku ainawai.

<sup>4</sup> Tuja Moisés faraógkan chichajak:

“Tuke Pujuu aehaet ai Egipto nugkanum nagkaemaktatjai, tujamui.

<sup>5</sup> Nuniai ashí egiptunmaya uchi iwai aidau jinattawai. Faraógka uchiji iwai apu ati timauwa nuwi nagkamnas, niina inataiji ajak juukbaun dekegka najanin aina nuna iwaijishkam jinattawai. Tuja ashí kuntin yama nagkamchaku petsakbau aidaushkam jinattawai.

<sup>6</sup> Nunikmatai ashí egiptunmak yaunchkesh imanishtain, tuja ajumaish nunikchatnun senchi buutuinak pampaidiagtatui.

<sup>7</sup> Tujash Israel aents aidaun uchiji iwai aidauk makichkish jakashtatui. Tuja tagkuji yama nagkamchaku petsakbau aidaukesh jinastatui. Nunik agkan batsatu asamtai, makichik yawá shinaukesh antuekashtatui. Duwi dekattagme Apajuí egiptunmaya aidaun suwimka suwak Israel aents aidaunak kuitama nunú.

<sup>8</sup> Juju aatus nagkaemakmatai amina atueka takataijum aina nunú ashí tajutuawag tikishmag segatuinak: ‘Aentsjum aidau ashí yajuakam wetajum’, tujutiagtatui. Untsu nuna tujutainachkuig wechattajai”, tiuwai.

Nuna tusa faraógka pujusa inamtaijin pujau Moisés kajeka jiiinkiuwai.

<sup>9</sup> Nunikmatai Tuke Pujuu Moisésan chichajak:

“Faraógnak tusa tamash antugtamtashtatui, nuniakush wi aan senchi ishamain aidaun ashí Egipto nugkanum iwainagtatjai”, tiuwai.

<sup>10</sup> Tuja Moisés Aarógnai faraógkan nunú ishamain aidaun ashí iwaintukui. Dutikamash faraógnak Tuke Pujuu antakchau emamu asa, Israel aents aidau Egipto batsatunak jijnjati tusag idaisachui.

## 12

*Pascua jiiistamatin pachisa jintiamu*

<sup>1</sup> Moisés Aarógnai eke Egipto nugkanum pujaun Tuke Pujuu chichajak:

<sup>2</sup> “Juju nantu taka juju atatui mijan nagkamnamu. Juju makichkish kajimattsuk puyatjusjum aneaku atajume.

<sup>3</sup> Nuadui ashí Israel aents aidau wi yamai tajim nunú ujaktajum: Juju nantutin tsawan diez tsawagtata duwi maki makichik múun uchigtin aidau uwig aishmag tsakatan, dutikachkush chivo aishmag tsakatan achiktinme.

<sup>4</sup> Untsu ujumchik uchiji ajamu aidauk tikich múun uchiji ujumchik ajamujai ijunag makichik kuntinun maa maki makichik aentsush wajupaun yumainaita dutiksag tinamdaegak yuwatnume.

<sup>5</sup> Nunú kuntinuk makichik mijan ajamu aishmag makichkish jamamtuchu pegkek atatui. Duka uwig tsakat, nuniashkush chivo tsakatkesh atatui.



<sup>6</sup> “Tuja nunú kuntin achikbau pujutta nunak, juju nantutin tsawan catorce tsawag agkuantai ashí Israel aents aidau maawagtatui.

<sup>7</sup> Dutika maawag nuna numpen jukiag jega dita ijunag yuwawagtata nuna waitiji atin, numi jimag ajiamua nuna, nuigtu yakí minamua nujai ashí ukatkatnume.

<sup>8</sup> Dutikawag nunú kashia\* nuaduik kuntu neje pegka inajuamun dupa yapau yutai aina nujai, nuigtu pag levadurajai pachimsuk inajuamujai yuwatnume.

<sup>9</sup> Untsu kuntu aina nuna neje uduuk, nuniachkush painka inagakum makichkish yuwawaigpajum, ayatak pegka inajuamu yuwatajum. Tuja buuke, nawe, anentai, akapé aina dushakam pegka inajuajum yuwatajum.

<sup>10</sup> “Untsu tsawaja yuwatnuk ukukigpajum, tuja neje ampinjamtaij jinum apeatajum.

<sup>11</sup> Tuja neje yuwakjumek shiig yapagmamajum, sapat wegamakjum, ushujutajum takusa wajasjum waugsajum yuwatajum, wagki wi atumi ayamjukan uwemtikattajim nunú tsawan asantai, mina emematjakjum tuke dutiksagmek yutinaitjume.

<sup>12</sup> “Tuja nunú kashia duwi wi ashí Egipto nugkanum nagkaemakum uchi iwai egiptunmaya aidaunak ashí ijinattajai. Dutikakun kuntu uchiji yama nagkamchaku petsakbau aidaunashkam ashí ijinattajai. Tuja egiptunmaya aidau apajuimtaiji aina nunashkam ashí tsaigkattajai. Ima wikitjai Apajui Tuke Pujuunuk, tikichik atsawai.

<sup>13</sup> “Tuja nunú numpai ukatkatajum duka atum tuu jeganum pujagme nuna iwainaktatui, nunú numpa wainkun atumnak agkan nagkaikittajime. Nuadui egiptunmaya aents aidaun wi ijinataish, atuminig makichik jamukesh atsuttawai.

<sup>14</sup> “¡Juju tsawantak tuke kajimatkishin atajum! Juju tsawantin ijunajum mina emematjakjum tuke jüstamtnaitjume. Junak uchi akiinak wedaushkam tuke dutiktin agtinme.

<sup>15</sup> Tuja tsawan catorcetin kuntu maa yuwattajum, duwi nagkamsajum siete tsawantai pag levadurajai pachimsuk inajuamu yuwattagme. Nuadui nunú tsawantin nagkamas atumi jeminig makichkish levadurak atsuttawai. Tuja makichik aentskesh pagkan levadurajai pachimaj inajua siete tsawan aina nunú tsawantin yuwauk, jiiki ajapeam atatu. Dutikamu asa Israel aents aidaujaig ijunjag pujuschatnai.

<sup>16</sup> Tuja tsawan jiista nagkamnamua duik, ashí ijunajum mina emematjtnaitjume. Tuja jiista amuebau tsawan sieteya duwishkam nunisjumek ashí ijunajum mina emematjtnaitjume. Nunú tsawantinig makichkish atumi takatjumek takaschattagme, untsu atum yuwatin umiktatjum duke dutikattagme.

<sup>17</sup> Nunú jüstaya duka, atum Egipto pujautigmin wi nunú tsawantai jiktatjim nuadui tuke jüstamtn atajum. Junak uchi akiinak wedaushkam tuke dutiktin agtinme:

<sup>18</sup> Juju yama nagkamchak mijan nagkamnamu nantu taka juju atatu pag levadurajai pachimsuk inajuamu yutai, juka tsawan catorcetin aagkü nagkamajum; veintiunotin aagkü inagnattagme.

<sup>19</sup> Siete tsawantai atumi jeminig levadura atsuttawai. Tuja siete tsawan aina nunú tsawantin pag levadurajai pachimja inajuamun yuwauk, Israel aentschaukesh, tuja Israel aents akushkam jiiki ajapeam atatu.

<sup>20</sup> Nuadui pag levadurajai pachimja inajuamuk makichkish yuwawaigpajum. ¡Atum tuwi pujuttagme! nuniakjumesh nunú jüstatinig pag levadurajai pachimsuk inajuamu yuwatajum”, tiuwai Apajui.

<sup>21</sup> Juna aatus Apajui timatai, Moisés Israel aents aidau apuji múun aidaun ashí ijumag chichajak:

“Wejum uwig aishmag tsakat achiktajum, tuja dutikachkugmesh chivo tsakatmesh achikjum maki makichik atumi jemin maatajum. Dutikawagmin nunú yuwaku Apajui iina jipag agkanmitkagmatta nunú tsawan Pascua jüstamawagmi.

<sup>22</sup> Untsu numpak pinignum jukitajum, dutikajum ajak hisopo tutaya nuna titiji kupika jukijum, numpai uchupajum waiti nujamkatin numi ajiamu aina nunú, tuja nuna yakin minamua nujai ashí ukatkatajum. Nunú dutikagmesh eke tsawatsaigkik makichkish jinkigpa.

<sup>23</sup> Egiptunmaya aents aidau uchiji iwai aidaun ijituatatus Tuke Pujuu nagkaemak waiti nujamtaim jimag numi awa nunú, yakin minamua nujai numpai ukatkamun wainak ikaa nagkaemaktatui. Nuniak niina aentsji nayaimpinmaya magkagtina nuna atumi jeminig wayashti titatui. Nuadui atumi uchijum iwai aidauk makichkish jakachagtatui.

<sup>24</sup> “Juju dutikatajum tubaji duka betek umiktin atajum, tuja atumi uchijum wegantu aidaushkam tuke dutiktin agtinme.

<sup>25</sup> Apajui nugkan anagtabauwa nuwi jegagmesh, juka tuke jutikin atinaitjume.

\* 12:8 Israel aents aidaunmak tsawanta duka etsa akagai nagkamas kashinia nuadui etsa akagai nagkanui, nuadui nunú kashia duka tsawan quince nagkamnawai.

<sup>26</sup> Tuja uchijum inimpainak: ‘¿Wagka jusha jutikaji?’ tusa inimpainakuig,

<sup>27</sup> atum ayaakjum: ‘Juju kuntin tuké maag juka Apajuí niina aentsji makagtinun awenamun nagkaemak egiptunmaya aentsu uchiji iwai aidaun ijitak, Israel aents aidaute jenig waittsuk, ikaa nagkaemak ijipachua nunú anentaimtusa jutikaji’ titajum”, tiuwai.

Aatus Moisés chichaca inagnakmatai, Israel aents aidauk ashí tikishmag pujusag Tuke Pujun emematuidau.

<sup>28</sup> Nunik wakitkiag, Tuke Pujuu Moisésan Aaróggjai akatjamunak imatiksag betek umikajui.

*Dieza imania suwimak suwaku uchi iwai aidaun ijinamu*

<sup>29</sup> Nuniyamunum aehaet Tuke Pujuu aentsji nayaimpinmaya magkagtin nagkaemak egiptunmaya uchi iwai aidaunak, faraógka uchiji iwai apu atin tibau niina apaji pujusa inamtaijin pujukawa nuwi nagkamas, aents achikam chimpijin uchiji iwai aidaunashkam, tuja kuntinu uchiji yama nagkamchaku petsakbau aidaunai ijinawai.

<sup>30</sup> Dutikamtai nunú kashia duwi faraón nijai atueka takataiji aidaunai, nuigtu ashí aents Egipto nugkanum batsamin aidauk nantajag shiig senchi buutuinak ashí egiptunmak pampaidau. Makichik jeganmakesh iwai iwaaku pujauk shiig atsusui.

<sup>31</sup> Nunikmatai nunú kashia duwik, faraón Moisésan Aaróggjai utsuka chichajak: “¡Shiyaktajum, nuniakjum Israel aents aidaun ashí yajuaktajum, nunikjum atum timaujum dutiksagmek atumi Apajuíjum Tuke Pujuu ememattajum!

<sup>32</sup> Nunika shimakjum atum mina segatmajum duka dutiksagmek uwig aidaun, baka aidaun yajuakjum wetajum. ¡Nuniakjum minash Apajuí Tuke Pujuu segatjitajum!” tau.

<sup>33</sup> Tuja Israel aents aidaun iina nugken batsata nuna wamak shimuinachkuig, ashí jinawaig tuidau asag, egiptunmaya aents aidaun ditan waugmitkaidau wamak shiyaktinme tusag.

<sup>34</sup> Dutikainam ditashkam harina nanegbau levadurajai pachimjachbaun, harina namutajai ijumag ditá jáanchjin pempeajag yanakiag jukiajui.

<sup>35</sup> Dutikainak Moisés ditan akatjamunak imatiksag Israel aents aidaun egiptunmaya aidaun wajiji jiju plata tutayai najanamun aidaun, orojai najanamun aidaun, tuja jáanch nugkutai aidaunashkam segaidau.

<sup>36</sup> Dutikainam egiptunmaya aidaun ashí dita sumamunak imatiksag susajui, wagki Israel aents aidaun eme anentus diitnume tusa Tuke Pujuu dita anentain antinkamu asag. Dutika dita wajiji aidaunak ashí susag wajigtuchu juwakajui.

*Israel aents aidaun Egipto nugkanum batsatu jiiinamu*

<sup>37</sup> Tuja Israel aents aidaun yaakat Ramsés batsatu jiiinag shiyakajui Sucot nugkanum. Tuja nuwa aidaun, uchi aidaun dekapatsuk ayatak aishmag wajiu maanimain aidaun dekapamak seiscientos mil aajakui.

<sup>38</sup> Israel aents aidaun jiiinag shimuinakug uwig aidaun, baka aidaun, shiig kuashat yajuakajui. Nunik shimiagtai aents tikich nugkanmaya aidaushkam shiig kuashat ditajai ijumag shiyakajui.

<sup>39</sup> Nunik shimuinak, yujumak inagmain tsawan atsutai yumainun inagkachaju asag harina levadurajai pachimtsuk nanegbau egiptunmaya jukumujin nuna pagkan najanak inagkajui.

<sup>40</sup> Tuja Israel aents aidaun Egipto nugkanmak cuatrocientos treinta mijan batsamsaju ainawai.

<sup>41</sup> Tuja cuatrocientos treinta mijan jegau ai, nunú tsawantaik Egipto nugkanum batsatu ashí jiiinjaju ainawai.

<sup>42</sup> Tuja Tuke Pujuu niina aentsji Israel aidaun Egipto nugkanum batsatun jiiigtatus nunú kashia duwi ditan kuitamak wekaetau. Nuadui atakea duish Israela uchiji aidaush Tuke Pujun emematuinak nunú kashia duwi kanutsuk tsawaidiagtin ainawai.

## 13

*Yama nagkamchak akiinawun aidaun Tuke Pujun agtatui tibau*

<sup>1</sup> Tuke Pujuu Moisésan chichajak:

<sup>2</sup> “Uchi iwai aina nunú midau agtin akaantugkata, wagki ashí Israel aents aidaun uchiji aishmag iwai akiinuk, tagku yama nagkamchaku petsakbau aina nujai ¡ashí midau ainawai!” tiuwai.

<sup>3</sup> Tusa tima Moisés nii wegantu Israel aents aidaun chichajak: “¡Atum Egipto nugkanum batsamsajum waitu batsatutigmin, Tuke Pujuu niina senchijjai juju tsawantain jiiipaja nunú tsawan aneaku atajum! Nuniakjum nunú tsawantinig pag levadurajai pachimja inajuamuk yuwawaigpajum.

<sup>4</sup> Atumek juju tsawanta juwi, nantu Abibtin\* jijnjume.

<sup>5</sup> Atumi muunjum aajaku aina nuna Tuke Pujuu anagkuak: ‘Canaán aents, hitita aents, amorreo aents, heveo aents, Jebús aents aina nuna nugke shiig pegkeg, ajak shiig tsapau, tagkush shiig muumpaina nuna atumi uchijum aidaunak susagtinaitjai’ tiuwa nuwi ejetamawagmatai, batsamsagmesh juju nantua juwi ijunjajum Tuke Pujuu tuké ememattin atajum.

<sup>6</sup> Tuja siete tsawantai pag levadurajai pachimtsuk inajuajum yutinaitjume, untsu tsawan sieteya duwi ijuntsajum Tuke Pujuu emematkujum jistamattagme.

<sup>7</sup> Siete tsawantai pag levadurajai pachimtsuk inajuamu yuwatajum, nunú tsawan aina nuaduik levadurak tuja pag levadurajai pachimja inajuamukesh atum pujamunmak shiig atsuttawai.

<sup>8</sup> Tuja nunú tsawantin uchijum aidau chichagkujum: ‘Juka ii Egipto nugkanum waitkam batsatutin Tuke Pujuu jii pajua nunú anentaimtusa jutikaji’ titinaitjume.

<sup>9</sup> Nunak Tuke Pujuu midau atinme tusa atumin uwegmin, dijaimin agatjamkau amainaitjum numamtuk asamtai, chicham umiktin agagbaun Tuke Pujuu umiktajum tujabauwa duka kajimattsuk aneaku atatjume. Wagki Egipto nugkanum waitkam batsatutigmin niina senchijin jii gmajaju asamtai.

<sup>10</sup> Nuadui maki makichik mijantin tsawan mamikiamua duwi shiig aneasa ijunjajum Tuke Pujuu tuké ememattajum!

<sup>11</sup> “Tuke Pujuu atumi muunjum aajaku aina nuna, tuja atumnashkam canaágnumia aents aidau nugken amastajime tusa anagtabauwa nuna amasmataig,

<sup>12</sup> ashí uchi iwai aishmag akiinaidauk, kuntinu uchiji yama nagkamchak aishmag petsakbauwa nujai Tuke Pujuu idaitustajum, wagki duka niinu asagmatai.

<sup>13</sup> Tuja uwija uchiji aishmag atsugtamkuig, burro yama nagkamchaku petsakbauwa nunú maatajum. Untsu uwig tsakat ajutjamkuig, tuja chivo tsakatkesch ajutjamkuig, nunú Tuke Pujuu suwakjum burrok mausuk idaisatajum. Tuja atumi uchijum aishmag iwai aidau Tuke Pujuu sumaina nunú tikich waji anentag Tuke Pujuu suwakum uchijum uwemtijatajum.

<sup>14</sup> Tuja tikich tsawantai uchijum inimpak: ‘¿Wagka jusha jutikame?’ tujamkuig, ame ayaakum: ‘Ii aidauti Egipto nugkanum batsamsa inaku waitkatai batsatutin Tuke Pujuu niina senchijin jii gmag agkanmitkagmauwa nunú tsawan asamtai jutikaji.

<sup>15</sup> Tuja faraón antakchaw wajas iina jii patan dakittai, Tuke Pujuu egiptunmaya uchi aishmag iwai aidaun, kuntinu uchiji yama nagkamchaku petsakbau aishmag aidaujai jii tuuwa nuadui, kuntin yama nagkamchak petsakbau maa apeaku Tuke Pujuu emematji, wagki jutii uchiji aishmag iwai aidau jatsuk uwemkaju aina duwi.

<sup>16</sup> Nuadui kuntin iinu atin kuntunum, dijainum agatjamu amaina numamtuk atum kuntin maa apeamua nunú tuké anemtijamsagke atinai, atum Egipto nugkanum pujautigmin Tuke Pujuu niina senchijin jii gmajaju nunú ”, tiuwai Moisés.

#### *Nayants kapantunmanini shiyakbau*

<sup>17</sup> Faraón Israel aents aidauun shiyaktinme tusa idaisamtaish, Apajuik filisteo batsata nuni jinta tutupit jegá aatu wetinme tusag tichauwai. Wagki filisteo aents aidau jinta epetam ditajai maaninak ishamak awake anentaimag Egipto nugkanum ataktu waketjainum tau asa.

<sup>18</sup> Nuadui dekas jinta uwegshun tentea wea nuni nayants kajis ain† tutaya aatus wetinme tiuwai.

Nuadui Israel aents aidauk Egipto nugkanum batsatu jii nag shimak, suntag maaniata-tus shimumaina imaanik shiyakajui.

<sup>19</sup> Nunik wenak Moisés José ukunchin jukiuwai. Nunak dutikauwai wagki José iwaku pujusa niina patayi Israel aents aidauun chichajak: ¡Apajuí atumnak jii gmajagtin ainawai; dutijamainakuig mina ukunchjuk ukutsuk jukitin atajum! tibau asag.

<sup>20</sup> Nunikag nugka Sucot tutainum batsatu jii nag uwegshunum jegantatak, Etam nugkanum jegawag aakmajag batsamsajui.

<sup>21</sup> Tuja tsawai dita shimamunum nuna emtin Tuke Pujuu yujagminum pachitkau eemak wejakuí, untsu kashi jii kegaunum pachitkau eemak wegau, nuna diisag tsawaish, kashish shiyaktinme tusa.

\* **13:4** “Abib” tawa nunak “ajak aidau yagkujut” taku tawai. Tuja nunú nantua duka nantu marzo tsawan 15tin nagkama nantu abril tsawan 15num ashimnawai. Hebreo aents aidau nantu dekapainakug Abibnum nagkama dekapau ainawai. Tuja iiniatinuk duka atsawai untsu apach aina nunú dekapainawai enerotin nagkamawag.

† **13:18** “Nayants kajis ain” tawa duka hebreo chichamnum tuu adaikamui. Untsu griego chichamnum yamajam chicham agagbauwa nuantuig “nayants kapantu” tawai.

<sup>22</sup> Tuja tsawai shimiagtaik yujagkim awaantamu eemak wajantun wejaku, antsag kashi shimiagtaishkam jii keeka eem wajantun wejaku.

## 14

*Israel aents aidau nayants kajis ain\* tutainum katiagbau*

<sup>1</sup> Israel aents aidau Etam nugkanum batsatai, Tuke Pujuu Moisésan chichajak:

<sup>2</sup> “Israel aents aidau ujakta, waketug Migdol nugka nayantsajai niniaku awa nuna ejapeen yaakat Pi-hahiroh tikich yaakat Baal-zefonjai awa, nujai niinis nayantsanum uwet aakmag batsamsatnume.

<sup>3</sup> Faraón anentaimas: ‘Israel aents aidauk wajuk wetinmeki nunak dekainatsui. Nuadui, auk uwegshunum wagaja yujatai’ titatui.

<sup>4</sup> Tuja atumin pataetugmaktinme tusan wi niinak ataktu antakchau awajatsatajai. Dutika ai pataetugmakui, niina, tuja niina suntaji aidaujai wi mina senchijun iwain-tuktatajai. Dutika ai egiptunmaya aidauk, wi Apajui Tuke Pujuu tutayaitag nuna dekajuawagtatui”, tiuwai.

Tusa tiaman Israel aents aidauk Tuke Pujuu tibaun betek uminak nuwi aakmajag batsamsajui.

<sup>5</sup> Nuninai faraógshakam Israel aents aidauk shiyakaje tabaun dekauwai. Nunik niijai atueka takatai aidaujai awake anentaimag kajekag chichainak: “¿Wagka Israel aents aidau iina takagtamainak batsatush jiiag shiyaktinme tusaish timaji?” tuidau.

<sup>6</sup> Tusag, carro maaniaku wetai aidau umiktajum tusa faraón timatai, imatiksag umikajui, dutikawagmatai niina suntajin ijumjauwai.

<sup>7</sup> Dutika seiscientos carro dekas pegkek aidaun yajuak, nuigtushkam egiptunmaya carro aidaunak ashí yajuakag nuwi maki makichik suntaja apuji aidau pekamiag shimutkajui.

<sup>8</sup> Tuke Pujuu faraógka shiig antakchau awagsauwai, dutikamu asa Israel aents aidauk Tuke Pujun senchijijai jiiag shimuidaun dekainayatak pataetukajui.

<sup>9</sup> Nuninak ashí suntag aidauk, carronum, caballonum aatus pataetukag, nayantsanum uwet yaakat Pi-hahiroh tikich yaakat Baal-zefonjai niinis awa nuwi aakmag batsamtatman amainaidau.

<sup>10</sup> Nuna wainkag, Israel aents aidauk shiig senchi ishamkajui, nuninak Tuke Pujuu ayamjutpakti tusag segaidau.

<sup>11</sup> Nuniayatak Moisésan chichajuinak:

“¿Egipto nugkanmak ukumataig atsau asantaig, imajui uwegshunum jinatnume tusamesh jiijatjamum? ¿Wagka jusha jutikagtime? ¿Wagka Egipto nugkanum pujajinish jiijatkimume?”

<sup>12</sup> Juju aneasa Egipto batsamsa chichaaku: Idaikagtustajum waitiakuish egiptunmaya aidau takajuinaku batsamsagmi ¿tichamkaijim? ¿Nunisaik batsatkuik, imajui uwegshunum jinumainkaitag?” wajaidau.

<sup>13</sup> Imatiagtai Moisés ditan ayaak: “¡Ishamkagtutsuk anentaim ichichiagtajum! ¡Nuniakjum Tuke Pujuu iina ayamjutpak dutikatta nunú wainkatajum! Yamai atum egiptunmaya aidau wainjum duka ataktu awagkigmek wainkashtinaitjume.

<sup>14</sup> ¡Atumek uyumakaigpa, Tuke Pujuu iina ayamjutpak maaniattawai!” tiuwai.

<sup>15</sup> Tusa tutai Tuke Pujuu Moisésan chichajak:

“¿Wagka minash yainkata tusamesh segatme? ¡Anui wajasam mina segatú wajsatsuk Israel aents aidau weajum antsagmek wetajum tita!

<sup>16</sup> Tuja jame ushujutajum takakam nunú takuim nayantsanmanini awentata! Dutikawamin nayants jimaituk kanaka ejapeen buku wajastatui, nunikmatai Israel aents aidau bukunum katiagtinme.

<sup>17</sup> Wi egiptunmaya aidaunak antakchau ema ai pataetugmakagtatui. Nuninaku ashí nii suntaji, carroji, caballoji aidau minina nuna ijinkun mina senchijun iwainaktatajai.

<sup>18</sup> Nuna dutikamtai jegiptunmaya aents aidauk dekajuawagtatui dekas wi Apajui Tuke Pujuu tutayaitag nuna!” tiuwai.

<sup>19</sup> Nuna tusa inagnaig, Apajui ángel tumain nayaimpinmaya Israel aents aidau shimamunum yujagminum pachitka eemak wegau ukuunum juwaku, nunitai yujag-mishkam antsag ukuunum asauwai.

<sup>20</sup> Nunú yujagkim egiptunmaya suntag aidau shimamunum nuna emtin wajantui, nuniaig suwe wajasui, untsu Israel aents aidau shimamunmak yujagkim etsantug

\* 14: “Nayants kajis ain” tawa duka hebreo chichamnum tuu adaikamui. Untsu griego chichamnum yamajam chicham agagbauwa nuanuig “nayants kapantu” tawai.

tsaaptin wajasui. Nuadui nunú kashi aajakua duik Israel aents aidaunak amaigkachaju ainawai.

<sup>21</sup> Nuninai Moisés niina uwejen nayantsanmanini awentauwai, dutikamtaí etsa minitaiya nuwiyau Tuke Pujuu makichik kashi shiig senchi dasenmitkakui. Imatika umpuamu asa nayantsak jimaituk kanakui. Aatus Tuke Pujuu nayantsa ejapeen buku awagsauwai.

<sup>22</sup> Nunik nayants ejapeen buku wajasá, mai yantamenig yumik muja iman wajas ai, Israel aents aidauk utsanawag katiyajui.

<sup>23</sup> Nuniagtai faraógshakam niina suntaji aidaujái carro maanítái aidaunum, caballo maanítái aidaunum pekamiag, pataetukag nayants buku wajasbaunum utsanawag ejapeantajui.

<sup>24</sup> Tuja aents maanítan yacha aidau Israel aents aidaun pataetukag shimuidau. Nunik shimuinai tsawamunum Tuke Pujuu Israel aents shimamunum eemak yujagminum tuja jii kegamunum wejakuá nunú egiptunmaya aidaun ayampatua díisui. Dutikam ishamaínak utujimkag waugtuínak wechamin wajasajui.

<sup>25</sup> Tuja carro kagketají aidaushkam kushatuk ukuínidau. Nuniagtai juwimainchau dekapenak untsumaidau. Nunínak ditak pempeentunikiag chichainak:

“¡Auk Tuke Pujuu Israel aents aidaun ayamjak jutíjai maaniak jutíjamui, dekas pisajagmi!”, tuidau.

<sup>26</sup> Tusa imatiagtai Tuke Pujuu Moisésan chichajak:

“¡Uwejen nayantsanmanini awentata, dutikamin yumi waketak egiptunmaya aents aidaun, díta carrojí aidaun, caballojí aina nujai yutua ijinati!” tiuwai.

<sup>27</sup> Tama Moisés niina uwejen nayantsanmanini awentauwai. Dutika uwejen awentamtaí, nayants ejapeen buku wajas auk, tsawak yaunchuk aajakbaunak imanísag piyag asauwai. Tuja egiptunmaya aents aidauk pisagtakama nayantsanmak egkemkajui. Aatus Tuke Pujuu egiptunmaya aidaunak nayantsanum aepá ijinauwai.

<sup>28</sup> Nuadui nayants yaunchuk aajakbaunak imanísag weak faraón niina suntaji aidaujái carro aidaunum, caballo aidaunum, Israel aents aidaun pataetukag nayantsanum utsaadau aidaunak ashí yutua ijinauwai. ¡Tuja faraógkan suntaji aidaunmayag makichikesh uwemjachui!

<sup>29</sup> Untsu Israel aents aidauk nayants buku wajasá, mai yantamen yumi muja iman wajas aunum díta eemak, shiig katiyajaju ainawai.

<sup>30</sup> Aatus Tuke Pujuu Israel aents aidaunak egiptunmaya aents waitkam batsatun ayamjuk uwentikjauwai. Dutikamu asag nayantsa tugkitken yujakma egiptunmaya aents jinaun nayants tsukatak tugkitak anugkam batsatun waínkajui.

<sup>31</sup> Nuna Tuke Pujuu imatika niina senchíjin egiptunmaya aidaun ijinamun waínkag, Tuke Pujun eme anentus díidau. Nuadui ima Apajúyaig kajinas anentaimainak, niina inake Moisésnashkam dutiksag kajitus anentaimtuidau.

## 15

### *Moisés Tuke Pujun emematak kantamamu*

<sup>1</sup> Tuke Pujuu ayamjúka uwentikjam, Moisés níi wegantu Israel aents aidaujái Niina emematuínak júna aatus kantamawajui:

“Tuke Pujun, eme anentsan kantamjuatjai, wagki niina senchíjin ashí depetmak, shiwag caballojín entsatkau aidaun nayantsanum ijináu asamtai.

<sup>2</sup> Tuke Pujuu minak senchímtijawai, niyai mína ayamjúmataíjuk, nuadui wíka níina kantamjajai. Niiyai dekas mína Apajújuk, nuadui shiig aneasan ememattatjai. Niiyai dekas mína apajun Apajúji, nuadui wíka tuke níina etsagjatnaitjai.

<sup>3</sup> Tuke Pujuuwa nunuwai dekas maanítan yachak. Niina daajig dekas Tuke Pujuu tutayai.

<sup>4</sup> “Faraógka carrojínak, ashí níina suntaji aidaujái, nuigtu suntaja apuji dekas yacha etegjamu aidaunashkam Tuke Pujuu nayantsanum aepá ijináe.

<sup>5</sup> Nuadui ditak nayantsa kunajin  
shiiḡ initak kayajai betek tepeawaje.

<sup>6</sup> “Chah, Tuke Pujuuwah,  
amina senchigmijai iina shiwaajig ijinamume,  
<sup>7</sup> Amina senchigmijai, shiwaajum aidau depetnaitme.

Iman asam ame kajekbaugmin chijichi kagaku  
apemaina numamtuk ijina emegkagmaume.

<sup>8</sup> Ame dase awemamu nayantsan umpui jimaituk akankae.

Dutikamu asa yaakat peejamua iman wajasmae.

Nayantsa initkenish yumik buchittsuk asae.

<sup>9</sup> Iina shiwaaji anentaimas:

‘¡Pataetukagmi! Dutika amainagkaja  
ijinku wajiji yajutka tinamdaekagmi’ tiaje.

<sup>10</sup> Tujash ame dase senchi dasenmikakam

nayantsa ejapeen aepá emegkakmaume.

Nuadui plomo ajugkam tepegama numamtuk tepeawagmae.

<sup>11</sup> “¡Chah, Tuke Pujuuwah!

¡Aents aidau apajuimtaiji aina duka kuashtai!

¿Tujash amejai betek amainush tikichish aintash?

¡Ima ameketme pegkejam muunmek!

¡Ameketme ashí senchigtinmek!

¡Ameketme wainchatai aidau

ishamain iwainam ibaumek!

¡Ameketme ememattaimek!

<sup>12</sup> Amina senchijum iwainakume, dutikawamin

nugka ujani egiptunmaya aidaunak kujag emegkaje.

<sup>13</sup> Amek amina aentsjum aidau

shiiḡ senchi aneau asam,

amina senchigmin uwentikjaume;

nuadui amina senchigminig uyunkagtusam ekagtame

nugka pegkeg anagkagtuawaitam

nuwi jegatnume tusam.

<sup>14</sup> Juna aents tikich nugkanmaya aidau antukag

senchi ishamainak kujainiagtatui;

tuja filisteo aidaushkam sapigmainak najaimaku

wajukmaina numamtuk tuni tunija iyainiagtatui.

<sup>15</sup> Tuja Edom nugkanmaya suntaja apuji aidauk, ishamkag wakan wajasagtatui.

Tuja Moab nugka apuji aidaushkam

ishamainak kujainiagtatui.

Nuninai Canaán nugkanum batsamin aidaushkam

ishamkag wainkauch dekapmamiagtinaí.

<sup>16</sup> ¡Chah, Tuke Pujuuwah,

aatus sapigmainak anentaimjatnume!

Amina senchijum iwainam juna dekainak

kaya buchitmainchauwa nunin wajastinme,

nunikmatai amina aentsjum ame uwentijamu

aina juka ame nugka anagkuawaitam

nuwi shiiḡ utsaanatnume.

<sup>17</sup> ¡Chah, Tuke Pujuuwah,

jukagtukim aminu atin muja etegkamua

nuwi pujustinme tusam ejekagtuata!

¡Ame nuwi pujustinme tusam etegkauwaitme,

tuja duka amina jem ame pujustin emtikam umikuitme!

<sup>18</sup> ¡Chah, Tuke Pujuuwah,

amek yamaish, kashinish, ajumaya duish

tuke inama pujutnaitme!” tiuwaí.

<sup>19</sup> Faraógka carroji maanitai aidaunum, caballo maanitai aidaunum suntag aidau pekamiag nayants buku wajasmatai utsaanawag shimuidaun, Tuke Pujuu yumin awakeak yutua emegkajui. Tujash Israel aents aidauk bukunum shiig katiyajui.

<sup>20</sup> Nunikagmatai Tuke Pujuu chichamen etsegtin María, Aarógka umayi, panderetan juki awatak kantamtaí, ashí nuwa aidauk ditashkam panderetan awaituinak nantsemaidau.

<sup>21</sup> Imaniagtai María ditajai ijunag kantamak: “¡Tuke Pujuu eme anentsajum kantamjuatajum, shiwag caballonum maanin aidau entsatkau minidaun nayantsanum aepá ijinak depetmaku asamtaí!” waja wajas kantamu.

*Yumi yapauun jegamu*

<sup>22</sup> Moisés nii wegantu Israel aents aidaujai nayants kajis ain tutainum batsatu juwakiag, uwejush Shur tutainum kpatatum tsawan yumi atsamunum shimu batsatu.

<sup>23</sup> Nunik shima shimakua yumi aunum jegawajui, tujash nunú yumik yapau asamtaí uwagchajui. Nuadui nunú nugka daajinak “Mará”<sup>\*</sup> adaikajui.

<sup>24</sup> Nuadui Israel aents aidau, Moisésa kajejuk pegkegchaun chichajuinak: “¿Yamaish iish wajig uwagtaji?” tusa imatjuinau.

<sup>25</sup> Imatjuinam Moisés Tuke Pujuu yainkati tusa segauwai. Tusa segam, Tuke Pujuu Moisésan inaktusui numi uchuchiji yajaan. Nuna Moisés tsupik juki yuminum ajugkuí, dutikam yumi sakam pegkeg wajasui.

Tuja nunú nugkanum Tuke Pujuu ditan dekapsauwai, dutika nuadui dita chicham umikagtinun susauwai.

<sup>26</sup> Dutika chichajak: “¡Wi Tuke Pujuu atumi Apajuígmetag nunú tabau puyatjusa antukjum wi wakegamu takakjum, chicham umiktinun wi amasuitjim nunú betek uniakjuminig, egiptunmaya aidaun jata awetiwaitag dutikanuk atumnak makichkish awetishatjime! ¡Witjai Tuke Pujuu atumi etsagaumainnuki!” tiuwai.

<sup>27</sup> Tusa tiamam shimui shimuinakua Elim tutainum, doce yumi pukuni jiinu, nuigtu setenta palmera aidau ijununum jegawajui, nunikag pukuni jijnainamunum ayaumas aakmajag batsamsajui.

## 16

*Apajuí Israel aents aidaun maná susamu*

<sup>1</sup> Israel aents aidau Elimnum batsatu ashí jijnag juwakiag shima shimakua Elim muja Sinajai niniaku awa nuwi uwejush Sin tutainum jegawajui. Nunak egiptunmaya jijnauwa duwi nagkamas makichik nantu asa jegawajui.

<sup>2</sup> Nunú uwegshunum Israel aents aidau Moisésan Aarógjai chichaman patatuidau.

<sup>3</sup> Tusa chichainak: “¡Atumek nujantai jinatnume tusajum juju muja juwi itajat-uaugme! ¡Awi batsamsaik waitiakuish, neje ollanum bete painka inagkamu shiig yuwa ejemaja pujuyaji, dekas Egipto nugkanum pujajinig Tuke Pujuu ijipati tumainus tichayagtai!” wajaidau.

<sup>4</sup> Imatiagtai Tuke Pujuu Moisésan chichajak:

“¡Dita yuwatnunak nayaimpinmayan yumijai betek wi yutumtjattajai! Dutika ai makichik tsawantai yuwatnugin juuktinme. Nuadui dekattajai yaki dekas wi dutikatajum taja nunash betekash umikat, tuja yaki umikchat nunashkam.

<sup>5</sup> Untsu tsawan seisa duwi yuwatin juwakjumek, jimag tsawantai yuwatin asamtaí, makichik tsawantai yuwatin juuttajum aan kuashat juuktatjume”, tiuwai.

<sup>6</sup> Tusa tima Moisés Aarógjai Israel aents aidaun ujinak:

“Yamai agkuanantai dekattagme, atum Egipto nugkanum batsatutigmin Tuke Pujuu jiiipagmaya nunú.

<sup>7</sup> Atum chicham patatjum nuna antugtamakaje. Nuadui kashin kashikmas niina imanjin iwaintugmaktata nunú wainkattagme. ¿Wagka atumesh jutiish augmatkattagme? ¿Iikaitag atum atsumamu sumainti?”

<sup>8</sup> Tusa ataktu Moisés chichaak:

“Atum yuwatnun Tuke Pujuu nejen ajum aagkú amastatui, untsu kashikmas pagkan shiig kuashat amastatui. Nunak dutikattawai atum chicham patatjukun antugtamakau asa. ¿Ilish ya ainaji? Atum chicham patatkagtajum duka jutiik tukagatsjume, Tuke Pujuu patatku tajume”, tiuwai.

<sup>9</sup> Nuna tusa Moisés Aarógan chichajak:

\* 15:23 “Mará” tawa nunak hebreo chichamnumak “yapau” taku tawai.

“¡Israel aents aidau ashí ujakta Tuke Pujuu emtin ijunjatnume! Nunikag antuktinme dita chichaman pataina duwish, Tuke Pujuuš wajintig”, tiuwai.

<sup>10</sup> Tusa tima Aarón Israel aents aidau ijumag chichaak wajai, uwegshunmanini niimsatakama, yujagkim winchamtinnum Tuke Pujuu wantintatman wainkajui.

<sup>11</sup> Nunú yujagminmaya Tuke Pujuu Moisésan chichajak:

<sup>12</sup> “Israel aents aidau chichaman pataina nuna antukjai. Nuadui juju aajam dita aidau ujakta: ‘Ajum agkuantai neje yuwattagme. Untsu kashikmasjum pag shiig kuashat yuwattagme tujamui. Aatus dekawagtatui wi Apajuí Tuke Pujuu tutayaitag nuna’ tawai”, tiuwai.

<sup>13</sup> Tusa timatai nunú tsawantin agkuantai aakmaja batsatbaunum codorniz\* shiig kuashat kaunauwai. Nuniku ai kashikmas yumi sajatuk nugkan uchupkauwai.

<sup>14</sup> Nunú yumi sajatuk nagkaemakmatai jiinkiang diikma jegashik dukanum ekemag aama numamtin tujash katsujam, uwegshunum nenentu yayjuch aidau eketag weajun wainkajui.

<sup>15</sup> Nunikag nuna dekainachu asag tudayinak: “¿Jusha wajimpaya?” Tiagtai Moisés ditan ayaak:

“Junak Tuke Pujuu pagkan yuwatnume tusa amasa nunuwai.

<sup>16</sup> Juna amaa aatus tujamjume: Maki makichikitijum wajupa yumainaitjume nunú betek jukitajum, tuja wajupa aents jeminish pujuinawa nunú dekaapajum maki makichik aentsdau ichinak jimag litro yajatainum aimkajum jukittagme tujamjume”, tiuwai.

<sup>17</sup> Tusa tima Israel aents aidauk dutiksag juukajui; tuja nii ima dukap juwai tikich ujumak juwaushkam asajui.

<sup>18</sup> Dutik jukitajum tibaunak betek jukiaju asagmatai kuashat jukiuiwa nudaush ampinjachui, tuja ujumchik jukiushkam etagachajui. Maki makichik dita wajupa yuwawagtatua nuna betek dekapa jukiaju.

<sup>19</sup> Dutikawagmatai Moisés ditan chichajak:

“¡Makichikitigmekesh kashin yuwatnuk ampigjume ukukigpajum!” tiuwai.

<sup>20</sup> Tusa tibau aig Moisésan antugtsuk, kashin yuwami tusa ampijag ukuidaushkam asajui, tujash duka aka pimutkam kauja mejedau. Nuna dutikawagmatai Moisés ditan kajegkauwai.

<sup>21</sup> Duwi nagkamas maki makichik dita yuwatnujin kashi kashinig yajumainau. Tuja etsa etsantak sukuam yumimea megkagu asamtai, kashikmas jiintujag yajumajaku ainawai.

<sup>22</sup> Untsu tsawan seistinig jimag ichinkanum aimak yajumainau. Dutikiagtai Israel aents aidau apuji aidau Moisésan jegajuawag ujaidau.

<sup>23</sup> Tama Moisés ditan chichajak:

“Aunak Tuke Pujuu dutikatnume tusa timae”, tiuwai. Nuna tusa: “Kashin tsawan ayamtai atinun, Tuke Pujuu etegkamu tsawagtin asamtai, inagmain akuig yamaik inagkatajum, tuja ukumain akuishkam yamaik ukuukatajum. Untsu yumain ampinjatta duka kashin yuwatin ukuktajum”, tiuwai.

<sup>24</sup> Aatus Moisés tibaunak imatiksag yutai ampinjaunak kashin yuwatnujin ukukiaju. Tujash nunak akakesh ikiachui, tuja mejetnakesh mejeachu.

<sup>25</sup> Nuadui Moisés ditan chichajak:

“Atum yau ukukbaujum nunú yamai yuwatajum. Juju tsawanta juka Tuke Pujuu etegkamu ayamtai tsawaje. Nunin asamtai, ¡juju tsawanta juwi yutai agá ayauk wainkashtatjume!

<sup>26</sup> Nuadui ayatak seis tsawanta duwi atum yuwatnuk juuktatjume. Untsu tsawan ayamtai Tuke Pujuu etegkamua nunú tsawantinig yutai juwamuk atsuttawai”, tiuwai.

<sup>27</sup> Tusa tiu aig, tsawan ayamtai tsawagmataish jiinki egaidaush asajui, tujash makichikish wainkachajui.

<sup>28</sup> Nuniagtai Tuke Pujuu Moisésan chichajak:

“Wi atumi jintinkun, juju umiktajum timajim dusha ¿wajupa chichagkama atumesh umiktatjume?

<sup>29</sup> Tsawan seistin yuwatnun kuashat amaaajim nunak, tsawan sieteya duwi ayamsatin asagmin dutikajai. ¡Nunú tsawantinig makichikish jiintsuk ditá jenig batsamsagtatui!” tiuwai.

<sup>30</sup> Tibau asa Israel aents aidauk nunú tsawan jegatai ayamaidau.

\* 16:13 “Codorniz” tawa duka yampitsa numamtainai.



<sup>31</sup> Israel aents aidau yutai kakekaun juujaku aina duka shawi jigkayiya numamtin, niime puju; dapa yumiji pagjai pachimjamu yumimitu pegkejan kugkuwama iman aajakui. Nuna Israel aents aidau adaikau ainawai “maná”.

<sup>32</sup> Tuja duwi pujus Moisés tiuwai:

“Tuke Pujuu juna aatus chichaak: ‘Atum Egipto nugkanum batsatutigmin wi jiija yajuakan uwegshunum yutain amasuitag nuna atak atumi uchijum akiinak wedaush wainkagtina nunú maná makichik ichinkanum aimkajum ukustajum’, tujamjume”, tiuwai.

<sup>33</sup> Nuna tusa Moisés Aaróghan chichajak:

“Makichik ichinkanum maná aimkata, dutikam jega pegkegma nuwi awayam Tuke Pujuu emtin apusata, atak atumi uchijum wegantu agtina dusha wainkagtin atinme”, tiuwai.

<sup>34</sup> Tuke Pujuu Moisésan tibaunak imatiksag Aarón maná ichinkanum chimpianun juki, chicham umiktin agagbau arcanum† egkeam aunum ejegan nujai niimtikas apusauwai.

<sup>35</sup> Israel aents aidauk ima manának yusag cuarenta mijan yujasui, ima nunak yusa yujasag jegawajui Canaán nugka nagkatkamunum.

<sup>36</sup> Israel aents aidau manán dekapainakug jimag litro dekapatai “gomer” tawa nujai dekapajaku ainawai. Tuja “efa” tawa nunú aajakui veinte litro dekapatai.

## 17

*Yumi kayanmaya jiiqbau*

*(Nm. 20.1-13)*

<sup>1</sup> Israel aents aidau uwejush Sin tutainum batsatu ashí jiinag diipas jintá kanui kanuinakua Tuke Pujuu chichamen antujus Refidim nugkanum jegawag aakmajag batsamsajui. Tujash yumi dita umumainuk atsujakui.

<sup>2</sup> Nuadui Moisésan jegajuawag chichajuinak:

“¡Yumi sukagtusta uwajagmi!” tusa imatjuuidau.

Tusa imatjam Moisés ditan chichajak:

“¿Wagka minash segatjume? ¿Wagka Tuke Pujuu senchigtuchua nunin chichagkugmesh ekajeagme?” tau.

<sup>3</sup> Tujash Israel aents aidau senchi kitamaidau asag Moisésan kajejuk chichajuinak:

“¿Wagka Egipto batsamsatnume tutsukesh jiijatjamiume? ¿Uchiji aidaujai, tagkuji aidaujai kitakai jinaati tusamek jiijatjamium?” wajaidau.

<sup>4</sup> Imatiagtai Moisés Tuke Pujuu segaak:

“¿Utugkattaja juju aents imatjutuina nunash? ¡Jukea akug kayai tukujuuinakua mantuawagtatui!” tau.

<sup>5</sup> Tama Tuke Pujuu Moisésan ayaak:

“Israel aents aidau ashí yajuaka weakum ditá apuji múun aina nunú ujumak jukim emka wetá. Nuniakum ame namak awatiuwaitam nunú ushujutaijum jukita.

<sup>6</sup> Tuja wika muja Horebnum\* kaya awa nuwi dakastajame, nuwi taam ¡nunú kaya awatta! dutikamin yumi jiiinkittawai. Nunikmatai ashí aents aidau uwagtinme”, tiuwai.

Tusa tima Moisés Israel aentsu apuji múun aidau wainainamunum kayan awatiuawai.

<sup>7</sup> Tuja Israel aents aidau yumi atsutai Tuke Pujuu emtin kajekag Moisésan pegkegchaun chichagkaju asagmatai, nuna nugka daajin adaikauwai “Meribá”.† Tuja nuigtushkam adaikauwai “Masá”.‡ Nunak Israel aents aidau chichainak: ¿Dekas Tuke Pujuuush jutijaish pujawash? tusag utujimkaju asagmatai tuu adaikauwai.

*Israel aents aidau Amalec aents aidaujai maaniamu*

<sup>8</sup> Israel aents Refidim batsatun Amalec aents aidau ditajai maaniawagtatus shimutkajui.

<sup>9</sup> Nuniagtai Moisés Josuén chichajak:

“¡Aents aidau etegjam Amalec aents aidaujai kashin maaniata! Nuniamin wi mujanum wakan ushujutain Apajui sujusbauwa nuna takusan pujuttajai”, tiuwai.

<sup>10</sup> Tusa tima nuna betek umiak, Amalec aents aidaujai maaniatatus jiiintukiuwai. Nunia Moisés, Aarón, nuigtu Hur aatus muja titijin wakajui.

† 16:34 “Arca”: Juka numi kajunjai betek najanamu aajakui. Nuwi chicham umiktinun Apajui agag Moisésan susauwa nunú egkemajakui. \* 17:6 Muja “Horeb” tawa nunak muja “Sinain” taku tawai. † 17:7 “Meribá” tawa duka hebreo chichamnumak “chichamjukbau” taku tawai. ‡ 17:7 “Masá” tawa duka hebreo chichamnumak “utujimkamu” taku tawai.

<sup>11</sup> Nuwi waka batsamas Moisés uwejen yakí takutai, Israel aents aidauk Amalec aents aidau depetuidau, untsu uwejen awaktai, Amalec aents aidau Israel aents aidau depetuinau.

<sup>12</sup> Moisés niina kuntuji yawetai awakeau asamtai, kaya jukiag apujtusam nuwi ekemsauwai. Nunikmatai Aarón, Hurjai Moisésa kuntujin mai takujiag emetjuawajui. Dutikam nunisag pujai, etsashkam akaikiuwai.

<sup>13</sup> Nuadui Josué niina aentsji aidaujai Amalec aents aidau depetuk amukui.

<sup>14</sup> Dutikamtai Tuke Pujuu Moisésan chichajak:

“¡Juju maaniamua juu pachisam papiinum agagta, ajumaish kajimatkishtin ati! Tuja Josué ujakta, Amalec aents aina nunak wi ashí ijinan emegkagatjai”, tiuwai.

<sup>15</sup> Tusa tima Moisés nuwi kaya yajuak ijumag altaran najana nuna daajin “Tuke Pujuu Nisi” adaikauwai. Nunak “Tuke Pujuuwai, bandera jiikbaujai betekmamtin depetmata sukagtinuk” taku tawai.

<sup>16</sup> Nuna tusa:

“¡Tuke Pujuuwa nuna depetmataig jutyai awai, nuadui Tuke Pujuu Amalec aents aidauk ijinattawai, dutikak ditá uchiji wegantu aidauwashkam ijinatnai!” tiuwai Moisés.

## Muja Sinaínum chicham umikbau

### 19

(19—24)

*Israel aents aidau muja Sinaínum jegawagbau*

<sup>1</sup> Israel aents aidau Egipto nugkanum batsatu jijnjau aina duwi nagkamas, kampatum nantua nuna achiak, makichik tsawan tsawajua nunú tsawantin muja Sinaí nagkatkamu uwegshunum jegawajui.

<sup>2</sup> Tuja Sinaínum jegawajua nunak Refidim batsatu juwakiag jegawajui. Nunikag nuwi mujá ijus uwegshunum aakmajag batsamsajui.

<sup>3</sup> Nuwi pujus Moisés Apajujjai chichastatus mujanum wakauwai. Nunikmatai Tuke Pujuu nunú mujanmaya Moisésan untsuka chichajak:

“Jacob tikich daaji Israel aajakua nuna uchiji wegantu Israel aents aina nunú ujakta:

<sup>4</sup> Egiptunmaya aents aidau wi itugkauwaitja duka atumek shiig wainkauwaitjume. Tuja wi atumin, ukukui niina nanapen uchiji aidau pataja yajumaina numamtuk kuitamkan wi pujag juwi ikaunmajim dushakam shiig dekagme.

<sup>5</sup> “Tuja ashí nugka aina duka ashí aents aina nujai midau ainawai. Nunin aig wi atumin mina aentsug atinme tusan etegkauwaitjume. Nuadui wi chichaman tajim nunú antukjum umiakjume atum dekas atatjume mina aentsug tikich aents aina nuna nagkaesau.

<sup>6</sup> Atum Israel aents aidautigmek dekas sacerdote aidau ima wi wakegamunak takagtin aina nujai betek ima wi wakegamuk takau atatjume. Juna wi taja juju Israel aents aidau ujakta”, tiuwai.

<sup>7</sup> Tusa tima Moisés wakitki jegaa, Israel aentsu apuji múun aidau untsuka, ijumag ashí dita antuinamunum Tuke Pujuu tita tibaunak betek etsegkauwai.

<sup>8</sup> Tusa timatai dita shiyakag Israel aents aidau batsatun ujakajui. Dutikawajam ashí betek aimainak:

“¡Tuke Pujuu tujama duka ashí umikagmi!” tuidau. Tusa tiagmatai Moisés nuna dutiksag Tuke Pujun ujakui.

<sup>9</sup> Tusa ujakam Tuke Pujuu Moisésan chichajak:

“Nijah, wi amejai chichamun aents aidau antukag, dekaskeap tawa tusag, tuké antugtamin atinme tau asan, yujagminum pachiinkan wantintuktatjame”, tiuwai. Tusa timatai, Moisés Israel aents aidau tibaunak imatiksag ataktu awagki Tuke Pujun ujakui.

<sup>10</sup> Tusa ujakam Tuke Pujuu Moisésan chichajak:

“¡Wakitki jegaam aents aidau ujakta! Yamai, tuja kashinchakam ashí shiig umintsat- nume, mina emematjagtin asag. Nuninak jáanchjin nijaktinme,

<sup>11</sup> nunikag shiig uminas batsatai, tsawan kempatuma duwi aents aidau ashí waituina- munum muja Sinaínum akaikittajai.

<sup>12</sup> “Nuniktin asamtai, aents aidau muja adjikainum dita ijuntsatin mamiktuata: ‘¡Mujanmak wakaigpajum, tuja nuigtush mamikiamua nuwig nagkaemakigpajum! ¡Antiitkesh antigkaigpajum! Nuna antiauk jakattawai’, tita.

<sup>13</sup> Untsu makichik aentskesh, tuja kuntinkesh nuna dajagtata duka achikaigpajum ayatak kayai tukua tukuakuajum maatajum. Untsu dutikachkugmesh nagkiikesh

maatajum. Duka kuntin akush, aents akush tuké dutika maam atatu. Utsu uwija kachuji senchi umpuamun antuinak mujanmak wamain ainawai", tiuwai.

<sup>14</sup> Tusa tima Moisés nunú mujanmaya wakitki, Israel aents aidau batsatbaunum taa chichaak: "¡Umintsatajum Apajuí emematiagmi!" tusa tiajam, ditashkam shiig umintsajui.

<sup>15</sup> Nunikagmatai Moisés ditan chichajak:

"¡Kashin pujus tsawak Tuke Pujuu wantintugmaktin asamtai, nuwemjaig tsanitsuk umintsajum dakamsatajum!" tiuwai.

<sup>16</sup> Tusa tiyajam, dakamainak batsatai, tsawan kempatuma nunú tsawamunum kashikmas ipamat ishamain wajau, imaniak peemshakam senchi peetu. Imaniamunum nunú mujanum yujagkim suwe wajas aunum, uwija kachuji umpuamu shiig senchi shinaun antukag, Israel aents aidau aaknum batsatuk shiig senchi ishamak kujainau.

<sup>17</sup> Imaniagtai Moisés ditá aakjin batsatun jiija yajuak Apajuíjai igkumtikatatus muja najatamunum ijumjauwai.

<sup>18</sup> Nuninai nunú mujanum jii kegaunum pachitkau Tuke Pujuu akaikiuwai. Nunikmatai muja Sinaik ashí bukuitau. Nuadui nunú mujak aja apeam esaak bukuituwama imaniau. Imaniai nunú mujak shiig senchi uuju.

<sup>19</sup> Tuja uwija kachuji shinamushkam Apajuí mujanum taattak minitai nuni senchi shinau. Tuja Moisés aujam, Apajuí ayaamuk ipamat wajuakeama imatu.

<sup>20</sup> Aatus Tuke Pujuu nayaimpinmaya muja Sinaí titijin yaki tauwai. Nunik taa Moisésan wakata tusa untsukui. Tusa untsukam Moisés wakauwai.

<sup>21</sup> Nunikmatai Tuke Pujuu chichajak:

"¡Wakitkita, nunikam aents aidau ujakta dita ijuntsatin mamiktuamua nuna nagkaiki mina diigsatatus wakainmegka! Nuna nunidauk jakagatui.

<sup>22</sup> ¡Tuja sacerdote minai tamain aina dukesh junisagkek tantainmeka, dekatkauk pegkeetnume! Nuninachkug ditashkam jinumain ainawai", tiuwai.

<sup>23</sup> Tusa tutai Moisés Tuke Pujuu ayaak:

"Aents aidauk juju muja juwig wakachagatui. Wagki juju muja duka aminu pegkejama asamtai, nuwi aents aidau wakainum tusam, dita ijuntsatin muja najatamunum mamiktuata timaum duka betek uminkae", tiuwai.

<sup>24</sup> Tutai Tuke Pujuu Moisésan chichajak:

"Wakitkim jegata. Nunikam Aarógjai wakata. Utsu sacerdote aina duka Israel aidau-jaig nugka mamiktuamua nuna nagkaikijag wi pujag juwig makichkish wakainmegka. Nuna nuninakug wi ¡suwimka susa ai jinawagtui!" tiuwai.

<sup>25</sup> Tusa tima Moisés wakitki jegaa Tuke Pujuu tibaunak imatiksag Israel aents aidau ujakui.

## 20

*Chicham umiktin dieza imajin agagbau  
(Dt. 5.1-21)*

<sup>1</sup> Apajuí chichaak juna aatus ashí tiuwai:\*

<sup>2</sup> "Witjai Tuke Pujuu atumi Apajuíginuk. Wi atumnak Egipto nugkanum inaku waitkatai batsatutigin jiijujtjime.

<sup>3</sup> "Tikich aina duka makichkish apajuimawaigpajum.

<sup>4</sup> "Tuja yakia, nugkaya, namaka initkenia aina duka makichkish dakumka najanagmek emematigpa.

<sup>5</sup> "Nunú aidau eme anentsajum Apajuíjai betek anentaimtu yujaigpajum. Witjai Tuke Pujuu Apajuí atum emematin ainajum duka. Wika Apajuí akasmauwaitjai. Nuniau asan aents aidau mina dakitjuinak pegkegchaun takaina nuna suwimka suwakun, nuna uchiji aidaunash, tijaji aidaunash, ama tijaji aina imanuiyanash suwimkan suwaitjai.

<sup>6</sup> Tujash mina anentuinak, chichamjun betek umigtuidaunak ashí niina uchiji wegantu agtina nujai shiig anentsan tuké kuitamnaitjai.

<sup>7</sup> "¡Tuja Tuke Pujuu atumi ememattajum Apajuíya nuna daaji wainka adaya yujaigpa! Nuna núnidaunak Apajuík suwimka sutsukek idaisashtinai.

<sup>8</sup> "¡Tsawan ayamtai Apajuí etegkamua nunú kajimatkitin aigpajum!

<sup>9</sup> Takamain aina duka seis tsawanta duwi ashí takastajum.

<sup>10</sup> Utsu tsawan sieteya duka Tuke Pujuuu, amina Apajuíjum etegkamu asamtai amina uchigmekesh, nawanjumkesh, tuja wainka inataijum aidaukesh, tagkugmekesh, tikich nugkanmaya ijagtamak taa pujaukesh, takatnak takaschagatui.

\* **20:1** Apajuí Moisésnakesh akattsuk nii tutupin chichakua duka ima juke.

<sup>11</sup> Wagki Tuke Pujuu Apajuik seis tsawantai nayaimpin, nugkan, nayantsan tuja ashí nuwi ayá nujai najankauwai. Dutika tsawan sieteya duwi ayamjauwai. Nuadui nunú tsawanta nunak tuke ayamtai atinun Tuke Pujuu etegkauwai.

<sup>12</sup> “Amina apa, dukujai eme anentsam diita. Dutikakum yaigta. Nunú dutikakum Tuke Pujuu Apajuí amina nugkan amastata nuwi jegagmesh, dukap tsawan pujusminjum.

<sup>13</sup> “¡Magkagtuawaipa!

<sup>14</sup> “¡Ikagmakaipa!

<sup>15</sup> “¡Kasamkaipa!

<sup>16</sup> “¡Tikich aentsush wainka tsanumjujaipa!

<sup>17</sup> “Tikichi jee wakejusam diisaipa. Tuja niina nuwegkesh, nuwa wainka inataijgkesh, aishmag aidaukesh, nuigtu tagkuji baka, burro aidaush, tuja ashí tikich niinu aidau wajig ayawa dukesh wakejusmek diisaipa”, tiuwai.

*Israel aents aidau Apajuín ishamkagbau*

*(Dt. 5.22-33)*

<sup>18</sup> Nuna aatus Apajuí chichai ipamat, peem, chaajip, nuigtu bukuitak mujanak ejakui. Nuna ashí Israel aents aidauk wainkajui. Tuja uwija kachuji shinaunashkam antuidau. Nuna ishamainak ikaa ijunas dii ijunu.

<sup>19</sup> Nuninak Moisésan chichajuinak:

“Ame dekas Apajuíjai chichasam ujjatkata. Nunú antuka umikagmi. Untsu Apajuik jutijaig ataktu awagkig chichasaigka, jinawaig taji”, tuidau.

<sup>20</sup> Tiagtai Moisés ditan ayaak:

“¡Ishamkaigpa! Apajuí junak niina senchijin atumi iwaintugmak juniawai. Juna wainkag ataktuk tudaunak takaschatnume tujamu asa”, tiuwai.

<sup>21</sup> Tusa tiamun nuwi ikaa ijunaig yujagkim bukusea wajas aunum Moisés jegantui Apajuí pujamunum.

<sup>22</sup> Nunikmatai Tuke Pujuu Moisésan chichajak:

“Israel aents aidau ujakta: ‘Yamaik wi nayaimpinum pujusan ditan aujag nuna antukaje,

<sup>23</sup> nuniku asag ¡mina emematjumaina numamtukek oro, plata aina nujai dakumak najanawajag emematinmeka!

<sup>24</sup> ¡Mina emematjuinakug, nugka ijumjag kuntuu maawag nuna nejen nuwi patai ashí apeenak emematjnume! Tuja dita tsagkugnagbaunum anentag itainakush tuja uwig, baka aidau apeenakush wi tuwi dutikatajum titatja ima nuwig dutikatnume. Nuna betek uminakui wishakam pegkegnun yumigsagtatjai.

<sup>25</sup> “Tuja kuntin patai apeatun kayan ijumainakush jimaituk dakatsuk takamchaun ijumjatnume. Untsu kayan jimaituk dakainakug chichaman intimainak dutikawagtatui.

<sup>26</sup> Tuja mina emematjaku kuntin maa patai apeatin najanamua nuwi najami watai atinuk najanawajgpa. ¡Wagki nuwi waaku wisu weagmin waipakainum!’ tawai Tuke Pujuu”, tiuwai Moisés.

## 24

*Moisés Israel aentsu apuji múun aidaujai muja Sinaínum wakamu*

<sup>1</sup> Tuke Pujuu Moisésan chichajak:

“Ame, Aarón, Nadab, Abiú, nuigtu Israel aents aidau apuji múun aidau setenta aatsajum wi pujamunum wakatajum. ¡Nunikjumesh ikaag tikishmagjum pujustajum!

<sup>2</sup> Untsu ima amek mina adiuktatme. Tikich aidauk adiuktainmegka. ¡Tuja tikich aents aidau wakeen ijuna duka makichkish amejaig wakainmegka!” tiuwai.

<sup>3</sup> Tusa tima Moisés aents aidau Tuke Pujuu nuniktajum tibaun ujaku. Tama aents aidau ashí pampajag: “¡Duka dutiksaik umigkagmi!” tiaju.

<sup>4</sup> Tusa tiagmatai Moisés Tuke Pujuu chichamunak ashí agajui. Dutika kashin tsawamunum kashikmas nantaki kuntin maa patasa apeaku Apajuí emematinun altaran najanauwai. Dutika doce kayan yajuak, Jacopa uchiji doce aajakua dutiksag batsakui.

<sup>5</sup> Nuna dutika Tuke Pujuu ditan ayamjuk agkanmitkamunum toro tsakatan maa ashí apeawagtinun, nuigtu tudau tsagkugtugti tusa toro tsakat aidau maawag nuna nejen ujumak apeawagtinun Israel aents datsauch aidau ujumak etegjauwai.

<sup>6</sup> Nuna nunpen jimaituk akanak Moisés juki tsapa aidauunum yajakui, dutika tikich jimaitukea nunak kuntin patai apetai najanamun ukatkauwai.

<sup>7</sup> Dutika idayak chicham umiktin agagbaun juki, ashí Israel aents aidau antuainunum ausauwai. Dutikamtaí dita aimainak: “¡Tuke Pujuu dutikatajum tujama duka ashí imatiksaik umikagmi!” tuidau.

<sup>8</sup> Tusa tiagmatai Moisés numpa juki aents aidau ijunbaunum pegashmak: “Juju numpa juka Apajuí atumjai chichaman umika duka dekaske taku jutikaji”, tiuwai.

<sup>9</sup> Nuna tusa Moisés, Aarón, Nadab, Abiú, nuigtu setenta Israel aents aidau apuji múun aidaujai mujanum wakauwai.

<sup>10</sup> Nunikag nuwi Israel aents aidau Apajuíji: Nawe najama wajamujig kaya safiro tutai wigkaya imadai ukatkamunmas winchamtinnun wajatai tumain nayaim wigkaya iman wajas atatman wainkajui.

<sup>11</sup> Tuja Apajuík nunú apu aidau nak waitkatnume tiu asantai wainkajui. Dutika wainkamash ditanak ijinachajui. Aatus niina emtin yutain yuwawag, umutnash uwajajui.

<sup>12</sup> Nunikagmatai Tuke Pujuu Moisésan chichajak: “iMujanum wi pujamunum wakam dakagsata, nuniamin kayanum chicham umiktinun wi atumin jintintuatasana agajag nuna amastajai!” tiuwai.

<sup>13</sup> Tusa tima Moisés niina yain Josuéjai mujá weuwai.

<sup>14</sup> Nunik weak Israel aentsu apuji múun aidau chichajak: “iJuwi atumek dakam-satajum nuniagmin tattaji! Tuja Aarón, Hurjai, atumjaig pujuttawai. iUtugchat ajutjamkujaish dita ujaktajum!” tau.

<sup>15</sup> Nuna tusa ukuak Moisésak mujanum wakauwai, nuniai yujagkim mujan ijiawwai.

<sup>16</sup> Tuke Pujuu imanji Sinaínum tauwai. Nunikmatai seis tsawanta imajin yujagkim iija asauwai. Nunú yujagminmaya tsawan sieteya duwi Tuke Pujuu Moisésan untasukui.

<sup>17</sup> Tuke Pujuu imanji wantinbau Israel aents aidau diismak yakí mujá titijin jii kegak wajukeama iman aajakui.

<sup>18</sup> Nunú yujagkim suwe wajas aunum Moisés waigkui. Nunik nunú mujanum cuarenta tsawan, nuigtu cuarenta kashi pujusui.

## 31

*Orojai toro tsakat dakumka najanamu  
(Dt. 9.6-29)*

<sup>18</sup> Tuke Pujuu Moisésjai muja Sinaínum chichasa ashimak, jimag kaya pakama najanamunum chicham umiktinun, nii agatug susauwai.

## 32

<sup>1</sup> Moisés muja Sinaínum wee megkaekamtaí, Israel aents aidau ijunag Aarórgan chichajuinak:

“iMoisés jutiinak Egipto nugkanum batsatjin jiiapajuí! iTujash dusha wajukaes, megkaetumkae! Nuniku asantai dekas jame ii apajuímatin najanata, nunú iina uyuntamsamtaí shiyakagmi!” tuidau.

<sup>2</sup> Tusa tiagtai Aarón ditan ayaak:

“iTakugmek atumi nuwemdau, uchigminu, nawanjumdau akiitaiji oro aina nunú ukuitajum juwi itatajum!” tiuwai.

<sup>3</sup> Tusa tiajam oro najanamu ditá kuishin nenau aidauk yajuakag Aarórgan ejetuawajui.

<sup>4</sup> Dutikawagmatai Aarón nuna yajuak ukuiyag, toro tsakatan dakumak najanauwai. Dutikamtaí dita chichainak: “iEgipto nugkanum inaku waitkatai batsatjin Apajuí jiiapakuwa duka jujuwai!” tuidau.

<sup>5</sup> Nuna Aarón antuk, toro tsakat dakumka najana apusamunum, nuna yantamen ayanas altaran najanauwai. Dutika senchi untsumak chichaak: “Kashin ijunja Tuke Pujuu emematuinaku jiiastamawagtatji”, tau.

<sup>6</sup> Tusa tiu asantai tsawainak kashikmas nantajag Apajuí agkanmitkagmawwai tusag nuna anentang suwinak kuintinun maidau, tuja tudau tsagkugnagtin tusashkam kuintinun maidau. Nuna dutikawag yujumkan yuwawag, umutan umuinak nantsemaidau.

<sup>7</sup> Nuniagtai Tuke Pujuu Moisésan chichajak:

“iMujá pujam duka wakitkita, amina aentsjum aidau Egipto nugkanum batsatu jiiagmayum duka pegkegchaun takainak wi dutikatajum tibaunak uminatsui!

<sup>8</sup> iWi umigtuktajum tibaunak shiig wamak kajimatkie! Nuninak oro ukuiyag toro tsakatan dakumak najanawag nuna emematuinak kuintinu maa apenawai. Dutikainak: “iEgipto nugkanum inaku waitkatai batsatjin Apajuí jiiapakuwa duka jujuwai!” tuinawai”, tau.

<sup>9</sup> Tusa Tuke Pujuu ataktu Moisésan chichajak:

“Wi ditanak diyakjai, nuniau asan dekajai ditak shiig antakchau ainawai.

<sup>10</sup> ¡Nuadui amek makichkish ayamjukaipa! ¡Wika shiig senchi kajekjai, nuniku asan ditanak ashí ijinattajai! Tujash ame wegantu aidaunak shiig kuashat ikauntuktajame”, tiuwai.

<sup>11</sup> Tusa tima Moisés Apajuí tsagkugti tusa chichajak:

“¡Tuke Pujuu mina Apajujuh! ¡Imanikmek kajekaipa! Ameku amina senchigmin amina aentsjum aidau Egipto batsatu jii gmayume.

<sup>12</sup> Nuadui ame dutikawaminig egiptunmaya aents aidau chichagtainak: ‘¡Apajuí ditanak tsanuja yajuak, mujá uyujus ijina emegkajui!’ tusa dushiktamain ainawai. Nuadui dekas ¡kajegkau akumesh tsagkujata!

<sup>13</sup> Amina inakem aidau Abraham, Isaac, Jacob aajaku aina nujai ame umiktinjum chichaakum: ‘Atumi uchijum wegantu aidaunak shiig kuashat ikauntukan, yaya nayaimpinum ayá iman awajsatnaitjai tusam, ¡juju nugka junak atumi uchijum wegantu agtina nudau tuke atinun amastatjime!’ tiuwaitam nunú adeagta”, tiuwai.

<sup>14</sup> Tusa tima, Tuke Pujuu ditan kajejuk ijinattajai tiuwaitak, anentain yapajia dutikachui.

<sup>15</sup> Nunikmatai Moisés mujá pujau waketak, jimag kaya pakama najanamunum chicham umiktin mai yantamen agagbaun juki ejegauwai.

<sup>16</sup> Nunú kayanak Apajuí najanauwai, tuja nunú kayanum chicham agagbau aajaku nunashkam Apajuik agajuí.

<sup>17</sup> Nunú chicham agagbaun jukimtai wakitkiag shimukma, aents aidau pampaidaun Josué antuk Moisésan chichajak:

“¡Aents aidau batsata nuwimpash maaniamunum pampainak wajuakeama imatuinani antajai!” tau.

<sup>18</sup> Tutai Moisés ayaak:

“Nunak depetmakbaunum shiig aneenakugkesh imatainatsui. Tuja nuniachkush tikich depetkam wake besemag dekapenakugkesh imatainatsui, ¡auk nunak nampeja batsamas imat batsatui!” tiuwai.

<sup>19</sup> Imatu batsatai Moisés jegakma aents aidau nantsemainak batsatun wainkauwai. Nunik diikma toro tsakat dakumka najanamu atatman wainak, senchi kajeka chicham umiktin kayanum agagbau takakbaunak nagkima ajuag tsaikui. <sup>20</sup> Nuna dutika toro tsakat dakumka najanamun juwakug nagkima jii kegamunum jiya tsaika yukukuntu ema yuminum chimpia pachimag, Israel aents aidau chichajak:

“Yamai juju uwagtajum” tusa aakui.

<sup>21</sup> Nuna dutika Aarógan chichajak:

“¡Juju aents aidaush itugtamkau asamtaiya, amesh ibau pegkegchau takamtikamkesh tunamitkame?” tau.

<sup>22</sup> Tutai Aarón ayaak:

“¡Apujuh, minak kajegtukaipa, amek shiig dekame, juju aents aina juka ayatak pegkegchau takatnak wakeyin ainawai!

<sup>23</sup> Minak dita chichagtuinak jutii aidauti Egipto nugkanum batsatjin Moisés jii pagmaya duka wajukaes megkaekae. Nuniku asamtai, ii shimajin uyuuntamsatin makichik apajuimtai najatkagtuata tujutuinaakui,

<sup>24</sup> wi ditá ayaakun: ‘Akiitaiji oro ajamu aidauk ikaunmatnume’ ti ai, ikaunmawagmatai wi jinum jiyamjai. Dutika ai juju toro tsakat najaneame”, tiuwai.

<sup>25</sup> Tuja Israel aents aidauk Aarón kuitamkacham batsamas pegkegchaun takainak, wainak yujaidau asamtai, ditá shiwaaji aidau dushikiam amainun Moisés anentaimas diisui.

<sup>26</sup> Nunik aakmaja yaaktamamunum waitainum Moisés wajas chichaak:

“¡Tuke Pujuu dekaskeapi tuidauk wijai ijunjatnume!” tiuwai.

Tusa timatai Leví wegantu aidau Moisésjai ashí ijunajui.

<sup>27</sup> Nunikagmatai Moisés ditan chichajak:

“Tuke Pujuu Israel aents aidau Apajuíjia nunú juna aatus chichaak: ‘Maki makichik puyagjin jukiag aents aidau batsata nuna shimutuk maki makichik jegan utuawag ashí aents pegkegchaun takamsau aina nuna dita yachi aidauunum nagkamas kumpaji aidau, tuja ditajai ijunag pujuidaun aatus kajegtinme’ tujamui”, tiuwai.

<sup>28</sup> Tusa tiajam Leví wegantu aidauk Moisés dutikatajum tibaun umiinak nunú tsawanta duwi tres mil aentsun ijinawajui.

<sup>29</sup> Dutikawagmatai Moisés chichaak:

“¡Yamai atumnak Tuke Pujuu pegkegnum yumigtamsag chichame antugtai etamiugme! Wagki atumek Tuke Pujuu umiju asajum atumi yatsum aidau, uchijum aidau pegkegchaun takaidau ijinawajui”, tiuwai.

<sup>30</sup> Tuja kashinia duwi Moisés aents aidaun chichajak: “Atumek shiig pegkegchau takasugme. Nuadui wi yamai mujá wetatjai Tuke Pujuu pujamunum, niish tsagkug-tamainashit nuna dekaatag tusan”, tiuwai.

<sup>31</sup> Nuna tusa ukuak, Moisésak mujá Tuke Pujuu pujamunum wakitkiuwai. Nunik waka Tuke Pujuu chichajak:

“¡Israel aents aidauk Apajuí tusag oron najanawag batsamtuidau asag dekaskenum shiig pegkegchaun takamsaje!

<sup>32</sup> ¡Wait aneamas ditá tudauji tsagkujata! tusan wi segajame. Tuja tsagkugmaichak-mek, mina daag amina aentsjum aidaun daaji agatkamua nuwi agatjujuitam duka esakatjuga”, tiuwai.

<sup>33</sup> Tusa tutai Tuke Pujuu ayaak:

“¡Wika ima mina chichamjun intimjutuina nuna daaji aidaunak esakatjattajai!

<sup>34</sup> ¡Tuja amek wakitkim Israel aents aidau yajuakam wi nugka amastajime tusan anagkuawaitjim nuwi wetá! Mina aentsug nayaimpinmaya uyuntamsattawai. Tujash tsawan dita suwimak jukitnuji jegakui, duwi suwimkanak susattajai”, tiuwai.

<sup>35</sup> Tuja Aarón toro tsakatan dakumak najanamun Israel aents aidau emamatiaju asagmatai, Apajuí suwimka suwak jata ishamainun ajunjauwai.

### 33

*Wi nugka anagkuawaitjim nuwi wetajum tusa Tuke Pujuu Israel aents aidaun tibau*

<sup>1</sup> Tuke Pujuu Moisésan chichajak:

“Abrahaman, Isaakan, Jacopan uchiji wegantu aidaun nugka susatnaitjai tusan wi tiuwaitag nuwi Israel aents aidau Egipto nugkanum batsatu ame jügmayum nunú yajuakam wetá.

<sup>2</sup> Amina uyuntamsatnun mina aentsug nayaimpinmayan awemattajai. Tuja Canaán aents, amorreo aents, hitita aents, ferezeo aents, heveo aents, Jebús aents aidau Canaán nugkanum batsata nunak jüjan utsagtajai.

<sup>3</sup> ¡Nuadui nugka pegkeg, ajakash shiig tsapaun amastatjim nuwi atumek wetajum!

“Tujash wika atumnak uyuntsashtatjime wagki intimkiu ainajum duwi. Nuadui kuitamamkatajum jintá weagmin shiwag amupakainum”, tiuwai.

<sup>4</sup> Tusa Tuke Pujuu timatai nuna antukag, Israel aents aidauk wake besemag dekapenak iwagmamku patakumtai aidaunak patakumachaju ainawai. Tuja nugkutaiji aidaunash nügkugchaju ainawai.

<sup>5</sup> Tuja Tuke Pujuu Moisésan chichajak:

“Israel aents aidau juju ujakta: Atumek antakchau ainagme. Nunin asagmin wi atumjai ijutkau pujaknuk wamak ijinan utsaumainaitjime. Nuadui atum iwagmamku nugkutaijum, patakumtai aidaujai ajutjamaina duka yamaikiuch yajuaka ukuktajum. Dutikawagmin anentaimsatjai atumnash itugkatjimki nuna”, tiuwai.

<sup>6</sup> Tusa tñjam ashí awimag ukukiaju asag, muja Horebnum nagkamas iwagmamku nugkutai aidaunak ataktuk nügkugchaju ainawai.

*Apajuíjai chichastasa waitai carpa aakmakbau*

<sup>7</sup> Apajuí tibaun umiak Moisés carpan juki aents batsatbaun ukuki imau agkan Apajuíjai chichastasa waitain aakmakui. Dutika nuna adaikauwai “Apajuíjai igkunika chichatai”. Tuja makichik aents Tuke Pujuujai chichastatus wakegawk, nuwi waya Tuke Pujuu unujajaku.

<sup>8</sup> Nunú aaknum Moisés Apajuíjai chichastatus wetai, ashí aents aidauk maki makichik ditá aakji waitinum ijunas dii ijunaig, nunú aaknum Moisés waijakui.

<sup>9</sup> Nunik wayamtai Tuke Pujuu niijai chichai yujagkim yakiya aaka waitijin wajantun au.

<sup>10</sup> Nuna aents aidau wainainak, maki makichik dita Apajuín wajuk emamatin ainawa nunisag ditá aakjin waitinum tikishmajag pujujaku ainawai.

<sup>11</sup> Tuja nunú carpa aakmakbaunum Moisés wayamtai, Tuke Pujuu Moisésjai igkunia niina kumpajijai chichamaina imanis chichau. Nunik chichasmatai, Moisés Israel aents aidau batsatbaunum waketujaku. Untsu Nun aajakua nuna uchiji Josué Moisésa yain aajakua duka nunú aakan kuitamak jüintsuk nuwig pujujaku.

*Moisés Tuke Pujuu wantintugkata wainkatjame tusa segamu*

<sup>12</sup> Moisés Tuke Pujuu chichajak:

“Ame minak juju aents aina juju yajuakam emata tujutme. Tujutiakum yaki minash atutkati duka eke tujuttsume. Nuniayatku: ‘Aneajame, nuniau asan kajittsan anentaintajame’ tujutmayune.

<sup>13</sup> Nunú dekasketkuig wajina dutikatjai tusamea anentaime nunú ujatkata, wisha nuna dekaan dekas yaimpaktatuapi titajai. Ame etegkagtujuime mina aentsug atinme tusam. Nuadui idaikagtutsuk uyunkagtusta”, tiuwai.

<sup>14</sup> Tusa tama Tuke Pujuu ayaak:

“¡Wi aminak uyuntsattagme, dutikakun agkan uyumat aneakas pujusti tusan kuita-mkattagme!” tiuwai.

<sup>15</sup> Tusa tama Moisés ayaak:

“¡Ame uyunkagtuschatnaitkumek, wetajum tusamek tukagtipa!

<sup>16</sup> ¿Ame uyunkagtushtaish itusag tikich aents aidaush amina aentsjum aina nunash tuja minash dekas Apajuyap kuitamua tusash tujamtinme? Ame uyunkagtau asamin, tikich aents aidau diismash dita nagkaesau agtatji”, tiuwai.

<sup>17</sup> Tusa tutai Tuke Pujuu Moisésan ayaak:

“¡Aminak kajitsta anentaimitau asan, ame segatam nunak umiktatjai, tuja aminak shiig anentsan diyagme!” tiuwai.

<sup>18</sup> Tusa tama Moisés niina chichajak:

“¡Untsu takumek dekas tikijuch paan wantintugkata!” tusa segauwai.

<sup>19</sup> Tutai Tuke Pujuu niina ayaak:

“Wi ame wajamunum nagkaemaktatjai, nuniakui ame mina pegkegmajua nunú wainkamnum tusan. Nuniakun mina daag Tuke Pujuuwa nuna ujakatjame. Wika yana wait anentasa wakegaja, nuna wait anennaitjai.

<sup>20</sup> ¡Tujash amek mina niimjuk wainkashtatme, mina waitkauk makichkish iwakuk pujumaitsu!” tiuwai.

<sup>21</sup> Tusa nuigtushkam chichaak:

“Nijah, minai ayaumas buchig awa juwi wajaim wajasta.

<sup>22</sup> Nuniamin wi aminí ayaumsan nagkaemakun aminak buchig waanum egkeattagme. Dutikakun mina uwejuí jiimin ejatkan nagkaemaktatjai.

<sup>23</sup> Nunikan mina uwejun jukittajai, dutikamtai ima mina tuntupjuk wainkattame. Tujash mina niimjuk wainkashtatme”, tiuwai.

## 34

### *Chicham umiktinun Apajuí ataktu agagbau*

*(Dt. 10.1-5)*

<sup>1</sup> Tuke Pujuu Moisésan chichajak:

“¡Jimag kaya tsupikam yaunchuk aajakua nujai betek pakama najanata! Dutikawamin nuwi chicham umiktin yama nagkamchaku agagbau ame ajiaja tsaikmayum nujai betekan ataktu agagtajai.

<sup>2</sup> Tuja nuigtushkam ¡kashin kashikmasam muja Sinaínum wakatin asam umintsata! ¡Nuwi wakam dekas muja titijin mina emtijui tantata!

<sup>3</sup> Untsu makichik aentskesh mujanmak amejajig wakaigka, tuja juju muja juwi wekaguk makichkish wainnakchati, nuigtush uwig aidau, baka aidau chijichin yuwak wekagush atsuti”, tiuwai.

<sup>4</sup> Tusa tima Moisés jimag kayan tsupik yaunchuk aajakua nujai betek pakama najanauwai. Dutika najana kashinia duwi kashikmas Tuke Pujuu tibaun umiak nuna juki muja Sinaínum wakauwai.

<sup>5</sup> Nunikmatai Tuke Pujuu yujagminum pachitkau akaikiuwai, nunik nuwi Moisésjai pujus niina daajin Tuke Pujuu tutaiya nuna ujakui.

<sup>6</sup> Nunika Moisés wajamunum nagkaemak senchi jiika chichaak:

“¡Witjai Apajuí TUKE PUJUÚ tutain, wika kakagchauch, wait anenkagtin, wamak kajechu, anenkaji múun, dekaskenum chichauwaitjai!

<sup>7</sup> Mina anenkajuk yaunchuk auwa nunisag tuke atinai, nuadui aents aidau mina dakitjuinak pegkegchaun takainak, wijai shiwagmagainakuish, tsagkugkagtinaitjai. ¡Dutikayatkun dita pegkegchau takamsamujin suwimka suwakun dita uchiji aidaunash tijaji aidaunash, ama tijaji aidaunash suwimkan suwaitjai!” tiuwai.

<sup>8</sup> Tusa timatai Moisés tikishmag tsunsuma nijayin nugka antig pujus Tuke Pujuu emematak,

<sup>9</sup> aatus tiuwai:

“¡Tuke Pujuuwah, dekaskenum mina anenkumek uyunkagtusta! Iik dekas antakchau ainaji, tujash tsagkugkagtujam amina aentsjum ekagti”, tiuwai.

### *Apajuí Israel aents aidaujai ataktu chichaman umikbau*

*(Dt. 7.1-5)*

<sup>10</sup> Tuke Pujuu Moisésan chichajak:



"Juju shiig antukta. Wi yamai ashí amina aentsjum aidaujai chichaman umikattajai, dutikakun tikich nugkanmash makichkish wainchatai aidauun kuashat iwainagattajai. Nuna tikich aents aidau atum pujamunum pujuidaush ashí wainkagattajai.

<sup>11</sup> "Wi yamai juna tajim juka imatiksagmek umiktajum. Nuniakjumin wi atumesh wainbaunum amorreo aents, cananeo aents, hitita aents, ferezeo aents, heveo aents, Jebús aents aidau batsata nunak jija utsaakun dita nugke aina nunak atumin amastatjime.

<sup>12</sup> "Tuja nunú nugkanum jegagmesh, nuwiya aents aidaujaig makichkish chichamak umikaigpajum, tsanupajag pegkegchau takatnum ajumpawainum.

<sup>13</sup> Duka nunitsuk dekas ditá apajuímtajin emematuinak patasa apetai altar aidau, tuja kayan emematin aina nunú, numin emematin aina nujai ¡ashí tsaikjum utsankatajum!"

<sup>14</sup> "¡Makichkish tikichik apajuímawaijpajum, ima midauk atajum! ¡Wika Tuke Pujuu akasmauwaitjai! Mina daajuk Apajuí akasmau tutayai.

<sup>15</sup> "Makichkish nuwiya aents aidaujaig dutik takasmi tusagmek chichamak umikaigpajum, wagki ditá apajuímtajai aidauun emematuinak kuntin maamun yuwami tusa ipapainakui atumesh nunú yuwawaijum.

<sup>16</sup> Tuja namputchawame atumi uchijum aidauun ditá nawanji aidaujai nuweami tusashkam tumain ainawai, dutikamak nunú nuwa aidau ditá apajuímtajin emematuinak atumi uchijum aidauunash pegkegchaun takamtikmain ainawai.

<sup>17</sup> "¡Tuja jiju ukuijajum atum ememattin dakumkagmek makichkish najanawaigpa!"

*Israel aents aidau Apajuí emematuinak maki makichik mijantin jüstamawagtin jintintuamu*

*(Ex. 23.14-19; Dt. 16.1-17)*

<sup>18</sup> "Pag lewadurajai pachimtsuk inajuamu yutai tsawan jegakuig, wi dutikatajum tibauwa duka dutiksagmek siete tsawantai yuwatajum. Tuja mijan achiamu marzo jimaituk nagkamna, abrilan ikak amuga nunú nantutin, tsawan mamikiamua duwi atumek duka dutikattagme, wagki nunú nantutin Egipto nugkanum batsatutijum jijnjau asajum.

<sup>19</sup> "Uchi aishmag iwai akiinuk ashí midau agtatui, tuja baka, uwig, cabra aina nuna uchiji aishmag yama nagkamchaku petsakbau aidauhshkam midau agtatui.

<sup>20</sup> Burro uchiji yama nagkamchaku petsakbau mina sujumaina nunú idaikum uwig tsakat, tuja chivo tsakatkeh sujustatjime. Tujash nunú dutika sujumain atsakuig, burro kuntuje kupigka maatajum. Tuja atumi uchijum aishmag iwai aina nunú anentag sujumainaitjum nunú idaikujum mina anentag sujustin tikich jukijum minitajum. Untsu mina anentag sujumain atugbauk, makichkish wi pujamunmak tantainmeka.

<sup>21</sup> "Atumek seis tsawantai takastajum. Untsu tsawan sieteya nuaduik ajakmamain akuish tuja ajak juumain akuish idaikujum ayamjatajum.

<sup>22</sup> "Trigo ajakmamu yama nagkamchaku juuktatjum nuna jüsta daaji 'semana aidau' tutaya duwi, tuja mijan amuebaunum\* ajak juuktatjum nuna daaji, 'ajak juut' tutaya duwishkam Apajuí emematjukum tuke jüstamtajum.

<sup>23</sup> "Nuadui ashí aishmag múun aidauk makichik mijanai kempatuma imania wi pujamunum taawag mina emematjitnume. ¡Witjai Tuke Pujuu atumi Apajuíginuk!

<sup>24</sup> Atumesh wainjumin tikich aents aidauunak jija utsakun, nunú nugkanak atumin amastatjime. Nuadui makichkish nugkanak atanjamkichagtin ainawai. Nuwi agkan batsamsajum wi Tuke Pujuu Israel aents aidauun Apajuíyitajum nunú emematjakjum maki makichik mijantin kempatuma imania ijunjajum jüstamtinaitjime.

<sup>25</sup> "Mina emematjaku kuntin maa apeamua nuna numpeg, pag lewadurajai pachimja inajuamujai jukigmek itagtuawaijpa. Tuja jüsta pascuatin Apajuí ememattasa kuntin maamua nuna neje ampinjamtaish kashinia duwi yuwatnuk ukukigpajum.

<sup>26</sup> "¡Yujág yama nagkamchak nejeku dekas shiig pegkeg aina iman mina jegajuig itagtuatajum! ¡Tuja chivo maajum inagkugmesh dukuji muntsuji ijugbaunum egkeagmek inagkaigpajum! tawai Apajuí", tiuwai Moisés.

*Chicham umiktinun Moisés agagbau*

<sup>27</sup> Nuna tusa Tuke Pujuu Moisésan chichajak: "¡Chicham umiktin aidauun wi yamai tajam nunú agagta! Wagki jujuwai ame Israel aents aidaujai umiktina nunú", tiuwai.

<sup>28</sup> Aatus Moisés mujanum cuarenta tsawan, nuigtu cuarenta kashi yujumkan yutsuk, umutnash umutsuk Tuke Pujuuai pujusui. Nuwi pujus kaya tsupika pakama najanamunum diez chicham umiktinun agajui.

\* 34:22 "Mijan amuebau" tawa nunak diciembren taku tatsui, wagki ditak marzotin nagkama dekapajaku ainawai.

<sup>29</sup> Nuna dutika muja Sinaínum pujau waketak nunú chicham umiktin agagbaun juki wakitkiuwai. Tuja Tuke Pujuujai igkunia chichasu asa niina yapinig winchamtin wajasui. Tujash nunak niig wainmamchau.

<sup>30</sup> Moisés minittaman Aarón niina patayi Israel aents aidaujai diikma yapiin winchamtin wajas midaun wainkag, senchi ishamainak jegantachaju ainawai.

<sup>31</sup> Nuniagtai Moisés Israel aentsu apuji aidaun utsukui ditajai chichastatus. Dutikawajam Aarón Israel aents aidaun apuji aidaujai Moisésan jegaantajui. Nunikagmatai Moisés ditajai chichasui.

<sup>32</sup> Nunik chichas nagkanainaig aents aidauk ashí jegaantajui. Nunikagmatai chicham umiktin aidaun Tuke Pujuu Moisésan muja Sinaínum susamunak, imatiksag dita umikagtinun ashí ujakui.

<sup>33</sup> Nuna ditajai chichas ashimak, nuadui jáanchi juki niina yapiin dukumakui.

<sup>34</sup> Tuja Tuke Pujuujai chichastatus weakug nunú jáanchnak ukuak waya, chichas jiinki Tuke Pujuu aents aidau ujakta tibaun betek ujakui.

<sup>35</sup> Tuja Moisésak niina yapi winchamtinun Israel aents aidau wainainau asagmatai, jáanchi dukumak pujujakui. Untsui Tuke Pujuujai chichastatus wayakug jáanchnak juki ukujakui.

## 40

### *Apajuújai chichatai carpan aakmakbau*

<sup>16</sup> Tuke Pujuu tibaunak Moisésak ashí betek umikui.

<sup>17</sup> Tuja Egipto nugkanum batsatu jijnajua duwi nagkama mijan jimaja nunú achiamunum nantu yama nagkamchak taka makichik tsawan tsawaju ai, Apajuújai chichatain carpan aakmak ashimkajui.

<sup>18</sup> Nuna Moisés aakmakug juni nagkabauwai: Yama nagkamchakug jiju dupajam taumi najanamui aidaun batsaka umikui. Dutika nunú jijunum numi dupajam dakagbau aidaun awajug umika, nuna ichichiagtinun numi tsejeg dakagbau aidaun minanjauwai. Dutika duwi aaka bakuin ajigka umikui.

<sup>19</sup> Dutika nuwi carpan aakmakui, Tuke Pujuu dutikata tibaunak imatiksag. Aatus aakmatkauwai Tuke Pujuujai chichastasa waitai pegkejam umikbau aajakua nuna.

<sup>20</sup> Dutika ashimak kaya pakama najanamunum chicham umiktin aidau agagbaun juki arcanum egkeauwai. Dutika dukutai shiig pegkeg najanamujai dukuka nunú yanaki jukitnun jimag numin wegaji apusauwai.

<sup>21</sup> Dutika Apajuújai chichastasa waitai aakmakbaunum, tesaamu “shiig pegkejam” tutainum nunú arcan awayauwai. Dutika awaya jáanch wegkagman juki ejatuuwai, Tuke Pujuu dutikata tibaunak imatiksag.

<sup>22</sup> Nuna umika duwi mesa najanamun juki carpa aakmakbaunum, tesaamu jáanch detuamua nuwi jegatsuk, dekatkau tesaamu pegkejam tutainum awaya untsuja nuni apusauwai.

<sup>23</sup> Dutika pagkan yajuak Tuke Pujuu wainai nunú mesanum shiig pataja umikui, Tuke Pujuu dutikata tibaunak imatiksag.

<sup>24</sup> Tuja nuigtushkam jii ekemaka pekatai ayatak oro najanamun candelabron juki mesa pujaun niimtikas menanmanini apusauwai.

<sup>25</sup> Dutika aceite yajakbaun juki, nuwi peka ekemag ukukiuwai, Tuke Pujuu dutikata tibaunak imatiksag.

<sup>26</sup> Untsui Apajuú emematku patasa apetai altar oro najanamun juki, jáanch ejamunum ejentattak apusauwai.

<sup>27</sup> Nuna dutika Tuke Pujuu tibaun umiak kugkuin incienso tutain juki nuwi patai apeauwai.

<sup>28</sup> Nuna ashí dutika inagnak, nunú aakmakbauwa nuna waitijin jáanchin detua ukukiuwai.

<sup>29</sup> Dutika ajuma duwi kuntin maa patasa apetai altar bronce najanamun juki, agá aaka waitijin igkuas apusauwai. Dutika Tuke Pujuu tibaun umiak kuntinun maa nuna nejen nuwi patai ashí apeauwai. Tuja ajak juukbaun Apajuúin anentag suwak nunashkam dutiksag apeuwei.

<sup>30</sup> Nuna dutika yumi yajaa ikigmatai palangana bronce najanamun pujaun juki Apajuújai chichatai carpa aakmakbau aajakua nujai niniaku altar pujaunum nuna ejapeen apusauwai. Dutika nuwi yumi ikigmagtinun yajauwai.

<sup>31</sup> Nuna Moisés Aaróggai tuja Aarógka uchiji aidau aatus ditá ikigmagtinun, nawe dijajagtinjin nuwiyen shikika jujaku ainawai.

<sup>32</sup> Tuja nunú aaknum wayatag tuinakug nunú yumi aimkamua nuna tuké ikigmag wajaku ainawai, Tuke Pujuu tibaunak imatiksag.

<sup>33</sup> Nuna ashí umika inagnak, aak carpa aakmakbau aajakua nuna agájin ashí tanishmag ashimak, jáanchi juki waitinum detua ukukiuwai.

*Apajuújai chichatai*  
*aak pegkejam*  
*carpa aakmakbaunum*  
*Tuke Pujuu wayamu*  
*(Nm. 9.15-23)*

<sup>34</sup> Aak pegkejam carpa aakmakbaun yujagkim ijiuwai. Nuniamunum Tuke Pujuu imanji pegkegma nunú aakan akijauwai.

<sup>35</sup> Tuke Pujuu imanji pegkegma nunú yujagmijai betek aakan ijiau asantai, Moisés waimainchau dekapjauwai.

<sup>36</sup> Tuja nunú yujagkim aak pegkegman ijia aajakua nunú yaki takuntai, Israel aents aidauk ditá aakji aidaun tegaka jukiag shimujakui.

<sup>37</sup> Untsu yujagkim yaki takunchataik, yaki takunti tusag dakak nuwig aakmag batsamajakajui.

<sup>38</sup> Tuja aak pegkejam carpa aakmakbaun yujagkim tsawai tuke ijia aajakua nunú, kashishkam keejakua duka, Israel aents aidau shimamunmak nunisag au asantai, dita nuna shiig wainajaku ainawai.

## Levítico 10

*Nadab Abiújai pegkegchaun takamsamu*

<sup>1</sup> Aarógka uchiji Nadab Abiújai kugkuin incienso chimpia apetaim jukiag, nuwi jii ekemakag incienson chimpiauwag Tuke Pujuu dutikatajum tichamu aig, aak pegkejam Apajuújai chichatai aakmakbaunum wayawag nuna apeawajui.

<sup>2</sup> Dutikiagtai chicham umiktin agagbau Apajuúnu egketunmaya jii keeka jiinak apeam mai jakajui.

<sup>3</sup> Nunikagmatai Moisés Aarógkan chichajak:

“Juna pachis Tuke Pujuu chichaak:

“Wi pujamunum taidaunak

mina pegkegmajun iwaintukagtatjai.

Tuja ashí Israel aents aina nunak

mina imanjun iwaintukagtatjai’ tujamayi”, tiuwai.

Nuna Aarón antuk, chichatsuk wajasui.

<sup>4</sup> Nuna tusa Moisés Aarógka apaji yachi Usiel aajakua nuna uchiji aidaun: Misaelan Elzafánjai untsuka chichajak: “Atumi yatsum aidaun aak pegkegmanum wayawag jinawaja nunú jikjum, ii batsatag nunú ukumtikijum imau ejeentajum ukuktajum”, tiuwai.

<sup>5</sup> Tusa tima shimutuk jiiki jukiag Moisés tibaunak imatiksag dita batsatbaun ukumtikijum imau ejegan ukukijui.

## 16

*Tudau tsagkugnagtasu*

*maki makichik mijantin dutikajakbau*

<sup>1</sup> Nunik Aarógka uchiji Tuke Pujuu pujamunum waikma jakagmatai, nuna pachis Tuke Pujuu Moisésan chichajak:

<sup>2</sup> “Aaknum tesaamu pegkejam tutaiya nuwi nunú tsawantai wayati tusa mamikiachbau aigkik, makichkish wayawaipa tusam amina yatsum Aarón ujakta. Wagki wika chicham umiktin agagbau arcanum egkeamu puja nuna dukutaijin pujajai, nuniau asan nuwi wi yujagminum wantintai jakai.

<sup>3</sup> “Tuja Aarón nuwi wayakug apeaku tudau tsagkugnagtinun toro tsakatan juki wayati, untsu mina anentag sujamun uwig tsakat aishmagkun juki waya, nuna apeak emematjiti.

<sup>4</sup> Aarón nuwi wayatatus weakug dekatkauk maíti, nunik nuadui jáanch esajam lino apagbau sacerdote nugkutain nugkug, nuigtu wegamatai lino apagbau wegamak, akachumtain akachuma, nuigtu atsejutai lino najanamun atsejuk wayati. Jujuwai jáanch dekas etegjama Tuke Pujuujai chichastasa wayaku iwagmamtai aidauk.

<sup>5</sup> “Tuja ashí Israel aents aina nuna tudauji tsagkugnagtinun Aarón maa apeati tusa jimag chivon susagtatui. Tuja Apajuú anentag suwamua nuna makichik uwig tsakat aishmagkun Aarón maa nuna nejen ashí apeati.

<sup>6</sup> Nuna dutika inagnak, nuadui Aarón niina tudauji nuigtu niina nuwe, uchiji aina nuna tudauji aidaujai tsagkugnagtinun toro tsakatan maa apeati.

<sup>7</sup> Tuja nunú jimag chivon aishmagkun juki aak pegkejam aakmakbauwa nuna agaaji peeja tenteamua nuwi waya aaka waitijin jegantatak Tuke Pujuu emtin ejentati.

<sup>8</sup> “Dutikamtai chivo jimaja nuwiyash tuki midaush ati tuja Azazeldaush tuki ati nuna kaya jimajan juki nujai dekaati.

<sup>9</sup> Tuja nunú chivo midau atata nunak tudau tsagkugnagtinun Aarón maa apeati.

<sup>10</sup> Untsu chivo Azazeldau atata nunak mauntsuk iwakun juki tudaun tsagkugtamtati tusag Apajuú emtin ejentattawai. Nuna dutika nuadui jiiki uwegshunum Azazel pujamunum awemattawai.

<sup>11</sup> “Nuna Aarón niina tudauji nuigtu niina nuwe, uchiji aina nuna tudaujjai tsagkugnagtinun toro tsakatan suwenum tsupik maa apeati.

<sup>12</sup> Nuna dutika Apajuújai chichaaku waitai aak pegkejam aakmakbaunum, dekatkau wayamua nunú ‘pegkejam’ tutaya nuwi kugkuin incienso chimpia apetaim jii kaiji kuntin apetaimaya yajuaka chimpianu eketa nuna jukiti. Dutika nuigtushkam kugkuin incienso atsaaki juki nunú aaknum tesaamu jáanch ejatuamua nunú ‘shiiig pegkejam’ tutaya nuwi awayati.

<sup>13</sup> Dutika wisha wainai jii kegamunum kugkuin incienson utsaati. Dutikam nunú bukuitamu arca dukuitain ijiati. Nunú bukuituk iija ejaku asamtai, wi nuwi wantintaishkam Aarógak jakashtatui.

<sup>14</sup> “Tuja nuigtushkam toro tsakata numpen ujumak juki, tsajam uwejen inua, arca dukutaiji yantamen makichkia pegashmag ukatkati, dutika tikich yantame eem awa nuna sieteya imania pegashmag ukatkati.

<sup>15</sup> Nuna dutika aents aina nuna tudauji tsagkugnagtinnun chivon maattawai. Dutika nuna numpen juki aak pegkejam Apajuújai chichatainum tesaamu shiig pegkegma nuwi awayattawai. Nuwi awaya arca dukutaiji tuntupen ukatuk, nuadui eemshakam ukatkattawai, yaunchuk toro tsakata numpegai ukatkama dutiksag.

<sup>16</sup> Nuna dutika Israel aents aidau pegkegchau takamsamuji aidau tsagkugnagmatai, nuadui nunú aak pegkejam Apajuújai chichatai aakmakbau, dita katseken pegkegchau wajas awa nuna iwajattawai.

<sup>17</sup> “Tuja tudau tsagkugnagtinnun takak, aak pegkegma nuwi Aarón waya pujau eke jiintsagkik, makichik aentskesh aak pegkegma nuwi jegantag pujusainmegka. Nuna dutika Aarón niinu, niina nuwenu, niina uchiji aidau, nuigtu ashí Israel aents aina nunú pegkegchau takasbauji aidau tsagkugnagtinnun ashí umika,

<sup>18</sup> jiinki Apajuú emematku patasa apetai najanamu altar puja nuna iwajatatus wetatui. Nunik toro tsakata numpen chivo numpejai ujumak juki incienson patai apetaiya nuna tsakaji ipak usumat wagaku aina nuna ukatkattawai.

<sup>19</sup> Tuja altar puja nuna niina tsajam uwejen numpan inua sieteya imania ukatkati. Aatus Israel aents aidau pegkegchau takasbaujin altar pegkegchau wajas awa nuna iwajattawai.

*Uwejush aents atsamunum chivo awemamu*

<sup>20</sup> “Dutika aak pegkejam Apajuújai chichataiya nuna, altar puja nujai Aarón ashí iwajug, nuadui chivo iwaku ukukbau utitajum tima itawagmatai jukittawai.

<sup>21</sup> Dutika nuna kuntinu buuken achika pujus, Israel aents aidau pegkegchau takasbaujin tuja Apajuú antugetsuk intinjukbau aidau ashí etsegtagmatai. Dutika ashí pegkegchau aina nunak chivo buuken utuatkattawai, dutikamtai makichik aents nuna juki uwegshunum eegan atia akupkati.

<sup>22</sup> Dutikam nunú chivo uwejush aents atsamunum megkagak, ashí ditá pegkegchauji aidau nak yajuak ajapattawai.

<sup>23</sup> “Nuna dutika nunú aak pegkejam aakmakbaunum Aarón waya jáanch lino apagbau nugkuagbaujin awimak ukuktatui. Wagki nunú jáanchik nuwi tuke ukutai asamtai.

<sup>24</sup> Dutika nuwig yuminum nijamag sacerdote nugkutai jáanch shiig iwajamun nugkuja, nuna agájin jiinki niina tudauji tsagkugnagtinnun, tuja Israel aents aidau tudauji tsagkugnagtinnun maa nuna nejen ashí apeak emematjittawai. Nuna dutikamtai ditá tudaujig tsagkugnagtatui.

<sup>25</sup> Tudaun tsagkugtugti tusa kuntin maa apeamua nuna wiyajinak altarnum patai apeati.

<sup>26</sup> “Aents chivon juki, uwegshunum akupkatatus weuwa duka aakmaja batsatbaunmak eke tatsuk, jáanchjin dijag niishkam, mai, nuadui wayati.

<sup>27</sup> “Tuja tudau tsagkugtugti tusa toro tsakat chivojai maa apeaku nuna numpe juki, aak pegkegma nuwi awayamua nunak, duwape, neje beseku aina nujai ijumag juki aents batsatbaun ukumtiki apeatneme.

<sup>28</sup> Aents nuna apeatta duka jáanchjin dijag niishkam mai, nuadui aents batsatbaunum wayati.

<sup>29</sup> “Tuja jujuwai dekas atum chicham umiktin tuke atina nunú. Nantu sieteya nunú taka, tsawan diez tsawagtata nuadui, atumek ijagmajum yujumak yutsuk pujustajum, nuniakjum takatjumes takatsuk ashí idaisatajum. Atum nuniagmin aents tikich nugkanmaya aidau atumjai pujuidauk ditashkam dutiksag umiktinme.

<sup>30</sup> Nunú tsawantai sacerdote wi pujamunum taa, atum pegkegchau takamsamunum tsagkugnagtinnun segattatui, nuadui tsagkugnagjum agkan juwaktajume.

<sup>31</sup> Juju chicham umiktina juka tuke asatnai, nuniau asamtai, nunú tsawanta nuadui atumek ayamkujum ijagmajum yujumak yutsuk pujuttagne.

<sup>32</sup> “Tuja atumi apa sumo sacerdoteya nujai yapajinatnunak wi etegkattajai. Tuja atumi tudaujum tsagkugnagtinnun mash wajina dutikattawa nunashkam betekmas umikti tusan, wi niinak inajai. Tuja nii sacerdote nugkutaiji jáanch puju lino apagbaun nugkugtatu.

<sup>33</sup> Nuna nugkuja aak pegkegmanum waya, tikich tesaamu shiig pegkegma nuna iwajug pegkeg awajattawai. Dutikak altarnashkam iwajug pegkeg awajattawai.

Sacerdote dutikatta nunú dita pegkegchau takamsamujinak, tuja ashí Israel aents aidau pegkegchau takamsamujinashkam tsagkugnagtagtatuí.

<sup>34</sup> Pegkegchau takasbaunum tsagkugnagtag tuinakug, juju chicham umiktina juna umiak maki makichik mijanai makichkia dutikatnume”, tiuwai.

Aatus Apajuí Moisésan tibaunak imatiksag Aarón umikui.

## 19

*Wajuk pujuínakua Apajuínash umigmain ainawa nunú pachisa agagbau*

<sup>1</sup> Tuke Pujuu Moisésan chichajak:

<sup>2</sup> “Israel aents aidau juju ujakta:

“¡Wika Tuke Pujuu atumi Apajuí gminuk pegkegmaitjai, nuadui atumshakam pegkejam atajum!

<sup>3</sup> “Maki makichik ditá apajin, dukujijai eme anentus diitnume.

“Nuigtushkam tsawan ayamtain wi etegkauwaitag nunú eme anentsajum diitajum. ¡Witjai Tuke Pujuu Apajuí atum emematin ainajum nunú!

<sup>4</sup> “Dakumka najanamu aina duka emematigpa, tuja nuigtush atum apajuímatnuk jiju ukuija dakumkagmek najanawaigpa. ¡Witjai Tuke Pujuu Apajuí atum emematin ainajum nunú!

<sup>5</sup> “Agkan pegkeg pujustasajum kuntin maa Apajuí anentag suwajum duka tuke dutiktajum, nunú dutikakjumek Tuke Pujuu shiig awagmamain dutikatajum.

<sup>6</sup> “Nunú kuntin maamua duka nunú tsawantaik yuwatajum, tuja kashinia duwishkam yumainaitjume, untsu tsawan kempatuma duwi yumain ampinjatta duka apeatajum.

<sup>7</sup> Nunú kuntinu neje ampinjaun kempatum tsawan tsawaju ai yuwauk tsumain diyam atatuí, nuadui nunú aentsnak Apajuí idaisattawai.

<sup>8</sup> Nuna yuwauk suwimkan ijutmamjattawai, tuja nuigtushkam ashí Israel aents aina nuwiya jiiki yaja ajapeam atatuí, Tuke Pujuu tibaun intimjuki umikchou asamtai.

<sup>9</sup> “Ajak juut tsawan jegamtai juwakjumesh ashí juukaigpajum, tuja ampinjau aina dukesh waketjukmek juukaigpa.

<sup>10</sup> “Uva juukbaunmaya ampinjauk waketjuki egakmek juukaipa, nuigtush kakekaukesh yajuakaipa; duka idaisata ujudauch aidau tikich nugkanmaya aidaujai yuwatnume. ¡Witjai Tuke Pujuu, atumi Apajuí gminuk!”

<sup>11</sup> “Kasamkaigpajum.

“Waitjuawaigpajum, atumek pempeentunikjumesh tsanunijaigpajum.

<sup>12</sup> “Umikchatnaitkum mina daag pachisa tsanumjaipa, duka amina Apajuí gmin daaji dushikiakum tame. ¡Witjai Tuke Pujuuunuk!”

<sup>13</sup> “Tikichish wainka takamtikakum waitkasaipa, niinu aina duka kasagkaipa. Nii takasbaujina akiktina duka kashin akiktagme tusa emetjuamek waitkasaipa.

<sup>14</sup> “Aents empeku dushikiakum pegkegchau chichagkaipa. Aents wainmachuk makichish tsanujaipa. ¡Witjai Tuke Pujuuunuk!”

<sup>15</sup> “Utugchat epegkeakjumesh tsanumtsuk shiig epegkeatajum. Ujudauch akuish, wiakuch akuish, takamsamui diigsajum suwimkak betek susatajum.

<sup>16</sup> “Wainkam amejai ijutkau batsata nuwi chicham tsuwapa wekayipa. Tikich aentsush maatnume tusamek tsanumjuja sujukaipa. ¡Witjai Tuke Pujuuunuk!”

<sup>17</sup> “Initak kajegkagtinuk aipa. Dekas ame chichagkatag takumek igkuam chichagkata. Nunú dutikachkumek, ameshkam pegkegchaun takasua iman wajastatme.

<sup>18</sup> “Amina pegkegchau awajtamainakuish, dutiksamkek iikaipa, tuja amina aentsjum aina dusha kajejin aipa. Duka nunitsuk amek anenmamsam tikichish aneeta. ¡Witjai Tuke Pujuuunuk!”

<sup>19</sup> “Chicham umiktinun wi tajim nunú ewaetsuk betek umiktajum. Atumi tagkujum aidauk tikich kuntin aidaujaig entsamtikaigpa. Ajagmin ajakmakmesh tikich ajakjai pachimjamek ajakmawaigpa. Tuja nuigtushkam jáanch pachimja najanamuk nugkujaigpa.

<sup>20</sup> “Nuwa wainka inaku waitkatai makichik aentsjai aishinatatus pujaun, tikich aents nuna dekyatatak nujai tsanijinuk, aents nuwatkatjai tiuwa nuna akiktatui, nii akikmak sumak niinu ema agkanmitkachu ataishkam. Tujash tikima mautnak maachagtatui ayatak suwimkan mai susagtatui. Wagki nunú nuwak eke sumaka agkanmitkachbau asamtai.

<sup>21</sup> Aents tsanijinauwa nunú nii pegkegchau takasbaunum tsagkugnagtinjin Tuke Pujuu suwakug makichik uwig tsakatan juki aak pegkejam Apajuíjai chichatai aakmakbauwa nuna waitjin ejentati.

<sup>22</sup> Nuna sacerdote maa apeak aents pegkegchau takasa nunú tsagkujata tusa mina segattatui. Nunú dutikamua duwi niina pegkeghaujig tsagkujam atatu.

<sup>23</sup> "Tuja wi nugka anagkuawaitjim nuwi jegajum, yujág ajakmattajum nuna neje aidauk yutsuk kumpatum mijan idaisatajum.

<sup>24</sup> Tuja mijan ipak usumta duwi yujág nejektata duka midau atatu, nuadu shiig aneasa jüstamkujum nunú yujág aidau mina sujustajume.

<sup>25</sup> Untsu mijan cincotin nejektata duwi nagkamajum atum yuwattajume. Nunú betek umiagmin aan kuashat yujág nejektatui. ¡Witjai Tuke Pujuu, atumi Apajuigminuk!"

<sup>26</sup> "Kuntin numpennukek makichkish yuwawaigpajum. Anentaimsa dekamjai tinu aina nuninuk makichkish takasaigpajum, tuja tunchi takatai aina dukesh takasaigpa.

<sup>27-28</sup> "Aents jakamtai atumi intashim wainka tsupi yujaigpajum, tuja susugmi titijgkesh tsupikaigpa. Nuigtushkam atumi iyashinig tsupimá yujaigpajum, tuja atumi iyashinig makichkish dakumkaigpajum. ¡Witjai Tuke Pujunuk!"

<sup>29</sup> "Atumi nawanjum aina duka akika wainka takatai ati tusa inakjume waitkasaigpajum. Dita pegkegchau takainamua nunú yujakmatai, atumi nugke shiig pegkegchau wajasai.

<sup>30</sup> "Tsawan ayamtai atinun wi etegkauwaitag nunú ajaantusjum diistajum. Nuigtushkam mina pujutaig pegkejam aakmakmauwa dushakam ajaantusjum diistajum. ¡Witjai Tuke Pujunuk!"

<sup>31</sup> "Tunchinmak makichkish inamajaigpajum. Tuja anentaimsa dekamjai tinu aina dushakam makichkish yujagsaigpajum. Nunin yujagkujum pegkegchau wajasaijum. ¡Witjai Tuke Pujuu atumi Apajuigminuk!"

<sup>32</sup> "Aents múun aina duka ajantusjum diistajum. Duka dutikatajum mina umigtau asajum. ¡Witjai Tuke Pujuu atumi Apajuigminuk!"

<sup>33</sup> "Aents tikich nugkanmaya atumjai pujau, wainka inaku waitkasaigpajum.

<sup>34</sup> Duka dutiksuk atum wegantu kuitamainaitjum dutiksagmek kuitamkujum, atumek anenmamsajum aneetajum. Atumshakam tikich nugkanmaya ainayatkujum, Egipto nugkanum batsamajaku ainagme. ¡Witjai Tuke Pujuu atumi Apajuigminuk!"

<sup>35</sup> "Dekapataiyai dekapakjumes tsanumsuk shiig dekapatajum, nuigtu kijin dekapataiyai dekapakjumes, tuja yumi wegantu dekapakjumshakam kasamsuk shiig betek dekapatajum.

<sup>36</sup> Betek ewaetsuk dekapatai balanza aina nunú, tuja kijin dekapataish, metro esajam dekapataishkam, ashí ajutjamtinme. ¡Witjai Tuke Pujuu, atumi Apajuikum, Egipto batsatutigmin jijuitjim nunú!

<sup>37</sup> Juju chicham umiktin aidaun wi tajim duka imatiksagmek umiktajum. ¡Witjai Tuke Pujunuk!"

## 23

*Apajuí ematku ijuntai tsawan etegjamu*  
(Nm. 28.16-25)

<sup>1</sup> Tuke Pujuu Moisésan chichajak:

<sup>2</sup> "Juju Israel aents aidau ujakta: Tsawan Apajuínu atin etegjamua duka 'Apajuí ematku ijuntai' tutai atatu. Duka juju ainawai:

<sup>3</sup> "Atumek seis tsawantai takastajume. Untsu tsawan sieteya nuaduik makichkish takaschattagme. Nunú tsawanta duka ayatak ijunja ayamku Apajuí ememattai atinai. Duka atum tuwi pujuttagme nuniakjumes nunú tsawanta duik Tuke Pujuu emematkujum tuke ayamtinaitjume.

<sup>4</sup> "Nunú tsawan etegjamu aina duwi atumek Tuke Pujuu emematkujum tuke ijuntinaitjume:

<sup>5</sup> "Mijan nagkamnamu yama nagkamchak nantu takatta duwi tsawan catorcetin agkuantai ijunjajum, nunú tsawantak atum jijnja agkanmagamu Pascua tutaya duwi shiig aneasa jüstamkujum Tuke Pujuu ememattajum.

<sup>6</sup> "Tuja nunú nantutinig tsawan quincetin pag lewadurajai pachimsuk inajuamu tutai asamtai, Tuke Pujuu emematkujum ijunjajum jüstamatajum. Tuja siete tsawantai pag lewadurajai pachimsuk inajuamu yuwattagme.

<sup>7</sup> Jiista nagkamnamu yama nagkamchak tsawagtata nuaduik takatak takatsuk ayatak ijunjajum Tuke Pujuu ememattajum.

<sup>8</sup> Tuja siete tsawantai Apajuí anentag suwamua nunú apeattagme. Tuja tsawan sieteya nuaduik atumi takatjig makichkish takasaigpajum, ayatak ijunjajum Tuke Pujuu ememattajum."

*Apaka neje yama nagkamchaku juukbaun tsawanji*

*(Nm. 28.26-31)*

<sup>9</sup> Tuke Pujuu Moisésan chichajak:

<sup>10</sup> "Juju Israel aents aidau ujakta: Wi atumin nugká amastatjim nuwi jegajum trigo ajaktatjum nuwiya yama nagkamchaku juuktatjum nunú jigka jukijum sacerdoté ejetuatajum.

<sup>11</sup> Nuna sacerdoté juki tsawan ayamtain nagkaiki tsawaitta nuadui Tuke Pujuu segaak iwaintuktatui nii atumi takatjumin shiig anenjamsati tusa.

<sup>12</sup> Nunú tsawantinig uwig tsakat aishmag pegkeg makichik mijan ajamun sacerdoté juki, Apajuín anentag suwak maa nuna nejen ashí apeattawai.

<sup>13</sup> Tuja nuigtushkam nunú tsawantaik Apajuí anentag suwaku apeatin kugkuin pegkeg ipak usumat nuigtu jimaituk kilo dekapamu harina aceitejai pachimja nanegbau itaattagme. Nuigtushkam ayatak ukagtina nunú vino makichik litro itaattagme.

<sup>14</sup> Atumek Apajuínua nunú eke anentag sutsukek, pag, trigo duwikkbau, tuja samek juukbauk aidaukesh yuwashattajume. Jujuwai atum tuwi pujuttagme, nuniakjumesch chicham tuke umiktina duka. Junak uchi akiinak wedaushkam tuke dutiktin ainawai.

<sup>15</sup> "Tsawan ayamtai kintamag tsawagtata duwi atum mina anentag sujakjum trigo tsupija jigkamu itagtuatajum, nunú tsawantin nagkama dekapajum siete semana ejetatjume.

<sup>16</sup> Duka tsawan ayamtai tsawagmatai, kashinia duwi nagkama dekapajum tsawan cincuenta jegak, ayamtai sawan tsawagtata duwi trigo yamá nagkamchaku juukbau anentag sujustajume.

<sup>17</sup> Nunú Apajuí anentag suwamua duka atumi jenia yama nagkamchaku trigo juuka dekegbau harina shiig pegkeg lewadurajai pachimja jimag pag maki makichik ipak usumat kilo ajamu aidau inajuamu itattajume.

<sup>18</sup> Tuja nuigtushkam ashí aents aidautijum ijunjajum siete uwig tsakat aishmag makichik mijanji ajamu pegkeg aidau, nuigte makichik toro tsakat, jimag chivo, nuigte trigo, cebada, vino, aatsa jukijum sacerdoté susatajum. Dutikam mina emematjak nuna ashí apeati, nuna kugkunti mina shiig awajtau asantai.

<sup>19</sup> Tuja nuigtushkam atumi tudaujum tsagkugnagtinnum makichik chivo sujustajume. Tuja agkan pegkeg pujatan sujusti tujutkugmek, jimag uwig tsakat aishmag makichik mijanji ajamu sujustajume.

<sup>20</sup> Nunú atum anentag mina sujamun, pagkan jimag uwig aishmag tsakat aidaujai, sacerdoté juki mina itagtuattawai. Nuna sacerdoté juki mina eme anenjun segatak iwaintugkattawai. Dutika nunak dita yuwawagtatu.

<sup>21</sup> "Nunú tsawanta nuaduik atumi takatjume makichikish takasaigpajum, ayatak ijunjajum Apajuí ememattajum. Jujuwai atum tuwi pujuttagme nuniakjumesch tuke umiktina nunú. Junak uchi akiinak wedaushkam tuke dutiktin ainawai.

<sup>22</sup> "Ajak ajakmamu juut tsawan jegantai, juwakjumesch ashí jukaigpajum, tuja ampinjau aina dukesh waketjukmek jukaigpa. Duka idaisatajum ujudach aidau aents tikich nugkanmaya aidaujai yuwatnume. ¡Witjai Tuke Pujuu atumi Apajuíminuk!"

*Apajuí emematku ijunja jüstamtai*

*(Nm. 29.1-6)*

<sup>23</sup> Tuke Pujuu Moisésan chichajak:

<sup>24</sup> "Juju Israel aents aidau ujakta: Nantu sieteya nunú taka tsawan makichik tsawaitta nunú ayamtai tsawan asantai, takatjume takatsuk ijunjajum jüstamkujum Tuke Pujuu ememattajum. Nuniakjum Tuke Pujuu yaimpamua nunú anentaimtusjum uwija kachuji umpuagtajum.

<sup>25</sup> Tuja nunú tsawantai Apajuí eme anentsa anentag suwamua nunú apeattagme. Nunú tsawantinig makichik takatjumkesh takaschattagme", tita tiuwai.

*Tsagkugnatai tsawan*

*(Nm. 29.7-11)*

<sup>26</sup> Tuke Pujuu Moisésan chichajak:

<sup>27</sup> "Nantu sieteya duwi tsawan diez tsawaitta nunú atalui tsagkugnatai tsawan. Nunú tsawantin ijagmajum yujumak yutsuk pujusjum, Tuke Pujuu emematkujum kuntin maa apeatajum.

<sup>28</sup> Nunú tsawantinig makichikish takatjume takaschattagme, wagki duka tsagkugnatai tsawan asantai. Tuke Pujuu Apajuí atumi pegkegchaujin tsagkugtamjagtatu.

<sup>29</sup> Untsu nunú tsawantin makichik aentskesh ijagmatsuk yujumka yuwaunak, Israel aents aina nuna ukumtikiag yaja jilki ajapeam atalui.



<sup>30</sup> Tuja nunú tsawantai aents takatjin takaushkam dushakam dutiksaik jiiki ajapeam atatu.

<sup>31</sup> “Nunú tsawantinig makichik takatkesh takasaigpajum. Jujuwai atum tuwi pujuttagme nuniakjumeshe tuke umiktina nunú. Junak uchi akiinak wedaushkam tuke dutiktin ainawai.

<sup>32</sup> Nunú tsawantin atum ayamkujum ijagma yujumak yutsuk pujustajume. Duka nantu sieteya duwi tsawan nuevetin aagkú nagkamna tsawag kashinia duwi agkuintai nagkantatu.”

*Numi kanawen aakmajag batsamsaju aina nunú tsawantin jistamajakbau (Nm. 29.12-40)*

<sup>33</sup> Tuke Pujuu Moisésan chichajak:

<sup>34</sup> “Israel aents aidau juju ujakta: Yaunchuk numi kanawe aakmajag batsamsaju aina nunú anentaimtusjum, numi kanawe aakmagjum juju nantu sieteya duwi tsawan quincetin nagkamajum ijunajum, siete tsawantai Tuke Pujuu eme anentsa ememattajum.

<sup>35</sup> Jiista nagkamnamu yama nagkamchak tsawan tsawagtata nuaduik makichik takatkesh takaschattagme.

<sup>36</sup> Untsu siete tsawantai Tuke Pujuu eme anentsajum nii anentag suwamu apeattagme. Tuja tsawan ochotin ayatak ayamku ijunajum Apajuú anentag suwamu nii emematkujum apeatajum. Nunú tsawanta duka Apajuú tsawanji asamtai, makichik takatkesh takasaigpajum.”

*Apajuú tsawantan etegjauwa nunú pachisa ataktu tibau*

<sup>37</sup> “Juju tsawan aina nunuwai Apajuú emematku ijuntai atina duka. Nuadui nunú tsawan aina duka pegkejam takat takashtai, ayatak ijunja Tuke Pujuu ememattai awajsatnaitjume. Tuja nunú tsawan aina duwi atum Apajuú anentag suwamu aidau apeamu, kuntin maa nuna neje ashí apeamu, trigo cebadajai juukbau anentag suwamu, pegke agkan pujutan sujusti tusa kuntin maa apeamu, vino anentag suwamu aina nunú maki makichik waji tsawantin dutikati tibauwaita duka betek dutikattagme.

<sup>38</sup> Nuigtushkam tsawan ayamtain ijunja mina emematjajum duka betek dutikayatkujum, juju tsawan aina juwishkam emematjittagme. Atum mina anentag sujustatjum nunú, nuigtu midau atin anagtuawaitjum nujai sujajum emematjittagme.

<sup>39</sup> Ajak juuka ashí ashimkajum nantu sieteya duwi tsawan quincetin Tuke Pujuu emematkujum ijunjatajum. Atumek jiista nagkamnamu tsawan tsawaita duwi ayamjattagme. Tuja tsawan ochotinchakam nunisjumek ayamjattagme.

<sup>40</sup> Jiista nagkamnamu tsawan tsawaita duwi yujág pegkeg aidau juukjum, palmera duke aidau, tuja tikich numi kuashat dukentin aidau, álamo namaka uwet ayá nuna dukee aidau tsupija aakmaktasajum yanaki juki shimittagme. Nunú dutikajum siete tsawantai Tuke Pujuu, atumi Apajuúgmi emtin shiig aneetnaitjume.

<sup>41</sup> Duka maki makichik mijantin nantu sieteya duwi siete tsawantai Tuke Pujuu eme anentsa emematkujum ijunjattajume. Junak uchi akiinak wedaushkam tuke dutiktin ainawai.

<sup>42</sup> Nunú siete tsawan aina duwi ashí atum Israel aents wegantunum akiidau aidautigmek, numi kanawe tsupija aakmakbaunum pujustajume.

<sup>43</sup> Juka atum Egipto nugkanum waitkam batsatutigmin wi jiija ai, numi kanawe dukentin tsupigjum aakmaja batsamsauwaitjum nuna atakea duwi atum wegantu aidau dekawagtin aina nunuwai. ¡Witjai Tuke Pujuu atum Apajuú emematin ainajum nunú!” tiuwai.

<sup>44</sup> Juna aatus Moisés Tuke Pujuu emematku ijuntai tsawan etegjamun pachis Israel aents aidau unjakui.

## Israel aents aidau uwegshunum yujasbau Números

### 6

*Sacerdote aidau Israel aents aidau pegkegnum yumigjagtin*

<sup>22</sup> Tuke Pujuu Moisésan chichajak:

<sup>23</sup> “Aarón niina uchiji aidaujai Israel aents aidau pegkegnum yumigkiakug aatus titinme:

<sup>24</sup> “ ‘iAtum aidautigminak

Tuke Pujuu pegkegnum yumigtamsatnume,

dutijamak nigki kuitamjamkatnume;

<sup>25</sup> Tuke Pujuu atumnak shiig anenjamas kuitamjamkatnume;

<sup>26</sup> Tuke Pujuu atumin

anempau asa,

shiig agkan pujustinme tusa kuitamjamkatin ati!’

<sup>27</sup> “Juna aatus sacerdote aidau mina daajun adayas Israel aents aidau tiagtatu. Nuadui wi ditanak pegkegnum yumigsagtatjai”, tiuwai.

### 9

*Aak pegkejam carpa aakmakbaun yujagkim ijia aajaku*

*(Ex. 40.34-38)*

<sup>15</sup> Chicham umiktin egkemsatnun aak pegkegman carpan aakmak ashimkaju ai, nunú tsawantaik aakan yujagkim ijiauwai. Nunik au agkuantai nagkamas jii keegama imanik aak pegkegmanum keeka au tsawak megkagajakui.

<sup>16</sup> Duka tuké nuníjakui: Tsawaig aaknak yujagkim ijia aajakui, untsu kashi jiijai betek keeka aajakui.

<sup>17</sup> Yujagkim nunú aakan ijia aajakua nunú yaki takuntai, Israel aents aidauk yajumakag shimujaku ainawai. Untsu yujagkim wegau tuwi jasa asattawa, nunitaik ditashkam nuwi aakmag batsamajaku ainawai.

<sup>18</sup> Israel aents aidauk Tuke Pujuu yujagmin emtikak ematai, nuna diisag shimujaku ainawai. Tuja yujagkim wegau jasa ataik, nuwi aakmag batsamajaku ainawai. Aak pegkejam carpa aakmakbaun yujagkim ijia au takuni wechataik dita batsatbaunmag batsamajakajui.

<sup>19</sup> Tuja yujagkim aak pegkejam aakmakbaun ijia kuashat tsawan ataik, Tuke Pujuu wetá tachamu asag, nuwi aakmajag batsamajaku ainawai.

<sup>20</sup> Tuja yujagkim ujumak tsawan ataishkam, nuwig dita batsatbaunmak batsamajakajui. Tuke Pujuu wetajum tama shimujakajui, tuja juwaktajum tutaik nuwi juwakag batsamajakajui.

<sup>21</sup> Untsu yujagkim nii nuniktatkug takuni wetsuk, nuwig jasa makichik kashi aajakui. Nunik au tsawak kashikmas takuni wetai shimujakajui. Tuja kashikesh, nuniachkush tsawaigkish yujagkim takuni wetaik, ditashkam shimujakajui.

<sup>22</sup> Aak pegkejam aakmakbaun yujagkim jimag tsawan, nuniachkush makichik nantu, atsa makichik mijankesh ataik, shimutsuk nuwig aakmajag batsamajaku ainawai. Untsu yujagkim takuni eemak wetai nuadui shimujakajui.

<sup>23</sup> Tuke Pujuu wetajum tama shimujakajui, untsu juwaktajum tutaik nuwi aakmag batsamajakajui.

Nunak Tuke Pujuu Moisésan akateak nunú umiktajum tibaun umiinak nuníjakui ainawai.

### 10

*Israel aents aidau muja Sinainum batsatu shiyakbau*

<sup>11</sup> Israel aents aidauk Egipto nugkanum inaku waitkatai batsatun Apajui jijua duwi nagkama jimag mijana nuna achikag, nantu jimaja nunú takau ai, tsawan veintetin aak pegkejam carpa aakmakbau aajakua nuna yujagkim ijia au yaki takuniuwai.

<sup>12</sup> Nunikmatai Israel aents aidau muja Sinainum batsatu jiiinag shiyakajui. Nunik shimui shimuinakua Parán nugkanum yujagkim jasa asamtai nuwi batsamsajui.

<sup>33</sup> Aatus muja Sinaínmaya juwakiag kampakum tsawan jegawajui. Nunik shimak chicham umiktin agagbau egketun arcan Levi wegantu aidau yanaki jukiag eemak wedau, tuwig yujagkim jasa asat, nuwi ayamsagtin asag.

<sup>34</sup> Kashikmas nantajag eke uminainaiag yujagmik takuni dita shiyaktinum wajantun wegau.

<sup>35</sup> Tuja chicham umiktin agagbau egketun yanaki juwagtai Moisés chichaak:

“¡Tuke Pujuwah, pai nantakta!

¡Nunikam amina shiwaajum aidau

dapampaakam utsagta!

¡Dutikawamin nuna diisag

amina kajegtamin aina duka ishamjamkag pisagtinme!” tau.

<sup>36</sup> Untsu nunú chicham umiktin agagbau egkeamun yanaki juki wedau apujiagtai Moisés chichaak:

“¡Tuke Pujuwah, amina aentsjum Israel aents

shiiig kuashat aina nunú ame taam kuitamkata!” tau.

## 11

*Apajui Israel aents aidau yuwatnun nejen susattajai tibau*

<sup>1</sup> Makichik tsawantai Israel aents aidau senchi waituinak, Tuke Pujuu pegkegchaun chichajuidau. Nuna Tuke Pujuu antuk senchi kajeka ditan ijinatatus jii kegaun dita batsatbaun tentea ajunjuawai.

<sup>2</sup> Dutikam nuna ishamainak Moisés ayamjupakti tusag untsuidau. Imatiagtai Moisés ditá pachis Tuke Pujuu segauwai. Dutikam jii kegau kajinkauwai.

<sup>3</sup> Nuadui nunú nugka daajig Taberá\* adaikamu aajakui, wagki nunú nugkanum Tuke Pujuu ditá ijinatatus jii kegaun ajunjuau asantai.

<sup>4</sup> Tuja Israel aents aidaujai tikich aents aidau pachiinak yujaidauk ayatak yutanak anentaimtujaku ainawai. Nuniagtai Israel aents aidaushkam ditajai betek buu buuttajai pegkegchaun chichainak:

“¡Yaki nejenash ii yuwatnunash amastí!

<sup>5</sup> ¡Egipto batsamsaik namak akikchau yuyag nunú anentaimtaji! Nuigtushkam pepino aidau, melón aidau, puerro aidau, cebolla aidau, ajo aidau yuu ayaji.

<sup>6</sup> Tujash yamaik juwig nujantai jinaji, tikich yutaigkesh atsawai ¡ima maná yusaik yujaji!” wajaidau.

<sup>7</sup> Nunú manák culantron jigkayijai betekmamtin aajakui, untsu niimeg culantro puwaji pauja numamtin aajakui.

<sup>8</sup> Maná kugkuntig harina aceitejai pachimja torta najanamun kugkuntijai betek aajakui. Nuna Israel aents aidau agá jiiinag juukag dekegkag pagjai betekmamtinun inajujaku ainawai.

<sup>9</sup> Tuja duka dita aakmaja batsatbaunum kashi yumi sajatbaunum kakegajakui.

<sup>10</sup> Israel aents aidau maki makichik uchiji aidaujai ditá jeen waitinum batsamas buutuidaun Moisés antukui. Nuniagtai Tuke Pujuu senchi kajekui. Tuja Moiséschakam chicham patatbau asa, ditá apuji atanak dakitjuawai.

<sup>11</sup> Nunik Tuke Pujuu chichajak:

“¿Wisha itugkamu asamea wi amina inakmetag nunin aish, imatikamesh waitkajame? ¿Wagka juju aents aidaush minai sujuamesh ame yajuaka emata tusamesh waitkajame?

<sup>12</sup> Uchi piipich muntsuaku minaaki jutayama numamtuk jukim, dita apachji aajaku aina nunú nugka anagkuawaitam nuwi ame ejegata tujutminum tusanuk wika ditá apajigkesh, tuja ditá dukujigkesh atsuwai.

<sup>13</sup> ¿Wisha tuwiyanak neje jukinush juju aents aidau yuwawagtinnash susagtaja? Mina tajutuawag buu buuttajai chichagtuinak: ‘Neje ii yuwatin sukagtusta’, tujutuinawai.

<sup>14</sup> “Tuja wika mina senchigijaigkik juju aents aina nuna yajuaknuk wemaitsujai, wagki juka takatak shiiig múuntai.

<sup>15</sup> Tuja jutika waitkaju pujutnaitkumek, waitu pujuti tujuttsuk dekaskenum minash wait anenjakmek mina pujutjuk jututkita. Dutijuawamin waitu pujumainaitag nuna dekas ayamsatjai”, tiuwai.

<sup>16</sup> Tusa tutai Tuke Pujuu niina ayaak:

“Israel aentsu apuji múun aidau ame wainbau chichame antugtai aidau setenta aents yajuakam aak Apajujai chichatai carpa aakmakbauwa nuwi ikaunmam dakagsata.

\* **11:3** “Taberá” tawa duka hebreo chichamnumak “jii kegau ishamain” taku tawai.

<sup>17</sup> Nuwi wi taan amejai chichastajai, nuniakun mina Wakanig aminí awa nuna Israel aents aidaun apuji aidaunash susatjai, dutikam dita aents aidau kuitabaunum yaimpaktinme. Nuadui amekek waittsashtatme.

<sup>18</sup> Tuja aents aidau ujakta kashin nejen yuwawagtataui, nuniktin asag yamai ditá pegkegchaujín iwagmamkatnume. Dita buu buuttajai chichainak: ¡Nejesh akuig yumainaitji! ¡Egipto nugkanum ima shiig pujuyaji! wajainawai.

“Imatuidau asagmatai, nejen yuwatnume tusan kashin susagtataui.

<sup>19</sup> Wika ditanak makichik tsawantai, jimag tsawantai, cinco tsawantai, diez tsawantai, nuniachkush veinte tsawantai yumainnakek susashtatjai.

<sup>20</sup> Ditak makichik nantu nejenak yuu batsamiagtataui, imatika yuu batsatu asag yawewug tsumiagtataui, wagki wi kuitamsam yujayatak dakitjujag mina emtijui buu buuttajai chichainak: “Egipto nugkanum batsatui jijnjauwaitag duwi nagkamsa yaunchuk Egipto batsamsa waitin aayag nuni senchi waitiaji” wajaidau asagmatai”, tiuwai.

<sup>21</sup> Tusa tutai Moisés Apajuín ayaak:

“Aents múun maanimain aidau wijai yuja duka seicientos mil ainawai. Imania dusha ¿Amesh itugkamea makichik nantuish nejesh ayujush pujuttame?

<sup>22</sup> ¿Tuwi ayawa uwig aidaush, baka aidaush, nunú maa aents aidau ashí ayugmainush? Nayantsanmaya namak aidau ashí yajuaka suwakuish makichkish ejemaitu imanush”, tiuwai.

<sup>23</sup> Tutai Tuke Pujuu ayaak:

“¿Amek mina senchujuk piipichik diyam? ¡Tuja wi taja dusha uminkatpash, atsa uminkashtimpash duka yamai wainkattame!” tiuwai.

*Israel aentsu apuji múun  
setenta aajaku aidau  
profetajai betek chichakagbau*

<sup>24</sup> Tusa timatai Moisés agá jíniki, Tuke Pujuu tibaun imatiksag aents aidaun ujakui. Dutika nuadui Israel aentsu apuji múun aidaun setenta, aak pegkejam aakmakbaun tentea ijumjauwai.

<sup>25</sup> Dutika ijumjamtai Tuke Pujuu yujagminum pachitkau akaiki Moisésjai chichasui. Nunik duwi Wakani Pegkeji Moisésai aun ujumak juki, setenta aents Israel aentsu apuji múun aidaun tinamkauwai. Dutikam Apajuí Wakani ditai pujugsam profetajai betek chichatan nagkamawajui. Tujash duka makichkia nunik nagkaemakiuwai ataktuk nunikchauwai.

<sup>26</sup> Setenta aentsun Moisés etegkauwa nuwiya jimag Eldad daagtin Medad daagtinjai, ditak aak pegkegmanmak wetsuk, dita batsatbaunum juwakajui. Nuwi batsatunak Apajuí Wakani egkemtujam ditashkam profeta chichamaina betek chichainau.

<sup>27</sup> Nunik chichagtai makichik uchi tupikaki, Moisésan ujaktatus weuwai. Nunik ujaak: “Eldad Medadjai dita batsatbaunmak pujusag profetajai betek chichagmae”, tau.

<sup>28</sup> Tusa tutai Nun aajakua nuna uchiji Josué datsauch asag Moisésan yaijakua nunú chichaak:

“¡Mina apujuh Moisésah, chichakainmegka tusam tita!” tiuwai.

<sup>29</sup> Tusa tama Moisés ayaak:

“¡Minak akasmatjukaipa! Dekas itugkag ashí aents aina nuna Apajuí niina Wakanin susa, dutikawajam ashí profeta anum tajaí”, tiuwai.

<sup>30</sup> Nuna tusa Moisés Israel aentsu apuji múun aidaujai waketug ditá batsamtaijin shiyakajui.

*Tuke Pujuu Israel aents aidaun codornisan ishitkamu*

<sup>31</sup> Nayantsanmayan Tuke Pujuu dasen dasenmikakui, dutikam nunú dase codornisan shiig kuashat ikaunmakui. Nunú dita aakmaja batsatbaunum tentea nuna yantamen nagkamas kakegak makichik tsawantai jegamainnum nagkankauwai. Imaniku asa makichik metro tumainun dupai asauwai.

<sup>32</sup> Imaniku asamtai nunú tsawantin nagkamawag, kashish, tsawajash codornisnak juu batsatu. Tuja ashí aents aidau juukajui. Imatikaidau asag dieza imajin ijumjag utuakajui, dutikawag dita batsatbau yantamen batsakajui jujukti tusag.

<sup>33</sup> Nuna codornisa yuwawag eke amuinachunak Tuke Pujuu ditan kajejuk suwimka susa shiig kuashat ijinauwai.

<sup>34</sup> Dutika Tuke Pujuu ijinau asamtai, nunú nugka daajin Quibrot-hataavá† adaikau ainawai. Wagki aents aidau ayatak yutanak anentaimtujaku aidau jinawagmatai, nunú nugkanum ukusaju asag.

† 11:34 “Quibrot-hataavá” tawa duka “aents ayatak yutanak anentaimtin aidau jinawajun ukusagbau” taku tawai.

<sup>35</sup> Tuja Israel aents aidauk Quibrot-hataavá batsatu jiiinag shima shimakua Hazerot jegawajui. Nunikag nuwi batsamsajui.

## 12

*María Aaróggjai Moisés chicham patatkamu*

<sup>1</sup> Moisés Etiopía nugkanmaya nuwan nuwatkauwai. Nunikmatai María Aaróggjai chichaman patatuidau.

<sup>2</sup> Dutikainak: “¡Tuke Pujuu ima Moisésjaigkik chichatsui, auk jutijaishkam chichawai!” tuidau. Tusa tiagtatman Tuke Pujuu antugkauwai.

<sup>3</sup> Tuja aents ashí nugkanmaya aidaujai apatka diismash Moisésak dekas kakagchauch ima Tuke Pujuu wakegamunak umijin aajakui.

<sup>4</sup> Nuadui Tuke Pujuu Moisésan, Aaróggkan, Marían aatus chichajak: “Atum kampa-tumtjijum aak pegkejam aakmakbauwa nuwi wetajum”, tiuwai.

Tusa tima shiyakajui.

<sup>5</sup> Nunikagmatai Tuke Pujuu yujagminum pachitkau akaiki aaka waitijin wajanta Aaróggkan Maríajai untukui. Tusa untuam ditashkam jegantajui,

<sup>6</sup> nunik jegantagmatai Tuke Pujuu ditan chichajak: “¡Antuktajum wi titatjim nunú! Atum ainajum anuiyan wi makichik profeta apusamua nujaig wika ayatak wakanmanta wajantan, tuja kajanum aajan chichajai.

<sup>7</sup> Untsu Moisés mina inakjua nujaig aajanuk chichatsjai. Niyai dekas ashí tikich mina inakeg aina nuna nagkaesau ima minak jikatjus umigta duka.

<sup>8</sup> Nuadui niijaig paan igkunian chichajai. Tuja nii mina igkuntua waita nuniaush, ¿wajukeakjumea atumesh mina inakeg Moisésash pegkegchaush chichagjume?” tiuwai.

## 13

*Canaán nugkan dekaatnume tusa aents ishiakbau  
(Dt. 1.19-25)*

<sup>1</sup> Tuke Pujuu Moisésan chichajak:

<sup>2</sup> “Ujumak aents yajuakam ishiakta wi atumin Canaán nugkan amastatag nuna dekaa ukuutinme. Israela uchiji doce wegantu aina nuwiya aents wajiu, chichame antugtai aidau maki makichik etegjam ishiakta”, tiuwai.

<sup>3</sup> Tusa tima Moisés Tuke Pujuu tibaun umiak, Parán nugkanum pujus aentsun ishiakui. Nunú aents aidauk wajiu chichame antugtai aajaku ainawai.

<sup>25</sup> Dutika ishiakbau cuarenta tsawan yujasag nugka dekaawag waketug, Parán nugkanum uwejush aajakua nuwi

<sup>26</sup> yaakat Cades kaunawajui. Nunikag nuwi Moisés, Aarón, ashí Israel aents aidau aatus batsatun dita yujasa wainkamu aidau unajakajui. Dutikawag nunú nugkanmaya yujág juki ejegamunashkam iwaintukajui.

<sup>27</sup> Nuadui Moisésan chichajuinak:

“Nugka dekaatajum tusa ame tukagtiamin wemaji. Nunika jegaa wainkamji. Dekas nugkak shiig pegkeje, ajakash shiig tsapagmae, tagkush shiig muumpagmae, nuwiya yujág juki itaaji”, tusa iwaintuidau.

<sup>28</sup> “Tujash nunú nugkanum aents batsata duka senchigtin agmae. Yaakat aidaushkam shiig múun makichkish utumainchau peeja apakbau agmae. Tuja nuigtushkam gigante Anac aajakua nunú wegantu aidau batsatu wainkamji.

<sup>29</sup> Untsu Néguev nugkanum Amalec aents aidau batsaamae. Tuja hitita aents aidau, Jebús aents aidau, amorreo aents aidau mujanum batsaamae. Untsu nayantsanmanini, tuja namak Jordágnun canaágnunia aents aidau batsaamae”, tuidau.

<sup>30</sup> Nuna antukag Israel aents aidau Moisésjai ijunag batsamas pampaidaun Caleb antuk itatmikak chichajak:

“¡Tutsuk dekas shiyakagmi, nunika maania depetmaka nunú nugka ii jukimi! ¡Dekas iik depetmaktatji!” tau.

<sup>31</sup> Tusa tutai nijai shiyaku aidau chichainak:

“¡Atsa, iik nunú aents aina nujaig maanimaitsuji, wagki ditak iina nagkaetamsau senchigtin ainawai!” tuidau.

<sup>32</sup> Tusag Israel aents aidau chichajuinak:

“Auk ii nugka dekaami tusa shiyakmayag duka pegkegchaui. Tuja nunú nugkanmaya aidauk nuwiya aents aidau main ainawai. Nuigtushkam nuwiya aents aidauk múun esajam ishamain agmayi.

<sup>33</sup> Tuja nuigtushkam gigante Anac aajakua nunú wegantu aidau batsatu wainkabaiji. Ditajai apatkamak iik manchia nunin wantinbaiji, tuja ditashkam nuninuk diijatiagmayi", tuidau.

## 14

### *Israel aents aidau Tuke Pujuu chichamen intimjukiagbau*

(Dt. 1.26-33)

<sup>1</sup> Nuna antukag Israel aents aidauk unsumainak tuke buu buutainakua tsawagkajui.

<sup>2</sup> Nunikag ashí dita aidau Moisésan Aaróggai chichamen patatuinak:

"¡Egipto nugkanum batsamsa jinumainus imajui uwegshunum yujasa jinaatin asa jijnjayagtai!

<sup>3</sup> ¡Tuke Pujuu imajuig itagmamaichaunas itagmayatai! ¡Ii aidautik iina shiwaajijai maaniawaja jinawagatjii! Tuja shiwag aidau iina nuwe aidau, iina uchiji aidaujai achija yajuakagtatui. ¡Dekas Egipto nugkanum atak waketmainus aniagtai!" wajaaidau.

<sup>4</sup> Nuna tusag diták pempeentunikiag chichainak: "¡Dekas iina apuji atin adaika Egipto nugkanum waketjami!" tuidau.

<sup>5</sup> Imatiagtai Moisés Aaróggai dita emtin tsunsumawag nijayin nugka antig pujusajui.

<sup>6</sup> Nuniagtai nugka dekatatus shiyakajua nuwiya Josué Calebjai anentai inmagk jáanchjin japiki ichigkajui.

<sup>7</sup> Nunikag Israel aents aidau chichajainak:

"¡Ii nugka dekatasa wemayag duka dekas shiig pegkejayi!

<sup>8</sup> Tuja Tuke Pujuu iina wait anenjamkug nii yaimpasmatai, nunú nugkanmak wayattaji. Tuja nunú nugkak dekas shiig pegkejayi, ajak aidau shiig tsapagmayi.

<sup>9</sup> Nuadui Tuke Pujuujaig dekas shiwagmagawaigpa, nuwiya aents aina dusha ishankaigpajum, wagki ditak jutijaig shiig wainkaush ainawai. Dita yaimainuk shiig atswai, untsu iinak Tuke Pujuu yaimpawai. ¡Nuniau asamtai ishankaigpajum!" tiuwai.

<sup>10</sup> Tusa tamaitak aents aidauk kayai tukua tukuakua maatag tuidau.

Nuninai Tuke Pujuu imanjiya nunú Apajuijai chichatai carpa aakmakbaunum wantinkauwai Israel aents aidau ashí wainainamunum.

<sup>11</sup> Nunik Moisésan chichajak:

"¡Juju aents aina dusha wajupa kuashta intimjutush yujagtata? Waji wainchatai aidau kuashat wi iwaintukajan kuitamka emamash juju aents aina duka dekaskeapi tujutuinatsui.

<sup>12</sup> Nunin asagmatai wi ditanak jata ishainun awetittajai, dutika ai jinawag wi nugka pegkejan anagkuawaitag nuwig wayashtinme tusan. Tujash aminiyanak kuashat aentsun uyujkatnaitjai, dutika ai Israel aents aidau nagkaesau kuashat, senchigtin agtinai", tiuwai.

<sup>13</sup> Tusa tutai Moisés Tuke Pujuu ayaak:

"Juu aents aidauk Egipto nugkanum batsatu amina senchigmin jigmayum nuna egiptunmaya aidau dekainawai. Nuadui ame kuitamsuk idaisaminig, egiptunmaya aidau nuna dekawagtatui.

<sup>14</sup> Nunikag Canaán nugkanum aents batsamin aina nuna ujakagtatui. Wagki ditashkam ame jutijai pujam nunak dekawaju ainawai. Tuja wishakam ame paan waitkati tujutui asamin wainkajame, nuadui ame jutijaig tuke pujame. Tuja ame jutii uyunkagtakum tsawai yujagkim wajanbaunum, kashi jii keeka wajanbaunum emka weam nunashkam dita aidauk shiig dekainawai.

<sup>15</sup> Nuadui juju aents aidau wamak ijinawaminig, aents tikich nugkanmaya ame imanjumin dekagtamin aidau chichainak:

<sup>16</sup> " 'Tuke Pujuu Israel aents aidau nugka amastajime tusa anagkuawa nuwi ejemainchau dekapeak, uwegshunum ijinai', tujamiagtatui.

<sup>17</sup> Nuadui ame anagkuakum dutikatjai tiuwaitam nunú umiakum senchijum iwainakta. Tuja ame chichaakum:

<sup>18</sup> 'Wika wamkek kajechuitjai. Aents aidau senchi anejai, nuniau asan dita pegkegchau takainak mina shiwagmatuinakuish tsagkujajai, untsu dita pegkegchau-jinig tuké suwimkan suwajai dutikakun ditá uchijinash, tijajinash, ama tijajinash ditá apaji pegkegchau takamsamunum suwimkan suwajai', tame.

<sup>19</sup> Nuadui amina anenkagmek múnta ibau asamtai, juju aents aina nuna pegkegchau-jig tsagkujata, wagki ditak Egipto nugkanum batsatu jiija yajuakam ame kuitamsam imajui ikaunbau asam", tiuwai.

*Apajui Israel aents aidaun suwimak susamu**(Dt. 1.34-40)*<sup>20</sup> Tusa tama Tuke Pujuu Moisésan ayaak:

"Ayu, ame segatam nunak imatiksianuk tsagkujattajai.

<sup>21</sup> Wika dekas tuke pujuuwaitjai. Mina imanjunak dekas ashí nugkanum dekainawai. Au aents aidauk wi dita muunji aidaun nugka anagkuawaitag nunak dekas wainkachagtinaí.<sup>22</sup> Wagki wi mina imanjuí wainchatai ishamain aidaun Egipto nugkanum tuja uwegshunmashkam iwainamun wainkau ainayatak, dekapjustasag mina umigtutan dakitjau aina nuadui.<sup>23</sup> Tuja wi ditá muunji aajaku aina nuna nugka amastajime tusan anagkuawaitag nunak ditak wainkachagtatui. Mina dakitjajaju aina dushakam makichkish nunú nugkanak wainkachagtinaí.<sup>24</sup> "Untsu Caleb mina inakjua duka tikich aina nujag betekchauwai, wagki nigka ima minak umigtaw asa. Nuadui nii nugká dekatatus weuwa nuwi niinak awayattajai. Dutika ai nii wegantu aidaushkam nuwi batsamsagtin ainawai.<sup>25</sup> Tuja Amalec aents aidauk canaágnunia aents aidaujui nugka pakanum batsatui. Nuadui atumek kashin kashikmasjum uwejush atum kaunamua nuni waketjajum nayants kapantu tutaya aatsajum shiyaktajum", tiuwai.<sup>26</sup> Tusa Tuke Pujuu Moisésan Aaróggjai chichajak:<sup>27</sup> "Israel aents aidau pegkegchau asag, wainak chichá yuja nunash ¿wajupa kuashtak tsagkujatja? Dita mina pegkegchau chichagtuinamun antukjai.<sup>28</sup> Nuniku asan wi yamai atumin titatjim nunú ujaktajum: 'Atum aidaatijum chichamugmin antugkajim duka nunisag uminkati, junak dekas uminkatnun Wi Tuke Pujun tajai.<sup>29</sup> Tuja ashí aents veinte mijanji ajamu daaji agatkamu aidau mina pegkegchaun chichagtukajuk ashí jinawagtatui, nunikagmatai ditá iyashig juju uwegshunum utsankattawai.<sup>30</sup> Wi nugkan amastajime tusa anagkuawaitijim nuwig atumek makichkish wayashattajume. Untsu ima Caleb Josuéjaig wayawagtatui.<sup>31</sup> "Tuja atum chichaakjum: Iina shiwaaji aidau mantamainak iina uchiji aidaun yajuakagtatui tusajum timaujum duka nunikchattawai. Wi atumi uchijum aidaunak yajuakan atum nugka dakitjaujum nuwi egegawagtatjai, dutika ai ditak nuwi ajakmawag yuwinak shiig aneas batsamsagtin ainawai.<sup>32</sup> Tuja atumi iyashig uwegshunum utsankattawai.<sup>33</sup> Untsu atumi uchijum aidau atum pegkegchau takasbaun umiinak uwija kuitamin waigkak uwegshunum cuarenta mijan waitu yujagtinaí, atum aidau jinaati tusa.<sup>34</sup> " 'Atum nugka dekaatag tusajum cuarenta tsawan yujasuitjum antsag, ditashkam cuarenta mijan dita pegkegchau takasbaujin umiinak yujasagtatui. Makichik tsawanta nuna makichik mijan yujagtatui. Aatus mina pegkegchau chichagtukbaunum yujasag waituinak dekawagtatui.<sup>35</sup> Juju aents pegkegchau aina nunak mina pegkegchau chichagtukaju asagmatai dutikattajai. ¡Nuadui ditak juju uwegshunum yujasag jinawagtatui! ¡Witjai Tuke Pujunuk, nunak dekas uminkatnun tajai!' Tusa Apajui tujamui", tiuwai Moisés.*Doce aents nugka dekatnume tusa ishiakbau aina nuwiya diez aents ditá pegkegchau-jin jinawagbau*<sup>36</sup> Nugka dekaatnume tusa Moisés aents aidaun ishiakua nunú waketug kaunawag, nuggak pegkegchauwe tusag Israel aents aidaun ujakajam nuna antukag Moisésan chichaman patatuidau.<sup>37</sup> Tuja nuggak pegkegchauwe tusa tiaju aina nunak Apajui suwimka susa ijinauwai.<sup>38</sup> Untsu Caleb ima Josuéjaig jakachajui.*Hormá nugkanum Israel aents aidau ijinamu**(Dt. 1.41-46)*<sup>39</sup> Tuke Pujuu tibaun Moisés Israel aents aidaun ujakuí. Dutikawajam nuna dekawag wake besemag dekapajajui.<sup>40</sup> Nunikag kashinia duwi kashikmas jijnag ataku waketug mujá shiyakajui, nunik nuwi wakag chichainak:

"¡Yamaik imajui kaunaji! Ii Tuke Pujuu intimjuki pegkegchau wajakag duka shiig dekaji, nuniku akuish Tuke Pujuu iina nugka anagtabauwa nuwi shiyakagmi", tuidau.

<sup>41</sup> Tusa tiagtai Moisés ditan chichajak:

“¿Wagka tujash atumesh Tuke Pujuu chichamesh intimjagme? ¿Atum tajum duka tuké umikchattagme!

<sup>42</sup> Nuadui shiyakaigpajum, wagki yamaik atumnak Tuke Pujuu uyuuntamainatsui. Nuniaui asamtai atumnak shiwag aidau amupakagtatui.

<sup>43</sup> Atum weajum nuwi Amalec aents aidau, canaágnumia aents aidaujai dakag-mainawai atumin amupakagtatus. Tuke Pujuu atum idaisamu asa yamaik atumnak uyuuntamainatsui”, tiuwai.

<sup>44</sup> Tusa tamashkam nunak antutsuk dekas mujá wakami tusag shiyakajui. Nunik shimakush arcanak jukichajui, tuja Moiséschakam wechauwai, ayatak dita batsatbaunmak juwakajui.

<sup>45</sup> Nunik jiinag shimittaman nunú nugkanum batsamin Amalec aents aidau canaágnumia aents aidaujai jiiuntujag pataetukag Hormá nugkanum amainagkag nuwi Israel aents aidau depetuk amukajui.

## 20

*Yumi kayanmaya jiiikbau*

*(Ex. 17.1-7)*

<sup>1</sup> Mijan nagkamnamu makichik nantu takau ai, uwejush Sin tutainum Israel aents aidau jegawajui. Nunikag nuwi Cadesnum ujumak tsawan pujusajui. Nuwi batsatai María jakauwai, nunikmatai nuwig ukusajui.

<sup>2</sup> Tuja nuwi yumi umumain atsau asamtai, Moisésan jiyakagtatus aents aidau ashí ijunajui.

<sup>3</sup> Nunik ijunag Moisésan Aarógjai chichajuinak:

“¿Tuke Pujuu tikich Israel aents aidau ijinawabia nunú nugkanmak iinash ijipamainnas aikagmayatai!

<sup>4</sup> ¿Wagka atumesh Tuke Pujuu aentsji aidautish imajuish uwegshunmash itajatu-augme? ¿Tagkuji aidaujai ashí jinatnume tukagtatsjumek?

<sup>5</sup> ¿Wagka Egipto nugkanmaya jiijatkgimesh, juju nugka shiig pegkegchawwa imagnumash itajatuugme? Juju nugka juwig makichkish ajakmamait sui. Tuja higueralesh, uvakesh, munchigkesh juwig shiig atsawai. Nuigtush iyumi umumainush shiig atsawai!” wajaidau.

<sup>6</sup> Imatiagtai Moisés Aarógjai aents aidau ukukiag Apajuujai chichatai aak aakmakbaunum nuna waitijin jegantag nuwi tsuntsumawag nijayin nugka antig pujusajui. Nunik pujuinai Tuke Pujuu niina imanijjai wantinkauwai.

<sup>7</sup> Nunik Moisésan chichajak:

<sup>8</sup> “Ushujutajum jukim Aarón yaimpasmatai aents aidau ijumjata. Dutika ijumjam ditá emtin kaya chichagkum: Yumi sukagtusta tita. Tusa tamin nunú kayanmaya yumi jiiinkittawai, nunikmatai dita umuinak tagkujinash agtinme”, tiuwai.

<sup>9</sup> Tusa tima nuna betek umiak, Moisés niina ushujutajui Tuke Pujuu emtin atatman jukiuwai.

<sup>10</sup> Dutika juki Aarógjai aents aidau kayanum ijumag chichajak: “Antuktajum, chichama intimkiu aidauwah: ¿Juju kaya juwiyen yumin jiiikag amasmatai, uwajagmi tusagmeka imatjum?”

<sup>11</sup> Tusa Moisés niina ushujutajin juki kayan jimajá awatiuwai. Dutikam kuashat yumi jiiinkiuwai. Nunikmatai Israel aents aidau nuna umuinak ditá tagkujinash aakajui.

<sup>12</sup> Tujash Tuke Pujuu Moisésan Aarógjai chichajak: “Atumek minai kajintsa anentaimtsuk, tuja mina pegkegmajua dushakam Israel aents aidauum iwainakchau asajum, wi nugka anagkuawaitjim nuwig juju aents aidau yajuakjumek wechattagme”, tiuwai.

<sup>13</sup> Nuadui nunú nugka daajin Meribá\* adaikajui. Nuwi Israel aents aidau Apajuin yumi sukagtusta tusa chichamjukaju asagmatai. Tusa segam Tuke Pujuu niina pegkegmajin ditan iwaintukui.

*Israel aents aidau nagkaemakinum tusa Edoma apuji dakitjamu*

<sup>14</sup> Cadesnum batsamas Moisés aents chichama etsejin aidau Edoma apuji pujamunum ishimak, juna aatus akatmamtujui:

“Amina yatsum Israel aents aidau juna aatus tujamainawai: Amek shiig dekame ii utugchatnum batsatui jiiinja yujag duka.

\* 20:13 “Meribá” tawa duka hebreo chichamnumak “chichamjukbau” taku tawai.



<sup>15</sup> Iina apachji aidau Egipto nugkanum shiyakag awi kuashat tsawan batsamsajui, tujash egiptunmaya aidau iina apachjin waitkasu aina dutiksag jutinashkam waitkag-mayanume.

<sup>16</sup> Imatijamainakui Tuke Pujuu yaimpakti tusa segabijai. Dutika ajin ii sumamun antugtamak, niina aentsji nayaimpinmaya ángel makichik awetugmabi, dutikam nunú Egipto nugkanum batsatutin jii pajuu asantai, yamai juju amina nugkem nagkatkamunum yaakat Cadesnum kauna batsatji.

<sup>17</sup> “Nuniau asa wait anenkagtugta, amina nugkemea nuni nagkaemakiagmi tusa taji. Nunika nagkaemakuish, ajak ajakmamunmak, tuja uva ayamunmash nagkaemakchattaji, tuja ame yumi umutaigmekesh uwagchattaji. Jinta wetaya duke yajash tsegketsuk amina nugkem nagkaikitasa wetatji tujamui”, tiajui.

<sup>18</sup> Tusa ujaam Edoma apuji ditan ayaak:

“iMina nulkajua junig makichkish nagkaemakigpa, tuja antutsuk nagkaemakjuminig, mina suntajujai jiiuntuktatjime atumjai maaniatasan!” tiuwai.

<sup>19</sup> Tusa tutai chichama etsejin aidau ataktu awena shiig ujainak:

“Jinta wetaya duke wetatji, untsu nuniamunum iikish atsa nuniashkush iina tagkujigkesh yumi amina umutaigmin umuinakuig nunak akiktajame. Iik ayatak nagkaemaktasa wakegaji”, tuidau.

<sup>20</sup> Tusa tiagtai, Edoma apuji chichaak:

“iTuajash junig nagkaemakchattagme!” tiuwai. Nuna tusa Israel aents aidaujai maaniatatus niina suntaji maanitan yacha aidaujai shiig uminas jiiuntukiuwai.

<sup>21</sup> Dutika nagkaemamainchau emam, Israel aents aidauk pempeenag yaja tikich yantamnum shiyakajui.

#### *Aarón jakamu*

<sup>22</sup> Israel aents aidauk Cades batsatu ashí jii nag muja Hor tutainum shiyakajui.

<sup>23</sup> Nunikag Edoma nugke nagkatkamunum jegawagmatai, nuwi Tuke Pujuu Moisésan Aaróggai chichajak:

<sup>24</sup> “Aaróggak jakattawai, nuniktin asa wi Israel aents aidau nugka anagkuawaitag nuwig wayashtatui, wagki atumek Meribánun yumi awa nuwi wi umikta tibau umikchau ainagme.

<sup>25</sup> Tuja Moisésah, ame Aarón niina uchiji Eleazarjai jukim, muja Hornum nuna titijin wakata.

<sup>26</sup> Nuwi wakam Aarón sacerdote nugkutaijin nugkuaja nunú awitka jukim niina uchiji Eleazar apegata. Nuwi Aaróggak jakattawai”, tiuwai.

<sup>27</sup> Tusa tima Moisés Tuke Pujuu tibaunak imatiksag umikui. Nunak ashí Israel aents aidau wainbaunum muja Hornum weuwai.

<sup>28</sup> Nunik waka nuwi Moisés Aaróggka jáanchjin awituk jujuki Eleazaran apegauwai. Tuja Aaróggak nunú mujá titijya nuwi jakauwai. Nunikmatai Moisés Eleazarjai mujanum batsatu waketug kaunauwai.

<sup>29</sup> Tuja Aarón jakamun Israel aents aidau dekawag, treinta tsawantai butiaju ainawai.

## 21

#### *Israel aents aidau Hormánmaya aents aidau depetkagbau*

<sup>1</sup> Canaágnunia aents aidau apuji yaakat Arad tawa nuwiya Néguev nugkanum pujukua nunú Atarim jinta nuni Israel aents aidau mininawai tabaun dekauwai. Nunik ditajai maaniatatus niina suntaji aidaujai jiiuntujajui. Nunik maaninak Israel aents aidau ujumak achika yajuakui.

<sup>2</sup> Dutikawajam Israel aents aidau Tuke Pujuu segainak: “Ame yaijatkamin nugka utuakuik, nuwi batsamin aina duka ashí ijinku yaaktajijai tsaikmi taji”, tiajui.

<sup>3</sup> Tusa tiagtai, kame dutikatajam tusa Tuke Pujuu tiuwai. Nuadui Israel aents aidau canaágnunia aents aidau amuktinme tusa Tuke Pujuu yaigkui. Dutikamu asa nuna amuinak yaaktajijai tsaikajui. Nuadui nunú nugka daajin Hormá\* adaikau ainawai.

#### *Dapi bronce najanamu*

<sup>4</sup> Israel aents aidauk muja Hornum batsatu jii nag Edoma nugke utuawaig tusag, nuna tента nayanats kapantu tutaya nuni shiyakajui. Nunik jintá shimamunum atsanmainchau dekapenak waugkamun aentaimitan jukiajui.

<sup>5</sup> Nuadui Apajuín Moisésjai chichaman patatuinak: “¿Wajukatnume tusagmea Egipto nugkanum batsatjinish jiiatkiugiuge? ¿Imajui uwegshunum jinaati tusagmek

\* 21:3 “Hormá” tawa nunak hebreo chichamnumak “nugka sujimkamu utumainchau” taku tawai.

jijatkimiujum? Yumi umumainush atsawai, tuja yumainush shiig atsugtamji. ¡Tuja nuigtush yutai junin yuwi yuwinakua yawetkaji!” tuidau.

<sup>6</sup> Imatiagtai, Israel aents aidaun esaitnume tusa Tuke Pujuu dapin ishitkauwai. Nuadui nunú dapi esaim kuashat jinawaju ainawai.

<sup>7</sup> Nunik jinuinak Moisésan jegajuawag chichajuinak:

“¡Tuke Pujuu chicham patatku, ameshkam chicham patatkau asaja pegkegchau wajasji! ¡Apajuí segata dapi iina waitkagma nuna yaja ishiakti!” tuidau.

Tusa tiagtai, Moisés Apajuín segauwai ditan tsagkujati tusa.

<sup>8</sup> Tusa segam Tuke Pujuu Moisésan chichajak:

“Anú dapi aina nunin dakumka makichik najanata. Dutikam numi esajam ajiam nuna titijin pempegka Dutikam numi esajam ajiam nuna titijin pempejam yakí jiikta. Tuja makichik aentskesh dapi esaimak, nunú dapi najanamua nuna diistinme, nuninak tsagajagtai”, tiuwai.

<sup>9</sup> Tusa tima Moisés broncen juki, dapi dakumak najanauwai. Dutika numin ajia nuwi pempeg awagkek yakí jiika ukukiuwai. Tuja dapi esaimak nuna diisag tsagajaku ainawai.

## 22

### *Balac Balaaman untsukbau*

<sup>1</sup> Tuja Israel aents aidauk shima shimakua Moab nugka pakaji namak Jordágka tsumujin yaakat Jericójai niniaku awa nuwi jegawag batsamsajui.

<sup>2</sup> Israel aents aidau amorreo aents aidaun depetuk amuke tabaun Siporan uchiji Balac Moab nugka apuji antukui.

<sup>3</sup> Tuja moabnumia aents aidaushkam Israel aents aidau shiig kuashat asagmatai, nuna wainkag senchi ishamkajui.

<sup>4</sup> Nunikag moabnumia aidau madiágnumia apu aidaun chichajuinak: “Au aents aina duka baká chijichin yuwa amuwama numamtuk iinak iina nugkejaí amupakagtai”, tuidau. Tuja nunú tsawantinig Balac aajakui Moab nugka apuji.

<sup>5</sup> Balac nigki maaniakug Israel aents aidaunak depetmainchau asa, Balaam Beora uchiji yaakat Petor tutainum namak eufratesnum ijus nugka Amav tutainum pujaun untsukui. Balac chichama etsejin aidaun Balaam ujaktajum tusa ishimak, juna aatus akatmamak:

“Egiptunmaya aents aidau kaunawag juju nugka junak ashí batsamtukaje, nuninak tikima wi pujamunmash kaunawaje. Imaniku asamtai,

<sup>6</sup> wamak taata, nunikam juju aents aidau pegkegchaunum yumigjata, wagki ditak iina nagkaetamsau kuashat, senchigtin ainawai. Ame pegkegchaunum yumigjamin, wi depetkan juju nugka juwi batsata nuna jijian ishiakchainjash, wagki ame pegkegnum yumigkiamuk tuja pegkegchaunum yumigkiamushkam betek uminna nuna wika dekau asan tajai, tujamui titajum”, tiuwai.

<sup>7</sup> Tusa akatjam moabnumia apu aidau madiágnumia aidaujai Israel aents aidau yumigkiamunum akimaktinun kuichki jukiag shiyakajui. Nunik Balaam pujamunum jegawag Balac akatmamjamun ujakajui.

<sup>8</sup> Tusa ujakam Balaam ditan chichajak:

“Juwi kajigtajum nuniagmin Tuke Pujuuish wajinjuttig nuna dekaan ujaktajime”, tiuwai. Tusa tiyajam moabnumia apu aidauk nuwi niijai juwakajui.

<sup>9</sup> Nunik batsatai Apajuí Balaaman wantintuk iniak:

“¿Anú aents amejai batsata dusha ya ainawa?” tau.

<sup>10</sup> Tusa tama Balaam Apajuín ayaak:

“Balac Sipora uchiji Moab nugkan apuji aents aidaun ishiake, mina chichaman ujatkatnume tusa.

<sup>11</sup> Kuashat aents egiptunmaya jijnag ashí nugkanum pampagke. Imaniku asamtai, Balac wakegawai mina awi wamak jegaa nunú aents aina nuna pegkegchaunum yumigjati tusa. Dutika ai niina nugken batsata nuna nii depetuk jiija ishiaktag tau asa”, tiuwai.

<sup>12</sup> Tusa tutai Apajuí Balaaman chichajak:

“Anú aents aina nujaig wepa, tuja nunú aents aina dushakam pegkegchaunum yumigjaipa, wagki ditak wi pegkegnum yumigjamu ainawai”, tiuwai.

<sup>13</sup> Tusa tima tsawak kashikmas nantaki, Balac ishiakbau apu aidaun chichajak:

“Tuke Pujuu wakegatsui atumjai weti tusag, nuniau asamtai, atumi nugkemin waketjatajum”, tiuwai.

<sup>14</sup> Tusa tiyajam apu moabnumia aidauk waketug Balac pujamunum jegawag ujainak: “Balaamak jutijai minitnak dakitmae”, tuidau.

<sup>15</sup> Tusa ujakmashkam antutsuk yama nagkamchak ishiakua nuni kuashat dekas apu chichame antugtai aidaun ataktu ishiakui.

<sup>16</sup> Dutika ishiakam Balaaman jegajuawag ujainak:

“Balac Sipora uchijiya nunú chichagtamak: ‘Wait aneamam juwi minitak dakiajaipa.

<sup>17</sup> Wi aminak shiig kuashat akiktatjame. Tuja nuigtushkam ame segatbaunak imatiksasuk umigkatjame. Nuadui wait aneamam juju aents aina nunú pegkegchaunum yumigjata’ tujamae”, tiujui.

<sup>18</sup> Tusa ujamashkam Balaam ditan ayaak:

“Balac niina pujusa inamtaijin oro aidau, plata aidau piyak atsuash nuna ashí sujakuish, wika makichkish imannak tuja imanchaunakesh Tuke Pujuu Apajuí dutikawaipa tujutbaunak dutikmaitsujai.

<sup>19</sup> Untsu wainkamekesh juwi pujusum kanagtajum, tuja yamaish Tuke Pujuuish wajinjuttig, nuna dekaan ujaktajime”, tiuwai.

<sup>20</sup> Tuja nunú kashia duwi Apajuí Balaaman wantintuk chichajak: “¡Anú aents aidau amina jujamkitatus kaunawaja nujai wetá! Tujash nunika wemesh wi amina wajintatjame duke umiktatme”, tiuwai.

<sup>21</sup> Tusa tima tsawag nii ekemsa wetinjin burro tuntupen patai umika, nuwi ekemi moabnumia apu aidaujai weuwai.

<sup>22</sup> Nunik ekemi wetai aents nii tsapakbau aidau jimag uyuniajui. Tuja Balaam wetai Apajuí kajejuk, nii weamun jintanum ángelchawashit tumaina wee wajasui.

<sup>23</sup> Nunik nunú ángel jinta ejapeen akijua puyaja takus wajaun burro wainkauwai. Nuna wainak tsegkeki ikamnum akumkauwai. Nunik akumtai Balaam jintanum awagkitatus asutiauwai.

<sup>24</sup> Dutika asuttai nunú ángel ukuki uva ajakbaunum jinta menaku mai yantamen kaya peejamunum wajasui.

<sup>25</sup> Nuwi ángel wajaun burro wainak, jinta kaya peejamunum atuumi tepak Balaama bakuin chanuntua tepesui. Nunitai Balaam ataktu burron asutiauwai.

<sup>26</sup> Dutiktai nunú ángel ukuki niyá eemak jinta shiig menaku makichkish ayampa waketmainchaunum wajasui.

<sup>27</sup> Nunik wajaun burro wainak nugká tepesui, nunikmatai Balaam kajeka numi juki asutiauwai.

<sup>28</sup> Dutiktai Tuke Pujuu burron chichamtikauwai. Dutikam burro Balaaman chichajak: “¿Wisha aminash itujeagme? ¿Tsuwah, kempatuma imania asuutam jama?” tiuwai.

<sup>29</sup> Tusa tama Balaam ayaak:

“¡Amek mina dushiktakum tujutme! ¡Kuchiin takakkunuk yamaikiuch maumainait-jame!” tau.

<sup>30</sup> Tusa tama burro ayaak:

“Wika burruitjai, ame tuké entsamka wekaetaigmetjai. Wi amina chichaman intimjuchuitjam duka amek shiig dekame”, tiuwai.

Tusa tama Balaam ayaak:

“Duka dekas tame”, tiuwai.

<sup>31</sup> Tusa timatai Tuke Pujuu nunú ángel puyaja takusa jintá waja nuna Balaam wainkati tiuwai. Nuna Balaam wainak eme anentus tsuntsuma nijayin nugka antig pujusui.

<sup>32</sup> Nunitai Apajuí ángel tumain\* wajas chichajak:

“¿Wagka amina burrogmesh kempatuma imanish asutiaume? Ame weam nunú mina shiig awajtachu asamtai, wi jintanak akigtatme.

<sup>33</sup> Amina burrojum mina waituk kempatuma tsegkeki menanjuse. Nunikchawaitkuig burronak iwaku akupeakun aminak maumain awajkajame”, tiuwai.

<sup>34</sup> Tusa tama Balaam ayaak:

“Niints awi pujusa jinta akigtujua tachau asan pegkegchaun takasjai. Tuja wi weag nunú amina shiig awagtamchakuig dekas wakikitjai”, tiuwai.

<sup>35</sup> Tusa tutai Apajuí ángel tumain wajas ayaak:

“¡Anú aents aina nujai weam duka wetá! ¡Tujash amek ayatak wi titatag duke chichaktatme!” tiuwai.

*Balac Balaaman igkug jukimu*

<sup>36</sup> Balaam minawai tabaun Balac dekaa Moapa nugke nagkatkamunum namak Arnón tutainum makichik yaakat awa nuwi jegajua igkug jukitatus wejiuwai.

\* 22:32 “Apajuí ángel tumain” tawa duka Nm 22.22num agagbauwa nujai betekai.

<sup>37</sup> Dutika igkug chichajak:

“Kuashta untsuakun waitkasjame. ¿Wagka juwi minitash dakitmaume? ¿Wi amina shiig kuashat akimainaitjam duka dekatsmek?” tau.

<sup>38</sup> Tusa tama Balaam ayaak:

“Kame yamaik juwi taajai amejai chichastasan. Tujash wika mina senchigjaikik chichamaitujai, Apajuí wajinjuttig nuna wika titatjai”, tiuwai.

<sup>39</sup> Nuna tusa Balaam Balacjai yaakat Quiriat-husot weuwai.

<sup>40</sup> Nuwi jegamtai Balac Apajuín anentag suwak baka aidaun, uwig aidaun kajegkui. Nuna nejen Balaam niina uyunainak apu yujaidaujai yuwawajui.

<sup>41</sup> Nuna dutika kashinia duwi kashikmas Balac Balaaman juki muja Bamot-baal tutainum wajasa diyam Israel aents aidau batsatbau shiig waindau asamtai, nuna iwaintuktatus weuwai.

## 23

*Pegkegnum yumigjamuk pegkegchaunmak yumigmaitusui*

<sup>1</sup> Nuwi waka Balaam Balakan chichajak:

“Juwi kuntin maa patasa apeaku Apajuí ememattin sieteya imajin najatjuata. Dutikam siete toro tsakat, nuigtu siete uwig tsakat aishmag aidau umigtukta”, tiuwai.

<sup>2</sup> Tusa tima Balac imatiksag umikui. Dutikamtai jimagtukag siete toro tsakat aidaun, siete uwig tsakat aishmag aidaujai maawajui, dutika kuntin patai apetai siete najanamunum nuwi maki makichik patajag apeawajui.

<sup>3</sup> Tuja Balaam Balakan chichajak:

“Kuntin maa patagbauwa juwi pujumata, nuniamin Tuke Pujuush wajinjuttig nuna dekaan ujaktajame”, tusa ukuak muja naintin weuwai.

*Balaam Israel aents aidaun pegkegnum yumigjamu*

<sup>4</sup> Nuwi waka pujaun Apajuí wantintukam Balaam Apajuín chichajak:

“Kuntinu maa patasa apeakun amina ememattasan sieteya imajin najanajai. Dutikan nuwi makichik toro tsakatan, nuigtu makichik uwig aishmag tsakatan aatsa patajan umikjai”, tau.

<sup>5</sup> Tusa tima Balaam chichaktinjin Tuke Pujuu ujaku. Dutika chichajak:

“Wakitkita Balac pujamunum, nunikam wi amina tajam nunú betek tita”, tiuwai.

<sup>6</sup> Tusa tima Balaam wakitki, Balakak apu moabnumia aidaujai kuntin maa patagbaunum nuna yantamen ijunai jegantui.

<sup>7</sup> Nunik jeganta Apajuí tibaun etsejak:

“Etsa minitainmanini muja ayá nuwi,

Aram nugkanum pujai,

Moabnumia aents aidaun apuji Balac

chichama akuptujak:

“Taata, nunikam Jacopa uchiji wegantu aidau

pegkegchaunum yumigjata’, tujutmae.

<sup>8</sup> Tujash wisha Apajuí pegkegnum yumigjamunash

¿wajuk pegkegchaunmash yumigjatjaki?

¿Wisha itugkanuk Apajuí dakitamunash,

utugchat ajiti tusanush ditanash titaja?

<sup>9</sup> Au aents aina duka,

tikich aents aina nuna pujutjijaig betekchau,

ditash kanakag batsamin ainawai.

Nunú aidaun juju mujanum wajasan wainjai.

<sup>10</sup> Dita aidauk shiig kuashat nugka yukukuntu

dekapamainchauwa iman ainawai.

¿Ibau kuashta nunash yaki dekapajainta?

Ditak pegkeg asag jainakush, shiig aneas jau aina nujai betek

wishakam shiig aneasan

jakatasan wakegajai”, tiuwai.

<sup>11</sup> Nuna antuk, Balac kajeka Balaaman chichajak:

“¿Wajuk takumea tame? Wika aminak mina shiwag aina nuna pegkegchaunum yumigjati tusan itaamjame. ¡Dutikamaitkum amek pegkegnum yumigkiame!” tiuwai.

<sup>12</sup> Tusa tama Balaam ayaak:

“Wika amejai chichaakun, Tuke Pujuush tunak tujutit nuna wika titatjai timagme”, tiuwai.

<sup>13</sup> Tusa tamashkam Balac ataktu chichajak:

“Wegajai, tikich yantama awi wemi, nunika awi diyam Israel aents aidau ujumak kanaka batsata nunú pegkegchaunum yumigtujata”, tiuwai.

<sup>14</sup> Tusa Balac Balaaman juki muja Pisgá nainti Sofim taitinum ejegauwai. Dutika nuwi kuntin maa patasa apeatnun sieteya imajin najana nuwi toro tsakat aidaun, uwig aishmag tsakat aidaujai kajegka maki makichik pataja umikui. Dutikamtai nuna Balaam apeak Apajuín emematiuwai.

<sup>15</sup> Nuwi Balaam Balakan chichajak:

“Juju kuntin maa patagbauwa juwi pujumata, nuniamin wi wenu Tuke Pujuujai chichastajai niish wajinjuttig”, tusa ukuak weuwai.

<sup>16</sup> Nunik jeganmatai Tuke Pujuu Balaama wantintuk nii chichaktinjin ujakui, dutika chichajak: “Wakitkita Balac pujamunum, nunikam wi amina tajam nunú betek ujakta”, tiuwai.

<sup>17</sup> Tusa tima Balaam wakitki kuntin maa patagbaunum nuna yantamen Balac apu moabnumia aidaujai ijunai jegantui. Nunik jeganmatai Balac iniak:

“¿Tuke Pujuush wajinjutpame?” tau.

<sup>18</sup> Tusa iniam, Balaam Apajuí tibaun etsejak aatus tiuwai:

“Balac Sipora uchijiyah,  
wi amina titatjam nunú shiig antukta.

<sup>19</sup> Apajuik aentschauwa nunin asa nigka waitjuchui,  
tuja chichakbaujinash  
yapajichui.

Nii nuna dutikatjai takug imatiksag uminai,  
tuja nii anagkagtuamunashkam imatiksag uminai.

<sup>20</sup> Nuniau asa Israel aents aidau pegkegnum yumigjata tusa Apajuí tujutne.

Nuadui Apajuí pegkegnum yumigkiamunak  
wika pegkegchaunmak yumigmaitsujai.

<sup>21</sup> Tuja nuigtush makichik aentskesh  
Israel aents aidau waitjutaijinak dekagchau ainawai,  
pegkegchau takamtaijinakesh dekauk shiig atsawai.  
Tuja ditanak Tuke Pujuu ditá Apajuíjiya nunú kuitamui.  
Tuja ditashkam: ‘Jujuwai iina apujig!’ tuinawai.

<sup>22</sup> Nuadui búfalo niina kachujin  
ayamjumama numamtuk  
Israel aents aidau ayamjumataijig  
Apajuí dita Egipto nugkanum  
batsatun jijua nunuwai.

<sup>23</sup> Jacopa uchiji wegantu aina nuna wi pegkegchaunum yumigkiaknush,  
wainka dutikmainaitjai.

Israel aents aina nunak tunchikesh wawemait sui.  
Wi yamai Israel aents aidaun tajai:  
‘¡Apajuí atumnak dekas shiig pegkegnum yaimpakaje!’

<sup>24</sup> Juju aents aina duka,  
Leónjai betek nantaki niina shiwaaji aidaun jeteakug,  
ayamtsuk ashí amuka,  
nuna numpen uwag duwi  
shiig ayamak tepena iman ainawai”, tiuwai.

<sup>25</sup> Tusa tutai Balac Balaaman chichajak:

“¡Au aents aina nunú pegkegchaunum yumigmainchau deka peau asam, pegkegnumak yumigjaipa!” tiuwai.

<sup>26</sup> Tusa tutai Balaam ayaak:

“¿Wi amina chichagkug, Tuke Pujuush tunak tujutit nuna titatjame tichamkajam?” tiuwai.

<sup>27</sup> Tusa timatai Balac chichajak:

“Wegajai tikich yantama awi wemi. Awi jegantaminish, Apajuish Israel aents aidau pegkegchaunum yumigjata tujamchaintash”, tiuwai.

<sup>28</sup> Tusa Balac Balaaman juki muja Peor tutai naintin emauwai. Nuwi wajasa diyam ashí uwejush aidau waintainum emauwai.

<sup>29</sup> Nuwi jeganta Balaam Balakan chichajak:

“Juwi kuintin maa patasa apeaku Apajuí ememattin sieteya imajin najatjuata. Dutikam siete toro tsakat, nuigtu siete uwig tsakat aishmag aidau juki umigtukta”, tiuwai.

<sup>30</sup> Tusa tima Balac imatiksag umikui. Dutika umikmatai Balaam toro tsakat aidau, uwig aishmag tsakat aidaujai kajegka kuintin patai apetai sieteya imajin najanamunum maki makichik pataja apeak Apajuín emematiuwai.

## 24

<sup>1</sup> Balaamak Apajuí Israel aents aidau pegkegnum yumigkiau asamtai, nuigtu awagkig Israel aents aidau pegkegchaunum yumigmainun dekaatasag wakekachui. Tuja yaunchuk Tuke Pujuu segajakbaujinak idayak uwegshunum Israel aents aidau batsatbaunmanini ayampa niimsauwai.

<sup>2</sup> Nuniak Israel aents aidau maki makichik wegantu doce aajakua nunú batsatun diittaman Apajuí Wakani\* ekemtujui.

<sup>3</sup> Dutika egkemtujam atakea duwi atinun juna aatus tiuwai:

“Witjai Balaam Beoran uchiji,  
wika Apajuí wakega nunak shiig dekajai.  
Wi chicham etsegbau antuktajum.

<sup>4</sup> Wika Apajuí Wakani egkemjutjamtai  
tikishmaja pujusan, paan wainjai.  
Tuja Apajuí ashí senchigtina nunú  
mina nii wakegamujin iwaintujak,  
chicham etsekatnun suja nuna ima shiig paan dekajai.

<sup>5</sup> ¡Jacopa uchiji wegantu aidauwah,  
atumi aakjum aidauk shiig pegkeg ainawai!  
¡Israel aents aidauwah,  
atum batsatjum duka shiig pegkejai!

<sup>6</sup> Palmera shiig kuashat tepajua imanai,  
ajak ajakbau namaka uwet aiyama imanai,  
ajak Apajuí ajakbau aiyama iman,  
¡setug namaka uwet ayau  
shiig pegkejama imanaitme!

<sup>7</sup> Israel aents aidau uwagtinuk  
yumi shiig kuashat aitnai.  
Tuja dita ajak jakma ukatkatnushkam  
imanisag aittawai.  
Ditá apujig tikich apu Agag daagtinun depetkatnai.  
Tuja ditá senchijig shiig múun atinai.

<sup>8</sup> Apajuí Israel aents aidau  
Egipto nugkanum batsatun jiihua nunuwai  
búfalo ayamjumatai kachujiya numamtin.  
Nuadui Israel aents aidauk  
ditá shiwaaji aidaunash amuktinai.  
Dutikak nagkí iju mainak,  
ukunchin kupijagtinai.

<sup>9</sup> Israel aents aidau ayamak tepakug,  
león tepegama nujai betek tepenawai.  
Iman asamtai, jegaantag ishintaumainchau  
dekapenawai.  
¡Amina pegkegchaunum yumigtamaidauk,  
ditashkam dutiksaik  
pegkegchaunum yumigkiam agtinai,  
untsu amina pegkegnum yumigtamaidauk,  
ditashkam dutiksaik  
pegkegnum yumigkiam agtinai!” tiuwai.

*Balaam Israel aents aidau pachis etsegkamu*

<sup>10</sup> Nuna antuk Balac Balaaman senchi kajegkauwai. Nunik uwejen awati chichaak:

\* **24:2** Apajuín Wakani egkemtujui tawa nunak Wakani Pegkejin taku tawai.

“Wika aminak mina shiwag aina nunú pegkegchaunum yumigjata tusa untsukmagme, dutikamaitkum amek au aents aina nunú kempatuma imania pegkegnum yumigkiame.

<sup>11</sup> Nuniau asam ¡dekas jemin wakitkita! Wika aminak shiig kuashat akiktagme timajai. Tujash Tuke Pujuu dakittin, amek wainka juwakume”, tiuwai.

<sup>12</sup> Tusa tama Balaam Balakan ayaak:

“Wika amina aentsjum chichama etsejin aidaun ujaakun,

<sup>13</sup> ame pujusa inamtaigmin oro aidau, plata aidau piyak atsuash nunú mina ashí sujakinish, wika Apajuí tujutbaun intimjknuk makichkish imannak tuja imanchaunakesh mina senchigjaig dutikmaitsojai. Ayatak Tuke Pujuu tujutbaunak tumainaitjai, tibaijai.

<sup>14</sup> Untsu dekas mina nugkajui wakitkitjai. Tujash eke wetsuk, au aents aina dusha amina aentsjum aidaunash atakea duwish itugkatnuk ainawa nuna ujaktajame”, tiuwai.

<sup>15</sup> Nuna tusa Balaam juna atak atinun etsejak aatus tiuwai:

“Witjai Balaam Beoran uchijinuk, wika shiig dekajai Apajuí wakegamua nunak. Tuja wi chicham etsegbau antuktajum.

<sup>16</sup> Wika Apajuí Wakani egkemjutjamtai tikishmaja pujusan, shiig paan wainjai Tuke Pujuu ashí senchigtina nunú nii wakegamujin mina iwaintujak, chichaman etsekatnun sujawai.

<sup>17</sup> Makichik aentsun atushat wainjai. Tuja makichik waji atushat aun wainjai: Duka Jacob wegantunmaya makichik yaya wantinui, nunuwai Israel aents aidaun apujig. Nunú apua duka Moab aents aidaun depetuk amuka, nuigtushkam Set wegantu aidaunash dutiksag amuktinai.

<sup>18</sup> Tuja Edom aents aidaunashkam depetkatnai. Seir nugkanum ditá shiwaaji batsata nunash depetuk, nugken atankiag dita jukiagtinai. Israel aents aidauk Edom aents aidaun depetuk dita senchijin iwainmamkagtinai.

<sup>19</sup> Jacob wegantunmaya makichik senchigtin depetbau atinai, nunú yaakat aidaunum ujumak juwakag pujuidaun amuktinai”, tiuwai.

<sup>20</sup> Nuna tusa Balaam Amalec aents aidau nugken ayampa wajas chichaak:

“Amalec aents aidauk senchigtin ajantusa diitai ainawai. Tujash ashí tsaika emegkam atinai”, tiuwai.

<sup>21</sup> Nuna tusa idayak Balaam quenita aents aidau nugken diisa chichaak:

“Atum Caín wegantu aidautigmek ayamjumataijum shiig umikbau akuish, tuja kaya múun aidaunum pishak pasugken ekenag kuitamama numamtuk umikuitkugmesh,

<sup>22</sup> suntag asirianmaya aidau, achigmajag yajupainak nunú pasugkem aina nunak tsaika jiyai apeawag utsagkagtinai”, tiuwai.

<sup>23</sup> Tuja inagnak Balaam atak tikich tsawantai nagkaemagtinun pachis juna aatus tiuwai:

“¡Chah! ¿Apajuí nuna dutiktata duwish, yaki eke iwakush pujustinaita?

<sup>24</sup> Chiprenmaya lancha nayantsanum suntajan yajuak minawai. Nunú asirianmaya aidaun, Hebernumia aidaujai amukagtinai, dutikawag ditashkam jinawagtinai”, tiuwai.

<sup>25</sup> Nuna tusa ashí etsejuk Balaam jiinki weuwai niina jeen waketak. Nunikmatai Balakshakam niina pujusa inamtaijin wakitkiuwai.

## 27

*Josué Israel aents aidaun apuji atin adaikamu  
(Dt. 31.1-8)*

<sup>12</sup> Nunik kuashat tsawan nagkaemakui ai, Tuke Pujuu Moisésan chichajak:

“Juju muja Abarim tutaya juwi wakata, nunikam Israel aents aidau wi nugka susatjai tusa anagkuawaitag nunú díista.

<sup>13</sup> Nunú nugka wainkam, duwi amina yatsum Aarón jakauwa nunismek, ameshkam jakattame.

<sup>14</sup> Atumek yumi umumain atsutai, Israel aents aidau chichamjuinakui, wi nunú dutikatajum tusan uwejush Sin tutainum tiuwaitjim nunú umikchauwaitjume. Nuwi Israel aents aidau yumi sumainakui, atum ditá emtin mina eme anenjuschauwaitjume”, tiuwai. Tuja nunak uwejush Sin tutainum yaakat Cades awa nuwi yumi pukuni jiinu Meribá tutaya nuna pachis tawai.

<sup>15</sup> Tusa tama Moisés Tuke Pujuu chichajak:

<sup>16</sup> “Ashí aents aina nuna Apajuji Tuke Pujuuwah, ame amina aentsjum aina nuna apuji atin makichik apu adaikata,

<sup>17</sup> nunú yajuak emati, uwig kuitamkachbau wainak yujama nunikainum”, tiuwai.

<sup>18</sup> Tusa tutai Tuke Pujuu Moisésan ayaak:

“Josué Nun tutain uchijiya nunuwai wi etegkamu, waji, mina umigtau. Nunú untsuka jukim amina uwegmin niina buuken achikta.

<sup>19</sup> Dutikam sacerdote Eleazar pujamunum ejegam, nuadui ashí Israel aents aidau wainbaunum apu adaikata.

<sup>20</sup> Dutikam nuadui ame takasuitam dutika takastinji ujakta. Dutikamu asamtai, ashí Israel aents aidauk niina chichamen umigkatnume.

<sup>21</sup> Untsu Josué nigki sacerdote Eleazarai weti. Nuwi jegamtai Eleazar mina inintsat-tawai. Tusa ininkui wi Urimnum\* wajuk iwainaktatja nuna Josuéu ujaktatui. Dutikamu asa nii Israel aents aidau apuji wajasa Israel aents aidau yajuak emati”, tiuwai.

<sup>22</sup> Tusa tima Moisés Tuke Pujuu timaunak imatiksag umikui. Dutikak Josuéu juki sacerdote Eleazar pujamunum ejegauwai, tuja nuigtushkam ashí Israel aents aidau batsatbaunmashkam ejega iwainakui.

<sup>23</sup> Nuna dutika Moisés Tuke Pujuu tibaun umiak, Josué buuken achika Apajuín segati apu emauwai.

---

\* 27:21 “Urim” tawa duka “dekaskeashit atsa dekaskechuashit tusa dekatasa takatai” aajakui.



## **Chicham umiktin aidau agagbau aajakua nunú ataktu pataka agagbau Deuteronomio**

*Apajuí Israel aents aidau anagkuawa nuna pachis Moisés muja Horebnum pujusa ditan ataktu ujakbau*

<sup>1</sup> Juna Moisés namak Jordágka amain etsa minitaiya nuni uwejush awa nuwi pujus, Israel aents aidau ujakui. Nunú uwegshuk Arabá nugkanum awai. Tuja duka yaakat Suf tawa nujai niniaku nugka Parán, Tótel, Labán, Haserot, Dizahab aatus aajaku aina nuwi awai.

<sup>2</sup> Tuja Cades-barnea jegamuk Horebnum juwaki jinta Seirnum wetaya duke wea weakua once tsawanta imajin jegawai.

<sup>3</sup> Tuke Pujuu Moisésan Israel aents aidau ujakta tusa tima ujakua nunak,

<sup>4</sup> amorreo aents aidau apuji Sejón Hesbón nugkanum pujaun, tuja Basán nugka apuji Og aajakua nujai depetuk amuka, nuigtu Astarot nugkanum yaakat Edrei tawa nuwiyashkam depetuk amukua duwi pujus, cuarenta mijan jegá, once nantu taka makichik tsawan tsawaju ai, Moisés Apajuí tibaunak imatiksag Israel aents aidau ujakui.

<sup>5</sup> Nunak Israel aents aidau namak Jordágka tsumujin Moab nugkanum batsatun, Moisés dita umikagtinun juna aatus chichajak:

<sup>6</sup> “Muja Horebnum batsatjin Tuke Pujuu iina Apajuí juna aatus chichagtamak: ‘Atumek juju muja juwig kuashat tsawan batsamsaugme.

<sup>7</sup> Nuadui aakjum aidau tegakjum, wajijum yajuakjum amorreo aents aidau batsatbaunum mujá wetajum. Nunikjum nuna yantamen tikich nugka ayá nuwi batsamsatajum. Duka nugkak juju ainawai: Arabá nugka, ikam tepaju, nugka paka weaju, Néguv nugká, nugka nayantsa pakaji, canaágnunia aents aidau nugke, nuigtu Líbano nugka, namak shiig múun Eufratesa aatus jegawai.

<sup>8</sup> Wi nunú nugka aina nunak atumin amaajime. Wetajum nunikjum nunú nugka jukitajum, nunak atumi apachjum Abraham, Isaac, Jacob aajaku aina nuna uchiji wegantu aidau susatnaitjai tusan anagkuawaitjai’, tujutmayi” tiuwai Moisés.

### **4**

*Apajuí umigkatajum tusa Moisés Israel aents aidau chichagkamu*

<sup>1</sup> “Mina pataag Israel aents aidauwah, chicham umiktina nuna wi jintintuawaitjim nunú yamai antukjum betek umiktajum. Nuniakjum iwaku pujusjum Tuke Pujuu atumi apachjum aajaku aidau Apajuí, nugka amastajime tusa anagtamauwa nunú nugkanum jegajum batsamsamnujum.

<sup>2</sup> Chicham umiktina nuna wi tajim duka makichkish ewaetsuk, tuja esakagjumkesh emegkautsuk betek umiktajum. Tuke Pujuu atumi Apajuí nuna chichame umiktin agagbauwa nuna wi tajim nunú betek umiktajum.

<sup>3</sup> Atumek shiig degagme iina patayi aidau muja Baal-peor tutainum batsamas, nuwiya aents aidau apajuímtaiji Baal aajakua nuna emematu yujatai, Tuke Pujuu kajejuk ijinauwai.

<sup>4</sup> Tujash atum aidautijum Tuke Pujuu atumi Apajuí nuna eme anentsajum niina chichame umigkau aidautigme yamai juwi ashí iwaku pujagme.

<sup>5</sup> “Tuja Tuke Pujuu mina Apajuí atumin nugka amasua nuwi atum pujusjum, chicham umiktinun nii tujutbaunak imatiksasuk ashí jintintuajime.

<sup>6</sup> Nunú chichama duka ashí betek umiktajum. Nuniagmin aents nunú nugkanmaya aidau, yachamet unimatjai atumin awa nuna dekawagtai. Nunú atum betek uniamugmin wainkag, dita chichainak: ‘Israel aents aidau shiig yacha ainawai!’ tujamiagtinai.

<sup>7</sup> Wagki aents tikich nugkanmaya aina duka ditá apajuímtaiji yayachbau asag, iina Apajuí Tuke Pujuu ii segamak betek yaimpau asamtai, senchigtin ainag imanuk makichkish atsawai.

<sup>8</sup> Tuja nuigtushkam iinu chicham umiktin aidau shiig pegkeg ajutjamu asamtai, senchigtin ainag ibauk makichkish tikich aents aidau atsuinawai. Wagki ditanuk iinu chicham pegkeg umiktin aidau ajutjama nunin atsubau asag. Nunú chichaman wi atumin jintintuan yamai amaajime.

<sup>9</sup> Nuadui kuitamamkatajum Apajuí atumin yaimpau asa, kuashat waji wainchatai aidaun iwainamu wainkauwaitjum nunú kajimatikijum. Tuja wi atumin jintinjim dushakam makichkish kajimatikigpa. Kajimattsuk atumi uchijum aidaun, tijajum aidaun, nunú pachisjum jintintuatajum”, tiuwai.

*Apajuí muja Horebnum chichakbau*

<sup>10</sup> “Atum aidautilum muja Horebnum Tuke Pujuu atumi Apajuí emtin pujuyujum nuadui Tuke Pujuu chichagtak: ‘Israel aents aidaun ijumjata mina chichamjun antukag unuimagtinme. Nunikag mina tuké umigtuktinme, nuninak dita uchiji aidaunash jintintuatneme. Dutikam ditashkam dutiksag umiktin atinme’, tujutiabi.

<sup>11</sup> “Tusa tujutai atumek muja najatamunum ijunjabiuigme. Nunika ijunjajumin nunú mujanmaya jii kegag bukuiti yaki takuni yujagkim najanea shiig suwe wajasabi.

<sup>12</sup> Nunú kegamunmaya Tuke Pujuu Apajuí atumin chichagtam antukuittume. Tujash atumek chichame antakjumes niina niimeg makichkish wainkachuitjume.

<sup>13</sup> Tuja nunú mujanum jimag kaya pakama najanamunum diez chicham umiktin aidaun agagbaun Tuke Pujuu amasabi. Dutika amaak juju ashí betek umiktajum tusa tujabiuwai.

<sup>14</sup> Nuadui Apajuí nugka amastata nuwi batsamsajum nunú chicham umiktina nuna atumin jintintuati tusa Tuke Pujuu mina inatjauwai.

*Dakumka najanamun aidaun emematigpajum tibau*

<sup>15</sup> “Muja Horebnum jii kegamunum Tuke Pujuu atumjai chichasua duwikkish atumek makichkish niina niimeg wainkachuitjume. Nuadui kuitamamkatajum,

<sup>16</sup> wainkajum dakumka najana ememattai aina nunú aishmagkesh, nuwakesh dakumka najanagmek emematigpa pegkegchau wajasajum.

<sup>17</sup> Tuja kuntinkesh, chigkikesh,

<sup>18</sup> japiinas yujau aina dukesh, namakia aina dukesh ememattinuk dakumkagmek makichkish najanawaigpa.

<sup>19</sup> Tuja nayaim diyakjumes, etsa, nantu, yaya aidaun, nuigtu tikich agkajunum etsantin ayá dukesh wakemain diyakjum emematigpa. Wagki nunú aidaunak juju nugkanum tikich aents aidaun batsata nunú ememattinme, tusa Tuke Pujuu tiuwai. Tujash ii Israel aents aidautilum Tuke Pujuu Apajuí ii emematin ainag ima duke emematiagmi.

<sup>20</sup> “Atumnak jiju ukuijata hornonum jitayama numamtuk Egipto nugkanum waitkam batsatutigmin Tuke Pujuu jiiipag niinu etamiuwai.

<sup>21</sup> Dutijamawaitak atumi pegkegchajin Tuke Pujuu mina kajegtuke. Nuadui amek namak Jordágkak katitkashtatme tujutne. Tuja nuigtushkam nugka atumdaun atinun amastata nuwig jegashtatme tusa tujutne.

<sup>22</sup> Tujutiui asantai wika namak Jordágnak katittuk juu nugka juwig pujusan jakattajai. “Untsu atum aidautilum Jordán katitkajum nugka pegkeja nunú jukittagme.

<sup>23</sup> Tujash kuitamamkatajum atum chicham umiktinun Tuke Pujuu atumi Apajuíjum amasua nunú kajimatikijum. Nuadui dakumka najana apajuímtai aidaun, Tuke Pujuu Apajuí dutikawaigpa tusa tujabiuwa duka makichkish dutikawaigpa.

<sup>24</sup> Wagki Tuke Pujuu atumi Apajuíjia duka dekas, Apajuí akasmauwai. Iman asa niig jii kegag apea emegkaina imanai.

<sup>25</sup> “Tuja nunú nugkanum batsamsajum uchijinkajum, tijajinkajum múuntuch wajas puajakjumes, Apajuí emematut idaikujum dakumka najana ememattai aina nuninuk emematigpajum, Tuke Pujuu atumi Apajuíjum kajegtamkainum.

<sup>26</sup> Tuja atum Jordágka amain katigjum Apajuí nugka amasua nuwi pujusjum dakumkam emematu yujakjume, nunú nugkanmak dukap tsawan pujutsuk ijina emegkam atinaitjume. Duka tuke uminkatta nuna wi yamai nayaimpin nugkajai adaisan tajai.

<sup>27</sup> “Tuja nuigtushkam Tuke Pujuu jiiipag ashí nugkanum utsampaktatjume, dutijamawagmatai nunú nugkanmak ujumchik juwakag pujusagtinai.

<sup>28</sup> Dutika utsampakmatai tikich nugkanum yuasjum nuwiya aidaun apajuímtaiji numi najanamun, kaya najanamun antuchu, wainmachu, yuchau, mayatchau aina nunú ememattinaitjume.

<sup>29</sup> Nunika tikich nugkanum batsamsajum waitiakjum, Tuke Pujuu atumi Apajuíjia nunú, ashí anentaimijai, wakanmijai segaakjum antujam atinaitjume.

<sup>30</sup> Atum tikich nugkanum batsamsajum dakumkam ememattukjum waitu pujautijum idaikujum, ataktu Tuke Pujuu atumi Apajuíjum umigjumini,

<sup>31</sup> niig wait anenkagtina iman asa atumnakek idaitamsashtinai. Ijipatnash ijipashtinai, nuigtushkam nii atumi muunjum aidaunai chichaman umikua nunak kajimatkishtinai, wagki nunak tuké umiktinaitjai tiu asa.

<sup>32</sup> “Atumesh anentaimsatajum: Apajuí yama nagkamchak aentsun najanauwa duwi nagkamsash, tuja ashí nugka najatawa imanuish, Apajuí iina yaimpau asa pegkeg aidaun yamai iwaina aika iwainakui tabaush makichkish antukukaitjum.

<sup>33</sup> ¿Jii kegamunum Apajuí atumin chichagtabau antakjumes, jinachuitjum nuninush tikich aents aidaush ainawash?

<sup>34</sup> Ii aidautinak Apajuí etegtamjauwai. Dutijabau asa iina ayamjutpak, jutii makichkish wainajakchamun ishamain aidaun Tuke Pujuu iwainag egiptunmaya aidaun senchi sapigmitkakua nunú atumek shiig wainkauwaitjume. Tuja tikich apajuímtai aina duka makichkish imanun iwainamainuk shiig atsawai.

<sup>35</sup> Nunak dutikauwai Tuke Pujuu senchigtina imanuk, tikich Apajuí shiig atsa nuna ashí aents aidaun dekatnume tusa.

<sup>36</sup> Apajuí atumi pujutjumin esetamatag tau asa, nayaimpinum pujusa chichag-tamkauwai. Tuja nugkaashkam jii kegaun iwaintugmakui. Nunú jii kegamunmaya niina chichame antukuitjume.

<sup>37</sup> Tuja atumi apachjum aajaku aina nunashkam Apajuí aneau asa dita wegantun-mayan etegjauwai. Dutikau asa Egipto nugkanum waitkam batsatun niina senchijijai jiija agkanmitkauwai.

<sup>38</sup> “Nuadui tikich aents atumi nagkaetamsau kuashat, nuigtush senchigtin aidaun atumesh wainjumin Apajuí jiija utsagke, wagki yamai atum juju nugka jukitin asagmin.

<sup>39</sup> “Nuniau asamtai Tuke Pujuu Apajuí nayaimpinash, nugkanash apujiya nunú shiig antukjum kajimattsuk aneaku atajum. Wagki Apajuíya imanuk tikichik atsawai.

<sup>40</sup> Nuadui niina chichame umiktajum tibauwa nuna wi yamai juju tsawanta juwi amaajim nunú betek umiktin atajum. Nunú betek umiakjumek, Tuke Pujuu Apajuí atumdaun nugka tuke atinun amastata nuwi kuashat mijan pujustinaitjume”, tiuwai.

## 6

### *Chicham umiktin aidaun agagbaun Moisés jintiamu*

<sup>1</sup> Moisés Israel aents aidaun chichajak: “Tuke Pujuu atumi Apajuíjum nugka anagtabauwa nuwi jegajum pujusjum, chicham agagbauwa nunú atum umiktin aidaun jintintuati tusa, Apajuí mina inatjauwa duka jujuwai:

<sup>2</sup> “Tuke Pujuu Atumi Apajuíjiiya duke ememattajum. Dutikakjum niina chichame umiktin aidaun agagbauwa nunú atum, atumi uchijum aidaun, tijajum aidaun aatus umiktinun wi jintinjim nunú betek umiktajum. Nuniakjum kuashat mijan iwaku pujustinaitjume.

<sup>3</sup> Nuadui Israel aents aidauwah, chicham umiktin aina nunú betek umiktajum. Nunú betek umiakjumek, nugka pegkeg ajak shiig tsapaun amastinaitjime tusa Tuke Pujuu atumi Apajuíjum atumi apachjum aidaun anagkuawa nuwi pujusjum shiig kuashat yujaktinaitjume.”

<sup>4</sup> “Antuktajum Israel aents aidauwah: Tuke Pujuuwa nunuwai iina Apajuíjig; Tuke Pujuuk ima makichkiuchi.

<sup>5</sup> Tuke Pujuu amina Apajuígmea nunú amina anentaimijai, wakanmijai, senchigmijai aneeta.

<sup>6</sup> Nuniakum wi yamai tajim nunú shiig atukjum kajimattsuk aneaku atajum.

<sup>7</sup> Nunikjum atumi uchijum aidaun kashi kashinig jintintajum. Dutikakjum atumi jeminish, tuja jintá wekaekugmesh, kashi kanakjumes, tsawaku nantakjumes, chicham umiktin aina nunú uchijum aidaun jintintuatajum.

<sup>8</sup> Atumek Apajuí etegkamu ainajum nunú iwainmamkujum chicham agagbau umiktin aina nunú kuntugmin patakumajum, atsejukjum yujastajum.

<sup>9</sup> Tuja nuigtushkam shugku aidaunum, nuigtu atumi jee aina nuna waitijinchakam agaja anujkatajum.

### *Moisés Israel aents aidaun chicham umiktin agagbauwa nunú betek umiktajum tibau*

<sup>10</sup> “Atumi apachjum Abraham, Isaac, Jacob aajaku aina nuna nugka amastajime tusa Tuke Pujuu atumi Apajuíjum anagkuawa nuwi atumnak etejamawagtatui. Nunú nugka nuwig yaakat múun shiig pegkeg aidaun atumkesh yaaktamkachbau,

<sup>11</sup> Jega aidaunum waji pegkeg aidaun pimasua weaku atum ipiakchamu, yumigmat aidaush atum taichbau yaunchuk tai umikbau aidaun, tuja uva ajakbau aidaun, aceituna ajakbau atum ajakmachbau aidaun, yaunchuk ajaka umikbau aina nuwiya shiig yuwajum pujustinaitjume.

<sup>12</sup> Nunú iman ayaunum jegagmesh, Tuke Pujuu Apajuí atum Egipto nugkanum inaku waitkatai batsatutigmin agkanmitkagmawuwa nunú kajimatkipa.

<sup>13</sup> ¡Tuke Pujuu atumi Apajuíjiya duke ememattajum! ¡Nuniakjum ima nigki eme anentsajum umigkatajum! ¡Tuja atum umiktin dekas takugmek ima Apajuí daajinig titajum!

<sup>14</sup> “Tuja tikich aents aidau apajuímtaiji aina duka emematigpa,

<sup>15</sup> wagki Tuke Pujuu atumi Apajuíjiya duka, dekas Apajuí akasmauwa, nuniau asa atum wainka apajuímtai aina nunú emematu yujataik, nii kajegtamak ashí ijipamainai.

<sup>16</sup> “Tuja Masá nugkanum pujusjum Tuke Pujuu atumi Apajuíjum dekapsauwaitjum numamtuk ataktu dekapsatasagmek wakeyigpajum.

<sup>17</sup> ¡Tuke Pujuu atumi Apajuíjiya nuna chichame umiktin agagbauwa nunú umiktajum tusa tujamauwa duka ewaetsuk betek umiktajum!

<sup>18</sup> Atumi apachjum aajaku aina nunú umikagtinun Tuke Pujuu anagkuawa nuwi jegajum shiig pujustag takugmek Tuke Pujuu wakegamu pegkeg aina duke takastajum.

<sup>19</sup> Nuniagmin nii tibauwa nuna imatiksag atumi shiwaajum aidaunak atumjai maaniawai tusa uwakek ipisjattawai.

<sup>20</sup> “Tuja atakea duwi atumi uchijum aidau inimpainak: ‘¿Juju chicham umiktin agagbau aina nuna Tuke Pujuu iina Apajuíji umiktajum tujabiuiwa nunash wajina taku tiuwaita?’

<sup>21</sup> Tujamainakuig atum ayaakjum: ‘Ii aidautik Egipto nugkanum batsamsa faraógka inaku waitkatai ayaji. Nuni batsatjin Tuke Pujuu niina senchijijai jiiipagmayi.

<sup>22</sup> Tuja faraógkan, niina nuwen, niina uchijin aatus Tuke Pujuu suwimka suwak wainchatai ishain aidau iwainajua nunú ii wainkauwaitji.

<sup>23</sup> Untsu jutiinak nuwi batsatutin nii jiiipag jujamki iina apachji aajaku aina nuna anagkuak nugka amastajame tiuwa nuwi itagmae. Dutijama nunú nugkan iina amase.

<sup>24</sup> Dutika amasu asa Tuke Pujuu iina Apajuíji chichagtamak: Juju chicham umiktin aidau agagbauwa nunú umiktajum, nuniakjum ajaantusjum diitajum, tusa tujamui. Wagki nunú betek uminaku yamai iwaku shiig batsatag junika batsamsatag tau asaja.

<sup>25</sup> Tuja chicham umiktin agagbauwa nunú umiktajum tusa Tuke Pujuu iina Apajuíji tujabiuiwa nunú betek umiajinig, dekas atumek pegkeg takagme tujamtatji’ titatjum”, tiuwei Moisés.

## 7

### *Dakumka najanamu aidauk emematigpa tibau*

*(Ex. 34.11-17)*

<sup>1</sup> “Tuke Pujuu atumi Apajuíjum, atum batsamsatnun nugka amastata nuwi ejemawagatui. Dutijama nuwiya aents aidau siete nugka múnu aidaunmaya maki makichik chichamtin, atumi nagkaetamsau senchigtin, shiig kuashat batsamin: hitita aents aidau, gergeseo aents aidau, amorreo aents aidau, cananeo aents aidau, ferezeo aents aidau, heveo aents aidau, Jebús aents aidau batsata nunak atumesh wainjumun Tuke Pujuu jiija utsagatui.

<sup>2</sup> Tuja nunú aents aina nuna depetkatnume tusa Tuke Pujuu atumi Apajuíjum senchimitijamantai, depetkajum utuagmek wait anenjaigpajum, tuja nuigtush ditajaigkish chichamak umikaigpajum, ayatak ijina utsagtajum.

<sup>3</sup> Tuja nuigtushkam atumek nuwiya nuwa aidaujaig nuwenawaigpajum, atumi uchijum aidaush, nawanjum aidaushkam nuwiya aents aidaujaig nuweawaigpajum.

<sup>4</sup> Wagki ditá aishin umiujinak aishi apajuímtaiji aidaun uchijum aidau, nawanjum aidau emematuinak Tuke Pujuu ememattan kajimatkinum. Dita nuniagtai Tuke Pujuu atumin kajegtamak shiig wamak ijipamain asantai.

<sup>5</sup> “Nuadui dita apajuímtaijin emematuinak kuintinun patasa apetai aidau najankamu ajuina duka tsaigkatajum. Dutikakjum dita apajuímtai kaya aidau, numi kumpujam tsupikbau, Asherá daagtin aidaun aatus dita emematuina duka ashí tsaigkatajum. Tuja nuigtushkam ashí tikich dakumka najanamu aina dushakam dutiksagmek tsaigka apeajum utsankatajum.

<sup>6</sup> Wagki atumek ima Apajuí Tuke Pujuu tutaya nudau atinme tusa etegjamu ainagme. Nuadui atumnak ima niinuk atinun ashí aents nugkanmaya aina nuwiyen etegtamjauwai.”

### *Israel aents aidauk Apajuí etegjamu ainakush juna umiktinme tibau*

<sup>7</sup> “Tuke Pujuu atumi Apajuíjiya nunú etegtamjauwa nunak, aents tikich nugkanmaya aina nuna nagkaesau ima kuashat asagminigkish etegtamjachui. Atumek dekas tikich aina nujai apatkamak imanchaush ainagme, nunin ajuminig etegtamjauwai.

<sup>8</sup> Tujash ¿wagkag nunash etegtamjabi? Nunak Tuke Pujuu atumin anempau asa, atumi apachjum aajaku aidaun anagkuawa nuna umiktag tau asa, Egipto nugkanum batsamsajum faraógka inaku waitkatai batsatutigmin niina senchijijai jigmajui.

<sup>9</sup> Nuadui Tuke Pujuu atumi Apajujiya duka aents aidaun niina aneak umijuinamak, nii umiktajai tibaujinak ewaetsuk, ditá uchiji wegantu aidaunmashkam tuke umina nunú dekaskeapi titajum.

<sup>10</sup> Tuja niina betek umigtsuk kajejuina nunak nii suwimka susa wamak ijina utsainai. Nunin aina nunak kuashat tsawannakesh sutsuk shiig wamak ijina utsainai.

<sup>11</sup> Nuniau asamtai yamai wi atum aidautigmin chicham umiktin agagbau aidaun umiktajum tajim duka betek umiktajum”, tiuwai.

*Chicham umiktina nunú betek umiakjum pegkegnum yumigkiam atatjume tibau (Lv. 26.3-14; Dt. 28.1-14)*

<sup>12</sup> “Juju chicham umiktin aidaun agagbauwa nunú antukjum betek umiagminig, atumi apachjum aidaun Tuke Pujuu atumi Apajuíjum ditan anagkuawa nuna betek umiktatui.

<sup>13</sup> Dutikak ima atumnak anempatnai. Nuadui pegkegnum yumigtamag atumi uchijum aidaunash pegkegnum yumigkig kuashat ikauntugmaktinai. Tuja ajakma juutnumash, trigogminash, vino, nuigtu aceite aidaunash, tuja baka aidaun, uwig aidaun tsakapatnumash atumi apachjum aidaun anagkuawa nunak imatiksag amasagatui.

<sup>14</sup> “Atum atinaitjume dekas tikich aents aidaun nagkaesau pegkegnum yumigsamu. Nuadui nuwa kaga aidaush atsutnai. Tuja aishmag aidaushkam uchi akiichuk atsutnai. Tagkujum nuwa aidaun petsachuk, tuja aishmag uchi akiichush atsutnai.

<sup>15</sup> Egiptunmaya aents aidaun jata ishamainun Tuke Pujuu ajuntug atumesh wainjumin ijinauwa annuk atum batsatmaunmak shiig atsutnai. Apajuí nunak emegkaktinai. Iman jata aina duka atumnak waitkagmaschagtinai, untsu tikich aents atumi shiwaajum aina nuna waitkasagtinai.

<sup>16</sup> “Tuja tikich aents aina nunú ijinatajum tusa Tuke Pujuu atumi Apajuíjum tujamkuig, wait anentsuk ijinatajum. Tuja ditá apajuímtajijiya dukesh emematigpajum. Nunú nuniakjumek waitut igkugjum suugatjume.

<sup>17</sup> “Tuja namputchawame, atum anentaimesajum, juju aents aina nunú iina nagkae-tamsau kuashat aina imajush ¿itugkaik jijiash utsagtaji? tumainaitjume.

<sup>18</sup> ¡Tujash ishamkaigpajum! Tuke Pujuu atumi Apajuíjum faraógkan egiptunmaya aents aidaujui itujuk ijinauwaita nunú adeagtajum.

<sup>19</sup> Atum Egipto nugkanum batsatutigmin Tuke Pujuu atumi Apajuíjum niina senchijin kuashat wainchatai aidaun atumesh wainjumin iwainag jiiipajua nunú anentaime-tus-tajum. Tuja atumi shiwaajum kuashat asamtai ishamajum nunashkam Tuke Pujuu ijinattawai.

<sup>20</sup> “Tuja nunú aents aidaun atum ijinjumin ujumak uwemjau, tuja tupikaki uumkaju aina nunashkam ijinati tusa Tuke Pujuu ete múun aidaun ishikattawai.

<sup>21</sup> Nuadui nunú aents aina duka ishamkaigpajum. Atumnak Tuke Pujuu atumi Apajuíjum senchigtina nunú uyuntamjume.

<sup>22</sup> Nunú aents aina nunak Tuke Pujuu diipas utsa utsakua emegkagtatui. Atumek juu tamawaikik, waamkek utsagkaigpa, dutika ajuminig nugka ankan wajasmatai, kuntin ikamia aina nunú yujaka waitkagmasainum.

<sup>23</sup> Tujash Tuke Pujuu atumi Apajuígmia nunú aents aina nunak atumin idaitugmastatui. Dutikau asa diipas utsa utsakua ashí emegkagtatui.

<sup>24</sup> Dutika utsagkam ditá apuji aina duka atumin yunumjagtatui, nuninakui atum ashí ijinajum emegkaktinaitjume. Dutikamu asa makichkish ayamjumainjig shiig atsujiagtinai. Nuadui atum ashí amuktinaitjume.

<sup>25</sup> “Tuja ditá apajuímtajiji aina dushakam apea utsankatajum. Untsu nunú tsayakjumesh wainkajum oro aidaun, plata aidaun ayá nunú wakejukjum jukigpajum, nunú atumin waittan itagtamamtai waittsajum. Wagki nunú aina nunak Tuke Pujuu tsuumawai.

<sup>26</sup> Nuniau asamtai, Apajuí diisam, waji pegkegchau aina nuninuk atumi jeminig awayawaigpa, Apajuí atumnashkam ijipawainum. Wagki nunú waji aina duka shiig pegkegchau asamtai, tsaika utsagbau atatui.”

## 8

*Aentsuk ima yujumkanak yusagkek iwaku pujumait sui tibau*

<sup>1</sup> “Tuja wi atum aidautigmin chicham umiktin agagbauwa nunú umiktajum tusan yamai tajim duka betek umiktajum. Nunú umiakjum iwaku batsamsajum kuashat

yujaktinaitjume. Nuniakjum atumi apachjum aidaun Tuke Pujuu nugka amastajime tusa anagkuawa nuwi jegajum batsamsannujum.

<sup>2</sup> “Atum Egipto nugkanum batsatutigmin Tuke Pujuu atumi Apajuujum jii pag jujamki cuarenta mijan uwegshunum awekapasua nunú makichkish kajimatkgipajum. Imaan mijan awekapasua nunak, ememataiji aidaun idaisatnume tusa, tuja nuigtu imanik waituinakush dekas mina chichamjunash umigtumainash aina tusa dekapjamak, dutijamawai.

<sup>3</sup> Tuja kuashat tsawan nujantai waitiagminish, maná atumi wainchatain tuja atumi apachjum aajaku aina dukesh wainajakchamun Tuke Pujuu ayugtamauwai. Nunak dutikauwai wagki aentsuk ima yujumkanak yusagkek iwaku pujutsuk, Tuke Pujuu chichamejai pujumaina nuna jintinjamak.

<sup>4</sup> Cuarenta mijan yujasuitjum duwikish atumi jaanchjumek mamukchajui. Tuja atumi nawe aidaukesh iyagchajui.

<sup>5</sup> “Nuadui Tuke Pujuu atumi Apajuujum makichik múun niina uchijin jintintama numamtuk jintinjamawajua nunú anentaimeusjum diistajum.

<sup>6</sup> Nuniakjum niina chichame umiktin agagbauwa nunú betek umiakjum, Apajuú eme anentsajum diitajum. Tuja nii jintinjamamua dushakam imatiksagmek umiktajum.

<sup>7</sup> “Wagki atumnak Tuke Pujuu atumi Apajuujum jujamki nugka pegkeg paka tepetpetu ikamnum, entsa aidaun, yumi pukuni jiinaidaun, yumi initkanmaya aidaun shiig kuashat ayaunum etejamawagtatui.

<sup>8</sup> Nunú nugkanmak trigo, cebada, uva ajakbau, higuera aidaun, munchi aidaun, olivo aidaun, dapa yumiji aidaun aatus ayawai.

<sup>9</sup> Nunú nugkanmak atumek wajinak yuwatja tusagmek puyatchattagme. Tuja tikich waji aina dukesh puyatjukchattagme. Kaya aidaunmaya wainkatnaitjume hierro aidaun, nuigtushkam mujanmaya taijum jiju cobre yajumtinaaitjume.

<sup>10</sup> Tuja yutai yuwajum ejemagjum shiig aneasa pujakjumek, Tuke Pujuu atumi Apajuujum kajimattsuk see titajum, nii nugka pegkejan amasu asamtai.”

#### *Apajuú kajimatkgipajum tusa tibau*

<sup>11</sup> “Kuitamamkatajum Tuke Pujuu atumi Apajuujiya nunú kajimatkiyum. Niina chichame umiktin agagbauwa nuna wi jintintuajim nunú umitsuk idaisaigpajum.

<sup>12</sup> Tuja yutai yuwajum ejemagjum shiig aneasjum juga pegkeg jegamkamunum pujakjumesh,

<sup>13</sup> nuigtu uwigjum aidaun, bakajum aidaun, oro aidaun, plata aidaun, nuigtu tikich wajijum aidaun aatus kuashat kawegku wainkugmesh,

<sup>14</sup> ememakjum Tuke Pujuu atumi Apajuujiya nunú atum Egipto nugkanum inaku waitkatai batsatutigmin jii pag,

<sup>15</sup> jujamkiag uwejush ishamain dapi aidaun, titig aidaun ayaunum kuitamjamak, yumi atsutaish nii kayanmayan yumi jii ki uwagtinme tusa amasajua nunú kajimatkgipajum.

<sup>16</sup> Tuja nuigtushkam atumi ememataigmin idaimitkagmastatus, tuja nuigtu dekas mina chichamjunash umigtumainash aina tusa dekapjamak atumi wainchatain, tuja atumi muunjum aajaku aina dukesh wainajakchamun uwegshunum manán ayugtabauwai. Nunak nii dekapjamas pegkegnum yaimpaktag tau asa dutijamawajui.

<sup>17</sup> “Wainka anentaimeusjum: ‘¡Juju waji aina junak mina senchigjai imatikatsjash!’ tiigpajum.

<sup>18</sup> Nunak Tuke Pujuu atumi Apajuujum atumi muunjum aajaku aina nuna anagkuamun umiak, jamamtuchu pegkeg batsamas takastinme tujabiu asamtai, pegkeg pujusa takakjum wajijinau asajum. Nuadui Tuke Pujuu atumi Apajuujiya duka kajimatkgipajum.

<sup>19</sup> “Untsu atum Tuke Pujuu atumi Apajuujiya nunú umigtsuk, tikich apajuúmtai aina nunú emematkugmek, duka ashí ijina utsam atatjume. Junak dekas uminkatnun tajime.

<sup>20</sup> Atum Tuke Pujuu atumi Apajuugmin chichame umigtsugminig, nii atumi shiwaajum aidaun ijinatta dutiksag atumnashkam ijipattawai.”

## 9

#### *Depetmata Israeldauchui, Apajuúni tibau*

<sup>1</sup> “Israel aents aidauwah, antuktajum: Namak Jordán katitkajum atumi shiwaajum aidaun senchigtin, atum ainajum aan kuashat, yaaktajish múun peeja apakbau utumainchau aina nunú utuajum depetkatnuk tsawantak jegawai.

<sup>2</sup> Nuwiya aents aidaun múun esajam gigante Anac aajakua nunú wegantujai betek aidaun batsatui. Tuja atumek dekagme yaunchuk aaja timauwa nunú: ¿Gigante Anac aajakua iman aents aina nunash yaki depetkainta?

<sup>3</sup> “Tujash atumnak Tuke Pujuu atumi Apajujiya nunú kuitamjamsantai shimajum nunú shiig dekau amainaitjume. Niig jii kegag ikagnamainchau ashí apeka weama iman asa, nunú aents aina nunak atumesh wainjumin ijinattawai. Tuke Pujuu atumi Apajujuum tujabiwu duka imatiksagmek utugchat atsau, nunú aents aidauk shiig wamak jiija utsaakjum ijinattagme.

<sup>4</sup> “Tuke Pujuu atumi Apajujiya nunú atumi shiwaajum aidaun jiija utsaak nugka amasmataish: ‘See kuashat, ii ima pegkeg ainag duwi Tuke Pujuu juna nugkan amase’, tiipajum. Wagki Tuke Pujuu nunú aents aidaunak ditá pegkegchaujín utsagtatui.

<sup>5</sup> Tuja atum ima pegkeg asagminkish, atsa nuniachkush atum dekasa ima shiig takau asagminkish wait anenjamu asag, nunú aents aina nunak jii jag utsagchattawai. Nunak ditá pegkegchaujín, nuigtushkam atumin apachjum Abraham, Isaac, Jacob aajaku aidaun anagkuawa nuna umiak dutikattawai.

<sup>6</sup> Juju shiig dekatajum: ¡Tuke Pujuu atumi Apajujiya nunú nugka pegkejan amastata nunak, atum ima pegkeg takau asagminkish amaschattawai! Atumek dekasa chicham umichu intimkiu ainagme.”

*Israel aents aidau muja Horebnum batsamas Apaju chichame intimjukiagbau*

<sup>7</sup> “Uwegshunum batsamsajum Tuke Pujuu atumi Apajujiya nuna chichame intimjukiú ainajum nunú kajimatkitin aigpajum. Atumek Egipto nugkanum batsatutigmin Tuke Pujuu jii pajajua duwi nagkamsajum yamaishkam tuke intimjakjum ikaje yujagme.

<sup>8</sup> Nuigtushkam muja Horeb pujusjumes pegkegchau takakjum Tuke Pujuu ikajkauwaitjume. Nuadui Tuke Pujuu atumin senchi kajegtamak ijpamain awagtamkabi.

<sup>9</sup> Tuja chicham umiktin agagbaun jukitasa wi mujá weamiajai. Nunikan yujumka yutsuk, umutnash umutsuk cuarenta tsawan nuigtu cuarenta kashi pujuyajai.

<sup>10</sup> “Nunika pujai, atumesh ijunajum diyagmin jii kegamanmaya atum chicham umiktinun Tuke Pujuu ujpapakabi. Nunú chichaman jimag kaya pakamamunum nii agagbaun juki sujusabi.

<sup>11</sup> Nuwi cuarenta tsawan nuigtu cuarenta kashi ejei ai, Tuke Pujuu jimag kaya pakama najanamunum chicham umiktin aidau agagbaun sujusami.

<sup>12</sup> Nuna sujusa chichagtak: ‘Amina aentsjum aidau Egipto nugkanum batsatu jii gmayum duka wainak yujawai. Nuniau asantai wamak wakitkita, wi dita aidaun juju umiktajum tusa tibaunak kajimatkiag idayinak jiju ukuijag nujai dita ememattinum najanawag batsamtuinawai’, tujutiabi.

<sup>13</sup> Tuja nuigtu chichagtak: ‘Juju aents aina junak shiig wainkagjai, ditak dekasa chichaman shiig intimkiu ainawai.

<sup>14</sup> Nunin asagmatai amek dita aidauk chichamjukaipa, wi ditanak ijinan utsagtatjai. Dutika ai nuashmak makichish juwakchatnai. Tujash aminiyanak dita aina nuna nagkaesau kuashat aentsun ikaugkattajai’, tujutiabi.

<sup>15</sup> “Tujutmatai jii kegamanum mujá pujaun waketkun, chicham umiktin agagbaun jukiamiajai.

<sup>16</sup> Nunika atum batsatbaunum jegakman, Tuke Pujuu umiktajum tujabau umitsuk wamak kajimatki idaikujum, jiju ukuijajum nujai toro tsakat dakumka najanajum batsamtautigmin wainkabiajime.

<sup>17</sup> Nunika kajekan, jimag kaya pakama najanamunum chicham umiktin aidau agagbau takakbaujun atumesh wainjumin nagkima ajiajan tsaikamiajai.

<sup>18</sup> “Nuna dutikan atum yaunchuk pegkegchau takakjum Tuke Pujuu ikajkagmin, wi niina segaakun cuarenta tsawan nuigtu cuarenta kashi yujumka yutsuk umutnash umutsuk pujuyag imanisnuk ataktushkam Tuke Pujuu segaaku pujuyajai.

<sup>19</sup> Nuniakun atum aidautigmin nii senchi kajegtamak ijpapatg takui puyatiajai.

“Tujash Tuke Pujuu wi ataktu segamun antugtu asa ijpachabi.

<sup>20</sup> Tuja Aarógnashkam Tuke Pujuu kajujuk maatag takui, wait aneamas maawaipa tusan ayamjukamiajai.

<sup>21</sup> Nuna dutikan nuadui, atum pegkegchau takakjum toro tsakat dakumka najanamugin jukin jii kegamanum nagkiman patakamiajai. Dutika ai kuwigmatai, dekegka tsaika yukukuntu eman, nunú mujanmaya entsa akagunum ajugka ajapawamiajai.

<sup>22</sup> “Tuja nuigtushkam Taberá nugka, Masá nugka, Quibrot-hataavá nugka aina nuwi pujusjumeskam pegkegchau takakjum Tuke Pujuu ikajkauwaitjume.

<sup>23</sup> Atum Cades-barnea pujagmin Tuke Pujuu chichagtak: ‘Wi nugka amasuitjim nuwi wetajum’, tusa tujamkuish atumek antugtsuk, nuigtush niyai kajintsa anentaimchau asajum, nii tujabau umigkachuitjume.

<sup>24</sup> ¡Atumek yaunchuk nagkamsagmesh intimkiu, Tuke Pujuu umigchau ainajum nunak wika dekajime!

<sup>25</sup> “Nunin asagmin Tuke Pujuu ijipatag takui, wi cuarenta tsawan nuigtu cuarenta kashi makichkish ayamtsuk shiig senchi Tuke Pujuu segaakun pujusamiajai.

<sup>26</sup> Nuwi pujusan niina senchi segaakun: “Tuke Pujuu Apajuíyah, ame tujinmainuk makichkish atsawai. ¡Nuadui juju amina aentsjum aidau, Egipto nugkanum batsatu amina senchigmijai jiijuitam duka, wait aneasam ijinawaipa!

<sup>27</sup> Tuja adeagta amina inakem Abraham, Isaac, Jacob aatus aajaku aina nunú. Nuniakum juju aents aina nuna umishtaiji, tuja dita pegkegchauji aina nujai tsagkujam wait anenjata.

<sup>28</sup> Wagki Israel aents aina juju ame ijinawaminig, egiptunmaya aents aidau chichagta-mainak: “Apajuí Israel aents aidau kajejau asa Egipto nugkanum batsatu jiija yajuak, nii nugka anagkuawa nuwi ejetsuk jintá uwegshunum ijina utsagke”, tujamain ainawai.

<sup>29</sup> ¡Tujash Israel aents aidauk amina aentsjum ainawai! Nuniau asamtai amina senchigmin Egipto nugkanum batsatu jiigmayume’, tusan tiyamiajai’ tiuwai Moisés.

## 10

### *Apajuí Israel aents aidaujai ataktu chicham umikbau (Ex. 34.1-10)*

<sup>1</sup> Tusa tai Tuke Pujuu chichagtak: “Jimag kaya pakamamu yama nagkamchak aajakua nujai betek tsupika umikta. Dutikam nuigtushkam chicham umiktin agagbau egkeatin arca najanata. Dutika nunú jukim mujá wakata wijai chichastasam,

<sup>2</sup> nunikamin wi nunú kaya pakama najanamua nuwi chicham umiktin yama nagkamchaku agagbau ame ajiaja tsaikabium nujai betekan agagtajai. Dutikamtai arca numi najanamunum egkeam kuitamkattame”, tujutiabi.

<sup>3</sup> Tusa tujutmatai numi acacia tutaiyai arcan najanawabiajai. Tuja nuigtushkam jimag kaya pakamamun tsupika jukin mujá weamiajai.

<sup>4</sup> Nunika waka ai Tuke Pujuu nunú kaya pakama najanamunum diez chicham umiktin aidau yama nagkamchak atumesh wainjumin ashí tuwaka ijunbaunum jii kegamunum tujabiuwa nuna imatiksag agag sujusabi.

<sup>5</sup> Dutika sujusmatai nuna jukin mujá pujaun wakitkiamiajai. Nunika jegaan arca najanamunum Tuke Pujuu dutikata tujutbaunak imatiksasuk egkeawabiajai. Duka yamaikish nuwi awai.

<sup>10</sup> Tuja wi yama nagkamchaku pujusamiag imanisnuk mujá cuarenta tsawan, nuigtu cuarenta kashi pujusamiajai, nunika pujusan Tuke Pujuu segabiajai, ijinawaipa tusan. Tusa sega ai yaunchuk antugtukua nunisag ataktushkam Tuke Pujuu mina antugtuku asa ijipachabi.

<sup>11</sup> Untsu ayatak mina chichagtak: “¡Wamak wakitkita, nunikam umintsam Israel aents aidau yajuakam, wi ditá apachji aajaku aina nuna nugka anagkuawaitag nuwi emata!” tujutmayi.

### *Apajuí Israel aents aidau juju umiktajum tusa tibau*

<sup>12</sup> Israel aents aidauwah, atumnash Tuke Pujuu atumi Apajuígmish yamaish ¿wajina segapainawa? Ima nigki eme anentsajum nii tabau betek umiktajum, dutikakjum aneetajum, nuniakjum atumi anentaimijai, wakanmijai ememattajum.

<sup>13</sup> Apajuí wakegawai chicham umiktin agagbauwa nuna umiktinme, nuninak shiig batsamsatnume tusa.

<sup>14</sup> Tuja nayaim aina duka, nayaimpi yakintin ayá dushakam, nuigtu nugka, tuja nugkanum ayá nujai ashí Tuke Pujuu atumi Apajuíjiya nudau aina nunú dekaatajum.

<sup>15</sup> Nunú imanuk ayaig, nuna etegmainaitak, atumi apachjum aajaku aina nuna aneau asa etegkauwai. Nuigtushkam kuashat aents tikich nugkanum ayau dekag nuwiyam etegmainaitak, atumi apachjum wegantunmaya aidautigmin mina aentsug atinme tusa etegtamjauwai.

<sup>16</sup> Nuniau asamtai anentainkachu atsuk, Tuke Pujuu atumjai chichaman umikua nunú shiig antukjum kajimattsuk aneaku atajum.

<sup>17</sup> Wagki Tuke Pujuu atumi Apajuíjiya duka tikich apajuimtai aina nuna nagkaesau, ashí apu aidau Apujiyai. Niig dekas Apajuí múuntai, senchigtinai, tuja ishamainai, niig aents aidauk etegka idaitsuk ashí betek kuitamnai, nuigtushkam wait anenjugi tusa akiamkesh amaitsui.

<sup>18</sup> Niig bitaik aidau, waje aidau wait anentau asa kuitamui, tuja nuigtushkam tikich nugkanmaya aidau atum batsatbaunum pujuina nunashkam aneau asa, yutain, nugkutajai suwawai.



<sup>19</sup> Nuadui atumek aents tikich nugkanmaya aina nunú aneetajum, wagki atumshakam egiptunmayachuitkujum Egipto nugkanum batsamajakuitjume.

<sup>20</sup> Tuke Pujuu atumi Apajuígmia duke ememattajum, nuniakjum ima nigki umigkatajum. Tuja atum umiktina nunú dekas takugmek ima Niina daajinig titajum.

<sup>21</sup> Wagki Apajuúk dekas múuntai. Iman asamtai, ima nigki emematuinaji. Niyai atumi Apajuújig, nuniau asa atum aidautigmin ayamjutpak, wainchatai ishainmain aidaun iwainajua nunú wainkauwaitjume.

<sup>22</sup> Atumi apachjum aidau Egipto nugkanum jegawaju aina duka setenta aentsuk aajaku ainawai. Tujash yamaik, Tuke Pujuu atumi Apajuújija nunú shiig kuashat ikauntamak, yaya nayaimpinum ayá ibau kuashat awajtamsaugme.

## 12

*Apajuú makichik nugkan etegkatta ima nuwig nii ememattajum tibau*

<sup>1</sup> “Atumi apachjum aajaku aina nuna nugken Tuke Pujuu atumi Apajuújum amastata nuwi jegá pujusjum, chicham tuke umiktina duka juju ainawai.

<sup>2</sup> “Nunú nugkanmaya aents aidau atum utuajum depetkattajum nuna ememattajii aidau muja aidaunum, nain aidaunum, nuigtu numi múun dukentin aidaun wakentin ayá nujai ashí tsaigkajum utsankatajum.

<sup>3</sup> Tuja dita apajuúmtaijin emematuinak kuntin maa patasa apetai dita najankamu aina duka tsaigkatajum. Nuigtu kaya aidau, numi múun kampuajam tsupikbau aidaun aatus dita emematuina duka ashí tsaigkatajum. Tuja nuigtushkam dakumka najanamu ditá apajuúmtajii aina dushakam dutiksagmek tsaika utsankatajum. Dutikamu asa makichkish atsusti.

<sup>4</sup> Tikich aents aidau ditá apajuúmtaijin emematuinak wajina dutikin ainawa, nujai betekak atumek Tuke Pujuu atumi Apajuújum emematkugmek dutikawaigpa.

<sup>5</sup> “Tuja atum makí makichik wegantu ainajum nuna nugke aina nuwiyen Tuke Pujuu makichik etegkattawai nii pujustinun. Dutikamtai nuwi wejum Apajuú ememattajume.

<sup>6</sup> Nuwi kuntin maajum nuna neje ashí apeakjum Apajuú ememattajume. Tuja nuwi weakjumek, diezmo, tuja atum Apajuú susatasa anagkuamu, tuja atumek anentaimsajum anentang Apajuú suwamu, nuigtu baka uchiji yama nagkamchaku petsakbau, uwija uchiji yama nagkamchaku petsakbau aatus jukijum wetajum.

<sup>7</sup> “Nunika nuwi jegajum Tuke Pujuu atumi Apajuúgmi emtin yutai yuwattagme. Tuja Tuke Pujuu atumi Apajuújum yaimpasmatai atumi ajakjum aidaush, tagkujum aidaush kuashat kawegku asamtai, nunú yuwakjum pataim aidaujui ijunajum shiig aneastinaitjume.

<sup>8</sup> “Tuja Tuke Pujuu makichik nugká etegkatta nuanuig, yamai atum wakegamu takajum duka dutikashtajume.

<sup>9</sup> Tujash Tuke Pujuu atumi Apajuújum nugka pegkeg agkan atum pujustinun amastata nuwig eke jegatsjume.

<sup>10</sup> Tuke Pujuu atumi Apajuújum nugkan amastata nuwi namak Jordán katitki jegajum pujuttajum nuwig, atumi shiwaajum yamai waitkagmaina dutika waitkamak achattagme. Nuadui atumek ishankagtutsuk pujutnaitjume.

<sup>11</sup> Nuniau asamtai wi Apajuú tibaun yamai tajim juka jega pegkejam jegamkatnun Tuke Pujuu atumi Apajuújum nugka etegkatta nuwi betek umiktatjum duka juju ainawai: Apajuú emematku kuntin maa nuna neje ashí apeamu, diezmo aidau, tuja Tuke Pujuu susatjai tusa etegjamu aidau aatus.

<sup>12</sup> Nunú umiakjum Tuke Pujuu atumi Apajuúgmia nuna emtin atumi uchijum aidaujui, inakem aidaujui, Levi wegantu aidau nugkenchau atumjai batsata nujai ijunajum shiig aneakjum dakujustajum.

<sup>13</sup> “Kuitamankatajum, tikich yantamnum yujasjum Apajuú emematji tusajum kuntin maa apé yujaijum.

<sup>14</sup> Duka nunitsuk Apajuú atum wegantu aina nuna nugkenian makichik etegkatta nuwi, wi yamai atumi tajim duka dutikattagme.

<sup>15</sup> Untsu atumi yaaktajin pujusjum neje yuwatag tusa wakegakjumek, kuntin atumdau aina nunú maajum japa nejejai betek yumainaitjume. Apajuú atum aidautigmin kuntin ikamian, nuniachkush tagkumtai aidaun amastata duka sacerdote Apajuúin sega pegkemtijumtai yuwatjai tusajum dakatsuk, pegkemtikachbau akugmesh, atum wakegakjumek maajum yuwatajum.

<sup>16</sup> Untsu kuntinu numpe aina duka yuwawaigpajum, ayatak yumi ukaja ajaptayama dutika ajapatajum.

<sup>17</sup> “Untsu trigo, vino, aceite aina nuwiya diezmo Apajúi susatin jukimu aina duka atumi yaaktagmin pujusjume yuwawaigpajum, nuigtushkam baka aidau, uwig aidau yama nagkamchaku petsakbau aina dushakam yuwawaigpajum. Tuja Apajúi anagkuamu aidau nuniachkush Apajúin anentag susatjai timau aina atumi yaaktagmin pujusjume dushakam yuwawaigpajum.

<sup>18</sup> Utsu Tuke Pujuu atumi Apajújum nugka etegkatta nuwi niina emtin atumi uchijum aidaujai, inakem aidaujai, Leví wegantu atumjai batsata nujai aatus ijunjajum nunú yuwattajume. Tuja Apajúi yaimpasmatai atumi ajakjum aidaush, tagkujum aidaush kuashat kawegku asamtai, shiig aneasjum dakujustajum.

<sup>19</sup> Apajúi nugkan amastata nuwi batsamsagmesh, Leví wegantu aidau makichkish kajimatki idaisaigpajum.

<sup>20</sup> “Tuke Pujuu atumi Apajújum nugka muuntan amastinaitjime tusa tujabiwa nuna imatiksag amasmatai pujusjum, neje yuwatag tusa wakegakjumek, puyatjutsuk atum wakegamu yuwatajum.

<sup>21</sup> Tuja Tuke Pujuu atumi Apajújum emematku ijuntai atinun nii nugkan etegkatta nunú atushtaitkuig, atumdau baka aidau, uwig aidau, Apajúi amasbau aina duka atum batsatbaunmak maajum nuwig pujusjum, wi atumin timajim dutiksagmek atum wakegamu yuwatajum.

<sup>22</sup> Sacerdote Apajúin sega pegkeemtijumtai yuwatjai tusajum dakatsuk, dutikachbau akugmesh japa neje yumaina dutiksagmek yuwattagme.

<sup>23</sup> Utsu kuntinu numpe aina duka makichkish yuwawaigpajum, wagki numpanum pujut au asamtai. Nunin asamtai, pujuta duka nejejai apatkaik yumait sui.

<sup>24</sup> Nuadui yumi nugka ukaja ajaptayama dutika ukaja ajapatajum.

<sup>25</sup> Nunú numpa yutsuk idaikugmek, Apajúi emtin pegkeg takau asajum, atumi uchijum aidaujai shiig pujustinaitjume.

<sup>26</sup> “Tuja Apajúin anentag susatjai tusa anentaimtugbau aina nunú, nii susatin anagkuamu aina nujai jukijum Apajúi emematku ijuntai etegkamua nuwi ejegatajum.

<sup>27</sup> Dutika ejegajum nuwi kuntin maajum nuna neje altarnum pataijum ashí apeakjum Apajúi ememattajum. Kuntin aidaun numpega duka altar ukatkatajum. Utsu nuna nejeja duka yuwatajum.

<sup>28</sup> “iWi atumin inajim nunú shiig antukjum betek umiktajum, nunú nuniakjum Apajúi emtin pegkeg takau asajum, atumi uchijum aidaujai shiig pujusminjum!” tiuwai.

### *Dakumka najanamu aina nunú emematigpajum tibau*

<sup>29</sup> Moisés Israel aents aidaun ataktu chichajak: “Tuke Pujuu atumi Apajújum nugkan amastata nuwiya aents aidaun ijina nugkan amasmatai jegajum pujusjumes,

<sup>30</sup> nuwiya aents aidau ditá apajúmtajjin wajuk emematin ainawa nunú dekatag tusagmek jatume makichkish inima yujaigpajum! Nuní yujasjum atumshakam nunú emematijum.

<sup>31</sup> Tikich aidau apajúi emematji tusag dakumak najanawag emematuina dutikagmek Tuke Pujuu atumi Apajújiya duka emematigpa, wagki nunin aina duka ditá apajúmtajjin emematuinak, ditá uchiji aidaun mawag jinum apen ainawai. Nunú dutikamua duka Apajúi diismak shiig pegkegchauwai.

<sup>32</sup> “Wi juna tajim duka atume nuwi ekekjumkesh ematsuk, tuja nuigtush esakajumkesh emegkautsuk, betek umiktajum”, tiuwai.

## 13

<sup>1</sup> “Namputchawame atum ainajum anuiya makichik aentskesh Apajúi chichamen etsegjai tusa kajanmayan dekau wekagas chichagtamak: ‘Wika dekajai wainchatai aidau atak nagkaemagtata nunak’ tusa tujabauwa,

<sup>2</sup> nunú betek imaanisag umintai chichagtamak: ‘Atumi wainchatai, tikich apajúi aina nunú emematni’, tusa tujamainakuish,

<sup>3</sup> duka antugkaigpajum. Wagki nunak Tuke Pujuu atumi Apajújiya nunú, dekas minash ashí ditá anentaijijai, wakanijai anentuinawash tusa dekapjamsatatus dutijamawagatatu.

<sup>4</sup> Tuke Pujuu atumi Apajújiya duke nemagkujum ajaantusjum diitajum. Nuniakjum chicham umiktajum tusa tujamauwa nunú betek umigkatajum. Niina chichame antugkajum umigkatajum, nuniakjum ima niyaig sumitkau atajum.

<sup>5</sup> Tuja nunú aents Apajúi chichamen etsegjai tusa, kajanmayan dekau wekaga duka maatajum, wagki atum Egipto nugkanum waitkam batsatutigmin Tuke Pujuu atumi Apajújum agkanmitkagmawajua nujai shiwagmitkagmatatus wakegau asamtai. Nunú aentsua duka Tuke Pujuu atumi Apajújum chicham umiktajum tujamauwa nuna

datumtijamatag tiuwai. Nunin asamtai nunú aents pegkegchau aidau atumjai batsata duka ijina emegkagtajum.

<sup>6</sup> “Amina yatsumkesh, amina uchigmekesh, nawanjumkesh, atsa amina nuwem aneetaigmekesh, nuniachkush amina shiig kumpagmekesh wakenmataik chichagtamak: ‘Apajuímtai tikich aidau ame wainchatain, tuja amina apakesh wainajakchamun emematmi’ tusa,

<sup>7</sup> nuwiya aents aina nuna apajuímtaiji aidau atum pujamunum tikiju, nuniachkush atushat ashí tikich nugka aidaunmash ayá nuninun pachis wakenmataik tujamainakui, <sup>8</sup> nunú antugkajum umigkaigpajum. Duka makichkish wait anenjaigpajum. Tuja waittsai tusagmesh puyatjukaigpajum, nuigtush uukaigpajum.

<sup>9</sup> Duka dutiktsuk maatajum. Tuja dekatkauk, amea kayai tukua tukuakua maattame. Dutikawamin tikich aidaushkam dutiksag maawagtatui.

<sup>10</sup> Apajuí Egipto nugkanum inaku waitkatai batsatutigmin jigmajajua nujai datumtain awagtamkau asamtai, duka kayai tukua tukuakuajum maatajum.

<sup>11</sup> “Nunú dutika ajumin ashí Israel aents aidauk nuna dekawag ishamkagtatui, nunikag ataktu awagkig nunin pegkegchau aina nunak takaschagtatui!”

## 18

*Profeta Moisésjai betek atinun Apajuí etegkattawai tibau*

<sup>14</sup> Moisés Israel aents aidaun chichajak:

“Atum nugka jukittajum nuwiya aents aina duka anentaimesa atak atinun dekajai tinu aina nuna antuju yujau ainawai. Tujash atumnak Apajuík nuninun takasainum tusa dakitawai.

<sup>15</sup> Nuadui Tuke Pujuu atumi Apajuíjiya nunú atum wegantu ainajum nuwiyan makichik profeta witag imajun etegkattawai. Dutikamtai nunú umigkattagme.

<sup>16</sup> Atum aidaatijum muja Horebnum ijunja batsamsajum Tuke Pujuu segaakjum: ‘Tuke Pujuu iina Apajuíji ataktu chichaakui antutak ishamaji, nuigtushkam jii kega ibau waitash dakitaji jinawaig tuidau asa’ tuyugme.

<sup>17</sup> Tusa tajumin Tuke Pujuu mina chichagtak: ‘Dita tuina duka dekas pegkejai.

<sup>18</sup> “ ‘Wi dita aina nuwiyan makichik mina chichamjun etsejin amejai betekan dita wegantunmayan etegkattajai. Dutikan wiki nii chichaktinnak jintintuattajai. Nuadui wi tabaun juki etsegtatui.

<sup>19</sup> Tuja nuna chichamen antugkachaju aidaunak wi suwimkan susattajai.

<sup>20</sup> “ ‘Tuja chichama etsejin wi inagchamaitak, wainak mina daajun pachis chichaushkam, mantamnattawai. Tuja tikich apajuímtai aina nuna daajin wegagas chichaman etsejushkam nunisag mantamnattawai.’

<sup>21</sup> “Atum anentaimesajum: ‘Tujash dekas Tuke Pujuu tibaunash etseja tusaish ¿wajak dekamainaita?’ tusa takugmek juju dekatatin atajum.

<sup>22</sup> Nunú wegagas atak atinun etseggatta nunú betek uminchakuig, dekas Tuke Pujuu awemachmawaitkumpap ememak tuu wekaewa tusajum dekattagme. Nuadui nunú aina duka ishamkaigpajum”, tiuwai.

## 19

*Waita etsejin aidau chicham umigkamu*

<sup>15</sup> “Makichik aents wi wainkamjai takuig dekaskeapi tiigpajum. Untsu jimagkesh, nuniachkush kampatumkesh, ii pegkegchaun takau wainkamji tusa tuinakui, nuadui nunú aents pegkegchau takamsauwa duka suwimak sumainaitjume.

<sup>16</sup> “Makichik aents wait wegagas, tikichin chichajak: ‘Juju aents pegkegchaun takase’ tusa tsanumjakuig,

<sup>17</sup> duka mai jukijum aak Apajuíjai chichatainum sacerdote aidau, apu chichama epegkin aidau aatus batsata nuwi ejegatajum.

<sup>18</sup> Dutika ajumin, chichama epegkin aidau emamkemas shiig dekajuawagtatui. Dutika dekajam dekaskenum jegachmataig,

<sup>19</sup> tsanumjuja ai suwimka susatnume tukama tsanumjauwa nunú nigki suwimkanak jukittawai. Aatsa dutikakjum aents pegkegchau aidau atumjai batsata duka ijina emegkagtajum.

<sup>20</sup> Nuna dekaawag tikich aidaushkam ishamainak tsanumat pegkegchau aina nunak idaisagtatui.

<sup>21</sup> Nunú aents aina duka atumek wait anenjaigpajum. Aents magkagtau atumshakam dutiksagmek maatajum. Aents tikichi jii emestauk atumshakam dutiksagmek emestugtajum. Aents tikichi naín emestauk atumshakam dutiksagmek emestugtajum. Aents

tikichi uwejen tsupijuk atumshakam dutiksagmek tsupigkatajum. Aents tikichi nawen tsupijuk atumshakam dutiksagmek tsupigkatajum” tawai Apajui.

## 24

*Nuwa ajapet pachisa chicham umikbau*

<sup>1</sup> “Makichik aents nuwena pujau niina nuwe shiig pujachbaun dekajua ajapatag takug, ajapdayatag tusa umitain papii umika nuwen susa idaimainai.

<sup>2</sup> “Dutika ajapamak tikich aentsjai aishinmainai.

<sup>3</sup> Tuja tikich aents nuna juki pujau dakitak ajapatag takug, dakitajai tusa, papiin umika susa idaimainai. Untsu nunú aishi jakamtaig,

<sup>4</sup> yama nagkamchak nuwatkauiwa duka ataktu awagkig nuwatmaitsui, wagki nuwa pegkegmachu asamtai. Nunú nuniamaa nunak Tuke Pujuu dakitawai. Nuniaw asamtai atum aidautigmek nuninuk takasaigpajum. Atum nuniakjum Tuke Pujuu atumi Apajuijum nugka amastata nunú pegkegchau emaijum.”

*Kuashat chicham umiktin aidau*

<sup>5</sup> “Makichik aents yama nuwena pujauk maaniamunmak wechattawai. Nuigtushkam tikich takat aina nunashkam takatsuk makichik mijan pujustatui. Aatus niina nuwejai shiig aneas, yainiak shiig agkan niina jeen pujuttawai.

<sup>6</sup> “Atumin diwimjamkatag takuish, trigo chimpia dekeetai kaya ajutjama nunú sujusta, akigkumin awagtuktagme tusagmek jujukigpajum. Nunú dutikakjumek niina pujutji atanmaina\* numamtin asamtai.

<sup>7</sup> “Makichik aents Israel aentskesh nii wegantunak pempeentuki achika juki, niina inaku waitkataiji ematatus, nuniachkush tikich nugkanum sujuktatus wekagu wainkugmek, duka maatajum. Dutikajum aents nuninun takau aidau atumjai batsata duka ijina emegkagtajum.

<sup>8</sup> “Tuja lepra achiimakjum jakjumek, sacerdote Leví wegantu aidau wajinjutpatig nunú betek umiktajum. Nuniakjum wi atum umiktinun jintintuawaitjim duka ashí betek umiktajum.

<sup>9</sup> Atum Egipto nugkanum waitkam batsatutijum jijnajum shimagmin, jintá Tuke Pujuu atumi Apajuijum Marían suwimka suwak itugkauwaita nunú aneaku atajum: Niig Apajuijai shiwagmagau asa, suwimkan juwak lepran achiimakui.

<sup>10</sup> “Tuja atum ijutkamunmaya kuichik tsagkatkugmesh, wi kuichkin tsagkatjam nunú akigkumin awagtuktagme tusajum niina jeen wayagmek niina wajijig jujukigpajum.

<sup>11</sup> Ayatak agá wajasjum dakastajum, nuniagmin nii juki amastí.

<sup>12</sup> “Tuja aents ujudauch kuichik tsagkatjukta tusa niina jáanchjin amastata duka kashin awagtuktagme tusagmek emetjuawaigpa.

<sup>13</sup> Duka dutiktsuk nunú tsawantaik etsa akagai wamak awagtuktajum. Dutikam nuna asepak kanagti. Nuniak nii Apajuiin segatjamtatui atumin yaimpakti tusa, aatsa atum dutikamua nunú Apajuiin shiig awagbau asamtai.

<sup>14</sup> “Aents ujudauch aidau, atumi pataim aidaukesh, nuniachkush tikich nugkanmaya atumi yaaktaji aina nuwi pujuidauch wainka akitsuk takamtikkujum waitkasaigpa.

<sup>15</sup> Duka dutiktsuk nunú tsawantaik nii takasbaujiniag akiktajum, wagki niig ujudauch asa sumak yuwatatus atumawai. Untsu nunú betek umiatsjuminig, nii Tuke Pujuu segattawai atumin suwimkan amastinme tusa.

<sup>16</sup> “Múun uchigtin aina duka, niina uchiji aidau pegkegchau takamsamujinig maamak amaitsui, tuja uchi aina dushakam ditá apaji aidau pegkegchau takamsamujinig maamak amaitsui, ayatak maki makichik dita pegkegchau takasbaujin maam agtatui.

<sup>17</sup> “Bitaik aidaush, tikich nugkanmaya aidaush wainka waitkasaigpajum. Duka dutiktsuk dita atumainakuig yaigtajum.

“Tuja waje kuichik tsagkatkugmesh, akigkumin awagtuktagme tusagmek niina jáanchjig jujukigpajum.

<sup>18</sup> “Atum Egipto nugkanum makichkish ayamjumainin chaw inaku waitkatai batsatutigmin Tuke Pujuu atumi Apajuijum jiiipajua nunú kajimatssuk aneaku atajum. Nuadui wi atum aidautigminak juju ashí umiktajum tusan tajime.

<sup>19</sup> “Tuja trigo juwamanum makichik trigo jigkamu kajimatkgimesh waketjukmek jujukigpajum. Duka idaisatajum aents tikich nugkanmaya aidau, waje aidau, bitaik aidau nuna juki yuwatneme. Aatsa dutikagmin Tuke Pujuu atumi Apajuijum takatjumin pegkegnum yumigtamsattawai.

\* 24:6 Pujutji atanmaina numamtin tawa nunak nunú jujukim dekegka pagka najana yutsuk nujantai jamaina nuna taku tawai.

<sup>20</sup> Olivon neje juwaakjumes, kanawen ampinjau juwaktata duka waketjukmek juukaigpajum. Duka idaisatajum aents tikich nugkanmaya aidau, waje aidau, bitaik aidau nuna juuká yuwatnume.

<sup>21</sup> Uva ajakbaunmaya nuna neje uva juwaakjumes, ampinjau juwaktata duka waketjukmek juukaigpajum. Duka idaisatajum aents tikich nugkanmaya aidau, waje aidau, bitaik aidau nuna juuká yuwatnume.

<sup>22</sup> Wagki atumshakam Egipto nugkanum inaku waitkatai batsamajakuitjum nunú aneaku atajum. Nuadui wí atum aidautigminak juju chicham ashí umiktajum tusan tajime.”

## 25

<sup>1</sup> “Aents utugchatjin diták epegmainchau dekapenakug, chicham epegkeaku ijuntainum suwimka jukiagtatus weagatui, nunikmatai chichama epegkin shiig dekajua, yakita utugchatjinnush nuna suwimka suwak tikichnak akupkattawai.

<sup>2</sup> Aents utugchatji aja nunú asutnati takug, chichama epegkin aidau nugká aepsatajum tusa tima aepsagmatai, nii pegkegchou takamsamujin diijus suwimka suwinak asutiawagatui.

<sup>3</sup> Tujash nunú aents utugchatji aja nunak cuarentaya nuna ewaekag asutiachagatui, wagki imatika asutiamak suwimak shiig múun asamtai, atumi pataim datsan diimain asajum.

<sup>4</sup> “Tuja toro trigon dajag akaak wekaeta nuna wenig jigkatuawaigpa yuwati.”

*Aents nuweena pujau jakamtaish nuna yachi aidaush wajenash itugmain ainawa nunú pachisa chicham umikbau*

<sup>5</sup> Jimag uchi akiamu makichik nugkanmak pujuidau niina yachi nuweena uchin akiitsuk jakamtaig, wajea duka tikich aentsjaig aishinmait sui, ima niina wajejiya duke niinak nuwatmainai. Dutika nuwatuk uchin akia, niina yachi uchijiya nunin emattawai.

<sup>6</sup> Nuadui yama nagkamchak nuwa uchi aishmagkun uchigmaktata nunak niina yachi daaji aajakua nuna adaikattawai, wagki nuna daaji Israel aents aidanum megkaekai tau asa.

<sup>7</sup> Untsu nuwatkashtatjame tusa niina wajeji dakitamak, chicham epegkeaku ijuntainum jeganta Israel aents aidan apuji aidan chichajak: “Mina wajejuk niina yachi daajiya nunú Israel aents aidanum megkaekai tutan dakitawai. Nuniau asa mina nuwatjutan dakitawai”, tumainai.

<sup>8</sup> Tusa timatai apu aidau nuna untsukag, nijai chichamain ainawai.

Untsu tusa tama, nii chichaak: “Wika niinak nuwatkashtatjai”, tusa tutaik,

<sup>9</sup> Israel aents aidan apuji aidau wainbaunum, nuwa niina wajejin jegantun sapat wegamakbaujin makichik jujuktatui, dutika yapinum usukia chichajak: “¡Aaja jutiktaya aents wajejin juki niina yachi uchiji atinun akiitan dakitauk!” titatui.

<sup>10</sup> Dutikamu asamtai nuna patayi niina jeen batsata duka Israel aents aidanmak “sapatji atankimu” tutai agtinai.

## 26

*Ajak ajakmamunmaya yama nagkamchaku juuktatjum nunú Apajuí anentag susatajum tibau*

<sup>1</sup> Tuke Pujuu atumi Apajuíjum nugka atumdau atinun amasagtata nuwi jegajum pujusjum,

<sup>2</sup> ajak ajakmattajum nunú nejekmatai, yama nagkamchaku juuktatjum nunú makichik chagkinnum chimpia jukijum Apajuí ememattai atinun nii etegkauwa nuwi ejegatajum.

<sup>3</sup> Dutikajum sacerdote puja nunú chichagkujum: “Wi mina Apajuíju emtin titatag nuna ashí tikich aidaush antuktinme: wika yamaik mina apachug aajaku aina nuna Tuke Pujuu Apajuí chichajak: Ame wegantu aidan nugka susatnaitjai tusa anagkuawa nuwi taa pujajai”, titatui.

<sup>4</sup> Tusa tiyamin nunú chagkinnum aimka ejeentamun sacerdote juki altarnum ejeenta nuna niimtika apusattawai.

<sup>5</sup> Dutikamtaí Tuke Pujuu amina Apajuími emtin ame chichaakum:

“Mina apachug arameo aents aajaku aina duka kuashtachu, nuigtush nugkenchau yujajaku ainawai. Nunik yuja yujakua Egipto nugkanum shiyakag nuwi batsamsajui. Nuwi kuashat tsawan batsamas shiig kuashat yujakag senchigtin wajasajui.

<sup>6</sup> Tujash egiptunmaya aents aidau shiig kuashat waitkagmasu ainawai. Dutijamainak wainka inatai etamiag waitkagmasajui.

<sup>7</sup> Imatijamainaku Tuke Pujuu iina apachji aajaku aina nuna Apajuji yaimpakti tusa segayaji. Nunú ii sumamun antugtamak, nuigtushkam inapainaku takainaku kuashat waituinamun waipaku asa,

<sup>8</sup> niina senchijjai ishamain wainchatai aidaun iwainag, Egipto nugkanum batsatutin jiiipagmayi.

<sup>9</sup> Dutika jiiipag jujamki imajui itagmauwai. Dutika itagma juju nugka pegkeg ajak shiig tsapaa imajun amase.

<sup>10</sup> Nunú nugkan Tuke Pujuu Apajuí sújusua nuwi ajakmamunmayan yama nagkamchaku juukbaun juki itaajai”, titatme.

Tusa tamawaik chagkinnun ajak juuka aimkamu pujau jukim altarnum ejeentam apusattame. Dutikam nuwi Tuke Pujuu amina Apajuigmi emtin tikishmaja pujustatme nii emematkum.

<sup>11</sup> Nunika emematim, amina pataim aidaujai, Tuke Pujuu amina Apajuíjum atumin amasbau aina nunú anentaimtusam shiig aneakum jiiistamata. Nuniamin Leví aents aidau, tuja aents tikich nugkanmaya atumjai batsata dushakam, atumjai ijunag jiiistamatnume.

*Ame takasa juwamunmaya Tuke Pujuu susatin diezmo akankatajum tibaw*

<sup>12</sup> “Mijan kampatuma nunú jegamunum Tuke Pujuu susatin diezmo jukitajum tusa timauwa duka, ashí ame ajak ajakmamua nuwiya akanja umikta. Dutikam Leví wegantu aidau, aents tikich nugkanmaya aidau atumjai batsatu, tuja bitaik aidau, waje aidau aatus atumi yaaktaji aidaunum batsamas, dita wakegamun yuwatnume tusam ashí susata.

<sup>13</sup> Dutikam Tuke Pujuu amina Apajuígmí emtin chichaakum: ‘Wi ajakmamu aina nuwiya juuka iijumjamunmayan, diezmo Tuke Pujuu susatnun akankajai. Nuna Leví wegantu aidaun, tikich nugkanmaya jutijai batsata nuna, bitaik aidaun, waje aidaun aatsan ashí tinamkajai, ame umikta tujutbauwa nunak ewaetsuk, nuigtush makichkish kajimattsuk.

<sup>14</sup> Tuja nunú diezmo akankamua nunak jakamunum buutku pujaknush, pegkegchau wajasa pujusnukesh, makichkish yuwachmajai. Tuja jakau aina nunakesh anagkuachmajai. Tuke Pujuu mina Apajuíjuh, wika ame umikta tujutbaunak betek ashí umikjai.

<sup>15</sup> Amek nayaimpinum amina pujutaijum pegkegma nuwi pujusam, amina aentsjum Israel aents aidau ame nugka pegkeg shiig ajak tsapau susamua nuwi batsata nunú pegkegnun yumigkiakum, iina apachji aajaku aina nunú anagkuawaitam dutiksamak kuitamkagtukta’ titatme”, tiuwai.

*Israel aents aidauk Apajuí aentsji ainawai*

<sup>16</sup> “Tuke Pujuu atumi Apajuíjyia nunú chicham umiktin aina nuna umiktajum tusa yamai tujamainawai. Nunú betek atumi anentaimjai, wakanmijai umiktajum.

<sup>17</sup> Apajuik dekas iina Apajuíjyiai. Nuadui atum chichaakjum: ‘Nii tujabauwa duka betek umikagmi, nuniaku niina chichame umiktin agagbauwa dushakam tuke umiktin agmi’, tsajum yamai tiugme.

<sup>18</sup> Nuadui Tuke Pujuuuskam nii anagtamauwa nunak imatiksag yamai chichaak: ‘Israel aents aidauk tikichdauk amaitsui, ima mina aentsjuk ainawai’, tujamui. Nuadui niina chichame umiktin agagbauwa duka betek umiktajum

<sup>19</sup> Tuja atum ima nigki umigkugmek, tikich aents aidau nii najankamu batsata nuna nagkaesau shiig kuashat, senchigtin, ajaantusa diitai atatjume, tusa Tuke Pujuu atumi Apajuíjum tujamui.”

## 30

*Apajuí tsagkugtug pegkegnun yumigtugti tuinakush wajukmaina ainawa nunú pachisa ujakbau*

<sup>1</sup> Moisés Israel aents aidaun chichajak: “Atum Tuke Pujuu atumi Apajuíjum umigjuminig, nii pegkegnun yumigtamsagtinai. Untsu atum nii umigtsugminig, pegkegchaunum yumigtamjagtatui. Tuja atum betek umigtsugminig, atumi nugken ukumtijamki atushat tikich nugkanum ajapjamawagtatui. Dutijamawagmatai nuwi pujusjumes, wi yaunchuk tibaijim nunú yamai tajim nujai adeagün atajum. Nuniakjum,

<sup>2</sup> pegkegchau takatak idaikujum wi tajim dutiksagmek, atum aidautijum uchijum aidaujai betek ataktu Tuke Pujuu atumi anentaimjai, wakanmijai umigkatajum.

<sup>3</sup> Nuniagmin Tuke Pujuu atumi Apajuíjyia nunú suwimka amamainun wait anenjamag pegkegnun yaimpakagtinai. Nuadui Apajuí atumin suwimkan amaak, shiwag depetuk

yajuaktinme tibau umintai, depetamak yajupakagmatai, tikich nugkanum batsatutigminash Tuke Pujuu awagtamkiag nii nugkan amasua nuwi itagmawagtinai.

<sup>4</sup> Tuja atumi shiwaajum aidau depetamak yajupakagmatai pampagjum, tikich nugkanum shiig atushat batsatutigminash, Tuke Pujuu atumi Apajujiya nunú yajupak,

<sup>5</sup> atumi apachjum batsamajakua nuwi ataktu awagtamki itagmawagtinai. Dutijamawagmatai atum yaunchuk batsamajakuitjum nuwig batsamsatnaitjume. Nuwi batsamsajum Tuke Pujuu yaimpasmatai, takatjumin emkatnaitjume. Nuniakjum atumi apachjum uchigtin aajaku aina nuna nagkaesau kuashat uchigtin atinaitjume.

<sup>6</sup> Tuke Pujuu atumi Apajuujum atumjai, tuja atum wegantu agtinjai chichaman umikua nunú kajimattsuk aneaku atajum. Nuniakjum atumi anentaimijai, wakanmijai Apajuí aneau asajum iwaku pujusminjum.

<sup>7</sup> “Tuja atumi shiwaajum aidau kajegtamainak, aintamiagtina nunú waittsatnume tusa Tuke Pujuu atumi Apajuujum ditan pegkegchaunum yumigjatnai.

<sup>8</sup> Dutikantai atumek Tuke Pujuuwai ataktu wakitkijum nii umigkatnaitjume. Nuniakjum chicham umiktin agagbauwa nuna wi yamai umiktajum tajim nunú ashí umiktin atajum.

<sup>9</sup> Nuniagmin Apajuí atumi takatjumnash, uchigminash, tagku tsakapatnumash, ajak ajakma juutnumash kuashat ikauntugmaktinai. Nuna Tuke Pujuu atumi Apajuujum diisa shiig aneastinai, wagki yaunchuk atumi apachjum aajaku aina nuna yaigkua dutiksag atumnashkam yaimpau asa.

<sup>10</sup> Aatus shiig anenjusti takugmek, Tuke Pujuu atumi Apajuujum nemagkujum niina chichame umiktin papiinum agagbauwa nunú umiktajum. Nunú umiakjum atumi anentaimijai, wakanmijai ima nigki ememattajum.

<sup>11</sup> “Juju chicham umiktin agagbauwa juna yamai wi amaajim duka, atuminig imanikag utugchatchauwai. Nuniaú asamtai, shiig antuka umimainchaukesh atsui, wagki atushtakesh achau asa.

<sup>12</sup> Tuja chicham umiktin agagbauwa duka nayaimpinmakesh atsui. Nuadui atumek: ‘¿Yaki nayaimpinum waka, chicham umiktin agagbauwa nuna juki itaa ujapakui antuka umikag?’ tumaitsugme.

<sup>13</sup> Nuniachkush nayantsa amainigkish atsui. Atum chichaakjum: ‘¿Yaki nayantsa amain chicham umiktin agagbau awa nuna katituk juki itaa ujapakui antuka umikag?’ tumaitsugme.

<sup>14</sup> Chicham umiktin agagbauwa duka atumin awai. Nuadui wi atumin umiktajum tiuwaitjim nunú antukjum unuimaju asajum, utugchat akuish betek umiktajum.

<sup>15</sup> “Tuja yamai atum etegkatajum tuu wakegagme nunú. Shiig pujutak wakegajum, atsa waitiamua duka wakegajum. Iwaku pujuta duka wakegajum, atsa jaka megkaetak wakegajum.

<sup>16</sup> Wi yamai atum aidautigmin umiktajum tusan tajim duka Tuke Pujuu atumi Apajuujum aneau asajum betek umiakjum, nii nemagkujum chicham umiktajum tusa agagbauwa nunú betek umiakjumek, iwaaku pujusjum, uchi uyujkattagme. Nuigtushkam Tuke Pujuu atumi Apajuujum pegkegnum yumigtamsagtinai, nii nugka amasua nuwi shiig pujustinme tusa.

<sup>17</sup> Utsu atum nunú ashí umitsuk idaikujum wainka apajuimtai aidau tikishmatjajum emematu yujakjumek,

<sup>18</sup> namak Jordán katitkajum Apajuí nugkan amastata nuwi jegagmesh, kuashat tsawan pujutsuk jinaatin ainagme, wi tajim duka ewaetsuk.

<sup>19</sup> “Wi atumin chichagkun: ‘Shiig pujutak wakegajum, atsa waitiamua duka wakegajum, tuja iwaku pujutak wakegajum, atsa jaka megkaetak wakegajum, nunú atum etegkatajum’ timajim nunú tuké uminkatnun yamai wi taja nunak nayaim nugkajai antamanum tajime. Duka dekass etegkatajum iwaku pujuta nunú, atum wegantu agtina dushakam iwaku pujustin atinme.

<sup>20</sup> Tuke Pujuu atumi Apajujiya nunú ima aneetajum. Nuniakjum nii umigkatajum. Tuja nii tabauwa nunú betek umigkatajum. Nunú betek umiakjumek, atumi apachjum Abraham, Isaac, Jacob aatus aajaku aina nuna Tuke Pujuu atumi Apajuujum nugkan amastinaitjime tusa anagkuawa nuwi jegajum kuashat tsawan pujustinaitjume”, tiuwai.

## 31

*Israel aents aidau apuji atin yamajam adaikamu  
(Nm. 27.12-23)*

<sup>1</sup> Moisés Israel aents aidau ataktu chichajak, juna aatus tiuwai:

<sup>2</sup> “Wika yamaik ciento veinte mijan ejelai, nuniku asan atushat wetag takunush kakaumainchau dekaapejai. Nuigtushkam minak Tuke Pujuu chichagtak, amek namak Jordágkak katitkashtatme tusa tujutmayi.

<sup>3</sup> Tujash atumek Tuke Pujuu atumi Apajuújiya nunú eemak wegak uyuuntamsantai wetatjume. Tuja atum shimamunum shiwaajum ayaunashkam nii depetuk ijinattawai. Dutikamtai dita nugke aina duka atum jukittagme. Atumnak Josué apu wajasu asa, nii yajupak etamtatui Tuke Pujuu atumi Apajuújum tibauwa nunak dutiksag.

<sup>4</sup> “Atumi shiwaajum aidaunak Tuke Pujuu yaunchuk amorreo aents aidau apuji, Sihón, Og, aatus ashí dita aentsjijai ijinauwa dutiksag ijinattawai.

<sup>5</sup> Nunú aents aina nuna depetkatnume tusa nii tujamatai depeteakjume, wi dutikatajum tusan tajim duka dutiksagmek umiktajum.

<sup>6</sup> Mijamtsuk wajuu wajastajum. Atumi shiwaajum aina nujai maaniakjumesish ishankagtukaigpa, wagki Tuke Pujuu atumi Apajuújum atumnak kuitamjamui, nuniau asa ima atumnakek kajimatjamkig idaitamsashtatui”, tiuwai.

<sup>7</sup> Nuna tusa Josué untsuka Israel aents aidau antuinamunum chichajak:

“Amek mijamtsuk wajuu wajasta, ametme juju aents aina nunú yajuakam Tuke Pujuu nugka amastinaitjime tusa amina apachjum aajaku aina nuna anagkuawa nuwi ejegatnumek. Nuadui Israel aents aina duka ame yajuakam nunú nugka nuwig utsattame.

<sup>8</sup> Tuke Pujuu aminak uyuuntamak, nigki kuitamjamkattawai. Nuniau asa ima aminakek kajimatjamkig idaitamsashtatui. Nuadui amek ishankagtukaipa tuja sapigmatash sapigmakaipa”, tiuwai.

*Diwimdaikamu aidau tsagkugdaitai mijan sieteya nunú jegakui chicham umiktin agagbau ausatin*

<sup>9</sup> Juju chicham umiktin aina nunak Moisés agajui. Tuja sacerdote Levi wegantu aidau Tuke Pujuu chichame umiktin agagbau egkeamun arcan yanakiag shimujakajua nuna ashí Israel aents aidau dita apuji aidaujai kuitamkatnume tusa susauwai.

<sup>10</sup> Nuna susa chichajak:

“Mijan sieteya nunú diwimdaikamu aidau tsagkugdaitai jegatta duwi, ashí Israel aents aidautijum ijunjajum tsawan numi kanawe tsupija aakmaja batsamsamua nunú tsawantin jüstamatajum.

<sup>11</sup> Nuadui ashí Israel aents aidau Apajuújai chichatai aak pegkejam carpa aakmakbauwa nuwi tuwakag antuinamunum chicham umiktin agagbauwa nuna ausattawai.

<sup>12</sup> Ashí aents aidau: Aishmag, nuwa, uchi, aents tikich nugkanmaya atumjai batsatu aidaushkam ijunjatnume. Nunikag chicham umiktin agagbauwa nunú ugbaun antukag Tuke Pujuu Apajuú eme anentsa diitan unuimagtinme. Nuninak wajuntu agagbauwaita nuna ashí betek umiktinme.

<sup>13</sup> Atumi uchijum aidau juju chicham umiktina nuna dekachu aidaush antukag, Apajuú nugkan amasagtata nuwi namak Jordán katitkajum batsamsattajum, nuwi batsamsash kajimatssuk Tuke Pujuu Apajuú eme anentsa diitan unuimagtinme”, tiuwai.

*Tuke Pujuu Moisésan inagnak jintintuamu*

<sup>14</sup> Nuna tusa inagnaku ai, Tuke Pujuu Moisésan chichajak: “Ame jakatnuk tsawantak jegawai. Nuniau asamtai Josué untsukam nijai aak pegkejam aakmakbauwa nuwi tantatajum. Nunikagmin wi atum dutikatnun jintintuatjime”, tiuwai.

Tusa tima Moisés Josuéjai aak pegkejam Apajuújai chichatai aakmakbaunum weajui.

<sup>15</sup> Nunik jegawagmatai Tuke Pujuu nuwi yujagminum pachitkau wantintuk, nunú aak pegkejam aakmakbau waitijin wajantun asauwai.

<sup>16</sup> Nuwi Apajuú Moisésan chichajak:

“Ame jakatnuk namput wajaschae. Nunika jakamin juju aents aina duka nugkan jukiagtata nuwi jegawag, nuwa aishin ukuak tikichjai weama numamtk nuwiya aents aidau apajuúmtai aina nuna emematuinak minak kajimatjukia, wi ditajai chichaman umikuitag nunashkam umikchagtinai.

<sup>17</sup> Nunidau asagmatai wishakam senchi kajegkan makichkish puyatjutsuk idaisagtinaitjai. Dutika ai shiig senchi waitu batsatu asa makichik tsawantai chichainak: ‘Ii senchi waituinag duka Tuke Pujuu iina Apajuúji idaitamsa nuadui imanika waituinaji’, tiagtinai.

<sup>18</sup> Nuna tusa tuinakuish, wika ditanak antugtsuk idaisagtinaitjai, wagki pegkegchaun takainak tikich apajuúmtai aidaun ememetiaju asagmatai”, tiuwai.

<sup>19</sup> Nuna tusa Moisésan chichajak: “Juju kantamtaiya nunú yamai agagta. Dutikam Israel aents aidau jintintuata. Nuna unuimajag, kantamainak chicham umiachkugminig, wi suwinka amastinaitjime, tusa tiuwaitag nuna tuke adeagtin atinme.



<sup>20</sup> Wagki wi dita apachji aajaku aina nuna anagkuakun, nugka pegkeg ajak shiig tsapaun amastinaitjime tusa tiuwaitag nuwi yajuakan ejegawaja ai batsamas, shiig yuwawag ejemakag duwekag tikich apajuímtai aidaun emematuinak mina kajimatjukiag, wi ditajai chichaman umikuitag nunak umikchagtinai.

<sup>21</sup> Nunik batsamas kuashat waituinak, juju kantamtainum agagbau chichaak: ‘Atum mina umigtachkugminig tuke suwimkan amastinaitjime’ tiuwaitag nuna adeagtin atinme. Tuja dita wegantu aidaushkam nunú kantamtaiya nunak kajimattsuk kantamtin ainawai. Wi nugka amastajime tusa tiuwaitag nuwi eke ejetsaig, nuwi jegawag dita pegkegchau takastinjinak emtika anentaimtuina nunak wika shiig dekaikai”, tiuwai.

<sup>22</sup> Tusa tima, nunú tsawantaik, Moisés kantamtain agajui. Dutika agag Israel aents aidaun jintintuauwai unuimagtinme tusa.

<sup>23</sup> Tuja Josué Tuke Pujuu juna aatus chichajak: “Mijamtsuk wajiu wajasta, ametme juju aents aina nunú yajuakam wi nugka amastinaitjime tusan anagkuawaitjim nuwi ejegatnumek. Tuja wi aminak kuitamkattagme”, tiuwai.

<sup>24</sup> Tuja chicham umiktin aidaun Moisés papiinum agag ashimak,

<sup>25</sup> sacerdote Levi wegantu aidau Tuke Pujuu chichame umiktin agagbau egketun arcan yanakiag shimujakajua nuna chichajak:

<sup>26</sup> “Juju chicham umiktin agagbauwa nunú jukijum Apajuí chichaman atumjai umikua nunú agagbau egkeamu arca puja nuwi ayauntsa apusatajum. Juju agagbauwa nunú atum Tuke Pujuu atumi Apajuíjum umigchakjum waittsatnaitjum nuna anemtijamjatinai.

<sup>27</sup> Wagki atumek aents antakchau intimkiu ainajum nunak wika shiig dekaikai. Wi atumjai iwaku pujag duikish atumek Tuke Pujuuwai shiwagmaejume. Nunin aidautigmesh ¿wajukatnuk ainagme wi jakamtaish?

<sup>28</sup> “Leví aents aidautijum, Israel aents aidaun apuji aina nunú, tuja nuigtu maki makichik wegantu aina nuna apuji múun aidaujai, ashí untsukjum ijumjatajum. Dutikawagmin wi atum aidautigmin jintintuajim dutiksanuk ditanash shiig ukagatajai. Dutikakun nayaimpin nugkajai pachisan dita antuinamunum dekas uminkatna nuna titajai.

<sup>29</sup> Wagki wi jakamtaig pegkegchaun takainak wi dutikatajum tiuwaitag nuna idaisagtina nunak wika dekaikai. Nuigtush atak tikich tsawan atina duwi Apajuí emtin pegkegchaun taka batsamas Tuke Pujuu kajegka suwimak susam kuashat waittsagtina nunashkam dekaikai”, tiuwai Moisés.

### *Moisés kantamamu*

<sup>30</sup> Nuna tusa Israel aents aidau ashí tuwakag antuinamunum yama nagkamchaku agagbaunum nagkama juna aatus Moisés kantamauwai:

## 32

<sup>1</sup> “¡Nayaimpih, nugkah, wi chichaktatag nunú shiig antuktajum!

<sup>2</sup> Wi jintinkagtamua duka yumijai betek yutugtatu, Mina chichamjuk yumi sajatama nujai betek atatu.

Yumi ujumak yutug chijichin uchupiam nujai betek atatu.

Yumi senchi yutak dupan uchupiam nujai betekai.

<sup>3</sup> Tuke Pujuu daaji pachisan nigka pegkejai, múuntai tusan etsegkatjai.

¡Atumshakam, iina Apajuíjia duka dekas múuntai titajum!

<sup>4</sup> Niyai iina kuitamjamnuk.

Nii takamujiya duka betek uminnai.

Niig Apajuí dekaskenun chichauwai.

Niig pegkegchaunak takachui.

¡Niig pegkegmai,

tuja nuigtush waitjuchui!

<sup>5</sup> “Israel aents aidauwah, atumek pegkegchau ainagme.

Pegkegchau takakjum Apajuí ikajin ainagme.

Nunin asajum Apajuí uchijig amaitsugme.

<sup>6</sup> Tuke Pujuu atumin kuitamjama duwika ¿aan iikuajum?

Atumek yachachu,  
anentainkachu ainagme.  
¿Apajuíchukai atumi apa  
najapauwa nunú?

¡Apajuíyai amina najapa uyujtamak  
senchintijamauwa duka!  
7 Ataktu awagkijum anentaimsatajum,  
nuniakjum adeagtajum  
yaunchuk aajakua nunú.

Tuja atumi apaji aidau, tikich múun aidaujai  
yaunchkesh pujutash wajuku ayi tusajum iniastajum.

8 Apajuí aents aidau nak akanag  
maki makichik chichamtin,  
nugkentin emak batsasui;  
tujash atum Israel aents aidautigminak Apajuí  
makichik nugkanmak ijupag kuitamjamui.  
9 Apajuik Jacopa uchiji wegantunmaya aidautin  
etegtamjauwai niinu agtinun.

10 “Nuadui, uwejush nugka buku, yumi atsau,  
dase umputainum  
batsatjin, nii kuitamjamak jintinjamauwai.  
Dutijamak makichik aents niina jiin shiig kuitamama imatikas kuitamjamkauwai.

11 Apajuik ukukui niina  
nanapen uchijin dukuka  
kuitamama numamtuk iinak kuitamjamnai.  
Apajuik, ukukui niina uchijin kuitamak  
niina nanapen pataja juwama numamtuk  
kuitamjamak ishamainnumian uwemtijamauwai.

12 “Tuke Pujuuwa nunuwai  
iina uyuntamsauwa duka, tikichik atsawai.  
¡Tikich wainka apajuímtai  
aina duka makichikish yaimpakchauwai!

13 Apajuí depetmitkagmak  
jujamki nugka pegkeg ajak shiig tsapau,  
nain aidau sujamsaje.  
Nuwiya dapa yumiji buchignum ayaun  
amasaje uwagtinme tusa.  
Nuwiya ajak aina nunashkam  
amasaje yuwatnume tusa.  
Tuja nugka kuashat kayagkamunum  
olivo ayá nuna aceitejinchakam amasaje.

14 Tuja baka aidau muntsuji  
ijugbau kantentikamu aidau,  
tuja uwija muntsuji ijugbau aidau  
kuashat ajutjamiugme.  
Tuja uwig duwejam aidau,  
uwig tsakat duwejam aidau,  
nuiغتu cabra shiig kuashat Basán nugkanum  
aajakua nuna neje yuuyugme.  
Nuiغتushkam trigo shiig pegkeg yuuyugme,  
niniakjum uva yumiji ijugbau  
kapantu umuyugme.

15 “Tujash Jesurún\* aidautigmek kuashat tagkugtin,  
kuashat ajakjintin wajasjum nunú yuwakjum duwekugme.  
Imanika duweku asajum,  
kuntin uduejam niina ujen winchamtin wajas pempeentuki  
niina kuitamnun tukumama numamtuk

\* 32:15 “Jesurún” tawa nunak “Israel aents aidau shiig anentus adayak” tuu adaikau ainawai.

Apajuí shiwagmawaitjume.  
 Apajuíyai atumi najapauwa duka.  
 Nunin aig atum dakitakjum idaisauwaitjume.  
 Apajuíyai atumin kuitamjamak uwemtijamjauwa duka.  
 Nunin aig atumek kajegkauwaitjume.

<sup>16</sup> Atumek dakumka najanamu  
 aidaun Apajuí dakita nunú  
 emematkujum, Apajuí senchi  
 ikajkauwaitjume.

<sup>17</sup> Nuadui Apajuí emematmaina nunú  
 idaikujum, wainka apajuímtai aina nunú  
 ememattag tusajum  
 kuntin maajum apejakuitjume.  
 Atumi apachjum aajaku aina dukesh  
 wainajakchamu, tuja ememattanakesh  
 emematchaju aina nunú,  
 atumek yama wainmawaik emematjume.

<sup>18</sup> Israel aents aidauwah,  
 atumek atumi Apajuíjum kuitamjamna  
 duka kajimatkiugme.  
 Apajuí pujutan amasua nunú kajimatkiugme.

<sup>19</sup> Nuadui Tuke Pujuu atumnak,  
 niina uchiji nawanji ajuminig idaitamsaje.”

<sup>20</sup> Nuadui Apajuí chichaak:  
 “Atumek aents pegkegchau ainagme.  
 Atumnak kajittsa diimainchau dekapeajime.  
 Nunin asagmin atumnak nuigtuk yaigchattajime.  
 Wajukatagmek nuna dakastajime.

<sup>21</sup> “Atum aidautijum wainka apajuímtai  
 kakakchau, dekachu aina nunú emematkujum  
 mina kajemtijakjum akasmu etagme.

Nuadui Israel aentschau aidau  
 chichagmash makichkish antakchau aina  
 nuna wi yayaakui, atumek  
 kajeakjum waittsattagme.

<sup>22</sup> Mina kajetjua duka jiijai betek kegawai.  
 Iman asa ashí nugka najatamunum kegak  
 nugkanak ajak aidaujai apea emegkaktatui.  
 Nuniak muja aidaunmashkam keettawai.

<sup>23</sup> Wi atum aidautigminak ashí pegkegchau aina  
 nuna ishikattajime waittsatnume tusan.

<sup>24</sup> Dutika ai nujantai, nuigtu tsuweakjum jinattagme.  
 Tuja jata ishamain iyanjamag ijipattawai.  
 Nuigtushkam kuntin kajen aidaun,  
 dapi aidaun ishikattajime.

<sup>25</sup> Atumi uchijum aidauk jintá  
 maa aepeam agtinai.  
 Tuja atumi jeminia aidaushkam  
 senchi sapigmagtinai.  
 Imaaninak uchi tsakat aidau,  
 nuwauch tsakat aidau, múuntuch aidau,  
 uchi muntsu muntsuaku aidaush jinawagtinai.

<sup>26</sup> “Tuja wi anentaimsan, tikich nugkanum  
 dapampaakan utsagtajai, dutika ai  
 dita wegantu aidau megkaejamtai,  
 pachisaish augmatchatai juwaktin ati tusan anentaimsabiajai.

<sup>27</sup> Tujash nuna dutika ai shiwag aidau  
 mina pegkegchau chichagtuinakui,  
 antutan dakitakun dutikachmaijai.  
 Wi dutika ai mina shiwag aidau

ememas chichainak: ‘Tuke Pujuu  
 Israel aents aidaunak jii jag utsagchabi,  
 jutii aidaui iina senchijijai jii ja utsagmajji’,  
 tumain asagmatai idaisabaijai.  
<sup>28</sup> Israel aents aidauk pegkegchau  
 shiig anentainkachau ainawai.  
<sup>29</sup> Atumesh shiig anentaimkau ainakjumek,  
 wi suwimkan amastinaitjime  
 tusan tiuwaitjim nunú shiig dekau amainaitjume.  
<sup>30</sup> Atumesh anentaimsgmesh diyagmek,  
 ¿atumi shiwaajum aina nuwiya suntag  
 ima makichikitak mil suntag  
 Israel aents aidaun ipisig ishiakua dusha?  
 ¿Tuja atumi shiwaajum jimagchik suntajaitak,  
 diez mil suntag Israel aents aidaun  
 ipisjauwa dusha?  
 Nunak Tuke Pujuu atumi kuitamjamna nunú,  
 shiwag aidau depetuk amuktinme tusa  
 tiu asamtai dutijamau ainawai”, tiuwai.

<sup>31</sup> Iina shiwaaji aina nuna apajuimtaiji aina duka  
 iina Apajujijya nujaig betekchauwa nunak  
 ditak shiig dekainawai.

<sup>32</sup> Dita aidauk sodomanmaya aents,  
 gomorranmaya aents aajaku aina  
 nujai betek ainawai, nuadui dita aidauk  
 uva pegkegchau yapau yuwa jamainun  
 nejemaina nujai betek ainawai.

<sup>33</sup> Nunú vino dita umutaiji aina dushakam  
 dapi tsagke magkagtina nujai betek ainawai.

<sup>34</sup> Tuja Apajuí chichaak:  
 “Wi Israel aents aidaun ayamjakun  
 dita shiwaaji aidaun tsaihtinaitag nunak  
 etseghashtatjai.  
 Duka makichik waji akik uukam  
 egkemama numamtinai.

<sup>35</sup> Witjai suwimka sukagtinnuk,  
 nuniau asan tsawan jegakui,  
 wi suwimkanak susatnaitjai,  
 wagki nii waittsatna duka tsawantak jegawai.  
 Tuja nii suwimak jukitnuji umigkamua duka  
 tsawantak uminuí”, tiuwai Apajuí.

<sup>36</sup> Tuke Pujuu niina aentsji aidau kakaag  
 ayamjumamainchaun wainu asa ayamjuktatui.  
 Ditan ashí amuinak aents inaku waitkatai,  
 tuja agkan batsamin aina nujai  
 amukam kakaumainchau dekapeagtai,  
 Apajuí wait anentug,

<sup>37</sup> chichajak: “¿Ii apajuimtaiji aina juju  
 ayamjupaktatui tusajum,

<sup>38</sup> nunú emematkujum  
 kuntin maa apeamua nuna wiyaji yuwakjum,  
 umutai vino nii anagkuamu umuyujum dusha tuwi batsatua?  
 ¡Nunú nantajag atum waitiajum nuna ayamjupaktinme!  
 ¡Nunú kaunawag kuitamjamkatnume!

<sup>39</sup> Ima Wikitjai Apajuínuk.  
 Tikich Apajuik makichikish atsawai.  
 Witjai pujuta sukagtinnuk,  
 tuja wikitjai pujuta atainnuk.  
 Witjai suwimka sukagtinnuk, tuja wikitjai tsagkugkagtinnuk.  
 ¡Mina suwimkajua nuna uwemtumainuk

makichkish atsawai!

<sup>40</sup> Mina uwejun nayaimpinum takuajai,  
nunikan wika Tuke Pujuu asan,  
wi dutikatnujun pachisan tajai.

<sup>41</sup> Mina puyagjun winchamtinun etsaka jukin,  
ya aidauwa pegkegchaun takainak  
mina shiwagmatuinak kajegtuinawa nuna  
ijinatasan nagkamattajai.

<sup>42</sup> Dutikan kuashat aentsun ijinkun  
mina puyagjunak numpeagattajai.

¡Makichkish uwemjachagtatui!

¡Shiwag ijinku nuna apuji aidau achija yajuakbau aina nunashkam ashí ijinattajai!

<sup>43</sup> “Nuadui ashí tikich aents  
judíochu aidautigmesh Apajuí aentsji aina  
nujai ijunjajum dakujustajum.  
Apajuí niina takajin aidau ijituamunum  
atumi shiwaajum aidauinak ijinattawai.  
Dutikak niina aentsji aidauinak wait anentug  
ditá tudaujinak tsagkujattawai”, tiuwai.

*Moisés inagnaku jintinkagtuamu*

<sup>44</sup> Moisés Josuéjai Israel aents aidau batsatbaunum jeganta dita antuinamunum yama  
nagkamchak agagbaunum nagkama kantama amukui.

<sup>45</sup> Nuna ashí kantama inagnak,

<sup>46</sup> nuadui Israel aents aidau chichajak:

“Wi atumin jintintuajim nunú shiig antuka jukitajum. Nunikjum atumi uchijum aidau  
jintintuatajum, dutikawajam ditashkam chicham umiktin agagbauwa nuna ashí betek  
umiktinme.

<sup>47</sup> Tuja juju chicham umiktin agagbauwa nunú wainkaya nunin diyakjum umitsuk  
idaisaigpajum. Juju chicham umiktina nunú atumnak pujutan amawai. Nuniau asamtai,  
Apajuí nugka anagtauwa nunú namak Jordágka amain awa nuwi jegagmesh, nunú  
umiakjum kuashat tsawan pujustinaitjume”, tiuwai.

*Apajuí Moisésan Canaán nugkan wainkati tusa iwaintukbau*

<sup>48</sup> Nunú tsawantin Tuke Pujuu Moisésan wantintuk chichajak:

<sup>49</sup> “Muja Abarim tutaya nuwi wetá, nunikam muja Nebo tutai Moab aents aidau  
nugkan yaakat Jericójai niinis awa nuwi wakata. Nunikam, nuwi wajasam Canaán  
nugkan wi Israel aents aidau susattag nunú diista.

<sup>50</sup> “Nunú mujanum wakattam nuwi amek amina yatsum Aarón Hor nugkanum  
jakauwa nunismek jakattame.

<sup>51</sup> Atumek yumi pukuni jijnbau Meribá-cades tutaya nuwi Israel aents aidau yumi  
umumain atsutai chichamjuinakui, wi nunú dutikatajum tusan uwejush Sin tutainum  
tiuwaitjim nunú umikchawaitjume. Nunú nugkanum Israel aents aidau yumin  
sumainakui atum mina eme anenjamu ditá emtin iwainakchau ainagme.

<sup>52</sup> Nuadui wi Israel aents aidau nugka susattag duka amek ayatak ikaa wajasam  
wainkattame. Tujash amek nuwig wayashtatme”, tiuwai Apajuí.

### 33

*Moisés Israel aents aidau pegkegnum yumigjamu*

<sup>1</sup> Apajuí inake Moisés, nii jakatnuji jegamtai pujusa, Israel aents aidau pegkegnum  
yumigkiak,

<sup>2</sup> juna aatus tiuwai:

“Tuke Pujuu jutijai pujustatus  
muja Sinainum tauwai,  
tuja nugka Seírnum nagkamas  
niina tsaaptinjig etsanjabi.  
Nunik etsantug yaakat Parágnum  
nagkamas uyuuntamsabi,  
tuja diez mil ángel aidaujai  
weak, niina uweje untsujiya

duwi chicham umiktin agagbaun takakuyi.

<sup>3</sup> Tuke Pujuuik niina aentsji aidaunak aneawai,  
tuja niinu etegjamu aidaunak kuitamui,  
nunú aidau Apajuín emematuinawai,  
nuninak nii umiktajum tibaun uminawai.

<sup>4</sup> Moisés chicham umiktin

Jacob wegantunum tuke asatna nuna Apajuí susamun juki amasajui.

<sup>5</sup> Apajuik Jesurúnkan apuji wajasui.

Apajuik Israel aents aidaun apuji aidaun apuji,  
tuja Israela uchiji maki  
makichik wegantu aidau  
ijunjajua nuna apuji wajasui", tiuwai.

<sup>6</sup> Tuja Rubén wegantun pachis Moisés juna aatus chichajak:

"¡Rubén wegantu aidauk tuke batsamsatin agtinai!  
¡Aishmag ujumak ataish,  
jinaa megkaejashtin ainawai!" tiuwai.

<sup>7</sup> Tuja Judá wegantun pachis Moisés juna aatus chichajak:

"Tuke Pujuuwah, Judá wegantu  
aidau amina segapainakuig antugkata.  
Ataktu awagkim tikich aents  
Israel wegantu aidau batsatbaunum ijumjata.  
Amina senchigmijai ayamjukta, dutikakum yaigta  
niina shiwaajinish ayamjumakti tusam", tiuwai.

<sup>8</sup> Tuja Leví wegantu aidaun pachis Moisés juna aatus chichajak:

"Tumim Urim\* aina duka aminu ainawai.  
Nunú Leví wegantu amina  
sacerdotejum aidau  
ame tabaun betek umigtamin  
aina nunú susauwaitme.  
Tuja Masá nugkanum ame dita dekapsauwaitme,  
dutikakum Meribá  
nugkanmashkam amina aentsjum aidau  
yumi susauwaitam nuwi senchi jiyakuitme.

<sup>9</sup> Leví wegantu aina duka

ame chicham umiktajum tiuwaitam nuna  
puyatjus uminawai, nuninak kakanmamainawai  
ame chicham tibaauwa nuna betek umikagtatus.  
Nuna ima senchi dita patayin nagkaesau  
eme anentuinawai.  
Nunidau asag ditá apaji aidaun  
dukuji aidaujai chichajuinak:  
'Atumnak wika dekatsjime' tuinawai;  
tuja dita yachi iwai aidaun, umayi iwai aidaun,  
tsakat aidaunashkam chichajuinak:  
'Wika atumnak dekatsjime' tuinawai;  
tuja ditá uchiji aidaun nawanji aidaujai chichajuinak:  
'Dekatsjime yatsu ainajum' tuinawai,  
wagki ditak ashí Apajuí umigtan  
idaisaju asagmatai.

<sup>10</sup> Dita ainawai amina chichamem umiktin  
agagbau aina nuna Jacob wegantun  
jintintuina duka.

Dita ainawai kugkuin incienson  
kuntin maa apeamujai jukiag,  
aak pegkejam aakmakbaunum  
nunú patasa apetai puja nuwi pataina nunú.

\* 33:8 "Tumim, Urim": Juka makichik wajich najanamu aajakui, nuna sacerdote Apajuíjai chichastatus wayak jujaku ainawai. Nujai dekaajakui Apajuí wakegamush tukita nuna.

11 Nuadui Tuke Pujuuwah,  
dita amina umigtamainak  
puyatjusag takaina nunú  
pegkegnum yumigsata.  
Dutikakum dita shiwaaji aina  
dushakam ame ijinata,  
tuja ditan kajejin aina dushakam  
ataktu wakitkig waitkaschatin atinme”, tiuwai.

12 Tuja Benjamín wegantun pachis Moisés juna aatus chichajak:  
“Tuke Pujuuwah, amek Benjamín  
wegantu aina duka aneame.  
Nuadui ditak shiig aneasag batsatui.  
Amek múun ashí senchigtinaitam ibau asam  
tuke kuitamtinaitme.  
¡Nuadui ame kuitamsam batsamsagtinai!” tiuwai.

13 Tuja José wegantu aidaun pachis Moisés juna aatus chichajak:  
“Tuke Pujuu niina nugkenak  
pegkegnum yumigsatin ati,  
dutikamu asantai, nayaimpinmaya yumi yutak,  
tuja nugka inikeniash yumi pukuni jininainak  
niina nugkenak tuke uchupsagke atinai.

14 José wegantu aidauk dita ajakmamujinian  
maki makichik mijantin  
ajak juut nantu jegatai, shiig  
kuashat juuka yuwagtinai.

15 Dita wegantu aidauk ajakmamujig, ikam aidaun,  
muja aidaun ayá iman aidaun juwagtinai.  
Tuja muja makichikish megkaechauwa iman tuke atinai dita ajakmamu aina duka.

16 Dita nugkenig yujág shiig  
pegkeg aidaun piyaktinai.  
Nuadui nii wegantu agtina  
nudaushkam imanishag ajiti tusam yaigta.  
Wagki ame mina zarza kegamunmaya wantintugkam,  
amina aentsjum aidaun yajuak emati tusam etegtuawaitam,  
dutiksamek ame Josék niina yachi iwai aidaun,  
ekeu aidaun apuji ati tusam etegkauwaitme.

17 Tuja Efraín wegantunmayag  
suntajak shiig kuashat agtinai,  
tuja Manasésnumiashkam aents maanin aidauk shiig kuashat agtinai.  
Nunú aina duka toro uchiji  
yama nagkamchak petsakbau pegkejama iman,  
búfalo senchigtinama iman agtinai.  
Iman asag ashí aents tikich  
nugkanmaya aidaunash, ditá  
senchijjai depetkatin ainawai”, tiuwai.

18 Tuja Sabulón wegantun Isacar wegantujui pachis Moisés juna aatus chichajak:  
“Sabulón wegantu aidautigmek shiig aneasajum,  
atumek nayantsanum yujasjum tikich nugkanum waji sujitin asajum.  
Untsu Isacar wegantu aidautigmek  
aakchinmak batsamsajum,  
kuntin tagkumajum shiig  
kuashat uyugkajum shiig  
aneasjum batsamsagtinaitjume.

19 Nunik batsamas tikich Israel aents aidaun  
ipaa mujanum yajuak iwajagtinai.  
Dutikawag nuwi batsamas,  
ame dutikatajum tusa timauwa nuna uminak  
kuntinun maawag apegatinai.  
Tuja nayantsanum waji pegkeg kuashat ayá

nuna tikich nugkanum yujasag sujiagtinaí.  
Nuninak nayantsanmaya  
yutai aidaun yuwagtinaí”, tiuwai.

<sup>20</sup> Tuja Gad wegantun juna aatus Moisés chichajak:

“¡Apajuíyah, ame Gad wegantu aidauk  
nugka múun susatnaitme, nuadui  
amina see tujamainak emematjantin ainawai!  
Gad wegantunmaya aidauk león dakamama  
numamtuk dakamak  
aentsun maakug kuntujin tsupijug,  
buuken tsupijug ukutnai.

<sup>21</sup> Israela uchiji aidau maki makichik wegantu  
aina nuna apuji aidau Canaán nugkan  
tesagdayagtaish, Gad wegantu aidau  
ima muuntan jukitnai apu aidau juinamujai betekak.  
Dita aidauk ame dutikata  
timauwa nuna umikagtin ainawai.  
Dita aidauk pegkegnum  
chichajam agtinai, wagki  
ame Israel aents aidau  
umiktajum timauwa nuna umidau asag”, tiuwai.

<sup>22</sup> Tuja Dan wegantun Moisés juna aatus chichajak:

“Dan wegantu aidauk león tsakat  
kuntinu tsekentama nujai betekai,  
iman asa niina shiwaajin jeteakug, nugka  
Basánum nagkamas tsekenti jiintawai”, tiuwai.

<sup>23</sup> Tuja Neftalí wegantu aidaun Moisés juna aatus chichajak:

“Neftalí wegantu aidaunak Tuke Pujuu  
shiig anentus diyawai,  
Ame Apajuíyah, ditak kuashat  
pegkeg aidaunum yumigsawaitme.  
¡Nuadui kucha múun Galilea tutaya duka  
nujinum nagkamas tsumujija  
aatus ditanu atinai!” tiuwai.

<sup>24</sup> Tuja Asher wegantu aidaun Moisés juna aatus chichajak:

“Apajuíyah, ame Aserak Jacopa uchiji  
tikich aina nuna nagkaesau  
pegkegnum yumigsata.  
Dutikamu asamtai, niina yachi aidau  
eme anentsa diitai ati.  
Tuja kuashat olivogtin asa  
aceitejishkam imanisag ajitin ati.

<sup>25</sup> Niina yaaktaji aidauk,  
tuja jee aidaushkam kuashat waitigtin atinai.  
Tuja nunú waiti aidauk jiju hierro,  
bronce aina nujai najanamu asamtai,  
niina shiwaajish kakajus utumainchau atinai”, tiuwai.

<sup>26</sup> “Jesurúman Apajuíji atumin  
yaimpaktatus niina senchijijai yujagminum  
egkemak minina imanuk tikichik atsawai.

<sup>27</sup> Apajuí Tuke Pujuuwa nunuwai  
amina ayamjumataigmek.  
Niig tuke senchigtina iman asa amina yaimpawai.  
Ame wainminig amina shiwajumnak  
uwakek ipisiak ijinata tusa amina inapawai.  
<sup>28</sup> Israelak ishankagtutsuk kajinas pujustinai.  
Nii wegantu aidaushkam agkan



utugchat atsaunum batsamsatin ainawai.  
 Niina nugke aidaunmash trigo aidauk  
 shiig kuashat aitnai, tuja uva ajakmaushkam  
 imanisag aitnai, tuja yumishkam tuke  
 yutitnai, nuniau asamtai, yuminak atsumchatnai.  
<sup>29</sup> ¡Israel aents aidautigmek  
 shiig aneastajum, wagki atum  
 kuashat asajum eme anentai ainajum  
 imanuk tikich aents aidauk atsawai!  
 Atumnak Tuke Pujuuwa nunú uwemtijamjaugme.  
 Nii atumnak kuitamjamui.  
 Tuja nigki ayamjupaktatui.  
 Atumi shiwaajum aidaujai maaniagminish,  
 niyai depetmitkagbauk.  
 Nuadui shiwag aidauk atumiin yunumjagtinai.  
 Nuninakuí atum wagagkijum  
 ijinatin ainagme”, tiuwai Moisés.

## 34

### *Moisés jakamtai ukusbau*

<sup>1</sup> Nuna tusa inagnak, nuadui Moisésak uwejush Moab nugkanum pujau juwaki, muja Pisgá tutai Jericójai niinis awa nuna titijin Nebo tutainum wakauwai. Nuwi wakamtai Galaad nugka múunta nuna wainkati tusa Tuke Pujuu iwaintukui. Tuja Danka nugkenashkam iwaintukui.

<sup>2</sup> Nuigtushkam Neftalí, Efraín, Manasés aina nuna nugke aidaun iwaintukui. Dutikak Judá nugke nayants Mediterraneo tutaya aatus awa nunashkam ashí iwaintukui.

<sup>3</sup> Tuja nuigtushkam Néguev nugkan, Jordágka pakajin, yaakat Jericó palmera ain tuuta awagmatia nuna, tuja yaakat Sóar tutaya imanui iwaintukui.

<sup>4</sup> Dutika duwi, Tuke Pujuu Moisésan chichajak: “Au nugka auwai, wi Abraham, Isaac, Jacob aajaku aina nuna, atum wegantu aidaun nugkan susatnaitjai tusa tiuwaitag duka. Wi aminak au nugka awi wayashtinaitkush, wainkati tusan wakegau asan iwaintukjame”, tiuwai.

<sup>5</sup> Aatus Moisés Apajuín inakega duka Moab nugkanum jakauwai, Tuke Pujuu tibaunak imatiksag.

<sup>6</sup> Nunik jakamtai Moab nugka pakaji, Bet-peor tutaya nujai niinis awa nuwi ukusbauwai. Tujash dekas tuwig ukusbauwaita nunak yamaikish dekainatsui.

<sup>7</sup> Moisésak ciento veinte mijan ajamu, wajiu, wainmatnash shiig wainbau, jamantuchu pujayatak jakauwai.

<sup>8</sup> Moisés jakamtai Israel aents aidau Moab nugkanum uwejush batsamas treinta tsawantai buutiaju ainawai. Aatus nii jakamtai buutuínak, aents jakamtai buutku iman tsawan pujutainak betek ejejajui.

<sup>9</sup> Moisés eke iwaku pujusa Josué buuken achika Apajuín segatiuwai, Israel aents aidaunmaya Apajuí chichamen etsejin profetak makichkish atsujakui.

<sup>10</sup> Tujash Tuke Pujuu Moisésjai igkunia chichajakua imanuk tikichik Israel aents aidaunmaya Apajuí chichamen etsejin profetak makichkish atsujakui.

<sup>11</sup> Tuja wainchatai ishamain aidaun iwainagti tusa Tuke Pujuu tibau asa, Moisés Egipto nugkanum faraógka emtin niina atuwe aidaush wainainai iwainajua imanuk tikich aentsuk makichkish atsujakui.

<sup>12</sup> Tuja Moisésak senhigtin asa, wainchatai ishamain aidaun atum Israel aents aidautijum wainjumin iwainajua imatika iwainamainuk tikichik makichkish atsujakui.

## Josué Canaán nugka utuamu

(1—12)

*Apajuí Josuén mina takagtusta tibau*

<sup>1</sup> Tuke Pujuu takajin Moisés jakamtai, Nun aajakua nuna uchiji Josué Moisésan yaijakua nujai Tuke Pujuu chichaak:

<sup>2</sup> “Mina inakeg Moisésak jakae. Nuniku asamtai, ame yamaik Israel aents aidau ashí yajuakam, wi atumin nugkan amastatjim nuwi weakum namak Jordágnum ikatiagtatme.

<sup>3</sup> Wi nugka amastinatjime tusan Moisésan anagkuawaitag nunak, imatiksasuk nugkanak ashí amastatjime.

<sup>4</sup> Nunú nugkak muja Néguev tutaya nuwi nagkamas, muja Líbano tutaya aatus, namak shiig múun Eufratesa imanui nagkamas, hitita aents aidau nugkega nuna ashí, tuja nayants Mediterraneo tutai etsa akaetaiya nuni awa imanuishkam ashí atumin amastatjime.

<sup>5</sup> Aminak makichkish depetamkashtin ainawai. Moisésan kuitamajakuitag dutiksanuk wi aminak kajimatki idaitsuk tuke kuitamkattagme.

<sup>6</sup> Nuadui kakajam, waju wajasta, wagki wi atumi muunjum aajaku aina nuna anagkuakun nugkan amastatjime tiuwaitag duka ame Israel aents aidauk tinamkattame.

<sup>7</sup> Wika aminak, ¡waju kakajam ata! tusan ima nunak segajame. ¡Nuniakum chicham umiktinun mina inakeg Moisés amasua nunú ashí betek umikta! ¡Nunú wajintu agagbauwaita duka imatiksamek ashí umikta! ¡Nunú ashí umiau asamin, ame takamugmesh ashí pegkeg atatu!

<sup>8</sup> Chicham umiktin agagbauwa duka tuke ausamke ata. Nuniakum tsawaish, kashish tuke ima nuwig anentaimta, wajintu agagbauwaita nunú umiktag tau asam. ¡Nunú betek umiakmek, ame takamugmesh ashí pegkeg atatu!

<sup>9</sup> “¡Aishmag wajasta! Wi aminak inajan awemagme. ¡Ishamkagtukaipa, awakesh anentaimjaipa, wagki witjai Tuke Pujuu amina Apajuíginuk! Tuja ame tuwi wekaetatme nuwi wika amejai pujuttajai”, tiuwai.

*Josué Israel aents aidau yajuak Canaán nugkanum wetatus umintsamu*

<sup>10</sup> Tusa tima Josué Israel aentsu apuji aidau chichajak:

<sup>11</sup> “Aents aidau batsata nuwi shiyakjum, ashí etsegkatajum, jintá weaku yuwatnun umiktinme. Tuke Pujuu ina Apajuíjia nunú nugka amastata nuwi weaku kashin pujusa tsawaku namak Jordán katitkattaji”, tiuwai.

<sup>12</sup> Aatus akateg ishimak nuigtushkam Rubén wegantu aidau, Gad wegantu aidau, Manasés wegantu jimaituk aidau akatmamtak:

<sup>13</sup> “Atumesh nugkentin agkan batsamsatnun, Tuke Pujuu atumin Apajuígmia nunú juju nugka juna amastatjime tusa Apajuín inake Moisés tiuwa nuna aneaku atinme, tujamui.

<sup>14</sup> Nuadui juju nugka namak Jordágka amain ii pujag juna Moisés atumin amasua juwi, atumi nuwe aidau, uchijum aidau, tagkujum aidaujajai batsaktajum. Untsu ashí aents maanmain aidautigmek maaniaku jutai aidau yajuaka umintsajum, Jordágka amain katiagjum atumi yatsum aidau maaninaku atuktajum.

<sup>15</sup> Dutika atukjum, Apajuí atumin nugkan amasua dutiksag, ditanashkam agkan batsamsatnum nugkan susatta nuna shiig emetjagmatai, waketjajum juju nugka Jordágka juni awa juna, Moisés atumin amasua juwi kaunajum tuke batsamsatnaitjime, tawai tita”, tiuwai.

<sup>16</sup> Tusa tima ditashkam imatiksag ujakajui. Nuna antukag dita aimainak:

“Ame tame duka imatiksaik ashí umikagmi. Tuja ame tuwi wetajum tukagtittame nuwi shiyakgmi.

<sup>17</sup> Yaunchuk Moisés tujamkui umijujukuitag, dutiksaik ame tabaushkam tuké umiktinaitji. Tuja iik wakegaji: ¡Apajuí Moisésan kuitamajakua dutiksag aminash kuitamjamkati! tusa.

<sup>18</sup> Tuja ashí aents amina chichamjumin intimki umigtamchawk mantamnati. ¡Iik wakegaji ame kakajam, waju ati! tusa” tiajui.

## 2

*Aents aidau uumak yujasag yaakat Jericón dekatnume tusa Josué ishiakbau*

<sup>1</sup> Sitim nugkanum batsamas, aents uumak yujas dekamatin aidau jimag aentsun etegka Josué ishimak: “¡Wetajum, nunikjum nugkash wajukukita nunú yaakat Jericójai diistajum!” tiuwai. Tusa tima shiyakag Jericónum jegawajui. Nunikag nuwa akika dutiktai Rahab pujaunum nuna jeen jegawajui, nuwi kajigkagatus.

<sup>2</sup> Nunikagmatai aents nuna wainkau Jericó apujin jegajua ujaak: “Ujumak aents Israel aents aidau dekamatus yamai kashi kaunawagmae”, tiuwai.

<sup>3</sup> Tusa ujakam Jericó apuji niina suntaji aidau Rahab ujaktajum tusa ishimak:

“¡Aents aidau amina ijagtamainak amina jemin kauna batsata nunú jiija ishiakta, wagki ditak iina nugken dekatatus yujawai!” tusa akatmamtuju. Tusa tima shiyakag imatiksag ujakajui.

<sup>4</sup> Tusa ujakmash jiija ishimtsuk uuka batsas chichaak:

“Nunú aents aidau dekas mina ijagtuinak kaunawagmae. Tujash dekachmajai tuwiyas agma.

<sup>5</sup> Juwi batsatu kiitai jiiinag shiyakagmae. Wagki nuniai yaaktanun waitain waitin epenin agma duwi. Tujash tutsu wegagma nunak dekachmajai. Yamaik pataetakjume amainamain ainagme”, tiuwai.

<sup>6</sup> Tujash nunak niina jeen tuntupe pakamamunum, lino juuka jigkaka ujugkatasa ijumjamunum nuwi, yakí uuka batsasuitak tiuwai.

<sup>7</sup> Nuwi batsataig, apu ishiakbau aidau shiyakeapi tuidau asag, pataetakag namak Jordágnumanini shimutuk katitainum jegawajui. Nunik suntag jiiinag shimaig, yaakta waitijinak epeniu ainawai.

<sup>8</sup> Nunik pataetak shiyakagmatai, nunú aents dekamatus yujau eke kanuinatsaig, Rahab wajuka ditan chichajak:

<sup>9</sup> “Tuke Pujuu atum aidautigmin juna nugka amasaja nunak wika dekajai, wagki atumin senchi ishamjamkatnume tusa Apajui tine. Nuadui ashí aents juju nugkanmaya aidau atumin ishamjamainak sapijai jinuinawai.

<sup>10</sup> Atum Egipto nugkanum batsatujum jiiinagmin nayantsa amain katiagtinme tusa Tuke Pujuu nayantsa kapantun ukuyauwa nunú iik dekajai. Tuja nuigtushkam atum aidautijum amorreo nugkanmayaapu aidau Sijón, Og aatus Jordágka amain batsatu ashí ijinawaitjum dushakam shiig dekajai.

<sup>11</sup> Nunú dekau asaja, shiig senchi ishamkagtuinaji. Tuja atumjai maaniatjai tumainuk makichkish shiig atsawai. Wagki Tuke Pujuu atumi Apajuijum atum emematjum nuuwai nayaimpinash, nugkanash ima nigki Apajuijiya duka.

<sup>12</sup> Nuadui wi atumin wait anenjan kuitamkajim, dutiksagmek mina pataag aidau wait anenjatnaitkugmek dekaskenum wait anenjattaji tusajum Tuke Pujuu daajin tujuttajum.

<sup>13</sup> Tuja atum maania depetmakjum juju nugka atumdau emakjumes minash, mina apag, mina dukug, mina ubag, mina kaig aina duka ashí dita patayi aidaujai ijijattsuk kuitamkagtuktajum. ¡Nunuwai dekas pegkegnun yainiamua duka!” tiuwai.

<sup>14</sup> Tusa tama dita chichajuinak:

“Juju nugka juwi kauna maaniamunum amina pataim aidau jakamtaig, Apajui iina suwimkan amastí. Tujash ameshkam juju pachismek makichkish etsegkaipa. Tuke Pujuu juju nugkan iina amasmataig, amek amina pataim aidaujai shiig kuitamnaktatme”, tiajui.

<sup>15</sup> Tusa tiagmatai yaakat peegmaja apakbaunum nuna ejapeen jega jegamkamunum pujau asa, nunú aents jiiinaidau wainkainum tusa niimtai ujaimunum daekan aganini detua nuni jiiig ishiakui.

<sup>16</sup> Dutika ishimak:

“¡Suntag aidau egapainak yujaina nunú waipakainum mujá wetajum! ¡Nunikjum nuwi kauptum tsawan uumkajum pujagmin, suntag aidau atumi egapainak shiyaka nunú waketug kaunamtai duwi shiyaktajum!” tiuwai.

<sup>17</sup> Tusa tama dita chichainak:

“Ame segajatkumin, ii umiktin dekas umiktatji tusa Apajui daajin timag duka imatiksaik umiktatji.

<sup>18</sup> Untsu ii juju nugka juwi wayamu wainkumek, juju daek kapantua juwi ii akaikittag nunú aganini nenata. Dutikam nuadui juju amina jemea juwi amina apa, duku, umaim aidau, kaim aidau, amina apa patayi aidaujai utsaatum.

<sup>19</sup> Tuja makichik aentskesh amina jemin pujayatak, jiinki wekaekama mantamnakug duka niinu atatu. Untsu amina jemin pujaunak utua mainakuig duka utugchatak iinu atatu.

<sup>20</sup> Tuja ii chichag nunú ame etseggaminig, ii umiktin Apajúi daajin taji duka umikchattaji”, tiaju.

<sup>21</sup> Tusa tama: “¡Ayu, atum tajum duke ati!” tiuwai.

Aatus ashí ditajai chichas ishiakui. Dutikam shiyakmatai nuadui niimtai ujaimunum aganini daek kapantun nená idaisauwai.

<sup>22</sup> Tuja nunú aents dekamín aidauk mujá shiyakag kauptum tsawan uumak batsamsajui. Nunik batsatai suntag aidauk ashí yantannum egai egainakua wainkachag waketug Jericó jegawajui.

<sup>23</sup> Nunik waketjamtai, ditashkam mujá batsatu akaejag Jordágkan katitkiag Josué pujamunum jegawajui. Nunik jegawag dita yujasbaun pachis niina ashí ujakajui.

<sup>24</sup> Tusa ujainak:

“Au nugkanak Tuke Pujuu ashí iinu atinun idaitugmase. Dutikamu asamtai nuwiya aents aidauk iina ishamjamainak sapijai jinime”, tiaju.

### 3

#### *Israel aents aidau namak Jordágkan katitkagbau*

<sup>1</sup> Aents uumak yujas nugka dekatatus shiyaku waketug kaunawag etseggagmatai, kashinia duwi shiig kashikmas Josué Israel aents aidaujai Sitim nugkanum batsatu ashí jünag shiyakajui. Nunik shimui shimuinakua jegawajui namak Jordágnum. Nunikag eke atú amain katitsuk nuwi aakmag batsamsajui.

<sup>2</sup> Nuwi batsamas kauptum tsawan nagkaemai, suntaja apuji aidau Israel aents aidau batsatun shimutkag

<sup>3</sup> ujainak aatus tuidau: “Leví wegantu aina nunú chicham umiktin agagbau egkeamun arcan yanaki juki wedau wainkugmek, atumi aakjum aidau tegaka jukijum wetajum.

<sup>4</sup> Nuniakjum dekatagme itug wetatjume nunú, wagki atumek yaunchkesh juju nugkanmak wekaechau ainajum duwi wajuk wetaigkita duka dekatsjume. Tujash chicham umiktin agagbau egkeamun arcan yanaki juki wena nunú ijusa wetsuk makichik kilómetro tumain ukuunum wetajum”, tiaju.

<sup>5</sup> Tusa ujakagmatai Josué ditan chichajak: “Tuke Pujuu iina yaimpaktin asa kashin wainchatain iwainaktatui. Nuniktin asamtai, ¡pegkeejum umints dakamsatajum!” tiuwai.

<sup>6</sup> Nuna tusa sacerdote aidau chichajak: “¡Chicham umiktin agagbau egkeamu arca yanaki jukijum emka wetajum!” tiuwai. Tusa tiajam nuna yanaki jukiag eemak wegajui.

<sup>7</sup> Nunik shimai, Tuke Pujuu Josué chichajak: “Wi yamai dutikattag nuna wainkag, Israel aents aina duka dekaskeap Apajúi jutii apuji atinun etegkauwaita tujamiagtatui. Aatus dekawagtatui wi Moisésan kuitamajakuitag dutiksanuk aminashkam kuitamja nuna.

<sup>8</sup> Untsu sacerdote aidau chicham umiktin agagbau egketun arcan juki wena nunú ame chichagkum: ‘Namak Jordágnum jegagmek wajaajum ijuntsatajum’ tita”, tiuwai.

<sup>9</sup> Tusa tima Josué Israel aents aidau chichajak: “Juwi kaunatajum, nunikagmin Tuke Pujuu iina Apajúji ii emematin ainag nunú mina tujuti nuna ujaktajime.

<sup>10</sup> Apajúi Tuke Pujuu tutaya nunú iina kuitamjamsamtai shimag duka, hitita aents aidau, heveo aents aidau, ferezeo aents aidau, gergeseo aents aidau, amorreo aents aidau, Jebús aents aidau aatus, Canaán nugkanum batsamin aina nunú ii shimaku Apajúi senchijin depetka ijina wetatag duwi dekattaji.

<sup>11</sup> Antuktajum nijah, Tuke Pujuu ashí aents aidau Apajújiya nuna chichame umiktin agagbau egkeamu arcan sacerdote aidau yanaki jukiag atum wainjumin namak Jordágkan katitkiagtatui.

<sup>12</sup> Nunikagmatai Israel aents aidautijum maki makichik wegantu ainajum nuwiya doce aents etegjatajum.

<sup>13</sup> Tuja Tuke Pujuu ashí aents aidau Apajújiya nuna chichame umiktin agagbau egkeamu arcan sacerdote aidau yanaki jukiag yuminum wawajagtatui. Nuniagtai, namakak jimaituk tesana buku wajas katigtatui. Nunitai yumi nujinmaya minaush, jasa muja iman wajas asattawai”, tiuwai.

<sup>14</sup> Tusa timatai Israel aents aidau namak Jordágka katitkagtatus jünag shimai, sacerdote aidau chicham umiktin agagbau egketun arcan yanaki juki eemak wedau.

<sup>15</sup> Tuja ajak juutai tsawan jegataik, namak shiig senchi dujajin asa namakak dujajua piyag aajakui. Imanik ai sacerdote aidau namaka jegawag tugkitak wawajajui.

<sup>16</sup> Nuninaig namakak kuyua buku wajas asauwai. Duka peegmagbau Saretag tutai awa nujai niiniaku yaakat Adam tutai awa imanui nagkamas namak tsujina yumi nujinum pimutai, tsumujin namak juwakuk sae saekawa nayants jakau\* tutainum nagkankauwai. Aatus Apajuí namakan akanak ukuyumtai, Israel aents aidauk yaakat Jericón igkuas katiajajui.

<sup>17</sup> Sacerdote aidau chicham umiktin agagbau egkeamun arcan yanaki juki wedauk nuna yanasag namak Jordán kuyua buku wajasbaunum ejapeen ijunai, Israel aents aidauk bukunum shiig katiajaju ainawai.

## 4

### *Namak Jordágnunia doce kaya yajuaka ijumjamu*

<sup>1</sup> Ashí Israel aents aidau namak Jordágnun katiajagmatai, Tuke Pujuu Josuéen chichajak:

<sup>2</sup> “Israel wegantu aina nuwiya maki makichik etegjam doce aents yajuakta.

<sup>3</sup> Dutikam ishiakta namaka ejapeen, sacerdote ijuna nuwian doce kayan yajuaktinme. Dutikawag yamai dita tuwi kajigtatua nuwi ijumjatnume”, tiuwai.

<sup>4</sup> Tusa tima Josué doce aents etegjamu aidaun utsuka ijumag

<sup>5</sup> chichajak:

“Namak kuyua buku wajasa nuna ejapeen Tuke Pujuu atumi Apajújiya nuna chichame umiktin agagbau egkeamu puja nuwi wetajum. Nunikjum maki makichik kaya jukitajum. Tuja ashí ijumjamak doce kaya atatu.

<sup>6</sup> Nunú kaya ijumjattajum nunú atatu atumi uchijum aidau atakea duwi inimpainak: ‘¿Wagka jusha kayash jutikaish ijumjamuita?’ tujamainaku,

<sup>7</sup> atum ayaakjum: ‘¡Chicham umiktin agagbau egketun arcan sacerdote aidau yanaki jukiag namak Jordágnun wajawagmatai, namak jimaituk kanaka buku wajasbaunum ii katiajuitag nuna anemtijamjatin auk ijumjamui!’ titinaitjume”, tiuwai.

<sup>8</sup> Tusa tima Josué tibaunak imatiksag umikajui. Dutikainak Israel wegantu doce aajakua dutiksag doce kaya jukiag dita batsatbaunum ejegawajui. Dutikawag Tuke Pujuu Josuéen chichajak, dutikatnume tibaunak imatiksag doce kayan ijumjajui.

<sup>9</sup> Tuja Josué niishkam dutiksag namak kuyua buku wajasbaunum, nuna ejapeen sacerdote aidau chicham umiktin egkeamun arcan yanasa ijunbaunum, nuwi doce kayan yajuak ijumjauwai. Duka yamaikish awai.

<sup>10</sup> Tuja sacerdote aidau chicham umiktin agagbau egketun arcan yanaki jukiag wedauk namak Jordán kuyua buku wajasmatai nuna ejapeen ijunai, Israel aents aidauk Tuke Pujuu Josuéen akateak juna umiktinme tibaunak imatiksag umikajui. Tuja Josuéshkam Moisés akatjamunak imatiksag umikui.

Nunikmatai aents aidauk shiig wamak katiajajui.

<sup>11</sup> Nunik ashí katiajagmatai, nuadui sacerdote aidau chicham umiktin agagbau egketun yanaki ijunu ditashkam katiajajui, nunikag dita emkajui.

<sup>12</sup> Tuja nuigtushkam maanitan yacha Rubén wegantu aidau, Gad wegantu aidau, Manasés wegantu jimaituk maaniaku jutai aidaun yajuakag uminas tikich Israel wegantu aidau shimamunum eemak, Moisés nuniktajum tibaunak imanisag shimuidau.

<sup>13</sup> Nunú aidauk shiig uminas cuarenta mil aents tumain jijnag chicham umiktin agagbau egketun juki wegagtai nuwi ichichmamjag, nugka paka tepajunum yaakat Jericónmanini shiyakajui.

<sup>14</sup> Tuja nunú tsawantai Tuke Pujuu ashí Israel aents aidaun, Josuéen eme anentus diitnume tiu asamta, Moisés iwaku pujusmatai, eme anentus diijaku aina dutiksag Josuénashkam eme anentus diidau.

<sup>15</sup> Nuadui Apajú Josuéen chichajak:

<sup>16</sup> “Sacerdote aidau chicham umiktin agagbau egketun arcan yanaki ijuna nunú katiagtajum tita”, tiuwai.

<sup>17</sup> Tusa timatai, katigtajum tusa tiuwai.

<sup>18</sup> Tusa tiyajam ditashkam katiajag kukag jijnainaig, namakak bete wajas yaunchuk aajakbaunak imanisag asauwai.

<sup>19</sup> Israel aents aidau Jordágnun katiaju aina nunak mijan nagkamnu yama nagkamchak nantu taka tsawan diez tsawaju ai katiajajui. Nunikag yaakat Jericó yantamen etsa minitaiya nuni nugka Guilgal tutainum aakmajag batsamsajui.

<sup>20</sup> Nunik batsamas doce kaya Jordágnunia yajuakbaun Josué nuwi ijumjauwai.

<sup>21</sup> Dutika ijumag Israel aents aidaun chichajak:

\* 3:16 “Nayants jakau” tawa nunak apach chichamnum “mar muerto” tawa nunuwai.

“Atakea duwi atumi uchijum aidau inimpainak: ‘¿Wagka jusha kayash ijumjamuita?’ tusa tujamainakuig:

<sup>22</sup> ‘Israel aents aidauti namak Jordán kuyua buku wajasmatai ii katiajag’, nunú pachisjum ujaktajum.

<sup>23</sup> Tuja nuigtushkam Tuke Pujuu atumi Apajuíjum yaunchuk nayants kapantun katitkatnume tusa ukuyuuwa dutiksag, yamaishkam namak Jordágkan katitkatnume tusa ukuyua buku awajsamtaí katiajulum nunú pachisjum ujaktajum.

<sup>24</sup> Nuna aatus ashí nugkanmaya aents aidau Apajuí senchigtina nuna dekawagtinaí. Untsu atumek Tuke Pujuu atumi Apajuígmia nunú tuke ememattinaitjume”, tiuwai.

## 5

### *Israel aents aidau Guilgal nugkanum batsamsamu*

<sup>1</sup> Israel aents aidau katiagtinme tusa Tuke Pujuu namak Jordágkan ukuyua buku awajsae tabaun amorreo aents aidau apuji aidau Jordágka amain etsa akaetaiya nuni batsamin aidau dekawajui. Tuja canaágnunmia aents aidau apuji aidau nayants Mediterraneonum batsamin aidaushkam dekawajui. Nunikag senchi ishamkag Israel aents aidaujaig kakaja maaniachmin dekapedau.

<sup>2</sup> Nuninaí Tuke Pujuu Josué chichajak: “Kaya aina anú ujumak kuchii najankata. Dutikam nuadui Israel aents aishmag aina nuna kati chuchuke ashí tsupijata”, tiuwai.

<sup>3</sup> Tusa tima Josué kuchiin najankauwai. Dutika Israel aents aishmag aidau ashí tsupijauwai. Nunak muja Aralot tutaya nuwi dutikauwai.

<sup>4</sup> Nunak dutikauwai wagki ashí aishmag waju maanimain aidau Egipto nugkanum batsatu jijnau aina duka uwegshunum yujas jinawaju asagmatai.

<sup>5</sup> Tuja Israel aents aishmag aidau Egipto nugkanum batsamajaku aina duka, nuwi batsatuk ashí tsupijamu aajaku ainawai. Dutikamu ainaig Egipto nugkanum batsatu jijnag shimak, uwegshunum cuarenta mijan yujasu aina duwi uchi aishmag akiinkau aina nunú eke tsupijashbau asamtaí, dutikauwai.

<sup>6</sup> Tuja aishmag waju maanimain aidau Egipto batsatu jijnau aina duka cuarenta mijan uwegshunum yujasu aina duwi ashí jinawajui. Nunú aents aidau Apajuín chichamen umigkachaju ainawai. Nuadui Apajuí ditan chichajak: “Atumi muunjum aajaku aina nuna anagkuakun, atum wegantun nugka pegkeg ajak shiig tsapaun, tagkush shiig muumpaina nuna susatnaitjai, tusan anagkuawaitag duka atumek wainkashtinaitjume”, tiuwai. Nunik jinawaju asagmatai, namak Jordágnun katiajaju aina duka tsupimakchau aajaku ainawai

<sup>7</sup> Nuadui Josué nunú aents aidau uchiji aajaku aina nuna tsupijauwai. Wagki, ditá apaji jinawaju asagmatai, Tuke Pujuu atum nugka jukitajum tibau asa waujus shimuinak tsupimachaju asagmatai.

<sup>8</sup> Dutika ashí tsupijajam nuna esamawagtatus dita batsatbaunmak juwakajui. Nunik batsamas ashí tsaggakajui.

<sup>9</sup> Nuwi batsataig Tuke Pujuu Josué chichajak: “Israel aents aidau Egipto nugkanum wainka inaku waitkatai asag datsaamajaku aina nunak, yamai nagkamsan dita datsantinak emegkatjajai”, tiuwai. Nuadui nunú nugka daajiya duka Guilgal\* tibau aajakui. Duka yamaikish tuu daagtinaí.

<sup>10</sup> Israel aents aidau Guilgal nugka yaakat Jericónmanini awa nuwi batsamsauwai. Nuwi batsamas mijan nagkannamu yama nagkamchak nantu taka, tsawan catorcetin Pascua pag levadurajai pachimsuk inajuamu yutai tsawan asamtaí, agkuntai ijunag jiiistamaidau.

<sup>11</sup> Nunú tsawantai pag levadurajai pachimsuk inajuamun trigo duwikbaujai yuwawajui. Nuwi kashinia duwi nunú nugkanmaya ajak aidau juukag yuwawajui.

<sup>12</sup> Nuna yuwidau asagmatai, maná kakebaunak nunú tsawantin megkaekauwai. Nuniku asamtaí ataktu awagkig, Israel aents aidau manának yuwachaju ainawai. Tuja nunú mijantinig Canaán nugkanmaya ajak aidau juukag yuwajaku ainawai.

### *Josué Apajuí suntaji apujin wainkamu*

<sup>13</sup> Makichik tsawantai Josué yaakat Jericónum jegattak pujusa aents puyajan takus wajattaman wainkauwai. Nunik jegantun iniak:

“¿Amesh ii ainag nuwiyagkaitam, atsa iina shiwaaji aina nuwiyachukaitam?” tau.

<sup>14</sup> Tusa iniam nii ayaak:

\* 5:9 “Guilgal” tawa duka hebreo chichamnumak “ajapjuamu” taku tawai. Tuja tutupnik takug akagkekbaú taku tawai.

“Ame jimag adayam nuwiyagkesh atsujai. Wika Tuke Pujuun suntaji aina nuna apujiyaitjai”, tiuwai.

Tusa tutai Josué niina eme anentus tsuntsuma nijayin nugka antig pujusa iniak: “Wajina dutikati tame nunú tujutta, nuna betek umiktajai”, tau.

<sup>15</sup> Tusa tutai nii ayaak: “¡Sapatjum ukuimakta, wagki ame wajam aanka dekas nugka Apajúi etegkamu shiig pegkegmai!”, tiuwai. Tusa tama Josué sapatjin ukuimakui.

## 6

### *Jerícó jetektasa chicham umikbau*

<sup>1</sup> Israel aents aidau utsaantugmawag amupakainum ayamjumakmi tuidau asag, yaakat Jerícó waitiji aidaunak shiig epenjaju ainawai. Dutikamu asamtai makichik aentskesh waimainchau, tuja agaagkesh jijnmainchau aajakui.

<sup>2</sup> Tujash Tuke Pujuu Josué chichajak:

“Jerícó apujin niina suntaji aidaujai depetuk ijinati tusan amina idaitusjame.

<sup>3</sup> Tuja atum suntag Israel aents aidautijum ¡makichik tsawantai makichkia Jerícó tentea ukutajum! Duti dutikakuajum seis tsawan ejetajum.

<sup>4</sup> Tuja yama nagkamchakug siete sacerdote aidau maki makichik umputai uwig aishmagku kachují najanamun takus emkatnume. Nunikag tikich sacerdote aidau chicham umiktin agagbau egketun arcan jukiag ukunum wenai dita eemak shimittawai. Nuninai suntag aidauk nuna ukujin shimittawai. Untsu tsawan sietetin sieteya imania yaakat tenteattagme. Tuja siete sacerdote aidau uwija kachujin takakuina nunú yaaktan tentea shimuinak umpuiniagtatui.

<sup>5</sup> Nunú uwija kachují umpuamun yapajia nuni senchi umpuinakui senchi untsumkatajum. Imatjumin yaakat peeamua nunú kupinak iyattawai. Nunikmatai pisajajum yaakat Jerícó utsantuattagme”, tiuwai.

<sup>6</sup> Tusa tima Josué sacerdote aidau untsuka ijumag chichajak: “Atum chicham umiktinun Tuke Pujuu amasbau egkeamu arca yanaki jukijum Jerícó tenteajum wetajum. Untsu atumnia siete aents aidau maki makichik uwija kachujin takus emkatnume”, tiuwai.

<sup>7</sup> Aatus tusa ukuak, suntag Israel aents aidau ashí ijumag chichajak: “Atum aidautigmeshkam wetajum. Nunikjum yaakat tenteatajum. Tuja aents maanitan yacha aina nunú sacerdote aidau arcan yanaki juki wena nuna emtin shimiagtatui”, tiuwai.

<sup>8</sup> Tusa timatai imatiksag umikajui. Nuadui siete sacerdote aidau maki makichik uwija kachujin jukiag umpui umpuinakua shimuidau. Nunik shimuinai nuna ukujin tikich sacerdote aidau arcan yanaki jukiag shimuidau.

<sup>9</sup> Tuja aents maanitan yacha aidauk sacerdote aidau shimamu emtin shimuidau. Nuninai untsu tikich suntag aidauk, sacerdote chicham umiktin agagbau egketun juki wena nuna ukujin shimuidau. Nuninai sacerdote uwija kachujin takaku aidauk umpui umpuinakua shimuidau.

<sup>10</sup> Israel aents suntag aidau eke jijnag shimatsaig Josué ditan chichajak: “¡Makichkish chichatsuk takamtak wetajum, wi untsumkatajum takui shiig senchi untsumkatin asajum!”, tiuwai.

### *Jerícó jetekbau*

<sup>11</sup> Sacerdote aidau arcan yanaki juki wena nunú yaaktan makichkia tenteatnume tusa Josué tiuwai. Tusa tima shiyakag makichkia tenteawag ukuinak waketug ditá batsatbaunum kaunawag nuwi kajigkajui.

<sup>12</sup> Nunikag kashinia duwi Josué kashikmas nantakmatai, Israel aents aidashkam ashí nantajajui. Nunikagmatai sacerdote aidau arcan yanaki jukijajui.

<sup>13</sup> Nunik shimiagtai aents maanitan yacha aidau eemag shimuidau. Untsu ditá ukujin sacerdote aidau uwija kachujin makichkish ayamtsuk umpui umpuinakua shimujakajui. Tuja nuna ukujin sacerdote arcan yanaki jukiag shimuinai, nuna ukujin inagnamunum suntag aidau shimuidau. Tuja kachu umpuamuk tuke shinu au.

<sup>14</sup> Kashinia duishkam dutiksag yaaktan tenteawag ukuinak dita batsatbaunum waketajajui. Duti dutikainakua seis tsawantan ejeyajui.

<sup>15</sup> Untsu tsawan sieteya duwi sacerdote aidau suntag aidaujai ejampek nantajag yaanchuk dutikamunak betek yaaktan tenteawag shimuidau. Untsu nunú tsawantin sieteya imania tenteawajui.

<sup>16</sup> Tuja sacerdote aidau sieteya imania uwija kachujin umpuiniagtai, Josué aents aidau chichajak:

“¡Senchi untsumkatajum! ¡Wagki Tuke Pujuu juju yaaktanak depetuk tsaitinme tusa iina idaitugmase!

<sup>17</sup> Au yaakta duka ashí nuwi wajig ayawa nujai tsainkattawai, wagki Tuke Pujuu nunikti tiu asantai. Untsu nuwa akika dutiktai Rahab ashí tikich aidaujai niina jeen batsamiagtata duka makichkish maawaigpa, wagki aents dekamatnume tusa wi ishiakbau aidauun nii uuka ayamjuku asantai.

<sup>18</sup> Tuja atumshakam kuitamamkatajum, wainka nuwiya waji aina duka makichkish jukigpa. Nuigtush achitkesh achikaigpa, wagki nunú aidauunak Apajuí ashí tsaitinme tujabiuwai. Untsu nunú atum umishtaik, Apajuí iina yaaktajin tsaigtamainai. Nuna dutikamtaig utugchatak iinu amainai.

<sup>19</sup> Untsu oro, plata, tuja ashí waji bronze, hierro aatus najankamu aina duka Tuke Pujuu anagkuamu atatuí. Nunú aina duka yajuaka, waji akik Apajuínu aidau egketainum egkenattawai”, tiuwai.

<sup>20</sup> Nuna aatus Josué Israel aents aidauun ujaka inagnakmatai, sacerdote aidau uwija kachujin umpuajajui. Nuna antuinamuik Israel aents suntag aidauk senchi unsumaidau. Imatuinai yaakat peejamu kupinak iyauwai. Nunikmatai pisajug yaaktan utuawajui. Nunikag yaaktan utsantuawag aents aidauun depetuk ijinawag, yaaktanak dita atainajui. <sup>21</sup> Dutikawag nuadui aents aishmag aidauun, nuwa aidauun, datsauch aidauun, múuntuch aidauun, ashí ijinawajui. Dutikainak buey aidauun, uwig aidauun, burro aidauunashkam ashí ijinawajui.

<sup>22</sup> Dutikawag nuadui aents nugka dekatatus yujasu aidauun Josué chichajak: “iNuwa akika dutiktai puja nuna jeen wetajum. Nunikjum nii jiyakjum tikich aidau niijai batsatushkan ashí jigtajum, atum wajintu nii anagkuawaitjume dutiksagmek!” tiuwai.

<sup>23</sup> Tusa tiajam wayawag Rahab, niina apaji, dukuji, umayi aidau, kai aidau, nuigtu niina patayi aidaujai batsatun ashí jiiijajui. Dutikawag ditá batsamtaijin ukumtikiag agkan ishamain atsaunum batsasu ainawai.

<sup>24</sup> Nuna dutikainai suntag aidau yaaktanak ekemakag ashí apeawajui. Untsu oro, plata, tuja waji bronze, hierro najankamu aidauunak apeachajui. Nunak ayatak jukiag waji akik Tuke Pujuuun aidau egketainum egkeawajui.

<sup>25</sup> Nuna imatika ashí ijinkush, Josuék Rahabnak niina patayi aidaujai maachui, wagki aents nugkan dekatnume tusa Jericó ishiakbau aidauun maawainum tusa uuka uwemtikjau asantai. Dutika maachbau asag, Rahab wegantu aidauk yamaikish Israel wegantu aidaujai batsamin ainawai.

<sup>26</sup> Nuna ashí dutika atakea duish tuke uminkatnun pachis Josué juna aatus tiuwai: “Makichik aentskesh yaakat Jericó tsaikbauwa nuna ataktu jegamjatjai tusa takug, niina uchiji iwai mantamnattawai. Nunikmatai takatan takau aidau nuna iyashin aepawag nuwi ekeniag jegamjagtinaí. Tuja niina uchiji ekeushkan nunisag mantamnattawai. Nunikmatai nuna iyashinashkam aepawag nuwi ekeniag yaakta waitijin najanawagtinaí”, tiuwai.

<sup>27</sup> Josuénak Apajuí yaigkui, nuadui ashí aents tikich nugkanum batsamin aidauun niina wajujinak shiig dekajujaku ainawai.

## 10

### *Amorreo aents aidau depetkamu*

<sup>1</sup> Josué Israel aents aidaujai Jericón tsaikajua dutiksag tikich yaakat Ai tutainashkan tsaikajui. Dutikawagmatai yaakat Gabaógnunia aidauk ishamainak Israel aents aidaujaig maaniachmi tusag chichaman umikaju asag, ditajai ijunag batsatui tabaun Adonisédec Jerusalégkan apuji dekauwai.

<sup>2</sup> Nunik dekaa yaakat Gabaógkak tikich yaakat Ai tutain Israel aents aidau tsaikajua nuna nagkaesau múun, kuashat apugtin tuja nuigtushkan suntag aidauun maanitan yacha aidau asagmatai, niina aentsji aidaujai shiig senchi ishankajui.

<sup>3</sup> Nuadui Adonisédec yaakat Hebrógka apujin Hohaman, yaakat Jarmutan apujin Píraman, yaakat Laquisha apujin Jafian, yaakat Eglógka apujin Debiran aatus chichaman akuptukui. Dutikawajam chichama etsejin aidau ditan uainak:

<sup>4</sup> “Apu Adonisédec chichaak: ‘Gabaón aents aidauk maanitsuk agkan batsamsagmi tusag Josuéjai, tuja Israel aents aidaujaishkan chichaman umikaje. Nuniku asagmatai ipajime kaunatajum. Nunikjum Gabaón aents aidaujai maaniamu atutkatajum’”, tiuwai.

<sup>5</sup> Tusa tiajam cinco apu amorreo aents aidauun apuji aidau: Yaakat Jerusalégnumia, Hebrógnumia, Jarmutnumia, Laquishnumia, Eglógnumia aatus ijunag dita suntaji aidaujai Gabaón jetekmi tusag shiyakajui.

<sup>6</sup> Nuna Gabaón aents aidau dekawag ditashkan Josué Guilgal pujaun chichaman akuptuinak aatus tiajui: “Ii atumjai chicham umiakku: ‘atumí inake agmí’, timaiji.



Nuniau asamtai atum jutiik ayamkagtumainaitjume. Nuadui amina suntajum aidaujai kaunajum ayamkagtuktajum, wagki amorreo aents aina nuna apuji aidau mujanum batsamin aina duka ashí ijunjaje jetepakagtatus”, tiuwai.

<sup>7</sup> Nuna antuk Josué Guilgal pujau niina suntaji maanitan yacha wajuu aidau yajuak ijumjauwai.

<sup>8</sup> Dutika umikmatai eke wegachunak Tuke Pujuu Josué chichajak: “Amorreo aents aina duka ishamkaipa, amina idaitusjame, nii depetuk ijinati tusan. Nuadui makichik aentskesh dita aina nuwiyag amejai igkunia maanimainuk shiig atsuttawai”, tiuwai.

<sup>9</sup> Tusa tima Josué Guilgal pujau Israel aents aidaujai jünag kashi shima shimakua jegawajui. Nunik amorreo aents aidau gabaógnumia aidau jetektatus anutujag batsamtaun pachiachbaunum jetekajui.

<sup>10</sup> Tuja amorreo aents aidau nak Tuke Pujuu Israel aents aidau jetenam ishamkatneme tiuwai. Tusa tibau asamtai Josué amorreo aents aidau Gabaógnum shiig kuashat amukui. Dutika amuum jinta Bet-horón wetainum pisatai pataetukag mai mainakua, yaakat Azecá yaakat Maquedájai aajakua imanui jegawajui.

<sup>11</sup> Tuja tikich aents amorreo aidau Israel aents aidau ishamak yaakat Bet-horón jegattak shimittaman, Tuke Pujuu bichan kayajai betek akaketuk Israel aents aidau puyajai ijinai nuna nagkaesau ijinawai.

<sup>12</sup> Tuke Pujuu amorreo aents aidau nak Israel aents aidau amuktinme tibau asag amukajua nunú tsawantín Josué niina suntaji aidau emtin Tuke Pujuuun segaak aatus tiuwai:

“¡Etsayah, Gabaón mamiksam jasa ekemsata!

¡Nantuh, ameshkam

nain ségaju Aialón tutaya nunú mamiksam jasa ekemsata!”

<sup>13</sup> Tusa tima etsa nantujai

jasa asauwai, nunikmatai

Israel aents aidau

dita shiwaajinak ashí

depetuk amukajui.

Tuja Israel aents aidau shiig wajak nunash yujasajamkiyi duka imatiksaik papii Jasher tawa nuwi agagbau aajakui. Tuja etsak akaetsuk makichik tsawan tumain jasa asauwai.

<sup>14</sup> Nunak yaunchuk aents aidau Tuke Pujuuun segajaku aina duikish dutikashbaun nunú tsawantín dutikauwai. Nunú tsawantai Tuke Pujuu Israel aents aidau ayamjak shiig paan maaniauwai.

<sup>15</sup> Tuja Josué nunik depetmak Israel aents aidaujai dita batsamtaijin Guilgalnum wakitkiuwai.

## 24

### *Josué jakattak pujusa akatmamjamu*

<sup>1</sup> Yaakat Siquemnum Josué Israel aents aidau ashí ijumjauwai. Nuwi Israel aentsu apuji múun aidau, apu chichama epegkin aidau, suntaja apuji aidau aatus, aak pegkejam Apajuújai chichatai aakmakbaunum niinis ijunjajui.

<sup>2</sup> Nunik ashí ijunjamtai Josué chichajak:

“Tuke Pujuu atumi Apajuújum juna aatus tujamainawai: ‘Yaunchuk atumi muunjum aajaku aidau: Téräh niina uchiji Abraham, Nacor, aatus namak Eufratesa amain batsamas dita apajuúmtaijin emematujaku ainawai.

<sup>3</sup> Nuni batsatun wi Abrahaman jiiki jukin juju Canaán nugka juwi itaan awekasuitjai. Tuja nuigtushkam nii wegantun kuashat ikauntukuitjai. Yama nagkamchaknum susauwaitjai niina uchijin, Isaakan.

<sup>4</sup> Tuja Isaakan susauwaitjai jimag uchijin: Jacopan, Esaújai. Tuja Esaún susauwaitjai muja ikam tepau Seir tutain. Untsu Jacob niina uchiji aidau yajuak Egipto nugkanum weuwai.

<sup>5</sup> “Nunika nuwi kuashat mijan batsatai, wi Moisésan Aarógnai akuptukuitjai ditan yaigtinme tusan. Dutikan egiptunmaya aents aidau nak shiig senchi suwimka susan waitkasan atumi muunjum aidau nuwi batsatun jiiuitjai.

<sup>6</sup> Tuja atumi muunjum aidau Egipto nugkanum batsatu jünjamtai, nuwiya aents aidau carro maanitai aidau caballo aidaujai yajuakag pataetukag nayants kapantunum egegawajui.

<sup>7</sup> Dutikainam, yainkata tusag mina untsugkajabi. Tujutuinakui egiptunmaya aidau shimamu emtin, tuja Israel aents aidau batsatbau ukujin suwe awajsamiajai. Tuja nayants buku wajasbaunum katidaun yumi pimak ijinati tusa ti ai, egiptunmaya aidau

nayants yutuam jinawabi. Wi nuna Egipto nugkanum dutikauwaitag duka atumek shiig wainkauwaitjume.

“ Nunikjum kuashat mijan uwegshunum yujasuitjume,

<sup>8</sup> nunika yujautigmin yajuakan namak Jordágka amain etsa minitaiya nuni amorreo aents aidau batsamtaijin ikaunmawaitjume. Dutika ai amorreo aents aidau atumjai maaniaawabi. Tujash wi ditan ijinatnum tiu asamtai, atum depetkajum ijinauwaitjume. Dutikajum dita nugke aidauk atum jukiuwaitjume.

<sup>9</sup> “ ‘Tuja tikich tsawantai Balac Sipora uchiji Moab aents aidau apuji atumjai maaniatatus kautjamkajui. Nunik chichama etsejin aidaun akateg Balaam Beora uchiji ujaktajum, dutikam nii atumin pegkegchaunum yumigtamjatnume tusa tiuwai.

<sup>10</sup> Tujash Balaam pegkegnum yumigtamjatnume tusan wi ti ai, pegkegnum yumigtamjajabi. Dutikan ayamjukuitjume.

<sup>11</sup> Dutika ayamjukbau asajum namak Jordán katitkajum Jericó kaunawaitjume. Tuja Jericónum batsamin amorreo aents aidau, Canaán aents aidau, hitita aents aidau, gergeseo aents aidau, heveo aents aidau, Jebús aents aidau aatus atumjai maaniaawajui. Tujash wi ditanak atumin idaitusuitjume. Nuadui atum depetka amukuitjume.

<sup>12</sup> Tuja atum aidautijum amorreo aents aidaun apuji jimag aajakua nunú dita aentsji aidaujai depetkauwaitjume. Tujash duka atum ima senchigtin asagmekesh, atsa atum maanit ima yacha asagmekesh dutikachuitjume. Nunú depetkauwaitjum nunak wi atumin ishamjamkatnume tibau asag, ishamjamaidau asagmatai depetkauwaitjume. Nuadui atumek eke jegatsjuminig, ishamjamak pisaju aina nunak nuniku ainawai.

<sup>13</sup> Nuadui yamai atumek tikich aents aidau jegamjamunum batsatjume. Tuja uva aidau, oliva aidau ajakmakbau juuka yuwajum dushakam dita ajakbaunmaya yuwagme. Wagki wi juju nugkanum ayá nunak ashí nugkajai atumin amasuitjime’, tawai Apajuí”, tusa Josué tiuwai.

Tuja nuigtu Josué chichaak:

<sup>14</sup> “Nunú ashí anentaimtusjum Tuke Pujuu eme anentsa emematjukum dekaskenum umigkatajum. Tuja yaunchuk atumi muunjum aidau namak Eufratesa amain etsa minitaiya nuni batsamas ditá apajuímtai aidaun emematujaku aina duka idaisatajum. ¡Nunikjum ima Tuke Pujuu umigkatajum!

<sup>15</sup> Tuja atum Tuke Pujuu umigkatasa wakegashkugmek, yamai titajum ya umigkatag tajume nunú. Yaunchuk atumi muunjum aidau namak eufratesnum batsamas dita apajuímtaiji aidaun emematujaku aina duka ememattag tajum, atsa nuniachkugmesh amorreo aents juju nugkanum batsamin aina nuna ememattai aina duka ememattag tajum, nunú titajum. Tuja atum Tuke Pujuu ememat dakitakjuminish, ¡wika mina pataag aidaujai Tuke Pujuu umigkun ememattajai!” tiuwai.

<sup>16</sup> Tusa tutai Israel aents aidau chichainak:

“¡Wainka apajuímtai aina duka ememattsuk ima Tuke Pujuuwa duke emematuinaku umigkagmi taji!

<sup>17</sup> Ii aidautin iina muunji aajaku aina nujai Egipto nugkanum inaku waitkatai batsatutin jiiipajua duka Tuke Pujuu iina Apajuíjijai. Niiyai wainchatai aidaun iish wainjin iwainajua nunú. Tuja nuigtushkam jiiinja shimaku kuashat aents aidau batsatbaunum shimajinish nii kuitamjamu asa ayamjutpakui.

<sup>18</sup> Ii shimamunum tikich aents aidau ayaunash nii jiija ishiakui. Amorreo aents aidau juju nugka juwi batsamin aajaku aina nunashkam nigki jiija utsagkui. Nunú anentaimtusa ¡Tuke Pujuu umigkagmi taji, wagki niyai iina Apajuíjijya duka!”, tuidau.

<sup>19</sup> Tusa tiagtai Josué ditan chichajak:

“Atumek Tuke Pujuu kakajus umigmajin dekapeatsjume, wagki Apajuik pegkegmai, akasmatnash akasmauwai. Iman asa atum niijai shiwagmaekujum pegkegchau takamugminak atsanjagkesh idaitugmamaitsui.

<sup>20</sup> “Atum aidautijum nii umigtsuk kajimatki idaikujum, tikich wainka apajuímtai aina nunú emematu yujagminig, wait anenjamag ayamjutpak uwemtijamjau akush, tuke suwimkanak amasagtinai”, tiuwai.

<sup>21</sup> Tusa tutai Israel aents aidau chichainak:

“¡Duka nunikchattawai, iik ima Tuke Pujuu umigkagmi taji!” tuidau.

<sup>22</sup> Tusa tiagtai Josué chichaak:

“Tuke Pujuu umigkagmi tusa tajum duka kame atumesh dekas umigmajin asagmes tajumtai”, tiuwai. Tusa tama dita aimainak:

“¡Iishkam ame tame dutiksaik anentaimji!” tiajui.

<sup>23</sup> Tusa tiagtai Josué ditan chichajak:

“Nunú takugmek anú wainka apajuímtai aidau atum pujamunum ayá nunú utsag-tajum. Dutikajum Tuke Pujuu atumi Apajuíjum, atumi anentaimijai ememattajum”, tiuwai.

<sup>24</sup> Tusa timatai Israel aents aidau aimainak:

“¡Ii aidautik Tuke Pujuu iina Apajuíjiya duke emematku, nii tujabauwa duke umigkami taji!” tuidau.

<sup>25</sup> Tusa tiagmatai yaunchuk Apajuí Moisésjai chichaman umikua dutiksag, Josué ashí Israel aents aidaujai nunú tsawantinig yaakat Siquemnum Apajuíjai chichaman umikajui. Nunú chicham umikbaun ditan susauwai umiktinme tusa.

<sup>26</sup> Dutika nuadui Apajuí chichame umiktin agatainum agajui. Duwi kaya muuntan juki aak pegkejam Apajuíjai chichatai aakmakbau aajakua nuna yantamen numi encina tutai wajaunum nuna wakentin apusauwai.

<sup>27</sup> Dutika apujus ashí Israel aents aidau chichajak:

“Atumek dekgame ii umiktin pachisa chicham taji nuna makichik tuké anta nunú. Nunú chicham ii umiamun aents wajas antauwa numamtin atata duka juju kaya nunuwai, wagki yamaya juwi atum aidautigmin Tuke Pujuu tujamiaja nunú umiktin pachisjum titin asagmin. Juju wainkujum Tuke Pujuu umijin amí tusa tajum nunú tuke aneasjumke atinaitjume”, tiuwai.

<sup>28</sup> Nuna ashí tusa inagnak Josué Israel aents aidau waketjatajum tusa maki makichik dita nugken ishiakui.

*Josué jakamu*

*(Jue. 2.2-10)*

<sup>29</sup> Dutika ishiak kuashat tsawan weatsaig, Josué Tuke Pujuum inake aajakua duka ciento diez mijanan ejeyi pujus jakauwai.

<sup>30</sup> Nunikmatai muja Gaash tutai awa nuwi niina nugke Timnat-Sérah daagtin Efraígka nugken awa nuwi ukusajui.

<sup>31</sup> Tuja Josué pujusmataig Israel aents aidauk ima Tuke Pujuumak umijujaku ainawai. Tuja Israel aents aidau yayaak kuashat waji wainchatai aidau Apajuí iwainajua nuna apu múun aidau wainkau aina nunú batsamsamtaishkam ima Israel aents aidauk Apajuínak umijujaku ainawai.

*Israel aents aidau José ukunchin ukusagbau*

<sup>32</sup> Israel aents aidau Egipto nugkanum batsatu jinnag shimak José ukunchin jukiajuu aina nuna yaakat Siquemnum ukusajui. Nunak Hamor Siquem aajakua nuna apaji nugken Jacob cien kuichik jiju plata tutai najanamui akikmak sumakua nuwi ukusajui. Nunú nugkanak José wegantu aidau jukiú ainawai.

*Eleazar jakamu*

<sup>33</sup> Eleazar Arónka uchiji jakamtaí, Efraín nugkanum niina uchiji Fineesa nugke mujá aajakua nuwi ukusajui.

## Apu chichama epegkin aidau Jueces

### 2

*Apajui ángel tumain Boquim nugkanum Israel aents aidau wantintukbau*

<sup>1</sup> Apajui ángel tumain Guilgalnumia juwaki Boquimnum weuwai. Nunik jegaa Israel aents aidau chichajak:

“Atumnak Egipto nugkanum batsatutigmin wi jigmajime. Dutikan juju nugka juna atumi muunjum aidau anagkuakun, atumi uchijum wegantu aidau susatnaitjai, tiuwaitag nuwi itajime. Ditan chichajuinakun: ‘Wi atumjai chichaman umikag nunak tuké umiktinaitjai’, tiuwaitjai.

<sup>2</sup> “Tuja untsu atum aidatigmek juju nugkanmaya aents aina nujag makichikish chichamak umikaigpa. Ayatak dita apajuimtaiji dakumkamu aina nunú tsaigka utsankatajum’, tiuwaitjime. Tujash atumek duka umigtukchawaitjume. ¡Yamaikish juju umikugmek, aniau asajum umigtukchau ainagme!

<sup>3</sup> Nuadui yamai tajime: ‘Au aents aidau atumjai batsata nunak jignuk utsagchattajai. Nuadui dita apajuimtai aidaujai atumin tsanupajagtai’”, tiuwai.

<sup>4</sup> Tusa nunú Apajui ángel tumain chichaka inagnakmatai, ashí Israel aents aidauk shiig senchi buutuidau.

<sup>5</sup> Nuadui nunú nugka daajin Boquim\* adaikau ainawai. Tuja nuwi kuntinun maawag apenak Tuke Pujuu emematiajai.

*Josué jakamu*

<sup>6</sup> Nuna Josué tusa inagnakmatai, Israel aents aidau maki makichik ditá nugken waketjajui.

<sup>7</sup> Tuja Josué pujusmataig Israel aents aidauk ima Tuke Pujuuunak umijujaku ainawai. Nuigtushkam Israel aentsu apuji múun aidau Tuke Pujuu ditan yayaak kuashat dutikauwa nuna wainajaku aidau batsamsamtaishkam, ima Apajuinak umijujaku ainawai.

<sup>8</sup> Tuja Josuék ciento diez mijan ejeyi pujus jakauwai.

<sup>9</sup> Nunik jakamtai, muja Gaash tutainum, Efraigka nugken niina nugke Timnat-Sérah tutai awa, nuwi ukusajui.

<sup>10</sup> Tuja Josuéjai betek batsamajaku aina dushakam múun waigkag jinawajui. Nunú jinawaju ai batsamas akiinkau aidauk Tuke Pujuuunak dekajakchaw ainawai. Tuja Apajui ditan ayamjak wainchatai aidau kuashat iwainajua nunakesh dekachaju ainawai.

*Israel aents aidau Apajui ememattan idaisagbau*

<sup>11</sup> Israel aents aidau uchiji aidauk Tuke Pujuu diismak shiig pegkegchaun takajaku ainawai. Nuniau asag wainka apajuimtai Baal aajakua nuna emematujaku ainawai.

<sup>12</sup> Nuninak ditá muunji aidau Egipto nugkanum batsatun Tuke Pujuu jijua nunak kajimatki idaisajui. Nuninak nuwiya aentsu apajuimtai aidau emematuidau. Nuniagtai Tuke Pujuu ditan senchi kajekauwai.

<sup>13</sup> Aatus Israel aents aidauk Baal, Astartéjai dakumka najanamu aidau emematuinak Apajui ememattanak kajimatki idaisajui.

<sup>14</sup> Nuadui Tuke Pujuu Israel aents aidau kajujuk dita wajiji aidau shiwag aidau kasajug yajutkatnume tusa idaisauwai. Nuigtushkam Israel aents aidau batsatbaunum nuna yantamen ditá shiwaaji aidau batsata nunú jetekag depetuk amuktinme tusa idaisauwai. Nuadui Israel aents aidauk ayamjumamainchau wajasui.

<sup>15</sup> Tuja maaniawagtatus shimiagtaish, Tuke Pujuu ditanak yaijakchawai. Dutika yayachbau asag maaninakush depetmajakchaw ainawai, Apajui tibaunak imatiksag.

Tuke Pujuu ditanak maaninakush kakaag iikmamainchau awajsauwai,

<sup>16</sup> nuna dutikakush Israel aents aidau kasajuidau ayamjuktinun apu chichama epegkin aidau adaitujui.

<sup>17</sup> Tujash Israel aents aidau apu chichama epegkin aidau adaijamunash umigkachaju ainawai. Numidau asag Apajuinak umigtsuk tikich wainka apajuimtai aidau emematu-jaku ainawai. Untsu ditá muunji aajaku aina duka Apajui chichamen umijujaku ainawai. Tujash ditak Tuke Pujuu chichame umigtanak dakitug idaisau ainawai.

\* 2:5 “Boquim” tawa nunak hebreo chichamnumak “buutbau” taku tawai.

<sup>18</sup> Tuke Pujuu apu chichama epegkin atinun adaikag tuké yaijakui. Nunú apu aidau batsamsamtaig, Israel aents aidaunak ditá shiwaaji waitkagtaish Tuke Pujuu ayamjujakui, wagki waituinak chichainamun antuju asa.

<sup>19</sup> Untsu nunú apu adaikamu aidau jakamtaig, ataktushkam nunisag Apajuí ememat-tan kajimatkiag wainka apajuímtai aidaun emematujaku ainawai. Ditak yaunchuk ditá apachji aajaku aina nuna nagkaesau pegkegchau aajaku ainawai. Nunidau asag aents antakchaujai betek ima pegkegchaunak takajaku ainawai.

<sup>20</sup> Nuadui Tuke Pujuu ditan kajejuk chichajak:

“Juju aents aina juka wi yaunchuk ditá apachji aidaujai chichaman umikuitag nunak uminatsui. Nunidau asag minak umigtuinatsui.

<sup>21</sup> Nuadui juju nugkanmaya aents aidaun Josué jiija utsag emau nii jak ukukbau batsata nunak wishakam jiignuk utsagchattajai”, tiuwai.

<sup>22</sup> Nuna tiuwa nunak: “Juna antukajash yaunchuk ditá muunji aidau Tuke Pujuu emematujaku aina nunisag ditash Tuke Pujuu emematchajaintash tusa dekapstatatus”, tiuwai.

<sup>23</sup> Nuna tau asa nuwiya aents aidaun Josué eke jiigchauwa nunak Tuke Pujushkam jiigchauwai, ayatak idaisauwai batsamsatnume tusa.

## 4

### *Débora Baracjai Sísaran depetkamu*

<sup>1</sup> Ehud jakamtai pujusag Israel aents aidauk Tuke Pujuu umigtsuk ataktushkam pegkegchaun takaidau.

<sup>2</sup> Nuniagtai Jabín canaágnunia aents aidaun apuji, yaakat Hasornum inamajakua nunú, Israel aents aidaun depetuk amuktinme tusa Tuke Pujuu idaisauwai. Jabígnkan suntaji aidaun apuji aajakui Sísara. Duka Haróset-goím tutainum pujujakui.

<sup>3</sup> Jabígnak ajujakui novecientos carro hierro najanamu aidau. Nuadui Israel aents aidaunak veinte mijanai waitka batsamtuaidau. Imatika waitka batsamtam ditashkam Tuke Pujuu yaimpakti tusag senchi segau ainawai.

<sup>4</sup> Tuja Israel aents aidaun waitkajaku aina nunú tsawantinig Lapidot\* aajakua nuna nuwe Débora, Apajuí chichamen etsejukakua nunú, apu chichama epegkin aajakui Israel aents aidaunum.

<sup>5</sup> Déborak palmera wajautin tuké ekemajakui. Nuadui aents aidau nunú palmeran “Débora palmeraji” tiu ainawai. Duka Efraígka mujaji tutainum yaakat Ramá Beteljai niniaku aajakua nuna ejapeen aajakui. Nuwi Débora pujau asantai, Israel aents aidau shimitujaku ainawai, chichaman epegtujuati tusag.

<sup>6</sup> Tuja makichik tsawantai Abinoáma uchiji Barac Neftalí wegantu aidau nugken yaakat Quedesnum pujuttaman, ujaka utitajum tusa Débora makichik aentsun akup-tukui. Dutika ujakam taamtai chichajak:

“Tuke Pujuu Israel aents aidau emematin aina nunú Apajuí juna aatus chichaak: ‘Muja Tabornum weti. Nunik nuwi Neftalí wegantu aidaun Sabulón wegantu aidaujai ipaa diez mil aentsun ijumjati.

<sup>7</sup> Tuja Jabígnka suntaji aina nuna apuji Sísara, atumin jetepaktatus niina carroji aidaunum namak Quisónnum kaunatnume titatjai. Nunikmetai wi atumin idaitus-tatjime depetuk ijinatnume’, tusa Tuke Pujuu tujamui”, tiuwai.

<sup>8</sup> Tutai nii ayaak:

“Wika amejai wetatjai. Untsu ame minachkuminig wikik wechattajai”, tiuwai.

<sup>9</sup> Tutai Débora ayaak:

“Wika amejai wetatjai. Wagki Tuke Pujuu Sísaranak nuwa maati titatui. Nuadui juju maaniamunum ame nagkamatink akumesh Barac maania depetmake, tamak achattame”, tiuwai.

Nuna tusa Baracjai yaakat Quedesnum weuwai.

<sup>10</sup> Nuwi Barac jegaa Sabulón wegantu aidaun Neftalí wegantu aidaujai untsuka diez mil aentsun ijumjauwai. Nunik wetai Déborashkam Baracjai weuwai.

<sup>11</sup> Untsu Moisésa wegaji Hobab aajakua nunú wegantu quenita aents aajaku aina nuwiya makichik Heber daagtin niish kanak, yaakat Quedes jegattak nugka Saanaim numi encina ayamunum pujujakui.

<sup>12</sup> Tuja Barac niina suntaji aidaujai muja Tabornum wakae tabaun Sísara dekauwai.

<sup>13</sup> Nunik novecientos carro hierro najanamu aidaun yajuak niina suntaji aidaujai ijumjauwai. Dutika ditajai yaakat Haróset-goím batsatu jing shima shimakua jegawajui entsa Quisónnum.

\* 4:4 “Lapidot” tawa nunak “antorcha” taku tawai.

<sup>14</sup> Nunikagmatai Débora Barakan chichajak: “¡Pai, yamai maaniata, Tuke Pujuu Sísaranak amina idaitugmase! ¡Amina suntajum aidau shimamunmak Tuke Pujuu eemak weawai!” tiuwai.

Tusa tima Barac muja Tabor pujau niina suntaji aidau diez mil yajuak akaikiuwai.

<sup>15</sup> Nunikag igkuniawag maaninamunum Sísara suntaji aidau carronum yujas maanin aidaujai Baraka puyagjin ishankajui. Nunak Tuke Pujuu nuniktinme tiu asantai, imanísag ishamak maanimainchau dekapenak pisajajui. Tuja niina suntaji aidau pisagtai, Sísarashkam niina carrojin egketu akaiki tupikakiuwai.

<sup>16</sup> Nunik Sísara tupikakmatai, suntag aidau tikich suntag carronum yujas maanin aidaujai pisaidau. Nuntitaman Barac niina suntaji aidaujai pataetuk ma maakua Haróset-goím ejegawajui. Nuna maaniawajua nuaduik Sísara suntaji aidau ashí ijinamu asa makichik iwakukesh juwakchauwai.

<sup>17</sup> Tuja Jabín, Hasoran apuji aajakua duka, quenita aents Heberan patayi aidaujaig maaninchu asagmatai, nuwi Sísarak Hebera nuwe Jael pujamunum tupikaki jegauwai.

<sup>18</sup> Nunikmatai Jael jiintuki igkug chichajak: “¡Mina apujuh, ishankagtutsuk juwi wayata!” tiuwai.

Tusa tima wayamtai, jáanch dupagman juki dukuka uukui.

<sup>19</sup> Dutikam pujasa senchi kitamak yumin uwagatasa Jaelan segauwai. Tusa segam duwap apagbaunum leche yajaa ukukbaun ujaka juki susauwai. Dutika susam nuna uwagmatai, ataktu dukuk idaisauwai.

<sup>20</sup> Dutikam Sísara niina chichajak: “Waitinum pujusta, nuniamin makichik aentskesh inimpak juwi pujatsuak tujamkuig, atsawai tita”, tiuwai.

<sup>21</sup> Nuna tusa Sísarak yawewe asa, shiig senchi kanag tepesui. Nunikmatai Jael martillon juki aak jigkatasa numi tsupija etsakamun juki, takamtak jegantun kajashkinum iju nugkajai ijumag achiauwai. Dutikam Sísarak jakauwai.

<sup>22</sup> Tuja Baracshakam Sísaran egá egakua Jaela jeen jegauwai. Nunikmatai Jael jiintuki igkug chichajak: “¡Wayata, ame egaku wekaetam nuna iwaintuktage!” tau. Tusa tama waya diikma, Sísarak yaunchuk buuknum iju chigkam jaka tepaun wainkauwai.

<sup>23</sup> Aatus Apajuí Israel aents aidau wainainamunum, Jabín canaágnumia aents aidau apuji aajakua nunak niina suntaji aidaujai depetkauwai.

<sup>24</sup> Duwi nagkamas Israel aents aidau Jabígnak nuni senchi jetedau. Ima imatikainakua ashí ijinawag idaisajui.

## 5

### *Débora Baracjai kantamamu*

<sup>1</sup> Nunú tsawantin Débora, Baracjai juna aatus kantamau ainawai:

<sup>2</sup> “Tuke Pujuu ashí ememattajum, wagi Israel aents aidau aents maaniatatus wakeyin aidau yawawai.

Tuja nuigtushkam ditá apuji aidau maaniawagmi tusa tamak utujimkas, ayu tinu aidau batsatui.

<sup>3</sup> ¡Apu aidauwah, yamai wi taja nunú antuktajum!

¡Apu atuwe aidauwah, antuktajum!

¡Wi yamai Tuke Pujuu kantamjuattajai!

¡Israel aents aidau

Tuke Pujuu emematin

aina nuna kantamjuattajai!

<sup>4</sup> “Tuke Pujuuwah, Seír Edom nugkanum aajakua nuwi ame kuitamkagtusamin

yujajin, nugka uugmayi, tuja yumishkam senchi yutujabi.

<sup>5</sup> Tuke Pujuu Israel aents aidau Apajuí ememattayah, ame wainmin muja aidau uujiagmayi.

Tuja muja Sinaishkam senchi uugkauwai.

<sup>6</sup> Samgar Anatan uchiji pujuakua nuaduik,

tuja Jael pujujakua duishkam,  
 jinta aidaunmak ishamain  
 wekaemainchau asamtai,  
 ditá shiwaaji aidau mantuawainum  
 tau asag, yaja menantag  
 jintachunum yujajaku ainawai.  
<sup>7</sup> Nunidau asag Israel aents aidauk  
 kanajag batsamas apugtuchu  
 kajimatkim batsatun,  
 wi Déboran ditá ayamjuktasan,  
 makichik nuwa uchijin ayamjuwama  
 numamtuk wejibiajai.

<sup>8</sup> Ashí Israel aents aidauk  
 wainka apajuímtai aidaun  
 emematiagmayi, nuniau asamtai,  
 ame ditá maaniatnume tusam  
 dita shiwaaji aidau ishikabieme.  
 Tujash ditak cuarenta mil suntag  
 nagkigtin, tantaajintin ainakush  
 sapigmaidau asag, maanimainji  
 atsugbau wajukmaina nuniagmayi.

<sup>9</sup> See tajame amina Tuke Pujuuwah,  
 tuja Israel aents aidaun  
 apuji aina nunashkam  
 shiig anentuinajai,  
 wagki ujumak waji u  
 aina  
 nunú maaniawaju asagmatai.  
 ¡Nuadui Tuke Pujuu ashí ememattajum!

<sup>10</sup> Atum wiakuch aidautijum  
 burro nuwa pujunum entsamka yujau aidautigmesh,  
 tuja ujudauch dawenum yujau aidautigmesh,  
 Apajuí kantamjuatajum,  
 wagki nii depetmatan amasu asamtai.

<sup>11</sup> ¡Tagku kuitamin aidautigmesh,  
 tuja ujudauch yaaktanum  
 batsamchau aidautigmesh,  
 Tuke Pujuu, Israel aents aidaun  
 ayamjuk agkanmitkau asamtai,  
 platillo aidau awatkujum  
 Tuke Pujuu kantamjuatajum!

<sup>12</sup> “¡Débora mijaakaipa!  
 ¡Wajiu wajasta!  
 ¡Nuniakum kantamata!  
 ¡Barac Abinoáma uchijiyah, ameshkam mijamtsuk,  
 aents maaniaku achigbau aidau  
 yajuakam chimpiata!

<sup>13</sup> “Tusa kantaman inagnai, Israel aents aidauk  
 wi ipaamu asag, shiwag  
 maanitan yacha aidaujai,  
 maaniawagtatus shiyakajui.

<sup>14</sup> Tuja Efraín wegantu ujumak aents  
 Amalec aents aidaun  
 nugkenia juwakiag akaejabi.  
 Untsu Benjamín wegantu aidau  
 nuna ukuujin shiyakagmayi.  
 Tuja Maquir wegantun-  
 mayashkam apu aidau shimutkabi.  
 Tuja Sabulón wegantu  
 aidaushkam apu aidau shimutkabi.  
<sup>15</sup> Nuninai Déboranashkam

apu Isacar wegantu aidau uyuniagmayi.  
Nuigtushkam Barakan

Isacar wegantu aidau uyuniagmayi.

Untsu Rubén wegantu aidauk

apu waji u ainayatak,

<sup>16</sup> ditá uwigji aidaun puyatjuinak

batsamas: ¿Maaniatjiash,  
atsa maaniashtajiash? waja batsatui.

Rubén wegantu aidauk múun

ainayatak sapig ainawai.

<sup>17</sup> Tuja Galaad wegantu\* aidauk

Jordágka amain yaaktamak batsamsaje.

Untsu Dan wegantu aidauk Asher wegantu aidaujai, nayantsa pakaji

wegajunum lanchagtin

waigkag batsamsaje.

<sup>18</sup> Untsu Sabulón wegantu aidau, Neftalí wegantu aidaujai maaninak  
ishamainnum yujasu ainawai.

<sup>19</sup> “Tuja Canaán nugkanmaya apu aidau

yaakat Meguidon ijus namak awa nuwi

yaakat Taanac kaunawajui,

nunikag nuwi maaniawajui,

tujash depetmakchajui.

Nunikaju asag makichik wajinakesh jutsuk waketkijajui.

<sup>20</sup> Israel aents aidau Sísarajai

maaninakug, yaya nayaimpinum

ayá nujai ijunjas maaninatai

tumainun maaniawagmayi.

<sup>21</sup> Iina shiwaaji aidau

entsa Quisónkan

katitkatag titatman,

yumi yutug dujajak tajaka utsagke.

¡Ame shiwag senchigtin

aidau depetkam, iikmak

chichakchamin awajsattame!

<sup>22</sup> ¡Caballo aidau ishamkagtukag

shiig senchi pisainak

tutugtau antuewai!

<sup>23</sup> Apajuí ángeltsukaita

tumain chichaman etsejak:

‘¡Yaakat Meroznum

aents batsata nuwi

suwimak iyagti tajai!’ tiuwai.

Nunak tiuwai wagki dita

aidauk waji u ainayatak,

Israel aents aidau

maaniagtai yaigchaju asagmatai.

<sup>24</sup> “¡Heberan nuwe Jael

quenita nuwa duka,

tíkich nuwa Israel aents aina

nuna nagkaesau pegkegnum

chichagtai atinai!

Tuja nuigtushkam nii pujamunum

nuwa aidau pujuina nuna nagkaesau

shiig anentam atinai.

<sup>25</sup> Sísara kitamak yumi segam,

Jael lechen juki susauwai.

¡Leche kanteku shiig pegkejan pinignum yajaa juki susauwai!

<sup>26</sup> Dutikam nuna uwag kanag tepesmatai,

\* 5:17 “Galaad wegantu” tawa nunak “Rubén, Gad, Manasés wegantu jimaituk aajakua” nuna taku tawai.



numi etsakamun juki  
 martillowai kajashkinum iju  
 nugkajai ijumag achia maabi.  
 27 Dutika ijum tadae tadaekawa  
 nuwig jaka tepesmayi.

28 “Tuja Sísara dukujig  
 uchiji megkaekamtai  
 puyatki, jeganum niimtai ujaimunum tsapui  
 niimas atsutai chichaak:  
 ‘¿Wagka mina uchijush  
 imanikash megkaekae?  
 ¿Wagka mina uchiju  
 carroji maanitai agma  
 dusha megkaejae?’ timayi.

29 Tuja niina inake nuwa yacha aidau chichagtai,  
 Sísara dukujishkam dutiksag chichaak:

30 ‘Maaniawag depetmakajas,  
 nuwa inak aidau achigbaun, suntag aidau maki  
 makichik, atsa nuniachkush  
 jimagnakesh akantunikag  
 yajumainak megkaejatai.  
 Tuja Sísaranun jáanch  
 pegkeg agatkamu aidau: makichik jáanchin,  
 tuja nuigtu jimag jáanch agatka apijamu  
 aents depetmakun  
 kuntujen anugtai aidau  
 aatus yajumainakus batsatai’, tuidau.

31 “Tuke Pujuuwah,  
 amina shiwaajum aina  
 duka ame ashí ijinata.  
 ¡Untsu amina anempaina duka etsa tajiag  
 etsantama iman atinme!” aatus tusa Débora  
 Baracjai kantama inagnakui.

Nuna maaniau aina duwi nagkamas cuarenta mijan maanitsuk batsamsau ainawai.

## 6

### *Apajui Gedeóghan mina takagtusta tibau*

1 Tuja Israel aents aidauk Tuke Pujun intimjukiag ataktushkam pegkegchaun takajaku ainawai. Nuniagtai nii madiágnunia aents aidau siete mijanai waitkastinne tusa idaisauwai.

2 Imatika waitkainamu asag ishamainak mujá waa aidauum uumak kakajus wainmainchau batsamajaku ainawai.

3 Nunik batsatai Madián aents aidau, Amalec aents aidau, nuigtu aents etsa minitaiya nuni batsamin aidau aatus Israel aents aidau ajajin utsantuawag kasajuidau.

4 Nunikag nuwi Israel aents aidau nugken aakmajag batsamas, ajak ajakmamu aidau-nak Israel aents aidau yumainnak makichkish ukugtsuk ashí ijituinak, nuigtushkam uwigji aidau, buey aidau, burro aidau aatus ashí yajutuidau. Dutikainak Israel aents aidau yumainnak makichkish ukujainachu.

5 Nunú shiwag aidauk, ditá aakjin tagkuji aidaujai yajuakag, Israel aents aidau nugken utsanawag piyakag nunú nugkanum ayaunak ashí tsaikag ijituinau. Imaaninak camellojjai shiig kuashat manchi ajaka amuktatus miniyama imanik minituidau.

6 Imatika waitkamu asag ditá yumainji atsujam shiig senchi waituidau. Imanik waituinak Tuke Pujun segau ainawai yaijatkata tusag.

7 Nuna Tuke Pujuu antujuk,

8 makichik profetan awetiuwai. Dutikamu nunú ditan chichajak:

“Tuke Pujuu Apajui Israel aents aidau emematin aina nunú juna aatus tawai: Atumi muunjum aidau Egipto nugkanum inaku waitkatai batsatun wi jijjabiajai.

<sup>9</sup> Tuja Egipto nugkanum batsatutigmin agkanmitkauwaitjim nunakek dutikachuitjime, tikich aents aidau waitkagmidaunashkam atumesh wainjuminig jiija utsagkan dita nugke aidaun atumin amasbaijime.

<sup>10</sup> Nuadui atumi chichagkun: ‘Witjai Tuke Pujuu Apajui atum emematin ainajum duka. Nuniau asamtai, amorreo aents aina nuna ememattai aidau dakumka najanamuna aina duka ishamkaigpajum’, tiuwaitjime. Tujash atumek minak umigtukchaugme tawai Apajui”, tusa profeta tiuwai.

<sup>11</sup> Nuna tiu ai Apajui ángel tumain yaakat Ofránnum taa numi encina wajaunum nuna wajautin ekemsauwai. Nunú numik Joás Abiezer wegantu aajakua nudau aajakui. Tuja nunú tsawantinig Gedeón Joása uchiji Madián aents aidau waitkainum tusa, uumak vino najanatasa uva najatainum pujus trigon awatug akaak pujau.

<sup>12</sup> Nuna pujujun Apajui ángeltsukaita tumain wantintuk chichajak:

“¡Aents waju senchigtinuh, Apajui amejaig pujawai!” tau.

<sup>13</sup> Tusa tama Gedeón ayaak:

“Tsagkugtuga Apujuh, tujash Apajui jutjai pujaish, ¿wagka imanikaish waituinaji? Iina muunji aidau ujpainak, Apajui wainchatai ishamain aidaun iwainag Egipto nugkanum batsatutin jiiipajui tusa tujamin agma dusha ¿wajukauwaita? Apajui iinak idaitamsau asamtai, madiágnunia aents aidau waitkagmainawai”, tiuwai.

<sup>14</sup> Tusa tutai Tuke Pujuu niina pempeentuki chichajak:

“Israel aents aidaun Madián aents waitkaina duka ame ayamjuktatme. Wi aminak awemajame”, tiuwai.

<sup>15</sup> Tusa tamashkam ataktu Gedeón ayaak:

“Chah Apujuh, wait aneamam tsagkugtuga. Wisha Israel aents aidaunash ¿wajuk ayamjuktajaki? Mina patag wegantu aina duka Manasés wegantu aidaujai apatkamak wainkauch kakakchau ainawai. Tuja mina yatsug aina nujai ijumjamash wika shiig wainkauchitjai”, tiuwai.

<sup>16</sup> Tusa tutai Tuke Pujuu ayaak:

“Wi amejai pujau asamtai, duka dutikattame. Nuadui Madián aents aidauk makichik aents depetmaina numamtuk depetkam ijinattame”, tiuwai.

<sup>17</sup> Tusa tama Gedeón chichaak:

“Dekaskenum minash Apajuiya ame aujtaemek wainchatai iwaintugkata, nuna wainkan dekas Apajuiyap tujutua titagme.

<sup>18</sup> Tuja wait aneamam wepa, juwi pujumata nuniamin amina ajamsatnun utitjai”, tiuwai.

Tusa tama nii ayaak: “Ayu juwi dakastajame, nuniai weme taata”, tiuwai.

<sup>19</sup> Timatai ukuak, niina jeen weuwai. Nunik makichik chivo tsakatan maa inagkauwai. Nuigtu veinte kilo harinan juki pagkan lewadurajai pachimtsuk inajuauwai. Dutika neje inajuamun chagkinnum egkea nuna yumijin ollanum yajaa juki numi encina tutai wajaunum ejentauwai.

<sup>20</sup> Dutikantai: “Anú neje inajuamua nunú pagjai kayanum patagta. Dutikam nuna yumijiyai ukatkata”, tusa nunú ángel tiuwai. Tusa tima imatiksag umikmatai,

<sup>21</sup> neje pagjai patagbaun ushujutai takakbauwai nuna titijin nunú ángel antigkui. Dutikam nunú kayanmaya jii kegak nuna apea emegkakui. Nuna dutika Gedeógan iwaintuk ayatak megkaekauwai. Nunikmatai ataktu awagkig Gedeógak wainkachui.

<sup>22</sup> Nunik megkaekamtai anentaimas, dekas Tuke Pujuu ángeljai betek wantinkaujaim-pap chichasja tiuwai. Nunik chichaak:

“¡Chah, Tuke Pujuuwah, amina ángeljai betek paan wainkajam duwish jakashtajash!” tiuwai.

<sup>23</sup> Tutai Tuke Pujuu ayaak:

“¡Ishamkaipa, jakashtatme! Wi aminak agkan pujutan amastasan tajuagme”, tiuwai.

<sup>24</sup> Tusa tima Gedeón Tuke Pujuu emematak nuwi kaya ekenag najanauwai. Dutika nuna “Apajui agkan pujutan sukagtin” tuu adaikauwai. Duka yamaikish Abiezeran patayi aidaun batsamta yaakat Ofrá tutaya nuwi awai.

<sup>25</sup> Tuja nunú kashia duwik Tuke Pujuu Gedeógan chichajak:

“Amina apa toroji jimaja nuwiya makichik siete mijan ajamu jukita. Dutikam amina apa ememattai Baal dakumka najanamuna awa nunú tsaigkata. Dutikakum nuna yantamen wainka apajuimtai Asherá dakumka najanamuna numi waja dushakam tsaigkata.

<sup>26</sup> Nunú dutikam Tuke Pujuu amina Apajuijum emematku kuntin maa patai apetai kaya aidau ekenjam yakí jiiikam najanata. Dutika umikam toro maam nuna neje nuwi patai ashí apeakum emematjita. Tuja nunú apeakmek numi Asherá dakumka najanamuna tsaitatam nujai apeattame”, tiuwai.

<sup>27</sup> Tusa tima Gedeón niina inake aidaun diez yajuak, Tuke Pujuu dutikata tibaunak imatiksag ashí umikui. Tujash nunak tsawai dutikachui, kashi dutikauwai, wagki niina apaji patayi aidaun, tikich aents nunú yaaktanum batsamin aidaunashkam ishamau asa.

<sup>28</sup> Nuna dutikau ai tsawak nunú yaaktanmaya aents aidau nantajag diikma, Baal dakumka najanamu numi Asherá dakumka najanamujai mai tsaikbaun wainkajui. Tuja nuigtushkam yamajam altar kaya ekenja najanamunum kuntin maa ashí apeamun wainkajui.

<sup>29</sup> Nuna wainkag pempeentunikiag iniininak: ¿Yaki junash jutikame? tusag, nuna ejetatus kuashta egakag, inimtanashkam imanisag inim yujakma, Gedeón Joása uchiji dutikau tabaun dekawajui. Nunik Joásan jegajuawag chichajuinak:

<sup>30</sup> “¡Amina uchijum jükta, maami! ¡Wagki Baal dakumka najanamuwe nuna, tuja tikich nuna yantamen numi Asherá dakumka najanamu wajama nujai nii tsaike!” tuidau.

<sup>31</sup> Tusa tiagtai Joás ditan ayaak:

“¡Atumek Baal ayamjakjumeke maanimaitsugme! ¡Tuja Baala ayamjauk eke tsawatsaig mantamnati! Tuu yujatsuk idaisatajum. Baal dekas Apajuíyaitkug, niina niime dakumka najanamua duka niinu asantai nigki ayamjumakti”, tiuwai.

<sup>32</sup> Aatus Gedeón Baal dakumka najanamu ememattai wajattaman tsaiku asantai, Israel aents aidau niina daajin yapagtuawag Jerubaal adaikau ainawai, wagki Joás chichaak: Baalak nigki ayamjumakti tiu asantai.

<sup>33</sup> Nunú nagkaemakui ai Madián aents aidau, Amalec aents aidau, nuigtu aents etsa minitaiya nuni batsamin aidaujai ijunag namak Jordágka amain katiajajui. Nunikag nuwi Jezreela nugke ségaju weajunum aakmajag batsamsajui.

<sup>34</sup> Tujash Gedeóggak Apajuí Wakani egkemtujam Abiezera patayi aidau wijai ijunjat- nume tusa uwig aishmagku kachujin umpuajui.

<sup>35</sup> Tuja nuigtushkam Manasés wegantu aidau ujaktajum ijunag atujatkatnume tusa, chichama etejin aidaun ishiakui. Nuigtushkam Asher wegantu aidau, Sabulón wegantu aidau, Neftalí wegantu aidau ujaktajum tusa ishiakui. Dutikamu nunú ujakajam ditashkam Gedeóggai atuniktatus shiyakajui.

<sup>36</sup> Nunik ijunjamtai Gedeón Apajuín chichajak:

“Israel aents aidau ayamjukta tusa tujutmaum nuna umikti tusa yainkatnaitkumek,

<sup>37</sup> uwija duwape uje wajasun trigo akatainum aipkittag nunú kashikmas nugkak buku aig nunú duwap chupijun wainkatjai. Nuna wainkan dekaattajai dekas ame Israel aents aidaun ayamjukti tujutbaunak. Nunikan dekaskeap Apajuí yainkattawa titatjai”, tiuwai.

<sup>38</sup> Nunú tibauk imanisag uminkauwai. Nuadui Gedeón kashikmas duwapen diikma chupig aun wainak juki ijuja makichik pinignum yumin aimkauwai.

<sup>39</sup> Nuna wainkau ayatak ataktushkam Gedeón Apajuín chichajak: “Wait aneam wi ataku iniimkuish kajegtukaipa. Yamaik ima junak segajame. Ataktush tikich iwainakta. Yamai duwap chupitna juju buku wetai nugka chupigti”, tiuwai.

<sup>40</sup> Gedeón tusa tibaunak nunú kashi aajakua duwi Apajuí betek dutikauwai. Nuadui kashinia duwi diyam duwapek buku aig nugka chupika asauwai.

## 7

### *Gedeón Madián aents aidaun depetkamu*

<sup>1</sup> Gedeón tikich daajin Israel aents aidau Jerubaal adaikau aina nunú kashikmas nantakmatai, suntag niijai yujau aidaushkam ashí nantajajui. Nunikag shima shimakua yumi pukuni jinu Harot tutainum jegawajui. Nunikag nuwi aakmajag batsamsajui. Nuwi pujusmak Madián aents aidauk nujinum muja Moré tutai najatamunum batsama- jakui.

<sup>2</sup> Tuja Tuke Pujuu Gedeóggan chichajak:

“Aents kuashtat yajuaka wegam duwi dita Madián aents aidaun depetkajag, Apajuí yaimpsamatai depetmakji tutsuk, kuashtat ainag duwi depetmakji tumain ainawai.

<sup>3</sup> Nuadui aents aidau ishamkagtuidauk jemin waketjatajum tita”, tiuwai.

Tusa tima Gedeón aents aidaun: ¡Ya ishamkagtawa duka dita jeen waketjati! tusa iniasui. Tusa iniam weintidos mil aents waketjajui. Nunikagmatai diez mil aents juwakajui.

<sup>4</sup> Nunikmataishkam Tuke Pujuu ataktu Gedeóggan chichajak: “Anú juwakaja dushakam shiig kuashtai. Nuniau asantai namaka yajuaka emata, dutikawamin wi awi dekapsattajai. Dutika dekapsan duwi ujaktagme, wajupak amejais shiyaktinme nuna”, tiuwai.

<sup>5</sup> Tusa tima Gedeón aents aidaun yajuak namaka yumin uwagtinme tusa ejegauwai. Dutikamtai Tuke Pujuu chichajak: “Tikishmatug tekemtuawag yumi umuinai, tikich aidaun uwejen shikikag yawá umau wajagtata nunú etegjata”, tiuwai.

<sup>6</sup> Tuja uwejen yumi shikikag yawajai betek umuidauk trescientos aents aajakui. Tuja tikich aidauk tikishmatug tekemtuawag uwajaju ainawai.

<sup>7</sup> Nunikagmatai Tuke Pujuu Gedeógkan chichajak: “Juju trescientos aents aina jujai Madián aents aidaunak ijinattajai atumi ayamjakun. Untsu tikich aina duka ashí waketjatnume”, tiuwai.

<sup>8</sup> Tusa timatai Gedeón tikich aidaunak waketjatajum tusa awakjauwai. Untsu eke waketuinatsaig dita uwagtin yajaka jukimu aidaun kachu aidaujui ashí atanjauwai.

Nunú waketjamtai ayatak trescientos aents etegjamu aidaujui Madián aents aidaun tsumunum batsatai nuna nujiin jegajuawajui.

<sup>9</sup> Nunikagmatai nunú kashia duwi Tuke Pujuu Gedeógkan chichajak:

“Nantakim jetekta, wi ame depetkati tusan idaitustatjame.

<sup>10</sup> Untsu jetet ishamakmek, amina inakem Purájai atuekam shiwag batsata nunú anutukta.

<sup>11</sup> Nuwi jeganta pujusam wajintuk chichakajat nunú antukta. Nunú antukam ichichmamjam jetektatme”, tiuwai.

Tusa tima niina inake Purájai weuwai. Nunik jegauwai nunú shiwag aakmag batsatbaunum.

<sup>12</sup> Tuja Madián aents aidaushkam Amalec aents aidaujui, nuigtu tikich aents etsa minitaiya nuni batsamin aidaujui aatus ijunag nugka dita batsatbaun pampantuk, manchi ajaka ijinatatus wajukmaina imanidau. Tuja dita camellojishkam shiig kuashat nayantsa kamatkajijai betek aajakui.

<sup>13</sup> Tuja Gedeógkak Purájai nunú shiwag batsatbaunum anumak pujus antukui makichik suntag kumpajin nii kajamjamujin pachis ujaak:

“Kajanmash makichik pag sebada najanamu kagkegak, ii batsatag juwi taak makichik aakan tukume. Dutikak aaknak tegaka ajuime”, tau.

<sup>14</sup> Tusa ujaam, niina kumpaji ayaak:

“Auk duka tikichkesh aan kajamjachume. Duka Joása uchiji Gedeón suntag Israel aents aidaun apujiya nunú aan kajamjaume. Apajuí senchijin Gedeón iina depetamkatta nunú aan kajamjaume”, tau.

<sup>15</sup> Nunú dekas uminkatnun niina kumpaji ujaun Gedeón antuk Tuke Pujuu emematiuwai. Nunik wakitkiuwai dita batsatbaunum. Nuwi jegaa Israel aents aidaun chichajak:

“¡Umintsatajum maaniawagmi, Madián aents aidaunak depetuk amuktinme tusa Tuke Pujuu iina idaitugmastatui!” tiuwai.

<sup>16</sup> Nuna tusa trescientos aents aina nuwiyam kempatuma imajin betek akanag ijumjauwai. Dutika uwija kachui aidaun tinamak, nuigtushkam yumi aimtainum nuwi ekematain yajaka ekemag tinamkauwai.

<sup>17</sup> Dutika chichajak:

“Mina diigkau atajum, wi shiwag batsata nuna yantamen jegakun wajukattaja nuniakuig atumshakam betek nuniktajum.

<sup>18</sup> Tuja wi mina uyuntuina nujai kachu umpuakuig, atumshakam dutiksagmek shiwag batsata nunú tenteajum umpuagtajum. Dutika umpuakjum senchi unsumkajum: ‘¡Tuke Pujuu daajin, Gedeógka daajin!’ titajum”, tiuwai.

<sup>19</sup> Nuna tusa Gedeógkak cien aentsun yajuak, shiwag aidaun jinta niimainak batsatu, kashi aehaet tikich aidaujui yapajinatatus uminainai jegantauwai. Nunik jegantun kachun umpuinak, cántaro yumi yajaa jutai takakbau aidaun tsaikajui.

<sup>20</sup> Dita umpuiniagtai tikich akanka ishiakbau aidaushkam betek umpuajajui. Nuninak yumi aimtai takakbaunashkam dutiksag tsaikajui. Jii ekemakbaunak menajin takusag, tuja kachunak untsujin takus ijunas unsumainak: “¡Tuke Pujuu daajin, Gedeógka daajin! ¡Jetektajum!” wajaidau.

<sup>21</sup> Tuja Israel aents aidauk Madián aents aidaun batsatun tenteawag jasa batsatu. Nunik batsataig senchi unsumaidau antukag ishamak, eke jeteachmaitak sapigmagak pisainak pampaidau.

<sup>22</sup> Tuja trescientos Israel aents aidauk kachun umpú batsataig, Madián aents aidauk ditak pempeentunikiag maaniatnume, nuninak pisajag yaakat Sererá wetaiya nuni shiyakag yaakat Bet-sitá jegatnume. Nuninai tikich aidauk yaakat Abel-meholá yaakat Tabatnum ijus awa imanui jegatnume, tiuwai Tuke Pujuu.

<sup>23</sup> Timau asag pisajgmatai, Neftalí wegantu aidaun, Asher wegantu aidaun, Manasés wegantu aidaun aatus Gedeón ashí untsukui, Madián aents aidau pisaja nuna pataetuk-tinme tusa.

<sup>24</sup> Nuna tusa Efraíngka nugke muja ikam weajunum batsamin aina nunú ujaktajum tusa chichama etsejin aidaun Gedeón ishimak: “Kaunawag Madián aents aidaujai maaniatneme. Nunikag Madián aents aidau eke nugka agkannum yujasag namak Jordágkan katitkag yaakat Bet-bará tutaya nuwi jegainatsaig, nunú nugkan dita batsamtuk akijuatneme”, tusa akatmamjauwai.

Tusa tiajam Efraín wegantu aidaushkam Gedeón tibaunak imatiksag umikajui. <sup>25</sup> Dutikainak nuigtushkam Madián aents aidau apuji Oreb, Zeeb aatus achikajui. Dutikawag Orebnak yamai kaya Oreb tutai awa nuwi maawajui. Untsu Zeeb aajakua nunak vino najanatasa uva chimpia najatai aajakua nunú yamai Zeeb tutaya nuwi maawajui. Nuadui nunú uva chimpia najatai aajakua duka niina daajin namkauwai. Aatus Madián aents aidau ai aintuinakua Jordágka amain Gedeón pujaunum waketuinak, Orepa buuken Zeepa buukejai tsupijuk jujukajui.

## 8

### *Gedeón Madián aentsun apuji aidaun achija yajuakbau*

<sup>1</sup> Gedeón Madián aents aidaujai maaniatatus, tikich Israel aents aidaunak chichama akuptuk ujayatak, Efraín wegantu aidaunak ujakchauwai. Dutikayatak imapam ujaku shiwajan pataetuk-tinme tusa. Nuadui kajekag Gedeóggjai jiyaniiku ainawai.

<sup>2</sup> Tusa tiagtai Gedeón ditan ayaak:

“¿Atum dekas mina nagkaetasu dutikaujum duka dekatsjume? Atum aidautijum ujumak dutikaujum duka ii aidauti kuashat dutikamua nuna nagkaesauwai.

<sup>3</sup> Apajui atumnak Madián aents aidau apuji aidau Orepan, Zeebjai achiktinme tujabiú asamtai achikugme. Tuja wika atum dutikaujum imannakesh dutikachjai”, tiuwai Gedeón.

Aatus timatai nuna Efraín wegantu aidau antukag kajekbaujin tsagkujajui.

<sup>4</sup> Nunikagmatai Gedeóggkak niina suntaji trescientos aidaujai shiwajan aintuinak pimpikajui ainayatak, namak Jordágnum jegawag atú amain katiaju ainawai.

<sup>5</sup> Nunikag yaakat Sucot tutainum jegawag, Gedeón nuwiya aents aidau chichajak:

“Wait aneasjum aents wijai yuja nunú yutai ajamjutsatajum, ditak pimpiki yawekag mininawai. Iik Madiágnumia apu aidau Zébah Salmunájai achiktasa ainu yujaji”, tiuwai.

<sup>6</sup> Tutai Sucotnumia apu aidau chichajuinak:

“Aina aentsjum aina duka yujumkak ajamsashtatji, wagki eke Zébah Salmunájai achikchaugme”, tuidau.

<sup>7</sup> Tusa tiagtai Gedeón ditan ayaak:

“¡Apajui yaintsamtai Zébah Salmunájai achika waketkun, numi jagkigtin aidaun zarza aidaujai uwegshunum ayá nuna yajuakan atumnak asutkattajime!” tiuwai.

<sup>8</sup> Aatus tusa nuwiya juwakiag jegawajui yaakat Penuelnum. Nunikag nuwishkam yaakat Sucotnum sumakbaunak dutiksag yutain sumakui. Tujash Penuelnumia aidaushkam Sucotnumiajai betek tiajui.

<sup>9</sup> Nuadui Gedeón ditan chichajak:

“¡juju yaaktanum kumpin jiikbau waja junak wi depetmaka waketkun ajaka ajuattajai!” tiuwai.

<sup>10</sup> Zébah Salmunájai yaakat Carcornum atú amain etsa minitaiya nuni quince mil suntag aidaujai batsatu, wagki ciento veinte mil suntag maaniamunum jinawaju asamtai.

<sup>11</sup> Nunik batsatai Gedeóggkak niina suntaji aidaujai jinta uwegshunmanini wegaunum yaakat Nóvah nuigtu Jogbehá aatus aajakua nuna yantamen etsa akaetaiya nuni shimutkauwai. Nunik jegajuawag anenjas batsatun jetekajui.

<sup>12</sup> Dutika jeteam Zébah Salmunájai jiinki tupikakajui. Nunikmatai Gedeón pataetuk amayag mai achikui. Nuna dutikamtai shiwag aidauk shiig senchi ishamkajui.

<sup>13</sup> Nunik Gedeón maania depetmak nugka yayjuch Heres tutai aajakua nuni wakitkui.

<sup>14</sup> Nunik wenak nunú nugkanum makichik datsauch yaakat Sucotnumia pujaun achika juki kuashat iniasui. Tusa iniam Sucotnumia apu setenta y siete aajaku aina nuna daajin ashí adaitujui.

<sup>15</sup> Tusa ujakam Gedeón nuna dekaa Sucotnum weuwai. Nunik jegaa nuwiya aents aidau chichajak:

“¿Atumesh aneakjumeK Zébah Salmunájai achikchaugme tusajum dushiktibiumum dusha? Tuja ¿atumesh aneakjumeK Zébah Salmunájai achikchaugme tusajum mina aentsug aidau yaweja pimpiki minidau deKayaitkujum yutai ajamsachbaijum dusha? ¡Pai yamaik achikan juwi itaajai!” tiuwai.

<sup>16</sup> Nuna tusa Gedeón apu Sucotnumia aidau suwimka suwak jagki aidau, zarza aidaujai uwegshunmaya yajuakbauwai asutkauwai.

<sup>17</sup> Tuja nuigtushkam kumpin jiikbau yaakat Penuelnum wajattaman ajak ajuauwai. Nuwiya aents aidounashkam kajekui.

<sup>18</sup> Dutika Zéban Salmunájai iniak:

“¿Atum muja Tabornumia aents aidau amukuitjum dusha wajuku aajabi?” tau.

Tusa tama dita aimainak:

“Amejai betek agmayi. Maki makichik aents aidauk apu tumain agmayi”, tuidau.

<sup>19</sup> Tusa tiagtai Gedeón senchi untsamak:

“¡Mina yatsug emkau aidau! ¡Dekas mina yatsug emkau aidau kajekuitjume! Nuadui Tuke Pujuu daajin tajime, atum dita maachuitkugminig, wisha atumnak yamaik maubaitsujime”, tiuwai.

<sup>20</sup> Nuna tusa inagnamuik niina uchiji emkau Jéter aajakua nuna ame maata tusa inajui.

Tujash Jéterak eke tsakatuch asa ishamak maumainchau dekapjauwai.

<sup>21</sup> Nunitai Zébah Salmunájai Gedeóghan chichajak:

“¡Amek dekas mai mantuata! ¡Aentsuk niina wajuujin dekatia!” tuidau.

Tiagtai Gedeón jegantun mauwai. Dutika Zébah camelloji Salmuná camellojjai kuntujen waji pegkeg apeekamu aidau yajutkauwai.

<sup>22</sup> Dutikamtaí Israel aents aidau Gedeóghan chichajuinak:

“Madián aents aidau waitkagmaidau ame ayamkagtukam agkanmitkagtuau asam ame, tuja ame wegantu aidaujai iina apuji atajum”, tiajui.

<sup>23</sup> Tusa tama Gedeón ditan ayaak:

“Wika atumi apujig achattajai. Tuja mina uchigkesh atumi apujig achattawai. Atumin apujig Tuke Pujuu atatui.

<sup>24</sup> “Untsu atum shiwag aidau maakjum ditá patakumtaiji aidau yajutkaujum nuna segajime mina sujustinme tusan”, tiuwai.

Tuja nunú suntag aidauk uwegshunum batsamin asag patakumtai oro najanamun tuke patakumajaku ainawai.

<sup>25</sup> Tusa timatai Israel aents aidauk jáanchin nugká ainak nuwi patakumtai yajuakbaun batsasajui. Dutikawag Gedeóghan chichajuinak:

“Pai, juju jukita”, tiajui.

<sup>26</sup> Nunú patakumtai oro najanamun aidauk diecinueve kilo tumain aajakui. Untsu apu aidau iwagmamtaiji, nugkutaiji nuigtu jáanch yamakaitkau aidau aatus duka dekapachbau aajakui. Tuja camello anujamu aidauhkam dekapachbau aajakui.

<sup>27</sup> Nunú oro yajuakbauwai Gedeón sacerdote nugkutain dakumak najanauwai. Dutika niina yaaktajin Ofrá ejegauwai. Nuna Israel aents aidau ashí emematuinak Tuke Pujuu ememattan idaisau ainawai. Tuja Gedeóghak pegkegnap dutikaja tukama, nuna niina patayi aidaushkam emematuidau asamtaí, niinishkam pegkegchau aajakui.

<sup>28</sup> Dutika depetkamu asag Madián aents aidauk Israel aents aidauum yunumag batsamajaku ainawai. Nuadui yaunchuk aajakbaunak betekchau tiki wainkauch juwakajui. Tuja Gedeón iwaku pujusmataig, nunú nugkanmak cuarenta mijan maanitsuk batsamsau ainawai.

### *Gedeón jakamu*

<sup>29-30</sup> Gedeón Jerubaal tuuta awagmatai aajakua duka niina jeen wakitki pujusui. Nuwi pujus setenta uchin akigkui, tuja niina nuweshkam kuashat aajakui.

<sup>31</sup> Tuja niina ikaa nuwe Siquem pujujakua dushakam makichik uchin uchigmakui. Dutikamtaí Gedeón nunú uchi daajin Abimelec adaikauwai.

<sup>32</sup> Gedeóghak shig muumpaki jakauwai. Nunik jakamtaí, niina apaji Joása ukumataiji Abiesel wegantu aidau batsamtaí yaakat Ofrá aajakua nuwi ukusajui.

<sup>33</sup> Gedeón jakamtaí batsamas Israel aents aidauk Baal dakumka najanamun aidau emematuinak Apajui ememattanak ataktu idaisajui. Tuja dita apajuimawagtinnak Baal-berit aajakua nuna etegkawag nuna emematujaku ainawai.

<sup>34</sup> Nunidau asag ditan shiwag waitkagtaí Tuke Pujuu Apajui ayamjukua nunak kajimatki idaisajui.

<sup>35</sup> Gedeón tikich daaji Jerubaal aajakua nunú ditan ayamjak kuashat takasu aig, niina patayi aidounash wait anenjachu ainawai.

## 9

*Abimelec apu wajasbau*

<sup>1</sup> Jerubaalan uchiji Abimelec niina dukuji wegantu aidau Siquemnum batsatu asamtai, ditajai chichastatus weuwai. Nunik jegaa ditan chichajak:

<sup>2</sup> "Iik pataa ainaji, nuadui tajime. Jerubaala uchiji setenta aina duka ashí apu amain ainatsui, ima makichik apu amainai tajai. Nuniau asamtai juwi tikich aents aidau batsata nujai nunú pachisjum shiig chichasjum antumtikatajum", tiuwai.

<sup>3</sup> Tusa timatai Abimelekan patayi asag, niina atuinak, Siquemnumia aidaujai chichastatus shiyakajui.

<sup>4</sup> Nuiqtushkam apajuímtai Baal-berit dakumka najanamu jegamjukbaunum kuichik plata najanamu atatman setenta jukajui. Dutika Abimelekan susajui. Dutikum nuna akikmak, Abimelec aents magkagtin aidau yajuaku. Dutika nunú aents aidaujai,

<sup>5</sup> yaakat Ofrá niina apaji Jerubaal pujujakbaunum weuwai. Nunik wegak niina yachi setenta aajaku aina nuna makichik kaya múun pujaunum nuwi ashí kajegkui. Untsu niina yachi Jotam awan aajakua nunú uumkau asa, ima nigki uwemjauwai.

<sup>6</sup> Dutika niina yachi aidau ashí amukmatai, Siquemnumia aents aidau, nuna yantamen Bet-miló aajakua nuwi batsamin aidaujai Siquemnum numi encina tutai wajaunum kaya pegkejam tutai pujaunum nuwi ijunajui. Nunikag nuwi Abimelekan apu adaikajui.

<sup>7</sup> Abimelec apu wajas tabaun Jotam dekaa, muja Guerizim tutainum wakauwai. Nunik nuwi wajas Siquemnumia atuktinme tusa senchi untsamak chichaak:

"¡Siquemnumia aidauwah, wi titatag nunú shiig antuktajum! ¡Atumnash Apajui antugtamakachajaintash!

<sup>8</sup> "Makichik tsawantai numi aidau apugtin amí tusag wakekajui. Nuadui olivon chichajuinak: '¡Ame iina apuji ata!' tajui.

<sup>9</sup> Tusa tama: 'Wika tikich numi aidau apuji atag takunuk, aents aidau Apajuin emematuinak mina aceitejun juki takau aina nuna, tuja ditanu atinnashkam mina aceitignak juki takau aina nuna idaikun apu amainaitjai', tusa dakitjauwai.

<sup>10</sup> "Tusa timatai higuera chichajuinak: '¡Untsu ame iina apuji ata!' tusag segajui.

<sup>11</sup> Tusa tama higuera chichaak: 'Wika numi aina nuna apuji atag takunuk, mina yujagkeg higo shiig pegkeg yumimitun nejenaitag nuna idaikun apu amainaitjai', tusa dakitjauwai.

<sup>12</sup> "Tusa timatai numi aidau uva numijin chichajuinak: '¡Untsu ame iina apuji ata!' tusag segajui.

<sup>13</sup> Tusa tama uva numiji chichaak: 'Wika numi aina nuna apuji atag takunuk, Apajuin emematuinak tuja dita aidauhkam minaiya vino najanamun umuinak shiig aneen aina nuna idaikun apu amainaitjai', tusa dakitjauwai.

<sup>14</sup> "Tusa timatai inagnamua nuna numi jagkigtinun chichajuinak: '¡Untsu ame iina apuji ata!' tusa segaidau.

<sup>15</sup> Tusa tama jagki chichaak: 'Dekaskenum atumi apuji ati tusajum wakegakjume, wi dukuka ijiam nuna wakentin batsamsatajum. Untsu atum dakitakjuminig, minaiya jii keeka muja Libano tutainum setug múun ayá nuna apea ijinattawai' tiuwai jagki", tiuwai Jotam.

<sup>16</sup> Nuna tusa inagnak: "Tuja yamai wi atumin tajime: ¿Atum Abimelec apu adaikabi-ujum dusha pegkejak dutikaujum? ¿Tuja mina apag Jerubaal atum aidautigmin shiig kuitamjankau aina dutikagmek, atumesh niina patayi aidau shiig kuitamkaujum?"

<sup>17</sup> Atumek Madián aents aidau waitkatai batsatutigmin, mina apag atumi ayamjutpak maaniak jamain wajakui.

<sup>18</sup> Tujash atumek duka aneetsuk, mina apaju patayi aidaujai shiwagmagajum niina uchiji setenta aajakua nunú makichik kayanmak ijinagme. Tujash ima dukek dutikachugme, nuigtush Abimelec atumi patayi asamtai, Siquema apuji ati tusajum adaikagme.

<sup>19</sup> Tujash yamai wi tajime: Atum aidautijum mina apag Jerubaal aajakua nunú niina patayi aidaujai pegkeg anentaiyai kuitamkau ainakjume, Abimelecjai shiig aneasjum pujustajum. Nuniagmin niishkam atumin shiig anenjamsatnume.

<sup>20</sup> Untsu atum shiig kuitamkachu ataik, Abimelecnumia jii kegak Siquemnumia aidau Bet-milónnumia aidaujai apea ijinati. ¡Tuja nunú jimag yaakta nuwiya jii kegak Abimelekan apea maati!" tiuwai.

<sup>21</sup> Nuna Jotam aatus tusa ukuak, tupikaki yaakat Beernum wee pujusui. Nunak nunikui wagki niina yachi Abimelekan ishamak.

<sup>22</sup> Tuja Abimelekek Israel aents aidaun apuji wajas kampatum mijan inamjauwai.

<sup>23-24</sup> Tuja nuadui Jotam tibaunak imanisag umigkauwai. Nuadui ashí aents aidaunum shiig pegkegchau, senchi waitiamu ati tusa Apajuí tiuwai. Nunú umintai, pempeentunikig tsainika ainawai.

## 13

### *Sansón akiinamu*

<sup>1</sup> Israel aents aidauk Tuke Pujuu umigtan kajimatkiag ataktushkam pegkegchau takaidau. Nuniagtai Tuke Pujuu ditan idaisauwai. Dutikamtaí filisteo aidau cuarenta mijan waitkasu ainawai.

<sup>2</sup> Tuja nunú tsawantin makichik aents Dan wegantu Manoa daagtin yaakat Soránun pujujakui. Niina nuweg uchi uchigmachu asamtaí uchijig atsujakui.

<sup>3</sup> Makichik tsawantai Apajuí ángeltsukaita tumain nayaimpinmaya nunú nuwan wantintuk chichajak:

“Amek yaunchuk nagkamsam uchigmachuitme. Tujash yamai ejapjuktatme, nunikam uchi aishmag uchigmaktatme.

<sup>4</sup> Nuadui umutai vino nuniachkush tikich uwaja nampetaí aidauk makichkish uwajaipa. Tuja Tuke Pujuu dakitamu aina dushakam yuwawaipa,

<sup>5</sup> wagki uchi aishmag uchigmaktatam duka atatuí Nazareo.\* Nunú uchi intashig awagchamu atatuí, wagki nii múun wajasa filisteo aidau Israel aents aidaun waitkaina nuna ayamjuk agkanmitkattawai”, tiuwai.

<sup>6</sup> Tusa tima aishin ujaktatus wejiuwai. Nunik jegaa ujaak:

“Apajuí ángeljai betek wi pujamunum tajutuame. Nuniakui senchi puyatkamjai, wagki Apajuí ángeljai betek asamtaí. Yaitpa tusanuk wikish iniaschamjai, tuja niishkam niina daajinak tujutchame.

<sup>7</sup> Untsu uchi uchigmaktatme tusa tujutmae. Nuna tusa, yamai nagkamsamek vino uwajaipa, tuja tikich uwaja nampetaí aina dukesh uwajaipa, tujutmae. Nuigtush pegkegchau aina duka yuwawaipa. Tuja ame uchi uchigmaktatam duka uchi eke akiintaig Apajuínu etegkamu asa, wika pegkegchau aina nunak takaschatjai tumamiu asa pegkegchaunak takatsuk, jau aina numamtin uchik atatuí, tujutmae”, tiuwai.

<sup>8</sup> Tusa ujakam Manoa Tuke Pujuu segaak aatus tiuwai: “Apujuh, ame aents awemaum nunú ataktu awekagtita tusan segajame, nunú taa uchi akiinkuish itugkattaji nuna ujakpakti taji”, tiuwai.

<sup>9</sup> Tusa segam Apajuí Manoa sumamunak betek umikui. Nuniak nuwa ajanum wekaetatan Apajuí ángeljai betek ataktu wantintukui. Tuja Manoa nijai wekaechau asamtaí,

<sup>10</sup> tupikaki weuwai ujaktatus. Nunik ujaak:

“¡Aentsun wi wainkabiag nunú ataktu wantintugkae!” tiuwai.

<sup>11</sup> Tusa ujakam Manoa niina nuwejai nunú aents pujamunum weuwai. Nunik jegantun iniak:

“¿Ameka tikich tsawantin mina duwagjai chichasmayum?” Tusa tama nii ayaak:

“Ehe, witjai”, tiuwai.

<sup>12</sup> Tusa tutai Manoa chichajak:

“Ame mina duwag tium nunú uminkuish ¿wajuk uchish kuitamainaitji? ¿Tuja uchish itugkattaji?” tau.

<sup>13</sup> Tusa tutai ángel tumain wantinkauwa nunú Manoa ayaak:

“Wi amina nuwemin timag nunak imatiksag umikti.

<sup>14</sup> Vino najanamun uwajaigka. Tuja tikich umutai uvanmaya najanamun aidaunash uwajaigka, nuigtushkam tikich umutai kajiau aidaunashkam uwajaigka. Tuja tikich yutai aidaun Apajuí dakita nunak yuwawaigka. Wi tibaunak Imatiksag umikti”, tau.

<sup>15-16</sup> Tusa tama, Apajuíyap ángeljai betek wantintujuk tujutua tachau asa chichajak:

“Wait aneam juwi jutjai juwakta, nunikamin chivo tsakatan maa inajuamtaí yuwami”, tau.

Tusa tama nunú ángeljai beteka nunú niina ayaak:

“Wi juwi juwaknush amina yutaigminak amejai jimagtuknuk yumaitsujai. Untsu chivo tsakat maam nuna neje ashí apeakum Tuke Pujuu emematta”, tiuwai.

<sup>17</sup> Tusa tama Manoa niina chichajak:

“Untsu amina daagmesh yaita dukesh ujjatkata, nuna dekau asan ame tukagtam nunú uminkui see kuashat titagme”, tiuwai.

\* 13:5 “Nazareo” tawa nunak Apajuínu asa pegkegchaunak makichkish takaschatjai tumamiu aidaun takau tawai.



<sup>18</sup> Tutai Apajuí ángeljai betek wantinkauwa nunú niina ayaak:

“¿Wagka mina daajush dekasamesh wakegame? Mina daajuk shiig pegkeja ibau asa kakajus dekamaitsui. Nuadui uukbaujai betekai”, tiuwai.

<sup>19</sup> Tusa timatai chivo tsakatan, ajak aidaun neje juukbaujai ijumag juki, kayanum patai nuna ashí apeak Tuke Pujuu emematiuwai. Nuna dutikamtaí Tuke Pujuu Manóan niina nuwejai wainchatai pegkeg aidaun iwaintukui.

<sup>20</sup> Tuja Manóa niina nuwejai chivon maa apeauwa nunú bukuitamunum Apajuí ángeljai betek nuwi pachitkau yaki waun wainkajui. Nuna wainkag tsuntsumawag nijayin nugka antig pujusajui.

<sup>21</sup> Nuna Manóa wainak anentaimjauwai, dekas Tuke Pujuuwáp ángeljai betek wantinkau wainkaja tiuwai. Duwi nagkamsag niinak tuja niina nuwenakesh ataktuk wantintukchauwai.

<sup>22</sup> Nuna wainkau asa niina nuwen chichajak:

“Iik dekas Apajuí wainkau asa jakattaji”, tiuwai.

<sup>23</sup> Tutai niina nuwe ayaak:

“Tuke Pujuu iina mantamatag takug, ii kuintin maa nuna neje ashí apeaku, ajak juukbaujai apeak nuna dakitmain wajake. Tuja iina iwaintugmaka nunashkam iwaintugmamainchau awajtamkae. Nuigtushkam iina ujpaka nunash ujpamainchau awajtamkae”, tiuwai.

<sup>24</sup> Duwi pujus niina nuwe ejajuk uchi aishmagkun uchigmakui. Nunikmatai adaikauwai Sansón. Nunú uchi muumpatai Tuke Pujuu pegkegnum yaijakui.

<sup>25</sup> Tuja makichik tsawantai yaakat Sorá Estaoljai niiniaku aajakua nuna ejapeen Danka nugke aajakua nuwi Sansón pujaun Apajuín Wakani egkemtujuí.

## 14

### *Sansón nuwenamu*

<sup>1</sup> Makichik tsawantai Sansón weuwai yaakat Timnat. Nunik nuwi filisteo nuwa pujuttaman wainak wakejukui.

<sup>2</sup> Nunik niina jeen wakitki apajin dukujijai ujaak:

“Yaakat Timnatnum filisteo nuwa pujaun wainkamag nujai nuwenatag tajai. Nuadui wait aneasjum nuwenatasa umitai aina nunú ashí umiktajum”, tiuwai.

<sup>3</sup> Tusa tutai niina apaji dukujijai ayaak:

“¿Wagkamek filisteo aents Apajuín umigchau aina nuninjaish nuwenatame? ¿Iina patayi aina nuwiyag nuwak atsawak? atsa nuniachkush ¿ashí Israel aents aina nuwiya nuwak makichikish atsawak?” tiuwai.

Tusa tama Sansón ayaak:

“Wika nuna nuwan wakegajai. Dekas nunú nuwa sumagtuktajum nujai nuwenatjai”, tiuwai.

<sup>4</sup> Tuja Tuke Pujuu yaunchuk emtika nuniktin ati tusa tibaunak niina apajig dukujijai dejakachau ainawai. Tuja nunú tsawantin Israel aents aidaun filisteo aidau waitkaidau asantai, wajuk waintuanuk filisteo aents aidaun ijinkun Israel aents aidaun agkanmitkawag tau asa tiuwai.

<sup>5</sup> Nuadui Sansógkak niina apaji, dukuji aatus yaakat Timnat weuwai.

Nunik wegau niina apajin dukujijai ukuak tsegkeki uvan egak weuwai. Nunik wegaun león yama tsakaju senchi kajeau jetekui.

<sup>6</sup> Dutiktai Apajuí Wakani Sansógkan egkemtujuí. Dutikam leónkan achika chivo tsakatuch maumaina dutika mauwai. Nuna dutikash apajinak dukujijai ujakchauwai.

<sup>7</sup> Tuja Timnatnum jegawag Sansógkak nii nuwa wakejukbau pujaunum weuwai. Nunik nijai chichasui.

<sup>8</sup> Nunik dukap tsawan pujusa nii nuwenatnuji tsawan jegamtaí, wenak yaunchuk nii león maamujin diistatus tsegkeki weuwai. Nunik jegan diikma leónka iyashi sakajunum dapa jegamak yumijina egketun wainkauwai.

<sup>9</sup> Dutika wainak ashí juki duka dukakua weuwai. Nunik niina apaji dukujijai pujaunum jegan, ditanashkam akaantuk susauwai, dutikam ditashkam nuna dukawajui. Tujash Sansógkak león maa ukukbaunmayan jukimjai tusag ujakchauwai.

<sup>10</sup> Nunik jegawag Sansógka apajig uchiji nuwe atinun wainkatatus wejiuwai. Tuja dat-sauch nuwenuk nuna dutikin ati tibaun umiak Sansón nii nuwenbaunum jistamatatus ipamauwai.

<sup>11</sup> Tujash filisteo aidauk ishmagkagtuídau asag, treinta datsauchin ipauwai, Sansón nuwentai uyunainak batsamsatin aidaun.

<sup>12</sup> Nunú treinta aents aidaun Sansón chichajak:

“Makichik anentaimsa aimtain iniastajime. Dutikamtai nuwenbau siete tsawan asa atata duwi ujatkatatum wajina takunua taja nunú. Nunú betek ujatkgaminig maki makichik jáanch shiig pegkeg lino najanamun, nuigtu nuwenbaunum weaku nugkutai aidaujai amastajime.

<sup>13</sup> Untsu nunú betek aimkachjume, jáanch shiig pegkeg lino najanamu, nuigtu jáanch nuwenbaunum weaku nugkutai aidaujai mina sujustajume”, tiuwai.

Tusa tama dita aimainak:

“Ame waji tame nunú tita antukmi nunika aimkagmi”, tuidau.

<sup>14</sup> Tusa tiagmatai Sansón aatus tiuwai:

“Yukagtinnumia yutai

pegkeg jiinkiuwai, senchigtinnumia

yumimitu jiinkiuwai”, tiuwai.

Timatai, nunash wajina takug tawa tusa kampatum tsawan batsamtakush ezechajui.

<sup>15</sup> Tuja ezechamin dekapenak tsawan ipak usumta duwi Sansógka nuwen chichajuinak:

“Iina tujabi nunash wajina takug timae nunú aishjum dekajuata. Nunikam amina ujakmatai uajatkata. Unstu nunú dekajuachaminig, aminak, amina apa patayi aidaujai apeattajime. ¡Wagki atumek dekas iina jáanchji aina nunú atankimi tusajum ipajatuagme!” tiajui.

<sup>16</sup> Tusa tiagmatai Sansógjai chichastatus weuwai. Nunik jegajua buttki chichajak:

“¡Amek minak anentsume! ¡Amek minak kajegtame! Nuniau asam mina pataag aina nunú anentaimsa aimtai iniasume, tujash amek minak dusha waji takumea tiume duka ujtsume”, tiuwai.

Tusa tama Sansón ayaak:

“Mina apagnakesh, tuja mina dukugnakesh ujatsug nunash aminash wagkanuk ujaktagme”, tiuwai.

<sup>17</sup> Tusa tamashkam ujatkatu tusa niyai ayaumas pujus nii nuwenku jüstabau siete tsawan aajakua imanisas siete tsawan buttu pujau. Imatika waitka pujujam tsawan sieteya duwi nunash wajina takug tiyawa nuna ujakui. Tusa ujakam niina patayi aidau batsatun jegajua niishkam ujakui.

<sup>18</sup> Dutika ujakajam tsawan sieteya duwi eke etsa akaetsaig Sansógka jegajuawag chichajuinak:

“Dapa yumiji yumimitun

nagkaesauk tikichik atsawai.

Tuja Leónka nagkaesau senchigtinuk tikichik atsawai”, tuidau.

Tusa tiagmatai Sansón ditan chichajak:

“Mina duwag ujakchamtaig, atumek nunap tawa tusagmek ejemainchau ainagme”, tiuwai.

<sup>19</sup> Nuna taig Tuke Pujuu Wakani egkemtug Sansógkan senchimtikuawai. Dutikam weuwai yaakat Ascalón, nunik nuwi treinta filisteo aidau mauwai. Dutika nuna jáanchji aidau najutuk akikmakui. Nuna dutika senchi kajeka niina apaji jeen wakitkiuwai.

<sup>20</sup> Nunikmatai Sansón nuwenbaunum aents aidau pujusu aina nuwiyajai Sansógka nuwen tikich aentsnum sujutkajui.

## 15

<sup>1</sup> Tuja kuashat tsawan nagkaemaku ai, trigo juut jegamunum Sansón niina nuwen ijagsatatus wegak chivo tsakatan juki weuwai. Nunik jegaa chichaak:

“Mina kanutajui wayan mina duwagjai chichastajai” tusa wayatag titatman niina wegaji dakitjauwai.

<sup>2</sup> Nunik chichajak:

“Wika dakitakus idaisayatai tibaijai. Tau asan amina kumpagmín nuwemnak sujukmaijai. Tujash tikich mina nawantug ekeu niina nagkaesau shigmauch puja nunú nuwatkata”, tiuwai.

<sup>3</sup> Tusa tama Sansón ayaak:

“Yamai atum filisteo aidautigminak wi ijinattajime. Dutika ai wagka aikae tujutmainuk atsuttawai”, tiuwai.

<sup>4</sup> Nuna tusa ukuak niina nuwe sujutkamunum iikmaktatus, trescientos amich nuwa aidau achika ijumjauwai. Dutika apa apatuk ujuknum jigkakui. Dutika jimag amich apatka jigkakbaunum nuna ujuken ekematain anug jigkakui.

<sup>5</sup> Dutika nuna ekemak amichan atia filisteo aidau ajaji aidaunum ishiakui. Nunú shimak trigo juuka ijumjamu aidaun eke juukchamu aidaujui ashí apekui. Dutikak nuigtushkam uva ajakbaun, olivo\* ajakbaujai ashí apeka ijinauwai.

<sup>6</sup> Dutika ijituam filisteo aidauk: ¿Yaki aikae? tusa inimainak yujakma: Auk Sansógka wegaji niina nuwen atanki, niina kumpajinig sujutkam, nuna iikmak aikae tabaun dekawajui. Nunik dekawag nuna shimutuk nunú nuwanak apajijai apeawag maawajui.

<sup>7</sup> Dutikawagmatai Sansón chichaak:

“Atum aniau asagmin, nuna iikmakun makichkish idaitsuk ashí amuktatjime. ¡Nunak dekas wi umiktinjun tajai!” tiuwai.

<sup>8</sup> Tusa senchi kajeku asa filisteo aidaun jeteka shiig kuashat ijinauwai. Dutika ukuak Etamnum kaya múun waa au asantai, nuwi uumak pujustatus weuwai.

*Sansón burro jagkejai filisteo aidaun ijinaumu*

<sup>9</sup> Nunik weu ai filisteo aidaushkam Sansógkan egainak Judá nugken shiyakajui. Nunikag jegawag nuwi nagkamas batsamak nugka Lehi† tutaiya imanui jegantajui.

<sup>10</sup> Imanikagmatai Judá wegantu aidau ditan iniinak:

“¿Wagka jutijai maaniasagmesh atumesh kaunaugme?” tuidau.

Tusa tama dita aMAINAK:

“Sansón iina pegkegchau awagtamkau asantai, achika juki iishkam dutiksaik iikami tusa yujaji”, tuidau.

<sup>11</sup> Tusa tiagmatai nuna antukag, tres mil aents Judá wegantu aidau Etamnum kaya múun waa aunum nuwi Sansón pujau asantai shimutkauwai. Nunik jegawag nuwi pujuttaman wainkag chichajuinak:

“¿AmeK dekatsmek filisteo aents aidau iina nagkaetamsau senchigtin aina duka? ¿Wagka jutikamesh utugchatash itagkagtuaume?” tuidau.

Tusa tama Sansón ditan ayaak:

“Wika dita pegkegchau takasbaujin dutiksanuk iikamjai”, tiuwai.

<sup>12</sup> Tusa timatai dita chichajuinak:

“Iik ame achika juki filisteo aidaunum sujukmi tusa kaunaji”, tuidau.

Tusa tama Sansón ayaak:

“Atum mantuashtinaitkugmek, dekas mashtatjame tusa tujuttajum”, tiuwai.

<sup>13</sup> Tusa tutai dita ainak:

“Atsa, ii aidaulik mashtatjame, ayatak achika juki filisteo aidau susami tusa taji”, tuidau. Aatus tusag jimag sogá yamagmai jigkajajui. Dutikawag uumak pujaun jiiikag jukiajui.

<sup>14</sup> Dutikawag we wenakua Lehin nugkanum jegawajui. Nunikagmatai filisteo aidau shiig aneek unsumkiag jiiintujajui. Dutikiagtai Apajui Wakani Sansógkan senchitkaiuwai. Dutikam sogayai niina kuntujin, uwejen jigkagbaunak hilo lino najanamu apeamu tsujinmaina numamtuk tsujajui.

<sup>15</sup> Dutika nuadui burro jagke eke shiig sakamchau atatman juki, duwi awatug mil filisteo aidaun kajegkui.

<sup>16</sup> Dutika chichaak:

“Makichik burro jagkenig mil aentsun kajegkan ijumsawa emakjai”, tiuwai.

<sup>17</sup> Nuna tusa burro jagke takakbaun nagkima ajapauwai. Nuadui nunú nugka daajig Ramat-lehi‡ adaikamu.

<sup>18</sup> Tuja Sansón senchi kitaag Tuke Pujun segaak: “¡Ame minak shiwag shiig kuashat aina nuna depetkati tusam yainkaume! Nuadui ¡yumi umumain atsutai juju aents amina umigtamchau batsata nuwi kitakai jakati, nunikmatai niina iyashin dushikjatnume tusamek idaitumaitsume!” tiuwai.

<sup>19</sup> Tusa timatai Apajui yumi initkanmayan jiiikiuwai. Dutikamtaí Sansón nuna uwajui. Nuna uwag ataktu wajiu wajasui. Nuadui nunú yumi pukuni jiiinkiuwa nuna daajin adaikauwai En-acore.§ Duka yamaikish nugka Lehin tutainum awai.

<sup>20</sup> Sansógkak veinte mijan Israel aents aidaun yaigkui. Nunak filisteo aidau nunú tsawantin Israel aents aidaun ashí depetuk waitkajaku aina nunú tsawantin niig takasui.

\* 15:5 “Olivo”: Juka makichik ajakai. Nuna nejeshkam olivo tutayai. Untsu nunú juuka painkamu aceituna tutayai.

† 15:9 “Lehi” tawa duka hebreo chichamnumak “kuntinu jagken” taku tawai. ‡ 15:17 “Ramat-lehi” tawa duka hebreo chichamnumak “jagke nain” taku tawai. § 15:19 “En-acore” tawa duka hebreo chichamnumak: “entsa segabau” taku tawai.

## 16

*Sansón yaakat Gazanum webau*

<sup>1</sup> Makichik tsawantai Sansón yaakat Gazanum weuwai. Nunik nuwi makichik nuwa akiaku dutiktai pujuttaman wainak, nuna jeen waya nijai kanajui.

<sup>2</sup> Nuwi pujai filisteo aidaushkam Sansón tae tabaun antukag, nunú yaaktanmaya aidau Sansón pujamun tenteawajui. Dutikawag yaakta waitijin kuitamainak makichik tsawan batsamtau asa, kiitai kashin tsawaku maami tusag dakainak jasa takamtak batsatu.

<sup>3</sup> Tujash Sansógkak ejampek shintaag waiti aidaunak numijijai tegajui. Dutika jiju minantuamunashkam ukuinag ashí yanaki yajuak, yaakat Hebróggai niiniaku nuna juitkaunum iwaka nagkimak utsagkui.

*Sansón Dalilajai*

<sup>4</sup> Duwi pujus, nuwa Dalila daagtin Sorec nugka pakajin pujuttaman jukitatus ausauwai.

<sup>5</sup> Dutikamtai filisteon apuji aidau Dalilajai chichastatus shiyakajui. Nunik jegajuawag chichajuinak:

“Sansógkash wagkag ibau senchigtinaita tsanuja dekajuata. Dutikawamin itugkaik depetmainaitji nunú ejemi. Nunú dekajua achika jigkaja apusami. Tuja ame dekajuawaminig, ii aidauti maki makichik mil cien kuichik plata najanamu amastatji”, tiajui.

<sup>6</sup> Tusa tima Dalila Sansógkan chichajak:

“Wagka ibau senchigtinaitme nunú minash wait aneamam ujatkata. ¿Wajigmin jigkapajagmataiya ayamjumainchaush amainaitme?” tau.

<sup>7</sup> Tusa tama nii ayaak:

“Siete daek samek aidauwai jigkatjagmataig, tikich aents aina nujai betek senchigtuchu amainaitjai”, tiuwai.

<sup>8</sup> Tusa timatai Dalila filisteo apuji aidau unjukui. Tusa ujakajam daek samek aidau siete jukiag Dalilan susajui. Dutikam nuna juki Sansógkan jigkajui.

<sup>9</sup> Dutika jigkaja, aents aidau yaunchuk niina kanutaijin uuka batsasu asa, unsumak: “¡Sansógka, filisteo aidau jetepainawai!” tau. Tusa tutai Sansón nantak nunú daeknak apeamujai betek tsujiajui. Dutikamtai filisteo aidauk wagkag ibau senchigtinaita nunak dekamainchau dekapjajui.

<sup>10</sup> Tuja Dalila Sansógkan chichajak:

“¡Tsanujaume! ¡Amek minak dushiktakum tujutiume! Tujash dekak yamaik wait aneamam tujutta, itugkaya emetmainush amainaitme nunú”, tiuwai.

<sup>11</sup> Tusa tutai Sansón ayaak:

“Soga yamajam makichkish takashtaiyai jigkatjagmataig, tikich aents senchigtuchu aina nujai betek amainaitjai”, tiuwai.

<sup>12</sup> Tusa timatai yaunchuk aents aidau niina kanutaijin uuka batsasua dutiksag batsasu asa, Dalila sogak yamagman juki Sansógkan jigkaja, unsumak:

“¡Sansógka, filisteo aidau jetepainawai!” tau.

Tusa tama Sansón nantak, hilo tsejgkush tsujimaina imatika soganak tsujiajui.

<sup>13</sup> Dutikamtai Dalila niina chichajak:

“¿Wagka ima tsanugme? ¡Amek minak tuke tsanugme! ¡Itugkaya emetmainush amainaitme nunú tujutta!” tau.

Tusa tama Sansón ayaak:

“Kakaumainchau wajasti tujutkumek, mina intashig siete chapikmagmawa nunú jáanchjai ijumjam jáanch apataiyai apijam, nuadui numi ajiam nuwi jigkamainaitme. Dutikawamin tikich aents senchigtuchu aina nujai betek amainaitjai”, tiuwai.

Tusa timatai Dalila Sansógkan ikanag aepes intashi siete chapikmagbaun ijumag jáanch apataiyai apijauwai.

<sup>14</sup> Dutika numi juki ajia jigka emetua unsumak:

“¡Sansógka, filisteo aidau jetepainawai!” tau.

Tusa tama nantak intashi jigkatuamunak japiki juwak jáanch apigtainak numi ajiamujai tsujiajui.

<sup>15</sup> Dutikamtai Dalila chichajak:

“¡Amek waitaitme! Nuniayatikum anejame tusa tujutmaume. Amek mina dushiktaku asam, kampatuma imania tsanujaume. Tujash tuwi senchigmesh ajutjamua duka eke ujattsume”, tau.

<sup>16</sup> Tusa kashi kashinig iniak waitkamu asa yawetug dakitak, dekak jakatjai tiuwai.

<sup>17</sup> Tau asa, wagkag ibau senchigtinush ayi nuna Dalilan ujaak:

“Wika nazareowaitjai. Mina intashjunak makichkish tsupigtuchu ainawai, wagki minak eke akiintsaisg Apajuinu ati tusa etegkamu asan, pegkegchaun takaschati tibauwaitjai. Tuja mina intashjun tsupigtukagmataig, tikich aents senchigtuchu aina nujai betek amainaitjai”, tiuwai.

<sup>18</sup> Tusa etsegtumakmatai, yamaik dekas ujatkae tusa filisteo apuji aidaun ujaktajum tusa chichaman akuptak:

“¡Yamaik Sansógkak wagkag ibau senchigtinaita nunak ashí ujatkae, nuniau asamtai kaunatajum!” tiuwai.

Tusa timatai ame dekaeuwaminig, akiktatjame tiu asag, kuichki jukiag Dalila pujamunum wegajui.

<sup>19</sup> Dalilak niina bakuin Sansógkan patas ikanjauwai. Nunik kanagmatai niina intashi siete chapikmagbaun tsupijati tusa makichik aentsun untukui. Nunú jegantun ashí tsupijauwai.

<sup>20</sup> Dutika tsupijamta Dalila unsumak:

“¡Sansógka, filisteo aidau jetepainawai!” tau. Tusa tama Sansógkak Tuke Pujuu niina idaisamunak dekachu asa, kanag tepau nantak tuke ayamjubau asa nuniktakama nunimainchau wajasui.

<sup>21</sup> Nunik kakaumainchau wajasmatai, filisteo aidau achikag jiin mai ukuikajui. Dutikawag yaakat Gazanum emajui. Dutika nuwi ejegawag cadena bronce najanamui jigkajag, aents achika chimpitainum trigon dekeak pujusti tusa apusajui.

<sup>22</sup> Dutikam pujai niina intashi ataktu tsakajauwai.

#### *Sansón jakamu*

<sup>23</sup> Filisteo aents aidaun apuji aidau Sansógka achiku asag depetmakji tusag, shiig aneenak ditá apajuimtaiji Dagón aajakua nuna emematuinak, kuntinun maawag apeawagtatus ijunajui. Nunik batsamas kantamainak:

“Iina apajuji yaimpasmatai, iina shiwaaji Sansón depetkaji” wajaidau.

<sup>24</sup> Tuja tikich aents filisteo aidaushkam nuna wainkag dita apajuimtaijin emematus kantamainak:

“Iina apajuji yaimpasmatai, iina shiwaaji Sansón ii ajakmamu aidaun ijitjamak aents aidaun kuashat ijinnuwe nunú depetkaji”, wajaidau.

<sup>25</sup> Imatuidau asag shiig aneenak Sansón achikam egketa nunú jiiki itatajum tima, jiiki itawagmatai senchi dushikinau. Dutikainak jega jegamku ajigbau jimag wajaunum nuna ejapeen awajsajui.

<sup>26</sup> Dutikam wajasu uchi niina egkesa ejeentaun chichajak:

“Juju jega jegamku ajigbau aina nunú jimag atsuak nuwi ejentunta, achimka wajasan ayamjatjai”, tiuwai.

<sup>27</sup> Tuja filisteo aidaun apuji aidauk nunú jeganum ashí nuwa nuwajaima ijunag piyak batsatu. Nuninai tikich aidaushkam nuna yakin ekenja jegamkamunum tres mil aents tumain Sansógkan dushikiagtai nuna diinak batsatu.

<sup>28</sup> Imatu batsatai Sansón senchi unsumak Tuke Pujun segaak: “¡Tuke Pujuu Apajuí ashí senchigtinuh, wait aneamas ima juke inagnamu yainkata! Filisteo aidau mina jiijun mai ukuijukajag dushiktuina nuna iikmaktajai. ¡Senchijum sujusta!” tiuwai.

<sup>29</sup> Nuna tusa jega jegamku ajiamu ejapeen jimag wajaun nuna mai achikui.

<sup>30</sup> Nunik achika wajas unsumak: “¡Filisteo aidautigmeke yamai wijai jinaattagme!” tiuwai.

Tusa tamawaik ashí niina senchijijai shitakiuwai, dutikam kupinak jega iyak filisteo apuji aidaunak, tikich nuwi batsatujai ashí yutua ijinauwai. Nii iwaku pujusa aentsun ijinauwa nuni kuashat nii jak ijinauwai.

<sup>31</sup> Nunik Sansón jakamtaí, niina yachi aidau patayi aidaujai kaunawag iyashin jukiag, yaakat Sorá Estaoljai awa nuwi niina apaji Manoa ukusbaunum ukusajui. Sansógkak Israel aents aidaun yayaak veinte mijan takasui.

## Rut

*Elimélec niina patayi aidaujai Moab nugkanum pujustatus shiyakgabu*

<sup>1-2</sup> Israel aents aidanmak eke apu adaijachbau asamtai, ayatak makichik aents Apajui etegkamuy ayamjukam batsamajaku aina, nunú tsawantin ditá nugken ashí nujan tepeauwai. Nunikmatai makichik aents Elimélec daagtin, Judá nugken yaakat Belégnum pujau, Moab nugkanum ujumak tsawan pujustatus weuwai. Nunik wegak niina nuwe Noemí\* nuigtu niina uchiji jimag: Mahlón, Quilión aatus juki weuwai. Dita aidauk Belégkanmaya ainayatak, Belégkan tikich daaji Efrata† tutai asamtai, Efrata aents tutai aajaku ainawai. Nunik shiyakg Moab nugkanum jegawag nuwi batsamsajui.

<sup>3</sup> Nuwi batsatai Noemí aishi Elimélec jakauwai. Nunikmatai niina uchiji jimag aajakua nujai Noemí juwakui.

<sup>4</sup> Nunik batsamas nunú uchi aidauk Moabnumia nuwa aidaujai mai nuwenawajui. Nunú nuwa aidaun daajig Orfa, Rut aatus aajakui. Nunik nuwenawag diez mijan tumain batsamas

<sup>5</sup> ditashkam mai jakauwai. Nunik uchiji jinaamtaí, Noemík uchigtuchu, nuigtush aishinchau nigkiuch juwakui.

*Noemí Rutjai Belén wakitkimu*

<sup>6</sup> Nunik pujus Tuke Pujuu niina aentsji Israel aents aidanmak wait anenjae, dutikau asamtai, ajak ajakmamuji aidauk shiig tsapai kuashat nejenawai. Nuadui yamaik nujantaik waituinatsui tabaun Noemí Moab nugkanum pujus dekauwai.

<sup>7</sup> Nunik dekaa Judá nugkanum waketak, niina uchiji nuwe aajaku aidaujai uminas jiinkiuwai.

<sup>8</sup> Nunik jintá wesag Noemí ditan chichajak:

“Atumi duku pujamunum wakitkitajum, atum mina, tuja mina uchig aidaujai shiig kuitamkagtukuitjum dutiksag atumnash Tuke Pujuu kuitamjamkatnume.

<sup>9</sup> Tuja nuigtush ataktu aishinawag shiig batsamsatnume tusa yaimpaktinme”, tiuwai.

Aatus tusa yapinum kugkuasui kumpama ishiaktatus. Dutikam dita buutuidau.

<sup>10</sup> Nuninak:

“¡Atsa wakitkishtatji! ¡lik amejai amina nugkemin minittaji!” tuidau.

<sup>11</sup> Tusa tiagtai Noemí ditan ataktu chichajak:

“¡Nawantug aidauh, tutsuk shiyaktajum! ¿Wagka wijaiish wetag tajume? wika muumpakui asan, atum aishinmainnak uchi aishmagnak nuigtuk uchigmamaitajui.

<sup>12-13</sup> Tutsuk atumi jemin waketajatum. Wika shiig múuntuch wasasjai, ataktuk aishinmaitajui. Tuja yamai kashia duik aishinan uchi aishmagkun uchigmakaintagtaih, ¡nunikmataish atumek tsakagmatai, aishinatjai tusa dakakjumek pujumaitugme! ¡Nunú tsakagti tusajum dakakjumek, aishintsuk jamain ainagme! Nawantug aidauh, atumek wijaiig pujumaitugme. Minak Tuke Pujuu waittsati tusa tujutmatai waitiag, nuna nagkaesau atum waitiamun diisan atumin wait anentakun waitmainaitjai”, tiuwai.

<sup>14</sup> Tusa tutai ataktushkam buutuidau. Tusa jimajá timatai, Orfak niina tsatsajin kumpama kugkuas ukuak wakitkiuwai. Untsu Rutak tsatsajijai juwakui.

<sup>15</sup> Nunik juwakmatai Noemí niina chichajak:

“Antukta nijah, amina wajegmi nuwe niina nugken, niina apajuimtaiji ayá nuwi waketui. Nuniau asamtai, ¡ameshkam nijai wetá!” tiuwai.

<sup>16</sup> Tusa tama Rut ayaak:

“¡Ukugkita tusamek tujutipa!

Ame tuwi wetatme nuwi wishakam minittajai.

Tuja ame tuwi pujuttame,

nuwi wishakam amejai pujuttajai.

Ame wegantu aina duka

wi wegantu agtatui.

Tuja amina Apajuígmeshkam

mina Apajuíg atatui.

<sup>17</sup> Ame tuwi jakatnaitme

nuwig wisha jakatnaitjai,

nunika ai nuwig ukugsagtin atinme tajai.

\* 1:1-2 “Noemí” tawa duka hebreo chichamnumak “yajauwajah” taku tawai. † 1:1-2 “Efrata” tawa duka yaakat Belégkan tikich daaji aajakui.

¡Jaka megkaechayatkun,  
wi amina ukuakun yaja wetaik,  
Tuke Pujuu suwimkan  
sujustin ati tajai!" tiuwai.

<sup>18</sup> Tusa imattai, Noemí anentaimas, dekas mina uyuuntus wekaesatasampap tawa tusa ataktu awagkig wakitkita tusag tichauwai.

<sup>19</sup> Nunik mai juwakag we wenakua Belén jegawajui. Nunik jegawagmatai aents aidauk senchi pampaidau shiig aneenak. Imatiagtai nuwa aidauk: "¡Noemí tae, Noemí tae!" wajaidau.

<sup>20</sup> Tusa imatiagtai Noemí ditan chichajak: "¡Noemí tujutigpajum, Mará<sup>‡</sup> tujuttajum! Wagki, minak Tuke Pujuu ashí senchigtina nunú kajegtuk waittsati tujutmatai waittsajai.

<sup>21</sup> Wi juwi pujaun weuwaitag nunak kuashat yajumakan wegabiajai. Tujash yamaik wainkan uwegmatak wakitkijai, wagki Tuke Pujuu aatus wakekau asamtai. Nuadui minak Noemí tujutigpa, wagki Tuke Pujuu ashí senchigtina nunú minak waittsati tujutmatai waittsajai", tiuwai.

<sup>22</sup> Aatus Noemí Moab nugkanum pujau, Rut niina uchiji nuwe Moabnumia aentsu nawanji aajakua nujai wakitki, cebada ajakbau juutai tsawan jegamunum, Belén jegauwai.

## 2

*Aents Booz daagtin aajakua nuna ajajin Rut takajakbau*

<sup>1</sup> Noemí aishi Elimélec aajakua nuna patayi Booz daagtin shiig wiakuch eme anentsa diitai, nunú tsawantín nuwi pujujakui.

<sup>2</sup> Makichik tsawantai Rut Noemín chichajak:

"Wisha aja aina nuwi wetajai. Nunikan nuwi wekaesa takakun ajagtin juwaak nagkaejamu aidaun ukunum wekaetusan juukchainjash", tiuwai.

Tutai Noemí ayaak:

"¡Ayu, wetá nawanta!" tiuwai.

<sup>3</sup> Tusa tima ajanum jeganta nagkaejamu aidaun juwaak wekagu. Niig tikichi ajajinis wekaeja tukama, dekas Noemí aishi Elimélec aajakua nuna patayi Booza ajajin wekagu.

<sup>4</sup> Nunik juwaak wekagai Booz Belén pujau niina ajajin weuwai. Nunik jeganta ajaka juu aidaun kumpamak aatus tiuwai:

"¡Tuke Pujuu atumnash kuitamjamkatnume!" tiuwai.

Tusa tama dita ainak:

"¡Tuke Pujuu aminashkam pegkegnum yumigtamsati!" tiajui.

<sup>5</sup> Tusa tiagmatai, Booz ajaka juu aidau apujin iniak:

"¿Juu nuwauch wekaga jusha yana patayimpaita?" tau.

<sup>6</sup> Tutai nii ayaak:

"Juka Moabnumia nuwa Noemíjai taama nunuwai.

<sup>7</sup> Nunú juwi taa, wisha ajaka juwaak yuja nunú nagkaikimu aidaun ukunum wekaesan juuktajai tusa mina segatkui ayu timajai. Tuja yama nagkamchak taama duwi nagkamas yamaikish taka wekagu, ame taum duwi machik ayamui", tiuwai.

<sup>8</sup> Tusa timatai Booz Rutan jegantun chichajak: "Nawanta, wi tajam nunú shiig antukta. Wainka tikich aja aina nuwi wekeasamek makichkish juukaipa. Nuwa mina tsakatkeg aidau ajaka juwaak juwi batsata nujai pujusta.

<sup>9</sup> Nunika pujusam ajaka juu aidau tuwi takagtatua nuniakui nuwi ameshkam wetá. Tuja mina tsakatkeg aina nunak amina waitkagmasainum tusan shiig ujakagjai. Tuja ame kitamakmek, yumi aimjamu batsata nuna dita umuina nuwiya uwagta", tiuwai.

<sup>10</sup> Tusa tama Rut niina eme anentus tsuntsuma nugkanum nijayin antig pujusa Boozan iniak:

"¿Wagka wi tikich nugkanmayayaitag nunin aish, imatika puyatjuttamesh waitash anenjujume?" tau.

<sup>11</sup> Tusa tama Booz ayaak:

"Amina aishjum jakamtai nagkamsam, niina dukuji wajuk kuitamkaume nuna wika shiig dekajai. Tuja nuigtushkam amina apa, amina duku, amina nugkem aaja ukukim ii amina wainchatai aidautijai ijunja pujustasa taum nunashkam shiig dekajai", tiuwai.

<sup>12</sup> Nuna tusa ataktu chichajak: "¡Atashu uchiji dukuji nanapen waigka ayamjumama numamtuk, amina kuitamjamkatna nunú Tuke Pujuu Apajui Israel aents aidau Apajuijaya nuwi yunumkaume! ¡Nuadui wi niina segajai, ame kuashat takasum nuna akigmakti tusan!" tiuwai.

<sup>‡</sup> 1:20 "Mará" tawa duka hebreo chichamnumak "yapau" taku tawai.

<sup>13</sup> Tusa tama nii ayaak:

“Apujuh, ame minak wait anenjujume. Ame tujutam nunú mina anentaig nak ichichtujui. Wika amina tsakatkem aina nujaig makichkish betekchawaitjai, nuniaig ame minak shiig anenjusam aultusume”, tiuwai.

<sup>14</sup> Tusa timatai yujumak yuwamunum Booz Rutan untsuka itan chichajak:

“Juiw tantam, juju pag puuka jukim ayaka yutai chujuin umikbauwa nuwi uchup-jata!” tiuwai.

Tusa tima ajaka juu aidau pegagbaunum jeganta ekemsauwai. Nunikmatai Booz cebada duwikbaun juki susauwai. Dutikam nuna yuwa ejemag nuigtushkam ampijui.

<sup>15</sup> Nuna dutika ukuak ataktu ajakan juuktatus wetai, Booz ajaka juu aidau chichajak:

“Cebada tsupija jigkaka ijumjamu aina nunú sujittsut susatajum, jukiti.

<sup>16</sup> Tuja atum cebada juuka jigkaka ijumjamunmaya akagag kakeguk duka idaitustajum nii yajuakti”, tiuwai.

<sup>17</sup> Tuja Rutak Booz ajajinian ajakan juwaak wekagai, etsa akaetai nii juukbaujin akaja ijumag dekapa diikma veinte kilo amainun nagkagas jukiuwai.

<sup>18</sup> Nuna yanaki juki Belén niina tsatsaji Noemí pujamunum jegauwai. Nunik cebada juukbaujin, nuigtu yutai ampija jukimujijai Noemín susauwai.

<sup>19</sup> Dutikam Noemí Rutan iniak:

“¿Tuwi yamaish takasume? ¿Tuwiya imatikamesh juukume? ¡Amina yaimpaka nunak Apaju pegkegnun yumigsati!” tiuwai.

Tusa timatai, yana ajajinig takasabi, nuna Rut niina tsatsajin ujaak:

“Wika aents Booz daagtinu ajajin takasmajai”, tiuwai.

<sup>20</sup> Tusa timatai Noemí ayaak:

“¡Tuke Pujuu niinash pegkegnun yumigsati! Tuja nii iinashkam yaunchuk aents batsamajaku aina nuna yaigkua dutiksag yamai yaimpawai. Nunú aentsua duka mina aishug ayá nuna patayiyai. Nuadui iinak nii kuitamjamainai”, tiuwai.

<sup>21</sup> Tusa timatai Rut ataktu chichaak:

“Nuigtushkam nunú aents chichagtak, mina tsakatkeg aidau takaina nujai takasta, nunikam ajak ashí juunkamtai idaisata tusa tujutnae”, tiuwai.

<sup>22</sup> Tusa timatai Noemí Rutan chichajak: “Ayu nawanta, nunikta, wainka tikichi ajajin wekaemin waitkagmasainum, dekas niina tsakatke aina nujai takasta”, tiuwai.

<sup>23</sup> Tusa tima Rutak Booz tsakatke aidau cebadan trigojai juwagtai, niishkam nuna juwa juwakua ashí ashimdaekamtai idaisauwai. Nunak niina tsatsajijai uyunis pujusa takajakui.

### 3

#### *Booz Rutan wait anenjamu*

<sup>1</sup> Makichik tsawantai Noemí Rutan chichajak:

“Nawantah, ame aishina shiig pujumainun egatkatjame”, tiuwai. Tusa chichajak:

<sup>2</sup> “Nijah nawantah, Booz mina aishju patayiya nuna tsakatke aidaujai ame ijunja takasmaun nunú, trigon cebadajai akagtatus yamai kashi niina ajajin wetatui.

<sup>3</sup> Nuniktin asamtai, yamai wi titatjam nunú umikta: ¡Maita, nunikam kugkuin ukatmamkam jáanch pegkeg nugkugta! Nunikam Booz niina ajajin takak pujamunum wetá. Tujash eke yujumkan yuwa umutnash uwag umintsaigkik wantintukaipa.

<sup>4</sup> Ayatak uumka pujusam tuwig kanajat nunú diyaku ata. Nunikam nii kanagmatai jegantam, nawenia jáanch pajantukam nuwi ayaumsam tepesta. Nunika tepamin, ame wajukattame nuna nii tujamtatui”, tiuwai.

<sup>5</sup> Tusa tama Rut ayaak:

“Ayu, ame tujutam nunak imatiksasuk umiktajai”, tiuwai.

<sup>6</sup> Aatus tusa Rut ajanum weuwai. Nunik jeganta niina aishi aajakun dukuji tibaunak imatiksag umikui.

<sup>7</sup> Tuja Boozak yujumkan yuwa, umutnash uwag shiig aneasui. Nunik nuadui kanagtatus ajak juuka ijumjamunum ayaumas tepesui. Nuwi kanak tepai Rutak takamtak jeganta Booz nawen ayaumas tepesui.

<sup>8</sup> Tuja Boozak kanag tepau ejampek shintaag ayanteagtakama, dekapjauwai makichik nuwa niina nawen ayaumas kanag tepaun.

<sup>9</sup> Nunik iniak:

“¿Yaitpa amesh?” tau. Tusa tama nii ayaak:

“Wika amina inakem Rutaitjai. Amek mina aishug ayá nuna shiig patayiyaitme, nuniaun asam ame minak kuitamjumainaitme. Nuadui ame nuwatjukta tajame”, tiuwai.



<sup>10</sup> Tusa tama Booz ayaak: “iNawanjuh, Tuke Pujuu pegkegnum yumigtamsati! Amek dekas amina aishjum aajakua duka shiig umigme. Nuadui tikich aents datsauch, ujunakesh nuniachkush wiachkakesh mina nagkaetasu aidau egamainaitkum, mina egatkaume.

<sup>11</sup> Nuadui nawanta ishankagtukaipa, ame nuwa pegkejaitam nunak mina yaaktajuig ashí dekeinawai. Nuadui ame segatam nunak imatiksasuk umiktajai.

<sup>12</sup> “Tujash wika amina aishjum aajakua nuna patayiyaitkunush, tikima shiig patayichuitjai, dekas niina shiig patayi aidauk batsatu.

<sup>13</sup> Tuja yamaikik juwi kanagta, kashin amina aishjum aajakua nuna shiig patayi puja dusha, wi kuitamkatjai tujamtimpash nunú dekaami. Untsu nii dakitakuig, wi kuitamkatjame. Nunak Tuke Pujuu daajin umiktinjun tajai. iTuja yamaik juwi shiig kanaja tsawagta!” tiuwai.

<sup>14</sup> Tusa tima Rutak Boozai ayaumas tepes kanajui. Nunik tsawak eke shiig pan weatsaig nantakiuwai, wagki Booz chichaak: “Juju nuwa ajanum tanta nunak makichkish wainkashtinme”, tiu asantai.

<sup>15</sup> Nunik pujuttaman Booz chichajak: “Jáanchjum atiam wegkukam shiig emetuata.” Tusa tima achika emetuamtaí, cebadan cuarenta kilo nagkagas yajatuuawai. Dutika jigkatua aenskam Belén wakitkiuwai.

<sup>16</sup> Nunik niina tsatsaji pujamunum jegamtaí, iniak:

“iNawanta wajuk wekaesume!” tau. Tama Rut Booz tibaun imatiksag ashí ujakui.

<sup>17</sup> Tuja ataktushkam chichaak:

“Juna cebadan sujusa chichagtak: ‘Amina aishjumi dukuji puja nuwig uwegmatkek wakemaitsume’ tujutmae”, tiuwai.

<sup>18</sup> Tusa timatai Noemí niina chichajak: “iNawanta waugtutsuk pujusam dakasta wajakatig! Auk niig kajimatikig idaisashtatui, tuké wamak chichas epegkea idaisattawai”, tiuwai.

## 4

### *Booz Rutjai nuwenamu*

<sup>1</sup> Etsa agkuantai Booz yaakta waitijin aents aidau ijunajaku aina nuwi weuwai. Nunik nuwi jegan eketu. Nunik eketu Rutan aishi aajakua nuna shiig patayi nagkaemattaman wainak untuka chichajak:

“Juwi tanta ekemsata, chicham awa nunú chichasmi”, tiuwai. Tusa tima jegan ekemsauwai.

<sup>2</sup> Nunikmatai nunú yaaktanmaya apu eme anentsa diitai aidaun diez ipauwai. Dutikam ditashkam nuwi jegantag ekemsajui. Nunikagmatai,

<sup>3</sup> dita antuinamunum Booz niina patayin chichajak:

“Noemí Moab nugkanum pujau wakitki tae. Nunik iina patayi Elimélecka nugke aajakua nuna sujuktatag tawai.

<sup>4</sup> Nuniau asantai, amina nii dekati, nunik sumaktatag takug yamaikiuch juju apu aina dusha antuinai, sumaktajai tusa titi tajame. Ame Eliméleckan shiig patayi asam, niina nugkega duka dekas sumamainaitme. Untsu ame sumakchatnaitkumek ujatkata. Ame dakitakminig, wi sumaktajai”, tiuwai.

Tusa tama nii ayaak:

“Nugkanak wi sumaktajai”, tiuwai.

<sup>5</sup> Tusa tutai Booz niina chichajak:

“Shiig anentaimsata nijah, ame nunú nugka sumakmek, waje Moabnumia nuwa puja najai nuwenattame. Wagki, nunú nugka yanau aajakuita duka nunisag niina daaji megkaetsuk asati tusam”, tiuwai.

<sup>6</sup> Tusa tama nii chichaak:

“Nuninaitkuig wika nunú nugkanak sumamaittujai, wagki mina uchig aidau nugkenchau wainak juwamain asagmatai. Untsu ame sumaktatag takumek dekas ame sumakta, wi sumamainun amina idaitajame”, tiuwai.

<sup>7</sup> Tuja nunú tsawanting Israel aents aidauk makichik aentskesh niinu amainun tikichi suwakug, niina sapatjin\* juinia yantamen ukuimak nunú aents sumaun sujaku ainawai. Nuna betek umiak,

<sup>8</sup> niina sapatjin ukuimak Boozan susauwai. Dutika chichaak: “Ame nugkak sumakta”, tiuwai.

\* 4:7 Sapat pachisa ausata Dt. 25.9-10.

<sup>9</sup> Tusa tima Booz apu aidau, nuigtu tikich Israel aents aidau aatus nuwi batsatun chichajak: “Wi Noemí aishi Elimélec tuja uchiji Quillón, Mahlón aatus aajaku aina nuna nugkenak yamai atum antagmin sumajai.

<sup>10</sup> Tuja wi Rut Moabnumia nuwa wajea nuna nuwat kattag dushakam dekagme. Nunak dutikattajai, wagki niina aishi Mahlón aajakua nuna daaji megkaekai tau asan. Nuadui Mahlónka daajig, tuja nii wegantu aidaushkam juju yaaktanmak megkaekashtinai. Atum dekamunum junak tajai”, tiuwai.

<sup>11</sup> Tusa timatai apu múun aidau tikich aents aidaujai nuwi batsatu chichainak: “¡Ehe, duka dekas iishkam wakegaji! ¡Nunú nuwa amina jemin wayatta nunak Tuke Pujuu yaigti, dutikam Raquel Leajai iina dukuji aajaku aina nujai betek atin ati! ¡Untsu amek Efrata, tikich daaji Belén tuuta awagmatia nuanuig, eme anentsa ajantusa diitai atatme!

<sup>12</sup> ¡Tuke Pujuu yaimpasmatai, juju nuwa jujai kuashat uchijinatín ata! Tuja wakegaji Judá Tamarai akiamu Fares shiig kuashat uchigtin aajakua, iman ati tusa”, tiajui.

<sup>13</sup> Aatus Booz Rutjai nuwenauwai. Nunik pujaun Apajuí Rutan ejapjukti tima, ejapjuk uchi aishmagkun uchigmakui.

<sup>14</sup> Nunik uchigmakmatai, nuwiya nuwa aidau Noemín chichajuinak:

“¡Tuke Pujuu emematiagmi, wagki nii yamai amina kuitamjamkatnun tijajumin amasu asantai! ¡Itusag amina tijajumek Israel wegantu aidaunmak eme anentsa diitai ah! taji.

<sup>15</sup> Ame muumpakiaminish nii shiig anentijamsatnai, wagki amina uchigmi nuwe amina senchi anempa nuna uchiji asa. Nuadui Rutak, amina uchijum siete amaina, nuna nagkaesau atinai”, tiajui.

<sup>16</sup> Tusa tiajam Noemí uchín juki tsakapajui.

<sup>17</sup> Nunú uchín Noemí pagkus wajaun nuwa aidau wainkag chichainak: “¡Noemís uchigmakatai tumain anentaji!” tuidau. Nuna tuidau asag uchi daajin adaikajui Obed.<sup>†</sup> Nunú aajakui Jesé apaji Davitan apachji aajakua nunú.

*David wegantu aidau*

<sup>18</sup> Juju aajaku ainawai Fares wegantu aidau: Fares aajakui Hesrógka apaji.

<sup>19</sup> Hesrón aajakui Ramá apaji. Ram aajakui Aminadapa apaji.

<sup>20</sup> Aminadab aajakui Nahasógka apaji. Nahasón aajakui Salmónka apaji.

<sup>21</sup> Salmón aajakui Booza apaji. Booz aajakui Obeta apaji.

<sup>22</sup> Obed aajakui Jesé apaji. Tuja Jesé aajakui Davita apaji.

<sup>†</sup> 4:17 “Obed” tawa duka hebreo chichamnumak “kuitamkagtin” taku tawai.

**Samuel pachisa  
yama nagkamchaku agagbau  
1 Samuel  
Samuel akiinamujin nagkamsa nii profeta wajasa takasbau  
aidau**

(1—7)

*Samuel akiinamu*

<sup>1</sup> Efraígka mujajin yaakat Ramánum makichik aents Elcaná daagtin, Jerohama uchiji Eliú tijaji pujajakui. Duka Suf Efrain wegantu aajakua nuna uchiji Tohu aajakua nuna ama tijaji aajakui.

<sup>2</sup> Elcanák jimag nuwentin aajakui: Jeteke daajig Ana aajakui, untsu awan nuwe daaji Peniná aajakui. Peniná aajakui uchigtin, untsu Ana uchigtuchu aajakui.

<sup>3</sup> Maki makichik mijantin Elcaná nii pujamujin ukuki yaakat Silónum wejaku, nuwi kuntu maa apeak Tuke Pujuu ashí senchigtina nuna ememattatus. Tuja sacerdote Elí uchiji jimag: Hofní Fineesjai, ditashkam sacerdote asag, Tuke Pujuu takajuinak nuwi batsamajaku ainawai.

<sup>4</sup> Tuja Elcaná kuntuinun maa apea Apajuín emematkug nuna nejenak niina nuwe Peninán, niina uchiji aidaun, nawanji aidaujui aatus betek akanag tinamajakui.

<sup>5</sup> Untsu Ananak Tuke Pujuu uchigmakchatin ati tibau aigkishkam senchi aneau asa, neje dekas pegkejan juki sujaku.

<sup>6</sup> Dutiktai Peniná Anan kajejin asa, Tuke Pujuu uchin uchigmachu ati tibau asamtai, pegkegchaun chichajak dushikiak waitkau.

<sup>7</sup> Maki makichik mijantin Tuke Pujuu jeen Niina ememattatus shimujakua duik Peniná Anan tuke dushikijaku. Imatika waitkamu asa yujumkan yutsuk pujus ayatak buutujaku.

<sup>8</sup> Nunitai niina aishi chichajak: “¿Wagka buutme Ana? ¿Wagka yujumak yutsukesh wake besemesh pujame? Wichaukaitag amina uchijum diez amaina nuna nagkaesau”, tiuwai.

<sup>9</sup> Tusa tima Ana Silónum pujus yujumkan yuwa umutnash uwag nuadui Apajuí jee pegkegmanum nuna waitijin sacerdote Elí eketbaunum jegantui.

<sup>10</sup> Nunik jeganta nii kajekbaujin buutki Tuke Pujuu segaak,

<sup>11</sup> juna aatus nii umiktinjin tiuwai:

“Tuke Pujuu ashí senchigtinuh, wika amina inakmetjai. Wi wake besemag wekagag duka amek dekame. Minash kajimatjuki idaitusuk wait anenjakmek uchi sujasta. Dutijuawaminig wika amina takagtamin ati titinaitjai. Dutikau asan, nuna betek umiakun makichkish uchi intashinak tsupigkashtinaitjai”, tiuwai.

<sup>12</sup> Aatus Ana Tuke Pujuu initkak segaak wenin umuchiaun Elí diistakama wainkauwai.

<sup>13</sup> Tuja Anak initkak Apajuín segau asa wenin umuchiaun asamtai, Elí antukchauwai. Nuadui Elí anentaimas nampekampas aan eketatai tusa,

<sup>14</sup> chichajak:

“¿Wagka ima nampetash wekaetame? ¡Nampet wekaetutsuk idaisata!” tiuwai.

<sup>15</sup> Tusa tama nii ayaak:

“Vionakesh, tuja tikich uwaja nampetainakesh uwagchamjai. Shiig senchi wake besemag dekapeamu ajutu asamtai, wi waitiamujin pachisan ashí Tuke Pujuu ujaakun eketjai.

<sup>16</sup> Wainkam nuwa pegkegchauwa nunin diigsaipa, wika uyumamu ajutu asamtai, wake besemag dekapeakun nuna pachisan Tuke Pujuu augkun eketjai”, tiuwai.

<sup>17</sup> Tusa tutai Elí ayaak:

“¡Agkan, shiig aneam wetá! Ame waji segaume nunak, Israel aents aidau Apajuín emematin aina nunú amastatui”, tiuwai.

<sup>18</sup> Tusa tima ayu tusa ukuak, niina jeen shiig aneam wakitkiuwai. Nunik jegaa yujumkan yuwauwai. Duwi nagkamsag wake besemag pujamujig atsugsauwai.

<sup>19</sup> Tuja kashinia duwi kashikmas Elcaná niina nuwe aidaun yajuak Apajuín jee pegkejam aajakua nuwi Tuke Pujuu ememattatus weuwai. Nunik nuwi jegaa Tuke Pujuu ememati ukuak, niina jeen yaakat Ramá wakitkiuwai.

Nunik wakitki jegaa Elcaná niina nuwe Anajai kanajui. Aatus Tuke Pujuu Anan wait anenjauwai.

<sup>20</sup> Nuadui Ana ejapjuk pujus tsawanji jegamtai, uchi aishmagkun uchigmakui. Dutika adaikauwai Samuel. Nunak “Apajúi segamu” taku tawai.

<sup>21</sup> Duwi pujus Tuke Pujuu ememattai mijan jegamtai, Elcaná niina nuwe Peninán niina uchiji aidaujai yajuak, nii Tuke Pujuu anagkuamun umiak kuntinun maa apeak Tuke Pujuu ememattatus yaakat Silónum weuwai.

<sup>22</sup> Untsu Anak ditajaig wechauwai, ayatak aishin chichajak:

“Wika minishtatjai, uchi yujumkan nigki yumain wajasmatai, niina jukin, juga pegkegmanum Apajúiin ejetuattajai, nuwi tuke pujustin ati tusan”, tiuwai.

<sup>23</sup> Tusa tutai niina aishi ayaak:

“¡Ame wajuk wakegame nunú umikta! ¡Amejai uchik pujus muntsun tsujakti! Ame tame nunak Tuke Pujuu umikti”, tiuwai.

Tusa timatai Anak niina uchijijai juwakui. Nunik pujai uchi muntsu tsujaka yujumkan nigki yumain wajasui.

<sup>24</sup> Nunikmatai Ana uchijin juki yaakat Silónum Apajúi jee pegkegmanum emauwai. Tuja nuigtushkam makichik toro tsakatan kampakum mijan ajamun, trigo veinti dos kilo, nuigtu duwap apagbaunum vinon yajaa aimak, aatus yajuak weuwai.

<sup>25</sup> Dutika ejegamtai Elcaná niina nuwe Anajai nuna apeak Tuke Pujuu emematiajui. Dutikawag uchi jukiag sacerdote Elí pujamunum ejeentajui.

<sup>26</sup> Dutika Ana chichaak: “Mina apujuh, wait aneasam antugtukta. Yaunchuk juwi wi aminí ayaumsa pujusan Tuke Pujuu segaakun pujubiajai,

<sup>27</sup> juna uchin sujusti tusan. Nuadui Tuke Pujuu juna uchin sujuse.

<sup>28</sup> Nuadui yamaik wishakam Tuke Pujuuun ati tusan niina idaitajai, ima niinak takagsatin ati tusan”, tiuwai.

Tusa timatai, Elí Tuke Pujuu emematak tsuntsuma nijayin nugka antig pujusui.

## 2

### *Ana kantamamu*

<sup>1</sup> Ana kantamak aatus Apajúiin tiuwai:  
“Tuke Pujuuwah, wika aminí shiig anejai,  
wagki ame senchintijau asamin.  
Yamaik mina shiwag aidaujaish  
aiinikan tudaimain wajasjai,  
wagki ame yainkau asamin.  
¡Yamaik shiig aneasan pujujai!

<sup>2</sup> ¡Tuke Pujuuwah,  
ame pegkegmaitam imanuk tikichik atsawai!  
¡Ame jutii Apajúji asam kuitamkagtam, imatikas  
kuitamkagtau tikichik makichkish atsawai!  
¡Amina nagkaetamsauk tikichik atsawai!  
<sup>3</sup> Makichkish ememasag chichamain ainatsui.  
Tuja ima nigki eme anenmamuk makichkish atsuti.  
Tuke Pujuuwai ashí yacha duka.  
Tuja Tuke Pujuuwai maki makichik aents  
pegkegchau takasbaujin diijus suwimkan suwa duka.

<sup>4</sup> Apajúiyai aents senchigtin aina nuna  
senchigtuchu emak,  
aents senchigtuchu aina nuna senchintiknuk.

<sup>5</sup> “Yaunchuk yumainji kuashat ajujakbaur,  
yamai makichik pag yuwatag  
tabaunum takak waituinawai.  
Tuja yaunchuk nujantai waitujaku aidau,  
yamai waituinatsui.  
Nuwa uchigmachu aajakushkam,  
nuwa uchighbau aidau  
nagkaesau sieteya imagnia uchigmainawai.  
Untsu yaunchuk uchiji kuashat ajujakagbaur,  
uchigmamainchau wajasaje.  
<sup>6</sup> Tuke Pujuuwai pujutan sukagtinuk.

Ima nigki jakati tusashkam tukagtau.  
Nunika jaka ajin iina patayi aidau  
ukumatainum ukugmasagmataish,  
ataktu inantamki pujutan amastina nunú.

<sup>7</sup> “Tuke Pujuuwa nunuwai ujuuna ekagtinuk.  
Tuke Pujuuwai wiakuch ekagtinuk.

Nii amasbaun atanjamkish,  
nigki ataktushkam imatiksag sukagtinai.

<sup>8</sup> Nii aents ujunauchin wiakchamtiknai.

Tuja aents yumainji atsugbaun,  
egaka yuu wekagun juki,  
aents eme anentai aidaujai betek emauwai,  
dutika nunú aents  
eme anentsa diitai aidau ekemtain ekentsatatus.

Tuke Pujuuwai ashí nugka aina nuna najanak,  
nugka patami asatnunashkam umikua duka.

<sup>9</sup> Tuke Pujuu ya niina shiig umijua nuna kuitamui.

Untsu aents pegkegchau aidauk jinuinawai,  
nunikag suwimkanum shimuinawai.

Wagki makichik aentsuk niina senchijinikik  
ayamjumamaitui.

<sup>10</sup> Tuke Pujuu nayaimpinum pujus niina shiwaaji  
aidau chaagpin ajuntug ijinattawai.

Ashí aents nugkanum batsata nunak

Tuke Pujuu dita takasbaujin diijus  
suwimkan susattawai.

Untsu apu atinun nii etegkamunak  
aan nagkaemas senchigtin emattawai”, tiuwai.

<sup>11</sup> Tusa kantama inagnakmatai, Elcaná Anajai niina jeen yaakat Ramá wakitkiuwai.  
Tuja uchik Tuke Pujuu takagsatatus sacerdote Elíjai juwakui.

*Elí uchiji aidau pegkegchaun takamsagbau*

<sup>12</sup> Elí uchiji aidauk pegkegchau aidau asag, Tuke Pujuu ajantus diijakchau ainawai.

<sup>13</sup> Nunidau asag makichik aentskesh Apajuin emematac kuintinun maa apeamun  
antukajag dita inaken akupejaku ainawai. Dutikamu nunú tenedor múun wajaknun  
takaku jegawag ajantsuk kuintinun neje yama najaunak,

<sup>14</sup> nunú tenedorai iju jiiag yajumaidau. Dutikainak Israel aents aidau yaakat Siló  
jegawag Apajuin ememattag tuidaunak waitkaidau.

<sup>15</sup> Tuja kuintinu wiyajin eke apeatus pujugatmanash sacerdote inake jegantun  
chichajak: “¡Sacerdotenu neje atinuk uduu mina sujusta wi jukin inagtuatjai, wagki  
sacerdotek neje injuamunak dakitawai!” tau.

<sup>16</sup> Tusa tama aents ayaak: “Jasta, dekatkauk kuintinu wiyajin apeatjai. Dutikantai ame  
wakegamu jukita.” Tama nii chichajak: “¡Tutsuk yamaikiuch sujusta! ¡Sujachkuminig  
wiki atankittagme!” tau.

<sup>17</sup> Elí uchiji aidauk shiig pegkegchau Tuke Pujuu umijajakchau ainawai. Nunin  
asag Tuke Pujuu anentag suwamunash ajaantus diitsuk dita wakegamun takajaku  
ainawai.

<sup>18</sup> Untsu uchi Samuelak Tuke Pujuu shiig umijajakui.

Nuniau asa nigka sacerdote nugkutai lino apagbau efod\* tutain nugkujakui.

<sup>19</sup> Tuja maki makichik mijantin niina dukuji apajijai Apaju jee pegkegmanum jegawag  
kuintinun maa apeanak Apajuin ememattatus weakug niina uchiji Samuel nugkugtin  
jáanch apagbaujin juki wejaku.

<sup>20</sup> Nuniau asamtai Elí, Elcanán Anajai pegkegnum yumigkiak: “Juju uchin Ana Tuke  
Pujuu anentag susa duwi, Tuke Pujuu Anayai nuni kuashat uchijum aidau amastí”,  
tiuwai.

Tusa tima dita jeen waketjajui.

<sup>21</sup> Nuadui Anak Tuke Pujuu pegkegnum yumigkiaku asa, kumpatum uchi aishmagkun,  
jimag nuwan aatus uchigmakui. Tuja Samuelak Tuke Pujuu kuitabau asa, nuwig niina  
takajak pujusa tsakau.

\* **2:18** Juju versiculonum chicham “efod” tawa nunú chichamak capítulo 14.3numshakam awai. Nunak jáanch lino  
apagbau sacerdote nugkutain taku tawai.

<sup>22</sup> Tuja Elik múuntuch aajakui, tujash niina uchiji aidau Israel aents aidau wait-kainawai tabaun ashí dekauwai. Tuja Apajuíjai chichatai jega pegkejam jegamkamua nuna waitijin nuwa aidau kuitamin aina nujaishkam kanuinawai tabaun dekauwai.

<sup>23</sup> Nunik dekaa ditan chichajak:

“Atum pegkegchau takainamun ashí aents aidau ujatkae. ¿Wagka dusha anish batsatjume?”

<sup>24</sup> Mina uchig aidauwah, atum aniajum duka shiig pegkegchauwai. Atum aniakjum tikich aents Tuke Pujuum nemajin aidau bakuagme, wagki atum pegkegchau dutikamun tikich aents aidau nuna augmatu yujaidaun antukjai.

<sup>25</sup> Makichik aents tikichin kajejaunak, Apajuí diisa ayamjumainai. Untsu aents Tuke Pujuum kajejaun ayamjumainuk makichikish atsawai”, tiuwai.

Tusa tamash, ditak apaji chichamenak antugkachajui, wagki Tuke Pujuu ditanak jinaati tibau asag.

<sup>26</sup> Untsu Samuelak nuni senchi muumpau. Nunitai Tuke Pujuu shiig anentau, tuja aents aidauahkam shiig anentuidau.

<sup>27</sup> Tuja nunú tsawantin Apajuí chichame etsejin Elín ijagsatatus jegajuauwai. Nunik jegajua chichajak:

“Amina apachjum aidau Egipto nugkanum faraógka inaku waitkatai batsatun wi mina senchijun ditan iwaintukuitag nuna dekati Tuke Pujuu tujamui.

<sup>28</sup> Israel aents aina nuwiyen Levi wegantu aidau etegkauwaitjai mina sacerdoteg agt-inme tusan. Dutika ai mina emematjuinak kuntu maawag nuna nejen ashí apeatnume, tuja kugkuin incienson apeatnume, jáanch sacerdoteg nugkutainashkam nugkugtinme tusan. Tuja Israel aents aidau anentag sujusbau aidau mina emematjuinak apeena nunashkam yuwatnume tusan amina apachjum aajaku aina nuna tiuwaitjai.

<sup>29</sup> Nunin aish, ¿wagka wi dutikatajum timawa nunú dutiktukesh dakitjagmesh idaisaugme? Amek amina uchijum aidau mina nagkaetasu puyatjau asam, Israel aents aidau mina anentag sujuinamua nunú jukim ayu ayugkawam udekume.

<sup>30</sup> “Dutikau asamin Tuke Pujuu Israel aents aidau Apajuíji mina takagtin atinme tusa tujabiuwa nunú chichaak: ‘Wi atumnak mina takagtustinme tusan etegkauwaitjime. Tujash duka yamaik makichikish uminkashtatui. Wika mina eme anenjuina nuna eme anentatjai. Untsu mina dakitjuina nunak wishakam dutiksanuk dakitjattajai.

<sup>31</sup> Amina uchijum aina duka yamai nagkamsag sacerdoteg achagtatui. Nuadui ame wegantu aina duka múuntuch wetsuk datsaitak jinawagtatui.

<sup>32</sup> Untsu amek tikich Israel aents aina nuna wi yayaaku nunú diisam ame waitiakum dita kajegtinaitme.

<sup>33</sup> Tuja ame wegantu aina nuwiyen sacerdoteg atinme tusan wi ujumak apusamu akushkam, duka wainmachujai betek tikich aidau takagtai nuna diisag kajenak wake besemag dekapenak buutiagtina. Tuja ame wegantu aidauk múuntuch wetsuk datsaitak jinawagtatui.

<sup>34</sup> “Tuja amina uchijum aidau Hofn, Fineesjai makichik tsawantaik mai jakattawai. Nunikmatai dekaattame dekaskeap tujutne tusan.

<sup>35</sup> “Nuadui tikich wegantunmayan wi kajittsa anentamujun, tuja mina chichamjun betek umiktinun, sacerdoteg atinun makichik etegkattajai. Dutikan niina uchiji wegantu aidauah megkaejainum tusan kuitamkattajai. Nuadui ditak wamak jinutsuk kuashat tsawan batsatu asa apu wi etegkamua nunú tabaun umigkatnume titatjai.

<sup>36</sup> “Nuadui ame wegantu jinaachu aidau nunú sacerdoteg jegajuawag ujumak kuichkin, yutajjai segainak tikishmatiagtina. Nuninak, minash takat sujista wisha takasan yumainun sumapaktajai wajagtina’, tujamui Apajuí”, tusa tiuwai.

### 3

#### *Apajuí Samuelan mina takagtusta tibau*

<sup>1</sup> Samuelak tsakataitak nagkamas sacerdoteg Elí takatai yayaak pujus Apajuín umijujaku. Nunú tsawantinig Tuke Pujuum kakajus aentsnak wantintujakchauwai. Nuadui makichik aentsnakesh chichama etsegtugkati tusag ujakchauwai.

<sup>2</sup> Elik muumpakui asa shiig wainmamainchau dekapeak niina kanutaijin kanak tepejakui.

<sup>3</sup> Nuniai Samuelak Apajuí jee pegkegmanum chicham umiktin agagbau egkeamu arca pujujaku nuwi niishkam kanak tepai, nunú jeganum jii ekemakbau eke kajintsag,

<sup>4</sup> Tuke Pujuu niina untsuak:

“¡Samuel, Samuel!” tama nii ayaak:

“Juwi pujajai”, tiuwai.

5 Tusa nantaki tupikaki Elí pujamunum jegantui. Nunik jeganta chichajak:

“Pai taajai, ¿wagka untsugme?” tau.

Tama Elí ayaak:

“Wika aminak untsuatsjame, wakitkim kanagta”, tiuwai.

Tusa tima wakitki tepesui.

6 Nunik tepaun Tuke Pujuu ataktu untsuak: “¡Samuel, Samuel!” tusa untsuam, nantaki Elí pujamunum jeganta chichajak:

“Pai taajai, ¿wagka untsugme?” tau.

Tama Elí ayaak:

“Wika uchuchi aminak untsuatsjame, weme kanagta”, tiuwai.

7 Samuelak Tuke Pujuuak makichkish wainchau tuja niina chichamenash antuchu asa yaki untsujua, tiuwai.

8 Tujash Tuke Pujuu ataktu kempatuma juna untsukui.

Tusa untsuam nantaki Elí pujamunum jeganta chichajak:

“Juwi taajai, ¿wagka untsugme?” tau.

Tutai Elí anentaimas dekas Tuke Pujuu untsuamap tawa tiuwai.

9 Nuadui chichajak:

“Wakitkim tepesta, nuniamin ataktu untsugmakuig: ‘Mina Apujuh, amina inakminuk juwi pujajai, waji tame tujutta’ tita”, tiuwai. Tusa tima Samuel wakitki tepesui.

10 Nunik tepettaman, Tuke Pujuu ataktu jegantun yaunchuk untsukbaunak dutiksag untsuak:

“¡Samuel! ¡Samuel!” tama nii ayaak:

“¡Mina Apujuh, waji tame tujutta, amina inakminuk juwi pujajai!” tiuwai.

11 Tusa tama Tuke Pujuu niina chichajak:

“Israel aents aidanum makichik ishamainun iwainaktatjai. Nuna aents aidau wainkag ishamainak kujaidiagtatui.

12 Tuja wi Elí patayi aidanun pachisa timag nunak nunú tsawantin makichkish ewaetsuk umiktatjai.

13 Wi niina ujaakun, amina uchijum aidauk mina umigtutsuk pegkegchaun takasaju asagmatai, suwimkan susattajai timag nunak nigka shiig dekawai. Wagki, niina uchiji aidau mina pegkegchaun chichagtiagtaish, makichkish jintintuachu asamtai.

14 Nuadui Elí patayi aidauk Apajuí tudaun tsagkugtamtajati tusag kuntuu maa apenakush, makichkish dita tudaujig tsagkujam achagtatui. ¡Wi nunak dekas nuniktinun tajai!” tiuwai.

15 Tusa tima Samuel ataktu tepesui, nunik kanag tsawag, kashikmas nantaki Apajuí jee pegkegma nuna waitijin ujainiuwai. Tujash Samuelak Tuke Pujuu tibaauwa nuna Elí ujanan ishamau.

16 Nunitai Elí untsuka chichajak:

“¡Uchuchi Samuela!” tau. Tama nii ayaak:

“¡Juwi pujajai!” tiuwai.

17 Timatai Elí niina iniak:

“¿Tuke Pujuuash wajinjutpame? ¡Wait aneamam ugtukaipa! ¡Apajuí tujamauwa nunú ame mina ugtutaik nii suwimkan amastatui!” tiuwai.

18 Tusa tama Samuel Apajuí tibaunak uugsuk ashí niina ujakui. Tusa ujakam Elí senchi untsamak:

“¡Aminak dekas Tuke Pujuu tujamne! ¡Nii tawa nunak imatiksag umikti!” tiuwai.

19 Samuelak nuwig pujus tsakajui. Tuja Tuke Pujuu niinak yaigkui, nuadui Apajuí tibaun nii etsegkauwa duka imanisas ashí uminkauwai.

20 Tuke Pujuu mina chichamjun etsegtugkati tusa Samuelan etegkae tabaun Israel aents aidauk, Dan wegantu aidau nugken nagkamas, yaakat Beersheba tutaya imanui ashí dekawajui.

21 Tuja Samuelak yaakat Silónum Apajuí jee pegkejam aajakua nuwi pujau asamtai, Tuke Pujuu nuwi tuke nijai chichau asa ataktushkam chichaman ujakui.

#### 4

1 Dutika ujakam Samuel ashí Israel aents aidanun Apajuí tibaunak imatiksag ujakui.

#### *Suntag filisteo aidau arcan jukiagbau*

Nunú mijan aajaku aina nuadui makichik tsawantai filisteo suntag aidau Israel aents aidaujai maaniawagtatus ijunajui. Nunik shimutkag nugka segau Afec tutainum nuwi aakmajag batsamsajui. Nuninai Israel aents aidashkam ditajai maaniawagtatus jijnjag nugka segau Eben-ézer tutainum jeggattak aakmajag batsamsajui.

<sup>2</sup> Nuwi batsamas filisteo suntag aidau Israel aents aidauun jetekajui. Dutikawag maaninamunum filisteo aidau Israel aents aidauun depetuk cuatro mil aentsun ijinawajui.

<sup>3</sup> Dutikam Israel aents aidau waketug ditá aakjin jegawagmatai, apu aidau ditan iniinak: “¿Wagka Tuke Pujush iinash filisteo aents aidau ijinatnume tusash idaitamsae? Dekas yaakat Siló shiyakagmi, nunikaja arcanum chicham umiktin agagbau egketa nunú utiagmi. Dutika ajin Tuke Pujuu iinash ayamjuptakti”, tuidau.

<sup>4</sup> Nuna tusag ujumak suntag aidauun ishiakajui yaakat Silónum arca utitnume tusa. Dutikam shiyakag arcan juki itawajui. Nunú arca dukutaijin jimag ángel querubin dakumkamun aunum nuwi Apajui ashí senchigtina nunú pujujakui. Tuja Elí uchiji aidauishkam, Hofní Finesjai nuwi takaidau asag ditashkam kaunawajui.

<sup>5</sup> Arcan juki dita batsatbaunum itawagmatai, ashí Israel aents aidauk shiig aneenak senchi unsumaidau. Nunú imatuinamu nugkan umuchkauwai.

<sup>6</sup> Imatuidauun filisteo aidau antukag inimainak: “¿Israel aents aidau batsata nuwish wagka imanikash pampainawa?” tuidau.

Tukama dekawajui Israel aents aidau arcan dita batsatbaunum itawaje tabaun.

<sup>7</sup> Nuna dekawag senchi ishamak chichainak:

“¡Apajui Israel aents aidau batsamtain tae! ¡Jaucha iish yamaish wajukatjiki, yaunchkesh anijakhamun yamai Apajui iina shiwaaji nugken tae!” wajaidau.

<sup>8</sup> “¡Apajui ashí senchigtina nunú iina suwimka amataish, yaki iinash ayamjuptakti! ¡Niyai egiptunmaya aidauun jata ishamain aidauwai suwimkan susa ijinauwa duka!

<sup>9</sup> ¡Nuniau asantai, hebreo aidau atumi inake aajaku aina nujai betek ditá inake atumesh atag tachakjume, suntag filisteo aidautijum umintsatajum, nunikjum aishmag wajasjum senchi maaniatajum!” tuidau.

<sup>10</sup> Tusa tiajam Israel aents aidauun jetekag maaniawag depetkajui. Dutikainak dawé yujasag maanin aina nuna treinta mil suntag aidauun amukajui.

<sup>11</sup> Tuja nuigtushkam arcanum chicham umiktinun Apajui Israel aents aidauun susauwa nunú egketun jukiajui. Dutikainak Elí uchiji Hofnín, Finesjai mai maawajui.

### *Elí jakamu*

<sup>12</sup> Untsu makichik suntag Benjamín wegantunmaya maaniamunum wekagu tupikaki nunú tsawantaik yaakat Siló jegauwai. Nunik tupikak wake besemag dekapeamunum jáanchjin japiki ichigka, niina buukenishkam nugkan yukumag ayatak nugkak wajas weuwai.

<sup>13</sup> Nunik jegakma, chicham umiktin agagbau egketun jukiaju asagmatai, Elí nuna puyatjak waitinum ayaumas ekemas jintanum niimak eketai jegauwai. Nunik jegá yaaktanun waya, nuwi aents batsatunum chichama etsegkauwai. Nuna antukag ashí aents aidauk senchi buutuidau.

<sup>14</sup> Imatuidauun Elí antuk iniimak: “Nunash ¿wagka imatuinawa?” tau. Tusa tai suntag tupikaki jegauwa nunú waujus Elí pujamunum jeganta, ashí chichaman ujakui.

<sup>15</sup> Tuja Elík noventa y ocho mijan ajamu asa múuntuch wainmamainchau wajas pujau.

<sup>16</sup> Nuna jegantun chichajak:

“Maaniamunum wekagun tupikakin yamai taajai”, tau.

Tama Elí iniak:

“¿Wajukawagmae tujash, uchuchih?” tau.

<sup>17</sup> Tusa tama nii ayaak:

“Filisteo suntag aidau, jutii aidautin depetamak, chicham umiktin agagbau egketunak atanjamkiagmae, nuigtu kuashat suntag aidauun ijinawagmae. Tuja amina uchigmishkam mai maawagmae”, tiuwai.

<sup>18</sup> Elík shiig múuntuch kakaumainchau wajasu asa, chicham umiktin agagbaun Apajui amasua nunak jukiagmae tusa ujakam, nuna antuk puyatuk sillanum eketu dakagá iyaak kuntujen akagak jakauwai. Elík Israel aents aidauunmak cuarenta mijan takasui.

<sup>19</sup> Tuja Elí uchiji nuweshkam ejamtin uchigmatnak wajas pujau asa, filisteo aents aidau chicham umiktin agagbau egketun arcan jukiagmae, tuja amina aishjumnash maawagmae, nuigtushkam amina aishjumi apajish jakae tabaun antukui. Nunik puyatuk uchin najaima uchigmakui.

<sup>20</sup> Nunik uchigmak jakauwai.

Nunik eke jatsaig uchi uchigmatkau aidau chichajuinak: “Ishamkaipa, uchik aishmag uchigmakume”, tiujui. Tusa tamash nigka chichakchauwai, wagki jakau asa.

<sup>21-22</sup> Untsu eke jatsuk uchiji daajin Icabod adaikauwai. Nunak: “Israel aents aidauk chicham umiktin atankimu asag yamaik shiig wainak juwakaje”, taku tawai. Nunak niina aishi jakau, tuja aishi apajishkam jakau asantai, tiuwai.



## 5

*Apajuí chichame umiktin egkeamun arcan filisteo aidau jukiag dita nugken ejegawagbau*

<sup>1</sup> Chicham umiktin egketun arcan filisteo aidau jukiag muja Eben-ézer tutaya nuni akaikiag ditá yaaktajin Ashdod ejegawajui.

<sup>2</sup> Dutikawag ditá apajuímtaiji dakumka najanamu Dagón tutai aajakua nunú jeganjukbaunum awayawag, Dagónkan ayaunas ekentsajui.

<sup>3</sup> Dutikawaju ai kashinia duwi kashikmasag Ashdodnumia aents aidau waya diikma, dita apajuímtaiji dakumka najanamu Dagón nagkima nugká ajajam, chicham umiktin Apajuínu arca eketu emtin tepaun wainkajui. Dutika wainkag inanki jukiag yaunchuk aajakbaunmak ukukiajui.

<sup>4</sup> Dutikawag tsawainak kashikmas nantakiag wayawag diikma, ataktushkam nagkima ajujam tepaun wainkajui. Tujash ayatak iyajag tepachu, buuke akagag uweje aidaukupinag, ima iyashig takamchau tepaun wainkajui.

<sup>5</sup> Nuadui sacerdote Dagónkan emematin aidau nunú jeganum wainakug, Dagónkan buuke kuntujejai kupinag batsamsauwa nunak najatsuk chikai nagkayin ainawai.

<sup>6</sup> Tuja duwi pujus filisteo aents aidau yaakat Ashdodnum batsamin aidaunak Tuke Pujuu suwimkan suwak jata tumor tutain ajunjauwai. Antsag tikich yaakat nuwi ayamus aushkam nunú jatai shiig senchi waituidau.

<sup>7</sup> Imanik waituidau asag Ashdodnumia aents aidau chichainak: “Israel aents aidaun Apajuíjiya nunú iinak Dagón iina apajuímtaijiya nujai ijumag senchi suwimkan amase. Nuadui juju chicham umiktin agagbau Israel aents aidaun Apajuíjinua duka juwig jutiyai agamaitsui”, tuidau.

<sup>8</sup> Nuna tuidau asag, filisteo apuji aidaun unsuka itantag iniinak:

“¿Israel aents aidaun Apajuíjiya nuna chichame umiktin agagbau egketa dusha itugkattaji?” tuidau.

Tama dita aimainak:

“Yaakat Gadnum jukijum ejegatajum”, tiajui.

Tusa tiajam ditashkam dutiksag juki ejegawajui.

<sup>9</sup> Tujash dutika juki ejegawaju ai, yaakat Gadnumia aidaun Tuke Pujuu suwimka suwak imum ishainun ajunjauwai. Dutikam múun aidauk, uchi aidauk, nuna utsumajag senchi waituidau.

<sup>10</sup> Imaniagtai, chicham umiktin egkeamu arca Gadnum ejegamun filisteo aidau jukiag tikich yaakat Ecrón tutainum ejegawajui. Dutika ejegawagmatai nuwiya aents aidau utsumainak: “¡Jinatnume tusa Israel aents aidaun Apajuíjiya nuna chichame umiktin agagbau egketun arcan juki itagtamawaje!” wajaidau.

<sup>11</sup> Gadnumia aents aidaun Apajuí suwimka suwak jata ishainun ajunjae tabaun ashí tikich yaaktanmaya aidau antukajui. Nunikag filisteo apuji aidaun unsuka ijumag chichajuinak: “¡Juju chicham umiktin Israel aents aidaunu arcanum egkeamua nunú jukijum itaujum duka, tuwi au jukimugme dutiksagmek wamak awagkitajum! Wagki Apajuí ashí ijpawai taji”, tuidau.

<sup>12</sup> Tusa imatuinak utsumainamuk nayaimpinmash antuegu. Tuja aents iwaku batsatuk imum amuam shiig senchi waituidau.

## 6

*Filisteo aidau arcan awagkiagbau*

<sup>1</sup> Filisteo aidau arcan jukiajua duka siete nantu dita nugken asauwai.

<sup>2</sup> Nuwi aig sacerdote aidaun, anentaimas dekamin aidaujai iniasagtatus unsukag ijumajui. Dutika iniinak:

“¿Chicham umiktin arcanum egketa dusha itugkattaji? Tuja wajuk awagkittaji nunú titajum”, tuidau.

<sup>3</sup> Tusa tama dita aimainak:

“Chicham umiktin egketa nunú arca awakeakjumek, Apajuí tsagkugtugi tusajum waji anentag awetitajum. Nunú dutikajum atum jata achiimagjum waitajum dusa tsagatatjume. Nunikjum duwi dekattagme wagkag suwimkanash Apajuísh amasaje nunú”, tiajui.

<sup>4</sup> Tusa tiajam dita aimainak:

“Tujash ¿ji pegkegchau takamsamunum kajegtamak suwimka amasai tusaish wajig sumainaitji?” tuidau.

Tusa tiagtai sacerdote aidau aimainak:

“Atumi apujum cinco aina dutiksagmek oro jukijum imumjai betek dakumkajum cinco najanatajum. Tuja nuigtu cinco katip dakumkajum dushakam orojai najanamu awetitajum, wagki atumek atumi apuji aina nujai jinuidau asajum.

<sup>5</sup> Nuadui imum katipjai dakumkajum najanatajum, wagki nunú aidau iina nugken emestugbau asamtai. Dutik etsagjatajum Israel aents aidau Apajuúji. Dutikawagminish tsagkugtagam suwimkan amatsuk, atumi apajuúmtaiji aina nunash tuja atumi nugke aidaunash agkan idaisachaintash”, tuidau.

<sup>6</sup> Nuna tusag: “¿Wagkamek atumesh egiptunmaya aents aidau ditá apuji aidaujai antakchau asag, Israel aents aidau jinija ishimain aig dutikchagtai, Apajuú suwimkan susam waituinak jinija ishiakua numamtinush atagme?

<sup>7</sup> “Duka nunitsuk makichik carreta yamajam najanatajum. Dutikajum atumdau jimag baka makichkish takamtikchatai yama petsaku aidau jukijum carretanum jigkajum ukuktajum, dutikakjum dita uchiji aidauk jujuki ukuktajum, dita wenak carretan japiki jukitneme.

<sup>8</sup> Dutikajum nuadui chicham umiktin egkeamu arca jukijum carretanum juinia yantamen egkeatajum. Dutikajum atum Apajuú tsagkugtugti tusajum anentag susatin orojai najanamu aidau nuna yantamen chimpiatajum. Dutikawagmin nunú baka wenak carretan japiki juki wetinme.

<sup>9</sup> “Tujash diyaku atajum baka aidaush nuna japikish itug wegagtig. Tuja Israel aentsu batsamtai yaakat Bet-shemesh iina nugke nagkatkamunum awa nuwi chicham umiktin agagbau egkeamu arca nuni weauku, duwi dekattaji dekas Apajuúyap suwimkanak amasaje tusaja. Untsu baka uchiji batsata nuni japiki shimakuig, Apajuú suwimkechuapi shiig jatap aikagmawa, titatji” tuidau.

<sup>10</sup> Tusa tianjam imatiksag betek umikajui. Nuadui jimag baka yama petsakun jukiag, daekai anawag carretanum jigkawajui. Untsu uchiji aidaunak baka egketai peejamunum egkeauwai.

<sup>11</sup> Dutikawag arcan jukiag, imum dakumka najanamu aidaun, katip dakumka najanamu aidaujai carretanum chimpiawajui.

<sup>12</sup> Dutikawagmatai baka aidau shimak carretan japiki juki, makichkish yaja wetsuk tutupit shinukmaikia yaakat Bet-shemesh wetainum wegajui. Nunik shimutai filisteo apuji aidaushkam pataetukag yaakat Bet-shemesh nagkatkamunum jegantajui.

<sup>13</sup> Tuja Israel aents aidauk nunú yaaktanum batsamin aidau yaakat jegattak waken ditá ajajin trigon juwak yujaidau. Nunik yujaidau niimsatakama arca carretanum egkeamun baka japiki inimaidau wainkajui. Nunik wainak shiig aneasajui.

<sup>14</sup> Nunú jimag baka carretan japiki we wenakua Josué Bet-shemesh pujujukua nuna ajajin jeganta nuwi ijuntsauwai. Nunikmatai carretan dakajag kaya shiig múun pujaunum nuwi patajag bakan mai maawag nuna nejen ashí apeenak Tuke Pujuu emematiajui.

<sup>15</sup> Nuna dutikainatsaig Leví wegantu aidau arcanak jiiki jukiajui. Dutikainak tikich waji orojai najanamu aidaunashkam jiikiajui. Dutikawag nunú kaya shiig múun pujaunum patajajui. Tuja nunú tsawantin aents Bet-shemesh batsamin aidauk Tuke Pujuu emematuinak baka aidaun maawag nuna nejen ashí apeawajui. Dutikainak tikich kuntin aidaunashkam apeawajui.

<sup>16</sup> Tuja filisteo aidau apuji cinco aajakua duka nuna dutikaidaun diisag ukuinak nunú tsawantaik yaakat Ecrón waketjauwai.

<sup>17</sup> Tuke Pujuu ii pegkegchau takasbaunum tsagkugtamjati tusa filisteo aidau imuman dakumak cinco orojai najadau aina nunak, dita yaaktaji aidau: Ashdod, Gaza, Ascalón, Gad, Ecrón aatus aajakua nuna daajin maki makichik najadau ainawai.

<sup>18</sup> Tuja katip dakumka orojai najadau aidauk filisteon yaaktaji aidau peeja apakbau, nuigtu peejachbaujai ijumjam cinco aajakua dutiksaik najanamu aajakui.

Tuja chicham umiktin egketun arcan kaya shiig múun pujaunum ekentsaju aina duka yamaikish nunú kajak Josué ajaji yaakat Bet-shemesh aajakua nuwi awai.

<sup>19</sup> Untsu Israel aents yaakat Bet-shemesh batsamin aidau arca initken diisu aidaunak Apajuú jinawawai. Ashí ijumjamak sententa aentsun jinawawai. Imatika Tuke Pujuu ijinamtai, nuwiya aents aidauk kuashat buutiaju ainawai.

<sup>20</sup> Nuna wainkaju asag chichainak: “¿Tuke Pujuu Apajuú pegkejam ashí senchigtina nuna emtinish yaki nigkish ayamjumakainta? Dekas Apajuú kajegtamak ijpawai tikich yaaktanum awemami”, tuidau.

<sup>21</sup> Nuna tuidau asag Israel aents aidau yaakat Quiriat-jearim batsamin aidau chichaman aatus akatmamtug akuptukajui: “Filisteo aents aidau chicham umiktin egketun arcan jukiajua nunak awagkiag itawaje. ¡Dutikawaju asamtai nunú taajum jukitajum!” tusa tiajui.

## 7

<sup>1</sup> Tusa ujakajam Quiriat-jearimnumia aents aidau wejiag arcan juki itawajui. Dutikawag Abinadapa jee nainnum aajakua nuwi awayag, nuna kuitamkatnun Abinadapa uchiji Eleazaran etegkawag Tuke Pujuun segatijai.

*Israel aents aidanum apu chichama epegkin atsau asamtai, Apajuí Samuelan adaitukui ditan yaigti tusa*

<sup>2</sup> Arcan jukiag Quiriat-jearimnum ejegawajua duwi nagkamas Israel aents aidauk veinte mijanai Tuke Pujuun segainak buutú batsatu, shiwag waitkagmaina nuna agkanmitkagmati tusag.

<sup>3</sup> Imaniagtai Samuel ditan chichajak:

“Atum dekatas Tuke Pujuu atumi anentaimijai emematjukum ima nigki umigkatag takugmek, ¡tikich nugkanmaya apajuímtai aina duka Astarté dakumka najanamua najai utsagtajum! ¡Dutikajum ima Tuke Pujuu takagsatajum! ¡Nuniakjum ima nigki ememattajum! Dutikagmin nii filisteo waitkagmaina nunak agkanmitkagmawagtatui”, tiuwai.

<sup>4</sup> Tusa tijam Israel aents aidauk Baal dakumka najanamua aidanuk, Astarté dakumka najanamua aidaujai ashí utsagkajui. Dutikawag ima Tuke Pujuunak emematuidau.

<sup>5</sup> Nunik batsatun Samuel ditan chichajak: “Ashí Israel aents aidautijum yaakat Mispá ijunjatajum. Nunikagmin wi atumin pachisan Tuke Pujuun segattajime”, tiuwai.

<sup>6</sup> Tusa tijam nunú yaaktanum ashí ijunjajui. Nunikag wake besemag pujamujin iwainainak yumi shikikag Tuke Pujuun anentag suwinak ukajajui. Dutikawag yujumka yutsuk batsamas, Tuke Pujuu emtin pegkegchau takamsamujin etsegtumakajui.

Tuja nunú nugkanum Samuel Israel aents aidan utugchatjin epegtin wajasui. Nunik duwi nii takamujin nagkamauwai.

<sup>7</sup> Israel aents aidau Mispá ijunag batsatui tabaun filisteo aidau dekawajui. Nunikag apu aidau dita suntaji aidan yajuakag shimutkajui. Nuna dekawag Israel aents aidauk senchi ishamaidau.

<sup>8</sup> Nuadui Samuelan chichajuinak: “¡Amek mijamtsuk Tuke Pujuu iina Apajuí segaa pujuta, nii ayamjutpakti filisteo aidau amupakainum!” tuidau.

<sup>9</sup> Tusa imatiagtai Samuel uwig tsakat aishmagkun juki takamchaun patai ashí apeak Tuke Pujuun emematiuwai. Nuna dutika Tuke Pujuun segauwai Israel aents aidau kuitamkata tusa. Tusa segam Tuke Pujuu ayu tiuwai.

<sup>10</sup> Samuel uwig aishmag tsakatan maa nuna nejen ashí apeak pujai, filisteo aidauk Israel aents aidan jetekagtatus jegajuawajui. Nuniagtai Tuke Pujuu ipamtan shiig senchi ajuntug uwakauwai. Dutikamtai Israel aents aidau filisteo aidan depetuk amuku ainawai.

<sup>11</sup> Dutikawag tikich aidau pisagmatai, Mispánmaya juwakiag pataetuk shima shimakua, amaigkag mai mainakua yaakat Bet-car tutaya nuna tsumujin jegawajui.

<sup>12</sup> Tuja nunú ashí nagkaankamtai, Samuel makichik kaya múunta juki Mispá, Sen aatus awa nuna ejapeen apusauwai. Dutika nuna adaikauwai Eben-ézer. Nuna adayak chichaak: “Tuke Pujuuk yamaikish yaimpawai”, tiuwai.

<sup>13</sup> Dutika depetkamu asag filisteo aidauk ataktu awagkig Israel aents aidau nugken waintuag waitkaschau ainawai.

Tuja Samuel iwaku pujusmataig, Apajuik filisteo aidanuk tuké ijinajakui.

<sup>14</sup> Nuadui Israel aentsu nugken filisteo aidau Ecrógnun nagkama Gatan nugke aajakua aatus jujukiu aina duka ataktu ditá nugke wajasui. Aatus Israel aents aidauk, filisteo aidau ditá nugken jujukiu aina nunak ataktu awagkijajui. Nuadui ditak amorreo aents aidaujaig maanitsuk agkan batsamajaku ainawai.

<sup>15</sup> Tuja Samuelak Israel aents aidan utugchatjin epegtin aajakua nunisag pujus jakauwai.

<sup>16</sup> Nii pujus Israel aents aidau utugchatjin epegtak maki makichik mijadai yaakat Betel, Guilgal, Mispá aatus wekagajakui.

<sup>17</sup> Nunik wekae wekaekawa nii pujutaijin yaakat Ramá waketujakui. Nunik nuwi pujus Israel aents aidanuk yaijakui. Tuja nuigtushkam nunú yaaktanum Tuke Pujuu emematku kuntin maa patai apetai altar najanauwai.

## 8

*Israel aents aidau apugtin amí tusa wakekagbau*

<sup>1</sup> Samuelak múuntuch wajasu asa, niina uchiji aidan Israel aentsu apuji atinme tusa adajauwai.

<sup>2</sup> Niina uchiji iwai Joel, tuja nuwi patatkau Abías aajakua nujai yaakat Beersheban apuji aajaku ainawai.

<sup>3</sup> Tujash ditá apaji Samuel shiig takasua nujai betekak takaschajui. Tikich aidaunak wait anentsuk ima ditanunak anenmamajaku ainawai. Nunin asagmatai aents aidauk suwimkan sujusainum tuidau asag kuichkin akijaku ainawai.

<sup>4</sup> Nuniagtai Israel aentsu apuji múun aidau ashí ijunjang Samuel Ramá pujau asamtai, nijai chichastasag shimutkajui.

<sup>5</sup> Nunik jegawag chichajuinak: “Amek yamaik múuntuch wajasume. Tuja amina uchijum aidaushkam ame shiig takasuitam nujai betekak takainatsui. Nuniau asamtai jtikich aents aidau apugtin aina nujai betek iina apuji atin, ame adaikata!” tiajui.

<sup>6</sup> Tujash nunú Samuulan shiig awagmakchawai. Nuadui nuna pachis nii Tuke Pujuu segauwai.

<sup>7</sup> Tusa segam Tuke Pujuu niina chichajak:

“Dita wajina segapagatata duka betek umigkata. Nunak amina dakitjamak tuja-mainatsui, jwi dita apuji atinun etegkeag duwi mina dakitjuinak tuinawai!

<sup>8</sup> Yamai amina tujamaina antsag wi ditan egiptunmayan jijujitag duwi nagkamas yamaikish minak tuke tujutin ainawai. Aanidau asag wainka apajuimtai aidaun emematuinak minak kajimatjukiaje.

<sup>9</sup> ¡Nuadui amina segapaina duka umigkata! Untsu ditá apuji atata dusha ditajash wajuk takastigki nunú shiig ujakta”, tiuwai.

<sup>10</sup> Tusa tima nuna imatiksag Samuel ditan ujaku.

<sup>11</sup> Dutika chichajak:

“Atumi apujum atin sumajum duka juna dutikattawai: Atumi uchijum aidaun yajuak carronum yujas maaniatin aidaun, caballonum entsamak yujas maaniatin aidaun, tuja niina kuitamkagtin aidaun, aatus akanjattawai.

<sup>12</sup> Dutikak nuigtushkam mil suntag aidaun apuji agtinun, nuigtu cincuenta suntag aidaun apuji agtinnashkam adaijattawai. Tuja tikich aidaunak ajaka ajakbau emaktinai. Untsu tikich aidauk nunú apu yuwatnun ajakan juu agtinai. Untsu tikich aidauk apu carroji maanitai aidaun najanin agtinai.

<sup>13</sup> “Tuja atumi nawanjum aidaunashkam niina inake emaktinai. Dutikam kugkuin aidaun najanin, yujumka inajin, pagka najanin agtinai.

<sup>14</sup> Tuja nuigtushkam nugka pegkeg aidaun yajuak ashí niinu emaktatui. Dutikak uva ajakbau, olivo ajakbaujai atumdau shiig pegkeg aina nunashkam niinu emaktatui. Nuna yajuak nijai atueka takatai aidaun tinamkattawai.

<sup>15</sup> Tuja atumdau ajak juukbau aidaunashkam, uva juukbau aidaujai ujumak akanak\* juki nijai atueka takataiji aidaun, suntaja apuji aidaujai tinamtinai.

<sup>16</sup> Tuja nuigtushkam atumi tsakatke aishmag aidaun, nuwa aidaun, buey aidaun, burro aidaun atanjamag niinu emak takamtiktinai.

<sup>17</sup> Nuigtushkam atumi tagkujum aidaun akanak yajutjamkatnai. Atumshakam niina inake atajume.

<sup>18</sup> Atum apu etegkamua nunú imatika waitkagmainakui chichagminish, Tuke Pujuu antugtamkashtatui”, tusa ujaku.

<sup>19</sup> Tusa ujamashkam aents aidauk dekaskeapi tutsuk aimainak:

“Iik duka puyatjatsji, ayatak apugtin atag tusa wakegaji.

<sup>20</sup> Tikich aents aidau apugtin aina nujai betek agmi taji. Nunú iina apuji etegkamua asa, iina nugken inamak iina shiwaaji aidaujai maaniamunmash nii chichamjutpakti, taji”, tuidau.

<sup>21</sup> Tusa tiagtai nuna ashí antujuk imatiksag Samuel Tuke Pujuu ujaku.

<sup>22</sup> Tusa ujakam Tuke Pujuu ayaak: “¡Dita sumamua duka ayu tusam apu adaitukta!” tiuwai.

Tusa tima Samuel Israel aents aidaun chichajak: “¡Maki makichik atumi yaaktagmin waketjatajum!” tusa ishiaku.

## 9

### *Saúl Samueljai igkunikbau*

<sup>1</sup> Makichik aents Quish daagtin Abiela uchiji, Zerora tijaji Benjamín wegantunmaya aajakui. Niina apajin apachjig Afiah uchiji Becorat aajakui. Quishak eme anentsa diitai aajakui.

\* 8:15 “Ujumak akanak” tawa nunak “diezmon” taku tawai.

<sup>2</sup> Niina uchiji datsa makichik yantsaptin shiijam Saúl daagtin aajakui. Tuja nii shiijam aajakua imanuk tikichik Israel aentsuk makichkish atsujakui, nuigtush niina esantijai betekak tikichik atsujakui.

<sup>3</sup> Tuja makichik tsawantai Quisha burroji aidau megkaejauwai. Nunikmatai niina uchiji Saúlan chichajak: “Makichik inak juki weme, burro megkaeja nunú egakta”, tiuwai.

<sup>4</sup> Tusa tima Saúl inaka juki burro egak Efraígka nugken mujanum weuwai. Nunik jegauwai Salisá nugkanum; tujash burronak wainkachui. Nuwi nagkaemaki weuwai Saalim nugkanum, nunik Benjamígka nugkenishkam jegauwai, tujash burro megkaejaunak wainkachui.

<sup>5</sup> Nunik wainkacha ukuak Suf nugkanum jegaa inakan chichajak:

“Wakitkimi mina apajuk burro megkaeja nuna nagkaesaus iina puyatjutpatai”, tiuwai.

<sup>6</sup> Tusa tama nunú inak ayaak:

“Juju yaakta juwi makichik aents Apajuí chichame etsejin pujawai, nunak nii tibau betek uminu asamtai, ashí aents aidau eme anentus diin ainawai. Nunú jegajua iniasmi, tuwig burrosh batsatua nuna ujakchaintash”, tau.

<sup>7</sup> Tusa tama Saúl ayaak:

“Ayu untsu wemi, ¿tujash nii iniakuish wajig susatji? Makichik pagkesh nii sumainuk shiig atsugtami”, tau.

<sup>8</sup> Tusa tutai inak ayaak:

“Wi takakjai plata piipichin, nunú Apajuí chichame etsejin suwaku dekajuami, burrosh itug batsatuaki nuna ujakpakti”, tau.

<sup>9</sup> (Initaikik makichik Israel aentskesh Apajuín inias dekatag takug: “Aents anentaimas ejenun iniasan dekatjai” tujaku ainawai. Nunak yamai ii profeta taji nuna taku tujaku ainawai.)

<sup>10</sup> Tusa tutai, ayu wemi tusa mai juwakiag yaaktanum Apajuí chichame etsejin pujamunum weajui.

<sup>11</sup> Nunik yaakat jegattak wekama nuwauch aidau yumi shikiktatus shimuidaun igkugkag iniinak:

“¿Aents anentaimas dekamnush juwig puja?” tuidau.

<sup>12</sup> Tutai ditá ainak:

“Ehe, tujash imau yaakta nagkaiki pujawai. Wamak wejitaum, kuntu maa, Apajuí ememata nainnum apeatatus yamai yaaktanum wakame.

<sup>13</sup> Nuwi yujumka yuwatatus eke weatsaig wejitaum. Wagki Apajuí emematku kuntu maamua nuna nii jegaa Apajuí segamtai yuwami tusa aents aidau dakainawai. Nuadui wamak wetajum, nuniakjum igkugtatjume”, tiajui.

<sup>14</sup> Tusa tiajam ditashkam yaaktanum shiyakajui. Nunik jegattak wenai, Samuelchakam kuntu maa apeatatus wegak dita shimamunmanini jiinki minaun wainkajui.

<sup>15</sup> Tuja Saúl kashinia duwi jegatin ai Tuke Pujuu Samuelan ujaak:

<sup>16</sup> “Kashin, yamai etsa eketa juniai Benjamígka nugkenian makichik aentsun awetitajame, nunú mina aentsug Israel aents aina nuna apuji atin asamtai. Ame aceiteyai buuken nijaktatme. Nii mina aentsug Israel aents aidau filisteo aidau waitkaina nuna ayamjuk agkanmitkattawai, wagki dita waituinak mina segatuinamunak wi antugkau asamtai”, tiuwai.

<sup>17</sup> Nuadui Samuel Saúlan wainkamtai, Tuke Pujuu chichajak: “Wi makichik aentsu pachisan amina timajam duka anuwai. Anú mina aentsug Israel aents aina nuna apuji atatu”, tiuwai.

<sup>18</sup> Nuniai Saúl Samuelan jegantun chichajak:

“¿Tuwi awa anentaimas dekamnu jeesh? nunú minash wait aneamam inaktugsata”, tau.

<sup>19</sup> Tusa tama nii ayaak:

“Witjai anentaimas dekamnunuk. Wegajai Apajuí jee pegkegmanum, awi wijai yujumak yuwata. Tuja ame waji dekaatag tusa wakegame nunak kashin kashikmasan ujaktagme, dutikamtai duwi wakitkita.

<sup>20</sup> Tuja burrojum megkagag kampatum tsawan wega duka puyatjukaipa, nunak wainkaje. Tuja nuigtushkam Israel aents aidau nugken waji pegkeg ayá duka ashí aminu nuigtu amina pataiminujai atatu”, tiuwai.

<sup>21</sup> Tusa tama Saúl ayaak: “¿Tujash wika tikich Israel aents wegantu kuashat aina imanchau Benjamín wegantunmaya ujumchik aina nuwiyayaitjai! Nuigtushkam Benjamín wegantu aina nunú ashí ijumjamash mina pataajak tiki wainkauch ainawai. ¿Nunin aish wagka minash dusha tujutme?” tiuwai.

<sup>22</sup> Tusa timatai, Samuel Saúlan niina inakejai juki yujumak yuwaku ijuntainum awayauwai. Dutika treinta aents eme anentsa diitai aidau pegagbaun nagkaesau dekasshiig pegkegnum ekentsauwai.

<sup>23</sup> Dutika Samuel yujumka inagnun chichajak: “Wi neje amaakun juka akanka ukukta timajam nunú itaata”, tiuwai.

<sup>24</sup> Tusa tima ayu tusa kuntuu bakuin juki Samuelan ekettsauwai. Dutikantai Samuel Saúlan chichajak: “Wi aents aidaun ipau asan, ditajai ijunag yuwati tusan anna akankan amina ukugkimjame, anú yuwata”, tiuwai.

Tusa tima nunú tsawanta duwi Saúl Samueljai jimagtuk yuwawajui.

<sup>25</sup> Nunikag Apajúi jee pegkegmanum batsatu juwakiag, Samuela jee yaakat jegantai, Saúl kanagatinun jega tuntupepegakan umigkajui.

<sup>26</sup> Dutikam nuwi kanajui. Nunikmatai kashinia duwi Samuel Saúl yakí pujaun untuka chichajak: “Nantakim wakitkita”, tau.

Tusa tima nantaki wetatus uminas Samueljai agá jiinkiajui.

<sup>27</sup> Nunikag yaakta ukukiag Samuel Saúlan chichajak: “Inakem amejai wekaga nunú emtikam awemata. Untsu amek machik ukuunum juwakta, nunikamin Apajúi tujutma nuna ujaktagme”, tiuwai.

## 10

### *Samuel Saúlan Israel aents aidaun apuji atinun adaikamu*

<sup>1</sup> Samuel aceite juki Saúla buuken nijakui. Dutika yapinum kugkuak aatus tiuwai:

“Tuke Pujuu amina Israel aents aidaun apuji ati tusa yamai etegtamae. Ame pujusam inamkun shiwag waitkana nuna agkanmitkattame. Tuja amina Apajúi etegtama duka juju aidau wainkun dekasskeapi titatme.\*

<sup>2</sup> Tuja yamai weakum Benjamígka nugken yaakat Selsah Raquel ukusbaunum jegantatak, jimag aents minidau igkugtatme. Nunú inimpak: ‘¿Burro megkaejamtaí egaku wemaum dusha wainkaumek? Amina apak burronak puyatjichmae, amina ima senchi puyatjupame, nuniak mina uchijush inakjaish wajukawagmaki tusa dekatatus iniimak wekaemae’, tujamiagtatui.

<sup>3</sup> “Nunú nagkaiki weakum, numi encina tutai yaakat Tabornum waja nuwi jegakum, kampatum aentsua nuwiya, makichkia nunú kampatum chivon jukimtai, tikichik kampatum pagkan juki, tuja tikich duwap apagbaunum vino aimkamun jukiag Apajuín ememattatus yaakat Betelnum shimuidau igkugtatme.

<sup>4</sup> Dutikawagmin kumpamjamawag jimag pagkan amainakuig dakittsuk jukita.

<sup>5</sup> “Nunika wea weakum, yaakat Guibeá Apajuínu taitainum filisteo suntag aidau batsamtaí awa nuwi jegattame. Nunika jegakman wainkattame aents kantamin aidau: pandero aidaun, arpa aidaun awatkiag, pigkui aidaun umpukmaikia, nuna ukujin profeta aidau Apajúi jee pegkegma nuwiya jijnjag Apajúi tibaun etseggamaikia akagaidau wainkattame.

<sup>6</sup> “Nuniamin Tuke Pujuu Wakani amina wainjamattawai, nuniakui profeta chichagtata nujai betek ameshkam chichattame. Duwi nagkamas amina pujutjumek yapajinattawai.

<sup>7</sup> Tuja nunú ashí uminkamtaí, ame waji takasta tame nunú dutikata. Apajúi aminak yaimpaktatui.

<sup>8</sup> “Tuja amek emkam yaakat Guilgal wetá. Nunikam awi siete tsawan dakagmin wi tattajai. Nunikan Apajúi daajin kuntuu maan nuna nejen ashí apeakun, nuigtu agkan pujutan Apajúi amastí tusan niina anentag susattajai. Dutikan duwi ujaktatjame ame wajak takastatme nuna”, tiuwai.

<sup>9</sup> Tusa tima nunú tsawantaik Samuel tibauk imanisag uminkauwai. Nuadui Saúl Samuelan kumpama ukuak weuwai. Aatus Apajúi Saúla pujutjin yapagtuauwai.

<sup>10</sup> Nunik Saúl niina inakejai yaakat Guibeá jegawajui. Nunik jegattaman profeta aidau untsumkiag jijnjajui Saúlan igkuinak. Nuninai Apajúi Wakani Saúlan egkemtuji. Dutikam niishkam profeta aidaujai betek wajasui.

<sup>11</sup> Nuniagtai yaunchuk Saúla wainin aidau pempeentunikiag tudayinak: “¿Quisha uchijish wagka aniawa? ¿Tuja au profeta aina dusha tuwiya jijnjae? ¿Tsuwah, Saúlsh profeta wajasu diyajai!” tuidau.

<sup>12</sup> Tiagtai nuwiya makichik chichaak: “¿Yana jintintai ainawa aush?” tau. Nuna aatus tiaju asagmatai, nuwiya chicham jijnak: “¿Saúlchakam profeta wajasu!” tibau juwakui.

<sup>13</sup> Nuna nunik nagkaanak Saúl niina inakejai nuwi nagkaemaki, we wenakua Apajúi emematku kuntuu maa apetai nain aajakua nuwi wakauwai.

\* **10:1** Juju versiculonum chicham agaja inagnaka punto apujumua nuwi nagkama agagbauwa duka tikich Biblia yaunchuk agagbau aina nuwi atsaush awai.

<sup>14</sup> Nunikmatai niina apaji yachi Saúlana niina inakejai iniak:

“¿Tuu wemaijume?” tau.

Tusa iniam Saúl ayaak:

“Burro megkaejamtaí egaku wemaiji. Nunika wainkacha Samuel pujamunum wemaiji”, tau.

<sup>15</sup> Tusa tama Saúla apaji yachi niina ayaak:

“¿Samuelash wajinjutpame? nunú minash wait aneam ujatkata”, tau.

<sup>16</sup> Tutai Saúl niina apaji yachin ayaak: “Burro aidau megkaejauinak wainkaje, tusa upajakmae”, tiuwai. Tujash Samuel niina chichajak: “Ame Israel aents aidau apuji atatme”, tusa tibaunak ujakchauwai.

<sup>17</sup> Duwi pujus Samuel Israel aents aidau untsuka, yaakat Mispá ijumjauwai, Tuke Pujuu emematiagmi tusa.

<sup>18</sup> Dutika ijumag chichajak:

“Tuke Pujuu Israel aents aidau Apajujiya nunú chichaak: ‘Atum Israel aents aidautijum Egipto nugkanum batsamsajum waitkam batsatutigmin wi jiijan agkanmitkawabiajime.

<sup>19</sup> Tuja wi atumi Apajuji asan yayajim duka dekayaitkujum, mina idaitakjum iish apugtin ami tusajum sumagme. Tujash nunak puyatjatsjai. Atum sumajum nunak betek umiktatjai, nuaduwi mina emtijui maki makichik wegantu ainajum duka ashí ijunjatajum’ tusa Tuke Pujuu tujamui”, tiuwai.

<sup>20</sup> Tusa tiajam maki makichik wegantu aidau ashí ijunjauwai. Nunikmatai Samuel kaya juki yana daajig jiinkiti tusa diyam Benjamín wegantunmaya jiinkiuwai.

<sup>21</sup> Nunikmatai Benjamígan patayi aina nuwiyash yana daajig jiinkit tusa dekap-sauwai. Dutika diyam Matrí patayinia jiinkiuwai. Nunikmatai ataktu awagkiag dekap-sajui, dutikam Saúla daaji jiinkiuwai. Nunikmatai Saúlana wainkatakama emegkakajui.

<sup>22</sup> Nunikmatai Tuke Pujuu iniasajui Saúlash juwig puja tusa. Tusa iniam Tuke Pujuu ayaak: “Waji ijumjamu aina nuwi uumak pujawai”, tiuwai.

<sup>23</sup> Tusa timatai uumak pujaun jukitatus shimutkajui. Dutika jukim Israel aents aidau ijunag batsatbaunum wegajui. Nunik jegamtaí diikma tikich niina nagkaekauk esagmak atsaun wainkajui.

<sup>24</sup> Nunikmatai Samuel Israel aents aidau ashí ijumag chichajak:

“¡Tuke Pujuu juna atumi apuji atinun etegka nunú ashí diistajum! ¡Niijai betek amainuk tikichik Israel aentsuk atsawai!” tiuwai. Tusa timatai dita shiig aneam aimainak: “¡Nii iina apujig ati tusa wakegaji!” tuidau.

<sup>25</sup> Tusa tiagmatai, Samuel apu takatjish wajuk atata nuna pachis Israel aents aidau ujakui. Nuna ujakama papiinum agag juki Apajuí jee pegkegmanum awayauwai. Dutika nuaduwi ashí aents aidau jemin waketjatajum tusa ishiakui.

<sup>26</sup> Dutikamtaí Saúlchakam yaakat Guibeánun niina jeen wakitkiuwai. Nunik wetai Apajuí niina uyuntsatnun ujumak aents wajiu aidau etegtujui.

<sup>27</sup> Nunik wematai aents pegkegchau aidau chichaman patatuinak: “¡Aush annush iinash ayamjupaktatuak!”, tusa tuidau asag apu wajasmataish makichik wajinakesh susachajui. Dutikamashkam Saúlak nuna chichamjutan dakitak idaisauwai.

## 11

### *Saúl amonita aents aidau depetkamú*

<sup>1</sup> Galaad nugkanum yaakat Jabes aajakua nuna jetektatus amonita aents aidau apuji Nahas aajakua nunú shiig uminas suntaja yajuak weuwai. Nuna dekawag nuwiya aents aidau Nahasan chichama akuptuinak: “Jutijaig maaniawaipa, ayatak chicham umikmi, nunika amina inakem agmi taji” tuidau.

<sup>2</sup> Tusa tiagmatai Nahas ditan ayaak: “Ayu, untsu chicham umikmi takugminig, wi atumi jii untsuja nuna ashí ukuitjatime. Dutika ai atum Israel aents aidautijum dushiktai datsan juwakminjum”, tiuwai.

<sup>3</sup> Tusa timatai Jabesnumia apu aidau chichainak: “Kame siete tsawan sukagtusta, tikich Israel aents aidau batsata nunú chicham akuptuka dekanati. Untsu iina yaimpamain atsakuig, ame tame duke ati”, tuidau.

<sup>4</sup> Nuna tusa chichama etsejin aidau yaakat Guibeánun Saúl pujujakua nuwi ishiakui. Dutikam jegawag Nahas tibaunak imatiksag nuwiya aents aidau ujakui. Nuna antukag kajekag buutiajui.

<sup>5</sup> Nunina Saúl niina ajajinia buey aidau yajuak minikma buutuidaun antuk iniimak: “¿Wagka imatuinawa? ¿Wagka buutuinaawa?”

Tutai: “Jabesnumia aents aidau kaunawag chichama etsegkamtai nuna antukag buutuinaawai”, tuidau.

<sup>6</sup> Tiagtai Saúl nuna antak wajai, Apajuú Wakani niina egkemtujui, dutikam shiig senchi kajekui.

<sup>7</sup> Nunik jimag bueyen achika juki tsupig mauwai. Dutika nunú aents yujaun tinamak Israel aents aidau batsatbaunum ashí ishiakui. Dutika ishimak juju etsegkatajum tusa chichama etsejin aidaun akateak: “Aents wijai, tuja Samueljai ijunag maanitan dakituidauk, tagkuji buey aidauk jutiksaik tsupija ijitam agtinne”, tiuwai.

Tusa timatai nuna antukag Israel aents aidauk shiig senchi ishampakui. Nuninak Saúljai atuniktatus makichik aents amaina numamtuk jijnajui.

<sup>8</sup> Nunik shiyakag ijunajui yaakat Bézec. Nunikmatai Saúl dekapajui, dutikam Israel aents aidauk trescientos mil aents ijunjauwai. Tuja Judá wegantunmaya aidau treinta mil aents ijunjauwai.

<sup>9</sup> Nunik ijunjamtai Saúl chichama etsejin aidaun chichajak: “Waketajum Jabesnumia aents aidau ujaktajum, kashin etsa tajimai agkanmitkawagtajai”, tiuwai.

Tusa tima jegawag Jabesnumia aents aidaun nuna ashí ujakajui. Nuna antukag shiig aneasajui.

<sup>10</sup> Nunikag Nahas ujaktajum tusa chichama etsejin aidaun akuptuinak: “Kashin ame wakegamu umikta tusa minittaji”, tiajui.

<sup>11</sup> Tuja kashinia duwi Saúl niina suntaji aidaun akanag kampatum ijunjauwai. Dutika eke etsa jiintsag shimutuk shiwag amonita aents aidau batsatbaunum jegawajui. Nunikag mai mainakua etsan tajipajui. Dutika amuam iwaku juwaku aidauk maki makichik pisaja megkaejauwai.

<sup>12</sup> Nunikagmatai nuwi aents yujau aidau Samuelan chichajuinak: “¡Israel aents aidau Saúlak iina apujig amaitsui tusa tiagma duka kajegmi!” tiajui. Tuidau asag, nunú aents aidau idaisatajum ii kajegmi tusa sumaidau.

<sup>13</sup> Tusa tiagtai Saúl chichaak: “Yamai tsawanta duik makichik aentskesh jakashtatui, wagki Tuke Pujuu yamai Israel aents aidaun ayamjuku asamtai”, tiuwai.

<sup>14</sup> Tusa timatai Samuel ashí aents aidaun chichajak: “Yaakat Guilgalnum shiyakagmi, awi Saúl apu wajas inabaun nagkamati”, tiuwai.

<sup>15</sup> Timatai aents aidauk ashí yaakat Guilgal shiyakajui. Nuwi jegawag Apajuú emtin Saúlan apu adaikajui, dutika chichainak: “¡Saúlai iina apujig!” tuidau. Nuna ashí umikag nuadui agkan maanitsuk pujustinun Tuke Pujuu amastí tusag kuntuu maa apeenak Tuke Pujuu emamatiajui. Nuadui Saúl Israel aents aidaujai ashí ijunag shiig aneasajui.

## 12

*Samuel Saúlan ame yamaik Israel aents aidaunum inamjata tibau*

<sup>1</sup> Nunú nagkaemakmatai Samuel ashí Israel aents aidau antamunum chichaak:

“Antuktajum nijah, wika atum aidautijum segatbaunak ashí umigkajime. Dutikau asan atumi apujinash adaitukjime.

<sup>2</sup> Nuadui yamai nagkamsag juju apu atuminig inamjattawai. Tuja wika yamaik múuntuch intashi puju wajasjai. Atumek dekagme mina uchig aidau atumjai batsatbaunawai.

“Wika datsauch asanuk atumi yayaakun taka takakuan yamai tsawantan ejejai.

<sup>3</sup> Nuadui wisha wajuk atumjaish takasja nunú namputchawame wi atumdau buey aidaunakesh, nuniachkunush atumi burrojum aidaunakesh atankimu akugmek, tuja tikichnakesh waitkasu akuig tujuttajum. Tuja chichama iwagtujati tusagmekesh akigkau akugmeshkam, yamai Tuke Pujuu emtin, juju apu Apajuú etegkamua nuna emtinchakam tujuttajum. Nunú tujutiagmin nuna akikmaktajai”, tiuwai.

<sup>4</sup> Tusa tutai dita aimainak:

“Amek makichkish kasagkagtukchauwaitme, nuigtush tsanujatjachuitme, nuigtush chichama iwagtugtagme tusamkesh makichkish kuichkik segajatchauwaitme”, tiajui.

<sup>5</sup> Tusa tiagtai Samuel chichaak:

“Tuke Pujuu emtinish, tuja apu aina nuna emtinish mina utugchatjuk makichkish ejetugchaugme”, tiuwai.

Tusa tutai ditá ainak:

“Ame tame duka dekaske”, tuidau.

<sup>6</sup> Tusa tiagmatai Samuel Israel aents aidaun chichajak:

“Atumi apachjum aidau Egipto nugkanum waitkam batsatun, jiija yajuak, juju nugka juwi ikaunmati tusa Tuke Pujuu Moisésan Aarógjai awetiuwai.



<sup>7</sup> Nuadui umintsatajum, wagki wi yamai atumin iwaintuktatjime, atum aidautijum ima Tuke Pujuuwaig kajintsa anentaimtsuk, apugtin amí tusa sumakjum pegkegchau takamsaujum nuna. Tuja atumi apachjum aajaku aina nuna uwemtikatatatus Apajuí dutikauwa nuna yamai dekamtikattajime.

<sup>8</sup> “Atumi apachjum aajaku aina nunú Jacob niina uchiji wegantu aidaujai Egipto nugkanum shiyakag batsatun, nuwiya aents waitkasu ainawai. Imatika waitkainam Tuke Pujuu yaimpakti tusag segajaku ainawai. Nuna antujuk Tuke Pujuu Moisésan Aarógjai awetiuwai. Dutikam iina apachji aidaun jiija yajuak juju nugka juwi ikaunmauwai.

<sup>9</sup> “Dutika ikaunmam batsamsash ima Tuke Pujuu dita Apajuíjinak umigtsuk kajimatkiu ainawai. Numidau asagmatai dita shiwaaji aidau depetkatnume tusa Tuke Pujuu timatai, Hasornumia suntag aidaun apuji Sísara aajakua nunú niina suntaji aidaujai depetek amukajui. Tuja nuigtushkam filisteo aidau, moabnumia aents aidau aatus ditanak depetek amuku ainawai.

<sup>10</sup> “Dutika depetkam wajanag nuadui Apajuín adeajag segainak: ‘Dekas iik Baal dakumkamu Astartéjai emematku tunamagji’, tiu ainawai. Nuna tusag iina shiwaaji waitkagmaina nuna ayamjutpakti tusa Tuke Pujuum segainak: ‘Ame ayamkagtukaminig, ima amek emematiagmi taji’ tiajui.

<sup>11</sup> “Nuna antujuk Tuke Pujuu Jerubaalan Barakan, Jefté aajakua nuna, tuja minashkam aatus awetugmauwai, atumin shiwaajum aidau waitkagmaina nuna ayamjutpakti tusa. Aatus iina apachji aajaku aina duka dita ayamjukam shiig batsamsau ainawai. Tuja yamai atumshakam kuashat tsawantai atumi shiwaajum waitkascham shiig batsatjume.

<sup>12</sup> “Tujash atumek amonita aidaun apuji Nahas aajakua nunú jetepaktag tabau antukjum, iish apugtin amí, nunú iinash yaimpakti tusajum, Tuke Pujuu atumi Apajuíjiya nunú dekayaitkujum sumakmaijume.

<sup>13</sup> “Nuadui atum apu sumakbaujum duka jujuwai. Juna Tuke Pujuu atum sumakbaun amasaje.

<sup>14</sup> Nuadui atumek atumi apujijai yamai juju umiktatjume: Tuke Pujuu eme anentsajum nigki ememattajum, dutikakjum nii tabau umiktajum. Nii dutikata tujabau takastajum, tuja nii wakegamu umigkujum pujustajum. Nunú dutikakjum shiig pujustatjume.

<sup>15</sup> Untsu nii umiktajum tabau umitsuk idaijuminig, Tuke Pujuu atumnak atumi apugmijai suwimkan amastatjume.

<sup>16</sup> “Nuniau asamtai titu batsamsatajum, Tuke Pujuu atum aidautigmin wainchatai aidaun iwaintugmakagatata nunú wainkamnujum.

<sup>17</sup> Tuja yamai tsawan aina duka trigo juut asamtai, yumi yutatsu nunú wainjume. Nunik aun wi Tuke Pujuu sega ai, nii ipa ipamtajai yumin yutumtjattawai. Dutikamtai atum aidautijum apu sumakujum duka Tuke Pujuu diismak pegkegchau dutikaujum nunú dekattagme”, tiuwai.

<sup>18</sup> Nuna tusa inagnamuik Samuel Tuke Pujuu segauwai. Dutikamuik Tuke Pujuu ipamtan yumijai ajunjawai. Dutikamtai ashí aents aidauk Tuke Pujuum Samueljai ishankajui.

<sup>19</sup> Nuadui aents aidau Samuelan chichajuinak:

“Amina aentsjum aidauti pachijattsam Tuke Pujuu amina Apajuíjum segata, wagki jinawaig tusa ishamaji. Iik apu sumá yujasa nuni senchi iina tudauji ikauntumakji”, tuidau.

<sup>20</sup> Imatiagtai Samuel ditan chichajak:

“Ishamkaigpa, Tuke Pujuum mantamachagtatui. Dekaske atum pegkegchau takasujum duka. Tujash nuniku akugmesh Tuke Pujuuwaig kanakaigpa. Duka nunitsuk ima nigki atumi anentaimijai ememattajum.

<sup>21</sup> Tuja tikich apajuímtai aina nunú atumi ayamjutpak uwemtijamainchau aina nuninuk yujagsaigpa. Duka wainak ainawai.

<sup>22</sup> “Atum aidautijum ima nigki eme anentsajum emematjuminig atumneke idaitam-sashatui, wagki niig mina aentsug atinme tusa etegtamjau asa.

<sup>23</sup> “Untsu wika atumnak mijattsuk Tuke Pujuum segattatjime, nuna dutikashkunuk pegkegchaun takakun nunimainaitjai. Nuigtushkam aents pegkeg atinme tusan jintintuattajime. Duka juju ainawai:

<sup>24</sup> “Atumek ima Tuke Pujuuwa duka ajantusjum diitajum, dutikakjum nii umigkujum dekaskenum atumi anentaimijai ememattajum. Tuja Apajuí atumi yaimpak kuashat dutikauwa nunú aneaku atajum.

<sup>25</sup> Untsu pegkegchau takat aidau idaitsuk duke pujugkugmek, atumek atumi apugmijai ijina utsam atajume”, tiuwai.

## 13

### *Israel aents aidau filisteo aidaujai maaniawagbau*

<sup>1</sup> Saúl apu wajas Israel aents aidauunum inabaun nagkamauwa nunak tsakaja pujus nagkamauwai. Nunik apu wajas inamak ujumak mijan pujau,

<sup>2</sup> makichik tsawantai tres mil suntag Israel aents aidau etegjauwai. Nuwiya dos mil suntag nijjai Betelnum jegattak mujanum yaakat Micmas juwakajui. Nuninai tikich aidauk Benjamígka nugken yaakat Guibeá Jonatágjai juwakajui. Untsu tikich aidauunak jemin waketjatajum tusa Saúl ishiakui.

<sup>3</sup> Tuja suntag filisteo aidau ditá nugken Guibeánum batsatunak, Jonatán niina suntajjai amukui. Dutika amuke tabaun tikich filisteo aidau dekawajui. Tuja Saúlchakam dekauwai. Nunik inamjauwai Israel aents aina nuna nugken ashí uwija kachujin umpuagtinme, nuna antukag umintsagmatai maaniawagmi tusa.

<sup>4</sup> Tuja Guibeánum suntag batsatunak Saúl amuke, dutikamtai filisteo aidau Israel aents aidau kajegkaje tabaun ashí Israel aents aidau dekawajui. Nuadui suntag aidau yaakat Guilgalnum Saúljai ijunjajui.

<sup>5</sup> Nuninai filisteo aidauhkam Israel aents aidaujai maaniawagtatus ijunjajui. Tuja filisteo aidauunak treinta mil carro maanantai aidau, seis mil suntag caballonum maanitan yacha aidau, nuigtu dawenum yujas maanitan yacha aidau aatus nayantsa kamatkajijai betek tumain aajakui. Imaanik ijunag shiyakag yaakat Bet-avén jegawag, nujai niinis yaakat Micmas aakmajag batsamsajui.

<sup>6</sup> Ibau kuashat jetenam ishamainak Israel aents aidauk waa aidauunum, japagau inatak aidauunum, kaya pagkaku aidauunum, nugka taimu aidauunum, yumigmat taimu aidauunum uumjajui.

<sup>7</sup> Nuninai nuigtushkam kuashat aents pisajag, Jordágkan katitkag Gad nugkanum, tuja Galaad nugkanmashkam shiyakajui.

Untsu Saúlak yaakat Guilgalnum juwakui. Nunikmatai suntag nijjai yujauk ishamainak senchi kujaidau.

<sup>8</sup> Tuja Saúlak nuwi pujus siete tsawan Samuelan dakasui, imaan tsawan dakagsattame tibau asa. Samuel tachatai daka daka aents aidauk wakettan nagkamaidau.

<sup>9</sup> Nuniagtai Saúl chichaak: “Apajuí daajin kuntin maa nuna neje ashí apeatnuwe nunú, tuja agkan pujutan Apajuí amastí tusa anentag susatnuwe nujai itagtuatajum”, tiuwai.

Tusa timatai juki eteuam nii nuna maa apeak Apajuín emematiuwai.

<sup>10</sup> Nuna dutika inagnai Samuel tauwai. Nunik taamtai Saúl jüntukiuwai igkgu kumpamatatus.

<sup>11</sup> Tujash Samuelak eke Saúlan kumpamtsuk chichajak:

“¿Wagka amesh dutikata tichamaitkumesh, kuntin maamesh apeaume?” tau.

Tusa tama Saúl ayaak:

“Ame taatin tsawan nagkaemaki wetai aents aidau waketuinakui, tuja nuigtushkam filisteo aidau Micmas jutijai maaniatatus batsatu asamtai,

<sup>12</sup> eke wi Tuke Pujuu segan umintsag, filisteo aidau kauna jetepakchajaintash tusan, kuntuu maan nuna nejen ashí apeakun Tuke Pujuu ememattajai tusan jutikajai”, tiuwai.

<sup>13</sup> Tusa timatai Samuel ayaak:

“Ame aikaum duka makichkish dutikmainchau aikaume. ¡Tuke Pujuu amina Apajuíjum dutikata tujamauwa nunú betek umikaminig, Israel aents aidau apuji tuke atin ati tusa Tuke Pujuu tujamain awajtamkae!

<sup>14</sup> Tujash yamaik ame apu wajas inabaugmek tuke achattawai. Yamaik Tuke Pujuu nii wakegamun betek umiaun makichik etegkattawai. Dutika Israel aents aidau apuji ati tusa adaikattawai, wagki amek Tuke Pujuu tujabau umigkachume”, tiuwai.

<sup>15</sup> Nuna tusa ukuak Guilgal pujau jüinki weuwai. Nunikmatai suntag nuwi juwakaju aidauk Saúljai shiyakajui, filisteo aidaujai igkunia maaniawagtatus. Guilgalnumia shiyakag Benjamígka nugken yaakat Guibeá jegawajui. Nunik jegawag nuwi Saúl seiscientos suntajan ijumjauwai.

<sup>16</sup> Dutika Saúlak niina uchiji Jonatágjai, nuigtu suntag nijjai yujau aidaujai aatus filisteo aidauk Micmas batsatai, ditak yaakaat Guibeánum Benjamígka nugken juwakajui.

<sup>17</sup> Nuwi batsatai filisteo aents maanitan yacha emak shimin kempatum akanka ijumjamu aidau, dita batsatbaunmaya makichik eemak wegak tikich aidauunum yajuakui. Nunik yaakat Ofránmanini Shual aajakua nuna nugkeen shiyakajui.

<sup>18</sup> Untsu tikich aidauk yaakat Bet-horón aajakua nuni shiyakajui. Nuniagtai kampa-tuma nunú Seboíma mujajin uwegshunum shiyakajui.

<sup>19</sup> Tuja Israel aents aidauk makichik aentskesh nagki aidau jiju hierrojai najannuk atsujakui, wagki filisteo aidau dekainayatak jintintuachbau asag. Nunak jintintuachajui wagki unuimajag puyajan, nagkin aatus najankag jutijai maaniawainum tuidau asag.

<sup>20</sup> Nuadui Israel aents aidauk kuchii, jacha, azadón, pico aidau etsakmainkesh atsugbau asag filisteo aents aidau segajaku ainawai.

<sup>21</sup> Dutika segam nunú etsakeamunum jimag kuichkin akikmajaku ainawai. Tuja jacha etsakeamunmak, jiju etsaktai aguijada aidau iwagbaujai makichik kuichkin segajaku ainawai.

<sup>22</sup> Nuadui suntag aidau Saúlan Jonatágjai uyunajaku aina duka puyaajinchau, nagkigtinchau aajaku ainawai. Untsu ima Saúlak Jonatágjai takaku aajaku ainawai.

<sup>23</sup> Nuninai filisteo aidauk Israel aents aidau yaakat Micmasumanini shimutkajui.

## 14

### *Jonatán filisteo aidau depetkamu*

<sup>1</sup> Makichik tsawantai Saúla uchiji Jonatán nii maaniaku jutaijin niina kumpaji takujus wekagajakua nuna chichajak:

“Namak katitka suntag filisteo aidau batsata nunú jetekmi”, tiuwai. Tusa weakush niina apajinak ujakchauwai.

<sup>2</sup> Niina apaji Saúlak Gabaanum yaakat Migrón aajakua nuwi munchi ayaunum nuna wakentin niina suntaji seiscientos aidaujai batsatai nunikui.

<sup>3</sup> Tuja makichik sacerdote yaakat Silónum pujus Tuke Pujuu umijujakua dushakam Saúljai pujau. Nuna daajig Ahías aajakui. Nunú sacerdote nugkurai lino apagbau efod tutain takujakui. Tuja Ahíasak Icabotan yachi Ahitub aajakua nuna uchiji aajakui. Untsu niina apachjig Elí uchiji Finees aajakui.

Tikich Israel aents aidaukham Jonatán niina kumpajijai webaunak dekachaju ainawai.

<sup>4</sup> Jonatágkak niina kumpajijai filisteo aidau batsatbaunum jegatatus wedau. Dita shimamunmanini jimag kaya múun Bosés daagtin Senéjai aajakui.

<sup>5</sup> Tikichia nunú nujinmanini yaakat Micmasjai niniaku aajakui. Untsu tikichia nunú tsunmanini yaakat Guibeájai niniaku aajakui.

<sup>6</sup> Nuwi wesag Jonatán niina kumpajin, chichajak:

“Weajai au nagkaiki atú amainia awi aents pegkegchaun takau aidau batsata nunú jegajua Tuke Pujuu yaimpasmatai maaniami, wagki kuashat akuish, nuniachkuish ujumchik akuish, iik Tuke Pujuu yaimpasmatai depetmainaitji”, tau.

<sup>7</sup> Tusa tutai niina kumpaji ayaak:

“Ayu, ame anentaimam duka betek umikta. Wika ame tujutbaun umiktasa wekaejai”, tiuwai.

<sup>8</sup> Timatai Jonatán niina chichajak:

“Weajai atú amainia awi filisteo aidau batsata nunú jegajua wantintukmi.

<sup>9</sup> Dutika wantintuka ajin dita chichainak: ‘Anuig wajastajum, nuniagmin ii kawawagmi’ tuinakuig wejutsuk nuwig wajas dakasmi.

<sup>10</sup> Untsu ‘wakatajum’ tujamkuig wajukmi. Nuni dekaattaji Tuke Pujuu ditan depetkatnume tusa tujabau”, tiuwai.

<sup>11</sup> Nuadui mai juwakiag filisteo aidau batsatbaunum jegantag wantintukajui. Nuni-agtai ditan wainak chichainak: “Nijah, au hebreo aents aidau waanum uumak batsatu jijnajana”, tuidau.

<sup>12</sup> Tusa tuinai aents aidau Jonatán niina kumpajijai wajattaman untsuinak: “¡Juwi wakatajum, nunikagmin wajuk maanitaimpaita nuna jintintuatjime!”, tuidau.

Tusa tiagtai Jonatán niina kumpajin chichajak: “Wi emka weakui mina ukujui minita, auk Tuke Pujuu ina amase, depetuk amuktinme tusa”, tiuwai.

<sup>13</sup> Nuna tusa Jonatágkak nunú kayanum achimki, achimki, niina kumpajijai mai wakauwai. Nunik waka suntag filisteo aidauk achika nagki nagkima ajiau. Dutiktai niina kumpaji patagas wegak nuna iju iju kajeau.

<sup>14</sup> Dutika yama nagkamchak Jonatán niina kumpajijai jetekajua nuaduk juu tamawaik veinte aentsun kajekajui.

<sup>15</sup> Nuna antukag suntag filisteo aidau aaknum batsatuk tuja suntag ujumak maanitan yacha eemak shimin aidaukham senchi ishamkajui. Tuja nuigtushkam nugka senchi uujak filisteo aidauk shiig senchi uwakauwai.

<sup>16</sup> Nuna ishamkag wakan wajasag pisainak pachimdagaidau. Imanidaun Saúla suntaji yaakta kuitamin aidau Benjamígka nugken Guibeánun pujuidau wainkajui.

<sup>17</sup> Imaniagtai suntag niijai yujaun Saúl chichajak: “Ashí diistajum betekash batsatag nunú dekaami”, tau.

Tusa tiajam, ashí diikma Jonatán niina kumpajijai megkaekauwai.

<sup>18</sup> Nunikmatai Saúl Ahíasan chichajak: “Chicham umiktinun Apajuí amasbau egketa nunú arca\* itaata”, tiuwai. Nunak tiuwai wagki chicham umiktinuk tikich yantannum au asantai.

<sup>19</sup> Tusa Saúl sacerdote Ahíasjai eke chichaak wakai, filisteo aidauk aan nagkaemas waugtukag pachimdagainak senchi chajuatunau. Imaniagtai Saúl Ahíasan chichajak: “Dekas arcak itawaipa”, tiuwai.

<sup>20</sup> Tusa ukuak Saúlak niina suntaji aidaujai ijunjauwai filisteo aidaujai maaniata-tus. Nunik diikma filisteo aidauk shiwagtsukaita tusa dita ditak pempeentunikiag maanidaun wainkauwai.

<sup>21</sup> Nuniagtai untsu hebreo aidau yaunchuk nagkamas filisteo inatai batsamin aidaushkam Israel aents aidaujai maaniatajum tima uminas batsatiatak, jijnag ukukiag Israel aents aidau Saúljai, Jonatágjai aatus ijunag batsatbaunum nuwi ditajai ijunjajui.

<sup>22</sup> Tuja tikich Israel aents ishankagtuinak Efraígka nugken uumkaju aidaunashkam, filisteo aidau pisainawai tabaun antukag ditashkam jijnag maaniawagtatus pataetukajui.

<sup>23</sup> Nunik pataetukag mai mainakua Bet-avén jegawajui. Aatus nunú tsawantin Tuke Pujuu Israel aents aidau ayamjuk agkanmitkauwai.

*Maaniamu nagkaantsaig suntag yutain yuwauk mantamnati tusa Saúl tibau*

<sup>24</sup> Israel aents aidauk yujumkan yutsuk maaniawaju asag, shiig senchi pimpikajui. Nunak Saúl chichaak: “Shiwag aidau eke depeteatsjinig, yutain yuwauk mantamnati” tusa chichaman umiku asantai, nuna umiinak nunikajui.

<sup>25</sup> Tujash nunú tsawantin aents aidau maaninak yujasag dapa ayaunum jegantajui.

<sup>26</sup> Nunik ikam akumak diikma dapa yumiji shiig kuashat ayaun wainkajui. Dutika wainkajash piipichinakesh dukachajui, wagki nuna nuniauk mantamnati tibau asantai, nuna ishainau asag.

<sup>27</sup> Untsu Jonatágkak niina apaji chicham umiamun dekachu asa, numi takakbauwai nuna titijin, dapa yumiji saegun antig dukauwai. Dutika pimpiki wekaebaun ichich-mamjauwai.

<sup>28</sup> Nunikmatai suntag aidounmaya makichik niina chichajak:

“Amina apa chichama umiak: ‘Makichik aentskesh juju tsawanta duwi yutain yuwauk mantamnati’ tiu asantai, iik senchi pimpikiatku makichik yutaigkesh yuwatsji”, tiuwai.

<sup>29</sup> Tusa tutai Jonatán chichaak:

“Mina apag chichaman umika nunak tumainchaun tine. Wika dapa yumijin dukaan pimpiki wekaebaujun ichichmamjajui.

<sup>30</sup> Tuja tikich Israel aents aidauh iina shiwaaji aidau depetka, yutai atankimua nuna yuwawajag, ditash aan nagkaemas senchigtin wemain wajakaje. ¡Nunikagmatai filisteo aidauk wamak amumain awajkaji!” tiuwai.

<sup>31</sup> Tuja Israel aents aidauk nunú tsawantin filisteo aidounak, yaakat Micmas nagkamas mai mainakua yaakat Aialón jegawajui.

Tujash Israel aents aidauk shiig senchi pimpikajui.

<sup>32</sup> Imanik pimpikajui asag, yapajuinak uwig aidau, baka aidau, toro tsakat aidau, filisteo yajutkamun aidau maawag neje numpemtin uduunak yuwawajui.

<sup>33</sup> Nuna nuniagtai nuwiya makichik Saúlan jegajua chichajak:

“Tuke Pujuu: Neje numpemtin yuwawaigpajum, tusa tujamiuwa nuna umitsuk, neje uduun numpejai yuwinak tunamainawai”, tau. Tusa ujakam Saúl chichaak: “¡Atumek Apajuí tubabuwa duka umitsuk intinjukiugme! Nuniku asajum kaya múun jukijum juwi itagtuatajum”, tiuwai.

<sup>34</sup> Nuna tusa, tikich Israel aents aina dushakam ashí ujaktajum: “Maki makichik toron, nuniachkush uwijan itaatneme. Dutikawag juju kaya múun puja juwi patai maatneme, dutikam nuna numpe saeki utsankamtai, duwi shiig numpe atsaun yuwatneme. Nuna nuninak tunamagchagtai”, tiuwai.

Tusa tima nunú kashia duik maki makichik toro jukiag kaya múun pujamunum ejegawag, nuwi pataidiag maawajui.

<sup>35</sup> Dutikawagmatai Saúl kuntin maa patasa apeaku Apajuí ememattinun makichikish najanchauwaitak najanauwai.

<sup>36</sup> Nuna dutika Israel aents aidau Saúl chichajak:

“Filisteo aidau kashi jeteke mai mainakua tsawampaku ashí amukmi”, tau.

\* 14:18 Juju chicham “arca” tawa duka tikich versiõnnumak “efod” tawai.

Tusa tutai dita aimainak:

“Ame wakegamua duka imanisag uminkati”, tuidau.

Tusa tiagtai sacerdote chichaak:

“Tujash deatkauk Apajuí iniasmi”, tau.

<sup>37</sup> Tusa timatai Saúl Apajuí iniak:

“¿Filisteo aidaunash jetemainkaitag? ¿Tuja filisteo aidaun amuktinme tusamesh yaijatkattamek?” tau. Tusa tamash Tuke Pujuuk nunú tsawantinig aikchawwai.

<sup>38</sup> Dutikam Saúl suntaja apuji aidaun chichajak:

“Apajuí mina aigkacha nunash ya pegkegchau takamsamunmak ankae nunú ejeta-jum”, tiuwai.

<sup>39</sup> Nuna tusa: “Tuke Pujuu Israel aents aidaun ayamjina nuna daajin uminkatnun tajai: ¡Mina uchig Jonatán pegkegchaun takasu akushkam mantamnattawai!” tiuwai.

Tutai suntag aidauk makichkish aimkachajui.

<sup>40</sup> Nuadui Saúl Israel aents aidaun chichajak:

“Kaunajum juwi ijunjatajum, nuniagmin wi mina uchig Jonatággjai atú yantam wajastajai”, tiuwai.

Tusa tutai suntag aidau chichainak:

“Ame tame nunisag uminkati”, tuidau.

<sup>41</sup> Tusa tiagmatai Saúl senchi untsamak Tuke Pujuun aujak: “Israel aents aidaun Apa-juíyah, ¿wagka amina inakem segapamush yamaish aikchaume? Mina pegkegchaug, nuniachkush mina uchig Jonatággka pegkegchauji akug Urim jiinkittawai, untsu Israel aents aidaun pegkegchauji ataik Tumim jiinkittawai”, tiuwai.

Dutika dekam Jonatággka daaji Saúldaujai jiinkiuwai. Nunikmatai Israel aents aidauk agkan utugchatjinchau juwakajui.

<sup>42</sup> Nunikmatai Saúl chichaak:

“Mina uchig Jonatán wijai dekapsatajum, yana daajig jiinkit”, tiuwai.

Dutika dekapeam Jonatággka daaji jiinkiuwai.

<sup>43</sup> Nunikmatai Saúl Jonatággkan chichajak:

“Amesh waji dutikamume nunú ujatkata” tiuwai.

Tusa tama Jonatán chichaak:

“Ima dapa yumijnak numi takakbau titijin antigka jukin dukamjai. ¿Tujash nunú dutikamuikik mantamnattag?” tau.

<sup>44</sup> Tutai Saúl untsamak:

“Jonatággkah, ame mantamnashatak Apajuí mina mantuati!” tau.

<sup>45</sup> Tutai Israel aents aidau Saúlan chichajuinak:

“Jonatán iina ayamjutpak filisteo aidaujai maania depetmaka nuniaush ¿wagkag mantamnati? Apajuí Tuke Pujuuwa nuna daajin makichik niina intashigkesh ukuiniakag nuggag iyagchattawai, wagki Apajuí yayasam depetmaku asamtai”, tiujui.

Aatus Israel aents aidau Jonatán mantamnainun ayamjukajui.

<sup>46</sup> Tuja Saúlchakam filisteo aidaujai maanitnak idaisauwai. Dutikam filisteo aidauk ditá nugken waketjauwai.

<sup>47</sup> Aatus depetmak Saúl Israel aents aidaun apuji wajas inamjauwai. Tuja Israel aents aidau nugken ditá shiwaaji Moab aents aidau, Amón aents aidau, Edom aents aidaunash ayamjuk agkanmitkauwai. Tuja Sobá nugka apujinash, filisteo aidaun aatus ashí depetkauwai. Saúl niina suntaji aidaujai shiwajan jeteakug tuke depetmajakui.

<sup>48</sup> Niina suntaji aidaujai ijunag maania Amalec aents aidaun depetuk ijinauwai. Dutika Israel aents aidaun kasajuinak waitkaidaun agkanmitkauwai.

<sup>49</sup> Saúla uchiji aidauk: Jonatán, Ishví, Malquisúa aatus aajakui. Tuja niina nawanji iwai aajakui Merab, untsu Mical aajakui ekeu.

<sup>50</sup> Saúla nuweg Ahinóam Ahimaasa nawanji aajakui. Tuja niina suntaji aidaun apujig Abner niina apaji yachi Neran uchiji aajakui.

<sup>51</sup> Saúla apaji Quish aajakua duka Abneran apaji Ner aajakua nujai Abielan uchiji aajakui.

<sup>52</sup> Saúl apu wajas pujusua nuadui, Israel aents aidauk filisteo aidaujai shiig senchi maaniau ainawai. Nuadui Saúlak suntag maanitan yacha aidaun etegkeg yajuak ijumag uminas pujujakui.

<sup>1</sup> Makichik tsawantai Samuel Saúlan chichajak: “Tuke Pujuu niina aentsji Israel aents aina nuna apuji atinun amina adaikati tusa awetine. Nuadui Tuke Pujuu tujama nunú shiig antukta.

<sup>2</sup> Tuke Pujuu ashí senchigtina nunú juna aatus tujamui: ‘Israel aents aidau egiptunmaya jínag minidaun Amalec aents aidau jetenak waitkasaju aina duwi, wi ditanak suwimka susagatjai.

<sup>3</sup> Nuadui amina suntajum aidaujai jetekjum ijinkujum dita wajiji aidaujai ashí tsaigkatajum. Tuja makichkish wait anenjaigpa. Aents aishmag aidau, nuwa aidau, uchi aidau, yama uchi akiinau aidau, tuja nuigtushkam toro, uwig, camello, burro aatsajum ashí ijinatajum’ tujamui”, tiuwai.

<sup>4</sup> Tusa tima Saúl suntag aidau chichama ishitkauwai. Nuna dekaawag Telaimnum ijunjamtai ashí dekapajui. Dutikam dawé yujasag maanin aidauk doscientos mil aents aajakui. Tuja Judá wegantunmaya aidaushkam diez mil suntag aajakui.

<sup>5</sup> Dutika dekapag nuna yajuak, yaakat múun Amalec nugkanum aajakua nuwi weuwai. Nunik nuwi jegattak entsa aunum nuna ijusag uumak batsamsajui, nuwi batsamsag pachiaichbau jetekagtatus.

<sup>6</sup> Nuwi batsamas Saúl quenita aents aidau chichama akatmamtug akuptak: “¡Amalec aents aidau batsatbaunum pujajum duka jínja yaja shiyaktajum! ditajai ijumja amukaijim. Wagki atum wegantutigmek Israel aents aidau egiptunmaya jínag minidau wait anenjau ainagme”, tiuwai.

Tusa ujakajam quenita aents aidauk Amalecjai ijunag batsatu jínag yaja shiyakajui.

<sup>7</sup> Nunikagmatai Saúl Amalec aents aidau nugka Havilánnum nagkama jeteka ipisig, Shur nugka Egipto nugke nagkatkamunum awa imanui ejegawajui, dutikawag nuwi amukui.

<sup>8</sup> Dutika amuak nuna apuji Agag aajakua nuna achikui, dutikak niina suntaji aidau nak ashí ijitauwai.

<sup>9</sup> Dutika ijiniatak Agagnak maachajui. Tuja nuigtushkam tikich waji imanchau aidau tsainayatak, uwig pegkeg aidau nak ijinachajui, dutikainak toro aidau nak, toro tsakat duwejam aidau nak, cabra tsakat aidau nashkam ijinachajui. Dutiksag waji akik pegkeg aidau nashkam tsai chajui.

<sup>10</sup> Dutikawagmatai Tuke Pujuu Samuelan chichajak:

<sup>11</sup> “Saúl nak apu adaimainchaunas adaikayagtai, mina chichamjun umigtutsuk nii wakegamun takawai”, tiuwai.

Tusa timatai, Samuel jaketa Saúl tsagkujata tusa Apajuín sega segaakua tuke tsawajui.

<sup>12</sup> Nunik tsawag kashikmas Saúljai igkunik chichastatus weuwai. Nunik eke wegaun igkug ujinak: “Auk Saúlak yaakat Carmel wemae, nunik nuwi kaya esagman awajame, nuna diisag emematjítume tusa. Dutika ukuak yaakat Guilgal wemae”, tusa ujakajui.

<sup>13</sup> Tusa ujakam Samuel Saúlan egak weuwai. Nunik jegamtai Saúl Samuelan chichajak: “Apajui pegkegnum yumigtamsati. Apajui dutikata tujutma nunak betek umikjai”, tiuwai.

<sup>14</sup> Tutai Samuel ayaak:

“¿Tujash dutika betek umiku aminish, uwig aidau, baka aidau pampaina dusha tuwiya ainawa?” tau.

<sup>15</sup> Tusa tama Saúl ayaak:

“Aunak mina aentsug aidau Amalec aents aidau amuinak uwig duwejam pegkeg aidau, toro duwejam pegkeg aidaujai etegkeg yajuakag itawagmae, wagki nunú maa apeaku Tuke Pujuu amina Apajuíjum emematmi tusag. Untsu tikich aidau ashí ijinamji”, tau.

<sup>16</sup> Tusa tutai Samuel ayaak:

“¡Takamtak wajasta! Tuke Pujuu yamai kashi tujutma nuna ujaktagme”, tiuwai.

Tama Saúl ayaak: “Ayu ujatkata”, tiuwai.

<sup>17</sup> Timatai Samuel chichajak:

“Yaunchkek amek wainkauch ayume, nunin aminig Tuke Pujuu Israel aents aidau apuji ati tusa etegtamabi.

<sup>18</sup> Dutijamau asa Amalec aents pegkegchaun takau aina nunú amukta tusa Tuke Pujuu tujabiu aish,

<sup>19</sup> ¿wagka Tuke Pujuu tujabau intimjukmesh amina suntajum aidau kuntin aidau yajumainakuish, yajuaktajum tusamesh timaume?” tau.

<sup>20</sup> Tusa tama Saúl ayaak:

“Wika Tuke Pujun umiju asan, nii dutikata tujutbaunak betek umiakun, Amalec aents aidau apuji Agag achikan itaajai. Tuja nuigtushkam Amalec aents aidau nak ashí ijinamji.

<sup>21</sup> Untsu suntag aidau uwig duwejam aidau, toro duwejam aidaujai ijinami tibau aig, yaakat Guilgalnum maa apeaku Tuke Pujuu amina Apajuujum emematmi tusa yajuakagmae", tiuwai.

<sup>22</sup> Tusa timatai Samuel chichaak:  
 "Kuntin maa, nuna neje ashí apeamua nuna nagkaesau, Tuke Pujuu tabau shiig antuka umigbauwa nunú niinak shiig awagmawai.  
 Tuja nuigtushkam anentag dekas shiig pegkeg aidau Apajuí suwamua nuna nagkaesauwa duka nii umigbauwa nunuwai.

<sup>23</sup> Nuadui amek anentaimsam dutikaum duka aents anentaimas dekamin aina nunin wajasume.  
 Tuja kaya esajam inantai apusam, juna diis emematjitnume tau asam, dakumkamun emematin aidau Apajuí diisam pegkegchau aina nunin wajasume.  
 Nuadui Tuke Pujuu amina Israel aents aidau apuji ati tusa etegtabauwa nunak, ame nii tibau kajimatkiu asamin, niishkam kajimatjamkittawai, tuja niina chichame umitsuk idaisau asamin, niishkam dutiksag idaitamsattawai", tiuwai.

<sup>24</sup> Tusa tima Saúl Samuelan chichajak:  
 "Dekas tame, Tuke Pujuu dutikata tujutbaun kajimatkin pegkegchaun takasjai, tuja ame tujutbaunashkam kajimatkiyai. Aents aidau ishamakun dita segatuinamun umigkajai.

<sup>25</sup> Tujash wait aneasam mina pegkegchaujush tsagkugtugta, nunikamin iijai wee Tuke Pujuu emematmi", tiuwai.

<sup>26</sup> Tusa tama Samuel ayaak:  
 "Wika amejaig wakitkishtatjai, wagki amek Tuke Pujuu umikta tujabau intimjukim umikchaum nuadui, yamaik Israel aents aidau apujig achati tusa Tuke Pujuu tujamne", tiuwai.

<sup>27</sup> Aatus tusa wetatman Saúl Samuela jáanchjin achika emetuawai. Dutikak jáanchjin ichiinkauwai.

<sup>28</sup> Dutikam Samuel Saúlan chichajak:  
 "Ame mina jáanchug ichinjukum dutiksag, ame Israel aentsu apuji wajasa pujam nunak Tuke Pujuu ichinjamkattawai. Dutika atanjamki, Israel aents tikich amina nagkaetamsau pegkeg puja nuna apu emattawai.

<sup>29</sup> Wagki Apajuí Israel aents aidau depetmatan suwa duka aents nii chichakbaujin yapajin aina nuninchauwai, nii tibaunak betek uminai", tiuwai.

<sup>30</sup> Tusa tima Saúl ataktu chichaak:  
 "Wika dekas tunamagjai. Nuniku akuish wait aneasam Israel aents aidau apuji aina nuna emtinig, tuja Israel aents aina nuna emtinchakam eme anenjusam diigsata. Nuadui iijai Guilgalnum wemi, nunika awi Tuke Pujuu amina Apajuujum emematmi", tiuwai.

<sup>31</sup> Tusa tima Samuel Saúljai wakitkiuwai. Nunik jegawag nuwi Saúl Tuke Pujuu emematiuwai.

<sup>32</sup> Dutikamtai Samuel chichaak: "Agag Amalec aents aidau apuji achikam puja nunú itagtuatajum", tiuwai.

Tuja Agagkak yaunchuk mantumainnap mantuachaje yamaik mantuachagtatuapi tusa puyattsuk shiig aneas Samuel pujamunum jegantui.

<sup>33</sup> Nunikmatai Samuel chichajak: "Amina puyagjumin uchi aidau kajegkamin, kuashat nuwa aidau uchigtuchu juwakajua nunisag, amina dukushkam uchigtuchu juwaktatui", tiuwai.

Tusa tamawaik puyajan juwakug Tuke Pujuu dutikata tibaun umiak asaag mauwai. Nunak dutikauwai yaakat Guilgalnum.

<sup>34</sup> Nuna dutika Samuelak yaakat Ramá niina jeen wakitkiuwai. Nunikmatai Saúlchakam yaakat Guibeánunum niina jeen wakitkiuwai.

<sup>35</sup> Duwi nagkamas Samuel Saúlan anentaimtus wake besemag anentaimkush ataktu awagkig wainikchauwai. Tuja Tuke Pujushkam nii Israel aents aidau apuji emau asa wake besemag anentaimjauwai.

## 16

*David Israel aents aidaun apuji adaikamu*

<sup>1</sup> Tuke Pujuu Samuelan chichajak:

“iSaúla utugchatji anentaimtusam wake besemag dekapeakum waitu pujutsuk idaisata! Yamai nagkamsag Israel aents aidaun apujig ahati tajai. Aní pujutsuk aminu kuntinu kachuji awa nuwi aceite yajaa jukim Belégkanmaya aents Jesé daagtin puja nuna jeen wetá. Niina uchiji aina nuwiyán makichik Israel aents aidaun apuji atinun etegkajai”, tiuwai.

<sup>2</sup> Tusa tama nii ayaak:

“¿Tujash nunash wajuk uuknuk dutikatja? iNuna Saúl degag minak mantuattawai!” tiuwai.

Tusa tutai Tuke Pujuu ayaak:

“Kuntinu maa apeakun Tuke Pujun ememattasan wegajai tusam makichik toro tsakatuch jukim wetá.

<sup>3</sup> Nunika jegaam Jesé ipaata ame kuntin maa apeamin uyuuntamsati. Tuja ame dutikatnunik wi jintintuattagme. Tuja apu atinnashkam wi iwaintuktatjame. Dutikamtai nunú aceiteyai buuknum nijakta”, tiuwai.

<sup>4</sup> Nuna Samuel imatiksag umikui. Tuja Samuel Belén jegamtai, nuwiya apu múun aidau niina wainkag kautuawajui. Nunikag igkug iniinak:

“¿Wagka taume, utugchat atsuak?” tuidau.

<sup>5</sup> Tusa tama nii ayaak:

“Utugchatak atsawai, ayatak kuntinu maa apeakun Tuke Pujuu ememattasan taajai”, tiuwai. Nuna tusa: “Umíntsatajum, nunikjum wi kuntinu maa apeakun Tuke Pujun emematkuí uyuntustajum”, tiuwai.

Aatus tusa eke kuntin maa apeatnunum wetsuk Samuel Jesén niina uchiji aidaujai dita pegkegchau takamsamujin iwagmitkak pegkeg emakui. Dutika nuadui ditajai kuntinu maa apeak Apajuín ememattatus weuwai.

<sup>6</sup> Nuwi ashí jegantag Samuel Eliabpan diisa anentaimas: “Junap dekas Tuke Pujuu apu atinnak etegkae”, tiuwai.

<sup>7</sup> Tujash Tuke Pujuu niina chichajak: “Niina niimeg esantijaig diigsaiapa, wagki nunak wika dakitajai. Aents niimen diijus etegkin aina nuninchauwaitjai, wika anentaimtajin diigsan etegkeajai” tusa nunak dakitjauwai.

<sup>8</sup> Dutikamtai Jesé niina uchiji Abinadapan untsuka Samuelai ejentauwai. Dutikamtai Samuel chichaak: “Junashkam Tuke Pujuu etegkache”, tiuwai.

<sup>9</sup> Tusa timatai Jesé tikich uchiji Shamá aajakua nuna ejentauwai. Dutikamtai: “Junashkam Tuke Pujuu etegkache”, tiuwai.

<sup>10</sup> Duti dutikakua niina uchiji siete aidaunak ashí Samuelai ejentauwai. Tujash Samuel niina chichajak: “Juju aina juwiyanak Tuke Pujuu makichikish etegkache”, tiuwai.

<sup>11</sup> Tuja inagnamun Samuel Jesén iniak:

“¿Uchijum tikichik atsugtamuak?” tau.

Tusa iniam, Jesé ayaak:

“Inagnamu makichik datsauch uwija kuitamak pujawai”, tau.

Tutai Samuel niina chichajak:

“Makichik aents awemata ujaka utiti, wagki kuntin maa apeamua nuna nejeg nii tatsaigkik yuwashatjai”, tiuwai.

<sup>12</sup> Tusa timatai, ujaka utitajum tusa Jesé aentsun awemauwai. Nunú uchik jegkemtin, pegkeg iwajamu wakejumain aajakui. Nunú jeganmatai Tuke Pujuu Samuelan chichajak: “Anuwai wi etegkamua duka, nuadui aceite jukim buuknum nijakta”, tiuwai.

<sup>13</sup> Tusa tima aceiten juki Davitan niina yachi aidaush wainbaunum buuknum nijakui, Israel aents aidaun apuji atin asantai. Nunú tsawantin nagkamas Apajuí Wakani Davitan egkemtujui. Tuja Samuelak nuna dutika ukuak, yaakat Ramá niina jeen wakitkiuwai.

*David Saúlan yaijakbau*

<sup>14</sup> Apajuí Wakani Saúlai pujaun Tuke Pujuu jujukuiwai. Dutikak wakan pegkegchaun awetiuwai. Dutikam nunú Saúlan senchi waitkau.

<sup>15</sup> Nuadui niina takajin aidau chichajuinak:

“Apajuí aminak wakan pegkegchaun awetugma nunú senchi waitkagmawai.

<sup>16</sup> Nuadui amina inakem aina nunú ishiakta, aents arpa shiig awatnun egaka utitnime. Tuja amina wakan pegkegchau waitkagmataish, nunú arpan awatkuí maak anentaimsa pujusminum”, tuidau.

<sup>17</sup> Tusa tama nii ayaak:



“Takumek wejum arpa shiig awatin egakjum itagtuatajum”, tiuwai.

<sup>18</sup> Tusa tutai niina inake aina nuwiya makichik Saúlan chichajak:

“Jesé Belégnumiaya nuna uchiji aina nuwiya makichik arpan shiig awatun wi wainkamjai. Nuigtushkam duka waji u maanitan yacha, chichamesh pegkeg, niimesh iwajamui. Tuja Saúl nak nuigtushkam Tuke Pujuu yayawai”, tiuwai.

<sup>19</sup> Tusa tima Saúl Jesén chichaman akuptak: “Uchijum David uwija kuitamna nunú awetugta”, tiuwai.

<sup>20</sup> Nuna antuk Jesé niina uchiji Davitan awetiuwai. Dutikak makichik burronum pagka pataja, vino aimkamun, nuigtu chivo tsakatan aatus ishitkauwai.

<sup>21</sup> Nuna David yajuak Saúla pujusa inamtaijin jegauwai. Nunik jegamtai Saúl shiig anentus jukiwui. Dutika niina atuwe ati tusa adaikauwai.

<sup>22</sup> Tuja Saúl Jesén chichama akuptak: “Amina uchijum Davidjai shiig pujajai, nuniau asan segajame wait aneam idaitugsata mina yaintak pujusti”, tiuwai.

<sup>23</sup> Tusa tima pujus wakan pegkegchau Apajuí awemamu Saúlan waitkatai, David arpan juki awatujaku. Nuna awattai wakan pegkegchau Saúlan waitkau ukukim mijaak shiig pujujaku.

## 17

### *David Goliatan maamu*

<sup>1</sup> Filisteo aidau Israel aents aidaun jetektatus ditá suntaji aidaun yajuak, Judá wegantu aidau nugken yaakat Soco ijunjai. Nunik Azecá Socojai niniaku awa nuna ejapeen nugka Efes-damim tutainum aakmajag batsamsajui.

<sup>2</sup> Nuninai Saúlchakam Israel aents aidaujai Elá nugkanum ijunjai, nuwi uminas juwakiag filisteo aidaujai maaniawagtatus.

<sup>3</sup> Tuja muja segau asantai, filisteo aidauk atú amain batsatai, Israel aents aidauk tikich yantannum batsatu.

<sup>4</sup> Nuninai filisteo suntag aidaunmaya makichik aents Gad wegantunmaya maanitan yacha Goliat daagtin, esanti kampatum metro aajakua nunú jiinkiuwai.

<sup>5</sup> Niina atsejutaijig bronce najanam tuja iyashi ejaktinji jiju najanam cincuenta y cinco kilo ajamun nugkuaju aajakui.

<sup>6</sup> Niina bakuin ejaktatus apujujakua dushakam bronce najanam aajakui. Tuja nagkijishkam bronce najanam aajakui.

<sup>7</sup> Tuja nagki numijishkam kampuajam nuna titijig jiju hierro eketkamu seis kilo aajakui. Niina emtin maanitai aidaun yajuak niina uyunajakua nunú eemak wejaku.

<sup>8</sup> Goliat Israel aents aidau batsatbaunum jegantatak wajanta untsumak:

“¿Wagka maaniasa umintayama imanikjumes uminjume? Wika makichikitjai filisteonuk, tuja atumek Saúla inake ainagme. Tujash dek as atum ainajum anuiya makichik wijai maanimain etegkajum awematajum wijai maanikti.

<sup>9</sup> Nii mina depeetuk mantakuig atumi inake waigatjai, untsu wi niina maantaig, atumek iina inake wajastatjume.

<sup>10</sup> “Yamai wi Israel aents aidautigmin segajime: ¡Makichik aents awematajum wijai maanikti!”, tau.

<sup>11</sup> Nuna Saúl Israel aents aidaujai antukag senchi ishainak awake aentaimeidau.

<sup>12</sup> Saúl apu aajakua nunú tsawantin makichik aents múuntuch Belégkanmaya Jesé daagtin pujujaku. Nuna uchijig ocho ajujaku. Nuwiya aajakui David.

<sup>13-14</sup> Nunú muunta uchiji kampatum: Eliab, Abinadab, Shamá, aatus iwai aidau maaniamunum Saúljai shiyakajui. Untsu Jesé uchiji tsakat David aajakua duka,

<sup>15</sup> Saúl niina suntaji aidaujai batsatbaunum chichama etsejak yutain juki ejega ukuak, atak wakitki niina apaji uwigjin kuitamak pujujaku.

<sup>16</sup> Nunik pujai Goliatak kashikmas, agkuantai aatus kashi kashinig untsuak: Makichik aents wijai maanimain etegkajum awematajum, tusa Israel aents aidaun cuarenta tsawan waitka pujuu.

<sup>17</sup> Imatju pujai makichik tsawantai Jesé niina uchiji Davitan chichajak: “Trigo duwikbauwa nunú veinte kilo jukim, nuigtu diez pag jukim, yatsum aidau maaniamunum batsata nunú ejetuata.

<sup>18</sup> Dutikakum baka muntsuji inanja nanegbau suntaja apuji susatin diez jukita. Nunika jegaam yatsumesh pegkejash batsata nunú dekaata. Tuja pegkeg batsatkuig, ame minakum ditá takataiji jukim itagtuata”, tiuwai.

<sup>19</sup> Eke Davitak uminak pujai Saúlak Davita yachi aidaujai, nuigtu ashí Israel aents aidaujai aatus nugka Elá tutainum filisteo aidaujai maaninak yujau.

<sup>20</sup> Nuninai David uminas tsawak kashikmas tikich aentsun, ame uwig aidau kuita-mamata tusa ukuak, niina apaji yutai aidau susamun juki weuwai. Nunik jegakma maaniatatus uminas, untsu-mainak pampainai jegauwai.

<sup>21</sup> Nunik jegau ai Israel aents aidauk filisteo aidaujai maaniawagtatus igkuniawajui.

<sup>22</sup> Nuniagtai David aents maaniaku jutai aidau kuitamak pujaun nii yutai jukimujin ame kuitamkata tusa ukuak, yachi aidau pegkejash yuja tusa iniastatus tupikaki weuwai.

<sup>23</sup> Nunik jeganta niina yachi aidaujai chichaak wajai, Goliat yaakat Gadnumia aajakua nunú filisteo aidau ijunbaunmaya jiinki wajan, yaunchuk nagkamas tuu pujuu asa, Israel aents aidau atsaneau. Tusa imatjittaman David antukui.

<sup>24</sup> Nunú aents ibaun, wainkag Israel aents aidauk senchi ishamak pisainak:

<sup>25</sup> “¿Atumesh aents maanitan yacha jiinki dusha wainkaugmek? Au aentsuk Israel aents aidau atsaneak tantae. Makichik aents auna depetuk maamtaig, kuashat waji akik aidau apu susattawai. Dutikak niina nawanjijai nuweattawai. Tuja nuigtushkam niina patayi aidauk apu akitai aina nunash akikmakchagtatui”, tuidau.

<sup>26</sup> Tusa tuinamun David shiig antukchau asa nijai ijunun iniak:

“Au filisteo, Israel aentsun atsaneak waitka nuna makichik aents maa agkan emamtaish ¿wajina apush sumainai tawa? Filisteo pegkegchaun takauwa dusha niish ¿ya asaya ¿annush Apajuí suntaji aidau nash pegkegchaun chichajush wekaewa?” tau.

<sup>27</sup> Tusa tutai dita yaunchuk tibaunak dutiksag chichajuinak: Goliata maunak waji aidau apu susattawai tibaunak betek ujakajui.

<sup>28</sup> Aatus nunú aents aidaujai David chichaun yachi emkau Eliab antujuk senchi kajejuk chichajak:

“¿Amesh juwish waji minitmaume? ¿Uwig ujumak uwegshunum batsama dusha ya kuitamkati tusamea ukukmaume? Wika ame setakchauwaitam nunak dekjai, tuja pegkegchaun anentaiyai aní wekagam nunashkam dekjai. Amek iina shiwaaji aidaujaish wajuk maaniaji nunú wainkatasa wekaeme”, tau.

<sup>29</sup> Tutai David ayaak: “Wi ayatak inimag nunash ¿wajina pegkegchaunash dutikaja?” tau.

<sup>30</sup> Nuna tusa David niina yachi iwai aidau ukuki, tikich aidau iniau. Tuja ditashkam yaunchuk tibaunak dutiksag ujakajui.

<sup>31</sup> Nunik iniimak wekagun antugkaju aidau Saúlan jegajuawag ujakajui. Nuna Saúl dekaa, ujaka utitajum tusa inamjauwai.

<sup>32</sup> Tusa timatai ujakam David jegaa Saúlan chichajak:

“¡Apuh, amek makichkish puyatjukaipa, auk wi niinak maattajai!” tau.

<sup>33</sup> Tutai Saúl ayaak:

“Amek makichkish maumaitsume. Nuigtushkam amek tsakatchitme, tuja niig yaunchuk datsa asag maanitnak yachai”, tau.

<sup>34</sup> Tama David ayaak: “Apuh, wika mina apaju uwigjin kuitamnaitjai. Tujash ikamyawa, nuniachkush chayukesh uwija maa juki tupikakuig,

<sup>35</sup> pataetukan niina weninian atannujai. Dutikai mina esattag takuig, jagkeen achikan awatjan mainujai.

<sup>36</sup> Dutiksanuk au filisteo aents Apajuí Tuke Pujuuwa nuna aentsji aidau dushikiak atsanea nunak maattajai.

<sup>37</sup> Ikamyawa chayujai maawai tusa Tuke Pujuu ayamjutkauwa nunú minak ya-maishkam filisteo maawai tusa ayamjutkattawai”, tau.

Tutai Saúl chichajak:

“Kame takumek wetá, Tuke Pujuu kuitamjamkati”, tiuwai.

<sup>38</sup> Nuna tusa nii maaniaku nugkutaijin anugkug, atsejutai bronce najanamun atsemittak, nuigtu iyash ejatai jiju najanamun anugjauwai.

<sup>39</sup> Dutika anugjam David puyaja juki akachumtaijin nenuwai. Dutika wekagas dekapes, unuimatchau asa, shiig wekaemainchau atai, Saúlan chichajak:

“Wika junika wekaetanak unuimatjachu asan, shiig wekaemainchau dekapejai”, tusa ashí nii nugkuagbaujinak awimag ukukiuwai.

<sup>40</sup> Dutika ushujutaijin juki cinco kaya entsanmayan yajuak wampachjin chimpia kaya egkea nagkintaijin juki, Goliat pujamunum jeganatus weuwai.

<sup>41</sup> Nuniai Goliatchakam maaniaku ejamatain takaku Davitan jegaantatatus wegau. Nuniai niina uyumin maanitai aidau yajuak eemak wedau.

<sup>42</sup> Tuja Goliat Davitan diikma tsakatuch shigmauch jekemtin wajaknun wainkauwai. Nunik wainak puyatjusagkesh diischauwai.

<sup>43</sup> Tuja Davitak ushujutaijin takus wajau asamtai, dushikis chichajak:

“¿Wi yawakaitag numi jujuki minitam atinnush?”

Tusa tamawaik niina apajuimtaiji daajin pachis Davitan pegkegchaunum yumig-jauwai.

<sup>44</sup> Tusa nuigtushkam chichajak: “Juwi tantata maatjame, dutikan amina iyashminak chuweg aidaun, kuntin yukagtin aidaujui ayujatjai!” tiuwai.

<sup>45</sup> Tusa tama David ayaak:

“Amek wijai maaniasam puyag, nagki, nuigtu akentai imaan jukim miname. Tujash wika aminak minitjame Tuke Pujuu ashí senchigtin Israel aents aidaute emematin ainag nuna daajin. Nuadui ame niina aentsji aidaun wainkaush diyakum dushikiam nunak nii kuitamkattawai. <sup>46</sup> Yamai Tuke Pujuu mina yainkattawai amina maati tusa. Nuadui amina maan buukmin tsupigkattagme. Dutika ai amina iyashminak amina suntajum filisteo aidaun jinaatta nujai chuweg aidaun, kuntin yukagtin aidaujui yuwawagatui. Dutika ai ashí tikich nugkanmaya aidaun dekawagatui, Israel aents aidaute ememattaig Apajui ima makichkia nuna”, tau.

<sup>47</sup> Nuna tusa filisteo aidaun chichajak: “Yamai juwi tuwaka ijunutijum, Tuke Pujuu puyagjaig, nagkijaig uwemtikagtuchua nunú ashí dekkattagme. Juju maaniamua juka Tuke Pujuu. Nii inak yaimpaktatui, atum aidautigmin depetuk ijinatnume tusa”, tiuwai.

<sup>48</sup> Tusa tama Goliat Davidjai maaniasam jiiintukiuwai. Nunitai Davidchakam tupikatkiuwai igkunua maaniasam.

<sup>49</sup> Nunik wegak wampachinian makichik kaya juki kaya nagkimtainum egkea nagkia Goliatan nijayin tukuwai. Dutika tukum nijayinig kayan awajau, shushum iyaag tepesui.

<sup>50</sup> Aatus David Goliatan depetkauwai. Kaya egkea nagkimtaichijinig kaya egkea nagkia tuku mauwai. Dutika maa puyaja takakchau asa,

<sup>51</sup> tupikaki jegantun niina puyagjinak ukuinak jujuki awena mauwai. Dutika maa buuken tsupijuk jujukiuwai.

Nunú maanitan yacha etegtua mantuam, filisteo suntag aidaun pisajajui.

<sup>52</sup> Nuniagtai Israel aents aidaun Judá wegantu aidaujui maaniami tusag senchi unsumkag pataetukag, filisteo aentsu yaaktaji aidaun Gad Ecrógjai aajakua imanui mai mainakua jegawajui. Dutika ijinamu asa Shaaraim uwaki, yaakat Gad wetainum, nuigtu yaakat Ecrón wetainum aatus filisteo suntag jinauk tepetag jegawajui.

<sup>53</sup> Israel aents aidaun pataetukag shiyaku waketug filisteo batsamtaijin kaunawag dita wajiji aidaunak ashí yajutkajui.

<sup>54</sup> Dutikawagmatai David Goliata buuken juki Jerusalén ejegawajui. Untsu maaniaku jutajui aidaunak niina aakjin jukiuwai.

<sup>55</sup> Eke David Goliatjai maaniasam wegai, Saúl suntaja apuji Abner aajakua nuna iniak: “¿Aush yana uchijimpaita?” tau.

<sup>56</sup> Tusa iniam Abner ayaak:

“Mina apujuh, wika shiig dekatsjai”, tiuwai.

Tusa tama apu Saúl chichajak:

“Kame inimsam dekata”, tiuwai.

<sup>57</sup> Dutika David Goliata maa buuken tsupijuk juki minittaman, Abner igkug juki Saúlai ejentauwai.

<sup>58</sup> Dutikamtai Saúl iniak:

“¿Amesh yana uchijiyaitpa? ujatkata”, tau.

Tama David ayaak:

“Wika amina inakem Jesé Belégnumiaya nuna uchijiyaitjai”, tiuwai.

## 18

### *Jonatán Davidjai chichaman umikbau*

<sup>1</sup> David Saúljai chichas inagnakmatai, Jonatán Davitan shiig kumpauchiwi wajasui. Nuadui Davitan senchi anejaku niina iyashin aneemaina imatikas.

<sup>2</sup> Tuja Saúlchakam nunú tsawantaik mina takagtin ati tusa apusauwai. Dutikau asa niina apaji jenig awagkichui.

<sup>3</sup> Tuja Jonatán Davidjai dita umiktinjin tudayinak: “Dekas iik atakea duwish tuke kumpaji ami”, tiaju, wagki Davitan niina iyashin aneemaina imatikas aneau asa.

<sup>4</sup> Nuigtushkam Jonatán jáanchin nii nugkuagbaujin awimak, puyagjin, flecha nagkim-taijin, akachumtaijin aatus Davitan susauwai.

<sup>5</sup> Davitak filisteo aidaujui maaniasam tusa awemam maaniakug tuke depetmau asantai, Saúl suntag aidaun apuji adaikauwai. Dutikamtai suntag aidaun ashí shiig aneasajui, nunisag suntaja apuji aidaushkam shiig anentuidau.

*Saúl Davitan kajekamu*

<sup>6</sup> Dutika David Goliatan maamtai suntag aidau waketug miniagtai, tuké nunin asag Israel aentsu yaaktaji aidaunmaya nuwa aidauk apu Saúlan igkugtasag ashí jijnjajui. Nuninak shiig aneasag kantamainak, nantsemainak, pandero aidaun, platillo aidaun aatus awatuidau.

<sup>7</sup> Imatuinak:

“Saúl mil aentsun kajegke,  
untsu David kajegke diez mil aentsun”,  
wajaidau.

<sup>8</sup> Nunú Saúlan shiig awajkachui. Nuadui senchi kajeka chichaak: “David diez mil aentsun mae tusag ima senchi eme anentuinawai. Tuja minak ayatak mil aentsnak mae tujutuinawai. ¡Ima apu adaitanak awajsaje!” tau.

<sup>9</sup> Duwi nagkamas Saúl Davitan kajejujakui.

<sup>10</sup> Tuja kashinia nuadui Apajuí awemamu wakan pegkegchau Saúlan egkemtujui. Dutikam niina pujusa inamtaijin pujus imaanjaujai betek wajas pujau. Tuja David nuwi nijai pujus tuke arpan awatin asa awatak eketu. Nuniai Saúl nagkin takus eketu.

<sup>11</sup> Nunik eketu Davitan tanishjai ijumjan achia maatjai tusa aketkauwai. Dutikam tsuntsumun jimajá uwetjauwai.

<sup>12</sup> Dutika maachu asa Saúl Davitan ishamau, wagki Tuke Pujuu niina yaitsuk Davitan yayau asamtai.

<sup>13</sup> Nuadui nijai pujaun jikiuwai. Dutika mil suntag aidaun apuji adaikauwai. Dutika ai ditajai ijungag yujas maaniak wekaesati tusa. Dutikamu asa Davitak Saúla pujusa inamtaijinig pujujukchauwai, tuké maaniak wekagajakui.

<sup>14</sup> Tuja Tuke Pujuu yayamu asa nii takamujia duka ashí pegkeg aajakui.

<sup>15</sup> Nuadui Saúl Davitan ishamau, wagki Davitak Tuke Pujuu yayamu asa shiig takau asamtai.

<sup>16</sup> Nuadui Israel aents aidau Judá aents aidaujai Davitan ashí wakegaidau. Wagki maaniamu ataik, nii chichakmatai maaniawag depetmak kaunaidau asag.

<sup>17</sup> Makichik tsawantai Saúl Davitan chichajak:

“Mina nawantug emkau Merab puja nujai nuweatjame. Tuja nunú jukitag takumek Tuke Pujuu daajin filisteo aidaujai maaniam depetmakta”, tiuwai.

Nunak nigkik maumainchau dekapeak filisteo aidau maatnume tusa tiuwai.

<sup>18</sup> Tusa tama David ayaak:

“Wika wainkauchitjai, mina pataag aidaushkam wainkauch ainawai. Wisha nunin-nush ame apuitam ibaumin nawanjinash jumainkaitag”, tau.

<sup>19</sup> Tuja David nuwenatin tsawan jegamtai, nii anagkuayatak Davita sumainun yapajia, tikich aents Adriel yaakat Meholánmaya aajakua nuwi nawanjin sujukui.

<sup>20</sup> Untsu Saúla tikich nawanji Mical Davitan wakekauwai. Nuna Saúl dekaa shiig aneasui.

<sup>21</sup> wagki nii anentaimas: “Dekas auna susatjai, dutikan ame tsanugta tusan inagtajai. Dutika ai tsanugmatai, filisteo aidau Davitan maatnume”, tau asa tiuwai. Nuadui ataktu Davitan chichajak:

“Yamaik dekas mina nawantug jukittame”, tiuwai.

<sup>22</sup> Nuna tusa Saúl niina inake aidaun chichajak:

“Davitai wetajum nunikjum tikich antuinachbaunum ima nijaiag chichaakjum: ‘Mina nawanjun jukiti tusa apu shiig senchi wakejutpawai, nunia asamtai ayu tita, tuja niina inake aidautishkam ame eme anentaji’ titajum”, tiuwai.

<sup>23</sup> Tusa tima shimutka ujainam nii ayaak:

“Atumesh anentaimsakjuah, ¿wi wainkauch ujunauchitag juninnush apu nawanjinash jumainkaitag? Kame nii taunash itugkatjaki, ayu titajai”, tiuwai.

<sup>24</sup> Tusa timatai Saúla inake aidau waketug jegawag nuna Saúlan ujakajui.

<sup>25</sup> Nuna dekaa Saúl filisteo aidau Davitan maatnume tau asa:

“Nuwa juamunum aishmag tuke akikbau aina nuna akikmmainun filisteo aidau kati chuchuken cien tsupijug yajuak sujusti. Dutik iikmaktaj tajai filisteo aidau iina amupakua nuna iikatag tau asan, tawai tusajum David ujaktajum”, tiuwai.

<sup>26</sup> Tusa timatai Saúla inake aidau nuna Davitan ujakajui. Tusa ujakam Davidchakam nuna dutikan apu nawanjin jukitjai tau asa shiig aneasui.

Nunú tsawan nuwenatin jegatsaig,

<sup>27</sup> David niina suntajai aidaun yajuak wee doscientos filisteo aidaun kajegkajui.

Dutika tsupijug yajuak apun ejetuuwai, niina nawanjin jukitag tau asa. Dutikamtai niina nawanji Micaljai nuweauwai.

<sup>28</sup> Tujash Tuke Pujuu Davitan yayau asamtai, niina nawanji Micalchakam senchi aneau.

<sup>29</sup> Nuna diis Saúl Davitan yaunchuk ishamajakbaunak nagkaesau senchi ishamau. Nuadui tuke niina shiwaaji wajasui.

<sup>30</sup> Filisteo aents aidaun apuji aidaun, dita suntaji aidaujui Israel aents aidaun jeteagtaik, Saúla suntaji apuji aidaun nagkaesau David ima senchi depetmajakui. Nuadui Israel aents aidaun eme anentujaku ainawai.

## 19

### *Saúl Davitan maatag tibaun*

<sup>1</sup> Saúl niina uchiji Jonatágkan ashí suntaja apuji aidaujui inajui David maatajum tusa. Tujash Jonatágkak Davitan senchi aneau asa,

<sup>2</sup> niina apaji tibaun Davitan ujaak:

“Mina apag Saúl mantamatag tawai, nuniau asantai, kashin kashikmasam waipainat-saig ikam uumkata.

<sup>3</sup> Tuja wi mina apagjai ame uumka pujuttam nuwi ijusan minittajai. Nunikan mina apajun ausattajai mantamawai tusan. Tusa taish wajinjuttig nunikmatai ujaktajame”, tiuwai.

<sup>4</sup> Aatus tusa ukuak Jonatán Davitan ayamjak niina apaji Saúljai chichaak aatus tiuwai: “Apuh, amek amina inakem Davitak pegkegchau dutikatasamek wakemaitsume, wagki niig aminak makichkish pegkegchauk awajtamtsui, ayatak ame tabaunak betek uminuwe.

<sup>5</sup> David nii mantamnamain wajak Goliatan maabi. Duwi nagkamas Tuke Pujuu yaimpasmatai, filisteo aidaun depetkamji. Nuna David maamtaime shiig aneemium dusha, ¿wagka yamaish David pegkegchaun takamchaush maatagtame?” tiuwai.

<sup>6</sup> Tusa tama Saúl Jonatágkan chichajak:

“Apajui daajin umiktinun tajame, makichkish pegkegchauk awajkashtatjai”, tau.

<sup>7</sup> Tusa tima Jonatán niina apajijai chichasbaunak imatiksag Davitan ujakui. Nuadui Saúl pujamunum ejegauwai, dutikam Davitak yaunchuk Saúlan takajak pujujakbaunak nunisag takak pujau.

<sup>8</sup> Nunik kuashat tsawan pujau filisteo aidaujui ataktu maaniamu jegamtaime, David maania depetuk ijinam tikich aidaun pisajajui.

<sup>9</sup> Nuna dutika David apu Saúla pujusa inamtaijin wakitkiuwai. Nunik pujai makichkish tsawantai Saúlan wakan pegkegchauk Tuke Pujuu awemamu ataktu egkemtujuui. Dutikam nagki takus, David arpa awattai antak eketu,

<sup>10</sup> Davitan nagkin aketkau tanishjai ijumag achia maatatus. Tujash David menaun uwetjauwai. Dutikam nagkik tanishnum wajaui. Dutikam nunú kashia nuadui David tupikaki niina jeen weuwai.

<sup>11</sup> Nunik tupikakmatai Saúl niina aentsji aidaun Davita jeen shimutkag nuwi batsamtus tsawampainak maatnume tusa ishiakui. Tujash Davita nuwe Mical niina emtika ujaak:

“Yamai kashia duwi tupikakchaminig, kashin mantamawagtatui”, tiuwai.

<sup>12</sup> Nuna tusa Mical Davitan jeganum niimtaime ujaimunum nuni jiiki awemauwai. Aatus David tupikakiuwai.

<sup>13</sup> Dutika awema Mical apajuimtaime dakumka najanamun juki, niina pegakjin aepsauwai. Dutika chivo tsakata ujen juki, intashin apujtus jáanchi pempeag aepsauwai.

<sup>14</sup> Dutika pujai Saúl niina aentsji aidaun David achiktajum tusa ishiakbau, tsawajag David jinchatai utuawag achikagtatus waitin ijutuidau. Nuniagtai Mical waiti ujai jiinki ditan chichajak: “Davitak jak tepawai”, tiuwai.

<sup>15</sup> Nuna Saúl dekaa niina aentsji aidaun David wejittajum tusa ishimak aatus akatjauwai:

“¡Jak tepakuish ukukigpajum jiiki jukijum itagtuatajum maatajai!” tiuwai.

<sup>16</sup> Tusa tima shimutuk Davita jeen utsanawajui. Nunik diikma apajuimtaime dakumka najanamun chivo tsakata ujegai intashi buuken apujtusbau pempeajam tepaun wainakajui. Nunik waketug Saúlan ujakajui.

<sup>17</sup> Nuna Saúl antuk niina inaken makichkish awemauwai Mical utittajum tusa. Dutikam juki itaamtaime, apaji chichajak:

“¿Wagka mina shiwag jiiki awemakmesh aajamesh tsanujaume?” tau.

Tama Mical ayaak:

“Nii minak chichagtak, tupikakta tujutchakminig, maattagme tujutkui tupikamtikim-jai”, tiuwai.

<sup>18</sup> Aatus David tupikaki uwemajauwai. Nunik Samueljai chichastatus yaakat Ramá weuwai. Nuwi jegaa Saúl niina maatag tibaun ashí Samuelan ujakui.

Tusa ujaka Samueljai yaakat Naiot Ramá awa nuwi pujustatus weuwai.

<sup>19</sup> Davitak yaakat Naiot Ramá jegattak pujawai tabaun Saúl dekauwai.

<sup>20</sup> Nunik dekaa Davitan achiktinme tusa niina aentsji aidaun ishitkauwai. Nunik jegakma, profeta aidaun ijunag Apajuí chichamen etsejiagtai shiig etsegkatnume tusa nuna diyak pujaun waikajui. Nuniai ditanashkam Apajuí Wakani egkemtujajui. Dutikam ditashkam Apajuín pachis etsejuidaun.

<sup>21</sup> Nuna Saúl dekaa tikich niina aentsji aidaun David achiktajum tusa ishiakui. Tusa ishiakam jegattaman, Apajuí Wakani egkemtujem ditashkam nunisag etsejuidaun. Nunikagmatai kempatuma duwi ataktu aents aidaun ishitkauwai. Dutikamu ditashkam tikich aidaun betek núnidau.

<sup>22</sup> Nuniagtai Saúl nii jiintuki yaakat Ramá weuwai. Nunik yaakat Secú tutainum yumi pimutai múun aunum jegaa, Samuelash Davitjaish tuwi pujawa tusa iniimu. Tusa inimitai makichik aents auk yaakat Naiot Ramá jegattak pujawai tusa ukajui.

<sup>23</sup> Tusa ujakam nuwi Saúl weuwai. Nunik wetatman Apajuí Wakani egkemtujui. Dutikam chichá chichaakua yaakat Naiot Ramá jegattak awa nuwi jegauwai.

<sup>24</sup> Nunik Samuel pujamunum jega jáanch nii nugkuagbaujinak awimang, maaniaku jutajinashkam utsag wisu tsawai, kashishkam tuke Apajuí tita tibaun chichá wekagu. Saúl nuniku asamtai: "Saúlaske profeta wajase", tiaju ainawai.

## 20

### *Jonatán Davitan yaigbau*

<sup>1</sup> Yaakat Naiot Ramá jegattak awa nuwi pujau David Jonatán pujamunum weuwai. Nunik jegaa iniak:

"¿Wisha wajina takamsaja? ¿Tuwiya mina utugchatjush? Amina apa mina mantuatatus egatak wekaga nunash wisha ¿wajina pegkegchaunash takagsaja?" tau.

<sup>2</sup> Tusa tama Jonatán ayaak:

"¡Apajuí dakitawai mina apag mantamawai tusa! ¡Nuadui aminak mantamashtatui! Ame dekame mina apajuk nii dutikatag tabau ataik, nigkik dutikchauwe tuké ujatnuwe, nuadui makichkish mina ujattsukek dutikashtatui", tiuwai.

<sup>3</sup> Tama David ataktu chichajak:

"Amina apa shiig dekawai ame mina kumpajuitam nuna. Nuniau asa anentaimas dekas Jonatágnak ujakchatajai, ujaka ai wake besemag anentaimjai titatui, tuja Tuke Pujuu daajin amina daagminchakam tajame, wi mantamnatnuk namput wajatsui", tau.

<sup>4</sup> Tusa tama Jonatán iniak:

"Wajina dutikati tusamea wakegame nunú tujutta, nuna umigkatjame", tiuwai.

<sup>5</sup> Tama David ayaak:

"Kashin atatui tsawan nantu yama takau jiiistamtai. Nunú jiiistatin wi apujai ekemsan tuké yujumkan yujajai. Tujash nunikchattajai. Wait aneasa etsegtugkaipa ajanum uumkan pujuttajai, nunikan kashin pujusa tsawakun agkuantai tajai.

<sup>6</sup> Tuja amina apa mina pachitus inimpakuig: 'Maki makichik mijantin kuntin maa apeaku Apajuí ememattai jegau asamtai, wisha mina pataag aidaun Belén batsata nujai ijunjan jiiistamatjai tusa segatkuí awemamjai', tita.

<sup>7</sup> Tusa tamin ayu timataig shiig aneasan juwaktajai. Untsu nii kajeakui dekaattame dekas maatag tawapi tusam.

<sup>8</sup> Nuadui wait aneasam wi segajam nunú umigtukta. Wagki wika yainikmi tau asan ame mina kumpag ata tujutkumin, Tuke Pujuu daajin chicham umikmaiji. Tuja dekas mina utugchatjuitkuig, amina apai ejetutsuk amek dekas mantuata", tiuwai.

<sup>9</sup> Tusa tutai Jonatán ayaak:

"Wainka tuu anentaimipa, mina apag mantamatag takuig wi ujaktatjame", tiuwai.

<sup>10</sup> Tusa tama David niina iniak:

"Tujash ¿ya minash ujakattawa amina apash ame ujaamash wajintigki nunash?" tau.

<sup>11</sup> Tutai Jonatán ayaak:

"Weajai ajanum wemi nunika awi ujaktagme", tiuwai.

Tusa ajanum weajui.

<sup>12</sup> Nuwi jeganta Jonatán Davitan chichajak:

"Tuke Pujuu Israel aents aidaui Apajuí emematin ainag nuna daajin tajame. Kashin, nuniashkunuk kashin pujusa tsawakun mina apajush wajintig nuna dekaattajai. Tuja mantamatag tutsuk pegkegnun chichakuig, chichaman akuptuktatjame upaktinme tusan.

<sup>13</sup> Untsu mantamatag taun dekyatkun, wi amina agkan utugchat atsaunum tupikak uwemjati tusan ujakchamtaig, Tuke Pujuu suwimkan sujusti. ¡Tuke Pujuu mina apajun yaigkua dutiksag aminash yaimpakti!

<sup>14</sup> Nunak wika Tuke Pujuu daajin umiktinjun tajame. Tuja wi iwaku pujakuig wi amina yayajam dutiksamek, minash wait aneasam yainkatin ata. Tuja wi jakamtaishkam,

<sup>15</sup> Tuke Pujuu amina shiwaajum aidaun ashí ijinamtaish mina uchig aidauk tuke wait anenjatin ata.

<sup>16</sup> Ame nunú umishtaik, Tuke Pujuu amina pataim aidaulai suwimkan amastinai", tau. Aatus tusa Jonatán Davidjai chichaman umikajui.

<sup>17</sup> Nuadui Jonatán niina iyashi aneemaina imatikas Davitan aneau asa ataktu awagki niijai chichaman umikui.

<sup>18</sup> Nuna umika Jonatán Davitan chichajak:

"Kashin nantu yama takau jüstamtaí tsawan asamtaí, ame ekemsa yuum duka agkan juwaktatui, nunikmatai wajukamki tujamiagtatui.

<sup>19</sup> Tuja kampatum tsawan wetai, wagkag imanikash megkaekae tusag, aminí senchi anentamiagtatui. Nuniktin asamtaí ame yaunchuk uumkabium nuwi wetá nunikam kaya múun batsata nuna awin uumkam pujusta.

<sup>20</sup> Nuwi pujamin flechanash shiijash akenag taunig wajakin ame pujamunmanini kampatum flechan akenkattajai.

<sup>21</sup> Dutikan mina inakjun chichagkun: 'Flecha nagkimamu tikiju batsata nunú utita', takui dekattame. Nunikam anenjas jüinkita, wagki nunak utugchat atsutin asamtaí titatjai. Nunak Tuke Pujuu tutaya nuna daajin umiktinjun tajame.

<sup>22</sup> Untsu wi niina chichagkun: 'Flecha nagkimamu imau kakeka nunú diista', takuig dekaattame Tuke Pujuuwap weti tujutua tusam, nuniakum ¡tupikakta!

<sup>23</sup> Juju chicham umikag duka Tuke Pujuu ii emematin ainag nuna daajin tuke atin umikji", tiajuui.

<sup>24</sup> Aatus tusag Jonatán niina apaji pujusa inamtaijin wakettai, Davitak ikam kaya múun ayaunum nuna awin uumkatatus weuwai. Nuwi uumak pujai jüista jegamtaí apu yujumka yuwatatus mesanum jeganta ekemsauwai.

<sup>25</sup> Nii tuké ekemsa yutaijin tanisha tuntupek ekemsauwai. Nunikmatai Jonatán niina apajijai niinis ekemsauwai. Untsu Abner niina apajijai tsanias ekemsauwai. Tuja Davita ekemtaiji agkan juwakui.

<sup>26</sup> Nunú tsawantinig apuk Davidnak pachikchauwai, wagki pegkegchau takamsas eke iwagamchau asa, sacerdoté yuwinamunum pachiinak yumainchau asa, megkaekatai tau asa pachitsuk idaisauwai.

<sup>27</sup> Tuja kashinia duwi jüstabaunmashkam Davita ekemsa yutaijig nunisag agkan au. Nunitai Saúl niina uchiji Jonatágnan iniak:

"¿Wagka Jesé uchijish yau yujumak yuwamunum tachma nunisagkesh yamaish tache?" tau.

<sup>28</sup> Tusa iniam Jonatán ayaak:

"Davitak Belén wetajai tusa, wait aneasam tsawan sujusta tusa segatkui, ayu timajai.

<sup>29</sup> Nuna segatak aatus tujutmae: 'Mina pataag kuntuinu maa apeak Apajuín ememati-agtin asamtaí, mina yatsug taata tusa untsugkae', tujutmae. Nuadui juwi jüstamainun niina yachi emkau aidaulai Belégnun jüstamatjai tusa segatkui, ayu wetá timajai. Nuwi weu asa, jutijai ijunag yujumka yuwatsu nunak aniawai", tiuwai.

<sup>30</sup> Tusa tutai Saúl Jonatágnan shiig senchi kajejuk chichajak:

"¡Dukuji detsetkauwa! ¿Wi dekatsjak Jesé uchiji amina shiig kumpagmia nuna? amek amina kumpajum yayau asam dukujai datsanmain juwakugme.

<sup>31</sup> Nuadui Jesé uchiji eke iwaku pujaigkik, amek makichkish Israel aents aidaupujig achattame. ¡Nunikaig tachakmek aents ishiakam David achika itagtuata maatjai!", tiuwai.

<sup>32</sup> Tama Jonatán ayaak:

"¿Tujash wagkak niish mantamnati? ¿Niish wajina pegkegchaunash dutikae mantamnatag tusash?" tau.

<sup>33</sup> Tujash Saúlak Jonatágnan aitsuk wajaakug nagki jukiuwai niina maatatus. Dutikan nii anentaimas dekas mina apag Davita maatag tawapi tiuwai.

<sup>34</sup> Nunik kajeka jimag tsawanta nunú jüista tsawagbaunum yujumkan yuwatatus mesanum eketu wajaki yujumkanak yutsuk ukukiuwai, wagki niina apaji Davitan maatatus datsantan chichaju asamtaí.

<sup>35</sup> Tuja Davitak chichama uatkachagtimpash tusa dakamak pujai, kashin tsawag Jonatán niina inake datsauchijai David uumak pujamunum weuwai.

<sup>36</sup> Nunik jegantag niina inaken chichajak:

“Tupikaki weme flecha aidaun akenkamag nunú egakta”, tiuwai. Tusa tima nunú uchi tupikaki wegau, nuniai Jonatán flechan nunú uchi weamun emtika atushat nagkimauiwai.

<sup>37</sup> Nunú flecha nagkimamu tepaunum niina inake jeganmatai shiig senchi untuka chichajak:

“¡Flecha nagkimamag duka ame wajam nuna nagkaiki tepawai!” tau.

<sup>38</sup> Nuna tusa ataktushkam untuak:

“¡Wamak tupikakta, makichkish wajasai!” tau. Tuja nunú inakak flecha nagkimamun juki, niina apuji Jonatán itajauuawai.

<sup>39</sup> Tujash inakak Jonatán tuke aneas Davita ujaak tabaunak makichkish dekachui, wagki nunak Jonatán ima Davidjaig dekajakui. Nuadui nunú inakak mina apug nagkimtan unuimagtasampap nagkimua, tiuwai.

<sup>40</sup> Nuna ashí dutika Jonatán nagkimtaiji aidaun jegá ejegata tusa niina inaken susauwai.

<sup>41</sup> Dutika susam wakitkintai, David kaya ayaunum uumak pujau jiinki Jonatán wajamunum jeganta, niina eme anentus tsuntsuma kempatuma imania nijayin nugkan antigkui. Nuadui pagkunik kumpamdayinak egaanidau, nunik David butbaun mijaakui.

<sup>42</sup> Nunikmatai, Jonatán Davitan chichajak:

“Ii chicham umikuitag duka Tuke Pujuu daajin umikmaiji, nuniau asamtai puyattsuk wetá. Tuke Pujuu amina, tuja mina, nuigtu ii uchiji wegantu aidaunash kuitamkatin ati”, tiuwai.

## 21

*David Saúl maatag tama tupikakbau*

<sup>1</sup> Saúl maatag tama David tupikaki sacerdote Ahimélec pujamunum weuwai. Nunik minittaman sacerdote wainak puyatuk iniak:

“¿Wagka ima amekesh miname?” tau.

<sup>2</sup> Tama David ayaak:

“Chicham dekaata tusa apu tujutmatai minajai. Tujash wagkak minash awetime nunak makichk aentskesh dekamainchau ainawai. Nuigtushkam wajina dutikata tusag akuptukmae nunashkam dekamainchau ainawai. Untsu mina aentsug aidaunak yaja batsakmajai”, tiuwai.

<sup>3</sup> Nuna tusa sacerdoten iniak: “Namputchawame ¿aminush yumainush atsugtamuak? Ajutjamkuig cinco pag ajamjusta, untso pag atsakuig waji awa dukesh sujista”, tau.

<sup>4</sup> Tusa tama sacerdote ayaak:

“Pag wainka yutai aina duka atsugtawai, ayatak Apajuí anagkuamu sacerdote yutaya duke awai. Untsu atumes ijagmajum yujakjuminig nuna amamainaitjime”, tiuwai.

<sup>5</sup> Tutai David ayaak:

“Maaniatasa shimakuik nuwajaig tsanichu ainaji. Tuja yamaishkam nunisaik maaniatasa yujachiatku, ii jeen pujauti jijnjamiag duwi nagkamsa ijagma yujaji”, tiuwai.

<sup>6</sup> Tusa timatai pag yama najanamu Apajuí anagkuamu aidaun nunú tsawantin jega pegkegmanum sacerdote awaya ukuak, pag yaunchuk najanamu aidau atatman yajuaka ukukbaujin tikich yumainik atsau asamtai, nuna juki Davitan susauwai.

## 24

*David Saúlan wait anentak maachbau*

<sup>1</sup> Makichik tsawantin Saúl filisteo aidaun pataetuk wejiuwai. Nunik wejiu wakatkama Davitak En-gadi nugkanum uwejush pujawai tabaun dekauwai.

<sup>2</sup> Nunik dekaa ashí Israel aents aidaunmayan etegkeg tres mil suntaja yajuak, David niina aentsji aidaujai chivo batsamtaiji kaya múun pagkaju weajunum pujau asamtai wejiuwai.

<sup>3</sup> Nunik wea weakua uwija wenuken ijus waa aunum David niina aentsji aidaujai uumak pujamunum jegantui. Nunik juwimpap uumak pujawa tachau asa, wakenum wetatus nunú waanum waigkui,

<sup>4</sup> nunik waittaman Davita aentsji aidau wainkag Davitan ashishmas chichajuinik:

“Tuke Pujuu amina chichagtamak: ‘Shiwajumnak amina idaitustatjame’, tujabauwa nunú betek uminui. Nuadui ame itugkatagtame dutikata”, tuidau.

Tusa tama David wajaki diipas jegantun Saúla jáanchji jawajin tsupijuk jukuiuwai.

<sup>5</sup> Nuna dutikashkam dekas aikmainchaunap aikaja tusa awake anentaimjauwai.

<sup>6</sup> Nuniak niina aentsji aidaun ashishmas chichajak:



“Wika apunak maumaitsojai, wagki niinak Tuke Pujuu apu ati tusa etegkamun asamtai”, tiuwai.

<sup>7</sup> Tau asa niina aentsji aidaun, Saúl maawaigpa, tusa tiuwai. Tusa mauntsuk idaisamin nunú waanmaya jiinki weuwai.

<sup>8</sup> Nunik jiinki wegaig, David nunú waanmaya jiinki untsamak:

“¡Apuh, mina apujuh!” tau.

Tutai Saúl ayampa diyau, dutikam David niina eme anentus tikishmag nijayin nugka antig pujusui.

<sup>9</sup> Nunik pujus chichajak:

“¿Wagka apuju tikich aents upainak, David pegkegchau awajtamkatag tawai tusa upainakuish dusha antugme?”

<sup>10</sup> Amesh yamai dekaume Tuke Pujuu aminak wi pujamunum awetabiu aig, amina mautan dakitau asan tsagkujamjame. Wi anentaimesan Tuke Pujuuwap apu ati tusa etegkauwaita tau asan idaisajame.

<sup>11</sup> “Juu wi takakag juu diista. Juka ame jáanchjum nugkuajam nuna jawajin tsupika jukimjai. Nuna tsupikmag nuaduik aminak maumain awajkamjame, tujash dutikashmajame. Nuadui dekamainaitme, wi amina pegkegchau awagmatan dakitag nunú. Tuja nuigtush pegkegchaunak takagchawaitjame, dutikamaitkum mantuatasamin aintame. <sup>12</sup> Dekas Tuke Pujuu diigmas, yakita pegkegchaush nuna tujamti. Untsu wika aminak makichkish maashtatjame.

<sup>13</sup> Yaunchuk tibau awai: ‘Aents pegkegchauk pegkegchaunak takawai’, nuadui wika aminak tuke maumaitsojame.

<sup>14</sup> Nuigtushkam wika eme anentsa diitaigkesh atsujai. Nuninaitag nunin aish, amesh ya pataetukmea ibau apumesh pujusa inamtaijum ukuakmesh, imajui uwegshunmash taume. ¡Amek auk yawá nujantai jau, nuniachkush sugku maatasamin ainmaina numamtin pataetugkum tsawan megkaeme! Makichkish aan wekaemainchau aniamine.

<sup>15</sup> Nuadui wika: ‘Yakita pegkegchaush nuna diis Tuke Pujuu tujamti’, tajai. Tuja nii mina takatjun diigtus duwi ame mantuatag tame nunashkam ayamjutkati”, tiuwai.

<sup>16</sup> Tusa inagnakmatai Saúl untsamak:

“¡Amekaitam Davitah, mina uchijuh, ya minash tujutua!” tusa Saúl buutu.

<sup>17</sup> Nunik buutki chichajak:

“Ame tame duka dekaske, wi amina maatasamin ainmaitkum, ame mina pegkegnum iiktukume.

<sup>18</sup> Yamai dekamtijuaume ame mina pegkegnum yaintamin nunú. Wagki Tuke Pujuu maati tujabiu aig, ame mina mantuachume.

<sup>19</sup> Makichik aents niina shiwaajin igkuakug, tuke pegkegchau awajkatatus wakenai. Tuja amek nuninchau asam mina mantumain ayatkum, wait anenjuju asamin, ¡Tuke Pujuu aminash yaimpakti tajame!

<sup>20</sup> Yamaik shiig dekaikai ame dekas apu atatamin nuna. Ame apu wajasamin, Israel aents aidauk amejai nuni nagkaemas emkagatui.

<sup>21</sup> ¡Nuadui mina uchig aidau tuja nuna uchiji aidaushkam ijina emegkagchatnaitkumek, yamai Tuke Pujuu daajin dutikashtatjai tusamin tujutta!” tiuwai.

<sup>22</sup> Tusa segamin nii ayaak: “¡Ame segatamin nunak dekas Apajui daajin umiktatjai!” tiuwai. Tusa timatai Saúlak niina pujusa inamtaijin wakitkiuwai. Nunikmatai Davidchakamin niina aentsji aidaujai dita yaunchuk uumak pujusbaunum shiyakajui.

## 25

### *Samuel jakamu*

<sup>1</sup> Samuel jakamtai ashí Israel aents aidau ijunag buutiaju ainawai. Nunikag Samuela iyashin jukiag yaakat Ramá nii akiinamu aajakua nuwi ukusajui.

## 28

### *Maaniamunum atutkati tusa Aquish Davitan ipaamu*

<sup>1</sup> Makichik tsawantai filisteo suntag aidau Israel aents aidaujai maaniawagtatun umintsajui. Nuniagtai apu Aquish Davitan chichajak:

“Ame amina suntajamin aidaujai maaniamunum atujatkatit tusan tajame”, tiuwai.

<sup>2</sup> Tusa tama David ayaak:

“Ayu, kame atuktagme. Yamai wainkattame juu amina inakem David dutikatta nunú”, tiuwai.

Tutai Aquish Davitan ayaak:

“Atujatkatit asamin, suntag mina kuitamjin aina nuna apuji adaikatjame”, tiuwai.

*Saúl makichik nuwa anentaimas dekamnun iniasbau*

<sup>3</sup> Nunú tsawantinig Samuelak yaunchuk jakau asa atsjakui. Nii jakamtai Israel aents aidau senchi buutiaju ainawai. Nunikag nii akiinamunmak yaakat Ramá ukusajui. Tuja aents anentaimas dekamnin aidau, nuigtu jakau wakanin untsujuk chichau aidau aatus Israel aents aidau nugken batsatunak Saúl ashí jiig utsagkui.

<sup>4</sup> Dutikau ai makichik tsawantai filisteo aidau ijunjajui. Nunikag uminas yaakat Sunem jegawag nuwi aakmag batsamas maaniaiwagtatus shiyakajui. Nuninai Saúlchakam niina suntaji Israel aents aidaujai muja Guilboa tutainum ijunjajui.

<sup>5</sup> Nuwi wajas diikma filisteo aidau aakmag batsatun wainkauwai, nunik shiig senchi ishankauwai.

<sup>6</sup> Nuniak Tuke Pujun iniasui. Tujash Tuke Pujuk kajanmagkesh, nuniachkush Urim tutai aajakua nuigkish, nuniachkush profetayaigkish ujakchauwai.

<sup>7</sup> Dutikam niina suntaji apuji aidaun chichajak:

“Wetajum nunikjum makichik nuwa jakau wakanin untsuka chichau aina nunin egaktajum. Dutikawagmin ¡Apajuish wajina dutikati tujutuaki nuna iniasan dekatjai!” tiuwai.

Tusa tutai dita ainak:

“Endornum aents jakau wakanin untsuka chichau makichik nuwa pujawai”, tusa ujakajui.

<sup>8</sup> Tusa ujakam Saúl nuna wejak dekajuawainum tusa tikich jáanchin nugkujui.

Nunik jimag aents uyuntsam kashi nunú nuwa pujamunum weuwai. Nunik jegaa chichajak:

“¡Wait aneam aents jakau wakani untsugtukta, iniasan dekaatjai wajinjuttig!” tau.

<sup>9</sup> Tama nuwa ayaak:

“Aents anentaimas dekamnin aidau, nuigtu jakau wakanin untsuka chichau aidau juwi batsatun Saúl jiija utsagmaya nunú ame dekam jamah. Nunin aish ¿wagka wi bakumamainush, tuja ameshkam bakumamainush tuu wekaeme?” tau.

<sup>10</sup> Tutai Saúl Tuke Pujuu daajin niina chichajak:

“¡Ishamkagtukaipa utugchatak atsgtamtatui, Tuke Pujuu daajin tajame!” tiuwai.

<sup>11</sup> Tutai nuwa ayaak:

“Tujash ¿yana wakanin untsugtukti tusamea tame?” tau. Tama:

“¡Samuela wakani untsugtukta!” tiuwai.

<sup>12</sup> Tusa tima Samuela wakanin untsuka wainkauwai. Nunik senchi untsamak Saúlan chichajak:

“¿Wagka minash tsanujaume? ¡Ame Saúlaitam jamah!” tau.

<sup>13</sup> Tutai Saúl chichajak:

“Ishamkagtukaipa, ¿ya wainkaume?” tau. Tusa tama:

“Makichik Apajuí nugkaya nayaimpinum waun wainjai”, tau.

<sup>14</sup> Tutai nii iniak:

“¿Wajukuita niimesh?” tau. Tama nii ayaak:

“Auk makichik aishmag múuntuch jáanchin nugkuajui”, tau. Tusa tutai Samuelnap dekas wainkae tiuwai. Tusa Samuelan eme anentus tikishmag tsuntsama nijayin nugka antig pujusui.

<sup>15</sup> Nunik pujus iniau. Tusa iniam Samuel Saúlan ayaak:

“¿Wagka minash taati tusamesh waitkajame?” tau. Tama Saúl ayaak:

“Filisteo aidau jetetainakui shiig senchi ishankagtajui, tuja Apajuishkam idaituse. Nuadui wi untsuaish profetayaigkish, nuniachkush kajanmagkesh aigtsui. Dutijakui wisha wajina dutikmainaitja nuna tujutti tusan amina untsukjame”, tau.

<sup>16</sup> Tutai Samuel ayaak:

“¿Tuke Pujuu kajegtamak idaitamas, amina shiwaajum wajasa nuniaish wagka minash ininme?

<sup>17</sup> “Tuke Pujuu amina idaitamsatnun pachis mina ujatkamtai wi amina ujakuitjame. Nuna umiak ame apuitam nunak atanjamki amina kumpajum Davitan susae,

<sup>18</sup> wagki nii inapagbau umigkachu asamin. Nuigtushkam Amalec aents aidau ashí ditá tagkuji aidaujai ijinatajum tujabau umikchawaitme. Nuadui Apajuí amina idaitamsa nunak dutijamae.

<sup>19</sup> “Nuigtushkam Israel aents aina nunak filisteo aidau depetuk ijinati, dutikak aminashkam mantamatnume tusa idaitamsattawai. Tuja kashin ame, amina uchijum aina nujai jinaattagme. Tuja Israel aents aidau batsata nunashkam filisteo aents aidau depetuk achija yajuaktinme tusa Tuke Pujuu idaisae”, tiuwai.

<sup>20</sup> Tusa tama Saúlak nuna antuk puyatuk, esajam wajakin jaka iyantui. Wagki nunak makichik tsawan, nuigtu makichik kashi yujumkan yutsuk wekagu asa nunikui.

<sup>21</sup> Nunik Saúl jake iyanmatai, nunú nuwa dekamin jegantun chichajak:

“Wika amina inakminuk wi mantamnamainun dekyatkun, amina umiju asan ame segatbaunak ashí umikjai.

<sup>22</sup> Nuadui wi titatjam nunú ameshkam umikta: Yujumkan amasmatai yuwata, nunika ichichmamjam weminum”, tiuwai.

<sup>23</sup> Tusa tamash Saúlak yujumak yutanak dakitau. Nunitai suntaja apuji aidau, dekas yuwata tusa nunú nuwajai ijuntu jag imatju idau. Ima imatjam ayu tiuwai. Tusa nugká tepau nantaki pegaknum jeganta ekemsauwai.

<sup>24</sup> Nunik eketai nunú nuwa makichik toro tsakat duwejam niinu pujaun mauwai. Nuigtushkam harinan lewadurajai pachimtsuk naneja pagkan inajuauwai.

<sup>25</sup> Nuna umika juki Saúlan niina suntaji aidaujai susauwai. Dutikam nuna yuwawag akatmam jag nunú kashik dita aakjin waketjajui.

## 31

*Saúl niina uchiji aidaujai ijinamu*

<sup>1</sup> Israel aents aidau Guilboa mujanum batsatun filisteo aidau jetekag amuinam pisajajui.

<sup>2</sup> Nunik pisajagmatai, filisteo aidau Saúlan niina uchiji aidaujai pataetukajui. Dutika amaigkag kampatum uchiji: Jonatán, Abinadab, Malquisúa aatus aajakua nunak ashí kajekajui.

<sup>3</sup> Dutika ukuinak Saúlan tuwajuk flecha nagkimin aidau nagkiawag ijuajui. Dutika ijum shiig senchi ishamkauwai.

<sup>4</sup> Nuniak niina uyunak maanitai aidaun yajuak takus wekaenun chichajak:

“Puyagjum jukim mantuata, filisteo pegkegchaun takau aina nunú kaunawag mantu-awag dushiktujainum”, tau.

Tutai: “¡Atsa wika maashtatjame!” tiuwai. Nunak ishamau asa tiuwai. Tama Saúl niina puyagjin juki awajai iyaak awagkemtukui.

<sup>5</sup> Nunik jakamtai niina uyunnushkam nunisag niina puyaginak awagkemtuk jakauwai.

<sup>6</sup> Nunik niina uchiji kampatum, tuja niina uyunin aatus ashí niina aentsji pisagchaju aidaujai jinawajui.

<sup>7</sup> Nunikagmatai tikich Israel aents aidau muja awin batsatu tuja Jordágka amain batsatushkam Israel aidauk filisteon ishamainak pisajaje. Tuja Saúlnak uchijijai amukaje tabaun antukag, yaaktajin ukuinak ditashkam pisajajui. Nunik pisajagmatai filisteo aidau nunú yaakat aidaunum dita akiinawag batsamsajui.

<sup>8</sup> Nunikag kashinia duwi filisteo aidau aents jinaun wajiji aidaun yajutkagtatus shimutuk yujagkama Saúla iyashi, uchiji iyashi aidaujai muja Guilboanum batsatun wainkajui.

<sup>9</sup> Dutika wainkag Saúla buuken tsupijuk jujuinak, tuja niina maanitaiji aidaunashkam yajutkajui. Dutikawag ashí ditá yaaktaji aidaunum, ditá apajuímtaiji jegamjukkabau aina nuwi aents aidau ijumjajum, Saúlak jakae tusajum etsegkatajum tusa akatmamag ishiakajui.

<sup>10</sup> Nuna dutikawag duwi pujus Saúla maanitaiji aidau yajuakbaun ditá apajuímtaiji Astarté jegagkamunum awayawajui. Tuja niina iyashinak, uchiji iyashi aidaujai jukiag yaakat Bet-san tutai peejamunum nuwi nenajag idaisajui.

<sup>11</sup> Nuna dutikawagbaun Israel aents aidaun Galaad nugkanum yaakat Jabes batsamin aidau dekawajui.

<sup>12</sup> Nuna dekawag aents wajuu aidau etegdaijag jijnag kashi shima shimakua yaakat Bet-san jegawajui. Nunikag Saúla iyashin, uchiji iyashi aidaujai nenajam aun kuwaki yajuakag Jabes egegawajui. Dutikawag nuwi apeawajui.

<sup>13</sup> Untsu ukunchi aidaun jukiag numi wajautin ukusajui. Dutika ukusag wake besemag dekapenak, siete tsawan yujumka yutsuk ijagmawag batsamsajui.

## Samuel pachisa jimaja nunú agagbau 2 Samuel David apu wajas inamjamu

(1—8)

*David Saúl jakamun dekaamu*

<sup>1</sup> Saúl jakamtai pujusa, David Amalec aents aidaujai maania depetuk wakitki yaakat Siclag jegauwai. Nunik nuwi jimag tsawan pujusui.

<sup>2</sup> Nunik pujai kumpatum tsawanta duwi, makichik aents Saúla suntaji wake besemag dekapeak, jáanchjin japiki ichig nugka yukukuntun buuken yukumag nugkak wajasa David pujamunum yaakat Siclag jegauwai. Nunik jegá Davitan eme anentus tikishmag tsunsuma nijayin nugka antig pujusui.

<sup>3</sup> Nunitai David niina iniak:

“¿Tuwiyamea miname?” tau.

Tama nii ayaak:

“Suntag Israel aents aidau batsatun filisteo aidau jeteam maaninakui tupikakmajai”, tau.

<sup>4</sup> Tutai David iniak:

“Tujash wajukawagmae nunú wait aneamam wamak ujatkata”, tau.

Tama nii ayaak:

“Israel aents aidautin depetamkagmatai, kuashtati pisagmaji. Tuja jinuidaushkam asagmae. Untsu Saúlak niina uchiji Jonatágjai mai jakame”, tiuwai.

<sup>5</sup> Tutai David iniak:

“¿Wajuk amesh dekame Saúl niina uchiji Jonatágjai jakaush?” tau.

<sup>6</sup> Tama nii ayaak:

“Wika tuke aneamam niimkun muja Guilboanum wekaemajai. Nuniai suntag filisteo aidau caballonum, carronum aatus Saúlan jegantattak shimutiagmae. Nuninai Saúlak niina nagkijin achimak wajame.

<sup>7</sup> Nunik wajau ayampa niimsatakama waituk untsugkui, aikmajai.

<sup>8</sup> “Tusa aika ai: ‘¿Amesh yaitpa?’ tujutkui: ‘Wika Amalec aentsuitjai’, timajai.

<sup>9</sup> Tai nii chichagtak: ‘Wait aneamam mantuata, jakatag takunush jamain dekapeatsjai’, timae.

<sup>10</sup> “Tujutkui jeganta diikman ashí jaka tepakui, tsagaumainchau asamtai maamjai. Dutikan atsejutaijii\* patakumtaijijai jujukin juwi itaajai, apujuh”, tiuwai.

<sup>11</sup> Nuna David antuk wake besemag dekapeak jáanchjin japiki ichigkui, tuja tikich aents nijai batsatushkam jáanchjin japiki ichigkajui.

<sup>12</sup> Nunikag Saúl niina uchiji Jonatánjai jakau asamtai, buutuinak wake besemag batsatu. Tuja niugtushkam Tuke Pujun suntaji Israel aents aidau jinawagbaun anen-taimtusag buutuidau. Nuninak yujumka yutsuk ijagmawag batsataig etsa akaikiuwai.

<sup>13</sup> Nuna nagkankag, David nunú aents chichama etsejak taun iniak:

“¿Amesh tuwiympaitpa?” tau.

Tama nii ayaak:

“Wika Amalec aentsuitjai, nuniayatkun Israel aents aidaujai pujajai”, tau.

<sup>14</sup> Tutai David senchi untsamak chichajak:

“¿Amesh wajuakeamea ishamsukesh Tuke Pujuu apu ati tusa etegkamush Saúlash maamume?” tau.

<sup>15</sup> Tusa tamawaik, niina aentsji aidanmayan makichik untsuka itan, anú aents maata tusa inajui. Tusa tima mauwai.

<sup>16</sup> Dutika mautai David chichaak:

“Tuke Pujuu apu ati tusa etegkamum maamujum etsegtuma wekaesam, jutika maam ame. Amek amina utugchatjuminig mantamname”, tiuwai.

*Saúl Jonatágjai jakamtai buutuinak wake besemag batsamsagbau*

<sup>17</sup> Saúl niina uchiji Jonatágjai jakamunum David wake besemag pujus kantamauwai.

<sup>18</sup> Nunú kantamtain ashí Judá wegantunmaya aidau jintintuatajam tusa inamjauwai. Duka papii Jasher† tutainum agagbau aajakui. Duka aatus tawai:

\* **1:10** “Atsejutaijii” tawa nunak, wainka atsejutai aina nuna taku tatsui. Duka apu “atsejutai corona tutai oro najanamum aajakua” nuna taku tawai. † **1:18** “Jasher” tawa nunak, “pegkeg” taku tawai. Tuja aents pegkeg aidau maaniau aina nuna daajinak nunú papiinum agatkamu aajakui.

19 “İsrael aents aidauwah,  
 “Amina imanijunea nunú mujanum tsainkae!  
 İWajukaya aents wajju  
 aidaush imanikash jinawaje!  
 20 Nunú pachisjum yaakat  
 Gadnum etsegkaigpajum,  
 tuja yaakat Ascalógnumashkam etsegkaigpajum,  
 nuna antukag filisteo nuwa  
 pegkegchaun takau aina  
 nunú, shiig aneenak nantsemawainum.

21 “Guilboa mujajiya nuwig,  
 ataktu awagkig yumik yutugchatnai,  
 nuigtush sajattanakesh sajatkashtinai.  
 Tuja nunú mujanmak aents aidauk ataktuk  
 jinashtin ainawai, wagki nunú mujanum  
 Israel aents waju aidaun makichkish  
 ayamjumamainchau ijinawaja nuadui.  
 Israel aents aidaun  
 wajuujig nunú mujanum megkaekae.  
 Nunú mujanum Saúla maaniaku eJamataiji‡  
 winchamtin aajakua duka bushapaje.  
 22 Saúla puyagjig, Jonatágka puyagjijai  
 shiwag dekas waju aidaun numpen  
 wiyajijai maatug waketin ayi.  
 23 İSaúlak Jonatágjai mina kumpag  
 shiig aneetaig ainawai!  
 İUkukuin nagkaesau amaimainchau,  
 leónka senchijin nagkaesau ainawai!  
 Iwaku pujusash kanakchajua nunisag  
 jainakush mai jakaje.

24 “Israel nuwa aidauwah,  
 atumek jáanch shiig pegkeg  
 yamakaitkau lino apagbaun,  
 nuigtu nugkutai orojai najanamun  
 Saúl amasmatai, nugku ayujum nunú  
 anentaimtusjum buuttajum.  
 25 İChah, aents kakajam aidaush wajukaya  
 imanikash maaniamunmash jinawaje!  
 İJonatágnashkam mujanum maawaje!  
 26 Jonatágkah, amek mina  
 yatsugjai betek ayume.  
 Nuadui aminí anentaimkun,  
 İShiig senchi wake besemag dekepeajai!  
 İAme minak shiig kuitamjukuiteme!  
 İWi anentaimsamak,  
 ame mina kuitamjukuitem duka  
 nuwa anenken nagkaesauwai!  
 27 İChah, aents kakajam aidaush wajukaya  
 imanikash maaniamunmash jinawaje!  
 İShiwag aidaun, iinia suntag  
 maanitan yacha aidaun amukaje!”  
 Tusa David juna aatus kantamauwai.

## 2

*David Judá wegantu aidaun apuji wajasbau*

1 Saúl Jonatágjai jakamtai, David ditan eme anentus kantamjuawa nunú nagkaemak-  
 matai pujus Tuke Pujuun iniak:

‡ 1:21 “Maaniaku eJamataiji” tawa nunak “escudon” taku tawai.

“¿Tuke Pujuuwah, wi mina aentsug aidaujai filisteo nugken pujag nunash, Judá wegantu aidauun yaaktajinish pujumainchaukaitag?” tau.

Tutai Tuke Pujuu ayaak:

“Ehe, wemainaitme” tiuwai.

Tama David iniak:

“Tujash ¿tuu yaaktanum wemainaitja?” tau.

Tutai Tuke Pujuu ayaak:

“Yaakat Hebrón wetá”, tiuwai.

<sup>2</sup> Tusa tima David niina nuwe jimag: Ahinóam yaakat Jezreelnumia aajakua nuna, Abigail waje Nabala nuwe yaakat Carmel pujujakua nujai mai juki weuwai.

<sup>3</sup> Nunik wegak nuigtushkam niina kumpaji suntagi aidauun patayi aidaujai yajuakui. Nunik yaakat Hebrón jegawag, nuna yantamen tikich yaakat ayaunum nuwi batsam-sauwai.

<sup>4</sup> Nuwi pujuttaman Judá wegantu aidau ujumak kautuawag, aceiten juki Davitan buuknum nijakag apu adaikajui. Davitak Judá wegantu aajakui.

Apu adaikam pujai, Galaad nugkanum yaakat Jabes batsamin aidau Saúla iyashin juki ukusaje tabaun dekauwai.

<sup>5</sup> Nunik dekaa ujumak aents chichama etsejin aidauun akateg ishiakui. Nunú jegawag chichama etsejuinak:

“Aatus apu David tawai: ‘Atumek Saúl wait anentuidau asajum niina iyashi jukijum ukusu asagmin, Tuke Pujuu pegkegnum yumigsatnume. Nunú dutikaujum duka dekasshiig pegkeg aikaugme. Atumek dekasshiig pegkeg ainagme.

<sup>6</sup> Nuigtushkam Tuke Pujuu wait anenjamak makichkish kajimatjamtsuk kuitam-jamkatnume tajai. Tuja wishakam atum pegkeg dutikau asagmin shiig kuitamkattajime.

<sup>7</sup> Nuadui ichichmamajum wajiuj wajastajum, wagki atumi apuji Saúl jakau ataish Judá wegantu aidau mina apu adaitukaju asamtai, wi yamaik atumi apujig atatjai’ tujamui”, tiuwai.

## 5

*David ashí Israel aents aidauun apuji adaikamu*

*(1 Cr. 11.1-3)*

<sup>1</sup> Davitak apu adaikam yaakat Hebrón pujai, makichik tsawantai Israel wegantu aidauun apuji aidau nijai chichasagtatus shimutkajui. Nunik jegajuawag chichajuinak:

“Jutii aidautik ametam nunú wegantu ainaji,

<sup>2</sup> Israel aents aidauk Saúl apu pujaig amina chichamjumin antugtamas maaniawag waketug kaunianme. Tuja Tuke Pujuushkam aminak Israel aents aidauun apuji wajas ditan kuitamkati tusa tujabiuwai”, tiajui.

<sup>3</sup> Nuna tusag Hebrógnum ashí Israel wegantu apuji múun aidau Davidjai chichasajui. Nunikagmatai David ditajai Tuke Pujuu daajin chichaman umikui. Dutikamta dita Davitan aceiteyai buuknum nijakag Israel aents aidauun apuji emajui.

<sup>4</sup> Davitak apu wajas inamtanak treinta mijanji ajamu asa nagkamauwai. Tuja ashí ijumjamak cuarenta mijan inamjauwai.

<sup>5</sup> Judá wegantu aidauun apuji wajasag yaakat Hebrógnum pujus siete mijan nuigtu jimaituk inamjauwai. Untsu ashí Israel aents aidauun apuji wajas yaakat Jerusalén pujus treinta y tres mijan inamjauwai.

*David maania depetmak yaakat Jerusalégkan jukimu*

*(1 Cr. 11.4-9)*

<sup>6</sup> Apu adaikam pujus David niina aentsji aidauun yajuak, nunú nugkanum Jebús aents aidau yaakat Jerusalén batsatu asamtai, maaniatatus shiyakajui. Jebús aents aidauk Davitak niina aentsji aidaujaig yaaktanak utuachagtatui tusa chichajuinak: “Atumek makichkish juwig wayashtatjume, atumnak aents wainmachu aidau, shutuu aidaujai depetamak awaktamjagtatui”, tuidau.

<sup>7</sup> Tujash Davitak niina suntaji aidaujai depetmakag apu pujusa inamtai kakajus utumainchau Sión tutai aajakua nuna utuawajui. Dutikawag, duwi pujus nunú yaaktanak, “Davita yaaktaji” tuu adaikau ainawai.

<sup>8</sup> Jebús aents aidaujai maania depetuk Jerusalégka jukittak pujusa David chichaak: “Aents wainmachu aina duke, shutuu aidaujai uwakattawai tujamainawai. Nuniakuig ima nunin aidauish itugkatjiki, yumi saetai taimua nuni utuajum kajegtajum, ditanak shiig senchi kajejai”, tiuwai. Nuadui makichik tibau awai: “Wainmachu aidaukesh, tuja shutuu aidaukesh Tuke Pujuu jee pegkegma nuwig wayashtin ainawai”, tibau.

<sup>9</sup> Duwi pujus David, niina nuwe aidau, uchiji aidau, suntaja apuji aidau aatus nuwi wayawag batsamsajui. Nuwi pujus nuna yaakta daajin “Davita yaaktaji” adaikauwai. Dutika duwi pujus niina aentsji aidaun yaakat peejatajum tusa inajui. Tusa timatai nain wajajunum nagkama peegkeg jukiag apu David pujusa inamtaijin inagnakajui.

*Apu Hiram niina aentsji aidaun Davitan ishitkamu*

<sup>10</sup> Davidnak Tuke Pujuu ashí senchigtina nunú yaijakui. Dutikamu asa Davitak kashi kashinig nuni nagkaemas tikich aidaun nagkaesau wajas wegau.

<sup>11</sup> Nuadui yaakat Tironmaya apu, nigki wee chichamainun, dekas niina aentsji tikich nugkanum apu chichamen etsegkatin adaikamu aidaun Davitan ishitkawai. Dutikak nuigtushkam aents numi dakaja jegamin aidaun, kaya pakama jegamin aidaujui ishitkawai. Dutikak setug dakagbau aidaunashkam ishitkawai. Nujai David pujusa inamjatnun jegamjukajui.

<sup>12</sup> Dutikawagmatai David anentaimas: “Dekas Tuke Pujuuwap Israel aents aidaun apuji ati tujutne. Nii Israel aents aidaun aneau asampap mina yainkui tikich aidaun nagkaesau wajasja”, tiuwai.

*Davitan tikich uchiji aidau*

<sup>13</sup> David Hebrón pujau Jerusalén jegá pujus, nuwiya nuwa aidaun nuwatjauwai. Nuigtushkam ikaa nuwe aidaun nuwatjauwai. Nunú nuwa aidaunum uchijin, nawanjin aatus kuashat akigkui.

<sup>14</sup> Tuja niina uchiji aishmag Jerusalégnun akiinkau aidauk: Shamúa, Shobab, Natán, Salomón,

<sup>15</sup> Ibhar, Elishúa, Nefeg, Jafia,

<sup>16</sup> Elishama, Eliada, Elifelet aatus aajakui.

*David filisteo aents aidaun depetuk ijinamu*

<sup>17</sup> Davitan Israel aents aidau apuji adaikaje tabaun filisteo aidau antukajui. Nunikag suntag aidau niina egainak shimutkajui. Nuna David dekaa niina suntaji aidaujui kaya múun waa aidaunum nii uumka uwemtaijin weuwai.

<sup>18</sup> Nunik weu ai, filisteo aidauk muja nagkatkamua paka wegaju Refaim tutainum kautuawajui.

<sup>19</sup> Nunikawagmatai nuna pachis David Tuke Pujuu iniak:

“¿Filisteo aidau kauna nunash jetemainkaitag? tuja wi jeteakuish ¿yainkattamek?” tiuwai.

Tusa iniam Tuke Pujuu ayaak:

“Ehe, amina suntajum aidaujui jetekta, wi atumnak yaigtatjime depetmaktinme tusan”, tiuwai.

<sup>20</sup> Tusa tima David niina suntaji aidaujui shimutuk Baal-perazim\* jegawajui. Nunik nuwi filisteo aidaujui maaniawag depetkajui. Dutika chichaak: “Shiwag minidaun Tuke Pujuu namak chichigmajai betek tajaka utsagke”, tiuwai. Nuna tusa nunú nugka daajin Baal-perazim adaikauwai.

<sup>21</sup> Tuja filisteo aidauk pisainak dita apajuimtaiji aidaun utsag ukukiajui. Dutikamun David niina suntaji aidaujui yajuakajui.

<sup>22</sup> Nunik pisaju ataktu waketug Refaimnum kaunak batsamsajui.

<sup>23</sup> Nuninai David ataktu awagki Apajuín iniasui. Tusa iniam Apajuí ayaak:

“Igku jetetsuk tenteajum ukunum jetektajum. Tuja numi bálsamo ijuna nuwi jegakjum,

<sup>24</sup> nuna titiji aidaunum aents waka wekaebau wajukama imatu antuktatjume. Nuniakjum pisajajum jetektajum, wagki nunak wi emkan filisteo aidaun ijinatasan wetatjai”, tiuwai.

<sup>25</sup> Tusa tima David Tuke Pujuu tibaunak imatiksag umikui. Aatus David filisteo aidaun depetuk yaakat Gabaón nagkama iji ijinkawa yaakat Guézer jegauwai.

## 6

*Chicham umiktin arcanum egketun David juki Jerusalén ematag tibau*

<sup>1</sup> David Israel aents tres mil suntag maanitan yacha aidaun etegkeg ijumjauwai.

<sup>2</sup> Dutika nuna yajuak Jerusalén pujau jiinki, Quirit-jeirim tikich daaji Baalá tutai Judá nugkanum aajakua nuwi weuwai. Nunak arcan juki Jerusalén ejegatag tusa wegak nunikui. Tuja Israel aents aidau Apajuí ashí senchigtina nuna emematin aina nuna chichame umiktin agagbau egkeamun arcan tapajiya duka Tuke Pujuu pujusa

\* 5:20 “Baal-perazim” tawa nunak, “Apajuí tajaka ajapae” taku tawai.

inamtaijijai betek tumain jimag querubin dakumkamu aajakui, nuna David niina yaaktajin ejegatag tiuwai.

<sup>3</sup> Nunik wea weakua muja yaigchi naintin Abinadab pujujakua nuwi wakajui. Nunikag arcan jukiag yamajam carreta najanamunum egkeawag jukiajui.

<sup>4</sup> Dutikawag buey carretan japiki wetai Abinadapan uchiji jimag, Uzá, Ahíojai paaetukajui. Nunikag, Ahío eemak wetai, Uzá ukuunum wegau.

<sup>5</sup> Dutika juki emainai David ashí Israel aents aidaujai eemak wenak arpan, panderetan, tampujan, platillo aidaun aatus awatuinak, nuigtu pigkuin umpuinak nantsemkiag shimuidau.

<sup>6</sup> Nuninai chicham umiktin agagbau egketun arcan carretanum egkejag buey japik-matai emaidau. Tuja Nacón trigon ijumajakua nuwi jagainai, buey winchainag iyaak carretan ayantai, arca iyajai tusa Uzá arcan achikui.

<sup>7</sup> Dutika achikmatai Tuke Pujuu niina shiig senchi kajegkauwai. Nuadui arcanum ayaumas jaka iyantui.

<sup>8</sup> Dutika Tuke Pujuu Uzán maamtai, David wake besemag dekapjauwai. Nuadui nunú nugka daajin Perez-Uzá adaikauwai. Duka yamaikish tuu daagtainai. Nunak Apajú Uzán kajujuk maamu taku tawai.

<sup>9</sup> Tuja David Tuke Pujuu senchi ishamak chichaak: “¡Chicham umiktin agagbau arcanum egketa nunak wika mina yaaktajuig jukishtatjai!” tiuwai.

<sup>10</sup> Nuna tusa Gadnumia aents Obeb-edom aajakua nuna jeen ejegatajum tusa tiuwai.

<sup>11</sup> Tusa timatai imatiksag umikajui. Nuadui Obed-edoma jeen kampakum nantu asauwai. Imaan nantu asauwa nunak imatiksag Tuke Pujuu Obed-edomnak niina patayi aidaujai pegkegnum yaigkui.

*David arcan juki Jerusalén ejegamu*

<sup>12</sup> Obed-edoma jeen arca au asamtai, niina patayi aidaujai Tuke Pujuu pegkegnum yaigke tusa Davitan ujakajui.

Tusa ujakam David arcan utitatus weuwai. Nunik shiig aneas arcan juki Jerusalén ejegauwai.

<sup>13</sup> Nunú arcan yanaki jukiag machik kuwagainag David makichik toro duwegman uwig tsakatjai maa apeak Tuke Pujuu emematiuwai.

<sup>14</sup> Dutika Tuke Pujuu emematak jáanch lino apagbaun sacerdote nugkutain nugkuja shiig senchi natsemki wegau.

<sup>15</sup> Nunitai ashí Israel aents aidauk arcan juki wedaun saetus shimuinak, Davidjai betek shiig aneanak unsumai tikich aidau uwija kachujin umpuidaush aidau.

<sup>16</sup> Arcan Jerusalén ejegawagmatai, Davita nuwe Mical Saúla nawanji, jeganum niimtai ujaimunum tsapui wajas niimkama arcan juki weagtai, nuna emtin apu David wesa Tuke Pujuu emematak senchi tsekeak nantsemki wegaun wainak senchi kajegkauwai.

<sup>17</sup> Dutika ejegawag nunú arca asatnun David emtika inamjamtai aakmakbaunum nuwi awayawajui. Dutikawagmatai David ajak juukbau aidaun Tuke Pujuu anentag susauwai. Tuja nuigtushkam kuntinun maa nuna nejen ashí apeak Tuke Pujuu emematiuwai, nii ayamjuk agkanmitkamu asa.

<sup>18</sup> Dutika Tuke Pujuu ememati ashimak ashí Israel aents aidaun chichajak: “Tuke Pujuu ashí senchigtina nunú tuké pegkegnum yaimpaktin atinme”, tuu yumigjauwai.

<sup>19</sup> Nuna tusa ashí Israel aents aishmag aidau, nuwa aidau aatus nuwi batsatunak pagkan, nuigtu makichik torta yujág dátíl tutajai najanamun, nuigtu uva ekaejamun aatus maki makichik tinamkauwai. Dutika tinamkam nuna jukiag ditá jeen waketajui.

<sup>20</sup> Nunikagmatai Davidchakam niina jeen niina nuwe, uchiji aidaujai batsatun pegkegnum yumigsatatus weuwai. Nunik jegamtai niina nuwe Saúla nawanji Mical jinki igkug chichajak:

“¡Yamai tsawanta duwi amek yajau iwainmamkachume! ¡Amek apu tusaikish eme anentsa diimainchau amina inakem nuwa aidau datsanmain pujutajum inaktu wekaeme!” tiuwai.

<sup>21</sup> Tama David ayaak:

“Dekas tame, nunak dekas nantsemamjai. ¡Tujash wika nunak Tuke Pujuu amina apan amina pataim aidaujai kajujuk idayak, mina Israel aents aidaun apuji ati tusa etegtuawa nuna emematkun nunikmajai! Nuadui wika ame tujutkuminish, Tuke Pujuu emematkun tuke nantsematjai.

<sup>22</sup> Tuja ame diisam pegkegchaun nuniag nunak, aan nagkaemasan nuniktatjai. Ame inak aidau pachisam tame duka, wisha wagkanuk aniaja nuna shiig dekawag eme anenjusagtatui”, tiuwai.

<sup>23</sup> Tuja Micalak Apajú suwimak susamu asa makichkish uchigmachu aajakui.



## 7

*Apajuí Davidjai chichaman umikbau*

<sup>1</sup> David apu wajasmatai niina shiwaaji aidaujai chichaman epegkea maanitsuk agkan nii inamtaijin pujusa shiig takasti tusa Tuke Pujuu yaigkui.

<sup>2</sup> Dutikam pujus, makichik tsawantai profeta Natágkan chichajak:

“Wika jega setug dakaja jegamkamunum shiig pujajai. Tujash chicham umiktinun Apajuí amasua duka aakchinum awa nunú ameshkam dekame”, tiuwai.

<sup>3</sup> Tusa tama Natán ayaak:

“Kame ame wajak anentaime duka betek umikta, wagki aminak Tuke Pujuu ashí yaimpawai”, tiuwai.

<sup>4</sup> Tusa tiu ai, nunú kashia duik Tuke Pujuu Natágkan chichajak:

<sup>5</sup> “Mina inakeg David jegajua chichagkum: ‘Amek wi pujustinuk jegamkashtatme’, tusa Tuke Pujuu tujamui tusam ujakta.

<sup>6</sup> Tuja wika Israel aents aidau Egipto nugkanum batsatun jijuitag duwi nagkamsan yamaikish jega pegkeg setug dakaja múun jegamkamunmak pujatsjai. Wika yaunchuk nagkamsan aakchinum puja pujakuan imajui tauwaitjai.

<sup>7</sup> Yaunchuk nagkamsan ditajai wekaesauwaitag duikish wika mina aentsug Israel aents aidau apuji atinun adaijauwaitag nunak, setug pegkeg dakagjum jega múun jegamjutkatajum nuwi pujustajai tusanuk segachu ainajai.

<sup>8</sup> “Nuadui yamai wi taja nunú mina inakeg David aatus Tuke Pujuu ashí senchigtina nunú tujamui tusam ujakta: ‘Amek uwig kuitamku pujaumin, wi aminak jukin Israel mina aentsug aina nuna apuji ati tusan adaikamjame.

<sup>9</sup> Dutikau asan ame tuwi wekaeyume nuniakminish, wi aminak kuitamkauwaitjame. Tuja amina shiwaajum aidau jetepainakuish, amina ayamjakun ijinawabaijai. Wi aminak tikich aents eme anentsa diitai aina iman eme anentsa diitai awajsajame.

<sup>10</sup> “ ‘Nuigtushkam mina aentsug Israel aents aidau batsamsatnun nugkan etegkajai. Dutikan nuwi batsasagjai. Nuadui yaunchuk shiwag aidau, kasa aidaujai waitkajaku aina dutika waitkamak achagtinai.

<sup>11</sup> Tujash amek yamaik amina shiwaajum aidaujaig maanitsuk agkan pujustatme. Nuigtushkam amina uchijum wegantu aidounmaya Israel aents aidau apuji atinai.

<sup>12</sup> “ ‘Untsu ame jakamin uchijum aina nuwiyam makichik etegkan apu adaikattajai.

<sup>13</sup> Dutika ai, nunú wi pujustinnak jegamjutkatnai. Tuja ame wegantunmayan apu atinun tuke adaitinaitjai.

<sup>14</sup> Wi niina apaji atatjai, untsu nii mina uchig atatu. Nuadui makichik múun uchiji pegkegchaun takatai, suwimka suwama numamtuk wi niinak suwimkan susatnaitjai.

<sup>15</sup> Tujash Saúlan wi apu adaikau ayatkun, niina ajapeakun amina apu emauwaitjam numamtuk, amina atankinuk tikich aentsnak apu adaikashtinaitjai.

<sup>16</sup> “ ‘Ame wegantu aidounak wi kuitamkatnaitjai, nuwiyam makichik mina aentsug aidau apuji atinun tuke etegkan adaitinaitjai’ tujamui tusam David ujakta”, tusa Apajuí Natágkan akatjauwai.

<sup>17</sup> Tusa akatjam Apajuí tibaunak imatiksag nii wainkamujai ashí betek Natán Davitan ujaku.

<sup>18</sup> Nuna antuk David Tuke Pujuujai chichastatus arca pujaunum wayauwai. Nunik Apajuíjai chichaak:

“Apuh, Tuke Pujuuwah, wika tikima wainkauchitjai. Tuja mina pataag aidaushkam tikima wainkauch ainawai. Nuadui wika apu atajai tumamait Sujai.

<sup>19</sup> Tuke Pujuuwah, wika wainkauchitag nunin aig, amina uchijum wegantu aidau apu agtinai tusam anagtame. ¡Ame yayiatnaitam imanuk tikichik atsawai!

<sup>20</sup> Tuke Pujuuwah, wi amina tumainuk makichkish atsugtawai, wagki wika amina inakmetjai. Nuadui ame minak shiig dekagme.

<sup>21</sup> “Juju pegkeg midau agtin, mina uchigdau agtinjai pachisam tujutam duka ame wakegamu umiktin asam tujutme. Nuadui wika dekaskeap umiktatua tajame.

<sup>22</sup> Tuke Pujuuwah, ¡amek dekas shiig múuntaitme! Yaunchuk iina muunji aajaku aidau ujayapanum nunú yamai dekas ii antaji, wagki tikichik amejai betek amainuk makichkish atsawai. Tuja wainka apajuímtai aina dukesh amea ibauk makichkish atsawai.

<sup>23</sup> Tuja amina aentsjum Israel aents aina nujai betek amainuk tikich aents aidau juu nugkanmak atsawai. Israel aents aidauk ame ayamjukam agkanmitkauwaitme.

“Tikich aents aidau nagkaesau dita ayamjukam ishainain wainchatai aidau iwainajutme. Dutikakum iish wainjinig iina shiwaaji aidau ijinauwaitme.

<sup>24</sup> Wagki Israel aents aidauk tuké amina aentsjum atin atinme tusam tiuwaitme. Tuja ame atinaitme Tuke Pujuu ditan Apajuji.

<sup>25</sup> “Tuja wi amina inakmetag nunú yamai ame anagtam duka, tuke Pujuu Apajuíyah, kajimatkitin aipa. Tuja mina uchig wegantu aidaushkam apu agtin atinme. Ame tame duka tuke umiktin ata.

<sup>26</sup> “¡Amina daagminak ashí nugkanmaya aidau emamattin atinme! ¡Nuninak, Israel aents aidaun Apajuíyiyai dekas ashí senchigtina duka titin atinme!

“¡Wi amina inakmetag nuna uchiji wegantu aidauk ame yayasam tuke apu agtin atinme!

<sup>27</sup> “Tuke Pujuuwah, ame ashí senchigtinum anagtakum mina uchig wegantu aidauk tuké apu wegagtinai tujutiu asamin, wika amina inakem ayatkun juna pachisan segajame.

<sup>28</sup> “Tuke Pujuu Apajuíyah, amek Apajuí dekaskenum chichauwaitme. Wika amina inakem aig, amina anenkagmin ibau múun anagtame.

<sup>29</sup> Nuadui segajame wait aneasam mina uchig wegantu aidau pegkegnum yumigtugkum, ajumaish tuke kuitamjutkatina ata. Amek Tuke Pujuu Apajuí asam dekaskenum chichauwaitme. Nuadui, ame yayamu asag ditak tikich aidaun nagkaesau agtinai. Nuninak amina umigtamkatina ainawai”, tiuwai David.

## David wegantu aidau Israel aents aidaun apuji namkagbau

### 9

(9—20)

*David Mefi-boshetan wait anentug kuitamkamu*

<sup>1</sup> Makichik tsawantai David iniimak: “¿Wi Jonatágjai chichama umikuitag, nuna umiakun kuitamainush Saúla uchiji wegantush makichkikesh iwaku pujaush atsawash?” tau.

<sup>2</sup> Tutai nuwiya makichik aents chichajak: “Saúl wegantu makichik inak Sibá daagtin pujawai”, tau. Tutai David niina chichajak: “Untsukta taati”, tiuwai. Tusa tima untsukam Sibá taamtai apu David iniak:

“¿Amekaitam Sibá?” tama nii ayaak:

“Ehe, witjai, ame tabaun umiktasan taajai apuh”, tau.

<sup>3</sup> Tutai apu David ayaak:

“Wi Apajuí daajin wait anenmainush Saúla uchiji wegantunmayash ¿makichki-uchikesh iwakush pujatsuak?” tau.

Tutai Sibá ayaak:

“Jonatágka uchiji makichik, naween mai beseju wekaechau pujawai”, tau.

<sup>4</sup> Tutai nii ayaak:

“¿Tuwi dusha pujawa?” tau. Tama:

“Duka yaakat Lodebar\* Amielan uchiji Maquira jeen pujawai”, tiuwai.

<sup>5</sup> Timatai apu David nunú weji utitajum tusa inamjauwai.

<sup>6</sup> Tusa tima wejag itawajui. Dutikam Mefi-boshet Davita emtin niina eme anentus tsuntsuma pujusui. Nunikmatai David senchi untsuak:

“¡Mefi-boshet!” tiuwai. Tusa tama nii ayaak:

“Ame tabaun umiktasan juwi pujajai”, tiuwai.

<sup>7</sup> Timatai David chichajak:

“Ishamkagtukaipa, wi amina apajai shiig wainijaku asan aminak shiig kuitamkattagme. Tuja amina apachjum Saúl aajakua nuna nugke aina nunak awagtugmaktinme titatjai. Tuja amek wijai ekemsam mesanum yujumak tuké yutinaitme”, tiuwai.

<sup>8</sup> Tusa tama Mefi-boshet tsuntsuma pujus chichaak:

“Wika amina inakem shiig wainkauchitjai, nunin aish ¿wagka minash waitash anenjame? Wika yawá jakaujai betekaitjai”, tiuwai.

<sup>9</sup> Tusa tutaishkam Sibá yaunchuk Saúlan inake aajakua nuna apu untsuka chichajak:

“Amina apujum Saúla wajiji aidaunak, niina uchijinu aidaujai ashí niina tijajin susajai.

<sup>10</sup> Dutikamu asamtai, ame, amina uchijum aidau, tsakatkem aidau aatus nunú nugkanum niinu atin takagsattagme, dutikakum ajak juukam ijumtatme. Dutikawamin nuna amina apujum Saúl aajakua nuna patayi aidau yuwawagtatui. Untsu Mefi-boshet Saúla tijajiyá duka wijai mesanum tuke yutatui”, tiuwai.

Tusa timatai Sibá quince uchigtin, nuigtu veinte inake ajujakua nunú,

<sup>11</sup> apu Davitan chichajak:

\* 9:4 “Lodebar”: Juju yaaktak namak Jordágnun etsa akaetaiya nuni Manasésa nugken aajakui.

“Apuh, ame tame nunak imatiksasuk umiktajai”, tiuwai.

Tuja Mefi-boshetak apu uchijiskait tumain sillanum ekemas mesanum yuujaku.

<sup>12</sup> Duwi nagkamas Sibá jeen batsataidauk Mefi-boshetan ashí takajujaku ainawai. Mefi-boshetan uchijig Micaías daagtin makichik aajakui.

<sup>13</sup> Mefi-boshetak naween mai beseju wekaechau asa Jerusalén pujujaku, wagki apu Davidjai ekemas tuké yujumkan yuu asa.

## 11

### *David Betsabéjai pachisa augmattsamu*

<sup>1</sup> Tsawan numi aidau yagkujut jegamunum apu aidau ditá suntaji aidaujai ijunag shiyakag shiwaaji aidaujai maanin asag, David suntaja apuji Joab aajakua nuna niina atuwe aidaujai, nuigtu ashí suntag aidaujai maaniatajum tusa awemauwai. Dutikam shiyakag Amón aents aidau yaakat Rabá batsatun jetekag depetuk amukajui. Untsu Davitak wetsuk Jerusalén juwakui.

<sup>2</sup> Nunik pujau makichik tsawantai agkuantai David pegakjin ayamak tepau, nantaki wajas niimsatatus yakí wakauwai. Nuwi wajas niimkama makichik nuwa shigmauch wajakin niina agájin maak pujuttaman wainkauwai.

<sup>3</sup> Nunik wainak niina inake aidaun, aush nuwash yakita inimsatajum tusa ishiakui. Tusa ishiakbau waketug kauna niina ujinak: “Au nuwa daajig Betsabé Eliama nawanji, hitita aents Uríasa nuwegai”, tiajui.

<sup>4</sup> Tusa tiagmatai itagtuatajum tusa David inamjauwai. Tusa timatai weji jukiag itajuawajui. Dutikawagmatai David nijai kanajui. Nunik Betsabék niina jeen wakitkiuwai. Davitjai kanajua nunak nuwauch jau aina nuna tsawantan ejeyi nagkaanak tuke nunin asag mai uminak pujus nunikui.

<sup>5</sup> Nunik ejajjuk Davitan chichaman akuptukui.

<sup>6</sup> Nuna David dekaa, Urías akuptugkata tusa Joapan tiuwai. Tusa tima akupkauwai.

<sup>7</sup> Urías jegamtai apu David Joapan pachis, suntag aidaun pachis, wajuk pujuagmae tusa iniasui. Tuja nuigtushkam amonitajai maaniamush wajuk amae tusa nunashkam iniasui.

<sup>8</sup> Nuna ashí inias dekajua, yamai jemin weme dawem dijajam ayamsata tusa awemauwai.

Dutikam jiinki wegaig yutai shiig pegkeg umikbaun Urías susatajum tusa apu David niina inaken awemauwai.

<sup>9</sup> Tujash Uríasak niina jenig wetsuk, suntag apu pujusa inamtain waitiji aidaun kuitamin batsatunum nuwi ditajai pujus tsawajui.

<sup>10</sup> Nunikmatai Uríasak niina jenig wakitkichmae tusa Davitan ujakajui. Nuna David dekaa, untuka itatajum tima itawagmatai iniak:

“Atushat wekagum tauwaitkumesh ¿wagka jeminish wechamume?” tau.

<sup>11</sup> Tama nii ayaak:

“Chicham umiktin agagbau arcanum egketa duka, suntag Israel aents aidau, Judá wegantu aidau, aatus ikam aak aakmakbaunum batsatui. Tuja Joab mina apujua dushakam suntaja apuji amina aentsjum aina nujai ikam jega atsaunum kanuinawai. Dita núninaish wisha ¿wagkanuk mina jegajui wayanush, yujumka yuwan, umutain uwajan, nuigtu mina duwagjaish kanush tepetja? ¡Wika makichkish nunimaitsujai, junak dekaskenun tajame!” tiuwai.

<sup>12</sup> Tutai David chichajak:

“Kame yamaik juwi juwakta nunikam kashin wetá”, tiuwai. Tusa tima niina jenig wetsuk Jerusalégnum kanag tsawajui. Nunikmatai kashinia duwi,

<sup>13</sup> David ipauwai nijai yujumkan yuwa umutain uwagtatatus. Dutika ipaa ama amakua enamkauwai. Tuja kiyaju asamtai, Uríasak jiinki niina jenig wetsuk, suntag apu kuitamin aidau kajiamunum nuwi kanag tsawajui.

<sup>14</sup> Nunikmatai kashinia duwi kashikmas David papii agag Joab susata tusa Uríasan susa akupkauwai.

<sup>15</sup> Nunú papii agagbaunum chichaak: “Maaniakjumek dekas ishamainnum Urías emtikatajum, dutikajum nigki ukuktajum shiwag aidau maatnume”, tuu agagbau aajakui.

<sup>16</sup> Nuna Joab jukiu asa shiwag aidaun tenteawajui, dutikawag suntag maanitan shiig yacha aidau batsatbaunmanini nuna nii dekau asa, Uríasan nuni awemauwai.

<sup>17</sup> Tuja shiwag aidauk dita yaaktajin ayamjuinak yaaktanunum batsamsag, Israel aents aidaujai maaninayatak agá jijnajui. Nunikag maaniamunum Davita suntaji aidau ditá apuji aidaujai jinawai, tuja nuwi Uríaschakam jakauwai.

<sup>18</sup> Nunikmatai Joab nuna pachis Davitan papiin agatug akuptukui

<sup>19</sup> Nuna papiin juki wegaun akateak:

“Ii maaniag nunú pachisam ashí apu ujakta.

<sup>20</sup> Namputchawame nunú tusa ujamin nuna antuk kajeka inimpak: ‘¿Wagka amonita aidau yaaktaji jeteakjumes, senchish yunumtukmaugme? ¿Atum dekatsjumek, shiwag aidau yaakat peejamunum waka ijunas flechan akenin aina nunú!

<sup>21</sup> Tuja yaakat Tebésnum makichik nuwa yaki waka wajas kayan nagkima Abimelec Jerubaal aajakua nuna uchijin mauwai. Nunú dekau asajum yaakat imatika yunumtumainchau yunumtukugme’, tujamkuig, ame ayaakum: ‘Amina suntajum aina nuna apuji aidau jinawaja nujai betek Uriaschakam jakame’ tita”, tiuwai.

<sup>22</sup> Tusa akatjam jiinki weuwai, nunik jegá, Joab akatmamjamunak imajtiksag ashí Davitan ujakui. Nuna antuk David Joapan shiig senchi kajegkauwai. Nunik chichama etsegnun chichajak:

“¿Wagka yaakat jeteakjumes, imanikjumes yunutukmaugme? ¿Atum dekatsjumek au aents aina duka yaunchuk nuwa yaakat Tebésnumia yaakat peejamunum waka wajas, kayai nagkia tuku Jerubaal aajakua nuna uchiji Abimelekan mauwa numamtuk dita nagkimin aina nunú? Nunú dekyatukgumesh ¿wagka tujash imanikjumes yaakat peejamush yunumtukmaugme?” tau.

<sup>23</sup> Tama chichama etsejin ayaak:

“Shiwag aidau jutijai maaniatatus iina nagkaetamsau shiig kuashat agá jijnjame. Tujash ii ipisja juki yaakta waitijin ejentamji.

<sup>24</sup> Dutikajin tikich suntag aidau yaakat peejamunum wakag iina suntaji aidau flechayai aketiagmae, imaniamunum ujumak suntaja apuji aidau jinawagmae, tuja Uriaschakam nuwi jakame”, tiuwai.

<sup>25</sup> Timatai David niina ayaak:

“Joab ujakta: ‘Nunú jinamunmak imanikag puyatjukaigka, kame maaniamunmak tuke bakumatia. Tujash shiig kuitamamak nuni senchi jeteka yaaktan tsakti, tuja ame niina anentai ichichtugta’ tujamui tita”, tiuwai.

<sup>26</sup> Tuja Betsabék niina aishi Urias jakae tabaun antuk senchi buutiuwai.

<sup>27</sup> Nunik butak wake besemag pujamujin nagkaankamtai, David niina untsukui. Dutika utsagkam jegamtai, David nii pujusa inamtaijin awayauwai. Dutika nii nuwatkauwai. Dutikam pujus makichik Davita uchijin uchigmakui. Tujash David dutikauwa duka Tuke Pujuanak shiig awagmakchauwai.

## 12

### *Natán Davitan jiyakbau*

<sup>1</sup> Tuke Pujuu profeta Natágkan Davitai awemauwai. Dutikam Davitan jegajua aujak: “Makichik yaaktanum jimag aents pujujakui. Tikichia duka aajakui wiakuch, untsu tikich ujudauch aajakui.

<sup>2</sup> Nunú wiakchanuk uwig aidau, baka aidau shiig kuashat ajujakui.

<sup>3</sup> Untsu ujudauchinuk ima makichkiuch uwig sumapakbau ajujakui. Nunak ima nigki tsakapajui. Tuja nunú uwijak niijai niina uchiji aidaujai aatus ijunag pujus tsakajui. Imatika aneasa kuitabau asa, uwijak dita yuwinamun niishkam yujakui, tuja umutnashkam dita umuinamun umujakui. Untsu kanakug dita kanamunum ayaumas kanujakui. Tuja unumúuntak uwignak niina nawanjijai betek kuitamajakui.

<sup>4</sup> “Tuja makichik tsawantai makichik aents nunú wiakchan ijagsatatus jegajuaui. Nunikmatai, niinu uwig aidauk, baka aidauk shiig kuashat ayaig, nuna maa ijag ajamtan sujimak, ujudauchi uwigji makichkiuch pujaun atanki maa inagkauwai, ijagkan ajamsatatus”, tiuwai.

<sup>5</sup> Nuna David antuk, senchi kajeka Natágkan chichajak:

“¿Wagkag tikima nunash dutikawabi? ¿Nunú aentsuk shiig pegkegchauwai! Nuadui, Tuke Pujuu pachisan tajame: ¿Nuna dutikauwa duka dekas mantamnamainai!

<sup>6</sup> Nuigtushkam nuna dutikauk cuatro uwija akiken akikmamainai, wagki aents ujudauchin wait anenjachu asa”, tiuwai.

<sup>7</sup> Tusa tutai Natán ayaak:

“¿Nunú aents pegkegchauwa duka ametme! Nuadui Tuke Pujuan Israel aents aidau Apajuin emematin aina nunú yamai juna aatus tujamui:

“ ‘Wi aminak Israel aents aina nuna apuji ati tusan adaikamiagme. Tuja Saúl maawai tusanchakam ayamjukmaijame.

<sup>8</sup> Ame pujusa inamjatnunasah, amina apugmi nuwe aidaujai amasmaijame. Nuig-tushkam Israel aents aidaun Judá wegantu aidaujai apuji awagsajame. Tuja wi imatikan amasuitag nunú ame diisam imanchauwaitkuig, aan kuashat amastajame timajai.

<sup>9</sup> “Tujash ¿wagka mina chichameg intimjutkimesh wi dakitamush pegkegchaush takasume? Suntag amonita aents aidau Uríasan maatnume tusam inamjaume. Dutikawamin maawagmatai, ame niina nuwe atankiume.

<sup>10</sup> “Tuja mina intimjutkim Uríasa nuwe jujukium nuadui, yamai nagkamas amina pataim aina nunak tuke puyajai mainiagtinaí, dutikamu asag kuashat waitiagtinaí.

<sup>11</sup> Amina uchijum aina duke pempeentugmakiag waitkagmasagtinaí. Tuja amina ikaa nuwem aina nuna uchijum atanjamki, amesh wainminig pan tsawai dutikati titatjai, wagki tikich aents aidaush ashí dekaatnume tusan.

<sup>12</sup> Amek uumka takamsaume, tujash wika ashí Israel aents aidau dekainamunum tsawai pan iwainaktatjai’, tawai Tuke Pujuu”, tiuwai.

<sup>13</sup> Tusa tama David Natágkan chichajak:

“Tuke Pujun pegkegchaun takagsajai”, tau.

Tutai Natán ayaak:

“Tuke Pujuu amina tudaugminak tsagkugtamjae, nuadui jakashtatme.

<sup>14</sup> Tujash amek Tuke Pujuu tuke dushikiakum pegkegchau takamsaum duwi, amina uchijum akiina duka jakattawai”, tiuwai.

<sup>15</sup> Nuna tusa ukuak Natán niina jeen wakitkiuwai.

Nunikmatai pujus Uríasa nuween David uchin akiauwa nuna Tuke Pujuu jatan susauwai, dutikam senchi jau.

<sup>16</sup> Nunitai David uchi jakai tusa Apajuín segaak, yujumkan yutsuk ijagma pegakjin kanutan dakitak, nugka tepes kanau.

<sup>17</sup> Imanik waittai niina atuwe apu aidau jegajuawag inankitag tuidau. Dutikamash niig dakitau. Tuja ditajai ijunja yujumak yutanashkam dakitau.

<sup>18</sup> Tujash nunú uchik siete tsawan wegak jakauwai. Nunikmatai suntaja apuji Davitan kuitamin aidau nii ujatan ishamaidau, wagki dita anentaimsag: “Uchi eke jatsaigkish ii niijai chichajinish, wake besemag dekapeau asa, ii tabaunak antugtamchama nuniaush ¿wajuk ujaktajiki uchi jakae tusaish? ¡Tusa ujamin nuna antuk nuni nagkaemas wake besemag dekapeak, pegkegchaunakesh dutikmainai!” tuidau.

<sup>19</sup> Tusa chichaidaun David antuk, dekas uchik jakaegapi tiuwai. Tusa ditan untsuka iniak:

“¿Uchish jakachmaka?” tau. Tutai:

“Ehe, uchik jakame”, tiajui.

<sup>20</sup> Tuja siete tsawantai uchi jak tepesua nuaduik Davitak makichkish maichui, tuja kugkuinnakesh nijamkachui, nuigtush jáanch pegkegnakesh nugkutsuk pujau. Nunik pujau uchi jakae tabaun dekaa, nugká tepau nantaki mainiuwai, nunik kugkuinun nijamak jáanchin yapagmamauiwai. Nunik Tuke Pujun ememattatus aak Apajuíjai chichatai aakmakbaunum wayauwai. Nunik Apajuín ememati ukuak, yujumkan sujusagmatai yuwatjai tusa niina jeen weuwai. Nunik jegamtai yujumak susam yuwauwai.

<sup>21</sup> Yujumkan yuwamtai inake aidau chichajuinak:

“Uchi iwaku pujusmataig aneakum yujumak yutsuk ijagma pujusam buutmaume, tuja uchi jakamtaig nantakim yujumak shiig yuwaum dusha, Apuh, amesh ¿wagka aniname?” tuidau.

<sup>22</sup> Tiagtai David ditan ayaak:

“Uchi jak tepema nuaduik Apajuí mina wait anenjug etsagagchaintash tusan yujumka yutsuk ijagma pujusan buutmajai.

<sup>23</sup> Tuja yamai uchi jaka nuaduish ¿wagkanuk ijagma pujusnush buuttaja? Wika uchi ataktu tsagagti tusanuk tumaitsujai. ¡Wi jakun niijai ijunjatnaitjai! Untsu niig ataktu aneantag wijaig pujumaitsui”, tiuwai.

#### *Salomón akiinamu*

<sup>24</sup> David niina uchiji Betsabéyai akiamu jakamtai, nuwe Betsabé buuttai etsagkeg ukukiuwai. Nunik pujau tikich tsawantin nuwen ijagsatatus wejiuwai. Nunik jega niijai kanajui. Dutikam pujus ejapjuk uchi aishmagkun uchigmakui, dutikamtai David adaikauwai Salomón. Tuja nunú uchinak Tuke Pujuu anejakui.

<sup>25</sup> Nuadui Tuke Pujuu profeta Natágkan akateak: “David niina uchiji akiina nunak Jedidía\* adaikati”, tusa tiuwai. Tusa tima David niina uchijin Jedidía adaikauwai.

\* 12:25 “Jedidía” tawa nunak hebreo chichamnumak “Apajuín aneetai” taku tawai.

## 13

<sup>23-39</sup> Absalón aajakui Davita uchiji tikich nuwanum akiamu. Nunú niina yachin maa shiwagmaga tupikaki, Gueshur nugkanum yaakat Tecoa jegaa nuwi uumak pujusui. Nunik pujai Absalón wakitki taati tusa Joab Davitan tiuwai.

## 14

*David niina uchiji Absalóghan tsagkujamu*

<sup>21</sup> Makichik tsawantai apu David Joapan chichajak: “Absalón wakitki taa pujusti tusan tajai. Nuadui weme Absalón ujakta wakitki Jerusalén taati”, tiuwai.

<sup>22</sup> Tusa tama Joab Davitan eme anentus tsuntsuma nijayin nugka antig pujus chichaak: “Apuh, ame mina wait anenjam nunak yamai dekas shiig dekaajai. Wi amina segabaijam nunú antugtuku asam, ame minak inatme”, tiuwai.

<sup>23</sup> Aatus tusa, jinki Gueshur nugkanum weuwai Absalóghan juki Jerusalén itaatatus.

<sup>24</sup> Nunik wetai Apu chichaak: “Yamaikik Absalóghak minak waitkashtatui, tutupit niina jeen weti”, tiuwai. Tusa tibau asa Absalóghak apu pujamunmak wetsuk tutupit niina jeen weuwai.

<sup>25</sup> Tuja Absalóghai ashí tikich Israel aents aidau ijumja diismash, nijai betek shigmauchik makichikish atsuajakui. Absalóghak niina nawen nagkamas buukenish shiig shigmauch aajakui.

<sup>26</sup> Niig maki makichik mijan amuebaunum intashin tsupimajakui, wagki intashi tsakatai tutitag dekapeau asa. Nunú intash tsupikbau dekapamak jimag kilo nagkaesau aajakui. Duka kijin dekapatai apunu aajakua duwi dekas shiig dekapa diisbau aajakui.

<sup>27</sup> Absalógha uchijig kempatam aajakui. Untsu nawanji makichik Tamar daagtin shigmauch aajakui.

<sup>28</sup> Absalóghak Jerusalén jegauwaitak, apu David eke waitkashti tibau asa, niina waitnsuk jimag mijan pujau.

<sup>29</sup> Nunik pujus makichik tsawantai Joapan untsukui, apu David ujatjukta, nijai chichastajai tusa. Tujash Joab dakitjauwai. Nunikmatai ataktushkam chichaman akuptukui. Tujash ataktushkam dakiajui.

<sup>30</sup> Nunikmatai Absalón niina inake aidau chichajak: “Joapa ajaji cebada ajakbau mina ajagjai apatdayas awa nunú wejijum japejuatajum!” tiuwai.

Tusa tima shimutkg Joapa ajajin apejuawajui.

<sup>31</sup> Dutikiagtai Joab Absalógha jegajua chichajak:

“¿Wagka amina inakem aidau min aajnash apenawa?” tau.

<sup>32</sup> Tama Absalón ayaak:

“¿Wagka wisha Gueshur pujaunush juwish taamja? Dekas imaug pujumainnas miniyagtai tajai. Tau asan amina akateakun: ‘Yamai apuh, amina wainkatasan wakedajai, tuja wi pegkegchaun takamsamu akuig mantuata tajame’ tujamui tusam apu David ujatjukta tusan awematag tai, ame dakitau asamin anak aikajai”, tiuwai.

<sup>33</sup> Tusa tima Joab apu Davitan ujaktatus wejiuwai. Nunik jegajua ujakam, apu David Absalóghan untsukui. Dutikam apu pujamunum jegá, apun eme anentus tsuntsuma nijayin nugka antig pujusui. Unstu apu niina kumpamak shiig anentus yapinum kugkuasui. Dutika tsagkujuk ataktu nii pujusa inamtaijin awayauwai.

## 15

*Absalón apu Davidjai shiwagmagamu*

<sup>1</sup> Kuashat tsawan nagkaemakiu ai, Absalón makichik carro maanitain caballo aidaujai ikamkauwai. Dutika niina kuitamkatin aidau cincuenta suntag yacha aidau ijumjauwai.

<sup>2</sup> Tuja Absalóghak kashi kashinig shiig kashikmas nantaki, yaakta waitijin jintá yantamnum tuké wajau. Nuwi wajas aents aidau utugchat ajam, apu chichama epegtuajui tusa minidaun chichajak: “Atumesh tuu yaaktanmaya ainagme”, tusa iniau. Tusa iniam: “Iik Israel aents aina nunú wegantu ainaji”, tuidau.

<sup>3</sup> Tusa tiagtai Absalón chichajak:

“Ame apu chichaman epegtuajui tusa wakegam duka dekas shiig pegkejai. Tujash apu niina aentsjin ame chicham epegkeata tusa adaikamuk shiig atsawai”, tau.

<sup>4</sup> Tusa nuigtu chichaak: “¿Wika apu chichama epegkin ati tusa adaikamuitkunuk, utugchat ajamu wijai chichastatus minidaunak wi epegtumainaitjai!” tau.

<sup>5</sup> Tusa tau asa, nuigtushkam aents niyai jegaunak, uwegnum achika kumpamak pagkuk yapinum kugkuau.

<sup>6</sup> Tuja nuigtushkam aents aidau apu David chichaman iwagtujati tusa minidaunak kumpamak tuké pagkuk kugkuau. Dutikak Israel aents aidau anentainak yampagtau. Nuadui niina apajin nagkaesau Absalóggkan ima senchi eme anentuidau.

<sup>7</sup> Tuja ipak usumat mijan pujus, Absalón apu Davitan chichajak:

“Wisha Tuke Pujuu anagkuawaitag nuna umiktag tusan Hebrón wetag tajai, nunú minash wait aneasam ayu tujutta.

<sup>8</sup> Wi Siria nugkanum Gueshur pujusan Tuke Pujuu segakun: ‘Ame Jerusalén awagtukiaminig, yaakat Hebrógnun wenu kuntuu maa apeakun ememattinaitjame’ tusan tiuwaitag nuna umiktag tajai”, tiuwai.

<sup>9</sup> Tusa tutai apu ayaak: “Ayu, wetá”, tiuwai. Tusa tima Absalón yaakat Hebrógnun weuwai.

<sup>10</sup> Tujash Hebrón eke wetsuk chichama etsejin aidau akateg Israel aents wegantu aidau batsatunum ishimak, uwija kachuji umpuamun antuinakug: “Absalóggkan yamaik Hebrógnun iina apuji atinun adaikaje tusa untumkatnum”, tiuwai.

<sup>11</sup> Tusa ishimak nuigtushkam Jerusalégnunian doscientos aents nii Hebrón wetai uyuntsatin aidau ipauwai, dutikam nii chicham umiamunak dekachu asag nijai shiyakajui.

<sup>12</sup> Tuja nuigtushkam, wi Apajuin emematkun kuntuu maan apetai uyuntusti tusa Davita chichajin apu aidauunmayan makichik Ahitófel daagtinun niina yaaktaji Guilo aajakua nuwi pujaun untukui. Dutika untukam Ahitófel Absalóggjai weuwai. Nuadui Israel aents aidauk nuni kuashat Absalóggjai ijunaidau. Nunidau asag shiig kuashat wajasajui.

*David Jerusalén pujau tupikakbau*

<sup>13</sup> Makichik aents chichama etsejin Davitan wejiuwai, Israel aents aidau Absalóggjai ijunjaje nuninak aminak shiwagmatjamainawai tusa ujaktatus.

<sup>14</sup> Dutika ujakam David suntaja apuji niinu aidau Jerusalén batsatun chichajak:

“¡Yamaikiuchia duwik wamak pisajagmi, nuniatsjinig Absalón mantamain ainaji! ¡Wamak umintsatum pisajagmi nuniatsjinig Absalón niina aentsji aidaujai amaintamak ashí Jerusalégnun batsatutinak amupamain ainawai!” tiuwai.

<sup>15</sup> Tusa tutai, apu Davita chichajuinak:

“Apuh, iik ame tabau umiktasa umintsa dakamji”, tuidau.

<sup>16</sup> Tusa tiagmatai apu niina ikaa nuwe aidau dieza imajin nii pujusa inamtaijin batsaak, nuwi ashí aents batsatu aidaujai jinkiuwai.

<sup>17</sup> Nunik jinki ashí niina uyunaidaujai yaakat nagkatkamunum jega pujaunum nuna yantamen ijunjajui.

<sup>18</sup> Nunikag ashí suntaja apuji aidauk niina ejapeawajui. Nuninai untsu quereteo aidau, peleteo aidaujai, apu pujusa inamtain kuitamin aidau, nuigtu seiscientos geteo aents aidau aatus yaakat Gadnum nagkamas apu pataetukaju aidauk apu wetai eemak shimujakajui.

<sup>19</sup> Nunik shimuinamunum makichik aents Gadnumia Itai daagtinun apu chichajak:

“¿Wagka amesh jutjaish minime? Amek dekas wakitkim yamajam apu ekemi nujai pujusta, wagki amek nuigtushkam nugkem ukuakum tikich nugkanum pujame.

<sup>20</sup> Wika wi pujustinnakesh shiig dekaa weatsug nuniaunush ¿wagkanuk wisha aminash yau taamun nuniauminash jutjai minita tusanush titagme? Dekas amek wakitkita nunikam amina pataim aidau batsatbaunum pujusta. ¡Tuke Pujuu pegkegnun yumigtamsati, dutijamak tuké kuitamjamkatin ati!” tiuwai.

<sup>21</sup> Tama Itai apu Davitan ayaak:

“Apajuish antai, tuja apuh ameshkam antamin tajame: ‘Wika ame tuwi pujutame, tuja tuwi jamainnumkesh wekaetatme, nuwi wishakam amejai amina inakem asan wekaetatjai’”, tiuwai.

<sup>22</sup> Tusa imattai David ayaak: “Ayu, kame takumek minita”, tiuwai. Tusa tima Itai David weamunum niina patayi aidaujai, nuigtu tikich aents aidau niina uyunaidaujai aatus ijunag weuwai.

<sup>23</sup> Nunik shimuinak David niina uyunaidaujai senchi buutuidau. Nunikag shimui shimuinakua, entsa chichijam Cedrón tutainum jegawag nuna ashí katitajui. Nunik-agmatai Davidchakam katigkui. Nunikag Davidjai ijunag jinta uwegshunum wetainum shiyakajui.

<sup>24</sup> Tuja sacerdote Sadokshakam ashí Leví wegantu aidaujai chicham umiktin agagbau egkeamun arcan yanaki jukiag shimuidau, nunik shimui shimuinakua ashí aents yaaktanmaya jijnagmatai, nunú arcanak sacerdote Abiatarai ukukajui.

<sup>25</sup> Dutikawagmatai David sacerdote Sadokan chichajak:

“Chicham umiktin agagbau egketu arca Apajuínua duka yaakat Jerusalén awagkitajum, wagki Tuke Pujuu mina wait anenjakug Jerusalén ataktu awagtuktatui, dutijakui juju chicham umiktin arcanum egketu ukuktatag duka Niina aakjinig aun ataktu wainmainaitjai.

<sup>26</sup> Untsu Apajuí wait anenjachu asa juwig pujusti tujutkuig, nunashkam nii wakegama nunisag uminkati titatjai.”

<sup>27</sup> Tusa nuigtushkam sacerdote Sadocan chichajak:

“Amek Abiatarjai Jerusalén wakitkita, tuja atum wegakjumeck uchijum jukijum wetajum. Ame jukita uchijum Ahimaas, tuja Abiatar jukiti uchiji Jonatágkan.

<sup>28</sup> Atum nunika shimagmin untsu wi uwejush tepetpetua nuwi pujuttajai, wakitki taajum chicham ujatkamnujum tusan”, tiuwai.

<sup>29</sup> Tusa tima Sadoc Abiatarjai Apajuí arcajin jukiag Jerusalén wakitkiajui, nunikag nuwi batsatu.

<sup>30</sup> Nuninai David Olivo nain tutainum wakauwai. Nuwi weakug sapatu weamatsuk wake besemag dekapeak datsaamamunum buuken dukuka buu buutkawa weuwai. Nunitai aents aidau niina uyudaidauskam nunisag buuken dukuka buu buutuinaakua shimuidau.

<sup>31</sup> Tuja Ahitófel Absalógjai chichaman uminawai tabaun antukag Davitan ujakajui. Nuna David dekaa, Ahitófel tabaun Absalón antugkashti tusa, Tuke Pujuum ausauwai.

<sup>32</sup> Nunik Davitak wea weakua muja titijin nii yaunchuk Apajuín emematak kuntinu maa apejakua nuwi wakauwai. Nunikmatai makichik aents Husai daagtin arquita aents wegantu jáanchjin japiki ichigka buuken nugka yukukuntun yukumag jünkiuwei, Davitan igkugtatus.

<sup>33</sup> Nunik minittaman David chichajak:

“Ame wijai minakminig kakajus tupikakin Absalón mantuawai tusan uumainchau atatjai.

<sup>34</sup> Untsu mina yainkatag takumek Jerusalén jegam Absalón chichagkum: ‘Wika ame inakmetjai, nuniau asan yaunchuk amina apa umijin ayag dutiksanuk amina umigkatjame tajai’, tita. Tusa tamin ayu tusa niina inake etamataig, nuwi pujusam Ahitófelash wajintuk chichat, nunú ame nii tabau yapagtumainaitme.

<sup>35</sup> Tuja Sadoc Abiatarjai imau batsata nunú chichaman nunú uجاتiatatui. Tuja Absalókgash nii pujusa inamtaijin pujusash wajintuk chichamnash umiawa mina shiwagmatuinakush, nunú antukam ame dita ashí uجاتtame, nuna untsu dita mina uجاتiatatui.

<sup>36</sup> Nuigtushkam sacerdote Sadoc, Abiatar, nuigtu dita uchiji Ahimaas, Jonatán aatus mina chichama ujatkgatin batsatu. Nuniau asantai, ame dekamau aidauk ditai yunumka pujusam wajintuk chichajat nunú ashí uجاتkata”, tiuwai.

<sup>37</sup> Tusa tima Husai Davita kumpaji aajakua nunú wea weakua Jerusalén jegakma Absalóghchakam Jerusalén jegá wayaig betek niishkam jegaui.

## 16

### *David Sibájai chichasbau*

<sup>1</sup> David mujanum pujau chichama dekaa jünki muja nagkaiki ujumak kuwagai, Sibá Mefi-boshetan inake aajakua nunú jimag burron entsamkatin umikbaun juki, nuwi doscientos pag chimpianun, uva juukbaun cien nantagkun, tuja uva ekaeja cien pag najanamun aatus pataja, nuigtu umutai vinon juki Davita igkugtatus weuwai.

<sup>2</sup> Dutika igkugkam David niina iniak:

“¿Aancha itugkatna imatikamesh iniime?” tau. Tama nii ayaak:

“Juju burro aina juka amina nuwem aidau, uchijum aidaujai pekamiagtina. Untsu pag aina nunak, uva ekaekamu aina nujai amina inakem aidau yuwawagtina. Tuja umutai vinoa juka jintá uwegshunum shimamunum yaki pimpiawa nunú uwajagtina”, tiuwai.

<sup>3</sup> Timatai David iniak:

“¿Amina apujum Saúl aajakua nuna tijaji Mefi-boshetash wajukame?” tau. Tama Sibá ayaak: “Auk ame tupikakiamin niina apachji Saúl apu aajakua nuadui mina apu adaitukchajaintash tusa Jerusalén juwakmae”, tau.

<sup>4</sup> Tusa tutai David niina chichajak:

“Ayu, dekas nii tuu wekagu asantai, Mefiboshetdau aajaku aina nunak amina amastajame”, tiuwai. Tusa tima apu emtin tsuntsuma pujus chichaak: “Wi ame wakegamun umiakui, ame mina yamai wait anenjum aikasmek tuké wait anenjujtin ata tajame”, tiuwai.



*Simí apu Davitan pegkegchau chichagkamu*

<sup>5</sup> Aatus chichasa ukuak Davitak aents niina uyunaidaujai we wenakua yaakat Bahurim jegawajui. Nuninai nuwiya makichik aents Saúl wegantu Guerar aajakua nuna uchiji Simí daagtin jiinki, Davitan pegkegchaun chichaju.

<sup>6</sup> Imatjak kaya juki Davitan tukutatus nagkiau, dutikak niina suntaji aidaunashkam nagkiau. Dutiktai Davita aentsji aidau, suntag niina kuitamin aidaujai tentea ejapeawag emainaig,

<sup>7</sup> Davitan pegkegchaun chichajak: “¡Magkagtinu, juwi pujutsuk wejumta!

<sup>8</sup> ¡Ame apu atasan Saúla patayi aidau amukuitam duwi Tuke Pujuu aminak suwimkan amawai! ¡Nuna umiak Tuke Pujuu yamai amina atanjamki, amina uchijum Absalógkan apu emattawai! Ame juwi wekaesam waitiam duka amina pegkegchaugmin waitiame. Amek dekas pegkegchau magkagtinaitme”,

<sup>9</sup> tusa imatjutai, Abisai Seruiá uchiji aajakua nunú apu Davitan chichajak: “¿Wagka jusha annaitkush aminash pegkegchaunash chichagtamua? ¡Dekas yamaikiuch niina buuken tsupigkan maatjai!” tau.

<sup>10</sup> Tutai apu ayaak:

“Atum Seruiá uchijitigmek tuke aanin chichá yujagme, tujash wika dutikatajum tichattajai, wagki nii mina pegkegchaun chichagta nunak Tuke Pujuu tita tibau asa tawai. Nuadui makichik aentskesh, wagka dusha tame tusag niinak tumain ainatsui”, tiuwai.

<sup>11</sup> Nuna tusa Abisain, suntaja apuji aidaujai chichajak:

“¡Mina uchigkesh mantuatag tujuta duwi, Benjamín wegantua duka dekas minak mantuatag tawai! ¡Idaisatajum pegkegchaun chichagtakush chichagtukti! ¡Tuke Pujuu tita tibau asants tujutatai!

<sup>12</sup> Tuke Pujuu wi waitiamun diigtus au aents mina yamai pegkegchaun chichagta nuna yapajia pegkegnum yumigtumainai”, tiuwai.

<sup>13</sup> Aatus tusa niina aentsji aidaujai, nuwi nagkaemakiag shimuidau. Nuniagtai Simí David weamunum yantamen peentaunum wesa pegkegchaun chichajak, kayai nagkiak, nugka yukukuntun juki yukuau.

<sup>14</sup> Tuja Davitak niina aentsji aidaujai namak Jordán jegawajui, nunikag senchi yawejaju asag nuwi ayamainak batsamsajui.

*Absalón Jerusalén jegamu*

<sup>15</sup> Tuja Davitak niina aentsji aidaujai tupikakiag imau yujainai, Absalón Ahitófeljai nuigtu ashí Israel aents aidaujai Jerusalén jegawajui.

<sup>16</sup> Nuninai Husai arquita aents Davita kumpaji Absalógka jegantun senchi untsamak chichajak:

“¡Ameketme apumek, ameketme apumek!” awaju.

<sup>17</sup> Imatjam Absalón niina iniak: “¡Wika aminak mina apag Davitan shiig kumpajim-papi tinugme! ¿Wagka amina kumpagmijaish wechamume?” tau.

<sup>18</sup> Tama Husai ayaak: “Wika Tuke Pujuu yana etegkattawa apu ati tusa, tuja nuigtushkam Israel aents ashí ijunag etegkawagtata nuna yayaakun pujustag tau asan juwakmajai.

<sup>19</sup> Ame apu uchijiyaitam nuna umigchaknush wisha tujash ¿yanak umigkatja? Nuadui wika amina apan umijiag dutiksanuk amina umigkattajame”, tiuwai.

<sup>20</sup> Tusa timatai idayas pujus Absalón Ahitófelan iniak:

“¿Amesh minash wajukati tujutme?” tau.

<sup>21</sup> Tusa tama Ahitófel chichajak:

“Amina apa tupikak niina ikaa nuwe aidaun juga kuitamkati tusa batsaki nujai kanagta. Dutikawamin ashí Israel aents aidau dekas niina apajinak shiwagmagapi tujamiagtatui. Aatus tikich amina yaimpaina dushakam aminí agtatui”, tau.

<sup>22</sup> Nuna tusa juga tuntupen carpan aakmatkajui. Dutikawagmatai nuwi apaji ikaa nuwe batsatun yajuak utsaa, ashí Israel aents aidau wainainamunum ditan kanutjauwai.

<sup>23</sup> Tuja nunú tsawanting Ahitófelan chichameg Apajuin chichamejai betek tumain aajakui. Nunak David pujusmataish iman aajaku asa, Absalón pujusmataish imanuk aajakui.

## 17

*Husai Ahitófelan anentain yapagtuamu*

<sup>1</sup> Duwi pujus Ahitófel Absalógkan chichajak:

“Amina suntajum maanitan yacha aina iman etegjam doce mil sujusta. Dutikawamin yamai kashia duwik Davitan pataektajai.

<sup>2</sup> Dutikan pimpiki ayamak pujaun amainagkan, niina aentsji aidaun uwaaka ishimkun nigki juwakmatai maatjai.

<sup>3</sup> Dutika ai ashí aents aidauk nuwa aishina niina apajin dukujijai ukuak, aishijai wegama numamtuk waketug aminí kaunattawai, wagki amek ima Davitak mantamnati tusam wakegame. David mantamnantai ashí Israel aents aidauk agkan ijunag utugchat atsaanum batsamsagtatui", tiuwai.

<sup>4</sup> Tusa timatai Absalón nuna shiig pegkeg diisui, tuja Israel aents aidaun apuji aidaushkam pegkejai tiajui.

<sup>5</sup> Tujash Absalóggak Husai untsuka utitajum niish wajintuk anentaimua nunú dekajuami tiuwai.

<sup>6</sup> Tusa tima Husai jegamtai, Absalón chichajak:

"Ahitófel chichaak: 'Yamaikiuch David pataetukmi' tawa dusha ¿amesh wajintu anentaima? nunú tukagtita", tau.

<sup>7</sup> Tama Husai ayaak:

"Yaunchuk pegkejan tujamin akush, yamai tujama nunak pegkegchaun tujamne.

<sup>8</sup> Amek shiig dekame amina apak niina aentsji aidaujui maanitan yacha ainawai. Iman asag chayú uchiji yajutkam kajeka ishain main wajama imaninawastai. Nuigtushkam amina apak yaunchuk nagkamas maanitnak unumatjauwai. Nuadui niig aneaku asa tikich aents aidaujui ijunjag kanagchattawai.

<sup>9</sup> Yamaikish auk niig waanmagkesh, nuniachkush tikich yantamnumkesh uumkas pujatai. Tuja ame jeteamin amina suntajum aidaun ujumak jinaamtaig, tikich Israel aents aidaun nuna dekawag Davitap dekas niina suntaji aidaujui depetkae tusa niina eme anenjagtatui.

<sup>10</sup> Nuniagtai amina suntajum dekas wajiu leónjai betek kaje aidaush nuna antukag maaniachmin dekapjagtatui, wagki Israel aents aidauk ashí dekainawai, amina apak niina aentsji aidaujui wajiu aina nuna.

<sup>11</sup> Nuadui wika dekas Israel aents aidaun yaakat Dagnum nagkamnas yaakat Beer-shebanmaya aatus suntag shiig kuashat nayantsa kamatkaji dekapamainchauwa iman batsata nunú ipaam ijumjata. Dutikam nunú ame yajuakam dekas wejita tumainaitjame.

<sup>12</sup> Dutika amina apash tuwig pujawa nunú jeteka, yumi sajatuk kakegama numamtuk pachiaichbau utsantua ashí niina aentsji aidaujui ijinami dutikam makichkish iwakuk juwakchati.

<sup>13</sup> Tuja David tupikaki tikich yaakat utumainchau peejamunum uumkamtaish, ashí Israel aents aidaun daek yajutka yaakat peejamu anaa japiki entsanum utsaattaji, dutika ajin makichik kaya pujaukesh atsuttawai. Nunikmatai utua amina apa pujau wainka maattaji", tiuwai.

<sup>14</sup> Aatus Husai timatai Absalón ashí Israel aents aidaujui wakejukajui, wagki Ahitófel tibaun nagkaesau pegkeg asantai. Ahitófel tibaun yapagtuawa nunak Tuke Pujuu tibau asantai dutikauwai, wagki nuna dutikamtai David Absalóggan depetkati tau asa.

<sup>15</sup> Aatus tusa ukuak Ahitófel wajintu Absalóggan ashí Israel aents aidaujui ijumag tine nuna pachis, tuja niish wajintu Absalógnash tine nuna aatus Husai sacerdoté Sadokan Abiatarjai ujakui.

<sup>16</sup> Dutika ditan chichajak:

"Wamak shiyakjum David ujaktajum, dita batsata nuigkik batsamsuk nuna ukukiag namak Jordágka amain katiagtinme. Untsu nuna nunichagtaik, Absalón niina suntaji aidaujui amukagtatui", tiuwai.

<sup>17</sup> Tuja Davitan ujakagtinuk Jonatán Ahimaasjai yaaktanum wayajin waipakainum tusag, yaaktanum jegattak yumi pukuni jiinin Roguel tutainum nuwi uumak dakamainak batsatu. Nuninai makichik nuwa inak weji ujakui. Dutikam nuna Davitan ujakagtatus jiinag shimuidau.

<sup>18</sup> Nuniidaun makichik uchi wainak, Absalóggan ujaktatus wejiuwai. Nunitai Jonatán Ahimaasjai waugtususag makichik aents dita waintai yaakat Bahurim tutainum pujujukau nuna jeen jegawajui. Nunikag nuna agájin yumigmat taimunum nuwi egkemawag uumkajui.

<sup>19</sup> Nunikagmatai nuna nuwe yumigmat dukutain juki dukuka nuwi trigo akagbaun ukaja, yumigmat taimunak wainmainchau emauwai. Dutikamu asantai makichkish yumigmatnak wainkachaju ainawai.

<sup>20</sup> Nunik chimpijai Absalóggka inake aidaun nuwi jegawag nunú nuwan iniinak:

"¿Ahimaasash Jonatágjaish tuwi batsatua?" tuidau. Tusa iniam nii ayaak: "Juwi kaunawag namaka aatu shiyakmae", tau.

Tusa timatai shimutkag egai egainakua wainkachag Jerusalén wakettajui.

<sup>21</sup> Nunik waketjamtai Ahimaas Jonatágjai jiinkiag tupikaki shiyakajui Davitan ujakag-tatus. Nunik jegawag ujinak:

“Wamak umintsajum Jordágka amain katiagtajum, wagki Ahitófel atumi mantamata-tus chichaman Absalóggjai umikaje”, tuidau.

<sup>22</sup> Tusa ujakajam David niina aentsji aidaujai ashí jiinjag waugtusag Jordágka amain katiagajui. Nunak nunú kashia duwik ashí katiagajui.

<sup>23</sup> Tuja Ahitófelak nii tibau umigkacham kajeka niina burrojin entsamak niina jeen yaakat nii akiinamujin weuwai. Nunik jegaa niina patayi aidaujai ashí chichas uminak, suween daekai jigkama jakauwai. Nunik jakamtai niina apaji ukusbaunum ukusajui.

*David yaakat Mahanaim jegamu*

<sup>24</sup> Davitak Mahanaim jegau ai, Absalóggkak niina suntaji aidaujai pataetuk Jordágkan yama katituidau.

<sup>25</sup> Tuja Joab suntaja apuji aajakua nuna yapajia Amasá Joapa ikaa yachi aajakua nuna Absalón adaikauwai. Amasá aajakui Ismael aents Itrá aajakua nuna uchiji, niig Nahasa nawanji Abigail Davitan ikaa umayi aajakua nuwi akiamu aajakui. Abigail aajakui Seruíá umayi Joapan dukuji.

<sup>26</sup> Tuja Absalóggkak tikich Israel aents aidaujai Galaad nugkanum jegawajui.

<sup>27</sup> Nuninai David Mahanaim jegamtai, Nahasa uchiji Sobí Amón nugkanum yaakat Rabánmaya, tuja Amiela uchiji Maquir yaakat Lodebarnumia, nuigtu Barzilai nugka Galaadnum yaakat Roguelimnumia aatus Davita igkug kumpamatatus jintukiajui.

<sup>28</sup> Nunik shimuinak David niina aentsji aidaujai susatnun: Jáanch asepatái aidaun, shikika umutai aidaun, ichinak aidaun aatus yajuakajui. Tuja nuigtushkam trigon, cebadan, harinan, trigo duwikbaun, haba aidaun, lenteja aidaun,

<sup>29</sup> dapa yumijin, manteguillan, uwijan, nuigtu baka muntsujijai queso najanamun aatus yajuakag David niina aentsji aidaujai yuwati tusa ejetiajui. Nunak dita anentaimas: Uwegshunum mininak pimpiki yapagkiag kitajag mininawai tusag dutikawajui.

## 18

*Absalón jakamu*

<sup>1</sup> David niina suntaji aidaun ashí dekapajui, dutika mil suntajan apuji agtinun, cien suntajan apuji agtinjai adaitujui.

<sup>2</sup> Nuna dutika nuwian kempatuma imajin akanag ijumag nunú makichik akanka ijumjamun apujin Joapan adaitukui, tuja tikich akanka ijumjamu apujin Abisaín adaitukui. Juju jimaja juka Seruíán uchiji aajakui. Untsu tikich akanka ijumjamun apuji atinun Itai Gadnumia aajakua nuna adaitukui. Dutika ashí ijumag chichajak:

“Wishakam maaniamunmak atumjai minittajai”, tiuwai.

<sup>3</sup> Tutai dita ainak:

“Dekas apuh amek minipa, wagki shiwajak ii aidautinak imanikag puyatjupainatsui, nuadui ii pisaajinish idaitamainai, nuniachkush jimaitukesh amupak idaitamainai. Tujash amek ii diez mil ainag nuna nagkaesau akikaitme. Nuadui amina dekas mantamawagtatus wakejutpainawai. Nuadui apuh, amek dekas juju yaakta juwig pujusam iina depetamainakui atujatkatin ishiakta”, tiajui.

<sup>4</sup> Tusa tama:

“Ayu, atum tajum duke ati”, tiuwai. Tusa tamawaik yaakta waitiji yantamen wajasui. Nunik wajai suntag mil akanjamu aidau, cien akanjamu aidaujai aatus jinaidau.

<sup>5</sup> Nunú eke shimuinatsaig apu David chichaak:

“Absalón wainkugmesh tikima maawaigpa”, tusa, Joapan, Abisaín, Itain aatus ujakui. Tusa taun suntag aidau ashí antukajui.

<sup>6</sup> Aatus suntag aidau jiinag tikich Israel aents aidaujai maaniawagtatus shiyakajui.

Nunak ikam Efraín tutainum maaniawajui.

<sup>7</sup> Nuwi maaninak Davita aentsji aidau tikich Israel aents aidaun depetkajui. Nuwi maaniamunum shiig kuashat jinawawai. Ashí ijumjamak veinte mil aents jinawajui.

<sup>8</sup> Nunú tsawantin ashí nugkanum maaniau ainawai. Tuja nuwi maaniamunmak puyajaik imanikag jinachajui, ikam shiig múun ishamainnum maanidau asag, imannum wainak akuumak yujasag ima kuashat jinawajui. Aatus Absalóggka suntaji aidau shiig kuashat jinawawai.

<sup>9</sup> Tuja Absalóggchakam burronum entsamak wekama Davita aentsji minidaujai pachiachbau igkuniki. Nuna burro wainak ishamak tupikaki numi encina tutai ayaunum akumkauwai. Nunitai Absalón nuna numi kanawen kuntujen eteemamtai, burro tupikak ukukiuwai, dutikam yaki numi kanawen detau.

<sup>10</sup> Nunik detaun makichik aents wainak tupikaki jegaa Joapan ujaak:

“¡Absalón numi kanawen eteema detaun wainkamjai!” tau.

<sup>11</sup> Tusa ujaam Joab niina chichajak:

“¿Wagka wainkayatkumesh nuwig maa ukukchamume? Dutikawaminig plata diez najanamu aidaun makichik akachumtaijai amamain awajkajame”, tau.

<sup>12</sup> Tusa tama nunú suntag niina chichajak:

“Nunú mil plata sujakminish, wika apu uchijinak maumait Sujai, wagki apu amina, Abisaín, Itain aatus chichagtamainak, mina uchijuk maawaigpa tujamaidau ashí antukmag nuadui.

<sup>13</sup> Tuja wi maamtaig apu Davitak tuké dekamainai, wagki niig makichkish uumjukaik idaimaitsui. Niig iniimas tuke dekamainai. Nunik dekamtaig amekesh minak ayamjutmaitsume, nii minak mantumainai”, tiuwai.

<sup>14</sup> Tusa tutai nii ayaak:

“¡Amejai chichaaku tsawan megkaemainuk atsugtawai!” tusa ukuak kampatum nagkin juki Absalógkan jegantun iwaku detaun aketuk kampfatum imania detsepnum ijuwai.

<sup>15</sup> Dutikantai Joapan uyunaidau diez aents yujau Absalógkan tenteawajui. Dutikawag awenawag maawajui.

<sup>16</sup> Dutikawagmatai, Joab uwija kachuji umpuagtajum tusa inamjauwai. Tusa tima umpuajagmatai, suntag aidauk tikich suntag Israel aidaun aintug shimuidau ukukiajui, wagki Joab ukuktajum tau asamtai.

<sup>17</sup> Nunikag Absalógka iyashin jukiag nunú ikamnum waa múun aunum nuwi egkeawajui, dutikawag nuwi kaya múun aidaun yajuakag shiig kuashat ijumjugag ukukiajui. Tuja tikich suntag Israel aents aidauk Davita suntaji aidau pataetuk shimuidau ukukiajam, maki makichik dita jeen pisajajui.

<sup>18</sup> Absalón iwaku pujusa niina niimen dakumak kayai najanauwai. Nunak nii anentaimas:

“Mina uchijuk atsa duwiyap wika jakanuk makichkish pachikcham megkaemainaitja”, tau asa nii iwaku pujusa dakummamak najanamujin, Absalón adaikauwai. Duka yamaikish Absalón dakummamak najanamu tutai nugka paka, apu nugke tutaya nuwi awai.

<sup>19</sup> Tuja Sadoka uchiji Ahimaas Joapan chichajak:

“Tuke Pujuu amina ayamjupak shiwaajum aidaunak ijinae tusan apu Davitan tupikakin wenu ujtakjai”, tiuwai.

<sup>20</sup> Tama Joab ayaak:

“Amek yamaik chichamak etseggashtatme, tikich tsawantin etseggkata, wagki yamaik apu uchiji mantamnae”, tiuwai.

<sup>21</sup> Tusa tiuwaitak suntag etiope aentsun chichajak:

“Ame wetá nunikam apu pujamunum jegam ame waji wainkaume nunú ashí ujakta”, tiuwai. Tusa tima niina eme anentus tikishmag nugkan nijayin antig pujau wajaki tupikaki weuwai.

<sup>22</sup> Nunikmatai Ahimaas Joapan ataktu chichajak:

“Dekas minash idaitusta wisha etiope aents wega nujai wetajai”, tau. Tutai Joab ayaak: “¿Wagka amesh nunú chicham etsegbaunum pegkeg waji jukitnunikish wetag tame?” tau.

<sup>23</sup> Tama Ahimaas ayaak:

“¡Duka puyatjukaipa, juachkunush jukishtajai. Wika wamak tupikakin wetag tajai!” tau. Tutai Joab ayaak:

“¡Untsu takumek, tupikakim wetá!” tiuwai. Tusa tima nugka paka tepajunmanini tupikakiuwai. Nunik etiope aentsnak amayag nagkaikiuwai.

<sup>24</sup> Nuninai Davitak yaakat Mahanaima waitijin nuna yantamen eketu. Nunik eketai suntag jinta kuitamin yaakat peejamu waitijin nuna yakin wakauwai. Nunik niimkama makichik aents tupi tupikakua midaun wainkauwai,

<sup>25</sup> nunik apu David antukti tusa senchi untsunkauwai. Nuna antuk apu chichajak:

“¡Ima nigki minakug, chicham pegkejan etseggkatatus minak aniwai!” tau. Tuja nunú aents tantattak minai,

<sup>26</sup> tikich aentschakam nuna ukujin tupi tupikakua midaun wainkauwai. Nunik nunú suntag waiti kuitamin untsamak:

“¡Tikishchakam tupi tupikakua minawai!” tau. Tutai apu ayaak:

“¡Niishkam chicham pegkejan etseggkatag tusas minatai!” tiuwai.

<sup>27</sup> Tutai waiti kuitamin awentsag chichaak:

“Tupikamuji diigsamash Sadoka uchiji Ahimaas diyajai eemak mina nunak”, tau. Tutai apu ayaak:

“¡Niig aents shiig anentaimkauwe, chicham pegkejan etsegkatasas minatai!” tau.

<sup>28</sup> Tusa chichaak eketai, Ahimaas tupikaki taakug apu eketun jegantun tikishmag tsuntsuna nijayin nugka antig pujus kumpama chichajak:

“¡Tuke Pujuu amina Apajuígmia duke ememattai ati! Wagki amina kajegtamiagma nuna, amina suntajum aidau depetkati tusa nii timatai depetkag ayamjupaku asag-matai”, tiuwai.

<sup>29</sup> Tama nii iniak:

“¿Absalókgash pegkejak wekaema?” tau. Tama Ahimaas ayaak:

“Joab mina chicham etsegkata tujutmatai tupikakin minai, mina ukujui suntag aidau shiig senchi pampaidanu antukmajai. Tujash dekachmajai wagkas imatiagma”, tau.

<sup>30</sup> Tutai apu David chichajak:

“¡Menasta, nunikam anui wajasa dakamsata!” tama Ahimaas ayu tusa menaas wajasui.

<sup>31</sup> Nunik wajai etiope aentschakam tupi tupikakua tantauwai. Nunik apu Davitan chichajak:

“Chicham pegkejan itaag nunú amesh, mina apujuh, antukta. Yamai Tuke Pujuu amina ayamjupak shiwag amina kajegtamiagma nunak ashí ijina agkanmitkagmae”, tau.

<sup>32</sup> Tusa tama apu David etiope aentsun iniak:

“¿Absalókgash pegkejak wekaema?” tau. Tama nii ayaak:

“Apajuí waketaik nunú uchi Absalón jakama nunisag tikich amina kajegtamina dushakam itugkag ashí jinawanum tusan wakegajai”, tau.

<sup>33</sup> Nuna antuk apu anentain inagmakui. Nunik waitinum yaki kanutai umikbaunum nuwi waka buutiwai. Tuja nuwi wegagas buutkabaikia chichaak:

“¡Uchuchi Absalóga! ¡Uchuchi Absalóga! ¡Wi mantamnamain ame mantam-naume! ¡Uchuchi Absalóga!” waja wajas buutu.

## 19

<sup>1-2</sup> Apu David Absalón jakamun dekaa buutui tabaun niina uyunainak Mahanaim jegawaju aidau dekawajui. Nunikag ujumak aents Joapan ujaktatus wejiajui.

<sup>3</sup> Nuna suntag aidau antukag depetmakaju asag shiig aneasag waketmainun, ayatak datsaajag depetmakchauti wajukmaina numamtuk wake besemag waketjajui.

<sup>4</sup> Nuninai apu David yapiin jáanchi dukumak senchi buutak: “¡Uchuchi Absalóga! ¡Uchuchi Absalóga! ¡Uchuchi Absalóga!” wajau.

<sup>5</sup> Imatak niina inamtaijin pujusa buutak pujuttaman, Joab jegajua chichajak: “Amina, tuja amina nuwem aidau, uchijum aidau, nawanjum aidau, ikaa nuwem aidau aatsa ayamjaku, amina kajegtamiagma duka yamai depetka ijinaji. Dutikau ajinig, amek ii pegkegchau takamsamtaí datsankagtakum wajukmaina aan pujame.

<sup>6</sup> Amek suntaja apuji aidau, nuigtu amina suntajum aina dushakam eme anentsa diyatsum nunú yamai paan iwainmamkaume. Nuniau asam ya amina kajegtamua nunú ima senchi aneakum, amina anempaina nunú kajejame. Amek ii jinaa ajinish puyatkagtutsuk, Absalón iwaku pujakuig shiig aneasa pujumain asam aniame.

<sup>7</sup> Aní pujutsuk jiinkim amina suntajum aina nunú anentai ichtugtuga. Ame dutikchataik, amina aentsjum aina duka makichkish juwi batsamsag tsawagchagtai. Nunikagmatai amek juwaktatme. Nunak Tuke Pujuu daajin tajame. Nunú atatuí ame yaunchuk datsauch asam utugchat igkugkuitam nuna nagkaesau utugchat igkugtatam nunú”, tiuwai.

<sup>8</sup> Tusa tima apu David yaakta waitijin jeganta ekemsauwai. Nunikmatai ashí aents aidau nuna dekaawag apu eketbaunum jegantag ijunjajui.

### *David Jerusalén wakitkimu*

Ashí Israel aents aidauk pisajag maki makichik dita jeen shiyakajui.

<sup>9</sup> Nunikagmatai Israel aents maki makichik wegantu aidau chichainak:

“Iina shiwaaji aidau waitkagmagma nunak David ayamjupakji, tuja filisteo aents aidau waitkagmaidaunashkam ayamjupak agkanmitkagmaji. Imanape tama Absalóga ishamak tikich nugkanum tupikaki wekaewai.

<sup>10</sup> Untsu Absalón iina apuji atin adaikamiag duka maaniamunum jakae. Nunika duwish ¿wagka David nigki ataktu iina apuji ati tumainchauwaita?” tuidau.

<sup>11</sup> Aatus Absalóga aentsji aajaku aidau tuinamun David dekauwai. Nunik: “Sacerdote Sadokan, Abiatarjai Judá wegantu aidanu apuji múun aidau iniastajum: ‘¿Wagkag ditash minash wakitki niina inamtaijin taati tusash untsujuinatsua?’

<sup>12</sup> Dita ainawai wi wegantu mina pataag aina duka. Nuadui dita ainawai dekas mina taati tusag untugmain aina duka' ", tiuwai.

<sup>13</sup> Tusa nuigtushkam Amasán chichajak:

"Ameshkam minak dekas shiig pataachijuitme. Nuadui Joab suntaja apuji puja nuna yapajiakun amina apu adaikattagme. Tuja nuna wi umishtaik, Apajuí suwimkan sujusti", tiuwai.

<sup>14</sup> Nuna tusa Judá wegantu aidau wainak chichá yujaun imijkauwai. Dutikam dita ashí ijunag apu David wakitki niina suntaji aidaujai Jerusalén taati tusag chichaman akuptukajui.

<sup>15</sup> Nuna dekaa apu David niina aentsji aidaujai wakitkiag namak Jordágnum jegawajui. Nuninai Judá wegantu aidaushkam David niina aentsji aidaujai Jordán katiniagtai, yaigkagtatus shimutuinak Guilgal jegawajui.

<sup>16</sup> Nunik shimiagtai Simí Gera uchiji Benjamín wegantu Bahurimnumia aajakua dushakam apu Davita igkugtatus tupikaki ditajai ijunag weuwai.

<sup>17</sup> Nunik wetai mil aents Benjamín wegantu aidau uyuniajui. Tuja Sibá Saúla jeen pujusa tsakajua dushakam niina uchiji quince aajakua nuna yajuak, nuigtu veinte inake aidaun yajuak eke apu David Jordán jegatsaig niyá jegauwai. Nunikag apu David batsatbaunum katiyajui.

<sup>18</sup> Nunak nunikajui wagki apu David niina patayi aidaujai yaigka ikatiaja shiig anemtikсами tuidau asag. Tuja apu David Jordágkan katitkatatus uminai, Simí niina jegantun eme anentus tsuntsuma wajas

<sup>19</sup> chichajak:

"Ame Jerusalén jiinki weamin, wi amina pegkegchaun chichagkauwaitjam nunú wait aneam tsagkugtuga. Tuja nuigtush anentaimtu pujutsuk kajimatkiti.

<sup>20</sup> Mina apujuh, wi dewakbaugnak dekgamajai. Nuadui wika amina igkugtasan ima wiki José wegantunuk wiyá emkan taajai", tiuwai.

<sup>21</sup> Tusa tutai Seruían uchiji Abisaí chichaak:

"¡Auk Simík apu Davitan Tuke Pujuu etegkamun pegkegchau chichagkau asa mantamnamainai!" tiuwai.

<sup>22</sup> Tusa tutai, David ayaak:

"¡Wainka tuu wekaetsuk idaisata! ¡Yamai aents suwimak susami tabauk atsawai! Ayatak ijuntsa jüstamatag taji, wagki Israel aents aidaun apujinuk yamaishkam wiktjai", tiuwai.

<sup>23</sup> Nuna tusa Simín chichajak:

"¡Aminak mashtatjame! Wi tajam nunak Apajuí antamunum tajai", tiuwai.

<sup>24</sup> Tuja Saúla tijaji Mefi-boshet aajakua dushakam apu Davitan igkugtatus jiintukiuwai. Tuja nüg David Absalógkan ishamak Jerusalén jiinkiuwa duwi nagkamas nawenak nijatsuk, jáanchjinash nijatsuk, tuja susujinashkam awatsuk pujai, apu David iwaku pegkeg wakitki tauwai.

<sup>25</sup> Tuja niishkam apu Davitan igkugtatus Jerusalén jegauwai. Nunik jegamtai apu chichajak:

"Amesh ¿wagka wijaiish minichmayume?" tau.

<sup>26</sup> Tama nii ayaak:

"Apujuh, wika shutuu asan wi ekemi wetinun burron itagtuati tusan mina inakjun inagbaijai. Tusa ti ai ayu tujutiatak, umikchau asamtai minichbaijai.

<sup>27</sup> Tuja wi wetinun umigtutsuk ukuak amina tajutjama wi makichkish tichamun amina tsanupagmayi. Tujash apuh, amek Apajuí aentsji nayaimpinmayajai betekaitme. Imanaitam duwi ame wajuk wakegapa duka nunisag uminkati.

<sup>28</sup> Wagki mina apaju uchiji aidautik ame ijinam amainaitku, amina pataim itugmaina numantuk ipatuawamin, amejai ijunja ekemsa yujumka yuwag nuniaunush ¿wisha nuigtush wajinak ima segatjame? Wika amina inakmetjai", tiuwai.

<sup>29</sup> Tusa tama apu David ayaak:

"Duka imanuk chichaak wekayipa. Wika amina Sibájai Saúla nugke aajakua nunú akandaika jukitajum timajime", tiuwai.

<sup>30</sup> Tama Mefi-boshet ayaak:

"Mina apachju nugke aina duka ashí niinu ati, wagki nuna nagkaesauwa duka, dekas ame shiig pegkeg ataku ame pujusa inamtaigmin taum nunuwai", tiuwai.

<sup>31</sup> Tuja Barzilai galaadnumia aajakua dushakam yaakat Roguülim pujau, apu David Jordágka katittai yaigka, nuwi apujai akatdayag ukuak wakitkitatus wejiuwai.

<sup>32</sup> Niinak ochenta mijanji ajujaku. Untsu nüg wiakuch aajakui. Iman asa apu David Mahanaim pujusa atsumamujinak nii ashí yaijakui.

<sup>33</sup> Nuadui apu David Barzilain chichajak:

“Jerusalén taata nunikamin wi amina kuitamkatjame”, tiuwai.

<sup>34</sup> Tusa tama Barzilai ayaak:

“Wika múuntuch wajasjai, nuniku asan kuashat tsawan iwakuk pujushtatjai. Tuja kuashat tsawan amejai pujustinigkik Jerusaléggak minimaitsujai,

<sup>35</sup> minak ochenta mijan ajutui, nuadui yujumka yuwaknush, umutain umaknush pegkegnak dekapeatsjai. Tuja nuigtushkam kantabaunash antumain dekapeatsjai. Nuadui wainka ame mina kuitamjakum waittsaim tajai.

<sup>36</sup> Ame Jordán katiakmin yaigtasan tajuajam duwikik apujuh, minash pegkegnum yainkatag tame. ¡Dekas duka puyatjukaipa!

<sup>37</sup> Wika dekas wakitkin mina yaaktajui jegaan, nuwi pujusan jakatjai. Nunikmatai mina apaju ukumataijin ukugsatnume tajai. Untsu juju mina uchig Quimham amina takagtamin ati tajai. Nii amina uyuuntamas wekaekui, ame nii yaigtin ata”, tiuwai.

<sup>38</sup> Tusa tama apu David niina ayaak:

“Untsu Quimham wijai pujusti, tuja ame uchigminash wajuk yainjukti tusa wakegame nunak imatixsanuk umiktajai. ¡Tuja ame waji segattatme nunak ashí dutikatjai!” tiuwai.

<sup>39</sup> Tusa chichas inagnakmatai, ashí aents aidauk Jordán utsaanawag katiatajui. Nunikag nuwi apu David Barzilajai akatdayag niina kumpamak yapinum kugkuasui. Dutikam Barzilaik niina jeen wakitkiuwai.

<sup>40</sup> Nunikmatai apu David niishkam Quimhamjai uyunis, nuigtu suntag Judá wegantu aidaujai aatus ashí ijumag, nuigtushkam suntag Israel wegantu aidau jimaituk aatus yaakat Guilgalnum shiyakajui.

<sup>41</sup> Nunik nuwi jegawag batsatai, dukap atsuk ashí Israel aents aidau apu Davitan jegajua chichajuinak:

“¿Wagka ii Israel wegantu aidauti ame yaigka Jordán ikatimain aish, Judá wegantu aidau aminash Jordán katitminish yaimpakagmae?” tuidau.

<sup>42</sup> Tusa tiagtai, Judá wegantu aidau ditan ainak:

“¿Wagka atumesh wainkagmesh kajeagme? Iik yaigmaji, wagki apuk iina patayi asamtai. Iik apu yutain, nuniachkush waji aidau amastí tusaikish yaigchamji”, tiajui.

<sup>43</sup> Tusa tiagtai Israel wegantu aidau ditan chichajuinak:

“Ii ainaji dekas apu yaimaintik, wagki ii ima kuashat maki makichik wegantu dekapamak dieza imajin ainaji, tuja atumek ima makichik wegantua duke ainagme. Tuja nuigtushkam ii ainaji apu wakitki taati tusa untsukutik. Dutikau ajinig atumek tikima wainkauchia nunin anenkagtagme”, tiajui. Tujash Judá wegantu aidau Israel aents aidau nagkaesau ima senchi pegkegchaun chichaidau.

## 22

*David nii depetmakbaujin pachis kantamamu*

<sup>1</sup> Saúl Davitan maatang tutai, Tuke Pujuu ayamjukui. Tuja tikich shiwag aidau maatang tiagtaishkam, Tuke Pujuu ayamjukkau asa Apajuin emematak juna aatus David kantamauwai.

<sup>2</sup> Nuniak aatus tiuwai:

“Tuke Pujuuwah,

ametme mina kuitamjaumek,

ametme mina ejamataigmek,

mina agkanmitkagnumek.

<sup>3</sup> Ametme mina Apajuigmek,

ametme kaya muunnum uumka eamtayama imanmek,

ametme mina ejamaka uwemtaijuk.

Ametme senchimek, mina uwemtijnmek;

amek dekas shiig yakí,

mina uumka uwemtaijuitime.

Amek dekas shiig yakí mina eamtaijuitime,

ametme mina uwemtijn.

¡Aents magkagtin aidau mantuatag tuinakuish,

ame minak ayamjutkabiume!

<sup>4</sup> Tuke Pujuuwa, ametme pegkejam

ememattaimmek,

wika amina emematjame,

mina shiwag mantuatag tuinakui

amina untsuagme,

tusa tai ame ayamjutme.

5 "Jamain ishamainnum jeganbajjai;  
tuja magkagtin aidaunum pachiinkan,  
mantuinawapi tusan senchi ishamkamiajai.

6 Jamainnum egkemkamiajai.

¡Nunak shiwag aidau  
maami tusag umigtukagmayi!

7 Nuna ishamakun Tuke Pujuu segabiajai,  
mina Apajuújun yainkati tusan segabiajai,  
tusa tai niina pujutaijin pujus antugtukmayi.  
¡Wi untsubaunak nii antukmayi!

8 "Untsuka ai nugka senchi uugkabi,

muja aidaushkam buchitjabi,  
nunak ¡Tuke Pujuu kajeka imatikabi!

9 Tuke Pujuu nujinia bukuiti jiinmayi.  
Tuja niina weninia jii keeka jiinmayi,  
niina weninian jii kajii kegaun nagkimayi.

10 Nayaimpik jáanchjai betek ichiinak nemaabi,  
nuwiya akaikibi mina ayamjutkatatus.

¡Amek yujagkim ikiyamag  
suwe wajasbaunum nuwi najamayume!

11 Amek mina ayamjutkatasam,  
ángel querubignum ekemis,  
nii nanaakmatai minatai tumain,  
dasenum pachitkau taabiume.

12 Yujagkim ikiyamag suwe ishamainnum,  
amek pachitkau taabiume.

13 Amina senchijum  
chaagpijai betek keeka jiinmayi,  
nuniai jii kegau yumijai betek yutibi.

14 Imaniamunum Tuke Pujuu Apajuí múunta nunú,  
chichamun ipamtajai betekan antukagmayi.

15 Imatak akentaiji aidaun akenak  
chaagpin ajuagmayi,  
imatikak mina shiwag aidaunak,  
uwakek ipisjabi.

16 Ame kajeka chichamin,  
dase senchi dasentak,  
nayantsa umpui buku emamtai,  
nugka initke wantinkauwai.

17 "Apajuíyah,  
ame minak nayaimpinum pujusam,  
uwejum awentuntabiume,  
dutikam nayantsa kunajinia  
jiikim uwentijugmayume.

18 Mina shiwag aidau,  
mina nagkaetasu senchigtin  
aidau kajegtiagmayi.

Tujash ame ayamjutkabiume.

19 Wi waitiakun pujai jetetkajabi,  
tujash Tuke Pujuuwa, ame minak ayamjutkauwaitme.

20 Amek mina anentu asam,  
uwentijujam agkanmitkajauwaitme.

21 Tuke Pujuuwah,  
wika ame wakegamun takau asamtai,  
ame minak pegkegnum akigkabiume.

22 Wika Tuke Pujuu tujutbaunak betek umikuitjai,  
nii tujutbaun umitskek idaisachuitjai.

23 Wika niina chichame umiktina nunak,  
ashí betek aneakjai,  
nuadui ¡niina chichame umiktina nunak



makichkish umitskek idaisachuitjai!

<sup>24</sup> Wika ame diismash  
pegkegchaunak takamsachuitjai,  
tuja tudau aina nunak tujanjauwaitjai.

<sup>25</sup> Tuke Pujuu emtin  
pegkegchaun takaschau asantai,  
nii minak pegkegnum yainkauwai.

<sup>26</sup> "Tuke Pujuuwah,  
amina betek umigtamainakuig,  
ameshkam betek uminaitme.  
Ya amina chichamjumin betek umiawa,  
nunú amek shiig kuitamnaitme.

<sup>27</sup> Aents dekaskenum chichau aina duka,  
ameshkam dutiksamek kuitamnaitme.  
Untsu aents waitjin aina duka ameshkam dutiksamek iikuame.

<sup>28</sup> Amek aents ememachu aidau uwentiknaitme,  
untsu ememau aina duka  
wainka dushiktai emame.

<sup>29</sup> Tuke Pujuuwah,  
ametme mina tsaaptinug,  
mina Apajujuh, ametme wi suwenum wekagaish  
tsaaptin etugtaumek.

<sup>30</sup> Ame yaintsamin,  
mina shiwag aina nujaig maaniattajai,  
nunikan depetkan amukatjai.

<sup>31</sup> "Apajuíyah, ame dutikamu  
aina duka ashí pegkejai.  
Ame anagkagtuamua nunak dekaskeapi tajai.  
Tuke Pujuuk ya niyai  
dekaskeapi tuinawa nuna kuitamui.

<sup>32</sup> Tuke Pujuuwah,  
ima ameketme Apajuímek.  
Ame kuitamkagtinaitam  
imanuk tikichik atsawai.

<sup>33</sup> Apajuíyai senchigtin mina kuitamjinuk,  
nii minak pujutji pegkeg ati tusa jintinjinai.

<sup>34</sup> Apajuí minak shiwag amaigkai tusa,  
japa amaimainchau tupikaina iman etawai.

Wi shiwag amaintukai tusan,  
muja titijin wakamtaish, ame minak kuitamjinaitme.

<sup>35</sup> Ame minak shiwagjai maanitash jintinjame,  
ametme flecha ekenka  
nagkintai jiju bronce najanamun,  
japiki nagkimati tusam senchintijaumek.

<sup>36</sup> Ametme shiwag aidau jetetuinakuish  
uwentijinmek, ame yaintu asamin,  
tikich aidaush eme anenjuinawai.

<sup>37</sup> Ame wi wekaebaunmak kuitamjame,  
nuadui atakuinjanush iyagchabijai.

<sup>38</sup> Mina shiwag aidau pataetukan  
ashí ijinamijai,  
dutika ijinan ima wiki wakitkimijai.

<sup>39</sup> ¡Shiwagnak ashí ijinawabijai!  
¡Makichik iwakukesh juwakchabi!

<sup>40</sup> Ame senchintijuawamin  
shiwaajujai maaniawabijai.  
Wijai shiwagmagaidaush  
mina nii ijinati tusam idaitugsabiume.

<sup>41</sup> Ame mina shiwag aidauk,  
wisha wainaig ipisja ishiakuitme.

Tujash wi pataetuka amainagkan  
 mina kajegtuidaunak ijinawabiajai.  
<sup>42</sup> Dutika ijinai,  
 tikich aents aidaun egayanme yainkatnume tusag,  
 tujash makichkish yaigchajabi.  
 Tuke Pujuuwah,  
 aminash egapayanume,  
 tujash yaigchabiume.  
<sup>43</sup> ¡Nugka tsaimaina imatikan tsaikamiajai!  
 Tsakus wajatua najamaina imatikiajai ditanak.  
<sup>44</sup> Mina pataag aidauk  
 pempeentugkiag shiwagmatuinakuish,  
 ame ayamjuttamin depetkamiajai.  
 Ame minak Israel aents aidau apuji,  
 nuigtu tikich aents aidau apujishkam etiuwaitme.  
 Aents wi wainajakchamu aidau  
 mina umigtuinak takagtuinawai.  
<sup>45</sup> Wi tabaunak betek umigtuinawai.  
 Aents tikich nugkanmaya aidau,  
 mina inataig waigkag emematjuinawai.  
<sup>46</sup> Aents tikich nugkanmaya aidauk,  
 wijai maaniatag takush sapigmainawai,  
 nuninak uumak batsatu kujaukmaikia  
 jiinkiag mantuawaipa tujutuinawai.

<sup>47</sup> “¡Tuke Pujuuwah,  
 amek tuke pujuuwaitme!  
 ¡Ameketme mina ejamataigmek!  
 ¡Ashí aents aidautijum  
 mina uwemtijina nunú ememattajum!  
<sup>48</sup> Apajuiyah, ame mina  
 shiwag aidauk ijinabiume,  
 ame minak kuashat tikich aents aina nunashkam  
 apuji etiuwaitme.  
<sup>49</sup> Mina shiwag kajegtuinak mantuatag  
 tuinakuish, ame minak uwemtijame.  
 ¡Tuke Pujuuwah,  
 aents pegkegchau aidau mantuatag tujutiagmayi,  
 tujash ame ayamjutkauwaitme!  
<sup>50</sup> Nuadui tikich aents  
 ii wegantuchu aina nuna emtinish  
 amina emematjame,  
 tuja amina etsagkeakun kantamjai.  
<sup>51</sup> Ame apu ati tusa etegtuau asam,  
 depetmatak tuké sujame.  
 Ame minak, tuja mina uchig wegantujai  
 amina anenkagmin tuké kuitamjame.”

## 23

*David jakattak pujusa chichakbau*

<sup>1</sup> Jujuwai David inagnaku kantamamu:  
 “Wika David Jesé uchijiyaitjai,  
 Israel aents aidau apuji ati tusa Apajuí etegtuau asa,  
 ajaantusa diyaku chichame antugtai  
 emauwa nunuwaitjai,  
 mina apachug Jacob aajakua duka  
 niina emematujakui.  
 Wika Israel aents shiig pegkegchin  
 kantamin asan wakejutaiyaitjai.  
 “Nuadui juna kantamjai:  
<sup>2</sup> “Tuke Pujuu Wakani minai pujau asa

chichamtijawai.

Nii tujuthauwa nuna kantamjai.

<sup>3</sup> Apajuí Israel aents aidautin

Apajújiya nunú chichakmae.

Israel aents aidautin

kuitamjamna nunú chichagtak:

‘Aentsu apuji atinun

Apajuí adaikauwa nunú shiig Apajuín ishamas,

betek pegkegnum takauk,

<sup>4</sup> kashikmas etsa jiiinak etsantama imatikas

aents aidaun yaigtatui.

Tuja yumi yutug nagkanbaunum etsa jiiinak

nugkan shiig sukuam chijichi tsapaama iman atatui.’

<sup>5</sup> Apajuik wijai chichaman umikui,

duka atakesh tuke atinai.

Nuadui mina pataag aidauk

ishamtsuk shiig batsamtatui,

tuja ima Apajuilke pujut pegkejan sukagta duka.

<sup>6</sup> Untsu aents pegkegchau aidauk

jagkijai betek achimainchau ainawai.

<sup>7</sup> Tsuwat aidau numi juki duwi tiwija

jii kegamunum utsaam

esaka megkagama numamtin ainawai.

Dutikamunak ataktu

waketjukiajag juchau ainawai”,

tiuwai David.

**Apu aidau takasbau aina  
nunú pachisa  
yama nagkamchaku agagbau  
1 Reyes  
David takas inagnakmatai nuwi nagkama Salomón  
takasbau**

(1—2)

*Abisag Davitan kuitamkamu*

<sup>1</sup> Apu Davitak muumpakiau asa senchi tsetsemak waitiau asamtai, jáanchin kuashat yajutuk asekedau. Imatikamash kukukutuk dekapeachu.

<sup>2</sup> Nunitai niina kuitamin aidau chichajuinak:

“Apuh, dekas amina kuitamjamkatin makichik nuwa muntsujut egaka itaami. Nunú aminí ayaumas kanakui, kukukut kanagminum”, tuidau.

<sup>3</sup> Aatus tusag Israel aents aidau nugkenian nuwa shigmauchin etegkatag tusa ashí egakajui. Dutikawag yaakat Sunemnum nuwa Abisag daagtinun wainkajui. Dutikawag nuna jukiag apu Davitan ejetuawajui.

<sup>4</sup> Abisagkak muntsujut shigmauch aajakui. Nunú apu Davitan kuitamajakui. Tujash apu Davitak nunú nuwauchijaig makichkish tsanijinachui.

*Adonías apu atajai tibau*

<sup>5</sup> Nunú tsawantin Davita uchiji Adonías, Haguit aajakua nuwi akiamu, wi Israel aents aidau apuji atajai tusa, carro maaniaku jutai aidaun, caballo maanitai aidaun, nuigtu cincuenta aents niina kuitamkatin aidaun aatus etegkeg ijumjauwai.

<sup>6</sup> Adoníasnak Davitak tsakat asamtaigkish, pegkegchau takamsaipa tusag makichkish chichagkachui. Nuigtushkam Adoníasak shigmauch yantsaptin, niina yachi Absalógka awaan akiinau aajakui.

<sup>7</sup> Tuja Seruíá uchiji Joab aajakua nujai, nuigtu sacerdote Abiatar aatus Adonías chichaman umikui. Nuadui dita aidau yajaku ainawai.

<sup>8</sup> Tujash sacerdote Sadokkesh, Benaías Joiadá uchijigkesh, nuniachkush profeta Natágnkesh, tuja Davitan kajittsa anentai Simí aajakua dukesh Adoníasnak yaigchajui. Tuja Davita suntaji yacha aina dukesh Adoníasnak yaigchajui.

<sup>9</sup> Makichik tsawantai Adonías chichaak:

“Jiistamku yuwatin uwig aidau, baka aidau, toro tsakat duwejam aidau kajegjum ingka umiktajum”, tusa inamjauwai. Nunak Roguel nugkanum yumi pukuni jijnbaunum ijus, Zohéletnum kaya múun pujujukua nuwi dutikauwai. Dutika umika apu Davita uchiji niina yachi aidaun, Judá wegantu aidaun, tuja apu Davita takajin aidaun aatus ashí ipauwai.

<sup>10</sup> Untsu profeta Natágnak, Benaíasnak, Davitan maawainum tusa, suntag kuitamajaku aina nujaig ipachui. Tuja niina yachi Salomógnakesh ipachui.

<sup>11</sup> Nunikmatai Natán Salomógka dukuji Betsabén chichajak:

“Apu David dekatsaig Adonías apu wajasa duka ¿amek dekatsmek?

<sup>12</sup> Nunú dekachkumek juwi taata, wí amesh amina uchijum Salomógjaish wajuk ayamjumaktatme nuna ujaktagme.

<sup>13</sup> Nijah, apu David jegajua chichagkum:

“Apuh, ame umiktinjum mina chichagtakum:

“ ‘Wi jakamtaig, mina uchig Salomón apu wajas inamjattawai’ tusa tujutmayum nuniaish ¿wagka Adoníasash apush wajase? tita.

<sup>14</sup> Tusa nijai chichamin wi wayakun, nunak dekas tawai tusan titajai”, tiuwai.

<sup>15</sup> Tusa tima Betsabé apu Davidjai chichastatus weuwai. Tuja apu Davitak shiig muumpakiau asamtai, Sunemnumia nuwa Abisag niina kuitamak pujau.

<sup>16</sup> Nuniai Betsabé apu pujamunum jeganta niina eme anentus tsuntsuma nijayin nugka antig pujusui. Nunitai apu David iniak:

“¿Waji atsumame?”, tau.

<sup>17</sup> Tama nii ayaak:

“Apujuh, amina Apajujum Tuke Pujuu tutaya nunú adaisam chichagtakum: ‘Amina uchijum Salomón apu wajas inamjattawai’ tujutmayume.

<sup>18</sup> Nunú umintsaig Adonías apu wajase, tujash duka amek eke dekatsme.

<sup>19</sup> Nunik apu wajasu asa, jiiistamku yuwami tusa toro múun aidaun, toro tsakat aidaun, nuigtu kuashat uwig maajum inagkatajum tusa niina inake aidaun inaje. Dutikak amina tikich uchijum aidaun ipae. Tuja nuigtushkam sacerdote Abiataran, nuigtu Joab suntag aidaun apujiya nuna aatus ipae. Tujash amina uchijum Salomógnak ipache.

<sup>20</sup> Nuadui ashí Israel aents aidau apu Davitash yanak dekask apu atinnash etegkeati tusa dekatatus yamai dakamainawai.

<sup>21</sup> Tuja nunú ame etseggkachaminig, ame jakamin minak mina uchig Salomógnai Adonías mantuattawai”, tiuwai.

<sup>22</sup> Tusa aujak pujai, profeta Natán jegauwai.

<sup>23</sup> Nunikmatai Davita inake aidau Natán tae tusa ujakajui. Tusa ujakam wayati tima, Natán apu pujamunum wayauwai. Nunik niina eme anentus tsuntsuma nijayin nugka antig pujusui. Natán wayamtai, Betsabék jiiinki weuwai.

<sup>24</sup> Nunikmatai Natán Davitan iniak:

“¿Apujuh, ame jakamin Adonías apu ati tusamesh ameka timaum?”

<sup>25</sup> Tichamaitkush ¿wagka Adoníasash Sojelet jegaash, toro múun aidaunash, tsakat aidaujaish, nuigtu uwig aidaujai maatajum tusa inamjash amina uchijum aidaun, suntaja apuji aidaun, nuigtu sacerdote Abiataran aatus ipash ijumag nuna ditajai yuwak, umutain umuinak batsamas untsumainakush:

“¿Adoníasai iina apujig!” wajainawa?

<sup>26</sup> Nuninakush minak, tuja sacerdote Sadoknak, Joiadá uchiji Benaíasnashkam ipapachaje. Tuja amina uchijum Salomógnakesh ipachaje.

<sup>27</sup> ¿Tuja ame jakaminish, yakí apush ati dusha ameka mina ujattsuk, Adonías apu adaikatajum tusam inamjamum?” tiuwai.

*Salomón apu atatuí tusa David etseggkamu*

<sup>28</sup> Tusa timatai apu David Betsabé untsuktajum tiuwai. Timatai untsukam apu Davitai jeganta wajasui.

<sup>29</sup> Nunikmatai apu David niina chichajak:

“Tuke Pujuu wi waitiamujun diigtus agkanmitkajauwa nuna adaisan tajame:

<sup>30</sup> Tuke Pujuu Apajuí jutii Israel aents aidauti emematin ainag nuna adaisan, wi yaunchuk amina timajam nunak yamai betek umiktatjai:

“¿Wi jakamtaig, amina uchijum Salomón apu wajas inamjattawai!” tiuwai.

<sup>31</sup> Tusa tima Betsabé tsuntsuma nijayin nugka antig pujus senchi jiika chichaak:

“¿Mina apujuh Davita, kuashat tsawan iwaku pujusam inamjatin ata tajame!” tiuwai.

<sup>32</sup> Tusa tima apu David sacerdote Sadokan, profeta Natágnan, Benaías Joiadá uchijin aatus ujaka utitajum tusa inamjauwai. Tusa timatai ujakam kampakuma duka betek kaunawajui.

<sup>33</sup> Nunikagmatai apu ditan chichajak:

“Mina atunitaig apu aina nunú ujektajum. Dutikajum atumjai ijunajum mina uchig Salomón burro mina entsamtaijua nuwi ekeni jukijum, Guihón ematajum.

<sup>34</sup> Nuwi ejegajum aceiteyai buuknum nijakjum, Israel aents aidaun apuji ematajum. Dutikajum yamajam apu ekenji tsujum makichik aents uwija kachuji umpuagta titajum. Nuna umpuakui senchi untsumkajum:

“¿Salomógnak, yamaik ametme iina apujig, kuashat mijan inamjatin ata!” titatjume.

<sup>35</sup> Dutikajum atum kuitamkajum Jerusalén itaatajum. Dutikam nii mina pujusa inamtaijui waya ekematsi. Nunik nuwi pujus inamjati, wagki wi niinak Israel aents aidaun, Judá wegantu aidaujai apuji ati tusan tijai”, tiuwai.

<sup>36</sup> Tusa tutai Joiadá uchiji Benaías apu Davitan ayaak:

“¿Ame tame duke ati! ¿Tuja ame tame duka Tuke Pujuu amina Apajuíjum tujabau tau asamin imanishag uminkati!”

<sup>37</sup> Tuja nuigtushkam Tuke Pujuu amina yaimpakua dutiksag Salomógnashkam yaigti. Dutikamu asa ame apu wajas inamjauwaitam, aan nagkaemas niina takatjig pegkeg ati”, tiuwai.

<sup>38</sup> Tusa timatai sacerdote Sadok, profeta Natán, Benaías Joiadá uchiji, quereiteo aents aidau, nuigtu peleteo aents aidau aatus ijunag apu Davita burrojin Salomógnan ekeniag juki Guihón emajui.

<sup>39</sup> Dutika ejegawagmatai, sacerdote Sadok aak pegkejam Apajuíjai chichatai aakmak-baunum chicham umiktin agagbau egkeamu arca aajakua nuwiyin uwija kachujin aceitejai jukiuwai dutika nunú aceiteyai Salomógnak buuknum nijak apu emauwai. Dutikamtai uwija kachuji jukimun umpuajajui. Nuna antukag ashí aents aidau untsumainak:

“¿Salomógnak, ametme iina apujig, kuashat mijan inamjatin ata!” wajaidau.

<sup>40</sup> Tusa imatuinak Salomógka saetus shimak shiig aneasag pigkuinak umpui umpuinakua shimuidau. Tuja shiig aneenak senchi untsumaidau asagmatai, nuggak jimaitukes puunatai tumain wajau.

<sup>41</sup> Tuja Adoníasak niina ipake aidaujai yujumkan yuwawag inagnainai, pampaidauun antukajui. Tuja kachu shinaun Joab antuk chichaak:

“¿Wagka yaaktanmash imanikash pampainawa?” tau.

<sup>42</sup> Tusa chichá wajaig, Jonatán Abiatara uchiji aajakua nunú jegauwai. Nunikmatai Adonías chichajak:

“Wayata amek eme anentsa diitaiyaitme, chicham pegkeg etsegkatasa taachumek”, tiuwai.

<sup>43</sup> Tama Jonatán Adoníasan ayaak:

“Atsa, chichamak pegkegchauwai. Iina apuji David Salomógkan apu adaikae.

<sup>44</sup> Dutika sacerdote Sadokan, profeta Natágkan, Joiadá uchiji Benaiasan, tuja quereleo aents aidaun, peleteo aents aidaujai Salomón uyuntsatajum tusa tine. Tusa tima apu Davita burrojin ekeniag emaje.

<sup>45</sup> Dutikawag entsa pukuni jiinu Guihón tutaya nuwi ejegawag sacerdote Sadoc profeta Natágjai aceiteyai buuknum nijakag apu emaje. Dutikawag shiig aneasag waketjaje. Nuadui yaaktanum aents pampaina nunak imatuinawai. Nunú imatuinamu atumek antukugme.

<sup>46</sup> Tuja nuigtushkam Salomógkak apu pujusa inamtaiya nuwi waya ekemsae.

<sup>47</sup> Nunikmatai apu Davitan atuwe suntaja apuji aidau shiig anentuinak Davitan nagkaesau Apajuí yaigti, dutikam shiig takasti tusa tiagtatus shimutkaje. Tuja Davidchakam Apajuín emematak niina pegajinig tsuntsuma tepese.

<sup>48</sup> Nunik tepes chichaak:

“ ‘Israel aents aidaun ememattai Apajuí Tuke Pujuu tutaya duke ememattai ati, wagki nii tibaunak betek umiak, yamai mina uchig aina nuwian makichik apu awajsae. Dutika mina pujusa inamtaijua nuwi pujus inamjati tusa apusa nuadui. Tuja minashkam eke jatsuk wainkati tujuti asamtai wainkajai’, tusa Apajuín aujak timae”, tiuwai.

<sup>49</sup> Nuna antukag Adonías ipaamu aidauk sapigmainak kujaidau. Nuninak maki makichik shiig wamak jiinag shiyakag megkaejajui.

<sup>50</sup> Nunikagmatai Adoniaschakam Salomón mantuawai tusa ishamak aak pegkejam Apajuíjai chichatai aakmakbaunum wayauwai. Nunik nuwi kuntin maa patai apetai altar aajakua nuna kachujin achimak pujusui.

<sup>51</sup> Nunikmatai makichik aents Salomógkan ujaktatus wejiuwai. Nunik jegaa ujaak:

“Adonías amina ishamjamak aak pegkegmanum waya altarnum achimak pujus chichaak:

“ ‘Apu Salomón mina mantuashitnaitkug, Apajuín adayas dekas mashtatjai tusa tujutti’ tujamui”, tiuwai.

<sup>52</sup> Tusa ujakam Salomón chichaak:

“Niish aents shiig anentaimkauwaitkug, niina buukeniag makichik intashigkesh iyagchattawai. Untsu niina pegkegchauji dekagnamtaig, tuke mantamnattawai”, tiuwai.

<sup>53</sup> Tusa tamawaik suntaja apuji aidaun jiiktajum tusa ishikauwai.

Tusa tima shimutkag jiiki juki ejegawajui. Dutika ejegam Adonías apu Salomógkan eme anentus niina emtin tsuntsuma wajasui. Nunikmatai Salomón, ¡wetá jemin! tusa awemauwai.

## 2

### *David inagnak niina uchiji Salomógkan akatjamu*

<sup>1</sup> David nii jakatnuji tsawan jegamtai pujusa, uchijin Salomógkan akateak:

<sup>2</sup> “Wi jakatnujuk tsawantak jegagtine. Nuadui ¡amek mijamtsuk waju wajasta!

<sup>3</sup> Nuniakum Tuke Pujuu Apajuí amina ememattaigmea nunú chichagtamak, wi wakegamua duke umikta tujabiwa nunú imatiksamek ashí umikta. Tuja Moisés chicham umiktinun agajua dushakam ashí umikta. Nunú betek umiakum ame takamuginig ashí pegkeg atatme. Tuja tuwi wekaetatme nuniakmeshkam ashí pegkegnun wekaetatme.

<sup>4</sup> Nuigtushkam Tuke Pujuu mina anagtak: ‘Uchijum aidau pujutti pegkeg asag chichaman betek dita anentajai, wakanijai mina umigtuinakuig, amina uchijum wegantu aidaunmayan tuke Israel aents aidau apuji ematnaitjai’, tujutiwa nuna dutiksag umikti.

<sup>5</sup> “Tuja Joab Seruíá uchiji takamsauwa nunú kajimatkipa. Niig jimag suntaja apuji Abner, Ner aajakua nuna uchijin, nuigtu Jétera uchijin Amasánashkam mauwai. Nunak

maaniachbau aig, yaunchuk dita magkagtuawajua duwi iikmajai tusa wainak chicham atsamunmak mauwai. Dutikak mina utugchatan itagtuauwai. Nuadui ame duka nii takamsamujinish wajuk titatme nunú dutikattame.

<sup>6</sup> Nuadui shiig anentaimsam dutikata. Tujash agkan pujus jakati tusamek idaisaipa.

<sup>7</sup> “Untsu Barzilai galaadnumiaya nuna uchiji aina duka wait anenjam ame ekemsa yutaigmin ekentsam ayujatin ata, wagki wi amina yatsum Absalón aintaku tupikaki wekagai, dita kuitamjuku ainawai.

<sup>8</sup> “Tuja aneaku ata, anui Benjamín wegantu Simí, yaakat Bahurimnumia puja nunú wi Mahanaim wegai shiig pegkegchaun chichagtukabi. Tujutiwaitak Mahanaim pujaun waketai, mina igkunkatatus namak Jordán tajutuawabi. Nunikmatai dekas wi umikintjun chichagkun: Maashtatjame tusan Tuke Pujuu daajin tiabaijai.

<sup>9</sup> Tujash amek duka tsagkujaipa. Amek yachaitme, iman asam ame diista itugkattame. ¡Tujash waitus jakati tita!” tiuwai.

#### *David jakamu*

<sup>10</sup> David jakamtai niina apachji aidau ukumasbaunum Jerusalén ukusajui.

<sup>11</sup> Davitak Israel aents aidau apuji wajasag cuarenta mijan inamjauwai. Yaakat Hebrógnun inamjauwai siete mijan, untsu Jerusalén inamjauwai treinta y tres mijan.

<sup>12</sup> Salomón niina apaji David jakamtai, nii apu wajas shiig agkan pujus inamjauwai.

### 3

#### *Salomón Egipto nugka apuji nawanjjai nuwenamu*

<sup>1</sup> Salomón Egipto nugka apujjai maaniachmi tusag chichaman umikui. Nunú chicham umiamunum Salomón nuna nawanjin nuwatkauwai. Dutika nuwatak yaunchuk Jerusalén David pujusa inamajakua nuwi ejegauwai. Nuwi pujai Salomón nii pujusa inamjatnujin yamagman jegamkauwai. Dutika Tuke Pujuu emematku ijuntainashkam jegamak umika, yaaktanashkam peegkeg ashimkauwai.

<sup>2</sup> Tuja jega Tuke Pujuu emematku ijuntai eke uminchau asamtai, Israel aents aidauk yaunchuk nuwiya aents aidau nugka nain aidaunum dita apajuimtajin emematuinak kuntuu maa apejaku aina nuwig ditashkam Tuke Pujuu emematuinak kuntuu maa apejaku ainawai.

#### *Salomón Apajuín yachametan segamu*

<sup>3</sup> Salomógkak Tuke Pujuu aneau asa, yaunchuk niina apaji David umijujakua nunisag niishkam Tuke Pujuu umijujakui. Nuniyatak nugka nain aidaunum kuntuu maa apejakui, dutikak kugkuin incienso tutainashkam nuwi apejakui.

<sup>4</sup> Ima nuigkik pujujakchauwai, yaakat Gabaógnumshakam wejaku kuntuu maa nuna nejen ashí apeak Apajuín ememattatus, wagki nunú ima nain tsakaju asamtai. Nuwi jegá mil kuntuu maa nuna nejen ashí apejakui.

<sup>5</sup> Nuwi pujai kashi Tuke Pujuu kajanum wantintuk chichajak:

“¡Waji wakegame, nunú segatta amastajame!” tiuwai.

<sup>6</sup> Tusa tama Salomón ayaak:

“Mina apag David amina inakem aajakua nunú ame tabaun betek umiak shiig takau asamtai, ame yaigkuitme. Tuja minashkam niina uchiji apu wajas shiig takasti tujutu asam, wait anenjakum duka tujutme.

<sup>7</sup> Tuke Pujuu, mina Apajuíjuh, ame mina apag David jakamtai, nii apu wajas inamjati tujutu asam, wika tsakatuch shiig anentaimja takamainchau aig etegtuabiume.

<sup>8</sup> Nunin ayatkun amina aentsjum shiig kuashat makichik aentskesh dekapajag ejemainchau aina imanun apuji wajasjai.

<sup>9</sup> Tuja makichik aentskesh juu aents shiig kuashat aina nuna apuji wajas, niina yachajinig shiig takamainuk atsawai. Nuadui minash shiig anentaimsa takatnum yachamtjuata. Dutijuawamin wisha juwapi pegkejak, tuja juwapi pegkegchau tusan shiig dekau atajai tusan segajame”, tiuwai.

<sup>10</sup> Tusa nuna sumakmatai Apajuí Salomógkan shiig anenjauwai.

<sup>11</sup> Nunik chichajak:

“Kuashat mijan iwaku pujutkesh, tuja wiakuch wetakesh, atsa nuniachkumesh shiwaajum aidau ijintakesh segattsuk, dekas wajuk mina aentsug aidaujaish shiijash takamainaitme nunú segatiu asamin,

<sup>12</sup> ame segatam nunak imatiksank amastajai. Tuja yaunchuk aents yacha aajaku aina nuna nagkaesau, nuigtush atakesh iman achatnun yachamtikattajame.

<sup>13</sup> Tuja ame segatchamunashkam wiakchamtikattagme, dutikakun eme anentsa diitai awajstaggme, dutika ai apu ashí nugkanmaya aidaun nagkaesau atatme.

<sup>14</sup> Tuja wi wakegamua duke takakum, nuigtu chicham umiktin agagbauwa nuna amina apa David umikua dutiksamek umiakminig, kuashat mijan iwaku pujustinnum yumigsattagme”, tiuwai.

<sup>15</sup> Tusa tima shintaag anentaimas, dekas kajanmap tujutne tiuwai. Nunik wakitki Jerusalén jegaa chicham umiktin agagbau egkeamu arca pujaunum jegantui. Nunik kuntinu maa nuna nejen ashí apeak Tuke Pujuun emematiuwai. Nuna dutika ajak juukbau aidaun Apajuín anentag suwak tikich kuntin tudau tsagkugnagtasa maamu aidaun neje ujumak apeaku ampigbaun nuna nejen inamag umika niina atuwe aidaun suntaja apuji aidaujui ashí ajamsauwai.

*Apu Salomón chicham epegtan yacha*

<sup>16</sup> Nunú tsawantin jimag nuwa akika dutiktai aidaun Salomógkan jegajuawajui. Nunik nii eketbaunum jegantag,

<sup>17</sup> makichkia nunú chichaak:

“¡Chah apujuh! Juju nuwa jujai makichik jeganmak pujaji. Nunika pujusan uchin uchigmakmajai.

<sup>18</sup> Nunikan kumpatum tsawan pujai, juju nuwashkam uchigmakmae. Nunika ima jimagchitik pujumji. Tikich aents wainchataigkesh atsume.

<sup>19</sup> Nuniamunum kashi juju nuwa uchijin tepejuk maame.

<sup>20</sup> Dutika ejampek shintaag, wi kanaja tepai mina uchig minai ayaumas tepaun juki niyai ayaunas aepeak, niina uchiji jakaun minai itan aepsame.

<sup>21</sup> Dutikau ai tsawajan kashikmasan nantakin mina uchiju amuntsuatag tukaman jakaun wainkamjai. Tujash shiig tsawagmatai, diikman mina uchigchaun wainkamjai”, tiuwai.

<sup>22</sup> Tutai tikich nuwa chichaak:

“Atsa, auk iwakua duka mina uchijui, jaka nunuwai amina uchigmik”, tau. Tutai yama nagkamchak chichakua nunú chichaak:

“Atsa, auk uchi jakauwa duka aminui, untsu uchi iwakua nunuwai mina uchijuk”, tusag aatus apu emtin jiyaniidau.

<sup>23</sup> Nuniagtai apu Salomón anentaimas: “¡Uchi iwakua juka mina uchijui tawai juju nuwa. Tuja untsu uchi jakauwa nunak tikich nuwa aunui tawai. Tujash tikich nuwa aushkam dutiksag tawai!”

<sup>24</sup> Tusa chichaak:

“¡Puyag sujustajum!” tiuwai. Tutai puyajan ejentuntajui.

<sup>25</sup> Dutikawagmatai chichaak:

“Anú uchi iwakua nunú jimaituk tsupikam jimag nuwa nunú mai etsegka susata”, tiuwai. <sup>26</sup> Tutai uchi iwaka nuna dukuji niina uchiji asamtai, puyatjau asa, apu Salomógkan chichajak:

“¡Wait aneamam apuh, uchi maawaipa! ¡Dekas juju nuwa susata!” tiuwai. Tutai untsu tikich nuwa nunú chichaak:

“Anú uchua duka midaukesh achattawai, ¡dekas jimaituk tsupiktinme!” tiuwai.

<sup>27</sup> Tusa tutai apu chichaak: “Uchi iwakua duka anú nuwa uchi maawaigpajum tawa nunú susata, wagki niyai dekas uchigtinuk”, tiuwai.

<sup>28</sup> Aatus apu Salomón epegkeamtaí, nuna ashí Israel aents aidaun dekawajui. Nunikag apu Salomógkan eme anentuidau, wagki Apajuí chichaman shiig epegkeati tusa yachametan susau asamtai.

## 5

*Salomón Tironmaya apu Hiram aajakua nujai chichaman umikbau*

(2 Cr. 2.1-18)

<sup>1</sup> Salomógkan apu adaikaje tabaun yaakat Tiro apuji Hiram dekawuai. Nunik kumpamatatus niina aentsji aidaun ishitkauwai. Nunak dutikauwai wagki yaunchuk nagkamas Davidjai shiig anendayajaku asa.

<sup>2</sup> Dutika ishitkam Salomón dita waketiagtai, HIRAMAN chichama akuptak:

<sup>3</sup> “Amek dekame mina apag David niina shiwaaji aidaujui maaniak jega Apajuí emematku ijuntain jegamkachua nunú. Tujash niina shiwaaji aidaun ashí depetkati tusa Apajuí tima ashí depetkauwai.

<sup>4</sup> Tujash yamai Tuke Pujuun Apajuín wi emematnaitag nunú iina agkatmikagbau asamtai, jutijai maanidauk atsawai.

<sup>5</sup> Nuadui Tuke Pujuu mina apag Davitan chichajak:

“ ‘Apajuí emematku ijuntain amina uchijum jegamkattawai, nuwi wayawag mina emematjiagtinun’, tusa tiuwa nuna umiakun jegan jegamkattajai.



<sup>6</sup> Nuadui amina aentsjum aidau Líbano tutaya nuwiyan setjun tsupigtugtinme. Tuja mina inakeg aidau ditan yainkagtatui. Nunú amina aentsjum aidaunak ame wajuk akikti tujuttatpa nuna wi akikagtajai. Nunak tajame, wagki jutii aidautik amina aentsjum Sidón batsamin aidau, numi tsupitan yacha aina imanuk makichkish atsa nunú, ameshkam dekau asamin”, tiuwai.

<sup>7</sup> Tusa chicham akuptukbaun Hiram antuk, shiig aneasui. Nunik senchi untsamak chichaak: “¡Tuke Pujuu Israel aents aidau emematin aina duke ememattai ati, wagki nii Davitan wait anentug uchi yachan niina aentsji aidau apuji atinun susauwai!” tiuwai.

<sup>8</sup> Tusa pujus Salomógkan chichama akuptak: “Ame chicham akupjutkamun antukjai. Nuniku asan ame segatam nunak imatiksasuk: Setjun pinojai ishitkattagme.

<sup>9</sup> Mina inakeg aidau Libanonmayan tsupijag nayantsanum utsawagtatui. Dutikawag-matai ame tuwi itagtuatnume titatme nuwi papagma ejetuatajum titatjai. Nuwi ikaunmawag atijagmatai ame yajuaktatme. Untsu ame mina akigmainaitam nunú mina aentsug aidau wi pujusa inamtaijui batsata nunú yuwatin aidau yujumak susata”, tiuwai.

<sup>10</sup> Aatus Hiram setug aidaun pino aidaujai, Salomón wakegamunak imatiksag ashí susauwai.

<sup>11</sup> Tuja Salomógshakam Hiram niina aentsji aidau ayujatnun cuatro millón cuatrocien-tos mil litro trigon, nuigtu cuatro mil cuatro cientos litro aceite olivo nejenia yajuakbaun susauwai. Tuja maki makichik mijanai nunak sujaku.

<sup>12</sup> Tuja Tuke Pujuu Salomógkan anagkuamunak imatiksag shiig yacha emauwai. Tuja Hiramshakam maaniachmi tusa Salomógjai chichaman umiku asa maanitsuk batsamajakui. Nuadui maanitsuk batsamajaku ainawai.

<sup>13</sup> Nunik batsamas apu Salomón takat nagkamnati tusa ashí Israel aents aidaunum chichaman ishiakui. Tusa tima treinta mil aents aidau tuwakajui.

<sup>14</sup> Nunikagmatai, muja Líbano tutainum maki makichik nantutin diez mil aentsun numin tsupigtinme tusa ishimajakui. Dutikamu osag aents aidauk nunú mujanum makichik nantu takasag waketug dita jeen jimag nantu batsamajaku ainawai. Tuja takata apujig Adoniram aajakui.

<sup>15</sup> Nuigtushkam nunú mujanum ciento cincuenta mil aents takainak batsatu. Nuwiya ochenta mil kayan tsupinau, dutikiagtai setenta mil aents yanaidau.

<sup>16</sup> Nuigtushkam Salomógnak aajakui tres mil trescientos aents takata takaidau kuitamaidau.

<sup>17</sup> Tuja apu Salomón aents kaya tsupin aidaun chichama akuptak:

“Kaya múun, shiig pegkeg aidaun, kaya pakamamu aidaujai jega Apajuí emematku ijuntai jegamkatnunum aepka nagkamatin aidaun, yajuak ikaunmatnume”, tiuwai.

<sup>18</sup> Tusa timatai Salomógka aentsji jegá jegamin aidau Hiram aentsji aidaujai, nuigtu yaakat Guebalnum tikiju batsamin aidau aatus numin tsupijag, kaya dakajag pakamawag jega Apajuí emematku ijuntain ashí jegamak umikajui.

## 6

### *Apajuí emematku ijuntain Salomón jegamkamu*

<sup>1</sup> Salomón apu wajas kampatum mijan ejeyi, nuigtu ipak usumta nuna achika nantu kampatuma nunú Ziv tutai taka jimaituk wegai, jega Apajuí emematku ijuntain jegamkatatus nagkamauwai. Nunak Israel aents aidau Egipto nugkanum batsatu jijnjauwa duwi nagkamsa dekapajam cuatrocientos ochenta mijan weamunum nagka-mauwai.

<sup>2</sup> Jega Apajuí emematku ijuntain Salomón jegamkauwa nuna esantig veintisiete dekapamu, wegkanti nueve dekapamu, tuja yakinti trece nuigtu jimaituk dakapamu aajakui.

<sup>3</sup> Tuja jega jegamku ajigbau waitinum jegantatak aajakua nuna esantig, jega wegkan-tijai betek nueve dekapamu aajakui, untsu wegkantig cuatro dekapamu, nuigtu jimaituk aajakui.

<sup>4</sup> Nunú jeganum wajasa niimtai aidaun najanak, jiju aidaun ajintuk umikui.

<sup>5</sup> Nuigtushkam sacerdote aidau, dita takataiji aidaun chimpiawag kuitamkagtinun nunú jega yantamen achimtika jegamkauwai. Dutika kampatum tesauwai.

<sup>6</sup> Nunú jeganum yama nagkamchaku tesaamu aajakua nuna wegkantig jimag deka-pamu, nuigtu veinticinco centímetro aajakui. Untsu nuna yakin tesaamua nunú jimag dekapamu nuigtu setenta centímetro aajakui. Tuja nuna yakin inagnamu tesaamua duka tres dekapamu nuigtu quince centímetro aajakui. Nunú jeganak yaigchinum

nagkama yaki iwakag jegamkauwai. Nunak dutik jegamkauwai wagki jega pegkejam jegamkamua nuna numi iju chigkawai tusa.

<sup>7</sup> Jega pegkejam Apajui emematku ijuntain jegamkug kaya pakamamu aidaun shiig umikbaun nuna ekenag jegamkajui. Nuadui martillo, jacha, tikich jiju najanamu aidauwaikish awatbauk makichkish antukachui.

<sup>8</sup> Tuja jega pegkejam jegamkamunum nuwi achimtika jegamkamua aajakua nuna waitijig untsugnumanini aajakui. Untsu nuwi waya yaki wataig papaja tentea iwakbau aajakui.

<sup>9</sup> Tuja Apajui emematku ijuntai jegamnak ashí uminkamtai, inagnak setug dakagbaun yaki pataja umikui.

<sup>10</sup> Tuja nuigtushkam nunú jeganum achimtika ashí tentea jegamkauwai. Nunak nuwi waji aidau chimpia kuitamkatnun dutikauwai. Tuja duka numi ajinka emetjamua aajakui. Untsu maki makichik tesaamu aajakua nuna yakintig jimag dekapamu nuigtu veinticinco centímetro aajakui.

<sup>11</sup> Nuna ashí ashimkamta Tuke Pujuu Salomógkan chichajak:

<sup>12</sup> “Ame Apajui emematku ijuntai múun jegamam nuna pachisan tajame: Shiig pujusam mina chichameg umiktin agagbau aina nunú betek umiakminig, wi amina apa Davitan anagkuawaitag nunak imatiksasuk amina yayaakun umiktatjai.

<sup>13</sup> Tuja Israel aents aidautigminak makichkish idaisashitnaitjime, wi atumnak tuke kuitamkatnaitjime”, tiuwai.

<sup>14</sup> Aatus Salomón jega múun Apajui emematku ijuntai atinun jegamak ashimkauwai.

<sup>15</sup> Dutika nuna initken setug dakagbaun anujung shiig umikui. Untsu nugkanum numi pino dakagbaun papaja shiig umikui.

<sup>16</sup> Tuja nuigtushkam jega nagkatkamunum makichik tesaauwai, dutika nunú tesaamua nunú “shiig pegkejam”<sup>\*</sup> tutai atinun setug dakagbauwai yaki nagkama shiig pegkejam umikui.

<sup>17</sup> Tuja tikich tesaamu ayatak “pegkejam” tutai aajakua nuna esantig dieciocho dekapamu aajakui.

<sup>18</sup> Tuke Pujuu emematku ijuntai jegamkamua aajakua nuna initkenig setug dakagbau shiig anujamunum taumi yagkug aidau, yujág aidau dakumjamua aajakui.

<sup>19</sup> Nunú jeganum tesaamu “shiig pegkejam” tutainum chicham umiktinun Tuke Pujuu agagbau egkeamu arca asatnun Salomón shiig umikui.

<sup>20</sup> Nunú tesaamu shiig pegkejam tutai aajakua nuwi waya dekapamak esantig nueve aajakui. Tuja wegkantishkam nueve dekapamu aajakui. Tuja yakintishkam nueve dekapamu aajakui. Tuja Apajui emematku incienso patasa apetai Salomón numi setjun najana orojai ukatkauwai. Dutika nunú tesaamu shiig pegkejam tutainum nuna niimtikas apusauwai.

<sup>21</sup> Tuja nuigtushkam jega Apajui emematku ijuntai jegamkamunak oron ukatkauwai, dutika nuwi tesaamu shiig pegkejam tutainashkam oron ukatku umikui. Dutika ashimak nuna waitijin cadena oro najanamu aidaun detujui.

<sup>22</sup> Aatus ashí oron ukatuk emau asa, Apajui emematku patasa apetai aajakua nunashkam dutiksag ukatuk umikui.

<sup>23</sup> Tuja nuigtushkam jega tesaamu shiig pegkejam tutainum asatnun, jimag querubigan dakumak numi olivo tutayai najanauwai. Nunú aidaun esantig cuatro dekapamu aajakui.

<sup>24</sup> Nuna nanapeg maki makichik jimag dekapamu nuigtu veinticinco centímetro aajakui. Nuniau asa mai apatkam ipak usumat dekapamu nuigtu jimaituk aajakui.

<sup>25</sup> Nunú dakumka najanamu jimag aajakua nuna esantig mai betekak aajakui. Niimeshkam betek aajakui.

<sup>26</sup> Nuna yakinti aidauk cuatro dekapamu nuigtu jimaituk aajakui.

<sup>27</sup> Nuna Salomón juki jega tesaamu shiig pegkejam tutai aajakua nuwi awayauwai. Nunú aidaun nanapeg yapaag aajakui. Nuniau asa tikichia nuna nanape mena nunini awa nunú tanishan antig aajakui. Untsu tikichia nuna nanape untsuja nuni awa nunú tikich tanishan antig aajakui. Tuja tikich nanapega duka mai igkunia antiinik aajakui.

<sup>28</sup> Nunashkam Salomón oron ukatkauwai.

<sup>29</sup> Nuna dutika jega initken, tuja awankenishkam querubin aidaun nanamtinun taumi dakumjauwai. Dutikak nuigtushkam palmera aidaun, yagkug aidaun dakumjauwai.

<sup>30</sup> Tuja jega initken nugkanum setug dakagbau shiig batsaka umikbau aajakua nunashkam agaajijai oron ukatkauwai.

\* 6:16 “Shiig pegkejam” tawa nunak apach chichamnum “lugar santísimo” tawa nuna taku tawai.

<sup>31</sup> Untsu nunú jeganum tesaamu shiig pegkejam tutaya nuwi wayaku ujatain jimag waitin numi olivon najanauwai. Nunú waiti nujamkatin aidau ajigbauk, cinco yantamjintin dakagbau asa yantagtaju aajakui.

<sup>32</sup> Tuja jimag waiti najanamu aajakua duka numi olivo najanamu aajakui. Nunú waitinum Apajuí aentsji nanaptin aidau taumi dakumjamu aajakui. Nuigtushkam palmera aidau, yagkug aidau dutiksaik dakumjamu aajakui. Tuja nunashkam oron ukatkauwai.

<sup>33</sup> Tuja jega Apajuí emematku ijuntai jegamkamun waitiji nujamkatnunashkam numi olivo cuatro dekapa tsupija ajigbau aajakui.

<sup>34</sup> Nuna waitijig jimag najanamu asa mai ujanajakua duka pino najanamu aajakui.

<sup>35</sup> Nuwishkam querubin nanaptin aidau, palmera aidau, yagkug aidau taumi dakumja oro ukatkamu aajakui.

<sup>36</sup> Tuja nunú jeganum atrio tutai agkajua nunashkam kaya pakamamu aidau kempatuma imania ekenag tentea umikui.

<sup>37</sup> Apajuí emematku ijuntain jegamkug nantu Ziv tawa duwi nagkamauwai. Nunak Salomón apu wajas ipak usumat mijan inamak pujus nagkamauwai.

<sup>38</sup> Dutika nagkama nii apu wajas inabaujin once mijanan ejeyi, nantu ochoa nunú Bul tutai takau ai, ashí umikui. Tuja ashí ijumjamak nunú jeganak siete mijanai umikui.

## 8

*Chicham umiktin agagbau egketun arcan juki jega Apajuí emematku ijuntainum awayamu*

<sup>1</sup> Nuna ashí umiku asa, Sión Davita yaaktaji tutai aajakua nuwi Tuke Pujuu chichame umiktin agagbau arcanum egketun jukitatus Salomón Israel aentsu apuji múun aidau, maki makichik wegantu aajaku aina nuna apuji aidau, nuigtu tikich Israel aents eme anentsa diitai aidau aatus ipaa Jerusalén ijumjauwai.

<sup>2</sup> Nunak Etanim nantutin numi kanawe tsupija aakmaja batsamsamu tusag jüstamajaku aina nunú tsawantin ashí Israel aents aidauk apu Salomógjai ijumjauwai.

<sup>3</sup> Nunikag Israel aents aidau apuji múun aidau ashí ijunjagmatai, sacerdote aidau,

<sup>4</sup> ujumak Leví wegantu aidau yaigkajam arcan juwinak, Apajuíjiai chichatai carpa aakmakbau aajakua nujai jukiajui. Dutikainak nuwi takatai aidauashkam ashí yajuakag Apajuí emematku ijuntai jega jegamkamunum, Apajuí dutikata tibaunak imatiksag ejegawajui.

<sup>5</sup> Dutikawagmatai apu Salomón ashí Israel aents aidau arca apusamunum nuna igkuas ijumjauwai. Dutika nuwi uwig aidau, toro aidau makichkish dekapamainchau shiig kuashat maa apeak Apajuín emematiuwai.

<sup>6</sup> Dutikantai, sacerdote aidau Tuke Pujuu chichame umiktin agagbau egketun arcan jukiag Apajuí emematku ijuntainum awayawajui. Dutikawag nunú jeganum tesaamu shiig pegkejam tutainum querubin dakumkamun nanamtin aidau ijunbaunum nuna nanape aidauunum yununak apusauwai.

<sup>7</sup> Nuna nanape aidauk chicham umiktin agagbau egkeamu arcan dukuka aajakui. Tuja arca juwaku numi wegagtai aajakua nunashkam dukuk aajakui.

<sup>8</sup> Tujash nuna numiji aidauk esajam aajakui. Iman asa agá wajasa diyam wantin-chakush, jega tesaamu ayatak pegkejam tutainum wajasa diyamak paan aajakui. Nuna dutika awayau aina duka yamaikish nunisag awai.

<sup>9</sup> Nunú arcanmak Israel aents aidau Egipto nugkanum batsatun yajuak emas, muja Horebnum jimag kaya pakama najanamunum chicham umiktin agagbaun Tuke Pujuu Moisésan susauwa ima duke egkemajakui.

<sup>10</sup> Sacerdote aidau arcan awayawag ukuinak, jega tesaamu pegkejam tutainum batsatu jiiinainag, yujagkim jeganak inikajai ijiuwai.

<sup>11</sup> Nunú Tuke Pujuu imanji jeganum akijauu asamtai, sacerdote aidauk ijunja Tuke Pujuu emematni tibaunak umikchajui.

*Apajuí emematku ijuntai jegamkamun Apajuí idaitusbau*

<sup>12</sup> Imanikmatai Salomón chichaak:

“Tuke Pujuuwah, ame chichaakun wika suwenum pujuuwaitjai tiuwaitme.

<sup>13</sup> Tujash wi ame tuke pujustinun jegan jegamjukjame”, tiuwai.

<sup>14</sup> Nuna tusa, Israel aents aidau tuwaka ijunbaunum ayampa wajas ditan pegkegnun yumigkiak,

<sup>15</sup> aatus tiuwai:

“Israel aents aidau emematin aina nunú Tuke Pujuu mina apag Davitan anagkuawa nuna umike. Nuadui ima nigki ememattai ati. Tuja nii chichaak:

<sup>16</sup> ‘Israel aents aidau Egipto nugkanum batsatun jijuitag duwi nagkamsanush mina jegajun jegamjutkagmatai, nuwi wayawag emematjtinume tusanuk maki makichik wegantu aina nuna yaaktaji aina nuwiyanak nugkanak makichikish etegkachuitjai. Tujash Davitan etegkauwaitjai mina aentsug Israel aents aina nuna apuji atinun’ tusa Apajui tawai”, tiuwai Salomón.

<sup>17</sup> “Nuadui mina apag David Tuke Pujuu emematku ijuntai atinun jegamkatatus wakekauwai.

<sup>18</sup> Tujash Tuke Pujuu niina chichajak:

“ ‘Ame mina jegag jegamkatasa wakegam duka dekas pegkejai.

<sup>19</sup> Tujash amechuitme jegamkatnumek, amina uchijum akiinatta nunú mina emematjaku ijuntainak jegamjutkatnai’, tiuwai.

<sup>20</sup> “Tusa tiuwa nunak imatiksug umike. Nii tibaunak imatiksasuk, atumi apuji wajasan, mina apag ekemas inamajakua nuwig wi wayan ekemsajai. Nuniku asan Tuke Pujuu emematku ijuntain jegan jegamkajai.

<sup>21</sup> Tuja nuigtushkam, iina muunji aajaku aina nuna Tuke Pujuu Egipto nugkanmayan jija yajuak chicham umiktinun susauwa nunú arcanum egketa nunashkam tesajuan umikjai”, tiuwai.

<sup>22</sup> Tusa inagnak, nunú jega agájin kuntin maa patai apetai altar pujaunum nuna igkuas wasuai. Nunikmatai ashí Israel aents aidashkam ijunjajui. Nunikagmatai ditá emtin niina uwejen nayaimpinmanini takuiniuwai.

<sup>23</sup> Nunik wajas senchi chichaka Tuke Pujun segaak:

“¡Tuke Pujuuwah, ametme Apajui Israel aents aidauti ememattaimek! Tuja ame chichakbaujum betek uminaitam imanuk tikichik nayaimpinmash, nugkanmashkam atsawai. Aents aidau amina dita anentain umigtamaina duka shiig anennaitme.

<sup>24</sup> “Tuja ame mina apag anagkuawaitam nunú yamai umikume. Niig ima aminak umigtamkauwa duwi ame niijai chicham umiakum: ‘Amina uchijum wi pujustinun jegan jegamjutkatnai’, tiuwaitme.

<sup>25</sup> Nuadui ame mina apag David chichagkum: ‘Ame wegantunmaya aidau shiig kuitamamas pujuinak, shiig takainakuig, nuwiyau apu atinun tuké etegtinaitjai’, tiuwaitam dushakam umikta.

<sup>26</sup> Tuke Pujuu, Israel aents aidautin Apajuijyah, ame mina apag anagkuawaitam duka imatiksamem umikta.

<sup>27</sup> “Nuga múun, nayaim múun aina nuwigkish amek betek pujumaitsume. ¡Tuja juju jega ame pujustinun wi jegamjukjam juninchinmash wajuk pujustameki tajai!

<sup>28</sup> Nuninuch aigkish Tuke Pujuuwah, wi segajam nunú wait aneam antugtukta. Wi amina inakmin yamai segajame.

<sup>29</sup> Tuja juju jeganum pujostatjai tiuwaitam nuadui ame pujakum tsawaish, kashish tuke diyaku ata. Wi amina inakmin juwi wajasan segajame.

<sup>30</sup> Amina aentsjum Israel wegantu aidauti, jega ame emematku ijuntai jegamkamua nuni iijntsa segajam nunú nayaim amina pujutaigmia nuwi pujusam antugkagtukta, nunikam ii pegkegchau takamsamujish tsagkugkagtugta.

<sup>31</sup> “Makichik aents tikich aentsun pegkegchaun takamjsumataig, juju kuntin maa patasa apetai juwi itantam wajas takamsachu asa dekaskenum chichaak: ‘Wika dekas takamsachmajai’ tumamkui,

<sup>32</sup> ame nayaimpinum pujusam, dekas yanawaita utugchatash nunú diisam aents takamsau suwimak suwakum, takamsachua duka idaisatin ata.

<sup>33</sup> “Tuja amina aentsjum aidau pegkegchau takagtamsau asagmatai, dita shiwaaji depetuk achija yajuakam yujas, waituinak awake anentaimag amina emematjamainak, juju jega jegamkamua juna anentaimtus, tsagkugtugta tusa segapainakuig,

<sup>34</sup> nayaimpinum pujusam antugkata. Dutika tsagkujam ame iina muunji aajaku aidau juju nugka susauwaitam juwi ataktu awagkim ikaunmatin ata.

<sup>35</sup> “Amina aentsjum Israel wegantu aina nunú amina pegkegchaun takagtamainakui, suwimak suwakum yumi yutumtikjachamin waituinak awake anentaimag amina emematjamainak, juju jega jegamkamua nuna anentaimtus segapainakuig,

<sup>36</sup> nayaimpinum pujusam antugkatatin ata. Dutikam amina aentsjum asagmatai, tsagkujatin ata. Dutikam jintintuatin ata, wajuk shiig batsamain ainawa nunú. Dutikam juju nugka atumdau tuke atinai tusa susauwaitam nuwi yumi yutumtjatin ata.

<sup>37</sup> “Juju nugkanum nujantai waitiamu, tuja yumish yutachu asantai, ajak aidau kagaka jinau, nuniachkush ajaka jati aidau, manchi aidau, tema aidau, shiwag aidaukesh

iina yaaktaji aidaun tenteawag jetedau, nuniachkush tikich waitut jata aidau aatus waitkainam,

<sup>38</sup> anentaimas juju jega ame emematku ijuntai jegamkamua juni uwejen takuniag wajasag amina segapainakuig antugkatin ata.

<sup>39</sup> Maki makichik aents wajuk anentaimainawa, tuja wajina dutikatag tuinawa duka ame dekame. Nuadui nayaim amina pujutaigmin pujusam maki makichik dita takatji diigsam aiktin ata. Dutikakum dekaskenum segapaina duka tsagkujatin ata.

<sup>40</sup> Dutikawamin ame iina muunji aidau nugka susauwaitam nuwi batsamsag aminak eme anenjamas umigtamiagtinai.

<sup>41</sup> "Makichik aents atushtanmaya Israel wegantuchu amina daagmin antuka, juwi taa juju jega ame emematku ijuntaiya juni ayampa pujus,

<sup>42</sup> amina segapakuig, amina daajum múunta nuna nuigtu ame senchigitinaitam nunashkam antuidau asagmatai,

<sup>43</sup> nayaim amina pujutaigmia nuwi pujusam antugkatin ata. Dutikakum nii segapamuk ashí susata. Nuna diisag aents tikich nugkanmaya aidaush, Israel aents aidau amina eme anenjamin aina dutiksag ditashkam eme anenjamsatnume. Aatus tikich nugkanmaya aidaushkam dekatnume amina daajum juju jegan wi umikag juwi ememattai atata nuna.

<sup>44</sup> "Tuja amina aentsjum Israel wegantu aidau, dita shiwaaji aidaujai maaniatnume tusam tuwi ishiaktatme, nuwi yujasag maaninak ame yaakat etegkauwaitam nuni ayampawag, tuja wi ame emematku ijuntain jegamkag junishkam ayampawag segapainakuig, <sup>45</sup> nayaimpinum pujusam dita sumamuji antugkam ayamjuktin ata.

<sup>46</sup> "Ashí aents aidau amina pegkegchaun takagtamsagmatai, shiig senchi kajekam, dita shiwaaji aidau achija yajuaktinme tima, achija yajuakam nugken ukukiag,

<sup>47</sup> tikich nugkanum batsamas amina emematjamainak dita pegkegchaun takamsamujin anentaimas awake anentaimag amina segapainakuig yaigtin ata.

<sup>48</sup> Tuja shiwag aidau achija yajuakam tikich nugkanum batsamas, juju yaakat Jerusalén ame etegkamua nuni ayampawag, tuja juju jega ame emematku ijuntai atinun wi jegamkag juni ayampawag pujusag dita anentaijai, wakanijai segapainakuig,

<sup>49</sup> dita sumamu antugkam nayaim amina pujutaigmia nuwi pujusam ayamjukam, kuitamkatin ata.

<sup>50</sup> Amina aentsjum aina nunú pegkegchaun takainak amejai shiwagmagainakuish, tsagkujatin ata. Dita shiwaaji aidau achija yajuakagmataish, nunú shiwag aidau amina aentsjum aidaun wait anenjatnume tita.

<sup>51</sup> Wagki ditak amina aentsjum asag aminu ainawai. Egipto nugkanum batsamas jiju jii kegamunum jiya ukuitayama numamtuk awajam waituinak batsatu ame jijuitme.

<sup>52</sup> "Amina aentsjum Israel aents aidau segapaina nunú, tuja wi amina inakminchakam segajam nunú antugkagtukta. ¡Ii sumamua nunú antugkagtukam yaijatkata!

<sup>53</sup> Tikich aents aidauk batsataig, juju aents aina nunú aminu agtin etegkauwaitme. Dutikauwaitam nunú pachisam, iina muunji aidau Egipto nugkanum batsatu jijuitam nuadui amina inakem Moisés ujakuitme", tusa aatus Salomón Tuke Pujun segauwai.

<sup>54</sup> Aatus Salomón altaran igkuas tikishmag pujus uwejen nayaimpinmanini takui Tuke Pujun segauwai.

<sup>55</sup> Nunik ashimak wajai, ashí Israel aents aidaun senchi chichaka pegkegnum yumigkiak:

<sup>56</sup> "Tuke Pujuu, nii anagkagtuamua nuna umiak, niina aentsji Israel aents aidau maanitsuk batsamsati tusa tujabiú asantai agkan batsatag nuadui ima nigki ememattai ati. Wagki nii pegkeg aidaun Moisésan anagkuaúwa nunak umitskek idaisachu asamai.

<sup>57</sup> Tuja Tuke Pujuu Apajuú ii emematin ainag nunú iina muunji aajaku aina nuna yaigkua dutiksag iinashkam yamaish yaimpakti. Ima iinakek idaitamsashti,

<sup>58</sup> dekas iinash nii wakesa umigtan amasti, dutijamantai nii wakegamua nunú umiaku niina chichame umiktin agagbau aidaun umiktajum tusa iina muunji aidaun susauwa dushakam umikagmi.

<sup>59</sup> ¡Juna ashí pachisan wi taja nunak, Tuke Pujuu iina Apajuú pegkegnum yaimpak, tsawaish, kashish tuke aneaku atin ati! Nuniak ii kashi kashinig atsumamunash siumsatin ati.

<sup>60</sup> Nuna diisag aents tikich nugkanmaya aidaush dekas tikich Tuke Pujuu Apajuúya ibauk atsawapi titin atinme.

<sup>61</sup> "Nuadui atum aidautigmek Tuke Pujuu ii emematin ainag duka dekaskenum takajin atajum. Nuniakjum niina chichame umiktin agagbau yamai umiajum dutiksagmek umiktin atajum", tiuwai Salomón.

<sup>62</sup> Nuna tusa inagnak, apu Salomón ashí Israel aents aidaujai Tuke Pujuu emematak kuntinun maa apeauwai.

<sup>63</sup> Aatus Salomón Tuke Pujuuai chicham epegkeamunum veinti dos mil toron, nuigtu ciento veinte mil uwijan mauwai, Apajuín emematak.\*

Dutika apu Salomón ashí Israel aents aidaujai nunú jega Tuke Pujuu emematku ijuntai jegamkamun: Juka yamaik Tuke Pujuuui, tusa niina idaitusui.

<sup>64</sup> Tuja nunú tsawanta duik nunú jega jegamkamua nuna waitijin jegantatak agkaju awa nuna, juka Apajuínui tusa nuwi emematak kuntu maa nuna nejen ashí apeauwai. Dutikak ajaka neje juukbau aidaunashkam Tuke Pujuu anentag susauwai. Tuja kuntu wiyaji aidaunashkam Tuke Pujuu agkan pujutan amastí tusa apeauwai. Tuja nunú aidaunak kuntu maa patai apetai bronze najanamu aajakua nuwi pataig apeachui, wagki nuwi ashí pataja apemáinchau kuashat asamtai.

<sup>65</sup> Nunú tsawantin numi kanawe tsupija aakmaja batsamsamu tsawan asamtai, Salomón ashí Israel aents aidaujai, nuigtu yaakat Hamat jegattak nagkamas entsa Egipto nugkanum awa imanuyia nagkamas shiig kuashat aents kaunawajua nujai ijunag siete tsawan jüstamawajui. Tuja tikich jüstanashkam siete tsawan jüstamawajui. Nunidau asag ashí ijumjamak catorce tsawan jüstamawajui.

<sup>66</sup> Nunú jüsta ashimdaekamtai, kanag tsawajag apu Salomón aents aidaun ashí kumpamauwai. Dutikam ditashkam Tuke Pujuu Davitan pegkegnum yayaak, ditanashkam dutiksag pegkegnum yaigbau asag, apu Salomóghan kumpamawag pegkegnum yumigkis shiig aneas waketjajui.

## 9

### *Apajuí Salomóghai chicham umikbau*

<sup>1</sup> Salomón jega Tuke Pujuu emematku ijuntain jegamak ashimak, nuigtu nii pujusa inamjatnunashkam ashimak, tuja tikichin nii dutikatag tibau aidaunashkam ashí umikui.

<sup>2</sup> Dutikamtai Tuke Pujuu yaunchuk Gabaógnun wantintukua dutiksag ataktushkam wantintukui.

<sup>3</sup> Nunik chichajak:

“Ame segatmaum nunak antugkajame. Nuadui juju ame jega wi tuke pujustin jegamkaum nunak tuke kuitamkattajai.

<sup>4</sup> Tuja amina apa David mina umigtak shiig takasua imatiksamek wi chicham umikta tibauwa nunú ashí betek umiakminig,

<sup>5</sup> wi amina apa Davitan anagkuakun:

“ ‘Amina uchijum aidaunmayag makichik tuké Israel aents aidaun apuji atinai’ tiuwaitag nunak imatiksank amejai umiktatjai.

<sup>6</sup> “Untsu ame, nuigtu amina uchijum wegantu agtina nunú mina chichameg umiktin agagbauwa nunú umitsuk tikich apajuimkugminig,

<sup>7</sup> wi Israel aents aidaun nugka susauwaitag nuwi batsatjum nunak utsagtinaítjai. Tuja juju jega juna wi pujustinun etegkag nunashkam idaisattajai. Dutika ai tikich aents aidaun Israel aents aidaunak dushikiagtinaí.

<sup>8</sup> Tuja juju jega juka tsaikam numi aidauk, kaya aidauk tuwasua weaku atinai. Dutika ai aents nuni nagkaemainak wainkag puyatuk tuke dushikis chichainak:

“ ‘¿Wagkag Tuke Pujuuish Israel aents aidaun nugkenash, juju jega nii pujustin jegamkamua nujaish imatikayawa?’ tiagtinaí.

<sup>9</sup> Tusa tiagtai, tikich aents ditan chichajuinak:

“ ‘Auk ditá muunji aajaku aina nunú Egipto nugkanum batsatun Tuke Pujuu jüja agkanmitkamaitak, nuna umigtsuk kajimatkiag tikichin apajuímainak idaisamu asa, suwimka suwak imatikae’, tiuwai.

## 10

### *Sabá nugkan apuji nuwa aajakua nunú Salomóghan ijagsatatus webau*

(2 Cr. 9.1-12)

<sup>1</sup> Salomóghak Tuke Pujuu yayamu asa, shiig yachai tusa augmatuinamun Sabá nugka apuji nuwa aajakua nunú antukui. Nunik dekas yachashit tusa dekapstatatus Jerusalén weuwai.

\* 8:63 Chicham Apajuíjai epegkeamunmak kuntu neje aina nunak ashí apejakchajui, ayatak wiyajin apeak nejenak inajuawag yujaku ainawai.

<sup>2</sup> Suntaja apuji aidau ejapeam camello aidaunum nijamtai kugkuin aidaun, oro aidaun kuashat yajuak, nuigtu kaya pegkejuch akik aidaun aatus yajuak jegauwai.

Nunik jegaa, Salomógkan iniastajai tibaunak ashí iniasui.

<sup>3</sup> Tusa iniam Salomón nunak ashí betek aikui. Makichkish nii aimainchau utugchat dekapeamuk atsugsauwai.

<sup>4</sup> Dutika ashí aimkamtai anentaimas, Salomógkak dekaskas yachapi tiuwai. Tuja Salomón pujusa inamjatnujin jegamkamunashkam wainkauwai.

<sup>5</sup> Nuigtushkam niina yutaiji aidau shiig kuashat ayau, tuja niina suntajin apuji aidau batsamtaijishkam shiig pegkeg umikbau, nuigtush niina takajin aidaush, nii uwagtinjin shikika su aidaujai shiig iwagmamkau aidau, tuja nuigtushkam kuntin duwejam shiig pegkeg aidaun sacerdote aidau Apajuín emematuinak maa ashí apeamu aidaun, aatus ashí wainak puyatus anentain jegagchauwai.

<sup>6</sup> Nunik apu Salomógkan chichajak:

“Amina takatjumin amina dekatjumjai pachisag augmatuیداun mina nugkajui pujusa antukmag duka shiig dekaske.

<sup>7</sup> Tujash wika dekaskeapi tichamjai, yamai juwi taa wainkau asan dekaskeapi tajai. Auk minak ashí ujtakchagmayi. Wi antukmayag nuna nagkaesau dekas amina dekatjumik takatjumjai shiig múntai.

<sup>8</sup> ¡Amina nuwem aidauk shiig aneasas batsatatai! ¡Amina inakem aidaush ame pegkeg chichamun antuinakus shiig aneasag batsatatai!

<sup>9</sup> ¡Tuke Pujuu amina Apajuigmea duke ememattai ati, wagki nii aminak shiig anenamas Isarael aents aidaun apuji ati tusa adaitamkae! ¡Tuke Pujuu Isarael aents aidaun aneau asa, apu adaitamkae shiig pegkegnum takasti tusa!” tiuwai.

<sup>10</sup> Nuna tusa, tres mil novecientos setenta kilo oron, nuigtu kugkuin nijamtai aidaun, kaya pegkejuch akik aidaun aatus shiig kuashat Salomógkan susauwai. Nunak yaunchuk nagkamsagkesh Isarael aents aidaunmak imatikaik apu sujakchamun nunú nuwa imatika Salomógkan susauwai.

<sup>11</sup> Nuigtushkam lancha múun aidaunum Hiram ofirnunian, oro aidaun ikautkauwai. Tuja numi sándalo tutai katsujam shiig pegkeg aidaunashkam, kaya pegkejuch akik aidaujai ikautkauwai.

<sup>12</sup> Dutikamtai nunú numi sándalo tutayai jega Tuke Pujuu emematu ijuntaijegamkamun nagkatkamunum wajasa niimtain, tuja nii pujusa inamjatin jegamkamua nunú nagkatkamunmashkam dutiksag umikui. Tuja nuigtushkam kantamin aidau awatiagtinun nunú numijai arpa aidaun, salterio aidaun ashí umikui. Yaunchuk nagkamsaish numi sándalok imatika wainajakchamun nunú tsawantin shiig kuashat wainnakui.

<sup>13</sup> Tuja Salomógshakam yaakat Sabá apuji nuwa aajakua nunú sumamunak ashí susauwai. Dutikak nuigtushkam nigki anentaimas tikich waji aidaunashkam susauwai. Dutika susam nuna yajuak niina aentsji kuitamkam nugken wakitkiuwai.

*Salomón yacha wiakuch wajasbau  
(2 Cr. 9.13-24)*

<sup>14</sup> Salomógkak maki makichik mijantin oro aidaun veinte dos mil kilo tumainun yajuak ijumajaku.

<sup>15</sup> Tuja nuigtushkam Isarael aents aidau nugken waji sujin aidaushkam Salomógkan akijaku ainawai. Arabia nugkanmaya aidaush, nugka yaig aidaun apuji aidaushkam, ashí akijaku ainawai.

<sup>16</sup> Tuja ejamaka maanitai tantag múun aidau oro ukatkajum doscientos najanatajum tusa inamjauwai. Tuja maki makichik ejamaka maanitai aidauk seis kilo oro ukatka najanamu aajakui.

<sup>17</sup> Tuja nuigtushkam trescientos tantag yayjuch najanatajum tusa nunashkam inamjauwai. Nunú maki makichik tantag aidauk makichik kilo nuigtu jimaituk tumain oro ukuijajum ukatka najanatajum, tiuwai. Tusa tima najanawagmatai, nuna yajuak jega pujusa inamtai Líbano ikamji tutai aajakua nuwi awayauwai.

<sup>18</sup> Nuna dutika nuigtushkam elefante nai\* aidau yajuakjum ekemsa inamtai najanatajum tusa inamjauwai. Tusa timatai imatiksag najanawajui. Dutikawagmatai, oro ukatkatatum tima, ukatkajui.

<sup>19</sup> Nunú ekemsa inamtai aajakua duka seisa imania ekeni najanamu aajakui. Tuja atumtajiya duka apuni najanamu aajakui. Untsu kuntujin patai ekemtai najatuamu aajakua nuna yantamen león wajau dakumka najanamu aajakui.

\* **10:18** “Marfil” tawa duka elefante nai najanamua nuna daajiyai.

<sup>20</sup> Tuja seisa imania ekenjamu aajakua nuwishkam maki makichik ekenjamua nuna yantamen león dakumjamu aajakui. ¡Nunak tikich apu aajaku aina dukesh numantin najanamukesh wainkashbaun nii imatika najanauwai!

<sup>21</sup> Tuja apu pujusa inamtaiji Libano ikamji tutai aajakua nuwishkam apu shikika umutaiji aidauk, egkeja yutaiji aidaujai oro najankamu aajakui. Makichkish plata najanamuk atsujaku, wagki Salomón pujusmataig platak wakejusa diimainchau aajakui.

<sup>22</sup> Tuja Salomógka lanchaji aidau yaakat Tarsisnum batsamajakua nunú Hiraman lanchaji aidaujai kumpatum mijan asa tuke kaunajakui, nuniak oro aidaun, plata aidaun, elefante nai aidaun, kuntin uwegtin aidaun, pavo real aidaun aatus ikaunmajaku ainawai.

<sup>23</sup> Tuja apu Salomógkak ashí tikich nugkanmaya apu aidaun nagkaesau wiakuch, nuigtush yacha aajakui.

<sup>24</sup> Apajuí yachamtikamu asamtai, ashí aents aidauk niina wainkatatus, nuigtu chichamen antugkatatus shimujaku ainawai.

<sup>25</sup> Nunik shimuinak apu susatnun maki makichik juki wejaku ainawai. Nunak waji plata najanamu aidaun, oro najanamu aidaunashkam, jáanch aidaun, maaniaku jutai aidaun, kugkuin nijamtai aidaun, caballo aidaun, burro aidaun aatus sujaku ainawai.

*Salomón carro aidaun caballo aidaujai sumajakbau*

*(2 Cr. 1.14-17; 9.25-28)*

<sup>26</sup> Salomógkak mil cuatrocientos carro maanитай aidaun, doce mil caballo maanитай aidaujai sumag ijumjauwai. Tuja tikich suntag aidauk carro maanитай aidaun kuitamainak batsatu, nuninai untsu tikich aidauk apu Jerusalén pujusmatai kuitamkagtin aidau dushakam batsatu.

<sup>27</sup> Apu Salomógkak Jerusalégnum kuichkinak kayajai betek shiig kuashat ijumjauwai. Tuja setjunashkam, higuera ajakchamaitak paka weagbaunum, shiig kuashat aiyama imatika ijumjauwai.

<sup>28</sup> Tuja Salomógka inake waji sujin aidau Egipto nugkanum nugka Musri tutai aajakua nuwiyán, Cilicia nugkanmayajai caballon apu Salomógkan sumajuk akuptujaku ainawai.

<sup>29</sup> Tuja makichik carro egiptunmayan akikeg seisientos kuichik plata najanamu aajakui. Untsu makichik caballo akikeg ciento cincuenta aajakui.

Tuja hitita aentsu apuji aidauk sirianmaya aentsu apuji aidaujai, Salomón sumagbaun nuwiyán carro aidaun, caballo aidaujai sumajaku ainawai.

## 11

*Salomógkan kuashat aents shiwagmawaju aidau*

<sup>26</sup> Nabat aajakua nuna uchiji Jeroboamshakam Salomógjai shiwagmagauwai. Jeroboam aajakui Salomógkan suntaji aidaun apuji. Niig yaakat Seredánmaya Efraín wegantu aajakui. Niina dukujig waje Serúa daagtin aajakui.

<sup>27</sup> Jeroboam apu Salomógjai shiwagmagauwa duka juni nagkamdauwai: Salomógkak Davita yaaktaji tutai aajakua nuna, nain wajajunum nagkama peegkeg tentea ashimak, agkaju aidaun sekaturg ashimkatatus takak pujusa,

<sup>28</sup> Jeroboam waji, takau wajasu asamtai, José wegantu aidau takaina nuna diisti tusa nuna apujin apu Salomón adaikauwai.

<sup>29</sup> Nunú tsawantin Jeroboam Jerusalén pujau jiinki wekama profeta Ahías yaakat Silónmaya aajakua nunú jáanch yamagman nugkuaju wegaun igkugkui. Dutika ima niijaig ajanum batsatu.

<sup>30</sup> Nuwi pujus Ahías jáanch yamajam nugkuagbaujin doceya imajin ichiajui.

<sup>31</sup> Dutika Jeroboaman chichajak:

“Juju jáanch doce ichiagbauwa juwiya diez aminu atin jukita, wagki Tuke Pujuu Apajuí Israel aents aidau emematin aina nunú amina chichagtamak: ‘Salomón apu puja nuna atankin, Israel aents aidau diez wegantu aina nuna amina amastatjame, dutikakun dita apuji adaikattagme’, tujamui.

<sup>32</sup> ‘Untsu David mina inakeg aajakua nunú mina chichamjun umigtuku asamtai, tuja Israel aents aina nuna yaaktaji aina nuwiyán makichik Jerusalégkan wi pujustinun etegkauwaitag nuadui, Salomógnak ima Judá wegantu aina nuna apuji ati tusan titatjai.

<sup>33</sup> Salomógkak minak dakitjuje, nuniak nuwa Astarté dakumka najanamun yaakat Sidógnmia aidau emematin aina nuna, nuigtu Quemós Moab aents aidau ememattai aina nuna, nuigtu Milcom amonita aents aidau emematin aina nunashkam emematui. Nuadui niina takatjig mina shiig awajatsui. Niina apaji David mina chichameg umiktin agagbau aidaun umikua dutikag niig umikchae.



<sup>34</sup> Nunin aigkishkam nii apu wajas inama nunak tikima ashí atankishtatjai. Nunak dutiktsuk nii iwaku puja duikik apu ati titatjai, wagki mina inakeg David wi etegkamu aajakua nunú mina chichamjun betek umigtuku asamtai.

<sup>35</sup> Tujash niina uchiji apu atina nunak Israel wegantu doce aina nuwiyen diez atankittajai, dutikamtai ame nuwi inamjattame.

<sup>36</sup> Tuja niina uchijinak ima makichik wegantunak ukugkittajai. Nunak dutikattajai, wagki mina inakeg David aajakua nunú wegantunmaya makichik Jerusalégkan wi etegkauwaitag nuwi pujus inamjati tusan.

<sup>37</sup> Tuja wi aminak ashí ame wakegamunum inamjata titatjame, dutikakun Israel aents aidaun apuji emattagme.

<sup>38</sup> Tuja wi amina titatjam nunú ashí umiakum takatjumes pegkeg, tuja mina chichameg umiktin agagbauwa dushakam mina inakeg David umikua dutiksamek umiakminig, wi aminak yaigtinaitjame. Dutikakun David wegantunmaya apu agtinai tiuwaitag nunak imatiksanutk ame wegantu aidaunmayanashkam Israel aents aidaun apuji wajas inamjatnun etegkatnaitjai.

<sup>39</sup> Untsu David wegantu aidaunak Salomón mina umigtutsuk tikichin apajuimák idai-tusu asamtai, suwimkan susagattajai. Tujash nunú suwimkanak tuke suu pujushtinaitjai', tawai Apajuí", tiuwai Ahías.

<sup>40</sup> Nuna Salomón antuk Jeroboaman maatag tiuwai. Dutikam Jeroboam tupikaki apu Sisac inamajakua nuwi Egipto nugkanum weuwai. Nunik nuwi pujaig Salomón jakauwai.

### *Salomón jakamu*

(2 Cr. 9.29-31)

<sup>41</sup> Salomógka pujutji, yachaji, takasbauji aidauk papii Crónica tutainum agagbau ainawai.

<sup>42</sup> Salomógkak Jerusalén pujus ashí Israel aents aidaunum cuarenta mijan tumain inamjauwai.

<sup>43</sup> Salomón jakamtai Jerusalégnum niina apaji Davita yaaktaji tutainum ukusajui. Nii jakamtai niina uchiji Roboam apu wajas inamjauwai.

## 12

### *Israel aents aidau kanakagbau*

(2 Cr. 10.1—11.4)

<sup>1</sup> Israel aents aidau Roboaman apu adaikagtatus Siquemnum shiyakajui, nunikagmatai Roboamshakam nuwi weuwai.

<sup>2</sup> Nuna aatus chichainamun Jeroboam Nabatan uchiji, Salomón maatag tama tupikaki, Egipto nugkanum weuwa nunú, nuwi pujus dekauwai.

<sup>3</sup> Jeroboaman untsuka itawag Israel aents aidau nijai ijunag Roboamjai chichastatus shiyakajui. Nunik jegajua chichajuinak:

<sup>4</sup> "Amina apa aajakua duka ii aidautinak senchi takamtijamak waitkagmasui. Tuja amesh imatika takat sukagtachkuminig, iishkam ame tabauk betek umiktatji", tiajui.

<sup>5</sup> Tusa tama Roboam ditan chichajak:

"iWaketjatajum, nunikjum kempatum tsawan asajum kaunatajum!" tiuwai.

Tusa tiajam Israel aents aidau waketjajui.

<sup>6</sup> Nunikagmatai Roboam niina apaji Salomón iwaku pujusmatai, múun aidau nijai takajaku aidaun iniak:

"Juju aents aidau tuina nunash wisha ¿wajintu aimainaitja?" tau.

<sup>7</sup> Tusa iniam dita ainak:

"Amina takagtamainak ame tabaun tuke umigtamkatin atinme tusam wakegakmek, yamai ditajai shiig chichasam, dita tujamaina nunú umikta", tuidau.

<sup>8</sup> Tusa tamashkam apu Roboamak ditanak antugkachui. Nuniak nijai betek tsakaku niina takajin aidau batsatun, iniak:

<sup>9</sup> "Juju aents aidau chichainak: 'Amina apa iina shiig senchi waitkagmasua nunitsuk, amek shiig kuitamkagtukta', tujutuina nunash ¿atum anentainsamash wajinmainaitja?" tiuwai.

<sup>10</sup> Tusa tutai nunú aents nijai betek tsakaku aidau niina chichajuinak:

"Au aents aidau amina chichagtamainak: 'Amina apa iina senchi waitkagmasua nunitsuk, amek shiig kuitamkagtukta', tusa tujamaina duka aajam tumainaitme: 'Mina apag atumin shiig kuitamjamkachuitkuig, wika nuni nagkaemasan shiig kuitamkashtatjime.

<sup>11</sup> Tuja mina apag senchi takamtijamsau ainakuig, wi nuni senchi takamtikun waitkastatjime. Tuja mina apag akachumtayai atumin asutamajakuitkuig, wi nuni nagkaemasan jiju hierro tutai tsakaskatu aina duwi asutiattajime" tita", tiajui.

<sup>12</sup> Tuja apu Roboam Jeroboaman kampatum tsawan asam taata tibau asa, Israel aents aidaujai ashí apu Roboamjai chichastatus jegawajui.

<sup>13</sup> Nunikagmatai apu Roboamak apu chichagkagtin múun aidau tibaunak umitsuk, shiig senchi pegkegchaun chichagkauwai.

<sup>14</sup> Nuniak nunú datsauch aidau tibauwa nuna imatiksag chichaak:

"Mina apag senchi takamtijamajakuitkuig, wika nuni senchi takamtikakun waitkastatjime. Tuja mina apag akachumtayai asutamajakuitkuig, wika nuni senchi jiju hierro tutai tsakaskatu aidauwai asutiattajime", tiuwai.

<sup>15</sup> Tau asa Israel aents múun aidau tita tibaunak Roboamak umikchauwai. Wagki nunak Tuke Pujuu profeta Ahíasan akateak:

"Salomón Israel wegantu doce aina nuna apujiya nunak diez atankin, Jeroboaman susattajai", tusa tiuwa nunú uminkatin asamtaí nunikui.

<sup>16</sup> Tuja Israel aents aidau tabaun apu Roboam antugcham dita chichajuinak:

"¡David wegantu aina nunú iina apuji ati tusaik wakegatsji! ¡Jesé uchiji aidau dita wajijiin akanak iina amamainuk makichkish atsujainawai! ¡Davita tijaji aidak dita ditak kuitamdaikatnume! ¡Untsu Israel aents aidautik iina jeen waketjagmi!" tiajui.

Aatus tusa ukuinak dita jeen waketjajui.

<sup>17</sup> Nunikagmatai Roboamak Israel aents ainayatak Judá wegantu aidau nugken batsamajaku aina nuna apuji wajas inamak pujujaku.

<sup>18</sup> Nunik pujai, tikich Israel wegantu aidau pampaidau. Imatiagtai Adoram takata apuji aajakua nuna Roboam dekata tusa awemauwai. Dutikamun Israel aents aidau kayai tukui tukuinakua maawajui. Dutikawagmatai apu Roboam ishamak shiig wamak carrojin egkema Jerusalén tupikakuwai.

<sup>19</sup> Aatus Israel aents aidau diez wegantu aajaku aina nunú David wegantu apu wajasujai shiwagmagawajui.

<sup>20</sup> Nunik batsamas Jeroboam wakitki tae tabaun Israel aents aidau diez wegantu aajaku aina nunú antukag, ijunag chichama akuptukajui taati tusag. Tusa akuptukam taamtaí, dita apuji adaikag chichainak: "¡Yamaik ametme iina apujimek!" Tuja David wegantu iina apuji ati tuidauk ima Judá wegantu aina duke juwakaje.

<sup>21</sup> Tuja Roboamak tupikaki Jerusalén wegak, suntag aidauan etegkeg Judá wegantunmayan Benjamín wegantunmayajai ciento ochenta mil yajuak, Israel wegantu aidaujai maania depetmakn ashí dita aidauan apuji atajai tusa jegawajui.

<sup>22</sup> Tujash profeta Semaías aajakua nuna Tuke Pujuu chichajak:

<sup>23</sup> "Salomógka uchiji Roboam Judá wegantu apujijai chichasta, nuniakum ashí aents Judá wegantu aina nujai, tuja Benjamín wegantu aidaujaishkam chichaakum:

<sup>24</sup> Tuke Pujuu chichaak: "Dita yachi Israel aents aina nujaiag maaniawainmegka. Nunak nunitsuk dita jeen waketjatnume, wagki wi mina aentsug aina nunak kanaktinme tijai", tawai tusam ujakta", tiuwai.

Nunú Tuke Pujuu tibau ujakam, nuna umiinak dita jeen waketjajui.

### *Jeroboam Apajuín umigtsuk pegkegchaun takasbau*

<sup>25</sup> Tuja Jeroboam yaakat Siquem Efraígka nugken awa nuna tentea peegkeg apakui, dutika nuwi nii pujusui. Nuwi pujus yaakat Penuel daagtin aajakua nuna peegkeg tentea apakui.

<sup>26</sup> Tujash nii anentaimas: "David wegantu aina nunú tikich Israel aents diez wegantu aina nuna awagki ijunag dita apuji atajai tumainai.

<sup>27</sup> Tuja juju aents aidauk Tuke Pujuu emematuinak, kuntinun apeatatus Jerusalén shimuina nuninak Roboam Judá wegantu apujiya nuna ataktu shiig anenmain ainawai. "Nuninak mina mantuawag Roboamjai ataktu ijunmain ainawai" tusa,

<sup>28</sup> niina suntaji apuji aidaujai chichasa, oro yajuakjum jimag toro tsakat dakumka najanatajum tusa inamjauwai. Nuna najanawagmatai, aents aidau chichajak: "Atum aidautijum kuashta Jerusalén shimagme. Tujash yamaik jujuwai atumi Apajuíjum, Egipto nugkanum batsatutigin jipajajua duka", tiuwai.

<sup>29</sup> Nuna tusa niina suntaji aidau inajui, dutikam nunú jimag toro tsakat dakumka najanamun makichik jukiag tsumujin yaakat Betelnum apusajui, untsu tikichnak yaakat Dagnum apusajui.

<sup>30</sup> Dutikawagmatai Israel aents aidauk pegkegchaun takamsajui, wagki Jerusalén wegak Apajuí emematainun idayinak, Betelnum shiyakag, tuja Dagnum shiyakag nuna emematuidau asag.

<sup>31</sup> Tuja Jeroboamshakam nain aidaunum jega Apajuí emematku ijuntai tusa jegam-jauwai. Dutika aents Leví wegantuchu aidaunak sacerdote adajjauwai.

<sup>32</sup> Nuigtushkam Jeroboam dutikati tichamaitak, nantu ocho takamunum tsawan quincetin Judá wegantu aidau jüstamin aina nunú jüstamami tusa nigki umikui. Dutika nigki nuigtushkam kuntinun maa kuntin patasa apetaimum apeauwai. Nunak nii inamjantai toro tsakat najanamu Betelnum aajakua nuna emematak dutikauwai. Dutika nunú jega wainka apajuímtai emematku ijuntai aidaun kuitamkatnun, atum sacerdote atajum tusa adaitujui.

<sup>33</sup> Aatus nantu ochoa nunú takamtai, tsawan quincetin Jeroboam kuntin patasa apetaim Betelnum najanauwa nuwi kuntinu maa patas apeauwai. Dutikak juju nantutin Apajuí emematku jüstamtai ati tusa Israel aents aidaun tiuwai. Nuna tusa kugkuin incienso tutain apeatatus altarnum wakauwai. Tujash nunak nii wakegak dutikauwai.

## 16

### *Acab Israel aents aidau apuji wajasbau*

<sup>29</sup> Makichik aents Asá daagtin Judá wegantunum apu wajas treinta y ocho mijan inamai, Omrí uchiji Acab aajakua nunú Israel nugkanum apu wajas inamtan nagkamauwai. Niig yaakat Samaria pujus veinti dos mijan inamjauwai.

<sup>30</sup> Tujash niina pujutig Tuke Pujuu diismak shiig pegkegchau aajakui. Tikich apu aidau pegkegchaun takasu aina nuna nagkaesau pegkegchau aajakui.

<sup>31</sup> Makichikish pegkegchaun takaschatjai tusagkesh anentaimesuk, Jeroboamjai betek pegkegchaun takasui. Nuniau asa Sidógan apuji Et-baal aajakua nuna nawanji nuwa pegkegchau Jezabelan nuwatkauwai. Nunik ditá ememattaiji Baal aajakua nuna niishkam emematujakui.

<sup>32</sup> Nuigtushkam Baal emematku kuntin patasa apeatnun Samaria nugkanum najanauwai. Dutikak Baal emematku ijuntain jegan jegamkauwai.

<sup>33</sup> Tuja nuigtushkam tikich dita apajuímtaiji Asherá aajakua nuna niimen numinum dakamak najanauwai. Dutikamtai Tuke Pujuu Israel aents aidaun Apajuíyia nunú, yaunchuk apu aajaku aidaun kajegkauwa nuna nagkaesau shiig senchi kajegkauwai.

<sup>34</sup> Acab apu aajakua nunú tsawantin makichik aents betelnumia Hiel daagtin yaakat Jericó tsaikbau aajakua nuna ataktu yaaktamauwai. Nuna yaaktamatatus yama nagkama takamunum niina uchiji iwai Abiram jakauwai. Tuja yaakta najana nuna waitijin apujitusu ai, niina uchiji ekeu Segub jakauwai. Duka nunikui wagki Tuke Pujuu Josué chichajak: "Makichik aents Jericón ataktu yaaktamatag tusa takatna nuna uchijig jinaatnai", tiuwa nunú umintai.

### **Apu Acab pujusmatai profeta Elías takasua nunú pachisa agagbau**

## 17

(17–21)

### *Yumi yutugchattawai tusa profeta Elías etsegkamu*

<sup>1</sup> Profeta Elías Tisbénmaya aajakua nunú apu Acabpan chichajak: "Juju mijana duwi nagkama yumi yutugchattawai, wi yutugti tama yutugtin asa! Tuja sajattanakesh sajatkashtatui. ¡Junak Israel aents aidau Tuke Pujuu Apajuín emematin aina nuna wi umijag nuna daajin dekas uminkatnun tajai!" tiuwai.

<sup>2</sup> Tusa pujai Tuke Pujuu Eliásan chichajak:

<sup>3</sup> "Juwi pujam nunú jüinkim etsa minitaiya nuni wetá. Nunikam entsa Querit tutai namak Jordágnum etsa minitaiya nuni awa nuwi uumkam pujusta.

<sup>4</sup> Nuwi pujusam nunú yumi uwagtatme. Tuja wi chigki cuervon\* awemattajai yutain amastí tusan", tiuwai.

<sup>5</sup> Tusa tima Eliás Tuke Pujuu tibaun umiak Querit entsanum weuwai.

<sup>6</sup> Nunik imau pujai, cuervo aidau pagkan nejelai jukiag kashikmas, aagkú aatus ejetuidau. Untsu yuminak nunú entsanmayan umujakui.

<sup>7</sup> Tujash yumi yutachu asamtai, nunú entsak dukap atsuk kuyua buku wajasui.

*Nuwa waje sareptanmaya Eliásan yujumkan ajamsamu*

<sup>8</sup> Nunik entsa kuyumtai, Tuke Pujuu Eliásan chichajak:

\* 17:4 "Cuervo": Juju chigkik uje bukusea chuwasga numamtainai.

<sup>9</sup> “Yaakat Sarepta Sidón nugkanum awa nuwi weme pujusta! Tuja makichik nuwa waje nuwi puja nunú amina yutain amastí tijai”, tiuwai.

<sup>10</sup> Tusa tima Elías nunú yaaktanum weuwai. Nunik wea weakua jegattak wekama, makichik nuwa chigkimin juwaak wekaetatman wainkauwai. Nunik untsuka chichajak: “¡Wait aneamam tsapanum yumi shikikam ajampusta uwagtajai!” tiuwai.

<sup>11</sup> Tusa tima nunú nuwa yumin utitag tusa wegaun Elías ataktu untsuka chichajak: “¡Wait aneamam pagshakam itagtuata!” tiuwai.

<sup>12</sup> Tama nii ayaak:

“Tuke Pujuu Apajuí ame emematnaitam nuna daajin dekaskenum tajame, pagkak shiig atsgutawai. Untsu harina shiig piipich ichinkanum, tuja aceiteshkam piipich jarranum ajutui. Nuna mina uchigjai inajuan yuwatan chigkimin juwakun wekaejai. Untsu nuna ashí inajuamtai yuwami, nunika nunú amuka nujantaikish jinaami, wagki tikich yumainuk shiig atsawai”, tiuwai.

<sup>13</sup> Tutai Elías ayaak:

“Nuna amukan nujantai jakashtajash tusamek puyatkaipa. Ame piipich ajutui tame nunú inagkata. Tujash wi yuwatna nunuwá pag inajuam sujusta. Dutikam nuadui ame yuwatin uchijum yuwatnujui inajuata.

<sup>14</sup> Wagki Tuke Pujuu Apajuín Israel aents aidau emematin aina nunú: ‘Harina ichinkanum awa duka amuekashatui, tuja aceite jarranum awa dushakam amuekashatui’, tawai. Nuadui nunú yusa pujajinig, Tuke Pujuu yumin yutumtijattawai”, tiuwai.

<sup>15</sup> Tusa tima ukuak weuwai. Nunik Elías tibaunak imatiksag umikui. Nuna yusag kuashat tsawan batsamsajui.

<sup>16</sup> Tuja Tuke Pujuu Elíasan tibaunak betek, harina ichinkanum auk amuekachui. Tuja aceite jarranum aushkam amuekachui.

<sup>17</sup> Nunik kuashat tsawan batsatai, nunú nuwa wajea nuna uchiji jata achikam shiig senchi jau asa jakauwai.

<sup>18</sup> Nunikmatai nunú nuwa Elíasan chichajak:

“¡Elíasah, Apajuín inakegah! ¿Wisha aminash itugkamu asamea suwimak sujakmesh mina uchijush mantugtame?” tiuwai.

<sup>19</sup> Tama Elías ayaak:

“¡Uchijum juwi itanta!” tusa niina bakuin uchijin patasa pujujun juki, Elías nii kanutaijin yakí iwaka niina pegakjin aepsauwai.

<sup>20</sup> Dutika senchi untsamak Tuke Pujuu Apajuín segaak: “¡Tuke Pujuu Apajuí mina ememattajuh! Juju nuwa mina kuitamjuka juna uchiji jakamtai, anentaimak senchi waittsati tusamesh ¿wagka tiume?” tau.

<sup>21</sup> Tusa tamawaik uchin kempatuma imania pagkuk senchi untsamak Apajuín segaak: “¡Tuke Pujuu Apajuí mina ememattajuh! ¡Wait aneamam juju uchi etsagagta!” tiuwai.

<sup>22</sup> Tusa segam Tuke Pujuu niina antujuk uchin etsagajui.

<sup>23</sup> Dutikamtai Elías uchi juki nugká akaiki dukujin suwak:

“¡Diisia nijah, amina uchigmek iwakui!” tiuwai.

<sup>24</sup> Tusa tama nunú nuwa ayaak: “Yamai dekaejai, amek dekas Apajuí etegkamuitme. Tuja ame tame duka ¡dekaskea nu Tuke Pujunmaya tame!” tiuwai.

## 18

### *Elías wakitki apu Acab pujamunum jegamu*

<sup>1</sup> Kampatum mijan nagkaemakui ai, makichik tsawantai Tuke Pujuu Elíasan chichajak: “¡Yumin yutumtijattajai, dutikatin asantai apu Acab pujamunum wetá!” tiuwai.

<sup>2</sup> Tusa tima Elías weuwai. Nunik apu Acab pujamunum jegauwai. Tuja nunú tsawantinig yaakat samarianmaya aidauk yumain atsau asantai, shiig senchi nujantai waituidau.

<sup>3</sup> Imanik waituidau asag Elíasak eke jegatsaig, Acab niina wajiji aidau kuitamin Abdías Tuke Pujun eme anentus emematujakua nuna untsukui.

<sup>4</sup> Tuja nunú tsawantin Jezabel Tuke Pujuu aentsji profeta aina nunú kajegtajum tusa suntag aidau inajui. Dutiktai Abdías cien profeta Apajuí takajin aidau ijumjauwai. Dutika cincuenta, cincuenta akanak jimag waanum uumkatajum tusa ishiakui. Dutika ishiakam imau uumak batsatun yujumkan etetua ayujujaku.

<sup>5</sup> Tuja Abdías apu Acab pujamunum jegamtai, nii chichajak:

“Juju nugkanum entsa aidau, namak aidau ayá nuni wemi. Nunika nuwi wekaesa namputchawame caballo aidau, burro aidau ayugmain chijichi atsawash egakmi. Dutika egachkuik kuntin jinaamtai tagkugtuchu juwaktatji”, tiuwai.

<sup>6</sup> Nuna tusag, nunú nugkanum dita yujastag tibaunum shiyakajui. Tuja Acab tikich yantamnum wetai, untsu Abdías tikich yantamnum weuwai.

<sup>7</sup> Nunik wekama Elías minaujai Abdías igkunikiui. Nunik niina emtin tsuntsuma pujus chichajak:

“¡Mina Apujuh! ¿Ame Elíaschaukaitam?” tau.

<sup>8</sup> Tama nii ayaak:

“Ehe, witjai. Weme amina apujum Acab, Elías tae tusam ujakta”, tiuwai.

<sup>9</sup> Tusa tama Abdías ayaak:

“Wi apu Acabpan jegajua ujaig, minak mantumainai.

<sup>10</sup> Apu Acab amina egapak ashí nugkanum aents ishiakbau aidau yujawai. Dutikamu waketug kaunawag wainkachji tusa ujainam, dekas wainkachuitkumek Tuke Pujuu daajin tajai tita tusa imatjawai. Nunak ame Tuke Pujuu Apajuí ame emematnaitam nuna daajin dekaskenun tajame.

<sup>11</sup> ¿Imania nunash wi jegajuan Elías juwi pujawai tusan ujaktag?

<sup>12</sup> Wi apu ujakatasan amejai pujag nuna ukukin wegai, Apajuí Wakani egkemtugmag wi dekaashbaunum etamtatui. Tuja wi Acabpan ujaka ai, nii amina waipaktakama waipakchag mina mantumainai. Wi amina inakmetag nunak datsauch asanuk Tuke Pujun umignaitjai.

<sup>13</sup> Tuja Jezabel profeta aidaun kajegtag takui, wi ayamjukuuitag duka ¿amek dekachukaitam? Tusa chichaman umikmatai, wi profeta aidaun cien ijumjan, cincuenta cincuenta akankan jimag waanum utsawabiajai. Dutikan nuwi batsatun yutain suyajai.

<sup>14</sup> Nunin aish ¿wagka yamaish minash, apujum wejim Elías juwi pujawai tusa ujakta tusamesh tujutme? Atsa amina waipakcha maati tusa ¿tujutsumek?” tiuwai.

<sup>15</sup> Tutai Elías ayaak: “Tuke Pujuu Apajuí ashí senchigtina nuna daajin tajame. Yamaikiuch apu Acabjai chichastasan wetatjai”, tiuwai.

<sup>16</sup> Tusa tima Abdías Acabpan ujakatus weuwai. Dutika ujakam Acab Elíasjai igkunik chichastatus weuwai.

<sup>17</sup> Nunik jegaa Elíasan chichajak:

“¿Amekaitam Israel aents aidau utugchat apugtusam waitkam nunú?” tiuwai.

<sup>18</sup> Tusa tama nii ayaak:

“Wika Israel aents aidaunak utugchatan apujtusnuk waitkatsjai. Auk ame amina pataim aidaujai Tuke Pujuu chichame umiktajum tibauwa nunú idaikujum, Baal emematu yujau asajum, Israel aents aidauk waitkagme.

<sup>19</sup> Untsu takumek ashí Israel aents aidau, Baala chichamen etsejin cuatrocientos aidau, nuigtu Astarté chichamen etsejin cuatrocientos aatus aina nuna Jezabel ayuju pujuja nunú muja Carmelo tutaya nuwí ashí ijunjatnume tusam tita”, tiuwai.

### *Elías Baala profetaji aidaujai*

<sup>20</sup> Tusa tima Acab ashí Israel aents aidaun Baala profetaji aidaujai muja Carmelonum ijumjauwai.

<sup>21</sup> Dutikamtai Elías ashí tuwaka ijunbaunum jeganta ditan chichajak:

“¿Atumesh ima Apajuik umigchau jimag anentaintin ainajum dusha wajutiya yapajinattagme? Wi Tuke Pujun umijag nunú dekas Apajuíyaitkuig nii umigkatajum. Untsu dekas Baal Apajuíyaitkuig nii umigkatajum”, tiuwai. Tusa tamash aents aidauk makichkish aimtsuk ijunu.

<sup>22</sup> Nuna tusa ataktu awagki chichaak:

“Tuke Pujuu chichamen etsegin iwakuk ima wikiuchitjai. Untsu Baala profetaji aina duka cuatrocientos cincuenta ainawai.

<sup>23</sup> Tuja jimag toro tsakat sugagtustajum, nuna dita makichik etegka jukiag maa asajag jii ikapagtin ijumjamunum patagtinme. Tujash eke jiiinak ekemakainmegka. Dutikawagmatai wishakam tikich toro tsakatan asajan jii ikapagtin ijumjamunum patagtajai, tuja wishakam jiiinak ikapagchattajai.

<sup>24</sup> Nunú ashí uminkamtai atum aidautijum atumi apajuíi untsuktajum. Tuja wishakam Tuke Pujun untsuktajai. Tusa untsuam nuna antujuk jii kegaun ajuag ekemaktata nunú dekas atatui Apajuíya duka”, tiuwai.

<sup>25</sup> Nuna tusa Elías Baala chichamen etsejin aidaun chichajak:

“Atumek kuashat ainajum nuadui jimag toro tsakat puja nunú diisjum etegka jukijum atumea umiktajum. Dutikajum atumi apajuíjum untsuktajum. Tujash eke jii ijumjamua duka ekemakaigpa”, tiuwai.

<sup>26</sup> Tusa tima, betek umikajui. Dutika umikag kashikmas nagkamas Baalan untsú batsatu. Imatuinak: “¡Apawa Baala aijatkata!” tusag kuntin patasa apetaunum nuna tatea ijunas peepet tsekenau. Tujash makichkish ayachu.

<sup>27</sup> Imaniagtai etsa tutupit ai, Elías ditan tuke aneas dushikiak: “Senchi untsumkatajum, auk dekas niyai apajuik. Tsawanji atsupmak aigmatsutai. Nuniachkush wakenmas wematai. Atsa nuniachkush tikich nugkanmas wematai. ¡Namputchawame kanag shintachu asa aniatsuash, ishintangajum!” tau.

<sup>28</sup> Tuja ditak tuke untsuma batsatu. Imatuidau asag, dita apajuíjin emematuinakug tuke nunin asag, kuchiyai tsupimakag numpak wajasag batsatu.

<sup>29</sup> Etsa tajiag tegamtaishkam, imaanjaujai betek tsekenak untsuma batsatu. Imani batsataig kuntin apeatin tsawan jegauwai. Tujash imatuidaun ayauk makichkish antukachui. Wagki ditan aimainuk makichkish atsau asa. <sup>30</sup> Nunikmatai Elías ashí aents aidaun chichajak: “Wi wajag juwi kaunatajum”, tiuwai.

Tusa tima ashí jegantajui. Nunikagmatai Tuke Pujuu emematku kuntin maa patasa apetai yaunchuk najanamu aajaku tsaikbaun ataktu iwajauwai.

<sup>31</sup> Nuna najankug Apajuí Jacopan Israel atatme tiuwa nuna uchiji doce aajakua imatiksag doce kaya aidaun yajuauki.

<sup>32</sup> Dutika nunú kaya aidaun ekenag Apajuí emematku kuntin patasa apeatnun najanauwai. Dutika, nuna tentea tainiuwai veinte kilo trigo chimpimainun.

<sup>33</sup> Dutika nuwi chigkimi patag nuadui toro tsakatan asaag nuwi pataajui.

<sup>34</sup> Dutika chichaak:

“Ipak usumat ichinkanum yumi aimkatajum, dutikajum kuntin asaaja patagbauwa nunú chigkim patagbauwa nujai kempatuma ukatkatajum”, tiuwai. Tusa tima imatiksag dutikau ainawai.

<sup>35</sup> Dutikamu asa nunú yumi saegak kuntin patasa apetai najanamunum nuna yantamen nugka taimunmak ashí piyajui.

<sup>36</sup> Tuja kuntinu neje ashí apetai tsawan jegamtaí Elías nuwi jeganta chichaak: “Tuke Pujuu Apajuín Abraham, Isaac, Israel aents aidaun emematin aina nunuwah, dekas amek Israel aents aidaun ememattayaitam nuna yamai dekatnume. Tuja wika amina inakem asan, ame inatjamin jutikag nunashkam dekatnume.

<sup>37</sup> ¡Tuke Pujuuwah ayu tujutta. Amek ditan Apajuíji asam aigkata, nuna wainkag ataktu amina umigtamainak, ame dita untsuam nuna shiig dekatnume!” tiuwai.

<sup>38</sup> Tusa inagnaig Tuke Pujuu awemamu nayaimpinmaya jii iyajui. Nunik iyaag nunú kuntin maa asaja patagbaunak chigkimjai ijumag apeauwai. Dutikak kayanashkam apea yuku emauwai. Dutikak nugka taimunum yumi piyajunak buku emauwai.

<sup>39</sup> Nuna wainkag aents aidauk ishamkag tsuntsumawag nijayin nugka antig pujusag chichainak: “¡Tuke Pujuu dekas iina Apajuíjiyai, Tuke Pujuu dekas iina Apajuíjiyai!” wajaidau.

<sup>40</sup> Imatiagtai Elías ditan chichajak: “¡Baala profetaji aina nunú achiktajum! ¡Makichkish tupikakig uwemjainmegka!” tiuwai. Tusa tima Israel aents aidaun aintug achikajui. Dutikawagmatai muja segaunum entsa Quisón tutainum yajuak emauwai, nuwi jejagawag kajegkajui.

### *Elías Apajuí segamu yumi yutugti tusa*

<sup>41</sup> Dutika ijinawagmatai Elías apu Acabpan chichajak: “Wamak weme yujumak yuwata, yumi uutun antajai”, tiuwai.

<sup>42</sup> Tusa tima Acab yujumka yuwatatus weuwai.

Tujash Elíasak muja Carmelo tutainum yakí wakauwai. Nunik nuwi tikishmag tsuntsuma yapin tikishin antig pujusui.

<sup>43</sup> Nunik pujus niina inaken chichajak:

“Weme nayantsanmanini niimsata”, tiuwai. Tusa tima wee diisui, nunik wakitki taa chichaak:

“Atsawai wainkachjai”, tiuwai. Tujash Elías chichajak:

“Sieteya imania wakitkita”, tiuwai.

<sup>44</sup> Tusa tima sieteya nuna wee taa chichaak:

“¡Nayantsanmaya yujagkim piipich uwegjai betek yakí wau wainnawai!” tiuwai. Timatai Elías niina chichajak:

“Weme Acab ujakta, carrojin juki, eke yumi yutatsaig weti, yumi senchi yutak epenkai”, tiuwai.

<sup>45</sup> Tusa tima, weji Acabpan ujakui. Dutika ujakam carrojin egkema yaakat Jezreelnum weuwai. Nuniai nayaimpinmak dasesegmat yujagkim suwe wajasui. Nunik shiig senchi yutujui.

<sup>46</sup> Tuja Elíasak Tuke Pujuu senchimitikamu asa, niina jáanchjin akachumtaiyai jigka shiig senchi tupikaki, apu Acab yaakat Jezreel jegatsaig niya jegauwai.

## 19

*Elías muja Horebnum tupikakbau*

<sup>1</sup> Acab yaakat Jezreelnum jegá, Elías dutikamun pachis wajuk Baala profetaji aidaun ijinae nuna ashí Jezabelan ujakuí.

<sup>2</sup> Dutika ujakam niina aentsji chichama etsegnun Elías ujakta tusa akateak: “¡Elíasah, ame mina profetag aidau kajegkume, nuadui wi aminak mantamatnume titatjai! ¡Tuja ame mina profetag aidau kajegkum dutiksanuk, kashin etsa yamai awa juniai wi amina maachmataig mina apajuig suwimkan sujusti!” tiuwai.

<sup>3</sup> Nuna chichama antuk maatag tabau asa tupikaki, Judá nugken yaakat Beershebanum weuwai. Nunik jegaa nuwi niina inaken ukukiuwai.

<sup>4</sup> Untsu niig nigki uwegshunmanini weuwai. Nunik makichik tsawan wea weakua tampusch wajamunum jeganta nuwi ayaumas pujusui. Nuwi pujus jamainun anentaimu asa chichaak: “¡Tuke Pujuuwah, yamai anentaimkun waittsashjai! ¡Dekas jakati tujutta, wagki wika mina muuntug aina nuna nagkaesaukesh atsujai!” tiuwai.

<sup>5</sup> Aatus tusa nuwig tepes kanajui.

Nunik tepaun ángel tumain Apajuí tajua achika ishintak: “¡Nantakim yujumak yuwata!” tiuwai.

<sup>6</sup> Tusa tama shigtaag ashí niimsatakama, niina chaiken makichik torta yama inajuamu, nuigtu yumi jarranum aimkam pujaun wainkauwai. Nunik wainak nantaki nuna yuwa umutnashkam uwajui. Nunik ataktu tepes kanajui.

<sup>7</sup> Tujash Apajuí ángel tumain ataktu tajua achika ishintak, chichajak: “¡Nantakim yuwata, ame wegama duka shiig atushtai!” tiuwai.

<sup>8</sup> Tusa tima Elías nantaki nuna yuwa umutain uwajui. Nuna yuwa ichichmamag cuarenta tsawan, nuigtu cuarenta kashi wekagas Apajuí mujaji Horebnum jegauwai.

<sup>9</sup> Nunik jegaa nuwi waanum waigka kanag tsawajui. Nuwi pujaun Tuke Pujuu niina chichajak:

“¿Elíasah, amesh juwish waji pujugme?” tiuwai.

<sup>10</sup> Tama nii ayaak:

“Israel aents aidau amina idaitamsaju asag, ame emematku kuntin maa patasa apetai najanamu aidaun yumpuajag, amina profetajum aidaunashkam kajegkaje. Nuninakuí amina akasmatkun shiig senchi kajeajai. Tuja ima wiki iwaku juwakjai. Minashkam mantuatatus egatuinawai”, tiuwai.

<sup>11</sup> Tusa timatai Tuke Pujuu niina chichajak:

“¡Jiinkim anú mujanum mina emtijuí wajasta!” tiuwai.

Nuna tusa inagnaig, Tuke Pujuu nagkaemakiuwai, nuniai dase shiig senchi dasentak nunú mujan umuchiam kaya múun aidau jimaítuk dakaejauwai. Nunú nagkaemaig nugka senchi uugkauwai. Tujash Tuke Pujuu dasenmak atsujakuí.

<sup>12</sup> Tuja nugka uugbau nagkaemaig, jii keejakuí. Tujash Tuke Pujuu nunú jii kegamunmashkam pujujakchauwai. Nunú jii kegau megkagai, antuekauwai shiig pegkegchin shinau.

<sup>13</sup> Nuna Elías antuk ishamak niina jáanchjin juki, yapin dukuka waanum pujau jiinki pujusui. Nunik pujai chicham chichamu antuegak:

“¿Elíasah, amesh anuish waji pujugme?” tau.

<sup>14</sup> Tama nii ayaak:

“Israel aents aidau amina idaitamsaju asag, ame emematku kuntin maa patasa apetai najanamu aidaun yumpuajag, amina profetajum aidaunashkam kajegkaje, nuninakuí amina akasmatkun shiig senchi kajeajai. Tuja ima wiki iwaku juwakjai. Minashkam mantuatatus egatuinawai”, tiuwai.

<sup>15</sup> Tusa tutai Tuke Pujuu niina chichajak:

“Ame taamun nunú jintanmak uwejush yaakat Damasco awa nuni wakitkita. Nunika jegaam Hazael aceiteyai buuknum nijakam Siria apuji emata.

<sup>16</sup> Tuja Nimsí tijaji Jehú aceiteyai buuknum nijakam Israel aents aidaun apuji emata. Untsu Safat Abel-meholánmayan uchiji Eliseo amejai yapajinatin adaikata.

<sup>17</sup> Dutikawamin Israel aents aidau Baalan emematiu aidaunak Hazael kajegtatui. Dutika kajeam pisagmataish, Jehú ijinattawai. Untsu Jehú maatag tama pisagmataig, Eliseo ijinattawai.

<sup>18</sup> Untsu Israel aents siete mil aidau Baalan tikishmatug emematchaju aidau, tuja sauktanakesh saukuachaju aina nunak ijinashattjai”, tiuwai.

*Elías Eliseon ipaamu*

<sup>19</sup> Tuja Elíasak nuwi pujau wakitkiuwai, nunik Eliseo ajak ajakmatnun takak pujaun wainkauwai. Tuja doce toro aidaunum nugka pukutai jigkatuamu aidau eemak, nugka

pukui shimutai niishkam nuna ukujin makichik japis nugka pukua pukuakua wegau. Nunittaman Elías jegantun niina jáanchjiyai tuntupnum dukukui.

<sup>20</sup> Dutikam nuna japis wegau ukuak tupikaki Elíasan jegantun chichajak:

“¡Machik tsawan sujusta! ¡Mina apajun mina dukugjai ujaka ukuakun amejai wekaesatjai!” tiuwai. Tusa tama:

“¡Ayu nunikta, tujash aneaku ata wi amina ipajam nunú!” tiuwai.

<sup>21</sup> Tusa tima Eliseo Elíasan ukuak weuwai. Nunik jegá nunú jimag toro nugka pukuu aidaun mauwai. Dutika umika, toro nugka pukuiti tusa numi minantua jgkamua nunak juki ikapag inajauwai. Dutika aents aidaun susauwai yuwatnume tusa. Nuna dutika ukuak Elíasjai uyunis wekaesatatus weuwai.

## 21

### *Nabot uva ajakbaun Acab atankitag tibau*

<sup>1</sup> Apu Acab aajakua duka Samaria nugkanum pujus inamajakui, nuniyatak tikich niina pujusa inamtaiji yaakat Jezreel ajujukui. Nunú yaaktanmaya makichik múun Nabot daagtin uva ajakbau jega apu pujusa inamtain nuna yantamen aajakui.

<sup>2</sup> Tuja makichik tsawantai Acab Nabotan chichajak:

“Amina ajajum uva ajakbauwa nunú mina sujusta, mina ajag ati, wagki wi pujusa inamtaijua nuwi au asantai. Nunú sujakminig, tikich ajanum uva ajakbau shiig pegkeja nuna amastajai. Untsu ame wakegaminig, juna akiken kuichkin akiktajame”, tiuwai.

<sup>3</sup> Tusa tama Nabot ayaak: “¡Mina apag mina dukugjai ukugtukmauwa duka midau asantai, amamaitsugme!” tiuwai.

<sup>4</sup> Tusa tima Acab wake besek wakitkiuwai, wagki Nabot chichaak: Mina apag mina dukugjai ukugtukbaunak amamaitsugme tusa tibau asa. Nunik jegaa yujumkan yutsuk yapin tanishnum anug tepesui.

<sup>5</sup> Nunik tepetai niina nuwe Jezabel, jegantun iniak:

“¿Wagka yujumak yutsukesh wake besekmesh pujame?” tau.

<sup>6</sup> Tama Acab ayaak: “Jezreelnumia múun Nabotjai chichasmajai, niina ajaji uva ajakbauwa nuna sumaktajai tusan. Tujash sujutan dakitaku, tikich aja uva ajakbauwa nuna nagkaesau pegkeg awa nuna susatjai timajai. Tujash nii mina sujutan dakitmae”, tiuwai.

<sup>7</sup> Timatai niina nuwe Jezabel ayaak:

“Tujash ¿amechukaitam Israel aents aidaun apujimek? Aní pujutsuk yujumak yuwata. ¡Au Nabotan ajajin uva ajakbauwa nunak wi ikamjuktage!” tiuwai.

<sup>8</sup> Tusa tamawaik Acabpa daajin papiin agag apu sellojin apuja, nunú yaaktanmaya apu eme anentsa diitai aidaun Nabotjai batsamin aidaun ishitkauwai.

<sup>9</sup> Nunú papiinmak aatus agajui: “Yujumak ijagmat ati tusajum etsegkatajum. Tuja aents aidaun tuwakmatai, Nabot juki ejentatajum dita emtin ekentsatajum.

<sup>10</sup> Dutikajum niina tsanumjugtin aidaun jimag aents pegkegchau aidaun niijai niimtikajum ekentsatajum. Nuwi ekemas tuke aneas tsanumjuinak: ‘Ame Apajuí pegkegchau chichagkum Apushkam pegkegchau chichagkamume’, tusa titinme. Tusa tiagmatai jiiikjum, kayai tukua tukuakujum maatajum”, tiuwai.

<sup>11</sup> Tuja Nabotan yaaktajinia aents aidaun múun aidaun, nuigtu apu aidaun aatus Jezabel papii agag akupkamunak imatiksag umikajui.

<sup>12</sup> Nuninak yujumka ijagmawag batsamas, Nabotan jukiag aents tuwak batsatbaunum ejegan dita emtin ekentsajui.

<sup>13</sup> Dutikawaju ai, ashí aents aidaun antamunum niina tsanumjugtin aidaun jimag jegantajui. Nunikag tsanumjuinak: “Nabot Apajuí, apu Acabjai pegkegchau chichaju antukmají”, tiajui. Tusa tiagmatai juki, yaakta ukumtikiag kayai tukui tukuinakua maawajui.

<sup>14</sup> Dutika maawagmatai, Nabotnak maawaje tusag Jezabelan ujakajui.

<sup>15</sup> Nuna Jezabel dekaa Acabpan chichajak:

“¡Nabot niina ajaji uva ajakbauwa nuna amina amatan dakitma nunú weme jukita, wagki yamaik niig jakae!” tiuwai.

<sup>16</sup> Nuna Acab dekaa Nabota ajajin jukitatus wejiuwai.

<sup>17</sup> Dutikamtai Tuke Pujuu Elíasan chichajak:

<sup>18</sup> “Wetá nunikam Acab Israel aents aidaun apuji Samaria nugkanum puja nunú egakta. Tuja yamaya juwik Nabota ajajin jukitatus ajanum jegan wekaewai.

<sup>19</sup> Nunú jeganta chichagkum: ‘Ame Nabot maakum numpe ukagbauwa nuna yawá aidaun dukajaja dutiksag, amina numpenashkam nuanuig dukajagtatui’, Apajuí tujamui tita”, tiuwai.



<sup>20</sup> Tusa ujakam, Nabot Eliásan ayaak:

“Amek mina shiwaajuitme, tujash juwi igkunkaume”, tiuwai. Tama Eliás ayaak:

“Ehe, igkugjame. Wagki amek Tuke Pujuu diismak ima pegkegchauwa duke takame.

<sup>21</sup> Nuniau asamin Apajuí aatus tujamui: ‘Aminak shiig pegkegchaun itajuattagme, dutikakun ame wegantu aidauunak ajituattagme; tuja amina uchijum aishmag aidau Israel nugkanun batsatunak ashí ijituattagme.

<sup>22</sup> Tuja Nabata uchiji Jeroboaman, niina uchiji aidaujai ijinauwaitag dutiksanuk aminashkam ijinattagme. Tuja Ahías aajakua nuna uchiji Baasa Israel aents aidauun pegkegchaun takantikak mina kajemtijuku asamtai, wi suwimka suwakun ijinauwaitag numamtuk aminashkam ijinattagme’, tujamui Apajuí.

<sup>23</sup> “Tuja Jezabelnashkam pachis Tuke Pujuu chichaak: ‘Jezabelnak yaakat Jezreel peejamua nuna aawin yawá aidau yuwawagtatui.

<sup>24</sup> Tuja amina pataim aidau yaaktanun jakagtata nunak yawá yuwawagtatui. Untsu agá jaunak chuweg yuwawagtatui’ ”, tiuwai.

<sup>25</sup> Tuja tikich apu aajaku aina duka Acabpan nuwe Jezabel tabaun umiju asa, Tuke Pujuu diismash ima pegkegchaunak takajakua nuninuk atsujakuí.

<sup>26</sup> Tuja amorreo aents aidau dakumkamun emematujaku aina nunisag, Acabshakam nuna emematak shiig pegkegchau Tuke Pujuu aentsji Israel wegantu aidau emtin iwainmamajakuí.

<sup>27</sup> Juna aatus Apajuí tibaun Acab antukui. Nunik puyatuk jáanchjin japiki ichigkui, dutika jáanch pegkegchaun nugkuja, yujumkan ijagma pujau. Nunik pujus makichkish yapagmamtsuk, wake besek wegagu.

<sup>28</sup> Nunik pujutai Tuke Pujuu Eliásan chichajak:

<sup>29</sup> “¿Acab awake anentaimag minai yunumka dusha dekamek? nuniku asamtai, nii iwaku pujaigkik, niina uchiji aidauunak ijituashtatjai. Untsu nii jakamtai, niina uchiji apu wetata nuaduí, niina uchiji wegantunak suwimkan susattajai”, tiuwai.

## 22

*Apu Acabpan depetuk maawagtinun pachis Micaías etsegkamu*

<sup>1</sup> Israel aents aidauk Siria nugkanmaya aidaujai maanitsuk kampakatum mijan batsamsajui.

<sup>2</sup> Tujash kampakatum mijana duwi Judá wegantu aidau apuji Josafat Israel aents aidau apuji Acabpan ijagsauwai.

<sup>3</sup> Nunik mai apuk chichaak batsatai, Acab Israel aents aidauun apuji niina atuwe aidauun chichajak:

“Atumek dekagme, yaakat Ramot Galaadnum awa duka dekas iinui. Nunin aig Siria nugkan apuji nii atai kuitama nunú atankimi”, tiuwai.

<sup>4</sup> Nuna tusa Josafatan iniak:

“Yaakat Ramot Galaadnum awa nuna sirianmaya aidau ayamjuinak akasmatuina nunú jeteamunum ¿yunkagtumainchaukaitam?” tau. Tama Josafat ayaak:

“Wika mina suntag aidaujai, tuja caballonum entsamak maanin aina dushakam betek amina suntajum aidaujai atuniaji.

<sup>5</sup> Tujash eke shimutsuk Tuke Pujuu iniasta ¿niish tunak tujamit?” tiuwai.

<sup>6</sup> Tusa tima Israel aents aidauun apuji Acab cuatrocientos profeta aajaku aina nuna ijumag chichajak:

“¿Yaakat Ramot Galaadnum awa nunash jetemainkaitag, atsa jetemainchaukaitag?” tiuwai. Tusa tama dita ainak:

“Jetekta, auk amek Tuke Pujuu yaimpasmatai depetkattame”, tiajui.

<sup>7</sup> Tujash Josafat Judá wegantu aidauun apuji iniak:

“¿Juju profeta aidauun dekaskeash tuina tusa, tikich profeta iniasa shiig dekamainush juwish pujatsuak?” tiuwai.

<sup>8</sup> Tusa tama Acab Josafatan ayaak:

“Ehe, makichik pujawai, nunú iniasa dekamainai Tuke Pujuuish wajintuaki. Nuna daajig Micaías, Imlá uchijiyai. Tujash wika niinak kajegnujai, wagki pegkejan ujattsuk, ima pegkegchaunak ujatu asamtai”, tiuwai. Tutai Josafat ayaak:

“¿Duka aajamek tiipa!” tiuwai.

<sup>9</sup> Tusa tima Israel aents aidauun apuji Acab makichik suntaja apujin untsuka chichajak:

“¿Imlá uchiji Micaías wamkes juwi taati tusan wakegajai!” tusa akateg akupkauwai.

<sup>10</sup> Tuja Israela apuji Acab Judá apuji Josafatjai apu nugkutain nugkujag iwagmamag, yaakat Samaria waitainum ekemsa ayamtai plazanum apu ekemtai aidau umikbaunum eketaidau. Nunik eketainaí ashí profeta aidauk, Apajuí tawai tusa chichaman etsejuidau.

<sup>11</sup> Tuja nuwiya makichik Sedequías daagtin múun Quenaaná uchiji baka kachujijai betek jiju najanamujin takus wajasa untsamak: “¡Tuke Pujuu aatus chichaak: ‘Juju kachu aina jujai sirianmaya aidau jetektatjume, dutikajum ashí amuktatjume!’ tawai”, tau.

<sup>12</sup> Tuja tikich profeta aidaushkam dutiksag chichainak: “Yaakat Ramot Galaadnum awa nunú jetekta, ame depetmaktatme, wagki Tuke Pujuu depetmak yaaktan atankiti tujamu asamtai”, wajaidau.

<sup>13</sup> Imatu batsatai Micaíasan utitag tusa weu jegajua chichajak:

“Ashí profeta aidauk ashí chicham pegkejan apu Acabpan ujakaje. Nuadui ¡wait aneasam ameshkam ditajai ijunjam, chicham pegkeg apu Acab ujakta! tusan tajame”, tiuwai.

<sup>14</sup> Tusa tama Micaías niina ayaak:

“¡Dekas umiktinun Tuke Pujuu daajin tajame. Wika Tuke Pujuuush wajintig ima nunak etsegkattajai!” tiuwai.

<sup>15</sup> Nuna tusa apu pujamunum weuwai. Nunik jegamtai apu Acab iniak:

“Micaíasah, ¿yaakat Ramot Galaadnum awa nunash jetemainkaitag, atsa jetemainchaukaitag?” tau. Tusa iniam nii ayaak:

“¡Jetekta, Tuke Pujuu yaimpaktatui depetmakti tusa!” tiuwai.

<sup>16</sup> Tusa tutai apu Acab niina ayaak:

“Ame dekas takumek, Tuke Pujuu daajin tajai tita tusan kuashta tajame”, tiuwai.

<sup>17</sup> Tusa tama Micaías niina chichajak:

“Israel aents suntag aidauk uwig aidau kuitamain atsugsam, pampagka yujama numamtuk yujaun wainkamjai. Tuja Apajúi mina chichagtak: ‘Dita aidau kuitamainuk atsawai, nuadui maki makichik agkan dita jeen waketjatnume’ tusa tujutui”, tiuwai.

<sup>18</sup> Tusa timatai Acab Josefatan chichajak:

“Wi juna aneasan, ¿juju aentsuk pegkegnakesh etsegchauwe, ima pegkegchaunak etsegnuwe tusan tichamkajam?”, tiuwai.

<sup>19</sup> Tusa tutai Micaías ataktu chichajak:

“Ame tame nuniau asam, wi Tuke Pujuu tujutbaun ujakattjam nunú shiig antukta: Tuke Pujuu niina ekemtaijin ekemsamtai, niina aentsji aidau untsujin, menajin aatus ijunun wainkamjai.

<sup>20</sup> Nunik ijunun Tuke Pujuu iniak: ‘Maaniamunum Acabpan maatnume tusa tuke aneas tsanuak Galaad, nugkanum yaakat Ramot awa nuna sirianmaya aidau akasmatuina nunú jetekta tusa ¿Acabpan tsanumainush yakita?’ timae. Tusa tutai niina aentsji aidau nuwi ijunu maki makichik anentain apusagmae.

<sup>21</sup> Tusa tuinai wakan pegkegchau Tuke Pujuu eketbaunum tanta chichaak: ‘¡Wi nunak tsanumainaitjai!’ timae. Tusa tutai Tuke Pujuu iniak: ‘¿Tujash wajuk dutikattame?’ timae.

<sup>22</sup> Tusa iniam nunú wakan pegkegchau Tuke Pujuu ayaak: ‘Auk profeta aina nunú ashí Acabpan tsanuginme titatjai’ timae. Tusa timatai Tuke Pujuu niina chichajak: ‘Kame tsanumain asameas tametai, weme tsanugta’, timae.

<sup>23</sup> Yamai dekaume amina profetajum aina nuna Tuke Pujuu wakan waitan egketjamu asa, maatnume tusa tsanugmaina nunú”, tiuwai.

<sup>24</sup> Tusa timatai Quenaaná uchiji Sedequías Micaíasa jegantun yapinum awati chichajak:

“Tuke Pujuu Wakani mina chichamtija nunú jiinki mina ukujak, aminí waya chichamtijatsuash tusamek wainka anentaimjaipa, nunak makichkish nuniatsui”, tiuwai.

<sup>25</sup> Tusa tama Micaías Sedequíasan ayaak:

“Ayu, ame mina tujutam duka tupikaki wekaesam uuma wekaetatam nuniakum dekattame”, tiuwai.

<sup>26</sup> Tusa timatai Acab chichaak:

“¡Achika jukijum yaakta apuji Amón puja nuwi ejegatajum, dutikakjum mina uchig Joásaishkam ejegatajum!

<sup>27</sup> Dutikawagmin wi taja nuna dutiksag aents achika egketainum egkeatnume. Dutikawag pagkan yumijai piipichin susatnume, dutikainai wi maania depetmakan pegkeg jatsuk taatjai”, tiuwai.

<sup>28</sup> Tusa tutai ataktushkam Micaías niina chichajak:

“¡Ame iwaku wakitkiaminig, mina tujutma nunak Tuke Pujuu tujutchau asamtai nuniktatme!” tiuwai.

<sup>29</sup> Tusa timatai suntag aidau Micaísan achikag aents achika chimpitainum juki emajui. Dutikainai Israel aents aidau apuji Judá wegantu aidau apujijai yaakat Ramotan jetekagtatus shimutkajui.

<sup>30</sup> Nunik shimutuinak Israel aents aidau apuji Josafatan chichajak: “Wika suntag wainkauch aina nuna nugkutain nugkugtajai. Untsu ame mina jáanchug apu nugkutaia nunú nugkugta”, tiuwai. Nuna tusa Acabpak suntag wainkauch aidau nugkutain nugkuja maaniamun nagkamauwai.

<sup>31</sup> Nunik shimuinai sirianmaya apushkam treinta suntaja apuji capitán carronum yujas maanin aidau chichajak: “¡Tikich aentsuk jetekaigpajum, ima Israel aents aidau apujiya duke jetektajum!” tiuwai.

<sup>32</sup> Tujash nunú suntag aidau Josafatan wainkag jutsukaita Israel aents aidau apuji tusag jintujag tenteawajui. Dutikam Josafat niina suntaji aidau untzukui yainkatnume tusa.

<sup>33</sup> Nuna antugkag, juka dekas Israel aents aidau apujichuapi tiajui. Nuadui tupikautaish pataetukchajui.

<sup>34</sup> Untsu Sirianmaya suntag makichik aentsnakesh wainchayatak wainak niina flechajin akenkauwai. Dutikkama Israel aents aidau apuji Acab niina suntaji aidau shimamunum pachitkau wegaun pachiaqbau ijuwai. Dutika ijum niina carrojin anuntuk wegaun chichajak: “¡Carro ataktu awagkita, wika jakattajai, minak ijutiaje!” tiuwai.

<sup>35</sup> Nunú tsawantin suntag aidau shiig senchi maaniawajui. Tuja apu Acabnak niina carrojin egkeja awajainiag batsamtuidau sirianmaya aents aidaujai maaninak. Tujash flechayai ijumunum numpa saegak carronak ayatak numpak awajsauwai, nunik etsa akagai jakauwai.

<sup>36</sup> Tuja etsa ashí akagai Israel suntag aidau apuji chichaak: “Ashí waketjatajum,

<sup>37</sup> wagki iina apujig jakae”, tabaun antukajui.

Tusa tima waketuinak Acabpa iyashin jukiag Samaria ejegawajui. Dutikawagmatai niina patayi aidau nuwi ukusajui.

<sup>38</sup> Dutika ukusagmatai niina inake aidau carro jukiag, nuwa wainka takatai aidau matainum ejegawag nijakajui. Dutikamunmayan numpa saekiun yawá aidau dukajajui, Tuke Pujuu tibaunak imatiksag.

<sup>39</sup> Tuja apu Acab pachisa augmatbauk nii takasbauji aidaujai, nuigtu jega apu pujusa inamtai marfil\* umikbau aajakua duka, tuja yaaktan najankauwa dushakam papii crónicanum apu aidau takasbau agatkamua nuwi agagbau ayawai.

<sup>40</sup> Aatus Acab jakauwai. Nunikmatai niina uchihi Ocozias apu wajas inamjauwai.

\* 22:39 “Marfil” tawa duka elefante nai tsupija, dakaja aduuja shiig pegkejuch umikbau aajakua nuna taku tawai.

**Apu aidau takasbau aina  
nunú pachisa jimajá agagbau  
2 Reyes  
Elías nayaimpinum wematai Eliseo nagkama takasua nunú  
agagbau**

**2**

(2—13)

*Elías nayaimpinum webau*

<sup>1</sup> Apajú dasen wainchijai betek ajuag Elíasan jukitin tsawan jegau ai, Elías Eliseojai yaakat Guilgal batsatu juwakiag shiyakajui.

<sup>2</sup> Nunik wesag Elías Eliseon chichajak:

“Amek juwi pujumata, Tuke Pujuu minak Betelnum awetawai”, tau. Tama Eliseo ayaak:

“Tuke Pujuu antai tuja ameshkam antamin tajai. Wika ima nigki weti tusanuk idaisashtatjame”, tiuwai. Tusa timatai mai juwakiag Betel jegawajui.

<sup>3</sup> Nunikagmatai profeta aidau Betelnum batsatu Eliseon igkugtatus jintujajui. Nunik igkug chichajuinak:

“¿Amesh amina jintinjamnun Tuke Pujuu jujutjamkitta dusha dekamek?” tuidau. Tusa iniam nii ayaak:

“Ehe, dekjai, tujash atumek duka tiigpa”, tiuwai.

<sup>4</sup> Tuja ajuma duwi Elías Eliseon chichajak:

“Amek juwi pujumata, minak Tuke Pujuu Jericó awetawai”, tau. Tama Eliseo ayaak: “Tuke Pujuu antai tuja amesh antamin tajai. Wika ima nigki weti tusanuk idaisashtatjame”, tiuwai. Tusa timatai mai juwakiag Jericó jegawajui.

<sup>5</sup> Nunikagmatai profeta aidau Jericó batsatu Eliseon igkugtatus jintujajui. Nunik igkug chichajuinak:

“¿Amesh amina jintinjamnun Tuke Pujuu jujutjamkitta dusha dekamek?” tuidau. Tama nii ayaak:

“Ehe, dekjai, tujash atumek duka tiigpa”, tiuwai.

<sup>6</sup> Tuja ajuma duwi Elías Eliseon chichajak:

“Amek juwi pujumata, Tuke Pujuu minak Jordán awetine”, tau. Tama Eliseo ayaak: “Tuke Pujuu antai tuja ameshkam antamin tajame. Wika ima nigki weti tusanuk idaisashtatjame”, tiuwai.

Tusa timatai mai juwakiag Jordán jegawajui.

<sup>7</sup> Nunik wegagtai cincuenta profeta aidau Jericó batsatu pataetakajui. Nunik pataetakag Elías Eliseojai ijunun nuna ukujin ikaa ijuntsajui. Nunik ijunai Elíasak Eliseojai namaka jegawajui.

<sup>8</sup> Nunik jegawag Elías jáanch nii dukumataijin juki pempeag yumin awatiuwai. Dutika awatim namakak jimaituk kanaka buku wajasui. Nunikmatai nugka bukunum katimaina imatikas mai katiyajajui.

<sup>9</sup> Nunik katiyajag Elías Eliseon chichajak:

“Eke amejai kanaatsug nuaduiik, ame wajina sujusti tame nunú segatta”, tiuwai. Tama Eliseo ayaak:

“Tuke Pujuu senchiji aminí awa nuna aan nagkaemas sujusti tajame”, tiuwai.

<sup>10</sup> Tusa tama Elías ayaak:

“Amek shiig kuashat sumame. Tuja mina Apajú jujuktata nunú waitkum ame segatam duka jukittame. Untsu mina Apajú jujamu waitchakmek jukishtatme”, tiuwai.

<sup>11</sup> Nuna aatus chichakiag shimuinai pachiachbau makichik carro kegau, tuja caballo dushakam kegau wantinkauwai. Nuniak tsanig wajaun akankauwai. Dutikam Elíasak dase wainchijai betek ishamain wajaunum pachiinak nayaimpinum weuwai.

<sup>12</sup> Nunikmatai Eliseo wainak senchi buutak:

“¡Apawah! ¡Apawah! ¡Amek Israel aents aidanmak suntag maanin aidau nagkaesau ayume!” waja wajas buutu. Tujash ataktu awagkig Elíasnak wainkachui. Elías wematai wake besemag dekapeak niina jáanchjin japiki ichigkui.

*Elías wematai*

*Eliseo nagkama takasbau*

<sup>13</sup> Elías wegak jáanch nii dukumataijin ajuag ukukbaun Eliseo jukiuwai. Nunik wakitki namak Jordágnun jegauwai.

<sup>14</sup> Nunik nuna jáanchin pempeag duwi namakan awati untsamak:

“¿Tuke Pujuu Apajuí Elíasan ememattaish tuwi pujawa?” tau. Dutikamuik namakak jimaituk kanaka buku wajasui. Nunikmatai Eliseo katigkui.

<sup>15</sup> Tuja profeta aidau nuwi ijunas dii ijunuk, Eliseo dutikaun wainak chichainak:

“¡Apajuí Wakani Elíasai pujumia nunú yamai Eliseowai pujawai!” tusag niina igkugtatus wejiajui. Nunik jegantag,

<sup>16</sup> tsunsuma ijunas chichajuinak:

“Antukta nijah, ii ame inakem ainag juwiya cincuenta aents wajuu aina nunú amina jintinjamin Elías megkaeka nuna egaktinme. Namputchawame Tuke Pujuu Wakani yaki takui juki tikich mujanum, dutikachkush segaunmakesh ajuag ukuchaintash”, tuidau. Tusa tiagtai nii chichaak:

“Atsa, makichik aentskesh egaktinme tusagmek awemaigpajum”, tiuwai.

<sup>17</sup> Tusa tamaitak intimki imatiagtai, ayu cincuenta aents ishiaktajum tusa tiuwai. Tusa timatai ishiakam kumpatum tsawan yujagsag egainakush wainkachajui.

<sup>18</sup> Nunik wainkacha waketug Jericó kaunamtai, Eliseo ditan chichajak:

“Wika anna aneasan wegajum timajime”, tiuwai.

*Eliseo Jericónmayan entsa pukuni pegkegchau jiinun pegkeg awajsamu*

<sup>19</sup> Tuja Jericónmaya aents aidau Eliseon chichajuinak:

“Iina yaaktajiya juka pegkejai. Duka ameshkam wainme. Tujash yumi pegkegchau umumaitsui, nugkashkam ajakmamash tsapatsui”, tuidau.

<sup>20</sup> Tiagtai Eliseo ditan chichajak:

“Tazón yamajam weejai jukijum itagtuatajum”, tau. Tusa tima juki ejentuntajui.

<sup>21</sup> Nuna Eliseo juki yumi pukuni jiiinbaunum jeganta nagkimak: “Juná aatus Tuke Pujuu chichaak: ‘Juju yumia junak wi pegkeg awagsajai. Nuadui makichik aentskesh juna umauk jakashtatui. Tuja nugkashkam ajak tsapamainchawk achattawai’ tawai”, tiuwai.

<sup>22</sup> Duwi nagkamas Eliseo tibaunak imanisag, yumi pegkeg wajasui.

<sup>23</sup> Nuna dutika ukuak Eliseok Betel weuwai. Nunik wegaun uchi betelnumia datsa aidau jiiintujag dushikinak:

“¡Nampiaju ameshkam nayaimpinum wetá! ¡Nampiaju ameshkam nayaimpinum wetá!” awajuidau.

<sup>24</sup> Tusa imatjam Eliseo ayampatua Apajuín adayas ditan yumigkig ukukiuwai. Dutika ukuag jimag chayú ikamia jiiintuki cuarenta y dos uchi datsa aidau ichiag ijinauwai.

<sup>25</sup> Nuwi juwaki Eliseo weuwai muja Carmelonum. Tuja nuwiya juwaki wakitkiuwai yaakat Samaria nugkanum.

## 4

*Eliseo Sunemnumia nuwajai*

<sup>8</sup> Makichik tsawantai Eliseo Samaria wegak yaakat Sunem aajakua nuni nagkaemakiuwai. Nunik nagkaemattaman nuwiya nuwa eme anentsa diitai pujau, yujumkan yuwati tusa waitkas ipauwai. Nuadui Eliseo nuni weakug nuwi yujumkan yuwatatus tuke waijakui.

<sup>9</sup> Tuja makichik tsawantai nunú nuwa niina aishin chichajak:

“Antukta nijah, wika dekajai au aents nagkaemak tuke waya ijagtama duka dekag pegkejam Apajuín profetajiyai.

<sup>10</sup> Nuadui jega tuntupega nuwi nii kanutai umigkami. Dutika makichik pegak, makichik patasa yutai, ekeantai, nuigtu ekematai aatsa umigkami. Dutika umikbau asamtai, iina ijagtamkush nuwi kanagti”, tusag umikajui.

<sup>11</sup> Dutika umikbaunum Eliseo nuwi kanagtatus waya,

<sup>12</sup> niina inake Guehazi aajakua nuna chichajak: “Nuwa jentin untsukta”, tiuwai. Tusa tima untsukui. Dutika untsukam taamtai, Eliseo niina inaken chichajak:

<sup>13</sup> “Anú nuwa iina shiig awajtamka nuniau asamtai, iish wajinmak yaimainaita nunú iniasta. Tuja niish wakegakuig apujai, nuniachkuish suntaja apujijai chichamainaitji”, tiuwai.

Tusa tutai nunú nuwa ayaak:

“Wika juwi mina pataag aidaujai pujau asan shiig pujajai, utugchatak atsugtawai”, tiuwai.

<sup>14</sup> Nuna tusa wakitkimtai, Eliseo niina inaken chichajak:

“¿Tujash wajuk yaimainkita?”, tau. Tama nii ayaak:

“Achah, wajak yaimaintsukait. Uchigtuchui, tuja aishishkam múunchi”, tiuwai.

<sup>15</sup> Timatai, kame ataktu untsukta tiuwai. Tusa tima ataktu weji untsukui, dutikam kanutainmak waitsuk, ayatak waitinum jegan wajasui.

<sup>16</sup> Nunikmatai Eliseo nunú nuwan chichajak:

“Tikich mijan atata duwi yamai tsawanta juniai, uchi uchigmakam pagkuaku atatme”, tiuwai. Tama nii Eliseon ayaak:

“Mina apujuh, amek Apajuí etegkamuitam iman asam minak tsanujaipa”, tiuwai.

<sup>17</sup> Tau asa nigka dekaskeapi tichauwai. Tujash duwi pujus Eliseo tibaunak imatiksag ejajjukui. Nunik tikich mijantin uchigmakui.

<sup>18</sup> Dutikam pujus nunú uchi muumpajui. Nunik pujau makichik tsawantai niina apaji aents ajaka juwagtai diyak ajanum pujau asamtai, ditajai pujustatus weuwai.

<sup>19</sup> Nunik jegan wajanbauwaik senchi buutak:

“¡Ayau, buukeg najautawai! ¡Ayau, buukeg najautawai!” wajau. Imattai apaji niina inaken chichajak:

“Juju uchi jukim dukujin ejegata”, tiuwai.

<sup>20</sup> Tusa tima juki dukuji pujamunum ejegauwai. Dutikamtai niina dukuji juki niina bakuin ekenas pujus utsan tajipiuiwai. Nunik nuwi pujusag uchik jakauwai.

<sup>21</sup> Nunik jakamtai dukuji juki profeta Eliseo kanutajjin yaki iwaka pegaknum aepes waitin epeni ukukiuiwai.

<sup>22</sup> Dutika ukuki niina aishin untsuka taamtai chichajak:

“Makichik inak burro susam awetugta nujai wi wenu profeta Eliseojai chichasan taatjai”, tiuwai.

<sup>23</sup> Tutai niina aishi chichaak:

“¿Wagka yamaish nijaiish chichastag tame? Nantuk yama takache, tuja tsawan-chakam ayamtaichui”, tau. Tama nii ayaak:

“Duka amek puyatjukaipa, nunin aigkish wetatjai”, tiuwai.

<sup>24</sup> Tusa timatai ayu tusa niina inaken burronum ekemsa wetin umikta tiuwai. Tusa tima umikmatai nuwa niina chichajak:

“Wegajai wamak, ame emkata, tuja wi juwi ayamjami tatsaigkik wajantaipa”, tusa weuwai.

<sup>25</sup> Nunik wea weakua muja Carmelonum Eliseo pujamunum jegauwai. Nuwi jegattak wetatman Eliseo wainak niina inake Guehazín chichajak:

“Nijah diisia, au nuwa mina duka Sunemnumia nuwa iina kanutain amauwe nunuwai.

<sup>26</sup> Tupikaki igkugkam iniasta niina aishish, niina uchijish pegkejash batsata nunú”, tiuwai. Tusa tima tupikaki weji igkug iniasui. Tusa iniam nii ayaak:

“Ehe, pegkeg batsatji”, tau.

<sup>27</sup> Nuna tusa Eliseo pujamunum jegauwai. Nunik Eliseo nawen tapit achik pujusui, nunitai Guehazi jegantauwai emenastatus. Dutiktai Eliseo niina inaken chichajak:

“Idaisata nigka kuashat anentaimak waitiawai, tujash Tuke Pujuu eke tujuttsui waji utugchatak ajawa”, tiuwai.

<sup>28</sup> Tusa tutai nunú nuwa Eliseon chichajak:

“¿Mina apujuh, wisha aminash uchi uchigmaktasan wakegajai tusanush timakaijam? Juna aneasan wika aminak wainkam tsanujaipa timaijame”, tiuwai.

<sup>29</sup> Tusa tutai Eliseo niina inake Guehazínkan chichajak:

“Umintsata nunikam mina ushujutaig jukim juju nuwa jeen wetá. Tuja jintá weamin aents igkupainakuish kumpamawaipa. Tuja makichik aentskesh kumpamjamkuish aikaipa. Nunika jegam mina ushujutaijua juju uchi yapiin patatta”, tiuwai.

<sup>30</sup> Tusa tutai nunú nuwa Eliseon chichajak:

“Tuke Pujuu antai, tuja ameshkam antamin tajame, wika ame wegachkuminig makichkish wechattajai”, tiuwai. Tusa imattai Eliseo nunú nuwajai weuwai.

<sup>31</sup> Nunik Eliseok eke wegai Guehazi niyá eemak jegá, ushujutai takakbauwai uchi yapiin patatiuwai. Tujash uchik makichkish tsagaumainchau tepau.

Nunitai ukuak Eliseon igkugtatus wejiuiwai. Nunik igkug chichajak:

“Ame tujutmaum nunak betek dutikamjai, tujash uchik tsagaichmae, jakamutak tepeme”, tiuwai.

<sup>32</sup> Tusa ujakam Eliseo niishkam jegá jegauwai. Nunik waya diikma uchi jaka peaknum tepaun wainkauwai.

<sup>33</sup> Dutika wainak nunú kanutain epeni Tuke Pujun aajak pujau. Tuja nunú kanutainmak ima Eliseok nunú uchi jakaujai pujau.

<sup>34</sup> Eliseo Apajuin aujus inagnak pegaknum waka uchi jakaun patamti uchin pagkuk niina wenin, jiin, uwejen, uchi wenin, jiin, uwejen, aatus tuket enekna tepesui. Nunik tepai, uchi jaka bichatug tepau nimpautan nagkabau.

<sup>35</sup> Nunitai Eliseo nantaki nunú kanutainum imau wajan, wekagu. Nunik ataktushkam pegaknum waka uchi patamti pagkuk tepau, nunik tepai uchi sieteya imania jachituk niimiuwai.

<sup>36</sup> Nunikmatai Eliseo Guehazigka untsuka chichajak: “Uchi dukuji untsuka”, tima untsukui. Tusa untsukam nunú nuwa Eliseo wajamunum jeganmatai Eliseo chichajak: “Juju uchijum jukita, jakache tsagaje”, tiuwai.

<sup>37</sup> Tusa tima tupikaki Eliseo nawen pagkuk pujusui. Dutika ukuak uchijin juki Eliseo kanutaijin pujau nugká akaikiuwai.

## 5

### *Naamán lepran achiimak jaun Eliseo etsagagbau*

<sup>1</sup> Siria nugkan apuji aajakua nuna suntaji aidaun apuji makichik aents Naamán daagtin aajakui. Niina Tuke Pujuu yayau asamtai, sirianmaya aidau maaninak depetmakaju asag, niinak apu shiig anentujukui. Tujash nunú aents lepra achiimak jak tepau.

<sup>2</sup> Nunik tepai makichik tsawantai, sirianmaya aidau Israel aents aidaujai maaninak, makichik nuwa tsakatan achikag jukiag Siria nugkanum ejegawajui. Dutikawagmatai Naamán niina nuwen inake ati tusa juki apusauwai.

<sup>3</sup> Dutikam pujus nunú nuwauch niina inaun chichajak:

“Mina apug amina aishjum ja duka profeta Samaria nugkanum puja nuna weji diyakug tsagaumainai”, tiuwai.

<sup>4</sup> Tusa timatai Naamán nuna pachis apun weji ujakui.

<sup>5</sup> Tusa ujaam apu chichaak:

“Dekas tame, wetá, ame wegakmin papii agajan, Israel aents aidaun apujin akuptuktajai yaimpakti tusan”, tiuwai. Tusa tima Naamán kuichik plata najanamun treinta mil juki, nuigtu kuichik oro najanamun juki, nuigtushkam diez jáanch nugkurai aidaun profeta akiktinun aatus yajuak niina inake aidaujai weuwai.

<sup>6</sup> Nunik wegak nuigtushkam papii agagbaun jujukuiwai. Nunú papiinmak:

“Wi mina aentsug Naamán suntaja apujiya nuna awemajai, lepra achimak ja nuna etsagagti tusan”, tuu agagbau aajakui.

<sup>7</sup> Nuna Israel aents aidaun apuji aujus diisa, shiig anentaimainchau waugkamim dekapeak, niina jáanchjin japiki ichigka chichaak:

“¿Wi Apajui pujuta sukagtin, nuigtush jakati tusash tukagtina dukaitag, aents lepra achimak ja nuna etsagagti tusa awetam atinun? ¡Atumesh shiig anentaimsa diistajum, wika junak maaniami tusa segapak jutijamui tajai!” tiuwai.

<sup>8</sup> Tuja papii agaja akupkamun apu diisa, jáanchjin japiki ichigke tabaun profeta Eliseo antukui, nunik niina chichaman akuptak:

“¿Wagka jáanchjumesch japikmesh ichigkume? aaní wekaetsuk anú aents awemata juwi tati. Nunik juwi taa dekaattawai, Israel aents aidaunum makichik profeta Apajui etegkamu puja nuna”, tiuwai.

<sup>9</sup> Tusa timatai Naamán niina carrojin caballo aidaujai yajuak weuwai. Nunik Eliseo jeen jeganta waitinum wajasui.

<sup>10</sup> Tujash Eliseok jiintukig kumpamachui, ayatak chichama etsegnun akateg awemak:

“Namak Jordágnun jegá sieteya imania nijamagti, nunik duwi tsagagtatui, tujamui tita”, tusa akateg awemauwai.

<sup>11</sup> Nuna antuk Naamán shiig senchi kajekui, nunik wegak chichaak:

“Wika niina jenis awaintua, nuwi wajasa Tuke Pujuu niina Apajujin segaa, nuadui mina iyashjui lepra ayá nuna achikmatai tsagajainja timajai.

<sup>12</sup> Israel aents aidau nugken namak aina nuna nagkaesau Damasconmaya namak pegkeg dekas múun aidau Abaná Farfarjai awa ¿duchaukait? Nuwi wika wenu nijamaja tsagaumain wajakchaja”, tau.

Tusa senchi kajeka weuwai.

<sup>13</sup> Nunik wetai niina inake aidau jegantag chichajuinak:

“¿Profeta amina aan nagkaemas utugchatan tujamkuig duka umikchatnukum? Iik umimainapi taji, nuadui dekas ayatak nijamajam tsagagta tujama duka, dutiksamak nijamajam tsagaumainaitme”, tijajui.

<sup>14</sup> Tusa tima Naamán namaka wee, Eliseo tibaunak imatiksag sieteya imania iyagka nijamajui. Nunik tsagag niina iyashinig uchi tsakatchin iyashjai betek pegkeg wajasui.

<sup>15</sup> Nunik tsagag niina uyunaidau aidaujai ijunag Eliseojai chichastatus weuwai. Nunik jegá Naamán Eliseon chichajak:

“¡Dekas yamaik shiig dekaajai, tikich nugkanmak Apajuik atsawai, ima Israel aents aidaunmak pujawai! Nuniau asamtai, wait aneamam ame mina etsaentuju asamin, wi amina inakem asan, waji aidaun amastatag nunú jukita”, tiuwai.

<sup>16</sup> Tusa tama Eliseo niina ayaak:

“Tuke Pujuu wi takamun deka nuna daajin tajame. Ame tujutam nunak ayu tichattajame”, tiuwai. Nuadui Eliseok Naamán, waji susatag tamash dakitajuwai.

<sup>17</sup> Dutika dakitjamtai Naamán Eliseon chichajak:

“Wi amina amastag taig ame dakitau asamin, untsu wi amina segajame. Juju Israel aents aidaun nugkega juna tai aimkan, jimag burro entsamainun nugkan jukitjai. Dutikan mina nugkajui ejegan Apajuí emematku kuntin maa patasa apetaín najanatjai. Wagki wika yamai nagkamsanuk tikich apajuimtai aina nunak kuntinu maan nuna nejen ashí apeaknuk emematchattajai, ima Tuke Pujuu ame emematam nunak ememattatjai.

<sup>18</sup> Untsu wi mina nugkajui jeganuk mina apug niina apajuimtaiji Rimón ememattatus weakui uyuntsattajai, wagki nunú ememattainum waya nuna emematak mina kuntujui achimak tikishmag pujakui, wishakam tikishmajan pujustatjai. Nuna wi nunitaish, minash Tuke Pujuu tsagkugtugi tajai”, tiuwai.

<sup>19</sup> Tusa tutai Eliseo niina chichajak:

“Ayu, puyattsuk nugka jukim wetá”, tusa tima Naamán nuwi pujau jiinki weuwai.

Nunik ujumak kuwagai,

<sup>20</sup> Eliseo inake Guehazí anentaimas: “Naamán sirianmaya aentsua nunú susatag tama mina apug Eliseo dakitug awagki nunak dekas wi wamak pataetukan amaigkan wajinak segainja nuna segatjai. Tuja nunak Tuke Pujuuish waitai umiktajai”, tiuwai.

<sup>21</sup> Aatus anentaimas Naamágkan pataetukui. Nunik pataetuk wegaun Naamán wainkauwai, nunik niina carrojin aepes akaikiuwai kumpamatatus, nunik kumpamak: “¿Utugchat atsuak?” tau.

<sup>22</sup> Tama nii ayaak:

“Atsa, utugchatak atsawai. Untsu mina apug Eliseo profeta datsa aidau Efraígka nugkenia kaunawaju asamtai, nunú susatin ame weme tres mil kuichik plata najanamu, nuigtu jimag jáanch nugkutajai sega utita tusa tujutmatai minajai”, tiuwai.

<sup>23</sup> Tutai Naamán niina ayaak:

“Dekas wait aneamam seis mil kuichik jukita”, tusa imatjau. Nuna tusa jimag sacon juki kuichkin chimpia jáanchnashkam jimajan egkeauwai. Dutika niina inake aidaun susauwai atum jukijum ejetuatajum, tusa.

<sup>24</sup> Dutikam jukiag mujanum Eliseo Guehazíjai pujujakua nuwi ejegawajui. Dutikawagmatai Guehazí nuna juki ditan kumpama ishiakui. Nunik shiyakmatai nunú kuichkin jáanchjai juki jegá uukui.

<sup>25</sup> Dutika uuka ukuak niina apuji Eliseo pujamunum jegaui, nunikmatai Eliseo niina iniak:

“¿Amesh tuwiyamea miname?” tau. Tama nii ayaak:

“Wika yajak wegatsjai, juwig pujajai”, tau.

<sup>26</sup> Tutai Eliseo niina ataktu chichajak:

“Naamán amina kumpamjamatatus niina carrojina akaikima nunak, nuwi amejai mina wakanjuk pujume. Yamaik kuichkikesh, jáanchkesh, olivo ajakbaukesh, uva ajakbaukesh, uwig aidaukesh, buey aidaukesh, inak aishmagkesh, nuwa aidaukesh makichkish jumaitsuji.

<sup>27</sup> Nuniaig ame jukui asamin Naamágka lepraji amina, ame wegantu aidajai achigmaktatui. Dutijamamtai tuke leprayai jau atatjume”, tiuwai.

Tusa tima Guehazí Eliseojai pujamun kanaabuik lepran achiimak niina iyashinig ishamain puju wajasui.

## 6

### *Jacha namakia jiikbau*

<sup>1</sup> Makichik tsawantai profeta aidau Eliseon chichajuinak:

“Ii ame pujamunum pujag duka shiig piipichi.

<sup>2</sup> Nuniau asamtai wait aneamam idaikagtusta, Jordágnum shiyaka numi tsupika ii pujustin jegamkagmi taji”, tuidau. Tusa tiagtai:

“¡Ayu wetajum!” tiuwai.

<sup>3</sup> Tutai nuwiya makichik niina chichajak:

“Wait aneamam uyunkagtusta”, tau. Tusa tama:

“¡Ayu, kame uyuntsatjime!” tiuwai.



<sup>4</sup> Aatus ditajai juwaki Jordán jegauwai. Nunikag nuwi numi tsupinak yujau.

<sup>5</sup> Nuninai nuwiya makichik aents jachan apakuig namaka ajugkui. Dutika ajugka untsamak:

“¡Chah, jintinkagtinuh! ¡Jachak midauchawe tsagkatjukagmae!” tau.

<sup>6</sup> Imattai nii iniak:

“¿Tuwi ajugmaume?” tau. Tutai nuwi tikich wajau chichaak:

“Auk juwi iyagmae”, tiuwai. Tusa timatai Eliseo numin tsupik juki nuwi nagkima ajugkui. Dutikam jacha wampumni jiiniuwai.

<sup>7</sup> Nunikmatai:

“Jukita”, tusa tima nuwi tikich wajau asa esanti jukiuwai.

*Eliseo sirianmaya suntag aidaujai*

<sup>8</sup> Tuja nunú tsawantin sirianmaya apu Israel aents aidaujai maanidau asag, tuwig niina suntaji aidaujaish ijunjatnush aajabi nuna pachis niina atuwe aidaujai chichasui.

<sup>9</sup> Nuna pachis Apajuí Eliseon ujakui. Dutikam Eliseo chichama etsegnun akateg awemak: “Sirian apuji niina suntaji aidaujai nunú nugkanum ijunjattaji tuinawai. Nuadui Israel aents aidau apuji niina suntaji aidaujaig nuni nagkaemakinmegka tusajum ujaktajum”, tiuwai.

<sup>10</sup> Tusa timatai ujakam, Israel aents aidau apuji anentaimas, Eliseosh dekaskeash tawa tusa niina suntaji aidau ujumak akupkauwai, dutika dekamá dekas atai, yaja shimak uwemaidau. Nunik kuashta uwemajaku ainawai.

<sup>11</sup> Nunidau asagmatai apu sirianmaya shiig senchi kajekui. Nunik suntaja apuji aidau untsuka ijumag chichajak:

“¡Israel aents aidau apuji maatasa chicham umijag nunash ya ima ujawa nunú etsegkatajum!” tiuwai.

<sup>12</sup> Tusa tutai nuwiya makichik ayaak:

“Iik apu ujakhamji, auk profeta Eliseo Israel nugkanum puja nunú ame chichamun antuk ashí ditan ujawai. Nuigtushkam ame amina kanutaigmin pujusa chichaam nunashkam antawai, nunik Israel aents aidau apujin ashí ujawai”, tiuwai.

<sup>13</sup> Tusa timatai sirianmaya apu chichaak:

“Tuwig Eliseosh pujawa nunú inimsa dekatajum, dutikajum nii pujamu shiig ejeyagmin, aentsun ishitkatjai achiktinme”, tiuwai.

Tusa tima iniimas dekawag:

“Eliseok yaakat Dotán pujawai”, tusa ujakajui.

<sup>14</sup> Tusa ujakam suntag caballonum maanin aidau, carronum yujas maanin aidau, nuigtu dawenum yujas maanin aidaujai ishitkauwai. Dutikam shimutuk kashi yaakat Dotárgan tenteawajui.

<sup>15</sup> Nunik batsatai kashikmas Eliseo inake nantaki agá jiinkama, suntag aidau caballonum, carronum aatus yaaktan tenteawag batsatun wainak tupikaki waya Eliseon chichajak:

“¿Jintinkagtinuh, yamaish iish wajukattaji?” tau.

<sup>16</sup> Tutai Eliseo niina ayaak:

“¡Ishamkagtukaipa! wagki jutijai batsata nunuwai ditajai batsata nuna nagkaesau aidau”, tiuwai.

<sup>17</sup> Aatus tusa Eliseo Apajuín segaak:

“¡Tuke Pujuuwah, wait aneasam amina senchigmin mina inakeg waintsu nunú yamai iwaintukta!” tiuwai. Tusa taig Tuke Pujuu niina suntaji caballo aidau, carro aidau nunú jii kegaujai betek nunú mujanum Eliseon tentea ijunun iwaintukui.

<sup>18</sup> Tuja suntag sirianmaya aidauk yaakat Eliseo pujamun jetektatus uminainai Eliseo Tuke Pujuu segaak:

“¡Au aents aina nunú wainmachujai betek emakta!” tiuwai. Tusa tima Tuke Pujuu imatiksag wainmachu emakui.

<sup>19</sup> Dutikamta Eliseo jiintuki ditan chichajak:

“Jintak juchauwai, wainka yujagme, tuja atum yaakat egajum dushakam juchauwai. Wi weakui minitajum, atum aents egajum nuwi ejegatjime”, tusa yajuak yaakat Samaria nugkanum ejegauwai.

<sup>20</sup> Dutika ejega Apajuín segaak:

“¡Tuke Pujuuwah, juju aents aina nunú yamai ataktu wainmitkakta!” tiuwai. Tusa tima Tuke Pujuu wainmitkakui, dutikam niimsatakama Samaria nugkanum batsatbaun wainkajui.

<sup>21</sup> Tuja Israel aents aidau apuji nunú aents aidau wainak, Eliseon iniak:

“¿Apawah, juju aents aidauwash kajegtatjak?” tau.

<sup>22</sup> Tutai Eliseo ayaak:

“¡Atsa kajegkaipa! Maaniamunum aents aidau achija yajuakbaukesh amek mauchume, nuadui duka tutsuk ¡yujumak ayujam dita apuji pujamunum awakjata!” tiuwai.

<sup>23</sup> Tusa timatai ¡iistan umikag, yujumkan shiig ayujawag, umutnash imatiksag ajamsag nuadui apu ditan kumpama ishiakui. Dutikam dita apujin waketjauwai. Duwi nagkamas Israel aents aidaujag maaniachaju ainawai.

*Samaria nugkanum nujan tepeamu*

<sup>24</sup> Nunú nagkaemakui ai, Siria nugkan apuji Ben-hadad niina suntaji aidaun ashí ijumag yajuak Samarian jetektatus weuwai. Nunik jegaa yaaktan tenteawajui.

<sup>25</sup> Dutikam epemi batsatu asagmatai, nunú tsawantin Samaria nugkanum nujan tepeauwai. Nuadui burro buuke akikeg ochenta plata najanamu aajakui. Untsu pauma iji jimaituk litro tumain yajamun akike cinco plata najanamu aajakui.

<sup>26</sup> Tuja makichik tsawantai Israel aents aidaun apuji yaakat peejamunum yakí nunigka wegaun makichik nuwa wainak untsuak:

“¡Apuh, minash yainkata!” tiuwai.

<sup>27</sup> Tusa tama nii ayaak:

“¿Tuke Pujukesh yaimpatsu nunash wisha itug yaigtgmeki? ¡Trigo amamainuk minak atsugtawai!

<sup>28</sup> ¿Wagka tuu wekaeme?” tau. Tama nii ayaak:

“Juju nuwa chichagtak, amina uchijum yamai yuwami, nunika kashin mina uchig yuwami tujutmae.

<sup>29</sup> Tujutmatai mina uchig maa, ukugkuutai aidau chimpijua inagka yuwamji. Tuja yamai aminu yuwami tai, niig uchijinak uuke”, tau.

<sup>30</sup> Nuna apu antuk kajeka, niina jáanchjin japiki ichigkui. Dutika yakí yaakat peejamunum wekagu asamtai, aents aidau diikma jáanch pegkegchaun nugkuaju wekagun wainkajui.

<sup>31</sup> Tuja nuwi wajas apu senchi untsamak:

“¡Yamaikiuch Eliseo Safatan uchijiya nuna buken tsupigkan maattajai! ¡Untsu dutikachmataig, Apajuí mina suwimkan sujusti!” tiuwai.

<sup>32</sup> Tuja Eliseok nii pujamunum Israel aentsu apuji múun aidaujai ijunak pujau. Nuniai apu niina aentsji aidaunmayan makichik Eliseon akuptukui. Tujash nunú eke jegatsaig, Eliseo Israel aentsu apuji múun aidaun chichajak:

“Au apu magkagtina nunú niina aentsjin mina buukjun tsupigtukti tusa awema nunú atumesh dekaatajum. Tujash antaku atajum. Nunú aents wayau wainkugmek waiti epentajum. Dutikajum nii wajamunmanini shitakjum emetuatajum. ¡Niina apuji ukunum patatkau minisa pampaun antajai!” tau.

<sup>33</sup> Tusa ditajai chichá wajaig, apu akupkamu tauwai. Nuniaig apushkam patatkau taa chichaak:

“¡Li waituinag nunak Tuke Pujuu aikagbau asamtai, nii yaimpakti tusanuk dakak pujumaitsujai!” tiuwai.

## 7

<sup>1</sup> Tusa tutai Eliseo niina ayaak:

“Tuke Pujuu chichaak: ‘Kashin yaakat Samarian waitijiya nuwi, yamai etsa eketa juniai, aents aidau makichik kuichik plata najanamuik siete kilo trigon sumagtatui, tuja cebadanashkam makichik kuichik plata najanamuik quince kilo sumagtatui’ tawai”, tiuwai.

<sup>2</sup> Tusa tutai apu atuwe niina ayaak:

“¡Tuke Pujuu nayaimpin ujaimtaish ame tame duka makichkish nunimaitsui!” tau. Tutai Eliseo ayaak:

“Nuna imatika sumaidauk ameshkam waintkattame. Tujash amek duka makichkish yuwashtatme”, tiuwai.

<sup>3</sup> Tusa chichainai cuatro aents jata lepran achiimaku aidau agá yaaktanun waitainum batsatu dita ditak pempeentunikiag chichainak:

“¿Lish juwish waji pujugji, nujantai jinaatag tusaika aní batsatag?”

<sup>4</sup> Yaakat wayaish, tuja juwig pekagkuish betek nujantai jinaattaji, wagki juju yaaktanmak yumainuk shiig atsawai. Dekas sirianmaya batsata nuwi shiyakagmi. Nunika dita wait anenjamainakuig, ditajai batsamsami. Untsu dita wait anenjamainachkug, mantamkush mantamatnume”, tuidau.

<sup>5</sup> Nuna tusag kintamainak juwakiag sirianmaya aidau aakmag batsatbaunum shiyakajui. Nunikag jegattak wesag diistag tukama makichik aentskesh atsaun wainkajui.

<sup>6</sup> Sirianmaya aents aidau nuwi batsatu pisajua nunak Tuke Pujuu carro aidanum, caballo aidanum, suntag maaniatatus shimuinamu kedegtuwama imatun antuktinme tibaub asag nuna antukag, Israel aents aidan apujimpap hitita aentsu apuji aidan, egiptunmaya aentsu apuji aidaujai jetekmi tusa minitjamainawa tusag,

<sup>7</sup> pisagtatus uminas batsatu asag, kashi pisainak dita aakjinak, caballoji aidanuk, burroji aidaujai, ashí batsainak, pisajajui.

<sup>8</sup> Nunik pisainak ukukbaunum lepran achiimaku jegawag aaknum wayawajui. Nunikag nuwiyay yutain yuwawag, umutnash uwajajui. Nunikag plata aidan, oro aidan, jáanch aidan, aatus yajuakag yaja uukajui. Dutika ukuinak tikich aaknum wayawag nuwiyaynashkam dutiksag waji aidan yajuakag yaja uukajui.

<sup>9</sup> Dutikawag ditak pempeentunikiag chichainak:

“Ii aikag duka pegkegchau dutikaji. Yamai tsawanta jujuwai pegkeg chicham, sirianmaya pisajaja nunú pachisa tikich Israel aents aina nunú ujamain. Dutikmain aig iik dutikatsji. Tuja kashin jegá etsegiinig ¿wagka wamak etsegkachugme? tusa iina kajegtamak suwimkam amamain ainawai. Nuadui dekas apui wemi, nunika sirianmaya aidauk pisajagmae tusa etsegkami”, tuidau.

<sup>10</sup> Aatus tusag waketug jegawag suntag yaakta kuitamin aidan untsuka chichajuinak:

“Sirianmaya aidau batsamtain wemaji, nunika jegá diikma makichkish atsume. Tuja makichik aents chichaukesh antukchamji. Ima caballo aidauk, carro aidaujai anaam batsaamae, tuja aak aakmagbau aidashkam nunisag batsaamae”, tiajui.

<sup>11</sup> Tusa tiagmatai, yaakta waitijin kuitamin aidau, apu pujusa inamtaijin kuitamin aidan untsukajui.

<sup>12</sup> Nuna apu dekaa, kiyaju aig nantaki, niina suntaji aidan chichajak:

“Jasta sirianmaya aidauh itugtamkatasag aninawa nuna ujaktajime. Aunak ii nujantai waituinag nuadui ikam uumja batsatjin nujantai jinuinak jiinaidau achigmi, dutika dita yaaktajin utsantuami, tusa aninawai”, tau.

<sup>13</sup> Tutai suntaja apuji chichaak:

“Dekas cinco caballo batsata nunú ame cinco aents etegkam susam ishiakta, dutika pujusa diismi wajukawagtig. Tuja dita iwaku waketuinakush, nuniashkush jinuinakush tikich Israel aents aidauti juwi batsatag nuna nagkaesauk achagtatui, tuja nuniachkush nuni wainkauchikesh achagtatui”, tiuwai.

<sup>14</sup> Tusa timatai ujumak suntag aidau jimag carron, caballo aidaujai jukiajui. Dutikawagmatai sirianmaya aidan batsamtaidi isa ukutajum, wagkag ankaje tusa ishiakui.

<sup>15</sup> Dutikam shiyakag diikma agkan wajas atatman wainkajui. Dutikawag pataetukag Jordán jegawajui. Tuja jintanmak jáanch aidauk, tikich waji aidaujai sirianmaya pisainak utsagbau tepetag weakun wainkajui. Nuna wainkag waketug jegawag, dita wainkamujinak imatiksag Israel aents aidau apujin ujakajui.

<sup>16</sup> Dutikawagmatai aents aidau shimutkag waji aidanuk ashí yajuakajui. Tuke Pujuu tibaunak imatiksag, waji sujín aidauk trigonak siete litron makichik kuichkijai yapajidau, tuja cebadanashkam quince litro sujak nunashkam dutiksag makichik kuichkijai yapajidau.

<sup>17</sup> Maniagtai apu niina atuwen yaakta waitijin kuitamkati tusa inajui. Tujash nuwiya aents aidau shiig kuashat utsaanaidau asag tepejuk maawajui. Nunak apu, profetajai chichastatus jegamtaí, profeta apun tibaunak imanisag jakauwai.

<sup>18</sup> Nuniktinun profeta Eliseo, Israel aents aidau apujin aatus tiuwai: “Yaakat Samaria nugkanum waitainum aents aidau siete litro tumainun harinan makichik kuichki sumagtatui. Tuja cebadanashkam quince litron makichik kuichki sumagtatui”, tiuwai.

<sup>19</sup> Tusa Eliseo tutai, apu awemamu suntaja apuji chichaak: “Tuke Pujuu nayaimpin ujaimtaish, duka makichkish imanimaitsui”, tutai, Eliseo ayaak: “Wi taja duka wainkattame, tujash amek duka yuwashatme”, tiuwa duka

<sup>20</sup> imanisag uminkauwai. Nuadui niinak Eliseo tiuwa nunak imatiksag yaakta waitijin kuitamak pujaun aents aidau utsaanainak tepegkam jakauwai.

## 13

*Eliseo jakattak pujusa inagnaku chicham etsegkamu*

<sup>14</sup> Eliseo shiig senchi jak tepau asamtaí, Israel aents aidan apuji Joás niina ijagsatatus wejiuwai. Nunik jegajua pagkuk buutak:

“¡Apawah! ¡Apawah! ¡Amek Israel aents aidanmak suntag maanin aidan nagkaesau ayume!” tiuwai.

<sup>15</sup> Tutai Eliseo niina chichajak:

“¡Flecha akentai, flechajai jukita!” tau. Tama nuna apu mai jukiuiwai.

<sup>16</sup> Dutikamtai Eliseo niina chichajak:

“¡Umintsata flecha akenkamnum!” tiuwai. Tusa tima uminai, Eliseo niina uwejen apu uwejen patainiuiwai,

<sup>17</sup> dutika chichajak:

“¡Niimtai najanamu etsa minitaiya nuni awa nunú ujaita!” tau. Tima apu ujainiuiwai. Dutikamtai Eliseo chichajak.

“¡Yamai flecha akenkata!” tau. Tama apu flechan akenkauwai, dutikamtai Eliseo senchi untsumak:

“¡Apajuíyai juju flechajai betek ayamkagtin! Nuadui ¡Apajuí yaimpasmatai sirianmaya aents aidau yaakat Afecnum depetkajum ashí ijinattagme!”, tiuwai.

<sup>18</sup> Tuja ataktu chichajak:

“¡Ataktushkam flecha jukita!” tiuwai. Tusa tima jukimtai, Eliseo chichajak:

“¡Anú flechayai nugka awatta!” tiuwai. Tama apu nunú flechayai kempatuma imania nugkan awatiuiwai.

<sup>19</sup> Dutikamtai Apajuí inake Eliseo niina kajejuk chichajak:

“Cinco imania dutikashkumesh seisa imania awatiuiwaitkumek, sirianmaya aidau depetkam ashí amumainaitme. Tujash kempatuma awatiu asam dutiksamak kempatuma imania depetkattame”, tiuwai.

<sup>20</sup> Nuna ashí tusa nuadui Eliseo jakauwai, nunikmatai ukusajui. Tuja maki makichik mijantin Moab aents kasa aidau Israel aents aidau nugken utuawag waitkaidau asagmatai,

<sup>21</sup> makichik tsawantai ujumak Israel aents aidau aents jakaun ukustatus nugka tagak batsatu. Nuna tagak batsatu diistakama, kasa aidau minidaun wainkag ishamak pisainak, aents jakau iyashin nagkimawag Eliseo ukusbaunum egkeawag ukukiajui. Dutika ukunaig nunú aents jakauwa duka Eliseo ukunchin antig aneantui, nunik jiinkiuwai.

## **Judá wegantu aidau apuji aidau takasagbau, Babilonia nugkanum achijag yajuakajua nujai pachisa augmattsamu**

### **18**

(18.1—25.26)

*Asirianmaya aidau yaakat Samarian tsaikagbau*

(2 Cr. 29.1-2)

<sup>9</sup> Elá uchiji Oseas Israel aents aidau apuji wajas siete mijan inamak pujai, Ezequíaschakam Judá wegantu aidau apuji wajas, ipak usumat mijan inamak pujau. Nunú tsawantin Asirian apuji Salmanasar niina suntaji aidaujai Samarian tenteawag jetekajui.

<sup>10</sup> Dutika maa maaninakua kempatum mijana duwi depetuk yaaktan utuawag dita atainiajui. Nunak apu Oseas inabaujin nueve mijan ejeyu ai, tuja apu Ezequíaschakam nii inabaujin seis mijan ejeyu ai, dutikau ainawai.

<sup>11</sup> Asiria nugkan apuji niina suntaji aidaujai Israel aents aidauak depetuk achija niina nugken asirianum yajuakui. Dutika Habor nugkanum yaakat Halah batsasui. Untsu tikich aidau Gozán nugkanum namak aajakua nuna yantamen batsasui. Tuja tikich aidauak medo aents aidau yaaktaji aidauak batsasui.

<sup>12</sup> Nunak dutikau ainawai, wagki Tuke Pujuu dita Apajuíyai yaunchuk ditajai chichaman umikua nuna umitsuk, tuja Tuke Pujun inake Moisés tibaunashkam betek umikchaju asantai, dutikau ainawai.

*Senaquerib Judá wegantu aidau jetekbau*

(2 Cr. 32.1-19; Is. 36.1-22)

<sup>13</sup> Apu Ezequías catorce mijan inamai Senaquerib Asirian apuji Judá wegantu aidau yaaktaji peejamu aidau jetekag depetuk utsantuawag nii atainiuiwai.

<sup>14</sup> Dutikamtai Judá wegantu aidau apuji Ezequías, Asirian apuji Senaquerib yaakat Laquishnum pujaun chichaman akuptak aatus tiuwai: “Wi dewakjai, nuniku asan ame jijnbaunum wajupa akigkati tujutpa nunak imatiksasuk akiktajame. ¡Mina nugkajui pujam duka amina suntajum aidaujai jiinkim wetá!” tiuwai.

Tusa tima Asirian apuji ayu tusa Ezequíasan nueve mil novecientos kilo platan segauwai, dutikak nuigtushkam novecientos noventa kilo oro akigkata, tiuwai.

<sup>15</sup> Tusa timatai Ezequías ayu tusa, jega Apajuí emematku ijuntai jegamkamunum ayaunak, apu pujusa inamtai aidaunum waji akik ayaujai nagkamas ashí yajuak susauwai.

<sup>16</sup> Dutikak nunú tsawantinig Ezequías jega Apajuí emematku ijuntai jegamkamu waitiji aidaun, tuja waiti nujamkatin aidaulai nii najanak, oro ukatkamú aidaunashkam ukuinag oron yajuak Asiria nugka apujin Senaqueripan susauwai.

<sup>17</sup> Dutika pujai Asiria nugka apuji yaakat Laquishnum pujus suntaja apujin, tikich niina atuwe kajittsa diitain, tuja tikichin suntaja apujin suntag aidaulai aatus apu Ezequíasan jetektinme tusa Jerusalén ishitkauwai. Dutika ishiakam Jerusalén jegawag, entsa pukuni jiinu Guihón tutai saekitin taimua nuna yantamen yumi piyajunum, aents aidaui jáanchin dijajag pegkeg emau aina nuwi anutug batsamsajui.

<sup>18</sup> Nuwi batsamsag apu Ezequíasan untukajui jiinkiti tusa. Tujash niig jiinkichui, ayatak niina aentsji aidaun kampatum ishiakui ditajai igkunikti tusa. Nuna daajig juju ainawai:

Eliaquim Hilquíasa uchiji apu pujusa inamtain waji ayaun kuitamin, untsu Sebná, Asaf aajakua nuna uchiji Joahjai papiin agau aajakui.

<sup>19</sup> Dutikam jegawagmatai, asirianmaya suntag apu aidaui ditan chichajuinak:

“Iina apuji Senaquirib Asiria apujiya nunú Ezequíasan chichama akupta nunú jegajum ujaktajum. Niig juna aatus tawai:

“¿Amesh yayai emesh anenmame?

<sup>20</sup> ¿Chicham pegkejuch chichamua duka, maanitan yacha senchi shiig maanimaina nujaig betekchawai! ¿Amesh ya yainkati tusamea wijai shiwagbaeme?

<sup>21</sup> Ame anentaimsamek, egiptunmaya aidaui yainkagtatui tau diyagme. Nunú takumesh duka wainka titatme, wagki auk egiptunmaya aidaui tagkan chipaju achika shutukmatku besemaina iman ainawai. Iman asag, Egipto apujiya duka niyai kajinas anentaimaidaunak senchi waitkawai.

<sup>22</sup> Tuja ame chichaakum:

“¿Tuke Pujuu Apajuí ii emematin ainag nunú iinak yaimpaktatui! tumainaitme. Nunú tumainaitkumesh ¿wagka tujash Apajuí emematku kuntin maa patasa apetai najankamu aidaui tsaika utsagmesh: ¡Ima Jerusalégnamak kaunajum ememattajum! tusamesh timayume?

<sup>23</sup> Nunú tuu anentaimtsuk dekas apu Senaquiribjai chicham umikta. Dutikawamin aents caballonum entsamak maanitan yacha aidaui egakaminig, wi dos mil caballon amastajai.

<sup>24</sup> Nuna amasmataish, amek asirianmaya suntag aidaui kakakchau aina dukesh uwakamek tupikantikmaitsume. Nuninaitkum amek egiptunmaya caballonum maanitan yacha aidaui ikamkatag tame.

<sup>25</sup> Tuja nuigtush amek Tuke Pujuu jetektajum tichamaitak jetepaktatus kaunacheash tumaitsume. ¡Minak Tuke Pujuu atumin jeteka ijinata, tusa tujutne!‘ tusajum Ezequías ujaktajum”, tiuwai.

<sup>26</sup> Tusa chicham akupkamun antukag Eliaquim, Sebná, Joah aatus nunú suntag asirianmaya chichama itaun chichajuinak:

“¿Wait aneam hebreo chichamaik aukagtusaipa, yaakat peejamunum yaki waka yuja nunú antuinawai! ¿Dekas arameo chichamai aukagtusta, wagki iik arameo chichamak antaji!” tiajui.

<sup>27</sup> Tusa tiagtai suntag asirianmaya ditan ayaak:

“Asirianmaya apuk ima atumi apuji Ezequíasnakek, tuja atumnakek chichamnak akuptugmakchame. Ashí aents aidaui yaakat peejamunum waka batsata nunú antuktinme timae, wagki dita aidaui atumjai betek yumain, umumain atsujuinam dita ijin yuwinak, shikiin umiagtatui”, tiuwai.

<sup>28</sup> Tusa tutai makichik suntaja apuji nuwi wajau senchi untsamak hebreo chichamai chichaak:

“Anú tikich apu aidaun nagkaesau apu asirianmaya chichaman akupka nunú, antugkatajum:

<sup>29</sup> ¿Ezequías tsanugma nunú wainka antuju yujaigpa, nigka makichkish mina depetukag ayamjutpamaitui!’

<sup>30</sup> Tuja Ezequíasak atumin tsanugmainak, Tuke Pujuu yaimpaktatui, tuja Tuke Pujuu asirianmaya aidaui juju yaaktan tsaikti tusag idaisashtatui tujamui.

<sup>31</sup> Tusa tujama duka antugkaigpa. Asiria apuji mina atumi ujakti tusa akaatak:

“¿Intimtsuk wijai chicham epegkeajum mina inataig atajum, nunika shiig batsamsajum maki makichkitijum nii ajakmamunmayan uvan, higo aidaun aatus yuwawagtaui, tuja yuminashkam dita taimunmayan uwajagtatui!

<sup>32</sup> Duwi pujus tikich nugkanum trigo aidau, uva aidau, pag najana yumain aidau, vino najana umumain, olivo aceiteji aidau, dapa yumiji aidau aatus atumi nugkeen ayá nujai betek ayá nuwi jujamki ejetamawagtatui. Dutijamawagmatai nuwi jinutsuk shiig batsamsatnaitjume. Nuadui Ezequíasak antugkaigpajum, wagki nigka atumi tsanugmak ¡Tuke Pujuu ayamjutpak agkanmitkagmattawai! tujamui.

<sup>33</sup> Nijah, atumesh anentaimsatatum, tikich aents aidau apajuímtaiji aina dusha ¿asirianmaya apun depetkash niina aentsji aidaunash ayamjukukait?

<sup>34</sup> ¿Hamatnumia aents aidaun apajuji, arpadnumia aents aidaun apajuji, sefaramnumia aidaun apajuji, yaakat Henánmaya aidaun apajuji, Ivánmaya aidaun apajuji aatus aajaku aina dusha asirianmaya aidaun depetkash samarianmaya aidaunash ayamjukukait?

<sup>35</sup> Tuja wi adaijag nuwiyash tuu nugkanmaya aidaun apajujiya asirianmaya aidaun ¿depetkash niina aentsji aidaunash ayamjukuita? Nunú dekau asajum, Jerusalégnunia aidautinak Tuke Pujuu yaimpak uwentijamjattawai tumaitsugme”, tiuwai.

<sup>36</sup> Tusa tutai aents aidau yaakat Jerusalén peejamunum yaki waka pekajuk itatug makichkish aimkachajui, wagki apu Ezequías ditan chichajak, makichkish aikaigpajum tibau asa.

<sup>37</sup> Nuna antukag Eliaquim, apu pujusa inamtaijin waji ayaun kuitamin aajakua nunú, Sebná, Joahjai papiin agajakua nunú aatus kajekag jáanchjin japiki ichigkajui. Nunikag asirianmaya suntajan apuji chichakbaun Ezequísan ujaktatus shiyakajui.

## 19

### *Judá wegantu aidau Senaquerib waitkam batsatun agkanmitkamu*

(2 Cr. 32.20-23; Is. 37.1-38)

<sup>1</sup> Nuna apu Ezequías dekaa jáanchjin japiki ichigka, wake besemag dekapeak jáanch pegkegchaun nugkuja, Tuke Pujuuai chichastatus jega Apajuí emematku ijuntainum weuwai.

<sup>2</sup> Nunik Apajuíjai chichasa ukuak, nii pujusa inamtaijin kuitamin Eliaquim aajakua nuna, tuja papii agagbau aidaun kuitamin Sebná, papiin agajakua nuna, nuigtu sacerdote eme anentsa diitai aidaun aatus, jáanch pegkegchau wake besemag pujaku nugkutai aidaun anugkug, profeta Isaías Amosa uchiji aajakua nujai chichastajum tusa ishiakui.

<sup>3</sup> Dutika ishimak aatus chichaman akuptukui:

“Nuwa uchigmaktinji jegagmaitak kakaumainchau dekapeak uchin uchigmamainchauwa numamtuk, yamai suwimak juki waituinaku kakaja ayamjumamainchau dekapeajin dushiktamainakui, datsaama batsatji.

<sup>4</sup> Tuja Tuke Pujuuun pegkegchaun chichagkati tusa apu asirianmaya niina suntaji aidau apujin akupkamu juwi taa, Apajuí Tuke Pujuuwa nuna pegkegchaun chichaja nuna, itusag Tuke Pujuu amina Apajuíjum antujuk suwimkan susa tajai. ¡Nuadui Israel aents aidau ujumak juwag batsata nunú pachisam Apajuí ausata! tujamui apu Ezequías titajum”, tiuwai.

<sup>5</sup> Tusa akatjam apu Ezequías atuwe aidau Isaíasjai chichastatus shiyakajui.

<sup>6</sup> Nunik jegawag Isaíasan ujakajui. Dutikam Isaías ditan chichajak:

“Tuke Pujuuun juna aatus tawai: ‘¡Nunú suntaja apuji asirianmaya mina pegkegchaun chichagtuka nunak ishamkainmegka!

<sup>7</sup> Wi niinak utugchatan antuk, ishamak niina nugken wakitkiti titatjai. Nunikmatai nuwiya aents aidau niinak maawagtatui’, tawai Apajuí timae tusajum apu Ezequías ujaktajum”, tiuwai.

<sup>8</sup> Tuja nunú asirianmaya suntaja apuji Apajuíun pegkegchaun chichagkauwa dushakam apu Senaqueripak niina suntaji aidaujai yaakat Laquishnum batsatu jijnag shiyakaje tabaun antukui. Nunik Jerusalén pujau niishkam weuwai. Nunik wekama apu niina suntaji aidaujai yaakat Libnán jetenamunum jegauwai.

<sup>9</sup> Nuna jetenak yujasag, apu Tirhaca Etiopianmayaya nunú Judá wegantu aidaun atuinak ataktu amejai maaniatatus niina suntaji aidaujai minitjamainawai, tusa tabaun Senaquerib antukui.

Nunik niina suntaji aidaun ataktushkam apu Ezequíasan ishitkauwai.

<sup>10</sup> Dutika ishimak aatus akatmamtujuji: “Ame chichaakum: ‘Wi Apajuíun emematnaitag nunú minak yainkattawai’, tame nunú Jerusalégkan tsaikai tusa dakitau asamtai, Jerusalégkak iinuk achattawai. Tujash aneaku ata nunú Apajuí wainak tsanupajai.

<sup>11</sup> Tuja asirianmaya apu aidau, tikich nugka múun aidaun tsaikaju aina nunú amek shiig dekame. Nuadui amek makichkish ayamjumakchattame.

<sup>12</sup> Mina muuntug aajaku aina nunú yaakat Gozán, Harán, Résef, Telasar aajaku aina nuna ashí tsaiku ainawai. Imatikiagtaish ditá apajuúmtai aidaukesh makichkish ayamjukchauwai.

<sup>13</sup> ¡Tuja yaakat Hamat, Arpad, Sefarvaim, Hená, Ivá aajaku aina nuna apuji aidounashkam ashí ijinawaju ainawai!” tiuwai.

<sup>14</sup> Tusa, papii agaja akupkamun Ezequías juki ausauwai. Nunik jega Apajuí emematku ijuntainum weuwai. Nuwi waya Tuke Pujuu emtin nunú papii agagbaun aepes,

<sup>15</sup> Tuke Pujuun aujak: “Tuke Pujuu, Israel aents aidau Apajuújiyah, amina pujusa inamtaigmek querubin batsatbaunum awai, ameketme ashí apu nugkaya aina nuna Apujimek. Tuja ametme nugka nayaimpijai najanaumek.

<sup>16</sup> ¡Tuke Pujuuwah, shiig jitusa antukta, nuniakum diyaku ata. Senaquerib mina chichama akuptujak, amina pachipas pegkegchaun chichagtamka nunú shiig antukta!

<sup>17</sup> ¡Tuke Pujuuwah, asirianmaya aidau tikich nugkanmayan tsaiku aina duka dekaske!

<sup>18</sup> Dutikainak nunú aents aidau apajuúmtaiji aidounashkam jinum apejuk utsankau ainawai. Tujash duka dekas Apajuúchu wainka aents dakumka numi, kaya najanamu aajaku ainawai. Nuadui nunak aepa ajapau ainawai.

<sup>19</sup> Tujash ametme Tuke Pujuu iina Apajuújimek, nuadui wait aneasam yamai dita iina waitkagmaina nunú ayamkagtukta. ¡Ame ayamkagtukamin, ashí nugkanmaya aidoush dekas Tuke Pujuu ima ameketam nuna ditashkam dekaatnume!” tiuwai apu Ezequías.

<sup>20</sup> Duwi pujus profeta Isaías Ezequíasan chichaman akuptak: “Tuke Pujuu Israel aents aidoun Apajuúji chichaak: ‘Ame Asirian apuji Senaquerib pachisam segatmaum nunak antugkajame’ tujamui”, tiuwai.

<sup>21</sup> Tuja yamai Apajuú Senaqueripan pachis juna aatus tawai:

“Senaqueripah,  
Jerusalégkak nuwauchijai betek  
amina dakitjamak dushiktamui.  
Jerusalégnunia aidauk  
ame waketmin dushiktamainak buuken pegainawai.

<sup>22</sup> ¿Amesh yanas dushikiakun  
pegkegchaun chichagja tame?  
¡Amek mina pegkegchau chichagtakum  
eme emematjai chichá wekaeme!  
¡Amek Israel aents aidoun ememattai  
Apajuú pegkegma nunú  
pegkegchau chichagkaume!

<sup>23</sup> Tuke Pujuun pegkegchau chichagkatnume  
tusam amina aentsjum chichama etsejin aidau  
akatja ishiakume.

“Tuja ame chichaakum:  
‘Mina carrog maanitai aidau  
shiig kuashat ayá duwi,  
egkemjan muja titiji aidounum wakajai,  
tuja muja Libanonum yakí wakan,  
nuwiya setug shiig esajam aidoun tsupigjai.  
Tuja muja shiig múun aina  
nuna ikamji aidau yagkug  
ajakbaujai betek aidounmashkam wakajai tame.

<sup>24</sup> Tuja tikichi nugke aidounmash  
yumígmatan tain nuwiyan yumin uwagmajai,  
dutikakun egiptunmaya  
namaknashkam dajajan ukuyakbaijai’, tame.

<sup>25</sup> Tujash duka wi nunikti  
tibau asantai, dutikauwaitme.  
Nuadui amek dekas Apajuúyap aikawa tumainaitme.  
Wi nunak yaunchuk emtikan nuna dutikatjai tusan  
anentaimtugbaujun yamai umikjai.  
Ame yaakat peejamu aidau tsayam duka  
nunú uminkui dutikame.  
Dutika tsaikbau asag kaya aidau,  
numi aidau tuwasua weakui.

<sup>26</sup> Nunú yaakat aidaunum  
 aents batsamajaku aina duka,  
 kakaag ayamjumamainchau aajaku ainawai,  
 sapig, datsan wajasu aidau,  
 dupa ajanum aiyama numamtin,  
 tuja chijichig yama tsapaku  
 samekbauwama numamtin,  
 tuja chijichig jega tuntupen tsapakun  
 dase etsa minitaiya nuwiya  
 dasentak umpuim jinuwama  
 numamtuk aidau asamtai, duka ijinawaitme.  
<sup>27</sup> Wika ame tuwi wekaeme nunak shiig wainjame,  
 ame waji dutikame nunashkam ashí wainjai,  
 ame mina senchi kajegtukum nunashkam dekaikai.  
<sup>28</sup> Amek kajen wajasu,  
 emebau wajasuitam nunashkam dekaikai,  
 nuadui makichik tsajam uwegnum patakumtain  
 amina dujimin tigkaan detuattagme,  
 tuja nuigtushkam chichakaim tusan  
 wenimin jigkatuattagme,  
 dutikan ame itug taamume  
 duke awagkittagme,  
 tawai Apajui Senaqueripan",  
 tusa Isaías Ezequíasan tiuwai.

<sup>29</sup> Tusa ataktushkam Ezequíasan chichajak:  
 "Juju mijantin tuja tikich mijantinchakam,  
 trigo aidau ajaachmaitak,  
 tsapaka nejektata nuna neje yuwattame.  
 Untsu mijan kempatuma duwi  
 atum ajakmajum nejekmatai juuttagme,  
 tuja uva ajakjum nunú nejekmatai yuwattagme.  
<sup>30</sup> Tuja Judá wegantunmaya jinachu aina duka  
 waji ajakaitkuish, kagkopenawag nejeawagtatui.  
<sup>31</sup> Jerusalégnunia aidauk  
 nujantaik ashí jinachagtatui,  
 ujumak aents iwaku batsamtatui.  
 Tuke Pujuu nunak dutikattawai  
 wagki nii senchi aneau asa.  
 Juju ashí betek uminkui dekaattagme,  
 dekas Tuke Pujuuwap yaimpawa tusajum", tiuwai.

<sup>32</sup> Nuigtushkam Isaías Ezequíasan chichajak:  
 "Asirianmaya apun pachis  
 Tuke Pujuu juna tawai:  
 'Asirianmaya apuk Jerusalégnak utuashtatui.  
 Tuja makichik flechanakesh aketkashatui.  
 Ejamaka maanitai aidaun ejamakash jetekchattawai.  
 Tuja yaakat peejamua nunak  
 pinikmatjagkesh utuachagtatui.  
<sup>33</sup> Untsu Jerusalégnumash niish  
 itug taamki nunak nunisag waketjumkittawai.  
 Juju yaaktanmak makichkish wayashtatui.  
 Witjai Tuke Pujunuk, nunak dekas nuniktinun tajai.  
<sup>34</sup> Wika wiki anenmamsan,  
 nuigtush David mina inakeg aajakua nunú  
 mina chichamjun shiig umigtuku asamtai,  
 niina aneau asan juju yaaktanak wi kuitamkattajai,  
 dutikakun ayamjuktatjai'  
 tusa Apajui tawai", tiuwai Isaías.



<sup>35</sup> Tuja nunú kashi aajakua duwik, Apajuí ángel tumain nayaimpinmaya taa ciento ochenta y cinco mil suntag asirianmaya aidaun ijinauwai. Dutikamu asa kashinia duwi aents jinawk tuwasua weaku aajakui.

<sup>36</sup> Dutika ijituam Senaquerib niina nugken wakitki yaakat Nínivenum pujusui.

<sup>37</sup> Nunik pujus makichik tsawantai niina apajuíji Nisroc tutain emematak pujai, uchiji aidau Adramélec Sarézerjai jegajuawag apajin maawajui, dutikawag ukuinak tupikakiag Ararat nugkanum wegajui. Dutika maawagmatai, niina tikich uchiji Esarhadón aajakua nunú apu wajasui.

## 22

*Josías Judá wegantu aidaun apuji wajas inamjamu*  
(2 Cr. 34.1-2)

<sup>1</sup> Josíasak ocho mijan ajamu apu wajasui. Nunik apu wajas Jerusalégnum pujus treinta mijan ejeyi, nuigtu machik mijan inamjauwai. Niina dukujig Adeías yaakat Boscatnumia aajakua nuna nawanji Jedidá aajakui.

<sup>2</sup> Tuja Josías takatjig Tuke Pujuu diismak shiig pegkeg aajakui. Niig nii wakegamun takatsuk, niina apachji Davita pujutji pegkeg aajakua nuna ainjauwai.

*Chicham umiktin agagbau aajakua nunú egketu wainkamu*  
(2 Cr. 34.8-33)

<sup>3</sup> Josías apu wajasa dieciocho mijan ejeyi pujus, Asalías aajakua nuna uchiji Mesulama tijaji Safán papiin agau aajakua nuna, jega Apajuí emematku ijuntainum weme sacerdotejai chichasta tusa awemauwai. Dutika awemak:

<sup>4</sup> “Weme sacerdote Hilquías wi taja nunú ujakta: ‘Israel aents aidau Tuke Pujuum anentag suwinak Apajuí emematku ijuntainum kuichkin ejegawagmatai, Leví wegantu waitin kuitamin aidau jukiag utsaawajua nuna yajuak ijumjatnume.

<sup>5</sup> Dutikawag jega Apajuí emematku ijuntaya nuna iwajiagtai yujajus diin aidaun susatnume. Dutikawajam nunú kuichkia duwi nuna iwajuinak takaidaun akiktinme.

<sup>6</sup> Nunak numi tsupija jegamtan yacha aidaun, jega shiig jegamnakti tusa chichamjin aidaun, jega jegamin aidaun aatus akiktinme. Tuja nunú kuichki numi sumankattawai, dutikaku kaya aidaushkam sumankati.

<sup>7</sup> Nuna kuichkin susajashkam wajuk akikmajugme tusagkesh iniaschagtatui, wagki ditak wainkagkesh takachu, shiig anentaimkau ainawai’ timae tusam ujakta”, tiuwai.

<sup>8</sup> Tusa ujakam chicham umiktin agagbaun jega Apajuí emematku ijuntai aajakua nuwi aun wainkajai tusa, Hilquías sumo sacerdote aajakua nunú Safánkan ujaku.

Dutika ujaka nuna juki susauwai, dutikam Safán juki asauwai.

<sup>9</sup> Dutika aujus nuna pachis apu ujaktatus weuwai. Nunik jegá ujaak:

“Jega Apajuí emematku ijuntainum plata ayaunak amina inakem ukuiyag umikaje. Dutikawag jega takaidaun susagmae”, tiuwai.

<sup>10</sup> Tusa nuigtushkam, sacerdote Hilquías chicham umiktin agagbaun sujusmae tusa apu Josíasan ujaku. Dutika niina aujtusui.

<sup>11</sup> Nunú aujtusam antuk, wake besemag dekapeak jáanchjin japiki ichigkui.

<sup>12</sup> Nuniamuik wamkes profeta Hilquíasan, Ahicam Safánka uchiji aajakua nuna, Acbor Micaías uchiji aajakua nuna, Safán apu takamun agajakua nuna, Asalías suntaja apuji apu kuitamajakua nuna aatus inag ishimak:

<sup>13</sup> “Wetajum nunikjum mina pachittajum, aents aidau pachisjum, ashí aents Judá wegantu aina nunú pachisjum, tuja chicham agagbau wainnaka nunú pachisjumshakam Tuke Pujuu iniastajum. Iina muunji aajaku aina nunú juju agagbaunum chichá nuna betek umikchaju aina duwis Tuke Pujuu iinak kajegtamkatai”, tiuwai.

<sup>14</sup> Tusa tima Hilquías, Ahicam, Acbor, Safán, Asalías, aatus Ticván uchiji Harhásan tijaji Salum aajakua nuna nuwe Huldá daagtin profeta aajakua nujai chichastatus shiyakajui. Salumak jega Apajuí emematku ijuntainum jáanch aidaun kuitamajakui. Untsu Huldá pujujaku Jerusalemén, tujash yaakta ejapeenig pujujachchawai tikich yantannum pujujaku. Nuna jegajuawag niijai chichasajui.

<sup>15</sup> Dutikam nii ayaak: “Tuke Pujuu, Israel aents aidauti Apajuíji juna aatus tawai: Mina inintsatnume tusa atumin awetami nunú ujakta:

<sup>16</sup> ‘Wi Israel aents aidau Apajuíjin tajai: Chicham uminkatnun Moisés agajua nuwi wajintu chichawa nuna apu Josías antuka dutiksanuk, juju aents Jerusalégnumia aidaunak suwimkan susattajai. Dutikakun yaaktajinashkam tsaigkattajai.

<sup>17</sup> Wagki dita aidauk mina kajimatjukiag pegkegchaun takainak, wainka apajuimtai aina nuna emematuinak, kugkuin incienson apenak shiig senchi kajemtjiunawai.

Nuadui juju nugkanmaya aina nunak shiig senchi kajegkau asan, aní batsamtinme tusanuk idaisashtajai. Ditanak tuke suwimkan susagtajai.<sup>7</sup>

<sup>18</sup> Dutikatin asamtai Judá wegantu aidaun apuji Tuke Pujuu iniasa dekatajum tusa atumin awetamijaja nunú ujaakum: Tuke Pujuu Apajuín Israel aents aidau emematin aina nunú junashkam chichagtamak:

“ ‘Wi juju yaaktanak tsaiikatjai, tuja nuwiya aents aidaunashkam pegkegchaunum yumigjattajai, tija nunú antukam minai yunumkaume.

<sup>19</sup> Tikich Israel aents aidau pegkegchaun takamsaju asamtai, wake besemag deka-peakum jáanchjum ichigkume. Tuja nunú aentainsam buutam nunashkam wainjame.

<sup>20</sup> Nuadui aminak shiig agkan pegkegnum jakati, nunik niina muunji aajaku aidaujai ijunjati tusan titatjame. Tuja amek wi nunú aents aidaun suwimka suwakun itugkattaja duka makichkish wainkashatme’, tujamui Tuke Pujuu tita”, tiuwai.

Tusa tima nunú aents aidauk nuna pachis apu Josíasan ujaktatus wakettajuwai.

## 23

<sup>1</sup> Nunik jegawag apu Josíasan ujakajui. Tusa ujakam Judá wegantu apuji múun aidaun nijai Jerusalégnun ijunjatneme tusa untsukui.

<sup>2</sup> Dutika untsuka, ashí Judá wegantu aidau, Jerusalégnunia aidau, sacerdote aidau, profeta aidau, ashí aents aidau, ujunauchinum nagkamas aents eme anentsa diitai aidau aatus jega Apajuí emematku ijuntainum shiyakag ijunjajui. Nunikagmatai, chicham umiktinun Apajuí Israel aents aidaun susauwa nuna jega Apajuí emematku ijuntainum aun Hilquías jukiwa dusha wajintuk agagbau ayi nuna imatiksag ashí ausauwai.

<sup>3</sup> Nuna ashí aujus, apu Josías jega jegamku ajiamunum ayaumas wajasu. Nunik wajas, dekask Tuke Pujuu daajin juju chicham umiktinun Moisés agajua duka ashí imatiksaik umikagmi tusa tiuwai. Tusa tutai ashí aents aidauk, ayu duke ati tiajui.

*Apajuí umigkatnun pachis apu Josías ataktu chichaman umikbau  
(2 Cr. 34.3-7)*

<sup>4</sup> Apu Josías sumo sacerdote Hilquíasan tikich sacerdote aidaujai, nuigtu waiti kuitamin aidaun, aatus jega Apajuí emematku ijuntainum wainka apajuímtai aidau, Baal, Asherá, nuigtu yaya aidau aatus dakumja najanamu ayá nunú emematku takatai aidaun ashí jigtajum tiuwai. Tusa tijam shiyakag ashí jujajui. Dutikawagmatai apu Josías apeatajum tusa tima Jerusalégka ukukiag entsa Cedrón tutaya nuna yantamen apeawajui. Dutikawag yuku wajasmatai nuna jukiag yaakat Betelnum ejegawajui.

<sup>5</sup> Tuja wainka apajuímtai Baal, etsa, nantu, yaya aidau nayaimpinum ayá nunú dakumkamua aidaun, nainnum jega jegamjag Apajuí emematji tusag kugkuin incienson apeatin aidaun yaunchuk Judá apuji aajaku aidau sacerdote aidaun adajiau aina nuna Josías ashí ijumag chichajak:

“Atumek yamaik sacerdotek achattajume, tuja nuigtush inciensos apeashtatjume”, tiuwai.

<sup>6</sup> Nuna tusa nuigtushkam, wainka apajuímtai Asherá dakumka najanamu jega Apajuí emematku ijuntainum aun juki Jerusalégkan ukumtiki entsa Cedrón tutai yantamen ejegawag apeawajui. Dutikawag yuku wajasun jukiag dita ukumataijin egkeawag ukukiajui.

<sup>7</sup> Tuja jega Apajuí emematku ijuntai aajakua nuwi batsamas, nuwa aidau dita apajuímtajui Asherá dakumka najanamu anugjatnun jáanchin apajaku aina nuwi mai aishmagkuk pegkegchaun takanijaku aina nunashkam tsaijuk utsankauwai.

<sup>8</sup> Nuna dutika Judá wegantu aidau yaaktajin sacerdote batsata nunú ashí kaunati tiuwai. Tusa tima kaunamtai, dita yaunchuk nain aidaunum kugkuin incienson apejaku aina nunak Guebanum nagkamas yaakat Bershebaya aatus ashí utsagkui. Tuja wakan pegkegchau aidau emematku kuntin maa patasa apetai Josué yaakta apuji aajakua nuna waitiji yaakat wayamunum mena nuni aajaku aina nunashkam ashí tsaiagakawai.

<sup>9</sup> Tujash nunú sacerdote wainka apajuímtai aidaun mujanum emematujaku aina duka, Apajuí jee jegamkamua Jerusalén aajakua nuwig wetsuk batsamas, dita kumpaji tikich sacerdote aidaujai ijunag pag lewadurajai pachimtsuk inajuanun yujaku ainawai.

<sup>10</sup> Tuja nuigtushkam muja najatamu wake Ben-hinom tutaunum wainka apajuímtai Moloc dakumkamua nunú tsaika ukuutajum, nuna emematuinak dita uchiji aishmagkun, dutikachkush nawanjinakesh maa apeawainum tusa aentsun ishiakui.

<sup>11</sup> Tuja yaunchuk eke Josías apu weatsaig, Judá apuji aajakajua nunú, etsan emematuinak caballon najatuamu jega Apajuí emematku ijuntainum nuna waitaijin ijus, suntaja apuji Natán-melekan kanutaiji aajakua nuna yantamen atatman nunashkam

tsaigkauwai. Dutikak dita apajuímtaiji etsa aajakua nuna carroji tusa najankamu aidaunashkam apea utsankauwai.

<sup>12</sup> Tuja apu Ahaz inamtai jegamkamunum niina kanutaijin tikich tesaamu ijuntai aajakua nuna tuntupen Judá wegantu aidaun apuji aidau kuntin maa patasa apeatnun altaran najanawajua nunashkam tsaigkauwai. Dutikak nuigtushkam Apajuí emematku ijuntainum nuna agájin kuntin maa patasa apeatnun altaran apu Manasés najanawua nunashkam tsaijuk yukuu wajasmatai, jukiag entsa Cedrógnum ukaja ajapawajui.

<sup>13</sup> Tuja Olivo nain tutai Jerusalégjai niniaku awa nuwi tsumujinini yaakat Sidógnunia aents aidaun apajuímtai Astarté aajakua nuna, Moab aents aidaun apajuímtai Quemós aajakua nuna, nuigtu amonita aents aidaun apajuímtai Milcom aajakua nuna aatus Salomón Israel aents aidaun apuji najanak umikua nunashkam apu Josías tsaika utsagkui.

<sup>14</sup> Tuja kaya aidau, numi aidau aatus dita apajuímtaiji dakumka najanamu aajaku aina nunashkam ashí tsaigkauwai. Dutika atak waketjukiag tikich wainka apajuímtai aidaun nuwi najanawainum tusa nunú tsaikebau aidaunum aentsu ukunchi aidaun ijumag ukukiajui.

<sup>15</sup> Nuna dutika ukuak, yaunchuk Nabatan uchiji Jeroboam, Betelnum wainka apajuímtai ememattinun umikmatai, nuna Israel aents aidaun emematmikak tunamitkajua nunashkam tsaika yuku awajus jinum apeauwai. Tuja tikich wainka apajuímtai Asherá dakumka najanamu aajakua nunashkam apu Josías apeauwai.

<sup>16</sup> Nuna dutika ayampas ashí niimkama, nuna mujajin ukumasbau ayaun wainak, nijai yujaun chichajak: “Au ukumasbau aina nuwiya ukunchi jiija yajuakjum utitajum” tusa ishiakui. Tusa tima ukunchin yajuak ikaunmawagmatai, kuntin patasa apetai najanamu Betelnum aunun nuwi patai Josías apeauwai. Duka Apajuí chichamen etsejin profeta nuna pachis etsegkauwa imanisag uminkauwai.

<sup>17</sup> Nuna dutika chichaak:

“¿Aush waji dakumka najanamuita?” tau. Tutai, betelnumia aents aidau ainak: “Ame yamai betelnumia aents aidau dita apajuímtaiji aidaun emematuinak, kuntinun pataidiag apen aina nunú tsaigkaun dutikatnun, chichama etsegkatatus Judánmaya tauwa nunú jakamtai ukusbauwai”, tiajui.

<sup>18</sup> Tusa tiagmatai Josías chichaak:

“¡Auk aantsag asati! ¡Ukunchig achikaigpajum!” tiuwai. Tusa timatai profeta chichama etsejin Judánmaya aajakua nuna ukunchinak samarianmaya profeta chichama etsejin aajakun ukunchijai mai dutiksag idaisajui.

<sup>19</sup> Tuja Israel aents aidau apuji aajakajua nunú wainka apajuímtai aidaun Samaria nugkanum jegamjuijagmatai, Apajuí senchi kajegkauwa nunashkam, Betelnum tsaikeu aina dutiksag Josíaschakam niina aentsji aidaujai ashí tsaigkajui.

<sup>20</sup> Nuna dutika pujus sacerdote wainka apajuímtain emematin aidau nuwi batsatunak altarnum patai kajegkui. Dutika aentsu ukunchi aidaun yajuakag nunú altarnum sacerdote kajegbau aidaujai ashí patag apeauwai. Dutika ukuak apu Josías Jerusalén wakitkiuwai.

#### *Josías Paskuan Jiistamamu*

(2 Cr. 35.1-19)

<sup>21</sup> Makichik tsawantai Apu Josías ashí aents aidaun chichajak: “¡Yaunchuk Apajuí chichame agagbaunum Tuke Pujuu, atumi Apajuíjum emematkujum Pascua jiistamatum tibauwa nunú umiakjum jiistamatum!” tiuwai.

<sup>22</sup> Tusa tiajam yaunchuk Israel aentsu apuji chichama epegkin aidau\* batsamajaku aina duikish imatikhtain, tuja Israel aents aidau apuji, Judá weantu aidau apuji” aatus aajaku aina duikish imatika jiistamajakchamun, nunú tsawantin shiig jiistamawaju ainawai.

<sup>23</sup> Nunak Josías apu ekemi dieciocho mijan takai, Jerusalégnun Tuke Pujun emematuinak Pascuan jiistamawajui.

#### *Josías Apajuíyai kajinas anentaibau*

<sup>24</sup> Josíasak tunchi aidaun, anentaimas dekamin aidaujai ashí ijinauwai. Dutikak dita jeen apajuímtai dakumka najanamu ayaunash, tuja tikich wainka apajuímtai aidau, ashí waji pegkegchau aidaujai Judá wegantu aidaunum ayaunak Jerusalégnun ayaujai nagkamas ashí tsaikeu utsagkui. Nuna dutikauwa nunak jega Apajuí emematku

\* **23:22** “Israel aents aidaun apuji chichama epegkin aidau” tawa nunak, Israel aents aidaun yaigkagtinun Apajuí adajamu “Jueces” tutai aajaku aina nuna taku tawai. † **23:22** “Israel aents aidaun apuji aidau, tuja Judá weantun apuji aidau”, tawa nunak, “Rey” aajaku aina nuna taku tawai.

ijuntainum Moisés chicham umiktinun agajua nunú atatman, sacerdote Hilquías wainkauwa nuna umiak dutikauwai.

<sup>25</sup> Tuja Josías niina anentaijai, wakanijai, senchijijai Tuke Pujuu umijujukua, imanuk yaunchuk apu aajaku aina nuwiyag makichkish atsujakui.

<sup>26</sup> Tujash Tuke Pujuu Judá wegantu aidaunak Manasés wegantu aidau pegkegchaujin kajegkamutak pujau.

<sup>27</sup> Nuadui Tuke Pujuu chichaak: "Judá wegantu aidaunak Israel aents aidaun ijinawaitag dutiksanuk ijinattajai. ¡Tuja Jerusalén wi etegkamua nunak jega wi pujustin jegamkamua nujai tsaktatjai!" tiuwai.

### *Josías jakamu*

(2 Cr. 35.20-27)

<sup>28</sup> Josías nuigtush kuashat takasua duka, tikich Judá wegantu aidau apuji takasu aina nunú agatkamu papii Crónica tutaya nuwi agagbau ayawai.

<sup>29</sup> Makichik tsawantai Egipto nugkan apuji Necao aajakua nunú asirianmaya apun maaniamunum atuktatus namak eufratesnum weuwai. Nunitai apu Josías iintukiuwai nijai maaniatatus, nunik wetatman faraón Necao niyá wainak Meguido nugkanum niina mauwai.

<sup>30</sup> Dutika maamtai, suntaja apuji aidau carronum egkeawag jukiag Jerusalén ejegawag, nii ukumastin umikbaunum ukusajui. Nuna dutika ukuinak, Josiasa uchiji Joacazan aceiteyai nijakag Judá apuji adaikajui.

## 24

### *Apu Joaquéikan suntaja apuji aidaujai achikag Babilonia nugkanum yajuakbau*

<sup>8</sup> Joaquéikak dieciocho mijanji ajamu Judá wegantu aidau apuji wajasui. Tuja Jerusalégnunmak ayatak kumpatum nantu inamjauwai. Niina dukujig Elnatán Jerusalégnunmia aajakua nuna nawanji Nehustá aajakui.

<sup>9</sup> Tuja Joaquéikak niina apajijai betek Tuke Pujuu intimjuki pegkegchaun takajakui.

<sup>10</sup> Tuja nunú tsawantin Babilonia nugkan apuji Nabucodonosor aajakua nuna suntaji aidau Jerusalékan jetekagtatus shimutkajui. Nunik jegawag tentea apakajui.

<sup>11</sup> Dutika tenteawag jetenai Nabucodonosorchakam jegauwai.

<sup>12</sup> Nunik jegamtai Joaquin Judá wegantu aidau apuji mantuawainum tusa ishamak, niina dukuji, tuja suntaja apuji aidau, niina atuwe aidau aatus Babilonia apujin sujumankauwai. Nunikagmatai achija yajuakajui. Nunú utugchat asauwa duka Nabucodonosor apu wajas ocho mijan inamai nunikui.

<sup>13</sup> Nuna achija yajuak jega Apajui emematku ijuntainum waji pegkeg akik aidau ayaanak, tuja apu pujasa inamtainia aidaunashkam Nabucodonosor ashí yajuakui. Dutikak nuwi takastin waji aidau apu Salomón oron najanak umikua nunashkam ashí tsauki.

<sup>14</sup> Dutika ukuak aents Jerusalégnunmia aidaunak ashí yajuakui. Suntaja apuji aidau, santag maanitan yacha aidau, dakumak najantan yacha aidau, hierrojai takata yacha aidau aatus ashí achija yajuakui. Ashí ijumjamak diez mil aentsun yajuakui. Dutikam Judá nugkanmak ayatak ujudauch aidauk juwakajui.

<sup>15</sup> Tuja nuigtushkam apu Joaquéikan, niina dukujin, niina nuwe aidau, suntaja apuji aidau, aents eme anentsa diitai aidau aatus achija Babilonia nugkanum yajuakajui.

<sup>16</sup> Tuja aents eme anentsa diitai aidaunak siete mil achija yajuakui, dutikak untu dakumak najanin aidau, hierrojai najanin aidaujai mil achija yajuakui. Dutikak nuigtushkam aents senchi maanitan yacha aidaujai ashí achija yajuakui.

<sup>17</sup> Dutika yajuak pujus apu Nabucodonosor Joaquéika apaji yachin Mataníasan Judá wegantu aidau apuji adaikauwai. Dutika niina daajin yapagtua Sedequías adaikauwai.

### *Sedequías Judá wegantu aidau apuji*

(2 Cr. 36.11-16; Jer. 52.1-3)

<sup>18</sup> Sedequíasak apu wajasa inamtanak nagkamauwai veintiún mijan ajamu. Nunik apu wajas Jerusalégnun inamjauwai once mijan. Niina dukujig Hamutal yaakat Libnánmaya Jeremiasa nawanji aajakui.

<sup>19</sup> Tujash Sedequíasak Joaquinjai betek Tuke Pujuu umigtsuk pegkegchaun takajakui.

<sup>20</sup> Nuadui Jerusalégnunmia aidau, Judá wegantu aidaujai Tuke Pujuu shiig senchi kajejuk yaitsuk idaisauwai.

Dutikam pujus apu Sedequías, Babilonian apujijai shiwagmagauwai.

## 25

*Jerusalén tsaikbau*  
(*Jer. 39.1-7; 52.3-11*)

<sup>1</sup> Sedequíás apu wajasa diez mijanan ejeyi, nuigtu nueve nantu inamak pujai, Babilonia nugkan apuji niina suntaji aidaujui shimutkajui Jerusalégkan jetekagtatus. Nunik jegawag, yaaktan tenteawajui, dutikawag nuwi ijus kumpinan najankajui, nuwi wakag ima shiig jetekagtatus.

<sup>2</sup> Dutika tenteawag nuwi batsataig, Sedequíás tsawan nii inabaujin once mijanan ejeyuwai.

<sup>3</sup> Dutika tenteam batsamas nunú mijantin nantu Julio tsawan veinticuatrotrin yujumak yumain abuekamtai nujantai senchi waituidau.

<sup>4</sup> Tuja nunú tsawantai babilonianmaya suntag aidau Jerusalén peejamun iju chigkawajui. Dutikawagmatai Israel aents aidauk senchi ishamaidau. Nuninak Sedequíás Israel aents aidaujui Jerusalén waitainum jimag apatka peejamunum niina pujusa inamtaiji agájin yagkug ajakbau aajakua nuni kashi jüinkiang jinta namak Jordán wetainum paka aajakua nunú pisajajui.

<sup>5</sup> Nunik shimittaman babilonianmaya suntag aidau apu Sedequíásan pataetukag Jericó pakajin amainagkajui. Dutikiagtai niina suntaji aidauk pisajag shimuinak ima niinak ukukiajui.

<sup>6</sup> Dutikam nigki juwakmatai, apu Sedequíásnak niina uchiji aishmag aidaujui, achikag jukiag Babilonia nugkan apuji yaakat Riblá, Hamat aajakua nuna nugken pujau asamtai nuwi ejegawajui.

Dutikawagmatai apu Nabucodonosor Sedequíás maatajum tusa inamjauwai.

<sup>7</sup> Tusa inamjamtai Sedequíása uchiji aidaunak nii wainai suwenum tsupik maawajui, untsu Sedequíásnak jiin mai ukuikajui, dutikawag cadenayai jigkajag Babilonia nugkanum jukiajui.

*Babilonianmaya suntag aidau jega Apajui emematku ijuntai Jerusalégnum jegamkamu aajakua nuna tsaikagbau*

(*2 Cr. 36.17-21; Jer. 39.8-10; 52.12-30*)

<sup>8</sup> Tuja Nabucodonosor Babilonia nugkan apuji wajas tsawan siete, nantu Julio, mijan diecinueve ejeyi pujus, niina kuitamin suntag aidau apuji Nebuzaradán aajakua nuna Jerusalén awemauwai.

<sup>9</sup> Dutikam jegaa, Apajui ememaku ijuntai jega jegamkamu aajakua nuna, apu pujusa inamtaijin nuigtu nunú yaaktanum tikich jega aidaun, tuja aents eme anentsa diitai aidau jenashkam ashí apeauwai.

<sup>10</sup> Tuja nuigtushkam suntaja apujin uyunainak yujaidau Jerusalén peeja tentea apakbau aajakua nunak ashí tsaikajui.

<sup>11</sup> Dutikawagmatai, Israel aents aidau Nebuzaradán mantamawai tusag ishamainak yunumjau aidaun, nuigtu dakumak waji aidaun najantan yacha aidaun, aatus achija niina nugken Babilonia yajuakui.

<sup>12</sup> Dutika yajumak shiig ujudauch aidaunak, uva ajakbau dupajin, tuja tikich ajak ajakbau aina nuna dupajijai takagsatnume tusa batsakiuwai.

<sup>13</sup> Nuna dutikawag jega Apajui emematku ijuntainum takastin waji bronceyai najankamu aidaunak ashí tsaikajui. Tuja jega bakui aidaun, jega jegamku aepkamu aidaun, nuigtu yumi aimtai múun najanamumu aidaun ashí tsaikajui. Dutikawag nuwi bronce ayaunak ashí Babilonia nugkanum yajuakajui.

<sup>14</sup> Nuigtushkam yuku shikika jutai aidaun, palana aidaun, cuchara aidaun, tijig aidaun, nuigtu Apajui emematku takatai bronceyai najankamu aidaun ashí yajuakajui.

<sup>15</sup> Tuja jii kaiji chimpitai oro najanamumu aidaun, nuigtu tsapa plata najanamumu aidaun aatus ashí Nabuzaradán yajuakui.

<sup>16</sup> Tuja jega Apajui emematku ijuntain Salomón jegamak jimag shugkun ajigkua duka, tuja yumi aimtai múun, nuigtu jiju taubau shugku ajigtin aepkamu aatus aajakajua nuna kijinjig makichkish dekapamainchau aajakui.

<sup>17</sup> Tuja jimag shugku aajakua nuna esantig maki makichik ocho dekapamun nagkaesau ajujakui. Untsu nuwi ekeni jiju bronceyai jega emetuatin najanamumu aajakua nuna esantig jimag dekapamun nagkaesau ajujakui. Nuwi manzanaya numamtin dakumka bronce najanamumu aidaun detugbau aajakui. Tuja nunú shugkuk mai betek aajakui.

*Judá wegantu aidau achija Babilonia yajuakbau*

<sup>18</sup> Tuja nuigtushkam sumo sacerdote Seraías, sacerdote Sofonías, nuigtu jega Apajui emematku ijuntai jegamkamun kuitamin kampatum aajakua nunashkam achija yajuakui.

<sup>19</sup> Dutikak sacerdotechunashkam suntaja apuji aidaun, cinco aents apu chichajin aidaun, nuigtu suntaja apuji aidaun daajin agatuk kuitamnun, tuja sesenta aents eme anentsa diitai aidaun aatus achikajui.

<sup>20</sup> Dutikawag nuna Nabuzaradán ashí yajuak Babilonia apujishkam yaakat Riblá pujai ejegauwai.

<sup>21</sup> Dutika Hamata nugken ejegawagmatai, Babilonia nugkan apuji kajegtajum tusa inamjauwai.

Aatus Judá wegantu aidaunak achijag, dita nugken ukumtikiag tikich nugkanum yajuakajui.

*Israel aents aidaun*

*ujumak iwaku juwaju aidaun*

*Egipto nugkanum pisajagbau*

<sup>22</sup> Tuja Judá nugkanum ujumak iwaku juwakajua nuna apuji ati tusa apu Nabucodonosor makichik Israel aentsun etegkauwai. Nuna daajig Guedalías, Ahicaman uchiji, Safánka tijaji aajakui. Niig yaakat Mispá pujujakui.

<sup>23</sup> Nuna suntaja apuji Judá wegantu achikchamu aidaun batsatu dekawag, Guedalíasjai chichasagtatus yaakat Mispá shiyakajui. Nunú apu aidauk: Netaníasan uchiji Ismael, Caréah uchiji Johanán, tuja Tanhúmetan uchiji Seraías yaakat Netofánmaya aajakui, untsu Jaazanías aajakui yaakat Maacánmaya.

<sup>24</sup> Nunik jegawagmatai, Guedalías ditan chichajak:

“Apajui Tuke Pujuu tutaya nuna daajin tajime: Juwi batsamsaja apu Nabucodonosor umigjinig, babilonianmaya aidauk shiig awagtamkagtatui. ¡Nuadui babilonianmaya suntag aidaun apuji aina duka ishamkaigpajum!” tiuwai.

<sup>25</sup> Tusa idayas siete nantu pujai, Judá wegantu aidaun apuji aajaku aina nunú wegantu, Netaníasa uchiji Elisamán tijaji Ismael, diez aents aidaun yajuak Guedalíasan jegajua mauwai. Dutikak judío aidaunashkam, babilonianmaya suntag aidaujui batsatunak ashí kajegkui.

<sup>26</sup> Nuna dutikawagmatai, ashí aents aidauk babilonianmaya aidaun ishamainak, datsauch aidaunum nagkamas múuntuch aidaujui, tuja suntaja apuji aidaujui pisajag Egipto nugkanum shiyakajui.

## **Apu Joaquín achikam Babilonia nugkanum pujau agkanmitkamu**

*(25.27-30)*

*Apu Joaquín aents achika egketainum achikam egketu jiiqbau*

*(Jer. 52.31-34)*

<sup>27</sup> Tuja Judá apuji Joaquín aajakua nunak achikag Babilonia nugkanum jukiaujui. Dutikam pujus treinta y siete mijan ejeyi, nantu doceya nunú takau ai, tsawan veintisietetin makichik aents babilonianmaya Evil-merodac apu wajasui. Nunik Joaquín wait anentug aents achika chimpitainum achikam egketun jiikiuwai.

<sup>28</sup> Dutika, tikich apu aidaun achikam chimpijaidaun nagkaesau shiig ausauwai.

<sup>29</sup> Nuadui Joaquín aents achika chimpitainum pujusa nugkujakbaujinak awimak ukuak tikich jáanch pegkejan nugkujui. Nunik pujus yujumkanak tuké apujai jimajuk yuuajakui.

<sup>30</sup> Tuja nuigtushkam apu Evil-merodac kashi kashinig nii atsumamu sumaktinjin tuké kuichkin sujakui.

## **Esdras** **Achija yajuakbau aidau waketjag jega Apajuí emematku** **ijuntain jegamkamu**

(1—6)

*Apu Ciro papii umikbau*  
(2 Cr. 36.22-23)

<sup>1</sup> Apu Ciro, Persia nugkan apuji wajasa makichik mijan takai, yaunchuk profeta Jeremiás Tuke Pujuu tibaun etsegkauwa nunú uminkatin tsawan jegau asamtai, apu Ciro papiin umika ashí nugkanum nii inama nuwi ishiakti tusa Tuke Pujuu niina anentain antinkauwai.

<sup>2</sup> Nuadui apu Ciro juna aatus papiin agajui:

“Tuke Pujuu Apajuí nayaimpinum pujuuwa nunú ashí aents nugkanmaya aidaunak mina idaitugsae. Nuadui Judá wegantu aidau nugken Jerusalégnum Apajuí emematku ijuntain jega pegkegman jegamkati tusa inatjae.

<sup>3</sup> Nuadui atum Apajuí aentsji aidautilum juwi batsatutigmek Jerusalén Judá nugken shiyaktajum. ¡Nunikjum Tuke Pujuu Apajuín Israel aents aidau emematin aina nunú nuwi puja nu emematku ijuntai, jega jegamkatajum! Apajuí nuwi puja nunú atumnak yaimpaktinme.

<sup>4</sup> Tuja ashí aents jinaachu aidau Apajuí emematku ijuntain jegamkatatus shimuidau-nak tikich aents ditajai batsamin aidau: kuichkin, oron, tikich waji aidaun, baka aidaun aatus susagtatui. Dutikainak nuigtushkam jega Apajuí emematku ijuntainum takastin waji aidaun anentag susagtatui”, tiuwai.

*Israel aents aidau Jerusalén waketjamu*

<sup>5</sup> Tusa timatai Judá wegantun apuji aidau, Benjamín wegantun apuji aidau, sacerdote aidau, Leví wegantu aidaushkam ashí Apajuí wakemittakbau aidauk Jerusalén shiyakag Apajuí emematku ijuntain jegamkagtatus umintsajui.

<sup>6</sup> Nunik uminiagtai aents ditajai ijunag batsamin aidau: oron, platan, waji pegkeg najanamu akik aidaun, baka aidaun, aatus susajui. Dutikainak nuigtushkam tikich waji aidaun kuashat anentag susajui.

<sup>7</sup> Tuja Apajuí emematku ijuntai jegamkamu Jerusalén aajakua nuwi waji ayaun Nabucodonosor yajuak niina apajuímtai jegamjukbaunum awaya ukukbaunashkam apu Ciro ashí yajuak susauwai.

<sup>8</sup> Tujash tikima nii jukig susachui, kuichki kuitamin Mitrídates aajakua nuna ame susata tima, nii juki ashí dekaapa Judá wegantu aidaunum gobernador Sesbasar aajakua nuna susauwai.

<sup>9</sup> Nunú waji aidauk juju aajaku ainawai:

Treinta pinig oro najanamu aidau,

mil pinig plata najanamu aidau,

veinti nueve kuchii,

<sup>10</sup> treinta taza oro najanamu,

cuatrocientos diez taza

plata najanamu aidaun

aatus susauwai.

Tuja nuigtushkam mil

tikich waji aidaun susauwai.

<sup>11</sup> Tuja waji orojai najanamu aidauk, platayai waji najanamu aidaujai ashí ijumjamak cinco mil cuatrocientos aajakui. Nunú waji aidaunak Sesbasar tikich judío aidau achija yajuakbau Babilonia nugkanum batsatujai Jerusalén waketuinak ashí yajuakajui.

### **3**

*Altar ataktu najanamu*

<sup>1</sup> Israel aents aidauk waketug ditá nugken jegawag maki makichik ditá yaaktajin batsamsau ainawai. Nunik batsamas nantu sieteya nu takau ai, ashí aents aidau Jerusalén ijunajui.

<sup>2</sup> Nunikagmatai Josué Josadakan uchiji niina kumpaji sacerdote aidaujai, tuja Zorobabel Salatielan uchiji, niina patayi aidaujai aatus ijunag Moisés jintiauwa nunak

imatiksag Apajuí emematku kuntin maa patasa ashí apeatnun altaran najanawagtatus nagkamawajui.

<sup>3</sup> Dutikawag nunú nugkanmaya aents aidaun ishamainayatak, yaunchuk altar najanamu tsaikbau aajakua nuwi ekeniag najanawajui. Dutikawag kashikmas, aagkú aatus tuké kuntinu maa nuna nejen ashí apeenak Apajuín emematuidau.

<sup>4</sup> Nuigtushkam numi kanawe tsupija aakmaja batsamsamu aajakua nunú tsawantin jüstamatajum tusa chicham umikbaunak imatiksag jüstamawajui. Nuninak maki makichik tsawantin Apajuí emematkuik imania kuntin maa, nuna neje ashí apeami tibaunak dutiksag apedau.

<sup>5</sup> Dutikaidau asag maki makichik tsawantai apetainak dutiksag apedau. Tuja nantu yama takamunum apetaïnashkam dutiksag apedau, wagki Tuke Pujuu nunú tsawantin emematitajum tusa tibaun imatiksag umidau asag. Tuja nuigtushkam aents aidau Tuke Pujun anentag waji aidaun suwidau.

<sup>6</sup> Apajuí emematku ijuntai jegamtanak eke nagkamtsuk nantu siete Etanim\* tutai taka makichik tsawan tsawaju ai nagkamas, Apajuí tudaun tsagkugtamjati tusa kuntinun maawag nuna nejen ashí apenak Tuke Pujun emematuidau.

<sup>7</sup> Nuna dutikawag jega jegamin aidaun, numi dakag takatan yacha aidaujai, kuichkin susajui. Untsu aents tironmaya, sidógnumia aidaujai, setug tsupigbau aidaun Líbano nugkanmayan yajuakag apu Ciro tibaunak imatiksag Jope nugkanum ikaunmawagtin aidaun yutain kuashat, umutai aidaun, nuigtu aceite aidaun kuashat susajui.

*Apajuí emematku ijuntai jegamkatasa nagkamamu*

<sup>8</sup> Tuja Salatielan uchiji Zorobabel, Josadakan uchiji Josué, dita kumpaji sacerdote aidau, nuigtu Leví wegantu aidau aatus ijunjajui. Nuigtushkam ashí aents achija yajuakbau aidau, Jerusalén wakitki kaunawaju aidaujai ijunjag nunú jega pegkegman jegamkagtatus nagkamawajui. Nunak Jerusalén kauna batsamas jimag mijana nuna achikag, nuigtu jimag nantu takau ai, nagkamawajui. Dutikainak sacerdote aidaun, Leví wegantu aidaujai veinte mijan ajamun nagkaesau aidaun etegkeg atum jega jegabau diistajum tusa tiajai.

<sup>9</sup> Tuja Josuéshkam niina uchiji aidau, niina yachi aidau aatus ijunjauwai. Tuja Cadmielchakam niina uchiji Judá wegantu aajaku aina nujai ijunjauwai. Nunikagmatai ditajai atunikag tikich aents Henadad wegantu aidau, Leví wegantu aajaku aina nujai ijunjag aents aidau nunú jegan jegamiagtai, shiig uminkati tusag diinak yujaidau.

<sup>10</sup> Tuja jegá jegamin aidau Apajuí emematku ijuntai jegamkatatus shugkun ajigkag umikagmatai, David dutikatajum tibaun uminak sacerdote aidau dita nugkutajin nugkukag iwagmamkag uwija kachujin yajuakag jegantajui. Tuja Leví wegantu Asaf aajakua nuna uchiji wegantu aidaushkam platillo aidaun yajuakag jegantajui, nuna awatuinak Tuke Pujun emematiagtatus.

<sup>11</sup> Nunik ijunag kantamainai, tikich aidauk: “Tuke Pujuk dekas pegkejai, nuadui see titajum, niig Israel aents aidaunak tuke aneetnai”, wajaidau. Ashí aents aidauk shiig aneas Tuke Pujun emematuinak pampaidau, wagki Apajuí emematku ijuntai ataktu jegamdau asamtai.

<sup>12</sup> Nuna jegamainak nagkamiagtai sacerdote aidau, Leví wegantu aidau, nuigtu maki makichik wegantu aidaun apuji múun aidau, yaunchuk yama nagkamchaku jegamkamun wainajaku asag ataktu nagkamawag jegamiagtai, shiig aneenak senchi jiika buutuidau. Nuninai tikich aidaushkam shiig aneenak untsumaidau.

<sup>13</sup> Imatuidau asamtai shiig anenakuash imatuina, atsa wake besemag dekapenakuash imatuina duka shiig dekamainchau aajakui. Nunú imati pampainamuk shiig atushat antugajakui.

## 6

<sup>1</sup> Tuja chicham uminkatin agagbau aidau ijumtai Babilonia nugkanum awa nunú egaktajum tusa apu Darío inamjauwai.

<sup>2</sup> Tusa tiajam egá yujakma Media nugkanum yaakat Ecbataná aajakua nuwi apu pujusa inamtain makichik papii dupajam patatun wainkajui. Nunú papiinum aatus agagbau aajakui:

<sup>3</sup> “Ciro apu adaikam makichik mijan takak pujus juna aatus agajui: ‘Tuja Apajuí emematku ijuntai jegamkamun pachis aatus agagbau aajakui: Jerusalégnun jega jegamtanak nagkamatnume, dutika ataktu jegamkatnume, nuwi kuntinun maa apenak

\* 3:6 “Etanim” tawa duka nantu setiembre ejapean nantu octubren achik jimaituk ejegak makichik nantu wega nuna daajin taku tawai.



Apajuín emematiagtin asag. Nunú jega yakintig veintisiete dekapamu atatui, tuja wegkantishkam veintisiete dekapamu atatui.

<sup>4</sup> Tuja nunú jega jegamkatasa aepkamu aidaunum nuwi nagkama kempatuma imania kaya múun aidau ekenja iwakbau atatui. Nunú maki makichik ekenjamu aidaunum numi yama dakagbau anujamu atatui. Tuja nuna akikenak kuichik apu aidau takasagtin tibauwa nuna jukiag akikmakagtatui.

<sup>5</sup> Tuja waji orojai najanamu aidau, jiju platayai najanamu aidaun aatus apu Nabucodonosor jega Apajuí emematku ijuntainmayan yajuak Babilonia nugkanum ikaunmauwa duka Jerusalén awakjamu atatui. Dutika Apajuí emematku ijuntai jegamkamua nuwi utsaamu atatui, wagki nuwiya yajuakbau asamtai' ", tuu agagbau aajakui.

<sup>6</sup> Nuna wainkagmatai, apu Darío nugka yaig namak eufratesnum etsa akaetaiya nuni aajakua nuna apuji Tatenai daagtin, nuigtu Setar-boznai niina kumpaji aidaujai batsatun chichajak:

"Jerusalégnum batsatjum duka jijnajum ukuktajum,

<sup>7</sup> judío apuji aidau dita atuwe aidaujai jega Apajuí emematku ijuntai tsaikbau aajakua nuna ataktu jegamkatnume.

<sup>8</sup> Tuja Apajuí emematku ijuntain dita jegamkatnume tusan yayaakun wishakam juna tajai: Namak Eufratesa yantamen etsa akaetaiya nuni aents nugka yaignum batsamin aidau apu takastinun kuichkin akikmaina duka jega jegamku takamunum akikmaktin ashí wayati, nunú dutikachmak wamak jega jegamain tsawan nagkaemaki.

<sup>9</sup> Tuja sacerdote Jerusalégnumia aidau wajinak atsumaijat nuna sumainakuig, makichkish utugchat apujutsuk, kashi kashinig sutajum: toro tsakat aidaun, uwig aishmag aidaun atsumainakuish, nuniashkush uwig tsakat aidaun maawag nuna nejen ashí apenak Apajuí ememattinun atsumainakuish susatajum. Tuja trigonakesh, weenakesh, vinonakesh aceitenakesh,

<sup>10</sup> apenak Apajuín shiig anemtiksatatus atsumainakuish susatajum. Nuna dutikainak mina pujutjun, mina uchig aidaun pujutjijai pachisag Apajuín ausatnume.

<sup>11</sup> "Tuja makichik aentskesh wi taja nuna umiachkug, niina jenai numi juki etsaka iju maam atatui. Tuja niina jeshkam ashí tsaigka ajapjam atatui.

<sup>12</sup> ¡Tuja makichik apukesh, nuniachkush aents nugka muunnumia aidaukesh Apajuí emematku ijuntai jegabaunum utugchatan apujunak Apajuí nii pujustinjin Jerusalégnan etegkauwa nunú ijinati! Wi junak apu Daríon tajai. ¡Juju wajintu agagbauwaita duka imanisag uminkati!" tusa agajui.

*Apajuí emematku ijuntai jegamka ashimkamu*

<sup>13</sup> Aatus apu chichaman umiku asamtai, nunú nugkanum batsamin aidaun apuji aidau Tatenai, Setar-boznai aatus, tikich apu dita kumpaji aidaujai papii agagbaunak imatiksag betek umikajui.

<sup>14</sup> Nuadui Apajuí chichamen etsejin profeta Hageo, Idó uchiji Zacarías aajakua nujai Apajuí emematku ijuntai jegamnaktinun pachis emtika etsegkamunak imatiksag apu takata chichamjin Judío aidau atak nagkamawag takasajui. Dutikainak Israel aents aidau Apajuí jega dutik jegamnakti tibaunak imatiksag jegamak umikajui. Tuja Persian apuji aidau: apu Ciro, apu Darío, apu Artajerjes aatus, tibaunashkam betek umikajui.

<sup>15</sup> Nunú jeganak Darío apu wajas seis mijan inamai, nantu Adar\* taka kempatun tsawan tsawaju ai, ashí jegamak ashimkajui.

<sup>16</sup> Dutika ashimkagmatai Israel aents aidau, sacerdote aidau, Leví wegantu aidau, nuigtu aents achija yajuakbau waketjau aidau aatus ijunag, shiig aneank jüstamawajui.

<sup>17</sup> Nunú tsawantin Apajuí emematku ijuntai jegamkam ashimnaku asamtai, cien toro tsakat aidaun, doscientos uwig aishmag aidaun, cuatrocientos uwig tsakat aidaun maawag Apajuín emematuinak apeawajui. Nuigtushkam Jacopa uchiji doce aajakua dutiksag ashí Israel aents aidau tudauji tsagkugnagtinme tsug doce chivon achikag maawag nuna nejen ujumak jukiag apeawajui.

<sup>18</sup> Nuna dutikawag Moisés agajua nuna uminak sacerdote aidaush wajina takastinuk aajabi, nuna mamiktujajui. Tuja Apajuí emematku Jerusalén ijunbaunmash Leví wegantu aidaush wajina dutikatnuk aajabi nunashkam dutiksag mamiktujajui.

*Pascua jüstamamu*

<sup>19</sup> Tuja nuigtushkam achija yajuakbau waketug kaunau aidau tsawan catorcetin mijan nagkamnamu yama nagkamchak nantu takau ai, Pascuan jüstamawajui.

\* 6:15 "Adar" tawa nunak nantu febrero ejapean achika, nantu marzo ejapean makichik nantu ejega nuna taku tawai.

<sup>20</sup> Sacerdote aidau, Leví wegantu aidaujai, atumi tudaujum aidau dutik iwagmankatajum, tusa tibaun uminak iwagmankau ainawai. Nunikag ashí aents achija yajuakbau aidau, dita kumpaji tikich sacerdote aidaun, tuja ditanu aidau aatus tsagkugnajagtinun nunú tsawan Pascuatin kuntinun maa apeawajui.

<sup>21</sup> Nunú kuntin Pascuatin maamu aidau nejenak ashí Israel aents achija yajuakbau waketug kaunau aidau, nuigtu tikich aents aidau, aents pegkegchaun takau aina nuna wekaetutsuk, Israel aents aidaujai betek Tuke Pujun ememattag tuidaujai ijunag yuwawajui.

<sup>22</sup> Tuja pag levadurajai pachimtsuk inajuamu yutai tsawan jegau asamtai, nuigtushkam Apajuí ditan ataktu yayaak Persia nugkan apuji, Apajuí emematku ijuntai jegabaunum yaigtinme tibau asa, yaigkam jegan jegamak ashimkaju asag, shiig aneenak siete tsawantai jistamawajui.

## 7

### *Esdras niina kumpaji aidaujai Jerusalén jegamu*

<sup>1</sup> Persia nugka apuji Artajerjes pujujakua nunú tsawantin Seraías uchiji Esdras daagtin pujujaku. Tuja Seraías patayi aidauk juju aajaku ainawai:

Asarias, Hilquías

<sup>2</sup> Salum, Sadoc, Ahitub,

<sup>3</sup> Amariás, Azariás, Meraiot,

<sup>4</sup> Seraías, Uzí, Buquí,

<sup>5</sup> Abisúa, Finees, Eleazar aatus. Tuja Aarón yama nagkamchak sacerdote aajakua nunashkam shiig patayi aajakui.

<sup>6</sup> Apajuí Moisésan chicham umiktinun susauwa nuna Esdrasak yacha aajakui. Tuja niinak Tuke Pujuu niina Apajújiya nunú yaijakui. Nuadui apu Artajerjes Esdras sumamunak ashí susauwai. Dutikam Babilonia nugkanum pujau,

<sup>7</sup> apu Artajerjes inabaujin siete mijan ejeyu ai, Israel aents aidaujai, sacerdote aidaujai, Leví wegantu aidau, kantamtan yacha aidau, Apajuí emematku ijuntai jegamkamun waitijin kuitamin aidau, nuigtu aents nunú jeganum takau aidau aatus ijunag Jerusalén wakitkijajui.

<sup>8</sup> Nunik mijan sietetin nantu cinco takau ai, Jerusalén jegauwai.

<sup>9</sup> Babilonia nugkanum batsatu waketjauwa nunak mijan nagkamnamu, yama nagkamchak nantu taka makichik tsawan tsawaju ai, nunú tsawantin jiinki, nantu cinco taka makichik tsawan tsawaju ai, Apajuí wait anenkagtina nunú kuitamsam Jerusalén jegauwai.

<sup>10</sup> Esdrasak Tuke Pujuu chichame umiktin agagbauwa nuna wisha shiig unuimajan umiakun Israel aents aidaun jintintuatjai, dutika ai ditashkam nuna umiktinme tusa puyatjajaku.

### *Apu Artajerjes papiin agag Esdrasan susamu*

<sup>11</sup> Apu Artajerjes papiin agag sacerdote Esdras jintinkagtin chicham umiktin agagbaun yacha aajakua nuna susauwa duka juju aajakui:

<sup>12</sup> “Apu Artajerjes, sacerdote Esdrasan Apajuí nayaimpinum pujuuwa nuna chichame agagbaun yacha, jintinkagtina nuna kumpamak, aatus tawai:

<sup>13</sup> Ashí Israel aents aidau mina nugkajui batsata nunú Jerusalén amejai wetag tuidauk wetinme. Tuja Leví wegantu aidaush, sacerdote aidaushkam wetag tuinakug wetinme.

<sup>14</sup> Wi mina aentsug chichagkagtin siete aina nujai, chichama umikan Judá nugken aents batsata dusha, tuja Jerusalén batsata dusha chicham umiktin agagbaun Apajuí atumin amasua nunash betekash umiina nunú dekata tusan amina awemajame.

<sup>15</sup> Tuja apu niina aentsji chichagkagtin aidaujai anentaimas, Israel aents aidaun ememattai Apajuí Jerusalén puja nunú iish susami tusag, platan, oron amasagtata nunú jukim wetá.

<sup>16</sup> Tuja plata aidau, oro aidau Babilonia nugkanum yaakat ayá nuwiya ikamkugmek ashí jukitajum. Nuigtushkam tikich aents aidau, sacerdote aidau, diták anentaimas Apajuí emematku ijuntai jegamkamun Jerusalén awa nuwi takastinun amainakuig ashí yajuakta.

<sup>17</sup> Dutika yajuakam nunú kuichkia duwi toro tsakat aidau, uwig aishmag tsakat, uwig múun aidaujai, nuigtu ajak juukbau aidau, vino aina nujai ijumjam sumakta. Dutikam nunú Apajuí emematku ijuntainum altar awa nuwi apeakjum atumi Apajújum Jerusalén puja nunú emematminjum.

<sup>18</sup> Tuja oro, plata aina nunú ampinkuig, amina kumpajum aidaujai chichasam Apajuí wakegamush tukita nunú dutikatajum.

<sup>19</sup> Untsu amina Apajuíjum emematku ijuntainum waya, nii emematku takastin aidaun amasag duka, Apajuí Jerusalén pujuuwa nunú susattame.

<sup>20</sup> Tuja nunú jeganum takastinush waji atsumtatme nuniakmek apu aidau takastin ijumjamu aina nuwiya jukita.

<sup>21</sup> Apajuí nayaimpinum pujuuwa nuna chichame umiktin agagbauwa nuna yacha, sacerdote Esdras sumamuk makichkish intimjuttuk ashí susatajum, tusan wi apu Artajerjesan aents kuichki kuitamin aidau namak eufratesnum etsa akaetaiya nuni batsatutigminak ashí tajime.

<sup>22</sup> Tuja duka juju aidau susattagme: Tres mil trescientos kilo plata, veintidos mil litro trigo, dos mil doscientos litro vino, dos mil doscientos litro aceite, tuja weenash wajupak atsumit duka imatiksagmek susattagme.

<sup>23</sup> Apajuí nayaimpinum pujuuwa nunú niina jenia atinun sumakuig duka wamak ashí sunastatui, wagki nunú umiatsjinig, Apajuín suwimkega nunú apu uchijin, tuja niina inamtaiji nugka múunta nuwí suwimak iyanjamain asamtai.

<sup>24</sup> Nuigtushkam juju dekatajum: Sacerdote aidauk, Leví wegantu aidauk, kantamtam yacha aidauk, juga Apajuí emematku ijuntain kuitamin aidauk, tuja nunú jeganum takau aidauk, nuniachkush tikich aentskesh nunú jeganum takau aidaushkam, apu kuichkiji atin akikmaktajum tusa waitkamuk makichkish atsuttawai.

<sup>25</sup> Untsu Esdrasah, aminak Apajuí shiig anentaimsa takatan amasua duwi shiig anentaimsam, apu chichama epegkin aidau, nuigtu nugka yaig aidaun apuji gobernador aidaujai adaijata. Dutikawamin dita utugchat ataish epegkeatnume. Nunú aidau ashí tikich nugka yaig aidau namak eufratesnum etsa akaetaiya nuni ayá nuwish, amina Apajuígin chichame umiktin agagbauwa nunash betekash umikajat nuna diistinme. Untsu nunú chichaman dekachu aina duka ame jintintuata.

<sup>26</sup> Ashí aents aidau Apajuí chichame umiktin agagbauwa nuna umiachuk, tuja apu chichamenash umiachuk wamkeuch mantamnattawai, dutikachkuish tikich nugkanum sujunkattawai, nuniachkush kuichkin akikmaktatui, nuniachkush aents achika chimpitainum achika egkeam agtatui", tusa apu Artajerjes agajui.

*Esdras Apajuín ausamu*

<sup>27</sup> Aatus apu papiin agag umikmatai, Esdras Apajuín aujak:

"¡Tuke Pujuu iina muunji aajaku aina nuna Apajuí emematiagmi! ¡Nunuwai dekas pegkejam wait anenkagtinuk, wagki nii apu Artajerjesa anentain antintuk, Apajuí emematku ijuntai Jerusalégnun awa nuna eme anentus diisti tumamtikiu asamtai!

<sup>28</sup> Tuja minashkam nii yaintsamtai, apu niina aentsji chichagkagtin aidaujai, nuigtu tikich aents aidau apu inamtaijin takau eme anentsa diitai aina dushakam ashí wait anenjujaje. Nuadui dita yaintsagmatai, Israel aents eme anentsa diitai aidaun wijai Jerusalén waketatnume tusan ijumjajai", tiuwai.

## Nehemías Jerusalén peejamun shiwag aidau tsaikagbaun Nehemías ataktu peejamu

(1.1—7.73)

*Jerusalégnunia aents aidaun pachis Nehemías Apajuín ajujtusbau*

<sup>1</sup> Witjai Nehemías Acalíasan uchiji. Jujuwai mina pachitus augmatbau. Artajerjes apu wajas inabaujin veinte mijan ejeyi, nuigtu nantu Quislev\* achika takak pujujukua, nunú tsawantin wi yaakat Susanum apu pujusa inamtaijin pujuyajai.

<sup>2</sup> Nuwi pujai mina yatsug Hananí tikich aidaujai Judá wegantu aidau nugken batsatu miniyame. Nunik minidaun wainkan iniakun: “Jerusalégnunia judío aents aidau shiwag amuam, achipag yajupakainum tusag pisaju aina dusha ¿wajukau ainawa?” tusan iniasabijai.

<sup>3</sup> Tusa iniai dita ajuuinak: “Shiwag aidau tikichin achija yajumiagtai pisaju aina duka, waketug Jerusalén kauna batsamas waituinak, tikich aents aidau dushikiam batsatu. Tuja Jerusalén peejamu aya nunashkam shiwag aidau tsaikajui. Waitijinashkam jiyai apeawajui”, tusa ujatkejabi.

<sup>4</sup> Nuna antukan buutijai. Nuniakun wake besemag dekapeakun, ujumak tsawantai yujumka ijagma pujusan Apajuí nayaimpinmayan augkun,

<sup>5</sup> aatsan tiabijai:

“¡Tuke Pujuu, Apajuí nayaimpinum pujuuwah, Apajuí múun senchigtinuh, amek ame anagkagtuamuk tuke uminaitme! ¡Tuja amina anempainak chichamjumin betek umidauk kajimatkimék idaichauwaitme!

<sup>6</sup> Nuadui wi amina aentsjum aidaun anentaimtusan tsawaish kashish tuke amina augjam nunú yamai antugtukta. ¡Israel aents aidauti amina chichamjum umitsuk, pegkegchau takamsag nunak dekaskeap nunikji tajai! ¡Mina muuntug aidau pegkegchaun takamsau aina nunak wishakam pegkegchaun takamsajai!

<sup>7</sup> Ame diismak shiig pegkegchau takaku batsamsaji. Amina inakem Moisés chicham umiktin susauwaitam duka iik umikchaji.

<sup>8</sup> Amina inakem Moisés chichagkun: “¡Mina chichamjum umigtutsuk pegkegchaun takainakuig, dapampaakan tikich nugkanum yujas waittsatnime tusan ishiaktinaitjai!’ tiuwaitme.

<sup>9</sup> Tujash dutika utsajatkamin yujasa, ataktu aminí mininaku chichamjum umiajinig, atushat nugka nagkatkamunum batsatjinish, ataktu awagkagtukim, ame nugka etegkam juwi emematjitin atinme tibaunum ikaunmatnaitjime tiuwaitam nunú adeagta.

<sup>10</sup> “Ti aidautik amina inakem ainaji. Amina aentsjum aidau Egipto nugkanum waitkam batsatu amina senchigmijai jiija agkanmitkauwaitam nunú ainaji.

<sup>11</sup> ¡Tuke Pujuuwah, wait aneamam wi tajam nunú antugtukta! ¡Tuja amina inakem aidau segapaina dushakam antugkata! Ii wakegamua duka ima ame ememattag tabauwa nunuwai. ¡Tuke Pujuuwah, wait aneamam minash atutkata, apu shiig aneam wi tabaun antugtuk yainkati tusan segajame!” tiabijai.

Tuja nunú tsawantinig wika apu Artajerjes uwagtinun shikikan su ayajai.

## 2

*Apu Artajerjes Nehemíasan Jerusalén weti tibau*

<sup>1</sup> Artajerjes apu wajasa inabaujin veinte mijan ejeyu ai, nantu Nisán taká makichik tsawan tsawaju ai, apu uwagtinun vino najanamun suwakun wake besemag wekaebaun apu waitkabi.

<sup>2</sup> Nunik chichagtak:

“Wake beseka wekagu diyagme ¿wagka aniamé? ¡Jachu diyagme, utugchatas ajutjamatai!” tujutiabi. Tujutkui shiig senchi ishambijai,

<sup>3</sup> nuniakun:

“¡Apuh, kuashat tsawan iwaku pujusam inamjata! ¿Wagkanuk wake besemag wekaechatja, yaakat mina apag mina dukugjai ukusbau aina nunú tsaikbau, tuja nuna waitijishkam apeka utsagbau aish?” tiabijai.

\* 1:1 Nantu “Quislev”: Juju nantua duka “Noviembre ejapean nagkamna nantu Diciembren achika jimaituk ejegak makichik nantu wega nuna daajin” tawai.

<sup>4</sup> Tusa tai, apu inintak:

“¿Wajinma yaimainaitjame?” tusa tujutkui, Apajú nayaimpinum pujuuwa nuna mina anentaijuig initak ausamajai.

<sup>5</sup> Nunikan apu ayaakun:

“Apuh, ame diisan pegkejaitkuig, tuja ame mina wait anenjakkemek, Judá nugken yaakat awa nuwi mina apag dukugjai ukusbauwa nuwi awetiti tajame. ¡Nuwi jegaan nunú yaakat tsaikbauwa nuna iwajatjai!” tiabijai.

<sup>6</sup> Tusa tai apu niina nuwe eketbaunum nuna yantamen eketu chichagtak:

“¿Wemesh wajupa tsawanta megkaemainaitme? Nunikmesh ¿wajutiya waket-mainaitme?” tujutiabi. Tujutkui tsawantan mamiktuawamajai. Tusa ti ai ayu tujutiabi.

<sup>7</sup> Tujutmatai nuigtushkam segaakun: “Ame dutikmainaitkumek, aents aidau namak Eufratesa yantamen etsa akaetaiya nuni batsamna nuna apuji aidau papii agatjata, wi nuni nagkaemai utugchatan apujtugsainum. Nuna jukin agkan Judá nugkanum jegatjai.

<sup>8</sup> Tuja Asaf, amina aentsjum ikama kuitamin puja nunú numi aidau nujusti. Nuna jukin Apajú emematku ijuntai jegamkamua nuwi jegantatak kumpin jiikbau awa nuna iwajatjai, dutikakun yaaktan peejatjai. Dutikakun wi pujustinnashkam iwajatjai”, tusan nunashkam segabijai. Tusa ti ai ayu tujutiabi, wagki Apajú mina yaintu asamtai.

<sup>9</sup> Tujutmatai jiinkin namak eufratesnum etsa akaetaiya nuni apu aidau batsatbaunum jegaan apu papii agagbau takakbaujun susabijai. Tujash apuk ima papiinakek sujuschabi, mina uyuntusagtinnash aents caballonum maanitan yacha aidau suntaja apuji aidaujai sujusabi.

<sup>10</sup> Nuna dekawag Horón aents Sambalat, Tobías apu atuwe amonita aents aajakua nujai senchi kajekajui, wagki makichik aentskesh Israel aents aidau nak yaigchatnume tuidau asag.

*Yaakat peejatnun wekaetus diisbau*

<sup>11</sup> Ima imaniakuan Jerusalén jegawabijai, nunika jegan kauptum tsawan pujusan,

<sup>12</sup> ujumak aentsu yajuakan dita uyuntusagmatai kashi nentakin wegabijai, tujash Apajú mina Jerusalén iwajata tusa tujutbaunak makichikish etsegkachabijai. Wika burronum entsamkan weyajai, nuniai tikich aidauk dawé shimuyanume.

<sup>13</sup> Nunú kashia duwi yaakta waitiji Valle tutaya nunú jiinkin, yumi pukunin daaji Pagki tutaya aajan, tikich waiti Tsawat utsautai tutaya nuni wegabijai. Nunika jegan Jerusalem peejamu tsaikbau aidau, waiti apekbau aidau, wekaetusan ashí diisabijai.

<sup>14</sup> Nuna diisa ukuakun waiti Entsa pukuni jiinin tutainum wegabijai. Tuja nuwi juwakin Apu maatai yumi aimkamu aajakunum jegan tabijai. Tujash burro wi entsamka wekaebau nuwi nagkaemamainchau ayi.

<sup>15</sup> Tuja eke suwe aig entsa aintin wakabijai. Nunikan yaakat peejamu aajakun ashí diisan ukuakun, yama nagkamchaku jiinkimunak nunisnuk wakitkiabijai.

<sup>16</sup> Tuja apu aidauk wi webaunak dekachaju ainawai, nuigtushkam wajina dutikaknuk wekaeyaja nunakesh dekachaju aajabi. Nunika wekaekunush judío aents sacerdoté aidauunash, apu aidauunash, apu yain aidauunash tuja tikich aents takata yaimkagtin aidauakesh makichikish ukachabijai.

<sup>17</sup> Nuadui dita chichagkun:

“Ii aidauti shiig utugchatnum batsatag duka atumek dekagme, Jerusalégkak tsaikam, waitiji aidauash apegakm awai. Nuadui wijai atuniktajum, ¡nunikagmin ijunja Jerusalén peejamu tsaikbauwa nunú ataktu peeja iwajami! ¡Dutika iwajau asa dushikiam batsatag duka dutikamak achattaji!” tiabijai.

<sup>18</sup> Nuna tusan Apajú mina wait anenjug yainkamun, nuigtu apu tujutbaunashkam ditan ukachabijai. Dutika ai dita aimainak:

“¡Ayu, takasagmi!” tusag shiig aneasag pempeentunikiag, dekas takasagmi tudayajabi.

<sup>19</sup> Nuna antukag Sambalat, Tobías, Guésem árabe aents aatus dushiktamainak aatus tujabianume: “¿Waji aikash batsamtagme atumesh? ¿Apu intimjuki atumek takakjumek aniajum?” tusa tujabianume.

<sup>20</sup> Tusa tujamainakui wi ditan ayaakun:

“¡Apajú nayaimpinmayaya nunú yaimpasmatai, niina inake aidautik juju tsaikbau aina duka ashí iwaja ashimkattaji! ¡Tuja atumek makichikish juka diimainchau ainagme, nuigtush Jerusalén pachisjumek makichikish chichamaitsugme, dekachu asajum!” tiabi-ajai.

**4**

*Israel aents aidau takatan emtikainum tusag shiwag aidau utugchatan apujtusagbau*

<sup>1</sup> Yaakat peejamu tusa nagkama takajin, Sambalat dekaa senchi kajekui.

<sup>2</sup> Nunik niina kumpaji aidau emtin, tuja suntag samarianmaya aidau emtinchakam dushikis Nehemíasan chichajak:

“¿Au nujantai jinattak yuja aniaush wajukatasaya anish yujawa? ¿Yaunchuk Apajuí emematuinak kuntuu maa apeyanum dutikatajum yamaish tujamchajaintash tusa aní yujatsuak? ¿Atsa nuniachkush makichik tsawantai takat ashimkami tuinatsuash? ¿Atsa nuniachkush kaya esaku tuwasua wegaka nuwiya yamajam kaya jiigmi tusag aní yuja?” tau.

<sup>3</sup> Nuna tai Amón aents Tobíaschakam nuwi wajau asa chichaak: “¡Yaaktan peegkeg emaina auk shiig wainkauchi! ¡Aunak kujancham nuwakesh awi wakug kupik ajuattawai!” tau.

### *Nehemías Apajuín ausamu*

<sup>4</sup> Tusa tuinakui wi Apajuín segaakun: “¡Iina Apajuíjyah, iina dushiktamaina nunú antukta! ¡Iina kajegtamainak dushiktamaina duka ditaig pempenkita, dutikawamin dita shiwaaji aidau depetuk achija tikich nugkanum yajuaktinme!

<sup>5</sup> ¡Dita pegkegchaujiya duka makichikish tsagkujaipa, tuja dita tudaujishkam esakatajaipa, wagki amina aentsjum aidau yaaktan ataktu peegtatman dushikina nuadui!” tiabiajai.

### *Shiwag aidau awanmakbau*

<sup>6</sup> Tusa Apajuín ausan idaikun takatnak mijattsuk emayajai, imatikau asan jimaituk peeja iwakabijai. Tuja aents aidaushkam shiig aneas wakekegat takayanume.

<sup>7</sup> Jerusalén peejamu yumpuagbau aidauk peeja ashí apaka emajin, Sambalat, Tobías, árabe aents aidau, Amón aents aidau, ashdodnumia aidau aatus nuna dekawag shiig senchi kajekajabi.

<sup>8</sup> Nunikag Jerusalégkan peegkeg emaina nunú tsaigkami, dutika awake anentaimtikjami tusag ijunag chichama unikajabi.

<sup>9</sup> Tusa tuinakui iina Apajuíjin ausabijajai, dutika idaikun jetepainakui ayamjumakmi tusan, aents jintan tsawai kashijai niimsatin aidaun etegjan batsakabijai.

<sup>10</sup> Untsu Judá wegantu aidau chichainak: “¡Aents kijinu yanau aina duka yaakat peejamu aidau tsaikbau tuwasua wegaka nuna diisag mijamainawai, nuadui kakajus ataktu peejaik ashimaitsuji!” tuyanume.

<sup>11</sup> Iina shiwaaji aidau anentaimsajag, eke dekainatsaig utua ijinami, dutika ajin takata emaina nunú idaimitkasagmi tusan anentaimianumtai.

<sup>12</sup> Tujash tikich judío aidau shiwag batsatbaunum ijus batsatu kaunawag ujpainak: “¡Au aents aina nunú ashí yantamnum kautjamkag jetepakagtai!” tusag kuashta ujpapayanume.

<sup>13</sup> Nuadui aents aidau dita patayi aidaujai juunikag yaakat peeja emamua nuna agájin, wake aidaunum, tuja eke peejachbau agkaju aidaunum aatus puyag aidaun, nagki aidaun, akentai aidaun yajuakjum dakamkatnume tusan tiabiajai.

<sup>14</sup> Tusa tai ishamainakui, wi wajantan aents eme anentsa diitai aidaun, apu aidaun, nuigtu ashí tikich aidaujai ijumjan chichagkun: “¡Ishamkaigpa, Apajuí senchigtina nunuwai dekas ishamainuk! ¡Ishamtsuk dekas atum wegantu múun aidau, dita uchiji aidau, nawanji aidau, nuwe aidau, dita jee aidau ayamjakjum maaniatajum!” tusan tiabiajai.

<sup>15</sup> Nuna iina shiwaaji aidau dekawag, dekas Apajuíyap ditanak yayawa, dutikamu asampap ii chicham umiamun dekagtamawaje tiajui. Tusa tiag wajantagmatai, yaakat peeja emamu idaisauti ataktu nagkama takayaji.

<sup>16</sup> Nuadui nagkamas mina aentsug aidauk jimaituk takatan takainai, tikich aidauk puyajan, nagkin, ejamatai tantag aidaun, akentai aidaun, nuigtu maaniaku nugkutai jiju najanamu aidaun aatus yajuakag uminas batsamianume. Tuja apu aidauk Judá wegantu aidau

<sup>17</sup> yaaktan peegkedaun yaianume. Tuja yaakat peejatnun chimpia juki ejegaidaush, yanakiag ejegaidaujai nagkamas ashí takainak yujayanume. Imanidau asag juinia uwejen takainak, tikich uwejen maanitai aidaun takaku aajabi.

<sup>18</sup> Ashí aents nuwi takaidauk maki makichik dita puyagjin akachumau aajabi. Untsu mina yantamjui uwija kachujin umpuagtin wekaeyi.

<sup>19</sup> Tuja aents eme anentsa diitai aidaun, apu aidaun, ashí tikich aents aidaujai chichajuinakun:

“Takatak shiig múuntai, iman asa ashimainuk kuasht awai, nuigtushkam maki makichik akanjamu aidauti atushat kanaja yujasa takainaji,

<sup>20</sup> nuadui iina shiwaaji aidau jetepagtaik, uwija kachuji shinuktatui. ¡Nunú antakjumek tupikaki, kaunajum yaijatkatajum! ¡Apajuí iina ayamjutpak, iina shiwaajijaig nii maaniattawai!” tiabiajai.

<sup>21</sup> Tuja ii jimaituk kanakuti kashi kashinig takainaku, kashikmas nagkamsa tuke etsa akapayaji, imaniajin tikich jimaituk kanaku aidau nagki takus shiwag minaun wainkatatus niimak ijunmayi.

<sup>22</sup> Tuja nuigtushkam nunú tsawantin aents aidaun chichagkun: “Atum takagmin yaimpau aina nujai ashí Jerusalén utsanatajum, nunikjum kashi jinta diistajum, nuniakjum tsawai takastajum”, tiabiajai.

<sup>23</sup> Nuigtush wika, mina pataag aidaujai, mina yaintin aidaujai, mina uyuntin aidaujai, tuja tikich aents jinta niimin aidaujai jáanch nugkuagbauk nunisaik makichkish yapagmamtsuk, nagki takusa jinta niimku ijuniaji.

## 7

*Apajuí chichame umiktin agagbaun aents tuwakbaunum Esdras ausamu*

<sup>73</sup> Ashí Israel aents maki makichik wegantu aidauk dita nugken batsamkajui, nunik batsatai nantu sieteya nunú takauwai.

## 8

<sup>1</sup> Nunikmatai ashí aents aidauk Jerusalégnun waitin daaji Yumi tutai aajakua nujai niinis ekemsa, ayamtai umikbau plaza tutai aajakua nuwi ijunajui. Nunik ijunag Esdrasan chichajuinak: Tuke Pujuu chichame umiktinun Moisés agag Israel aidaun susauwa nunú jukim itanta tusa tiajui.

<sup>2</sup> Tusa tima sacerdote Esdras chicham umiktin agagbaun juki aents aishmag aidau, nuwa aidau, nuigtu ashí uchi anentaimjau aidau aatus tuwakbaunum ejentauwai. Nunak nantu sieteya nunú taka makichik tsawan tsawaju ai dutikauwai.

<sup>3</sup> Dutika ejegan, kashikmas nagkamas aents tuwaka aunum nuna emtin wajas, au augkawa etsan tajipiuiwai. Nuna augtai ashí aents aidauk jasa ijunas puyatjus antu ijunu.

<sup>4</sup> Esdrasak aents tuwaka ijunbaunum nuna emtin numi yakí papamunum wajau. Tuja niina untsujiya nuni Matatías, Sema, Anías, Uriás, Hilquías, Maaseías aatus ditashkam ijunu. Nuninai untsu menajinini Pedafías, Misael, Malquías, Hasum, Hasbadana, Zacarías, Mesulam aatus dushakam ijunu.

<sup>5</sup> Nuwi Esdras waka wajau asamtai, ashí aents aidauk wainaidau, nuniamunum chicham umiktin agagbaun juki ausatatus ujatai, ashí aents aidauk wajainiajui.

<sup>6</sup> Nunikagmatai Esdras Tuke Pujuu ashí senchigtinun emematiuuiwai. Nunitai ashí aents aidauk uweje takuiniag aimainak: “¡Aatus ati, aatus atil!” tiajui. Nuna tusag tikishmag pujusag tsuntsumawag nijayin nugka antig pujusag Tuke Pujuum emematiujui.

<sup>7</sup> Tuja Leví wegantu aidau: Josué, Baní, Serebías, Jami, Acub, Sabtai, Hodías, Maaseías, Quelitá, Azarías, Jozabad, Hanán, Pelafías aatus nunú chicham umiktin agagbauwa dusha wajina takug tawa nuna aents aidaun shiig ujaidau. Tuja aents aidauk dita wajamunmak nuwig jasa ijunu. <sup>8</sup> Nunik ijunai chicham umiktin agagbaun senchi jiikag aujuinak, shiig paan antuktinme tuidau asag: Junak taku tawai tusag dita chichamen ujaidau.\*

<sup>9</sup> Nuna aujiagtai antuinak, ashí aents aidauk buutuidau. Nuniagtai gobernador Nehemías, sacerdote Esdras, nuigtu Leví wegantu aidau aatus aents aidaun ujinai asag ditan chichajuinak: “¡Wake besemjak anentaimigpa, tuja buuttash buuttigpa!” tiajui. Nunak tiajui, wagki nunú tsawanta duka Apajuí emematmi tusa etegkamu asamtai.

<sup>10</sup> Tuja nuigtu Esdras ditan chichajak: “¡Jemin wejum yujumak shiig yuwajum, umutai vino yumimitu uwagtajum, nuniakjum juju tsawanta duka Apajuí emematku ijuntai asamtai, yumain umikbau atsujaidaujai ajamdaisatajum! ¡Wainka wake besemag anentaimigpajum, Tuke Pujuu dakunkutan ama nunú iinak ichichtamu asamtai, shiig aneasjum jiistamatajum!” tiuwai.

<sup>11</sup> Tuja Leví wegantu aidaushkam ashí aents aidaun anentain ichichtuinak: “¡Buuttuk itatkatajum, juju tsawanta duka pegkejam Apajuí tsawanji asamtai, uyumaku wake besemag dakapeamuk atsumainai!” tuidau.

\* **8:8** “Dita chichamen ujaidau” tawa nunak, chicham umiktin agagbau aajakua duka hebreo chichamnum agagbau asamtai, arameo chichamnum ujakaju aina nuna taku tawai. Israel aents aidau achija Babilonia nugkanum yajuakam batsamsau aina duwi nagkamas arameo chichamnak unuimaju ainawai.

<sup>12</sup> Tusa nunú chicham jintintuam shiig antukaju asag, ashí aents aidauk yujumkan yuwinak, umutain umuinak tikichdau yumain umikbau atsujaidaujaish ajamdaisata tusag shiig aneas shiyakajui.

*Numi kanawe aakmaja batsamsamu tsawan jegamtai jüstamamu*

<sup>13</sup> Nuna inagnakag kashinia duwi maki makichik wegantu aidaun apuji aidau, sacerdote aidau, Levi wegantu aidau aatus ashí Esdrasjai ijunjajui, chicham umiktin agagbauwa dusha wajina takug tawa tusa aujus diinak.

<sup>14</sup> Dutika auju batsamtukma Tuke Pujuu Moisésan jintintak, Israel aents aidau numi kanawe aakmajag batsamsajua nunú tsawantin nuna anentaimtusag, numi kanawen aakmag batsamas Apajuin emematuinak jüstamatnume, tusam ujakta tibau agagbaun wainkajui.

<sup>15</sup> Nunikag ashí yaakat aidaunum, tuja Jerusalégnunshakam, ashí aents aidau, mujá shiyakag olivo kanawe aidaun, arraya duke aidaun, palmera duke aidaun, nuniachkush tikich numi kuashat dukentin kadaukdauju aidaun egaktinme, Apajuu chichame umiktin agagbaunum tawa dutiksaik aakmagtinun, tusa tibau antuekauwai.

<sup>16</sup> Nuna antukag aents aidauk dita jeen yaki aakmaktinun, tuja jega agaaji aidaunum aakmakagtinun, nuigtushkam jega pegkejam Apajuí emematku ijuntai jegamkamunum waitijin jegantatak agkaju ayatak shugku ajigbauwa nuwi aakmaktinun, tuja waitin daaji Yumi tutaya nuwi plaza awa nujai niniaku aakmaktinun, nuigtu tikich waitin daaji Efraín tutainum plaza awa nuwi aatus aakmajagtinun numi kanawen tsupig ikaunmawajui.

<sup>17</sup> Ashí aents achijam yajuakbau aidau waketjau aidauk betek aakmajajui, dutikawag nuwi utsanawajui. Nunak aents Nun daagtin aajakua nuna uchiji Josué pujusmatai dutikau aina duwi nagkamas, dutiktuk idaisamun imapam nunú tsawantin dutikawajui. Nuadui shiig aneaku dakujamu asauwai.

<sup>18</sup> Tuja nunak siete tsawantai jüstamawajui, nuninak yama nagkamchak tsawan tsawagbaunum nagkamas chicham umiktin agagbaun Esdras kashi kashinig au augkawa jüsta amuebaunum inagnakui. Nuna inagnak tsawan ochoa duwi ijunjajui, nunikag nunú tsawantinish wajinak dutiknush aajabi nuna betek umikajui.

## 9

*Israel aents aidau tudaujin Esdras etsegtukbau*

<sup>1</sup> Nantu sieteya nunú takau ai, tsawan veinticuatrotrin Israel aents aidau yujumka yutsuk batsamas Apajuin ausagtatus ijunjajui. Nuninak jáanch pegkegchaun nugkujag, buuken nugka yukukuntun yukumajag,

<sup>2</sup> aents tikich nugkanmaya dita wegantuchu aidau ijunbaun ukukiag, ditash kanakag ijunas dita pegkegchau takamsamu aidaun, dita muunji aajakua aidau pegkegchau takamsau aidaujai ashí etsegtumakajui.

<sup>3</sup> Tuja nunisag ijunaig chicham umiktin agagbaun Tuke Pujuu dita Apajuji ditan susauwa nuna kampatum horayai ausajui. Tuja tikich kampatum horaya duwi dita pegkegchau takamsamu aidaujin etsegtumakajui. Nunikag nuadui Tuke Pujuu dita Apajujiin emematiajui.

<sup>4</sup> Nuna inagnakag, Levi wegantu aidau: Josué, Binuy, Cadmiel, Sebanías, Binuí, Serebías, Baní, Quenani aatus numi yaki papamunum wakajui. Nunikag nuwi ijunas senchi untumak, Tuke Pujuu dita Apajujiin ausajui.

<sup>5</sup> Dutikawag Levi wegantu aidau: Josué, Cadmiel, Binuy, Hasabnías, Serebías, Hodías, Sebanías, Petahías aatus aidau chichainak:

“¡Wajaitajum, nunika ijuntsajum Apajuí Tuke Pujuuwa nunú yamaish ajumaish tuke ememattajum! ¡Apajuí daaji dekash tikich aidaun nagkaesau ima pegkegma nunú kantamjakjum shiig ememattajum!” tiajui.

<sup>6</sup> Tusa tiagmatai Esdras chichaak:

“Tuke Pujuuwah, tikich apajuí amejai betekak makichkish atsawai, ima ameketme Tuke Pujuumek. Ame nayaimpik najanauwaitme, tuja nuna nagkaiki awa dushakam ame najanauwaitme, dutikam ashí yaya aidaushkam najankauwaitme. Nugkashkam, tuja nugkanum ayá dushakam ashí ame najanauwaitme. Tuja nayants aidaushkam najanam nuwi ayá dushakam najankauwaitme. Ashí waji aina duka ame pujutak suwame. Nuadui yaya nayaimpinum ayá duka amina emematjamainawai.

<sup>7</sup> Tuke Pujuuwah, ame Abram etegkauwaitme. Dutikau asam caldeo aents aidau yaaktaji Ur aajakua nuwi pujau, ame jilkim niina daaji yapagtuam Abraham adaukauwaitme.

<sup>8</sup> Dutikam ima aminig kajinas anentaimu wainu asam, niijai ame chicham umiakum:



Canaágnumia aents aidaun nugke, hitita aents aidaun nugke, amorreo aents aidaun nugke, ferezeo aents aidaun nugke, Jebús aents aidaun nugke, gergeseo aents aidaun nugke aatus aina nuna ame wegantu aidaun susatnaitjai tusam, anagkuawaitam duka betek umikuitme.

<sup>9</sup> Iina muunji aajaku aidau Egipto nugkanum batsamas waitujaku aina duka amek wainkauwaitme. Tuja nayants kapantu tutainum jegawag buutuidaush ame antugkauwaitme.

<sup>10</sup> Nuadui faraón ashí niina inake aidaujai, tuja nunú nugkanmaya aidau ashí suwimak suwakum ishain wainchatai aidau iwainajuitme, wagki Israel aents aidaun shiig pegkegchaunum waitkaidau asagmatai. Dutikau asam yamaik ameketme dekas pegkegnum augmattaimék.

<sup>11</sup> Ditash wainainai nayants jimaituk akanka buku awajsabiume. Dutikamunum katiajajui. Untsu shiwag aidau ditan pataetukajua duka nayantsa ejapeen dekas shiig kunajin kayajai betek aepá emegkagmayume.

<sup>12</sup> Dutika ayamjukam tsawai shimakui, yujagkim emtika awantamin, nuna diisag shimuyanume, untsu kashi jii kegau emtika awantamin jintan tsaaptin emamtai, shiig shimuyanume.

<sup>13</sup> Tuja tikich tsawantin muja Sinaínun akaikiuwaitme. Tuja nayaimpinum pujusam ditajai chichasuitme. Nuwi susauwaitme chicham umiktin shiig pegkeg aidau agagbau.

<sup>14</sup> Tuja tsawan ayamtai ame etegkauwaitam nunú jegakuig, nunú tuké dutikin atajum tusam jintintuawaitme. Tuja chicham dekaskenum umiktin agagbau Moisés susauwaitme, nuna umiktinme tusam.

<sup>15</sup> Tuja nuigtushkam dita yapajainak waituinakuish, nayaimpinmaya pag susauwaitme, nuna yuwawag ichichmamjatnume tusam. Tuja kitamainakuish uwagtinme tusam, kayanmaya yumi susauwaitme. Nuigtushkam nugkan amastinaitjime tusam anagkuawaitam nunú jukitajum tiuwaitme.

<sup>16</sup> Tujash iina muunji aajaku aina duka emebau, antakchau wajasu aajaku ainawai. Nuadui amina chichamem umiktin agagbaunash umikchau ainawai.

<sup>17</sup> Nunidau asag amina chichamjum umitan dakitjag, ame dita yayaakum wainchatai ishain aidau iwainajuitam nunashkam kajimatkiajui. Nunidau asag amina chichama intinjupakiag, tikich apun adaikajabi ataktu Egipto nugkanum awagtamki waitkam batsabiag nuwig ejetamatnume tusag. Tujash amek tsagkugkagtin, anejatin, wait anenkagtin, nuigtush kakajus kajechuitam duwi kajimatkimék idaisachuitme.

<sup>18</sup> Jiju ukuijag baka tsakatan dakumak najanawag, jujuwai apajui, ii Egipto nugkanum waitkam batsatutin jügmajajua duka tusag emematuinak pegkegchaun takainakuish,

<sup>19</sup> uwegshunum jinaati tusamek idaitsuk wait anenjauwaitme.

Dutikam tsawai dita shimamunum yujagkim wajantun wejaku dusha, tuja kashi shimamunum yujagkim keeka wejaku dushakam emegkakchauwaitme.

<sup>20</sup> Nuigtushkam Wakani Pegkeji ditan jintintuatin susabiume, tuja dita yapajak yuwawagtin nayaimpinmaya yutai maná akaketkabiume, tuja kitamainakuishkam dita uwagtinuk sumayume.

<sup>21</sup> Tuja cuarenta mijan uwegshunum yujasag yuwawagtinush ame susabiume, tuja jáanchjigkesh mamugchagmayi, nawenigkish iyagchagmayi.

<sup>22</sup> Nugka múun aidau susauwaitme. Dutikau asam nunú akaantujam tesagkam maki makichik wegantu aidau tinamkauwaitme. Tuja apu Sihón aajakua nuna nugke Hesbón aajakua nunú, apu Og aajakua nuna nugke Basán aajakua nujai ame susauwaitme, dutikam nuna jukiag nuwi batsamsaju ainawai.

<sup>23</sup> Nuigtush nayaimpinum yaya ayá iman kuashat uchigtin atinme tusam tiuwaitme. Tuja dita muunji aajaku aidau anagkuakum, nugka atumdaun atinum amastinaitjime tiuwaitam nunú umiakum, yajuakam nunú nugkanum ejegauwaitme.

<sup>24</sup> Dutikamu asag nunú nugkanum utsanawag Canaán nugkan jukiajui. Tuja nuwiya aents aidauk chichaka ayamjumakchamin awajsauwaitme. Tuja dita apuji aidaushkam nuwiya aents aidaujai ashí Israel aents aidau, dita wakegamun dutikatnume tusam ditai idaisauwaitme.

<sup>25</sup> Nuigtushkam yaakat peejamu aidaun, nugka pegkeg ajak tsapau aidaun, jeganum waji pegkeg piyaku aidaun, yumi taimu aidaun, uva ajakmabbau aidaun, olivo ajakbau aidaun, aatus nuigtu tikich ajak jigkayi yujutai aidaun, shiig kuashat yajuakajui. Dutikawag nuna shiig yuwawag duwekajui. Aatus ame wait anenja kuitabau asag shiig batsamsajui.

<sup>26</sup> Nunik batsatiatak, aminak umigtamkachu ainawai. Nunidau asag amejai shiwagmagawag, chicham umiktin ame susauwaitam nunak dakitug idaisau ainawai. Tuja nuigtushkam amina chichamjumin etsejin profeta aidau ditan chichajak, aní batsamsuk Apajúi nemagkatajum tusa dita pegkegchaujain paan etsegtau asag kajegku ainawai. Dutikaidau asamtai, ameshkam dita kajegkauwaitme.

<sup>27</sup> Nuadui dita shiwaaji aidau waitkstinme tusam idaisauwaitme.

Dutikam batsamas waituinak amina segapajabi. Tusa segapainakui, amina anenkem múunta iman asamtai, nayaimpinum pujusam dita sumamu antugkam, ditan ayamjuk agkanmitkatin aidau aents etegtujuitme.

<sup>28</sup> Dutika ayamjukam machik agkan pujamuik, amina ataktu pegkegchaun takamjupagmayi. Nunidau asagmatai dita shiwaaji aidau waitkstinme tusam idaisabieme. Dutikam waituinak ataktu amina segapainakui, amek wait anenkagtin wajasuitam iman asam, dita sumamu nayaimpinum pujusa antugkam kuashta ayamjukam agkanmitkauwaitme.

<sup>29</sup> Tuja chicham umiktin agagbauwa nunú umiktajum tusameshkam ujayume. Tujash ditak eme anenmamaidau asag, amina chichamjum umiktin agagbaunak ajantusagkesh diischau ainawai. Nunidau asag amina chichamem pujutan sukagtina nunak umikchaju ainawai. Nuninak intimkiu antakchau wajasag, nunú chicham umitnak dakitjau ainawai.

<sup>30</sup> Imanik pegkegchaun takamainakuish, kuashat mijadai atsanjauwaitme. Nuadui aminí Wakan awa nujai, tuja amina chichamjumin etsejin profeta aidaujai ankaigpa tusam ujayume. Tujash ditak antukchaju ainawai. Nuadui aents nugka múun aidanmaya ditan depetuk waitkstinme tusam idaisauwaitme.

<sup>31</sup> ¡Dutikau ayatkum ame wait anenkagtutaigmek múunta iman asamtai, ashí ijintsuk, nuigtush ima ditakek idaitsuk kuitamkauwaitme, wagki amek Apajúi kak-agchauch, wait anenkagtinaitam iman asam!

<sup>32</sup> ¡Nuadui iina Apajúijiyah, amek múun, senchigtin, ishamain, ame chicham tibauk imatiksamek uminaitme, tuja amina anenkagmek múunta! Jutiin apuji aidau, tikich apu aidau, sacerdote aidau, amina chichamjumin etsejin profeta aidau, iina muunji aajaku aidau, nuigtu ashí aents aidau, Asiria nugkan apuji pujujakua duwi nagkamas waitujaku aina nunisaik yamaishkam waitiaji.

<sup>33</sup> Tujash ii imanika kuashat waittsa minag duka utugchatak aminuchui. Ii pegkegchau takasu asajin, amek amina chichamjum betek umiau asam suwimkak sukagtame.

<sup>34</sup> Iina apuji aidau, tikich apu aidau, sacerdote aidau, iina muunji aajaku aina dushakam, chicham umiktin agagbaunak umikchaju ainawai. Tuja pegkegchau takasaigpa, suwimak jukittagme tusa ame ujamash antukchaju ainawai.

<sup>35</sup> Nunidau asag ame apu emam apusamuitak, tuja nuigtush shiig kuashat waji aidau susamaitak, nuigtush nugka pegkeg shiig tsapau susamuitak, nunak kajimatug emematjamchaju ainawai. Nunidau asag pegkegchau takamujinash idaisachu ainawai.

<sup>36</sup> ¡Diista nijah, ame iina muunji aidau nugka susauwaitme ajakmawag yuwatnume, nuninak wajigtin atinme tusam! ¡Nunú nugkanum batsamsa iina pegkegchaujain yamaikish wainka inaku waitkatai batsatji!

<sup>37</sup> Ii ajakmamu shiig kuashat juwag duka iina pegkegchaujain ame apu aidau sukagtusu asamin, dita yuwatin ajaaku waitiaji. Ii aidautinak nunú apu aidau iina tagkuji aidaujai niinu etamak waitkagmainawai. Nuadui shiig pujuschamin dekapeakun waitiaji", tiuwai Esdras.

*Chicham umiktin agagbauwa nunú umikmi tusag Israel aents aidau tumamiagbau*

<sup>38</sup> Imanika waituidau asaja dekas chicham umiktin agagbauwa nunú umikmi tusa tumamainaji. Nuadui nunú pachisa papiinum agaji. Nunú papii agaja umikbaun iina apuji aidau, Leví wegantu aidau, sacerdote aidau aatus dita daajin apujawag firmainawai.

## Job Job pachisa yama nagkamchaku agagbau

(1—2)

*Job waittsamu*

<sup>1</sup> Makichik aents aajakui Job daagtin, pegkejam, utugchatji atsuju, Apajuí inake, pegkegchaun takasaig tusa kuitamamin aajakui. Niig Us nugkanum pujujakui.

<sup>2</sup> Jopa uchijig aajakui siete aishmag, kumpatum nuwa.

<sup>3</sup> Niina tagkuji aidauk: siete mil uwig, tres mil camello, mil buey, nuigtu quinientos burro nuwa aidau aatus aajakui. Nuigtushkam niina inake aidauash kuashat ajujakui. Etsa minitainmanini tikich aents batsamajakua nuna nagkaesau nii ima wiakuch aajakui.

<sup>4</sup> Niina uchiji aidauk maki makichik tsawantan etegkawag yujumka umikag yuwinak jüstamajaku ainawai. Nuna jüstamainak dita umayi kumpatum aajakua nuna tuké ipajaku ainawai.

<sup>5</sup> Nuna ashí uminkagmatai Job anentaimas, namputchawame mina uchig aidau Apajuín pegkegchaun takagsachajeash tusa, niina uchiji aidau untsuka ijumag, kashikmas nantaki dita tudauji tsagkugnagtinun kuntu maa nuna nejen ashí apeak Apajuín emematujakui.

<sup>6</sup> Makichik tsawantai Apajuí aentsji ángel aidau Tuke Pujuuwai jegantagtin ainai, iwanchakam Apajuíyai jegantui.

<sup>7</sup> Nunikmatai Tuke Pujuu niina iniak:

“¿Tuwiyamea miname?” tama iwanch ayaak:

“Ashí tikich nugkanum wekagun minajai”, tiuwai.

<sup>8</sup> Tutai Tuke Pujuu ayaak:

“¿Mina inakeg Job ima minak umigtinuwe dusha wainkachmakum? Aents ashí nugkanmaya aidaujai ijumja diyamash, niig ima minak umigtak, wi wakegamunak takak, pegkegchaun takatsuk pujuuwe imanuk makichkish tikichik atsawai”, tiuwai.

<sup>9</sup> Tusa tutai iwanch Tuke Pujuu ayaak:

“Tujash amina umigtama nunak tikima wainkag umigtamtsui.

<sup>10</sup> Niina, tuja niina nuwe, niina uchiji aina nuna, niina wajiji aidaujai waitkasainum tusam tuke kuitamjame. Tuja niina takatjinish ame kuashat ikauntame. Nuadui au nugkanmak tikich aidau nagkaesau nii ima tagkugtinai.

<sup>11</sup> Tujash diik niinu aina nunú atankikiah, dutikamak aminak pegkegchaun chichag-tamkattawai”, tiuwai.

<sup>12</sup> Tusa tutai Tuke Pujuu iwanchin ayaak:

“Dekas tame. Niina wajiji aina duka ame itugkatag tame dutikata. Tujash nigka makichkish antigkaipa”, tiuwai. Tusa tima, iwanchik Tuke Pujuuai chichaak pujau jiinki Job pujamunum weuwai.

<sup>13</sup> Makichik tsawantai Jopan uchiji aidau, nawanji aidaujai niina uchiji iwai aajakua nuna jeen yujumka umikag ijunag yuwinak jüstamainak batsatai,

<sup>14</sup> makichik aents tupi tupikakua Jopa jeen taa niina chichajak:

“Mina kumpag aidaujai baka nugkan pukuakui batsatjin, burro nuwa aidau ii pujamunum tikiju dupan yuwak ijunmae.

<sup>15</sup> Nuniamunum pachiachbau arabianmaya sabeo aents aidau kaunawag, ashí juju tagku aidau kasamak yajumainak, mina kumpag aidau kuchiyai ijuag kajegmae. Dutikainakui ima wiki tupikakin uwemjan taajai amina ujaktasan”, tau.

<sup>16</sup> Tusa eke etsejak wajaig, tikich inak tupikaki taa chichaak:

“Chaajip iyaak uwija kuitamin aidau uwigjai ijiname. Dutikamtaí ima wiki uwemjan amina ujaktasan tupikaki taajai”, tau.

<sup>17</sup> Tusa eke etsejak wajaig, kumpatuma nunú tupikaki taa chichaak:

“Caldeo aents aidau kuashat kaunawag jetepakag depetamak, camello aidau yajumainak, tagku kuitamin aidau kuchiyai iju kajegkagmae”, tau.

<sup>18</sup> Tusa eke etsejak wajaig, tikich tupikaki taa chichaak:

“Amina uchijum aidau nawanjum aidaujai uchijum iwai jeen yujumka umikag yuwatatus batsatai,

<sup>19</sup> pachiachbau dase uwegshunmaya dasentak jegan umpui kupik ajuak, amina uchijum aidau ashí ijiname. Dutikamtaí ima wiki uwemjan amina ujaktasan minajai”, tau.

<sup>20</sup> Nuna antuk, Job wajaki wake besemag dekapeak, jáanchjin japiki ichigka, awamajui pinuin. Nunik Apajuin emematak tikishmag pujus tsuntsuma nijayin nugka antig pujusui.

<sup>21</sup> Nunik pujus chichaak:  
 “Juu nugka juwi akiinkunuk wajigtuchu akinawaitag,  
 nunisnuk jaknushkam  
 wajigtuchu jakattajai.  
 Tuke Pujuu mina ashí sujusua nunú  
 nigki ashí jujutkine.  
 ¡Nuadui ima Tuke Pujuu  
 pegkegma nuna ememattajai!” tiuwai.

<sup>22</sup> Aatus imaanik waitiakush, makichkish pegkegchaunak takamsachui, nuigtush Apajuinash pegkegchaunak chichagkachui.

## 2

### *Jopan ataktu dekapsamu*

<sup>1</sup> Makichik tsawantai Apajuí aentsji ángel aidau Apajuíyai jegantagtin ai, iwanch niishkam jegantui.

<sup>2</sup> Nunikmatai Tuke Pujuu niina iniak:  
 “¿Tuwiyamea miname?” Tama iwanch ayaak:  
 “Ashí nugkanum wekagun minajai”, tiuwai.

<sup>3</sup> Tutai Tuke Pujuu ayaak:  
 “¿Mina inakeg Job ima minak umigtinuwe dusha wainkachmakum? Aents ashí nugkanmaya aidaujai ijumja diyamash, niig ima minak umigtak wi wakegamunak takak, pegkegchaun takatsuk pujuuwe imanuk makichkish tikichik atsawai. Tuja ame utugchat atsujaig, dekapsatjai tusa segatkumin dutikata timajame. Tujash ame imatika uchiji aidau, tagkuji aidau ijutuamash nigka shiig umigtawai, nii pegkegchau takamuk atsujuí”, tiuwai.

<sup>4</sup> Tusa tama iwanch Tuke Pujuu ayaak:  
 “Makichik aentsuk niina iyashin najaimamuji atsugmak shiig pujawai. Unstu najaimamu achiamak jakaig tusa nii wakegamun dutikattawai.

<sup>5</sup> Diik najaimaku waitmain susakia, dutikamash wajukatig, nunú dutikamak jakaig tau asa amesh antamin pegkegchaun chichagtainai”, tau.

<sup>6</sup> Tutai Tuke Pujuu iwanchin ayaak:  
 “Dekas tame. Ame itugkata tame dutikata. Tujash niina pujutjig antinkaipa”, tau.

<sup>7</sup> Tusa tima iwanch Tuke Pujuujai chichaak pujau jiinki Job pujamunum nugká weuwai.

Nunik Jopan jatan susauwai, dutikam jata iyashnum amujatin shiig kuashat ashí iyashnum amuuwai.

<sup>8</sup> Imatika amuamu asa atsanmainchau dekapeak, tsuwat ijumja apetainum jeganta yukunum pujusui. Nuwi pujusa jakachin juki duwi bechmamajakui.

<sup>9</sup> Imani pujutai niina nuwe chichajak.  
 “Apajuí nemagkum shiig pujakmesh pegkejak jukichume. Nuadui Apajuí antug wekaetsuk pegkegchau chichagkam, jaka ajapnata”, tau.

<sup>10</sup> Tusa tama Job ayaak:  
 “¡Duwajuh, nuwa anentainkachujai betek chichakaipa! Apajuí waji pegkeg aidau kuashat amaakui juwag dutiksaik, nii pegkegchaun amaakuishkam jumainaitji”, tiuwai. Tuja imanik waitiakush makichkish pegkegchaunak takamsachui, nuigtush pegkegchaunakesh Apajuínak chichagkachui.

### *Jopa kumpaji aidau niina ijagsatasag jegajuawagbau*

<sup>11</sup> Jopa kumpajig kumpatum aajakui: Temágnunia aents Elifaz, Súah nugkanmaya Bildad, Naamat nugkanmaya Sofar aatus aajakui. Nunú aidau Job jak shiig senchi waitiawai tabaun antukag, ijagsami anentai ichichtaku tusag shimutkajui.

<sup>12</sup> Nunik shima shimakua jegattak wesag diikma, Job ashí jaka yaunchuk aajakbaunak yapajina pujaun wainkag senchi jiika buutiajui. Nuninak wake besemag dekapenak jáanchjin japiki ichigkajui, dutikainak nugka yukukuntun atsaaki jukiag yaki nagki-mawag dita buukeenishkam ukatmamkajui.

<sup>13</sup> Nunikag Job pujamunum jegantag pujusajui. Nunik siete tsawan, kashishkam imanishag siete kashi makichkish chichatsuk batsatu, wagki Jopak najaimak shiig senchi waitiau asamtai.

## **Job niina kumpaji aidaujai chichashbau**

## 3

(3—27)

*Job senchi waitiak kajeka chichakbau*

<sup>1-2</sup> Jopak imanik waitiakush, chichatsuk pujau tikima atsanmainchau dekapeak chichakui. Nuniak:

“Wika akiinmainchaunas  
akiinawabiagtai tajai.

<sup>3</sup> ¡Tsawan wi akiinamua  
duka pegkegchau atin ati!

Tuja wi akiinamtai kashi chichainak:  
Aishmag akiinae tujutiu aina dushakam  
pegkegchau atin ati.

<sup>4</sup> ¡Wi akiinawaitag nunú tsawannak  
Apajuí suwe emamainnas aikachamiatai,  
Apajuí nunú tsawantan kajimatkiu ataik,  
tsawaumainchaun tsawajui!

<sup>5</sup> ¡Wagkag nunú tsawantinish  
makichik suwe dupajam iyagchabi!  
¡Nunú tsawannak yujagkim suwe ijia  
emegkaumainnas aikachamiatai!  
¡Etsa etsantun epenak suwe ishamain  
emama imatika emegkaumainnas aikachamiatai!

<sup>6</sup> ¿Wagkag nunú kashia duwi mina dukug  
ejapjukua dusha, suwe wajas megkaekachabi?  
¡Nunú tsawantin kashi mina dukug  
mina ejapjutkauwa duwi nagkamsag  
tsawan aidauk, nantu aidauk, mijan aidauk  
dekapamainchaus ayatai!

<sup>7</sup> “¡Mina dukujuk nunú kashia duwik  
ejapjuchu wemainnas nunikchamiatai,  
nunikuitkuig makichik aentskesh  
aishmag akiinae tusag tumainchau wajakajui!

<sup>8</sup> ¡Tunchi aidau, makichik kuntin múun  
nayants puju Leviatán tutaya nuna iwishtug  
nii wakegamu dutikati  
tumainnas dutikachajabiatai!  
Nunú tunchi aidaush

¿wagkag nunú kashi aajakua nunash emesjachajabi?  
dutikau agtaik mina  
dukujuk ejapjumainchau wajakui.

<sup>9</sup> ¡Yaya tsawagtatak etsantin aidau,  
mina dukug ejapjutkamtai,  
ejampek etsanjau aina  
nunak etsanmainchaus ayatai.

Tsawan tsawagmatai, etsa jiinu  
wainna duka wainnamainchau wajakui!

<sup>10</sup> ¡Mina dukug kashi ejapjutkauwa nunú  
kashia duka pegkegchau atin ati!  
wagki jakati tutsuk

akiinati tusa tujutiu asamtai,  
nunú kashi aajakua duwi akiina pujusan,  
senchi waitiag ankatin asamtai.

<sup>11</sup> ¿Wagkanuk mina dukujui  
egkemsanuk jakachamiaja?  
Nuniachkunush ¿wagkanuk  
yama akiinmawaik jakachamiaja?

<sup>12</sup> ¿Wagkag wi akiinamtaish,  
mina dukujush kuitamjukabi?

¿Wagkag muntsujinash amunstuawabi?

<sup>13</sup> Yama akiinmawaik jakauwaitkunuk,

utugchatji atsugbau shiig kanak tepemaina  
numamtuk, yamai ayamkun tepemainaitjai.

<sup>14</sup> Yaunchuk jakauwaitkunuk apu aidaun,  
dita atuwe aidaun,  
jega múun aidaun jegamjau aidaun  
jinawajua nujai ijunja pujumain wajajai.

<sup>15</sup> Nuniachkunush maki makichik nugka apuji  
aajaku aidaun, dita pujusa  
inamtaiji aajakunum oro  
aidaun, jiju plata aidaun  
utuamajaku aina nujai  
ijunjan pujumain wajajai.

<sup>16</sup> ¿Wagkag uchi jakau akiidaun  
ukusa ajapin aina dutika ajapjuachajabi?

<sup>17</sup> Aents pegkegchau jakauk,  
pegkegchaunak taka pujumaitsui,  
tuja tikich aentsnashkam  
pegkegchaunum inakug waitkamaitisui.  
Tuja aents pimpiki yaweja  
pujaushkam jakug ayamui.

<sup>18</sup> Nuwi batsamas achikbau  
aajaku aidaun agkan batsatui,  
wagki takata apuji senchi takatsjume,  
tusa jiyaku suwimchamu asag.

<sup>19</sup> Nuwig batsatui aents  
eme anentsa diitai aidaun,  
imanchaush aidaushkam betekmas batsatui.  
Inaku waitkatai jinau aidaush  
apuji waitkascham agkan batsatui.

<sup>20</sup> “¿Wagkag Apajuish aents  
waittsatnunash akiinati tawa?  
¿Wagkag aents kuashat waitianash  
iwaku pujusti tawa?

<sup>21</sup> Aents jakatatus egauk wamak jatsui,  
waji pegkeg akik uukbaun wainkatatus  
egama imatika jakatatus egakush jatsui.

<sup>22</sup> Nunú aents shiig aneamujiya duka  
jakamtai ukusam megkaga nunuwai.

<sup>23</sup> Niinash waji utugchatak ajiti nunak  
Apajuik dekamiktisui.  
Nuadui aents wainmachujai betek,  
jinta wetai epenbaunum  
wetakama tujimaina numamtuk wajawai.

<sup>24</sup> “Yujumak yumainun idaikun,  
wake besemag dekaapeakun buuttjai,  
umutain umakun pujumainun  
senchi waitiakun kajeajai.

<sup>25</sup> Ashí mina ishamtaig ayá nunú,  
dekas mina uwaktin ayá nunú  
yamai waitkajawai.

<sup>26</sup> Makichkish ayamainchau dekaapeajai,  
mina anentaijun ichichtujug  
shiig anentijumainuk atsawai.  
Shiig aneasan agkan pujumainchau,  
ayatak waugkamin dekaapeajai”, tiuwai Job.

#### 4

*Elifaz Jopan ayaak chichakbau*

<sup>1</sup> Job chichaka inagnakmatai, Elifaz yama nagkamchak Jopan ayaak aatus tiuwai:

<sup>2</sup> “Makichik aentskesh aujtamsatag takuig,  
kajegmainaitme.  
Tujash chichatskek idaimainchau dekaapeajai.

<sup>3</sup> Wika ame tikich aents aidau  
jintintin aayum nunak dekajai.  
Tuja aents kakaakchau aidaush  
anentai ichichtin aayume.

<sup>4</sup> Aents wake besemag pujaush  
ame niina anentai ichichtuyume.  
Tuja aents jakatag taushkam  
ame jakai tusam yayume.

<sup>5</sup> Amek sapigmamaitsume,  
tuja yamai waitiam dushakam ishamaitsume.

<sup>6</sup> “Amek Apajuik tuké shiig umignaitme,  
amek aents pujutji shiig pegkejaitme.  
Imanmesh ¿wagka Apajuíyaish dekaskeapi tumaitsume?

<sup>7</sup> Aents pegkeja takaun,  
Apajuí kajejuk mauwai tabaush  
antukuashitam, nunú anentaimsa diista.

<sup>8</sup> Kuashat mijan pujau asan,  
utugchatan wainka weakun dekajai,  
aents magkagtak pegkegchaun takauk,  
dutiksaik iikuum auwai.

Wagki duka aents nii ajakmamujinia  
nejekun juuwama numamtinai.

<sup>9</sup> Dita pegkegchaun takaidau asamtai,  
Apajuí kajejuk dasejai betek umpui ijinui.

<sup>10</sup> Aents pegkegchau aidauk  
ikamyawajai betek,  
kajeak senchi shinak  
tikich aentsun maatag tutaish,  
Apajuí nunak ikamyawa nai kupijam itatama  
numamtuk itatmitkaktatui.

<sup>11</sup> León nii yuwatnujin  
wainkacha jamaina numamtuk,  
nunú aents aidauk jakagtatui.  
Nunikagmatai dita uchiji aidauk  
pampagkag megkaejagtinai.

<sup>12</sup> “Tikichish antuinatsaig  
takamtak chicham tajutuae,  
nuna takatkamat  
shiig pegkejan antukjai.

<sup>13</sup> Aents aidau kashi  
kaja achiam kanuinai,  
wika kanumainchau dekapjamjai.

<sup>14</sup> Sapigmamu achigkame,  
mina iyashjuk ashí kujaime.

<sup>15</sup> Mina yapijui dase  
umpuntun dekapjamjai,  
dutijakui iyashjui anchiajua nunin dekapmajai.

<sup>16</sup> Makichik aents nuwi wajame.  
Nuna wi wainkamjai.

Tujash niimesh dekas wajukuki  
nunak wainkachmajai;  
ashí itatjamunum untsujak,  
aatus tujutmae:

<sup>17</sup> ‘Aents aidauk ashí jau ainawai.  
Apajuik makichik aentsnakesh,  
ametme chicham betek umiimek,  
tusa tama amainuk shiig atsawai.

Tuja ametme dekas  
 pegkegchau takamchaumek,  
 tama amainchakam shiig atsawai.  
 18 Apajuik niina aentsji ángel aidaunakesh,  
 tikima shiig kajittsag diyatsui.  
 Apajuí diismak ditashkam  
 tikima pegkegmak ainatsui.’  
 19 Nuadui aents aidauk  
 ima pegkegnakek takainatsui.  
 Maki makichik aents aina duka,  
 nugka jegamkamua numamtin ainawai.  
 Jega jegamin aidau  
 nugka yukukuntunum apuja,  
 jegamaina numamtin ainawai.  
 Nuadui dase dasentai yumpunak,  
 nuwi mamuk ayaun  
 yutua emegkauwama numamtuk emegkam amainai.

20 “Aentsuk kashikmasagkesh,  
 nuniachkush agkugkesh jaka megkaewai.  
 Nunikmataish makichikish pachinatsui.  
 21 Niina pujutig hilo yupichu tsujimaina numamtuk  
 tsujigkam megkaewai.  
 Aentsuk ashí unuimajag jatsui”, tiuwai Elifaz.

## 5

1 “¡Senchi untsunkata Jopah!  
 ¡Makichik aentskesh aipakchatpash,  
 nunú antukmi!  
 Ame yainkati tusa  
 segamainuk ángelak atsawai.  
 2 Aents pegkegchauwa duka,  
 Apajuíjai shiwagmagau asa jawai,  
 aents shiig anentaimkachunak,  
 kajegkagtutaijiya nunú maawai.  
 3 Wi wainjai aents pegkegchau aidau,  
 kuashat wajiigtin wedaun,  
 tujash machik asag  
 wamak niina jeen atantuinawai.  
 4 Niina uchiji aidaun, nawanji aidaun,  
 kuitamjumainuk atsawai.  
 Apu chichama epegkin aidaush  
 tuke aneas waitkainawai,  
 ditá ayamjumainuk atsawai.  
 5 Ajakmamujinash kuitamjuinatsui,  
 nuadui aents nujantai jinuidau nuna yujuinawai,  
 dutikainak jagkinmayanash  
 akuumtuk yujajus yajutuínawai.  
 Tuja wajiji aidaun diisag,  
 imanun jukitag tinu aidau  
 kasajuk yajutuínawai.  
 6 Wake besemag dekapemua duka  
 ajakjai betekak nugkayag tsapatsui.  
 Tuja waitiamua dushakam  
 nugkanmayag tsapatsui.  
 7 Jii kegaunmaya kaiji  
 tsachigtuk shimuwama  
 numamtuk aentsuk  
 waittsatatus akiinainawai.

8 “Wika ametkunuk  
 Apajuí yainkati tusan segamainaitjai,



tuja wi waitiamua nunak  
Apajuín idaitumainaitjai.

<sup>9</sup> ¡Apajuí iwainawai kuashat waji wainchatai ishamain aidaun,  
tuja nunash wajuk dutikawaki nuna  
dekaa ejemainuk makichkish atsawai!

<sup>10</sup> Apajuí yuminak nugká yutumtikawai,  
nunú yumi yutak ajak aidaun ukatui.

<sup>11</sup> Apajuík aents kakagchauch aidaun  
eme anentai emawai.

Tuja aents patayi jajukam  
wake besemag pujaunashkam  
anentain ichishtawai.

<sup>12</sup> Aents pegkegchaun dutikatasa  
anentaimas umiaunash Apajuí yapagtinai.  
Dutika yapagtuam wainak nagkaanui.

<sup>13</sup> Aents niina yachajin pegkegchaun  
dutikatatus umiaunash

nii umiamujinig pempegki ajua emegkainai,  
dutikak nii anentaimtugbaun yapagtuam wainak nagkanui.

<sup>14</sup> Tikichin pegkegchaun  
takamtiksatatus yuja duka,  
kashi numi tukumka iyaumaina  
numamtuk wajainawai.

Tsawai aentsun tsanuina dushakam,  
wainmachujai betek ainawai.

<sup>15</sup> Untsu Apajuík aents kakaakchau  
niina shiwaaji waitkam pujaunash,  
nii ayamjuk uwemtikawai.

<sup>16</sup> Tuja aents kakaakchau aina duka,  
Apajuí ayamjutuk  
uwemtijugti tusa dakainawai.

Apajuík aents pegkegchau aina nunú,  
tikich aents kakaakchau aina nuna,  
kuntin yutaijin, yuwa amuwama  
numamtuk amukti tusag idaitsui.

<sup>17</sup> “Nuadui aminak Apajuí  
suwimkan amasmatai waitiau asam,  
¡amek shiig aneasta!

Apajuí ashí senchigtina nunú  
jintinjamak aikagma nunú dakitjaipa.

<sup>18</sup> Tuja nii jata amasmatai jam nunashkam,  
nigki etsaentamjattawai.

Tuja nii waittsati tujamatai  
waitiaminchakam, nigki yaimpaktatui.

<sup>19</sup> Ame ishamainnum pujutaish,  
nigka kuashta aminak  
agkanmitkagmattawai.

Tuja pegkegchauwa nunú  
waitkasti tusag idaitamsashtatui.

<sup>20</sup> Nujan tepeamtaish  
nujantai jakai tusa yaimpaktatui,  
tuja maaniamunmash  
nii ayamjutpaktatui mantamawainum tusa.

<sup>21</sup> Amina pegkegchaun  
chichagtamainakuish ishamkagtukaipa,  
duka makichkish uminkashtatui,  
wagki aminak Apajuí kuitamjamui.

<sup>22</sup> Nujantaikish, nuniachkumesh  
senchi waitiakmesh,  
amek duka dushiksam diitnaitme.

Tuja kuntin ikamia kajen aina dushakam ishamkashtinaitme.

<sup>23</sup> Ame ajagminig utugchat atsaunum  
agkan shiig takastatme,  
wagki ajagminig kaya awatmainkesh  
atsau pegkeg atinai.

Tuja kuntin kajen ikamia aina duka  
makichkish jetepakchagtinai,  
duka ayatak amina kumpajum agtatui.

<sup>24</sup> Nuadui amina jeminig  
utugchat atsau pujustinaitme,  
tuja amina tagkujum aidauk  
makichkish megkaekashtinai.

<sup>25</sup> Tuja amina uchijum  
wegantu aidauk shiig kuashat dupa ikam ayá iman agtinai.

<sup>26</sup> Trigo ajakbau tsawanji jegamtai,  
pegkejan tsamaka uminas aama  
numamtuk amek múuntuch wajasam  
jatanum jegamesh  
senchigtin, pegkeg pujutnaitme.

<sup>27</sup> Kuashat mijan pujau asan,  
utugchat nagkaetujua  
nunak shiig dekajai.  
Nuadui atak nagkaemagtinun tajam  
nunak dekaskenum tajai.  
Nijah, juju wi tajam nunú  
dekaskeapi takumek dekapkata”,  
tusa Elifaz Jopan tiuwai.

Elifaz, Bildad, Sofar, aatus Jopan ausajui. Dutikam Job inagnak ditan ayaak aatus tiuwai:

## 14

<sup>1</sup> “Aents nuwanum akiinauwa  
nuna pujutjig ujumke,  
untsu waitiamuji ima múuntai.

<sup>2</sup> Aentsu pujutjig yagkug kashikmas  
pegkegchin yagkujuk ajum kagaja  
megkagama numamtinai,  
nuigtushkam aentsu pujutjig etsa  
bikian wamak megkagama numamtinai.

<sup>3</sup> Wika wainkauchitag nuniaigkiap  
mina utugchatug diigtusam,  
suwimak sujustasam chicham umigtame.

<sup>4</sup> Pegkegchauwa duka pegkejak wemaitisui,  
nuna dutikmainuk makichkish atsawai.

<sup>5</sup> Aents aidaush wajupa tsawantak  
juju nugka juwish batsamsagtinaita  
duka ame dekame,  
tuja ii jakatnuk tsawantak mamikiamui,  
nunú inagkeakik pujumaitisui.

<sup>6</sup> Nuadui idaikagtusta diijattsuk,  
idaikagtusta agkan pujusagmi.  
¡Idaikagtusta takasa jukimui ii atsumamua nunú sumakagmi!

<sup>7</sup> “Aents numin ajakag  
nuna wajauti jeeka tsapai  
muumpagti tusa dakauwai.

<sup>8</sup> Tuja numi múun wajasa  
kagkapeen kukaja jakattak wajaush,

<sup>9</sup> yumi juki ukatjamak ataktu uchimea  
yama nagkamchaku ajak ajaamu tsapai,  
pegkeg samekbaun  
muumpama iman weawai.

<sup>10</sup> Tujash aents aidautik wamak jaji,

nunika jaka tuke megkaeji.

<sup>11</sup> “Tuja aents aidautik kucha aidau,  
entsa aidau, kuyuka buku waiyama  
numamtuk ainaji.

<sup>12</sup> Nuadui nayaim eke aigkik aents jakamtai,  
ukusbau aidauk ataktuk nantamainchau ainawai.  
Aents jakauwa duka tuke kanajujai betekai.

<sup>13</sup> “¡Apajuíyah, ame kajekbaujum  
nagkaetamai dekas jakatjai,  
nunikan aents jinau aidau  
batsatbaunum pujustajai  
tumain anentainjai!

¡Nuwi pujai ame wait anenjujam  
ataktu inantukminum tusan!

<sup>14</sup> Aents jakauwa duka  
ataktu anean nantakig pujumaitsui,  
wika aents jakau aidau batsatbaunum  
dakamkun pujuttajai,  
wait anenjug ayamtijugti tusan.

<sup>15</sup> Ame mina najatuaum  
wait anenmain diigsam untsugkuminig,  
wika aminak aimainaitjame.

<sup>16</sup> Ame mina kuitamjukta tau asam,  
wi takamug aidauk ashí wainme.  
Nuadui wi pegkegchaun takasmataish,  
tudau takasume tusamek tujutchattame.

<sup>17</sup> Duka tujuttsuk ame minak tsagkugtujam  
mina tudaujuk wampachnum egkea jukim  
shiig atushat ajapmainaitme.

<sup>18</sup> Dutikmain aminig  
ayatak muja aidau,  
buchig aidaujai yumpunawag  
amugama nuniaji.

<sup>19</sup> “Ashí aents aidauk iwaku  
batsamsagtatus wakegainawai,  
tujash ame duka yumi kayan  
taumama numamtuk awagme.

Dutikakum yumi yutak  
nugka yukukuntun tajaka,  
ajapama numamtuk  
aentsu pujutjig ajapeame.  
<sup>20</sup> Dutikam tuke emegkame,  
pujutchakam atankagtame,  
dutikam ukumatainum ekagtame.

<sup>21</sup> Aents jakauwa duka,  
aents iwaku aidaush  
dita uchiji aishmag aidau,  
nawanji aidaujai takatjin diigsash,  
shijash awagmaina nunak dekatsui,  
tuja pegkegchaun takagtaish,  
itujenawaki nunashkam dekatsui.

<sup>22</sup> Ima nii iyashin  
najaimamunak decapeawai,  
nuniak buutui”, tusa Job tiuwai.

## 19

<sup>1</sup> Nuna tusa nuigtu Job chichaak:

<sup>2</sup> “¡Make agkan idaitustajum, ipimtagme!  
¡Atum tujutjum duka

kuchiyai ijutbau najamaina imatijawai!

<sup>3</sup> Kuashta minak pegkegchau chichagtagme.

¿Mina jutika waitkajakjumes  
datsaamatsjumek?

<sup>4</sup> Wi pegkegchau takamsau

amainaitag duka,  
atumnak pegkegchawk etamait sui,

duka ima mina utugchatjue.

<sup>5</sup> Atumek mina nagkaetasu

pegkejam anenmamjume,

wi jakun kakaumainchau

wajasa pujag duwi

dushiktaku imatjutagme.

<sup>6</sup> Wi waitiag junak,

Apajui waittsati tujutmatai waitiag nunú

shiig dekatajum.

Kuntin chanua maatasu

umigtayama numamtuk

Apajui umikbaunum pujusan waitiajai.

<sup>7</sup> “Senchi untsumkan

¡mantuinawai! tusan imattaish,

makichkish aijuinatsui.

Yainkatajum taish,

makichkish yaintuinatsui.

<sup>8</sup> Apajui minak nagkaemaki

tusa jintan akigtujue.

Tuja nuigtushkam

jintan suwe etugtine.

<sup>9</sup> Mina wajiig aidaun, tagkug aidaun,

aents inakeg aidaun ashí yajutjue;

dutijak nuigtushkam eme anentsa

diyam amainchau etine.

<sup>10</sup> Minak makichkish wajigtuchu

shiig wainak etine.

¡Numi kagkapejai tegai ajapamu, ataktu tsapamaitsu numamtuk,

tsagagnuap pujustatja

tumainchau awajtuse!

<sup>11</sup> Nii kajekbaujin imatijawai,

imatijak shiwaajui

utugmaina dutijawai.

<sup>12</sup> Niina suntaji aidauk ashí nantagtujaje,

nunikag mina jegajun tentea apakag

uminas jetetuinak waitkajuinawai.

<sup>13</sup> “Mina yatsug aidau

mina kumpag aidaujai kajimatkitnume,

dutikainak aents tikich nugkanmaya

utugtaya dutikatnume tusa Apajui tine.

<sup>14-15</sup> “Mina pataag aidaushkam

kumpag aidaujai pachittsuk idaitusaje.

Wijai ijunag yujajaku aidaushkam pachitkachaje.

Mina inakeg aidaushkam

aents tikich nugkanmaya

wainchatai itugmaina dutijainawai.

<sup>16</sup> Mina inakeg aidaun

untsuaish aijuinatsui;

kuashta untsuaish

makichkish antugtuinatsui.

<sup>17</sup> Mina duwagshakam

wi mejeau asamtai tsumjawai,

tuja mina yatsug aidaushkam kajegtuinawai.

<sup>18</sup> Uchi ai aidauwaske dushiktuinawai,  
eke yama wajain wekaesatag taig,  
dushiktuinawai.

<sup>19</sup> Mina shiig kumpauchig aidaush  
kajegtuinawai,  
mina aneetaig aidau,  
shiwagmatuinawai.

<sup>20</sup> Watsajan ayatak ukunchik wajasjai,  
ashí jakan piipichin iwaakjai.

<sup>21</sup> “Mina kumpag aidauwah,  
minash wait anenjgatajum,  
minak Apajuí waittsati tujutiu asamtai,  
wika senchi waitiajai.

<sup>22</sup> ¡Make idaitustajum!  
atumek kuashta waitkagjume.  
¡Apajuí waittsati tujutmatai  
waitiag duke ati!” tiuwai.

## 31

<sup>1</sup> Tuja nuigtu Job chichaak:

“Wika nuwa muntsujut aidaunak  
makichkish wakejukchatin  
atajai tumamiuwaitjai.

<sup>2</sup> Wi nuwa aidaun diisan wakegá wekaetaik  
Apajuí ashí senchigtin  
nayaimpinum puja nunú  
minak dekas suwimkan sujumainai.

<sup>3</sup> Atumek aents pegkegchauwa nuna  
Apajuík suwimkan susa  
waitkawai tajume.

<sup>4</sup> Wisha wajinak dutikaja  
nunak Apajuí dekawai,  
tuja wisha wajuk pujajaki  
nunashkam nigki dekawai.

<sup>5</sup> Wika makichkish tikich aentsnak  
pegkegchawk awagmachuitjai,  
tuja makichik aentsnakesh tsanugchauwaitjai.

<sup>6</sup> ¡Apajuí minak kijin dekapatayai  
waji dekapatiama numamtuk dekapá diijus,  
mina anentaig pegkeja nuna dekaattawai!

<sup>7</sup> “Tuja wi pegkeg pujutan idaikun,  
pegkegchauwa nuna wekaetutaik,  
tuja wi wakegamun taka wekaetaik,  
nuigtu wi kasamkamujun ejetujiajag

<sup>8</sup> wi ajakmamua nunak  
tikich aents aidau ashí yajuaktinme.

<sup>9</sup> Tuja tikich nuwa aishinnun wakekau ataik,  
nuniachkunush wijai ijunja pujutaiju nuwen  
pakijimatasan wakejuku ataik,

<sup>10</sup> mina duwajuk inaku waitkatai wajasti,  
nunikmatai aents tikich nugkanmaya aidau  
kanutjatnume.

<sup>11</sup> Wi nuwajai pegkegchaun  
takamsau ataik,  
apu aidau minak  
suwimkan sujumain ainawai.

<sup>12</sup> Wi pegkegchaun takamsau ataik,  
jii kegak aepa tsaika ajapama numamtuk  
mina wajiig aidaunak

ashí tsaika ajapmainai.

<sup>13</sup> “Wika mina inakeg aidau segatainakui,  
dita sumamunak tuké umijin ayajai.

<sup>14</sup> Wika ditan waitkasuitkunuk,  
Apajuí suwimka sujakuish  
ayamjumamait Sujai.

Tuja ame takamsamu ujatkata  
tujutkuishkam, wika dekaskea nuna  
ashí ujamainaitjai,  
dutika ai nuna diis  
suwimkanak sujumainai.

<sup>15</sup> Apajuí mina najatuuwa duke  
mina inakeg aidaunashkam najanauwai.  
Dutika betek pujutan amasui.

<sup>16</sup> Tuja ujudauch aidau  
atsumainak segatainakui,  
yaitskek idaisachuitjai,  
tuja nuwa waje aidaunash  
nujantai waittsatnume  
tusanuk idaisachuitjai.

<sup>17</sup> Yujumka yuwaknush bitaik aidaunash  
ajamtsukek yuwachuitjai.

<sup>18</sup> “Makichik múun uchijin  
kuitamaina imatiksán  
bitaik aidaunak tuke kuitamkauwaitjai.  
Tuja waje aidaunashkam  
tuke kuitamin ayajai.

<sup>19</sup> Makichik aents jáanchji atsujam  
tsetsekai jaun wainkunuk,  
tuja jáanchji asepamain atsujunashkam,  
<sup>20</sup> mina uwigjun ujejai jáanch apagbaun  
asepakti tusan suyajai,  
dutika ai shiig anenjin aajabi.

<sup>21</sup> Wika apu chichama epegkin aina nunú  
mina kumpag ainakuish,  
ditajai ijunjanuk uchi bitaikanak makichkish kajegchauwaitjai.

<sup>22</sup> Wí taja nunú dekaskechuitkuig,  
mina kuntujun kupigtuginme,  
dutikawag ichiajag ajapatnume.

<sup>23</sup> Wika Apajuí suwimkenak ishamaajai,  
¡wagki wika niina senchijjaig  
betekchauwaitjai!

<sup>24</sup> “Wika oro kuashat ajutkuish,  
nunuapi shiig pujutan  
sujustinuk tusankesh,  
ima nuig anentaimsanuk  
pujukchauwaitjai.

<sup>25</sup> Wika wiakuch akunush,  
tuja kuichik kuashat ajutkuigkish,  
ememaku shiig aneamuk atsugtinai.

<sup>26</sup> Etsag nantujai shiig pegkeg ainawai,

<sup>27</sup> tujash wika makichkish uumkankesh,  
nuniachkunush aents aidau  
emtinish nu aidaunak emematmait Sujai.

<sup>28</sup> Nuna emematiu ataik,  
Apajuí minak suwimkan sujusu amainai,  
¡wagki niina umigkachu asamtai!

<sup>29</sup> Tuja mina shiwaajunu utugchat ajakuish,  
wika dushikchauwaitjai.

Tuja ditan waitkainak  
pegkegchaun chichajuinakuish,  
wika makichkish dushikjachuitjai.

<sup>30</sup> Wika mina shiwajunak makichkish  
pegkegchaunmak yumigchauwaitjai,  
tuja utusag jaka  
tusagkesh tuchauwaitjai.

<sup>31</sup> Tuja wijai ijunag batsamin aidau  
aents tikich nugkanmaya aidaun  
waitkastag tuinakuish,

<sup>32</sup> wika nunú aents aidaunak  
agá kajigtinme tusanuk idaisachuitjai,  
aents tikich nugkanmaya aidau yujaunash  
mina jegajui awayan ikannaitjai.

<sup>33</sup> “Wika tikich aents aidau  
ditá pegkegchaujin  
ugmamin aina nuniknukesh  
makichkish ugmamchauwaitjai,  
tuja uumkan pegkegchaun takamsatag tusankesh anentaimchauwaitjai.

<sup>34</sup> Wika aents aidau  
dushiktugchagtimdash tusanuk puyatjatsjai,  
nuadui wika ashí pan iwainajan takajai,  
patatjukchagtimdash tachau asan  
mina jegajuig epeminuk pujatsjai.

<sup>35</sup> ¡Utusag makichik aentskesh antugtuka tajai!  
Wi taja nuna dekaske titinme tusan  
papiinum agagjai.  
¡Apajuí ashí senchigtina nunú yamai aigkati tajai!  
Tuja wi pegkegchaun takamsamu ataik,  
papiinum agatjuginme.

<sup>36</sup> Nunú agagbauwa nunak  
eme aneasan jukin,  
atsejutaijai betek atsejuktatjai.

<sup>37</sup> Tuja wi takasbau aidaunak  
Apajuín ashí ujaktatjai, dutikau asan,  
apu pegkeg utugchatjinchau amaina iman  
wajasan Apajuín jegantattajai.

<sup>38-39</sup> “Wika mina aentsug aidaunak  
makichkish waitkachuitag duwi,  
mina nugkajuk pegkegchaunmak yumigtuchui,  
wika mina inakeg aidau  
ajakmamujinak kasagchauwaitjai,  
nuadui nugka tai  
ijumja ajakmamu aina dushakam  
wake besemag  
anentaimkug buutuinsui.

<sup>40</sup> ¡Untsu wi taja nunú dekaskechu ataik,  
mina nugkajuig trigo  
tsapatsuk jagki tsapaktinme,  
tuja cebada tsapamainun dupa tsapakti!”  
tusa juna aatus Job ayamjumak chichaka inagnakui.

## Tuke Pujuu Jopan aikbau

### 38

(38.1—42.6)

*Job chichaka ashimkamtai Tuke Pujuu aikbau*

<sup>1</sup> Job chichaka inagnakmatai, dase senchi dasenbaunum Tuke Pujuu Jopan chichajak aatus tiuwai:

2 “¿Amesh ya asamea  
mina dekatjua nunú  
dekaskechua nunin anentakmesh  
pegkegchaush chichame?

3 Diik minash amina  
wajijum iwaintugkakah,  
nunikam wi yamai

iniastatjam nunú aigkata:

4 Amek wi nugka najanauwaitag,  
nunú tsawantaik atsuyume,  
untsu dekaskenum dekakmek,  
wi nugka najadiag duwish ¿amesh tuwi pujuyume? nunú kame tujutta.

5 ¿Yaki nugkanash múun ati tusash tiyabi?  
tuja ¿yaki najanawabi?  
duka amek dekatsme.

6 ¿Wajinum chichijaya nugkash awa?  
¿Nugka patami asatnunash  
ya kayanash apujtuawaita?

7 Kashikmas pegkejan  
etsantug jiiinama nuniai,  
yaya aidau aents ijunag  
kantamaina numamtuk kantamiagtai,  
ángel aidau nantsemianum  
nuaduik amek atsuyume.

8 Tuja nayants nugka  
ejapeen jiiiniuwa nunú  
piyag betsakai tusash  
¿ya epetkauwaita?

9 Wi nunak makichik nuwa uchijin jáanchi  
pempagama numamtuk,  
yujagkim pujui dukukan epetkauwaitjai,  
dutikan yujagkim  
suwé ijikan idaisauwaitjai.

10 Tuja nayantsak pimu amain aig,  
yumi initak jiiinaidaun  
epenjan idaisauwaitjai.

11 Dutikan chichagkun:  
‘Juwig nagkankata, nuigtu  
nagkaemakmek piyajaipa;  
tuja tsukatbaujum  
ishamain waja dushakam  
nuigtuk wee pujushtatui’, tiuwaitjai.

12 “Amek tsawan pegkejan etsantug  
tsawagti tusamek makichkish inachuitme.

13 Amek nuigtush etsa ashí nugkanum etsanjati,  
nunitai aents pegkegchau aidau  
suwenum uumjatnume  
tusamek inachuitme.

14 Nunú etsa etsantug jiiinak  
nugkanak jáanch kapantuama iman emawai.

15 Nunitai aents pegkegchau takau aidauk  
kashi uumak takamin asag,  
nunikchamin dekapenak idayinawai,  
wagki tsawai nuniagtaik,  
achika suwimak suwam amain asag.

16 ¿Tuja yumish tuwiyag jiiinua  
nunú wainkatasamesh,  
amesh nayantsa initkenish jegamkayum?

17 ¿Amesh aents jakau aidau  
batsamtain jegamesh wainkaukaitam?

18 ¿Tuja nugkash wajupa múuntaita



dusha dekamek?

¡Nunú ame dekamék minash ujatkata!

<sup>19</sup> ¿Tuja tsaaptinush  
suwejaish tuwi awa?

<sup>20</sup> Amek duka dekachu asam  
tsaaptinuk emamaitsume,  
tuja suweshkam emamaitsume.

<sup>21</sup> ¡Nunú aidaun wi najanauwaitag,  
nunú tsawantinig eke  
akiinchau asam atsuyume!

<sup>22</sup> “¡Tuja wisha yujagminash bicha aidaujaish  
tuwig ukuaja duka amek waintsume!

<sup>23</sup> Nunak maaninamunum  
aents pegkegchau aidau suwimak suwaku,  
yutumtijatnun ukusan pujugjai.

<sup>24</sup> ¿Tuja peem peetish itug weawaki?  
duka amek dekatsme.

¿Tuja dasesh etsa  
minitaiya nuni dasenkash,  
itusaya ashí nugkanash jajutuaki?  
duka amek dekatsme.

<sup>25</sup> ¿Nugka taimunum  
yumi saagama numamtuk  
yumin yutumtikna dusha yaita?  
tuja ¿yaita aents jintan inaktumaina numamtuk,  
ipamat pati wetai jinta inaktinush? duka amek dekatsme.

<sup>26</sup> Witjai nuna dutikaunuk,  
tuja witjai uwejush aents makichkish atsamunum yutumtikaunuk,

<sup>27</sup> wagki nunú yutak nugka tutuptinnash  
uchupjati, dutikam chijichig tsapaiti tusan dutikajai.

<sup>28</sup> Yumi, nuigtu jegashik aina duka  
aents apagtin aina nuninchau ainawai. ¡Witjai nuna najanaunuk!

<sup>29</sup> Bicha aidauk, tuja jegashik aidauk  
aents dukugtin aina nuninchau ainawai.

¡Witjai nuna najankaunuk!

<sup>30</sup> ¡Witjai yuminak bichatin  
kaya katsugma iman emaunuk,  
tuja nayantsa awankenishkam bichatbikajan katsujam emauwaitjai!

<sup>31</sup> “¡Yaya aidau ijumnag ayá duka  
ame dutikachuitme!

¡Tuja amechuitme yaya  
ijumnaju aidau sutu tutai,  
tunim tutai ditash  
kanakag aina nunú umikumek!

<sup>32</sup> Tuja ¿amekaitam  
makichik yaya múun tsawak  
etsanjati tímawa nunú etsanmitkaum?  
Tuja ¿amekaitam yaya ijumnaju aidau  
Osa múun tutaya nunú,  
Osa yaijuch tutaya nunujai  
wantinkatnume tusam iwaidaum?

<sup>33</sup> Tuja yaya aidau, nantu aidau,  
tikich aidau nayaimpinum ayá dusha ¿wajuk buchitainawaki?  
duka amek anentaimsamek ejemaitsume.

¡Nuadui amek nunú aidau etsantug  
nugkan tsaaptin ematnume  
tusamek tumaitsume!

<sup>34</sup> ¿Amesh yumi yujagminmaya  
yutak piyagti tusamesh tumainkaitam?

<sup>35</sup> ¡Amek chaajip, peem aina duka,

amina inakmejai betek  
 umigtuktinme tusamek,  
 tikich yantamnum wetajum  
 tusamek tumaitsume!  
<sup>36</sup> ¿Yaita atash ayumpan,  
 chigki aina nujai tsawantan dekapeak  
 shinin atinme tusa tiuwa dusha?  
<sup>37</sup> Wika yachaitag iman asan,  
 yujagmish wajupa ayawa nunak dekajai.  
 Tuja witjai yumi yutumtiknununuk.  
<sup>38</sup> Wi yumi yutumtikag nunak  
 nugka yukukuntua nunú chupija  
 achinig katsujam wajasti tusan dutikajai.

<sup>39</sup> “¿Amekaitam león aidau  
 dita uchijin ayuja ututuakti tusam  
 yutaiji egatka suum?  
<sup>40</sup> ¡León niina waajin uumak tepes,  
 nuniachkush dupanum  
 uumak tepesa, kuntinjin tsekenti  
 tepejuk maina duka ame dutikatsme!  
<sup>41</sup> ¡Chuwagka uchiji aidau  
 yapajainak buutiagtai,  
 yutaijin mina segatuina  
 duka amek sumaitsume!”

### 39

<sup>1</sup> “¿Amesh dekamek cabra ikamia aina dusha  
 ejajujukajash, wajupa asag petsajawa?  
 Tuja ¿japa petsaidaush wainnukum?  
<sup>2</sup> ¡Amek wajupa nantu asag  
 petsajawa duka dekatsme!  
<sup>3</sup> Japak petsaktinji tsawan jegajim,  
 uchijin najaimakug  
 nugká tepes petsauwai.  
<sup>4</sup> Dutika petsakam chichiag  
 ikam pujus muumpawai.  
 Nunik dukujin ukuak  
 kanaka yaja wenawai,  
 nunika ataktu wakitkig dukujinig tainatsui.

<sup>5</sup> “¿Ya burro ikamia aina nunash  
 waitkaschamu agtinme tusash tiuwaita?  
 ¿Ya ditanash agkan  
 yujatnash susauwaita?  
<sup>6</sup> Wi ditak uwegshunum,  
 nuigtu nugka paka  
 kachi tepaju asamtai,  
 dupa tsapachu aina nuwi  
 batsamsatnume tusan etegtuawaitjai.  
<sup>7</sup> Tuja yaaktanmaya aidau senchi pampainak dakitmain wajaidau asagmatai,  
 nuna dakituinak atushat batsatui,  
 nunidau asag aents aidau  
 burro tagkumamu aidaun inainak  
 jiyainamunashkam antuinatsui.  
<sup>8</sup> Nunik batsamas dita yuwatnujin  
 dupan egainak mujanum yujainawai.

<sup>9</sup> “¡Amek toro ikamia aina nunuwap  
 wi takatai yainkag, kiitai  
 mina tagkuju batsamtain  
 kajigkagtua tusamek tumaitsume!

10 ¡Tuja nugka pukugti tusamek  
jigkaja emetuamek waitkamaitsume!  
¡Nuigtush nugka pukugbaun  
tsaikti tusamesh tumaitsume!

11 ¡Nunú senchigtin ainakuishkam,  
amek dita takagtustinme  
tusamek ditakek idaimaitsume!

12 ¡Ame ajakmamu aina  
nunak ditaap juuka  
ikaunma ijumjutjattawa  
tusamek tumaitsume!

13 “Avestruzak shiig aneak,  
nanapen awagtumawai,  
tujash avestruzak shiijak awajkagtuchui.

14 Tuja avestruzak kamatkan tai,  
nuwi petsaka etsa sukuam, nimpak takiagti tusa pachitsuk idainai.

15 Tuja niig makichik aentskesh,  
nuniachkush kuntinkesh dajag  
tsaikchaintash tusag anentaimtsui.

16 Avestruzak uchijinash  
niina uchijichu itugmaina  
numamtuk awagnai,  
tuja megkaekachaintash  
tusagkesh puyatjuchui.

17 Nunak nuniawai, wagki  
wi unuimatan susachuitag nuadui,  
tuja shiig jintiaja  
anentaimtanashkam susachuitjai.

18 Untsu nantaki tupikakug caballo aidaunak  
aents nuwi entsatkau aidaujai  
juwiachu asamtai dushikiawai,  
wagki nii ima senchi tupikau asa.

19 “¿Amekaitam caballo  
aidau senchimtikaum?  
tuja ¿amekaitam caballo kuntujen  
intash tumain pegkeg  
ajuwama nunú najatuaum?

20 ¿Manchi tsekegama imanik tsekeak,  
senchi mayatak aentsun uwakna  
nunú ameka dutikam?

21 Caballo aidauk maaniatasa ijumjamak  
sapigmakas ejapkabiag,  
aents niini entsatkau  
aidau shiwagjai igkunia  
maaniati tusa tupikauwame.

22 Tuja suntag aidau maanitain yajuakag uminas ijunun wainkush,  
ishamtsuk tupikatki jetegame.

23 Tuja suntag aidau flecha chimpia jutain  
caballo aenskam tupikainak  
tatagtutaish, ishamchauwai.

Tuja nagki aidau, flecha aidau akenbau  
winchantutaish, ishamchauwai.

24 Maaniatatus uwija kachujin umpuniagtaish,  
caballo aidauk jasa ijunmainchau dekapenak,  
tupikatiagtai, suntag nuwi entsatkau aidaushkam  
kakajus emetmainchau dekapajame.

25 Maaniatnume tusa  
uwija kachuji umpuamun  
caballo aidau antuinakug,  
aentsjai betek pampauwame,

tuja atushat ijuntsag  
 maaniamu ataik dekapeajame.  
 Tuja suntaja apuji aidau  
 dita suntajin chichajuinamunak,  
 suntag aidau pampaidaujai  
 atushat wajasag antinai.

<sup>26</sup> “Tuja pinchu aidau  
 yakí nanaak yujas  
 etsa minitaiya nuni yuja nunú  
 ¿ameka amina yachagmin  
 nuniktinme tusam tiuwaitam?  
<sup>27</sup> Tuja ¿ameka ukukui aidau  
 yakí nanaak yujau atinme,  
 nuninak yakí kayanum pasugmakag  
 nuwi petsau atinme tusam tiuwaitam?  
<sup>28</sup> Ukukuik yakí kayanum pujuuwai.  
 Tuja nunú kaya yakí jítkauwa nunuwai  
 nii pujusa ayamjumatai,  
 jega peejamua numamtina duka.  
<sup>29</sup> Imanui yakí pujus  
 yutajjin wainak akaetuki maa yuwame.  
<sup>30</sup> Ukukuik tuwi jakau  
 tepawa nuna tuwajui,  
 tuja uchiji aidauk  
 nuna neje uduun yuwinak  
 shuig aneen ainawai”,  
 tiuwai Apajuí.

## 40

<sup>1</sup> Nuigtushkam Tuke Pujuu Jopan chichajak:  
<sup>2</sup> “Witjai Apajuí ashí senchigtinun,  
 amek mina chicham patatjukume,  
 nuniakum umikchamna nunin diiksaume.  
 ¿Dusha yamaish nunismekkek anentaimam?  
 nunú yamai tujutta”, tiuwai.  
<sup>3</sup> Tuke Pujuu nuna tusa inagnakmatai, Job ayaak:  
<sup>4</sup> “¿Wisha wainkauchitag juninnush,  
 wajintuk aiktajame aminash!  
 Wi tumainuk makichkish atsugtawai.  
<sup>5</sup> Wika kuashat chichakjai,  
 nuigtu tikich tumainuk atsugtawai”, tiuwai.

*Apajuí Jopan ataktu awagki tibau*

<sup>6</sup> Tusa tama Tuke Pujuu dase senchi dasenbaunmaya ataktu Jopan chichajak:  
<sup>7</sup> “¿Diik ibau wajuwaitkumek,  
 sapigmatsuk wi amina  
 iniastatjam nunú aigkata!  
<sup>8</sup> ¿Ame pegkeg jumamkum  
 mina pegkegchauwa nunin jujukiume!  
<sup>9</sup> ¿Amekaitam mina nagkaetasu ima senchigtinum?  
 ¿Ame chichamugmish  
 wi chichamu chaagpijai beteka ibaukai?  
<sup>10</sup> ¿Nunú dekasketkuig, amina imanjum  
 senchigmejai iwainmamkata!  
<sup>11</sup> Tuja imanika kajeakmek  
 katsuntu pujutsuk, aents  
 emebau aina nunú  
 suwimak susam inatsakta.  
<sup>12</sup> Kame ame ima pegkeg takau asam,  
 apu emebau aina duka diyamuik  
 dita inamtaiji aina nunú emegkatjata.

Tuja aents pegkegchau aina  
duka tuwi ame waintatme,  
dutikakum ijina utsagta.

<sup>13</sup> Dutikam nugka taim ashí yutuata.

Dutikawamin magkagtin aidau  
achikam chimpimama numamtuk,  
aents jinau aidau

batsatbaunum batsamsatnume.

<sup>14</sup> Nunú dutikawamin,  
niina senchijiniap imanik depetmake titajai.

<sup>15</sup> “Amesh kuntin múun

Behemot tutaiya nunú  
anentaimtusa diista.

Wi nunú kuntinun najanauwaitag  
dutiksanuk aminashkam najanawaitjame.

Nunú kuntinuk bueyejai betek dupan yuwai.

<sup>16</sup> Niina senchiji aina duka  
tuntupega nuwi ashí ajawai.

<sup>17</sup> Untsu ujekeg setug katsugma imanai.

Tuja yaape nawen achitjau aidaushkam,  
daek chapikmagbaujai

betek kampujam ainawai.

<sup>18</sup> Tuja ukunchi aidauk,  
tubo jiju bronce tutai najanamua imanai.

Untsu bakui aidauk jiju hierro tutai  
katsugma iman ainawai.

<sup>19</sup> Wi kuntin aidau najankauwaitag

nujai ijumja diismash,

nunú kuntinun nagkaesauk  
tikichik atsawai.

Nunú kuntinu maumainuk makichkish atsawai,  
ima wiki maumainaitjai,

wagki wi niinak najadau asan.

<sup>20</sup> Nunú kuntinuk chijichin yusa pujuuwai,

nuadui ibau múun senchigtin ataish,  
tikich kuntin aina duka ishamainatsui.

Tuja nii chijichin yuwak tepetai,

tikich kuntin aidauk nuna tentea  
batsamas wasugkamin ainawai.

<sup>21</sup> Tuja ayamsatag takug

numi jagkigtin loto tutai aina

nuna wakentin tepenai,

nuniachkush kuchanum tagkan ayaunum

waigka uumak tepenai bichatjatatus.

<sup>22</sup> Numi loto tutai aina

nuna kanawe bikintu emamunum,

tuja numi álamo tutai

entsa akaebaunum tsapaka bikintu emamunum nuwi waig tepenai.

<sup>23</sup> Nujag senchi dujajutaish ishamchawai.

Tuja nujag dujajua utugmashkam

ishamtsuk tepenai.

<sup>24</sup> Nunú kuntinun makichik aentskesh achika,

jii ukuituk wainmachu emamainuk atsawai.

Nuigtush nujiin tigkajua daekai wegak anaa  
emetmainuk atsawai.”

## 41

1 “Amek semagkau\* agseayaik  
makichkish maumaitsume,

\* 41:1 “Semagkau” tawa duka Job 3.8num nayantsanmaya kuntin múun “Leviatán” tawa nunú kuntinnak tawai.

tuja wenigkesh jigkatmaitsume.

<sup>2</sup> Amek makichkish semagkau  
nujig jigkatmaitsume,  
tuja jagkenum awagkekmes emetmaitsume.

<sup>3</sup> “Aminak semagkauk  
wait anenjugta tusa  
segapakug waitkagmamait sui.

<sup>4</sup> Tuja nuigtushkam,  
amina inakem wajasan,  
tuke amina taka takagkawan  
jakatin atajai tusag  
makichkish tujamait sui.

<sup>5</sup> “Amek uchi pishakjai  
wasugkamama numamtukek,  
makichkish semagkaujaig wasugkamaitsume.  
Amek makichkish semagkauk  
amina nawanjum aidaun  
wasugkamtai ati tusamkesh  
anaamek apugmaitsume.

<sup>6</sup> Namaka sujin aidauk  
semagkaun sujuktasag  
namak sujutainmak ejemainchau ainawai.

<sup>7</sup> “Amek semagkauk flechayai ijumek  
duwapeg chigkagmaitsume,  
Tuja arponkai buuknum  
ijuakmes maumaitsume.

<sup>8</sup> Ame achika emetuatag tukamamek,  
nii depetamkui maa maaniakuam pimpikim,  
awake anentaimjam atakek  
aikchau atajai tusam idaimainaitme.

<sup>9</sup> Amek itugkanuk semagkaun  
depetkag tusamek tiipa.

¡Ayatak wainmawaik  
ishamkam jaka iyaumainaitme!

<sup>10</sup> Makichik aentskesh umuchiamak  
kajeak ishamain wajawai,  
tuja nijai maanimainuk  
makichkish atsawai.

<sup>11</sup> Ashi nugkanmak makichkish  
nijai maania depetmainuk atsawai.

<sup>12</sup> “Tuja semagkaun naweg  
shiig senchi ainawai,  
niig tikich kuntin aina nuna  
nagkaesau senchigtinai.

<sup>13</sup> Niina duwape dupajam wajakin  
katsugma nuna iju chigka emestumainuk  
makichkish atsawai.

<sup>14</sup> Makichik aentskesh  
semagkaun achika emetua  
iwaag nai ishamain tsaskaskatu aina  
nuna diigmainuk atsawai.

<sup>15-17</sup> “Niina duwapeg shiig achimjau  
dasegkesh waimainchau  
kayajai betek katsugmai.  
Iman asantai nuna  
chigkamainuk makichkish atsawai.  
Nuadui niig ememawai.

18 Nii jachitbaujig peemjai betek jiinui.  
 Tuja niina jiig tsawak etsa  
 kapantun etsantug jiinama imanai.

19 “Niina nujinia jii keeka jiinui,  
 tuja nunú jii kega nuwiya  
 yantsagtuk jiinainawai.

20 Niina nujinia bukuiti jiina duka  
 olla jinum ekenkam  
 kuwaak bukuiti jiinama imaniawai.

21 Tuja nii mayatbaujiya  
 nunú jiin ekemawai,  
 tuja niina weniin jii kegaun jiyawai.

22 Niina kuntujeg shiig  
 kampujam senchi wajaknai.  
 Iman asamtai aents aidau  
 nuna diinakug ishamainawai.

23 Tuja niina nejeshkam katsujam  
 jiju hierro ukuijamu nanaju  
 katsugmama imanai,  
 nuadui makichkish tsupimaitsui.

24 Tuja niina aentaishkam  
 kaya katsugma imanai.

25 Nunú nantaun wainainakug,  
 tikich senchigtin aidaush  
 niina ishamainak pisainawai.

26 “Niinak nagkiikesh,  
 puyajaikish, flechayaikish,  
 makichkish maumainchau ainawai.

27 Nii diismak jiju hierrok  
 dupa kagajujai betekai,  
 tuja jiju broncesshkan  
 numi mamujujai betekai.  
 Nuadui niinak nunú jiju aina nujai  
 maanitai najanamu aina  
 duwik makichkish  
 maumainchau ainawai.

28 Niig flechan ishamakug tupikatsui,  
 kayai nagkiamua duka nii diismak  
 dupa kagajuwai nagkimaina nuninai.

29 Tuja numi kijinai awatmawa duka  
 nagkushpi awatmaina numamtainai.  
 Tuja nagki aketmashkam  
 niig dushikis diyawai.

30 “Tuja japiinak weakug,  
 nugkanak numi etsakamui taumaina  
 imatika taumi jintama weawai.

31 Tuja nayantsa kunajin tepeakug,  
 nayantsanak yumi kuwaak  
 wajukeama imatikawai.

32 Nunik wegak yuminak tsakigmitkak,  
 puju winchamtinun saugmitkak ukuawai.

33 Tuja semagkaun niimega nuninuk  
 tikichik juju nugka juwig  
 makichkish atsawai,  
 Wi niinak najanauwaitjai  
 makichkish ishamkagtuchu atinun.

34 Niig tikich kuntin múun  
 senchigtin aidaunash ishamatsui.  
 Niiyai ashí tikich

kuntin aina nuna apujig”,  
tiuwai Apajuí.

## 42

### *Job Apajuín aikbau*

<sup>1</sup> Tuke Pujuu tusa inagnakmatai, Job ayaak:

<sup>2</sup> “Wika ame ashí

dutikmainaitam nunak shiig dekjai,  
ame dutikmainchauk makichkish atsawai.

<sup>3</sup> Amek makichkish tujintsuk

ame wakegakmek,  
ashí dutikmainaitam nuna  
dekachua numamtuk chichakag nunak,  
ame yachaitam ibauchu asan,  
wainkan anentaimkas chichakjai.

Wika ame yacha asam

ashí ame najanamu aidau kuitamam nunak  
utujimsanuk anentaimaitsujai.

Wi chichakmag nunak wainkan

dekachiatkun chichakmajai,  
nuadui waji pegkeg aina nunashkam  
shiig dekamainchau dekafejai.

<sup>4</sup> Ame chichagtakum:

‘Antukta wi titatjam nunú,

nunikam aigkata,

wi iniastatjam nunú’, tujutmaume.

<sup>5</sup> Wika yaunchuk nagkamsan,

amina pachis etsegbaun antin ayajai.

Tujash yamaik ame tujutu asamin,

paantas wainkaja tumain dekafejai.

<sup>6</sup> Nuadui wi chichakbaujun

anentaimsan datsaajan, awake anentaimjai.

Nuniakun pegkegchaunap tija tusa

anentaimkun yukunum pujajai”,

tiuwai Job.

### *Apajuí Jopan yaunchuk aajakua imanuk awajsamu*

<sup>7</sup> Aatus Job chichaka ashimkamtai, Tuke Pujuu Elifazan chichajak: “Amek amina kumpajum aidaujai mina pachittsajum waitjuau asagmin, senchi kajegkajime. Untsu Jopak mina pachitus dekaskenun chichake.

<sup>8</sup> Tuja atum waitjuaujum nuna tsagkugtugi tujutkugmek, siete toro, nuigtu siete uwig aishmag aidau yajuakjum, mina inakeg Job puja nuwi wetajum, nunikjum atumi tudaujum tsagkugnagtinnum nunú kuntin aidau maajum nuna neje ashí apeatajum. Dutikawagmin mina inakeg Job atumin pachipas mina segattatui. Tusa tujutkui atumek mina inakeg Job dekaskenun chichaka nunitsuk pegkegchau chichaku asajum, suwimak jumain ajuminig tsagkujattajime”, tiuwai.

<sup>9</sup> Tusa tiajam Elifaz, Bildad, Sofar aatus Tuke Pujuu tibaunak betek umikajui. Dutikawagmatai Tuke Pujuu Job sumakbaunak betek umikui.

<sup>10</sup> Job niina kumpaji aidau pachis Apajuín segauwa duwi pujus, Tuke Pujuu Jopan ataktu yaunchuk aajakua imanuk awajsauwai. Dutikak nuigtushkam yaunchuk niina wajiji aidau ajujaku nuni kuashat ikauntukui.

<sup>11</sup> Dutikam pujaun niina yachi aidau, umayi aidau, kumpaji aidau, tuja tikich aents aidau, nii pegkeg pujus wainajakbau aidau aatus shimutkajui ijagsatatus. Nunik jegawagmatai, ditajai ijunag yujumkan yuwinak jiiistamawajui. Nunikag Jopan chichajuinak: “Tuke Pujuu waittsati tujamatai waittsaum nunú anentaimsa wake besemag anentaimji”, tiajui. Nuna tusag, nuigtushkam plata aidau, tuja patakumtai oro najanamu aidaujai aatus maki makichik susajui.

<sup>12</sup> Aatus Tuke Pujuu Jopan nii waitus nagkaikiuwa duwi nagkamas yaunchuk ajujakbaun nagkagas ikauntukui. Niina tagkuji aidauk: catorce mil uwig, seis mil camello, dos mil baka nугá pukuu aidau, mil burro aatus ajujaku.

<sup>13</sup> Nuigtushkam diecisiete uchin akiauwei, catorce aishmagkun, kampatum nuwan.



<sup>14</sup> Nawanji emkaunak Jemimá\* adaikauwai, untsu nuwi patatkaun adaikauwai Quesiá† tuja nuwi patatkaun adaikauwai Queren-hapuc.‡

<sup>15</sup> Nunú nuwa aidauk ashí nugkanmak dita ima shigmauch aajaku ainawai. Tuja Job niina wajiji aidaun, tagkuji aidaun, nugke aidaun, aatus ashí niina uchijinu atinme, tusa tiuwai. Dutikak niina nawanjinashkam ditashkam jukitin atinme tiuwai.

<sup>16</sup> Apajuí etsagajua duwi nagkamas Job ciento cuarenta mijan pujusui. Nuadui uchiji aidau, nawanji aidau, tsakaka uchi akigbau aidau, ama tijaji aidaunashkam wainkauwai.

<sup>17</sup> Nunik pujus múuntuch wajas jakauwai.

---

\* **42:14** "Jemimá" tawa nunak hebreo chichamnumak "paum" taku tawai. † **42:14** "Quesiá", tawa nunak hebreo chichamnumak "canela", (tawai) taku tawai. ‡ **42:14** "Queren-hapuc" tawa nunak hebreo chichamnumak "kugkuin aidaun chimpitai pegkejuch" taku tawai.

## Salmos LIBRO I

### 1

(Salmos 1—41)

*Dekaskenum shiig aneasa pujamu*

<sup>1</sup> Aents pegkegchau aidau  
chichainamun antujus umiju wekaechauk  
shiig aneas pujustinai.  
Tudau aidau takatan  
wakejus taka wekaechauk,  
tuja Apajuin pegkegchau chichajuidaujai ijunag,  
ditajai betek chichá wekaechauk  
shiig aneas pujustinai.  
<sup>2</sup> Wagki niig nuna wekaetutsuk,  
Apajuí chichame umikta  
timauwa nuna umiak,  
kashish, tsawaish tuke nuwig  
anentaimas pujau asa.  
<sup>3</sup> Nuadui nunú aentsuk makichik numi  
yuminum ijusa ajaamu,  
pegkeg, senchi nejen,  
dukesh kaketsama imanai.  
¡Iman asa ashí nii takamuji aidauk  
shiig pegkeg ainawai!

<sup>4</sup> Untsu aents pegkegchau aina duka  
nunú aentsjaig betekchau ainawai,  
nuadui ditak ajusa wampujin dase umpui ajapama numamtin ainawai.

<sup>5</sup> Aents pegkegchau aidaunak  
Apajuí dita takasbaujin  
diijus suwimkan susatnai.  
Tuja aents pegkejan takau aidau  
Apajuí pujutain ijunjagtina  
nuwig ditak wayachagtinaí.

<sup>6</sup> Tuke Pujuuk aents  
pegkeg aidaun kuitamui.  
Untsu aents pegkegchau aidauk  
dita pegkegchaujinig waittsagtinaí.

### 2

*Ametme mina uchigmek*

<sup>1</sup> ¿Wagka aents pegkegchau aidaush  
Tuke Pujuujai shiwagmagainakush  
ijunjash pampandayinawa?

¿Wagka chicham jegamainchaunash  
wainkash tuu yujawa?

<sup>2</sup> Nugkanmaya apu aidau  
yaakta apuji aidaujai ijunag  
Apajuin kajejuinak, nii etegka  
apu adaikauwa nunashkam  
shiwagmainak wakenmataik  
chichaman umijuinawai.

<sup>3</sup> Nuninak senchi untsumkag:  
“¡Achikbaujai betek batsatag  
duka ankanmagawagmi!  
¡Tuja jigkaja emetuamujai betek  
batsatag dushakam  
agkanmagawagmi!” wajainawai.

<sup>4</sup> Imatiagtai Apajuik niina pujusa inamtaijin  
nayaimpinum pujus dushikiawai.

<sup>5</sup> Dutikak kajejuk uwakeawai,  
untsu nuni senchi kajejuk chichajak:

<sup>6</sup> “Wi etegkan apu emamugnak  
muja etegkamua nuwi Jerusalén  
pujus inamjati tusan  
wi apusajai”, tawai.

<sup>7</sup> Tuja Tuke Pujuu mina tujutma  
nuna etsegkatjai.

Tuke Pujuu chichagtak:  
“Ametme mina uchigmek,  
amek wi akiinati tima akiinawaitme.

<sup>8</sup> Ame wakegamu segatta,  
Wi nunak imatixsanuk ashí nugkanmaya  
aents aidaun amastatjame aminu atinun.

<sup>9</sup> Ichinak najanamu shigki basegbauwai  
awati tsaimaina numamtuk,  
apu pegkegchau aina duka  
ame tsaika utsagatme”, tujutmae.

<sup>10</sup> ¡Apu nugkanum inamin aidauwah,  
shiig antuktajum, nunikjum  
juju chicham shiig unuimagtajum!

<sup>11</sup> Nuniakjum Apajuí  
eme anentsajum umigkujum  
shiig aneasjum ememattajum.

<sup>12</sup> Apajuí eme anentsajum ememattajum  
kajegtamkainum, nii kajegtamkamtaig  
jinumain ainagme, wagki nii kajeamujig  
makichkish imijtumaitsui.  
Aents Apajuyai kajinas anentaimaidauk  
nii kuitamsam pujuidau asag,  
shiig aneas pujusagtinai.

## 8

*Apajuí imanjiya nunú aentsu pujutjijai*  
David kantamamu

<sup>1</sup> Tuke Pujuuwah, ametme iina apuji,  
ashí tikich aidau nagkaesau muunmek.

¡Amina daagmek  
ashí nugkanum antunawai!  
¡Amina imanjumek nayaim  
múunta nuna nagkaesauwai!

<sup>2</sup> Amina shiwaajum kajegtamainak  
mantamatag tinu aina duka,  
uchi tsakat aidau,  
uchi muntsu muntsuaku aidaujai  
shiig pegkegchin kantamaina duwi  
amina senchijum iwaintukam itatmikajume.

<sup>3</sup> Ame nayaim najanamua  
nuna diisan, tuja nantu,  
yaya aidaujai ame najankamu aidau  
nayaimpinum ayá nunashkam wainkun

<sup>4</sup> anentaimesan:  
¡Aents aidautik pegkegmakesh ainatsji!  
¡Tikima wainkauch ainaji!  
Nunin ajinish ¿wagka tujash  
puyatkagtusmesh kuitamkagtame?

<sup>5</sup> Aentsuk ángelchawashit tumain najanauwaitme.

Nuadui apu kuitamaina  
imatiksam kuitamam duka dutikame.

<sup>6</sup> Tuja ashí ame najankamu aina duka

ashí nii idaitusuitme, dutikakum

tikich ame najankamu aina  
nuna nagkaesau emam apusauwaitme.

<sup>7</sup> Dutikam uwig aidau

buey aidau, kuntin ikamia aidau,

<sup>8</sup> chigki yakí nanamin aidau,

namak nayantsanmaya aidau,

tuja tikich kuntin aidau

nayantsanum ayá duka

ashí nii idaitusuitme.

<sup>9</sup> Tuke Pujuuwah, ametme iina apujimek,

ametme ashí tikich aidau

nagkaesau dekas muunmek.

¡Amina daagminak

ashí nugkanum dekainawai!

## 14

### *Aents pegkegchau aidau pujutji*

David kantamamu

<sup>1</sup> Aents anentainkachu aidauk:

“Apajuik atsawai”, tuinawai.

Nuadui dita anentainig

ima pegkegchau aina nunú takatak ajuinawai,

nuadui dita takamuji aina duka shiig dakitmainai.

Tiki makichkiuchikesh

pegkejan takauk shiig atsawai.

<sup>2</sup> Apajuik aents aidauk

nayaimpinum pujusag

diyawai, makichkikesh

shiig anentaimkau Apajuí

umigmain atsuash tusa wainkatatus.

<sup>3</sup> Tujash aents aidauk

pegkegchau takatan yujajui,

nunidau asag ashí betek tunamakaje.

¡Tiki makichkikesh pegkejan

takauk shiig atsawai!

<sup>4</sup> Pegkegchaun takau aina

duka anentaimainatsui.

Pag yuwa wamak amutiama numamtuk

mina aentsug aidau amuinawai.

Nunú aents aidauk

Apajuí yainkati tusagkesh makichkish

Tuke Pujuuwak segachu ainawai.

<sup>5</sup> Nunú aents pegkegchaun takaina duka

sapigmainak kujaidiagtatui.

Tuja Apajuik aents ima niina chichamen

umin aidauum pujawai.

<sup>6</sup> Atum pegkegchau aidautijum

aents ujudauch ememachu aina nunú

atsaneakjum dushikiagme,

tujash Tuke Pujuu ditanak kuitamui.

<sup>7</sup> ¡Israel aents aidau uwemtijatín utusag

Siógka mujajinia taawa! tusan wakegajai.

Tuke Pujuu niina aentsji aina nuna

pujutjin iwagtugmataig,  
Jacob Israel daagtina nuna  
uchiji aidauk ashí shiig aneasagtinai.

## 15

*Apajuí jee pegkegmanum aents aidau pujumain*

David kantamamu

<sup>1</sup> Tuke Pujuuwah,

¿aentsush wajuku aidauwa

amina jem pegkegma

nuwish pujumainaita?

Tuja ¿wajuku aidauwa muja ame etegkamua

nuwish pujumainaita?

<sup>2</sup> Nuwi pujusagtina duka

aents pegkeg bakumamainji

atsugbau, pegkejan takau,

waitjutsuk dekaskea nuna chichau;

<sup>3</sup> tikichnash pegkegchaun chichagchau,

niina kumpajinash pegkegchau awagmachu,

tuja nii ijutkamu aidaunash inatsauchu;

<sup>4</sup> aents Apajuín dakitaujaig

makichkish ijunchau,

untsu Tuke Pujuun eme anentaunak

niishkam eme anentus diin,

tuja waitiakush

nii anagkaguamunak betek umin.

<sup>5</sup> Kuichkin tsagkatkagtukash

ewaekam akigkata tusa waitkagkagtuchu,

tuja aents takamsachu aig,

tsanumjugta akiktagme tamash dakitin.

Nunú aents imanis puja duka shiig aneas tajimat pujustinai.

## 16

*Apajuí mina sujusua nuna nagkaesau pegkejak atsawai*

David agagbau

<sup>1</sup> Chah, Tuke Pujuuwah, kuitamjukta,

wika aminí ejamatnak egajai.

<sup>2</sup> Wi amina chichagkun:

“Ametme mina apug

pegkegnum yainnumek,

tikich amea ibauk atsawai.”

<sup>3</sup> Ame chichagtakum:

“Mina aentsug nugka batsata nunú

minak umigtuidau asag

shiig awajtuinawai.

<sup>4</sup> Untsu tikich aents aidau apajuíchun apajuímainak niina umijuina duka

senchi waittsagtinai”, tame.

Nuadui wika nunak

tuké etsagjashtinaitjai.

Tuja nunú apajuímtai aina

nunak makichkish emematchattajai.

Nuna daajinakesh makichkish adaikashhtinaitjai.

<sup>5</sup> Tuke Pujuuwah,

ametme mina ashí sujinnmek.

Ame sujame kuashat pegkeg aidau,

mina pujutjua duka aminí awai.

<sup>6</sup> Nugka shiig pegkeg aidau

makichkish wi anentaimtujakchamu ajutui,

Apajuí anagtuamu wi jukitin ajuta duka

dekas shiig pegkejai.

<sup>7</sup> Tuke Pujuunak shiig pegkegnum chichagtinaitjai,  
nii minak pegkegnum jintinjau asamtai.

Dekas mina iyashjunash jintinjutui,  
dutijak kashishkam esetawai.

<sup>8</sup> Tuke Pujuu mina Apajuíjua duka  
tuke wijai ijutkau pujawai.

Wika niini emetuman wajau asamtai, makichkish ajunjashtin ainawai.

<sup>9</sup> Wika shiig aneasan dakunkut pujajai,  
ima niyaig kajintsa anentaimsan pujuttajai.

<sup>10</sup> Apajuíjuh, amek minak  
jakati tusamek idaituschattame,  
tuja ;pegkegmaitak ukumatainum ukusam  
kaugti tusamesh idaituschattame!

<sup>11</sup> Jinta pujutnum ekagtina nunú  
ame iwaintugkattame.

Ame pujamugmia nuwig  
shiig dakujamu awai.

Aminí awai dakujut tuke atina nunú.

## 19

*Apajuí imanjiya duka nii najankamu aina duwi dekanui*

David kantamamu

<sup>1</sup> Apajuí imanjiya nunak  
nayaimpia nunú ujjatui,  
nayaaim wigkaya nunú wainku,  
dekas Apajuíyap najanauwaita taji.

<sup>2</sup> Tsawaiya nunú, kashia nujai,  
Apajuí imanjinak tuke etsejuinawai.

<sup>3</sup> Chichainachiatak,  
makichik chichamnakesh tuinachiatak,  
tuja chichamujigkesh antugchatayaitak,

<sup>4</sup> ashí nugka nagkatkamunum  
dita chichainamuk antugainawai.

Tuja nayaimpinum etsa ekemsatnunak  
Apajuí umikui.

<sup>5</sup> Etsag nuwi eketu makichik aents  
yama nuwan nuwatuk  
nii kanutaijin pujau  
jiinama numamtuk kashikmas jiinui.

Nunik jiinki aents  
tupikain uminas shiig aneas  
wemaina numamtuk weawai.

<sup>6</sup> Nunik nayaaim tikich yantamnumia etsa jiinki,  
tentea wea weakua,  
yaja tikich yantamnum jegaa kintamui.  
Nuadui etsa etsantun uwemtumainuk makichkish atsawai.

<sup>7</sup> Tuke Pujuun chichamega duka  
yamajam pujutan sukagtau asa, shiig pegkejai.

Tuke Pujuun chichamega duka  
waitchauwai, shiig dekaske,  
wagki nunú aents  
kakagchauchin unuidau asa.

<sup>8</sup> Tuke Pujuun chichame  
umiktina duka pegkejai,  
anentainum dakujutan sukagtau asa.  
Tuke Pujuun chichame umiktina duka  
dekas shiig pegkeg tsaaptinun anentaimtikagtinaí.

<sup>9</sup> Tuke Pujuu puyatjusa  
umigbauwa duka shiig pegkejai,  
tuja nii chichamega dusha

tuke megkaekashtinai.

Tuke Pujuun chichame umiktina duka waitchauwai,  
dekaskenum ashí pegkejai.

<sup>10</sup> ¡Nunú chichamak oro tsuwatjinchau  
shiig pegkeg akika nuna nagkaesauwai,  
tuja dapa yumiji yumimitu pegkejama  
nuna nagkaesau shiig pegkejai!

<sup>11</sup> Wika amina inakmetag duwi pegkegchaun takasai tujutu asa,  
amina chichamjumea nunú jintinjawai.  
Nunú chichaman umiauk shiig pujustinai.

<sup>12</sup> Makichik aentsuk niina tudaujinak  
nigki anentaimsag dekagmamaisui.  
Nuadui, Tuke Pujuuwah,  
¡wi pegkegchaun takamsatjai tusan  
wakegachiatkun takamsamug aidaush tsagkugtugta!

<sup>13</sup> Tuja mina ememataijush emegkatjukta.  
Mina emematug wagagtuki, idaitusaipa.  
Aatsan wisha ibau tudau ajuta  
nuna agkanmagatjai.

<sup>14</sup> Tuke Pujuuwah, mina chichamjush  
mina anentaimtagjai,  
ame diismash pegkeg, wakemain ati.  
Chah, Tuke Pujuuwah,  
ametme mina ayamjutkam uwemtijinmek.

## 22

*Waitiamunum pujusa Apajuí emematku kantabau*

David kantamamu

<sup>1</sup> ¡Apajuíjuh, Apajuíjuh!  
¿Wagka minash idaitusume?  
¿Wagka taamesh uwemtijatsme?  
¿Wagka wi imanikan amina segaakun  
buutaish pachittsume?

<sup>2</sup> Mina Apajuíjuh, tsawaish,  
kashish untsuajame,  
imatjamash aigtsume.  
¡Wi ayabaujuk atsugtawai!

<sup>3</sup> Tujash ametme pegkegmamek,  
ametme apumek, iman asamin  
Israel wegantu aidau emematjamainawai.

<sup>4</sup> Iina apachji aajaku aina duka  
aminí kajinmamsag  
anentaimajaku ainawai;  
aminí kajinmamsag  
anentaimaidau asamtai,  
agkanmitkauwaitme.

<sup>5</sup> Yainkata tusa segapainakuish,  
ame agkanmitkauwaitme,  
tuja aminí kajitmamsag  
anentaimaidau asagmatai,  
tsanugmek idaisachuitme.

<sup>6</sup> Tuja wika aents tamak amaitsujai,  
wika bagajai betekaitjai.  
¡Wika aents aidau dushiktaiyaitjai!

<sup>7</sup> Mina waituidauk dushijuinawai,  
nuninak buuken pegainawai.

<sup>8</sup> Nuninak: “¡Tuke Pujuuwai

kajinmamas anentaima pujuuwe  
 nuadui, nii taa uwemtikjati!  
 ¡Imatika aneau asa, nii uwemtijati!” tuinawai.

<sup>9</sup> Tuu yujatnume:

Ame minak akiinati tujutiu asamin,  
 mina dukuju waken  
 egkemkan akiinawaitjai.  
 Tuja ame minak mina dukuju kuntujin  
 patattsam kuitamjukmayume.

<sup>10</sup> Duwik nagkamsam wi akiintsag,  
 ame minak kuitamjukuitme.  
 Tuja mina dukuju wakeen pujubiag  
 duwi nagkamsamek  
 mina Apajuíg aayume.

<sup>11</sup> Ima minakek idaitusaipa,  
 wika waittanum jegantan pujajai.  
 Tuja mina yainmainuk atsugtawai.

<sup>12</sup> Mina shiwag aidauk,  
 baságnunia toro kajen aina  
 iman tententuawaje.

<sup>13</sup> Dutijuawag ikamyawa kajen  
 shinuwama imatuinak  
 esattatus tsekenjuinawai.

<sup>14</sup> Tuja wika yumi ukagag  
 megkagama numamtinaitjai;  
 mina ukunchig aidauk  
 akaejaujai betek wajase.

Tuja mina anentajjuk  
 wiya yumimeaujai betek wajase.

<sup>15</sup> Mina wenujuk ichinak yama inajuamu  
 bukuama nunin wajase.

Mina idaijush kayakmataijui nujamjutkae.  
 ¡Jakaujai betek minak  
 nugka yukukuntunum aepjukiume!

<sup>16</sup> Aents pegkegchaun takau aidau  
 yawajai betek tuwagtukaje;  
 tuja mina dawegnak,  
 mina uwejujai ichinujaje.

<sup>17</sup> Mina ukunchig aidaunash  
 pan wainmain dekapeajai;  
 tuja mina shiwag aidauk  
 ayatak diiju batsatui.

<sup>18</sup> Mina jáanchjun jujuktiag, yana daajig jiinkiti,  
 nunú jukiti tusag,  
 nunú dutika dekatain  
 wasugkamainawai.

<sup>19</sup> Tujash Tuke Pujuuwah,  
 ametme mina senchimtijnmek.  
 ¡Tupanjutsuk, wamak taam yainkata!

<sup>20</sup> Puyajai ijutiag mantuawainum  
 minash agkanmitkajuata.  
 Yawajai betek aina nunú  
 maatnume tusamek idaitusaipa.

<sup>21</sup> Leónjai betek kajen aina nunú mantuawainum ayamjuktata.  
 ¡Toro kajen kachujin  
 magkagtina iman aina nunú  
 mantuawainum ayamjuktata!

<sup>22</sup> Ame ayamjuktamin, wi amina pachisan



mina yatsug aidaun ujaktajai;  
 dutikan ditajai ijunjan  
 amina emematkun kantamatjai.  
<sup>23</sup> ꞑAtum Israel aents aidautijum,  
 Tuke Pujuu eme anentin aidautigmek,  
 Niina senchiji anentaimtusjum ememattajum!  
<sup>24</sup> Apajuik ujudauch aidau waitiamun  
 wainiatkug waittsatnume tusag  
 pachitskek idaitsui.  
 Tuja uumjutnakesh uumjuchui.  
 Yainkata tusa segamak antujui,  
 nunik betek yayawai.  
<sup>25</sup> Apajujuh,  
 ima aminak ememattagme,  
 amina aentsjum eme anenjamin aidau  
 kuashat tuwakbaunum nunak umiktatjai.

<sup>26</sup> Ujunauch aidautigmek  
 yutai yuwajum shiig ejemagtajum.  
 Tuja Apajuí wainkatasa  
 egautigmek nii ememattajum,  
 nuniakjum kuashat mijan pujustajum.  
<sup>27</sup> Ashí aents tikich nugkanmaya  
 ditash niimtin aidau,  
 chichamnash tikich  
 chichaman chichaaku aidauwah,  
 Tuke Pujuu kajimatkgipajum.  
 Niiyai jeganjum,  
 ꞑtikishmaja pujusjum ememattajum!  
<sup>28</sup> Tuke Pujuuwai apua duka,  
 iman asa ashí nugkanum inamui.  
<sup>29</sup> Shiig atsumkas pujautigmes,  
 tuja ashí jaka pujautigmeskam,  
 ima Apajuíya duke tsuntsumjuajum etsagjatajum,  
 wagki ima atumkek  
 pujutak jukichu asajum.

<sup>30</sup> Wi wegantu aidauk  
 Tuke Pujuu emematuinak,  
 tuké niina pachisag etsejiagtin ainawai.  
<sup>31</sup> Nuninak atakea duwi  
 akiinawagtina nunashkam  
 Apajuín takatji pegkeja nuna,  
 kuashat wainchatai aidaun  
 iwainajua nujai pachisagajakgtinai.

## 23

*Apajuí minak  
 aents uwija kuitamnujui betek  
 kuitamjawai*

David kantamamu

<sup>1</sup> Aents uwigjin puyatjus  
 kuitamna numamtuk  
 mina kuitamjauk Tuke Pujuuwai,  
 nuadui wi atsumamuk atsugtawai.  
<sup>2</sup> Aents niina uwigjin chijichi pegkejan  
 ayu ayugkawa pimpiagtai,  
 yajuak bikintunum ayamtikama numamtuk,  
 Tuke Pujuu minak ayamtijawai.  
 Tuja kitamamun uwagti tusashkam  
 entsa pegkeg wiyakunum ejetawai.

<sup>3</sup> Niig tuke anenka ibau asa,  
wi pimpitaishkam ichichtawai,  
dutijua pujut pegkegnum etawai.

<sup>4</sup> Nugka ségaju ishamain  
suwenum nagkaemaknush,  
ame wijai wekagu asamin, ishamkashtatjai.  
Uwija kuitamin uwigin ayamjuktatus  
ushujutaijin takus wekagama numamtuk,  
amek mina ayamjutkatasam wekaeme.  
Nuadui jamainnum jegaknush ishamkashtatjai.

<sup>5</sup> Mina shiwag kajegtin aidaun emtin,  
ame minak yutai pegkeg aidau umigtame.  
Aents ipaamujin shiig anentus juwak  
buuken kugkuinai nijau aina imatiksam  
minak shiig awajtukume.  
Umutai umikbau pinignum aun  
aents wainak shiig anegama numamtuk,  
minashkam shiig anemtijusume.

<sup>6</sup> Amina anenkagmia nunú,  
wait anenkagtutaigmijai  
ashí tsawantai tuke uyuuntawai.  
Tuke Pujuwah, wika  
ame pujam nuwi tuke pujustinaitjai.

## 24

*Ashí najankamu aina nuna apuji*

David kantamamu

<sup>1</sup> Nugkak ashí Tuke Pujunui,  
nunú nugkanum ashí ayá duka,  
nuwi batsamin aidaujai  
ashí niinu ainawai.

<sup>2</sup> Wagki nugka tujig asatnunak nii umikui,  
dutika nayantsanum,  
namak aidaunum aatus  
emetug idaisauwai.

<sup>3</sup> Tuke Pujuu mujaji etegkamua nuwish  
¿yaki wakainta?  
Apajui jee pegkegma imannummash  
¿yaki wayash pujusainta?

<sup>4</sup> Nunak aents pegkegchaun takachu,  
anentai pegkeg,  
dakumka najanamun emematchau,  
umikchatnaitak tsanumak  
Apajui daajin adayas  
dekas umiktatjai tuu wekaechau,  
nuwig wayawagtinai.

<sup>5</sup> Nunú aentsnak  
niina apuji Apajuiya nunú uwentijatnai.  
Tuja niinak Tuke Pujuu  
pegkegnum yumigkig,  
ayamjuk shiig pujutan susatnai.

<sup>6</sup> Tuke Pujuu, Jacopa Apajujiyah,  
aents amina egapaidauk,  
dutika yayaam agtinai.  
Tuja amina segapaina nuna uchiji aidaushkam  
dutiksaik yayaam agtinai.

<sup>7</sup> ¡Jerusalégka waitijiya nunú ujaitajum!

¡Yaunchuk waitai aajakua  
 nunú ujai idaisatajum!  
 ¡Apu pegkejam niina imanjin nayaimpinum,  
 nugkanmash inamna nunú wayattawai!  
 8 Apu pegkejam niina imanjin nayaimpinum,  
 nugkanmash inamna dusha ¿yaita?  
 Duka dekas iina apuji  
 Tuke Pujuu niina shiwaajinash ishamchau,  
 wajuwa nunuwai.  
 9 ¡Jerusalégka waitijiya nunú ujaitajum!  
 ¡Yaunchuk waitai aajakua  
 duka ujai idaisatajum!  
 ¡Apu pegkejam niina imanjin nayaimpinum,  
 nugkanmash inamna nunú wayattawai!  
 10 ¿Yaita nayaimpinum,  
 nugkanum inamna dusha?  
 ¡Duka Israel aents aidaun Apujiyai!  
 ¡Duka Tuke Pujuu ashí senchigtina nunuwai!  
 ¡Niyyai dekas apu pegkejam,  
 niina imanjin nayaimpin, nugkan apujiya nunú!

## 27

*Apajuíyai mina tsaaptinjuk, mina uwemtaijuk*

David kantamamu

1 Tuke Pujuuwai mina tsaaptinjuk,  
 Tuke Pujuuwai mina uwemtaijuk,  
 Tuke Pujuuwai mina pujutjun kuitamjutuk,  
 nunin aish ¿yanak wisha ishamkainja?

2 Aents pegkegchau  
 mina shiwag aina nunú,  
 ijunainawai mina mantuawagtatus,  
 tujash ditak tukumak iyajag jinuinawai.

3 Kuashat suntag mina tententuinakuish,  
 wika ishamkashtatjai,  
 tuja mina jetetkagtatus uminainakuish,  
 wika puyattsuk pujuttajai.

4 Ima makichkia nunak  
 Tuke Pujun segabaijai,  
 tuja wika ima makichkia nunak wakegajai:  
 Wika iwaku pujag duikik  
 kashi kashinig Tuke Pujun emematkun  
 niina jee pegkegma nuwi  
 pujustatajai, niina pegkegmajiya  
 nuna wainkatasan.

5 Tsawan utugchat ajuttaish,  
 Apajuí niina jee pegkegma nuwi uugkattawai,  
 Tuja kaya muunnum waka  
 uwemaina numamtuk uwentijugtatui.

6 Nuadui mina shiwag aidau  
 tententuinakuish, ishamkashtatjai  
 Apajuí depetmikaju asamtai.  
 Nuadui kuntuin maan  
 Apajuí jee pegkegma nuwi  
 apeakun niina ememattatjai;  
 shiig aneasan senchi kantamkun  
 Tuke Pujun ememattatjai.

7 ¡Tuke Pujuuwah,  
 amina segajame, antugtukta!  
 ¡Minash wait anenjujam, aigkata!

<sup>8</sup> Mina anentaig chichagtak:  
 “Apajuí egakta”, tujutui.  
 Nuadui amina wainkatasan egagme.  
<sup>9</sup> ¡Wait aneamam uumjutkaipa!  
 ¡Kajegtukam aigtsuk idaitusaipa!  
 ¡Ima ameketme mina yainnumek!  
 Nuadui mina ayamjutmain atsugtaigkik,  
 ima minakek idaitusaipa,  
 wagki ametme mina Apajuíg uwentijin.  
<sup>10</sup> Mina apag mina dukugjai  
 ima minak idaituinakuish,  
 Tuke Pujuwah,  
 ame minak jujukim kuitamjuktinaitme.

<sup>11</sup> Mina shiwag aidau egatuinawai,  
 nuadui Tuke Pujuwah,  
 amina jintim pegkeja nunú iwaintugkata,  
 tuja wisha wajuk pujumainaitja nunú tujutta.  
<sup>12</sup> Mina shiwag aidau dita wakegamujin uminak,  
 maatnume tusamek tsagakmjukaipa,  
 mina shiwag tsanumin aidau nantagtujaje.  
<sup>13</sup> Tujash wika eke jatsuk  
 iwaku juju nugka juwig pujusan,  
 amina pegkegmagma nuna  
 wainkatnunak shiig dekaikai.

<sup>14</sup> ¡Tuke Pujuuwai  
 kajinmamsam anentaimsata!  
 ¡Ishamkagtutsuk, ichichmamjata!  
 ¡Ehe, dekas ima Tuke Pujuuwaig  
 kajinmamsam anentaimsata!

## 32

### *Tudau etsegtumaka tsagkugnamu*

David kantamamu

<sup>1</sup> Tudauji ashí tsagkujamua duka  
 shiig aneastinai.  
<sup>2</sup> Aents pegkegchau takatan  
 anentaimtus wekaetuchuk shiig aneastinai.  
 Tuja tudauji ashí tsagkujamushkam shiig aneastinai.  
<sup>3</sup> Wika mina tudaujun etsegtumachkunuk,  
 wake besemag pujau asan ayatak jamaijai.  
<sup>4</sup> Nuadui ame dekapjau asamin,  
 tsawaish tuja kashish  
 senchi waitmaijai.  
 Yagkug etsa sukuam kagama  
 numamtuk dekapmamkun,  
 kakaumainchau dekapmaijai.  
<sup>5</sup> Nuniakun mina pegkegchaugnak,  
 makichkish uutsuk etsegtumaktajai  
 tusan amina ashí ujakmaiijame,  
 nuadui ame mina tudaujuk  
 ashí tsagkugtugmayume.  
<sup>6</sup> Nuadui amina umigtamin aidauk,  
 waituinakush amina segapainawai.  
 Nuadui nujag dujajak  
 nugka punag weakush,  
 ditanak amaigkashtinai.  
<sup>7</sup> Ametme mina ejamataigmek,  
 ishamainnumash ame kuitamjame;

nuadui ame agkanmitkajuamun anentaimtusan  
shiig aneakun, kantamjagme.

<sup>8</sup> Apajuí chichaak:  
“Wi aminak diyakjame,  
nuadui amina unuinagtasan jintintuattagme,  
tuja wiki jintan inaktusan kuitamkattagme.

<sup>9</sup> Nuadui caballo, burrojai anentaimchau  
asamtai, jagken jijui jinka emetua  
mai japia, mai japia,  
awajam wegama numamtinuk, amek aipa”,  
tujamui Apajuí.

<sup>10</sup> Aents pegkegchaun takau aina duka  
kuashat waituinawai.  
Untsu ima Tuke Pujuuwaig  
kajinas anentaimaina nunak,  
niina anenke múunta duwi  
tuke ijik kuitamui.

<sup>11</sup> Aents pegkeg,  
tuja takatjish pegkeg aidautigmek,  
Tuke Pujuuwai shiig dakujustajum,  
¡Nuniakjum nii emematjukum shiig aneasjum senchi kantamjuatajum!

### 33

*Shiig aneasa Apajuí emematku kantamjamu*

<sup>1</sup> Aents pegkeg aidauwah, shiig aneasjum  
Tuke Pujuu emematjukum kantamatajum.  
Aents pegkeg aidau kantabauk yajautsui.

<sup>2</sup> Arpa awatku kantamtai kantamkujum  
Tuke Pujuu see titajum.

<sup>3</sup> ¡Kantamtai pegkeg aina nunú  
kantamkujum nii ememattajum!  
Tuja yamajam kantamtai  
kantamkujum nii eme anentsajum  
shiig aneakjum unsumtajum.

<sup>4</sup> Tuke Pujuu chichamega duka  
waitchauwai, shiig dekaske,  
nuadui nii tibauwa duka ashí betek uminui.

<sup>5</sup> Tuke Pujuuk pegkeg takata nuna  
dekaskea nujai aneawai.

¡Nuadui niina anenkega duka  
ashí nugkan jamag awai!

<sup>6</sup> Tuke Pujuuk ima niina chichamenig  
nayaim aidaun, nantu, etsa, yaya aidaun  
aatus ashí najankauwai.

<sup>7</sup> Apajuyai kucha múun aidaunmayan  
yumi yajuak makichkinmak ijumjauwa duka.

<sup>8</sup> ¡Aents ashí nugkanmaya aidautijum  
Tuke Pujuu eme anentsajum umigkatajum!

<sup>9</sup> Wagki nii niina chichamenig  
ashí najankauwai.

Tuja nii nunikti timauwa duka imanisag  
makichkish wajukachmin wajas asauwai.

<sup>10</sup> Tuke Pujuuk aents pegkegchau  
tikich nugkanmaya aidau  
pegkegchaun dutikatag tusa  
anentaimtugbaujin betek umikti  
tusag ayatkek idaitsui.

11 Untsu Tuke Pujuu nuna dutikatjai tibauwa duka makichkish yapajinchauwai.

12 Aents aidau Tuke Pujuuwai dekas iina Apajuujig tuina duka

shiig aneasag pujusagtinai, wagki midau ati tusa etegkamu asag.

13 Tuke Pujuuuk nayaimpinum pujusag ashí aents aidaunak diyakui.

14 Nii puja nuwi pujusag aents nugkanmaya aidaush wajukenawa nunak ashí wainui.

15 Apajuíyai iina anentain najadauk, nuadui ashí ii takamunak diigtamkawai.

16 Makichik apua duka niina suntaji aina nujaig ayamjumakag uwemaitisui, tuja aents aidaushkam niina senchijinigkik ayamjumamaitisui.

17 Tuja caballo aina duka senchigtin ainayatkush, aentsu ayamjukag uwentikmaitisui.

18 Untsu Tuke Pujuuun eme anentus, ima nuyaig kajinmamas anentaimaina nunak nii tuké kuitamui.

19 Tuja nujan tepeamtaish, nujantai jakati tusag idaitsui.

20 Ii aidautik Tuke Pujuuwai kajinmamsa anentaimji, nuniajin jnii kuitamjamak yaimpaji!

21 Iina anentain Apajuí anentaimtusa shiig aneaji. Nuniaku niina daaji pegkegma nuwi kajinmamsa anentaimji.

22 ¡Tuke Pujuuwah, aminí anentaimsa pujau asajin, amina anenkagmia nunú uyunkagtusti!

## 34

*Apajuí wait anenkagtamu anentaimtusa kantabau*

David Abimelec maatag tama mantuawai tusa tsanumak imaanjaujai betek wajatai, jiiki awemam pujus agagbau

1 Wika Tuke Pujuuunak kashi kashinig pegkegnum chichagkun, tuke ememattinaitjai.

2 Wika Tuke Pujuuwai eme anenmamjai; nunú antukjum ememachu aidautigmek, shiig aneastajum.

3 Tuke Pujuu daaji múunta nunú ashí ijuntasaja emematiagmi.

4 Wika Tuke Pujuuun segabiajai yainkati tusan, dutika ai sapigmamujun agkanmitkajuabi.

5 Tuke Pujuuwai anentaimas pujuidauk, shiig aneasag pujuinawai, nuadui datsan ipatmak achagtinai.

6 Wika wainkauchitjai, nuniau asan Tuke Pujuuun segabiajai. Tusa segai nii antugtuk,

wi waitiamujun agkanmitkajuabi.

7 Aents Apajuín eme anentus umijin aidaunak

Tuke Pujuu aentsji ángel awemamua nunú kuitamui.

<sup>8</sup> Tuja Tuke Pujuush dekas pegkejashit tusajum dekaatasa wakegakjumek dekapstajum: ¡Aents Apajuíyai kajinmamas anentaimaidauk, shiig aneas pujusagtinai!

<sup>9</sup> Tuke Pujuunu atajai tumamiu aidautigmek, nii eme anentsajum ememattajum; wagki niina umijuidauk makichkish atsumchagtinai.

<sup>10</sup> Wiakuch aina duka ujudauch wajasag nujantai waituinawai.

Untsu aents Tuke Pujuun egau aina duka tuke waittsachagtinai.

<sup>11</sup> Mina uchig aidauwah, minai minitajum, nunikjum antugtuktajum, Tuke Pujuu umigtan wi jintituatjime.

<sup>12</sup> ¿Kuashat tsawan pujustasamesh wakegamek? Iwaku pujusam shiig takakum dakujustasamesh ¿wakegamek?

<sup>13</sup> Nuniakmek, pegkegchau chichamak chichatsuk pujusta, tuja wait aina duka makichkish chichakaipa.

<sup>14</sup> Pegkegchau takat aina duka idaisata, nunikam pegkeja duke takasta; nuniakum kakanmamsata maak agkan pujutnum.

<sup>15</sup> Tuke Pujuuk aents niina shiig umijin aina nuna kuitamui, dutikak nii sumamunash antujuk yayawai.

<sup>16</sup> Untsu tudaun takau aidaunak Tuke Pujuu kajejawai, dutikak ijina atakesh adeagchatnun emegkagtatui.

<sup>17</sup> Tuke Pujuuk niina umijin aidau sumamun betek antujui; dutikak nii waitiamujinash agkanmitkawai.

<sup>18</sup> Aents wika uwemjashthinapitja tusa anentaimak waitiaun uwemtijatatus Tuke Pujuuk tikijuch pujawai.

<sup>19</sup> Tuke Pujuun umigna duka kuashat utugchatan igkuawai, tujash niinak Apajuí depetmatnak suwawai.

<sup>20</sup> Tuja niina ukunchi aidaunashkam nii kuitamjawai; nuadui makichik ukunchinakesh kupigkachagtinai.

<sup>21</sup> Aents pegkegchau aina duka ditá tudau takamsamujin waituinawai, tuja Apajuí umijin aidaun kajejuina dushakam suwimkan jukiagtinai.

<sup>22</sup> Tujash Tuke Pujuuk niina inake aidaun uwemtikawai. Nuadui ¡Tuke Pujuuwai kajinmamas anentaimaidauk suwimak suwamak achagtinai!

## 37

*Apajuíyai g kajitmamsa anentaimat*

David kantamamu

<sup>1</sup> Aents pegkegchaun pujutji diigsam kajeikaipa, tuja aents pegkegchau aidau atsumkas pujuinakui, nunú diisam kajejkagtukaipa.

<sup>2</sup> Wagki nunú aents aina duka

dupa tsupikam wamak kagaja megkagama  
numamtin ainawai.

<sup>3</sup> Tuke Pujuuwaig kajinmamsam anentaimsata,  
nuniakum ima pegkeja duke takasta.  
Nuniamin Apajuí yaimpasmatai,  
juju nugkanum pujusa takakum  
shiig yuwa pujusminum.

<sup>4</sup> Tuke Pujuu shiig anentsam aneeta,  
nii umiktatui ame senchi wakegamunak.

<sup>5</sup> Amina pujutjumeke Tuke Pujuu idaitusta,  
dutikakum niyai kajinmamsam pujusta,  
nuniamin nii yaimpaktatui.

<sup>6</sup> Ame shiig pujamugmea nunú,  
tuja amina takatjum pegkeja dushakam  
etsa tajimak shiig etsantama iman atinai.

<sup>7</sup> Tuke Pujuu emtin wainka chichá wekaetsuk  
takamtak pujusta;  
nuniakum dakasta nii yaimpakti.  
Tuja aents pegkegchau aidau  
shiig atsumkas pujuinakui,  
nunú diisam kajegkagtukaipa.

<sup>8</sup> Tuja kajeta duka idaisata,  
kajeka jiyanita dushakam ukukta,  
kajekaipa, wagki kajeamua duka utugchatan itawai.

<sup>9</sup> Aents pegkegchau aina duka ijina utsaam agtinai.  
Untsu aents aidau Apajuín umiujinak  
niinig anentaimas kajinas batsata nunú  
Tuke Pujuu nugkan anagkagtuawa nuna jukiagtinai.

<sup>10</sup> Aents pegkegchaun takau aidauk,  
dukup atsuk megkaejattawai;  
nunikagmatai wainkatasa egaakmesh  
makichkish wainkashtainaitme.

<sup>11</sup> Untsu aents ememachu aina nunú nugka pegkegnum wayawag,  
tutit chicham atsamunum shiig pujusagtinai.

<sup>12</sup> Untsu aents pegkegchauwa duka  
aents pegkejan kajejak  
pegkegchau awajkatatus egatui.

<sup>13</sup> Tujash Apajuik nunú aents aidaunak dushikiawai,  
wagki dita megkaejatnuk tsawan jegau asamtai.

<sup>14</sup> Aents pegkegchau aina duka  
ujudauch aidaun, ememachu aidaun,  
pujutji pegkeg aidaun aatus maawagtatus  
puyagjin akentaijjai uminawai.

<sup>15</sup> Tujash ditak, dita puyagjinig maam agtatui,  
untsu akentaiji aina duka  
kupija utsantam agtatui.

<sup>16</sup> Aents pegkegma duka  
wajiji kuashat achataish,  
aents wiakuch pegkegchaun  
nagkaesau shiig pujawai.

<sup>17</sup> Wagki Tuke Pujuuk  
aents pegkegchau aidaun ijinak,  
aents pegkeg aidaun kuitamkattawai.

<sup>18</sup> Apajuik aents tudaugtuchu aidaun kuitamui,  
tuja ditak ajumaish tuke atina nuna jukiagtinai.

<sup>19</sup> Tsawan waitiamu jegataish,



ditak waittsachagtinai,  
tuja nujan tepeamtaish,  
dita yuwatnuk kuashat ajiagtinai.

<sup>20</sup> Aents pegkegchau aina duka  
dupa kagakujai betek keekagtinai.  
Tuja Apajuín shiwaaji aidaushkam  
jii bukuiti megkagama numamtuk  
megkaejatin ainawai.

<sup>21</sup> Aents pegkegchauwa duka  
tsagkatjukta takui tsagkatkamash akikmachui;  
untsu aents pegkeja duka  
tsagkatkamak nuni ewagas akikmawai.

<sup>22</sup> Apajuí pegkegnum yumigsamu aina nunú  
nugka pegkegnum pujusagtinai;  
untsu nii pegkegchaunum  
yumigjamu aina duka, ijina utsam agtinai.

<sup>23</sup> Tuke Pujuuk aentsu pujutjin diijus  
nii wakegamujai betek pegkeg ataik,  
shiig pujusti tusa yayawai.

<sup>24</sup> Tuja nunú aentsuk  
pegkegchaunum iyakush,  
nunisagkek megkaekashtinai,  
wagki nigka Tuke Pujuu achiakbau asa.

<sup>25</sup> Wi datsa asan pujuyag duwikish,  
tuja yamai múuntuch wajasan pujag duwish,  
makichkish waintsujai aents pegkeg aidau  
Apajuí kajimatki idaisamu asag waituidaunak,  
tuja dita uchiji aidaukesh  
yumain atsumam waituinak  
sumá yujaunak makichkish waintsujai.

<sup>26</sup> Aents pegkeg aina duka  
ashí tsawantai wait anenkagtinai,  
nuniau asa tsagkatkagtinai;  
tuja niina uchiji aidaushkam  
pegkegnum chichajam agtinai.

<sup>27</sup> Pegkegchau takata duka tupanjata,  
nunikam pegkeja duke takasta,  
nuniakum ame pujustinun Apajuí anagtabauwa  
nuwi tuke pujustinaitme.

<sup>28</sup> Wagki Tuke Pujuuk  
shiig takamua nuna wakegawai;  
nuadui niina umijuidaunak kajimatkig idaitsui;  
untsu pegkegchau aidauunak  
dita uchiji aidaujai ashí ijinui.

<sup>29</sup> Nugkan Apajuí anagkagtuawa nuwig  
aents niina umijin aidau tuke pujusagtinai.

<sup>30</sup> Aents pegkejak shiig anentaimas chichawai;  
nuniak tuke pegkeja nunak chichawai.

<sup>31</sup> Nuniau asa niina aentainishkam  
Apajuí jintintuamua nunak tuke aneakui;  
¡nuadui niig makichkish pegkegchaunmak  
iyaumaitsui!

<sup>32</sup> Aents pegkegchauwa duka  
aents pegkejan tsanumjug,  
maatnume tusa sujuktatus wekaetawai.

<sup>33</sup> Tujash Tuke Pujuuk aents pegkegchauwa nunú

maati tusag idaisashtatui;  
tuja nuigtushkam tsanumjujagmatai,  
achikag waitkastinme tusagkesh idaisashtatui.

34 Tuja amek Tuke Pujuuwai kajinmamsam pujusta,  
nuniakum niina chichame umigkata;  
wagki nii aminak tikich aidaun nagkaesau etamtatui,  
dutijama nugkan anagtabauwa nuna amastinai.  
¡Nuwi pujusam aents pegkegchau aidau  
jinuidau wainkatnaitme!

35 Aents pegkegchauwa nunú  
numi múun wajaama numamtuk  
ememas wajaun wainkabiajai.

36 Tujash wajukayawas, megkaekabi,  
wainkatasan egaknush wainkachmaijai.

37 Aents shiig anentaimkauwa nunú diista,  
nunú aentsuk tutit chicham atsaunum agkan pujustinai.

38 Untsu aents antumtikmainchau  
intimkiu aina duka  
ashí ijina utsaam agtinai;  
nuadui ditak jinatnujin dakainawai.

39 Tuke Pujuu aents pegkeg aidaun  
yaigka uwemtiknai,  
tuja tsawan waitiamu jegataish,  
nii ejaka kuitamui.

40 Tuja ditanak Tuke Pujuu ayamjuk agkanmitkawai,  
wagki niyai kajinmamas  
anentaimaidau asagmatai.

## 40

*Apajuíjuh, ame wakegamun umiktasan wakegajai*  
(Sal. 70)

David kantamamu

<sup>1</sup> Wika Tuke Pujuu yainkati tusan  
niiyai kajitmamsa pujusan segabiajai;  
tusa segai nii antugtukmayi.

<sup>2</sup> Tuja wi jamainnum jeganta pujaish,  
nii uwemtijugmayi.

Tuja kuchanum tepea  
jamaina numamtuk ashí jaka pujai,  
Apajuí uwemtijugmayi.  
Dutijua kaya múun  
makichkish buchitmainchaunum wajasa iyaumaitsu iman etibi.  
Nuadui wi wekaesatnunak nii umigtuke.

<sup>3</sup> Dutijak yamajam kantamtain  
Apajuí kantamjutain kantamati tusa jintinjuabi;  
nuna wi kantabau kuashat aents aidau  
anentain antinkabi,  
dutikam Tuke Pujuuwaig kajinas anentaibiugmayi.

<sup>4</sup> ¡Aents ememachu  
tuja wainka apajuímtai aidaunash emematchau,  
ima Tuke Pujuuwaig kajinmamas anentaimaina duka  
shiig aneas pujustinai!

<sup>5</sup> Tuke Pujuu mina Apajuíjuh,  
amek jutii wait anenkagtakum,  
kuashat ishamain wainchatai aidau iwainajuitme.  
¡Makichkish amejai betekak atsawai!

Nuna pachisan etsegkatag takunush,  
ashí etsegmainchau dekaapeajai.

<sup>6</sup> Apajui tsagkugtugti tusag  
kuntinu maawag nuna nejen ashí apeatnume,  
dutikainak ajak aidaunashkam anentag sujustinme tusamek sumatsme.  
Untsu Apajuín chichamen antukti tujutiume.

<sup>7</sup> Nuadui, papiinum agagbau  
mina pachitus tawa nujai betek,  
chichaakun: Juwi pujajai, timajai.

<sup>8</sup> Apajuíjuh, ame wakegamu takata nunú minak shiig awajtaiwai.  
¡Ame jintinjuamua nunú mina anentaijui ajutui!

<sup>9</sup> Amina aentsjum aidau  
kuashat tuwaka ijunbaunum  
amina takatjum pegkegma nuna iwainakmajai.  
¡Tuke Pujuuwah, wi aminun pachisa etsegsuk  
uuka pujatsug duka amek shiig dekame!

<sup>10</sup> Tuja aents aidau wait anentakum,  
dita tudaujish tsagkugnaitam nunú pachisa  
etseganmak itattsachmajai.  
Tuja ame anagkagtuamuk betek uminaitam nuna  
ame uwemtikagtamujai pachisan chichagkagtukmajai.  
Nuigtush amina aentsjum kuashat aina  
nuna emtinig amina anenkagminak  
dekaskegmijaig, makichkish uukchamjai.

<sup>11</sup> Nuadui Tuke Pujuuwah, amesh minash wait aneamam  
amina anenkagmea duka atushat etugtipa.

¡Amina anenkagmin  
pegkegmagma nujai yainkata!  
<sup>12</sup> Untsu ame kuitamjachkuminig wika jamainaitjai,  
wagki wi waitiamua duka  
dekapakuish makichkish ejemait sui.  
Mina tudaujuk mina intashjun nagkaesau  
shiig kuashat ajutui.  
Iman asantai, datsaamakun shiig niimsachmin,  
nuigtush shiig pujuschamin jakamin dekaapeajai.

<sup>13</sup> Tuke Pujuuwah, ¡wait aneamam,  
minash agkanmitkajuata,  
dutijakum wamak yainkata!

<sup>14</sup> Aents aidau mina mantuawagtatus  
wakejutuina duka ame inatsakta;  
dutikamu asag,  
mina pegkegchau awajtuktatus  
anentaimaina duka  
datsantin pisagtinme.

<sup>15</sup> Tuja mina dushijuina duka  
datsagkag pisagtinme.

<sup>16</sup> Untsu amina egapaina duka shiig aneastinme;  
tuja ame uwemtikagtinaitam  
nuna wakejuina duka:

“¡Apajuíyai dekas múunta duka!” tusag  
tuke emematjantin atinme.

<sup>17</sup> Tuja wi shiig senchi waitiakun  
wake besemag pujag nunú,  
minash wait aneamam Tuke Pujuuwah, kajimatjukipa.  
Ametme mina yainkam uwemtijinmek;  
nuadui Apajuíjuh, minash wamak yainkata.

## 42

*(Salmos 42—72)**Wi jinta niimjamua duka Apajuíyai*

Coré uchiji aidau kantamawagbau

1 Japa senchi kitamak uwagtatus yumin egama numamtuk wika Apajuíjuh, amina egajame.

2 Apajuí pujuta sukagtina nuna wainkatasan, aents kitakai waitiak yumin egamaina numamtuk egajai.

¿Wajutik wisha ataktush

Apajuí jee pegkegma nuwish wayatja? tusan anentaima pujajai.

3 Nuadui tsawaish,

tuja kashish buutú pujajai,

nuniaí aents aidau inintuinak:

“¿Amina Apajuígmasha?” tujutuinawai.

4 Nuwi anentaimkunuk

wake besemag dekapeajai.

Wi yaunchuk aents aidaun yajuakan

Apajuí jee pegkegma nuwi emai,

shiig aneasag Apajuín emematuinak

untsumki shimuyanum nuna anentaimjai.

¡Yajauwajah ijunja Apajuí emematbau!

5 Iman aish ¿wagkanuk wisha mijaktaja?

Wi puyatjumainuk atsawai.

Apajuí uwemtikagtina nuwig

kajintsan anentaimtatjai,

nuniakun ima niinak ememattatjai.

6 Shiig aneasa pujuschamin

wake besemag dekapeajai,

nuniakun muja Hermón

tuja muja Misar tutainum

namak Jordágka nujinchi jinagbaunum

pujusan aminí senchi anentaimjai.

7 Tuja ame najankamu aidau

mujanum wajasa antam,

namaka nujinchi chichijam

tuna detau aidau senchi uutak,

ishamain wajama imanik

wi waitiamua duka minitjawai.

8 Tujash kashi kashinig

Tuke Pujuu niina anenkega duwi minak yaintui;

nuadui wishakam

Apajuí mina pujutan suja nuna emematkun

kashi kantamtanak mijattsujai,

nuniakun segatnashkam segatskek idaitsujai.

9 Apajuí mina ayamjutna nuna chichagkun:

“¿Wagka minash kajimatjukiume?”

¿Wagkanuk wisha mina shiwag aintuinakuish,

wake besemjash wekaetaja?” tajai.

10 Mina shiwag aidau dushiktuinak:

“¿Amina Apajuígmasha?”

tusa aju ajumag inintuinawai.

Imatjutiagtai mina ukunchig najautuinawai.

11 Tuja ¿wagkanuk wisha mijaktaja?

Wi puyatjumainuk atsawai.

Apajuí uwemtikagtina nuwig

kajintsan anentaimtatjai,  
nuniakun ima niinak ememattatjai.  
¡Niyai mina Apajuíg uwemtjinuk!

### 43

<sup>1</sup> Apajuíyah, wi pegkegchau takamsamu  
atsugta duka ame dekame,  
nuniau asam jaents pegkegchau aina nunú  
maawai tusam ayamjutkata!  
¡Aents pegkegchau waitjin aidaunum agkanmitkajuata,  
<sup>2</sup> wagki ametme mina Apajuíg kuitamjinmek!  
¿Wagka minash idaitusume?  
¿Wagkanuk wisha mina shiwag aintuinakuish  
wake besemjash wekaetaja? tajai.  
<sup>3</sup> Amina tsaaptinjum  
dekaskegmijai sujusta, nunú jintinjuati.  
Muja ame etegkamunum pujam nuwi  
wakatag tusaish wajuk wemainaita nuna.  
<sup>4</sup> Nuwi wakan amina altarjumin jegantan,  
arpa awatkun amina ememattajame;  
wagki shiig aneasa pujuta nunú ame sujau asamin.  
  
<sup>5</sup> Tuja ¿wagkanuk wisha mijaktaja?  
Wi puyatjumainuk atsawai.  
Apajuí uwemtikagtina nuwig kajintsan anentaimtatjai,  
nuniakun ima niinak ememattatjai.  
¡Niyai mina Apajuíg uwemtjinuk!

### 46

#### *Apajuík jutijai pujawai*

Coré uchiji aidau agajagbau  
Juka jaka ukumamunum kantamajakbauwai  
<sup>1</sup> Apajuíyai iina kuitamjamin,  
iina senchimtjamin,  
tuja utugchat ataish tuke yaijatin.  
<sup>2</sup> Nuadui nugka buchittai,  
muja aidau yumpunainak,  
nayantsanum kakegu  
wainkuish ishamaitsuji.  
<sup>3</sup> Nayants senchi tsukatbau,  
kedegtak muja aidau senchi umuchiak  
ishamain wajakuish ishamaitsuji.  
  
<sup>4</sup> Namakak nii tsegkeakbaujjai  
Apajuí yaaktajin aents batsatun shiig anemtikui,  
nunú yaaktak dekas tikich yaakat aidau nagkaesau  
shiig pegkegmai, Apajuí pujutai asa.  
<sup>5</sup> Apajuík nunú yaakta ejapeen pujawai,  
nuadui makichkish tsaimainchau ainawai.  
Tuja Apajuí aentsji aidau,  
nunú yaaktanum batsatunak kashikiuch nagkamas yayawai.  
<sup>6</sup> Aents nugka muunnumia aidauk,  
nugka múun aidau apuji aidaujai  
Apajuí chichamun antukag  
ishamainak senchi pampainawai.  
Tuja nugkashkam Apajuí chichatai,  
yumpuna tsainak megkaewai.  
  
<sup>7</sup> ¡Tuke Pujuu ashí senchigtina duka jutijai pujawai!  
¡Jacopan Apajuíjya nunuwai iina kuitamjamin!  
  
<sup>8</sup> Tuke Pujuu ishamain wainchatai aidau

juju nugkanum iwainajua nunú  
taajum diistajum.

<sup>9</sup> Maanitik ashí nugkanum atsuti tusa tine.  
Nuadui maaniaku flecha akentai aidaunak  
nagki aidaulai kupigmayi,  
dutikak carro maaniaku jutai aidaunashkam  
apeka utsagmayi.

<sup>10</sup> ¡Anuig nagkankatajum!  
¡Witjai Apajuínuk, nunú dekatajum!  
Ashí nugkanmaya aidauk mina umigtukagtatui.

<sup>11</sup> ¡Tuke Pujuu ashí senchigtina duka jutijai pujawai!  
¡Jacopa Apajuíiya nunuwai iina kuitamjamnuk!

## 47

*Apajuíyai ashí nugka apujig*

Coré uchiji aidau kantamawagbau

<sup>1</sup> Ashí aents aidautijum Apajuí uwejum awatitajum.

Tuja nii emematkejum

shíig aneasjum senchi kantamatajum.

<sup>2</sup> Wagki Tuke Pujuuwai ishantai múun, ashí nugka apujiya duka.

<sup>3</sup> Aents tikich nugkanmaya aidaun Apajuí depetuk,  
atum inagtajum tusa iina idaitugmasui.

<sup>4</sup> Apajuí Jacopan aneau asa,  
nii wegantu aidautin etegtamjauwai,  
dutijama nugka pegkejan  
nii anagtabauwa nuna sujamsajui.  
Nunú nugka duwi ii eme anenmamji.

<sup>5</sup> Tuke Pujuu Apajuík niina aentsji aidau  
shíig aneasag senchi kantamainak,  
nuigtu uwija kachujin umpuinak  
pampainamunum niina pujusa inamtaijin  
waya ekemsae.

<sup>6</sup> ¡Kantamtai Apajuí kantamjuatajum!

¡Kantamtai iina apuji kantamjuawagmi!

<sup>7</sup> Apajuíyai ashí nugkanmaya aidaun apuji,  
nuadui shíig aneasjum kantamjuatajum.

<sup>8</sup> Apajuík nii pujusa inamtaiji  
pegkegma nuwi pujusag,  
ashí aents nugkanmaya aidaun inawai.

<sup>9</sup> Tuja ashí tikich nugkanmaya  
apu eme anentsa diitai aidauk,  
Abrahama Apajuíjin ememattatus  
nii wegantu aidaulai ijunainawai.

<sup>10</sup> Ashí aents nugkanmaya aina duka Apajuínu ainawai.  
Nuadui nii ashí inawai.

## 51

*Apawa wait aneasam mina tudaujush tsagkugtugta*

David Betsabén nuwatkamtai\* profeta Natán jiyakam pujusa juna aatus agajui

<sup>1</sup> Apajuíyah, amina anenkagmin wait anenjugta;

tuja amina wait anenkagtutaigmin  
mina tudaujush tsagkugtugta.

<sup>2</sup> ¡Mina anentaijui pegkegchau ayá nunú nijatjugta!

Tuja mina tudaujush jaipja utsanjukta.

<sup>3</sup> Mina pegkegchaugnak wika shíig dekagmamjai.

Tuja wi pegkegchau takamsamua duka  
mina anentaijuig sakamtsui.

<sup>4</sup> Ame dakitamun amina emtimin

\* 51: Nunú pachisa ausata 2 Sam 12.1-12.

pegkegchaun takamsan  
 ikajeakun waitkagme.  
 Nuadui minak dekaskenum  
 suwimkak sujustatme.  
 Wika pegkegmaitjai tusanuk tumaitsujai.

<sup>5</sup> Wika dekas wi akiinawaitag  
 duwi nagkamsanuk tudauwaitjai;  
 tuja mina dukuju muntsujin muntsuaku asanuk tudau ayajai.

<sup>6</sup> Amek dekas aents ememachu  
 dekaskenum chichauwa nunú aneame;  
 nuadui shiig anentaimja pujut sujusume.

<sup>7</sup> Wi pegkegchau takamsamu  
 mina anentajjui ajuta nunú hisopowai† jaipja ajapjutuata,  
 dutijuawamin pegkeg wajastajai;  
 ashí minak nijatjata, dutijuawamin  
 yujagkim pujuama nuna nagkaesau wajastajai.

<sup>8</sup> Suwimak sujakum waitkagsau akumesh,  
 yamaik minash shiig aneasa pujut sujusta.

<sup>9</sup> Mina tudaug aina duka kajimatkita,  
 nuniakum mina pegkegchaug aina nunú  
 ashí esaktujata.

<sup>10</sup> Apajuíyah, mina anentajjush tudaugtuchu yamajam etugtita,  
 dutikakum pegkeg anentaimat  
 ima aminak umigtamain sujusta.

<sup>11</sup> Tikima ajapjutak ajapjuawaipa,  
 tuja amina Wakanim Pegkegma dusha jujutkipa.

<sup>12</sup> Tuja ame uwentikagtujamin shiig aneamu  
 ajutkagtuwama nunú ataktu sujusta,  
 nuniakum amina Wakanim wait anenkagtina nujai  
 kuitamjukta.

<sup>13</sup> Dutijuawamin aents amina chichamjumin umitan  
 dakitin aina nuna jintintuatjai,  
 amina nemagtamkatnume tusan.  
 Dutika ai aents tudau aidaush dita tudaujin idaisag  
 ima aminak umigtamkatnume.

<sup>14</sup> Apajuíyah, ametme mina uwentijinmek,  
 tuja wi pegkegchaun takamsawaitag duwi  
 maatnume tusamek idaitusaipa.  
 Wisha ame wait anenkagtutaigmea nuna  
 pachisan etsegekun shiig aneasan  
 kantamtain senchi kantamjuatjame.

<sup>15</sup> Apuh, minash kantamati tujutta,  
 wisha kantamtain amina kantamjuatjame.

<sup>16</sup> Tuja uwija maan nuna nejen ashí apeakun,  
 nuigtu anentag aidaun amaakun  
 amina ememattag takunush  
 dutikmainchau dekapeajai,  
 wagki duka aminak shiig awajtamchau asamtai.

<sup>17</sup> Apajuíyah, amek aents wika tudauwapitja tusa  
 anentaimak waitia nunú shiig anentame.  
 Tuja aents wika tudauwapitja tusa  
 awake anentaimag tsagkugtugta tusa  
 segapakuig, yaitskeke idaichauwaitme.

<sup>18</sup> Apuh, wait aneam  
 Isarael aents aina nunú  
 wait anenjam kuitamkata.

† 51:7 "Hisopo" tawa duka makichik ajak ajakui. Nuna duke juki jaipmaina numamtuk jaipjugti tusa David tiuwai.

Dutikakum Jerusalén peejamu tsaikbauwa nuna  
 ataktu peejatneme tusam yaigta.  
<sup>19</sup> Dutikawamin kuntinu maawag  
 nuna nejen ashí apeawagtata  
 nunú shiig awajtamkattawai.  
 Nuadui amina emematjamainak  
 toro tsakat aidaun maawag apeawagtinaí.

## 63

### *Apajui anenkeg*

#### *pujutan nagkaesauwai*

David Judá wegantu aidau nugken uwegshunum pujusa agagbau

<sup>1</sup> Apajuijuh,  
 ametme mina Apajuígmek,  
 Yama tsawamuik kashikmasan  
 wakejusan segajame,  
 wika amina wainkatasan wakegakun  
 kitamaku wajuktayama imaniajai.  
 Tuja yumi yutushtai nugka buku wajas,  
 yumin atsumak wajukchawash imaniawai,  
 mina iyashjuk amina atsumjamak.

<sup>2</sup> Amina jem pegkegma nuwi wayan,  
 amina imanjumea nuna

senchigmijai wainkatasan wakegajai,

<sup>3</sup> wagki amina anenkagmea duka

pujutan nagkaesauwai,

nuadui kantamkun ememattatjame.

<sup>4</sup> Wika aminak tuke ememattinatjame,

nuniakun mina uwejun takuin

amina aujattatjame.

<sup>5</sup> Aents yutai pegkejan yuwa

shiig aneas pujuuwa numamtuk wika shiig aneasan pujuttajai,

nuadui shiig aneasan

kantamkun ememattatjame.

<sup>6</sup> Kashi kanaku tepesnush

aminí anentaimsanuk tepajai.

<sup>7</sup> Ametme mina yaintumek;

nuadui aminí yunumsan

ame kuitamjusamin shiig aneasan pujujai.

<sup>8</sup> Ashí mina pujutjua nunak

amina amaajai, wagki ame minak

amina senchigmin kuitamjame.

<sup>9</sup> Mina mantuawagtatus

wakejutuina duka ijinata,

dutikam inítak yutuam emegkagta.

<sup>10</sup> ¡Dítak nagkí iju maam agtinaí,

dutikamun ikamia yawá yukagtin aidau

dítá iyashinak yuwawagtinaí!

<sup>11</sup> ¡Untsu apuk, Apajuiyai shiig aneastinaí!

¡Tuja ashí aents Apajuin daajin chichau aidaushkam

shiig anentsag kantamjuawagtinaí!

Untsu waitjin aina nuna weninak

Apajui ashí epetjatnai.

## 65

### *Ima Apajuíke ememattaig*

David kantamamu

<sup>1</sup> Apajuiyah, muja Siógnun pujuuwah,

jametme eme anentsa

kantamjam amainmek!



Amina takagsatjame tusa anagtabau aidauk  
betek umigtamain ainawai.

<sup>2</sup> Amek ii segamash antugkagtame;  
tuja ashí nugkanmaya aidauk aminí mininawai.

<sup>3</sup> Iina tudauji aidau wagagkagtakuish,  
ame tsagkugkagtame.

<sup>4</sup> Ame aents aidau etegjam,  
ame jem pegkegma nuwi amejai pujustinme  
tiuwaitam duka shiig aneasagtinaí.  
¡Tuja ame jem pegkegma nuwi pujusa  
amina pegkegmagma nunú waikau asaja shiig aneestatji!

<sup>5</sup> Apajuíyah, ametme jutiin uwemtikagtinmek,  
nuadui aents pegkegchau aidau suwimak suwakum  
amina umigtamaidauk shiig anennaitme.

Nuadui ashí nugkanum pujuidak  
tuja nayantsa amain atushat batsamin aidaushkam  
ima aminig kajinmamas anentaimainawai.

<sup>6</sup> Muja aidauk amina senchigmijai najanauwaitme,  
dutikam buchittsuk asatnume tusam kuitame.

<sup>7</sup> Amek nayants tsukatbaujish imignaitme,  
tuja aents aidau pampaidash,  
bitat asatajum tusam itatmitkauwaitme.

<sup>8</sup> Tuja atushat batsamin aidaushkam ame amina senchigmin  
wainchatai aidau iwainamun waikag kujainawai.

Tuja ashí nugkanum batsamin aidaush  
aminí shiig aneenak untsumainawai.

<sup>9</sup> Ametme nugka kuitamnumek;  
tuja yumishkam yutumtikame,  
dutikam ajak aidaush tsapapitkame.  
Ame yumi yutumtikjama betsaka akagak  
nugkan uchupjamtai, trigo aidaush  
shiig tsapainiag nejenawai.

<sup>10</sup> Ajak ajakmatasa nugka taimu aidaush  
yumi yutumtikjam uchupiamé,  
wagki ajak aidau tsapainiag senchi nejektinme tusam.

<sup>11</sup> Ajak aidau mijadai kuashat nejektinme  
tusamesh nejemtiknaitme.

Tuja yumi kuashat yutau asamtai,  
yumi atsumakuish waitnatsui.

<sup>12</sup> Nuadui uwegshunmash  
dupa tsapaka samekbau pegkeg wajas awai.

Tuja muja aidaushkam  
samekbau pegkejan iwagmamainawai.

<sup>13</sup> Tuja nugka nain pegkeg aidaunmak,  
tagku aidau piyake,  
tuja nugka paka aidaunmak  
kuashat trigo ayawai.

¡Ashí nunú aidau shiig anenawai!

## 66

*Apawa amina takatjumek shiig pegkejai*

Kantamtai agagbau

<sup>1</sup> Ashí nugkanmaya aidautijum  
shiig aneasjum Apajuí kantamjuatajum.

<sup>2</sup> Apajuí daaji pegkegma nunú pachisjum  
kantamtai kantamatajum.

Tuja niina imanjiya nunú pachisjumshakam  
kantamtai kantamatajum.

<sup>3</sup> Apajuí chichagkujum:

“Amina takatjumek shiig pegkeg ainawai.

Ame ima senchigtin asamin,  
 amina shiwaajum aidauk  
 ishamjamainak aminí yunumainawai.  
 4 Nuninak ashí amina etsagtamainawai,  
 nuninak amina daagmin pachisag  
 kantamtain kantamainawai”, titajum.

5 Apajuí aents aidautin ayamjutpak  
 ishamain wainchatai aidaun iwainajua  
 nunú anentaimekastajum.

6 Nigki nayantsanash ukuya buku emauwai,  
 dutikamtai ii muunji aajaku aidau bukunum katiyajui.  
 Nuadui jima Apajuíyaig shiig aneasagmi!

7 Apajuí niina senchijiya duwi  
 aents aidaunak tuke inawai;  
 untsu niina umigtan dakitin aidaunak  
 nijai shiwagmagawainum tusa tuke diyakui.

8 ¡Ashí aents aidautijum,  
 iina Apajuíjiya nunú  
 pegkegnum chichagtajum!  
 ¡Dutikakjum kantamtai kantamjuatajum!

9 Wagki nii iinak kuitamjamui.  
 Pegkegchaun takastinme tusag idaikagtatsui.

10 Iina Apajuíjiyah,  
 amek ima aminigkiash  
 kajinas anentaime tusam  
 dekapkagtusuitme,  
 nuadui plata jinum jiyamu  
 pegkejama iman ekagtiuwaitme.

11 Tuja kuintin achiktinun  
 dakamtikak, kuintinun achiyajama numamtuk,  
 shiwaaji achiktinme tusam  
 tsagkamkagtukume.

Nuigtush shiig kuashat waitkagkagtusume.

12 Nuadui aents pegkegchau aidau  
 waitkastinme tusam  
 agkan idaisabiame,  
 tuja jutiik yuminmash tuja  
 jiinmashkam nagkaemakmai.  
 Dutika ashí dekapkagtusam,  
 juju nugka pegkeja imagnum  
 pujustinme tusam apujkagtusmayume.

13-14 Nuadui wi yaunchuk  
 ishamainnum pujusan amina chichagkun:  
 Ame yaintsamin juna nagkaikinuk,  
 amina emematkun anentag amastinaitjame  
 tiuwaitjam, nuna imatiksasuk amina jem  
 pegkegma nuwi wayan kuintinu maan,  
 nuna nejen ashí apeakun ememattatjame.

15 Tuja kuintin duwejam aidaun  
 uwija wiyaji aidaujai  
 amina eme anentsan ashí apeattajai.  
 Nuigtushkam toro aidaun, chivo aidaun,  
 amina emematkun apeattajai.

16 ¡Ashí atum Apajuí umijin  
 aidautigmek minitajum!  
 Numikjum antuktajum  
 Apajuí mina yainka nuna pachisan ujaktajime.

17 Apajuín untsukmai.  
 dutikan niina emematkun kantamjuamiajai.

18 Wi ayatak pegkegchaunmak

anentaimesan pujutaik,  
 Apajuik antugtukchatnuyi.  
<sup>19</sup> Tujash minak antugtuku asa,  
 wi segamunash yainkabi.  
<sup>20</sup> ¡Apajuik wi segamunak dakitjachmayi,  
 tuja niina anenkenash sujitjukchabi,  
 nuadui tuke ememattai atin ati!

## 69

### *Waitiaku pujusa Apajuí segamu*

David kantamamu

- <sup>1</sup> Apajujuh, kuashat waitiakun  
 atsanmainchau dekapeajai,  
 wait aneamam yainkata.  
<sup>2</sup> Kucha amutnununum tepeajai,  
 wajai emetumainkesh atsugtawai.  
 Dekas namaka kunajin akaejai,  
 namak chichijam asa ajektawai.  
<sup>3</sup> Untsu untsunkawan sagagjai;  
 mina suweg dajautawai.  
 ¡Apajuin daka dakakuan jiijuish yawegjai!  
<sup>4</sup> Mina shiwaajuk intash kuashta  
 nuna nagkaesau ainawai,  
 utugchat atsugtaig kajegtuinak,  
 mantuata tag tuinawai.  
 Tuja makichkish kasamkachu aig,  
 kasamkamujum awagkita tusa imatjutuinaawai.
- <sup>5</sup> Apajujuh, ame dekame wika pegkegchau ayajai;  
 nuadui mina tudaugnak ugmaitsugme.  
<sup>6</sup> Tuke Pujuu Apajuí ashí senchigtinuh,  
 jaminí kajinmamas anentaimein aina nunú,  
 wainak mina pegkegchaujui  
 datsaama yujainum idaisaipa!  
 Israel aents aidaun Apajuíjyah,  
 aents amina egapau aina nunú  
 mina pegkegchaujui datsaama  
 yujainum kuitamkata.  
<sup>7</sup> Amina umiju asan  
 kajegtuinakuish katsuntajai.  
 Datsanjui mina yapujuk nimpawai.  
<sup>8</sup> ¡Mina yatsuchig aidaush,  
 tikich aents itugmaina dutijuinawai!
- <sup>9</sup> Amina jemin akasmatkun senchi waitiajai.  
 Tuja amina pegkegchaun chichagtamainakui,  
 nuna antakun kajeajai.  
<sup>10</sup> Buutkun yujumkan yutsuk  
 ijagmaan pujai, dushiktuinakuish katsuntajai.  
<sup>11</sup> Jakamunum nugkutain  
 nugkuai, dushiktuinakuish katsuntajai.  
<sup>12</sup> Ashí aents aidauk  
 pegkegchaun chichagtuinawai.  
 Tuja nampen aidaushkam  
 tuke aneam dushiktuinak kantamjutuinaawai.
- <sup>13</sup> Tujash Tuke Pujuuwah,  
 wika amina segajame,  
 ¡wait aneamam yainkata!  
 Amek anenkaitme, tuke kuitamkagtinaitme,  
 iman asam minash uwemtijugta.  
<sup>14</sup> Tsakusnum tepean tepag nunú

eke jatsaig jiigkita,  
tuja mina kajegtuina dusha agkanmitkajuata.  
Tuja namak chichijam ajapjuattak  
awajta nunú uwemtijugta.

<sup>15</sup> ¡Namak chichijam  
ajekjati tusamek idaitusaipa!  
Tuja wainchi ishamaina nunú  
yutua emegkakti tusamesh idaitusaipa.

<sup>16</sup> ¡Tuke Pujuuwah,  
amek pegkeg, anentak wajasuitme,  
iman asam minash aigkata!  
Amek wait anenkagtinaitam  
iman asam minash antugtukta.

<sup>17</sup> ¡Juju amina inakem  
segapa nunú antugsuk idaisaipa!  
¡Utugchat ishamain ajutui, wamak yainkata!

<sup>18</sup> ¡Juwi taam, shiwag aidau  
waitkajuina nunú ayamjuktata!

<sup>19</sup> Amek mina dushiktuinak  
inastuina duka shiig dekame.

Tuja mina shiwaajush ya ainawa  
dushakam amek dekame.

<sup>20</sup> Ima imatjutuinakua ipimtukiaje,  
nuadui shiig aneasa pujumainchau  
kakaagchamin dekaapejai.

Yaki wait anenjug  
anentajun ichichtujainta tusan,  
egaknush wainkachmajjai.

<sup>21</sup> Yapajaish, yutainum jatain egketjiagmayi,  
tuja kitamaish chujuinun sujiagmayi.

<sup>22</sup> Nuadui dita jiiistamaina nunú  
yutaiji aina nunú aatus ditan pempeentuki  
utugchatan apujtusti.

<sup>23</sup> ¡Tuja wainmachu,  
kakaumainchau emakta!

<sup>24</sup> Dutikakum ame kajekbauwai  
makichkish idaitsuk ashí ijinata.

<sup>25</sup> Dutikawamin dita jee aina duka  
agkan juwajagtatui,

tuja nunú jega aidaunmak  
makichkish pujuschatnume.

<sup>26</sup> Wagki ame mina suwimak sujusamin  
waitiaish, ditak minak diigtsuk  
ayá dushiktuinak, nuni senchi waitkajuinawai.

<sup>27</sup> Nuadui ameshkam  
pegkegchaunmak ikata.

¡Tuja makichkish dita tudaujig tsagkujaipa!

<sup>28</sup> ¡Aents tuke pujusagtin aina nuna daaji  
papiinum agatkamua nuwi, dita daaji ayá  
duka ashí esakatjata!

Tuja aents amina umigtamin aidaun  
daaji agatkamua nuwig,  
dita daajig makichkish agatjaipa.

<sup>29</sup> Apajuíyah, wi jakun wake besemag  
dushikiam pujag nunú minash  
wait aneasam yainkam uwemtijugta.

<sup>30</sup> ¡Apajuín see tusan kantamtain kantamkun,  
shiig aneasan ashí iwainakan  
niina daajin ememattajai!

<sup>31</sup> Nunú dekas, kuntin aidau  
 maa apeamun nagkaesau  
 Tuke Pujuunak shiig awagmaktatui.  
<sup>32</sup> Tuja aents Apajuín segau aidau  
 wake besemag batsatuk,  
 nuna wainkag shiig aneasagtatui;  
 nuninak ichichmamjagtatui.  
<sup>33</sup> Wagki Tuke Pujuuk aents waitiak  
 wake besemag pujus sumaunak antujui;  
 tuja niina aentsji aidau achikam batsamas  
 waitiagtaish, dakitjag idaitsui.  
<sup>34</sup> Nugka, nayaim, nayants aidautigmesh  
 Apajuí ememattajum,  
 tuja ashí nuwi batsamin aidautigmeshkam  
 Apajuí ememattajum.  
<sup>35</sup> Apajuí Jerusalégnak kuitamkattawai,  
 dutikak Judá wegantu aidaun  
 yaaktaji aidau tsaikbau aina nunak  
 ataktu iwagkattawai.  
 Dutikamtai niina aentsji aidau  
 nuwi batsamsagtinai.  
<sup>36</sup> Nunú nuggak niina aentsji aidaun  
 uchiji wegantu aidaunu atinai.  
 Tuja nunú nugganmak Apajuín aneen aidau  
 shiig batsamsagtinai.

## 72

### *Apu eme anentsa Apajuí segatbau*

Salomón kantamjuamu

<sup>1</sup> Apajuíjuh,  
 juju apu amina takatjum pegkeja nuna  
 niishkam shiig takasti tusam yaigta.  
 Tuja tikich apu atina dushakam  
 dutiksag shiig takastin atinme.  
<sup>2</sup> Aatus amina aentsjum aidaun,  
 tuja nuigtu waitkam batsatu aidaun apuji wajas,  
 inamak shiig takastin ati.  
<sup>3</sup> Tuja muja aina nuwiya jijnjag,  
 agkan maanitsuk pujutan,  
 pegkeg takatjai aents aidaun jintintuati.  
<sup>4</sup> ¡Ujudauch aidaun ayamjukti!  
 ¡Tuja aents waituina nuna  
 uchiji aidaunashkam ayamjukti!  
 ¡Tuja untsu tsanumag kasamin aina nunak waitkasti!  
<sup>5</sup> ¡Nii tuké iina apuji atin ati,  
 Tuja etsa, nantu megkaekashtinun tuke auwa  
 nujai betek pujustin ati!  
<sup>6</sup> ¡Yumi yutak nugkan uchupig, ajakan shiig tsapapama iman ati!  
<sup>7</sup> ¡Nii apu wajas inamtata duik shiig agkan pujusa takamu ati!  
 ¡Tuja nii inabaujig nantu tuke auwa  
 nujai betek atin ati!  
<sup>8</sup> ¡Nunú apua duka  
 etsa jiiintaya imanui nagkamas,  
 etsa akaetaiya aatus  
 ashí nugkanum inamjatin ati!  
<sup>9</sup> ¡Tuja niina shiwaaji aidau  
 uwegshunum batsata duka  
 nii tabaun umiktinme!  
<sup>10</sup> ¡Nuninak Tarsis nugkan apuji aidau,

ajuntai aidaunum batsamnun apuji aidau,  
 Sabá nugkan apuji aidau,  
 nuigtu Sebá nugkan apuji aidau aatus  
 waji aidaun ikautiagtina!

11 ¡Ashí apu aidauk

ima niinak tikishmatjagtatui!  
 ¡Tikich nugkanmaya aidaushkam  
 ima niinak umigkagtatui!

12 Ujudauch aidau atsumainak  
 sumainamunak nii yaigtatui,  
 tuja waitiak wake besemag  
 pujaunashkam nii ayamjuktatui.

13 Ujudauch aidaun wait anenjattawai,  
 dutikak wake besemag pujaunash  
 yaigka uwemtijattawai.

14 Ujudauch aidaun waitkainak maaniagtaish,  
 nii ayamjuk uwemtijattawai.  
 Wagki dita pujutji aina duka  
 nii diismak akik ainawai.

15 ¡Niig tuke iina apuji atin ati!

¡Sabánmaya oronak ashí susatnume!

¡Nii pachisa tuke Apajuí segattai ati!

¡Tuke pegkegnum chichagtai ati!

16 ¡Tuja ashí juju nugkanmak  
 trigo shiig kuashat aittawai,  
 imaniak muja titijinak iija emegkaktatui!  
 Imaniau asa muja Libano tutainum

trigo aajakua iman wajasti,  
 nuniak nuna yagkuji aidauk  
 dupa yagkujuwama imanik yagkujuk asattawai.

17 ¡Apu daajig etsa tuke ekemna iman

tuke pegkegnum chichagtai ati!

¡Aents ashí nugkanmaya aidauk

niina daajin pegkegnum yumigkiam agtinai!

Ashí nugkanmaya aidauk niina

pegkegnum chichajiagtina!

18 Tuke Pujuu, Israel aents aidaun Apajuíjia duka  
 tuke pegkegnum chichagtai ati,  
 wagki ima nigki wainchatai aidaunash iwaidau asamtai.

19 Apajuí daaji pegkegma duka

tuke pegkegnum chichagtai ati.

¡Niina imanjiya nunú ashí nugkan jamagti!

¡Aatus ati!

20 Jesé uchiji David aajakua nunú kantamamuk juwi amuewai.

## LIBRO III

### 73

(Salmos 73—89)

*Apajuí wait anenkagtamu*

Asaf kantamamu

1 Israel aents aidau anentaimtaji pegkeg aidaunak  
 Apajuí shiig kuitamui.

2 Namput wajaschabijai iyautnak,  
 jukea akunuk iyagtinuyajai.

3 Aents Apajuín umigchau aidau wiakchamenakui,  
 nuna diisan kajebijai.

4 Ditak jamamtuchu batsatu asag

jakachainjash tusagkesh puyatuinatsui.

<sup>5</sup> Dita utugchatjig atsujuinawai,  
nuadui tikich aidau waituina imanikag  
waituinarsui.

<sup>6</sup> Nuadui ditak nugkutai pegkeg najanamu  
nugkumaina numamtuk,  
dita emematin nugkuaju ainawai.  
Tuja ditak magkagtutaijinak,  
jáanchjai betek nugkuaju ainawai.

<sup>7</sup> Duwegmatnak duwejam ainawai,  
tujash dita yapinig wainnawai  
anentai shiig pegkegchau aina duka.

<sup>8</sup> Ememainak tikich aents aidaunash  
dushikinawai, nuninak  
makichkish datsaamtsuk,  
ii wakegakuik pegkegchau takamsattaji  
tusag awanmainawai.

<sup>9</sup> Nuninak Apajuinash pegkegchaun chichajuinawai,  
tuja aents aidaunash dutiksag pegkegchaun chichajuinawai.

<sup>10</sup> Nuna aents yujajus iniinak  
yajau chichainatsui tusag  
shiig antuju yujaush ainawai.

<sup>11</sup> Nuninak: “¿Apajuish wajuk dekatki iina pujutjinash?  
Tuja Apajuí nayaimpinum puja aniaush  
aents takainamunash  
¿wajuk dekamainaita?” tuinawai.

<sup>12</sup> ¡Diisjua aents pegkegchau aina nunú!  
Ditak utugchatji atsau,  
shiig pujusag wiakuch wenawai.

<sup>13</sup> ¡Wi pegkegchau takatan  
ashí idaisauwaitag duka minak  
makichkish pegkegnumak yaintsui!

<sup>14</sup> Minak wa wamak utugchatan itagtuinawai,  
tuja kashi kashikmasan suwimkanak igkuajai.

<sup>15</sup> Tuja wisha dita anentaimaina nujai betek anentaimkunuk,  
amina aentsjum aina nunak kajimatki idaikunus,  
wi wakegamun takasu aintagtai.

<sup>16</sup> Tuja ibau tudaugtin aidaush,  
¿wajukag wiakchash wenawa? tusa  
anentaimsan ejetakamanush  
ejemainchau dekapjabiajai.

<sup>17</sup> Nuni pujaun Apajuí jee pegkegma nuwi  
niijai chichastasan waya ai,  
aents pegkegchau aidaush  
wajukatnuk ainawa  
nuna Apajuí dekamtijuabi.

<sup>18</sup> Nunú aents aidauk ishamainnum batsasume,  
dutikamu asag dita megkaejatnum shimawai.

<sup>19</sup> ¡Nunú aidauk pachiaichbau  
shiig wamak ijina utsam agtatui!  
¡Ditak sapijai jinawagtinai!

<sup>20</sup> Tuke Pujuuwah, aents kanag tepau nantak  
nii kajamjamujin kajimatama numamtuk,  
ame nantakum aents pegkegchau aidau  
ditash ima pegkeg ainawa tumain aina duka  
emegkagtatme.

<sup>21</sup> Wi senchi kajekan pujubiajai,  
nuniai mina anentaig dajautibi.

<sup>22</sup> Wika aents pegkegchau aina nuna

pujutjin dekajuatasan wakegakun,  
 kuntin jintiag anentaimchau asa  
 wajukmaina numamtuk wajabiajai.  
<sup>23</sup> Nuniayatkun amējaig tuke pujubiajai,  
 nuniau asamtai tudaunum iyawai tusam  
 egkeksam awekatmayume.  
<sup>24</sup> Umigtukti tujutu asam  
 ame chichagtukmayume,  
 nuadui wi jakamtaish,  
 eme anenusam jujuktinaitme.  
<sup>25</sup> ¿Amina nagkaetamsaush tikichish  
 nayaimpinmash ya pujawa? Duka atsawai,  
 ima ameketme.  
 Amejai pujaknuk juju nugkanmaya aidaunak  
 makichkish wakejumaitsujai.  
<sup>26</sup> Mina pujutjua duka nagkankattawai,  
 tujash Apajuíya nunú  
 pujut tuke atinun sujustatui,  
 tuja nii mina anentaijuish ichichtawai.  
<sup>27</sup> Aents amina nemagtamtan dakitauk, jinawagtinai;  
 tuja ima aminig kajinas  
 anentaimainachushkam ijinatnaitme.  
<sup>28</sup> Untsu wika ima Apajuíyaig  
 anentaimsan pujustinaitjai,  
 nunú minak shiig awajtawai.  
 Ametme Tuke Pujuu Apajuí, mina ayamjutkatnumek.  
 Nuadui ashí ame dutikamu aina nunak etseggattajai.

## 80

### *Tuke Pujuuwah, wait anenkagtugta*

Asaf kantamamu

<sup>1</sup> Apajuí, Israel aents aidaun kuitamnuh,  
 jame José wegantu aina duka  
 aents uwigjin kuitamas awekauwama numamtuk  
 kuitamsa awekame!  
 ¡Ame querubin aidauk iname!  
 ¡Iman asam Efraín wegantu aidau,  
<sup>2</sup> Benjamín wegantu aidau,  
 Manasés wegantu aidau wait anenjata!  
 Dutikakum amina senchigmijai uwemtikagtugta.  
<sup>3</sup> Tuke Pujuuwah, ¡iina pujutji yapagkaguam  
 yaunchuk ayag iman ekagtita!  
 Dutikagtuawaminig jutiishkam uwemjagtatji.

<sup>4</sup> Tuke Pujuu ashí senchigtinuh,  
 amina aentsjum aidau  
 segapainakui dakitam dusha  
 ¿wajupa kuashta aikash pujugtatme?  
<sup>5</sup> Yutai sukagtumaina nunú  
 waitut sukagtusmayume,  
 tuja umutai umumaina nunú  
 waitiaku buutbau sukagtusmayume.  
<sup>6</sup> Iina nugkega nuna yantamen batsamin aina  
 nunú atsaneaku dushiktai ekagtiume.  
<sup>7</sup> Apajuí ashí senchigtinuh,  
 ¡iina pujutji yapajiam  
 yaunchuk ayag iman ekagtita!  
 Dutikagtuawaminig jutiishkam uwemjagtatji.



8 Uva numiji\* egiptunmaya jukim  
 juwi itaam, aents pegkegchau aidau  
 jiija utsaakum juju nugkanum ajabiume.  
 9 Dutikam shiig tsapaiti tusam nugka iwajabiume,  
 dutikawamin nuwi tsapaka  
 ashí nugkan jamagmayi.  
 10 Imaniku asa nunú tsakaak  
 muja aidaunak bikintu awajsabi;  
 dutikak numi múun aidaunash  
 nagkagag niina kanawen yutua asabi.  
 11 Imaniau asa kanawe aidauk  
 nayantsanum jegabi.  
 Tuja nuwi yama tsapaidaushkam  
 namak Eufratesa imanui jegabi.  
 12 Uva ajakbau peejamua dusha  
 ¿wagka yumpuntuamesh agkantash awajtusume,  
 aents aidau nagkaemainak  
 akajag yajumtinme tusamesh?  
 13 Paki utsantua tegaja ijinui.  
 ¡Kuntin ikamia aidau amuinawai!

14 Amek Apajuí ashí senchigtinaitme,  
 iman asam wait aneamam  
 nayaimpinum pujusam  
 juju uva ajakbauwa nunú kuitamkata.  
 15 Juju uva ayá duka ame ajakbau ainawai,  
 nuadui kuitamkata.  
 16 Tuja uva numijin tsupig apea ijinuk,  
 ameshkam dutiksamek ijinata.  
 17 Untsu apu ati tusa ame etegkamua duka  
 kuitamkata, dutikakum yaigta.  
 18 Tuja yamai nagkamsaik  
 makichkish aminig tsujakchattaji.  
 ¡Pujut sukagtusta ima aminig  
 kajitmamsa batsamsagmi!  
 19 Chah, Tuke Pujuwah, ametme  
 Apajuí ashí senchigtinmek,  
 nuadui ¡iina pujutji yapajiam  
 yaunchuk ayag iman ekagtita!  
 ¡Dutikagtuawaminig jutiishkam uwemjagtatji!

## 84

*Apajuí jee pegkegma nuwi pujustasan ima senchi wakegajai*

Coré uchiji aidau kantamawagbau  
 1 ¡Tuke Pujuu, ashí senchigtinuh,  
 amina jemea duka shiig pegkejai!  
 2 ¡Wika Tuke Pujuu jee pegkegma nuwi pujustasan  
 shiig senchi wakegajai!  
 ¡Nuniakun Apajuí pujuta sukagtina nuna  
 shiig anentsan senchi kantamjajai!  
 3 Tuke Pujuwah, ametme ashí senchigtinum.  
 Mina apug, Apajuíjuh,  
 tiki pishakchikesh amina jemin waya,  
 pasugmak uchijin muumpitkamainuk  
 agkantak ayawai.  
 4 ¡Amina jem pegkegma nuwi pujuidauk  
 shiig aneamag batsatainawai,  
 nunidau asag amina emematjamtanak

\* 80:8 "Uva numiji" tawa nunak Israel aents aidau Egipto nugkanum batsatun Apajuí jiija yajuak Canaán nugkanum ikaunma, nuwi aents aidaun jiija utsaak nunú nugkanum batsasua nuna taku tawai.

makichkish mijamainatsui!

<sup>5</sup> Tuja aents aidau aminiyau  
senchimetan juwina duka shiig aneasagtatui,  
tuja amina jemin minitag tusa  
wakeyin aina dushakam shiig aneasagtatui.

<sup>6</sup> Nugka paka buutbau tutai  
yumi atsaunum weakush,  
yumi pukuni jiinaidaun waintinai;  
tuja yumigmat taimunmaya yumi  
kuyua megkaetaish, yumi yutak  
ashí nugka waa aidaunmak pimasua waigtinai.

<sup>7</sup> Apajuíyah, amina senchigmejai  
ditak tuké senchimeawagtinai.  
Tuja Siógnnum jegawag  
Apajuí senchigtina nuna wainkagtinai.

<sup>8</sup> Tuke Pujuu, ashí senchigtin,  
Jacopan Apajuíjiyah,  
jwi sumamush antugtukta!

<sup>9</sup> Apajuíyah, jutii ejamaktin  
ame etegkam apu emauwaitam  
nunú shiig anentsam kuitamkata.

<sup>10</sup> Amina jem pegkegma nuwi waya,  
makichik tsawan pujamua duka,  
mil tsawan agá pujumaina  
nuna nagkaesau ima pegkejai.  
Wika aents pegkegchau aina nujai  
ijunja pujutnak idaikun,  
dekas amina jem pegkegman waitijiya nuna  
kuitamin atajai tusan wakegajai.

<sup>11</sup> Wagki Tuke Pujuu Apajuí iinak ejapak kuitamjamui;  
tuja aents tudau takatsuk batsata nunak,  
nii wait anentak eme anentus kuitamui,  
dutikak waji pegkeg aidaunak sujitatsui.

<sup>12</sup> Tuke Pujuu, ashí senchigtinuh,  
jamini kajinmamas anentaimaidauk  
shiig aneasagtinai!

## 87

### *Jerusalén pachisa kantamamu*

Coré uchiji aidau kantamawagbau

<sup>1</sup> Yaakat Jerusalégkak muja pegkejam  
Apajuínu tutaiya nuwi yaaktamamui.

<sup>2</sup> Tuke Pujuu Israel aents aidaun yaaktaji,  
tikich aina nuna nagkagas,  
Jerusalégkan ima senchi aneawai.

<sup>3</sup> Apajuín yaaktajiya nuna  
Jerusalégkan pachisag,  
shiig pegkejan augmatuinawai.

<sup>4</sup> Apajuí chichaak:

“Aents aidau mina emematjuina duka  
Egipto nugkanum, Babilonia nugkanum,  
Tironum, Etiopía nugkanum, Filisteo nugkanum aatus batsatui.  
Nunú nugkanmaya aents aidau chichainak:  
‘Apajuínak Jerusalégnum wainkabaijai’ tiagtatui”, tiuwai.

<sup>5</sup> Tuja Siógnnumia aidaun chichajuinak:  
“¿Wagkag ditash ibau pegkegnumash batsamsajabi?  
Dita batsamsatnunak dekas Apajuíyap  
umigkauwaita”, tiagtinai.

<sup>6</sup> Aents aidaun daaji agattainum  
Tuke Pujuu dita daajinak:  
"Juka Síógnum akiinawai", tuu agatjatnai.

<sup>7</sup> Nuadui nuwiya aents aidauk nantsemki,  
kantamkabaikia chichainak:  
"Mina pujutajuk Jerusalégkai", tiagtinai.

## 89

### *Apajuí Davitjai chicham umikbau*

Esrahita aents Etán aajakua nunú kantamamu

<sup>1</sup> Tuke Pujuuwah, wi kantamkunuk,  
amek tuke wait anenkagtinaime titatjame,  
tusan aju ajumag kantamjittagme.

<sup>2</sup> Nuniakun amina anenkem tuke auwa nuna,  
tuja ame anagkagtuamuk  
nayaime yapajinchauwa imana nuna etsegkattajai.

<sup>3</sup> Amek Davidjai chichamak umikuitme;  
dutikau asam nii anagkuakum:

<sup>4</sup> "Ame jakaminig,  
ame wegantunmaya apu wajasa  
ame pujusa inamtaigmin pujus inamjatnai",  
tiuwaitme.

<sup>5-7</sup> Chah, Tuke Pujuuwah,  
nayaime aidauk amina takatjum pegkeja  
nuna diisag emematjamainawai,  
tuja ashí ángel aidauk  
amina anenkagmin pachisag chichainawai;  
ima aminak eme anenjamainawai.  
Tuke Pujuuwah, ametme  
tikich aents aidaun apajuíji aina  
nuna nagkaesau ishamtai dekas muunmek.

<sup>8</sup> Tuke Pujuu ashí senchigtinuh,  
ame senchigtinum chichakbaugmek  
betek uminaitam imanuk tikichik  
makichkish atsawai.

<sup>9</sup> Ame nayantsak inau asam,  
tsukatak ishamain wajakuish,  
mijaakta tusam imijame.

<sup>10</sup> Nayantsanmaya kuntin múun depetkam,  
amina senchigmin shiwaajum aidau  
uwaakam ipisjabiume.

<sup>11</sup> Nayaim, nugka aina duka aminu ainawai,  
ame nugkak, tuja ashí nugkanum  
ayá nujai najankauwaitme.

<sup>12</sup> Tsumujinish, nujinchinish  
ame ashí nugkak najanauwaitme.  
Tuja muja Tabor, muja Hermógjai  
amina daagmin pachisag kantamainawai.

<sup>13</sup> Amina kuntugmek senchigtinai,  
tuja amina uwejum untsuja dushakam  
senchigtin depetbauwai.

<sup>14</sup> Amek pegkegnum anenkajai inaame,  
tujash nuna nagkaesau dekas  
amina anenkagmin  
tuke kuitamkagtame.

<sup>15-16</sup> Chah, Tuke Pujuuwah,  
aents amina emematjamin,  
amina tsaaptinjamin wekayin,

tuja amina takatjum pegkegma nuna diis  
 tuke shiig anea duka  
 amek eme anentame,  
 dutikakum pegkegnum yumigkiame.  
 17 Wagki dita imanji aina duka,  
 tuja senchiji aina nujai ame susauwaitme.  
 Nuadui jutii aidaulik aan nagkaemasam  
 senchigtin ekagtame.

18 Israel aents aidaun Apajufji, Tuke Pujuuwah,  
 ametme iina apuji pegkegmamek,  
 tuja ametme ejajakam kuitamkagtaumek.

19-20 Amina chichamjumin etsejin  
 yaunchuk kajanum chichagkum:

“Mina aentsug aina nuwiyam  
 makichik wajiun etegkajai,  
 duka mina inakeg Davitai,  
 wi niinak yaigkan, chichame antugtai emajai.  
 Dutikan ¡Israel aents aidaun apuji adaikajai!

21 Niinak yaitskek idaisashtinaitjai.

Mina senchigjai senchimitkatnaitjai.

22 Niina shiwaaji aidaush jetekchagtin ainawai,  
 tuja aents pegkegchau aidaushkam  
 depetkachagtin ainawai.

23 Niina shiwaaji aidaunak  
 niish wainaig ijinatnaitjai,  
 tuja niina kajejuidaunash ijinatnaitjai.

24 Wi niina aneamua duka tuke atinai,  
 wi kuitamsam kuashat kaweg  
 senchigtin wajastinai.

25 Tuja niig nayants Mediterraneo tutaya  
 nuwi nagkamas namak  
 Eufratesa aatus inamjatnai.

26 Tuja nii chichagtak:

‘Ametme mina apag kuitamjaumek;  
 tuja ametme mina Apajuiḡ uwemtijinmek’, tujuttinai.

27 Tuja wi niinak mina uchig iwai,  
 ashí tikich apu aidaunash  
 nagkaesau apu emattajai.

28 Wika niinak tuke anetnaitjai,  
 tuja wi nijai chichaman umikuitag  
 dushakam tuke atinai.

29 Nayaim awa nunisag aigkik,  
 niina uchiji wegantu aidaunmayag  
 tuke apu wegagtin ainawai.

30 Untsu dita chicham umiktinun  
 wi jintintuau ainag nuna

kajimatkiag batsamas,

31 nunú chichaman uminachkuig,

32 dita pegkegchaujin  
 suwimak ishamainun susatnaitjai.

33 Untsu Davidnak tuke anetnaitjai,  
 tuja wi niina anagkuawaitag nunashkam  
 umitskek idaisashtinaitjai.

34 Wi nijai chichaman umikuitag nunak  
 tuke idaisashtinaitjai,  
 nunak tuke umiktinaitjai.

35 Makichik tsawantai  
 wi Davitan anagkuawaitag nunak  
 dekas umiktatjai tusan tumamjai.

36 Etsa eketa nunisag eketaigkik,  
 niina uchiji wegantu aidauk

tuke apu wegagtin ainawai.

<sup>37</sup> ¡Nii wegantu aidauk,  
nantu tuke ekemna iman atinai!  
¡Nii pujusa inamtaijishkam nayaim tuke auwa iman atinai!” tiuwaitme.

<sup>38</sup> Tusa tiuwaitkum ame apu etegkamu aig,  
kajegkam dakitja idaisaume.

<sup>39</sup> Dutikau asam nijai chicham umikuitam duka  
umitsuk, David kajimatkim idaisaume.

<sup>40</sup> Tuja yaakat Jerusalén peejamua dushakam  
yumpua tsaikam ayamjumamainchau  
emam idaisaume.

<sup>41</sup> Ashí aents nuni nagkaemaidauk  
wayawag dita wakegamun kasamainawai,  
tuja aents dita nugkega nuna yantamen  
batsamin aidau dushikinawai.

<sup>42</sup> Nuadui Davita shiwaaji aidauk shiig anenawai,  
wagki dita ima senchijinawaju asag.

<sup>43</sup> Niina maanitaiji puyagshakam atankiume;  
dutikau asam maaniakuish yaigchaume.

<sup>44</sup> Eme anentai aajakua duka  
wainkauch idaisaume;  
dutikakum apu wajasa inamtaijishkam  
tikima wainkauch awajtusume.

<sup>45</sup> Tuja nuigtush kuashat mijan  
pujuschatu tusam atankiume,  
dutikakum datsa datsantak awajsaume.

<sup>46</sup> Chah, Tuke Pujuwah,  
¿uumjuktamek pujuttam?

¿Kajegtukbaukek pujuttam?  
<sup>47</sup> Apuh, mina pujutug piipichia nunú adeagta;  
ame aents najanamua duka  
ujumak tsawantak pujus jauwai.

<sup>48</sup> ¡Makichik aentsuk jatsukek iwakuk pujumaitsui!  
¡Tuja jakashtajai tusa,  
jata uwentumainchakam makichkish atsawai!

<sup>49</sup> Apuh, ¿ame yama nagkamchakum:  
Davita tuke anetnaitjame tusam  
tiuwaitam dusha wajukame?

<sup>50</sup> Apuh, iinak kuashat dushiktamainawai,  
imatika dushiktamainakuish atsaneaji.

<sup>51</sup> Tuke Pujuwah, amina shiwaajum aidau  
¡aatus iina pegkegchaun chichagtamainawai!  
¡Aatus ame apu etegkamua nuna  
aju ajumag pegkegchaun chichajuinawai!

<sup>52</sup> ¡Tuke Pujuuk, tuke pegkegnum chichagtai atin ati!  
Maake, aatus ati.

## LIBRO IV

### 90

(Salmos 90—106)

*Aentsuk Apajuí tuke pujuwawa nuninchauwai*

Moisés Apajuí etegkamu aajakua nunú Apajuín ausamu

<sup>1</sup> Apuh, amek yaunchuk nagkamsam  
jutiik tuké yaijatnaitme.

<sup>2</sup> Tuja muja aidaush najaneatsaig, nugkashkam najaneatsaig,  
yaunchuk nagkamsam,  
yamaya juish, tuja atakea duishkam  
ameketme Apajuimek.

<sup>3</sup> Amina chichamjuminig  
aents aidauk jakag nugka najanenawai.

<sup>4</sup> Ame diismak mil mijana duka  
makichik tsawan nagkaema nuninai;  
tuja mil mijana duka  
kiyag tsawak megkagama  
numamtuk nagkaemawai.

<sup>5</sup> Amek namak chichigmajai betek  
aents aidauk utsame,  
tuja iina pujutjig kajanum kajamja  
shintaku ukutiama nujai betekai.

<sup>6</sup> Aents aidauk dupajai betek ainawai,  
dupa kashikmas yagkujuk,  
etsa akagai kagaka  
jinuwama numamtuk wajaji.

<sup>7</sup> Ame kajekbaugmin amujatme,  
tuja ame kajekamin ishamka  
imaanjaujai betek pujaji.

<sup>8</sup> Iina tudauji pegkegchauwa duka  
ame shiig dekame.

<sup>9</sup> ;Ame kajekagtukaminig  
ii iwaku batsatag duka,  
mayai mayati ajaptayama  
numamtuk jaka megkaemainaitji!

<sup>10</sup> Iik ayatak setenta mijan pujusa jainaji,  
tuja nuni wajuu aidau ochenta mijan jegainawai;  
tujash imaan mijan pujakuish,  
ima waitiamua duke utugchatjai igkunui.  
;Mijanak jutii pujutjijai betek  
wamak nagkaemawai!

<sup>11</sup> Ame senchi kajeamugminash  
¿ya dekamainaita?  
Ame kajekbaujum ishamaina nunash  
¿yaki dekamainaita?

<sup>12</sup> ;Iik tuke jakatnapitji tusa,  
shiig dekau ata nunú jintinkagtuata!  
;Nunú dekau asaja,  
pegkegnum pujuta nunú puyatjukagmi!

<sup>13</sup> ;Tuke Pujuuwah, ataktu yaijatkata!  
¿Wajupa asamea yaijatkattame?  
;Juju amina inakem aina nunú wait anenjata!

<sup>14</sup> Kashikmasa nagkamsam  
amina anenkagmea nunú sukagtusta,  
dutikagtuawaminig ashí tsawantai,  
shiig aneasa tuké kantamtinaitji.

<sup>15</sup> Kuashat mijanai waitujakuitag  
imatiksamek shiig aneasa pujut sukagtusta.

<sup>16</sup> ;Juju amina inakem aina nunú  
dita wegantu aidaujai amina imanjumin  
senchigmejai wainkatnume tusam iwaintukta!

<sup>17</sup> ;Iina Apajuuji Tuke Pujuuwa  
nuna wait anenkagtutaijig jutinii asati!  
;Apajuujuh, iina takatjish pegkegnum yumigsata!  
;Ehe, dekas iina takatjig pegkegnum yumigsata!

## 91

*Apajuuyai iina kuitamjamruk*

<sup>1</sup> Apajuí múun, ashí senchigtina nunú  
kuitamsam pujauk,

<sup>2</sup> Tuke Pujuun chichajak: "Ametme

mina ejamataijuk,  
wi uumka ayamjumataig.  
¡Ametme mina Apajuíg,  
ima aminig kajintsan anentaimjai!" tawai.

<sup>3</sup> Wakan pegkegchau  
utugchatan apujtugmataish,  
tuja jata aidaunmashkam  
ima nigki ayamjtpamainai.

<sup>4</sup> Wagki niig atash niina nanapen uchuchiji aidaun  
dukuka kuitamama numamtuk kuitamjammnai,  
nuadui amek puyattsuk  
shiig aneasam pujustinaitme.

¡Niina anenkega duwi  
aminak tantag ejamatia numamtuk  
ejapak kuitamjamkattawai!

<sup>5</sup> Nuadui kashi ishamainnum pujakmesh,  
tuja tsawai wekaekumesh,  
mantuachagtimpash tusamek ishamkaipa.

<sup>6</sup> Tuja jata kashi magkagtin,  
tsawai magkagtinkesh iyanjugmatai,  
jakashtajash tusamek ishamkaipa.

<sup>7</sup> Amina menagmae nuni mil aents jinitnai,  
tuja untsugmea nunishkam  
diez mil aents jinitnai,  
tujash amek makichkish wajukashtinaitme.

<sup>8</sup> Untsu aents pegkegchau aidaun Apajuí suwimak susam jinuidau waitinaitme,

<sup>9</sup> wagki aminak Tuke Pujuu múun,  
ashí senchigtina nunú  
ejapak kuitamjamu asamtai.

<sup>10</sup> Aminak makichik pegkegchaukesh  
waitkagmaschatnai,

tuja jatashkam amina jeminig utugmashtinai.

<sup>11</sup> Wagki Apajuí ángel aidaun ishiaktatui  
ame tuwi wekaetatme nuwi kuitamjamkatnun.

<sup>12</sup> Nunú ángel aidau achigmaku agtatui,  
kaya tukumak iyajai tusa.

<sup>13</sup> Nuadui, ikamyawa yukagtin aidau,  
tuja tikich kuntin ishamain ayaunum  
wekaekumesh, uyumat aneakas wekaetatme.

<sup>14</sup> Apajuí chichaak:

"Juju aentsuk mina waitui,  
anentanash anentui, nuniau asamtai  
wi niinak ayamjukan uwemtikjattajai.

<sup>15</sup> Tuja yainkati tusa mina segatkuishkam,  
aiktinaitjai, dutikakun ¡niijaig pujutnaitjai!  
¡Tuja waitiakuishkam agkanmitkatnaitjai!  
¡Dutikakun eme anentsa diitai awajsatnaitjai!

<sup>16</sup> Tuja kuashat mijan  
shiig pujustin ati titinaitjai.  
¡Dutikakun pujut nagkanchau tuke atina nuwi pujus  
dakujusti tusan jukitnaitjai!" tawai Apajuí.

## 93

### *Apajuíyai dekas apuk*

<sup>1</sup> ¡Tuke Pujuuwai dekas apua duka!  
Tuke Pajuuk etsantug tsaaptin wajas eketui,  
niyai ashí senchigtina duka,  
tuja nugka buchitkai tusashkam kuitamui.

<sup>2</sup> Amek yaunchuk nagkamsam apuitme,

¡Amek tuke pujuuwaitme!

<sup>3</sup> Chah, Tuke Pujuuwah,  
namak senchi tsukatak uutui.

<sup>4</sup> Tujash apujuh, amek nayaimpinum pujusmek,  
namak tsukatak uutuina nuna nagkaesau,  
tuja nayants uutbaun nagkaesau  
senchigtinaitme.

<sup>5</sup> Chah, Tuke Pujuuwah,  
amina chichamjum umiktina duka  
yapajinchau tuke auwai.

¡Amina pegkegmagma duka  
makichik jeganum yagkug  
nenaja iwajamuama imanik,  
amina jem pegkegma nuwi tuke awai!

## 95

*Apajuí shiig anentsa kantamjuawagmi*

<sup>1</sup> Kaunatajum,  
Tuke Pujuu, iina kuitamjamak  
uwemtijamna nunú  
shiig aneasa kantamjuawagmi.

<sup>2</sup> Nii pujamunum wayawaja  
nii emematku kantamtaí kantamjuawagmi.

<sup>3</sup> Wagki Tuke Pujuuwai dekas múun senchigtin,  
ashí tikich apajuimtai aina nunashkam Apujiyai.

<sup>4</sup> Nugkak inítken nagkamas  
ashí Apajuí emetuam awai,  
tuja muja tsakaju aidaushkam niinu ainawai.

<sup>5</sup> Tuja nayantsashkam  
nii najanamu asa ima niinuke.  
¡Nugkanashkam nigki najanauwai!

<sup>6</sup> Minitajum,  
Tuke Pujuu, iina najapauwa nunú  
tikishmatja emematiagmi.

<sup>7</sup> Niyai iina Apajuújig,  
tuja iik niina aentsji ainaji,  
nuadui uwija kuitamin  
niina uwigjin kuitamama numamtuk  
iinash kuitamjamui.

Apajuí yamai atumin tujama  
nunú antuktajum.

<sup>8</sup> "Yaunchuk Meribánum,  
tuja uwejush Masánmashkam  
Apajuí chichamen intimjukiú aina  
numamtuk wajakaigpajum.

<sup>9</sup> Atumin muunjum aajaku aina duka  
kuashat wainchatai aidaun  
wi iwainamun wainainayatak,  
dekaskechua nunin diisu ainawai.

<sup>10</sup> Nuadui nunú aents aidaun  
dakitjan cuarenta mijan pujubiajai,  
nuniakun: 'Juju aents aidauk  
shiig wainak yujawai; núnidau asag  
mina chichamjunak umigtuinatsui'.

<sup>11</sup> Nuadui kajekan,  
chicham yapajiashtinun chichaakun:  
'Dita shiig batsamsatnun nugka pegkejan  
wi ditan anagkuawaitag  
nuwig ditak jegashtin atinme' tiabiajai",



tiuwai Apajuí.

## 96

*Yamajam kantamtai ii apuji kantamjamu*

<sup>1</sup> Ashí nugkanmaya aents aidautijum  
yamajam kantamtai

Tuke Pujuu kantamjuatajum.

<sup>2</sup> Tuke Pujuu kantamjakjum,  
niina daaji pegkegnum chichagtajum.  
Tuja Apajuiyai uwentikagtinuk tusajum  
kashi kashinig etsegtajum.

<sup>3</sup> Apajui imanjiya nunú,  
niina pegkegmajijai pachisjum  
ashí nugka múun aidaunum etsegkatajum.

<sup>4</sup> Wagki Tuke Pujuuwai dekas múuntak,  
ima nigki eme anentsa kantamjam amainuk.  
Niyai tikich apajuímtai aina  
nuna nagkaesau ishamain.

<sup>5</sup> Tikich aents aidaun apajuímtaiji aina duka  
wainak ainawai;  
tuja Tuke Pujuuwai nayaimpin najanauk.

<sup>6</sup> ¡Apajuín tsaaptinjiya duka jiin utsumakui!  
¡Nii pujamujiya nuwig niina senchiji,  
pegkegmajiya nujai awai!

<sup>7</sup> Ashí nugkanmaya aidautijum:

“Ameketme senchigtinum,  
ameketme pegkegmamek”,  
tusajum Tuke Pujuu ememattajum.

<sup>8</sup> Tuke Pujuu anentag susatin jukijum,  
nii jega nuna agájin ikaunmajum,  
tikishmaja pujusjum Apajuí etsagjatajum.

<sup>9</sup> Apajui jee pegkegma nuwi  
wayajum etsagjatajum.

¡Ashí nugkanmaya aidauk  
amina ishamjamainak kujaitnume!

<sup>10</sup> Ashí aents nugkanmaya aidau chichagkujum:  
“¡Tuke Pujuuwai iina apujiya duka!  
Nugkanak jasa buchittsuk asatnun nii najanauwai,  
tuja ashí aents aidaunak  
nii inak betek diyakui.

<sup>11</sup> ¡Nayaim aidaush, tuja nugkashkam  
shiig aneestinme!

¡Tuja nayantsashkam,  
tikich namak múun aidaujai  
shiig aneenak uuttinme!

<sup>12</sup> ¡Tuja nugkashkam,  
nunú nugkanum batsamin aidaujai  
shiig aneestinme!

¡Tuja numi ikam ayaushkam shiig aneenak,

<sup>13</sup> juu nugka juwi inamjatin  
mina nuna emtin pampaitnume!

¡Tuke Pujuu dekas  
iina nugken inamjatatus taattawai!  
Nunik taa aents aidau takasbaujin  
diijus etegjattawai.”

## 100

*Apajuí iina najapauwa duwi niinu ainaji*

See taku kantamtai

<sup>1</sup> Ashí nugkanmaya aidautijum

shiiġ aneasjum Apajui kantamjuatajum.  
<sup>2</sup> Shiig aneasjum  
 Tuke Pujuu etsagjatajum.  
 iShiig aneasa untsumkujum  
 Apajui jee pegkegma nuwi minitajum!  
<sup>3</sup> iTuke Pujuuwapi dekas apuk titajum!  
 Iinak nii najapauwai, nuadui iik niinu ainaji.  
 iNiina aentsji ainag duwi,  
 aents uwigjin kuitamama numamtuk  
 kuitamjamui!  
<sup>4</sup> Nuadui Apajui jee pegkegma  
 nuna waitijin kaunajum,  
 Apajui see takujum niina daaji pachisjum  
 kantamtai kantamkujum ememattajum.  
<sup>5</sup> Wagki Tuke Pujuu dekas pegkejai,  
 tuja niina anenkajishkam tuke auwai,  
 antsag nii anagkagtuamujig  
 makichkish yapajinchauwai.

## 103

### *Ashí mina senchigjai Apajuinak ememattajai*

David kantamamu  
<sup>1</sup> Ashí mina anentaigjai  
 Tuke Pujun emematkun  
 pegkegnum chichagtinaitjai;  
 niina daaji pegkegma nuna  
 pachisan ashí mina senchigjai  
 pegkegnum chichagtinaitjai.  
<sup>2</sup> Ashí mina wakanjujai  
 Tuke Pujun emematkun  
 pegkegnum chichagtinaitjai;  
 tuja nii mina yainkauwa nunak  
 makichkish kajimatkishtinaitjai.  
<sup>3</sup> Niyai mina tudaujun tsagkugtauk;  
 nigki wi jaaku pujaish etsaentinuk.  
<sup>4</sup> Tuja jamainnum jeganta aish,  
 niyai mina uwentijnuk.  
 Tuja nigki niina anejattaijiya nuna  
 mina anentaijui suja duka.  
<sup>5</sup> Niig ashí pegkeg aina nuna sujawai.  
 Tuja wi múuntuch wajasan pujaish,  
 nii minak ataktu senchimtijua  
 ukukui yakí nanamama iman etawai.  
<sup>6</sup> Tuke Pujuu, pegkegma iman asa,  
 aents waituidaunash yaigka  
 agkanmitkawai.  
<sup>7</sup> Moisés Israel aents aidaujaj  
 dutikatnun, tuja dita umikagtinun  
 aatus Apajui jintintuauwai.  
<sup>8</sup> Tuke Pujuu kakagchauch  
 wait anenkagtinai;  
 wamak kajechui,  
 tuja anentak wajasui.  
<sup>9</sup> Apajuik jiyajatu pujuchui;  
 tuja kajegkagtukbaujish tukek achauwai.  
<sup>10</sup> Ii pegkegchau takamtaijin  
 shiiġ kuashat suwimak jumain ajinig,  
 imatikagkesh amaschauwai.  
<sup>11</sup> Niina umijin aidaunak Apajuik  
 nayaim múun nagkatkachua nuni  
 nagkaemas aneawai.

12 Etsa jiintaijiya nuna  
 etsa akaetai jiya nujai  
 atushat akankauwa numamtuk,  
 iina tudaujinak atushat datupajui.  
 13 Tuke Pujuu niina umijuina nunak,  
 makichik múun uchijin shiig anentus  
 kuitamama imatikas kuitamui.  
 14 Wagki iish wajiyai najanamuitji  
 nunak nii dekawai;  
 iik nugka yukukuntujai najanamuitji,  
 nuna nii shiig dekawai.

15 Aentsu pujutjiya duka  
 dupajai betekmantinai;  
 dupa tsapai yagkujuwama numamtuk wajawai.  
 16 Tuja yagkugnak dase dasentak umpui utsauwame,  
 dutikamu asamtai, ataktu awagkik wainchataiyai.  
 17 Untsu Tuke Pujuu anenkega duka  
 niina umijin aidaunmak  
 megkaekashtinun tuke atinai.  
 Nuadui, nuna uchiji wegantu aidaunash,  
 18 tuja ditajai chicham umikbauwa nuna  
 betek umidaun, nuigtu diez chicham umiktin  
 agagbaun kajimattsuk umidaun  
 aatus tuke yaigtinai.  
 19 Tuke Pujuu pujusa inamtaijiya duka  
 nayaimpinum awai;  
 nuwi ekemas ashí nugkanum inamui.

20 ¡Nayaimpinmaya aents ángel senchigtin,  
 Apajui chichame umijin,  
 tuja nii inapakuí umiktasajum  
 batsamin aidautihum  
 Tuke Pujuu ememattajum!  
 21 ¡Atum niina suntaji aidautihum nii takajin,  
 tuja nii inapamu betek umijin aidautihum  
 Tuke Pujuu ememattajum!  
 22 ¡Tuja Apajui najankamu  
 ashí nugkanum batsamin aidautihum  
 Tuke Pujuu ememattajum!  
 Tuja wishakam ashí mina wakanujai  
 Tuke Pujuu ememattajai.

## 104

### *Apajui emematbau*

1 Ashí mina wakanujai Tuke Pujuu  
 emematkun pegkegnun chichagtinaitjai.  
 ¡Tuke Pujuu mina Apajuijuh,  
 amek dekas múuntaitme!  
 Tuja amek amina imanjumea nunú ijiam,  
 etsanjam pujame.  
 2 Amek dekas tsaaptin ijimakume.  
 ¡Ame nayaimpia duka  
 jáanchjai betek ejauwaitme!  
 3 Dutikam yaki nayaimpinum  
 ame pujustinjum umikuitme.  
 Amina carrogmin yujagminum  
 egkemkam wekaeme.  
 ¡Amina nanapjumin  
 dasenum nanaakam wekaeme!  
 4 Dase aina duka ame iname,

ame nunikti tama jiishkam kegawai.

<sup>5</sup> Apajuik nugkanak nigki  
buchitmainchaun najanauwai;  
nuadui makichkish umuchmainchau atinai.

<sup>6</sup> Ame nayants pimuntikjam  
nugka yutuabiume,  
dutikakum ashí muja  
múun tsakaku aidaush yutuabiume.

<sup>7</sup> Imanikmataish,  
kuyua buku wajasti timayume,  
tusa tabaugmin amina chichamjumin  
ipamtajai betek antuk wamak kuyuabi.

<sup>8</sup> Nuadui, yumi piyag  
muja aidaun amuja auk,  
wake aidaunum akaiki,  
ame nuwi ijumnagti tibaunak imanisag  
nuwi ijumnajui.

<sup>9</sup> Nunikmatai ataktu pimak  
nugkan utujai tusam,  
juwig nagkankati, nuwi nagkama  
pima pimakuag wechati tiuwaitme.

<sup>10</sup> Untsu yumi mujanum pukuni jiinki,  
entsa najanea pakajin jegak,  
namak múun wajasti tusam idaime.

<sup>11</sup> Nunú yumin kuntin ikamia aidaun  
burro ikamia aidaujui kitamainak  
umin ainawai.

<sup>12</sup> Nunú namaka yantamen numi ayaunum,  
nuna kanawen chigki aidaun pasugmak petsainak,  
shinuinamu antunawai.

<sup>13</sup> Tuke Pujuwah, amek  
nayaimpinum pujusam yumi yutumtijam,  
ikam ukatkam pegkeg emame;  
tuja amina anenkagmea nunú  
nugkanak shiig anemtikui.

<sup>14</sup> Apajuí dupanak tsapapitkawai,  
kuntin nuna yuu aidaun  
yuwatnume tusa,

tuja ajak aidaunashkam  
tsapapitkawai, nunú nejekmatai  
aents aidaun yuwatnume tusa.

<sup>15</sup> Tuja pagkan yuwa ichichmamtain,  
tuja vino uwaja shiig aneastinun,  
nuigtu aceite kugkuin yapinum  
nijamtain aatus ashí umikui.

<sup>16</sup> Tuke Pujuu numi najankamua duka  
yumi uchupiam shiig ijunui,  
tuja Libanonmaya setug aidaun  
nii tsapapitkakua dushakam,  
yumi yutak nugkan uchupiau asamtai  
shiig ijunui.

<sup>17</sup> Nuna kanawe aidaunum  
chigki aidaun pasugmak petsainawai;  
nuwi pishak cigueñashkam pujawai.

<sup>18</sup> Tuja muja tsakaku aina duka  
cabra ikamia aidaun batsamtai ainawai;  
untsu kaya múun aina duka  
wapujushan uumka batsamtai ainawai.

<sup>19</sup> Apajuí nantunak najanauwai,  
wajupa nantuk weawa tusa dekatnun;

tuja tsawan dekapa dekatain etsan najanauwai.

<sup>20</sup> Etsa akaetaik kiyawai,  
nunikmatai kashi kuntin  
ikamia aidau jiiinag yujawai.

<sup>21</sup> Tuja león aidaushkam kashi jiiinag,  
dita yumainji atsutai shinuinawai,  
Apajuín segainak.

<sup>22</sup> Untsu tsawak etsa jiiintai,  
dita waajin akuumag megkagainawai.

<sup>23</sup> Tsawan tsawagmatai,  
aents aidau takatjin jiiintukiag,  
takai takainakua agkutai ukuinawai.

<sup>24</sup> ¡Tuke Pujuuwah,  
amek shiig kuashat najankauwaitme!

Tuja ashí duka  
amina yachagmijai umikuitme.

¡Nugka ame najanamua  
nuwig ashí ame najankamu aina nunú batsatui!

<sup>25</sup> Diisia ame najanamu  
nayants shiig múun,  
nuwig kuntin múun aidau,  
kuntin piipich aidau shiig kuashat  
makichkish dekapamainchau ayawai.

<sup>26</sup> Nuwi yujawai lancha múun aidau;  
tuja nuwi semagkau múun

najanawaitam nunú  
shiig aneak wasugkamui.

<sup>27</sup> Nunú aidauk ashí  
amina dakagmainawai,  
wajutik yutainash amasat tusag.

<sup>28</sup> Nuadui ame dita yuwatnuk suwame,  
dutikam jukiag shiig yuwinawai.

<sup>29</sup> Untsu ame uumjukmak,  
senchi ishamainawai;  
tuja ame mayatut jujamshakam jawai,  
nunik iyashig yukukuntu najaneawai.

<sup>30</sup> Tujash ame Wakanim suwamak  
ashí nugkanmaya aents aidauk  
yamajam pujutan juwinawai.

<sup>31</sup> ¡Tuke Pujuu imanjiya duka tuke auwai!  
¡Tuke Pujuuu nii najankamujin diisa shiig aneawai!

<sup>32</sup> Tuja Apajuí diyamak nugkak kujawai,  
untsu muja aidauk

Apajuí antiamak bukuituinawai.  
<sup>33</sup> Wi eke iwaku pujuttag nuaduik  
Tuke Pujuuun, mina Apajuíjun emematkun  
kantamtain kantamjuattajai.

<sup>34</sup> Tuja Tuke Pujuu wi aentaibaujua  
nuna shiig aneas diigtusti,  
wagki minak niyai shiig aneamujuk ajutui.

<sup>35</sup> ¡Aents pegkegchaun takau aidau  
Apajuí ememattan dakituidauk  
ashí jinawag megkaejatnume!

¡Ashí mina wakanjujai Tuke Pujuuun emematkun  
pegkegnum chichagtinaitjai!

¡Yajauwajah! Tuke Pujuuun daaji ememattai ati.

1 ¡Tuke Pujuu see titajum!  
 ¡Niina daaji pachisjum  
 aents aidau ujaktajum!  
 Dutikakjum nii takatji  
 tikich nugkanmaya aidaush ujaktajum.

2 Apajuí wainchatai aidaun  
 iwainajua nunú anentaimtusjum,  
 kantamtai kantamjuatajum.

3 Niina daaji pegkegma nunú  
 anentaimtusjum eme anenmamtajum.

¡Tuke Pujuun umijin aidautigmek,  
 shiig aneatajum!

4 Ashí tsawantai Tuke Pujuu egaktajum,  
 nuniakjum niina senchijiya nunú segatajum.

¡Tuké Apajuí egaktajum!

5-6 Apajuí ii aidautin, tuja niina inake Abraham, Jacob aajaku aina  
 nunú wegantu aidaun etegjauwa nuna,  
 ayamjak wainchatai ishamain aidaun  
 iwainajua nunú anentaimtustajum.  
 Tuja chicham umiktin agagbauwa  
 dushakam adeagtajum.

7 Niyai Tuke Pujuu, iina Apajuíjiya nunú;  
 niyai ashí aents aina nuna apujig.

8 Kuashat mijan nagkaemataish,  
 nuna dutikatjai tusa anagkagtuamujinak  
 Apajuik tuke kajimatkishtinai.

9 Nunak Abrahamjai umikua nuna,  
 Isaakjaishkam ataktu umikui.

10 Nuna Jacobjaishkam umikui,  
 tuja nunú tuke asatin  
 Israel aents aidaunum juwakui.

11 Nuadui Apajuí niina chichajak:  
 “Wi nugka Canaágnak amastajai,  
 aminu tuke atina nuna”, tiuwai.

12 Israel wegantu aidauk  
 ujumchik aajaku aina duwik  
 nugkenchau asag,  
 Canaán nugkanmak ijagjai betek  
 wainak yujajaku ainawai.

13 Nunidau asag,  
 tikich nugkanum shiyakag,  
 nuwi batsamas, nuna ukuinak  
 tikich apu aidau batsatbaunum jegawag,  
 nuwi ujumchik tsawan pujusag,  
 waja yujayanume.

14 Tujash Apajuik  
 waitkastinme tusag idaisachmayi,  
 nuadui ditan ayamjak  
 apu aidaun suwimkan susabi.

15 Nuadui apu aidaun chichajak:  
 “Mina aentsug wi etegjamu aina duka,  
 tuja mina chichamjun etsejin aidaushkam  
 makichkish waitkasaigpajum”, tiuwai.

16 Tuja Canaán nugkanum  
 Apajuí ajak aidaun ashí ijinabi,  
 dutikamu asa nujan tepeabi.

17 Tujash eke nujan tepeatsaig,  
 Apajuí Josén emtika Egipto nugkanum  
 awemauwai, dita yachi aidau  
 wainka inataijai betek sujukajua nuna.

18 Dutikam Egipto nugkanum jegamtai,

Josénak jijui dawenum jigkajag  
jukiag aents achika egketainum  
egkeawagmayi.

<sup>19</sup> Tuja José kajamjamuji uminkati tusa,  
Tuke Pujuu niina dekapeak  
kuashat tsawan waitkstinme tiuwai.

<sup>20</sup> Nunik waitu pujaun,  
Egipto nugkan apuji José jiiktajum tusa  
inamjamtai jiikiagmayi,  
dutika agkanmitkabi.

<sup>21</sup> Dutika jiiki niina jeen apuji ema,  
nuigtu niinu aidau Egipto nugkanum ayaunak ashí diisti tusa niina idaitusui.

<sup>22</sup> Tuja nuigtushkam apu atuwe aidau,  
tuja tikich apu aidaunashkam  
nigki jintintua unuinakti tusa idaitusui.

<sup>23</sup> Nunikbaunum Jacob Israel daagtin  
aajakua nunú Egipto nugkanum jegauwai.  
Nunik jegaa tikich nugkanmayayaitak  
Cam nugkanum pujusui.

<sup>24</sup> Nunik pujusmatai, Apajuí  
nii aentsji aidaun kuashat uyujkauwai,  
dutika niina shiwaaji aidaun  
nagkaesau senchigtin emauwai.

<sup>25</sup> Tujash egiptunmaya aidau  
Israel aents aidaun kajejiagti,  
dutikainak tsanujagtinme tusa  
Apajuí tsagkamkauwai.

<sup>26</sup> Tuja kuashat waitkagtai,  
Apajuí niina inake etegkamujin Moisésan Aarógjai  
Egipto nugkanum awemauwai.

<sup>27</sup> Nuadui Apajuí senchijin  
wainchatai ishain aidaun Egipto nugkanum, Cam nugkanum iwainakajui.

<sup>28</sup> Tuja Egipto nungkak ashí suwe wajasti tusa  
Apajuí suwe emabi.

Nuna wainainayatak  
egiptunmaya aents aidauk,  
Apajuí chichamenak  
antugkachaju ainawai.

<sup>29</sup> Tuja yumi aidaunak ashí numpa awajtusui;  
imanikmatai, namak aidaushkam jinawajui.

<sup>30</sup> Takash aidaunashkam,  
ashí yaaktanum piyakti,  
nuniak apu pegajinish  
tuja nii ekemtaijinish utsaniag  
waitkasti tusa ishitkabi.

<sup>31</sup> Apajuí nunikti timatai,  
anchi tetejai pachimnag,  
yujagkim wajukama imanik  
Egipto nugkanak akijuawabi.

<sup>32</sup> Tuja yumin yutumtiktsuk,  
bicha kaya iman najaneaku  
jijjai pachimag nayaimpinmayan  
Egipto nugkanum yutumtikjabi.

<sup>33</sup> Nunú yutak uva ajakbau aidaun,  
higo aidaunash ijinabi.

Dutikak numi kanawe  
aidaunashkam ashí kupijabi.

<sup>34</sup> Tuja Apajuí ataktushkam nunikti tusa timatai,  
manchi aidau shiig kuashat kaketukmayi.

¡Shiig kuashat asa dekapatash dekapamaichabi!  
<sup>35</sup> ¡Imaniau asa ajak ajanum ayaunak,

tuja dupa aidaunak ashí amukagmayi!

<sup>36</sup> ¡Dutiksag egiptunmaya aents aidaun  
uchiji iwai aidaunashkam ijituabi!

<sup>37</sup> Dutika nuadui,

iina muunji aidaunak Apajuí  
oro aidaun, tuja plata aidaun  
aatus uyumitkak jiiḡmayi.

Nunik shimakush Israel aents aidauk  
makichik kayanakesh tukumkachagmayi.

<sup>38</sup> Nunik shimiagtai, egiptunmaya aidauk  
ishamkagtu batsatu asag,

shiḡ aneasaju ainawai.

<sup>39</sup> Dutika jiiḡa yujagmin awetiuwai,

niina aentsji aidaun ejakti tusa;  
tuja dutiksag kashi diisag  
shiyaktinnashkam jii kegaun awetiuwai.

<sup>40</sup> Tuja yumainji atsuḡam yapajuinak sumagtaish,  
codornisan ishikabi;

tuja nayaimpinmaya yutai susam  
nuna yuwawag ejemajag  
shiḡ aneasagmayi.

<sup>41</sup> Tuja Moisés kayan awatmatai,

kayanmaya yumi jiiḡkibi,  
nunik entsajai betek wajas  
uwegshunum akaikibi.

<sup>42</sup> Apajuí yaunchuk Abrahaman  
anagkuamunak betek umikmayi.

<sup>43</sup> Aatus Apajuí niina aentsji aidau  
Egipto nugkanum batsatun jiiḡmayi.

Dutikam aents aidauk  
shiḡ aneenak unsumiagmayi.

<sup>44</sup> Dutika yajuak nugka  
tikich aents aidau batsamtain susabi,  
dutikak ajak tikich aents aidau  
ajakbau aidaunashkam susabi.

<sup>45</sup> Nunak Apajuí dutikauwai,  
juwi batsamas chicham umiktin agagbauwa nuna umiktinme tau asa.  
¡Yajauwajah! Apajuí emematiagmi.

## LIBRO V

### 107

(Salmos 107—150)

*Apajuíyai pimpiki wake besemag pujajinish yaijatnuk*

<sup>1</sup> Tuke Pujuu see titajum,  
wagki niyai pegkejak,  
niina anenkajig tuke auwai.

<sup>2</sup> Iina shiwaaji aidau inaku  
waitkatai batsatutin Tuke Pujuu  
niina senchijijai jiiḡmag  
agkanmitkagmabi titajum.

<sup>3</sup> Dutijama etsa jiiḡtai, etsa akaetai,  
nujinum, tsumunum batsamin  
aidautin yajupak ijupagmayi.

<sup>4</sup> Tuja iina muunji aajakajua duka,  
wainak megkagag uwegshunum yujajakui,  
yaakat dita batsamainun  
wainainachu asag.

<sup>5</sup> Nuninak nujantai, kitakai  
ashí jinawag yujagmayi.

<sup>6</sup> Nunik waituinak Tuke Pujun



yaijatkata tusag segagmayi,  
nuna nii antujuk, dita  
waitiamujin yaigka agkanmitkabi.

<sup>7</sup> Dutika jintintua dita  
shiig batsamsatnunum ejegawagmayi.

<sup>8</sup> Nuadui Tuke Pujuu emematiagmi,  
niina anenkajin iina ayamjutpak  
ishamain wainchatai aidaun iwainajua,  
nunú pachisaja.

<sup>9</sup> Wagki Apajuíyai aents kitakai jaunash,  
tuja nujantai jaunashkam suwa duka.

<sup>10</sup> Tuja iina apachji aajakajua duka,  
inaku waitkainam pimpikiag  
wake besemag pujuagmayi.

<sup>11</sup> Nunak Tuke Pujuun shiwagmainak,  
chicham umiktinun susauwa nunash  
uminachu asag nunikajui.

<sup>12</sup> Nuadui Apajuí suwimak susam  
shiig senchi waitujakajui,  
dita yaimainuk makichkish  
atsugsamu asa.

<sup>13</sup> Nunik waituinak Tuke Pujuun  
yaijatkata tusa segagmayi,  
nuna Apajuí antujuk, dita  
waitiamujin yaigka agkanmitkabi.

<sup>14</sup> Dutika senchi inainaku waitkam batsatun  
agkanmitkabi.

<sup>15</sup> ¡Tuke Pujuu anenkega nunú see titajum,  
wagki nii jutiin ayamjutpak  
kuashat wainchatai ishamain  
aidaun iwainajua nuadui!

<sup>16</sup> ¡Waiti bronce najanamunash,  
tuja jiju awajamu aidaujai,  
Apajuí ashí tsaikui!

<sup>17</sup> Tuja iina apachji aidauk anentainkachu asag,  
dita pegkegchajin jata achikam  
senchi waitiagmayi.

<sup>18</sup> Nunik jinuinak yujumkan tsumainak  
yutsuk, nujantai ashí jinaa batsabi.

<sup>19</sup> Nunik waituinak Tuke Pujuun  
yaijatkata tusa segagmayi,  
nuna Apajuí antujuk,  
dita waitiamujin yaigka agkanmitkabi.

<sup>20</sup> Ashí niina chichamenig etsagakmayi.  
¡Aatus ashí jinaa batsatun uwentikjabi!

<sup>21</sup> Tuke Pujuun anenkega nunú see titajum,  
wagki nii jutiin ayamjutpak,  
kuashat wainchatai ishamain aidaun  
iwainajua nuadui.

<sup>22</sup> Apajuí yaimpakua nunú anentaimtusjum,  
see takujum kuntin maa apeatajum,  
dutikakjum nii dutikamuji pachisjum  
shiig aneasjum senchi  
untsumkajum etsegkatajum.

<sup>23</sup> Iina apachji aajaku aina nunú  
lanchanum nayants shiyaku aidauk,  
nayantsa amain tikich nugkanum  
wajiin sujak yujau ainawai.

<sup>24</sup> Ibau nayants muunnum yujasag,  
junak dekas Tuke Pujuuwap najanauwaita  
tusa dekawajui.

25 Apajuí chichakmatai,  
dase ishamain iyagmayi,  
imaniak nayantsan shiig senchi  
tsukatmitkabi.

26 Imatikak lanchanak  
yaki ema ema ajuibi.  
¡Imaniau asamtai,  
ayamjumamainchau dekapiagmayi!

27 Nuninak nampekujai betek  
winchainag tukumak iyainiagmayi.  
Imaaninak lanchanum  
yujatan yacha ainayatak  
dutikmainchau dekapiagmayi.

28 Imanitai ishamainak  
Tuke Pujuun segagmayi,  
tusa segam antujuk yaigka uwemtijabi.

29 Dutikak dase ishamain wajak  
nayantsan tsukatmitkaunak imijakmayi.

30 Nunik mijakmatai, shiig aneasagmayi,  
tuja Apajuí ditanak yajuak  
dita jegatag tibaunum ejegauwai.

31 ¡Tuke Pujuu anenkega nunú see titajum!  
Wagki nii jutiin ayamjutpak,  
kuashat wainchatai ishamain aidaun  
iwainajua nuadui.

32 ¡Ashí aents aidautigum ijunjajum  
Apajuí ememattajum!  
Tuja Israel aents aidaun apuji  
múun aidautigmesh ijunjajum  
Apajuí ememattajum.

33 Apajuík namak múun aidaunash  
ukuya uwejush emawai,  
tuja yumi pukuni jiinunash  
ukuya buku emawai.

34 Tuja nugka ajak shiig tsapaunash,  
nuwiya aents aidau tudaujin  
ajak tsapachu emawai.

35 Uwejush yumi atsaunash  
kucha ain emawai,  
dutikak nugka buku ataish,  
yumi pukuni jiinin emawai.

36 Tuja aents nujantai waituidaunak  
yajuak nuwi batsawai,  
dutikam nuwi dita batsamsatnun  
yaaktan najanainawai.

37 Nuwi batsamas uva ajakag  
kuashat nejekun juuka yuwinawai.

38 Apajuí ditanak yayawai,  
tuja dita tagkuji aidaunashkam  
kuashat ikauntawai.

39 Untsu tikich aidauk  
kuashat waitkainamu asag,  
ujudauch ainawai.

40 Tuja Apajuík aents pegkegchau  
waitkagkagtin aina nunak kajejawai.  
Nuadui ditanak uwegshunum wainak yujas  
jinaati tusa idaisauwai.

41 Tuja aents ujudauch  
wake besemag pujaunash  
nii agkanmitkawai.  
Dutika nii uchijinak

tagkujai betek kuashat uyujtawai.

<sup>42</sup> Nuna aents Apajuí umijin aidau diisag shiig anenawai.

Untsu aents pegkegchau aidauk datsaamainak ataktuk tumainchau dekapenawai.

<sup>43</sup> Aents shiig anentaimkauk juna anentaimas diisti.

Nuniak Tuke Pujuun anenkega nuna dekattawai.

## 110

*Apajuí apunak senchintiknai*

David kantamamu

<sup>1</sup> Tuke Pujuu mina apujun chichajak:

“Mina untsujui ekemsata, nunikamin wi amina shiwaajum aidaunak depetkan aminí ikaunmakmatai, ame inagminum”, tiuwai.

<sup>2</sup> Jerusalégnun pujusa inamjati tusa

Tuke Pujuu amina umigtamkae.

Tuja amina shiwaajum aidaunak nii depeteawai.

<sup>3</sup> Ame apu wajasamin,

amina aentsjum aidau shiig aneas kaunawag, ame tabau umikmi tusa tujabiagtin ainawai.

Tuja amek kashikmas

jegashjuk tsawauwama numamtuk,

kashi kashinig yamajam senchi jutatme.

<sup>4</sup> Tuke Pujuu nii umiktinjin

yapajinashtinun chichaak:

“Ametme sacerdote Melquisedec aajakua

nujai betek tuke sacerdote atinmek”, tiuwai.

<sup>5</sup> Apajuik amejaig pujawai amina yaimpaktatus.

Makichik tsawantai nii kajeka

apu aidaunak ijinattawai.

<sup>6</sup> Aents aidaun suwimkan susa ijinatnai,

dutikam ashí nugkanmak

aents jinaw tuwasua weaku atinai.

¡Nugka múun aidaun

apuji aidaunash ashí ijinatnai!

<sup>7</sup> Depetmak jintá minis

yumi entsanmayan uwagtinai;

nunik ataktu ichichmamjatnai.

## 115

*Iina Apajuíjig nayaimpinum pujawai*

<sup>1</sup> Tuke Pujuuwah, jutiik eme anenkagtusaipa,

dekas ima amek eme anenmamta,

amina anenkagmin,

tuja dekaskegmijai eme anenmamta.

<sup>2</sup> Wagkag aents pegkegchau aidaush

jutiin chichagtamainakush ¿tuwi pujawa

atumi Apajuígmesh, tusash tujamiajainta?

<sup>3</sup> Iina Apajuíjig nayaimpinum pujawai,

tuja nii wakegamu aidaun ashí najankauwai.

<sup>4</sup> Aents pegkegchau aidau

apajuímtaijig oro, plata ainawai.

Tuja duka aents najankamu ainawai.

<sup>5</sup> Dita apajuímtaijig weni ajamaitak

chichachu ainawai;

jiishkam ajamaitak wainmachu ainawai.

<sup>6</sup> Kuwishish ajuidau, tujash antuchu;

nujintin, tujash mayatchau;  
 7 uwegtin aidau, tujash achimchau;  
 nawentin aidau, tujash wekaechau;  
 ¡makichik chichamujigkesh  
 antugchatai ainawai!

8 Nuniau asamtai aents nuna najanin,  
 tuja nunú dakumka najanamua  
 nuna emematin aina duka  
 dita apajuímtaijjai betek ainawai.

9 ¡Israel aents aidautigmek,  
 Tuke Pujuuwaig kajinmamsa anentaimsatajum!  
 Wagki nii jutiinak yaimpawai,  
 tuja nigki kuitamjamui.

10 Sacerdote aidautigmesh  
 ima Tuke Pujuuwaig kajinmamsa  
 anentaimtajum.

Wagki nii jutiinak yaimpawai,  
 tuja nigki kuitamjamui.

11 Ashí aents Tuke Pujuu umijin aidautigmek,  
 ¡Tuke Pujuuwaig kajinmamsa anentaimsatajum!  
 Wagki nii jutiinak yaimpawai,  
 tuja nigki kuitamjamui.

12 ¡Tuke Pujuu iinak kajimatjamtsuk  
 pegkegnum yumigtamjatnai!  
 ¡Israel aents aidaunashkam  
 pegkegnum yumigjatnai!  
 ¡Sacerdote aidaunashkam  
 pegkegnum yumigjatnai!

13 Aents Tuke Pujun eme anentus  
 umijin aidaun:  
 aents eme anentsa diishtai,  
 eme anentsa diitai aidaujai  
 Apajuí ashí ditanak pegkegnum yumigjatnai.

14 Tuke Pujuu atumi uchijum aidaunash,  
 tuja nuna uchiji aidaunash uyujtugmaktinai.

15 ¡Tuke Pujuu nayaimpin, nugkajai najanauwa nunú  
 aminak pegkegnum yumigtamsattawai!

16 Nayaimpia auk Tuke Pujunui,  
 tuja nugka nuna aents aidaun susauwai.

17 Jakau aidauk chichamainchau asag,  
 Tuke Pujunak emematmainchau ainawai.

18 Untsu ii iwaku aidautik  
 tuke ememattinaitji.

¡Yajauwajah!  
 Iina Apajuí ememattai ati.

## 116

### *Apajuí see tabau*

1 Wika Tuke Pujunak anejai,  
 wagki wi segamun antugtuku asamtai.

2 Wagki wi segamun antugtuku asamtai,  
 wi iwaku pujaknuk,  
 niina tuke segatnaitjai.

3 Jata achigkamtaijpap  
 jakattaja tusan ishankabaijai,  
 nuniakun wake besemag pujubaijai.

4 Nuniakun Tuke Pujun segabaijai  
 uwemtijugta tusan.

<sup>5</sup> Tuke Pujuuk pegkejam, wait anenkagtinai,  
iina Apajujiya duka  
kakagchauch anejatin wajasui.

<sup>6</sup> Tuke Pujuuk aents kakakchau  
aidaunash kuitamui.

Wi kakaumainchau wajasan pujaishkam,  
nii minak uwemtijugmayi.

<sup>7</sup> ¡Yamaik shiig aneasan pujumainaitjai,  
Tuke Pujuu pegkeg etiu asamtai!

<sup>8</sup> Wagki Apajuí jamainun uwemtijug  
wi wake besemag buutku

pujamugnash yaintuk uwemtijuja nuadui.

<sup>9</sup> Tuja iwaku juju nugka juwi pujag nuaduik,  
Tuke Pujuunak tuke umigkatnaitjai.

<sup>10</sup> Wika senchi waitiagnushkam, Apajuínak dekaskeapi tibaijai.

<sup>11</sup> Tuja wi waugtukan chichaakun:  
“Ashí aents aidauk waitjin ainawai”,  
tibaijai.

<sup>12</sup> ¿Tuke Pujuu mina pegkegnum  
yainkamunmash,

wisha wajuk akimainaitja?

<sup>13</sup> Tuja nii mina uwemtijugbaunum  
vinon anentag Tuke Pujuun suwakun,  
niina daajin pachisan ememattajai.

<sup>14</sup> Wi umiktajai tusan

Tuke Pujuun tiuwaitag nunak,  
yamai ashí niina aentsji aidau  
wainainamunum umiktatjai.

<sup>15</sup> Tuke Pujuuk niina umijin aina  
nunú jakamtaig,

wake besemag dekaapeawai.

<sup>16</sup> ¡Tuke Pujuuwah, wika amina inakmetjai!

¡Wika nuwa amina inakmea  
nuna uchijiyaitjai!

¡Ame minak achikbaujai betek  
ashí jakan pujai uwemtijugmayume!

<sup>17</sup> Tuke Pujuuwah, ame uwemtijugbaunum  
see takun uwija maan apeakun ememattajame,  
dutikakun daagmin pachisan segattajame.

<sup>18</sup> Wi umiktajai tusan

Tuke Pujuun tiuwaitag nunak,  
yamai ashí niina aentsji aidau  
wainainamunum umiktatjai.

<sup>19</sup> Yaakat Jerusalégkan ejapeen,

Tuke Pujuu jee pegkegma

nuna waitijin jegantatak agkaju

ayatak shugkuk ajigmauwa nuwi nunak dutikattajai.

¡Yajauwajah!

Apajuí daaji ememattai ati.

## 118

*Tuke Pujuu uwemtikagtugbaunum see tabau*

<sup>1</sup> Tuke Pujuu see titajum,

wagki niyai pegkejak;

niina anenkajig tuke auwai.

<sup>2</sup> Israel aents aidauk yamaikiuch:

“Apajuí anenkeg tuke auwai”, titinme.

<sup>3</sup> Sacerdote aidaushkam:

“Apajuí anenkeg tuke auwai”, titinme.

<sup>4</sup> Tuke Pujuun eme anentus diin aidaushkam:

“Apajuí anenkeg tuke auwai”, titinme.

<sup>5</sup> Waittanum pujusan

Tuke Pujuun untukbaijai,  
dutika ai, aijuk uwentijugmayi.

<sup>6</sup> Tuke Pujuu wijaig pujawai;  
nuadui wika ishamkagtatsjai;  
minak makichkish pegkegchauk  
awajtumain ainatsui.

<sup>7</sup> Tuke Pujuu wijaig pujawai;  
nuniau asa minak nii yaintui.  
¡Nuadui mina shiwag aidau  
mina kajegtuina nuna nii ijinamun wainkattajai!

<sup>8</sup> Aentsnum kajintsa anentaima wekaetsuk,  
dekas Tuke Pujuuwaig kajintsa anentaimainaitji.

<sup>9</sup> Apu aidaunum kajintsa anentaima wekaetsuk,  
dekas Tuke Pujuuwaig kajintsa anentaimainaitji.

<sup>10</sup> Tikich nugkanmaya aents aidau  
tuwagtukagmayi;  
tujash Tuke Pujuu daajin depetkamiajai.

<sup>11</sup> Ashí tententuawagmayi;  
tujash Tuke Pujuu daajin depetkabiajai.

<sup>12</sup> Etejai betek tuwagtukagmayi;  
tujash jagki ijumjamun jii apea  
emegkauwama imatikan ajapabiajai;  
¡Tuke Pujuu daajin depetkabiajai!

<sup>13</sup> Ajua maami tusag shitatkiagmayi;  
tujash minak Tuke Pujuu ayamjutkabi.

<sup>14</sup> Wika Tuke Pujuu mina senchintija  
nuna kantamajjai.  
¡Niiyai mina uwemtjinuk!

<sup>15</sup> Aents Apajuín umijin aina nuna jenig  
shiig aneas untsumainak:  
“Tuke Pujuun senchijiya nunú depetmake”,  
titinme.

<sup>16</sup> ¡Tuke Pujuun senchijiya duka  
augmatkuish, makichkish ejemaitisui!  
¡Tuke Pujuun senchijiya nunú depetmakui!

<sup>17</sup> ¡Jakashtatjai, iwaku pujuttajai,  
wagki Tuke Pujuu iina ayamjutpak  
dutikauwa nuna etsegkatasan!

<sup>18</sup> Tuke Pujuu minak shiig senchi  
suwimkan sujusmayi;  
tujash jakati tusag idaituschabi.

<sup>19</sup> ¡Apajuí jee pegkegma nuna  
waitiji ujatitajum;  
nuwí wayan Tuke Pujuun see titag tajai!

<sup>20</sup> Juju waitiya duka  
Tuke Pujuu pujamunum waitaiyai;  
aents Apajuín nemajin aidauk  
nunú waitiya nuni wayawagtinai.

<sup>21</sup> Tuke Pujuuwah, see tajame  
wagki ame antugtukam uwentijuju asamin.

<sup>22</sup> Kaya ekenag jegamin aidau  
kaya pegkegchauwai tusag,  
dakitjajua nunú yamai  
dekas kaya ima pegkeg atsumtai wajase.

<sup>23</sup> Nunak Tuke Pujuu dutikae,  
duka yamaik puyattsas diimainai.

24 Juju tsawanta juwai,  
Tuke Pujuu iina ayamjutpakua nunú;  
nuadui iyamai shiig anenaku jiiistamawagmi!

25 Tuke Pujuuwah, ¡wait aneasam uwemtikagtugta!  
Tuke Pujuuwah, ¡wait aneasam yaijatkata,  
shiig batsamsagmi!

26 ¡Tuke Pujuu awemamu mina nunú  
dekas ememattai ati!

¡Tuja Tuke Pujuu jee pegkegma nuwi pujusan atumin pegkegnum yumigkiajime!

27 Tuke Pujuu Apajuíyai.  
¡Apajuíyai tsaaptinun sujamsauk!  
Yagkug aidau yajuaka altarnum  
ejegawagmi, dutikawaja Apajuí  
aentsji aidau nuwi batsata nunú uyuntsagmi.

28 Amek mina Apajuíg asamin see tajame,  
nuniakun amina imanjumin emematjai.

29 Tuke Pujuu see titajum,  
wagki niyai pegkejak;  
niina anenkajig tuke auwai.

## 119

97 ¡Amina chichamjum umiktin sukagtusuitam nuna  
shiig senchi aneau asan,  
kashi kashinig nuwig anentaimjai!

98 Nunú chicham umiktin agagbau  
umiktajum tusa sukagtusuitam nunú  
mina shiwag aidaun

nagkaesau yachamtijawai,  
wagki nunú jintinjau asamtai.

99 Wika nuna ausa dekau asan,  
mina jintinjin aidaun nagkaesau  
chicham umiktin agagbauwa nuwi anentaimjai.

100 Tuja amina chichamjum umiktin  
sukagtusuitam nuna umiau asan,  
múun amina chichamjumin etsejin aidaun  
nagkaesau amina chichamjumnak dekajai.

101 Amina chichamjumin umiktag tau asan,  
pegkegchau aina nunak idaisabijai.

102 Tuja ame minak jintinjau asamin,  
aminu chicham umiktina nunak idaisachmaijai.

103 Ame umiktin anagkagtuawaitam  
nunak mina kayakmataijuig  
shiig yumintsak dekapeajai,  
tuja mina wenujui dapa yumijin nagkaesau  
yumintsak dekapeajai.

104 Amina chichamjum umiktin  
sukagtusuitam nuwiya unuimaju asan,  
waitjut aina nunak kajejajai.

105 Amina chichamjum agagbauwa nunú  
jii ekemakbaujai betek,  
wi weamunum tsaaptin emawai,  
tukumak iyajai tusa.

106 Wi yaunchuk chichaakun,  
umiktajai tiuwaitag nunak, ataktushkam tajai:  
“Amina chichamem  
pegkegma nunak dekas umiktatjai.”

107 ¡Tuke Pujuuwah, shiig pimpikin  
wake besemag pujajai!

¡Ataktu ichichtugta, ame chichamjum  
 wajintu chichawa dutiksamek!  
 108 Tuke Pujuuwah,  
 wi amina emematjam nunú  
 shiig aneasam jujutkita,  
 nuniakum amina chichamjumia nunú jintinjuata.  
 109 Wika tuké jamainnum pujajai,  
 tujash ame jintinjuamua nunak kajimattsujai.  
 110 Aents pegkegchau aidau,  
 utugchatan apujtujuinawai,  
 tujash amina chichamjum umiktin  
 sukagtusuitam nunak kajimatkinuk idaitsujai.  
 111 Amina chichamjum umiktina nunú  
 minak tuké shiig aneasa pujutan sujawai.  
 112 Wika amina chichamjum umiktin  
 sukagtusuitam nunak wakejusan,  
 atakea duwish tuke umiktin atajai,  
 tusan tumamjai.

129 Amina chichamjum umiktina  
 duka shiig pegkejai;  
 nuadui wika betek umiajai.  
 130 Amina chichamjum etsegbauwa duka  
 tsaptinjai betekai;  
 nuniau asa aents kakagchauchinak  
 shiig dekamtikawai.  
 131 Amina chichamjum umiktin sukagtusuitam  
 nuna dekatasan wakegajai,  
 nuniakun itugkanuk shiig dekawag  
 tusa anentaimekun waitiajai.  
 132 Tuke Pujuuwah, amina anempau aidau  
 wait anentam dutiksamek,  
 minash diigsam wait anenjugta.  
 133 Amina chichamjum wajintua dutiksamek awekattsata;  
 pegkegchau wagagkiti tusamek idaitusaipa.  
 134 Aents pegkegchau aidau  
 mantuawainum ayamjutkata,  
 wika amina chichamjum umiktin  
 sukagtusuitam nuna umiktasan wakegajai.  
 135 Wi amina inakmetag dusha  
 shiig aneasam diigsata,  
 nuniakum nunú chichamem jintinjuata.  
 136 Amina chichamjumin  
 eme anentus uminachu asantai,  
 shiig senchi buutjai.  
 137 Tuke Pujuuwah, amek pegkegmaitme;  
 tuja ame suwimak sukagtam  
 dushakam pegkegnum jintinkagtawai.  
 138 Chicham umiktin ame sukagtusuitam  
 duka waitchauwai, betek uminnai.  
 139 Mina shiwag aidau  
 amina chichamjumin uminachkui,  
 kajeakun shiig senchi waitiajai.  
 140 Amina chichamjumik  
 ashí dekapsamu dekas pegkegmai,  
 nuadui wika amina  
 inakminuk nuna wakegajai.  
 141 Wika dushiktai, wainkauchitjai,  
 tujash amina chichamjum umiktin  
 sukagtusuitam nunak kajimattsujai.  
 142 Amina takatjum pegkeja duka  
 tuké imanisag auwai,



tuja amina chichamjum umiktin  
 agagbauwa duka dekas shiig pegkegmai.  
<sup>143</sup> Waitiakun wake besemag pujubiajai;  
 tujash amina chichamjum umiktin sukagtusuitam  
 nunak minak shiig anemtijusmayi.  
<sup>144</sup> Ame chicham umikuitam  
 duka makichkish yapajinchauwai.  
 ¡Yainkata wisha nuna shiig antukan umiktajai!

## 121

*Tuke Pujuuwai amina kuitamjamnu*

Atushat wekaeku Apajuíyai anentaimsa kantabau

<sup>1</sup> Muja aidaun pagkain diyakun:

¿Tuwiya taag minash ayamjutkainta? tajai.

<sup>2</sup> Minak Tuke Pujuu nayaimpin nugkajai najanauwa nunú yainkattawai.

<sup>3</sup> ¡Apajuik waitkastinme tusag  
 makichkish idaituschattawai!

¡Amina kuitamjamna duka makichkish kanatsui!

<sup>4</sup> Nigka makichkish kanuchui;

Israel aents aidaun kuitamna duka  
 makichkish kanuchui.

<sup>5</sup> Tuke Pujuu aminak kuitamjamui;

Tuke Pujuu aminak ejaka kuitamjamui.

Niig amina yaimpaktatus amejai ijutkawai.

<sup>6</sup> Tuja tsawaishkam etsag senchi sukupakug  
 waitkagmaschattawai,  
 antsag nantushkam waitkagmaschattawai.

<sup>7</sup> Ishamain ataish,

Tuke Pujuu ejapak kuitamjamui;

tuja nii amina pujutjumnash kuitamjutpawai.

<sup>8</sup> Tuke Pujuu yamaya juwish, tuja ajumaish  
 ame tuwi wetatme nuniaminish,

tuja wakitki minaminish,

nigki tuké kuitamjamkatnai.

## 122

*Jerusalén kantamjuamu*

David Jerusalén wakatatus wesa shiig aneak kantamamu

<sup>1</sup> Tuke Pujuu jee pegkegma nuwi wemi

tujutuinakui, wika shiig anebiajai.

<sup>2</sup> Jerusalégkah, yamai juwi waitinum kaunaji.

<sup>3</sup> Jerusalén yaaktamamua nuwi  
 ashí tikich yaakat aidaushkam ijutkau ainawai.

<sup>4</sup> Ashí Israel aents Tuke Pujun aentsji aidauk  
 Jerusalén tuwainawai, Apajuin emematuinak,  
 wagki nuwi Apajuí ememattajum  
 tibau asag, nuna umiinak.

<sup>5</sup> Nuwi awai chicham inagnatai,  
 tuja Davitan pujusa inamtaijishkam.

<sup>6</sup> Nuadui: “Jerusalégkah,  
 aminak utugchatak atsugtanti;  
 tuja amina anempaina dushakam  
 agkan pujustinme.

<sup>7</sup> Yaakat peeja apakbauwa nuna initken  
 aents batsata dushakam agkan,  
 tuja jega apu pujusa inamtaijiya  
 dushakam waitkaschamu ati”, titajum.

<sup>8</sup> Tuja mina yatsug aidaun  
kumpag aidaujui chichagkun:  
“Atumnash utugchatak atsugtamtinme”, tajai.  
<sup>9</sup> Untsu Jerusalégkah,  
aminig pujut pegkeg ati tusa wakegajai,  
wagki Tuke Pujuu amina Apajuígmí  
jee pegkegma nunú au asamtai.

## 124

### *Apajuík tuke yaijatui*

David Jerusalén wakatatus wesa shiig aneak kantamamu

<sup>1</sup> Ashí Israel aents aidautigmek,  
Tuke Pujuu iina yaimpakchau akuish,  
wajukauk ainji, tumamtajum.

<sup>2</sup> Tuke Pujuu iina yaimpakchau ataik,  
aents aidau jetepagmaya nuaduik,

<sup>3</sup> ashí ijipamain awajtamkajui,  
senchi kajegtamkaju asag.

<sup>4</sup> Dutijamawagmatai namak dujajak tajaka  
ajapama numamtuk ajapeam amain wajakuitji.

<sup>5</sup> Namak chichijam tajaka ajapama  
numamtuk ajapjamain awajtamkajui.

<sup>6</sup> ¡Tuke Pujuu tuke pegkegnum chichagtai ati,  
wagki shiwaaji ijinatnume  
tusa idaitamsachu asamtai!

<sup>7</sup> Aents chigkin achiktatus detuamunum  
chigki nemak tsujimak wegama numamtuk,  
iishkam shiwag achigmak  
mantamatag tujamainakui, pisaja uwemjabiaji.

<sup>8</sup> Tuke Pujuu nayaimpin nugkajai  
najanaauwa nunuwai ayamkagtinuk.

## 126

### *Achija yajuakbau waketjagbau*

Jerusalén wakatatus wesag shiig aneak kantamawagbau

<sup>1</sup> Achija yajupakagmatai, waitu batsatutin  
Tuke Pujuu awagtamag Jerusalén ikaupamtai,  
kajanmatskait dekapin ayaji.

<sup>2</sup> Nuniaku senchi dushimiaji,  
imaniaku shiig aneasa senchi kantamajji.

Nuniajin tikich nugkanmaya aents  
pegkegchau aidau chichainak:

“¡Tuke Pujuu ditanak  
shiig pegkegnum yaigke!” tuyanume.

<sup>3</sup> Duka dekaske, ¡Tuke Pujuu  
iinak yaimpak agkanmitkagmabi!  
¡Nuadui iishkam shiig anebiaji!

<sup>4</sup> ¡Tuke Pujuuwah, yumi uwegshunum yututai,  
entsa najanea akagama numamtuk,  
ataktu awagkim Jerusalén itajatuata!

<sup>5</sup> Aents buu buuttajai ajakmaku aidauk,  
atakea duwi shiig aneas juukagtinai.

<sup>6</sup> Tuja aents aidau ajak pegkejan juki  
ajakmatatus buutkabaikia shiyakaju aidauk,  
dita ajakmamunmayan juukag,  
shiig aneas kantamkiag  
dita jeen wakitkiagtinai.

**127***Ashí Tuke Pujuummaya junawai*

Salomón Jerusalén wakatatus wesa shiig aneak kantamamu

<sup>1</sup> Tuke Pujuu jegan jegamchataik,  
jega jegin aidauk wainak takak waituinawai;  
tuja Tuke Pujuu yaakta kuitamchataik,  
yaaktan kuitamin aidauk  
wainak kuitamak waituinawai.

<sup>2</sup> Ajakma yuwatatus takak,  
kashikmas nantaki tuke etsan akapakush,  
kuashat juuka yuwatnunig  
wainak imanik waituinawai.  
Nuninai Apajuik niina kumpajinak kanak tepetaish,  
nii yuwatnujinak ashí suwawai.

<sup>3</sup> Iina uchiji aina duka,  
Tuke Pujuu anentag pegkejuch amasbau ainawai.

<sup>4</sup> Ii datsa ajin iina uchiji akiinaina duka,  
aents maanitan yacha nuna  
flechajijai betek ainawai.

<sup>5</sup> Nuadui aents kuashat uchigtina duka  
shiig aneasagtin ainawai.  
Tuja niina shiwaaji aidaujai igkuniakush dushikiam achatnai,  
niina uchiji kuashat asa, apajin ayamjukagtina.

**130***Tuke Pujuuwai kajintsa anentaibau*

Jerusalén wakatatus wesag shiig anenaku kantamawagbau

<sup>1</sup> Tuke Pujuuwah, waanum initak  
egkema pujusan amina untsuagme.  
<sup>2</sup> ¡Apuh, wi untsuajam nunú antugtukta!  
¡Wi amina egakun untsuag  
nunú antugtukam yainkata!

<sup>3</sup> Tuke Pujuuwah,  
ame tsagkugkagtugchawaitkuminig,  
iwakuk batsamaitsoji.

<sup>4</sup> Tujash ame tsagkugkagtau asam,  
eme anentsa umijam atatme.

<sup>5</sup> Wika Tuke Pujuuwai ashí mina anentaigjai,  
kajintsan pujajai.  
Tuja nii anagkagtuawa nunashkam  
dekaskeapi tajai.

<sup>6</sup> Wika yaakta kuitamin  
wajupa asag tsawajat tusa,  
tsawantan dakajama numamtuk  
mina Apajuujun dakajai.

<sup>7</sup> Israel aents aidautigmek  
Tuke Pujuu taatnuji dakastajum;  
wagki niyai awai anentak, tuja ashí agkanmaetashkam.

<sup>8</sup> Apajuí Israel aents aidaun tudaujinak  
ashí tsagkujug agkanmitkattawai.

**137***Achija Babilonia nugkanum yajuakbau*

<sup>1</sup> Babilonia namak aidaunum  
uwet pekaamsaja,  
Jerusalén anentaimtusa buutiaji.  
<sup>2</sup> Nuwi numi ayaunum nuna kanawen  
iina arpaji aidau nenayaji.

<sup>3</sup> Nunika nuwi batsatjin  
 suntag iina achipag yajupaku aidau  
 chichagtamainak:  
 “¡Shiig aneasjum kantamatajum,  
 tuja atumi nugkem Sión pachisjumshakam  
 kantamatajum!” tusa waitkagmayanume.  
<sup>4</sup> Iik makichkish iina Apajuúji kantamjutaig  
 tikich nugkanmak kantamaitsuji, tuyaji.  
<sup>5</sup> ¡Jerusalégkah,  
 wi amina kajimatkin idaitaik,  
 mina uweg untsujua duka makichkish achika  
 takamainchau wajasti!  
<sup>6</sup> ¡Tuja wi amina eme anentsuk,  
 kajimatkin idaikun shiig aneasan pujutaik,  
 mina idaijuk kayakmataijui nujamak asati.

<sup>7</sup> Tuke Pujuuwah,  
 babilonianmaya aents aidau  
 Jerusalégkan tsaikajua duwi,  
 Edom aents aidau chichainak:  
 “¡Ashi tsaiktajum!” tusa imatianum  
 nunú kajimatki idaisaipa!

<sup>8</sup> ¡Babiloniah, ameshkam tsayam atatme!  
 ¡Ame jutii aidauti waitkagkagtam  
 nuna iiktamainak tsaipaidauk  
 shiig aneasagtin atinme!  
<sup>9</sup> ¡Amina uchijum aidaun achika yajuakag  
 kayanum anugkag tsupig ijinawagtina nunak  
 Apajuí pegkegnum yumigjatin ati!

## 139

### *Apajuík ashí wainui*

David kantamamu

<sup>1</sup> Tuke Pujuuwah, ame minak shiig dekagme.  
<sup>2</sup> Ame wi dutikamu aina duka ashí dekame,  
 amek atushat pujusmesh,  
 wi wajuk anentaimja dushakam dekame.  
<sup>3</sup> Wi wajuk wekaeja duka amek ashí dekame,  
 ¡wi wajina takaja dushakam ashí dekame!  
<sup>4</sup> Wika eke chichatsaig,  
 wi wajina titag taja duka amek  
 emtikam dekame.  
<sup>5</sup> Ame minak ashí tententuum,  
 amina uwegmin achigsam pujame.  
<sup>6</sup> Wika amina yachajum imana nunak  
 kakajus dekamainchau dekaapeajai.  
 Mina dekatjuk nuwig makichkish jegatsui.  
<sup>7</sup> Amina Wakanmin ukuknush ¿tuki wetaja?  
 Ame ashí nugkanum dekam nuniaish,  
 ¿wisha itug tupikaknuk uumjuktagme?  
<sup>8</sup> Wi nayaimpinum wakamtaish,  
 amek nuwi pujuttame,  
 tuja wi nugka initken akaikimtaish,  
 amek nuwishkam pujuttame.  
<sup>9-10</sup> Wi nanaakan etsa minitaiya nuni wemataish,  
 ame minak achigkau atatme,  
 tuja etsa akaetaiya nuni nayantsa amain wenu  
 pujusmataishkam, ame minak yainkattame.  
<sup>11</sup> Wi suwenum uumkatjai tumainaitjai,

tuja nuniachkush tsawaiya nunú suwe wajasmataish,  
 12 suwea duka minak aminig ugmaitsui;  
 ame diismak kashia duka tsaaptinai.  
 ¡Ame diismak suwea duka tsaaptinjai betekai!

13 Ame mina iyashjuk najatjuawaitme,  
 ame minak, mina dukuju wakeen najatuawaitme.  
 14 Wika ame imatika najanamu asan see tajame,  
 ame najanamu aina duka ashí pegkejai.  
 ¡Wika nunak shiig dekjai!  
 15-16 Wi initak wainkachbau  
 mina dukuju wakeen najaneauwaitag duka ame waitmayume,  
 eke najaneag wajupa tsawan pujustinaitya duka  
 ame umigtukuitme.  
 ¡Nunú amina papiigmin agagbauwai!

17 Chah Apajuíjuh,  
 amina anentaimtagmia nunak  
 shiig anentaimja ejeyin  
 dekamainchau dekapeajai.  
 ¡Untsu nuna pachisan augmattsatag takun  
 ima utugchat dekapmainaitjai!  
 18 Nuna dekapagtajai takunush,  
 kamatak kuashta iman asamtai,  
 kakajus dekapamaitsojai.  
 ¡Tuja kanaja shintaish amek wijaig pujame!

19 Apajuíyah, aents pegkegchau aina duka ijinata,  
 dutikakum magkagtin aidaushkam datupatjukta.  
 20 Nunú aents aidauk amina daagmin pachisag  
 pegkegchaun chichainawai.  
 Nuninak amijai wainak shiwagmagainawai.  
 21 Tuke Pujuuwah,  
 amina kajegtamaidaunak wishakam kajejajai,  
 tuja amina dakitjamaidaunashkam  
 dutiksanuk dakitajai.  
 22 ¡Nunú aents aidaunak shiig senchi kajejajai!  
 Amina shiwaajum aina duka  
 mina shiwag ainawai.  
 23 Chah Apajuíyah,  
 mina anentajush shiig diigtusta,  
 dutikam mina anentaimtajush shiig dekapjutsata.  
 24 Tudau jintan aintsujash nunú diigtusta,  
 nuniakum jinta pujut nagkankashtinum  
 ekagtina nuni etita.

## 145

*Ashí aents aidauk Apajuín ememattinme*

David kantamamu

1 Mina apug Apajuíyah,  
 amina daajum ajumaish tuke atina  
 nuna pachisan etsegkatjai.  
 Tuja amina daagminak tuké pegkegnum  
 chichagtinaitjai.  
 2 Ashí tsawantai aminak pegkegnum chichagtatjame,  
 nuniakun amina daagmin tuke ememattinaitjai.  
 3 Tuke Pujuuk dekas múuntai,  
 iman asa ima nigki emematam amainai,  
 iman asamtai anentaimsaish, kakajus dekamaitsojai.  
 4 Uchi akiinak wegagtina duka  
 ame pegkeg iwainajuitam nuna emematiagtina.

Tuja amina senchigmejai  
wainchatai ishamain aidau  
iwainajuitam nunú etsegnaktinai.

<sup>5</sup> Amina imanjumin tsaaptinjumjai pachisag  
etsejiagtinai.

Nuninakuí wishakam  
ame iwainajuitam nuna pachisan chichattajai.

<sup>6</sup> Amina senchigmin shiwaajum aidau  
depetnaitam nuna pachisag chichagtinai.

Nuninakuí wishakam ame múuntaitam  
nuna pachisan chichattajai.

<sup>7</sup> Amina wait anenkagtutaigmin  
pachisag etsejiagtinai;

nuninak shiig aneas kantamainak:  
¡Apajuíyai pegkegmak! tujamiagtinai.

<sup>8</sup> Tuke Pujuuk kakagchauch, wait anenkagtin;  
wamak kajecheu anentak wajasui.

<sup>9</sup> Tuke Pujuuk ashí aents aidau kuitamui;  
tuja tikich nii najankamu aina nunashkam puyatjus kuitamui.

<sup>10</sup> ¡Tuke Pujuuwah,  
ashí ame najankamu aidau emematjamtinme!

¡Tuja amina umigtamin aidau shkam  
pegkegnum chichagtamtinme!

<sup>11</sup> ¡Amina inamtaijum pegkegma nuna  
pachisag chichatnume!

¡Tuja amina senchigmejai  
wainchatai ishamain aidau  
iwainajuitam nuna pachisag chichagtatui!

<sup>12</sup> ¡Tuja amina senchigmea nuna,  
ame inamtaijum pegkegma nujai  
ashí aents aidau dekaatnume!

<sup>13</sup> Amina inamtaigmea duka  
ajumaish tuke atinai,  
nuadui ajumaish amek tuke inamtinaitme.

<sup>14</sup> Tuke Pujuu aents wake besemag pujaunash yayawai,  
tuja kakakchau wajas pujaunash senchimitikawai.

<sup>15</sup> Apujuh, ashí aents aidauk  
amina dakagmainawai, yutain sujamsati tusa.

<sup>16</sup> Nuninakuí ame shiig aneasam suwame,  
nuna ashí iwaku aidauk

yuwawag ejemakag shiig anenawai.

<sup>17</sup> Tuke Pujuuk ashí  
nii anagkagtuamunak betek uminai,  
tuja nii najankamu aina nunak

shiig anentawai.

<sup>18</sup> Tuke Pujuuk aents niina dekaskenum  
segau aina nujai ijutkawai.

<sup>19</sup> Tuja niina eme anentus umijin aina nunú  
segamak antujuk yaigka uwemtikui.

<sup>20</sup> Tuke Pujuuk niina aneen aidau kuitamui;  
untsu aents pegkegchau aidau nak ijina utsawai.

<sup>21</sup> ¡Wika kantamkun Tuke Pujuun ememattatjai!

¡Ashí aents nugkanum batsamin aidauk

Apajuí daaji pegkegma nuna pachisag  
tuké ajumaish ememattin atinme!

**148**

*Apajuí najankamu aidautigmek nii ememattajum*

- <sup>1</sup> ¡Iina Apajuí emematiagmi!  
 ¡Nayaim aidautijum Tuke Pujuu ememattajum!  
 ¡Yakí agkajunum Apajuí ememattajum!  
<sup>2</sup> ¡Atum Apajuí aentsji ángel aidautijum  
 Apajuí ememattajum!  
 ¡Nayaimpinmaya suntag aidauwah,  
 Apajuí ememattajum!  
<sup>3</sup> ¡Etsa, nantu aidauwah,  
 Apajuí ememattajum!  
 ¡Yaya aidautigmesh Apajuí ememattajum!  
<sup>4</sup> ¡Yumi yakiya aidautigmesh  
 Apajuí ememattajum!  
 ¡Nayaim shiig múunta  
 dushakam Apajuín emematti!
- <sup>5</sup> Tuke Pujuu daaji ememattajum,  
 wagki nii chichakmatai,  
 ashí najaneakua nuadui.
- <sup>6</sup> Nii ashí umikui tuke asatnun;  
 dutika chichaman umikui atakesh yapajinashtinun.
- <sup>7</sup> ¡Nugkaya aidautigmesh,  
 tuja nayantsanum batsamin  
 kuntin múun aidautigmesh,  
 nayantsa initken batsamin aidaujái  
 Tuke Pujuu ememattajum!
- <sup>8</sup> ¡Chaaqip, bicha, nieve, yujagkim aidautigmesh,  
 tuja dase Apajuí dasenkati tima  
 ishamain dasentin aidautigmesh,
- <sup>9</sup> muja aidautigmesh, nain aidautigmesh,  
 tuja ashí setug aidautigmesh,  
 numi neje yujutai aidautigmesh  
 Apajuí ememattajum!
- <sup>10</sup> ¡Kuntin tagkumtai, kuntin tagkumchatai,  
 chigki aidau, kuntin japiinas yujau aidautigmesh,
- <sup>11</sup> tuja ashí nugka múun aidaun  
 apuji aidautigmesh, atumi aentsjum aidaujái,  
 apu ashí nugkanmaya aidautigmesh,
- <sup>12</sup> aishmag, nuwa,  
 datsa, múuntuch aidautigmesh,
- <sup>13</sup> ashí Tuke Pujuu daaji ememattajum,  
 wagki ima niina daajiya duke múuntak!  
 ¡Niina imanjiya duka nayaimpin  
 nugkajái nagkaesau múuntai!
- <sup>14</sup> ¡Apajuí niina aentsji aidaunak senchimitikawai!  
 Nuadui niina aentsji Israel wegantu aidautik  
 nii emematuinaji.  
 ¡Yajauwajah!  
 Apajuí ememattai ati.

**150**

*Ashí aentstijum Apajuí kantamjuatajum*

- <sup>1</sup> ¡Yajauwajah!  
 ¡Apajuí niina jee pegkegma nuwi ememattajum!  
 ¡Apajuí nayaim wigkaya nuna  
 niina senchijijái najanauwa nuwi ememattajum!  
<sup>2</sup> ¡Niina senchijin wainchatai aidaun iwainajua  
 duwi ememattajum!  
 ¡Niina imanjig nagkatkachua

duwi ememattajum!

<sup>3</sup> ¡Uwija kachuji aidau umpuakjum ememattajum,  
arpa, salterio aatsa awatkujum ememattajum!

<sup>4</sup> ¡Pandero aidau awatkujum  
nantsemkijum ememattajum!

¡Pigkui umpuakjum,  
guitarra awatkujum ememattajum!

<sup>5</sup> ¡Platillo awatkujum ememattajum!  
¡Platillo senchi shinin aina nunú

awatkujum ememattajum!

<sup>6</sup> ¡Ashí pujutji ajamu aidauk  
Tuke Pujuun ememattinme!

¡Yajauwajah!



**Pujutan wakannumiajai pachis jintiamu**  
**Proverbios**  
**Yama nagkamchaku agagbau**

(1.1-7)

*Chicham pegkeg yachametai jintinkagtamu*

<sup>1</sup> Juju ainawai apu Salomón, Davita uchiji, Israel aents aidaun apuji aajakua nunú tibau.

<sup>2</sup> Juna tiuwa nunak:

Niina aentsji Israel wegantu aidau yacha shiig anentaimkau atinme, nuninak dekas chicham pegkeg aina nuna dekau atinme.

<sup>3</sup> Nuninak jintiamu antuka jutan, wainak chichashtan, shiig takatan, imagnisa emetmamja pujutan,

<sup>4</sup> tuja datsauch imanis jintiag anentaimchau aidaun

jintintua waji aneaku emak, shiig anentaimsa eseja pujutan unuinagtatus agajui.

<sup>5</sup> Aents yacha shiig anentaimkauwa duka

juju jintiamua nunak shiig antawai,

nunik nuni kuashat unuimatan

shiig anentaimtajai juwawai.

<sup>6</sup> Wagki niig aents yacha

shiig anentaimkau aidau

tuja dita apachji augmattsamu,

etsegbaun, tuja adivinanza

jintiamu aidaun aatus

antuka unuimagtag tau asa.

<sup>7</sup> Yachameta duka Tuke Pujuu

eme anentsa umigbauwa nuwi nagkamnawai.

Tuja aents pegkegchau aidauk

unuimat pegkeg jintiamua nunak dakitawai.

*Datsa aidau chichagbau*

<sup>8</sup> Uchuchih,

amina apa chichame antugkata,

tuja amina duku jintinjabaush

kajimatki idaisaipa.

<sup>9</sup> Nii jintinjabaauwa duka

amina nugkutaijum pegkeg nugkuaju,

tuja atsejutai corona atsejaku

amainaitam nujai betekai.

<sup>10</sup> Uchuchih,

aents pegkegchau aidau

tsanupagtag tuinakuish antugkaipa.

<sup>11</sup> Tuja dita tujamijaintaih:

“Juwi taata nunikamin

jutijai ijunja tuke aneasa

ii wakegamu umiktasa

aents utugchatji atsugbau

nagkaebaukesh maami,

<sup>12</sup> dutikaku aents shiig anentaimkau

aina dushakam dutiksaik maami.

Dutikawaja nugka tai initak yutua ukukiagmi.

<sup>13</sup> Dutika waji aidau yajuaka

wiakchameawagmi.

¡Nuniaku iina jenig

waji kasamkamu aidau  
 yajuaka aimkagmi!  
<sup>14</sup> Nuadui taata nunikamin  
 kasamkattag nunú akandaika  
 yajuakmi”, tujamainakuish,  
<sup>15</sup> jamek uchuchi ditajaig wepa!  
 Tuja dita pegkegchaun  
 takaina duka amek tupanjata.  
<sup>16</sup> Wagki ditak pegkegchaun  
 takastatus waugtuinawai;  
 ¡Aentsun maatasashkam waugtuinawai!

<sup>17</sup> Pishak achiktasa,  
 pan wainmain apujtusmak,  
 pishakak nuna wainu asa  
 duka nagkaemamait sui.  
<sup>18</sup> Tujash nunú aents aidauk  
 dita jamainnak dekainayatak  
 pempeentumakiag umigmamainawai.  
<sup>19</sup> Nuadui aents magkagtin aina  
 duka wiakuch wetajai tukama,  
 dita pegkegchau takamtin  
 ¡ditashkam dutiksaik maam ainawai!

*Unuimat Apajuínmaya jukitajum tusa ipaamamu*

<sup>20</sup> Unuimatak antugtuktinme tusa  
 jinta aidaunum unsumainawai.  
<sup>21</sup> Unuimata duka yaakta waitijin,  
 tuja tuwig ima senchi aents aidaush  
 tuwawa nuwi aatus unsumainak:

<sup>22</sup> “Datsauch imanis jintiag  
 anentaimchau aidauwah,  
 atumesh ¿wajutiya dushikagtutash,  
 kajegkagtutash idaisattagme?  
 Tuja unuimat dakitajum dusha  
 ¿wajutiya idaisattagme?  
 ¿Wajutiya unuimagtatjume?  
<sup>23</sup> Wi tajim nunú antuktajum,  
 nuniakjumin wi atumnak  
 mina wakanjun amastatjime,  
 dutikakun mina anentaimtajun  
 dekamtikattajime.  
<sup>24</sup> Wi atumnak untsuajime,  
 tuja wi ipaajime kaunatajum tusan,  
 tujash atumek mina antugtutak dakitagme.  
<sup>25</sup> Nuniau asajum, mina chichamjuk  
 kajimatkijum idaisaugme,  
 tuja wi atumin jintinbau  
 antuka unuimatchakam dakitagme.  
<sup>26</sup> ¡Nuadui wishakam  
 atum waitiakjuminish,  
 tuja sapigmakjuminish  
 ayatak dushittajai!  
<sup>27</sup> Tuja sapigmamu, waitut,  
 wake besemag pujamu,  
 waugkamin anentaibau aatus,  
 dase wainchijai betek  
 iyaak nugká ayaunak  
 ashí tsaiyama imanik minitjamkui,  
<sup>28</sup> waitiakjum untsugkugminish,  
 wika aikchatnaitjime.

Egatkugmesh waitkashtinaitjume,  
untsugkugmesh ayam achattagme.

<sup>29</sup> Wagki atumek unuimat  
pegkeja duka dakitau asajum,  
Apajuí umigtashkam dakitagme.

<sup>30</sup> Nuniau asajum, mina chichameg  
antuka jutak dakitagme,  
tuja wi atumin nunikaigpajum  
tusan tajim dushakam dakitagme.

<sup>31</sup> ¡Nuadui atumek nunú umiakjum waittsattagme!  
¡Tuja atum wakegamu  
taka takakuajum pimpiktatjume!

<sup>32</sup> Aents shiig emetug  
anentaimkachu aina nunak  
nii dekachbaujiya duke pempeentuki maawai.  
Tuja aents pegkegchau aina nunak  
nii wakejus pegkegchaun taka duke  
pempeentuki maawai.

<sup>33</sup> Untsu mina chichamjun umigtau  
makichkish ishamkagtutsuk  
agkan shiig pujustinai.”

### 3

#### *Unuimat pachisa ujaniamu*

<sup>1</sup> Uchuchih, wi jintinkagtamua nunú kajimatkipa,  
tuja mina chichameg umiktin agagbauwa nunú  
amina anentaimin jukita.

<sup>2</sup> Nunú umiakum, kuashat tsawan iwaku shiig aneasam pujustinaitme.

<sup>3</sup> Tuja anenka duka, dekaskea nujai  
makichkish idaisatin aipa;  
duka nugkutajjai betek nugkuaju ata.

Amina anentaimtagmin  
kajimatmainchau aneaku ata.

<sup>4</sup> Nuniakum Apajuí wait anentam atatme,  
tuja aents aidaushkam wait anenjamjagtatui.

<sup>5</sup> Amina dekatjumin kajinmamsa anentaimtsuk,  
ima Tuke Pujuuwaig ashí  
kajinmamsam anentaimta.

<sup>6</sup> Ashí ame takattam duka  
Apajuí anentaimtusam takasta,  
nuniamin nii pujut pegkegnum etamtatui.

<sup>7</sup> Ame ima yacha jumamipa,  
duka nunitsuk Tuke Pujuu umigkata,  
nuniakum pegkegchau aina nunú tupanjata.

<sup>8</sup> Nuniakum jamamtuchu,  
wajiu pegkeg pujuttame.

<sup>9</sup> Amina tagkujum aidau, wajijum aidau  
akanka Tuke Pujuu suwakum emematta;  
dutikakum ajak ajakmamu aina  
nuwiyashkam yama nagkamchaku  
juukbau Tuke Pujuu susata.

<sup>10</sup> Dutikakum yutanmash,  
tuja umutnumash atsumkas pujuttame.

<sup>11</sup> Uchuchih,  
Tuke Pujuu esetamatatus  
suwimkan amaakuig dakitjaipa,  
tuja nii chichagtamkuish kajekaipa.

<sup>12</sup> Wagki Tuke Pujuk

makichik múun uchijin jintintak,  
 suwimkan suwama numamtuk,  
 nii aneamu aidaun  
 jintintak suwimkan suwawai.  
<sup>13</sup> Datsauch unuimaju,  
 shiig anentaimkauwa nunak  
 Apajui pegkegnun yumigkiawai.  
<sup>14</sup> ¡Nunú unuimata nunuwai oron nagkaesau,  
 plata nagkaesau pegkeja duka!  
<sup>15</sup> Unuimat shiig anentaimja  
 pujutan sukagta duka,  
 kaya shiig pegkejuch akik aina  
 nuna nagkaesauwai.  
 ¡Iman asa tikich waji pegkeg  
 wakejumain aina nujai gkish betekchawai!  
<sup>16</sup> Aents unuimaju, yacha duka  
 kuashat mijan pujustinai,  
 nunik wiakuch wajas eme anentam atinai.  
<sup>17</sup> Apajuín chichame umiamua  
 nunú ima pegkejai,  
 tuja nii jintinkagtamu  
 betek umiamua nunú  
 agkan pujutan sukagtawai.  
<sup>18</sup> Shiig anentaimja pujutan unuimaina  
 nunú pujutan juwinawai.  
 Shiig anentaimja pujutan juidauk,  
 numi pujuta sukagtinjai betek ainawai.  
 Tuja nunú unuimatan jukiaju aidauk  
 shiig aneasagtinai.

## 6

### *Daki aipa*

<sup>6</sup> Dakih, week wajuk takawa  
 nunú weme diisam unuimagta:  
<sup>7</sup> Weeka inauk atsawai,  
 tuja nunú dutikata tusa  
 tumainchakam atsawai,  
<sup>8</sup> nuniaig nii yuwatnujinak esattin  
 ajak juut jegamtaí, juuka ijumui.  
<sup>9</sup> ¡Dakih, yamai kanaschaum jamah!  
 ¿Wajupa asamea nantaktatme?  
<sup>10</sup> Ame kanú tepamin,  
 tuja kajim mantamkui pukuga eketmin,  
 tuja shiig kanagtasam  
 pagku pagkumasa tepamin,  
<sup>11</sup> waitut, kasajai betek pachiaichbau iyanjama  
 shiig ujuuna awajtamsattawai.

### *Apajuí dakitamua nunú*

<sup>16</sup> Awai seisa imajin, tuja nuigtu  
 makichik, nujai ijumjamak sieteya imani  
 Tuke Pujuu shiig dakita nunú:  
<sup>17</sup> Emebau aidaun, waitjin aidaun,  
 aents utugchatji atsujunak main aidaun,  
<sup>18</sup> aents anentaimtaji pegkegchau aidaun,  
 pegkegchau takatan wakejus wekaetaun,  
<sup>19</sup> tikichin tsanumjin,  
 tuja waitjin, chichama tsanumjug  
 niina yachijaig maanimitkau aidaun  
 aatus Apajuik dakitawai.

## 7

*Nuwa aishin pegkegchau takajin aidau ujaamu*

<sup>1</sup> | Uchuchih, mina chichameg umikta,  
mina chichameg umiktin agagbauwa nunú  
shiig aneaku ata!

<sup>2</sup> Mina chichameg umiktin  
agagbau aina nunú umikta;  
dutikakum amina jiim kuitamainaitam imatiksam kuitamkata,  
nuniakum iwaku pujuttame.

<sup>3</sup> Amina tsajam uwegmin jigka nenau ata,  
anentaimin kajimatmainchau, aneaku ata.

<sup>4</sup> Unuimata duka amina umaimijai betek emata,  
tuja yachameta nunú amina kumpajum emata.

<sup>5</sup> Tuja nuwa aishin pegkegchaun takamjin,  
pegkegchin chichagtamak,  
tsanuja pegkegchaun takamtiksai tusa,  
unuimata nunú ayamjupaktatui.

<sup>6</sup> Makichik tsawantai jeganum  
niimtai ujaimunum wi niimkun wajayajai.

<sup>7</sup> Nunika niimku wajai,  
uchi datsa imanik jintiag  
anentaimkachu aidau yujainamunum,  
nuwi makichik datsauch nuni nagkaemas  
shiig esegag anentaimkachun wainkabiajai.

<sup>8</sup> Nunú uchik jinta aintug juwaki,  
jinta tuniakbaunum jeganta  
nunú nuwa jeega nuni wemayi.

<sup>9</sup> Nuniaig etsa akaemayi,  
nuniak suwe wemayi.

<sup>10</sup> Nuniai nuwa akika dutiktai iwagmamin  
aina nujai betek, makichik nuwa iwagmamjau,  
pegkegchaun takamin asa  
nunú anentaiyai jiinkibi uchin igkugtatus.

<sup>11</sup> Nunú nuwak setakchau datsantainkachu,  
tuja emetnag jeen titu pujuchu,

<sup>12</sup> jinta ain wekayin, tuja plazanum,  
jinta tuniakunum aents nagkaebaun igkug,  
pegkegchau takamtiksatus wekayin.

<sup>13</sup> Nunin asa nunú uchi wetatman  
pagkuk saukua ajantsuk chichajak:

<sup>14</sup> “Wi mina apajuímtaiju  
emematkun kuntinun maamua  
nuna nejen ajamsatjame.

Wi dutikatjai tibaugnak yamai betek umikjai.

<sup>15</sup> Nuadui amina igkugtasan jiinkijai,  
amina wainkatasan shiig senchi  
egamjam nuna yamai igkugjame.

<sup>16</sup> Mina pegakjui,  
colcha egiptunmaya lino  
pegkeg najanamun ainkamjai,  
<sup>17</sup> dutikan kugkuin pegkeg mirra,  
áloe, canela aidauwai ukatkamjai.

<sup>18</sup> Wayata nunikamin ii wakegamu a aniakua tuke tsawampagmi.

<sup>19</sup> Mina aishjuk atsawai;  
tikich nugkanum wemayi.

<sup>20</sup> Kuichkin aimak juki wemayi,  
nuadui wamkek tashtatui,  
nantu antumai taattawai”, tau.

<sup>21</sup> Tusa pegkegchin ima

imatjakua wakemitkakmayi,  
<sup>22</sup> dutikam buey maatasa  
 juki ematiama numamtuk,  
 tuja kuntin maatasa dakamtikamunum  
 japa egkemkamtai,  
<sup>23</sup> flechayai anentai ijutim  
 jama numamtuk wajaktatus,  
 tuja pishak achiktasa  
 detua ukukbaunum awimpap  
 jakattaja tusa dekachu asa,  
 wemaina numamtuk nuwan pataetuk megkaekabi.

<sup>24</sup> Nunika megkaekatag tachakmek  
 uchuchih, mina chichameg antukam umikta.  
<sup>25</sup> Amek nunú nuwa duka  
 anentaimtusmek diisaipa.  
 Wagki nunú wekaetakum,  
 amina pujutjumin megkaekaim.  
<sup>26</sup> Nunú nuwa duka kuashat aentsun  
 pegkegchaun takamtikas emegkawai.  
 ¡Nii emegkagbau aidauk shiig kuashtai!  
<sup>27</sup> Tuja niina jeen wayamua duka  
 jaka megkaemaina nujai betekai.

## 8

### *Unuimatan chichame*

<sup>1</sup> Unuimata duka senchi untsumui;  
 yachameta nunú niina chichamen  
 antumtikagtawai.  
<sup>2</sup> Nain aidaunum,  
 jinta amatkau aidaunum,  
<sup>3</sup> tuja waiti aidaunum,  
 yaaktanum waitainum wajas untsamak:  
<sup>4</sup> “¡Ashí aents aidautigmin juna tajime!  
<sup>5</sup> Datsauch jintiag anentaimkachu aidautigmesh  
 shiig anentaimkau atajum;  
 tuja atum shiig anentaimkachu aidautigmek,  
 eseja anentaimat unuimagtajum.  
<sup>6</sup> Pegkeg unuimamainum  
 wi titatjim nunú shiig antuka jukitajum.  
<sup>7</sup> Wi titatag duka dekaske;  
 minak waitjutak shiig awajtuchui.  
<sup>8</sup> Mina chichamjuk ashí pegkejai;  
 wika jimag weninnuchuitjai.  
<sup>9</sup> Aents shiig anentaimkauwa  
 nunú diismak mina chichamjuk dakitmainchau  
 paan antumainai.  
<sup>10</sup> Plata jumain idaikujum,  
 dekas wi jintiamua nunú jukitajum,  
 tuja oro shiig pegkeg jumain idaikujum,  
 dekas unuimata nunú jukitajum.  
<sup>11</sup> Unuimata duka kaya pegkejuch aina  
 nuna nagkaesauwai.  
 Tuja waji pegkeg wakemain ainakush,  
 makichkish unuimatjaig betekchawai.  
<sup>12</sup> Witjai dekatnuk,  
 witjai chicham pegkejan sukagtinnuk,  
 tuja wi dutikatag takunuk  
 shiig anentaimsan dutikajai.  
<sup>13</sup> Tuke Pujuun umija duka  
 pegkegchau takat aina nunak kajejawai.

- Tuja ememamu,  
 tikich wagagkau anentaimat, pegkegchau takat,  
 waitjut aina nunak wika kajejajai.
- <sup>14</sup> Chichagkagtut, pegkegnum anentaimat,  
 yachamet, unuimat aina duka midau ainawai.  
 Tuja senchia dushakam midauwai.
- <sup>15</sup> Wi nunikti tibau asag apu wenawai,  
 nuninak chicham umiktin  
 dekas pegkeg aidaun najananawai.
- <sup>16</sup> Ashí apu nugkanum inamin aina duka,  
 wi nunikti tibau asag inamainawai.
- <sup>17</sup> Tuja mina anentuidaunak  
 wishakam dutiksanuk anejajai,  
 tuja mina egatuidaunashkam wantintajai.
- <sup>18</sup> Wiakchamet, eme anentam ata,  
 shiig pujut, waji wamak megkaejashtin  
 aina nunashkam wi suwajai.
- <sup>19</sup> Wi sukagtamua duka  
 oro pegkeja nuna nagkaesauwai,  
 tuja wi sukagtamua duka  
 plata akiken nagkaesauwai.
- <sup>20</sup> Wika tuke pegkejan takauwaitjai,
- <sup>21</sup> nuniau asan mina anentuidaunak,  
 kuashat wajigtin wiakuch emajai.
- <sup>22</sup> “Tuke Pujuu minak najatuawai.  
 Nii najankamu aina nunak  
 eke najantsuk miná najatuawai.
- <sup>23</sup> Tuja nugkanak eke  
 najantsuk miná najatuawai.
- <sup>24</sup> Mina najatuawa nuaduik  
 nayantsak atsujakui,  
 tuja yumi pukuni jiinaidaush,  
 namak aidaush atsujakui.
- <sup>25</sup> Tuke Pujuuk muja aidaun, nain aidaun  
 eke najantsuk miná najatuawai.
- <sup>26</sup> Tuja nugkanak ikam aidaunash,  
 nuigtu nugka yukukuntujai nugkan najankauwa  
 nunakesh najantsuk miná najatuawai.
- <sup>27</sup> Apajuí nayaimpin yumi  
 piyajunum eneknak najanaawa  
 nuaduik wika pujuyajai.
- <sup>28</sup> Tuja yakí agkajunum yujagmin najana umika,  
 nayantsan initken yumi pukuni jiinaidaun epetug,
- <sup>29</sup> nayantsanum yumi piyag betsakai tusa emetug idayak,  
 tuja nugka buchitmainchau  
 atinun umikua nuadui nagkamsan,
- <sup>30</sup> wika Apajuí takakui,  
 nijai takakun pujuyajai.  
 Wi ayajai niina shiig anemtikin,  
 tuja niina emtinig shiig aneasan  
 wasugkamkun pujuyajai.
- <sup>31</sup> Apajuí nugka najanamun  
 diisan shiig aneyajai,  
 tuja nii aentsun najanaawa nuna  
 diisan shiig aneamu ajuti.
- <sup>32</sup> “Nuadui uchig aidauwah,  
 wi tajim nunú antugtuktajum:  
 Wi tajim nunú umiakjume,  
 Apajuí yayaam atinaitjume.
- <sup>33</sup> Wi jintinjim nunú dakittsuk

shiig unuimagtajum,  
 nuniakjum shiig anentaimkau atajum.  
<sup>34</sup> Aents kashi kashinig mina jegajui taa  
 mina chichamjun antugtau shiig aneastinai,  
 wagki Apajuí yayamu asa.  
<sup>35</sup> Mina igkuntuk pujutan juwawai,  
 nunik Tuke Pujuu wait anentam awai.  
<sup>36</sup> Tuja mina pegkegchaun chichagtau  
 jaka megkaetanum pujawai.  
 ¡Tuja mina kajegtuina duka  
 jaka megkaetan aneenak núninawai!"

## 13

<sup>1</sup> Uchi shiig anentaimkauwa duka  
 niina apaji chichamen umignai,  
 untsu uchi anentainkachua duka  
 apaji chichamenak antugsui.  
<sup>2</sup> Maki makichik aentsuk nii pegkeg chichakbaujinian pegkejan juwawai,  
 untsu aents chichaman betek umichu aina duka  
 dita pegkegchajin suwimkan juwinawai.  
<sup>3</sup> Shiig anentaimag chichauk  
 niina pujutjin kuitamak nuniawai,  
 untsu wainak chichá wekaguk kuashat utugchatan igkuawai.  
<sup>4</sup> Aents dakia duka  
 nii wakegamujin jukitag takush juwatsui,  
 untsu aents takauwa nudauk  
 kuashat waji ajawai.  
<sup>5</sup> Aents pegkegchau takatan  
 tupanjauk waitjutnak dakitawai.  
 Untsu aents pegkegchaun takauk  
 eme anentsa diishtai,  
 datsan chichajam auwai.  
<sup>6</sup> Shiig anentaimsa pujamua nunú  
 aentsnak pegkeg emawai,  
 untsu aents pegkegchaun takau aina  
 nunak niina pegkegchajig bakuawai.  
<sup>7</sup> Awai aents makichikish wajigtuchuitak  
 wiakuch atajai tusa wakegau,  
 tuja antsag kuashat wajigtin aidaushkam  
 wajigtuchuapi tujuttinme tusa uumush ainawai.  
<sup>8</sup> Aents wiakcha duka achikmak,  
 mantuawainum tusa ishamkagtak  
 niina kuichkijin ashí akikmak uwemainai,  
 untsu ujunauchik achigkachagtimpash  
 tusa anentaimkug waitiatsui.  
<sup>9</sup> Aents pegkegchau takatan  
 tupanjauk aina duka tsaptin pegkeg winchamtinama iman ainawai,  
 untsu aents pegkegchauwa duka  
 jii kajinkaujai betekai.  
<sup>10</sup> Ememata duka ima maanitnak inimui;  
 untsu unuimata nunú  
 aents chichama antuk umin aina nuwi awai.  
<sup>11</sup> Yupichuch wiakchameamua duka  
 wamak amugak megkaewai;  
 tuja aents shiig takak,  
 diipas wiakchamea duka kuashat ikauwai.  
<sup>12</sup> Tuja ii wakegamu uminchakuig,  
 wake besemag dekapnawai.  
 Untsu ii atsumamu betek uminkuig,  
 shiig aneamu ajutkagtawai.



13 Aents chichaman umiachuk  
suwimkan jukitnai;  
untsu chichaman umiauk akiam atinai.

14 Aents shiig anentaimkau  
jintinkagtamua duka pujutan sukagtawai,  
nuadui jamainun uwemtikagtawai.

15 Shiig jintinkagtauks shiig anentam auwai,  
untsu shiig jintinkagtachuk  
pegkegchaunum jegantinai.

16 Aents yacha shiig anentaimkauwa duka  
shiig anentaimag takawai,  
untsu aents anentainkachua duka  
nii dekachbaujiya nuna iwaintumawai.

17 Aents chichaman betek etsegchauwa  
duka utugchatan apujui,  
untsu chichaman shiig  
betek etsegna nunú  
aentsnak shiig anemtikawai.

18 Aents chichagkatatama dakitauk,  
waittanum, datsannum pujutnai;  
untsu chichaman antuk umiauk,  
eme anentam atinai.

19 Ii wakegamu uminkuig shiig aneenui;  
tuja aents anentainkachu aina duka  
pegkegchau takat idaitanak atsanenatsui.

20 Aents yacha aidaujai tsaniauk,  
niishkam yacha atinai,  
untsu aents shiig anentainkachu aina nujai tsaniauk, pegkegchaunum jegatnai.

## 15

1 Pegkegnum aimawa nunú  
kajekbaunak imijiawai;  
untsu kajeka aimawa duka nuni senchi kajeamun inimui.

2 Aents yacha shiig anentaimkau aina  
nuna chichameg unuimatan sukagtawai,  
untsu aents anentainkachu aina  
nuna chichameg pegkegchau ainawai.

3 Tuke Pujuuk ashí yantannum pujawai,  
nuniau asa aents pegkeg aidaun pegkegchau aidaujai diyakui.  
4 Pegkeg chichamua nunú aentsnak pegkegnum yayawai.  
Untsu pegkegchau chichamua nunú aentsu pujutin emestawai.

5 Aents anentainkachua duka  
niina apaji jintinmash dakitawai,  
untsu yacha shiig anentaimkauwa duka niina apaji chichamen antujui.

6 Aents Apajuí umigna duka  
shiig kuashat wajigtinai,  
untsu aents pegkegchauwa nunak  
niina wajijiya duke utugchatan itajui.

7 Aents yacha shiig anentaimkauwa duka  
nii dekamujin tikich aentsnash  
pegkejan jintintui.  
Untsu aents anentainkachu aina duka  
pegkegchauwa nuna jintintui.

<sup>8</sup> Aents pegkegchau aidau  
Apajui anentag suwaji tusag,  
kuntinun maa apeena duka  
Tuke Pujunak shiig awagmatsui.  
Untsu aents pegkegchau takatan tupanjau aina  
nunú segamak Apajuik shiig antujui.

<sup>9</sup> Tuke Pujuk aents pegkegchau aina  
nuna pujutjinak dakitawai,  
untsu ya tudaun tupantug  
pegkejan takak pujawa nuna aneawai.

## 20

<sup>1</sup> Vino nampeamua nunú  
aentsun pegkegchau chichamtin emawai;  
uwaja nampetai aina duka utugchatan inimui;  
nuna uwag nampeauk shiig anentaimag chichatsui.

<sup>2</sup> Apu kajena duka  
león kajeak shinuwama imanai;  
tuja nuna apun ikajeauk nigki bakumawai.

<sup>3</sup> Aents pegkegchau takatan  
tupanjauk jiyanitnak dakitawai;  
untsu anentainkachua duka jiyanitan wekaetawai.

<sup>4</sup> Aents dakia duka aja takamain esat tepeau aig,  
takatsuk pujau asa,  
yumi tepeamtai nii yumainjig atsugtinai.

<sup>5</sup> Aentsu anentaimtajig  
nayantsa kunjajinia wainmaitsu numamtinai.  
Untsu aents yacha duka  
nuna takumpap tawa tusa shiig dekawai.

<sup>6</sup> Kuashat aents aidau,  
amina kumpauchijum atajai tuinawai;  
¿tujash dekas aents imanush igkumainashit?

<sup>7</sup> Aents pegkegchau takatan  
tupanjau aidaun uchiji aidauk,  
dita apaji pegkejan takajaku aina nujai betek  
pegkejan takainak,  
Apajui yayamu asag shiig aneasagtinai!

## 22

<sup>1</sup> Pegkegnum augmatam ata nunuwai  
wiakchameutan nagkaesau.

<sup>2</sup> Aents wiakuch akush ujunajaig betekai,  
wagki mai Tuke Pujuu najanamu asag.

<sup>3</sup> Aents yacha shiig anentaimkauwa duka  
pegkegchaun wainkug wamak idaiwai;  
untsu aents anentainkachua duka  
ayatak akuumtawai, nuniau asa,  
utugchatan igkug waitiawai.

<sup>4</sup> Apajui eme anentsa puyatjusa umigbauwa nunú  
sukagtawai pujutan, wiakchameutan,  
eme anentam atan.

<sup>5</sup> Aents pegkegchau aina nuna  
tsanumtaiji aidauk ishamain ainawai.  
Untsu aents niina pujutjin  
kuitama duka nunak tupantawai.

<sup>6</sup> Amina uchigmek piipichia duik shiig jintintuata,  
dutikamu asa múun wajasash kajimatkishtinai.

**23**

<sup>4</sup> Wiakuch atajai tusam  
anentaimkum waittsaipa,  
duka puyatjutsuk idaisata.

<sup>5</sup> Ame shiig anentaimsa diyakmek,  
wiakuch wetak wainkaya nunú dekaattame,  
wagki duka águila uchiji aidau  
nanapjuk nanaak shimak megkagama  
numamtuk megkaewai.

<sup>19</sup> Uchuchih, wi tajam nunú  
shiig antukam unuimagta,  
nuniakum shiig anentaimsam pegkeg takata duke takasta.

<sup>20</sup> Aents nampeku aidaujai  
ijunjamek wekaesaipa,  
tuja ushu aina nujaiskam kumpajinawaipa.

<sup>21</sup> Wagki nampen aidauk,  
ushu aidauk, ujuuna wenawai,  
tuja daki aidauk jáanch pegkegchau  
ampinkau mamuku aidau apajag nugkuinawai.

<sup>22</sup> Apa amina akimpawa  
nuna chichame antugkata;  
tuja amina duku múuntuch  
wajasmataish dakitjaipa.

<sup>23</sup> Dekaskea nunú, yachameta nunú,  
jintinjamamu aina nunú,  
unuimata nunú aatsam sumakta.  
¡Dutikamek duka sujukaipa!

<sup>24</sup> Uchi pegkeg, yacha,  
shiig anentaimkauwa nuna apajig  
shiig aneak ememas anentaimui.

<sup>25</sup> ¡Yajauwajah, uchi yacha shiig anentaimkau aidau mak!  
Nuadui uchita atumek atumi apa dukujai  
shiig anemtiksatajum.

<sup>26</sup> Uchuchih,  
wi tajam nunú shiig antukta,  
nuniakum wi jintintuawaitjam nunú kajimatkipa;

<sup>27</sup> wagki nuwa akika dutiktai aina duka  
waa múun suwe ishamainama imanai;  
tuja nuwa aishintin tikichjai  
tsanijinna dushakam waa tsejgkush,  
init akagama numamtinai.

<sup>28</sup> Nuadui kasajai betek  
kuashat aishmag aidau achiawai,  
dutika aents nuna yujajin aina  
nujai betek emawai.

<sup>29</sup> ¿Yaita waitiaush?  
¿Ya waitiakush ejetua?  
¿Yaita utugchatan apujus  
anentaimak waitu wekagush?  
¿Yaita nigki suwimkan sumamas waitiaush?  
¿Yaita bushapajun niim wekagush?

<sup>30</sup> Nunak vino uwaja,  
nampetan makichkish idaitsuk,  
tikich umutai aidau nashkam umú yujau aina nunú  
nunak núninawai.

<sup>31</sup> ¡Datsauchih, uwaja nampetai aidau  
kajiak niime pegkeg wega duka  
makichkish anentaimtusmek diisaipa!  
¡Nunú diyakmek wakejukam uwagtatme!

32 Tuja niimeg pegkejaitak,  
dapi esajatbau tsaagke najamama imanai.

33 Iman asamtai nunú umakmek,  
pegkegchau wainchatai aidau waintatme,  
tuja pegkegchau anentaimkum  
ima pegkegchauk chichattame.

34 Nuniakum lanchanum egkemjanus  
yaki jiiitkaunum ekemsan nayantsanum  
wegagtai dekaptatme.

35 Nuniakum: "Awatujagmae,  
tujash dekapjachmajai;  
asutuinaikuish dekapjachmajai;  
tujash nunak puyatjatsjai,  
juna sakapagnuk nantakin vino egakan,  
nuni kuashat uwagtatjai", titatme.

## 24

3 Jegak shiig anentaimsa jegamtayai,  
tuja shugkushkam  
shiig anentaimsa ajitayai.

4 Waji pegkejuch wakejumain aidau  
ijumaina numamtuk, unuimata nuna  
niina kanutaiji aidaunum ijumui.

5 Aents yacha nunuwai tikich aents  
senchigtina nuna nagkaesauk.

Unuimata nunuwai dekas  
senchigtin ata nuna nagkaesauk.

6 Wagki maaniatag takuik, shiig anentaimsa  
chicham umika maanitayai,  
tuja depetmaktatus wakegawk  
tikichi chichamenash shiig antuku amainai.

17 Amina shiwaajum waituinakuish,  
shiig aneakjum dushikjaigpajum,  
tuja utugchatji ajakuish dushikjaigpa.

18 Wagki duka Tuke Pujuunak shiig awagmatsui,  
nuniau asa amina kajegtamak suwimkan amamainai.

19 Aents pegkegchau aidau diisam kajekaipa,  
tuja niina wajiji aidau  
diigsamesh kajekaipa.

20 Wagki aents pegkegchauwa duka  
pegkeg pujtnakesh jukishtinai.  
¡Aents pegkegchau aina duka  
lampara ikagnakbaujai betek agtinai!

## 25

21 Amina shiwajumesh yapajakuig,  
yutai ajamsata;  
tuja kitamakuishkam umutai susata.

22 Nunú ame dutikamin,  
amina pegkegchau awajtamin asa  
nii tuma datsaagtatui,  
Nuadui Tuke Pujuu aminak  
pegkegnum akigmaktinai.

## 27

1 Kashin nuna imatikan takastatjai  
tusamek emtikamek tumamipa,  
wagki amek dekatsme  
kashinish wajukatamki duka.

2 Duka amek ek imatipa,  
idaisata nunak tikich aidau tujamtinme,

iik eme anenmamku  
imatbauk pegkegchawai.

<sup>3</sup> Kaya, kamatak aina duka  
senchi kijin ainawai,  
tujash nuna nagkaesau kijinai  
aents anentainkachu nii wakegamun  
umiktakama kajeamujiya nunú.

<sup>4</sup> Kajeamua duka pegkegchawai, tutitjan itawai,  
tujash nuna nagkaesau  
kakajus depetmainchauwa duka,  
tikich takakui diisa kajegkagtamua nunuwai.

<sup>5</sup> Aents amina anempa duka  
uuka chichá wekaetsuk,  
paan igkumpa tujamtatui.

<sup>6</sup> Shiwag kajegtamiatak tsanupak kumpamjama nunú kajittsa diitsuk,  
dekas iina kumpaji igkujatua tukagta nuwi  
kajintsa anentaimainai.

### 30

<sup>18</sup> Wi puyatjusa diyamug aidauk  
kampatum waji, tuja nuigtu makichik,  
nujai ijumjamak ipak usumta imajin ainawai.  
Tujash shiig ejeyin dekamainchau dekapeajai.

<sup>19</sup> Duka juju ainawai:

“Águila yakí wekaga nuna jintig dekamaitsui,  
tuja kaya aidaunmash dapi jintish  
wajuk awaki duka shiig dekamaitsui.  
Tuja lancha nayantsanum wekaga nuna jintishkam dekamaitsui;  
tuja wagkag aishmagkush imatikash  
nuwanash wakegawa dushakam dekamaitsui.  
Juju aina nuna shiig ejeyin  
dekamainchau dekapeajai.”

### 31

*Nuwa pegkeg  
eme anentsa diitai*

<sup>10</sup> Nuwa shiig anentaimkauk  
kakajus igkumaitsui,  
¡kaya pegkejuch akik aina  
nuna nagkaesauwai!

<sup>11</sup> Niina aishig shiig kajitus diyawai,  
tuja kuichkinash atsumchagtinai.

<sup>12</sup> Niina aishig, nuwe utugchatan apujtus  
waitkachbau asa,  
tuké shiig aneas pujawai.

<sup>13</sup> Lanan ujuchjai egaka sumak,  
nuna wakejus shiig aneas jáanchi apijug najanak pujawai.

<sup>14</sup> Lancha wajiin atushtanmayan ikaunmama numamtuk,  
nunú nuwa dita yuwatnujinak atushtanmayan ikaunmawai.

<sup>15</sup> Dutika eke tsawatsaig nantaki,  
yutain inajuk uchiji aidaun  
inake aidaujui ayujuk,  
inake aidaunak takatnum ishimui.

<sup>16</sup> Tuja nugka pegkejan diisa,  
nuna akikenak nii takasa jukimui  
betek akikmak sumawai.

Dutika nuwi uvan ajakmawai.

<sup>17</sup> Aatus kakaag senchi takau asa,  
shiig aneas kashikmas nagkama taka takakua etsa akapak ukuawai.

18 Wajiji kuashat kawegti tau asa nii kuitamui,  
tuja kashish takau asamtai, jii tuké keeka awai.

19 Tuja niina jáanchjinash  
nigki apaja nugkuawai.

20 Tuja ujudauch aidau  
atsumiagtaish, yayawai.

21 Tsetsek tepetaish,  
niina uchiji aidaunak puyatjatsui,  
wagki ditak jáanchin shiig nugkujag yujaidau asagmatai.

22 Colchajinash nigki najanui,  
tuja niig jáanch shiig pegkeg  
apagbau aidaun nugkuawai.

23 Tuja niina aishinashkam  
yaaktanmaya aidauk ashí wainainawai,  
wagki apu eme anentsa diitai aina nuwi niishkam  
pachitkau asamtai.

24 Nunú nuwak jáanch aidaun  
akachumtai aidaujai najanak,  
waji sujin aidaunum sujawai.

25 Eme anentsa diitai asa,  
nuna megkaekaig tusa kuitamamui.  
Tuja atakea duish wajukatnukitja  
tusagkesh puyatmamtsui.

26 Chichaakush shiig anentaimas chichawai,  
tuja niina uchijinash shiig anentus jintintui.

27 Niina jeen utugchat ai tusa aneaku pujawai,  
tuja nii takasa jukichbaujinianak yuwatsui.

28 Nuadui niina uchiji aidau  
niina aishijai emematus chichajuinak:

29 “¡Nuwa pegkeg aidauk kuashat ayawai,  
tujash ametme ashí tikich nuwa aina  
nuna nagkaesaumek!” tuinawai.

30 Nuwa shigmaji diisa wakejamua duka wainkayai,  
tuja shiig awajkagtamujia  
dushakam wainkayai,  
dekas nuwa Tuke Pujuun umigna  
nunuwai ememattsu diyam auwa duka.

31 ¡Niina takatji pegkeja nunú anentaimtusjum,  
ashí aents aidau emtin eme anentsajum  
pegkegnum chichagtajum!

## Juninai pujutak Eclesiastés

### 3

*Ashí waji nagkaema nunak maki makichik tsawanji ajuinawai*

<sup>1</sup> Juju nugkanum ashí waji aidau nagkaemaina duka tsawanji mamiktuamu ainawai:

<sup>2</sup> Tsawan jegawai akiinbau,  
tuja jamu, ajak ajakmamu,  
nunú ajakmamu nejekmatai juwaamu.

<sup>3</sup> Tsawan jegawai aents maamu,  
tuja aents jakui tsuwamu,  
yaakat tsayamu,  
tuja yaakat tsaikbau ataktu yaaktabau jegawai.

<sup>4</sup> Tuja buuttinush tsawan jegawai,  
tuja shiig aneaku dushiamush,  
jakamunum buutku wake besemag pujamush,  
tuja jiistamatnush tsawan jegawai.

<sup>5</sup> Tsawan jegawai kaya yajuaka utsamu,  
kaya utsagbau yajuaka ijubau;  
shiig anendaiku pagkuniamu,  
tuja kanaamu.

<sup>6</sup> Tsawan jegawai kuichik juwamu,  
tuja takatsuk wainka pujamu,  
ii takasa jukimu anetamu,  
tuja ii anettsamu utsamu.

<sup>7</sup> Tsawan jegawai jáanch ichiamu,  
nunú ichigbau apigbau,  
chichatsuk pujamu,  
tuja tsawan jegawai chichaamu.

<sup>8</sup> Tsawan jegawai aneeniamu,  
kajegdayamu, maaniamu,  
maanitsuk agkan shiig pujamu.

<sup>9</sup> Aents senchi takak waitia dusha ¿waji pegkegna juwawa?

<sup>10</sup> Tuja Apajuí aents aidaunak takainak batsamsatnume tusa, kuashat takatan susauwa nuna anentaimsan ejemaijai.

<sup>11</sup> Tuja Apajuí juju nugkan najanauwa duwi nagkamas, aentsnak shiig pegkejan najanauwai. Dutika unuimatan susauwai, atakea duish wajig nagkaemajagtinaita nuna dekatnume tusa. Tujash dutikamaitak, aents aidauk Apajuí yama nagkamchak najankauwa nunak shiig dekamainchau dekapenawai.

<sup>12</sup> Nuadui wika dekaikai dekas aentsuk eke iwaku puja duik, pegkejan takak shiig aneas pumumainai.

<sup>13</sup> Tuja ii yutai aidau yuwaku, umutai umag duka ii takasa jukimunmaya dutikaji, wagki Apajuí nunak amasu asamtai.

<sup>14</sup> Tuja nuigtushkam dekaikai ashí Apajuí najankamu aina duka tuke asatna nunak: Nii najankamua duka

nuwi ekekaik makichkish najanmaitsui,  
tuja emegkautkesh emegkaumaitsui.  
Nunak Apajuí dutikauwai,

wagki niina senchijin dekaatnume tau asa.

<sup>15</sup> Ashí yamai ayá duka yaunchuk aijakua nunuwai,  
tuja atakea duwi agtina dushakam  
yamai ayá nunuwai.

Tuja yaunchuk nagkaemajua nunak  
Apajuí ataktu nunikti tusa tima ataktu wantinui.

*Aents jakug nugka yukukuntu najaneawai.*

<sup>16</sup> Juju nugkanmak apu aidauwap shiig takasagtatua tusa eme anentamaitak,

ima pegkegchaunak takainak  
aentsun waitkaina nuna  
anentaimesan ejemaijai.

<sup>17</sup> Nuadui Apajúi aents aidaunak tsawan jegatna duwi pegkejan takasunash pegkegchaun takasujai mai apatuk dekajuatnai.

<sup>18</sup> Tuja nuigtushkam aentsu pujutjig kuntinu pujutijaig betekmamtina nuna Apajúi ditan dekamtikaun anentaimesan ejemaijai.

<sup>19</sup> Shiig anentaimesa diyamak, aents aidaush, tuja kuntin aidaush mayattaiji betek ajamu asag, tsawanji jakatin jegagmak betek jainawai. Wagki juju nugka juwi pujutak aajayai.

<sup>20</sup> Ashí iwaku aina duka betek jainawai.

Nunikag nugka yukukuntui najanamu asag,  
nunisag ataktu nugka yukukuntu wajasagtinai.

<sup>21</sup> ¿Ya tumainaita, aentsu wakanig yakí nayaimpinum weawai, nuniai untsu kuntinu wakani nugka initken akaewai tusash?

<sup>22</sup> Untsu jaka ajin inantamki, atakea duish wajig nagkaemakinta nuna iwaintugma-mainuk makichkish atsawai. Nuadui ii takasa juwamua duwi ii wakegamu takaku shiig aneasa pujumainun anentaimesan ejemaijai, wagki iik nuni takas pujusti tibau ainaji.

## 9

*Iwaku pujamu jaka megkaebaujai anentaimeusa diyamu*

<sup>7</sup> ;Wainka anentaimekum waitu pujutsuk, Apajúi amina takatjumin shiig anenjamsau asamtai, yutai yuwam, umutai vino uwajam shiig aneasam pujusta!

<sup>8</sup> Amek jáanch puju tuké nugkuta, nuniakum kugkuin buukmin tuké nijamta.

<sup>9</sup> Juju nugka juwi pujutak wainkaya nuna Apajúi amasua nuwi pujusam, amina nuwem aneetaigmea nujai kashi kashinig shiig anendaisam pujusta. Nunuwai ame kuashat takaku waitiam duwi pegkeg juwamua duka.

<sup>10</sup> Ashí ame takamain ajutjamkuig, duka ame dekapmamsam takasta; wagki ame jakam wetatam nuwig takamainuk, tuja dekatan jukitjai tusa waitmainchakam makichkish atsutnai.

<sup>11</sup> Tuja tupikamunum depetma duka ya ima senchi tupikawa nunú depetmatsui, tuja maaniamunum depetma dushakam nunú ima waju asagkesh nuniatsui; tuja yacha aina nuna yuainjig tuké ajuinatsui, wamak unuibau aina dusha wiakchak ainatsui. Tuja papiin unuimaju aina dusha shiig anenmak ainatsui; ditanushkam shiig pujamu shiig pujachbaush jegajuinawai.

<sup>12</sup> Tuja dekatsji wajutik ii jakatnush tsawantash jegagtamti duka, nuadui red nená ukukbaunum namak nemama numamtuk, tuja pishak achitai nená ukukbaunmashkam pishak nemama numamtuk pachichbau ii waittsatnunum jegaku waitiaji.

## 11

<sup>1</sup> Aents yapajau wainkumek, yutai susata yuwati.  
Nunú dutikau asam,  
makichik tsawantai ameshkam dutiksaik iikum atatme.

<sup>2</sup> Aminu ajutjama duka anetu pujutsuk ajamasta,  
wagki amek dekatsme  
waji utugchatak juju nugka  
juwish nagkaemakti duka.

<sup>3</sup> Yujagkim bukusea weakug yumi yutak nuniawai.  
Numi katugak nujinum, tuja nuniachkush  
tsumunmagkesh iyakug tuwi iyaje, nuwig tepestinai.

<sup>4</sup> Ajakmatasa wakegakmek dase dii pujuipa;  
tuja ajak ajakmamu juuktag takumek  
nayaim dii pujuipa.

<sup>5</sup> Dase dasenkash itug weawaki nunú dekatsum numamtuk, tuja uchish wajak najaneawaki dusha dekatsum numamtuk, Apajúi ashí najankauwa nunash wajak dutikaukita duka dekatsme.

<sup>6</sup> Kashikmasam ajakmata, tuja agkushkam ajakmata, wagki yama nagkamchaku ajaamua nunuwash ima shiig nejekat, atsa, ukuunum ajamua nunuwash ima shiig nejekat, aatsa nuniachkush mai betekash nejekat duka dekamainchau asamtai.



**12**

<sup>1</sup> Eke múuntuch wetsuk yamai datsauchitam duik  
Apajuí amina najapauwa nunú aneaku ata.  
Tuja tsawan waitiamu jegamtai,  
ame chichaakum:  
“Kuashat tsawan waitu pujutak shiig awajtatsui”,  
titinaitme.

<sup>2</sup> Eke etsa, nantu, yaya aidau  
etsanbaujin kajinainatsaig,  
amina najapauwa nunú adeagta.  
Tuja yumi yutug nagkankamunum  
yujagkim wajas awa duik adeagta.

<sup>3</sup> Tuja tsawan jegattawai  
apu pujusa inamtain kuitamin aidau  
ishamkagtuinak kujainamu.  
Tuja aents wajiu aidaush  
ishamkagtuinak tikishmasua waigkagtatui;  
tuja trigo dekeen aidaushkam ujumchik asag  
dekeetnak idaisagtatui.  
Tuja jeganum niimtai ujaimunum niimin aidaushkam  
wainmamainchau wajasagtatui.

<sup>4</sup> Nunú tsawan jegamtaig,  
waiti aidauk ashi epenjamu atatui.  
Tuja trigon dekeenak  
tatagmitkamushkam itatjagtinai.  
Nuninai untsu pishak shinuinamu senchi antuetinai.  
Untsu ame kantabaugmek  
shiig antumainchau initak kujakjatu antuetinai.

<sup>5</sup> Nunú tsawan jegakuig  
nainnum wamu ishamtinaitme.  
Tuja iyajaig tusamshakam ishamtinaitme.  
Tuja almendro yagkujamu nagkamnattawai,  
tuja amina iyashmek makichkish  
atsumchattame, ayatak manchi pakaemag  
nanapjug nanaak wegama numamtuk  
atasam duke dakattame.  
Nunú jegakuig amek ataktu wakitki  
tashtinnun wetinaitme,  
nunikamin aents aidau ame jakamin  
buutuinak agá tuwagtamkagtinai.

<sup>6</sup> Nuadui amina pujutjum  
plata najanamui anaa emetuamua  
numamtina nunú eke tsujintsaig,  
tuja ichinak oro najanamu tsaintsu duik,  
tuja nuigtushkam ichinak yumi shikitaiya  
nunú eke tsainak ajapnatsaig,  
yamaya juwik Apajuí amina najapauwa nunú  
kajimattsuk umíkgata.

<sup>7</sup> Nunú tsawan jegamtaig,  
amina iyashmek nugka yukukuntu wajastinai,  
wagki amek nugka yukukuntu juki najanamu asam.  
Untsu wakanik Apajuiyai wakitkittawai,  
wagki nii amasbau asa.

<sup>8</sup> Wi Apajuí chichamen etsegnun juna ataktu tajai:  
“¡Juju pujuta juwig iman pegkejak  
makichkish atsawai!  
¡Ashí wainak ainawai!”

## Isaías Jerusalén Judá wegantu aidaujui pachisa etsegkamu

(1—6)

*Judá wegantu aidauk pegkegchaun takau aidau*

<sup>1</sup> Judá wegantu aidaunash waji utugchatak ajitnush ayi nuna pachis Amosa uchijin Isaíasan Apajuí ujakui. Nunak Judá wegantu aidau apuji aidau Uzías, Jotam, Acáz, Ezequías aatus aajaku aina nunú tsawantin ujakui.

<sup>2</sup> Dutikam nuna Isaías etsejak:

Nayaim, nugka aidautigmesh

Tuke Pujuu tawa nunú antuktajum.

Apajuí chichaak:

“Wi Israel aents aidaunak mina uchig asagmatai,

kuitamkan tsakapakan idaisauwaitjai.

Dutikamaitak mina umigtutsuk wijai shiwagmagawaje.

<sup>3</sup> Tuja bakak, yaita niina kuitamnush

nunak shiig wainui;

tuja burro aidaushkam aents niyai entsamak

wekaena nunak shiig dekainawai,

untsu mina aentsug Israel aents aina duka

wi kuitamsam batsatiatak

mina shiwagmatuinawai.

<sup>4</sup> “iAents ayatak pegkegchaunak takau aidauk,

pegkegchau takat aina nuna

utuatmamkag batsamin ainawai!

iTuja pegkegchaun takajaku aina

nuna uchiji wegantu aidaushkam,

pegkegchaunak dekainayatak,

nuninun yujaju asag

Tuke Pujuu, pegkejam,

Israel aents aidau Apajuíjiya nuna

kajimatkiag idaisaje!

<sup>5</sup> Atumek dekas intimkiu atag tusajum wakegagme,

nunin asagmin shiig kuashat suwimkan amasjime.

Imatikamu asajum atumi iyashinig

pegkeg ayautkauk atsawai.

Tuja atumi buuken pujagbauk esamsui,

tuke imanisag ayawai.

iNuadui atumek kakakchau wajasugme!

<sup>6</sup> Dawemin nagkamas buukmijai

ashí atumi iyashig makichkish pegkeg ayautkauk atsawai;

tuja anú ibau atumi iyashin ayá nuna

ampia pempenjamag kuitamak

etsaentamainuk makichkish atsawai.

Tuja najaimagminish aceiteyai yakagtamjagkesh, imijtugmakchaje.

<sup>7</sup> Atumi nugkenak yaaktajum aidaujui

shiwag aidau tsaikagmatai,

agkan shiig pujumainchau wajase.

Tuja yaakat aidau apeamu keenawai.

Tuja atum ajakmamu aidaumayan

shiwag aidau juukag atumesh wainjuminig amuinawai.

Yaunchuk yaakat Sodoma tsaikam

atsau agkan juwakua numamtuk wajase”,

tujamui Apajuí.

<sup>8</sup> Untsu ima Jerusaléggak tsaikchamu juwake,

nuniku asa melón ajakbaunum nuna ejapeen

makichik aak aakmaka pachitsuk idaisamu aama

numamtuk wajas awai.

Nuniak nuigtushkam makichik yaakat  
shiwag tenteam aama numamtin wajas awai.

<sup>9</sup> Tuja Tuke Pujuu ashí senchigtina nunú  
jutii ainag nuwiyán ujumak uwemtikchakuig,  
iik sodomanmaya aents, gomorranmaya  
aents aidaujai ijinauwa numamtukes wajakagtai.

*Israel aents aidau Apajuín dekaskenum emematchagbau*

<sup>10</sup> Israel aents aidau apuji aidautigmek,  
sodomanmaya tuja gomorranmaya aents  
aidau apuji pegkegchau aajaku aina nunin wajasugme.  
Nuadui Tuke Pujuu chichamega nunú  
shiiig antuka jukitajum.

<sup>11</sup> Tuke Pujuu chichaak:

“¡Atum Apajuí anentag suwaji tusajum,  
kuntin aidau maajum mina emematjaku  
kuntin patai apetainum patagjum,  
nuna neje ashí apeajum nunak wika dakitajai!  
¡Ataktuk sujusaigpa!

Tuja toro aidau wiyaji, uwig aishmag aidau,  
chivo tsakat aidau numpen wainkunchakam  
tsumajai.

<sup>12</sup> Wika mina emematjitasajum minakjum,  
kuntin aidau ikaunmatajum tusanuk  
makichkish atumnak segatsjime.

Atumek mina dushiktakjum,  
mina jegag pegkegma nunú  
pegkegchau ematasajum kaunjume.

¡Juju jeja mina emematjaku ijuntaya juwig batsamtsuk,  
jiinja shiyaktajum!

<sup>13</sup> Ataktu awagkigmek anentag mina sujamu  
pegkegchau aina juninuk itagtuawaigpa.

Nunú apeamua nunak wika tsumain diyajai.

Tuja nantu yama takamunum Apajuí emematku jüstamtai,  
nuigtu tsawan ayamtain

jüstamtai ati tusa umikbauwa nunú  
jüstamami tusajum aents aidau ipajum ijumjume,  
tujash wika aents pegkegchaun takau aidau  
jüstamaina nunak shiiig dakitajai.

<sup>14</sup> Nantu yama takamunum jüstamjum nunak wika dakitajai;

¡Nunú jüstamjum nunak dakitmain diyajai,  
nuniakun katsuntu pujumainchau dekapeajai!

<sup>15</sup> Tuja atum mina aujtustasajum uwejum takuajum nunak  
wika makichkish diyatsjime;  
tuja antugtanakesh antugsujime.

Tuja atumek kuashat aents mainaitjum duwi,  
uwejum takuajum duka ayatak numpak ainawai.

<sup>16</sup> ¡Nijamaktajum!

¡Pegkegchaujum aidau diitan dakitajai!

¡Pegkegchau takatak idaisatajum!

<sup>17</sup> ¡Pegkeja nunú takat unuimagtajum,  
kakanmamsatajum pegkeg takatnum,  
nuniakjum aents waitkam batsata nunú yaigtajum,  
dutikakjum uchi bitaik aidauush,  
tuja waje aidauushkam ayamjuktajum!”

<sup>18</sup> Tuke Pujuu chichagtamak:

“Yamai juju pachisa atumjai chichasmi.

Tuja atumi tudajum numpa kapantua imanaitkuish,  
wi nunak esakatjan yujagkim pujua iman awajtustatjime;  
tuja jáanch numpa kapantui egkekbaui imanaitkuish,

wi nunak esakatjan lana pujuama iman awajtustatjime.

<sup>19</sup> Atum mina umigtakjume,  
atumi nugkem pegkeja nuwi ajakmajum yuwattagme.

<sup>20</sup> Untsu atum ayatak intimkugmek,  
duka maaniamunum ijina utsam atatjume”,  
tujamui Tuke Pujuu tusa, Isaías tiuwai.

*Apajuí Jerusalégnak iwajattawai*

<sup>21</sup> ¡Jerusalégnumia aents aidauk  
yaunchkek shiig anentaimkau, waitjuchu, pegkeg aajabi,  
tujash yamaik nuwa wainka akika dutiktajai betek,  
magkagtin wajasu ainawai!

<sup>22</sup> Atumek plata pegkejama iman ayugme,  
tujash yamaik utsagbaujai betek wajasugme.  
Yaunchkek vino pegkeja iman ayugme,  
tujash yamaik chujuin wajasugme.

<sup>23</sup> Atumi apuji aidauk aents intimkiu,  
pegkegchau aina nuna kumpaji ainawai.  
Kuichik akiam, tuja waji aidau suwam  
nuna juwinak,  
aents takamsachunak jujuwai takamsauk tuinawai.  
Tuja bitaik aidaunash, waje aidaunash waitkainawai,  
dutikainau asag makichkish yainatsui.

<sup>24</sup> Nuadui apu Tuke Pujuu ashí senchigtina nunú chichaak:

“¡Ditak mina shiwag ainawai,  
nuadui wi ditanak suwimkan susagtatjai!

<sup>25</sup> Dutikakun dita tudaujinak waji pegkegchau aidau  
apetia numamtuk apean utsankattajai,  
dutikan dita pegkegchau takamtaiji aina nunak esakatjattajai.

<sup>26</sup> Dutikan yaunchuk apu chichama epegkin aidau,  
chichagkagtin aidau shiig takau,  
waitjuchu aajabia nujai betek emaktatjai.

Dutika ai: ‘Jerusalégnumia aents aidauk,  
pegkejan takau aidau’, nuigtu:  
‘Ima Apajuínak umijin aidau’, tujamtin ainawai.

<sup>27</sup> Wika wait anenkagtin asan,  
nuigtush uwemtikagtin asan,  
Jerusalégnumia aents aidau mina umigtuinakuig,  
wainka waitkam yujakuish,  
wi ditanak ayamjuktinaitjai.

<sup>28</sup> Untsu aents pegkegchaun takau aina duka  
ashí jinawagtinaí,  
wagki mina umigtutan dakituidau asag.

<sup>29</sup> Tuja atum aidautijum anú yagkug aidau,  
tuja numi encina aidau ayá nunú shiig wakejusjum  
kuitamjum nuwi wainka apajuímtai aidau  
emematjum nunú diisjum datsagtinaitjume.

<sup>30</sup> Atum aidautigmek, numi encina duke kakekamtai,  
wentsamtug wajama numamtin,  
tuja yagkug yumi ukattsuk idaisamujai betek atinaitjume.

<sup>31</sup> Tuja atum ainajum anuiya senchigtina duka  
chijichi kagaju apeam megkagama  
numamtuk megkaejatnai.  
Niina tudauji aina nunuwai jii kegaujai beteka duka.  
Nuniau asa nunú chijichinak apea ajapeawai.  
Nuadui niina tudaujjai esatnai,  
tuja nuna ikagnamainuk makichkish atsutnai.”

**2**

*Ashí nugkanmaya aents aidauk agkan batsamsagtin ainawai*

<sup>1</sup> Apajuí Judá wegantu aidaun, Jerusalégjai pachis, Amosa uchijin Isaíasan ujakua duka jujuwai:

<sup>2</sup> Apajuí emematku ijuntai  
mujanum jegamkamu awa duka  
atakea duish eme anentsa diitai atinai.

Nuna diinak kuashat aents  
tikich nugkanmaya aidaun kauniagtinai.

<sup>3</sup> Kuashat aents aidaun kaunainak:

“¡Minitajum au muja Tuke Pujuu etegkamua awi wakagmi,  
tuja jega Apajuí emematku ijuntai  
jegamkamua awi wakagmi.

Awi Apajuí niina chichamen jintinjamamtai,

nunú antuka nii tabauwa duke umikagmi!” titinai.

Wagki nii chichame umiktin agagbauwa duka Siógnunia wantintinai.

Tuja niina chichameshkam

Jerusalégnunia jinki antuetinai.

<sup>4</sup> Tuja nugka múun aidaunmayanash

Apajuí dita pegkegchaujin diijus suwimkan susatnai.

Nuadui ashí nugka múun aidaunmayag

dita maanitaiji aidaunak ajak ajakmaku nugka pukutai,

arroz tsupitain najankatin ainawai.

Dutikawagmatai maaniamuk nagkankatnai,

tuja maaniatin jintiamushkam atsustinai.

<sup>5</sup> ¡Israel aents aidauwah,

Tuke Pujuun chichamega nunú antuka betek umikagmi!

## 5

### *Uva ajakbau pachisa kantamamu*

<sup>1</sup> Mina kumpaju daajin pachisan, nii uva ajakmamujiya nuna pachisan, kantamtain wi kantamatjai.

Mina kumpagdau nugka pegkeg  
shiig tsapaunum uva ajakbau ajuyi.

<sup>2</sup> Nuna nugkan pukuja, kaya aidaun utsantuk,

uva ajake shiig pegkeg aidaun ajakui.

Dutika peegkeg apaka,

nunú aja ejapeen kumpinan jiika,

vino najanatnunashkam umikui.

Dutika umika uva yumimitun tsamakti tusa

eke tsamachu asamtai, dakak pujau.

Tujash nunú uva aidaun chujuinun tsamakui.

<sup>3</sup> Jerusalégnunia aidauwah,

Judá aents aidauwah,

nunú nunika dusha ¿yanawaita utugchatash,

midaukait, atsa uva ajakbauwa nudaukait?

<sup>4</sup> ¿Uva chujuin ai tusan wi dutikmainush awak?

Wika yumimitun nejekti tusan wakekabiajai,

tujash ¿wagkag chujuinnash nejekiawa?

<sup>5</sup> Tuja midau uva ajakbauwa nunash,

wisha itugkatag tajaki nuna yamai ujaktajime.

Wika aunak ashí ijinatnume tusan

kuitamtsuk idaisattajai, tuja utsaantuawag,

najakag kupig ijinatnume tusan

peejamua nunashkam tegajattajai.

<sup>6</sup> Dutikan pachitsuk idaisattajai.

Tuja tuke nejen ati tusa,

kanawe pegkegchau aidaun tsupija utsanka

pegkeg ematia nunash dutikachagtatui.

Tuja dupanash takagsachagtatui,

dutikamu asa dupa jagki aidaujui tsapaka

akijuatnai.

Tuja nuna uchupig pegkeg ematnunash  
yuminak yutumtijashtatjai.

<sup>7</sup> Tuke Pujuu ashí senchigtin uvan wakejus ajakua duka

Israel aents Judá wegantujai aina nunuwai.

Tuke Pujuuk mina chichamjun umigtuktinme  
tusa wakekauwai,

tujash ditak magkagtin wajasu ainawai.

Tuke Pujuuk shiig pegkeg dekaskenum takau atinme

tusa wakekauwai,

tujash ditak ima pegkegchaunak takaidaun

Tuke Pujuu wainui.

## 6

*Apajuí Isaíasan chichaman etsegtugkati tusa etegkamu*

<sup>1</sup> Apu Ozías jakauwa nunú mijantin Apu Apajuí niina ekemsa inamtaiji shiig  
pegkegnum yakí eketun wainkabajai. Tuja jega Apajuí emematku ijuntai jegamkamua  
nuna initkenak nii jáanch nugkuagbauwa nunú dukuka amayi.

<sup>2</sup> Apajuí eketbaunum nuna yakin serafín aidau batsamayi. Maki makichik seis  
nanaptin agmayi. Jimag nanapega duwi yapin dukuaku agmayi, tikich jimaja duwi  
nawen dukuaku agmayi, tuja tikich jimaja duwi nanamiagmayi.

<sup>3</sup> Tuja dita chichainak:

“Tuke Pujuu ashí senchigtina duka shiig pegkegmai,

tuja niina imanjiya nunú ashí nugkan jajutua awai”, wajagmayi.

<sup>4</sup> Nunú Apajuín emematuinak imatuinamu, jega Apajuí emematku ijuntai waitiji  
aidaun senchi umuchmayi, nuniai nunú jeganum bukuituk yujagkim wajas asabi.

<sup>5</sup> Imaniakui chichaakun:

“¡Jajapi yamaik! Wagki wika pegkegchaun chichau wajasu,

tuja aents pegkegchaun chichau aina nujai ijunjan pujag,

nuniyatkunuap Tuke Pujuu ashí senchigtina nuna pan wainkaja”, tusan tibaijai.

<sup>6</sup> Tusan tai makichik serafín wi wajamunum nanaak tantabi. Nunik minák  
altarnumian jii kaiji kapaun juki itanmayi.

<sup>7</sup> Dutika duwi mina wenujun antinjuk chichagtak:

“Nijah, juju jii kaiji amina wenimin antinjamkae.

Juwi Apajuí amina tudaugminak esakatjamjae.

Nuadui amina tudaugmek tsagkugnaje”,

tujutmayi.

<sup>8</sup> Tujutmatai pujai Apajuí chichaak:

“¿Yanak awemainja?

¿Yaki iina chichamen etsegnush ati?”

taun antukbaijai. Tusa takui wi ayaakun:

“¡Mina awetita, wi amina chichamjumnak etsejin atajai!”

tiabaijai.

<sup>9</sup> Tusa tai nii chichagtak:

“Wetá nunikam juju aents aidau aatsam ujakta:

‘Chichaman antuinakush

nunap tawa tusag tichagtatui,

tuja pan wainainakush dekachagtatui.’

<sup>10</sup> Juju aents aina nuna dekatig pachimjukta,

dutikakum antukchamin, wainmakchamin emakta,

dutikamu asag wainmamainchau, antutnash antumainchau,

tuja anentaimsash nunap tawa

tusa dekamainchau wajastinme,

nuninak pujutjinish yapajinmainchau atinme.

Numidau asagmatai,

wishakam dita tudaujinak tsagkujashtatjai,

tawai tita”,

tujutmayi.

<sup>11</sup> Tusa tujutkui wi niina iniakun:

“Apuh, ¿tujash dusha wajupa tsawanta atata?”

tibaijai.

Tusa tai nii aijak:  
 “Yaakat aidaun tsainak  
 ashí aents aidaun ijinawajam agkan wajastina duwi,  
 tuja jega aidaunmash makichik aents pujaukesh atsutna duwi,  
 aja aidaunmash atsutna duwi,  
<sup>12</sup> tuja Tuke Pujuu aents aidaun dita nugkenian  
 jijia tikich nugkanum ishiakmatai,  
 dita nugkega nunú aents atsau  
 agkan juwaktina nunú tsawantin nagkankatnai.  
<sup>13</sup> Tuja cien aents aidaunmaya  
 diezkesk iwaku pujau akushkam ijina utsam agtatui.  
 Dutika ashí ijinawagmataish,  
 numi ajakam wajauti juwama numamtuk,  
 ujumchik Israel Apajuín umijin aidaun juwakagtinaí.  
 Nuwiya aidaun numi ajakbaitak,  
 wajauti ataktu jegama numamtuk wajakagtinaí”,  
 tujutmayi.

## Emanuel pachisa agagbau

### 7

(7—12)

*Isaías apu Acazan yama nagkamchak ujakbau*

<sup>1</sup> Jotama uchiji, Ozíasa tijaji Acaz Judá aents aidaun apuji wajas Jerusalén pujai, Siria nugkan apuji Resín, Remalíasa uchiji Pécah Israel aents aidaun apuji aajakua nujai jimagtukag Jerusaléggkan jetekajui, depetka iinu emami tusag. Tujash depetkachajui.

<sup>2</sup> Dutika jeteagtai, Apu Acaz pujusa inamtaijin niina aentsji aidaujui pujuttaman jegajuawag ujainak: “Sirianmaya aents aidaun Israel aents aidaujui jetepakagtatus ijunjaje”, tusa ujakajui. Nuna dekaa niina aentsji aidaujui ishamak kujainak, numi dase umpuam saatama imanidaun.

<sup>3</sup> Imaniagtai Tuke Pujuu Isaíasan chichajak: “Amina uchijum Sear-iasubjai weme apu Acaz igkugta. Duka Gihonnum yumi pukuni jiina nuwiya japiki aimkatin aepá juki yaki yumi aimentainum nain iwakbauwa nuwi ayaumas jáanch nijaku wetai jinta nagkaemakua nuwi igkugtatme.

<sup>4</sup> “Nunika chichagkum:

“ ‘Kuitamamkata, tujash ishamkaipa;  
 apu Resín, apu Pécahjaji shiig senchi kajenawai,  
 tujash ishamkaipa,  
 wagki ditak jii bukuituk wamak kajinama numamtin ainawai’, tita.

<sup>5</sup> Tuja sirianmaya aents aidaun, Efraín aents aidaun  
 Remalíasan uchiji aatus amina  
 mantamatatus chichaman umigtamkagmae.  
 Nunik chichainak:

<sup>6</sup> ‘Judá aents aina duka uwaaka depetka utua  
 Tabeelan uchijiya nunú apu adaitukmi’, tuinawai.

<sup>7</sup> Tujash Tuke Pujuu chichaak:  
 ‘¡Duka makichkish nunikchattawai!

<sup>8-9</sup> Wagki Sirian yaaktaji dekas  
 múunta duka Damaskui,  
 tuja Resínkai Damascon apuji;  
 tuja Efraín aents aina nuna yaaktaji  
 dekas múunta duka Samariayai,  
 tuja Remalíasan uchijiya nunuwai Samarian apuji.  
 Tujash Efraín aents aidaun ditash nugkentin aina nunak  
 sesenta y cinco mijan jegai, depetkag  
 nugke atankim nugkenchau juwakagtatui.  
 Tuja atumshakam minai kajintsa  
 anentaimkujum dekaskeapi tusajum,  
 mina umigtachkugmek ijina utsam atatjume’,  
 tawai Apajuí”, tiuwai Isaías.

<sup>10</sup> Tuja nuigtushkam Tuke Pujuu Acazan chichajak:

<sup>11</sup> “Ame dutikatnujum wainchatai aidau iwaintugkata tusam Tuke Pujuu amina Apajuujum segata, tuja ame waji wakegame nunú nayaimpinmayagkesh nuniachkumesh nugka initkeniagkesh segatta, tusa tujamui”, tau.

<sup>12</sup> Tusa tama Acaz ayaak:

“Atsa make, wika Tuke Pujuu nuna segaakun pegkegchaunum dekapitanak dakitajai”, tiuwai.

<sup>13</sup> Tutai Isaías chichaak:

“Davitan patayi aidautijum antuktajum.  
¿Aents atumin chichagtamu antugsuk intimjakjum  
waitkajum duke nuniskek,  
Apajuíyaske waitkastasajum wakegajum?

<sup>14</sup> Nunin asagmin atumnak

Apajuí nii dutikatnujin iwaintugmaktatui.  
Nunak: ¡Makichik nuwa muntsujut aentsu takashtai ejapjuktatui,  
nunik uchi aishmagkun uchigmaktatui,  
dutika uchigmakmatai, uchi daaji adaikattagme Emanuel!\*

<sup>15</sup> Nunú uchi muumpak ashí anentaimama nuniak  
baka muntsuji kantemtikamun dapa yumijiyai yutinai.

<sup>16</sup> Tujash nunú uchik eke jintiag anentaimtan juwatsaig,  
jimig nugka múun amina uwaktamaina nuna tsaikagtinai.

<sup>17</sup> “Tuja duwi pujus tikich tsawantin amina,  
nuigtu amina aentsjum aina nuna,  
ame wegantu aina nuna aatus  
Tuke Pujuu suwimak ishamainun awetugmattawai.  
Dutikamtaí yaunchuk Salomón apu pujusmatai,  
Israel aents aidau

Judá wegantu aidaujai kanakajua duwi nagkamsaish,  
makichkish imanuk wainkachbau shiig ishamain atinai.  
¡Duka asirianmaya apu niina suntaji aidaujai  
waitkagmasagtina nunuwai!

<sup>18</sup> Nunú tsawan jegatai, egiptunmaya suntag aidaun,  
kaapjai betek shiig kuashat,  
tuja nuigtu asirianmaya suntag aidaun dapa ishamain  
ijujatin aina imanun Tuke Pujuu ishitjamkatnai.

<sup>19</sup> Dutikam kaunak nugka ségaju aidaunum,  
uwejush aidaunum, kaya múun waa aidaunum,  
jagki tepaju aidaunum,  
tuja yumi baka umutai aina nuwi, aatus ashí piyaktinai.

<sup>20</sup> Nunú tsawantin namak Eufratesa amainia  
navaja ikamka itamaina numamtuk,  
Apajuí asirianmaya aents aidaun apujin  
niina suntaji aidaujai ikaunmatnai.  
Dutikam Israel aents aidau intashin,  
susujin, uje aidaunash ashí kesajug utsankagtinai.

<sup>21</sup> “Nunú tsawantinig makichkiuch bakan,  
jimigchik uwigjai apujus pujayatak,

<sup>22</sup> shiig kuashat nuna muntsujin  
ijuja juwau asa, nuna kantemtika yutinai.  
Tuja tikich aents maaniamunum uwemjau  
aidaushkam nunú baka muntsuji kantemtikamun,  
dapa yumijiyai atsumkas yutin ainawai.

<sup>23</sup> Tuja mil uva ajakbaun akike  
mil plata aajakua duka ayatak jagki tsapaka  
ikam wajas asatnai.

<sup>24</sup> Nunú nugkanmak ashí jagki tsapaka akijua  
ikam wajasu asamtai,  
ayatak kuntin maatasa wekaetai atatui.

<sup>25</sup> Tuja nain tepetpetu aidaunum

\* 7:14 “Emanuel” tawa nunak: “Apajuik jutiyai awai” taku tawai.



pegkeg takatai aajabia duka jagki wajastinai,  
 imanikmatai ishamainak makichkish duka wechagtinai.  
 Ayatak uwig aidau, baka aidau yutai wajastinai.”

## 8

### *Isaíasan uchiji akiinatin pachisa etsegkamu*

<sup>1-2</sup> Tuke Pujuu chichagtak: “Sacerdote Urías, Jeberequíasa uchiji Zacaríasjai untsukta. Dutikam dita wainbaunum makichik numi dakakbau wegkajam jukim nuwi shiig pan wainmain: ‘Maher-salal-hasbaz’\* tuu agagta” tujutiabi.

<sup>3</sup> Tujutmatai nuna agajan pujusan tikich tsawantin mina duwajui uchi aishmagkun akiauwaitjai. Dutika ai Tuke Pujuu chichagtak: “Uchi daajig Maher-salal-hasbaz adaikattame.

<sup>4</sup> Nunú uchik: ‘Apauch, awach’ tusagkesh eke chichatsaig, asirianmaya aidau yaakat Damasconak Samariajai mai tsaikagtinai. Dutikawag dita wajiji aidaunak ashí yajutkagtin ainawai”, tujutmayi.

<sup>5</sup> Nuna tujuti ataktu Tuke Pujuu chichagtak:

<sup>6</sup> “Wika yumi aimkamu Silóé tutai chichigmachua nujai betek kakagchauchitag duwi juju aents Judá wegantu aina duka Siria apuji Rezinkan Israel aents aidaun apuji Pécahjai ishamainak, dita ayamjupaktinme tuidau asag mina dakitjuinawai”, tiuwei.

<sup>7</sup> Nuadui ditanak Apajuí asirianmaya suntag aidaun ishitkattawai, dutikam namak Eufrates dujajak ashí utuja nugkan yumpuag eemak, nuwi ayaunak ashí utsauwama numamtuk ditanak utsagtatui.

<sup>8</sup> Imatikau asa Judá wegantu aidaunashkam waji nujagketkuish, ashí utuja suwega iman iwaktinai. Imatikak águilajai betek nanapen ayapatug ashí dukuk uwemainchau awajsatnai. Tujash jutiyai Apajuí pujawai.†

<sup>9</sup> Ashí aents nugka muunnum atushat batsamin aidautigmesh antuktajum, atum maaniami tusajum uminkugmesh wainkajum nuniktatjume; tuja maaniami tusajum maanitai aidau umiakjumesh ayatak sapigmaktatjume, nuniakjum ijinam atatjume.

<sup>10</sup> Atum waji dutikatag tajume duka umiktajum; tujash nunak Apajuí emegkattatui; tuja atum waji dutikatasajum wakegagme dushakam chicham umiktajum, dutikakjumesh makichkish umikchattagme, wagki Apajuí jutijai pujawai.‡

### *Tuke Pujuuwai ishamainuk*

<sup>11</sup> Minak Tuke Pujuu niina uwejen senchi achijuk emetjua chichagtak: “Tikich Judá aents aidau takaina nuninuk amek takasaipa”, tusa tujutmayi. Nuna tujuti nuigtushkam chichagtak:

<sup>12</sup> “Apajuín shiig umijin aina nunak pempeenkagtuki sujujatna nuninuk chichagmain ainatsui. Nuadui atum ishamkatnume tusa ishamainun chichaina duka makichkish ishamskaigpajum.

<sup>13</sup> Dekas Tuke Pujuu ashí senchigtina nunuwai, shiig pegkejam asantai, ishamaku ajantusa diimaina duka.

\* 8:1-2 “Maher-salal-hasbaz” tawa juka hebreo chichamnumak, “Amujatkatnuk tsawantak ashí jegae” taku tawai.

† 8:8 “Jutijai Apajuí pujawai” tawa duka hebreo chichamnumak “Emanuel” taku tawai. ‡ 8:10 Juka versículo 8num tawa nujai betekai.

<sup>14</sup> Atumin shiig pujatan sujamna duka Apajuíyai. Tujash Israel aents aidauk Judá wegantu aidaujai nuna dakitjaje. Nunidau asag Apajuí suwimak susam Jerusalégnunia aidauk kaya múun tukumaina numamtuk tukumkag iyaidaun nunú kaya tepegkam nantamainchau wajasag jiniagtinaí.

<sup>15</sup> Kuashat aents atum ainajum anuiya kayan tukumak iyajag jinuidau agtinaí. Tuja kuashat achija yajubaushkam agtinaí.”

*Isaías niina jintintaiji aidaun anemtikak ujakbau*

<sup>16</sup> Juju chicham Apajuínun wi etsejag nunú jintinkagtag nujai ashí agagjum shiig ijjajum uuka ukuktajum.

Dutikajum tikich tsawantin jintinkagtuatatjum.

<sup>17</sup> Tuke Pujuu Jacopan kajejuk uumjuku akuish,

wika ima niyaig kajintsan anentaimjai,

nuniakun ima niinak dakajai.

<sup>18</sup> Mina daagnak, mina uchig aidaun

Apajuí sujusbau aina nuna daaji aidaujai

Tuke Pujuu ashí senchigtin muja Siógnum pujuuwa nunú

Israel aents aidaun utugchatjin iwaintuktatus adaikamu ainaji.

<sup>19-20</sup> Tuja atumin chichagtamainak:

“Ashí aents aidauk dita apajuímtaiji aidaun

iniasag dekainawai.

Nuadui atumshakam aents jakau aina nuna wakani,

tuja anentaimsa dekaji tinu aina

nujai iniasjum dekaatajum,

atakea duish waji utugchatak nagkaetamkiajat”, tusag tujabiagtatui.

Tujash atumek nuninuk antugkaigpa,

duka shiig wainkayai.

Atumek dekas Apajuí iniasjum dekaatajum.

<sup>21</sup> Tuja yumain atsutai,

tikich nugkanum yujasag waituinak

kajekag dita apujin, dita apajuímtaiji aidaujai

pegkegchaun chichajiagtinaí,

nuninak ataktu yaki pagkaidiag niibiagtinaí.

<sup>22</sup> Untsu nugká niimkama, ayatak waitut, suwe,

buutut, wake besemag ayaun wainkagtinaí,

iman suwenum ditak pujusagtinaí.

## 9

<sup>1</sup> Tujash imanik waituinak wake besemag

batsabiagtina duka tuke achatnai.

*Agkan pujutan sukagtin akiina apu wajas inamjatin*

Tuja Sabulógka nugkeg Neftalí nugkejai mai Galileanum aents Apajuín nemagchau

aidau batsata nuna ijus awai. Nunú nugkak, namak Jordágka amain nagkamnas

nayantsanum jegaa nagkanui. Tuja yaunchuk nunú aidaun Apajuí suwimkan susa

ijinauwai. Tujash duwi batsamas ataktu Apajuí anenken wainkau ainawai.

Nunú nuniktinun Isaías pachis etsejak:

<sup>2</sup> “Aents aidau suwenum yujau agma nunú tsaaptinun wainkaje;

tuja suwenum batsatunashkam tsaaptin etsantug iyanjaje.

<sup>3</sup> Apuh, aents aidauk kuashat uyugkaume,

tuja shiig aneamushkam múun awajsaume.

Nuadui ajak juwamunum shiig aneen aina numamtuk,

amina emtimin shiig aneasagtin ainawai.

Tuja wiakuch wajiin akantuninak

shiig aneen aina numamtuk shiig aneasagtinaí.

<sup>4</sup> Wagki aents aidau inaku waitkatai wajasag

waitu batsamaya duka ame agkanmitkaume.

Dutikakum Madián wegantu aidau tsaikuitam dutiksamek

yamaishkam ijina utsagkam agkanmitkaume.

<sup>5</sup> Tuja suntag aidau maaniatatus shimuinak

botasjin wakugtin aajabia duka,

jáanchji numpamkamu aidaujui jinum apeam utsankatnaitme.  
<sup>6</sup> Wagki iinak makichik uchi akiintugmae,  
 Apajuí iinak makichik uchin amase.  
 Nunú uchía nunuwai apu ati tusa etegkamua duka.  
 Nuadui niina daaji aidauk:  
 ‘Shiig chichagkagtin’,  
 ‘Apajuí senchigtin’,  
 ‘Apajuí tuke Pujuu’,  
 ‘Agkan pujutan apuji’ tutai atinai.  
<sup>7</sup> Nunú uchik apu David inamaajakua nuwi pujus  
 ashí nugkanum inamjatnai.  
 Nuniau asamtai agkan pujuta duka tuke atinai.  
 Tuja nii inabaujig shiig emetjamu atinai,  
 nii inabajinig shiig takamu, ajantunisa niiniamu atinai.  
 Nunak Tuke Pujuu ashí senchigtina nunú  
 iina anempau asa dutikatnai.”

## 11

*David wegantunmaya apu wajas agkan pujutan sukagtustinai tibau*

<sup>1</sup> David wegantuk numijai betek ajaka ajuamu atalui,  
 tujash nuna wajautinia yamajam jeeka tsapaitnai.  
<sup>2</sup> Nunikmatai Tuke Pujuu Wakani niyai pujus  
 unuimatan, shiig anentaimtan, senchimetan,  
 tuja Apajuín shiig wainu asamtai,  
 puyatjus umigtan susatnai.  
<sup>3</sup> Nunú apuk aentsnak ayatak diisagkek  
 suwimkanak susashtinai,  
 tuja nuigtush ayatak chichaman antamuikik,  
 nuni ati tusag chichammak iwajachagtinai.  
<sup>4</sup> Aents kasagtai aidau,  
 ujudauch aidaujui waitkam batsata nuna ayamjuktinai,  
 dutikak untsu aents magkagtin,  
 pegkegchau aidaunak suwimkan susa ijinatnai.  
<sup>5</sup> Niiig pegkeg takatan  
 dekaskea nujai ayamjak maanitkatnai.  
<sup>6</sup> Tuja nunú tsawan jegamtaig,  
 lobo uwigjai ijunag pujuagtinai;  
 ikamyawa chivojai ijunag kanitnai,  
 untsu baka leónjai ijunag wekagas tsakagtinai,  
 tuja uchi aidau nuna yutaijin ayujuinak yajuak awekaidiagtinai.  
<sup>7</sup> Tuja baka nuwa, chayú nuwajai shiig kumpaji agtinai,  
 tuja uchiji aidaushkam nujai ijunag kajiitnai,  
 tuja leónshakam bueyejai ijunag chijichin yuwagtinai.  
<sup>8</sup> Tuja uchi piipich aidaushkam dapijai wasugkabiagtinai,  
 dapi pasugken pujaunash inua achiagtinai.  
<sup>9</sup> Nunú sawantinig Tuke Pujuu mujanum puja nuig  
 pegkegchau awajkagtumainuk makichkish atsutnai,  
 wagki yumi nayantsanum pima numamtuk,  
 Tuke Pujuu imanjinak ashí nugkanum dekawagtin ainawai.

**Israel aents aidau pachisa kuashat agagbau**

## 28

(28—35)

*Yaakat Samaria tsainkattawai tusa etsegkamu*

<sup>1</sup> ¡Chah, Samariayah,  
 amina nugkemek pegkeg  
 shiig tsapau wajasuitam duwi,  
 Efraín aents nampen aina duka aminí ememainawai!  
 Untsu atumi apujig yagkug pegkejuch aidau  
 kagaka megkagama numamtuk megkagainawai.

Samarianmak ima aents nampen aina duke piyak awai.

<sup>2</sup> Makichik aents senchigtin

Tuke Pujuu etegkamu pujawai,  
niina senchijig bicha kakegak ishamain wajama imanai,  
tuja dase senchi dasentak magkagtina iman,  
yumi senchi yutug, nujag pimak ijijatna imanai.

Iman asa samarianmaya aents  
aidaunak makichkia shitamuik ajuattawai.

<sup>3</sup> Dutikak Efraín wegantu nampen wajasu aidau,  
yaakat Samaria pegkeg asamtai,  
emema batsata nunak nii tsaika ajapatnai.

<sup>4</sup> Dutikamtai nunú nugka pegkegnum  
yagkug kagaku ayá duka,  
higo tsamajun aents ajantutsuk akaka yuwa  
amuwama numamtuk awajam agtatui.

<sup>5</sup> Untsu nunú tsawantin aents niina umijin aidau  
iwaku juwagtina nuna atsejutaiji, dekas pegkeg atina duka,  
Tuke Pujuu ashí senchigtina nunuwai.

<sup>6</sup> Tuja apu chichama epegkin aidaunashkam  
Apajuí shiig takau emaktinai,  
tuja suntag yaaktan kuitamin aidaunash wajiumitkaktinai.

*Jerusalégnak tsaikagtatui tusa etsegkamu*

<sup>7</sup> Tuja profeta aidaushkam sacerdote aidaujai,  
senchi vinon umuidau asag,  
nampejag winchainainak tukumak iyá yujawai;  
imanik nampedau asag,  
Apajuí chichamenak antukchamin batsatui.

<sup>8</sup> Nuadui dita mesajinig  
ayatak tsumain iyakbau ayawai,  
makichkish iyaka tsuwapachbauk atsawai.

<sup>9</sup> Tuja mina chichagtuinak:  
“iTaata nunikam aminash Apajuísh  
wajina iwaintugmake, nunú uchi piipich  
<sup>10</sup> papii augchau unuimagti  
tusa a, ba, cha, da, jintinmaina numamtuk  
jintinkagtuata!” tusa dushiktuinawai.

<sup>11</sup> Tuja atumek nampekjum  
pegkegchau chichá batsatu asajum,  
chicham antut dakitau asagmin,  
aents tikich chichaman chichaaku aidau  
amuktinme tusa Apajuí idaitamsattawai.

<sup>12</sup> Yaunchuk Apajuí chichagtamainak:  
“Juwig utugchatak atsawai, juwi ayamainaitjume,  
aents pimpikiuk ayamsati”, tusa tujabiuwai.  
Tujash atumek tusa tujamaig antugkachuitjume.

<sup>13</sup> Nuadui Tuke Pujuu atumnak  
uchi piipich papii augtan unuimagti tusa  
chichagmaina numamtuk chichagtamkattawai.  
Uchi piipich yama wekagama numamtin atatjume,  
nunin asajum tuntupmin iyagjum,  
najaimakjum nantakchamin dekapattjume.

<sup>14</sup> Atum datsantainchau aidau  
Jerusalégnum apu wajasum, inamak batsatu aidautijum  
Tuke Pujuu tujama nunú antuktajum.

<sup>15</sup> Atum chichaakjum:  
“Ii aidautik jinaw aidaujai chicham umikji”, tajume.  
Tuja atumek asirianmaya suntag aidau ishamakjum  
iwanchnum sujumankaugme, nii kuitamjamkati tusajum.  
Nuniku asajum, chichakjum:

“Iinak makichkish mantamainchau ainawai,  
wagki nunú iina shiwaaji aidaunak

tsanuja dushijattawai”, tajume.

<sup>16</sup> Nuadui Tuke Pujuu chichaak:

“Siógnum makichik kaya etegkamu shiig pegkeg akikan apusattajai, nunú atatuí dekas ima eme anentsa diitai.

Nunú kayanum ekeni jegamnaktatui.

Nunú kayanum kajinas anentaimaidauk shiig agkan batsamsagtinai.

<sup>17</sup> Nunú jegamku, tunin ai tusa

plomo nená diitia numamtin

atatuí shiig takamua nunú.

“Atumek egiptunmaya aidau ayamjupaktatui tajume, tujash ditanak asirianmaya suntag senchigtin aidau namak dujjak tajaka ajapama numamtuk ijinawagtinai.”

### 30

*Egiptunmaya aents aidaun emematin aidau pachisa etsegkamu*

<sup>1</sup> Tuke Pujuu chichaak:

“¡Chah, mina uchig intimkiu aina nunak,

wait anentuinajai, wijai chichatsuk,

wi inachmaitak dita wakegamun takasagtatus chichaman uminawai!

¡Nuninak aan kuashat tudaun utuatmamainawai!

<sup>2</sup> Tuja mina inintsuk Egipto nugka apuji

ayamjupakti tusag pisajuinawai.

<sup>3</sup> Tujash Egipto nugka apujig,

wi ayamjuktajime tiuwaitak,

ditanak ayamjukchattawai,

dutikam egiptunmaya aidaunum yunumka uwemjami tukama datsajagtatui.

<sup>4</sup> Israel aents aidauwah,

Soán nugkanum yaakat ayá imanui,

tuja yaakat Hanés tutaya imanuishkam

aents atumin chichamjupaktin aidau ishiaku akugmesh,

<sup>5</sup> nunú nugkanmaya aidauk atumnak tsanupajagtatui,

ditak makichkish yaimpakchagtatui,

ayatak utugchatan itagtamawagmatai,

waitiakjum datsagtajume”, tiuwai Apajuí.

<sup>6</sup> Tuja Isaías chichaak: “Juna Apajuí aatus tawai:

‘Israel aents aidauk egiptunmaya aents aidau

ayamjupaktinme tusag dita wajiji aidaun,

dita burrojin, camellojin aatus patag yajuakag,

Néguev nugka ishamain, león aidau,

dapi aidau, dragón nanamtin aidau

aatus ayamunum shimuinawai,

<sup>7</sup> tujash egiptunmaya aidauk

kakagmachu tikima wainkauch ainawai.

Nuadui dita daajinak:

“Kuntin múun shinakush wainak imatin”

tuu adaikauwaitjai’ tawai Apajuí”, tiuwai Isaías.

<sup>8</sup> Tusa inagnakmatai Apajuí Isaíasan chichajak:

“Wi timag nunú yamai numi pakama najanamunum agagta,

atakea duwish wi tibauwa nuna tuke adeagtin atinme”, tiuwai.

<sup>9</sup> Tusa tima Isaías chichaak:

“Israel aents aidauk intimkiu asag,

Tuke Pujuu chichame umiktin agagbauwa

nunú umitnak dakituinawai.

<sup>10</sup> Nunidau asag Apajuí chichamen etsejin

profeta aidaun chichajuinak:

‘Yamai nagkamsagmek atum kajanum wainkamu aidauk etseju yujaigpa.

Tuja chicham pegkeg dekaskea dushakam ujjatkaigpa;

duka idaikujum dekas nugkaya waji pegkeg aidau ayá  
nunú ujjatkatajum.

<sup>11</sup> Tuja jinta pegkegnum atum wegajum duka idaisatajum,  
nuniakjum ataktu awagkigmek,  
Israel aents aidaun Apajuji pegkegma nunú  
pachisjume ajkagtusaigpa', tuinawai.

<sup>12</sup> Nuadui Israelan Apajuji pegkegma nunú chichaak:  
'Atumek ujamash dakitagme,  
nuniakjum ayatak pegkegchau, magkagtut,  
waitjut aina nunú takatnum eme anenmamjume.

<sup>13</sup> Nuadui atumek atumi tudaugmin  
nugka peegmagbau pachiachbau yumpuna  
iyauwama numamtin ainagme.

<sup>14</sup> Tuja ichinak najanamu ashí tsainak ajapnamtai,  
jii kaijigkesh chimpia jumainchau,  
tuja yumikesh shikimainchau wegama numamtuk,  
Apajuí ditanak ashí tsaika emegkagtatui.'

<sup>15</sup> Nuadui Tuke Pujuu Israel aents aidaun Apajuji  
pegkegma nunú chichaak:  
'Ataktu mina umigtuktajum,  
nuniakjumin wi senchintikattajime.

Tuja dekas minai kajintsajum anentaimkugmek,  
wainkajum chichá batsamtsuk takamtak batsamsatajum,  
nuniakjum uwemjattagme', tujamui.  
Tujash atumek nunú dakitau asajum,

<sup>16</sup> chichaakjum:

'Atsa, dekas caballonum, ekemi pisajagmi', tajume.  
Kame takugmek pisagtajum.

Tuja nuigtushkam chichaakjum:

'Carronum egkemja pisagmi', tajume.

Kame takugmek nuniktajum,  
tujash atumin aintamaidau ima senchi tupikainau  
asag amaintamkagtatui.

<sup>17</sup> Nuadui makichik aents awanmaig,  
nuna ishamainak mil aents pisajagtatui.

Tuja cinco aents awanmakuig nunú ishamakjum,  
atumek ashí pisagtinaitjume.

Nunikagmin ujumchik juwakag,  
makichik numi mujanum ajiamu wajama numamtuk,  
tuja mujanum numi ajiamunum bandera jikbau  
makichik wajama numamtuk juwaktatjume.

*Apajuí Israel aents aidaun uwemtjatin*

<sup>18</sup> "Untsu atum tsagkugnagtin tsawan jegamtai, Tuke Pujuu atumin wait anenjamag  
atumi tudaugmin tsagkugtamtajattawai. Apajuik niina anenken iwaintugmaktatus  
wakegawai, wagki niig pegkegchaunak dakitin asa, ima pegkeja nunak takauwai.  
jNuadui Apajuíyai kajinas anentaimaidauk shiig aneasagtin ainawai!" tiuwai Isaias.

## 31

*Egiptunmaya suntag aidau ayamjupakagtatui tinu aidau pachisa ujakbau*

<sup>1</sup> Egipto nugkanmaya aidaun caballoji maanitai aidau kuashat,  
tuja carrojishkam imanisag asagmatai,

Israel aents aidau dita yaimpaktinme tusag  
shimutuina nunak wait anentuinajai,  
wagki Israel aents aidau ememattai

Tuke Pujuu pegkegma nunú yaimpakti tusag,  
niina segamainun idayinak wainak yujau asagmatai.

<sup>2</sup> Tujash Apajuik makichikish tsanushtayai,  
iman asa suwimkan sukagtinai,  
tuja nii dutikatjai tibaun yapajiag idaichauwai,  
betek uminai.

Apajuik aents pegkegchaun takau aidaun

yayaunak suwimkan susa ijinatnai.

<sup>3</sup> Egiptunmaya aidauk Apajuíchu ainawai,  
ditak aents ainawai;

tuja caballoji aidaushkam iyashtin ainawai, wakankesh ainatsui.

Tuke Pujuu ditanak suwimkan susattawai.

Nuadui Israel aents aidauk ya ditan ayamjawa  
nujai betek suwimkan jukiag jinawagtatui.

<sup>4</sup> Tuja Tuke Pujuu chichagtak tujutmae:

“León uwijan maamtai, uwijan kuitamin aidau tuwakag,  
senchi untsumkag leónkan uwakatajtakush  
uwakmainchau ainawai.

Numamtuk Tuke Pujuu ashí senchigtina nunú taattawai muja Siógnum  
niina aentsji aidaun ayamjuktatus.

<sup>5</sup> Tuja chigki nanaak wekagas

niina uchijin kuitamama numamtuk,

Tuke Pujuu ashí senchigtina nunú

Jerusalégnak kuitamak uwemtikattawai,

dutika ayamjuk agkanmitkattawai.”

<sup>6</sup> Nuadui Israel aents aidauwah,

atum tudau, chicham imtimkiu akugmesh,

ataktu Apajuí umigkatajum.

<sup>7</sup> Wagki atum aidautijum,

oro, plata aidaujai atum dakumka najanamu aidau

emematjum nunú idaisagminig,

<sup>8</sup> asirianmaya aents aidauk ijina utsam agtatui,

tujash nunak aents aidauk ijinashtatui,

ayatak maaniamun ishamainak pisajagtatui,

tuja datsauch maanitan yacha aidaush

wainka inaku waitkatai wajasagtatui.

<sup>9</sup> Tuja dita apujig nuna ishamak tupikaki jiinkittawai,

tuja suntaja apuji aidaushkam banderajinak ukuinak pisajagtatui.

Tuja junashkam Apajuí chichaak:

“Niina shiwaaji aidaun suwimak susatnujig

Jerusalégnum umikbau awai”, tawai.

## 32

*Makichik aents apu wajas pegkegnum inamjatin*

<sup>1</sup> Makichik aents apu atinai

pegkegnak inamjatin,

tuja nuna atuwe aidaushkam

shiig takasagtin ainawai.

<sup>2</sup> Aents aidauk shiwag jeteamash,

tuja utugchatnum jegainakush,

tuja pegkegchau takainak waitkainamash,

nunú apu aidau shiig takaidau asagmatai,

ditai yunumak ayamjumaktin ainawai.

<sup>3</sup> Nuadui Israel aents aidauk

wainmachu wainmamaina numamtuk

Apajuínak pan wainkagtinai.

Nuninak Apajuí chichamesh wajintua

nuna puyatjus antuktatus wakeyagtinai.

<sup>4</sup> Nuadui waugtutsuk emamkemas takasagtatui,

nuninak dekaskea nuna shiig antumainun chichagtatui.

<sup>5</sup> Aents pegkegchau, tsanumin aina duka

eme anentsa diyam achagtinai.

<sup>6</sup> Wagki aents pegkegchauwa duka

ima pegkegchaunak chichawai;

tuja niina anentainish ayatak pegkegchau takatnak anentaimui;

nuniak magkagtuta nuna wekaetawai,

tuja Apajuínash tsanumjuinak pegkegchaun

chichajuinawai;

nunidau asag aents nujantai waitiaunash,  
 tuja kitakai waitiaunashkam ajampenatsui.  
 7 Aents waitjin aina nuna ayamjumataijig ishamainai;  
 tuja pegkegchau takastinun niina anentain umiawai;  
 Nunin asag ujudauch aidau chichamjumak,  
 ayamjumamainchaunak tsanumjug,  
 apunum sujuk waitkainawai.

8 Untsu aents pegkeg aidauk tikichnash yaigtatus wakenai,  
 nuadui niina pegkegjinig shiig anentam atinai.

*Jerusalégnunia nuwa aidau chichagkamu*

9 Atum nuwa daki batsamtin  
 puyatmamchau aidautijum,  
 wi titatjim nunú antuktajum.

10 Atumek yamaik puyatmamtsugme,  
 tujash kuashat tsawan atsuk, yumain atsakui,  
 tuja uva juuka yumainkesh atsakui,  
 makichik mijan nuigtu ewaekajum waitiakjum kujaittagme.

11 Nuwa aidautijum puyatmamtsuk  
 shiig aneasa batsatutigmek puyatakjum kujaitajum;  
 tuja atum pachimakas pujautigmek sapigmakjum kujaitajum.  
 Nuniakjum jáanch pegkeg  
 nugkuagjum duka awika ukuakjum,  
 wake besemag pujaku nugkutai nugkugtajum.

12 Atumdaud trigo ajakbau, uva ajakbau aidaujai  
 shiig kuashat pegkeg ayá  
 duka imankek achattawai.  
 Nuadui wake besemag dekapeakjum  
 detsepem ijutajum.

13 Mina nugkag múunta nuwig jagki aidau  
 ashí tsapak akijuattawai,  
 tuja jega pegkejuch aidau yaaktanum ayá nuwi batsamsajum,  
 shiig anee batsatjum duka ashí tsaikam megkaejattawai.

14 Tuja apu pujusa inamtaijishkam ukukim  
 itajak juwaktatui;  
 yaakat muunchakam ukukim agkan juwaktatui.  
 Tuja kumpin jiikbau aidaushkam,  
 yaakat tentea peejamu aidaush, ashí ukukim agkan juwagtatui.  
 Nunikmatai ikamia burro aidau,  
 baka aidau nuwi batsamsagtinai.

15 Tujash Apajuí ashí waji aidaun  
 najankauwa nuna senchiji ataktu tajutjamattawai,  
 nuniak uwegshunak nugka pegkeg  
 ajak ajakmamain awajsattawai,  
 untsu nugka pegkeja duka yaunchuk aajakua  
 nuna nagkaesau shiig pegkeg wajastatui.

16 Nunikmatai juju nugka múunta juwig  
 ashí yantamnum pegkeja duke takamu atatui.

17 Tuja pegkeg takamua nunuwai atakesh maanitsuk agkan,  
 kajinmamsa pujutan sukagta duka.

18 Nuadui mina aentsug aidauk waitkascham  
 agkan dita jeen puyatkas shiig batsamsagtinai.

19 Bicha kakegak ikaman ijinau akuish,  
 tuja yaakat tsaikbau akuish,

20 jatumek yumi ayaunum ajakmajum,  
 nunú yuwakjum pujustinaitjume,  
 tuja burro aidaush, baka aidaush  
 chijichi ayaun yuwinak agkan batsatkui,  
 shiig aneasjum pujustinaitjume!



## 33

*Apajuíyai uwemtak awai*

- <sup>1</sup> Wait anentagme aminak,  
wagki amek tikich nugkanmaya aidau  
tsainaitkum tsaikchamuitme,  
nuigtush amek tikich nugkanmaya aidau  
tsanuwaitkum tsanugchamuitme.  
Nuadui amujatut idaisa pujamin,  
aminashkam tikich nugkanmaya aidau tsaipakagtinai,  
tuja tsanujatut idaisa pujamin,  
tikich nugkanmaya aidau tsanupajagtinai.
- <sup>2</sup> Tuke Pujuuwah,  
niimpap yaimpaktatua tusa  
aminig anentaimaidautik wait anenkagtugta.  
Nuniakum tuké kashikmasam yaijatta,  
tuja ishamainnum jegamunmash ame uwemtikagtugta.
- <sup>3</sup> Amina chichamjumin antukag ishamainak,  
tikich aents aidauk pisainawai,  
tuja yaakat muunnumia aidauk  
amina senchijum iwainamun wainainak,  
ishamkag pampagkag megkagainawai.
- <sup>4</sup> Nuniagtai dita shiwaaji aidau  
manchijai betek yumpuntuk utsantuawag,  
dita wajiji aidaunak ashí yajutuinaawai.
- <sup>5</sup> Tuke Pujuuwai dekas múuntak,  
niig nayaimpinum pujawai;  
Jerusalégnunia aidaunak pegkejan takainak,  
esegag pujustinme tiuwai.
- <sup>6</sup> Nuadui shiig pujustinme tusa tuké kuitamtinai.  
Unuimata duka dekata nujai uwemtan sukagtau asa,  
waji pegkeg aidaun nagkaesauwai.  
Tuke Pujuu pyatjusa umigbauwa nunuwai  
waji pegkeg akik aina nuna nagkaesau.
- <sup>7</sup> ;Suntag waji u aidau tikich yaimpaktinme tusag,  
jintá yujas untsumainawai,  
tuja agkan pujutan chichaman etsejin  
aidaushkam kajekag buutuinaawai!
- <sup>8</sup> Jinta aidauk bashiake,  
makichkish jintanmak yujainatsui,  
tuja jutijai chichaman umikajua nunash uminatsui;  
nuadui ajantunisa niniamush atsawai.
- <sup>9</sup> Israel aents aidaun nugkega duka ajak aidau tsapaachu asamtai,  
wake besemag wajas awai.  
Libano aidaush datsaamainak jajatuk jinawai;  
tuja nugka paka Sarón tutaya dushakam  
yaunchkek pegkeg ajak shiig tsapaya nunak  
yamai uwegshujai betek wajase.  
Tuja Basán nugka, muja Carmelo tutaya nujai  
nugka pegkeg numi dukentin ayau asa,  
pegkeg samekbau wajas ayá duka duke kakekamtai,  
wentsamtuk ijunui.
- <sup>10</sup> Nuadui Tuke Pujuu chichaak:  
“Wi yamai nantagkitjai;  
nuniakun ashí mina senchijun iwainaktajai.
- <sup>11</sup> Tuja atum chicham umiamua duka  
dupa kagakujai betek,  
nuigtush tsuwatjai betek ainawai.  
Nunin asamtai wi umpuamua nunú  
nunak jiijai betek ekemak ajapattajai.
- <sup>12</sup> Nuadui aents aidauk jagki tsupigbau akaam  
keegama numamtuk keeka yuku wajasagtatui.

<sup>13</sup> “Atushat pujautigmek,  
wi dutikauwaitag nunú dekatajum,  
tuja tikiju pujautigmeshkam, mina senchijua nunú dekaskeapi titajum.”

<sup>14</sup> Aents pegkegchau aidau Jerusalégnum  
batsata duka sapijin kujainawai,  
tuja aents Apajuín umigchau aina dushakam sapigmainawai.  
Nuninak: “¿Li ainag nuwiyash yaki jii kajinchau  
tuke kee auwa ibaanmash pujusainta?”

<sup>15</sup> Aents pegkejan takau, dekaskenum chichau,  
tuja tikichin atanki yajutuk wiakchameuchu,  
tuja akikam yaimchau,  
magkagtuata tusa tamash dakitin,  
nuigtush pegkegchaunak makichkish anentaimtuchu,

<sup>16</sup> nunú aentsuk waitkascham agkan pujustinai.  
Niina jeeg utumainchau kaya jegamkamu atinai.  
Tuja nii yuwatnujish uwagtinjish ashí ajitnai.

<sup>17</sup> Tuja ataktu wainkatnaitme  
apu niina imanjin etsantug tsaaptin wajas eketu.  
Niig atushat tikich nugka aidaunmash inamjatnai.  
<sup>18</sup> Ame yaunchuk sapigmayum nunú anentaimtusa chichaakum:  
“Apu kuichkiji atin akikmakbau aidaun dekapainak,  
akikmaktajum tusa

waitkagmayanum dusha ¿tuwi batsatua?

¿Tuwi batsatua ajak juukbau aidaun  
dekapau aajabia dusha?

Iina uchiji aidaun suntagmagatnume tusa  
achija yajutjamianum dusha ¿tuwi batsatua?” titinaitjume.

<sup>19</sup> Aents pegkegchau tikich chichaman antumainchaun  
pachimtakan chichaaku aidaujai ijunjajum  
pujajum duka yamaik nunikhchatagme.

<sup>20</sup> Jerusalégnum jega Apajuí emematku ijuntainum  
ijunja jüstamnuweg nunú anentaimtusam diista;  
Jerusaléggak aak shiig aakmagbau yumpumainchau  
numi ajigbaush kupimainchau, tuja  
daekai jigkakbaush tsujimainchawama iman atinai.

<sup>21</sup> Nuwi Tuke Pujuu niina imanjjijai iina wantintugmawai.  
Jerusalégnumak namak múun chichijam aidau ayawai.

Namak iman agtaish, shiwag aidauk  
dita lanchaji wiyanka wekaetai aina duikish,  
tuja lanchaji múun aina duikish kakajus utuachagtinai.

<sup>22</sup> Wagki Tuke Pujuuwai iina ayamjutpa duka,  
tuja ii umiktinnak nii chichaman sukagtawai.

Niyai iina apujig, iina uwemtijamin.  
<sup>23</sup> Nunú lanchanum numi ajiamu aidau  
jigkakbauwa duka daekak takatkae,  
nunuku asamtai jáanch detuamua duka  
pukugak iyaumain wajawai.

Nunitai wemainchau dekapenakui,  
lanchajin utsaantua wajiji aidau yajutkagtatji,  
dutikajin aents shutuu ai aidaumaske  
dita wajiji aidaunak yajuakagtatui.

<sup>24</sup> Tuja Judá wegantu aidaun tudaujinak  
Apajui tsagkujatnai,

nuadui makichik aentskesh:  
“Jajai”, tusa tauk atsutnai.

## 35

*Israel aents aidau Jerusalégnum waketjamu*

<sup>1</sup> Uwejush ajak ajakmmainchau  
buku wajas awa duka

nugka pegkeg wajastatui,  
 nunik ajak aidau tsapatái, uwegshuk aents  
 shiig aneemaina numamtuk shiig aneestatui.  
<sup>2</sup> Nunik ajak aidau kuashat tsapakmatai,  
 uwegshuk shiig aneas senchi kantamtatui.  
 Tuke Pujuuwa nunú uwegshunak,  
 Líbano nugka, Carmelo nugka,  
 Sarón nugka pegkeg aina iman awajsattawai.  
 Dutikamtaí ashí aents aidauk  
 iina Apajuji imanjiya nuna niina senchijijai wainkagtinaí.  
<sup>3</sup> Atum mina chichameg antautigmek,  
 Judá wegantu kakaakchau aina nunú ichichiagtajum,  
 dutikakjum pimpikiu aidaushkam yaigtajum.  
<sup>4</sup> Tuja sapig aidau chichagkujum:  
 “Íshamkagtutsuk, aishmag wajastajum!  
 ¡Amina Apajuji juwi pujawai uwemtijamjagtatus,  
 tuja iina shiwaaji aina nunak níi suwimkan susattawai!” titajum.  
<sup>5</sup> Dutikamtaí aents wainmachu aidau wainmakagtinaí,  
 tuja empeku aidaushkam chichaman antukagtinaí;  
<sup>6</sup> tuja aents shutuu aidaush  
 japajai betek tsekeniagtatui,  
 nuninaí chichachu aidaushkam chichainak shiig aneasag untsumiagtinaí.  
 Nuninaí uwegshunmashkam  
 shiig kuashat yumi pukuni jiiniagtinaí.  
<sup>7</sup> Imanidau asamtaí,  
 uwegshuk yumi wajas asattawai,  
 tuja nugka bukunmashkam kuashat yumi pukuni jiiniagtatui.  
 Tuja lobo batsamtaí aina nuwig  
 tagkan kajis aidaujai tsapaktatui.  
<sup>8</sup> Nuwi atinaí makichik jinta.  
 Nuna daajig: “Jinta pegkejam” tutai atinaí.  
 Aents pegkeechu aidauk  
 nunú jintanmak wechagtin ainawai;  
 tuja aents anentainkachu aidauk nunú jintanmak yujaschagtin ainawai.  
<sup>9</sup> Nuwig leónkak atsutnai,  
 tuja tikich kuntin yukagtin aidaukesh  
 nunak makichkish adjkachagtinai.  
 Tuja Tuke Pujuu uwemtikjamu aidauk nunú jinta nuni waketjagtinaí.  
<sup>10</sup> Tuke Pujuu uwemtikjamu aidauk shiig aneas kantamkiag  
 Jerusalén utsanawagtinaí.  
 Nunikag tuké shiig aneasag batsamsagtinaí.  
 Ditaig ima shiig aneamua duke atinaí.  
 Nuadui wake besemjak atsutnai,  
 tuja najaimamushkam atsutnai.

## 40

*Apajuí Jerusalégnunia aidau anentain ichichtau*

<sup>1</sup> Iina Apajuji chichaak:  
 “Shiwag aidau achipag dita nugken yajupakagmatai batsamsagmesh,  
 ¡mina aentsug aina nuna anentain ichichtugtin atajum!  
<sup>2</sup> Jerusalégnunia aents aidauk shiig anentsajum ausatajum,  
 tuja achija yajuakam yujasag waituina nunú  
 ayamsagtinuk tsawantak jegae”, titajum.  
 Dita tudaujig tsagkugnaje.  
 Dita pegkegchau takasbaujin nagkaesau  
 Tuke Pujuu suwimken jukiag waituinak umikaje.

<sup>3</sup> Makichik aents uwegshunum untsamak:  
 “¡Tuke Pujuu wekaesatin jinta uwegshunum  
 shiig iwaja jintamajum, tunin aidau  
 dakuegjum umiktajum!

<sup>4</sup> Nugka ségaju aina duka  
yutuka aimjajum paka awajsatajum,  
tuja muja tsakakunum  
nuna wakeen entsa ayá dushakam  
yutukjum makichkish wagaku atsau paka awajsatajum.

<sup>5</sup> Dutika umikagmin  
Tuke Pujuu niina imanjin iwainaktinai,  
nuna ashí aents aidau ijunag wainkagtinai,  
tawai Tuke Pujuu”, tusa Isaías tiuwai.

<sup>6</sup> Nuna tusa nuigtushkam Isaías chichaak:  
“Makichik aents chichagtak:  
‘¡Untsumkata!’ tujutkui, wi ayaakun:  
‘¿Wajintu unsumkattaja?’ tai, nii chichagtak:  
‘Ashí aents aidauk dupajai betek,  
tuja yagkug ikamia niime wainak  
pegkegchiama nunin ainawai.

<sup>7</sup> Tuja Tuke Pujuu dase awemamu dasentak  
tukua tukuam dupa kagaka ijuname,  
tuja yagkugshakam kagaka kakegame.  
Numamtuk aentsuk dupajai betek ainawai.

<sup>8</sup> Dupag kagaka jininai,  
tuja yagkugshakam kagaka kakenai.  
Tujash Apajuí chichameg makichkish  
megkaekashtinun tuke auwai’.

<sup>9</sup> “Jerusalégnunia aidauwah,  
muja titijin wakatajum,  
nunikjum nuwi ijuntsajum senchi unsumkatajum,  
aents ashí nugkanmaya aidau antuktinme.

Jerusalégnunia aidauwah,  
chicham etsegtak ishamkagtutsuk  
senchi unsumkajum etsegkatajum,  
ashí Judá nugkanmaya yaakta aidau  
yamajam chichaman antuktinme.  
Senchi unsumkajum:

‘Iina Apajuíyia duka jujuwai’, tusa titajum.

<sup>10</sup> Apu Tuke Pujuu niina senchijijai minawai,  
nuniak nii ima senchigtin asa, ashí depetmak minawai.  
Nunik minak niina aentsji aidau waitkam batsatun yajuak inimui.

<sup>11</sup> Uwija kuitamnújai betek  
niina aentsji aidau kuitamak inimui.  
Uwig tsakat aidau nak pagkuk juki inimak,  
yama petsakbau aidau nak shiig puyatjus juki minawai.”

*Israel aents aidau Apajuíjin nagkaesauk tikichik makichkish atsawai*

<sup>12</sup> “Apajuí nuyantsanak makichik uwejenig  
achika dekapamainai.

Tuja nayaimpinashkam tsajam uwejinig  
ashí achika dekapamainai.  
Nugkash wajupa kijinkita nuna shiig dekauk Apajuíyai.  
Apajuí dekawai muja aidau  
wajupa kijinuk ainawa nunak.

<sup>13</sup> Tuke Pujuu chichagnuk makichkish atsawai.  
Apajuín jintinmainuk shiig atsawai.

<sup>14</sup> Apajuín jintintua unuinajuk makichkish atsawai.  
Tuja pegkeg takat aina nuna takasti tusa Apajuín jintintushkam atsawai.  
Niig ashí yachai.

Ashí waji ayá dusha wajak najaneakukita  
nuna pachis Apajuín jintinmainuk atsawai.  
Niig ashí dekawai, wagki nii najankau asa.  
Apajuí yacha ati tusa jintintua unuinajuk atsawai.

15 Nugka múun aina duka nii diismak  
makichik yumi dakitamua nujai betek,  
nugka yukukuntunmaya  
makichik nenentuch piipich juki,  
balanzanum dekapam kijinji atsumaina numamtinai.  
Nugka múun aidau nayantsan ijus ayá dushakam  
makichik kayam piipichia nunin ainawai.

16 Ikam múun Líbano tutaya nuwiya kuntin  
ashí yajuaka Apajuí emematku apeatin ijumjamash,  
Apajuí diismak piipichi, tuja kuntin maa apeatin  
nunú ikamnumia numi ashí yajuaka ijumjamash  
Apajuí diismak piipichi.

17 Ashí aents maki makichik chichamtin  
nugka muunnum batsamin aina dushakam  
Apajuí emtinig shiig wainkauch ainawai.  
Nii diismak atsaujai betek ainawai.

18 Atumek Apajuík makichkish tikichjai  
apatkagmek diimaitugme.  
Dakumka najanamu aina dukesh  
Apajuíjai betek amainuk makichkish atsawai.

19 Aents dakumak najanna nunú dakumak najanui,  
dutikamtai tikich aents patakumtai aidaun najanin  
orojai ukatuk umiawai,  
dutika cadenan platayai najatui.

20 Tuja ujunauch aidaunu aents dakumak najanna duka  
numi katsujam wamak mamumainchaun diisa najanui.  
Dutika nunú iyaag tsainkai tusa  
tikich aentsun ame juju chichiag asatin  
najatuata tusa inawai.

21 “¿Atumek duka dekachuk ayujum?  
¿Nuna pachisag chichaidauk antuchuk ainajum?  
¿Yama nagkamchakush ujakaku ainatsuak?  
Apajuí nugkan najanauwa duwi nagkamas  
aents aidauk dekau amain ainawai.

22 Apajuí pujusa inamtaijiya duka nayaimpi yakin awai.  
Nuwi pujus aents aidaunak manchia nuninush diyawai.  
Tuja nayaimpinak Apajuí carpajai betek ejaa,  
nuna nugkaan aents aidau batsamsatnume tiuwai.

23 Apajuík aents senchigtin aidaunak  
tikima wainkauch emawai,  
tuja nugkaya apu aidaunashkam ijina emegkawai.

24 Nuadui ditak ajak yama ajakmamu  
kagkape yama achimag wegama nujai betek ainawai.  
Tuja Apajuí dasen dasenmitkataik pimpika jinawai,  
tuja dase ishamain iyakug  
chijichi tsupigbau kagakujai betek umpui utsawai.

25 Tuja Apajuí pegkegma nunú chichaak:  
‘Atumek minak makichkish tikichjai  
apatukjumek diigmaitugme.  
Wijai betekak makichkish tikichik atsawai’, tawai.

26 Yaki pagkaijum diistajum:  
¿Juju ayá nunash ya najanauwaita?  
Yaya aidaun, nantu, etsa,  
nuigtu tikich aidau ayá nuna najanak,  
maki makichik akanag pekasua nunú  
nigki nuna daaji aidaunash adaitug umikui.  
Niig senchigtina ibau asa,  
makichkikesh najantsuk ampia ukukbaujig atsawai.

27 Jacopa uchiji Israel aents aidauwah,  
¿wagka atumesh wainkagmesh chichagme?  
¿Wagka wainkagmesh:

Tuke Pujúuk wi waitiag nunak dekatsui;  
tuja Apajuuk minak pachittsui, tajume?  
28 Apajuí Tuke Pujúu,  
ashí nugkan, nayaimpijai najanauwa duka  
makichkish yawechu, nuigtush pimpichu,  
dekatish amuechauwa duka ¿amek dekatsmek,  
atsa nuniachkumesh amek antuchukum?

29 Apajuíyai aents pimpikiunash senchímtika  
wajiu emauwa duka,

tuja aents kakakchaunash senchijin ikauntinai.

30 Datsauch aidaush pimpikiag kakaumainchau dekapenawai,  
tuja aents senchigtin aidaush nugka tukumak iyainawai.

31 Tujash ima Tuke Pujúuwaig kajinas anentaimaina duka  
yamajam senchin jukiagtin ainawai.

Águilajai betek nanaakagtin ainawai,  
wekaekush yawegchagtin ainawai,  
makichkish yaweakchau shiig tupikaidiagtinai.”

## 41

*Israel aents aidaunak wi agkanmitkatnaitjai tusa Apajuí tibau*

1 Apajuí chichaak:

“Yaakat múun nayantsanum ijus ayá nuwi  
batsamin aidautigum takamtak pujusjum antugtuktajum.

Tuja nugka muunnum batsamin aidautigmesh  
ishamkagtutsuk kaunatajum.

Nunikagmin atumesh shiijash batsatjum nunú ijunja dekaami.

Nunika atumesh wajukatagmeki  
nunú chicham umikmi.

2 Etsa minitaiya nuwiya apu

tuke depetma nunash ¿ya dutiknaita?

Anú apu tikich nugkanmaya aidaun depetuk  
ijinatnume tusan umiaunuk witjai.

Nuadui nunú apu suntaji aidau, puyagjai,  
nagkijai aatus shaa dekeaja tsaitiama numamtuk  
tsaikag ijinatnume,

dutikawag chijichi kagakun dase umpui dapampaak  
utsauwama numamtuk emegkagtinme tusan idaijai.

Dutikakun dita apuji aidaushkam suntaji amutam  
sapijin ditai yunumjatnume tusan idaijai.

3 Shiwaajin pataetakush ishama in atsaunum,  
agkan shiig wamak nanaakas shimatai tumain  
shimitnume tusash ¿ya dutiknaita?

4 Witjai nuna dutikaunuk.

Yama nagkamchakun nugkan nayaimpijai  
najanawaitag duwi nagkamsan,  
yaunchuk waji nagkaemajua nunak,  
tuja yamai nagkaema nunashkam,  
wi dutiknaitjai.

Witjai Tuke Pujúu dekas Apajuínuk.

5 Wí dutikamunak yaakat nayantsanum  
ijus batsamin aidauk wainin ainawai.

Nuna wainainak senchi sapigmainawai.  
Nugkashkam ashí yantamnum uujuí.

Aents tikich nugkanmaya aidau ijunjagtatus  
ashí kaunawag mininawai.

6 “Maki makichik aents dakumak najanin aidauk  
niina kumpajinak ima niinakek idaitsui,  
yayawai dutikak anentain ichichtawai.

7 Dakumak najanin aina duka patakumtain,  
nugkutain orojai najanin aina nuna chichajuinak:

'Pegkeg najanme, idaitsuk takasta', tuinawai.  
 Tuja martillowai takau aidauk,  
 jiju awatug ikag najanin aidaun chichajuinak:  
 'Achija umikum duka pegkejai', tuinawai.  
 Nuna tusag dakumka najanamu iyajai tusag  
 clavowai achiawag ukuinawai."

<sup>8</sup> Apajuí chichaak:

"Jacob wegantu Israel aents aidauwah, antuktajum:  
 Atumek mina inakeg, wi etejamu ainagme.  
 Atumek mina kumpag Abraham aajakua  
 nunú wegantu ainagme.

<sup>9</sup> Tuja tikich nugkanum achija yajuakam  
 atushat batsatutigmin wi agkanmitkauwaitjime,  
 dutikan mina takagtustajum tusan chichagkun:  
 'Atumek mina inakeg ainagme', tiuwaitjime.

Wi atumnak etegkauwaitjime,  
 nuadui atumnak dakitjankesh idaisachjime.

<sup>10</sup> Ishamkagtukaigpa, wi atumjaig pujajai.  
 Ishamkagtukaigpa, witjai atumi Apajuíjinuk.  
 Wi atumnak senchintikajime,  
 wi atumnak yayajime,  
 mina uweg senchigtin depetmauwa duwi  
 ayamjukan kuitamjime.

<sup>11</sup> "Amina kajegtamin aidaunak, wi inatsaktinaitjai.  
 Dutika ai ememamujinak kajimatkiagtinaí.

Atumjai maanidaushkam ashí ijinawajam megkaejattawai.

<sup>12</sup> Nunik megkaejamtai, wainkatasajum  
 egakjumesh wainkashtinaitjume,  
 wagki amejai maaniatag tinu aidauk  
 ashí amukam megkaejatnai.

<sup>13</sup> Tujash aminak wi achiakjame.

Wi atumin chichagkun: 'Ishamkagtukaigpa,  
 wi atumnak yayajime' tiuwaitjime", tawai Apajuí.

<sup>14</sup> Tuja Apajuí ataktu awagki chichaak:

"Jacob wegantu Israel aents aidautigmek,  
 piipich kakakchau ainakjumesh,  
 ishambkagtukaigpa, wi atumnak yayajime.  
 Witjai Israel aents aidau Apajuíji pegkegmanuk,  
 wi atumnak agkanmitkauwaitjime.

<sup>15</sup> Antuktajum nijah: Atum ainajum anuiyan,  
 makichik trigo akatain yamagman,  
 naín batsatkan najanattajai.

Dutikamtai nujai muja aidau tsaikam  
 yukukuntu awajsattagme.

Tuja nain aina dushakam tsaitatjume,  
 dutikawagmin hijichi kagaku tuwasua weaku atatui.

<sup>16</sup> Nunú yakí takuí nagkimjumin, dase umpui utsagtinaí.

Tuja trigo akagbau, dukee utsankam  
 wampuji juwakun dase shiig senchi dasentak  
 utsauwama numamtuk,  
 atumi shiwaajum aidaun dapampaak utsagtatui.  
 Dutikamtai Israel aents aidaun Apajuíji  
 pegkegma nuwi shiig aneam pujuttame,  
 nuniakum ima niyaig eme anenmamtatne.

<sup>17</sup> "Aents ujudauch kuichigtinchau,  
 wajigtuchu wekagas yumi egá egakua  
 wainkacha kitamak umumain atsum,  
 suweuchijin jujuk wekaetatui.

Tujash wi niinak yaigtinaitjai,  
 witjai Tuke Pujuu Israel aents aidau Apajuujinuk,  
 nuadui ditanak kajimatkinuk idaisashtinaitjai.  
 18 Muja uwegshunum entsa ayau awajsatnaitjai,  
 tuja nugka ségaju paka aidaunmashkam  
 yumi pukuni kuashat jjiiniagtinai.  
 Nuadui yumi kuashat ayau asamtai,  
 dupa shiig tsapak aama iman uwegshunak emaktatjai.  
 19 Uwegshunmak setug aidaun,  
 numi acacia aidaun, arrayan aidaun,  
 nuigtu olivo aidaun tsapapitkatnaitjai;  
 untsu nugka bukunum, numi pino aidaun,  
 abeto aidaun, nuigtu cipre aidaun tsapapitkatnaitjai.  
 20 Nuna ashí aents aidau wainkatnume,  
 nuninak puyatjus unuimagtinne,  
 wi Tuke Pujun mina senchigjai dutikag nuna.  
 Witjai Israel aents aidaun Apajuuji pegkegmanuk,  
 wi nunak najanauwaitjai”, tiuwai.

*Apajuú tikich apajuúmtai aidaun atsaneamu*

21 Jacob wegantu Israel aents aidaun Apajuuji chichaak:  
 “Apajuúmtai dakumka najanamu aidautigum kaunajum,  
 chichamjumaktajum, nuniakjum atumi takatjum ayamjuktajum.

22 Kaunatajum,  
 nunikjum atakea duwi atin etsegkatajum,  
 dutikakjum yaunchuk waji nagkaemajua nunú  
 shiig uajatkatajum, iish shiig antukagmi  
 atakea duish wajig nagkaemagtinaita nunú,  
 tuja dusha dekas uminkatpash nunú diismi.  
 23 Atakea duish waji nagkaemagtatua nunú tukagtitajum.  
 Atum dekas Apajuuyaitkugmek nunú iwainaktajum.

¡Atum dutikmain pegkeg aidau,  
 tuja pegkegchaukesh,  
 nuniachkush ishamain iina uwaktamain  
 aidaukesh iwainaktajum!

24 ¡Atumek shiig wainkauch ainagme,  
 nuadui makichkish iwainamait sugme!  
 ¡Atumin kajintsa aentaimeuwa duka  
 pegkegchau shiig wainkayai!

25 “Makichik aentsun etsa minitaiya nuwiyan jikjai,  
 dutikan niina daajin untsuka ai nujinmanini minawai.  
 Nunú aentsua nunú tikich apu aidaunak tsakus  
 najamaina numamtuk najaktatui,  
 tuja ichinka najanin duwen nawen najama  
 numamtuk najak ukuktatui.

26 Junak emtikan eke nagkaematsaig wi ashí ujajime.  
 Dakumka najanamu apajuúmtai aina duka  
 wi etsejag nunak, wi taatsaigkik yaunchkek  
 makichkish etsegchau ainawai;  
 Dita chichamuk makichkish antugchatayai.

27 Junak makichkish etsegchatain wi Jerusalégnunia aidaun ujakuitjai.  
 Tuja aents achija yajuakbau tikich nugkanum batsata duka,  
 dukap atsuk waketjattawai tusa etsegkatnun  
 wi makichik aentsun akatjan Jerusalén awemajai.

28 Ashí diyajai, tujash makichik apajuúmtai  
 dakumka najanamukesh wantintsui;  
 chichaman etsegmainkesh makichkish wantintsui.  
 Tuja wi ditan iniasagmag nuna aigmainkesh  
 makichkish wantintsui.

29 ¡Ditak shiig wainak ainawai!  
 Dita dutikmainuk makichkish atsawai.



Ditak dakumka najanamu waa ainawai.”

## 42

### *Tuke Pujun inake*

<sup>1</sup> “Jujuwai mina inakeg, Wi niinak achiakjai, wi niinak etegkauwaitjai, niini shiig aneajai, niyai mina Wakanjun apusajai; Nii aents ashí nugkanmaya aidaun pujut pegkejan susatnai.

<sup>2</sup> Niig senchi jikag untsumchatnai, chichaakush senchi jikag chichashtinai, jintá wekagas senchi untsumak chichamujish antuekashtinai.

<sup>3</sup> Tagkan kupinak aunash tsujigkag ajapashtinai, tuja lamparin ekemakbau shiig keeshtaish ikagnakchatnai. Niig dekag pegkeg pujutan itaatnai.

<sup>4</sup> Tuja ashí nugkanum pujut pegkeg ati tau asa, nii takamujinak makichkish ayamsashtinai, tuja pimpikigkesh idaisashtinai.

Tuja nugka múun nayantsa ijus ayá nuwi aents batsamin aidauk, nii jintiamun antuktatus niina dakagtinai, tawai Apajuí”, tiuwai Isaías.

<sup>5</sup> Tuke Pujuu Apajuí nayaimpin najanauwa nunú, tuja nugkanashkam najana, nunú nugkanum tsapau aidaunashkam najankauwa nunú,

tuja iwaku pujutan mayattanashkam aents aidaun susauwa nunú niina inaken chichajak:

<sup>6</sup> “Witjai Tuke Pujuu Apajuínuk, tikichik atsawai, wi aminak mina takagtusti, nuniak uwentikagtugti tusan etegkeawaitjame, wi aminak kuitamkatnaitjame, dutikakun achiaku atatjame, wagki wi chichaman ditajai umikuitag nuna umiakun, mina aentsug aidaun amasjai.

Ame tsauptin asam, aents aidau yajuakam minai ikaunmatnaitme.

<sup>7</sup> Aents wainmachu aidau wainmitkaka, tuja aents achikbau aidau suwenum chimpija dushakam jijjam agkanmitkata, tusan wakegajai.

<sup>8</sup> ;Wika Tuke Pujuuwaitjai, nunuwai mina daajuk! Mina emematjaku kantamtai aina duka tikichik makichkish kantamjuawaigpa, tuja mina emematjutmaina nunú idaikumek, dakumka najanamu aina duka makichkish emematipa.

<sup>9</sup> Wi yaunchuk etsegkauwaitag nunú uminka nunú atumesh anentaimsa diistajum, yamai etsegkattajai yaunchkesh antukchamu yamajam aidaun. Nunú eke wantintsaig, atumnak dekamtikajime”, tiuwai Apajuí.

### *Tuke Pujuu uwentikagtugbau anentaimtusa kantamtai*

<sup>10</sup> Yamajam kantamtai Tuke Pujuu kantamjuatajum.

Ashí nugka najatamunum batsamin aidautigmesh Apajuí emematkujum kantamatajum, lanchanum nayants yujau aidaush, kuntin nayantsanum batsamin aidaush, tuja nugka múun nayantsa ijus ayá nuwi batsamin aidaush Apajuín ememattinme.

<sup>11</sup> Uwegshunum yaaktamak batsamin aidaush, tuja Quedar wegantu aidaujai batsamin aidaushkam shiig aneastinme. Yaakat Selá batsamin aidaushkam shiig aneasag

dakunkut Apajuín kantamjuatnume;  
tuja aents mujanum batsamin aidaushkam  
depetmaka shiig aneaku unsumaina imattinme.

<sup>12</sup> Tuke Pujuu imanjiya nunak ima niinak idaitustinme,  
tuja nugka muunnum nayantsa ijus batsamin  
aina dushakam Apajuín emematak kantamjuatnume.

<sup>13</sup> Tuke Pujuu, múun, senchigtin asa, maanitan yacha,  
shiwaaji aidaun kajejuk,  
suntag maaniamunum unsumajama imati unsumak jiintuki,  
shiwaaji aidaunak ijinattawai.

<sup>14</sup> Apu Mesías chichaak:

“Kuashat tsawantai chichatsuk pujujai,  
makichik chichamnakesh tutsuk,  
tuja nuigtush kajetsuk pujujai.  
Tujash yamaik nuwa uchin uchigmak,  
buutak mayatama imanittajai.

<sup>15</sup> Muja aina nunak nain aina nujai tsaittatjai,  
tuja numi aidaun, ajak aidaun ayá nunashkam ashí ijinattajai.  
Tuja entsa ayá nunak ukuyuan buku awajsattajai.  
Dutikakun kucha aidaunashkam ukuyan buku awajsattajai.

<sup>16</sup> Wainmachu aidaunak jinta dita wainajakhamunum emattajai.  
Tuja suwenum yuja nunak tsaaptin ettittajai.  
Tuja jintanum kaya pujutjin weaja  
nunashkam utsakkan pegkeg awajustattajai.

Wi taja nunak umitskek idaisashtattajai,  
tuké dutikattajai.

<sup>17</sup> Tuja wainka apajuímtai dakumka najanamun aidaun  
dekaskeapi tinu aina duka  
dita apajuímtajai aidaun chichajuinak:  
'Atumetjume jutii apajuíji aidautigmek', tuinawai.  
Nuna tinu aina duka datsagkag jinag  
megkaejagtinai”, tiuwai Apajuí.

*Israel aents aidaun Apajuí chichamen antuinakush umikchagbau*

<sup>18</sup> Antuchu aidaunwah, antuktajum,  
wainmachu aidaunwah, niimi wainmaktajum.

<sup>19</sup> Wi mina takagtustinme tusan,  
atumin etegkau asan aents aidaun chicham ujaktajum tusan  
ishiakbau ainayatkujum aents antuchu,  
wainmachu aina nujai betek ainajum,  
nuninuk tikichik makichkish atsuinawai.  
Atumin wi mina takagtustinme tusan  
etegkamu aidautigum chicham antuchu,  
wainmachujai betek ainajum annuk tikima tikichik  
makichkish atsawai.

<sup>20</sup> Wi atumin yayaakun kuashat dutikawaitag  
duka atumek wainkauwaitjume,  
tujash umigtukchau ainagme.  
Atumek chichamak antagme,  
tujash wi tajim duka makichkish nunap tawa tusagmek dekatsjume.

<sup>21</sup> Tuke Pujuu uwemtikagtina ibau asa,  
pegkeg wakemain aina nuna  
aents aidaun jintintuatjai tusa wakejukui.

<sup>22</sup> Tujash juju aents aina nunak,  
dita shiwaaji aidaun kasajainak waitkainawai.  
Dutikainak achijag waanum,  
nuigtu aents achika chimpitainum chimpiauwag batsamtawai.  
Dutikawag dita wajiji aidaunak ashí yajutuinauwai.  
Ditan ayamjumainuk makichkish atsawai.  
Tuja dita patayi aidaunash achika jukiag,  
akikmakui awagtukmi tusag emegkatuinauwai.

Tujash ditan ayamjuk awakmainuk atsawai.

<sup>23</sup> Tujash atum ainajum anuiyag  
makichkish nunak puyatjusagkesh diinatsui.  
Nunidau asag atakea duish wajukatnukita tusa  
dekatus wakegawk makichkish atsawai.

<sup>24</sup> Jacob wegantu Israel aents aina nuna  
shiwag aidau utsaantuawag kasajuinak waitkaina nunash,  
ya dutikati tima dutikainawa duka  
atumek shiig dekagme.

¿Tuke Pujuuchukait nuna dutikau?

Israel aents aidauk Apajuin pegkegchau takamjusu ainawai,  
nuninak, Apajuish ditanash wajuk pujustinme  
tiyamkiyi nunash umikchau ainawai,  
nunidau asag nii jintintuawa nuna umitnash dakitajui.

<sup>25</sup> Nuadui atumnak kajegtamak suwimkan amasmatai,  
maaniamunum ijipau ainawai.

Tujash imaanika waitiakjumes, makichkish unuimatsjume.

## 43

### *Ima Tuke Pujuuke uwemtikagtinuk*

<sup>1</sup> Jacob wegantu Israel aents aidauwah,

Tuke Pujuu atumin najapauwa nunu chichagtamak:

“Ishamkagtukaigpa,

witjai atumin agkanmitkaunuk,

wi atumnak daagmin adaisan midau atinme tusan

etgkauwaitjime, nuadui atumek midau ainagme.

<sup>2</sup> Yumi piyajunum nagkaemakminish, wi kuitamkattagme,

tuja namak aidau katitkuminish, jakejai tusan kuitamkattagme;

tuja jii kegamunum nagkaemakmesh esashtinaitme,

jii kegak nimpauh dekapjashtinaitme.

<sup>3</sup> Witjai Tuke Pujuu, amina Apajuigminuk,

witjai amina uwemtiknunuk,

witjai Israel aents aidau Apajuji pegkegmanuk.

Wi Egipto nugkan, Etiopia nugkan, Sabá nugkan aatsan sujaku

atumnak sumakuitjime.\*

<sup>4</sup> Atum iwaku batsamsamnujum tusa tabaunum

tikich aidau jinawajui.

Atum jinumainun yapajian dekas dita jinatnume tiuwaitjai.

Wi nunak dutikauwaitjai,

wagki atumin wait anentau asan,

atumek dekas waji pegkeg akikama iman ainagme.

Wika atumnak anejime.

<sup>5</sup> Ishamkagtukaigpa, wi atumjaig pujajai.

Amina aentsjum aidau etsa minitaiya nuni,

tuja etsa akaetaiya nuni batsata nuna

ijumjatasan yajuakan ikaunmattajai.

<sup>6</sup> Tuja aents nujinum batsamin aidau chichagkun:

‘Awakjatajum’, titatjai.

Tuja tsumunum batsamin aidau chichagkun:

‘Makichkish emetuawaigpa’, titatjai.

‘Mina uchig aidau, mina nawantug aidaujai,

atushat nugka nagkatkamunum batstush

awakjatajum.

<sup>7</sup> Tuja uchi apaji daajin naamama numamtuk

mina aentsug asag, mina daajun jukiu aina nunak

mina daag ememattai atinun najanauwaitjai;

nuadui makichkish emettsuk awakjatajum.’

\* **43:3** “Wi atumnak Egipto nugkan, Etiopia nugkan, Sabá nugkan aatsan sujaku sumakuitjime” tawa nunak “juju nugka aidauwmaya Israel aents aidau waitka batsatu asantai, Apajuí dita shiwaajin sujua idayak Israel aents aidau ayamjuk agkanmitkauwa” nuna taku tawai.

<sup>8</sup> “Mina aentsug aidau jiintin ainayatak  
wainmachujai betek aina nunú,  
tuja kuishtinaitak antuchu aina nunú dita nugken  
ashí awakjatajum.

<sup>9</sup> Ashí aents aidautijum  
makichik ijunbaunmak ijunjatajum.  
Nunikjum tujuttajum atum ainajum anuiyash  
¿yaita atakea duwi atinun pachis, tuja yaunchuk  
nagkaemajua nunash betek etsegnush?  
Nunin ataik juwi itantinme,  
dutikam nunú etsegtai antukag dekaskeapi titinme.”

<sup>10</sup> Apajuí chichaak:

“Atumek mina chichamjun etsegtugkatnume tusa  
etegkamu ainagme,  
wi atumnak etegkauwaitjime,  
minai kajintsa anentaimkugmek,  
dekas wi Tuke Pujuuwaitag nunú dekajuattagme.  
Initaikia duwish tikich apajuí mina nagkaetasuk atsujakui,  
tuja atakea duwish, duka makichkish atsunai.

<sup>11</sup> Ima wikitjai Tuke Pujunuk;  
tikichik uwemtikagtumainuk atsawai.”

<sup>12</sup> Tuke Pujuu chichaak:

“Wi atumin ujaakun, uwemtijatnaitjime tusan  
tiuwaitjim nunak, betek uwemtijauwaitjime;  
tuja wainka apajuimtai aina duka atumnak uwemtijamjachajui,  
duka atumek shiig dekagme.

<sup>13</sup> Witjai yaunchuk nagkamsan Apajuínuk,  
tuja atakea duwish wiki atinaitjai Apajuínuk.  
Makichkish mina suwimkajun uwemtumainuk atsawai.  
Tuja wi dutikamua nuna emegkaumainush  
makichkish atsawai.”

<sup>14</sup> Tuke Pujuu pegkejam, Israel aents aidaun  
agkanmitkauwa nunú aatus tawai:

“Atumin ayamjakun suntag aidaun Babilonia nugkanum ishiaktatjai,  
dutika ai dita yaaktaji waitiji aidaunak tsaikagtatui.  
Dutikawagmatai, caldeo aents aidau shiig aneas  
batsataina nunak wake besemag juwakagtatui.

<sup>15</sup> Witjai Tuke Pujuu, Israel aents aidaun najanaunuk.  
Witjai atumi Apajuíjum pegkegmanuk.”

<sup>16</sup> Nayants kuna ishamainnum

nuna ejapeen Apajuí ukuya buku awajus ikankauwai.  
Aatus niina aentsji aidaun ikatiajui.

<sup>17</sup> Tuja Egipto nugkanmaya suntag maanitan yacha aidau  
caballo aidaujui, carro aidaujui Israel aents aidaun pataetukajui,  
tujash nayantsanum tepeawag makichkish jiinkishtinun megkaejabi;  
tuja lamparin ekemakbau kajinak megkagama numamtuk megkaejabi.

<sup>18</sup> Apajuí niina aentsji aidaun yamai chichajak:

“Waji nagkaemakiuwa duka pachikaigpa,  
tuja anentaimtutkesh anentaimtusaigpa.

<sup>19</sup> Wi iwainaktatjai yamagman,  
nunú ame yamaikiuchia duik wainkattame.  
Uwegshunum jintan jintamattajai,  
tuja nugka pegkegchau ajak tsapachua nunashkam  
entsa ayau awajsattajai.

<sup>20</sup> Kuntin ikamia kajen lobo aidau,  
avestruz aidau aatus shiig anenjusagtinai,  
wagki wi yumi pukuni jinin uwegshunum kuashat jiiju asantai.  
Tuja nugka ajak tsapachunum  
entsa aidaun kuashat najankattajai,

mina aentsug, wi etegkauwaitag nuna, uwajagtinun.

<sup>21</sup> Nunú aents aidaunak wi najankauwaitjai, mina emematjitnume tusan.

<sup>22</sup> “Tujash Israel aents

Jacob wegantu aidautigmek  
mina umigtutak kajimatki idaisaugme.

<sup>23</sup> Tuja uwig aidaush anenjauchik sujatsjume,  
kuntin maa nuna neje ashí apeakjumes emematjatsjume.

Wika atumnak anentag sujustajum  
tusa segaaknuk waitkatsjime, tuja kugkuin incienso  
apeatajum tusankesh segaaknuk waitkatsjime.

<sup>24</sup> Mina anentag sujustinuk pagat kugkuin aina  
duka sumagtukchabiugme,  
kuntin aidau wiyajigkesh apeakjume minak emematjishbaijume.  
Ayatak pujusjum pegkegchau takamugmin dii diin yawetjajai,  
nunú pegkegchaugmia nuna diitan tsuwaagjai.

<sup>25</sup> Tujash wi amina Apajuújum asan,  
ame magkagtutajum aidaunak esakatjattagme,  
dutikan atakea duish adeagchatnun kajimatkin idaisattajai.

<sup>26</sup> Ame mina utugchatug dekagtakmek  
yamai tujutta, chichasmi.  
Pai, ame waji titag tame nunú tita,  
nunú tiyamin amesh dekas shiig imagnismeash  
pujam nunú dekaami.

<sup>27</sup> Atumi apachjum aajakua nunú,  
tikich amina chichaman jintinjabianum  
nujai mai pegkegchaun takainak  
mina umigtukchau ainawai.

<sup>28</sup> Tuja amina apujum aajaku aidau  
jega mina emematjaku ijuntain shiig kuitamkachu ainawai.  
Nuadui Jacob wegantu Israel aents aidaunak ijinatnume,  
dutikawag dushiki batsamtitin atinme  
tusan idaisauwaitjai”, tawai Apajuí.

## 44

*Israel aents aidauk Apajuínu ainawai*

<sup>1</sup> Tuke Pujuu chichaak:

“Jacob wegantu Israel aents aidautigmin  
wi mina takagtustinme tusan etegkauwaitjim,  
nunú aidautigum yamai shiig antuktajum.

<sup>2</sup> Witjai Tuke Pujuu, atumin najanaunuk,  
atumek eke akiintsugminig najanaawaitjime.  
Wi atumnak yayajime.

Ame Jesurún\* Jacob wegantu, mina inakeg  
wi etegkamuitme, nuadui ishamkagtukaipa.

<sup>3</sup> Uwegshunmak yumi kuashat ayau awajsattajai,  
tuja nugka buku aina nuwishkam entsa kuashat aittawai.  
Ame wegantu aidaunak mina Wakanjun susagtinaitjai,  
dutikakun kuashat pegkegnum yaigtinaitjai.

<sup>4</sup> Nuadui chijichi yumi ukattai asa,  
pegkejan muumpama iman,  
tuja álamo namaka tugkitken tsapaka aiyama  
iman atinaitjume.

<sup>5</sup> Nuwiya makichik chichaak:

‘Wika Tuke Pujunuitjai’, tumamtainai.

Tuja tikichik:

‘Jacob wegantu’, naamkatnai.

Untsu tikichik niina uwejen:

‘Wika Apajuínuitjai’ tuu agatmamjatnai.

\* 44:2 Chicham “Jesurún” tawa duka diista Dt. 32.15.

Tuja nuigtu ikak agak, niina apachji daajin  
'Israel' agagtinai."

<sup>6</sup> Tuke Pujuu, Israel aents aidaun apuji, Israel aents aidaun uwentikin,

Tuke Pujuu ashí senchigtina nunú chichaak:

"Witjai nagkamtinish tuke pujuunuk,

tuja atakea duish tuke pujutnaitjai.

Tikich Apajuí mina nagkaetasuk atsawai.

<sup>7</sup> ¿Yaita wijai betek amainush?

Iman akug juwi wajanta tujutti.

Tuja mina aentsug agtinun etegkauwaitag

duwi nagkamsan atakea duwi

nagkaemagtinnash etsegnunuk witjai,

tuja wikitjai atakea duish wajig nagkaemagtinaita

nuna betek etsegnunuk.

<sup>8</sup> ¡Makichkish ishamkagtukaigpa!

Yaunchuk nagkamsan emtikan junak ukuitjime.

Duka atumek shiig dekagme,

tikich Apajuik wijai betekak makichkish atsawai.

Tikich Apajuí atumin kuitamjamainuk atsawai.

Wika tikich Apajuínak waintsujai.

*Dakumka najanamu aidaunak Apajuí dakitau*

<sup>9</sup> "Dakumak najanin aina duka pegkejak ainatsui. Tuja dakumka najanamu aidaun dita shiig anentuina dushakam pegkegchau ainawai. Tuja dakumka najanamun emematuina duka anentainchau wainmachujai betek ainawai, nuadui ditak datsagkak wainak juwakagtatui.

<sup>10</sup> Tuja dita emematiagtinun jiju ukuiyag najanin aina duka shiig pegkegchauwai.

<sup>11</sup> Dakumka najanamun emematin aidauk datsaajagtinai, wagki dakumak najanin aina duka aents wainkauch ainawai. Ashí dita aidauk Apajuí emtin dita utugchatjin dekagmamawag datsaajagtinai, nuninak sapigmakagtinai.

<sup>12</sup> "Diistajum jiju najanin wajuk takawa nunú: Jinum jiya inimpag, martillowai dekegka tsaika niina senchijin takawai. Nuadui nuna puyatjak yujumkan yutsuk, umutnash umutsuk pujujus pimpiki takamainchau dekaapeawai.

<sup>13</sup> "Tuja numi taumi dakumak najanin aina dushakam anentaimtusa diisagmi: Niig reglayai dekapawai, tuja lápisai, compásai aatus dakumui. Dutika formónkai tai aentsun dakumak najana jega Apajuí emematku ijuntainum awaya apujui.

<sup>14</sup> "Tuja tikichik setjun ajainawai, dutikamun yumi yutak uchupiam muumpawai, nuadui niinu setug ajaka takamain aittawai. Nuniachkush numi ciprén, roblejai wakegainakug ikam ajawag shiig kuitamainawai kampuagti tusa.

<sup>15</sup> Nunú kampuaju aidaun ajakag kanawen tsupig yajumainawai jiin ikapag anamawagtinun, untsu tikichnak pag inajuatnun juwinawai. Dutikainak wainka apajuímtain dakumak najanatnunashkam juwinawai, dutika najanawag emematuinawai.

<sup>16</sup> "Tuja numi jimaituk ampinjaun jukiag nuna ikapajag, nuwi kuntu nejen pegka inajuawag shiig yuwawag senchi tutuinawai. Nunikag nunú jinum ayaumas anamak pujus chichaak: '¡Yajautsui jii ijusa pujusa anabauk!' tuinawai.

<sup>17</sup> Nuwiya numi ampinjaun jukiag wainka apajuímtain dakumak najanainawai, dutikawag nuna ememata tikishmatug pujus segaak: '¡Ametme iina apajuíjimek, jutish uwentikagtugta!' tuinawai.

<sup>18</sup> "Nunú aentsuk makichkish dekatsui, tuja antutnash antatsui, wainmachujai betekai, unuimatish atsau, shiig anentainkachui.

<sup>19</sup> Ekeemsagkesh anentaimainatsui, jintiaja shiig anentaimat atsujuinawai, nuadui ditak: 'Jimaituk numin apeamjai, dutikan nuna kaijin pagkan inajuamjai, tuja nuigtu neje pegka inajuan yuwamjai, tuja nunú ampinjaunwai juna pegkegchaun tsumainun dutikamjai, ¡wika numi tsupikbaun emematu wekaejai!' tumamainchau ainawai.

<sup>20</sup> Duka dekaskenum yuku yumaina numamtinai. Duka wainka tsanuam nuni wekaemainai. Nunú aents aina duka pujutjinak uwentijashtin ainawai. Dita takuinaka duka shiig pegkegchauwai. Nunin ataish ditak: 'Juka pegkegchauwapi' tusa dekamainchau ainawai", tiuwai Isaías.

*Tuke Pujuu Israel aents aidaun wait anentug uwentijamu*

<sup>21</sup> "Israel aents Jacob wegantu aidauwah, mina inakeg ainajum nunú adeagtajum;

atumek mina inakeg ainagme,  
 atumek mina inakeg wi najanamu ainagme,  
 nuadui iminak kajimatjuki idaitusaigpajum!  
 22 Amina pegkegchaujum aidaunak  
 yujagkim kakegak megkagama numamtuk emegkatkagme.  
 Ataktu wakitkim mina umigtukta,  
 wi aminak agkanmitkauwaitjame”  
 tawai Apajui.

23 iNayaimpih, ameshkam Tuke Pujuu dutika  
 nunú anentaimtusam shiig aneakum senchi kantamata!  
 Nugka initken batsatutigmesh  
 senchi untsumkujum aents wajukmaina imattajum.  
 Muja aidautigmesh, ikam aidautigmesh,  
 ashí numi aidaujai shiig aneakjum  
 aents wajukmaina imatkujum senchi untsumtatum.  
 Tuke Pujuu Israel aents Jacob wegantu aina  
 nuna ayamjuk agkanmitkak niina senchijin iwainake.

24 Tuke Pujuu amina uwemtijamin,  
 ame eke akiintsuminig najapauwa nunú chichaak:  
 “Witjai Tuke Pujuu, ashí waji aina nuna najankaunuk,  
 wi nayaimpinak nugkajai najanauwaitjai,  
 mina yainkauk makichkish atsawai.

25 Tuja waita etsejin aina nunú etsegbau  
 betek uminkati tusanuk wika wakegatsjai,  
 anentaimsa dekamji tinu aina nunak anentainchau emajai.  
 Aents yacha aina nuna dekatjinak yapagtuan  
 shiig wainak dekachu emajai.

26 Untsu mina inakeg aidau chichaman etsejuina duka  
 betek uminkati tusan yayajai,  
 tuja aents wi awemamu aidau chichaman umina  
 dushakam imaniasag betek uminkati tajai.  
 Tuja Jerusalégnumak ataktu yaaktamak batsamsagtinaí.  
 Tuja Judá wegantu aidaun yaaktaji aajaku aina  
 dushakam ataktu awagki yaaktamkamun atatui.  
 Yaakat tsaikbau aidaun ataktu jegamjatnume tusan,  
 jega jegamin aidaun wi inagtatjai.

27 Tuja nayants kuyua buku wajasti,  
 nunikmatai tikich namak aidaushkam  
 buku waigti tusan tumainnuk witjai.

28 Wi apu Ciron chichagkun:  
 ‘Ametme mina uwig aidau kuitamnumek,  
 amek wi wakegamua duke ashí takastatme’ tajai.  
 Tuja Jerusalégkan chichagkun:  
 ‘Amek ataktu yaaktamamu atatme’ titatjai.  
 Untsu jega Apajui emematku ijuntai jegamkamun chichagkun:  
 ‘Amina ataktu jegamjamkatnun,  
 jega jegamin aidaun awemattajai’ tawai Apajui”,  
 tusa Isaías tiuwai.

## 45

*Ciro takastinun Apajui takatan susau*

<sup>1</sup> Tuke Pujuu Ciron apu adayak,  
 aents tikich nugka múun aidaunum  
 apu senchigtin batsata nuna depetuk,  
 maanitaji aidaunak atanjati tusa yayaak,  
 egkesa awekajakuí.

Tuja yaakat peeja apakbau aina nunash  
 tujintsuk utua shiwag aidaun ijinati tawai.  
 Nuadui Apajui niina chichajak:

<sup>2</sup> “Ame weamunmak wi emkan wetatjai,  
 tuja muja aidaunak yumpuajan paka emaktatjai,

waiti jiju bronce najanamu aina nunak tsaiktatjai,  
tuja jiju hierro waiti batsatkamua nunashkam tsaiktatjai.

<sup>3</sup> Tuja waji pegkeg aidau  
makichkish wainmainchau uukbau awa nuna,  
wi amastatjai.

Nunú wainkam, Tuke Pujuu Israel aents aidau  
Apajujinuk ima wikitag nunú dekattame.

Wi aminak untsukmajame.

<sup>4</sup> Israel aents Jacob wegantu aidau,  
mina inakeg aina nunú aneamunum,  
amek minak dekaagsuminig wi aminak etegkamjame,  
dutikan apu emamjame tikich apu aina nuna  
nagkaesau ati tusan, nuadui aents aidaush  
ame tabaun antugtamakgatui.

<sup>5</sup> Witjai Tuke Pujunuk,  
tikich mina nagkaetasuk atsawai,  
amek minak dekaagsuminig wi aminak  
kuitamkattajame depetmakti tusan.

<sup>6</sup> Ashí tikich nugkanum batsamin aidaush  
tikich Apajui mina nagkaetasuk atsa nuna  
dekaatnume tau asan nunak dutikattajai.

Witjai Tuke Pujunuk, tikich mina  
nagkaetasuk makichkish atsawai.

<sup>7</sup> Witjai tsaaptinun suwejai najanaunuk,  
tsawan pegkeg atinnash,  
tsawan pegkegchaw atinnashkam,  
ashí nunak wi dutikajai.”

*Apajui ashí senchigtin*

<sup>8</sup> “Ashí nugkanmaya aidauk  
ima pegkeg takat aina nunak takagtatui,  
duka Tuke Pujuu jegashik nayaimpinmayan  
akakea numamtuk atatui.  
Aatus aents aidau pegkejan takainak uwemtan jukiagtinaí.”

<sup>9</sup> Pinig duwe juki najanamua duka,  
aentsjai betekak, niina najanauwa nuna chichagku:  
“Amek najantak dekatsme” tusag jiyanimaitsui,  
tuja tsakusai pegkejan dakumak najannunak: “¿Waji takame?” tusag tsakusak iniatsui.

<sup>10</sup> Tuja uchi yama akiinauwa duka  
niina apajinak dukujijag: “¿Wagka minash akiintuabiugme?”  
tusag jiyanimaitsui.

<sup>11</sup> Apajui pegkejam, Tuke Pujuu, Israel aents aidaun  
najanauwa nunú chichaak:

“Atumek minak makichkish inatmain ainatsjume,  
mina aentsug aidaunash wisha itugkatnaitja  
nuna ujatkatí tusagmek wakemaitusgme,  
tuja wi dutikamujua dushakam jutik dutikata  
tusagmek jintinjumain ainatsjume.

<sup>12</sup> Wi nugkanak najanan,  
nuwi aents aidaun batsasuitjai,  
tuja nayaimpinash múun agkajun najanan,  
nuwi agkajunum etsanjatin aidaun najankauwaitjai.

<sup>13</sup> Wi apu Cironak etegkajai,  
dutikau asan wi miinak Jerusalén mina yaaktajua nuna  
ataktu jegamag yaaktamkati tusan yaigtatjai.  
Nuadui Israel aents aidau achija yajuakam  
Babilonia nugkanum batsata nuna jigtatui,  
dutika jijia agkanmitkakush, akikmaktajum tusag  
makichkish kuichkinak segashtatui”,  
tusa Tuke Pujuu ashí senchigtina nunú juna aatus tawai.

<sup>14</sup> Tuke Pujuu Israel aents aidaun chichajak:  
“Egiptunmaya aents ajakan ajakbau,



tuja etiopianmaya aents waji sujin aidau,  
 Sabá aents esajam aina dushakam,  
 ashí ditak ima atum tabaunak umigtabiagtatui.  
 Ditak atumi wainka inaku waitkatai agtatui.  
 Imanik waituinak atumi emtin tikishmag pujusag  
 chichainak:

‘Dekas Apajuik ima atumjaig pujawai,  
 tikich Apajuik makichkish atsawai.’

<sup>15</sup> Amek dekas wainmainchawaitme,  
 tuja ametme Israel aents aidau ayamjukam uwemtiknumek.

<sup>16</sup> Wainka apajuímtai aidaun dakumak najanin aina duka datsagkag  
 wainak juwakagtatui.

<sup>17</sup> Tuja Israel aents aina nunak  
 Tuke Pujuu tuke batsamsatnun uwemtijatnai.  
 Nuadui ditak wainka inaku waitkatai,  
 dushiktaig achagtinai.”

<sup>18</sup> Tuke Pujuu Apajuí nayaimpin, nugkan najana,  
 juwi aents aidau batsamsatnume tusa  
 umikua nunú chichaak:

“Witjai Tuke Pujuuunuk, tikichik makichkish atsawai.

<sup>19</sup> Wika aents aidau antachbaunum suwenum uumka  
 pujusnuk chichatsjai.

Tuja Israel aents aidaun susashtinaitkunuk,  
 segattajum amastajime tusanuk anagkuatsjai.  
 Wika Apajuí dekasken pegkejan chichawaitjai.”

*Wainka apajuímtai aidaun atsaneak Tuke Pujuu chichakbau*

<sup>20</sup> “Ashí nugkanum batsatutijum  
 juwi kaunajum ijunjajum, antuktajum.

Atumek anentainkachu ainajume, wainka  
 apajuímtai numi dakumka najanamu makichkish  
 atumin uwemtijamainchau emematjume.

<sup>21</sup> Tuja wainka apajuímtai dakumka najanamu  
 emematjum dusha pegkejash aniajum nunú  
 pempeentunikjum ininistajum.

¿Yaita juju waji aidau nagkaemagtinun pachis emtika etsegkaush?

Makichik aentskesh juju waji nagkaemaina nuna pachis etsegkauk atsawai.

Witjai Tuke Pujuu juju waji nagkaemaina juniktinun yaunchuk emtikan etsegkaunuk.

Tikich Apajuí mina nagkaetasuk makichkish atsawai.

Apajuí pegkejam uwemtikagtinuk tikichik atsawai.

<sup>22</sup> “Tikich nugkanum atushat batsatutigmes  
 minai minitajum, wi uwemtan amastajime,  
 witjai Apajuínuk tikich mina nagkaetasuk atsawai.

<sup>23</sup> Wika dekas umiktinjun tumamjai,  
 mina shiwag aina nunak ijinatnaitjai,  
 duka dekas imanisag uminkatnai.

Tuja mina emtijui aents aidauk  
 tikishmag batsamsag emematjuinak:  
 ‘Dekas ametme jutii Apajuíjimek’, tujutiagtin ainawai.

<sup>24</sup> Tusa chichainak:

‘Pegkeg takata duka ima Tuke Pujuuwaig awai,  
 tuja ima nigki senchigtinuk’ tujutiagtinai.  
 Aents mina chichamjun umitan dakitujaku aina duka  
 datsagkag wainak juwakagtinai.

<sup>25</sup> Ashí Israel aents aidauk wi yayamu asag,  
 minak umigtuinak ima pegkeg takata nunak takagtinai”,  
 tawai Tuke Pujuu, tiuwai Isaiás.

<sup>1</sup> Isaías chichaak:

“Babilonianmaya aidaun apajuímtaiji Bel, Nebo,  
aina duka winchainag, nugka iyainawai.

Tuja babilonianmaya aidauk,  
kuntin waji pataja jutai aidaunum dita  
apajuímtaiji aidaun patajag yajumainak,  
kijin asamtai kuntinjin waitkainawai.

<sup>2</sup> Nunik kijimainak nugka tukumak iyaak  
ajuajam ayamjumamainchau asag tsainak ajapnainawai.  
Nunin asagmatai tikich nugkanum yajumainawai”, tiuwai.

<sup>3</sup> Tuja Apajuí chichaak:

“Jacob wegantu, Israel aents iwaku batsatutijum antuktajum:  
Wi atumnak eke akiintsugminig uchi pagkusa  
kuitamaina numamtuk kuitamkauwaitjime.

<sup>4</sup> Tuja atum múuntuch wajasjum jempejuja pujakjuminish,  
wi atumin najadau asan, yamai kuitamjim dutiksanuk kuitamkan  
uwentijatnaitjime.

<sup>5</sup> “Wijai betek tikichik makichkish atsawai.  
Witjai tikich aina nuna nagkaesaunuk.

<sup>6</sup> Tuja awai aents kuashat oron, platan ikaunbau.  
Dutika ikaunamtai aents wainka apajuímtain  
dakumak najanin najanamtai,  
emematmi tusag nunú aentsun egainawai.

<sup>7</sup> Tuja nuna najanamtai, yanaki jukiag  
tuwi pujustatua nuwi ejegan apujuinawai,  
dutika apujkim makichkish buchittsuk pujawai.  
Nunik pujaun yaimpakti tusag,  
senchi untsukag segamash makichkish ayatsui,  
tuja waituinak nii ayamjutpakti tusa segamash  
makichkish ayamjumaitsui.

<sup>8</sup> Pegkegchaun takau aidauwah,  
juju adeagtajum, nuniakjum shiig anentaimjatajum,  
<sup>9</sup> yaunchuk waji aidau nagkaemajua nunú adeagtajum,  
witjai Apajuínuk tikichik atsawai;

witjai Apajuínuk, tikich wijai betekak makichkish atsawai.

<sup>10</sup> Tuja tsawan nagkanbaush wajuk atinaita nunak  
wika yaunchuk nagkamsan dekjai,  
tuja atakea duish

waji nagkaemagtinaita nunashkam etsegjai.  
Wi wajina dutikatag tusanua wakegaja nunak  
wika imatiksasuk uminaitjai.

<sup>11</sup> Makichik aentsun tikich nugkanmayan  
etsa minitaiya nuwiyun untsukmajai,  
duka tuke chuwegajai betek atushtanmaya minittawai,  
nigka wi tabaun umiktatui.

Tuja wi nuna dutikatin atajai tusan tiuwaitag nunak  
nii imatiksag umiktatui.

Wi dutikatnujun chichaman umikuitag nunak tuke umiktatjai.  
Nunak dekas uminkatnun tajai.

<sup>12</sup> Chichaman antakchau, intimkiu aidautijum  
anentaimsajum, iik wamak agkanmagashin  
ainaji tusajum tautijum, wi tajim nunú antuktajum.

<sup>13</sup> Wi atumnak wamak agkanmitkattajime,  
nunak shiig wamak dutikattajai.

Tuja Jerusalégnun aents aidau batsata  
nunak wi ayamjukan agkanmitkattajai.  
Mina imanjua duka Israel aents aidaunum atatuí”,  
tiuwai Apajuí.

## 49

*Tuke Pujuu minak dukuju wakeen egketaig yaunchuk nagkamas etegtuauwai*

<sup>1</sup> “Yaakat múun nayantsan ijus ayá

nuwi batsamin aidautijum,

tuja tikich nugka múun aidaunum atushat

batsamin aidautigmeshkam wi tajim nunú antugtuktajum:

Tuke Pujuu minak eke akiintsaigna etegtuauwai.

Tuja mina dukuju wakeen egketaig mina daajun adaitujus untsugkauwai.

<sup>2</sup> Apajuí minak senchimtijua chichamtin,

puyag etsakamu empekama iman,

tuja flecha etsakamu tsakaskatuama iman awajtusmayi.

Dutijua makichik waji ejaka kuitamaina numamtuk kuitamjukmayi.

<sup>3</sup> Tuja nii chichagtak:

‘Israel aents aidauwah, atumek mina inakeg ainagme,

atumiin mina senchignak iwainaktatjai’, tujutmayi.

<sup>4</sup> Tuja wi anentaimsan chichaakun:

‘Pegkegnakesh jukitnunig wainka takakun waitiajai’, tibaijai.

Tujash wi takasbaunum jukitnujuk Tuke Pujuu

senchigtina nuwi amayi.

<sup>5</sup> “Israel aents Jacob wegantu aidau

pampagka batsata nuna yajuak

atak awakeag ikaunmati,

dutikak mina takagtusti tujutu asa,

wika eke akiintsaigna, Tuke Pujuu minak wait anenjug,

yaunchuk nagkamas etegtuauwai.

<sup>6</sup> Tuja nii chichagtak:

‘Wika aminak mina inakeg ati, nuniak

Jacob wegantu aidau achija yajuakam nugken ukukiag,

tikich nugkanum batsata nuna ataktu awakeag,

dita nugken ikaunmati tusanuk ima nunakeg tatsugme.

Tuja ashí tikich aents judíocho aina nuwishkam

tsaaptinun iwainakti titatjame.

Ashí tikich nugka aidaunum mina chichamjun etsekgati,

nunitai ditashkam uwemjatnume tusa’, tujutmayi.

<sup>7</sup> Tuke Pujuu uwemtikagtin,

Israel aents aidau Apajuí pegkegma nunú,

niina aentsji tikich nugkanmaya aidau kajejam,

wainka inaku waitkatai batsata nuna chichajak:

Wi atumnak etegkauwaitjim nuadui apu aidauk

niina atuwe aidaujai atumi waipakag,

eme anenjamsag, atumi emtimin tikishmag pujusagtinai.

Nuadui wi atumin anagkuawaitjim nunak

imatiksanuk umiktatjai.”

*Jesuralén tsaikbauwa nunú ataktu yaaktamatin pachisa etsekgamu*

<sup>8</sup> Tuke Pujuu chichaak:

“Wi wait anenkagtamun tsawan jegau asamtai,

untsugkugmin aikmajime,

uwemain tsawan jegagtamiaju asamtai,

wi yaigbaijime.

Wi atumnak tikich aents aina

nuna nagkaesau agtinme tusan etegkauwaitjime.

Nuadui atum Israel aents aidautigmek

atumi nugkemin ataktu waketjattagme,

nunika jegajum atumi shiwaajum aidau

yaaktan tsaikajua nunú ataktu yaaktamkatnaitjime.

<sup>9</sup> Tuja aents aidau achijam chimpija nunú chichagkujum:

‘Yamaik agkan wajasugme,

tuja suwenum batsatutigmeshkam tsaaptin wainkatajum,

nunikjum jinta yantamenig chijichi pegkeg ayau wainkattagme.

Tuja muja uwegshunmash baka aidau

yumainjig kuashat aittawai', titajum.

<sup>10</sup> Atumek nujantaish tuja kitakaish, etsa sukupainakuish, seekiyaish, makichkish waittsashtin ainagme.

Wi atumnak aneau asan uyuntsattajime, tuja nuigtushkam yumi pukuni kuashat jiiinaidaun amastinaitjime.

<sup>11</sup> Muja aina nunak yumpuajan pakaman, shiig iwaja jintaman esekan tutupit dakuejan umiktatjai.

<sup>12</sup> Tuja Israel aents aidautigmek tikich nugka nagkatkamunum atushat batsatutijum juwi kaunatnaitjume.

Untsu tikich aidauk nugka Sinim\* batsatu kaunatnai.

<sup>13</sup> ¡Nayaimpih, shiig aneakjum kantamatajum!

¡Nugkah, shiig aneasta!

¡Muja aidauwah, shiig aneakjum untsunkatajum!

Wagki Tuke Pujuu niina aentsji waituinak

wake besemag batsatun,

wait anentug anentai ichichtuju asantai.

<sup>14</sup> "Atum Jerusalén batsamsajum chichaakjum:

'Tuke Pujuu jutiinak kajimatjamki idaitamsae', tuyugme.

<sup>15</sup> "¿Nuwa nii jujegbaujınash wait anentsukesh kajimatkish idainukaih?

Nuwa nii jujegbaujin kajimatki idaisaintai,

tujash wika aminak makichkish kajimatkinuk idaisashtatjame.

<sup>16</sup> Atumek mina aentsug ainajume,

mina uwejuı agaja takaku amainaitag numamtin ainajume.

Jerusalén peeja tenteamu tsaikbauwa nuna tuke anentaimtajai.

<sup>17</sup> "Shiwag aidau Jerusaléggkan

wamak tsaikajua nuni senchi shiig wamkeuch

ataktu jegamjajum yaaktamkatin ainajume.

<sup>18</sup> "Jerusalén batsatutigmek pagkaijum,

ashı yantannum niimsatajum,

Israel aents aidau achija yajuakbau aidau

ataktu waketug Jerusalén kaunainawai.

Junak dekas uminkatnun wi Tuke Pujuuın tajai.

Dita nunik waketiagtai, nuwa aishinatın tsawan jegamtaı,

iwagmamak patakumtain patakumama numamtuk Jerusaléggkak wajaktatui.

<sup>19</sup> Atumi nugkem tsaikam pegkegchau wajas amayı,

tujash nuna dutikau aina duka yamaik ukukiaje.

Nuadui nunú nugkanum kuashat aents piyakmataı,

tikich aents pujumain agkauk atsutnai.

<sup>20</sup> Atumi uchijum aidau megkaejamtaı,

kajimatki idaisamu aidau kaunawag chichagtamainak:

'Juju nugkak tikima piipich asa ijıunja pujumaitsui.

Nunin asamtaı tikich nugka sukagtusta nuwi pujusagmı',

tujamiagtatui.

<sup>21</sup> Tujamainakui atum chichaakjum:

'¿Ya iınash uchinash imatikash amase?

iik kuashat uchigtuchu ayaji,

nuigtush uchijinmainchau ayaji,

iik uchiji yajutka ukukim uchigtuchu juwakuitji.

Tujash ¿jusha tuwiya kaunae?

¿Jusha ya kuitamkam tsakakuıta?' titinaitjume", tiuwai.

<sup>22</sup> Nuadui Tuke Pujuu apu chichaak:

"Wi nugka múun aina nunak

wainchataı ishamaın aidaun iwaintuktatjai,

dutika ai, nuna wainkag atumi uchijum aidaun,

\* **49:12** Nugka "Sinim" tawa nuna daajig yamaik, "Asuán" adaikamui, nuadui tikich versiónnumak Asuán agagbauwai.

nawanjum aidaun shiig kuitamas yanaki jukiag  
ikaunmatnume titatjai.

<sup>23</sup> Tuja atumek apu aina nunú apajimattagme,  
untsu apu nawanji aidauk  
atumi nawanjuchijum aidaun kuitamin agtatui.  
Nuninak atumin tikishmatjamjag  
dawem bika wajasun dukatjamiagtinaí.  
Nuninakui anentaimsajum,  
dekas Tuke Pujuuk pujawapi titatjume.  
Tuja mina dekaskeapi tujutuidauk tsanuamak achagtinaí.

<sup>24</sup> “Aents wajiú maanitan yacha asa,  
maania depetmak waji jukimujia duka kakajus atanmaitsui.  
Tuja aents maaniaku achikmauwa dushakam  
aents wajiun tsanug ukukig tupikaumaitsui.

<sup>25</sup> Tujash Tuke Pujuu chichaak:  
Aents senchigtin maania depetmak,  
waji aidaun yajuakbaujinak atanjagtinaí,  
tuja tikich aents wajiú aentsun achika  
jukiúwa nunashkam atankiagtinaí.  
Tuja atum Israel aents aidautigmin  
utugchatan itagtamainakuig,  
wi atumi uchijum aidaunak ayamjuktinaitjai.  
<sup>26</sup> Dutikakun ditak pempeentumakiag yumamatnume,  
nuninak dita numpenak uwag vinojai betek  
nampegtinme titatjai.  
Dutika ai ashí aents nugkanmaya aidauk  
wi Tuke Pujuu, amina uwemtikin Jacopan Apajuí  
senchigtinaitag nuna dekawagtatui.  
Witjai amina ayamjukan agkanmitkaunuk”,  
tiuwai Apajuí.

## 50

<sup>1-3</sup> Nuigtushkam Tuke Pujuu chichaak:

“Israel aents aidauwah,  
wika atumin egaknush wainkachmaiijime.  
Untsukmaiijime, tujash aigkashmaiijime.  
Wika atumnak pachitskek idaisachuitjime;  
tuja mina diwig akikmaktinun kuichkin jukitag tusankesh  
wainka inaku waitkatai atinme tusanuk sujukchabiajime.  
Wika atumi tudaugmin idaisabiajime.  
Tujash atum waitu batsatjum nuna  
jiiki uwentikmainuk mina senchijuk ajutui.  
Aents patayi jakamtai, jáanch bukusean nugkuwama  
numamtuk nayaimpinak wi bukuseayai dukukan idaijai.  
Tuja nayants, nuigtu namak aina nunú kuyuatag takug  
wi nunikti tusan machikiuch tamawaitak kuyumainai.  
Nunik yumi buku wajasmatai,  
namak aidau jinaa kaukti tusa nunak nunimainai”, tiuwai.

<sup>4</sup> Tuke Pujuu, apu, minak aents pimpiki  
batsatun jintintua anentain ichichtugti tusa unuitugmae.  
Tuja aents chichaman antuk betek umiauk  
jintintayama duwi minak Apajuí kashi kashinig  
tuké kashikmas inaantawai,  
niina chichamen antuk unuimagti tujutu asa.

<sup>5</sup> Tuke Pujuu, apu, minak chichama umin ati tusa  
jintinjauuwai.

Nuadui wika niina intimjuknuk umigtsukek idaisachmaiiai.

<sup>6</sup> Mina tuntupjuí asutuínakuish,  
asutuátnume tusan idaisabiajai,

susujun uwegtuinakuish, idaisabiajai.  
Dushiktuinak yapijui usuktuinakuish,  
yapignak ejakchabiajai.

<sup>7</sup> Tuke Pujuu, apua nunuwai mina yainta duka,  
nuadui pegkegchau chichagtuina nunak  
wika najaimatsjai.

Nuadui wika kaya múun umuchmainchawama iman  
wajasan pujuyajai,  
nuadui wika wainka inatsamak achattajai.

<sup>8</sup> Mina ayamjutna duka wijai pujawai.

Tuja ¿wi pegkegchau takamsamujun etsegtugmainush yaita?  
¡Nuna dekau akuig, apu chichaman epegkin  
pegkeg puja nuwi wemi!

Wi pegkegchau takamsamun dekau akug nuwi tantati.

¡Nunik mina igkuntua tujutti!

<sup>9</sup> Tuke Pujuu, apu, minak kuitamjawai,  
mina achijuk suwimka sujumainuk makichkish atsawai.

Mina shiwag aina duka jáanch mamuk yuwam  
megkagama numamtuk megkaejagtinai.

## 52

*Jerusalégnunia aents aidaunak agkanmitkattajai tusa Apajuí tibau*

<sup>1</sup> Jerusalégnunia aidautijum aneaku niimkau pujustajum,  
Jerusalén yaakat pegkegma nuwi batsatutigmek wajiu wajastajum,  
nuniakjum shiig iwagmamkatajum,  
wagki Apajuín umigchau aents pegkegchau aina duka  
ataktu awagkig atumnak jetepakchagtatui.

<sup>2</sup> Jerusalégnunia aidautijum  
nugká pushugkajum batsatjum duka,  
datsaamtsuk wajakjum jáanchjum pegakjum yantsaptuktajum,  
nunikjum apu niina inamtaijin ekemaina numamtuk ekemsatajum.  
Tuja datsauch aidautigmesh, achija yajuakam  
batsabaijum nunisjumek yamaikish batsamtsuk,  
agkanmagatajum.

<sup>3</sup> Tuja Apajuí chichaak:

“Atumin achipag yajupakajua nunak minak akigkachu ainawai.  
Nuadui wishakam atumin awakeaknuk makichkish akikmakchattajai.

<sup>4</sup> Yaunchuk mina aentsug aidau Egipto nugkanum shiyakag  
nugkenchau inaku waitkatai batsamajaku ainawai.

Tuja tikich tsawantinchakam makichkish  
utugchatji atsujunak asirianmaya aents aidau  
senchi waitkasaju ainawai.

<sup>5</sup> Tujash yamaish ¿wagka imatikash waitkainawah?  
Mina aentsug aina nunak utugchatji atsujunak  
Babilonia nugkanum yajuakaje.

Dutikawag nuna apuji aidau waitkainak  
ememas chichainak kashi kashinig kajemtijuinawai.

<sup>6</sup> Tujash tsawan jegattawai,  
mina aentsug aidau mina shiig waitkagtina nunú.  
Nunik waitkag adeajagtinai, wi ditan chichagkun:  
‘Witjai apunuk’ tiuwaitag nuna”, tiuwai Apajuí.

<sup>7</sup> Aents mujanmaya akaiki wekagas yamajam chichaman  
agkanmaetan uwemtajai pachis etsejak wekagas,  
Jerusalégnunia aents aidaun chichajak:

“Atumin Apajuíiyai dekas apuk”,  
tusa etseja duka shiig anentam auwai.

<sup>8</sup> Atumi suntajum jinta niimin aidau  
Tuke Pujuu Jerusalégnun wakitki midaun wainkag  
shiig aneanak unsumaina nunú ¡antuktajum!

<sup>9</sup> ¡Jerusalégnnumia aidauwah,  
 Tuke Pujuu niina aentsji aidaun wait anentug  
 Jerusalégnashkam agkanmitka duwi  
 nii eme anentsajum kantamtaí shiig anejasum  
 senchi kantamatajum!  
<sup>10</sup> Ashí aents tikich nugkanmaya aidaush  
 wainainamunum Tuke Pujuu niina senchijin iwainake.  
 Tuja Apajuí iina uwemtijamja nunak ashí nugkanum dekawagtinaí.  
<sup>11</sup> ¡Babilonia nugkanum batsatjum duka  
 jijnjajum ukuktajum!  
 ¡Tuja Tuke Pujuu jeen takastin waji aidau  
 ikaunmatnutigmek kuitamamkatajum,  
 pegkegchau takasaigpa!  
<sup>12</sup> Tujash wainkajum waugtukaigpa,  
 tuja uumkagmekesh tupikakigpa,  
 atumi aintamuk atsawai.  
 Tuke Pujuu, Israelan Apajuíjiya nunú atumnak  
 kuitamjamainawai.

*Tuke Pujuu inakeg waitiakush nii yayasam depetmawai*

<sup>13</sup> Mina inakjuk ashí depetmaktinaí,  
 nuadui tikich aidaun nagkaesau eme anentam atinaí.  
<sup>14</sup> Kuashat aents aidau niina yapin diigsag puyatkagtinaí,  
 wagki yapi emestujam aents niimtinchau  
 wajasu asamtaí.  
<sup>15</sup> Tuja aents tikich nugkanmaya aidaushkam  
 senchi puyatkagtinaí.  
 Tuja apu aidauk nuna wainkag makichkish chichakchagtinaí,  
 wagki nunak yaunchkesh antushtain antuínak,  
 waitanashkam wainaidau asag.

## 53

<sup>1</sup> ¡Ii etsegbaunak makichik aentskesh dekaskeap tawa  
 tichau ainawai!  
 ¡Apajuí senchijinak makichik aentskesh wainkachui!  
<sup>2</sup> Apajuí niina inakenak ajak yama tsapaak kagkape  
 nugka katsugmanum init akagama nunikti tiuwai.  
 Nunú aentsuk imanचाuch, eme anentsa diimainchau,  
 nuigtush wait anenmainkesh atsayi.  
<sup>3</sup> Ashí aents aidauk niina tsumainak dakitianume.  
 Niyai dekas senchi najaimak waittsauwa duka.  
 Niig waitiakush, waitiajai tichauwai,  
 wagki tuke unuimatjau asa.

Nuadui makichik aents ii dakitamu diimaitsu dutikiaji.  
 Tsuwaaja idaisabiaji, nuadui puyatjusaikish diischauwaitji.  
<sup>4</sup> Tujash niig dutikamaitak ii waitiamujinak nii yajuakmayi,  
 tuja iina najaimatai aidaunak nii yajuakmayi.  
 ¡Iik niina pegkegchaujinis aents aidau eemtin  
 Apajuí suwimak susam waitiatatí tuyaji!  
<sup>5</sup> Niinak iina katseken nagki ijuajui,  
 tuja iina tudaujin shiig senchi waitkasaju ainawai.  
 Nii waittsamunum agkanmagat jukimui,  
 tuja nii ijunbaunum iinak etsaentamjauwai.  
<sup>6</sup> Tuja yaunchkek iik uwig kuitamkacham wagaka  
 wekagama numamtuk aayaji.  
 Tujash yamaik Tuke Pujuu iina tudaujinak  
 niyai akikmatjamkauwai.  
<sup>7</sup> Niinak shiwag aidau shiig senchi suwimawagmayi,  
 imatikamash niig ayatak yunumkabi,  
 nuniak makichkish chichakchabi,  
 uwig maatasa juki ematia numamtuk

jukiag emagmayi maatasag.

Tuja uwig uje tsupigmash takamtak tepegama numamtuk makichkish chichakchabi.

<sup>8</sup> Pegkegchaun takamsachunak achikag jukiagmayi, dutika juwagtaish niina ayamjumainuk makichkish atsubi.

Tuja uiinak makichkish puyatjukchagmayi, ayatak ajak ajaamu tegai ajapmaina numamtuk, mina aentsug aidau tudaujin maawagmayi.

<sup>9</sup> Niig makichkish magkagtuachu aig, tuja waitjtnakesh waitjuachu aig, aents pegkegchau aidau jinau ukusbaunum nuna yantamen ukusagmayi.

<sup>10</sup> Nunak Tuke Pujuu dutik waitkastajai tusa wakekauwai.

Niig aents aidau tudaujin waittsau asa, kuashat mijan jatsuk iwaku pujus, nii wegantu aidaun uchiji wegantu aidaunak ashí wainjatnai.

Tuke Pujuu nii dutikatnugin anentaime tua duka nunú aents waittsamunum betek uminkatnai.

<sup>11</sup> Imanik waitus nagkaikiu asa, dekaattawai dekas Apajuí umigbau ima pegkeja nuna, nunik shiig aneas juwaktinai.

Apajuín inake chichaman betek umina nunú aents aidau tudaujinak entsaktinai, dutikak agkanmitkatnai.

<sup>12</sup> Nuadui Apajuí niinak senchigtin ashí eme anentsa diítai awajsattawai.

Wagki niig pegkegchau takamsachuitak, pegkegchaun takamsaujai betek, aents aidau uwemjatnume tusa, dita tudaujin dita mantamnamainun nii mantamdauwa duwi.

## 54

*Tuke Pujuu anenkeg atakesh nagkankashtinai*

<sup>1</sup> Isaías chichaak:

“Nuwa uchin uchigmachu aidauwah, shiig aneakjum kantamtai senchi kantamatajum, Apajuí chichaak:

‘Nuwa uchin uchigmachu asamtai, idaisamua duka aishinnun nagkaesau uchigtin atatui’, tawai.

<sup>2</sup> Israel aents aidauwah, atumin aakjum aina nunú puyattsuk nuni senchi múun awajsatajum,

dutikajum daek esajam yajuakjum nunú achimtika jigkaktin numi shiig ajigtajum.

<sup>3</sup> Ame wegantu aidauk shiig kuashat yujaktatui, nunikag tikich nugkanum shiyakag makichik yaaktakesh atsaunum dita yaaktamak batsamsagtinai.

<sup>4</sup> Ishamkagtukaipa, wainka pegkegchau chichagmak achatnaitme, dushikiamash achattame.

Datsa asam uchijum atsau asamtai, dushikiam wekaeyum duka kajimatkita. Ame wajemea pujamin dushiktamainakui, datsaamin ayum duka yamaik nunikchattame.

<sup>5</sup> Wagki Apajuí amina najapauwa nunú nuwa nuwatkamujai betek awajtamsattawai. Niina daajig Tuke Pujuu ashí senchigtin tutayai.

Amina ayamjupak uwemtijamna duka Israela Apajuí pegkejam ashí nugkan jajutua awai.

<sup>6</sup> Amek nuwa muntsugtaitak idaisam pujus waitu pujuuwama numamtuk waitu pujubiume. Tujash niina aishi ataktu awagki tsagkujung



jumaina numamtuk,  
Apajuí untsugmawai midau ati tusa,  
nuadui juna aatus tujamui:

<sup>7</sup> 'Ujumchik tsawantai pachitsuk idaisamjame,  
tujash wika wait anenkagtinaitag iman asan,  
ataktu awagkin minai itattagme.

<sup>8</sup> Amina kajegkan, ujumak tsawan uumjukan idaisamiagme.  
Tujash makichkish kajimatmainchaun aneau asan,  
wait anenjabiagme',  
tusa Tuke Pujuu amina uwentijamjauwa nunú tawai."

<sup>9</sup> Tuja junashkam Apajuí chichaak:

"Yumi ashí nugkanum piyajua nunú tsawantin  
wi Noén chichagkun:

'Ataktu awagkinuk nugkanmak yuminak  
pimuntijashtinaitjai' tiuwaitag dutiksanuk yamaishkam tajai.  
Ataktuk aminak kajegkashtatjame,  
tuja awantanashkam awankashtatjame.

<sup>10</sup> Muja aidau tikich yantamnum shimakuish,  
tuja yumpuna kakekuish,  
wi amina anejam nunak anentaingnak yapajiashtinaitjai,  
tuja utugchat akuish, epegkea pujutai atinun  
chichaman umikuitag dushakam yapajinashtinai,  
tusa Tuke Pujuu  
amina wait anenjamja nunú tujamui",  
tiuwai Isaías.

*Yamajam Jerusalén*

<sup>11</sup> Apajuí chichaak: "¡Jerusalégkah,  
aminak anentaimin ichichtugmatsuk kajimatki idaitamsagmatai,  
dase tukua tukuam pegkegchau wajasum nunak  
ataktu nagkaman iwajattagme!

Dutikakun kaya zafiron aepkan nuwi ekenin  
kaya pegkejuch akik aidauwai peejan umiktatjame.

<sup>12</sup> Kumpin aidaunak kaya rubí tutayai najanattajai,  
tuja waiti aidauk kaya berilo tutayai najanamu agtatui.  
Untsu yaaktanak kaya pegkejuch aidauwai peejattajai.

<sup>13</sup> "Amina uchijum aidaun,  
nawanjum aidaujai ashí jintintuattajai,  
dutika ai, ditak agkan shiig batsamsagtinai.

<sup>14</sup> Amek shiig takauwaitam duwi senchi atatme,  
nuadui makichik aentskesh inapakug waitkagmaschatnai.  
Tuja sapigmamush atsgtamtinai,  
ishamain antakum sapigmam duka ataktuk  
sapigmakchatnaitme.

<sup>15</sup> Makichik aentskesh jetepakug,  
wi inagbau asagkesh jetepakchatnai,  
dutihjamkuish duka ame depetkatnaitme.

<sup>16</sup> "Juju shiig antukta:

Aents jiju ukuiyag najanin aina nunak wi najanauwaitjai,  
tuja aents magkagtak utugchatan  
aepin aina nunashkam wiki najanauwaitjai.

<sup>17</sup> Tuja wi najankauwaitag nuna nagkaesaun magkagutai  
amina mantamainun najanauk makichkish atsawai.  
Nuadui amina mantamatag tuidauk ashí depetkam  
itatmikagtinaitme.

Wika mina inakeg aidaunak:  
'Depetmatan suwajai' " tusa Tuke Pujuu tiuwai.

## 55

*Apajuí niina aentsji aidaun ijumjatin*

<sup>1</sup> Apajuí chichaak:

“Aents kitamauk minai taa uwagti.

Kuichik atsugbau aidauk minai kaunawag trigo, vino, leche aidaun akikmatsuk yuwatnume.

<sup>2</sup> Waittsa takasa kuichik jukimua duka

yutai sumaka yuwa yapajamu megkaekashtinaitkuik, wainka akikmakaik ajapmaitsui.

Wi tajam nunú antukam yutai pegkeg yuwatnaitme.

<sup>3</sup> “Juwi minai kaunajum wi titatjim nunú antuktajum, nuniakjum iwaku pujustajum.

Wi Davita aneau asan anagkuawaitag nuna

umiakun, atumjai chichaman umiktatjai

atakesht yapajinashtin tuke asatnun.

<sup>4</sup> Juju shiig antuktajum,

wi niinak mina chichamjun ashí tikich nugkanmaya aidaunash

jintintuati tusan apu awajsauwaitjai.

<sup>5</sup> Israel aents aidauwah,

aents tikich nugkanmaya aidau untsuktinaitjume.

Dutikawagmin atumin waipachu ainayatak,

tupi tupikainakua kautjamawagtinai.

Wi nunak atumin wait anenjamjatnume tusan dutikattajai.

Witjai Tuke Pujuu, Israel aents aidaun Apajuí pegkegmanuk.

<sup>6</sup> Tuke Pujuu wainkatag takugmek yamaikiuchia duik egaktajum,

tuja tikijuch puja duik untsutash untsuktajum.

<sup>7</sup> Pegkegchaun takau aina duka nuninun wekaetutsuk idaisati,

tuja pegkegchaun anentaimtin aina dushakam nunak idaisatnume.

Ataktu wakitkijum Tuke Pujuu tsagkugkagtina nuwi minitajum,

nuniagmin nii wait anenjamjagtatui.”

<sup>8</sup> Tuke Pujuu chichaak:

“Wika atumjai betekak anentaimtsujai.

Nuigtush wi takamua duka atum takajum nujaig betekchawai.

<sup>9</sup> Tuja mina anentaimtajuk,

atumi anentaimtajin nagkaesauwai,

mina takatjushkam atum takajum nuna nagkaesauwai”,

tusa Apajuí tujamui.

<sup>10</sup> Yumik nayaimpinmaya yutawai,

nunikash ataktuk nayaimpinmak waketsui,

ayatak nugkan uchupig ajak tsapamain emawai,

dutikamtai ajak aidau tsapawai,

nunik nejeku juuka yutayama

<sup>11</sup> numamtuk mina chichamjushkam

wi tibau umintsukek,

tuja wi wakegamua nunashkam dutiktisukek

wakitkig minaig waatsui.

<sup>12</sup> Atum achija yajuakam batsatjum duka

jiinjajum agkan shiig aneasjum,

atumi nugkemin wakettajum kaunattagme.

Nunika kaunajum muja aidau wainkujum,

shiig aneasjum senchi kantamtnaitjume.

Atum imatjumin muja aidauk, numi aidauk,

aentsjai betek uwejen awatiagtinai.

<sup>13</sup> Atumi nugkemin jagki ayá nunú jinaamtai,

pino aidau tsapaktinai,

tuja naja jinutai arrayán aidau tsapaktinai.

Nuna wainainak ashí aents nugkanmaya aidauk

Apajuín emematiagtinai.

Apajuí niina senchijin umikbaunak makichkish

tsaikchagtin ainawai.

## 58

*Ijagma pujusa Apajuí segamu*

<sup>1</sup> Apajuí mina chichagtak:

“¡Ishamkagtutsuk senchi untsumkata,  
uwija kachuji shinaujai betek senchi chichakta!  
¡Imatkum mina aentsug Jacob wegantu aina nunú  
pegkegchaun takamsamuji pachisam senchi chichagkata!

<sup>2</sup> Dutikakum tita:

‘Atumek minak kashi kashinig untsugjume,  
nuniakjum chichama unin najaneajum  
mina umigtuktasajum wakegagme.  
Nuniau asajum ii chicham uminkatna nunú  
sukagtusta tusajum segatjume,  
nuniakjum shiig aneagme Apajuí umigji’ tusajum.

<sup>3</sup> Tusa tayatkujum:

‘¿Wagkaik wainkaish Apajuí waipatsu nuniaish  
ijagmash pujutji?  
¿Wagkaik ijagmaish waitush wekaetaji Apajuí waipatsu  
nuniaish?’ tajume.

Tau asajum atumek ijagma pujusa Apajuí segatia  
nunú tsawantin waji sujakjum,  
atumi takagtamin aidaushkam shiig akitsuk kasagjume.

<sup>4</sup> Atumek ijagma pujusa Apajuí segatia  
nunú tsawantin jiyaniakjum, maaniakjum ijuni batsatjume.  
Apajuí atum ijagma pujusa segamun  
antugtukti takugmek, a antajaig takamaitsugme.

<sup>5</sup> Ijagma pujusa Tuke Pujuu segaji tayatku,  
imani batsatmawa duka Apajuínak shiig awagmatsui.  
Atumek kajis namaka uwet kasua wajama nunikjum  
tsunsuma pujusjum, jáanch wake besemag pujaku  
nugkutai nugkugjum yukunum tepajum nunú,  
ijagma pujusa Apajuí segaji, tajume.  
Nuniakjum juju Tuke Pujuunak shiig awagmawai, tajume.

<sup>6</sup> Tujash duka dekaskechui.

Mina shiig awajkati tutjukgumek,  
ijagma pujusam:  
Aents achikam chimpija nunú agkanmitkata,  
takamsachu aig jigkajam batsata nunú atiam agkanmitkata,  
inaku waitkatai batsata nunú agkanmitkata.  
Dutikakum shiig takashtai, pegkegchau aina duka  
ashí idaisatajum.

<sup>7</sup> Nuniakjum, atumdau yutai ajutjamaina nunú  
tikich aents nujantai waituidau ajamsatajum;  
tuja aents jenchauwa duka atumi jem jukitajum;  
tuja nugkumainji atsakuishkam,  
jáanch susatajum nugkugti.  
Dutikakjum tikich aidaushkam tuké yaitajum.

<sup>8</sup> Nunú dutikakjumek, kashikmas etsa jiinak  
etsantama iman atatjume.

Nuniagmin mina imanjua nunú uyuntamsagtatui.  
Tuja pegkegchau takataijum aidau tsupimakbaujai betek wajas awa  
duka wamak esamattawai.

<sup>9</sup> Nunikmatai untsugkugminig aiktatjime;  
tuja yainkata tusajum senchi untsugkugminishkam,  
wi ayaakun: ‘Juwí pujajai’, titatjime.  
Tikich aents aidau waitkajum nunú idaisajum  
pegkegchau chichagtsuk, nuigtush wainka tsanumjutsuk,

<sup>10</sup> yumainji atsujush amek anenmamsam ajampeakum,  
tikich waituidau yayakjumek,  
suwenum jii kegak tsaptin emama numamtin atatjume.  
Tuja amina pegkegchajum suwe wajas awa duka,

yamai pegkeg takagmin, etsa tutupit wegak  
etsantug tsaaptin emama iman wajastatui.

<sup>11</sup> Wi aminak tuké uyuntsattagme,  
dutikakun uwegshunum pujakminish,  
shiig kuashat yutain amastatjame,  
dutikakun senchintikattagme,  
nuadui ajak ajakbau yumi ukattai asa pegkejama iman,  
nuigtu yumi pukuni jiinu tuke amuechau ama iman atatjume.

<sup>12</sup> Atum wegantu aidau  
yaakat yaunchuk tsaikbau aidau ataktu jegamjagtinaí.  
Dutikainak nunú jegamku kaya aepkamu aidau  
yumpunawai tusa shiig emetug umikagtinaí.

Dutikau asagmatai:  
'Yaakat peejamu tsaikbaun ataktu iwajin aidau',  
nuigtushkam: 'Jega tsaikbaun iwajin aidau'  
tuu adaikagtinaí."

*Ayamtai tsawan pachisa jintiamu*

<sup>13</sup> "Tsawan ayamtaya nunú ajantusjum diistajum,  
tuja mina tsawantug pegkegma duik  
atumi takatjumek takasaigpajum.  
Nunú tsawanta duwi shiig aneasjum ima Tuke Pujuu  
pegkegma duke ememattajum, tibauwa nuwi anentaimsatajum.  
Nunú tsawantin atumi takatjum,  
nuniachkush atum wakegamukesh  
chichamju yujatsuk ayatak ajantusa diistajum.

<sup>14</sup> Nunú umiakjuminig,  
shiig aneasa pujutan wi amastatjime.  
Nuigtush nugka múun aidau apuji awajsattajime.  
Dutikakun wi atumi apachjum Jacopan  
anagkuawaitag nuna nugkan amastatjime.  
Junak dekas wi umiktinjun tajai", tiuwai Tuke Pujuu.

## 60

*Yamajam Jerusalén*

<sup>1</sup> Isaías chichaak:

"Jerusalégnunia aidauwah,  
atumnak Tuke Pujuu imanjiya nunú  
ijipaku asamtai, winchamtin wajasugme.

<sup>2</sup> Untsu nugkanak suwe dukuakui,  
nuniaí yaakat múun aidau suwe ijike,  
untsu atumnak Tuke Pujuu etsantug wajantugmattawai,  
nuniak niina imanjiya nunú wantintugmakagtatui.

<sup>3</sup> Aents nugka muunnumia aidauk  
atumin etsantug awa nuwi miniagtatui,  
tuja apu aidauhkam atumin tsaaptin awa nuwi miniagtatui.

<sup>4</sup> ¡Jerusalégnunia aidauwah,  
ayampajum ashí niimsatajum,  
ashí aents aidauk Jerusalén ijunainawai.  
Atushtanmaya aidau dita patayi aidaujai ashí  
yajumakag uchin pagkuaku mininawai!

<sup>5</sup> Nunú imanik kaunainak,  
nayantsanmaya waji aidau,  
tikich nugka múun aidau maya waji aidau  
takuinaku mininaku shiig aneastinaitjume.

<sup>6</sup> Madiágnunia aidau, efánmaya aidau  
camellonum entsatkau minidau waintinaitjume.  
Tuja Sabá nugkanmaya aidauhkam  
ashí camellon yajuakag oron, kugkuin  
inciensojai patajag minidau wainkujum,  
mina emematjitnaitjume wi dutikau asamtai.

<sup>7</sup> Tuja Quedarnunia aents aidau

tagkuji ikaunmawagtata duka,  
 Nebaiotnumia uwig tsakat aidaun ikaunmawagtata nujai  
 ashí Apajuín shiig anemtiksatín altarnum pataijum apeattagme.  
 Aatus Apajuí niina jee pegkegma nunak nuni pegkeg awajsattawai.

<sup>8</sup> “¿Aush yujagmijai betek nanaakag,  
 paum dita pasugken shimuwama numamtuk  
 minina dusha ya ainawa?

<sup>9</sup> Duka lancha múun Tarsisnumia aidaun,  
 atumi uchijum aidaun yajuakag Tuke Pujuu  
 atumi Apajuíjum senchintijamna nuna emematiagtatus  
 oron, plata aidaujui yajuak mininawai.

<sup>10</sup> “Apajuí atumin kajegtamak suwimkan amasajui.  
 Dutijamayatak yamai wait anenjamjau asamtai,  
 aents tikich nugkanmaya aina nunú  
 yaakat peejamu aidaun tsaikbauwa nunak ataktu peegekeg umikagtatui.  
 Tuja apu aidauk amina inakem agtatui.

<sup>11</sup> Tikich nugkanmaya apu aidaun dita aentsji aidaujui  
 waji aidaun ikaunmawagtín asagmatai,  
 Jerusalégka waitijig kashish, tsawaish tuke ujaim asatnai.

<sup>12</sup> “Ashí aents tikich nugkanmaya aidaun  
 atumin takagtamtan dakituidauk ijinam agtinai.

<sup>13</sup> Apajuí Jerusalégnumia aidaun chichajak:  
 ‘Libanonmaya waji aina duka, numi dakaja jegamtai shiig pegkeg:  
 pino, abeto, cipre aina nujai  
 ashí wi pujusa inamjatnún etegkauwaitag nuwi  
 mina jegag awa,  
 nunú iwaja shiig pegkejuch awajsatnún ikaunmawagtínai.

<sup>14</sup> Yaunchuk atumin waitkagmajaku aina  
 nuna uchiji aidauk atumin inake waigtatui,  
 tuja atumin yaunchuk dakitjamajaku aidauk  
 atumin tikishmatjamag, Jerusalégkan chichajuinak:  
 “Tuke Pujuu, Israel aents aidaun Apajuíji  
 pegkegma nuna yaaktajiyai”, wajagtínai.

<sup>15</sup> Atumek kajimatki idaisamu, kajegtai ayugme.  
 Tujash nunak wi yapajian  
 atumin imanjumek tuke atin ati titatjai.  
 Nuadui atumek ajumaish shiig aneasjum pujustínaitjume.

<sup>16</sup> Tikich nugkanmaya aidaun atum yuwatnún  
 yutai shiig pegkeg aidaun ikautjabiagtínai,  
 tuja apu aidaushkam waji akik aidaun  
 anentag amasagtínai.  
 Nuna Jerusalégnumia aidaun wainainak  
 wi Tuke Pujuu, senchigtín, Israel aents aidaun  
 uwemtínaitag nuna dekaajuawagtínai.

<sup>17</sup> “Witjai Israel aents aidaun Apajuíjinuk,  
 nudiau asan, agkan shiig takainak batsamsatnume tusan agkan pujutan,  
 waitjutsuk shiig takatan jintintuattajime.

Dutikakun bronce amamainaitkun dekas oron amastatjime,  
 tuja hierro amamainun dekas platan amastatjime,  
 tuja numi amamainun dekas brancen amastatjime,  
 tuja kaya amamainun hierron amastatjime.

<sup>18</sup> Atumi nugkeminig maaniamuk makichkish antuekashtínai,  
 tuja yaakat tsayamush atumi nugkeminig  
 makichkish atsutnai.

Nuadui Jerusalén peejamua duka  
 “Uwemtai” adaikatnaitjume.  
 Untsu waitiji aina nunú “Dakujutai” adaikatnaitjume.

19 “ Tuja etsantug tsaaptin wajas  
 ajumaish tuke atina duka witjai.  
 Nuadui atumek etsa etsankui yujasmi,  
 tuja nuniachkuish nantu kashi etsantak tsaaptin  
 weakui yujasagmi tusagmek batsamchattagme.  
 20 Witjai Tuke Pujuu atumi Apajuújinuk.  
 Nuadui etsag makichkish akaikig megkaekashtinai,  
 tuja nantushkam etsanbaujinak kajinkashtinai.  
 Wi ajumaish atumi tsaaptinjum tuke atinaitjai.  
 Nuadui atum wake besemag pujamuk atsugtamiagtinai.

21 “ ‘Atumi aentsjum aidauk shiig anentaimkau  
 eme anentsa diitai, nugkeesh atantam achatnaitjume,  
 tuja waji ajakaitkuish wi ajakmamu atinaitjume.  
 Wi nunak mina imanjun iwainaktasan dutikattajai.  
 22 Kuashtachu aina nunú yujaka mil aents wajastinai,  
 nunú yujaka nugka múun wajastinai.  
 Wi nunak nunú tsawan jegakui wamak dutikattajai.  
 Witjai dekas Tuke Pujuunuk’, tawai Apajuú”, tiuwai Isaías.

## 61

*Israel aents aidaunum uwemat taatin pachisa etsegkamu*

1 Tuke Pujuu inake chichaak:  
 “Apajuú minak ujudauch aidaun yamajam chichaman ujakti,  
 dutikak waitkam batsata nuna anentain ichichtugti,  
 tuja achikbau aidaunash agkanmitkati,  
 dutikak achikam chimpija nunashkam  
 agkanmitkati tusa awetine.  
 Nuadui niina Wakani minai awai.  
 2 Nuigtushkam Tuke Pujuu  
 iina wait anenjamjatnuk tsawan jegattawai,  
 tuja nunú tsawantin Apajuú iina shiwaaji  
 waitkagmaina nuna depetuk, uwemtijamjatnuk  
 tsawantak jegattawai tusam etsegkata tusa awetine.

“Tuja aents wake besemag batsatunashkam  
 anentain ichichtugti tusa awetine.  
 3 Israel aents aidau dita shiwaaji depeteam  
 buutu batsata nuna shiig aneastinme,  
 tuja yukuun ukatmama batsata nuna  
 dakunkut anentain susati tusa awetine.  
 Tuja wi agkanmitkamú asag, numi roble  
 Apajuú ajakbau pejkejush amain aina iman asagmatai, tikich aidau chichajuinak:  
 ‘Roble katsujam tegamainchau’ tiagtinai.

4 “Tuja yaunchuk yaakat tsaikbau aidau  
 tuwasua wegaka nunú Jerusalégnumia aidautigum  
 ataktu jegamjajum yaaktamkatnaitjume.  
 5 Dutikawagmin aents tikich nugkanmaya aidau  
 kaunawag tagkuji aidaun, ajajum uva ajakbau aidaujai  
 kuitamjutpakagtinai.

6 “Tuja atumnak ‘Sacerdote aidau,  
 Tuke Pujuun takajin’ tujamiagtinai.  
 Atumek yutai tikich nugkanmaya aidau  
 shiig pegkeg yutinaitjume.  
 Tuja nugkutai aidaushkam pegkeg iwajamu aidau  
 tikich nugkanmaya iwagmamtainaitjume.  
 7 Atumek mina aentsug ainayatkujum  
 shiig kuashat datsan chichajam,  
 busainaku dushikiam kuashat waittsau ainagme.

Nuadui nuna nagkaesau atumi nugkem  
waji aidaujui shiig kuashat jukitnaitjume.  
Dutikajum ajumaish tuké shiig aneasjum pujustinaitjume.  
<sup>8</sup> Apajuik waitjutsuk shiig takamua nuna aneawai,  
nuniak kajegdayat, magkagtut aina nunak kajejawai.  
Nuadui niina aentsji anagkuamunak  
makichkish ewaetsuk umiktinai.  
Dutikak chicham tuke atinun ditajai umiktinai.  
<sup>9</sup> Dutikau asamtai, dita wegantu aidauk  
tikich aents aidaun nagkaesau shiig kuashat agtinai.  
Ashí aents aidauk nuna diisag:  
‘¡Tuke Pujuuwap ditanak pegkegnum yumigjauwaita!’ tiagtinai.

<sup>10</sup> “Tuke Pujuu minak shiig anemtijawai.  
Apajuí minak dakunkut pujutan sujawai.  
Apajuí minak uwemtijuje.  
Apajuí minak shiig pegkegnum kuitamjuke.  
<sup>11</sup> Nuadui jigkai ajaamu tsapaama numamtuk,  
tuja ajak ayaunmaya tikich ajak tsapaama numamtuk,  
tsanumtsuk shiig takatan  
shiig aneasa pujutjai ashí aents aidaunum  
waji ajakaitkuish, Tuke Pujuu tsapapitnai.  
Nuadui shiig aneenak kantamiagtinai.”

## 63

*Apajuí Israel aents aidaun ayamjak edomnumia aents aidaun ijinatin*

<sup>1</sup> ¿Yaita aush edomnumia yaakat múun  
Boshrá tutaya nuwiya jáanch kapantui egkekbau tumainun  
shiig pegkejan nugkuaju ishamain mina dusha?  
Nunak wi depetmaktinun iwainajai,  
wika senchigtin asan uwentikagtumainaitjai.  
<sup>2</sup> ¿Wagka uva naja najam jáanch kapantu wegama  
imanush jáanchjumesch wajasuita?  
<sup>3</sup> Junak imanikjai wiki uvan najakun,  
makichkish yainkachaje.  
Senchi kajekmajai, nunikan mina shiwag aidaun  
suwimkan susamjai.  
Dutikakun senchi kajeku asan, tepegka ijinmaina imatikamjai,  
dutikai nuna numpe aidau  
tsakiantak jáanchjuí ukatjukmae.  
<sup>4</sup> Nunak dutikamjai mina aentsug aidaun ayamjakun,  
mina shiwag aidau ijinatin tsawan jegau asamtai.  
<sup>5</sup> Mina yainmainush atsuash tukaman  
makichkish wainkachmajai,  
nunikan anentai jegachmajai.  
Nunikan senchi kajekbaujui mina senchigjai depetmakmajai.  
<sup>6</sup> Shiig senchi kajekbaujui  
aents nugka muunnumia aidaunak  
tepegka ijinmaina numamtuk ijinabijai.  
Dutika ai numpa saeki akaikibi.

*Apajuí Israel aents aidaun wait anenjatín*

<sup>7</sup> Isaías chichaak:  
“Apajuí anenken pachisan chichaakun,  
nii jutiin ayamjutpak kuashat dutikauwa nuna  
anentaimtusan kantamatasan wakegajai.  
Apajuik Israel aents aidaun wait anentau asa  
niina anenkega nuna ditan iwaintak kuashat yaigkui.”  
<sup>8</sup> Apajuí chichaak:  
“Ditak mina aentsug asag, mina uchig,  
mina nawantug aina duwi  
intimjutmainchau ainawai.

Nuadui dita pegkegchaujig kuashat aig,  
wait anentug uwemtikjauwai.

<sup>9</sup> Israel aents aidaun waitkagtaik,  
niig tikichin akupkag ayamjukchauwai,  
dekas nii Apajui taa ayamjukui.  
Apajuik niina anenken, niina senchijin aatus,  
Israel aents aidaunak wait anentak  
tuké ayamjuk uwemtiknai.

<sup>10</sup> Imatika yayamash Israel aents aidauk intimjuinak,  
Apajui pegkegman ikajejaku ainawai.  
Nuadui ditan pempeentuki shiwaajui  
itugmaina numamtuk ditajai maaniauwai.

<sup>11</sup> Imanik waituinak yaunchuk Moisés  
dita apachji aajaku aidaun jiija yajuak  
uwemtikjauwa nuna anentaime tus chichainak:  
'Moisés Israel aents aidaun apuji aajakua nunú  
piipich asantai, namak Nilonum ajugkam jakeun  
jiikiuwa dusha Apajuish ¿tuwi pujawa?  
Tuja Moisésai Niina Wakani pegkegman  
apusauwa dusha Apajuish ¿tuwi pujawa?

<sup>12</sup> Apajui niina senchijijai Moisésan uyunajakua dusha,  
tuja niina aentsji aidau ishamainun ukumtikak,  
atakea duish kajimatkishtinun niina senchijin iwainak  
nayantsan ukuyauwa dusha ¿tuwi pujawa?

<sup>13</sup> Caballo mujanum weakush atakuinag iyauchua numamtuk,  
nayants buku wajasbaunum initak shimakush,  
atakuinjashtinme tusa umikua dusha Apajuish yamaish ¿tuwi pujawa?

<sup>14</sup> Apajui niina aentsji aidaun baka aidau nainnum yujau  
wakeen nugka pakanum utsanawag  
ayamama numamtuk ayamtikna dusha  
Apajuish ¿tuwi pujawa?' tiagtinaí", tiuwai.

Tuja inagnamua nuna Isaías chichaak:  
"Apajuin Wakani ditan uyuntsauwai.  
Aatus niina imanjin ashí iwainak ekemsauwai", tiuwai.

*Apajui yainkati tusa augbau*

<sup>15</sup> Israel aents aidau Apajuin aujainak:  
"Chah, Apajujuh, ame pujutaijum  
nayaim pegkegma nuwi pujusam antukta.  
Amek jikamsa anejatchau dekaepaji,  
tuja ame senchigtinaitam dusha iwainkagtatsme.  
¿Amesh jutiish wajuk diijatme?  
Atsa amina wait anenkagtutaigmek ¿amuekaek?

<sup>16</sup> ¡Ametme jutiin apajimek,  
Abraham niina uchijichu anenjamkuish,  
tuja Israel pachipachkuish,  
ametme iina apajimek!  
¡Ametme iina tuke uwemtikagtinmek!

<sup>17</sup> Aminí kanaktinme tusamek tukagtipa,  
tuja intimkiu atinme tusamesh tukagtipa.  
Amina inakem ainag nunú,  
amina aentsjum maki makichik wegantu  
aina nujai aneakmek, ataktu wait anenkagtugta.

<sup>18</sup> Amina aentsjum ame etegkamu aina duka  
dita nugkeenig ujumak tsawanchik batsatui.  
Ame emematku ijuntaiya nunak  
iina shiwaaji aidau pegkegchau awajainawai.

<sup>19</sup> Ii aidautik amina chichamem umitsuk,  
nuigtush aminuchu amaina numamtuk batsatji.  
Wait aneam amina anenkem  
ataktu iwainkagtukta", tiajui.



## 64

<sup>1</sup> Apajujuh, utusamek nayaim ujaim  
 akaikim nugká taakum muja aidau pegakam,  
<sup>2</sup> jii kegak jagki kagakun apegama numamtuk,  
 tuja dutikachkush yumin ukuwama numamtuk  
 awajkam tusa wakegaji.  
 Nuna amina shiwaajum aidau wainainak,  
 Apajuik ima ameketam nuna dekawagtinai.  
 Tuja aents nugka muunnumia aidaush ishamjamainak  
 kujaidiagtinai.  
<sup>3</sup> Kuashat ishamain aidau iwainajuitam nunú  
 iina uwaktamkauwai.  
 Nuadui muja aidaush amina emtimin  
 senchi buchitiagmayi.  
<sup>4</sup> Aminí kajinas anentaimaidau yayaakum,  
 ame ishamain aidau iwaintujuitam dutika  
 tikich apajui niina kajitus anentaidaun yayaak,  
 imanun ditan iwaintukuk yaunchkesh makichkish wainkachbauwai,  
 tuja antutkesh antushtayai.  
<sup>5</sup> Aminak aents shiig aneas pegkejan takak,  
 chichamjum umiktina nuna  
 aneaku puja nunú shiig awajtamui.  
 Amek ii pegkegchau takaku yaunchuk  
 nagkamsaish ikaje pujag duwi kajekume.  
<sup>6</sup> Ii aidaulik makichik aents tsumaina iman ainaji.  
 Ii pegkeg takaji taji dushakam jáanch tsuwata iman ainawai.  
 Ashí ii aidaulik duka kagaka kakekaujai betek ainaji.  
 Tuja iina magkagtutaijija nunú dasejai betek  
 tukugmi ajapjamainawai.  
<sup>7</sup> ¡Amina segapauk, tuja amina nii wait anenjuti tusa kakanmamukesh  
 makichkish atsawai!  
 Nuadui amek iina pegkegchaujin uumka idaikagtusume.

<sup>8</sup> Apuh, ii nunin ainajinish, ametme iina apajimek.  
 Ii aidaulik duwejai betek ainaji,  
 untsu amek aents duwen namuka najannujai betekaitme.  
 ¡Iik ashí ame najankamu ainaji!  
<sup>9</sup> Tuke Pujuwah, imanikmek kajekaipa,  
 tuja iina magkagtutai aidaush pachikaipa.  
 ¡Kame, iik amina aentsjum ainaji!  
<sup>10</sup> Yaakat ame etegkamu aina duka  
 itajak wajas bashiak ainawai.  
 Jerusalégnak iina shiwaaji aidau tsaikam  
 pegkegchau wajas awai.

<sup>11</sup> Amina jem pegkegmanum iina apachji aidau  
 amina emematjamajaku aina nunak  
 jiiyai apea ashí tsaikajui.  
 ¡Ii ima senchi wakesa diin ayag duka  
 tsaikam pegkegchau wajas awai!

<sup>12</sup> Tuke Pujuwah, imatikau aina nuna iikmakti  
 tusamek amek ¿yajiatkashtatmek?  
 Atsa ¿ayatkek idaisattam?  
 Nuniakum aan senchi waitkastinme  
 tusamek ¿idaikagtustatam?

## 65

*Apajuin shiwagbaunak nii suwimkan suwawai*

<sup>1</sup> Apajuí chichaak:  
 “Aents makichkish mina segatchau aajabia

nunú mina kautjuinawai;  
 tuja aents mina egatkachu aajabia nunú  
 yamai mina waituinawai.  
 Mina emematjuchu aajabia nuna chichagkun:  
 'Juwi pujajai', tibajjai.  
<sup>2</sup> Aents intimkiu aidau  
 wijai shiwagmagainak,  
 dita wakegamun pegkegchaun taka yujau aina  
 nunú segatainakui yaigtasan tuke dakabiajai.  
<sup>3</sup> Nunú aents aidauk mina igkuntuawag  
 tuke inastuinawai.  
 Dita aidauk apajuímtai dakumka najanamun  
 emematuinak,  
 kuntuu maawag ikam yujasag, kaya pataja  
 najanamunum nuwi patainiag apé yujau aajabi.  
 Nuigtushkam ladrillo najanamunum kugkuin incienson  
 apé yujau ainawai.  
<sup>4</sup> Nunú aents aidauk ukumatainum pekamá yujayanume,  
 nuninak waanum uumak batsamas tsawampa  
 batsamianume.  
 Nunú aents aidauk Apajuí dakitamun  
 kuchi nejen yuyanume,  
 nuigtush dakumkamu emematku kuntu  
 maamu aidau painkamun yumiji ollanmak tsumain aajabi.  
<sup>5</sup> Nunú aents aidau chichainak:  
 'Antijatkaigpa iik Apajuí etegjamu asa  
 pegkejam ainaji', tuinawai.  
 Nunú aents aina duka jii tuke,  
 tsawantai keeka aama numamtin ainawai.  
 Jii bukuituji dujin amajama  
 numamtuk minak waitkajuinawai", tiuwai.

*Nayaim yamajam nugka yamagmajai*

<sup>17</sup> Apajuí chichaak:  
 "Antuktajum nijah, wi yamajam nayaimpin,  
 nugka yamagmajai najanattajai.  
 Tuja yama nagkamchak nayaim  
 nugkajai aajakua nunak kajimatkiagtinaí.  
 Makichkish nunak tuke adeagchagtinaí.  
<sup>18</sup> Wi nuna yamagman najanatin asamtai,  
 ajumaish tuké shiig aneastin atajum.  
 Wi yamajam Jerusalégkan shiig pegkejan  
 najanattajai;  
 dutikamtai nuwi aents aidauk shiig aneasag batsamsagtinaí.  
<sup>19</sup> Tuja wishakam Jerusalégkan diisan  
 shiig aneestatjai;  
 nuniakun mina aentsug aina nuwishkam  
 shiig aneestatjai.  
 Jerusalégnamak jaku buutbaush atsutnai.  
<sup>20</sup> Nunú nugkanmak uchi akiina jaka megkaguk atsutnai,  
 tuja múunchishkam tsawanjin shiig ejetsuk  
 jauk atsutnai.  
 Tuja makichik aentskesh cien mijan ajamu jauk  
 múuntuch achatnai, datsauch atinaí.  
 Tuja cien mijanan ejetsu duka suwimak asamtai nuniktinaí.  
<sup>21</sup> Aents aidauk nunú yaaktanum jegamag batsamas,  
 trigon, uvan ajakmakag nuna nejen juukag yuwagtinaí.  
<sup>22</sup> Dita jegamkamunmak tikich  
 akiinag batsamsachagtinaí,  
 tuja dita ajakmamujinash atankiajag yujuachagtinaí.  
 Mina aentsug aidauk numijai betek  
 kuashat tsawan iwaku pujusagtinaí;

Wi etejamu aina duka dita takasbaujinian  
 jukiag shiig batsamsagtinai.  
<sup>23</sup> Dita aidauk Apajuí pegkegnum yumigjamu asag  
 wainak takainakug waittsachagtinai,  
 tuja dita uchiji aidaushkam  
 tsawan jegatsaigkik jakachagtinai.  
 Nunú uchi aidau wegantu aidaushkam  
 ditajai betek pegkegnum yumigjamu agtinai.  
<sup>24</sup> Eke dita untsujuinatsaig,  
 wiyá ditanak aiktinaitjai;  
 tuja eke chichakag ashimainatsaig,  
 wiyá ditanak antugkatnaitjai.  
<sup>25</sup> Lobo uwig tsakatjai jimagtuk yuwawagtinai.  
 Leónkak bueyejai betek chijichin yutinai.  
 Untsu dapi nugka yukukuntun yutinai.  
 Tuke Pujuu chichaak:  
 'Jerusalégnamak tikichin pegkegchau awagbauk  
 makichkish atsutnai' ", tiuwai.

## 66

<sup>1</sup> Tuke Pujuu chichaak:  
 "Nayaimpi mina ekemsa inamtaijui.  
 Untsu nugka nunuwai wi najamsa eketbau.  
 Atumek wi ayamsatnuk mina jegajuk  
 jegamjutmaitsugme,  
 tuja nunú jegamainchakam nugka etegkamuk atsawai.  
<sup>2</sup> Waji ayá nunak wiki ashí najankauwaitjai;  
 dutika ai nunisag juwajui.  
 Witjai Apajuínuk.  
 Wi nunak dutikauwaitjai.  
 Wika aents wakanin pimpiki pujusa  
 mina chichamjun eme anenta nuna diyakjai", tiuwai.

## Jeremías

### Jerusalén Judájai pachisa chicham etsegkamu

(1—25)

*Yama nagkamchaku agagbau*

<sup>1</sup> Profeta Jeremías Hilquíasa uchiji sacerdote wegantu, Benjamígka nugken yaakat Anatot pujujakua nuna, Tuke Pujuu chicham etsegtugkata tusa ausauwai.

<sup>2</sup> Tuke Pujuu Jeremíasan ausauwa nunak, Amónka uchiji Josías Judá apuji wajas trece mijan inamai, chichaman ujakui.

<sup>3</sup> Tuja nuigtushkam Josías uchiji Joaquim Judá wegantu aidaun apuji aajakua duishkam Apajuik Jeremíasnak ausauwai. Tuja Josías uchiji tikich Sedequías Judá apuji wajas inabaujin nantu Julion achiak, once mijanan ejeyuwa nunak, Apajuik Jeremíasjaig kuashta chichasui. Nunú tsawantin Jerusalégkan jetekag depetuk, Israel aents aidaun achijag yajuakajui.

*Apajuí Jeremíasan mina takagtusta tusa inagbau*

<sup>4</sup> Tuke Pujuu mina chichagtak:

<sup>5</sup> “Wi aminak eke akiintsuminig, mina chichamjun ashí nugkanum etsegtugkati tusan etegkauwaitjame”, tujutmayi.

<sup>6</sup> Tusa tujutkui wi ayaakun:

“Chah, apu Tuke Pujuuwah, wika tsakataitag nuniau asan jintiaja chichatnak dekatsjai”, tibaijai.

<sup>7</sup> Tusa tai nii chichagtak:

“Tsakataitjai tusamek tiipa.

Wi amina tuwi awemattagme nuwi amek wetatme, nunikam wi titatjam nunú etsegkattame.

<sup>8</sup> Makichkish ishambagtukakaipa

wi aminak kuitambagtagme,

wi nunak dekas umiktinjun tajai”, tujutmayi.

<sup>9</sup> Nuna tusa Tuke Pujuu wenujun achigtuk chichagtak:

<sup>10</sup> “Antukta nijah, aminak yamai nagkamas

aents nugka muunnumia aidaush,

nuna apuji aidaush antugtamkagtinun, tuja tsaiktinun,

ijinatinun, tsaikbau ataktu yaaktamkatnun

ajakmatnum senchintikajame”, tujutmayi.

<sup>11</sup> Nuna tusa chichagtak: “¿Jusha wajimpaya?” tujutmayi. Tujutkui wi ayaakun: “Anka almendro kanawegai”, tibaijai. Tusa tai Tuke Pujuu aijak:

<sup>12</sup> “Dekas tame, wika mina chichameg uminkati tusan antaku pujuttajai”, tujutmayi.

<sup>13</sup> Nuna tujuti ataktu chichagtak: “¿Jusha wajimpaya?” tujutkui wi ayaakun: “Ichinak ekenkamu kuwaak nujinmanini yantak ukagattak eketui”, tibaijai.

<sup>14</sup> Tusa tai Tuke Pujuu chichagtak:

“Nujinmaya juwaki tsumujiya aatus aents batsata nunak suwimkan susattajai.

<sup>15</sup> Dutikakun aents nugka muunnumia

nujinum batsata nunak ashí untsuktatjai.

Dutika ai nuna apuji aidaun kaunawag

Jerusalégnum waitaiya nuwi kaunawag,

yaakat peejamua nuna tenteawag batsamtusag,

Judá wegantu aidaun jeteke depetuk

achija yajuakagtatui.

<sup>16</sup> Nuni suwimkan susattajai,

aents aidaun mina umigtutsuk wainka apajuímtain

tikich aents aidaun emematin aina

nuna dakumak najanawag, nuna emematuinak

kugkuin incienson apenau asagmatai.

<sup>17</sup> Untsu amek umintsata;  
nunika weme wi amina titatjam nunú ashí etsegkata.  
¡Wainka ishankagtukaipa!  
Ishankagtakminig shiwagjai igkuniak  
sapijin kujaiti titatjame.

<sup>18</sup> Wi aminak yaakat peejamu utumainchawa iman,  
jiju hierro ajiamu kupinchauwa iman,  
tuja yaakat broncejai peejamu tsaika  
utumainchawa iman awajsajame.  
Judá wegantu aina nuna nugkenig,  
tuja dita apuji aina nujaiskam,  
sacerdote aina nujai nagkamas  
ashí aents aina nuna chichagkati tusan  
senchintikajame.

<sup>19</sup> Jetepakagtatui, tujash depetamkachagtinai,  
wagki wi amina kuitamkatasan,  
amejai pujau asamtaí.  
Witjai Tuke Pujuu ashí senchigtinnuk,  
junak dekas uminkatnun tajaí”, tiuwai.

## 2

*Israel aents aidau pegkegchaun takainak Apajuíjai shiwagmagawagbau*

<sup>1</sup> Tuke Pujuu mina chichagtak:

<sup>2</sup> “Jerusalén wetá, nunikam ashí aents aidau senchi unsumka chichagkum aatus Tuke  
Pujuu tawai tita:

“ Ame tsakat asam ima minak umigtin ayum nuna aneakjai.

Tuja yama nuwatkamu aishin aneemaina  
imatikam anentiume, nuniau asam  
uwejush ajakmamash tsapamainchaunum  
juki emaissh pataetugsam miniyume.

<sup>3</sup> Israel aents aidauk midau agtin etegkamu ayi,  
ditak ajak ajakmamu yama nagkamchak  
shiiig pegkejan nejegama iman aajabi.

Tuja ditan waitkainakuig,  
wi nunak suwimkan su ayajai.  
Nunak dekas dutikamujun’, tajaí”, tiuwai.

<sup>4</sup> ¡Israel aents aidauwah, Apajuí chichame antuktajum!

<sup>5</sup> Tuke Pujuu chichagtamak:

“Atumi apachjum aajaku aina dusha  
¿waji utugchatan waitjukajaya minash  
tupanjujush ainawa?

Dakumka najanamu pegkegchaun emematu yujau asag,  
ditashkam nuninuk wajasajui.

<sup>6</sup> Nunidau asag, dita apachji aidau  
Egipto nugkanum batsatun jiija yajuakan,  
uwejush yumi atsau, muja yumpunjau aidau,  
ishamain aents aidaush pujumainchau,  
makichkish nagkaemamainchau  
ishamain wegajunum wi kuitamsan  
emauwaitag nunak aneetsuk pachitkachajui.

<sup>7</sup> Wi atumnak juju nugka pegkeja juwi  
ajakmawag yuwatnume tusan ikaunmawaitjime.  
Tujash atum kaunajum mina nulgag pegkeg ayá nunú emesjauwaitjume.  
Nuadui mina nulgag pegkeg ayá duka tsumain awajsaugme.

<sup>8</sup> Sacerdote aidaush mina pachittsag inimsachu ainawai;  
tuja mina chichamjun jintinkagtin aidaush  
makichkish waitkachaju ainawai,  
apu aidaush pegkegchaun takamjuttssau ainawai,

tuja mina profetag aidaushkam  
Balan etsegtuinak, mina chichamjunak  
etseggkachu ainawai.

Nunidau asag dakumka najanamu aidaun  
wainak emematujaku ainawai.

<sup>9</sup> Nuadui atumnak, atumi uchijum aidaun,  
tijajum aidaujai suwimkan jukitnume tusan umigkattajime.  
Nunak wi Tuke Pujun dekas umiktinjun tajai.

<sup>10</sup> "Etsa akaetaiya nuni nayantsa ajuntajjin  
yaakat ayá nuwi wetajum,  
nuniakjum Quedar nugkanum aents awematajum.  
Dutikajum inimsatajum

<sup>11</sup> tikich aents dakumka najanamun emematin aina dusha,  
atum wajuakeajum ankampash  
nuna idayinak, tikichin nemaju yujau aina.  
Nunú aents aidauk wainka apajuímtai dakumka  
najanamun pegkegchaun emematin ainayatkush,  
yapa yapajiakuag wechau ainawai.  
Tujash mina aentsug aina duka dakumka  
najanamu aidaun yujajak, dekas wi  
Tuke Pujuu senchigtinaitag nunak idaitusaje.

<sup>12</sup> Nugka múunta duka nuna antuk  
puyatuk ishamak senchi kujawai.  
Witjai Tuke Pujunuk. Nunak dekas tajai" tiuwai.

<sup>13</sup> "Mina aentsug aidauk jimajan tudaun takamsaje:  
Yumi pukuni pujutan sukagtina duka witjai,  
nuniaig mina kajimatjukiag idaitusaje.  
Nuninak yumi aimtain chigkaejaun tikichin umikaje."

#### *Israel aents aidau*

*Apajuín umigkachaju asag  
suwimka jukiag waittsagbau*

<sup>14</sup> "Israel aents aidauk wainka inaku waitkataig ainatsui,  
Israel aents aidauk inaku waitkakai atinuk akiinachajui.

Tujash ¿wagka imatika waitkamash ainawa?

<sup>15</sup> ¿Wagka imatikash leónjai betek jetenakush  
senchish unsumainawa?

Dita nugkega duka yaaktaji aidau apegkam  
pegkegchau wajas bashiak awai.

Nuwi pujauk makichkish atsawai.

<sup>16</sup> Menfisnumia suntag aidau,  
Tafnesnumia aidaui buukmin tsaigtamjaje.

<sup>17</sup> Nunak wi Tuke Pujuu atumi Apajuíjum asan,  
kuitamka itamaitkujum mina kajimatjuki asajum  
dutikam asaugme.

<sup>18</sup> Tuja yamaish atumesh  
¿waji wakegakjumea

egiptunmaya suntag aidau asirianmaya aidaui  
atujatkatajum tusa ditajai chicham umikmi  
tusagmesh tajume?

<sup>19</sup> Atumek intimkiu, pegkegchau takamin ainajum  
duwi dekas nunin ainagme tama ajume.

Nuadui mina umigtichagtaish,  
waji utugchatak miniawa nunú wainkajum  
dekaskeapi titajum.

Witjai apu Tuke Pujuu ashí senchigtinnuk, nunak dekas tajai.

<sup>20</sup> Yaunchuk nagkamsajum wijai shiwagmagajum,  
mina umigtut dakitakjum:

'Apajuí umigtak dakitaji', tiuwaitjume.

Tau asajum, mina umigtutsuk

dakumka najanamu aidau nain aidanun emematkujum,  
numi kampuja aidau wakentin nuwa akika dutiktajjai betek wajasjum,  
pegkegchau takama yujayugme.

<sup>21</sup> Wi atumnak uva numiji  
dekas shiig pegkeg etejamu juki ajamaina  
iman amainun waji ajataitkuish ajauwaitjime.  
Tujash ¿wagka imanikjumesh pegkegchaush wajasugme?

¡Imaniku asagmin wainkatag takunush waintsujime!  
<sup>22</sup> Lejjajai nijamakjumesh, tuja jabón pegkeg aidaujai  
atum wakegamu nijamakjumesh,  
atumi pegkegchaujum makichkish esakaumaitsugme.  
Witjai Tuke Pujuunuk, nunak dekas tajai.

<sup>23</sup> Ibu pegkegchau ainayatkugmesh  
¿wajukeakjumea iik pegkegchauk takatsji,  
tuja dakumka najanamu aina dushakam  
emamatuinatsji tajume?  
Nijah, nugka Ben-hinom aajakua nuwi  
wakeen pujusjumes wajukin ayugme nunú adeagtajum,  
nunikjum dekaskeapi titajum.

Atumek camello numpajak emetnag  
pujuschamin wajama nujai betek ainagme.

<sup>24</sup> Atumek burro numpajak  
aishmag entsamjutkati tusa egak,  
dase dasentai mejea, mejea, mejea wajak  
tupikaki ikam akumkuig,  
makichkish emetnaitsu nujai betek wajagme.  
Imaniau asantai, aishmag egakug yupichuch igkuinai.

<sup>25</sup> ¡Israel aents aidauwah,  
sapatjinchau tupika yujasjum dawem ichiajaigpa,  
kitakai jinawaigpa! tusa tamash,  
atum chichaakjum:

Atsa, duka makichkish nunikchattawai,  
iik tikich aents aidau dakumkamun emematin aina  
nunú emematmi tusa wakegau asa,  
ditajai shimaji tusajum shimutjume.

*Israel aents aidauk dita pegkegchaujin suwimak suwam atin*

<sup>26</sup> Atumek kasa kasamkatatus wekagu wainkam  
datsaamama numamtuk, atumi apujum aidaujai,  
sacerdote aidaujai, profeta aidaujai ashí datsagtajume.

<sup>27</sup> Atumek numi chichagkujum:  
'Ametme iina apajimek', tajume.

Tuja kaya chichagkujum:  
'Ametme iina dukujig', tajume.  
Tujash atumek minak diigtsuk tuntupmatjagme.  
Nuniyatukjum ishamaainnum jegakjumek:

'¡Ayamkagtukta!' tusajum segatjume.  
<sup>28</sup> Tuja atum aidautijum atumek dakumka najanamu  
apajuima yujaujum dusha ¿wajukawaje?  
Atumi apajuimtai aidauk yaakat kuashta iman ainawai.  
Nunú aidau kaunawag atum ishama in igkuagminish  
ayamjutpaktinme.

<sup>29</sup> ¡Atumek minak tuke intimjutin ainagme!  
Nunin asajum minak wainkagmek pegkegchauk chichagtumaitsugme.  
Witjai Tuke Pujuunuk, nunak dekas tajai.

<sup>30</sup> Atumi uchijum aidauk  
suwimak suwakuish wainka dutikmainai,  
wagki imanik suwimka juinakush makichkish unuimainatsui.  
Atumek León kajeaujai betek  
mina profetag aidau ijinawaitjume.

<sup>31</sup> Tuja atum yamai uchi aidautigmeshkam  
Tuke Pujuu chichame antuktajum.

Wika uwejush nimpain asamtai,  
waittayama dutikankesh waitkachuitjime,  
tuja waa suwenum pujusa waittayama  
dutikankesh waitkachuitjime.  
Dutika waitkashtayaitkugmesh ¿wagka iik  
agkan batsatji, nuniau asa ataktuk  
aminak emematchattagme tusagmesh tujutjume?  
<sup>32</sup> Nuwa aishinatnuk jáanch aishinku nugkutainak  
patakumtai aidaujaig makichkish kajimatbait sui.  
Tujash mina aentsug aidauk yaunchuk  
minak kajimatjukiaje.

<sup>33</sup> ¡Amek pakijintai aina nuanuig shiig yachaitme!  
Iman asamin nuwa akika dutiktai aina duka  
aminiyan unuimainawai.

<sup>34</sup> Amina jáanchjum aidauk  
aents pegkegchaun takachu aina nuna numpen,  
ujudauch aidau numpejai maatug numpak wajasui.  
Makichkish takamsachu aig, tsagkugtsuk  
tuke aneasam mainaitme.

<sup>35</sup> Nuninaitkum datsantainkas chichaakum:  
‘Wika Apajuí kajegtukti tusanuk  
pegkegchaunak takamtsujai’, tame.  
Ayu kame takamtsujai tusa imatu asamin,  
nuna dekajuatasan apu chichama inagdaun aina  
nuwi ematjame.

<sup>36</sup> ¿Wagka tujash atunikinjum egaakmesh  
imanikmesh waugtame?  
Auk Asiria nugkanmaya aidau idaitamsa antsag  
Egipto nugkanmayashkam idaitamsattawai.

<sup>37</sup> Mina kumpag ainawai tame nunak  
wi dakitjan idaisajai.  
Nuadui amek egiptunmaya aidaujai atunikan maaniatjai  
tukamam depetamkagmatai,  
datsaaja wake besekam wakitkittame.  
¡Amina kumpajum ainakush makichkish yaimpakchagtai!  
tujamui Tuke Pujuu”, tiuwai Jeremías.

## 6

### *Israel aents aidau Apajuín intimjukiaqbau*

<sup>16</sup> Apajuí niina aentsji aidaun chichajak:  
“Jintanum wajasjum diistajum,  
yaunchuk jintu pegkeg aajakua dusha  
tuki ayi tusajum inimsatajum.  
Jintu pegkeja nunú ainkejum ayamat igkugtatjume”,  
tujamui.

Tujash dita chichainak:  
“Atsa, iik nii tawa nunú umigtak dakitaji”, tuinawai.

<sup>17</sup> Jintu niimin aidau utugchat atai, etsegkatnun  
Apajuí ishiaku asa, Israel aents aidaun chichajak:  
“Dita chicham atai etsejainakui antuktajum” tiuwai.  
Tusa tamashkam dita chichainak:  
“Iik nunú antutak dakitaji”, tuinawai.

<sup>18</sup> Tusa tiagtai Apajuí chichaak:  
“Mina aentsug aidaunash itugkagtajak  
nunú tikich nugkanmaya aidautigmesh dekatajum.

<sup>19</sup> Ashí nugkanmaya aidautigmesh antuktajum:  
Mina aentsug aidau dita wakegamun  
takastag tuidau asag,  
wi chicham umiktajum timawa nuna  
dakitug umitsuk idaisaju asagmatai,  
wi ditanak suwimkan susagtatjai.



20 ¿Wagka Sabá nugkanmaya kugkuin incienso  
jukigmesh itagtuaugme?  
¿Wagka tikich nugka atushtanmaya  
kugkuin jukigmesh itagtuaugme?  
Atum anentag itaamu aidau, tuja mina emematjaku  
kuntin maa nuna neje ashí apeajum duka  
minak shiig awajatsui.”

21 Nuna tusa Tuke Pujuu chichaak:  
“Wi shiwag aidaun ishitkattajime,  
dutika ai jetepakag,  
uchijum aidaun,  
atum pujamunum nuna yantamen ijunag pujuidaunak  
atumi kumpaji aidaujui ashí ijinatnume, tusan”, tiuwai.

*Nujinmanini jeteka ijinam agtin*

22 Tuke Pujuu chichaak:  
“Aents atushat nujinum batsamin senchigtin aidaun  
uminainawai maaniawagtatus.

23 Suntag aidauk puyag aidaun akentai aidaujui  
yajuakag umintsaje;  
ditak magkagtin wait anenkagtuchu ainawai.  
Dita unsubstaujig nayants uutbaujai betekai  
caballonum ekemiag mininawai  
Jerusalégkan jetekagtatus”, tiuwai.

24 Nuna aents aidaun antukag chichainak:  
“Nunú chicham dekawaja  
sapigmainaku kakaumainchau dekapeaji,  
nuniaku nuwa tsawanji  
jegajim uchin najaimak waitama imaniaji.

25 Nuadui makichkitigmekesh ajanmak wegpajum,  
tuja jinta ainjagmesh yujasaigpajum,  
¡shiwag aidaun puyaja yajuakag mininawai!  
¡Ashí yantannumak sapigmainawai!

26 Mina aentsug aidauwah,  
jáanch wake besemag pujaku nugkutai nugkugjum  
yuku tadaetugtajum,  
nunikjum makichik uchi pujau jakamtai, wake  
besemag dekapeaku buutmaina imanikjum buuttajum;  
wagki iina ijipawagtinuk dukap atsuk  
kautjamkagtatui”, tibaijai.

27 Tuja Tuke Pujuu mina chichagtak:  
“Wi aminak mina aentsug aina nuna pujutish  
wajukuk ainawa nuna diígsati tusan  
apusabiagme”, tujutmayi.

28 Tujutkui wi ayaakun:  
“Ditak intimkiu, tsanumkagtin, chichama antuchu,  
pegkeja iman wantinaidaun, tujash  
chichamesh pegkegchau antumtikmainchau  
bronze, hierro katsugma iman ainawai.

29 Jiju jinum jiyamak kuwija  
pegkegchaujin utsanak pegkeg weawai,  
tujash aents pegkegchau aina nuna  
iwagmainuk atsawai.  
Nunú iwajatag takuish, wainka tsawan megkaemainai.

30 Nunin asagmatai ame idaisau asamin:  
‘Plata pegkegchau asagmatai utsagbau’  
tuu adaikagtinai.”

## 7

*Jega Apajuí emematku ijuntai jegamkamunum Jeremías chichagkagtukbau*  
1 Tuke Pujuu Jeremíasan chichajak:

<sup>2</sup> “Jega Apajuí emematku ijuntainum wetá, nunikam nuwi wajasam juju chicham etsegkum: ‘Judá wegantu aidautijum Apajuí ememattag tusajum juju jeganum utsanin aidautijum, Tuke Pujuu Israel aents aidaun Apajuí ashí senchigtina nuna chichamega nunú antuktajum:

“ ‘Atumi pujutjum, pegkegchau takataijum aidaujai iwagmamjatajum, nunikagmin kuashat tsawan juju nugka juwi iwaku batsamsatnume titatjime.

<sup>4</sup> Waita jintinkagtin aidau chichagtamainak:

¡Jega Apajuí emematku ijuntaig jujuwai, tusa ujpainakuish, duka antugkaigpa!

<sup>5-7</sup> Atumi pujutjum iwajatajum, nuniakjum tikich aidaujaish, pegkegnum yainiktajum, tuja aents tikich nugkanmaya aidau, bitaik aidau, waje aidau, shiig akikchatnaitkujum inaku waitkajum nunú idaisatajum.

Nuniakjum aents takamsachu aig, maajum dushakam idaisajum, nuigtush wainka apajuímtai aidau emematkujum, atumek pegkegchau wegajum nunú ashí idaisagminig, juju nugka juna

atumi apachjum aidaun susauwaitag nuwi kuashat tsawan iwaku batsamsatnume titatjime.

<sup>8</sup> “ ‘¡Tujash atumek wait chicham, atumnash pegkegnumkesh yaimpakchatna nunú ima dekas antugjume!

<sup>9</sup> Atumek kasanjume, magkagtagme, tikichi nuwejai tsanijinjume, nuninaitkujum tsanumkujum Apajuí anagmagme, tuja wainka apajuímtai aidau Baal tikich aina nujai yaunchkesh wainchau ainayatkujum emematkujum kugkuin inciense apé yujagme.

<sup>10</sup> Nunin ainayatkujum juju jega mina emematjaku ijuntaya juwi kaunajum, juju jega juwi pujakuits, uwemtak jumainaitai tajume. Nuadui agá jiinkigmek pegkegchau tsumain wi dakitamu aina nunú takagme.

<sup>11</sup> Atumek mina emematjaku ijuntai jegamkamua duka kasa batsantai emaugme, wika nunak ashí wainkajai. Witjai Tuke Pujuunuk, nunak dekas tajai.

<sup>12</sup> “ ‘Israel aents aidauwah, yama nagkamchak mina emematjaku waitai pegkejam aakmakbau Silónum aajakua nuwi wetajum, nunikjum diistajum wisha nunú jeganash atumi tudaujinish itugkauwaitja nunú.

<sup>13</sup> Wika atumi pujutjumin pachisan atumnak kuashta chichagkauwaitjime, tujash mina umigtutak dakitauwaitjume. Nuniau asajum wi tabau antuka umitsuk pegkegchau takata nunú ainjauwaitjume. Witjai Tuke Pujuunuk, nunak dekas tajai.

<sup>14</sup> “ ‘Nuadui, juju mina emematjaku ijuntai jegamkamua nuna wi atumin, tuja atumi apachjum aajakua aina nunashkam susauwaitag, nuwi atum kajinmamsajum anentaimjum nunak, wi amasu akunush wi yaunchuk nunú aak Silónum aun tsaikuitag dutiksanuk tsaikatjai.

<sup>15</sup> Dutikakun yaunchuk atumi yatsum Efraín wegantu aidaun jijjan utsagkuitag dutiksanuk atumnashkam utsagtatjime’ tujamui Apajuí”, tiuwai Jeremías.

*Israel aents aidau Apajuí umigtan idaisagbau*

<sup>16</sup> Apajuí chichagtak: “Jeremíasah, yamai nagkamsamek juju aents aina nunú pachismek segatipa, tuja dita anentaimtusmesh buutipa, tuja yaigta tusa segatkumesh waitkagsaipa, tutjukuminish antugkashtatjame.

<sup>17</sup> “Judá wegantu aidau nugken tuja Jerusalégnum junta aina nuwi pegkegchaun takaina duka zamek waintsumek?

<sup>18</sup> Uchi aidau chigkimin ikaunmainawai, múun aidau jiin ikapainawai, nuwa aidau pagkan injuinawai dita apajuímtaiji nuwa shigmauch nayaimpinmaya etegkamu tuina nuna emematuinak susatnun. Dutikainak nuigtushkam tikich wainka apajuímtai aina nuna emematuinak, vinon suwina duka mina dushiktuinak aninawai.

<sup>19</sup> Tujash dekas minak dushiktuinatsui, ditak pempeentumakiag datsantan dushikmainak aan yujawai. ¡Witjai apu Tuke Pujuunuk, nunak dekas tajai!

<sup>20</sup> Nuadui wi kajekbaujuu juju nugka junak aents aidaun, kuntin aidaun, numi aidaun, ajak aidaun, ashí ijinattajai. ¡Wi kajekbaujua duka jijjai betek kakajus kajinchauwai! Nunak dekas uminkatnun tajai.”

<sup>21</sup> Tuke Pujuu ashí senchigtin, Israel aents aidaun Apajuúji niina aentsji aidaun chichajak: “Atum wakegakjume mina eme anenjusjum anentag sujustin aina duka, kuntin maa nuna neje ashí apeatin aidaujai yajuakjum ijuma pujutajum, dutikajum nuna neje yuwajum tagkajum kantaushmaktajum.

<sup>22</sup> Untsu atumi apachjum aidau Egipto nugkanum batsatun jijuitag nunak wika mina eme anenjusjum anentag sujustajum, nuniakjum kuntin maajum nuna neje ashí apeatajum tusanuk ditanak inagchauwaitjai.

<sup>23</sup> Wika ditanak mina umigtuktinme, nuninakuí wi ditá Apajuúji atajai, untsu dita mina aentsug atinme tiuwaitjai. Tuja nuigtushkam chicham umiktinun wi susajuitag nuna umiktinme nuninakuí shiig batsamsatneme tiuwaitjai.

<sup>24</sup> Tujash minak umigtukchajui, nuigtush puyatjusagkesh dekaskeap tawa tujutajui. Nunidau asag, anentainkachu najaneawag dita wakegamun takajaku ainawai. Nunidau asag mina idaituinak nuni senchi pegkegchau wajasajui.

<sup>25</sup> Atumi apachjum aidau Egipto nugkanum batsatu jijnjau aina duwi nagkamsan wika yamaikish atumnak profeta mina chichamjun etsejin aidaunak makichkish mijattsuk tuke ishitanaitjime.

<sup>26</sup> Imatikamaitkujum atumek minak umigtatsjume. Nuadui mina chichamjuk puyatjusumkesh diitsuk, atumi apachjum aidaun nagkaesau pegkegchau ainagme.

<sup>27</sup> “Jeremíasah, antugtamtakshatin ainaigkish, tuja aipakchagtin ainaigkish, juju chicham senchi untsumkam ashí etsegkata.

<sup>28</sup> Ame dita chichagkum: ‘Juu aents aina duka Tuke Pujuu dita Apajuúji umigtanak dakituinawai. Nunidau asag Apajuú jintintuatag tamash dakituinawai. Dita dekaskenum chichataijig shiig atsujuinawai’, tita” tujutmayi.

#### *Jerusalégnium pegkegchaun takasagbau*

<sup>29</sup> ¡Jerusalégniumia aidauwah,  
intashim esajam aina duka tsupigjum utsagtajum!  
¡Dutikajum muja uwegshunum shiyakjum,  
nuwi yujasjum wake besemag pujaku kantamatajum,  
wagki atumnak Apajuú kajegtamak idaitamsau asamtai!

<sup>30</sup> Apajuú chichaak:

“Judá wegantu aina duka wi dakitamu aidaun, dakumka najanamu pegkegchau tsumain aina nuna mina jegag pegkegma nuwi awayawag mina jegajun pegkegchau etugtiae.

<sup>31</sup> Tuja nuigtushkam, wi dutikata tichamaitak makichkish anentaimtushtaijun, dita uchiji aidaun nawanji aidaujai maawag, apeanak dita apajuúmtaijin emematiagtinun Ben-hinom nugka ségaju awa nuwi altar Tófet tutain najanawaje.

<sup>32</sup> Tujash nunú Tófet, Ben-hinom tutai aina nuna daajig dukek achagtinai. Nuna daaji yapajinkatnuk tsawan jegattawai. Nunikmatai: ‘Nugka ségaju aents aidau kajeetai’, adaikagtinai. Witjai Tuke Pujuu, nunak dekas tajai. Tuja aents jinawajunak tikich nugka ukumamain atsau asamtai, Tófet tutaya nuwig batsakiagtinai.

<sup>33</sup> Dutikamun, nuna ayamjumainuk atsau asamtai chuwig aidau, kuntin aidau yuwa amukagtinai.

<sup>34</sup> Tuja Judá wegantu aidaun yaaktaji aidaunum jüstamku kantabau, shiig aneamu, nuwenbaunum shiig aneaku kantabau aajabia nunak ashí emegkagtatjai. Dutikamtai Judá aents aidau nugkega duka bashiak itajak wajas asattawai.”

## 9

<sup>10</sup> “Nunikmatai muja aidaunum yujasjum  
“atumi tagkujum aidaun yutaiji chijichi aidauk  
ashí apekbau asamtai,  
wake besemag dekapeakjum buuttajum.  
Tuja imatika apekbau asamtai,  
nuni nagkaematnak dakitainawai;  
tuja atumi tagkujum aidau shinaukesh  
makichkish antuenatsui,  
chigki aidaush, kuntin ikamia aidaush  
ashí pisag megkaejaje.

<sup>11</sup> “Judá wegantun yaaktaji aidaunak wi ashí tsaitatjai,  
dutika ai aents atsau bashiak agkan wajas asatnai.

Jerusalégnashkam tsaiaktatjai, dutika ai  
ayatak kaya tuwasua weaku atatui.  
Nunú nugkanmak ikamia yawá aina duke  
batsamsatnai, tujamui Tuke Pujuu”, tiuwai Jeremías.

<sup>12</sup> Nuigtu Jeremías chichaak: “Juu nugkanum yaakat ayá dusha ¿wagka imatikaish tsaiqbauwaita? Juu nugka juni waya nagkaebauk makichkish atsawai.

“¡Uwegshuchuashit tumain wajas awai! ¿Yaita nuna shiig dekamainush? Profeta Apajui awemamu asa, ¿nuna pachis iina ujpamainush awash?” tiuwai.

<sup>13</sup> Tutai Tuke Pujuu ayaak: “Ehe, auk chicham umiktinun wi ditan susauwaitag nuna intimkiag umitsuk idaisaju asag aikam asaje.

<sup>14</sup> Nuna umitsuk dita apaji emematujakagbaun nuna, ditashkam dita anentai wakegaman Baal aidaun emematiaju ainawai.

<sup>15</sup> Nuadui wi Tuke Pujuu, Israel aents aidaun Apajuji, ashí senchigtinun juna tajai: Wi ditanak yutai yapaun ayujawagtatjai, tuja umutai jatai egketuamun aajagtatjai.

<sup>16</sup> Tuja yaunchkesh dita apajigkesh wainajakchamunum tikich nugkanum dapampaakan utsagtatjai. Dutika ai, shiwag aidau puyaja juki yujagsag ashí amuktinme titatjai”, tiuwai.

*Jerusalégnunia aidau awake anentaimjag buutiagbau*

<sup>17</sup> Tuke Pujuu ashí senchigtina nunú chichaak:

“¡Juu shiig antugtuktajum!

Aents jakamtai buutin atinme tusa  
etegjamu nuwa aina nunú unsuka ikaunmatajum.

<sup>18</sup> ¡Duka dekas buuttan yacha aina nunú  
wamak kaunawag atumin egampagtinme!  
¡Imatuinak dita jiniig negaikjinak bete wajastinme!

<sup>19</sup> Nunik Siógnum nagkamas buutuinak:

‘¡Jachah, wagkaik imatika tsyamash asaji!  
Iina jee aidaunak ashí tsaigtamkaje,  
tikich nugkanum shimaku ukukiagmi’,  
wajaidau antuenawai.

<sup>20</sup> Tuja nuwa buuttan yacha aidauwah,  
Tuke Pujuu chichame shiig jitusa antuktajum,  
nunikjum atumi nawanjum aidau  
kumpajum aidaujai wake besemag pujaku  
buuttai, juu aatsa jintintuatajum:

<sup>21</sup> Iina jee aidaunum jata wainjamae,  
tuja apu pujusa inamtainish wayae,  
nuniku asa, uchi piipich jintá wasugkamak yujaun,  
datsauch aidau plazanum yujaunashkam ijinui.

<sup>22</sup> Dutikamu asa aents jinai aidauk,  
ajak juwaam kakegak batsamama numamtuk,  
tuja tsuwat ukaja ukukmawa numamtuk wajas awai.  
Witjai Tuke Pujuu, nunak dekas tajai.

<sup>23</sup> “Tuja aents yacha duka  
niina yachajinigkik eme anenmamigka,  
tuja aents senchigtina dushakam,  
niina senchijinigkik eme anenmamigka,  
tuja wiakchashkam niina wiakchajinig eme anenmamigka.

<sup>24</sup> Dekas eme anenmamsatatus wakegakug,  
wi Tuke Pujuu ashí senchigtinaitag nuna shiig dekaa  
umigtak eme anenmamainai.  
Wika nugkag anenkajai takajai,  
nuadui anenka nunú tsanumtsuk shiig takamua  
nujai shiig awajtawai.”

## 14

*Kuashat tsawantai yumi yutugchamu*

<sup>1</sup> Yumi yututsuk kuashat tsawan au asamtai, Tuke Pujuu Jeremíasan chichajak:

<sup>2</sup> “Judá wegantu aidauk wake besemag dekapenek buutuinawai, dita yaaktaji aidaunmash waji sujutaiji aidauk atsujuinawai.

Ashí aents aidauk nugká batsatui, tuja Jerusalégnumak senchi buutuinawai.

<sup>3</sup> Wiakuch aidauk dita inake aidau yumi egaktajum tusa ishimainawai, tusa tima yumi aimentinum shiyakag egainawai, tujash yumik atsawai.

Nunitai yumi shikitainak wainak takus yuja yujakua waketuinak, puyatkiag datsantin buuken dukumakag waketuinawai.

<sup>4</sup> Tagkugtin aidauk yumi yutachu asamtai, nugka buku wajasmatai, senchi puyatuinak buuken dukuinawai.

<sup>5</sup> Nugka buku wajasu asa chijichi jinaamtai, japa aidauk yumainji atsujam, uchiji yama petsakbaunak ukukiag yaja shimuinawai.

<sup>6</sup> Ikamia burro unuinakchamu aidauk chijichi yumain atsutai, nain uwegshunum ijunas nujantai jinuinak, ikamia yawajai betek dase dasantai mejea mejea wajainawai, imaaninak jaka iyainawai”, tiuwai.

*Profeta Jeremías Apajuí segamu*

<sup>7</sup> Jeremías Apajuín segaak:

“Tuke Pujuwah, iik dekas ame umigtsuk amina emtimin shiig kuashat pegkegchau takamsaji.

¡Tujash wait aneamam ame tuke pujuuwaitam nunú anentaimsam yaijatkata!

<sup>8</sup> ¡Ametme Israel aents aidau uwemtiknumek, ametme tsawan utugchat akuish ayamkagtukam uwentikagtinmek!

Imanaitkumesh, ¿wagka aents tikich nugkanmaya ijaak tau asa, ayatak diijatus kanag tsawak wegama numamtukesh awajkagtame?

<sup>9</sup> Israel aents aidau Apajuíjijyah, ashí aents aidauk dekeinawai amina aentsjum ainag nunak, tuja amek jutijai pujame.

¡Kajimatkimék idaikagtusaipa! Aents kakakchau maanitan yachachu ayamkagtumainchauwa nunin wajasume”, tiuwai.

<sup>10</sup> Tuke Pujuu aents aidau chichajak:

“Atumek wainka apajuimtai aidau ememattasajum ima senchi wakegagme, nuniau asajum wainka yujagme, anka minak shiig awajtatsui, nuadui wi atumnak suwimkan amastatjime”, tujamui.

<sup>11</sup> Nuna tusa Tuke Pujuu mina chichagtak:

“Jeremíasah, anú aents aina nuna yaigti tusam segatkumek waitkagsaipa.

<sup>12</sup> Yujumak ijagma pujusam segatkuminish, wika antugkashtatjame; kuntin aidau, trigo, cebada aidau kuashat anentag sujakjuminish, wika jujukchattajime. Wika atumnak maaniamunum, nujantai, jatai ijinattajime”, tujutmayi Apajuí.

<sup>13</sup> Tujutkui wi ayaakun:

“Tujash apu Tuke Pujuwah, tikich profeta aidau aents aidau chichajuinak, maaniamuk atsuttawai, tuja nujanchakam tepeashtatui tusa, amina au nii shiig utugchat atsaunum batsamsatnume tusa yaimpaktatui tuinawai”, tibaijai.

<sup>14</sup> Tusa tai Tuke Pujuu aijak:

“Nunú profeta aidau mina daajun pachis tuina nunak waitjuinak tuinawai. Wika ditanak, atum wejum chicham etsegkatajum tusanuk makichkish inatsjai. Nuigtush wika ditanak aujuinatsjai. Nunak ditak anentaimas waitjuinak tuinawai.

<sup>15</sup> Nunú profeta aidau wi akatja awemachmaitak mina pachitus, auk maaniamuk atsutawai, tuja nujanachakam juju nugkanmak tepeashtatui tuu yuja duka nujantai, puyajai jinawagtatui.

<sup>16</sup> Tuja tikich aents aidaun dita ujaina dushakam nunisag nuwe aidau, nawanji aidau, uchiji aidau aatus ashí nujantai, puyajai jinawagtatui. Nunik jinawagmatai, dita iyashi aidauk Jerusalén jinta ayá nuwi tepetag waigtatui, wagki ditan ukumainuk atsau asamtai. Nuni akikmakagtatui dita pegkegchau takamsamujinak.

<sup>17</sup> “Nuniktin asamtai juju aatsam aents aidau ujakta:

“ ‘iMina aentsug aidau utugchat ishamainun igkugkaju asamtai, nuna anentaimtusan tsawaish, kashish mijamtsuk tuke buut pujuttajai!  
Dita utugchatjiya duka tsupimakbaujai betek najamawai.

<sup>18</sup> Jiinkin ajanum wekaman, aents aidau puyajai kajegkam batsatun wainjai, tuja yaaktanum waikmanchakam, nujantai jinuidaun wainjai. Imanitaish profetakesh, sacerdotekesh, wagkag imaniawa nunak puyatjutsuk wainak tikich nugkanum yujawai’, tujutmayi.”

*Profeta Jeremías Apajuín aikbau*

<sup>19</sup> Jeremías Apajuín ayaak:

“Apuh, ¿Judá wegantu aidauk tuke idaikumek idaisaum?

¿Yaakat Jerusalégkak yawetjamek idaisaum?

¿Wagka waji jataitkuish ampimakuish,

tsagaumainchaush ekagtiume?

Pegkejap batsamsattaji tibaiji,

tujash pegkegchau iyanjamamtai, kuashat waituinaji.

<sup>20</sup> Tuke Pujuuwah,

iina pegkegchaujiya duka dekagmamji,

tuja iina apachji pegkegchaun takasu aina

dushakam dekaji.

Iik dekas ame pegkegchau takagku tunamagji.

<sup>21</sup> ¡Amek betek uminaitam iman asam,

antugkagtuskek idaikagtusaipa,

tuja amina pujutaijum jega pegkegma nunú tsaikaipa!

Duka dutiktsuk ame jutijai chicham umikuitam nunú

adeagta nunikam betek umikta.

<sup>22</sup> Tuke Pujuu, iina Apajuíjiyah,

dakumkamu apajuímtai aina duka

yuminak makichkish yutumtikmaitsui,

ametne yumi nayaimpinmaya yutumtiknumek,

ametne ashí najankaumek.

¡Nuadui ima aminig kajintsa anentaimji!” tiuwai.

## 15

*Suwimak atin etsegkamu*

<sup>1</sup> Tuke Pujuu chichagtak: “Juju aents aina nunú wait anenjata tusa Moisés, Samueljai segatainakuish, wika juju aents aina nunak wait anenmaitsujai. Jiinag shiyaktinme tujamui tusam ujakta, dutikam jiinag shiyaktinme.

<sup>2</sup> Tuja tuwi shiyaktatji tusa inimpainakuig ame ayaakum:

“ ‘Nii jatai jakati tibauk nunisag jakati;  
tuja nii maaniamunum jakatnuk nunisag  
maaniamunum jakati;  
untsu nujantai jakatnuk dushakam nunisag  
nujantai jakati;  
tuja achija yajuakam yujas waittsatnuk  
nunisag waittsatnume’.

<sup>3</sup> “Wi ditanak ipak usumta imajin suwimkan ishltkattajai. Tuja duka juju ainawai: Maaniamunum jinawagtinai, nunikmatai yawá aidau esainiag japisa yujagtatui, chuweg amukagtinai, dutikawagmatai kuntin kajen aidau, shiig amutan amukagtinai.

<sup>4</sup> Nunak Ezequiasa uchiji Manasésa pegkegchaujin dutikattajai. Wika nunú Judá apuji wajas pujusa Jerusalégnum wajina dutikauwaita nunak kajimattsujai. Nuna antukag nugka múun aidaun apuji aidau senchi ishmkagtatui. Nunak dekas nuniktinun tajai.

<sup>5</sup> “¿Jerusalégkah, aminash yaki wait anenjamjainta?

¿Yaki amina anempakush buutti?

¿Yaki aminash jamamtuchu pujusti tusash puyatjutpakti?

<sup>6</sup> Atumek mina idaitusjum pegkegchau takagtusugme.

Nuniakjuminish wait anentau asan tsawanta ewae ewaekawan yawegjai, nuniku asan yamaik ijinattajime.

<sup>7</sup> Jerusalégkah, amini aents batsata nunak chijichin dase umpui utsauwama numamtuk yaakta ukumtikin utsagtajai.

Mina aentsug aidauk mina umigtukchaju asag uchigtuchu juwakaje.

Wi ditanak mina umigtukchaju asagmatai ijinawagjai.

<sup>8</sup> Dutika ai nayantsa kamatkaji kuashta nuna nagkagas nuwa aidauk shiig kuashat wajemeakagtinai.

¡Etsash etsantaig nuwa aidaunak dita uchiji datsa aidaujai ijinattajai!

Makichkish nuniktatuapi tachamunum pachiachbau ishainun ajunjagtatjai.

<sup>9</sup> Nuwa kuashat uchigtin aidauk wampainag iyajag nunisag jagtinai.

Nunikag datsan dushikiam agtinai,

Tuja etsa pegkeg etsantug au suwe wajastinai.

Makichik aentskesh iwaku pujaunak

tikich aents aidau maatnume tusan idaisattajai.

Nunak dekas nuniktinun tajai”, tiuwai Tuke Pujuu.

*Profeta Jeremías buutbau*

<sup>10</sup> “¡Chah, dukuwa wika senchi anentaimkun waitiajai!

¡Wika akiinmainchaunas akiinawamiagtai!

Wika makichik aentsnakesh pegkegchauk awagmachuitjai, tujash minak ashí pegkegchaun chichagtuinawai, dutiujinak shiwagmatuinakui ditajai maaniajai.

<sup>11</sup> Wi ame inatjamun umikchau ataik,

tuja dita pachisnush amijai chichaschau ataik,

dita tujutuina duka betek uminkati.

¡Tujash mina shiwag aidau waituinakui,

nuna yaigti tusan

wi amina segajam duka amek dekame!

<sup>12</sup> Tuke Pujuu aents aidaun chichajak:

Suntag asirianmaya, babilonianmaya aina nuna depetmainuk atsawai.

<sup>13</sup> Israel aents aidautigmek ashí tunamakugme, nuniku asagmin atumi tagkujum aidau, wajijum aidau, tuja atumi nugkemin ayá nunashkam atumi shiwajumin ashí susattajai.

<sup>14</sup> Wika shiig senchi kajekjai,

nuniku asan, jijjai betek apeattajime.

Atumi shiwaajum aidau achipag tikich nugka atumi wainchataijin yajupakag, dita inainak waitkastinme tusan idaisattajime”,

tiuwai Tuke Pujuu.

*Jeremías Apajuín ausamu*

<sup>15</sup> Jeremías Tuke Pujuu aujak:

“Tuke Pujuuwah, amek ashí dekame,  
wika amina takaju asan maatag tama ajai,  
minash kajimatjutsuk yainkata.

¡Tuke Pujuuwah, mina mantuatag tuina duka  
ayatak dí pujugtsuk eke mina mantuinaatsaig,  
suwimak susam ijinata!

<sup>16</sup> Tuke Pujuu ashí senchigtinuh,  
ame mina aujtuyum nunak  
wika puyatjusan antuyajai.

¡Wika aminuitag duwi  
amina chichamjumin antakun shiig aneyajai!

<sup>17</sup> Wika aents pegkegchau takatnak yujajin aina  
nujai ijunja wekaetanak idaisajai.

Aminu etiwaitam duwi nagkamsan wika wiki pujajai,  
tuja pegkegchau takat ame kajejam nunak  
wishakam kajejajai.

<sup>18</sup> ¿Wagka tujash imaniknush waitush pujaja?

¿Wagka wi imanikan waitiag dusha  
megkaemainchauwaita?

Niimpap yainkattawa timajai, tujash idaitusume,  
amek yumi pukuni jiinu kuyua  
buku wegama numamtin wajasume”, tiabiajai.

#### *Apajuí Jeremíasan aikbau*

<sup>19</sup> Tusa ti ai Tuke Pujuu aijk:

“Nunú anin wainka tuu wekaetsuk,  
awake anentaimjam minai minakminig,  
mina chichamjun etsegtujin ati tusan yaigtatjame.  
Dutika ai ame mina profetag atatme.

Amek ditaig waketmaitsume,  
auk dita aminí minimain ainawai.

<sup>20</sup> Juju aents aina nuna emtinig wi aminak  
yaakat bronzejai peejamua iman awajsattajame.

Amina shiwaajum aidau jetepainakush  
depetamkachagtatuí,

wi aminak ayamjukan uwemtijattagme.

Witjai Tuke Pujuuunuk, nunak dekask dutikatin asan tajai.

<sup>21</sup> Aents pegkegchau aidau mantamatag tuinakuish,  
wi ayamjukan uwemtikjattagme;

tuja magkagtin aidau mantamatag tuinakuish,  
wi uwemtikjattagme”, tiuwai.

## 18

#### *Duwe namuka najanin pachisa augmattsamu*

<sup>1</sup> Tuke Pujuu chichagtak:

<sup>2</sup> “Jeremíasah, duwe namuka najanin puja nuna jeen wetá. Nunikamin nuwi  
chichaman ujaktagme”, tujutmayi.

<sup>3</sup> Tusa tujutmatai nuna jeen webajjai. Nunika jegakman nunú aents shikika umutain  
tornonum najanak pujaun wainkabiajai.

<sup>4</sup> Nuna najanak pujus, shiig jiinkichmatai, nunú duwenak juki ataktu nagkama nii  
wagegamunak imatiksag shiig pegkejan najanmayi.

<sup>5</sup> Nuwi Tuke Pujuu mina chichagtak:

<sup>6</sup> “Atumek mina uwejuí pujagme, nuadui wika atumnak juju aents duwen namuka  
najanak itujeawa nujai betek awagmamainaitjime.

“Witjai Tuke Pujuuunuk, nunak dekask tajai.

<sup>7</sup> Wi wakegaknuk, nugka múun aidaunash, tuja apu aidaunash, shiig wamak tsaikan  
utsajai.

<sup>8</sup> Untsu nunú aents aidau pegkegchau takatan idayinak mina umigtuinakuig,  
suwimkan susatasan umigkau akunush suwimkanak sumaitsujai.

<sup>9</sup> Tuja tikich tsawantai, aents nugka muunnumia aina nunú takainak emkatnume,  
nununak senchigtin wajastinme tusanush dutikajai.



<sup>10</sup> Untsu nunú aents aidau pegkegchaun takainak mina umigtuinachkuig, wi dita wajiji aidau susatag tibaugnash suchauwaitjai”, tujutmayi Apajuí.

<sup>11</sup> Tuja duwi pujus Tuke Pujuu chichagtak:

“Judá aents aina nunú Jerusalégnum batsamin aidaujai, wi taja nunú ujakta: ‘Atumin suwimka amastasan chichaman umiajai. Tuja suwimak dakitakjumek, pegkegchau takat idaikujum pujutjum iwajatajum’ tujamui Apajuí tita tujutmayi.

<sup>12</sup> Tusa tamin dita chichagtamainak: ‘Wainka tsawan megkaekum tuu wekaetsuk wetá, iik ii wakegamu takainaku batsamsatasa wakegaji!’ tujamiagtatui.

<sup>13</sup> “Tusa tujamainakui wi ditan chichagkun:

“Tikich aents pegkegchaun takau aina duka tikima atumjai betekak atsawai.

¡Tuja atum Israel aents aidautigmek tikima shiig pegkegchau takagme!

<sup>14</sup> Muja Líbano titiji aidanum bicha nujamag ayá duka makichkish megkaechauwai.

Tuja entsa bichatin muja aidanum ayá dushakam kuyuag megkaechauwai.

<sup>15</sup> Tujash mina aentsug aidauk minak kajimatjukiaje, nuninak dakumka najanamu apajuímtai aidan emematuinak kugkuin incienson apé yujawai.

Dita yujatai jinta aya nuna imagkag wainak jintachunum yujawai.

<sup>16</sup> Nunidau asagmatai,

dita shiwaaji aidau wa wamak waitkamu asag yaaktaji tsaigkam, dita nugkeg bashiak awai.

Ashí aents nuni nagkaemaidauk nuna diisag puyatkag buuken pegag nagkagainawai.

<sup>17</sup> Israel aents aidanuk dase etsa minitainmaya dasentak utsaumaina numamtuk wi utsagtatjai; tuja dita shiwaaji aidan ishamkag pisagtinme titatjai.

Suwimak jukitnuji tsawan jegamtaig,

ditanak ausachgatjai,

ayatak atsu ayampatuan idaisagtatjai”, tiuwai.

*Jeremías maatasá chicham umigkamu*

<sup>18</sup> Aents aidau chichainak: “Sacerdote aidau, aents yacha aidau, profeta aidau Apajuí chichamen iina jintinjainai tuke aitnai. Nuadui nii tawa duka makichkish antugkachmi, dutikaku Jeremíasak chicham umigka tsanumjuja maa ajapami”, tuidau.

*Jeremías Apajuín ausamu*

<sup>19</sup> ¡Tuke Pujuuwah, wait aneam antugtuka!

¡Mina shiwag aidau chichaina nunú antukta!

<sup>20</sup> ¡Wi egkema jakatnujun waa muuntan tautjiaje!

¡Wika ditanak pegkegnun yayamaitak,

dita mina aan iiktuina duka pegkegchauwai!

Wi ditan wait anentakun juwi taan,

suwimak susaipa tusan amina segajam nunú adeagta.

<sup>21</sup> ¡Tujash yamaik ame dita uchiji aina duka

nujantai jinaati tita!

Untsu nuniachkush maaniamunum jinaati tita.

¡Nunikagmatai dita nuwe aidauk waje

uchigtuchu juwakagtinme!

¡Tuja aents múun aidanuk jata ijinatnume!

¡Untsu datsa aidauk maaniamunum jinatnume!

<sup>22</sup> Tuja pachiaichbau kasa aidau ishikata,

¡nuna ishamainak pampaidau antuekati!

Wagki ditak wi egkema jakatnun waa muuntan tai umigtukaje.

Tuja wi weamunmashkam iyatnun umigtuinawai.

<sup>23</sup> Tujash Tuke Pujuuwah, mina mantuawagtatus chichaman umigtuina duka amek shiig dekame.

¡Dita pegkegchauji aina duka tsagkujaipa!

¡Tuja kajimatkimesh idaisaipa!

¡Ame kajekbaugmin suwimak susata,  
shiwag aidau depetuk ijinatnume tusam idaisata!

## 19

*Yumi shikitai intajamu pachisa augmattsamu*

<sup>1</sup> Tuke Pujuu mina chichagtak: “Yumi shikitai makichik duwe najanamu sumakta. Dutikam aents aidaun apuji múun aina nuwiya ujumak, sacerdote múun chichin aidaujui untukam ijumjata.

<sup>2</sup> Dutikam dita uyuntamsagmatai, Ben-hinoman pakajin wetá. Nunikam yaakta waitiji ichinak duwejai najanamu tutaya nujai niniaku wajasam, wi amina akatjattajam nunú etsegkata.

<sup>3</sup> Nuwi wajanta chichaakum: ‘Judá apuji aidauwah, Jerusalégnunia aidautigmejai, Tuke Pujuu ashí senchigtin, Israel aents aidaun Apajujiya nuna chichame antuktajum. Apaju chichaak juna aatus tawai:

“ ‘Juju nugka juwi waitut ishamainun awemattajai, dutika ai nuna antuidauk senchi ishamak kujainiagtinaí.

<sup>4</sup> Wagki Israel aents aidauk mina kajimatjukiag, juju nugka junak Apajuí etegkachua nunin awajsag, ditash wainchataijin, tuja dita apachji aajaku aina dukesh wainajakchamun, Judá wegantu aidaun apuji aidaukesh wainchatai wainka apajuímtai aidaun emematuinak nuwi kugkuin incienson apé yujawai. Nunidau asag juju nugkanak aents takamsachu aina nuna numpeg awajsaje.

<sup>5</sup> Tuja nuigtushkam, wi dutikatajum tichamaitak, nuigtush makichkish anentaimtachtbaujun, Baalan emematuinak dita uchijin maawag patasa apeatnun altaran najadau ainawai.

<sup>6</sup> Nuadui juju nugka daaji Tófet tutaiya nunú yapagtuatin tsawan jegattawai. Dutikamu asa Ben-hinoman pakaji tutaigkesh achattawai. Juju nugka daajig: “Aents ijinamu” tutai atinai. Witjai Tuke Pujuunuk, nunak dekasken uminkatnun tajai.

<sup>7</sup> Judá wegantu aidau Jerusalégnunia aidaujui chichaman umina nunak pachimjukan emegkatkattajai. Dutikan shiwag aidau maaniamunum ijinatnume tusan idaisagattajai. Dutika ai nuwi jinawag tepetag waigkun chuweg aidau, kuntin kajan aidaujui amukinme titatjai.

<sup>8</sup> “ ‘Tuja Jerusalégnak ashí tsaikam ishamain awajsattajai. Dutika ai bashiak asattawai. Tuja aents nuni nagkaemaidauk nunú imatika yaakat tsaikbaun diisag ishamiagtinaí. Nuninakush dushikiagtinaí.

<sup>9</sup> Shiwag ishamain aidau ditan ijinawagtatus yaaktan tenteawagtinaí. Dutikawagmatai jiuusuk batsamas yumain atsutai, nujantai jinuinak dita uchiji aidaun, nawanji aidaujui yuwatnume, dutikainak pempeentunikiag yudaitinme tusan idaisattajai, tawai Apajuí’, titatme.

<sup>10</sup> “Nunú tusa inagnakam, aents aidau amina uyuntamainak yuja nunú wainainamunum yumi shikitai duwe najanamu takakbaujum ajajaja tsaiaktatme, dutika tsaikam

<sup>11</sup> chichagkum: Apajuí ashí senchigtina nunú chichaak: ‘Juju aents aina nunak yumi shikitai tsainka nunú iwagmaitu numamtuk ataktush nantamainchaun tsaiaktatjai. Dutikamtaí aents aidauk nuna iyashi aidaunak tikich ukumamain atsau asamtai Tófetnum ukusagtinaí.

<sup>12</sup> Tuja Jerusalégnak tsaikam Tófetjai betek wajastatui. Witjai Tuke Pujuunuk, duka dekaskenum uminkattawai.

<sup>13</sup> Nuadui, Jerusalégnunia jega aina nuwig, tuja Judá wegantu aidaun apuji aidau pujusa inamtaiji aina nuwishkam minak makichkish emematjishstinme titatjai, wagki ashí yaya aidaun emematuinak nunú jega aina nuna tuntupen kugkuin incienson apeenak, tikich apajuímtai aidaun anentag suwinak vinon ukaidau asag senchi tunamaidau asagmatai. Nuadui duka ashí Tófetjai betek juwaktatui’ tawai Apajuí’, tiuwai Jeremias.

<sup>14</sup> Nuna tusa inagnak, Tuke Pujuu mina chichameg etsegkata tima, Tófetnum weuwa nuwiya wakitkiuwai. Nunik jega Apajuí emematku ijuantai jegamkamunum nuna waitijin jegantatak wajanta ashí aents aidaun chichagk:

<sup>15</sup> “Tuke Pujuu ashí senchigtin, Israel aents aidaun Apajujiya nunú chichaak: ‘Juju aents aina duka yaaktajijai nagkamas nuni senchi intimkiag mina umigtutnak dakitjaje. Nuadui dita suwimak jukitnun pachisan timag nunak imatixsanuk suwimkan susagattajai’ tawai Apajuí’, tiuwai Jeremias.

## 20

*Profeta Jeremías sacerdote Pashurjai*

<sup>1</sup> Imer aajakua nuna uchiji Pashur sacerdote Apajuí emematku ijuntai jegamkamun apuji aajakua nunú Jeremías utugchat nagkaemagtinun pachis chichagkagtaun antukui.

<sup>2</sup> Nunik: “Jeremías achikjum asutiatajum, dutikajum aents achika chimpitai Apajuí emematku ijuntai jegamkamua nuwi jegantatak, Benjamígka waitiji tutaya nuwi ayamas awa nuni egkeatajum”, tusa inamjauwai.

<sup>3</sup> Tusa inamjayatak kashinia duwi kashikmas Jeremías jikhtajum tusa tiuwai. Tusa timatai jikhtajui, dutikam Jeremías niina chichajak:

“Amina daagminak Tuke Pujuu yapagtugmattawai. Dutijamamtai Pashur idaikum Magor-misabid\* namkattame.

<sup>4</sup> Wagki Tuke Pujuu chichaak: ‘Aminak senchi sapigmitkaktatjame, dutikakun amina kumpajum aidaunashkam sapigmitkaktatjai. Nuadui amesh wainminig shiwag aidau amina kumpajum aidaunak ijinawagtatui. Tuja ashí Judá wegantu aidaunak Babilonian apuji depetuk achija niina nugkeen yajuakti, tuja dutikachkush kuchiyai kajegti tusan niina idaitustatjai.

<sup>5</sup> Tuja nuigtushkam ashí dita wajiji aidaunak apu takatai waji akik pegkeg aidaujai nagkamsan shiwajan ashí susattajai. Dutika ai nuna ashí yajuakag Babilonia nugkanum jegewagtinai.

<sup>6</sup> Tuja Pashura aminak amina pataim aidaujai achipajag Babilonia nugkanum yajupakagtinai. Dutijamawagmatai nuwi pujusam jakattame, nunikamin amina kumpajum aidau Apajuí pachisam wainka tsanu ayum nujai ijumag ukupasagtinai’ tusa Apajuí tawai”, tiuwai Jeremías.

*Jeremías senchi waitiak Apajuíyai chichamjumakbau*

<sup>7</sup> Jeremías chichaak:

“Tuke Pujuuwah, amek minak pegkeg chichagtukam untsugkabiume, tusa tujutkumin ayu tusan aikmaijame. ¡Amek mina nagkaetasu senchigtinaitme, iman asam wagagtukmayume!

“Minak aents aidauk tuké dushiktuinawai.

<sup>8</sup> Wi tuwi chichaja nuniaknuk: ‘¡Suwimak juki waittsatin tsawan jegawai! ¡Shiwag ijipatin tsawan jegawai!’ tusan tuké nuna tajai.

Nuadui amina chichamjumin etseju asan kashi kashinig dushikiam pujajai.

<sup>9</sup> Tuja wi anentaimsa chichaakun: ‘Dekas yamai nagkamsanuk Apajuínak kajimatkitjai, tuja niina daajin pachisnush etsekkashtatjai’, tajai. ¡Tujash amina chichamem mina anentajui jiijai betek nimpak mina ukunchjunash sukuawai! Dekas yamaik chichakchatjai tajai, tujash amina chichamjumnak etsegtuk idaimainchau dekapeajai.

<sup>10</sup> “Aents aidau tuke aneas dushiktus chichainak:

‘¡Ashí yantamnum sapigmainaji!’ tuinawai. Tikichnashkam chichainak: ‘¡Kaunatajum tsanumjuja utugchat apujtusmi!’ tuidaunash antajai.

Mina shiig kumpauchig aidaush itusag pegkegchaun takasa tusa utugchatan egatjuinawai.

Nuninak: ‘Tsanusa dekapsami, dutikkama ajuaik depetka emegkaktatji’, tujutuinawai.

<sup>11</sup> “Tujash Tuke Pujuuwah,

\* 20:3 “Magor-misabid” tawa duka hebreo chichamnumak, “ashí yantamnum sapigmamu awai” taku tawai.

amek maanitan yacha depetmainchawaitme,  
ame wijaig tuké pujame;  
nuadui mina aintuina duka minak depetukchagtatui.  
Ame depetkamu asa datsagkag, ame dutikamua  
nunak makichkish kajimatkishtinun  
tuke augmatu yujatin atinme.

<sup>12</sup> “Tuke Pujuu ashí senchigtinuh,  
amek aentsu anentaimtajig shiig wainme,  
nuadui ii anentaibaujish, tuja ii dutikatasa  
anentaimtamush ashí dekame.  
Ame wajuk suwimak susattame nuna wainkatasan wakegajai,  
wagki wika midauwa nunak amina idaitusjame.

<sup>13</sup> ¡Tuke Pujuu kantamjuatajum!

¡Tuke Pujuu ememattajum,  
wagki aents pegkegchau aidau  
ujudauch aidau waitkagtaish,  
nii ayamjuk agkanmitkawai!

<sup>14</sup> “¡Tsawan wi akiinamua duka  
shiig pegkegchau atin ati!  
¡Mina dukug uchigmatjukua nunú tsawanta duka  
pegkegnum chichagtai achati!

<sup>15</sup> Wi akiinamtai: ¡Aishmag akiinae! tusa  
mina apajun ujaka shiig anemtiksauwa duka  
shiig pegkegchau atin ati.

<sup>16</sup> Utusag nunú aentsuk yaakat Tuke Pujuu tsaikam,  
tuke megkaena numamtuk megkaeka tusan wakegajai.  
¡Nuniak imaanjaujai betek kashikmas untsumiagtai,  
tuja etsa tutupit aish,  
maaniamunmas imatuinawa tumainun antak sapigma wekaya tajai!

<sup>17-18</sup> Imanikan waitu pujutnaitkunush

¿wagkanuk akiinawabiajah?

Aika datsanmain maa ajapeam atinaitkunus  
dekas jakau akiinachamiagtai.

¡Akiintsuk jakauwaitkunuk  
wi ukumasbaujuk mina dukuju wake amainai!” tiuwai.

## 23

### *Achija yajuakbau wakjetjatin*

<sup>1</sup> Tuke Pujuu chichaak:

“¡Chah, aents uwija kuitamin, mina uwijun pachitsuk ipisig ishima nunak wait  
anentajai!”

<sup>2</sup> Tuke Pujuu, Israel aents aidau Apajujiya nunú, niina aentsji aidau apuji aina  
nuna chichajak: “Atum aidautijum mina uwig aidau dapampaakugme, dutikajum  
shiig kuitamtsuk ipisjaugme. Dutikau asagmin wi atumnak suwimkan amastatjime,  
wagki atumi pegkegchaujin achijag tikich nugkanum yajuakaju asagmatai. Witjai Tuke  
Pujuunuk, nunak dekas tajai.

<sup>3</sup> Tujash wi dutika yajuaktinme tibau asag dutikau ainakuish, mina uwig aidau  
wiki ataktu awakjan dita nugken ikaunmattajai, dutika ai nuwiyen chijichin yuwinak  
yujakag kuashat wajasagti tusan.

<sup>4</sup> “Dutika ikaunman, ditan kuitamkagtinun tikich aidau adaitugtatjai, dutika ai  
ishamkagtutsuk batsamsagtinai. Witjai Tuke Pujuunuk, nunak dekas tajai”, tiuwai.

<sup>5</sup> Tuke Pujuu chichaak:

“Mina aentsug aidau  
aents shiig takau, yacha nunú apu atatui.  
Duka David wegantunmaya atinai.  
Nunú dekaskenmak shiig takastinai.

<sup>6</sup> Nii inamjatna dui,  
mina aentsug Judá wegantu aidauk ayamjumaktinai,

Tuja Israel aents aidaushkam agkan shiig batsamsagtinai.  
 Nunidau asag, Apajuí daajinak:  
 ‘Tuke Pujuuwai iina depetmitkagbauk’  
 tuu adaikagtinai.

<sup>7</sup> “Tuke Pujuu chichaak: ‘Israel aents aidau Egipto nugkanum batsatun Tuke Pujuu jijjua nuna daajin tajai’ tusa tutaiya nunú yapajinatnuk tsawan jegattawai.

<sup>8</sup> Nunikmatai nuna idayinak: ‘Israel wegantu aidau Babilonia nugkanum, tuja tikich nugka aidaunum, utsagkam batsatun Tuke Pujuu jijja yajuak ikaunmauwa nuna daajin tajai’ tiagtinai. Apajui yajuaka ikaunmam dita nugken batsamsagtinai”, tiuwai.

*Profeta waitjin aidau*

<sup>9</sup> Jeremías chichaak:

“Profeta aidaun anentaimtusan  
 shiig senchi anentaimkun waitijai,  
 imaniai mina iyashjuk ashí sunatui.  
 Tuja Tuke Pujuu niina chichame pegkegma duwi  
 profeta aidaun pachis ujatkau asamtai,  
 nuwi senchi anentaimkun,  
 aents vinon nampeka wajukmaina numamtuk  
 winchainjan iyaumain dekafejajai.

<sup>10</sup> Juju nugkanmak,  
 ayatak aents pegkegchaun takau aidau,  
 pegkegchaun takastatus tupikatin aidau,  
 apu adaikam nuna anagma  
 tikichi waitkau aidau aatus batsatui.  
 Nunin asagmatai juju nugkanak Apajuí pegkegchaunum yumigjauwai.  
 Dutikamu asamtai chijichi kagaka megkaejamtai,  
 juju nugka juka uwejush wajas asae.”

<sup>11</sup> Tuke Pujuu chichaak:

“Profetayaske, sacerdoteyaske  
 pegkegchaun takainawai,  
 nunidau asag mina emematjaku ijuntai  
 jegamkamua nuwi pegkegchaun takaidaun wainkamjai.  
<sup>12</sup> Nuadui dita jintig suwe atakuinja iyaumain atinai.  
 Shitaki ajuatnume tusan wi inamjattajai.  
 Suwimak jukitnuji tsawan jegamtai,  
 wi ditanak suwimkan susagatjai.  
 Witjai Tuke Pujunuk, nunak dekas tajai.

<sup>13</sup> “Samarianum shiig pegkegchaun wainkamjai.

Wi dakitamua nuna profeta aidau  
 Baalan pachis etsejuinawai,  
 dutikainak mina aentsug aidau ima minak  
 umigtumainun datupainawai.

<sup>14</sup> Tuja profeta Jerusalégnunia aina duka dekas  
 nuna nagkaesau shiig pegkegchau ainawai.  
 Nuadui ditak dekas Apajuí chichamen etsegsuk  
 dita anentaimsa jikbaujin waitan etsejuinawai.  
 Nuna aents pegkegchau aidau antuinak  
 ichichmamainawai.

Nunú aidauk, makichkish pujutjin yapajiatag  
 tusagkesh anentaimainatsui.  
 Ayatak pegkegchaunak takainawai.  
 Nuadui ditak dekas aents sodomanmaya,  
 gomorranmayajai aajaku aina nuna nagkaesau ainawai.

<sup>15</sup> Nuadui wi apu Tuke Pujuu ashí senchigtinun  
 profeta Jerusalégnunia aina dusha wajukawagtigki  
 nuna yamai etsegjai:  
 Ditanak yutai yapaun ayujawagatjai.  
 Tuja umutainashkam jatain egketuan aajagatjai,

nunak dita pegkegchauji aidau ashí Israel aents aidau nugken yujaku asamtai, dutikawagtatai”, tawai Apajuí.

<sup>16</sup> Tuja atum Israel aents aidautigmin pachipas Tuke Pujuu ashí senchigtina nunú chichagtamak: “Israel aents aidautigmek anú profeta aidau tujamaina duka makichkish antugkaigpa. Dita etsejuina nunak waitjak tuu yujawai, wi mina chichameg etsegtugkata tichamaitak, ditak nagkabiag tuu yujawai.

<sup>17</sup> Nunidau asag mina chichamjun dakitin aidaun chichajuinak: ‘Tuke Pujuu tujamui, utugchata atsugtamiagtatui’, tuinawai. Tuja aents dita wakegamunak takaina nuna chichajuinak: ‘Makichik suwimkakesh jukishtatjume’, tuinawai.”

*Jeremías senchi chichakbau*

<sup>18</sup> ¿Yaita nigki waya Tuke Pujuuai chichasush?

¿Yaita nuna wainkaush, tuja nuniashkush chichamen antugkaush?

¿Yaita nuna antuk puyatjus umiktajai tusa anentaimush?

<sup>19</sup> Tuke Pujuu kajekbaujiya duka dase ishamainun dasentama iman asa, aents pegkegchau aidaunak ijinattawai.

<sup>20</sup> Tuke Pujuu kajekbaujiya duka makichkish mijamtsuk ashí wajina dutikatjai tawa nuna umika nagkankattawai.

Makichik tsawantai dekatnaitjume, waggag dusha imaniktinaita.

*Profeta waita etsejin aidaun pachis Apajuí etseggamu*

<sup>21</sup> Nunú profeta aina nunak wika makichkish awematsjai, mina chichameg etsegtugkatajum tusanuk, ditanak augtanakesh augtsujai, dutikamaitak jiinki yujasag mina daajun pachisag etsejuinawai.

<sup>22</sup> Dekas mina chichamjun antuk uminakug, mina aentsug aidaunak mina chichamjun ujakag pegkegchau takatnak idaimitkamain ainawai.

<sup>23</sup> Tuke Pujuu chichaak:

“Atushat akuish, tuja tikijuch akuish wika nuwi pujajai.

<sup>24</sup> Nuadui minak makichkish uumjutmainchau ainawai. Nayaimpinmash, nugkanmash wika pujajai, wi nunak Tuke Pujuu dekas taji.

<sup>25</sup> “Anú profeta aidau waitjuinak mina pachitus Apajuuai kajanum chichaji tuidaun antukjai.

<sup>26</sup> Wainak waitjuinak ditak anentaimas dita wakegamun chichá yuja nunash ¿wajutik idaisagti?

<sup>27</sup> Kajanmayan augmatuina mina aentsug aidaun tsanuinawai, dutikam yaunchuk dita apachji aidau Baalan emematuina mina kajimatjuki idaitusu aina numamtuk ditashkam kajimatki idaisatnime tusa.

<sup>28</sup> Makichik profetakesh kajamkagtujag, kajanmayan taji titi. ¡Untsu mina chichamjun antuk etsejuk, shiig betek etseggati! Trigon dukega duka nejejaig betekchawai.

<sup>29</sup> Mina chichamjuk jijjai betek, nuigtu martillowai kaya awati tsaitiama imanai. Witjai Tuke Pujuuunuk, nunak dekas taji.

<sup>30</sup> “Nuadui wika au profeta aidau dita ditak pempeentunikiag, witjai dekas Apajuí chichamen etsejunuk tusa tuu yuja nuna antakun kajejai. Witjai Tuke Pujuuunuk, nunak dekas taji.

<sup>31</sup> Au profeta aidau ditak anentaimas jiikiag tsanumak mina chichamjua numamtuk etsejuina nuna antakun kajeajai.

<sup>32</sup> Au profeta aidau kajanmayan waitan etsejuinak, mina aentsug aidau anentain yapagtuawag pegkegchau takamtikaina duwi kajeajai. Wika ditanak makichkish mina chichameg etsegtukatajum tusanuk ishimtsujai. Nuadui ditak mina aentsug aidau nak pegkegnumkesh yaimainchau ainawai. Witjai Tuke Pujunuk, nunak dekas tajai", tiuwai.

## **Aents aidau pegkegchaunum yumigjamu uwemtajai pachisa agagbau**

### 26

(26—45)

*Jeremíasan maatag tiagbau*

<sup>1</sup> Josíasan uchiji Joaqum Judá wegantu aidau apuji wajas inabaun nagkamai, Tuke Pujuu Jeremíasan Jerusalén pujaun chichajak:

<sup>2</sup> "Mina emematjaku ijuntai jegamkamua nuna waitijin jegantatak agkaju ayatak shugku ajigbauwa nuwi wajasta. Nuwi wajasam, aents Judá wegantu aidau mina emematjatus minidau wi amina akatjamjam nunú ashí ujakta.

<sup>3</sup> Nuna antukag pegkegchau takatan idayinak pujutjin yapajinakuig, suwimkan susatjai tiu akunush dutikashtajai.

<sup>4</sup> Tuja jujuwai ame dita ujaktinuk: 'Mina antugtutsuk, wi ditan jintintuawaitag nunash umitsuk,

<sup>5</sup> wi mina profetag aidau ishiakbau yujasag pata pataka ujamash nunashkam antugkachaju asagmatai,

<sup>6</sup> juju mina emematjaku ijuntai Jerusalén awa nunak yaunchuk Silónum aak mina emematjaku waitai aakmakbau tsaukitag dutiksanuk tsauktatjai, dutika ai juju yaakta duka ashí aents tikich nugkanmaya aidau dushiktai atatu' tawai Apajui", tiuwai Jeremias.

<sup>7</sup> Nuna aatus Jeremías tabaun sacerdote aidau, profeta aidau, ashí aents aidaujai antukajui.

<sup>8</sup> Tuja Tuke Pujuu tita tibaun ashí tusa inagnakmatai, sacerdote aidau, profeta aidau, ashí aents aidaujai ijuntujag Jeremíasan achikajui. Dutikawag chichajuinak: "¡Amek yamaik mantamnattame!

<sup>9</sup> ¿Wajukeakmea amesh Tuke Pujuu daajinish, juju Apajui jega duka, yaunchuk Silónum Apajuijai chichatai aakmakbau wajukauwa nuniktatui tusamesh, nuigtush yaaktashkam tsaukam aents jinaamtaí agkan wajastatui tusamesh tame?" tuidau. Nuna tsag ashí aents aidau nuwi batsatuk ijuntug tenteawag achikajui.

<sup>10</sup> Nuna Judá wegantu aidau apuji aidau antukag apu inamtain batsatu Apajui emematku ijuntai jegamkamunum shiyakajui. Nunik jegawag nunú jega waitiji yamajam aajakua nuwi jegantag ekemsajui.

<sup>11</sup> Nuwi pekajun sacerdote aidau, profeta aidaujai ditan chichajuinak: "Juju aentsua duka mantamnainai, wagki atumesh antagmin: 'Juju jega duka yaaktajai tsainkat-tawai' tuu wekagu asa", tuidau.

<sup>12</sup> Tusa imatiagtai, Jeremías apu aidau ashí tikich aents aidaujai ijunun chichajak: "Apajui emematku ijuntai jegamkamun, yaakat Jerusalégjai pachisan wi tabau antukunum nunak wiki nagkamnukek tatsujai, nunak dekas Tuke Pujuu tita tujtbaun tajai.

<sup>13</sup> Suwimak dakitakjume pujutjum iwajatajum, nunikjum Tuke Pujuu atumin Apajuijiya nunú umigkatajum. Nuniagminig nii suwimkan amastatjime tujabi nunak amaschattawai.

<sup>14</sup> Tuja wika juwi atumjai pujajai, atum itugtuktatajume, nunú atum wakegamu umiktajum.

<sup>15</sup> Tujash atum mina mantakjume, utugchatak atumdau atatu, wagki aents utugchatji atsaig mau asajum. Wika wiki nagkamnukek tatsujai, dekas Tuke Pujuu etsegkata tujtbaun etsegjai", tiuwai.

<sup>16</sup> Tusa timatai apu aidau, ashí aents aidaujai sacerdote aidau profeta aidaujai chichajuinak: "Juju aents pegkegchau takamsamujig atsujui, niig Tuke Pujuu iina Apajuijiya nunú tibaun etseju, nuadui niig makichkish mantamnaimatsui", tuidau.

<sup>17</sup> Tusa tiagtai, apu múun aidau ujumak wajakiag nuwi aents ijunag batsatun chichajuinak:

<sup>18</sup> “Ezequías Judá apuji wajas inamjauwa nunú tsawantin profeta Miqueas Morésetnumia aajakua nunú, Tuke Pujuu akatjam ashí aents Judá wegantu aidau juna aatus chichajak:

“Tuke Pujuu ashí senchigtina nunú chichaak:  
 ‘Jerusalégnak tsaikagtina;  
 dutikam ayatak kaya tuwasua weaku atinai.  
 Tuja nainnum Apajuí emematku ijuntai  
 jegamkamua nunak dupa tsapaka akijuatnai.  
 Jerusalégnak dutika tsaikbau asa jega atsau,  
 ayatak ajak ajakmatai wajastatui’, tiuwai.

<sup>19</sup> “Nuna aatus Miqueas tutaish, apu Ezequíasak Judá wegantu aidaujai ijunjug niinak maachajui. Nuadui apu Ezequíasak ashí aents aidaujai Tuke Pujuu ishamaidau asag, tsagkugkagtugta tusag segajui. Nuadui Tuke Pujuu ditan suwimkan susatag tiuwaitak tsagkujung idaisauwai. ¿Dita nuniku ainaimpash, ii Jeremías maaku utugchat igkugtag?”  
 tiajui.

<sup>20</sup> Tuja Semaías yaakat Quiriat-jearimnumia aajakua nuna uchiji profeta Urías Jeremíasjai betek Tuke Pujuu daajin Jerusalégnak nugka múunta nujai pegkegchaun chichagkauwai.

<sup>21</sup> Tusa timatai, apu Joaquim niina atuwe aidaujai nuna antukag mantamnati tiuwai. Tujash nuna Urías dekaa ishamak Egipto nugkanum tupikakuwai.

<sup>22</sup> Nunikmatai apu Joaquim Acboran uchiji Elnatán aajakua nuna uchijin tikich aents aidaujai Urías egaktajum tusa ishiakui.

<sup>23</sup> Dutikam yujajus Egipto nugkanum pujaun juki itawajui. Dutikawag apu Joaquiman ejetuawajui. Dutikawagmatai: “Maatajum, dutikajum aents jakau egkea ajaptai nugka taimua nuwi egkeatajum”, tusa inamjauwai.

<sup>24</sup> Tuja Zafagka uchiji Ahicam Jeremíasan wait anentau asa, aents aidau maawainum tusa ayamjukui.

## 31

*Israel aents aidau dita nugken waketyamu*

<sup>1</sup> Tuke Pujuu chichaak:

“Israel aents aidau achija yajuakbau Babilonia nugkanum batsata nunú ataktu waketug kaunawagmataig, wi ashí Israel aents aidau Apajuíji atatjai, untsu dita mina aentsug agtinai”, tawai.

<sup>2</sup> Tuke Pujuu chichaak:

“Israel aents aidau uwegshunum yujayanum nunak wi wait anenjan yaigkuitjai.

Tuja maaniamunum jinachu aina nunashkam wi ayamtiksauwaitjai.

<sup>3</sup> Yaunchkek wika ditanak atushat wantintukuitjai.

Nunika chichagkun: Wika atumnak tuke aneen asan, yamaikish tuke wait anentakun kuitamjime.

<sup>4</sup> Israel aents aidauwah, ataktu inantaittajime.

Dutika ai ataktu pandereta awatkujum shiig aneasjum nantseminaitjume.

<sup>5</sup> Samaria mujajin ataktu uva ajakmakjum nunú nejekmatai, shiig aneasjum yuwatnaitjume.

<sup>6</sup> Tuja suntag jinta kuitamin aidau

Efraigka mujajinia untsu mainak:

‘iKaunatajum, nunikagmin Jerusalén shiyaka

Tuke Pujuu iina Apajuíji emematiagmi!’

tiagtina nunú tsawan jegatnai”, tawai.

<sup>7</sup> Tuke Pujuu chichaak:

“Israel aents aidau pachisjum,

shiig aneasjum kantamatajum,

atum ainagme tikich nugka múun aina

nuna nagkaesau eme anentsa diitai aidautijum.



Nuadui senchi kantamkujum:

‘i Tuke Pujuu niina aentsji aidau ujumak iwaku juwaku aina nuna ayamjuk uwemtikjati!’ titajum.

<sup>8</sup> Babilonia nugkanum batsatjum nunak awakjattajime, tuja tikich nugkanum batsatutigminashkam atumi nugkemin awakjattajime.

Wainmachu aidaush, shutuu aidaush, nuwa ejamtin aidaush, yama uchigmaku aidaush waketjagtinaí.

Nuninak shiig kuashat waketjagtinaí.

<sup>9</sup> Awake anentaimag buutkiag waketiagtinaí, nunik mininakui wi yajuakan,

jinta pegkeg paka tukumka iyaumainchau wega nuni emagtinaítjai.

Witjai Israel aents aidau apajinuk.

Tuja Efraígakai mina uchig iwaiya duka.

<sup>10</sup> Ashí aents aidautijum

Tuke Pujuu chichame antuktajum,

nunikjum nayantsa pakajin atushat yujasjum

niina chichame etsegkatajum.

Israel aents aidau Apajuí dapampaak emegkajui.

Tujash nigki ataktu ikaunmattawai,

dutika uwija kuitamin uwigjin kuitamama imatikas kuitamkattawai.

<sup>11</sup> Tuke Pujuu Israel aents aidauak

tikich nugka muunnumia achija yajuakbaun

ayamjuk agkanmitkatnai.

<sup>12</sup> Dutika Apajuí yaigbau asag, Israel aents aidau Jerusalén

kaunawag shiig aneenak kantamiagtinaí.

Untsu Tuke Pujuu ditan yayaak: Trigo, vino, aceite,

uwig aidau, baka aidau susamun nuna maawag

shiig aneas yuwawagtinaí.

Tuja ditak ajak ajakbau yumi ukattai asa,

pegkegchiama iman agtinaí.

Ditak atakesh depeteamak achagtinaí.

<sup>13</sup> Tuja nuwa muntsujut aidau, aishmag datsa aidau,

múuntuch aidau aatus shiig aneasag nantsebiagtinaí.

Wi dita anentainak ichichtugtinaítjai,

dutikakun wake besemag batsatunak yapagtuan

dakujamun susagtinaítjai.

Tuja dita najaimainak waituina nuna nagkaesau

shiig anemtiksagtinaítjai.

<sup>14</sup> Sacerdote aidaushkam dekas

yutai shiig pegkeg aidau yuwawagtinaí,

tuja mina aentsug aidaushkam,

wi ditan susagtinaítaj nunak dita atsumamun

nagkaesau jukiagtinaí, nuninak shiig anediagtinaí.

Witjai Tuke Pujuunuk, nunak dekas tajai.”

<sup>15</sup> Nuigtu Tuke Pujuu chichaak:

“Ramá nugkanum senchi buutbau antuenawai,

nunak Raquel niina uchiji jinamunum buutak imatui,

tuja anentai ichichtugta tamash dakitawai”, tawai.

<sup>16</sup> Tujash Tuke Pujuu niina chichajak:

“Raquelah, buutu pujutsuk idaisata,

nunikam negaikijum jaipjata,

wainkan uchigtuchu juwakchatjash tiipa,

amina uchijum aidauk

shiwaja nugken batsatu waketug kaunattawai.

Nunikmatai wake besemag pujam duka

shiig aneastatme.

Witjai Tuke Pujuunuk, nunak dekas tajai.

<sup>17</sup> Uchigtuchup wajasja tusam anentaimkum waitieme,

tujash amina uchijum aidauk atakea duwi

waketug kaunatnai.

Witjai Tuke Pujuunuk nunak dekas tajai.

<sup>18</sup> Mina aentsug Efraín wegantu aidau kajeka buutuinak:

‘Israel aents aidau Apajuíjiyah,  
¡Ametme Tuke Pujuu, ii aidauti Apajuíjimek!  
Iik toro kakajus unuinamaitsu iman ayaji,  
tujash ame unuinakbau asa, ame tabau umiaji.

¡Ametme jutii Apajuíjimek,  
nuadui ataktu awagkim yaijatkata!

<sup>19</sup> Ii aidautik ame umigtsuk wainka yujasji,  
tujash awake anentaímja ii pegkegchau

takamsamu anentaímtusa,  
pempeentumaki iina bakui iju yujaji.  
Yaunchuk datsa asa pegkegchau takamsamu  
anentaímtusa datsaamaji’, tuidau.”

<sup>20</sup> Tujash Tuke Pujuu ditan chichajak:

“Efraín aents aina duka mina uchig ainawai,  
nuadui wika dita aidauun ima senchi anejai.

Suwimka susanush pachitskek idaitsujai.

¡Ashí mina anentaígjai anejai!

¡Ditanak shiig anentuínajai!

Witjai Tuke Pujuuunuk, nunak dekas tajai.

<sup>21</sup> Israel aents aidauwah,  
atum weajum nunú jinta shiig diisa wetajum,  
kajimatkugmesh ataktu yupichu wainkamnujum.

Atumi wekaetaijum aajakua nunú shiig diístajum.  
Nunikjum, ¡wakitkijum atumi yaaktajin kaunatajum!

<sup>22</sup> Makichik nuwauch emetnag pujuchujai betek  
wainka yujajum dusha ¿wajutiya idaisattagme?

Witjai Tuke Pujuu, Israel aents aidau Apajuíjinuk,  
juju nugka juwi pegkejan Apajuí umike.

Nunak nuwa aishin aneak ataktu wakitkittawai”, tawai.

*Israel aents aidau atakea duwi shiig batsamsagtin*

<sup>23</sup> Tuke Pujuu, Israel aents aidauun Apajuíji ashí senchigtina nunú kajanum chichagtak:  
“Judá wegantu aidau shiwaja nugken batsata nuna awakjan Jerusalén ikaunmattajai.  
Dutika ai dita nugken, dita yaaktajin batsamas ataktu chichainak: ‘¡Jerusaléggkah, amek  
Tuke Pujuu pegkegnum yumigsamu ata! ¡Jerusalégnun dekas shiig takamu awai!’  
tiagtinaí.

<sup>24</sup> “Nunú nugkanmak, Judá wegantu aidau, dita yaaktaji aidau, ajak ajakbau aidau,  
uwija kuitamin aidau aatus aítnei.

<sup>25</sup> “Tuja aents pimpikiag kakaumainchau wajas batsatunak wi ayujatnaitjai, dutikakun  
umutainashkam agtinaitjai”, tusa Apajuí tujutmayi.

<sup>26</sup> Tujutkui antu pujaun shintajan, kajanmap ankaja tibaijai, nunú mina shiig  
awajtukmayi.

<sup>27</sup> Tuke Pujuu chichaak: “Israel aents aidau nugken, Judá wegantu aidau nugken,  
aents aidau shiig kuashat, tuja kuntin aidaushkam imanísag yujakti tusan titatjai. Nunú  
uminkatin tsawan jegattawai.

<sup>28</sup> Tuja tsaitkasan, ijinatasan, tegaktasan, aneaku pujuyag nunisnuk yamaishkam  
yaakat tsaitkbaun ataktu yaaktamkatasan, ataktu ajakmatasan, ataktu iwajatasan nunú  
betek uminkati tusan aneaku pujuttajai. Witjai Tuke Pujuu, nunak dekas uminkatnun  
tajai.

<sup>29</sup> Nunú tsawantin chichainak: ‘Múun aidau takainawai, nuniagtai uchi aidau  
akikmainawai’ tusa tauk makichkish atsutnai.

<sup>30</sup> Wagki maki makichik aentsuk nii pegkegchau takamsamujin suwimkan jukitnai.  
Nuadui maki makichik dita pegkegchau takasbaunum jakagtinaí”, tiuawai.

<sup>31</sup> Tuja Tuke Pujuu junashkam tawai:

“Wi Israel aents aidaujai, Judá wegantu aidaujai, chichaman umiktinaitag nunú  
tsawan jegatnai.

<sup>32</sup> Wi chichaman umiktinaitag duka yaunchuk dita apachji aajaku aidau Egipto  
nugkanum batsatun ijiin ditajai chichaman umikuitag nujai betekak achatnai, wagki  
ditak midau ainayatak, mina chichamjun umikchaju ainawai. Witjai Tuke Pujuuunuk,  
nunak dekas tajai.

<sup>33</sup> “Tuja nunú tsawan jegamtai, wi ditajai chichaman umiktinaitag duka juju atinai: Wi chicham umikbauwa nuna dita anentain egketjattajai, tuja anentaimtajinish agatjagtatjai. Wi dita Apajuji atatjai, untsu dita mina aentsug agtatui. Witjai Tuke Pujunuk, nunak dekas tajai.

<sup>34</sup> “Nuadu makichik aents mina chichamjun unuimag tikichi jintinmainuk makichkish atumnashtinai, wagki nunú tsawantinig uchi aidau nagkamas múun aidaushkam ashí mina chichamjunak unuimajagtinai. Tuja wi dita tudaujinak ashí tsagkujatnaitjai. Ataktu awagkinuk dita tudaujinak adeagchatnaitjai. Witjai Tuke Pujunuk, nunak dekas uminkatnun tajai”, tiuwai.

<sup>35</sup> Tuke Pujuu etsanak tsawai etsanjatnun apusauwai, tuja yaya, nantu, aina nunashkam kashi etsanjagtinun apusauwai.

Tuja nayantsak tsukatak uutti tama imaniawai. Nunak Tuke Pujuu ashí senchigtina nunú tawai:

<sup>36</sup> “Tuja Israel aents aidau chicham umikagtinun wi umikag nuna betek uminachkug, duwi nagkamsag mina aentsug achagtinai. Witjai Tuke Pujunuk, nunak dekas tajai.

<sup>37</sup> Untsu wi ditan anagkuawaitag nuna, dita pegkegchajin idaisatag takunuk, makichik tsawantai nayaimpin ashí dekapa ashimak, nugka initkenash ashí ejeyagmatai idaisatnaitjai. Witjai Tuke Pujunuk nunak dekas tajai.”

<sup>38</sup> Tuke Pujuu chichaak: “Mina yaaktag Jerusalén tsaikbau ataktu kumpin jiikbau Hananel awa, nuwi nagkama waiti múun najanamu yaakat tuniakbaunum awa imanui yaaktamkatin tsawan jegattawai.

<sup>39</sup> Yaakat peejamu nagkatkau aidauk, tutupit juwaki Garebnum nain awa nuwi ejeenta, nuwi tunimtikja juki Goa tutaya nuni emamu atatu.

<sup>40</sup> Tuja aents jakau aidau ukutai, yuku aidau utsautai wake aina duka ashí midau atatu. Tuja nuigtushkam nugka agkan takaschamu entsa Cedrón tutaya aatus nagkamas, caballo waitai tutai etsa minitaiya nuni awa imanui nagkatkauwa duka ashí midau atatu. ¡Atakea duish Jerusaléggak ataktu awagki tsayamak achatnai!” tiuwai.

## 36

*Baruc chicham duwapnum agagbaun jega Apajuí emematku ijuntainum waya ausamu*

<sup>1</sup> Josías uchiji Joaquín Judá apuji wajas ipak usumat mijan inamai, Tuke Pujuu Jeremíasan chichajak:

<sup>2</sup> “Jeremíasah, duwap ikamkata, dutikam wi Israel aents aidaun, Judá wegantu aidaun, tuja tikich nugkanmaya aidaunashkam pachisan apu Josías pujusmatai nagkamsan timajam nunú yamai tajam nujai ashí ijumjam agagta.

<sup>3</sup> Judá wegantu aidaun wi suwimka susatasan umijag nuna antukag, pegkegchaun takaina nuna idayinakuig, dita tudaujinak tsagkujagtatjai”, tiuwai.

<sup>4</sup> Tusa timatai, Neríasan uchiji Baruc aajakua nuna Jeremías untsuka itan Tuke Pujuu tibaunak imatiksag ashí ujaku. Dutikam Baruc nuna agajui.

<sup>5</sup> Nuna ashí agagmatai, Jeremías Barukan chichajak:

“Minak juwi achijuk emetjuawagmatai, Apajuí emematku ijuntainmag wemainchau wajasau pujajai.

<sup>6</sup> Nuniau asamtai, tsawan ijagma pujusa Apajuí augtai jegatta duwi ame dekas Apajuí emematku ijuntainum wetá. Nunika jegaam wi Tuke Pujuu chichamen amina ujaka ai, ame agagmaun nunú senchi jiika ausata. Dutikamin Jerusalégnunia aidau, tikich aents Judá wegantu dita yaaktajin batsamin aidaujai nuwi kaunawag Tuke Pujuu chichamen antuktinme.

<sup>7</sup> Nunikag Tuke Pujuu ditan kajejuk suwimka susatatus umia nuna dekawag, pegkegchau takamujin idayinak pujutjin yapajiachajaintash”, tiuwai.

<sup>8</sup> Tusa tima ayu tusa nuwi weuwai. Nunik jegaa Jeremías tibaunak imatiksag Tuke Pujuu chichame agagbaun ausauwai.

<sup>9</sup> Tuja nunú tsawantin Jerusalégnunia aidau, tikich aents Judá wegantu dita yaaktajin batsamin kaunau aidaujai ashí ijagma pujusa Tuke Pujuu augnasti tusa Josías uchiji Joaquín, Judá wegantu aidaun apuji aajakua nunú, tiuwai. Nunak apu Joaquín inabaujin cinco mijanan achika, nantu nueveya nunú takau ai tiuwai.

<sup>10</sup> Nunú tsawantin Baruc Apajuí emematku ijuntainum weuwai, nunik aatu yantannum waiti yamajam najanamu aajakua nuwi jegantatak agkaju ayatak shugku ajigbau aajakua nuwi wayauwai. Nunik nuwi Safánka uchiji Guemariásan papii takataiji tesaamu aajakua nuwi wajas, ashí aents aidau antuinamunum Tuke Pujuu chichamen ausauwai.

*Apu aidau emtin Baruc Apajuí chichamen ausamu*

<sup>11</sup> Micaías, Guemariása uchiji, Safánka tijaji aajakua nunú, Tuke Pujuu chichamen Baruc augbaun ashí antukui.

<sup>12</sup> Nunik apu pujusa inamtain weuwai, nunik papiin agau pujutai tesaamunum apu aidau: Papii agatan yacha Elisamá aajakua nunú, Semaíasan uchiji Delaías, Acboran uchiji Elnatán, Safánkan uchiji Guemariás, Ananiásan uchiji Sedequías, nuigtu tikich apu aidau aatus ijunag batsatbaunum wayauwai.

<sup>13</sup> Nunik Micaías waya, Baruc Apajuí chichame agagbaun ashí aents aidau emtin aujun antukbaujinak imatiksag etseggauwai.

<sup>14</sup> Tusa etseggamtaí, apu atuwe aidau Netaniásan uchiji, Selemiásan tijaji, Cusiékan ama tijaji Jehudí aajakua nuna, Baruc ujakta nii chicham agagbaun aents aidau antuinamunum ausama nuna itaati tusa akateg awemajui. Nunú ujakam Barucshakam chicham agagbaun juki dita batsatbaunum jegauwai.

<sup>15</sup> Nunikmatai dita chichajuinak:

“Anui ekemsam chicham agagbau takakam nunú ausata antukmi”, tuidau.

Tusa tima, Baruc nuna ausauwai.

<sup>16</sup> Dutika aujus ashimkamtaí, nuna antukag ishamak pempeentunikiag chichainak:

“Dekas juju pachisa apu ujakagmi”, tiajui.

<sup>17</sup> Nuna tusag Barukan iniinak:

“Jusha tuwiya agagmaume nunú etseggkata. ¿Jeremíasak tuu agagta tujamatai agagmaum?” tuidau.

<sup>18</sup> Tusa tama Baruc ditan ayaak:

“Wika junak Jeremías tuu agagta tujutkui, nuna imatiksasuk tintai agagmajai”, tiuwai.

<sup>19</sup> Tusa timatai niina chichajuinak:

“¡Nuniakuig amek yamaikiuch Jeremíasjai mai tupikakim uumkatajum! ¡Makichkish atum pujamunak dekashtinme!” tiajui.

*Apu Joaquim papii agagbaun apeamu*

<sup>20</sup> Nuna tusag apu atuwe aidauk nunú chicham agagbaun Elisamá pujusa papii takataijin awaya ukuinak, nuna pachis apu ujakagtatus wegajui.

<sup>21</sup> Dutika ujakam, nunú chicham agagbau Elisamá papii takatainum au asamtaí, nunú utita tusa Jehudínkan awemauwai. Tusa tima juki itaa, apu niina atuwe aidaujai antuinamunum ausauwai.

<sup>22</sup> Tuja nantu Quislevting tsetsek aajakui. Iman asamtaí apuk tsetsektin pujustinji tesaamunum nuwi jii anamak pujau.

<sup>23</sup> Nuwi pujau asa Jehudí chicham agagbaun aujus wetai, ausa nagkaikimun apu kuchiyai tsupik jinum Pataka apejakui. Duti dutikakua ashí apea ashimkauwai.

<sup>24</sup> Nunú chicham Apajuínu agagbaun antuinakush, apuk niina atuwe aidaujaig makichkish ishambachajui, tuja awake anentaimjagkesh wake besemag dekapenakug jáanchjinak ichigchajui.

<sup>25</sup> Nunú chicham agagbaun apu apetaí, Elnatán, Delaías, Guemariásjai niina chichajuinak: “Wait aneamam apeawaiapa”, tuidau. Tusa tamash ditanak antuugsuk,

<sup>26</sup> Jerahmeel aajakua nuna, tuja Asrielan uchiji Seraiásan, Abdeelan uchiji Selemiásan aatus apu chichajak: “Baruc Jeremías tabaun agauwa nunú Jeremíasjai achikjum egkeatajum”, tusa inamjauwai. Tujash ditanak Tuke Pujuu uukuí wainkainum tusa.

*Jeremías Barukan ataktu Apajuí chichame agagta tusa inagbau*

<sup>27</sup> Baruc Tuke Pujuu chichamen Jeremías agagta tima agajua nuna apu apea ajapamtaí, Tuke Pujuu Jeremíasan ataktu chichajak:

<sup>28</sup> “Yamajam duwap ikamkata, dutikam yama nagkamchaku agagbaun Judá apuji Joaquim apeabia nujai betek nunú duwapnum agagta.

<sup>29</sup> Tuja nuigtushkam apu Joaquim chichagkum: “Tuke Pujuu chichaak: Babilonianmaya aidauk makichkish megkaetsuk tuké kaunattawai, nunikag aents aidau-nak kuntin aidaujai ijinawagtatui, tusa Jeremías agajua nunú apeaume, dutikakum Jeremíaschakam jiyakume.

<sup>30</sup> Dutikau asam yamai juju dekata. Amina uchijum aina nuwiyag makichkish Judá wegantu aidaun apujig achatnai. Tuja ame jakaminig ukugmaschagtinai, dutijamawag-matai amina iyashmek etsa sukuam tepetnai, untsu kashi bichatug tepetnai.

<sup>31</sup> Aminak ame wegantu aidaujui, tuja amina atuwem apu aina nujai ijumjan atumi pegkegchajuin suwimkan amastatjime. Atumin, tuja Jerusalégnunmia aidaunashkam, ashí Judá wegantu aina nujai ijumjan suwimak ishain aidaun amastatjime tusan tibaijim nunak imatiksasuk amastatjime. Nunak dutikattajime wagki atumek mina umigtukchau asagmin', tujamui Apajui', tiuwai Jeremías.

<sup>32</sup> Nuna tusa nagkanak, Jeremías tikich duwapen juki Baruc papiin agau aajakua nuna susauwai, dutikam nuna juki Jeremías tabaunak imatiksag ashí agajui. Nunak yama nagkamchaku agagbaun apu Joaquim apeauwa nuna ashí betek agajui, dutikak, nuigtushkam tikichin nunú chicham agagbaujai betekmantinun Jeremías ekek tutai nunashkam dutiksag ashí agajui.

## 37

### *Jeremías achika egkeamu*

<sup>1</sup> Babilonia nugkan apuji Nabucodonosor, apu Joaquina uchiji Jeconíasan Judá apuji adaimainun idayak, Josías uchiji Sedequíasan apu adaikauwai.

<sup>2</sup> Tujash Sedequíasak, niina atuwe aidaush, tuja tikich aents Judá wegantu aidaushkam Jeremías Tuke Pujuu chichamen etsegbaunak antugkachu ainawai.

<sup>3</sup> Nuninayatak apu Sedequías Selemíasan uchiji Jucal aajakua nuna sacerdote Sofonías Maaseíasan uchiji aajakua nujai akateg profeta Jeremías ujaktajum tusa ishiakui. Dutika ishimak aatus akatmamjauwai: "Jeremíasah, Tuke Pujuu iina Apajuijia nunú ame segatkagtitá", tiuwai.

<sup>4</sup> Tuja Jeremíasak eke aents achika chimpitainmak egkeachbau asa, agkan wekagajakui.

<sup>5</sup> Nunú tsawantin babilonianmaya suntag aidau Jerusalégkan jetektatus tenteawag batsamtau. Nunik batsatun egiptunmaya suntag aidau apu Sedequías maanitai atuk-agtatus mininawai tabaun antukajui, nunik antukag ishamak dita nugken waketuinak Jerusalégnak ukukiajui.

<sup>6</sup> Nunikagmatai Tuke Pujuu Jeremíasan chichajak:

<sup>7</sup> "Judá apuji aents chichama etsejin aidaun awemama nunú ujakta: Egiptunmaya suntag aidau dita ayamjuktatus minina duka dita nugken wakettattawai.

<sup>8</sup> Nunikmatai, babilonianmaya aidau ataktu waketu Jerusalégnak jetekag depetuk ditanu emagtatui, dutikainak yaaktanak jiiyai apeawagtatui.

<sup>9</sup> Tuke Pujuu chichaak: Babilonianmaya aidau tuke shimak shiyakaje, ataktu wakitkig kaunachagtatui tusagmek shiijak aneasaigpajum, nunak nunikchattawai.

<sup>10</sup> Tuja atumin ataktu jeteppainakui, atum ashí ijinawagminish, ujumak aents kupinau aidau dita aakjin juwajuu aina nunú ataktu nantajag atumnak depetamak atumi yaaktajinak jiiyai ekemakagtatui", tiuwai.

<sup>11</sup> Tuja egiptunmaya suntag aidau mininamun antukag, caldeo suntag aidau Jerusalégkan tentea batsatu waketuinaig,

<sup>12</sup> Jeremías nuwi pujau jinkiuwai, Benjamín wegantu aidau nugken wetatus, wagki nuwi jegaa nugkan tinamkagtiagtai niinu atinun jukitin asa.

<sup>13</sup> Nunik wea weakua Benjamíngka waitijin jegattaman, Selemíasan uchiji Irías Hananíasan tijaji waitin kuitamin aajakua nunú awajus chichajak:

"¡Amek dekas babilonianmaya suntag aidaujui ijunjatjai tusameap wakegame!" tiuwai.

<sup>14</sup> Tusa tama Jeremías ayaak:

"¡Wika babilonianmaya suntag aidaujui ijunjatjai tusanuk wakegatsjai!" tiuwai.

Tusa tutaish antugtsuk achika juki apu atuwe batsatbaunum egeauwai.

<sup>15-16</sup> Dutikamtaí nunú apu atuwe aidau Jeremíasan shiig senchi kajejuidau asag, suwimatajum dutikajum Jonatán papiin agauwa nuna jee aajakua nunú, yamai aents achika egketai awajsamua nuwi inatak taimua nuwi egkeatajum tusa tima egkeawajui. Dutikam nuwi kuashat tsawan pujusui.

<sup>17</sup> Nuwi pujaun, Jeremías jikjum wi pujusa inamtaijua juwi itaatajum tusa apu Sedequías, tiuwai. Tusa timatai Jeremíasan juki egeawajui. Dutikawagmatai apu Sedequías ima niinak akanak iniak:

"¿Chicham etsegkata tusa Tuke Pujuu akatamjamush atsuak?" tau.

Tama Jeremías ayaak:

“Ehe awai, tuja apujuh, aminak Babilonia nugkan apujiya nunú depetamkattawai tujutmae”, tiuwai.

<sup>18</sup> Nuna tusa niina pempeentuki iniak:

“Atum mina achigkajum egketuaujum nunash wisha ¿aminash, amina atuwem aidaunash, nuniachkunush ashí tikich aents aina nunash waji pegkegchauna dutikau asamtai egketuaugme?”

<sup>19</sup> Tuja profeta aidau chichainak, babilonianmaya aidauk atumnak, tuja atumi nugkenash jetekchagtinaí tusa tujamin agma dusha ¿tuwi batsatua?

<sup>20</sup> Apuh, minash wait anenjugta tajame. Wait aneamam, ¿ataktu awagkimek Jonatágka jeen egkeatajum tusamek tiipa! ¡Nuwi epenim pujus jakati tusamesh wait aneamam idaitusaipa!” tiuwai.

<sup>21</sup> Tusa timatai apu Sedequías, Jeremías jukijum agá suntaja ijuntai awa nuwi apusajum, kashi kashinig pagka sujin yuja nuwiya makichik pag sutatjume, tiuwai. Tusa timatai jukiag, suntaja ijuntain apusajui. Dutikawag makichik tsawantai makichik pagkan suwidau. Dutika suu batsatu ashí yaaktanum pag amuekamtai, sutsuk idaisajui.

## 38

### *Jeremías achika waanum egkeamu*

<sup>1</sup> Nunú kuashat tsawan nagkaemakui ai, Jeremíasan shiwaaji aidau: Matánka uchiji Sefatías, Pashura uchiji Guedalías, Selemías uchiji Jucal, aatus antuinamunum Jeremías aents tuwakbaunum chichaman etsejak:

<sup>2</sup> “Tuke Pujuu chichaak: ‘Juju yaaktanum juwak pujauk maaniamunum, nujantai, jatai aatus jinawagtatui, untsu babilonianmaya suntag aidaunum sujumanuk, pujutjinakesh uwemtijattawai.’”

<sup>3</sup> Tuja nuigtu Tuke Pujuu chichaak: ‘Juju yaaktanak Babilonia nugkan apuji niinu awajsattawai, dutikamtaig makichkish atanmainchau atatuí’, tawai Apajúí”, tiuwai Jeremías.

<sup>4</sup> Nuna antukag apu atuwe aidau apun chichajuinak:

“Jeremiasak nuna taku, suntag yaaktanum batsata nunak ashí aents aidaujai, kakakchau wainkauchia nunin anemtikawai. Juju aentsuk pegkegnakesh augmatu wekaetsui, ima pegkegchaunak augmatuí”, tuidau.

<sup>5</sup> Tusa tiagtai apu Sedequías ditan ayaak:

“Ayu, atum tajum duka pegkejai, atum itugkatag tajume dutikatajum. Wika atum dutikatag tabaunak dutikawaigpajum tumaitsujai”, tiuwai.

<sup>6</sup> Tusa timatai, shimutuk Jeremíasan achikajui, dutikawag daekai jigkawag apu uchiji Melquías aajakua nuna yumigmatji agá taimu aajakua nuwi egkeawajui. Nunú yumigmatnumak yumi atsau, ayatak kunta piyaku asamtai, nuwi initak amamki egkemsauwai.

<sup>7</sup> Dutikawaju ai etiope aents apu inake kajitssa diitai Ébed-mélec apu inamtain pujujakua nunú, Jeremíasan achika waanum egkeawaje tabaun dekauwai. Nunú tsawantinig apu Sedequíasak Benjamígka waitiji tutainum ijuna pujujakui.

<sup>8</sup> Untsu Ébed-mélec apu pujusa inamtaijin pujau jiinki apu ujaktatus weuwai.

<sup>9</sup> Nunik jegajua ujaak: “Apujuh, au aents aidau Jeremíasan shiig senchi waitkainawai, nugka taimunum initak egkeam puja nuwig pujus nujantai jakattawai, tuja pag sumainchamak ashí yaaktanmak atsawai”, tiuwai.

<sup>10</sup> Tusa ujakam apu Sedequías Ébed-mélekan inajui, treinta aents jukim Jeremías eke jatsaig jikktajum tusa.

<sup>11</sup> Tusa tima Ébed-mélec aentsu yajuak, apu pujusa inamtaijin makichik tesaamu jáanch ijumtainum waya, jáanch mamukun juki, daekai jigka Jeremíasan detuauwai.

<sup>12</sup> Dutika chichajak:

“Anú jáanchia duwi kuntugmin pempemagta, daek pakapakai”, tiuwai. Tusa tima kuntujin jáanchin pempemajui.

<sup>13</sup> Nunikmatai daeka detuawag jiiikajui. Dutika jiiikim Jeremiasak apu suntaji aidau ijuntai agá aajakua nuwi pujau.

### *Sedequías Jeremíasan untsukbau*

<sup>14</sup> Nuwi pujaun Jeremías jukijum Apajúí emematku ijuntai waitiji kempatuma nuwi ejentatajum, tusa apu Sedequías timatai, jukiag ejeentajui. Dutikawagmatai apu Sedequías Jeremíasan jegantun chichajak:

“Wi amina iniastatjam nunú waitjutsuk dekas aigkata”, tiuwai.

<sup>15</sup> Tusa tama Jeremías ayaak:

“Wi dekaskenum aimkamtaig amek mantuattame, tuja wi chicham pegkejan amina ujaiish antugtukchattame”, tiuwai.

<sup>16</sup> Tusa tutai apu Sedequíás nii dekaskenum umikintjin ashishmas chichajak:

“Atsa, mashattajame, nunak Tuke Pujuu iina pujutan amasua nuna daajin tajame. Tuja tikich maatnume tusanush idaisashtajame”, tiuwai.

<sup>17</sup> Tusa tama Jeremías Sedequíásan chichajak:

“Ayu, kame ujaktajame: Tuke Pujuu ashí senchigtina nunú chichaak: ‘Atum aidautigmek ashí Babilonia apujin sumimkatajum, nunikjumeck amina pataim aidaujai uwemjattagme. Tuja yaaktakesh apenashtatui.

<sup>18</sup> Untsu ame nunishtaik, juju yaaktanak babilonianmaya aidau utsantuawag apeawag-tatui, dutikainakuí atumshakam makichkish uwemjashtatjume’ tujamui”, tiuwai.

<sup>19</sup> Tusa tutai Sedequíás ayaak:

“Kame nunak nunimainaitjai, tujash judío aents aidau babilonianmayajai ijunjaja nuna wi ishamajai. Wi Babilonia apujin yunumtaik, nunú judío aents aidau minak senchi suwi suwimjuinakua mantumain ainawai”, tiuwai.

<sup>20</sup> Tusa tutai Jeremías ayaak:

“Apujuh, aminak judío aents aidauk suwimjamachagtatui. Tuke Pujuu chichamen wi amina tajam nunú wait aneasam umikta, nunú umiakmek shiig pujustatme, tuja nuigtush mantamachagtatui.

<sup>21</sup> Untsu Tuke Pujuu tujama nunú umiatsminish, waji utugchatak nagkaetamkiti nuna Apajuí iwaintugkame.

<sup>22</sup> Apujuh, ame pujusa inamtaigmin nuwa aidau batsata nunak babilonianmaya aidau ashí yajuakag suntaja apuji aidau susagtatui, dutikam imau batsamas chichainak:

“ ‘Apu Sedequíásnak niina kumpauchihi aidau tsanujag depetkagmayi, amina kumpajum aidauk ashí idaitamsaje. Tuja amek suwemea iman kuntanum amamam tepeattaku wajame’, tujamiagtinai”, tiuwai.

<sup>23</sup> Nuna tusa nuigtushkam chichajak:

“Amina nuwem aina nunak uchijum aidaujai ashí Babilonia nugkanum yajuakagtatui, tuja ameshkam uwemjashtatme, Babilonia apuji aminak achigmaktatui, tuja yaak-tanashkam apeawagtatui”, tiuwai.

<sup>24</sup> Tusa tutai Sedequíás Jeremíasan chichajak:

“Ame pujutjum puyatjakmek, juju mina ujatkaum duka makichkish tikichik ujakaipa.

<sup>25</sup> Tuja wi amijai chichasag nuna apu aidau dekawag, waji pachisam apush ausamume, tuja niish wajinjutpame nunú uutsuk etsegkata, tuja nunú etsegchakmek mantamnattame tujamain ainawai.

<sup>26</sup> Tusa tujamainakuig ame chichagkum: ‘Ataktu awagtukmek Jonatágka jeen aents achika egketai awa nuwi egkeam pujus jakati tusamek wait aneasam tujutipa tusan augkun pujumjai’ tita”, tiuwai.

<sup>27</sup> Tusa apu tibaunak imatiksag ashí apu atuwe aidau Jeremíasan shimutkajui. Nunik jegajuawag inidau. Tusa iniam, apu tuu aimkata tibaunak imatiksag betek aimkauwai. Tusa timatai, apu Sedequíás Jeremíasjai chichamun antukchaju asag utugchatan tutsuk agkan ukukiajui.

<sup>28</sup> Tuja Jeremiasak suntaja ijuntai agá aajakua nuwi pujau. Nuwi pujaig Jerusalégkan jetekag utuawajui.

## Ezequiel Profeta untsukbau

(1—3)

*Ezequiel Apajúi pujusa inamtaiji wainkamu*

<sup>1-3</sup> Witjai sacerdote Ezequiel, Buzí uchiji. Babilonianmaya aents aidau apu Joaquiŕkan achika juwinak tikich Israel aents aidaujai ijumag achijuk jujukiajabi. Dutijuawagmatai Babilonia nugkanum cinco mijan pujusan, mina mijanjun treinta mijan ejeyu ai, tsawan cincotin, nantu Tammuz\* takau ai, kajanum namak Quebar aajakua nuwi uwet eketai, nayaim ujaniabi. Nunikmatai Apajúin wainkabajai, nunikan Tuke Pujuu senchijin dekapjabajai, dutijua ashí iwaintugkabi tikich tsawantinish wajig nagkaemagtinush ayi nuna.

<sup>4</sup> Nunú nayaim ujanbaunmayan diikman etsa akaetaiya nuwiya dase shiig senchi dasentuk yujagkim múun ijiamu winchamtin, tuja nunú yujagminmaya peem ashí yantamnum peetun, nuigtu yujagminum jii kegaunum nuna ejapeen jiju jinum jiyam duwenip wegama imanun wainkabajai.

<sup>5</sup> Imaniamunum nuna ejapeen, ipak usumat aentsjai betek wantinkabi.

<sup>6</sup> Nunú aina duka ipak usumat yapintin, ipak usumat nanaptin,

<sup>7</sup> kagkajig chuujam aentsu kagkajijai betek, nanchikig toro tsakata nanchikijai betek, bronce shiig keemja winchamtin awajsamujai betekayi.

<sup>8-9</sup> Nuigtushkam nunú ipak usumat yapintin, ipak usumat nanaptin aina nuna uwejeg nanape nugkaan ipak usumat aentsu uwejejai betek agmayi. Tuja nanape aina duka mai nanapenig antiniakuyi, tuja nanamainakushkam betekush ukunmakesh ayampag niimtsuk nanamiagmayi.

<sup>10</sup> Tuja nuna niimeg juninuyi:

Eem diyamak aentsua nuninuyi, tuja untsugnumanini diyamak león niimtinuyi, unstu menanum diyamak toro tsakata nuninuyi, tuja ukunum diyamak ukukuijai betekayi.

<sup>11</sup> Tuja nanape aidauk yaki takuni agmayi, nuwiya jimaja nunú mai nanapeg antinik amayi, tuja tikich jimaja nunú iyashin dukuakuyi.

<sup>12</sup> Apajúi senchiji wajuk ditan emawa nunisag tutupit, makichkish ukunmakesh ayampash niimtsuk shimiagmayi.

<sup>13</sup> Nunú aina nuna niimeg jii kaiji kegaujai betek agmayi, tuja nuna ejapenis jii ekemaka ekentsamu mai we mai we wajatai tumain wantinmayi, tuja jii nunú kegauk winchantibi, nuwiya peem aidau jiiiniagmayi.

<sup>14</sup> Nunú aina duka shiyakajash shiig wamak peemjai betek waketug kaunmayi.

<sup>15</sup> Tuja nunú aidau diikman maki makichik dita ijunbau yantamen rueda ajuidaun wainkabajai.

<sup>16</sup> Nunú rueda aidauk makichik niimtinuk betek najanamu, kaya pegkejuch winchamtina iman agmayi. Tuja nuna initkenis tikich rueda egketatai tumain shiig shutukja umikbauyi.

<sup>17</sup> Imatika umikbau asa ashí yantamnum buchitkush ukunmak waketchabi.

<sup>18</sup> Tuja rueda ipak usumat shutukjamua nuna yantame aidauunmak jii batsatkamu winchamtin agmayi. Nuna imanun wainkan senchi ishambabajai.

<sup>19</sup> Nunú aentsjai betek aidau shimutai, ruedashkam ditajai betek shimibi, tuja dita yaki takuntaik, ruedashkam yaki takuniagmayi.

<sup>20</sup> Nunú aidauun Apajúi Wakani pujau asa, nii wajuk weawa nunitaik ditashkam nunisag shimiagmayi, tuja yaki takuntaik betek yaki takuniagmayi, untsu nugká akaetaik betek akayagmayi, tuja ukunum wakettaishkam betek waketiagmayi.

<sup>21</sup> Tuja aentsua nunin aidau buchitiagtaik, rueda aidashkam buchitaidau, tuja dita nuwig jasa ataik ruedashkam nuwig batsamayi. Untsu nunú yaki takuniagtaik ditashkam yaki takunaidau, wagki Apajúi Wakaniya nunú ruedanum au asantai.

<sup>22</sup> Nunú aentsjai betek aidau buuken makichik nagkuekau vidrio winchamtina iman pegkejuch ajiagmayi.

<sup>23</sup> Nuna nugkaan, jimag nanape dakuenak mai antiniakuyi, tuja tikich jimaja nunú iyashin dukuakuyi.

\* 1:1-3 "Tammuz" tawa nunak iina calendariojinig nantu Junio ejapeen tsawan quincen achika nagkama nantu Julio ikak tsawan quincetin makichik nantu ejega nuna taku tawai.



<sup>24</sup> Tuja nanamiagtaik, nanape aina duka namak senchi dujajua uutama imatmayi, Apajui ashí senchigtina nunú chichamus imatatai tumain, suntag kuashat ijunag pampaumaina imatmayi. Tuja nanaak wegau iyainiagtaik, nanape aina duka nugkaan nemag amayi.

<sup>25</sup> Nuninai dita buukenia makichik waji nagkuekau ajuinamunmaya senchi chajatuk jijnmayi.

<sup>26</sup> Tuja nunú dita buuken ajuina nuwi apu ekemsa inamtaiji safiro najanamujai betekayi. Nuwi makichik aentsjai betek ekemayi.

<sup>27-28</sup> Tuja akachumtaya nuwi nagkamas yakinig, jiju ukuija tsuwatji utsankamu winchamtinama imanayi, untsu akachumtaya nuna nugkanig jiijai betek keebi. Tuja ashí yantamnumak keeka tsaaptin wajas amayi. Untsu nuna yantamen yumi yutugmatai yujagminum pagki wajaie tutayama nunin winchamtin wajaknuyi. Nuwiya Tuke Pujuu imanji wantintugkabi.

Dutajakui tikishmajan nijaijui nugka antigkan pujusan mina aujtaun antukbajiai.

## 2

### *Apajui Ezequielan takagtusti tusa untsukbau*

<sup>1</sup> Tuja Apajui chichagtak: "Aentsu uchijiyah, wajaita amejai chichastatajai", tujutmayi.

<sup>2</sup> Tusa tujutai Apajui senchiji egkemjutuabi, nunik awajtukmayi, dutijuamtai dekabi-ajai Apajui aujtamun.

<sup>3</sup> Tuja nii chichagtak: "Aentsu uchijiyah, Israela uchiji aidauk, dita apachji aidau mina chichamjun umigtukchaju aina nujai betek mina chichameg umitan dakitin asag yamaikish pegkegchaunak taka batsatui.

<sup>4</sup> Dita uchiji aina duka antakchau, kakajus antumtikmainchau ainawai, nunin ainaig wi aminak awemajame, mina chichamjun ditan ujakti tusan.

<sup>5</sup> Tusa ujamin dita antugtamainakug antugtamain ainawai, nuniachkush antugtamainchau ainawai. Nuninakuish duka puyatjukaipa, amek chichamak etsegkata, ditak antakchau chichaman umichu intimkiu aina duwi nunimain ainawai, tujash nunak ditai profeta puja nunak dekayaitak nunikagtatui.

<sup>6</sup> Tujash ditak ishamkaipa, dita chichaman tujamainakuish, ishamkagtukaipa, jagki tentea apakbauwa iman, tuja titig ayaunum ejapeena wajamaina iman dekapeakmesh, tuja kajekag pegkegchaun chichagtamainakuish, amek ishamkagtukaipa.

<sup>7</sup> Mina chichamjun antutan dakitainakuish, amek mijamtsuk mina chichamjuk etsegkata, ditak chichaman umichu intimkiu ainawai.

<sup>8</sup> Wi tajam nunú shiig antukta. Tuja amek ditajai betekak aipa, tuja wi amina amastatag nunú yuwata", tujutmayi.

<sup>9</sup> Tujutkui diistakaman papiinum chicham agaja pempeagbaun awentujun wajaun wainkabajiai,

<sup>10</sup> tuja mai yantamejai agagbaun nuna dakuék iwaintugkabi, nunú agagbauk: "Jakamunum buutbau, najaimamu, wake besemag pujamu", aatsa agagbauyi.

## 3

<sup>1-4</sup> Nuna iwaintujuk chichagtak: "Aentsu uchijiyah, juju papiinum chicham agagbaun amag nunú yuwam ejemagta", tujutmayi. Tusa tujutmatai papiinum chicham agagbaun yuwabajiai, duka dapa yumijijai betek yumimituyi. Nuna yuwa ai chichagtak: "Israel aents aidaunum weme wi amina titatjam nunú etsegkata", tujutmayi.

<sup>5-6</sup> Nuigtu chichaak: "Tuja ame chicham dekamainchaun chichaaku aidau batsatbaunmak awematsjame, ame wegantu aidaunum awemajame. Aents tikich chichaman chichaaku aidau batsatbaunum awema aish, ditak ame mina chichameg etsegbaunak shiig antugtamain ainawai.

<sup>7</sup> Tujash Israel aents aina duka aminak antugtamakachagtatui, wi tabaunash antu- inachu asag, wagki ditak antakchau, kakajus antumtikmainchau, intimkiu ainawai.

<sup>8</sup> Tuja wi aminak dita kajemtin antakchau aina nujai betek awajsattajame.

<sup>9</sup> Wi aminak kaya katsugma iman emattajame. Nuadui amina kajegtamainak ishamainun diigmainakuish ishamkagtukaipa, ditak kakajus antumtikmainchau intimkiu ainawai", tujutmayi.

<sup>10</sup> Tuja nuigtushkam Apajui chichagtak:

"Wi titatjam nunú shiig antukam jukita, dutikam kajimatmainchau aneaku ata.

<sup>11</sup> Amina pataim aidau achija yajuakbau Babilonia nugkanum batsata nuwi weme wi tajam nunú etsegkata. Tusa etsegmin antugtamainashkuish, makichkish idaitsuk, Tuke Pujuu tawai tusam etsegkata", tujutmayi.

<sup>12</sup> Tusa tujutai Apajuí senchiji yaki takugmayi, dutijai mina ukujui Tuke Pujuu imanjin nugka au takunak uujak wajukeama imatun antukbajiai.

<sup>13</sup> Tuja aentsjai betek aina dushakam, nanapen mai apatuinak senchi uutmayi, tuja rueda aidaushkam kagkegainak nugka uujak wajukeama imatmayi.

<sup>14</sup> Tuja minak nuwi pujai, uwegnum achika jumaina numamtuk Apajuín Wakani jujukmayi. Dutijakui kajekan wake besemag dekapmajiai.

<sup>15</sup> Nunikan Tel Abib, namak Quebarnum uwet, Israel aents aidau achija yajuakbau bat-satbaunum jegabijai, nunikan nuwi ditajai makichkish shiig anentaimjan tumainchau dekapeakun chichatsuk wake besemag siete tsawan pujubijai.

*Apajuí Ezequielan Israel aents aidanum mina chichamjun etsegtugkati tusa apusamu*

<sup>16</sup> Siete tsawan nagkaemai, Tuke Pujuu chichagtak:

<sup>17</sup> “Aentsu uchijiyah, wi aminak Israel aents aidanum kuitamkati tusan apusajame, dutikamu asam, wajina wi titatjame duka imatiksimek dita aidau ujaktatme.

<sup>18</sup> Tuja aents pegkegchau takaina nunak idayinak pujutjin iwajatnume tusan wi taja nunú ame ujakcham, pegkegchau takatan idaitsuk batsamas jinawagmataig, ametme suwimak jukitnumek.

<sup>19</sup> Untsu pegkegchau takainajum duka idaikujum pujutjum iwajatajum tusa ame ujamaitek, amina antugtamtsuk pegkegchau takatan idaitsuk batsamas jinaamtaig, amina utugchatjume atsuttawai.

<sup>20</sup> Tuja namputchawame, aents pegkegchau takatan tujanjawaitak, ataktu pegkegchaun takak megkaetanum pujau wainiatkum ame mina chichameg ujatsuk idaisam pujus jakamtaig, ame suwimak suwam atatme.

<sup>21</sup> Tuja ame chicham utjakam awake anentaimag pujutjin yapajiakug iwaku pujuttawai, nuniakui ameshkam utugchat atsau agkan juwaktatme”, tujutmayi.

*Ezequiel chichachu wajasbau*

<sup>22</sup> Nuna tusa Tuke Pujuu mina uwejuí achijuk chichagtak:

“Wajaim agá nugka paka nuwi wetá, nunikamin ame dutikatnun pachisan ujakta-jame”, tujutmayi.

<sup>23</sup> Tujutmatai agá jiiinkin jeganbajiai, nuwi wajasau Tuke Pujuu imanjin wainkabijai, nunikan shiig diikman namak Quebarnum uwet pujusan Apajuí imanjin wainkabijai nujai betek wainkan, tikishmajan nijaijuí nugkan antigkan pujusbajiai.

<sup>24</sup> Nunikan pujai Apajuí Wakani egkemjutug awajtukmayi, dutijua chichagtak:

“Jemin weme epemim egkemsata.

<sup>25</sup> Nijah, aminak achipakag daekai jigkapajag, jiiinki agkan wekaemainchau etamiagtatui.

<sup>26</sup> Tuja wi aminak ujumak tsawantai chichachu awajstajame, nuadui amek Israel aents aidau intimkiu aina duka kakajus chichagmainchau wajastatme.

<sup>27</sup> Tujash wi ataktu chichamtikattajame, dutika ai chichaakmek: ‘Nii antuktatus wakegawk antukti, tuja antutan dakitauk antukchati’ tawai Tuke Pujuu titatme. Wagki ditak intimkiu ainawai”, tiuwai Apajuí.

## 18

*Pegkegchaun takauk jakattawai tibau*

<sup>1</sup> Tuke Pujuu nuigtu chichagtak:

<sup>2</sup> “¿Wagka Israel aents aidaush juju chicham agagbaunum chichaak: ‘Múun aidau pegkegchau takamsamunum uchi aidau waituinawai’, tawa nunash kajimatuinatsua?

<sup>3</sup> Tujash dekas uminkatnun wi yamai juna tajai. Atumek juju chicham agagbauwa duka ataktu awagkimek Israel aents aidanum mak augmattsashtinaitjume.

<sup>4</sup> Ashí aents aina duka midau ainawai, múun aidaush, uchi aidaushkam midau ainawai. Nuadui aents ayatak pegkegchaunak takaidauk jakagtinaí.

<sup>5</sup> “Aents pegkejan taka duka pegkeg takatan dekawai.

<sup>6</sup> Nunin asa wainka apajuímtai dakumka najanamu aidanum emematiagtatus mujanum shimutaish, ditajai ijunjag ememattsui, tuja nuwigkish kajinmamsag anentaimtsui. Tikichi nuwejaish tsanijinchauwai, niina nuwe tsawanjin jataish nuwejaig kanatsui,

<sup>7</sup> tikichnash makichkish waitkachui, tuja aents diwijun akimkum jukitjai tusa niina jáanchji ukukbaunash akimatai awaktawai. Makichik aentsnakesh kasagchauwai. Yumainji atsujunash ajampeawai, jáanch atsujunash suwawai.

<sup>8</sup> Kuichkin tsagkamkash ewaekam akigkata tusag tuchauwai, tuja tikichnash pegkegchau awagmattsui, utugchat ajaunash yadaukita dekas utugchatash nuna diisa shiig epegtinaí.

<sup>9</sup> Nunú aentsua duka iwaku dukap tsawan pujustinai, wagki mina chichamjun betek umiau asa. Witjai apu Tuke Pujuunuk, nunak dekas uminkatnun tajai.

<sup>10</sup> "Tujash nunú aentsu uchijiyaitak kasa, magkagtin, niina apaji dutikachbaun takak,

<sup>11</sup> nuwiya aents aidau wainka apajuúmtain ememattatus mujanum shimutai, ditajai ijunag nuna emematak, tuja tikichi nuwen tsanijimak,

<sup>12</sup> ujuuna aidau waitkak, tikich aidanash kasajin, tuja aents diwimkagtukbaujin akikmak jukitatus, niina jáanchji ukukbaujinash awagtutsuk, wainka apajuúmtai aidanum kajinas anentaimak pegkegchaun wi dakitamua nuna takak,

<sup>13</sup> kuichkin tsagkamkash nuní senchi ewaegak segaakug iwakuk pujumaisui. Ashí wi dakitamua nuna dutikau asa, nunú aentsuk nii pegkegchau takasbaujinig akikchau jaka ajapnattawai.

<sup>14</sup> "Tujash aents pegkegchauwa nuna uchiji, niina apaji tudau ataish, nigka nunak aintsuk,

<sup>15</sup> wainka apajuúmtai aidau mujanum emematuinak ijunag jüstamiagtaish, ditajai ijunag jüstamchau, nuigtush nuwigkish kajintsag anentaimchau, tuja tikichi nuwejaish tsanijnchau,

<sup>16</sup> tikichnash waitkachu, akikmakun jukitjai tusa jáanch ukukbaunash betekush awagtau. Makichkish aentsnak kasagchau, aents yumainji atsununash ajampeau, jáanchji atsununash suwau,

<sup>17</sup> tikichnash pegkegchauk awagmachu, kuichkin tsagkamkash ewaekam akigkata tusag segachu. Nunú aentsua duka niina apaji tudaujinig mantamnamaisui. Ayatak nigka dukap tsawan iwaku pujustinai. Wagki wi mina chichameg umiktinun ukuki-uwaitag nuna betek umiau asa.

<sup>18</sup> "Tuja niina apajig katsek, kasa, tikichin kasajin asa, nii pegkegchau takasbaujin suwimkan juki jakattawai.

<sup>19</sup> Namputchawame atum anentaimsajum:

" '¿Apaji tudau aajakua nunin aish, wagka uchijish suwimkanash jumainchawaita?' tumainaitjume. Tujutkugmin wi atumin ayaakun: 'Nigka mina chichamjun betek umiak pegkegchau takat aidanuk takaschau asa, iwaku pujustatui', tumainaitjime.

<sup>20</sup> Múun uchigtin aina duka, niina uchiji aidau pegkegchau takamsamujinig suwimkanak jumaisui, tuja uchi aina dushakam ditá apaji aidau pegkegchau takamsamujinig suwimkanak jumaisui. Ayatak nii pegkegchau takasbaujin suwimkan jukittawai, untsu nii pegkejan takasuk waji pegkejan jukitnai."

*Apajuú chichameg betekush uminnai*

(Ez. 33.10-20)

<sup>21</sup> "Aents pegkegchauwa nunú, awake anentaimag pegkegchau takatan idayak, mina chichamjun betek umiakug, jatsuk iwaku pujustatui.

<sup>22</sup> Tuja nii tudauji aidanuk tsagkujan, atakea duish anentaimtuschatnun kajimatkin idaisatnaitjai, nigka waji pegkeg aina nuna takasu asa iwaku pujustatui.

<sup>23</sup> Aents pegkegchau aina nunú jakai tusan dakitajai, ayatak pegkegchau takatan idayinak pujutjin iwajatnime, nunikag iwaku pujustinme tajai. Witjai Tuke Pujuunuk nunak dekas uminkatnun tajai.

<sup>24</sup> "Tuja aents pegkeg takatan idayas, aents pegkegchau aina nujai betek wi dakitamu tsumain aina nuninun takakush, ¿nunú aentsush iwakush pujumainkait? Wika nii pegkeg takasbaujija nunak ataku awagkinuk adeagchatnun kajimatkin idaisatnaitjai. Dutikam nigka mina umigtutsuk pegkegchau takata nunak taka wekagu asa jakattawai.

<sup>25</sup> Tuja atum chichaakjum:

" 'Auk Apajuú pegkegchauwai shiig takatsui', tajume. Israel aents aidauwah, shiig anentaimsajum aigkatajum, ¿dekas wikaitag shiig takachunush? ¿Atumchaukaitjum dekas pegkegchau takautigmek?

<sup>26</sup> Tuja aents pegkeja nunú pegkeg takatan idayak pegkegchaun takakug, nii pegkegchaujinig jakattawai.

<sup>27</sup> Tuja aents tudauwa nunú pegkegchau takatan idayak, niina pujutjin iwajug pegkejan takakug pujutjinak uwemtijattawai.

<sup>28</sup> Nii pegkegchau takamujin wainmamak awake anentaimag nuna idaisau asa, jatsuk iwaku pujustinai.

<sup>29</sup> "Tujash Israel aents aidautijum ataktushkam chichaakjum:

" 'Apajuú shiig takatsui', tujutjume. ¿Tujash dekaskenmesh wika shiig takatsug? ¿Atum Israel aents aidautijum dekas pegkegchau takatsjumek?

<sup>30</sup> Israel aents aidauwah, witjai atum maki makichik takasbaugmin diigsan suwimkan amastinnuk. Witjai Tuke Pujuunuk nunak dekas uminkatnun tajai. Tuja atumi tudaujum aina duka idaisatajum, atum pegkegchau takasbaunum suwimak juki waittsaijum.

<sup>31</sup> Atum pegkegchau takajum duka ashí idaisatajum. Nuniakjum shiig anentaimat, yamajam pujut jukitajum. Nunú nuniakjumek makichkish jakashtatjume.

<sup>32</sup> ¡Wika atum jakatnime tusanuk wakegatsjai! ¡Nuadui pegkegchau takat aina duka idaisatajum, nuniakjumek iwaku pujustatjume! Witjai apu Tuke Pujuunuk nunak dekas uminkatnun tajai”, tiuwai.

## Uwemat anagkagtuamu (33—39)

### 33

*Profetak niina aentsji aidaun kuitamainai*  
(Ez. 3.16-21)

<sup>1</sup> Tuke Pujuu nuigtu chichagtak:

<sup>2</sup> “Ezequielah, wi tajam nunú chicham Israel aents aidau ujakta: ‘Wi makichik nugkanum maaniamun akupeakui, juwiya aents makichik etegkajum jinta kuitamkatin adaikatajum.

<sup>3</sup> Nunú jinta kuitamna nunú shiwag aidau yaaktanum kaunattak miniagtai, aents aidaun ujaak uwija kachujin umpuagtatui.

<sup>4</sup> Nunú uwija kachuji umpuamun antayatak, intimki umintsuk pujai, shiwag aidau jetekag maawagmak, duka niina utugchatji atatui.

<sup>5</sup> Wagki nunú umpuamun antuk umintsau akug uwemainaitak, umintsuk pujus mantamdau asa.

<sup>6</sup> Untsu jinta kuitamna nunú shiwag aidau minidaun wainiatak, uwija kachujin umputsuk pujai, shiwag aidau jeteka makichik aentsnakesh maamak nunú aentsuk tudauk pujus jakattawai, tujash wi jinta kuitamna nunak nunú aents jakamunum suwimkan susattajai.’

<sup>7</sup> “Aentsu uchijiyah, wi aminak Israel aents aina nuna kuitamin ati tusan etegkajame, nuadui mina chichameg shiig antukam, wi tajam nunú etsegekata.

<sup>8</sup> Tuja aents pegkegchauwa nuna wi chichagkun: ‘Nigka niina pegkegchaujinig jakattawai’, tusan titatjai. Tuja ame aents pegkegchauwa nunú: ‘Tudaujum idaisam pujutjum iwajata’, tusan ujatsuk pujamin, tudaugtin pujus jakamtaig, ame bakumatnaitme.

<sup>9</sup> Untsu nunú aents chichagkun: ‘Tudaujum idaisata nunikam pujutjum iwajata’, tusa ujamaítak, nunú antutan dakitakug niina tudaujinig jakattawai. Nunikmataish amek ujaku asam bakumashtinaitme.”

*Aents aidau dita pujutjin maki makichik puyatjukagtin*  
(Ez. 18.21-32)

<sup>10</sup> “Aentsu uchijiyah, Israel aents aina nunú chichagkun: Atum chichaakjum: ‘Tik shiig tudau waigji, imaniku asaja i aidautik kaujujai betek ainaji, nunin aidautish ¿itugsaik iwakush batsamsatji?’ tajume.

<sup>11</sup> Tujash wika aents tudau aina nunú jinaati tusanuk wakegatsjai, ayatak pujutjin yapajiwag iwaku pujustinme tusan wakegajai. Israel aents aidauwah, pegkegchau takajum duka idaisatajum, nuniakjumek jakashtatjume, tawai Tuke Pujuu.

<sup>12</sup> “Ezequielah, amina pataim aina nunú ujakta: Aents pegkeja nunú tudaun takakuig, nii pegkejan takajaku akuishkam uwemtijashtinaitjai. Tuja aents tudauwa nunú, pegkegchau takatan idayak pujutjin yapajiamtaig, nii tudau aajakua duwik suwimkanak susashtinaitjai. Aents pegkeja nunú tudaun takakug, yaunchuk tudaun takajakchauwa nuaduiik iwakuk pujuschattawai.

<sup>13</sup> Tuja aents pegkeja nuna wi chichagkun: Amek kuashat mijan pujustinaitme timawaitak, nii pegkeg takasbaujin kajinas anentaimak, pegkegchaun ataktu takakuig, pegkejan takasu akuishkam kajimatkin idaisatnaitjai. Dutikamu asa nunú aentsuk niina tudaujinig jakatnai.

<sup>14</sup> Aents tudauwa nuna chichagkun: ¡Amek amina tudaugmin jakatnaitme! tusa tai, niina tudaujin idayas pegkejan takak,

<sup>15</sup> aents diwimkagtak akimamun jukitjai tusa jáanch ukukbaun awagtukchamujin, tuja kasamkamujin awakeakuig, niina tudaujinak kajimatkitnaitjai. Dutikamu asa mina chichameg pujuta sukagtina nuna betek umiau asa, atakea duish tuke pujustinai.

<sup>16</sup> Yaunchuk nii pegkegchau takasbauji akuish, nunak kajimatkitnaitjai. Nigka ashí pegkeg aidaun takasu asa iwaku pujustinai.

<sup>17</sup> Tuja amina pataim aidau chichainak:

“ ‘iApajuik shiig takatsui!’ tuinawai. Tujash dekaskenmak dita ainawai pegkegchaun takaidauk.

<sup>18</sup> Untsu aents pegkeja nunú, pegkeg takatan idayak pegkegchaun takakug, niina pegkegchaujini jakattawai.

<sup>19</sup> Aents tudauwa nunú pegkegchou takatan idayak, pujutjin yapajia, pegkejan takakug iwaku pujustina.

<sup>20</sup> Tuja Israel aents aidau ataktushkam pegkegchaun chichagtuinak:

“ ‘iApajuik shiig takatsui!’ tujutuina. Tujash wi Israel aents aidaunak maki makichik dita takasbaujin diigsag suwimkan susatnaitjai.”

*Jerusalén tsayam atin etsegkamu*

<sup>21</sup> “Tuja babylonianmaya achipag yajupakagmatai, nuwi jegaa, tsawan cinco, nantu diez, doce mijan batsatjin, shiwag Jerusalégkan tsayagtai, makichik aents uumak tupikakui, Jerusalégnak iina shiwaaji aidau tsaikagmae tusa ujatka.

<sup>22</sup> Tuja nunú aents eke taatsaig, Tuke Pujuu niina senchijin kashi mina egkemjutak, chichachu awajutsmayi, tujash kashinia duwi nunú aents uwemjau tatai, Apajuí ataktu chichamtijukmayi.”

<sup>23</sup> Nunika Tuke Pujuu mina chichagtak:

<sup>24</sup> “Israel aents aidau nugke tsaikbauwa nuwi aents ujumak iwaku juwaju aidau batsamas chichainak: ‘Abrahamak nigkitak, juju nugkanak niinu ema pujusui, tuja ii aidautik kuashat ainaji nuadui utujimkas iinu emami’, tuinawai.

<sup>25-26</sup> Nuadui ame weme Tuke Pujuu tawai tusam etsegkata: ‘Atumek pegkegchou takakjum, neje numpentin yuwagme, wainka apajuimtai dakumka najanamu emematjume, atumi maanitajum aidau eme anentajume, nuniakjum tikichi nuwejaish tsanijinjume, nuni batsatiakugmek, ¿juju nugkak iinu atatui tajum?’ tawai Apajuí tita.

<sup>27</sup> “Tuja jushakam ujakta: ‘Israel aents aidau shiwag amuam ujumak iwaku juwaju yaakat tsaikbaunum batsata nunashkam ijinawagtatui, tuja aents ikam batsatunashkam kuntin kajen aidau yuwawagtatui. Tuja wainmainchau shiig peeja apakbaunum, waanum uumak batsataidauk jatai jinawagtatui. Witjai apu Tuke Pujuuunuk nunak dekaskenmak uninkatnun taji.

<sup>28-29</sup> “ ‘Atumek pegkegchou wi dakitamua nunú takagme, nuadui wi atumi senchijinak, atumi ememataijum aidaujai atankittajime, dutika ai juju nugkak bashiak aents atsau shiig agkan itajak juwaktatui. Muja aina nuwig makichik aentskesh wegaguk atsustina. Nunikmatai wi dekaskenmak Tuke Pujuuwaitag nuna dekajuawagtina.’

<sup>30</sup> “Amina pataim aidau, yaakat peejamua imanui nagkamas, dita jeen waitijin amina pachipas chichainak: ‘Kaunatajum Tuke Pujuu niina chichamen Ezequielai awetugma nunú antukagmi’, wajainawai.

<sup>31-32</sup> Nunik kaunawag ame chichamun antukagtatus tuke nunin asag, aminí ayaumas pekajui. Amek dita diismak aents kantamtan yacha pegkegchin anenkan kantamnujai betekaitme, ditak senchi wakegainawai ame chichamun antukagtatus. Tujash ditak kuichkin ima puyatjuinawai. Nunidau asag ame chichamunak antugtamainayatak uminatsui.

<sup>33</sup> Tuja wi taja duka shiig wamak uminkattawai. Nunú betek umintai, dekawagtina Apajuí chichamen etsegtin dita pujamunum puja nuna, tawai Apajuí”, tiuwai Ezequiel.

## 34

*Israel aents aidaun apuji pegkegchou aajaku aidau*

<sup>1</sup> Nuigtu Tuke Pujuu chichagtak:

<sup>2</sup> “Aentsu uchijiyah, Israel aents aidaun apuji aina nunú juna apu Tuke Pujuu tawai: ¡Chah, apu Israel aents aidaun uwigjai betek kuitamin aina nunak wait anentuinajai! ¡Dita aidauk nunú uwijan shiig kuitamtsuk ima ditanunak anenmama batsatui!

<sup>3</sup> Atumek uwija muntsuji ijugbau umagme, tuja nuna uje najanamush nugkuagme, nuigtush uwig duwejam aidau maagme; dutikayatkujum uwig aidauk kuitamtsugme.

<sup>4</sup> “Atumek uwig kakakchau aidauk kuitamtsugme, tuja jakuishkam ampiatsjume, nawen kuwimjukmataish pempenjagmesh kuitamtsugme, tuja wagakmataish ejakjume ataktu awakeatsjume, tuja megkaekamtaish egatsjume, duka dutiktuk ayatak asutiakjum senchi waitkagme.

<sup>5</sup> Mina uwig aidauk kuitamain atsugsam, ditak batsatu asa pisaja megkaejae, nunik wainak yujaun kuntin kajen aidau yuwinawai.

<sup>6</sup> Uwig aidauk ashí muja aidaunum tuja nain aidaunum pisaje, nuninak ashí nugkan pampamtuk megkaejae, nunik megkaejamtaish, nuna egaka awakjatatus puyatjuk makichkish atsawai.

7 “Uwija kuitamin aidauwah, wi taja nunú shiig antuktajum!

8 Mina uwig aidau kuitamainuk atsau asamtai, kuntin ikamia kajen aidau amuke. Uwija kuitamkagtinun adaijamu aidauk uwignak kuitamainatsui. Ditak anenmamainak uwig aidau nak pachikchaje. Witjai apu Tuke Pujuunuk, nunak dekaskenum tajai.

9 Nuadui wi chichaman tajim nunú uwija kuitamin aidautijum shiig antuktajum:

10 Uwija kuitamin aidauwah, wika yamaik atumnak shiwagmajime, mina uwig aidau kuitamkatajum tiuwaitjim dusha betekash umikujum nuna dekajuatjime. Dutikakun mina uwig aidau apuji ainajum nunak jikktajime. Nunak dutikattajime ima atumek anenmamkujum mina uwig aidau yuu batsamijum tusan. Dutikan mina uwig aina nunak ataktu yajuakan ijumjattajai, tawai tusam ujakta.”

### *Uwijan shiig kuitamin*

11 “Tuja mina uwig aidau nak tikich kuitamkatnime tusanuk idaisashtajai, ima wiki kuitamkattajai. Witjai apu Tuke Pujuunuk, nunak dekas dutikattajai.

12 Aents uwigi megkaejamtai puyatjuwama imatiksana mina uwig aidau nak puyatjittajai, nuadui yujagkim suwe wajasmatai ishama inak pisaja megkaeja nunak ataktu yajuakan ikaunmattajai.

13 Tikich nugkanum achija yajuakbau batsata nuna ataktu awakjan, dita nugke ashí batsamtukbauwa nuwi ikaunmattajai. Dutikan dita nugken muja aidau, entsa aidau ayá nuwi ashí yajuaka iwajan chijichi pegkeg aidau ayujawagtajai.

14 Israel aents aidau nugken muja aina nuwi yajuakan iwagtajai, nuwiya dupa shiig pegkeg aina nuna yuwatnime tusan. Dutika ai nuwiyana pegkeg dupa aidau shiig yuwawag ayamjagtatui.

15 Wi dita yuwatnunak susattajai, dutikakun ayamtiksgattajai. Nunak dekas wi umiktinun tajai.

16 Uwig megkaeja nuna egakan tikich jintanum yujaunash yajuaka ikaunman nawen ichiinkau akuish, shiig dijajan ijijuan kuitamkattajai, tuja duwejam waju aidau nak kuitamkattajai, dutikakun kakaakchau aidau nakshkam shiig kuitamkattajai.

17 “Atum mina uwig aidautigmin wi tajim nunú antuktajum: Atum ainajum anuiyag uwig múun, tuja uwig tsakatuch, uwig kakaakchau, uwig waju, tuja chivokesh akuishkam ashí betek ijumsan kuitamkattajai.

18 Atum ainajum anuiya chijichi pegkejan yuwinakush shiijak aneansui, ayatak tikich chijichi ayaunash najak tsaika ukuinawai. Yumi pegkejan saawin umuinawai, nuninayat tikich saawi wajas aunan wajatug ukusmak ukuinawai.

19 Mina uwig kakaakchau aidauk atum chijichi najakbaun yuwawagtatui, tuja yuminashkam atum ukusmakbaun uwajagtatui.

20 Nuadui wi juna tajime: Wika aents wajuunash kakakchaujai betek diisan suwimkan susattajai. Nunak dekas dutikatnujun tajai.

21 Atum waju aidautijum uwig kakakchau aidau depetkajum kachugmin ijua ijuakuajum tupikantikjume.

22 Tujash mina uwig aina nunak wi ayamjukagtajai. Ataktu kasajuinak waitkastinime tusanuk idaisashtajai. Mina uwig aina nuwish yakita shiig takaush, tuja shiig takachush nunak wi diistajai.

23 Mina inakeg David mina umigtujakua nunú uwijan kuitamkati tusan ataktu untsuktajai.

24 Witjai Tuke Pujuunuk. Wi dita Apajuji atatjai, untsu dita apujig David atatui. Witjai Tuke Pujuunuk, nunak dekas uminkatnun tajai.

25 Agkan pujusagtinime tusan wi ditajai chichaman umiktatjai. Tuja kuntin ikamia kajen aina nunak yaja ishiaktatjai, dutika ai mina uwig aidau agkan batsamsatnime, nuninak ikamash agkan kanitnime tusan.

26 “Mina uwig aidau nak midau muja pegkegma nuna yantamen batsasattajai, tuja ditanak wi yaigtatjai, dutikakun yuminashkam nunú tsawantin yutugti tibaunak imatiksana yutumtijattajai.

27 Numi aidau shiig nejeagtina, tuja ajakmamash shiig tsapai kuashat nejetai, nuadui ditak dita nugken shiig batsamsagtina. Mina aentsug aidau waitkaina nuna suwimkan suwakun agkanmitkawaja ai, wi dita Apajujiyaitag nuna shiig dekawagtina.

28 Aents Israel wegantuchu tikich nugkanmaya aidauk, Israel aents aidau nak tusan yuwachagtina. Nuadui ditak makichkish ishankagtutuk agkan shiig batsamsagtina.

29 Dita nugkenak pegkeg, ajak aidau shiig tsapai awajattajai. Nuadui ditak nujantaik waittsachagtina, tuja tikich nugkanmaya aidau shiig ataktu awagkiajag dushikjachtina, wagki shiig batsatu asagmatai.

<sup>30</sup> Nuadui wi Tuke Pujuu, dita Apajuújin ditajai pujag nuna dekawagtinaí. Witjai apu Tuke Pujuuunuk, nunak dekas tajai.

<sup>31</sup> Atumek mina uwijujai betek ainagme. Witjai atumin Apajuúgminuk”, tiuwai Tuke Pujuu.

## 36

22-23 “Nuadui Israel aents aidau chichagkum:

“Juna aatus apu Tuke Pujuu chichaak: Atumi pegkegchaujin tikich aents aidau mina daag pegkegma nuna dushikinawai, nuadui atumek tsagkujamak amaitsugme. Nunin ajuminig wika mina daag pegkegma nuna ayamjakun agkanmitkattajime. Dutika ai nuna wainkag wika Tuke Pujuu pegkejam, ashí senchigtin, Israel aents aidau Apajuújiyitag nuna dekawagtinaí. Witjai Tuke Pujuuunuk nunak dekas uminkatnun tajai.

<sup>24</sup> Atum tikich aents aidau waitkam batsatjum nunak wi agkanmitkattajime, dutikan yajuakan atumi nugkeen ikaunmatnaitjime.

<sup>25</sup> Atumek dakumka najanamu tsumain emematin ainagme, tujash wi atumi tudaujinak kajimatkin idaisattajai, dutikan jáanch bika dijaja pegkeg ematia numamtuk dijajan pegkeg awajsattajime.

<sup>26</sup> Wi atumnak yamajam pujutan, pegkeg anentaimtajai amastatjime. Dutikakun kakajus antumtkmainchau kayajai betek ainajum nuna, kakagchauch chichaman umin awajsattajime.

<sup>27</sup> Nuigtushkam mina Wakanjun amastinaitjime, mina chichameg umiktin agagbau aina nuna umiktinme tusan.

<sup>28</sup> Dutikamu asajum atumi apachjum aajakajua nuna nugkan susauwaitag nuwi jegajum batsamsatnaitjume. Tuja atumek mina aentsug atatjume, wi atumi Apajuújum atatjai.

<sup>29</sup> Atumi tudaujumnak esakatjattajime, dutikakun shiig kuashat trigon tsapamtikatnaitjai, nunú yuwakjum ataktu awagkigmek nujantaik waittsashtinaitjume.

<sup>30</sup> Tuja ashí numi nejen aidaunak, atum ajakmamu aidaujai senchi nejemtikatnaitjai, wagki atum nujantai waitiagmin, tikich nugkanmaya aidau dushiktamaina nunak ataktu awagkig dushiktamjashtinme tau asan.

<sup>31</sup> Nuna dutika ai atumi pujutjum pegkegchau, tuja takamujum aidaush shiig pegkegchau aina nunú wainmamkajum datsagtajume.

<sup>32</sup> Israel aents aidautijum shiig antuktajum. Wi ashí nuna dutikattag nunak atum pegkejam asagminkish dutikashtatjai. Nunak dutikattajai, atumi pujutjum anentaimtusjum datsaagminjum tusan. Witjai apu Tuke Pujuuunuk, nunak dekas uminkatnun tajai.

<sup>33</sup> “Wi atumi tudaujum aidaun ashí tsagkujan, atumi yaaktaji tsaiqbau aina nuna ataktu jegamjatnime timatai, jegamjajum nuwi batsamsatnaitjume.

<sup>34</sup> Tuja atumi nugkeg ukumkimu asa takascham bashiak au, atum ataktu kaunajum nuwi ajakmatnaitjume. Nuna ashí aents nuni nagkaemaidauk wainiagtinaí.

<sup>35</sup> Nunik chichainak: ‘Juju nugka ukumkimu asa bashiak amaya nunú yamai Edégjai betek wajase; tuja yaakat tsaiqbau asa kaya tuwasua weaku aajabia dushakam shiig jegamja peeja umikbau ainawai. Imannum aents aidau batsatui’, tiagtinaí.

<sup>36</sup> Tuja imatika tsaiqbauunash wi ataktu jegamjan, tegagbaunash ataktu ajakmakan uminaitag nuna diisag, Israel aents aidau nugken tikich yantamnum aents iwaku pujuidauk dekas Tuke Pujuuwap aikae tiagtinaí. Witjai Tuke Pujuuunuk, nunak dekas umiktatjai.

<sup>37-38</sup> “Tuja nuigtush Israel aents aidauk shiig kuashat yujakag uwigjai betek agtinaí, wagki nunak dita aatus mina segatiaje. Nunak dekas dutikattajai. Yamaik dita yaaktaji tsaiqbau aina nunak ataktu yaaktamkag, nuwi aents aidauk pimasua weaku atatui. Jiista jegamtaí, Apajuúin emematuinak uwijan shiig kuashat Jerusalén yajumin aina nujai betek atatui. Imanitai nuna wainainak, dekas Tuke Pujuuwap aikawa tiagtinaí”, tiuwai.

## 37

### *Ukunch sakaku aidau*

<sup>1</sup> Apajuú senchiji mina tajutuamtaí, niina Wakani egkemjutug muja najatamu pakajin ukunch sakaku tuwasua weakunum ejentunmayi.

<sup>2</sup> Dutijua ashí yantamnum awakatus shiig kuashat ukunch sakaku batsatun iwaintugkabi.

<sup>3</sup> Nuna iwaintujuk chichagtak: “Ame anentiamsamash juju ukunch sakakua dusha ¿ataktu aents najanemainuk aina?” tujutmayi. Tujutkuí wi ayaakun: “Apu, Tuke Pujuuwah, duka ame dekame”, tibaijai.

<sup>4</sup> Tusa tai nii chichagtak: “Ukunch sakaku batsata nunú mina pachittsam ujaakum: ‘Ukunch sakaku aidauwah, juju Tuke Pujuu chichame antuktajum.

<sup>5</sup> Apu Tuke Pujuu chichaak: Wi atumnak mayain egketjattajime aneantinme tusan.

<sup>6</sup> Dutikan yaapen, nejen, duwapen batsatkan mayain egketjattajime, anean iwaku pujustinme tusan. Dutika ai, dekass Tuke Pujuuwap aikae tujuttattajime’ tita”, tujutmayi.

<sup>7</sup> Tusa tujutmatai nii tujutbaunak imatiksasuk ukunch sakaku batsatun ujakbaijai. Tusa ujaakun wajai, nugka uugmayi, ¡nuniaig ukunch aidauk ikaniagmayi!

<sup>8</sup> Nuniaig yaap aidau, neje aidau, duwap aidau, ukunch aidauin ijika iyashtin emabi. Tujash mayati pujustinjig eke atsujiagmayi.

<sup>9</sup> Nunikagmatai nii chichagtak: “Mayai pujutan sukagtina nunú mina pachittsam chichagkum: ‘Aatus apu Tuke Pujuu tawai: Mayati iwaku pujutan sukagtinuh, ashí yantannum taata, nunikam aents jinaa batsata nunú egkemtujam inanjata’ tita”, tujutmayi.

<sup>10</sup> Tusa tujutbaunak imatiksasuk Apajuí daajin tibaijai. Tusa ti ai nunú mayati pujutai egkemtujumayí, dutikam ashí nantajag shiig kuashat suntajai betek ijunjabí.

<sup>11</sup> Nunikagmatai Apajuí chichagtak:

“Aents uchijiyah, Israel aents aidauk juju ukunch sakaku aina nujai betek ainawai. Nunin asag chichainak: ‘¡Iik ukunch sakakujai betek ainaji! ¡Iina ayamjutpamainuk atsuqtamui! ¡Kakaja ayamjumakchamin wajasji!’ tuinawai.

<sup>12</sup> Tuu batsata nunú mina pachittsam ujaakum: ‘Apu Tuke Pujuu juna tujamui: Mina aentsug aidauwah, atumek aents jinau ukusbaujai betek ainagme, nunin akugminish wi yajuakan atumi nugkemin ejegattajime.

<sup>13</sup> Dutikan jakau aidau ukusbau sakaku ujamaina numamtuk awajkattajime, dutika ai: Juwapi Tuke Pujuu iina Apajuíyia duka, titattajime.

<sup>14</sup> Tuja wi atumnak mayati iwaku pujutan amastattajime, dutika ai atumek aneantattajime, nunikagmin atumin nugkeminig batsastattajime.’ Nuadui: Dekas Tuke Pujuuwap nii tibaunak betek umike, titattajime. Witjai Tuke Pujuuunuk, nunak dekass uminkatnun tajai.”

### *Judá aents aidau*

### *Israel aents aidaujai*

### *ataktu ijumjamu*

<sup>15</sup> Nuigtushkam Tuke Pujuu mina chichagtak:

<sup>16</sup> “Makichik numinum agakum ‘Judá aents aidauk Israel aents aidaujai atuunin ainawai’, tuu agagta. Untsu tikich numinum agakum: ‘Josén uchiji Efraín wegantu aina nunú tikich Israel wegantu aidaujai ijunainawai’, tuu agagta.

<sup>17</sup> Dutikam nunú numi mai apatkam achikta.

<sup>18</sup> Dutikawamin ame wegantu Israel aents aidau inimpainak: ‘¿Jusha wagka aikame?’ tujamainakuig,

<sup>19</sup> ame ayaakum: ‘Tuke Pujuu juna aatus chichaak: Numinum José daaji agagbauwa nuna Efraín tikich Israel aidaujai takakuina nuna jukin, tikich numi Judá daaji agagbauwa nujai apatkan makichik numi awajsattajai.

<sup>20</sup> Tuja ame jimag numinum agagmaun nunú ditash wainainai mai apatkam achikta.’

<sup>21</sup> Nunú takusa wajasam dita chichagkum: ‘Tuke Pujuu juna aatus chichaak: Israel aents aidau tikich aents aidau nugken batsata nunak jiija yajuakan dita nugken ikaunman batsattajai.

<sup>22</sup> Dutikan dita nugkenak dita mujaji aidaujai ashí makichik nugkak emattajai. Dutika ai jimag nugka akankachbau makichik apugtinuk agtinai.

<sup>23</sup> Tuja nuigtushkam Israel aents aidau ataktu awagkig, dakumka najanamu tsumain aina nuna emematuinakug tunamagchagtin ainawai, tuja tikich pegkegchau aina nunashkam takama yujashtin ainawai. Dita pegkegchaujinash pachitsuk idaisatnaitjai. Ditak mina aentsug agtinai, untsu wi dita Apajuíji atinaitjai.

<sup>24</sup> “Dita aidauin apujig David atatu, tuja ditan kuitamkatnushkam ima Davitak atinai. Untsu chicham umiktinun wi ditan susauwaitag nunak dita umikagtinai.

<sup>25</sup> Nuninak wi Jacopan nugka susauwaitag nuwi batsamsagtinai. Nunú nugkanum dita muunji aajaku aidauhshkam batsamajaku ainawai. Nuwi ditak dita uchiji aidaujai tuke batsamsagtinai, tuja dita wegantu aidauhshkam ashí nuwi batsamsagtinai. David mina inakjua nunú dita apujig tuke atinai.



<sup>26</sup> Utugchat atsaunum agkan batsamsatnume tusan wi ditajai chichaman umiktatjai. Wi ditajai chichaman umiktatag duka atakesh tuke yapajinashtinai. Wi ditanak shiig kuashat uyujkatnaitjai, tuja dita nugken mina emematjaku ijuntain tuke asatnun umiktinaitjai.

<sup>27</sup> Dutikan ditajai pujustinaitjai, nuniakun wi dita Apajuji atinaitjai, untsu dita mina aentsug agtinai.

<sup>28</sup> Mina emematjaku ijuntai nugka dita batsamtain jegamkamu tuke atina nuna tikich aents Israel wegantuchu aidau diisag, dekas Tuke Pujuwap Israel aents aina nunak etegkauwaita tiagtinai. Witjai Israel aents aidaun Apajuji' tawai Apaju', tusa Ezequiel tiuwai.

## Daniel Daniel pachisa agaghau

(1—6)

*Yama nagkamchaku augmattsamu*

<sup>1</sup> Joaquim Judá aents aidaun apuji wajas kampfatum mijan inamai, Babilonia nugkan apuji Nabucodonosor Jerusalégkan jetektatus niina suntaji aidaujui tenteawajui.

<sup>2</sup> Apu Nabucodonosor Israel aents aidaun depetuk, apu Joaquim tikich Israel aents aidaujui achija yajuakti tau asa, Tuke Pujuu Israel aents aidaunak yaigchawuai. Tuja Apajui emematku ijuntai jegamkamunum takatai aidaunashkam yajuaktinme tusa tiuwai. Nuadui Nabucodonosor Israel aents aidaun achija Babilonia nugkanum yajuakui, dutikak Apajui jeen takatai ayaunashkam kuashat yajuak Babilonia nugkanum ejegauwai, dutika dita apajuimtai aidaun jegamjukbaunum nunú emematku takatai waji akik pegkeg aidaun ayaunum nuwi awayauwai.

<sup>3-4</sup> Tuja nuigtushkam apu Nabucodonosor niina aentsji aidaun apu pujusa inamtaijin takau aidaun apuji Aspenaz aajakua nuna chichajak: “Israel aents achighbau aina nuwiya apu wegantu aidaun, tuja aents eme anentsa diitai aina nuwiyashkam datsauch shigmauch, yantsapin, iyashish pegkeg, ashí yacha, apu inamtaijin pujusa takamain aidaun etegjata. Dutikawamin iish wajuk batsamin ainaji nunú, tuja iina chichameshkan kampfatum mijanai jintinnati.

<sup>5</sup> Tuja ditak kampfatum mijanai apu yuwatin umikbaun yuwawagtatui, umutainashkam apu uwagtin umikbaun umiagtatui. Nuni nuninakua kampfatum mijanai ejeyag, duwi nagkamas apu takajuinak batsamsatnume tajai”, tiuwai.

*Danielan niina kumpaji aidaujui yajuakag apu pujusa inamtaijin ejegamu*

<sup>6</sup> Datsauch aidaun etegjaju aina duka ipak usumta imajin Judá wegantu aajakua ainawai; dita daaji aidauk: Daniel, Ananías, Misael, Azariás aatus aajakui.

<sup>7</sup> Tuu daagtin aidaun Aspenaz yapagtukui, dutikak: Danielan Beltsasar adaikauwai, untsu Ananíasan Sadrac adaikauwai, tuja Misaelan Mesac adaikauwai, untsu Azariásan Abed-nego adaikauwai.

<sup>8</sup> Tujash Danielak nigki anentaimas dekas wika apu yutainak yuwashatajai, umutaijinkesh uwagchatjai tumamiuwai, wagki nii nuna yuwakug pegkegchaw wemain dekapeau asa. Nuadui Aspenazan chichajak: “Apu yutai aina nunú yuwata tusamek wait aneam waitkagsaipa, tuja mina kumpag aidaushkam waitkasaipa”, tiuwai.

<sup>9</sup> Tusa tutaish Apajui Danielnak yayau asamtai Aspenazak kajegkachui.

<sup>10</sup> Dutikayatak chichajak:

“Atum yuwatnunak, tuja atum vino uwagtinashkam apu chichaman umike. Nuadui wika mina apujun ishamajai. Wagki tikich datsa aidaun pegkeg batsatai, atum yujumak yuwachu asajum jaujai betek shigchaw wajasum pujagmin, apu waipagak mina mantumainai. Dutijuamtaig atumdau utugchatak atatui”, tiuwai.

<sup>11</sup> Nuna tusa apu pujusa inamtain waji aidaun kuitamin Melsar aajakua nuna Aspenaz etegkauwai, Danielan niina kumpaji aidaujui kuitamkati tusa. Dutikamta Daniel Melsarjai chichastatus weuwai, nunik jegajua chichajak:

<sup>12</sup> “Jutii aidautik amina inakem ainaji. Nuadui wait aneam diez tsawantai ii yuwatnuk, yutai ajanmaya juukbau aidaun yumi uwagtinjai sukagtusta tajame.

<sup>13</sup> Tuja nunú diez tsawan jegamta, tikich datsauch aidaun apu yuwatin umikbaun yuwina nujai apatkam diijattsata. Nunikam ame wajuk anentaima nunú tita”, tiuwai.

<sup>14</sup> Tusa tima ayu tusa Daniel tibaunak imatiksag dutikauwai.

<sup>15</sup> Nunú diez tsawan nagkaemakmatai diikma, Danielak niina kumpaji aidaujui tikich datsauch aidaun apu yuwatin umikbaun yuwidaun nagkaesau shiig pegkeg waji aidaun batsatun wainkauwai.

<sup>16</sup> Dutika wainak, yujumak vinojai susatajum tusa apu tibaunak sutsuk yutai ajanmaya juukbau aidaun yumijai sujaku.

<sup>17</sup> Nunú ipak usumat datsauch aajaku aina nunak, ashí waji aidaun unuimagtinme tusa Apajui yachantikauwai. Nuigtush Danielak kajanmayanash shiig dekajaku.

<sup>18</sup> Apu tsawantan mamikiamu jegamta, Aspenaz datsauch aidaun yajuak apu Nabucodonosor pujamunum ejegauwai.

<sup>19</sup> Dutikamta apu ditajai chichasui. Tujash Daniel, niina kumpaji aidaujui shiig yacha aajaku aina imannak tikich datsauch aidaunak makichkish wainkachui. Nuadui ditak apu takajuinak batsamsajui.

<sup>20</sup> Apu nii dekatag tusa wakegamujinak ashí inias dejakaku, tuja anentaimas dekamin aidau, tunchi aidau apun ujakaku aina nuna nagkaesau ditak shiig yacha aajaku ainawai.

<sup>21</sup> Aatus Danielak nuwi pujaig, tikich apu yamajam Ciro, Persia nugkanmaya aajakua nunú, Babilonia nugkan apuji wajasui.

## 2

### *Apu Nabucodonosor kajamjamu*

<sup>1</sup> Nabucodonosor apu wajasa jimag mijana nuna inamak pujus, kajanum kuashat pegkegchaun kajamjauwai, nunik wagkanuk aan kajamjaja tusa senchi anentaimak kanumainchau dekapau.

<sup>2</sup> Nuniak ujatkatnume tusa, anentaimas dekamin aidau, tunchi aidau, yaya dekapau aidau aatus untsukui. Dutikam apu pujamunum jegawajui.

<sup>3</sup> Nunikagmatai apu nii kajamjamujin ditan ujaak:

“Kajanum kajamjag nuna shiig ejemainchau dekapau senchi anentaimjai”, tau.

<sup>4</sup> Tutai dita arameo chichamai apun chichajuinak:

“¡Apuh, kuashat tsawan pujusam inamjatin ata! Tuja waji kajamjaume nunú amina inakem aidauti uajatkata, nunikamin wagkamek aan kajamjaume nunú ashí ame ujakmi taji”, tiujui.

<sup>5</sup> Tusa tiagtai apu ditan ayaak:

“Wika juna anentaimasjai. Wi kajamjag nunash wajukatnunak aan kajamjaja nunú betek ujatckajumek asaja ijinan atatjume, tuja atumi jeshkam ashí tsainkattawai.

<sup>6</sup> Untsu atum wi kajamjag nunash wagkanuk aan kanagja nunú betek ujatckagminig, kuashat waji aidau amatatjime. Dutikakun ashí aents aidauk atumin eme anenjamtimme titatjai”, tiuwai.

<sup>7</sup> Tusa timatai anentaimas dekamtan yacha aidau niina ataktu chichajuinak:

“Apuh, ame waji kajamjaume nunú etsegkata, nunikamin wajukatnuk aan kajamjaume nunú ii ame ujakmi”, tuidau.

<sup>8</sup> Tusa tiagtai apu ditan ayaak:

“Atumek mina tsawan emegkatkujum tuu yujagme. Wagki atumek wi tija nunú dekaujum nuadui, wajintuk tsanujag tusajum tajume.

<sup>9</sup> Tujash wi tija nunak yapajiashtatjai. Ayu kame wi kajamjag nunash wajukatnuna aannunash kajamjaja nunú yamai ujatkatajum. Nunú ujatckagmin dekas yachap ainawa titajime. Nunú betek ujatckajumek ashí betek suwimak jukittagme”, tiuwai.

<sup>10</sup> Tusa timatai dita ainak: “Initaikish makichik apukesh iman senchigtinaitkush aents yacha nii iniasa dekataiji aidauinak ibau utugchat shiig ejemainchaunak iniaschauwai. Nuigtush apuh, ame dekatag tame nuna anentaimas ejeyi ujamainuk ashí nugkan-mash makichikish atsawai.

<sup>11</sup> Untsu apajuimtai aina dutsu ujamainuk. ¡Tujash duka juju nugkanmak batsamchauwai!” tuidau.

<sup>12</sup> Tusa tiagtai apu senchi kajeka aents yacha dekamin babilonianmaya aina duka ashí kajegtajum tusa inamjauwai.

<sup>13</sup> Tusa timatai Danielnashkam niina kumpaji aidaujai maatasag shimutuk egakajui.

### *Apu Nabucodonosor kajamjauwa nunash wajukatnunak aan kanajabi nuna Daniel ujakbau*

<sup>14</sup> Sntag apu kuitamin aidau apuji Arioc aajakua nunú aents yacha anentaimas dekamin aidau ijinatatus umintaun Daniel dekauwai.

<sup>15</sup> Nunik Ariokan jegajua shiig pegkegnum iniak:

“¿Wagka apush aents yacha anentaimas dekamin aina nunú ijinatajum tusash inamjae?” tau.

Tusa iniam, wagkag inamjabi nuna ashí ujakui.

<sup>16</sup> Dutika ujakam Daniel apun jegajua chichajak: “Apuh, wait aneam tsawan sujasta, nunikamin ame kajamjaum dusha wajukatnuk aan kajamjaume nuna dekaan ujaktajame”, tiuwai.

<sup>17-18</sup> Nuna tusa ukuak nii pujutaijin weuwai, nunik niina kumpaji Ananíasan, Misaelan, Azariásan aatus nii apujai chichasbaun ashí ujakui. Dutika: “Apajuí segatajum nii nuna ashí dekamtijamati, wagki nunú betek ujakcha ajin babilonianmaya yacha aina nuna mainak iinash mantamawainum”, tiuwai.

<sup>19</sup> Nuna tusa kanuinai, kajanum Nabucodonosor kajamjamun Apajuí Danielan ashí ujakui. Dutikam Daniel Apajuí emematak,

<sup>20</sup> aatus tiuwai:

“Apajuíyah, amek senchigtin ashí yachaitme.

¡Apajuín daajiya nunú  
ajumaish tuke ememattai atin ati!

<sup>21</sup> Tsawan yapajinak minina nunak Apajuí dutikawai,  
Apajuí aentsnak apu emawai,  
nuigtush nigki yapajinai,  
aents yacha shiig anentaimkau aina nunak nii dutikawai.  
Tuja wamak unuibau aina nunashkam  
nigki dutikawai.

<sup>22</sup> Anentaimsaish ejemainchaunash nii iwainauwai,  
tuja uukbau ataish nigki iwainauwai.  
Apajuíyai tsaaptinuk.

<sup>23</sup> Apajuíyah,  
ametme mina apachug aajaku aina nuna Apajuíjimek,  
amina see takun emematjame.  
Ame minak yacha wajiu etüme,  
tuja ii sumakmag duka imatiksamek,  
apu nii kajamjamujin anentaimtus dekatatus  
waitma nunú mina iwaintugkaume”, tiuwai.

<sup>24</sup> Nuna aatus Apajuíjai chichasa ukuak, Ariokan wejiuwai, nunik jegajua chichajak:  
“Aents yacha anentaimas dekamín babilonianmaya aina duka kajegkaipa. Dekas mina  
apui ejetuata. Nii kajamja nunash wajukatnunik aan kajamjae nuna wi ashí ujaktajai”,  
tiuwai.

<sup>25</sup> Tusa timatai Arioc Danielan juki wamak apu Nabucodonosor pujamunum eje-  
gauwai, dutika apun chichajak:

“Apuh, ame kajamjamugmin ujpaktinun judío aents achija yajuakbau batsata  
nuwiyán makichik jukin itaajai”, tiuwai.

<sup>26</sup> Tusa timatai Danielan dita Beltsasar adaikau aina nuna apu chichajak:

“Ameka wi kajamjag nunú ejeyim, nunash wajukatnunik aan kanagja nunú ¿tujut-  
mainaitam?” tiuwai.

<sup>27</sup> Tusa tama Daniel ayaak:

“Ame kajamjaum nunak, aents anentaimas dekamnukesh, tunchikesh, yayan deka-  
pau aidaukesh wajukatnuk aan kajamjaume nuna ejeyig makichkish ujpamainchau  
ainawai.

<sup>28</sup> Tujash Apajuí nayaimpinum puja nunuwai dekamainchaunash dekamtikagtinuk.  
Nii aminak atakea duwi atinun iwaintugmake. Jujuwai kajamjaum duka.

<sup>29</sup> Apuh, ame anentaimsam atakea duish wajukatnukita tusam ane anentaimkawam  
kanimume, nuniamin Apajuí nuna iwaintugmake.

<sup>30</sup> Nuna minashkam Apajuí iwaintugkame, tujash wi tikich aents aidau nagkaesau  
yacha asamtaigkish iwaintugkache, ayatak ame kajamjaum dusha wajukatnuk aan  
kajamjaume nuna ujakti, dutikam shiig dekaati tusa iwaintugkae.

<sup>31</sup> “Apuh, kajanum makichik aents dakumka najanamu múun, tsumain wajakin,  
winchamtin ishain wainkaume.

<sup>32</sup> Nuna buukeg tikichjaigkish pachimjachbau ayatak oro najanamu; tuja detsepeg  
kuntujijai plata najanamu, untsu ampuji bakuijai bronce najanamu,

<sup>33</sup> kagkaji hierro najatuamu, tuja naweg hierro tsakusjai pachimja najanamu waju  
wainkaume.

<sup>34</sup> Nunú díi wajamin makichik kaya múun mujanmaya, aentskesh shitakchamaitak  
nigki kagkegak juwaki nunú wajattaman, dawenum dekegka nawe tsagkam iyaag  
tepesmae.

<sup>35</sup> Nunik iyaabuik oro, plata, bronce, hierro aidauk tsainak yuku wajase. Nuniaig dase  
senchi dasentak trigo akaaku duke ijumjamun umpui utsauwama numamtuk umpui  
utsagke. Dutikam tuke megkagak megkaekae. Untsu nunú kaya tuku tsaikua duka muja  
shiig múun najaneau wainkaume.

<sup>36</sup> “Apuh, ame kajamjaum duka juju ainawai. Tuja dusha wajukatnuk aan kajamjaume  
nuna yamai ujaktajame:

<sup>37-38</sup> Apuh, aents dakumka najanamun buuke oro wainkaum duka ametme. Aminak  
Apajuí nayaimpinmayaya nunú apu etamne, dutijabau asa senchigtin eme anentsa díitai  
awajtamsae. Tuja nuigtushkam ashí aents nugkanmaya aidauk kuintin aidauk chigki  
aidaujai ashí amina idaitugmase.

<sup>39</sup> “Amina ukuugmin tikich aents ametam aan wainkauch apu wajastinai. Untsu nuna ukuujin kempatuma nunú broncejai betek tumain apu wajas ashí nugkanum inamjatnai.

<sup>40</sup> Untsu nuna ukuujin ipak usumta nunú apu wajastinai, tuja duka hierrojai betek atinai. Iman asa tikich apu aidaunak ashí depetuk ijinatnai.

<sup>41-42</sup> “Tuja nuigtushkam apuh, ame nunú aentsu nawe hierro, tsakusjai najatuamu wainkaum duka ipak usumta nunú apu wajastina duwi aents aidau kanakagtina nunú aan wainkaume. Nunú apua duka hierro katsugma iman atinai. Untsu tikichia nunú tsakus pukutsama nunin kakakchau atinai.

<sup>43</sup> Tuja aents dakumka najanamu wainkaum nuna tsjam nawe hierro tsakusjai pachimjamu tame duka, kanakchagmi ijutkau agmi tusag tikich nugkanmaya aidaujai nuwan sudayagtata nunú aan kajamjaume. Tujash nuninakush hierro tsakusjai apatka anugkam tuke amaitsu numamtuk maki makichik apugtin aina duka makichikish ijinmainchau atatu.

<sup>44</sup> “Tujash nunú tsawantin Apajuí nayaimpinmaya makichik tuké apu atinun adaikatnai, nunak makichikish depetkachagtinai. Tikich apu aidaunak nii ashí depetuk ijinatnai.

<sup>45</sup> Apuh, ame kaya makichikish shitakchamaitak kagkegak iyaak aents dakumka najanamu wajaun dekegka tsaika yuku emau wainkaum duka nunú aikaume. Nuna Apajuí tikich tsawantin nagkaemaktinun iwaintugmake. Ame kajamjaum duka dekaske, tuja wajukatnuk aan kajamjaume dushakam wi taja imanisag betek uminkattawai”, tiuwai.

<sup>46</sup> Tusa Daniel timatai, apu Nabucodonosor Danielan ememattatus tikishmag pujusui. Tuja nuigtushkam Daniel anentag suwakjum kuntin maajum apeatajum dutikakjum kugkuin inciensosshkam apeatajum tusa tiuwai.

<sup>47</sup> Nuna tusa Danielan chichajak:

“Atumi Apajuíjiya duka wainka apajuímtai aina nuna nagkaesau múuntai. ¡Niyai apu aidau nagkaesauwa duka! Niig ashí yachai, nuadui nii ujakmatai kajamaya kakajus dekamainchaush ujatkaume”, tiuwai.

<sup>48</sup> Nuna tusa, apu Nabucodonosor waji pegkeg akik aidaun anentag susauwai. Nuigtushkam babilonianmaya nugka yaig aidaun apuji gobernador adaikauwai, dutika nunú nugkanmaya aents yacha dekamin aidaun apuji awajsauwai.

<sup>49</sup> Dutikau asa, Daniel niina kumpaji aidaun chichamjukmatai, ditanashkam Daniel takatai yaigkagtinun adaitujui. Tuja Danielak tikich aents apujai takau aidau batsatbaunum nuwi niishkam pujujaku.

### 3

#### *Aents dakumka oro najanamun emematujakgabu*

<sup>1</sup> Duwi pujus Apu Nabucodonosor chichaak, aents dakumkajum oro najanatajum tusa inamjauwai. Nuna esantig treinta dekapamu untsu wegkanti tres dekapamu aajakui. Nuna najanawag babilonianum nugka yaig aajakua nuwi muja Durá tutai najatamu pakajin apusajui.

<sup>2</sup> Dutikawagmatai nunú iwainamunum, apu Nabucodonosor tikich apu nugka yaijan apuji gobernador aidaun, suntaja apuji aidaun, apu chichajin aidaun, kuichki diin aidaun, apu chichama epegkin aidaun, aatus ashí ipauwai, nuna wainkatnume tusa.

<sup>3</sup> Dutika ipaam ashí apu aidauk aents dakumka najanamu iwainamunum jüstamawag-tatus ijunjajui.

<sup>4</sup> Nunikagmatai, makichik aents ame nagkamattame tusa tibau senchi jiika chichaak: “Ashí aents maki makichik chichamtin aidaütijum juwi kaunaujum nunütijum antukta-jum:

<sup>5</sup> Uwija kachujin, pigkuijai umpuinak, cítara, lira, salterio, gaita aatus awatuidau antakjumek, tikishmaja pujustatjum, apu Nabucodonosor inamjamtai, aents dakumka oro najanamua nunú ememattajume.

<sup>6</sup> Untsu nunú tibau aig tikishmag pujusa emematuinachuk, wamak juki pag inagtai kee awa nuwi egkeam agtatui”, tiuwai.

<sup>7</sup> Tusa tibau asag, nuna awatiagtai ashí tikishmajag batsamsajui, nunikag aents dakumka oro najanamun emematuídau.

<sup>8</sup> Tuja ujumak Israel aents aidau nuwi batsatuk emematchajui, nuniagtai babilonianmaya aents aidau, apu ujakmi tusag shiyakajui.

<sup>9</sup> Nunik apu Nabucodonosoran chichajuinak:

“¡Apuh, kuashat tsawantai iwaku pujusta! ¡Tuja amina daagmek tuke pachitai atin ati!

<sup>10</sup> Apuh, ame chichaakum músican awatuinamu antakjume wakamak tikishmaja pujustajum, nunikjum aents dakumka oro najanamua nunú ememattajum,

<sup>11</sup> tuja nuna nuniachuk pag inagtai kee awa nuwi wamak jukijum egkeatajum tukagtimume.

<sup>12</sup> Tujash ujumak judío aents aidau, nugka yaig babilonianum awa nuwi amejai atuegak takasagtiin Sadrac, Mesac, Abed-nego aatsam batsasmayume, tujash ditak aminak eme anenjamainatsui, nuninak amina apajuímtaijum aidaunash, tuja aents dakumka oro najanamunashkam emematuinatsui”, tiajui.

<sup>13</sup> Tusa ujakam, apu Nabucodonosor senchi kajeka, utitajum tusa inamjauwai. Dutikam yajuak apu pujamunum itawajui.

<sup>14</sup> Dutikawagmatai apu ditan iniak: “Mina apajuímtaijua nuna emematuinatsui, nuninak aents dakumka oro najanamua nunashkam tikishmatjag emematuinatsui tujamaina nunash ¿dekaskek tujamaina?

<sup>15</sup> Nunú dekasketkuish nunak tsagkujajime. Untsu yamai músican awatuinakui, jeganjum tikishmaja pujusjum ememattajum. Nuniakjuminig suwimkanak amaschagtatjai. Untsu atum emematchakjuminig, pag inagtai horno kega imannum egkeatajum tusan titatjai. Nuna dutika aish, makichik apajuikesh atumnak ayamjutpakchagatui”, tiuwai.

<sup>16</sup> Tusa tutai, dita chichajuinak: “Iik duka makichkish puyatjatsji.

<sup>17</sup> Ame jinum egkejatuawaminish, Apajuí ii emematnaitag nunú iinak uwentijamainai, tuja ame itugkami tukagtame, nunashkam iinak Apajuí uwentijamjattawai.

<sup>18</sup> Tuja Apajuí iina uwentijamchakuish amina apajuímtaigmia duka, tuja dakumka oro najanamua dukesh tikishmatja emematchapash tusaik makichkish anentaimtsuji”, tiajui.

*Kampatum datsauch aidau jii kegamunum egkeamuitak esachaju*

<sup>19</sup> Aatus datsauch aidau tiagtai, apu Nabucodonosor ditan senchi kajejuk yapinig kapantu wajasui. Nunik aents aidaun, jii kega nunú nuni senchi siete jii kemaina imatikajum ikapagtajum tusa tiuwai.

<sup>20</sup> Tusa tima imatiksag umikagmatai, suntag senchi aidaun etegkek, atum datsauch kampatuma nunú achikjum jinum egkeatajum tusa inajui.

<sup>21</sup> Tusa timatai, kampatum datsauch aidauk ditashkam tuke apu asag jáanch pegkek aidau nugkuajunak imatiksag achikag, jigkaja jukiag jiiinum nagkimawag egkeawajui.

<sup>22</sup> Tuja apu inamjantai jiiik nuni senchi ikapajam shiig senchi atushat nimpau asa, suntag aidau uchin achikag egkedaun apeam jinauwai.

<sup>23</sup> Untsu datsauch aidauk shiig pegkek jigkagbaunak nunisag hornonum egkemsajui.

<sup>24</sup> Nunik pegkek chimpintai, Nabucodonosor puyatuk wajaakug aents niina anentaimtan su aidau ijunun jegantun chichajak:

“¡Uchi datsa kampatume duka imatiksaikiap jigkaja chimpjami!” tau.

Tutai dita ainak: “Ehe, kampatume duka dutiksaik egkeamji”, tuidau.

<sup>25</sup> Tusa tiagtai apu chichaak:

“¿Wagka tujash ipak usumta imanish chimpjua? Jigkagbaunak atimawag jii sukuachbau wajukmaina numamtuk shiig yujawai. Nuigtushkam ipak usumta nuwiya makichik ángeljai betekai”, tiuwai.

<sup>26</sup> Nuna tusa Nabucodonosor horno waitijin jeganta untsamak:

“¡Apajuí múunta nuna inake: Sadrac, Mesac, Abed-nego aidauwah, jiinkijum juwi taatajum!” tau.

Tusa tama kampatuma duka imanisag jinum chimpjiu jiinkiajui.

<sup>27</sup> Nunikagmatai ashí apu aidau nuwi ijunuk datsauch aidaun jegaantag diidau, tujash makichkish esachajui, nuigtush makichik intashigkesh shiig esachui, tuja jáanchjii aidaukesh shiig esachu asa, jáanch esau mejegama dukesh shiig atsau.

<sup>28</sup> Nuna wainak Nabucodonosor senchi untsamak: “¡Sadrakan, Mesakan, Abed-negon ayamjak niina aentsji ángelan awema nunú Apajuí ima nigki tuke emamattai ati! Ditak dita Apajuíjin kajinas anentaimaidau asag, wi chicham umikbaunash umikchagmae. Nuadui wainka apajuímtai aina nunú ememattan dakituinak, dekas ayatak jinaami tumabiagmae.

<sup>29</sup> Tuja juju datsauch aina nuna Apajuíji iwainaka imanun iwainamainuk tikich Apajuik makichkish atsawai. Nuadui, nunú Apajuí pegkegchaun chichajuk asaja maam atatui, tuja niina jeshkam apea ajapjam atatui. ¡Nunak juwiya akuish, tuja tikich nugkanmaya akuish, makichkish tsagkujashtatjai!” tiuwai.

<sup>30</sup> Aatus apu chichaman umika pujus, nunú uchi datsa kampatum aajakua nunak imatiksag Babilonia nugkanum nugka yaig provincia aajakua nuna tuke apuji agtinun adaijauwai.

## 4

*Apu Nabucodonosor detsemeagbau*

<sup>1</sup> Nuna dutika pujus, apu Nabucodonosor chichaak: “Wika ashí aents maki makichik chichamtin, ditash nugkentin aina duka shiig agkan maanitsuk, ajak aidaun ajakmawag shiig atsumkas batsamsatnume tusan wakegajai.

<sup>2</sup> Apajúi nigki ashí wagakua nunú shiig pegkeg aidaun mina iwaintugka nunú atumesh dekatajum tusan wakegajai.

<sup>3</sup> ¡Yaunchkesh dekashtai aidaun Apajúi iwainamua duka, shiig pegkeg makichkish ejemait sui! Nii inabaujiya duka ajumaish tuke atinai, tuja niina senchijiya dushakam makichkish nagkankashtinai.

<sup>4</sup> “Witjai Nabucodonosor, wika apu asan, makichkish atsumkas mina pujusa inamtaijui shiig aneasan pujuyajai.

<sup>5</sup> Imanisan pujukman, kashi kajanum ishamainun kajamjabiajai. Nuna anentaimtusan senchi ishabiajai.

<sup>6</sup> Nuniakun, nunash wajukatnununak aan kajamjaja, nuna ujatkatnume tusan, aents anentaimsa dekamtan yacha aidau ashí ikautjuatajum tiabiajai.

<sup>7</sup> Tusa ti ai, tunchi aidaun, anentaimas dekamin aidaun, yaya dekapau aidaun ikaunmawagmatai, wi kajamjamujun ujakajabiajai, tujash makichkish duka nuniktin aan kajamjaume tusag ujatkachagmayi.

<sup>8</sup> Nunik ujatkachagmatai pujai Daniel taawabi. Wi niina daajinak yapagtuan mina apajujun eme anentsan Beltsasar adaikamiajai. Wika Danielnak Apajúi pegkegma nuna Wakani jintintui tajai. Niina wi kajamjamujun ujaakun:

<sup>9</sup> “ ‘Beltsasarah, amek juju aents yacha aidau ijuna nuna nagkaesau yachaitme. Apajúi pegkegma nuna Wakani aminí puja nunak wika dekajai, nuadui amek shiig dekamainchau aidaush ashí dekame. Nuadui wi kajamjamujun amina ujaktatjam nunú antukam wajukatnununak aan kajamjaja ujatkata’, tiabiajai.

<sup>10</sup> “Nuna tusan wi kajamjamujun ujaakun:

“ ‘Kajanmash nugka múunta nuna ejapeen numi múun jiiitkau wajame.

<sup>11</sup> Nunú numia duka shiig muuntan tsakaja nayaimpin antiime, iman asamtai ashí nugkanmaya aidaush wainiagmae.

<sup>12</sup> Nunú numi dukeg pegkeg samekbauwe, tuja shiig kuashat nejeku asamtai, nuna ashí chigki aidauk yuwagmae, tuja kuntin aidauk nuna wajauti bikintunum batsamas ayamiagmae, untsu kanawe aidaunum chigki aidau pasugmagmae, ashí nugkanum iwaku batsamin aidauk nuwiyau yuwa batsamae.

<sup>13</sup> “ ‘Nuna dii wajakman pachiaichbau makichik ángel kuitamkagtin nayaimpinmaya akagun wainkamjai.

<sup>14</sup> Nunú senchi untsamak chichaak:

“ ‘ “¡Au numia duka ajaka ajuatatum!  
Dutikatum kanawe tsupijatum,  
dukeshkam utsankatum,  
neje aidaushkam akagum utsankatum.  
Tuja kuntin aidau nuna wakenti bikintunum batsata duka pisagtinme,  
pishak aidau kanawen pasugmaina dushakam shiyaktinme.

<sup>15</sup> Untsu wajautiya duka tegainigpajum, ayatak cadena hierro najanamui, bronce najanamujai jigkagjum, ajanum dupa ayaunum ukuktatum. Dutikam jegashik uchupiam asati. Nuniak kuntin aidaujai jimagtuk chijichin yuwati.

<sup>16</sup> Nunú numi anentaimtajig yapajinati,

nunikmatai kuintinjai betek wajasti.  
Nunisag pujus siete mijanan ejeti", timae.

<sup>17</sup> Aatus Apajuin aentsji ángel aidau suwimkan susatnuwe.

Nunak dutikatnuwe, wagki Apajuí nigki ashí wagakua nunuwai apu aidaun inauk, tuja apu atinnashkam nii wakegamun etegkeawai, aikasag makichik nugka apuji atinnash aents aidaunmayan imanचाuchin etegka apu emawai tusa aents aidaun nuna iwaintukttag tusa dutikmae'.

<sup>18</sup> "Juna wi amina ujam nuna kajamjamjai. Nunikan yacha aidaun ujatkatatum tjai, tujash ujatkachaje. Tujash wika amina Beltsasara niimpap ujatkatatawa tjai, wagki aminig Apajuí pegkegma nuna Wakani pujawai, tibaijai.

<sup>19</sup> "Tusa ti ai Danielak kuashat anentaimat minitbau asa, puyatak chichatsuk ekemayi. Nuniakuwi wi niina tikich daajin untsukan chichagkun:

" 'Beltsasarah, wi kajamjamua duka puyatjukaipa, tuja nunash wajukatnunak aan kajamjaja dushakam puyatjukaipa, ayatak ujatkata', tibaijai.

"Tusa tai nii chichagtak: '¡Chah apuh, utugsag ame kajamjaum nunú ashí shiwag aidauwai uminka tjai!

<sup>20</sup> Numi múun shiig esagman tsakaju asamtai, ashí nugkanmaya aidaush wainaidau,

<sup>21-22</sup> tuja nuna dukeg pegkeg samekbau, tuja shiig kuashat nejeku asamtai, ashí nugkanmaya aidauk nuwiyán yuwawag batsatu, tuja kuintin aidauk nuna wajauti bik-intunum batsamas ayamaidau, chigki aidaush nuna kanawen pasugmaidau kajamjaum duka, ame ashí tikich aidaush nagkaesau wajasum nunú kajanum wainmamkaume. Tuja amina imanjumea duka nayaimpinash antigke. Nuigtush ame inabaugminak ashí nugkanum dekainawai'.

<sup>23</sup> "Tuja nuigtushkam Apajuí aentsji nayaimpinmaya kuitamkagtin minis chichaak: 'Au numia duka ajaka ajuajum tsaittajum, untsu wajautjiya duka tegainigpajum, ayatak cadena hierro najanamui bronce najanamujai jigkagjum ajanum dupa ayaunum ukuktajum. Dutikam jegashik uchupiam asati. Nuwi kuintin aidaujai ijuntug chijichin yuwati', tusa tau kajanum wainkaume.

<sup>24</sup> Auk duka Apajuí nigki ashí wagakua nunú amina suwimkan amastatus umigtamka nunú aan kajamjaume.

<sup>25</sup> Amek aents aidaujai ijunjamek pujuschattame, kuintin aidaujai ijunjam pujustatme, nuniakum ditajai betek dupa yutatme. Amek jegashik uchupiam tepettame, nunika pujusam siete mijan ejetatme. Nuwi pujusam dekas Apajuí nigki ashí wagakua nunuwap apu aidaunak inawa, tuja nii wakegamujinap apu atinnash etegkeawa tusam anentaimat jukittame.

<sup>26</sup> "Numi ajakbauwa duka wajautitjai ukuktajum tusa tau kajanum antukum duka, dekas Apajuyapi ashí senchigtinuk tusam anentai jukittam duwi ataktu apu wajastatam nunú aan kajamjaume.

<sup>27</sup> Nuadui wi yamai titatjam nunú antukta: Pegkegchau takatak idaisata, nunikam shiig takakum ujudauch aidau yaigta. Nunú dutikakum shiig aneasam agkan pujakum shiig atsumkas pujuschainpash", tiuwai.

<sup>28</sup> Aatus Daniel apu Nabucodonosoran ujakua duka imanísag ashí uminkauwai.

<sup>29</sup> Makichik mijan nagkaemaku ai apu nii pujusa inamtaijin niimak wekagu.

<sup>30</sup> Nunik wekagu untsamak chichaak: "¡Atumesh Babilonia shiig múunta nunú diis-tajum! ¡Aunak wi awi pujusa inamjatnunun ibau pegkejan umikuitjai! ¡Nuigtush mina senchijun ashí aents tikich nugkanmaya aidaun iwaintuktasan imatikan umikuitjai!" tau.

<sup>31</sup> Tusa eke chichaak wajai nayaimpinmaya chichau antuekauwai, nunú niina chichajak: "Apuh, amek yamai nagkamsamek apu achattame.

<sup>32</sup> Amek aents aidaujai ijunjamek pujuschattame, kuintin aidaujai ijunja pujusam ditajai betek dupa yusa pujusam siete mijan ejetatme. Nuwi pujusam dekas Apajuí ashí senchigtina nunuwap apu aidaunak inawa, tuja nii wakegamujinap apu atinnash etegkeawa tusam anentaimat jukittame", tiuwai.

<sup>33</sup> Nuna tusa inagnaig duka imanísag uminkauwai. Nuadui Nabucodonosor niina pujusa inamtaijin pujaun jiiki jukiag baka batsatbaunum ejegan ukukiajui. Dutikam nuwi pujus bakajai betek chijichin yuu pujau. Nuwi pujus jegashkijug pujau, tuja



intashishkam águilan ujejai betek, nanchikish águilan nanchikijai betek muuntan tsakapak pujau.

*Nabucodonosor detsemeag pujamun tsagagbau*

<sup>34</sup> “Wi suwimkan juki waitiamu tsawan amuekamtai, wi Nabucodonosor nayaimpin diismaijai, nunikan detsemeajujai betek waitu pujamujun tsagagbajai. Nunikan Apajuí nigki ashí wagaku tuke pujuuwa nuna emematkun:

“ Apajuí senchijiya duka

nagkankashtin atakesh tuke atinai,

niina inamtaijiya dushakam tuke imanuk atinai.

<sup>35</sup> Apajuí emtinig aents aidauk tikima wainkaush ainawai.

Apajuik nayaimpinmash, nugkanmash

nii wajuk wakegawa nuna umiawai.

Apajuíjai ainik tudaimainuk atsawai, nuigtush

¿wagka aikame? tusa tumainkesh atsawai’, tibaijai.

<sup>36</sup> “Tusa Apajuín emematin nagkanmawaik, detsemeaja pujamugnak pegkeg wajasmaijai, nunikan ataktu inamntan nagkamabiajai. Nunika ai chichamnum mina yaintujaku aidau tikich aents apu aidaujai ashí kautjuawagmayi. Nunik kaunawagmatai, ditajai ijunjan yaunchuk aajakbaujun nagkaesau wajasmaijai.

<sup>37</sup> “Nuadui wika Apajuí nayaimpin apujiya nuna emematjai, wagki nii takamujiya duka betek shiig pegkeja nuadui. Aents emebauwa nunak Apajuí inatsawai. Wika apu Nabucodonosoraitjai. Wi nunak dekaskes tajai.”

## 5

*Tanishnum chicham agagbau wantinkau*

<sup>1</sup> Apu Belsasar Babilonia nugkan apuji jiiista muuntan umika, nijjai takau aidau mil aents eme anentsa diitai aidaun ipauwai. Dutika ipaam kaunawag vinon shiig kuashat uwajajui.

<sup>2-3</sup> Tuja apu Belsasarchakam kuashat vinon uwag nampeka, yaunchuk niina apaji Nabucodonosor Jerusalégnum Apajuí emematku ijuntai aajakua nuwiyen shikika umutai oro najanamu aidaun, plata najanamu aidaujai yajuakua nuna utugtitajum tusa inamjauwai. Nunak nii ipaamu aidaujai, tuja niina nuwe aidaujai, nuigtu awan nuwe aidaujai aatus batsamas duwi shikikag umú batsabiagtatus tiuwai.

<sup>4</sup> Nuna umuinak batsamas dita apajuímtaiji oro, plata, bronce, hierro, numi, kaya najanamu aidaun emematuinak kantama batsatu.

<sup>5</sup> Imatu batsatai makichik uweg tanishnum wantinuk, jii kegau asamtai, apu pujusa inamtaiji tanish pujui ukatkamunum paan agau. Nuna apu wainak,

<sup>6</sup> senchi ishamak kujaak yaping puju wajasu.

<sup>7</sup> Imaniak, babilonianmaya tunchi aidaun, yaya dekapau aidaujai senchi untsamak chichajak:

“Anú chicham agajam awa dusha wajintuaki nuna ujatkaunak jáanch shiig pegkeg yamakaitkaun anujattajai, tuja nuigtush kuntujeanum nugkutai oro najanamun anujattajai. Niinak mina ukujui tikich jimag apu aina nuna ukujin apu atinun adaikattajai”, tau.

<sup>8</sup> Tusa imattai aents yacha yaya dekapau aidau, anentaimas dekamin aidau aatus nuwi apu inamtain batsatuk ashí jiiinag chicham agajam aunum utsanawajui. Tujash wajintu agagbauk ayi nuna ujus diis nuna taku tawai tusa apu ujamainuk makichkish atsusui.

<sup>9</sup> Nuadui apu Belsasarak senchi puyatuk yaping puju wajasui. Nunitai nijjai takau apu aidauhkam shiig anentaimjachmin dekapedau.

<sup>10</sup> Belsasar nii aents ipaamu aidaujai pampainiagtai, nuwa múun niina dukuji reyna tutai pujau jiiinki, yujumak yuwaku ijuntainum wayauwai. Nunik chichaak:

“¡Apuh, kuashat tsawan iwaku pujustin ata! ¡Imanikmek puyatkaipa, tuja nuigtush senchi ishamkaipa!

<sup>11</sup> Juwi iina nugken makichik aents yacha pujawai. Niyaiig Apajuí pegkegma nuna Wakani pujawai. Amina apa Nabucodonosor ayá nunú niina shiig wainajakui, nuadui ashí aents yacha anentaimas dekamin aidaun apuji adaikauwai.

<sup>12</sup> Nunú aents yacha duka kajanmayanash, tuja utugchat shiig dekamainchaunash shiig etsegmainai. Niina daajig Daniel aig apu Nabucodonosor yapagtua Beltsasar adaikauwai. Nunú untsukta, dutikawamin nii taa juju agagbauwa jusha wajintuk agagbauwaita nuna ujakpakti”, tiuwai.

<sup>13</sup> Tusa tima Danielan untsukui, dutikam taamtai apu niina iniak:

“¿Amekaitam Daniel mina apag Nabucodonosor judío aents Judá nugkanmaya aidaun achijja ikaunmauwa nuwiyam?

<sup>14</sup> Amina pachipas ujatuinak, Apajuí pegkegma nuna Wakani Danielai pujawai, nuadui niig shiig yachai, iman asa kajanmaya shiig dekamainchaunash betek etsejui tujamainawai.

<sup>15</sup> Ame eke tatsminig juwiya dekas ashí aents shiig yacha anentaimas dekamain aina imanun ikaunman, juju agagbauwa dusha wajintua nunú ausa diisjum ujatkatajum ti ai diisagmae, tujash makichkish dekeinatsui.

<sup>16</sup> Nuigtushkam ishmainak kujaidau, wagki nii yana kajejawa nunak mau, dutikak wait anentamujinak mauntsuk idayu asamtai. Nii yana apu ati tusa wakegawa nuna apunash adayu, untsu nii dakitamunak idayajakui.

<sup>17</sup> Tusa tama Daniel niina ayaak:  
“Apuh, tanishnum agagbauwa dusha wajina takug tawa nunak wi aminak ujamainaitjame. Tujash minak makichik wajigkesh sujumaitsume, nuigtush apu adaitukti tusanush wakegatsjai.

<sup>18</sup> “Apajuí nigki ashí wagakua nunú, amina apa Nabucodonosornak apu emauwai. Nuadui nugka muunnum aents batsamin aidaush ashí ajaantus diijaku ainawai, niina imanjinash shiig deka jaku ainawai.

<sup>19</sup> Nuigtushkam ishmainak kujaidau, wagki nii yana kajejawa nunak mau, dutikak wait anentamujinak mauntsuk idayu asamtai. Nii yana apu ati tusa wakegawa nuna apunash adayu, untsu nii dakitamunak idayajakui.

<sup>20</sup> Apu Nabucodonosor, nigki ima wagaku senchigtin anenmamtai, Apajuí nii apu aajakua nunak atankiuwai.

<sup>21</sup> Dutikamu asa nigka aents aidaujui ijunjag pujumainchau asamtai, kuntin aidau batsatbaunum egegawag ukukiajui. Dutikam nuwi pujus burro ikamia aidaujui betek dupan yuujaku, tuja iyashinashkam jegashik jegashkijam tepejakui, nunik nuwi pujus dekas Apajuí nigki ashí wagakua nunuwap apu aidaunak inawa, tuja nii wakegamujinap apu atinnash etegkeawa tusa anentaimtan jukiuiwai.

<sup>22</sup> Tuja apuh, amek nuna uchiji asam shiig dekame, nuniayatkum pegkeg takatak dakitame.

<sup>23</sup> Nuadui Apajuí dushikiakum niina jenia shikika umutai aidau yajuakbau aina nunú itagtuatajum tusa inamjamin ikaunmawagmatai, nujai vino shikikam tikich apu ipaamu aidaujui umame, wainka apajuímtai aidau oro, plata, bronce, hierro, numi, kaya aidau najankamu, wainmatnash wainmachu, antutnash antuchu, anentaimtajish atsu aina nunú emematu wekaeme, Apajuí pujatan amasua nunú emematmain idaikum.

<sup>24</sup> Nuadui Apajuí uwejan awemae juna agagti tusa. Nunú chicham agagbauwa duka juju ainawai: <sup>25</sup> ‘MENE MENE TEKEL Y PARSIN’.

<sup>26</sup> Juju chicham aina duka juna taku tawai: MENE tawa duka: Ame apu asam inamam nunú amuekatnunak Apajuí tsawantan mamiktugmae, taku tawai.

<sup>27</sup> Untsu TEKEL tawa duka: Makichik waji yaunchuk kijin aajaku duwi dekaapam kijinji megkaekauwa numamtuk amina Apajuí apu etamiu aig, ame shiig takaschaum nuna taku tawai.

<sup>28</sup> PARSIN, tawa duka: Ame inabaugmea nuna Apajuí jimaituk akankattawai, dutika Medo aents aidaun, Persia aents aidaujui susatta nuna taku tawai”, tusa Daniel ujakui.

<sup>29</sup> Tusa ujakam nuna ashí antuk nagkanmawaik, Daniel jáanch shiig pegkeg yamakaitkau anujatajum, tuja nugkutai oro najanamua dushakam anujatajum tusa inamjauwai. Nuna tusa, nugka yaijan apuji\* kampfatum duka Daniel atatui tusa ashí etsegkauwai.

<sup>30</sup> Nuna tusa kintamun nunú kashia duik apu Belsasar Babilonia nugkan apujin mau ainawai.

<sup>31</sup> Nunikmatai Darío Media nugkanmaya aajakua nunú apu wajasui. Tuja Darío sesenta y dos mijanji ajamu apu wajasui.

## 6

*Daniel leónka batsamtain waanum egkeamu*

<sup>1</sup> Darío apu wajasu asa niina yaigtin aidaun ciento veinte gobernadoran adaijauwai.

\* 5:29 “Nugka yaijan apuji” tawa nunak “gubernadoran” taku tawai.

<sup>2</sup> Tuja gobernador aidau takagtai, diistin aidaun kampatum apun adaitujui. Nunak adaitujui wagki apu nuna uyumak anentaimak waittsai tusa. Nunú kampatuma nuwi Danielchakam pachitkau aajakui.

<sup>3</sup> Tuja Daniela takatjig tikich apu aidaun takatjijai diismash nii ima yacha shiig takajakui. Iman asamtai apu anentaimas, ashí wi inabauwa nuwi mina aentsug aina nuna apuji dekas adaikatjai tiuwai.

<sup>4</sup> Nuna tikich apu aidau dekawag, wajinmak dewakat, tuja nuniachkush wajinak shiig umikchat nuniakuig apu ujatkami tusag egatuidau. Dutikainakush Danielak shiig takau asamtai, makichkish pegkegchaunak waitkachajui.

<sup>5</sup> Nuniku asag chichainak: “Daniel shiig takatsui tusa tsanumjumainuk makichkish atsujui, untsu nii Apajuín umigjai tawa nuwi utugchat apujtusmi”, tiajui.

<sup>6</sup> Aatus gobernador aidau chichaman umikag, apu Daríojai chichastatus shiyakajui. Nunik jegajuawag chichajuinak:

“¡Apuh, kuashat mijan pujustin ata!

<sup>7</sup> Apuh, chicham umiktina nunú papii najannati tusa, amejai takau aidauti chichasji. Nunú chicham umiamunmak: makichik nantua duwi tikich apajuímtai aidau, tuja aentskesh emematbauk shiig atsusti, untsu apuh, ima aminak emematjamtinme. Tuja nuna umiachunak leónka batsamtain egkeatneme.

<sup>8</sup> Nunú papii ame firmawaminig, nunak makichkish yapagmainchau ainawai. Duka aatus Media nugkanum Persia nugkanmashkam umikbauwai”, tiajui.

<sup>9</sup> Tusa tiagmatai, nunú papii umikbaunum apu Darío firmauwai.

<sup>10</sup> Dutika apu papii umike tabaun Daniel dekaa ukuak Apajuín ausatatus niina jeen weuwai. Nunik waya nunú jeganum Jerusalégnumanini niimtai ujaimu epenim aun ujai, nuwi tikishmag pujus maki makichik tsawantai kampatuma Apajuín augtaijinak dutiksag Apajuín aujak pujau.

<sup>11</sup> Nunik Apajuín aujak pujai, nunú aents chichaman umiku aidau Daniela jeen utsaankama Apajuín aujak, ememataku pujaun wainkajui.

<sup>12</sup> Dutika wainkag Danielan tsanumjajagtatus apun wejiajui, nunik jegajuawag chichajuinak:

“Apuh, ame chicham umiakum makichik nantu wainka apajuímtai aidaunak, tuja aentsnakesh emematchagatui, ayatak ima minak emematjitinme, untsu nuna umiachuk leónka batsamtaijin egkenati timaum duka eke nantuk amuetsui. Nunú ¿dekaskechukait?” tuidau.

Tiagtai apu ditan ayaak:

“Ehe, duka dekaske. Media nugkanum, tuja Persia nugkanmashkam chicham umikbawak makichkish yapagmait sui, duka nunisagke”, tiuwai.

<sup>13</sup> Tusa timatai, nuigtu chichajuinak:

“Nunin aish ¿wagka tujash judío aents achija ikaunmamua dusha Danielash amina eme anenjamtskesh, nuigtush ame chicham umikbauwa nunash ajaantus diitskesh, tsawantash kampatuma imaniash Apajuínash auju pujawai?” tuidau.

<sup>14</sup> Nuna apu antuk, senchi wake besemag dekapjauwai. Nuniak wajuk Danielan ayamjukajak tusa ane anentaimkawa kintamu.

<sup>15</sup> Nuniai nunú aents aidau ataktu apu jegajuawag chichajuinak:

“Apuh, Daniel jakatnuk amek dekame. Wagki Medo aents aidaun apuji, nuniachkush Persia aents aidaun apujigkesh chichaman umikbawak makichkish yapajimait sui”, tiajui.

<sup>16</sup> Tusa tiagtai, untsu Daniel utitajum, dutikajum león batsata nuwi egkeatajum tusa inamjauwai. Tujash eke egkenatsaig Danielan apu chichajak: “¡Ame Apajuí tuke umignaitam nunú ayamjutpakti!” tiuwai.

<sup>17</sup> Tusa inagnaig Danielan jukiag leónka batsamtain egkeawajui. Dutikawag kaya muuntan jukiag nunú waan dukukajui, dutikawagmatai nuna waitjijin apu niina sellojin apujtuawai. Tuja tikich apu aidaushkam Danielan jikinum tusa ditashkam dita sellojin apujtuawajui.

<sup>18</sup> Dutika ukuak apuk nii pujusa inamtaijin weuwai, nunik jegaashkam yujumkanak yutsuk kanagtatus tepesui, nunik kanagchamin dekapeak tuke kanutsuk tsawau, nuniakush kantamtain awattinme antuktajai tusagkesh tichauwai.

<sup>19</sup> Nunik tsawamuik nantaki waugtus leónka batsamtain weuwai.

<sup>20</sup> Nunik waanum jeganatak wesa wake besemag dekapeak aatus Danielan untsukui: “¡Apajuí pujutan sukagtina nuna inake Danielah! ¿Amina Apajuígmesh león yujamawai tusash ayamjutpakchaek?” tau.

<sup>21</sup> Tusa untsuam Daniel ayaak:

“¡Apuh, kuashat tsawan iwaku pujustin ata! tajame.

<sup>22</sup> Wi pegkegchau takamsachbaun Apajuí dekau asa, tuja aminakesh tsanuchuitjam nunashkam dekau asa, león yuwawai tusa, wi Apajuín nemajag nunú niina aentsji ángelan akupkame, dutikamu taa nii leónka weninak epetjame”, tau.

<sup>23</sup> Tusa aimkamtai Daniel jiiktajum tusa apu tiuwai. Apu timatai jiikajui, dutikawag león esaicheash tusa ashí diidau, tujash Danielak shiig pegkeg egketu, wagki niig Apajuíyai kajinas anentaimu asa.

<sup>24</sup> Daniel jiinkimtai ajuma duwi, aents Danielan tsanumjuju aidau ikaunmatajum tusa apu timatai ikaunmawajui. Dutikawagmatai ashí nuwejai, uchiji aidaujai yajuakag león batsatbaunum ashí chimpiauwajui, dutikam eke nugka iyachunak yakig león aidau tsekentiag ichiajajui.

<sup>25</sup> Nunikmatai, apuk ashí aents tikich nugkanmaya ditash chichamtin aidau papiiin aatus agatjauwai:

“Ashí atum aidautigmin kumpamjime,

<sup>26</sup> nuniakun ashí wi inamag nuwi batsamin aidauk Daniela Apajuíjia nuna ememat-tinme tajai.

“Apajuíyai pujutan sukagtina duka,

niig tuke pujuuwai.

Nii inabaujiya duka makichkish megkaekashtinai,

tuja niina senchijishkam nagkankashtinai.

<sup>27</sup> Apajuíyai agkanmitkagtin,

Apajuíyai uwemtikagtin,

niig nayaimpinmash, nugkaash wainchatai pegkeg aidau iwainauwai.

Apajuí Danielan león yuwawai tusa ayamjuke”, tiuwai.

<sup>28</sup> Nuadui Danielak apu Darío aajakua nunú eme anentsa diitai aajakui. Tuja apu Ciro Persian apuji aajakua duishkam imanuk aajakui.

## 7

### *Apajuí Danielan kajanum iwaintukbau*

<sup>1</sup> Belsasar Babilonia apuji wajasa makichik mijan inamak pujai, Daniel kashi kajanum kajanjauwai, nunik shintaag nii kajanjamujin agajui. Tuja duka aatus tawai:

<sup>2</sup> “Kajanum nayaimpinmaya dase ashí yantamnum dasentuk nayantsan iyantug senchi tsukatmitkabi.

<sup>3</sup> Imaniamunmaya pachichbau ipak usumat kuntin múun maki makichik niimtin aidau jiiniagmayi.

<sup>4</sup> Yama nagkamchak jiiniuwa duka leónjai betekmamtinayi, tujash nanapeg ukukuin nanapejai betekayi. Nuna dii wajai nanapen japiki ichinkagmayi, dutikawag inantainiag aentsjai betek awajainiagmayi, dutikawag aentsu anentaimtajijai betek awajsagmayi.

<sup>5</sup> “Untsu tikich kuntinuk chayujai betekayi, niina pagae juinia yantame ima wagakuyi. Tuja kampatum ukunch pagae aidau apaakuyi, nuna chichajuinak: ‘iWetá, nunikam neje ame wakegamu shiig kuashat yuwata!’ tiagmayi.

<sup>6</sup> “Tuja tikich kuntinuk kaichjai betekayi. Nunú kuntinuk chigki nanapejai betek tuntupen ipak usumat nanape ajibi, tuja buukeshkam ipak usumta imaniyi. Niina senchimitkawagmayi, aents aidau apuji wajas inamjati tusa.

<sup>7</sup> “Untsu tikich kuntinun kajanjabiag duka yama nagkamchakun kampatum kuntinun kajanjabiag nuna nagkaesau shiig tsumain, ishamain, senchigtin, diez kachugtinayi. Iman asa naísh jiju hierro tsakaskatu etsakamu asantai, nii wainbaunak ashí amubi, dutikak ampunuk najak tsaika ukubi.

<sup>8</sup> “Nunú kuntu kachuji diez asantai, nuna dii wajai pachichbau tikich kachuji piipich ukuunum jiinmayi. Nunikmatai, nunú nigki agkan wajasti tusa kachuji múun aidau kampatum ukuitkagmayi. Tuja kachu yama tsapainiwa nuna jiig aentsdaujai betekayi, chichaakush ememas chichabi.

<sup>9</sup> “Nuniakui dii wajai, apu ekemsa inamtai aidau jukiag apusagmayi,

nuwi makichik apu múun ekemsabi.

Nuna jáanchjig yujagkim shiig pujua imanayi,

intashishkam lana pujua imanayi.

Tuja ekemtaijia nuna ruedajig jii kegaujai betek

tsawan wajas amayi.

10 Tuja nii eketbaun emtinia jii kegau betsaka akaemayi.  
 Nunú muunnak aents shiig kuashat emematiagmayi.  
 Nuninai tikich aents aidau nuni kuashat  
 makichkish dekapamainchau,  
 jegantag ijuniagmayi.  
 Nuninai nunú múun dita takasbaujin diijus  
 suwimkan susatatus papii aidaun ujakmayi.

11 “Nuna kuntinun kachuji yamajam tsapainiuwa nunú ememas chichaakui dii  
 wajabiajai, nuniai nunú kuntinun maawagmayi, dutikawag tsupijag jii kegaunum  
 chimpiauwagmayi.

12 Nuna dutikawag tikich kuntin aidaunashkam kakaagchamin awajsagmayi, dutikau  
 ainayatak mautsuk tsawanji jegagti tusag ukukiagmayi.

13 “Nuna wika kajanum ashí diyakun wajabiajai.

“Nuniai pachiaichbau, yujagminum pachitkau  
 makichik aentsjai betek akagun wainkabiajai.  
 Nunik akaiki nunú múun eketbaunum jeganmayi.

14 Nunikmatai niina dekas  
 tikich aidaun nagkaesau apu emabi,  
 dutikamtai aents ashí nugkanmaya maki makichik  
 chichamtin aidau niina umiujinak emematiagmayi.  
 Niina senchijig imanisag atinai,  
 tuja inamtaijishkam makichkish megkaekashtinai.

15 “Nuna imanun wainkan senchi ishamkabiajai, nunikan puyatkan jamaijai.

16 Nuniakun aents tuwaka ijunbaunum jegantan, makichik iniakun: ‘Aunash wagka  
 imaninawa nunú minash ujatkata’ tibaijai. Tusa tai ayu tujutmayi. Tusa chichagtak:

17 ‘Juju ipak usumta imajin kuntin múun aina duka ipak usumat apu aidau ashí  
 nugkanum inamjagtina nunuwai.

18 Tujash nunú nagkaemakmatai, Apajuí aents aidaun etegkauwa nunú atakea duish  
 tuke inamjatnai’, tusa ujatkabi.

19 “Tusa ujatkamtai shiig dekatag tau asan, kuntin inagnamu ipak usumta nunú tikich  
 aidaujaig betekchau tsumain, nai aidaush hierro, nanchikish bronse, nii wainbaunak  
 ashí yuwa amuka, ampunak najak tsaika ukua aush wagkag ibauwaita,

20 tuja nuigtush diez kachugtina dusha, tuja kachuji uchuchiji yama tsapainiuwa nunú  
 jiina dusha wagkag annaita, tuja nuigtush chichaakush ememas chichau, tuja kachuji  
 yamajam tsapainiuwa nunú piipichitak tikich kachuji múun aidaun nagkaesau, nunú  
 tsapatai kumpatum kachuji ukuiniaja nunash, wagkag ankae nuna dekatan iniasbaijai.

21 Tuja nuigtushkam, nunú kachu yama tsapainiuwa nunú Apajuín aentsji aidaujai  
 maania ditan depeteaun wainkabiajai.

22 Imatika pujujai nunú múun taabi, nunik Apajuí ashí senchigtinu aentsji aidaun  
 ayamjuk agkanmitkabi. Nunak Apajuí ashí senchigtinun aentsji aidau apu wajasag  
 inamjagtin tsawan jegau asamtai nunak dutikatnai.

23 “Dutika chichaak:

“ ‘Kuntin inagnamu  
 ipak usumta nunú kuntin wainkaun duka,  
 apu ipak usumta nunú  
 ashí nugkanum inamjatna nunuwai,  
 duka tikich aidaujaig betekchau atinai.  
 Ashí nugkanmaya aidaunak yuwa amuak,  
 tikich aidaunak najak tsaika ukubi.

24 Untsu diez kachujiya duka,  
 nunú tsawantin diez apu aidau inamjagtina nunuwai.  
 Nunú nagkaemakmatai, yama nagkamchak  
 apu aajaku aidaun nagkaesau tikich apu wajastinai,  
 nunik diez apu aidaunmayan kumpatum depetek maatnai.

25 Nunú apuk Apajuí pegkegma nuna  
 pegkegchau chichagtinai.  
 Nuniak Apajuí aentsji aidaujai maanitnai.  
 Tuja Apajuí chichame umiktin agagbauwa nunashkam,

Apajuí emematku ijuntai tsawan etegjamu aidaunashkam yapajiatag tinai.

Nuniak Apajuí aentsji aidaunak kempatum mijan nuigtu jimaituk nii wagagki waitka pujugtinai.

<sup>26</sup> Tujash nunú apua duka apu chichaman inagdau aidau utugchatjin ejetim suwimkan jukitnai, nunik ajumaish apu achatnun tuke megkaekatnai.

<sup>27</sup> Nunikmatai Apajuí ashí senchigtina nuna

aentsji aidau apu wajasag

nugkanmaya apu aidaunak ashí inagtinai.

Dutikamtai dita aidau niina chichamen

umijuinak emematiagtinai.

Tuja nii inabaujig atakea duish tuke atinai.'

<sup>28</sup> "Juna augmattsag nunuwai wi kajanum wainkamua duka. Nuna kajamjan puyatkan shiigchau yampia wajasmaijai, tujash nuna pachisnukesh tikichnak makichkish ukachabiajai", tiuwai Daniel.

## 9

*Daniel niina aentsji aidaun pachis Apajuín ausamu*

<sup>1</sup> Asuero uchiji Darío, Medo aents aajakua duka, caldeo aents aidaun apuji wajas inamajakui.

<sup>2</sup> Nunú apu makichik mijan inamai, nunú mijantin wi Daniel, Apajuí profeta Jeremíasan ujaak, Jerusalégnak tsaikagtinai, dutikam setenta mijan asatnai tiuwa nunú agagbaun augkun pujuyajai.

<sup>3</sup> Nuna ausan, yujumka ijagmaan jáanch pegkegchaun nugkujan, yukunum antumka pujusan mina pataag aidaun pachisan Apajuín aujajai.

<sup>4</sup> Wi Tuke Pujuu minna Apajuíjun segaaknuk aatsan segayajai:

"Apajuíjuh, ametme múun ashí senchigtinum. Ame dutikatjai tibauk betek uminaitme, tuja amina anempainak chichamjumin umigtamin aina nunú amina anenkem iwaintinaitme. Nuadui anentaimsan

<sup>5</sup> dekas pegkegchawap takasji tajai. Ii aidautik aminig pegkegkesh iwainmamtsuji. Ame ataskmin wajukmaina numamtuk batsatu asa, ame umigtash kajimatki idaisa wainka yujaji.

<sup>6</sup> Amina takagtamin profeta aidau ame akatjam wekagas iina apuji aidaun, iina muunji aajaku aina nunash, tuja ashí Israel aents aidaunash chichaman ujaku ainawai. Tujash ii aidautik nii chichaman ujpakuish dekaskeapi tatsuji. Nunidau asa makichkish antugtsuji.

<sup>7</sup> Apuh, ametme pegkegmamek. Nuadui ii judío aents aidautik datsaamaji. Jerusalégnam batsatushkam datsaamainawai, tuja tikich Israel aents aidau amina shiwagmatjamawagmatai, ame utsagkam tikich nugkanum batsatushkam datsaamainawai.

<sup>8</sup> Tuke Pujuuwah, iik pegkegchau takamsau asa datsaamainaji. Tuja iina apuji aidaush, iina muunji aidaush datsaamainawai.

<sup>9</sup> Iik ame intimjaku chichamjumik umikchaji. Tujash amek tuke wait anenkagtinaitam duwi tsagkugkagtumainaitme.

<sup>10</sup> Tuke Pujuu iina Apajuíjyah, amina profetajum aidau ame akatjamu jintinjamainakuish nunú antukaik umikchaji.

<sup>11</sup> Israel aents aidau ashí amina chichamem umiktina nunak umikchaje, nuninak tupantug idaisaje. Nuadui Moisés amina inakem agak: Apajuí umigchakjumek suwimak jukitnaitjume tiuwa nunú uminu asamtai, iina pegkegchajin amina suwimakum iyanjamae.

<sup>12</sup> Ame yaunchuk ujabatkam uumiakum, jutii pegkegchau takasbaunum, tuja iina apuji aidaush pegkegchau takasagbaunum suwimak ishamain shiig katsuunmainchau, yaunchuk Jerusalégnam aents iina shiwaaji aidau batsatu suwimak suwakmesh imatika susachbau sukagtusume.

<sup>13</sup> Juju suwimak iina iyanjamja duka yaunchuk Moisés agajua nunú imanisag uminkae. Tuke Pujuu iina Apajuíjyah, iik nunú iman dekainayatku ame egatsuk, tuja ame umigtsuk, nuigtush iina tudauji aidaush idaisachji, tuja amina chichamjumkesh umikchaji.

<sup>14</sup> Nuadui Tuke Pujuuwah, ame suwimak sukagtusume, iina Apajuíjyah, ame dutikamua duka shiig pegkejai, nunin aig jutii aidauti ame umijut dakituinaji.

<sup>15</sup> "Apuh, iina Apajuíjyah, yaunchuk ame aentsjum aidau Egipto nugkanum inaku waitkatai batsatu ayamjukam amina senchigmijai jügmayume. Nunú ame dutikakum senchijum iwainakuitam duka yamaikish augmattai awai. Iman aig jutii aidautik pegkegchau takamsaji.

<sup>16</sup> Apuh, ame wait anenkagtinaitam duka shiig dekaji. Tuja Jerusalén amina yaaktamchia duka wait aneamam ame kajeku akumesh tsagkujata, wagki ashí aents amina umigtamchau tikich nugkanmaya aidau iina pegkegchaujin, tuja iina apachji aajakajua nuna pegkegchaujinishkam Jerusalégkan tsaikajua nuna diisag amina aentsjum aidauti-nashkam dushiktamainawai.

<sup>17</sup> Iina Apajuíjyah, wi amina inakmin segajam nunú wait aneamam antugtukta. Ame emematku ijuntai pegkegma nunú wajukaya awa nunú wait anenjata.

<sup>18</sup> Apajuíjuh, wait aneamam antugkagtukta; jii waitiamua nunú diista, tuja ame emematku ijuntai yaakat aya nunashkam tsaikajui! Ii sumag duka pegkeg takau asaikish sumatsji, amek wait anenkagtinaitam nunú dekau asa sumaji.

<sup>19</sup> ¡Apuh, ii pegkegchau takamsau ainakuish, wait aneamam tsagkugkagtugta! ¡Apuh, idaikagtutsuk atujatkata! ¡Apajuíjuh, amek anenmamsam, amina aentsjum amina emematjamin aidau anentaimtusam, tuja amina yaaktajum anentaimtusam, kuashat tsawan megkaetsuk wamak yaijatkata!" tusan segabiajai.

### *Setenta semana*

<sup>20</sup> Tuja nuigtushkam, mina pegkegchaujun pachisan, Israel aents aidau pegkegchaujin, tuja Jerusalégkan pachisnushkam Tuke Pujuu mina Apajuíjun augkun pujuyajai.

<sup>21</sup> Nunika Apajuí augkun pujai, yaunchuk ángel Gabriel wantintugkauwa nunú nanaak taawabi. Nunak etsa akagai aagkú Apajuí emematku kuntin maa apetia nuniai taawabi.

<sup>22</sup> Nunik chichagtak:

"Danielah, chichaman amina shiig ujaktasan minajai.

<sup>23</sup> Apajuí amina senchi anempawai, nuadui ame yama nagkamchakum Apajuí augmaum duik nagkamas ame sumamunak Apajuí antugtamak aigmake. Wi nuna pachisan amina ujaktasan tajuagme. Tuja ame kajamjaum dusha wajukatnuk aan kajamjaume nunashkam wi ujaktatjam nunú shiig antukta:

<sup>24</sup> "Amina pataim aidau Apajuín intimjukiag pegkegchaun takamsaju asag suwimkan jukiag waituina nunak, setenta semana\* waitu batsamtatui, tuja yaakat pegkejam tsaikbauwa dushakam nunisag setenta semana asatnai. Imanik waituinak anentaimtan jukiagtinaí, tuja Apajuí dita tudaujinak tsagkujatnai, dutikamtai ima pegkeg takata nunú tuke atinai. Tuja Apajuí emematku ijuntai jegamkamunum tesaamu shiig pegkejam tutaya dushakam yaunchuk profeta aidau takasu aina iman shiig iwajamu atinai.

<sup>25</sup> Juju ame shiig dekaata:

Jerusalén tsaikbauwa nuna iwajatnume tabau chicham antuekatna nunú tsawantin nagkamas yamajam apu etegkamu wantinkatna duwi siete semana jegattawai. Jerusalégnun jinta ayá nunú iwagbaunak, Jerusalén peeja iwagbaujai sesenta y dos semana ashimkagtinaí, tujash nunú tsawantinig senchi waitiamu, wake besemag atinai.

<sup>26</sup> Sesenta y dos semana nagkaemakmatai, apu atin etegka adaikamun makichkish utugchatji atsujunak maawagtinaí. Tuja tikich apu ekemtina nuna suntaji aidau Jerusalégnak jega Apajuí emematku ijuntai jegamkamujai ashí tsaikagtinaí.

\* 9:24 Jer 25.11-12; 29.10num chichaak, setenta mijan tawa nuna juwi setenta semana tawai. Junak maki makichkish semanatinig siete mijan atinun tawai. Tuja setenta semanatinish wajupa mijanak jegawa imaan waitu batsamiagtinun taku tawai.

Nunú tsawan uminbauk pachiachbaunum  
nujag dujajak utuwama numamtuk atinai.  
Tuja maaniamu, tsainiamu atinai tusa etsegkamua  
duka imaniasag wea weakua amuekatnai.  
<sup>27</sup> Tuja nuigtu makichik semana inagnamua duwi  
apu pegkegchau ekemiuwa nunú aents aidaujui  
chichaman umiktinai.  
Dutikayatak jimaituk semana wegak  
Apajuí emematku kuntin maa  
nuna neje ashí apetia nuwi shiig pegkegchaun tsumainun takamsatnai.  
Nuniau asa Apajuí emematku anentag suwamuk atsusti titinai.  
Tusa umik pujuttaman, Apajuí suwimkan susa maatnai”, tujutmayi.



## Oseas

*Nuwa akika dutikтайjai Oseas nuwenamu*

<sup>1</sup> Beeri uchiji Oseasan Tuke Pujuu ausauwai. Nunak Ozías, Jotam, Ahaz, Ezequías aatus Judá wegantu aidaun apuji aidau, tuja Joásan uchiji Jeroboam Israel aents aidaun apuji aatus batsamajaku aina nunú tsawantin ausauwai.

<sup>2</sup> Yama nagkamchak Tuke Pujuu Oseasan ausauwa duka jujuwai:

“Israel aents aina duka mina umigtutnak idaisaje, nuninak nuwa akika dutikтайjai betek wajasaje, nuadui ameshkam nunismek nuwa akika dutikтайjai nuwenata, nunikam nuwi uchi akiata. Dutikamu asag ditak nuwa akika dutiktain uchiji agtinme”, tiuwai.

<sup>3</sup> Tusa tima múun Diblaim aajakua nuna nawanji Gómeran nuwatuk pujus uchi aishmagkun akiauwai.

<sup>4</sup> Nunú uchi akiinamtai Tuke Pujuu Oseasan chichajak:

“Anú uchi daajig Jezreel adaikata, wagki ujumak tsawan asan, apu Jehú Jezreel nugkanum kuashat amujatkawa nuna umiakun, suntag Israelfnumia aidaunak ashí ijinattajai. Dutikan Jehú apu wajas puja nunak atakesh tuke apu achatnun atankittajai.

<sup>5</sup> Nunak nugka paka Jezreel tutaya nuwi Israel aents aidaun shiwaaji jetekag ijinatnume, dutikainak achija yajuaktinme titatjai”, tiuwai.

<sup>6</sup> Duwi pujus Gómer ataktu ejapjuk tsawanji jegajim nuwauchin uchigmakui. Nunikmatai Apajuí Oseasan chichajak:

“Israel nugkanmaya aidaunak ataktuk wait anenjashtatjai, tuja nuigtush ditá pegkegchaujinash tsagkujashtatjai. Dutikatin asantai, uchi nuwauch akiina nuna daajig Lo-ruhama\* adaikattame.

<sup>7</sup> “Untsu Judá wegantu aina nunak wi, apu Tuke Pujunuk, wait anenjattajai. Tujash wika ditanak suntagjai ijunjanuk, nagki, puyag, flecha, caballo, aidaun yajuakan maaniankesh ayamjukchagatjai ima wiki ayamjukagatjai”, tiuwai.

<sup>8</sup> Tuja Gómer niina nawanji Lo-ruhama aajakua nuna amuntsuamun atsujuk pujus, ataktu ejapjuk uchi aishmagkun uchigmakui.

<sup>9</sup> Nunikmatai Tuke Pujuu Oseasan chichajak:

“Anú uchik Lo-amí,† adaikattame, wagki atumek mina aentsug ainatsjume, wishakam atumi Apajuigmichuitjai.

<sup>10</sup> “Tujash Israel aents aidaun shiig kuashat yujagak, nayantsa kamatkaji dekapamainchauwa iman wajasagtinai. Nunú tsawantinig Apajuik ataktu chichaakug: ‘Atumek mina aentsjuchu ainagme’, tichatnai. Ayatak dekas:

‘Atumek Apajuí tuke pujuuwa nuna uchiji ainagme’, titinai.

<sup>11</sup> Tusa tima Judá wegantu aidau Israel aents aidaujai ijunag dita apujin ima makichik adaikagtinai. Dutikawagmatai tikich nugkanum achija yajuakbau batsatushkam waketug kaunawagtinai.

\* 1:6 “Lo-ruhama” tawa nunak hebreo chichamnumak “wait anenjabshbau” taku tawai. † 1:9 “Lo-amí” tawa nunak hebreo chichamnumak “mina aentsjuchui” taku tiuwai.

Duwi nagkamas Jezreel nugkanmak  
shiiḡ aneasa pujamu atinai”, tiuwai.

## 2

1 Nunik atumi yatsum aidau waketug kaunawagmatai  
atum chichagkujum:

“Apajuin aentsji aidau” titinaitjume.

Untsu nuwa aidau chichagkujum:

“Wait anenjamu aidau” titinaitjume.

*Israel aents aidau Apajuin umigkachagbau*

2 Nuigtu Apajuin chichaak:

“iWika Israel aents aidaunak  
nuwa nuwatkamua numamtin anentiajai,  
tujash ima minakek umigtukchau ainawai.

Nuadui wika yamaik pachikchagtajai.  
iAtum dita uchiji aidauntijum apu chichaman  
epegkin aidaunum chicham egketuatajum.

Niiḡ yamaik mina duwagchauwai,  
tuja wishakam niina aishichuitjai!

Untsu wainak nuwa akika dutiktaijai betek waja puja nuna idaisati!

iNiina pakiji aidaun shiiḡ anemtika pujutsuk idaisati!

3 Nuna nuniachkuig, jaanchjin awitkan

nii yama akiinak wisu akiinauwa nunin awajsattajai.

iDutikan uwejush nugka buku takasa pujumainchau awajsattajai!

Dutika ai kitakai jinattawai.

4 Tuja niina uchiji aina duka mina uchigchau ainawai,  
nunak nii pegkegchaun takamak wekagas uchigmaju asamtai,  
wika ditanak wait anenjachtatjai.

5 Israel aents aidauk nuwa akika dutiktai  
datsantainkachua nunin ainawai.

Nunin asag chichainak:

‘Mina pakig aidaun egaktajai,  
wi atsumamu aidaunak dita:

yujumkan, yumin, jaanch lana najanamun,  
lino najanamun, aceiten, vinon, kugkuin aidaun  
aatus sujuinak wi wakegamun umigtin ainawai’,  
tuinawai.

6 Tuidau asagmatai, jiinki yujasag pakijin igkugkainum tusan,  
jintanak jagki awajsattajai.

7 Dutika ai, dita pakijin igkugtag tuinakush  
igkugchagtatui, tuja nuigtush wainkachagtatui.

Nuninak: ‘Yama nagkamchakun aishinauwaitag nujai  
ima shiiḡ pujuyajai, dekas niyai wakitkitjai’, titinai.

8 “Tuja wika niina kuitamu asan,  
nii yuwatnunak, nii atsumamujinash  
ashí suwaitag nunak niḡ anentaimas diyatsui.

Wika niinak oronash, platanash suwaitjai.

Dutika aish nuna yajuak nii ememattin aidaun  
dakumag najanauwai.

9 Nunin asamtai, wi nii yuatnun trigon, vinon,  
tuja nii asepaktinun lana, lino najanamun aidaun  
susauwaitag nunak imatiksasuk ashí atanjattajai,

10 dutikakun niina pakiji aidau emtin wisu awikan inatsagtatjai.

iNuna dutikai niina ayamjumainuk makichkish atsuttawai!

11 Tuja maki makichik semanatin,  
maki makichik nantutin,  
maki makichik mijantin jiiistamtaya nunak  
jiiistamashti titatjai.

Nuadui nuna jiiistamak dakujinuwe nunak  
ataktuk nunikchattawai.

12 Higo ajakbau ayá nuna, uva ajakbau ayá nujai pachis:  
 Juka mina pakiig aidau sujusbau ainawai  
 tusa emema puja nunak unuptuktatjai,  
 dutika ai ikamia kuntin aidau ashí amutkatnai.  
 13 Tuja dakumkamu aidaun emematak incienson apejakui,  
 nuigtush mina kajimatjuki,  
 niina pakijin pataetak  
 patakumtain patakuma,  
 nugkuntain nugku nugkus iwagmamag weawai.  
 Nuni wekagu asamtai wi suwimkan susattajai.  
 Witjai Tuke Pujuun, nunak dekas tajai.”

*Apajuik niina aentsji Israel aents aidaunak aneawai*

14 “Aatus mina aentsug pegkegchaunum wekaekuish,  
 wi jukin uwegshunum emattajai,  
 dutikan ataktu mina anenti tusan  
 shiig kuitamkattajai.  
 15 Dutika unuinakan,  
 niina nugken uva ajakbau ayá nunak  
 imatiskanuk awagtuktatjai.  
 Tuja muja Acoran pakaji pegkegchauwa nunak  
 pegkeg awajsattajai,  
 dutika ai nuwiyán yuwa pujustinaí.  
 Nuniak ataktu nagkama  
 yama nagkamchak aya iman atatui,  
 nuniak egiptunmaya jiinki shiig aneeya  
 imanun anentaimtatui.  
 16-17 Nuadui ataktu awagkig:  
 ‘Baaldauwaitjai’ tichatnai,  
 dekas: ‘Wika aminuitjai’, tujuttinaí.  
 Ataktu awagkig wainka apajuímtai aidaun daajinak  
 adaikashatin ati tusan idaimitkastatjai.  
 Witjai Tuke Pujuu Israel aents aidaun Apajuíjinuk.  
 Nunak dekas uminkatnun tajai.

18 “Nunú tsawan jegamtaig,  
 mina aentsug aidauk shiig agkan maaniamu atsaunum batsamsatnume tusan kuitamk-  
 agtatjai.  
 Tuja kuntin aidau ditan waitkamainush atsunai.

19 “Israelah, wika aminak waji nuwaitkuish  
 ataktu nuwatkatagme,  
 ajumaish amek tuke mina duwag atinaitme.  
 Wika aminak shiig senchi aneajame,  
 nuadui amek dekas mina shiig duwag  
 wi chicham umikbaunum nuwenin aina  
 nujai betek nuwatkamun atatme.

20 Wika aminak mina duwajun kuitamainaitag  
 imatiskan kuitamkattagme,  
 dutikakun ima aminak anettagme,  
 nunú diisam, dekas juwapita mina apujuk tujuttinaitme.

21 Israel aents aidauwah, nunú tsawan atina duwí  
 wi yumin yutumtijatnaitjai,  
 22 dutika ai, trigo, aceite, vino aatus shiig kuashat aitnai.  
 Aatus Jezreel nugka duka shiig pegkeg  
 ajak tsapau wajastinaí.

Witjai Tuke Pujuu Israel aents aidaun Apajuíjinuk.  
 Juna taja nunak dekaskenum tajai.

23 Mina aentsug aidaunak Israel nugkanum  
 ima midauk agtinun batsastinaitjai.  
 Dutikan chichagkun:  
 ‘Atumek mina aentsjuchu ayugme,

tujash yamaik mina aentsug ainagme', titinaitjai.  
Untsu dita chichagtuinak:  
'iAmetme iina Apajuújig!' tujutiagtinaí."

### 3

*Oseasa nuwe ekagbau aajakua nujai pachisa augmattsamu*

<sup>1</sup> Tuke Pujuu ataktu chichagtak:  
"Oseasah, amina nuwemek wainak takamin asa,  
amina kumpagmijai pakijina pujawai.  
Nunin aigkish kajegtsuk ataktu aneeta.  
Tuja Israel aents aidaushkam dakumka najanamu aidaun ataktu waketjukiag emema-  
tuinak  
anentag torta susamu aidaun yuu batsatui.  
Nunin ainaig wika ditanak anejai", tujutmayi.

<sup>2</sup> Tusa tujutmatai, mina duwajun awagkitasan niina pakijin quince kuichik plata najanamun akikmajjai, dutikan nuigtu cebadan trescientos treinta kilo susabijai.

<sup>3</sup> Dutikan mina duwajun chichagkun:

"Yamaik mina duwag wajasu asam,  
pegkegchau takamtsuk pujusta.  
Nuniakminig wishakam pegkegchaunak takamjuschattagme.  
Untsu ujumak tsawan tsanigkaik kanagchattaji", tibajjai.

<sup>4</sup> Numamtuk Israel aents aidauk kuashat tsawan apugtuchu batsamsagtinaí, tuja Apajuínash anenjakesh susachagtinaí, Apajuísh ditanash wajina dutikatnume tusag wakegawa nunakesh dekachagtinaí, tuja sacerdote aidaush atsutnai, dita jenish dakumka najanamu emematmainuk makichkish atsutnai.

<sup>5</sup> Nunú nagkaemakmatai Israel aents aidauk awake anentaimjag Tuke Pujuuwai ataktu waketjagtinaí. Nunikag nunú tsawan umintai, ataktu Tuke Pujun eme anentus umijuinak, nii yaimpakti tusag segagtinaí. Nuninak dita apuji Davitan ataktu egakagtinaí.

### 4

*Apajuí Israel aents aidaun utugchatan apujtusbau*

<sup>1</sup> Israel aents aidauwah, Tuke Pujuu chichaa nunú antuktajum.

"Juju nugkanmayag waitjutsuk chichauk atsawai,  
tikichjaish aneeninatsui.

Tuja minashkam iina Apajuújiyapi tujutuínatsui.  
Nuadui juju nugka juwi batsamin aidaunak  
Apajuí chichaman umigkae.

<sup>2</sup> Juju nugka juwig ayatak waitjamu,  
umikchatnaitak Apajuí daaji adaisa tsanumat,  
magkagtut, kasamat, nuwennush, aishinnush  
antugdayas batsamtsuk ikagdaibau,  
aju ajumag magkagtamu aina duke piyak awai.

<sup>3</sup> Iman wajas au asantai, aents aidauk buutuínawai,  
nuninak kakaagchamin dekapenawai,  
tuja kuntin ikamia aidaush, chigki aidaush,  
namak nayantsanmaya aidaush ashí jinuinawai."

*Sacerdote aidau  
suwimkan jukiagtatui tusa  
Tuke Pujuu tiuwai*

<sup>4</sup> Tuke Pujuu chichaak:  
"iSacerdote aidauk makichkikesh  
tikich aidaunak jiyachati!

Tuja utugchatnakesh apujtuschati.  
Wika atum sacerdote aidautigminak kajejajime.

<sup>5</sup> Atumek tsawaish kashish,  
tuke pegkegchau takamjume,  
nuniakjum tikich profeta aidaush,

pegkegchau takamtikagme.

Nunin asagmin amina aentsjum aidaunak ijinattajai.

<sup>6</sup> Mina aentsug aidauk dita Apajuíjichua nunin anenjuidau asagmatai ijinauwaitjai.

Untsu amek sacerdote mina umigtukchau asamin,

wi aminak ajapattagme,

wagki amek mina chichameg umikchaume,

nuadui atum wegantu aidaunashkam pachikchatnaitjai.

<sup>7</sup> Kuashat sacerdote kawenakug,

imanisag pegkegchaun takainak mina shiwagmatiagmayi.

Nuadui eme anentam aina nunak,

dushiktai awajsagtatjai.

<sup>8</sup> Tuja mina aentsug aidau

dita tudaujin tsagkugnajagtatus

kuntinun ikaunmagtai Sacerdote aidauk nuna yusa batsatu asag,

puyatjutsuk pegkegchaun takastinme tusag idayinawai.

<sup>9</sup> Nunin asagmatai, ditanak mina aentsug aidaujai ijumjan

suwimkan susagtatjai.

<sup>10</sup> Mina umigtutan idaisaju asag

imanik yuwinakush shiig aneasag pujuschagtinai.

Tuja uchi akiami tusag tuinakush

uchinash akiachagtinai”, tawai.

*Wainka apajuímtai aidaun*

*Israel aents aidau*

*emematiagbau*

<sup>11</sup> Nuigtushkam Apajuí chichaak:

“Israel aents aidauk nuwan yujajuinak,

vino nampe yujau asag, shiig anentainja

pujumainjig atsujuinawai.

<sup>12</sup> Nunin asag numi dakumka najanamu aidaun wajinjutpatig,

tuja atakea duish wajukatnukitji tusag

nuna jegantun iini yujawai.

Pakijintanak idaimainchau dekapedau asag,

mina aentsug aidauk nuna yujajuinak

mina umigtutan tapanjugag wagakag wainak yujawai.

<sup>13</sup> Nugka nainnum wakag imanui numi ayaunum

nuna wakentin bikintunum,

kuntinu maa apenak, kugkuin incienzon apenak

dita apajuímtaijin emematuinawai.

¡Dita nawanji aidauk tuja dita uchijin nuwe aidaushkam

nuwa akika dutiktai aina nujai betek ainawai!

<sup>14</sup> Nunik pegkegchaun takamainakuish,

wika ditanak suwimkanak susashtatjai,

wagki atumshakam nuwa wainka apajuímtai

aidaun apajuímin aina nuninjai tsanijinjume.

Aents shiig anentaimesa pujutan mekgaga

duka tuke beseak nuninawai.

<sup>15</sup> Israel aents aidauwah, atum aidautijum,

wainka apajuímtai yujagjuminish,

Judá wegantu aidauk atum pegkegchau takajum nunak takaschagtatui.

¡Guilgalnum, tuja Bet-avénnumshakam

dakumka najanamu ememattai aina duka emematigpa!

¡Nuigtush Tuke Pujuu daajin umiktatjai tusagmek

tuu yujaigpajum!

<sup>16</sup> Israel aents aidauk antakchau intimkiu,

burro nuwa unuinakchamujai betek ainawai.

Nunin aina nunash itugsag Tuke Pujuu

uwig tsakatuch chijichi pegkeg samekbau ayamunum

kuitamaina ¿imatiksash kuitamkati?

<sup>17</sup> Israel aents aidauwah,

wainka apajuímtai aidau ememattasajum wakegakjume

emematu yujatajum.

¿Atumek datsaamtak wakegajum,  
atsa shiig anentam atak wakegajum?

<sup>18</sup> ¡Nampenakug nuwa akika dutiktai aina nuna yujajuinawai!

Pegkeg takatnak dakituinak,  
pegkegchau datsanmainun yujajuinawai.

<sup>19</sup> Wainka apajuímtai aina nuninun  
emematu yujaidau asag,  
dase chijichi kagakun umpui ajapama numamtuk  
ajapeam agtatui”, tiuwai.

## 5

*Israel aents aidau suwimkan jukiagtin etsegkamu*

<sup>1-2</sup> ¡Sacerdote aidauwah, antugtuktajum!

¡Israel aents aidauwah, antugtuktajum!

Apu patayi aidauwah, shiig antuktajum.

Atum aidautijum mina aentsug aidau tsanuakjum,  
wainka apajuímtai aidau ememattajum tusajum  
dita dakituinaig, waitkasjum muja Tabornum, Mizpanum  
awekasjum, Sitima pakajin yumigmat taimu  
ukumkimujai betek awajsauwaitjum duwi  
suwimkan amastatjime.

<sup>3</sup> Efraín wegantu aidauwah,

Israel aents aidauwah,  
wika atum wajuku ainagme nunak shiig dekajai.  
Atumek nuwa akika dutiktajai betek ainagme.

<sup>4</sup> Nuadui ataktu Apajuí umigkatag tajuminish, atumi pegkegchau takataijum aina nunú  
nunimainchau etamainawai.

Wainka apajuímtai aidau emematuidau asajum  
minak iina Apajujiyapi tujuttsugme.

<sup>5</sup> Atumek pegkegchau, emebau ainagme,  
nunin asajum ijina utsam atatjume.

¡Judá wegantu aidaushkam dutiksaik ijinam agtatui!

<sup>6</sup> Tuke Pujuu tsagkugtamjati anentag susami tusag,  
uwig aidaun, baka aidaun yajuak shimiagtinai,  
nuninakush Apajuí idaisamu asag, niinak wainkachagtinai.

<sup>7</sup> Ditak Tuke Pujuunak umigchau ainawai,  
dita uchiji aina duka mina uchigchau ainawai.

Ima Apajuínak umigchau aina duwi  
dita nugkenak ditajai ijumag makichik nantuik  
tsaika emegkam agtatui.

*Israel aents aidau Judá wegantu aidaujai suwimkan jukiagtin*

<sup>8</sup> ¡Kachu Guibeánum umpuagtajum,

untsu uwija kachuji Ramónum umpuagtajum!

¡Adeagtinme tusa umputai Bet-avénum umpuagtajum!

¡Benjamín wegantu aidau ujaktajum aneaku pujustinme!

<sup>9</sup> Israel aents aidaun suwimkan susattajai tiuwaitag  
duka imanisag uminkattawai tusan etsegjai.

Nuna dutika ai, Efraín wegantu aidaun nugkeg  
yaakat aidaujai tsaigkam bashiak asatnai.

<sup>10</sup> Judá wegantu aidaun apuji aidauk

aents ajantsuk tikichi nugken kasajin aina

nujai betek asag Israel aents aidau nugken atantuinawai.

Nunin asagmatai wi kajekbaujui ditanak suwimkan susagtatjai.

<sup>11</sup> Israel aents aidauk wainka apajuímtai aina nuninun

apajuíma yujau asagmatai,  
tepejus chichajuinak ajantusash diitsuk  
dushiki batsamtuinawai.

<sup>12</sup> Nuadui Israel aents aidaunak,  
Judá wegantu aidaujai ijinattajai.

Mamuk numin amuwama numamtuk ashí amuktatjai.

<sup>13</sup> Tuja Israel aents aidauk, Judá wegantu aidaujai dita kuashat pegkegchau takamsamujin mai suwimka jukiag waituinak, asirianmaya apu yaimpakti tusag shimutkagtinaí, tujash niig makichkish yaigchatnai.

<sup>14</sup> Israel aents aidaunak, Judá wegantujai leónjai betek jetektatjai, dutikan wiki achikan asaajan ukuktatjai, nuna dutikai ditan ayamjumainuk makichkish atsuttawai.

<sup>15</sup> Dutikan ujumak tsawan pachitsuk idaisan dakastinaítjai awake anentaimjatnume tusan, dutika ai, dita pegkegchau takamsamujin anentaimtusag buu buuttajai egatkagtinaí, tawai Apajuí tiuwai, Oseas.

## 6

*Israel aents aidau pegkegchaun taka batsatu awake anentaimjag dekas Apajuí umigkagmi tiagbau*

<sup>1</sup> Nuna antukag Israel aents aidau chichainak: “Kaunatajum ataktu wakitki Tuke Pujuu umigkagmi, nii kajegtamak suwimkan amasu akush, nigki wait anenjamag tsagkugtamtattawai.

<sup>2</sup> Jakaujai betek batsatag nunak jimag tsawan asa, nuniachkush kampatum tsawan asa, inantamkintai niijai ijutkau atatji.

<sup>3</sup> ¡Tuke Pujuu umigtanum kakanmamsagmi! Imaniajinig etsa kashi kashinig jiina numamtuk, tuja numi yagkujutnum yumi yutak nugka uchupiamana imanisa iina yaimpaktatus tajutjamattawai”, tuidau.

*Apajuí Israel aents aidaun aikbau*

<sup>4</sup> Tusa tiagtai Apajuí ditan ayaak:

“Israel aents aidauwah, Judá wegantu aidauwah, ¿itugkainjimki atumnash?

Atum mina aneagme tujutjum duka yujagkim kashi kakegak, tuja jegashik kashi kakekau, tsawak kashikmas megkagama numamtuk atumi anenkeg megkaewai.

<sup>5</sup> Nuadui, wi mina profetag aidaun akatja ishiaka ai, yujasag dita mina chichamjun etsejuinamu chaajip iyaak tsaimaina imatijamawaje, wi shiig takamua duka jii keeka tsaaptin emaama imanai.

<sup>6</sup> Atum mina anentag sujajum nunak wika dakitajai, tuja mina emematjakjum kuintin maajum nuna neje ashí apeajum nunashkam dakitajai.

Wika ayatak mina anentinme, nuninak: ¡Ametme iina Apajuíjimek! tujuttinme tusan wakegajai.

<sup>7</sup> Tujash mina aentsug aidautigmek, Adágjai betek antakchau intimkiu ainagme, nuadui chicham umiktinun wi amasuitag nunú umikchaugme.

<sup>8</sup> Yaakat Galaadnumak ayatak pegkegchau aidauk magkagtin aidaujai batsatui.

<sup>9</sup> Sacerdote aidauk jinta Siquemnum wetaya nuwi kasajai betek uuma yujawai, aents nuni wedaun mainak wajijin atankiagtatus.

<sup>10</sup> Tuja Israel aents aidauk nuna nagkaesau pegkegchau

Apajuín umigchau intimkiu aidaun wainkajai.

<sup>11</sup> Tuja Judá wegantu aidautigmeshkam  
pegkegmauchik ainatsjume,  
nuadui atumshakam suwimak jukittagme.

“Nunú ashí nagkaemagmatai,  
mina aentsug aidaunak  
dita nugken waketjati titinaitjai.”

## 11

*Apajuik niina aentsjig intimkiu ainaig aneawai*

<sup>1</sup> “Israel aents aidaunak tsakatuch ainaig nagkamsan aneen ayajai,  
wi ditanak mina uchig asagmatai,  
Egipto nugkanum batsatun jiiujitjai.

<sup>2</sup> Dutikamaitak mina umigtutan dakituinak  
nuni senchi tupanjuyanume,  
nuninak wainka apajuímtai aidaun emematuinak  
kuntinun maa apeenak,  
kugkuin incienonashkam apeeyanume.

<sup>3-4</sup> Nunin ainaig wi ditan aneau asan  
uchijai betek jukin egkesan emayajai,  
dutikakun wekaetanash jintintuawabiajai,  
yutainash ayujiajai, utugchatnumash yaigkabiajai.  
Imatika kuitamaitak, Apajuíyap kuitamjamua  
tichau ainawai.

<sup>5</sup> Nunidau asag mina umigtutnak dakitjau ainawai.  
Nuadui egiptunmaya aents aidaun inainak  
waitkajaku aina nunak, yamaik asirianmaya  
ditanak inainak waitkasagtatui.

<sup>6</sup> Dita yaaktaji aidaunak tsaigkagtinai,  
dutikainak aents aidaunashkam ijinawagtinai,  
nuna dutikainak dita anentaimjamujinak ashí idaimitkasagtinai.

<sup>7</sup> Mina aentsug aidaun,  
wainka apajuímtai aidaun emematuinak  
mina umigtutnak dakituinawai.  
Nunidau asag mina idaitusag batsata  
nunisag batsamsatatus wakegainawai.  
Senchi unsumainawai,  
tujash makichkish ditan yayauk atsawai.

<sup>8</sup> “¡Israel aents aidauwah, wika atumi aneakun  
shúg senchi waitiajai,

nuadui wika kajimatkinuk idaimaitsujime!  
¡Wika Admánmaya aents aidaun,  
Seboímmunia aents aidaujui dita pegkegchaujin  
ijinauwaitag imatikanuk tikima ijinmaitsujime!

<sup>9</sup> Wika atumnak kajekbautkek suwimkanak amaschagtatjai,  
Tuja Efraín wegantu aidaunak ataktuk ijinashtinaitjai,  
wagki wika aentschawaitjai, wika Apajuíyaitjai.  
Witjai Tuke Pujuu pegkegmanuk,  
wika atumjai ijutkau pujajai,  
wika atumin ijinatasanuk tachmajai.”

## 13

*Apajuí Israel aents aidaun suwimkan susattawai tusa etsegkamu*

<sup>4</sup> Tuke Pujuu chichaak:

“Israel aents aidauwah,  
witjai apu atumi Apajuígminuk,  
atum Egipto nugkanum batsatutigmin wi jiiujitjim  
duwi nagkamsanuk yamaikish wika atumi Apajuíyiyaitjai.  
Witjai atumin uwentiknununuk.



<sup>5</sup> Uwejush yumi atsau nimpainnum batsabiujum duish  
wi atumnak kuitamkauwaitjime.

<sup>6</sup> Tujash atumek yutai kuashat ajutjamu asamtai,  
ememakjum mina kajimatjuki u ainagme.

<sup>7</sup> “Nuadui león kajeka kuntinun jetegama imatikattajime.  
Jintá yantam uumka tepesan ikamyawajai  
betek tepegkattajime.

<sup>8</sup> Chayú niina uchiji megkaetujam wainkatatus egak  
ishamain wajama imanika jiintukin detsepen ichinjattajai;  
dutikan nuwig leónjai betek amuktatjai.

<sup>9</sup> Israel aents aidautigmek wi kuitamkam batsamnaitjume,  
tujash yamaik wi ijinattajime,  
dutikawaipa tujutmainuk atsawai.

<sup>10</sup> Dusha atumi apujish ¿wajukame?

¿Wagka nunú untsuatsjume ayamkagtukta tusajum?

Tuja nuigtush tikich apu aidau adaitujata tusajum  
sumabiujum dusha ¿wajukawagmae?

<sup>11</sup> Imatkugmin atumin kajegkan apun adaitukbaijime.

Tuja yamaishkam nunisnuk atum kajemtijuku asagmin  
nunak atankittajime,  
dutikam apugtuchu juwaktatjume.

<sup>12</sup> “¡Atum pegkegchau takasbau aidaunak ashí papiinum agagai!

<sup>13</sup> Israel aents aidautigmek anentainkachu ainagme,  
nunin asajum uchi akiinatnuji jegau aig,

tutupit egkemsuk tunija egkemama nuninaitjume.

<sup>14</sup> Nunin ainayatkujum  
Apajuí uwemtijamjati tusajum dakagjume.

¡Wika atumnak jatanmak uwentikjashtatjime!

Nuadui: ‘¿Jaka megkaetaish tuwi awa?

¡Amina senchigmejai juwi taam  
juju aents aidau ijinata!’ tusan untsuajai.

<sup>15</sup> Yaja aneasjum chijichi tsupigbau ataktu pegkejan tsapaama numamtuk  
wajakainjuntaih, nuniakjuminish dase uwegshunmaya dasentak

entsa pukuni jininun buku emama numamtuk

wi ijinan emegkagtatjime.

Dutika ai atumi shiwaajum aidau

wajijum pegkeg akik aidaun yajutjamkagtinai.

<sup>16</sup> Samarianmaya aidauk Apajuín shiwagmawaju asag

suwimkan jukiagtatui.

Nuwi aents aidauk maaniamunum jinawagtatui,

uchi piipich aidaunak nugká ajiajag kajegkagtinai,

untsu nuwa ejamtin aidaunak

ejapeniag ijinawagtinai”, tawai.

## 14

*Oseas Israel aents aidaun pegkegchau takat idaikujum Apajuí umigkatajum tibau*

<sup>1-2</sup> Oseas Israel aents aidaun chichajak:

“Israel aents aidauwah,

atumi pegkegchaujum wagagtamkintai,

kakaumainchau wajasjum batsatjum nunú idaikujum

ataktu atumi Apajuíjum, Tuke Pujuuwai minitajum.

Nuniakum juju aatsajum Apajuí segatajum:

‘Apajuíjuh, amek pegkejaitme,

nuadui wait aneasam iina tudaujish tsagkugkagtugta,

dutikawamin ii ame emematku kantabauwa nunú

amina shiig awajtamkati.

<sup>3</sup> Asirianmaya aidauk carrogtin ainakush,

iinak ayamjutpamainchau ainawai,

nunin asamtai ataktu awagkik ii dakumka najanamu aidauk emematchattaji.  
 Bitaikshakam ima aminiyanak anenkanak wainainawai'  
 titajum", tiuwai.

<sup>4</sup> Tuke Pujuu Israel aents aidaun chichajak:

"Wi kajekbaugnak mijaakjai,  
 nuniku asan dita pegkegchau ainaigkish,  
 mina anenkajun iwaintukagtatai,  
 dutika ai nuigtuk intimkichagtatui.

<sup>5</sup> Israel aents aidaunmak wika jegashkijai betek atatjai.  
 Tuja dita aidauk Lirio yagkujuwama iman,  
 Libanonmaya setug shiig kagkopenag wajama  
 iman agtatui.

<sup>6</sup> Tuja kanaweshkam olivo kanawejai betek  
 kadaukdauju pegkegchou,  
 Libanonmaya setug pegkegchin kugkuwama  
 iman agtatui.

<sup>7</sup> Israel aents aidauk ataktu wi  
 kuitamkam batsamsagtinai;  
 dutikamu asa trigojai betek tsakajagtinai,  
 nuninak uva yagkujuwama imaniagtinai,  
 kugkuntishkam muja Libanonmaya vinon  
 kugkuntijai betek atinai.

<sup>8</sup> Tuja Efraim nugkanmaya aidau chichainak:  
 'Dakumka najanamu aina duka iik makichkish puyatjatsji', tiagtinai.  
 Witjai mina aentsug aidau segatuinakui antujunuk,  
 witjai mina aentsug aidaun kuitamunuk.  
 Wika pino pegkeg samekbau tuke kukachua imanaitjai,  
 minai pegkeg waji aidaunak jukiagtinai", tawai.

*Inagnaku etsegkamu*

<sup>9</sup> Aents yacha shiig anentaimkau akug,  
 juna chichaman antukti:  
 Tuke Pujuu dutikamu aina duka shiig pegkejai,  
 nuadui dita aidaun diisag tikich aidaush  
 pegkeg takata nunak takamain ainawai.  
 Tuja aents pegkegchau aina duka  
 pegkegchaunak takainawai,  
 nuadui Apajui ditanak suwimkan suwawai.

## Joel

### *Manchi ajakan amukbau*

<sup>1</sup> Joel Petuelan uchiji aajakua nuna Apajuí Israel aents aidaun ujakti tusa akateak aatus tiuwai:

<sup>2-4</sup> Atum chichaman jintinkagtin múun aidautigum  
juju shiig antuktajum,  
tuja ashí aents aidautigmeshkam antuktajum.  
¡Ipak usumta imajin manchi maki makichik niimtin  
aidau kakegak iina ajake aidaunak  
tikich manchi aidau amuak ukubaun ashí amutjamkaji!  
Tuja çatumesh wajutiya junin wantinush wainkauwaitjume?  
Yaunchuk atumi muunjum aidau  
batsamajaku aina duka makichkish  
junin wantinunak wainkachu ainawai.

¡Nuadui atumi uchijum aidau nunú pachisjum ujaktajum,  
tuja dita ujaktinme dita uchiji aidaun,  
nuna uchiji aidau ujaktinme dita uchiji aidaun!

<sup>5</sup> ¡Nampen aidauwah, nantagtajum,  
vino umin aidautigmek buuttajum,  
atum vino umumainuk atsuttawai!

<sup>6</sup> Manchi shiig kuashat,  
suntag maaniatatus shimaujui betek  
iina nugkeen untsaantugmae.  
Nuna nai aidauk shiig empek asag,  
león kajenun naíya iman ainawai.

<sup>7</sup> Iman asag uva ajakbau aidaunak higo ajakbau aidaujui ashí tsupije.  
Imatikau asa kanawe aidaunak ashí pakajug saeptuchu emake.

<sup>8</sup> Imatikau asamtai, nuwa nii aishinatag tibau jakamtai,  
wake besemag pujaku nugkutain nugkuja  
buutama imanikag,  
aents aidauk makichkish etsagmainchau buutuinak  
jakamunum nugkutain nugkuinawai.

<sup>9</sup> Tuja Apajuí anentag suwaku vino, trigo,  
cebada ejemainuk atsutai,  
jega Apajuí emematku ijuntainmag  
ejegainachu asamtai, sacerdote aidaushkam buutuinawai.

<sup>10</sup> Ajanum ajak ayauk kagaka asae,  
imaniku asamtai trigok, vinok, aceitek makichkish atsawai.  
Tuja nuggak uwejush tutuptina nunin  
wake besemag wajas asae.

<sup>11</sup> Atum ajanum takau aidautigmek,  
uva ajakbaunum takau aidautigmek,  
wake besemag dekapeakjum buuttajum.  
Atumek trigo cebadajai ashí jinaamtai,  
shiig wainka juwakugme.

<sup>12</sup> Uva aidau, higo aidau, munchi aidau, palmera aidau,  
manzana aidau, tikich numi aidau aatus  
ashí jinaamtai, aents aidauk buutuinawai.  
Nunin shiig aneamunak idayinak  
wake besemag batsatui.

<sup>13</sup> Vino, trigo, cebada aina duka atsau asamtai,  
aents aidauk Apajuínak anentag ejetuinsui.  
Nuadui Apajuí emematku ijuntainmak makichkish atsawai.  
Nunú diisjum atum sacerdote Apajuí altarjin  
takau aidautigmek wake besemag pujaku nugkutai

jáanch nugkugjum kashi buu buutkawajum tsawaitajum.

<sup>14</sup> Nuniakjum Apajui emematku ijuntainum  
apu múun aidau ashí Israel aents aidaujai ijumjatajum.  
Dutikajum, ijagma pujusjum Apajui ausatajum.

<sup>15</sup> ¡Apajui taatnuk namput wajaschae!  
¡Tsawan ishamain atina duka ashí jegawai!  
¡Pegkegchau takat idaiku Apajui umigtsujinig,  
Apajui ashí senchigtina nunú  
suwimak ishamainun amastatui!

<sup>16</sup> Ii yuwatin agmaya nunak manchi aidau  
iish wainjinig dukeen amutuk ijinae.  
Nuadui Apajui emematku ijuntainum  
shiig aneasa takau ayag duka nunimainchau wajasji.

<sup>17</sup> Trigo ajakbau aidauk, yumi yutushtai ashí jinae,  
nuadui juuka yumain shiig atsau asantai,  
trigo chimpitai aidauk  
wainak batsamas mamuka utsanui.  
<sup>18</sup> ¡Iina bakaji aidauk buutuinawai!  
¡Uwig aidaushkam buutuinawai!  
¡Tagku aidauk yumainji chijichi atsutai,  
nujantai jinuinawai!

<sup>19</sup> Tuja jii kegak dupa aidaunak, numi aidaunashkam apea ijinae.

¡Apajuijuh, wait aneasam yaijatkata!  
<sup>20</sup> Entsa aidauk kuyuka buku waigke,  
tuja jii kegak dupanak ashí ijinae.  
¡Imanikmatai kuntin ikamia aidaushkam  
Apajui yaimpakti tusag ima aminak segapainawai!

## 2

<sup>1</sup> ¡Jerusalégnum uwija kachuji umpuagtajum!  
¡Adeagtinme tusa umputai Tuke Pujuu emematku  
ijuntainum umpuagtajum!  
Nuna antuinak ashí aents aidau  
Judá nugken batsamin aidauk sapigmmainak kujaitnume,  
wagki Tuke Pujuu taatin tsawan ashí jegae.  
<sup>2</sup> Nunú tsawanta duka suwe atinai,  
nunú tsawantinig yujagkim suwe wajastinai.

Suntag aidau shiig kuashat depetmainchau  
muja aidaunum shiyaktatui,  
nunikag etsa kashikmas yama jiiinak etsantug,  
ashí mujan patamtuwama numamtuk  
ashí nugkan pampankattawai.  
Duka yaunchkesh imanuk wainkachbauwai,  
tuja atakea duish imanuk wainnakchatnai.  
<sup>3</sup> Nunú iman aina duka jii kegaujai betek asa,  
nii juwi taatatus minakug ashí apea nagkaemawai.  
Nunú tatsaigkik nuggak shiig pegkeg ayi,  
nunú taamtai nagkamas nuggak uwegshujai betek wajase.  
¡Nuna uwemtumainuk makichkish atsawai!

<sup>4</sup> Nunú manchi aina duka  
aents caballonum maanitan yacha aidau  
maaniamunum jetejatmaina imanik utsantawai.

<sup>5</sup> Ikam utsaana tsekeamuji antamak  
carro maanитай shimak wajukama imatui,  
duka kagaku apeam tsachigtuwama imatui,  
suntag shiig kuashat ijunag uminas  
shiwaajin jetektatus ijunama imanai.

<sup>6-9</sup> Nunú manchi aina duka kasajai betek  
jeganum wakag niimtai ujaimua nuni utsanui.

Suntag aidaujui betek yaakat peejamunash  
tujintsuk pachiaichbaunum yaaktan utsantawai.  
Nunidau asag dita shimamunak nunisag  
makichkish tunitsuk, shitanitnash shitanitsuk,  
ukunmakesh wakettsuk shimutui.  
Tuja akentai aidaun shiig kuashat aketmash  
ditak nunisag shimawai.  
Imanik manchi minidaun wainkag  
aents aidauk senchi ishamainak yapinig puju wajasag kujainawai.

<sup>10</sup> Tuja nuggak nayaimpijai senchi uujui,  
nunitai etsa, nantu kajinag suwe wajase.

Tuja yaya aidaushkam etsantainatsui.

<sup>11</sup> Tuke Pujuu niina suntaji aidaujui minak  
chichamujig ipamtajai betek wajawai,  
Tuke Pujuu suntajig senchigtin ainawai,  
Tuke Pujuu tabaun umin aidauk  
shiig kuashat dekapamainchau ainawai.  
¡Tsawan Apajuí minamuk ishamain atatu!  
¡Imanun atsaneg pujumainuk makichkish atsawai!

*Tuke Pujuu niina aentsji aidaun wait anentamu*

<sup>12</sup> Tujash Tuke Pujuu yamai juna aatus tawai:

“Atum pegkegchau takajum duka  
idaisajum atumi anentaimijai umigtuktajum,  
nuniakjum ijagma pujusjum buutkujum Apajuí ausatajum.

<sup>13</sup> ¡Pegkegchau takatak idaikujum  
mina umigtuktajum!

Wake besemag dekapeakjum,  
jáanchjum japiki ichí yujatsuk  
atumek pempeentumakjum kajegmankatajum,  
nuniakjum dekas dewakjapi tumamtajum.  
Wika kakagchauch wait anenkagtinaitjai.  
Wika wamak kajeचितjai, nuadui wika  
tsagkugkagtugtasan pujajai.

<sup>14</sup> Nuniagminish nii suwimkan amastag tiu akush tsagkugtamag  
trigon, vinon nii anentag susatnun shiig kuashat amaschajaintash.

<sup>15-16</sup> “¡Jerusalégnum uwija kachuji umpuagtajum!

¡Ashí aents aidau ijumjatajum!

¡Múuntuch aidau, uchi aidau,

uchi muntsu muntsuaku aidaushkam,  
tuja yama nuwedau aidaushkam jegá batsataidauk ashí kaunatnume!

Nunikagmatai ijagma pujusjum pegkegchau takat  
idaisajum umintsatajum Apajuí ememattasajum.

<sup>17</sup> Sacerdote aidaushkam kaunatnume,  
nunikag altarnum jeganta wajasag  
buutuinaak aatus Apajuín segatnume:

“¡Tuke Pujuuwah,  
amina aentsjum aidau tsagkujata,  
makichik aentskesh ditan dushijati tusamek idaisaipa!  
¡Tuja tikich aents aidau depetkatnume tusamesh idaisaipa!  
Aents tudau aidau tuke aneasag inimpainak:  
‘¿Atumi Apajuíjish wajukame?’ tusag dushiki  
batsamtinme tusamek idaisaipa”, tiuwai.

<sup>18-19</sup> Tusa imatjumin Apajuí juju nugka juna aneau asa,  
wait anenjamag chichagtamak:

“Juju shiig antuktajum:

Trigon, vinon, aceiten shiig kuashat amastatjime,

dutikamtai nunú yuwakjum  
 shiig aneasjum pujustatjume.  
 Ataktu awagkinuk tikich aents aidau  
 dushiktai atinme tusanuk idaisashtatjime.  
<sup>20-21</sup> Nujinmaya aidau manchijai betek  
 atumin ajaantugmatsuk jetepakaja nunak  
 uwegshunum utsagtatjai.  
 Untsu igku jetepaktata nunak,  
 nayants jakau tutaya nuwi utsaan ijinattajai.  
 Tuja ukuunum jetepaktata nunak  
 nayants mediterraneonum utsaan ijinattajai.  
 ¡Dutika ai nunú kauja senchi mejettawai!

“Mina aentsug juju nugkanum batsatutigmek  
 ishamkagtukaigpa, ayatak shiig aneastajum,  
 Tuke Pujuu atumin ayamjutpak, yaunchkesh  
 wainkachbau aidau iwainaktatui.  
<sup>22</sup> Kuntin ikamia aidautigmek,  
 ¡ishamkagtukaigpajum!  
 ¡Ataktu chijichi tsapaktatui!  
 Numi aidaushkam kuashat nejeagtatui,  
 tuja uva aidaush, higo aidaush shiig kuashat aittawai.  
<sup>23</sup> ¡Atum Jerusalégnunia aidautigmek  
 shiig aneasjum Tuke Pujuu atumi Apajuujum emematkujum  
 kuntin maajum apeatajum!  
 Apajuí yaunchuk yumin yutumtikjauwa dutiksag  
 yamaishkam yumi yutugtin jegamtai yutumtijattawai.  
 Niina anenken iwaintugmak yagkug yagkujut aig  
 yumi yutut tepeamtai yutuwana nujai betek yutumtijattawai.  
<sup>24</sup> Nuadui trigo, vino, aceite, shiig kuashat aittawai.

<sup>25</sup> “Atumi ajaji aidau manchi amukmatai,  
 tuja shiwag aidau tsaigtamkamtai, ajakjinchau  
 wajasujum nunak Apajuí yaunchuk aajakua imanuk awajtugmastatui.  
<sup>26-27</sup> Atumek shiig yuwajum pujusjum  
 Apajuí ememattinaitjume,  
 wagki nii atumin ayamjutpak  
 wainchatai ishain aidau kuashat iwainajui.  
 Nuadui niina aentsji aidauk wainka inatsamak yujashtinai.

“Witjai Israel aents aidau Apajuujinuk,  
 wika mina aentsug aidaujai pujajai.  
 Nuadui ima wiki dita Apajuujig atinaitjai.

*Apajuí Wakani taamu*

<sup>28</sup> Nunú uminkamtai,  
 mina Wakanjun ashí susagtinaitjai,  
 dutika ai nuwa aidau, aishmag aidau ashí mina pachitus etsejiagtinai.  
 Tuja múuntuch aidaujaig  
 kajanum chichatnaitjai,  
 untsu datsauch aidau nak pan wantintukan augtinaitjai.  
<sup>29</sup> Tuja nunú tsawantaik, inak nuwa aidau nash,  
 aishmag aidau nashkam mina Wakanjun susagtinaitjai.  
<sup>30</sup> Yaunchkesh wainkachbaun ishain aidau nayaimpinum iwainagtinaitjai,  
 dutikakun nugkanmashkam,  
 numpan, jin, senchi bukuitaun iwainagtinaitjai.  
<sup>31</sup> Etsag etsanjashtinai,  
 tuja nantushkam numpa iman wajastinai,  
 juka eke Tuke Pujuu ina apuji Apajuí minitin  
 tsawan ishain atina nunú jegatsaig nagkaemaktinai.  
<sup>32</sup> Imanitaish ima Tuke Pujunak kajitus umiujinak  
 segaidauk uwemjagtinai.

Tuke Pujuu anagkagtuauwa duka imanisasi  
muja Sión yaakat Jerusalégniuma uwemtak atinai,  
Apajuí etejamu aidauk jatsuk uwemjagtinai”, tawai.

### 3

*Apajuí aents aidau pegkegchajin diijus suwimkan susatin*

<sup>1</sup> Nunú tsawan jegakuig,

Judá wegantu aidau Jerusalégniuma aidaujai  
achija yajuakbau batsatunak awakjatnaitjai.

<sup>2-3</sup> Untsu aents tikich nugkanmaya aidauanak

Josafat nugka pakajin ashí ijumjatnaitjai,  
dutika ijumjan, dita mina aentsug Israel aents aidau  
achija yajuakag tikich nugkanum dapampaak  
emegkajag, dita nugke aidauashkam atanjag,  
dita uchiji, nawanji aidauash kuichkin juwinak,  
tikich nugkanum sujujag nunú kuichkia duwi  
vinon sumak umuinak nampenak,  
nuigtushkam nunú kuichkia duik  
nuwa akika dutiktai aidau yujaju asagmatai, suwimkan susagtinaitjai.

*Tuke Pujuu aents tikich nugkanmaya aidau pegkegchajin diijus suwimka susatin*

<sup>4</sup> Atum Tiro nugkanum, Sidón nugkanum, filisteo nugkanum batsamin aidautijum  
mina aentsug Israel aents aidau jeteajum dusha ¿wisha itugkamu asagma jeteajume?  
Atsa ¿iikmakmi tusagmek aikajum? Nunú atum eke jeteatsjuminig, wiyá atumnak  
suwimkan amasan ijinattajime.

<sup>5</sup> Atumek oro, plata, tuja ashí tikich waji pegkeg akik midau aidau yajuakjum, atumi  
apajuimtajum emematku ijuntai jegamkamunum ashí utsauwaitjume.

<sup>6</sup> Atum Tironmaya, Sidónnumia aidautijum Judá wegantu aidau Jerusalégniuma aents  
aidaujai achija yajuakjum, griego aidau inataiji atinme tusajum Grecia nugkanum  
sujujaitjume.

<sup>7</sup> Dutikam nuwi batsatun wi ditanak jiija yajuakan ikaunmattajai. Untsu atumnak  
mina aentsug waitkasuitjum dutiksanuk wishakam iikattajime.

<sup>8</sup> Dutikakun, atumi uchijum aidau, nawanjum aidaujai, Judá wegantu aidau  
sujutjattajime. Dutika ai dita yajuakag Sabá aents aidau num sujujagtinai. Witjai Tuke  
Pujuunuk, nunak dekas uminkatnun tajai.

<sup>9</sup> Juju chicham tikich aents aidau num etsegkatajum,  
dutikajum ;suntag maanitan yacha aidau ijunjajum  
shiiig umintsatajum!

¡Nunikjum Apajuín aentsji aidaujai maaniatajum!

<sup>10</sup> Atumi takatajum aidau maaniaku jukitin,  
nagki, puyagjai najankatajum.

Tuja aents sapig aina nunú, waji wajastinme.

<sup>11-12</sup> Ashí atum Judá wegantu aidau  
shiwaaji aidautijum

Josafat nugkanum wamak kaunajum ijunjatajum.

Tuja aents kakagchauch maanitan dakitin akush,  
maanitan yacha wajasag ashí ijunjatnume.

Nunikagmin ashí aents jutii aidauti nugken ijus  
batsamin aidauanak Tuke Pujuu suwimkan susattawai.

<sup>13</sup> Wagki nunú aents aidauk shiiig pegkegchau ainawai,  
nunin asagmatai,

trigo tsamaku tsupija juutiama numamtuk tsupigta;

tuja ajak juutak tsawantak uminkae,  
nuadui uva tsamakmatai juuka

vino najanatasa najatiama numamtuk awajkata.

¡Dita tudauji aidauk dekas shiiig múuntai!

<sup>14</sup> Tuke Pujuu taatin tsawan uminu asamtai,  
Josafat nugkanum aents aidau shiiig kuashat ijunjaje.

<sup>15</sup> Tuja nantuk etsajai mai kajinak suwe wajastatui.

Yaya aidauashkam etsanjachagtatui.

<sup>16</sup> Tuke Pujuu kajeka muja Siógniuma pujusa chichaak

ipamtajai betek wajatai, nuna antukag  
nugkak nayaimpijai uugtatui.  
Imanitaish Israel aents aidaunak  
Tuke Pujuu niina aentsji asagmatai kuitamkattawai.

*Judá wegantu aidauk atakea duish shiig batsamsagtin*

<sup>17</sup> Tuja Tuke Pujuu niina aentsji aidaun chichajak:

“Atumek nunú tsawan uminkui,  
mina pachittsajum dekas iina Apajujiyapi tujuttinaitjume.  
Wika muja Sión wi etegkamua nuwi pujajai.  
Jerusalégkak pegkejam mina aneetaijui,  
nuadui shiwag tikich nugkanmaya aidauk  
ataktu utuawajag makichkish dajagchagtinai.

<sup>18</sup> Apajuí shiwag aidaun suwimkan susa ijinamtai nagkamas,  
shiig kuashat uva ayau asamtai,  
vino najanamu aidauk shiig kuashat aittawai,  
tuja baka aidaushkam shiig kuashat ayau asamtai,  
nuna muntsuji ijugbauk shiig kuashat  
mujanmaya yumi betsaka akagama iman atinai.

Judá wegantu aidaun nugkenig yumi shiig kuashat aitnai.

Mina jegajuiya yumi pukuni jiinki  
Sitim nugka pakajin ashí ukattinai.

<sup>19</sup> Untsu Egipto nugkanmaya aidau,  
Edom nugkanmaya aidaujai  
Judá wegantu aidaun utugchatji atsaunak,  
tuke aneas jetekag dita nugkenig  
aents utugchatjinhaunak ijinawaju asagmatai,  
suwimkan susagtatjai.

Dutika ai, dita nugkega duka aents atsau  
bashiak pegkegchau wajas asattawai.

<sup>20</sup> Judá wegantu aidau jinawaja nunak wi iikmatkattajai.  
Nuna dutikau aidauk suwimkan jutsukek pujuschagtatui.

<sup>21</sup> Untsu Judá wegantu aidau nugkeg  
agkan bashiakag asashtinai,  
Jerusalégchakam agkantak aents atsauk achatnai.  
Tuja wika Jerusalégnun  
muja Sión wi etegkamua nuwi pujuttajai”, tawai.



## Amós

### *Apajuí kajekbau*

<sup>1</sup> Nugka uugbau atin jimag mijan ai, Ozías Judá wegantu aidaun apuji, tuja Jeroboam Joása uchiji Israel aents aidaun apuji aatus batsamajaku aina nunú tsawantin, Amós uwija kuitamin yaakat Tecoanmaya aajakua nuna Apajuí akatjauwai. Dutikam Israel aents aidaun ujakui.

<sup>2</sup> Nunak aatus tiuwai:

“Tuke Pujuu kajeka Jerusalén pujus chichataik, hijichi aidauk kagaka jinawai, tuja muja Carmelonum ajak pegkeg wegajushkam kagaka jinawai.”

*Ashí aents Apajuín umigchau aidau suwimkan jukiagtin pachisa etsegkamu*

<sup>3</sup> Tuke Pujuu chichaak:

“Damasconmaya aidauk ayatak tudauk ainawai. Iman asagmatai, makichkish tsagkujachagtatjai. Wagki ditak galaadnumia aents aidaun trigo dekegka tsaimaina imatikawajui.

<sup>4</sup> Nuadui jega apu Hazael

pujusa inamtaijiya nunak apejuattajai, dutika ai nunú kegak niina uchiji Ben-hadad pujusa inamtaijiya nunashkam apeattawai.

<sup>5</sup> Damasco waitijinak tegajattajai, dutika utuan, Bicat-avénkan apujin Bet-edénkan apujijai mai maattajai. Dutikamtai atum aidautigminak achigmajag Quir nugkanum yajupakagtatui”, tawai Tuke Pujuu.

<sup>6</sup> Nuigtu Tuke Pujuu chichaak:

“Gazanmaya aents aina duka ayatak pegkegchauk ainawai. Iman asagmatai, makichkish tsagkujachagtatjai. Nuigtush kuashat aentsun achija yajuakag Edom aents aidaunum sujujajui, dita inake atinme tusag.

<sup>7</sup> Nuadui yaakat Gaza peejamua nunak ashí apejuattajai, dutika ai nunú kegak apu pujusa inamtainak ashí apeattawai.

<sup>8</sup> Tuja apu Ashdodnum puja nunak

Ascalónkan apujiya nujai mai tsaitatjai,

dutikakun wi kajekbaujui utuan filisteo aents aidaunak ijinattajai.

Dutikakun ecrógnumianashkam wi kajekbaujui ijinattajai. Nunak dekas uminkatnun tajai”, tawai Tuke Pujuu.

<sup>9</sup> Tuke Pujuu nuigtu chichaak:

“Tironmaya aents aidauk ayatak pegkegchauk ainawai. Iman asagmatai, makichkish tsagkujachagtatjai.

Wagki ditak tikich aents aidau

dita yachi yachijaig chichama umikag batsatunash ajaantus diitsuk achija yajuakag,

Edom aents aidaun inake atinme tusag ashí sujujajui.

<sup>10</sup> Nuadui yaakat Tiro peejamua nunak apejuattajai, dutika ai nunú kegak apu pujusa inamtain ashí apeattawai.”

<sup>11</sup> Tuja junashkam Tuke Pujuu chichaak:

“Edom aents aidauk, ayatak pegkegchauk ainawai.

Iman asagmatai, makichkish tsagkujachagtatjai.

Wagki ditak dita yachi Israel aents aidaun

tuke kajejin asag,

dita kajetin umiinak pempeentukiag ai aintuinakua, makichkish wait anentsuk puyajai ijinawaju ainawai.

<sup>12</sup> Nuadui yaakat Temágnak apejuattajai,  
dutika ai nunú kegak apu pujusa inamtain  
Boshránum awa nunak ashí apeattawai”, tawai.

<sup>13</sup> Junashkam Tuke Pujuu chichaak:  
“Amón aents aidauk ayatak pegkegchauk ainawai.  
Iman asagmatai, makichkish tsagkujachagtatjai.  
Wagki ditak kuashat nugkan jukitag tuidau asag,  
Galaad nugkanum nuwa aidaun ejapeniag ijinau ainawai.  
<sup>14</sup> Nuadui yaakat Rabá peejamua nunak apejuattajai,  
dutika ai nunú kegak apu pujusa inamtain ashí apeattawai.  
Dutikan ijinai buutuinaumu  
dase suwe wajas kedegtuwama imattatui.  
<sup>15</sup> Tuja dita apujinak, niina atuwe tikich apu aidaujui  
achikag, yaja tikich nugkanum jukiagtinau.  
Witjai Tuke Pujuumuk, nunak dekas uminkatnun tajai.”

## 2

<sup>1</sup> Tuke Pujuu chichaak:  
“Moab aents aina duka ayatak pegkegchauk ainawai.  
Iman asagmatai, makichkish tsagkujachagtatjai.  
Wagki ditak Edom aents aidaun apujin  
ukunchin apeawag yuku awajsajui.  
<sup>2</sup> Nuadui Moab nugkanak apeattajai,  
dutika ai nunú kegak apu pujusa inamtain  
Quiriotnum awa nuna apeattawai.  
Moab aents aidauk maaniaku untsubau,  
cornetan umpuinamu aatus pampainamunum jinawagtatui.  
<sup>3</sup> ¡Dita apujinak, tikich apu eme anentsa diitai  
aina nujai ashí wi ijinattajai!  
Nunak Tuke Pujuu dekas uminkatnun tawai.”

<sup>4</sup> Tuja junashkam Tuke Pujuu chichaak:  
“Judá wegantu aina duka ayatak pegkegchauk ainawai.  
Nunin asagmatai, makichkish tsagkujachagtatjai.  
Wagki ditak Tuke Pujuu chichamen umigtsuk,  
dakumka najanamu aidaun  
dita apachji emematiu aina nuna ditashkam emematiaju ainawai.  
<sup>5</sup> Nuadui Judá wegantu aidaun yaaktaji aina nunak apejuattajai,  
dutika ai nunú kegak apu pujusa inamtai aidau  
Jerusalén ayá nuna apeattawai.”

*Israel aents aidau dita pegkegchajin suwimkan jukiagtin*

<sup>6</sup> Tuke Pujuu chichaak:  
“Israel aents aina duka ayatak pegkegchauk ainawai.  
Iman asagmatai, makichkish tsagkujachagtatjai.  
Dita aidauk aents ujudauch aidaun,  
tikichi inake atinun kuichkin juwinak sujuinawai,  
dutikaidau asag sapatjaiyaske yapajinawai.  
<sup>7</sup> Tuja aents ujudauch aidaunak tikima shiig senchi waitkainawai,  
dutikaidau asag makichkish yainatsui.  
Múun aidauk, uchijjai makichik nuwanak jimagtu yujawai.  
Nuninak kajetan sujuinawai.  
<sup>8</sup> Aents ujudauch aidau jáanchjin  
diwijum akikmaku jukita tusa  
emetjuamu aidaun ainak tepesag,  
dita apajuimtaijin emematuinak yujumkan yuu batsatui.  
Aents diwimkagtukchaunak akikmakta tusag  
kuichkin atankiag,  
nunú kuichkia duwi vinon sumakag,  
dita apajuimtaiji jegamjukbaunum wayawag umú yujawai.  
<sup>9-10</sup> Israel aents aidauwah,

wi atumnak Egipto nugkanum waitu batsatutigmin jiigmaiijime,  
 dutika yajuakan wi kuitamsan  
 cuarenta mijan uwegshunum awekasuitjime.  
 Dutikakun atumi shiwaajum amorreo aents aidau  
 shiig senchigtin esajam wajatpakin aidaunak  
 ashí ijinan dita nugken atumin amasuitjime.

<sup>11</sup> Atumi uchijum aidaunmayan profeta agtinun etegjauwaitjai,  
 tuja tikich aidaunak nazareo atinme tusan nunashkam akanjauwaitjai.  
 Tuke Pujuu nunak dekas nunikua nuna tawai.

<sup>12</sup> “Tujash atum aidautijum  
 nunú nazareo aidau vino uwagta tusajum waitkasu ainagme.  
 Dutikakjum profeta aidaushkam mina chichamjun  
 etsegkai tusajum dakitjauwaitjume.

<sup>13</sup> Nuadui, carreta trigon aimak wegak  
 nugkan umuchiakui,  
 wajasa ayamainchau dekapmaina imatikattajime.

<sup>14</sup> Nuna imatikai uwemjatag tusajum tupikakjumesesh uwemjashtatjume,  
 aents senchigtin akush kakaumainchau dekapjattawai.  
 Tuja aents wajiushkam ayamjumakchattawai.

<sup>15</sup> Tuja flecha akentan yacha akush,  
 senchi tupikain akush,  
 caballonum tupikain akush, uwemjachagtatui.

<sup>16</sup> Nunú tsawantinig maanitan yacha akush,  
 maanitai aidau takakbaujinak utsag ukuinak pisajagtatui.  
 Nunak dekas nuniktinun Tuke Pujuu tawai”, tiuwai Amós.

### 3

#### *Profetan takatji*

<sup>1</sup> Israel aents aidauwah, atum Egipto nugkanum batsamsajum waitu batsatutigmin  
 Tuke Pujuu jiapag agkanmitkagmawa nuna chichame antuktajum:

<sup>2</sup> “Ashí nugkanum aentsuk ayaig,  
 ima atumnak etegkauwaitjime.  
 Dutikamuitkujum pegkegchau takamsau asajum,  
 nunú umiakjum diwimkagtukbau akikmamaina numamtuk  
 suwimak jukittajume.

<sup>3</sup> “Jimag aents tsanigka wekaga nunak,  
 mai antugdayas wekagu asa aniaawai.

<sup>4</sup> León shinakug, kuntinjin maa akasmatak shinawai,  
 tuja leónka uchiji waanum shinakug,  
 kuntinjin mau asa akasmatak shinawai.

<sup>5</sup> Pishak nemak pujakug,  
 nemaktinji detua ukukbaunum nemawai.  
 Kuntin achiktasa dakamtika ukukbau  
 tsekea nunak achika aniaawai.

<sup>6</sup> Trompeta yaaktanum shidaun antuinakug,  
 aents aidauk pampainawai.  
 Utugchat yaaktanum nagkaema duka  
 Tuke Pujuu nunikti tibau asa nuniawai.

<sup>7</sup> Tuke Pujuu niina aentsji profeta aidaun  
 dekamtiksukek nii wakegamu ataish,  
 nigkik makichkish dutikatsui.

<sup>8</sup> León shinaun antuinakug,  
 ashí ishamainak kujain ainawai.  
 Tuja Tuke Pujuu profetan chichakti tamak  
 niina daajin chichamainai”, tawai Apajui.

#### *Yaakat Samaria tsayam atin*

<sup>9</sup> Ashdotan apuji aidau batsatbaunum,  
 Egipto apuji aidau batsatbaunum

chicham etsegekujum:

“Samaría mujaji aina nuwi kaunatajum”,  
tusajum ijumjatajum,  
nuwi ijunas Samaria nugkanum  
magkagtuinamu pegkegchau takainamujai  
pachimnaga awa nuna wainkatnume.

<sup>10</sup> Tuke Pujuu chichaak:

“Samarianmaya aidauk shiijak takainatsui,  
aents aidaun mainak wajiji yajutkamu aidaun  
dita pujusa inamtaijin ijumag batsamtawai.”

<sup>11</sup> Nuadui Tuke Pujuu chichaak:

“Shiwag aidau yaakat Samarian jetektatus tenteawagtatui,  
dutika jetekag kaya jegamkamu aidaunak tsaikag,  
apu pujusa inamtaijin waji ayaunak  
ashí yajuakagtatui”, tawai.

<sup>12</sup> Tuja junashkam Tuke Pujuu chichaak:

“Uwija kuitamin uwigji yujam ayamjuktatus  
maanitkush ayatak jimag nawe ampigbaun  
nuniachkush kuishi ampigbaunakesh,  
juwama numamtuk

atum samarianmaya aidautijum  
Damasconmaya jáanch pegkeg ainkajum  
kaji batsatjum duka  
pisakjum piipich jukijum pisagtajume.”

<sup>13</sup> Nuadui Tuke Pujuu ashí senchigtina nunú ataktu chichaak:

“Antuktajum atum aidautijum,  
nunikjum Jacob wegantu aidau  
suwimkan jukiagtata nunú pachisjum etsegekatajum.

<sup>14</sup> Wika dita pegkegchau takamsamujin

suwimkan susagtajai,  
dutikakun Betelnum dita apajuímtaijin emematuinak  
altar najankamu ayá nunak ashí tsaiktatjai,  
dutika ai nugká batsamsattawai.

<sup>15</sup> Wiakchan jee aidau, tsetsek tepeamtai kanutai,

jega pegkeg umikbau aina nunak,  
esattin kanutai aina nujai tsaiktatjai.  
Tuja jega marfil jegamkamu aina nunashkam tsaiktatjai,  
tuja jega apu pujusag inamaina nunashkam  
ashí tsaiktatjai”, tawai Tuke Pujuu.

#### 4

<sup>1</sup> Samarianmaya nuwa aidautijum antuktajum:

Atumek baságnunia baka duwejam aina iman  
duwekjum batsatjume.

Atumek ujudauch aidau senchi waitkakjum dushikiagme,  
nunin asajum atumi aishjum aidau vino sujusta uwajan nampektajai  
tusajum inaku waitkagme.

<sup>2</sup> Israel aents aidaun Apajuíji

niina pegkegmajin nii umiktinun aatus tawai:

“Atumin tsegkenai awagtamak

japiki jujamkiagtinuk tsawan uminui,  
tuja atumi uchijum aidaunak agseyai nenakag japikiagtinai.

<sup>3</sup> Atumek yaakat peejamu agkaju aidaunum eteemajum maki makichik jijnatnaitjume.  
Nunikagmin muja Hermógnum utsampakagtinai.”

Nunak Tuke Pujuu dekas uminkatnun tawai.

*Israel aents aidauk suwimkan juinakush anentaimainachu*

<sup>4-5</sup> “Atumek pegkegchau takat aidau

ima wakegau asajum Betelnum shiyakjum,  
tuja Guilgalnumshakam shiyakjum,  
atumi apajuímtai dakumkamu najanamu aidau  
emematu batsamtajume.

Atum nuniakjuminish, wika puyatjukchattajai.  
 Witjai Tuke Pujuu, Israel aents aidaun Apajuíjinuk,  
 nunak dekas uminkatnun tajai.  
 ¡Atum wakegakjumek tunamá batsamtajum!  
 Tuja atumi apajuímtaiji aidaun emematkujum  
 kashikmasjum kuntin maajum apeatajum.  
 Dutikakjum nuigtushkam kampatum tsawan jegakui,  
 atum ajakmamunmaya juukjum diezmo tuké sutajum,  
 tuja tikich anentag aidaushkam susatajum,  
 ashí aents aidaun anentag susatnume tusajum  
 etsegekatajum.

<sup>6</sup> Nujantai waittsatnume ti ai,  
 ashí yaakat aidaunum yumain atsakui,  
 nujantai waitbaijume.  
 ¡Imanika waitiakjumesh atumek minak  
 umigtukchabiugme!

<sup>7</sup> “Tuja nuigtushkam ajak juut jegau aig,  
 kampatum nantui yumin yutumtijachmaijai.  
 Makichik yaaktanmak yutumtijamiajai,  
 untsu tikich yaaktanmak yutumtijachmaijai.  
 Tikich yantannumak yumi yutuju asamtai,  
 nugka chupika pegkeg wajas amayi,  
 nuniai untsu tikich yantannum yumi yutugchau asamtai,  
 ajakak kagaka amayi.

<sup>8</sup> Nunikmatai aents aidaun yumin egainak  
 maki makichik yaaktanum yujabi,  
 imanik yujainakush kuashat uwaja kitak  
 amikmainnakesh wainkachagmayi,  
 tuja imanika waitiakjumesh minak  
 umigtukchabiugme.

<sup>9</sup> “Wi atumdau ajak ajakmakbau aidaunak,  
 tuja numi nejen aidaunashkam ijituajime,  
 atumi ajagmin manchi aidaun ishikbiajime,  
 nuigtushkam dase sukutnun uwegshunmayan  
 dasenmitkakkabajai,  
 tujash imanika waitiakjumesh atumek minak umigtukchabiugme.

<sup>10</sup> Egiptunmaya aents aidaun suwimkan susauwaitag  
 imatikan suwimkan amasuitjime;  
 tuja atumi uchijum aidaun  
 maaniamunum jinaati ti ai jinawabi.  
 Nunikagmatai dita caballoji aidaun yajutkajabi,  
 nunú jinaa kauku mejeakjum waitiugme,  
 ¡imaniakjumesh minak umigtukchawaitjume!”  
 tawai Tuke Pujuu.

<sup>11</sup> Apajuí ataktu chichaak:  
 “Sodomanmaya aents aidaun,  
 Gomorranmaya aents aidaun suwimka suwakun  
 jii ajunjan ijinauwaitag numamtuk awajkauwaitjime atumnashkam.  
 Dutika ai jii kaiji ampinjau tepegama numamtuk wajakuitjume.  
 ¡Imanika waitiakjumesh minak umigtukchau ainagme!”  
 tawai Tuke Pujuu.

<sup>12</sup> “Nunin asagmin, yaunchuk tikich aidaun  
 suwimkan susauwaitag numamtuk  
 awajkattajime Israel aents aidautigminak.  
 Apajuí suwimkeg uwemtumainchau asajum,  
 ¡umintsajum Apajuí igkugtasajum dakastajum!”

<sup>13</sup> Tuke Pujuuwai muja aidaun najanin,

dasenashkam najanin, tsawainash suwe emau,  
niinu aidaunash aentsun paan dekamtikau  
ashí nugkanum wekagu.  
Tuke Pujuu, Apajui ashí senchigtin tutaya  
nunuwai niina daajig.

## 5

*Pegkegchau takatak idaikujum Apajui umigkatajum tusa Israel aents aidau chichagkamu*

<sup>1</sup> Israel aents aidauwah,  
ishamain nagkaemaktin asamtai,  
wi wake besemag dekapeakun kantamag nunú antuktajum.

<sup>2</sup> Israel aents aidau imanji,  
pegkeg wajaknuwe nunú nantakchatnun iyaajaje,  
nunikag nantamainchau wajasag batsatui.  
Ditan inanmainuk atsawai.

<sup>3</sup> Tuke Pujuu Israel aents aidau chichajak:  
“Makichik yaaktanmaya  
mil suntag maaniamunum ishiakbauk,  
ayatak cien suntajak iwaku wakitkittawai.  
Tuja cien suntag ishiakbauk,  
ayatak diez suntag iwaku wakitkittawai”, tawai.

<sup>4</sup> Tuke Pujuu Israel aents aidau nuigtu chichajak:  
“Iwaku pujustag takugmek, mina umigtuktajum.  
<sup>5</sup> Dakumkamu aidau ememattasajum Betelnum wetin aigpajum.

Nunú nuniakjumek ijina utsam atatjume.  
Tuja Bershebanmakesh wetin aigpajum,  
nuniachkugmesh Guilgala nunigkesh nagkaemaktin aigpajum,  
wagki nuwiya aents aidau ashí achijag yajuakgtinai.  
Tuja Betelak tsaikam uwejush wajas asatnai.

<sup>6</sup> Tuke Pujuu umigkatajum,  
nuniakjum iwaku pujustajume,  
atum nii umigtsugminig, Israel aents aidau  
kanakag ijunjajua nuna ijinattawai.  
Betelnum dakumka najanamu apajuímtai aina nunak ekemaktatui,  
dutikamtaig makichkish ikagnakchagtatui.

<sup>7</sup> Aents ujudauch aidau waitkam batsata nunú  
shiig anentsajum kuitamchau,  
nuigtush aents ayamke atsaujai  
betek waitkau aidautigminak wait anentajime.  
Wagki atumek pegkeja nunú pegkegchau anentagme.

<sup>8-9</sup> “Apajuiyai yaya aidau, nayaimpijai najadau,  
tsaaptinnash suwe emau,  
suwenash tsaaptin emau,  
yuminash yutumtikau.  
Apajulk yaakat peejamu aidaunash tsainai,  
tuja nunú tsaikbaunmayanak juga múun aidau kaya ekenag jegamak uminai.  
¡Tuke Pujuu ashí senchigtin tutaya nunuwai niina daajig!

<sup>10</sup> Aents shiig takantsati tusa chichamjaun  
waitjutsuk dekasken chichaujai kajeja nunak wait anentajai.

<sup>11</sup> Wagki ditak ujudauch aidau tepejuk batsamtusag,  
diwijum akikmakta tusag trigo atantuinawai.

Nunin asag, juga pegkeg aidau  
dita jegamjajua nuwig pujuschagtatui.  
Tuja nuigtush dita uva ajakbaujiya nuwiyau  
vino najanawajag shiig aneasag uwagchagtatui.

<sup>12</sup> Dita aidau shiig kuashat pegkegchaun takamaina nunak  
wika shiig dekajai.

Tuja apu chichama epegkin aidau aents pegkegchau aidaun yayaak,  
tikich aents utugchatji atsujunak suwimkan suwina  
nunak shiig dekaikai.

Nuadui chicham ataik, wiakuch aidau  
ujudauch aidaunak tuke depetuinawai.

<sup>13</sup> Nuadui kuashat pegkegchau takamu ayau asamtai,  
aents yacha duka takamtak pujawai.

<sup>14</sup> “Pegkegchau takat aina duka idaikujum,  
pegkeg takat aina nunú takastajum,  
nunú nuniakjum dukap tsawan pujustajume.  
Nuniagmin Tuke Pujuu, ashí senchigtina nunú  
inak yaimpawai tajum nunú dekaskenum atumnak tuke yaimpaktatui.

<sup>15</sup> ¡Pegkegchauwa duka dakitajatum!

¡Pegkeja nunú waketajum!

Apu chichama epegkin aidautigmek,  
shiig betek chicham iwajatasajum anentaimtajum.

Nuniagminig Tuke Pujuu, Apajui ashí senchigtina nunú  
Israel aents aidau ujumak iwaku batsata nunash  
wait anenjachajaintash.”

<sup>16-17</sup> Tuke Pujuu ashí senchigtina nunú chichaak:

“Wi atumin suwimka amastasan minitak,  
ashí yantamnum buutiagtinaí.

Jinta aidaunum buutuidau,

yutai ijumja sujutai aidaunum buutuidau,

ashí plaza aidaunum buutuidau,

uva ajakmabau aidaunum buutuidau,

aja aidaunum buutuidau,

jakamunum buutuidaushkam agtatui”,

tawai Tuke Pujuu.

<sup>18</sup> ¡Tuke Pujuu tattawai tusajum shiig aneautigminak  
wait anentajime!

Atumek waji utugchatak nagkaetamkiti nunú  
dekachu asajum tuu yujagme.

¡Tuke Pujuu minamuk, tsauptinuk achattawai,  
suwe ishamain atatuí!

<sup>19</sup> Nunú tsawantinig makichik aents

león aintam tupika wekama, chayujai igkuniak  
wajuk anentaimainaita iman atatuí.

Nuniachkush jegá waya tanishnum atumkama,

nuwi dapi tepau esaim anentaimaina iman atatuí.

<sup>20</sup> Duka dekaske, Tuke Pujuu minamuk

tsauptinuk achattawai, suwe atatuí;

¡nunú tsawantinig shiig aneamuk achattawai,

ayatak wake besemag atinaí!

<sup>21</sup> ¡Jiistamtai ati tusa tsawan etegjamu aina

nunú umiaji tusajum jiistamjum nunak shiig dakitajai!

Tuja Apajui emematji tusajum ijunajum

shiig aneajum nunashkam shiig dakitajai.

<sup>22</sup> Apajui tudaun tsagkugtamjati tusajum

kuntin maajum nuna neje ashí apeajum

nunak wika dakitajai.

Tuja agkan pujutan amastí tusagmeshkam,

kuntin aidau, ajak juukbau aidaujai

anentag kuashat ikaunmagne,

tujash wika nunú diitnak dakitajai.

<sup>23</sup> ¡Juwi wainka kantama batsamtsuk,

yaja shiyakjum kantamatajum!

¡Atum arpa awatjum nunú antutnak dakitajai!

<sup>24</sup> Aan batsamtsuk dekas

wi shiig kuitamkagtinaitag nunisjume,  
atumshakam tikich aidau shiig kuitamkatajum.  
¡Atum shiig takamua duka namak kuyua  
megkaechauwa nujai betek ati!

<sup>25</sup> “Israel aents aidauwah, atum cuarenta mijan uwegshunum yujasuitjum nuaduik,  
anentag aidauk minak sujuschauwaitjume.

<sup>26</sup> Atumek Sicut atum dakumka najanamu wainka apajuímtai atum apu tajum nunú  
yanasa yujayugme. Nuiqtushkam Quiliún atum dakumka najanamu yaya nunín aajakua  
nunú yanasa yujayugme.

<sup>27</sup> Nuadui aents tikich nugkanmaya Siria nugkan nagkaiki batsamin aidau achija  
yajuaktinme tusan idaisattajime”, tawai Tuke Pujuu, Apajuí ashí senchigtina nunú.

## 6

*Apajuí Israel aents aidau suwimak susamu*

<sup>1</sup> Amós chichaak:

¡Jerusalégnunmia aidau sapigmatsuk  
puyatkas batsata nunak wait anentuinajai!  
Yaakat Samaria eme anentautigminak wait anentajime.

Juju nugka múunta nuwi apu aidautijum  
puyattsuk batsatutigminak wait anentajime.

<sup>2</sup> Yaakat Calné wejum diistajum,  
tuja nuwi juwakjum yaakat Hamat shiig múunta nuwi wetajum,  
nunikjum nuwi nagkaemakjum filisteo aidau yaaktaji Gat wetajum,  
nunika jegajum nunú yaakat aidauunash itugkajamkiyi nunú diistajum.

Atumek dita nagkaesau ainatsjume,  
tuja atumi nugkega dushakam dita nugken nagkaesauchi.

<sup>3</sup> Atumek suwimak jukig tusajum dakitajume,  
nuniyatjukum ayatak suwimak akumtagme.

<sup>4</sup> Atumek wainka batsamsajum pegak shiig pegkeg  
marfil najanamu aidauunum kaji batsatjume,  
nuniakjum kuntin pegkeg duwejam aidau yuu batsatjume.

<sup>5</sup> Atumek arpa wainka awatkujum kantamainchau wainka kantajume,  
tuja kantamku awattai aidau tusajum wainka najanjume,  
nuniakjum David yacha aajakua iman anenmamjume.

<sup>6</sup> Atumek tsapa muunnum vino umakjum  
shiig senchi nampeagme,

tuja dekas kugkuin pegkeg akik aina ibau nijamjume.  
¡Nuniau asajum atumi yatsum aidau waituina duka pachiatjume!

<sup>7</sup> Nunin ainajum duwi, aents aidau achija yajumainakug  
atumna etegtamawag jujamkiagtinai,  
dutijamawagmatai atum shiig jüstama batsatjum duka  
wainka juwaktatjume.

<sup>8</sup> Tuke Pujuu Apajuí ashí senchigtina nunú pan antumainun chichaak:  
“¡Jacob wegantu aidauk jega muuntan  
jegamag batsamas ememaidau asagmatai kajejajai!  
Nuadui dita yaaktaji aidauunak shiwag aidau tsaigkatneme  
tusan idaisattajai.

<sup>9</sup> “Dutika ai makichik jeganum diez aents iwaku pujauk ashí ijinam agtatui.

<sup>10</sup> Nunú aents jinaw aidau patayi aidau dita iyashin jukiag apeawagtatus kaunawag  
yujattaman, tikich nuna patayi aidau nuwi yujau ditan iniinak: ‘¿Tikichish atsua?’ tusa  
tama: ‘Atsa, makichkish atsawai’, tiagtinai, nuna tusa: ‘¡Takamtak wajasta!’ tiagtinai.  
Wagki nuna inima yujas mina daajun adaikug nuni senchi suwimkan jumain asagmatai.

<sup>11</sup> Wagki Tuke Pujuu Israel aents aidau suwimkan suwak, jega múun aidau jega  
piipich aidaujai ashí tsaittatui.

<sup>12</sup> “Atumesh anentaimsakjuah,  
¿caballosh kayanmash tupikaumainkait?  
Tuja ¿kayanmash pukujaish ajakmamainkait?  
Tujash atumek shiig takata duka jata awajsaugme,



dutikakjum shiig aneasa pujuta dushakam  
wake besemag awajsaugme.

<sup>13</sup> Atumek yaakat piipich aidau depetakjum  
ememasa chichaakjum:

‘Tina senchijin depetkaji’, tusajum shiig aneajume.

<sup>14</sup> Nuniau asagmin, Tuke Pujuu Apajuí, ashí senchigtina nunú chichagtamak:  
Shiwag aidau Hamatnum nagkamas jetepakag,  
uwejush tsumujin awa aatus ashí depetamak  
dita wagagtamiag waitkagmastinme tusan idaisattajime”,  
tujama nunú Israel aents aidautijum shiig antuktajum,  
tiuwai Amós.

## 7

### *Manchi aidau ajakan amuktin*

<sup>1</sup> Ajak ajakmamu nejeka tsamakmatai, apu susatnun yama nagkamchak juuka idaisamu, ataktu tsamakmatai dita yuwawagtinnak eke juwinatsaig, manchi kaketuk amuktatus uminas aun Tuke Pujuu iwaintugkabi.

<sup>2</sup> Nunú jak aidau manchi kaketuk dupajai nagkamas ashí amuakui, Tuke Pujuu segaakun:

“¡Tuke Pujuuwah, wait aneasam tsagkugkagtugta! Amina aentsjum Jacob wegantu aidau kuashtachua dusha manchi ajakji amutkamash ¿wajina yuwa batsamsattawa?” tibajjai.

<sup>3</sup> Tusa tai Tuke Pujuu chichagtak:

“¡Duka nunikchattawai!” tujutmayi.

### *Jii kegau wainkamu*

<sup>4</sup> Junashkam Tuke Pujuu jii kegauwai suwimkan sukagtustatus umiamujin iwaintugkabi. Nunú jii kegak ashí nugkan apebi, tuja nayantsa kunajinash apebi.

<sup>5</sup> Imatikakui wi Apajuín chichagkun:

“¡Tuke Pujuuwah, wait aneasam imijkata! Amina aentsjum Jacob wegantu aidau kuashtachua dusha ¿wajuk ibaunash atsanjag pujustinme?” tibajjai.

<sup>6</sup> Tusa tai Tuke Pujuu ditan wait anentug chichaak:

“Juju suwimkashkam uminkashtatui”, timayi.

### *Plomo najanamu*

*nená dekapatain takus  
wajau wainkamu*

<sup>7</sup> Nuigtushkam Tuke Pujuu juna iwaintugkabi: Apajuí nená dekapatain plomon takus yaakat peejamunum ayaumas wajaun wainkabijai. <sup>8</sup> Nuwi wajas inintak:

“¿Amosah, jusha wajimpaya?” tujutmayi.

Tujutkui wi ayaakun:

“Aanka plomo, jega jegamin takau aina nunuwai”, tibajjai.

Tusa tai nii chichagtak:

“Juna takakag juwi mina aentsug aidau nak dekapatan diistatjai, dita pujutish pegkejash aina nuna. Tuja dita pujuti pegkegchau ainakuig, makichkish tsagkujachagtatjai.

<sup>9</sup> Isaac emematujakbau nain aidau num ayá nunak tsaitatjai, tuja Israel aents aidau wainka apajuímtai aidau emematuinak jegamjamu aina nunashkam tsaitatjai. Dutikakun Jeroboam wegantu aidau nak ijinattajai”, tujutmayi.

### *Amós Amasíasjai kajegdaikamu*

<sup>10</sup> Betelnumia sacerdote Amasías Israel aents aidau apujin Jeroboaman chichaman akuptak: “Apuh, amina Amós Israel aents aidau num wekagas chichaman umigtamu. Tuja iik nuna tujamá wekaeti tusaik idaimaitsuji.

<sup>11</sup> Nuwi wekagas chichaak: ‘Jeroboamnak maaniamunum maawagtatui, tuja Israel aents aidau nak ashí achijag yajuakagtatui’ tusa tuu wekaewai”, tiuwai.

<sup>12</sup> Tusa ujaka ukuak Amasías Amósan chichajak:

“¡Dekamnuh, juwi pujusam tuu pujutsuk jiinkim wetá! Ame chicham etsejam nuwiya yuwa pujustag takumek, Judá wegantu aidau nugken wetá.

<sup>13</sup> “Tujash Betelnumak nunú pachismek nuigtuk chichakaipa, wagki juju yaakta juwig dekas apu niina apajuímtaijegamjukbau awai”, tiuwai.

<sup>14</sup> Tusa tama Amós ayaak:

“Wika profetachuitjai, tuja profeta achainjash tusankesh anentaimtsujai. Wika uwija kuitamkun, higo ikamia aidau juuka sujakun, nuwiyau yuwan pujajai.

<sup>15</sup> Nunika pujai Tuke Pujuu nuna idaimitkajak, mina chichameg Israel aents aidaunum etsegkata tujutmayi.

<sup>16</sup> Nuadui nii tujutbaun etsejag nunú, yamai Tuke Pujuu chichame antukta. Ame chichaakum: 'Israel aents aidau pachisam pegkegchau chichagkaipa, tuja nuigtush Isaac wegantu aidaushkam pegkegchau chichagkaipa', tusa tame.

<sup>17</sup> Amek tame, tujash Tuke Pujuu juna aatus tawai: 'Juju yaakta juwi amina nuwem akika dutiktai wajastatui, amina uchijum aidaunak tuja nawanjum aina nunashkam maawagtatui. Dutikawagmatai tikich aents aidau amina nugkemnak jukiagtinaí, amek amina nugkem ukukim atushat aents Apajuí nemagchau aidau nugken jakatnaitme, Israel aents aidaunak achijag nugken ukumtikiag tikich nugkanum atushat yajuakagtinaí' tawai Apajuí", tiuwai Amós.

## 8

### *Yujág juuka*

#### *chagkinum aimkamu*

<sup>1</sup> Makichik chagkinum yujág tsamaku juuka aimkam pujaun Tuke Pujuu iwaintugkabi.

<sup>2</sup> Nuna iwaintujuk chichagtak:

"¿Jusha wajimpaya?" tujutmayi.

Tujutkui wi ayaakun:

"Yujag juuka chagkinnum aimkamu pujawai", tibaijai.

Tusa tai, Tuke Pujuu chichagtak:

"Israel aents aidau suwimak jukitnujig yujág tsamaka uminas aama numamtuk tsawantak ashí jegae. Nuadui makichkiakesh tsagkujashtatjai.

<sup>3</sup> Nunú tsawantin kuashat aents jinaamtaí, apu pujusa inamtaijinig shiig aneasa kantabauk atsutnai, ayatak wake besemag atinaí. Nunú aents jinau aidaun iyashinak takamtak yajuakag utsagkagtinaí", nunak Tuke Pujuu dekas uminkatnun tawai.

#### *Israel aents aidaun pegkegchauji dígsa suwimak susatnuk tsawantak uminuí*

<sup>4</sup> Juju nugkanmaya aents ujudauch aidaun kasajak waitkau aidautijum shiig antukta-jum;

<sup>5</sup> atum chichaakjum: "¿Trigo wamak sujukchamnush, wagka nantu yama takamunum jüstamtaya dusha tsawantash wamak nagkaematsua? Trigo sujaku kijinji imanichau aig, tsanumja kasamku kuashat kuichik jukichminush ¿wagka tsawan ayamtaish wamak nagkaematsua?" wajagme.

<sup>6</sup> ¡Imatu asajum, trigok saepejai sujumain dekapeagme! Nunin asajum ujudauch aidauk inaku waitkatai ati tusajum kuichik piipich juwakjum sujuktaj tajume, tuja nuigtush makichik sandaliayai yapajiatag tajume.

<sup>7</sup> Nuadui Tuke Pujuu, Israel aents aidaun Apajuíji chichaak: "Atum dutikajum nunak makichkish kajimatkishtinaitjai", tawai.

<sup>8</sup> Imatika waitkajum duwi nugka senchi uugtinai, imaniak namak Nilo dujajak ikaman utuja ataktu kuyua, ataktu utug kuyua wajama imanittawai. Imanitai aents aidauk ishamainak buutiagtinaí.

<sup>9</sup> "Nunú tsawantinig etsag etsanjashtinaí, tuja etsa tutupit wajas etsantu eketiatak kajinak suwe wajastinaí, nunitai ashí nugkanmak suwe wajastinaí.

<sup>10</sup> Atum jüstamkujum shiig aneenujum nunú idaikujum, aents jinamunum wake besemag batsamsajum ayatak buut batsamtajume, nuniakjum jáanch jakamunum nugkutai nuggugjum yujastajume.

Nuniakjum pinui awamagjum, makichik aents uchiji makichkiuch ajamu jajukam wake besemag dakapeak kajeka buutama imanittagme.

<sup>11</sup> Yapajut tepeatin tsawan jegattawai, tujash duka pag atsutaigkish yumi atsutaigkish nunikchattawai; duka mina chichameg antuktasa yapajamujai betek wakegamu atinaí. Nunak Tuke Pujuu dekas uminkatnun tawai.

<sup>12</sup> Tuke Pujuu chichamen antuktajai tusa ashí yantamnum nayantsa amain yujatnai, tujash imaaninakush mina chichamjun etsejuidaunak antukchagtinaí.

<sup>13</sup> Nunú tsawantinig,  
nuwa muntsugtauch shigmauch aidaush,  
tuja uchi datsa wajiu aidaushkam  
pimpikiag weetuk wampainag iyainiagtinaí.

<sup>14</sup> Tuja nuigtushkam samarianmayan, Dagnumian,  
bershebanmayan wainka apajuímtai aidaun emematiaju aidauk,  
tuke jainak wampainag iyainiagtinaí.  
Nunú wainka apajuímtai aidaun jutsukaita  
dekas Apajuík tusag, ame tuke umigtai atin ata tusag  
tinu aidauk nantakchatnun tuke jak wampainag  
iyainiagtinaí”, tawai Apajuí, tiuwai Amós.

## 9

*Apajuí aentsu pegkegchaujin diijus suwimkan susatna nuna uwemtumainuk makichk-  
ish atsawai*

<sup>1</sup> Duwi pujusan Tuke Pujuu altaran ijus wajasa chichagtak:  
“Tuke Pujuu emematku ijuntai jegamku  
shugku ajigmawa nunú awatim kupikta,  
dutikam jega yumpunak aentsun yutua ijinati,  
tuja tupikaki uwemjatag tuinakush makichkish uwemjachagatui.  
Tupikaki uwemjashkam maaniamunum jakattawai.

<sup>2</sup> Nugka initken uumkagmataish, imanuiyanash jüigtatjai,  
tuja nayaimpin nagkaesau yaki uumkagmataish,  
imanuiyanash ajuawagatjai.

<sup>3</sup> Tuja muja Carmelo titijin waka uumkagmataish,  
egakan achikagatjai,  
tuja nayantsa kunajin uumjutkagmataish,  
kuntin múun ichiag ijinati tusan awetittajai.

<sup>4</sup> Tuja shiwag aidau yajuakam uwegshunum shiyakmataish,  
puyajai ijinatnume tusan inamjattajai.  
¡Ditanak tuké diyaku atatjai,  
tujash nunak yayakdukeshtutikashtatjai,  
suwimkan suwakun dutikattajai!

<sup>5</sup> “Tuke Pujuu Apajuí, ashí senchigtina nunú  
nugkan antiawai, dutikam nugkak yumpunui,  
nunitai aents aidauk buutuinaawai.  
Tuja nugkak uujak namak Nilo dujajak ikaman utuja  
kuyua, ataktu utug kuyua wajama imanittawai,  
imanitai aents aidauk ishamainak buutiagtinaí.

<sup>6</sup> Tuke Pujuu niina jenak nayaimpinum umikui,  
untsu nuna ichichiagtinun nugkanum umikui,  
nayantsak bukuiti yaki weawai, nunik yumi najanea  
ataktu yuta nunak Apajuí dutikawai.”  
Niina daajig “Tuke Pujuu” tawa nunuwai.

<sup>7</sup> Tuke Pujuu chichaak:  
“Wi diismak Israel aents aidautigmek  
etiopianmaya aidajai betek ainagme.  
Atum Egipto nugkanum batsatutigmin  
jijian ikaunmawaitjim dutiksanuk,  
filisteo aidaunashkam Creta nugkanum  
batsatun jijian ikaunmawaitjai.  
Tuja arameo aidaunashkam dutiksanuk  
Quir nugkanum batsatun jijian ikaunmawaitjai.”

<sup>8</sup> Juju Israel nugkanmaya aidau  
pegkegchau aina nuna Tuke Pujuu diisa chichaak:  
“Au aents aidaunak ashí ijinan emegkattajai,  
dutikaknush Jacob wegantunak ashí ijintsuk  
ayamjukan uwemtijattajai.

Witjai Tuke Pujunuk, nunak dekas dutikattajai.

<sup>9</sup> Tuja Israel aents aidautigmin shiwag aidau trigo wampuji utsankatasa pegamash jigkayi pegkejak iyautsama imatijamatnume tusan titatjai.

<sup>10</sup> Ashí aents chichainak:

‘Duka makichkish nunikchattawai, utugchatak atsugtamtatji’, tuinawai.

Tujash nuna tuu chichaina duka

maaniamunum puyajai ashí jinawagtatui”, tawai.

*Apajuí Israel aents aidaun atakea duwi yaigtin*

<sup>11</sup> “Nunú tsawan jegakui, Davita aakji tegaekau ataktu aakmamaina numamtuk, ataktu nii wegantunmaya Israel aents aidaun apuji wajas inamjatnai. Nuadui yaunchuk ayanum iman wajasagtinai.

<sup>12</sup> Nunikag edomnumia iwaku pujuidauk, tuja tikich aents mina emematjin aidaujai ataktu ashí Israel aents aidaujai awakjattajai”, tusa Tuke Pujuu nii dutikatnun tawai.

<sup>13</sup> “Kuashat trigo juwamu atin tsawan jegawai. Trigo juwamuk eke ashimchayatkujum ataktu nagkamajum ajakmattagme. Tuja uva juukbaushkam eke vino najantsuk ukuakjum ataktu uva ajaktatjume. Imatikau asagmin vino najanamu aidauk mujan-mash, nain aidaunmash yumijai betek shiig kuashat aitnai.

<sup>14</sup> Nunú tsawan uminkui, mina aentsug Israel aents aidau achija yajuakam tikich nugkanum batsatun jiiija yajuakan ikaunmatnaitjai. Dutika ai dita yaaktaji tsaikbau aidaun ataktu najanawag batsamas, uva ajakmakag vinon najanawag umuinak, tikich ajak aidaunashkam dita agájin ajakmawag, nuna nejen yuwinak shiig batsamsagtinai.

<sup>15</sup> Israel aents aidaunak waji ajakaitkuish wi dita nugken susauwaitag nuwi atakesh tegai ajapashtinun ajakmawagtatjai”, tusa Tuke Pujuu tawai, tiuwai Amós.

## Jonás

### Jonás awematatama intimkiuwa nunú, nayantsanum ajugkajua nujai pachisa agagbau

(1.1-16)

*Jonás Apajuín intimjukbau*

<sup>1</sup> Amitai uchiji Jonásan Apajuí chichajak:

<sup>2</sup> “Ninive yaakat múunta nuwí wetá. Nunikam dita chichagkum, atumi pegkegchaujig Apajuíyai ashí wantinkae. Nuadui Apajuí suwimkan susagatjai tujamui tusam ujakta”, tiuwai.

<sup>3</sup> Tusa timaitak Nínive wemainun ukuak, dekas tikich nugkanum Apajuísh wait-mainchaunum wetajai tusa, yaakat Jope lancha anumtajin jegauwai. Nunik jegakma makichik lancha wetatus uminas tepaun wainkauwai. Nunik España nugkanum yaakat Tarsis atushat asantai, imanui weakun Apajuín uumjuka ukuktajai tusa shiig aneas akikmak egkemjauwai.

<sup>4</sup> Tuja lancha juwaki nayantsanum ejapean wegai, pachiachbau Apajuí dasen shiig senchi dasenmitkatali, nayants senchi tsukatu. Imaniau asantai lanchak tsainkattak wajau.

<sup>5</sup> Imanitai aents lanchanum takau aidau chimpijuk ishamainak, kujaukmaikia senchi untsu untsamak dita apajuíjin segaidau nii yaimpakti tusag. Nuninak lancha tepeawai takunti tusag, waji aidau chimpijunak nayantsanum utsaawajui. Imaaninai Jonásak inítak waji chimpitainum waya shiig kanak egketu.

<sup>6</sup> Nunittaman lanchanum takau aidaun apuji jegantun chichajak:

“¿Kaja wajasuh, amesh juwish waji kanush egkemtame? ¡Nantakim amina Apajuíjum segata! ¡Wait anenjamag yaimpakchaintash!” tau.

<sup>7</sup> Tusa tayatak dita ditak pempeentunikiag chichainak:

“Yana utugchatjinig imajush iyanjamjae nunú dekaami”, tuidau.

Tusag nunú dekataiyai dekapkamá Jonásan ejeyajui.

<sup>8</sup> Nunikmatai Jonásan iniinak:

“¿Wagka jusha imajush iyanjamae? nunú ujabatkata, tuja amesh ¿wajinma takauwaitme? ¿Tuwiyamea miname? ¿Tuita nugkemesh? ¿Ya aentsuitpa?” tusa inidau.

<sup>9</sup> Tusa iniam Jonás ditan ayaak:

“Wika hebreo aentsuitjai, wika Tuke Pujuu Apajuí ashí najankauwa nuna emematainaitjai. Juka mina utugchatjui. Junak wi Tuke Pujuu uumjukan ukuakun tupikag duwi imaniawai”, tau.

<sup>10-11</sup> Tusa tutai, daseshkam aan senchi dasentak nuni senchi ishamain wajau asantai, senchi ishamaidau asag chichajuinak:

“Juka amek pegkegchau aní wekaeme. ¿Dase mijaakti tusaish iish amesh utug-mainaitji?” tuidau.

<sup>12</sup> Tusa tama nii aimak: “Juju dase ishamain waja duka dekas mina utugchatjui imaniawai. Dekas minak nayantsanum ajunkatajum, dutijuawagmin nayants tsukatak ishamain waja nunak mijaktatui”, tau.

<sup>13</sup> Tuja nayantsanum yujatan yacha aidauk shiig senchi wiyantuidau anumkami tusag, tuwash nayants nuni senchi dasentu asantai, anumainchau dekapedau.

<sup>14</sup> Nunidau asag Apajuín segainak: “Tuke Pujuuwah, juju aentsua juna tudaujin jinaati tusamek idaikagtusaipa. Nii jamainnumak ii aidautik waitbaitsuji. Juka ame diisam jutikame”, tuidau

<sup>15</sup> Nuna tusag Jonásan jukiag nayantsanum ajugkajui, dutikawagmatai nayants senchi tsukatbaunak mijaakui.

<sup>16</sup> Nunik mijakmatai, lanchanum takau aidau chichainak: “Tuke Pujuu dekas senchigtinai iman asantai, yamai nagkamsaik dekas Apajuí tuke umigkagmi”, tiajui. Nuna tusag kuntinun maa apeenak Apajuín ememataijui.

*Jonás namaka ampujin pujusa Apajuí segamu*

<sup>17</sup> Tuke Pujuu Jonásnak namak muuntan akuptukui, nunú Jonás nayantsanum iyaittaman kujajui. Dutika kujajam kampakum tsawan, kampakum kashi namaka ampujin pujusui.

## 2

*Jonás Apajuín ausamu*

<sup>1</sup> Nunik Jonásak namaka ampujin egkemas Tuke Pujuu niina Apajuíjin aujak,  
<sup>2</sup> aatus tiuwai:

“Tuke Pujuuwah, namaka initken tepeakun jajapi tibaijai.

Ashí jakan amina untsukmaijame,  
 dutika ai ame minak yainkabiume.

<sup>3</sup> Dekas nayantsa kunajin ajunkabiume,  
 ayatak yuminum egkemkan wekaebaijai.

Wainchi ishamain ame awemamu  
 tuku tukuji nagkaetibi.

<sup>4</sup> Minak dekas ajapjuaumeapi tibaijai,  
 tuja amina jem pegkegma nunak  
 ataktu awagkinuk wainkashtinapitja tibaijai.

<sup>5</sup> Shiig initak tepeabaijai,  
 nayants ijitua emegkatkabi,  
 initkanmaya dupa aidau buukjun pempenjibi.

<sup>6</sup> Shiig initak tepean nugkanum jegabaijai,  
 tuke jinkishtinapitja tibaijai.

Tujash Tuke Pujuuwah, mina Apajuíjuh, ame minak uwentijugmayume.

<sup>7</sup> Tikima jakun aminí anentaimjan,  
 untsukmaijame. Tusa untsamai  
 ame amina jem pegkegma nuwi pujusam antugtukmayume.

<sup>8</sup> Wainka apajuímtai aidau emematuinak  
 ima aminak umigtamainun idayinawai.

<sup>9</sup> Tujash wika kuntinun maa apeakun amina ememattatjame,  
 nuniakun wi amina ememattatjame tusan  
 tiuwaitjam nunak imatiksasuk umiktatjai.

¡Wagki ameketne uwentikagtinmek!” tiuwai.

<sup>10</sup> Tusa aatus timatai, Tuke Pujuu nunú namak Jonásan kukag iyakti tiuwai. Tusa tima  
 Jonásan kukag iyakui.

**Jonás yaakat Nínivenum chichagkagtukbau**

## 3

*Nínivenmaya aents aidau Apajuín umigkagbau*

<sup>1</sup> Tuke Pujuu Jonásan ataktu chichajak:

<sup>2</sup> “Nínive yaakat múunta nuwi wetá. Nunika jegaam wi amina akatjattajam nunú  
 etseşkata”, tiuwai.

<sup>3</sup> Tusa tima, Apajuí tibaun umiak Nínivenum weuwai. Yaakat Nínivek shiig múun  
 asamtai, ashí wekaesa wainkatag takuik, kumpatum tsawantai tenteemain aajakui.

<sup>4</sup> Nunú yaaktanun Jonás waya makichik tsawan Apajuí chichamen etsejak: “¡Juu  
 yaaktanak Apajuí cuarenta tsawan asa tsaitatui!” tau.

<sup>5</sup> Tusa etsegtai, ashí aents Nínivenmaya aidauk uchinum nagkamas múun aidauškam  
 pegkegchau takatnak idayinak, dekas Apajuí umigkagmi tuidau. Nuna tusag wake  
 besemag dekapenak, jáanch pegkegchaun nugkukag yujumkan ijagmawag Apajuín  
 segainak batsatu.

<sup>6</sup> Tuja Níniven apujishkam nuna dekauwai. Nunik niishkam ekemsa inamtaijin  
 eketu wajaki, jáanch apu nugkutai nugkuagbaunak awimak ukuak, jáanch pegkegchaun  
 nugkuja nugká pujusui. Nunak Apajuín eme anentus nunikui.

<sup>7</sup> Nunik pempeenmawaik, apu niina atuwe aidaujai chichaman umika ashí aents  
 Nínivenmaya aidau akuptak: “Makichik aentskesh yujumkanak yuwashntime. Tuja  
 tagku aidauškam ayugnashiti, yumish sunaschati.

<sup>8</sup> Duka puyatjutsuk ashí aents aidautijum wake besemag pujaku nugkutai jáanch  
 pegkegchau aidau nugkuktajum, nunikjum Apajuí senchi untsuktajum. Nuniakjum maki  
 makichkitijum pegkegchau takamtajum, magkagtutajum aidaujai idaisatajum.

<sup>9</sup> Nunika ajinish Apajuí iina kajegtamak suwimkan amastag tiu akush, wait anenjamag  
 tsagkugtamtajamti jinutsuk iwaku pujuschainjiash”, tiuwai.

<sup>10</sup> Tuja ashí aents Nínevenmaya aidau pegkegchau takatan idaisagmatai, Apajuí  
 suwimkan susatjai tiuwaitak, dekas dutikashtatjai tusa idaisauwai.

## 4

*Jonás kajebau*

<sup>1</sup> Apajuí Nínivenmaya aents aidaun tsagkujung suwimkan sutsuk idaisantai, Jonás senchi kajekui.

<sup>2</sup> Nunik Tuke Pujuu chichajak:

“Tuke Pujuuwah, wika juna aneasan tuyajai. Wi mina nugkajui pujusan anentaibiang duka imatiksamek umikume. Amek Apajuí pegkeg, wait anenkagtiin, wamak kajechu, anentak wajasuitam iman asam, suwimkan susattajai timesh awake anentaimjam, suwimak sutsuk idainaitam nuna dekau asan, wika amina ukukin Tarsis nugkanum atushat tupikattajai tibajai.

<sup>3</sup> Ame suwimak sutsuk idayam nunú minak shiig awajatsui. Aaní pujutnaitkumek dekas minak mantuata. Iwaku pujusan ame suwimak suwatsum dutikakmin anentaimku waittan dakitajai”, tiuwai.

<sup>4</sup> Tujash Tuke Pujuu niina ayaak:

“¿Amesh wagka wainkamesh kajeame?” tiuwai.

<sup>5</sup> Tusa tima yaaktanum pujau jiinki, etsa minitaiya nuni yantamnum numi kupig pataja bikintu wajasmatai, nuwi waig ekemas Apajuísh yaaktanash itugkatig tusa diyaak eketu.

<sup>6</sup> Nuwi pujaig Tuke Pujuu makichik ajakan tsapapiuwai, dutikam nunú Jonás pujamun bikintu awajsauwai. Nuni yaigkui Apajuí Jonásan senchi etsa sukuak waitkasai tusa. Dutikam Jonásak shiig aneas nuna wakentin bikintunum pujau.

<sup>7</sup> Nunik pujai tsawak kashikmas Apajuí shuni numin yuwatí tima yuwauwai. Dutikam nunú numi jakauwai.

<sup>8</sup> Nuniku ai kashikmas etsa jiinai, Apajuí dase sukutnun etsa akaetaiya nuwiyen dasenmitkakui. Nunú shiig senchi sukuam Jonás jamain dekapeak:

“Iwaku pujutnak dakitajai, jakatag tajai”, wajau.

<sup>9</sup> Imattai Apajuí chichajak:

“¿Anú numi jakamtai kajeam dusha pegkejan aniajai tamek?” tau. Tusa tama Jonás ayaak:

“Ehe, wika pegkejan aniajai. ¡Senchi kajeakun jajai!” tiuwai.

<sup>10</sup> Tusa tutai Tuke Pujuu chichajak:

“Aanka ame ajachbau, tuja nuigtush ame tsakapagchamu nigki kashi tsapai tsakaja, tikich kashia duwi jaka tsawaja nunú ame puyatjame.

<sup>11</sup> ¿Ame numikesh puyatjam nunash, wi ciento veinte milan nagkaesau aents Nínivenmaya aidau shiig dekachu asag uchijai betek yuja nuna, nuigtu kuashat kuntinchakam ayá nuna wait anenjashtag? Nuadui wika wait anentajai”, tiuwai Apajuí.

## Miqueas

### Apajuí yaakat Samaria pegkegchaujin diijus tsaiktin pachisa, Jerusalén pachisa, tikich yaakat Judá wegantunu aidaujai chicham umigkamu

(1—3)

*Apajuí yaakat Samaria pegkegchaujin diijus tsaiktin pachisa etsegkamu*

<sup>1</sup> Tuke Pujuu Samarian Jerusalégjai dita pegkegchaujin diijus tsaiktinjin pachis Miqueas Moréset nugkanmaya aajakua nuna ujakuí. Nunak Judá wegantu aidaun apuji aidau Jotam, Acáz, Ezequíás aatus takasu aina nunú tsawantin ujaak aatus tiuwai:

<sup>2</sup> “¡Ashí aents aidautijum wi taja nunú antuktajum!  
¡Juju nugkanmaya aidautijum shiig antukjum jukitajum!  
Tuke Pujuuk niina jee pegkegma nuwi pujusag,  
atum suwimak jukitnun pachis etsegkattawai.

<sup>3</sup> Tuke Pujuu niina pujusa inamtaijin pujau ukuak,  
muja titijin taa nuwi wekagas tattawai.

<sup>4</sup> Tuja nii taa mujan najataik,  
muja aidauk wiya jinum sukuam yumimegama  
numamtuk wajaktinai,  
tuja muja najatamu paka aidauk  
yumi senchi yutak nugkan yumpuwama imanik  
yumpunag kanaktinai.

<sup>5</sup> Duka Israel aents aidau intimtaijin,  
tuja dita tudaujin nuniktinai.  
Israel aents aidauk Samaria nugkanum pegkegchaun takamsau ainawai,  
untsu Judá wegantu aidauk wainka apajuímtai dakumka najanamu aidaun  
Jerusalégnun jegamjujag nuna emematujaku ainawai.”

<sup>6</sup> Nuadui Tuke Pujuu chichaak:  
“Yaakat Samarianak tsaikatjai,  
dutika ai ayatak kaya tuwasua weaku,  
jega atsau ayatak uva ajakmamain awajsattajai.  
Tuja muja najatamu paka aina nuwishkam,  
nunú kaya aidaun nagkinkattajai.  
Dutikan yaakat najanku kaya aepkamunash ipaantujan pan awajsattajai.

<sup>7</sup> Tuja dita apajuímtaiji dakumka najanamu  
Samaria nugkanum ayá duka ashí tsainkattawai.  
Tuja dita ememattai numi aina dushakam ashí apenkattawai.  
Nunú dita apajuímtaiji aina duka  
nuwa akika dutiktai aidaun kuichkiji juki  
najanamu asagmatai, jinum jiya ukuijan ataktu  
nuwa akika dutiktai aina nuna kuichkiji awajsattajai”,  
tjutmayi Apajuí.

*Miqueas buutbau*

<sup>8</sup> Nuna antukan shiig senchi wake besemag dekapeakun senchi buutjai,  
nuniakun wisu sapatjinchau wekaesan,  
bakantau shinau wajakun, lobo buutu wajajai.

<sup>9</sup> Samarianmaya aents aidaun tudaujig tsagkugnainchou,  
Judá wegantu aidaun tudaujinash amaigkae,  
imaniak mina aentsug aidau Jerusalén batsata  
imaniuishkam jegae.

<sup>10</sup> Tujash Gadnumia aents aidauk juju pachisjumek ujakaigpajum,  
buuttakesh buutigpajum,  
ayatak wake besemag dekapeakunum  
Bet-le-afránmaya nugka yukukuntua nuwi tadaejatajum.

<sup>11</sup> Bellavistanmaya aents aidautigminak achipajag jujamkiagtinaí,  
dutiJamawagmatai wainka inataijai betek,



wisu datsan shiyaktinaitjume.

Atum pujamun ijus tikich yaaktanum batsamin aidau buutiagtinaí.

Tujash dutika jujabiagtaish, Zaanágnumia  
aents aidaush atumnak ayamjupakchagtinaí.

<sup>12</sup> Tuja yaakat Amargura batsamin aidauk  
ayamjupaktinme tusa dakamainak waitiagtinaí.

Tujash Tuke Pujuuk Jerusalén waitainum nagkamas suwimkanak susatnai.

<sup>13</sup> Atum Laquishnumia aidautigmek,  
caballo senchi tupikain

carro maanitainum jigkajum umintsatajum.

Siógnumia aents aidauk Laquishnum  
pegkegchau takatnak unuimaju ainawai.

Tuja nuwi Israel aents aidaushkam

Apajuín intimjukiag pegkegchaun takasu ainawai.

<sup>14</sup> Atumi nugkem Moréset-gat tutaya duka  
tuke ukuakjum ukuktajum.

Tuja Israel aidaun apuji aidaunak  
yaakat Aczibnumia yaigchagtinaitak  
wi yaigtatjime tusag tsanujaje.

<sup>15</sup> Tuke Pjuuu chichaak:

“Maresánmaya aents aidautigmin depetamak amupaktinme tusan  
aents maanita yachan ataktu awetittajime.

Nunú minitaik Israel aents dekas wajuu aidaush,  
nuna ishamak pisajag waa Adulam tutaya  
nuwi akumjagtinaí.

<sup>16</sup> Jerusalégnnumia aidautigmek buuttajum,  
nuniakjum susujum awagtajum,

buuttajum nuniakjum awamagjum,  
chuagka buukejai betek pinui wajastajum.

Atumi uchijum aneetaijum aidaunak,  
achijag tikich nugkanum yajuakagtinaí”, tawai.

## 2

*Aents ujudauch aidaun waitkaidauk suwimkan jukiagtin*

<sup>1</sup> Aents pegkegchau aina nunak wait anentuinajai,  
wagki ditak depetmak batsatu asag, ememainak  
wajina pegkegchaun takastag tuinawa nunak  
kaja kajanmaske uminawai.

Nuadui nantaamuik nunak betek dutikainawai.

<sup>2</sup> Tuja nugkan wakegainakug  
tikichi nugken atantuinawai,  
tuja jega aidaun wakegainakushkam,  
tikichdaun atainiag juwinawai.

Dutikainak jennunak niina nuwe, uchiji aidaujai  
tsanujag jülki ajapawag waitkainawai.

<sup>3</sup> Nuadui Tuke Pjuuu chichaak:

“Wishakam atum suwimak jukitnunak chichaman umikjai.

Suwimak katsunmainchau amastatjime,  
nuna uwemtumainuk makichkish atsuttawai.

Suwimak ishamain katsunmainchau asamtai,  
emema yuja nunak nunikchagtatui.

<sup>4</sup> Nunú tsawantin aents aidau dushiktamiagtinaí,  
nununak juna aatus kantamjupainak:

‘¡Ashí depetkam wainak juwakaje!

¡Yaunchkek Apajuí aentsji ayanume,  
tujash nunak idaisaje!

¡Iina suntaji aidau depetkagmatai,  
dita nugke aidauk ii akandaija yajuakji!’ tiagtinaí.

<sup>5</sup> ¡Israel aents aidautijum antuktajum!

Atumek mina aentsug ayugme,  
tujash wika nugkanak ataktuk amaschagtatjai”, tujamui.

*Profeta waita etsejin aidau*

<sup>6-7</sup> “Atum waita etsejin aidautigmek  
Apajuí profetaji chicham pegkegchaun ujat kai!”  
tusajum dakitagme.

Atumek utugchat ajutjamu dekakjumes,  
dekaskeapi tatsugme.

Nuadui profeta etsegbau antutak dakitagme.

Nuniakjum: “Apajuik jutijaig shiwagchawai,  
Apajuik jutiinak kajegtamkash idaitamsuk atsane pujuttawai,  
nuigtush Apajuik aajag dutikchawai,  
Apajuik ashí aents aidau pegkejan takaidaunak  
shiig kuitamnai”, tajume.

<sup>8</sup> Atumek mina aentsug aidaujai shiwagmaejume.

Tuja maaniamunum shiyaku aidau  
uwemjajiapi tusag shiig aneas waketug minidaushkam,  
jáanch akik aidaun yajuak minidau atanjume.

<sup>9</sup> Dutikakjum dita jee aneetaiji aidaushkam  
atum atankujum nuwa aidau jiiki ajapeagme.  
Dita uchiji aidaun wi susauwaitag dushakam  
tuke jujuki emegkatjume.

<sup>10</sup> Nuadui atumek juwi batsamsuk, jijnja shiyaktajum!  
Juwig dita wakegamun takainak batsamsatnume tichamui,  
tuja atum pegkegchau awajsau asagmin,  
juka ashí tsainkattawai.

<sup>11</sup> Makichik aents nigki nagkami waitjak:  
“Vino senchi kajiau umamuk pegkejai,  
tuja tikich uwaja nampetai aina dushakam pegkejai”,  
tawa nunú atumek dekas profeta pegkejai tajume.

*Apajuí niina aentsji aidaun uwemtikjatin*

<sup>12</sup> Israel aents aidau ujumchik iwaku batsatunak yajuakan,  
uwig makichik wenuknumak ijumaina numamtuk ijumjattajai.  
Dutika ai shiig aneena, kuashtachuitak,  
kuashat pampaumaina imatiagtinaí.

<sup>13</sup> Apajuí eemak jinta jintama wetinai,  
nunitai dita pataekagtinaí,  
yaakta waitijiya nuni jijnjagtinaí.  
Nunikagmatai dita apuji Tuke Pujuu eemak wetinai.

**3***Israel aents aidaun apuji pegkegchau aidau chicham akuptukbau*

<sup>1</sup> Israel aents aidaun apuji aidautijum  
juju yamai antuktajum!

¿Atumchaukaitjum shiig takastinme tusa  
etegkamu aidautijum?

<sup>2</sup> Tujash atumek pegkeja nunú kajejakjum,  
pegkegchauwa nunú takagme.

Nuniaú asajum mina aentsug aina nuna neje  
ichiaja yajutkajum ayatak ukunchik emajum ukuajume.

<sup>3</sup> Tuja atumek mina aentsug aidauk iwakuk yuwagme,  
dutikakjum duwape ichinjajum,  
neje ollanum painkatasa akaaja ukunchi tsupigtayama imatikagme.

<sup>4</sup> Makichik tsawantai Tuke Pujuu untsuktinaitjume,  
tujash niig aigmakchagtinaí.

Atumek tikima pegkegchau ainajum duwi  
Apajuí atumnak uumjutpakagtinaí.

*Profeta waitan etsejin aidau*

<sup>5</sup> Mina aentsug aidauk profeta waita etsejin aidau  
tsanumainak, utugchatak atsuttawai tuina  
nuna antujuinak pegkegchaunum yujawai,  
nunú profeta aidauk ya ditan yujumkan ajampeawa

nuna shiig anentuinak,  
 yujumkan ajampenatsu nunak kajejuinawai.  
<sup>6</sup> Nuadui wi wajina dutikatag taja nunak  
 ataktuk ditanak ujakchagtinaitjai.  
 Ajumaish ditanak makichkish dekamtikashtinaitjai,  
 nuadui ditak wajig nagkaemaktinaita  
 nunak makichkish etseggashtin ainawai.  
<sup>7</sup> Nuadui nunú profeta aidauk,  
 anentaimas dekamin aidaujai shiig datsantan juwakagtinai.  
 Wagki Apajú jintinchamush wajinak etseggatnume nuninak  
 wainak chichá yuja nunak itatjatnai.  
<sup>8</sup> Untsu minaig Tuke Pujuu Wakani pujau asa,  
 nunú minak senchimtijawai.  
 Nuadui wika Apajúk dekas  
 shiig betek imatikas takawai tajai.  
 Tuja nuigtushkam Israel aents aidauk  
 pegkegchau intimkiu ainawai tajai.

*Jerusalén tsaikbau*

<sup>9</sup> Apajú chichaak:  
 "Israel aents aidaun apuji aidautijum antuktajum.  
 Atumek tsanumtsuk shiig takata duka dakitajume,  
 tuja chicham umiktina dushakam yapajiajum takagme.  
<sup>10</sup> Jerusalégnumak,  
 tuja mina jegag pegkegma nuwishkam,  
 pegkegchau takat, tuja magkagtut aina duka  
 makichkish mijamsuk tuke imani awai.  
<sup>11</sup> Apu chichama epegkin aidauk ya kuichkin akikmawa nuna yainawai,  
 tuja sacerdote aidaushkam kuichkin akigkatnume tusa jintinkagtuinawai.  
 Profeta aidaushkam kuichik akiam chichaman etsejuinawai,  
 nuninak: "Tuke Pujuu jutijaig pujawai,  
 nuadui suwimkanak amaschattawai", tuinawai.  
<sup>12</sup> Atumi pegkegchaujin mina jegag pegkegma duka tsainkattawai,  
 tuja atumi pegkegchaujin Jerusalégkak tsaikam aents atsau bashiak asattawai.  
 Tuja muja pegkejam Siógkak dupa ijiam asattawai", tawai.

**4**

*Tuke Pujuu ashí nugkanum inamjatin*

<sup>1</sup> Tuke Pujuu jee pegkejam awa nunú mujak,  
 tikich muja aidaun nagkaesau dekas muja shiig múun atinai.  
 Nunú mujanum ashí aents tikich nugkanmaya aidau  
 shiig kuashat kauniagtinai.  
<sup>2</sup> Kuashat aents nugka muunnumia aidau kaunainak:  
 "¡Minitajum muja Tuke Pujunua nuwi wakagmi,  
 nunika Jacopa Apajújiya nuna jeen jegawagmi,  
 awi Tuke Pujuu niina chichame umiktin agagbauwa nuna  
 jintinjamantai, iish nunú antuka umikagmi!" tiagtinai.  
<sup>3</sup> Tuke Pujuu aents nugka muunnumia aidaunak,  
 tuja atushtanmaya aidaunashkam suwimkan susattawai.  
 Tuja utugchat ataishkam nii epegkeatnai.  
 Nuadui dita aidauk puyagjinak  
 ajak ajakmaku takatain najankagtinai,  
 untsu nagki aidaunak trigo tsupitain najankagtinai.  
 Dutikawaju asag nugka muunnumiagkesh  
 tikichjai maaniauk makichkish atsutnai.  
 Tuja maaniatag tusa uminku  
 suntagmaebaushkam atsustinai.  
<sup>4</sup> Nuadui ashí aents aidauk ishamkagtutsuk  
 maki makichik dita uva ajakbaujin, higo ajakbaujin  
 nuna wakentin bikintunum shiig agkan  
 ayamainak batsamsatnai.  
 ¡Nunak dekas Tuke Pujuu ashí senchigtina nunú aatus tawai!

<sup>5</sup> Tuja tikich aents aidauk  
dita apajuímtaiji aidaun umijuinawai;  
dita núninakuish, iik Tuke Pujuu iina Apajuíjiya nunú  
atakea duish tuke umigkatin ainaji.

<sup>6-7</sup> Tuja junashkam Tuke Pujuu chichaak:  
“Mina aentsug aidauk  
wi suwimak susam waituidau asag,  
uwigjai betek yawekag, shutusag wainak yujawai.  
Tujash dukap atsuk ataktu yajuakan ijumjattajai.  
Nunú tsawan jegamtai,  
ujumak iwaku batsatun yajuaka ijumjan,  
ataktu shiig kuashat senchigtin awajsatnaitjai.  
Dutikan wi dita apuji wajasan  
mina jegag pegkegma nuwi pujusan inamjatnaitjai.

<sup>8</sup> Muja Siógkah, ame yaakat Jerusalén mina  
aneetaijua nunú ejakam kuitamin ayume,  
nuadui ataktu yaunchuk aayum iman wajastatme.  
¡Ame atatme mina aentsug aina nuna  
dekas yaaktaji shiig múun!”\* tawai.

<sup>9-10</sup> “¿Wagka tujash Jerusalégka amesh  
nuwa uchin najaimak buutama imanikmesh buutme?  
Amek wainkamek buutmaitsume,  
amina apugmik pujawai,  
tuja apu chichagkagtin aidaushkam batsatui.  
Dekas buutttag takumek, amina aentsjum aidau  
ukugmakiag ikam ajanum batsatun,  
babilonianmaya aidau achijag yajuakagtina nunú  
anentaimsam buutta.  
Dutikawagmataish, wi ditanak ayamjukan  
uwemtikjan agkanmitkawagtinaitjai.

<sup>11</sup> “Kuashat aents nugka muunnumia aidau  
amina shiwagmatjamainau asag chichainak:  
‘¡Utusag Jerusalégkan tsaikanum tusa wakegaji!’ tuinawai.

<sup>12</sup> Tujash nunú aents aidauk Apajuísh wajinak dutikatag tawa nunak shiig dekainatsui,  
Apajuí ditanak trigo tsupija ijumja jigkatiana  
numamtuk awajkatta nuna  
ditak dekainachu asa tuu yujawai.

<sup>13</sup> ¡Pai Jerusalégkah!

¡Nantakta, nunikam dekegka tsaikta!

Wagki Apajuí chichaak:

‘Wi aminak depetmakti tusan toro senchia iman,  
kachuji jiju hierro katsugma ibau,  
nuigtush nanchiki bronce katsugma iman awajsatagme.  
Dutika ai depetkam dita wajiji kasamka ijumtai aina nunú  
ashí yajutkam mina sujustinaitme,  
wagki ashí nugka duka midau ainawai’, tawai Apajuí”,  
tiuwai Miqueas.

## 5

*David wegantunmaya apu wajas inamjatin*

<sup>1</sup> Jerusalégnumia aidautigminak tentempawaje,  
atum ayamjumaktinjum umintsatajum.

Apajuí atumi shiwaajum aina nuna ishikut,  
Israel aents aidau apujin senchi suwimkan susattawai.

<sup>2</sup> Untsu Belén Efrata tuuta awagmatia,  
nuwiya aidautigmek, tikich Judá wegantu aina nujai  
diismash ujumchik ainagme.

\* **4:8** “Yaakat shiig múun” tawa nunak apach chichamnum “capital” tawa nunú taku taji.

Nuninuch ainayatkujum,  
eme anentsa chichagtai atinaitjume.  
Wagki atumi patayi aajakua nuwiya  
apu atin akiina Judá wegantunum inamjattawai.\*

<sup>3</sup> Tuja Tuke Pujuuk  
nuwa uchin uchigmaktin ejajjuk puja  
nunú uchigmakmatai,  
niina aentsji aidaunak ataktu yaigtin asa,  
yamai nagkamas ima ditanak idaiwai.  
Nunú uchi akiinamtai, tikich Israel aents aidau  
shiwag amuam iwaku juwaku aidau  
dita patayi aidaujai ijunjagtinai.

<sup>4</sup> Nunikagmatai aents uwija kuitamnuijai betek  
nunú apu Apajuí senchijijai ditan kuitamkatnai.  
Tuja nunú apuk ashí nugka nagkatkamunmash inamjatnai.

<sup>5</sup> Nuniak nii agkan pujutan amastinai.  
Tuja asirianmaya aidau iina nugken utsanawag  
jega múun aidaun atanjamjatag tuinakuig,  
siete apu aidau ocho suntaja apuji aidaujai  
ditan jetektinme tusa ishiaktatji.

<sup>6</sup> Dutika depetka Asiria, Nimrotan nugkega nunú utsaantua ii jukitnaitji.

*Shiwag aidau ijinatin*

<sup>7-8</sup> Tuja maaniamunum jinachaju aidauk  
tikich aents aidaujai apatka diismash,  
chijichi yumi ukatchamaitak,  
Tuke Pujuu yumi yutumtijamu yutak uchupjam  
pegkegchin iwagnama iman agtinai.  
Tuja nuigtushkam león tagku wenuken waya,  
uwig aidaun ashí ijinama iman agtinai.

<sup>9</sup> Tuke Pujuuwah, amek amina shiwaajum aidauk  
imatika jetekam ashí ijinatnaitme.

*Ashí tsaikbau*

<sup>10</sup> Tuke Pujuu chichaak:

“Nunú tsawan jegatna duwi,  
amina caballojum maanitai aidaunak  
ashí ijituattagme,  
dutikakun carrojum aidaunashkam tsaigkattagme.

<sup>11</sup> Tuja yaaktajum aidaunashkam kumpin jiigbau ayá nujai ashí tsaiktinaitjai.

<sup>12</sup> Tunchijum aidaunak,  
anentaimas dekamin aidaujai ashí ijituattagme.

<sup>13</sup> Amina apajuímtajum aidaunak,  
tuja dakumka kaya najanamua aina nujai ashí tsaiktatjai.  
Dutika ai ame najanamua emematu pujam duka  
ataktuk emematchatnaitme.

<sup>14</sup> Yaaktajum aidaunak ashí tsaiktatjai,  
tuja amina apajuímtajum Astarté,  
dakumka najanamua nunashkam,  
numi aidau emematam nujai tsaiktatjai.

<sup>15</sup> Ashí aents tikich nugkanmaya aidau  
mina umigtutan dakitjau aina nunak  
mina umigtukchagbaunum iiknakun  
shiig senchi suwimkan susagatjai”, tawai.

## 6

*Apajuí Israel aents aidaun kajegkamu*

<sup>1-2</sup> Israel aents aidauwah, shiig antuktajum.

Tuke Pujuu atumin kajegtamak chichaak:

“Mina aentsug aidauwah,

\* 5:2 Juju versiculonum chichá duka Mt. 2.6numshakam augmatui.

atumi utugchatjumin dekajuajime,  
 nuniku asan, yamai ayamjumaktajum tajime.  
 Atum ayamjumaku chichamun antukag,  
 nunak dekas tawai tusa amina yaimpakagtina nunú,  
 muja aidau, nain aidau utsuka ijumjam,  
 atum antugtagmin chichamjumaktajai titajum.

<sup>3</sup> “Tujash nunú ame eke chichaktin aminig wi tajame:  
 ¿Wisha aminash itugkamjame? Atsa dutikachkunush  
 ¿wajinma pegkegchaush awajkajame? Nunú tujutta.

<sup>4</sup> Atumek Egipto nugkanum inaku waitkatai batsatutigmin  
 wi jiijan agkanmitkauwaitjime;  
 atumin yaimpakag jiiipagtinme tusan  
 Moisésan, Aarórgan, Marian ishiakamiajai.

<sup>5</sup> Mina aentsug aidauwah,  
 Moab nugkan apuji Balac  
 atumin pegkegchaunum yumigtamjatag tuyi,  
 tujash Balaam mina daajui atumin  
 pegkegnum yumigtamjabia nunú adeagtajum.  
 Tuja nuigtushkam Sitim nugkanum juwaki,  
 Guilgal shimamunmash waji utugchat igkugkabiugme  
 nunú kajimattsuk aneaku atajum. Nuniakjum,  
 dekas Tuke Pujuuwap yaimpakuita titajum”, tiuwai.

<sup>6</sup> Tusa timatai dita chichainak:

“Tuke Pujuuwah, amek múuntaitme.

¿Ame emematkuish, iish waji jukiya aminish tamainaitji?

¿Toro tsakat makichik mijanji ajamu maa  
 nuna neje ashí apeakuika emematmainaitag?

Tujash amek duka wakegatsme.

<sup>7</sup> Dutikachkuish mil carnerok,  
 atsa diez mil namak amaina ibau kuashtak  
 aceite anentag amamainaitag.

Tuja dushakam aminak shiig awajtamtsui;  
 amek iina tudaujinig iina uchiji iwai aina nuna  
 sujustinme tusamkesh tatsume”, tuidau.

<sup>8</sup> Tuke Pujuuk atumnak tuwita pegkejash,  
 tuja aminunash wajina wakegawa nunak  
 yaunchuk ujapakagmae.

Duka utugchatchauwai shiig yupichuchi,  
 tuja duka juju ainawai:

Shiig takata nunú aneetajum,  
 nuniakjum aents imanchauch aidaush wait anenjatajum,  
 nuniakjum emematsuk ima minak emematjitajum  
 tusa Apajuuk wakegawai.

## 7

*Apajuuk niina aentsji aidaunak wait anentug tsagkujawai*

<sup>18</sup> “Apajuújuh, tikich Apajuú amejai betekak atsawai.

“Amek amina aentsjum ujumak iwaku batsata  
 nuna pegkegchauji tsagkujakum,  
 intimtaji aidaush kajimatkim idaime.

Amek jutii aidauti anejatu asam,  
 kajekmesh tuke nunismekek pujatsme.

<sup>19</sup> Nuadui wait aneasam ataktu wait anenkagtujam,  
 iina tudauji aidauk

dekas nayantsa kunajin ajugka ajapata.

<sup>20</sup> ¡Iina apachji Abraham, Jacob,  
 nuigtu tikich iina muunji aajaku aidau  
 anagkuawaitam duka,

dutiksamek wait aneasam amina anenkagmin  
 tuke kuitamkagtuktin ata!” tijaui.

## Habacuc

*Profeta Habacuc Tuke Pujuujai chichasbau*

<sup>1</sup> Profeta Habacuc aajakua nuna Apajuí nii aentsji aidaun chichama ujakti tusa iwaintukui.

<sup>2</sup> “Tuke Pjuuwah, yainkata tusan senchi untsuagme, tujash amek minak antugtatsme.

¿Wajutiya minash antugtuktatme?

Pempeentuniki waitkaniamu ayá nunú suwimak susam emegkagta tusan segamjame, tujash amek makichkish duka dutikatsme.

<sup>3</sup> ¿Wagka minash ibau pegkegchau aidau iwaintugkumesh waitkajame?

Pegkegchau takat aidau, utugchat aidau, yaakat tsayamu, jiyaniamu, maaniamu aina duka makichkish agkaatsui, ashí yantamnum ayawai.

<sup>4</sup> Amina chichamem umiktin agagbaunak makichkish uminatsui,

ajantunisag shiig aneas betek yainidauk makichkish atsawai.

Aents pegkegchau aidau aents pegkeg aidaun waitkainawai.

Tsanumat, kasamat aina duka

ashí yantamnum ayawai”, tiuwai Habacuc.

*Apajuí suwimak sukagtustin etsegekamu*

<sup>5</sup> Tusa tímatai Apajuí ayaak:

“Tikich aents aidau batsata nuwish

wajukeawa nunú shiig diistajum.

Aunak dukap tsawan atsuk wi dutikattag

nunú wainkajum anentai jegashtatjume.

Juna tikich ujpainakuig,

atumek dekaskeapi tumaitsugme.

<sup>6</sup> Caldeo aents pegkegchau magkagtin aidau

ashí nugkanum yujasag,

tikichi nugken atankiagtatus wakeyin aina nuna

inajagtatjai jetepaktinme tusan.

<sup>7</sup> Ditak pegkegchau takatnum eemkau ainawai,

nunin asag, dita wakegamun takau ainawai,

nuadui makichkish tumainchau ainawai.

<sup>8</sup> Aents caballonum maanin aidauk shiig kuashat

caballonum entsatkau atushat minisag

tutugtuinawai.

Nunú caballo aidauk ikamyawan nagkaesau senchi tupikainawai,

tuja nuigtush uwegshunmaya lobo kajen ajankachua nuna nagkaesau ainawai.

Iman asag atushat minisag

dita shiwaajinak águila yutaijin wainak,

nanaak akaetuki achiyama iman ainawai.

<sup>9</sup> Dita shimuinakug ashí ijina shimawai,

imaaninak senchi uwakmakag shimawai,

tuja aentsun achijag yajumaina duka,

nayantsanum kayam dekapamainchauwa iman weakui.

<sup>10</sup> Iman asag apu aidaunak, tuja tikich aents

eme anentsa diitai aina nunashkam dushikinawai.

Yaakat peejamu aina nunak

wainkauch diinak dushikinawai,

nuninak kamatkanum batsamas yaaktanak utuinawai.

<sup>11</sup> Dase senchi dasentak kedegtuk nagkaemama iman ainawai.

Iman ainakush dita senchijiya nuna

apajuímaidau asag tunamainawai”, tiuwai.

*Profeta kajeka ataktu chichakbau*

<sup>12</sup> “Israel aents aidaun Apajujiyah,  
amek pegkejam tuke pujuuwaitme;  
jinatnume tusamek idaikagtusaipa.

Amek amina aentsjum aidaun suwimak susam jintintuatag  
tusam, caldeo aents aidaun ishitkaume.

<sup>13</sup> Amek pegkegmaitam iman asam,  
pegkegchauwa duka atsane pujuchuitme,  
tuja tudaushkam dakitnaitme.

Nuadui ayatkek dii pujuipa, tuja aents pegkegchau aidaun  
aents pegkeg aidaun maatnume tusamek  
agkan idaisaipa.

<sup>14</sup> ¿Wagka aents aidaush  
nayantsanmaya namak aidaujui betekash,  
tuja kuntin apugtuchu aina nujai betekash awajsaume?

<sup>15</sup> Nuadui caldeo aents aidaun,  
aents namaka main agsean ajuntuk,  
tuja retan nená yupichuch  
kuashat namakan achiyama numamtuk  
aents aidaun achija ijumainawai,  
dutikawag nuna diisag shiig aneenawai.

<sup>16</sup> Nuadui nunú aents namaka main aina duka  
niina redjin, agseajijai emematuinak  
kuntinun maa apeenak,  
kugkuin inciensonashkam apeenawai,  
wagki ditak duwi maawag  
dita yuwatnujinak shiig kuashat ijumag batsatu asag,  
shiig aneas batsatui.

<sup>17</sup> Caldeo aents aidaun wainak mau batsamtitnume  
tusamek idaikagtusaipa”, tiabiajai.

**2***Apajuí inagnak Habacukan aikbau*

<sup>1</sup> Nuna pachisan Apajuin segau asan,  
suntag jinta niimin ekemas niimak ekemama numamtuk  
Tuke Pujush wajinjuttig tusan dakakun pujubiajai.

<sup>2</sup> Nunikan pujai Tuke Pujuu mina aijak:  
“Wi amina iwaintuktatjam nunú  
tablanum paan shiig wainmain agagta,  
dutikamu asantai, tikich aidaush yupichuch ausatnume.

<sup>3</sup> Nunú ame wainkattam duka  
juu tamawaikik nagkaemakchattawai,  
tujash amek waugtutsuk dakasta,  
nunú nagkaemaktinuk eke tsawan jegatsui.  
Tujash duka makichkish megkaetsuk  
tuké uminkattawai”, tujutmayi.

*Aents pegkegchau aidaush wajukatruk ainawa*

<sup>4</sup> “Tuja wi agagta tajam nunak juna tajai:  
‘Aents pegkegchau emebau aidauk jinawagtinai,  
untsu aents pegkeg ima Apajuínak umijuidauk jinachagtinai.’

<sup>5</sup> Aents emebau aidauk apu atag tusag wakegainawai,  
vino pegkejaitak enamkagtuwama nujai betek ainawai.  
Tikich aidaun nagkaesau amí tuidau asag,  
makichkish ayámjutsuk yujajus  
aents tikich nugkanmaya aidaun amuinawai.  
Dita aidauk jaka megkaetaijai betek,  
tuja ukumatai aents jakaun dakitmaitsu nujai betek ainawai.  
Nunin asag ayatak wenawai.

<sup>6</sup> Tujash ditak yana waitkainawa nunú pempeentuki dushikiam agtinai.  
Dutika dushikinak:



‘¡Ame tikich aents aidaun wajiiji yajutkam  
wiakuch wajasum nunak wait anentagme!  
¿Amesh wajutiya kasamtash idaisattame?’

<sup>7</sup> “Ame waitkam nunú pachiachbaunum  
pempeentugmakiag waitkagmasagtinai,  
imatijamainakui sapijai kujaitnaitme,  
tuja amina wajijum aidaunak ashí atanjamjagtinai.  
<sup>8</sup> Tikich nugkanmaya aidaun ijunag chichama umikag,  
ame dita kasajauwaitam dutiksag ditashkam  
ashí kasagtamjagtinai.

Dutik akikmaktatme ame juju nugka juwiya  
aents ijinkum yaakat aidaun tsaikuitem nuadui.

<sup>9</sup> ¡Kasamkamu aidaun,  
tikich tsanuja yajutkamu aidaunajai  
amina aentsjum aina nunú wiakuch awajsaum,  
nuadui aminak wait anentagme!

Ame anentaimesamek,  
jutikanus shiig batsasainja tamestai.

<sup>10</sup> Tujash ayatak datsanmain iwaintukume.  
Kuashat aents tikich nugkanmaya aidaun ijinatjai  
tukamam, amek pempeentumakim amumakume.

<sup>11</sup> Yaakat peejamu aidaun, jega ayanke aidaunajai  
ame pegkegchau takamsamua nuna pachisag  
aentsjai betek senchi untsumiagtinai.

<sup>12</sup> “¡Amek aents aidaun ijinkum,  
dita nugke atanjam nuwi yaakat najankaume,  
nuadui aminak wait anentagme!

<sup>13</sup> Tujash ame waittsa umikum duka wainka imatikaume,  
aunak Tuke Pujuu ashí senchigtina nunú ashí apea tsaika ajapattawai.

<sup>14</sup> Tuja Tuke Pujuun imanjiya duka,  
yumi nayantsan ipiamna numamtuk,  
ashí nugkanum piyaktatui.

Nunikmatai ashí nuna dekawagtinai.

<sup>15</sup> ¡Aents amejai tikiju batsatu  
vino drogajai pachimja ama amakuam enamkam wisu weakui,  
nunú diisam dushiki pujam nunak wait anentagme!

<sup>16</sup> Tuke Pujuu aminak inastamjattawai,  
amek makichkish emematam amaitsume.  
Atum tikich aidaun datsan dushikiajum dutiksag,  
atumnashkam Apajuí datsanmainun iwaintamkagtatui.

Dutijamawagmatai emebau ainajum duka  
ememachu wajastatjume.

<sup>17</sup> Muja Líbanonmaya kuntin aidaun  
ijinawaitam nunú aminak bakugmattawai.

Ame aents aidaun ijinamunum,  
tuja yaakat aidaun tsaikbaunum, suwimak juki waitiakum  
amina pegkegchajum akikmaktatme.

<sup>18-19</sup> ¡Babilonianmaya aidaunak wait anentuinajai!  
¿Wagka atumesh wainka apajuímtai aidaunmash  
kajintsagmesh anentaimjume?

¿Wagka atumesh aannush yainkata tusagmesh  
segash yujagme?

Auk numi, kaya, atum najanamun ainawai,  
tujash duka wainak ainawai.

Auk jiju najana orojai, platayai ukatkamu iwakuchu asa  
nigki wajamainchau, tuja chichamainchau ainawai.

<sup>20</sup> Tujash Tuke Pujuuk niina jee pegkegma nuwi pujawai.  
¡Niina emtinig ashí nugkanmaya aents aidaun  
takamtak pujustinme!” tajai.

## 3

*Habacuc Apajúi segamu*

<sup>1</sup> Profeta Habacuc Apajuín juna aatus segauwai:

<sup>2</sup> Tuke Pujuuwah,

ame ashí dutikaum nunak shiig dekajai,  
nuadui amina ishamakun kujajai.

Wait aneasam iina apachji aidau yaigkuitam  
dutiksamek yaijatkata,

kajegkagtukam idaikagtusu akumesh, wait anenkagtugta.

<sup>3</sup> Apajuík Temán nugkanmaya minawai,

Apajúi pegkegma nunú muja Parágnnumia jiinki minawai,

Apajuín imanjiya duka ashí nayaimpin jajutua awai,  
tuja ashí nugkanum Apajúi emematku kantamtain kantamainawai.

<sup>4</sup> Winchamtinnum egkemak minawai,

niina uwejenia chaajip keeka jiinui,  
nuniak niina senchiji uumak aunash iwainawai.

<sup>5</sup> Nii minitaik kuashat aents aidau

jata ishamainun achiimakag jinuinawai.

Tuja niina ukuujin tsuwemu ishamain minawai.

<sup>6</sup> Apajúi minau jasa wajataik, nugka uujui,

tuja ashí aents aidau diitaik,

aents aidauk ishamainak kujainawai,

muja aidauk tsainak megkagainawai,

muja yaunchuk nagkamas aajaku aidaush yumpunainawai.

Tujash Apajuín jintiya duka yumpunagkesh megkaekashtinun tuke atinai.

<sup>7</sup> Nuigtushkam Cusagnumia aents aidau

initak makichkish jinmainchaunum egkema

waitmaina imanik senchi waituidaun wainkabiajai.

Tuja Madián nugkanmaya aidaushkam

senchi ishamainak jiintsuk ayatak kaemag

aakchinmag batsatun wainkabiajai.

<sup>8</sup> Tuke Pujuuwah, aents caballonum entsatkau

minimaina imanika minakum,

aents maaniamunum depetmak carro maanitainum egkemag wegama

numantuk wajam dusha ¿wagka imanikmesh umintaume?

¿Namak aidau, nayants aidau, wainka apajuímtai aina nunú kajegkamek imanikmesh umintaum?

<sup>9</sup> Akentaiyai aketka iju ichimaina imatikabiume nugkak,

amina senchigmin imatikamua nunú

namak najaneakmayi.

<sup>10</sup> Muja aidauk amina waipainak, ishamjamak sunatuinawai.

Tuja nayaimpinmaya yumi senchi yutawai,

imanitai nayants kuna senchi tsukatu asa

kedegtak ishamain wajawai.

<sup>11</sup> Ame chaajip ishamain winchamtin nagkijai betek

ekemaka akupkaamin,

etsak nantujai uumak megkaekaje.

<sup>12</sup> Ame kajekam nugka tenteame,

dutikakum ame kajekbaugmin

aents nugka muunnumia aidauk dajaja tsaika

ajapmaina imatikame.

<sup>13</sup> Amina aentsjum aina duka ame apu etegkauwaitam nujai yayaakum miname.

Untsu aents pegkegchau aina nuna apujig mantuam,

inabaujiya duka ashí tsaigkam emegkatkaume.

Dutikamu asa ditak shiig wainak juwakaje.

<sup>14</sup> Caballonum maanitan yacha aidau ememasag

dase senchi dasentujai betek jetepaidau asag,

amupaktag tiagmayi.

Imatijamainakui ayamjumamainchau dekapmai,ji,

tujash ame dita apujig niina flechajinig depetkabiume.

<sup>15</sup> Amek amina caballogmin entsamkam  
nayants ishamain wajamunum wekaerne.

<sup>16</sup> Nuna antakun senchi ishamkabiajai.

Nuniai mina wenujuk sunatmayi,  
imaniakun wajaschamin, ashí mina iyashjuig  
kakaumainchau dekapmajjai,  
nuniakun anentaijui tetegtimiajai.

Tujash wika imaniaknush,  
waugtutsuk iina waitkagbau aina nuna Apajuí waitkastin tsawan jegatna nuna dakas-  
tatjai.

<sup>17-18</sup> Tuja higuera ajakbau nejeachkuish,  
uva nejeachkuish, olivo aceitunan nejeachkuish,  
ajanmaya aidaush, ikamia aidaukesh nejenachkuish,  
tuja baka aidaush, uwig aidaush ashí jinutjamamtaish,  
minak Tuke Pujuu uwentijuju asamtai,  
wika shiig aneasan niina ememattatjai.

<sup>19</sup> Wagki Tuke Pujuu minak senchimitjawai,  
dutijak japa senchi tupikaina iman awajtus  
muja aidaunum iwajuk tikichish maumainchau kuitamjawai.

## Zacarias

### 9

*Israel aents aidaun apuji atin pachisa etsechkamu*

<sup>9</sup> ¡Yaakat Jerusalégnunia aidautigmek shiig aneastajum!  
¡Shiig aneakjum kantamatajum!

¡Amina apujum burro tsakatnum entsatkau minitjamui!  
Imanchauch wajakin, pegkejam, pegkegchaun takachu,  
amina yaimpak depetmitkagmaktatus minawai.

<sup>10</sup> Efraín wegantu aidaun carroji aidaunak,  
flecha akenka nagkimtai aidaujui ashí tsaiktatui,  
dutikak Jerusalégnunia caballo aidaunashkam ijinattawai.  
Israel nugkanmak ashí depetmaktatui,  
nunik ashí tikich aents aidaush agkan batsamsatnume titatui.  
Tuja niig nayants jinagbau aina imanui nagkamas,  
namak Eufratesa aatus ashí nugkanum inamjatnai,  
nii inabaujig nagkatkauk achatnai.

*Apajuí niina aentsji aidaun yainka ataktu inantaitin*

<sup>11</sup> Tuke Pujuu chichaak:

“Jerusaléghkah, wi amejai numpai chichaman  
umikuitag nuna betek umiakun,  
yumigmat taimu yumi atsaig ashí  
jinaajum chimpigjum nunak jiijan uwentijattajime.

<sup>12</sup> Achija yajuakam tikich nugkanum batsatutigmek  
yaakat shiig peeja umikbauwa nuwi waketjattagme.  
Yamaik atum waitiajum nuna nagkaesau,  
pegkegnum yumigsattajime,  
nuadui shiig aneasjum batsamsattajume.

<sup>13</sup> Judá wegantu aidaun arcojai betek,  
tuja Israel wegantu aidaun flechajai betek,  
tuja Jerusalégnak puyagjai betek awajsattajai,  
dutikan ditajai griego aents aidaunak ijinattajai”, tawai.

<sup>14</sup> Tuke Pujuu ditan jetektajum tusa titata nunak,  
dita nagki akenbaujig peemjai betek agtinai,  
Apajuí kachun umpuag tsumujinia dasenum pachitkau wetinai.

<sup>15</sup> Tuke Pujuu ashí senchigtina nunú  
niina aentsji aidaunak kuitamkatnai,  
dutikamu asag dita shiwaaji aidaunak depetuk  
najakag ashí amukagtinai.  
Aatus depetmakaju asag, shiig aneenak  
altar ukatkatasa numpa tsapanum aimka jutaya  
imatika aimak vinon umuinak nampejag shiig aneenak pampainiagtinai.

<sup>16</sup> Nunú tsawan jegakuig, mina aentsug aidaunak,  
uwija kuitamin uwigjin ayamjina numamtuk  
wi ayamjukan uwentikjatnaitjai,  
dutika ai dita nugken waketug batsamsag  
kaya pegkeg winchamtin juki atsejutai najanam winchantuwama iman agtinai.

<sup>17</sup> ¡Yajauwajah, nuwauch aidaun,  
uchi datsauch aidaun shiig yuwawag senchigtin  
shiig aneas dakunkut juju nugkanum batsatbau!

### 10

Text to get InDesign to put correct chapter number.

## Malaquías

### *Yama nagkamchaku agagbau*

<sup>1</sup> Israel aents aidaun ujakti tusa Tuke Pujuu profeta Malaquíasan akatjauwa duka jujuwai:

<sup>2</sup> Tuke Pujuu chichaak: “Wika atumnak aneajime”, tujamui. Tusa tujamaig atum chichaakjum: “¿Amesh jutiish wajuk anejatme?” tajume. Tusa tajumin Tuke Pujuu chichaak: “Wika atumnak Esaú Jacobjai jimagmamui aig, Jacopan anejakuitag dutiksanuk atumnashkam aneajime.

<sup>3</sup> “Tuja Esaúnak dakitjauwaitjai. Dutikau asan, niina nugke muja pegkeg ikam tepau aajakua nunak emestujan pegkegchau, uwejush ayatak kuntinun batsamta awajtusuitjai”, tawai Apajui.

<sup>4</sup> Tuja Esaú wegantu Edom aents aidau chichainak: “Iina yaaktaji aidaunak tsaigtamkau ainawai, dutikau ainakuish ataktu yaaktamkagmi”, tumain ainawai. Tusa tiagtai Tuke Pujuu ashí senchigtina nunú chichaak: “Yaaktamkatnume, dutikawagmataish wi nunak ataktu tsaigkagtatjai. Dita nugkeg: ‘Aents pegkegchau aidaun batsamta’ tutai atinai. Tuja ‘nuwiya aents aidauk Apajui tuke kajegtai agtin’ tutai atinai.”

<sup>5</sup> Nunú wainkajum chichaakjum: “¿Apajuiin senchijiya nunak Israel aents aidaun nugkega nuna nagkaiki aents batsamin aidaush ememattinme!” titinaitjume.

### *Sacerdote aidau Apajuiin shiig takagsachagbau*

<sup>6</sup> Tuke Pujuu ashí senchigtina nunú sacerdote aidaun chichajak: “Uchi aidauk dita apajinak umiujinawai, tuja inak aidaushkam dita parjugjin umiujinawai. Tuja wi atumin Apajuijyitag nuniaish ¿wagka minash eme anenjusumesh diigtsugme? Tuja wi atumin apugmitag nuniaish ¿wagka ajaantugsagmesh diigtsugme? Atumek minak dakitjagme, nuniakjum: ¿Iish amina daagmesh wajutiya dakitjaish idaisabiaji? tajume.

<sup>7</sup> “Atumek pag pegkegchau aidau jukijum mina altarjui itagme. Nuniyatkujum: ¿Iish waji pegkegchauwa dutikajai? tajume. Atum aidautijum mina altarjua nunú ajaantusa diitsuk wainkaya nunin diyajum nunú minak kajetan sujawai.

<sup>8</sup> Kuntin wainmachu aidau, shutuu aidau, jau aidau mina sujakjum, pegkeg takaji tajume. Diik nunú yajuakjum atumi apujum aidau susakjua ditash shiig aneasampash jukiajat.

<sup>9</sup> “¿Apajui anentag suwaji tusajum aanin pegkegchau aidau ikaunmayatkugmek, Apajui ii segamun antugtamak wait anenjamjati tusajum dakagjum? Witjai Tuke Pujuu ashí senchigtinnuk. Tuja juna shiig dekatnume tusan wakegajai:

<sup>10</sup> ¿Wika mina jegajun waitiji aina duka epennati tusan wakegajai! Ataktu awagkijum anentag susami tusajum, aanin pegkegchau aidau ikaunmajum mina altarjui wainka apeawajum tusan dakitajai, wagki wika atumnak kajegkajime, nuadui makichkish jujukchattajime.

<sup>11</sup> “Ashí nugkanum mina eme anenjus dijuina duka, mina emematjuinak kugkuin incienson apeanak, dek asentag pegkeg wisha wakemain aidaun itagtuinawai.

<sup>12</sup> Tujash atum sacerdote aidautigmek minak ajaantugsagmek diigtsugme. Nuadui midau altar, mina mesajua nunú pegkegchau diyakjum, nuwi anentag mina sujusbau yutai aina dushakam tsumain diyagme.

<sup>13</sup> “Tuja atum chichaakjum: ‘¡Jutika pujutak iik yawetjaji!’ tajume. Tau asajum, kuntin kasamkamu, baka shutuu, nuniachkush jamamtin jukijum, juju maa apeaku Apajui shiig anemtiksamí tajume. Duka minak makichkish shiijak awajatsui, atumek duka mina dushiktakjum aikagme.

<sup>14</sup> ¿Kuntin shiig pegkeg, mina anagtuamun yapajia ukuak, tikich kuntin pegkegchau juki mina anentag itagta duka aentsuk tikima shiig pegkegchau atinai! Witjai dek asapunuk, wika aents aidaun ishamtayaitjai”, tusa Tuke Pujuu ashí senchigtina nunú tawai.

## 2

<sup>1</sup> “Juna yamai wi Tuke Pujuu ashí senchigtinun taja nunak sacerdote aidaun tajai:

<sup>2-3</sup> “Atumek ima minak umigtumain ainagme, nuniakjum ajaantugsajum diigmmain ainagme. Nuniachkuminig pegkegchaunum yumigjattajime. Tuja dekaskenum takagtachkugminig, wi atumin pegkegnum yumigkijum nuna yapajian, pegkegchaunum yumigjattajime. Tuja nuigtushkam atum sacerdote asajum, eme anentaku kuitamam ajum duka jilki ajapam wainka juwaktatjume. ¡Nunikagmin atum kuntin mina sujajum

nuna ijinig yapimin nijaktatjime, dutika ai ijan japimak ajapenak atumjai ijumjamag ajapjamawatatui!

<sup>4-5</sup> “Juna tajim nunak atumi apachjum Levi wegantu aajaku aina nujai chichaman umikuitag nuna, betek umiktag taja nuna dekatnume tusan emtikan ujjajime. Levijai chichaman umiakun:

“ ‘Shiig agkan pujustajum tusan yaigtinaitjime’, tusa tai, nii chichagtak:

“ ‘Wishakam aminak ajaantusan eme anentsan ememattinaitjime’, tutujiuwa nunak niig betek umikui”, tusa Tuke Pujuu ashí senchigtina nunú tawai.

<sup>6</sup> “Levík aentsnak makichkish tsanugchawai, ayatak dekaskea nuna jintiauwei, nigka minai sumitkau aajakui, kuashat aents pegkegchau takaidaunash idaimtkasui.

<sup>7</sup> Sacerdote aidauwah, atumek mina chichameg etsejin ainagme. Nuadui atumi takatjiya duka, mina chichamjun aents aidau unjaktinme, dutikawajam ditash pujutjin iwajag mina nemagtuktinme tibau ainagme.

<sup>8</sup> “Tujash atumek pegkeg takatak idaisaugme, nuniakjum pegkegchau takat tikich aents aidauh jintinjume. Wi Levijai chichaman umikuitag dushakam umiatsjume.

<sup>9</sup> Nuadui atumnak aents aidauk ajantugmas diigmaschatnume, tuja antugtanash antugkashtinme tijai, wagki atum mina umigtachu asagmin. Atumek aents jintinkugmesh ashí betek wait anentsuk tikich ima wait anentagme”, tusa Tuke Pujuu ashí senchigtina nunú tawai.

*Aents nuwejai idainayas ataktu nuwenaidau pachisa agagbau*

<sup>10</sup> ¿Ashí aents aidautin najapauwa dukechukai iina Apajuíji? ¿Tujash nunin aish, wagka iik pempeentunikish tsanunijai? ¿Wagka iina apachji aajaku aina nujai Apajuí chichaman umikua dusha umiatsji?

<sup>11</sup> Judá wegantu aidauk Apajuínak antugchau ainawai, nunin asag pegkegchau datsanmain aina nuna Jerusalégnum, tuja Israel nugkanmashkam takamsajui.

Judá wegantu aidauk Tuke Pujuu niina jeen dekas senchi anea nunash ajaantus diischaje. Nuninak aishmag aidauk nuwa wainka apajuímtai aidau emematin aina nuna nuwatjaje.

<sup>12</sup> Utusag aents nunin aina nunak Tuke Pujuu ashí senchigtina nunú ijinawa, dutikak, Tuke Pujuu anentag suwajai tusa altarnum jeganta pujus buut pujaunashkam puyatjutsuk ashí ijinawa tajai.

<sup>13</sup> Tujash atumek Apajuí anentag suwajum nuna nii shiig aneas jujutjamchakui, altarnum jeganta pujusjum nuni senchi buutjume.

<sup>14</sup> Nuniakjum ¿wagkag Apajuish aigmatsua? tajume. Tuke Pujuu atumin aigmatsu nunak, atum datsa asajum yama nagkamchaku nuwenkujum, amejaig jakatnaitjai tiuwaitam nunú umikchaum duwi aikagmawai.

<sup>15-16</sup> Apajuí iinak makichik iyashik, makichik wakanik atinme tusa najapauwai. Nunak dutijamauwai, wagki niina aentsji atinme tujamu asa. Aents nuwen ajapin aina nunashkam Apajuik kajejawai. Nuadui atumek kuitamamkatajum, nuniakjum ima atumi nuwemjaig pujustajum, tusa Tuke Pujuu Israel aents aidau Apajuí ashí senchigtina nunú tawai.

*Apajuí Israel aents aidau pujutjin iwagtugtin*

<sup>17</sup> Tuke Pujuu atum sumamun antu antugtama yawetjamjaje. Nuniku aig atum iniakjum: “¿Iish yawetjamjati tusaish, waji ima segaji?” tajume. Tau asajum: “Tuke Pujuu pegkegchau asa, aents pegkegchau aidau shiig kuitamui”, tajume. Atumek makichkish: Apajuik dekas pegkejapi, tatsugme.

### 3

<sup>1</sup> Tuja Tuke Pujuu ashí senchigtina nunú chichaak: “Wi taatnun jintan umigtukti tusan mina chichamjun etsegnun awemattajai. Atum Tuke Pujuu dakajum duka pachichbaunum warnak niina jee pegkegma nuwi wayattawai.

“¡Chicham umikbaun jintinjamatna duka minawai!” tawai.

<sup>2</sup> Tujash nii juwi tatai, ishamtsuk shiig aneas wajamainku atsawai, ayatak tikichmajag pujusagtinaí. Niig jii kegaujai betek taattawai iina pujutjin iwajatatus. Jabón jáanch bika wajasun esakag iwajama numamtuk iina tudaujin esakagtinaí.

<sup>3</sup> Tuke Pujuu Levi wegantu sacerdote aidaukanak, oro, plata jinum jiyam pegkegchauji esaka ajapnak dekas pegkeg juwauwa numamtuk awagmaktatui. Dutika pujutji iwagtujam Apajuínak anentag sumain ainawai. Tujash nunak dita wakegamun takatsuk, Apajuín shiig awagma nuna imatiksag dutikmain ainawai.

<sup>4</sup> Aatus shiig takagtaik, yaunchuk Judá wegantu aidau Jerusalégnumia aidaujai Tuke Pujuu anentag suwam, shiig aneas jujakua imatiksag shiig aneas jukittawai.

<sup>5</sup> Tuke Pujuu ashí senchigtina nunú chichaak: “Wika atumin suwimka amastasan taat-naitjai. Tuja nuigtushkam tunchi aidaun, nuwentin, aishintin tsanjijima yujau aidaun, tuja wainak tsanumak Apajuín anagbau aidaun, aentsun akikchatnaitak takamtikak, waje aidaunash, bitaik aidaunash waitkau aidaun, tuja aents tikich nugkanmaya aidaunash shiig kuitamchau aidaun, nuigtu mina eme anenjuchu aidaunashkam ashí suwimkan susattajai”, tawai.

*Israel aents aidau  
dita diezmojin  
Apajuín sutsuk idaisagbau*

<sup>6</sup> “Witjai Tuke Pujunuk. Wika yapajintsujai. Nuadui Israel aents aidautigminak ashí ijinachuitjime.

<sup>7</sup> Atumi apachjum chicham umiktinun wi susauwaitag nuna tupantug umikchaju aina nunisjume, atumshakam tupanajum umitsuk idaisaugme. Wi Tuke Pujuu ashí senchigtinun atumin chichagkun: ‘¡Ataktu mina umigtuktajum, nuniakjumin wishakam ataktu yaigtatjime!’ timaijime. Tujash atum chichaakjum: ‘¿Wagkaik amesh ataktush umigkatji?’ timaijime.

<sup>8</sup> Tusa takugmin wi ayaakun: ‘Minak makichik aentskesh kasagtumaisui. Tujash atum minak kasagtagme.’ Nuniayaitkujum: ‘¿Ilish waji aminush kasamkaji?’ tusajum ininjume. ¡Atumek minak atum takasa jukimunmaya diezmo, nuigtu anentag sujasta tibus aina nunú kasagtagme!

<sup>9</sup> Nunak dekas ashí aents aidau kasagtuinawai, tuja atumshakam minak kasagtagme, nuadui pegkegchaunum yumigattajime. Nunak wi Tuke Pujuu ashí senchigtinun tajai.

<sup>10</sup> “Atumi diezmojin aidau mina gegajui itaatajum, dutikawagmin yutai aidau kuashat atatui. ¡Dutikajum dekapjustajum! Nunú dutikakjuminig, atum jukitnun nayaimpinmayan shiig kuashat ukatuattajime.

<sup>11</sup> Tuja atumi ajakjum aidaunak uva ajakbau aidaujai jata iyantug ijinawai tusan-chakam kuitamjuktatjime.

<sup>12</sup> Nuadui ashí aents aidauk atumnak, ‘Apajuí pegkegnum yumigsamu aidau’ tujamiagtinaí, wagki atumi nugkem shiig pegkeg asamtai. Witjai Tuke Pujuu ashí senchigtinnuk, nunak dekas wi tajai”, tiuwai Apajuí.

*Apajuí Israel aents aidau shiig kuitamkatnaitjime tusa anagkuamu*

<sup>13</sup> Tuke Pujuu chichaak: “Atumek minak pegkegchau chichagtagme. Tujutiatkujum chichaakjum: ‘¿Ilish waji pegkegchauwa amesh chichagji?’ tajume.

<sup>14</sup> Atum chichaakjum: ‘Apajuí ashí senchigtina duka wainkaik umiju pujumaisui, tuja nii pegkegchau takamjusaish wake besemag dekapeakuik, jáanch aents jakamtai wake besemag pujaku nugkutaig nugkumaisui, tuja niina chichame umiktin agagbauwa dushakam umujuk pujumaisui.

<sup>15</sup> Auk aents emebau aidau ima shiig batsatui, tuja aents pegkegchau aidau dita takatjinash ima shiig eemtikainawai. Tuja Apajuíjai shiwagmagainakush, Apajuín dekapenakush suwimkan juinatsu jama’, tajume”, tiuwai Apajuí.

<sup>16</sup> Tusa timatai Apajuín emematin aidau dita ditak pempeentunikiag chichaidau. Tusa chichaidau Apajuí antujuk, dita daaji aidauk aents Tuke Pujunum eme anentus umijin aidau daaji agatkamua nuwi agatkamu ati, tawai Tuke Pujuu.

<sup>17</sup> Tuja nuigtushkam Tuke Pujuu ashí senchigtina nunú ditan pachis chichaak: “Dita aidau ataktu mina aentsug wajasagtina nunú tsawan jegattawai. Makichik múun niina uchiji umigbau asa, wait anentus kuitamna numamtuk wishakam ditanak wait anenjagtatjai.

<sup>18</sup> Nuadui, juwapi pegkejak, tuja juka pegkegchauwapi tusag ataktu shiig dekawagti-nai. Nuninak Apajuín emematuidaush wajukuk ainawa, tuja Apajuín emematchau aidaush wajukuk ainawa nunashkam shiig dekawagtinai”, tawai.

## 4

*Tuke Pujuu niina aentsji aidau suwimak suwamu*

<sup>1</sup> Tuke Pujuu ashí senchigtina nunú chichaak: “Trigo dukee tsupigbau jinum chimpian keeka ashí esak megkagama numamtuk, aents pegkegchau aidau, emebau aidau ashí esak megkaejatna nunú tsawan uminui.

<sup>2</sup> Untsu atum mina eme anenjautigminak shiig kuitamkattajime. Duka makichkish uukchamu paan etsa etsantujai betek atinai. Tuja pegkegchau awajtamkatag tuinakuish wi kuitamkatnaitjime. Dutikamu asajum, toro tsakatuch aidau wenuken batsatu jijnainak, shiig aneas tsekgama imanitnaitjime.

<sup>3</sup> Nunú tsawan jegamtaig aents pegkegchau aidauk, atum depetkajum nugka yukukuntu najatiama numamtuk awajkatnaitjume”, tawai.

*Inagnaku chichagkagtukbauwa nunú, Elías wakitki taatnujai pachisa etsegkamu*

<sup>4</sup> “Wi mina inakeg Moisésan chicham umiktin agagbaun, Israel aents aidau umikagt-inun, muja Horebnum susauwaitag nunú adeagtajum.”

<sup>5</sup> “Juju antuktajum, wi atumin suwimkan amastasan wakitkin minittakun, emtikan profeta Elíasan awetittajime.

<sup>6</sup> Dutika ai múun aidau uchiji aidaujai tsagkugnayag, shiig agkan pujustinme tusa nii yaigtatui. Untsu nuna umiinachkuig wi tajuan suwimka suwakun, dita nugke aidaunak emestujan pegkegchau awajtusagtajai”, tawai Apajui, tiuwai Malaquíás.



## Yamajam chicham Mateo agagbau

*Jesucristo muunji aajakú aidau*  
(Lc. 3.23-38)

<sup>1</sup> Ju ainawai Jesucristo muunji aajakajua nuna daaji agatkamua duka. Nigka David, Abraham aina nu weantu aajakui.

<sup>2</sup> Abraham akiauwai Isaacan,  
Isaac akiauwai Jacopan,  
Jacob akiauwai Judan nuigtú yachi aidaunashkam.

<sup>3</sup> Judá akiauwai Tamarai Faresan nuigtú Zarajai.  
Fares akiauwai Esroman,  
tuja Esrom akiauwai Araman.

<sup>4</sup> Aram akiauwai Aminadapan.  
Aminadab akiauwai Naasogkan,  
tuja Naasón akiauwai Salmogkan.

<sup>5</sup> Salmón Rahapai akiauwai Boozan,  
Booz Rutai akiauwai Obetan,  
tuja Obed akiauwai Isain.

<sup>6</sup> Isai\* akiauwai rey Davitan,  
tuja rey David akiauwai Salomogkan Uriasa nuwe aajakua nui.

<sup>7</sup> Salomón akiauwai Roboaman,  
Roboam akiauwai Abiasan,  
tuja Abías akiauwai Asan.

<sup>8</sup> Asa akiauwai Josafatan,  
Josafat akiauwai Joraman,  
tuja Joram akiauwai Uziasan.

<sup>9</sup> Uzías akiauwai Jotaman,  
Jotam akiauwai Acazan,  
tuja Acaz akiauwai Ezequiasan.

<sup>10</sup> Ezequías akiauwai Manasesan,  
Manasés akiauwai Amogkan,  
tuja Amón akiauwai Josiasan.

<sup>11</sup> Josías akiauwai Jeconiasan nuigtú yachi aidaunash, Babilonia yajuakbau aajakajua nu tsawantin.

<sup>12</sup> Babilonia yajuakam batsamsag  
Jeconias Salatielan akiauwai,  
tuja Salatiel Zorobabelan akiauwai.

<sup>13</sup> Zorobabel akiauwai Abiutan,  
Abiud akiauwai Eliaquiman,  
tuja Eliaquim akiauwai Azoran.

<sup>14</sup> Azor akiauwai Sadocan,  
Sadoc akiauwai Aquiman,  
tuja Aquim akiauwai Eliutan.

<sup>15</sup> Eliud akiauwai Eleazaran,  
Eleazar akiauwai Matagkan,  
Matán akiauwai Jacopan.

<sup>16</sup> Tuja Jacob akiauwai Josen, María aishi aajakua nuna; nuwi akiinawai Jesús, Cristo tujakbauwa nu.

<sup>17</sup> Nunin asa Abrahamai nagkama ashí akiinak Davitai tantauwa duka catorce awai, tuja Davitai nagkama Babilonianmaya yajuakbauwa nui ejemash catorce awai, tuja Babilonia yajuakam batsamsauwa nui nagkama Cristo akiinawa imanui ejemashkam catorce awai.

*Jesucristo akiinamu*  
(Lc. 2.1-7)

<sup>18</sup> Jesucristo akiinamuk aatus aajakui. Josek Jesucristo dukují atinun Marian anagma pujau, tujash eke nemachiatak pujus Wakaní Pegkejin ejapjukui.

\* 1:6 "Isai" tawa nunak tayatak "Jesé" tai, tikich tuidau "Yesé" taushkam ainawai. Tuja griegonmag "Issai" tawai.

<sup>19</sup> Tujash José María aishiyai duka, aishmag pegkeg asa, pegkegchau diisainum tabaunum wakenmataik idaisatjai tiuwai.

<sup>20</sup> Nuna aatus anentaimas José kanittaman, Apu Apajuí angelji awemamu kajanum wantintuk: “José, David weantu uchijiyah, ishamtsuk Mariak jukita, ni ejajjuka nunak Wakaní Pegkejin ejajjuka”, tiuwai.

<sup>21</sup> “Nuna uchigmaktatui, nunikmatai adaikattame JESÚS,<sup>†</sup> wagki niina aentsji tudauji aina nunak tsagkujug uwemtijatin asamtai”.

<sup>22</sup> Ju ashí aatus nunikua duka, Apu Apajuí tibaun profeta tiuwa nu uminbaunum nunikui, duka:

<sup>23</sup> “Ejajjuktinai makichik muntsujut aentsú takashtai, nunik uchigmaktinai aishmagkun, nunikmatai Emanuel<sup>‡</sup> adaikagtinai”, nunak: “Apajuik jutijai awai” taku tawai.

<sup>24</sup> Nu aaja tima José shintaag, Apu Apajuí angelji tibauwa dutiksag Marianak juki nuwatkauwai.

<sup>25</sup> Tujash Mariajaig tsanigchawai eke uchi akiintsagkik, nunik pujai uchi akiinamtai adaikauwai Jesús.

## 2

### *Yacha aidau kaunkag Jesusan emematiagbau*

<sup>1</sup> Rey Herodes inamak pujai, Jesús yaakat Belén akiinawai, Judea nugkanum awa nui. Nunikmatai ujumak mago\* etsá minitaijin batsamin aidau Jerusalén kaunawajui.

<sup>2</sup> Nunikag iniimainak:

—¿Tuwí pujawa judío aidaun reyji atin akiina dusha? yaya ni akiintai wantinkatnai timawa nunú wantinkamtai etsá minitaijin pujauti wainká mininaji ni ememattasa, tuidau.

<sup>3</sup> Nu tabaun Rey Herodes antuk anentai jegachu, antsag ashí Jerusalegnumia aidaushkam puyatkajui.

<sup>4</sup> Nunik apu Herodes sacerdote apuji aidaun, escriba<sup>†</sup> aidaujai untsuk ijumag:

—¿Tuwí Cristush akiinatnaita? taku.

<sup>5</sup> Tutai dita aiinak:

—Duka Belén, Judea nugkanum awa nui akiinatnai; juna aatus profeta agajui:

<sup>6</sup> “Belén, amek Judá nugkanmayaitme; tujash Judanum yaakat eme anentai aina nú piipchikesh atsume, wagki aminí jiinkitnai makichik Apu, tikich apu aidaun nagkaesau mina aentsug Israel aina nuna uwemtikatin”<sup>‡</sup> tawai, tuidau.

<sup>7</sup> Tiagtai Herodes mago<sup>§</sup> aidaun wakenmataik untsuká shiig inias dekajauu, yayá wainkajash wajupa tsawanta yujawa nuna.

<sup>8</sup> Dutika Belén ishimak:

—Wetajum nunikjum shiig inimsajum dekaatajum tuwig uchish pujawa, nunika waketkujum minash ujakatajum wisha wenu ememattajai, tiuwai.

<sup>9</sup> Tusá rey tima weaju, nuniai yaya etsá minitaijin pujusá wainkamu dita weamunmani wegau, nunik uchi pujamunum mamikis tajiaku.

<sup>10</sup> Nuna yayá wainkag shiig senchi aneasaju.

<sup>11</sup> Nunikag jegá waikmag uchin wainkaju, dukují Mariajai pujuttaman, nunik tikishmatug emematuidau; nuninak cofre\*<sup>‡</sup> ujakag uchin anentag susaju: oron, incienson nuigtú mirranashkam.

<sup>12</sup> Tujash nuna dutika kajiittaman kajanum ángel, Herodes pujamunmag wakitkigpajum tibaun asag, ditá nugkeen waketuinakug tikich jintanum weajui.

### *José Mariajai Egipto tupikakbau*

<sup>13</sup> Nunik waketjau ai, Josenashkam Apu Apajuí angelji kajanum wantintuk chichajak: “Nantaktá, nunikam uchi dukujijai jukim Egipto wetá, nunikam nui pujamin wi wakitkita tusan ujaktajame, wagki Herodes uchin maatatus egaktatui”, tau.

<sup>14</sup> Tama Joseschkam nantakí nunú kashia duik uchin dukujijai juki Egipto weuwai.

<sup>15</sup> Nunik nui pujai Herodes jakauwai. Nunú nunikua duka Apu Apajuí tibaun profeta: “Mina uchig Egipto pujaun untsukjai”,<sup>†</sup> tibauwa nu imanisag uminkauwai.

### *Herodes suntaji aidaun uchin kajegtí tusa ishiakbau*

<sup>†</sup> 1:21 “Jesús” tawa duka griego chichamai, nunak “Uwemtikagtin” taku tawai. <sup>‡</sup> 1:23 Is. 7.14. \* 2:1 “Mago” aina duka yaya aidaun dekapawag diisag dekau aidau etsá minitaijin batsamajakú ainawai. <sup>†</sup> 2:4 “Escriba” tawa nunak: Chicham umiktin agagbaun pachis etsegnun tawai. <sup>‡</sup> 2:6 Mi. 5.2. <sup>§</sup> 2:7 Versículo unonum magon pachis tawa nu diistá. \* 2:11 “Cofre” tawa duka, makichik caja tapagtin waji akik aidau egketai aajakui. <sup>†</sup> 2:15 Os. 11.1.

<sup>16</sup> Nunú mago aidau tsanugbaun Herodes dekaqmama shiig senchi kajekú, nunik suntajin ishiakui ashí uchi belemnian nuigtú nui tikiju batsataidaunash yamá akiináu aidaunum nagkama jimag mijan ajuinamun kajegtinme tusa, nunak mago aidaush wajupa tsawantak yayá wainkajash yujaayi nuna shiig dekaajuau asa nuna diis dutikauwai.

<sup>17</sup> Aatus uminkauwai profeta Jeremías tibauwa nu, duka:

<sup>18</sup> “Antukmajai Ramá pampainamun, untsu untsumas senchi buutuinau, nunak Raquel uchiji aidaunum buutak, anentai ichichtumain wajachmae, wagki uchiji aidauk jinawaju asagmatai”,<sup>‡</sup> tawai.

*José Mariajai Nazaret wakitkimu*

<sup>19</sup> Herodes jakau ai, José Egipto pujuttaman Apu Apajuí angeli kajanum wantintuk:

<sup>20</sup> “Nantaktá, nunikam uchi dukujijai jukim Israel nugkanum wakitkita, wagki uchin maatatus egagmaya duka jakaje”, tiuwai.

<sup>21</sup> Nunú tima Joseshkam uchin dukujijai juki Israel nugkanum wakitkiuwai.

<sup>22</sup> Tujash Arquelao rey wajas Judeanum inamui apaji Herodes inamajakua nui tabaun dekaa nuwi wetanak ishamau, nunittaman kajanum ujakam, Galilea nugkanum weuwai,

<sup>23</sup> nunik jegaa yaakat Nazaret pujustatus jegauwai. Nunú aatus nunikua duka, profeta aidau: Nazaretnumia<sup>§</sup> tama atinai, tibauwa nu uminkauwai.

### 3

*Juan Yamijatin uwegshunum chichagkagtukbau*

(Mr. 1.2-8; Lc. 3.1-20; Jn. 1.19-28)

<sup>1</sup> Nu aatus tsawan aina nu nagkaemakui ai, Juan Yamijatin Judea uwegshujin wekaegas chichagkagtak:

<sup>2</sup> “Tudau takatak idaikujum pujutjum yapajiatatum, wagki Apajuí aentsnum inamjatta duka tikijuch wajasé”, tau.

<sup>3</sup> Juagkak profeta Isaias niina pachis tiuwa nu aajakui, duka:

“Makichik chicham uwegshunum untsubau antuewai: ‘Apu minitin jinta iwajatajum, jinta tutupit dakuektajum’ ”, tawai.

<sup>4</sup> Juagká nugkutaijig camello uje najanamu aajakui, akachumtaijish duwap nuigtú langostan,<sup>\*</sup> dapá yumijin yuujakui.

<sup>5</sup> Juan chichagkagtamun antukagtatus Jerusalegnumia aidau, ashí Judea nugkanmayash, Jordán uwet batsamin aidaushkam kautuidau.

<sup>6</sup> Nunikag tudauji aidaun etsegtumagtai namak Jordagnum yamiau.

<sup>7</sup> Nuniai kuashat fariseo aidau, saduceo aidaujai yamimajagtatus jegantajam, chichajak: “¡Iwanchi uchiji aidauwah! ¿Ya atumnash yamimaku Apajuí suimkaji tikijuch wajasé nu uwemtumainai tusash tujabiagmae?”

<sup>8</sup> Dekas tudau takatan idaisaush wajuku amainaita, nunú iwainmamkatajum peggek aina nu takaakjum,

<sup>9</sup> atumek: ‘Abraham wegantu asaja yupichu uwemain ainaji’ tumamigpa; wagki Apajuik jujú kaya aina junakesh Abrahama uchiji aidau emamainai.

<sup>10</sup> Yamaiya juik jachai kagkap tsupitiamu numamtuk awakatatus Apajuí suwimkeg uminas awai; ashí ajak nejeachu tsupika jinum apetiama dutikatatus.

<sup>11</sup> Wika yumi yamijatai tudau takatan idaiyinak pujutin yapajiatnume tusan; tujash mina ukujui minitta nuuwai mina nagkaetasu wenschigtin, wika nuna sapatjinakesh jujumaitusujai, niyai Wakaní Pegkejiyai yamigmajagtinuk nuigtush jiiyai yamigmajagtina nu.

<sup>12</sup> Nigka trigo awagti wampuji utsanku neje akantayama numamtuk awajkatatus uminas awai. Dutika ijumtainum trigonak yajumak, wampujinak jii ajumaisih kajinkashtina nui apeatnai”, tiuwai.

*Jesús yamimagbau*

(Mr. 1.9-11; Lc. 3.21-22)

<sup>13</sup> Jesús galileanmaya jiinki Jordán jegauwai, nunik Juan yamijati tusa jegantauwai.

<sup>14</sup> Dutikam Juan yamimainchau dekapeak:

—Wiitag jamah ame yamiam amainaitag nunak, ¿nuniaig ame minai yamimagtasa minam? tau.

<sup>15</sup> Tama Jesús ayaak:

<sup>‡</sup> 2:18 Jer. 31.15.    <sup>§</sup> 2:23 Is. 11.1.    \* 3:4 “Langostak” yutai aajakui, manchi katsajaip tutaya numamtin.

—Idaitusta, aaja jutikaku umiktatji ashí Apajuí pegkejan wakega nunú.

Tutai Juagshakam yamijú.

<sup>16</sup> Dutika yamijam Jesús wamkes yuminmaya jiinkiu, nuniai nayaim ujaniuwai, nunikmatai Apajuí Wakaní† pauma nunin akaiki niini jegattaman wainkauwai.

<sup>17</sup> Nuniaig nayaimpinmaya chicham antuekau: “Juuwai dekas mina Uchig anetaijuk, niini shiig aneamu ajutui”, tabau.

## 4

*Iwanch Jesusan pegkegchaunum dekapsamu*

(Mr. 1.12-13; Lc. 4.1-13)

<sup>1</sup> Nunikmatai Wakaní Pegkeji Jesusan juki emauwai uwegshunum, Iwanch\* dekapsati tusa.

<sup>2</sup> Dutikam cuarenta tsawai, cuarenta kashi, ayuná pujau asa, yapajuauwai.

<sup>3</sup> Nunitai Iwanch Jesusa jegantun chichajak:

—Ame dekas Apajuí Uchijiyaitkumek, ju kaya aina jujú pag najankam yuakia, tau.

<sup>4</sup> Tama Jesús ayaak:

—Agagbau awai: “Aentsuk imá pagjaigkik pujumait sui, ashí chicham Apajuí wenin jiina nujai pujumainai” tawai, tiuwai.

<sup>5</sup> Timatai, Iwanch Jesusan yaakat pegkejam Jerusalegka nui emauwai, dutika jega Apajuí ememattai jegamkamunum yakí nagkatkamunum iwaká awajus,

<sup>6</sup> chichajak:

—Ame dekas Apajuí Uchijiyaitkumek tsekem iyata, wagki agagbau awai:

“Apajuí ángel aidaun awetugmattawai, dutikam dita achigmakagtatui kayá tukumkai tusa” tiuwai.

<sup>7</sup> Tama Jesús ayaak:

—Dushakam agagbau awai: “Amina Apujum Apajuiya nu pegkegchaunum dekapsa-tasamek wakeyipa” tawai, tiu.

<sup>8</sup> Timatai nuigtú Iwanch Jesusan muja tsakajunum iwakui. Dutika ashí nugkanmaya yaakat aidaun shiig wiakuch senchigtin aina nuna iwaintukui, nuigtú ashí nuna imanji aina nunashkam iwaintukui,

<sup>9</sup> dutika chichajak:

—Ashí junak amina amastajame tikishmajam emematjakminig, tau.

<sup>10</sup> Tama Jesús ayaak:

—¡Wetá Iwanchih!† agagbau awai: “Amina Apujum Apajuiya duke emematta, nuniakum imá nigki umigkata” tawai, tiu.

<sup>11</sup> Tima Iwanchik ukukiuwai. Nunikmatai ángel aidaun kautuawajui kuitamkagtatus.

*Jesús Galileanum takatji nagkamamu*

(Mr. 1.14-15; Lc. 4.14-15)

<sup>12</sup> Jesús, Juangkan achikag egkeawaje tabaun antuk Galilea wakitkiuwai.

<sup>13</sup> Tujash Nazaretak juwakchauwai, yaakat Capernaúm Galilea kuchajin uwetus awa nui jegaa pujusui, Zabalón, Neftalí aajakajua nuna nugke aajakua nui.

<sup>14</sup> Aatus uminkauwai, yaunchuk profeta Isaías tibauwa nunú:

<sup>15</sup> “Zabulogka nugke nuigtú Neftalí nugke, nayantsa yantamen batsamin aidaun, Jordagka amain batsamnushkam, Galilea judiochu aidaun batsata dushakam;

<sup>16</sup> Aents aidaun suwenum yujau agma nunú tsaaptinun wainkaje; tuja suwenum batsatunash tsaaptin etsantug wajantae”, tawai.

<sup>17</sup> Nui nagkama Jesús chichagkagtak: “Tudau takatak idaikujum pujutjum yapajiata-jum, wagki Apajuí aentsnum inamjatta duka tikijuch wajasé”, tau.

*Jesús ni jintintaiji atinun cuatro namaká main aidaun yajuakbau*

(Mr. 1.16-20; Lc. 5.1-11)

<sup>18</sup> Jesús Galilea kuchajin wekaekamá Simón, Pedro daagtina nuna, ni yachi Andresjai namakan main asag retan kuchanum ajuntuinak yujattaman wainkau,

<sup>19</sup> nunik Jesús chichajak:

—Minitajum wi jintintuatjime, namak maatasa yujagjum anmamtuk, Apajuí chichame etsegkujum aents aidaun minai ikautjin atajum tusan, tau.

<sup>20</sup> Nu tamawaik, ditá redjinak ukuinak niijai weajui.

† 3:16 “Apajuí Wakaní” tawa nunak “Wakani Pegkejin” tau asamtai, “Apajuí Wakani” takuishi “Wakani Pegkeji” taji. \* 4:1 “Iwanch” tawa nunak tuinayatak griego chichamnum “Diablo” tai, hebreo chichamnum “Satanás” tawai. “Diablo” tawa nunak “Tsanumkagtin” taku tawai. Tuja “Satanás” tawa nunashkam “Shiwag” taku tawai.

† 4:10 Diistá versículo 1.

<sup>21</sup> Nunik Jesús machik kuwaesag wekamá, Jacobon yachijai Juagjai, apaji Zebedeo aatus barcanum chimpimas redjin apijuinak chimpimatman wainak, ditanash Jesús untukú.

<sup>22</sup> Tamawaik ditashkam:

—Barcanak ukuinak, apajinashkam ukukiag Jesusjai weajui.

*Jesús Galilea chichagkagtakau jau aidau etsagakbau*  
(Lc. 6.17-19)

<sup>23</sup> Jesusak ashí Galilea nugkanum wekaegas, jega ditá ijuntai aidaunum wayá jintinkagtau, nuniak yamajam chichaman Apajuí inabaujiya nuna pachis etseju nuniak ashí jatai jau aidaunash nuigtú najaubau aidaunashkam etsagau.

<sup>24</sup> Nu dutikamua duka ashí Sirianmag antuekauwai nunikmatai itajuidau ashí jatai jau aidaun, nuigtú pegkegchau ajamu waituidaun, wakan pegkegchau egkemtuamunash, kukujiyai jau aidaun, pimpijú aidaunashkam, dutikam Jesuschakam ashí etsagakui.

<sup>25</sup> Nunitai kuashat aents aidau galileanmaya, decapolisnumia, jerusalegnumia, judean-maya nuigtú Jordagkan amain batsamin aidaush Jesusan saetuidau.

## 5

*Shiig aneasjum pujustajum tibau*  
(Lc. 6.20-26)

<sup>1</sup> Imatika tuwajam Jesús wainak wakau nainnum, nunik nui ekeemsamtai ni jintinbau aidaushkam jegaantaju.

<sup>2</sup> Nunikmatai Jesús nagkama jintintak tau:

<sup>3</sup> “Shiig aneastinme iikik iina wakanig uwemtikmaitsuapi tuidauk, wagki Apajuí ashí nayaimpinum inama duka ditanu asamtai.

<sup>4</sup> “Shiig aneastinme buutuidauk, wagki ditak ichichmamtan jukiagtin ainawai.

<sup>5</sup> “Shiig aneastinme kakagchauch aidauk, wagki ditak nugka anagtamamua nuna jukiagtin ainawai.

<sup>6</sup> “Shiig aneastinme pegkejan takastatus wakegak yapajaku nuigtú kitamtaiyama imanidauk, wagki ditak shiig juakagtin asag.

<sup>7</sup> “Shiig aneastinme wait anenkagtin aidauk, wagki ditashkam wait anentam aagtin asag.

<sup>8</sup> “Shiig aneastinme anentai pegkeg aidauk, wagki ditak Apajuí wainkatin asag.

<sup>9</sup> “Shiig aneastinme shiig agkan pujutan chichamjina duka, wagki ditak Apajuí uchiji ainawai tama agtin asag.

<sup>10</sup> “Shiig aneastinme pegkeja nuna takainak waitkam aidauk, wagki ditanu ainawai Apajuí inamtaijiya duka.

<sup>11</sup> “Shiig aneasjum atumek, aents pegkegchau chichagtamainak, pegkegchau awata-mainakuish, mina nemagtau asagmin ashí waitan tsanumjutpainakuish.

<sup>12</sup> Shiig aneasjum dakujustajum, wagki atum jukitnuk shiig muun nayaimpinum ajutjamaidau asamtai. Wagki atum atsagmin profeta batsamajakua nunash aatus waitkasaju ainawai.

*Nugkanmag weega nunin tsauptina nunin ainagme tibau*  
(Mr. 9.50; Lc. 14.34-35)

<sup>13</sup> “Atumek ju nugka juajuig tuke weega nunin ainagme. Tujash nunú wee jea jeatuji megkaekamtaish,\* ¿utugsaya ataktush jea jeatush emamainaita? Duka atumnachu asamtai agaa ukajá ajapmainai dutikamun aents aidau najamain ainawai.

<sup>14</sup> “Atumek nugka juajuig tuke tsauptina nunin ainagme. Yaakat nainnum awa duka uumkag amaitsu.

<sup>15</sup> Lámpara ekemakaik kajunai dukukaik idaichatiame, dutiktuk yakí ekentayame ashí jeganum awa nuna tsauptin emati tusa. <sup>16</sup> Atumshakam nunisjumek, ashí pegkeg aidauk takaakjum aents aidaush iwaintuktajum, nuna wainainak atumin Apa nayaimpinum puja nuna emematiagtinme.

*Chicham umiktin agagbauwa nunú pachisa Jesús jintinkagtuamu*

<sup>17</sup> “Chicham umiktinun, nuniachkush profeta aidau agagbau aina nunakesh emegkaktatus taacheash tusajum anentaimigpajum, wika nuna emegkaktasanuk tachuitjai, ayatak nuna umiktasan tauwaitjai.

\* **5:13** “Wee jea jeatuji megkaekamtaish” tawa junak palestinanmaya week nigkish jea jeatujig megkaeyin ainawai tawai Thompson.

<sup>18</sup> Nunak dekas tajime: Nugka, nayaim aina nunú megkaegainatsaigkik chicham umiktinnum, piipich agasbau aina dukesh megkaekashtinai, imanisag aig ashí uminkatnai.

<sup>19</sup> Nuadui makichik aentskesh, jujú chicham umiktajum tibuwa juiyan imanchau diyak umiachuk, tikich aidaunash umiktajum tusa jintinchauk, Apajú inama nuish imanchau diyam atinai. Tuja chicham umiktajum tibuwa nuna betek umiak tikichnashkam dutikashag jintintuk, Apajú inama nui eme anentam agtinai.

<sup>20</sup> “Tujash, chicham umiktinun jintinkagtin aidau, nuigtú fariseo aidau umiina nuna nagkaesau pegkeg aina nunú takaachkugmek, Apajú ashí nayaimpinum inama nuig wayashtin ainagme.

*Shiwajumjaish shiig chichasá epegkeata tibau*

(Lc. 12.57-59)

<sup>21</sup> “Atumek antukuitjume atumi muunjum aajakajua nunú tibau aajakajua nu: ‘Magkagtuawaipa, makichik aentskesh magkagtau suwimak suwam atatu’ tawai.

<sup>22</sup> Tujash wi tajime: Makichik aentskesh wainak yachin kajejauk, suwimak suwam amainai. Nunisag yachin anentainkachu chichajú wekagushkam, Sanedrín’ ejega deka-jam amainai, tuja yachin pegkegchau chichajú wekagushkam jii ajumaish kajinkashtina nui pujus waittsatnai.

<sup>23</sup> “Nunin asantai ofrenda jukim altarnum jegakmam yatsumjai kajegdaikamu adeagmek,

<sup>24</sup> ofrendak altarnum ejetsuk ukuakum dekatkauk yatsumjai epegkam agkan wajasam wakitkim ofrendajum ejentata.

<sup>25</sup> “Ame apunum utugchat dekagmamasam weakmek eke jintaa weamuik amina shiwajumjai chichasam epegtuniata, nunikchaminig jueznum ejetamantai, juez aentsji inajam cárcel egkepawai.

<sup>26</sup> Dekas tajame, nui egkepamtaig jiinkishtatme, kuichkijum ashí akikmakam ashinkam jiiinmainaitme.

*Jesús tsanijinawaigpa tibau*

<sup>27</sup> “Atumek antuku ainagme: ‘Tsanijinawaigpa’ tibuwa duka.

<sup>28</sup> Tujash wi tajime: Aents nuwan dutikachainjash tusa wakegas diyaushkam, anentainig tsanijimui.

<sup>29</sup> “Nuniau asantai amina jiiim untsugmia nu tudaunum ajumpamain awajtamkuig ukuinkam ajapata; wagki pegkejai iyashminia makichik megkaebauwa nu, ashí iyashmia nu waitiaku pujutaiya nui ajapeam amaina nu.

<sup>30</sup> Tuja uwejum untsuja nunú tudaunum ajumpakuig tsupikam ajapata; wagki pegkejai iyashminia makichik megkaebauwa nu, ashí iyashmia nu waitiaku pujutaiya nui ajapeam amaina nu.

*Jesús nuwak idaimaitsui tibau*

(Mt. 19.9; Mr. 10.11-12; Lc. 16.18)

<sup>31</sup> “Jushakam tibuwai: ‘Aishmag nuwen idaikug, papí nuwa idaiku najantain umiká sumainai’, tawai.

<sup>32</sup> Tujash wi tajime: Aishmag nuwen ekagmakchau aig idaikug, aentsjai tsanijinati tusa idaimaina dutikawai. Nuwa idaisamujai nuwenushkam ekagmawai.

*Atum dutikatin pachisjumek Apajuik adakaigpajum Jesús tibau*

<sup>33</sup> “Nuigtushkam antukuitjume atumi muunjum aajakajua nunú tibau aajakajua nu: ‘Ame Apujum Apajú pachisam dutikatjai tibauk umitskek idaisaipa’, tawai.

<sup>34</sup> Tujash wi tajime: Apajú adaisagmek tiigpajum, nayaim pachisjumesh tiigpa; wagki nayaimpia duka Apajú ekeemtai asantai,

<sup>35</sup> nugka ju pachisjumesh tiigpajum, wagki Apajú najamsa eketbau asantai; Jerusaleghakam pachisa tiigpa; wagki Rey ashí nagkaekagtasua nuna yaaktaji asantai.

<sup>36</sup> Atumi buukem pachisjumesh tiigpajum; wagki makichik intashia dukesh bukusea nuniachkush pujukesh emamainchau asajum.

<sup>37</sup> Dekas ayatak ame dutikmainaitkumek ‘ehé’ tita, tuja ame dutikmaichakmek ‘atsá’ tita, aaja tumaina nu wainka tu wekaebauk pegkegchau asantai.

*Jesús pegkegchaunmag ikdaikaigpajum tibau*

(Lc. 6.29-30)

† 5:22 “Sanedrín” tawa nunak concilio tawai. Nuanuig fariseo aidau, saduceo aidau, judío apuji aidau, escriba aidaujai ijunajakajui chichaman dekawagtatus, nunak Sumo sacerdote chichakmatai ijunajakajui.

<sup>38</sup> “Atumek antuku ainagme: ‘Aents jiimin emestugmakuig, ameshkam dutiksamek emestugta, tuja daimin akagtamkuish, ameshkam dutiksamek nai akagkata’, tawa nu.

<sup>39</sup> Tujash wi tajime: Duka dutikawaigpa. Amina pegkegchau takagtamkuishkam iikatasam wakeyipa. Makichik aentskesh yapim untsugmia atú awatamkuishkam, atumesh iikajum awattsuk, juinia yapijuish awatita tusajum ayampatuatajum.

<sup>40</sup> Makichik aentskesh nugkutaigmin atanjamkitatus utugchatan aputugmakuig, awantak pataká nugkutaigmesh<sup>‡</sup> susata.

<sup>41</sup> Aents kijinun amaak: ‘Jujú jukim makichik kilómetro kuwagtukta’, tujamkuishkam jimag kilometronum ejentuntajum. <sup>42</sup> Makichik aentskesh segapakuig susata, tuja amina wajjigmin tsagkatjukta tusa segapakuish, sujitkaipa.

*Shiwajui aidau aneamu*  
(Lc. 6.27-36)

<sup>43</sup> “Dushakam antuku ainagme: ‘Amejai ijutkamu aneakum, shiwajum aidau kajekatajum’ tibauwa nu.

<sup>44</sup> Tujash wi tajime: Atumi shiwajum aidaush aneetajum, nuniakjum atumin pegkegchau chichagtamaidaush Apajui aujtustajum.

<sup>45</sup> Nunú aajam dutikakjum, atumi Apa nayaimpinum puja nuna uchiji atatjume. Wagki nigka ashí aents pegkeg, pegkegchau aina nudaujai etsanak etsanmitkawai, aikasag yuminashkam pegkejan takaidau, pegkegchau takau aina nudaujai yutumtikawai.

<sup>46</sup> Tujash atum ya anempainawa nujaig aneniakjumes<sup>h</sup> ¿wají imana juwagme? Nunak apu kuichkiji atinun ijumin aidaush nunin ainawai.

<sup>47</sup> Tuja atum yatsum aidaujaig kumpamdayakjumes<sup>h</sup> ¿wají imana iwainame? Nunak Apajui anentaimtuchu aidau nunin ainawai.

<sup>48</sup> Dekas atumek betek umin atajum, atumin Apa nayaimpinum puja nu betek umina iman.

## 6

*Aents atsumau yayamunak tikichik dekamainchau ainawai*

<sup>1</sup> “Atum pegkeg takaajum nunú aentsnum iwainmamkata tabaunum dutikawaigpa, kuitamamkatajum. Atum aaja dutiktaik atumi Apa nayaimpinum puja duka wají pegkeja nunak amaschagtinai.

<sup>2</sup> “Nuniau asantai atum aents atsumau yayakjumes<sup>h</sup>, wi takaamun dekaatnume tusagmek jega ijuntainmagkesh, jintaagkesh etsejú yujaigpajum; nunak aentsú tsanú aidau eme anenjús diigsatnume tusag nuní yujau ainawai. Dekas tajime: Nuna nunidauk aents eme anentam aidau asag wají pegkeg suamak achagtinai.

<sup>3</sup> Tujash ame atsumau yayakmek tikichkesh ujakaipa,

<sup>4</sup> duka dekachbaunum dutikata. Nunak amina Apa ame dutikamunak wainu asa wají pegkeg aidau amastatui.

*Jesús Apajui aujut jintinkagtuamu*  
(Lc. 11.2-4)

<sup>5</sup> “Atumek Apajui aukjumes<sup>h</sup>, aentsú tsanú aidau, jega ijuntai aidau, nuni-nachkush jintá wajantag, aents aidau wainkamu atag tus wakegainak Apajuin aujú yujau aina nunikaigpa; dekas tajime, nuna nunidauk aents eme anentam yujaidau asag wají shiig pegkeg aina nunak jukichagtinai.

<sup>6</sup> Tujash ame Apajui aukjume<sup>k</sup>, ame kanutaigmin wayam waiti epenim, dekachbaunum amina Apa puja nu ausata. Nuniamin amina Apa amek dekachbaunum nuniam nuna waipau asa wají pegkejan amastatui.

<sup>7</sup> “Apajui aukjumes<sup>h</sup> chicham imanchauk awá awagkigmek aujigpa, Apajui anentaimtuchu wajukin aina nunitsuk, ditak imatjamas imá shiig antugtukai<sup>n</sup>ta tusag nunak imatin ainawai.

<sup>8</sup> Atumek dita wajukena nunikaigpa, wagki amina Apa duka dekawai atum atsumamunak eke segatsjum<sup>in</sup>ig.

<sup>9</sup> Atumek aaja aujmainaitjume:

“ ‘Tina Apajiyah, amek nayaimpinum pujuwaitme.

Pegkegmaitam ibau asam imá ameketme ememattaim.

<sup>10</sup> Amek jutiishkam inajatjata.

Ame wakegamun nayaimpinmaya umigtamaina nunisag ju nugka juiyash aminak umigtamkatnume.

<sup>‡</sup> 5:40 “Awantak pataká nugkutaí” tawa nunak, judío aidauk tsetsektin ejamakta tabaunum awantak pataká nugkujakú asagmatai tiuwai.

11 Dutiksamek ii yuwatnushkam kashí kashinig sukagtita.

12 Nuigtú ii tudauijishkam tsagkugkagtugta, jutii tikich pegkegchau awajtamush tsagkujuinag aikasmek.

13 Pegkegchaun takastinme tusamek idaikagtutsuk, ayatak yaijatkam agkanmitkaguata', tiuwai.

14 "Atum tikich pegkegchau awajtamaidau tsagkugtaik, atumnashkam atumí Apa nayaimpinum puja dusha tsagkugtamjattagme,

15 untsu atum tikich aents aidaush tsagkugchataik, atumin Apa dushakam atumi tudaugminash tsagkugtamjashtatui.

*Jesús ayuno pachisa jintinkagtuamu*

16 "Atum ayuno takaakjumek, wake besemjak yapiminish iwainmamkaigpa, aentsú tsanú aidau, ayunawapi tusa aents waitkatnume tusag wajukena nunitsuk. Dekas tajime: Nuna nunidauk aentsnum iwainmamá yujaidau asag wájí shiig pegkegnak jukichagtinai.

17 Nuadui ame ayuná pujusam Apajuí aujkumek wake besekam wekaetsuk, yapim nijaim, shiig temashmajam, shiig dakunkut wekaesata,

18 aents aidau ayunawapi tusa dekagmawainum. Ame nuniemunak, imá amina Apa duke amijai puja nu waipawai, nuniau asa amina Apa dekachbaunash waina nu wájí pegkejan amastatui.

*Nayaimpinum wiyakchameaut*

*(Lc. 12.33-34)*

19 "Jujú nugka jui wajiin mamuk emesmain, nuniachkush kawanchjumain, kasashkam wayá kasamain aina juninum wiyakchameatasagmek wakeyigpajum.

20 Dekas nayaimpinum, mamukush wajiin emeskantai megkaemainchau, nuniachkush kawanchjumainchau, kasashkam wayá kasamainchauwa nui wiyakchameatajum.

21 Wagki tuwí atum wiakchameatin ajutjamua nuig anentaimsa pujustajum.

*Lámpara pachisa augmattsamu*

*(Lc. 11.33-36)*

22 "Atumi jimek lámpara ekemakam tsaaptin emaaam numamtuk atumi iyashminak awagmawai. Jiim pegkeg asamtai shiig wainmamainaitam imatksam, ashí pegkeg aina duke anentaimtaik, anentaiminish tsaaptin ajutjamainai.

23 Untsu jiim pegkegchau ataik ashí amina iyashmia duka suwenum amainai. Aminí tsaaptin awa nu suwe wetaik, nuni nagkaemas pujutjum pegkegchau wemainai.

*Jesús inakak jimá apuginuk amaitsui tibau*

*(Lc. 16.13)*

24 "Makichik inakak jimag apun takagnuk amaitsui; wagki tikichin dakitak, tikichnak aneemainai, nuniachkush tikichin eme anentus diyak, tikichnak junik diimainai, nunin asamtai Apajuí umigkata tu, wiyakchameatasa anentaimtu wajamait sui.

*Apajuí ni uchijí aidaunak kuitamui*

*(Lc. 12.22-31)*

25 "Nuadui atumin tajime: ¿Wajina yuwanuk, wajina uwagnuk, wajina nugkugnuk pujustaja? tusagmek uyumá pujuigpajum. Yutai nagkaesauwa duka atumi pujutjumia nuuwai, tuja jaanchin nagkaesauwa duka, atumi iyashmia nuuwai.

26 Shiig anentaimsa diistajum pishak agkajunum nanamaina nunú. Ditak ajakmak-agkesh juwinatsui, jeganakesh jegamkag yutaijinak ijumainatsui, nuni aunak atumi Apa nayaimpinmaya nu dita yuwatnunak suawai. ¿Atum dekas chigki aidau nagkaesau ainatsjumek?

27 ¿Yaa atum ainajum anuiyash, esajam atajai tusa anentaimtu pujakush esaumainaita?

28 "¿Wagka atumesh jaanchish imá puyatjagme? Ikamia yagkug aina nu anentaimsa diistajum wajuk tsakainawa, ditak takainatsui, ujuchnash kutamainatsui.

29 Tujash atumin tajime, Salomón ashí imanun iwagmamá wajakuitkush yagkujá niimega ibanuk nugkujakchauwai.

30 Dupa ikamia aidau kashin apeam atinnakesh Apajuí imatikas iwaja ibaush, ¿wagkag aan nagkaemas atumnash dutijamashtinme aents imatikas dekaskeapi tuchau aidauwah?

31 Nuadui atumek: '¿Wajig yuwatji?, nuniachkugmesh ¿wajig uwagtaji?, tachakjumesh ¿wajig nugkugtaji?' tsajum anentaimá pujuigpajum.



<sup>32</sup> Wagki ashí nunú aidaunak Apajuí anentaimtuchu aidau puyatjus yujajin ainawai, tujash atumi Apa nayaimpinmayaya nu shiig degagtamjume, atum ashí nu atsumajum nunak.

<sup>33</sup> Nuadui dekatkauk Apajuí inama nu nuigtú ni pegkejan takaa nunuwá egaktajum, nuniakjume ashí nunú aina dushakam aan kuashat ajutjamiagtinaí.

<sup>34</sup> Nunin asamtai kashin atina duka anentaimtu pujuigpajum, wagki kashin dutik-mainuk tsawan ajitin asamtai, adeagtajum makí makichik tsawanta nuna utugchatji ajuiina nunú.

## 7

### *Tikichi pujutji pachisjume augmatigpa tibau*

(Lc. 6.37-42)

<sup>1</sup> “Tikichi pujutjig augmatú yujaigpajum, atumnash Apajuí aikasag tujaminum.

<sup>2</sup> Wagki atum tikich aidau pegkegchaujish augmatú yujataik, Apajuí atumnash nunú aents tajum dutiksag tujamtatjume. Atum tikich utujagme dutiksag Apajuí atumnash dutijamattagme.

<sup>3</sup> ¿Wagka yatsumi jiin chipum tekani egkemaush diyagme, atumi jiimin numi egketa nu diitskesh?

<sup>4</sup> ¿Utugsamea amina yatsumish: Yatsuju jasta chipum tekani jiimin egketa nuna jgkitjame tumainaitme?

<sup>5</sup> ¿Tsanumin aidauwah! Dekatkauk amina jiimin numi egketa nu jiiktá, nunikam shiig wainkam yatsumi jiin chipum tekani egketa dusha jüigkita.

<sup>6</sup> “Antsagmek Apajuí chichame pegkegma nu ujamaitak antutan dakituinakuig waitkatsuk idaisatajum, ditak yawá kajen aidau yutai pegkeg suwamaitak iiki esajatta tuwama nunidau asagmatai. Tuja atumdau perlak kuchi batsatbaunmag ukubaitsugme, dajag tsaiká atumin pempentugmaki emestamain asamtai.

### *Wajuk Apajuish aujmainaita nu pachisa tibau*

(Lc. 11.9-13; 6.31)

<sup>7</sup> “Apajuishkam segatajum, imatjamak amastatjume; egatash egaktajum, egakjume igkugtatjume; untsuktajum, imatjamak waitin ujatjamtatjume.

<sup>8</sup> Wagki ashí aents sumauk, suwam auwai; egauk igkuinai, ni egamujinak; waitinum wajas untsumushkam, ujatam auwai.

<sup>9</sup> ¿Ya aentsuita uchijí yujumak segamaitak kayá sumainush?

<sup>10</sup> ¿Nuniachkush namak segamaitak dapí sumainush?

<sup>11</sup> Atum pegkegchau ainayatkugmesh, uchijum pegkeg sutak dekagme; jwagkag aan nagkaemas atumi Apa nayaimpinum puja dusha atum segamunash waji pegkegnash amaschagti!

<sup>12</sup> “ ‘Nunin asamtai, ashí pegkeg aina nujai tikich aidau shiig awajkatajum, atum shiig awajtuktinme tusajum wakejin ainajum nunisjume’, wagki aatus chicham umiktina duka jintinkagtawai nuigtú profeta aidau tibauwa nuishkam.

### *Waiti menakua nu*

(Lc. 13.24)

<sup>13</sup> “Waiti menakua nuní wayatajum. Kuashat aents aidau junta untsujin, waiti wegkajam megkaetanum ekagta nuní imá weenawai.

<sup>14</sup> Wagki waiti menaku, junta tsejgkuch pujutnum ekagta nunak ujumak aents igkuinawai.

### *Numik neje diigsajum dekamainaitjume tibau*

(Lc. 6.43-46)

<sup>15</sup> “Kuitamamkatajum profeta wait aina nunú tsanugmajainum, ditak uwija nunin wajas minitjamainawai, tujash anentainig ikamyawa kajena iman ainayatak

<sup>16</sup> Nuadui atumek aents aidauk ditá takatji diigsajum wainmainaitjume, untukjak munchiinak nejetsame, antsag uvashkam jagkinmayag juushtayame.

<sup>17</sup> Nunisag ashí numi pegkeg aidauhkam pegkegnak nejenai. Tuja numi pegkegchaushkam pegkegchaunak nejenai.

<sup>18</sup> Nunin asa numi pegkejak pegkegchaunak nejemait sui, antsag numi pegkegchaushkam pegkegnak nejemait sui.

<sup>19</sup> Ashí numi pegkegchau nejen aidauk tsupija apea ajaptaiyai.

<sup>20</sup> Nuadui atumek aents aidauk dita takaamuji diigsajum wainmainaitjume.

*Nayaimpinmag ashí wayachagtinai tibau*  
(Lc. 13.25-27)

<sup>21</sup> “Ashí aents aidau: ‘Apuh, Apuh’, tujutuina duka Apajuí nayaimpinum inama nuig wayachagtin ainawai. Mina Apag nayaimpinum puja nunú wakegamun takasú aina duke wayawagtinai.

<sup>22</sup> Nunú tsawan atina dui kuashat aents: ‘Apuh, Apuh’ Jutiishkam amina daagmin chichamjum etsegekabaiji, nuniaku amina daagmin iwanch aidau aentsun egkemtuaush jiijá ishimaíji, tuja aents dutikmainchau aidaush kuashat takasuitji, tujutiagtinai.

<sup>23</sup> Tujash wi ayaakun: ‘¡Atumnak wainchau ainajime! ¡Pegkegchau takau aidauwah, wetajum!’ titinaitjai.

*Jegamkatasa ajiagbau pachisa tibau*  
(Mr. 1.22; Lc. 6.47-49)

<sup>24</sup> “Makichik aentskesh mina chichamjun antugtuk wi taja dutiksag umia duka, jega jegamtan dekau nugkan inital tai kaya muunnum dekanmitkak ajia jegamkau aajakua nuninai.

<sup>25</sup> Nuniai yumi yutug, namakash dujajukui, dasesh senchi nunú jegan umpuau imatika tukuinakush yumpuachui, kaya muunnum dekanmitkaka ajigbau asamtai.

<sup>26</sup> Untsu mina chichamjun antuinayatak umigtachuk, aents anentainkachu jegan kayamnum tauk ajigká jegamkauwa nuninai.

<sup>27</sup> Nuniai yumi yutug namakash dujajukui, dase senchi jega umpuak tegakui, dutikam shiig tsainkauwai”.

<sup>28</sup> Juna aatus Jesús chichá chichakua ashimkamtai, aents aidauk ni jintiamujinak anentai jegachajui,

<sup>29</sup> wagki Jesusak jintinkagtau apu chicham antugtai tumaina imatikas, maestro chicham umiktinun jintinkagtin aidaun nagkaegas, apu chichame antugtai jintimaina imatika jintinkagtau asamtai.

## 8

*Aents lepragtinun Jesús etsagagbau*  
(Mr. 1.40-45; Lc. 5.12-16)

<sup>1</sup> Nuna Jesús ashimak nainnumia akaiki wetai, kuashat aents saetukaju.

<sup>2</sup> Nuniai makichik aents jata lepra achikam jaak pujau wainak, Jesusan jegantun niina eemtin tikishmag pujus segaak:

—Apuh, wakegakmek etsaentumainaitme, tau.

<sup>3</sup> Tama Jesús uwejin antiak:

—Wakagajai, pegkeg wajastá, tiuwai. Tamawaik leprak megkaekauwai.

<sup>4</sup> Nunikmatai Jesús chichajak:

—Nijah, makichik aentskesh ujakaipa, sacerdote jegajuam wantintukta, nuniakum ofrenda susata Moisés dutikata tibauwa dutiksamek, ditashkam waipakag dekas tsagaje tujamtinme, tiu.

*Jesús Capernaunumia capitani inaken etsagagbau*  
(Lc. 7.1-10; Jn. 4.43-54)

<sup>5</sup> Jesús Capernaum jegattaman capitán jegantauwai aujsatatus.

<sup>6</sup> Nunik:

—Apuh, mina inakeg ashí iyashí najaimak shiig senchi waitiak buchitmainchau wajas gegajui tepawai, tiuwai.

<sup>7</sup> Tama ni ayaak:

—Ayú, wi anui taan etsagagtajai, tiuwai.

<sup>8</sup> Tutai capitán\* ayaak:

—Apuh, wika amea ibauk mina gegajui utuamak amaitsujai; ayatak chichamaik tsagagti tujutta, tamak mina inakjush tsagagatui.

<sup>9</sup> Wagki wikishkam apu umigbau ajutui, antsag suntag mina umigtuidaush ajutuinawai, nunú aina nuiyan wi: “Wetá”, tamak wegawai. Tikichia nuna: “Taata”, tamak minawai; aikasnuk mina inakjunash: “Ju dutikata”, tamak dutikawai, tau.

<sup>10</sup> Nuna tutai Jesús antuk anentai gegagchau, nunik niina saetus minina nuna chichajak:

—Dekas tajime, Israel aina nuiyanakesh imatika dekaskeapi tabau ajamunak wainkachjai.

\* 8:8 “Capitán” tawa nunak tikich agagbaunmag “centurión” tuinawai.

<sup>11</sup> Nunin asamtai tajime: Etsá minitajinia, etsá akaetaijinia kuashat aents aidau kaunkagtinai, nunikag Apajuí inamtajjin nayaimpinum Abraham, Isaac, Jacob aina nujai pekaamsag yuawagtinai,

<sup>12</sup> tujash Apajuí inamtajjin wayatnume tibau aina duka, agaa jiikí suwenum ajapeam agtinai, dutikam nui batsamas butuinak nainak takegtú batsamtin ainawai, tau.

<sup>13</sup> Nuna tii Jesús capitanin chichajak:

—Wakitkita, ame dekas ashí nuniktatuapi tame duka imatiksag uminkattawai, tau. Nuna tiuwa duik inakshakam tsagajui.

*Jesús Pedro tsatsají etsagagbau*

(Mr. 1.29-31; Lc. 4.38-39)

<sup>14</sup> Nuna tusa ukuak Jesús Pedro jeen weuwai, nui jegakmá Pedro tsatsají senchi tsuweak tepettaman wainkauwai.

<sup>15</sup> Dutika Jesús uwegnum antigkui, dutikam tsuweamunak megkaekau, nunik nantakí Jesusan yutain ajampeau.

*Kuashat aents etsagakbau*

(Mr. 1.32-34; Lc. 4.40-41)

<sup>16</sup> Nunú tsawantaik kintamai, kuashat aents wakan pegkegchau egkemtuamu aidau ikautuawajui; dutikawagmatai chichamenig wakan pegkegchau aidauak jiijá ishiakui, dutika ashí jau aidounash etsagaku.

<sup>17</sup> Nunak profeta Isaías tibau aajakua nu uminkati tusa dutikauwai, duka: “Nigki jutii kakakchamujinash, jatanashkam jukini”, tawai.

*Jesusa jintintajji agtatus wakejukaju aidau*

(Lc. 9.57-62)

<sup>18</sup> Jesús kuashat aents tuwajuinam wainak, ni jintintajji aidau: —Amain wegagmi, tiuwei.

<sup>19</sup> Nuniai makichik maestro chicham umiktinun jintinkagtin jegantun:

—Maestroh, wisha ame tuwig wekaetam nuniakminish tuke amijaig wekaesatin atajai tajai, tau.

<sup>20</sup> Tutai Jesús ayaak:

—Kujan Cham aidau waajig ajuinawai, antsag yakiya pishak aidauhkam pasugkeg ajuinawai; tujash Aentsmaga akiinauwa duka buuké atumsa ayamainjigkesh atsujui, tiu.

<sup>21</sup> Nuna tutai makichik niina jintintajji aina nuiya:

—Apuh idaitusta, dekatkauk wenu mina apajun ukusan ukuakun nemagkatjame, tau.

<sup>22</sup> Tutai Jesús ayaak:

—Amek nemagtukta, idaisata wakanin jakau aina nu jakau aidauak ukustinme, tiuwei.

*Jesús dase imijkamu*

(Mr. 4.35-40; Lc. 8.22-25)

<sup>23</sup> Nuna tusa ukuak Jesús ni jintintajji aidaujai barcanum chimpimjag weajui.

<sup>24</sup> Nunik weenai dase shiig senchi dasentu, imaniau asa tsukatak barcanum yumik senchi yajanu; tujash Jesusak kanag egketu,

<sup>25</sup> imanitai niina jintintajji aidau jegaantag ishintainak:

—¡Apuh, uwemtikagtugta jakektatji! tuidau.

<sup>26</sup> Tama ditan ayaak:

—¿Wagka sapigmajume aents imatikas dekaskeapi tuchau aidauwah?

Tusa nantakí dasen, kuchanashkam imijiaku, dutikam kuchashkam miyasuch wajas patamsauwai.

<sup>27</sup> Dutikamtai ditak pempeentunisag:

—¿Jusha waji aents asamtaiya dasesh, kuchash ni chichamenash antujuinawa? tudaiyinau.

*Gadaranmaya aents aidau wakan pegkegchau egkemtuamu*

(Mr. 5.1-20; Lc. 8.26-39)

<sup>28</sup> Nunik Jesús kuchá amain katigkú, nugka gadaranmaya aidau batsamtain, nuniai jimag aents iwanch egkemtuagbau aidau ukumatainmaya jiiinkiag Jesusan jegantaju. Nunú aents aidauk senchi kajen aidau asamtai, nunú jintanmag makichkish nagkaemamainchau aajakui;

<sup>29</sup> nunik untsumainak:

—¿Apajuí Uchijyah, jutiish utugkagtukta tame? ¿Tsawan jegatsaigkik juish suwimak sukagustasam minam? tuidau.

<sup>30</sup> Tuja kuashat kuchishkam ikaa yuwak batsatu,

<sup>31</sup> nuniau asamtai wakan pegkegchau aidau Jesusan segainak:

—Ju aentsnumia jijiatkumek, au kuchi batsata awi awekagtita.

<sup>32</sup> Tusá tama Jesús ayaak:

—Wetajum, tiuwai.

Tama wakan pegkegchau aidaushkam aentsnak ukuinak kuchinum utsanawajui, dutikam kuchishkam pisajag betsag tajaekaunum utsanawag kuchanum iyagkag jinawajui.

<sup>33</sup> Nunikagmatai kuchi kuitamin aidaushkam pisajag yaakat jegawag, kuchi jinamun pachis, tuja aents wakan pegkegchau egkentuamu aidaushkam nunikagmae tusag ashí etsejuidau.

<sup>34</sup> Tiagtai ashí yaaktanmaya aidauk Jesusan wainkagtatus wejiajui, nunik wainkag, juig pujutsuk yajá wetá tusag segajui.

## 9

### *Jesús aents wekaechau etsagagbau*

(Mr. 2.1-12; Lc. 5.17-26)

<sup>1</sup> Nuna dutika ukuak, Jesús barcanum egkemag, amain katigká niina yaaktajin jegauwai.

<sup>2</sup> Nunikmatai aents wekaechaun camillanum pataidiag ejetiaju; dutikawagmatai Jesús dita dekaskeapi tuinamujin wainak, jaun chichajak:

—Uchijuh, shiig aneasta, ame tudajum aidauk tsagkugnaje, tau.

<sup>3</sup> Nuna tutai ujumak maestro chicham umiktinun jintinkagtiin aidau anentaimsag: “Juka Apajuin pegkegchaun chichajak tu wekaewai”, tuidau.

<sup>4</sup> Tu anentaimaidaun Jesús dekau asa ditan chichajak:

—¿Wagka anentaiminish pegkegchaush anentaimjume?

<sup>5</sup> ¿Tuwaita imá yupichuch tumainush, tudajum aidauk tsagkugnaje taja dukaih, atsa nantakim wetá tumainaitag dukaih?

<sup>6</sup> Tujash Aentsmaga akiinawuwa nu, ju nugka juish tudau aidaunash tsagkugkagtumaina nu dekaatajum. Tusa wekaechaun chichajak:

—Nantaktá nunikam camillajum jukim jeemin wakitkita, tiuwai.

<sup>7</sup> Tama niishkam nantakí jeen weuwai.

<sup>8</sup> Nuna wainkag aents aidauk ishankaju, nunikag Apajuin emematiaju, niina senchijin ashí aents aidaunum iwainaku asamtai.

### *Jesús Mateo untsukbau*

(Mr. 2.13-17; Lc. 5.27-32)

<sup>9</sup> Nuna dutika Jesús wekamá Mateon\* wainkauwai, kuichik apunu atinun akikmagtai yajumak ekeematman, nunik:

—Mateo, wegajai mina jintintaig aminum, tau.

Tama Mateoshkam ayú tusa wajakug Jesusjai weuwai.

<sup>10</sup> Jesús yujumkam yuwak jintintaiji aidaujai Mateo jeen eketai, apu romanmaya kuichkiji atinun ijumin aidau, nuigtú tikich aents tudaugtin aidaujai kuashat kaunawag Jesús eketbaunum jegaantag pekaamsaju.

<sup>11</sup> Nuna wainkag fariseo aidau Jesusa jintintaiji aidaun iniinak:

—¿Wagka atumi jintinjamnush apú kuichkiji atinun ijumin aidau, nuigtú aents tudau aidaujaish ijunjash yuawa? tuidau.

<sup>12</sup> Nu tabaun Jesús antuk ayaak:

—Jamamtuchu aidauk ampijatnunak atsumatsui, jau aidau atsumawai.

<sup>13</sup> Wetajum nunikjum ju chichamash wajina takua tawa nu unuimagtajum: “Wait anenkagtín atajum tusan wakegajai, anentag itaajum nunak dakitajai”, tawa nu. Wika aents pegkejan takau aidau untsuktasan minichuitjai, aents tudaugtin aidaunum tauwaitjai.

### *Ayuno pachisa iniimsamu*

(Mr. 2.18-20; Lc. 5.33-35)

<sup>14</sup> Juagká jintintaiji aidau Jesusan jegaantag, iniinak:

—¿Wagka jutiik, fariseo aidaujaig kuashtá ayuno takau agmag nuniajinish, amina jintintaijum aidaush ayunonash takainatsua? tuidau.

\* 9:9 Jujú papinum “Mateo” tawa nunak tayatak tikichnumag “Levi” tawai.

<sup>15</sup> Tama Jesús ayaak:

—¿Nuwenbaunum ipaamu aidaush wake besemag batsamainkaih, nu nuwenu ditajai pujaigkish? Tujash tsawan jegattawai nuwena nunú juwam atata nu, nunikmatai ipaamu aidauk ayunó wajakagtatui.

<sup>16</sup> “Makichik aentskesh jaanch yamagman tsupikag jaanch mamujunmag adujtuchu ainawai, yamajam asa waketak jaanch mamujua nuna nuní nagkaemas ichiimain asamtai.

<sup>17</sup> Antsag vino yamagmak duwap apagbau ajutnumag yajashtaiyai, dutikamak ichiimain asamtai, nunik vinok ukaegag, duwapshakam ichiinak ajapnamainai. Nuadui vino yamagmak duwap yamagmanum yajataiyai, nunin asa mai pegkejak amainai”, tiuwai.

*Jairo nawanji nuigtú nuwa Jesusa jaanchjin antigkua nu*

(Mr. 5.21-43; Lc. 8.40-56)

<sup>18</sup> Jesús nuna pachis chichagkagtai judío aidau apuji tajua, niina eemtin tikishmag chichajak:

—Mina nawantug yamá jakae; tujash ame minim uwegmin antinjukta, dutikam aneantatui, tau.

<sup>19</sup> Tama Jesuschakam ni jintintaiji aidaujai weajui.

<sup>20</sup> Nuniemunum nuwa doce mijadai numpan puwak waitú pujú Jesusan wainak ukunum juwatki adijkauwai, nunik Jesusa jaanchji wenin antigkui,

<sup>21</sup> wagki ni anentaimgag: “Imá jaanchjinkesh antiaknuk tsagagtajapi”, tau asa.

<sup>22</sup> Dutika antigkam Jesús ayampá nuwan wainak:

—Nawantah, shiig aneasta, ame dekaskeapi tabaugmia nu etsaentamjae, tiuwai.

Nu tsawanta nuaduik nuwak tsagajui.

<sup>23</sup> Nunik Jesús judío aidau apujiya nuna jeen jegakmá pigkuin<sup>†</sup> umpuin aidau nuigtú kuashat aents pampaa batsamtatman wainkau,

<sup>24</sup> nunik chichajak:

—Jiinjatajum, nuwauchik jakache ayatak kanaje, tau.

Tutai dushikidau.

<sup>25</sup> Tujash ashí aents jiinjagmatai wayá, nuwauchin uwegnum achiká inantam, niishkam nantakiuwai.

<sup>26</sup> Nu dutikamua nunak ashí nu nugkanum etsejug dapampajajui.

*Jesús jimag aents wainmachu etsagagbau*

<sup>27</sup> Nuna dutika Jesús jiinki wetatman, jimag aents wainmachu pataetukag, unsumkag:

—¿Davita uchijiyah, juitiish wait anenkagtugta! wajaidau.

<sup>28</sup> Nunik Jesús jegá wayamtai, wainmachu aidaush jegantajam, ditan iniak:

—¿Dekaskeap etsaentumainaita tujutjumek? tau. Tama ditashkam:

—Ehé Apuh, tuidau.

<sup>29</sup> Tiagtai Jesús ditá jiin antintak:

—Atum dekaskeapi tajum nunisag uminkati, tiuwai.

<sup>30</sup> Tamawaik wainmakajui. Nunikmatai Jesús shiig ujaak:

—Makichik aentskesh ujakaigpa, tiuwai.

<sup>31</sup> Tujash ditak jiinjag weenak, ashí aents nu nugkanum batsamin aidaunak ujá ujakua weajui.

*Aents chichachun Jesús etsagagbau*

<sup>32</sup> Nunú wainmachu jiinki weenaig, aents iwanch egkemtuamu asa chichachun, Jesusan itajuawajui.

<sup>33</sup> Dutikam iwanchin jigkiuwai, nunikmatai chichachushkam chichakú. Dutikamtai aents aidauk anentai jegachaju, nunikag:

—Israel aidautik makichkish jutikamuk wainchataiyai, tuidau.

<sup>34</sup> Tujash fariseo aidauk:

—Juka iwanch aidau apujiya nuna senchijin iwanch aidaunak jiyawai, tuidau.

*Jesús aents aidau wait anentsá diyamu*

<sup>35</sup> Jesusak wekagajakui ashí yaakat aidaunum nuigtú yaakat yaijuch aidaunmashkam, makí makichik ditá ijuntaiji aina nui jintinkagtak. Nuniak yamajam chicham Apajui inamjatnuijin pachis etsejak ashí jatai jau aidaunash tuja najaimagtin aidaunashkam etsagau.

<sup>†</sup> 9:23 Flauta tawa duka makichik umputai aajakui.

<sup>36</sup> Aents imanik tuwaidain wainak, wait anenjauwai, wagki pimpikiag nuigtú pampagkag uwig pastorji atsugbau wajukmaina nunidau asagmatai.

<sup>37</sup> Nuniak ni jintintaiji aidaun:

—Dekaskenmag juumainuk kuashtai, tujash takau aidau ujumke,

<sup>38</sup> nuadui nunú ajak juuktinun Apujiya nu segatajum, nuwi takastin aidaun ishiakti tusajum, tiuwai.

## 10

*Jesús ni apostolji agtin aidau etejamu*

(Mr. 3.13-19; Lc. 6.12-16)

<sup>1</sup> Jesús niina jintintaiji doce aina nuna untsuká, wakan pegkegchau aidau jiiktinun, jau aidau nuigtú najaimagtin aidau etsagaktinun senchintikauwai.

<sup>2</sup> Nunú doce apóstol aina nuna daajig jujú ainawai: dekatkauk Simón, tikich daaji Pedro, Andrés Simogka yachi nuigtú Jacobo niina yachi Juagjai Zebedeo uchiji aidau;

<sup>3</sup> Felipe, Bartolomé, Tomás, Mateo apú kuichkiji atinun ijumajakua nu, Jacobo Alfeo uchiji nuigtú Tadeo,

<sup>4</sup> Simón cananeo tutai nuigtú Judas Iscariote Jesusan sujukua nunú.

*Jesús ni apostolji doce aina nu ishiakbau*

(Mr. 6.7-13; Lc. 9.1-6)

<sup>5</sup> Jesús jujú doce aina nuna ishimak juna jintintus tiuwai: “Judiochu batsatbaunmag wegpajum, samarianmaya yaaktaji aidaunmash wayawaigpajum;

<sup>6</sup> dekas Israel uwig megkaejauwa nunin aina nui wetajum.

<sup>7</sup> Nunikjum etsegekatajum, ‘Apajuí nayaimpinmaya inamjatna duka tikiju wajasé’ tusajum.

<sup>8</sup> Jau aidaush etsagatajum, jakau aidaush inantajum, lepragtinush etsagatajum, iwanch egkemtuumush jijatajum. Nu dutikatnuk anenjauch jukiú ainajum nunisjumek anenjauch dutikatajum.

<sup>9</sup> “Jukigpajum kuichkikesh, orokesh, akachumtaigmin cobrekesh,

<sup>10</sup> waji egkesá jutai jintá atsumainkesh, yapagmamatkesh, sapatkesh, ushujutaigkesh; wagki aents takaa duka yuwatnujig suwam auwai.

<sup>11</sup> “Tuja yaaktanum jegakjumesh nuniachkugmesh yaakat yaigchinum jegakjumshakam, egaktajum aents kajintsá diimaina nu, nunikjum nuig pujusjum weakjum ukuktajum.

<sup>12</sup> Tuja jegá wayaakjumesh nuwi batsataina nunú kumpamatajum.

<sup>13</sup> Tuja nunú jeganmaya aents aina nu atumnash shiig aneas jujamiagtaik, atum agkan pujamu ajutjama duke ditaish atí; tuja nuninchau ataik, agkan pujamuk atsujiagtatui.

<sup>14</sup> “Tuja makichik aentskesh jeen awaintamtan dakitjamainak, atum chicham etsegbau antutnash dakitakuig, nunú jegak ukuakjum, nuniachkugmesh yaakat jinkugmekesh daweminia tsetse pegatjam akaketkam ukuktajum.

<sup>15</sup> Dekas tajime: Suwimak sukagtamú tsawan atina duik, nu yaakta duka, Sodoma Gomorra nugka aajakua nui aents batsamajakú suwimak susamua nuna nagkaesau suwimkan jukiagtinaí.

*Waitiamu atin Jesús emtika etsegekamu*

<sup>16</sup> “Aneaku atajum, wika atumnak ikamyawa batsatbaunum uwig ishimaina numamtuk aents pegkegchau batsatbaunum ishimjime. Nunin asantai atumek dapi ebetmainchauwa iman atajum, nuniakjum paum aidau tutitjajish atsujin aina iman atajum.

<sup>17</sup> Kuitamankatajum, wagki achigmakag apu chicham inagnau aidaunum sujupakagtinaí, dutijamawagmatai jega ditá ijuntaiji aidaunum awaintamawag asutamawagtinaí;

<sup>18</sup> dutijamainak gobernador aidaunum ejetamawag nuigtú rey aidaunmash ejetamawagtinaí mina nemagtuidau asagmin. Dutijamawagmatai ditá eemtin mina pachittsajum chichaakjum, Apajuí anentaimtuchu aidau eemtinish etsegtugkatin ainagme.

<sup>19</sup> Tujash achigmakag sujupainakuish atum chichaktinuk uyumakaigpa wajintu titatjume dushakam, wagki atum chichattajum dui wajintu chichaktatjume duka tibau atinaitjume.

<sup>20</sup> Wagki duka atum chichakchatnaitjume, atumi Apa nuna Wakaní atumin aujtama nu chichaktinaitjume.

<sup>21</sup> “Nuniamunum yachin maatnume tusag sujiagtinaí, antsag uchigtin aidaush uchijin sujiagtinaí, uchi aidaushkam apajin shiwagmagtinaí nuninak maidiagtinaí.

<sup>22</sup> Ashí aents aidau kajegtabiagtinaí mina daag pachisjum chichaidau asagmin; tujash ni ebetmagag nagkanbaunum jegaa nu uwemjagtinaí.

<sup>23</sup> Tuja makichik yaaktanum pujagmin aintamainakuish tikich yaaktanum tupikak-tajum. Dekas tajime, Israelnumia yaakat aina nui mina chichameg pachisjum ashí etsegtugminig, wi Aentsmagan akiinawaitag nunak taatnaitjai.

<sup>24</sup> “Jintintaiya duka jintinkagtina nuna nagkaesauchui, tuja inakshakam apujin nagkaesauchui.

<sup>25</sup> Jintintaiya duka jintinkagtina ibauk amainai, nunisag inaka dushakam apujiya ibauk amainai. Jeenna nuna Beelzebú\* tuina nuniaush, ¿wagkag nuna jeen batsata nunash pegké tichagtinme?

*Dekas ishamaina nu*

*(Lc. 12.2-9)*

<sup>26</sup> “Nuadui ditak ishamkaigpajum; wagki uukbau wantintsuk juwaktinuk makichkish atsawai, antsag dekaachbau dekantsuk juwaktinchakam makichkish atsawai.

<sup>27</sup> Nuadui atumek tikichish antachbaunum wi imá atumnak jintinbau antukujum nunú, ashí aents antuinamunum etsejatajum dekaatnume.

<sup>28</sup> Iyashmin mainakuish ishamkaigpajum, tujash wakanminak maumainchau ainawai. Dekas ishamkatajum iyashin, wakannash waitut tuke atina nui egkepamaina nu.

<sup>29</sup> “¿Makichik kuichkiuch kayauch piipich juwaku jimag pishak sujushtaigkaih? Tujash nunú pishak aina nuna atumin Apa Apajuiya nu jakatí tachamak makichkish jamaitsui;

<sup>30</sup> tuja nigka atumi intashim wajupa awa nunash dekaapag shiig dekawai.

<sup>31</sup> Nuadui ishamkaigpajum; wagki atumek kuashat pishak aina nuna nagkaesau akik ainagme.

*Ishamtsuk Cristo nemagnaitjai tumaamainai*

*(Lc. 12.8-9)*

<sup>32</sup> “Makichik aentskesh Cristunuitjai tusa aents aidau eemtin etsegtugkaju aidaunak, wishakam dutiksanuk ditanashkam mina Apag nayaimpinum puja nuna eemtin titinaitjai.

<sup>33</sup> Tujash makichik aentskesh, aents aidau eemtin: Wika Cristunak nemagchawaitjai tujuti aidaunak, wishakam dutiksanuk mina Apag nayaimpinum puja nuna eemtin: Ditak minak nemagtuchu ainawai titinaitjai.

<sup>34</sup> “Atumek agkan pujustinme tusas ju nugka juig tauwaitai tajume; tujash wika agkan batsamsatnume tusanuk taachuitjai, maaninak batsamsatnume tusan tauwaitjai.

<sup>35</sup> Wika miniuwaitjai uchi apajijai shiwagmagati tusan, nawanjish dukujijai shiwagmagati tuja nuwa nemakush tsatsajijai shiwagmagati tusan;

<sup>36</sup> nuniemunum ditá shiwajiyi duka niina patayí aina duke agtinai.

<sup>37</sup> “Aantsag mina anenmaina nuní nagkaemas apajin, nuniachkush dukujin imá senchi aneauk midau amaitsui, antsag uchijin nuniachkush nawanjin mina nagkaetasu aneauschkam, midau amaitsui;

<sup>38</sup> tuja ni mina nemagtuk waittan dakitaushkam, midau amaitsui.

<sup>39</sup> Aents ju nugka jui pujutan imá senchi wakegak, mina nemagtuk waittan dakitauk uwemjashatin ainawai; tujash mina nemagtak niina pujutinash puyatjukchauk, uwemjatnai.

<sup>40</sup> “Atumin jujamaina duka mina jujuinawai, tuja mina jujuina dushakam mina awetiuiwa nuna juinawai.

<sup>41</sup> Makichik aentskesh profeta Apajuí tabaun etsejin asamtai niina jeen juwauk, nu profeta waji shiig pegkejan jukitna dutiksag jukitnai; antsag aents pegkejan takau waji shiig pegkejan jukitna dutiksag jukitnai.

<sup>42</sup> Makichik aentskesh ju mina nemagtin imanचाuch aina juna, yuminakesh vasonum suwauk, dekas tajime, waji shiig pegkeg juwamu atina nunak megkaekashtinai”.

## 11

*Juan Yamijatin ni jintintaiji aidaun chicham dekaatajum tusa ishiakbau*

*(Lc. 7.18-23)*

<sup>1</sup> Jesús ni jintintaiji doce aina nuna ashí jintintua inagnak, nuiya jiinki ditá yaaktaji aina nui jintinkagtak chichaman etsegkatatus weuwai.

\* **10:25** “Beelzebú” tawa duka tu chichamkita shiig dekantsui, tujash iwanchnak taku tawai.

<sup>2</sup> Juagkak achikam cárcel egkemas antuku Cristo chichagkagtak wekaebaun; nunik ni jintintaiji aidaun awetiuwai,

<sup>3</sup> Jesusan juna iniasti tusa:

—¿Amekaitam taatnai tibauwa nu, atsa tikichnak dakastatag?

<sup>4</sup> Tama Jesús ayaak:

—Wetajum nunikjum Juan ujaktajum atum antukujum nu nuigtú wainkajum dushakam.

<sup>5</sup> Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaush yamajam chichaman antuinawai,

<sup>6</sup> shiig aneastinai mina junik anentaimtujuinatsu duka, tiuwai.

*Juan pachisa Jesús etsegkamu*

(Lc. 7.24-35)

<sup>7</sup> Nunik ditak waketjamtai, Jesús nui aents batsatun Juagkan pachis iniak: “¿Wají wainkatasagma uwegshunmash weabiugme? ¿Tagkanan dase umpuau wainkatasagmek weabiujum?

<sup>8</sup> ¿Nuniachkugmesh wají wainkatasagma weabiugme? ¿Aents jaanch shiig pegkejan nugkujá pujau wainkatasagmek weabiujum? Atumek dekagme jaanch pegkejan nugkuaju aidauk rey aidau jeen pujuinawai.

<sup>9</sup> Tujash ¿wají wainkatasagma weabiugme? ¿Profeta wainkatasagmek weabiujum? Ehé, dekaske, duka profeta nagkaesau aajakui.

<sup>10</sup> Wagki ni pachisa agagbauwa duka:

“ ‘Wi mina chichamjun etsegnun emtikan awemajai, ni jintanak umigtamkati tusan’, tawai.

<sup>11</sup> “Dekas tajime, aents akiinaina nuig Juan Yamijatna nuna nagkaesauk atsawai; tujash Apajú nayaimpinum inama nuig aents dekas imanchauchia nuuwai niina nagkaesauk.

<sup>12</sup> “Juan Yamijatn tauwa nuwi nagkamas yamaikish, Apajú nayaimpinmaya inama nunak tutitag awagmainak waitkainawai, tuja aents kakakantu aidau nunak emegkakta tuinawai.

<sup>13</sup> Ashí profeta aidau nuigtú chicham umiktina duka Juan tauwa imanuiya atinun etsegkajui.

<sup>14</sup> Tuja wi taja nu dekas nuninapi takugmek dekaatajum, niyai Elías taatnai tibauwa nu.

<sup>15</sup> Ni antutaiji ajamuk antukti”, tiuwai.

<sup>16</sup> “¿Jujú aents aina junash wajijai apatkanua tumainaitja? Ditak, uchi aidau plaza aidaunum\* pekaamsag kumpajijai untsuninak:

<sup>17</sup> ‘Flauta umpuakuish, atumek nantsemachmaugme; wake besemjan kantamkuish, buutchamugme’, tunaiyin aina numamtin ainawai.

<sup>18</sup> Wagki Juan taa, yutainash yuachu, umutnash umachkui, Iwanch ajamu asa aniwai, tajume.

<sup>19</sup> Tuja Aentsmaga akiinawuwa nu taa yutainash yuwau, umutainash umakui, yuwa yuwakua wegawai, umutnash umú wekaewai, apu kuichkiji ijamin nuigtú tudaugtin aina nuna kumpajiyai, tajume. Tujash Apajú yachajig, ni pegkeg takaamujiya dui wainnawai”.

*Aents pegkegchau idaitan dakitin aidau*

(Lc. 10.13-16)

<sup>20</sup> Tusa aents dutikmainchaun kuashat iwainak yaakat aidaunum takasua nuna najamnun chichagtan nagkamauwai, wagki anentain yapajiachaju asagmatai, nunik:

<sup>21</sup> “¡Jauchaj Corazigkah aminak wait anentajame! ¡Jauchaj Betsaidah aminash wait anentajame! Tironmash nuigtú Sidogkash aents dutikmainchau atum iwaintukbau ainajum dutikamu ainakug, yaunchkes kuashat anentai idagmak yapajinmain aajakú ainatai.

<sup>22</sup> Tujash tajime tsawan dekagmabau atina duik, tironmaya, sidogkanmaya aina nuna nagkaesau atumek suimkak jukiagtin ainagme.

\* 11:16 Plaza, makichik agkantú yaakat awa nu.



<sup>23</sup> Capernaúm,† ¿amesh nayaimpinum juwam atinaitjai tamek? Atsa, amek Hades‡ akaikitnaitme. Wagki aents dutikmainchau atum iwaintukbau ainajum dutika sodoman-mayash iwaintukbau ainakug, yamaiya juish yaaktak amainai.

<sup>24</sup> Tujash tajame, tsawan suwimak sukagtamú atina duik, amek Sodoma nugkanmaya nagkaesau suwimkak jukitnaitme”, tiuwai.

*Jesús ni Apají emematbau*  
(Lc. 10.21-22)

<sup>25</sup> Nunú tsawantinig Jesús chichaak: “Emematjame Apawah, nayaimpin nugkan Apujijah, wagki yacha nuigtú unuimaju aina duka uugkam aents imanchauch aina nunú iwaintuku asamin.

<sup>26</sup> Dekaske Apawah, wagki amek aajam wakegame”, tiuwai.

<sup>27</sup> “Mina Apag ashí wají aina nunak mina idaitugsauwai. Makichkish wainainatsui Uchijinak, nunak Apajig wainui; antsag makichkish Apagnak wainuk atsawai, nunak Uchijig wainui, nunak Uchijiya nu iwaintam dekamain ainawai”.

<sup>28</sup> “Minai minitajum ashí atum kuashat takat takaakjum pimpikjum nuigtú kijin aidau yanamaina imanikjum pujautigmek, nunak wi ayamtijatjime.

<sup>29</sup> Wi atumin dutikatajum tajim juka umiktajum nuniakjum midau unuimagtajum, wi batajuch nuigtú imanchauch anentaimtumauwaitag nu; aaja nuniakjumin wi atumi wakanminash ayamtihsattajai.

<sup>30</sup> Wagki wi atum chicham umiktinun amajim juka yupichuchi nuigtú umikcham-nukesh atsui”.

## 12

*Jesusa jintintaiji aidau tsawan ayamtai aig trigo jukí yuwawagbau*  
(Mr. 2.23-28; Lc. 6.1-5)

<sup>1</sup> Nunú Tsawan weamunum Jesús tsawan ayamtai ai ajak ajakmakbaunum nagkaebau. Nuniamunum niina jintintaiji aidaushkam yapajau asag, trigon kupik jukiaju nejen yuawagtatus.

<sup>2</sup> Nuniagtatman fariseo aidau wainkag:

—Jintintaijum aidau diisia! ¡Tsawan ayamtai tsawagmataig makichkish dutiknashti tibauwa nunin aig anina nu! tuidau.

<sup>3</sup> Tiagtai ni ayaak:

—¿Atumek ausachukaitjum David nijai ijunag yujaamujai yapajuinak,

<sup>4</sup> jega Apajui ememattainum wayá, pag Apajui anagkuamun nijai yujá nujai yuwawajua duka? nunak nigkish yumainchau nuigtú nijai yujá dukesh yumainchau aajakui, nunak imá sacerdotek yuwati tibau aajakui.

<sup>5</sup> ¿Nuigtush atumek chicham umiktina nuyag ausachukaitjum, jega Apajui ememattainum sacerdote aidauk tsawan ayamtai aig takainawai tawa nu, nuninakush bakumamainjig atsujuina duka?

<sup>6</sup> Nuniau asamtai tajime, juajui pujawai jega Apajui ememattaiya nuna nagkaesau dekas imana nu.

<sup>7</sup> Nuadui atum jujú chicham: “Wait anenkagtin atajum tusan wakegajai, anentag kuntin itaajum nunak dakitajai”, tawa dusha wajina takua tawa nu dekakjumek, bakumamainun dutikainatsaigkik nimjuuk yujamainchau ainagme;

<sup>8</sup> wagki Aentsmaga akiinauwa duka, tsawan ayamtaiya nuna Apujiyai, tiuwai.

*Tsawan ayamtai aig Jesús aents jau etsagagbau*  
(Mr. 3.1-6; Lc. 6.6-11)

<sup>9</sup> Jesús nuyia jiinki jega ditá ijuntaijin jegauwai.

<sup>10</sup> Nuwi aents uwejí jaka ekemkau pujau asamtai, Jesusan kajejuidau asag wajintig timatai etsegtuka bakumí tuidau asag iniinak:

—¿Tsawan ayamtai aish jaush etsagaumainkaih? tuidau.

<sup>11</sup> Tama Jesús ayaak:

—¿Atum ainajum anuyia, makichik uwig ajamu aintai, nuniamunum nunú uwig tsawan ayamtai tsawaju ai waanum egkemamtaish, juiskek idaimainaitjum?

<sup>12</sup> Tujash ¿aentschukait dekas uwijá nagkaesau akika duka? Nunin asamtai tsawan ayamtai aigkish pegkeg aina duka dutikmainai, tiu.

† **11:23** “Capernaúm”, griego chichamnumag Cafarnaúm tawai. Tau asamtai tikich tuidauk “Cafarnaúm” taush ainawai. ‡ **11:23** “Hades”, tawa duka griego chichamai, tuja hebreo chichamnumag “Seol” tutaiyai. Nunak aents jakau aidau wakaní batsamtain tawai. Hadesnak nugká initken auwa nuninun iwainawai (Mt. 11.23; Lc. 10.15).

13 Tusa nuna aentsun chichajak:

—Uwejum dakuekta, tiuwai.

Tamawaik uwejin dakuek, tikich kuntujijai betek pegkeg wajasui.

14 Tujash fariseo aidauk jijnjag, Jesusash wajuk maumainkita nuna pachisag chichasajui.

*Profeta Jesús pachisa tibau uminkauwa nu*

15 Jesusak nuna dekaa, nuiya jiinki weuwai, nunitai kuashat aents pataetukajui; tuja niishkam ashí jau aidanu etsagau,

16 dutikak akateau: Mina pachittsagmek etsegkaigpa tusa.

17 Ju aatus nuniemunum profeta Isaías tibauwa nu uminkauwai, duka:

18 “Juwai mina inakeg wi etegkauwaitag nu, mina anetaig, niini shiig aneamu ajuta nu. Niina susatnaitjai mina Wakanjun, dutikam ni aents judiochu aina nunash pegkeg takat aina nuna ujaktinai.

19 Nigka jiyani wekaechatnai nuigtush untsunash wekaechatnai, jintá wajaná untsuná wekagunakesh antukchagtin ainawai.

20 Nigka aents tudaugtinnash tsagkugsukek idaisashtinai, ayatak tsagkujug pegkemtinai, aikasag aents niina imatikas anentaimuinachunash nigki dekaskeapi tumamtiktinai. Aatus ashí pegkegchau aidanuk ni pegkejan takaak depetkatnai, ashí aents aidan Apuji atinai.

21 Tuja ashí aents aidau dakamuji atina duka niyai”, tawai.

*Jesusak Beelzebú senchijin wakan pegkegchaunak jiyawai tibau*

(Mr. 3.20-27; Lc. 11.14-23; 12.10)

22 Aents wainmachu nuigtú chichachu, iwanch egkemtuamun Jesusan ejetuawajui, dutikawagmatai niishkam etsagaju; dutikam wainmakui nuigtushkam chichakui.

23 Ashí aents aidauk nuna wainkag, puyatkag: “¿Juchauwashit David weantunum Cristo akiinatnai tibauwa nu?” tuidau.

24 Tuinamun fariseo aidau antukag: “Beelzebú, iwanch aidau apujiya nuna senchijin iwanch aidanuk jiyawai”, tuidau.

25 Jesusak dita aatus anentaimainamujin dekau asa, tiuwai: “Makichik nugkanmag inamin ainayatak shiwagmagawag maaní batsatkujag megkaemain ainawai, nuigtú makichik yaaktanmag batsatiatak nuniachkush nu jeganmag batsamnaitak pempeentunisag maaní batsatushkam megkaemain ainawai.

26 Tuja Iwanch pempentuki iwanchin jiyakug, pempentunisag maaninak nunimainai, ¿nuniaush wajuk ni inamtaijinash kuitamainaita?

27 Atumek Beelzebú senchijin Iwanch aidanuk jiyawai tutujume; tujash nu aatus aish, ¿atumi jintintaijum aidanash, ya senchinash suwawa Iwanch aidan jiktinme tusash? Nuadui, dita iwainmaminawai atum dewakjum tu yujajum nunak.

28 Wagki wi Apajuí Wakaniya nujai Iwanch aidan jijaag nunak, atumiin Apajuí inamu asamtai jutikajai.

29 “Aents senchigtina nuna jeen wayaa wajijin yajutkata takug, nuna aentsun jigkajá nuadui yajutmainai ashí wajijinak.

30 “Aents mina yaintuinatsu duka, mina shiwagmatuinawai; nunisag wijai takainatsu dushakam aentsnak dapampainawai.

*Wakaní Pegkeji pachisa Jesús tibau*

(Mr. 3.28-30)

31 “Nuadui tajime, ashí aentsun tudaujig nuigtú Apajuí pegkegchaun chichagkau aidauk tsagkugnainai; tujash Wakaní Pegkejin pegkegchau chichagkau aidauk tsagkugnagchagtinai.

32 Makichik aentskesh Aentsmaga akiinawuwa nuna pegkegchau chichagkau akush tsagkujam atinai. Tujash Wakaní Pegkejin pegkegchau chichagkau aidauk, yamaiya juish ajumaish tuke tsagkujam achagtinai.

33 “Numi pegkejak, pegkegnak nejeawai; tuja ajak pegkegchaushkam, pegkegchaunak nejeawai. Nuadui ajakak niina nejenig dekataiyai.

34 ¿Iwanch weantu aidauwah! ¿pegkegchautigmesh, wajuk pegkejash chichagtagmeki? Wagki shiig kuashat anentainum awa nuiyan aentsuk chichawai.

35 Aents pegkejak pegkegnumag anentaimu asa, pegkegnak chichawai. Nunisag aents pegkegchaushkam pegkegchaunmag anentaimu asa, pegkegchaunak chichawai.

36 Tujash wi tajime: Suimak sukagtau tsawan jegatna duik, ashí aentsuk dita chicham pegkegchau chichakbaujiya nunak imatiksag etsegtumakagtin ainawai.

<sup>37</sup> Wagki ame chichamjum aina duik pegkeg diyam atatme nuniachkumesh chichamjumea duik bakumattame”.

*Aents pegkegchau aidau Jesusan wainchatai iwainakia tibau*  
(Mr. 8.12; Lc. 11.29-32)

<sup>38</sup> Ujumak fariseo nuigtú maestro chicham umiktinun jintinkagtin aidaujai Jesusan iniinak:

—Maestroh, ame wainchatai iwainamu wainkatasa wakegaji, tuidau.

<sup>39</sup> Tiagtai Jesús ayaak:

—Jujú aents pegkegchau nuigtú betek umichu aina nu wainchatai iwainamun wainkatatus wakegainawai. Tujash nunak dutikashtajai, ayatak profeta Jonás wajakauwa numisnuk ditanak iwaintuktatjai.

<sup>40</sup> Wagki Jonás namak muunta ampujin kampakum tsawan kampakum kashi egkemsauwa nunsag, Aentsmaga akiinawuwa dushakam nugká inikten kampakum tsawan kampakum kashi pujustinaí.

<sup>41</sup> Nunsag ninivenmaya aents aidau atak suwimak atina duwi bakugmagtinai. Ditak Jonás Apajúi chichame ujakam, dekaskeapi tusag tudaujin idaiyinak Apajuin nemagkajua dui. Tujash jui atumjai pujawai Jonasa nagkaesau.

<sup>42</sup> Aantsag surnumia reina aajakua dushakam nugka najatamunmaya Salomogkan tajiawai Apajúi yachamtikumun antujuk dekajuatatus, nunú atumnak bakugmagtinai atak suwimak juwamu atina duik, wagki wi Salomogkan nagkaesau chichagmash umikchau asajum.

<sup>43</sup> “Wakan pegkegchau aentsnumia jiki ajapamak, weawai uwegshunum ni ayamain-jin egaak; tuja waínkachag:

<sup>44</sup> ‘Mina jegajui pujaun jinkibiag nuwi wakitkitjai tusa anentaimas’, tajua diíkmá japímká shiig iwajamun ukumkimun wainak,

<sup>45</sup> wakitki siete wakan niina nagkaesau pegkegchau aidau yajuak egkemtawai. Dutikam aentsuk duik pegkegchau aajakbauwa nuna nagkaesau pegkegchau weawai. Nunsag júj aents pegkegchau aina juka dutikam agtatui”.

*Jesusa dukují ni yachi aidaujai kautuamu*  
(Mr. 3.31-35; Lc. 8.19-21)

<sup>46</sup> Tusa Jesús eke aents aidau aujak pujai niina yachi aidau, dukujijai tajuawag agaa ijunaí, Jesusjai chichastatus wakegaidau asag.

<sup>47</sup> Nuniai tikich aents Jesusan ujaak:

—Amina duku, yatsum aidaujai aujsatjai tusa kaunawag agaa ijunui, tau.

<sup>48</sup> Tusá ujaam, nu aents etseja nuna chichajak:

—¿Yaita mina dukujush, tuja yaita mina yatsug aidau?

<sup>49</sup> Tusa ni jintinbau aina nuna inakmas:

—Jujú ainawai mina yatsug, mina dukug aidauk.

<sup>50</sup> Wagki mina Apajuin nayaím puja nu wakegamun umijuina nuuwai mina yatsug, mina ubag, mina dukug aina duka, tiuwai.

## 13

*Ajakan ajakbaun pachis Jesús augmattsamu*  
(Mr. 4.1-9; Lc. 8.4-8)

<sup>1</sup> Nunú tsawantaik Jesús jegá pujau jinki kuchanum jegaa uwetus ekeemsantai,

<sup>2</sup> aents aidauhakam tuwagkaju. Imanikagmatai Jesuschakam barcanum egkemag ekeemsau, nuniai aents aidauk kaamatak ijunaí.

<sup>3</sup> Nunikagmatai kuashat wajjin pachis augmatus ujaak:

“Ajakan ajakbau ajakmatatus weuwai.

<sup>4</sup> Nunik jegantá ajajin jigkai nagkimam jintá kakekaunak, pishak kaketuk amukui.

<sup>5</sup> Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, wagki nugkak awankauch asamtai;

<sup>6</sup> nunikatman etsa jijnak kagkapé inítak akaejachu asamtai apeká ijinauwai.

<sup>7</sup> Tuja tikich jigkai jagki ayaunum kakekaunak, jagki tsapainak yutuawajui.

<sup>8</sup> Tujash tikich jigkaik nugka pegkegnun kakekajui, nunikajuk shiig nejekajui; makí makichik ajak aidau cien, tikich sesenta, tikitchakam treinta aatus nejekajui.

<sup>9</sup> Ni antutajji ajamuk antukti”, tiuwai.

*Augmattsu jintinkagtama nu pachisa tibau*  
(Mr. 4.10-12; Lc. 8.9-10)

<sup>10</sup> Tusa augmatus ashimkamtai niina jintintaiji aidau jegaantag, iniinak: ¿Wagka aents aidau aujkmesh augmatta jintinkagtau pachismesh tame? tuidau.

<sup>11</sup> Tama ni ayaak: “Atumnak Apajuí dekamtijamui ni nayaimpinum inama nu dekachbau aajakajua nuna; tujash ditak nunak dekamain ainatsui.

<sup>12</sup> Wagki kuashat aja duka nuní dukap suwam atinai; untsu atsuja duka, nu piipich ajamua dukesh atantam atinai.

<sup>13</sup> Nuadui ditanak augmatbaujai pachisan jintinjai; wagki ditak wainainakush wainchau wajukmaina nuninak, antuinakush antachu wajukmaina nunidau asagmatai.

<sup>14</sup> Juka ditai uminui profeta Isaías tibauwa nu, duka tawai:

“ Antutaijin antuinakush, dekachagtinai; wainainakush, wainchau wajukmaina nunik-  
agtinai.

<sup>15</sup> Jujú aents aina nuna anentaimtajig wamak dekamainchau waigkaje, antutaijish epetkamua nunin,

jiishkam ejatkamua nunin ainawai.

Nuninchau ainakug jiin wainainak, antutaijin antuinak, anentainish dekainak yapajin-  
main ainawai, nuninaku wi etsagaumainaitjai’.

<sup>16</sup> “Tujash atumek shiig aneastajum, waintash wainu, antutash antau asajum.

<sup>17</sup> Dekas tajime, Kuashat profeta aidau nuigtú aents pegkejan takajakú aina dushakam yamai atum wainjum juna wainkagtatus wakegajakú ainawai. Tujash wainkachu ainawai, antutnash yamai atum antajum juna antukagtatus wakegajakú ainawai, nuninakush ditak antukchajui.

*Ajakan ajakbau timag nunak, juna takun timajai tusa Jesús etsegkamu*

(Mr. 4.13-20; Lc. 8.11-15)

<sup>18</sup> “Wi ajakan ajakbaun augmattsan jintinkagtuamag nuna pachisan takui antuktajum.

<sup>19</sup> Ashi aents Apajuí inama nu pachisa etsegbaun antuinakush dekamainchau dekapena duka, jigkai jintá kakekauwa nunin ainawai, nunin asamtai Iwanch chicham antukbaujin anentainian kajimitka nuna takun timajai.

<sup>20</sup> Jigkai kayagnunum kakekajua duka, chicham antukag wakegas juina nuna iwainawai;

<sup>21</sup> tujash nu ajakak kagkapenachu asa ebetumsui; numamtuk utugchat minitmash nuniachkush Apajuí chichamen umidau asag waitkainam wamkes idaiyinawai.

<sup>22</sup> Untsu jigkai jagki ayaunum ajaamua duka, chicham etsegbaun antuina nuuwai; tujash ju nugkanmaya takat aina nuna imá senchi uyumainak nuigtú wiyakchameata tabaujiya nu tsanuinam chicham antukbaujin sakapajag ajak nejemainchauwa nunin wenawai.

<sup>23</sup> Tujash jigkai nugka pegkegnum kakekajua duka, chicham etsegbaun antukag shiig dekwag dutiksag pegkejan takaina nuna iwainawai, makí makichik ajak treinta, sesenta, cien nejewajua numamtuk”.

*Trigo cizañajai\* pachisa Jesús jintinkagtuamu*

<sup>24</sup> Nuigtú tikichin augmatus jintinkagtak: “Apajuí inama duka aents niina ajajin jigkai pegkejan ajakmakua nujai betekmamtinai.

<sup>25</sup> Tujash kajiinak batsatai, shiwaji jegají trigo ajakbaunum cizaña ajatuk ukuak weuwei.

<sup>26</sup> Dutikamu trigoshkam tsapakag nejena, cizañashkam paan wantinkajui.

<sup>27</sup> Nunikmatai takau aidaushkam ajagtina nuna jegajiag chichajuinak: Apuh, ¿ame jigkai pegkeg ajagmin ajakbauwa nuniaish, tuwiya cizañash tsapaidiaje? tuidau.

<sup>28</sup> Tama ni ayaak: ‘Aunak shiwag aikae’, tau. Tutai takajin aidau aiinak: ‘¿Shimutkaja tegachagtatjik?’ tuidau.

<sup>29</sup> Tiagtai: ‘Atsa, idaisatajum, cizaña tegakmajum trigoshkam tegainijum;

<sup>30</sup> idaisatajum mai betekak tsakagtí, nunikmatai juwamu jegatta dui ajaka juu aina nuna, dekatkauk cizaña tegagjum jigkaka batsastajum apenkati, dutikakjum trigok mina ajak ijumtajua nui ijumjatajum titajai’ ”, tiuwai.

*Mostaza jigkayí pachisa augmattsamu*

(Mr. 4.30-34; Lc. 13.18-19)

<sup>31</sup> Junashkam Jesús tikich augmatbaun pachis jintinkagtak: “Apajuí inama duka, aents mostaza jigkayin niina ajajin ajauwa numamtinai. <sup>32</sup> Dekaskenmag mostaza jigkayig ashi tikich jigkai aina nuní piipichi; tujash tsakakug ajak nugkauchik nejen

\* 13:23 “Cizaña”, tawa duka makichik dupayai, trigo niimejai betek.

aina nuna nagkaegas tsakawai; nunik numi wajasmatai kanawen pishak pasugmama numamtainai”, tiuwai.

*Levadura pachisa augmattsamu*  
(Lc. 13.20-21)

<sup>33</sup> Nuigtushkam tikichin augmatus jintinkagtak: “Apajuí inama duka levdurajai betekmamtinai, nuna makichik nuwa juki, harinan kampakuma† imania dekaapa namukbaunum pachimjauwai, dutikam ashí harina namukbauwa nuna wampush-mitkajua numamtainai”, tiuwai.

<sup>34</sup> Jesusak ashí augmatbau aina nujai aents aidaunak jintintujukui, augmattsukek jintinkagtuachui.

<sup>35</sup> Aatus uminkauwai profeta chichaak:  
“Augmatbaujai chichaktajai, iwainaktatjai yama nugka najanetnumash dekaachbau aajakua nuna”, tibauwa nunú.

*Jesús cizaña augmattsamua nu pachisa tibau*

<sup>36</sup> Jesús nuna tusa aents aidaun ukuak, jegá wayauwai, nunikmatai jintintaiji aidau jegaantag: Cizaña ajanum ajakbau augmattsam timaum nu ujjatkata, tusag segaidau.

<sup>37</sup> Tama Jesús ayaak: “Jigkai pegkejan ajakma duka, Aentsmaga akiinawuwa nuuwai;

<sup>38</sup> aja timag nunak ashí nugkanmayan takun timajai, ajaka jigkayí pegkeg timag dushakam Apajuí inama nuna uchiji aina nuuwai; untsu cizaña timag duka Iwanchi uchiji aina nuuwai;

<sup>39</sup> tuja shiwag ajakú timag duka, Iwanchi. Ajak juwamu timag dushakam nugka nagkanbaunum atina nuna iwainawai, tuja ajakan juu aina duka, ángel ainawai.

<sup>40</sup> Cizaña tegajá jiinum apetiama numamtuk wajaktinai nugka nagkanbaush.

<sup>41</sup> Aentsmaga akiinawuwa nunú angelji aidaun ishiaktinai, ni inama nuiyan ashí pegkegchau takau aidau, tikichin pegkegchaun takamtikin aina nuna ijunjatnume tusa;  
<sup>42</sup> dutika jii kegamunum chimpinatnai, dutikam nui batsamsag buutuinaik daik takegtú batsamtin ainawai.

<sup>43</sup> Untsu pegkejan takasú aina duka, ditá Apají inamtaijiya nui wakag tuke etsajai betek etsantiagtinai. Ni antutaiji ajamuk antukti, tiuwai.

*Oro uukbau pachisa jintinkagtuamu*

<sup>44</sup> “Apajuí inama duka oro nugkanum yutua ukukbauwa nuninai, nuna makichik aents wainak, nuig ataktú yutua ukuak, shiig aneas wakitki, ashí niina wajijjinak sujug, nunú nugkan sumakui.

*Kaya perla pachisa jintinkagtuamu*

<sup>45</sup> “Apajuí aentsnum inama duka, aents waji sujin kaya perla tutai dekas pegkeg iwajamu akiktanash akikan wainkatatus egá wekaetukmá,

<sup>46</sup> wainak wakitki ashí niina wajijjinak sujug sumakua nujai betekmamtinai.

*Red augmattsu tibau*

<sup>47</sup> “Aantsag Apajuí inama duka, redjai betekmamtinai, nuna namaká main aidau nayantsanum ajugkam ashí namak aidaunak yajumui;

<sup>48</sup> nunik kuashat chimpinkamtaí, kaamatak ajuidiag, ekeemsag namak pegkejan chagkinnum chimpinak, pegkegchau aidaunak utsain ainawai.

<sup>49</sup> Aatus atinai ju nugka nagkanbaunmashkam, ángel aina nu pegkegchau aina nuna pegkeg aina nuiyan akanjagtinai;

<sup>50</sup> dutika jii kegamunum chimpinatnai, dutikam nui batsamsag buutuinaik daik takegtú batsamtin ainawai”.

<sup>51</sup> Tusa Jesús iniak:

—¿Ashí wi taja dusha antukugmek? tau.

Tutai dita aiinak:

—Ehé Apuh, tiajui.

<sup>52</sup> Tiagtai ni chichajak:

—Ashí maestro chicham umiktinun jintinkagtin aidau Apajuí inama nuiyan unuimauk, aents jeentin oroji ukukbaun, yamagman nuniachkush ajutan jiiyama nuni-nawai, tiuwai.

† 13:33 “Kampakum”, tawa nunak apach chichamnumag “tres medidas” tawai. Nuna Antiguo Testamentonum 20 kilos tawai. Tres medidas tawa nunak ocho litros ajawai taush ai, tikich tuidau 10 nuniachkush 11 litros ajumainai tuinawai. Nunin asamtai ii ayatak “tres medidas tawa nuiya, kampakuma imania dekaapa” tusa ukuwai.

*Jesús Nazaret pujusbau**(Mr. 6.1-6; Lc. 4.16-30)*<sup>53</sup> Jesús nu augmatbaun ashimak, nuiya juaki weuwai,<sup>54</sup> nunik niina nugkeen jegaa, jega ijuntainum wayá jintinkagtau, nunitai anentai jegagchag chichainak:

—¿Jusha tuwí unuimajuita imatika deka dusha? ¿Utugsaya aents dutikmainchaunash dutikawa?

<sup>55</sup> ¿Jujú carpintero uchijiya duchaukaih? ¿Dukujish María, yachi aidaush Santiago, José, Simón, Judas ainajama?<sup>56</sup> ¿Ni umayí aidaushkam jui jutiijai batsata aniaish, wajukaya niish imatikash dekawa? tuidau.<sup>57</sup> Tusa pampantuinam Jesús chichaak:

—Profetak niina nugkenig tuja niina jeenish eme anentamak achauwai, tiuwai.

<sup>58</sup> Tau asa, nuanuig kuashat aents dutikmainchau aidaunak iwainajag takaschauwai, dekaskeapi tuinachu asagmatai.**14***Juan Yamijatin maamu**(Mr. 6.14-29; Lc. 9.7-9)*<sup>1</sup> Nunú tsawantinig Herodes tetarraca Jesús pachisa tuinamun antuku,<sup>2</sup> nunik ni inake aidaun chichajak: “Duka Juan Yamijatnai, nunú nantakne, nuniku asa senchijí ajawai aents dutikmainchaun iwaina nunak”, tau.<sup>3</sup> Nunak Herodesak niina yachi Felipe nuwe Herodiasan nuwatuk pujau asa Juangkan achiká cárcel egkeau aajakui.<sup>4</sup> Wagki Juan chichajak: “Amek, yatsumi nuweg nuwatkamek pujumaitsume”, tibau asa.<sup>5</sup> Herodesak maumainaitak aents aidaun ishamak idaisauwai; wagki Juagnak profetayai tuidau asagmatai.<sup>6</sup> Tujash dutikauwaitak Herodes akiinamuji tsawagmatai, Herodiasa nawanji ipaamu aidaun eemtin nantsemawai, nuniak Herodesan shiig awajkauwai,<sup>7</sup> dutikam makichkish yapajimainchaun anagkuauwai ni wajina segattawa nunak imatiksag susatatus.<sup>8</sup> Tima nuwauchishkam dukují akatjam, Herodesan jegantun:

—Platonum Juan Yamijatnun buuké sujustá, tusa segauwai.

<sup>9</sup> Nunú tama Rey Herodesak wake besekui, nuniayatak ipaamu aidaush antuinamunum yapajimainchaun anagkuau asa, susatume tiuwai.<sup>10</sup> Dutika inamjauwai Juan cárcel puja nuna buuken tsupiktinne tusa.<sup>11</sup> Timatai Juangkan buuken platonum egkejag itaantajui, dutika nuwauchin susajui. Ni juki dukujin susauwai.<sup>12</sup> Dutikawagmatai Juangkan jintintaiji aidaun kautuawag iyashin jukiag ukusag ukuinak, Jesusan wejiag ujakajui.*Jesús cinco mil aents ayugkamu**(Mr. 6.30-44; Lc. 9.10-17; Jn. 6.1-15)*<sup>13</sup> Jesús nuna antuk, nuiya jiinki barcanum egkemag uwejush agkantunum nigki pujustatus weuwai; nuniai aents aidaushkam dekaawag, yaaktanmaya juakiag kukag shimutkajui.<sup>14</sup> Nuniai Jesús barcanmaya jinkamá, kuashat aents tuwaká ijunun wainak, wait anenjauwai, nunik jau aidaun ikaunmamunash etsagakui.<sup>15</sup> Nuniai kiyau asamtaí, niina jintintaiji aidaun jegaantag:

—Juig aents atsamunum batsatji, etsash akaewai. Aentsuk akatjam ishiakta, yaakat yaijuch aina nui wegag dita yuwatnun sumaktinne, tuidau.

<sup>16</sup> Tutai Jesús ayaak:

—Wemain ainatsui, atum dita yuwatnuk susatajum, tau.

<sup>17</sup> Tama dita aiinak:

—Atsugtamui ayatak cinco pag nuigtú jimag namak ajutjamui.

<sup>18</sup> Tiagtai Jesús:

—Jui itagtuatajum, tiuwai.

<sup>19</sup> Tusa aents aidaunak chijichi aina nui batsamsatnume tiuwai. Tusa cinco pagkan nuigtú jimag namaka nuna juki, nayaimpinum pagkai see tusa, pag aidaun puujá ni jintintaiji aidaun tinabiu; dutikam dita aents aidaun tinabijui.<sup>20</sup> Tuja ashí yuwawagmatai, ampinkaun yajuakag doce chagkinnum aimjajui.

<sup>21</sup> Nui yuawaju aina duka cinco mil aishmag tumain aajakajui; nuwa aidau, uchi aidauš dekapatsuk.

*Jesús yumí awanken wekaesá webau*  
(Mr. 6.45-52; Jn. 6.16-21)

<sup>22</sup> Nuna dutika, Jesusak ni jintintaiji aidaunak barcanum egkemjag ditá eemak kuchá amain katigtinme tusa ishimak, nigka aents aidaun akateg ukuktatus juwakui.

<sup>23</sup> Nunik aents aidaun akateg ukuak, mujanum kanakí wakauwai Apajuin aujsatatus. Nunik kiyagmataishkam nuig nigki pujau,

<sup>24</sup> nuniai barcashkam atushat nugkan ukukí wegai, dase igku umpuau, dutikamu asa yumi tajeamuijiya nu barcanak senchi pegau.

<sup>25</sup> Imaniai tsawagtatak weamunum, Jesús yumí awanken wekaegas ditan adjikauwai.

<sup>26</sup> Nunik yumí awanken wekaegas minittaman jintintaiji aidau wainkag, puyatkağ:

—¡Pasun, pasun! tusag untsumaidau sapigmaidau asag.

<sup>27</sup> Imatiagtai Jesús chichaak:

—¡Witjai, ishankaigpajum! ¡Imatigpajum! tau.

<sup>28</sup> Tutai Pedro ayaak:

—Apuh, dekas ametkumek minash, yuminum wekaesam tantata tujutia, tau.

<sup>29</sup> Tutai:

—Minitá, tiuwai Jesuschakam.

Tama Pedroschkam barcanmaya jiinki, yumí awanken wekaegas Jesús wajamunum jegantatus wegau.

<sup>30</sup> Tujash dase senchi dasentun wainak ishamkau, nunik yuminum tepeak:

—¡Apuh, achigkata! tau.

<sup>31</sup> Taig Jesuschakam uwegnum achikú, dutika:

—¡Aents imanis dekaskeapi tuchauwah! ¿Wagka utujimkaume?, tiuwai.

<sup>32</sup> Tusa barcanum egkemjagmatai, daseg mijakui.

<sup>33</sup> Nunikmatai ashí barcanum chimpujuk Jesusan jegaantag emematuinak:

—¡Ameke dekaskenum Apajuin Uchijiyaitme!, tiajui.

*Jesús Genesaretnumia jau aidau etsagakbau*  
(Mr. 6.53-56)

<sup>34</sup> Nuna nunikag katigkag Genesaret nugkanum jegawajui.

<sup>35</sup> Nunikmatai nuiya aents aidau Jesusa wainkajui, nunikag ashí nu nugkanmag etsegkajui, dutikawagmatai ashí jau aidaunak niina ikautuidau;

<sup>36</sup> dutikawajam ni jaanchji weninakesh antigtajai, idaikagtusta tusag segaidau, tuja ashí aents antigkaju aidauk tsagagkajui.

## 15

*Aentsun pegkegchau ema nu pachisa tibau*  
(Mr. 7.1-23)

<sup>1</sup> Ujumak fariseo aidau nuigtú maestro chicham umiktinun jintinkagtin aidaujai Jerusalegnumia kaunawag Jesusan jegaantag iniinak:

<sup>2</sup> —¿Wagka amina jintintajum aidauš iina muunji umiktajum tibauwa nuna umitskesh ikigmatskesh yuinawa? tuidau.

<sup>3</sup> Tiagtai Jesús ayaak:

—¿Wagka tujash atumesh atumi muunjum umiktajum tibauwa nu umiakjumesh, Apajuí umiktajum tibauwa dusha umiatsjume?

<sup>4</sup> Wagki Apajuí: “Amina apa, dukujai eme anentsam diistá, tuja apajin, dukujinakesh pegkegchaun chichajuk tsagkugsuk maatajum”, tiuwai.

<sup>5</sup> Tujash atumek: Makichik aentsuk apajin, nuniachkush dukujinakesh: “Wika yaimaitsugme, wagki ashí ajutuina junak, Apajuin ofrendan susajai”, tumainai tajume,

<sup>6</sup> nuniau asag, apajinak dukujinash yaimaitsui tajume. Aaja tau asajum atumek, atumi muunjumi umitaijiya nu umiakjum Apajuí umiktajum tibauwa duka imanchauch awajsaugme.

<sup>7</sup> ¡Tsanumin aidauwah! profeta Isaías atumin pachipasag shiig tiuwai:

<sup>8</sup> “Ju aents aina juka weninig eme anenjuinawai; tujash anentainig atushat minai ainawai.

<sup>9</sup> Mina emematjuina duka wainkayai; jintinkagtuina nunak, aents tibauwa nuna jintinkagtuinawai”.

<sup>10</sup> Nuna tii, Jesús aents aidaun untsuká:

—Antuktajum, nuniakjum dekaatajum, tiuwai.

<sup>11</sup> Wenunum wayá duka aentsnak pegkegchauk ematsui; untsu wenunmaya jiina nuwai aentsun pegkegchau ema duka.

<sup>12</sup> Timatai ni jintintaiji aidau Jesusan jegaantag iniinak:

—¿Amesh wainkamkum fariseo aidau ame tame nuna antukag kajekagma dusha?, tuidau.

<sup>13</sup> Tama ni ayaak:

—Ashí ajak mina Apag nayaimpinum puja nu ajachbau aidauk, kagkapejai tegam agtinai.

<sup>14</sup> Idaisatajum, ditak wainmainatsui, nuninaitak tikich wainmachu aidau jintan inaktustatus wajukmaina nuninawai. Wainmacha nunú tikich wainmachun jintan inaktustatus weakug mai waanum iyaumainai.

<sup>15</sup> Tutai Pedro Jesusan:

—Ame augmatbau pachisa timaum nu ujabatkata, tau.

<sup>16</sup> Tutai Jesús ayaak:

—¿Atumesh duka dekamainchauk dekapeajum?

<sup>17</sup> ¿Dekatsjumek ashí wenunum wayauk ampugnum nagkaemaki, atsumamunum wegam letrinanum ajapna duka?

<sup>18</sup> Tujash wenunum jiina duka anentainmaya jiiui; nuniau asa aentsnash pegkegchau emawai.

<sup>19</sup> Anentainmaya jiiui pegkegchau anentaibau aidau, magkagtamu aidau, tsanijinat, ashí pegkegchau iyashnum takanit, kasamat aidau, dekaskechu aig tsanumjut aidau, pegkegchau chichagkagtut aina nu.

<sup>20</sup> Ju aina juuwai aentsun pegkegchau ema duka, tujash ikigmagjum yuwatajum timawa nunú, ikigmatsuk yuwamuk aentsnak pegkegchauk ematsui.

*Canaagnumia nuwa Jesusan dekaskeapi tibau*

(Mr. 7.24-30)

<sup>21</sup> Jesús nuiya jiiiki Tiro nugkanum, Sidón nugkanmash weuwai.

<sup>22</sup> Nui jeggattaman canaagnumia nuwa Jesusan untsukmaikia minis:

—¡Apuh, Davita uchijiyah, minash wait anenjugta! ¡Mina nawanjun wakan pegkegchau egkemtug senchi waitkagta nu!, tau.

<sup>23</sup> Tamash Jesusak machikish aikchauwai. Nunitai ni jintintaiji aidau jegaantag:

—Iina ukujin minis untsú untsukawa minajama, wakitkita tikia, tuidau.

<sup>24</sup> Tama Jesús:

—Apajuik minak Israel aents megkaejau aina nuig awetiuwai.

<sup>25</sup> Tujash nuwak Jesusa eemtin tikishmatug pujus:

—Apuh, yainkata, tau.

<sup>26</sup> Tutai Jesús ayaak:

—Uchijui aidau pag atankí yawá suwamuk pegkegchauwai, tau.

<sup>27</sup> Tutai nuwa ayaak:

—Apuh dekaske; tujash yawashkam mesanmayan apají tsaisá akakeamun yuwama-jamah, tau.

<sup>28</sup> Tutai Jesús chichajak:

—Nawantah, dekaskeapi tabaujum shiig muun ajutjamui, ame wakegam duka nunisag uminkati, tiuwai.

Nuna taig wamkes niina nawanjishkam tsagajui.

*Jesús kuashat aents jaidau etsagakbau*

<sup>29</sup> Jesús nuiya jiiiki Galilea kuchajin tikiju jegauwai; nunik nainnum waka ekeem-sauwai.

<sup>30</sup> Nunikmatai kuashat aents aidau ni eketbaunum tuwakaju; nuninak shutú aidau, wainmachu aidau, manchantuku aidau, chichachu aidau, nuigtú kuashat jau aidounashkam ni eketbaunum ikautuidau. Nunikmatai Jesuschakam etsagakui.

<sup>31</sup> Nuna Dutikamantai aents aidauk anantai jegagchaju chichachu aidau chichaidau, manchantuku aidau pegkeg wedau, shutú aidauhkam wekagaidau, wainmachu aidauhkam wainmaidaun wainaidau asag. Nuninak Israela Apajuijiya nuna emematu- idau.

*Jesús cuatro mil aents ayugkamu*

(Mr. 8.1-9)

<sup>32</sup> Nunikagmatai Jesús ni jintintaiji aidau untsuká chichajak:



—Aents aina juna wait anentuinajai, wagki kampatum tsawan jui wijai batsatainawai; tujash yumainjig atsujuinawai. Yujumkan ayugtsukek ditá jeenig ishimaitsujai, wagki jintá wekamag jaka iyaantainum tau asan, tau.

<sup>33</sup> Tutai ni jintintaiji aidau:

—¿Tuwiya jukiya yumainush sumainaita, aents atsamunum pujag juniautish?, tuidau.

<sup>34</sup> Tiagtai Jesús ditan iniak:

—¿Wajupa pagka ajutjamainawa?, tau.

Tutai dita aiinak:

—Siete pag nuigtú wajumchik namak ajutjamui, tiajui.

<sup>35</sup> Tiagmatai Jesús aents aidaunak nuská batsamsatajum tusa

<sup>36</sup> siete pag aina nuna juki nuigtú namak aina nunashkam juki Apajuin see tii, puujá jintintaiji aina nuna susajui, dutikam dita aents aidaun tinamkajui.

<sup>37</sup> Dutikawajam ashí shig yuwawajui, nuigtushkam ampinjau aidaun siete chagkin-num aimjajui.

<sup>38</sup> Nui yuawajuk cuatro mil aishmag aajakajui; nuwa aidau, uchi aidaush dekapatsuk.

<sup>39</sup> Juna dutika Jesús aents aidaun akateg ukuak, barcanum egkemag Magdala nugkanum weuwai.

## 16

*Fariseo saduceo aidaujai, wainchatai iwainakta tusa Jesusan segamú*

(Mr. 8.11-13; Lc. 12.54-56)

<sup>1</sup> Fariseo aidau, saduceo aidaujai pegkegchau anentaiyai dekapasagtatus Jesusan jegaantajui, nunikag nayaimpinmaya wainchatain iwainakti tusag segaidau.

<sup>2</sup> Tiagtai ni yaak: “Atumek agkuanantai: Pegkeg tsawan atatui, nayaim kapantu wajasé”, tinu ainagme;

<sup>3</sup> untsu kashikmasjum: “Yamai tsawanta juik senchi dasenkattawai, wagki nayaim kapantu wajas yujagkim suwe wajasé”, tajume. Atum nayaimpi niimé diisjum nuniktatui tinu ainayatkugmesh, ¿wajuk asagma tsawan aina nui wantinkagtin aina dusha dekamainchaush dekapegme?

<sup>4</sup> Jujú aents pegkegchau aidau Apajuí chichamenash umigchau aina nu, wainchatai iwainakta tusag segatuinawai. Tujash dita tuina nunak nuigtuk iwaintukchattajai, ayatak Jonás wajukauwa nunisnuk ditanak iwaintuktajai, tusa ukuak weuwai.

*Fariseo jintinkagtuina duka, levaduraya numamtinai tibau*

(Mr. 8.14-21)

<sup>5</sup> Jesusa jintintaiji aidau kuchá amain weenak pagkan kajimatki jutsuk katigkajui.

<sup>6</sup> Nunikbaunum Jesús ditan chichajak:

—Nijah, fariseo aidau nuigtú saduceo levaduraji aina nujai kuitamamkatajum, tau.

<sup>7</sup> Tutai niina jintintaiji aidau pempeentunikiag:

—Junak ii pag takukchag dui tujamji,

<sup>8</sup> tusa tuinamun Jesús antuk:

—Aents imanis dekaskeapi tuchau aidauwah, ¿wagka pagkak atsgtamji tajume?

<sup>9</sup> ¿Eke dekamainchawk dekapegajum nuigtush aneaktsugmek, wi cinco pagka nuiyan cinco mil aents tinamkam yuinak ampijagmataish, wajupa chagkina aimjabiugme duka?

<sup>10</sup> ¿Nuigtush aneaktsugmek, wi siete pagka nuiyan cuatro mil aents tinamkam yuinak ampijagmataish, wajupa chagkina aimjabiugme dusha?

<sup>11</sup> ¿Wagka antumainchaush dekapegme, wi kuitamamkatajum fariseo, saduceo levadurajiya nujai taja nunak pagkan pachisan tatsug duka? tiuwai.

<sup>12</sup> Timatai dekawajui. Jesusak levadura pag najanatasa pachimtaiya nuna tatsuapita; fariseo, saduceo jintinkagtutaiji aidaunap tawa tusag.

*Pedro, Jesusan amek Cristuitme tibau*

(Mr. 8.27-30; Lc. 9.18-22)

<sup>13</sup> Jesús nugka Cesarea, Filipino yaaktamamua nui jegaatatus wesa, ni jintintaiji aidaun iniak:

—¿Aents aidaush Aentsmaga akiinawua nunash yayai tuinawa?, tau.

<sup>14</sup> Tutai dita aiinak:

—Ujumak aents aidau: “Juan Yamijatnai”, tuinai; tikich chichaidau: “Auk Eliasai”, taush ainawai. Nuniai tikich tuidau: “Jeremiasai nuniachkush profeta aajakú aina nuyaskaitai” tuinawai, tuidau.

<sup>15</sup> Tiagtai ditan iniak:

—¿Tujash atumesh minash yayai tujutjume?, tau.

<sup>16</sup> Tutai Simón Pedro ayaak:

—Amek Cristo, Apajuí tuke pujuuwa nuna Uchijiyaitme, tiuwai.

<sup>17</sup> Tutai Jesús ayaak:

—Simón, Jonasa uchijiyah amek shiig aneasta, aminak aents nejentin numpenna nuninkesh tujamchae, mina Apag nayaimpinum puja nunú dekamtijamae.

<sup>18</sup> Wishakam amina tajame, yamaik amek Pedro\* atatme. Jujú kaya muunta jui ekenin mina iglesiagnak† jegamkattajai, nunak jaamua dukesh depetkashtinai;

<sup>19</sup> amina idaitustatjame Apajuí inama nuna llave‡ ujatiana numamtuk awajkati tusan; dutikamu asam ame ju nugka jui chicham etsegbaun dekaskeapi tachauk nayaimpinmag tsagkugnagchatnai. Untsu ame chicham etsegbaun dekaskeapi tauk aantsag nayaimpinmaskam tsagkugnagtinai, —tiuwai.

<sup>20</sup> Nuna tusa ni jintintaiji aidaun, makichikish tikich aidauk, nigka Cristuwai tusagmek tiigpajum, tiuwai.

*Jesús ni maam atinji etsegkamu*

(Mr. 8.31-33; Lc. 9.22)

<sup>21</sup> Nui nagkamas Jesús ni jintintaiji aidau ujakan nagkabau, ni Jerusalén jegamtai apu aidau, sacerdote apuji aidau, maestro chicham umiktinun jintinkagtin aidaujai waitkasa maam, kumpatum tsawanta jui nantaktina nuna pachis.

<sup>22</sup> Tutai Pedro akanak juki kakaakan chichajak:

—Apuh, Apajuí wakechataik, duka nuninuk makichikish nagkaetamait sui, tau.

<sup>23</sup> Tujash Jesús Pedron ayampatua chichajak:

—¡Wetá Iwanchih, ukugkita! Ame utugchat aputugme, amek dekatsme Apajuí dutikatjai tabaujiya duka, nuadui nuna umikai tusam tujutme, aentsú anentaimtaig anentaimam duwi, tiuwai.

*Jesús mina nemagtukta tautigmek atum wakegamuk idaikujum nemagtuktajum tibau*

(Mr. 8.34-38; Lc. 9.23-27)

<sup>24</sup> Nuna tii Jesús ni jintintaiji aidaun:

—Makichik aentskesh mina jintintaig atatus wakegauk, niinunak idaiyak, waitiakush nemagtukti.

<sup>25</sup> Wagki aents ju nugka jui pujutan imá senchi wakegak, mina nemagtuk waittan dakitauk uwemjashtin ainawai. Tujash mina nemagtak niina pujutinash puyatjukchauk, uwemjatnai.

<sup>26</sup> ¿Wajinna yaimainaita aentsnash ashí nugka juiyan niinu emakush, wakanin megkaemaina nuish? ¿Nuniachkush wajupa wakaninash akimatmainaita?

<sup>27</sup> Wagki Aentsmaga akiinauwa duka, ni Apají imanjiya nujai nuigtú niina angelji aidaujai minitnai, nuniak makí makichik aents takasbaujiya dutiksag akiktinai.

<sup>28</sup> Dekas tajame Atum jui ijunjum juyaitijum ujumak aidautijum eke jatsuk, Aentsmaga akiinauwa ni inamjatatus minau wainkatnutigmesh ajume, tiuwai.

## 17

*Jesús yapajinamu*

(Mr. 9.1-13; Lc. 9.28-36)

<sup>1</sup> Seis tsawan asa Jesús, Pedron, Jacobo niina yachi Juangkan aatus juki muja yakí tsakajunum weajui.

<sup>2</sup> Nuwi ditash wainainaig Jesusa niimé yapajinauwai; nunik yapig etsajai betek etsantu, niina jaanchjishkam shiig puju tsauptin wajasui.

<sup>3</sup> Nuniai Moisés Eliasjai Jesusan aujuinak ijuntatman wainkajui.

<sup>4</sup> Nunik Pedro Jesusan chichajak:

—Apuh, jutiish maigkis jui batsatagtai!, amesh wakegakminig kumpatum aak umikagmi, makichik aminu, tikich Moisesdau, nuigtú Eliasdau, tau.

<sup>5</sup> Nuna aatus Pedro chichai, yujagkim winchamtin ashí ditajai ijumag ijikui; nuniai yujagminmaya chichaak: “Juuwai mina uchig anetaijuk, wi etegkamu. Nigki antugkatajum”, tiuwai.

<sup>6</sup> Nu tabaun antukag, niina jintintaiji aidau senchi ishamkag tikishmajag tsuntsumawaju.

\* **16:18** “Pedro” tawa duka griego chichamnumag “Petros” tawai, nunak “kaya” taku tawai. † **16:18** Griego chichamnum “eklesia” tawa nunak tayatak apach chichamnum againak “iglesia” tuinawai. Nunak “asamblea” (ijunbau) taku tawai. ‡ **16:19** Llave, “llavé amatatjame” tawa nunak Juan capítulo 20 versículo 23num tawa nunak tayatak tawai; tujash nu dutikatna nunak imá apóstol aina duke dutikawagtinun tiuwai.

<sup>7</sup> Nunikagmatai Jesús ditan tajuntun antiak:

—Nantaktajum; ishamkaigpajum, tau.

<sup>8</sup> Tama diistakamá imá Jesusak wajattaman wainkajui.

<sup>9</sup> Nunik Jesús mujanmaya minisá:

—Atum wainkaujum nu pachisjumek makichik aentskesh ujakaigpajum, Aentsmaga akiinauwa nu jakau aina nuiya nantatsaigkik, tiu.

<sup>10</sup> Nuna timatai, ni jintintaiji aidau inidau:

—¿Wagka maestro chicham umiktinun jintinkagtin aidaush, dekatkauk Eliasá taatnai tuinawa?

<sup>11</sup> Tusa iniam Jesús ayaak:

—Duka dekaske, Elias niyá eemak taa tikich takastinun umiktinai tibauwa duka.

<sup>12</sup> Tujash wi tajime, Eliasak taabi, nunikunak ditak dekachaju ainawai, nuninak ashí dita wakegaina dutiksag niinak inagkeatkiagmayi. Nunisag Aentsmaga akiinauwa dushakam dita waitkam atalui, tiuwai.

<sup>13</sup> Nuna tutai ni jintintaiji aidaushkam dekaawajui, Jesusak Juan Yamijatnunap pachis tawa tusag.

*Wakan pegkegchau uchin egkemtuamun Jesús etsagagbau*

*(Mr. 9.14-29; Lc. 9.37-43)*

<sup>14</sup> Aents tuwakbaunum jegamtai, makichik aents Jesusa tajuntun tikishmatug chichajak:

<sup>15</sup> —Apuh, mina uchijush wait anenjutjata, nantu nantutin jauwe nuniak senchi waitnuwe, imaniak kuashtá jinun patamnuwe nuniak namakash iyainuwe;

<sup>16</sup> imaniakui jintintajum aidau itaantamjai; tujash etsagagchagmae, tau.

<sup>17</sup> Tutai Jesús ayaak:

—¿Aents dekaskeapi tuchau pegkegchau aidauwah! ¿Wajupá dukapea atumjaish pujumainaitja? ¿Wajupak katsunjatjime?

Jui uchi itantá, tiuwai.

<sup>18</sup> Tusa Jesús iwanchin jiyaká uchinmayan jiikiuwai, dutikamuik uchishkam pegkeg wajasui.

<sup>19</sup> Nuna dutikamtai ajuma dui jintintaiji aidau Jesusan niinak akanki iniinak:

—¿Wagka jutiish wakan pegkegchau jiktakamaish tujinkamji?, tuidau.

<sup>20</sup> Tiagtai Jesús chichaak:

—Atumnak dekaskeapi tabauk imaanis atsugtmainawai. Dekas tajime, dekaskeapi tabaujum mostaza jigkayiya nuninkesh ajutjamainakuig, ju muja jujú chichagkujum: “Juig atsuk tikich yantamnum wetá”, tamak nunisag nagkaemamainai. Makichkish tujinmainuk atsugtmainaitjume.

<sup>21</sup> Tujash jujú wakanik ayuno takaaku, Apajuí aujku jiimainai, tiuwai.

*Jesús awentsag ni mantamnatnuji etsegkamu*

*(Mr. 9.30-32; Lc. 9.43-45)*

<sup>22</sup> Galilea weenak ijunja shimamunum Jesús jintintaiji aidau chichajak:

—Aentsmaga akiinauwa nunak, aents aidauunumujukagtai,

<sup>23</sup> dutikawagmatai maawagtai; tujash kampakum tsawanta jui nantaktai, tau.

Tutai ditashkam senchi wake besekajui.

*Jega Apajuí ememattainum kuichik akikmaktin tibau*

<sup>24</sup> Nunik Jesús ni jintintai aidaujai yaakat Capernaúm jegawagmatai, jega Apajuí ememattainum kuichik itaamun yajumin aidau Pedron jegaantag iniinak:

—¿Amina jintinjamnu jega Apajuí ememattainum kuichik itaata tibauwa nunak akikmakchattawak?, tuidau.

<sup>25</sup> Tama Pedro ayaak:

—Ehé akikmaktai, tusa ukuak jegá wayamtai. Jesús niyá iniak:

—¿Simogka amesh wajuk anentaime? ¿Ju nugka juiya Rey aidaush yaá aents aidaua akikmakta tuinawa? ¿Ditá uchijish akikmainawak atsa tikich aents aidauunak akikmakta tuina?, tau.

<sup>26</sup> Tutai Pedro ayaak:

—Ikaya aina nuna akikmakta tuinawai, tau. Tutai Jesús ayaak:

—Dekaske, ditá uchijig akikmainatsui;

<sup>27</sup> tujash nunin aig dita shiig juwakchainum tau asá kuchanum weme agsea ajugtá, dutikam dekatkau namak ajuittam nuna weni iwanjam diistá. Nui kuichik egkemtatui. Nunú kuichik jukim jega Apajuí ememattainum weme, midau aminujai akikmakta, tiuwai.

## 18

*Yaki dekas imá wagaakush atinaita tiagbau*

*(Mr. 9.33-37; Lc. 9.46-48)*

<sup>1</sup> Nunú tsawantinig ni jintintaiji aidau Jesusa jegaantag:

¿Apajuí inama nuish yaita dekas iman wagaakush? tusag inidau.

<sup>2</sup> Tiagtai Jesús makichik uchin untsuká itan ditá ejapen awajus,

<sup>3</sup> chichaak:

Dekas tajime, atum yapajinajum uchi aina numamtin wegachkugmek, Apajuí inama nuig waimain ainatsjume.

<sup>4</sup> Nunin asamtai makichkikesh imanchauch anenmamak jujú uchia junin weena nuuwai Apajuí inama nui iman wagaakua duka.

<sup>5</sup> Makichkikesh ju uchia juninun mina daajui juidauk, mina jujuinawai.

*Tikichin pegkegchau takamtikaidau pachisa tibau*

*(Mr. 9.42-48; Lc. 17.1-2)*

<sup>6</sup> “Makichkikesh jujú piipich aina juiya mina dekaskeapi tujutuina nuna tudaun takamtikaidauk, dekas kaya muun juki kuntugnum jigká detua nayantsa kunajin ajugká ajapmainus ajapachbau ainatai.

<sup>7</sup> ¡Wait anentuinajai aents aidaunak, tsanumin aidau midiagtin asagmatai! Duka uwentumainchau atinai; tujash ¡wait anentuinajai ya aents aidaun tudaun takamtiki-agtatua nunak!

<sup>8</sup> “Nuadui amina uwejum nuniachkush amina dawem tudaunum ajumpamain awajtamkuig tsupika ajapata; pegkejai uwejí muntuch wajasá nuniachkush shutusá pujutnum wayamuk, jimag uwegtin jimag nawentin jii tuke kajinchauwa nui ajapeam amaina nu.

<sup>9</sup> Tuja amina jiim tudaunum ajumpamain awajtamkuish, ukuinkam ajapata; pegkejai makichik jiintin pujutnum wayamuk, jimag jiintin jii waitiaku pujutaiya nui ajapeam amaina nu.

*Uwig megkaekaun pachis Jesús augmattsamu*

*(Lc. 15.3-7)*

<sup>10</sup> “Nijah, imanchauch diisaigpajum ju piipich aina jujú, wagki ángel aidau ditan kuitamin aina duka nayaimpinmag mina Apag nayaim puja nunak tuke wainainawai.

<sup>11</sup> Wagki Aentsmaga akiinauwa duka, megkaekauwa nuna uwentikatatus tauwai.

<sup>12</sup> “¿Wajuk anentaimejume? Aents cien uwig ajamu makichik wagak megkaetukam, noventa y nueve uwija nunak muja aidaunum batsaak, ¿megkaekauwa nuna egaak wemainchaukaih?

<sup>13</sup> Nunik wainkag, dekaskenmag nuna imá shiig anenmainai, noventa y nueve megkaekachu aina nuna nagkaegas.

<sup>14</sup> Nunisag atumi Apa nayaimpinum puja dushakam, jujú piipich aina juiya makichk-ish megkaekatnime tusag wakegatsui.

*Apajuí nemajin aidautish wajuk tsagkugdaimainaita*

*(Lc. 17.3)*

<sup>15</sup> “Amina yatsum tudaun takagtamkuig, imá nigki ausata, dutikakum ni dewakbaujish dekamtikata. Ame tama antugtamkuig, duka yatsum yaigkume.

<sup>16</sup> Untsu antugtamchakuig, makichik aentskesh nuniachkumesh jimagkesh jukim wetá, jimag nuniachkush kampatumkesh antuinamunum ashí chichamua duka dekaamu atí.

<sup>17</sup> Ditanash antugchakuig, iglesia ujaktá; iglesianash antugchakuig, aents Apajuí anentaimejume nuigtú apú kuichkiji atinun ijumin aidau antsú tsanug yajutin aina nuninuk emá idaisatajum.

<sup>18</sup> Dekas tajime, atum ju nugka jui aaja yayachmak nayaimpinmashkam tsagkug-nagchatnai. Untsu atum ju nugka jui tsagkujamuk, nayaimpinmashkam aantsag tsagkugnagtinai.

<sup>19</sup> Ataktushkam awentsanuk tajime, ju nugka jui jimagtigmekesh atuekajum, ashí wají pachisjum segamak mina Apag nayaimpinum puja nu amastatjume.

<sup>20</sup> Wagki tuwí jimag nuniachkush kampatumkesh mina daajui ijunag pujuinawa, nuwi wika ditajai pujajai”.

<sup>21</sup> Nuna tutai Pedro Jesusan jegantun iniak:

—Apuh, ¿wajupa imania tsagkugmainaitja mina yatsug tudaun takagtakuish? ¿Si-eteya imania tsagkugmainaitja?

<sup>22</sup> Tama Jesús ayaak:

—Sieteya duke tsagkujata tatsujame, tuke tsagkugsamké ata tajai, tiuwai.

*Aents tsagkugkagtugchauwa nu pachisa augmattsamu*

<sup>23</sup> “Nuadui Apajui nayaimpinum inama duka, rey niina takajin diwibau asa, akikmakti tiuwa nujai betekmamtainai.

<sup>24</sup> Dutika nagkamak, aents diez mil kuichkin diwimkagtaun juki ejetuawajui.

<sup>25</sup> Tuja nunú akikmamainji atsuju asamtai, apu inamjauwai nuwesh, uchiji aidaush nuigtú ashí wajiiji aina dushakam sujunkati, dutika diwijig akikmakbau atí tusa.

<sup>26</sup> Tutai apú takagnushkam tikishmag segak: Apuh, wait aneamam dakagsata, amina diwimjam nunak ashí akiktatjame, tau.

<sup>27</sup> Tama apushkam niina inaken wait anenmain diisá, diwijinak tsagkujauwai dutika agkan idaisauwai.

<sup>28</sup> Tujash nunú apú inake jiinki wekamá, nijai takataiji cien denario\* diwimun igkugku, nunik suwenum ininá awajus: ‘Diwimjam nunú yamaik akigkata’, tusa segau.

<sup>29</sup> Imatikam nijai takauwa dushakam tikishmatug segak: ‘Wait aneamam dakagsata, amina diwimjam nunak ashí akiktatjame’, tau.

<sup>30</sup> Tamash antuugsuk, achiká egkeauwai, nui pujus diwin akikmakti tusa.

<sup>31</sup> Nunú dutikamun tikich ditajai takatai aina nu wainkag shiig wake besemag diisajui, nunikag apun jegajag ashí dita wainkamunak imatiksag ujakajui.

<sup>32</sup> Dutikam apushkam itatnume tusa inamjauwai, nunik: ‘¡Inak pegkegchauwah! ame segatu asamin ashí mina diwimjam nunak tsagkujamjame.

<sup>33</sup> Dutikamu asam ameshkam, amijai takau diwimjama duka wait anenmain awajkaume, wi amina wait anenjamjam dutiksamek’.

<sup>34</sup> Tusa apu senchi kajeká achijatin aidaun inajui suwimkan susatnume, dutikam ashí niina diwijinak akikmakti tusa”.

<sup>35</sup> Dutiksag mina Apag nayaimpinum puja dushakam atumi yatsum dekas anentaiyai tsagkugchataik dutijamawagtinaí, tiuwai.

## 19

*Jesús nuwak idaimaitsui tibau*

(Mr. 10.1-12; Lc. 16.18)

<sup>1</sup> Jesús nuna tusa ashimak, Galilean ukuak Judea nugkanum jegaa Jordagka amain katigkui.

<sup>2</sup> Nunikmatai kuashat aents aidau pataetukaju, dutikam nui jau aidaunash kuashat etsagakui.

<sup>3</sup> Nuniai ujumak fariseo aidau Jesusan jegaantaju, nunikag pegkegchau anentaiyai iniinak:

—¿Nuwennush utugchat atsaish nuwenash idaimainkai?, tuidau.

<sup>4</sup> Tama Jesús ayaak:

—¿Atumek ausachukaitjum Agagbaunum, Apajui yama nagkamchakug aishmagkun nuwajai najanauwai,

<sup>5</sup> dutika chichajak: “Aishmag nuwenkug apajin, dukujin ukuak niina nuwejaig ijunmainai, nuniak nuwejai makichik iyash wegawai” tawa duka?

<sup>6</sup> Nunin asag jimagchauwai, makichik iyash weawai. Nuadui aatus Apajui dutikamua nunak aentsuk datupaumainchau ainawai, tiuwai.

<sup>7</sup> Tutai dita iniinak:

—¿Wagka tujash Moisesash papí nuwa idaiku najantain umiká nuwá susa idaisati tiuwaita?

<sup>8</sup> Tiagtai Jesús ayaak:

—Nunak atum antumtikmainchau ainajum dui, Moisesak nuwemik idaimainaitjume tujabijai, tujash nagkamting Apajui nunak tichauwai.

<sup>9</sup> Wi tajime, makichikesh nuwe tsanijinachu aig tikichjai nuwenkug ekagmawai, nunisag nuwa idaisamujai nuwennushkam ekagmawai, tiuwai.

<sup>10</sup> Tutai ni jintintaiji aidau:

—Aatus aishmag nuwejai nunimainaitkuig, nuwenmaitsujama, tuidau.

<sup>11</sup> Tiagtai ni ayaak:

—Nunak ashí aentsuk nunimain ainatsui, ya nunin atí tibauwaita duke nunimain ainawai.

\* 18:28 “Denario”, romano aidau kuichkiji. Makichik tsawantai takasá jumaina nunin aajakui.

<sup>12</sup> Awai aents tuke nuwenmainchau akiinawu aidaush; nuniai tikichik aents kagamtikamush ainawai, tuja aents nigki Apajuí inama nuna etsegtin atajai tabaunum nuwenmainchaush ainawai. Ni nunimain dekapmamuk; nunikti, tiuwai.

*Jesús uchi ikautkamu*

*(Mr. 10.13-16; Lc. 18.15-17)*

<sup>13</sup> Ujumak uchi aidaun Jesusan ikautuawajui achiká Apajuin aujtusti tusag; dutikiagtai ni jintintaiji aidau uchin ikaunmaina nuna jiyaidau.

<sup>14</sup> Nudiagtai Jesús chichaak:

—Idaisatajum uchi aidauk minai minitnume, utujiakaigpajum, wagki Apajuí inama duka jujú uchi aina junin aina nudauwai, tiuwai.

<sup>15</sup> Nuna tusa uchi aidaun makí makichik buuknum uwejin achiká pegkegnum yumigkis ukuak weuwai.

*Datsauch wiyakuch Jesusan iniasbau*

*(Mr. 10.17-27; Lc. 18.18-27)*

<sup>16</sup> Makichik aents Jesusan jegantun iniak:

—Maestroh, ¿wají pegkegna takamainaitja pujut nagkanchaun jukitasanush?, tau.

<sup>17</sup> Tutai Jesús ayaak:

—¿Wagka pegkeg pachismesh ininme? Imá makichki pegkeja duka. Tujash ame pujutnum wayatasam wakegakmek, chicham umiktina nu umiktá, tau.

<sup>18</sup> Tama ni ayaak:

—¿Tu ainawa?, tau.

Tutai Jesús ayaak:

—Magkagtuawaipa, tsanijnawaipa, kasamkaipa, wainkamek tsanumkagtuajaipa,

<sup>19</sup> amina apa dukujai eme anentsam diístá, nuniakum tikich aidaush amek anenmam-sam aneeta, tiu.

<sup>20</sup> Tama datsauch ayaak:

—Wika nunak datsauch asanuk ashí umikuitjai. ¿Nuigtush wajina dutikmainaitja?, tau.

<sup>21</sup> Tutai Jesús ayaak:

—Ame pegkeg atasam wakegakmek, weme amina wajijum ajutjamaina duka sujukam, ujunauch aina nu susata, dutikam nayaimpinum wajijgmik ajutjamtatui; nunika taam mina nemagtukta, tiuwai.

<sup>22</sup> Nu tama datsauchik wake beseká weuwai, wagki shiig wiyakuch asa.

<sup>23</sup> Nunikmatai Jesús jintintaiji aidaun chichajak:

—Dekas tajime, wiyakuch aidauk kakajus Apajuí inama nuig wayashtin ainawai.

<sup>24</sup> Awentsanuk tajime: Camellok aujá jijnish waigkag yupichu nagkaemamainai, tujash wiyakuch Apajuí inamtaijin wayata tabauk utughatai.

<sup>25</sup> Nu tabaun jintintaiji aidau antukag shiig anentai jegagchag:

—¿Yaki tujash uwemjaush amainaita? tudayinau.

<sup>26</sup> Tiagtai Jesús ditan diis chichajak:

—Aents diismak dutikmaitsui, tujash Apajuik ashí dutikmainai, tiuwai.

*Mina nemagtuidauk ditanu ukukbaujin nagkaesau jukiagtinai tibau*

*(Mr. 10.28-31; Lc. 18.28-30)*

<sup>27</sup> Tutai Pedro ayaak:

—Nijah, jutii ashí iina ajutjamaina duka ukuinaku ame nemagkabiajim nuutish, ¿wajig jukitnaitji?, tau.

<sup>28</sup> Tutai Jesús ayaak:

—Dekas tajime, ashí najankamu aidau yamagmitkamu jegatna nunú tsawantin, Aentsmaga akiinawuwa nu ni ekeemsa inamtaiji imana nui ekeemsantai, atum mina nemagtuku aidautgimek doce ekeemtainum ekeemsajum, Israelan uchiji doce aajakajua nunú weantu inagtin ainagme.

<sup>29</sup> Tuja ashí aents mina nemagtuinak jeen, yachi aidaun, umayí aidaun, apajin, dukujin, nuwen, uchiji aidaun, nugke aidaun ukukjau aidauk, dita ukukbaujin nagkaesau ciegra imania jukiagtin ainawai, nuigtushkam pujut tuke atina nunash jukiagtinai.

<sup>30</sup> Tujash kuashat aents dekatkau atatus wakegaina nu ukunum juwakagtinai. Untsu iman atan anentaimitumachu aina nu dekatkauk agtinai.

<sup>1</sup> “Apajui inama duka, uva ajagtin, shiig kashikmas ajajin takastin aidaun aentsun egaak jiinkiuwa nujai betekmantinai.

<sup>2</sup> Nunik takastin aina nuna igkug, makichik tsawan takagtustajum akiktajime tusa chichasá, uva ajakbaunum ajajin ishiakui.

<sup>3</sup> Nunik ataktú a las nueve tumain ai jiinkiuwai, nunikmá tikich aidaushkam plazanum wainak batsatun wainak,

<sup>4</sup> chichajak: ‘Atumshakam mina ajajui uva ajakbauwa nui takaakjum wetajum, atumnashkam dutiksanuk betek akiktajime, tama ditashkam weajui’.

<sup>5</sup> Dutika ataktushkam etsa tajajua ai jiinkiuwai, nunik wakettsag a las tres wegaishkam jiinkiuwai, nunik nunashkam betek dutikauwai.

<sup>6</sup> Nunik a las cinco jegattak wegai jiinki wekamá, tikich aidaushkam wainak ijuntatman wainkauwai, nunik iniak: ‘¿Wagka atumesh takatskesh etsash akapagme?’, tau.

<sup>7</sup> Tama dita aiinak: ‘Inak makichik aentskesh, takastá tusag egapainatsui’. Tiagtai: ‘Atumshakam mina ajag uva ajakbauwa nui takaakjum wetajum’, tiuwai.

<sup>8</sup> Nunik kiyagmatai uva ajagtina nu, niina inake takatá diinun chichajak: ‘Ashi takau aidau untsuktá dutikam inagnamunum wayawagma nui nagkamsam, nagkamchak wayawagma imanui akigtá’, tiuwai.

<sup>9</sup> Timatai a las cinco jegattak wegai wayau aidau kaunawag, makichik tsawantai takasbaunum akikmataiya dutiksag makí makichik aidau makichik denario\* jukiaju.

<sup>10</sup> Dutikamtai yama nagkamchak wayau aidau jegaantag, jutiinak aan dukapeap akigmaktatji tusag anentaimaidau, tujash ditashkam dutiksag makí makichik, makichik denario jukiaju.

<sup>11</sup> Nuna jukiag, ajagtina nu augmattan nagkamawaju,

<sup>12</sup> nunikag chichajuinak: ‘¿Wagka jujú aidau inagnamunum wayawag makichik hora takasagma nuniaish jutiijai betekash akikume, dekás jutií kijin takainaku etsa sukumainakuish katsunja tsawan ashimag nuniajinish?’, tuidau.

<sup>13</sup> Tiagtai ajagtina nu dita aina nuiyan makichik ayaak: ‘Kumpajuh, wika aminak makichik pegkegchaunakesh dutikatsjame, ¿wi yama nagkamchakun makichik denario akiktajime tama, ayú tichamkum?’

<sup>14</sup> Juuwai aminua duka, jukim wetá, inagnamunum waya nunash amina amaajam dutiksanuk susatasan wakegajai.

<sup>15</sup> ¿Mina kuichkignak wi wakegamun dutikmainchaukaitag? ¿Wi pegkeg asan dutikag duiká ame tikich kajejakum tu wekaegam?’, tiuwai.

<sup>16</sup> “Tujash kuashat aents dekatkau atatus wakegaina nu ukunum juwakagtinai. Untsu iman atan anentaimtumachu aina nu dekatkau agtinai”.

*Kompatuma juna Jesús ni mantamnatnuji etsegkamu*

(Mr. 10.32-34; Lc. 18.31-34)

<sup>17</sup> Jesús Jerusalén wakattatus wesa jintaa jintintaiji doce aina nuna akanki chichajak:

<sup>18</sup> —Yamai Jerusalén wakattaji, nunikmatai Aentsmaga akiinauwa nunak achikag sacerdote apuji, maestro chicham umiktinun jintinkagtin aidaunum sujukagtatui maatnume tusag,

<sup>19</sup> dutikam dita jukiag judiochu aidaunum sujukagtatui; dushí dushikinakuag, asuti-awag, achijag maatnume tusag; tujash kompatum tsawanta jui nantaktatui, tiu.

*Zebedeo nuwe uchijinun pachis Jesusan segamú*

(Mr. 10.35-45)

<sup>20</sup> Zebedeo uchijí aina nuna dukují niina uchijí aidaujai ijunag, Jesusan jegantun niina eemtin tikishmaju, wait anenjujti tusa segatatus.

<sup>21</sup> Nunitai Jesús iniak:

—¿Wají wakegame?, tau.

Tama nuwa ayaak:

—Ame inamtaigmin mina uchig jimaja juna, makichik untsujin ekenak, tikichia junak menajin eketjusti tajame, tau.

<sup>22</sup> Tutai Jesús ayaak:

—Atumek dekatsjume mina segatjum duka.

¿Atumesh wi waittsattag imaanikjumesh waitmainuk ainajum? tau. Tama dita aiinak: Ehé, iishkam duka nunimainaitji, tuidau.

<sup>23</sup> Tiagtai Jesús ditan chichajak:

\* 20:9 “Denario”, diistá Mt. 18.28.

—Dekaskenum wi waittsattag nunisjumek waittsatin ainagme; tujash mina untsujui nuigtú mina menajui ekeemsatajum tusanuk wika tumaitsujai; nunak mina Apag ya aidau ekeemsatnuna umigkauwaita nuna dutikatnai, tiuwai.

<sup>24</sup> Nu tabaun tikich diez jintintaiji aina nu antukag, mai yachijai kajegkajui.

<sup>25</sup> Nuniagtai Jesús ditan untsuká chichajak:

—Atumek dekamge, aents ju nugka juiya aentsun apuji aidauk, aentsnak ditanua nunin emak inainawai, tuja nunú apu aina nuna aentsji aidaushkam aentsnak, dita wakegamun inainawai.

<sup>26</sup> Tujash atum ainajum anuiyag nuninuk amaitsui; dekas apu atatus wakegawk atum ainajum anuiyag, tikichi takajin amainai;

<sup>27</sup> Atum ainajum anuiya dekatkau atatus wakegawk, atumi inakem wemainai.

<sup>28</sup> Wagki Aentsmaga akiinauwa duka umigtuktinme tusag taachui, nigka tikich aidau yaigtatus tauwai, nunik mantamnak kuashat aentsun uwemtikata tau asa.

*Jesús jimag aents wainmachu etsagagbau*

(Mr. 10.46-52; Lc. 18.35-43)

<sup>29</sup> Jericonmaya dita jiinki weagtai, kuashat aents Jesusan saetukajui.

<sup>30</sup> Nuniamunum jimag aents wainmachu aidau jintá yantamen eketaidau, Jesús nagkaebaun antukag:

—¡Apuh, Davita uchijiyah, jutiish wait anenkagtugta! tusag untsuidau.

<sup>31</sup> Imatiagtai aents aidau itatkati tusag jiyaidau; tujash ditak nuní senchi untsumkag:

—¡Apuh, Davita uchijiyah, jutiish wait anenkagtugta!, tuidau.

<sup>32</sup> Imatjam Jesús nui wajan untsuk ikaunman iniak:

—¿Utugtukti tusagma wakegamge?, tau.

<sup>33</sup> Tama dita aainak:

—Apuh, iik wainmaktasa wakegaji, tuidau.

<sup>34</sup> Tiagtai Jesuschakam wait anentug ditá jiin antinkaju, dutikamuik wainmakag, ditashkam Jesusan nemagkaju.

## 21

*Jesús Jerusalén wayamu*

(Mr. 11.1-11; Lc. 19.28-40; Jn. 12.12-19)

<sup>1</sup> Jerusalén tikiju wajasag Betfagé jegawaju Olivosan mujají awa nui, nunik Jesús ni jintintaijin jimajan awemauwai,

<sup>2</sup> dutikak:

—Wetajum au yaakat yaijuch awa awi, nunikjum wainkattagme makichik burra\* jigkam uchijijai wajau. Nunú atia jukijum itagtuatajum.

<sup>3</sup> Nu dutikagmin makichik aentskesh wajinjutpatig, takuish: Apu atsumawai, wamak awagtugmaktatui, tusajum ukuktajum, tiuwai.

<sup>4</sup> Jujú junikua duka profeta tibuauwa nu uminkauwai, duka:

<sup>5</sup> “Yaakat Jerusalén batsamin aina nu titajum:

‘Diistá amina Reyjum minitjamui, imanchauch wajasá,

burronum ekemi, burro tsakat, kuntin kijin takamtiktaiya nuna uchijin’ ”, tawai.

<sup>6</sup> Tiajam jintintaiji aidaushkam wegag Jesús tibaunak imatiksag umikaju.

<sup>7</sup> Dutikawag burran uchijijai itantag, jaanchji aidau tuntutupen aitkagmatai, Jesús ekebiuwai.

<sup>8</sup> Kuashat aents asag, jinta Jesús weamunum jaanchji aidau aainak emainai, tikich aidauk dukan tsupig jintá ainag emaidaush aidau.

<sup>9</sup> Imatikainak aents eemak weedau, ukunum minidaushkam untsumkag:

—¡Shiig anentsagmi Apu David weantunum akiinauwa nunú! ¡Apu Apajuí awemam miná duka pegkegmai! ¡Apajuishkam emematiagmi! wajaidau.

<sup>10</sup> Nunik Jesús Jerusalén wayamtai ashí aents aidauk pampaidau, nuninak:

—¿Jusha yaita? tusag inimaidau.

<sup>11</sup> Tiagtai:

—Juka profeta Jesusai, Nazaret, Galilea awa nuiyayai, tuidau.

*Jega Apajuí ememattainum aents batsatun Jesús jiigbau*

(Mr. 11.15-19; Lc. 19.45-48; Jn. 2.13-22)

\* 21:2 “Burra” tawa nunak versión Dios Habla Hoy (DHH) tawai, nuiya jukimui antumain atí tusa. Tuja tikich versión Reina-Valeranmag (RV) nunak tayatak “asna” tawai.



<sup>12</sup> Jesús jega Apajuí ememattainum wayau, nunik nui sujak batsatun sumau aidaujai ashí agaa jiijú, dutikak kuichki yapajiin aidau mesajinashkam shitaki akaketuk, paumá sujin aidau ekeemtaiji aidaunash dutiksag akaketkau;

<sup>13</sup> dutika:

—Agagbau awai: “Mina jegajuk, Apajuí aujku ijuntai tutai atinai” tawai; nuniaig atum kasá batsamtaí emaugme, tiuwai.

<sup>14</sup> Jega Apajuí ememattainum Jesusan jegajuawajui wainmachu aidau, shutú aidaujai; nunikmatai niishkam etsagakui.

<sup>15</sup> Tujash Jesús anentai jegamainchau dutikamun sacerdote apuji aidau, maestro chicham umiktinun jintinkagtin aidaujai wainkag, uchi aidaushkam jega Apajuí ememattainum batsamas untsumainak: “¡Davita uchijí emematiagmi!”, awajuinamun antukag kajekag,

<sup>16</sup> Jesusan chichajuinak:

—¿Antamek jujú imataina dusha?, tuidau.

Tiagtai Jesús ayaak:

—Ehé, antajai; tujash ¿atumek tuke ausachuk ainajum: “Uchi tsakat aidau, muntsuaku aidaujai emematjitnume tusam umikume” tawa duka? tiuwai.

<sup>17</sup> Nuna tusa yaaktan ukuak jiiinki, Betania weuwai, nunik nui kanajui.

*Higuera nejechun Jesús yumigamu*

(Mr. 11.12-14, 20-26)

<sup>18</sup> Kashikmas yaakat waketak, Jesús yapajuau.

<sup>19</sup> Nuniak higuera jintá yantamchijin wajattaman wainak jegantau, tujash nejeg atsau ayatak dukak wajas atai, chichajak:

—¡Amek tuke nejekchatnaitme! tamawaik higueraashkam kukajá wajasú.

<sup>20</sup> Nunikun wainkag jintintaiji aidau puyatkajui, nunikag Jesusan iniinak:

—¿Wajukaya higueraash tabauwaikish kukajé?, tuidau.

<sup>21</sup> Tiagtai Jesús ayaak:

—Dekas tajime, atum dekaskeapi tabau ajutjamkui utujibaush atsugtamkuig, imá higuerañ jutikag dukek dutikmainchau ainagme, ju muja jukesh: ¡Jui atsupk nayantsanum wajaata! tamak nunimainai.

<sup>22</sup> Ashí atum Apajuí aujukum, dekaskeapi tabauwai segakjumek, jukittagme, tiuwai.

*Sacerdote apuji aidau Jesusan iniasagbau*

(Mr. 11.27-33; Lc. 20.1-8)

<sup>23</sup> Jesús jega Apajuí ememattainum wayá jintinkagtak waijai, sacerdote apuji aidau nuigtú judío apuji aidaujai tajuntag iniinak:

—¿Aminash ya jintinkagtuata tusash awetamae? ¿Yana chichamenia jusha juniame?, tuidau.

<sup>24</sup> Tama Jesús ayaak:

—Wishakam makichik iniastajime, nunú aigkagmin wisha ya aikata tujutkuiya jutikaja nuna titajime.

<sup>25</sup> ¿Juagnash ya yamijatjata tiuwaita, Apajuik awemauwait atsa aents aidauk awemauwait?, tau.

Tama ditak pempeentunikiag chichainak: “Juagnak Apajuí awemauwai tajinish, ¿tujash wagka dekaskeapi tichau ainagme tujamtatajama?”

<sup>26</sup> Tuja aents aidau awemauwai titag takuish, aents aidau ishamaji, Juagnak profetayai tuidau asagmatai”.

<sup>27</sup> Nunikag Jesusan aiinak:

—Dekatsji, tuidau.

Tiagtai ni ayaak:

—Wisha tichattajime yana chichamenia jutikaja nunak, tiuwai.

*Aents jimag uchigtin pachisa tibau*

<sup>28</sup> Jesús ditan iniak:

—¿Atumesh jusha wajuk anentaimtagme? Makichik aents jimag uchijí ajujakui, nunú uchijí emkauwa nuna chichajak: “Uchijuh, yamai uva ajakbauwa nui weme takastá”, tiuwai.

<sup>29</sup> Tama uchi ayaak: “Maake, wechattajai”, tau. Tiuwaitak anentai yapajia, weuwai.

<sup>30</sup> Tikichia nunashkam jegantun dutiksag tiuwai. Tama nu ayaak: “Ayú apuh, wi wetajai”, tiuwai. Tujash wechauwai.

<sup>31</sup> ¿Ju jimaja juiyash, tuuwa apají wakegamunash dutikauwaita? Tuinam dita ainainak:

—Dekatkauwa nuuwai, tuidau.

Tiagtai Jesús ayaak:

—Dekas tajime, apú kuichkiji atinun ijumin aidau nuigtú nuwa akiká takatai aina duka, atumek wayasjuminig Apajú inamtaijinig ditá wainawai.

<sup>32</sup> Wagki Juan Yamijatna duka pegkeg takatan jintinjamatatus tauwai, tujash atumek dekaskeapi tichau ainagme; atum nuniagmin apú kuichkiji atinun ijumin aidau nuigtú nuwa akiká takatai aidaushkam dekaskeapi tiajui, tujash atumek ashí nu wainiatkujum tudaujum idaisajum pujutjum yapajiachu ainagme nunikjum niish dekaskeapi tumainaitjum nu, tiuwai.

*Takau pegkegchau aidau pachisa tibau*

(Mr. 12.1-12; Lc. 20.9-18)

<sup>33</sup> “Antuktajum tikich augmatbaushkam: Aajakui makichik aents jeentin, nunú uvan ajakui, dutika tanishig, uva yumiji ijugtinnash umik, wajasá diistinnash torre ajiauwai. Dutika ujumak takau aidau ukujak tikich nugkanum weuwai.

<sup>34</sup> Nunik uva juwaamu jegamtaí, ni inake aidau ishiakui takau aidau batsatbaunum, niinush wajupaita nuna jukitnume tusa.

<sup>35</sup> Tujash takau aidau inak awemamu aina nuna achikag, makichkia nuna suimainak tikichia nunak maawag, tikichia nunak kayai tukujajui.

<sup>36</sup> Dutikawagmatai nagkamchaku ishiakbauwa nuní kuashat inaken ishitkauwai; tujash nunashkam dutiksag dutikawajui.

<sup>37</sup> “Dutikawagmatai inagnamunum niina uchijin awemauwai: ‘Mina uchignak ajantusampap diimain ainawa’, tusa anentaimas.

<sup>38</sup> Tujash takau aina nu uchi wainkag ditak pempeentunikiag: ‘Auwai ju aja juna jukitnuk, dekas maa ajapami, dutikaku juka iinu emami’, tuidau.

<sup>39</sup> Tusag achiká jukiag uva ajakbaun ukumtikiag maawajui.

<sup>40</sup> “Dusha atumesh wajuk anentaimtagme, dekas uva ajagtina nunú minakush, ¿utugmainai tajume takau aina nunash?”

<sup>41</sup> Tutai dita aiinak:

—Nunú pegkegchau aina nunak wait anentsuk kajeemainai, dutika tikich takau aidau idaitumainai uva juut jegamtaí juwinak niinu amaina nuna sujustinme tusa.

<sup>42</sup> Tiagtai Jesús ditan ayaak:

—¿Atumek Agagbau aina duka tuke ausachuk ainajum, nui:

“Kayá ekenag jegamin aidau, kaya pegkegchauwai tusag dakitjajua nunú yamai dekas jegá ichichkatin kaya apujutia iman wajasé;

Nunak Apu Apajú dutikau asamtaí jutii diismak anentai ejetumaitsiu’ tawa duka?

<sup>43</sup> “Nuadui tajime, Apajú atumin inapa nunak idaiyak tikich aentsun inagtinaí, midau atin aidauan dutiksag itagtuatnume tau asa.

<sup>44</sup> Nunú kaya nui iyauk, tsainkatnai; untsu kaya aentsnum iyaakug, yuku ematnai”.

<sup>45</sup> Nuna Jesús augmattai sacerdote apuji aidau, fariseo aidaujai antukag, ditan pachis tawa nuna dekagmamawaju.

<sup>46</sup> Nunikag achiktag tuidau; tujash aents aidau ishamaidau, Jesusak profetayai tuidau asagmatai.

## 22

*Nuwenku fiestamamu pachisa Jesús augmattsamu*

(Lc. 14.15-24)

<sup>1</sup> Jesús ditan aujuinak ataktú nagkama augmatbaun pachis tau:

<sup>2</sup> “Apajú inama duka makichik rey uchiji nuwenatin asamtaí yutai shiig pegkejan umigkauwa nujai betekmamtinaí.

<sup>3</sup> Dutika ishiakui inake aidau, ipaamu aina nuna ujaktinme tusa, tujash ditak nui minitnak dakitjajui.

<sup>4</sup> Nunikagmatai ataktú tikich inake aidau ishimak: ‘Ipak aidau ujaktajum, yumainuk uminkae, mina toro aidaujun, kuntin uduekbau aidauashkam maatajum tijai; ashí uminkae, nuwenbaunum minitnume, timae titajum’ tusa.

<sup>5</sup> Tujash ipaamu aidauk antugkachajui. Nunikag makichik ajajin wegai, tikich wajijin sujak weuwai,

<sup>6</sup> nuniai tikich aina duka, apú inake ishiakbau aina nuna achikag, wai waitkainakuag maawajui.

<sup>7</sup> Dutikamun rey antuk kajeká suntaji aidau ishitkauwai, dutikam wejiag aents magkagtuau aina nuna kajeká, ashí yaaktajinash apejuk ukugkiajui.

<sup>8</sup> Nuna dutika inake aidaun chichajak: ‘Nuwenbaunum yuwatnuk uminkae, tujash ipamu aidauk minimainchau ainawai.

<sup>9</sup> Wetajum yaaktanum jinta aina nui, nunikjum ashí aents atum wainbauk ipaatajum nuwenbaunum kaunatnume’, tiuwai.

<sup>10</sup> Tiajam inak aidaushkam jintanum shiyakag, ashí aents dita wainbaunak ipaawajui pegkeg aidaun, pegkegchau aidajui. Imatikamu asa jeganmag aentsuk piyakui.

<sup>11</sup> “Nunikmatai rey wayau, ipak aidaun diistatus. Nunikmá makichik aents nuwenbaunum weaku nugkutain nugkuagchaun wainkau,

<sup>12</sup> nunik: ‘Kumpajuh, ¿wajuk amesh juish wayaume jaanch nuwenbaunum nugkutai nugkutskesh?’ Tamash nigka chichaachu.

<sup>13</sup> Nunitai rey ni inake aidaun chichajak: ‘Juka dawenum jigkagjum, uwejinish jigkagjum agaa suwea awi jiiktajum, nui pujus buutak nainak takegtú pujuti’, tiuwai.

<sup>14</sup> Wagki untsukbau aidauk kuashtai, tujash etejamu aidauk ujumke”.

*Kuichik akikmamu pachisa tibau*

(Mr. 12.13-17; Lc. 20.20-26)

<sup>15</sup> Timatai fariseo aidaun jijnag chichaman umikaju, Jesús wajintig nunikmatai tsanumjugmi tusag.

<sup>16</sup> Nunikag ishiakajui ditá aentsji aina nuiyan ujumak, Herodesan aentsji aina nujai, Jesusan iniastinme tusag, dutikawajam:

—Maestroh, dekanaji amek dekaskea duke tame duka, Apajuí jinti dekaskea duke jintinkagtam dushakam, aents tuina dukesh uyumatsme wagki dita shiig awajkatasam tachau asam.

<sup>17</sup> Nuniau asamin tajame: ¿Amesh wajinpa, Cesarash kuichkish akimainkaih atsa akimainchaukaih?, tuidau.

<sup>18</sup> Tiagtai Jesús dita pegkegchau anentaiyai tabaun dekaju asa:

—¿Tsanumin aidauwah! ¿Wagka pegkegchaunum dekapjustasagmesh wakejutagme?

<sup>19</sup> Iwaintugkakjua kuichik akikmajum nunú, tau. Tama makichik denario ejentuntaju.

<sup>20</sup> Dutikam ditan iniak:

—¿Yana niimegaita jusha, tuja yana daajiyaita ju agagbauwa jusha?, tau.

<sup>21</sup> Tama dita aiinak:

—Cesardauwai,\* tuidau.

Tiagtai Jesús ayaak:

—Cesardauwa duka, César susatajum; Apajuinua duka, Apajuí susatajum, tiuwai.

<sup>22</sup> Nuna antukag anentai jegagchaju, nunikag ukuinak weajui.

*Jakau nantagtin pachisa iniimsamu*

(Mr. 12.18-27; Lc. 20.27-40)

<sup>23</sup> Nunú tsawantaik saduceo aidaushkam Jesusan wejiaju, ditak jakau aidauk nantagchatnai tinu asag, nunikag iniinak:

<sup>24</sup> —Maestroh, Moisés chichaak: “Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai”, tiuwai.

<sup>25</sup> Nuniamunum, jutii ainag juiya siete yachigbau aayi. Nuanuiya nagkamchak nuwenauwa duka uchin akiitsuk jakauwai, nuniak nuwanak yachin ukugkiuwai.

<sup>26</sup> Nunikmatai jimaja ju jukishkam nunisag jakauwai, nunisag kempatuma dushakam jakauwai, nuni nuninakua siete aajakajua duka ashí jinawajui.

<sup>27</sup> Nu ashí jinawagmatai pujus nuwashkam jakauwai.

<sup>28</sup> Nuna nunikajua duish, atak nantamunmash, ¿Siete yachi aajakajua nu ashí nunak nuwatkajua duish, yana nuweg atinaita? tuidau.

<sup>29</sup> Tama Jesús ayaak:

—Atumek Agagbau aina duka, nuigtú Apajuí senchijiya dushakam dekachu asajum dewakugme.

<sup>30</sup> Atak nantamu atina duik nuwenbauk atsutnai, ángel nayaimpinum batsata nuninuk agtinai.

<sup>31</sup> Tujash ¿jakau nantajagtinun pachis Apajuí tibau agagbauwa duka ausachuk ainajum, nuanuj:

<sup>32</sup> “ ‘Witjai Abraham, Isaac, Jacob aina nuna Apajuujinuk’ tawa duka? Apajuik jakau aidaun Apajuujichui, iwaaku aina nuna Apajuujiyai”, tiuwai.

<sup>33</sup> Aents aidaun nuna antukag, Jesús jintinkagtamun anentai jegagchaju.

\* 22:21 “César”, tawa nunak Roma apujiya nuna tujakajui, tujash duka aentsú dajichui, duka makichik título Roma apuji taku tujakbauwai.

*Chicham umiktin dekas imana nu*

(Mr. 12.28-34)

<sup>34</sup> Jesús saduceo aidaun itatmitkakbaun fariseo aidau antukag, ijunjaju;  
<sup>35</sup> nunikbaunum dita aina nuiya makichik maestro chicham umiktinun jintinkagtin, pegkegchau anentaiyai iniak:

<sup>36</sup> —Maestroh, ¿chicham umimain dekas imana dusha tuwaita?, tau.

<sup>37</sup> Tama Jesús ayaak:

—Amina Apujum Apajuiya nu, ashí amina anentaimjai, ashí amina wakanmijai, ashí amina anentaimtagmijai aneeta, tawai.

<sup>38</sup> Juuwai dekas imanuk, nuigtú chicham dekatkau umimaina duka.

<sup>39</sup> Tuja tikichia duka jujai betekmamtinai, duka: “Tikich aidaush amek anenmamsam aneeta”, tawai.

<sup>40</sup> Ju jimag chicham umiktina juig ashí chicham umiktin aidau nuigtú profeta aidau tibauwa dushakam ainawai, tiuwai.

*Cristush yana uchijigkita tibau*

(Mr. 12.35-37; Lc. 20.41-44)

<sup>41</sup> Fariseo aidau ijunjamutak batsataig, Jesús iniak:

<sup>42</sup> —¿Atumesh Cristush wajuk anentaimtagme? ¿Yana uchijiyai tajume?, tau.

Tuinam dita aiinak:

—Davita uchijiyai, tuidau.

<sup>43</sup> Tiagtai:

—Nuniaish, ¿wajuk asamtaiya Davitash Wakan ichachiamash Apú tiuwaita?

<sup>44</sup> Tau asa:

“Apu mina Apujun chichajak: Ekeemsata mina untsujui, nunikamin wi amina shiwajum aidaunak ashí idaitustajame”, tiuwai.

<sup>45</sup> —David, Apu tawa nuniaish, ¿wajuk asaya Davita uchijish amainaita?, tau.

<sup>46</sup> Tutai makichkish aimainchau dekapedau asag, nui nagkamsag makichkish iniaschajui.

## 23

*Jesús fariseo aidaun, escriba aidaujai pegkegchauji pachisa tibau*

(Mr. 12.38-40; Lc. 11.37-54; 20.45-47)

<sup>1</sup> Nunikagmatai Jesús aents aidaun, niina jintintaijai aidaujai chichajak:

<sup>2</sup> “Maestro chicham umiktinun jintinkagtin aidauk, fariseo aidaujai Moisés tibauwa nuna jintinkagtuinawai.

<sup>3</sup> Nuadui atumek, ashí dita dutikatajum tujamaina duka umigkatajum; tujash dita takaina duka takasaigpajum, wagki ditak tuinayatak nunak takainachu asagmatai.

<sup>4</sup> Ditak shiig kijin yanamainchau aidaun tikichnak ayanainawai, ditakesh makichik tsajam uwejinkesh antitnak dakituinayatak.

<sup>5</sup> Ashí dita dutikaina nunak aents wainkamu atatus nuninawai, nuninak senta wegkagman jukiag, chicham umiktajum tibauwa nuiyan agajag, kuntujinish dutiksag jigkamá yujainawai. Aantsag nugkuagbauji weniya nuwish esagman sasamjukag detug nugkujag yujainawai.

<sup>6</sup> Yutai umikbau yuinamunmash, aents eme anentsá ekeemsati tibaunum ekeemsag-tatus wakegainawai; nunisag jega ijuntainum wainakush nuninawai.

<sup>7</sup> Nunidau asag, plazanum aents kumpamjuinakush eme anenjus: Rabi\* tujuttinme tusag wakejin ainawai.

<sup>8</sup> “Tujash atumek ‘Rabi’ tujuttinme tusagmek wakemaitusgme; wagki makichki atumi Maestrogmek, tuja ashí atum aidautigmek yatsut ainagme.

<sup>9</sup> Atum aidautigmek ju nugka juiyag makichkish ‘Apawá’ tiigpajum; wagki makichki atumi Apak, nayaimpinum puja duke.

<sup>10</sup> Nuigtush ‘maestro’ tamak aigpajum; wagki atumi Maestrogmik makichki, Cristua duke.

<sup>11</sup> Atum ainajum anuiya dekas eme anentaiya nunú, tikich aina nuna inake amainai.

<sup>12</sup> Wagki nigki eme anenmama duka, imanchau diyam atinai, untsu imanchau diyamua nu eme anentam atinai.

<sup>13</sup> “iWait anentajime atumnak, maestro chicham umiktinun jintinkagtin nuigtú fariseo aidautigminak tsanumin asagmin! Wagki Apajuí inama nui wayawainum tusa epetjume, atumkesh wayachiatkujum tikich wayata tuidaush idaitsugme.

\* 23:7 “Rabi”, tawa duka arameo chichamai, nunak mina jintinjin taku tujakú ainawai.

14 ;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Wagki atumek nuwa waje aina nuna jee atankijum, tsanumkujum Apajuí dukap aujú yujau ainagme, nunin asajum imá senchi bakumatin ainagme.

15 “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek kukag nuwa nuigtú nayantsanum yujagme atumdaa amain wainkatasajum, nunika wainkagmek nunú aentsuk unuinajum, atumi nagkaetamas jimaja imania waitmain emá idaiyin ainagme.

16 “;Wait anentajime atumnak, wainmachu ainayatkujum jinta inakmaidau asagmin! Atumek: ‘Makichkikesh jega Apajuí ememattaiya nuna pachis dutikattajai tauk wainkayai tajume; untsu oro jega Apajuí ememattain awa nuna pachis tawa nu, ni tibaujiya nunak betek umimainai tajume’.

17 ;Anentainkachu, wainmachu aidauwah! ¿Dekas tuwaita imanush: orokaih, atsa nuniachkush jega Apajuí ememattai oron pegkemtika dukaih?

18 Nuigtushkam atumek tajume: ‘Altaran adaiyas ni dutikatnujin umikattajai tauk, wainkayai’ tajume; ‘untsu Apajuí ofrenda suwamu altarnum patatun adayas tauk, dekas imatiksag umimainai’ tinu ainagme.

19 ;Wainmachu aidauwah! ¿Dekas tuwaita imanush: ofrendakai atsa altar ofrendan pegkemtika dukaih?

20 Aents ni dutikatnujin altaran adayas tawa duka imá altarnak taku tatsui, ashí altarnum patata nujai taku tawai.

21 Tuja jega Apajuí ememattaiya nuna pachis taushkam imá jeganak takug tatsui, Apajuí nui puja nujai taku tawai.

22 Aantsag nayaimpin pachis taushkam Apajuí ekeemtaijiya nuna nuigtú nui eketa nunashkam pachis tawai.

23 “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek menta, anís,<sup>†</sup> comino aatsajum diezmó<sup>‡</sup> wajau ainagme; nuniayatkujum chicham umiktin dekas iman aina duka umiatsjume: pegkeg takata nu, wait anenkagtuta nu, dekaskeapi tabauwa dushakam. Jujú dutikmain ainagme, tikichia dushakam idaitsuk.

24 ;Wainmachu ainayatak jintá inakbau aidauwah! Wiyunchik tsatsamá ajapeayatkujum, camellok kujajume.

25 “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Wagki vaso, plato aina nuna awankeg jaipjagme, tujash inittak kasamtaijum nuigtú pegkegchau takataijum aina duka piyak ajutjamainawai.

26 ;Fariseo wainmachuh! Dekatkauk vaso, plato aina nuna initkegá jaipjata, dutikam awankeshkam pegkeg atalui.

27 “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Aents ukusbau awanke pujui ukatkamua nunin asajum pegkeg wantinjume, tujash initkagminig aents jakau ukunchí tsumain wajas aama nunin ainagme.

28 Atumshakam nunin ainagme aents aidau eemtinig pegkejan takauwa iman iwainmajume; tujash initkagminig tsanumtaijum, pegkegchajum aidau piyak ajutjamainawai.

29 “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek profeta ukusbau aina nunú jegagkajum nuigtú aents yaunchuk pegkejan takasú batsamajakajua nuna niimé dakumkamu aidash shiig iwajin ainagme,

30 nuniakjum: Jutish ii muunji batsamajakua nunú tsawantin pujujakuitkuik, profeta aidau mainak numpen ukajajua nuig jutiik pachinkachus amainaitai, tajume.

31 Nunú tajum nuadui atumek etsegumagme profeta aidau maawaju aina nunú weantu ainajum nu.

32 ;Atumi muunjum nagkamamua duka, atumshakam dutiksagmek ashimkatajum!

33 “;Iwanch dapimea aentsun tsanujua nujai betek aidauwah! ¿Wajuk uwemtugtagmeki, suwimak waitiamu atina dusha?

34 “Nuadui wí profeta aidau, aents yacha aidauwash, maestro aidauwashkam awemattajai. Tujash atum nunú aina nuiya maakjum, tikichik achigtin ainagme; tikich

<sup>†</sup> 23:23 “Anís” tawa duka Dios Habla Hoy (DHH) tawa nuiya jukimui. Untsu Reina-Valera takug: Eneldo tawai.

<sup>‡</sup> 23:23 “Diezmo”, tawa nunak dieza nuiya makichik Apajuinu atin akanbauwa nuna tawai.

aina duka jega atumi ijuntaigmin awayajum asutiakjum, tikich aina duka ya yaaktanum yujagsajum aintú yujagtin ainagme.

<sup>35</sup> Aaja nuniau asagmin, atumiin suimkak iyagtinai, ashí numpa pegkejam nugkaa ukaejamunum, Abel pegkejan takajakua nui nagkamas, Zacarías Berequiasa uchijí, jega Apajuí ememattai ai altar awa nuna ejapen mau ainajum dui.

<sup>36</sup> Dekas tajime, ashí nuna nunikajua dui yamai aents aina jui suimkak iyagtinai.

*Jesús Jerusalén anentai idajtukbau*

*(Lc. 13.34-35)*

<sup>37</sup> “¡Jerusalén, Jerusalén, amek profeta aidaush mainaitme, dutiksamek aminí awe-mamu mininakuish kayai tukui tukuinakuajum main ainagme! Kuashtá wakekamjai uchijum aidaun, atash uchijí aidaun nanapen ijumama numamtuk awajkatasan, tujash amek dakitjamume.

<sup>38</sup> Nuniku asagmin atumi jeemia duka ukumkimu juakagtinai.

<sup>39</sup> Nunin asamtai tajime yamai nagkamsagmek ataktuk waitkashtatjume, nuniautijum: ¡Apajuí awemam mina ju emematiagmi! tujuttinaitjum dui waitkatín ainagme”.

## 24

*Jega Apajuí ememattai tsayam atinai tusa Jesús etsegkamu*

*(Mr. 13.1-2; Lc. 21.5-6)*

<sup>1</sup> Jega Apajuí ememattainmaya jiinki Jesús wetai, niina jintintaiji aidau jegaantaju jega Apajuí ememattai jegamkamun inaktustatus.

<sup>2</sup> Dutikam Jesús chichaak:

—¿Ju ashí wainjumek? Dekas tajime, juka makichik kayakesh ekenjamu aina nuiyag juwakchatnai, ashí tsaiqbau atinai, tuuwai.

*Nagkanbau jegatsaig wantinkagtin aidau*

*(Mr. 13.3-23; Lc. 21.7-24; 17.22-24)*

<sup>3</sup> Jesús Olivosa mujajin waka ekemsamtai, niina jintintaiji aidau jegaantag, niinak akanak iniinak:

—Tukagtita, ¿wajutiya dusha nuniktinaita, tuja waji wantinkatnaita ame taattaku wajataish, nuigtú nugka nagkanbau jegattak wajataish?, tuidau.

<sup>4</sup> Tiagtai Jesús ditan ayaak:

—Kuitamamkatajum, makichkish tsanugmajainum.

<sup>5</sup> Wagki kuashat midiagtinai mina daajun pachisag, nuninak: “Witjai Cristunuk”, tusag kuashat tsanumiagtinai.

<sup>6</sup> Atumek maaniamu aidau, nuigtú maaniatatus pampanyamush antitnaitjume, imatuinakuish puyatkaigpajum. Duka dekas ashí aatus nagkaemagtinai, tujash nu achatnai nagkanbauk.

<sup>7</sup> Nugka muunnum inamnuk, mai imanuk maaniagtinai, tuja nugka yaignum batsam-nushkam, mai nuninuk maaniagtinai. Jata ishamain utsumaja jinamush, yapagdash, kuashat nugkanum uugbaush atinai.

<sup>8</sup> Tujash ashí ju aina juka waitut yamá nagkamnak imanitnai.

<sup>9</sup> “Untsu atumnak waitkastinme tusag sujupakagtinai, dutijamawagmatai mantamawagtinai; ashí aents aidau kajegtabiagtinai, mina daag pachisjum chichaidau asagmin.

<sup>10</sup> Nunú tsawantinig kuashat aents minak tupanjukagtinai, nuninak pempé pempeentunisag sujuminak, pempeentunisag kajegdayagtinai.

<sup>11</sup> Kuashat profeta tsanumaidaush wantinjatnai, nuninak kuashat aentsun tsanuagtinai.

<sup>12</sup> Kuashat pegkegchau aitnai, imaniau asamtai kuashat aents Apajuí aneamunak mijakagtinai.

<sup>13</sup> Tujash ni ebetmag pujusá nagkanbaunum jegaa nu uwemjatnai.

<sup>14</sup> Ju yamajam chicham Apajuí inamjatin pachisa etsegbauwa duka, ashí nugkanum etsegkamu atinai, ashí aents aidau dekaatnume tabau asamtai; nunikmatai nagkanbauk atinai.

<sup>15</sup> “Profeta Daniel Apajuí ememattai pegkegma nui shiig pegkegchau dutikawagtinun pachis agajua nunú wainkugmek (nuna aujuk dekaatnume),

<sup>16</sup> atum Judea batsatutigmek mujanum pisagtajum.

<sup>17</sup> Tuja jega ekenja jegamkamu nagkatka nui pujauk akaikig makichkish wajijinak jukiigka; <sup>18</sup> antsag ajanum takaak pujaushkam, jaanchi jukitjai tusag waketjukigka;

<sup>19</sup> Iwait anentuinajai nunú tsawantin nuwa ejamtin, nuigtú uchí amuntsuaku agtina nunak!

<sup>20</sup> Apajuí ausatajum, atum pisamua nu tsetsek tepeamunum, nuniachkush tsawan ayamtai aigkish ajutjaminum.

<sup>21</sup> Wagki nugka najanamu aajakua nui nagkamas, yamaiya juish, atakea duish imanika waittsashtin tikima senchi waitiamu atinai.

<sup>22</sup> Tuja nunú tsawan aina nui imanika waitiamu atina nuna Apajuí imijchataik, makichik aentskesh uwemainchau ainawai; tujash ni etegjamu aina nunú aneamunum imijkatnai.

<sup>23</sup> “Tuja makichik aentskesh: ‘Diistajum, jui Cristo pujawai’, tachakush: ‘Awi pujume’ tuinakuish dekaskeapi tiǵpajum.

<sup>24</sup> Wagki kuashat aents, ‘Cristuitjai’ tusag nuigtú profeta ainaji tuidaush wantinjagtinai; nuninak kuashat aents dutikmainchaun iwainagtinai tsanumainak, nunidau asag Apajuí etegkamu aidaunash dita tsanuamunak tsanujagtinai.

<sup>25</sup> Unak yaunchkesh timajime.

<sup>26</sup> Nuadui: ‘Uwegshunum pujawai’, tujamainakuish weegpajum; nuniachkush: ‘Jega tesamua jui pujawai’, tujamainakuish dekaskeapi tiǵpajum.

<sup>27</sup> Wagki peem etsá minitaiya nuiya peeti, etsá akaetaiya atú peemama numamtuk wajaktinai Aentsmaga akiinawua nu minamuk.

<sup>28</sup> Tuwí jakau tepettawa nuna chuwegkak tuwakagtinai.

*Aentsmaga akiinawua nu minitnuji*

(Mr. 13.24-37; Lc. 21.37)

<sup>29</sup> “Nunú waitut nagkaemaig, etsag suwe wajastinai, nantushkam etsanbaunak megkaekatnai, yaya aidaushkam kakeyagtinai, imanidau asagmatai nayaimpinmaya senchigtin aidaushkam peganjagtinai.

<sup>30</sup> Nuniamunum Aentsmaga akiinawua nu minamu nayaimpinum wantinkatnai, nunitai ashí aents nugkanmaya aidauk buutiagtinai, Aentsmaga akiinawua nunú nayaimpinmaya yujagminum pachitkau shiig tsawan wajas senchijjai minaun wainkag.

<sup>31</sup> Nunik ni angelji aidaun ishiaktinai trompeta senchi umpuajag ashí nugka nagkatkamunum nayaim najatamunum nagkamas ni etejamuji batsata nuna ijumjatnume tusa.

<sup>32</sup> “Higueran pachisan augmattsan titatjim nu unuimagtajum, atumek: ‘Higuera kanawe aidau wentsamtuju dukekguig wamkeap esat nagkamnattawa’, tusajum dekau ainagme.

<sup>33</sup> Nunisjumek, ashí nunú wají uminaidau wainkugmek, Aentsmaga akiinawua nu taatnuk namput wajaschagapi titin atajum.

<sup>34</sup> Dekas tajime, yamai aents aina jusha batsataig ashí uminkatnai.

<sup>35</sup> Nayaimpik nugkajaig megkaejatnai, tujash mina chichamjuk umintsukek juwakchatnai.

<sup>36</sup> “Tujash tsawannak, horanash makichkish dekainatsui, nayaimpinmaya ángel aidaukesh, Apajuí Uchijigkesh dekatsui, imá Apajuk dekawai.

<sup>37</sup> “Noé pujusua nu tsawantin wajujejakú aina nuninuk atinai Aentsmaga akiinawua nu minamunmash.

<sup>38</sup> Nunú tsawantaik eke diluvio\* nagkamnatsaig batsamsag, yutai yuinak, umutnash umuinak, nuwenainak, nawanjin suju waja batsatai Noé niina arcajin egkemaui; <sup>39</sup> imaní batsatai asag dekachajui, nuniai diluvio nagkamna ashí aentsnak tajak utsagkui. Nunisag atinai Aentsmaga akiinawua nu minamushkam.

<sup>40</sup> Nuniamunum, jimag aents ajanum takaak pujauk makichik juwaku, tikichik ukuam atinai.

<sup>41</sup> Jimag nuwa deketainum dekeak pujuidaushkam makichik juwaku, tikichik ukuam atinai.

<sup>42</sup> “Iwá pujutajum, wagki atumek atumí Apugmesh wají tsawantinig minitnaita duka dekachu asajum.

<sup>43</sup> Tujash ju dekatajum, makichik jeentin wají horatinia kasa taattawa nuna dekakug, iwá pujumainai wayá kasagtukai tau asa.

<sup>44</sup> Nuadui atumshakam umintsajum pujustajum; wagki Aentsmaga akiinawua duka, hora atum anentaimtachbaunum minitin asamtai.

*Inak betek umina nu, umichua nujai pachisa augmatbau*

(Lc. 12.41-48)

\* **24:38** “Diluvio”, yumi chiwautsuk senchi yutú puja nunú diluvio tutaiyai.

<sup>45</sup> “¿Yaita inak betek umin nuigtú shiig anentaimkau asamtai, apuji niina jeen batsatun yutain diyaku susati tibauwa dusha?

<sup>46</sup> Shiig aneastinai inak, ni apuji wakitki takamá, ni tibaujinak betek umiak pujaun wainam atina duka.

<sup>47</sup> Dekas tajime ashí niina wajiiji aina nunak ni diísti tusa idaitumainai.

<sup>48</sup> Untsu nunú inak pegkegchau asa anentaimas: ‘Mina apujuk wamak taashtatui’, tusa;

<sup>49</sup> tikich inak aina nuna suwimak, nigka nampen aidaujai yuwak, umak wekagai,

<sup>50</sup> nunú inaka nuna apuji tsawan dekachbau, horash dekachbau ai taa,

<sup>51</sup> suwimkan susa, aents tsanumin aidaujai waittsati tusa idaimainai. Dutikam nui pujus buutak nainig takegtú pujutnai.

## 25

### *Diez nuwa muntsujut aidau pachisa Jesús augmattsamu*

<sup>1</sup> “Apajúi inama duka, diez nuwa muntsujut lámpara jukiag nuwenun igkugtatus jiintukiajua nujai betekmamtin atinai.

<sup>2</sup> Cinco nuwa aina duka shiig anentaimkachu aajakajui, nuniai tikich cinco aina duka shiig anentaimkau aajakajui.

<sup>3</sup> Shiig anentaimkachu aina duka, lamparajin juinakush aceitenak jukichajui;

<sup>4</sup> nuniai nuwa shiig anentaimkau aina duka, lamparajin juinakush aceitenak botel-lanum aimak jukiajui.

<sup>5</sup> Nuwenatna nu tachatai, dakai dakainakua kaji pujajuinam ashí kajigkajui.

<sup>6</sup> Nuniai aehaet ai antukajui: ‘iNuwenatta duka minawai, jijnajum igkugtatum!’ tusa untsumjamun.

<sup>7</sup> Tutai nuwauch aidaushkam nantajag lamparajin ekemaktasag uminaidau.

<sup>8</sup> Nuniamunum nuwa shiig anentaimkachu aina nu, nuwa shiig anentaimkau aina nuna: ‘Jutii lamparajig kajinainawai, aceite machik sukagtusta’, tuidau.

<sup>9</sup> Tama dita aiinak: ‘Uju ujumak akantunika jukimak, minashkam aminash abuetug-mamainai, dekas aceite sujutainum wejum sumaktajum’, tiaju.

<sup>10</sup> Tiajam aceiten sumaktatus weenai, aents nuwenatnush tauwai, nunikmatai nuwa umintsag daká batsataidauk, nuwenku fiestabaunum utsanawaju, nunikmatai waitin epeniuwai.

<sup>11</sup> Nuniku ai nuwa aceiten sumainak wegajushkam kaunkag: ‘iApuh, apuh, waiti ujatkgagtita!’ wajaidau.

<sup>12</sup> Tama ni ayaak: ‘Dekas tajime wika atumnak wainchaujime’”, tiuwai.

<sup>13</sup> Nuadui atumek aneaku batsamtajum, wagki Aentsmaga akiinauwa nu taatnujig tsawantak nuigtú horash dekachu asajum.

### *Kuichik pachisa augmattsamu*

*(Lc. 19.11-27)*

<sup>14</sup> “Apajúi inama duka, aents tikich nugkanum wetin asa, inake aidaun untsuká niina wajiiji aidaun tinamkauwa nujai betekmamtinai.

<sup>15</sup> Makichik inakega nuna cinco talento suwak, tikichia nuna jimag talenton susa, kampatuma juna makichik talenton susauwai. Junak makí makichik dita takamainjin diijus tinamkauwai. Dutika ukuak tikich nugkanum weuwai.

<sup>16</sup> Inak cinco talento jukiuk, wajiin sumag sujak nuigtushkam imatiksag cinco talento ikaugkauwai.

<sup>17</sup> Tuja jimag talento jukiushkam, dutiksag jimag talento ikaugkauwai.

<sup>18</sup> Untsu inak makichik jukiuiwa duka, ni apuji kuichikjinak nugkan tai yutua idaisauwai.

<sup>19</sup> “Kuashat tsawan nagkaemakui ai, apushkam ni inake batsatbaunum wakitki tauwai; nunik, wajupak kuichkinash ikaugkaje tusa dekajuawagtatus nagkamau,

<sup>20</sup> nuniai cinco talento jukiuiwa nu, nuigtú cinco talento juki jeganun chichajak: ‘Apuh, cinco talento sujusmayume; nunak jui itajuajame, nunú talentowa nuna takamtiksan, nuigtú cinco talento ikaugkajai’, tau.

<sup>21</sup> Tama apuji chichajak: ‘Ayú, amek inak pegkeg nuigtush betek uminaitme. Machik susamuitkum imatikam ikaugkaume, yamaik aan kuashat amastajame. Wayata, nunikamin iijai dakujusmi’.

<sup>22</sup> Tusa inagnaig, tikich jimag talento jukiuiwa nu jeganun chichajak: ‘Apuh, minak jimag talento sujusmayume nunak jui itajuajame, juna takamtiksan nuigtú jimag talento ikaugkajai’, tau.



<sup>23</sup> Tama apuji ayaak: 'Ayú, amek inak pegkeg, nuigtush betek uminaitme. Machik susamuitkum, imatikam ikaugkaume, yamaik aan kuashat amastajame. Wayata, nunikamin iijai dakujusmi', tiu.

<sup>24</sup> "Nuniai tikich makichik talento jukiuiwa dushakam jegantun chichajak: 'Apuh, wika ame waitkagkagtinaitam nuna dekaejame; ame ajakchawaitkum juu wekaenaitme, nuigtushkam ame ipanjachuitkum yajumá wekaenaitme;

<sup>25</sup> nunin asamin ishamakun talentogminak nugká yutuan idaisabiajai, dutikamun yamai jui itajuajame', tau.

<sup>26</sup> Tutai apuji ayaak: 'Amek inak pegkegchau, dakitme; wi ajakmachiatkun juu wekayin, nuigtushkam ipanjachuitkun yajumá wekayin dekaaju asam,

<sup>27</sup> banconum takau aidau sumain awajkaume, dutikau asamin wi taakun midau kawegkun jumain wajakjai'.

<sup>28</sup> Tusa nui ijuntatman chichajak: 'Aanú makichik talento aja nu atankijum, diez talento aja nu susatajum,

<sup>29</sup> wagki kuashat aja duka, nuní dukap suwam atinai, dutikamu asa nuní kuashat ajitnai; untsu atsuja duka, ni piipich aja dukesh atantam atinai.

<sup>30</sup> Ju inak atsumnatsu duka, agaa suwea awi jiiiktajum, nui pujusá buutak daik takegtú pujutí'.

*Inagnamunum dekaqmabau atina nu*

<sup>31</sup> "Aentsmaga akiinauwa nu tsawan wajas ashí niina angeljijai minakug, ekeemtaiji dekas imana nui ekeemsantai,

<sup>32</sup> niina eemtin, ashí aents nugkanum batsataidauk tuwakagtinaí. Nunikmatai pastor uwigjin chivojai akanama numamtuk akanjatnai.

<sup>33</sup> Uwig aidaunak untsugnum ijumak, chivo aidaunak menanum ijumjatnai.

<sup>34</sup> Dutika, untsujin ijunaina nuna Rey chichajak: 'Minitajum, mina Apag pegkegnum yumigsamu aidautigmek, nunikjum jukitajum atum inamjatnun nugkash najannatsaig umigtamkamua nunú.

<sup>35</sup> Wagki yapagbajjai, nuniakuish atum ajamjusbajjume; kitabiajai, nuniakuish umutai sujusbajjume; tikich nugkanum wekaeyajai, nuniakuish atumi jeemin jujukbajjume.

<sup>36</sup> Nugkumainush atsgutyui, nuniakuish atum sujusbajjume; jaakun tepakuishkam taajum ijagtusbajjume; achikgagmatai egketaish waitkatasajum tajutbajjume', titinai.

<sup>37</sup> Tutai pegkejan takasú aina nu aiinak: 'Apuh, ¿wajutiya ame yapajú wekaeminish ayujabiajame? ¿Wajutiya kitamá wekaeminish umutaish amasbajji?

<sup>38</sup> ¿Wajutiya tikich nugkanum wekaekuminish, iina jeenish jukibiajime, tuja nugkumain atsgutamkuish, wajutiya amasbajji?

<sup>39</sup> ¿Nuniachkuish wajutiya ame jaakum pujaminish tajuabiajime nuniachkuish achinká pujakminish wainkatasais tabiaji?' tiagtinaí.

<sup>40</sup> Tiagtai Rey ayaak: 'Dekas tajime, ju mina yatsug aina juiya wait anenjauwaitjum duka, mina dutijuau ainagme'.

<sup>41</sup> "Tusa menajin ijunun chichajak: 'Pegkegchau aidauwah, jii ajumaish tuke atin Iwanch ni angelji aidaujai umigkamua nui wetajum.

<sup>42</sup> Wagki yapagbajjai, nuniakuish atumek ajamjuschabiugme; kitabiajai, nuniakuish umutaig sujuschabiugme;

<sup>43</sup> tikich nugkanum wekaeyajai, nuniakuish atumi jeeminish jujukchabiugme, nugkumainush atsgutyui, nuniakuish sujuschabiugme, jaaknush tepebiajai, achinkanush pujubiajai, nuniakuish waitkatasagmesh tajutuachbajjume', titinai.

<sup>44</sup> Tama ditashkam aimainak: 'Apuh, ¿wajutí ame yapagkim, kitaajam, tikich nugkanmash wekagu, jaanchjinchau, jaakum nuniachkumesh achinkam pujamu wainiatkuish yaigchabiajime?'

<sup>45</sup> Tiagtai Apu ayaak: 'Dekas tajime, atum ju aents imanchauch aina jujú yaigchawaitjum duka, mina dutijuau ainagme', titinai.

<sup>46</sup> Aaja tima nunú aents aidauk suwimak tuke atina nui weagtinaí; untsu aents pegkeg aidauk pujut tuke atina nui wayawagtinaí", tiuwai.

## 26

*Jesús maami tusa chicham umigkamu*

(Mr. 14.1-2; Lc. 22.1-6; Jn. 11.45-57)

<sup>1</sup> Jesús nuna ashí chichaká ashimak ni jintintaiji aidau chichajak:

<sup>2</sup> —Atumek dekadang, jimag tsawan asa fiesta Pascua\* atata duka, nuanui Aentsmaga akiinawuwa nunak, achigintme tusag sujukagtatui, tiuwai.

<sup>3</sup> Tuja nunú tsawantinig sacerdote apuji aidau, judío apuji aidaujai sumo sacerdote Caifasa jeen agaajin ijunjajui.

<sup>4</sup> Nunikag chichaman umikajui, Jesús tsanumjuja achiká maami tusag.

<sup>5</sup> Tujash fiesta aigkik dutikachagmi, yaaktanum pampandayamu ai, tiajui.

*Betanianmaya nuwa Jesusan kugkuinui buuken nijakbau*

(Mr. 14.3-9; Jn. 12.1-8)

<sup>6</sup> Jesús Betanianum, Simón lepragtin tutai jeen pujai,

<sup>7</sup> nuwa tajauwui makichik botella alabastro najanamunum kugkuin aimkamu shiig akik wajaknun takusá, nunik Jesús mesanum eketun buuknum ukatjauwai.

<sup>8</sup> Nunú dutikamun ni jintintaiji aidau wainkag kajekajui, nunikag:

¿Wagka wainkash wasujua?

<sup>9</sup> Dekas akik sujuka ujunauch aidau yaimainajama, tuidau.

<sup>10</sup> Jesús nuna antuk ditan chichajak:

—¿Wagka ju nuwash kajejagme? Mina jutija junak pegkejan takaak aikae,

<sup>11</sup> ujunauch aidauk tuke atumjai batsamiagtatui, tujash wika atumjaig pujushtatjai.

<sup>12</sup> Ju nuwa mina iyashjui kugkuinun ukatjuka junak, wi ukuntsatnun umigtak jutijawai.

<sup>13</sup> Dekas tajime, yamajam chichama juna etsejuinak ashí nugkanum yujainakush, ju nuwa mina jutija juna pachis tuke etsejiagtin ainawai, tiuwai.

*Judas Jesusa sujuktatus kuichik jukimu*

(Mr. 14.10-11; Lc. 22.3-6)

<sup>14</sup> Doce aina nuiya, Judas Iscariote daagtin sacerdote apuji aidaujai chichastatus weuwai.

<sup>15</sup> Nunik:

—¿Wajupa sujumainaitjume, wi Jesusan atumiin sujakuish?, tau.

Tutai treinta kuichkin susaju.

<sup>16</sup> Nui nagkamas ni yupichu sujumainjin egatu.

*Jesús inagnaku Pascuatin yuwamu*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Pag levaduragtuchu† yuwaku fiestamtai nagkamak tsawagmatai, ni jintintaiji aidau Jesusan jegaantag iniinak:

—¿Pascua yuatnush tuwí umiktinme tusamea wakegame?, tuidau.

<sup>18</sup> Tama ni ayaak:

—Yaakat wetajum, nunikjum atum aents wainjum nunú jegajuajum: “Maestro chichaak: Mina tsawanjuk namputchí wajaschae, nuniau asamtai niina jeen mina jintintaig aidaujai Pascuan fiestamatjai tujamae” titajum, tii.

<sup>19</sup> Tiajam jintintaiji aidaushkam Jesús tibaunak imatiksag Pascua yuwatnunak umikajui.

<sup>20</sup> Kiyagmatai Jesús ni jintintaiji doce aina nujai mesanum jeganá ekeemsau.

<sup>21</sup> Nui yuwamunum Jesús chichaak:

—Dekas tajime, atum ainajum juiyag makichik minak sujutkattawai, tau.

<sup>22</sup> Tutai shiig senchi wake besemag dekapjag, makí makichik iniinak:

¿Apuh, wikaitag? wajaidau.

<sup>23</sup> Tiagtai Jesús ayaak:

—Wijai nu platonmag uchutua yuwa nu, minak sujutkattawai.

<sup>24</sup> Dekaskenmag Aentsmaga akiinawuwa duka, ni pachisa agagbauwa nunisag wetatui; tujash iwait antajai ya sujuktatua nunak! Duka dekas akiinmainchaunas akiinawabi-ataih, tau.

<sup>25</sup> Tutai Judas niina sujukua nu chichaak:

¿Maestroh, wikaitag?, tau.

Tutai ni ayaak:

—Ame tame duka dekaske, tiuwai.

<sup>26</sup> Yuwinak pekagbaunum, Jesús pagkan juki Apajuin see tii, puuká, jintintaiji aidau suwak:

\* 26:2 “Pascua” tawa duka judío aidau uwig aishmag tsakatan maawag yuwinaku fiestamtaiji aajakui. Nunak Egipto nugkanum batsamas waitkam batsatun Apajui ayamjuk jijjá agkanmitkamu asag, nuna anentaimtusag fiestamainak dutikajakú ainawai. Diistá Ex. 12.1-28. † 26:17 “Levadura”, tawa nunak pagkan inagkatatus harinan namukag ajuntin ainawai, wampushmitkatí tusa.

Ju yuwatajum, juka mina iyashjun iwainawai;

<sup>27</sup> tusa, copa juki Apajuin see tii, suwak:

—Ju copa<sup>‡</sup> juiya ashí atum uwagtajum;

<sup>28</sup> wagki juka mina numpajui, yamajam chicham apaamunum kuashat aents tudaujin tsagkugnagti tabaunum ukajatta nuuwai.

<sup>29</sup> Dekas tajime, yamai nagkamsanuk ju uva yumijinak awenanuk uwagchattajai, atak tsawan uminkui mina Apajú inamtain ataktú atumjai ijunkun yamagman uwagtin asan.

*Pedro Jesusnak wainchaujai tusa uukbau*

(Mr. 14.26-31; Lc. 22.31-34; Jn. 13.36-38)

<sup>30</sup> Nuna timatai himno kantamawag Olivosan mujajin weajui.

<sup>31</sup> Nunik Jesús ditan chichajak:

—Jujú kashia juik, ashí atum aidautigme minak ukugkittagme, wagki agagbauwa nui: “Pastoron maattajai, dutikam uwig ijunag batsatuk pampagkagtinai” tawa nunisag.

<sup>32</sup> Tujash ataktú nantakin, atumek Galilea wegatsjuminig wiyá emkan wetatjai, tiuwai.

<sup>33</sup> Tutai Pedro ayaak:

—Ashí tikich aidau ukugmainakuish, wika aminak tuke ukukchattajame, tau.

<sup>34</sup> Tutai Jesús ayaak:

—Dekas tajame, jujú kashia juik atash shinatsaig, kempatú: “Wainchaujai” tujuttatme, tiuwai.

<sup>35</sup> Tama Pedro ayaak:

—Amijai jakata tau asan, wainchaujai tichattajame, tau.

Nuna tutai ashí niina jintintaiji aidaushkam dutiksag tiajui.

*Jesús Getsemaní pujusá Apajúi ausamu*

(Mr. 14.32-42; Lc. 22.39-46)

<sup>36</sup> Nunik Jesusak ditajai ijunag Getsemaní tutainum jegaa, jintintaiji aidau chichajak:

—Jui ekeemsatajum, nuniagmin wi awi wenu Apajuin ausatjai.

<sup>37</sup> Tusa Pedron nuigtú Zebedeo uchijin mai juki wesa wake besetan nagkamauwai, nuniak shiig senchi anentaimak waitiau.

<sup>38</sup> Nunik Jesús chichaak:

—Senchi wake besemag dekapeakun jamain dekapeajai, atumek jui batsamsajum wijai betekak iwá batsamtajum, tiuwai.

<sup>39</sup> Tusa machik kuwaesag, tikishmag nugkan nijayin intaa pujus, Apajuin aujak: “Mina Apajuh, nunimainaitkuig, wi waitmainaitag duka agkanmitkajuata. Tujash wi wakegamu ahati, ame wakegamu atí”, tiuwai.

<sup>40</sup> Nuna ti ni jintintaiji batsakbaunum wakitkiu, nunikmá kajigká batsatun wainak Pedron chichajak:

¿Atumek wijaig makichik horakesh iwamainchauk dekapeajum?

<sup>41</sup> Kají batsamtsuk Apajúi ausatajum, pegkegchaunum iyawaijum; dekaskenmag atumi wakanmik uminas awai, tujash iyashia nuuwai kakaakchauk.

<sup>42</sup> Tusa ataktú wakitki Apajuin aujak:

Mina Apajuh, wi waitmainaitag nuna waittsuk nagkaemainchauwaitkuig, ame wakegamu dutikata, tau.

<sup>43</sup> Nuna tusa ataktú tanta diikmá, kajigkag batsatun wainkauwai, kaji senchi mainamu asag.

<sup>44</sup> Nunik diisá ukuak kempatuma jui wakitki Apajuin aujak, ni tibaujinak dutiksag auju.

<sup>45</sup> Nunik ataktú jintintaiji aidau jegantun:

—¿Atumek ayamkugmek kají batsatjum? Yamaik horak jegawai, Aentsmaga akiin-  
auwa nuna tudaugtin aidaunum sujukagtata nu.

<sup>46</sup> Nantagtajum weagmi, mina sujuta duka tikiju minawai, tiuwai.

*Jesús achiká jukimu*

(Mr. 14.43-52; Lc. 22.47-53; Jn. 18.2-11)

<sup>47</sup> Tusa Jesús eke chichaak wajai, Judas doce aina nuiya, kuashat aents espada, numi aidau takuinaku sacerdote apuji nuigtú judío apuji aidau ishiakbaujai tajuntau.

<sup>48</sup> Judas Jesusan sujukua nu: “Wi kugkuastatag nu atatuí, nu achiktajum”,

<sup>49</sup> tiu asa Jesusan jegantun:

¡Maestro pujamek! takug kugkuasu.

<sup>50</sup> Tutai Jesús ayaak:

Kumpajuh, ¿wagka miname? Taunak jegaantag Jesusan achikajui.

‡ 26:27 “Copa” tawa duka yukunta numamtin aajakui.

<sup>51</sup> Nuna dutikiagtai Jesusa jintintaiji aina nuiya espadajin ukuini juakug, sumo sacerdote inake kuwishin tsupigkauwai.

<sup>52</sup> Dutikamtai Jesús chichajak:

Espadajum jukim awajata, ashí aents espadajai magkagtau, espadajai maam agtinai.

<sup>53</sup> ¿Dekatsmek, wi mina Apajun segamak yamaiya juik doce nagkaesau legión ángel aidaun<sup>§</sup> ishitjumaina duka?

<sup>54</sup> Tujash nu nunitaish, ¿wajuk uminmaina ainawa Agagbau aina nui aatus nuniktinai tibauwa dusha?

<sup>55</sup> Tusa Jesús aents tuwakun chichajak:

—¿Wagka kasa achiktasa utugmaina imanikjumesch espada, numi aidau takusjumesch achigkatasagmesh minitjagme? Wi kashí kashinig jega Apajuí ememattainum atumin jintinnujim nuniakuish, jutikagmek achigkachu ainagme.

<sup>56</sup> Tujash ashí ju juniajum juka, profeta aidau agagbau aina nunú uminu asamtai juniagme.

Nuna taig, ashí niina jintintai aidauk pisainak ukukiaju.

*Jesús apu aidau batsatbaunum ejentamu*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Jesusan achikag jukiaju aina nu, Caifás sumo sacerdote jeen ejegawajui, maestro chicham umiktinun jintinkagtin aidau nuigtú tikich apu aidaujai ijunag batsatbaunum.

<sup>58</sup> Tujash Pedrok ikaag pataetus wea weakua sumo sacerdote agaajin jegaui. Nunik wayá achijatin aidaujai ekeemsau, wajuk inagnakagtig tusa diistatus.

<sup>59</sup> Sacerdote apuji aidau, ashí apu chichaman inagnau aidaujai egatuidau, Jesusan tsanumjujag maatnume tusa sujukagtatus;

<sup>60</sup> tujash ejetichaju kuashat aents wainak tsanumjuinakush. Nuninai inagnamunum jimag aents tsanumjugtin taawaju,

<sup>61</sup> nunikag:

Ju aents chichaak: “Wika jega Apajuí ememattaiya juna tegakan, kempatun tsawantai ataktú jegamainaitjai timayi”, tuidau.

<sup>62</sup> Tiagtai sumo sacerdote wajaki iniak:

—¿Wagka machikish aimtsume? ¿Nunash wajinbauna tujamainawa? tau.

<sup>63</sup> Tamashkam Jesusak chichaachu. Nunitai sumo sacerdote chichajak:

—Apajuí iwaakua nuna daajin tajame, ame dekas Cristo, Apajuí Uchijiyaitkumek dekas ujabatkata, tau.

<sup>64</sup> Nu tama Jesús ayaak:

—Duka ame tiume, nuigtushkam tajime, yamai nagkamsajum Aentsmaga akiinawua nu Apajuí ashí senchigtina nuna untsujin eketu tsawan uminkamtai, nayaimpinmaya yujaginunum pachitkau minau waitkatnaitjume, tiuwai.

<sup>65</sup> Nuna tutai sumo sacerdote ni nugkuagbaujin japikí ichigká chichaak:

—¡Apajuin pegkegchaun chichagkae! ¿Nuigtush ya etsegukti tusaya atsumaji? ¡Yamaik atumshakam Apajuin pegkegchau chichagka nu antukugme!

<sup>66</sup> ¿Atumesh wajuk anentaimtagme?, tau.

Tutai dita aiinak:

—Aanka mantamnamainai, tiaju.

<sup>67</sup> Tiagtai yapinum usukinak ijuidau: Nuniai tikich aidauk yapinum awatuinak:

<sup>68</sup> —Cristo dekakia, ¿ya awapime?, tuidau.

*Pedro Jesusnak wainchaujai tusa uukbau*

(Mr. 14.66-72; Lc. 22.54-62; Jn. 18.15-25)

<sup>69</sup> Pedro jegá agaajin ekeemtatman, makichik nuwa inak jegantun chichajak:

—Amesh Jesús galileanmayaya nujaimpap wekaemume, tau.

<sup>70</sup> Tujash nigka ashí aents aidaun eemtin uwau, nuniak:

—Dekatsjai, waji takumes tame, tiuwai.

<sup>71</sup> Nuna tusa waitinum jiintatman tikich nuwa inak wainak, nui aents ijunun ujaak:

—Ju Jesús nazaretnumiaya nujai wekaenuwejama, tau.

<sup>72</sup> Tujash Pedrok ataktushkam:

—¡Dekas tajai, wika au aentsnak wainchaujai!, tau.

<sup>73</sup> Machik asag aents nui batsatu Pedron jegaantag:

—Dekaskenum amesh dita aina awiyayapitme, ame chichamjuminig dekamge, tuidau.

<sup>74</sup> Tama Jesusan pegkegchaun chichajak nuigtú Apajuí adaiyas:

§ 26:53 “Doce legión nagkaesau ángel aidaun” tawa nunak, 36,000 nuniachkush 72,000 ángel amainun taku tiuwai.

—¿Wika au aentsnak wainchaujai! tau.

Taig atash shinukui,

<sup>75</sup> nunikmatai Pedroshkam adeaju Jesús chichajak: “Atash eke shinatsaig kauptumá ugtukinaítme” tibauwa nuna. Nunik nuiya jiinki senchi kajeká buutiuiwai.

## 27

*Jesús Pilatowai ejegamu*

(Mr. 15.1; Lc. 22.66-71; Jn. 18.28)

<sup>1</sup> Tsawagmatai, ashí sacerdote apuji aidau, judío apuji aidaujai Jesusan chichaman umigkajui mantamnati tusag.

<sup>2</sup> Dutikawag jigkajá jukiag, apu Poncio Pilato pujamunum ejegawag susajui.

*Judas Iscariote kajemjamu*

(Tak. 1.18-19)

<sup>3</sup> Judas, Jesusan sujukua nunú, maawagtatus imatikiagtai wainak, anentai idajuk sacerdote apuji aidaun tikich apu aina nuna treinta kuichkin awagtak:

<sup>4</sup> —Wika tudau takasjai, pegkegchau takasbaujish atsujaig maatajum tusa sujuku asan, tau.

Tama dita aiinak:

—¿Ilish dusha utugkatjiki? Duka aminuajamah, tiaju.

<sup>5</sup> Tiagtai Judas kuichkin nagkimá jega Apajuí ememattainum ukuak, wee kajemjauwai.

<sup>6</sup> Dutikamtai sacerdote apuji aidau kuichkin jukiag:

—Ju kuichkia juka ofrenda egketaiya nuig egkemaitsui, aents mantamnati tusa akikmatkamú asantai.

<sup>7</sup> Tusag chichasag nunú kuichkia duik, “Duwé takau nugke” tutain sumakajui, aents tikich nugkanmaya jaidaun ukustinun.

<sup>8</sup> Nuadui, nunú nugka duka yamaikish “Nugka numpeagbau” tutaiyai.

<sup>9</sup> Aatus uminkauwai profeta Jeremías:

“Jukiaje treinta kuichkin Israela uchiji aidau akike apujtusbaun,

<sup>10</sup> dutikawag sumakaje duwé takauwa nuna nugkeen, Apajuí tibauwa dutiksag” tawa nunú.

*Pilato Jesusan iniasbau*

(Mr. 15.2-15; Lc. 23.2-25; Jn. 18.28-40)

<sup>11</sup> Jesusa jukiag gobernadora eemtin ejegawajui, dutikawagmatai iniak:

—¿Amekaitam Rey judío aidaunu?, tau.

Tama Jesús ayaak:

—Duka ame tujutme, tiuwai.

<sup>12</sup> Tuja sacerdote apuji aidau, tikich apu aidaujai bakutatus etsegtuidau, imatjamash nigka makichkish chichaachu;

<sup>13</sup> nunitai Pilato chichajak:

—¿Antatsmek kuashat wajiin pachis imatjutpaina duka?

<sup>14</sup> Tamashkam Jesusak makichik chichamnakesh aikchau. Nunitai apuk shiig anentai jegagchau.

<sup>15</sup> Tuja apuk fiestatinig aents achikbau aina nuiyan makichik jiisagké au, aents aidau nu jiinkiti tusa mamikiamua nuna.

<sup>16</sup> Nuniamunum Jesús Barrabás\* daagtinchakam pegkegchaunum wantinjau achikam egketu.

<sup>17</sup> Nunin asantai aents aidau nui ijuntatman Pilato iniak:

—¿Yana jiikti tusagmea wakegagme, Jesús Barrabasnak jiiktatag atsa Jesús, Cristo daagtina nunaká jiiktatag?, tau.

<sup>18</sup> Nunak kajejuidau asag sujukaja nuna dekau asa tiuwai.

<sup>19</sup> Nuna tusa Pilato chicham epegkatasa ekeemtaijin eketai, niina nuwe chichaman awetak: “Amek aanú aents pegkejan takauwa nuig pachinkaipa. Wi ishamainun kajamjamjai yamai, aanú imatikamunum”, tiu.

<sup>20</sup> Tujash sacerdote apuji aidau nuigtú tikich apu aidaujai, aents tuwaká ijunun anentain egketuawaju, Pilaton segatí Barrabás jiintai Jesús mantamnati tusag.

<sup>21</sup> Ataktushkam Pilato ditan iniak:

—¿Ju jimaja juiyanash, yana akupkati tusagmea wakegagme?, tau.

Tutai dita aiinak:

\* **27:16** “Jesús Barrabás”, manuscritos initaik agagbau aina nuig Jesús Barrabás tawai griego chichamnumag.

—Barrabás akupkata, tuidau.

<sup>22</sup> Tiagtai Pilato ditan iniak:

—¿Tujash Jesús, Cristo tajum junash utugkatjaki? tau.

Tutai ashí pampaajag:

—¡Anka achinjati! wajaidau.

<sup>23</sup> Tiagtai apu ayaak:

—¿Tujash jusha waji pegkegchauna takasé?, tau.

Tutaishkam nuní senchi untsumkag:

—¡Anka achigtá! wajaidau.

<sup>24</sup> Pilatok makichkish niinak antujuinatsu nuna wainu asa, ayatak nuní senchi pampaaidiagtai yumí utugtitnume tusa inamjau, nunik ashí ditá eemtin ikigmak:

—Wika agkantaitjai, ju aents pegkegma nuna numpe ukaemainnumag; atum diistajum, tau.

<sup>25</sup> Tutai ashí aents pampaajag:

—Ni mantamnamua duka jutiini nuigtú ashí ii uchijí aina nui juakti, tiaju.

<sup>26</sup> Tiagtai Barrabasan jikiu, dutika Jesusnak asutiawagmatai, achigtinme tusa sujukui.

*Suntag aidau Jesusan waitkasagbau*

(Mr. 15.16-20; Jn. 19.1-3)

<sup>27</sup> Dutikamtai apú suntaji aidau Jesusan jukiag apú pujusá inamtaijin ejegawagmatai, ashí suntag ijuntujaju ni wajamunum.

<sup>28</sup> Nunikag jaanchin awitkag tikich jaanch kapantu nentetkaun anugjaju.

<sup>29</sup> Dutiksag atsejutain jagkin najatuawag Jesusan atsemitkakag, uwejí untsujin numin achimtikag, niina eemtin tikishmatjag dushikinak:

—¡juuwai Rey judío aidaunuk! awajuidau.

<sup>30</sup> Imatjuinak usukidau, dutikainak numi atakuamujin jujukiag buuknum awatuidau.

<sup>31</sup> Dutikainak dushí dushikinakua jaanch anugjamunak awituk, ni nugkutaijinak anugjag juki emajui achijagtatus.

*Jesús achigbau*

(Mr. 15.21-32; Lc. 23.26-43; Jn. 19.16-24)

<sup>32</sup> Jiinkamag, yaakat cirenenmaya Simón daagtinun wainkag, Jesús achigtinun cruzan yanaktí tusag susajui.

<sup>33</sup> Nunikag Gólgota tutainum jegantajui, (“Gólgota” tawa duka, “Buuké Sakamtai” taku tawai.)

<sup>34</sup> Nui ejentag, Jesusan vino chujuau dupa yapaujai pachimjamun uwagti tusag susajui. Nu susam apas dekapes idaisauwai.

<sup>35</sup> Dutika achijag, suntag aidauk Jesusa jaanchjinak yana kayají jiintukne nuna diisag akandaikajui.†

<sup>36</sup> Nunikag pekaamsag dii batsamtuidau.

<sup>37</sup> Tuja wajuk asamtaiya achijaje nuna pachisag agajag chaiken anujtukaju: “JUUWAI JESÚS, REY JUDÍO AIDAUNU”, tusag.

<sup>38</sup> Nuigtushkam jimag kasan niijai achijajui, makichkia nuna untsujin awajainak, tikichia nunak menajin awajawajui.

<sup>39</sup> Tuja nui aents nagkaemaidauk, buuken pegajag pegkegchau chichajuidau, nuninak:

<sup>40</sup> —¡Ame, jega Apajui ememattai tegakam kumpatum tsawantai ataktú jegamainaitjai tinumjamah, akaikim uwemjakia! ¡Dekas Apajui Uchijiyaitkumek, cruznum nematsuk akaikita!, tuidau.

<sup>41</sup> Dutiksag sacerdote apuji, maestro chicham umiktinun jintinkagtin aidau nuigtú tikich apu aidaujai ijunag dushikinak:

<sup>42</sup> —Tikich aidaunak uwemtiknuwe, tujash nigkig uwemain dekapeatsui. Nuigtush Israela Reyjiyai, nunin asa yamai cruznum deta nuna akaikimtai, niinig dekaskeapi tiagmi.

<sup>43</sup> Apajuin kajinas anentaimtinuwe, ni wakegakug yamai agkanmitkati, wagki Apajui Uchijiyaitjai tumamnuwe dui, wajaidau.

<sup>44</sup> Nunisag kasa aidaushkam Jesusjai achijam detaidaush pegkegchau chichajuidau.

*Jesús jakamu*

(Mr. 15.33-41; Lc. 23.44-49; Jn. 19.28-30)

† 27:35 Textus Receptus (TR), tawa duka latin chichamai. Nunak “Texto Recibido” taku tawai. Nunú textoa nu awaiwai salmo capítulo 22 versículo 18, nuiyan Reina-Valerashkam tawai; tujash duka ju textonmag idaiji, wagki griego dekas yaunchuk agagbau aina nuig, duka atsau asamtai.

<sup>45</sup> Etsa tutupit ai nagkamas, a las tres wegaish ashí nugkanum suwe wajas asauiwai.

<sup>46</sup> A las tres jegattak weamunum Jesús senchi untsamak: “Elí, Elí, ¿lama sabactani?”,<sup>‡</sup> tiuwai. (Nunak: “Mina Apajuijuh, mina Apajuijuh, ¿wagka idaitusume?” taku tiuwai).

<sup>47</sup> Ujumak aents nui ijunaidauk nuna antukag:

—Eliasan untsuawai, tuidau.

<sup>48</sup> Tusa taig, ijuna nuiya makichik tupikaki esponja juki vino chujuaunum ajugká tagkanai aapi Jesusan uwagti tusa iwagkau.

<sup>49</sup> Dutiktai tikich aidau chichainak:

—Idaisakia, Elías uwentijatatus minishtimpash wainkami, tuidau.

<sup>50</sup> Tujash Jesusak ataktú senchi untsamak, jakauwai.

<sup>51</sup> Nuniaig jega Apajuí ememattainum jaanch ejaamuk, yakiin nagkamnas ichiinak jimaituk kanakui. Nugkashkam ugkauwai imaniau asamtai kaya muun aidaushkam punjauwai;

<sup>52</sup> Imanikmatai ukumatai aidau ujanaijui, nunikmatai kuashat pegkejam jinau aidaushkam nantajajui;

<sup>53</sup> nunikag ukusbaunmaya jijnajui Jesús nantakui ai, nunik yaakat pegkegma nui utsanawajui, nunikun kuashat aents wainkajui.

<sup>54</sup> Tuja capitán tikich niijai ijunas Jesusan diyak ijunaidauk, uugbau imanikmatai nuigtú kuashat ishamain nagkaemajun wainkag, senchi ishamkag chichainak:

—Dekaskenum juka Apajuí Uchiji aajakui, tuidau.

<sup>55</sup> Nui nuwa aidaushkam ikaa ijunas dii ijuntuidau, Jesusan Galileanum nagkamsag saetusag yaijakú aina nunú.

<sup>56</sup> Nu aina nuiya María magdalanmaya; María, Santiagon Josenashkam dukujiya nu nuigtú Zebedeo uchiji aina nuna dukují aatus wajaidau.

#### *Jesús ukusbau*

(Mr. 15.42-47; Lc. 23.50-56; Jn. 19.38-42)

<sup>57</sup> Kintamai arimateanmaya José daagtin wiyakuch, niishkam Jesusa jintintaiji aajakú asa tauwai.

<sup>58</sup> Nunik Pilaton Jesusa iyashin segauwai. Tutai Pilatosham Jesusa iyashin susatnume tiuwai.

<sup>59</sup> Tuja Joseshkam Jesusa iyashin juki, dekas sávana pegkejai pempeajui,

<sup>60</sup> dutika ukumatai yamá kaya taimunum awayá kaya muuntan apapetug waajin epeti ukuak weuwei.

<sup>61</sup> Tuja María magdalanmaya tikich María aatus, Jesús ukusbaunum jegantag eketaidau.

#### *Jesús ukusbaun kuitamkatnume tusa ishikamu*

<sup>62</sup> Kashinia nu, tsawan ayamtai tsawagtin asamtai, sacerdote apuji aidau nuigtú fariseo aidaujai Pilaton jegajuawag:

<sup>63</sup> —Apuh, adeagji wait aaya nunú, iwaaku pujus chichaak: “Kampatum tsawan asan nantakinaitjai”, tuuyi.

<sup>64</sup> Nuniau asamtai, awemata aents ukusbauwa nuna kampatum tsawantai shiig kuitamkatin, dutikashmak niina jintintaiji aidau kashi kautuawag iyashin jukiag, aents aidaun ujanak: “Jakabia duka nantakne”, tiagtatui. Nuna aatus tuinakug yama nagkamchaku waitjuamua nuna nagkaesau waitjuawagtatui, tuidau.

<sup>65</sup> Tusa tiagtai Pilato ayaak:

—Anú suntag aidau kuitamkatnume, wejum wajuk wakegagme dutiksagmek umiktajum, tau.

<sup>66</sup> Timatai ditashkam wegag ukusbau kaya apujtukbaunak shiig asakug, nui suntag kuitamkatin aidaunashkam batsatkiajui.

## 28

#### *Jesús nantakbau*

(Mr. 16.1-8; Lc. 24.1-12; Jn. 20.1-10)

<sup>1</sup> Tsawan ayamtai nagkaemaki tumig tsawagmatai, María magdalanmaya, tikich Mariajai Jesús ukusbaun diisagtasag weaju.

<sup>2</sup> Nuniamunum senchi ugkauwai, wagki Apajuí angeli nayaimpinmaya akaegu asamtai, nunik taak kayan ekek ni nui ekeemsauwai.

<sup>3</sup> Nuna niimeg peemjai betek, jaanchjish puju nieve\* tutaya iman aajakui.

<sup>‡</sup> 27:46 “Elí, Elí, ¿lama sabactani?”, tawa juka hebreo chichamai.

winchamtin, dukap diimainchau jii emesmain.

\* 28:3 “Nieve” tawa duka ujuh puja ibau

<sup>4</sup> Imanun wainkag suntag kuitamak batsatuk ishamak kujagkag, jakaujai betek kakekajui.

<sup>5</sup> Nunikaju ai, ángel nuwa aidaun chichajak:

—Ishamkaigpajum, wika dekjai atum Jesusan achijagma nu egajum nunak.

<sup>6</sup> Juig atsawai, nigka nantakne ni timaya nunisag. Jui tantajum Apu Jesusan ukusagma nunú diistajum,

<sup>7</sup> nunikjum wamak wejum: Jakama duka nantakne, tusajum niina jintintaiji aidau ujaktajum. Nigka, niyá eemak Galilea wetatui, awi wainkagtatui. Juna titajime timajai, tiuwai.

<sup>8</sup> Nu tima nuwa aidaushkam, ukusbaunmaya jinkiag ishamainayatak shiig aneasag tupikaidau, Jesusa jintintai aidaun chichaman ujakgtatus.

<sup>9</sup> Nuniai Jesús wantintuk ditan kumpamauwai. Tuja ditashkam Jesusan jegaantum dawenum pagkukag emematuidau.

<sup>10</sup> Dutikam Jesús chichajak:

—Ishamkaigpajum; wejum mina yatsug aidau ujaktajum Galilea minitnume, awi minak waitkagtatui, tiuwai.

*Jesús nantakbaun etsegekainum tusa suntag aidau akikbau*

<sup>11</sup> Nunikag nuwa aidauk weenai, ujumak suntag nuna kuitamaidau yaaktanum wegag, sacerdote apuji aidaun dita wainkamunak ashí ujakaju.

<sup>12</sup> Tusá ujakajam weajui apu aidaujai ijunjag chichaman shiig umikaggtatus. Nunikag kuashat kuichkin suntajan susaju.

<sup>13</sup> Dutikainak:

Atumek aajajum etsegekatajum: “Jutii kajigká batsatjin jintintaiji aidau kashi kautu-awag kasamkagmae titajum”,

<sup>14</sup> tuja gobernador dekamtaishkam jutii tiagtatji, dutikaku atumnak ayamjuktatjime, tiaju.

<sup>15</sup> Tiajam ditashkam kuichkin jukiag, dita titajum tusa akatjamunak imatiksag tuidau. Jujú tibuauwa nunak yamaikishkam judío aidauk dutiksag tinu ainawai.

*Jesús niina jintintaiji aidau dutikatnuji ujakbau*

*(Mr. 16.14-18; Lc. 24.36-49; Jn. 20.19-23)*

<sup>16</sup> Tuja Jesusa jintintaiji once aina duka Galilea weajui, Jesús nunú mujanum minitnume tibaunum.

<sup>17</sup> Nunikag Jesusan wainkag emematuidau, tujash ujumak utujumushkam asaju.

<sup>18</sup> Jesús ditá jegantum chichajak:

“Ashí nayaimpinmaya aidau, nugkanmaya aidaushkam ame diistá” tusa mina Apag sujusé,

<sup>19</sup> nunin asamtai, wetajum nunikjum atum jintintuatajum ashí nugkanmaya aidaush, nuniakjum Apajú daajin, Uchiji daajin, Wakaní Pegkeji daaji pachisjum yamigtajum,

<sup>20</sup> dutikakjum ashí ju umiktajum, atumin tiuwaitjim dushakam jintintuatajum. Wika ashí tsawantai, nugka nagkanbau atina duish atumjaig tuke pujutnaitjai.

Aatus atí.



## Yamajam chicham Marcos agagbau

*Juan Yamijatin uwegshunum chichagkagtukbau*

(Mt. 3.1-12; Lc. 3.1-20; Jn. 1.19-28)

<sup>1</sup> Jesuscristo Apajuí uchijija nu pachisa yamajam chicham etsegbauwa nu nagkam-namu.

<sup>2</sup> Profeta Isaías agagbaunum:

“ Wi mina chichamjun etsegnun emtikan awemajai, ni jintanak umigtamkati tusan’.

<sup>3</sup> ‘Makichik chicham uwegshunum untsubau antuewai’:

‘Apu minitin jinta iwajatajum, jinta tutupit dakuektajum, tibauwa nu uminkauwai’ ”.

<sup>4</sup> Aatus asantai Juagshakam uwegshunum aentsun yamiau, nuniak etseju tudau idaiyinak yamimajag tudau aidaun tsagkugnagtinme tusa.

<sup>5</sup> Nuna antukag ashí yaakat Judea nugkanmaya aidauk, ashí Jerusalegnumia aidaushkam kautuidau. Nunikag ditá tudaujin etsegtumagtai Juagshakam Jordagnum yamiau.

<sup>6</sup> Juagká nugkutaijig camello uje najanamu, achachumtaijish duwap aajakui, tuja langostan\* nuigtú dapá yumijin yuujakui.

<sup>7</sup> Juan aents aidaun chichajak: “Mina ukujui minittawai dekas mina nagkaetasu senchigtin. Wika nuna sapatjinak tsuntsuntuankesh jigkatuamunak atitmaitsujai niya inanchau asan.

<sup>8</sup> Wika ayatak yumiik yamigmajime, tujash nigka Wakani Pegkejiya dui yamigmagtatjume”, tau.

*Jesús yamimagbau*

(Mt. 3.13-17; Lc. 3.21-22)

<sup>9</sup> Nunú tsawantai Jesús Nazaret, Galilea nugkanum awa nuiya jiinki jegauwai, nunikmatai Juan Jordagnum yamijui.

<sup>10</sup> Dutikam yuminmaya jinkamá, Jesús wainkauwai nayaim ujanmatai, Wakani Pegkeji pauma nunin niini akaetatman.

<sup>11</sup> Nuniai nayaimpinmaya chicham antuekau: “Ametme mina uchig aneetaigmek, dui aminig shiig aneajai”, tabau.

*Iwanch Jesusan pegkegchaunum dekapsamu*

(Mt. 4.1-11; Lc. 4.1-13)

<sup>12</sup> Juna timatai Wakani Pegkeji uwegshunum emauwai.

<sup>13</sup> Nui cuarenta tsawan pujusui, nunitaman Iwanch pegkegchaunum dekapsauwai. Kuntin kajen aidau batsatbaunum pujau; tuja ángel aina nu Jesusnak kuitamaida.

*Jesús Galileanum ni takatji nagkamamu*

(Mt. 4.12-17; Lc. 4.14-15)

<sup>14</sup> Juangkan achikag egkeawaju ai, Jesús Galilea weuwai yamajam chicham Apajuinua nuna etsegkatatus.

<sup>15</sup> Nuniak: “Tsawantak yamaik uminkae, Apajuí inamjatnuk tikijuch wajasé; tudau idaikujum, yamajam chichama ju dekaskeapi titajum”, tiuwai.

*Jesús ni jintintajji atinun cuatro namaká main aidaun yajuakbau*

(Mt. 4.18-22; Lc. 5.1-11)

<sup>16</sup> Jesús Galilea kuchají yantamen wekamá Simogkan, ni yachi Andresjai namakan main asag retan ajuntuinak yujattaman wainkau,

<sup>17</sup> nunik Jesús:

—Minitajum wi jintintuatjime, namak maatasajum yujagjum anmamtuk, Apajuí chichame etsegkujum aents aidaun minai ikautjin atajum tusan, tau.

<sup>18</sup> Tamawaik ditá redjinak ukuinak niijai weajui.

<sup>19</sup> Nuwi nagkaemaki machik kuwaesag wekamá, Zebedeo uchijí Jacobo ni yachi Juagjai, barcajin chimpimas redjin apijuinak chimpimatman wainkauwai.

<sup>20</sup> Dutika nunashkam:

—Weajai, mina jintintaig atajum, tiu. Tama ditashkam apají Zebedeonak ditajai takau aidaunak barcanum ukuinak Jesusjai weajui.

\* 1:6 “Langostak yutai aajakui, manchi katsajait tutaya numamtin”.

*Aents wakan pegkegchau egkemtugbaun Jesús etsagagbau*  
(Lc. 4.31-37)

<sup>21</sup> Capernaúm jegawajui, nunik tsawan ayamtai tsawagmatai Jesús jega ijuntainum wayá jintinkagtau.

<sup>22</sup> Nunitai aents aidauk ni jintinkagtamujin puyatjuk diidau, wagki maestro chicham umiktinun jintinkagtin aidaun nagkaegas, apu chichame antugtai jintimaina imatika jintinkagtau asamtai.

<sup>23</sup> Nuniamunum jega ijuntaiya nui, makichik aents wakan pegkegchau egkemtuamu eketu untsamak:

<sup>24</sup> —¡Jesús nazaretnumiyah! ¿Wagka amesh jutii pujamunmash miname, ijijatu-atasamek minam? Wika ame yaitpa nunak dekaegme, amek pegkejam Apajuinuitme, tiuwai.

<sup>25</sup> Tama Jesús wakan pegkegchaun jiyaak:

—¡Takamtak jiinkim ju aentsuk ukuktá!, tiuwai.

<sup>26</sup> Tamawaik wakan pegkegchaushkam aentsun waugmitkak nugká ajaiaui, dutika shiig senchi untsamak jiinki ukukiuwai.

<sup>27</sup> Nunikmatai ashí ishambag, ditak pempeentunikiag:

—¿Jusha yaita? ¿Jintiamujish yamagmajama, wajuku asaya chichamesh senchigti-naita wakan pegkegchau aidaush antujuina dusha?, tudayinau.

<sup>28</sup> Nunú nunikbaunak wamak ashí galileanmaya aidauk dekawajui.

*Pedro tsatsaji Jesús etsagagbau*

(Mt. 8.14-15; Lc. 4.38-39)

<sup>29</sup> Nunik Jesusak jega ijuntainmaya jiinki Jacobojai nuigtú Juagjai, Simón nuigtú Andresa jeega nui weajui.

<sup>30</sup> Simogka tsatsajig tsuweak pegakjin tepau, nunitai Jesusan ujakajui.

<sup>31</sup> Tima Jesuschakam jegantun uwegnum achik inankiuwai; dutikamuik tsuweamunak megkaegak, Jesusan yutain umijuk ajamsauwai.

*Kuashat jau aidau etsagakbau*

(Mt. 8.16-17; Lc. 4.40-41)

<sup>32</sup> Kintamai, etsa akaikiu ai, ashí aents jau aidaun nuigtú iwanch egkemtuamu aidaunashkam Jesusan ikautkaju;

<sup>33</sup> tuja ashí aents nui batsamin aidauk waitinmag tuwakaju.

<sup>34</sup> Nunikagmatai Jesús kuashat aents ashí tikich jatai jau aidaun etsagakui, kuashat iwanch aidaunashkam jijui; tujash iwanch aidaunak chichaktú tusag idaichau, wainainamu asa.

*Jesús Galileanum chichagkagtukbau*

(Mt. 4.23-25; Lc. 4.42-44)

<sup>35</sup> Tsawak eke suwe aig nantakí, jiinki aents atsamunum weuwai, nunik nui Apajuí auju.

<sup>36</sup> Nunikmatai Simón ni kumpají aidaujai egaak weajui;

<sup>37</sup> nunik Jesusan wainakag;

—Ashí aents egapainawai, tuidau.

<sup>38</sup> Tusa tama ni chichaak:

—Wemí yaakat tikiju anem aina nui, awishkam chichaman etsekatjai; wika nuna nuniktasan tauwaitjai, tau.

<sup>39</sup> Nunik Jesusak ashí Galileanum makí makichik yaaktanum jega ijuntai aidaunum chichagkagtak, iwanch aidaunashkam jijá ishimu.

*Aents lepragtinun Jesús etsagagbau*

(Mt. 8.1-4; Lc. 5.12-16)

<sup>40</sup> Makichik aents lepra achikbau Jesusa jegantun tikishmag pujus:

—Wakgakmek etsaentumainaitme, tau.

<sup>41</sup> Tama Jesuschakam wait anentug uwejin antiak:

—Wakgajai, pegkeg wajastá, tiuwai.

<sup>42</sup> Tusa taig leprak megkaekauwai, nunikmatai pegkeg wajasui.

<sup>43</sup> Tujash Jesús nuna shiig akateg ukuak:

<sup>44</sup> —Nijah, makichik aentskesh ujakaipa; ayatak weme sacerdote wantintukta, nuniakum ofrenda jukita Moisés tibauwa dutiksamek, ame pegkeg wajasum nuna ditash waipaktinme, tiuwai.

<sup>45</sup> Tujash nigka jiinki weak makichkish uutsuk ni tsagagbaujinak etse etsekwawa weuwai. Dutikau asamtai, Jesusak wantinak yaaktanmash waimainchau wajasú

asa, aents atsamunum wekagu; nuniaig ashí yantamnumia aidau niina wainkatatus minituidau.

## 2

*Jesús aents wekaechau etsagagbau*

(Mt. 9.1-8; Lc. 5.17-26)

<sup>1</sup> Ujumak tsawan pujus Jesús wakitki Capernaúm jegauwai; nunikmatai jega ni pujamujin dekajuawaju.

<sup>2</sup> Nunikag kuashat aents aidauk jeganmag pimuidiaju, waitinum nagkamasag tikichish wayachmin awajsaju. Imanikagmatai niishkam Apajúi chichamen etseju.

<sup>3</sup> Nuniai cuatro aents aidau, aents wekaechaun jukiag itawaju.

<sup>4</sup> Dutikawag kuashat aents asamtai, Jesús wajamunum jegamainchau asag, Jesús wajamun mamikis jegá tuntupen wakag chigkaidiag, wekaechauwa nuna camillanum aepsag akakiaju.

<sup>5</sup> Dutikamtai Jesús niini dekaskeapi tuidaun wainu asa, wekaechaun chichajak:

—Uchijuh, amina tudaujum aidauk tsagkugnaje, tau.

<sup>6</sup> Nuna tutai ujumak maestro chicham umiktinun jintinkagtin aidau nui pekajaidau dita anentainig:

<sup>7</sup> “¿Wagka jusha tuush chichawa? ¡Apajuin pegkegchau chichajak tu wekagajama! Imá Apajuikeajama tudaun tsagkugkagtumainuk”, tuidau.

<sup>8</sup> Dita aatus anentaimainamujinak Jesús dekau asa:

—¿Wagka aannush anentaimainagme?

<sup>9</sup> ¿Tuwaita imá yupichuch wekaechauwa ju tumainush, amina tudaujum aidauk tsagkugnaje taja dukaih, atsa nantakim tepetaijum jukim wetá tumainaitag dukaih?

<sup>10</sup> Tujash Aentsmaga akiinauwa nu, ju nugka juish tudau aidaunash tsagkugkagtu-maina nu dekaatajum.

Tusa wekaechaun chichajak:

<sup>11</sup> —Amina tajame, nantakim ainká tepetaijum jukim jeemin wetá, tiuwai.

<sup>12</sup> Tamawaik nantakug tepetaijin juki ashí wainainamunum jinikiu. Nunikmatai ashí ditak anentai jegagchajui, nunikag Apajuin emematuinak:

—Juninuk makichkish wainkachuitji, tuidau.

*Jesús Levin mina jintintaig atá tibau*

(Mt. 9.9-13; Lc. 5.27-32)

<sup>13</sup> Dutika Jesusak ataktú weuwai kuchá tugkitken; nunitai kuashat aents niina jegajuidau, dutikam niishkam jintinkagtau.

<sup>14</sup> Nui nagkaemakmá Leví\* Alfeo uchijin wainkauwai, apú kuichkiji atinun ijumin asa akikmagtai yajumak ekeematman, nunik:

—Wegajai mina jintintaig aminum, tiuwai.

Tama Levishkam wajakí Jesusjai weuwai.

<sup>15</sup> Nunik Jesusak Leví jeen jegaa mesanum ekeemsau, kuashat apu romanmaya kuichkiji atinun ijumin aidau nuigtú tudaugtin aidaush, jintintaiji aidaujai ijunag niijai ekeemsajui, kuashat niina saetus yujaidau asag.

<sup>16</sup> Nunittaman maestro chicham umiktinun jintinkagtin fariseo aina nu, Jesús ijunag yuwaun wainkag jintintaiji aidau chichajuinak:

—¿Wajukeakua niish apú kuichkiji atinun ijumin nuigtú tudaugtin aina ibaujaish ijuntug yuwakush, umutnash umawa?, tuidau.

<sup>17</sup> Nu tabaun Jesús antuk ayaak:

—Jamamtuchu aidauk ampijatnunak atsumatsui, jau aidau atsumawai. Wika aents pegkejan takau aidau untsuktasan minichuitjai, aents tudaugtin aidaunum, tauwaitjai.

*Ayuno pachisa iniimsamu*

(Mt. 9.14-17; Lc. 5.33-39)

<sup>18</sup> Juagká jintintaiji aidau, fariseo aidaushkam ayuno takainak batsataidau, nuninai ujumak Jesusan jegantun iniinak:

—¿Wagka Juan Yamijatna nuna jintintaiji aidauk, fariseo aidaujai ayuno takainaish, ame jintintaijum aidaush ayunonash takainatsua?, tuidau.

<sup>19</sup> Tama Jesús ayaak:

—¿Ipaamu aidaush nuwena nu ditajai pujaigkish ayunaumainkaih? Nuwenu ditajai pujaigkik ayunaumaitsui.

\* 2:14 Diistá Mt. 9.9.

<sup>20</sup> Tujash tsawan jegattawai nuwena nunú juwam atata nu, nunikmatai ipaamu aidaush wake besemag dekapenak ayunawagtatui.

<sup>21</sup> “Makichik aentskesh jaanch yamagman tsupikag jaanch mamujunmag adujtuchu ainawai, yamajam asa waketak jaanch mamujua nuna nuní nagkaemas ichiimain asamtai.

<sup>22</sup> Dutiksaik vino yamagmashkam duwap apagbau ajutnumag yajashtaiyai, dutikamak ichiimain asamtai, nunik vinok ukaegag, duwapshakam ichiinak ajapnamainai. Nuadui vino yamagmak duwap yamagmanum yajataiyai”.

*Jesusa jintintaiji aidau tsawan ayamtai aig trigo juki yuawagbau*

(Mt. 12.1-8; Lc. 6.1-5)

<sup>23</sup> Tsawan ayamtai tsawaju ai, Jesús trigo jakbaunum wegau, nuniamunum niina jintintaiji aidau trigon kupig juidau.

<sup>24</sup> Nuniagtai fariseo aidau wainkag:

—Nijah, ¿wagka tsawan ayamtai aig takantsashti tibauwa nuniaish aikainawa?, tuidau.

<sup>25</sup> Tusa tiagtai Jesús ayaak:

—¿Atumek tuke ausachuk ainajum, David niijai yujaamujai yapajuinak dutikawajua duka?

<sup>26</sup> Abiatar sumo sacerdote wajas pujai, jega Apajuí ememattainum wayauwai, nunik yuauwawai pag Apajuí anagkuamu imá sacerdotek yuwati tibauwa nuna, dutikak aents niijai yujaunash susauwai.

<sup>27</sup> Tsawan ayamtaiya duka aents atsumau asamtai aikamui. Untsu aentsuk tsawan ayamtaiya nuiya umimain aina nuna umiktinme tichamui.

<sup>28</sup> Nunin asamtai Aentsmaga akiinauwa duka, tsawan ayamtaiya nuna Apujiyai, tiuwai.

### 3

*Tsawan ayamtai ai Jesús aents jau etsagagbau*

(Mt. 12.9-14; Lc. 6.6-11)

<sup>1</sup> Jesús ataktú jega ijuntainum wayau, nuwi aents uwejí jaka ekeemkau pujau.

<sup>2</sup> Nunitai dii ijuntuidau tsawan ayamtai aish etsagagchatpash tusag tsanumjugtatus.

<sup>3</sup> Nuninaig Jesús aents uwejí jaka ekeemkaun chichajak:

—Wajaktá nunikam ejapen wajantá, tiuwai.

<sup>4</sup> Nuna ti, tikich aidau chichajak:

—¿Tsawan ayamtai aina nuish pegkejan dutikati atsa pegkegchaun dutikati tibaukaihi; etsagautskek jakati tusa idaimainait?, tau.

Tamash ditak aimainachu.

<sup>5</sup> Nuna ti nui ijuntatman kajaké, wake besemag diisú antumtikmainchau asagmatai. Nunik nuna aentsun chichajak:

—Uwejum dakuekta, tiuwai.

Tama niishkam uwejin dakueku, nuniamuik uwejenig pegkeg wajasui.

<sup>6</sup> Dutikamtai fariseo aidau, Herodesan aentsji aidaujai agaa jünjag, Jesusan maatasag chichaman umigkajui.

*Kuashat jau aidau Jesús etsagakbau*

<sup>7</sup> Tujash Jesusak ni jintintaiji aidaujai kuchanum weajui, nuniai kuashat aents galileanmaya aidau, Judeanmaya aidaushkam,

<sup>8</sup> Jerusalegnumiashkam, idumeanmaya aidaush, Jordagka amain batsamin aidaushkam nuigtú Tiro, Sidón aina nuwi tikiju batsamin aidaush ininitiajui, Jesús kuashat iwainaka takaamun antukaju asag wainkagtatus.

<sup>9</sup> Nuniau asamtai, Jesusak ni jintintaiji aidau, kuashat aents kaunainak chanuntu-awainum tau asa barca yaijan shiig umis asatnume tusa ujakajui;

<sup>10</sup> wagki kuashat jau aidau etsagau asamtai, ashí najaimak waituidauk niina antigkagtatus awagkentuaidau asamtai.

<sup>11</sup> Tuja wakan pegkegchau aidauk Jesusan wainkag, niina eemtin tikishmajag, senchi untsunkag:

—Amek Apajuí Uchijiyaitme, tuidau.

<sup>12</sup> Tujash Jesusak senchi jiyau, dekajuawainum tau asa.

*Jesús ni apostolji agtin aidau etejamu*

(Mt. 10.1-4; Lc. 6.12-16)

<sup>13</sup> Nunik Jesús mujanum wakauwai, nui untsukui ni wakegamu aidaun, dutikam niini kauntajui.

<sup>14</sup> Dutika nuanuiyan etegjauwai doce, nunú aidaunak apóstol tusa adajiauwai tuke nijjai ijunja wekaesatin aidaun, niina chichame etsegkati tusa ishiaktinji aina nuna,

<sup>15</sup> dutikak wakan pegkegchau aidau egkemtugbau jiiiktinnashkam senchijin susauwai.

<sup>16</sup> Doce etegjamua duka ju ainawai: Simón, Pedro atatme tibuau nu,

<sup>17</sup> Jacobo ni yachi Juagjai, Zebedeo uchiji aidaun Jesús Boanerges adaikajua nu (nunak “ipamta uchiji aidau” taku tawai),

<sup>18</sup> Andrés, Felipe, Bartolomé, Mateo, Tomás, Jacobo Alfeo uchiji, Tadeo, tikich Simón cananeo tutai aajakua nu,

<sup>19</sup> nuigtú Judas Iscariote Jesusan sujukua nunú.

*Jesusak Beelzebú senchijin wakan pegkegchaunak jiyawai tibau*

*(Mt. 12.22-30; Lc. 11.14-23; 12.10)*

<sup>20</sup> Nuna dutika Jesús jegá wayauwai, nunikmatai ataktushkam aents aidau tuwagkag yujumkash yumainchau awajuidau.

<sup>21</sup> Nuna antukag Jesusa patayí aidau jukitasag kautuawaju, anentainkachu wajas wekaetsuash tuidau asag.

<sup>22</sup> Maestro chicham umiktinun jintinkagtin aidau Jerusalegnunia kaunawaju aidau chichainak: “Beelzebú, iwanch aidau apujiya nuna senchijin iwanch aidaunak jiyawai”, tuidau.

<sup>23</sup> Tiagtai Jesús ditan untsuká, augmatbaun pachis ujaak: ¿Utugkaya iwanchish, iwanchnash jiimainaita?

<sup>24</sup> “Makichik nugkanmag batsatiatak pempeentuniki maani batsatkug megkaemain ainawai.

<sup>25</sup> Tuja makichik jeganmag ijunag batsatiatak pempeentuniki maani batsatushkan megkaemain ainawai.

<sup>26</sup> Aantsag Iwanchia dushakam pempeentuniki, maaniakug, megkaemain ainawai, nuniakug nagkanbauji jegajim nunimainai.

<sup>27</sup> “Aents senchigtina nuna jeen wayag makichish wajiijinak yajutmainchau ainawai nuna jigkatskek, untsu nuna jigkajá wajiijinak yajutmain ainawai.

*Wakaní Pegkeji pachisa Jesús tibau*

*(Mt. 12.31-37)*

<sup>28</sup> “Dekas tajime, Apajuik ashí aentsú tudaujinak tsagkujatnai, niina pegkegchau chichagkau aidaunashkam,

<sup>29</sup> tujash Wakaní Pegkejin pegkegchaun chichagkau aidauk, tuke tsagkugnagchatnai, ajumaish tudaujig tuke atinai”.

<sup>30</sup> Nunak Jesusak: “Wakan pegkegchau ajawai” tibau asa tiuwai.

*Jesusa dukuji ni yachi aidaujai kautuamu*

*(Mt. 12.46-50; Lc. 8.19-21)*

<sup>31</sup> Nuna tusa inagnaku ai Jesusa yachi aidau dukujjai kautuawaju, nunikag agaag ijuntsag, untsugtuktajum tiajui.

<sup>32</sup> Tuinam Jesusan tenteawag pekajuidau ujinak:

—Amina duku, yatsum umaim aidaujai agaa ijunas egapainawai, tuidau.

<sup>33</sup> Tusá ujaam ni ayaak:

—¿Yaita mina dukug, mina yatsug aidaush?

<sup>34</sup> Nuna tusa nui pekajuidaun ayampatua:

—Jujú ainawai mina dukug, mina yatsug aidauk.

<sup>35</sup> Ashí aents Apajuí wakejamun takaina nuuwai mina dukug, mina yatsug, mina ubag aidauk, tiuwai.

## 4

*Ajakan ajakbaun pachis Jesús augmattsamu*

*(Mt. 13.1-9; Lc. 8.4-8)*

<sup>1</sup> Jesús ataktú kuchanum uwet jintinkagtau nunitai shiig kuashat aents tuwagkaju, nunikmatai barca kuchanum nanatunum egkemag ekeemsau, nuniai aents aidauk kucha uwet kaamatak ijunaidau.

<sup>2</sup> Nunik kuashat waji aidaun pachis augmatus jintinkagtak:

<sup>3</sup> “Antuktajum, ajakan ajakbau ajakmatatus weuwai.

<sup>4</sup> Nunik jegantá ajajin jigkai nagkimam jintá kakekaunak, pishak kaketuk amukui.

<sup>5</sup> Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, wagki nugkak awankauch asamtai;

<sup>6</sup> nuniktatman etsa jijnak, kagkapé inital akajachu asamtai apeká ijinauwai.

<sup>7</sup> Tuja tikich jigkai jagki ayaunum kakekaunak, jagki tsapainak yutuawajui, dutikamu asa nejeachui.

<sup>8</sup> Tujash tikich jigkaik nugka pegkegnum kakekajui, nunikajuk tsapaidiag, tsakajag shiig nejekajui, ni treinta nejeai, tikich sesenta, tikich cien aatus nejekajui”, tau.

<sup>9</sup> Nuna tii nuigtushkam: “Ni antutaiji ajamuk antukti”, tiuwai.

*Ajak augmattsa jintinkagtuamua nu pachisa tibau*

(Mt. 13.10-17; Lc. 8.9-10)

<sup>10</sup> Nigki juwakmatai, niijai juwakajua nu doce aina nujai inidau ajak augmattsa tibuauwa nuna pachis.

<sup>11</sup> Tama ni ayaak: “Atumnak Apajuí dekamtijamui ni inabauji dekaajakchamua nuna; tujash tikich aina nunak ashí augmatbau pachisan tajai,

<sup>12</sup> imanik wainainakush wainmachu wajukmaina nuniktinme, kuashat antuinakush antachu wajukmaina nuniktinme, nunidau asag yapajinashtinme nunitai tudau aidaujish tsagkugnagchatnume tusan”, tiuwai.

*Ajakan ajakbau timag nunak juna takun timajai tusa Jesús etsegkamu*

(Mt. 13.18-23; Lc. 8.11-15)

<sup>13</sup> Junashkam tiuwai: “¿Atumek jujú augmattsa tabauk dekatsjumek? ¿Aniautigmesh ashí wi augmattsan takuish, wajuk dekkattagme?”

<sup>14</sup> Ajakan ajakbauwa duka chichaman ajakma nuuwai.

<sup>15</sup> Ajaka jigkayí jintá kakekauwa nunin aina duka juninai: yamaikik chichaman antittaman wamak Iwanch tajua chicham ditai ajakmamua nuna sakapitkawai.

<sup>16</sup> Tikich aidauk ajaka jigkayí kayagnunum ajakmamua nunin ainawai: chichaman antukag yamaikik shiig wakegas antuinawai,

<sup>17</sup> tujash nu ajakak kagkapanachu asa ebetmamtsui; numamtuk utugchat minitmath nuniachkush Apajuí chichamen umidau asag waitkainam wamkes idaiyinawai.

<sup>18</sup> Tikich aina duka ajaka jigkayí jagki ayaunum ajaamua nuninai: chichamnak antawai,

<sup>19</sup> tujash ju nugkanmaya takat aina nuna imá senchi uyumainak, wiyakchameata tabaujiya nu tsanuinam nuigtú ashí waji ajuttí tusa senchi wakegamujiya nu egkemtam chicham antukbaujinak sakapag ajak nejemainchauwa nunin weawai.

<sup>20</sup> Untsu jujú ainawai nugka pegkegnum ajamua nunin aina nu: chichaman antukag, jukiaju aidauk makichik ajak treinta jigkain, sesenta, cien aatus nejeawajua nunin ainawai”.

*Lámpara pachisa augmattsamu*

(Lc. 8.16-18)

<sup>21</sup> Junashkam chichaak: “¿Lámpara ekemakaish, dukukaik dutikachkuish pegaká wakentinig aputayama? ¿Dutiktsuk yakí ekenchataigkama?”

<sup>22</sup> Nunisag, ashí uukbau aidauh wantintsuk juwaktinuk atsawai, antsag ashí dekaachbau aidauhkam dekaamu agtinai.

<sup>23</sup> Ni antutaiji ajuinamuk antuktinme”.

<sup>24</sup> Junashkam tiuwai: “Shiig antuktajum, tikichish utujagme dutiksagmek atumesh dutikam atatjume, antuidautigmeek aan nagkaemasa eketam atinaitjume.

<sup>25</sup> Wagki kuashat ajá duka nuní dukap suwam atinai; untsu piipich ajamua dusha, nu piipich ajamua dukesh atantam atinai”.

<sup>26</sup> Junashkam Jesús tiuwai: “Apajuí inabaujiya duka, aents jigkain nugká ajaa nuninai,

<sup>27</sup> nunik ajaa kanak tepaish tuja iwaa pujaishkam kashi tsawai aish jigkaik tsapaawai, nunik tsakawai ajauwa duka wajuk tsakaawa nunak dekatsaig.

<sup>28</sup> Nunak nugka nigki nejemtikamu asa nuniawai, dekatkauk dupaya nunin wee, tsakaak pasamjawai, nunik pasamega nui ayatak jigkaik weawai.

<sup>29</sup> Nunik jigkayí tsamakmatai hozan juki juintawai juuktatus, tsawan juumainji jegau asamtai”.

*Mostaza jigkayí pachisa augmattsamu*

(Mt. 13.31-32; Lc. 13.18-19)

<sup>30</sup> Junashkam Jesús tiuwai: “¿Apajuí inama dusha waji pachisaiya nuninai tumainaita, nuniachkuish waji augmatbaujaiya apatkaish tumainaita?”

<sup>31</sup> Duka mostaza jigkayí nugká ajatiama nuninai. Ashí nugkanmaya jigkai ajakmatai aina nuna nagkaesau shiig piipichi,

<sup>32</sup> tujash ajaam tsakaakug ajak nugkauchik nejen aina nuna nagkaegas tsakawai, nunik kanawe muun wajasmatai yakiya pishak aidaushkam nuna wakenti bikintunum pasugmau ainawai”.

<sup>33</sup> Tusa Jesusak kuashat augmatbaun pachis jumamtin aidaun jintinkagtujakui, dita wajak antumaina ainawa dutiksag.

<sup>34</sup> Augmatbaun tutsukek aents aidaunak aujujakchauwai, tujash jintintaiji aina nunak ditanak akanki ashí jintias ujakui.

*Jesús dase imijkamu*

*(Mt. 8.23-27; Lc. 8.22-25)*

<sup>35</sup> Nunú tsawantai kiyagbaunum Jesús jintintaiji aidaun chichajak:

—Amain weagmi, tiuwai.

<sup>36</sup> Timatai aents aidaunak ukuinak, Jesús barcanum egketunak dutiksag jukiag weajui. Nunia tikich barcanum minidaush aidau.

<sup>37</sup> Nunik weenai dase senchi kuchan umpuak tsukatmitkau, imaniau asa barcanmag yumik bete wajasú.

<sup>38</sup> Tujash Jesusak barca ukujin atamjutain atamjuk kanag egketu, nunittaman ishintainak:

—¡Maestro! ¿Amek puyatkagtsmek jutii jakektatag duka?, tuidau.

<sup>39</sup> Tama nantakí dasen jiyak idaiyak, kuchanashkam:

—¡Mijakta! ¡Jasá asata!, tiuwai.

Tamawaik daseshkan mijaku, nunikmatai kuchashkam wiyaku wajasú.

<sup>40</sup> Nuna dutika niina jintintaiji aidaun chichajak:

—¿Wagka sapigmajume? ¿Dekaskeapi tabauk atsgtamainawak?, tau.

<sup>41</sup> Nuna dutikamtaí shiig senchi puyatkaju, nunikag ditak pempeentunikiag:

—¿Jusha yaita dasesh, kuchash antujam awa dusha?, tudayinau.

## 5

*Gadaranmaya aents wakan pegkegchau chimpintuamun Jesús jiijamu*

*(Mt. 8.28-34; Lc. 8.26-39)*

<sup>1</sup> Kuchá amain katigkajui gadaranmaya batsamtaí nugkeen.

<sup>2</sup> Nunik Jesús barcanmaya jiinaig, ukumatainmaya aents wakan pegkegchau egkem-tugbau tajauwauai.

<sup>3</sup> Nunú aentsuk ukumatainum pujú, makichkish cadenayaikish jigkamainchau.

<sup>4</sup> Kuashtá cadenayai uwejin jigkajá, dawenum jigkajá awajkamash tsujiag utsau, imaniau asa makichkish depetmainchau.

<sup>5</sup> Nuniak tuke kashi tsawaishkam mujanum, ukumatainmash wekaegas unsumá wekagu, nuigtush kayai ijumak tsupimag wekagu.

<sup>6</sup> Nuniau Jesusan atushat wainmawaik, tupikatki jegantun tikishmatjau.

<sup>7</sup> Nunik senchi unsumak:

—¡Jesusah, Apajuí ashí tikich aidau nagkaesau muunta nuna uchijiyah! ¿Wagka amesh minaish miname? Apajuí daajin segajame, ¡wait aneamam waitkagkagtsaipa!, tau.

<sup>8</sup> Nunak Jesús:

—Wakan pegkegchauwah, aents jiinkim ukuktá, tibau asa tiuwai.

<sup>9</sup> Tutai Jesús iniak:

—¿Amesh yaitpa?, tau.

Tama ni aiimak:

—Wika Untsujiyaitjai, wagki jutiik kuashat asaja, tiuwai.

<sup>10</sup> Nuna tii senchi segau Jesusan tikich nugkanum aweti tusa.

<sup>11</sup> Mujanum tikiju kuashat kuchi dupaan yuwinak yujau asamtaí,

<sup>12</sup> ashí wakan pegkegchau aidau Jesusan segainak:

—Kuchi batsata awi awekagtita, kuchinum wayawagmi, tuidau.

<sup>13</sup> Tutai Jesuschakam nuniktinme tusa idaisauwai. Dutikam wakan pegkegchau aidaushkam jijnag, dos mil kuchi tumain batsatunum utsanawajui. Dutikawajam kuchishkam pisajag betsag tajagak kuchanum najataunum utsanawag jinawajui.

<sup>14</sup> Nunikagmatai kuchi kuitamin aidaushkam pisajaju, nunikag yaaktanum jegawag et-sejuinak, ajanum batsataidaunash dutiksag ujakajam, aents aidaushkam nu nunikbaun diisagtatus shimutkaju.

<sup>15</sup> Nunik Jesús pujamunum jegakmag, wakan pegkegchau untsují chimpintuamu aajakushkam pegkeg wajas, jaanchin nugkujá eketun wainkag, senchi ishankajui.

<sup>16</sup> Nuna wainkau aidau tikich aidaunashkam ujaidau, aents iwanch chimpimtuamu tsagajun nuigtú kuchi jinaamun pachisashkam.

<sup>17</sup> Tiagtai Jesusan segajui, ditá nugkenak ukuak, yajá weti tusag.

<sup>18</sup> Jesús waketak barcanum egkentai, iwanch egkentuamu aajakushkam niijai wetatus segauwai.

<sup>19</sup> Tujash Jesusak nunikta tichauwai, ayatak:

—Jeemin wetá pataim batsatbaunum, nunikam shiig kuashat Apu Apajuí amina wajuk wait anenjamjae nunú pachisam ashí ujaktá, tiuwai.

<sup>20</sup> Tima weuwai, nunik Decápolis jegaa Jesús niina shiig kuashat wait anenja nu pachisa etsegtan nagkabau. Nunitai ashí aents aidauk anentai jegachaju.

*Jairo nawanji nuigtú nuwa Jesusa jaanchjin antigkua nu*

*(Mt. 9.18-26; Lc. 8.40-56)*

<sup>21</sup> Jesús barcanum egkemag ataktú kuchá amain katigmatai, kuashat aents aidau tuwagkaju; dutikam nigka nuig kuchá tugkitkenig juwakui.

<sup>22</sup> Nunitai jega ijuntaiya nuna apuji aina nuiya makichik Jairo daagtin Jesusan wainak jegantun tikishmatjau;

<sup>23</sup> nunik senchi segau: —Mina nawantug ashí jakaun ukukmajai; ame taam uwegmin achigtukta, dutikam tsagag pujustí, tusa.

<sup>24</sup> Tama Jesús niijai wegau, nunitai kuashat aents saetuidau asag senchi chanuidau.

<sup>25</sup> Nu imatikainamunum nuwa doce mijadai numpan puwak waitú pujú asa,

<sup>26</sup> kuashat ampijatín aidaunum wekaegas ampimak ashí ni ajamuchijinak ashimkush, tsagautsuk nuni nagkaemas waitú wekayin,

<sup>27</sup> Jesús pachisa chichainamun antuk, aents tuwakbaunum eteenki, ukujin pataetuk Jesusa jaanchjin antinkauwai.

<sup>28</sup> Wagki ni anentaímsag: “Imá jaanchjinakesh antiaknuk tsagagtatjapi”, tau asa.

<sup>29</sup> Nunitai nuwauk numpa puwamujinak megkaekau, tuja ashí iyashin jaamujinash pegkeg weamujin dekapjauwai.

<sup>30</sup> Nunitai Jesús chakam niina senchijí jinin dekapeg, aents minidaun ayampatua:

—¿Yaa jaanchjuish antinkae?, tau.

<sup>31</sup> Tutai niina jintintaiji aidau ayaak:

—Kuashat aents chanumpaina nu wainiatkumek, ¿ya antinkae tame?, tuidau.

<sup>32</sup> Tujash Jesusak ashí diyau, yaki antinkame tusa wainkatatus.

<sup>33</sup> Nunitai nuwak ishamak kujaukmaikia, ni wajukae nuna dekau asa, jegantun niina eemtin tikishmag, dekaskenum ashí ni waitiamujinak ujakú.

<sup>34</sup> Tusá ujaam:

—Nawantah, ame dekaskeapi tabaugmia nu etsaentamjae, shiig agkan anentaímsam wetá, yamaik jaamugmik tsagajume, tiuwai.

<sup>35</sup> Tusa eke chichaak wai, apu Jairo jeen batsatu kaunawag ujainak:

—Nawanjume jakame ¿utugkatasamea Maestrosh waitkame?, tuidau.

<sup>36</sup> Tujash Jesusak nu tuinamun antuk, jega ijuntain apujiya nuna chichajak:

—Ishamkaipa, ayatak dekaskeapi tita, tiuwai.

<sup>37</sup> Nuna tii makichik aentskesh uyuntusainmegka tusa Pedro, Jacobo ni yachi Juan aatus weajui.

<sup>38</sup> Nunik apú jeen jegakmá aents pampainak, untsu untsumas butuidaun wainkauwai.

<sup>39</sup> Nunik wayá:

—¿Wagka pampakjumes bututsh batsatjume? Nuwauchik jakache kanag tepawai, tiuwai.

<sup>40</sup> Tutai dushikidau. Tujash nigka ashí aents nui batsatunak jijjá, nuwauchi apají, dukuji nuigtú ni jintintaiji uyunaina nujai utsanawajui nuwauch jaka tepamunum.

<sup>41</sup> Nunik uwegnum achik:

—¡Talítá cum!,\* tiuwai. Nunak: “Nuwauchih, amina tajame, nantaktá”, taku tiuwai.

<sup>42</sup> Tamawaik nuwauchik nantakiu nunik wekagu, duka doce mijan ajau. Nuna dutikamtaí aents aidauk senchi ishamkajui.

<sup>43</sup> Tujash Jesusak makichikish etsegkaigpajum tusa shiig akatjag idaiyak, nuwauch yumain susatajum yuwati, tiuwai.

## 6

*Jesús Nazaret pujusbau*

*(Mt. 13.53-58; Lc. 4.16-30)*

\* 5:41 “Talítá cum”, tawa duka arameo chichamai, texto griegonmag aatus tau asamtaí dutiksaik jui inagkeakji.



<sup>1</sup> Jesús nuiya jiinki ni nugken wetai, jintintaiji aidaushkam niijai weajui.

<sup>2</sup> Nunik tsawan ayamtai tsawagmatai, jega ijointainum nagkama jintinkagtutai nui kuashat antuidauk puyatjukag:

—¿Jusha tuwí imatikash unuimajuita? ¿Utusaya imatikash yachameajuita? ¿Tuwiyana senchinash jiyawa uwejinig aents dutikmainchaun dutika nunash? tuidau.

<sup>3</sup> ¿Jujú carpinterowe duchaukaih, María uchiji nuigtú Santiago, José, Judas, Simón aina nuna yachi? ¿Umayí aidaushkam jutijai batsatajama? Tusag pampantuidau.

<sup>4</sup> Tujash Jesús ditan chichajak:

—Profetak niina nugkenig, niina patayí aidaunmash tuja niina jeenish eme anentamak achauwai, tiuwai.

<sup>5</sup> Nuwig aents dutikmainchaunak makichkish dutikachui, nuniayatak ujumchik jau aidaun uwejin achik etsagakui.

<sup>6</sup> Nunik anentai jegagchauwai ditak dekaskeapi tuinachu asamtai. Nunik yaakat yaijuch aidaunum wekaegas Jesusak jintinkagtaw.

*Jesús jintintaiji doce aina nu ishiakbau*

*(Mt. 10.5-15; Lc. 9.1-6)*

<sup>7</sup> Nunik ni jintintaiji doce aina nuna untsuká, jimá jimajan apatuk ishimtan nagkamauwai, dutikak wakan pegkegchau aidau jiiimainnash senchijin susauwai.

<sup>8</sup> Dutikak jintá wesá atsumainuk wají egkesá jutaigkesh, pagkesh, akachumtaigmin kuichkikesh jukigpajum, ayatak ushujutaigmek jukitajum,

<sup>9</sup> nuniakjum sapat wegamaktajum, tujash nugkutaigmik pataká nugkujaigpajum, tiuwai.

<sup>10</sup> Tusa ditan chichajak:

—Makichik jeganum wayaakjumek nuig pujusjum weakjum ukuktajum.

<sup>11</sup> Tuja atum tu yaaktanma jegattagme nuniagmin jujamtan dakitjamainak, antugtanash dakitjamainakuig jiinki ukuktajum, nuniakjum atumi akap dawemin yukukuntu awa nu pegajum akakejum ukuktajum dita suwimak jukitnujiya nu iwaintakjum. Dekas tajime, suwimak sukagtamu tsawan jegatna duik, nunú yaaktanmaya aents aina duka, nugka Sodoma Gomorra aajakua nui aents batsamajakú suwimak susamua nuna nagkaesau suwimkan jukiagtinaí.

<sup>12</sup> Tima jintintaiji aidau shiyakag, aents aidau tudaujin idaiyinak pujutjin yapajiatneme tusag etsejuidau.

<sup>13</sup> Nuninak kuashat iwanch aidaunash jiiag ishimainak, jau aidaunashkam buuken aceitiyai nijak etsagaidau.

*Juan yamijatin maamu*

*(Mt. 14.1-12; Lc. 9.7-9)*

<sup>14</sup> Rey Herodes Jesús pachisa chichainamu ashí yantannum naatun antuku. Wagki ujumak chichainak: “Juan Yamijatin maamua nu nantakiu asa, senchigtin wajas aents dutikmainchaun aikawai”, tuidau.

<sup>15</sup> Tikich chichaidau: “Auk Eliasai” tuinai, tikich chichaidau: “Profetayai nuniachkush profeta aajakú aina dutsukaitai”, tuidau.

<sup>16</sup> Nunú tuinamun Herodes antuk:

—Auk Juan wi buuké tsupigkatajum tii ai tsupijuk maawajamia nunú nantakne, tiuwai.

<sup>17</sup> Nunak Herodesak nigki Juan achiktajum tima shimutkag, achikag cadenayai jigkajag cárcel egkeau aajakui. Nunak ni yachi Felipe nuwe Herodiasan juki nuwatuk pujutai,

<sup>18</sup> Juan Herodesa chichajak: “Amek yatsumi nuweg nuwatkamék pujumaitsume”,

<sup>19</sup> tabaun Herodías antuk kajejuk maatatus wakegayatak dutikmainchau dekaepeau,

<sup>20</sup> wagki Herodesak Juagnak ishamau, pegkegnak takau nuigtush pegkegnan dekaeu asa, nuniak kuitamu. Herodesak Juan chichatai antujak tumainchau dekaepeayatak, wakejus antuju.

<sup>21</sup> Nuniannum Herodes ni akiinamuji tsawagmatai fiestamak, yutai umikbaun ni aentsji aidaujai nuigtú suntajá apuji aidau, galileanmaya eme anentsá diitai aidaujai yuwinak pekagbaunum,

<sup>22</sup> Herodiasa nawanji wayá nantsebaw, nuniak Herodesan nuigtú niijai mesanum pekajuidaunashkam shiig awajkauwai. Nunikmatai rey nuwan chichajak:

—Ame wakegamu segattá, tujutkuminig amastajai.

<sup>23</sup> Tusa Apajuí pachis anagkuauwai ashí ni wajina segamua nuna nuniachkush ni inama nunakesh jimaituk susatatus.

<sup>24</sup> Tima jiinki dukujin jegajua chichajak:

—¿Wajinak segatjá?, tau.

Tama dukují ayaak:

—Juan Yamijatna nuna buuké segatá, tau.

<sup>25</sup> Tima nuwauchishkam wamkes rey pujamunum wayau, nunik:

—Yamaikiuch Juan Yamijatna nuna buuken platonum egkejá sujustí tusan wakegajai, tau.

<sup>26</sup> Tama rey shiig senchi wake besekú; nuniyatak ipaamu aidaush antuinamunum yapajimainchaun anagkuau asa, dakitmainchau dekapjauwai.

<sup>27</sup> Nuniku asa rey wamak makichik suntajan awemauwai, Juagká buuken tsupik itati tusa. Tima suntagshakam cárrel jegá Juagká buuken tsupigkauwai,

<sup>28</sup> dutika platonum egkea itauwai. Dutikamtai nuwauchin susau, tuja ni juki dukujin susauwai.

<sup>29</sup> Nu dutikamun Juagká jintintaiji aidau antukag wejiag, iyashin jukiag ukusajui.

*Jesús cinco mil aents ayugkamu*

(Mt. 14.13-21; Lc. 9.10-17; Jn. 6.1-15)

<sup>30</sup> Apóstol aidau Jesusjai ijunjaju, nunik ashí dita dutikamujin nuigtú jintinkagtuamu-jinash ujaidau.

<sup>31</sup> Tama ni chichajak:

—Minitajum, wegagmi agkan aents atsamunum, nunikjum machik ayamsatajum, tiuwai.

Wagki kuashat weenai tikich minidaush aidau asag yujumak yumainush agkantak atsujuuidau.

<sup>32</sup> Nunik barcanum chimpimjag nugka agkantunum ditak shiyakajui.

<sup>33</sup> Tujash nunik wetatman kuashat aents aidau wainkag, tuwí weakua nuniawa nuna dekawag kukag juakiag tupikakiag ditá jegawaju.

<sup>34</sup> Jesús barcanmaya jinkamá shiig kuashat aents tuwaká ijunun wainkau, nunik wait anenmain diisui, uwig pastorji atsugbau wajukmaina numamtuk wajaidau asagmatai. Dutikak kuashat wájí aidaun pachis jintintan nagkamaui.

<sup>35</sup> Nuniai etsashkam akaegu asamtai jintintaiji aidau jegaantag:

—Juig aents atsamunum batsatji, etsash akaewai.

<sup>36</sup> Aentsuk akatjam ishiakta, aja aina nui nuigtú yaakat yaig aidaunum wegag yumainun sumaktinme, yumainjig atsujuinawai, tuidau.

<sup>37</sup> Tiagtai Jesús ayaak:

—Atum dita yuwatnuk susatajum, tau.

Tama dita aiinak:

—¿Jutii shiyakaiyash doscientos denariowai pag sumaka ayugkatag?, tuidau.

<sup>38</sup> Tiagtai ni ayaak:

—¿Wajupa pagka ajutjamainawa? wejum diistajum.

Tima wegag dekawag:

—Cinco pag nuigtú jimag namak awai, tuidau.

<sup>39</sup> Tusa ujakam:

—Aents aidau yajuakjum chijichi aina anui akanjajum batsagtajum, tiuwai.

<sup>40</sup> Tiagam ditashkam cien aentsun akanak batsainai, tikich cincuenta akanag batsaush aidau.

<sup>41</sup> Dutikawagmatai cinco pagkan nuigtú jimag namaka nuna juki, pagkai nayaimpin diis see tusa, pagkan puujá jintintaiji aidaun susaju, dita aentsun tinamkatnume tusa. Dutiksag namak jimaja nunashkam ashí tinamkau.

<sup>42</sup> Dutikawajam ashí shiig yuwawajui.

<sup>43</sup> Nunikagmatai pag namakjai ampinkauak yajuakag doce chagkinnum aimjaju.

<sup>44</sup> Junak cinco mil aishmag aidau yuawajui.

*Jesús yumí awanken wekaesá webau*

(Mt. 14.22-33; Jn. 6.16-21)

<sup>45</sup> Nuna dutikamuik, jintintaiji aidaunak barcanum chimpijag dita eemak atú amain Betsaida katigtinme tusa ishimak, aents aidaun akateg ukuktatus juwakui.

<sup>46</sup> Nunik aentsun akateg ukuak mujanum wakauwai Apajuin ausatatus.

<sup>47</sup> Nunik kiyaju ai, barcashkam kuchá ejapean wegai nigka kukag juwaku.

<sup>48</sup> Nunikmá wainkau dase igku umpuamu asa, wiya wiyantuinakua pimpikiag tsawagtatak wedaun. Nuniamunum niishkam yumí awanken wekaegas ayaumas nagkaikitatus ditan adjikau.

<sup>49</sup> Nunik yumí awanken wekaegas minittaman wainkag, dita anentaimsajag pasun minatsuash tusag senchi unsumaidau,

<sup>50</sup> wagki ashí wainaidau asag ishamainak. Imatiagtai Jesús chichaak:

—;Witjai, ishankaigpajum! ;Imatigpajum!, tiuwai.

<sup>51</sup> Tusa dita chimpigbaunum barcanum egkemjau, nunikmatai daseshkam mijaku; nunikmatai senchi puyatkg anentai jegagchaju.

<sup>52</sup> Wagki pag dutikamua nunakesh, dutikamape tusag anentaimtuinachu asag, utujimas anentaimaidau.

*Jesús Genesaretnumia jau aidau etsagakbau*  
(Mt. 14.34-36)

<sup>53</sup> Kuchá amain katigkag Genesaret nugkanum anumkaju.

<sup>54</sup> Nunik barcanmaya jiinaidaunak Jesusan aents aidau wainkaju.

<sup>55</sup> Nunikag ashí yaaktanum wegag jau aidau camillanum pataidiag Jesús nui pujawai tabaun antuinakug nui emaidau.

<sup>56</sup> Dutikaidau asag yaakat yaig aidau makesh, yaaktan makesh nuniachkush ajanum batsatbaun makesh ni tuwí jegawa nuwi jau aidau jintá aepedau, dutikam jaanchji weninakesh antigtajai tusag segaidau. Ashí nuna antidauk tsagakjaju.

## 7

*Aentsun pegkegchau ema nu*  
(Mt. 5.1-20)

<sup>1</sup> Fariseo aidau, maestro chicham umiktinun jintinkagtin Jerusalegnumia kaunawaju aidaujai Jesusan jegaantajui.

<sup>2</sup> Nunú aidau, ujumak Jesusa jintintaiji uwejí tsuwat aig achiká yuwagtatman wainkag augmatuidau, nunak ikigmagchaju asagmatai tiajui.

<sup>3</sup> Wagki fariseo aidauk, ashí judío aidau shkam eke yutsuk ikigmanjati tibauwa nuna umitskek yuujakchajui, ditá muunji nunitaijinak idaimainchau dekapedau asag.

<sup>4</sup> Ditak, mercado wegag wakitki tawajash ikigmateskek yuujakchajui. Nuigtushkam kuashat tikich aidau nash umijakú ainawai, vaso nijatan, jarra aidau nuigtú tikich takatai cobre aidau, pegaknumia aina nunashkam.

<sup>5</sup> Fariseo aidau nuigtú maestro chicham umiktinun jintinkagtin aidaujai Jesusan jegaantag iniinak:

—¿Wagka amina jintintaijum aidau, iina muunji umiktajum tusa tibauwa nuna umitskesh uwejí tsuwat aigkish yuinawa?, tuidau.

<sup>6</sup> Tama ni ayaak:

—Tsanumin aidauwah, dekas profeta Isaiás atumin pachis agak:

“Ju aents aina juka weninig eme anenjuinawai; tujash anentainig atushat minai ainawai.

<sup>7</sup> Mina emematjuina duka, wainkayai; jintinkagtuina nunak, aents tibauwa nuna jintinkagtuinawai”, tiuwai.

<sup>8</sup> Atumek Apajui chicham umiktajum tibauwa duka umitsuk, aents tibauwa nu idaimainchau dekapegme. Jarra aidau nijakjum, vaso aidau nuigtú tikich kuashat jumamtin aidau takaa yujagme.

<sup>9</sup> Nuigtushkam tiuwai: Apajui umiktajum tujabauwa duka wainka diyagme, atumi muunjum umiktajum tibauwa nu umikta tau asajum.

<sup>10</sup> Wagki Moisés tiuwai: “Amina apa, dukujai eme anentsam diístá”, tuja “apajin, dukujinakesh pegkegchaun chichajuk tsagkugsuk maatajum”.

<sup>11</sup> Tujash atumek makichik aentsuk apajin nuniachkush dukujinakesh: Wika yaimait-sugme, ashí ajutuina juka Corbagkai (nunak ofrenda Apajuinu taku tawai) tumainai tajume;

<sup>12</sup> nuniakjum apajinakesh, dukujinakesh yaimainchau emagme;

<sup>13</sup> Apajui chichamega duka idaikujum, atumi muunjum umiktajum tibauwa duke tikich aidau inagkeatjume, nuigtú kuashat wáji jumamtin aidau takagme, tiuwai.

<sup>14</sup> Juna tii, Jesús ashí aents tuwakú aidau untsuká chichajak:

—Wi taja ju shiig antugtuktajum:

<sup>15</sup> Makichkish atsawai agaya aentsnum wayá aentsun pegkegchau emamainuk, untsu aentsnumia jiina nuuwai pegkegchau ema duka.

<sup>16</sup> Ni antutaiji ajamuk antuktinme, tiuwai.

<sup>17</sup> Nuna tusa aents aidau ukuak jegá wayamtai, niina jintintaiji aidau nu augmatbaun pachisag inidau.

<sup>18</sup> Tama ni ayaak:

—¿Atumesh duka dekamainchauk dekapegum? ¿Dekatsjumek ashí agaya wayá duka aentsnak pegkegchau ematsu duka?,

<sup>19</sup> wagki anentainum wayachu asa ampugnum egkemá letrinanum ajapnawai.

Junak ashí yutai aidauk pegkeg ainawai taku tiuwai.

<sup>20</sup> —Untsu aentsnumia jiina nu aentsnak pegkegchaw emawai.

<sup>21</sup> Wagki initkanmaya, aentsú anentainia jiinainawai pegkegchaw anentaimat aidau, ashí pegkegchaw iyashnum takanitaish, kasamat aidau, magkagtamu aidaushkam,

<sup>22</sup> tsanijmbau aidau, pegkegchaw wakegamu aidau, pegkegchaw aidau, tsanubau, ii wakegamuk takaamu, tikichdau diisá kajeamu, Apajui pegkegchaw chichagbau, eme anenmabau, shiig anentaimchat aina nu;

<sup>23</sup> Ju ashí pegkegchaw aina juuwai initkanmaya jiinu asa, aentsun pegkegchaw ema duka.

*Sirofenicianmaya nuwa dekaskeapi tibau*

(Mt. 15.21-28)

<sup>24</sup> Nuiya jiinki Tiro nugkanum weuwai. Nunik jegá wayauwai makichik aentskesh dekajuawainum tau asa; tujash uumainchau dekapjuuwai.

<sup>25</sup> Nuniai wakan pegkegchaw egkemtugbauwa nuna dukují wamak antukui, Yesusak nui pujawai tabaun, nunik tajuntun tikishmatjau.

<sup>26</sup> Duka nuwak judiochu, Sirofenicianmaya aajakui, nunú segauwai nawanji iwanch egkemtugbaun jigatugkita tusa.

<sup>27</sup> Tujash Jesús ayaak:

—Jasta dekatkauk Israela uchijí aina nuwá shiig yuwatnume, wagki pegkegchaw uchi pag yuwamuji atanki yawá suwamuk, tau.

<sup>28</sup> Tama nuwa ayaak:

—Apuh dekaske, tujash yawashkam mesa wakentin pujusá uchi yuwaku tsaisá akakeamun yuwamajamah, tau.

<sup>29</sup> Tutai ni ayaak:

—Nunú tame duik wetá, iwanchik nawanjumnak jiinki ukukne, tau.

<sup>30</sup> Tima nuwashkam wakitki jeen jegakmá, nawanjig iwanch jiinki ukukim pegaknum tepettaman wainkauwai.

*Aents antuchu shiig chichachun Jesús etsagagbau*

<sup>31</sup> Jesús Tiro nugkanmaya jiinki Sidón nagkaemak, Galilea kuchají Decápolis nugkanum awa nui jegauwai.

<sup>32</sup> Nunikmatai aents antuchu shiig chichachun itaantag segaidau uwejin achiktí tusa.

<sup>33</sup> Tama Jesús aentsun ukumtiki niinak akanki, tsajam uweji aidauwai kuwishin inujauwai; dutika usukin juki inayinash antinkauwai.

<sup>34</sup> Dutika wajan nayainpinum pagkai senchi mayatak: “Éfata”, tau. (Nunak: “Ujanta” taku tiuwai.)

<sup>35</sup> Tusa tamawaik aents antuchun kuwishig ujaniuwai, inayishkam pegkeg wajasui, nunikmatai shiig chichakú.

<sup>36</sup> Dutika, makichik aentkesh ujakaigpajum tusa tiuwai. Tujash tiigpajum tibauwaitak nuní senchi etsejuidau.

<sup>37</sup> Aents aidauk shiig senchi puyatgag: “Ashí dekas pegkejan takaawai, empekunash antumtikawai, chichachunash chichamtikawai”, tuidau.

## 8

*Jesús cuatro mil aents ayugkamu*

(Mt. 15.32-39)

<sup>1</sup> Nunú tsawantinig ataktú kuashat aents tuwakú asag yumainji atsujuidau asagmatai, Jesús ni jintintaiji aidaun untsuká chichajak:

<sup>2</sup> —Ju aents aina juna wait anentuinjai, wagki kempatum tsawan jui wijai batsat-ainawai; tujash yumainjig atsujuinawai,

<sup>3</sup> wi yujumkan ayugtsuk jeen ishiakmak, jintá wekamá jaka iyaumain ainawai, ujumak atushtanmaya kaunkajush aina dui, tau.

<sup>4</sup> Tutai jintintaiji aidau aiinak:

—¿Tuwiya jukiya yumainush sumainaita aents atsamunum pujag juniautish?

<sup>5</sup> Tiagtai ditan iniak:

—¿Wajupa pagka ajutjamainawa?

Tama:

—Siete pag ajutjamui, tuidau.

<sup>6</sup> Tiagtai aents nugkanum batsagtajum tusa ishiakui. Dutika siete pagkan juki Apajuin see tí, puujá ni jintintaiji aidaun tinabiu, dutikam ditashkam aentsun tinamkaju

<sup>7</sup> Nuigtushkam ujumchik namak ajuidau, nuna Apajuin see tii tinamkagtitajum tusa tinabiuwai.

<sup>8</sup> Nunik ashí shiig yuwawajui, nunikagmatai ampinkau aidaun siete chagkinnum aimjajui.

<sup>9</sup> Nuna yuawajuk cuatro mil tumain aajakajui. Imana nuna akatek ishiakajui.

*Fariseo aidau wainchatai iwainkagtukta tusa Jesús segamú*  
(Mt. 16.1-4; Lc. 12.54-56)

<sup>10</sup> Nunik jintintaiji aidaujai barcanum chimpimjag Dalmanuta nugkanum weuwai.

<sup>11</sup> Nui jegamtai fariseo aidau kautuawag Jesusjai tudaiyidau, nuninak pegkegchau anentaiyai dekapsgatatus nayaimpinmaya wainchatai iwainakti tusag segaidau.

<sup>12</sup> Tusá segainam Jesús senchi mayati chichaak:

—¿Wagka ju aents aidaush wainchatai iwainakti tusash segamainawa? Dekas tajime makichik wainchataigkesh iwaintamak achagtatui.

<sup>13</sup> Tusa ukuak barcanum egkemag, ataktú amain katigkui.

*Fariseo aidau jintiamujig levaduraya numamtinai tibau*  
(Mt. 16.5-12)

<sup>14</sup> Kajimatkiaju asag pag aidaunak jukichajui, ayatak makichik pag ajuidau barcanum egketu.

<sup>15</sup> Nuniku ai Jesús ditan chichajak:

—Nijah, fariseo aidau nuigtú Herodesa levaduraji aina nujai kuitamamkatajum, tau.

<sup>16</sup> Tutai ditak pempeentunikiag: “Nunak pag takukchag dui tujamji”, tuidau.

<sup>17</sup> Nu tuinamun Jesús dekjua:

—¿Wagka pag atsawai tusagmesh jiyaniagme? ¿Atumek dekamainchawk nuigtush antumainchau dekapeajum? ¿Ekek utujimsa anentaimjum?

<sup>18</sup> ¿Jiimesh ajutjamainaigkik wainmatsjum nuigtush antutaigmish ajutjamainaig antasjum? ¿Nunia asagmek aneaktsujum?

<sup>19</sup> Wi cinco pagkan puujan cinco mil aents ayugkamash ¿ampinjau aidaush wajupa chagkina aimjamiugme?

Tama dita aiinak:

—Doce, tiaju.

<sup>20</sup> Tiagtai:

—Wi siete pagkan cuatro mil aents ayugkamash ¿ampinjau aidaush wajupa chagkina aimjamiugme?

Tama dita aiinak:

—Siete, tiaju.

<sup>21</sup> Tiagtai ni ayaak:

—¿Dutikauwaitkugmek antumainchau dekapeajum?

*Betsaidanmaya aents wainmachun Jesús etsagagbau*

<sup>22</sup> Nunik Betsaida jegawajui, nunikmatai wainmachun itajuawag, antinjukta tusa segaidau.

<sup>23</sup> Tama Jesuschakam wainmachun uwegnum egkesá juki yaakat yaijan ukumtiki jiin usuktua, uwejin nuna jiin patati, machikish wainmawash tusa iniau.

<sup>24</sup> Tama wainmachushkam pagkai niimak:

—Aents aidaunak numia nuninun wainjai; tujash weedaun wainjai, tau.

<sup>25</sup> Tutai Jesús wainmachu jiin ataktú uwejin patatiu, dutikam paan wainmakui, nunik atushtanmayanash shiig wainu.

<sup>26</sup> Nunikmatai jeen awemak:

—Yaakat yaija awigkesh wayawaipa, tiuwai.

*Pedro Jesusan amek Cristuitme tibau*  
(Mt. 16.13-20; Lc. 9.18-22)

<sup>27</sup> Nuna dutika, Jesús jintintaiji aidaujai weajui yaakat yaig aidau Cesarea nugkanum Filipo yaaktamamua nui. Nunik jintá wesa jintintaiji aidaun iniak:

—¿Aents aidaush minash yayai tujutuinaawa?, tau.

<sup>28</sup> Tutai dita aiinak:

—Ujumak aents: “Juan Yamijatnai” tuinai, tikich chichaidau: “Auk Eliasai” taush ainawai, tikich tuidau: “Profeta aajakajua nuiyaskaitai” tujamainawai, tuidau.

<sup>29</sup> Tiagtai ni ayaak:

—¿Tujash atumesh, minash yayai tujutjume? tau.

Tutai Pedro ayaak:

—Amek Cristuitme, tiu.

<sup>30</sup> Tujash Jesusak mina pachittsagmek makichkish tiigpajum, tiuwai.

*Jesús ni maam atinji etseggamu*

*(Mt. 16.21-23; Lc. 9.22)*

<sup>31</sup> Tusa Jesús nagkama jintinkagtak:

Aentsmaga akiinauwa duka kuashat waittsattawai nuigtú judío apuji aidau, sacerdote apuji aidaush, maestro chicham umiktinun jintinkagtin aidaujai dakituinak maawagatui, dutikamash kampatum tsawan asa nantaktatui, tau.

<sup>32</sup> Tusa paan etsegtai, Pedro akanak juki kakaakan chichagtan nagkabauwai.

<sup>33</sup> Tujash Jesús ayampattsag, jintintaiji aidaun diis Pedron jiyaa:

—¡Wetá Iwanchih, ukugkita! Amek Apajuinu aina duka anentaimtatsme, aentsú anentaimtajig anentaime, tiuwai.

*Mina jintintaig atatus wakegawk waitiakush nemagtukti tibau*

*(Mt. 16.24-28; Lc. 9.23-27)*

<sup>34</sup> Nunik Jesusak jintintaiji aidaun nuigtú tikich aents aidaunashkam untsuká chichajak:

—Makichik aentskesh mina jintintaig atatus wakegawk, niinunak idaiyak, waitiakush nemagtukti.

<sup>35</sup> Wagki ashí aents ju nugka jui pujutan imá senchi wakegak, mina nemagtuk waittan dakitauk uwemjashstin ainawai; tujash mina nemagtak nuigtú yamajam chichaman etsejuinak waituidauk uwemjatnai.

<sup>36</sup> ¿Wajinma yaimainaita aentsnash ashí nugka juiyan niinu emakush, wakanin megkaemaina nuish?

<sup>37</sup> Nuniachkush aentsush ¿wajupa wakaninash akikmatmainaita?

<sup>38</sup> Wagki mina pachitus etsegtan datsanjuju tuja mina chichamjunash aents betek umichu weantu aina nuna nuigtú aents tudaugtin aidau ujatnash datsanjau aidaunak, Aentsmaga akiinau Apají imanjiya nujai ángel pegkejam aidaujai minitna dui datsanjatnai.

## 9

<sup>1</sup> Junashkam Jesús chichaak:

—Dekas tajime: Atum jui ijunjum juiyatijum ujumak aidautijum eke jatsuk iwaaku pujusjumek, Apajú inama nu senchijijai minau wainkatnutigmesh ajume, tiuwai.

*Jesús yapajinamu*

*(Mt. 17.1-13; Lc. 9.28-36)*

<sup>2</sup> Jesusak seis tsawan nagkaemaku ai, Pedron, Jacobon, Juangkan aatus juki ditanak akanki muja yaki tsakajunum weuwai. Nui ditá eemtin, Jesusa niimé yapajinauwai.

<sup>3</sup> Jaanchjig winchamtin, shiig puju, nugkanmaya jaanchi nijaukesh imatikag puju emamainchau aajakui.

<sup>4</sup> Nuniai Moisés, Elías aatus Jesusjai chichaidaun wainkajui.

<sup>5</sup> Nunik Pedro Jesusan chichajak:

—Maestroh, pegkejai jutii jui batsatag duka, nuniau asá kampatum aak aakmakagmi. Makichik aminu, tikich Moisesdau nuigtú Eliasdau, tau.

<sup>6</sup> Nunak ni tabaujinakesh dekachiatak tiuwai, wagki ishamkaju asag.

<sup>7</sup> Nuna taig yujagkim ijikui, nuniai yujagminmaya chichaak: “Juuwai mina uchig anetaijuk, ni antugkatajum”, tabaun antukajui.

<sup>8</sup> Nuna taig diikmá, imá Jesusnak wainkajui nuigtú tikichik atsuaidau.

<sup>9</sup> Nunik mujanmaya akaebaunum, dita wainkamujinak Aentsmaga akiinauwa nu jaka nantatsaigkik makichik aentsnakesh ujakainum tusa akatajui.

<sup>10</sup> Tibau asag ditakek pachitsuk idaiyinayatak, jaka nantatsaigkik tawa nunash wajukatnunak tawa tusag iniinidau.

<sup>11</sup> Nuninak Jesusan iniinak:

—¿Wagka maestro chicham umiktinun jintinkagtin aidaush, dekatkauk Eliasá taatnai tuinawa?, tuidau.

<sup>12</sup> Tiagtai Jesús ditan ayaak:

—Dekaskenmag Eliasak niyá eemak taatnai nunik ashí waji aidaunak ni ataktú iwajatnai. Tujash ¿Aentsmaga akiinau pachisaish wajintu agagbauwaita, senchi waittsatnai nuigtush dakitjamu atinai tatsuak?

<sup>13</sup> Tujash wi tajime: Eliasak taabi, nunikmataish ashí dita wakegaina dutiksag inagkeatkiagmayi, agagbaunum niina pachis tawa dutiksag, tiuwai.

*Wakan pegkegchau uchin egkemtuanun Jesús etsagagbau  
(Mt. 17.14-21; Lc. 9.37-43)*

<sup>14</sup> Nunik ni jintintaiji aidau batsatbaunum jegakmá, wainkaju kuashat aents tuwajuk aun, tuja maestro chicham umiktinun jintinkagtinchakam ditajai tudayinaun.

<sup>15</sup> Nunidau Jesusan wainkag puyatuk tupikatkiag jegaantag kumpamawajui.

<sup>16</sup> Nunikmatai ditan iniak:

—¿Wají pachisjumea ditajaiash tudaijume?, tau.

<sup>17</sup> Tutai aents tuwakbaunmaya makichik ayaak:

—Maestroh, mina uchijun wakan pegkegchau egkemtua chichachu etugtimun amina itajuajame.

<sup>18</sup> Junak wakan egkemtakug nugká ajinuwe, nunik saun apak, nain takegtak, ichichkam patamnuwe. Imatijutin asantai amina jintintaijum aidaun jigtugkitajum timajai, tujash tujinkagmae, tau.

<sup>19</sup> Tutai Jesús ayaak:

—¡Aents dekaskeapi tuchau aidauwah! ¿Wajupá dukapea atumjaish pujumainaitja? ¿Wajupá dukapek dakastajime minak dekaskeapi tujuttinme tusanush? Jui uchi itantá, tiuwai.

<sup>20</sup> Timatai uchin ejentuntaju. Dutikam wakan pegkegchaushkam Jesusan wainak uchinak waugmitkak nugká ajiaju, dutikam tadaegak saun apakú;

<sup>21</sup> nunitai Jesús uchi apajin iniak:

—¿Junash wajutí nagkamsaya imatikawa?, tau.

Tama ni ayaak:

—Uchuch aig nagkamas.

<sup>22</sup> Dutikau asa kuashtá jinumash patakta tinuwe, namakash ajug maata tinuwe. Ame machikish dutikmainaitkumek, jutiish wait anenkagtujam yaijatkata, tau.

<sup>23</sup> Tutai Jesús ayaak:

—Dekaskeapi tumainaitkuminig, dekaskeapi tawa nudauk ashí dutikmain ajawai, tau.

<sup>24</sup> Tusa taig uchi apajishkam unsumak:

—¡Dekaskeapi tajai! ¡Wi dekaskeapi tachakuish yainkata!, tiuwai.

<sup>25</sup> Jesús kuashat aents tuwagtai wainak, wakan pegkegchaun jiyak:

—Wakan chichachu empekuwah, wi tajame: ¡Jiinkim ukuktá, ataktuk waketjukmek egkemtuaawaipa!, tiuwai.

<sup>26</sup> Tama wakanchakam unsumak uchin kujamtikak waugmitkak jiinkiuwai, nunikmatai uchik jaka iyaantu. Nunitai kuashat aents chichainak:

—Jakajamah, tuidau.

<sup>27</sup> Tujash Jesús uwegnum achiká inankiu, dutikam wajainiu.

<sup>28</sup> Nuna dutika Jesús jegá wayamtai, jintintaiji aidau agkan niinak iniinak:

—¿Wagka jutiish jiiktakamaish tujinkamji?, tuidau.

<sup>29</sup> Tiagtai ni ayaak:

—Tujash ju wakanía juka junisaikik jimait sui ayuno takaaku Apajuí aujku jiiimainai, tiuwai.

*Jesús awentsag ni mantamnatnuji etsegkamu*

*(Mt. 17.22-23; Lc. 9.43-45)*

<sup>30</sup> Nuwiya jiinki Galilea wegamunum makichik aentskesh dekawainum tusa Jesús dakitau,

<sup>31</sup> wagki ni jintintaiji aidaun jintintu asa. Nunik:

—Aentsmaga akiinawua nunak aents aidaunum sujukagtatui, dutikawagmatai maawagtatui. Tujash jakaashkam kumpatum tsawanta jui nantaktatui, tau.

<sup>32</sup> Tutaish ditak ni tawa nunak dekamain dekapenachu, nuninakush ishamaidau asag iniaschajui.

*Yaki dekas imá wagaakush atinaita tiagbau*

*(Mt. 18.1-5; Lc. 9.46-48)*

<sup>33</sup> Yaakat Capernaúm jegawajui, nunik nui jegá batsatbaunum Jesús jintintaiji aidaun: ¿Jintaa minisjumesch waji tudaimugme?, tau.

<sup>34</sup> Tujash ditak chichainachu, wagki jintaa minisag ditak pempeentunikiag, yaki imá wagaakush atinaita tudaiyaju asag.

<sup>35</sup> Nuniagtai ekeemsau, nunik jintintaiji doce aina nuna untsuká: Ni dekatkau atatus wakegauk, ashí tikich aina nuna ukujin amainai, nuniak ashí tikich aidaun takajin amainai.

<sup>36</sup> Nuna tii uchin juki ejapen awasauwai, dutika minaaki juki chichaak:

<sup>37</sup> Ju uchía junin aidaun mína daajui juidauk, mína jujuinawai; tuja mína jujuina duka, minakek jujuinatsui, mína awetiúwa nunash juwinawai.

*Jutiin shiwagmatjamtsu duka jutiinu asa aniwai*  
(Lc. 9.49-50)

<sup>38</sup> Tutai Juan chichaak:

—Maestroh, makichik wainkamji amina daagmin iwanchin jiyau, tujash jutiijai minitan dakitakuí, amek aikawaipa timaji, tau.

<sup>39</sup> Tutai Jesús ayaak:

—Atumek aikawaipa tusagmek tiigpajum. Makichik aentskesh mína daajui wainchatain iwainayatkug, pempeentugsagkek pegkegchaunak chichagtumaitsui.

<sup>40</sup> Jutiin shiwagmatjamtsu duka, jutiinu asa nuniawai.

<sup>41</sup> Tuja makichik aentskesh atumin mína daajui, Cristunu asagmin yumin amasú aidauk, dekas tajime, dita wáji shiig pegkeg jukitnujiya nunak megkaekachagtinai.

*Tikichin pegkegchau takamtikaidau tibau*

(Mt. 18.6-9; Lc. 17.1-2)

<sup>42</sup> “Makichikesh júj piipich aina juiya mína dekaskeapi tujutuina nuna tudaun takamtikaidauk, dekas kaya muun júki kuntugnum jigká detua nayantsa kunajin ajugká ajapmainus ajapachbau ainatai.

<sup>43</sup> Amina uwejum tudau takamtijamkuig tsupikta, dekas pegkejai muntuch wajasá pujut tuke atina nui wayamuk, jimá uwegtin asá waitiaku pujutai, jii tuke kajinchaunum waimaina nu,

<sup>44</sup> nuig akash jinuchu nuigtú jiishkam tuke kajinchauwa nui.

<sup>45</sup> Tuja amina dawem tudau takamtijamkuig tsupikta, dekas pegkejai pujut tuke atina nui shutusá wayamuk, jimá nawentin asá waitiaku pujutai, jii tuke kajinchaunum ajapeam amaina nu,

<sup>46</sup> nuig akash jinuchu nuigtú jiishkam tuke kajinchauwa nui.

<sup>47</sup> Amina jiiim tudaun takamtijamkuig ukuinkata, dekas pegkejai Apajui inamtaijiya nui makichik jiiintin wayamu, jimag jiiintin asá waitut tuke atina nui ajapeam amaina nu,

<sup>48</sup> nuig akash jinuchu nuigtú jiishkam tuke kajinchauwa nui.

<sup>49</sup> “Wagki ashí nunú aidauk weejai kachitiamá numamtuk jiiyai kachiam agtinai.

<sup>50</sup> Week\* pegkejai; tujash jea jeatuji megkaekamtaish, ¿utugsaiya ataktush jea jeatush emainaita? Atuminish weega numamtin ajutjabiagti nuigtú shiig agkan tikichjai pujamush ajutjamtinme”.

## 10

*Jesús nuwak idaimaitsui tibau*

(Mt. 19.1-12; Lc. 16.18)

<sup>1</sup> Jesús Capernaunnumia jiiinki Judea nugkanum jegaa, Jordagka amain katigkú. Nunikmatai aents aidaú ataktú tuwagkajam jintinkagtutan nagkabau, ni tuke jintinkagtina dutiksag.

<sup>2</sup> Nuniái ujumak fariseo aidaú Jesusan jegaantaju, wajintig tusa dekapsagtatus, nuwennush nuwenash idaimainashit tusag.

<sup>3</sup> Tama ni ayaak:

—¿Moisesash wajukatajum tujabiajuita?

<sup>4</sup> Tama dita ainnak:

—Moisesak papí nuwa idaiku najantai umikjum nuwemek idaisatajum tujabiuiwai, tuidau.

<sup>5</sup> Tiagtai Jesús chichaak:

—Moisesak atum antumtikmainchau ainajum dui nu umiktinnak agajui.

<sup>6</sup> Tujash yama nagkamchaku najanbaunmag Apajuik aishmagkun nuwajai najanauwai.

<sup>7</sup> Dutikamu asag aishmag nuwenkug apajin, dukujin ukuak niina nuwejaig ijunmainai, <sup>8</sup> nuniak nuwejai makichik iyash wegawai. Nunin asa jimagchauwai, makichki.

<sup>9</sup> Nuadui aatus Apajuí dutikamua nunak aentsuk datupaumainchau ainawai, tiuwai.

<sup>10</sup> Nunik jegá jegawag jintintaiji aidaú nuna pachisag Jesusan inidaú.

<sup>11</sup> Tusá iniam:

—Makichik aentskesh nuwen idaiyas tikich nuwajai nuwenkug, jeteken ekajeak nunimainai,

\* 9:50 Diistá Mt. 5.13.



<sup>12</sup> nunisag nuwashkam aishin idaiyas tikich aentsnum nemakug, ekagmawai, tiuwai.

*Jesús uchi ikautkamu*

*(Mt. 19.13-15; Lc. 18.15-17)*

<sup>13</sup> Ujumak uchi aidaun Jesusan ikautuawajui, uwejin antinjukti tusag. Dutikiagtai ni jintintaiji aidaun, uchin ikaunmaina nuna jiyaidau.

<sup>14</sup> Dutikiagtatman Jesús wainak kajek chichajak:

Idaisatajum, uchi aidaun minai minitnume, utujiakaigpajum, wagki Apajuí inama duka jujú uchi aina junin aina nudauwai, tiuwai.

<sup>15</sup> Dekas tajime: Aents aidaun, uchi mina anentaimjutuina imanis anentaimjutu-inachuk, Apajuí inamak amain ainatsui, tiuwai.

<sup>16</sup> Tusa Jesús uchi aidaunak minaaki juki, makí makichik uwejin buuknum achiak Apajuí pujutnum yumigtamsatnume, tiuwai.

*Datsauch wiyakuch Jesusan iniasbau*

*(Mt. 19.16-26; Lc. 18.18-27)*

<sup>17</sup> Jesús wetatus jiinaí, makichik tupikaki tajuntaun, nunik niina eemtin tikishmatug iniak: —Maestro pegkejah, ¿wajina dutikmainaitja pujut tuke atina nuna jukitasanush?, tau.

<sup>18</sup> Tama Jesús ayaak: —¿Wagka pegkejá tujutme? Makichikish pegkejah atsawai, imá makichik Apajuiya duke pegkejah.

<sup>19</sup> Chicham umiktin aina nu dekame: “Tsanijinawaipa, magkagtuawaipa, kasamkaipa, wainkamek tsanumkagtujaipa, wainka tsanujá jujukipa, apa dukujai eme anentsam diistá” tawa nu, tau.

<sup>20</sup> Tama ni ayaak:

—Maestroh, wika ashí nunak datsauch asanuk umikuitjai, tiuwai.

<sup>21</sup> Tutai Jesús wait anenmain diisui, nunik chichajak:

—Makichik umimain ajutjame: wetá, nunikam ashí amina ajutjamaina duka sujukam ujunauch aina nu susata. Nu dutikawamin nayaimpinum wajigimik ajutjamtainai. Nu dutika ukuakum waitiakmesh atsanjam nemagtukta, tiuwai.

<sup>22</sup> Nu tama junik dekapjauwai, nunik wake besek weuwai shiig wiyakuch asa.

<sup>23</sup> Jesús ayampá ashí niimas jintintaiji aidaun chichajak:

—Shiig utugchatai wiyakuch aidaun Apajuí inamtaijin wayata tabauk.

<sup>24</sup> Nuna tutai jintintaiji aidaun puyatkaju. Nuniagtai Jesús ataktú chichaak:

—Uchig aidaun, shiig utugchatai Apajuí inamtaijin wayata tabauk.

<sup>25</sup> Camellok aujá jiinish waigkag yupichu nagkaemamainai, tujash wiyakuch Apajuí inamtaijin wayata tabauk utugchatai, tau.

<sup>26</sup> Nuna antukag, nuní nagkaemas puyatkag, pempeentunisag iniininak:

—¿Yaki tujash uwemjaush amainaita?, tuidau.

<sup>27</sup> Tiagtai Jesús ditan diis chichajak:

—Aents diismak dutikmaitsui, tujash Apajuiyaig nuninchauwai, wagki Apajuik ashí waji aina nunak dutikmainai.

*Mina nemagtuidauk ditanu ukukbaujin nagkaesau jukiagtainai tibau*

*(Mt. 19.27-30; Lc. 18.28-30)*

<sup>28</sup> Pedro nagkama Jesusan chichajak:

—Nijah, Jutiik ashí iinu aina duka ukuinaku, ame nemagkauwaitji, tau.

<sup>29</sup> Tutai Jesús ayaak:

—Dekas tajime, makichik aentskesh mina nemagtak nuigtú yamajam chichaman etsejak jeen, yachi aidaun, umayí aidaun, dukujin, apajin, uchijí aidaun, nugke aidaunash ukukiu aidaun,

<sup>30</sup> yamai puja duish cieгка inagkeas jee aidaun, yachi aidaun, umayí aidaun, dukují aidaun, uchijí aidaun, nugke aidaun ukukbau aidaun inagkeas jukiagtainai waittsau ainakush, nunik atak atina nuish, pujut tuke atina nuna jukiagtainai.

<sup>31</sup> Tujash kuashat aents dekatkau atatus wakegaina nu ukunum juwakagtainai. Untsu iman atan anentaimtumachu aina nu dekatkau agtainai.

*Kompatuma juna Jesús ni mantamnatnuji etsegkamu*

*(Mt. 20.17-19; Lc. 18.31-34)*

<sup>32</sup> Jerusalén wakatasa wegamunum, Jesusak eemak wegai ni jintintaiji aidaun puyatuidau nuniai tikich aidaun ishamaidau. Nuniagtai ataktú niina jintintaiji doce aina nuna yajuak akanki, niinash waji nagkaikittawa nu pachisa ujanan nagkabau.

<sup>33</sup> Nuniak: “Yamai Jerusalén wakatasa wegag juik Aentsmaga akiinauwa nuna achikag sacerdote apuji aidau nuigtú maestro chicham umiktinun jintinkagtin aidanum sujukagtatui; dutikam dita mantamnati tusag judiochu aidanum sujukagtatui.

<sup>34</sup> Dutikawagmatai dushi dushikinakua, usu usukinak, asuttanash asut awa awa-jainakua maawagtatui, tujash kempatum tsawanta jui nantaktatui”, tiuwai.

*Juan, Jacobojai Jesusan segagbau*

(Mt. 20.20-28)

<sup>35</sup> Zebedeo uchijí aidau Jacobo Juagjai, Jesusan jegaantag:

—Maestroh, ii segamtatag nuna wait aneas umigkagtuksi tusa wakegaji, tuidau.

<sup>36</sup> Tiagtai ni iniak:

—¿Wajina dutikati tusagmae wakegagme?, tau.

<sup>37</sup> Tutai dita aiinak:

—Jutii jimajaitag nunuti ame inamtaijum imana nui, makichkia nu untsugmin enekum, tikichia nu menajui ekeemsatin atajum tukagtita, tuidau.

<sup>38</sup> Tiagtai Jesús ayaak:

—Atumek mina segatjum duka dekatsjume. ¿Atumesh wi waittsattag imaanikjumes h waitmainuk ainajum nuigtush wi jakattag nunisjumkek jamain ainajum?, tau.

<sup>39</sup> Tama dita chichainak:

—Ehé, nunimainaitji, tuidau.

Tiagtai Jesús ditan chichajak:

—Dekaskenmag wi waittsattag nunisjumek atumesh waittsatin ainagme, wi jakattag nunisjumek jakatin ainagme,

<sup>40</sup> tujash mina untsujui, mina menajui ekeemsatin atajum tusanuk tumaitsujime. Duka ya aidau ekeemsatnuji umigkamuita nudau ainawai.

<sup>41</sup> Nu tabaun tikich diez jintintaiji aina nu antukag, Juangkan Jacobojai kajegkajui.

<sup>42</sup> Nuniagtai Jesús ditan untsuká chichajak:

—Atumek dekagme, aents ju nugka juiya aentsun apuji aidauk aentsnak ditanua nunin emak inainawai, tuja nunú apu aina nuna aentsji aidaushkam aentsnak dita wakegamun inainawai.

<sup>43</sup> Tujash atum ainajum anuiyag nuninuk amaitsui, dekas apu atatus wakegawk atum ainajum anuiyag tikich aina nuna umijin amainai.

<sup>44</sup> Atum ainajum anuiya dekatkau atatus wakegawk, tikichi inake amainai.

<sup>45</sup> Wagki Aentsmaga akiinauwa duka umigtuktinme tusag taachui, tikich aidan yaigtatus tauwai, ni mantamna kuashat aentsun uwemtikata tau asa, tiuwai.

*Wainmachu Bartimeo wainmakbau*

(Mt. 20.29-34; Lc. 18.35-43)

<sup>46</sup> Jericó jegawajui; nunik nuiya jiinki Jesusak ni jintintaiji aidaujai nuigtú kuashat aents aidaujai ashinai, wainmachu Bartimeo daagtin Timeo uchijí jintá yantam ekeemas, kuichkin segamak eketu.

<sup>47</sup> Nuniau Jesús nazaretnumia nagkaemawai tabaun antuk, untsumtan nagkamau, nuniak:

—¡Jesusah Davita uchijiyah, wait anenjugta! wajau.

<sup>48</sup> Imattai kuashat aents itatkati tusag jiyaidau; tujash nigka nuní senchi untsamak:

—¡Davita uchijiyah, minash wait anenjugta! wajau.

<sup>49</sup> Imattai Jesuschakam wajantú, nunik chichaak:

—Untsuktajum, tau.

Tutai wainmachun untsuinak:

—Shiig aneasta, untsugmawai wajaktá, tuidau.

<sup>50</sup> Tama niishkam tseke wajakí jaanchjinak nagkimá ukuak Jesús wajamunum jegantui.

<sup>51</sup> Nunikmatai Jesús iniak:

—¿Minash utugtukti tusamea wakegame?, tau.

Tama wainmachu ayaak:

—Maestroh wainmaktasan wakegajai, tau.

<sup>52</sup> Tutai Jesús:

—Wetá, ame dekaskeapi tabaugmin tsagajume, tiuwai.

Tusá tamawaik wainmakui, nunik Jesús wetai niishkam weuwai.

## 11

*Jesús Jerusalén wayamu**(Mt. 21.1-11; Lc. 19.28-40; Jn. 12.12-19)*

<sup>1</sup> Jerusalén tikiju awajus weenak, jegawajui Betfagé nuigtú Betania Olivosan mujajin diiká awa nui, nunik Jesús ni jintintaijin jimajan awemauwai,

<sup>2</sup> nunik chichajak:

—Wetajum au yaakat yaijuch awa awi, nuwi waikmajum wainkattagme burro tsakat jigkam wajau, makichik aentskesh entsamchatai, nu atiajum itaatajum.

<sup>3</sup> Nu dutikagmin makichik aentskesh: ¿Wagka aikagme? tusa inimpainakuig, Apu atsumawai, wamak awagkittawai tusajum ukuktajum, tiuwai.

<sup>4</sup> Tiajam wegag, burrok yaakta waitijin agaan jigkam wajattaman wainkajui, nunikag atiwajui.

<sup>5</sup> Dutikiagtai ujumak aents nui ijunaidau:

—¿Wagka burrosh atigme? tusag inidau.

<sup>6</sup> Tiagtai ditashkam Jesús titá tibaunak dutiksag tiajui, tutai jukiti tusag idaisajui.

<sup>7</sup> Dutikawag burron jukiag Jesusan ejetuawag, burro tuntupen jaanchji aidaun aitkajui, dutikawagmatai niishkam ekebiuwai.

<sup>8</sup> Kuashat aents jaanchji aidaun ainag emainai tikich aidauk ajanmayan dukan tsupijag ainag emaidaush aidau.

<sup>9</sup> Imatikainak aents eemak weedau, ukunum minidaushkam untsumkag:

—¡Emematiagmi! ¡Apu Apajui awemam miná duka pegkegmai!

<sup>10</sup> ¡Pegkejai iina apaji David inamajakua nui inamjatatus mina nui! ¡Nigki nayaimp-inmash ememattai atí! wajaidau.

<sup>11</sup> Nunik Jesús Jerusalén wayá, jega Apajui ememattainum weuwai. Nunik ashí waji nui atatman diis ukuak, etsa akaegu asantai jintintaiji doce aina nujai Betania weuwai.

*Higuera nejechu Jesús yumigja maamu**(Mt. 21.18-22)*

<sup>12</sup> Kashinia dui betanianmaya jiinki wegamunum Jesús yapajuau,

<sup>13</sup> nunikmá ikaag wainkau higuera duken, nunik neje atsuash tusa diistatus wejiu; tujash jegantá diikmá nejeg atsau ayatak dukeg au, higo\* nejetchau asantai.

<sup>14</sup> Jesús higuera chichajak:

—¡Ame nejekbaunak makichik aentskesh tuke yuwachagtin ainawai!, titatman ni jintintaiji aidau antugkajui.

*Jega Apajui ememattainum aents batsatun Jesús jiigbau**(Mt. 21.12-17; Lc. 19.45-48; Jn. 2.13-22)*

<sup>15</sup> Jerusalén jegawag jega Apajui ememattainum Jesús wayá, nui sujak batsatun sumau aidaujai agaa jiiju, dutikak aents kuichki yapajiiin aidau mesajinashkam shitatki akaketuk, paumá sujin aidau ekeemtaiji aidaunash dutiksag akaketkau,

<sup>16</sup> dutika jega Apajui ememattaiya nui makichik wajinakesh takusá wayawainum tusa dakitau.

<sup>17</sup> Nunik jintinkagtak:

—Apajui chichame agagbaunum:

“Mina jegajuk ashí tikich nugkanmaya aidau Apajui aujuinaku ijuntai tutai atinai” tawa nuniaig atum kasa aidau batsamtai emaugme, tiu.

<sup>18</sup> Nuna timatai sacerdote apuji, maestro chicham umiktinun jintinkagtin aidaujai antukag, wajuk maumainaita tusag egatuidau; wagki ni jintinkagtamun ashí aents puyatjus antujuidau asantai nuna ishainainak.

<sup>19</sup> Tujash kiitai, Jesusak jintintaiji aidaujai yaaktanmaya jiiinjajui.

*Higuera yumigjamua nu kukajú wainkamu**(Mt. 21.20-22)*

<sup>20</sup> Shiig kashikmas ai nagkaemakmag, higuera ashí kagkapejai kukag wajattaman wainkaju.

<sup>21</sup> Nunik Pedro adeag Jesusan chichajak:

—Maestroh, diisia ame higuera yumigjam ukukmaum nu kukajá wajana, tau.

<sup>22</sup> Tutai Jesús ayaak:

—Imá Apajuiyaig dekaskeapi titajum.

\* 11:13 “Higo”, tawa duka higuera neje tutaiyai.

<sup>23</sup> Wagki dekaskenum tajime, makichkitigmekesh ju muja chichagkujum: ¡Jui atsuk nayants wajaata! tusam anentaiminish utujimtsuk dekas wi taja duka nuniktatuapi tamak, nunisag uminkattawai.

<sup>24</sup> Nuadui tajime, Atum Apajuí aujku segakjume, dekas jukittajapi titajum, nuni-akjume jukittagme.

<sup>25</sup> Atum Apajuí aujkugmek, tikichjai kajegdaikamu ajutjamkuig tsagkujatajum, atumnashkam Apajuí nayaimpinum puja dushakam aikasag tsagkugtamjatnume atum pegkegchau chichakbaugminash.

<sup>26</sup> Wagki atum tsagkugkagtushtaik, atumin Apa nayaimpinum puja dushakam, atum pegkegchau chichakbaugminash tsagkugtamjashtajume.

*Sacerdote apuji aidau Jesusan iniasagbau*

(Mt. 21.23-27; Lc. 20.1-8)

<sup>27</sup> Ataktú wakitkiag Jerusalén jegawajui. Nunik jega Apajuí ememattainum Jesús wekaetatman sacerdote apuji, maestro chicham umiktinun jintinkagtin aidau nuigtú tikich apu aidaujai jegaantag,

<sup>28</sup> iniinak:

—¿Aminash ya jintinkagtuata tusash awetamae? ¿Ya ju aikata tusash tujamae?, tuidau.

<sup>29</sup> Tuinam Jesús ayaak:

—Wishakam iniastajime, atum nu aigkagmin ujaktajime ya jutikata tutjutmataiya jutikaja junash.

<sup>30</sup> ¿Juagnash ya yamijatjata tiuwaita, Apajuik awemauwait atsa aents aidauk awemauwait? Nunú aigkatajum, tau.

<sup>31</sup> Tama utujimkag, ditak pempeentunikiag chichainak: “Juagnak Apajuí awemauwai tajinish, ‘¿tujash wagka dekaskeapi tichau ainagme’ tujamtata jama?”

<sup>32</sup> ¿Wajintajiki, aents aidau awemauwai titajash?” Tuinayatak aents aidau ishamaidau Juagak dekaskenum profetayai tuidau asagmatai.

<sup>33</sup> Nuninak Jesusan chichajuinak:

—Dekatsji, tuidau.

Tiagtai Jesús ayaak:

—Wisha tichattajime yana chichamenia jutikaja nunak, tiuwai.

## 12

*Takau pegkegchau aidau pachisa tibau*

(Mt. 21.33-46; Lc. 20.9-18)

<sup>1</sup> Jesús ataktú augmatbaun pachis aents aidau jintintak, tau: “Aents niina ajajin uvan aajakui, dutika tanishig, uva yumiji ijugtinnash umik, wajasá diistinnash torre ajiauwai. Dutika ujumak takau aidau: Atum takastajum nuniakjum minash sujustajum tusa susa ukuak tikich nugkanum weuwai.

<sup>2</sup> Nunik uva juut jegamtai, makichik inaken awemauwai takau batsatbaunum, nui jegamtai uva neje jukbaun niinun susatnume dutikam itagtuati tusa,

<sup>3</sup> nui jegamtai uva neje jukbaun niinun susatnume dutikam itagtuati tusa, nunik jegattaman takau aina nu suwimawag sutsuk wainak awagkiajui.

<sup>4</sup> Dutikawagmatai ataktú tikich inaken awemauwai, tujash nunak kayai buuknum tukuag upukajui, dutikawag pegkegchaun chichagkag awagkiajui.

<sup>5</sup> “Dutikawagmatai tikichin awemauwai, nunashkam maawajui. Dutikamtai tikichin kuashat ishiakui; dutikamun ujumak suwimainak, tikichnak maawajui.

<sup>6</sup> “Inagnamun niina uchijí makichkiuch aneetaiji ajamun dita batsatbaunum awemauwai: ‘Mina uchignak ajantusampap diimain ainawa’ tusa anentaimas.

<sup>7</sup> Tujash takau aidauk ditak pempeentunisajag: ‘Auwai ju aja juna jukitnuk, maami, dutika juka iinu emami’, tuidau.

<sup>8</sup> Tusag achikaju, dutika maawag uva ajakbauwa nuna ukumtikiag iyashinak ajapawajui.

<sup>9</sup> “¿Nunash uva ajagtina dusha utugmainaita? Dekas ajagtina nu tajakug nunú ajanum takaina nunak kajeg idaiyak, ajanak tikichin sumainai.

<sup>10</sup> “¿Atumek Agagbauwa duka ausachuk ainajum:

“ ‘Kayá ekenag jegamin aidau, kaya pegkegchauwai tusag dakitjajua nunú, yamai dekas jegá ichichkatin kaya apujtutia iman wajasé;

<sup>11</sup> Nunak Apu Apajuí dutikau asamtai jutii diismak anentai ejetumaitsui’ tawa duka?”

<sup>12</sup> Tutai achiktag tuidau, wagki augmatus tawa nunak, ditan pachis tawa nuna dekaidau asag, tujash aents tuwakajua nuna ishamaidau asag, ukuinak weajui.

*Kuichik akikmamu pachisa Jesús iniasbau*  
(Mt. 22.15-22; Lc. 20.20-26)

<sup>13</sup> Nunikag ujumak fariseo aina nuiyan, Herodesan aentsji aidaujai awemajui, Jesusan iniastinme dutikam wajintig, nunikmatai tsanumjugmi tusag.

<sup>14</sup> Dutikawajam ditashkam Jesusan jegaantag:

—Maestroh, dekainaji, amek dekaskea nu tame duka, nunin asam aents tuina dukesh uyumatsme, wagki dita shiig awajkatasam tachau asam, Apajui jinti dekaskea duke pachisam jintinkagtau asam. ¿Amesh wajinpa, Cesarash sumainashit, atsa sumainchaukai? tusag inidau.

<sup>15</sup> Tama Jesús dita tsanubaujin dekaju asa:

—¿Wagka pegkegchau anentaiyai dekapjustasagmesh wakegagme? ¡Makichik kuichik itagtuakjua diistajai!, tau.

<sup>16</sup> Tutai ditashkam ejentuntaju, dutikam:

—¿Yana niimempaita jusha, tuja yana daajiyaita ju agagbauwa jusha?, tau.

Tutai dita aiinak:

—Cesardauwai, tijaju.

<sup>17</sup> Tiagtai Jesús ayaak:

—Cesardauwa duka Cesarak susatajum, Apajuinua duka Apajui susatajum, tiuwai.

Nuna timatai anentai jegagchajui.

*Jakau nantagtin pachisa iniimsamu*  
(Mt. 22.23-33; Lc. 20.27-40)

<sup>18</sup> Nuniku ai saduceo aidaushkam Jesusan tajuntajui, jakauk nantakchagtin ainawai tinu aina nunú, nunikag iniinak:

<sup>19</sup> —Maestroh, Moisés agag ukugtamkiuwa nuig, makichik aents nuwentin uchi akiitsuk jakamtaig, yachi nuwan juki uchin akig yachi uchijiya nunin emamainai tawai.

<sup>20</sup> Nuniamunum siete yachigbau aajakui. Nuanuiya nagkamchak iwai nuwenuwai, tujash uchin akiitsuk jakauwai.

<sup>21</sup> Nunikmatai tikich yachi jukiuwai. Nunik niishkam uchinak akiitsuk jakauwai. Kapatuma nu jukishkam nunisag jakauwai.

<sup>22</sup> Nuni nuninakua siete aajakajua duka uchinak akiitsuk ashí jinawajui. Nunikaju ai dui pujus nuwashkam jakauwai.

<sup>23</sup> Dusha atak nantamu atina dui nantainakush, ¿siete aajakajua nu nunak nuwatka-  
jua duish, yana nuweg atinaita?, tuidau.

<sup>24</sup> Tiagtai Jesús ayaak:

—Atumek Agagbau aina nu nuigtú Apajui senchijiya dushakam dekachu asajum dewakugme.

<sup>25</sup> Atak nantamu atina duik nuwenbauk atsutnai, ángel nayaimpinum batsata nuninuk agtinai.

<sup>26</sup> Tujash jakau nantajagtinun pachis tawa duka, ¿atumek ausachuk ainajum Moisés papí agagbauwa nui Apajui zarza kegamunum chichaak: “Witjai Abraham, Isaac, Jacob aina nuna Apajuinuk” tawa duka? <sup>27</sup> ¡Apajuik jakau aidau Apajuinchi, iwaaku aina nuna Apajujiyai! Nunin aig atumek shiig kuashat dewagme, tiuwai.

*Chicham umiktin dekas imana nu*  
(Mt. 22.34-40)

<sup>28</sup> Jesús shiig aimkamun maestro chicham umiktinun jintinkagtin aina nuiya antuku asa, jegantun iniak:

—¿Tuwaita ashí chicham umiktin aina nuiya dekatkau umimaina dusha?, tau.

<sup>29</sup> Tutai Jesús ayaak:

—Ashí chicham umiktajum tibauwa nuiya dekatkau umimainuk juuwai: “Antuktajum Israel aidauwah, Apu iina Apajujiya duka, Apuk makichkiuchi.

<sup>30</sup> Amina Apujum Apajuia nu, ashí anentaimjai, ashí amina wakanmijai, ashí amina anentaimtagmijai, ashí amina senchigmijai aneeta, tawai.

<sup>31</sup> Tuja tikichia duka jujai betekmamtinai, duka: Tikich aidaush amek anenmamsam aneeta”, tawai. Tikich chicham umiktin juna nagkaesauk atsawai, tau.

<sup>32</sup> Tutai maestro chicham umiktinun jintinkagtinchakam:

—Maestroh duka dekas tame, imá makichik Apajuik awai, tikichik atsawai;

<sup>33</sup> tuja ashí anentaijai, ashí anentaimtajai, ashí senchijai nuigtú tikich iik anenmamsa aneamua nuuwai kuntin maa apeaku Apajui ememattaiya nuna nagkaesauk, tiuwai.

<sup>34</sup> Shiig anentaimas timatai, Jesús wainak:

—Apajui inama nuig atushat atsume, tiuwai.

Nui nagkamsag makichik aentskesh inimainchau dekapjajui.

*Cristush yana uchijigkita tibau*  
(Mt. 22.41-46; Lc. 20.41-44)

<sup>35</sup> Jesús jega Apajuí ememattainum jintinkagtak:

—¿Wajuk asamtaiya maestro chicham umiktinun jintinkagtin aidaush, Cristuk Davita uchijiyai tuinawa?

<sup>36</sup> David Wakaní Pegkejiya nu ichachiam:

“Apu mina Apujun chichajak:

Ekeemsata mina untsujui,

nunikamin wi amina shiwajum aidaunak ashí idaitustajame”, tiuwai.

<sup>37</sup> David mina Apug tawa nuniaish, ¿wajuk asaya Davita uchijish amainaita? tau.

Tutai nui aents tuwakú aidauk shiig aneasag antujuidau.

*Maestro chicham umiktinun jintinkagtin aidaug pegkegchaujín pachisa Jesús tibau*  
(Mt. 23.1-36; Lc. 11.37-54; 20.45-47)

<sup>38</sup> Jesús jintinkagtak: “Maestro chicham umiktinun jintinkagtin aina nujai g kuita-mamkatajum, ditak nugkutai esagman nugkujag yujainak, plazanum igkuntuinakush eme anenjús kumpamjítume tusag wakejin ainawai,

<sup>39</sup> nuninak jega ijuntainum nuniachkush yuamunum wainakush aents eme anentsá ekeemsati tibanum ekeemsagtatus wakejin ainawai,

<sup>40</sup> nuninak nuwa waje aina nuna jee aidaun atankiag tsanumainak dukap Apajuí aujú yujau ainawai. Nunú aidaug imá senchi bakumatin ainawai”.

*Nuwa waje ujunauch ofrenda egkeamu*  
(Lc. 21.1-4)

<sup>41</sup> Jesús ofrenda egketainum igkuas, aents aidaug kuichkin egkeagtai diyak eketu; tuja kuashat wiyakuch aidaushkam kuichkin kuashat chimpidaug.

<sup>42</sup> Nuniai nuwa waje ujunauch taa, niishkam jimagchik kuichik cobre najanamug, akiktanash imanís akikchaun egkeauwai. <sup>43</sup> Nunikmatai jintintaiji aidaun untsuká ikaunman chichajak:

—Dekas tajime, ju waje ujunauchia ju ashí kuichkin egkeena nuna nagkaesau imá kuashat egkeae,

<sup>44</sup> wagki ashí tikich egkeawaja duka ampinun egkeawaje, tujash juka ujunauchitak ní sumaka yuamainiya nunak ashí egkeae, tiuwai.

## 13

*Jega Apajuí ememattai tsayam atinai tusa Jesús etsegkamug*  
(Mt. 24.1-2; Lc. 21.5-6)

<sup>1</sup> Jesús jega Apajuí ememattainmaya jiiintatman niina jintintaiji aina nuiya makichik:

—Maestroh, ¿kaya aina nu diisia nuigtú jegamkamua dushakam!, tau.

<sup>2</sup> Tutai Jesús ayaak:

—¿Ju ibau ekenjá jegamkamua nu wainjumek? Juka makichik kayakesh ekenjamug aina nuiyag juwakchatnai, ashí tsaikbau atinai, tiuwai.

*Nagkanbau jegatsaig wantinkagtin aidaug*  
(Mt. 24.3-28; Lc. 21.7-24; 17.22-24)

<sup>3</sup> Olivosa mujáji jega Apajuí ememattaijai ninis awa nui waka Jesús ekeemsauwai. Nunikmatai Pedro, Jacobo, Juan, Andrés aatus niinak akanak iniinak:

<sup>4</sup> —¿Wajutiya dusha nuniktinaita? ¿Tujau tu wantinkatnaita ashí nu waji aina ju uminkatnush?, tuidau.

<sup>5</sup> Tiagtai Jesús ditan ayaak: “Kuitamamkatajum makichkish tsanugmajainum,

<sup>6</sup> wagki kuashat midiatginai mina daajun pachisag, nuninak: ‘Witjai Cristunuk’, tusag kuashat tsanubiagtinai.

<sup>7</sup> “Atumek maaniamug aidaug, nuigtú maaniatasa pampandayamug antakjumesh puy-atkatín aigpajum; wagki duka aatus nagkaemaktinai, tujash nu achatnai nagkanbau.

<sup>8</sup> Wagki nugka muunnum inamnuk, mai imanuk maaniagtinai, tuja nugka yaignum batsamnushkam mai nuninuk maaniagtinai. Nuigtush kuashat nugkanum uugbaush atinai; nuniai yapagdash tepeatnai, pampandayamushkam atinai. Waitiamug yama nagkamnamuk nu agtinai.

<sup>9</sup> “Tujash atumek kuitamamkatajum; wagki apu chichaman inagnau aidaunum sujupakagtinai nuigtú jega ijuntai aidaunum awaintamawag asutamawagtinai. Duti-jamainak mina nemagtau asagmin gobernador batsatbaunum ejetamawag nuigtú rey batsatbaunmash ejetamawagtinai, mina pachitus tinime tusag.

<sup>10</sup> Tujash dekatkauk yamajam chichama juka ashí nugkanum makí makichik chichaman chichaaku batsata nuish etsegkamu atinai.

<sup>11</sup> Tuja apunum sujupaktatus jujamainakuish, atum chichaktinuk uyumakaigpajum, nui titatjum duka Apajuí tujamtata nu chichaktatjume; wagki duka atum chichakchattagme, Wakaní Pegkejiya nu chichamtijamkatnai.

<sup>12</sup> Nuniamunum yachin maatnume tusag sujiagtinai, antsag uchigtin aidaushkam uchijin maatnume tusag sujiagtinai; uchi aidaushkam apají shiwagmagtinai nuninak maidiagtinai.

<sup>13</sup> Ashí aents aidau kajegtabiagtinai mina daag pachisjum chichau asagmin; tujash ni ebetmamag nagkanbaunum jegá nu uwemjagtinai.

<sup>14</sup> "Tuja profeta Daniel, makichkish dutikmainchaun shiig pegkegchau dutikawagtinun pachis tiuwa nunú wainkugmek (nuna aujuk dekaatnume), Judea batsatutigmek mujá pisagtin atajum.

<sup>15</sup> Tuja juga ekenja jegamkamu nagkatka nui pujauk, akaiki jegagkesh wayawaigka makichik wajijjinakesh jukitasag,

<sup>16</sup> antsag ajanum takaak pujaushkam, jaanchi jukitjai tusag waketjukigka.

<sup>17</sup> ¡Wait anentuinajai nunú tsawantin nuwa ejamtin nuigtú uchi amuntsuaku agtina nunak!

<sup>18</sup> Apajuí ausatajum, atum pisamua nu tsetsek tepeamunum ajutjaminum.

<sup>19</sup> "Wagki Apajuí nugká najanauwa nui nagkamas yamaiya juish imanika waitchatain, atakea duish imanika waittsashtin tikima senchi waitiamu atinai.

<sup>20</sup> Tuja Apu Apajuí nu waitiamu aina nuna imijchataik, makichkish uwemainchou ainawai; tujash ni etegjamuji aina nu aneamunum, waitiamu aina nunak imijkatnai.

<sup>21</sup> "Tuja makichik aentskesh: 'Diistajum, Jui Cristo pujawai' tachakush 'Awi pujume' tuinakuish dekaskeapi tiigpajum.

<sup>22</sup> Wagki kuashat aents 'Cristuítjai' tusag nuigtú profeta ainaji tuidaush wantinjagtinai; nuninak kuashat aents dutikmainchaun iwainagtinai tsanumainak, nunidau asag Apajuí etegkamu aidaunash dita tsanuamunak tsanujagtinai.

<sup>23</sup> Nuadui atumek kuitamamkatajum, ashí juna pachisnuk yaunchuk emtikan tibaijime.

*Aentsmaga akiinawu nu minitnuji*  
(Mt. 24.29-44; Lc. 21.25-28)

<sup>24</sup> "Nunú tsawan waitut nagkaemaig, etsag suwe wajastinai, nantushkam etsanbaunak megkaekatnai.

<sup>25</sup> Yaya aidaushkam kakeyagtinai, imanidau asagmatai nayaimpinmaya senchigtin aidaushkam buchitjagtinai.

<sup>26</sup> Nunú imaniai Aentsmaga akiinawu nu, yujagminum pachitkau ashí senchijijai tsawan wajasá minaun wainkagtinai.

<sup>27</sup> Ni angelji aidau ishiaktinai, dutikam ni etegjamuji aidau ashí nugka nagkatkamunum nayaim najatamunum batsatun ijumjatnume tusa.

<sup>28</sup> "Higueran pachisan augmattsan titatjim nu unuimagtajum, atumek: 'Higuera kanawe aidau wentsamtuju dukekguig wamkeap esat nagkamnattawa', tusajum dekau ainagme.

<sup>29</sup> Nunisjumek, nunú wájí uminaidau wainkugmek, Aentsmaga akiinawu nu taatnuk namput wajaschagapi titin atajum.

<sup>30</sup> Dekas tajime, yamai aents aina jusha batsataig ashí uminkatnai.

<sup>31</sup> Nayaimpik nugkajaig megkaejatnai, tujash mina chichamjuk umintsukek juwakchatnai.

<sup>32</sup> "Tujash tsawannak nuigtú horanash makichkish dekainatsui, nayaimpinmaya ángel aidaukesh, Apajuí Uchijigkesh dekatsui, imá mina Apajuk dekawai.

<sup>33</sup> Nuadui atumek aneaku pujakjum iwá pujutajum, wagki nu tsawan uminkatnuk dekachu asajum.

<sup>34</sup> Juka, aents tikich nugkanum weak, niina inake aidauw juga kuitamjutkatajum tusa makí makichik inake aina nuna takatan tinamak, waitin kuitamkatnunashkam iwá pujutá tusa ukuak weuwa nuninai.

<sup>35</sup> Nuadui iwá pujutajum, wagki jeenna dusha wajutik minit; kintamkumpash nuniachkush ae aetash, atash shinaimpash, kashikmasampash minit duka dekachu asajum;

<sup>36</sup> nuniagmin pachiaichbau minikmá kajigka batsatjumin waipakinum.

<sup>37</sup> Atumin tajim junak, ashí tikichnash tajai: ¡Iwá pujutajum!"

## 14

*Jesús maami tusa chicham umigkamu*

(Mt. 26.1-5; Lc. 22.1-6; Jn. 11.45-57)

<sup>1</sup> Jimag tsawan asa fiesta Pascua nuigtú pag levaduragtuchu yutai jegatin ai, sacerdote apuji aidau maestro chicham umiktinun jintinkagtin aidaujai, wajuk Jesusash achikaiya tsanumjuja maumainaita nuna egatuidau.

<sup>2</sup> Nunidau asag: Fiesta aigkik dutikachagmi, aents aidaujai pampandayamu ai, tiajui.

*Betanianmaya nuwa Jesusan kugkuinui buuken nijakbau*

(Mt. 26.6-13; Jn. 12.1-8)

<sup>3</sup> Jesús Betania weuwai, Simón lepragtin tutaiya nuna jeen. Nunik mesanum jegan eketai, makichik nuwa botella alabastro najanamunum kugkuin ayatak nardo najanamu senchi akikan takusá tajauuwai. Dutika botella alabastro najanamua nuna kupik Jesusa buuken ukatjauwai. <sup>4</sup> Dutikamtai ujumak aidau initag kajedaush asajui, nunikag:

—¿Wagka kugkuinnash wainkash wasujua?

<sup>5</sup> Aikatsuk trescientos denario amain sujuka ujunauch aidau sumainajamah, tusag nuwan ashishmatuidau.

<sup>6</sup> Tiagtai Jesús chichajak:

—Idaisatajum, ¿wagka waitkagme? Pegkejan jutijawai.

<sup>7</sup> Ujunauch aidauk tuke atumjai batsamiagatui, nuniakui atum wakegakjumek yaimainaitjume, untsu wika atumjaig pujushtatjai.

<sup>8</sup> Juka nuwak ni dutikmaina nuna dutikae; wagki mina iyashjunak emtika ukatjutkae mina ukugsagtina nuna.

<sup>9</sup> Dekas tajime, yamajam chichama juna etsejuinak ashí nugkanum yujainakush, ju nuwa mina jutija juna pachis tuke etsejiagtin ainawai, tiuwai.

*Judas Iscariote Jesusan sujukta tibau*

(Mt. 26.14-16; Lc. 22.3-6)

<sup>10</sup> Nuna timatai Judas Iscariote, doce aina nuiya jiinki weuwai sacerdote apuji aidaujai Jesusan wajuk sujumainaita nuna chichaman umiktatus.

<sup>11</sup> Nu tama antukag shiig aneasaju, nunikag kuichkin susatatus anagkuawaju. Dutikam Judaschakam wajuk yupichu sujukajak tusa egatu.

*Jesús inagnaku Pascuatin yuwamu*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Pag levaduragtuchu yutai nagkamak fiesta tsawagbaunum, Pascua yuwatin uwig aishmag tsakat mautai asantai, Jesusa jintintaiji aidau:

—¿Tuwi umiktatji Pascuatin yuwatnush?

<sup>13</sup> Tiagtai jimagchik niina jintintaijin awemak:

—Yaakat wetajum, nunikjum aishmag yumin aimak waketu wainkattajum nunú pataetuktajum,

<sup>14</sup> nunikjum wayaakui jeenna nu: “Maestro chichaak: Tuwi wi mina jintintaig aidaujai Pascua yumainush” agkantash awa tujamae titajum, tiu.

<sup>15</sup> —Nu tajumin ni inaktugmastatui yakí tesamu agkan muuntan shiig umikbaun, nuanui jutiinuk umiktajum, tiu.

<sup>16</sup> Tiajam jintintaiji aidaushkam wegag yaakat jegakmag, ni tibaunak imatiksag wainkag, Pascuatin yuwatnunak nui umikajui.

<sup>17</sup> Kiyagmatai Jesús niina jintintaiji doce aina nujai jegawaju.

<sup>18</sup> Nunik mesanum pekaamsag yuwinamunum Jesús chichaak:

—Dekas tajime: Atum ainajum juwiyag makichik wijai yuwa nu minak sujutkattawai, tau.

<sup>19</sup> Tutai ditak wake besekaju, nunikag makí makichik iniininak:

—¿Wikaitag? tutai, tikitchakam: —¿Wikaitag? wajaidau.

<sup>20</sup> Tiagtai Jesús ayaak:

Duka doce ainajum juwiya wijai nu platonmag uchutua yuwa nuuwai, tau.

<sup>21</sup> Tusa:

—Dekaskenmag Aentsmaga akiinauwa duka, ni pachisa agagbauwa nunisag wetatui; tujash, iwait anentajai ya sujuktatua nunak! Duka dekas akiinmainchaunas akiinawabi-ataih, tau.

<sup>22</sup> Yuwinak pekagbaunum, Jesús pagkan juki Apajuin see tii puuká, ditan suwak:

—Ju yuwatajum, juka mina iyashjun iwainawai, tau.

<sup>23</sup> Tusa, copa juki Apajuin see tii ditan susauwai, dutikam ashí betek uwajajui.

<sup>24</sup> Dutika:



—Juka mina numpajui, yamajam chicham apaamunum kuashat aentsnum ukaejatta nuuwai.

<sup>25</sup> Dekas tajime, ju uva yumijinak awenanuk uwagchattajai, atak tsawan uminkui Apajui inamtaijin ataktú yamagman uwagtin asan, tiuwai.

*Jesús Pedron uugtuktatme tusa ujakbau*

(Mt. 26.30-35; Lc. 22.31-34; Jn. 13.36-38)

<sup>26</sup> Nuna timatai himno kantamawag, Olivosan mujajin weajui.

<sup>27</sup> Nunik Jesús ditan chichajak:

—Jujú kashia juik, ashí atum aidautigmek mina pampanjगतatjume; wagki agagbauwa nui: “Pastoron maattajai, dutikam uwig aidauk pampagkagtinai” tawa nunisag.

<sup>28</sup> Tujash ataktú nantakin, atumek Galilea wegatsjuminig wiyá emkan wetatjai, tiuwai.

<sup>29</sup> Tutai Pedro ayaak:

—Ashí tikich aidau ukugmainakuish, wika nunikchattajai, tau.

<sup>30</sup> Tutai Jesús ayaak:

—Dekas tajame, yamai kashia juik atash eke jimajá shinatsaig, kampatumá wainchaujai tujuttatme, tau.

<sup>31</sup> Tamashkam Pedrok itatchau, nuniak:

—Amijai jakata tau asan wainchaujai tichattagme, tau.

Tutai tikich aidaush ashí dutiksag tiajui.

*Jesús Getsemani pujusá Apajui ausamu*

(Mt. 26.36-46; Lc. 22.39-46)

<sup>32</sup> Nunikag ajak ajakbau Getsemani tutainum jegawajui. Nunik jintintaiji aidaun:

—Jui ekeemsatajum, nuniagmin wi awi wenu Apajuin ausatjai.

<sup>33</sup> Tusa weak Pedron, Jacobon, Juan aatus yajuak ditajai wesa, wake besetan nagkamauwai nuniak shiig senchi anentaimak waitiau,

<sup>34</sup> nuniak:

—Senchi wake besemag dekapeakun jamain dekapeajai, atumek jui batsamsajum iwá batsamtajum.

<sup>35</sup> Tusa machik kuwaesag, nugká tikishmag, Apajuin ausauwai, nunimain atag ni waitmaina duka tsawantak jegagtishiti tusa.

<sup>36</sup> Nunik: “Mina Apajuh, ashí waji aina duka ame dutikmainaitme, wi waitmainaitag nuwig agkanmitkajuata, tujash wi wakegamuk achati, ame wakegamu ati”, tiuwai.

<sup>37</sup> Tusa wakitki dita batsatbaunum jegakmá, kajig batsatun wainak, Pedron chichajak:

—Simón, ¿kanamek? ¿Makichik horakesh iwamainchauk dekapeam?

<sup>38</sup> Kají batsamtsuk Apajui ausatajum, pegkegchaunum iyawaijum; dekaskenmag wakanik pegkejan takastatus wakegawai, tujash iyashia nuuwai kakaakchauk.

<sup>39</sup> Tusa ataktú wee, ni tibaujiya dutiksag, Apajui ausauwai.

<sup>40</sup> Nunik waketjuki diikmá, ataktú kajig batsatun wainkauwai kaji senchi mainam, nunidau asag aimainchau dekapajui.

<sup>41</sup> Kampatuma jui waketjuki taa, chichajak:

—Kajigtajum nuniakjum ayamjatajum, yamaik horak jegae Aentsmaga akiinawua nuna tudaugtin aidaunum sujam atata nu.

<sup>42</sup> Nantagtajum, wegagmi; mina sujuta duka tikiju minawai, tiuwai.

*Jesús achiká jukimu*

(Mt. 26.47-56; Lc. 22.47-53; Jn. 18.2-11)

<sup>43</sup> Tusa Jesús eke chichaak wajai, Judas, doce aina nuiya kuashat aents espada, numi aidaun takuinaku sacerdote apuji nuigtú maestro chicham umiktinun jintinkagtin aidaun judío apuji aidaun ishiakbaujai tajuntauwai.

<sup>44</sup> Judas Jesusan sujukua nu: “Wi kugkuastatag nu atatui; achikjum shiig emetjajum jukitajum”,

<sup>45</sup> tiu asa Jesusan wamkes jeganmawaik:

—¡Maestro! takug kugkuasui.

<sup>46</sup> Dutiktai achikag jukiajui.

<sup>47</sup> Tujash ijuna nuiya makichik espadajin ukuini juwakug, sumo sacerdote inake kuwishin tsupigkauwai.

<sup>48</sup> Tuja Jesús nu aents aidaun chichajak:

—¿Wagka kasa achiktasa utugmaina imanikjumesch espada, numi aidaun takusjumesch achigkatasagmesh minitjagme?

<sup>49</sup> Wi kashí kashinig jega Apajui ememattainum atumjai pujusan jintinnujime, nuniakuish achigchau agmaugme; tujash juka Agagbau uninu asantai juniagme, tiuwai.

<sup>50</sup> Nuna taig, ashí niina jintintaiji aidauk pisainak, ukukiajuu.

<sup>51</sup> Tujash makichik datsauch sabanan pempemag pataetuku, nunittaman achikajui,

<sup>52</sup> tujash sabananak ukuak wisú tupikakuwai.

*Jesús apu aidau batsatbaumum ejentamu*

(Mt. 26.57-68; Lc. 22.53, 54-71; Jn. 18.12-14, 19-24)

<sup>53</sup> Jesusan jukiag sumo sacerdote pujamunum ejegawajui; dutikawagmatai ashí sacerdote apuji aidau, judío apuji aidau nuigtú maestro chicham umiktinun jintinkagtin aidaujui ijunjajui.

<sup>54</sup> Tuja Pedrok ikaag pataetus wea weakua, sumo sacerdote jeen wayá agaajin achijatin aidaujui jiin anamak eketu.

<sup>55</sup> Sacerdote apuji aidau, ashí apu chichaman inagnau aidaujui egatuidau, Jesusan tsanumjujag maatnume tusa sujukagtatus, tujash ejetuinachu.

<sup>56</sup> Wagki kuashat wainak tsanumjuinakush, betek tuinachu.

<sup>57</sup> Nuniai ujumak wainak tsanumjuinak:

<sup>58</sup> —Jutii ní tabauk antugkabiaji: “Wi ju jega Apajuí ememattai uwejai takasbauwa nunak yumpuan kampatum tsawantai tikichin uwejai takaschamun jegamkattajai” timayi, tuidau.

<sup>59</sup> Tujash nuna aatus tuinakush makichkish bakumainchaun tuidau.

<sup>60</sup> Nuniai sumo sacerdote ejapan wajantá, Jesusan iniak:

—¿Wagki machikish aimtsume? ¿Nunash wajinbauna tujamainawa?, tau.

<sup>61</sup> Tujash nigka aimkag chichaachu, nunitai sumo sacerdote awentsag iniak:

—¿Amekaitam Cristo, Apajuí Pegkeja nuna Uchijim?, tau.

<sup>62</sup> Tutai Jesús ayaak:

—Witjai, nuigtush wainkainaitjume Aentsmaga akiinauwa nu Apajuí ashí senchigtina nuna untsujin eketu nayaimpinmaya yujagminum pachitkau minamu, tau.

<sup>63</sup> Tutai sumo sacerdote ni nugkuagbaujin japiki ichigká chichaak:

—¿Nuigtush ya etsegtukti tusaya atsumaji?

<sup>64</sup> Apajuin pegkegchau chichagka nu antukugme, ¿atumesh wajuk anentaimtagme?

Tusag ashí pampajag, mantamnati tajui.

<sup>65</sup> Tiagmatai ujumak usukinai, jiin epetkag ijuinak:

—Adaikakia, ya ijupime, tuidau.

Tuja achijatin aidaushkam yapinum awatuidau.

*Pedro Jesusnak wainchaujai tusa uuqbau*

(Mt. 26.69-75; Lc. 22.56-62; Jn. 18.15-18, 25-29)

<sup>66</sup> Pedro jegá agaajin nugkaa pujai sumo sacerdote inake nuwa aina nuiya makichik tajuntau,

<sup>67</sup> nunikmá Pedro jiin anamak ekeematman wainak, dii wajatu, nunik:

—Amesh Jesús nazaretnumiaya nujaimpap wekaemume, tau.

<sup>68</sup> Tama Pedro uwaak:

—Wika wainchaujai, ame tujutam nunakesh dekatsjai, tiuwai.

Tusa ukuak waitaiya nuni jiinkiuwai, nuniai atash shinukui.

<sup>69</sup> Nuna inaka nu ataktú wainak, nui batsatun chichajak:

—Jujú ditajai wekaenuwejamah, tau.

<sup>70</sup> Tujash nigka ataktushkam uwau. Nuniai machik asag, nui batsatu ataktushkam Pedron chichajak:

—Dekaskenum amesh dita aina nuiyampapitme, wagki amesh galileanmayaitam-jamah, dita chichaina aujai betek chichamjamah, tuidau.

<sup>71</sup> Imatjuinam pegkegchau chichatan nagkama nuigtú Apajuí adaiyas:

—¡Atum tajum nunak wika wainchaujai!, tau.

<sup>72</sup> Nuna taig atash awentsag shinukui, nunitai Pedroskam Jesús chichajak: “Atash jimajá shinatsaig, kampatumá waintsamjai tujuttatme” tibauwa nuna adeag buutiuiwai.

## 15

*Jesús Pilatowai ejegamu*

(Mt. 27.1-2, 11-14; Lc. 23.1-5; Jn. 18.28-38)

<sup>1</sup> Tsawamunum, sacerdote apuji aidau, judío apuji aidau, maestro chicham umiktinun jintinkagtin aidau nuigtú apu chichama inagnau aidaujui ijunjag chichasag, Jesusan jigkajag jukiag Pilaton ejetuawajui.

<sup>2</sup> Dutikawagmatai Pilato iniak:

—¿Amekaitam Rey judío aidaunu?, tau.

Tama ni ayaak:

—Duka ame tujutme, tiuwai.

<sup>3</sup> Tujash sacerdote apuji aidauk kuashat wajiin pachisag etseguidau asagmatai,

<sup>4</sup> Pilato ataktú iniak:

—¿Amek machikish aimtsumek? Diisia kuashat wajiin pachis tsanumjutpaina nu, tau.

<sup>5</sup> Tujash Jesusak nu tamashkam aimchau, nunitai Pilato anentai jegagchau.

<sup>6</sup> Tuja fiestatinig aents achikbau aina nuiyan makichik jiisagké au, aents aidau ya jiinkiti tusaya segabiagtata nuna.

<sup>7</sup> Nuanui Barrabás daagtin, apu dakituinaku pampandayamunum ni kumpajijai aentsun mau asamtai achikam cárcel egketu.

<sup>8</sup> Nuniemunum kuashat aents kaunkag, makichik aents tuke akupdauwe dutiksaik akupnakti tusag Pilaton segaidau.

<sup>9</sup> Tama Pilato ditan chichajak:

—¿Wakegagmek judío aina nuna Reyjin akupkati tusagmesh?, tiuwai.

<sup>10</sup> Nunak sacerdote apuji aidau tuke aneas kajejuinak sujukaja nuna dekau asa tiuwai.

<sup>11</sup> Tujash sacerdote apuji aidau aents tuwaká ijunun akatjajui, Pilato dekas Barrabasan jiikti titajum tusag.

<sup>12</sup> Tiagtai Pilato ataktú ayaak:

—¿Judío aidau Reyji tajum junash utugkati tajume?, tau.

<sup>13</sup> Tutai untsumkag:

—¡Achinjati!, tiajui.

<sup>14</sup> Tiagtai Pilato ayaak:

—¿Tujash jusha waji pegkegchauna takasé?, tau.

Tujash nuni senchi untsumkag:

—¡Achigtá! awajuidau.

<sup>15</sup> Imatiagtai Pilatosham aents aidaun shiig awajkata tau asa, Barrabasan jiikui; dutikak Jesusnak asutiawagmatai achigtajum tusa inamjauwai.

<sup>16</sup> Dutikamtai suntag aidau jukiag jega apu pujusá inamtaijin ejegawagmatai, ashí suntag aidau ijuntajaju.

<sup>17</sup> Dutikawag jaanch kapantu nentetkaun anugjag, atsejutai jagki najanamun atsemittakag,

<sup>18</sup> eme anentsá kumpamji tusag dushikinak:

—¡Juuwai Rey judío aidaunuk! awajaidau.

<sup>19</sup> Imatjuinak tagkanai buuknum awatuidau, usuktanash usukidau, nuninak emematji tusag tikishmatuidau.

<sup>20</sup> Dutikainak dushi dushikinakua jaanch kapantu nentetkaunak awituk jujuinak, ni nugkutainginak anugjag juki emajui achijagtatus.

*Jesús achigbau*

*(Mt. 27.32-44; Lc. 23.26-43; Jn. 19.17-27)*

<sup>21</sup> Makichik aents cirenenmaya, Simón daagtin Alejandro, Rufo aina nuna apaji, ajajinia wakettatman inajajui cruzan yanakti tusag.

<sup>22</sup> Dutika Jesusnak Gólgota tutainum ejentag, (“Gólgota” tawa duka “Buuké sakamtai” taku tawai);

<sup>23</sup> vino mirrajai pachimjamun susajui; tujash nigka uwagchawai.

<sup>24</sup> Dutika achijag, suntag aidauk Jesusa jaanchjinak, yana kayaji jiintukne nuna diisag akandaikajui.

<sup>25</sup> Jesusnak kashikmas a las nueve ai achijajui.

<sup>26</sup> Dutikainak wajuk asamtaiya achijaje nuna pachisag: “REY JUDÍO AIDAUNU” tusag agatjajui.

<sup>27</sup> Nuigtushkam jimag kasan nijai achijajui, makichkia nuna untsujin awajainak, tikichia nunak menajin awajawajui.

<sup>28</sup> Aatus uminkauwai agagbaunum chichaak:

“Pegkegchau takau aidaujai betek dutikam atinai”, tawa nunú.

<sup>29</sup> Tuja nui aents nagkaemaidauk, buuken pegainak pegkegchau chichajuinak:

—¡Waj!, ame jega Apajui ememattai tegakam kauptum tsawantai ataktú jeganun-jamah,

<sup>30</sup> cruznum nematsuk akaikim, amek uwemjakia, awajuidau.

<sup>31</sup> Dutiksag sacerdote apuji aidau, maestro chicham umiktinun jintinkagtin aidaujai dushikinak:

—Tikich aidaunak uwemtiknuwe, tujash nigkig uwemain dekapeatsui.

<sup>32</sup> Cristo, Israela Reyjiya nunú yamai cruznum deta nuna akaikiti nunikmatai wainká dekaskeapi tiagmi, awajuidau.

Nunisag niijai achijam detaidaush pegkegchaun chichajuidau.

*Jesús jakamu*

(Mt. 27.45-56; Lc. 23.44-49; Jn. 19.28-30)

<sup>33</sup> Etsa tutupit wajasú ai nagkamas a las tres wegaish ashí nugkanum suwe wajas asauwai.

<sup>34</sup> Nuniamunum a las tres wegai Jesús senchi untsumak: “Eloí, Eloí, ¿lemá sabactani?”\* tiu. Nunak: “Mina Apajuijuh, mina Apajuijuh, ¿wagka idaitusume?” taku tiuwai.

<sup>35</sup> Tuja ujumak aents nui ijunaidau nuna antukag:

—Antukjua, Eliasa untsuana, tuidau.

<sup>36</sup> Nuniai makichik tupikaki, esponjan vino chujuau pujaunum uchupig, tagkannum aapi Jesús uwagti tusa susau, dutika:

—Elias juna kuwaktatus minishtimpash nuniau wainkagmi, tau.

<sup>37</sup> Tujash Jesusak senchi untsumak jakauwai.

<sup>38</sup> Nunikmatai jega Apajuí ememattainum jaanch ejaamuk, yakiin nagkamnas ichiinak nugkaan jegaak jimaituk kanakui.

<sup>39</sup> Tuja capitán Jesús achigbaunum diyaak wajau, senchi untsumak jakamtai wainak, chichaak:

—Dekaskenum ju aentsuk Apajuí Uchijí aajakui, tau.

<sup>40</sup> Nuigtushkam ujumak nuwa ikaag ijunas diidau, nu aina nuiyag María magdalanmaya, tikich María José nuigtú Santiago ekeuwa nuna dukuji, Salomé aatus ijunu,

<sup>41</sup> Jesús Galilea pujusmatai, nemajus yujasag yaijakú aina nu; nuigtú kuashat nuwa Jesusjai Jerusalén kaunawajua dushakam.

*Jesús ukusbau*

(Mt. 27.57-61; Lc. 23.50-56; Jn. 19.38-42)

<sup>42</sup> Kintabaunum, tsawan ayamtai nagkamnatin asamtai uminbaunum,

<sup>43</sup> José arimateanmaya, apu chichaman inagnau aina nuiya eme anentsá diitai, niishkam Apajuí inamjatnun dakau asa, ajankas Pilaton jegajua Jesusa iyashin segauwai.

<sup>44</sup> Tusa segam Pilatok anentai jegachu jakae tutai. Nunik capitainin untsuká iniasui, wajupa yaunchkea jakame tusa.

<sup>45</sup> Tutai capitán jakame tusa ujakam, Josen Jesusa iyashinak jukita tiuwai.

<sup>46</sup> Dutikam makichik sabanan sumak, Jesusa iyashin kuwakí juki pempeajui; dutika ukumatai kaya tai umikbaunum egkea, kaya muuntan apapetug waajin epeni ukuiuwai.

<sup>47</sup> Nui ukuamun María magdalanmaya nuigtú María Josen dukujiya nujai wainkajui.

## 16

*Jesús nantakbau*

(Mt. 28.1-10; Lc. 24.1-12; Jn. 20.1-10)

<sup>1</sup> Tsawan ayamtai nagkaemakmatai María magdalanmaya, tikich María Jacobo dukuji nuigtú Salomé aatus, pegkeg kugkuinun sumakaju, Jesús ukusbaunum wegag Jesusa iyashin ukatkatgatus.

<sup>2</sup> Nunikag tumig tsawaju asamtai, shiig kashikmas Jesús ukusbaunum wegaju, etsa jiiniu ai.

<sup>3</sup> Nunik weenak pempeentunikiag:

—¿Yaki eketjamkati ukumatai waitainum kaya aputuamuwe nunash?, tudayinau.

<sup>4</sup> Tujash jegaantag diikmá, kaya shiig muun aputukbauk ekekam atatman wainkajui.

<sup>5</sup> Nunik ukumatain utuawag diikmag, untsugumanini aents datsauch jaanch puju esagman nugkuaju ekeemtatman wainkag ishankaju.

<sup>6</sup> Nuniagtai nunú chichajak:

—Ishamkaigpajum, atumek Jesús nazaretnumian achijagma nu egagme, duka nantakne, juwig atsawai, anui ukusagma nunú diistajum.

<sup>7</sup> Tujash wejum niina jintintaiji aidau nuigtú Pedroschkam ujaktajum. Nigka Galilea niiyá eemak wetatui, awi wainkagtatui ni tiuwa nunisag, tiuwai.

\* 15:34 “Eloí, Eloí, ¿lemá sabactani?”, tawa juka arameo chichamai. Tujash Biblia Reina-Valeranmag “Eloí, Eloí, ¿lama sabactani?”, tawai. Untsu ju “Lama sabactani” tawa juka hebreo chichamai.

<sup>8</sup> Nu tima nuwa aidaushkam Jesús ukusbaunum jegantajuk ukuinak tupikakajau, shiig senchi ishankag kujaidau asag, makichik aentsnakesh ujakchajui.

*María Magdalanmaya Jesús wantintukbau*  
(Jn. 20.11-18)

<sup>9</sup> Jesús tumigtin kashikmas nantakí deatkauk María magdalanmaya wantintukui, ni siete iwanch jiijamu aajakua nuna.

<sup>10</sup> Dutikam wee Jesusjai yujajakú aidau, wake besemag dekapenak buutú batsatun jegajua ujakajui.

<sup>11</sup> Tujash ditak, Jesusak iwaakuwe wi wainkamjai tusa ujainamash, dekaskeapi tuinachu.

*Jesús ni jintintaiji jimag wantintukbau*  
(Lc. 24.13-35)

<sup>12</sup> Nuigtushkam ni jintintaiji jimag ajanum wetainum jintá wetatman tikichia nunin wajas wantintuku.

<sup>13</sup> Dutika wantintukam ditashkam tikich batsatun jegajiag ujakaju; tuinamash ditanash dekaskeapi tichajui.

*Jesús apóstol aidau dutikatnuji tibau*  
(Mt. 28.16-20; Lc. 24.36-49; Jn. 20.19-23)

<sup>14</sup> Inagnamunum once aina nunú mesanum pekajun wantintuku, nunik dekaskeapi tuinachu asamtai kakaakan chichagkauwai, nantakiu wainkau aidau ujamash dekaskeapi tichaju asagmatai.

<sup>15</sup> Nuna tii chichajak: “Ashí nugkanum wetajum, nunikjum yamajam chichama ju ashí aents aidaunum etsegkatajum.

<sup>16</sup> Dekaskeapi tuidauk yamimagtinme nuninak uwemjatnume; untsu dekaskeapi tuinachuk, bakumagtinai.

<sup>17</sup> Dekaskeapi tuina duke ju wainchatai aina nunak dutikawagtinai: mina daajui iwanch aidaun jiiinak, yamajam chicham chichashtainash chichagtinai;

<sup>18</sup> dapi achiam esaimash, jatai egketuamun umuinakush jakashtin ainawai. Jau aidaunash ditá uwejin achikag etsagaidiagtinai”, tiuwai.

*Jesús nayaimpinum wakitkimu*  
(Lc. 24.50-53; Tak. 1.6-11)

<sup>19</sup> Apu Jesús nuna tusa inagnak, nayaim weak takuniuwai; nunik Apajui untsujin ekeemsauwai.

<sup>20</sup> Tuja ditashkam jiiinag ashí yantamnum etsejuidau, nuniagtai Apu Jesús chicham etsegbaunash aents aidaush dekaskeapi titinme tusa wainchatai aidau iwainamunmash yaigkui.

Aatus atí.

## Yamajam chicham Lucas agagbau

### *Nagkabau*

<sup>1</sup> Kuashat aents dekasaje augmatbau jutiiní dekaskenum nagkaemakiuwa nuna pachisag betekmas agajagtatus,

<sup>2</sup> yama nagkamsag Jesusan wainkau aidau, chichaman etsejuidau jutiin jintinjamawajua dutiksanuk,

<sup>3</sup> wishakam kuitamsan ashí waji aidaush wajuk nagkamdauwaita nuna shiig inimsan dekaan, betekmasan aneetaiju Teofiloh agatjame,

<sup>4</sup> amina dekaskea nuna jintinjamawajua nu shiig dekau aminum tau asan.

### *Juan Yamijatin akiinatnuji etsegkamu*

<sup>5</sup> Herodes Judeanum rey wajas inamai, sacerdote Zacarías daagtin pujujukui Abías weantu, nuweg Aarón weantu Elisabet daagtin aajakui.

<sup>6</sup> Ditak Apajuí eemtinish pegkegnak takaidau, nunidau asag Apu Apajuí chicham umiktajum tibauwa nui awa nunashkam imatiksag betek umidau.

<sup>7</sup> Tujash uchijig atsujuuidau Elisabet kaga asamtai, nuigtushkam ditak mai muuntuch wajasaju asag.

<sup>8</sup> Nuniamunum makichik tsawantai Zacarías, ditajai ijunja takataijai antiamu asa, sacerdote Apajuí eemtin takau aina dutika takainamunum,

<sup>9</sup> sacerdote aidauk tuke dutikin asag, Apu Apajuí ememattai pegkegma nui wayash yaki incienonash apeat tabaunum, niina kayaji jüntukuiwai.

<sup>10</sup> Nunikmatai incienso apetai hora jegamtai, ashí aents aidauk agaa ijunas Apajuin aujuuidau.

<sup>11</sup> Nuniai Apu Apajuí angelji Zacariasan wantintuk, altar incienso apetainum ayaumas untugnumanini wajantau. <sup>12</sup> Nuna Zacarías wainak puyatkau, nunik senchi ishamau;

<sup>13</sup> nunitai ángel chichajak:

—Zacariasah ishamkaipa, wagki ame Apajuí augbauk antuekae, nuniau asamtai nuwem Elisabet aishmagkun uchigmakmatai Juan adaikattame.

<sup>14</sup> Nunikmatai shiig aneasam dakujustatme. Tuja kuashat aents aidaushkam shiig aneediagtatui nu uchi akiinamunum;

<sup>15</sup> wagki nigka Apu Apajuí eme anentai atinai, uwagchatnai vinonash, umutai kajiau aidaunashkam nuigtushkam dukují wakeen nagkamsag Wakani Pegkeji ajitnai;

<sup>16</sup> kuashat Israelan uchijí aidaun ataktú ditá Apuji Apajuiya nui awakeagtatui;

<sup>17</sup> niyá eemak taa etsegkattawai Apu minitnujin Eliasa wakaní nuigtú senchijí ajujakua nunisag, dutikak muun aidaush anentain yapajiwag uchijijai iwajag pujustinme, aents intinkiu aidaushkam chichaman betek umiktinme, apu minitaish shiig anentus jukitag tuidau asag, tau.

<sup>18</sup> Tama Zacarías angelan ayaak: ¿Nunash wajuk nuniktatuapi titajaki, wi mina duwagjai mai muuntuch wajasag juninnush?, tau.

<sup>19</sup> Tutai ángel ayaak:

—Wika Gabrielaitjai, Apajuí inakegaitjai, ni awetime yamajam chicham pegkeja nuna amina ujaktí tusa;

<sup>20</sup> tujash wi tajam nu dekaskeapi tatsum dui, yamaik chichachu wajastatme, nunikam chichatsuk pujusam, tsawan wi tajam nu ejetatme, tau.

<sup>21</sup> Nuniai aents aidauk Zacariasan dakak ijunaidau, tesamu pegkegmanum wayá megkaekamtai, wagkag imanikash megkaekae tusag.

<sup>22</sup> Nuninai jüinkü chichamainchau dekapeau, nunitai tesamu pegkegmanum waya duwiyap wantintuke, tuidau. Nigka ayatak iwimas augmamununiak chichatsuk pujau.

<sup>23</sup> Nunik Zacariasak tsawan ni takaamujinak ashí umik ukuak, ni jeen wakitkiu.

<sup>24</sup> Nuna nunik dukap tsawan pujatsaig nuwe Elisabet ejapjukui, nunik wantintsuk jeenig pujus cinco nantun inagkeakui.

<sup>25</sup> Nunak: “Apu Apajuí wait anenjak jutijuae, wi datsaamá pujuweg nuna emegkatjuk-tatus”, taku nunikui.

### *Jesús akiinatin etsegkamu*

<sup>26</sup> Elisabet ejapjuk seis nantu pujai, Apajuí, ángel Gabrielan yaakat Nazaret tutai Galilea nugkanum awa nui awemauwai,

<sup>27</sup> nuanui makichik nuwa María daagtin aentsú antishtai, Rey David wegantu José daagtin anagmamununiak pujau asamtai.

<sup>28</sup> Nunik ángel María pujamunum wayaak:

—María pujamek, aminak Apu Apajuí wait anenjamag etegtamjae, dutijabau asa amijai awai, tau.

<sup>29</sup> Tujash nigka nu aaja tama antuk puyatkau, wajina takug tuush kumpamjawa tusa.

<sup>30</sup> Nunitai ángel chichajak:

—María ishamkaipa, aminak Apajuí wait anenjamjae,

<sup>31</sup> nunin asamtai amek ejapjukam aishmag uchigmakam, Jesús adaikattame.

<sup>32</sup> Duka eme anentai atatuí, nuniau asa “Apajuí ashí tikich aidau nagkaesau muunta nuna Uchiji” tama atinai. Apu Apajuí nu, niina apaji David ekeemas inamajakua nui inamjati tusa susattawai,

<sup>33</sup> dutikamu asa, Jacopa uchiji aidaunum tuke inamin atí tusa, ni inabaujiya duka ajumaish nagkankashtinai, tau.

<sup>34</sup> Tama María angelan ayaak:

—¿Dusha wajak nunimainaita wi makichik aishmagjaigkish pujatsugjama?, tau.

<sup>35</sup> Tutai ángel ayaak:

—Wakaní Pegkeji aminí taattawai nunikmatai ashí tikich aidau nagkaesau muunta nuna senchiji ejapaktatui. Nunin asa uchi akiinatta dusha pegkejam “Apajuí Uchiji” tama atinai.

<sup>36</sup> Tuja ame pataim Elisabetchakam muumpatnu ejapjuka, nunik seis nantu wegawai, kagae tinu agma nunú.

<sup>37</sup> Apajuí tujinmainuk makichkish atsawai, tau.

<sup>38</sup> Tutai María ayaak:

—Wika Apu Apajuí inakegaitjai, ame tujutam duka nunisag uminkati, tiu.

Timatai angelak weak ukukiuwai.

*María Elisabet ijagsamu*

<sup>39</sup> Nunú tsawan wegamunum, María waujus jiinki weuwai, Judea nugka mujajin yaakat aunum,

<sup>40</sup> nunik Zacariasa jeen wayá Elisabetan kumpamau.

<sup>41</sup> Nunik Elisabet, María kumpamku chichaamun antaig uchi senchi kakaaju, nuniaig Elisabetan Wakaní Pegkeji egkemtujam,

<sup>42</sup> senchi chichaak:

—Ashí nuwa aina nuiyan amina Apajuí pegkegnum chichagtai awatamsae, antsag uchigminash pegkegnum chichagtai awasae.

<sup>43</sup> Wi imanchauwaitag nunin aish, ¿wagka mina Apujú dukujimesh ijagtustasamesh miname?

<sup>44</sup> Wagki ame mina kumpamjakum chichaam nuna antaig, uchi senchi kakaaje, shiig aneak.

<sup>45</sup> Shiig aneastinai dekaskeapi tiuwa duka, wagki Apu Apajuí tibauwa duka uminkatin asamtai.

<sup>46</sup> Tutai Mariashkam:

“Wika Apunak mina anentaimtagjai emematjai.

<sup>47</sup> Mina wakanjuk shiig aneawai Apajuí mina uwemtijina nui,

<sup>48</sup> niina inake imanchau aigkish mina etegtua dui.

Yamai nagkamsag ashí aents aidauk, shiig aneasui tujutiagtinai.

<sup>49</sup> Wagki Senchigtina nu, waji shiig muuntan minai dutika duka daajig Pegkegmai.

<sup>50</sup> Nuigtush ni wait anenkagtutaijiya duka, aents akiinak minidau niina ajantus emematiagtin aina nudauwai.

<sup>51</sup> Nigka senchigtina ibau asa junak jutikae; dutikak emebau aidau dutikatasa anentaim-tusbaujinash wainak emake.

<sup>52</sup> Senchigtin aidau ekeemtaijinak atankine, dutika imanchauk aina nuna dekas iman awasae.

<sup>53</sup> Yapajuau aidaunash waji pegkeg aidaun shiig kuashat susaje, dutikak wiyakuch aidaunak uwegmatak ishiake.

<sup>54</sup> Ni inake Israelnak yaigké, ni wait anenkagtutaijiya nuna aneaku asa;

<sup>55</sup> nuna pachisag jutii muunji aajakajua nuna tiu aajakui, Abrahaman nuigtú ni weantunum akiinak wegagtina nunash tuke atina nuna”.

<sup>56</sup> María nuna tii, Elisabetan jeenig kumpatum nantu tumain pujusui, nunik wakitki-uwai niina jeen.

*Juan Yamijatin akiinamu*

<sup>57</sup> Elisabet tsawanji jegajim, aishmagkun uchigmakui.

<sup>58</sup> Nunikmatai nui ijutkau batsataidau, niina patayí aidaushkam Apu Apajuí wait anenjam uchigmakbaun antukaju asag Elisabetjai shiig aneasajui.

<sup>59</sup> Uchi akiina ocho tsawan wetai, uchi pakaji ajapjuatasag\* kautuawajui, nuninak apají daaji Zacariasa nunak adaikatag tuidau.

<sup>60</sup> Tujash uchi dukují chichaak:

—Atsa, uchik Juan atatu, tau.

<sup>61</sup> Tutai: —Ame pataim aina nuiyag tu daagtinuk atsajamah, tuidau.

<sup>62</sup> Tutai uchi apajin iwiyas inidau, daajish ya atí tawaki tusag.

<sup>63</sup> Nuniagtai tapna sujustá tusa inakmatai susam: Daajig Juagkai tusa agaju. Dutikamtai ashí anentai jegagchaju.

<sup>64</sup> Nuna dutikamuik ataktú chichakú. Nunik Apajuin emematiu.

<sup>65</sup> Nunikmatai nui ijutkau batsamin aidauk senchi puyatkaju; nunisag ashí Judea mujajin batsamin aidaushkam, nu nunikbauwa nunak ashí dekaawaju.

<sup>66</sup> Ashí aents nuna antuidauk: “¿Jusha uchish wajukuk atinaita?” tuidau, Apu Apajuí niina senchijin kuitabaun dekaidau asag.

### *Zacariás Apajuí emematbau*

<sup>67</sup> Zacariás, uchi apajiya nu, Wakaní Pegkeji chichamikam, nuniktinun pachis chichaak:

<sup>68</sup> “Emematiagmi Apu, Israelan Apajuijiya nu, ni aentsjin agkanmitkatatus taa nunú.

<sup>69</sup> Awetugmaji makichik senchigtin Uwemtikagtinun, ni inake David aajakua nunú wegantun.

<sup>70</sup> Yaunchuk nagkamas niina profetaji

pegkejam aajakajua nu etsejuinak:

<sup>71</sup> iina shiwaji aidaun

nuiqtú ashí tikich aents kajegtamin aina nunash depetuk uwemtijamjatna nuna;

<sup>72</sup> iina muunji aajakajua nunash wait anenjatnaitjame tusa chicham apakbau pegkegma nuna aneaku asa.

<sup>73</sup> Iina apají Abrahaman dekas umiktatjai tiuwa duka juuwai:

<sup>74</sup> Ishamkas pujuinaku, iina shiwajinish agkanmagawaja, ni umijuinaku,

<sup>75</sup> pegkeniaja nuiqtú pegkeja nu takainaku niijaig

ashí tsawantai pujusagtasá”, tiuwai.

<sup>76</sup> Nuna tii uchijinashkam:

“Amek uchijuh, ashí tikich aidau nagkaesau muunta nuna profetaji tama atatme;

wagki amek eemkam wetatme Apú jinti umigkatasam,

<sup>77</sup> ni aentsjish uwemat dekamtikatasam;

tudau aidau tsagkugnamushkam.

<sup>78</sup> Iina Apajuijiya nu shiig senchi wait anenjamu asa, nayaimpinmaya etsa puwau jiiinama nuniktinun awetugmae,

<sup>79</sup> suwenum batsatina nuna tsaapmitka;

jinta agkan pujutnum ekagtina nui jutiinash awekapasti tau asa”, tiuwai.

<sup>80</sup> Uchishkam tsakau, nuniak wakaninchakam nuní senchi ichichmamu, nuniak uwegshunum pujusui, Israelnun chicham etsegkatin tsawan jegatai wantinkatatus.

## 2

### *Jesús akiinamu*

*(Mt. 1.18-25)*

<sup>1</sup> Nu tsawantin, César Augusto ashí aents aidau agatmamkatnume tusa chichaman umik dapampajui.

<sup>2</sup> Jujú nagkamchaku agatmabauk Cirenio, Siria apuji wee pujai nunikui.

<sup>3</sup> Tibau asamtai ashí shimuidau, makí makichik ditá yaaktajin agatmamjagtatus.

<sup>4</sup> Tuja Joseshkam Galileanun yaakat Nazaret awa nuiya juwaki Judea nugkanum jegau, yaakat Belén David akiinamu aajakua nui, nigka David wegantu asa.

<sup>5</sup> Nui agatmamjatatus weak, ni nuwenatasá dakaniamuji María ejamtinun ayasá weuwai.

<sup>6</sup> Nunikag nui jegaa pujuinai tsawan ni uchigmaktinji jegajui.

<sup>7</sup> Nunikmatai iwaijin aishmagkun uchigmaku, dutika uchi pempetaiyai pempeag tagku ayugtatum egkeauwai, ijagka kajiitainig dita ayamainuk agkantak atsusú asamtai.

\* 1:59 “Pakaji ajapjuatasag” tawa nunak, judío aidauk uchi aishmag akiinamtaig, Apajuí dutikata tibau asag uchi katiuchiji chuchuken tsupigkag ajapjukú asamtai tawai. Diistá Gn. 17.10-12; Lv. 12.3.



*Ángel aidau uwijá kuitamin aidau wantintukbau*

- <sup>8</sup> Nu nugka nuiyag ujumak pastor aidau uwigin kuitamainak kashi iwá batsataidau.  
<sup>9</sup> Nuniai makichik ángel Apu Apajuinu wantintuku, nuniaig Apu Apajuí tsaaptinjia nu tsawan awajus tenteawajui, dutikam shiig senchi ishankajui.  
<sup>10</sup> Nuniagtai ángel chichaak: “Ishankaigpajum, wika atumin yamajam chichaman ujaktasan minitjime, ashí aents aidau shiig aneasagtata nuna.  
<sup>11</sup> Yamai kashia juik Davita yaaktajia nui makichik Uwemtikagtin, Apu Cristo akiinae.  
<sup>12</sup> Uchi pempeajam tagku ayugtainum egketu wainkattajum nunú atatuí”.  
<sup>13</sup> Nuniaig pachiachbau angeljai kuashat tikich ángel nayaimpinmaya aidau wantin-jau, nunikag Apajuin emematuinak:  
<sup>14</sup> “Nayaimpinmash Apajuiya duke emematiagmi, nugkanmash shiig agkan pujamu atatuí Apajuí wait anenjamu aina duka”, wajaidau.  
<sup>15</sup> Ángel aidau nayaimpinum wakitkiagmatai, pastor aidau pempeentunikiag:  
 —Belén wegagmi, Apu Apajuí nunike tusa ujakapa nu wainkagmi, tuidau.  
<sup>16</sup> Tusag waujus wegag jegakmag, Marian Josejai nuigtú uchi tagku ayugtainum egkemtatman wainkaju.  
<sup>17</sup> Nunik wainkag, uchi pachisa tibauwa nuna etsejuidau.  
<sup>18</sup> Tusa pastor aidau etsegbaun ashí aents antuidauk anentai jegachaju.  
<sup>19</sup> Tujash Mariak nu ashí tabau antukbaun sakapamainchau dekapreau, nuniak nuwi nuwig anentaimá pujau.  
<sup>20</sup> Nunikag pastor aidauk waketuinak Apajuin eme anentsag emematuidau, ashí antukbauji nuigtú wainkaja duka, ángel tibauk imanisag uminkau asamtai.

*Jesús jega Apajuí ememattainum ejegamu*

- <sup>21</sup> Ocho tsawan jegamtai, uchin pakaji ajapjuatasag adaikaju JESÚS. María eke ejapjumainchau aig, nu adaikattame tusa ángel tibaunak dutiksag.  
<sup>22</sup> Nunikag tsawan dita pegketnujia nu jegamtai, Moisés chicham umiktinnum tibaauwa dutiksag Jerusalén ejegawaju Apu Apajuí eemtin iwainaktatus.  
<sup>23</sup> Nunak Apu Apajuí tibau chicham umiktina nui agagbaunum: “Ashí uchi aishmag iwai akiinuk Apu Apajuinu atí”, tibau asamtai dutikawajui.  
<sup>24</sup> Nunik weenak Apu Apajuinu atinun jukiaju chicham umiktajum tibaunum: Jimag tórtola,\* nu atsakuig jimag paum tsakat itaatajum tibauwa dutiksag.  
<sup>25</sup> Nunú tsawantinig Jerusalén pujujakuí Simeón daagtin, pegkejan takau, wait anenk-agtin, Israelan Apajuí ichichjatna nuna wainkatatus daká pujú, Wakaní Pegkejishkam ajamu;  
<sup>26</sup> nuniau asa Wakaní Pegkejiya nu dekamtikau aajakui, Apu Apajuí Eteggamu waintsukek jakashtinaitme tusa;  
<sup>27</sup> nunin asa Wakaní Pegkeji anentaintikjam jega Apajuí ememattainum weuwai; Joseshkam Mariajai Jesusan jukiag jega Apajuí ememattainum jegawaju, chicham umiktinnum dutikatajum tawa nuna betek dutikatatus.  
<sup>28</sup> Nunik Simeón uchin minaaki juki Apajuin pegkegnum chichajak:  
<sup>29</sup> “Apuh, yamaik ame chicham tujutbauwa duka uminkau asamtai, mina inakjuk shiig agkan anentaimas jakati tusam idaitusta.  
<sup>30</sup> Wagki mina jiiui wainkajai ame uwemtikagtamunak,  
<sup>31</sup> ashí aents aeme awemamun wainkagtata nuna.  
<sup>32</sup> Juka tsaaptin judiochu aidaunash wantintuktina nuuwai, amina aentsjum Israel aina nu eme anentai atina nu”, tau.  
<sup>33</sup> Ashí nuna pachis uchi tutai, Josek Mariajai anentai jegachaju.  
<sup>34</sup> Nuna tii Simeón atumnash Apajuí yaimpaktinme tusa, Jesusa dukujin, Marian chichajak:  
 —Nijah, ju uchía junak kuashat Israel aina nuiyag dakitigtinai niina dakituidauk megkaejagtatuí, nuninai kuashat nemajigtina nu uwemjagtinai. Nigka Apajuinua nuna iwainatnai, tujash kuashat aents dakitigtinai,  
<sup>35</sup> aatus nuninak ditá anentain awa nuna iwainmabiagtinai, nu nuninamua nunú aminak espadayai ijumaina imatijamak anentaimin waitkagmastinai, tiuwai.  
<sup>36</sup> Nuanuig nuwa profeta Ana daagtin, Fanuela nawanji Aser weantu shiig muuntuch wajasá pujau. Nigka shiig tsakatuch aishina siete mijan pujusui,  
<sup>37</sup> nuniau wajemea ochenta y cuatro mijan wegau; nuigtush jega Apajuí ememat-tainum kashish tsawaishkam megkaechau, nuniau asa ayunó wajak Apajuin aujú pujú.

\* 2:24 “Tórtola” tawa duka pauma numamtin tagkumtai aajakui.

<sup>38</sup> Nuniaig niishkam, Apajuin see taku uchin pachis ashí aents Jerusalén agkanmitkam atinun dakaina nuna tau.

<sup>39</sup> Apu Apajuí chicham umiktajum tibauwa nunak imatiksag umikag, ditá yaaktaji Nazaret, Galilea nugkanum awa nui wakitkiaju.

<sup>40</sup> Tuja uchishkam tsakau nuniak senchi wegau, nuigtush senchi yachameau, tuja Apajuí wait anentamujish niini au.

*Jesús jega Apajuí ememattainum pujau wainkamu*

<sup>41</sup> Ashí mijantin José Mariajai, Jerusalén tuke wesagké aidau fiesta Pascua jegatai;

<sup>42</sup> nuniamunum Jesús doce mijan ajamu ai weajui Jerusalén fiesta inagkeautaiya nuna betek dutikatatus.

<sup>43</sup> Nunik fiesta ashimnakmatai ditak waketai nai Jesusak Jerusalén juwakui, Josek Mariajai dekainatsaig.

<sup>44</sup> Dita anentaimesajag, tikich aidaujais ijunag wegatai, tusag makichik tsawan kuwaekaju, nuniau ashí ditá waintai nuigtú ditá patayi aidanmash egaidau;

<sup>45</sup> tujash wainkachag Jerusalén waketai jaju egainak.

<sup>46</sup> Nunikag kampatum tsawanta jui wainkaju, jega Apajuí ememattainum maestro chicham umiktinun jintinkagtin aidaujai ejapena ekeemas, chichaagtai antak niishkam iniimak eketun.

<sup>47</sup> Ashí aents ni chichaamun antujuidauk, yachajin diijus puyatkag diidau, dita iniamash shiig aimu asamtai.

<sup>48</sup> Nunitaman apají dukujijai wainak puyatjuk, dukují chichajak:

—Uchijuh, ¿wagka jusha jutikagtame? Nijah, wi apajai shiig senchi puyatjukan egakun wekaetusjamna, tau.

<sup>49</sup> Tama ni ayaak:

—¿Wagka minash egatjume? ¿Atumek dekatsjumek mina Apagdau aidan uyumainaitag duka?, tau.

<sup>50</sup> Tujash ditak, wagkag tawa tusag dekagmainchau dekapedau.

<sup>51</sup> Nunikag Jesusan jukiag Nazaret waketai jaju, Jesús nui pujusá ashí dita tabaunak betek umiau. Tujash niina dukujig ashí Jesús nunikbaunak tuke kajimattsuk anentaimitú pujau.

<sup>52</sup> Tuja Jesuschakam nuní senchi tsakau, nuniak nuní senchi dekau, nunisag Apajuishkam shiig anentau nuigtú aents aidashkam shiig anentuidau.

### 3

*Juan Yamijatin uwegshunum chichagkagtukbau*

(Mt. 3.1-12; Mr. 1.1-8; Jn. 1.19-28)

<sup>1</sup> Tiberio César quince mijadai inabaunum, Poncio Pilato gobernador wajas Judeanum inamu, nuniai Herodes Galilea inamu, untsu niina yachi Felipe Iturea nuigtú Tracónitenum inamu, nuniai Lisaniás Abilinia inamu,

<sup>2</sup> nuniai Anás, Caifás aatus sumo sacerdote wajas pujuinai, Zacariasa uchijí Juan uwegshunum pujuttaman Apajuí ujakui chichagkagtukti tusa,

<sup>3</sup> dutikam niishkam Jordagnum tikiju batsataidaunum ashí wekaegas chichagkagtaw, tudau idaiyinak yamimajag tudau aidan tsagkugnagtinme tusa;

<sup>4</sup> profeta Isaías tibau agagbaunum tawa nunisag, duka:

“Makichik chicham uwegshunum untsubau antuewai:

‘Apu minitin jinta iwajatajum, jinta tutupit dakuetajum’,

<sup>5</sup> ashí japagau aidanash nugkan ainjatnai,

nainnashkam yumpuag pakamak betekmaktinai, jinta tunin aidanash tutupit esekatai, jinta

japaejau aidanash ainjatnai, tawai.

<sup>6</sup> Apajuí uwemtikagtamua nunak ashí aents wainkagtatui”, tawai.

<sup>7</sup> Kuashat aents aidau Juan yamijati tusag minituidau, nuniagtai chichajak: “¡Iwanchi uchijí aidauwah! ¿Yaa atumnash yamimaku Apajuí suwimkaji tikijuch wajasa nu uwemtumainai tusash tujabiagmae?

<sup>8</sup> Dekas tudau takatan idaisaush wajuku amainaita nunú iwainmamkatajum, wainka atumek anentaimesajum: Abraham wegantu asaja yupichu uwemain ainaji, tumamigpa; wagkí Apajuik jujú kaya aina junakesh Abrahama uchijí emamainai.

<sup>9</sup> Nuigtush yamaiya juik jachai kagkap tsupitiama dutikatatus Apajuí suwimkeg uminas awai; ashí numi nejenatsu duka tsupika jinum apeam atatuí”.

<sup>10</sup> Tutai aents aidau iniinak:

—¿Waji dutikmainaitji?, tuidau.

<sup>11</sup> Tiagtai ni ayaak:

—Jimag nugkumainji ajamuk atsugbaun susati, yumainji ajamushkam dutiksag dutikati, tau.

<sup>12</sup> Apú kuichkiji atinun ijumin ujumak yamijati tusag kaunawag iniinak:

—Maestroh, ¿jutiish wajukmainaitji?, tuidau.

<sup>13</sup> Tiagtai Juan ayaak:

—Wajupa akikmakta tibauwaita, nunú uwaekajum akikmakta tiigpa, tau.

<sup>14</sup> Tutai ujumak suntag aidaushkam iniinak:

—¿Jutiish wajukmainaitji?, tuidau.

Tiagtai:

—Makichkish uwakagmek atankigpajum, tikichish tsanugmek jujukigpa, apujum akigmaina nujai shiig aneasum juwaktajum, tau.

<sup>15</sup> Tuja aents aidauk, dakak batsataidau asag, ditá anentainig, Juagchauwashit Cristo, tuidau;

<sup>16</sup> tujash Juan ashí ditan chichajak: “Wika dekaskenmag yumí yamijatjai, tujash mina nagkaetasu makichik senchigtin minawai, wika niina sapatji jigkamunakesh atitmaitsujai niya imanchau asan. Niiyai Wakaní Pegkejiya nujai yamigmagtinuk nuigtush jiiyai yamigmagtina dushakam.

<sup>17</sup> Nigka trigo awagti wampuji utsanku neje akantayama numamtuk awakatatus uminas awai, dutika ijumtainum trigonak yajumak, wampujinak jii ajumaish kajinkashtina nui apeatnai”, tiuwai.

<sup>18</sup> Juna aatus tusa nuigtú kuashat tikich chicham aidaujai Juagkak aents aidauk jintintu yamajam chicham pegkeja nuna.

<sup>19</sup> Tuja gobernador Herodesan jiyakui, yachi Felipe nuwen Herodiasan juki pujau asamtai, nuigtú ashí pegkegchau dutikamuji aina nuna pachis,

<sup>20</sup> nu aaja tibau asa nuní nagkaemas pegkegchaun takaak, Juangkan achiká cárcel egkeauwai.

*Jesús yamimagbau*

*(Mt. 3.13-17; Mr. 1.9-11)*

<sup>21</sup> Ashí aents yamimainamunum, Jesuschakam yamimajui, nunik Apajuí aujai nayaim ujani;

<sup>22</sup> nuniai Wakaní Pegkeji pauma nunin wajas paan niini akaegu, nuniai nayaimpinmaya chicham antuekau:

—Ametme mina uchig aneetaigmek, aminí shiig aneamu ajutui, tabau.

*Jesucristo muunji aajakú aidau*

*(Mt. 1.1-17)*

<sup>23</sup> Jesús takatjin nagkamauwa duka treinta mijan tumain ajujukui, José uchijiyai tujakajua nu,

Josek Elí uchijí aajakui,

<sup>24</sup> Elik Matata uchijí,

Matat Leví uchijí, Levik Melqui uchijí,

Melquik Jana uchijí, Jana José uchijí,

<sup>25</sup> José Matatiasa uchijí, Matatías Amosa uchijí,

Amós Nahuma uchijí, Nahúm Eslí uchijí,

Eslí Nagai uchijí,

<sup>26</sup> Nagai Maata uchijí,

Maat Matatiasa uchijí, Matatías Semei uchijí,

Semei José uchijí, José Judá uchijí,

<sup>27</sup> Judá Joana uchijí, Joana Resa uchijí,

Resa Zorobabela uchijí, Zorobabel Salatiela uchijí,

Salatiel Neri uchijí,

<sup>28</sup> Neri Melqui uchijí,

Melqui Adi uchijí, Adi Cosama uchijí,

Cosam Elmodama uchijí, Elmodam Era uchijí,

<sup>29</sup> Er Josué uchijí, Josué Eliezera uchijí,

Eliezer Jorima uchijí, Jorim Matata uchijí,

Matat Leví uchijí,

<sup>30</sup> Leví Simeogka uchijí,

Simeón Judá uchijí, Judá José uchijí,

José Jonagka uchijí, Jonán Eliaquima uchijí,

<sup>31</sup> Eliaquim Melea uchijí, Melea Mainagka uchijí,

Mainán Matata uchijí, Matat Natagka uchijí,  
 Natán Davita uchijí,  
<sup>32</sup> David Isaí uchijí,  
 Isaí Obeta uchijí, Obed Booza uchijí,  
 Booz Salmogka uchijí, Salmón Naasogka uchijí,  
<sup>33</sup> Naasón Aminadapa uchijí, Aminadab Arama uchijí,  
 Aram Esroma uchijí; Esrom Faresa uchijí,  
 Fares Judá uchijí,  
<sup>34</sup> Judá Jacopa uchijí,  
 Jacob Isaaca uchijí, Isaac Abrahama uchijí,  
 Abraham Taré uchijí, Taré Nacora uchijí;  
<sup>35</sup> Nacor Serugka uchijí, Serug Ragau uchijí,  
 Ragau Pelegka uchijí, Peleg Hebera uchijí,  
 Heber Sala uchijí,  
<sup>36</sup> Sala Cainanka uchijí,  
 Cainán Arfaxata uchijí, Arfaxad Sema uchijí,  
 Sem Noé uchijí, Noé Lameka uchijí,  
<sup>37</sup> Lamec Matusalegka uchijí, Matusalén Enoca uchijí,  
 Enoc Jareta uchijí, Jared Mahalaleela uchijí,  
 Mahalaleel Cainagka uchijí,  
<sup>38</sup> Cainán Enosa uchijí,  
 Enós Seta uchijí, Set Adagka uchijí,  
 Adán Apajuí najanamu.

#### 4

*Iwanch Jesusan pegkegchau takamtiksata tibau*

*(Mt. 4.1-11; Mr. 1.12-13)*

<sup>1</sup> Jesús Wakani Pegkeji egkemtujam Jordagnumia wakettai, Wakani Pegkeji uwegshunum emauwai,

<sup>2</sup> cuarenta tsawan pujustí tusa, nui pujaun Iwanch pegkegchaun takamtiksata dekapasuwai. Nu tsawan aina nuwig makichkish yuwachui, nunú inagnamunum yapajuuwai.

<sup>3</sup> Nunitai Iwanch chichajak:

—Ame dekas Apajuí Uchijiyaitkumek, ju kaya ju pag najanam yuakia, tau.

<sup>4</sup> Tutai Jesús ayaak:

—Agagbau awai: “Aentsuk imá pagjaigkik pujumait sui, ashí Apajuí chichamega nujai pujumainai” tawai, tiuwai.

<sup>5</sup> Timatai Iwanch juki muja tsakajunum iwakui, dutika juu inaktamuik ashí nugkanum inamin aina nuna iwaintukui.

<sup>6</sup> Dutika Iwanch chichajak:

—Ashí ju imaja junak nuigtú ditá imanji aina nunashkam amina amastajame, wagki juka minai idaisamui, nuadui wi wakegamun sumainaitjai.

<sup>7</sup> Ame mina tikishmajam emematjakminig, ashí aminuk atí tusan idaitustajame, tau.

<sup>8</sup> Tama Jesús ayaak:

—¡Wetá Iwanchih! agagbau awai: “Imá amina Apujum Apajuiya duke emematta, nuniakum imá nigki umigkata” tawai, tiu.

<sup>9</sup> Timatai nui juki Jerusalén ejegau, dutika jega Apajuí ememattainum yakí nagkatkamunum iwaká:

—Ame dekas Apajuí Uchijiyaitkumek, tsekem iyata,

<sup>10</sup> wagki agagbau awai:

“Apajuí, angelji aidaun awetugmattawai amina kuitamjamkatnun,

<sup>11</sup> dutikam dita achigmakagtatui kayaká tukumkai tusa”, tiuwai.

<sup>12</sup> Tutai Jesús ayaak:

—Dushakam agagbauwai: “Amina Apujum Apajuiya nu pegkegchaunum dekapasatasame wakeyipa” tawai, tiuwai.

<sup>13</sup> Tuja Iwanchik pegkegchau takamtiksata tibaunak ashí dekapes, ujumak tsawan idaisauwai.

*Jesús Galileanum takatji nagkamamu*

*(Mt. 4.12-17; Mr. 1.14-15)*

<sup>14</sup> Nunik Jesusak Wakani Pegkeji senchintikam Galilea wakitkiuwai, nunikmatai ashí nugkanum nui batsataidaik niina pachisag kuashat chichaidau.

<sup>15</sup> Nui jegaa, jega ijuntainum wayá jintinkagtutai ashí aents aidauk emematuidau.

*Jesús Nazaret pujusbau*  
(Mt. 13.53-58; Mr. 6.1-6)

<sup>16</sup> Jesús Nazaret ni pujusá tsakagbaunum wakitki jegaa, tsawan ayamtai tsawagmatai jega ijuntainum wayau tuke nunin asa; nunik wajainiu Apajuí chichamen ausatatus,

<sup>17</sup> nunitai papí pempeagbau profeta Isaías agagbaun susaju, dutikam dakuek, ju pachisa agagbaun wainkau, nunik auju:

<sup>18</sup> “Apu Apajuí Wakaní minai awai, nuniau asa mina etegtuauiwai, ujunauach aidaunash yamajam chichaman ujakti tusa;

achikbau aidaunash antuinamunum senchi chichaká agkanmaetan ujakti, nuniak wainmachu aidaunash wainmitkakti, waitkatai aidaunash agkanmitkati,

<sup>19</sup> yamai mijana juuwai Apu Apajuí wakegamu tusa chichagkagtukti” tibauwa nuna.

<sup>20</sup> Nuna aujus inagnak papiin pempeag nui takaun susa ekeemsau; nunikmatai ashí aents jega ijuntainum utsanawajuk, dii pekajaidau.

<sup>21</sup> Nuniagtai:

—Agagbaunum tawa juka, atumin eemtimin yamai uminkae, tiuwai.

<sup>22</sup> Ashí aents aidauk niina pachisag pegkejan etsegtuidau, ni waji pegkeg pachisa chichamunashkam puyatjusag diidau, nuninak:

—¿Ju José uchijiya duchaukaih?, tuidau.

<sup>23</sup> Tiagtai ni ayaak:

—Dekaskenmag ju chicham: “Ampijatnuh, amek ampimata” tibauwa ju tujuttatjume. Nuigtushkam: “Kuashat waji aidau Capernaúm dutikamu antinuweg nu, juwish amina nugkeminish dutikata”, tujuttatjume.

<sup>24</sup> Nuna tii:

—Nuigtush dekas tajime, makichik profetakesh niina nugkenig shiig anentsá juwamak achauwai.

<sup>25</sup> Junak dekas tajai, Elías pujujakua nunú tsawantinig Israel nugkanmag kuashat nuwa waje batsamajakajui, nuniamunum kampakum mijan jimaituk yututsuk au asamtai, ashí nugkanum yapajut tepeauwai;

<sup>26</sup> tujash Eliasnak nuwa waje Israel batsata nui awematsuk, sareptanmaya nuwa waje yaakat Sidón tikiju awa nui pujaunum awemauwai.

<sup>27</sup> Nuigtushkam kuashat aents lepragtin Israel aijkui, profeta Eliseo pujujakua nunú tsawantin; tujash makichkish nunú aidaunak etsagautsuk, Naamán sirianmaya aajakua nuna etsagajui, tiuwai.

<sup>28</sup> Nu tabau antukag jega ijuntainum utsanawajuk senchi kajekaju,

<sup>29</sup> nunikag wajatjag Jesusan yaaktanmayan jiikiag, muja nagkatkamunum ditá yaaktajish nuwig au asamtai jukiag iwakaju betsag tajaekaunum ajuami tusag.

<sup>30</sup> Dutikam dita mininamunmag eteenki, waketak ukukiuwai.

*Aents wakan pegkegchau egkemtugbaun Jesús etsagagbau*  
(Mr. 1.21-28)

<sup>31</sup> Nunik Jesusak yaakat Capernaúm Galilea nugkanum awa nui weuwai, nui pujus tsawan ayamtai tsawautai jintinkagtau.

<sup>32</sup> Nunitai aents aidauk ni jintinkagtamujin puyatjuk diidau, wagki apu chichame antugtai jintimaina imatika jintinkagtau asamtai.

<sup>33</sup> Nuniai jega ijuntainum aents wakan pegkegchau egkemtuanu wayá eketu, shiig senchi untsumak:

<sup>34</sup> —¿Jesús nazaretnumiyah, ukujatkiti! ¿Wagka amesh jutii pujamunmash miname, ijijatuatasamek minam? Wika ame yaitpa nunak dekaame, amek pegkejam Apajuinu- itme, tiuwai.

<sup>35</sup> Tutai Jesús jiyak:

—¿Takamtak jiinkim ju aentsuk ukuktá!

Tama iwanchakam ditá eemtin ajiaju, nunik jiinkiuwai makichkish aentsnak pegkegchau ematsuk.

<sup>36</sup> Nunikmatai ashí aents aidauk anentai jegagchaju, nunikag pempeentunisag:

—¿Jusha wajuku asaya chichamesh senchigtinaita wakan pegkegchau aidaunash chichamenig jiyá dusha?, tuidau.

<sup>37</sup> Nu dutikamua duka, ashí nu nugkanmag antuejauwai.

*Jesús Pedro tsatsaji etsagagbau*  
(Mt. 8.14-15; Mr. 1.29-31)

<sup>38</sup> Jesús jega ijuntainmaya jiinki Simogka jeen jegauwai. Nuniai Simogka tsatsaji senchi tsuweak tepau, nunitai etsagagti tusag segajui.

<sup>39</sup> Tama Jesuschakam niina tsuntsumtua, tsuwemun ukuktí tamawaik pegkeg wajasá nantakí yutain umijuk ajamsauwai.

*Kuashat aents etsagakbau*

(Mt. 8.16-17; Mr. 1.32-34)

<sup>40</sup> Etsa akaegai, ashí aents makí makichik jatai jau aidau Jesusan ikautuawajui, dutikawagmatai niishkam makí makichik achiká etsagakui.

<sup>41</sup> Nuigtushkam iwanch kuashat aentsun egkemtuju aidau senchi unsumak jinainak:

—Amek Apajuí Uchijiyaitme, tuidau; tujash Jesusak senchi jiyau chichakai tusa, wagki ni Cristua nunak dekaidau asagmatai.

*Jesús Galileanum chichagkagtukbau*

(Mr. 1.35-38)

<sup>42</sup> Nunik tsawagmatai, Jesusak jiinki aents atsamunum weuwai. Nuniai aents aidauk egai egainakuag ni pujamunum jegawag, emetuidau ukujatki tusag.

<sup>43</sup> Tujash ni ayaak:

—Wika tikich yaakat aina nuwishkam yamajam chicham Apajuí inama nuna pachisan etsegmainaitjai, wagki nuna nunikti tusa awemamuitjai, tiuwai.

<sup>44</sup> Tau asa, Galilea\* jega ijuntai aidau mash wayá chichamnak etseju.

## 5

*Kuashat namak achikbau*

(Mt. 4.18-22; Mr. 1.16-20)

<sup>1</sup> Jesús kucha Genesaretun uwet wekagai, kuashat aents Apajuí chichamen antuk-agtatus tuwakag chanuidau.

<sup>2</sup> Nuniamunum jimag barca kaamatak tepaun Jesús wainkauwai, namaká main aidau redjin nijainak jijnjá ukukbau.

<sup>3</sup> Nunik makichik Simogka barcajiya nui egkemag, machik ejapen inananta tusa, nui ekeemas aents namaká uwet tuwakun jintintu.

<sup>4</sup> Nunik chichamun ashimak, Simogkan chichajak:

—Wiyankam kuchanum ejapeantam redjum ajugkam namak maata, tau.

<sup>5</sup> Tama Simón ayaak:

—Maestroh, kashi red ajú ajunkawa tsawampakuish makichkish maachmaji, tujash ame chichamjumin ajugtjai, tau.

<sup>6</sup> Tusag ajukmag, shiig kuashat namakan chimpikaju, imatikamu asa rednak ichiau.

<sup>7</sup> Nunitai ditá kumpají tikich barcanmayan iwiyaidau, taawag yaimpaktinme tusag. Dutikam kautuawaju, nunikag namaknak barcanmag mai aimkaju, dutikam tepeattak wajau.

<sup>8</sup> Imanitai Simón Pedro nuna wainak, Jesusa eemtin tikishmag:

—Apuh, ukugkita minak, wika tudauwaitjai, tiu.

<sup>9</sup> Namakan imatika kajegká ishankau, nunisag ashí nijai yujaidaushkam,

<sup>10</sup> nuniamunum Jacobo, Juan Zebedeo uchiji Simogka kumpají aina dushakam nunikaju. Nunitai Jesús Simogkan chichajak: —Ishankaipa, yamai nagkamsamek namak maatasa wekaetam anmamtuk, Apajuí chichame etsegkum aents aidau minai ikautjin atame, tiu.

<sup>11</sup> Nunikag barca aidau anugkag, ashí ukuinak, Jesusjai weajui.

*Aents lepragtinun Jesús etsagagbau*

(Mt. 8.2-4; Mr. 1.40-45)

<sup>12</sup> Tikich tsawantai, Jesús makichik yaaktanun pujai, aents lepragtin tajauwai, nunik Jesusan wainak tikishmag tsunsumá, nijayin nugká antig pujusá:

—Apuh, wakegakmek etsaentumainaitme, tau.

<sup>13</sup> Tama Jesuschakam uwejin antiak:

—Wakegajai, pegkeg wajastá, tiuwai.

Tusa tamawaik leprak megkaekauwai.

\* 4:44 Tikich papí agagbaunmag “Judea” tuinai, tikich agagbauwa nui “Galilea” tawa nuyia jukimui, nunin asa mai pegkejai.

<sup>14</sup> Dutika: Makichkish ujakaipa, sacerdote jegajuam wantintukta, nuniakum ofrenda susata ame pegkeg webaugmin Moisés tibauwa dutiksamek, ditashkam waipakag, dekas tsagaje tujamtinme, tiuwai.

<sup>15</sup> Tujash ni dutikamua duka nuní nagkaemas naatu, nuniau asamtai kuashat aents tuwajuidau ni chichamen antugkagtatus nuigtú dita jaamujinash etsaentugti tusag.

<sup>16</sup> Tujash nigka nugka agkantu aidaunum wegau, nunik Apajuin auju.

*Jesús aents wekaechau etsagagbau*

(Mt. 9.1-8; Mr. 2.1-12)

<sup>17</sup> Makichik tsawantai Jesús jintinkagtau, nuniemunum fariseo aidau, maestro chicham umiktinun jintinkagtin aidau eketaidau, nunú aidauk ashí yaakat yaijuch galileanmaya, Judeanmaya nuigtú Jerusalegnomia aina nuyia kaunawajui. Nuniemunum Apu Apajuí senchijin Jesús iwaidau aents aidau etsagamunum.

<sup>18</sup> Nuniemunum ujumak aents aidau, aents wekaechaun camillanum pataidiag itawag, awayatag tuidau Jesús wajamunum ejentuntatus.

<sup>19</sup> Tujash kuashat aents tuwakú asa waimainchau asamtai, jegá tuntupen wakaju, nunikag ujjag aagkawag, wekaechauwa nuna camillanum akakijau, dutikawag ejapen Jesusa eemtin aepsaju.

<sup>20</sup> Jesús dita dekaskeapi tabaujin wainak chichajak:

—Aishmagkuh, amina tudaujum aidauk tsagkugnaje, tau.

<sup>21</sup> Nuna tutai chicham umiktinun jintinkagtin aidau, fariseo aidaujai ditak anentaim-sag: “¿Niish ya asaya Apajuinash pegkegchaunash chichajua? ¿Ya tudau aidanash tsagkugkagtumainaita imá Apajuikeajama?”, tuidau.

<sup>22</sup> Tu anentaimaidaun Jesús dekau asa ditan chichajak:

—¿Wagka annush anentaimjume?

<sup>23</sup> ¿Tuwaita imá yupichuch tumainush, amina tudaujum aidauk tsagkugnaje taja dukaih, atsa nantakim wetá tumainaitag dukaih?

<sup>24</sup> Tujash Aentsmaga akiinawuwa nu, ju nugka juwush tudau aidanash tsagkugkagtu-maina nu dekaatajum.

Tusa wekaechaun chichajak:

—Amina tajame, nantakim camillajum jukim jeemin wakitkita, tiuwai.

<sup>25</sup> Tusa tamawaik ditash wainainag nantakiuwai, nunik camillajin juki Apajuin emematki jeen weuwai.

<sup>26</sup> Dutikamtai ashí aents aidauk puyatkaju, nunikag Apajuin emematiaju, nunik ishankag, chichainak:

—¡Yamai anentai jegagmainchau wainakaji!, tuidau.

*Jesús Leví untsukbau*

(Mt. 9.9-13; Mr. 2.13-17)

<sup>27</sup> Nuna dutika ukuak jinki, nunik wekamá Leví\* apú kuichkiji atinun akikmagtai ijumak ekeematman wainkauwai, nunik chichajak:

—Wegajai mina jintintaig aminum, tiuwai.

<sup>28</sup> Tama ni takatajinak ashí ukuak niijai weuwai.

<sup>29</sup> Nunik nunú tsawantaik Jesusan eme anentus ajamsatatus niina jeen yutain shiig umikú, dutikamunum Leví kumpaji, apu romanmaya kuichkiji atinun ijumin aidaushkam, nuigtú tikich aidaujai mesanum pekajaidau.

<sup>30</sup> Nuniagtai maestro chicham umiktinun jintinkagtin aidau fariseo aidaujai, Jesusa jintintaiji aidaun chichajuinak:

—¿Wagka atumesh apú kuichkiji atinun ijumin, nuigtú tudaugtin aidaujai ijunjajum yuwakjumes, umutash umagme?, tuidau.

<sup>31</sup> Tiagtai Jesús ayaak:

—Jamamtuchu aidauk ampijatnunak atsumatsui, jau aidau atsumawai.

<sup>32</sup> Wika aents pegkejan takau aidau untsuktasan minichuitjai, wika aents tudaugtin aidau tudaujin idaiyinak mina nemagtuktinme tusan tauwaitjai, tiuwai.

*Ayuno pachisa iniimsamu*

(Mt. 9.14-17; Mr. 2.18-22)

<sup>33</sup> Jesús tutai dita aiinak:

—¿Wagka Juagká jintintai aidauk, kuashatá ayunainak Apajuinash aujin agmae nunisag fariseo aidaushkam, tujash amina jintintaijum aidauk ayatak yuwinak, umut-nash umú yujainawa?, tuidau.

<sup>34</sup> Tutai Jesús ayaak:

\* 5:27 Diistá Mr. 2.14.

—¿Nuwenbaunum ipaamu aidaush, nu nuwenu ditajai pujaigkish, ayunatajum tumainuk ainajum?

<sup>35</sup> Tujash tsawan jegattawai nuwena nunú juwam atata nu, nunikmatai ayunawagta-tui, tiuwai.

<sup>36</sup> Tusa junashkam augmatus:

—Makichkish nugkurai yamagman tsupikag nugkurai mamujunmag adujtuchu ainawai, dutikamak nugkurai yamagmaitak besemain asamtai, tuja yamajam tsupikbau mamujunum adujtamashkam shiig juwamaitui.

<sup>37</sup> Dutiksaik vino yamagmashkam, duwap apagbau ajutnumag yajashtaiyai, dutikamak vino yamajam ichiimainai nunik ukaemainai, nunitai duwapshakam ajapnamainai.

<sup>38</sup> Nuadui vino yamagmak duwap yamagmanum yajataiyai, dutikamu asa mai betek amainai. <sup>39</sup> Tuja umutai kajiau unim aidauk, yamá kajiaunak wakegainatsui, wagki: “Kajiau imá pegkejai” tuidau asag, tiuwai.

## 6

*Jesusa jintintaiji aidau tsawan ayamtai aig trigo juki yuwawagbau*

(Mt. 12.1-8; Mr. 2.23-28)

<sup>1</sup> Tsawan ayamtai tsawaju ai, Jesús ajak ajakbaunum nagkaebau. Nuniamunum ni jintintaiji aidau trigo nejeen kupik jukiag uwejin pakajag yuwidau.

<sup>2</sup> Nuniagtai ujumak fariseo aidau chichajuinak:

—¿Wagka tsawan ayamtai tsawagmataig takantsashti tibauwa nunin aish aikagme?, tuidau.

<sup>3</sup> Tiagtai Jesús ayaak:

—¿Atumek agagbauk ausachuk ainajum, David niijai yujamujai yapajuinak,

<sup>4</sup> jega Apajuí ememattainum wayá, pag imá sacerdotek yuwati tibauwa nuna yuwak, niina kumpají aidaunash susauwa duka?, tau.

<sup>5</sup> Nuna tii, nuigtú chichaak:

—Aentsmaga akiinauwa duka, tsawan ayamtaiya nuna Apujiyai, tiuwai.

*Tsawan ayamtai aig Jesús aents jau etsagagbau*

(Mt. 12.9-14; Mr. 3.1-6)

<sup>6</sup> Ataktú tikich tsawan ayamtai ai, Jesús jega ijuntainum wayau, nunik jintinkagtau; nuniamunum nui aents uwejí untsujiya nu jaka ekeemkau pujau.

<sup>7</sup> Nunitai maestro chicham umiktinun jintinkagtin aidau, nuigtú fariseo aidaujai Jesusan dii ijuntuidau, tsawan ayamtai aish etsagagchatpash tusag tsanumjugtasag.

<sup>8</sup> Tujash nigka dita anentaibaujinak dekau asa, aents uwejí jaka ekeemkau chichajak:

—Wajaktá, nunikam ejapen wajantá.

Tama niishkam wajakí ejapen wajantú.

<sup>9</sup> Nunikmatai Jesús chichajak:

—Iniastajime: ¿Tsawan ayamtai aina nuwish pegkejan dutikati atsa pegkegchaun dutikati tibaukait; etsagautskek jakati tusa idaimainait?, tau.

<sup>10</sup> Nuna tii ashí aents nui ijunun diisá, nuna aentsun chichajak:

—Uwejum dakuekta, tiuwai.

Tama dakueku, nunik uwejenig pegkeg wajasui.

<sup>11</sup> Dutikamtai ditak senchi kajekag, Jesusash utugmainkita tusag chichaidau.

*Jesús ni apostolji agtin aidau etejamu*

(Mt. 10.1-4; Mr. 3.13-19)

<sup>12</sup> Nunú tsawantai Jesús Apajuí ausatatus mujanum weu, nunik nui kashi pujus Apajuí au aujkawa tsawampajui.

<sup>13</sup> Nunik tsawag jintintaiji aidau untsukui, dutika nunú aina nuiyan doce etegjauwai, nunú aidau apóstol tusa adaijauwai.

<sup>14</sup> Duka jujú ainawai: Simón, Pedro atatme tibauwa nu, Andrés Simogka yachi, Jacobo, Juan, Felipe, Bartolomé,

<sup>15</sup> Mateo, Tomás, Jacobo Alfeo uchijí, nuigtú Simón Zelote tutai aajakua nu.

<sup>16</sup> Judas Santiago uchijí, nuigtú Judas Iscariote Jesusan sujukua nu aatus.

*Jesús kuashat aents jintintuamu*

(Mt. 4.23-25)

<sup>17</sup> Nunik mujanmaya ditajai ijunag akaiki, pakanum wajantú, nunikmatai kuashat aents tuwagkaju ashí judeanmaya, jerusalegnumia, Tiro nayantsa uwet awa nuiya, sidognumia aidau, ni jintinkagtamujin antukagtatus, nuigtushkam dita jaamujinash etsaentugti tusag,



<sup>18</sup> nunikag wakan pegkegchau egkemtugbau aidaush tsagagkaju.

<sup>19</sup> Ashí aents aidauk Jesusan antigtatus kakanmamaidau, niiniya senchi jjinak ashí aents jau aidaunak etsagau asamtai.

*Shiig aneasagtin waittsagtinjai tibau*  
(Mt. 5.1-12)

<sup>20</sup> Jesús ni jintintaiji aidaun diisá chichajak: "Shiig aneastajum atum ujunauch aidautigmek, wagki Apajuí inama duka atumdaus asamtai".

<sup>21</sup> "Shiig aneastajum yamai yapajautigmek, wagki shiig juwakagtin asajum. Shiig aneastajum atum yamai buututigmek, wagki shiig aneakjum dushigtin asajum.

<sup>22</sup> "Shiig aneastin atajum, Aentsmaga akiinawu nemaju asagmin aents aidaus kajegtamainak, yajá pujusta tusa jiiipainak, pegkegchau chichagtamainak, daagmin adaisajash pegkegchau tujamainakuish.

<sup>23</sup> Nunú tsawantinig shiig aneakjum dakujustin atajum, wagki atum jukitnuk shiig muun nayaimpinum ajutjamaidaus asamtai; wagki aatus dutikajakú ainawai atumi muunjum, profeta aajakajua nunashkam.

<sup>24</sup> "¡Tujash wait anentajime atum wiyakuch aidautigminak, wagki ju nugka juwig atum shiig aneamuk ajutjamaidaus asamtai!

<sup>25</sup> "¡Wait anentajime atum yamai shiig yuwá batsatutigminak! wagki atak yapajuawagtin asagmin.

"¡Wait anentajime atum yamai dushit batsamtautigminak, wagki wake besemag jegagtamkui buuttin asagmin!

<sup>26</sup> "¡Wait anentajime atum ashí aents pegkegnum chichajam aidautigminak! wagki atumi muunjum aajakajua dusha wait profeta aidaun imatikas chichajajakú aina dui.

*Shiwajui aidau aneamu*  
(Mt. 5.38-48; 7.1-2, 12)

<sup>27</sup> "Tujash atum mina antugtautigmin tajime: Atumi shiwajum aidaush aneetajum, kajegtamaidauskam pegkegnum yaigtajum;

<sup>28</sup> pegkegchau chichagtamaidaus pegkegnum chichagkatajum, wainak tsanumjutpainakuish Apajuí aujtustajum.

<sup>29</sup> Yapinum awatamkujaish, tikich yapiminish awapiti idaitusta; capa\* jujutjamkujaish tunicagmesh<sup>†</sup> sujittusuk susata.

<sup>30</sup> Makichik aentskesh segapakuig susata; tuja amina wajiigmin jujutjamkuishkam, awagtugkita tiipa.

<sup>31</sup> Atum tikich aidau shiig awajtuktinme tusajum wakejin ainajum nunisjume tikichish shiig awajkatajum.

<sup>32</sup> "Atumin anempa duke atumshakam aneakjumesh, ¿wají imana juwagme? Wagki aents tudaus aidaushkam dita aneniamujaig aneninawai.

<sup>33</sup> Atumin shiig awajtamaina duke shiig awagmakjumesh ¿wají imana juwagme? Wagki aents tudaugtin aidaush nunak nunin ainawai.

<sup>34</sup> Atum kuichkin ekes awagtugmamaina duke tsagkatkugmesh ¿wají imana juwagme? Wagki aents tudaugtin aidaushkam penpeentunisag tsagkatdayin ainawai, uwaegak jukitag tuidaus asag.

<sup>35</sup> Atumi shiwajum aidaush aneetajum, nuigtush shiig awajkatajum, nuigtushkam tsagkatkatajum, niish minash jutiksag iktukti tusa dakatsuk, aatus nuniamunum waji shiig pegkeg jukitnuk ajutjamtinai, nuniakjum Apajuí ashí tikich aidau nagkaesau muunta nuna uchijí atajume; wagki nigka pegkejai, niina see tuchau aidau, pegkegchau aina nujaiskam.

<sup>36</sup> Wait anenkagtin atajum, atumin Apa wait anenkagtina ibau.

*Tikichi pujutji pachisjume augmatigpa tibau*  
(Mt. 7.1-6)

<sup>37</sup> "Tikichi pujutjig augmatú yujaigpajum, atumesh dutiksagmek tama aijum. Suwimkash sukagtusaipa amesh suwimak suwam aim, tsagkugkagtugtajum dutiksaik tsagkujam aminjum.

<sup>38</sup> Tikich atsumau wainkugmek susatajum, atumnash Apajuí amastinme tikich atsubau wajak suwagme dutiksag. Nigka shiig kuashat atum atsumamu nagkaesau amastatjume.

\* 6:29 "Capa", tawa duka awantak nugkutai esajam aajakui. Lana nuniachkush cabra uje nuniachkush ujuch najanamu tsetsemaku nuniachkush dasenkui dukumatai. Diistá Mt. 9.20. † 6:29 "Túnica", tawa duka jaanch nugkutai esajam tikishia imaan jegaaku aajakui. Duwap nuniachkush uje nuniachkush lana nuniachkush lino najanamu aajakajui. Ujunauch aidauk imá tunicanak nugkujakajui.

*Tikich augmatigpa tibau**(Mt. 7.3-6, 15-23; 12.34-35)*

<sup>39</sup> “Jesús junashkam augmatak tau: ¿Wainmachua dusha tikich wainmachunash jintanash inaktumainkaih? ¿Mai waanum iyaumainchaukaih?

<sup>40</sup> Jintintaiya duka jintinkagtina nuna nagkaesachui. Untsua papí augbaujin ashinkatta dui, niina jintinta iman wemainai.

<sup>41</sup> “¿Wagka yatsumi jiin chipum tekani egkemaush diyagme, atumi jiimin numi egketa nu diitskesh?

<sup>42</sup> ¿Utugsamea amina yatsumish: Yatsuju jasta chipum tekani jiimin egketa nuna jigkitjame tumainaitme? ¿Tsanumin aidauwah! Dekatkauk amina jiimin numi egketa nu jiiktá, nunikam shiig wainkam yatsumi jiin chipum tekani egketa dusha jiigkita.

*Numik niina nejeen dekataiyai*

<sup>43</sup> “Numi pegkejak pegkegchaunak nejemaitsui, numi pegkegchaushkam pegkegnak nejemaitsui.

<sup>44</sup> Wagki makí makichik numi aidauk ni nejea dui dekanui; untukjak munchiinak nejetsame, antsag uvashkam zarzanmayag juushtayame.

<sup>45</sup> Aents pegkejak pegkegnak chichauwai, wagki pegkeja duka anentain ajamu asa. Nunisag aents pegkegchaushkam pegkegchaunak chichauwai, wagki pegkegchauwa duka anentain ajamu asa; wagki shiig kuashat anentain aja nunak, chichaak iwainawai.

*Jegamkatasa ajiagbau pachisa tibau**(Mt. 7.24-29)*

<sup>46</sup> “¿Wagka: ‘Apuh, Apuh’ tujutjume wi taja nu umiachiatkugmesh?

<sup>47</sup> Ashí aents minai tanta, mina chichamjun antugtugak imatiksag umidaunak wajijai betekaita nuna titajai.

<sup>48</sup> Duka aents jegá jegamkatatus initalak tai, kaya muunnum dekanmitkak ajiamun, namak piyujak jegan senchi tukuakush, kayanum dekanmitkakbau asamtai machikish umushkachua numamtainai.

<sup>49</sup> Tujash mina chichamjun antayatak umigtachuk, aents jegá jegamak, ajitsuk nugká awanken ekeni jegamkamun, namak piyujak jegá senchi tukú tegak shiig tsaik ajapauwa numamtainai”.

**7***Jesús Capernaumnumia capitani inaken etsagagbau**(Mt. 8.5-13; Jn. 4.43-54)*

<sup>1</sup> Jesús aents aidau jintinbaun ashimak Capernaúm weuwai.

<sup>2</sup> Nui makichik capitán pujau, nuna inake aneetaijiya nu jau, nuniak jakattak tepau.

<sup>3</sup> Nunitai Capitán Jesús pachisa chichaamun antuk, ujumak judío apuji aidau awetiuwai, mina inakjun taa etsaentujati, timae titajum tusa.

<sup>4</sup> Tima Jesusan jegajiag ujakaju, nuninak:

—Au capitani dekas wait aneasam yaimainaitme;

<sup>5</sup> nigka judío aidautinash anejatnuwe, nuniau asa jega ijuntainash jegamjupakmayi, tuidau.

<sup>6</sup> Tiagtai Jesuschakam ditajai weuwai. Tujash jegá tikiju wajasá weenai, capitán\* ujumak niina kumpají aidau ishikauwai, dutikak: “Apu kajegtukaigka, wika niia ibau, mina jegajui utuamak amaitsujai;

<sup>7</sup> nuniau asan wika niinakesh adijmaitsujai, tujash tsagagti tujutti, tamak mina inakjush tsagagtatui;

<sup>8</sup> wagki wikishkam apu umigbau ajutui, antsag suntag mina umigtuidaush ajutuinawai, nunú aina nuiyan wi: Wetá, tamak wegawai: Tikichia nuna: Taata, tamak minawai, aikasuk mina inakjunash: Ju dutikata, tamak dutikawai”, tujamae tita tiuwai.

<sup>9</sup> Tusá ujaam Jesús antuk anentai jegagchau, nunik nui aents minidaun ayampattag: —Dekas tajime, Israel aina nuiyanakesh imatika dekaskeapi tabaují ajamunak wainkachjai, tau.

<sup>10</sup> Nunú awemamu aidau waketug jegá jegakmag, inak jau ukukbauk tsagag pegkeg pujaun wainkaju.

*Nuwa waje uchijí jakau Jesús inankimu*

<sup>11</sup> Nu nuniku ai, Jesús yaakat Naín tutainum wegau, nunitai ni jintintai aidau nuigtú kuashat aents aidau saetukaju.

\* 7:6 Diistá Mt. 8.8.

<sup>12</sup> Nunik yaakta waitijin tikiju wajas wegai, nuwa waje uchiji makichkiuch ajamu jakamtai ukustatus emaidau, nunitai nuwan uyunainak kuashat aents weedau.

<sup>13</sup> Nunittaman Apu Jesús nuwan wainak wait anenjau, nunik chichajak:

—Buutipa, tiu.

<sup>14</sup> Tusa jakaw patasá yanaki emamun adijkau, nunik antigku. Dutikamtai yanasá weedash wajanataju, nunikmatai Jesús chichajak:

—Datsauchih, amina tajame nantaktá, tiu.

<sup>15</sup> Tama jakaushkam nantakiu, nunik chichatan nagkabau, nunikmatai Jesús dukujin susauwai.

<sup>16</sup> Dutikamtai ashí aents aidauk ishambag Apajuin emematuinak: Profeta dekas senchigtin jutiinash wantintugmakji, Apajuí ni aentsji aidautin yaimpektatus tajutjamaji, tuidau.

<sup>17</sup> Nu Jesús dutikamuk ashí Judeanmag antuekau, nuigtú tikiju aneem batsatu aidaunmashkam.

*Juan Yamijatn ni jintintaiji aidaun chicham dekaatajum tusa ishiakbau*

(Mt. 11.2-6)

<sup>18</sup> Juagká jintintaiji ashí nu waji dutikamu aidaun ujakaju. Dutikam Juagshakam jimag jintintaijin untsuká,

<sup>19</sup> Apu Jesús pujamunum awemau iniastinme: “¿Amekaitam minitnai tibauwa nu atsa tikichik dakastatag?” tusa.

<sup>20</sup> Tusa awemajam Jesusan jegajuawag:

—Juan Yamijatna nu amina iniasti tusa awetamaji, nuniak: ¿Amekaitam minitnai tibauwa nu atsa tikichik dakastatag? timae, tuidau.

<sup>21</sup> Nuna tuinaig aents jau aidaun, tikich jatai waituidaunash, wakan pegkegchau egkemtuamu aidaun, nuigtú kuashat wainmachu aidaunash nimitkijau.

<sup>22</sup> Tiagtai Jesús ditan ayaak:

—Wetajum, nunikjum atum wainkaujum ju nuigtú antukujum dushakam Juan ujaktajum: Wainmachush wainmainawai, shutú aidaushkam wekaegainawai, lepragtin aidaush tsagainawai, empekush antuinawai, jakaush nantainawai, tuja ujunauch aidauk yamajam chicham ujaam ainawai;

<sup>23</sup> nuigtú shiig aneasagtinai minai dekaskeapi tabaujin megkaegainatsu duka, timae tusam ujaktajum, tiuwai.

*Juan pachisa Jesús tibau*

(Mt. 11.7-15)

<sup>24</sup> Juan awemamu aidau waketjamtai, Jesús Juangkan pachis aents aidaun iniak: “¿Waji wainkatasagma uwegshunmash weabiugme? ¿Tagkanan dase umpuau wainkatasagmek weabiujum?”

<sup>25</sup> Nuniachkugmesh ¿waji wainkatasagma weabiugme? ¿Aents, jaanch shiig pegkejan nugkuja pujau wainkatasagmek weabiujum? Atumek dekagme, nugkutai shiig pegkejan nugkuaju aidauk rey aidau jeen shiig aneek pujuinawai.

<sup>26</sup> Tujash ¿waji wainkatasagma weabiugme? ¿Profetaka? Ehé, dekaske, duka profeta nagkaesau aajakui.

<sup>27</sup> Juuwai ni pachisa agagbauwa duka:

“ ‘Wi mina chichamjun etsegnun emtikan awemajai, ni jintanak umigtamkati tusan’, tawa nu.

<sup>28</sup> “Dekas tajime, ashí aents akiinaina nuiyag Juagká nagkaesauk atsawai, tujash Apajuí inamtainig aents imanchauchia nuuwai niina nagkaesauk.

<sup>29</sup> “Nunú tabaun antukag ashí aents aidau nuigtú apú kuichkiji atinun ijumin aidaushkam, Apajuí nuniktinme tusa wakega nuna dutiksag umiinak, Juan yamijatbaunum yamimakajui.

<sup>30</sup> Tujash fariseo aidauk, maestro chicham umiktinun jintinkagtin aidaujai dakitjaju, Apajuí ditan wait anentuinak umiktajum tibauwa nu umitnak, nunidau asag Juan yamijatbaunmash yamimakchajui”.

*Juangkan dekaskeapi tichaju aidau*

(Mt. 11.16-19)

<sup>31</sup> “¿Jujú aents aina junash wajijai apatkanua tumainaitja? ¿Wajijai betekai tumainaita?”

<sup>32</sup> Ditak, uchi aidau plazanum pekaamsag kumpajijai untsuninak: ‘Flauta umpuakuish, atumek nantsemachmaugme; wake besemjan kantamkuish, bu-utchamugme’, tudaiyin aina numamtin ainawai.

<sup>33</sup> Wagki Juan Yamijatin taa pagnash yuwachu, vinonash umachu nuniakui atum chichagkujum: Iwanch ajamu asa aniwai, tajume.

<sup>34</sup> Tuja Aentsmaga akiinauwa nu yutainash yuwau, umutainash umakui: Ju aentsua juka yuwa yuwakua wegawai nuigtush vino umú wekaewai, nuniau asa apú kuichkiji ijumin nuigtú tudaugtin aina nuna kumpajiyai, tajume.

<sup>35</sup> Tujash Apajuí yachajiyi nunak, uchiji aina nu pegkegnak iwainawai”.

### *Jesusan fariseo Simón daagtin ipaamu*

<sup>36</sup> Fariseo aina nuiya yujumkan ajamsatatus Jesusan ipauwai, tima fariseo jeen wayá mesanum jegan ekeemsauwai.

<sup>37</sup> Nuniai nuwa pujutji pegkegchauwa nu yaaktanum pujau. Nuniau Jesús fariseo jeen yuwak pujawai tabaun dekaa, botella alabastro najanamunum kugkuinun juki tajuntau;

<sup>38</sup> nunik Jesusa nawen ayaumas pujus buutak nawen negaikiajui, dutika intashinig ujgutu, nuniak nawen kugkuntak kugkuinui ukatu.

<sup>39</sup> Dutiktai fariseo Jesusan ipauwa nunú nigki anentaimas: “Jujú aents profetayaitkug, ya antiawa, tuja jusha nuwash wajukuita, pujutji pegkegchauwa nuna dekamainapi”, tau.

<sup>40</sup> Nunitai Jesús chichaak:

—Simón, makichik wajiin titajame.

Tutai:

—Maestro tujutta, tau.

<sup>41</sup> Tutai Jesús ayaak:

—Kuichkin tsagkatkagtinun jimag aents diwimaidau, nuniamunum makichkia nu quinientos denario diwimai, tikichia nu cincuenta diwimu;

<sup>42</sup> nunú akikmamainji atsujiagtai mai tsagkujauwai. Yamai tujutta: ¿Ju jimaja juwiyash tu imá senchish aneemainaita?, tau.

<sup>43</sup> Tama Simón ayaak:

—Diwijí imá muun tsagkujamua nu imá senchi aneemain diyajai. Tutai: Duka dekas tiume, tau.

<sup>44</sup> Tusa nuwan ayampatua diis Simogkan chichajak:

—¿Ju nuwa wainmek? Jeemin wayamjai, nunikmataish daweg dijagtinuk yumik sujuschamume; tujash jujú dawejun negaikig niina intashinig ujgutu.

<sup>45</sup> Kumpamjakmesh minak kugkuntsachmaume; tujash ju nuwa juka wayamag dui nagkamas dawegnak kugkunjú pujawai.

<sup>46</sup> Buukeajuish aceiteyaikish nijatkachmaume; tujash jujú kugkuinui dawejun niatjuje.

<sup>47</sup> Nunin asamtai tajame; niina tudauji shiig kuashta duka ashí tsagkugnaje, dutikamu asa imá senchi anentui, tujash aents tudauji ujumak ajamu tsagkujamuk ujumak anentui, tiuwai.

<sup>48</sup> Nuna tii nuwan chichajak:

—Tudaujum aidauk tsagkugnaje, tiu.

<sup>49</sup> Tuja mesanum nijai pekajaidauk ditak pempeentunisag chichainak:

—¿Jusha ya asaya tudaunash tsagkugagtawa?, tudayinau.

<sup>50</sup> Tuinaig nigka nuwan chichajak:

—Ame dekaskeapi tame nu uwentijamjae, shiig agkan anentaimsam wetá, tiuwai.

## 8

### *Nuwa aidau Jesusan yaigkú aina nu*

<sup>1</sup> Nuna nunik Jesusak kuasht yaakat aidaunum nuigtú yaakat yaijuch aidaun-mashkam wekaegas, yamajam chichaman Apajuí inabaujin pachis etseju, nunitai doce aina nunú uyunaidau,

<sup>2</sup> nuigtú ujumak nuwa wakan pegkegchau egkemtuamu, jau aidau etsagagbau aidaushkam uyunaidau. Nuanui pachitkau María magdalanmaya, siete wakan pegkegchau egkemtuamu jijamua nunú,

<sup>3</sup> tikich Juana, Cuza Herodesa kuichkijin kuitamna nuna nuwe, Susana, nuigtú kuasht aidau ditá wajiji aina nujai yaidau.

### *Ajakan ajakbau pachisa Jesús augmattsamu*

(Mt. 13.1-9; Mr. 4.1-9)

<sup>4</sup> Makí makichik yaakat aina nuiya aents minidau Jesusan wainkatasag, nunikag kuasht tuwakagmatai Jesús juna pachis augmata:

<sup>5</sup> “Ajakan ajakbau ajajin ajaka jigkayin nagkimak ukutatus weuwai, dutika ajakmau asa. Nunik ajajin jegaa nagkimkau, dutikam ujumak jigkai jintaa kakekauwai, nunikun aents najakag ukukbaun yakiya pishak kaketuk amukajui.

<sup>6</sup> Tikich jigkai kayagnunum kakekauwai, nunik tsapainiuwaitak jakauwai, chupit-nuchu asamtai.

<sup>7</sup> Tuja tikich jigkaik jagki ayaunum kakekauwai, nunik tsapaittaman jagki yutua ijinauwai.

<sup>8</sup> Tujash tikich jigkaik nugka pegkegnum kakekajui, nunikajuk tsapaidiag shiig nejekajui, makí makichik ajak cien jigkain nejeawajui”.

Nuna tii senchi jiiká chichaak: “Ni antutaiji ajamak antuktinme”, tiuwai.

<sup>9</sup> Timatai jintintaiji aidau, wají takumea nu augmattsamesh timaume tusag inidau.

<sup>10</sup> Tama ni ayaak:

—Atumnak Apajuí ni inabauji dekaachbau aajakajua nuna dekamtijamjume, tujash tikich aidauk augmatbaujai pachisan augjai, wagki wainmainakush wainmachu wajukmaina nuniktinme tuja antuinakush antachu wajukmaina nuniktinme tusa, tiuwai.

*Ajakan ajakbau timag nunak juna takun timajai tusa Jesús etsegkamu*

(Mt. 13.18-23; Mr. 4.13-20)

<sup>11</sup> Wi ajakan ajakbaun augmattsan timag nunak juna takun timajai: Jigkaiya duka Apajuí chichamega nuuwai.

<sup>12</sup> Jintá jigkai kakekauwa duka, aents aidau chichaman antuidaun, Iwanch juwatki chicham ni anentain wayaun dekaskeapi tuinak uwemjainum tusa yajuta nuuwai.

<sup>13</sup> Jigkai kayanum kakekajua duka, chichaman antukag wakegas nemajuina nuna iwainawai; tujash nu ajak kagkapanachua duka, ujumak tsawantai dekaskeapi tuinawai; tujash utugchat minitam idaiyina nuuwai.

<sup>14</sup> Jagki ayaunum iyajua duka, chichaman antuina nuuwai; tujash tsawan wegamunum uyumamu aina nu, wiyakchameamu aina nu nuigtú dita wakegamu aina nuna anentaimtuinak ajak nejemainchauwa nunin wenawai.

<sup>15</sup> Tujash nugka pegkegnum iyajua duka, aents anentai pegkeg nuigtú wakegas antukag chichaman umiinak, imagnis pujuidauk, ajak pegkejan nejekua nunin ainawai.

*Lámpara pachisa augmattsamu*

(Mr. 4.21-25)

<sup>16</sup> Makichik aentskesh lámpara ekemakajag ichinkaik dukuchu ainawai, dutikachkush pegaká wapken awaigkagkesh apujchau ainawai, dutiktsuk yaki ekenin ainawai wayatatus minidaush tsaptinun wainkatnume tusag.

<sup>17</sup> Numamtuk yamai uukbauwa nunik awa juka, atak paan wantinkatnai. Aantsag yamai dekamainchauwa dushakam atak shiig dekamun atinai.

<sup>18</sup> Juna tajim jujú shiig antuktajum, ni aja duka nuní kuashat suwam atinai, untsu atsuja duka, ajuttatuapi tusa anentaimta dusha atantam atinai.

*Jesusa dukuji ni yachi aidaujai kautuamu*

(Mt. 12.46-50; Mr. 3.31-35)

<sup>19</sup> Jesusa dukuji, yachi aidaujai tajuawajui; tujash ni wajamunmag jegamainchau dekapajui kuashat aents tuwakaju asamtai.

<sup>20</sup> Nunitai niina ujainak:

—Amina duku yatsum aidaujai waipaktatus tajutjamawag agaa ijunui, tuidau.

<sup>21</sup> Tama ni ayaak:

—Mina dukug nuigtú mina yatsug aina duka Apajuí chichamen antukag umiina nu ainawai, tiuwai.

*Jesús dase imijkamu*

(Mt. 8.23-27; Mr. 4.35-41)

<sup>22</sup> Makichik tsawantai Jesús ni jintintaiji aidaujai barcanum chimpimjaju, nunik: Kuchá amain wegagmi. Tusag weedau,

<sup>23</sup> tujash katiamunum Jesusak kanaju. Nuniai dase senchi dasentak kuchan umpuau, nunitai barcanum yumi yajanak tepeattak ishamain wajau.

<sup>24</sup> Imanitai jegaantag ishintainak:

—¡Maestroh, Maestroh iik jakektatji! tuidau.

Tama shintaag dasen jiyak idaiyak, kucha tsukatunashkam:

—¡Mijakta!, tiuwai.

Tusá tamawaik dase imaniauk mijak, miyasu wajas patamsau.

<sup>25</sup> Nunikmatai ni jintintaiji aidau chichajak:

—¿Dekaskeapi tabaugmish utugkaugme?, tau.

Tujash ishambkag aentai jegagchaju, nunikag ditak pempeentunikiag:

—¿Jusha ya asamtaiya dasesh, yumish ni chichamenash umiujinawa?, tuesdayinau.

*Gadarammaya aents wakan pegkegchau egkentuamu*

(Mt. 8.28-34; Mr. 5.1-20)

<sup>26</sup> Nunikag kuchá amain katigkag gadarammaya batsantai nugkeen Galilea igkuas awa nuwi anumkajui.

<sup>27</sup> Nunik Jesús jiiinkimtai nunú yaaktanmaya aents, kuashat mijanai iwanch egkem-tujam pujú igkugtatus jiiintukiuwai, duka jaanchnash nugkuchu, jegaash pujuchu ukumatainum pujú.

<sup>28</sup> Nunú Jesusan wainak senchi untsumkau, nunik niina eemtin tikishmag senchi untsamak:

—¡Jesusah, Apajuí ashí tikich aidau nagkaesau muunta nuna Uchijiyah, minash utugtuktasamea miname! ¡Wait aneasam suwimkak sukagtusaipa!, tau.

<sup>29</sup> (Wagki Jesús, wakan pegkegchauwa nuna: Anú aentsuk jiiinkim ukuktá tibau asa tiuwai. Nu aentsnak kuashat tsawantai wakan pegkegchau egkemtug pujuju, nuniau asamtai cadena aidaujai jigkajag kuitamaidau, tujash cadena aidau nak tsujimtikag, wakan pegkegchau nugka uwejush aidau un emau.)

<sup>30</sup> Tutai Jesús iniak:

—¿Amesh yaitpa?

Tama ni aimak:

—Wika Untsujiyaitjai, tau.

Nunak kuashat wakan pegkegchau aentsun chimpimtua batsamtau asag tiuwai;

<sup>31</sup> nunú aidau Jesusan, waa muun ishaimain akaga nuig awekagtipa, tusag segaidau.

<sup>32</sup> Nuanui kuashat kuchi mujanum dupaan yuwinak yujaidau asamtai, nuwi wayatjai idaikagtusti tusag segaidau, tiagtai niishkam; nuniktajum, tiuwai.

<sup>33</sup> Tima iwanch aidauhshkam aentsnumia jiiinjag kuchinum utsanawajui; dutikam kuchishkam pisajag betsag tajagak kuchanum najataunum iyagkag jinawajui.

<sup>34</sup> Nunikmatai kuchí kuitamin aidau nu nunikbaun wainkag pisajag yaaktanum jegawag etsejuinak, ajanum batsataidaunash dutiksag ujakajui.

<sup>35</sup> Tusá ujakajam: Wagkag ankae diisagmi, tusag wejiajui. Nunik Jesús pujamunum jegakmag, aents iwanch egkemtuamu aajakua duka pegkeg wajas, shiig anentaimas Jesusai ayaumas jaanchin nugkujá ekeematman wainkag ishambkaju.

<sup>36</sup> Nuniagtai nuna wainkau aidau aents aidau, Iwanch egkemtuamu wajuk tsagaje nuna ujaidau.

<sup>37</sup> Tiagtai ashí aents nugka Gadaranum batsataidauk Jesusan yajá weti tusag segaidau, senchi ishamaidau asag. Tama Jesuschakam barcanum egkemag wakitkui.

<sup>38</sup> Nunitai aents Iwanch jijiamushkam Jesusan segau niijai wetatus; tujash Jesús akateg ukuak:

<sup>39</sup> —Ameke jeemin wakitkita, nunikam Apajuí amina ashí dutijama nunú etsegekata, tiuwai.

Tima wee ashí yaaktanum etsejauwai Jesús niina shiig kuashat dutika nuna pachis.

*Jairo nawanji nuigtú nuwa Jesusa jaanchjin antigkua nu*

(Mt. 9.18-26; Mr. 5.21-43)

<sup>40</sup> Jesús wakitki jegamtai kuashat aents tuwakajuk shiig aneas jukiaju, ashí aentsuk niina dakaidau asag.

<sup>41</sup> Nuniamunum Jairo daagtin, jega ijuntaiya nuna apuji tauwai. Nunik Jesusa tikishmatug segauwai niina jeen jukitatus,

<sup>42</sup> wagki niina nawanji shiig makichkiuch doce mijan ajamu tumaina nu jakattak tepau asamtai. Nunik wegaun kuashat aents wedau asag Jesusan chanuidau.

<sup>43</sup> Nunú aents aina nuiya makichik nuwa doce mijadai numpan puwak waitú pujú pachitkau, nuigtú kuashat ampijatun aidau un ampimak ashí ni ajamuchijinak ashimbkau; imaniakush makichkish etsagam asachui.

<sup>44</sup> Nunú nuwa ukunum jegantun Jesusa jaanchji wenin antigkui; dutikamuik numpa puwamujinak megkaekauwai.

<sup>45</sup> Dutikam Jesuschakam:

—¿Yaa antinkame?, tau.

Tujash ashí aents aidauk etseghagtai, Pedro chichajak:

—Maestroh, kuashat aents tuwakag chanumpaina nu antimpakaja nuniaigkik, ¿ya antinkae tame?, tiu.

<sup>46</sup> Tutai Jesús ayaak:

—Makichik antinkau awai, wagki minaiya senchi jiinun dekapjajai, tau.

<sup>47</sup> Tutai nuwak, uumainchau dekapeak kujaukmaikia Jesusan jegantun tikishmatug, ashí aents antuinamunum, wajuk asaya antigke nuna pachis, nuigtú ni Jesús antiamuik tsagagbaujinashkam ujakú.

<sup>48</sup> Tutai Jesús ayaak: —Nawantah, ame dekaskeapi tabaugmia nu etsaentamjae, shiig agkan anentaismam wetá, tiuwai.

<sup>49</sup> Eke Jesús chichaak wajai, Jairo jega ijuntaiya nuna apuji jeenia makichik aents tanta:

—Nawanjumek jakame, nuigtuk Maestrok waitkasaipa, tau.

<sup>50</sup> Tabaun Jesús antuk chichajak:

—Ishamkaipa, ayatak dekaskeapi tita nawanjumik aneantatui, tau.

<sup>51</sup> Nunik jeganum jegaa, wayamunum tikich aidaunak makichkish awayachajui, ayatak Pedro, Jacobo, Juan, nuwa jakauwa nuna apají dukují aina duke wayawajui.

<sup>52</sup> Tuja ashí aents aidauk buutuidau nuninak anentai idajuidau nuwauch jakaun anentaimitusag. Tujash Jesús chichajak:

—Buutigpajum jakache, ayatak kanaje, tau.

<sup>53</sup> Tutai dushikidau, jakaun dekaidau asag.

<sup>54</sup> Tujash nigka uwegnum achiak senchi chichaká:

—¡Nuwauchih nantaktá!, tiu.

<sup>55</sup> Tusá tamawaik mayai egkemtujam nantakmatai, Jesús chichajak: Yumain susatajum, tiuwai.

<sup>56</sup> Dutikamtai nuwauchi apajig dukujijai anentai jegachaju; tujash Jesusak:

—Ju junika ju pachisjumek makichik aentskesh ujakaipajum, tiuwai.

## 9

### *Jesús doce jintintaiji aina nu ishiakbau*

(Mt. 10.5-15; Mr. 6.7-13)

<sup>1</sup> Jesús jintintaiji doce aina nuna ijumag ashí iwanch aidaunum jiiainun, nuigtú jata aidaunum etsaegkagtumainnash senchin susauwai.

<sup>2</sup> Dutikak ishiakui Apajuí inama nuna pachis etsegkatnume nuninak jau aidaunash etsagatnme tusa;

<sup>3</sup> dutikak:

—Makichkish jukigpajum jintá weaku atsumainuk. Ushujutaigkesh, waji egkesá jutaigkesh, pagkesh, kuichkikesh, nuigtú nugkutaigmesh yachiagmek jukigpajum;

<sup>4</sup> atum tu jeganma wayattagme nuig pujustajum nunikjum weakjum ukuktajum.

<sup>5</sup> Tuja tuwí atumin jujamtan dakitjamiagtata, nuniakuig nu yaaktanmag jiiinki ukuakjum, atumi dawemin yukukuntu awa nu pegagjum akaketkajum ukuktajum, dita suwimak jukitnuji iwaintakjum, tiu.

<sup>6</sup> Tiajam ditashkam jiiinjag ashí yaakat yaijuch aidaunum nagkaemainak yamajam chichama nuna etsejuinak, jau aidaunashkam etsagaidau.

### *Herodes Jesusan yakita tibau*

(Mt. 14.1-12; Mr. 6.14-29)

<sup>7</sup> Herodes tetarraca Jesús ashí dutikamua nuna antuku, nunik anentai jegachu, wagki ujumak aents aidau chichainak: “Juan maamua nu nantakne”, tuinai

<sup>8</sup> tikich chichaidau: “Auk Eliasai” tuinai, tikich chichaidau: “Yaunchuk profeta aajakajua nuiya nantakne”, tuidau asagmatai.

<sup>9</sup> Tujash Herodes chichaak:

—Wi inamja ai Juagká buuken tsupikagmayajama, ¿dusha ya amainaita tuinamun antujag dusha?

Tusa wainkatatus wakegau.

### *Jesús cinco mil aents ayugkamu*

(Mt. 14.13-21; Mr. 6.30-44; Jn. 6.1-15)

<sup>10</sup> Apóstol aidau Jesús ishiakbau waketug kaunawag, ashí dita dutikamujinak ujakaju. Dutikam ditan yajuak nugka agkantu yaakat Betsaida tutainum awa nui weajui.

<sup>11</sup> Tujash aents aidau dekaawag shimutkaju; nunikag jegajuawajam Jesuschakam ditan shiig anentus jukiajui, dutika Apajuí inama nuna pachis ujainak, tsagagtatus atsumaidaunash etsagau.

<sup>12</sup> Nuniai etsashkam akaegu asantai, doce aina nunú jegaantag chichajuinak:

—Aents akatjam ishiakta, yaakat yaig aina nui nuigtú ajanum batsata nui wegag kanuinak dita yuwatnujinash egaktinme, wagki juig makichkish atsamunum batsatji, tuidau.

<sup>13</sup> Tiagtai Jesús ayaak:

—Atum dita yuwatnuk susatajum, tau.

Tuinam dita aiinak:

—Atsugtamajamah, cinco pag, nuigtú jimag namaka duke ajutjamajamah, untsu jutii shiakaja ashí ju aents aidau yuatnuk sumamainchawwah, tuidau;

<sup>14</sup> duka cinco mil aishmag tumain aajakajui. Tiagtai Jesús ni jintintaiji aidaun:

—Cincuenta, cincuenta kanagjum batsamsatajum titajum, tiu.

<sup>15</sup> Tima ditashkam ashí dutiksgag batsasaju.

<sup>16</sup> Dutikawagmatai cinco pagkan nuigtú jimag namaka nuna juki, pagkai nayaimpin diis see tusa puug jintintaiji aidaun tinabiu, dita aentsun tinamkatnume, tusa.

<sup>17</sup> Dutikawajam ashí shiig yuwawajui, nunikagmatai ampinjau aidaunak doce chagkin-num yajuakajui.

*Pedro Jesusan amek Cristuitme tibau*

*(Mt. 16.13-20; Mr. 8.27-30)*

<sup>18</sup> Makichik tsawantai Jesús kanaká Apajuin aujak pujusá ni jintintaiji aidaush, nui pujuidau asamtai iniinak:

—¿Aents aidaush minash yayai tujutuina?, tau.

<sup>19</sup> Tutai dita aiinak:

—Ujumak aents aidau, Juan Yamijatnai tuinai; tikich chichaidau auk Eliasai taush ainawai; nuniai tikich tuidau yaunchuk profeta aajakajua dutsu aneantatai tujamainawai, tuidau.

<sup>20</sup> —Tiagtai Jesús ayaak: ¿Atumesh minash yayai tujutjume?, tau.

Tutai Pedro ayaak:

—Amek Cristo Apajuí awemamuitme, tiu.

<sup>21</sup> Tujash Jesusak mina pachittsagmek makichkish tikichik tiigpajum, tiuwai.

<sup>22</sup> —Aentsmaga akiinauwa duka kuashat waittsattawai nuigtú judío apuji aidau, sacerdote apuji aidaush, maestro chicham umiktinun jintinkagtin aidaushkam dakitjagtatui. Dutikau asag maawagtatui, tujash kampakatum tsawan asa nantaktatui, tiuwai.

*Mina jintintaig atatus wakegawk waitiakush nemagtukti tibau*

*(Mt. 16.24-28; Mr. 8.34-38)*

<sup>23</sup> Tusa ashí aents aidaun chichajak:

—Makichik aentskesh mina jintintaig atatus wakegawk, niinunak idaiyak kashí kashinig waitiakush nemagtukti.

<sup>24</sup> Wagki aents ju nugka jui pujutan imá senchi wakegak, mina nemagtuk waittan dakitauk uwemjashtin ainawai; tujash mina nemagtak niina pujutjinash puyatjukchawk, uwemjatnai.

<sup>25</sup> ¿Wajinma yaimainaita aentsnash ashí nugka juwiyannu emakush, wakanin nigki megkaemaina dusha?

<sup>26</sup> Wagki mina pachitus etsegant datsanjuju tuja mina chichamjunash datsanjuu aidaunak, Aentsmaga akiinau Apají imanjiya nujai ángel pegkejam aidaujai minitna dui datsanjatnai.

<sup>27</sup> Tujash dekas tajime, atum ainajum juwiyatijum ujumak eke jatsuk, Apajuí inabauji wainkatnutigmesh ajume, tiuwai.

*Jesús yapajinamu*

*(Mt. 17.1-13; Mr. 9.1-13)*

<sup>28</sup> Nuna tii ocho tsawan tumain nagkaemaku ai Jesús Pedron, Juangkan, nuigtú Jacobo juki mujanum wakauwai, Apajuí ausatatus.

<sup>29</sup> Nunik Apajuin aujak pujai niina yapi yapajinawai, jaanchjish puju winchamtin wajasui.

<sup>30</sup> Nuniaig jimag aents Jesusan aujuuidau, duka Moisés, Eliasjai aajakajui;

<sup>31</sup> nunik tsaaptin winchamtin wajasbaunum wantinkaju, nunikag ni wakitkitnujin nuigtú Jesús Jerusalén waitkasa maam atinun pachis aujuuidau.

<sup>32</sup> Tuja Pedro ditajai ijunag yujaidaushkam, kaji depeteam kajigkú shintaukmá, Jesús tsawan wajas Moisés, Elías aatus ijuntatman wainkajui.

<sup>33</sup> Nunik jimag aentsua nunú wegagmatai, Pedro Jesusan chichajak:



—Maestroh, jutiish maigkis jui batsatagtai; kampakum aak umikagmi, makichik aminu, makichik Moisesdau, nuigtú Eliasdau, tau; tujash nunak ni tabaunash dekachiatat, tiuwai.

<sup>34</sup> Juna aatus Pedro chichai, yujagkim ditajai ijumag ijikui, dutika yujagkim ijikam ishankajui.

<sup>35</sup> Nuniai yujagminmaya chichaak: “Juuwai mina Uchig, wi etegkamu ni antugkatajum”, tabau antuekauwai.

<sup>36</sup> Nunú chichaamu nagkanaig Jesús nigki wajaun wainkajui; tujash ditak takamtak juwakajui, nuigtush nunú tsawanta duik, makichkish tikich aidaunak dita wainkaja nunak ujakchajui.

*Wakan pegkegchau uchin egkemtuamun Jesús etsagagbau*  
(Mt. 17.14-21; Mr. 9.14-29)

<sup>37</sup> Nunik kashinia dui mujanmaya akaejagmatai, kuashat aents Jesusan igkugtatus minidau.

<sup>38</sup> Nuniai tuwakbaunmaya makichik aents senchi jiiká chichaak:

—¡Maestroh, wait aneamam mina uchig makichkiuchia ju etsaentujata;

<sup>39</sup> wakan pegkegchau egkemtakug pachiaichbau untsuntiknuwe, imatikak kujantiknuwe, dutikam saun wenin apauwe! ¡Nuigtush tunamitkag waitkas ipimpig ukuwe!

<sup>40</sup> Imatikakui amina jintintaijum aidaun segamjai jigtugkitnume tusan tujash tujinkagmae, tau.

<sup>41</sup> Tama, Jesús ayaak:

—¡Aents dekaskeapi tuchau, pegkegchau aidauwah! ¿wajupá dukapea atumjaish pujumainaitja, wajupak katsunjatjime? jui uchijum itantá, tiuwai.

<sup>42</sup> Tima uchishkam adiju, nuniai iwanch uchin nugká ajiaju, dutika waugmitkam senchi kujau; tujash Jesús wakan pegkegchaun jiyakú, dutikamtai uchik tsagaju, nunikmatai apajin susauwai.

<sup>43</sup> Dutikamtai ashí aents aidauk anentai jegachaju Apajuí senchijiya nuna wainkag.

*Jesús awentsag ni mantamnatnuji etsegkamu*  
(Mt. 17.22-23; Mr. 9.30-32)

Nunikag ashí aentsuk Jesús dutikamun wainkag puyatuk ijunainai, Jesús jintintaiji aidaun chichajak:

<sup>44</sup> —Shiig antuktajum wi titatjim nu: Aentsmaga akiinauwa nunak, aents aidaunum sujukagtatui, tau.

<sup>45</sup> Tujash ditak antuinachu wajina takua tawa nunak, eke Apajuí dekamtikchamu asag; nuigtush ajantuidau nunú pachisa iniitnak.

*Yaki dekas imá wagakush atinaita tiagbau*  
(Mt. 18.1-5; Mr. 9.33-37)

<sup>46</sup> Nunikag jintintaiji aina nu, dita aina nuiyash yaki imá wagakush atinaita tudayinau.

<sup>47</sup> Jesús dita anentaibaujinak dekaju asa, uchin juki niini ayaunas awajsau,

<sup>48</sup> dutika chichaak:

—Makichik aentskesh ju uchua juna mina daajui juwauk, mina jujak dutikawai; nuigtú makichik aentskesh mina jujauk, mina awetiuwa nuna juwawai; wagki atum ainajum anuiya imanachau anenmamaina nu imá wagaaku atinai, tiuwai.

*Jutiin shiwagmatjamtsu duka jutiinu asa aniwai*  
(Mr. 9.38-41)

<sup>49</sup> Tutai Juan ayaak: Maestroh, makichik wainkamji amina daagmin iwanchin jiyau; tujash jutijai minitan dakitakui, amek aikawaipa timaji, tau.

<sup>50</sup> Tutai Jesús ayaak:

—Duka tiigpajum, jutiin shiwagmatjamtsu duka, jutiinu asa nuniawai, tiuwai.

*Jesús Jacobo jiyakbau*

<sup>51</sup> Jesús nayaim wakitkitnuji tsawan jegau asamtai, puyatkas Jerusalén wegau.

<sup>52</sup> Nuniak chichama etsegkatin aidaun emtikak awemau, dutikam ditashkam wegag samarianmaya aents aidaun batsamtaijin yaakat yaignum wayawaju ni kanagtinun umikagtatus.

<sup>53</sup> Tujash samarianmaya aidaun dita jutanak dakitajau, Jerusalén weenak tuidau asamtai.

<sup>54</sup> Dutikainam Jacobo, Juagjai Jesusan chichajuinak:

—Apuh, ¿nayaimpinmaya jii iyak apeká ijinati tumainchaukaih?, tuidau.

<sup>55</sup> Tujash Jesús ditan ayampattsag jiyakú.

<sup>56</sup> Nunik tikich yaakat yaignum weajui.

*Jesusa jintintaiji agtatus wakejukaju aidau*

(Mt. 8.18-22)

<sup>57</sup> Nunik jintá weenai, makichik aents Jesusan chichajak:

—Apuh, wisha ame tuwig wekaetam nuniakminish tuke amijaig wekaesatin atajai tajai, tau.

<sup>58</sup> Tutai Jesús ayaak:

—Kujan Cham aidau waajig ajuinawai, antsag yakiya pishak aidaushkam pasugkeg ajuinawai; tujash Aentsmaga akiinawua duka tepesá ayamainkesh atsujui, tiu.

<sup>59</sup> Nuna tii Jesús tikich aentsun:

—Nemagtukta, tiuwei.

Tama:

—Apuh idaitusta, dekatkauk wenu mina apajun ukusan ukuakun nemagkatjame, tau.

<sup>60</sup> Tutai Jesús ayaak:

Idaisata, wakanin jakau aina nu jakau aidau nak ukustinme; tujash amek weme Apajui inama nu pachisam etsegkata, tiu.

<sup>61</sup> Tikitchakam:

—Apuh nemagkatjame, tujash idaitusta, dekatkauk mina jegajui pataag aidau akatlan ukuutajai, tau.

<sup>62</sup> Tutai Jesús ayaak:

—Aents nugka tsayaak, nugka tsaitaijiya nuna bakajin nena tsayaak wekaeyatak, ukujin ayampatua dii wajamaina numamtuk wajauk, Apajui inama nu pachisa etsegkata tamak amaitsui, tiuwei.

## 10

*Jesús setenta y dos ishiakbau aidau*

<sup>1</sup> Nuna tii, Apu Jesús tikichnashkam setenta y dos\* etejauwai, dutika jimá jimajan emtika ashí yaakat nuigtú nugka ni wetin aidau num ishiakui.

<sup>2</sup> Dutika chichajak: “Dekaskenmag ajak juumainuk kuashtai, tujash takau aidau ujumke; nuadui ajakjinna nu segatajum aents nuwi takastin aidau ishiakti tusajum, tiuwei.

<sup>3</sup> Nunin asantai wetajum; tujash kuitamamkatajum, atumnak uwig ikamyawa batsatbaunum ishimaina numamtuk aents pegkegchau batsatbaunum ishimjime.

<sup>4</sup> Weakjumes hichik egketai, waji egkesá jutaigkesh, sapat aidaukesh jukigpajum; jintá weakjumes makichik aentskesh kumpamkujum wajantaigpa.

<sup>5</sup> Makichik jeganum wayaakjumes, dekatkauk: Apajui atumnash shiig agkan anentaimes pujatan amastinme titajum.

<sup>6</sup> Tajumin aents nui puja nu shiig aneas jujabiagtaik, Apajui ditanash yaigtatui. Untsu atumin shiig aneas jujamchagtaik, Apajuishkam ditanak yaigchagtatui.

<sup>7</sup> Nunú jega nuwig pujustajum nunikjum dita yutain amainamuk yuwatajum, umutain amainakuish uwagtajum; wagki aents takaa duka akiam auwai, makí makichik jeganum kanagum nagkaemá yujaigpajum.

<sup>8</sup> Atum makichik yaaktanum jegattajum nui jujamkiag, yutain amasagtata duka yuwatajum.

<sup>9</sup> Nuniakjum nui jau akuish etsagaitajum, dutikakjum: ‘Apajui inama duka tikiju wajasé’, titajum.

<sup>10</sup> Tuja makichik yaaktanum jegagmin jujamtan dakitjamainakuig jiinkijum:

<sup>11</sup> ‘Atumi yaaktagminia nugka jutii nawen peemja juka, atuminig pegajá akakeka ukuaji, chicham etsegbau dakitjau asagmin; tujash Apajui inamjatta duka tikiju wajasé’, titajum.

<sup>12</sup> Juna tajime: Suwimak sukagtam tsawan jegatna duik, sodomanmaya aidau suwimkan jukiuwa nuna nagkaesau jukiagtina.

*Aents pegkegchau idaitan dakitin aidau*

(Mt. 11.20-24)

\* **10:1** Yamajam chicham nagkamku griego chichamai agagbau aina nuwish jimajan tuinawai, tikich 70 tai tikich 72 tawai, nuniau asa apach chicham aina nuwish mai pegkejai. Duwi iina chichamega juig 72 apusamui.

<sup>13</sup> “¡Corazinkah aminak wait anentajame! ¡Betsaidah aminash wait anentajame! Tironmash nuigtú Sidonkash aents dutikmainchau atum iwaintukbau ainajum dutikamu ainakug, yaunchkes senchi anentai idagmak tudau takatan idaiyinak yapajin-main aajakú ainatai.

<sup>14</sup> Tujash Apajúi suwimak sukagtamú jegatna duik, tironmaya, sidogkanmaya aina nuna nagkaesau atumek suwimkak jukiagtin ainagme.

<sup>15</sup> Capernaúm,<sup>†</sup> ¿amesh nayaimpinum juwam atinaitjai tamek? Atsa, amek Hades<sup>‡</sup> akaikitnaitme.

<sup>16</sup> “Atum chicham etsegbaun antugtamaina duka, mina antugtuinawai; untsu atumin dakitjamaina duka, mina dakitjuinawai; mina dakitjuina dushakam mina awetiuwai nuna dakituinawai”.

*Setenta y dos ishiakbau waketja kaunkamu*

<sup>17</sup> Setenta y dos ishiakbau shiig aneas kaunawag:

—Apuh, ame daagmin iwanch aidaush: Jiinkita tamak, iinash antugtamak aents aidaunash jiinkiag ukuagmae, tuidau.

<sup>18</sup> Tama ni ayaak:

—Dekaske, wisha wainkabiajai Iwanch peem wajuksa imanik nayaimpinmaya iyaun.

<sup>19</sup> Nuadui atumi shiwajum Iwanchia nuna senchiji depetkatnun mina senchijun amasmajime. Dutikamu asagmin dapi esapainakuish, titigkesh ijupainakuish wajukash-tatjume.

<sup>20</sup> Tujash shiig aneasaigpajum wakan pegkegchau aidau antugtamkaja duikik, dekas shiig aneastajum, atumi daagmik nayaimpinum agagbauwa nuadui.

*Jesús shiig aneasbau*

(Mt. 11.25-27)

<sup>21</sup> Nuna tusa idaiyak, Jesús Wakaní Pegkeji shiig anemtikam: “Apawah, amek ashí nayaimpinum batsamin aidau, nugkaya aidaushkam apuji asamin emematjame; wagki yacha nuigtú unuimaju aina duka uugkam aents imanchauch aina nunú iwaintuku asamin. Dekaske Apawah, wagki amek aajam wakegame”.

<sup>22</sup> “Mina Apag ashí waji aina nunak mina idaitugsauwai. Makichkish dekajuinatsui Apajúi Uchijiyaitag nunak, imá mina Apajuk shiig dekajui, aikasag mina Apagnash dekainatsui, imá wiki shiig wainjai. Tuja Uchijiya nu iwaintamu dekamain ainawai”.

<sup>23</sup> Tusa jintintaiji aidaun ayampatua ditanak chichajak: “Shiig aneasagtinai atum wainjum juna wainaidauk;

<sup>24</sup> wagki junak tajime kuashat profeta aidau, rey aidaushkam atum wainjum juna wainkatatus wakegajakú ainawai, tujash wainkachajui; antutnash atum antajum juna antukagtatus wakegajakú ainawai, nuninakush ditak antukchajui ju chichammak”, tiuwai.

*Samaritanmayan pachis Jesús augmattsamu*

<sup>25</sup> Tutai maestro chicham umiktajum tibauwa nuna jintinkagtin wajakí, Jesusan dekapsatatus:

—Maestroh, ¿wajina dutikmainaitja pujut tuke atina nuna jukitaskanush?, tau.

<sup>26</sup> Tama ni ayaak:

—¿Wajintu agagbauwaita chicham umiktina nuwish? ¿Wajintu augme?

<sup>27</sup> Tama ni ayaak:

—“Amina Apujum Apajuiya nu ashí anentaimjai, ashí wakanmijai, ashí senchigmijai, ashí anentaimtagmijai aneeta, nuniakum tikich aidaush amek anenmamsam aneeta” tawai, tiu.

<sup>28</sup> Tutai Jesús ayaak:

—Shiig aimkaume; nunú dutikata, nuniakum pujut tuke atina nu jukittame, tau.

<sup>29</sup> Tujash ni tabajin shiig juwakta tau asa, Jesusan iniak:

—¿Yaita wijai ijutkamush?, tau.

<sup>30</sup> Tutai Jesús ayaak:

—Makichik aents Jerusalegnumia juwaki Jericó wegau, nunikmá kasanum egkemkauwai; nunikmatai kasa achikag suwi suwimainakua, ipu ipujú ashí maawag, ni takakbaujinak yajutum weak ukukiajui.

<sup>31</sup> Dutikamu ai, pachiaichbau sacerdoteshkam nunú jintanmag nagkaemakmá wainak, ikaag diis ukukiuwai.

<sup>32</sup> Nunisag lewitashkam nuwi jegakmá wainak, ikaag wajas diis weak ukukiuwai.

<sup>33</sup> Nuniai samarianmaya aentschakam nu jintanmag wekamá wainkauwai, nunik wait anenjauwai.

<sup>34</sup> Nunik jegantun, aceite vinojai juki ipujamu aidaun ampijua pempeaju, dutika niina entsamtaijin ekeni jega kajiitainum ejega kuitamkauwai.

<sup>35</sup> Nunik kashinia dui weak, jeennun jimag denarion akik chichajak: “Ame kuita-mjutkata, wi waketkun wajupa tujuttatme nunash akiktajame”, tiuwai.

<sup>36</sup> Tusa, ¿ju kampatum aina nuiyash ya aajakuita nigki anenmamas kasa suwimam aents tepaun wait anenjaush?, tau.

<sup>37</sup> Tutai ni ayaak: Nuna wait anenjauwa nuuwai, tiuwai.

Timatai Jesuschakam:

—Ameshkam wakitkim, dutiksamek amijai ijutkamu wait anenjata, tiuwai.

*Jesús Martan Mariajai ijagsatasa webau*

<sup>38</sup> Tusa ukuak Jesusak wega weakua yaakat yaig aunum jegauwai; nunikmatai nuwa Marta daagtin niina jeen juki awayauwai.

<sup>39</sup> Nuna kai María daagtin pujau, duka Jesús chichatai ayaumas antak eketu.

<sup>40</sup> Tujash Martak kuashat takamainun uyumak wekaetau asa, Jesusan jegantun chichajak:

—Apuh, anú mina kaig ayatak eketa nu, kaim yaigtá tusam awetujia niish yainkati, tau.

<sup>41</sup> Tama Jesús ayaak:

—Marta, Marta, shiig kuashat takamain uyumakam pimpikim wekaeme,

<sup>42</sup> tujash dekas imá senchi puyatjumainuk makichkiuchi, Mariak dekas pegkejan etegka mina chichamjun antak eketui nunak makichkish atanmain ainatsui, tiuwai.

## 11

*Jesús Apajú aujut jintinkagtuamu*

(Mt. 6.9-15; 7.7-11)

<sup>1</sup> Makichik tsawantai, Jesús Apajuin aajak pujuttaman wainkaju. Nunik ashimkamtai jintintaiji aina nuiya makichik jegantun:

—Apuh, Apajú aujut jintinkagtuata, Juan jintintaijin jintintuuwa dutiksamek, tau.

<sup>2</sup> Tama ni ayaak:

—Apajú aukkugmek aaja titajum: “Apawah, amek nayaimpinum pujuwaitme, pegkegmaitam ibau asam imá ameketme ememattaim. Amek jutiishkam inajatjata. Ame wakedamun nayaimpinmaya umigtamaina nunisag, ju nugka juwiyash aminak umigtamkatneme.

<sup>3</sup> “Dutiksamek ii yuwatnushkam kashí kashinig sukagtita.

<sup>4</sup> Jutii tudajish tsagkugkagtuga, wagki jutiish ashí pegkegchau awajtamaidaush tsagkujuinag dutiksamek, pegkegchaun takastinme tusamek idaikagtusaipa” ayatak yaijatkam agkanmitkagtuata, tiuwai.

*Segatajum, egaktajum, untsuktajum Jesús tibau*

(Mt. 7.7-12)

<sup>5</sup> Junashkam tiuwai:

—Atum ainajum anuiyash, ¿ya kumpají ajamu asa, aehaet jegajua: “Kumpajuh, kampatum pag tsagkatjukta,

<sup>6</sup> mina kumpag atushtanmaya tajutua nunú ajaamain shiig atsugtau asamtai tajame”,

<sup>7</sup> tamin ni jegaag pujus aigmak: “Waitkagsaipa, waitinak epenin mina uchig aidaupai kanakun tepajai, nunin asan nantaknuk amamaitsujai tujamainkait?”

<sup>8</sup> Dekas tajime, nantakí sumainchau ayatkush niina kumpají asamtai, nantakí ashí ni atsuma nunak sumainai.

<sup>9</sup> Nuadui wi tajime: Apajuishkam segatajum, imatjamak amastatjume; egatash egaktajum, egakjumek igkugtatjume; untsuktajum, imatjamak waitin ujatjamtatjume.

<sup>10</sup> Wagki ashí aents sumauk, suwam auwai; egauk igkuinai, ni egamujinak; waitinum wajas unsumushkam, ujatam auwai.

<sup>11</sup> “¿Atum ainajum anuiyash, yaita uchijí yujumak segamaitak kayá sumainush? ¿Nuniachkush namak segamaitak dapí sumainush?”

<sup>12</sup> ¿Nuniachkush makichik nujintan segamaig, titigkin sumainush?”

<sup>13</sup> Atum pegkegchau ainayatkugmesh dekgame uchijum aidau pegkeg waji aidau sutak. Atumkesh nuniagminish ¡wagkag aan nagkaemas atumi Apa nayaimpinum puja dusha Wakani Pegkeji segamash amaschagti!”, tiuwai.

*Makichik jeganum batsatiatak pempeentuniki shiwagmagaidau*  
(Mt. 12.22-30; Mr. 3.20-27)

<sup>14</sup> Iwanch aentsun egkemtua chichachu emamun Jesús jiiki awetak chichamtikau, nunikmatai aents aidauk anentai jegagchaju.

<sup>15</sup> Tujash ujumak aents chichainak: Juka “Beelzebú, iwanch aidau apujiya nuna senchijin iwanch aidauk jiyawai”, tuidau.

<sup>16</sup> Nuna tuinai tikich aidau, pegkegchaunum dekapsagtatus, nayaimpinmaya wainchatain iwainakti tusag segaidau.

<sup>17</sup> Tujash nigka dita anentaimainamun dekau asa:

“Makichik nugkanmag batsatiatak pempeentuniki maani batsatkujag megkaemain ainawai; nunisag makichik jeganmag batsatiatak maani batsatushkam megkaemain ainawai.

<sup>18</sup> Nunisag Iwanch nigki pempeentuniki shiwagmagakush ¿wajuk niina inamtaijiya dusha nunisagkesh amainaita? Nunak atum, Beelzebú senchijin iwanch aidauk jiyawai tujutjum dui tajime.

<sup>19</sup> Atumek Beelzebú senchijin iwanch aidauk jiyawai tujutjume; tujash nu aatus aish, ¿atumi jintintaijum aidauk, ya senchinash suwawa, iwanch aidauk jiihtinme tusash? Nuadui atumi jintintaijum aina duke atumnak bakugmatnai.

<sup>20</sup> Wi Apajuú senchijin iwanch aidauk jiyag nunak, atumiin Apajuú inamu asamtai jutikajai.

<sup>21</sup> “Aents senchigtin niina jeen kuitamak akajun takus wajaatak wajiji nui awa duka ashí betek amainai.

<sup>22</sup> Tujash tikich aents niya nuni senchi minitak depetuk, akajun atanki jegá wayá ashí wajjinak yajutuk kumpají aidauk tinamainai.

<sup>23</sup> “Aents wi takaag nujai shiig aneas juwachuk mina shiwagmatui, nunisag Apajuú chichame etsegbaunash yainchagtaik, kuashat aents uwemainun megkaegainawai.

<sup>24</sup> “Wakan pegkegchau aentsnumia jiiki ajapamak, wegawai uwegshunum ni ayamain-jin egaak; nunik wainkachag: Wi pujaun jünkibiag nuwig wakitkitjai tusa anentaimas,

<sup>25</sup> tajua diikmá, nunú aentsuk jega japimká shiig iwajamuama imanun wainak ukuak,

<sup>26</sup> tikich wakan niina nagkaegas pegkegchau aidauk sieteya imaan yajuak nu aentsnum pujustatus egkemtawai. Dutikam aentsuk duik pegkegchau aajakbauwa nuna nagkaesau shiig pegkegchau wegawai”, tiu.

*Dekas shiig aneasagtin aidau*

<sup>27</sup> Eke Jesús nuna pachis chichá wai, aents tuwakua nuiya nuwa senchi untsumak:

—¿Shiig aneastinai nuwa amina jujepag muntsujin amuntstamauwa duka! tiuwai.

<sup>28</sup> Tutai Jesús ayaak:

—¿Dekas nuni nagkaemas shiig aneastinai Apajuú chichamen antukag umijuina nu! tiuwai.

*Aents pegkegchau aidau Jesusan wainchatai iwainakia tibau*

(Mt. 12.38-42; Mr. 8.12)

<sup>29</sup> Jesús aents aidau nuni kuashat tuwajam nagkama chichaak: “Ju aents aina juka pegkegchau asag aents dutikmainchau iwainakta tujutuinauwai, tujash nunak dutikashtajai, ayatak Jonás wajakauwa nujai betekak iwaintuktatjai.

<sup>30</sup> Jonás namaknumia iwaku jiiinki ninivenmaya aents aidauk Apajuú chichamen etsegta dekas Apajuú awemamuapita tajua nunisag, Aentsmaga akiinauwai dushakam jaka nantakmatai wainkag, dekas Apajuú awemamuapita tujutiagtatui.

<sup>31</sup> Aantsag surnumia reina aajakua dushakam Salomogkan tajiuwai, Apajuú yachamtikamun antujuk dekajuatatus. Nunú atumnak bakugmagtinai, atak suwimak atina duik, wi Salomogkan nagkaesau dekaun imatika chichagmash antukchaju asagmin.

<sup>32</sup> Nunisag ninivenmaya aents aidau atak suwimak atina duwi bakugmagtinai. Ditak Jonás Apajuú chichame ujakam, dekaskeapi tusag tudaujin idaiyinauwai Apajuun nemagkajua dui. Tujash jui atumjai pujawai Jonasa nagkaesau.

*Lámpara pachisa augmattsamu*

(Mt. 5.15; 6.22-23)

<sup>33</sup> “Makichik aentskesh lámpara ekemakag yantannum uuká nuniachkush kajunai dukukag apujchau ainawai, dutiktuk yaki ekenin ainawai, wayatatus minidaush tsaaptinun wainkatnume tusag.

<sup>34</sup> Atumi jimek lámpara ekemakam tsaaptin emaama numamtuk atumi iyashminak awagmawai. Jiim pegkeg asamtai shiig wainmamainaitam imatksam, ashí pegkeg aina

duke anentaimtaik, anentaiminish tsaaptin ajutjamainai. Untsu jiim pegkegchauwaitkui wainmaminchawaitam nunisjumek, ayatak pegkegchauk anentaimkugmek suvenum pujagme.

<sup>35</sup> Nunin asamtai aminí tsaaptin awa nunú suwe wajatjamsai kuitamkata.

<sup>36</sup> Ame ashí pegkegchau aidau idaisam pujakmek, lámpara kashi ekemakam tsaaptin emama numamtuk, atumi pujutjuminish wajagme”.

*Jesús fariseo aidau escriba aidaujai pegkegchauji pachisa tibau*

*(Mt. 23.1-36; Mr. 12.38-40; Lc. 20.45-47)*

<sup>37</sup> Jesús chichaká ashimai, makichik fariseo yujumkan ajamsatatus ipauwai.

Tima Jesuschakam jegá wayá, mesanum jegantá ekeemsau.

<sup>38</sup> Nunikmatai fariseo wainak anentai jegagchau, eke yujumak yutsuk tuke ikig-masjumké atajum timawa nuna umikchamtai.

<sup>39</sup> Tujash Apu Jesús ayaak:

—Atum fariseo aidautigmek, vaso nuigtú plato aina nuna awanke nijamaina numamtuk wajagme; tujash atumi anentaiminig kasamtaijum nuigtú pegkegchau takataijum aidaushkam piyak ajutjamainawai.

<sup>40</sup> ¡Anentainkachu aidauwah! ¿Apajuí iyashin najanauwa duke iina anentainash najanachukait?

<sup>41</sup> Nuadui atumek, atumin ajutjamaina duka ujunauch aidau susatajum, aaja nuni-akjum ashí pegkeg atatjume.

<sup>42</sup> “¡Wait anentajime fariseo aidautigminak!, atumek menta, ruda, nuigtú ashí ajak nugkauchik nejen aina nuiya diezmó wajagme. Tujash pegkeg takat aina nu nuigtú Apajuí anemainaitjum dushakam idaijume. Juuwai dekas dutikmaina nu, tikichia dushakam idaitsuk.

<sup>43</sup> “¡Wait anentajime fariseo aidautigminak! Atumek jega ijuntainum aents eme anentsá ekeemsati tibaunum ekemsatasajum wakejin ainagme, plazanum igkuntu-inakush eme anenjús kumpamjuatnume tusagmesh wakejin ainagme.

<sup>44</sup> “¡Wait anentajime atumnak! Atumek aents ukusbau wainmainchau shiig yutuamua nunin ainagme, nunin asagmin aents nui awantak wekaekush dekatsuk wekaemaina numamtuk wajainawai”.

<sup>45</sup> Tutai maestro chicham umiktinun jintinkagtin ayaak:

—Maestroh, ame fariseo aidau tame duka jutiishkam tukagtakum tame, tau.

<sup>46</sup> Tutai Jesús ayaak:

—¡Wait anentajime atum maestro chicham umiktinun jintinkagtin aidautigminash! wagki atumek chicham umiktin kakajus umimainchauwa ibauk, tikich aidau ju umiktajum tajume atumkesh umiachiatkujum, nuniau asajum tikich kijin ayankajum machikish yaitsuk chichagmainaitjum numamtuk wajau asagmin.

<sup>47</sup> “¡Wait anentajime atumnak, atumek profeta ukusbau aina nu jegamjin ainagme, atumi muunjum maawajua nu!

<sup>48</sup> Nu nuniakjum iwainmamjume atumi muunjum dutikajakú aina nuninuk atumesh ainajum nu, wagki dekaskenmag dita maawajui, dutikamtai atum profeta ukusbauwa nu jegamjau asajum.

<sup>49</sup> “Dui Apajuí ni yachajin atumin pachipas: ‘Awetitajime profeta aidau nuigtú apóstol aidounashkam, nunú aina nuiya mainakjum tikich aidauk aintú yujatin ainagme’ tiuwai.

<sup>50</sup> Nuadui ju aents aina junak Apajuí suwimkan susatnai ashí profeta aidau nugka najanamu aajakua nui nagkamas maawaju aina nuadui,

<sup>51</sup> Abela maawajua nui nagkamas Zacarias maawajua imanui, jega Apajuí ememattai ai altar awa nuna ejapen maawaju aina nu. Nuadui ju aents aina junak Apajuí suwimkan susatnai.

<sup>52</sup> “¡Atum maestro chicham umiktinun jintinkagtin aidautigminak wait anentajime! Atumek aents llave takakiatak, tikich jegá wayata tutai waitin epetin aina numamtuk, aents Apajuí nemagkag uwemjata tuinaig, atum chicham umiktina duka dekyatkujum, wajina tawa nunú dekachu asajum shiig jintintsugme, nuniau asajum atumkesh uwemainnum pujatsjume”.

<sup>53</sup> Tusa Jesús nuiya jiinkimtai, maestro chicham umiktinun jintinkagtin aidau fariseo aidaujai senchi kajekú asag, kuashat awá awagki iniinak waitkaidau,

<sup>54</sup> wajantuk chichakat timatai tsanumjuja maami tusag.

## 12

*Fariseo aidau levaduraji pachisa tibau*

(Mt. 10.26-33; 12.32; Mt. 10.19-20)

<sup>1</sup> Nuniai kuashat mil aents aidau tuwakaju asag, pempeentuniki najanidau. Imaniagtai Jesús dekatkauk jintintaiji aidaun chichajak: —Fariseo aidau levaduraji aina nujai kuitamamkatajum, ditá tsanumtaiji aina nujai.

<sup>2</sup> “Wagki uukbau wantintsuk juwaktinuk makichkish atsawai, antsag dekaachbau dekantsuk juwaktinchakam makichkish atsawai.

<sup>3</sup> Nuniau asamtai ashí atum tikich antachbaunum chichakbauwa duka, paan antuekat-nai; atum kanutaigmin epeni pujusjum chichakbaunashkam ashí antukagtinai”, tiuwai.

*Dekas ishamaina nu*

(Mt. 10.26-31)

<sup>4</sup> Atum mina kumpag aidautigminash tajime: Iyashmin mainakuish ishamkaigpajum, nuna dutikainakush nuigtuk dutikmainchau ainawai.

<sup>5</sup> Tujash wi jintintuatjime ya ishamainaitjume nuna: Apajuí ishamkatajum suwimkan sujamak waitut tuke atina nui egkepawagmatai waitmainaitjum nunú.

<sup>6</sup> ¿Jimag kuichkiuch kayauch piipich juwakjum cinco pishak sujuchuk agmujum? Tujash nunú aina nunak Apajuik makichkish kajimatkg idaitsui.

<sup>7</sup> Antsag atumnash Apajuik atumi intashim wajupa awa nunash shiig dekawai, nunin asamtai atumek ishamkaigpajum. Atumek pishak aina nuna nagkaesau ainagme.

*Ishamtsuk Cristo nemagnaitjai tumaamainai*

(Mt. 10.32-33; 12.32; 10.19-20)

<sup>8</sup> Makichik aentskesh Cristunuitjai tusa aents aidau eemtin etsegtugkaju aidaunak, dutiksag Aentsmaga akiinauwa dushakam Apajuí angelji aidau eemtin mina nemagtin ainawai titinai;

<sup>9</sup> “Tujash aents aidau eemtin mina pachitus dekachujai tujutiú aidauk, Apajuí angelji aidau eemtin ditanak wainchaujai tama agtinai.

<sup>10</sup> “Ashí aents aidau Aentsmaga akiinauwa nuna pegkegchau chichagkau akush tsagkujam agtinai; tujash Wakaní Pegkejin pegkegchau chichagkau aidauk tsagkug-nagchagtinai.

<sup>11</sup> “Atum mina nemagtin aidautigminak juga ijuntainum gobernante nuigtú apu inamin aidau eemtin ejetamawagmataish, wajak aimkatjaki nuniachkugmesh wajintuk titaja tusagmek uyumaktin aigpa;

<sup>12</sup> wagki Wakaní Pegkeji dekamtijamattawai wajintu titatjume nunak”.

*Wiyakuch anentainkachu*

<sup>13</sup> Aents tuwakú aina nuiya makichik chichaak:

—Maestroh, iina apají jaak wají ukugtamkimua nu, ame mina yatsug, yatsumjai akantuniktajum tujutta, tau.

<sup>14</sup> Tutai Jesús ayaak:

—Kumpajuh, ¿ya minash ame juez atá nuniachkumesh aents wají sujitdayinakui akantukam suu atá tusash adaitukmae? tau.

<sup>15</sup> Nuna tii idaiyak:

—Kuitamamkatajum, utugsag shiig kuashat wají ajutia tusagmek anentaimtú pu-juigpa; wagki aentsú pujutjiya duka, shiig kuashat wají aja nui atsui, tiuwai.

<sup>16</sup> Nuna tusa augmatbaun pachis: “Makichik wiyakcha nugkeen, shiig kuashat ajak juumain uminjauwai.

<sup>17</sup> Imanikmatai nigki anentaimas: ‘¿Utugkatjaki juuká ijumain atsugta duish?’ tau.

<sup>18</sup> Nunik anentaimag: ‘Dekas juna jutikatjai, ajak juuká ijumtai aina junak tegagtajai dutikan aan muuntan jeganjatjai, nuwi ashí ajak juukbau aidaun ijumkun nuigtú mina wajig aidaunashkam nuwig ijumjatjai;

<sup>19</sup> nunikan umikan: Kuashat mijanai yumain wají aidaunash nuwig ijumjan, nuanui jegá pujusan ayamkun shiig yuwakun, umutainash umakun shiig aneasan pujustajai’, tiuwai.

<sup>20</sup> Tujash Apajuí chichajak: ‘¡Anentainkachuh! Yamai kashia juik jakattame; tuja ame wají imatikam ijumjaum dusha, ¿yanau atatu?’ tiuwai.

<sup>21</sup> Aatus nuniawai nigki wiyakchameatatus wakega duka, tujash Apajuí eemtin pegkejan takaachkug”, tiuwai.

*Apajuí ni uchijí aidaunak kuitamui*

(Mt. 6.25-34)

<sup>22</sup> Jesús nuna tusa idaiyak jintintaiji aidaun chichajak: “Nuadui tajime. Atumek wajinak yuwatja, wajinak nugkugtaja tusagmek uyumá pujuigpajum.

<sup>23</sup> Dekas pujuta nuuwai yutai nagkaesauk, tuja iyashia nuuwai jaanchin nagkaesauwa duka.

<sup>24</sup> Cuervo aidau anentaimsa diistajum, ditak ajakmag juuchu ainawai, ajak juuká ijumtaijish jegash atsujuinawai; nuniaig Apajuí ayujui. ¿Atum dekas cuervo aidau nagkaesau akik ainatsjumek?

<sup>25</sup> ¿Atum ainajum anuiyatigmesh wajupatigmea esajam achainjash tusajum anentaimtú pujakjumesh esaumainaitjume?

<sup>26</sup> Nu nuninchikesh dutikmainchau ainayatkugmesh, ¿wagka tikich waji aidaush imanikjumesh uyumagme?

<sup>27</sup> “Yagkug aina nu anentaimsa diistajum wajuk tsakainawa, ditak takainatsui, ujuchnash kutamainatsui; tujash atumin tajime, Salomón ashí imanun iwagmamá wajakuitkush yagkujá níimega ibaunak nugkujakchauwai.

<sup>28</sup> Dupa ikamia aidau kashin apeam atinnakesh Apajuí imatikas iwaja ibaush, ¿wagkag aan nagkaemas atumnash dutijamachagti aents imatikas dekaskeapi tuchau aidauwah?

<sup>29</sup> Nuadui atumek yuwatin, uwagtin aina nu uyumaka anentaimkujum waitú pujuigpajum.

<sup>30</sup> Wagki ashí ju waji aina junak aents Apajuí anentaimtuchu aidau, puyatjus yujajin ainawai, tujash atum nunú waji atsumajum nunak atumin Apa nu dekawai.

<sup>31</sup> Nuadui atumek, Apajuí inama nu egaktajum, nuniakjum nunú aina duka aan kuashat ajutjamtatjume.

*Nayaimpinum wiyakchameaut*  
(Mt. 6.19-21)

<sup>32</sup> “Ishamkaigpajum, ujumak mina jintintaig ainajum nuutigmek, wagki atumnak Apa Apajuiya nu mina inamtaijui pujustinme tusa wakejutpagme.

<sup>33</sup> Sujuktajum atumi wajiijum aidauk dutikajum ujunauch aidau yaigtajum. Atum dutiktai Apajuí nayaimpinum wiyakchameaut tuke atinun, kasash waimainchau, mamukush wajiin emesmainchauwa nuanui ukugtamsattajume;

<sup>34</sup> nunú wiyakchameatin ajutjamaina nuanuig anentaimsajum pujustajum.

*Umintsajum aneaku pujustajum tibau*  
(Mt. 25.1-13; Mr. 13.34-36)

<sup>35</sup> “Shiig umintsajum lámpara ekemakjum dakamsatajum;

<sup>36</sup> nuniakjum inak aidau apuji nuwenbaunum wematai, wakitki taa unsumkui wamak ujattajai tusa daká pujuwa numamtuk wajatajum.

<sup>37</sup> Shiig aneasagtinaí nunú inak aidauk apuji wakitki takamá iwá batsatu igkuam atina duka; dekas tajime, nunak yapagmitka mesanum pekas ni yutain ajamsatnai.

<sup>38</sup> Shiig aneasagtinaí ditak, aehaet wajasú aish nuniachkush tsawamunmakesh apuji minak uminas batsatu wainam agtina duka.

<sup>39</sup> Tujash ju dekatajum, jeenna nunú waji horatinia kasa taattawa nuna dekakug iwá pujumainai, nuniakug jeenig utua kasagmak amaitsui.

<sup>40</sup> Nunisjumek atumshakam umintsá pujumainaitjume, wagki Aentsmaga akiinawuwa duka, nu horatiniap minittawa tusa anentaimtachbaunum minitnai”, tiuwai.

*Inak pegkeg inak pegkegchaujai pachisa augmatbau*

<sup>41</sup> Nuna timatai Pedro iniak:

—Apuh, ¿nu augmatbau tame dusha jutiikek tukagtam atsa ashí tikich aidaush takumek tame? tau.

<sup>42</sup> Tutai Apu Jesús ayaak: “¿Yaita inak betek umin nuigtú shiig anentaimkau asamtai, apuji niina inake aidaun diisti nuniak yutain diyakuk susati tusa idaitam amaina dusha?

<sup>43</sup> Shiig aneasagtinaí inak, ni apuji wakitki takamá, ni tibaujinak betek umiak pujaun wainam atina duka.

<sup>44</sup> Dekas tajime, ashí wajiijinak niina diigtusti tusa idaitustinaí.

<sup>45</sup> Tujash nunú inak anentaimas: ‘Mina apujuk wamak taashtatui’, tusa tikich inak aidau nuigtú inak nuwa aidounashkam suwimak, nigka yuwak nuigtú umak, nampetnash nampee waja pujai,

<sup>46</sup> nunú inaka nuna apuji tsawan dekachbau, horash dekachbau ai taa suwimkan susa, tikich aents betek umichu aina nujai waittsati tusa idaimainai.

<sup>47</sup> “Nunú inak apuji wakegamun shiig deokayatak, umitsuk takatnash takatsuk puja nunú imá senchi suwimkan jukitnai.



<sup>48</sup> Untsu suwimak jumainun dekachu asa dutikauwa duka, ujumak suwimak suwam atinai; wagki ya kuashat susamuita, duka kuashat segam atinai; ya kuashat kajintsa idaitusbau ainawa, duka nuní inagkeasa segam atinai.

*Jesusa nemajin nemagchau aidaujai tupandayagtinaí tibau*  
(Mt. 10.34-36)

<sup>49</sup> “Wika ju nugka juwig tauwaitjai mantuawagmatai ataktú nantaki ai mina nemagtuidau Wakani Pegkejin jukitnume nunitai tikich mina dakitjuina nunak Apajui suwimkan susatnume tusan, nuniau asan utugsag wamak uminka tajai.

<sup>50</sup> Senchi waittsan inagkeaktatjai, nuadui nunú uminkati tabaunum kuashat anen-taimkun waitiajai!

<sup>51</sup> ¿Atumek agkan pujustinme tusas ju nugka juwig tauwaitai tajumek? Nunin-chauwaitjai, wika atum mina nemagtin aidautigmin tikich dakitjamainak kajegtamá batsamtin asamtai tauwaitjai.

<sup>52</sup> Wagki yamai nagkamas makichik jeganum cinco aents batsata nuiya, kempatuma nu jimaja nuna shiwagmattawai; nuniai jimaja nu kempatuma nuna shiwagmattawai.

<sup>53</sup> Apajishkam uchijijai shiwagmagagtinaí, uchishkam apajin shiwagmatnai, dukujish nawanjijai nunisag nawanjish dukujijai, uchiji nuweshkam tsatsajijai, tsatsajishkam uchiji nuwen shiwagmatnai”, tiuwai.

*Tsawanta niimé diísá dekamu*  
(Mt. 16.1-4; Mr. 8.10-13; Mt. 5.25-26)

<sup>54</sup> Tusa Jesús aents aidau chichajak: “Yujagkim etsá akaetaiya nuiya jinu wain-mawaik, yumi yutugtatuí tajume, tibauk imanisag yutawai.

<sup>55</sup> Dase tsumunmaya dasenkamtaig atumek: Seeki atatuí tajume, duka imanisag uminui.

<sup>56</sup> ¿Tsanumin aidauwah! atum nugkanmayash, nayaimpinmayash niimé diisjum, tsawan wajuku atatua nunú dekau ainayatkugmesh, wi takaamush wainu nuniaiy-atkugmesh, ¿wagka Apajuinunap iwainawa tusagmesh dekamainchaush dekaepagme?

*Shiwajumjaish epegkata tibau*  
(Mt. 5.25-26)

<sup>57</sup> “¿Wagka atum pegkeg takamainaitjum duke egatmamtsugme?

<sup>58</sup> Amina shiwajumjai apu chichaman epegunum weakmek, jintaag kakantsam iwajata. Nunikchaminig jueznum ejetamantai, juez aentsji inajam cárcel egkepawai.

<sup>59</sup> Duwi tajame, nui egkepamtaig jünkishtatme, diwijum ashí akikmakam jün-mainaitme”, tiuwai.

## 13

*Pujutjum yapajiachkugmek megkaekattagme tibau*

<sup>1</sup> Nunú tsawantai, ujumak aents Jesusan jegajuawag, wajuk Pilato ujumak galilean-maya aidau kajekgé Apajui emematuinak uwijan maawag apeenak batsamtatman, nuna pachisag ujadau.

<sup>2</sup> Tiagtai Jesús ditan ayaak: “¿Atum anentaimsagmek nunú galileanmaya aidau dutikawaja duka, galileanmaya aina nuig dita imá senchi tudau asag aikam ainawai tajumek?

<sup>3</sup> Atsa, duka nuninchauwai. Atumshakam tudau takat idaisajum pujutjum yapaji-achkugmek ashí betek antsagmek jinatin ainagme.

<sup>4</sup> Torre iyak Siloenum batsatun dieciocho aentsun kajekgua dusha, ¿Jerusalén bat-samajakajua nuna nagkaesau tudau asajampap suwimkan juwak jinawaita tajumek?

<sup>5</sup> Atsa, duka nuninchauwai. Atumshakam tudau takat idaikujum pujutjum yapaji-achkugmek ashí betek antsagmek jinatin ainagme”.

*Higuera nejenchau pachisa augmattsamu*

<sup>6</sup> Junashkam Jesús augmatak: “Makichik aents uva ajanum makichik higuera ajaamu ajujukui, nuna nejeatsuash tusa diístatus wejiuwai, tujash nejeg makichkish atsujui.

<sup>7</sup> Nunitai ni inake ajan kuitamak pujuttaman: ‘Jujú higuera kempatum mijadai tajaan diyajai nejeatsuash tusan, tujash nejeatsui ajakam ajapata. ¿Wagkag atsumnachi-atkush nugká akijuash wajastí?’, tiu.

<sup>8</sup> Ajakjintin tutai inak ayaak: ‘Apuh, dekás makichik mijan dekasi nejeashtimpash, wi wajutuí tentean pukujan, tikich nugka dekás pegkeg aina nuna yajutkan ijutjatjai;

<sup>9</sup> dutikamash nejekchatpash, untsu tikich mijantinish nejeachkui ajakta’ ”, tiuwai.

*Jesús tsawan ayamtai aig nuwa jau etsagagbau*

<sup>10</sup> Jesús jega ijuntainum tsawan ayamtai ai jintinkagtau;  
<sup>11</sup> nuniai nui makichik nuwa dieciocho mijadai jaa pujú, wakan pegkegchau egkemtuamu asa machikish dakuentsuk, punus wekayin eketu.

<sup>12</sup> Nuna Jesús wainak untsuká chichajak:

—Nuwah, yumaik jaam duka tsagame.

<sup>13</sup> Takug nuwan achikú; dutikamuik nuwashkam dakuenkau, nunik Apajuin emematu.

<sup>14</sup> Tujash jega ijuntaiya nuna apuji kajekú, wagki Jesús tsawan ayamtai aig etsagaju asantai, nunik aents aidaun chichajak:

—Seis tsawan awai takat takamainuk, nunú tsawan aina dui kaunatajum etsaentugti takugmek, tsawan ayamtai aig antsuk, tau.

<sup>15</sup> Tutai Apu Jesús ayaak:

—¡Tsanumin aidauwah! ¿Makí makichik atum aidautigum tsawan ayamtai aig baka nuniachkugmesh burro ayugtaijin batsatu atiajum namaká ejegajum yumi amuchuk agmaujum?

<sup>16</sup> Jujú nuwa Abraham wegantu dieciocho mijadai Iwanch waitkam pujaunash, ¿wagkanuk etsagagchatja tsawan ayamtai aigkish?

<sup>17</sup> Jesús nuna aatus timatai, niina shiwaji aidauk datsajajui; tujash ashí aents aidauk shiig aneedau, kuashat anentai jегamainchaun Jesús dutikau asantai.

*Mostaza jigkayí nuigtú levadura pachisa augmattsamu*

*(Mt. 13.31-33; Mr. 4.30-32)*

<sup>18</sup> Junashkam Jesús chichaak: “¿Apajuí inabaujiya dusha wají pachisaiya nuninai tumainaita nuniachkuish wají augmattsaiya tumainaita?

<sup>19</sup> Apajuí inama duka mostaza jigkayin makichik aents ajajin ajauwa nuninai; dutikamu tsapai tsakajá muun wajasmatai, yakiya pishak aidaun nuna kanawen pasugmakajui”, tiuwai.

<sup>20</sup> Nuigtushkam chichaak: ¿Apajuí inama nunash wajijai apatkanua tumainaitja?

<sup>21</sup> Duka makichik nuwa harinan kempatuma imania dekaapa namukbaunum levaduran pachimjauwai, dutikam ashí harina namukbauwa nuna wampushmitkajui, tiuwai.

*Waiti menakua nu*

*(Mt. 7.13-14, 21-22)*

<sup>22</sup> Jerusalén jegatatus weak, Jesús yaakat aidaunum nuigtú yaakat yaig aidaunmashkam jinti jintinkagtakua wegau.

<sup>23</sup> Nuniai makichik iniimak:

—Apuh, ¿uwemkagtin aidaush wajumkek aina? tau. Tama ni ayaak:

<sup>24</sup> —Waiti menakua nuní wayatasajum kakanmamsatajum; wagki tajime, kuashat wayatatus kakanmabiagtinaí nuniakush ashí betek wayachgtinaí.

<sup>25</sup> Jeenna nu wajakí waiti epenmataig, atum agaa waitinum ijuntsajum untsumkujum: “Apuh, Apuh waiti ujatjita, tajumin, ni aigmak: “Wika atumnak wainchau ainajime, tuwiyants ainajum tujabiagtinaí”

<sup>26</sup> Takui atum ayaakjum: “Apuh, jutii amijai yuwaku, umutash umin aayagjama, jutii plazajinish jintinkagtin aayumjama, tiagtin ainagme”.

<sup>27</sup> Tajumin ataktú ni aigmak: “Wika atumnak wainchau ainajime, tuwiyants ainajum wetajum ashí pegkegchau takau aidauwah”, tujabiagtinaí.

<sup>28</sup> Nunú atinai atum agaa utsagkam batsamsajum buutbau nuigtú dai takegtamu, Apajuí inamtaijin Abraham, Isaac, Jacob nuigtú ashí profeta aajakua nu ijunu wainkajum.

<sup>29</sup> Wagki etsá minitajinia, etsá akaetaijinia, nortenmaya, surnumia aidaun kaunkag, Apajuí inamtaijin mesanum pekaamsagtinaí yuawagtatus.

<sup>30</sup> Nuniemunum aents dekatkau atatus wakegaina nu ukunum juwakgtinaí. Untsu iman atan anentaímtumachu aina nu dekatkauk agtinaí.

*Jesús Jerusalén anentai idajtukbau*

*(Mt. 23.37-39)*

<sup>31</sup> Nunú tsawanta duik ujumak fariseo aidaun Jesusan tajuawag: Juig jiinkita, nunikam tikich nugkanum wetá, wagki Herodes mantamatatus wakejutpawai, tuidau.

<sup>32</sup> Tama ni ayaak:

—Wetajum, nunikjum nunú apu pegkegchau takatan shiig anentaímtug takauwa nu jegajum ujaktajum: Wika yamai, kashinchakam iwanchnak jiittajai, aents jau aidaunash etsagaittajai, nunikan kempatum tsawanta jui ashimkattajai wi dutikmaina nunak.

<sup>33</sup> Wi yamai wegag junisnuk wetatjai, kashinchakam, nui tsawaknush, wagki makichik profetak Jerusalén pujachukek maamak amaitsui.

<sup>34</sup> “Jerusalén, Jerusalén amek profeta aidaush mainaitme, dutiksamek aminí awe-mamu aidau mininakuish kayai tukui tukuinakuam mainaitme! Kuashtá wakekamjai uchijum aidaun, atash uchijí aidaun nanapen ijumama numamtuk awajkatasan, tujash amek dakitjamume.

<sup>35</sup> Nuadui atumdau jega Apajuí ememattaiya duka ukumkimu atatu; dui tajime ataktuk awenagmek waitkashatjume tajim nunak, nuniautijum tsawan jegamtai: ¡Apú daajin mina duka pegkejai! tujuttinaitjum dui waitkatin asajum”.

## 14

### *Jesús aents jau etsagagbau*

<sup>1</sup> Tsawan ayamtai ai Jesús fariseo aidau apuji jeen yujumka yuwatatus weuwai, nunitai tikich fariseo aidauk wajukatig tusag diidau.

<sup>2</sup> Nunik waikmá Jesús wainkau aents iyashin iyag tepettaman.

<sup>3</sup> Nunitai Jesús escriba aidaun, fariseo aidaujai iniak:

—¿Tsawan ayamtai aish aents jaush etsagaumainkaih, atsa etsagaumainchaukaih? tau.

<sup>4</sup> Tujash ditak aimainachu. Nuniagtai Jesús kuntunum achiká etsagaju, dutika awemauwai.

<sup>5</sup> Nudiagtai ditan chichajak:

—¿Yaa atum ainajum anuiyash uchijigkesh nuniachkush torojigkesh waanum egkemamtaish, tsawan ayamtaiyai tusash wamak jiiskesh idaimainaita?

<sup>6</sup> Tamashkam ditak aimainchau dekapedau.

### *Nuwenbaunum ipaamu aidau*

<sup>7</sup> Nuwenbaunum ipaamu aidau aents eme anentsá ekentsatin aidaun etegkawag pekabiagtai, juna augmatu:

<sup>8</sup> —Makichik aentskesh nuwenbaunum ipapamtaish, aents eme anentsá ekentsatin aidaunmag ekeemsaipa, wagki amina nagkaetamsau tikich eme anentsá ipaamush amainai;

<sup>9</sup> nuniau asa amina ipapauwa nu tajuntugman: “Wajaktá, ju aents ekeemsaati”, tujamkui, datsá datsanjai wajakim ukunum ekeemtai aunum ekeemsaim.

<sup>10</sup> Duka nunitsuk, ipapawagmataish ukunum ekeemsaata, nuniamin ni ipapauwa nu minak: “Kumpajuh, eemkam ekeemtai pegkeja awi ekeemsaata”, tujamti. Aatus dutijamamtai ashí ipaamu aina nuna eemtinish eme anentam atatme.

<sup>11</sup> Wagki nigki eme anenmama duka, imanchau diyam atinai, untsu imanchau diyamua nu eme anentam atinai.

<sup>12</sup> Nuigtushkam aents niina ipauwa nuna chichajak:

—Yuwatin umiakjumesh nuniachkugmesh aagkú yuwatin dutikakjumesh, kumpajum aidau, yatsum aidau, pataim aidau, amijai ijutkamu wiyakuch pujaukesh ipaawaipa; nu dutikamak, ditashkam dutiksag ipapainakui, akikbauwa nunin juwaktatme.

<sup>13</sup> Duka nunitsuk, yuwatin pegkeg umiakmek untsuktá ujunauch aidau, takamainchau aidau, shutú aidau, wainmachu aidaushkam;

<sup>14</sup> nuniakmek shiig aneastinaitme, wagki ditak akigmamainchau asagmatai, tujash aents pegkejan takasú aidau nantajagtina dui akiam atinaitme.

### *Aagkú yuwatin pachisa augmattsamu*

(Mt. 22.1-14)

<sup>15</sup> Nu tabaun antuk, Jesusjai mesanum pekaja nuiya makichik chichaak:

—Shiijap aneastin ainawa Apajuí inamtaijin yutai shiig umikbaun yuawagtin aina duka, tau.

<sup>16</sup> Tutai Jesús ayaak:

—Makichik aents yutain shiig umikui aagkú yuwatnun, dutika kuashat ipamauwai.

<sup>17</sup> Dutika aagkú yuamun hora jegamtai, inaken awemauwai ipaamu aidaun ujaktí tusa, dutikak: Kaunatnume, yuwatnuk ashí uminkae, tita tusa.

<sup>18</sup> Tujash ashí makí makichik tsakugtugti tutan nagkamawaju. Dekatkau ipaamua nu chichaak: “Yamá nugká sumakjai, nuna diyakun wetatjai, wait aneas tsagkugtugti”, tau.

<sup>19</sup> Nuniai tikich chichau: “Cinco toron yachigkan sumakjai, nuna dekapatsatan weajai, wait aneas tsagkugtugti”, tiu.

<sup>20</sup> Tikitchakam aikasag: “Yamá nuwenajai, nuniau asan minishtatjai”, tau.

<sup>21</sup> Tiagmatai inak wakitki apujin ashí ujakui. Dutikam jeennushkam kajeká inaken chichajak: “Wamak plaza aina nui wetá nuigtú yaaktanun jinta aina nuishkam,

nunikam ujunauch aidau, takamainchau aidau, shutú aidau, wainmachu aidaushkam jui ikaunmakta”, tiuwai.

<sup>22</sup> Tima inakshakam wee, aents nunin aidaunak yajuak ikaunma apujin wejí: “Apuh, ame tujutmaum nunak imatixsanuk umikjai, tujash nuigtú ekeemainuk awai”, tau.

<sup>23</sup> Tama apu inaken chichajak: “Wetá jinta aina nui nuigtú yaakat pegmagbau agaaji aina nuishkam, nunikam tikich aidau wainkam kakantsam jukim ikaunmata, mina jegajui ekeemtai agkan awa nu ashí piyakti.

<sup>24</sup> Wagki wi nagkamchakun ipaamu agma duka, aagkú yuwatnun shiig umikag nunak yuwachagtai”, tiuwai.

*Cristo nemagbaunum waitmaina nu*  
(Mt. 10.37-38; 5.13)

<sup>25</sup> Kuashat aents Jesusjai weedaun, ayampatua chichajak:

<sup>26</sup> “Makichik aentskesh mina nemagtayatak, apajin, dukujin, nuween, uchijí aidaun, yachi aidaun, umayi aidaun, niina pujutinakesh imá senchi aneak, mina jintintajjuk amaitsui.

<sup>27</sup> Nunisag mina nemagtuk waittan dakitaushkam, mina jintintajjuk amaitsui.

<sup>28</sup> Atum ainajum anuiya, torre jegamkatatus wakegakug, ¿dekatkauk wajupa akikaik jegamainaita kuichkish kuashtash ajuta ju ashimainush tusa ekeemas anentaimainchaukait?

<sup>29</sup> Nuniachkug jegamkatatus ajiajuitak ashimkashmataig, ashí nuna wainaidauk dushikmain ainawai;

<sup>30</sup> nuninak: ‘Junak makichik aents jegamkatatus nagkamabi, nunikiatak ashimkachmayi’, tumain ainawai.

<sup>31</sup> Nuniachkush makichik rey tikich reyjai maaniata takug, ¿dekatkauk ekeemas anentaimainchaukait, diez mil suntag ajuta jujaish dita veinte mil minitjuina nujaish maanimainashitag tusa?

<sup>32</sup> Nunik maanimainchau dekapeakug, eke nagkamtsuk rey atushat pujaig, dekass epegkami, tusa chichaman akupjumainai.

<sup>33</sup> Nunisag, atum ainajum anuiyatijum makichkitigmekesh ashí atumdau aina nu idaichakjumek, mina jintintajjuk amaitsugme.

*Wee jea jeatuji pachisa Jesús augmattsamu*  
(Mr. 9.50)

<sup>34</sup> “Week pegkejai, tujash jea jeatuji megkaekamtaish, ¿utugsaya ataktush jea jeatush emamainaita?

<sup>35</sup> Wee nunikmataig nugkanum takamainkesh, abono najanmainnumkesh atsumait-sui, ayatak agaa ukajá ajapmainai. Nuna antutaiji ajamuk, antuktinme”, tiuwai.

## 15

*Uwig megkaekau augmattsamu*  
(Mt. 18.10-14)

<sup>1</sup> Jesusan antugkagtatus kuashat aents apú kuichkiji atinun ijumain aidau, tikich aents tudaugtin aidaujai ijuntuidau.

<sup>2</sup> Imatikiagtai fariseo aidau, escriba aidaujai Jesusan pachisag:

—Au aentsuk tudau aidau yajuak ditajai ijunag yu wekaenuwe, tusag ashishmatuidau.

<sup>3</sup> Nu tama ju augmatbaun pachis augmatak:

<sup>4</sup> Atum ainajum anuiya, cien uwig aja nuiya makichik megkaetukam, noventa y nueve juwaka nunak uwejush batsaak, ¿megkaekauwa nuna igkugtatus egaak jiiintumainchaukaih?

<sup>5</sup> Nunik wainkag, shiig anentus yanakí juawai;

<sup>6</sup> nunik wakitki jeen jegaa, kumpají aidaun nuigtú nijai ijutkau batsatun chichajak: “Uwig megkaetugkaunak yamaik igkugjai, nuniku asamtai atumesh wijai shiig aneastajum”, tumainai.

<sup>7</sup> Nunin asamtai tajime, nayaimpinmash juní nagkaemas shiig aneamu awai makichik aents tudau takatan idaiyak pujutjin yapajintaig, noventa y nueve pegkeg aidau sujumankatatus atsumainatsu nuna nagkaesau.

*Kuichik emegkakbau pachisa augmattsamu*

<sup>8</sup> ¿Nunisag nuwa diez dracma\* ajamu makichik emegkak, lámpara ekemak, jegá japimak shiig kuitamas egaak igkumainchaukaih?

<sup>9</sup> Nunik wainak, kumpají aidaun nuigtú niijai ijutkau batsatun ijumag: “Dracma emegkakmayag nunak igkugjai, nuniku asantai atumesh wijai shiig aneestajum, tumainai.

<sup>10</sup> Nunin asantai tajime, Apajuí angelji aidauk shiig aneenawai, makichik aents tudau takatan idaiyak pujutjin yapajitaik”.

*Uchi kuichkin ashimkauwa nu pachisa augmattsamu*

<sup>11</sup> Junashkam Jesús augmatak: “Makichik aents ajujakui jimag uchijí;

<sup>12</sup> tuja uchi ekeuwa nu apajin chichajak: ‘Apawah, wají aidaú midau amaina duka yamaik sujestá’, tusa segauwai. Tutai apajishkam wají aidaunak mai akantuk susauwai.

<sup>13</sup> Dutikam dukap tsawan atsuk, uchi ekeuwa duka ashí ni wajiijinak ijumag juki apajinak ukuak, tikich nugkanum atushat weuwai. Nunik nui pujus pegkegchaunum wekaegak, wajiji aidaunak wainak ashimkauwai.

<sup>14</sup> Nunik ashí ashimak pujai, nunú nugkanum shiig senchi yapajut tepeauwai, nunikmatai niishkam shiig atsumamunum jegantui.

<sup>15</sup> Nuniak wee nuiya aentsun jegantun takatan inimtai, ajajin awemauwai kuchin kuitamjuktati tusa.

<sup>16</sup> Dutikam kuchi yuinamun yumain dekapeau, tujash makichik aentskesh yutainak suwinachu.

<sup>17</sup> Dutikam anentaimag: ¡Mina apajú takajin aidauk shiig kuashat yutaiji ajuinainpap wi jui pujusan nujantai jakattaja!

<sup>18</sup> Dekas mina Apajuí wakitkitjai, nunikan jegaan: Apawah, wika Apajuinash tuja aminash shiig pegkegchau takagsajame,

<sup>19</sup> nuniku asan wika amina uchijum tamak amaitsuajai, minak amina takagtamin aina nuninuk etita titajai, tiuwai.

<sup>20</sup> Tusa jiinki apají pujamunum weuwai. Nunik iká minittamanak uchijin wainak, apají wait anenjauwai, nunik tupikatki igkug, kajut pagkuk kugkuasui.

<sup>21</sup> Dutikam uchijí chichaak: ‘Apawah, wika Apajuinash tuja aminash shiig pegkegchau takagsajame, nuniku asan wika amina uchijum tamak amaitsuajai’, tiuwai.

<sup>22</sup> Tujash apajig inake aina nuna chichajak: ‘Wamak jaanch dekas pegkeg agma iman jikjum anugtujatajum, dutikakjum tsajam uwejinish anillo patakuajum, sapatckakam wegagtuktajum.

<sup>23</sup> Dutikajum toro tsakat duwejam itajum maatajum, yutai shiig umiká yuwinaku fiestamawagmi;

<sup>24</sup> wagki juka mina uchijuk jakau aajakui, tujash yamaik iwaaku wakitki tae; megkaekau aajakui, tujash yamaik wainkaji’. Tusa timatai fiestamant nagkamawajui uchijí tajuam shiig aneak.

<sup>25</sup> “Nuniai, uchijí eemkau ajanum pujau, wakitki jegá taattak minikmá, nantsemainak música ishinainamun antuku;

<sup>26</sup> nunik inaken untsuká: ¿Wagka imatuinawa? tusa iniau.

<sup>27</sup> Tama ni ayaak: —Amina yatsum taamtai apa, toro tsakatan dekas duwegman mae, uchijí jatsuk iwaaku tau asantai, tau.

<sup>28</sup> Tama kajeká, jegaa waitnak dakitau, nunitai apají jiintuki, wayata tusa imatjau.

<sup>29</sup> Tama apajin ayaak: ‘Apawah, wajupa mijadaia ame dutikata tabaunak makichkish intinjutsuk yayatsjame, nuniaigkish makichik cabra tsakatchikesh kumpají aidaújai fiestamati tusamek sujuchume.

<sup>30</sup> Tujash ju amina uchijum, ashí wajijum aidaunak nuwa akiká takatai aidaújai wekagak ashimak taamtai, eme anentsam toro tsakat dekas duwejam mantuam ayugkum fiestamjame’, tau.

<sup>31</sup> “Tama apají ayaak: ‘Uchijuh, amek wijai ijunjam tuke pjujuwaitme, ashí wají midau aina duka aminu ainawai.

<sup>32</sup> Tujash juka fiestamainaitji shiig aneaku, wagki juka yatsumek jakau aajakui, tujash yamaik iwaaku wakitki tae, megkaekau aajakui, tujash yamaik wainkaji’ ”, tiuwai.

## 16

*Wají kuitamin betek umichu pachisa augmattsamu*

\* 15:8 “Dracma”, tawa duka Persanamaya kuichik kaya oro najanamu aajakui.

<sup>1</sup> Junashkam Jesús jintintaiji aidaun ujaak: “Aajakui makichik aents wiyakuch, nu ajujaku makichik inak wajiji aidaun kuitamjin; nuna apujin ujatkejui, wajijiminak wainak takagtamui”, tusag.

<sup>2</sup> Tiagtai untsuká chichajak: ¿Wajuk asamtaiya nunash tujamainawa? Ame takasbaujum iwaintugkata, wagki yamaik mina wajig kuitamnuk achattame, tau.

<sup>3</sup> Tama waji kuitamin anentaimas: “¿Mina apug takatnum jiija duish, wajinak dutikatja? Nugkanash kakaajan taumaitsojai, wainkauch sujustajum tusa segamtanash datsamajai.

<sup>4</sup> Untsu juna jutikatjai apu ni takatjin jigtaiash, aents ditá jeen jujumain aina nuna”, tau.

<sup>5</sup> Tusa ni apujin diwimaidaun makí makichik untsuká, dekatkauwa nuna iniak: ¿Wajupa mina apujush diwime? tau.

<sup>6</sup> Tama ayaak: “Wika aceite cien barril\* diwimjai”, tau. Tutai: “Ju papí jukim ekeemsam wamkesam agagta cincuenta diwimjai tusam”, tiuwai.

<sup>7</sup> Nunik tikichin iniak: “¿Amesh wajupa diwime?” Tama ni ayaak: “Wika trigo cien saco diwimjai”, tau. Tutai ni ayaak: “Ameshkam ju papí jukim ekeemsam wamak agagta ayatak ochenta diwimjai tusam”, tiuwai.

<sup>8</sup> Nunú inak waji kuitamin pegkegchauwa nu, shiig anentaimag dutikamujin waituk, apujig shiig anentsauwai. Nuna tusa Jesús, Apajuí nemagchau aina duka pegkegchau takatnumag, Apajuí nemajin aidaun nagkaegas imatika anentaimainawai.

<sup>9</sup> “Nuadui tajime: Dekas kuichik pegkegchau takasa jukimua duka tikich yayakjum kumpajum ikaugkatajum, nu dutikagmin atumdau abuetugmakmataish, Apajuí ni pujutaiji tuke auwa nui jumakitin asamtai.

<sup>10</sup> “Aents waji piipichinakesh kuitamas takauwa duka, waji muunnumash nunisag amainai; untsu waji piipichinakesh kuitamas takachuk, waji muunnumshakam nunisag amainai.

<sup>11</sup> Aents ju nugka jui pujus, kuichik kuashat ajamaitak pegkejan takaachunash, ¿Yaa dekas tuke atina nunash sumainaita?

<sup>12</sup> Tikichdaukesh kuitamsa takaschaum nunash, ¿yaki amastí atumdau atí tibaunash?

<sup>13</sup> “Makichik inakak jimag apunak takagmaitsoi; wagki makichkia nuna dakitak, tikichia nuna anemainai; nuniachkush makichkia nuna umijak, tikichia nunak umigmaitsoi. Atumek Apajuí takag, wiyakchameatasa takaa wajamaitsoigme”.

<sup>14</sup> Ashí ju waji aina nu tabaun fariseo kuichkinak anentaimtin aina nu antukag, dushikis chichajuidau.

<sup>15</sup> Nudiagtai Jesús ayaak: “Atumek aentsú eemtinig pegkejan takauwa iman jumamjume, tujash Apajuí atumi anentaimnak dekagtamjume; wagki aents eme anentam aina nunak, Apajuik dakitawai.

*Chicham umiktin nuigtú Apajuí inamtai pachisa tibau*

<sup>16</sup> “Chicham umiktin nuigtú profeta tibau aina duka Juan tauwa nui nagkanui; nui nagkamas yamajam chicham Apajuí inabau pachisa etsegnawai, nuwi wayawagtatus ashí kakanmamainawai.

<sup>17</sup> “Nugka, nayaaim aina nu megkagainatsaigkik, chicham umiktinnum Moisés agagbau piipich aina dukesh umintsukek juwakchatnai.

*Jesús nuwak idaimaitsoi tibau*

*(Mt. 19.1-12; Mr. 10.1-12)*

<sup>18</sup> “Makichik aishmag nuwen idaiyas tikichjai nuwenkug, ekagmawai; tuja nuwa idaisamujai nuwenushkam, nunisag ekagmawai.

*Lázaro wiyakchajai*

<sup>19</sup> “Aajakui makichik aents wiyakuch, apu iwagmamtai dekas jaanch shiig pegkejan iwagmag pujus, kashí kashinig yutain shiig umiká festamá pujau.

<sup>20</sup> Nuniai, makichik ujunauch Lázaro daagtin ashí iyashinig kuwi kuwimjú wajasan wiyakcha waitijin apujkajui nui pujus segamti tusa;

<sup>21</sup> nui pujus senchi yapajak wiyakcha mesajinia puunas kakegun yuwatatus wakegau, nunnittam yawá aidau tajuawag kuwimjin dukatuidau.

<sup>22</sup> Lázaro nuní pujau jakamtai, ángel aidau jukiag Abraham pujamunum iwakajui. Nuniku ai wiyakchashkam jakauwai, nunikmatai ukusajui.

<sup>23</sup> “Tuja wiyakchak Hades† waitiak pujus pagkas niimkamá, Abrahaman atushat wainkauwai, Lazaroshkam niini ayaumas ekeemtatman.

\* 16:6 Makichik barrilnumag ocho galones inagkeasa aceitek yajá wajakbauwai. † 16:23 “Hades” tawa duka diistá Mt. 11.23.

<sup>24</sup> Nunik senchi untsamak: ‘Apawah Abrahamah, minash wait anenjugta nuniakum Lázaro awetugta ni tsajam uweji titigchijin yumí antig idaijun bichatmitkajuati, wagki jii imaniamunum pujusan senchi waitiajai’, tau.

<sup>25</sup> Tujash Abraham ayaak: ‘Uchijuh, ame pujusbaujum adeagta, aminak waji pegkeg aidau ajutjamajakui; nuniai Lazarok waitujakui. Tujash yamaik nigka jui shiig aneas pujai, ame waitiame.

<sup>26</sup> Nuigtushkam juwiyati anui minita takuish minimaitsui, wake ishamain asamtai. Anuiyatigmeshkam jui minitasajum wakegakjumesh nagkaemamaitsugme’, tau.

<sup>27</sup> “Tama wiyakuch ayaak: ‘Untsu apawah Abrahamah, Lazaron mina apajú jeen awemati tusan segajame,

<sup>28</sup> nui cinco yatsug batsata nuna ujatjukti, dutikam ditak ju imag waitiamua juig minishtinme’, tau.

<sup>29</sup> Tama Abraham ayaak: ‘Ditak, Moisés nuigtú profeta aidau agagbauwa nu ajuinawai; nuna aujus imatiksag umiinak waittanmag minimainchau ainawai’, tau.

<sup>30</sup> Tama wiyakuch ayaak: ‘Atsa, apawa Abrahamah, jakau aina nuiya makichik nantakí jegajua ujamak, tudau takatan idaiyinak pujutjinak yapajimain ainawai’, tau.

<sup>31</sup> Tutai Abraham ayaak: ‘Moisés nuigtú profeta aidau agagbauwa nuna betek umiinatsu anidauk, jakau aina nuiya nantakí ujamash antugkachagatui’ ”, tiuwai.

## 17

### *Tikichin pegkegchau takamtikaidau pachisa tibau*

(Mt. 18.6-7, 21-22; Mr. 9.42)

<sup>1</sup> Jesús jintintaiji aidau chichajak: —Kakajus tupanmaitsui tudau takata nuna anentai egketkagtuina duka; tujash ¡wait anentajai makichik aentskesh tikichin tudau takamtikaina nunak!

<sup>2</sup> Dekas pegkeja duka jujú piipich aina juiya mina dekaskeapi tujutuina nuna tudaun takamtikaidauk, dekas kaya muun juki kuntutnum jigká detua nayantsa kunajin ajugká ajapmainus ajapachbau ainatai.

<sup>3</sup> Nuadui ¡Atumek kuitamamkatajum! “Amina yatsum tudau takagtamkuig, jiyaktá; dutikam tsagkugtugta takuig, tsagkujata.

<sup>4</sup> Nuigtú makichik tsawantinig sieteya imagnia tudaun takagtammas, sieteya imania tajutjama: Atak awagkinuk ankashtatjai takuig, tsagkujata”, tiuwai.

### *Dekaskeapi tabauwa nu*

(Mt. 21.21)

<sup>5</sup> Apóstol aidau Apu Jesusan:

—Dekaskeapi tabau aan nagkaemas sukagtusta, tuidau.

<sup>6</sup> Tiagtai Apu Jesús ayaak:

—Dekaskeapi tabauwa nu mostaza jigkayiya nuninkesh ajutjamainakuig, ju sicómoro chichagkujum: “Teganim nayantsanum wajaata”, tamak nunisag umigtamainai, tiuwai.

### *Inak aidau umimain*

<sup>7</sup> “¿Atum ainajum anuiyash, ya inake ajanum takaak wekagu nuniachkush baká kuitamak wekagu taamtai, wayam mesanum ekeemsam yujumak yuwata, tumainaita?

<sup>8</sup> ¿Nunak tutsuk: ‘Aagkú yuwatin umigtukta, nunikam yapagmamam ajamjusta wi yuwan, uwagmatai amesh dui yuwam uwagta’, tuchauk aina?

<sup>9</sup> ¿Inakega nuna dutikata tibaun imatiksag umikmataish see tinuk aina?

<sup>10</sup> Atumshakam nunisjumek, Apajú ashí dutikata tibaauwa duke umiká idaikugmek: ‘Jutiik inak atsumchatai ainaji, imá tibaauwa duke umidau asaja’, tumainaitjume”.

### *Diez aents lepragtin aidau Jesús etsagakbau*

<sup>11</sup> Jesús Jerusalén weak, Samaria, Galileajai tesagdayamu jinta asamtai nuní nagkaebau.

<sup>12</sup> Nunik yaakat yaignum jegai, diez aents lepragtin jünag ikaag ijuntsaju,

<sup>13</sup> nunik senchi untsumkag:

—¡Jesús, Maestro, jutiish wait anenkagtujia! wajaidau.

<sup>14</sup> Imatiagtai Jesús wainak, chichajak:

—Wetajum nunikjum sacerdote wantintuktajum, tiu.

Tima ditashkam, jintá wesag pegkeg wajasaju.

<sup>15</sup> Nunik dita aina nuiya makichik ni tsagagbaujin wainmamak, senchi jiiák Apajuin emematki waketak,

<sup>16</sup> Jesusa jegantun tikishmag dijayin nugkan antig pujus, see tau. Duka samarianmaya aajakui.

17 Nunitai Jesús chichak:

—¿Diez aidau tsagagchagmaka? ¿Nueveya dusha wajukawagmae?

18 ¿Imá jukeuchikaih tikich nugkanmayayaitak wakitki Apajui ememati duka? tau.

19 Tusa Jesús:

—Wajakim wetá, amek dekaskeapi tame dui tsagajume, tiuwai.

*Apajuish wajutí inamjatnaita tibau*

(Mt. 24.23-28, 36-41)

20 Fariseo aidau Jesusan, Apajuish wajutí inamjatasash taatnaita tusag inidau.

Tama ni ayaak: —Apajui inamjatna duka duwiyap atatua tusaik kakajus dekamaitsumi.

21 Nuniau asantai: “Jui inamui, awi inamui”, tabauk achatnai. Apajuik yamaiya juik atumin inamui, tiuwai.

22 Tusa jintintaiji aidaun chichajak:

—Tsawan jegatnai, Aentsmaga akiinauwa nuna makichik tsawankesh wainkatatus wakeyagtin aina nu, nuniakush waitkachagtin ainawai.

23 Ujumak aents aidakush chichagtamainak: “Jui pujawai”, nuniachkush “awi pujume”, tujamainakuish wegpajum nuigtushkam nemagkaigpajum.

24 Wagki peem peeti nayaimpin mai yantamejai tsaaptin emama numamtuk wajaktinai tsawan Aentsmaga akiinau minamu atina duka.

25 Nunú tsawan jegatsaig, dekatkauk senchi waittsattajai, aantsag aents aidaush dakitjiagtatui.

26 Noé pujusua nu tsawantin wajujejakajua numamtuk wajagtinai, tsawan Aentsmaga akiinauwa nu minamunmash.

27 Aents aidauk yuwinak, umutnash umuinak, nuwenainak, nawanjin suju waja batsatai, Noé niina arcajin egkemauiwai, nuniai diluvio minak ashí tajakui.

28 Nunisag Lot pujujukua nu tsawantinish yuwinak, umuinak, sumainak, sujuinak, ajakmainak nuigtú jegá jegam waja batsataidau;

29 nuniai Lot Sodoma pujau jiiinkiuwai, nunikmatai nayaimpinmaya jii yutug azufrejai pachimdaegag iyajui, nunikmatai ashí jinawajui.

30 Nunisag atinai Aentsmaga akiinauwa nu wantinkatna dusha.

31 “Nu tsawantin, jega ekenja jegamkamu nagkatka nui pujauk, wajiiji jegá aunak akaikig jukishti; antsag ajanum takaak pujaushkam jeenig wakitikishti.

32 Adeagtajum Lota nuwe wajukauwaita nu.

33 Aents ju nugka jui pujutan imá senchi wakegak, mina nemagtuk waittan dakitauk uwemjashin ainawai; tujash mina nemagtak niina pujutinash puyatjukchauk, uwemjatnai.

34 “Junashkam tajime: Jimag aents kashi makichik pegaknumag tsanias tepaushkam, makichik juwaku, tikichik ukuam atinai.

35 Jimag nuwa tsanias deketainum dekeak pujuidaushkam makichik juwaku, tikichik ukuam atinai.

36 Jimag aents ajanum takaak pujaushkam, makichik juwaku, tikichik ukuam atinai”, tau.

37 Tutai iniinak:

—¿Apuh, dusha tuwí nuniktinaita?

Tiagtai ni ayaak:

—Tuwí jakau tepettawa, nuwi chuwegkak tuwakagtinai, tiuwai.

## 18

*Nuwa waje juez pegkegchaujai pachisa augmattsamu*

1 Jesús juna augmattsauwai mijamtsuk Apajui tuke augmaina nuna pachis jintinkagtuata tau asa.

2 “Makichik yaaktanum makichik juez pujujakui, Apajuinash ishamsash anentaimtuchu, aentsnash eme anentsagkesh diichu.

3 Nunú yaaktanmag pujujakui makichik nuwa waje, nunú shiwaji utugchat aputusam juezan jegajua: ‘Jujú epegtujuata’, tusa segau.

4 Tusa imatjú pujugmash yaitnak dakitú pujau asa nigki anentaimas: ‘Apajuin ishamsanush anentaimtuchu, aents aidaunash ajantusnush diichu akunush,

5 ju nuwa waje waa wamak tajatak waitkaja juní pujui yaigkan epegtuatjai dutikam, agkan idaitusti’”, tiuwai.

6 Tusa nuigtú Apu Jesús chichaak: Juez pegkegchaukesh aatus tiuwa nunin aish;

7 ¿Apajuish ni etejamu aidau kashi tsawaijai untsuamash, wagkag ayamjukchati? ¿Wamak aitskesh idaimainkaih?



<sup>8</sup> Dekas tajime Apajuik waamak yaimpamainai. ¿Tujash wi Aentsmaga akiinauwaitag nuna ataktú ju nugka jui taatnaitag nuniaknush aents dekaskeapi taunash wainkat-nashitag?, tiuwai.

*Fariseo nuigtú apú kuichkiji atinun ijumnujai pachisa augmattsamu*

<sup>9</sup> Ujumak aents aidau dita imá pegkejan takauwa iman anenmamainak, tikich aidauanak imanchauch diidau asagmatai, Jesús jujú augmatbaun pachis chichaak:

<sup>10</sup> Jimag aents Apajuin ausatatus jega Apajuí ememattainum weajui, makichik fariseo, tikich apú kuichkiji atinun ijumnujai.

<sup>11</sup> Nunik fariseo Apajuin aujak wajai wajas: Apawah, see tajame, wika tikich aents aidau kasa, pegkegchau takau, tsanijimtan wekaetin, jujú apú kuichkiji atinun ijumin puja juninkesh atsujai;

<sup>12</sup> Wika makichik semanatin jimag tsawantai ayunó wajaujai, nuigtushkam kuichki-nash ashí wi juamunak diezmó wajaujai, tau.

<sup>13</sup> Tujash apú kuichkiji atinun ijumnuk kanaká iká wajas, nayaimpinash pagkai diitsuk, detsepen ijuak: “Apajuiyah, wika tudauwaitjai, minash wait anenjugta”, tiuwai.

<sup>14</sup> “Wika tajime, nunú aatus tiuwa nu pegkeg Apajuí emtin wantinak waketai, tikichia duka nunikchauwai. Wagki nigki eme anenmama duka, imanchau diyam atinai; untsu imanchau diyamua nu eme anentam atinai”, tiuwai.

*Jesús uchi ikautkamu*

*(Mt. 19.13-15; Mr. 10.13-16)*

<sup>15</sup> Nuna tusa ashimkamtai uchi aidau Jesusan ikautuidau antinjukti tusag. Imatiki-agtai ni jintintaiji aidau wainkag uchigtin aidau jiyaidau.

<sup>16</sup> Tujash Jesús, uchin untsuká:

—Idaisatajum, uchi aidauk minai minitnume, utujiakaigpajum, wagki Apajuí inama duka, jujú uchi aina junin aina nudauwai.

<sup>17</sup> Dekas tajime: Aents aidau, uchi mina anentaimjutuina imanis anentaimjutu-inachuk, Apajuí inamak amain ainatsui, tiuwai.

*Datsauch wiyakuch Jesusan iniasbau*

*(Mt. 19.16-26; Mr. 10.17-27)*

<sup>18</sup> Makichik apu Jesusan iniak:

—Maestro pegkejah, ¿wajina dutikmainaitja pujut tuke atina nuna jukitanush? tau.

<sup>19</sup> Tama Jesús ayaak:

—¿Wagka pegkejá tujutme? Makichkish pegkejak atsawai, imá Apajuiya duke pegkejak.

<sup>20</sup> Amek dekame chicham umiktin agagbaunum: “Tsanijinawaipa, magkagtuawaipa, kasamkaipa, wainkamek tsanumkagtuajaipa, amina apa dukujai eme anentsam diistá” tawa nunú, tau.

<sup>21</sup> Tama ni chichaak:

—Wika nunak datsauch nagkamsanuk ashí umikuitjai, tau.

<sup>22</sup> Nuna tutai Jesús antuk ayaak:

—Nuigtú makichik umimain ajutamui: ashí amina ajutamaina duka sujukam ujunauch aina nu tinamkata. Nu dutikawamin nayaimpinum wajijgmik ajutamtinai. Nu dutika ukuakum mina nemagtukta, tiuwai.

<sup>23</sup> Tujash nu tama wake besekú, wagki shiig wiyakuch asa.

<sup>24</sup> Nunik senchi wake besektatman Jesús wainak chichaak:

—¿Shiig utugchatai wiyakuch aidau Apajuí inamtaijin wayata tabauk!

<sup>25</sup> Camello aujá jiin waigká nagkaemamain yupichuchia nuna nagkaesau utugchatai, wiyakuch Apajuí inamtaijin wayatag tabauk, tiuwai.

<sup>26</sup> Nu tabaun tikich aidashkam antukag, iniimainak:

—¿Yaki tujash uwemjaush amainaita? tuidau.

<sup>27</sup> Tiagtai Jesús ayaak:

—Aents aidau dutikmainchauwa nunak Apajuí dutikmainai, tiuwai.

*Mina nemagtuidauk ditau ukubaujin nagkaesau jukiagtinau tibau*

*(Mt. 19.27-30; Mr. 10.28-31)*

<sup>28</sup> Tutai Pedro ayaak:

—Apuh, jutii aidautik ashí iina ajutamaina duka ukuinaku, ame nemagkabiaji, tau.

<sup>29</sup> Tutai Jesús ayaak:

—Dekas tajime, ashí aents Apajuí inabaujin etsejuinak jeen, nuwen, yachi aidau, uchijí aidau, apajin dukujjai ukukiag yujaidauk,

<sup>30</sup> jujú nugka jui pujusash, ni ukukbaujin nagkaesau jukiagtinai, nuigtú atak atina duish pujut tuke atina nunash jukitnai.

*Kampatuma juna Jesús ni mantamnatnuji etsegkamu*

(Mt. 20.17-19; Mr. 10.32-34)

<sup>31</sup> Jesús ni jintintaiji doce aina nuna akanak chichajak: “Yamai Jerusalén wegag dui, profeta aidau Aentsmaga akiinau nuniktinun ashí agajajua nunú uminkattawai.

<sup>32</sup> Nuniau asamtai aents judiochu aidaunum sujukagtatui, dutikawagmatai pegkegchau chichajuinak, dushikinak usukiagtatui;

<sup>33</sup> dutikawag asuttanash asut awa awajtuinakuag maawagtatui; tujash kampatum tsawanta dui nantaktatui”, tau.

<sup>34</sup> Nunak jintintaiji aidauk makichkish shiig dekachajui, wajina takua tawa nuna shiig dekamainchau dekapedau asag.

*Jericonmaya wainmachu wainmakbau*

(Mt. 20.29-34; Mr. 10.46-52)

<sup>35</sup> Jesús Jericó jegattak wegai, aents wainmachu jintá yantamen ekeemas: Kuichik sujustajum, tusa segamá eketu.

<sup>36</sup> Nuniau kuashat aents nagkaemainak pampainamun antuk, wagka imatainawa tusa iniimu.

<sup>37</sup> Tutai, Jesús nazarenumia wetai imatuinawai tusag ujaidau.

<sup>38</sup> Tiagtai senchi untsamak:

—¡Jesusah, David weantu uchijiyah, minash wait anenjugta! wajau.

<sup>39</sup> Imattai aents eemak ashinaidau itatkati tusag jiyaidau, tujash nigka nuní senchi untsamak:

—¡David weantu uchijiyah, minash wait anenjugta! wajau.

<sup>40</sup> Wainmachu imatbaun antuk Jesús wajantá:

—Jukijum jui itagtuatajum. Timatai ejentuntam, iniak:

<sup>41</sup> —¿Utugtukti tusamea wakegame? tau.

Tama ni ayaak:

—Apuh, wainmaktasan wakegajai, tau.

<sup>42</sup> Tutai Jesús chichajak:

—¡Wainmakta! Ame dekaskeapi tame dui tsagajume, tiu.

<sup>43</sup> Tusá tamawaik wainmakui. Nunik Apajuin emematkamaikia Jesusan nemagkauwai. Tuja ashí aents nuna wainkajushkam Apajuin emematuidau.

## 19

*Jesús Zaqueojai igkunikbau*

<sup>1</sup> Jesús yaakat Jericó wayá nagkaebau.

<sup>2</sup> Nuniai Zaqueo apú kuichkiji atinun ijumin aidaun apuji shiig wiyakuch, nunú yaaktanmag pujau.

<sup>3</sup> Nuniau asa Jesusan wainkatatus wakegau; nuniayatak kuashat aents tuwagkagmatai wainmainchau dekapjau, sutajuch asa.

<sup>4</sup> Nuniak eemak tupikaki, sicomoronum waka ekeemsau, Jesús nuní nagkaemaktin asamtai wainkatatus.

<sup>5</sup> Nuniai Jesuschakam nui jegak pagkai diyak:

—Zaqueo, wamkesam akaikita, yamai amina jeemin ayamjatasan minajai, tiu.

<sup>6</sup> Tama Zaqueoshkam wamkes akaiki, shiig anentus Jesusan juki niina jeen emauwai.

<sup>7</sup> Nunitai ashí aents aidau wainkag, aents tudaugtinu jeen kanagtatus wegawai tusag augmatuidau.

<sup>8</sup> Tujash Zaqueok niina jeen ejega wajakí Jesusan chichajak:

—Apuh, yamai nagkamsanuk aents ujunauch aidaunak jimaituk wajijun akankan tinamtajai, wi makichik aentsun wajiin kasagkau akunush ipaksumta imagnia awagtuktajai, tau.

<sup>9</sup> Tutai Jesús ayaak:

—Yamaik ashí amina pataimijai uwemkaugme, Abraham dekaskeapi tiuwa nunisjumek dekaskeapi tujutuijum dui, dekas Abraham wegantu wajasugme.

<sup>10</sup> Wagki wi Aentsmaga akiinauwaitag nunak, megkaejauwa nuna egaká uwemti-jatasan tauwaitjai, tiuwei.

*Kuichik pachisa augmattsamu*

(Mt. 25.14-30)

<sup>11</sup> Jesús Jerusalén jegattak wegau asamtai, aents aidau ni chichaamu antugkaju asag, awi jegaa apu wajasá waamak inamjash timpash tusag anentaimaidau asagmatai augmatbaun nagkabau.

<sup>12</sup> Nuniak tau: "Makichik aents eme anentsá diitai aajakui, nunú tikich nugkanum atushat weuwai, rey wajas wakitki taatatus.

<sup>13</sup> Eke wetsuk niina inaken diez aina nuna untsuká, makí makichik kuashat kuichkin susa chichajak: 'Jujú kuichkia ju takamtikamatajum nuniagmin wisha taatjai', tiuwai.

<sup>14</sup> Tujash aents niina nugkenia aidau kajejuidau asag, dekas apun chichaman awetuinak: 'Jutiik anú rey wajas jutiiní inamjati tusaik wakegatsji', tiajui.

<sup>15</sup> "Tujash nu aaja tabau aig, rey adaikam wakitki niina nugkeen tauwai, nunik inake kuichik tinamká ukukbauji aidaun untsukajui, maki makichikish wajupak ikaugkaje tusa dekajuatatus.

<sup>16</sup> Tiajam makichik niyá eemak jegantá: 'Apuh, amina kuichkigmik diesa imania kawegke', tau.

<sup>17</sup> Tama ni ayaak: 'Ayú, pegkeg aikaume, amek inak pegkejaitme, machik susamuitkum imatikam ikaugkaume, dui wishakam diez yaakat aina nuna apuji emattajame'.

<sup>18</sup> Tusa inagnaig tikitchakam jegantun chichajak: 'Apuh ame kuichik sujusmayum duka, nuigtú cincoa imania kawegke', tau.

<sup>19</sup> Tutai rey nunashkam ayaak: 'Ameshkam cinco yaakta apuji atá', tiuwai.

<sup>20</sup> "Tuja tikich inak tajuntun chichajak: 'Apuh, juuwai kuichkigmik, jaanchi shiig ijian ukusan pujugjai,

<sup>21</sup> wagki amek waitkagkagtin, nuigtush ame susachu ayatkum atantin, aikasmek ame ajakchauwaitkum juu wekayin asamin ishamakun kuichkigminak takamtiksachmajai', tau.

<sup>22</sup> Tama ni ayaak: 'Amek inak pegkegchauwaitme, amina chichamjuminig baku-mattame, wi waitkagkagtin, susachu ayatkun atantin, nuigtú ajakmachu ayatkun juu wekayin dekajiatkumesh,

<sup>23</sup> ¿wagka banconum egkeam ukugtukchabiume, wakitki taak kawegkun jukiti tusam?', tau.

<sup>24</sup> Tusa nui ijuntatman chichajak: 'Aanú kuichik atankita, dutikam diesa imania ikaugka nu susatajum'.

<sup>25</sup> Tutai aents chichajuinak: Apuh, niinuk diesa imania ikaugkamu ajajama, tuidau.

<sup>26</sup> 'Tiagtai rey chichajak: Kuashat aja duka nuní dukap suwam atinai; untsu piipich ajamua dusha, nu piipich ajamua dukesh atantam atinai.

<sup>27</sup> Mina shiwag aidau rey wajasá jutiiní inamjai tusa dakitjiagma nunú, jui itanjum mina emtijui kajegtajum', tiuwai.

### *Jesús Jerusalén wayamu*

(Mt. 21.1-11; Mr. 11.1-11; Jn. 12.12-19)

<sup>28</sup> Juna tusa idaiyak, Jesús nagkaemaki Jerusalén wakatatus wegau.

<sup>29</sup> Nunik Betfagé nuigtú Betania awa nui tikiju wajas, olivosa mujají tutainum jegan, Jesús ni jintintaijin jimajan awemauwai.

<sup>30</sup> Dutikak: Wetajum au yaakat yaijuch awa awi, nuwi jegakmajum burro makichik aentskesh entsamchatai jigkaam wajau wainkattagme; nu atajum itaatajum.

<sup>31</sup> Nu dutikagmin makichik aentskesh inimpainak: ¿Wagka atiangme? tujamkujaish: Apu atumawai titajum, tiu.

<sup>32</sup> Tiajam jintintaiji aidaushkam wegag, jegakmá ni tibaunak imatiksag betek wainkaju.

<sup>33</sup> Nunik jegantun atittaman burrogtin wainak:

—¿Wagka burrosh atiangme? tau.

<sup>34</sup> Tama dita aiinak:

—Apu atumau asamtai juwaji, tiaju.

<sup>35</sup> Dutika jukiag Jesusan itaantaju, dutikawag jaanchji aidaun jukiag burro tuntupen aitkag, Jesusan ekeniaju.

<sup>36</sup> Nunik Jesús wetai, aents aidauk ditá jaanchji aidaun jintá ainag emaidau.

<sup>37</sup> Nunikag olivosan mujají chapaibaunum jegantatak weenak, ashí Jesusa nemajin aidauk shiig dakujusag senchi jiiakg Apajuin emematuidau, aents dutikmainchaun dutikaun wainkaju asag.

<sup>38</sup> nuninak: —¡Apu Apajuí awemam Rey miná duka pegkegmai! ¡Nayaimpinmash shiig agkan atí, antsag ashí yakiya aidaush junak ememattinme! wajaidau.

<sup>39</sup> Imatiagtai ujumak fariseo nui pachitkau aidau:

—Maestroh, jintintaijum aina nu itatjatajum tita, tuidau.

<sup>40</sup> Tama Jesús ayaak:

—Dita itatiagtaik kaya aina ju pampaumain ainawai, tiuwai.

*Jesús Jerusalegnumia aents aidau egaagbau*

<sup>41</sup> Jesús Jerusalén tikiju wajasú, nunik yaakta wainak, buutiuwai.

<sup>42</sup> Nunik: “iWajuk dekawajumek tusan wakegajai yamaiya juik amina agkan etamaina nu! Tujash yamaik duka dekamainchawaitme ejatkamua nunin asam.

<sup>43</sup> Tujash tsawan jegagtamtinai, shiwajum yaaktagmin peegmak apagtamak, ashí yantannum dakagmajag jetepakagtina nu.

<sup>44</sup> Dutijamainak atumnak ashí uchigmijai amupainak yaaktaginash ashí tsaigtamk-agtinai, dutikamu asa makichik kayakesh tikich kayanum patamiukesh juwakchatnai, wagki Apajui uwentijamjatatus awetugmamu dakitjau asajum”.

*Jega Apajui ememattainum aents batsatun Jesús jügbau*

(Mt. 21.12-17; Mr. 11.15-19; Jn. 2.13-22)

<sup>45</sup> Nuna tusa idaiyak, Jesús jega Apajui ememattainum wayauwai, nunik nui sujak batsamtatman jiijú.

<sup>46</sup> Dutika chichajuinak:

—Agagbau awai: “Mina jegajuk Apajui aujku ijuntaiyai” tawa nuniaig, atum kasa aidau batsamtai emaugme, tiu.

<sup>47</sup> Nunik Jesusak jega Apajui ememattainum kashí kashinig jintinkagtau. Nunitai sacerdot apuji, maestro chicham umiktinun jintinkagtin nuigtú judío apuji aidaujai maawagtatus chichaman umijuidau.

<sup>48</sup> Tujash yupichu dutikmainchau dekapedau, kuashat aents aidaush ni chichagkagta-munak puyatjus antujuidau asagmatai.

## 20

*Sacerdote apuji aidau Jesusan iniasagbau*

(Mt. 21.23-27; Mr. 11.27-33)

<sup>1</sup> Jesús jega Apajui ememattainum aents aidaun jintintak nuigtú yamajam chichaman etsejak pujai, sacerdote apuji aidau, maestro chicham umiktinun jintinkagtin, tikich judío apuji aidaujai utsanawajui.

<sup>2</sup> Nunikag: ¿Aminash ya jintinkagtuata tusash awetamae? ¿Yana chichamenia jusha juniame? tuidau.

<sup>3</sup> Tama Jesús ayaak:

—Wishakam iniastajime, aigkatajum:

<sup>4</sup> ¿Yaa Juagnash yamijatjata tusash awemauwaita, Apajui awemauwait, atsa aents aidauk awemauwait? tau.

<sup>5</sup> Tama ditak pempeentunikiag chichainak: “Juagnak Apajui awemauwai tajinish, ‘¿Tujash wagka dekaskeapi tichau ainagme?’ tujamtata jama.

<sup>6</sup> Tuja aents awemauwai tajinchakam, ashí aents aidauk Juagnak profetayai tuidau asag kayai tukugmag mantamain ainawai”, tuidau.

<sup>7</sup> Tusag:

—Dekatsji, yatsu Juagnash yamijatjata tusash awemauwait, tuidau.

<sup>8</sup> Tiagtai Jesús ayaak:

—Wishakam tichattajime yana chichamenia jutikaja nunak, tiuwai.

*Takau pegkegchau aidau pachisa tibau*

(Mt. 21.33-46; Mr. 12.1-12)

<sup>9</sup> Junashkam Jesús aents aidaun jintintak augmatbaun pachis nagkama tau: “Makichik aents ajajin uvan ajakui, dutika ujumak aents takau aidaun ukujak, weuwai dukap tsawan asa taatatus. <sup>10</sup> Nunik uva juut jegamtai, makichik inaken awemauwai takau batsatbaunum, nui jegamtai uva neje jukbaun niinun susatnume dutikam itagtuati tusa, nunik jegattaman takau aina nu suwimawag sutsuk wainak awagkiajui.

<sup>11</sup> Dutikawagmatai tikich inaken awemauwai, tujash nunashkam suwimawag pegkegchaun chichagkag wainak awagkiajui.

<sup>12</sup> Nuna dutikawagmatai kempatuma juna tikich inaken awemauwai, dutikamun ajanum takaina nu sENCHI suwimá, upu upujú awajsag jiiKI awemajui.

<sup>13</sup> “Dutikawagmatai uva ajagtina nu anentaimas: ‘¿Utugkatjaki? tusa, dekas mina uchig anetaijua juna awematjai, dutika ai nuna wainkag ajantus diischajaintash’ tiuwai.

<sup>14</sup> Tujash takau aina nu uchi minittaman wainkag: ‘Auwai ju aja juna jukitnuk, dekas maa ajapami, dutika juka iinu emami’, tuidau.

<sup>15</sup> Tusag achiká jukiag uva aja ukumtikiag maawajui.

“¿Nunash ajagtina dusha utugmainai tajume?”

<sup>16</sup> Dekas ajagtina nu tajakug takau aina nunak kajegká utsak, uva ajakbauwa nunak tikich aents aidaun susa idaimainai”.

Nuna Jesús tutai antukag:

—¿Duka tuke dutikamak achatnaitji! tuidau.

<sup>17</sup> Tiagtai Jesús ditan esetug diisá:

—¿Tujash wajina pachisaya agagbauwa nuwish:

“Kayá ekenag jegamin aidaun, kaya pegkegchauwai tusag dakitajua nunú, yamai dekas jegá ichichkatin kaya apujtutia iman wajasé”, tawa?”

<sup>18</sup> Nunú kaya nui iyauk tsainkatnai, untsu kaya aentsnum iyakug yuku ematnai, tau.

<sup>19</sup> Nuna Jesús augmattai, sacerdote apuji aidaun, maestro chicham umiktinun jintink-agtin aidaujui achikta tuidau. Nuninayatak aents aidaun ishamaidau.

*Kuichik akikmamu pachisa tibau*

(Mt. 22.15-22; Mr. 12.13-17)

<sup>20</sup> Nuninak aents aidaun, iish pegkeja nu dekatasa wakegainaji tusajum dekaajuatajum tusag awemajui, dutika Jesús wajintig timatai achiká gobernador inama nui sujukmi tusag.

<sup>21</sup> Tiagam Jesusan iniinak:

—Maestroh, jutiik dekanaji ame tame duka nuigtú jintinkagtam dushakam dekas jintinkagtame; nuigtush aents shiig awajkata tabaunum dutikasma, amek dekaskenum Apajui jintiya nu pachisam jintinkagtame.

<sup>22</sup> Nuniau asamin amina iniagme: ¿Jutiish Cesarash akimainkaih atsa akimainchaukaih? tuidau.

<sup>23</sup> Tujash Jesusak pegkegchau anentaimainamujin dekaju asa:

—¿Wagka pegkegchau anentaiyaish tujutjume?”

<sup>24</sup> Iwaintugkakjua makichik kuichik. ¿Yana niimegaita jusha, yana daaji agagbauwaita?

Tama:

—Cesardauwai tuidau.

<sup>25</sup> Tiagtai Jesús ayaak:

—Cesardauwa duka, César susatajum, Apajuinua dushakam Apajuik susatajum, tiuwai.

<sup>26</sup> Nuna ashí aents antuinamunum timatai, tsanumjumainchau dekapjaju. Nunikag nu tu aikam anentai jegagchag, itatjaju.

*Jakau nantagtin pachisa iniimsamu*

(Mt. 22.23-33; Mr. 12.18-27)

<sup>27</sup> Juna tusa machik aig, ujumak saduceo aidaun, jakauk nantagchagtin ainawai tinu asag, Jesusan iniinak:

<sup>28</sup> —Maestroh, Moisés papí agag ukugtamkiuwa nui: “Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai”, tawai.

<sup>29</sup> Tuja nuniamunum, siete yachigbau aajakajui, nuanuiya nagkamchak iwai nuwenauwai, tujash uchinak akiitsuk jakauwai.

<sup>30</sup> Nunikmatai tikich yachi jukishkam, uchinak akiitsuk jakauwai.

<sup>31</sup> Tuja kempatuma nu jukiish, uchinak akiitsuk jakauwai, nuni nuninakua siete aajakajua duka, uchinak akiitsuk jinawajui.

<sup>32</sup> Nunikagmatai dui pujus nuwashkam jakauwai.

<sup>33</sup> Siete aajakajua duka ashí nunak nuwatjaju aina duish ¿dekas yana nuweg atinaita atak nantainamunmash? tuidau.

<sup>34</sup> Tusa tiagtai Jesús ayaak:

—Ju nugka juig aishmag aidauk nuwenainawai, nuwa aidaushkam aishinainawai,

<sup>35</sup> tujash uwemkaju aidaun jakau nantajag tuke pujustin aina nuig, makichkish nuwenbauk atsutnai,

<sup>36</sup> jatanash jakachagtinaí. Ditak angeljai betek agtinai nuigtú Apajui uchiji agtinai nantakiaju asag.

<sup>37</sup> Jakau aidaun nantajagtina nunak Moisés dekamtijamui zarza kegamunum, Apu Apajui chichaak: “Witjai Abraham, Isaac, Jacob aina nuna Apajuijinuk”, tiuwa dui.

<sup>38</sup> Wagki ¡Apajuik jakau aina nuna Apajuijichui, nigka iwaaku aidaun Apajuijiyai! Apajui diismak jakau aidaush iwaaku batsatainawai.

<sup>39</sup> Aatus timatai maestro chicham umiktinun jintinkagtin aidaun:

—Maestroh shiig tiume, tuidau.

<sup>40</sup> Nuna timatai ataktuk iniaschajui.

*Cristush yana uchijigkita tibau*

(Mt. 22.41-46; Mr. 12.35-37)

<sup>41</sup> Nuniagtai Jesús ditan iniinak:

—¿Wajuk asamtaiya Cristuk Davita uchijiyai tuinawa?

<sup>42</sup> Tujash David nigki Salmosnum agak:

“Apu mina Apujun chichajak, ekeemsata mina untsujui;

<sup>43</sup> nunikamin wi amina shiwajum aidaunak,

amina dawemin ikautkatjame”, tiuwai.

<sup>44</sup> David Apug tawa nuniaish ¿wajuk asaya Davita uchijish amainaita? tau.

*Jesús escriba aidau pegkegchajui pachisa tibau*

(Mt. 23.1-36; Mr. 12.38-40; Lc. 11.37-54)

<sup>45</sup> Ashí aents antuinamunum jintintaiji aidaun chichajak:

<sup>46</sup> “Maestro chicham umiktinun jintinkagtin aina nujaiig kuitamamkatajum, ditak nugkutai esagman nugkujag yujainak, plazanum igkuntuinakush eme anenjus kumpamjintume tusag wakejin ainawai, nuninak jega ijuntainum nuniachkush yuamunum wainakush aents eme anentsá ekeemsati tibaunum ekeemsagtatus wakejin ainawai.

<sup>47</sup> Nuwa waje aidau jeenash atankiag, tsanumainak Apajuin au aujuinakua ukú yujag aina nunin aigpajum. Nunú aidau imá senchi suwimkan jukiagtin ainawai”.

## 21

*Nuwa waje ujunauch ofrenda egkeamu*

(Mr. 12.41-44)

<sup>1</sup> Ofrenda egketainum wiakuch aidau kuichkin egkeagtai Jesús diyak wajau,

<sup>2</sup> nunikmá makichik nuwa waje ujunauch jimag kuichik cobre najanamun egkettaman wainkau.

<sup>3</sup> Nunik:

—Dekas tajime, jujú nuwa waje ujunauchia ju ashí tikich aidaun nagkaesau egkeae,

<sup>4</sup> wagki ashí ofrendan tikich egkeawaja duka ampinum egkeawaje, tujash juka ujunauchitak ni sumaka yumainjiya nunak ashí egkeae, tiuwai.

*Jega Apajuí ememattai tsayam atinai tusa Jesús etsegkamu*

(Mt. 24.1-2; Mr. 13.1-2)

<sup>5</sup> Ujumak aents aidau jega Apajuí ememattain pachis, kaya pegkeg nuigtú ofrenda itaamu aidaujai jega shiig iwajamua nuna pachisag chichaidau. Tiagtai Jesús chichajak:

<sup>6</sup> —Atum ju imatika jegamkamu wainjum juka, tsawan jegatnai nunikmatai makichik kayakesh ekenjamu aina nuiyag juwakchatnai, ashí tsaikbau atinai, tiuwai.

*Nagkanbau jegatsaig wantinkagtin aidau*

(Mt. 24.3-28; Mr. 13.3-23; Lc. 17.22-24)

<sup>7</sup> Tutai Jesusan iniinak:

—Maestroh, ¿wajutiya dusha nuniktinaita? ¿Wají aidauk wantintinaita nu dutikam atin jegattak wajataish? tuidau.

<sup>8</sup> Tama ni ayaak: “Kuitamamkatajum tsanuam aijum, wagki kuashat midiatgintai mina daajun pachisag, nuninak: ‘Witjai Cristunuk, tsawantak tikiju wajasé’ wajagtina, tuinakuish atumek antugkaigpajum.

<sup>9</sup> Maaninawai tuinamu antiitnaitjume, nuigtú pampandayamush aitnai, imaninakuish ishamkaigpajum; dekatkawk nunú aidauwá nagkaemagtinai, tujash nagkanbau nu nuniaig achatnai”.

<sup>10</sup> Tusa nuigtushkam: “Nugka yaignum batsamin aidau tikich nuninum batsatujai maaniagtina, tuja nuninai nugka muunnum batsamin aidaushkam, mai imannumiajag maaniagtina.

<sup>11</sup> Senchi uugbau aidaush agtinai nuigtú yapagdash, jata ishamain utsumaja jinamush ashí yantannum atinai. Nayaimpinmayashkam shiig ishamain wantinaidaun wainiagtina.

<sup>12</sup> “Tujash ju ashí wi tajim nu eke jegatsaig, atumnak achigmakag waitkagmasagtina. Dutijamainak jega ijuntai aidaunum awaintamawag, nui jujamkiag cárrel egkepawag, nui jujamkiag tikich apu aidaunum etjamawag, nui inagkeapakiag gobernador aidaunum mash etjamawag, nuigtú rey aidaunum mash etjamawagtina mina nemagtin asagmin.

<sup>13</sup> Tujash nuna dutijamainakuish, mina pachittsajum tikich yupichu ujamainush ajutjamiagtinaí.

<sup>14</sup> Nuniakjumesh uyumakaigpa atum ayamjumamainush wajintu tumainaitjume duka;

<sup>15</sup> wagki wi atum chichaktinnak dekamtikattajime, dutikamu asagmin atum chichataik, shiwajum aina nuyyagkesh makichkish tujamainchau agtinaí.

<sup>16</sup> Tujash atumnak apa aidau, yatsum aidau, pataim aidau, kumpajum aina duke sujupakagtinaí, dutijamawagmatai dita maamuk maam agtinaí;

<sup>17</sup> nuigtush ashí aents aidau kajegtabiagtinaí mina daag pachisjum chichaidau asagmin,

<sup>18</sup> tujash makichkish minaig datumtamain ainatsui.

<sup>19</sup> Tujash ebetmamja pujakjumek, uwemjatin ainagme.

<sup>20</sup> "Suntag aidau Jerusalegkan tentea au wainkugmek, wamkeap tsaikagtata tusajum dekaatin atajum.

<sup>21</sup> Nuadui, Judea batsatutigmek mujá pisagtin atajum; Jerusalén batsatushkan jijnag yaaktanak ukuktinme; ajanum takaak batsatushkan, yaaktanmag wakitkig waimainchau ainawai.

<sup>22</sup> Wagki duka tsawantak suwimak jegau asa imanitnai, ashí agagbaunum tibauwa nu uminu asa.

<sup>23</sup> ¡Wait anentuinajai nunú tsawantin nuwa ejamtin nuigtú uchi amuntsuaku agtina nunak! Wagki ju nugka juig shiig senchi waitiam atinaí nuigtushkan ju aents aina judauk suwimak ishamain atinaí.

<sup>24</sup> Espadayai maamush agtinaí nuigtush achijag ashí tikich nugka aidaunum yajumam agtinaí; judiochu aina nu Jerusalegnak tsaikagtinaí, nunisag pujus tsawan dita mamik-tugbauwa nuna ejeyagtinaí.

*Aentsmaga akiinauwa nu minitnuji*

(Mt. 24.29-44; Mr. 13.24-37)

<sup>25</sup> "Nuniamunum etsa, nantu, yaya aidaunum wainchatai aidau wantiniagtinaí. Ashí nugkanmaya aents aidauk anentaimak waitiagtinaí nuniak puyatiagtinaí nayants shiig senchi tsukatak uutbauji antuidau asag.

<sup>26</sup> Imatu asantai ishamainak jaka iyauke agtinaí nugkanum nagkaemaktata nuna anentaimtusag, nuigtú nayaimpinmaya senchigtin aidaush peganaidau asagmatai.

<sup>27</sup> Nuniai Aentsmaga akiinau yujagminum pachitkau tsawan wajas niina senchijijai minau wainkatnaitjume.

<sup>28</sup> Nunú nagkamna imaniakuig ichichmamjatajum, nuniakjum pagkai diistajum, wagki atum agkanmagatnuk tikijuch wajasú asantai", tiuwai.

*Numi higuera pachis Jesús augmattsamu*

(Mt. 24.32-35; Mr. 13.28-31)

<sup>29</sup> Tusa Jesusak junash augmatus: "Higuera diistajum nuniachkugmesh tikich numi aina dukesh. <sup>30</sup> Atumek numi wentsamtuju dukegkuig, wamkeap esat nagkamnattawa tusajum dekau ainagme.

<sup>31</sup> Nunisjumek, nunú nunidau wainkugmek, Apajuí inamjatnuk tikijuap wajasé tusajum dekaatin atajum.

<sup>32</sup> "Dekas tajime, yamai aents aina jusha batsataig ashí uminkatnai.

<sup>33</sup> Nayaimpik ngkajaig megkaejatnai, tujash mina chichamjuk umintsukek juwakchatnai.

*Umintsajum dakamsatajum tibau*

<sup>34</sup> "Kuitamamkatajum, pegkegchau unuimatjam shiig anentaimja dekaachmin wajasaim, nampet nuigtú nugkaya aina nu uyumakam wekaetakum, nuniamin pachiachbau tsawan nagkanbau jegak uwaktamkai,

<sup>35</sup> chinamu ujabatbauwa numamtuk; wagki duka ashí aents nugkaa batsatana nuwi minitnai.

<sup>36</sup> Nuadui atumek aneaku ashí tsawantai Apajuí aujú pujutajum, nunú ishamain nagkaemagtina nu uwemtugminjum nuigtushkan Aentsmaga akiinauwa nujais ijun-jamnujum".

<sup>37</sup> Jesusak tsawai jega Apajuí ememattainum jintinkagtua, kiitaik Olivosa mujaji tutainum weejakuí.

<sup>38</sup> Ashí aents aidauk kashikmasag jega Apajuí ememattainum weedau, Jesús jintinkagtutai antukagtatus.

## 22

*Jesús maami tusa chicham umigkamu*

(Mt. 26.1-5; Mr. 14.1-2; Jn. 11.45-57)

- <sup>1</sup> Fiesta pag lewaduragtuchu yutai Pascua tutai jegattak wajai,  
<sup>2</sup> sacerdote apuji aidaui, maestro chicham umiktinun jintinkagtin aidaui, aentsun ishamaidau asag, Jesús wajuk maawajik tusag chichaidau.  
<sup>3</sup> Nuniamunum Jesusa jintintaiji doce aina nuiya Judas, Iscariote tuuta awagmatia nuna Iwanch egkentuauwai,  
<sup>4</sup> dutikam wee sacerdote apuji aidaui nuigtú jega Apajuí ememattain kuitamin aidaui chichasajui, wajuk Jesusash achikaish sujumainaita nuna pachisag.  
<sup>5</sup> Tama ditak shiig aneasajui, nuninak kuichkin susatatus anagkuawajui.  
<sup>6</sup> Tama Judaschakam ayú tusa wajuk Jesusan aents atsamunum sujukajak tusa egau.

*Jesús inagnaku Pascuatin yuwamu*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

- <sup>7</sup> Pascuatin, pag lewaduragtuchu yuwaku uwig aishmag tsakat maa yutai jegau asamtai;  
<sup>8</sup> Jesús, Pedron Juagjai awemak:  
 —Wetajum, nunikjum Pascua yuwatin umiktajum, tiuwai.  
<sup>9</sup> Tuinam dita aiinak:  
 —¿Tuwí umiktí tusamea wakegame? tuidau.  
<sup>10</sup> Tiagtai Jesús ayaak:  
 —Yaakat wayamunum makichik aishmag yumí aimak waketu wainkattagme, nunú pataetukjum jeen wayatta imanui jegatajum,  
<sup>11</sup> nunikjum jeentin chichagkujum: “Maestro chichagtamak: ¿Tuwí awa tesamu wi mina jintintaig aidaui Pascua yumainush? tujamae” titajum,  
<sup>12</sup> tajumin ni inaktugmastatui yaki tesamu agkan muuntan shiig umikbaun, nuanui umiktajum, tiuwai.  
<sup>13</sup> Tusa tiajam wegag Jesús tibaunak imatiksag wainkaju. Nunikag nui Pascua yuwatnunak umikajui.

*Jesús inagnaku Pascua yuwamu*

(Mt. 26.20-25; Mr. 14.17-21)

- <sup>14</sup> Hora jegamtai, Jesús apóstol aidaui mesanum jegaantag pekaamsajui.  
<sup>15</sup> Nunik chichaak:  
 —Senchi wakemajai, eke jatsuk ju Pascuan atumjai ijunjan yuwatasan.  
<sup>16</sup> Wagki junak ataktuk jutikanuk yuwashtinaitjai; atak Apajuí inabauji uminkatna dui yuwatin asan, tiuwai.  
<sup>17</sup> Tusa vino copanum aun juki, Apajuin see tusa chichaak:  
 —Ju uwagtajum ashí atum aidautijum,  
<sup>18</sup> dekas tajime, ataktuk jutikanuk uva yumijinak uwagchatnaitjai, Apajuí inamak taatna duwi uwagtin asan, tiuwai.

*Jesús, mina anentaimjutsajum yuwakjumek juni dutikatajum tibau*

(Mt. 26.26-29; Mr. 14.22-25; 1 Co. 11.23-26)

- <sup>19</sup> Tusa pagkan juki Apajuin see tii puuká, jintintaiji aidaun susa chichaak:  
 —Jujú pagka juka mina iyashig atumiin mantamnatta nuna iwainawai, juka tuke jutiksagmeké atin atajum mina anentaimjutsajum.  
<sup>20</sup> Tusa ashí yuwawagmatai copa juki, chichaak:  
 —Ju copa juka, mina numpajui yamajam chicham apaamu atumiin ukajetta nuuwai.  
<sup>21</sup> Mina sujutkatta duka ju mesa juwig wijai eketui.  
<sup>22</sup> Dekaskenmag Aentsmaga akiinawuwa duka, nuniktinai tusa agagbauwa nunisag wetatui, tujash nuna sujuktata nunak wait anentajai, tau.  
<sup>23</sup> Tutai ditak pempeentunikiag iniinidau, yaki nunash dutikati tusag.

*Yaki dekas imá wagakush atinaita tiagbau*

(Mt. 19.28; 20.25-28; 23.11; Mr. 9.34-35; 10.42-45; Lc. 9.46; Jn. 13.12-15)

- <sup>24</sup> Nuigtushkam jintintaiji aidaui jutii ainag juwiyash yaki imá wagakush atinaita tusag pampandayidau.  
<sup>25</sup> Tudaiyagtai Jesús chichajak: “Rey nugkanum inamaina duka aentsnak ditanua nunin emak waitkainawai, tuja apu inamaina nunú, pegkegnum yaimin ainaji tumamin ainawai;



<sup>26</sup> tujash atumek nuninuk amaitsugme. Duka nunitsuk atum ainajum anuiya eme anentai atag takug, datsauch eme anentsá diishtaya nunin anenmamainai. Inamna dushakam tikichin takagna nunin amainai.

<sup>27</sup> Wagki ¿yaita eme anentsá diitash, mesanum eketa dukaih atsa ajaama dukaih? ¿Mesanum eketa duchaukaih? Nunin aig witjai atumjaig ajamauwa nuninnuk.

<sup>28</sup> “Atum ainagme mina pegkegchaunum dekapjuinakuish wijaig ijutkau yujasujum duka.

<sup>29</sup> Nuadui wi atumnak apu emajime, mina Apag mina apu etiuwa dutiksasuk,  
<sup>30</sup> mina inamtaijui mina mesajui yuwakjum uwagminjum tusan, nuniakjum ekeem-tainum ekeemsajum Israelan uchijí doce aajakajua nunú wegantu inagtiin ainagme”.

*Jesús Pedron ugtuktatme tusa ujakbau*

*(Mt. 26.30-35; Mr. 14.26-31; Jn. 13.36-38)*

<sup>31</sup> Junashkam Jesús tiuwai:

—Simón, Simón Iwanch segamne, atumin trigo pegatia numamtuk awatamkagtatus;

<sup>32</sup> tujash wi aminak segatmagme, dekaskeapi tabaugmia nunú mijakaim tusan. Ame minai ataktú anentaimjam, yatsum aidaush minai ebetmamjatnume tusan yaigminum tau asan.

<sup>33</sup> Tama ni ayaak:

—Apuh, wika umintsan wekaejai cárcel jujamainakuish nuniachkush mantamainakuish amijai jakatasa, tau.

<sup>34</sup> Tutai Jesús ayaak:

—Pedro, yamai kashia juik atash eke shinatsaig, Jesusnak waintsamjai tusam kampakumá ugtuktatme, tiuwai.

*Wají egkea jutai, kuichik egkea jutai, espadajai tibau*

<sup>35</sup> Tusa idaiyak:

—Atumin wi ishimkun, wají egkea jutaigmekesh, kuichik egketaigkesh, sapatkesh jukigpajum tiuwaitjim duish, ¿makichkish atsumamush ajutjamsauk aina?

Tama dita aiinak:

—Atsa, tiajui.

<sup>36</sup> Tiagtai Jesús ayaak:

—Tujash yamaik wají egkea jutaigmesh, kuichik egketaigmeshkam jukitajum, espadam atsumtamkuig, jaanchjum sujukum makichik sumaktajum.

<sup>37</sup> Dekas tajime, agagbaunum tawa duka minai uminkattawai: “Aents pegkegchaujai betek diyam atinai”, tusa mina pachittsa agagbauwa duka uminui, tau.

<sup>38</sup> Tutai dita aiinak:

—Apuh, jui jimag espada ajutjamui, tiajui.

Tiagtai Jesuschakam:

—Maake, tiuwai.

*Jesús Getsemani pujusá Apajuí ausamu*

*(Mt. 26.36-46; Mr. 14.32-42)*

<sup>39</sup> Tusa Jesús yaaktanmaya jünki Olivosan mujajin weuwai, nui tuke weu asa, nunitai jintintaiji aidaushkam ashinkajui.

<sup>40</sup> Nui jegantá jintintaiji aidaun chichajak:

—Jui pujusjum Apajuí ausatajum, pegkegchaunum iyawaijum, tau.

<sup>41</sup> Tusa ukuak nigka kaya nagkimam iyauwama imaan atushat kanaká, tikishmag pujus Apajuin aujak:

<sup>42</sup> “Apawah, amesh wakegakmek, wi waitmainaitag nu agkanmitkajuata; tujash wi wakegamu ahati, ame wakegamu atí”, tiuwai.

<sup>43</sup> Nuniai makichik ángel nayaimpinmaya wantintuku anentain ichichtugtatus.

<sup>44</sup> Jesusak ni senchi waittsatnuji jegau asamtai anentaimak waitiau asa, nuní senchi Apajuin auju, imaniau asamtai segagbaujig numpa apu aidau nugká kitaama numamtuk wajaidau.

<sup>45</sup> Jesús Apajuí augbaun inagnak wajakí, jintintaiji batsakbaun jegantun diikmá, wake besemag dekapenak ane anentaimainakua kajig batsatun wainak:

<sup>46</sup> —¿Wagka kajish batsatjume? Nantakjum Apajuí ausatajum pegkegchaunum iyawaijum, tiuwai.

*Jesús achiká jukimu*

*(Mt. 26.47-56; Mr. 14.43-52; Jn. 18.2-11)*

<sup>47</sup> Tusa Jesús eke chichaak wajai, kuashat aents kaunawaju, nuniemunum ni jintintaiji doce aina nuiya Judas daagtiin eemak minau, nunú jegantau Jesusan kugkuastatus;

48 Nunitai Jesús chichajak:

—Judasah, ¿Aentsmaga akiinauwa duka kugkuasmeap sujame? tiuwai.

49 Jesusjai yujaidauk, nu nunidaun wainkag:

—¿Apuh, espadajaig maaniattag? tuidau.

50 Tuinai dita aina nuiya makichik sumo sacerdote apuji inaken espadayai kuwishi untsujin tsupigkauwai.

51 Dutiktai Jesús chichajak:

—Maake, idaisatajum.

Tusa kuwishi tsupigkamun juki ataktú anujtuk pegkeg awajtusui.

52 Dutika sacerdote apuji aidau, jega Apajui ememattain kuitamin aidau apuji nuigtú judío apu aidaujai niina achiktatus kaunau aidau Jesús chichajak:

—¿Wagka kasa achiktasa utugmaina imanikjumes, espada aidau, numi aidau tinamdaekagmesh tantaugme?

53 Wi kashi kashinig jega Apajui ememattainum atumjai ijunnuweg duikish jutikagmek achigchau agmaugme. Tujash juka tsawantak atumdauwai, Iwanch inapainakui juniajum juka, tiuwai.

*Pedro Jesusnak wainchaujai tusa uukbau*

*(Mt. 26.57-58; Mr. 14.53-54; Jn. 18.12-18, 25-27)*

54 Dutikawag Jesusa achiká jukiag sumo sacerdote jeen ejegawaju, dutikiagtai Pedroskham ikaag patataetus wegau.

55 Nuwi, jegá agaajin jí ikapajag pegagbaunum, Pedroskham ditajai anamak ekeem-sau.

56 Nunitaman makichik nuwa inak, jinum ekeematman wainak, dii wajatu, nunik:

—Jusha Jesusjai wekaemajama, tau.

57 Tama Pedro wainchauwa nunin chichaak:

—Nuwah, wika wainchaujai, tau.

58 Machik asag, tikitchakam Pedron wainak:

—Amesh Jesusa jintintajitajama, tau.

Tama Pedro ayaak:

—Atsa, duchauwaitjai, tau.

59 Tusa makichik hora tumain nagkaemai, tikitchakam iniak:

—Dekaskenum jusha niijaimpap wekaenaita, wagki niishkam galileanmaya asa, tuidau.

60 Tiagtai Pedro chichaak:

Wika atum tajum nunak dekaatsjai.

Tusa chichaak wajai, atash shinukui.

61 Nuniai Jesús ayampá Pedron diisú, dutikam Pedroskham adeaju Apu Jesús chichajak: “Atash eke shinatsaig kampakumá ugtuktinaitme”, tibauwa nuna.

62 Nunik Pedrok nuiya jiinki, senchi kajeká buutiawai.

*Apu aidau Jesús maatajum tusa inamjamu*

*(Mt. 26.59-68; Mr. 14.5-65; Jn. 18.19-24)*

63 Aents Jesusan kuitamak ijunaidauk niina dushikinak awatuidau.

64 Dutikainak jiin epetkag iniinak:

—Dekakia ¿ya awatamne? tuidau.

65 Tusag nuigtú kuashat pegkegchaun chichajuidau.

66 Nunik tsawagmatai, judío apuji aidau, sacerdote apuji aidau, maestro chicham umiktinun jintinkagtin aidaujai ijunjag Jesusan jukiag Sanedrín\* ejegawag, iniinak:

67 —¿Amekaitam Cristo? tukagtita, tuidau.

Tama Jesús ayaak:

—Wi nunuwaitjai takuish, dekaskeapi tujutchattagme,

68 tuja wi inimkuish aigmaitsugme, nuigtush akupjumaitugme.

69 Tujash yamaiya jui nagkamas Aentsmaga akiinauwa duka, Apajui ashí senchigtina nuna untsujin ekeemsattawai, tiuwai.

70 Tutai ashí pampanjag iniinak:

—¿Untsu amekaitam Apajui Uchijim? Tuidau.

Tuinam Jesús ayaak:

—Dekaske atum tajume, tiuwai.

71 Nuna timatai:

\* 22:66 “Sanedrín” tawa duka diistá Mt. 5.22.

—¿Nuigtush ya etsegtukti tusaya atsumaji? ii dekas ni chichaamu antugkagjamah, tuidau.

## 23

*Jesús Pilatowai ejegamu*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Ashi aents aidauk wajajag, Jesusan jukiag Pilato pujamunum ejegawaju.

<sup>2</sup> Dutikawag Jesusa tsanumjuinak:

—Jujú aents jutii nugkeen chichaman tsuwapak wekaegas: —Witjai Rey Cristunuk; tusa, Roma apujig akimaitsui, tu wekagu asamtai jui itaaji, tuidau.

<sup>3</sup> Tiagtai Pilato iniak:

—¿Amekaitam Rey judío aidaunu? tau.

Tama Jesús ayaak:

—Duka ame tujutme, tiuwai.

<sup>4</sup> Timatai sacerdote apuji, nuigtú aents tuwakú aina nuna Pilato chichajak:

—Wika ju aents bakumamainjinak makichkish waitsuajai, tau.

<sup>5</sup> Tutai nuní nagkaemasag:

—Aanka aents aidaun jintintak dapamkagtú wekaenuwe. Nuniak Galilea nagkamas jintí jintinkagtakua juwish Judeanmash dutiksag dapamkagtú wekaewai, awajuidau.

*Jesús Herodesai ejegamu*

<sup>6</sup> Nu tabaun antuk, Pilato iniimu, ju aents galileanmayachukai tusa.

<sup>7</sup> Jesusak Herodes inama nuiyayai tabaun dekaa, Herodesan awetiuwai, niishkam nunú tsawantinig Jerusalén taa pujau asamtai.

<sup>8</sup> Herodes Jesusan wainak shiig aneasu, kuashat tsawantai niina wainkatatus wakegá pujú asa, niina pachis chichaidaun antau asa, nunik Jesusan wainchatai iwainakta titatus.

<sup>9</sup> Nuniau asa kuashat iniasui, tujash Jesusak makichkish aikchauwai.

<sup>10</sup> Nunitai nui sacerdote apuji, maestro chicham umiktinun jintinkagtin aidaujui ijunu wainak senchi tsanumjuidau.

<sup>11</sup> Herodeschakam ni suntaji aidaujui, Jesusan dushikinak, jaanch shiig iwajamun anugkug, ataktú Pilato pujamunum awemauwai.

<sup>12</sup> Yaunchkek Herodesak Pilatojai shiwag pujuwaitak, nunú tsawanta duik, nuna dutikainak kumpamdayawajui.

<sup>13</sup> Dutikawagmatai Pilato sacerdote apuji aidaun, gobernante aidaun nuigtú tikich aents aidaun ijumjau.

<sup>14</sup> Dutika chichajak:

—Atum ju aents itagtuamugme, aentsun dapampawai tusajum; tujash wi atumi eentimin iniasjai, dutikaknush dekajuashjai atum nuninai tajum nui bakumamainnak.

<sup>15</sup> Nunisag Herodeschakam dekajuache, dutikau asa awagkine; diistajum, makichkish ni mantamnamainnak pegkegchaunak takaschae.

<sup>16</sup> Asutiatajum titajai, dutikan akupkatjai, tiuwai.

<sup>17</sup> Nu fiestatinig makichik aents tuke jiitai aajakui.

<sup>18</sup> Tutai ashí aents aidauk betek pampaajag:

—¡Anka mantammati, Barrabás akupkata! wajaidau.

<sup>19</sup> Barrabasnak cárcel egkeawaju yaaktanun pampandayamunum aentsun mau asamtai.

<sup>20</sup> Pilato Jesusan akupkata tau asa, ataktú awentsag ditan chichajak: —Dekas Jesusan akupkatjai, tau.

<sup>21</sup> Pilato tutai nuní senchi untsumkag:

—¡Achigtá! ¡Achigtá! wajaidau.

<sup>22</sup> Imatiagtai kempatuma juwishkam Pilato chichajak:

—¿Tujash wají pegkegchauna takasé jusha? wika ni pegkegchau takasbaunum bakumaku mantamnamainjinak dekagchau asan, ayatak asutiawagmatai jiiiktajai, tau.

<sup>23</sup> Tutaiishkam nuní senchi untsumkag, achinjati wajainak Pilatonak depetkiajui.

<sup>24</sup> Imatiagtai Pilatoshkam, dita sumaina dutiksag uminkati, tiuwai,

<sup>25</sup> dutikak dita aentsun jiinkiti tusa segaimana nuna jiikiuwai, pampandayamunum aentsun maamtai cárcel egkeamua nuna, dutikak Jesusnak dita wakegaina dutiksag umiktinne tusa sujuk idaisauwai.

*Jesús achigbau*

(Mt. 27.32-44; Mr. 15.21-32; Jn. 19.17-27)

<sup>26</sup> Dutikam Jesusan achigtatus juki emainak, cirenemaya aents Simón daagtin ajajinia minittaman awantag, cruzan ayankajui.

Dutikam Jesús eemak wetai, ukuunum yanas wegau.

<sup>27</sup> Jesusan kuashat aents nemajus ashinainamunum, nuwa aidaushkam imanisag ukunum saegas, untsu untsumas buu buutuinaukua ashinaidau.

<sup>28</sup> Imatiagtai Jesús nuwa aidaun ayampatua chichajak:

—Jerusalegnunia nuwa aidauwah, minak eganjaigpajum, atumek egaamakjum uchijum anentaimtusjumesh buuttajum.

<sup>29</sup> Wagki tsawan jegagtamiagtinaí, nunikmatai: “Nuwa kaga aidauk, uchinash jujegchau, muntsujinash amuntsuachu aidauk yajau aneas batsatainatsuapi wajatin ainagme”.

<sup>30</sup> Nuniakjum muja chichagkujum: “¡Yutujatuata!” takujum, mujauch aidaush: Uujatkata, wajatin ainagme.

<sup>31</sup> Wi tudau takaschau aig, imatijuawag waitkajuinaish, ¿Apajuish wagkag tudau aidaunash waitkaschati? tiuwai.

<sup>32</sup> Nuigtushkam jimag magkagtinun jukiajui, Jesusjai achijag maawagtatus.

<sup>33</sup> Nunikag Gólgota tutainum ejegawag, Jesusan achijajui nuigtú magkagtin aidaunashkam, dutikawag makichik untsugnum awajuinak tikichnak menajin awajawajui.

<sup>34</sup> Dutikam Jesús chichaak: “Apawah, tsagkujata, wagki dita jutikaina nunak dekainatsui”, tau.

Nuniai suntag aidauk, yana kayajig jiinkit nunú Jesusa jaanchjinak jukiti tusag wasugkamaidau.

<sup>35</sup> Nuniamunum aents aidauk dii ijuntuinai, gobernante aidau Jesusan dushikinak:

—Tikichnak uwemtikuwe, yamai niishkam nigki uwemjati, ju dekas Cristo, Apajuí etegkamuitkug, tuidau.

<sup>36</sup> Nunisag suntag aidaushkam jegaantag dushikinak, vino chujuinun aagtatus jegan-tag,

<sup>37</sup> chichajuinak:

—Ame judío Reyjiyaitkumek, amek uwemjania, awajuidau.

<sup>38</sup> Tuja ni chaikenchakam griego, latín, hebreo chicham aidauwai: “JUJUI REY JUDÍO AIDAUNUK”, tusag agatjajui.

### *Magkagtin aidau chichakbau*

(Mt. 27.45-56; Jn. 19.28-30)

<sup>39</sup> Jimag magkagtin achijam deta nuiya makichik Jesusan pegkegchau chichajak:

—Ame dekas Cristuaitkumek, amek uwemjam, aaní nematsuk amea akaikim, jutiish uwemtikagtujia, tau.

<sup>40</sup> Tutai nui tikich detau aiká jiyak:

—¿Amek Apajuik ishamatsmek, amesh nijai betek suwimak juwayatkumesh?

<sup>41</sup> Jutiik dekaskenum waituinaji, ii nunikbaunum suwimak juwau asá; tujash juka makichikish pegkegchau takasbauk atsujui, tau.

<sup>42</sup> Tusa Jesusan chichajak:

—Jesusah, minash ame apu wajasam inamjattam nuniakmesh kajimatjukipa, tiuwai.

<sup>43</sup> Tutai Jesús ayaak:

—Dekas tajame, yamaiya juik amek wijai paraíso pujuttame, tiuwai.

### *Jesús jakamu*

(Mt. 27.45-56; Mr. 15.33-41; Jn. 19.28-30)

<sup>44</sup> Etsa tutupit ai nagkamas, a las tres wegaish ashí nugkanum suwe wajas asauwai.

<sup>45</sup> Etsa suwe wajas ai, jega Apajuí ememattainum jaanch ejaamu ichiinak jimaituk kanakuí.

<sup>46</sup> Nuniai Jesús senchi untsamak:

—¡Apawah, amina uwegmin mina wakanjunak idaijai! tau. Nuna tusa jakauwai.

<sup>47</sup> Nunik jakamtai Capitán wainak, Apajuin emematak:

—Dekas ju aentsua juka pegkegchaukesh atsujui, tau.

<sup>48</sup> Ashí aents nui ijunaidauk, nu nunikbaun wainkag, waketuinak, wake besemag dekapienak detsepenak awatkiag weedau.

<sup>49</sup> Nuninai ashí Jesusa waintajii aidauk, nuwa Galilea nagkamas saetusag yujajakú aidaushkam, ikaag ijunas Jesusan dii ijuntuidau.

### *Jesús ukusbau*

(Mt. 27.57-61; Mr. 15.42-47; Jn. 19.38-42)

<sup>50</sup> Judeanum yaakat Arimatea tutai awa nuiya José daagtin, niishkam apu chichaman inagnau aina nuiya, aents pegkeg nuigtushkam pegkeg aidaunak takaak pujuwa nu,

<sup>51</sup> Apajuí inamjatnujin dakak pujú asa, Jesusan maata tiagtaish dakitjauwa nu

<sup>52</sup> Pilato jegajua Jesusa iyashin segauwai.

<sup>53</sup> Dutika cruznumian akakí sabanayai pempeag, kaya waa muun tai umikbau, makichik aentskesh ukuschamunum egkeauwai.

<sup>54</sup> Nunú tsawantak, tsawan ayamtai atin asamtai, ashí umintai aajakui.

<sup>55</sup> Nuwa aidau Galilea nagkamas Jesusa nemajus yujasaju aidaushkam, José wetai pataetukaju, nunik wainkaju Jesusa iyashin wajuk ukusaje nuna,

<sup>56</sup> nunik waketug jegá kaunkag, Jesusa iyashí ukatkatnun kugkuin shiig pegkeg aidaun najanawaju, dutikawag tsawan ayamtai tsawaju asamtai, ayamjaju chicham umiktinum tawa nunisag.

## 24

### *Jesús nantakbau*

(Mt. 28.1-10; Mr. 16.1-8; Jn. 20.1-10)

<sup>1</sup> Tumig tsawagmatai shiig kashikmasag nuwa aidau kugkuin shiig pegkeg najanamu-jin jukiag, Jesús ukusbaunum wegaju.

<sup>2</sup> Nunik jegakmag ukumatai kaya muuntai epenbauk ekemak atatman wainkaju;

<sup>3</sup> nunik utuawaju, tujash Apu Jesusa iyashinak wainkachajui.

<sup>4</sup> Nunikag puyatkatg, wajukamki tusag iniininak wajainai, jimag aents jaanch winchamtinun nugkuaju ditai ayaumas wajaantaju.

<sup>5</sup> Nuna wainkag senchi ishankag, nugká tsuntsumá ijunainai chichajag:

—¿Wagka iwaaku pujaush jakau ukutainmash egagme?

<sup>6</sup> Juig atsawai, nantakne. Adeagtajum ni Galilea pujus chichaak:

<sup>7</sup> “Aentsmaga akiinauwa nunak, aents tudaugtin aidaunum sujukagtatui dutikawag-matai achijag maawagtatui, dutikam kampatum tsawanta jui nantaktatui”, tujabijua nu.

<sup>8</sup> Tama ditashkam Jesús chichaak nuniktatjai tibauwa nuna adeajaju.

<sup>9</sup> Nunik ukusbaunmaya waketug jegawag, ashí dita wainkamujinak niina jintintaiji once juwakajua nuna ujakajui nuigtú tikich aidaunashkam.

<sup>10</sup> Apóstol aidaun ujakajua duka: María magdalanmaya, Juana, tikich María Jacobo dukujíya nunú, nuigtú tikich nuwa aidau aajakajui.

<sup>11</sup> Nuwa tusa etsejiagtaish, wainak tu yujatsuash tusag, ditak dekaskeapi tichajui.

<sup>12</sup> Nuniagtai Pedrok jiinkug tupi tupikakua Jesús ukusbaunum jegantá, tekená diikmá imá sabananak wainkauwai, nunik anentai jegacha wajukamki tusa ane anentaimkawa jegá wakitkiuwai.

### *Emaús wedaun wantintukbau*

(Mr. 16.12-13)

<sup>13</sup> Nunú tsawantinig, Jesusa jintintaiji aina nuiya jimag, yaakat yaijuch Emaús tutainum wedau, Jerusalén juwaki once kilómetro awa nui jegawagtatus.

<sup>14</sup> Nunik weenak ashí Jesús dutikamun pachisag chichai chichainakua weedau.

<sup>15</sup> Nuna tuinak ditak tudayinai, Jesuschakam amainag ditajai ijunag ashinu.

<sup>16</sup> Tujash ditak, wainainayatkush Jesusapita tuinachu.

<sup>17</sup> Nudiagtai Jesús iniak:

—¿Jintá wesagmesh, wají pachisjumea chichamugme? Tau. Tama wake besekag ijuntsajui.

<sup>18</sup> Tutai Cleofas daagtin ayaak:

—¿Imá amekek ashí wají Jerusalén nagkaemaki nunú dekatsum? Tau.

<sup>19</sup> Tama ni iniak:

—¿Wají nagkaemakne? Tau.

Tutai: —Jesús nazaretnumia profeta aayi, takaamujish tuja chichamesh senchigtin Apajuí eemtin nuigtú ashí aents aidaunmashkam;

<sup>20</sup> nuna, sacerdote apuji aidau nuigtú jutii gobernanteji aidaujai sujukagmae achijag maatnuna tusa.

<sup>21</sup> Tujash jutiiik, niimpap Apu wajas Israel aidautinak agkanmitkagmattaji tusa dakauji. Nuna dutikawaja duka kampatum tsawan nagkaemawai.

<sup>22</sup> Nuniemunum ujumak nuwa jutijai yujau aidau kashikmas Jesús ukusbaunum wegaju, anentai jegamainchaun,

<sup>23</sup> Jesusa iyashin wainkachag, waketug kaunawag, ángel aidau wainkamji nunika ajin, Jesusak iwaaku pujawai tujamaji tusa etsejiagtai,

<sup>24</sup> ujumak jutii kumpají aidau Jesús ukusbaunum wegag, nuwa tiaja nunak imatiksag wainkaje, tujash Jesusnak wainkachaje, tuidau.

<sup>25</sup> Tiagtai Jesús ayaak:

—¡Wagka anentainkachush ainagme nuigtush dekaskeapi tumainchauk dekapeajum ashí profeta tiajua duka!

<sup>26</sup> ¿Atumek dekatsjumek Cristuk niina imanjiya nuwig eke waitsuk waittsatna duka?

<sup>27</sup> Tusa, Moisés agagbauwa nui nagkamas nuigtú ashí profeta aidau, ashí agagbaunum niina pachis tawa nuna ujakajui.

<sup>28</sup> Nunik yaakat yaijuch Emaús jegamunum, Jesusak nagkaemaki wegau, nuní atushat wegau wajukmaina numamtuk.

<sup>29</sup> Nunitai dita chichajuinak:

—Jui jutijai juwakta, kiyawai, tuidau.

Tiagtai Jesuschakam wayauwai ditajai juwaktatus.

<sup>30</sup> Nunik ditajai mesanum jegantá pekagbaunum, pagkan juki Apajuin see tusa puukú, dutika susaju.

<sup>31</sup> Nuna dutiktai dekawajui Jesusapi tusag, nuniaig nigka megkaekauwai.

<sup>32</sup> Nunikmatai ditak pempeentunikiag:

—¿Wagkaik jintá minis Apajuí chichameg nuní awai tusa ujakajui, shiig aneasua minimag duwish anentaimjaish diischamji? tudayinau.

<sup>33</sup> Tusag tamawaik jijnag Jerusalén wakitkiajui, nunik jegakmag once aina nu nuigtú tikich aidaujai ijunag batsatun wainkajui.

<sup>34</sup> Nunik kaunamtai ujinak:

—Dekas Apu Jesusak nantakne, nunik Simogkan wantintuke, tuidau.

<sup>35</sup> Tama ditashkam jintá wesá wainkamun nuigtú pag puuká susam Jesusapi tusa dekamujin pachis ujaidau.

*Jesús jintintaiji aidau wantintukbau*

(Mt. 28.16-20; Mr. 16.14-18; Jn. 20.19-23; Tak. 1.4-9)

<sup>36</sup> Nuna pachisag chichainak batsatai, Jesús ditá ejapen wajantá, chichaak: —Agkan pujamu atumnash ajutjamti, tau.

<sup>37</sup> Tama ditak senchi ishamkaju, wakan waintsujias tusag.

<sup>38</sup> Nuniagtai ditan chichajak:

—¿Wagka imaanikjumesh ishamagme? ¿Wagka utujimsagmesh anentaimjutjume?

<sup>39</sup> Mina uweg aidau diistajum nuigtú daweg aina dushakam, witjai, achigká diigsa-tajum; makichik wakanik nejeesh ukunchí aidaukesh atsgnai, mina ajutu wainjum junikag.

<sup>40</sup> Nuna tii niina uwejin, dawenmashkam achiamu aajakua nuna ditan inaktusajui.

<sup>41</sup> Dutikam wainkag shiig aneenayatak dekas nantakneapi tumainchau dekapiagtai:

—¿Yumainuk atsgtamainawak? tau.

<sup>42</sup> Tutai makichik namak achijuamun kupik susaju,

<sup>43</sup> dutikam niishkam juki ditá eemtin yuwauwai.

<sup>44</sup> Nunik chichaak: Juna pachisan atumjai pujubiag duwi, Moisés chicham umiktin agagbaunum, profeta aidau agajajua nuwish nuigtú salmosnum ashí mina pachitus agagbauwa duka uminkattawai tusan ujayajime, tiuwai.

<sup>45</sup> Nuna aatus taku Apajuí chichamen agagbauwa nuna shiig dekamtikawajui.

<sup>46</sup> Nuna ti nuigtú chichaak: —Aaja agagbauwai, Cristuk jakatnai, nunik kampakatum tsawanta jui nantaktinai,

<sup>47</sup> nunikmatai niina daajin pachis chichagkagtuinak ashí nugkanmaya aidaush anentai yapajiwag, tudaujin tsagkugnagtinme tusag, duka Jerusalén nagkamsajum

<sup>48</sup> atum ainagme ju ashí wainkajum nunú etsejatin aidautigme.

<sup>49</sup> Tujash yamaikik Jerusalegkak juwaktajum, nuniagmin wi mina Apag Wakaní Pegke-jin anagamawajua nuna awetitjime, nunikmatai nayaimpinmaya senchi jukitajum, tiuwai.

*Jesús nayaimpinum wakitkimu*

(Mr. 16.19-20; Tak. 1.9-14)

<sup>50</sup> Nunik Jesusak jintintaiji aidaun yajuak yaakta ukumtiki Betania ejegawajui, nunik nui Jesús uwejin takui: Apajuí yaimpakti, tiuwai.

<sup>51</sup> Tusa Apajuí yaimpaktinme tamawaik yakí takuniuwai, nunik nayaimpinum wakitkiuwai.

<sup>52</sup> Nunikmatai ememati ukuinak, shiig aneasag Jerusalén waketjajui.

<sup>53</sup> Nunikag jega Apajuí ememattainum kashí kashinig tuke ijuntsagké aidau Apajuin emematuinak.

## Yamajam chicham Juan agagbau

*Cristo chicham dekaskea nunak itauwai*

<sup>1</sup> Yama nagkamtinig Chichamak aajakui, nu Chichama duka Apajuijai aajakui, nuigtush Chichama duke Apajui aajakui.

<sup>2</sup> Nagkamtinish nigka Apajuijai pujujakui.

<sup>3</sup> Ashí wají aidauk ni najankamu ainawai, nunin asa makichkish ni najanachbauk atsawai.

<sup>4</sup> Niinig pujutash aajakui, nunú pujuta nu aentsun tsaaptinji aajakui.

<sup>5</sup> Nu tsaaptin suwe aidauk tsaaptin awajsauwai, imatikamu asa suwea dushakam tsaptinnak depetkachajui.

<sup>6</sup> Aajakui makichik aents Apajui awemamu, Juan daagtin,

<sup>7</sup> nigka tsaaptinun pachis etsegtukti tibau aajakui, nunú etsegtai ashí aents aidauk dekaskeapi titinme tabaunum.

<sup>8</sup> Juagkak tsaaptina nu aajakchauwai; ayatak tsaaptina nuna etsegtukti tusa awemamu aajakui.

<sup>9</sup> Nu dekas tsaaptin ashí aentsun tsaapmitkauwa nu, wamak ju nugka jui taatin asamtai.

<sup>10</sup> Nunú tsaaptinuk nugká akiinawai, nuigtush nugkak ni najanamu aajakui; tujash nugkanmaya aidauk, juwapita Apajui awemamuk tusag dekachaju ainawai.

<sup>11</sup> Niinu aidau batsatbaunum tauwai, tujash niinu aina duka dakitjajui.

<sup>12</sup> Dutikawagmataish ya aidauwa chichaman etsegtai shiig wakejus antugkag dekaskeapi tiae, nu aidauk Apajui uchijí emakui,

<sup>13</sup> nunin asag Apajui uchijí ainawai, aents wakegamunum akiintai aina nunin ainatsui, Apajuijai akiinkaju asag.

<sup>14</sup> Nunú Chichama duka Aentsmaga akiina jutijai wajumchik mijan pujusui. Nuna imanjiig jutii wainkabiaji, Apajui Uchijí makichkiuchia nu, wait anenkagtamuji nuigtú dekaskejishkam.

<sup>15</sup> Juan Jesusan pachis etsegtak: “Juuwai wi niina pachisan: Mina ukujui minitta nuuwai mina nagkaetasuk, wagki nigka wisha atsaig pujujakú asa” timayag duka, tiuwai.

<sup>16</sup> Wagki ashí niina imanjiya nuiyag pegkeg pujutak jukiuiwaitji, shiig kuashat anentag wait anenjamjauwa dui.

<sup>17</sup> Apajuik chicham umiktina nunak Moisesai sujamsau aajakui, tujash wait anenkag-tamu nuigtú dekaskea duka Jesucristui jukiuiwaitji.

<sup>18</sup> Apajuinak makichik aentskesh tuke wainkachu ainawai, ni Uchijí makichkiuch Apajijai ijunag pujuwa nunú dekamtijamauwai.

*Juan Yamijatín Jesucristo pachisa etsegtukbau*

*(Mt. 3.11-12; Mr. 1.7-8; Lc. 3.15-17)*

<sup>19</sup> Juna Juan etsegkauwai, judío apuji aidau Jerusalén batsamsag sacerdote aidau, levita aidaujai Juagkan iniasti niish yakita tusag ishitkajua dui.

<sup>20</sup> Nu aidau tusá iniam Juan ugmamtsuk etsegtumak:

—Wika Cristuchuitjai, tiuwai.

<sup>21</sup> Tutai ataktú iniinak:

—¿Tujash amesh yaitpa? ¿Eliaskaitam? tuidau.

Tama: Duchauwaitjai, tau. Tutai: —¿Profeta taatnai tibauwa dukaitam?

Tamashkam:

—Atsa, tiuwai.

<sup>22</sup> Tutai:

—¿Tujash amesh yaitpa? jutii awetabiagma nu ujakta tau asá dekatasa taji, ¿amesh yaitjai tumame?

<sup>23</sup> Tama Juan ayaak:

—Wika makichik chicham uwegshunum untsubau antuekatnai:

“Apu minitin jinta tutupit dakuektajum”, titinai tusa profeta Isaías tiuwa nuuwaitjai, tau.

<sup>24</sup> Fariseo aidau ujumak aents aidau Juagkan iniasti tusa awemamu aidau,

<sup>25</sup> iniinak: —Ame Cristuchu, Eliaschau, profetakesh achayatkumesh ¿wagka aentsush yamiame? tuidau.

<sup>26</sup> Tiagtai Juan ayaak:

—Wika yumí yamijatjai, tujash atum ainajum anuiya awai makichik, duka atumek waintsugme,

<sup>27</sup> nigka duik nagkamas tuke pujuwaitak mina ukujui patatkawai. Wika niya ibaucha asan ni sapatji jiggamunakesh atitmaitsujai, tiuwai.

<sup>28</sup> Ashí jujú aina duka Betábara Jordagka amain, Juan yamijatak pujamunum nunikui.

*Apajú Uwigji pachisa tibau*

<sup>29</sup> Kashinia dui, Juan Jesusan wainkauwai, niina adijkatatus minittaman, nunik: “Diistajum, auwai Apajú Uwigji,\* ashí aents nugkanmaya aidau tudaujin akikmak mantamnatta nunú.

<sup>30</sup> Juuwai wi niina pachisan: ‘Mina ukujui makichik aents minitta nuuwai mina nagkaetasu, wagki nigka wisha atsaig tuke pujujakú asa’, timag duka.

<sup>31</sup> Wikishkam niinash yaita nunak dekachiatkun yumí yamijatmajai, Israel aents aidauk ni wantintai dekaatnume tau asan”, tiuwai.

<sup>32</sup> Junashkam Juan: “Wakaní Pegkeji nayaimpinmaya pauma nunin wajas akaiki, Jesusai ekeematman wainkabaijai tusa etsegkauwai.

<sup>33</sup> Nuniakuish eke dekachbaijai niish yaita nunak; tujash yumí yamijatjata tusa awetiawa nu chichagtak: ‘Wakaní Pegkeji akaiki yayai ekeemu wainkattame, nunú atatuí Wakaní Pegkejijai yamijatjatnuk’, tujutmayi.

<sup>34</sup> Wika nuna wainkau asan, nigka Apajú Uchijiyai tusan etsegtajai”, tiuwai.

*Nagkamchak Jesusa jintintaiji aajakaju*

<sup>35</sup> Kashinia dui, Juan ataktú jimag jintintaijjai wajai,

<sup>36</sup> Jesús nagkaemattaman wainak: —Diistajum, auwai Apajú Uwigji, tau.

<sup>37</sup> Tutai jimag Juagká jintintai aidau antukag, Jesusan nemagkajui.

<sup>38</sup> Nunik miniagtatman Jesús ukujin ayampá diikmá wainak:

—¿Wají atumesh egagme? tau.

Tutai dita ainnak:

—Rabí (nunak maestro taku tawai), ¿tuwí pujame? tuidau.

<sup>39</sup> Tiagtai Jesús ayaak:

—Minitajum nunikjum wainkatajum, tau.

Tima ditashkam wegag ni pujamujin wainkajui, nunikag nuig juwakajui, a las cuatro tumain wegag asantai.

<sup>40</sup> Jimaja nuiya Juan tabaun antuk Jesusan nemagkajua duka Andrés, Simón Pedro yachiya nu aajakui.

<sup>41</sup> Andrés Jesusan wainak dekatkauk ni yachi Simogkan wejí:

—Yamaik Mesías wainkaji, tusa ujakui. (“Mesías” tawa nunak “Cristo” taku tawai.)

<sup>42</sup> Tusa Simogkan juki Jesús pujamunum ejegauwai, dutikantai Jesús wainak, chichajak:

—Amek Simogkaitme, Juagká<sup>†</sup> uchijí, tujash yamaik amek Cefas<sup>‡</sup> atatme, tiuwai. (Cefas tawa nunak Pedro taku tawai.)

<sup>43</sup> Kashinia dui, Jesús Galilea wekamá Felipe igkug, chichajak:

—Nemagtukta, tiuwai.

<sup>44</sup> Felipek betsaidanmaya, Andrés Pedro aina nuna yaaktajiya nuyag niish aajakui.

<sup>45</sup> Felipeshkam Natanaelan ujaktatus weuwai, nunik: —Jesús nazaretnumia, José uchijí wainkamji, niina pachis Moisés chicham umiktinnum agajua nu, nuigtú profeta aidash dutiksag agajajua nu, tau.

<sup>46</sup> Tama Natanael chichaak:

—¿Nazaretnumiash makichik pegkejash jijnmainkaih? tau.

Tutai Felipe ayaak:

—Dekas wemi amesh wainkamnum, tiuwai.

<sup>47</sup> Tima Natanael Jesús pujamunum jegantatus wetatman ikaag wainak:

—Ju mina juuwai dekaskenum Israel aents, tsanumtanash tsanumchauwa nu, tau.

<sup>48</sup> Tama Natanael ayaak:

—¿Tuwí minash waitkamume? tau.

\* **1:29** Judío aidauk ditá tudaujin tsagkugnagasag, tuké uwijá uchijin aishmagkun maa apejakú ainawai. Juan Jesusan pachis: “Juuwai dekas Apajú Uwigji” tiuwa nunak, jutii tudaujin mantamnatin asantai tiuwai. † **1:42** “Juan” tawa nunak Simón Pedro apajin tawai tikich versión aina nuig, nuna imá Reina Valeraya duke Jonás tawai. Mt. 16.17 Jonás tawai Simón Pedro apajin. Nuniau asa pachimtakan tuinawai, tujash initaik manuscrito griego agagbau aina nuig Juan tau asantai, aikasaik ukuaji. ‡ **1:42** “Cefas” tawa nunak arameo chichamnum kaya taku tawai. Tuja Pedro tawa dushakam griego chichabai kaya taku tawai duka diistá Mt. 16.18.



Tutai Jesús ayaak:

—Eke Felipe tajutjama ujpatsaig, higuera wakentin pujamin wainkamjame, tiuwai.

<sup>49</sup> Tama Natanael ayaak:

—Rabí, amek Apajuí Uchijiyaitme, ametme Rey Israeldau, tau.

<sup>50</sup> Tama Jesús ayaak:

—¿Higuera wakentin pujamin wainkamjame taja duikik, dekaskeapi tujutam? juna nagkaesau waji aidau wainkattame.

<sup>51</sup> Tusa nuigtú chichaak:

—Dekas tajime, Atumek nayaim ujanmatai Apajuinu ángel aidau Aentsmaga akiin-  
auwa nuwi taa waketuidau wainkatin ainagme, tiuwai.

## 2

*Caná nuwenbaunum Jesús yumin vino emamu*

<sup>1</sup> Kampatum tsawan asa nuwenbau asauwai Caná Galilea nugkanum awa nui. Jesusa dukujish nui pujau.

<sup>2</sup> Nunú nuwenbaunum Jesusnashkam jintintaiji aidaujai ipawajui, dutikamu asa weajui.

<sup>3</sup> Nuniamunum vino abuekamtai Jesusan, dukují chichajak:

—Vinsonak amukaje, tau.

<sup>4</sup> Tama Jesús ayaak:

—Dukuwah, ¿wagka dusha minash tujutme? Wi takamainjuk eke mina tsawanjuk jegatsui, tau.

<sup>5</sup> Tutai ajaamak yujaun María chichajak:

—Ni tujamtata duka imatiksagmek dutikatajum, tiuwai.

<sup>6</sup> Nui batsatu seis buits kaya najankamu yumi aimtai, judío aidau pegketasa takataiji, makí makichik buitsnumag cincuenta, nuniachkush setenta litro\* tumain pimuidau.

<sup>7</sup> Jesús ajaamau aidau chichajak:

—Buitsnum yumi aimjatajum, tiu.

Timatai ajaamau aidau yumin buitsnum betsamsat aimjaju.

<sup>8</sup> Dutikawagmatai Jesús chichaak:

—Machik shikikjum fiesta chichamja auwá susatajum, tau. Tutai dutiksag susajui.

<sup>9</sup> Fiesta chichamjauk yumi vino emamun uwag dekapsauwai, tuwiyanak aikainawa nunak dekatsuk; nunak imá inak aina duke dekaidau, dita yumin aimjaju asag. Nunik fiesta chichamja nu, nuweena nuna untsuká,

<sup>10</sup> chichajak: —Tikich nuwenaidauk dekatkauk vino pegkejan ajaabau agmae, dutikawag ipak dukap uwajagmatai, dui vino imanchauchin ajamau agmae. Tujash amek, yamaikish vino pegkeja duke ajamá pujame, tiuwai.

<sup>11</sup> Juna nagkamchak Jesús aents dutikmainchaun iwainakua nunak Caná, Galilea awa nui dutikauwai. Aatus niina imanjin iwainakmatai jintintaiji aidauk dekas Apajuí Uchijimpapita tiajui.

<sup>12</sup> Nuna dutika Jesusak Capernaúm weuwai ni dukují, niina yachi aidau nuigtú ni jintintaiji aidaujai; nunik nui ujumak tsawan batsamsajui.

*Jega Apajuí ememattainum aents batsatun Jesús jügbau*

(Mt. 21.12-13; Mr. 11.15-17; Lc. 19.45-46)

<sup>13</sup> Judío aidau fiestamtaiji, Pascua jegattak wajasmatai, Jesusak Jerusalén weuwai.

<sup>14</sup> Nunik jega Apajuí ememattainum waikmá toro aidau, uwig aidau, paumá sujín aidau nuigtú kuichki yapaijin aidau chicham jekajaidau wainkauwai.

<sup>15</sup> Nunik nuwi duwap etsentsjamu atatman juki chapikmag, jiyaká iwiyag, jega Apajuí ememattainum batsatunak ashí jiiujui, uwig aidau, toro aidau, paumá sujín aidau nuigtú kuichki yapaijin aidau kuichkijinak nugká nagkimjuk, mesajinash akaketkauwai.

<sup>16</sup> Dutika, paumá sujín aidau chichajak:

—Jui aina juka jiiجتajum. Mina Apajuí jeeg, waji sujutai emaipajum, tiuwai.

<sup>17</sup> Dutikamtai jintintaiji aidau, agagbaunum chichaak: “Amina jeemnak senchi akasmatjai”, tawa nuna adeajajui.

<sup>18</sup> Dutiktai judío apuji ainnak:

—¿Waji iwainakmea aents chicham antugtai wajukeya nunikmesh aikame? tuidau.

<sup>19</sup> Tama Jesús ditan ayaak:

\* 2:6 “Cincuenta, nuniachkush setenta litro” tawa juka versión (DHH) tawa nuiya jukimui, tikich versión aidauk dos o tres medidas tuinai, tikichik cien litro tuidaush ainawai.

—Jega Apajuí ememattaiya ju tegaktatjume, dutikawagmin kampatum tsawan asan ataktú jegamkattajai, tiuwai.

<sup>20</sup> Tutai judío apuji aidau chichajuinak:

—Cuarenta y seis mijadai ju jega Apajuí ememattai jegamkamua duká, ¿ame kampatum tsawantai jegamkattam? tuidau.

<sup>21</sup> Tujash ni, jega Apajuí ememattai tawa nunak, niina iyashin taku tiuwai.

<sup>22</sup> Nuadui, jakamtai ukusbau aajakú nantakmatai jintintaiji aidau adeajajui nuna tiuwa nuna; nunikag Agagbauwa nuna nuigtú Jesús tibauwa nunashkam dekaskeapi tiajuí.

*Jesusak ashí aents anentaibaujin dekawai*

<sup>23</sup> Jesús fiesta Pascua tutain inagkeaktatus Jerusalén jegaa pujai, kuashat aents niini dekaskeapi tiajuí, aents dutikmainchau dutikaun wainaidau asag.

<sup>24</sup> Tujash Jesusak ditanak kajinas anentaimituinachu, ashí ditanak wainu asa;

<sup>25</sup> nuniau asa atsumachu aents aidau pachis etsegtuktinme tusag, wagki nigka aentsun anentaimitajinak shiig dekaju asa.

### 3

*Nicodemo Jesusan tajuamu*

<sup>1</sup> Aajakui makichik fariseo Nicodemo daagtin judío aina nui eme anentsá diitai.

<sup>2</sup> Nunú kashi Jesusan ausatatus weuwai, nunik:

—Rabí, jutiik dekainaji, aminak Apajuí jintinkagtuati tusa awetabiuwa duka, wagki makichkish ame aents dutikmainchau iwainam jutikmainchau ainawai, Apajuí niijai achataik, tau.

<sup>3</sup> Tama Jesús ayaak:

—Dekas tajame, aents ataktú akiinachuk Apajuí inamtaijinak wainmain ainatsui, tau.

<sup>4</sup> Tutai Nicodemo iniak:

—¿Muuntuch wajasush utugsaya akiinmainaita? ¿Ataktú dukují wakeen egkemkag akiinmainait?

<sup>5</sup> Tutai Jesús ayaak:

—Dekas tajame, yuminum nuigtú Wakaní Pegkejiya nui akiinachuk, Apajuí inamtaijinig waimainchau ainawai.

<sup>6</sup> Aentsnum akiinaina duka, aentske; Wakanía nui akiinauk, wakanía duke.

<sup>7</sup> Wi tajam duka, anentai jegagchamnuk anentaimitipa, nunak: “Ataktú akiinmain” ainawai.

<sup>8</sup> Daseg ni wajuk wakegawa nunisag umpuawai, nunú dasentu antakmesh, tuwiya minawa, tuja tuwí wegawa duka dekatsme. Juninke ashí aents Wakaní Pegkejin akiinaidaush, tiuwai.

<sup>9</sup> Tama Nicodemo ayaak:

—¿Dusha wajukaya nunimainaita? tau.

<sup>10</sup> Tutai Jesús ayaak:

—¿Ame Israela maestroyaitkumek, dusha dekatsum?

<sup>11</sup> Dekas tajame, jutiik dekamu chichainaji, tuja wainkamu etsejuinaji. Tujash jutii taji duka dekaskeapi tatsugme.

<sup>12</sup> Wi ju nugkanmaya wajiin pachisan takuish dekaskeapi tatsujum aniautigmesh, ¿Utusagmek dekaskeapi titagme nayaimpinmaya pachisa chichaakuish?

<sup>13</sup> “Makichkish nayaimpinum wakauk atsawai; nayaimpinmaya akaikiuwa duke, duka Aentsmaga akiinaiuwa nunuwai.

<sup>14</sup> Moisés dapi dakumká najanamun uwegshunum yakí jiiikua numamtuk, Aentsmaga akiinaiuwa nunash yakí jiiikagtinai,

<sup>15</sup> ashí aents niina dekaskeapi tuidauk, pujut nagkanchaun jukitnume tabaunum.

*Apajuí ashí aentsun aneawai*

<sup>16</sup> “Wagki Apajuí ashí aentstin senchi anejatu asa, Uchijí makichkiuchia nuna sujamsauwai, ashí niina dekaskeapi tuidauk megkaekashtinme, ayatak pujut nagkanchau ajitnume tau asa.

<sup>17</sup> Wagki Apajuik Uchijinak ju nugka juig aents aidau suwimkan susati tusag awemachui, ayatak aents aidau niini uwemtan jukitnume tusa awemauwai.

<sup>18</sup> “Niina dekaskeapi tuidauk, bakumashtinai; tujash niina dekaskeapi tuinatsu duka bakumatnum juwakajui, wagki Apajuí Uchijí makichkiuchia nuna daajin dekaskeapi tichaju asag.

<sup>19</sup> Dekaskeapi tuinachu bakumakbauwa duka juuwai: tsaaptinuk ju nugká juig tae, tujash aents aidauk tsaaptinnak dakituinawai, suwen imá senchi wakegaidau asag tudau takaina nuna iwaintugkai tuidau asag.

<sup>20</sup> Wagki ashí aents pegkegchaun takaina duka, tsaaptinnak dakituinawai, nunidau asag tsaaptinnak adijainatsui, pegkegchaun aidau takaamujin iwaintugkai tuidau asag.

<sup>21</sup> Tujash dekaskea nuna takaidauk, tsaaptinnum mininawai, Apajuí wakegamu takaamua nu paan iwainakbau atí tuidau asag”.

*Nuwenatna nuna kumpaji*

<sup>22</sup> Nuna tii, Jesús jintintaiji aidaujai Judea nugkanum weuwai, nunik nui ditajai pujus yamijatu.

<sup>23</sup> Nuniai Juagshakam Enón yamijatu, Salimnum tikiju awa nui, nuwi kuashat yumi au asantai; nuwi aents aidauk weedau yamimajagtatus.

<sup>24</sup> Nunak Juagkak eke cárcel egkeachbau asa nunikui.

<sup>25</sup> Nuniamunum Juagká jintintaiji aidau, makichik judiojai pegkeamun pachis tuday-inau,

<sup>26</sup> nunikag Juagkan jegajuawag, chichajuinak:

—Rabí, Jordagka amain amijai pujubia nu, ame ni pachisam etsegmayum nunú yamijattai, kuashat aents aidauk tuwajuinawai, tuidau.

<sup>27</sup> Tama Juan chichaak:

—Apajuí dutikata tichamunak aentsuk makichkish dutikmaitsui.

<sup>28</sup> Atumetjume wi tibau antuku aidautigmek, wika Cristuchuitjai, ayatak ni minitin asamtai emtika awemamuitjai tibiajim nunú.

<sup>29</sup> Nuwenbaunum, nuwe atinun achiaka duka nuwatkatna nuuwai, tuja aishmag nuwenatna nuna kumpajig ayaumas wajas nunú chichatai antak shiig aneawai. Wishakam nunisnuk senchi shiig aneajai ju chichainamu antakun.

<sup>30</sup> Niyyai imá eme anentam atata duka, nuniakuí wika imanchauch juwaktatjai.

*Yakiya tauwa nu*

<sup>31</sup> Yakiya tauwa nuuwai ashí nagkaekagtasia duka. Nugkanmayaya duka, nugkanmayagke, nunin asa chichakush nugkanmayanak chichawai. Tujash nayaimpinmaya mina nuuwai ashí nagkaekagtasia duka;

<sup>32</sup> nunin asa ni wainkamujin nuigtú antukbaujin etsejui, nunitaish makichkish dekaskeapi tuinatsui ni etsegbaunak.

<sup>33</sup> Tujash ni etsegbaun antujuina nuuwai, Apajuí tabauk dekaske tuina duka.

<sup>34</sup> Apajuí awemamua duka Apajuí chichamenak chichawai, wagki Apajuí Wakaní Pegkeji ashí susamu asa.

<sup>35</sup> Apajiya nu Uchijin aneau asa, ashí wají aidauk niina uwejin idaitusui.

<sup>36</sup> Duwi niina Uchijin dekaskeapi tuidauk, pujut nagkanchau ajuinawai, tujash niina Uchijiya nuna dekaskeapi tuinachuk, nu pujutak atsujuinawai, nunin asag Apajuí suimkaji ishamaina nunak jukiagtinaí, tiuwai.

## 4

*Jesús Galilea weaku jünkimu*

(Mt. 4.12; Lc. 4.14)

<sup>1</sup> Jesús antuku fariseo aidau dekawaje Jesús yamiamua nu Juagká jintintaiji aidau nagkaesau kawewai tuinawai tabaun.

<sup>2</sup> (Jesusak yamijattsai niina jintintaiji aidau yamijatuinaig tuidau.)

<sup>3</sup> Nuna Jesús dekaa, Judeanak ukuak ataktú Galilea weuwai.

*Jesús Samarianmaya nuwajai igkunikbau*

<sup>4</sup> Nunik Samaria nugkanum nagkaemak,

<sup>5</sup> Samaria nugkanum yaakat Sicar tutainum, Jacob ni uchijí Josen nugká susauwa nui tikiju jegauwai.

<sup>6</sup> Nuwi au Jacob nugka tai yumi chigkamu aajakua nu. Jesús miná minakua pimpikiu asa, nugka tai yumi chigkamunum ayaumas ekeemsauwai, etsa tajiastatak wegai.

<sup>7</sup> Nuniai samarianmaya nuwa yumin shikiak tantantai, Jesús chichajak:

—Minash machik yumi ajamjusta uwagtajai, tau.

<sup>8</sup> Jintintaiji aidauk yaakat yutain sumaktasag wegaju ai.

<sup>9</sup> Tujash judío aidauk samarianmaya aidaujaig dakitdayin asag, nuwa ayaak:

—¿Wagka ame judiowaitkumesh, wi samarianmaya nuwa aish, yumi ajamjusta tusamesh segatme? tau.

<sup>10</sup> Tama Jesús ayaak:

—Apajuí anentag awemamua nu yumin segapa nu dekaemek, dekas tajame, ameshkam segamainaitme, dutikamak nigka yumi iwakua nuna amamainai, tiu.

<sup>11</sup> Tutai nuwa chichaak:

—Apuh, yumi shikitai takaktsum aniaumesh, yumishkam initka nunin aish, ¿tuwiya yumi iwakush sujutatme?

<sup>12</sup> ¿Ame ii muunji Jacob aajakua nunú nagkaesaukaitam? Ii muunji Jacob aajakua nu junak nugká tai yumin chigká ukugtamkiuwai. Niishkam junak ashí ni uchijijai umujakui, tagkujinashkam junak suujakui, tau.

<sup>13</sup> Tama Jesús ayaak:

—Ashí ju yumia juna umuidauk tuke kitabiagtin ainawai,

<sup>14</sup> untsu wi yumi susattag nuna uwajuk, tuke kitaagchatin ainawai, ayatak wi yumi susattag nunú niini yumi pukuni jiinama imaní au asa, pujut tuke atina nu ajitnai, tiuwai.

<sup>15</sup> Tama nuwa ayaak:

—Apuh, minash nunú yumi sujustá, kitamchau atajai, nuigtú yumi shikiaknush minichu atajai, tiuwai.

<sup>16</sup> Tutai Jesús chichajak:

—Weme aishum jukim, jui taata, tau.

<sup>17</sup> Tama nuwa ayaak:

—Wika aishinchauwaitjai, tiuwai.

Tutai Jesús ayaak:

—Dekas tame aishinchauwaitjai tame duka;

<sup>18</sup> tujash cinco aishum ajutjamajakui, tuja yamai ajutjama dushakam aishumchauwai. Duwi dekas tiume, tau.

<sup>19</sup> Nunú tama nuwa chichaak:

—Apuh, profeta diyajame;

<sup>20</sup> iina muunji aajakajua nu Apajuí emematujakbauk au muja auwai, tujash judío aidautigmek, Apajuí emematmainuk imá Jerusalegka nuigki tinu ainagme, tau.

<sup>21</sup> Tutai Jesús ayaak:

—Nuwah, dekaskeapi tujutta, hora jegawai imá ju muja juig, imá Jerusalegkak Apagnak emematchagata nu.

<sup>22</sup> Atumek dekachatkujum emematjume; tujash jutiik ya emematji duka dekainaji, wagki uwemtikagtinuk judionmaya minitin asamtai.

<sup>23</sup> Yamaik horak jegawai, duka yamaiya juiki, dekaskenum Apajun emematin aidauk, Wakan tawa dutiksag dekaskenum emematiagtata nu. Mina Apajuk nunú aidaun emematjitnume tusa egawai.

<sup>24</sup> Apajuk Wakani, nunin asamtai niina emematuidauk, wakan tawa dutiksag dekaskenum emematmain ainawai, tau.

<sup>25</sup> Tutai nuwa ayaak:

—Dekajai Mesías\* Cristo daagtin taatna nunak, ni taak ashí waji aidaunak ujpaktinai, tau.

<sup>26</sup> Tutai Jesús ayaak:

—Nunak wi amijai chichag nuuwaitjai, tiuwai.

<sup>27</sup> Nuna aatus chichaak pujai, jintintaiji aidau kaunawajui, nunikag anentai jegagchajui makichik nuwajai chichaak pujau asamtai. Nunikajash makichikish ¿waji iniame? nuniachkush ¿waji pachisme chichame? tusagkesh iniaschajui.

<sup>28</sup> Nunik nuwak yumi shikitaijin ukuak, yaakat weuwai. Nunik jegaa aents aidaun ujaak:

<sup>29</sup> —Awi aents pujuma nu ashí wi nunikbaugnak tujutmae, atumesh miní diistajum ¿Cristochuashit? tau.

<sup>30</sup> Tutai yaaktanmaya aidauk jijnjag, Jesús pujamunum weajui.

<sup>31</sup> Nuna nuninai, jintintaiji aidau:

—Maestro, amesh yuwata, tuidau.

<sup>32</sup> Tama ni ayaak:

—Wi yumainuk ajutui, atumek duka dekatsjume, tau.

<sup>33</sup> Tutai ditak pempeemtunikiag:

—Tikichiash yuwatnunash itajuawagma, tudayinau.

<sup>34</sup> Tiagtai Jesús chichajak:

\* 4:25 Hebreo chichamnum “Mesías” tai, griego chichamnum “Cristo” tawai, nunak “Apajuí Apu atinun etegka awemamu” tawa nunak taku tuinawai.

—Mina yutaijua duka, mina awetiuwa nu wakejamuji umigkata tabau nuigtú ni takatji ashimjukta tabauwa nuuwai.

<sup>35</sup> Atumek: Ajak juutak eke ipaksumat nantu awai, tinu ainagme. Tujash wi tajime: Pagkai diistajum, ajak ajakbauk uminag saigká, juumain wajas awai.

<sup>36</sup> Ajak juwaamunum takaa duka akiam auwai, nu ajak juukbauwa duka pujut nagkanchaunum atina nuuwai; ajakbauwa nu, juwá nujai shiig aneastinme tabaunum.

<sup>37</sup> Wagki ju tibauwa juka dekaske: Makichkia nu ajakmawai, tikichia nu juwaawai, tawa nu.

<sup>38</sup> Wi atumnak, makichkish atum takaschamu aig, juuktajum tusan ishiakbaijime; tikich takaa waittsau ainawai, nuniku aig, atum nu takasbauwa nuiya juukbaijume, tiuwai.

<sup>39</sup> Nuniai Kuashat samarianmaya nunú yaaktanum pujuidauk, dekaskeapi tiajui, nuwa etsejak: “Wi nunikbaugnak ashí tujutmae”, tiu asamtai.

<sup>40</sup> Nunikag samarianmaya Jesusan kautuawag, jui jutiijai juwakta tusag segajui. Tima nui jimag tsawan pujusui.

<sup>41</sup> Nui pujus chichatai niina chichamen antuinak, nuní kuashat dekaskeapi tiajui.

<sup>42</sup> Nunikag nuwan chichajuinak: Ame timaum duikik dekaskeapi tatsuji, wagki juti-ishkam ni chichamuk shiig antugkaji, nuniku asá niimpapita dekas ashí nugkanmayan uwemtijatnuk tusa dekainaji, tiajui.

*Suntajá apuji Capernaumnumia uchijin Jesús etsagagbau*

<sup>43</sup> Jimag tsawan pujusá, Jesús Galilea weuwai.

<sup>44</sup> Wagki Jesús nigki etsegkauwai, “profetak niina nugkenigkik eme anentamak achauwai”, tusa.

<sup>45</sup> Nunik Galilea jegamtai, nuiya aidauk shiig anentus jukiajui, Jesús Jerusalén pujus fiesta Pascuatin ashí dutikamujin ditashkam fiestatin jegawag wainkaju asag.

<sup>46</sup> Ataktú Jesús Caná Galilea awa nui jegauwai, ni yumin vino emamua nui. Nuniai Capernaum pujau makichik rey oficialji, nuna uchijí jaak tepau.

<sup>47</sup> Nunú, Jesús Judeanmaya Galilea tae tabaun dekaa, jegajua segau, mina uchig ashí jakama nu, jegajui taam etsaentujata tusa.

<sup>48</sup> Tama Jesús ayaak:

—Aents dutikmainchau iwainamu waintsukek kakajus dekaskeapi tumaitsume, tiuwai.

<sup>49</sup> Tutai oficial ayaak:

—Apuh, mina uchig jaatsaig jegaami, tau.

<sup>50</sup> Tama Jesús chichaak:

—Jeemin wakitkita, uchigmik tsagaje, tiuwai.

Tutai dekaskeap Jesusak tawa tusa wakitkiuwai.

<sup>51</sup> Nunik jeen wakettatman, ni inake aidau igkugkag: —Uchigmik tsagagmae, tusag ujaidau.

<sup>52</sup> Tiagtai wáj horatinia tsagagmae tusa inidau. Tama dita aainak:

—Yau a la una ai tsuweamunak bichatjame, tuidau.

<sup>53</sup> Tama uchí apajishkam adeaju, nunú horatin Jesús chichajak: Uchigmik tsagaje, tibauwa nuna.

Nunik nigka ashí ni patayí aidaujui, Jesusai dekaskeapi tiajui.

<sup>54</sup> Ju jimaja juna wainchatain iwainakua nunak, Jesús Judeanmaya jiinki Galilea jegaa dutikauwai.

## 5

*Aents wekaechaun Jesús etsagagbau*

<sup>1</sup> Nuna dutika pujai, judío aidau fiestamaidau, nuniagtai Jesuschakam Jerusalén wakauwai.

<sup>2</sup> Jerusalén, waiti Uwijá waitai tutaiya nui tikiju awai yumi ipiagbau, hebreo chichamai Betesda tutai. Duka cinco waiti aagjamu ajuidau.

<sup>3-4</sup> Nuanui kuashat jau aidau batsataidau wainmachu aidau, shutú aidau nuigtú wekaechau aidau.

<sup>5</sup> Nunú jau aina nuiya makichik aents treinta y ocho mijadai jauwa nu nui pujau.

<sup>6</sup> Nunittaman Jesús wainak, nunisag kuashat mijadai tepenun dekau asa, iniak:

—¿Tsagagtasamesh wakegatsmek? tau.

<sup>7</sup> Tama jau ayaak:

—Apuh, yumi ipiagbauwa ju tagkittai ajunmainuk atsau asamtai, wi iyagta taig tikichia iyainawai, tiuwai.

<sup>8</sup> Tutai Jesús chichajak:

—Nantakim camilla jukim wetá, tiuwai.

<sup>9</sup> Tusá tamawaik nunú aentschakam tsagag, ainká tepetaijin takui juki wekaetan nagkamauwai, nunak tsawan ayamtai aig nunikui.

*Tsawan ayamtai pampanjama*

<sup>10</sup> Tujash judío aidau, nu aents tsagajua nuna chichajuinak: —Yamaik tsawan ayamtaiyai, nunin asamtai ainká tepetaijum jukimek wemaitsume, tuidau.

<sup>11</sup> Tama ni ayaak:

—Tujash mina etsaentugma nu chichagtak: Ainká tepetaijum jukim wetá tujutma-jamah, tau.

<sup>12</sup> Tutai dita iniinak:

—¿Yaita ainká tepetaijum jukim wetá tujabiush? tuidau.

<sup>13</sup> Tujash etsagagbau aajakua duka dekachu ya etsagaje nunak, wagki Jesusak nui aents batsata nunak ukuak weu asamtai.

<sup>14</sup> Dutikamu ajuma dui Jesús, jega Apajuí ememattainum wainkau, nunik chichajak:

—Nijah, yamaik tsagajume, ataktú awenamek tudau takasaipa, aan nagkaemas pegkegchau ajutjami, tiuwai.

<sup>15</sup> Mina weuwai, nunik judío aidaun jegajua: —Mina etsaentuja duka Jesusai tusa ujakajui.

<sup>16</sup> Nunak tsawan ayamtai aig dutikau asamtai judío aidau Jesusan achiktatus egaidau.

<sup>17</sup> Nudiagtai Jesús chichaak:

—Mina Apajuk yamaikish takaawai, nuniau asamtai wishakam dutiksanuk takaajai, tiuwai.

<sup>18</sup> Nuna tutai judío aidauk nuní senchi maatus wakegaidau, wagki tsawan ayamtaiya nunak umiachu nuigtushkam Apajuíjai betek chichagmamak, Apajuik mina Apajui tau asamtai.

*Apajuí Uchijiya nuna senchiji*

<sup>19</sup> Nu imatjuinam Jesús ayaak: “Dekas tajai, Uchik nigki nagkamig takamait sui, Apají dutikamun waina nuna takamainai; wagki ashí Apají takaa nunak Uchijishkam takauwai.

<sup>20</sup> Wagki Apajiya nu uchijin aneau asa ashí wájí aidaun ni takaa nunak iwaintawai, nuigtush nuní nagkaemasash iwaintuktatui, dutikamtai atumek anentai jegamainchau juwaktatjume.

<sup>21</sup> Wagki Apag aents jakaunash inanki pujutan suwa dutiksanuk wishakam wi wakejamugnak pujutan suwajai.

<sup>22</sup> Apajuk aentsnak etejashtinai, nunak ashí mina idaitugsauwai ame dutikata tusa;

<sup>23</sup> mina eme anenjin aina dutijamsag aminash eme anenjamtinme tujutiuiwai. Tujutiui asamtai mina eme anenjachuk, Apag mina awetiuwa nunashkam eme anentuinatsui.

<sup>24</sup> “Dekas tajime, mina chichamjun antuk, mina awetiuwa nunash dekaskeapi tauk, pujut nagkanchau ajawai; nuniau asa bakumashtinai, wagki jaakug megkaemaina nuna ukuak pujut nagkanchaun jukiu asa.

<sup>25</sup> Dekas tajime, hora jegawai, duka yamaiya juwai, jakau aidau Apajuí Uchijí chichamen antukagtata nunú, nuna antuidauk tuke pujusagtinai.

<sup>26</sup> Wagki mina Apajuí pujutak awai, nunin asa wi niina Uchijí asamtai niinish pujutak nunisag ajiti tusa sujusui;

<sup>27</sup> nunak wi Aentsmaga akiinawaitag nuna nigki aentsnash etejati tusa idaitugsauwai.

<sup>28</sup> Juka anentai jegagchamin anentaimtigpajum; wagki hora jegatnai ashí ukusbau aina nu, niina chichamen antukagtina nu,

<sup>29</sup> nuniamunum pegkejan takasú aidauk nantakiagtinai, pujutan jukitatus; untsu pegkegchaun takasú aina duka nantakiagtinai, suwimkan jukiagtatus.

*Cristo etsegtin aidau*

<sup>30</sup> “Wika wikik makichkish dutikmait sujai. Apag dutikata tujutbauwa dutiksanuk etegkeajai, tuja wi etegkeag duka pegkejai, wagki wi wakegamun egatsjai, Apag mina awetiu wakegamua nuna egajai.

<sup>31</sup> Wi wiki pachimasan etsegtumamuk, dekaskechu amainai.

<sup>32</sup> Tujash awai tikich mina pachitus etsegtuju, nunú mina pachitus etsegtuja duka dekas tawai.

<sup>33</sup> Atum Juangkan inias dekajuati tusajum awemauwaitjume, tama nigka dekaskea nuna etsegkauwai.

<sup>34</sup> Tujash wika aents mina pachitus etsegtugkatnume tusanuk atsumatsjai, junak atum uwemkamnujum tabaunum tajime.

<sup>35</sup> Juagakak lámpara kegak etsantama numamtin aajakui, tuja atumek ujumak tsawantai niina chichame wakejusa antugkujum shiig anejakuitjume.

<sup>36</sup> Tujash Juan mina pachitus etsegtugkauwa nuna nagkaesau ajutui; wagki mina Apag takatan sujak ju umiktá tujutbauwa nuna takaag duke minak etsegtujuinawai Apag awetiuwa nuna.

<sup>37</sup> Nuigtushkam mina Apag jui awetiuwa dushakam, mina pachitus etsegtujui. Atumek niina chichameg makichkish antugkachu ainagme, waintashkam wainkachu ainagme, <sup>38</sup> niina chichamega dushakam atumek umigtsugme, dekas Apajui awemamuapi tujutchau asajum.

<sup>39</sup> Atumek Agagbauwa duka shiig kuitamsajum augjume, awiyampap pujut tuke atina duka jumainaita tau asajum, nunu agagbauwa nuwig mina pachitus chichawai,

<sup>40</sup> nuniaig atumek nunu pujut jukitasajum minaij minatsjume.

<sup>41</sup> "Tujash wika aents aidau eme anenjitnume tusanuk wakegatsjai,

<sup>42</sup> tujash atumnak wainjime nuigtush dekajai dekaskenum Apajui aneamu atsugta-maina nuna.

<sup>43</sup> Wika mina Apag awetimtai taamjai, nuniaig atumek minak dakitjagme. Tujash tikich, awemachmaitak, nigki nagkami minakuig, duka shiig anentsajum jumainaitjume.

<sup>44</sup> ¿Utusagmek dekaskeapi titagme, atumek pempentunikjum iman anendaiyajakjum, Apajui makichkia nuna imanji egachutigmesh?

<sup>45</sup> Wainka anentaimsaigpa Apajin ujatjamak bakugmashtimpash tusajum. Atumin bakugmatna duka Moisesa nuuwai, atum dakakjum batsamtajum nunu.

<sup>46</sup> Wagki Moisés dekaskeapi takugmek, minash dekaskeapi tujutmain ainagme, wagki nigka mina pachitus agajui.

<sup>47</sup> Tujash ni agagbauwa nu dekaskeapi tachautigmesh, ¿utugsagmek mina chichamjush dekaskeapi titagme?", tiuwai.

## 6

### *Jesús cinco mil aents ayugkamu*

(Mt. 14.13-21; Mr. 6.30-44; Lc. 9.10-17)

<sup>1</sup> Nuna tusa ukuak, Jesusak Galilea kuchají amain weuwai, Tiberias tutainum.

<sup>2</sup> Nuaniamunum kuashat aents saetukajui, jau aidau aents dutikmainchaun dutikaun wainkaju asag.

<sup>3</sup> Nudiagtai Jesusak nainnum waka, jintintaiji aidaujai ekeemsauwai,

<sup>4</sup> Judío aidau fiestamtaiji Pascua tikiju wajasú ai.

<sup>5</sup> Nunik Jesús niimkamá shiig kuashat aents niini minidaun wainak, Felipe iniak:

—¿Pagkash tuwiya sumaktatji aents imaanik minina au ayugmainush? tau.

<sup>6</sup> Tujash nunak dekapsatatus tiuwai, wagki nigka dekau wajuk dutikattawa nunak.

<sup>7</sup> Tama Felipe ayaak:

—Doscientos denariowai pag sumaka, makí makichik aents imá imachik tinamash tuké jegamaisui, tiuwai.

<sup>8</sup> Tutai jintintaiji aina nuiya makichik Andrés, Simón Pedro tutaya nuna yachi chichaak:

<sup>9</sup> —Jui makichik uchi cinco pag cebadajai najanamu nuigtú jimag namak ajawai. ¿Jukeuchish aents ibauwa nuish jegamainkaih? tiuwai.

<sup>10</sup> Tiagtai Jesús ayaak:

—Ashí aents aidau batsamsatajum titajum, tiuwai.

Nuanui kuashat chijichi ayau, nuwi batsamsajui cinco mil aishmag tumain.

<sup>11</sup> Jesús nuna pagkan juki Apajuin see tii jintintaiji aidau tinamkauwai, dutikam dita jukiag batsata nuna tinamkajui, dutika namaknashkam dita wakegaina dutiksag tinamkajui.

<sup>12</sup> Dutikam shiig yuwawagmatai, Jesús jintintaiji aidau chichajak:

—Punjau ampinkaja duka yajuaktajum, wainak utsankai, tiuwai.

<sup>13</sup> Tima ditashkam yajuakajui, dutikawag doce chagkinnun aimkajui, cinco pag cebada najanamu yuwaku puujá ampigbau aina nuna. <sup>14</sup> Dutikawagmatai aents aidaushkam, Jesús aents dutikmainchaun dutikau asamtai, chichainak:

—Juka dekaskenum profeta ju nugka jui taatnai tibauwa nuuwai, tuidau.

<sup>15</sup> Tujash aents aidau Jesusan tajuwag kakantus jukiag rey ematasag wakegainamun dekau asa, ataktú nigki muja yakí jítkaunum wakauwai.

*Jesús yumí awanken wekaesá webau**(Mt. 14.22-33; Mr. 6.45-52)*

- <sup>16</sup> Nunik kintamai, Jesusa jintintaiji aidauk kuchanum jegawajui,  
<sup>17</sup> nunikag barcanum chimpimjag Capernaúm katigtatus weedau. Shiig suwe wajasmataishkam, Jesusak eke wakitkig taachu asamtai.  
<sup>18</sup> Nuniamunum, dase senchi umpuamu asa kuchak senchi tsukatu.  
<sup>19</sup> Imatikamaitak wiyankag seis kilómetro tumain kuwagainai, Jesús yumí awanken wekaegas barcan adjikkattak minittaman wainkajui. Nunik ishamkajui.  
<sup>20</sup> Nuniagtai Jesús chichaak:  
 —¡Witjai ishamkaigpajum! tiuwai.  
<sup>21</sup> Tutai shiig aneasag barcanum egkejajui, nunik machik wesag wamkes dita jegatasa wegamunum anuumkajui.

*Aents aidau Jesús egakbau*

- <sup>22</sup> Kashinia dui, aents kuchá amain juwaju aidauk adeajajui, jintintaiji aina duka makichik barca au asamtai ditak weenai, Jesús ditajai egkemjachua nuna.  
<sup>23</sup> Nuniamunum yaakat Tiberiasnumia barca aidau, Apu Jesús Apajuin see tusa pagkan puujá, aents aidaun ayugkauwa nui, tikiju anumkajui.  
<sup>24</sup> Nunikag diikmá, Jesús ni jintintaiji aidaujai nui atsuagtai, ataktú barca aina nui chimpimjag Capernaúm weajui, Jesusan egakagtatus.

*Jesuai pag pujutan sukagtinuk*

- <sup>25</sup> Nunik kuchá amain katikmag Jesusan wainkag, iniinak:  
 —Maestroh, ¿wajutí juish taamume? tuidau.  
<sup>26</sup> Tama Jesús ayaak:  
 —Dekas tajime, atum egatjum duka aents dutikmainchaun dutikamag dui egattsugme, pag shiig yuwamujum dui egatjume.  
<sup>27</sup> Yutai dukap atsuk abuena duka anentaimtigpajum. Dekas yutai abuechau tuke pujutan sukagtina nu jukitasajum anentaimtustajum; nunak Aentsmaga akiinawua nu amastatui, wagki Apajuí mina Apajua nu: Ame duka dutikata tusa inatjau asamtai.  
<sup>28</sup> Timatai aents aidau iniinak:  
 —¿Wají dutikmainaita Apajuí wakegamu umigkatasaih? tuidau.  
<sup>29</sup> Tiagtai Jesús ayaak:  
 —Juuwai Apajuí wakega duka, ni awemamua nuna dekaskeapi titinme tawa nuuwai.  
<sup>30</sup> Tutai dita chichajuinai:  
 —¿Wají wainchatai iwainkagtumainaitme, nu wainkaja dekaskeapi tumainush?  
 ¿Tuwaita ame takaamu aidaush?  
<sup>31</sup> Jutii muunji aajakajua duka uwegshunum maná yuujakú ainawai, agagbaunmash: “Nayaimpinmaya pagkan yuwatnume tusa susauwai” tawai, tuidau.  
<sup>32</sup> Tiagtai Jesús ayaak:  
 —Dekas tajime, nunak Moisés nayaimpinmaya pagnak susachui, mina Apajua nuuwai nayaimpinmaya pag dekaskea nuna sukagta duka.  
<sup>33</sup> Wagki Apajuí pagjiya duka nayaimpinmaya jui akaikiuwa nuuwai, ashí nugkanmayan pujutan susatna nu.

<sup>34</sup> Tutai:

—Apuh, nu pag tuke sukagtita, tuidau.

<sup>35</sup> Tiagtai Jesús chichaak:

—Witjai pag pujutan sukagtinnuk, minai minidauk tuke yapajuashtin ainawai. Nunisag minai dekaskeapi tuidaushkam tuke kitaagchatin ainawai.

<sup>36</sup> Tujash timajim dutiksanuk tajime, mina waitiatkugmesh dekaskeapi tujuttsugme.<sup>37</sup> Ashí mina Apag sujamu aina nu minaig tamain ainawai, nunú minai taidaunak wika dakitjashtatjai.<sup>38</sup> Wagki wi nayaimpinmayan akaikig nunak, wi wakegamun takastasan taachuitjai; mina awetiuwa nu wakegamun takastasan tauwaitjai.<sup>39</sup> Juuwai mina awetiuwa nu wakegamua duka, makichkish ni sujusbauwa nunak emegkaumainchawaitag nu, dutikakun tsawan nagkanbaunmash inanmainaitag nuuwai.<sup>40</sup> Wagki mina Apag wakegamua duka, ashí aents Apajuí Uchijimpapita tusa dekaskeapi tujutuidauk pujut nagkanchau ajitnume, nunikmatai wi tsawan nagkanbaunum inankitjai, tawa nuuwai.<sup>41</sup> Nuna tutai judío aidauk Jesús augmattan nagkamawaju, wagki ni chichaak: “Witjai pag nayaimpinmayan akaikiunuk” tau asamtai.



42 Nunik pepeemtunisag: —¿Ju Jesús José uchijí, apajish nuigtú dukujish jutii wainnuweg duchaukaih? ¿Wajukeakua jusha nayaimpinmayan akaikijai tusash tawa? tuidau.

43 Tiagtai Jesús chichaak:

—Atumek tudayá yujatsuk idaisatajum.

44 Makichkitigmekesh minaig tamain ainatsjume mina Apag awetiuwa nu itag-mashkuig. Tuja wi inankittajai tsawan nagkanbaunum.

45 Profeta aidau agagbaunum: “Ashí Apajuí jintintuamu agtinai”, tawai. Nunin asamtai ashí Apajun antugkau aina nu nuigtú niinayan unuimaina nu minaig mininawai.

46 “Nunak makichik aentskesh Apajun wainkau asa nuniatsui, ya Apajuiyai pujau tauwaita duke Apagnak wainkauwai.

47 Dekas tajime, minai dekaskeapi tuidauk, pujut tuke atina nu ajuinawai.

48 Witjai pag pujutan sukagtinnuk.

49 Atumi muunjum aajakajua nu uwegshunum maná yuwawaju aina duka jinawaju ainawai;

50 tujash wika pag nayaimpinmaya akaikiuwa nuna tajai, ya nuna yuwattawa duka jakashtinai tusan.

51 Witjai pag iwaaku nayaimpinmayan akaikiuwaitag nunak. Makichik aentskesh ju pagka juna yuwauk, tuke pujutnai. Wi pagkan sukagtustatag duka, mina iyashjua nuuwai, nunak wi ashí nugkanmaya aidaun pujutan susatasan nuniktatjai”.

52 Tutai judío aidau ditak tudaiyinak:

—¿Utugsaya niina nejenash yuwatajum tusash sujamainaita? tuidau.

53 Tiagtai Jesús ditan chichajak:

—Dekas tajime, Aentsmaga akiinawua nuna neje yuwachkugmek, numpesh umachkugmek, pujutak atsgutabiagtinaí.

54 Mina nejejun yuwak, numpagnash uma nu, pujut tuke atina nu ajawai; nuna tsawan nagkanbaunum wi inankittajai.

55 Wagki dekaskenum yutaiya duka mina nejejuu nuuwai nuigtú dekaskenum umutaiya dusha, mina numpajua nuuwai.

56 Mina nejejun yuwak, mina numpajun umauk, wijai ijutkawai, nunisnuk wisha niijai ijutkajai.

57 Apag iwaaku pujuwa nu awetiu asamtai, wisha niinig iwaaku pujajai; nunin asamtai minaiyan yuwauk, wijai pujustinaí.

58 Juuwai pag nayaimpinmaya akaikiuwa nu. Atumi muunjum maná yuujakaju jinawaju nuninchau, ju pagka juiyan yuwauk, tuke pujustinaí.

59 Jesús ashí ju aidaun pachis jintinkagtuauwa nunak, Capernaúm jega ijuntainum tiuwai.

*Chicham pujut tuke atina nuna sukagtin*

60 Nu jintinkagtamun antukag, kuashat niina nemajuidau chichainak:

—Juna jintia juka shiig utugchatai, ¿ya nunash nunimainaita? tuidau.

61 Nuna tusa ashishmatuinamun Jesús dekaa chichajak:

—¿Wi tajim duka atumnak shiig awajtamkachajek?

62 ¿Atumesh wajukmainaitjume, Aentsmaga akiinawua nu yaunchuk pujujakbauwa nuwi weak takunu wainkugmesh?

63 Wakani pujutan sukagta duka, tujash iyashia duka nunak sukagtumaitisui; wi chicham aidaun timajim nu ainawai wakan aidauk nuigtú pujut aina duka.

64 Tujash atum ainajum anuiya ujumak dekaskeapi tuinachush ainawai. Nunak Jesusak yama nagkamsag ya aidauwa dekaskeapi tuinatsua, tuja ya sujama atinaita nuna dekau asa tiuwai.

65 Nuigtushkam chichaak:

—Nuadui timajime makichkitigmekesh minaig minimainchau ainagme, Apag nunikti tichamu aidautigmek tusan.

66 Duwi nagkamas, kuashat jintintaiji aidauk ukukiajui, nunikag nuigtuk niijaig yujainachu.

67 Nunikagmatai Jesús ni jintintaiji doce aina nuna:

—¿Atumesh wetasajum wakegatsjumek? tau.

68 Tutai Simón Pedro ayaak:

—Apuh, ¿jutiish yayaig wetaji? Amina chichamjum aina dukeajama pujut tuke atinum sukagta duka.

69 Jutiik aminí dekaskeapi tiuwaitji, nunin asá dekaji, amek Cristo, Apajuí pegkegma nudauwaitme, tau.

<sup>70</sup> Tutai Jesús ayaak:

—¿Wichaukaitag atum doce ainajum nuna etegjaunuk? Dutikamu ainagminig, atum ainajum anui makichik Iwanch pachitkawai, tiuwai.

<sup>71</sup> Nunak Judas Iscariote, Simogka uchijiya nuna tiuwai, wagki nunú doce aina nuiya sujam atin asa.

## 7

*Jesusa yachi aidau dekaskeapi tichagbau*

<sup>1</sup> Nuna tusa idaiyas, Jesusak Galileanum wekagu, Judea pujutnak dakitau, wagki nuiya judío aidau maatasag egainamu asa.

<sup>2</sup> Judío aidau fiestamtaiji tabernáculo\* tutai tikiju wajasú ai,

<sup>3</sup> yachi chichajuinak:

—Juig pujutsuk Judea wetá, jintintajum aidau ame takaamun wainkatnume;

<sup>4</sup> wagki makichkish aents wainkamu atatus wakegawk, waji aidaunak uuká takachu ainawai. Nunin asamtai ju aina ju jutikakmek, ashí aents wainainamunum dutikata, tiaju.

<sup>5</sup> Nunak yachi aidaukesh niini dekaskeapi tuinachu asag tiaju.

<sup>6</sup> Tiagtai Jesús chichaak:

—Mina tsawanjuk eke jegatsui, tujash atumdauk tsawantak uminas awai.

<sup>7</sup> Atumnak ju nugkanmaya aents aidauk kajegtamain ainatsui, tujash minak kajegtuinawai, wagki dita takaamujiya nu pegkegchawai tusa etsegtuinamu asa.

<sup>8</sup> Atumek fiestanmag wetajum, wika minishtatjai; wagki mina tsawanjuk eke jegachu asamtai, tiuwai.

<sup>9</sup> Nuna tusa, nigka Galilea juwakui.

*Jesús fiesta tabernáculo tutainum webau*

<sup>10</sup> Tujash yachi fiestanum weaju ai, Jesuschakam wantintsuk uumak weuwai.

<sup>11</sup> Judío aidauk fiestatin egaidau, nuninak:

—¿Dusha tuwig pujawa? tuidau.

<sup>12</sup> Kuashat aents aina nuiya niina pachis kuashat chichaidau. Nuniai ujumak chichaidau: “Duka aentsuk pegkejai”, tuinai; tikich chichaidau: “Atsa nuninchauwai, aentsun tsanuawai”, tuidau.

<sup>13</sup> Tujash makichkish niina pachisag paan iwainakag chichainachu, judío apuji aidau ishamaidau asag.

<sup>14</sup> Fiestamainamu tsawan ejapeantu ai, Jesuschakam jega Apajuí ememattainum wayau, nunik jintinkagtau.

<sup>15</sup> Nunitai judío apuji aidauk puyatjusag diidau, nuninak: —¿Utusaya imatikash dekawa papi ausachua annaitkush? tuidau.

<sup>16</sup> Tiagtai Jesús ayaak:

—Wi jintinkagtag duka midauchui, mina awetiuwa nudauwai.

<sup>17</sup> Aents Apajuí wakegamun takastatus wakega nunú, dekamainai wi jintiag jusha Apajuinumiayashit atsa wiki nagkamnuash taja nuna.

<sup>18</sup> Nigki nagkami chichá duka, niina imanjinak egak tawai; tujash ya awemauwaita nuna imanjin egá nuuwai, dekaskea duka nuigtush ni pegkegchau takaamujish atsuja nu.

<sup>19</sup> “¿Moisés chicham umiktinun atumin amaschaukaitjum? Dutikamuitkujum atum ainajum anuiyatigmek makichkish umiatsjume. ¿Wagka mantuatasagmesh wakegagme?”, tau.

<sup>20</sup> Tutai aents aidau aiinak:

—Iwanch ajutjamui, ¿ya mantamata tujamua? tiaju.

<sup>21</sup> Tiagtai Jesús ayaak:

—Wi aents dutikmainchaun makichik dutikamag duik anentai jegatsjume.

<sup>22</sup> Dekaskenun Moisés, uchi aishmag akiinkuig pakaji ajapjitajum tujabaiju, (nunak Moisés nagkamachui, duka atumi muunjum nagkamamui); nunin asamtai atumek tsawan ayamtai aigkish pakaji ajapjin ainagme.

<sup>23</sup> Duka dekaske, atumek Moisés umiktajum timawa nuna uwaekaig tusajum, tsawan ayamtai aigkish uchi aishmag akiinamtaig pakaji ajapjin ainagme. Nunin ainayatkugmesh ¿wagka wi tsawan ayamtai aig, aents jaun etsagagmataish kajeagme?

\* <sup>72</sup> “Tabernáculos” tawa duke, fiesta de los tabernáculos, nuniachkuish fiesta de las enramadas tutaiyai. Nunak judío aidau nantu Eitanim-Tishri tawa nu jegatai siete tsawantai fiestamajakú ainawai. Duka hebreo chicham sukkot tawa nu, apach chichamnum tienda, enramada, cabaña tibauwai.

<sup>24</sup> Atumek aentsú niimé diisjum etegkawaigpajum; dutikakjumesesh shiig anentaimsa dutikatajum, tiuwai.

*Jesús tuwiya tauwaita nu etsegkamu*

<sup>25</sup> Ujumak Jerusalegnunia aidau:

—¿Juchaukaih maatatus egagma nu?

<sup>26</sup> Diisjuah, tuwakbaunum chichataish pachinatsujamah. ¿Dekas Cristui tuidau asampash apu aidau ayatak diina?

<sup>27</sup> Tujash jutiik jusha tuwiyampaita duka dekainaji, untsu Cristo minitna nunak makichkish dekajuachagtin ainawai tuwiyampaita nunak, tiajui.

<sup>28</sup> Nu tuinamun, Jesús jega Apajuí ememattainum jintinkagtak pujau antuk, senchi chichaak:

—Minak dekagjume tuwiyana minaja duka. Tujash wika, wiki nagkamnuk taachmajai, minak dekaskea nu awetiuwai, duka atumek waintsugme.

<sup>29</sup> Tujash wika wainjai, wagki niiniya minau asan nuigtush nigki awetiuwai, tau.

<sup>30</sup> Tutai achikta tuidau; tujash makichkish achikchajui, niinu hora eke jegaachu asamtai.

<sup>31</sup> Kuashat aents niini dekaskeapi tiajua nunú chichainak:

—Cristo taatna duish, ¿ju iwainag takaa juni nagkaemasampash takastinait? tuidau.

*Fariseo aidau Jesús achikta tibau*

<sup>32</sup> Aents aidau Jesusan pachisag chichainamun fariseo aidau antukajui; nunikag fariseo aidau, sacerdot apuji aina nujai jega Apajuí ememattai kuitamin aidau awemajui Jesusan achiktinme tusag.

<sup>33</sup> Nudiagtai Jesús chichaak:

—Wika atumjaig wajumchik tsawan pujusan, mina awetiuwa nui wetatjai.

<sup>34</sup> Atumek minak egatkattagme, tujash waitkashtatjume, nuigtush wi tuwí pujuttaja, nuig atumek minimainchau ainagme, tiuwai.

<sup>35</sup> Timatai judío aidau pempeentunisag iniininak:

—¿Tuwig jusha wetí ii wainmainchaunmash? ¿Judío aidau pampagkag griego aents batsatainamunum pujuina nui wee, griego aidau jintintuatasampash tawa? tuidau.

<sup>36</sup> ¿Nunash wajuk takua, “egatkattagme, tujash waitkashtatjume, nuigtush wi tuwí pujuttaja, nuig atumek minimainchau ainagme”, tujamji? tiajui.

*Yumi pujutan sukagtinun pachis Jesús tibau*

<sup>37</sup> Fiesta ashimnamua nunú tsawan dekas imá puyatjusa anentaimtutai asamtai, nunú tsawantin Jesús wajantá senchi jiiká chichaak:

—Makichik aentskesh kitabauk, minai tantati, nunik uwagti.

<sup>38</sup> Ni minai dekaskeapi tauk, Agagbau tawa nunisag, niina anentainig yumi pujutan sukagtina nunú pukuni jintuktinai, tiuwai.

<sup>39</sup> Nuna tiuwa nunak, niini dekaskeapi tuidau Wakanin jukiagtin aina nuna taku tiuwai; Nu tsawantaik Wakaní Pegkejig eke taachu, wagki Jesús jaka nantakí nayaimpinum waketchau asamtai.

*Aents aidau kanakagbau*

<sup>40</sup> Nunú tabaun ujumak aents antukaju chichainak:

—Dekas ju aentsua juka profetayai, tuidau.

<sup>41</sup> Tikich chichaidau:

—Juka Cristui, tiajui.

Ujumak chichaidau: ¿Cristo galileanmayag atinait?

<sup>42</sup> ¿Agagbauwa nuanui, Cristuk David weantu nuigtú belegnumia atinai David pujukaua nuiya tatsuaq? tuidau.

<sup>43</sup> Nuna Jesusan tukiag, aents aidau kanajajui.

<sup>44</sup> Nuniai ujumak dita aina nuiya Jesusan achiktag tuidau, tujash achikchajui.

*Judío apuji aidau Jesusai dekaskeapi tichamu*

<sup>45</sup> Nunikag jega Apajuí ememattain kuitamin aidau waketyag fariseo aidau, sacerdot apuji aidaujai batsatbaunum jegawajui. Nunikmatai iniinak:

—¿Wagka itachugme? tuidau.

<sup>46</sup> Tusá tuinam jégá kuitamin aidau aiinak:

—Makichik aentskesh nu aents chichama imatika chichauk tuke wainkashbauwai, tiajui.

<sup>47</sup> Tiagtai fariseo chichainak:

—¿Atumesh tsanuamak yujainajum?

<sup>48</sup> ¿Jutii apuji aidaukesh, nuniachkush fariseo aidaukesh niini dekaskeapi tuidaush wainjumek?

<sup>49</sup> Tujash au aents chicham umiktinun dekatsu duka, shiig pegkegchauwai, tuidau.

<sup>50</sup> Tiagtai dita aina nuiya Nicodemo, Jesusan ausatatus jegajauwa nu chichaak:

<sup>51</sup> —¿Jutii chicham umiktina nuish, makichik aents ni chichamujish antugtsuk nuigtú ni takaamujish dekagtsuk suwimak sumainai tawak? tiuwai.

<sup>52</sup> Tutai dita aiinak:

—¿Amesh galileanmayagkaitam? Agagbauwa nu ausam diistá nuniakum wainkatame, galileanmayag makichkish profetak tuke jiinkichui, tiajui.

<sup>53</sup> Tusag makí makichik ditá jeen shiyakajui.

## 8

### *Nuwa ekagmaku Jesús ejentunbau*

<sup>1</sup> Tujash Jesusak Olivosa mujajin weuwai,

<sup>2</sup> nunik kashinia dui, kashikmas, jega Apajuí ememattainum wakitki jegauwai. Nunikmatai kuashat aents tuwagkam ekeemas jintinkagtutan nagkamauwai.

<sup>3</sup> Nunia maestro chicham umiktinun jintinkagtin aidau, fariseo aidaujai, nuwa aentsjai takamun wainkag jukiag itawaju, dutika aents aidau ejapen awaasajui,

<sup>4</sup> dutikawag Jesusan iniinak:

—Maestroh, ju nuwa aentsjai takaniak pujau wainkaji.

<sup>5</sup> Moisés chicham umiktajum tujabauwa nuig, nuwa junin aidaunak ayatak kayai tukua tukuakua maatajum tawai, ¿tujash amesh wajinpa? tuidau.

<sup>6</sup> Nunak wajintig tusa dekapsatatus tiajui, nunik tsanumjugasag. Tujash Jesusak tsuntsumá uwejin nugkanum agau.

<sup>7</sup> Nunitaishkam ayatak inidau, imatjam Jesús pagkai chichaak:

—Atum ainajum anuiyash yaita machikish tudaun takachush, nunú dekatkauk kayai tukutí, tau.

<sup>8</sup> Tusa ataktú tsuntsumá nugkan agau.

<sup>9</sup> Nuna timatai ditá tudaujinash dekagmamaidau asag, muunchinum nagkamna makí makichik jii jiinkawag ashi shiyakagmatai, imá Jesusak nuwajaig juwakui.

<sup>10</sup> Nunik Jesús pagkai niimkamá aents atsuagtai nuwan iniak:

—Nuwah, ¿dusha wajukawagmae? ¿Makichkish tukugmachagmaka? tau.

<sup>11</sup> Tusa tama nuwa ayaak:

—Atsa Apuh, tiuwai.

Tutai Jesús chichaak:

—Wisha suwimkan jukiti tumaitsujame. Wetá, nuigtuk awenamek tudauk takasaipa, tiuwai.

### *Jesusai nugká tsaaptinjiya nu*

<sup>12</sup> Ataktushkam Jesús aents aidaun chichajak:

—Witjai nugká tsaaptinjinuk; mina nemagtau, suwe aidaunmag wekaesastinai, ayatak tsaaptin pujatan sukagtina nu ajiagtinai.

<sup>13</sup> Tutai fariseo aidau chichajak:

—Amek, aminuk pachisam etsegtumame, nuniau asam ame etsegtumam duka dekaskechui, tuidau.

<sup>14</sup> Tiagtai Jesús ayaak:

—Wi wiki midaun pachisan etsegtumaknush, wi tumamag duka dekaske, wagki wika dekajai tuwiyana tauwaitja nuigtush tuwí wetatja nunak; tujash atumek tuwiyana tauwaitja nuigtú tuwí wetatja dusha dekatsjume.

<sup>15</sup> Atumek aentsú anentaimtaijiya dutiksagmek etegkeagme; tujash wika makichik aentsnakesh etegkeatsjai;

<sup>16</sup> tujash wi etegkeaknuk, dekaskenum dutikmainaitjai, wagki wika wikichuitjai; wi, Apag awetiwa nujaiyaitjai.

<sup>17</sup> Atum chicham umiktin agagbauwa nuig, jimag aents etsegtuina nuuwai dekaskek tawai.

<sup>18</sup> Witjai midaun pachisan etsegtubaunuk, nuniai Apag awetiwa dushakam mina pachis etsegtujui.

<sup>19</sup> Nuna tutai:

—¿Amina Apash tuwí pujawa? tusag inidau.

Tama Jesús ayaak:

—Atumek minak dekagtsugme, nuniau asajum mina Apagshakam dekamaitisugme. Atum mina dekagkugmek mina Apagshakam dekamain ainagme, tiuwai.

<sup>20</sup> Juna tiuwa nunak Jesusak ofrenda aidau egketainum, jega Apajuí ememattainum jintinkagtak pujus tiuwai; tujash makichik aentskesh achikchajui, wagki horaji eke jegachu asamtai.

*Wi wegamunmag minimaitsugme tibau*

<sup>21</sup> Jesús ataktú chichaak:

—Wika wetatjai, nunikmatai egatkattagme, tujash atumek atumi tudaugminig jakatnaitjume. Wi wetatag nuig, atumek minimainchau ainagme.

<sup>22</sup> Tutai judío aidau chichainak:

—¿Nigki maamatan asampash, wi wegamunmag atumek minimainchau ainagme tujama? tuidau.

<sup>23</sup> Tiagtai Jesús ayaak:

—Atumek nugkaya ainagme, witjai yakianuk. Atumek ju nugka juiya ainagme, wika ju nugka juiyachuitjai.

<sup>24</sup> Nuadui timajime atumi tudaugminig jakatnaitjume timag nunak; wagki Witjai taig dekaskeapi tujutchakjume, atumi tudaugminig jakattagme, tau.

<sup>25</sup> Tutai:

—¿Amesh yaitpa? tusag inidau.

Tama Jesús ayaak:

—Nunak nagkamchakun timajime.

<sup>26</sup> Kuashat atum dutikajum nu pachisa tumainuk ajutui; tujash mina awetiuwa nu dekaskea nuna tawai. Nunin asamtai wika, ni tabau antukbauwa nuna aents aidaunak augjai, tiuwai.

<sup>27</sup> Tujash ditak dekachajui Apajin pachis tawa nunak.

<sup>28</sup> Nuadui Jesús ditan chichajak:

—Aentsmaga akiinawuwa nunú yakí takuijum dekattagme Wikitag nu, nuigtú wiki nagkamin takatsuk, Apag jintinjuamua dutiksanuk chichag dushakam.

<sup>29</sup> Mina awetiuwa duka wijai pujawai, Apajuk minakek idaitatsui, wagki wika ni wakega dutiksanuk tuke takau asamtai, tiuwai.

<sup>30</sup> Nuna Jesús timatai, kuashat aents aidau niini dekaskeapi tiajui.

*Dekaskea nu agkanmitkagmattawai*

<sup>31</sup> Jesús judío aidau niini dekaskeapi tiaju aidaun chichajak:

—Atum wi jintinjim nu dutiksagmek umiakjume, dekaskenum mina jintintaig atatjume;

<sup>32</sup> nuniakjum dekaskea nu dekattagme, tuja dekaskea nunú agkanmitkagmattagme, tiuwai.

<sup>33</sup> Tutai dita aiinak:

—Jutiik Abraham weantu ainaji, nunin asaja makichkish inaku waitkataig aakchahuwaitji. Nuniajinish, ¿wagka agkanmagattagme tukagtame?

<sup>34</sup> Tiagtai Jesús ayaak:

—Dekas tajime, ashí aents tudau takaa duka, tudau inaku waitkatai ainawai.

<sup>35</sup> Inaku waitkataiya duka inamnun jeenig tuke pujuchu ainawai; untsu inamnun uchijiya nuwai jeen tuke pujuwa duka niina uchijí asa.

<sup>36</sup> Nuadui, Uchijiya nu agkanmitkagmakuig, dekaskenum agkanmagattagme.

<sup>37</sup> Dekajai atumek Abraham weantu ainajum nunak, nuninaitkujum mantuatasajum wakegagme, wagki mina chichameg atumiin shiig juwachu asamtai.

<sup>38</sup> Wika Apagdauwa nu wainkamun chichaajai; atumshakam nunisjume, apanu antukbauwa duke takaagme, tau.

<sup>39</sup> Tutai dita aiinak:

—Jutii apajig Abrahamai, tuidau.

Tiagtai Jesús ayaak:

—Abrahama uchijí ainakjume, Abraham takajakua duke takamainaitjume.

<sup>40</sup> Wi mina Apag jintinjuamun dutiksanuk jintinmash minak ayatak mantuatasajum wakejutagme. Abrahamak makichkish annunak anentaimajakchahuwai.

<sup>41</sup> Atumek, atumi apá takatjiya nu takaagme, tau.

Tutai dita aiinak:

—Jutiik kasanum akiamuk ainatsji, iina Apajig imá makichki, Apajuiya duke, tuidau.

<sup>42</sup> Tiagtai Jesús ayaak:

—Atumi apa Apajuiyaitkuig, dekaskenum mina anenmain ainagme, wagki wika Apajuinunia taan jui pujajai. Wika wiki nagkamnuk taachmajai, minak Apajuí awetiuwai.

<sup>43</sup> ¿Wagka wi chichaamush dekamain dekapeatsjume? Duka mina chichameg antut dakituidau asajum nuniagme.

<sup>44</sup> Atumin apa duka Iwanchia nuuwai; nunin asamtai atumí apa wakega duke takastasajum wakegagme. Nagkamtinish Iwanchik magkagtin aajakui, nunin asa dekaskea nunak nigka tuchauwai, wagki niinig dekaskea duka atsau asamtai. Waita nunin asa chichakush waitnak tawai tuke nunin asa, wagki nigka waitai, nunin asa waita apajiyai.

<sup>45</sup> Tujash wika dekaskea nuna chichaig, dekaskeapi tujattsugme.

<sup>46</sup> Atum ainajum anuiyash ¿ya wi tudau takasbaugnash dekagtuinawa? ¿Wagka wi dekaskea nuna etsegkuish, dekaskeapi tujattsugme?

<sup>47</sup> Apajuinua duka, Apajuí chichamen antujuk umijin ainawai; tujash atumek Apajuinuchu ainajum nuadui, nu antutak dakitagme.

*Cristuk Abraham akiintsaij pujujukui*

<sup>48</sup> Tutai judío aidau chichajuinak:

—Íi timayag duka dekaske, amek samarianmaya aentsuitme, nunin asamin Iwanch pujugtamui timayag duka.

<sup>49</sup> Tama Jesús ayaak:

—Makichik iwanchkesh minak atsugtawai. Wi takaag nunak Apajun eme anentsan aikajai, nuniag atumek minak eme anenjusumek diigtsugme.

<sup>50</sup> Wika mina emematjitnume tusanuk egatsjai; tujash Apajuí emematjitnume tujutu asa, mina emematjumainnak iwainawai, nuuwai aentsú etegkea duka.

<sup>51</sup> Dekas tajime, mina chichamjua nuna umiauk, tuke jakachagtin ainawai, tiuwai.

<sup>52</sup> Tutai judío aidau aiinak:

—Yamai dekas dekaji Iwanch ajutjama duka; Abraham nuigtú ashí profeta aidaush jinai aina nuniag, “mina chichamjua nuna umiauk, tuke jakachagtinai”, tame.

<sup>53</sup> ¿Ame iina apají Abraham aajakua nuna nagkaesaukaitam? Abrahamak nuigtú profeta aajakajua dushakam jinawajui nuniash, ¿amesh ya anenmamkumea tame? tiajui.

<sup>54</sup> Tiagtai Jesús ayaak:

—Wiki eme anenmamkunuk, wi eme anenmamag duka wainkayai. Tujash mina eme anenjauk, mina Apajuí, atum iina Apajuíiyai tajum nunú.

<sup>55</sup> Tujash atumek wainchauwaitjume, wika wainjai; wainchaujai takunuk, atum waitaitjum nuninuk amainaitjai. Tujash wainu asan, ni chichamenash umigjai.

<sup>56</sup> Abraham atumi muunjum aajakua nu, wi jui taamtai waitkatatus shiig anejakui; nuniu mina waituk shiig aneasu, tiuwai.

<sup>57</sup> Tutai judío aidau:

—Cincuenta mijankesh ajutjamtsu nuniagkik, ¿Abrahaman wainkauwaitjai tame? tuidau.

<sup>58</sup> Tama Jesús ayaak:

—Dekas tajime, Abrahamash akiintsaij, tuke pujuwaitjai, tau.

<sup>59</sup> Tutai tukutasag kaya aidaun jukiajui, tujash Jesusak uumkauwai, nunik jega Apajuí ememattainmayag jiinkiuwai.

## 9

*Aents wainmachu akiinaun Jesús etsagagbau*

<sup>1</sup> Jesús nuiya jiinki wekamá, aents tuke wainmachu akiinaun wainkauwai.

<sup>2</sup> Nunikmatai jintintaiji aidau iniinak:

—Maestroh, ¿wagka jusha wainmachush akiinauwaita? ¿Apají nuniachkush dukují tudaujiniash ankauwait atsa niina tudaujinigkiash aanin akiinauwait? tuidau.

<sup>3</sup> Tiagtai Jesús ayaak:

—Juka niina tudaujin nuniachkush apají, dukují tudaujinkish ankachui; Ju junin akiinauwa juka, Apajuí ni senchijin iwainaktatus wakegau asamtai aanin akiinauwai.

<sup>4</sup> Eke tsawaiya juik, mina awetiu dutikata tujutbauwa nunak takastajai; kashi wajasmataig, makichkish takamainchau agtatui.

<sup>5</sup> Nugkaa pujag juikik, nugká tsauptinjiyaitjai, tiuwai.

<sup>6</sup> Nuna tusa, Jesús nugkaa usukmá, niina sawinjin nugkan bikamkatu ema juki, wainmachu jin anutukui.

<sup>7</sup> Dutika chichajak:

—Yumi ipiagbau Silóé tutaya awi weme nijamita, tiuwai. (“Silóé” tawa nunak, “Awemamu” taku tawai.)

Tima wainmachushkam wee nijamajui, nunik wainmak wakitkiuwai.

<sup>8</sup> Nunikmatai wainmachujai ijutkau batsamin aidau nuigtú yaunchuk segamá ekeem-nun wainin aidau chichainak:

—¿Juchaukaih ekeemas segamá ekeemnuwe nunú? tuidau.

<sup>9</sup> Tiagtai ujumak chichainak:

—Ehé, niyai, tuinai; tikich chichainak: —Atsa, auchui, nujai betekmamtinai, tiajui.

Tiagtai ni chichaak:

—Witjai, tau.

<sup>10</sup> Tutai:

—¿Tujash wajukamea wainmakume? tusag inidau.

<sup>11</sup> Tiagtai ni ayaak:

—Makichik aents Jesús daagtina nu, nugkan bikamkatu ema jiiujui anutujuk, weme “yumi ipiagbau Siloé tutaya nuwi nijamita”, timatai wenu, nijamin wainmakmajai, tau.

<sup>12</sup> Tutai:

—¿Dusha tuwí pujawa?

Tama:

—Achah, tiuwai.

*Fariseo aidau wainmachu tsagajun iniasagbau*

<sup>13</sup> Nunú wainmachu aajakua nuna jukiag fariseo batsatbaunum ejegawajui.

<sup>14</sup> Jesús nugkan bikamkatu ema wainmachun wainmitkakua nunak tsawan ayamtai aig dutikau asamtai,

<sup>15</sup> fariseo aidau awentsag iniasajui: ¿Wajukamea wainmakume? tusag, tama ni chichaak: —Nugkan bikamkatu ema jiiujui adutugkamtai nijamin, yamaik wainmajai, tau.

<sup>16</sup> Tutai ujumak fariseo aidau chichainak:

—Nuna dutijama duka Apajuí awemamuk amaitsui, wagki tsawan ayamtaiya nunak ajantus diyatsui, tuidau.

Tiagtai tikich aidau chichainak:

—¿Utugsaya aents tudaugtinush aents dutikmainchaunash iwainamainata?

Tusag ditak kanajajui.

<sup>17</sup> Nunikag awaksag wainmachu aajakua nuna iniinak:

—Amesh, amina etsaentamja dusha ¿yayai tame?

Tama: —Duka profetayai, tiuwai.

<sup>18</sup> Tujash judío aidauk wainmachu aajakua nuuwap yamai wainmawa tusag dekaskeapi tumainchau dekapedau, nuninak apajin dukujijai utsukajui,

<sup>19</sup> dutika iniinak: —¿Jukaih atumi uchijum wainmachu akiinawwai tuina nunú? ¿Utugsaya yamaish wainmawa? tuidau.

<sup>20</sup> Tiagtai nuna apají dukujijai chichainak:

—Ju iina uchiji wainmachu akiinawwa duka dekaji,

<sup>21</sup> tujash dekatsji wajuk wainmake duka, nuigtushkam yaki wainmitkakmae dusha dekatsji. Nigka muuntai, nigki iniastajum, ni tujamtatui, tiuwai.

<sup>22</sup> Nuna, apají dukujijai tiajua nunak, judío aidau, makichikesh Jesusak Cristui takuig, iina ijuntaijinig jiikmi tusag chichaman umikaju asagmatai ishamainak tiajui.

<sup>23</sup> Nuniau asamtai wainmachu apajig dukujijai:

—Nigki iniastajum, nigka muuntai, tiajui.

<sup>24</sup> Nuna timatai judío aidau wainmachu aajakun ataktú utsuká itan chichajak:

—Apajuí eemtin dekaskenum tukagtita. Jutiik dekainaji nu aentsua duka tudaugtinai.

<sup>25</sup> Tiagtai ni ayaak:

—Tudaugtinashit, dekatsjai. Makichik wajiji nunak dekajai, wainmachu aajakuitkun, yamai wainmag juna, tiuwai.

<sup>26</sup> Tutai ataktú iniinak:

—¿Utugtamkame? ¿Utugkaya niimtijamne? tuidau.

<sup>27</sup> Tusá iniam: Timajimjamah, tujash antugtatsjume, ¿Wagka awagki titi tusagmesh wkegagme? ¿Atumesh ni nemagkatasajum wkegau asagmek tajum? tiuwai.

<sup>28</sup> Tutai pegkegchau chichajuinak:

—Ameakitme nu aentsú jintintaimék, tujash jutiik Moisesa jintintai ainaji.

<sup>29</sup> Apajuí Moisesan aujukaua duka dekainaji; tujash au aentsuk tuwiyagkita dusha dekantsui, tiaju.

<sup>30</sup> Tama ni chichaak: —Nuwajamah kamé anentai jegagmainchau, mina wainmitkajui, atum dekatsji tuwiyaskai tajum nu.

<sup>31</sup> Dekainaji Apajuik tudaugtin aidaunak antugtsu nu, tujash Apajuin puyatjus umijuinak, ni wkegamujin takaa nuna antujui.

<sup>32</sup> Nagkamtinish antukchamui makichik aentskesh, aents wainmachu akiinaun wainmitkakui tabauk.

<sup>33</sup> Au, Apajuí awemam taachuitkug, makichkish aikmaitsui, tau.

<sup>34</sup> Tutai dita aiaak:

—Ame akiinkumesh ayatak tudauk akiinauwaitkumek, ¿jutii jintinkagtam? tusag jega ijuntainmayan jiiikajui.

<sup>35</sup> Jesús antuku jiiikiaje tabaun, nuniau asa wekamá wainak chichajak: —¿Amesh Aentsmaga akiinauwa dusha dekaskeapi tamek? tiuwai.

<sup>36</sup> Tama ni ayaak:

—Apuh dusha yaita, wisha niini dekaskeapi titajai, tau.

<sup>37</sup> Tutai Jesús ayaak:

—Amek duka wainme, wi amijai chichag juuwaitjai, tau.

<sup>38</sup> Tutai ni ayaak:

—Apuh, dekaskeapi tajai. Tusa tikishmag emematiuwai.

<sup>39</sup> Tutai Jesús ayaak:

—Wika ju nugka juig tauwaitjai aents aidau etejatasan, wainmachu aidau wainmaktinme, nunitai wainbau aina nu wainmachu waigtinme tusan.

<sup>40</sup> Tutai ujumak fariseo aidau ditajai ijunu, nuna antukag, iniinak:

—¿Jutiish wainmachuk ainag? tuidau.

<sup>41</sup> Tiagtai Jesús ayaak:

—Atum wainmachu ainakjumek atumin tudaugminish bakumamainuk atsugta-mainai; tujash atum wainbau ainaji tajum dui, tudaugmik ajutjamainawai, tiuwai.

## 10

### *Pastor uwigjijai pachisa augmatbau*

<sup>1</sup> Nunik Jesús chichaak: “Dekas tajime, uwig pegmatjamu waitijiya nuwi waitsuk yajá waya duka, kasa nuniawai,

<sup>2</sup> tujash waitinum wayá duka, pastor uwijá kuitamna nu nuniawai.

<sup>3</sup> Nuna waiti kuitamnuk ujutui, nunikmatai uwig aidaushkam nuna chichamen antuinawai; nuniau asamtai makí makichik daajin adaitus untsuawai, dutika jiyawai.

<sup>4</sup> Dutika ashí jiijá, ni eemtuk weawai, nunitai uwigshakam saetuinawai wagki niina chichamen antuju asa.

<sup>5</sup> Uwijak ni wainchataijinak saetuchu ainawai, ayatak pisag shiminai, wagki chichamen takanchbau antuju asa”, tiuwai.

<sup>6</sup> Jesús ju augmatbau apatuk tiuwa nunak, ditak dekachajui wajintu takua tawa nunak.

### *Jesusai pastor pegkejak*

<sup>7</sup> Jesús ataktú chichaak: “Dekas tajime: Witjai uwig aidau waitijinuk.

<sup>8</sup> Ashí yaunchuk wi taatsaig kaunawaju aina duka kasa aidau, uwijá yajumin aajakajui; tujash uwig aidauk antugkachajui.

<sup>9</sup> Witjai waitinuk, aents minai waidauk uwemjagtin ainawai; nunik uwig wenuken utsanawag jiiinag pasto yuwama numamtuk wajagtaiui.

<sup>10</sup> “Kasak, kasamak kajeg ijina emegkaktatus minawai, tujash wika pujutan jukiag shiig atumkas batsamsatnume tusan tauwaitjai.

<sup>11</sup> Witjai dekas pastor pegkegnuk; pastor pegkejak ni pujutinak uwigji aidaunum tsagakmanmainai;

<sup>12</sup> untsu akitaia duka, pastorchauwai, wagki uwig aina duka niinuchu asamtai, nunin asa ikamyawa minittai wainkug, uwignak ukuak tupikainai; nunikmatai ikamyawashkam uwig aidaunak uwakek ipisiawai. <sup>13</sup> Nunú aentsua duka tupikawai wagki akítai asa, nunin asa uwig aidaunak puyatjatsui.

<sup>14</sup> “Witjai pastor pegkegnuk; nunin asan uwig midau aidaunak wainjai, nunisag minash waituinawai.

<sup>15</sup> Apag mina waita antsanuk, wishakam Apagnak wainjai, nuniau asan mina pujutjunak uwig aidaunum tsagakmankattajai

<sup>16</sup> Nuigtush tikich uwig aidaush ajutuinawai ju pegjamua juiyachu; nunú aidaunashkam yajuakan ikaunmattajai, dutika ai makichkinmag ijunag batsamas mina chichamjun antugtiagtatui, nuigtú pastorchakam makichik atatui.

<sup>17</sup> “Nuadui Apajuk anentui, wagki mina uwigjun ayamjakun mantamnan ataktú nantaktin asamtai.



<sup>18</sup> Makichkish minak mantumain ainatsui, wika wiki tsagkamankattajai; minak senchig ajutui jakanush ataktú nantamainaitag dushakam. Nunak mina Apag aatus tujutiuwai”.

<sup>19</sup> Jesús nu tabaun antukag, judío aidauk ditak tudaiyag, ataktú kanakajui.

<sup>20</sup> Kuashat dita aina nuiya chichainak:

—¿Wagka antugjume, Iwanch egkemtuamu asa imaanag tuu wekaga aniaush? tuidau.

<sup>21</sup> Tujash tikich chichaidau:

—Makichkish Iwanch egkemtuamuk aajag chichamaitsujama, ¿iwanchish wainmachunash wainmitkamainkaih? tuidau.

### *Judío aidau Jesusan dakitjagbau*

<sup>22</sup> Tsetsek tepeau ai, Jerusalén fiestamaidau jega Apajui ememattai jegamkamua nunú tsawan jegau asamtai.

<sup>23</sup> Tuja Jesusak jega Apajui ememattainum Salomón waiti aagjamunmanini wekagu.

<sup>24</sup> Nuniaun judío aidau tenteawag, iniinak:

—¿Wajutiya shiig dekamainush tukagtittame? Ame dekas Cristuitkumek shiig ujabatkacia, tuidau.

<sup>25</sup> Tiagtai Jesús ayaak:

—Wika atumnak timajime, tujash dekaskeapi tujuttsugme. Mina Apag dutikata tibaun takaakun paan atumnash iwaintajim nuuwai mina etsegtuja duka;

<sup>26</sup> tujash atumek dekaskeapi tujuttsugme, wagki mina uwigjuchu asajum.

<sup>27</sup> Mina uwig aidauk mina chichamjun antugtuinawai, wishakam ditanak wainjai, nunú aidau minak saetujuinawai.

<sup>28</sup> Wi ditanak pujut tuke atina nunak suwajai, dutikamu asag tuke waittsashtin ainawai. Mina uwejuianak makichkish atanjumainchau ainawai.

<sup>29</sup> Mina Apag ashí nagkaekagtasua nu minak sujusui. Nunin asamtai Apajui uwejinianak makichkish atanmainchau ainawai.

<sup>30</sup> Wika mina Apagjaig makichkitji, tiuwai.

<sup>31</sup> Tutai judío aidau ataktushkam kayá jukiag tukutá tuidau.

<sup>32</sup> Dutikam Jesús chichaak:

—Wi mina Apagdaun kuashat pegkejan takasan iwaintukmajim duish, ¿tu dutikamunma kayaish tukugta tajume? tau.

<sup>33</sup> Tama judío aidau aiinak:

—Pegkeg takasbaunum tukumí tatsujame, amek aentsuitkum Apajui pegkegchau chichagkum, Apajuiya iman anenmamam dui kayai tukumí taji.

<sup>34</sup> Tiagtai Jesús chichaak:

—Atum chicham umiktina nuwi agagbaunum: ¿Wi, atumek Apajui ainagme tijai tatsuak?

<sup>35</sup> Agagbaunum tawa duka dekainaji, nuninchauwai tumaitsui; Apajuik ni chichamen aents aidaun awetiua nuig apajui ainagme tiuwai.

<sup>36</sup> Apajui mina etegtua ju nugka jui awetimtai tau asan: —Wika Apajui Uchijiyaitjai takuish, wajak anentaimsagmea Apajui pegkegchau chichajui tujutjume

<sup>37</sup> Wi mina Apag wakega dutiksanuk takaachkuig, dekaskeapi tujutigpa.

<sup>38</sup> Mina dekaskeapi tujutthakjumes, wi takaag nu diisjum dekaskeapi titajum, nuniakjum minai Apag ai, wi Apajui aja dushakam dekaatajum.

<sup>39</sup> Tutai ataktú achikag jukiagta tuidau, imatikainam Jesusak jiinki weuwai.

<sup>40</sup> Nunik Jesús wakitki Jordagka amain weuwai, yaunchuk Juan yamijatujakbauwa nui, jega pujusui.

<sup>41</sup> Kuashat aents jegajuawag:

—Juagak dekaskenmag aents dutikmainchaunak iwainakag takaschauwai; tujash Juan ju aentsun pachis ashí tiuwa duka dekaske, tuidau.

<sup>42</sup> Nuninak kuashat aents nui batsatuk Jesusnak dekaskeapi tiaju.

## 11

### *Lázaro jakamu*

<sup>1</sup> Betanianmaya Lázaro daagtin jaak pujau; María, Marta aina nuna umayí.

<sup>2</sup> Duka Mariak, Lázaro umayí Apu Jesusa nawen kugkuinui ukatuk niina intashinig ujgjutjua nunú aajakui.

<sup>3</sup> Nunú, ni kajai Jesusan chichaman akupjuinak:

—Apuh, amina kumpajum aneetaigmia duka jaawai, tiajui.

<sup>4</sup> Jesús nuna antuk, chichaak:

—Au jata duka jachataiyai, ayatak Apajuin eme anentuinak, nuigtú Apajuí Uchijiya nunú dutikamunum eme anentiagtata nuna iwainaktatus aniawai, tiuwai.

<sup>5</sup> Jesusak Martan niina kajai, nuigtú Lazaronashkam aneejakui.

<sup>6</sup> Lázaro jaawai tabaun antukuitak, wetsuk, ni pujamunmag jimag tsawan pujusui,

<sup>7</sup> nunik ni jintintaiji aidaun chichajak:

—Judea wakitkimi, tiuwai.

<sup>8</sup> Tama dita aiinak:

—Maestroh, dukap atsujama judío aidau kayai tukugmagta tiagma nunú, nuniaigkik, ¿ataktú awi wakitkitasamesh wakegam? tuidau.

<sup>9</sup> Tiagtai Jesús ayaak:

—¿Makichik tsawantan doce hora ajatsuak? aents tsawai wekaegas wegauk tukumtsame tsaptinnum shiig wainak wegau asa;

<sup>10</sup> untsu kashi wekaga duka tukumui, tsaptinnum wainak wegachu asa.

<sup>11</sup> Nuna tii, nuigtú:

—Iina kumpají Lazarok kanawai, tujash wi wejin ishintagtajai, tiuwai.

<sup>12</sup> Tutai jintintaiji aidau chichajuinak: —Apuh, kanag tepauku, nantaktatajamah, tuidau.

<sup>13</sup> Tujash Jesusak Lázaro jakau asamtai tau, nuniaig ditak kanag tepaunas tawatai tuidau.

<sup>14</sup> Tiagtai Jesús paan iwainak: —Lazarok jakae,

<sup>15</sup> tujash awi pujuschag dui shiig anejai; wagki atum dekaskeapi tiagtin asagmin. Tujash wee diisagni, tau.

<sup>16</sup> Tutai Tomás, Jimagmamu tutaiya nu, tikich Jesusa jintintai aina nuna chichajak:

—Jutiishkam wegagmi, mainakush jutijai mantamatnume, tiuwai.

*Jesuai jakaunash inantin pujtnash sukagtin*

<sup>17</sup> Jesús jegakmá, Lázaro ukusam cuatro tsawan wegaun wainkauwai.

<sup>18</sup> Betaniak Jerusalén jegattak kampatum kilómetro tumain au.

<sup>19</sup> Kuashat judío aidau Martan Mariajai jegajuawaju, umayí jakau asamtai anentain ichichtugasag.

<sup>20</sup> Nuninai Jesús taattak minawai tabaun Marta antuk, igkugtatus juintukiuwai, nunitai Mariak jegag juwakui.

<sup>21</sup> Nunik Marta Jesusan chichajak:

—Apuh, ame jui pujutaik mina ubajuk jamain wajakchae,

<sup>22</sup> tujash wika yamaikish ame Apajuí segamunak imatiksagkeap amastatua tajai, tiuwai.

<sup>23</sup> Tutai Jesús ayaak: —Amina umaimek aneantatui, tau.

<sup>24</sup> Tama Marta chichaak:

—Dekaske, tsawan nagkanbau atina dui jakau aidau nantakiagtina nunak dekajai, tiu.

<sup>25</sup> Tutai Jesús chichajak:

—Witjai jakaunash inannunuk, wikitjai pujtnash sukagtinnum. Minai dekaskeapi tauk, jakau akush tuke pujutnai;

<sup>26</sup> ashí aents iwaaku pujuina nu mina dekaskeapi tujutuk, tuke jakashtin ainawai, ¿dusha dekaskeapi tamek? tiuwai.

<sup>27</sup> Tama ni ayaak:

—Ehé Apuh, wika aminak dekaskeapita Cristo Apajuí Uchijí, ju nugka jui taatnai tibuwa nuuwapi tajame.

*Lázaro ukusbaunum Jesús buutbau*

<sup>28</sup> Nuna tusa ukuak, Martak kai Marian jegantun, niinak akanki:

—Maestro jui taa untsugmawai, tau.

<sup>29</sup> Nu tama antamuik, Mariashkam wajaakug Jesusan wainkatatus wejiuwai.

<sup>30</sup> Jesusak yaaktanmag eke waitsuk, Marta igkugbaunmag pujau.

<sup>31</sup> María waujus jiinki wetai, judío aidau María jeen anentai ichichtuinak kauná batsatushkam: —Umayí ukusbaunum jegantá buuttasas wegatai, tusag pataetukajui.

<sup>32</sup> Nunik Mariak Jesús pujamunum jegantá tikishmatug pujus:

—Apuh, ame jui pujutaik, mina ubajuk jakachampastaih, tau.

<sup>33</sup> Tusa María buuttai, judío Marian pataetuk kaunkaushkam buutiagtatman Jesús wainak, shiig senchi wake besemag dekapjauwai.

<sup>34</sup> Nunik iniak: —¿Tuwí ukusmaugme? tau.

Tutai aiinak: —Apuh jui ukusmaji, tantá diistá, tuidau.

<sup>35</sup> Tama jegan diikmá wainak Jesús buutiu.

<sup>36</sup> Nunitai judío aidau:

—¿Diisjuah, yaitnaku aneejakaujaj! tuidau.

<sup>37</sup> Tiagtai dita aina nuiya chichainak:

—¿Jujú wainmachunash wainmitkauwe ibaush, Lázaro jataish utugkatnuki, ni pujutaish jakatnasha? tuidau.

*Jesús Lázaro inankimu*

<sup>38</sup> Jesús ataktú shiig senchi wake besemag dekapeg, ukusbaunum jegantú. Duka makichik waa, waitaiji kaya aputuamu aajakui.

<sup>39</sup> Nunik Jesús chichaak: —Kayak ekektajum, tiuwai.

Tutai Marta, jakauwa nuna umayí chichaak:

—Apuh, mejeawastaih, wagki jaka cuatro tsawan wega dui, tau.

<sup>40</sup> Tutai Jesús ayaak:

—¿Ame dekaskeapi takumek, Apajuí senchijí iwainamu wainkattame tichamkajam? tiuwai.

<sup>41</sup> Tama kayan ekekaju, dutikamtai Jesús nayaimpin pagkai diyak:

—Apawah see tajame, wagki antugtukum dui.

<sup>42</sup> Wika dekajai, amek minak tuke antugtam nunak; tujash ju aents ijunaina nu shiig wainkag, ame awetiwaitam nuna dekaskeapi tujuttinme tabaunum tajame, tau.

<sup>43</sup> Nuna tii, senchi untsuká:

—¡Lázaro, nantakim agaa jiinkita! tiuwai.

<sup>44</sup> Tama jakauwa dushakam, uwejinish nawenish pempeagbau nuigtú jaanchi yapijai pempeagbauk imanisag jiinkiuwai. Nunikmatai Jesús chichaak:

—Atiajum idaisatajum, wetí, tiuwai.

*Jesús maami tusa chicham umigkamu*

(Mt. 26.1-5; Mr. 14.1-2; Lc. 22.1-6)

<sup>45</sup> Kuashat judío aidau Marian uyunainak kaunawajuk, Jesús dutikamun wainkag: Dekas juka Apajuí Uchijimpapita, tiajuí.

<sup>46</sup> Tujash ujumak dita aina nuiya fariseo aidaun wejiag, Jesús dutikamun ujakajui.

<sup>47</sup> Dutikam fariseo aidau, sacerdote apuji aidaujai apu chichaman inagnau aidaun ipawag ijunjag: —¿Utugkattaji, au aents aentsush dutikmainchaun iwainag kuashat takaa aush?

<sup>48</sup> Aikasaik idaijinig, ashí niinig dekaskeapi tiagtatui; nuniamunum romanmaya kaunawag iinu juga Apajuí ememattaiya nuna tsainak, ashí jutijai amupaktatajama, tuidau.

<sup>49</sup> Tiagtai dita aina nuiya, Caifás daagtin, nunú mijantin sumo sacerdote wajas pujau asa, chichaak:

—Atumek makichkish dekatsjume,

<sup>50</sup> anentaimsgamesh diyatsjume, ashí aents jinumaina nuna makichik aents mantamnamaina duka, tiuwai.

<sup>51</sup> Nunak Caifasak nigki nagkamig tichauwai, nunú mijantin sumo sacerdote wajas pujau asa, Jesús judío aidaunum mantamnatnun etsegkauwai;

<sup>52</sup> tujash imá judío aidaunmagkek mantamnatsuk, ashí Apajuí uchijí pampag batsataina nu ijunja makichik emata tabaunum nuniktinun tiuwai.

<sup>53</sup> Nunikag, nunú tsawanta duik, mantamnati tusag chichaman umigkajui.

<sup>54</sup> Nuadui Jesusan judío aidaunmag wantinkag wekaechau, nuniau asa Judeanak ukuak, makichik yaakat yaijuch Efraín tutai uwejush tikiju anem aunum weuwai. Nunik nui jegaa niina jintintaiji aidaujai pujusui.

<sup>55</sup> Judío aidau fiestamtaiji Pascua tikiju wajasú asamtai, kuashat aents yaaktanmaya aidau Jerusalén weedau, eke Pascua jegatsaig pegkeniagtatus.

<sup>56</sup> Nunik Jesusan egaidau asag, juga Apajuí ememattainum wayawag pempeentunisag iniininak:

—¿Wajuk Jesusash anentaimtagme? ¿Fiestanmash taatpash? tuidau.

<sup>57</sup> Sacerdote apuji aidau, fariseo aidaujai: —Makichkitigmekesh Jesús pujamuji dekagkugmek etsegkatajum achikmí, tiajuí.

## 12

*Betanianmaya nuwa Jesusa naween kugkuinui ukatkamu*

(Mt. 26.6-13; Mr. 14.3-9)

<sup>1</sup> Seis tsawan asa Pascua jegatin ai, Jesusak Betania weuwai, Lázaro jakamtai ni inankiuwa nuna pujutaijin.

<sup>2</sup> Nui jeganmtai Jesusan eme anentsag agkú yuatnun umigkajui; dutikawagmatai Marta yutain pekai. Lázaro Jesusjai mesanum eketaidau.

<sup>3</sup> Nuninai María kugkuin senchi akik, ayatak nardo najanamun, jimaituk litro juki tajuntun, Jesusa nawen ukatuk, niina intashinig ujugtujui. Dutikam kugkuntig jegan akijuuawai.

<sup>4</sup> Imanikmatai Judas Iscariote, niina jintintaiji aina nuiya, makichik niina sujuktina nu chichaak:

<sup>5</sup> —¿Wagka jujú kugkuinush trescientos denario sujunkache, dutika ujunauch aidau yaimaina nu? tau.

<sup>6</sup> Tujash nunak, ujunauch aidaun puyatjak tichauwai, nigka kasa asa nuigtú kuichik egketainash nigki takaku asa, nui egkeamunash juujakú asa dutikatatus tiuwai.

<sup>7</sup> Tutai Jesús ayaak:

—Idaisata, junak mina ukugsagmatai jutijuuwagtinun ukusá pujugbaun jutijawai.

<sup>8</sup> Ujunauch aidauk atumjaig tuke batsabiagatui, untsu wika atumjaig tuke pujushtat-jai, tiuwai.

*Lázaro maami tusa chicham umigkamu*

<sup>9</sup> Kuashat judío aidau Jesús Betania pujawai tuinamun dekawag weajui, niina wainainak Lazaronashkam jakau aig Jesús inankiu asamtai, wainkata tuidau asag.

<sup>10</sup> Nudiagtai sacerdote apuji aidaushkam, Lázaro maami tusag chichaman umigkajui,

<sup>11</sup> wagki ní nantakbaujin wainainak, kuashat judío aidau Jesusan dekaskeapi tusag nemajuinak ditajai kanaidau asagmatai.

*Jesús Jerusalén wayamu*

*(Mt. 21.1-11; Mr. 11.1-11; Lc. 19.28-40)*

<sup>12</sup> Kashinia dui kuashat aents fiestanum kaunau aidau, Jesús Jerusalén taatatus minawai tabaun dekawaju,

<sup>13</sup> nunikag duká tsupijag jijnjag igkuinak, senchi untsumkag:

—¡Emematiagmi! ¡Apu Apajuí awemam Israela Reyji miná duka pegkegmai! wajaidau.

<sup>14</sup> Jesús burron wainkau, nunik nuwi ekeemiu, Agagbaunum tawa nunisag, duka:

<sup>15</sup> “Siognumia aents aidautigmek ishamkaigpa; diistá atumi Reyjum burronum entsatkau mina nunú”, tawai.

<sup>16</sup> Nagkamchakug jintintaiji aina duka wagka aniawa nunak dekachajui; tujash Jesús nayaimpinum wakitkintai adeajajui, ashí niina utugkaje, nu pachisa agagbauwa nunak.

<sup>17</sup> Aents aidau Jesús Lázaro ukusbaun untsuká inanbaun wainkaju aina nu, dutikame tusag etsejuidau.

<sup>18</sup> Nunikmatai, aents aidau Jesusan igkugtatus jiintujaju, wagki aents dutikmainchaun dutikamu tabaun dekawaju asag.

<sup>19</sup> Nuniagtai fariseo aidau ditak tudaiyinak: —¡Dijsjuah, ashí aents igkugtatus ashintuinana! Ii chicham umikmag duka makichkish dutikashtatagjama, tiajui.

*Griego aidau Jesusan wainkatatus kaunkamu*

<sup>20</sup> Fiestanum Apajuin ememattatus kaunkau aina nuiya, ujumak griego aents aidau,

<sup>21</sup> Felipe yaakat betsaidanmaya Galilea nugkanum pujuuwa nuna jegaantag:

—Apuh, Jesús wainkatasa wakegaji, tiajui.

<sup>22</sup> Tama Felipe Andresan jegajua ujakú, nunik niijai Jesusan ujakajui.

<sup>23</sup> Tusá ujaam Jesús chichaak:

—Aentsmaga akinauwa nu nayaimpinum wakitkitta duka yamaik horak uminkae.

<sup>24</sup> Dekas tajime, Ajakan jigkayí nugkaa ajachmak nunisag nigki awai, untsu nugkaa inital ajaam jaka tsapai nejeakug, kuashat nejeawai.

<sup>25</sup> Aents ju nugka juiyan wakegas takaa pujauk, uwemjashtinai; untsu ju nugkanmaya aina nunak uyumatsuk mina umigtuina duka pujut tuke atina nuna jukitin ainawai.

<sup>26</sup> Aents mina umigtuktatus wakegawk nemagtuktinme, mina umigtin aidauk wijai pujusagtinai, tuja mina umigtin aina nunak mina Apagshakam eme anentinaí.

*Jesús ni mantamnatnuji etsegkamu*

<sup>27</sup> Yamaiya juik shiig senchi anentaimku waitiamu ajutui, ¿wajintajaki? ¿Apawah, mina mantuawagtata nunak idaitustinme titajash? Tujash juna juniktasan tauwaitjai.

<sup>28</sup> Apawah, aminak emematjabiagtinme, tiuwai. Nuna tai nayaimpinmaya chicham: Duwik emematjitnime tusanuk dutikabiajai, tujash awentsanuk iwainaktatjai tabau antuekauwai.

<sup>29</sup> Nu tabaun aents nui ijunu antukaju, nunikag, ipamtai tuidau; nuniai tikich aidau:

—Ángel chichaké, tuidau.

<sup>30</sup> Tiagtai Jesús chichaak:

—Juna chichá nunak mina antumtijuktasag tatsui, atumin antumtijamkagtatus tawai.

<sup>31</sup> Yamaiya juuwai ju nugkanmaya suwimak suwamu atata duka, tuja yamaiya juiki Iwanch ju nugka jui inama nunú depetkamu atata dushakam.

<sup>32</sup> Mina numinum achijag yakí takujiagmatai, jakan nantaakun, ashí aentsnak minai minaiig ikaunmantatjai, tiuwai.

<sup>33</sup> Nunak ni wajak maam atinaita nuna aentsun dekamtikak tiuwai.

<sup>34</sup> Tutai aents aidau aiinak: —Chicham umiktina nui, Cristuk tuke pujutnai tibauwa nu antukuitji; nuniaish, ¿wajak asamea Aentsmaga akiinauwa duka maatasá yakí takuam atatuí tame? ¿Nu Aentsmaga akiinaush yaita?

<sup>35</sup> Tiagtai Jesús ayaak: —Yamaikik tsaptinuk atumjai ijunag pujawai, tujash dukap tsawan pujutamchattawai, wajumchik tsawan atumjai pujuttawai, nuniau asamtai atumjai tsaptin awa duik, tsaptinum yujastajum. Pachiachbau suwe minak uwaktamkainum, wagki suwenum wekaga duka dekatsui ni wegamujinak shiig wainmak wegachu asa.

<sup>36</sup> Tsaptin atumin awa duik, tsaptina nu dekaskeapi titajum, nunikjum tsaptinu uchiji aminjum.

Juna Jesús tusa ukuak weuwai, nunik ditanak uumjukui.

*Judío aidau dekaskeapi tichamu*

<sup>37</sup> Tujash aents dutikmainchaun kuashat ditá eemtin iwainataish Jesusnak dekaskeapi tuinachu;

<sup>38</sup> nu nuniamunum profeta Isaías agagbauwa nui:

“Apuh, ¿ya ii etsegbaunash dekaskeapi tuinawa?

¿Apush yana niina senchijinash iwaintawa?” tawa nu uminkauwai.

<sup>39</sup> Nuadui dekaskeapi tumain dekapenachu, junashkam Isaías agak:

<sup>40</sup> Apajui ditanak wainmachu, anentaimitanash anentainkachu emakajui; dutikamu asag jinchakam wainmachua nunin ainawai, chicham etsegbaun antuinakush antachua nunin ainawai, nunin ainachkug chichamjun antukag pujutjin yapajinakuig wi ditanak uwemtikmainaitjai, tiuwai.

<sup>41</sup> Isaías juna tiuwa nunak, Jesusa imanjin wainkau asa, niina pachis tiuwai.

<sup>42</sup> Tujashkam kuashat aents aidau, nuigtú apu aidaushkam Jesusnak dekaskeapi tiajui. Nuninakush fariseon ishamainak iwainmamainachu, ditá ijuntaijin tuke jiyaku jiyam aig tuidau asag.

<sup>43</sup> Nunak aents eme anentam ata wakegaidau asa, Apajui dekas eme anentam amaina nunak imanchau anentuinak nunikajui.

*Jesús aentsun uwemtijatasan tauwaitjai tibaw*

<sup>44</sup> Jesús senchi jiiaká chichaak: “Mina dekaskeapi tujutuk imá minakek dekaskeapi tujutsui, mina awetiuwa nunash dekaskeapi tawai;

<sup>45</sup> tuja mina waita dushakam, mina awetiuwa nunash wainui.

<sup>46</sup> Wika tsaptin ju nugka juig taamjai, minai dekaskeapi tuidau suwenum pujusainum tusan.

<sup>47</sup> Makichikesh mina chichamjun antayatak umiatsu nunak wika bakushtatjai; wagki wika aents aidau bakutasanuk taachuitjai, aentsun uwemtijatasan tauwaitjai.

<sup>48</sup> Mina dakitjak, chichamjunash antugtatsu nuna bakutnuk awai, chichaman wi timajim nunuwai tsawan nagkanbaunum bakujattinuk.

<sup>49</sup> Wika wiki nagkamnuk chichatsjai, Apag mina awetiuwa nu nigki wi tumainaitag nunak nuigtú jintimainaitag nunash umiktá tujutiwai.

<sup>50</sup> Nuadui wika shiig dekajai, Apag umiktá tibauwa duka pujut tuke atina nuna; nunin asamtai wi atumin tajim nunak Apag tujutbauwa dutiksanuk tajime”, tiuwai.

## 13

*Jesús jintintaiji aidau nawe nijatkamu*

<sup>1</sup> Pascua fiestantai eke jegatsaig, Jesús ni Apajin weaku ju nugka ukuktinji hora jegaun dekau asa, ni jintintaiji aidau ju nugka jui pujus aneejakbaujinak, imatiksg inagnamunmash aneamujin iwaintukui.

<sup>2</sup> Nunik agkú yuamunum Judas Iscariote Simogkan uchijiya nuna, Jesús sujutnum Iwanch anentaimitajuwai.

<sup>3</sup> Jesusak Apají ashí wají niini idaitusbauwa nuna, nuigtú Apajuijai pujau tauwa nunash, nuigtushkam Apajuiyai waketa nunashkam dekau asa;

<sup>4</sup> agkú yuamunum wajakí jaanch awantak nugkuagbaujin awimak toalla juki itipjuauwai.

<sup>5</sup> Nunik bandejanum yumin yajaa, niina jintintaiji aidau nawe nijattan nagkamau, dutika toalla itipjuamujiya nujai ujugtuk emau;

<sup>6</sup> dutikau asa Simón Pedronashkam jegantau, dutikam ni chichaak: —¿Apuh, ameká mina daweg nijatjugtatam? tau.

<sup>7</sup> Tutai Jesús ayaak: —Wi jutikag juka yamaikik dekatsme, tujash dui dekaattame, tiuwai.

<sup>8</sup> Tusa tama Pedro chichaak: —Apuh, amek mina dawejuk tuke nijatjugchattame, tiuwai.

Tutai Jesús ayaak: —Amina nawemin wi nijagchamtaig, amek wijaig ijunmaitsume, tau.

<sup>9</sup> Tama Simón Pedro chichaak: —¡Untsu apuh, imá dawejuk nijatsuk, uwejush nijatjakum, buukjushkam nijatjugta! tiuwai.

<sup>10</sup> Tutai Jesús ayaak: —Mainua duka nuigtú nijamagtasag atsumatsui, ayatak naweeg nijatam amainai; wagki ashí iyashiya duka tsuwatchau asamtai, numamtuk atumek tsuwatchau ainagme, tujash ashí tsuwatchauk ainatsjume, tiuwai.

<sup>11</sup> Jesusak dekau ya sujuktatua nunak, nuadui: “Ashí tsuwatchauk ainatsjume”, tiuwai.

<sup>12</sup> Dutika, ashí nawen nijatuk, jaanchjin juki wakitki mesanum jegantá chichaak: —¿Atumesh dekagmek wi jutikajim jusha?

<sup>13</sup> Atumek minak Maestro nuigtú Apú tujutjume, duka dekas iman asamtai tujutjume.

<sup>14</sup> Wi Maestroitkun nuigtush Apuitkun atumi nawemin nijatjajime, atumesh junisjumek atumin kakagchajum pempeentunikjum iwaintuniktajum.

<sup>15</sup> Wi jutikag junak, atumesh jutiksagmek takastajum tusan iwaintakun jutikajime.

<sup>16</sup> Dekas tajime, inakak apujin nagkaesauchui, awemamua dushakam awekagtiuwa nuna nagkaesauchui.

<sup>17</sup> Ju aina ju dekaajum atumesh dutiksagmek takaakjume shiig aneasjum pujustin ainagme.

<sup>18</sup> Junak ashí atumin takun tatsujime, wika dekajai ya aidauna etegjauwaitja nunak; tujash Agagbauwa nui: “Wijai pagkan yuwa nuyag pempeentugkittawai”, tawa nu uminkattawai.

<sup>19</sup> Yamai nagkamsanuk, eke jegatsaig tajime, wagki nunú tsawan jegakui, dekas Apajuí Uchijimpapita tujutminjum tau asan.

<sup>20</sup> Dekas tajime, wi awemamun jukitta duka, mina jujuinawai, mina jujuina dushakam, mina awetiuwa nuna juinawai.

### *Jesús Judas sujam atin etsegekamu*

(Mt. 26.20-25; Mr. 14.17-21; Lc. 22.21-23)

<sup>21</sup> Jesús nuna tii, shiig senchi wake besemag dekapjauwai, nunik chichaak: —Dekas tajime, atum ainajum juyag makichik minak sujutkattawai, tau.

<sup>22</sup> Nuna timatai jintintaiji aidauk pempeentunisag niinidau, yana takug tawa tusag.

<sup>23</sup> Nuniai jintintaiji aina nuyi makichik, Jesusa anetaiji, Jesusai ayaumas eketu.

<sup>24</sup> Nuna Simón Pedro iwijau, yana takug tawa iniasti tusa.

<sup>25</sup> Dutikam Jesusan adijik, iniak: —¿Apuh, dusha yaita? tau.

<sup>26</sup> Tama Jesús ayaak: —Yana wi pagkan puukan uchupjan susattaja nuuwai. Tusa pagkan uchupig Judas Iscariote Simogkan uchijiya nuna susauwai;

<sup>27</sup> dutikam yuwaig, Iwanch waintuauwai. Nunitai Jesús chichajak: —Ame dutikattam duka, wamak dutikata, tiuwai.

<sup>28</sup> Tujash makichikish mesanum eketaina duka dekachajui wagka tawa nunak.

<sup>29</sup> Ujumak anentaimasjai, Judas kuichik egketain takaka duis, Jesús: Fiestanum atumtin sumakta nuniachkumesh ujunauch aidau susata tawastai taja.

<sup>30</sup> Judaschakam pag puukbau juki waujus jiinkiuwai. Nunak kashi nunikui.

### *Yamajam chicham umiktin*

<sup>31</sup> Judas jiinki wematai, Jesús chichaak: —Yamaiya juuwai Aentsmaga akiinawuwa nu eme anentam atata nu, nuigtú Apajuinash niini eme anentiagtatui.

<sup>32</sup> Aentsmaga akiidau Apajuí ememattinme tusa iwainataik, Apajuishkam Uchijun ememattinme tusa wamak umiktatui.

<sup>33</sup> Uchuchig aidauwah, atumjai ijunjanuk kuashat tsawantaik pujushtatjai, tujash judío aidaun timag dutiksanuk atumnash tajime, wi wetatag nuanuig atumek yamaikik minimainchau ainagme.

<sup>34</sup> Chicham umiktinun yamagman ukugjime: Makí makichik pempeentunisjume k aneenitajum; wi atum aneamun iwaintukjim nunisjume k, atumesh pempeentunisjume k aneenitajum tusan.

<sup>35</sup> Atum pempeentunikjum aneediagtaik, tikich aidaush Jesusa jintintaijimpap ainawa tusag deka gmawagtatui, tiuwai.

*Jesús Pedron uugtuktatme tusa ujakbau*  
(Mt. 26.31-35; Mr. 14.27-31; Lc. 22.31-38)

<sup>36</sup> Tutai Simón Pedro iniak: —Apuh, ¿tuwí wetatme? tau.

Tama Jesús ayaak: —Wi wetatag nuig yamaik minimaitsume, tujash dui pujusam minittame, tau.

<sup>37</sup> Tutai Pedro ayaak: —Apuh, ¿wagka yamaikish minimainchauwaitja? wisha aminí jakatasan umintsan pujajai, tau.

<sup>38</sup> Tutai Jesús ayaak: —¿Dekaskek wijai mantamnatasam umintsam wekaegam? Dekas tajame, eke atash shinatsaig kpatumá ugtuktatme, tiuwai.

## 14

*Jesusai jinta ina Apajin wetai*

<sup>1</sup> Nuna tii: “Atumek wi tajim nunú anentaimtakjum wake besemag anentaimá pujuijpajum; Apajuiyai dekaskeapi takujum, minaishkam dekaskeapi titajum.

<sup>2</sup> Mina Apajú jeenig kuashat pujumain awai, nu iman au asamtai, wi atum pujustinnak umigkatjime tusan weajai.

<sup>3</sup> Yamai wenu atum pujustinun umikan, ataktú waketsanuk taattajai, mina pujutaijui pujustajum tusan atumin juwakun.

<sup>4</sup> Atumek jintak wainjume, wi wegag nui minimaina duka”.

<sup>5</sup> Tutai Tomás: —Apuh, dekatsji tuwí wegame duka, nuniautish, ¿wajuk jintash dekamainaitji? tau.

<sup>6</sup> Tutai Jesús ayaak: —Witjai jintanuk, dekasketnash wikitjai, nuigtushkam witjai pujutnash sukagtinnuk. Makichkish wijaichuk mina Apajuij jegamainchau ainawai.

<sup>7</sup> Atum mina waitutigmek, mina Apagshakam wainjume. Yamai mina waitjum juik, mina Apagshakam wainjume, tau.

<sup>8</sup> Tutai Felipe chichaak: —Apuh, Apa iwainkagtukta, duke atsumaji, tiuwai.

<sup>9</sup> Tama Jesús ayaak: —Felipeh, kuashat tsawan atumjai pujag nuniaigkik, ¿eke waittum? Mina waita duka, Apagnashkam wainui, nuniaish; ¿wagka Apa iwaintugkata tame?

<sup>10</sup> ¿Dekaskeapi tatsumek wi mina Apajui pujau asamtai, mina Apagshakam minai puja duka? Wi chichaman tajim nunak, wiki nagkammuk tatsujai, mina Apag minai puja nunú, ni dutikata tabaunak takaajai.

<sup>11</sup> Wi mina Apajai pujau asamtai, mina Apag minai pujawai taja duka dekaskeapi titajum. Nuniachkugmesh, wi takaag nunú diisjum, dekaskeapi tujuttajum.

<sup>12</sup> Dekas tajime, mina dekaskeapi tujutuk, wi takaag junak jutiksag takastatui, nuigtush wi takasag juna nagkaegas takasagtinai, wagki wi Apajú wegau asamtai.

<sup>13</sup> Ashí mina daajui Apag segattajum nunak amastatjime, wi dutikamunum Apajun ememattinne tau asan.

<sup>14</sup> Makichik wajigkesh mina daag pachisjum atum segatkugminig, imatiksank umiktatjai.

*Jesús Wakani Pegkeji anagkagtuamu*

<sup>15</sup> Atum mina anenkugmek, wi chicham umiktajum tajim nunú betek umiktajum.

<sup>16</sup> Nuniakjumin wi Apajun segattajai, atumiin tuke pujus ichichtamtina nuna Wakani Pegkeji awetugmati tusan.

<sup>17</sup> Nunú Wakan dekasaka nuna jintinkagtina nunak, aents mina nemagtuchu aidauk jumain ainatsui, wagki waintanash wainmainchau dekatnash dekamainchau asag; tujash atumek deka gme, wagki atumiin pujau asamtai nuigtushkam atuminig tuke pujutnai.

<sup>18</sup> Tuke bitaika numamtukek ukukchatnaitjime, waketjusnuk ataktú tajuatnaitjime.

<sup>19</sup> Machik asag, aents mina nemagtuinatsa duka waitkachagtatui, tujash atumek waitkattagme, wagki wi pujau asamtai atumshakam tuke pujutin asajum.

<sup>20</sup> Nunú tsawan jegakui, wi Apajui pujai atumshakam minai pujagmin, wi atumin pujamuk shiig dekaatagme.

<sup>21</sup> Aents wi chicham umiktajum tibauwa nuna umiakug dekas mina anentak nuniktatui. Nuniaun mina Apajuk aneettawai, nuniakui wishakam aikasnuk anettajai, dutikakun wantintuktajai.

<sup>22</sup> Tutai Judas (Iscariotechu) chichaak: —Apuh, ¿amina nemagtamchau aidau wantintutskesh, utugsamea imá jutiikesh wantinkagtuktatme? tau.

<sup>23</sup> Tama Jesús ayaak: —Mina anentak, mina chichamjua nuna umiktatui, nunitai mina Apajush aneettawai; nuniakui wishakam mina Apagjai niina anentain tajaan tuke pujustinaitjai.

<sup>24</sup> Utsu mina anenchauk, mina chichameg aina nunak umikchattawai; tujash jujú chicham atum antajum juka midauchui, Apag awetiwa nudauwai.

<sup>25</sup> Ashí juna tajim junak, yamai atumjai pujag dui tajime.

<sup>26</sup> Tujash Ichichkagtina nuna, Wakani Pegkejin Apag mina daajui awematta nunú, ashí waji aina nunak jintinjamawagtatui, dutikak ashí wi tiuwaitjim nunash aneemtijamjag-tatui.

<sup>27</sup> Shiig agkan pujuta nuna ukugjime, mina shiig agkan pujutajua nunash amajime, wika ju nugkanmaya sukagtin aina nuninnak amatsjime; nunin asamtai anentainish puyatkaigpa, ishamtash ishamaigpajum.

<sup>28</sup> Wika wegajai, nuniknush wakettsanuk atumjai pujustasan tajuattajime tabaushkam antukmaugme. Dekas mina anenkugmek, wi Apag mina nagkaetasua nui wegajai tabau antugtakjume shiig aneemain ainagme.

<sup>29</sup> Junak emtikan tajime, nunú uminkui dekaskeapi timinjum tusan.

<sup>30</sup> Atumjaig kuashat chichá pujushtajai, ju nugka juna apuji minau asamtai, nigka mina depetumainjig senchijig atsujui;

<sup>31</sup> tujash ju nugkanmaya aidauk dekamain ainawai wi mina Apajun aneau asan, ni dutikata tujutbaunak imatiksasuk umijag nuna.

Wajagtajum, wegagmi.

## 15

### *Jesús, witjai uva numijinuk tibau*

<sup>1</sup> Witjai dekaskenum uva numijinuk, utsu mina Apajua nuuwai ajakan kuitamna duka.

<sup>2</sup> Ashí mina kanaweg nejeachunak tsupiwawai; utsu ashí kanaweg nejena nunak, asantug iwajui aan senchi nejektí tau asa.

<sup>3</sup> Atumek wi chichaman jintintuamjim nu umiau asajum shiig asanjamu ainagme.

<sup>4</sup> Wijai ijutkau atajum, wi atumjai ijutkag antsagmek. Ajakan kanawe numijin achitkachu nigki kanakí akug nejemaitsui, antsagmek atumesh wijai ijutkau achakjumek pegkejak takamaitsugme.

<sup>5</sup> Witjai uva numijinuk, atumetjume mina kanaweg aidautigmek, wijai ijutka nu, tuja wi niini ijutkag nunú senchi nejewawai; wagki atum wijai ijutkau achakjumek Apag wagemama duka makichkish dutikmainchau ainagme.

<sup>6</sup> Wijai ijutkatsu duka, jiiki ajapam ajaka kanawe tsupikbau kukagmatai, juki jiinum apetiama numamtuk awajam atinai.

<sup>7</sup> Wijai ijutkau pujakjume nuigtú mina chichameg aina dusha umiakjume, ashí atum wagemama segattajum, nuniakjuminig ashí amastinaitjime.

<sup>8</sup> Atum pegkeg takaamu aina duke iwainagtaik, tikich aidaush mina Apagnash shiig emematiagtatui, nuninak dekas mina jintintaig ainajum nunashkam dekagmawagtatui.

<sup>9</sup> Apag mina anenta dutiksasuk atumnashkam aneajime, nuadui wi aneajim nunisjume atumshakam anenitajum.

<sup>10</sup> Mina chichameg aina nu umiakjuminig wishakam aneettajime, wi mina Apajú chichame aidaun umiju asamtai, ni anenta aikasnuk.

<sup>11</sup> Ju aidaun tajim junak, wijai betek dakujus shiig aneas pujustinme tusan tajime.

<sup>12</sup> Wi chicham umiktajum tajim duka: Mina nemagtin aidautigmek pempeen-tunisjume aneenitajum, wi atumin aneajim antsagmek, tajim nuuwai.

<sup>13</sup> Makichik aentskesh ju anenka juna nagkaesauk atsujui, niina pujutjin kumpají aina nui tsagkamanmainuk.

<sup>14</sup> Atumek mina kumpag ainagme, wi dutikatajum tajim nu umiakjume.

<sup>15</sup> Nuniau asamtai inak ainagme tichattajime, wagki inaka duka apuji takaa nunak dekatsui; mina kumpag ainagme tajime, wagki mina Apag tabau antukbaunak ashí ujakjim nuadui.

<sup>16</sup> Atum minak etegtuachu ainagme, wi atumnak etegjauwaitjime, dutikau asan mina chichameg etsegkujum, ajak senchi nejegama numamtuk wajaktajum timaijim duka



ajumaish tuke atinai. Nuadui atum mina pachittsajum, ashí mina Apag segamak amasagtinai.

<sup>17</sup> Junashkam tajime: Pempeentunisjume anenitajum.

*Nugkanmaya kajegtabiagtinai tibau*

<sup>18</sup> Aents mina nemagtuchu aidau, atum mina nemagtau asagmin kajegtamainakuish, adeagtajum, mina dekas nagkamchakug kajegtuku ainawai.

<sup>19</sup> Atumesh ju nugkanmaya agtaik, dita anenina aikagmasajag anempamain ainagme. Tujash wi atumnak ju nugkanmaya aina nuiyatigmin etegjan midau emakbau asajum, ditajai betekchau ainajum duwi kajegtamainawai.

<sup>20</sup> Adeagtajum wi: "Inakak apujin nagkaesachui" timajim nu. Mina waitkagsaju aina dutiksag atumnash waitkagmasagtinai. Mina chichamjun umiauk, atum tabaunash umikagtatui.

<sup>21</sup> Ashí nu aina nunak mina nemagtuidau asagmin imatijabiagtinai, wagki mina Apag awetiuwa nuna dekainachu asag.

<sup>22</sup> Wi jui taan ujakchamu ainakug, tudaujin bakumamainuk atsumain ainawai; tujash yamaik ditá tudaujin ayamjumamainuk atsujuinawai.

<sup>23</sup> Mina kajegtuidauk, mina Apagnash kajejuinawai.

<sup>24</sup> Wi dita aina nui tikichish dutikhatain takaschau ataik, bakumamainchau ainawai; tujash wi iwainaja takaamun waituinayatak ayatak kajegtuinak, mina Apagnashkam kajejuidau asag bakumagtinai.

<sup>25</sup> Tujash junak dita chicham umiktin agagbauwa nui: "Wainak kajegtukajui", tawa nu uminu asantai aikajuinawai.

<sup>26</sup> Tujash wi Ichichkagtinun awemattag nu, Wakan Apagdau dekasken jintinkagtina nu, mina pachitus shiig dekamtijamattagme.

<sup>27</sup> Dutijamainaku atumshakam yama nagkamchakjumes wijaig batsamsau asajum mina pachittsajum tikich aidaush ujaktatjume.

## 16

<sup>1</sup> Juna tajim nunak, minai dekaskeapi tabau megkaekaijum tusan tajime.

<sup>2</sup> Jega ijuntai aina nui wayagminish agaa jigmaktin ainawai, dutijamawag mantamainak: Juka Apajuí takaju asa jutikaji tiagtinai.

<sup>3</sup> Nunak mina Apagnash, minashkam dekajuinachu asag dutijamiagtinai.

<sup>4</sup> Juna tajim nunak, nu tsawan jegakuish wi tibauwa nu adeagminjum tusan tajime.

*Wakaní Pegkeji takatji*

Junak nagkamsanush tichabiajime, wagki wi atumjai pujau asan.

<sup>5</sup> Tujash yamaik mina awetiuwa nujai pujustasan wegajai, makichikitigmekesh: ¿Tuwi wegame? tusagmek inintsachugme;

<sup>6</sup> ayatak, wi nunú aidaun takui wake besekjum pekagjume.

<sup>7</sup> Tujash dekaskea nuna tajime: Wi weamua nu atuminig imá pegkejai; wagki wi wechataik, Ichichkagtina duka atumjai pujustasag tamait sui, tujash wi wenu awemattajai.

<sup>8</sup> Dutikam ni taa, aents aidau tudaunum batsata nunak dekamtikattawai, pegkeg takat aina nunash nuigtú suwimak atina nunashkam.

<sup>9</sup> Tudau takaina duka, mina dekaskeapi tujutuinsu nuuwai;

<sup>10</sup> Wi pegkejan takaunuk mina Apajuí wetatjai, nunikmataig ataktuk waitkashtatjume;

<sup>11</sup> suwimkan jukitta duka, ju nugka juna apujiya nuwai, duka suwimkan jukiti tibauwai.

<sup>12</sup> Kuashat waji aidau atum tumainuk ajutui, tujash yamaiya juikik imatikagmek ashí dekamainchau ainagme.

<sup>13</sup> Tujash Wakan dekaskea nu taa, ni ashí dekaskea nuna dekamtijamattawai, wagki nigka nigki nagkamig chichakchattawai, ashí ni antukbaujiya nuna titatui nuigtush waji nagkaemagtina nunash dekamtijamattawai.

<sup>14</sup> Wakaní Pegkejiya nu mina imanua nunak iwaintugmak, imá midaunmayanak atumnash dekamtijamattagme.

<sup>15</sup> Ashí mina Apagdauwa duka midau ainawai; nuadui Wakaní Pegkeji midauwa nuna juki, dekamtijamattawai tajime.

*Wake besemja duka shiig aneamujai yapajinatnai*

<sup>16</sup> Machik asagmek minak waitkashtatjume, tujash dukapech tsawan asagmek ataktú waitkattagme.

<sup>17</sup> Tutai ujumak jintintaiji aidau pempeentunisag iniininak:

—¿Wajina takua nunash, “machik asagmek minak waitkashtatjume, tujash dukapech tsawan asagmek ataktú waitkattagme, wagki Apajuí wegau asantai” tawa nunash tawa? tuidau.

<sup>18</sup> Tusag ¿wajina takua: “Machik asagmek tawa”? Antumaitsui wajina takus tawa, tuidau.

<sup>19</sup> Tusag, iniastag tuinamun Jesús dekau asa, chichaak: —“Machik asagmek minak waitkashtatjume, tujash dukapech tsawan asagmek ataktú waitkattagme” taja duká, ¿pempéentunikjum iniiniakjum, wajinak tawa tajum?

<sup>20</sup> Dekas tajime, atumek buutkujum wake besemag pujuttagme, nuniagmin ju nugkanmaya aents aidauk shiig aneediagtatui; tujash atum wake besemag pujamua duka, sakapakjum ataktú shiig aneestatjume, wi nantakin wantintuktatjim dui.

<sup>21</sup> Nuwa uchigmakug najaimawai, wagki horaji jegagbau asa; tujash uchin uchigmak-tata dui, ni waitksamujinak kajimatui, uchin uchigmak shiig aneamunum.

<sup>22</sup> Atumnashkam aantsag yamaik wake besemag ajutjamainawai, tujash waketsanuk wainkattajim dui, atumi anentaimin shiig aneestainaitjume, nunú shiig aneamugmia nunak makichkish emegkatjamainchau ainawai.

<sup>23</sup> Nunú tsawanta duik makichkish inintsashtin ainagme. Dekas tajime: Atum mina pachittsajum ashí mina Apag segattajum nunak amastatjume.

<sup>24</sup> Yamaikish makichkish mina pachittsagmek Apajuk segachugme, tujash yamaik segatajum nuniakjumek jukittagme, nunikjum atumesh shiig aneestatjume.

*Jesús nugkanmayanak depetkauwai*

<sup>25</sup> Ju aina junak augmatbaujai apatkan tinujime, tujash hora jegawai augmatbaujai apatkan tutsuk, shiig paan mina Apajun pachisan etseggattag nu.

<sup>26</sup> Nu tsawantinig mina pachittsajum Apag segatajum, wi Apajun atumin segattajime tatsujime,

<sup>27</sup> wagki Apajuk tuke atumnak anempajume. Atumin anempajum nunak mina anenjum dui anempawai, wagki wi Apajuinomia tauwaitag nu dekaskeapi tujutuidau asagmin.

<sup>28</sup> Mina Apajuiyan jinkin ju nugka juig tauwaitjai, yamaik ju nugka junak ukuajai Apajui waketskun.

<sup>29</sup> Tutai jintintaiji aidau chichainak: —Makichik augmatbaukesh tutsuk, yamaik paan tukagtjume, tuidau.

<sup>30</sup> Yamaik dekaji ashí waji aidau dekam duka, nuigtush atsumatsme inintsatnume tusanek, nuadui Apajuiyap awemauwaita tusa dekaskeapi tuinaji, tuidau.

<sup>31</sup> Tama Jesús ayaak: —¿Yamaik dekaskeapi tajum?

<sup>32</sup> Yamaik hora jegawai, duka yamaiya juiki, atum pampagjum makí makichik shimakjum minak ukugkittajum nu. Tujash imá wikik juwakchattajai, wagki Apag wijai pujawai.

<sup>33</sup> Juna tajim junak, minaiya shiig agkan pujuta nu ajitnume tusan tajime. Ju nugka juig waitiamuk igkugtinaitjume, tujash ichichmamjatajum, wi ju nugkanmayanak depetkajai.

## 17

*Jesús jintintaiji aidau Apajuí segatbau*

<sup>1</sup> Nuna tii idaiyak, Jesús nayaimpin diis chichaak: Apawah, minak horak jegagtine; minash ememattai etita, aents aidaushkam: Dekas Apajuí Uchijimpapita tusag dekajuatnume. Wishakam dutiksanuk aents aidaunmash iwainaktajame emematjabiagtinne tusan.

<sup>2</sup> Ame minak ashí nugkanmaya aina nunak, nigki diistí tusam idaitugsaume, dutikakum senchigmishkam sujusmaume, mina nemagtin aidau ame sujusmauwa nunash pujut nagkanchaun susati tusam

<sup>3</sup> Pujut nagkanchauwa nunak, amina dekagmawag: imá jukeapita dekas Apajuik tujamainak, ame mina awetiwaitam nunashkam: Dekas juwapita uwentikagtumainuk, tuidau jukiagtinai.

<sup>4</sup> Wika ju nugka jui pujusnuk aminak emematjame, nuniakun ame umiktá tujutiuwaitam nunash imatiskanuk umikjai.

<sup>5</sup> Apawah, yamaik ame minash yaunchuk nugkash najannatsaig amijai emematjamin aajabia imanuk etita.

<sup>6</sup> Ame ju nugkanmaya aents aidau etejam sujusuitam nunak, wishakam amina pachisnuk shiig jintintuawagjai. Duka aminuk sujusuitme, dutikamu asag ditashkam chichamjumnak betek umigtamainawai.

<sup>7</sup> Yamaik wi ashí aminu aidaun jintintuabiag nunak, dekainawai;

<sup>8</sup> aikasnuk ame mina chicham etsegtugkata tujutbaunak imatiksasuk ujakagmajai, dutikam ditashkam wakejus antukagmae, nuninak: Dekas Apajuí awemamuap tauwaita tusag dekaskeapi tujutuinaawai.

<sup>9</sup> Duwi ditanun pachisan segagme aminu asagmatai, tikich aents mina nemagtuinatsun nuna pachisnuk segagsjame.

<sup>10</sup> Ashí aents midauwa duka aminu ainawai, tujamtai aminu aidauk midau ainawai. Nunú aidau mina emematjuinawai, tikich aidaushkam Jesusa imanjin wainkatnume tusag.

<sup>11</sup> Wika aminí midau asan juig pujushtatjai, tujash jujú aidauk nugká juwainawai. Apawa pegkegmah, amina senchigmin kuitamkata ame sujusbau aina duka, ii makichik duke anentaimkag nunisag ditashkam anentaimtinme.

<sup>12</sup> Wi ditajai pujaknuk, ame senchijum sujusbauwa dui ditanak kuitamnujai, dutikamu asa dita aina nuyag makichikesh megkaekache, nuninaitak aatus megkaekati tibauwa nu megkaekae, yaunchuk chicham agagbauwa nu uminu asamtai.

<sup>13</sup> Yamaik ame pujam nui minajai, nuniyatkun ju nugka jui pujusan tajame, ditanash wi shiig aneag nunisag betek ajitnume tau asan.

<sup>14</sup> Amina chichamjumnash jintintuawagmajai, dutikai aents ju nugkanmaya aidau kajejuinawai, wagki wi ju nugkanmayachuitag nunisag ditashkam ju nugkanmayachu asagmatai.

<sup>15</sup> Ju nugka jui batsamsainum yajuakta tusanuk segagsjame, Iwanch waitkainakuish ayamjukta tusan segajame.

<sup>16</sup> Wi ju nugkanmayachuitag nunisag ditashkam ju nugkanmaya ainatsui.

<sup>17</sup> Amina chichamjum dekaskea nunak umigtamkatnume ditash pegkemtikata.

<sup>18</sup> Ame mina ju nugka jui, aents amina dakitjamin aidau batsatbaunum awetiwaitam dutiksasuk ditanash ishimjai.

<sup>19</sup> Wika, amina takaju asan mina pujutjunak ashí idaitusjame, ditashkam nunisag aminu dekaskea nuna takagtamainak, ashí ditá pujutinak idaitugmastinme.

<sup>20</sup> Tujash imá jujú aidaunakek segagsjame, dita chichaman etsejiagtai antuinak mina dekaskeapi tujutiagtiin aidau pachisnush segajame;

<sup>21</sup> ashí dita aina duka ijutkau atinme, tusan. Apawah, ame minai amin, wi aminí au asamtai makichkitag nunin ditash atinme, nuniagtai ju nugkanmaya aidaush ame awetiwaitam nuna dekaskeapi tiagtinme.

<sup>22</sup> Ame imanjum mina sujusuitam nunak ditanash susajai, jutii makichkitag nunisag ditash makichik agtinme tusan;

<sup>23</sup> wi ditai ai, ame wijai ame nunisag, shiig betek ijunas makichik atinme, nuniagtai ju nugkanmaya aidaush ame awetiwaitam nuna dekaatuatnume, nuninak mina anentam aikasmek dita aneam nunashkam dekaatnume.

<sup>24</sup> "Apawah, ame sujusbau aina nunak mina pujutajui ditash pujusag, nugkash najannatsaig ame mina anentujakú asam, amina imanjum ashí mina sujusum nunash wainkatin atinme tusan wakegajai.

<sup>25</sup> Apag pegkegmah, aents nugkanmaya amina umigtamainachuk dekaagmainatsui; tujash wika aminak dekaagme, ju aina jusha dekaagmainawai ame mina awetiwaitam nunak.

<sup>26</sup> Wika amina pachisnuk ditanak shiig dekamtikamjai, aan nagkaemasnush tuke dekamtiksané atajjai, ame mina anentam aantsag ditaish atí, nuniakui wishakam ditai atajjai tau asan".

## 18

### *Jesús achiká jukimu*

(Mt. 26.47-56; Mr. 14.43-52; Lc. 22.47-53)

<sup>1</sup> Jesús aatus Apajuin aujus inagnak, ni jintintaiji aidaun yajuak entsa Cedrón tutai amain katigkui, nunik ajak olivos tutai ajakbaunum jegantajui.

<sup>2</sup> Nunak Judas, Jesusan sujuktina dushakam dekau, wagki nui Jesús ni jintintaiji aidaujai kuashtá ijunin asamtai.

<sup>3</sup> Nunin asa Judaschakam, kuashtat suntag aidaun yajuak nuigtú sacerdote apuji, fariseo aidau ditashkam, jega Apajuí ememattain kuitamin aidaujai ishiakbaujai, lampanan nuigtú jii ekemajag, nagkí tinamdaekag Jesusan kautuwawajui.

<sup>4</sup> Tujash Jesusak, ashí niina utugkagtatua nuna dekau asa, jiintuki igkugku, dutika iniak: —¿Yaa egagme? tiuwai.

<sup>5</sup> Tama dita aiinak:

—Jesús nazaretnumia egaji, tuidau. Tiagtai Jesús ayaak: —Witjai nunak, tiuwai. Judas niina suja dushakam ditajai wajau asa,

<sup>6</sup> Jesús chichaak: “Witjai”, tutai waketsag nugkaa kakekaju.

<sup>7</sup> Nunikagmatai awentsag iniinak: —¿Yaa egagme? tau. Tutai dita aiinak: —Jesús Nazaretnumia egaji, tiujai.

<sup>8</sup> Tiagtai Jesús ayaak: Witjai timajim jama, mina egatkugmek, ju aina juka idaisatajum wetinme, tiuwai.

<sup>9</sup> Nunak Jesús Apajin segaak: “Apawah, ame sujusbaunak makichkish emegkatkach-jame” tiuwa nu betek uminu asamtai tiuwai.

<sup>10</sup> Nuniagtai Simón Pedro, espadajin ukuini juwakug sumo sacerdote inake Malco daagtinun kuwishi untsujiya nuna tsupigkauwai.

<sup>11</sup> Dutiktai Jesús Pedron chichajak: —Espadajum jukim awajata, ¿amek, mina Apag waittsati tujutbauwa nunak umimainchauk anentaimtujam? tiuwai.

### *Jesús Anasai ejegamu*

<sup>12</sup> Suntag aidau, comandante, jega Apajui ememattai kuitamin judío aidau ishiakbau aina nujai Jesusan achikag jigkajajui.

<sup>13</sup> Dutikawag dekatkauk Anasai ejegawajui Caifasa wegajin, nu mijantinig Caifás sumo sacerdote wajas pujau asamtai.

<sup>14</sup> Nunú Caifás judío aidaun chichajak: “Ashí aentsun ayamjuk uwemtijatnuk, dekask makichik aents mantamnamainai”, tiuwa nu aajakui.

### *Pedro Jesusnak wainchaujai tusa uukbau*

(Mt. 26.69-75; Mr. 14.66-72; Lc. 22.54-57)

<sup>15</sup> Jesusan jukiag emagtai, Simón Pedro nuigtú tikich Jesusa jintintaijiya nujai, ukunum pataesag weedau. Nunú Jesusa jintintaijiya duka, sumo sacerdote waintai asa, sumo sacerdote jeen agaajin Jesusan awayagtai niish wayauwai,

<sup>16</sup> nunitai Pedrok agaag, waitinum juwakui. Nuniai Jesusa jintintai sumo sacerdote waintaijiya nu jiinki, nuwa waiti kuitamna nuna aujus Pedron awayauwai.

<sup>17</sup> Nunittaman nuwa waiti kuitamna nu Pedron iniak: —¿Amesh au aentsú jintintaiji aina duchaukaitam? tau.

Tama Pedro ayaak:

—Atsa, duchauwaitjai, tau.

<sup>18</sup> Tsetsek asamtai, sacerdote apujin inake aidau nuigtú jega Apajui ememattai kuitamin aidaujai jiin ikapajag anamainak ijunaidau; nuniamunum Pedroshkam ditajai ijunag jii anamak wajau.

### *Anás Jesusan iniasbau*

(Mt. 26.59-66; Mr. 14.55-64; Lc. 22.66-71)

<sup>19</sup> Sumo sacerdote Jesusan, niina jintintaiji aidaun nuigtú ni jintinkagtutajin pachis iniau.

<sup>20</sup> Tutai Jesús ayaak: —Wika ashí aents antuinamunum chichaujai. Tuke jintinkagtinujai jega ijuntainum nuigtú jega Apajui ememattainmash ashí judío aidau ijunin aina nu, wika uuknuk chichachujai.

<sup>21</sup> ¿Wagka minash ininjume? Wi chichaamun antuku aina nu iniasta, dita wi wajintu chichaujai nunak dekainawai, tiuwai.

<sup>22</sup> Nuna Jesús tutai, jega Apajui ememattain kuitamna nu makichik juwatki yapinum awatí chichajak: —¿Ajamek sumo sacerdotesh aiyamum? tiuwai.

<sup>23</sup> Dutikam Jesús ayaak: —Wi pegkegchaun chichakmataig, titá wajina pegkegchauanash tija nu, nuninchau aish, ¿wagka awatame? tiuwai.

<sup>24</sup> Timatai Anás, Jesusnak jigkagbautak sumo sacerdote Caifás pujamunum awe-mauwai.

### *Pedro Jesusnak wainchaujai tusa uukbau*

(Mt. 26.71-75; Mr. 14.69-72; Lc. 22.58-62)

<sup>25</sup> Nuniai, Pedroshkam jii anamak wajau. Nunittaman iniinak:

—¿Amesh aina jintintaiji aina nuyachukaitam? tuidau.

Tama Pedroshkam uwaak: —Atsa duchauwaitjai, tiuwai.

<sup>26</sup> Titatman sumo sacerdote inake aina nuiya makichik, Pedro kuwishi asankauwa nuna patayí chichajak: —¿Wi amina ajak ajakbaunum Jesusjai wajamin wainkachmak-ajam? tau.

<sup>27</sup> Tamashkam Pedrok ataktú uuku, nuniaig atash shinukui.

*Jesús Pilatowai ejegamu**(Mt. 27.1-2, 11-14; Mr. 15.1-5; Lc. 23.1-5)*

<sup>28</sup> Jesusnak Caifasa jeenian jukiag gobernador romanmaya pujamunum ejegawajui. Dutikawag tsawau asamtai, apú jeenig wayachajui, pegkegchau utsumakaja Pascua yuwachaig tuidau asag.

<sup>29</sup> Nuniagtai Pilato dita ijunbaunum jiinki, iniak: —¿Jusha aentsush wajukamtai itagtuaugme? tau.

<sup>30</sup> Tutai dita aiinak: —Ju aents katsekchawaitkuig jutika achikaik itagmaitsujime, tuidau.

<sup>31</sup> Tiagtai Pilato chichaak: —Atum jukijum, atum chicham umiktinnumash wajintua dutiksagmek dutikatajum, tiuwai.

Tutai judío apuji aidau aiinak: —Jutii judío aidautik, makichik aentskesh maatajum tibauk ainatsji tiajui.

<sup>32</sup> Aatus uminkauwai Jesús, wajuk waitus jakatin asaya tiuwaita nu.

<sup>33</sup> Tiagmatai Pilato ataktú jega niina pujusá inamtaijin wayá, Jesusa iniak: —¿Amekaitam Rey judío aidaunu? tau.

<sup>34</sup> Tama Jesús ayaak: —¿Dusha amek nagkamek tujutam atsa tikich mina pachitus tujamchagmaká? tau.

<sup>35</sup> Tama Pilato ayaak: —¿Wi judiokaitag? Amina aentsjum nuigtú sacerdote apuji aina nujai achigmakag minai itagmawaje. ¿Wají aikamume? tau.

<sup>36</sup> Tama Jesús ayaak: —Mina inamtaijuk ju nugka juchauwai; juiya ataik, mina takagtín aidau maanimain ainawai achikag judío aidaunum mina sujutkainum tusa; tujash mina inamtaijuk juyachui, tiuwai.

<sup>37</sup> Tutai Pilato iniak: —Nuniakmek ameapitme rey, tau.

Tama Jesús ayaak: —Ame rey tujutam duka dekaske. Wika ju nugka juig akiinauwaitjai, nunikan chicham dekaskea nuna etsegkatasan tauwaitjai. Ashí aents chicham dekaskea nuna antukag umiina nu mina chichamjunak antugtuinawai, tiuwai.

<sup>38</sup> Tutai Pilato iniak: —¿Wajimpaya dekaskea dusha? tiuwai. Nuna tii ukuak agaa jiinki, judío aidau ijuntatman chichajak: —Wika ju aents bakumamainjinak makichkish pegkegchajuinak dekajuachjai.

*Jesús mantamnati tibau**(Mt. 27.15-30; Mr. 15.6-17; Lc. 23.17-25)*

<sup>39</sup> Tujash Pascua jegakuig, tuke makichik jiiktá takugmin jiinuweg dutiksag, ¿judío aina nuna Reyjinash jiiktá tajumek? tau.

<sup>40</sup> Nuna tutai ataktú ashí senchi untsumkag: —¿Aanka jiikipa, Barrabás jiiktá! wajaidau.

Duka Barrabasak kasa aajakui.

**19**

<sup>1</sup> Imatiagtai Pilato, Jesusan jukijum asutiatajum tusa suntag aidaun inajui.

<sup>2</sup> Dutikamtai suntag aidaushkam jagkin chapikmajag atsejutain najanawag Jesusan atsemitkakag, jaanch kapantu nentetkaun anugajui;

<sup>3</sup> dutika chichajuinak: —¿Juuwai judío aina nuna Reyjig! awajuidau.

Tuinakug yapinum awatuidau.

<sup>4</sup> Tiagtai Pilato ataktú jiinki chichaak: —Diistajum jui agaa itanjai, ni bakumamainjig makichkish atsuja nuna dekatnime tusan, tau.

<sup>5</sup> Jesuschakam jagki atsejutai najanamu atsegmitkakbaunak nuigtú jaanch kapantu nentetkau anujamunash imanisag jiinkiuwai, nunikmatai Pilato chichaak: —¿Ju aentsun jui itanjai, diistajum! tiuwai.

<sup>6</sup> Tutai sacerdote apuji aidau, jega Apajuí ememattai kuitamin aidaujai wainkag, senchi untsumkag:

—¿Achigtá! ¡Achigtá! awajuidau. Imatiagtai Pilato ditan chichajak: —Imatjakjumek atum jukijum achigtajum; wika ni pegkegchau takasbaujin mantamnainnak deka-juachjai, tau.

<sup>7</sup> Tutai judío apuji aidau aiinak: —Jutii chicham umiktin agagbauwa nui tawa nunisag jamainai, wagki Apajuí Uchijiyaitjai tumamu asa, wajaidau.

<sup>8</sup> Tuinamun Pilato antuk, nuní senchi ishankauwai.

<sup>9</sup> Nunik jega niina pujusá inamtaijin ataktú wayá Jesusan iniak: —¿Amesh tuwiyam-paitpa? tau.

Tujash Jesusak aikchauwai.

<sup>10</sup> Nunitai Pilato chichaak: —¿Wagka aigtsume? ¿Dekatsmek wi achigtajum takunush, nuniachkunush akupkatajum tusanush tumainaitag duka? tau.

<sup>11</sup> Tutai Jesús ayaak: —Mina Apag dutikata tujamchakuig makichkish minak dutikatum tujutmaitsume; untsu mina aminí itajuawaja nu ainawai amina nagkaetamsau tunamaina duka, tiuwai.

<sup>12</sup> Nuna tutai Pilato Jesusan utugsanuk jiikiag tusa kakantu; tujash judío aidauk senchi untsumkag: —Aanú jiyakmek Roma apuji Cesara nuna kumpajichu atatme, ashí aents reyyaitjai tumamuk, Roma apuji Cesara nuna shiwaji weak tawai, awajuidau.

<sup>13</sup> Nuna Pilato antuk, Jesusnak agaa jiikiuwai, nunik chicham dekaku ekeemtaijin ekeemsauwai hebreo chichamnum Gabatá tutainum. “Gabatá” tawa nunak “Kaya ukatkamu” taku tawai.

<sup>14</sup> Pascua jegatin asamtai uminainak batsatbaunum, etsa tajiastatak wajasú ai, Pilato judío aidaun chichajak: —¡Rey atumdaunak jui itantajime! tau.

<sup>15</sup> Tujash ditak senchi untsumkag: —¡Dakitaji! ¡Dakitaji! ¡Achigtá! wajaidau. Imatiagtai Pilato iniak: —¿Atumi reygminash achigtag? tau. Tutai sacerdoté apuji aiinak: —¡Lina reyjig imá Roma apuji Cesara duke! tuidau.

<sup>16</sup> Tiagtai Pilatoshkam achigtinme tusa ditan susauwai, dutikamtai suntag aidau Jesusan jukiajui.

### *Jesús achigbau*

(Mt. 27.32-50; Mr. 15.21-37; Lc. 23.26-49)

<sup>17</sup> Dutikam Jesusak cruz ni achinjatnun yanakí jiinkiuwai, “Buuk sakaju” tutainum weak, hebreo chichamnum Gólgota tutaiya nui.

<sup>18</sup> Nuwi achijajui, dutikainak niijai nuigtú jimajan achijag, Jesusan ejapeawag awajawajui.

<sup>19</sup> Dutikawagmatai Pilato: “JESÚS NAZARETNUMIA, REY JUDÍO AIDAUNU” tusa agajui, dutika cruznum adutuktajum tiuwai.

<sup>20</sup> Kuashat judío aidau nu agagbau ausajui, wagki Jesús achigbauk yaaktanum tikiju au asamtai; nu agagbauwa duka hebreowai, latigkai nuigtú griego chichamai agagbau aajakui. <sup>21</sup> Nu dutikamu asamtai, sacerdoté apuji aidau, tikich apu aidaujai Pilaton jegaantag aujuinak: —Judío aidau reyji tusamek agajaipa; tutsuk, juka: “Judío aidau reyjiyaitjai” tinuwe nuuwai tita, tuidau.

<sup>22</sup> Tiagtai Pilato ayaak: —Wi agagmag duka, nunisag atatu, tiuwai.

<sup>23</sup> Suntag aidau Jesusan achijag, jaanchjin jujukiajui, dutikawag ipaksumta imajin ichiajag makí makich tinamdaekajui. Nuigtushkam tunicajinash jukiajui apijachbau ayatak yakiin nagkama awantua nulgá inagnakbau aajakua nuna;

<sup>24</sup> dutikawag, pempeentunisag chichainak: —Juka ichiagchagmi, yana kayajig jiinkit nu jukiti, tiajui.

Nuní uminkauwai, duik Agagbaunum: “Mina jaanchjunak ditak tinamdaekaje, dutikainak mina jaanchjun yana kayajig jiinkit nu jukiti tiaje”, timawa duka. Junak suntag aidau dutikawajui.

<sup>25</sup> Cruz Jesús achigbaunum niina dukují, dukujiya nuna kai, tikich María Cleofasa nuwe, nuigtú María magdalanmusa aatus tikiju ijunaidau.

<sup>26</sup> Nunitaman Jesús dukujin wainak nuigtú ni jintintaiji anetaiijiya dusha nuig wajau asamtai, dukujin chichajak: —Dukuwah, yamaik anuwai uchigmik, tau.

<sup>27</sup> Nuna tii, jintintaijin chichajak: Anuwai amina dukuk, tiuwai.

Nu tima ajumag niina jeen jukiuwai.

### *Jesús jakamu*

(Mt. 27.45-56; Mr. 15.33-41; Lc. 23.44-49)

<sup>28</sup> Nuna tii, Jesús ashí ni dutikmainjin uminkaun dekau asa, Agagbauwa nu uminkati tabaunum: —Kitamajai, tiuwai.

<sup>29</sup> Tutai nui buitsnum vino chujuau bete pujau asamtai, nu chujuauwa nujai esponjan uchupjag numi hisopo kanawen ayai takuji aapawajui.

<sup>30</sup> Dutikam Jesús vino chujuau uwag chichaak: —¡Yamaik ashí umikjai! tusa tsuntsumá jakauwai.

### *Jesús bijagnum nagki ijumu*

<sup>31</sup> Judío aidauk Pascua atin asamtai uinaidau asag, iyashik cruznumak juwakchati tuidau tsawan ayamtaiya duka dekas puyatjusa diitai asamtai, nuninak Pilaton jegajag chichajuinak: Suntag ishitkata aents cruznum detaina nuna kagkajin kupijag, ashí kuwajag yajuaktinme tuidau.

<sup>32</sup> Tima suntag aidaushkam wejiajui, nunikag Jesusjai achigbau aidau dekatkauwa nunaan nuigtú tikichia nunashkam kagkajin kupigkajui.

<sup>33</sup> Nuna dutikawag Jesusan jegantun diikmag jakaun wainkajui, nunikmatai kagkajin kupigkachajui.

<sup>34</sup> Dutikamu aig makichik suntag nagki bijagnum iju ichigkui, dutikamuik numpa yumijai jiiinkiuwai.

<sup>35</sup> Wika nunak dekas winkau asan etsegjai, winkachbaugnak etsegtsujai. Wi wainai dutikawaju asagmatai, atumshakam shiig dekaatajum, nunikjum dekaskeap nunikuuta timinjum tusan uajajime.

<sup>36</sup> Nu nunikajua duka Agagbaunum: “Makichik ukunchigkesh kupigkachbau atinai”, tibauwa nunú uminkauwai.

<sup>37</sup> Nuigtú tikich Agagbaunumash: “Ijumun wainkagtin ainawai”, tawai.

### *Jesús ukusbau*

(Mt. 27.57-61; Mr. 15.42-47; Lc. 23.50-56)

<sup>38</sup> Nu ashí dutikamu ai, José arimateanmaya Jesusa jintintaiji asa, judío aidaun ishamak wakenmataik Pilaton jegajua, Jesusa iyashin jukitjai tusa segauwai; tama Pilatosham dutikata tiuwai, tima weji Jesusa iyashin jukiuwai.

<sup>39</sup> Nicodemo Jesusan yaunchuk kashi ijagsatatus jegajuauwa dushakam, kugkuin mirra, áloe tutajjai pachimjamun treinta kilos takus tauwai.

<sup>40</sup> Nunikmatai Joseshkam nujai atuegak Jesusa iyashin jukiag, jaanchin kugkuidai ukatuk pempeajag, judío wajuk ukuumau ainawa dutiksag ukusajui.

<sup>41</sup> Nunú Jesús achigbauwa nuig ajak ajakbau au, nunú ajak ajakbauwa nuig ukuumatai yamajam makichik aentskesh ukuschamunum,

<sup>42</sup> judío aidau pascuaji atinun uminaidau asag, Jesusa iyashinak jukiag ukusajui, nu ukuumatai imá tikiju asamtai.

## 20

### *Jesús nantakbau*

(Mt. 28.1-10; Mr. 16.1-8; Lc. 24.1-12)

<sup>1</sup> Tumig tsawaju ai, María magdalanmaya kashikmas, suwe aig Jesús ukusbaunum weuwai, nunikmá kaya aputukbau ekekam atatman wainkauwai;

<sup>2</sup> nunik tupikaki, Simón Pedro tikich Jesusa jintintaiji anetaiijiya nu pujamunum weuwai, nunik jegawag: —Iina Apujin ukusagma nunak jukiaje, tujash dekatsji tuwig ukusaje, tusag ujadau.

<sup>3</sup> Tusa ujakajam Pedro tikich Jesusa jintintaiijiya nujai ukusbaun diisagtatus weajui.

<sup>4</sup> Nunik mai tupikaidau, tujash tikich jintintaiiya nu Pedro nagkaesau tupikau asa, niyyá eemak Jesús ukusbaunum jegantui;

<sup>5</sup> nunik tekená diikmá, imá jaanchnak wainkauwai, tujash nigka wayachui.

<sup>6</sup> Nuniai Simón Pedroskam niina ukujin tantauwai, nunik Jesús ukusbaunum wayaa, diikmá imá jaanch aidauk atatman wainkauwai,

<sup>7</sup> nuigtushkam Jesusa buuké jaanchi pempenjamu ajakua duka, iyashí pempeagbauwa nujai ijunag achau, kanaká pempeajam tepaun wainkauwai.

<sup>8</sup> Nuniai tikich jintintai ukumatainum eemak tantauwa dushakam wayauwai, nunikmá wainak, dekaskeapi tiuwai.

<sup>9</sup> Ditak Apajui chichamen agagbaunum: Jesusak maamash ataktú nantaktinai tibauwa nunak anenachui.

<sup>10</sup> Nuna dutika diisag jintintaiji aina duka ditá jeen wakitkijui.

### *Jesús María Magdalanmaya wantintukbau*

(Mt. 28.1-10; Mr. 16.9-11; Lc. 24.10)

<sup>11</sup> Tujash Mariak agaa Jesús ukusbaunum buutú wajau; nunik buutkabaikia Jesús ukusbaun tekenas diikmá,

<sup>12</sup> jimag ángel pujun nugkuaju aidau Jesusa iyashí ukukbau aajakua nui chaiknum makichik eketai, tikich dawenmanini ekeematman wainkauwai.

<sup>13</sup> Dutikam ángel aidau iniinak: —Nuwah, ¿wagka buutme? Tau. Tama ni ayaak: —Mina Apujun jukiaje, tujash tuwig ukusaje nuna dekachu asan butjai, tiuwai.

<sup>14</sup> Nuna tusa ayampakmá Jesús nui wajattaman wainkauwai, tujash dekaachui niimpapita tusag.

<sup>15</sup> Nunitai Jesús iniak. —Nuwah, ¿wagka buutme? ¿Yaa egame? tau.

Tama nigka, ajak ajakbauwa nuna kuitamnuskaitai tau asa: —Apuh, ame jukiuwait-kumek, tuwí ukusmaume nu ujakata, wi jukitjai, tau.

<sup>16</sup> Tutai Jesús ayaak: —¡Mariah! tiuwai. Tama ayampatua diikmá Jesusan wainak: —Raboni, tiuwai, (duka arameo chichamnumag: Maestro taku tawai).

<sup>17</sup> Nuna takug achikta tama Jesús chichajak: —Achigkaipa, eke mina Apajuig weatsjai; wetá mina yatsug batsatbaunum nunikam ujaktá: Mina Apajuí weajai, atumnash Apa nui nuigtú mina Apajuig atumnash Apajuigmea nui timae tusam, tiuwai.

<sup>18</sup> Nu tima María magdalanmayashkam weuwai, nunik Apu Jesús wainkamujin nuigtú ni tibaujiya nunash jintintaiji aidaun ujakajui.

*Jesús jintintaiji aidau wantintukbau*

(Mt. 28.16-20; Mr. 16.14-18; Lc. 24.36-49)

<sup>19</sup> Nunú tsawantinig tumig kintabaunum, jintintaiji aidau judío ishamainak waitinak epenjag pujuinai, Jesús ejapan wajantú, nunik ditan kumpamak: —Apajuí atumnash shiig agkan pujutan amastinme, tiuwai.

<sup>20</sup> Nuna tusa, uwejí achigbau aidaun nuigtú bijagnum nagki ijumunash iwaintukui. Nunitai jintintaiji aidaushkam Apu Jesusan wainkag shiig aneasajui.

<sup>21</sup> Dutika Jesús awentsag: —Apajuí atumnash shiig agkan pujutan amastinme. Mina Apag awetiwa dutiksanuk atumnash awemajime, tiuwai.

<sup>22</sup> Nuna tusa ditainini suut umpuiniuwai, dutika: —Wakaní Pegkeji jukitajum.

<sup>23</sup> Atum ju nugka jui tsagkujashbauk, nayaimpinmashkam tsagkugnagchatnai. Untsu atum ju nugka juish tsagkujamuk nayaimpinmashkam tsagkugnagtinai, tiuwai.

*Tomás dekaskeapi tichamu*

<sup>24</sup> Tujash Tomás doce aina nuiya Jimagmamu tutaya duka, Jesús wayauwa nuig atsau asa wainkachui.

<sup>25</sup> Nuniku asamtai tikich jintintaiji aina nu: —Apu Jesús wainkamji tuidau. Tama ni chichaak: —Wika uwejin clavowai achijagmaya nuna wainkan tsajam uwejuish inujuan diigtsukek nuigtú bijagnum ijuagmaya nunash inujuan dekapsukek dekaskeapi tumaitsujai, tau.

<sup>26</sup> Ocho tsawan nagkaemakui ai, jintintaiji aidauk makichik jeganum ataktú ijunajui, nuanuig Tomasah pujau. Waitinak shiig epenag batsataig, Jesús ejapan wajantá kumpamak: —Apajuí agkan pujutan atumnash amastinme, tiuwai.

<sup>27</sup> Nuna tusa Tomasah chichajak: —Jui tsajam uwegmin inuata, dutikakum mina uweg aina nu diistá; uwejum intantá nunikam mina bijagui inuata. ¡Dekaskeapi tuchauk aipa, dekaskeapi tinu atá! tiuwai.

<sup>28</sup> Tama Tomás senchi chichaká: —Mina Apujuh, amek mina Apajujujuitme, tau.

<sup>29</sup> Tutai Jesús ayaak: —Tomasah yamai mina waitkaum dui, dekaskeapi tujutme. ¡Mina waitkachuitak dekaskeapi tujutiú aina nu shiig aneasagtinai! tiuwai.

*Wagka ju papish agagbauwaita nu pachisa tibau*

<sup>30</sup> Jesús aents aidau dutikmainchaun ashí iwainag niina jintintaiji aidaush wainainanunum takasua duka, ashí ju papinumag agagchamui.

<sup>31</sup> Nuniaig juka: Atumesh Jesusak, Cristo Apajuí Uchijimpapita, tusajum dekaskeapita takujum, pujut tuke atina nu jukimnujuk, tusan agatjime.

## 21

*Jesús jintintaiji aidau ataktú wantintukbau*

<sup>1</sup> Nuna nunik, Jesús jintintaiji aidau kucha Tiberias tutai tugkitken batsatun ataktú wantintukui. Nunak juní nunikui:

<sup>2</sup> Simón Pedrojai ijunjag, Tomás Jimagmamu tutaiya nu, Natanael Caná Galilea awa nuiya, Zebedeo uchijiú aidau, nuigtú jimag Jesusa jintintaiji aidau batsataidau.

<sup>3</sup> Nuninamunum Simón Pedro chichaak: —Namakan maatjai, tau. Tutai, ditashkam: —Jutijai wegagmi, tusag barcanum egkemjag weajui, nunik nu kashia duik makichikish maachajui.

<sup>4</sup> Nunikag yamá tsawaig, Jesús kuchanum uwetus wajau, tujash jintintaiji aidauk, Jesusapi tichajui.

<sup>5</sup> Nuniai Jesús: —Uchig aidauh, ¿makichik namakkesh maachugmek? tau.

Tama dita aiinak: —Atsah, tiajui.

<sup>6</sup> Tiagtai Jesús chichaak: —Redjum barcanum untsuja atú ajugtajum, dutikakjum achiktatjume, tama ajugkajui dutikam kuashat namak chimpimkamtai jiiktakamag tujinkajui.

<sup>7</sup> Nunitai Jesusa jintintaiji anetaijiya nu Pedron chichajak: —¡Auk Apu Jesusai! tau.

Tabaun Pedro antamuik awimaku asa jaanchjin nugkujui, nunik tseke namaká iyagkui.



<sup>8</sup> Nuniai tikich jintintaiji aidauk barcanum anumkaju rednum namak chimpimkaun japisag, cien metros tumain yujau asag.

<sup>9</sup> Nunik kukag jiinkamag jii ikapagbaunum, makichik namak pagjai jiyamun wainkajui.

<sup>10</sup> Dutikainai Jesús chichaak: —Namak achikujum nu ujumak itatajum, tiuwai.

<sup>11</sup> Tutai Simón Pedro barcanum egkemjau, nunik retan kukag jiikiu, namak muun aidau ciento cincuenta y tres imaan piyakun, imaan chimpimkauwaitkush rednak ichighchauwai.

<sup>12</sup> Nunikmatai Jesús chichaak: —Tantajum yuwatajum, tiuwai.

Makichikish jintintaiji aina duka iniaschajui: ¿Amesh yaitpa? tusag, wagki Apu Jesusan dekaidau asag.

<sup>13</sup> Nuna tii, Jesús jegantá, pagkan juki tinamak, dutiksag namaknashkam tinamkauwai.

<sup>14</sup> Nunak Jesusak jakau nantakí kempatuma jui jintintaiji aidau wantintukui.

*Jesús Pedron kempatumá iniasbau*

<sup>15</sup> Yujumak yuwá nagkankamunum Jesús, Simón Pedron iniak: —Simón, Jonasa uchijiyah, ¿minash jujú aina juna nagkaesauk anentam? tau.

Tama Pedro ayaak: Ehé Apuh, ame wi anejam duka dekagtame.

Tutai Jesús chichajak: Uwig midau aina nu kuitamkata, tau.

<sup>16</sup> Tusa awentsag iniak: Simón, Jonasa uchijiyah, ¿minash anenmek? tau.

Tama Pedro ayaak: Ehé Apuh, ame wi anejam duka dekagtame, tau.

Tutai Jesús chichajak: Uwig midau aina nu ayujata, tau.

<sup>17</sup> Tusa kempatuma juna iniak: Simón, Jonasa uchijiyah, ¿minash anenmek? tau.

Tama Pedro wake besekú, kempatuma juish: ¿Anenmek? tabau asa. Nunik Pedro ayaak: —Apuh, amek ashí dekame, wi dekaskenum anejam duka, tau.

Tama Jesús ayaak: Uwig midau aina nu kuitamkata.

<sup>18</sup> Dekas tajame, amek aan datsauch asamek, amek nugkujam ame wakegamunum wejaukuite; tujash muuntuch wajastatam nuig, kuntujum dakuekamin tikich anugtam-jagtinai, dutijama ame wakegachbaunum jujamkiag etabiagtinai, tiuwai.

<sup>19</sup> Nunak Pedro wajuk maam atinaita nuna ujaak tiuwai. Nuna tii: —¡Nemagtukta! tiuwai.

*Jesusa aneetaiji pachisa chichasbau*

<sup>20</sup> Tima Pedro ayampá niimkamá, Jesusa jintintaiji niina aneetaijiya nu, agkú yuwamunum niini ayaumas ekeemas: —Apuh, ¿yaita amina supupaktinush?, tusa iniasua nu minittaman wainkau.

<sup>21</sup> Nuna Pedro wainak, Jesusan iniak: —Apuh, ¿jusha wajukatnaita? tau.

<sup>22</sup> Tama Jesús ayaak: Wi wakegaknuk nigka iwaaku pujaig taatin atajai tumainaitjai. ¿Wagka amesh dusha uyumame? Amek tutsuk nemagtukta, tiuwai.

<sup>23</sup> Nunú tibauwa nunak yachi aidau nu jintintaiya nunak jakashtinai tine tabaun antujajui; tujash Jesusak, jakashtinai tichauwai: Wi wakegaknuk iwaku pujaig taatin atajai tumainaitjai. ¿Wagka amesh dusha uyumame? tiuwai.

<sup>24</sup> Junak Jesusa dekas jintintaiji aajakua nunú, ashí ni wainkamujinak etsejak dekaske tusa agajui. Dutikamu asamtai dekaskeapi tuinaji.

<sup>25</sup> Jesús takasbauwa duka shiig kuashtai, nunú makí makichik pachisa agamak, ju nugka juig ayatak papikes piyakaintai.

Aatus atí.

## Apóstol aidau takasbau

### *Wakaní Pegkeji anagkagtuamu*

<sup>1</sup> Anetaiju Teofiloh, wi yama nagkamchakun papiin agatjabiajam nunak, Jesús ashí takaamujin, jintinkagtamujin nagkamauwa nuna,

<sup>2</sup> nuigtú ni nayaimpinum wakitkiuwa imanuiyan pachisan agatjabiajame. Nunak eke wetsuk Wakaní Pegkeji dutikata tabau asa ni etegjamuji apóstol aidaun jintintuauwai;

<sup>3</sup> nuigtush waitus jaka nantakí, iwaku paan kuashat aents aidaun kuashtá wantintukui cuarenta tsawantai, nuniak Apajui inabaujin pachis ujakajui.

<sup>4</sup> Nui Jesús apóstol aidaujai ijunag yuwak pujus: Jerusalén ukukí wegpaajum juig pujusjum, mina Apag Wakaní Pegkejin amastatjime tusa anagtamamun ujaknajim nunú dakastajum,

<sup>5</sup> wagki Juagkak imá yumiik yamijatjauwai, tujash atumek dukap tsawan atsuk Wakaní Pegkejiya nujai yamigbau atatjume, tiuwai.

### *Jesús nayaimpinum wakitkimu*

<sup>6</sup> Tutai nui ijunag pujuina nu iniinak: ¿Apuh, yamaikik Israelfumash ataktú yaunchuk inamin aajabia nunin awasattam? tuidau.

<sup>7</sup> Tama Jesús ayaak: Atumek dekamaitsugme tsawantak nuniachkugmesh wajutí dutikatjai tusa Apag nigki mamikiauwaita duka;

<sup>8</sup> tujash Wakaní Pegkeji atumiin tajutjamamtai nuna senchijí jukittagme, nunikjum mina pachittsajum jui Jerusalén, ashí Judeanum, Samarianmashkam, nuigtú ashí nugka atushat aina nuwishkam etsegtugkattagme, tiuwai.

<sup>9</sup> Nuna tutai ditash dii ijunaig takuniuwei, nuniaig yujagkim ijikui, nunikmatai awenag wainkachajui.

<sup>10</sup> Nunik Jesús wematai nayaimpin dii ijunai, jimag aents jaanch pujun nugkuaju ditai ayaumas wajaantaju,

<sup>11</sup> nunikag ditan chichajuinak:

—Galileanmaya aents aidauh, ¿wagka nayaimpish diish ijunjume? Jujú Jesús, nayaim wegau wainkaujum junisag ataktush minitnai, tiaju.

### *Matías etegkamu*

<sup>12</sup> Nunú tusa tiajam Olivosa mujají tutainum batsatu Jerusalén wakitkiajui, nuní imá tikiju asamtaí, chicham umiktinnum tsawan ayamtai tsawagmataig tikujuk wekaenasti tibauwa dui.

<sup>13</sup> Yaaktanum jegawag jega yakí tesamunum wakaju nui batsataidau asag, nuna daajig ju ainawai: Pedro, Juan, Jacobo, Andrés, Felipe, Tomás, Bartolomé, Mateo, Jacobo Alfeo uchijiya nunú, Simón Zelote tutai, Judas Santiago uchijiya nunú.

<sup>14</sup> Ashí nunú aidauk kashí kashinig makichik anentaiyaik ijunas Apajuin aujuinak ijunaidau, Jesusa yachi aidaujai, María Jesusa dukujiya nu, nuigtú tikich nuwa aidaushkam.

<sup>15</sup> Nunú tsawantín ciento veinte aents tumain ijunajui Jesusa nemajin aidau, nunikbaunum Pedro wajakí chichaak:

<sup>16</sup> Yatsug aidauh, David Wakaní Pegkeji dekamtikam, Judas Jesusan achiktinme tusa unupiatgatinun pachis yaunchuk Agajua duka kuashat mijan nagkaemakne.

<sup>17</sup> Judasag jutijai ijunag wekaegas niishkam jutii takaag jutiksag takaajakui.

<sup>18</sup> (Nuninaitak Jesusan sujuk kuichkin juki nugkan sumakui, tujash nigka nunú nugka ni sumakbauwa nuig kajeemag tsujimak achapai iyaak pujaká ampuijin jiijá jakauwai.

<sup>19</sup> Nu nunikbaunak ashí Jerusalegnunmia aidauk dekawajui, nunikag nuna nugkan ditá chichamen Acéldama adaikajui, nunak “Nugka Numpeagbau” taku tiaju.)

<sup>20</sup> Nuna tusa nuigtú Pedro chichaak: Wagki duka salmosnum agagbauwai:

“Niina jeeg ukumkimu atatui, makichik aentskesh nuig pujuschatnai, nuigtushkam:

Niina takatjinak tikich takastinai”, tusa.

<sup>21-22</sup> “Nu tibau asamtaí makichik etegkami, Apu Jesús jutijai pujusmatai tuke ijunag yujasaju jutijai batsatina nuiya, Juan Jesusan yamijua dui nagkamas tuke Jesusjai wekaegas nayaimpinum wegaunash wainkauwa nu, dutikamu asa jutijai betek Jesús nantakbaun pachisash shiig etsegmainai”, tau.

<sup>23</sup> Timatai, jimajan ju atí tiaju, José Barsabás tutai, Justo tuuta awagmatia nuna nuigtú Matiasan.

<sup>24</sup> Dutikawag aatus Apajuin aujuinak: “Apuh, ame ashí aentsú anentaimtajig wainam ibau asam, iwainkagtukta, ya ju jimaja juwiyash etegkaume nunú,

<sup>25</sup> dutikamu asa niishkam Judas, apóstol atí tibauwa nu, ni dutikata tabaujin wejag ukukí nuna takastí tusam”, tiajuí.

<sup>26</sup> Dutikawag, yana kayajig jiintukit tabaunum, Matiasdau jiinkiuwai; nunikmatai once apóstol aina nuanui Matiasan pachiauwai.

## 2

### *Wakaní Pegkeji taamu*

<sup>1</sup> Tsawan Pentecostés jegamtaí, ashí makichkinmag ijunjag batsataidau.

<sup>2</sup> Nuninai, pachiaichbau nayaimpinmaya dase senchi dasentak kedegtuwama imatuk, jegá dita pekagbaunum tauwai;

<sup>3</sup> nuniaig, wantinjauwai jii kegama numamtin aidau, nunik ditan makí makichik kanajug pekamtujui;

<sup>4</sup> nunikmatai Wakaní Pegkeji ashí egkemtujajui, dutikam tikich chichaman chichaidau Wakan chichamtikamua dutiksag.

<sup>5</sup> Nu tsawanta duik, judío aidau Apajuí puyatjus umijin ashí tikich nugkanum batsamin aidau Jerusalén kaunawag batsataidau.

<sup>6</sup> Nu imatuk kedegtamun antukag aents aidauk ijunjajui; nunikag puyatkajui, wagki makí makichik ditá chichamen chichaidaun antuidau asag.

<sup>7</sup> Nunik puyatkg anentai jegachag chichainak:

—¿Ju chichaina jujú ashí galileanmaya ainatsuak?

<sup>8</sup> ¿Wajukaya chichainawa makí makichik iina chichamen chichaidau antuinag dusha?

<sup>9</sup> Juwig partianmaya aidau, medianmaya aidaush, elamnumia, mesopotamianmaya, judeanmaya, capadocianmaya, pontonmaya, asianmaya,

<sup>10</sup> frigianmaya, panfilianmaya, egiptonmaya nuigtú Libia nugka aina nui, Cirene tikiju awa nuyia, Roma batsamnushkam juig pujuinawai;

<sup>11</sup> ujumak judío aidau nuigtú judío atajai tumabiag judío waigkú aidau, cretanmaya aidaushkam nuigtú arabianmaya aidaujai antuinaji iina chichamen Apajuí imanjin pachisag chichainamu.

<sup>12</sup> Tusag ashí puyatkaju, nunikag shiig anentaimainchau dekapenak, pempeentunisag iniininak:

—¿Jusha wagka juninawa? tudayinau.

<sup>13</sup> Tuinai tikich aidau dushikinak:

—Nampejajama, tuidau.

### *Pedro chichakbau*

<sup>14</sup> Tiagtai Pedro, once aina nujai wajainiag, senchi chichaká: “Mina pataag judío aidauwah, nuigtú ashí atum Jerusalén batsamin aidautigmesh, jujú shiig dekaatajum wi titatjim nu.

<sup>15</sup> Atum nampegchajeash tajum duka nuninchauwai, yamá a las nueve weawai;

<sup>16</sup> juka profeta Joel nuniktinai tusa etsegkamua nuuwai, duka:

<sup>17</sup> “Tsawan inagnamunum, Apajuí tawai, mina Wakanjun ashí aentsun susatnaitjai. Dutikawajam atumi uchijum aidau, nuigtú nawanjum aidaushkam mina pachittsag etsejiagtinaí; nuniamnunum

datsauch aidauk paan wainiagtinaí, nuninai muuntuch aidauk kajanum kajabiagtinaí.

<sup>18</sup> Aikasnuk aishmag, mina inakeg aina nuna, nuigtú

nuwa mina inakeg aina nunashkam nu tsawan atina duik mina Wakanjun susatnaitjai.

Dutikawajam mina pachittsag etsetgujiagtinaí.

<sup>19</sup> Yakí nayaimpinum nuigtú nugkanmashkam nuninush wainchatain iwaintuktinuitjime: Numpan, jiiin, yujagkim aidau bukuitamun.

<sup>20</sup> Etsag suwe wajastinaí, nantushkam numpa wajastinaí,

eke Apu Apajuí senchijijai tsawan wajas minitna nu jegatsaig.

<sup>21</sup> Tujash ashí aents Apu Jesusan adaiyas segauk uwemjatnai’,\* tawai.

<sup>22</sup> “Israel aidautigmesh ju chicham antuktajum: Jesús nazaretnumiaya nuna Apajuí awemauwai dutikau asa niina senchijinash susauwai, dutika niini aents dutikmainchau aidaun, anentai jegagmainchau aidaunash nuigtú wainchatai aidaun atumin iwaintugmakajua duka atumek shiig dekaume;

<sup>23</sup> nunú sujukuitjume Apajuí wajuk dutikatasa emtikak dekauwaita dutiksagmek; dutikajum aents pegkegchau aidaujai ijuntugjum cruznum achigjum mau ainagme.

\* 2:21 Jl. 2.28-32.

<sup>24</sup> Tujash Apajúi inankiuwai ni jaak najaimaku waittsamunash agkanmitka, wagki jata duka niinak depetmainchau aajakui.

<sup>25</sup> “Davidchakam Jesusan pachis tiuwai:

“ Wainbaijai mina Apujuk tuke mina emtijui pujaun,

wagki mina untsujui pujawai nuniau asamtai umuchtumainchau ainawai.

<sup>26</sup> Nuadu mina anentaijuk shiig aneawai, nuniak shiig aneas kantamui, nuigtushkam ashí mina iyashjuk niinu dekas atatu;

<sup>27</sup> wagki mina wakanjuk Hadesnumak idaisashtatme, nuigtush aminu Pegkegma duka kaugtí tichattame.

<sup>28</sup> Ame iwaintugkauwaitme jinta aidau pujutnumiaya nunú;

Dutijuam shiig aneemtijustatme ame pujau asam'.<sup>†</sup>

<sup>29</sup> “Yatsug aidauh idaitustajum paan titajime, iina muunji David aajakua duka jakauwai, nunikmatai ukusaju ainawai, nu ukusbauk yamaikish jutiini awai.

<sup>30</sup> Tujash Davitak profeta aajakui, nuniau asa dekakui Apajúi chicham yapajimainchawai anagkuak, ame weantunmayan makichik ame ekeemtaigmin ekentsatnaitjai tibauwa nuna.

<sup>31</sup> Nuna aatus emtikak Cristo aneantinun wainu asa, wakanig Hadesnumag juwakchatnai iyashgkesh kaugchatnai tiuwai.

<sup>32</sup> Nunú Jesusa nuna Apajúi inankiuwai, duka jutii ashí wainkau ainaji.

<sup>33</sup> Dutika eme anentai awajus nuigtú Apajúi niina untsujin ekentsam, Apají Wakaní Pegkejin anagtamauwa nuna juki sukagtusa nunú wainkaugme nuigtush antukugme.

<sup>34</sup> Wagki Davidchauwai nayaimpinum wakauwa duka, nigki juna:

“ ‘Apu mina Apujun chichajak, ekeemsata mina untsujui,

<sup>35</sup> wi amina shiwajum aidaunak amina dawemin ikautkatjame’,<sup>‡</sup> tiuwai.

<sup>36</sup> “Nunin asamtai shiig dekaskea ju ashí Israel aidautigmek dekaatajum, nunú Jesús atum achigbauwa nuna Apajúi etegka atumi Apujum nuigtú uwentikagtin awasae”.

<sup>37</sup> Nuna antukag shiig senchi anentain najaimawaju, nunikag Pedron nuigtú tikich apóstol aidaun iniinak:

—Yatsug aidauh, ¿jutiish wajukmainaitji? tuidau.

<sup>38</sup> Tiagtai Pedro ayaak:

—Tudau takat idaikum pujutjum yapajiatatum, nunikjum makí makichik yamimagtatum Jesucristo daajin, tudau tsagkugnagtag tabaunum; nunikjum Wakaní Pegkeji jukittagme.

<sup>39</sup> Wagki Apajúi anagkagtuamua duka atumdau ainawai, atumi uchijum aina nudau, nuigtú ashí atushat batsataina dushakam; ya aidauna Apu Apajúi untsuktatus wakegawa nudau ainawai.

<sup>40</sup> Nuigtú kuashat tikich chichamnash etsejak aents aidaun chichajak tiuwai:

—Aents pegkegchrau aina duka ukuktatum.

<sup>41</sup> Nu tabaun chichaman antukag yamimakajui; nunikag nunú tsawanta duik tres mil aents tumain kawegkajui.

<sup>42</sup> Nunikag apóstol aidau jintiamua dutiksag umidau, nuninak shiig ijuntsag pempeentunisag yainidau, nunisag pagkan yuinak Apajuinash aujuidau.

*Nagkamchak Jesusa nemagkaju aidau pujutji*

<sup>43</sup> Ashí puyatjusag diidau aents aidauk, kuashat aents dutikmainchaun dutikainak apóstol aidau iwainagtai.

<sup>44</sup> Ashí Jesusa dekaskeapi tiaju aidauk makichik anentaiyaik ijunaidau, nunidau asag ashí waji aidaush betek ajuidau;

<sup>45</sup> ditá nugken nuigtú wajuijinash sujukag, ashí makí makichik atsumaina dutiksag akandayidau.

<sup>46</sup> Kashi kashinig jega Apajúi ememattainum ijuntsagké aidau, nuninak ditá jeenish ijunag shiig aneas wakegat anentaiyai pagkan yuidau,

<sup>47</sup> nuninak Apajuin emematuinak, imadiagtai ashí aents aidaushkam wakejus diidau. Nuniagtai Apu Apajuishkam kashi kashinig aents uwemaidaunak ikaweau.

### 3

*Aents wekaechau etsagagbau*

<sup>1</sup> Makichik tsawantai Pedro, Juagjai jega Apajúi ememattainum weedau a las tres wajasú ai, Apajúi aujtai jegaun asamtai.

<sup>2</sup> Nuanui jega Apajuí ememattai waitiji daaji Shiijam tutainum, aents akiinmawaik shutú akiinai pujau, nuna kashí kashinig itan apujuidau, nui aents wainiagtai kuichkin segamti tusag.

<sup>3</sup> Nunin asa Pedro Juagjai jega Apajuí ememattainum wayatatus minidaun wainak:

—Wait aneamam kuichik sujustá, tusa segau.

<sup>4</sup> Tama Pedro Juagjai esetug diinai, nunik Pedro chichajak:

Dijattsata, tiaju.

<sup>5</sup> Tama niishkam diyau piipichinakesh sujustatuapi tusa.

<sup>6</sup> Nunitai Pedro chichajak:

—Kuichkik atsugtawai, oroshkam atsugtawai, tujash ajuta nuna amastajame; Jesu-cristo nazaretnumliaya nuna daajin wajaktá nunikam wekaesata.

<sup>7</sup> Takug uwejí untsujin achiká awajkiu, dutikamuik nawenig nuigtú wanusenish pegkeg wajasú.

<sup>8</sup> Nunik tseke wajakí wekagu, nunik ditajai ijunag jega Apajuí ememattainum nigki wekaegas tsekeas dekapki, Apajuí emematki wayau.

<sup>9</sup> Ashí aents aidau wekaegas Apajuin emematun wainkag,

<sup>10</sup> senchi puyatkaju nuigtush ishankaju nu nunikmatai, nu aentsnak jega Apajuí ememattai waitiji Shiijam tutainum ekeemas kuichkin segamnun wainin asag.

*Salomón waiti aagjamu tutainum Pedro chichakbau*

<sup>11</sup> Shutú etsagagbauwa duka Pedronak, Juagjai idaichau, nunitai ashí aents aidauk puyatkag pisajag Salomón waiti aagjamu tutainum pujuagtatman jegaantaju.

<sup>12</sup> Nunidaun Pedro wainak aents aidau chichajak: “Israel aidauwah, ¿wagka ju junikmataish puyatkaugme? ¿Wagka iina senchijin nuniachkuish jutii pegkeg takau asaja ju aents awajkim wekaekui diimaina imatikagtagme?”

<sup>13</sup> Junak iina muunji Abraham, Isaac, Jacob aina nuna Apajuí, iina muunji aajakajua nuna Apajuí, niina Uchiji Jesusan ememattinme tusa jutikae; atum sujukagmin Pilatok akupkata taig atum dakitjau ainajum nuna.

<sup>14</sup> Atumek Pegkejam Pegkejan takauwa nu dakitjauwaitjume, dutikakjum magkagtina nunú jiktá tusajum segauwaitjume;

<sup>15</sup> dutikakjum mau ainagne pujutan sukagtina nunú, tujash jakamtaish Apajuí inankiuwai duka jutii wainkau ainaji.

<sup>16</sup> Jesusa daaji dekaskeapi tabaunum ni etsagaje, atum wainjum junak nuigtush dekaikum nunak; ni dekaskeapi tabau asa shiig etsagaja juka atumesh ashí wainjume.

<sup>17</sup> “Yatsug aidauh, atumek dekachu asajum apujum aidaujai dutikauwaitjum nunak, dekajai.

<sup>18</sup> Tujash junak Apajuí umiké, yaunchuk ashí niina profetaji aajakajua nui niina Cristujig aatus waittsatnai tusa etsegkauwa nuna.

<sup>19</sup> Nunin asantai tudau takat idaikujum pujuttum yapajiatatum, atumi tudaujum aidauwash esaktumagtinme, dutijamawag Apajuí ichichamantan amastinme;

<sup>20</sup> dutika Apajuí Cristo Jesusan awetugmati yaunchuk tujamajua nuna.

<sup>21</sup> Yamaikik Jesucristuk nayaimpinmag pujuttawai, nuniai Apajuí ashí waji aidau yamagmitkamu tsawan atinun, yaunchuk niina profetaji pegkejam aidau batsamajakajua nui etsegkauwa nu jegati tusa.

<sup>22</sup> Moiseschakam iina muunji aajakajua nuna chichajak: ‘Apu, atumi Apajuigmia nu, atumi yatsum aina juiyan etegkatnai makichik profetan wiya juninun; dutikamtai mina antugtatum jutiksagmek ashí waji aidau tujamtina duka umigkatatum;

<sup>23</sup> wagki ashí aents nunú profeta tabaun antugchawk niina aentsjig achagtinaí’,\* tiuwai.

<sup>24</sup> “Ashí profeta aidau, Samuel pujujakua nui nagkamas batsamsajua dushakam, ju tsawan aidau pachis etsegkaju ainawai.

<sup>25</sup> Profeta aidau Apajuí anagkauwa duka atumdauwai, nuigtú jutii muunji aajakajua nujai chichaman apakajua dushakam, Abrahaman chichajak: ‘Ashí nugkanmaya aents aina duka, amina tijajum akiinak weagtina nuiya makichik akiinatna dui pegkegnun yumigsamu agtinai’,† tiuwai.

<sup>26</sup> Apajuí ni Uchijin inanki dekatkauk atumná awetugmae, pegkegnun yaimpaktinme dutikam maki makichik tudaujin idaiyinak yapajinatnume tujamu asa”.

## 4

*Pedro Juagjai apu aidau eemtin chichakbau*

\* 3:23 Dt. 18.15, 18, 19. † 3:25 Gn. 12.3 y 22.18.

<sup>1</sup> Pedro Juagjai aents aidaun aujak wajai, sacerdote aidau, jega Apajuí ememattaiya nuna kuitamnun apuji, saduceo aidaujui kautuawaju.

<sup>2</sup> Nunikag kajekaju, Pedro Juagjai aents aidaun jintintuinak; jakau aidau nantagtinnak, Jesús nantaak paan iwainake tuidau asagmatai;

<sup>3</sup> achikag cárcel egkeawag ukukiaju etsa akaegu asamtai, kashin dekajuami tusag.

<sup>4</sup> Tujash chicham etsegbaun antukag kuashat dekaskeapi tiaju aina nu imá aishmag aidauk dekapam cinco mil tumain wajasaju.

<sup>5</sup> Kashinia dui Jerusalén gobernante aidau, judío apuji aidau, escriba aidau;

<sup>6</sup> nuigtú sumo sacerdote Anás, Caifás, Juan nuigtú Alejandro, nuigtú ashí sumo sacerdote aidaun patayi aidaushkam, ijunjaju.

<sup>7</sup> Nunikag, Pedron Juagjai dita batsatbaunum itantagmatai ejapen awaantag iniinak: —¿Yana senchijinia, nuniachkugmesh yana daajinia jusha atumesh jutikagme? tuidau.

<sup>8</sup> Tama Pedro Wakaní Pegkeji tabau asa chichaak:

—Gobernante aidautijum nuigtú Judío aidaun apuji aidautigmeshkam antuktajum:

<sup>9</sup> Atumek aents jau pegkegnum yaigkag nu pachisjum wajukaya tsagaje tusa dekatasajum inijatjume.

<sup>10</sup> Nuniau asajum ashí atumesh dekaatajum nuigtú ashí Israel aidautigmeshkam, ju aents ashí wainjum junak, Jesucristo nazaretnumia atum achigjum maawagmin Apajuí inankiuwa nuna daajin tsagaje.

<sup>11</sup> Nunú Jesusa nuuwai atum jega jegamin aidautijum kaya dakitmaina numamtuk awakau ainajum nunú, dutikamu yamaik kaya dekas jegá ichichkatin apujutia iman wajasé.\*

<sup>12</sup> Makichkish tikich iina uwemtijamainuk shiig atsawai, wagki ju nugka juig Apajuí tikichin adaiyak juna daajin aentsuk uwemjatnume tusa susamuk atsau asamtai, tiuwai.

<sup>13</sup> Pedro Juagjai ajankas chichainamun apu aidau wainkaju, nunikag papinash ausachu, unuimatnash unuimaggchau aina nuna dekaidau asag anentai jegagchaju, nunikag Jesusa jintintaimpap ainawa tusag, dekawaju.

<sup>14</sup> Nuigtush tsagajua dushakam ditajai nuig wajaun wainaidau asag, tumainchau dekapedau.

<sup>15</sup> Nunidau asag Sanedrín† ijunjamunmag Pedronak Juagjai jiikiajui ditak chichasag-tatus:

<sup>16</sup> —Nunikag, ¿Au aents aina dusha utugkattaji? Ashí Jersalegnumia aidauk aents etsagagbaunak pan wainkajajamah; nunin asamtai waitai tusaikish tumaitsuji.

<sup>17</sup> Tujash nuna pachis aents aidaunum etsegkainum tuidau asag “yamai nagkamsag-mek makichik aentskesh Jesusa daaji pachisjumek ujakaigpajum, nu idaichakjuminig suwimkan amastatjime timí”, tuidau.

<sup>18</sup> Tusag Pedron Juagjai untsukaju.

Dutikawag, yamai nagkamsagmek Jesús pachisjumek chichakaigpajum makichik aentskesh jintintuawaigpajum, tiaju.

<sup>19</sup> Tama Pedro Juagjai aimainak:

—Atum nunimainai titajum ¿Pegkegkaih Apajuí eminish, atum umigku ni umigmaitsu dusha?

<sup>20</sup> Jutiik ii wainkamu nuigtú antukuitag dushakam tutsukek idaimaitsuji, tuidau.

<sup>21</sup> Tiagtai apu aidau:

—Suwimkan amastatjime tusag awemaju, suwimak jumainnak waitkachaju asag. Wagki ashí aents aidauk nunú dutikamun wainkag, Apajuin emematuidau asagmatai;

<sup>22</sup> nu aents, aentskesh dutikmainchau aig etsagagbauwa duka cuarenta mijan tumain ajujakui.

### *Jesusa nemajin aidau Apajuí ausagbau*

<sup>23</sup> Pedro Juagjai jiikiajam waketug Jesusa nemajin aidau batsatbaunum jegawag, sacerdote apuji aidau nuigtú judío apuji aidau tiagbaunak ashí ujakaju.

<sup>24</sup> Nuna antukag ashí ijunag Apajuin aujuinak: Apuh, ametme ashí senchigtin nayaim, nugka najanaumek, nayantsashkam ashí nui ayá dushakam.

<sup>25</sup> Ame Wakaní Pegkejiya nui, inakem David iina muunji aajakua nui chichaakum:

¿Wagka aents aidaush pampainawa? ¿Wagka wainkash anentaimainawa?

<sup>26</sup> Nugkanmaya rey aidau nuigtú apu aidaushkam ijunjag, Apu Apajuin kajejuinak ni etegkamu Cristunash kajejuinawai,‡ tiuwaitme.

\* 4:11 Yaunchuk judío aidau, jegamainakug kaya muunta apujtua nui ekeni jeamajakú ainawai. Diistá Sal. 118.22.

† 4:15 “Sanedrín” tawa duka Mt. 5.22num diistá. ‡ 4:26 Sal. 2.1-2.

<sup>27</sup> “Tibau asamtai Herodes nuigtú Poncio Pilatojai, jujú yaaktanum ashí Israel aidau nuigtú judiochu aidaujai ijunjag, Uchijum Jesús pegkejam ame etegkauwaitam nuna kajegkajui,

<sup>28</sup> yaunchuk amina senchigmin nuigtú ame waketagmin nuniktinai tibauwa nuna dutikawagtatus.

<sup>29</sup> Nunin asamtai Apuh wainme amina inakem aidau awantuina nunú, senchijum susata, ditash ishamkagtutsuk chichamjumin etsegkatnume,

<sup>30</sup> nuninak amina senchigmin jau aidau nash etsagainak nuigtush aents dutikmainchaunash amina inakem Jesús pegkegma nuna daajin iwainatnume, tusam”, tuidau.

<sup>31</sup> Tusa Apajuin ausag nagkanbaunum, dita ijunja batsatbau buchitkau; nuniag Wakani Pegkeji ashí egkemtujajui, dutikawajam sapigmakas Apajuí chichamenash etsejuidau.

*Ashí waji aidauk ashí ditanu aajakbau*

<sup>32</sup> Ashí dekaskeapi tiaju aina duka, betekak anentain idajus anentaimtuidau, nunidau asag betek nuninnak anentaimidau. Nunin asag makichkish ditá wajijinak imá midauk atí tusag anentaimainachu, ashí waji aidauk betek aajakajui.

<sup>33</sup> Tuja apóstol aidauhkam Apajuí senchijin Apu Jesús nantakbaun pachis etsejuidau, nuigtush Apajuí ashí ditan wait anentuidau asa senchi yayau.

<sup>34</sup> Dutikamu asag dita aina nuyag makichik atsumaukesh atsumidau, wagki ditá nugke ajamuk nuniachkush jee ajamukesh sujukag kuichkin jukiag,

<sup>35</sup> apóstol aidau itajuidau, dita makí makichik atsumamujin diijus akaantugtinme tusag.

<sup>36</sup> Nuanui José Leví weantu chiprenmaya, apóstol aidau Bernabé adaikajua nu pachitkau, (nunak “ichichkagtinu Uchiji” taku tawai);

<sup>37</sup> nunú nugke ajamu asa sujuk kuichkin juki, apóstol aidau wajuk dutikmainaita nunak dita dutikatnume tusa itajuu.

## 5

*Ananías Safirajai*

<sup>1</sup> Tujash makichik aents Ananías daagtin niina nuwe Safirajai nugkeen sujuku;

<sup>2</sup> dutika nuwejai chichasag, kuichkin akanak ukuinak, tikich akankamun jukiag apóstol aidau wajuk dutikmainaita nunak dutikatnume tusag itajauwai.

<sup>3</sup> Dutikamtai Pedro chichajak:

—Ananiasah, ¿wagka anentaimin Iwanch, Wakani Pegkejin tsanugti tujamkuish antugkaume, nugkem sujukam kuichik jukim aminu akankam ukukiuwaitkumesh?

<sup>4</sup> ¿Eke sujatsminkek nugkak aminuchuka? nuigtú sujukum duish ¿Kuichkik aminuchukai? ¿Wagka jusha juniame? Aents aidaukesh tsanugchaume, Apajuí tsanujume, tau.

<sup>5</sup> Nu tabaun antamuik Ananiasak jaka iyaantu. Nu nunikbaun ashí aents aidau dekawag senchi ishamkajui.

<sup>6</sup> Nunikmatai datsauch aidau tajuntag pempeag jukiaju ukusagtatus.

<sup>7</sup> Nunik tres hora tumain nagkaemaí Ananiasa nuweshkam wayauwai, nigka nu nunikbaunak dekatsuk.

<sup>8</sup> Nunikmatai Pedro iniak:

—¿Nugkem sujakjumes ju kuichkia jukek jukimujum? tau.

Tama nuwa ayaak:

—Ehé, anú kuichkia anke jukimji, tau.

<sup>9</sup> Tutai Pedro ayaak:

—¿Wagka atumesh mai betekash Apu Apajuí Wakanish tsanugta tajume? Anú waitinum tantattak mininawai amina aishumin ukustatus weagma nunú, aanke aminash jujamkiag ukugmasagtatu.

<sup>10</sup> Tamawaik Safirashkam Pedro wajamunum ayaumas jaka iyaantu. Nuniktatman datsauch aidauhkam waikmag jaka tepaun wainkaju, nunikag jukiaju, dutikawag aishi ukusmaunmag ayaunas ukusaju.

<sup>11</sup> Nunikmatai, ashí iglesia aidauk nuigtú ashí nuna dekawaju aidauhkam senchi ishamkajui.

*Aents dutikmainchau kuashat dutikaku iwainakbau*

<sup>12</sup> Apóstol aina nui Apajuí, aents dutikmainchau aidau kuashat aents aidau iwainaidau; nuniagtai ashí Jesusa nemajin aidauhkam makichkinmag anentaimas ijunaidau Salomón waiti aagamui tutaiya nui.

<sup>13</sup> Makichikish tikich aidauk ditajaig ijunmainchau dekapedau; tujash nuninayatak aents aidauk kuashat eme anentuidau.

<sup>14</sup> Nuniamunum Apu Jesusan dekaskeapi tuidaush aishmag aidau nuigtú nuwa aidaushkam aan kuashat kawedau.

<sup>15</sup> Tuja jau aidaunashkam ainká tepetaiijn jukiag nuigtú camilla aidaunum pataidiag jikiag jintanum batsaidau, Pedro nagkaematai makichkinakesh niina wakaní wakanman wajantati, tusag.

<sup>16</sup> Nuigtush yaakat tikijunmaya aidaush Jerusalén kaunaidau, nuninak jau aidaun nuigtú wakan pegkegchau waitkam batsatunash ikaunmaidau; dutikiagtai ashí et-saegkaju.

*Pedro Juagjai waitkasagbau*

<sup>17</sup> Nuniagtai sumo sacerdote nuigtú ditajai ijunag takau aidau, saduceo aidaushkam senchi kajegkaju;

<sup>18</sup> dutikawag apóstol aidaun achikag cárcel yaaktanum au asamtai nui egkeawaju.

<sup>19</sup> Tujash makichik ángel Apu Apajuinu carcela waitiji aina nuna ujati jiyak:

<sup>20</sup> “Wetajum, nunikjum jega Apajuí ememattainum wayajum, ashí ju chicham pujutan sukagtina jujú aents aidau ujaktajum”, tiu.

<sup>21</sup> Nu tabaun antukaja nunisag kashinia dui kashikmas, jega Apajuí ememattainum wayawag jintinkagtuidau.

Nuninai sumo sacerdote nuigtú ditá aentsijjai batsatu kaunawag, ashí israelita apuji aidaun untsukag, sanedrinnun ijunaju, nunikag apóstol aidau cárcel batsatun, utitajum tusag awemaju.

<sup>22</sup> Tujash suntag aidau jegajuawag diikmag wainkachaju, nunikag waketjag ujinak:

<sup>23</sup> —Carcelak shiig epenjamuwe nuigtush suntag aidaush kuitamainak waitinum ijunmae; tujash ujai wayá diikmá wainkachmaji atsuagmae, tuidau.

<sup>24</sup> Tiagtai sumo sacerdote nuigtú jega Apajuí ememattain kuitamin aina nuna capitánji aidaushkam antukag anentai jegagchaju nunikag dusha wajukawagmaki tusag ditak iniinidau.

<sup>25</sup> Nuna tuinaig makichik tanta:

—Atum cárcel egkeamujum duka, jega Apajuí ememattainum aents aidaun jintintak pujuagma jamah, tuidau.

<sup>26</sup> Tiagtai capitán niina suntaji aidaujai wejiag, apóstol aidaun jukiaju tutit awagmat-suk, wagki aents aidau kayai tukujinum tusa ishamaidau asag.

<sup>27</sup> Dutika itawag apu aidau batsatbaunum sanedrín ejegawaju, dutikawagmatai sumo sacerdote chichajak:

<sup>28</sup> —¿Ii Jesusa daaji pachisjume makichikish jintinkagtuawaigpa tichamkajim? Atum nu aaja ashí Jerusalegnunia jintinbau asag, jutií aidautin dita nunú aentsun mau ainawai tujamainawai, tuidau.

<sup>29</sup> Tuinam Pedro nuigtú tikich apóstol aidaujai chichainak:

—Jutiik aents aina nu umigtsuk Apajuí umigmainitji.

<sup>30</sup> Iina muunji aajakajua nuna Apajuíi Jesusnak inankiuwai, atum numinum nenaajum mau ainajum nuna.

<sup>31</sup> Dutika Apajuí niinak ashí nagkaekagtasu Apu nuigtush uwentikagtin awajus untsujiin ekentsauwai, Israel aidau tudaujin idaiyagtai tsagkujati, tusa.

<sup>32</sup> Jutiik dekas waikau asaja etsegi, tuja Wakaní Pegkejiya dushakam dutiksag etsegtawai. Wagki Apajuik niina umijuina nuna Wakaní Pegkejiya nunak suwawai, tuidau.

<sup>33</sup> Nuna antukag kajekaju nunikag maatag, tuidau.

<sup>34</sup> Nuniagtai nunú apu aina nuiya makichik fariseo Gamaliel daagtin, maestro chicham umiktinun jintinkagtin ashí aents aidaun ajantusa diitaiya nu wajakí, apóstol aidaun machik agaa jiktajum tiuwai.

<sup>35</sup> Dutika chichaak:

—Israel aidauwah, kuitamamkatajum jujú aents aidau utugkatag tajume nunú.

<sup>36</sup> Wagki yaunchuk, Teudas witjai apunuk tumamtai cuatrocientos aents saetukajui, nuidau nuna maawagmatai ashí nuna saetin aidauk pampagkajui nunikmatai nui nagkankauwai.

<sup>37</sup> Nu nuniku ainai, Judas galileanmayashkam tsawan aentsú daaji agatbau ai kuashat aentsjintin wajasui, tujash nuna maawagmatai niina saetin aidauk pampagkajui.

<sup>38</sup> Nunin asamtai tajime: Jujú aents aina juka waitkatsuk agkan idaisatajum; juna jutikaina ju ditak juní yujainakug megkaekagtatui;



<sup>39</sup> tujash Apajuinuitkuig atumek depetkashtatjume, kuitamamkatajum Apajuijai maanaikajum aniatsjupash, tiuwai. Nu tamawa nuna pegkeg diisajui.

<sup>40</sup> Nuna tusag apóstol aidaun untsukajui dutikawag asutiawag Jesusa daaji pachismek chichakaigpa tusag akupkajui.

<sup>41</sup> Dutikawajam apóstol aidaushkam apu ukukiag weenak, shiig aneasag dakunkut weedau, Apajui Jesusai waitsatnume tima waituidau asag.

<sup>42</sup> Nunidau asag kashí kashinig jega Apajui ememattainum nuigtú makí makichik jeganmash yamajam chichaman etsejuidau Jesusak Cristui tusag.

## 6

### *Siete diácono aidau adaijamu*

<sup>1</sup> Nunú tsawantin Jesusa nemajuidau kuashat kaweg wenamunum, griego chichau aina nu, hebreo chichau aina nuna chichaman patatuidau, nuwa waje griego aina duka, dita yuwatnuk betek suinachbau asag.

<sup>2</sup> Nudiagtai doce aina nu, ashí Jesusa nemagkau aina nuna ijumjag chichainak:

—Pegkegchawwai jutii Apajui chichame etsegmaina nu idaiku, wajuk yuawagtatua nu uyumaka wekaetuinag duka.

<sup>3</sup> Nunin asantai yatsug aidaauh, atum ainajum anuiya siete yatsug eme anentsá diitai, Wakaní Pegkeji ajamu, shiig anentaimas dutikmain aina nu etegjatajum, nunú aidau ju takatnak diistinme.

<sup>4</sup> Nuninai jutii Apajui aujut, chichame etsegta nujai uyumakagmi.

<sup>5</sup> Nuna aatus tiagtai, ashí aents tuwakaju aidauk wakekaju, nunikag etegkawaju Esteban kuashat dekaskeapi tabaujish ajau nuigtú Wakaní Pegkejish ajamun, tikichin Felipen, Prócoron, Nicanoran, Timogkan, Parmenasan, Nicolás antioquianmaya judío wajasua nujai;

<sup>6</sup> dutika apóstol aidau batsatbaunum ejegawaju, dutikawagmatai ditashkam buuknum achikag Apajuin aujtusaju.

<sup>7</sup> Tuja Apajui chichame etsegbaush nuní senchi wegau, Jesusa nemajuidaushkam Jerusalegak kuashat kawegkaju; nunisag sacerdote aidaushkam kuashat Jesusan dekaskeapi tusag nemajuidau.

### *Esteban achikbau*

<sup>8</sup> Esteban Wakaní Pegkeji ajamu nuigtú Apajui senchijin kuashat aents dutikmainchaun aents aidaunum iwainau.

<sup>9</sup> Jega ijuntai, agkanmagau aidau ijuntai tutainum ujumak, cirenenmaya, alejandrianmaya, cilicianmaya, nuigtú asianmaya aina nu ijunag Estebagjai tudayinau;

<sup>10</sup> tujash niijaig tudaimainchau dekapedau Wakaní Pegkeji dekamtikam chichau asantai.

<sup>11</sup> Nuninak ujumak aentsun akikaju, “Esteban Moisesan pegkegchau chichajak nuigtú Apajuinash pegkegchau chichaju ii antugkamji” titinme, tusag.

<sup>12</sup> Nuna dutikawag aents aidaun ekajkaju, judío aidaun apuji, maestro chicham umiktinun jintinkagtin aidaunashkam; dutikawajam Estebagkan achikag jukiag, sanedrin ejegawaju.

<sup>13</sup> Nuigtushkam tsanumjugtin aidaunash egakaju, dutikam chichainak:

—Ju aentsua juka jega Apajui ememattai pegkegma nuna pachis, chicham umiktina nunashkam pegkegchau chichagtanak idaitsui;

<sup>14</sup> nuniau asa “Jesús nazaretnumiaya nunú junak tsaitkatui, dutikak Moisés juní pujustajum tujabiwa nunashkam yapagkattawai” timayi, tuidau.

<sup>15</sup> Nuna tiagtai ashí aents sanedrinnun pekajuk, Estebagkan shiig esetug diikmag, angela yapiya numamtin wajas eketun wainkajui.

## 7

### *Esteban apu aidau eemtin chichakbau*

<sup>1</sup> Sumo sacerdote Estebagkan: ¿Dekaskek nunash tujamaina? tau,

<sup>2</sup> tama ni ayaak: “¡Yatsug aidaauh nuigtú mina muuntug aidautigmesh antuktajum! Iina Apajui dekas imana nunú, iina muunji Abraham aajakua nuna, Harán wegatsaig Mesopotamia pujuttaman wantintuk,

<sup>3</sup> chichajak: ‘Nugkemik ukuktá pataim aina dushakam, nunikam wetá wi nugkan\* inaktustatjam nui’, tiuwai.

\* 7:3 Gn. 12.1.

<sup>4</sup> Tima Abrahamshakam Caldea nugkanak ukukí, Harán nugkanum pujusui. Nuwi pujai apají jakamtai, Apajuí ju nugka yamai atum batsatjum jui itauwai.

<sup>5</sup> Tujash nugkanak piipichinakesh nawe najamainnakesh susachui, tujash makichik uchijigkesh atsujaig anagkuauwai amastinaitjame tusa, nuigtú niina uchijí weantu agtina nudaunashkam.

<sup>6</sup> Nuigtushkam, Apajuí: ‘Amina uchigmiin akiinak wegagtina duka, tikich nugkanum nugkenchau, wainka inatai, nuigtush waitkainam cuatrocientos mijan batsamsagtinaí,

<sup>7</sup> tujash tu nugkanmaya inainak waitkagtinaita nunak suwimkan susatnaitjai, dutika ai nuiya jijnag jujú nugka jui emematjiagtinaí Apajuí tiuwai’.

<sup>8</sup> Tuja Apajuí Abrahamjai chichaman apakua dui pakamaktajum tiuwai; tibau asa Abraham uchijí Isaac akiina ocho tsawan wetai pakajiuwai.† Dutiksag Isaacshakam uchijí Jacopan dutikauwai, tuja Jacobshakam aikasag uchijí aidaunak dutikauwai, doce aajakajua nuiya Israel aidaun apají agtina nuna.

<sup>9</sup> “Nunú iina apají aajakajua duke José kajejuinak Egipto jukitnume tusagujukajui. Tujash Apajuí Josejai au asa,

<sup>10</sup> ashí ni waitiamujinak agkanmitka, nuigtú yachamtikauwai dutikamu asamtai Faraón Egipto reyjiya dushakam wait anentus diisui, dutika ‘Egiptonu gobernador adaiyak nuigtú jega ni inamku pujutaiya nunash niinak idatusui’.

<sup>11</sup> “Nuniku ai yumi yututsuk asamtai nugka buku wajasui ashí Egipto nugkanum nuigtú Canaagshakam, nunikmatai yapajut tepeamtai senchi waitiamu asauwai, nuniau asamtai iina muunji aajakajua dushakam yumainjig atsujuidaun.

<sup>12</sup> Nunidau, Egipto trigo awai tabaun Jacob antukui, nunik iina muunji aajakajua nuna nagkamchak ishiakui.

<sup>13</sup> Nunikmatai ataktú jegawagmatai, José niina yachi aidaun wantintukui, nunikmatai Faraogshakam Josesh ya weantu ita nuna dekauwai.

<sup>14</sup> Nunik José, niina apají Jacopan ashí niina patayí aidaujui kaunatnume timatai setenta y cinco aents Egipto jegawajui.

<sup>15</sup> Nunik Egipto jegaa pujus Jacopak iina muunji aajakajua nujai jinawajui.

<sup>16</sup> Nunikagmataish iyashí aidaunak jukiag Siquem egegawajui, dutikawag Abraham ukumatain Hamora uchijí aidaunun shiig akikan sumakua nui ukusajui.

<sup>17</sup> “Apajuí Abrahaman anagkuauwa nu uminkattak wajau asamtai, Israel aidauk ayatak kawedau, nuninak aan kuashat Egipto yujakajui.

<sup>18</sup> Nuniamunum, tikich rey Egiptonum ekeemiuiwai José wainchau aajakú.

<sup>19</sup> Nunú rey iina aentsjin tsanujui, dutikak iina muunji aajakajua nuna waitkainak suwimkan sujakú ainawai; dutikau asa uchi aishmag aidaun akiidiagtaik jutsuk idaisatnume jakati tiuwai.

<sup>20</sup> Nunú tsawantain Moiseschakam akiinawui, nunikmatai Apajuishkam wakegas diisui, tuja apají jeen kampatum nantu ukag apusajui;

<sup>21</sup> dutikawag uumainchau wajasmtai jakati tusa ajapawajui dutikamun, Faraogka nawanji juki tuke niina uchijí ema tsakapajui.

<sup>22</sup> Dutika Moisesnak egiptonmaya unuimatai aina nunak ashí jintintuawajui. Dutikamu asa, chichamesh najamin takatjinish imanuk ajakui.

<sup>23</sup> “Cuarenta mijan ajamu Moisés niina yachi, Israel aajakua nuna uchijí aidaun ijagsata tabau anentaimat ajusam weuwai.

<sup>24</sup> Nunikmá niina patayin Egiptonmaya aents suimtatman wainkauwai, nunik nuna ayamjak egiptonmaya aentsun mauwai.

<sup>25</sup> Moisés anentaimsag mina yatsug aina duka, Apajuí ditan agkanmitkati tujuttata nunak dekainawapi tau, tujash ditak aajag anentaimjachaju.

<sup>26</sup> Kashinia dui Moisés, jimag Israel ditak pempeentunikiag maanidaun wainak epegtuatatus jegantun chichajak: Atumesh yatsumjaish ‘¿Wagka pempeentunikjumes maaniagme?’ tau.

<sup>27</sup> Tama yachin suwima nu Moisesan shitakui, dutikak: ‘¿Yaa aminash jutii aidautin apuji, nuigtú juez atí tusash adaitamkame?’

<sup>28</sup> ¿Minash yau Egiptonmaya maamun dutiksamek mantuatasamek tujutam?’ tau.

<sup>29</sup> Nu tama antuk Moisesak Madián nugkanum tupikakiuui, nunik jegaa tikich nugkanmayaitak nuwi pujusui, nuwi jimag uchi ajusui.

<sup>30</sup> “Cuarenta mijan nagkaemai, makichik ángel uwegshunum wantintukui muja Sináí tikiju awa nui, numi zarza tutai jii kegamunum.

<sup>31</sup> Nunittaman Moisés wainak puyatkau, nunik shiig wainkatatus adjikamá Apu Apajuí chichamun antuku, nuniak:

† 7:8 “Pakaji” ajapjtajum tiuwai tawa duka, diíst Lc. 1.59num.

<sup>32</sup> 'Witjai, amina muunjum aajakajua nuna Apajuijinuk, Abraham, Isaac, nuigtú Jacob aajakajua nuna Apajuijinuk', tau. Tutai Moisesak ishamak kujau, nuniak diimainchau dekapeau.

<sup>33</sup> Nunitai Apu Apajúi chichajak: 'sapatjum ukuimakta, wagki ame wajam anka nugkak pegkegmai.

<sup>34</sup> Dekaskenum mina aentsug Egipto batsamas waituina nunak wainkajai, nuigtush buutainak untsujuina nunash antugkajai, nunikan agkanmitkatasan akaikijai. Nunin asamtai tantata Egipto awematjame',<sup>‡</sup> tiuwai.

<sup>35</sup> "Nunú Moisesan dakituinak: '¿Yaa aminash apu, nuigtú juez atí tusash adaita-mkame?' tiajua nuna Apajúi apu ema, nuigtú agkanmitkagtin atí tusa ángel numi zarzanum wantintukua nuna senchijin awemauwai.

<sup>36</sup> Tima Moisés Egipto batsamatman jiiui, aents dutikmainchaun Egipto nugkan-mayan iwaintuk, dutiksag Nayants Kapantu tutainmash, nuigtú cuarenta mijadai uwegshunum yujasua nuishkam.

<sup>37</sup> "Nunú Moisesa duke Israel aidaun chichajak: 'Apu, atumi Apajuigmia nu, atumi yatsum aina juiyan etegkatnai makichik profetan wiya juninun',<sup>§</sup> tiuwai.

<sup>38</sup> Nunú Moisesa duke Israel uwegshunum ijunjagmatai, muja Sinainum angeljai chichajakua duka, nuigtú iina muunji aajakajua nujaishkam; nigki chicham pujutá sukagtinun jukiuiwa dushakam jutii ujaktinun.

<sup>39</sup> "Tujash iina muunji aajakajua duka dakituidau asag umijujakchajui, ayatak Egipto waketjagtatus anentaimajakajui.

<sup>40</sup> Nunidau asag Aarogkan chichajuinak: Ii Apajuimatin aidaun najatkagtuata ni emjutpakti; wagki Moisés Egipto nugkanum batsatjin jügmakiuwa duka dekantsui wajuakaeki, tiajui.

<sup>41</sup> Tusag toro tsakat niimtinun najanawaju, dutika kuntinun maa apeenak dita najanamujin eme anentuinak, fiestamaidau. <sup>42</sup> Nudiagtai Apajuishkam ditanak idaisauwai nayaimpinmaya yaya aina nuna ememattinme tusa. Aatus agagbauwai profeta aina nuna papijinish:

"Israela uchiji aidauwah,

¿atum uwegshunum cuarenta mijadai yujasuitjum duish kuntin maa apeakjumes h emematjiuk ainajum?

<sup>43</sup> Duka dutiktsuk Moloc, nuigtú atumi apajuijum yaya Refán, atum ememattasajum dakumká najanauwaitjum nudau tabernáculo yanasjum yujau asagmin,

Babilonia inagkeakin atushat emattajime,\* Apajúi tiuwai'.

<sup>44</sup> "Iina muunji aajakajua nunú uwegshunum jega pegkejam Apajuijai chicham apaaku kayanum agagbauwa nu aajakui, Apajúi Moisesan chichajak wainkaum dutiksamek jegamkata tibauwa dutiksaik takasbau.

<sup>45</sup> Nunú tabernaculon iina muunji aajakajua nu jukiajui, dutikamun tikich nugkanum aents batsatun Apajui depetuk dita emtin jiiua nui utsanawagtatus Josuejai mininak itawajui, duka David pujujakua duish aajakui. <sup>46</sup> Davitan Apajúi wait anenjauiwai, dutikamu asa Jacopa Apajuijiya nudaun tabernáculo jegamkatatus wakejukui;

<sup>47</sup> tujash Salomón jega Apajúi ememattainak jegamjukui;

<sup>48</sup> nunin aigkish Apajuik aents jegamkamunmag pujatsui. Profeta tawa nunisag:

<sup>49</sup> "Mina ekeemtaijuk nayaimpia auwai, untsu mina najamtaijua duka nugka nuuwai. ¿Minash waji jegak jegagtuktage? ayamainjush atugta juniaish, ¿tu amainaita mina ayamtaijush? tawai Apu Apajúi.

<sup>50</sup> ¿Ju ashí waji aina juka wí najankashbaukaih?' ††

<sup>51</sup> "Atumek tuke antumtikmainchau, nuigtú antutaigmish, anentaimtagminish Apajúi anentaimtuchua nunin aajakuitjume, nuniau asajum Wakaní Pegkejishkam shiwag-magme, atumi muunjum wajukejakua nunisjumek.

<sup>52</sup> ¿Ya profeta aidauna atumi muunjum aajakajua dusha waitkajakchau ainawa? Nunidau asag pegkejan takau taatna nuna pachis emtikak etsejuidaun maajakú ainawai, yamai nunú pegkejan takauwa nu tamtaish unupiagjum sujukuitjume dutikajum mau ainagme.

<sup>53</sup> Atumek chicham umiktinun ángel aidaun amasajua nu ajutjamainaig umikchau ainagme'.

*Esteban maamu*

<sup>54</sup> Nu tabaun antukag, Estebangkan senchi kajegkag, nainak taket emenawag katet-mitkaidau.

‡ 7:34 Ex. 3.5, 7-8, 10. § 7:37 Dt. 18.15. \* 7:43 Am. 5.25-27. † 7:50 Is. 66.1-2.

<sup>55</sup> Tujash Esteban Wakaní Pegkeji ajamu asa, nayaimpin diikmá Apajuí imanjin wainkau, nuigtú Jesús Apajuí untsujin wajattaman, nunik:

<sup>56</sup> —Nayaim ujaniun wainjai, nuigtú Aentsmaga akiinauwa dushakam Apajuí untsujin wajaun, tau.

<sup>57</sup> Tujash ditak kuwishinan epenkag, senchi pampanjag ashí wajatjag achikag;

<sup>58</sup> yaaktanmag jiiikiag kayai tukuidau; nuninak tsanumjuina duka ditá jaanchjin awimajag makichik datsauch Saulo daagtinun kuitamkati tusag susajui.

<sup>59</sup> Kayai tukuamaitak Esteban Apajuin aujak: “Apu Jesusah, mina wakanjuk jujutkita”, tusa

<sup>60</sup> tikishmag senchi untsamak: “¡Apuh, ju mina jutijuina juna tudaujig tsagkujata!” tiuwai.

Nuna tii jakauwai.

## 8

### *Saulo Jesusa nemajuidaun waitkasbau*

<sup>1</sup> Sauloshkam nui pujau asa Estebagkak mantamnati tau.

Nunú tsawantin iglesia Jerusalén batsatu senchi waitkamu nagkamnauwai; nuniau asamtai ashí nugkanum Judea, Samarianmash pampagkajui, tujash apóstol aidauk nuig batsatu.

<sup>2</sup> Tuja Estebannak ujumak aents Apajuí puyatjus umijin aidau, Estebagkan iyashin jukiag ukusag, senchi buutiajui.

<sup>3</sup> Nuniamunum Saulok iglesianmaya aidau waitkatan nagkamau, nuniau asa makí makichik jeganum utua, aishmag aidau, nuwanashkam achig yajumu cárrel chimpiatatus.

### *Yamajam chicham Samaria etsegkamu*

<sup>4</sup> Tujash pampagkaju aidauk, dita tuwí jeginawa nuanui yamajam chichama nuna etsejuidau.

<sup>5</sup> Nuniamunum Felipe yaakat Samaria jegaa, Cristo pachis etseju.

<sup>6</sup> Nunitai aents aidauk ijunjag Felipe etsegbaun puyatjus antuidau, nuninak aents dutikmainchau dutikamunash wainaidau.

<sup>7</sup> Wagki kuashat aents wakan pegkegchau ajamu aidauk senchi untsamak jiiinaidau, nuigtushkam wekaechau aidau, nuigtú shutú aidauunashkam etsagaku.

<sup>8</sup> Dutiktai nunú yaaktanmaya aidauk shiig aneedau.

<sup>9</sup> Yaunchuk nagkamas nunú yaaktanum makichik aents Simón daagtin magia takau pujujakui, nuniak samarianmaya aidauk tsanuau “Wika imajaitjai” tusa.

<sup>10</sup> Tutai, ashí uchi, muun aidaujai nagkamas puyatjus antujuinak: “Juuwai ‘dekas Apajuí senchijig’”, tuidau.

<sup>11</sup> Tuidau asag nuna antujuidau, wagki kuashat tsawantai mágico takatai aidaujai takaak tsanú pujujuinamu asag.

<sup>12</sup> Tujash Felipe yamajam chichaman Apajuí inabaujin nuigtú Jesucristun pachis etsegtaí, aishmag nuwa aidaujai dekaskeapi tiaju aidauk yamimakajui.

<sup>13</sup> Nuniamunum Simogshakam dekaskeapi tusa yamimag, Felipejai ashí yantamnum wekaegu, nuniak aents dutikmainchau kuashat dutiktai puyatjus diyau.

<sup>14</sup> Nuniamun apóstol aidau Jerusalén batsatu, Samarianmaya aidauk Apajuí chichamen wakegas antuinawai tabaun antukag, Pedron Juagjai awemajui.

<sup>15</sup> Dutikawajam ditashkam jegawag Apajuin aujtusaju, Wakaní Pegkejin jukitnime tusa,

<sup>16</sup> wagki eke ditaig makichkinmakesh Wakaní Pegkejig taachui, ayatak Apu Jesusa daajinak pachisag yamimakaju asagmatai,

<sup>17</sup> Pedro Juagjai buuknum achikag Apajuin aujtuinam, Wakaní Pegkeji egkemtujajui.

<sup>18</sup> Apóstol aidau aentsun buuknum achitai, Wakaní Pegkeji egkemtamun Simón wainak, kuichkin anagkuauwai.

<sup>19</sup> Nuniak: Minash aanú senchi sujustajum, wisha tikich aents aidau buuknum achiai Wakaní Pegkejin jukitnime, tau.

<sup>20</sup> Tutai Pedro chichajak:

—Amek kuichkigmijai megkaekatnaitme, Apajuí anentag sukagtusbauwa nunú kuichki sumakta tiu asam.

<sup>21</sup> Amek makichkish jukiti tamak amaitsume, wagki Apajuí emtinig amina anentaimik pegkegchauwai.

<sup>22</sup> Nuniau asam pegkegchaujum idaikum Apajuí segatá, ame aaja anentaimjaum nunash tsagkugtamtajaintash;

<sup>23</sup> wagki senchi kajeam nuna wainjame, nuniau asam pegkegchauwa nu achikam wekaeme, tiuwai.

<sup>24</sup> Tama Simón ayaak:

—Atum minash Apu segatjitajum, atum mina tujutjum nunú imanisag nagkaetuki, tiuwai.

<sup>25</sup> Pedro Juagjai Apajúi chichame etsegbaun ashimkag, Jerusalén wakitkijai, nuninak kuashat yaakat yaig samarianmaya batsatbaunum weenak, yamajam chichaman etsejuidau.

*Felipe Etio pianmaya yamigbau*

<sup>26</sup> Nuniku ai makichik Apajúi angelji Felipen chichajak: “Felipeh, surnumanini weta jintá Jerusalén juwaki Gaza wegamunum uwejush awa nui”, tiuwai.

<sup>27</sup> Nu tima Felipeshkam weuwai, nunikmá etio pianmaya aents, aents kaga emamu, Etiopia reinaji Candace kuichkijin kuitamin Jerusalén Apajuin ememattatus weu wakettatman wainkau;

<sup>28</sup> nugkeen waketak carrojin ekeemas profeta Isaías agagbaun au aukkawa wegau.

<sup>29</sup> Nunittaman Wakan Felipen chichajak: “Carro wega au adjkata nunikam tikiju wajastá”, tiuwai. <sup>30</sup> Tama Felipeshkam adjkamá profeta Isaías agagbaun au aukkawa minittaman antujuk iniak:

—¿Ame aujam dusha antamek? tau.

<sup>31</sup> Tama ni ayaak:

—¿Wajuk antuktajaki, nuna taku tawai tusa ujachbaunush? tau.

Nuna tusa Felipen:

—Wakata tiuwai niijai ekeemsatatus.

<sup>32</sup> Agagbaunum ju chicham tawa juna auju:

“Uwig mautainum juki ematia numamtuk jukiag emagmayi;

nunisag uwig uje tsupigmash takamtak tepegama numamtuk niishkam chichakchabi.

<sup>33</sup> Nuniau asa ayatak yunumkabi, nunitaish makichkish ayamjauk atsusui,

niina uchijgkesh atsugsauwai ju nugka juig maamu asa”.\*

<sup>34</sup> Tibauwa nuna eunuco† Felipen iniak:

—Wait aneasam tujutta, ¿junash profetash yana takua tawa; nigkik tumama, atsa tikichin takug tawa?

<sup>35</sup> Tutai Felipeshkam nunú ni Apajúi chichamen auja nui nagkama, chicham yamagman Jesusan pachis ujaku.

<sup>36</sup> Nunik weamunum jintaa entsa aunum jeganá eunuco chichaak:

—¿Ju yumi awa jui wi yamimagta tamash waji utugchata amainaita? tau.

<sup>37</sup> Tutai Felipe ayaak:

—Ame dekas ashí anentaimjai dekaskeapi takumek yamimamainaitme, tiuwai.

Tama ni ayaak:

—Wika Jesusak dekas Apajúi Uchijimpapita tajai, tiuwai.

<sup>38</sup> Tutai carrojum awantata tusa awantamtaí, mai yuminum jegawajui nunik Felipeshkam yamijú.

<sup>39</sup> Entsanmaya jiinkimtai, Wakaní Pegkeji Felipenak jukiuwai; dutikantai eunucok ataktuk wainkachu, tujash shiig aneas weuwai.

<sup>40</sup> Felipek Azoto wantinkauwai, nunik ashí yaaktanum nagkaemak yamajam chichaman etse etsegkawa Cesarea jegauwai.

## 9

*Jesús Saulo wantintukbau*

(Tak. 22.6-16; 26.12-18)

<sup>1</sup> Nuna nuninai Sauloshkam Apu Jesusa nemajuidaun maatasa awantanak idaichau. Nuniau asa sumo sacerdoten jegajuau.

<sup>2</sup> Nunik papí agajam sujustá Damasco jegaan jega ijuntaiya nui wayaaknush nuna inakmasan, Jesusa nemajuidaun aishmag, nuwa aidaujui achijan, Jerusalén ikaunmak-tajai, tusa segau.

<sup>3</sup> Nunik, Damasco jegaattak tikiju wajas jintá wetatman, pachiachbau nayaimpinmaya tsaaptin Saulon egkeku;

<sup>4</sup> dutikam nugká iyaju, nunikmá makichik chicham: “Saulo, Saulo ¿Wagka minash waitkajame?”, tabaun antuku.

\* 8:33 Is. 53.7-8. † 8:34 “Eunuco” tawa juka, aishmag suki katijai tsupigkamu aajakajui, ashí rey jeen takasagtin aidaun, nunú shiig wainkatasam diistá Mt. 19.12 Jesús nunin aidaun kumpatum niimtinun tawa nu.

<sup>5</sup> Tama Saulo iniak: “¿Apuh, amesh yaitpa?” tau. Tutai ni ayaak: “Wika Jesusaitjai, ame ya ainkum waitkame nuuwaitjai,

<sup>6</sup> nantaktá nunikam yaakat jegata, awi ame dutikmainnak tujabiagtatui”, tiuwai.

<sup>7</sup> Aents aidau Saulojai ashinuk senchi ishamkaju, chichamunak antuinayatak wainainachu asag.

<sup>8</sup> Nunik Sauloshkam nugká tepau nantakí nimitakamá wainmamainchau wajasú. Nunikmatai uwegnum achik egkesag Damasco ejegawaju;

<sup>9</sup> dutikam kampatum tsawan wainmatsuk, yutanash yutsuk, umutnash umutsuk pujau.

<sup>10</sup> Damasco Jesusa nemajin Ananías daagtin pujau, nunittaman Jesús wantintuk: “¡Ananiasah!” tiuwai. Tama ni ayaak: “Apuh, jui pujajai”, tau.

<sup>11</sup> Tutai Apu Jesús chichajak: “Jinta tutupit tutaya nui wetá, nunikam Judasa jeen jegaam inimsata Saulo daagtin tarsonmaya pachisam, nui Apajuin aujak pujawai;

<sup>12</sup> wainkae Ananías daagtin wayá wainmaktitus buuknum achiamun”, tiuwai.

<sup>13</sup> Tama Ananías chichaak: “Apuh, au aentsun, Jerusalén amina nemagtamin pegkejam aidau batsata nuna, tikima pegkegchau waitkamujin pachisag chichainamun antukmagjama;

<sup>14</sup> nuniau asa juishkam sacerdote apuji aidau inajam, juiya amina daagmin pachis chichaina nuna achig yajuaktatus taajama”, tau.

<sup>15</sup> Tutai Apu Jesús ayaak: “Wetá, wi aunak etegkajai mina pachitus ashí judiochu aidanum nuigtú rey aidanumash nuigtú Israela uchiji aina nunash ujakti tusan;

<sup>16</sup> wagki wi iwaintuktatjai mina daajun pachis etsejak wajupa waittsashtatua nuna”, tiuwai.

<sup>17</sup> Tima Ananiaschakam jega Saulo pujamunum weuwai, nunik waya niina uwejin buuknum achiah:

—Yatsug Sauloh, Apu Jesús ame jintá minamin wantintugmaka nunú awetine ataktú wainmakti tujamu asa, nunik Wakani Pegkejinash jukiti tusa, tiuwai.

<sup>18</sup> Tamawaik Saulo jinia namaká saepega nunin aidau kakekauwai nunikmatai wainmakui; nunik wajakmatai Ananías yamijui.

<sup>19</sup> Dutikam yutain yuwa chichiajui, nunik Jesusa nemajin aidau Damasco pujuidaujai ujumak tsawan ijunag pujusui.

#### *Saulo Damasco chichagkagtukbau*

<sup>20</sup> Nuniak jega ijuntai aidanum wayá Jesusak Apajuin Uchijiyai, tusa etseju.

<sup>21</sup> Ashí nuna antuidauk puyatkaju, nunikag:

—¿Juchaukaih Jerusalén Jesusa daajin pachis chichaidaun achig yajuaktatus aintú wekaetinuwe nu? ¿Jukechukait juiyanash achijá yajuak sacerdote apuji aidanum sujukagtatus ta nunú? tuidau.

<sup>22</sup> Tujash Saulok aan nagkaemas sapigmakas Jesusak Cristui tusa etseju, nunitai judío aidau Damasco batsata duka pachimdaekag shiig dekamainchau juakajui.

#### *Saulo chagkinum egkea yaaktanmaya jikbau*

<sup>23</sup> Nunikag dukap tsawan asag judío aidau, Saulo maami tusag chichaman umigkaju;

<sup>24</sup> tujash Saulok dekau ni maami tuinamunak. Ditak tsawai kashishkam yaakta waitiji jaintainum dakak batsamtau jiinkui maami tusag.

<sup>25</sup> Tujash Saulo jintintaiji aidau kashi jukiag chagkinnum egkeawag yaakat pegmagbaunum nenea akakiaju.

#### *Saulo Jerusalén wakitkimu*

<sup>26</sup> Saulo Jerusalén jega Jesusa nemajin aidaujai ijunjatatus wakegau, tujash ashí ishamaidau, wagki nigka Jesusa nemagtsuapi, tuidau asag.

<sup>27</sup> Tujash Bernabé juki, apóstol aidau batsatbaunum ejegau, dutikam Saulo jintá wesa Apu Jesusan wajuk wainkae, wajintu ausae nuigtú Damascosh wajuk ajankas Jesusa pachis etsegkae nuna pachis ukajaju.

<sup>28</sup> Saulok Jerusalén juwaku nunik, ditajai ijunag wekaegas ajankas Jesusan daajin pachis etseju;

<sup>29</sup> nuniak chichaak judío, griego chichaman chichau aidaujai tudaiyu Apu Jesusa daajin pachis; tujash ditak ayatak maata tuidau.

<sup>30</sup> Nuna yatsut Jesusa nemajin aidau antukag jukiag, Cesarea ejegawaju dutikawag Tarso awemajui.

<sup>31</sup> Dutikawagmatai iglesia aidauk ashí Judea nugkanum, Galileanmash nuigtú Samaritanmashkam, shiig agkan batsatainak, Apu Jesusan puyatjus umijuidau, nuninak nuni nagkaemas kawedau Wakani Pegkeji ichichmamat suinamu asag.

*Pedro Eneas etsagagbau*

<sup>32</sup> Pedro, yatsut Jesusa nemajin aidaun diyaak wekaetau asa, Lidantum Jesusa nemajin pegkejam aidaun batsatu asamtai wainkatatus weuwai.

<sup>33</sup> Nunikmá Eneas daagtin wekaechau asa, ocho mijadai pegajinig tepenun wainkauwai.

<sup>34</sup> Nunik Pedro chichajak:

—Eneasah, Jesucristo etsaentamui; nantakim janchjum ainkata.

Tamawaik Eneasak pegkeg wajas wajakiuwai;

<sup>35</sup> nunikmatai ashí yaakat Lida nuigtú Sarón batsamin aidaun nuna wainkag Apu Jesusan nemagkajui.

*Dorcas jakaun Pedro inankimu*

<sup>36</sup> Nunú tsawantin yaakat Jopenum, Jesusa nemajin Tabita daagtin pujau. (Duka griego chichamnumak “Dorcas” taku tawai.) Nunú nuwak ashí pegkeg aina nunak takaak, aents ujunauch aidaunash yayaak pujau;

<sup>37</sup> nuni pujau Dorcas jakauwai. Nunikmatai iyashin nijajag jega makichkia ekeni jegamkamunum iwakag, tesamunum awayá aepsajui.

<sup>38</sup> Lidak, Jope tikiju au asamtai, Pedro nui pujawai tabaun dekaawag, Jesusa nemajin aidaushkam jimag aentsun: “Jopenum megkaetugsuk tajutjamati, tujamae tusa ujaktajum”, tusa awetiaju.

<sup>39</sup> Tusa ujakajam Pedroskam ditajai weu. Nunik jegamtai jukiag yakí jakau tepamunum awayawaju, nunikmatai ashí nuwa waje aidauk buutuina tentewaju, nunikag túnica aidaun inaktuidau nuigtú tikich jaanch Dorcas ditajai iwaaku pujusá najantajji aidaun.

<sup>40</sup> Dutikam Pedro ashí aentsun jiijú nunik, tikishmag Apajuin aujus, jakaun pempeentuki:

—¡Tabita nantaktá! tiu.

Tama nuwashkam nimiuwai, nunik Pedron wainak nantakí ekeemsau.

<sup>41</sup> Nunikmatai Pedro uwegnum achik awajainu, dutika Jesusa nemajin aidaun, nuigtú nuwa waje aidaujai utsuká iwakun iwaintukaju.

<sup>42</sup> Nunú dutikamun ashí jopenmaya aidauk dekaawaju, nunikag Apu Jesusan kuashat dekaskeapi tiaju.

<sup>43</sup> Nunik Pedrok Jopenum Simón duwapé apijin tutaiya nuna jeen kuashat sawan pujusui.

**10***Pedro Cornelio jeen webau*

<sup>1</sup> Yaakat Cesareanum makichik aents Cornelio daagtin pujau, sntag akankamua nuna daaji Italianmaya tutaiya nuna capitanji.

<sup>2</sup> Duka ashí niina patayí aidaujai ijunas Apajuin puyatjusag emematin aidau. Nunin asa judío senchi atsumamui juidounash yayaak kuashat kuichkin suwau, nuniak Apajuinashkam tuke augsagké au.

<sup>3</sup> Nuniau makichik tsawantai, a las tres tumain ai paan wainkau, Apajuí angeli ni pujamunum waittaman, nuniak:

“¡Cornelioh!” tiuwai.

<sup>4</sup> Tama Cornelio dii wajau, nunik ishamayatak: “¿Apuh, wagka tujutme?” tau. Tama ángel ayaak: “Apajuí, ame aujam nunak antugtamkae, nuigtú ame atsumaidau yayam nunash waitjamkae;

<sup>5</sup> nunin asamtai ujumak aents awemata yaakat Jopenum, Simón, Pedro tutaya nuna utitnume.

<sup>6</sup> Nigka tikich Simón duwapé apijin tutaya nuna jeen nayantsan uwetus pujawai”.

<sup>7</sup> Ángel Cornelion aujus wakiktintai, jimag ni inaken, nuigtú makichik sntag Apajuin puyatjus anentaimtinun ni kajittsá ditaijjai utsukú;

<sup>8</sup> dutika ashí ni wainkamujinak ujaká Jope awemauwai.

<sup>9</sup> Kashinia dui jintá eke yaakat jegattak weenai, Pedroskam jega ekenja jegamkamun nagkatkamunum wakauwai Apajuin ausatatus etsa tajiastatak wajasú ai.

<sup>10</sup> Nui pujus senchi yapajau, nuniak yuwatatus wakegau; tujash eke yutain umiagtai pujukmá niishkam makichik yakiya wantinun wainkauwai,

<sup>11</sup> nayaim ujanmatai, sávana muun wegkagma iman cuatro weni nagkatjamui jigkatkamu nugkanum akaetatman,

<sup>12</sup> nuanui ashí kuntin cuatro nawentin aidau, yakiya chigki aidaush, ashí japiinas ujuau aidaushkam chimpiju.

<sup>13</sup> Nuniamentum makichik chichaman antuku: “Pedro, wajakim anú maata dutikam yuata”, tabaun.

<sup>14</sup> Tama Pedro ayaak: “Atsá Apuh, dutikashtatjai, wika ju yuchatai nuigtú tsumain aina nunak tuke yuwachuitjai”, tiu.

<sup>15</sup> Tutai ataktú awentsag chicham: “Apajuí pegkeg emamua duka amek tsumainai tiipa”, tiuwai.

<sup>16</sup> Duka kampakumá nunikmatai, sabananak wamak nayaimpinum awagkiuwai.

*Pedro judiochu jeen wayamu*

<sup>17</sup> Kajanum nuninun paan wainak Pedro, puyatuk wajukatnunak aunash wainkaja tusa anentaimtú pujai, Cornelio aents awemamu aidaushkam Simogkan jeen inimas waitinum tantaju,

<sup>18</sup> nunikag untsumak iniimu, Simón daagtin Pedro tutaya nu anuish pujatsuak tusag.

<sup>19</sup> Pedro eke kajanum paan wainkamujjiya nuna anentaimtú pujai, Wakaní Pegkeji chichajak: “Simogka kampakum aents egapainawai,

<sup>20</sup> wamak akaikita, nunikam ditajai ijunjam utujimtsuk wetá, wi ditanak awemamjai”, tiuwai.

<sup>21</sup> Tama Pedroskam akaiki, aents aidaun jegantun:

—Witjai, atum egatjum duka, ¿wagka taugme? tau.

<sup>22</sup> Tama dita ainak:

—Capitán Cornelio, pegkejan takaak Apajuin emematin asamtai ashí judío aidaush aneas wakegas diin aina nunú awetamatai minaji. Nuna Apajuí angelji chichajak amina ujaktá, dutikam ni jeemin tajutjamati, nunik ni tujamkui shiig antugkata tibau asa, tuidau.

<sup>23</sup> Tutai Pedro jegá awayawaju, dutika nu kashia duik ditajai kajigkaju, nunik tsawajag Pedro ditajai weagtai, ujumak Jesusa nemajin aidau jopenmaya uyuntsaju.

<sup>24</sup> Nunikag kashinia dui Cesarea jegawaju, Cornelioskam niina patayí aidaujai nuigtú niina shiig kumpají aidaun ipaa dakak pujau.

<sup>25</sup> Pedro jegá jegattaman, Cornelio jiiintuki igkuak tikishmatjau ememattatus.

<sup>26</sup> Tujash Pedro awajki chichajak:

—Wajaita, wishakam ame aentsuitam annuketjai, tiuwai.

<sup>27</sup> Tusa niijai chichá chichakua wayau, nunikmá kuashat aents ijunag atatman wainkau.

<sup>28</sup> Nunik Pedro chichaak:

—Atumek shiig dekagme, judío aidautinak iinu chicham umiktina nuig, judiochu aina nuaja ijunmainchaun nuigtush ditá jeenkesh utumainchaun tujama duka. Tujash Apajuí mina iwaintugkae makichikish tsumainai tsuwatai tumaitsug nuna.

<sup>29</sup> Nuadui mina awetujiagminish utujimtsuk minimjai, yamai iniastajime: ¿Wagka taati tujutmaugme?, tau.

<sup>30</sup> Tutai Cornelio ayaak:

—Cuatro tsawan weawai, ju horaya junin ai a las tres wegai mina jegajui Apajuí aujkan pujukman, makichik aents jaanch winchamtinun nugkuaju wajattaman wainkamjai;

<sup>31</sup> nunika ai chichagtak: “Cornelioh, ame Apajuí aujam nunak antugtammae, aents atsumaidau yayam nunash waitjamkae.

<sup>32</sup> Awemata aents Jopenum dutikam Simón Pedro tutaya nuna itaatnume, tikich Simón duwapé apijin nayants uwetus puja nuna jeen pujawai”, tujutmae.

<sup>33</sup> Nuna tujutiú asamtai wamkesan utugtitajum tusan awetimjame, dutikamu asam ameshkam pegkeg taume. Yamai Apajuí waipamunum jui ijunjaji, nunidau asaja wakegainaji, amina Apu Apajuí tujabau iishkam ame etsegkumin antukagtas.

*Pedro Cornelio jeen chichagkagtukbau*

<sup>34</sup> Tama Pedro nagkama chichaak:

—Dekaskenum yamaik dekajai, Apajuik aents aidaunak akanag juka jushá awai, jushakam nishá awai tatsu nunak;

<sup>35</sup> nigka ashí nugkanmaya aents aidaunak shiig anentus diyawai, niinak puyatjus umijuinak pegkegnak takaina nunak.

<sup>36</sup> Apajuí Israel aidaun chichaman awetiuwai yamajam chicham shiig agkan pujatan Jesucristo etsegkauwa nuna, nigki ashí Apua nunú.

<sup>37</sup> Atumek dekagme ju chicham ashí Judea nugkanum, Galilea nagkamas Juan yamimagtajum tusa chichagkagtamun wantinjauwa duka.

<sup>38</sup> Dekagme, Apajuí senchijin nuigtú Wakaní Pegkejin Jesús nazaretnumiaya nuna susauwa duka, dutikam wekaegas pegkeg aidaun takaak Iwanch waitkam batsatunash etsagajakui, wagki nunak Apajuí niini pujau asamtai dutikauwai.



<sup>39</sup> Jutii ainaji ashí wají aidaun Jesús Judea nugkanum, nuigtush Jerusalén takaamu wainkau aidaulik, nuna numinum nenawag maawaju ainawai.

<sup>40</sup> Tujash Apajuí kampakum tsawanta jui inankiuwai, dutika iinash iwaintugmakui;

<sup>41</sup> ashí aentsnak wantintukchawai, imá jutiiinak wantintugmakui, ya aidauna Apajuí duik nagkamas, ju aidau etsegkatin atinme tusa etegjauwaita nunú aidautin, jutii aidauti nantakmatai niijai yuinaku nuigtush umutash uwagmajji.

<sup>42</sup> Ni awetabaijui aents aidaun ujaktinme, nuninak Jesusnak Apajuí, iwaku aidaun, jakau aidaunash juezji ema apusae tusa etsegkatnume tusa.

<sup>43</sup> Ashí profeta aidauk Jesusnak pachis etsegtuinawai, ashí niina dekaskeapi tuidauk niina daajin tudaujig tsagkujam agtinai tusa.

### *Judiochu aidaun Wakaní Pegkeji egkemtugbau*

<sup>44</sup> Pedro eke chichá wajai, Wakaní Pegkeji ashí aents nunú chichaman antuidaunak egkemtujajui.

<sup>45</sup> Pakamatan chichamjin Pedrojai kaunkaju aidauk, anentai jegachajui judiochu aidaunash Wakaní Pegkeji egkemtujajam,

<sup>46</sup> tikich chichaman chichainak Apajuin emematuidau antuidau asag.

<sup>47</sup> Nudiagtai Pedro chichaak:

—¿Wajinma utugmamain ainawa yamimagta tabaunmash aents aidau Wakaní Pegkeji jutiijai betek jukiaja dusha?

<sup>48</sup> Dutika Jesucristo daajin yamimagtajum tusa, ashí yamikajui, dutikawajam Pedron:

—Jui ujumak tsawankesh pujusam wetá, tusag segajui.

## 11

### *Pedro Jerusalegnomia Jesusa nemajin aidau ujakbau*

<sup>1</sup> Apóstol aidau, nuigtú Jesusa nemajin aidau Judea batsatu dekaawaju, judiochu aidaush Apajuí chichamen wakejus antuinawai tabaun.

<sup>2</sup> Tujash Pedro Jerusalén jegamtaí, pakamaku aina nuiya chicham patattan nagkamawaju.

<sup>3</sup> Nuninak: ¿Wagka amesh aents pakamakchau aidau batsatbaunum wayamesh, ditajai ijunjamesh yujumkash yuwaume? tuidau.

<sup>4</sup> Tuinam Pedroshkam nagkama, makí makichik wajuk nagkaemakni nuna pachis ujainak:

<sup>5</sup> —Wika yaakat Jopenum pujusan Apajuí aujku pujukman, kajanum paan sávana muun wegkagma iman makí makichik nagkatjamujin jigkatkamu nayaimpinmaya akaiki wi pujamunum iwaintugbau wainkamjai.

<sup>6</sup> Nunikan shiig diikman ashí kuntin nugkanmaya kajen aidau, nuigtú japiinas yujau aidau, yakiya chigki aidaushkam chimpimatman wainkamjai.

<sup>7</sup> Nuniai makichik chicham: Pedro, wajakim anú maata, dutikam yuata tujuttatman antukmajai.

<sup>8</sup> Tujutkui wi ayaakun: “Atsá Apuh, dutikashtajai, wika ju yuchatai nuigtú tsumain aina nunak tuke yuwachuitjai”, timajai.

<sup>9</sup> Nuna tai awentsag nayaimpinmaya chicham: “Apajuí pegkeg emamua duka amek tsumainai tiipa”, tujutmayi.

<sup>10</sup> Nunak kampakumá dutika ashí nayaimpinum jukibi.

<sup>11</sup> Nu nunikmatai pujai, cesareanmaya awemamu kampakum aents juga wi pujamunum tajutuawagmayi.

<sup>12</sup> Nunikmatai Wakan, utujimtsuk ditajai wetá tujutmayi. Tujutmatai jujú seis yatsut Jesusa nemajin aina jujai wegagmajji, nunika makichik aentsú jeen wayabaijai;

<sup>13</sup> nunika ajin ni ujakmayi, wajuk angelan niina jeen wajaun wainkae, nunik chichajak: “Aents awemata Jopenum, dutikam Simón, Pedro tutaiya nuna tititnume;

<sup>14</sup> dutikam ni chichaman tujamtatui ame, amina pataimijai uwemainaitam nuna, tujutmae” tusa.

<sup>15</sup> Timatai wi nagkaman chichai, ditanashkam Wakaní Pegkeji tajuawagmayi jutiiin nagkamchak utugtambakbia dutiksag.

<sup>16</sup> Nuna nunikmatai adeagmajjai, Apu Jesús chichaak: “Juagkak yumí yamijatjauwai, tujash atumek Wakaní Pegkejiyai yamigbau atatjume”, tujabauwa nuna.

<sup>17</sup> Nunin asamtaí, Apajuí jutii Apu Jesucristo dekaskeapi tabaunum anenjauch amasajua dutiksag ditanash susaja nunash, ¿wisha yaitja Apajuin dutikawaipa titin-nush?

<sup>18</sup> Nu tabaun antukag itatkaju, nunikag Apajuin emematuidau, nuninak:

—Dekas judiochu aidaunash Apajuí, tudauji idaiyinak pujutan jukitnume tusa aikae, tuidau.

*Antioquía Jesús nemajut nagkamamu*

<sup>19</sup> Estebagkan maawagmatai pujusag, Jesusa nemajuidau waitkatan nagkamawaju, dutikainam pampagkag ujumak Fenicianum weenai, Chiprenmash, Antioquianmashkam shiyakaju. Nui batsamsag yamajam chichaman Apu Jesusan pachisag tikichnak ujatsuk imá judío aidaunak jintintuidau.

<sup>20</sup> Nuninai ujumak Jesusa nemajin aidau chiprenmaya, cirenemaya aidau Antioquía jegawag, griego aidaunash yamajam chichaman Apu Jesusan pachisag ujaidau.

<sup>21</sup> Nuniagtai Apu Jesuschakam niina senchijin ditan suidau, dutikainamu asag kuashat dekaskeapi tusag Jesusan nemagkajui.

<sup>22</sup> Iglesia aidau Jerusalén batsatu antukag, Bernaben Antioquía awemaju.

<sup>23</sup> Dutikam jegaa, Apajuí wajuk yainawa nuna wainak senchi shiig aneasu, nunik: Shiig anentaiminish ebetmamajum Apu Jesús nemagkatajum, tusa chichaju.

<sup>24</sup> Wagki Bernabek aents pegkek, nuigtush Wakaní Pegkejiya nuna senchiji kuashat ajamu, dekaskeapi tabaujishkam imanuk. Iman asamtai ni chichamun antugkag kuashat aents Apu Jesusan nemagkajui.

<sup>25</sup> Nuna dutika Bernabek Tarsonum weuwai Saulon egaak,

<sup>26</sup> nunik wainak Antioquía jukiuwai. Nuwi iglesia aidajai makichik mijan pujusajui, kuashat aents aidaun jintintuinak. Nui nagkamas Antioquía Jesusa nemajin aidaun “cristunu” ainawai, tiajuí.

<sup>27</sup> Nunú tsawanting ujumak profeta aidau Jerusalegnumia akaikajui Antioquía weenak,

<sup>28</sup> nuanuiya makichik Agabo daagtin wajakí, Wakan dekamtikam: “Senchi yapajut ashí nugkanum Roma apuji inama nui tepeattawai”, tusa etseju, duka Apu Claudio inamak pujai nagkaemakuiwai.

<sup>29</sup> Nunikmatai Jesusa nemajin antioquianmaya aidau, Jesusa nemajuidau Judea batsatu waitiagtai, makí makichik dita ajuinamujin awetitnume tusag umikajui;

<sup>30</sup> dutika Bernabé Saulojai wetai, Jesusa nemajin aidaun apuji Judea batsatun ofrenda awetiajuí.

## 12

*Jacobon mainak Pedro achiká egkeamu*

<sup>1</sup> Nunú tsawantaik, rey Herodes ni suntaji aidaun ishiakui, ujumak iglesia aidaun achikag waitkastinme tusa;

<sup>2</sup> dutika Jacobo\* Juangkan yachiya nunak espadayai maatajum, tiuwai.

<sup>3</sup> Nu dutikamu judío aidaun shiig awajkagmatai Pedroskam achiktajum, tiuwai. Nu tsawan aina duka pag lewaduragtuchu yutaiya nu jegamunum nunikui.

<sup>4</sup> Dutika achikagmatai cárcel egkeauwai, dutikam dieciséis suntajan cuatro cuatro kanajag kuitamkatnume, dutikawag Pascua nagkaemakmatai aents aidau ijunjamunum jiiikin, chichaman dekajuatjai, tusa anentaimsauwai.

<sup>5</sup> Dutikamu asa Pedrok cárcel shiig kuitamkam egketu; tujash iglesia aidauk niina pachisag mijattsuk Apajuin senchi aujtuinak batsatu.

*Pedro cárcel egketun ángel jiiikbau*

<sup>6</sup> Herodes, kashin jiiiktajai ashí aentsú emtin, dutikan chichaman dekajuatjai tiu ai nu kashik, Pedrok jimag suntag ejapeam, cadenayai jigkaam kanak tepau, nuniai tikich suntag aidauk waitin kuitamainak ijunaidau.

<sup>7</sup> Nuninai makichik Apu Apajuí angelji wantinkau, nunitai carcelak tsawan wajasui; nuniak Pedron bijagnum antig ishintaju, dutika: “Wamak nantaktá”, tiu. Nuniaig cadaña Pedro uwejin jigkamuk kakekau;

<sup>8</sup> nunikmatai ángel chichajak: “Jaanchjum nugkujam akachumam, sapatjumes shiig jigkagtá”, tiuwai. Tama dutiksag umikú, nunikmatai ángel chichajak: “Jaanchjum nugkugtá, nunikam wi weakui pataetugkata”, tiuwai.

<sup>9</sup> Tama Pedroskam pataetuk jiiinkiu, tujash dekaskeash ángel tawa dusha junia tusa dekachiatak, wagki nigka kajanum waintsujash tau.

<sup>10</sup> Tujash deatkauwa nuna, nuigtú jimaja juna kuitamunash nagkaikiag, waiti jijui epenbau yaakat jiina nui jegantaju; nuniaig dushakam nigki ujaniu, nunikmatai jiiinkig makichik jintá nagkaikajui, nunik angelak weak niinak ukukuiwai.

\* 12:2 Ju “Jacobok” Juangkan yachi Zebedeo uchiji Jesús chicham etsegtugkata tusa etegkamu aajakua nunuwei. Jacoboa duke Santiago tuuta awagmataiyai.

<sup>11</sup> Dutikam Pedro nigki anentaimas: “Dekaskenum Herodes jutija junak mantuata tau asamtampap agkanmitkajuatatus Apu Apajuí angeljin awetugni, ashí judío aidau dakajuina dui, tau”.

<sup>12</sup> Nuna aatus dekaa idaiyak, Juan Marcos tuuta awagmatia nuna dukují María jeen jegau, nui kuashat ijunag Apajuin aujuinak batsatbaunum.

<sup>13</sup> Nunik agaa wajas waitin ijutai makichik nuwauch inatai Rode daagtin yakita tus diistatus jegantú;

<sup>14</sup> nunik Pedro chichamen antujuk shiig aneas ujatsuk tupikaki wakitki wayá Pedro tanta waitinum wajawai, tau.

<sup>15</sup> Tutai dita aiinak: ¡Imanjachumek!, tuidau. Tujash nigka dekas tajai tutaishkam, dita aiinak: Ni amaitsui angelji amainai, tuidau.

<sup>16</sup> Nuna tuinai ataktushkam Pedro waitin ijuau, nunitai waitin ujakmá wainkag puyatkajui.

<sup>17</sup> Nuniagtai uwejin takuinu bitat asatnume tusa, nunik Apu Jesús wajuk carcelnumian jiikne nuna pachis ujakaju, dutika:

—Atum Santiago, tikich yatsut aidaushkam ujaktajum, tusa ukuak jinki yajá weuwai.

<sup>18</sup> Tsawagmatai, sntag aidauk ditak pampandayidau Pedrosch wajukamki tusag.

<sup>19</sup> Nunikmatai egaktajum tusa Herodes ishiakui, dutikamash wainkachagmatai kuita-mkaju aina nunak kajegtajum tiajam kajekajui, nuna dutika Herodes Judeanak ukuak Cesarea weuwai nui pujustatus.

### *Herodes jakamu*

<sup>20</sup> Herodes tironmaya aidaujai, nuigtú sidognumia aina nuna senchi kajekkauwai; tujash ditak chichama umikaju niijai chicham apakmí tusag, nunikag Blasto kumpamawaju rey Herodesjai takau asamtai, nunikag: “Ame chicham epegkami tuinawai tusam tukagtitá”, tiajui, Herodes inabaujinian yutain sumaidau asag.

<sup>21</sup> Tiagmatai Herodes tsawantan mamikiau asa, jaanch dekas pegkeg rey nugkutaijin nugkug iwagmamag, chicham dekatasa ekeemtainum ekeemas nagkama chichau;

<sup>22</sup> nunitai aents aidauk senchi unsumkag: “¡Shiig aentschauwai, Apajuí chichau wajawai!” awajuidau.

<sup>23</sup> Nuna imatjuinai, Apu Apajuí angelji jatan susauwai, Apajuin emematchau asamtai; dutikam Herodesak aka amukam jakauwai.

<sup>24</sup> Tujash Apajuí chichamega nunak aan nagkaemasag ashí yantamnum etsejuidau.

<sup>25</sup> Bernabeshkam Saulojai dita takaamujinak ashimak, Jerusalén waketuinak Juan, tikich daaji Marcos tutaiya nuna jukajui.

## 13

### *Bernabé Saulojai nagkamchaku Apajuí chichame etsegku webau*

<sup>1</sup> Iglesia aidau Antioquia, profeta nuigtú maestro aidau; Bernabé, Simón (Shuwin tutai), Lucio cirenemaya; Manaén (Herodes Tetrarcajai ijunag tsakajua nu) nuigtú Saulo aina ju batsatu.

<sup>2</sup> 28 Makichik tsawantai Apu Apajuin emematuinak nuigtú ayuno takainak batsatai, Wakani Pegkeji chichaak: “Bernabek Saulojai akaantugkatajum, wi dita takastinun untsukuitag nui takastinme”, tiuwai.

<sup>3</sup> Tiajam ayunamun nuigtú Apajuí augbaun inagnakag, buuknum achikag Apajuin aujtus awemajui.

<sup>4</sup> Bernabé, Saulojai Wakani Pegkeji awemam weajui Seleucia, nui juaki barconum egkemawag ajuntai Chiprenum weajui.

<sup>5</sup> Nui Salamina jegawag, juga judío ijuntaijin Apajuí chichamen etsejuidau. Juan Marcos tutaya nunashkam yaimpakti tima wekaegu.

<sup>6</sup> Ashí ajuntai aina nunak yujagsaju, nunikag Pafos jegakmag wainkajui, makichik iwishin judío aents Barjesús daagtin wait profetan;

<sup>7</sup> nunú iwishna duka gobernador Sergio Paulo yacha nujai pujau. Nunú gobernador, Bernaben Saulojai untsukú, Apajuí chichamen antuktatus wakegau asa.

<sup>8</sup> Nunitaman iwishin, griego chichamaik Elimas tutaya nu, gobernador Sergio utugchatan apujtau dekaskeapi tii, tau asa.

<sup>9</sup> Tutai Saulo tikich daaji Pablo tutaya nu; Wakani Pegkeji ajamu asa shiig emetug diis chichajak:

<sup>10</sup> —Amek tikima wait, pegkegchau, iwanchin uchijí, ashí pegkeg aina nuna shi-wajiyaitme; ¿Wagka Apu Apajuin chichame pegkeja dusha, pegkegchauwa nuninush chichagme?

<sup>11</sup> Yamai Apu Apajuí suwimkan amasmatai, wainmachu wajasam etsash waintsuk dukap tsawan pujustatme, tiu.

Nunú tamawaik iwishnushkam wainmachu wajasú, nunik aentsun egau egkegsamtai wekaesatjai tusa.

<sup>12</sup> Nu nunikun gobernador wainak dekaskeapi tiu, nunik Apu Jesús pachisa etsegbau-nash shiig puyatjus antukui.

*Pablo Bernabejai Antioquia, Pisidia awa nui chichagkagtukbau*

<sup>13</sup> Pablo ni kumpaji aidaujai Pafos jegawaju nunikag barconum chimpimjag Perge shiyakajui, Panfilia nugkanum awa nui; tujash Juagkak ditan ukuinak Jerusalén wakitkiuwai.

<sup>14</sup> Nunikmatai ditak Perge ukuinak jegawajui Antioquia Pisidia awa nui; nuniai tsawan ayamtai tsawagmatai jega judío ijuntaijin wayawag ekeemsajui.

<sup>15</sup> Nuniai chicham umiktin agagbauwa nuna, profeta agagbau aidaunash ashí aujus ashimkag, jega ijuntaiya nuna apuji chichajuinak:

—Yatsug aidauh, atumesh aents aidau anentai ichichtumain ajutjamkujaig chichaktajum, tau.

<sup>16</sup> Tama Pabloskam wajakí, uwejin takuinu bitat asatnume tusa, nunik:

—Israel aidauwah, nuigtú judiochu Apajuí puyatjusjum umijin aidautigmeshkam antugtuktajum.

<sup>17</sup> Israelan Apajuijiya nu, iina muunji aajakajua nuna etegjauwai, dutikamu asa shiig kuashat yujakajui nuigtush tajimat wajasajui eke Egipto nugkenchau batsatiatak, imanikagmatai Apajuí shiig senchigtina ibau asa jiiui.

<sup>18</sup> Dutikam uwegshunum cuarenta mijan tumain yujas pegkegchaun takaagtaish katsunjauwai;

<sup>19</sup> dutika Canaán nugkanum, siete nugkanum ditash chichaku aidau batsamtatman depetuk ii muunji aidaun batsasui.

<sup>20</sup> Nu ashí cuatrocientos cincuenta mijan tumain nagkaemakui ai; “Apajuí juez aidaun adaijauwai, nu dutikamuk profeta Samuel pujujakua imanui jegantui.

<sup>21</sup> Nunik pujusmatai, Samuelan segau ainawai iina reyjjish ajutjamti, tusag. Tiagtai Apajuí Saulan Cisa uchijin, Benjamín weantun susauwai, dutikam cuarenta mijan inamjauwai.

<sup>22</sup> Dutikamun idaimitkak Davitan rey ema chichaak: ‘Davitan Isai uchijin wainkajai ju anentaijui shiig awajtawai ni ashí wi tabaunak dutikattawai’.

<sup>23</sup> Nunú David weanta nuiyan ni anagkuaewa dutiksag Apajuí, Jesusan Israel aidaun uwemtijatnun awetiuwai.

<sup>24</sup> Tujash Jesús eke jintinkagtutan nagkamtsaig, Juan ashí Israel aidaunak, ‘tudau takat idaikujum yamimagtajum’, tusa etsejú wegau.

<sup>25</sup> Nuniak Juan jakatnuji tikiju wegau asamtai chichaak: ¿Atumesh minash yayai tusagmae anentaimtugjume? wika atum auchuashit tujutjum duchauwaitjai; tujash mina ukujui makichik minittawai, nunak wika sapajinakesh atitmaitsujai, tiuwai.

<sup>26</sup> “Yatsug aidauh Abraham weantu aidauwah, nuigtú atum judiochu Apajuí puyatjusjum umijin ainajum aanutigmin juna chichaman antukag uwemjatnume tusa awetugmaje.

<sup>27</sup> Tujash Jerusalén batsamin aidauk, ditá apuji aidaushkam Jesusnak dekachaju ainawai, nuigtú profeta chichamen ashí tsawan ayamtainum aujuinakush dekachajui, nunidau asag Jesusnak mantamnati tiaju ainawai, nuna dutikainak Apajuí nunikti tibauwa nuna umikajui.

<sup>28</sup> Ni dutikamujin mantamnamainuk atsujaig Pilaton segajui maati tusag.

<sup>29</sup> Nuna ashí ni pachisa agagbauwa nuna umikag, numinmayan akakiag ukusaju ainawai.

<sup>30</sup> Tujash Apajuí jakaunak inankiuwai.

<sup>31</sup> Dutikam kuashat tsawantai wantintukui Galilea nagkamas Jerusalegkash tuke niijai ijunag yujajakú aina nuna. Nunú ainawai yamai niina pachis, ashí aents aidaush antuinamunum etsejuina duka.

<sup>32</sup> “Nuadui jutiishkam yamajam chicham atuminish etsejuinaji: Apajuí ii muunji aajakajua nuna anagkuaewa nunú;

<sup>33</sup> nunak Apajuí yamai, jutii ditá uchijí ainag nui umiké, Jesusan inankiuwa nuadui; Salmo jimaja ju agagbaunum agak: ‘Amek mina uchijuitme tuja witjai amina Apanuk, wi yamai aentsnum akiinati tima akiinau asam’,\* tibauwa nunisag.

\* 13:33 Sal. 2.7.

<sup>34</sup> Apajuik ni chichame agagbauwa nui etsekgau aajakui, Jesús inankim niina iyashig ukumatainmag kaugchatna nuna pachis, duka: ‘Wi Davitan pegkejan dekaskea nuna anagkauawaitag nunak aminí umiktatjai’,<sup>†</sup> tawai.

<sup>35</sup> Nuadui tikich agagbaunmash: ‘Ameke amina inakem Pegkegma nuna iyashí kaugtí tusamek idaisashtatme’, tawai.

<sup>36</sup> Dekaskenmag Davitak ni weantu aina nuig Apajuí dutikata tibaunak ashí imatiksag umik jakauwai, nunikmatai niina muunji ukumataijinig ukusam kaujui.

<sup>37</sup> Tujash Apajuí Jesusnak inankiuwai dutikamu asa kaugchauwai.

<sup>38-39</sup> Nunin asamtai yatsug aidauh, atumesh dekamain ainagme, tudau tsagkugnamuk Jesusai awai tusa etsejuinag nu; nunin asamtai ditá tudauji aidauk, Moisés chicham umiktá tibaauwa nu umiamunmakesh pegkejai tamak asachajui, tujash ashí Jesusai dekaskeapi tabaunum pegkeg ainagme tama asajui.

<sup>40</sup> Kuitamamkatajum profeta aidau tibaauwa nu atumin uminkai, duka:

<sup>41</sup> “ ‘Dushikkagtin aidauwah antuktajum, puyatkatajum, nunikjum megkaejatajum; wagki atum batsamtinaitjum dui makichik takatan iwainaktinaitjai, duka makichik aentskesh ujapainakuish, dekaskeapi tichatin ainagme’ ”.<sup>‡</sup>

<sup>42</sup> Juna tusa ashimak Pablo ni kumpají aidaujai jega ijuntainmaya ijinjagmatai, judiochu aina nu, tikich tsawan ayamtai atata duishkam ju pachisam aan nagkaemasam uajatkata, tusag segaidau.

<sup>43</sup> Nunú ijunbau ashimnakmatai, kuashat judío aidau, nuigtú judío atajai tumamiu aidaujai Pablon Bernabekai wetai uyunaidau.

Nuniagtai, atumek Apajuí wait anenjamja nuig ebetmamjatajum tusag chichajuidau.

<sup>44</sup> Tikich tsawan ayamtai jeganmai, ashí yaaktanmaya tumain ijunajui Apu Apajuí chichame etsegbaun antukagtatus.

<sup>45</sup> Tujash judío aidau kuashat aents tuwakajun wainkag senchi kajekag, Pablo tabaunak dakituidau asag pegkegchau chichajuidau.

<sup>46</sup> Tuinam Pabloskam Bernabekai ajankas aikaju:

—Dekas dekatkauk atum ainajum nunú Apajuí chichame ujaktajum tibau ainagme. Tujash atumek pujut tuke atina duka dakitau asagmin, yamaik judiochu aina nui wetatji.

<sup>47</sup> Wagki jutiinak Apu Jesús chichagtamak:

“Aminak judiochu aina nui tsaaptina numamtin atí tusan apusajame, dutikamu asam midau uwemat pachisam ashí nugkanmash etsekgata tusan”, tujamajji.

<sup>48</sup> Nuna antukag, judiochu aidauk shiig aneasajui, nunikag Apu Apajuí chichameg pegkejai tutan nagkamawaju, nuninashí pujut nagkanchaun jukitnume tibau aina duka dekaskeapi tiajui.

<sup>49</sup> Apu Apajuí chichamega nunashkam ashí nunú nugkanmag dekaawajui.

<sup>50</sup> Tujash judío aidau, nuwa Apajuin puyatjus umijin eme anentsá diitai aidaun, nuigtú aishmag chicham antugtai aidaujai akatjajui; dutikam Pablon Bernabekai waitkaidau, dutikawag ditá nugkeenig jiiikiag awemajui.

<sup>51</sup> Dutikam ditashkam ditá nawen yukukuntu awa nuna, pegajag akaketkaju dakituinamu asag iwaintuinak, dutika ukukiag Iconio weajui.

<sup>52</sup> Tujash Jesusa nemajin aidauk, shiig aneasag pujuidau, Wakani Pegkejish ajamu asag.

## 14

### *Pablo Bernabekai Iconio yamajam chicham etsekgamu*

<sup>1</sup> Pablo Bernabekai Iconio jegaawaju, nunikag tuke nunin asag, jega judío aidau ijuntaijin mai wayawaju, nunikag Jesusan pachisag etsejiagtai antukag kuashat judío aidau, judiochu aidauhkam dekaskeapi tusag Jesusan nemagkajui.

<sup>2</sup> Tujash judío aidau dekaskeapi tuinatsu nu, judiochu aina nuna pegkegchau anentaiyai akatedau, Jesusa nemajuidau kanjekatnume tusag.

<sup>3</sup> Nuninaig Pablo Bernabekai dukap tsawan nui pujusajui, nunikag ajankas Apu Jesusai kajinas, Apajuí wait anenkagtamun pachis etsejuidau, nuniagtai senchijin suwidau dutikam aents dutikmainchaun iwainagtai chicham etsegbaunash dekaskeapi tuidau.

<sup>4</sup> Tujash aents yaaktanmayag kanakajui; ujumak judío aidaujai ijunainai, tikich ujumak apóstol aidaujai ijunaidau.

<sup>5</sup> Nunidau asag judío aidau, judiochu aidaujai nuigtú apu aidaujai chichaman umigkaju, waitkasa kayai tukuí tukuinakua maami tusag.

<sup>†</sup> 13:34 Is. 55.3.    <sup>‡</sup> 13:41 Hab. 1.5.

<sup>6</sup> Nunú tuinamun Pablo Bernabejai dekaawaju, nunikag Licaonia nugkanum yaakat tikijumamtin aidaunum, Lистра nuigtú Derbe aina nui jegawaju,

<sup>7</sup> nunikag nuwishkam yamajam chichama nuna pachis etsejuidau.

*Pablo Listranum kayai tukuagbau*

<sup>8</sup> Listranum makichik aents tuke wekaechau shutú akiinauwa nunú eketu;

<sup>9</sup> Pablo chichagkagtutai antak, nunittaman Pablo esetug diikmá, dekas tsagau-mainapitja tabaujin waitkau;

<sup>10</sup> dutika senchi jiiká chichajak:

—¡Wajaita, nunikam tutupit wajastá! tau.

Tamawaik tseke wajakí wekaetan nagkabau.

<sup>11</sup> Pablo dutikamun wainkag aents aidauk, Licaonia chichamai senchi untsumkag:

—¡Apajuí aidau aentsmaga jutiini taawaje!

<sup>12</sup> Tusag Bernaben chichajuinak:

—Juka Apajuí Jupiterai\* tuidau.

Tuja Pablon ni chichagkagtau asamtai:

—Juka Apajuí Mercuriowai tuidau.

<sup>13</sup> Nunú yaaktanum niniasuk Apajuí Júpiter tutai ememattai jega au, nuna sacerdotéji toro aidaun jukiag nuigtushkam iwagmamak yagkug aidaujai yajuak, kuashat aents aidaujai kaunawaju. Nunikag toron maa apeenak, ememattag tuidau.

<sup>14</sup> Nu nuniamun apóstol Pablo, Bernabejai wainkag, jaanchjin tujit ichigkag aents tuwaká ijunbaunmag ditashkam eteena wajan senchi untsumkag:

<sup>15</sup> —Muun aidauh, ¿wagka aancha aikagme? Jutiishkam aents atum ainajum annuketji; nunin asaja atum wainkajum aikajum aanú idaikujum, dekas Apajuí iwaku pujuwa nu nayaimpin, nugkan, nayantsan, nuigtú ashí nui ayá nunash najankauwa nu nemagkatajum tusa yamajam chicham etsejuinaji.

<sup>16</sup> Yaunchuk tsawan ajakua duik, Apajuik ashí aentsnak dita wakejuinamunak takastinme tusa idaisauwai;

<sup>17</sup> dutikauwaitak ni pegkeg takaamujiya nui niish yaita nunak tuké iwainmamkauwai; nigki atumin nayaimpinmayan yumin awetugma dushakam ajakash shiig nejektí tusa, nunikmatai shiig yuawag ditá anentainish shiig aneastinme tusa.

<sup>18</sup> Tusá ujainamash, aents aidauk nunú toro maa apeaku dita ememattanak kakajus idaimainchau dekapedau.

<sup>19</sup> Nuninai ujumak judío aidau, antioquianmaya nuigtú iconionmaya aidaujai kawnawag, aents aidauk anentain yapagtuawaju, dutikawajam Pablonak kayai tukui tukuinakua, maajistai tusag japikí jukiag yaaktanum jiikiag aipkiajui. <sup>20</sup> Tujash Jesusa nemajin aidau ijunag Pablo tentea batsamtai niishkam nantakiu, nunik ataktú yaakat wayau; nunik kashinia dui Bernabejai jiinkiang Derbe weajui.

<sup>21</sup> Nunik nunú yaaktanum yamajam chichama nuna etsejagtai, kuashat aents Jesusan nemagkagmatai ukuinak, Lистра, Iconio, Antioquía aina nuní waketjajui.

<sup>22</sup> Nui jegawag Jesusa nemajuidaun chichajuinak:

—Atumek dekaskeapi tiuwaitjum nuig emetmamatajum, Apajuí inamtaijin wayata takuik, kuashat waitiamuk inagkemainai, tiaju.

<sup>23</sup> Nunikag makí makichik yaakat aidaunum iglesia aidau batsatun anciano aidaun adaitujag, ayunawag Apu Apajuin aujtusag niini dekaskepita tiu aidaunak niina idaitusajui.

*Pablo Bernabejai Antioquía Siria awa nui wakitkimu*

<sup>24</sup> Nuna dutikawag ukuinak Pisidia nugkan nagkaikiag Panfilia jegawajui.

<sup>25</sup> Nunikag Perge chichaman etsegkag ukuinak, Atalía akaikiajui.

<sup>26</sup> Nui egkemjag Antioquía weajui, nunú yaakta nui Apajuí anenkajin kuitamsam takastinme tusa idaisam, takasaju asag.

<sup>27</sup> Nunik Antioquía jegawag, ashí iglesia aidaun ijumag, Apajuí dita takainamunum shiig kuashat yaigkagbaun pachis ujakaju, judiochu aidaush wajuk Apajuin dekaskeapi tiaje nunashkam.

<sup>28</sup> Nunikag Pablo Bernabejai kuashat tsawantai nuig Jesusa nemajin aidaujai ijunag batsamsajui.

\* **14:12** Jupiterai, Mercurio tawa nunak versión Reina-Valera (RV) tawai. Tikich versión Dios Habla Hoy (DHH) takug: Zeus, Hermes tawai. Zeus, Hermes aina juka griego aidau apajimtaiji ajakajui. Nuna romanmaya aidau tuinakug Júpiter, Mercurio tujakajui nunak tuinayatak.

## 15

*Jerusalén ijunjamu*

<sup>1</sup> Nunú tsawantai ujumak Judeanmaya aidau Antioquía jegawag, Jesusa nemajin aidau jintintuinak: “Atumek Moisés chicham umiktinun agajua nui, pakamaktajum tibauwa nu umiachkugmek uwemain ainatsjume”, tuidau.

<sup>2</sup> Tabaun Pablo Bernabesai antukag, ditajai senchi pampandaijag kajegdaikaju. Nunikag, Pablo Bernabesai nuigtú tikich aidau ujumak Jesusa nemajin aidaujai Jerusalén wetinme, nunikag apóstol aina nujai nuigtú anciano batsata nujai nuna pachisag chichastinme tiaju.

<sup>3</sup> Iglesia antioquianmaya awemajam, Fenicia nugkanum nuigtú Samarianmash nagkaemainak wajuk judiochu aidau duik umitaijin idaisaje Apajuin nemagkagtatus. Nuna etsejiagtai ashí Jesusa nemajin aidau antukag shiig aneedau.

<sup>4</sup> Jerusalén jegawagmatai shiig anentus jukiaju iglesia aidau, apóstol aidaush nuigtú anciano aidaushkam, dutikawajam ditashkam ashí Apajuí ditai dutikawaja nunak ujakaju.

<sup>5</sup> Tujash ujumak secta\* fariseo aina nuiya, Jesusan dekaskeapi tiaju aidau wajainiag chichainak:

—Judiochu aidau Jesusa nemajuina dushakam pakamaktinme, nuninak Moisés chicham umiktajum tibauwa nunash umiktinme tumainai, tuidau.

<sup>6</sup> Tiagtai apóstol aidau nuigtú anciano aidaujai ijunjaju shiig dekawagtatus.

<sup>7</sup> Kuashat nuna pachis chichai chichainakua Pedro wajakí chichaak:

—Yatsug aidauh, atumek dekagme yama nagkabaunum, Apajuí atum ainajum anuyiatigmin mina etegtuauwa duka, wi yamajam chichaman etsetgai judiochu aidaush antukag Jesusan dekaskeapi titinme tusa.

<sup>8</sup> Apajuí aentsú anentainash waina nunú, ditanash iwaintukui ni anea nuna, dutikak Wakani Pegkejinash susajui jutiin utugtambauwa dutiksag;

<sup>9</sup> jutii ainag nujai ditanak tikich aentsua nuninuk diigmaschauwai, dekaskeapi tabaunum ditá anentainash pegkemtikajui.

<sup>10</sup> Nunin aish, ¿wagka Apajuí ekajmainush, iina muunji aidakesh umikchaju, jutiikesh umimainchauwa dusha, Jesusa nemajin aidaush umiktinme tajume?

<sup>11</sup> Duka nunimatsui, yamaik jutii Apu Jesús dekaskeapi tabaunum anenjauch uwemainag nunisag ditashkam uwemainawai, tiuwai.

<sup>12</sup> Timatai ashí itatjaju, Bernabé, Pablojai tutai antukagtatus, nunikagmatai judiochu aidau aents dutikmainchau aidau Apajuí ditai iwainagbaun etsejuaidau.

<sup>13</sup> Nu Chichaamun ashimkagmatai Santiago wajakí chichaak:

—Yatsug aidauh, minash antugtuktajum.

<sup>14</sup> Simón ujakpakmaji, Apajuí nagkamas judiochu aidau aents dutikmainchau aidau aentsug agtinme tusa.

<sup>15</sup> Duka Profeta aidau agagbaunum tawa jujai betekai:

<sup>16</sup> “Ju junikmatai Davita jee iyaaja nuna waketjakin ataktú jegamkattajai; tsainka nuna ataktú jegamkan yaunchuk aaya imanuk awasattajai;

<sup>17</sup> dutikam tikich aents aidaush Apú egaktinme, nuigtú ashí judiochu aidau mina daag pachisa ujakbau aina dushakam.

<sup>18</sup> Aatus Apu Apajuí tawai, yaunchuk nagkamas jujú chichaman dekamtijamauwa nunú.”<sup>†</sup>

<sup>19</sup> “Nuadui wika judiochu aidau, Apajuin nemagkaja duka waitkaschagmi tajai;

<sup>20</sup> dekas ayatak carta agatmainai, apajuimtai aidau anagkuamu pegkegchau aina duka, pempeaja maamu aina nuna nejeesh, nuigtú kuntu numpeshkam yuawaigpajum tsanijintash tsanijinawaigpa tiagmi;

<sup>21</sup> wagki yaunchuk nagkamas duka awai, Moisés chicham umiktajum tusa agagbauwa nuna etsejuaidau, duka ashí yaaktanum tsawan ayamtai tsawagmatai jega ijuntainum tuka aujtaiyai”, tiuwai.

*Papi agaja judiochu aidau awetimu*

<sup>22</sup> Nuna tutai apóstol aidau, anciano aidaush nuigtú iglesia aidaushkam pegkeg diisajui, nunikag chichasag jutii ainag juiya etegjami dutika Pablo Bernabesai awemami Antioquía, tiaju. Dutikawag Judas, Barsabás tutaiya nuna Silasjai etegkawajui, dita aina nuiya eme anentsá diitai aidau;

<sup>23</sup> dutika ditai juna carta agajag awemajui:

\* 15:5 “secta” tawa junak, Jesusa chichame dekaskea nuna yapajia etsejin aina nuna tawai. † 15:18 Am. 9.11-12.

“Apóstol aidauti nuigtú anciano aidaujai atumi yatsum aidauti, iina yachí judiochu aidautijum Antioquia, Siria nuigtú Cilicia batsatjum nunú aidautigmin, kumpanjime.  
<sup>24</sup> Antukmaji ujumak jutii ainag juiya jutii awemachbauwaitak, atumiin taawag anentaimtagmin pachimjupak ukugmakiaju tabau.

<sup>25</sup> Nunikaja ashí ijunja chichasji, jutii ainag juiya ujumak aents etegkami dutika, jutii aneetaiji yatsug Bernabé, Pablojai atumin ijagtamsatats mininakui awemami tusaja;

<sup>26</sup> Bernabé, Pablo aina juka Apu Jesucristo chichamen etsejuidau asag, maata tama ishamainnum yujainakush ditá pujutinak puyatjuinatsui.

<sup>27</sup> Nunidau asagmatai Judasan, Silasjai awetajime, dita igkumpawag, ashí ju agajag juna pachisag shiig ujapaktinme tusa.

<sup>28</sup> Wakaní Pegkejin shiig awajkae jutiinash aikasag, nunin asamtai makichkish dita umimainchawk utugchatak apujtusachgmi, jujú aina junak dutikatnume taji;

<sup>29</sup> apajuimtai aidau anagkuamu maamu aina duka yuwawaigpajum, kuntuu numpe aidaushkam, kuntuu pempeaja maamu aina nuna nejeesh, nuigtú tsanijintash tsanijinawaigpajum, tajime. Jujú aidau tupantakjume pegkeg nuniktatjume; aja juaktajum”.

<sup>30</sup> Ditashkam akatmag ukuinak Antioquia weajui, nunikag Jesusa nemajin aidau ijumag cartan susajui;

<sup>31</sup> dutikawajam nuna ausag shiig aneasaju anentai ichichtuinamu asag.

<sup>32</sup> Judas, Silas aina dushakam profeta asag, yatsut aina nuna kuashat ausaju, dutikam ichichmamjag shiig aneas juakaju.

<sup>33</sup> Nui dukap tsawan batsamsag waketiagtai, Jesusa nemajin aidau shiig anentsag akateg awemajui.

<sup>34</sup> Tujash Silasak nui juakta tabau shiig awajkam juwakui.

<sup>35</sup> Pablok Bernabesjai Antioquia juwakajui, kuashat tikich Jesusa nemagkau aidau jintintak, nuigtú yamajam chicham Apu Jesusdaun etsejak.

#### *Pablo Bernabesjai kanakbau*

<sup>36</sup> Ujumak tsawan asag Pablo Bernaben chichajak:  
 —Ataktú wee yatsut aidau ijagsami, ashí yaaktanum Apu Jesusa chichame etsegkabiag nui wajuk batsatainawaki diyaku, tiuwai.

<sup>37</sup> Tama Bernabé Juangkan ayatá tau Marcos tutaiya nuna;

<sup>38</sup> tujash Pablok Marcos jutanak dakitau, wagki Panfilia ditajai ijunag takaamunum ukukbau asa.

<sup>39</sup> Nunitai kuashat jiya jijanituinakua mai kanakaju. Nunik Bernabek Marcosan juki egkemag Chipre weuwai.

<sup>40</sup> Nuniai Pablo Silasan etegkauwai, nunikmatai yatsut aidau, Apu Jesús wait anenjamjati tusa akatjam, nuiya jiinkiajui.

<sup>41</sup> Nunikag Sirianum nuigtú Cilicianum iglesia aidau anentain ichichtukiag nagkaemakiajui.

## 16

#### *Timoteo Pablon Silasjai uyuntsamu*

<sup>1</sup> Pablo Derbe jegaa nagkaemaki Listra jegauwai. Nui makichik Jesusa nemajin Timoteo daagtinun wainkauwai, dukujig judío nuwa Jesusa nemajin, tujash apají griego.

<sup>2</sup> Yatsut listranmaya, Iconionmaya aidaushkam Timoteo pachisag pegkejan chichajuidau.

<sup>3</sup> Tuidau asagmatai Pablo uyuntusti tau asa, pakagtajum tima pakajiajui, judío nui batsamin aidau pegkegchaun anentaimtinum tau asa, apají griegon ashí dekaidau asagmatai.

<sup>4</sup> Nunikag ashí yaaktanum nagkaemainak, Jesusa nemajin aidau, apóstol aidau nuigtú anciano aidau Jerusalén batsata nujai chichaman umikag agagbauwa nuna pachisag ujadau.

<sup>5</sup> Nuniai asamtai iglesia aidaush dekaskeapi tabaujiya nuig ichichmamaidau, nuninak kashí kashinig kawedau.

#### *Pablo kajanum macedonianmaya aents wainkamu*

<sup>6</sup> Wakaní Pegkejiya nunú Asia nugkanmag chichamak etsegkaipa tabau asag, Frigia nugkanum nuigtú Galaciya aatú nagkaemakiajui;

<sup>7</sup> nunikag Misia nugkanum jegawag, Bitinia nugkanum wegagtatus anentaimaidau; tujash Jesusa Wakaní wetinme tichauwai.

<sup>8</sup> Nunikag Misianak tutupit nagkaikiag Troas jegawajui.



<sup>9</sup> Nuanui Pablon Macedonianmaya aents kajanum paan wantintuk chichajak: “Macedonia katigkam jutiish yaijatkata”, taun wainkauwai.

<sup>10</sup> Pablo nuna wainkamtai, dekas Macedonia wegagmi tusa umintsabiaji, junak Apajuiyap yamajam chichaman awi etsekgati tujamu asa jutikawa tusaja.

*Pablo Silasjai Filipos jegaamu*

<sup>11</sup> Nunikaja Troas egkemjá tutupnik wega weakua ajuntai Samotracia jegaa, kashinia dui Neápolis jegabaiji.

<sup>12</sup> Nui pujusá Filipos weamiaji, romanmaya batsamtaiji dekas yaakat iman Macedonia nugkeen awa nuanui, nunika nu yaaktanum machik tsawan pujusbaiji.

<sup>13</sup> Nuniamunum tsawan ayamtai tsawagmatai, yaakat jiinki namaká uwet jegawabaiji, judío aidau Apajuí aurtaijig awints awatai tau asaja; nui pekaamsa nuwa aidau ijunjau chicham ujabaiji.

<sup>14</sup> Nu aina nuiya nuwa Lidia daagtin, yaakat tiatiranmaya jaanch kapantu nentekau sujin, Apajuinash emematin ekeemas antú ekeemayi; nunittaman Apu Apajuí anentain antinkabi Pablo etsegbaunash shiig antukti, tusa.

<sup>15</sup> Nunik ashí niina patayijai yamimakag:

—Atumesh, minash Apu Jesusan dekas umigmmain waitkugmek, mina jegajui taajum kanagtajum tusa segapakui, weamiaji nui pujustasa.

*Pablo Silasjai cárcel egkeamu*

<sup>16</sup> Nunika, Apajuí aurtainum wegajin, nuwa muntsujut inak wakan dekamin ajamu igkumpaktatus jiintugmakmayi. Nunú dekaamtai apuji aidauk kuashat kuichkin juidau.

<sup>17</sup> Nunú, jutiin Pablojai wegajin pataetugmak minis senchi untsamak:

—Ju aents aina juka Apajuí ashí nagkaekagtasu muunta nuna inake ainawai, nunin asag nuiya uwemta nuna pachis jintinjamatatus minitjamainawai! wajau.

<sup>18</sup> Nunak kuashat tsawantai imatú wekaegu, nunitai Pablo kajejuk ayampatua wakanin chichajak: Jesucristo daajin tajame, aanú nuwauch jiinkim ukuktá.

Tamawaik wakanchakam jiinki ukukiuwai.

<sup>19</sup> Tujash nuna apuji aidau ni dekamamtai kuichik jutaijin nunimainchau wajasmatai, Pablon Silasjai achiká jukiag, plazanum apu aidau eemtin ejegawaju.

<sup>20</sup> Dutika juez aidau chichajuinak:

—Jujú aents aina juka judío ainawai, nuninaidak iina yaaktajin taawag dapamkagtu-inawai,

<sup>21</sup> nuninak ditá pujutin ii romanmaya aidautik machikish dutikmaitsug nuna jintinawai, tuidau.

<sup>22</sup> Nuna tiagtai aents aidau Pablon Silasjai pampantug wajatkiagmatai, juez aidau, jaanchjin awitug, numí suwimatajum, tusa inanjau.

<sup>23</sup> Timatai senchi suwimawag cárcel egkeawaju, dutikawag achikbau kuitamin aidau:

—Shiig kuitamkatajum, tiajui.

<sup>24</sup> Nunú tijam, achikbau kuitamnushkam juki, carcela initken calabozo egkeawajui, dutikawag naween cepo\* apujtusag shiig emetug ukukiajui.

<sup>25</sup> Tujash aehaet wajasú ai, Pablo Silasjai Apajuin aujuinak, kantamtan kantam wajagtai, tikich achigbau aidaukam antú batsatu.

<sup>26</sup> Nuniai pachiachbau shiig senchi uujak, cárcel jegamku ajigbau aidau senchi umuchiau, nuniaig waamak ashí waiti aidauashkam ujanjau; nunitai ashí achigbau aidau cadenayai jigkakbauk tsujinag kakekajui.

<sup>27</sup> Imaniai achikbau kuitamin shintaak diistakamá, carcela waitiji aidauk ujanag ataman wainkau, nunik espadajin ukuini juki maamata tau, achigbau aidauk tupikakiajeapi tusa.

<sup>28</sup> Nunitai Pablo senchi untsuká:

—Maamawaipa, jutiik ashí betek batsatji, tiuwai.

<sup>29</sup> Tutai achikbau kuitamnushkam jii ekemakjum sujstajum tusa segabiu, nunik ishamak kujaukmaikia tupikaki Pablo Silasjai wajamunum jegantá tikishmatjau.

<sup>30</sup> Dutika agaa jiiiki:

—Muun aidauh, ¿wajina wisha dutikmainaitja uwemjatasanush? tusa iniau.

<sup>31</sup> Tuinam dita aiinak:

—Apu Jesucristo dekaskeapi tita, nuniakum ame, nuigtú amina pataim aidaujui uwemjattame, tiajui.

<sup>32</sup> Tusa Apu Apajuí chichamen niina ujaak, ashí niina jeen batsata nunash ujakui.

\* 16:24 “Cepo” tawa nunak, achikbau cárcel pujau jiinki tusag tapna jimag mai yantamen agtuamunum dawenum apatuk chanua ukujakú ainawai.

<sup>33</sup> Nunú hora kashia duik juki, achikbaun kuitamnushkam ipujamu aidaun nijatkau; dutikam nuadui yamimakaju ni, nuigtú ashí patayí aidaushkam.

<sup>34</sup> Nunik niina jeen juki yutain ajamsau, nunikag ashí niina jeen batsata duka shiig aneasaju, Apajuin dekaskeapi tiaju asag.

<sup>35</sup> Kashikmas juez aidau achijatin aidaun, achikbau kuitamnun awetiaju: Anú aents aidauk jiktajum, timae titajum tusa.

<sup>36</sup> Tima achikbaun kuitamin Pablon chichajak:

—Juez aidau akupkati tujutiaje; nunin asamtai shiig aneasjum wetajum, tau.

<sup>37</sup> Tujash Pablo achijatin aidaun chichajak:

—Jutiik romanmaya aents ainajinig shiig chichaman dekagtamtuk tuwakbaunum asutamawag cárceel egkepawagmae; dutijabau ainayatkush, ¿wagka yamaish uukash jigmakta tuinawa? Duka nunimait sui, dita taawag jigmaktinme, tuidau.

<sup>38</sup> Achijatin aidau juez aidaun timae tusa ujainam, antukag senchi ishamkaju, romanmaya aents ainaji tuidau asagmatai.

<sup>39</sup> Nunikag Pablon, Silasjai wejiaju, tsagkugtugtajum, tita tusag. Dutikawag jiikiag:

—Juig pujutsuk wetajum, tusag awemaju.

<sup>40</sup> Carcelnumia jiinkiag Pablo Silasjai Lidia jeen weaju, nunikag nui yatsut aidaun wainkag anentain ichichtujag ukuinak shiyakajui.

## 17

### *Tesalónica pampandaijumu*

<sup>1</sup> Nunik ashinkag Anfipolis, nuigtú Apolonia nagkaikiag Pablo Silasjai Tesalónica jegawaju, jega judío aidau ijuntaijin.

<sup>2</sup> Pablok tuke nunin asa, jega ijuntainum wayau, nunik tresa imania tsawan ayamtai aina nui ditajai tudaiyidau Agagbaun pachisag.

<sup>3</sup> Dutikak, Cristuk waitkasa maam ataktú nantaktinai tusa agagbauwa nuna pachis ujaak:

—Wi Jesusan pachisan ujaajim, nuuwai Cristuk, tiuwai.

<sup>4</sup> Nuna tutai wajumchik judío aidau dekaskeapi tiaju, nunikag Pablojai nuigtú Silasjai ijunjaju; nuigtushkam kuashat griego Apajuí emematin aidaush, nuigtú kuashat nuwa puyatjusa diitai aidaushkam, dekaskeapi tiaju.

<sup>5</sup> Tujash judío aidauk senchi kajejudau asag, aents pegkegchau, daki aidaun jintaa yujattaman yajuakaju, nunikag nujai ijunjag aents aidaun dapampaidau; nuninak Jasogka jeen jetekaju, Pablo Silasjai egainak, jukiag aents tuwakbaunum ejegatasag.

<sup>6</sup> Tujash nui wainkachag Jasogkan, nuigtú ujumak yatsut aidaujai jukiag yaakta apuji batsatbaunum ejegawag unsumaidau:

—Ju aents aina ju, ashí nugkanum wekaegas dapamkagtú wekaenuwe nunú jui tajutjamamtai;

<sup>7</sup> Jasón niina jeen apujus pujujui, dutikam dita ashí Roma apuji chicham umiktin aidau umikbauwa nunak dakituinawai, tikich rey Jesús daagtin awai tuidau asag.

<sup>8</sup> Nunú tabaun aents aidau, ashí yaakta apuji aidaush antukag, pampaidau.

<sup>9</sup> Imatiagtai Jasón, nuigtú tikich aidaujai kuichkin susajui dutikamtai akupkajui.

### *Pablo Silasjai Berea jegamu*

<sup>10</sup> Dutikawajam wamkesag kashi aig yatsut Apajuí nemajin aidau, Pablo Silasjai Berea awemajui, dutikam jegawag judío aidau ijuntaijin weajui.

<sup>11</sup> Nuiya aidauk tesalonicanmaya aidaun nagkaegas shiig anentaimaidau, nunin asag wakegas chichamnash antuidau, nuninak kashí kashinig agagbauwa nuna kuitamas aujuinak egaidau, Pablo tawa dusha dekaskeashit tusag dekawagtatus.

<sup>12</sup> Nunidau asag kuashat judío aidauk dekaskeapi tiaju, nunisag kuashat griego aidaushkam dekaskeapi tiaju nuwa eme anentsá diitai aidau nuigtú aishmag aidaushkam.

<sup>13</sup> Nuniemun judío Tesalonicanmaya aidau, Pablo Berea Apajuí chichamen etsejui tabaun dekaawag shimutkaju, nunikag nuishkam aentsun dapampaidau.

<sup>14</sup> Nudiagtai yatsut Jesusa nemajin aidau Pablon; nayants anunjukam wetá tusag awemaju, nuniai Silas Timoteojai Berea juwakajui.

<sup>15</sup> Pablo uyunaidauk Atenas ejegawaju, nunikag waketiagtai Pablo, Silasan, Timoteojai waamak jui taatnume, ditajai igkuniktajai, tiuwai.

### *Pablo Atenas pujusbau*

<sup>16</sup> Pablo Atenas, Silasan Timoteojai dakak pujus, kuashat anentain idajtus diyau, ashí yaakta nuanuig imá ditá apajuimtaijui aina duke ayau asamtai.

<sup>17</sup> Nuniau asamtai jega judío aidau ijuntaijin wayá judío aidaujai tudaiyu, tikich judiochu Apajuin puyatjus emematin aidaujaishkam, dutiksag kashí kashinig plazanum tuwakbaunmash tudaiyu.

<sup>18</sup> Nunisag, ujumak filósofo epicúreo aidau nuigtú estoico aidaush Pablojai tudayinai, nuniagtai ujumak aents aidau:

—¿Aush wajina pachisaya imá chichawa? tuidau.

Tiagtai tikich chichaidau:

—Tikich nugkanmaya apajuimtai aidaun yamagman pachis etsejajama, tuidau.

Nunak yamajam chichaman Jesusan pachis nuigtú nantakbaujin etseju asamtai, tiajui.

<sup>19</sup> Tusag Pablon, Areópago ejegawag iniinak:

—¿Ame yamajam jintinkagtam dusha waji pachisimea tame nunú dekatasa wakegag dusha tukagtumainkaitam?;

<sup>20</sup> wagki waji aidau dekashtai tame dusha waji takumea tame nu dekatasa wakegaji, tuidau.

<sup>21</sup> Ashí Atenas batsamin aidauk, nuigtú tikich ikaya kaunkau nui batsamnushkam, tikichnak dutiktusuk ayatak chichaman antuktatus wakegaidau nuninak yamajam aina nunak pachis augmatuidau.

<sup>22</sup> Tama Pablo Areópago\* ejapen wajantá chichaak:

Atenasnumia aidauwah, atum apajuimjum duka dekas pujawapi tusajum anentaimtin ainajum nunak wainjime.

<sup>23</sup> Atumi apajuujum emematku ijuntaigmin nagkaemaku diikman, altarnum APAJUÍ WAINCHATAI tusa agagbaun wainkamjai; nunú atum wainchayatkujum emematjum nuna wika pachisan etsejai.

<sup>24</sup> Apajuí nugkan najanauwai, nuigtú ashí nui ayá nunashkam, niyai nayaimpin nugkanash apujig, nunin asa aents ni ememattai atin jegamkamunmag pujuchui;

<sup>25</sup> makichik aentskesh niinu atinun takagtusti tusag atsumchauwai; niyai pujutnash, mayainash nuigtú ashí waji aina nunash sukagtinuk.

<sup>26</sup> Tuja makichik aentsusa nuiyanak yujak ashí nugkanum batsamsatnume tiuwai. Dutika mamiktujui tsawantan tuja nugka dita batsamsatnunashkam;

<sup>27</sup> nunak Apajuik, mina egatkatnume nuninak antintsagkesh dekapsatnume tusa. Tujash dekasenmag jutiijaig atushtak atsui.

<sup>28</sup> Wagki Apajuí takui pujaji, nuniau asa buchituinaji, nunisaik iwaku batsatji; ujumak atumdau poeta† ajajakajua dushakam: “Jutiik Apajuí uchijí ainaji”, tiajui.

<sup>29</sup> Dui Apajuí uchijí aidau asaja oro nuniachkush plata nuniachkush kayakesh aents aidau anentaimsa najanamu aina duka jutsukaitai Apajuik tusaik anentaimtumaitsuji.

<sup>30</sup> Nunak aents dekaeha aents nuniagtaish, Apajuik pachitsuk idaisauwai, tujash yamaik aents ashí nugkanum batsamin aidaush, tudaujinak idaisatnume, tawai.

<sup>31</sup> Wagki Apajuik makichik tsawantan mamikiauwai, nunú tsawan jegatai ashí nugkanmaya aidaun, Cristo Aentsmaga akiinau maamu nantakiuwa nuna, yamaik aents pegkegchau aidau, pegkeg aidaujai etegjam akankam ijumjata titin asa.

<sup>32</sup> Tujash nantakbau tabaun antukag tikich aidauk dushikinai, tikich chichainak:

—Dekas ju tame duka tikich tsawantin ataktú jutiksaik antukagmi, tiaju.

<sup>33</sup> Tiagmatai Pabloskam ditanak ukukiuwai.

<sup>34</sup> Tujash ujumak aents dekaskeapi tiaju, nunikag Pablojai ijunjajui, nuanui pachitkau Dionisio Areópago ijunin, nuigtushkam makichik nuwa Dámaris daagtin, nuigtú tikich aidaushkam.

## 18

### *Pablo Corinto jegaamu*

<sup>1</sup> Pablo nuna dutika ukuak, Atenas jiinki Corinto weuwai.

<sup>2</sup> Nui jegakmá, Pontonmaya Aquila daagtinun nuwe Priscilajai wainkau italianmaya taa ujumak tsawan pujuttaman apu Claudio ashí judío Roma batsata duka jiinjatnume tibau asa. Pablo nuna diyak wejiuwai;

<sup>3</sup> nunik jegakmá, jegamkatnun duwapen apijin asagmatai niishkam nu takatnak takau asa ditajai juwakui ijunag takasagtatus.

<sup>4</sup> Ashí tsawan ayamtai tsawautaik, jega ijuntainum jegaa, judío aidaun, griego aidaunash tuke ausagké au dekaskeapi titinme tusa.

\* **17:22** “Areópago” tawa nunak, yaaktanmaya apu aidau chichaman dekawagtatus tuwakua nuna tawai. Nunak nunijakú ainawai, aents ikaya taamtai chichaman antugkatgatus. † **17:28** “Poeta” tawa juka, aents wake besemag anentaibau, nuniachkush shiig aneamu ajam, ni nunimain anentaimtamun agau aina nuuwai.

<sup>5</sup> Silas Timoteojai Macedonia pujau taawagmatai, Pablok imá chicham etsegbauwa nunak takau, dutikak judío aidaunash Jesusak Cristuwai tusa ujaidau.

<sup>6</sup> Tujash judío aidaun dakituinak pegkegchau chichajuinam, Pablo niina jaanchjin pegajá wajantá chichaak:

—Atumek bakumajum megkaekatin ainagme, wika atuminig agkantaitjai yamai nagkamsanuk judiochu aidaunum wetatjai, tiuwai.

<sup>7</sup> Tusa jega ijuntainmaya jiiinkiu, nunik Ticio Justo Apajuin emematin jega ijuntainum ayaumas pujau asamtai nuna jeen weuwai.

<sup>8</sup> Tujash Crispo, jega ijuntaiya nuna apuji ashí niina patayijai Apu Jesusan dekaskeapi tusag nemagkaju. Tikich corintionmaya aidaush chicham etsegbaun antukag kuashat dekaskeapi tiaju, nunikag yamimakajui.

<sup>9</sup> Nuniku ai Apu Jesús Pablon kashi paan wantintuk chichajak: “Sapigmakaipa, chichagkagtukta itatkaipa;

<sup>10</sup> wagki wi amijaig ajai, makichkish pegkegchau awajtamkatasag achigmamainchau ainawai, ju yaakta jui mina aentsug aidaun kuashat ajutui”, tiuwai.

<sup>11</sup> Nu tima Pablo makichik mijan nuigtú jimaituk Corinto pujusui, nuiya aents aidaun Apajuí chichamen jintintak.

<sup>12</sup> Nunú tsawantin Galión Acayanum gobernador wajas pujau asamtai, judío aidaun ijunjang chichaman umikag Pablo jukiag, chicham dekatainum ejegawaju,

<sup>13</sup> dutikawag:

—Ju aentsua ju ashí aents aidaun Apajuí duke ememattajum tawai, iinu chicham umiktina nuig nuniktajum tabauk atsaig.

<sup>14</sup> Tiagtai Pablo nagkama chichaktag taig, Galión judío aidaun chichajak:

—Ju aents pegkegchau takasbau, nuniachkush magkagtuamukesh pachisjum takuginig judío aidaunum tajum nunak antugmainaitjime;

<sup>15</sup> tujash ayatak chichama duke, aentsú daaji pachisjum, nuigtú atumin chicham umitaigmea duke pachisa tau asajum; atumek juka iwajatajum, wagki wika aanú aina nuig juez amaitsujai.

<sup>16</sup> Tusa chicham epegkeaku ijuntainmayan agaa jiiijú.

<sup>17</sup> Dutikawajam ashí aents aidaun jiiinjang Sóstenes jega ijuntain apujiya nuna achikag, chicham epegtaiya nuig suwimaidau, tujash Galiogkak nunak pachikchau.

### *Pablo Antioquia wakitkimu*

<sup>18</sup> Pablo Corinto kuashat tsawan pujus yatsut aidaun akateg ukuak, Aquila Priscila aatus Siria nugkanum ashinkauwai, nunik Cencrea jegaa barconum egkemtsuk, Pablo buuken kesajui, Apajuin nuniktajai tiuwa nuna umiak.

<sup>19</sup> Nunik Pablo Éfeso jegaa, Priscilanak Aquilajai nui ukukiuwai, nunik jega ijuntainum waya judío aidaun Jesusan pachis tudaiyu.

<sup>20</sup> Nunikmatai: —Dukap tsawan jutijai pujusam wetá, tusa segaidau, tujash nigka ayú tichauwai;

<sup>21</sup> nunik ditá akateg ukuak: —Apajuí wakegakuig ataktú wakettsanuk taattajai, tusa barconum egkemag, Éfeso ukuak weuwai.

<sup>22</sup> Cesarea anumak Jerusalén weu, iglesia aidaun kumpamatatus; nunik Antioquia weuwai.

<sup>23</sup> Nui dukap tsawan pujus ataktú jiiinkiu, makí makichik nugka aidaunum Galacianum, Frigianmash ashí Jesusa nemajin aidaun anentain ichichtugtatus.

### *Apolo Éfeso chicham etsegkamu*

<sup>24</sup> Nunú tsawantin makichik judío Apolo daagtin, Alejandrianmaya Éfeso jegauwai. Nunú aentsuk Apajuí chichamenash agagbaunashkam shiig dekau aajakui iman asa shiig antumainun chichau.

<sup>25</sup> Nigka, Apu Jesús pachisa jintintuamu asa, wakekegat shiig paan antumainun Jesusan pachisash jintinkagtau, imá Juan Yamijatin jintinkagtuamun deokayatak.

<sup>26</sup> Apolo jega ijuntainum ashí antuinamunum chichatai Priscila Aquilajai antujuk, akanak niina jeen jukiag, Apajuí pachis shiig ujakajui.

<sup>27</sup> Apolo Acaya wetag tutai, yatsut aidaun yaigkaju dutikainak cartan agatjaju nuiya Jesusa nemajin aidaun shiig anentus jukitnume tusag. Dutikam Acaya jegaa, Apajuí wait anentsam dekaskeapi tiaju aina nuna kuashat yaigkú;

<sup>28</sup> nuniau asa ashí antuinamunum judío aidaunash, agagbauwa nuiyan Jesusak Cristuwai tusa iwaintau.

## 19

*Pablo Éfeso pujusbau*

<sup>1</sup> Apolo Corinto pujai, Pablok mujanmanini tsupina Éfeso jegauwai, nunikmá kuashat Jesusa nemajin aidaun wainkauwai;

<sup>2</sup> nunik iniak:

—¿Atumesh dekaskeapi tiuwaitjum duish Wakaní Pegkejish jukiuk ainajum? tau.

Tama dita aiinak:

—Atsah, jutiik Wakaní Pegkeji pachisa chichamukesh antuchuitji, tuidau.

<sup>3</sup> Tiagtai:

—¿Wajiyai yamimajuitjume?

Tama dita aimainak:

—Juan yamijatujakua nujai, tuidau.

<sup>4</sup> Tiagtai Pablo ayaak:

—Juagkak ayatak aents aidaun tudau takatan idaiyagtai yamijakui, nuniakush mina ukujui minitta nunú dekaskeapi titajum, tiuwai, nunak Jesusan tiuwai.

<sup>5</sup> Nunú tabaun antukag Apu Jesusa daajin yamimakajui.

<sup>6</sup> Nunikagmatai Pablo ditá buuken achikmatai, Wakaní Pegkeji ditanash egkemtujajui. Dutikawajam tikich chichaman chichaidau, nuninak Apajui tabaunash etsejuidau.

<sup>7</sup> Nunú ashí aina nuiyag doce aishmag tumain aajakajui.

<sup>8</sup> Pablok kumpatum nantua imajin jega ijuntainmag wesag pujau, nui jega ishamk-agtutsuk chichaman etseju, nuniak aents aidaunash Apajui inabaujin pachis aujuuidau shiig dekamtikatatus.

<sup>9</sup> Tujash ujumak antumtikmainchau aidauk dekaskeapi tuinachu. Nunidau asag ijunjamunum yamajam chichama nuna pegkegchau chichajuidau. Nuniagtai Pablok ditajais kanakú, nunik Jesusa nemajin aidaun yajuak, Tirano escuelajin utsaa, kashí kashinig jintintu.

<sup>10</sup> Aatus jimag mijan takasui, nuniamunum ashí aents Asia nugkanum batsamin aidaush, judío aidaujai, tikich judiochu aidaushkam Apu Jesusa chichame etsegbaun antukajui.

<sup>11</sup> Apajuishkam Pablon yayau dutikam kuashat aents dutikmainchau aidaun iwaidau;

<sup>12</sup> nuniau asamtai pañuelo aidaun jukiag, nuniachkush jaanchikish Pablo iyashin antigkag aents jaun etetuidau, dutikam tsagaidau, wakan pegkegchau aidaushkam jinaidau.

<sup>13</sup> Tujash ujumak judío wakan pegkegchaun jiiin aidaun, Apu Jesusa daajin adaikag jiiiktá tuidau; nuninak “Pablo Jesusa etsegta nuna daajin jiiinkitajum”, tuidau.

<sup>14</sup> Nunak sacerdote aidaun apuji Esceva daagtin judío aentsua nuna uchijí siete aajakajua nu dutikaidau.

<sup>15</sup> Tujash wakan pegkegchau ayaak: “Jesusk wainnujai, nuigtush yaita Pablosh nunak dekaikai; tujash atumesh ¿ya ainagme?”

<sup>16</sup> Tamawaik, aents wakan pegkegchau egkemtuamua dushakam tupikatki achikag ashí depetkau, dutika senchi suwimainam jegan ukuinak wisú upu upujukim tupikaki-aju.

<sup>17</sup> Judío aidau, judiochu aidaushkam ashí Éfeso batsatuk antukaju, nunikag ashí ishamkaju, nuninak Apu Jesusa daajin pachisag emematuidau.

<sup>18</sup> Nunisag kuashat Jesusan dekaskeapi tiu aidaush kaunawag, ashí antuinamunum dita pegkegchau takataiji aidaun etsegumaidau.

<sup>19</sup> Nunisag kuashat aents magia takajakú aidaushkam, papiijin ikaunmak, ashí wainainamunum apekaju; nuna akikeg cincuenta mil kuichik tumain aajakui.

<sup>20</sup> Aatus Apu Jesusa chichameg niina senchijijai, ashí tikich nugkanmash pampag wegau.

<sup>21</sup> Nunú nunik nagkaemakiu ai, Pablo macedonianmaya aidaun, nuigtú Acayan-mayanash ijagsatjai, nunikan Jerusalén wetajai, tiuwai. Nuigtushkam:

—Jerusalén pujusan Roma wemainaitjai, tiuwai.

<sup>22</sup> Nuniak jimag niina yain aina nuna Timoteon, Erastojai Macedonia awemauwai, nunik nigka machik tsawan Asia pujustatus juwakui.

*Efesunum pampandaijamu*

<sup>23</sup> Nunú tsawantai Yamajam chicham pachisa kuashat pampandayamu asauwai.

<sup>24</sup> Wagki Demetrio daagtin, jiju plata tutain takau asa, jega Diana ememattain dakumak najanu, dutikak niijai takaina nujai kuashat kuichkin juidau;

<sup>25</sup> nunin asag niijai takau aidaujui, nuigtú tikich ditajai beteknamtuk takau aidaunash ipaa ijunjag chichainak: “Kumpag aidauh, dekagme jújú takainaku kuashat kuichik juu ainag duka;

<sup>26</sup> tujash atumesh wainjume, nuigtush antagme jújú Pablo, apajuimtai aidau aents najanamu aina duka apajuichu ainawai tusa, kuashat aents aidaun dekas nuninapi tumamtikui, nunak imá Efesowa juig tatsui, ashí Asia nugkanmash tu wekaewai.

<sup>27</sup> Juna jutika juka shiig ishamainai, wagki jutii sujuinag juka megkaemainai, nuigtú jega iina apajuiji Diana\* dekas imana nu ememattaiya jushakam pachikchamu atatu, nunitai Asia nugka juiya, ashí tikich nugkanmaya aidaush emematin agma nunak dakitug idaisagtatui”.

<sup>28</sup> Tiagtai antukag, senchi kajekag untsumainak: “¡Diana efesonmayanua duke dekas imanuk!” wajaidau.

<sup>29</sup> Imatuidau asag ashí yaaktanmag shiig dekaashmin wajasag pachimdaekaju, nunikag Macedonianmaya jimag aents Pablon uyunaidaun, Gayo, Aristarcojai, achiká japiki júkiag teatro† ejegawaju.

<sup>30</sup> Dutikawagmatai Pabloskham nui wayatatus wakegau, aents aidaun ausatatus, tujash Jesusa nemajin aidauk idaisachajui.

<sup>31</sup> Asianmaya apu aina nuiya ujumak Pablo kumpají aidau, nigka teatronmag wayawaigka, tusag chichaman akupjukajui.

<sup>32</sup> Nunú ijunjaja duka pachimdaekaju, nuninak makí makichik wajiin pachisag senchi untsumaidau, nunidau asagmatai kuashat aents aidauk dekainachu, wajina pachisag ijunjaje nunak.

<sup>33</sup> Imadiagtai dita aina nuiya ujumak Alejandro ujakaju wagka aninawa nuna pachis, dutikawag judío aidau shitaki jikiaju ni chichaktí tusag, dutikam Alejandroshkam uwejin takuinu bitat asatnume tusa, judío aidaun ayamjak ashí antuinamunum chichaktatus.

<sup>34</sup> Tujash judío asamtai wainkag, ashí untsumkag: “¡Diana efesonmayanua juke dekas imanuk!” wajai wainainaku jimag hora amainun ejesattak weedau.

<sup>35</sup> Nudiagtai yaakta sekretarioji imatuidau itatmitkak chichaak: “Efesonmaya muun aidauwah, ashí nugkanmaya dekainawai yaakat Efesowa ju, apajuí Diana dekas imana nu ememattaiya nuna jeenak kuitamkati, ashí niina niimejai betek nayaimpinmaya iyajua nunashkam tibauwa nunak.

<sup>36</sup> Dui junak wainkayai tumainchau asagmatai bitat asatajum, waugtukjumek pegkegchawk dutikawaigpajum;

<sup>37</sup> wagki jújú aents atum juu itaujum juka, atumi apajuijum ememattai jega nunakesh pegkegchawk ematsui, apajuigminakesh pegkegchawk chichagtsui.

<sup>38</sup> Demetrio, niijai takau aina nuwai, tikich aidaujui tudaimain ataik, juez aidau batsata nui wegag, makí makichik ditanua nunak tudaimain ainawai.

<sup>39</sup> Untsu atum tikich tumain ajutjamainakuig, nunú pachisjumek dekas ijunjamunum tumain ainagme.

<sup>40</sup> Yamai nagkaemaki juka puyatjumainnum awai, apu aidau dekawajag chichaman tsuwapau aidau tujabiagtatui, nuninak pampandaijamua nuna pachis inimpainakui juní asae tumainush atsawai”.

<sup>41</sup> Nuna tusa aents aidaunak ishiakui.

## 20

### *Pablo Macedonia Grecia webau*

<sup>1</sup> Nunú pampandayamu nagkankamtai, Pablo Jesusa nemajin aidaun untsukaju, dutika anentain ichichtug ditan pagkuk, pujumatajum atak wainiami tusa ukuak Macedonia weuwai.

<sup>2</sup> Nui wekaegas ashí Jesusa nemajuidaun ijajus anentain ichichtug ukuak Grecia jegaa;

<sup>3</sup> nui kampatum nantu pujusui. “Siria barcanum wetajai tusa uminas pujukmá”, dekauwai judío aidau chicham umigkagbaun, nunik ataktú kukag Macedoniaya atú nagkaemaktajai, tiuwai.

<sup>4</sup> Tusa wetai uyuntsajui Sópater Pirro uchijiya nu bereanmaya, Aristarco nuigtú Segundo Tesalonicanmaya; Gayo derbenmaya, nuigtú Timoteo, nuigtú Tiquico, Trófimo Asia nugkanmaya aidau.

<sup>5</sup> Ju yatsut aina juka eemkagmayi, nunikag Troas dakagmasagmayi.

\* 19:27 “Diana” tawa duka griego aidau apajuijimtaji aajakui. Tikich versiognumak “Artemisa” tawai Diana tawa nunak tayatak. † 19:29 “Teatro” tawa duka jega muunnum, aents aidau tuwakmatai, iwainaku jittaiya nuna tawai.

<sup>6</sup> Tujash jutiik pag levaduragtuchu yuwaku fiestamtaiya nu inagkeaki; filiposnumiati barcanum juaki, cinco tsawan Troas jegaa, nui makichik tumig inagkeakiabiaji.

*Pablo Troas ijagsamu*

<sup>7</sup> Tumig tsawagmatai ijunjabiaji Jesús jakamu anentaimtusa pag yuwatasa, nuni-  
munum Pablo kashinia dui jünkitin asa, Jesusa nemajin aidaun jintü jintintai aehaet  
wajasabi.

<sup>8</sup> Jutiik jega yakí tesamunum kuashat lámpara ekemagbaunum ijunja batsamiaji;

<sup>9</sup> nuniemunum makichik datsauch Eutico daagtin, ventananum eketu, Pablo chichá  
chichakua ematai kají achikam inítjau kanag tercer pisonmaya iyawabi; nunikmatai  
jakaun wainkajabi.

<sup>10</sup> Nunikun Pablo akaetuki, uchin patamti pagkuk inankiabi. Dutika chichaak:

—Puyatkaigpajum iwaakui, tiabi.

<sup>11</sup> Dutika ataktú waka, Jesús mantamnamun anentaimtusag pagkan puug yuwa chichá  
chichakua tsawampaju, nunik weuwai.

<sup>12</sup> Nunitai uchin iwakun jukiag shiig ichichmamjag juwakajui.

*Troasnumia juaki Mileto webau*

<sup>13</sup> Jutiik emka barcanum juaki Aso wegabiaji Pablo jukitasa, nigka kukag wetasan  
wagegajai, tiu asantai.

<sup>14</sup> Nui Aso niijai igkunika niish egkemjamtai Mitilene jegawabiaji;

<sup>15</sup> nuyati jiinki kashinia dui Quío jegawabiaji, nui juwaki kashinia dui Samos  
anumtainum anumkabiaji. Nunika Trogilio kanaja kashinia dui Mileto jegawabiaji.

<sup>16</sup> Nunak Pablok, Éfeso tutupit nagkaemaktatus Asia nugkanum dukap tsawan pujutan  
dakitau asa nunikui, wamak Jerusalén jegaa niishkam fiesta Pentecostés pachinkata tau  
asa.

*Pablo Efesonmaya anciano aidaui akatdaijamu*

<sup>17</sup> Pablo Mileto pujus, anciano aidaui efesonmaya iglesian diin aina nuna untsukabi.

<sup>18</sup> Tima kaunkamtai chichajak: “Atumek dekagme wi yama nagkamchakun, jui Asia  
nugkanum taawabiag dui nagkamsan, ashí tsawantin atumjai wajuk pujusmaiija duka.

<sup>19</sup> Ashí tsawantai atumjai pujusuitjai Apu Jesusan takagkun, emematsuk kuashat  
negayai; nuigtú Judío aidaushkam kuashat utugchatan itagtuinak waitkajianume.

<sup>20</sup> Tujash, wika atumnak pegkegnum yaimpamaina nunak ujatskek idaisachmaijime,  
nuniakun ashí antuinamunmash, nuigtú atumi jeeminish jintinbaijime.

<sup>21</sup> Judío aidaun, judiochu aidaunash tudau takatak idaikujum, Apajuí nemagkujum,  
Apu Jesuschakam dekaskeapi titajum tusan, ujayajime.

<sup>22</sup> Yamaik Wakaní Pegkeji awetau asamtai Jerusalén wegajai, awish wajig nagkaetukit  
nunash dekasuk.

<sup>23</sup> Untsu Wakaní Pegkeji ashí wi yaaktanum wegag nuig achigmakagtatui nuigtush  
waittsattame, tusa ujatbaunak dekaujai.

<sup>24</sup> Tujash wika nunak puyatjuchujai, mina pujutjunash uyumasnukesh diichujai, wika  
mina takatjua nuna shiig aneasan ashimkatasan wagegajai, Apu Jesús yamajam chicham  
Apajuí anentag uwemtikagta nu pachisan etsegkata tujutbauwa nuna.

<sup>25</sup> “Yamaik dekas nuniktata nunak dekajai, wi atumiin wekaesan Apajuí inamtaijin  
pachisan ujayajim nuyatigmekesh minak awenagmek waitkashin ainagme.

<sup>26</sup> Nuadui yamai titajim tusan wakegajai, wi ashí atum ainajum nui bakumamainuk  
makichkish atsugtawai;

<sup>27</sup> wagki atumnak Apajuí wakegamujiya nunak uugtsuk ashí imatiksasuk ukaitjim  
nuadui.

<sup>28</sup> Nuadui atumek kuitamamkujum ashí Apajuí iglesiajiya dusha kuitamkatajum.  
Adeagtajum atumnak Wakaní Pegkejiya nu pastor etamkajui, Apajuí iglesiaji niina Uchiji  
nunpeen sumakua nuna kuitamkatnime tusa.

<sup>29</sup> Wagki dekajai, wi wemataig tikich aidaui kuintin kajen aina iman tajutjamawag,  
iglesian emegkaktatus wakeyagtata nunak.

<sup>30</sup> Atum ainajum anuyag ujumak waitan jintinkagtaush agtatui, Jesusa nemajuidaush  
dekaskeapi tuinak nemagtuktinme tusag.

<sup>31</sup> Nuadui aneaku pujustajum; adeagtajum kempatum mijadai kashi tsawajai,  
makí makichik atum aidautigminak idaitsuk nuní pujustajum tusan negá negajai  
chichagmajim nunú.

<sup>32</sup> “Yatsug aidaui, yamaik Apajuiyai idaijime, ni anejatbaunum chichaman su-  
jamsauwa nujai juwaktajum, nu chichamak senchigtinai, iman asa yaimpaktatjume

wakannum tsakatnumash, nuigtush ashí ni aentsji pegkemtikbau aidaun anagkuaauwa nunash amastatjume.

<sup>33</sup> Wika tikichdau kuichik, oro, jaanch aidaunakesh wakeejuk wekaechabijai.

<sup>34</sup> Atumek shiig dekagme wi atsumamunash, nuigtú wijai yujaidau atsubiagtaish jujú uweg aina ju yainkagmayi.

<sup>35</sup> Ashí jintinbaijime aaja takaaku atsumaidaush yaimainaitjume, nuigtush adeagtajum Apu Jesús chichaak: ‘Ni juwak shiig anea nuní nagkaemas shiig aneawai tikichin suwa duka’, tiuwa dushakam”.

<sup>36</sup> Juna tusa idaiyai Pablo ashí tikich aidaujui tikishmajag, ditajai Apajuin ausajui.

<sup>37</sup> Nunikag ashí buutuinaak, Pablón pagkukag kugkuyanume.

<sup>38</sup> Senchi wake besemag dekapenamuk, ataktú awenagmek waitkashtin ainagme tawa nu aayi, nunikag uyuntsag barcanum ejegawajabi.

## 21

### *Pablo Jerusalén webau*

<sup>1</sup> Nuiyati yatsug aidau ukuinaku barconum chimpinjá, tutupit Cos wegabijai, nunika kashinia dui Rodas jegaa, nagkaemasaik Pátara jegawabijai;

<sup>2</sup> nunikmá barco Fenicia wegaw wainká, nui egkemjá weamijai.

<sup>3</sup> Nunika wesá Chipre ajuntaiji wainka duka menamanini ukuaku Siria weamijai, nunika Tiro anumkabijai barconmayan wajiin jügta tuinakui.

<sup>4</sup> Nui Jesusa nemajin aidau wainkaja makichik tumig ditajai batsamsabijai; nuniamunum Wakan dekamtikamu asag dita, Pablón Jerusalegak wemaitsume, tiajabí.

<sup>5</sup> Tujash makichik tumig pujusú asaja jijná wenajin, Jesusa nemajin aidau nuwejai nuigtú uchijí aidaujui yaaktan ukukiag uyuntamas minianume, nunikagmatai nui kaamatkanum tikishmakaja Apajuí ausabijai.

<sup>6</sup> Nunikaja akatdaiyinaku pagku pagkuni nagkanka barconum egkemjin ditashkam jeen waketjajabi.

<sup>7</sup> Jutiik Tironmayati juwakiaja Tolemaida jegawabijai, nunika yatsut aidau kumpamawaja nui makichik tsawan ditajai pujusabijai.

<sup>8</sup> Kashinia dui jinkiaja Cesarea jegawabijai, nunika apóstol aidaun yaigtin sietee aajakua nuiya Felipe wekaegas chichagkagtina nuna jeen kanababijai;

<sup>9</sup> nuna nawanji cuatro agkanjam profetisa aidau batsabianume.

<sup>10</sup> Nuanuig kuashat tsawan pujajin Judeanmaya profeta Agabo daagtin taawabi,

<sup>11</sup> nunik waipaktatus taa Pablo akachumtaijin jukiabi, nunik uwejin nawenishkam jigkamaq, chichaak:

—Aatus Wakaní Pegkeji tawai: Jutika aents juna akachumna nuna jigkajagtatui Jerusalén judío aidau, dutikawag judiochu aidaunum sujukagtatui, tiabi.

<sup>12</sup> Takui nu antukaja juti, Cesareanmaya aidaujui: Pablo, Jerusalegak weepa, tiabijai.

<sup>13</sup> Tama Pablo aigmak:

—¿Wagka buutkugmesh anentaijuish wake besemjash egketjagme? Wika ayatak jigkagbau atasanuk umintan wekaetsujai, Apu Jesús takagbaunum chichame etsegbaunum Jerusalén jakatasan wekaejai.

<sup>14</sup> Depetmainchau weakui:

—Apu Jesús wakegamu atí, tusa idaisabijai.

<sup>15</sup> Nu tusa idaisá pujusá, umintsá Jerusalén ashinkabijai.

<sup>16</sup> Nuniajin cesareanmaya ujumak Jesusa nemajin aidau uyuntamsag, chiprenmaya Mnasón daagtinu jeen ejetamawagmayi, nigka duik nagkamas Jesusa nemajin pujaw asamtai, niina jeen kanagtin asajin.

### *Pablo Jerusalén jegaamu*

<sup>17</sup> Jerusalén jegaa ajin yatsut aidau shiig anenjamsag jujamkiagmayi.

<sup>18</sup> Kashinia duwi Pablotai ijunja weamijai Santiago wainkatasa, nunikmá ashí anciano aidau ijunag batsatbaunum jegawabijai.

<sup>19</sup> Nunika ajin Pablo ditan kumpamá, makí makichik judiochu aidaunum ni takatai Apajuí wajuk yaigke nuna pachis ujayi.

<sup>20</sup> Nuna antukag Apajuin emematiagmayi, nunikag Pablón chichajuinak:

—Dekaske yatsujuh, amesh wainme shiig kuashtai judío aidau Jesusan dekaskeapi tuina duka; nunú aina duka ashí Moisés chicham umiktajum tibauwa dusha idaitsuk umimainai tuinawai.

<sup>21</sup> Tujash amina pachipas upapakagmayi, ashí judío aidau, judiochu aidaunum batsata nuna jintintak; Moisés chicham umiktajum timawa duka idaisatajum, uchi aishmag akiinkuish pakagmait sui, iina muunji takajakua dushakam idaisatajum, tawai tusa.



<sup>22</sup> ¿Wagka junash tujamainawa? Aents aidauk dekawagtatui ame jui taum nunak.

<sup>23</sup> Nunin asamtai ju dutikmainaitme: Jutii ainag jui, cuatro aents aidau Apajui eemtin dutikatjai tibaujin yamai umiktatus batsatainawai.

<sup>24</sup> Nunú yajuakam wetá nunikam ditajai pegkeeta, nunikam ditash akikmatkata buuken kesagtinme; dutikawamin amina pachipas tujabiaja dusha ashí dekawag wainkappap tuinawa, niish dekas Moisés chicham umiktá tibauwa nunash imatik-sagkeap umiawa, tujabiagtatui.

<sup>25</sup> “Judiochu aidau Jesusan dekaskeapi tusag nemajuina dushakam, ashí apajimtai aidau anagkuamu aina duka yuwawaigpajum, tsanijintash tsanijinawaigpajum, kuntin ayatak pempeaja maamu aina nuna nejeesh, numpeshkam yuwawaigpajum tusa agatjabiaji”, tiaju.

### *Pablo achikbau*

<sup>26</sup> Tima Pabloskam cuatro aentsun yajuak wee, kashinia dui ditajai pegkeniag, jega Apajui ememattainum wayau, wajutí pegkeamush tsawantash abuekattawa, wajutiya makí makichik ditanu ofrendanash itawagtatua nuna etsegkatatus.

<sup>27</sup> Nunik siete tsawantan ejetatak wajai, ujumak judío Asia nugkanmaya aidau Pablo jega Apajui ememattainum pujamunum taawaju, nunikag ashí aentsun ujakag pampanjag Pablon achikag,

<sup>28</sup> untsumkag: “¡Israel aidauwah, yaijatkatajum! Ju aentsua juuwai ashí nugkanum wekaegas jintinkagtak, jutii aidautinash pegkegchau chichagta wekaega nu, nuniak Moisés chicham umiktinun amasua nunash umikaigpajum taku, nuigtú jega Apajui ememattaiya nunash pegkegchau chichajui, nuniau asa yamaish jega Apajui ememattai pegkegma nui griego aidauun utsaa pegkegchau awasae”, wajaidau.

<sup>29</sup> Nunak, yaunchuk Tróximo yaakat efesomayaya nujai Pablo wekaegun wainkajui, nuniku asag jega Apajui ememattainmash awayachiawash tuidau asag tiaju.

<sup>30</sup> Nunitai ashí nu yaaktanmaya aidauk pampaidau, nuninak pisag kaunawag Pablonak achikag jega Apajui ememattainum wajaun japikí agaa jiyamuik, wamkesag waitinak epetiagmayi.

<sup>31</sup> Ayatak maata tiagtai, wamkes romanmaya suntaja comandantejin, ashí aents Jerusalegnunia aidauk senchi maaninawai, tusa ujakajui.

<sup>32</sup> Dutikam comandanteshkam ujumak capitán aidau, nuigtú suntag aidauunash yajuak pisajag aents tuwak ábaunum kaunawagmayi. Nunikmatai comandante suntagjai wainkag Pablo suwibaunak idaisagmayi.

<sup>33</sup> Nunikmatai comandante jegantun, Pablon achiká juki jimag cadenayai jigkagtajum tiabi, dutika amesh yaitpa, waji aikaume tusa iniibi.

<sup>34</sup> Tujash ujumak aents, tikichi pachisag untsumainai, tikich aidauhkam dutiksag tikichin tuidau, imati pampaidau asamtai shiig dekamainchau dekapeau asa comandante, suntajá batsamtain jukitajum, tiuwai.

<sup>35</sup> Tiajam Pablon juki, suntag aidau ditá batsamtain awayatasag, papajá iwakbaunum jegantag yanakiag jukiajui, aents aidau Pablon achiktatus imatikaidau asagmatai.

<sup>36</sup> Ashí aents aidauk saegas wesag untsumak: “¡Maatajum!” awajiagmayi.

### *Pablo ayamjumaku aents tuwakbaunum chichakbau*

<sup>37</sup> Suntajá batsamtain awayattaku emam, Pablo comandanten iniak:

—¿Wisha machik augmaitsujamek? timayi.

Tama comandante ayaak:

—¿Amesh griegosh dekamek?

<sup>38</sup> ¿Amechukaitam egiptonmaya aents yamaipat romanmaya apun shiwagmá, chichaman tsuwapá cuatro mil maanin aidauun yajuak uwegshunum jijjua nu? tau.

<sup>39</sup> Tama Pablo ayaak:

—Wika judiowaitjai, mina pujutajjuk yaakat muun Tarso, Cilicia nugkanum awa nuiyayaitjai. Wait aneasam ayú tujutta, aents aina juna machik ausatasan wakegajai, timayi.

<sup>40</sup> Tutai comandante ayú tima papajá iwakbaunum Pablo wajas uwejin takuiniabi aents tuwak abauunum, dutikam pampamun itatjamtai hebreo chichamai ditan aujak:

<sup>2</sup> Tusa Pablo hebreo\* chichamai aujuinam antukag nuní nagkaemas bitat asagmayi. Nunikagmatai Pablo chichaak:

<sup>3</sup> “Wika judiowaitjai, yaakat Tarso Cilicia nugkanum awa nui akiinawaitjai, nunikuitkun jui Jerusalén tsakajuitjai, Gamaliel jintinjauwai iina muunji aajakajua nu chicham umijakbauwa nunak imatikag. Dutikamu asan, Apajuinash akasmatnaitjai atum yamai wajuakeajum nunisnuk.

<sup>4</sup> Nuniau asan wika duikik, yamajam chichama juna umiktatus wakegaidaunak egakan maatasanush, aishmag aidaunak nuwá nuwajai achijan cárcel chimpiyajai.

<sup>5</sup> Sumo sacerdoteshkam, ashí apu aidaush nunak shiig dekagtuinawai. Dita papí agag sujusajui, Damasco iina yachi judío aidau batsatbaunum jegá nuna inakmas, Jesusa nemajin aidaun egak achijá, jui Jerusalén ikaunmamtai, suwimak susami tusag.

*Pablo ni yapajinamu etsegtumamu*

*(Tak. 9.1-19; 26.12-18)*

<sup>6</sup> “Tujash Damasco jegattakun jintá wegai, etsa tajiastatak wajasú ai, nayaimpinmaya tsaaptin egketkamtai,

<sup>7</sup> nugká iyagbajai. Nunikman makichik chichaman antukbajai: ‘Saulo, Saulo ¿wagka minash waitkajame?’

<sup>8</sup> tujutkui wi iniakun: ‘¿Apu amesh yaitpa?’ tibajai. Tai ni aijk: ‘Wika Jesús nazaretnumiayaitjai, ame ya ainme nuuwaitjai’.

<sup>9</sup> Wijai yujaushkam tsaaptinun wainkag ishankagmayi, tujash mina aujta nunak chichamnak antukchagmayi.

<sup>10</sup> Nuna tujutkui: ‘Apuh, ¿wajukati tusamea wakejutame?’ tusan iniasbajai. Nuna tai Apu Jesús chichagtak: ‘Nantaktá nunikam wegam antsamek Damasco jegata, awi jegawamin ame dutikmainnak ujapakagtatui’, tujutmayi.

<sup>11</sup> Tsaaptina nu wainmachu etimtai, wijai yujaidau egkegsag Damasco ejetiajabi.

<sup>12</sup> “Nuanui makichik aents Ananías daagtin, Apajui puyatjus umijin, Moisés chicham umiktajum tibauwa nunash umin asamtai, ashí judío Damasco batsamin aidauk niina pachisag pegkeg chichagtai pujubi.

<sup>13</sup> Nunú tajutua chichagtak: ‘Yatsug Sauloh, yamaik ataktú wainmakta, tujutmayi’, nuna tujutmawaik niimkaman niina wainkabijai.

<sup>14</sup> Nunika ai chichagtak: ‘Iina muunji aajakajua nuna Apajuiji, duik nagkamas wi wakegamanush dekaatin atí tusa etegtanjau asa, yamai Jesús dekas Pegkeja nunash wainak, ni chichamujinash antugkatit tusa aikagmaume;

<sup>15</sup> dutijabau asamtai ashí aents aidaunmash, ame wainkamu, nuigtú antukbaugmish etsejin atatme tujutmayi.

<sup>16</sup> Yamaish, ¿wají dakame? Wajaktá nunikam Apu Jesusa daajin yamimagta, dutikam tudaugminish tsagkugnagta’, tujutmayi.

*Pablo judiochu aidaunum awemamu*

<sup>17</sup> “Nunikan Jerusalén wakitki jegaan, jega Apajui ememattainum Apajuin aujkon pujusan paan wainkabijai;

<sup>18</sup> nunika ai Apu Jesús chichagtak: ‘Jerusalén pujutsuk waamak jiinkita, juiyag ame mina pachittsam etsegtash antugtambachagtatui’, tujutmayi.

<sup>19</sup> Tujutkui wi ayaakun: ‘Apu minak ditak, wi jega ijuntainum wekaetusan nuiya aents amina dekaskeapi tujamaidaun achiká cárcel chimpian suwimin aayag nunak;

<sup>20</sup> nuigtush Esteban, amina inakem amina pachipas etsegna nuna maatnum tusan chichaman ijtukan, nuna maidaun jaanchjin wiki kuitamjuyag nunash dekagtuinawai’.

<sup>21</sup> Tai Apu Jesús chichagtak: ‘Tutsuk wetá, wi aminak atushat tikich nugkanum aents judiochu aidau batsatbaunum awemattajame’, tujutmayi”, tiabi.

*Pablo comandante uwejin juwakkbau*

<sup>22</sup> Pablo tabaun ashí antuggak, senchi pampajag: “Juka aentsuk pujumait sui mantam-nati”, waintak dakitaji wajainak,

<sup>23</sup> untsumaidau nuninak jaanchjinak japikí tujit ichigkak wajantag, nugka yukuukun-tun atsaaki jukiag yakí nagkimawag wajagtai;

<sup>24</sup> comandante atum batsatbaunum Pablo awayajam asutiatajum, dutikam wajuk asamtaig aents aidaush imatjuinawa nuna etsegtati, tusa inamjabi.

<sup>25</sup> Dutikawajam Pablonak jigkagbautak asutiata tama, nui capitán wajau asamtai chichajak:

\* 22:2 Tikich papinumag arameo tuinawai. Hebreo chichamak arameojaig betekmamtin aajakui. Jutii chichame wampisdaujai betekmamtina anmamtin.

—¿Atumesh romanmaya aentsush bakumamainji dekgatsuk asutiatajum tibaukaitjum? timayi.

<sup>26</sup> Nunú tama capitán antuk, comandanten jegantun chichajak:

—¿Aush aentsush utugkattame? romanmaya aentsui, tiyabi.

<sup>27</sup> Tima comandante Pablon jegantun iniak:

—¿Dekas ame romanmaya aentskaitam? tau.

Tama Pablo ayaak:

—Ehé, romanmayayaitjai, tuuyi.

<sup>28</sup> Tutai comandante chichaak:

—Wi romanmaya aents wetasanuk kuashat kuichkin akikmakuitjai, timayi.

Tutai Pablo ayaak:

—Tujash wika Roma akinau asan romanmaya aentsuitjai, tuuyi.

<sup>29</sup> Nuna timatai Pablon asutiatus ijunjaushkam ukukiagmayi. Comandanteshkam romanmaya aentsun dekjaua ni jigkagtajum tusa inanjau asa senchi sapigmakmayi.

*Pablo judío apuji aidaun ijunjamunum awayamu*

<sup>30</sup> Kashinia dui comandante, Pablonash wajinmag judío aidaush imatjuinawa tusa shiig dekjauata tau asa, cadena aidaunak atitjau, dutika sacerdote apuji aidaun, nuigtú tikich apu aidaujui ijunjatnume tusa, ashí ijunjamtai Pablon juki ejega ejapen awaantagmayi.

## 23

<sup>1</sup> Dutikam Pablo apu ijunjau aidaun shiig esetug diis chichaak:

—Yatsug aidauh, wika Apajuí emtinish pegkeg anentaiyai pujusuitjai yamaiya juishkam nunisnuk pujajai.

<sup>2</sup> Tutai sumo sacerdote Ananías, aents Pablon adijis ijuna nuna: —Aanú tawa nu weni awatita tusa inajabi.

<sup>3</sup> Tutai Pablo ayaak:

—¡Aentsun tsanuwah, amina dekas Apajuí awatamtatui! Chicham umiktin tawa dutiksamek dekgatuatasam eketiatkumesh, ¿wagka chicham umiktina nu umitskesh awattá tujutme?

<sup>4</sup> Tutai nui pekajuidau Pablon chichajuinak:

—¿Aajamesh Apajuí sumo sacerdotejish pegkegchaush chichagkamum? tiajabi.

<sup>5</sup> Tama Pablo ayaak:

—Yatsug aidauh, wika Sumo Sacerdotenak dekachu asan tajai. Apajuí chichame agagbauwa nuishkam: “Atumin apujum aidauk pegkegchau chichajigpajum”,\* tawai.

<sup>6</sup> Pablo tii Pablo saduceo aidaun, nuigtú fariseo aidaushkam pachitjaun wainak senchi jiiká chichaak:

—Yatsug aidauh, wika fariseowaitjai, fariseo uchijiyaitjai, nunin asan jakaish nantak-tinaitji tau asamtai, nuna dekgatuatus imatjuinawai, tuuyi.

<sup>7</sup> Pablo nuna timatai fariseo aidaun, saduceo aidaujui ditak pempeentunikiag tuná tunaiyinakua, kanakajabi.

<sup>8</sup> Wagki Saduceo aidauk, nantamuk atsutnai, ángel aidaush atsuinawai, wakan aidaush atsuinawai tuinai, fariseo aidauk ashí nunak awai tinu asag nunikagmayi.

<sup>9</sup> Nunikag senchi untsumiagtai, wajumchik maestro chicham umiktinun jintikagtin fariseo weantu aidaun, wajakiag chichainak:

—Ju aentsuk makichik pegkegchaunakesh takaschae, makichik wakankesh nuni-achkush angelkesh ausau amainai, tuidau.

<sup>10</sup> Ayatak nuní senchi shiniagtai, comandanteshkam ishabi Pablon maawainum tusa, nuniak suntag aidaun chichaman awetiabi, kaunawag nuiyanak jiiiktinme, dutikawag dita batsatbaunum ejegawagti tusa.

<sup>11</sup> Dutikam kanittaman, kashi Apu Jesús Pablon wantintuk: “Pabloh, anentaim ichichi-agma, Jerusalegka jui mina pachittsam etsegkaum antsamek, romashkam etsegkata”, tiuwai.

*Pablo maatasá chicham umigkamu*

<sup>12</sup> Kashinia dui, ujumak judío aidaun chichaman umikaju Pablo maami tusag, nunú umikchaik iik suimkak jukimi tiaju, nuninak yutash yutsuk, umutash umutsuk batsamsá, Pablo maami tuidau.

<sup>13</sup> Nuna tumabijau aidauk cuarentan nagkaesau aajakajui.

<sup>14</sup> Nunú aidaun sacerdote apuji aidaun, nuigtú tikich apu aidaun jegajiag chichajuinak:

\* 23:5 Ex. 22:28.

—Jutii aidauti, Pablo maachkuik iik suwimkak jukimi tiagji, nuniau asaja yutash yutsuk batsamsá maami taji tuidau.

<sup>15</sup> Yamaik atum aidautijum, apu chichaman epegkin aina nujai comandante segatajum kashin jutii batsatbaunum itata tusajum, shiig kuitamka chicham dekajuami tusa utugmaina dutikajum, jutii umintsá batsamtaji atumiin eke taachuk maatasa, tuidau.

<sup>16</sup> Nu tuinamun Pablo umayin akiinau uchi antuk, suntaja batsamtaijin wayau nunik Pablon ujakabi.

<sup>17</sup> Dutikam Pablo capitán aina nuiyan makichik untuk:

—Ju uchi jukim comandante pujamunum ejegata, dutikam ni ujamain awa nuna ujakti, tiabi.

<sup>18</sup> Tima capitán juki, comandante pujamunum ejegau, dutika:

—Pablo achikam puja nunú untujuk, jujú uchi jukim comandante ejetuata, ni ujamain awa nuna ujakti tujutmae, tau.

<sup>19</sup> Tama comandante uchin uwegnum egkes juki niinak akanak:

—¿Waji tujutta tame? tusa iniau.

<sup>20</sup> Tama ni ayaak:

—Judío aidau chichaman umikagmae, nuninak amina pachipasag segatajum Sanedrín kashin Pablo itaata tusajum, shiig kuitamka chicham dekajuami tusa utugmaina dutikajum tujabiagmae;

<sup>21</sup> tujash dekaskeap tuinawa tiipa, wagki cuarentan nagkaesau aents uumkag dakainawai, nu aidauk maachkuik iik suwimkak jukimi tuidau asag yutash yutsuk, umutash umutsuk batsamsá maami tiagmae; nunidau asag yamaik uminas aminak dakagmainawai aigmakti tusa, tau.

<sup>22</sup> Tima comandante uchin awemak:

—Makichik aentskesh ujakaipa mina ujatkaum duka, tiuwai.

*Pablo apu Félix pujamunum awemamu*

<sup>23</sup> Nunú ujaká ukukim jimag capitandin untuká:

—Doscientos suntag dawé weagtin aidau, setenta caballonum wegagtin, nuigtú doscientos nagki tinamkam umiktá, yamai kashia juik a las nueve Cesarea wetinme, <sup>24</sup> nuigtushkam makichik caballo shiig umikjum Pablo nuí ekenjum iwaaku shiig kuitamkajum gobernador Félix pujamunum ejegatajum, tusa awemak;

<sup>25</sup> juna cartan agatug awetiuwai:

<sup>26</sup> “Witjai Claudio Lisias, gobernador Félix chichame antugtaiyah, eme anentsan kumpamjame.

<sup>27</sup> Judío aidau, ju aentsua juna achikag maata tuidaun dekaan, wi mina suntajujai shimutkan ayamjukjai, romanmaya aentsui tabaun antukan.

<sup>28</sup> Wajinmag imatjuinawa tusan dekajuatatan wakegau asan Sanedrín ejegamjai.

<sup>29</sup> Nunikman dita chicham umitaiji aina nuna pachisag tuidaun antugkamjai; tujash ni cárcel wemaina nunak, maam amainnakesh dekajuachmajai.

<sup>30</sup> Tujash judío aidau maawagtatus chichaman umigkagbaun ujatkgamatai, anui aminí awemajai; dutikakun chichaman tsanumjuina nunash segamjai ame antaminish niina pachisag, wagkag kajejuinawa nunash titinme tusan, dui wainiami”.

<sup>31</sup> Suntag aidaushkam dutikatajum tibaunak imatiksajag Pablon caballonum ekeni jukiag, kashi wee weenakua Antipatris jegawaju.

<sup>32</sup> Kashinia dui suntag dawé ashina duka, Pablonak caballonum ematnume tusag ditá batsamtain waketjaju.

<sup>33</sup> Nunik Cesarea jegawag cartan gobernadoran suwinak, Pablonash ejegawaju.

<sup>34</sup> Nuna cartan gobernador aujus, tu nugkanmayayaitpa tusa inias; cilicianmayayaitjai tutai dekajua,

<sup>35</sup> chichajak:

—Amina tsanumjutzpaina nu kaunak chichainakui, dekajuatjame timayi. Tusa achijatin aidaun inagmayi Herodes yaunchuk jega jagamkamu aajakua nui ejega shiig kuitamkatnume tusa.

## 24

*Pablo gobernador Félix antamunum chichakbau*

<sup>1</sup> Cinco tsawan nagkaemakui ai sumo sacerdote Ananías, nuigtú ujumak judío apuji aidajai, makichik abogado Tértulo daagtinun ayasá Cesarea kaunawajui, gobernadoran emtin Pablon bakumamainun tiagta tusa.

<sup>2</sup> Nunik Pablon itaawagmatai Tértulo wajakí Félix antai tsanumjak:

—See tajame gobernador, ame inamu asamin agkan batsatainaji, nuigtushkam amina yachagminig kuashat waji iina nugkeenish iwagnaka dui.

<sup>3</sup> Ashí nu dutikam duka ashí yantamnum ashí tsawantin juwinag dui apu Felisah see tuinaji.

<sup>4</sup> Tujash kuashat tsawantan atankijam tau asan, wait aneasam jutii chichamush machik antugkagtukta tusan segajame.

<sup>5</sup> Ju aentsua juka makichik jatai, nunin asa niyai chichaman tsuwapak datumkagtú wekaega duka, ashí judío aidaunum wekaesash Nazaretnumia sectan\* chichamjú wekayin.

<sup>6</sup> Nuigtushkam jega Apajuí ememattaiya nunashkam tsuwapaktatus nagkamamtai achikmaji, jutii chicham umitajin tawa dutiksaik dekajuami tusa.

<sup>7</sup> Nuniajin comandante Lisias suntajin utsanjama, senchi kakantus jujutjamkibi,

<sup>8</sup> dutikak chichaman tsanumjuina nuna aminí wetajum timayi. Nunin asamtai imá ameketme jutii tuinag nu ashí iniasam dekagmainaitam duka.

<sup>9</sup> Nuna tutai judío aidau nui ijunushkam:

—Ni tawa duka dekaske, tuidau.

<sup>10</sup> Tiagmatai gobernador iwijau Pablon chichaktí tusa, dutikam Pablo chichaak:

—Dekajai, kuashat mijanai ame ju nugka juig juez wajasam pujam nunak, nunin asamain shiig aneasan wi ayamjumamainun tajai.

<sup>11</sup> Ameketme ju shiig chicham dekamainaitam duka, wi Jerusalén Apajuin ememat-tasan wakabiag duka doce tsawan wegawai;

<sup>12</sup> nuig makichik aentsjaigkish, jega Apajuí ememattainmagkesh, ijuntainmagkesh, tikich yaaktanmagkesh dapamkagtujan jiyaniaku wekagaigkesh waitkachagmae.

<sup>13</sup> Jujú aents aidau chichaman tsanumjutuina kaunawaja juka, dekas wi nunikbaug-nak aminak nuna nunikme tusagkesh ujamamain ainatsui.

<sup>14</sup> Untsu junak etsegjai: Wika mina muuntug aajakajua nuna Apajuijin emematjai, Yamajam Jinta juna, dita secta† tuina nuna, wagki wika chicham umiktina nunash, profeta aidau agajajua nunashkam dekaskeapi tau asan.

<sup>15</sup> Wishakam dita aidau, Apajuik aents pegkeg aidau, pegkegchau takau aidaunash inanjatnai tuina nunak dakajai.

<sup>16</sup> Nuniau asan Apajuí eemtinish, nuigtú aents aidaunmash mina anentaimtajuish pegkeg, wantinkatasan kakanmamjai.

<sup>17</sup> “Ujumak mijan tikich nugkanum wekagun, mina nugkajui aents waituidau yaigtinun ofrenda ejegatasan taamjai.

<sup>18</sup> Nunikan pegkeenu asan, jega Apajuí ememattainum pujumjai, tujash nuig kuashat aentsuk atsuagmae, nuwig pampandaimainnakesh dutikachmajai.

<sup>19</sup> Minak ujumak judío asianmaya aidau tajutuawag waitkagmae. Nunú ainawai amina emtimin mina pegkegchaujush ajutuash nuna tujamain aina duka.

<sup>20</sup> Nuniachkush, ju ijuna jujú aidaukesh, Sanedrín etetuawagmaya duish, wi bakuma-mainnash waitjukajiawash nuna ujamamain ainawai;

<sup>21</sup> untsu ditá eemtin senchi jiikan: ‘Yamai mina jutijajum juka, jakau aidaush nantagtinai taja dui, nu dekagtuatasajum jutijagme’ tusan imá nunak timajai”.

<sup>22</sup> Nuna tutai Félix, duik nagkamas yamajam chicham etsegbaunak shiig dekaa pujau asa, ijunbaunak nuig tsujig idaiyak:

Comandante Lisias taamtai, aminunak shiig dekajuatjame, timayi.

<sup>23</sup> Dutika capitanin, kujikum kuitamna apusatajum, tujash machik agkan idaisatajum niina kumpaji aidaush tajuaawag wainkatnume, nuninak yaigtinme, timayi.

<sup>24</sup> Ujumak tsawan asa Félix, niina nuwe Drusila judío nuwa nujai tajuau, nunik:

—Pablo itaatajum, tima itawajui, dutikam Jesucristua duke dekaskeapi tumainai tusa etsegbaun antuku.

<sup>25</sup> Tujash Pablo, pegkeg takatan pachis, iik kuitamamtan, suwimak atinun pachis etsegtaí Félix ishamak:

—Maake juig atí, wetá tsawan agkan ajutkui ataktú untsuktajame, timayi.

<sup>26</sup> Felisak Pablo kuichkin justú tau asa, tuke untsuká auju.

<sup>27</sup> Duti dutikakua jimag mijan jegaamtai Félix juintai Porcio Festo yapajinuwai. Nuniak judío aidaujai shiig juwakta tau asa Pablonak achikbautak Félix ukukiuwai.

## 25

*Pablo apu Festoi ejegamu*

\* 24:5 “Sectan” tawa nu diistá; Tak. 15.5. † 24:14 “Secta” tawa ju diistá Tak. 15.5.

<sup>1</sup> Nunik Festo Cesarea jegaa, kumpatum tsawan asa Jerusalén weuwai.

<sup>2</sup> Nunikmatai sacerdote apuji aidau, nuigtú judío apuji aidaushkam, Pablo pachisag tsanumjuidau.

<sup>3</sup> Nuninak wait aneasam Pablo jui Jerusalén awematajum tita tusag segaidau. Nunak ditak jintá dakak maata tuidau asag, tiajui.

<sup>4</sup> Tiagtai Festo ayaak:

—Pablok Cesarea achikam pujawai, nuniai wi ujumak tsawan pujusan awi wetatjai.

<sup>5</sup> Nunitai ujumak atumi apujum aidau wijai minitnume, nunikag awi dita titinme waji pegkegchauna takasé nuna, tau.

<sup>6</sup> Nunik Festok Jerusalén ocho tsawan nuniachkush diez tsawan tumain ditajai pujus Cesarea jegaa, kashinia dui chicham dekatainum ekeemsauwai, Pablon niina eemtin itaatnume tusa.

<sup>7</sup> Pablo wayamtai, judío aidau Jerusalegnumia kaunkajuk adijis ijunas, kuashat waji pegkegchau aidau tsanumjuidau nunap dutikae tusaish tumainchaun.

<sup>8</sup> Imatjuinam Pablo ni ayamjumaktatus chichaak:

—Wika makichik pegkegchaunakesh takaschamjai, judío chicham umiktajum timawa nuna pachisnukesh, jega Apajuí ememattaiya nunakesh, Roma apujinakesh pegkegchauk chichagkachmajai, timayi.

<sup>9</sup> Tujash Festo judío aidaujai shiig juwaktag tau asa, Pablon iniak:

—¿Jerusalén wetasamesh wakegatsmek? Awi chichaman dekajuatjame, tau.

<sup>10</sup> Tama Pablo ayaak:

—Wika Roma apuji chicham inagnataijin pujajai, nuniau asan nuig dekajam amainaitjai. Wika judío aidau nak makichkish pegkegchaunak takagsachmajai, duka amek shiig dekame.

<sup>11</sup> Wi mantamnamainum pegkegchau takasuikunuk jatanak dakitmaitsujai, tujash atsaig mina tsanumjutuina aniaigkik, makichik aentskesh ditaig sujutmain ainatsui. Nunin asan segajame, Roma apujiya nu chichamnak dekagtuati tusan, timayi.

<sup>12</sup> Tutai, Festo ditajai takatai aidaujai chichasag, chichajak:

—Roma apuji dekagtuati tame nuniau asam, Roma apuji pujamunum wetatme, tiabi.

*Festo rey Agripan Pablo pachisa ujakbau*

<sup>13</sup> Ujumak tsawan nagkaemakui ai, rey Agripa, Berenicejai Cesarea jegawaju Feston kumpamawagtatus.

<sup>14</sup> Nui jegawag kuashat tsawan batsataidau asag, Festo nunú reyn Pablo pachis ujak:

—Jui makichik aents Pablo daagtin Félix achiká ukukbau pujawai.

<sup>15</sup> Jerusalén pujai sacerdote apuji aidau, judío apuji aidaushkam niina pachis dekamas mantamnat tita tusag segatiagmayi.

<sup>16</sup> Tujutuinakui wi ayaakun, romanmaya aidautik aents chicham tsanumjamua nunú, ya tsanumjuinawa nujai igkumtikam, ayamjumamainjin taigkik mantamnat tuchau ainaji, tibajai.

<sup>17</sup> Tai ditashkam wijai jui taawagmatai, tsawantan megkaetsuk kashinia dui chicham dekatainum ekeemsan, nunú aents itaatajum, tibajai.

<sup>18</sup> Chichaman tsanumjuina dusha pegkegchau takasbaujin tichagtimpush tusa anentaimtamunak tichagmayi.

<sup>19</sup> Imá ditá muunji Apajuin umijin aina nunak, tikich Jesús daagtin maamu yamaik nantakui asa iwaku pujawai tusa Pablo tabaujinak pachisag etsegtiagmayi.

<sup>20</sup> Tuina nuna dekamainchau dekapeau asan iniasmajai, Jerusalén wetasash wakegatsush, awi dekajuatjai tusan.

<sup>21</sup> Tujash Pablo Roma apuji chichamnak dekagtuati tajai, tujutkui, yamaikik untsu junismek pujustá, wi aents ejetamain akui awematjame tusan idaisamjai, tau.

<sup>22</sup> Tutai Agripa ayaak:

—Wishakam wakegajai ni chichaakui antugkatasan.

Tutai Festo ayaak:

—Kashin amesh chichaakui antugkata, tau.

<sup>23</sup> Kashinia dui, Agripa, Berenicejai shiig iwagmamjag taawaju, suntajan apuji aidau, nuigtú nu yaaktanmaya chichame antugtai aidaujai, nunikag chicham dekatasas ijuntainum utsanawagmayi, nunikmatai Festo chichaak:

—Pablo utitajum, tima itawaju.

<sup>24</sup> Dutikawagmatai Festo chichaak:

—Rey Agripah, ashí muun aidautijum jutijai jui ijunjaujum nu aidautigmesh diistajum: Juuwai aentsuk, juna ashí judío aidau chichaman apujutuasag Jerusalén nagkamas, jui Cesarea taamtaish ayatak mantamnat, tusag segatuinak senchi chichainawai.

<sup>25</sup> Tujash wika ni mantamnamainun pegkegchau takasbaujinak waitchau asan, niishkam Roma apujiya nu chichamnak dekagtuati tujutu asamtai, niini awematjame, timajai.

<sup>26</sup> Tujash mina apug Roma puja nunash, niina pachisan juna jutikae tusa agatmainuk atsugtawai; nunin asamtai jui atumiin itaajai, rey Agripah, amina niish iniasti dutikam wajintig nuna antugkan cartanash agatjatjai, tusan.

<sup>27</sup> Wagki shiig dekamaitsui, achikbauwa nu awemakuish, juna jutikau asamtai jutikainawai tutsuk dutikamuk, tiabi.

## 26

*Pablo Agripa emtin ayamjumaku chichakbau*

<sup>1</sup> Agripa Pablon chichajak:

—Ame ayamjumaku chichamainuk agkan ajutjamui, timayi.

Tama Pabloskam uwejin takuinu, nunik ni ayamjumamainun chichaak nagkamau:

<sup>2</sup> “Rey Agripah, shiig aneamu ajutui, judio aidau ashí tsanumjutuina nuna yamai amina emtimin ayamjumaktasan chichag dui.

<sup>3</sup> Amek judio aidauti dutiktaiji aina duka ashí dekame, nuigtú nuiya pachisa tunaiyin ainag dushakam. Nuniau asamin segajame minash emamkesam antugtukta tusan.

<sup>4</sup> “Ashí judio aidauk dekagtuinawai, wi uchuch nagkamsan, datsauch asanush mina pataag aidaujaish, nuigtú Jerusalegkash wajuk pujujukuitja nunak.

<sup>5</sup> Ditak minak yaunchuk nagkamas dekajuinawai, nunin asag wakegainakug etseg-main ainawai, wi fariseo asan iinu secta tawa imatksanuk umijkuitag nuna.

<sup>6</sup> Yamai mina tujutuina nunak, Apajuí iina muunji aajakajua nuna anagkuauwa nuna dakag dui, nuna dekagtuatasag jutijunawai.

<sup>7</sup> Nunú anagkagtuamu umintai wainkatag tuidau asag, doce Israela uchijí aajakajua duka, Apajuin emematuinak kashi tsawaijai takajuinawai. Nuna dakag duik rey Agripah, judio aidauk tsanumjutuinawai.

<sup>8</sup> ¿Wagka atumesh, Apajuí jakau aidanash inanmaina dusha dekaskeapi tumain-chaush dekaepeagme?

*Pablo ainragtujakbau*

<sup>9</sup> “Wi anentaimsanuk wajuk dutikmainaitja nunak ashí dutikatjai Jesús nazaretnumi-aya nuna daajin pachis chichaina nuna emegkaktasan timaijai;

<sup>10</sup> nunak dutiksanuk Jerusalegkash takamiajai. Sacerdote apuji aidau inatjagmatai Jesusan nemajin aidanum kuashat achijan cárcel chimpiyajai, mainakuish chichaman ijuyajai.

<sup>11</sup> Kuashtá suwimkan suinakan waitkayajai dekaskeapi tabaun idaimitkastasan; nunak ashí jega ijuntainum dutikajai, ditanak senchi kajejau asan, tikich nugkanmaya yaakat aidanum batsatunash aintú wekaeyajai.

<sup>12</sup> “Nuna dutikatasan yaakat Damasco webaijai, sacerdote apuji aidau dutikata tusa awetuinakui.

<sup>13</sup> Tujash rey Agripah, etsa tajajau ai jintá wekaman, makichik tsaaptinun nayaimpinmaya etsa etsanbaujin nagkaesaun wainkabiajai, nunú tsaaptina duke ashí wijai minidaujai ijumag egketkabi.

<sup>14</sup> Dutijamantai ashí nugká kakekabiaji. Nuniamunum hebreo chichamai nayaimpinmaya chichagtak: ‘Saulo, Saulo ¿wagka minash waitkajame? Amek baka kajejá jagkin tukumak beseakush dekapsama numamtuk amek pegkegchau weakum imaniame tujtmayi’.

<sup>15</sup> Tujtukui: ‘¿Apuh amesh yaitpa?’ tusan iniai: ‘Wika Jesusaitjai, ame ya waitkame nuuwaitjai, tujtmayi.

<sup>16</sup> Tujash nantaktá nunikam wajantá, yamaik mina inakeg ematasan wantintukjame, dutikamu asam ame midau wainkaun nu etsegkata, ataktú iwaintukatjam dushakam dutiksamek etsegkata.

<sup>17</sup> Judio aidau nuigtú judiochu aidau kajegtamainakuish wi ayamjuktatjame, dutikatin asan dita batsatbaunum awemajame,

<sup>18</sup> ame wainmitkakta dutikam suwenum batsata nuna tsaaptinun wainkatneme, nuninak Iwanchi inatai batsata nunak ukuinak Apajuin nemagkatneme; nuninak mina dekaskeapi tujutuinak tudau aidanash tsagkugnagtinme, nunikag Apajuí aentsji pegkejam aina nuninuk atinme’, tujtmayi.

<sup>19</sup> “Tujutiu asamtai, rey Agripah, nayaimpinmaya wainkamunak intimjukchabiajai;

<sup>20</sup> nunikan dekatkauk Damasco batsata nuiyá etsegkabiagai, nui juakin Jerusalén, nuigtú ashí Judea nugkanmash, judiochu aidanash tudau takatan idaiyinak Apajuin

nemagkatnume, nunikag pegkejan takainak dita yapajinamujinash iwainmamkatnume, tusan.

<sup>21</sup> Nuna taja duik judío aidau, jega Apajuí ememattainum pujai achigkag mantuagag tujutiagmae.

<sup>22</sup> Tujash Apajuí yaintsamtai yamaikish nuig ebetmamjan pujajai, nuniakun ashí aents imanchau aidau nuigtú eme anentai aidanash, yacha aidanashkam ujasnuké ajai. Profeta aidau nuigtú Moisés nuniktinai tiajua nuna idaikunuk chichachujai

<sup>23</sup> Cristuk waitus jakatnai, nunikash ni dekatkau jakaunmayag nantaktinai, nunik tsaaptina nuna pachis judío aidanum, judiochu aidanumash etsegkatnai tiuwai”, tuuyi.

<sup>24</sup> Nunú aidau Pablo ayamjumak tutai, Festo senchi chichaká:

—¡Pabloh, imanjaume! Senchi au aukawam imanjaume, timayi.

<sup>25</sup> Tama Pablo ayaak:

—Apu Festoh, chichame antugtayah, imaanjachjai, wi taja duka dekaske, nuigtush anentaimtumainai.

<sup>26</sup> Anui rey Agripa eketa dushakam ju waji aidanuk shiig dekawai, nunin asamtai shiig agkan chichajai niina emtin, wagki niish junak ashí dekawai, juka uuká takaschamu asamtai.

<sup>27</sup> ¿Rey Agripah, profeta aidau tiajua dusha dekaskeapi tamek? Wika dekajai dekaskeapi tame nunak.

<sup>28</sup> Tama Agripa Pablon ayaak:

—¿Machik tame duikik, minash Cristo nemagkatni tujutam?, timayi.

<sup>29</sup> Tutai Pablo:

—Wi kuashat tsawan etsegchataish, machik tsawan etsegtaish, Apajuik aminak, nuigtú ashí wi chichaamun antuina junash wi wajukeyag juniktinme tujamjume, tujash wi cadenayai jigkajam wajag junitsuk.

<sup>30</sup> Juna Pablo timatai, rey wajakiu nuigtú gobernador, Berenice, ashí nui ditajai pekajushkam.

<sup>31</sup> Nunik kanakiag chichainak: Ju aentsua juka pegkegchau takasbaujin mantamnamainuk atsujui, carcelash wemaitisui.

<sup>32</sup> Tusa Agripa Feston chichajak:

—Juka akupmainitji, Roma apujiya nu chichaman dekgatuati tichauwaitkuig, timayi.

## 27

### *Pablo Roma awemamu*

<sup>1</sup> Nunikag dekas Italia awemami tujamaidau asag, Pablon nuigtú tikich achigbau aidan ujuak, makichik capitán Julio daagtin niina suntaji romanmaya apunu tutaiya nuna sasuabi.

<sup>2</sup> Nunikmatai adramitionmaya barco Asia nugkanum anumtai aina nui wetatus uminas tepaunum chimpimjá shimamunum, Aristarco macedonianmaya Tesalónica awa nuiyashkam jutiijai wemayi.

<sup>3</sup> Kashinia dui Sidón anumkabiaji, nunika ajin Julio Pablon eme anentus diyau asa, ni kumpaji aidauh kautua wainainak yaigtinme tusa idaisabi.

<sup>4</sup> Sidón juwaki dase igku umpumpau asamtai, Chipre ajuntaiji anuasa webaiji.

<sup>5</sup> Nunika Cilicia, Panfilia aina nuna yantamen ijusa wega weakua, Mira yaakat Licia awa nui jegaabiaji.

<sup>6</sup> Nui jegaajin capitán barco Alejandrianmaya Italia wegaun wainak nui chimpipagmayi jui wetajum tusa.

<sup>7</sup> Dutjamamtai kuashat tsawantai diipasa wee batsabaiji, nunisa ashintsá senchi takai takainakua Gnido igkuasa jega, nui juwaki dase igku umpumpau asamtai, Creta jegaabiaji Salmona igkuasa.

<sup>8</sup> Nunika wai waitiakua tugkitak anuasa ashí ashinkawa yaakat Lasea tikiju, Anumtai Pegkeg aidau tutainum jegawabiaji.

<sup>9</sup> Kuashat tsawan megkaekabiaji, ayuno fiestamtai nagkaemakui asa nayants wetak ishamain wajau asamtai, nunin asamtai Pablo aents nui chimpijun chichajak:

<sup>10</sup> —Muun aidauh, ju ii wegag juka shiig ishamain atin diyajai, nuigtú barcosh ashí waji aidauhkan megkaemainai, tuja jutii aidautish jinakuik jinumainaitji, timayi.

<sup>11</sup> Tujash suntag aidan capitanjiya duka, barcogtina nuna, anunta nujag antujak, Pablonak antugkachmayi.

<sup>12</sup> Nunú anumtaig yumi tepeamtaish pujusá inagkeaumainchau pegkegchau asamtai, kuashat aents aidau Fenice jegasá dekapsagmi, anumtai Cretanum etsá akaetaiya nuni awa nui, awi yumi tepeamtaish inagkeakiagmi, tiagmayi.



*Nayants senchi dasenkamu*

<sup>13</sup> Surnumia dase diipas dasentu asamtai, dita anentainsajag wemainapi tusag anclan egkejag Creta tugkitken tikiju wajasá weedau.

<sup>14</sup> Nuniai machik asa etsá minitaijiya atú ayaumas, Euroclidón\* tutai shiig senchi dasentuk minak barcon tukuau;

<sup>15</sup> nuniak senchi umpumpak yajá pempempaki etamkui, dase depetka waketmainchau asa, junisaikish wemi, tusa idaisabiaji.

<sup>16</sup> Nunika ajin dase jujamkintai ajuntai yaijuch Cauda tutai ukujin dasen ejatjamkam-tai nagkaemaku, bote yaijuch nenea minamua nu waitkasa barconum pataibiaji.

<sup>17</sup> Dutika patai ajin barcon sogayai jigkajagmayi wewe ematatus. Dutikawag Sirte kaamatkajin pataamig tusag ishamaidau asag, jaanch ejagbaunak kuwajag idaisagmayi, ayatak dase umpui emati tusa.

<sup>18</sup> Kashinia duishkam daseg senchi dasentu asamtai, barcanum waji chimpianunak jig utsaidiagmayi.

<sup>19</sup> Kampatum tsawanta jui, barconum waji chimpijunak ditak utsaidiagmayi.

<sup>20</sup> Kuashat tsawantai etsash, yaya aidaush waintsuk yujau asaja, daseshkam senchi tukugbau asamtai, jijnattajapi tabauk atsugtamayi.

<sup>21</sup> Kuashat tsawantai yutsuk yujanu asamtai, Pablo ejapen wajantá chichaak:

—Muun aidaush, wi timajim nu antugtugmagmin Creta dakasuitkuik, waji aidaush megkaemainchau wajakji.

<sup>22</sup> Tujash ichichmamjatajum tajime, makichkish jakashtatjume, imá barcok megkaekattawai.

<sup>23</sup> Wagki kashi, wi Apajuinu asan nuigtush niina umijag nuna angelji minai ayaumas wajantá,

<sup>24</sup> chichagtak: “Pabloh ishamkaipa, wagki amek Roma apuji pujamunum jegaatasam wegama, nuniau asamin ashí amejai barconum weena junak Apajuí kuitamkattawai tujutmae”.

<sup>25</sup> Nuadui muun aidaush ichichmamjatajum, wagki minak Apajuiyai kajintsan anentaibau ajutui, nunin asamtai tujuti duka nunisagkeap uminkattawa tajai.

<sup>26</sup> Tujash makichik ajuntainum patamtatji, tuuyi.

<sup>27</sup> Nunika jimag tumig inagkeamunum makichik kashi dase mai jujam awajtamkui nayants Adriático nanamsabiaji, nuniajin barconum takau aidau aehaet ai, nugkan tikiju adijun dekapenak,

<sup>28</sup> kunajin dekaapa diikmag treinta y seis metros kunaji atatman wainkajabi, dutikawag nuni dukapech ekemsag dekapakmag veintisiete metros atatman wainkag,

<sup>29</sup> kaya tukuig tusag ishamainak, barca ukujin cuatro ancla atatman nayants utsawajabi, dutikawag, utusag wamak tsawaja tusag Apajuin segayanume. <sup>30</sup> Nuniai barcanum takau aidau, uumak pisajagtatus bote yaig pataimun, barco nuniananas ancla aina nuna ajuinatali tumain ajugkajabi.

<sup>31</sup> Nudiagtai Pablo capitainin nuigtú suntag aidaujai chichajak:

—Ju aents aidau barconmag juwainachkuig atumek jijnashtatjume, timayi.

<sup>32</sup> Tutai suntag aidau, bote yaigchia nuna anagke aidaun tsupijug nayants ajugkagmayi.

<sup>33</sup> Dutikawagmatai tsawamunum Pablo ashí aents aidaun chichajak:

—Jimag tumig atumesh yutsuk yujagme wajukatjik tusa dakainaku.

<sup>34</sup> Nuniau asagmin tajime, piipichikesh yuwatajum. Duka dekass atumnawai nu ichichmamsa iwaaku jegatasaja, atum ainajum anuiyag makichkish jakashtatjume.

<sup>35</sup> Nuna tusa idaiyak, Pablo pagkan juki, ashí aentsush wainainamunum Apajuin see tii puuká yuwau.

<sup>36</sup> Nunitai tikich aidaushkam anentain ichichiajag yuawagmayi.

<sup>37</sup> Ashí ijumjamak barconum chimpijutik doscientos setenta y seis aents aajabiaji.

<sup>38</sup> Dita yapajamunak shiig yuwawag, trigonak nayants utsagkag, barconak wampu awasajabi.

*Barco tsainkamu*

<sup>39</sup> Tsawagmataish barconum takau aidauk nunú nugkapita tusag dekachagmayi; tujash nayants egkeentaunum kaamatak atatman wainkagmayi, nunikag awi anuumkamii tiagmayi.

\* 27:14 “Euroclidón” tawa junak dase shiig senchi dasenta nuna tuujakú ainawai.

<sup>40</sup> Tusag ancla aidau anagke aidaunak tsupijug nayantsanmag idaiyinak, remo aidau atiawaju, dutikawag jaanchin barca nujiin detuawagmatai, dase umpuakui kaamatak adijkatasa weyaji.

<sup>41</sup> Nunikmá chichijam tukuniagbaunum barco kaamatak pataamatai, nujinchig shiig tepea umuchmainchau wajasabi, nuniai ukujinak kupiyi nayants tsukatak senchi tukuau asa.

<sup>42</sup> Imanitai suntag aidau aents achigbau aidaunak kajegta tuyanume, yukuak pisajainum tusa.

<sup>43</sup> Tiagtai suntag aidau capitanji Pablon uwemtijatatus wakedau asa, dutiktuk dekas ya imá senchi yukumnaita nunú niyá eemak yukuak kukag jiiinkitnume,

<sup>44</sup> nuninai tikich yukumta dekeinatsu duka tapnan barca kupinja nunakesh jukiag patabiag katigtinme, tiabi. Nuna aatus tiu asamtai ashí jinutsuk kukag jiiinjabiaji.

## 28

### *Pablo Malta ajuntaijin pujusbau*

<sup>1</sup> Nunika jiiinjá Malta ajuntaijimpapi tusa dekaawabiaji.

<sup>2</sup> Nuwiya aidaush ashí shiig awajtamkajabi, nuninak yumi yutak tsetsek asamtai, jiiin ikapajag anamatajum tusa ipapawajabi.

<sup>3</sup> Nuniamunum Pablo chigkímin yajuak jiiinum pataayi; nuniai nuiya dapi jii sukuam jiiinak, uwegnum esainiabi.

<sup>4</sup> Dutika Pablon dapi uwegnum esai nemajuaun wainkag nu ajuntainum batsamin aidau pempeentunikiag chichainak: “Juka aentsuk dekas magkagintsukaitai, nunin asamtaints nayants jakegchamtaish, iina apajuijiya dutsu jakati tusa suwimkan suwak jutikatai”, tuyanume.

<sup>5</sup> Tujash Pablok dapin pegajá jiiinum jiyawabi, nunikash machikish wajuktsayi.

<sup>6</sup> Nunitai uwejinish iyagchatpash, nuniachkush pachiachbau jaka iyagchatpash tusag dakayanume; tujash kuashat dakasag makichkish wajukchatai, “Auk makichik Apajuiyai”, tiajabi.

<sup>7</sup> Nunú ajuntaiya nui tikiju, apu eme anentsá diitai Publio daagtinun nugke ajibi, nu niina jeen jujamki kampatum tsawantai shiig anenjamas kuitamjamkabi.

<sup>8</sup> Nui Publio apají disenteria achikam jaak tsuweak pegaknum tepeyi. Nunittaman Pablo diistatus waintua Apajuin aujus, uwejin antig etsagajabi.

<sup>9</sup> Nuna dutikamtai ashí jau ajuntainum batsamin aidaushkam kaunianume, nunikag ditashkam tsagagakajabi.

<sup>10</sup> Nunikag eme anenjamsag kuashat yaimpakajabi, nuigtú ii jintá wesá atsumainnash ashí wají aidaunak amasajabi, dutijamawagmatai, nu yajuaka barconum chimpimjá shiakabiaji.

### *Pablo Roma jegaamu*

<sup>11</sup> Kampatum nantu ajuntainum pujusá inagkeakiaja, Alejandrianmaya barco niishkam nui pujus tsetsek nagkaemakmatai wegaunum egkemjabiaji, nuna nujinchin ditá apajuimtaiji Cástor\* nuigtú Pólux dakumjuka adujtukbau aayi.

<sup>12</sup> Nunika ashí ashinkawa Siracusa anumtainum anumkaja, nui kampatum tsawan pujusabiaji.

<sup>13</sup> Nuiyati juwaki anuasa ashí ashinkawa Regio jegawabiaji. Nunika kashinia dui dase surnumia senchi umpumpakui, jimagchik tsawantaik Puteoli jegawabiaji.

<sup>14</sup> Nui ujumak Jesusa nemajin aidau wainká ajin, jui jutiijai makichik tumig juaktajum tusa ipapawagmatai juaka; tsawan jegakui Roma jegatasa jiiinkiabiaji.

<sup>15</sup> Yatsut romanmaya aidauk juii minamunak dekawag batsatu asag, iina igkumpaktatus wají sujutai Foro tutai Apio awa nui kaunawajabi, nuniai tikich aidauk Kampatum Jega tutaiya nui igkumpakajabi. Nunikmatai Pablo ditan wainak Apajuin see tiabi, nunik ichichmamjabi.

<sup>16</sup> Roma jegaa ajin, capitán aents achikbau aina nunak dekas suntajá apujin susa idaiyak, Pablonak niinash akanak makichik suntag kuitamkati tusa apusajabi.

### *Pablo Roma Apaju chichame etsegkamu*

<sup>17</sup> Kampatum tsawan nagkaemai, Pablo judío aidau apuji aidau untsuká ijumag ditajai chichaak:

\* 28:11 “Cástor” Pólux tawa duka, Alejandrianmaya apajimtaiji daaji, jimagmamu taku tawai.

—Yatsug aidauh, wika judío aidaunakesh pegkegchaunak takagsachu aig, iina muunji umitaiji aina nunakesh pegkegchau chichagtsaig Jerusalén achigkag romanmaya aents aidaunum sujutkagmae;

<sup>18</sup> dutijuawagmatai kuashat inintsag, wi pegkegchau takasbaunum mantamnamainuk makichkish atsgutau asamtai akupjuktag tujutiagmayi.

<sup>19</sup> Tujash judío aidau dakituidau asamtai, Roma apujiya nu chichamnak dekgatuati tibaijai, tujash mina nugkajui pegkegchau takasbaunum tujutuidau asamtai tichabiajai.

<sup>20</sup> Nuadui atumnash untsukjime, atumjaish wainiakan chichastasan, jutii Israel aidautik Cristo dakainag nuadui, jutika cadenayai jigkajam wajajai, timayi.

<sup>21</sup> Tutai dita chichajuinak:

—Jutiik Judeanmaya amina pachipas carta agagbaukesh jukichmaji, makichik yat-sutkesh awiya taawajag, amina pegkegchaugmin pachisagkesh ujakachagmae.

<sup>22</sup> Tujash ame wajuk anentaime nu dekatasa wakegaji, wagki jutii dekaing duka ashí tikich nugkanmaya aidaush, ju yamajam sectaya juna dakituinak, kuashat chichainamu antaji, tiagmayi.

<sup>23</sup> Makichik tsawantan, Pablojai ijunjami tusa mamikiawaju asag, kuashat kaunawajui jega ni pujamunum, nunikagmatai Pabloskam kashikmas nagkamas agkujai Apajú inabauji pachis ujaidau; dutikak Jesusa pachisash etseju shiig antumtikatatus, Moisés chicham umiktinum tibauwa nui nagkama profeta aidau tiajua nunashkam.

<sup>24</sup> Ujumak aents nuna etsegtaí dekaskeapi tuinai, tikich dekaskeapi tuinachush aidau.

<sup>25</sup> Nunidau asag, Pablo nuna timatai dekaskeapi tuinai tikich dekaskeapi tuinatsu nujai shiig juwamainchau dekapedau, nuninak aents aidauk jiiing shimutan nagkamawaju, nuniagtaí Pablo chichaak:

—Dekaskenum Wakani Pegkeji profeta Isaías aajakua nui, atumi muunjum aajakajua nuna chichajak:

<sup>26</sup> “Wetá, au aents aina nui, nunikam titá:

Antutnak antiagtinai, nuniakush dekashtin ainawai,

nuigtush diinakush, wainkashtin ainawai.

<sup>27</sup> Wagki ju aents aina juna anentaímtajig antumtikmainchau wajasé;

nuigtush, antutajig epetkamu ainawai,

nunisag jii aidaush epetkamu ainawai,

dutikachbauwaitkug jiiin wainainak, kuwishinish antumain ainawai,

nuninak anentainish shiig dekaing tudau takatan idaiyinakuig, wi etsagaumainaitjai”, †  
tiuwai.

<sup>28</sup> Nunin asamtai, atumesh dekaatajum, yamai nagkamsag Apajú uwemtikagta nu pachisa etsegbaunak, judiochu aidau antukagtatui.

<sup>29</sup> Nuna timatai, judío aidauk ditak pempeentunikiag pampa pampanyainakua shiyakagmayi.

<sup>30</sup> Pablok, nu jega ikamkamua nuig jimaj mijan pujusui, nuniak ashí niina wainkatatus minidaunash nui juujakui.

<sup>31</sup> Nuniak Apajú inabaujin etsejak, Apu Jesucristo pachisash aents aidaunak jintin-mayi shiig agkan waitkascham pujus.

## Pablo carta agaja romanmaya aidau awetimu

### *Kumpamkagtam*

<sup>1</sup> Wika Pablo, Jesucristo inakegaitjai. Apajuí minak Jesucristo pachis yamajam chichama juna etsegkati tusa etegtuauwai;

<sup>2</sup> ni anagkagtuamua nuna niinu profeta aajakajua nunú etsegkajui, dutikak agaju ainawai;

<sup>3</sup> niina Uchijí iina Apuji Jesucristo David weantu aajakua nuna pachisag;

<sup>4</sup> nigka David weantunum Aentsmaga akiinaw aajakui, nuninaitak jakau atak nantakmatai Wakan pegkemtikagtina nu Apajuí Uchijí senchigtina nuna iwainaku. Duka Jesucristo iina Apujiya nuuwai.

<sup>5</sup> Ni nunikbaunum Apajuí jutiinak wait anenjamag apóstol etamiuwai, Jesusa pachis etsegtkuti nunitai, ashí aents aidauk niini dekaskeapi tuinak niinak umigkatnume tusa.

<sup>6</sup> Atumshakam nu aina nuyag ainagme Apajuí Jesucristunu ati tusa etegjamu asajum;

<sup>7</sup> ashí atum Roma, Apajuí aneetaiji pegkejam atinme tusa etegjamu aidautijum batsatjum nuna agatjime: Apajuí iina Apajiya nunú, iina Apuji Jesucristujai wait anenjamag, shiig agkan pujutnum yaimpaktinme.

### *Pablo romanmaya aidau ijagsatasa wakekamu*

<sup>8</sup> Dekatkauk, Jesucristo yaintsamtai mina Apajuijun see tajai ashí atumin pachisan, atum dekaskeapi tabau ajutjamaina nuna pachis tikich nugkanmash pegkejam chichaidau asagmatai.

<sup>9</sup> Apajuí wakejusa takaju asan, niina Uchijin pachisan yamajam chichaman etsegtag nunú dekagtawai, Apajuí aukun idaitsuk tuke atumin adaisanké ajim nunak;

<sup>10</sup> nuniakun Apajuin tuke augjai, niish wakegakug tsawantan sujusmatai atumin tajuwan wainkatasan.

<sup>11</sup> Wagki senchi wakegajai atumin wainkatasan, nunikan Wakaní Pegkeji don sujusbau ajuta nuna, atum ichichmamja pujumaina nuna jintintuatasan;

<sup>12</sup> nunak wi dekaskeapi tabau ajuta duke atumnash ajutjamu asagmatai, pempeentunisaik ichichdaijagmi tusan tajai.

<sup>13</sup> Yatsug aidauh, atumesh dekaatajum tusan wakegajai, kuashtá atumiin minitasan anentaimsamjai, tujash yamaikish tuke tujiamu ajutui. Wika, tikich nugkanmaya judiochu aidau Cristo nemagkagmaya nunisag atum ainajum anuyash Cristo nemagkatnume tusan wakegajai.

<sup>14</sup> Wika ashí aents griego aidaush, griegochu aidaush jintintuata tusa awemamu asan, diwimkagtau anentaimaina imaniajai jintinkagtuata tusan.

<sup>15</sup> Nuniau asan atum Roma batsatjum nunash yamajam chichama juna Jesucristo pachisan ujaktasan wakeesan pujajai.

### *Chicham yamagma nu pachisa etsegbau*

<sup>16</sup> Wika yamajam chichama ju Jesucristo pachisa etsegtnmag datsamatsjai, wagki ashí aents nuna antukag dekaskeapi tuidaunak Apajuí senchigtina ibau asa uwemtika dui, dekatkauk judio aidaua uwemtikak dui judiochu aidauashkam uwemtikatin asamtai.

<sup>17</sup> Wagki chicham yamagma ju dekamtijamui, Apajuish wajina dutikawa jutiin pegkeja iman digmastatkush, nunak imá niinig dekaskeapi tabauwa duik dutikawai. Aatus agagbaunmash: "Apajuí pegkejaitme tibauwa nu imá niinak dekaskeapi tawa nu tuke pujutnai", tawai.

### *Apajuí aents dakituinamu asa dita wakegamun takastinme tusa idaisamu*

<sup>18</sup> Apajuik nayaimpinum pujusag dekamtijamji, ashí aents niina ajantus diitsuk pegkegchau takaidaun kajejuk suwimkan suwa nuna, wagki dita pegkegchau takatinig tikich aidaush dekaskea nuna dekamainchau dekapedau asagmatai;

<sup>19</sup> ditak dekainawai ashí aentstí Apajuinu dekamainaitag nunak, wagki Apajuí najankamua nuna dekaidau asag.

<sup>20</sup> Apajuí wainmainchauwa duka dekamainaitji ni takasbauji wainainag nu anentaimtusa diyaku nuigtú nugka yama nagkamchaku najanamu ashí wainainag juajui paan wainawai, ni dekas Apajuiya nunú nuigtú niina senchijish tuke atina dushakam. Nuadui aents pegkegchau aidauk, wika Apajuinak dekatsamjai tusa ayamjumamainjig atsujuinawai.

<sup>21</sup> Apajuinak shiig dekainayatak, niinak eme anentus see tutsuk, ayatak pegkegchauanak ane anentaimainakua dekamainchau wajasajui.

<sup>22</sup> Yacha ainaji tumamainayatak, dekachu waigkajui;

<sup>23</sup> nuninak Apajuí ajumaish jakashtina nu eme anenmaina nuna idaiyinak, aents jinin aina nuna, chigki, kuntin, dapi aidau niime dakumkamun emematiajui.

<sup>24</sup> Nunidau asantai Apajuishkam pegkegchau aidau anentaimtuina nunak takastinne tusa idaisajui; dutikawajam tikima datsanmainun pempé pempeentunisag takanidau;

<sup>25</sup> nuninak Apajuinu dekaskea nunak idaiyinak waita nuna antujuinak, najankagtina nunú emematmaina nuna; najankamu aidau emematuidau, imá nigki ajumaish ememattai atí. Aatus atí.

<sup>26</sup> Nuniagtai Apajuishkam idaisauwai tikima datsanmainun takastinne tusa. Dutikamu asag, nuwa aidauk aishmagjai pujustinme tibauwa nuna idaiyinak, mai nuwak pempeentunikiag takanijakajui;

<sup>27</sup> nunisag aishmag aidaushkam nuwajai pujutan idaiyinak mai aishmagkuk pempeentunikiag takanistasag senchi wakegaidau, nuninak tikima datsantainchau waigkag, mai aishmagkuk pempeentunikiag takanijakajui. Nunidau asag dita pegkegchau takasbaujin suwimkanak egatmamkag ditak waituinawai.

<sup>28</sup> Apajuik aents aidau dakituinamu asa, pegkegchau anentaimta nuwi idaisauwai; pegkegchau dutikmainchau aina nunak takastinne tusa.

<sup>29</sup> Dutikamu asag ashí pegkegchau aina nunak takainak, pegkegchaunak unuimatkejui, ashí waji ajuttí tusa waugtutan, yajaumaetan, tikichdau pegkeg wakejuka kajegtan, magkagtin, jiyanita wekaetin, tsanumin, chichama wekaetin,

<sup>30</sup> augmatkagtin, Apajuí shiwaji, datsantan chichaaku, eme anenmamin, ni wagaaku chichagmamin, pegkegchaush wajuk takamainaita nuna jintiag anentaimin, apajinash dukujinash chichaman umigchau,

<sup>31</sup> anentaimtajish pegkegchau, ni tibaujinash umichu, makichik aentsnakesh shiig anentus diichu, tsagkugkagtuchu, wait anenkagtuchu ainawai.

<sup>32</sup> Apajuí aentsun nuninun takaidauk suwimkan juak tuke jakatin atinme tiuwa nunak shiig dekainawai. Tibau aig, ditak pegkegchauwa nunak takainak, tikich pegkegchaun takaagtaish shiig anentus diinawai.

## 2

### *Apajuik aents takasbaujiya dutiksag susatnai*

<sup>1</sup> Nunin asantai ameshkam, yaki ainme nunin akumesh, tikich pegkegchau takainawai tusa bakutá takumesh amek bakumame, nunin asa ame ayamjumamainuk atsugtamui; amesh dita pegkegchau takaina nuninuk takau asam.

<sup>2</sup> Dekaji aents nuninun takau aidauk, Apajuí dekas dita pegkegchau takaamujiya dutiksag suwimkan suwa duka.

<sup>3</sup> ¿Nunin asantai ame, tikich nuniawai tusa augmatiatkum, dita takaina nunismek takama dusha, Apajuik suwimkanak sujuschatnapí tamek?

<sup>4</sup> Apajuik ame pegkegchau takataish shiig senchi wait anenjamu asa suwimkan sujamsuk, tudau takatan idaiyak pujutin yapajiati tusa emamkes dakagma dusha dakitame.

<sup>5</sup> Tujash ame antushtaigmin, tudau takat idaikum pujutum yapajishtaigmin suwimak aminu atinuk ikauntumame, tsawan jegatai Apajuí kajeká, aents takasbaujiya dutiksag suwimkan susatna nui aminush atina nu.

<sup>6</sup> Apajuik, makí makichik aents wajuk takasaje, nuna diijus dutiksag susatnai.

<sup>7</sup> Pujut tuke atina nunak, ya aidauwa Apajuí imana nuna egak, eme anentsá diyam, jachau amig tusag pegkegnak takainak kakanmamsaje nuna susatnai;

<sup>8</sup> tujash aents nigki anenmamin aidauk, Apajuí kajujuk suwimkan susatnai, dekaskea nuna dakituinak pegkegchaun takaa batsatu asagmatai.

<sup>9</sup> Ashí aents pegkegchau takatnak batsamtauk waittsagtinai, nuninak senchi anentaimak waittsagtin ainawai; dekatkauk judío aidau pegkegchau takaidauwá nunikagmatai, dui judiochu aidauhkam nunikagtinai.

<sup>10</sup> Untsu ashí aents pegkejan takasú aidauk, Apajuishkam shiig anentus ni pegkeja imanuk emaktinai nuigtush shiig agkan pujamu atina nunash susatnai; dekatkauk judío aidauwá dutika, judiochu aidauwá dutikatnai;

<sup>11</sup> wagki Apajuik jushá aentsui, aushá awai tuchauwai.

### *Chicham umiktinun Moisés agajua nu*

<sup>12</sup> Wagki ashí aents chicham umiktinun Moisés agajua nunú atsgbau batsamas tudau takasú aidauwá suwimkanak jukiagtinai. Chicham umiktina nunú ajamaitak tudau takasú aidauhkam, chicham umiktinum tawa dutiksag suwimkanak jukiagtinai,

<sup>13</sup> wagki chicham umiktina nuna aents dekau asamtai Apajuik pegkeg takauwaitme tatsui; aents chichaman umiina nuna Apajuik pegkeg takauwaitme tawai.

<sup>14</sup> Judiochu aina duka, chicham umiktin atsugmaitak tuke nunin asag, dita dutikaina duwi chicham umiktinnun tawa nuiyan takainawai, nuninak iwainmaminawai dutikmainchounash, dutikmainnash dekaina nuna;

<sup>15</sup> nuninak chicham umiktin ditá anentaimtajin ajuina nuna iwainnawai. Juka pegkegchawapi, juwap dekas pegkejaita tusag anentaimaina nunash iwainawai, nunin asa ditá anentaimtajiya duke bakumainai nuniachkush ayamjumainai;

<sup>16</sup> aatus nagkaemaktinai tsawan jegamtai Apajuí niina Uchijí Jesucristun, aents aidau ashí takasbauji nuigtú tikichish dekachbaunum anentaimsamujish diigsam, dita takasbaujiya dutiksamek susata titinai tusan, wi yamajam chichaman Jesucristo pachisan etseguuweg nunisag.

*Judio aents aidau chicham umiktin umiachbau*

<sup>17</sup> Atum ainajum anuiya ujumak aidautijum, jutiik judiowaitji Moisés chicham umiktinnash sujamsauwai, nuadui Apajuiaish shiig ijutkaji tusajum emebautigmesh ainagme.

<sup>18</sup> Atumek Apajuí wakegamua dusha dekagme, chicham umiktina nu pegkeg aina duke etegja takatan dekamtjamu asamtai.

<sup>19</sup> Atum anentaimsagmek aents wainmachu egkesá emamaina numamtuk awajkgatin ainaji tajume. Nuigtush Apajuí dekachu aidau Apajuin dekaatnume tusa yain ainaji tajume.

<sup>20</sup> Nuigtushkam dekachu aidauš jintintin ainaji, nuniaku chicham umiktin ajutjamu asamtai Apajuí chichamen imaanis dekainachush unuidau ainaji wajuk shiijash puju-mainaita dushakam, jutiik dekaskea dusha shiig dekainaji tajume.

<sup>21</sup> Atum aaja tikich jintintin ainayatkugmesh ¿wagka atumek jintinmamsugme? Atum kasamchatia tusa etsejiatkugmesh, ¿wagka kasamjume?

<sup>22</sup> Atum tsanjinchatia tayatkugmesh ¿wagka tsanjinjume? Atum apajuimtai dakumkamu dakitayatkugmesh, ¿wagka jega nunú dakumkamu ememattainum wayagmesh kasamjume?

<sup>23</sup> Atumek chicham umiktin ajutjamaina dui ememagme, nuniyatkujum nuiya umiachu asajum Apajuik eme anents diyatsjume.

<sup>24</sup> Yaunchkesh aaja agagbauwai: “Atum pegkegchau takatigmin judiochu aidau, Apajuin pegkegchau chichajuinawai”, tusa.

<sup>25</sup> Duka dekaske, judío asaja pakamainag duka pegkejai, tujash chicham umiktinnun tawa nu ashí umiinaku aaninakuik pegkeg amainaitji. Tuja pakamaku\* akugmesh chicham umiachkugmek pakamakchau aina nujai betekak ainagme.

<sup>26</sup> Tuja pakamakchauwa nunú, chicham umiktinnun tibauwa nuna umiagtaik pakamakua iman Apajuik diyawai.

<sup>27</sup> Pakamakchau akush, chicham umiktina nuiyan umiakug atumin bakugmagtin ainawai, atum chicham umiktinush ajutjamaig nuigtush pakamaku ainayatkujum chicham umiachu asagmin.

<sup>28</sup> Judío aents asajum nuniachkugmesh iyashnum awantak awa nui pakamaku asajum judío tamak amaitugme;

<sup>29</sup> dekaskenun judiowa duka ditá anentainish yapajinau aina nuuwai dekaskenun pakamakaju aina duka, nunak Wakaní Pegkeji dutikawai chicham umiktinun Moisés agajua nu dutikatsui; dutikamu aina nuna Apajuik pegkeg ainagme tawai, tikich aents aidau tutan dakituinaigkishkam.

### 3

<sup>1</sup> Nunin aish ¿wajinma imanita judío atash? ¿wajinma yaijatua pakamamush?, tautigmesh amainaitjume;

<sup>2</sup> tujash duka nuninchauwai, dekaskenmag judío aidautik tikich nagkaesau ainaji, Apajuí ni chichame agagbau dekatkauk jutiná sujamsauwa dui.

<sup>3</sup> ¿Tujash ujumak judío aina nuiya Apajuí tibuin dekaskeapi tusag umikchaju aina duiká, ni anagkagtuamua nunak umimainchawait?

<sup>4</sup> Makichkish nunimaitui, Apajuik dekas ni tibuinjak betek uminai, ashí aents aidau wait ainaigkish. Dui agagbauwamash:

“Ame tibuagmek betek umin asam pegkejai tama atatme, iman asam pegkegchau aikawai tujamainakuish, bakumamainkesh atsgtamu asamtai, tuke depetmaktinaitme”, tawai.

\* 2:25 “Pakamaku” tawa duka diistá Gn. 17.10-25.

<sup>5</sup> Jutii pegkegchau takaamuji, Apajuí pegkeg takaamujin nuní paan iwainais, ¿wagka Apajuish suwimkanash sukagtumainaita, pegkegchau takaakug nunimainait? (Junak tikich aents aidau wajuk chichainawa nuna dutiksanuk tajai.)

<sup>6</sup> ¡Duka makichkish nuninchauwai! Apajuí pegkegchaun takaakush, ¿Wajuk aents nugkanmaya aidaunash suwimkanash sumainaita?

<sup>7</sup> Tujash wi waitjamua nu, Apajuinu dekaskea nuna, aan nagkaemas paan emais, ¿wagka wisha tudauwaitme tamash aja?

<sup>8</sup> Ujumak aents aidau wainak tsanumjutuinak: Pegkeg ajutjamti takuik pegkegchau takamainai tusa jintinkagtawai, tujutuinau, ¿Dekas aajanuk jintinkagtaw? Makichkish nuninchauwai, nunú aents aidau mina pachitus tu chichaina duka suwimak jumainun tu yujainawai.

*Ashí aents aidautik tudau ainaji*

<sup>9</sup> ¿Wajinmainaitji? ¿Jutii judío aidautika tikich aidau nagkaesau imá pegkeg ainag? ¡Makichkish nuninchauwaitji! Timajim nunisag judío aidautish, judiochu aidaushkam tudau ainaji.

<sup>10</sup> Nunin asamtai Apajuí chichame agagbauwa nuwi:

“¡Makichkish aents pegkejan takauk atsawai, shiig makichkiuchikesh atsawai!

<sup>11</sup> Makichkish Apajuí pegkejan wakega nuna dekaukesh atsawai, antsag Apajuin egaukesh atsawai.

<sup>12</sup> Ashí aentsuk Apajuinak tupankaju asag atsumainchau waigkaju, nunin asag ashí pegkegchau ainawai.

¡Makichik aentskesh pegkejan takauk atsawai!

¡Shiig makichkiuchikesh atsawai!

<sup>13</sup> Suwenig

aents ukusbau ashimua imanai,

waitjuidau asag;

dítá weninig dapí tsaagkega iman ajuinawai,

<sup>14</sup> nunidau asag, kuashat kajeamujin aentsnash pegkegchaun chichajuinawai.

<sup>15</sup> Wamkes kajedau asag aentsun maatatus yujain ainawai;

<sup>16</sup> dita tuwí yujainawa nuninakush pegkegchaun dutikainak,

tikich aents aidaunak waittanum ukuinawai.

<sup>17</sup> Dekainatsui tikichjaish shiig agkan pujutnak.

<sup>18</sup> Apajuí ajantusa diyamujish atsujuinawai”, tawai.

<sup>19</sup> Chicham umiktina nui: “Ashí pegkegchau ainagme”, tawa nunak jutii judío aidautin Apajuí chicham umiktinun sujamsau asa tujama duka dekainaji. Nunú chicham umikchamunum chichamainchau juwaktinaitji. Nunin asamtai judío aidautish, ashí nugkanmaya aents aidaush wi bakumamainuk atsuagtawai tumainuk atsustinai, wagki Apajuí diismak ashí aentstí bakumamainuk ajutjamaidau asamtai.

<sup>20</sup> Nuadui makichik aentskesh Apajuí eemtinig chicham umikbauwai pegkeg diyamak achatnai, wagki chicham umiktina duka ayatak jutii tudauwaitag nunak dekamtijamu asamtai.

*Apajuik Jesucristo dekaskeapi tabaunum uwemtijamui*

<sup>21</sup> Tujash yamaiya jui iwaintugmake, chicham umiktina nu umiatsjinkesh Apajuish wajuk pegkeg diigmaji nuna, juna pachisag chicham umiktina nuwish, profeta aidaushkam etsegkaju ainawai.

<sup>22</sup> Nu aidau dekamtijamawajui Jesucristo dekaskeapi tabaunum Apajuí pegkeg ainagme tujama nunak, nunin asamtai ashí aents Jesucristo dekaskeapi tuina nunak, yaá aentsuk ainta nunin ataish nunak pachitsuk ashí betek pegkeg ainagme tujamji.

<sup>23</sup> Ashí aentstik betek tunamaku asaja, Apajuí diismak pegkejak wantinkachuitji.

<sup>24</sup> Nunin ajinig, Jesucristo iina tudaujin esaktugmag agkan etamkau asamtai wait anenjame anenjauch pegkeg ainagme tujabiuwai.

<sup>25</sup> Apajuik Jesusnak jutii suwimak jumaina nuna ni suwimkan juwak mantamnati tusa awetugbauwai, numikmatai Jesusan minaimpap mantamdauwaita tusag dekaskeapi tuinak uwemjatnume tusa. Aatus Apajuik pegkeg takaamujinak iwainmamkauwai, nunin asa aents yaunchuk tudau takasbaujinash pachitsuk yaa Jesusan dekaskeapi tawa nuna uwemtikui.

<sup>26</sup> Ni pegkeg dutikamun iwainmamkata tau asa Jesusan jutiini mantamnati tusa awetugbauwai. Nuna aatus dutikak Apajuik pegkeg takaamujinak iwainakui nuigtushkam Jesusan dekaskeapi tuina nuna pegkeg ainagme tawa dui.

<sup>27</sup> Nunin asamtai jutii ememamainuk makichkish atsawai, chicham umiktajum tibaauwa nu umikbaunmagkesh pegkeg ainagme tichamu asaja. Ayatak Jesucristo dekaskeapi tabaunum Apajuik pegkeg ainagme tujamui.

<sup>28</sup> Apajuik Jesucristo dekaskeapi tabaunum pegkeg ainagme tujama nunak, chicham umiktajum tibaauwa nu umikbauwaikish tujamtsu duka dekaji.

<sup>29</sup> Atsa ¿Apajuik imá judío aina nuna Apajuijigke tajumek? Atsa ¿Ashí judiochu aina nunash Apajuijichukaih? Dekaskenum ashí aents judiochu aina nunashkam Apajuijiyai.

<sup>30</sup> Apajuik makichkiuchi, nunin asa nigki Jesucristo dekaskeapi tuidaunak pakamaku agtaish, pakamakchau agtaishkam pegkeg ainagme titinai.

<sup>31</sup> Nunin asamtaig, ¿Jesucristo dekaskeapi tau asajin chicham umiktina duka wainak juwaka? ¡Makichkish nuninchauwai! Nunisag awai, ayatak nuni nagkaemas paan awasaji chicham umiktinush wajinma yaijatua duka.

## 4

### *Apajuish wajuk pegkejash diigmawa nuna Abraham iwainakbau*

<sup>1</sup> Yamai dewagmi Abraham iina apají wajukauwaita nudau.

<sup>2</sup> Abraham ni takasbaujiya nu diigsá aents pegkejai tibau akug, nigki emematmamain aajakui, tujash Apajuiyai ememamain aajakchauwai.

<sup>3</sup> Apajuí chichame agagbauwa nuig: “Abrahamak Apajuiyai dekaskeapi tujakui, nuniau asamtai Apajuí Abrahamnak pegkeg diisui”, tawai.

<sup>4</sup> Aents ni takagsamunum akiakug: Junak anentag amajame tumaitsui, diwibaunum akiau asa.

<sup>5</sup> Tujash aents pegkejan takaschau aig Apajuí tudaunum agkanmitka nunak niini dekaskeapi tau asamtai dutikawai, nunú dekaskeapi tibaauwa duik pegkeg ainagme tawai.

<sup>6</sup> Davidchakam aikasag agajui. Aents pegkeg takasbaujish atsujag, Apajuí pegkeg ainagme tima shiig aneastinjin pachis agajua duka,

<sup>7</sup> aatus tawai:

“¡Shiig aneasagtinai aentsú pegkegchauji tsagkujamu aidauk,

tuja tudau yaunchuk takasbaujish

pachitsuk idaitusbau aidaushkam!

<sup>8</sup> ¡Shiig aneasagtinai

Apu Apajuí nu aents aidau tudaujin anenjachbau agtina duka!”

<sup>9</sup> Juna tibaauwa jusha ¿imá jutii pakamaku aidauti shiig aneastinnak tiuwait atsa pakamakchau aidau shiig aneastinun tichaukaih? Nunak ditanashkam tiuwait. Yaunchuk timajime, Apajuik Abrahamnak niinig dekaskeapi tabau asa, aents pegkeg diisui tusan.

<sup>10</sup> Tujash nunash ¿wajukamtaiya dutikauwaita? ¿pakamakmataig dutikauwait atsa pakamatsaigkik dutikauwait? Nunak pakamakmatai dutikachui, eke pakamatsaig dutikauwai.

<sup>11</sup> Nunik pujus Abrahamak pakamakui, ayatak Apajuí dekaskeapi tabaunum pakamakchau ajinkesh Apajuí pegkeg ainagme tujama nuna iwainakta tau asa. Nuniku asa Abrahamak pakamakchau ainayatak Apajuí dekaskeapi tuina nuna apají wajasui, ashí nunin aidaunak Apajuik betekmas pegkeg diyawai.

<sup>12</sup> Nuigtushkam pakamaku ainakush, Abraham eke pakamatsuk Apajuiyai dekaskeapi tujakua nunisag anentaimaina nuna apají wajasui.

### *Apajuik Abraham dekaskeapi tujakua nunin aidau pegkeg ainagme tawai*

<sup>13</sup> Apajuí Abraham anagkuaku tibaauwa duka: Ju nugka juka amina uchijum weantu akinak wegagtina nudau atin atí tiuwait. Nunak Moisés chicham umiktajum tibaauwa nuna umikú asamtaigkish tichauwai. Ayatak niini dekaskeapi tau asamtai pegkeg diisá tiuwait,

<sup>14</sup> wagki jutii judío aidauti chicham umiktajum tibaauwa nunú umiaku jumainaitkuig, Apajuiyai dekaskeapi tabauwa duka ni anagkagtuamua nujai wainak juwamainai.

<sup>15</sup> Moisés chicham umiktajum tiuwa duka ii umiachbaunum Apajuí suwimkan sujamaina nuna itagtamji. Tujash chicham umiktina nunú atsakuig umiatsjume tamak amaitsuji.

<sup>16</sup> Nunin asamtai Apajuí Abrahaman anagkuauwa nunak, ni weantu aidaush dekaskeapi tabaunum anenjauch uwemjatnume tiuwait. Apajuí anagkagtuamuk, jutii judío aidauti chicham umiinag nudaukechui, Abraham Apajuiyai dekaskeapi tujakua nunisag ashí aents dekaskeapi tuina nudauwai. Aatus asamtai Abrahamak ashí jutii aidauti apajiyai.



<sup>17</sup> Nuadui Apajuí eemtinish Abrahamak dekaamauwai chicham agagbaunum: “Wi aminak kuashat aents aidau apaji emajame” tawa nuna. Nuadui Abrahamak aents jakaunash Apajuí inanki ataktú pujutan suwak, atsamunmayanash ashí wajiin najanna nuanui dekaskeapi tujakui.

<sup>18</sup> Nunin asa Abrahamak uchijish atsugmaitak, dekaskeap uminkattawa tabauwai dakasui, nuniku asa kuashat aentsun apaji wajasui, Apajuí chichajak: “Amina uchigmiin akiinak wegauk, yaya dekapamaichauwa ibau atinai”, tibau asa.

<sup>19</sup> Abrahamak cien mijan tumain ajujukui, Sarashkam muuntuch wajasú asa uchinash ejajumainchau wajasui, tujash dekaskeap uminkattawa tabaunmag mijakchauwai.

<sup>20</sup> Nuigtush Apajuí niina anagkuamunash utujimsag anentaimtsuk, nuní nagkaemas dekaskeapi tabujin ichichmagam Apajuin emematiuwai.

<sup>21</sup> Abrahamak: Apajuí ashí senchigina ibau asampap ashí ni anagkagtuamujinash imatiksag umiktatua, tiuwai.

<sup>22</sup> Nunú aaja dekaskeapi tabauwai Apajuik Abrahamnak pegkeg diisui.

<sup>23</sup> Tujash Apajuí Abraham dekaskeapi tabau asa pegkeg diisua duka, imá ni nunikbauwa duke pachisa agagchamui.

<sup>24</sup> Jutii nuniktina dusha pachisa agagbauwai: Ii dekaskeapi tabaunum Apajuí pegkeg ainagme tama atinaitag nunú. Duka jutii Jesucristo iina Apujiya nu jakaunak Apajuí inankiuwa nunú dekaskeapi tuinag nuuwai.

<sup>25</sup> Apajuí Jesusnak jutii tudaujin mantamnat tusa idaisauwai, nunik maawagmataish ataktú nigki inankiuwai jutiiin pegkeg ainagme tujamta tau asa.

## 5

### *Yamaik Apajuí wait anenjabauunum pujaji*

<sup>1</sup> Yamaik Apajuíyai chichatash agkan ajutjamji, Jesucristo iini mantamna iina tudaujinash esaktugmagmatai pegkeg ainagme tujabiu asamtai nuigtush iina Apuji Jesucristo dekaskeapi tuinag dui.

<sup>2</sup> Cristo dekaskeapi tabaunum Apajuik adjikauwaitji, ni wait anenkagtuju asamtai shiig anenaji nuniaku shiig aneasa dakainaji nuigtushkam Apajuí tsuwatan antiakchauwa imanuk iishkam wajasaja, atak niijai ijunja pujustinaitag nunú dekanaku shiig aneamu ajutjamji.

<sup>3</sup> Imá duikik shiig aneatsji, kuashat waitiamu ajutjamkuish shiig aneasa batsatji, waitiamua nu utugchat emamkesa katsunjá nagkaetan unuitama dui,

<sup>4</sup> nunú emamkesa nagkaiki, Apajuí dekapjabaush nunisaik nagkaikijaja atakeap niijai pujustinaitja tusa shiig aneasa dakamu ajutjamji.

<sup>5</sup> Nunú dakainaku pujuidaulik idatsamak achatnaitji, wagki Wakaní Pegkejiya nu iina anentain pujau asa Apajuí niina anenkajin amasua nuna dekamtijamkui tikich aidaujaish pempentunisaik anenidau asaja.

<sup>6</sup> Jutiilek uwemainchau waigká batsatjin, Apajuí tsawan mamikiamu jegamtai Jesucristun awemauwai, dutikam jutii tudaujin mantamna uwemtijamjauwai.

<sup>7</sup> Makichik aentskesh tikich aents pegkejan takau asamtai ayamjakun mantamnatjai tumainuk atsawai, ¿aents pegkegnun yaigbau asampash: Wi mantamnatjai tumainait? Achah tumainashit.

<sup>8</sup> Tujash Apajuik ni anenkajinak iwaintugmakui, ii tudau ainajinig Cristo jutiiin mantamdauwa dui.

<sup>9</sup> Cristo niina numpen Apajuíyai iwainakmatai jutiiin pegkeg ainagme tujabiuwai. Nuadui Cristo aan nagkaemas iina Apajuí suwimak sujamainnak ayamjupakmatai waittsashitnaitji.

<sup>10</sup> Yaunchkek aents aidautik Apajuin shiwaji ainajinig, ni Uchijí iina ayamjupak mantamna ni Apajijaish epegtugmauwai. Dutijamau asa yamaik Cristo iwaku pujau asa aan nagkaemas ayamjupaktinai.

<sup>11</sup> Imá dukechui jutii Apajuíyai shiig aneenag duka, iina Apuji Jesucristo Apajijai shiwagmagamun epegtugmauwa duish shiig anenaji.

### *Adán Cristujai pachisa tibau*

<sup>12</sup> Makichik aents tudau takasua dui, nugkanum tudau takaamush nagkamdauwai. Nu aaja tudau takasbaunum jatashkam nagkamdauwai, nunikmatai ashí jinin wajasuitji, wagki ashí aentstik tudau takau asaja.

<sup>13</sup> Apajuí Moisesan chicham umiktinun eke suwatsaig nugkanmag tudauk aajakui, tujash Apajuik aents tudaun takaagtaish pachikchauwai, chicham umiktinun eke susachu asa.

<sup>14</sup> Nunin aigkishkam Adán pujujukua dui nagkamas Moisés pujujukua imanuish jamuk aajakui, Adán tudau takaak Apajúi intinjukiuwa nuninachiatak. Duka Cristo minitna nuna iwainak nunikui.

<sup>15</sup> Tujash Adán umikchamunum tunamagbauwa duka Apajúi anenjauch sujamsauwa nujai apatkaish tumaitsui. Makichik aents tunamagbauwag ashí jinin wajasuitji. Tujash Apajúi wait anenjamag anenjauch Jesucristun awetugmauwa nuadui ashí iinu pegkeg aina nunak aan nagkaemas pegkejan dutikauwai. Aatus Apajúi wait anenjamag nunú aents tunamajua nuna nagkaegas pegkejan dutikauwai.

<sup>16</sup> Adán tudau takasbauwa duka Apajúi anenjauch sujamsauwa nujai apatkaish tumaitsui. Adán tudau takasua dui ashí aentstik Apajúi eemtinish bakumainnum juwakuitji. Tujash aents imanik tudau takasú aigkish, Apajúi anenjauch dutikauwa dui pegkeg ainagme tujamji.

<sup>17</sup> Makichik aents umikchamunum tunamagbauwa dui jaamuk asauwai, tujash nuna nagkaesau makichik aents Jesucristua nu pegkeg dutikamunum Apajúi shiig senchi wait anenjamu asa, pegkeg ainagme tibau aidautik yamajam pujuta nuwi tuke pujustin ainaji.

<sup>18</sup> Makichik aents Apajúi umigkashbaunum, ashí aentstik Apajúi, atumek suwimak juwakjum jakattagme tama asauwaitji. Aantsag makichik aents Jesucristo pegkeg dutikamunum, Apajúi ashí aentstinak pegkeg ainagme tujabiuiwai pujut nagkanchaun jukitnume tujamu asa.

<sup>19</sup> Makichik aents Apajúi intinjukbaunum kuashat aentstik tudau waigkuitji. Tuja makichik aentsua nu Apajúi umigkamunum, kuashat aents pegkeg ainagme tama agtinai.

<sup>20</sup> Chicham umiktina duka ayatak nuní nagkaemas tudaunak ikauntugmakui; tujash nu imanikmataish nuna nagkaesau, Apajúi ni wait anenkagtamujiya nuna iwaintugmakui.

<sup>21</sup> Nunú tudau jatan itagtabauwa nunisag Apajuishkam ni wait anenkagtamujiya nunak Jesucristo iina Apuji jakauwa dui pegkeg ainagme tujamu asa, pujut tuke atina nuna jukitnume tujabiuiwai.

## 6

### *Jutiik tudau takatnumag jakauwa numamtuk juwakuitji*

<sup>1</sup> ¿Dusha wajuk anentaimtagme? ¿Apajúi senchi wait anenjamjati tusaik tudau takaa batsaamainait?

<sup>2</sup> ¡Duka makichkish nunimaitsui! Jutiik tudau takatnumag jakauwa numamtuk juwakuitji, nunintish ¿wagkaik tudaush takaash pujutji?

<sup>3</sup> Atumek shiig dekagme, jutií Cristo Jesusai dekaskeapi tabaunum yamimainakuik, ni jakauwa numamtuk wajainag duka.

<sup>4</sup> Nunin asaja yamimainakuik Cristun ukusajua numamtuk wajainaji, nijai betek jakauwa numamtuk wajaidau asá. Nuniku asaja Cristo Apaji niina senchiji imana nujai inankiuwa numamtuk wajainaji yamajam pujutnum pujuuidau asaja.

<sup>5</sup> Nijai jamaina numamtuk wajakú asá, ni nantakiuwa nunisaik jutiish nantaktinaitji.

<sup>6</sup> Yaunchuk aajakuitag duka Cristo achijá maamua nujai betekak maamua duka dekainaji. Aatus nunikmatai iina iyashí yaunchuk tudau takamtiktai wajasua duka wainak juwakti, nunikmatai tudau takainak waitú batsamchatnume tujamu asa.

<sup>7</sup> Aents jakauwa duka tudaunak takaa pujuchui jaka agkan wajasú asa.

<sup>8</sup> Numamtuk jutiishkam iina tudau takataiji aidauk Cristujai jakau asamtai agkantaitji. Nuadui dekasenum Cristujai pujutnaitji.

<sup>9</sup> Dekainaji Cristo jakaunak Apajúi inankimu asa ataktuk jakashtina duka. Cristuk jaamunak depetkau asa ataktuk jamaitsui.

<sup>10</sup> Aents tudaun takaagtai Apajúi suwimkan susatjai tiuwa duka, Cristo waitus jakauwa duik ashí nagkankauwai. Yamaik nantakí puja nunak Apajúi shiig anemtikak pujawai.

<sup>11</sup> Atumshakam nunisjumek tudau takatnumak jakauwa nunin anentaimtumastajum, tuja iwaaku anentaimtumastajum, ii Apuji Cristo Jesusai ijutkau batsatjukum Apajúi shiig aneemtiksata tabaunum.

<sup>12</sup> Nuadui atumek tudauk takaa batsaamaitsugme, atumi iyashim pegkegchaun takastatus wakega nunú takaakjum.

<sup>13</sup> Atumi iyashmia nuiyagkesh tudau takamtiktaig awasaigpajum. Dekas Apajuiyai idaimamsatajum jakauti nantamaina numamtuk wajakú asajum, iyashmiin ajutjamaina nunak Apajúi pegkegnum takamtiksati tusajum idaitustajum.

<sup>14</sup> Aaja dutikamu asamtai tudauwa duka atumnak inapamaitsui, wagki chicham umiktina nu umiktasa batsamtutsuk Apajúi wait anenjabaunum batsatu asagmin.

*Aents yana umigkatjai tawa duka nuna umijin wegawai*

<sup>15</sup> ¿Tujash wajukmainaita? ¿Chicham umiktasa batsattsuji Apajúi wait anen-jabaunum batsatji tusaika, tudau takamainait? ¡Makichkish numimait्सु!

<sup>16</sup> Atumek dekagme, makichik aents wika parjugkan takajin atajai tumamkug, nuna inake wajasá parjugji wakegamujin umigna duka. Numamtuk aents ayatak tudaunak takaa pujauk nigki jatan egatmamak nuniawai. Untsu Apajuin umijak pegkeg aina nunak takauk, pegkeg pujuta nuwi weawai.

<sup>17</sup> Apajuin see tajai, yaunchkek tudau achikam batsatutijum Jesucristo pachisa jintiamu antukjum, dekas anentaimin wakejusjum umijin waigkujum nuadui.

<sup>18</sup> Tudau takatnum achikbauwa nunin batsatutijum agkanmitkamu asajum, pegkeg aina nunak takau atajai tumamiuwaitjume, nunikjum pegkeja duke takaakjum batsatjume.

<sup>19</sup> Nunak atum kakajus antumainchau asagmin apattsan shiig antuktinme tusan tajime. Yaunchkek atumi iyashmik pegkegchau nuigtú tsumain aina nuanui takamtika-jakuitjume. Tujash yamaik atumi iyashmik pegkeg takat aina nuanui takamtikakjum pegkeejum pujustajum.

<sup>20</sup> Atumek tudau takatnum idaimamsau asagmin, Apajúi pegkejan wakega nunú takagsatajum tumainchau aajakuitjume.

<sup>21</sup> Tujash ¿waji pegkeja jukiwaitjume, yamai datsantan itagtamaina nunú takasuit-jum duish? Duka ayatak jatanmag ejetamjume.

<sup>22</sup> Tujash yamaik atumek tudaunum agkanmitkam Apajúi takajin wajasujum nuadui, pegke pujakjum pujut tuke atina nuwi jegantinaitjume.

<sup>23</sup> Tudauk Apajuyai datumkagtawai; untsu Apajúi anenjauch sujama duka iina Apuji Cristo Jesusjai ijutkau pujamunum pujut tuke atin juwamua nuuwai.

## 7

*Chicham umiktajum tibauwa nunú nuwenbauwa nujai apatka dekamú*

<sup>1</sup> Yatsug aidauh, atumek chicham umiktina duka dekagme. Nuigtushkam dekagme chicham umiktina nunak aents iwaaku puja duke umimaina nunú.

<sup>2</sup> Ju anentaimtusa diisagmi; chicham umiktina nuanuig nuwa nemakua duka aishi pujaigkik tikichnumag nemamait्सु, untsu aishi jakamtaig chicham umiktin tawa nuig agkan juwawai tawai.

<sup>3</sup> Nunin asamtai aishi pujaig tikichjai nemakug ekagmawai, untsu aishi jakamtai chicham umiktin nuwenbaun pachis tawa nunak agkan wajasú asa, tikich aentsnum nemakush ekagmatsui.

<sup>4</sup> Mina yatsug aidauh, atumesh numamtuk Cristujai ijunkujum niijai jakauwa numamtuk wajasum chicham umiktina nuig agkan wajasuitjume, nunikjum yamaik Cristo jakaukan Apajúi inankiuwa nujai ijunjajum pujagme, nuniau asajum Apajúi pegkejan wakega duke takagmain wajasugme.

<sup>5</sup> Yaunchkek iina iyashi pegkegchau takatan unuimatjauwa duke takajakuitji, nuniajin chicham umiktina nunú nuni nagkaemas pegkegchau takatnum dekamtijamauwai, dutijamantai nunú takainaku jatanum jegantuitji.

<sup>6</sup> Tujash yamaik chicham umiktajum tibauwa nuanuig jakauwa numamtuk wajakaju asaja, agkanmagawaitji achikbauwa numamtin aajakuitag duka. Nunin aajakuti yamaik Wakani Pegkeji yaimpasmatai yamajam pujuta nu juku asaja nujai Apajuik takajuinaji yaunchuk chicham umiktajum tibauwa duka idaiku.

*Tudau minai pujugta nunú*

<sup>7</sup> Nunin asantaig ¿chicham umiktina duka tudauwai tumainait? ¡Duka makichkish nuninchauwai! Chicham umiktina nunú atsakuig wika tudaunak dekaachu amainaitjai, nuigtushkam tikichdau pegkegchau anentai egketua wakejuta nunash chicham umiktina nu tachakuig dekaachu amainaitjai.

<sup>8</sup> Tujash tudauk, nunú chicham umiktin tawa duka ashí tikichdau wainká pegkegchau anentai egketua wakejut minai awa nuna dekamtijauwai, wagki tudauwa duka chicham umiktina nu atsutaik jakauwa nunin wajas au asamtai.

<sup>9</sup> Wika yaunchkek chicham umiktina nunash dekatsuk pujujakuitjai; tujash chicham umiktina nuna dekakam wi shiig tudauwaitag nuna dekagmamuwaitjai.

<sup>10</sup> Tuja chicham umiktina nu, pujutnum ejetumaina nuna megkaetanum ejetiuiwai,

<sup>11</sup> wagki tudauwa duka chicham umiktin tawa nujai tsanujug jatanum ejetiuiwai.

<sup>12</sup> Aaja dekainaji chicham umiktina duka pegkegma nu, nunin asa umiktin aina dushakam pegkegmai nuigtushkam pegkejai, pegkeg aidau takastinun tau asa.

<sup>13</sup> ¿Tujash nu iman pegkejaitkush, wagka minash megkaetanmash ejetiuiwaita? Duka nuninchauwai. Nuninaitak tudauwa nu, pegkeja iman wajas megkaetanum ejetiuiwai dekas tudauwa nuna iwainmamkata tau asa. Nunak chicham umiktin tawa nuwishi shiig pegkegchauwa nuna iwainmamkatatus nunikui.

<sup>14</sup> Nunin asamtai dekeinaji chicham umiktina nunak Apajuí Wakani jintintuam Moisés agajui dutikamu asa pegkejai, untsu wika ju nugkanmaya asan kakaakchawaitjai. Nunin asan inak apujin umijama numamtuk tudau umijag nunak dutiktsukek idaimainchau dekapejai.

<sup>15</sup> Wika dekamain dekapeatsjai, wi wakegamujua nuna takatsuk, dekas wi dakitamujua nuna takaag dui.

<sup>16</sup> Nuniau asan wi dutikag nunak dakitamujua nuna takau asan, chicham umiktina duka dekas pegkejapita tajai.

<sup>17</sup> Nuadui wichawaitjai dekaskenum pegkegchoun takaunuk; minai tudau ajuta nu takamtijakui nuniajai.

<sup>18</sup> Nunin asan wika mina iyashig kakaakchauwa nuwi makichkish pegkejak atsugta nunak shiig dekagmamjai, wagki pegkeja nuna takastasan wakegayatkun takamainchau dekapeau asan.

<sup>19</sup> Pegkeg takastasa wakegamua nunak takatsuk, pegkegchou dakitamujua nuna imá takaajai.

<sup>20</sup> Tuja wi dakitamujua nuna takaaknuk, wi takaakun nuniatsjai, minai tudau ajuta nu takamtijakui nuniajai.

<sup>21</sup> Dutijau asamtai pegkeja nuna takastasan wakegayatkun, pegkegchou ajuta nuna chicham umiktina nuwi dekagmamjai.

<sup>22</sup> Nunak mina anentaijuí chicham umiktin Apajuí sujamsamua nu umiktasa wakegamu ajutu asamtai.

<sup>23</sup> Tujash mina iyashjui umigmajau ajuta nuna wainjai, duka mina anentaimtajuig pegkeja nuna umigkata taig dakitmitkajak, mina iyashjui tudau ajuta nu achigkauwa nunin eti ajuta nuuwai.

<sup>24</sup> ¡Wajukawajak tajai! ¿Ya agkanmitkagmainaita mina iyashig pegkegchoun takamtijak megkaetanum eta nuanuish?

<sup>25</sup> Apajuin see tajai, iina Apuji Jesucristun awetugma agkanmitkagmawai dui. Inagnakun tajime: Apajuinu chicham umiktina nuna mina anentaijuig umigkata tajai; tujash mina iyashig tudau takatan unuimatjauwa dui idaimainchau dekapejai.

## 8

### *Wakani Pegkeji wakega nunisaik pujamu*

<sup>1</sup> Tujash yamaik Cristo Jesusai ijutkau pujuina duka suwimak jumainuk shiig atsujuinawai.

<sup>2</sup> Wagki Cristo Jesús umiujinaku pujuidautinak Wakani Pegkeji pujatan sujamas agkanmitkagmawajui tudaunum pujuidautin nuigtú megkaemaina nunashkam.

<sup>3</sup> Moisés chicham umiktinun tibauwa duka makichkish umimainchau aajakui, iina iyashi pegkegchou unuimatjau asa kakaakchou asamtai. Nuniamun Apajuí niina Uchijin aentsti iyashi tudauwa nunin ema awemauwai, ni tudaunum mantamnati tusa. Aatus Apajuik tudaunak depetkauwai Cristo iyashi kakaakchou wajasua nujai.

<sup>4</sup> Nunak chicham umiktin pegkeja nuna imatiksag umiinak iyash unuimatjamua nuna batsamtutsuk, Wakani Pegkeji wakega nunisag pujustinme tusa dutikauwai.

<sup>5</sup> Wagki iyash wakegamua nunak takaa pujuidauk, nunak anentaimtin ainawai; untsu Wakani Pegkeji wakega nunisag pujuidauk, Wakan wakega nunak anentaimtin ainawai.

<sup>6</sup> Nunin asa iyash wakegamua duke takaa pujamak megkaetanum ejekagtawai; untsu Wakani Pegkeji wakega dutiksaik takaamak pujutnum ejekagtawai nuigtú shiig agkan pujutnumshakam.

<sup>7</sup> Aents iyashi wakega nunak takastatus anentaimtú pujuidauk, Apajuí shiwaji weenawai, wagki Apajuí chicham umiktajum tibauwa nuna dakituidau asag, umitnash umimainchau asag.

<sup>8</sup> Aents iyashi wakega nunak takaa puja duka, makichkish Apajuinak shiig awagmamait sui.

<sup>9</sup> Tujash atumek, iyashim wakega nu takaakjumek pujatsjume, Wakani Pegkeji wakega nu takaakjum pujagme, Apajuí Wakani Pegkejin sujamsamua nu atuminish pujugtamu asamtai. Untsu Wakani Pegkejin Cristo sujama nu atsugbau aidauk Cristunu chu ainawai.

<sup>10</sup> Iina iyashi tunamaju asamtai jakatin atí tibau aigkish, Cristo atumiin pujau asa wakannash pujatan suwawai, Apajuí pegkeg ainagme tujabiu asamtai.

<sup>11</sup> Jesús jakaunak Wakan inankiuwa nu atumiin pujau asa, nigki Cristo inankiuwa dutiksag yamajam pujutan susatnai ina iyashinash, Apajui Wakaní Pegkeji sujamsamu atumiin pujugtamjum dui.

<sup>12</sup> Aatus asamtai yatsug aidauh, ii dutikmaina duka ajutjamji, tujash duka ina iyashí wakega nu takaaku pujuta duchauwai.

<sup>13</sup> Jutii iyashí wakega duke takaa pujuinakuik, tuke megkaekatin ainaji; untsu ina iyashí wakega nu Wakaní Pegkeji yaimpasmatai idaiyutik, Apajuijai tuke pujustin ainaji.

<sup>14</sup> Ashí aents aidau Apajui Wakaní takamtijusti tusa idaimamaidauk, Apajui uchiji ainawai.

<sup>15</sup> Atumek wakan inajatak waitkagkagatina nu jukichuitjume ataktú sapig batsamtita tusagmek, Wakaní Pegkejiya nu Apajui uchiji etamkaju asamtai. Nunú Wakan ichachtamkui: ¡Mina Apajui! tuinaji.

<sup>16</sup> Nunú Wakania duke ina wakaninash dekamtikawai, Apajui uchiji ainagme tusa.

<sup>17</sup> Apajui uchiji asaja, Apajui ii jukitnun anagtabauwa dushakam jukitnaitji Cristo jukitna nunisaik; dekaskenum Cristo waittsauwa nunisaik waittsajaik, niina imanjiya nuwish niijai pujutnaitji.

*Apajui anagtamamua nuwi kajintsá pujuidau asaja ichichmamja batsatainaji*

<sup>18</sup> Ju nugka jui yamai waituinag duka wainkayai, Apajui atak pujut dekas imanun amastina nujai apatkaish tumaitsui.

<sup>19</sup> Ashí Apajui najankamu aina duka shiig senchi wakegas dakainawai, tsawan jegatai jutii Apajui uchiji aidautin ashí wainainamunum iwaintamkatna nuna wainkagtatus.

<sup>20</sup> Wagki ashí najankamu aina duka dekaskenmash wajuku atí tibauwaita nunak megkaekaju asag wainak juwakajui, nunak dita wakegainak nunikchajui, Apajui aatus nuniktinme tibau asa nunikajui. Nunak Apajui makichik tsawantai yapajiatin asa dutikauwa nuna dakainawai,

<sup>21</sup> wagki duka besekú asag jinin waigkajui, nuniku asag inaku waitkatali wajas awa nunú Apajui imanjiya nujai niina uchiji aidautin agkanmitkagmatna nujai betek, ditashkam agkanmitkam agtin asamtai dutikamui.

<sup>22</sup> Duka dekainaji yamaiya juikish ashí najankamu aina duka, najaimaku ejettayama imatuinak nuwa uchin uchigmaktatus najaimama imanina duka.

<sup>23</sup> Tujash imá ditakek waituinatsui, jutii Apajui amastina nu jukitin asaja emtika Wakaní Pegkeji jukiu aidautishkam waituinaji, niina uchiji aidautin agkanmitkagmatna nu dakainaku batsamsaja.

<sup>24</sup> Nunú dakamu ajutjama duka uwemkau asa nuninaji. Nu dakaku pujuinag nu jukiu ainakuik, jukitnap ainaji tusaik dakaak pujumaitsuji. ¿Ya jukiwaitkush dakakush pujumainaita?

<sup>25</sup> Tujash dakainag duka ii wainchamua nu dakainaji, nuniau asá emamkesa dakainaji.

<sup>26</sup> Antsag Wakaní Pegkejishkam ii kakaakchau wegajinish yaimpaji, wagki Apajuish wajak aujmainaita duka dekachu asajin; tujash Wakaní Pegkejiya nu jutiiin pachipas Apajuin ajutugmawai, anentai senchi idajka tumainchau dekaepeajinchakam.

<sup>27</sup> Tuja Apajui aentsú anentain shiig dekagna ibau asa, Wakaní Pegkejish wajina tawa nunak shiig dekawai, wagki Apajui wakega dutiksag niina aentsji pegkeemtikamu aina nuna segatu asamtai.

*Jesucristo anempau asa ashí utugchatan depetkatnime tusa yaimpaji*

<sup>28</sup> Dekainaji Apajui aneen aidautinak ashí ina waji nagkaetamainawa duka pegkeg-num yaijata nu. Nunú aidautik ni Apajui wajak dutikatjai tawa dutiksaik untsukbau ainaji.

<sup>29</sup> Wagki ni yaunchuk emtika wainkamui ainag nu aidautin etegtamjauwai mina Uchig Cristua imanuk atinme tusa, dutikau asa ni yachi kuashat aina nuig ni iwai atí tiuwai.

<sup>30</sup> Nunú yaunchuk midau atinme tibau aina nu untsukbau ainawai. Nunú untsukbau aina nuna, pegkeg ainagme tiuwai. Pegkeg ainagme tiuwa nuna, wijai pujuinak eme anentai agtinme tiuwai.

<sup>31</sup> ¿Nuna tajim nuanuish tu tumainaita? Apajui ina wait anenjama nu jutiijai awa nuniaish, ¿ya pegkegchaush awajtamainaita?

<sup>32</sup> Apajui niina Uchijinakesh sujitjamtsuk ashí aents aidau tudaujin mantamnati tusa awetugbauwa ibaush, ¿wagkag ni Uchijin ashí wajiin susatna dutiksag iinash amaschagti?

<sup>33</sup> ¿Ya Apajui etegjam aidautinash bakugmamainaita? Makichikish atsawai, wagki Apajuiya duke ina pachipas juka pegkeg ainawai tujamu asamtai.

<sup>34</sup> ¿Ya suwimkanash amamainaita? Makichkish atsawai, wagki Cristo Jesusai jutiiní mantamdauwa duka, nuigtushkam nigki nantakiuwa dushakam, nunik yamaik Apajuí untsujin ekeemas iina segatjama dushakam nigki.

<sup>35</sup> ¿Ya Jesucristo iina anempa nunash datumtamainaita? Makichkish atsawai. Waitiamukesh, utugchatkesh, waitkagmainakugkesh, yapajamukesh, mamuamukesh, ishamaikesh, mantamata tuinakugkesh datumtamaitui.

<sup>36</sup> Dutiksag Apajuí chichamen agagbauwa nuwi jutiin pachipas: “Apajuíyah, jutiik aminu asaja, tuké puyatjumainnum pujuinaji mantamata tuidau asagmatai;

uwig mautainum juki ematiama numamtuk awajtamainawai”, tawai.

<sup>37</sup> Tujash ashí nunú aidaunmag Jesucristo anempak dutikauwa dui ashí depetmamu ajutjamui.

<sup>38</sup> Wika junak shiig dekau asan tajai: Jaamukesh, iwaaku pujamukesh, ángel aidaukesh, dekas wakan pegkegchau aina nuna apujigkesh, wakan senchigtin aidaukesh, ii yamai pujag juiyagkesh, atak atina dukesh,

<sup>39</sup> agkajunum batsamas inamin aidaukesh, nugká initken batsamas inamin aidaukesh, nuniachkush ashí Apajuí najankamu aina nuiyagkesh, Apajuí jutií anempamujin ii Apuji Cristo Jesusai iwaintugmakua nuna datumtamainuk atsawai.

## 9

### *Apajuí Israel mina aentsug atí tusa etegkamu*

<sup>1</sup> Cristun dekaskeapi tinu asan waitjutsuk dekass tajai, Wakaní Pegkeji mina anentaimtija dushakam dutiksag tujutu asantai duka dekaskeapi tau asan,

<sup>2</sup> shiig kuashat wake besemag dekapeakun anentaijun tuke idagmasnuké ajai.

<sup>3</sup> Nunimainaitkuig wi Cristui kanakan suwimkan jukitjai tumain dekapeajai, aaja nunimash mina yatsug aidaush wait anentam amainaitkuig.

<sup>4</sup> Ditak Israel aajakua nunú weantu asag Apajuí etegkamu ainawai, dutikau asa Apajuí niina imanjiya nuna iwaintukajui, ditajai Apajuik chichaman apakui, chicham umiktinun Moisés agajua nunashkam susauwai, wajuk emematjiti tusa wakegawa nunashkam shiig ujakajui, aikasag kuashat yaigtinaitjime tusa anagkuaui.

<sup>5</sup> Ditashkam ii muunji Apajuí etegkamu jutií uyujtamkatin aajakajua nu weantuk ainawai. Nunú ii muunji aajakajua nuwi Jesucristuk egkemak aentsmaga akiinauiwai. ¡Cristui ashí waji aina nuna diyauk, niyai Apajuik, nigki tuke ememattai atí! Aatus atí.

<sup>6</sup> Apajuí tibauwa duka mina pataag dekaskeapi tuinachu asantai umintsuk juwaktin asagkesh aniatsui, wagki ashí Israel weantu ainag nuiyatik ashí betek etegjachbau ainag dui,

<sup>7</sup> nunisag ashí Abraham weantu aina nuiya aidautik, ashí betekak Abrahama uchijig ainatsji, wagki juna Apajuí Abrahaman chichajak: “Ame weantu aidauk Isaac akiiamua nuiya agtinai”, tiuwai.

<sup>8</sup> Jui dekainaji, ayatak Abraham weantu ainag duikik Apajuí uchijí tama amaitsug duka, Apajuí anagtabauwa nuna dekaskeapi tuina nunú dekas Abraham weantu ainawai.

<sup>9</sup> Apajuí Abrahaman anagkuak tiuwa duka juuwei: “Tikich mijantin ataktú tajuattajam dui, Sara uchijí ajittawai”.

<sup>10</sup> Jushakam anentaimtustajum, iina muunji Isaac aajakua duke aajakui Rebeca jimagma uchigmakbau aajakajua nuna apají,

<sup>11</sup> tujash uchik eke akiinainatsaig, pegkegnash pegkegchaunash takainatsaig, Apajuí wajuk dutikatasaya anentaimtus etegkauwaita duka nunisag atí tau asa takasbaujinak diigtsuk,

<sup>12</sup> Apajuí Rebecan tiuwei: “Iwaiya nunú ekeuwa nuna umigkatnai”, tusa.

<sup>13</sup> Dutiksag agagbaunmash: “Jacopan aneakun, Esaunak dakitajai”, tawai.

<sup>14</sup> Juna taja juka Apajuí pegkegchau takaakuap aniawa tumaitsui, nigka makichkish pegkegchaunak takachui.

<sup>15</sup> Apajuí Moisesan chichajak: “Wika, wi wakegamujun wait anenjatnaitjai”, tiuwai.

<sup>16</sup> Nunin asa, aents etegtuati tusa wakegaidau asamtaigkish, nuniachkush niina shiig awajkatatus senchi kakanmamu asamtaigkish etegkeatsui; Apajuik nigki nagkami ni aents wait anenjata tabaujiya nuna wait anentawai.

<sup>17</sup> Nunin asantai Apajuí chichame agagbauwa nuwi Faraogkan chichajak: “Wi aminak apu emamjame, aminí mina senchijun iwainakmatai ashí aents nugkanmaya aidaush mina dekajuatnume tabaunum”, tibau awai.

<sup>18</sup> Nuadui Apajuik ni wakegamun wait anentawai, tuja aents intimkiti tusa wakegakush dutiksag intimtikawai.

*Apajuik judio aents aidau tuja judiochu aents aidauash wait anentawai*

<sup>19</sup> Tujash atum tujutmainaitjume, nunin aish: “¿Wagka Apajuish aents aidauash pegkegchau aniagme tumainaita, Apajuí wakegak dutika nuna makichik aentskesh aikawaipa tumainush atsa aniaish?”

<sup>20</sup> Nunin tautigmin tajime: “¿Amesh ya iman asamea Apajuish wagka aikame tumainaitme?” ¿Ichinak najanamush, najankagta nuna pempeentukish: “Wagka juní najatuaume”, tumainkaih?

<sup>21</sup> Aents duwen takauwa duka, ni wakegamujin diisá najanmainai, nunú duwea duik amamuk fiestatin takastinun najanak, tikichnak ichinak ashí atsumamunum takastinun najanmainai.

<sup>22</sup> Nunin asa Apajuishkam ni kajeamujin senchijiya nujai iwainakta tau asa shiig senchi emamkes katsunjauwai, nunú aidauk suwimkan juinak megkaetanum wegagtina nuna.

<sup>23</sup> Nunisag jutiin wait anenjamjauwa nunash iwainmamkauwai, nunú aidautik Apajuí yaunchuk nagkamas emtikak niina imanji tuke atina nuwi pujustinme tusa etegiamu ainaji.

<sup>24</sup> Dutikamu aina nuiyag jutii ainaji. Tujash imá judiotikek ainatsji, atum judiochu aidautigmesha ainagme.

<sup>25</sup> Juna pachis yaunchuk Apajuí tiuwa nuna, profeta Oseas agagbaunum: “Yaunchkesh mina aentsjuchu aajakú aidauash: ‘Mina aentsjuitme’ titinaitjai, duikish aneeshtaijua nuna: ‘Mina anetaijú’ titinaitjai”, tawai.

<sup>26</sup> “Nuanuig junashkam tawai:

‘Atumek mina aentsjuchu ainagme’, tiuwa nu nugkanmag batsatunak makichik tsawan-tai:

‘Atumek, Apajuí tuke pujuuwa nuna uchijí ainawai’ tama atinaitjume”, tiuwai.

<sup>27</sup> Nuigtushkam Isaías Israel aidau pachis: “Israelan uchijí weantu aidauti shiig kuashat nayantsa kaamatkajiya ibau ainakuishkam, ayatak wajumketi ayamjuka uwemtikjamu agtinaitji,

<sup>28</sup> wagki Apajuik, ni tibaujiya nunak wamak ashí nugkanmu umiktatui”, tiuwai.

<sup>29</sup> Nunak Isaías yaunchuk agagbauwa nuwish:

“Apajuí ashí senchigtina nu,

iina muunji aajakua nuna wait anenjachuitkuig,

nu weantu aidautik yamaikiuchia juik Sodomamaya aentsun,

Gomorranmaya aents aidaujai ijinauwa numamtuk awajam amainaitji”,

tawai.

*Apajuí dutikamua nuwi dekaskeapi tuidaun Apajuik pegkeg ainagme tawai*

<sup>30</sup> Nuna tajim nuanuish ¿wajinmainaita? Judiochu aina duka Apajuí eemtin pegkeg atasag kakanmamchayatak, Apajuí dutikamujiya nuwi dekaskeapi tuidau asag pegkeg diyam asajui.

<sup>31</sup> Tujash Israel aina duka, chicham umiktina nuna umiinak Apajuiyai pegkeg wantinkagtatus kakanmamainakush igkugchajui.

<sup>32</sup> ¿Tujash wagka nunash nunikajuita? Nunak Apajuiyai dekaskeapi tutsuk dita takashbaujiya nujai Apajuí eemtin pegkeg diyam atag tukamag nunikajui. Nunidau asag kaya tukuumaina numamtuk wajakajui.

<sup>33</sup> Nuna pachis Apajuí chichame agagbauwa nui:

“Wi Siognum\* apusattajai makichik kaya muuntan.

Nunú kaya nunak kuashat aents tukumak iyajagtinaí.

Tujash niini dekaskeapi tauk,

makichkish wainkag juwakchatnai”, tawai.

## 10

*Apajuik ashí aents Jesucristui dekaskeapi tuina nuna pegkeg ainawai tawai*

<sup>1</sup> Yatsug aidauh, mina anentaijui wakegag nunak, Israel aidauash uwemjatnume tau asan Apajuinash aujtuinajai.

<sup>2</sup> Wika ditanak shiig wainin asan tajai; ditak Apajuinak shiig senchi umigkagtatus wakegainawai, nuninayatak Apajuinu dekaskea nuna shiig dekainatsui.

\* **9:33** “Siognum” tawa duka: 1. Jega Apajuí ememattai Jerusalén aajakua nuna tawai. 2. Yaakat Jerusalegan pachisashkam tawai.

<sup>3</sup> Ditak shiig dekainaitsui Apajuí aentsun pegkeg ema nunak, nunidau asag ditak kakanmaminawai Apajuí pegkeg diyam atajai tuidau asag,

<sup>4</sup> wagki Apajuí chicham umiktajum tibauwa duka Cristo tauwa dui nagkamas nagkankauwai. Yamaik Cristo dutikauwa nuig dekaskeapi tabaunum pegkeg ainagme tujamji.

<sup>5</sup> Pegkeg takaamua nunú chicham umiktina nuwi tibauwa nuna Moisés agak: “Aents chicham umiktinum tawa nuna imatiksag umiauk, nunú umiamua duwik tuke pujutnai”, tawai.

<sup>6</sup> Tujash Apajuí dutikamua nuna dekaskeapi tuidaun pegkeg diya nuna pachis agakug tawai: “Makichkitigmekesh wainka anentaimsajum: ‘Yaki nayaimpinum waka’, tiigpajum”. Nunú aaja tuinakui, “Cristo yaki pujau wajuká nugká itawagmi”, tumaina nunin asamtai.

<sup>7</sup> Nuniachkugmesh: “Yaki jakau batsamtain akaikia tiigpajum”, tawai. Nunú aaja anentaimainakuik, “Aents jakau batsamtainum Cristo pujau jegaji, juki iwakagmi”, tumaina nuninai.

<sup>8</sup> Nunin asamtai junashkam: “Chichamak tikijuch atumi wenimin, atumi anentaimin ajutjamjume”, tawai. Nunin asamtai dekaskeapi tabauwa nu pachisa chichamak etsegnawai.

<sup>9</sup> Ame wenimin chichakam: Jesusak mina Apujui takum, anentaiminish Jesús jakauwa nunash Apajuiyap dekas inankiuwaita takumek uwemjau atatme.

<sup>10</sup> Wagki anentainum dekaskeap nunikuuta tabaunum pegkeg ainagme tama ainaji. Tuja, iina wenin chichaká Jesusak mina Apujui tabaunum uwemtak junawai.

<sup>11</sup> Aikasag Apajuí chichame agagbauwa nuwi: “Ashí aents niini dekaskeapi tauk makichkish wainkag juwakchatnai”, tawai.

<sup>12</sup> Wagki nunak judío aidautin, griego aina nunashkam betek taku tawai, wagki Apajuik makichkiuchi ashí aents aidau Apujiya duka, nunin asa ashí ya niina segawa nunak shiig anentus yayawai.

<sup>13</sup> Duka agagbau: “Ashí aents Apu Jesucristun uwemtijugta tusa segauk, uwemjagtin ainawai”, tawai.

<sup>14</sup> Tujash, ¿wajuk segatnumki uwemtijugta tusash, dekaskeapi tuinachush? Tuja ¿wajuk dekaskeapi tiagtigki, ni pachisa etsegbaunash antukchaju aidaush? ¿Nuwigtush wajuk antuktinmegki niina pachis etseju atsa aniaish?

<sup>15</sup> ¿Wajuk etsegkatnumki etsegkata tusa awemachbau aidaush? Apajuí chichame agagbaunum: “Tikima shiig pegkejai, yamajam chicham pegkeja nuna pachis etsejak taa duka”, tawai.

<sup>16</sup> Tujash aents yamajam chicham etsegbaun antukaja nuiyag ashí betekak dekaskeapi tuinatsui. Nuna pachis Isaias: “Apuh, ¿ya ii etsegbaunash dekaskeapi tuinawa?”, tiuwai.

<sup>17</sup> Nunin asamtai dekaskeapi tabauwa duka, chicham etsegbau antukbaunum nagkam-nawai, nunú chichama duka Cristo chichame pachisa etsegna nuuwai.

<sup>18</sup> Tujash wi iniastajime: ¿Nunash dekaskek chichamnash antukchaju asajag antukchau ainaji tuina? ¿Dekaskenum antukaju ainawai! Wagki Agagbaunum chichaak: “Chichamak ashí nugkanum etsegkamui”, tawai.

<sup>19</sup> Ataktushkam iniastajime: ¿Dekaskek Israel aidaush dekaachu aina? Duka nunin-chauwai. Dekatkauk Moisés Apajuí tama iina pachipas:

“Wi atumnak akasbau emattajime mina aentsjuchu aina nuna yayaakun, tuja atum aents imanchau diyajum nuna yayaakun kajemtikattajime”, tiuwai.

<sup>20</sup> Dutiksag Isaiaschakam wakejus chichaak:

“Aents mina egatú wajakchau aidau, waitkaju ainawai.

Tuja aents mina pachitus inimjutú wajakchau aidaunum, iwainmamkauwaitjai”, tiuwai.

<sup>21</sup> Junashkam Israel aidaun pachis:

“Ashí tsawantai dakasjai

mina aentsug intimkiu, ai aimtau aina nuna yaigtasan”, tiuwai.

## 11

*Israel aina nuiyan niini dekaskeapi tuidaun Apajuí etegkauwai*

<sup>1</sup> Yamai juna tajime: ¿Apajuish niina aentsji Israel aidaunash idaisau asag tawa? ¿Duka nunin-chauwai! Wagki witjai Israel weantunuk Abraham weantu asan Benjamín aajakua nunú weantunuk.

<sup>2</sup> Apajuik jutii Israel aidautinak yaunchuk, juka midau atinme tusa etegtamjau asa, ni aentsji aidautinak idaitamsachui. ¿Atumek eke dekatsjumek Apajuí chichame



agagbaunum, Elías profeta aajakua nu, Israel aents aidau pegkegchau dutikamu jin Apajuin ujaak:

<sup>3</sup> “Apuh, chichamjumin etsejin aidaunak ashí kajegkag, ame altarjumnash yumpuajag, wiki juwakmatai minashkam mantuatus aintuinawai”, tiuwa duka?

<sup>4</sup> Tama Apajuí ayaak: “Wi siete mil aents mina umigtin aidaun ayamjukan uwemtija-jai, apajimtai Baal tutaya nuna eme anentus tikishmatug emematchaju aidaun”, tiuwai.

<sup>5</sup> Yamaishkam nunisag ujumak Israel weantu aidau Apajuí wait anenjamag etegjamu aidauti juwakji.

<sup>6</sup> Nunú wait anenjá etegjamu aidautik, jutii pegkeg takasbaujinig etegjamu ainatsji, wagki aents pegkeg takasbaujin diigsá etegtaiyaitkuig, Apajuí wait anenkagtutaijig atsumainai.

<sup>7</sup> Nunin asamtaish ¿wajintu anentaimitumainaitji? Israel aidautik egakuitag nuig jeganchau ainaji; tujash ujumak Israel weantu aidauti Apajuí wait anenjamag etegjamu aidautik, uwemtak jukiu ainaji. Nuniajin tikich aidauk utujimag juwakajui.

<sup>8</sup> Apajuí chichame agagbaunum:

“Apajuí, Israel aidaunak

ditá wakaninia egamujinak

anentaimituja dekaachmin emakui,

dutikamu asag yamaikish nuninuk ainawai,

jiinish wainmachua nunin,

antuinakush antakchawua nunin atinme”, tawa nunisag.

<sup>9</sup> Aikasag Apu David aajakua nu agagbaunmashkam:

“Dita shiig aneastasa fiestamainamua duke ditanak,

iwagtukbau dawenum jigká emetmaina numamtuk awajkatnume.

Nuniachkush suwenum jigká maumaina numamtuk wajainak suwimkan jukitnume.

<sup>10</sup> Jiinish bushapaju asa

shiig wainmatsama numamtuk

wajaktinme,

tuntupenish

aents kijinun yanakí punus wekaemaina numamtuk

tuke waitin atinme”, tiuwai.

#### *Apajuí judiochu aidaunash uwemtikui*

<sup>11</sup> Yamai juna tajai, ¿Israel aidautin pachipas kaya tukumká iyautiama numamtuk wajakaje tawa nunash, nunisag juwaktin asamtaig tawa? ¿Makichkish nuninchauwai! Nunak Israel aidau chicham umiktinun umikchagmatai judiochu aidau uwemtan jukitnume tabaunum nunikajui, nuniagtai Israel aidau akasmatjitnume tawai.

<sup>12</sup> Nunú mina pataag aidau intimkimunum, Apajuí ashí aentsun pegkegnum yaitan nagkabauwai. Dutikau asa: ¿Dekaskenun mina pataag aidau ashí Apajuin umijiagtaik, aan nagkaemas pegkegnum yaigtinai!

<sup>13</sup> Nuadui atum judiochu aidautigmin tajime: Apajuí minak judiochu aidau chicham ujakta tusa etegka awetiuwai. Nunin asamtai wi takaag junak, eme anentsan diiyajai.

<sup>14</sup> Wi judiochu aidaunum aatus takaamun wainainak, mina pataag aidau sh Apajuí akasmatchajaintash nuninak wajumkesh uwemjatnume tusan wakegajai.

<sup>15</sup> Dutika judío aidau idaisamua dui ashí aents aidau Apajuí epegtuniawaju ainawai. Aikasag mina pataag aidaun Apajuí ataktú niina aentsji emaktina duik jakau ataktú nantamaina numamtuk awajkatnai.

<sup>16</sup> Pag najanatasa nagkamku nanegbauwa duka, Apajuinu atí tusa pegkeemtikamu asa, ashí nanegbauwa dushakam pegkejam ainawai; antsag ajak Apajuinu atí tusa pegkeemtikamu asa, kanaweshkam pegkeemtikamu ainawai.

<sup>17</sup> Tuja Judío aidau ajak olivo tutaya nunin aina nuna kanawe ujumak tsupigbauwa nuwi ikamia olivo kanawe jukí dekaskajaknum ikakmau asa, nuna kagkopenian shiig pegkejan juwa numamtuk Apajuí awajtamkaje atum judiochu ainajum nuna jutii judío ainag nujai.

<sup>18</sup> Dutikamu asajum judío aidau ajakan kanawega numamtin aina nu imanchau diyakum ememaigpa. Tuja atum eme anenmamkugmek, adeagtajum, kanawega duka niina pegkejinak kagkopenak inagkeatmaitsui, kagkapega nuuwai pegkegin kanawen inagkeata duka, numamtuk atumnash awajtamkajui.

<sup>19</sup> Atum anentaimsagmek: “Tujash Apajuí judío aidaunak ajaka kanawe tsupika ajaptayama numamtuk ditanak awakajama, jutiiin ajaknum ikamaina numamtuk awajtamkata tau asa”, tumainaitjume.

<sup>20</sup> Dekaske, ditak Cristo dekaskeapi tachamunmag dutikam asajui, tujash atumek ni dekaskeapi tabauwa duik uwentikamu ainagme. Dutikamu asajum emematsuk dekas ayatak puyattsá anentaimtumastajum.

<sup>21</sup> Wagki Apajuí judío aidau ajaka kanawega numamtin aina nuna tsagkujachua nunin asa, aminashkam tsagkugtamjashatui.

<sup>22</sup> Anentaimsajum diistajum, Apajuik shiig pegkejai nuigtushkam ni tibaujinash uwaechauwai. Iman asa judío aidau tupanjam ni tibaujinak imatiksag umiak idaisauwai. Nunin asamtai atumek ni wait anenjamu asajum nunisjumek pujumainaitjume, nu nunishtaik atumnash idaitamain asamtai.

<sup>23</sup> Tuja judío aidaushkam dita dekaskeapi tuchataijiya nuna idaiyagtaik, numí kanawe tsupika ajapamu júki duik aajakbaunmag ikamaina numamtuk awajkgatnai, Apajuik senchigtina ibau asa.

<sup>24</sup> Wagki atumek yaunchkek ikamia olivo aina numamtin aajakuitjume, nuninaitkujum kanawe tsupika júki dekas ajak olivonmash ikamainchau aig ikamaina numamtuk awajkamu ainajum nuniaish, ¡wagkag dekas judío aidau ajak olivoa numamtin aina nunash ataktú yaunchuk aajakbaujin ikamaina numamtuk awajkashti!

*Apajuí niina aentsji Israel aidaunak uwentijatnai*

<sup>25</sup> Yatsug aidauh, Apajuí dutikatnuji dekaachbau aajakua nu dekaatajum tusan wakegajai, wainkajum yacha iman anenmamkujum ememá yujajum tusan. Israel aina nuiya ujumak antumtikmainchaush juwakaje, duka nunisag batsamsag ashí judiochu aidau niini wayawagtina imanui jegangtatnai.

<sup>26</sup> Nu nunikmatai ashí Israel aidaunak Apajuí uwentijatnai agagbaunum tawa dutiksag, duka:

“Agkanmitkagtinuk Sión yaaktanum taa, Jacopa uchiji weantu aidau pegkegchaujina utsankatnai”.

<sup>27</sup> “Wi ditajai chichaman apaktinaitag duka, ditá tudaujin tsagkujatnaitag nu atinai”, tawai.

<sup>28</sup> Nunin asag judío aidauk yamajam chicham etsegbauwa nuna dakituidau asag Apajuí shiwaji ainawai. Nunak atum uwemjatnume tabaunum nuninawai, tujash Apajuik ditanak aneawai, ditá muunji aajakajua nuna mina aentsug atinme tusa etegkauwa dui.

<sup>29</sup> Apajuik anentag sukagtusbaujiya nunak atankagtuchui, antsag midau atinme tusa etejamujiya nunash yapajichui.

<sup>30</sup> Atum judiochu aidautigme yaunchkek Apajuí chichameg umigchau aajakuitjume, tujash yamaik judío aidau Apajuí chichamen umiujinachu asamtai, Apajuí atumin wait anenjamjaje.

<sup>31</sup> Nunisag yamai ditashkam Apajuinak umiujinatsui, nuniagtai Apajuí atumin wait anenjamjau asa dutiksag ditanash wait anenjata tau asa dutikauwai.

<sup>32</sup> Apajuik ashí aentsnak umigtukchatnume tusa idaisauwai, nunikagmatai ashí ijumag wait anenjata tau asa.

<sup>33</sup> ¡Anentai jegamatsui, Apajuí yachajiya duka, nuigtú anentaimtuja dutiktaiya dushakam! ¡Ni takaamujiya nuna anentaimtug ejetumainuk makichkish atsawai, tuja ni juní atí tawa nuna, wagkag tawa tusa ejetumainush shiig atsawai!

<sup>34</sup> Wagki: “¿Ya dekgamainaita Apajuí anentaibaujinash nuniachkush ya ju jutikata tusash jintinmainaita?”

<sup>35</sup> Tuja ¿ya yaunchkesh Apajuinash makichik wajiinash susauwaita minash aikasag sujústí tusash?”

<sup>36</sup> Ashí najankamu aina duka Ni najankamu ainawai, nunú aina duka ni chichamenig ainawai, nunin asa ashí niinuk ainawai. Iman asamtai: ¡Imá nigki tuke ememattai atí! Aatus atí.

## 12

*Yamajam pujut*

<sup>1</sup> Nuadui mina yatsug aidauwah, Apajuí wait anenjamjau asamtai, atumi iyashmia duka iwaku ofrenda pegkejam Apajuinash shiig awagmamaina nunú Apajuí susatajum tusan segajime. Nuuwai dekaskenum Apajuí emematkujum dutikmainaitjum duka.

<sup>2</sup> Atumek Apajuí nemagchau pujuina nujai betekak pujusaigpajum; nunitsuk dekas anentaimtajum yapajiatatum nunitai pujutjumish yapajinau atí, nuniakjum dekattagme Apajuí wakegamujiya nu, pegkeja dushakam, Apajuin shiig awagma nunú nuigtú imagnisa pujuta dushakam.

<sup>3</sup> Minak Apajuí wait anenjug chicham etsegkata tujutiwa dui ashí atumin tajime: Makichkitigmesh atum wagaakuk anentaimitumigpajum. Duka nunitsuk, dekas makí makichkitijum ebetmamjajum anentaimekau atajum, atumin Apajuí shiig yupichu dutikatnun dekaskeapi tau asagmin sujamsamua nunisjumek.

<sup>4</sup> Wagki, iina iyashig makichkitak kuashat akanjamu ajawai, tujash nuninaitak makichik takata nunakek takainatsui.

<sup>5</sup> Nunisaik jutiishkam, kuashat ainayatku, Cristo nemagbaunum makichik iyashia nunin weenaji, nunin asaja tikich aidaujaish pempeentunisaik atumdayaji.

<sup>6</sup> Nunin asamtai Apajuí makí makichik niimtin yupichuch takastinun anenjauch sujamsauwa dutiksaik dutikawagmi. Ni Apajuí tabaujin yupichu etsegtanum susamuk Apajuyai dekaskeapi tabaujish wajuk ajawa dutiksag dutikmainai,

<sup>7</sup> ni aentsun yain atí tusa Apajuí wakegat susamuk, dutiksag wakegas dutikati. Apajuí yupichu jintinkagtuati tusa susamushkam, dutiksag jintinkagtumainai;

<sup>8</sup> pegkegnum wakemitagtina duka dutiksag dutikati; aents atsubaun suwaushkam, shiig aneas dutikati; Cristo nemagnun apuji aidaushkam shiig puyatjus takastinme; aents waitiaun wait anentaushkam aneas dutikati.

*Cristo nemajin aidau umimainji*

<sup>9</sup> Tikich aidaujaish dekaskenum pempeentunijkum anenitajum, pegkegchauwa duka dakitakjum, pegkeja duke wakejusjum takau atajum.

<sup>10</sup> Cristo nemajin aidautigmek pempeentunisjumek aneenitajum, nuniakjum ajan-tunisa niiniakjum eme anendaitajum.

<sup>11</sup> Kakanmamsatajum, iina Apuji wakejusa takagsata tabaunum, dakik aigpajum.

<sup>12</sup> Shiig aneasjum pujustajum atum jukitin dakakjum pujau asajum. Waitiakjumes emamkesjum katsunjatajum. Apajuí ajujut idaisaigpajum.

<sup>13</sup> Jesucristo nemajin aidau atumainakuig yaigtajum. Aents amina ijagtamsatatus minaushkam, shiig anentsajum jukitajum.

<sup>14</sup> Waitkagmainakuish, pegkegnumag chichagtajum. Pegkegchauk chichagtsuk, pegkegnumag chichagtajum.

<sup>15</sup> Shiig aneas pujaujaig, atumshakam shiig aneasjum pujustajum, tuja buutuidaujaig, atumshakam buuttajum.

<sup>16</sup> Atú atumek shiig ijuntsajum pujustajum, emebau aigpajum, aents imanchauk aina nujai betek anenmamtajum. Tikichin nagkaesau yacha imanuk anenmamigpa.

<sup>17</sup> Pegkegchau awajtamainakuish makichkish pegkegchaunmag iikaigpajum, duka nunitsuk pegkeg aina duke takaakjum ashí tikich aidaush pegkeg iwaintukta tabaunum kakanmamsatajum.

<sup>18</sup> Atumek utugsanuk ashí aents aidaujaish shiig agkan pujusag tusajum kakanmam-satajum.

<sup>19</sup> Aneetaig yatsug aidauh, atumkek iikmakaigpa, Apajuí idaitusta ni suwimkanak susati, wagki Apajuí chichame agagbaunum: "Witjai aents tikichin pegkegchau awag-baun suwimkan suwaunuk, nunin asan aents pegkegchaunak wi suwimkan susattajai", Apu tiuwai.

<sup>20</sup> Nunin asamtai:

"Amina shiwajum yapajakuish

yutai ajamsata,

kitamakuishkam umutaish ajamsata.

Ame aajam dutikamin,

amina pegkegchau awajtamin asa datsagtatui", tiuwai.

<sup>21</sup> Pegkegchauwa nu depetkamu aigpajum, pegkegchauwa duka pegkeg takaakjum depetkatajum.

## 13

*Apu aidauum sumimkatajum*

<sup>1</sup> Ashí aents aidauk apu aina nuwi sumimain ainawai, wagki makichik apukesh nigki, wi apu atajai tusa apu weguk atsawai. Yamai apu aina duka Apajuí apu emamu ainawai.

<sup>2</sup> Nunin asamtai nunú apua nuwi sumimtan dakituidauk, Apajuí apu emamu aina nuna shiwagmainawai, nuna nunidauk ditak suwimkanak jumain ainawai.

<sup>3</sup> Wagki apu aina duka aents pegkejan takaaidau ishankati tusaik adaikachbau ainawai, untsu pegkegchau takaina nu ishainawai. Apu ishankats pujustasam wakegakmek pegkeja duke takastá, nunitai apu aidaush eme anenjammas diigmastinme.

<sup>4</sup> Ditak pegkeja nuna takastinme tusa Apajuí apusamu asag, atumnak pegkegnum yaimpamain ainawai. Untsu ame pegkegchau takaakmek dekas apuk ishainaitme.

Wagki apuk, wainak suwimkan sukagtusti tusaik adaikachbau ainawai. Apajuú pegkejan takastinne tusa apusamu asag pegkegchau takaina nuna suwimkan suwawai.

<sup>5</sup> Nuadui apu aidaujaig sumitkau amain ainag duka suwimkan sujusai tamawaikik nunimaituji, jutik duka pegkegchau anentaimesa diyam aig tabaunum nunimainai.

<sup>6</sup> Nuadui apunu kuichik atin tibauwa dushakam dutiksagmek akikmagme, wagki apu aidauk Apajuú takastinne tusa apusamu asag nuna umiinak takaidau asagmatai.

<sup>7</sup> Makí makichkitijum wajinna akikmamañ ajutjamainawa duka betek akikmaktajum. Apunu atin aidaush dutiksagmek akikmaktajum, nuniakjum ajantusjum diyakjum eme anentsajum diitajum.

*Pegkegchau takat idaikujum tikichjaish aneenitajum*

<sup>8</sup> Makichik aentskesh diwimkaigpajum, diwimkagtukmesh akikmatskek idaisaigpajum. Dekas pempeentunisaik aneenita nuuwai akikmamainchauwa duka, wagki tikich aidaush iik anemamsa aneamua dui chicham umiktajum tibauwa duka uminu asantai.

<sup>9</sup> Apajuú chicham umiktajum tiuwa duka: "Tsanijnawaigpa, magkagtuawaigpa, kasamkaigpa, dekaskechuk tikichik tsanumjujaigpa, tikichdauk anentaimtusa wakejukaigpa", tawai. Nuigtú tikich aidau umimain awa duka: "Tikich aidaush amek anenmamsam aneeta", tawa nunú imatiksaik umiamunum, chicham umiktinum tawa duka ashí uminui.

<sup>10</sup> Aents aneenit ajamuk, tikichnak pegkegchaunak takagmait sui. Nuniau asamtai chicham umiktajum tibau umiamua duka, aneenita nuuwai.

<sup>11</sup> Nunin asamtai jujú tawa duka umiktajum. Wagki atumek dekagme Cristo jui taatnuji tsawantak namput wajaschae, jutii dekaskeapi tusa Cristo nemagkau aayag duik imá dukap aayi. Tujash yamaik tsawantak tikima shiig jegawai, Apajuú uwentijamatna duka. Nuniau asamtai atumshakam kajinkagmek batsamigpajum aneaku batsamsatajum.

<sup>12</sup> Pegkegchau takata duka shiig senchi juikne, nuniau Cristo jui ataktú minitai, kiyag au tsawautai tsaaptin wegama numamtuk wajaktata dusha tikiju wajasé. Nuadui pegkegchau takaakjum suwenum wekaemaina numamtuk wajainajum duka idaisatajum, sungat maaniatin asa uminas aama numamtuk pegkeg takaakjum umintsajum pujustajum.

<sup>13</sup> Nuadui yamai nagkamsaik tsawai wekaemaina numamtuk shiig kuitamamka pujusagmi. Ijunag yuwinajum wekaetusjum ayatak yuwa yuwakua weakjum nampet batsamtajum duka idaisatajum, iyashnum takanit tunamatja pujugtash, jiyaniñ yujagku tikichdau diisá iish imanuk atajai tukamá kajekgagtash.

<sup>14</sup> Duka nunitsuk, Apu Jesucristo nemagkaju aidaush wajuk pujumaina ainawa nunisaik pujuinaku, iina iyashí pegkegchau takamtikta dushakam idaisagmi.

## 14

*Yatsut chicham patatmainchau*

<sup>1</sup> Cristo nemagna nu dekaskeapi tayatak shiig dekainachu wainkugmesh shiig anentsajum jukitajum, tujash dita anentaimeñainai nunú pachisjum jiyaniñtsuk.

<sup>2</sup> Wagki, awai aents, ashí yutai aina duka yumainai tuidaush, nuniai tikich Cristui dekaskeapi tayatak shiig dekachu asa ajak dita ajakmamun yuu ainawai.

<sup>3</sup> Nuniau asamtai ashí yutai aidaun tinamag yuwina duka, tikich nuna yuwinachunash dakitmañtsui. Nunisag ashí tinamag yuwinatsu dushakam chichamnak patatmañtsui tinamag yuwina nunak, wagki Apajuú nunú aidaunak ashí niina aentsji emaku asamtai.

<sup>4</sup> Nunina nuwish, ¿amesh ya asamea tikichi inakega dusha chichamash patatash wekaeme? Apajuiyai ni inau asa shiig takataish, shiig takashtaish tumaina duka, wagki iina Apujig senchigtina ibau asa niinig ebetmamjau atinme tusa yaigtatui.

<sup>5</sup> Nuniai, awai aents makichik tsawantan puyatjus diyau, tikichia nu, tsawantak ashí betekajama tuidaush ainawai. Makí makichik aents aidauk dita tsawantan wajuk anentaimeñainawa nunak dita anentaimeñtsubaujiya nunisag ebetmamjati.

<sup>6</sup> Aents makichik tsawantan dekas wagaakua iman anentaimeñtsuñ dutika duka, dekas Apajuin eme anentus dutikawai. Nunisag ashí tinamag yuwina dushakam Apajuin eme anentus dutikainawai, wagki Apajuin see tusa yuwidau asag. Ashí tinamag yuwinatsu dushakam, Apu Apajuú eme anentamunum yuwinatsui, wagki ditashkam Apajuin see tuidau asag.

<sup>7</sup> Wagki jutik iik shiig awagmamkatasaiñ pujatsji, jaakuishkam shiig awagmamkatasaiñ jainatsji.

<sup>8</sup> Nuadui iwaaku pujakuik Apu Cristo shiig awajkata tabaunum pujuinaji, jaakuishkam Apu Cristo shiig awagmainaji. Nunin asaja iwaaku pujakuish, jaakuishkam imá Apu Cristunuk ainaji.

<sup>9</sup> Wagki Cristo maamuitak ataktú nantakiuwa nunak aents iwaaku aina nuna nuigtú jakau aidounashkam Apuji wajastatus nunukui.

<sup>10</sup> Nunin asamtaish, ¿wagka yatsumish chichamash patatme? ¿Wagka wainkaya nuninush niiniagme? Ashí jutií aidautik Apajuí eemtin tuwaká ajin ní tujamtinai.

<sup>11</sup> Wagki agagbaunum:

“ ‘Witjai dekas tuke pujuunuk’ tawai Apu.

Nuadui ashí aents aidauk, tikishmatj jag emematjuinak:

‘Ametme dekas Apajuimek’, tujutiagtinai”, tawai.

<sup>12</sup> Ashí jutií aidautik makí makichkiti ii wajuk takasuitji duka dutiksaik Apajuí ujaktinaitji.

*Tikich Cristo nemajuidau pegkegchau awajkaig tusa kuitamamain*

*(1 Co. 8.1-13)*

<sup>13</sup> Nuadui Cristo nemajin aidautik pempeentunisaik chichamak patatdaikachagmi. Dekas ayatak kuitamamkatajum, ame pegkegchau diyachu asam takatai, tikich yatsum waipak niishkam dutiksag takakmá tunamamaina nunú.

<sup>14</sup> Wika Apu Jesusan nemajin asan, makichkish yutai aina duka pegkegchauwap ainawa tatsujai. Untsu makichik aents ashí tinamjá yuwamuk pegkegchauwai takug, nigki tawai, nuniau asa tinamjá yuwamuk niinig pegkegchauwai.

<sup>15</sup> Yamai juna tajime, ame yuwam nuna waipak yatsum anentaimak waitmainai, nu aaja waitkamek, duka anejatkum nuniatsme. Ame yuwam nuna pegkegchauwapi tayatak yukamá tunamag megkaemainai Cristo niinish mantamdauga nunin aig.

<sup>16</sup> Nu atum yuwakjumes pegkeg dutikajum duka, yatsum Apajuí tupanmain wainkugmek idaisatajum tikich aidau pegkegchau chichagtamkainum.

<sup>17</sup> Apajuik jutiinak ii yuwamun, ii umamun diisag inapatsui. Nigka Wakani Pegkeji jutiini puja nu yaimpasmatai pegkeg takaaku, shiig agkan pujaku, dakujuusa pujutnum inajatu.

<sup>18</sup> Juna ashí imatiksag Cristo wakejamun umiidauk, Apajuin shiig awagmainawai. Nunidau asagmatai, tikich aents aidauk pegkeg ainawai tumain ainawai.

<sup>19</sup> Nuniau asamtai ashí tikich aidaujaish shiig agkan pujuta nu egakagmi, nuninaku pempeentunisaik Apajuinu dekatnum yainikagmi.

<sup>20</sup> Apajuí aentsnum pegkejan dutikauwa nunú, yutanum utugchat apujmaunum wainkaya nunin juwakai tudau asaja. Dekaskenmag ashí yutai aina duka pegkeg ainawai, untsu pegkegchauwa duka dita tunamamainji yuwaku Jesucristui dekaskeapi tabauji emegkatmaina nuuwai.

<sup>21</sup> Nuadui dekas nejek yumaitsume, umutaish nampemain aina duka umumaitsume, makichkish amina yatsum pegkegchau wemainuk, anentaimak waitmainkesh nuigtú kakaakchaunum jegamainkesh dutikawaipa.

<sup>22</sup> Ame dekaskeapi tabaunum dutikam nunak Apajuish dekagtamui. Nunin asamtai shiig aneasagtinai aents ní takaamujin bakumamainush atsugbau aina duka.

<sup>23</sup> Tujash utujimaitak yuwa duka, nigki suwimak jumainnak egatmamui, wagki juka tudauk ekagtumaitsuapi tusa dekaskeapi tabauwai anentaimas yuwachu asa. Ashí ii dekaskeapi tachayatku dutikamua duka, tudauwai.

## 15

*Tikich Cristo nemajuidaush pegkeg diyamu aina duke dutikatajum*

<sup>1</sup> Nuadui jutií Apajuiyai dekaskeapi tabaunum ichichmamjau aidautik, tikich aidau Apajuí dekaskeapi tabaunum ichichmamjachu aina nu yaimainaitji, ii shiig aneasta tabauwa duke egatmamtsuk.

<sup>2</sup> Nuniaku tikich Cristo nemagkau aidauk shiig awajkatas wakemainaitji, pegkegnum yaigkam, ditash Cristui dekaskeapi tabaunum ichichmamjatnume tusa.

<sup>3</sup> Wagki, Cristukesh imá nigki shiig awagmamkatasag wakekachui, duka niini uminkauwai Apajuí chichame agagbaunum: “Apajuiyah, aents amina pegkegchaun chichagtamaina nunak, mina tujutuinaawai”, tawa nu.

<sup>4</sup> Wagki yaunchuk Apajuí chichame agagbauwa nuwi agakbauwa duka, jutiin jintinjamatin asamtai agakbauwai. Nunú chichama nujai ichichmamku, ebetmamsa pujamunum Apajuí dakamuk ajutkagtawai.

<sup>5</sup> Apajuí ebetmamja pujutan sukagtak ichichkagtina nu atumnash yaimpaktinme shiig anendaisa batsamtanum, Cristo Jesús jintinjamawajua nunisjumek pujusminjum.

<sup>6</sup> Nuniakjum ashí betek ijuntsajum, Apajuí, iina Apuji Jesucristo Apajiya nunú ememattajum.

*Judiochu aidau yamajam chicham ujakbau*

<sup>7</sup> Nuniakjum pempeentunisjumek shiig anendaisajum judaitajum, Cristo atumin Apajuin ememattinme tujamu asa, shiig aneas jujamkiajua nunisjumek.

<sup>8</sup> Juna tajime: Cristo Jesusak judío aidautin yaimpaktatus tauwai, Apajuí iina muunji aidaun anagkauwa nuna umiktatus. Ni nuniak iwainakuí Apajuik dekas ni anagkagtuamujinak betek umina nuna.

<sup>9</sup> Nuigtushkam Cristuk tauwai, judiochu aidaush Apajuí wait anenjamu asag, ditash Apajuin ememattinme tusa; agagbaunum:

“Nuadui Apajuíyah, wika judiochu aidaui ijuntsan amina emematkun, daagmin pachisan kantamjuatjame”, tibauwa dui.

<sup>10</sup> Tikich agagbaunum tawai:

“Judiochu aidautigmesh, judío Apajuí etegjamu asag Apajuí uchijí aina nujai dakujustajum”.

<sup>11</sup> Nuigtú tikich agagbaunmashkam:

“Ashí aents judiochu aidautigmeshkam Apu Cristo emematkujum, ni imanjiya duke pachisjum chichastajum”, tawai.

<sup>12</sup> Tuja Isaías agakshakam:

“Isaí weantunmaya atinai, ashí aents judiochu aidaunmash inamjatnuk, nunitai ashí aents aidauk imá niinak dakagtinai”, tiuwai.

<sup>13</sup> Apajuí niini mijamtsuk dakatan sukagtina nu, atum dekaskeapi tautigminak shiig dakunkut pujutan amaak, shiig agkan pujutnashkam amastinme. Dutijamainak Wakani Pegkeji senchijiya nujai shiig senchi wakesa Apajuí dakamainnumash sujamsatneme.

<sup>14</sup> Mina yatsug aidaush, atumek pegkeg wajakin ainajum dui tikich jintinmainush dekau asajum, pempeentunisjumek chichagdaimain ainajum nunak shiig dekajai.

<sup>15</sup> Nuniayatkun ju papiin agatjime, dekaskenum atum dekamtikata tabau ajuta nuna, tuke aneakuk atinme tau asan. Apajuí minak wait anenjuju asa,

<sup>16</sup> judiochu aidaush Cristo Jesús pachisan uwemjatneme tusa awetiuwai. Tibau asan, yamajam chicham Apajuinua nuna judiochu aidaunash ujaajai. Wakani Pegkeji pegkeemtikajam tudaugtuchu wajas pujuinakui Apajuí emtinish ofrenda shiig pegkeja imanun ditanash iwainakta tau asan.

<sup>17</sup> Nuadui wi Apajuí takaju asan eme anenmamainuk ajutui, Cristo Jesusan pachisan chichagkagtag dui.

<sup>18</sup> Wika tikichdaunakesh pachisan chichatsuk, Cristo, judiochu aidaush Apajuin umigkatneme tujutiwa nunak chichagkagtakun takasmajai.

<sup>19</sup> Wakani Pegkeji senchijin aents dutikmainchaunash iwainajan takaakun, Jerusalén nagkamsan ashí yantamnumash yamajam chichama junak etse etsegkawan Iliria nugkanmash Cristo pachisnuk etsejajai.

<sup>20</sup> Aajan wika wekaesan yamajam chichama nuna etsegkun takasjai, tuwí Cristo pachis etsegkachaje nuwí, wagki tikich etsegkamunum wisha nuig pataká chichagkagutnak dakitau asan.

<sup>21</sup> Ju chicham agagbau:

“Yaunchkesh ni pachisa etsegbaunash antujakchau aina nu wainkagtin ainawai, ni pachisa etsegbaunash antukchaju aina nu dekaawagtin ainawai”, tawai.

<sup>22</sup> Nuna etsegkun pujau asan, atumin wainkatasan minitá takunush minimain dekapjachmajai.

<sup>23</sup> Tujash yamaik jui takamainuk atsugtau asantai, kuashat mijadai atumiin minitasan wawéga pujau asan,

<sup>24</sup> España weakun atumin wainkatasan minitag tajai. Nunikan atumin wainkan shiig aneasan ujumak tsawanchikesh pujusan nagkaemakuí, atum yainkatajum wi wemaina duka.

<sup>25</sup> Tujash yamaikik Jerusalén wegajai, yatsut waituidau yaigtin awa juna ejetuatasan.

<sup>26</sup> Junak yatsut macedonianmaya, Acayanmaya aidaui, Jerusalegunmia Jesucristun nemajuidau waituina nu yaigmí tusag wakesag anenjauch ijumjaje.

<sup>27</sup> Juna wakegas pegkejan jutikawaja junak, judío aidau Jesusa nemajuina nu, ditak judiochu ainaig wakannum uwemtan pachisag ujakagbau asag, ditashkam judío aidau atsumiagtai yainak aikainawai.

<sup>28</sup> Ashí ju dutikmain ajuta nuna ashimkan nuigtú atum ijumjaujum nuna jukin Jerusalén jegaan ditá susan ukuakun, España weakun minittajai nuniakun atum-nashkam ijagsattajime.

<sup>29</sup> Wika shiig dekajai, wi anui atumiin taattag duik Jesucristo pegkegnun yumigtam-sagtata nunak.

<sup>30</sup> Yatsug aidauh, iina Apuji Jesucristo daajin, Wakani Pegkeji aneenitan sujama nujai segajime, wi maaniamu ajuta nuig atumshakam ijutkau atajum, nuniakjum mina pachittsajum Apajui aultugsatajum tusan.

<sup>31</sup> Apajui segatajum dekaskeapi tuinachu Judea batsata nuwi agkanmitkajuati, tuja anentag ijumjamun yatsut Jerusalén batsataidau yaigtinun ejetuattag nunashkam shiig anentus jukitnume tabaunum.

<sup>32</sup> Wisha Apajui wakegakuig, shiig aneasan atumiin taan ayamjatjai.

<sup>33</sup> Apajui shiig agkan pujutan sukagtina nu ashí atumjaish atí. Aatus atí.

## 16

### *Kumpamkagtamu*

<sup>1</sup> Iina umayí Febe, diaconisa Cencreanum iglesia atsumiagtai nuanui, niishkam dita atsumiagtai yaimna nuna awemag nunú,

<sup>2</sup> Apu Jesucristo nemajin asantai, shiig anentsajum jukitajum. Jesucristui dekaskeapi tinu aidau wajuk judaimainaita dutiksagmek, ashí ni atumakuish yaigtajum. Nigka tikich aidaunash kuashat yaigkui, nigki minash yainkauwai.

<sup>3</sup> Priscila, Aquilajai kumpamjutuatajum, wi Cristo Jesusan pachisa etsegtaku wekagai yainkau aina nu.

<sup>4</sup> Ditak, mina ayamjutuina pujutjin ishamainnun jegantaju aina dui see tajai, imá wikik see tatsujai, iglesia judiochu aina dushakam see tuinawai.

<sup>5</sup> Tuja niina jeen iglesia ijunaina dushakam kumpamjutuatajum, aiksagmek Epeneto mina aneetaijua dushakam, niyai asianmaya nagkamchak Cristun nemagkauwa duka.

<sup>6</sup> María atumin senchi yaimpakua dushakam kumpamjutuatajum,

<sup>7</sup> aikasmek Andrónico, Juniasjai kumpamjutuatajum, ditak mina pataag ainawai, nuigtush wijai betek achinkajui. Ditanak apóstol aina dushakam aneas diin ainawai. Wika eke Cristun nemagsuk pujai, ditá Cristunak nemagkaju ainawai.

<sup>8</sup> Dutiksamek Amplias, mina aneetaig iina Apuji Jesucristun nemaja dushakam kumpamjutuatajum.

<sup>9</sup> Kumpamjutuatajum Urbano, wi Cristo Jesusan pachisan etsejai kuashat yainkauwa nu, tuja mina aneetaig Estaquischakam.

<sup>10</sup> Aikasmek Apeles, Cristo takagusti tusa etegkamua nu, tuja Aristóbulo jeenia aidaush kumpamjutuatajum.

<sup>11</sup> Mina pataag Herodiogshakam kumpamjutuatajum, Narciso jeenia Apu Jesucristun nemajuina dushakam.

<sup>12</sup> Aikasmek Trifena, Trifosajai Jesucristo takatjin takainak batsata nu, tuja iina aneetai ubag Pérsida Apu Jesusdaun shiig senchi takasua dushakam kumpamjutuatajum.

<sup>13</sup> Nuigtú Rufo, Apu Jesús etegkamua nu, tuja niina dukují minashkam dukujua imana dushakam kumpamjutuatajum.

<sup>14</sup> Aiksamek Asíncrito, Flegonte, Hermes, Patrobas, Hermas, nuigtushkam ashí yatsug ditajai ijutkau batsataina dushakam kumpamjutuatajum.

<sup>15</sup> Dutiksamek Filólogo, Julia, Nereo, niina umayijai, Olimpaschakam, tuja ashí aents Jesucristo nemajin aidau niyai ijunag batsataina dushakam kumpamjutuatajum.

<sup>16</sup> Atumek pempeentunikjum shiig anendaisajum pegkeg anentaiyai kumpamdaiyatajum. Ashí Cristo iglesiasjai aidau kumpamjamainawai.

<sup>17</sup> Yatsug aidauh, segajime diyaku atajum, atum Jesucristo chichame jintinkagtamun antukuitjum nuna yapajawag jintinjamainakui kanakajum, nunin aidaujaig atumek ijunjaigpa.

<sup>18</sup> Nunú aents aidauk ii Apuji Cristunak takajainatsui, dita wakejuinamun egainak tu-idau asag, chicham pegkegchi aujuinak, shiig tsanuinawai imanis anentaimainachunak.

<sup>19</sup> Ashí dekagtamainawai atum Jesucristo umigjum nunak, nuadui shiig aneajai. Nuniau asan utusajag pegkegchaunak takatsuk, aan nagkaemas pegkejan takainak pegkegnunak iwainmamkatnume tusan wakegajai.

<sup>20</sup> Apajui shiig agkan pujutan sukagtina nu wamak iwanchin depetugmaktatui, nunisag iina Apuji Jesucristua dushakam wait anenjabaujin iwaintugmaktatui.

<sup>21</sup> Timoteo, mina takatnum yainta nunú atumnash kumpamjamainawai. Tuja mina pataag Lucio, Jasón, Sosipater aina dushakam aikasag kumpamjamainawai.

<sup>22</sup> Wika Terciowaitjai, wi agajai jujú papiinak, nuniau asan wishakam Apu Jesucristo daajin kumpamjime.

<sup>23</sup> Gayo wi niina jeen pujag dushakam kumpamjamainawai, ashí iglesia atsumiagtaish yaina nu. Erasto ju yaaktanum kuichkin kuitamna dushakam, iina yachi Cuartojai kumpamjamainawai.

<sup>24</sup> Iina Apuji Jesucristo wait anenkagtutaijiya dushakam ashí atuminish atí. Aatus atí.

*Inagnaku Apajuí emematbau*

<sup>25</sup> Apajuí emematiagmi, wi yamajam chichaman etsejag nuanuish, Jesucristo pachisan jintinkagtag nuig atumnash ebetmamjatnume tusa yaimpa nunú. Juka Apajuí tuke puju nugkash najannatsaig dutikatjai tusa anentaimtusbau dekaashbau aajakun iwainaka nuuwai.

<sup>26</sup> Tujash yamaik iwaintugmakji Apajuí etsegtin aajakajua nunú agajajua nunak, nuigtush Apajuí tuke pujuuwa nuna ashí aents aidauk imá Jesucristunak dekaskeapi tuinak umigkatnume tibauwa nunashkam.

<sup>27</sup> ¡Apajuí imá nigki yacha, ashí wajiin dekauwa nu tuke emematiagmi Jesucristo daaji pachisa!

Aatus atí.



## Pablo nagkamchaku carta agaja corintonmaya aidau awetimu

### *Kumpamkagtamu*

<sup>1</sup> Witjai Pabloitjai, Jesucristo apostoljiyaitjai Apajuí wakegau asamtai, yatsug Sostenes-jai pujusan,

<sup>2</sup> atum iglesia Apajuinu aidautijum yaakat Corinto batsatutijum Cristo Jesús pegkeemtiki mina aentsug pegkejam atinme tusa, ashí tikich nugkanmaya aidau Jesucristo daajin adaiyina nujai etegtamjau asa ditá Apuji iina Apujiya nunú,

<sup>3</sup> Apajuí iina Apajiya nunú, Apu Jesucristujai wait anenjamag, shiig agkan pujutan atumnash amastinme.

### *Pablo Apajuí see tabau*

<sup>4</sup> Tuke Apajuí see tusanké ajai atumin pachisan, atum Cristo Jesús nemajuidau asagmin, Apajuí wait anenjamajau asamtai.

<sup>5</sup> Wagki atumnak Apajuí Cristo Jesusai ashí pegkeg wakannumia aina nunak amasajui: Chichatan nuigtú dekatnashkam,

<sup>6</sup> nemisag wi Cristo pachisan etsegkauwaitag dushakam atuminig imanisag juwat-jamkajui.

<sup>7</sup> Nunin asamtai Apajuí don sujamsamua duka ajutjamainawai, iina Apuji Jesucristo wantinkatnuji dakakjum batsatjum dui.

<sup>8</sup> Apajuí nigki kuitamjamkattagme, ii Apuji Jesucristo minitta duwish bakumamain-chau agtinme tujamu asa.

<sup>9</sup> Apajuik ni anagkagtuamujinak imatiksag uminai, nigki etegtamjauwai niina Uchiji Jesucristo iina Apujiya nujai ijutkau pujustinme tusa.

### *Jesucristo nemajin tupandaiyina*

<sup>10</sup> Yatsug aidauh, iina Apuji Jesucristo daajin segajime, ashí atum aidautigmek tuké betek atuesajum takastajum, nuniamunum atsuti kanainamu, shiig anendaisajum pujustajum, nuniau asajum dutikatasa anentaimtamugmik nuní nuninuk anentaimtamu atinme.

<sup>11</sup> Mina yatsug aidauh, junak tajime, atum pampandayá batsatjum nuna, Cloé patayí dekamtijuau asamtai.

<sup>12</sup> Juna titag tajime, atum ainajum anuiya: “Wika Pablon nemagnaitjai”, tai; tikich: “Wika Apolon nemagnaitjai”, tawai. Nuniai: “Wika Cefasan nemagnaitjai” tai, tikich: “Wika Cristo nemagnaitjai”, tau awai.

<sup>13</sup> ¿Cristush akanjamukaih? ¿Pablok atumiin achinjuwait? ¿Nuniachkugmesh Pablo daajinig yamigbau ainajum?

<sup>14</sup> Wika atumnak yamigchawaitjim dui Apajuin see tajai, imá Crispinak, Gayojaig yamigbajjai,

<sup>15</sup> makichkish mina daajui yamigbau ainaji tujutijum tau asan.

<sup>16</sup> Estefanasa patayinash yamigbajjai, nuigtuk dekatsjai tikichnash yamijuashitag nunak.

<sup>17</sup> Minak Cristuk yamijatjata tusag awetichui, yamajam chicham etsegkata tusa awetiuwai; aents niina yachajin chichamaina nuniknuk etsegkashbajjai, Cristo cruznum achigbauwa nuna wainkaya nunin diisainum tau asan.

### *Apajuí yachajiya duka aentsú yachajiyaig betekchawai*

<sup>18</sup> Cristo cruznum jakauwa nu pachisa etsegbauwa nunak wainak diinawai, megkaetanum batsata duka; tujash jutii uwemjau aidautinmag, ju chicham etsegbauwa juka Apajuí senchijiyai.

<sup>19</sup> Chicham agagbaushkam:

“Wi yacha aidaunak yachachu emaktatjai, dutikakun dekatajinash emegkatjattajai”, tawai.

<sup>20</sup> ¡Apajuí ju nugkanmaya unuimat aidaunak wainak emake! dutikamu asa yacha aidau, chicham umiktinnash jintikagtin nuigtú tikichjai chicham ataish imaakas chichau aina dushakam wainak juwakaje

<sup>21</sup> Wagki Apajuí ni yachajin iwainakua nunak aentsuk ditá yachajiya nujaig dekamain-chau wajasajui, tujash Apajuik wakeekauwai, chicham etsegbaun imanchau diinaigkesh dekaskeapi tuina nuna uwentikatatus.

<sup>22</sup> Judío aidauk wainchatai iwainamun wainkatatus wakegainawai, nuniai griego aidauk aentsú yachajin antuktatus wakegainawai.

<sup>23</sup> Tujash jutiik Cristo numinum achinjauwa nu pachisa etsejuinaji, nunak judío aidauk dakitus diinai, judiochu aina duka wainkaya nunin diinawai.

<sup>24</sup> Tujash Apajú untsukbau aina n dauk, judío akush, griego akushkam, Cristuk Apajú senchijiyai nuigtú Apajú yachajiyai.

<sup>25</sup> Apajuinu imanchau diyamua nuuwai aentsú yachajiya nuna nagkaesauwa nu, Apajuinu kakaakchau diyamua nuuwai aentsú senchijiyai nuna nagkaesau senchigtina duka.

<sup>26</sup> Yatsug aidauh, atumek, aents diismak yacha wajakin, apu chichame antugtai aina iman, eme anentsá diitai ainatsjum duka dekaamagme.

<sup>27</sup> Nunin ainagminig Apajuik, aents yacha aidaun inatsakta tau asa, aents wainkauchia nuna etegkauwai. Dutiksag aents chichame antugtai aidaun inatsaktatus, aents imanchauch aina nuna etegkauwai.

<sup>28</sup> Apajuik aents imanchauch diyaku jujú nugka juig dakitjamu aina nuna etegjauwai, aents eme anentai aina duka wainak juwaktinme tau asa.

<sup>29</sup> Nunak Apajuik, niina eemtinis ditak eme anenmaminum tau asa dutikauwai.

<sup>30</sup> Tujash Apajuyia duke atumnak Cristo Jesusai ijupajajui, dutijama Cristunak iina yachají, iina pegkek etamin, iina pegkeemtijamin nuigtú iina agkanmitkagbau emauwai.

<sup>31</sup> Nunin asantai chicham agagbauwa nuwish: “Makichik aentskesh eme anenmam-jatatus wakegauk, Apu Jesusai eme anenmamjati”, tibau awai.

## 2

### *Cristo achigbauwa nu pachisa etsegbau*

<sup>1</sup> Yatsug aidauh, wi atumin Apajuinun pachisan ujaktasan tauwaitag nunak, aents yacha shiig jintiag chichaman chichaaku aina imanun iwainmamkatasanuk taachbaijai.

<sup>2</sup> Wika atumjai pujubiag duik atumdaun dekatanuk wakekachbaijai, imá Jesucristo numinum achigbauwa nunak pachisan ujakbaijime.

<sup>3</sup> Wi atumin wantintukbaijim duik, imanchauch dekapmamkun senchi sapigmakun kujalbaijai.

<sup>4</sup> Mina chichamjuk, wi chicham etsegbaushkam, aents yachameagbaujijai tikichin wakeemitkaktatus chichau aina nunitsuk, Wakaní Pegkeji dekamtijamunum chichagk-agtakun, senchijinash iwainakbaijai.

<sup>5</sup> atum dekaskeapi tabaugmia duka aentsú yachajiya nuwi najaneau ahati, Apajú senchijiyai nui najaneau atí tau asan.

### *Yaunchuk dekaachbau aajakua nunak Wakaní Pegkeji dekamtijamauwai*

<sup>6</sup> Nuniyatku dekaskeapi tabaujin katsugkú aina duka, dekata nujai jintiaja ujaaji. Tujash nu unuimatak ju nugka jui unuimaina nuiya unuimagchamui, nuigtú ju nugka jui senchigtin inamaina nudaukesh atsui, duka wamak megkaejatin ainawai.

<sup>7</sup> Jutiik Apajú yachají yaunchuk dekaachbau uukbau aajakua nu chichaji, nunak Apajú nugkanash najantsuk niina imanjin ii shiig aneainstijn dutikauwai.

<sup>8</sup> Nunak ju nugka jui inamin aina dukesh makichkish dekachaju ainawai, wagki nuna dekau ainakug iina Apuji dekas imana nunak achijag maachaju amain ainawai.

<sup>9</sup> Tuja agagbaunmash:

“Apajú umigkauwai niina aneen aidaunak, waji makichkish wainkachbaun, antutkesh antukchamun, anentaimitutkesh anentaimitugchamun”, tawai.

<sup>10</sup> Tujash Apajú jutiinak Wakaní Pegkejiya nujai dekamtijamauwai. Wakanía nuuwai ashí shiig mamikis dekauk, Apajuinu makichkish dekamainchauwa nunashkam.

<sup>11</sup> ¿Tujash aents aidautih wajupatiya tikich anentaibaus dekamainaiti? Nunak aentsú wakaní niini puja duke imá shiig dekawai. Nunisag Wakaní Pegkejiya duke dekawai Apajú anentaibaujiya nunak.

<sup>12</sup> Jutiik ju nugka juiya wakanik jukichu ainaji, Wakaní Pegkeji Apajuinumiya nunú jukiu ainaji, Apajú wait anenjamag ashí amasbau aina nuna dekaati tujamu asantai.

<sup>13</sup> nunú pachisa chichainag duka, aents jintinjamamu unuimagbauk chichainatsji, Wakaní Pegkeji jintinjamamu chichainaji. Nunidau asaja wakannunia pachisa jintink-agtakui, Wakaní Pegkeji tawa dutiksaik jintinkagtaji.

<sup>14</sup> Tujash aents wakanin akiinachu aina duka, Apajú Wakanía nuiya pachisa chichamunak wainkaya nunin diidau asag antumainchau dekapenawai, Wakaní Pegkeji atsugbau asag.

<sup>15</sup> Wakaní Pegkeji ajamua duke ashí jintinkagtamunak dekaskeapi tusag dekamainai; tujash nunú aentsnak makichkish nuninchauwai tumain ainatsui.

<sup>16</sup> Chicham agagbaunum: “¿Yaa Apu Apajuí anentaibaujinash dekaagmainaita? ¡Makichkish Apajuí jintinmainuk atsawai!” tawai. Tujash jutiitaiji Cristo anentaimitaiya nu anentaimekau aidautik.

### 3

#### *Jutiik Apajuí takajin ainaji*

<sup>1</sup> Yatsug aidauh, wika aents wakanin katsugkú aidau chichagmaina imatikanuk chichagkachbaijime, ayatak aents wakanin katsugachau aidau chichagmaina dutiksanuk chichagkabajime, Cristo nemagtanmag uchuchia nunin asagmin.

<sup>2</sup> Ayatak jintintuabaijime shiig yupichuchin, uchi kuwijuch katsugman yumainchau asamtai muntsu amutiama numamtuk. Wagki atumek yutai katsugmak yumainchauwa nunin asagmin, yamaikishkam nuninuk ainagme,

<sup>3</sup> nuniaú asajum tikichi pujutji diigsajum kajejagme, nuniakjum maanitash maaniakjum, tupandaikajum batsatjume. Ju aaja nuniakjum aents Apajuí nemagchau aina nujai betek pujutjum yapajitsuk batsatjume.

<sup>4</sup> Atum: “Wika Pablon nemagnaitjai” tajumin, tikich chichau: “Wika Apolon nemagnaitjai” tuinajum duka, ayatak aentsú anentaimitaiji anentaimekujum tu yujagme.

<sup>5</sup> ¿Pablosch wajimpaita, Apolosch wajimpaita? Jutiik ayatak Apajuí takajin ainaji, nunin asá jutií chicham etsegbau antukjum, dekaskeapi tiu ainagme; duka Apu Jesús makí makichik dutikata tujabauwa dutiksaik takasaju ainaji.

<sup>6</sup> Wi atumi anentaimein Apajuí chichamen ajakmamiyajai, dutikamun Apolo ajak yumi ukattayama numamtuk awajtamkajui Apajuí chichamega nuna ujakpak, tujash Apajuiya nuuwai ashí niinua nuna dekamtijamawajua duka.

<sup>7</sup> Nunin asamtai ajakan ajau, yumi ajakan ukatjau aina duka wainkayai, Apajuiyai dekas ashí ajakmakbaun tsakapa duka.

<sup>8</sup> Wika Apolojag mai betekaitjai, nunin asajin Apajuí iina takatjin diigtamas makí makichik akigmaktinai.

<sup>9</sup> Apajuí takatjiya nunú takagtanmag Apolok mina atuetaijui; untsu atumek Apajuí ajakji, Apajuí jee ainagme.

<sup>10</sup> Apajuí wait anenjug, Cristo chichame etsegtukta tujutiuiwa duwi, wika jega jegamtan yacha nagkamak shugkú ajiyama numamtuk, wi Cristo pachisan nagkamsan atumnak jintintuauwaitjime. Tikich nui ekeniag emainawai, tujash makí makichik kuitamas jegamaina numamtuk, Apajuí chichamenak shiig jintinjamain ainawai.

<sup>11</sup> Aatus asamtai, nagkamsa Jesucristo pachisa etseggamua duka, jega jegamkatasa nagkamku shugku ajitiama numamtuk awakamui, nunin asamtai pataká tikich ajimaitsu numamtinai.

<sup>12</sup> Makichik aents nunú shugku ajigbauwa nui ekenag jegamak oroi, jiju plata tutaiyai, kaya pegkejuch aidauwai, numiikesh, tagkanaikesh, dukaikesh jegaamainai;

<sup>13</sup> nunú aidauk makí makichik takasbau dekaagbau tsawan atina dui, ashí paan wantinjatnai, wajiyaijag jegamkamuita nunú. Ashí takasbau aidauk jiyai apetiama numamtuk dekaeamu agtinai.

<sup>14</sup> Tuja jegamkamua nunú esakchamtaig, nuna jegamkauwa duka akiam atinai.

<sup>15</sup> Tuja ni takasbauji esagkamuk wainak juwaktinai; nuniagkish nigka uwemjatnai, jega esatai jiiinmaina numamtuk.

<sup>16</sup> ¿Atumek dekaatsjumek jega Apajuí ememattai asagmin, Apajuí Wakaní atumiin puja duka?

<sup>17</sup> Makichik aentskesh jega Apajuí ememattain tsayaunak, Apajuishkam dutiksanug niinash tsaktinai. Wagki, jega Apajuí ememattaiya duka pegkegmai, duka atum ainagme.

<sup>18</sup> Makichikitigmekesh atumek tsanumajaigpajum. Atum ainajum anuiyatijum, ju nugkanmaya unuimatai aina nu ashí dekauiwa iman dekapmamutigmek, dekachua nunin atajum, dekas yacha atasa wakegakjumek.

<sup>19</sup> Ju nugkanmaya yachameta duka, Apajuí diismak shiig wainkayai, agagbau aatus tawai: “Apajuik yacha aidaunak ditá tsanumtaiji aina nuig achiawai”.

<sup>20</sup> Nuigtushkam tawai: “Apu Apajuí dekwai yacha aidau anentaimitaiji aina duka, wainkaya nunak”.

<sup>21</sup> Nuadui makichik aentskesh, tikich aentsun pachisag emematmaitsui, wagki, jujú aidauk ashí atumdau ainawai:

<sup>22</sup> Wishakam, Apoloschkam, Cefaschkam, nugka dushakam, pujutash, jaamushkam, atum yamai pujajum dushakam, atak atina dushakam. Ashí ju aidauk atumdau ainawai,

<sup>23</sup> tuja atumetjume Cristunu aidautigmek, untsu Cristuwai Apajuinuk.

## 4

*Jesús chicham etsegtugkata tusa awemamu aidaun takatji*

<sup>1</sup> Atumek jutiik Cristo inake aina nunin anentaimkagtustajum, Apajuinu yaunchuk dekaachbau aajakua nu jintinkagtuata tusa awemamu ainag dui.

<sup>2</sup> Yamai dekaami, jintinkagtuata tibau aidauk, kajittsá diyam amaina nuna iwainmainainawai.

<sup>3</sup> Wika, atumkesh, tikich aidaukesh mina pachittsag nuní takaawai tujutmaina nunak pachiatjsai. Wikik, shiijash takaag atsa tunatú takaajash nunak tumamaitsujai.

<sup>4</sup> Mina pegkegchau anentaimtamú atusugta nuniaigkish, pegkejaitme tamak amaitsujai, tujash mina tujutmaina duka, imá iina Apujiya duke.

<sup>5</sup> Nuadui atumek makichik aentskesh nuniktinai tusagmek tiigpa eke tsawan jegaatsaigkai, ayatak dakastajum Apu Jesús jui taa, suwenum awa nunak tsaaptinum wainmaina imatikas aentsú anentaimtajin aunak shiig paan iwainakui wainkatnaitji. Dutika Apajuí makí makichik aentsdaun diijus shiig aneestinjin susatnai.

*Corintonmaya aidau ditak eme anenmamainamu*

<sup>6</sup> Yatsug aidauh, midaun, Apolonujai pachisan tajim junak, ditash Apajuí chichame agagbau tawa nuna uwaegak anentaimtsuk, jutiinu diis unuimajagti tusan tajime, makichkia nu eme anentsá diyakjum, tikichia nu junik diisaijum tau asan.

<sup>7</sup> Atumnash ¿ya tikichin nagkaesau pegkejash etabiaje? ¿Apajuí amaschamush waji ajutjamainawa? Ashí Apajuí amasajua nuniaish, ¿wagka atumek jukiwua nunin anenmamkugmesh ememagme?

<sup>8</sup> Atum anentaimsagmek: Jutiik Apajuí chichameg shiig dekaidau asaja, tikichik atsumatsji tajume, nuniau asajum atumek apu wajasjum jutiik atsumkagtatsjume. Atumesh dekas apu waigkagminig, jutiish atumjai betekak inaamainaitji.

<sup>9</sup> Wagki wi anentaimsanuk, apóstol aidautik Apajuí idaisamu asajinis, mantamnati tusag chichaman umigtamkaje dekapmamaji. Nunin asajin aents ju nugka juiya aidauk, ángel aidaushkam, wakeejumainun iwainakui diistasa wakeejutiama numamtuk awajtamainawai.

<sup>10</sup> Jutiik Cristo aneaku, ni pachisa etsegtamunum anentainkachua nunin diyam ainaji, nuniajin atumek Cristo nemaju asajum shiig anentaimkau ainagme. Jutii kakaakchau ainajin, atumek ichichmamjau ainagme, jutiinak wainkauch diigmainak, atumnak eme anenjamás diigmainawai.

<sup>11</sup> Yamaikishkam jutiik nujantai, kitakaish, nugkumain atusgtamkuish waituinaji, aents aidaush tutitag awajtamainawai, ii pujumainush atusgtamainawai.

<sup>12</sup> Jutii uwejenig takai takainakua pimpikiagji, pegkegchau chichagtamainakuish pegkegnumak chichajuinaji, waitkagmainakuish katsuntuinaji.

<sup>13</sup> Pegkegchaunum augmatjamainakuish, wait anentsá chichajuinaji. Yamaikish ju nugka juig tsuwata nunin diigmainak ashí aentsuk dakitjamainawai.

<sup>14</sup> Junak idatsagtasankesh agattsujime, mina uchig anentsan aneau asan chichagkun tajime.

<sup>15</sup> Wagki atum Cristo Jesús nemaju asagmin diez mil jintinkagtin ajutjamkush apak kuashtak amait sui. Atumí apanuk witjai, wagki yamajam chicham wi etsegbau antukjum Cristo nemagkau asagmin.

<sup>16</sup> Nunin asagmin segajime, wi pujag junisjumek pujustajum tusan.

<sup>17</sup> Nuadui Timoteo mina uchijua iman aneetaig, Apu Jesusan shiig umigna nuna awetajime; wi Cristo Jesusa nemajin asanush wajak pujuwaitja, nuigtush wajak jintinkagtinaitja ashí yantannum wekaesan ashí iglesianmash nunashkam ujakpaktinme tusan.

<sup>18</sup> Atum ainajum anuiya ememaush ainawai; wi atumiin tuke taashtina nunin anentaimtujuinak.

<sup>19</sup> Tujash wika Apu wakegakuig wamkes minittajai, nunikan anui taakun wainkatag tajai nunú aents ememak tu yujaina dusha dekas Apajuí senchijin takainakpash tuina, atsa ayatak chichainak tu yujainatsuash.

<sup>20</sup> Wagki Apajuí aentsnum inama nunak, ayatak chichamaikik inajattsui, niina senchijiya nujai inajatui.

<sup>21</sup> ¿Waji wakegagme, taa suwimkan sujamsati, nuniachkush anenkai shiig anenjamás aujtamsatneme tajumek?

## 5

*Cristo nemagkau pegkegchaun takaakuish utugmainaita*

<sup>1</sup> Dekanae atum ainajum anuiya tsanijinainamu, nunak Apajuí anentaimtuchu aidaukesh nuninatsui; nuniamunum makichik apají nuween nuwejai betek ema pujuju tabau antuewai.

<sup>2</sup> Nuniaig atumek ememá batsatjume, nunitsuk wake besemag batsatkujum, nunú aents nuninun takaa puja duka jiikjum awemamainaitjume.

<sup>3</sup> Wi atumjai ijunja pujachkunush wakannumag ijutkajai, nunin asan wi anui pujusan aents nunikun tumainaitag nuna tajai:

<sup>4</sup> Apu Jesucristo daajin, niina senchijin ijuntatjum nuanuig, wishakam mina wakanjuig atumjai ijutkau atatat dui;

<sup>5</sup> nunú aentsuk Satanás idaitustajum, dutikam ni nuna iyashin suwimak susam waitiak, pujutjin yapajia Apu Jesús minitaish wakanin uwemjati.

<sup>6</sup> Atumek ememasjum anentaimainchau ainagme, dekagme: "Pag najanatasa nanegbauwa nunak levadura piipich ajuntuamuitak ashí utujá wampushmitkauwai" tawa duka.

<sup>7</sup> Levadura yaunchuk ajutjamajakajua duka utsagtajum, nunikjum yamajam nanegbau wajastajum, levaduragtuchu ainajum nunisjume, wagki iina pascuaji Cristua duka jutiini mantamdau asamtai.

<sup>8</sup> Nunin asamtai yaunchuk tudau takainaku pegkegchau unuimatkamun aina nuni-saik pujusaik Cristo ememattsuk, yamajam pujut dekas pegkeg aina nu takainaku dekaskenum emematiagmi.

<sup>9</sup> Wi duik papiin agajan awetibiajim duishkam tsanijimtan idaiyinsu nujaig ijunjaig-pajum tibaijime.

<sup>10</sup> Wika junak anui aents Cristun nemagchau aidau tsanijimtan batsamtin, ekagbau, suji, tsanumag kasamin, apajuimtai dakumkamun emematin batsatina nujai tupandaikatajum tusanuk tichabaijime. Nu nunikta takumgek ju nugka ju ukuakjum nunimainaitjume.

<sup>11</sup> Wika nunak, Jesucristo nemajin asá yatsut ainaji tayatak tsanijimtanak wekaetin, suji, apajimtai dakumkamun emematin, pegkegchaun chichagkagtin, nampen, tsanumag kasamin aina nujaig ijunmaitsugme tibaijime. Aents nunin aidaujaig makichkish ijunjagmek yuwawaigpajum.

<sup>12</sup> Wika Apajuí nemajuinatsun nunak suwimak susatajum tumaitsujime. Untsu Jesús nemagjum nuiya pegkegchau takainakuig, atumek pempeentunisjume wajak juwaktatua duka tumain ainagme.

<sup>13</sup> Apajuí nemajuinatsun nunak, Apajuí titatui; nunin asamtai atumiin pegkegchau takau puja duka jiki ajapatajum.

## 6

### *Cristo nemajin aidauk chichamnak ditak epegmainai tibau*

<sup>1</sup> Atum mai Jesucristo nemajin ainayatjukum chicham tsuwapjuniagmesh, ¿wagka apu chichama iwajin Apajuí anentaimtuchu aina dusha, ni epegtugmati tusagmesh wejagme, Jesusa nemajin pegkejam aina nujaig epegmainush?

<sup>2</sup> ¿Atumek dekatsjume Apajuí aentsji pegkejam aina duka, Apajuí nemagchau aina nuna dita diistin aina duka? Nunú atum iman dutikatin ainayatjukumesh, ¿wagka imanchau aina dusha atumkesh iwagmainchaush dekaepagme?

<sup>3</sup> ¿Nuiyitush dekatsjume angel aidauh jutiik diistin ainag duka? Aan nagkaemasa juiya utugchat aina duka dutikmainaitji.

<sup>4</sup> Nunin asamtai chicham tsuwapjuniagmesh, ¿wagka apu chichaman epegtuati tusagmesh wejagme iglesianum ijutkachu aina nunin aish?

<sup>5</sup> Junak datsamas dekapsatnime tusan tajime. ¿Atum Apajuí nemajin ainajum anuiyag yatsut chicham epegtan yachak makichkish atsau asamtaig,

<sup>6</sup> yatsumjai pempeentunikjumesh, apu chichaman epegkin Apajuí nemagchau aidau eemtinish jiyani yujajum?

<sup>7</sup> Atum Jesucristo nemagkau aidautigme pempeentunikjum chicham tsuwapjuniatum duka tikima pegkegchauwai. ¿Wagka pegkegchau takagtamainakuish ayatak katsunjá idaitsugme? ¿Wagka kasagtamainakuish jukiti tusam idaitsugme?

<sup>8</sup> Tujash atumetjume pegkegchau takaajum duka, Jesusa nemajin aidautigme yatsumjai pempeentunikjum kasagdaiyinau asajum.

<sup>9</sup> ¿Atumek dekatsjume aents pegkegchaun takaidau Apajuí inamtaijinig wayashtinai tawa duka? Wainkajum tsanumajaipajum: Aents tsanijimtanak yujajin aidau, apajuimtai dakumkamun emematin aidau, ekagbau aidau, aishmagkuitak nuwameaushkam, aishmag nuwameaun dutiknushkam,

<sup>10</sup> kasamin aidaush, suji aidau, nampenchakam, chicham dekaskechunak tsanum-nushkam, tsanumag kasamin aidaushkam Apajuí inamtaijinig wayachagtinai.

<sup>11</sup> Yaunchkek atum ainajum anuiyatigmesh nunin aajakuitjume. Tujash yamaik Apu Jesucristo nemagkagmin, Apajuí wakaniya nunú atumin egkemtugmajag tudaugmin utsanjamkag pegkemtijabiau, nuadui Apajuik pegkegma iman diigmainawai.

*Iina iyashig Apajuinui*

<sup>12</sup> “Ashí waji aidaunak takamainaitjai”, tujash ashí shiig awajtumain ainatsui, “ashí waji aidaunak takamainaitjai”, tujash nunú depetukti tusanush idaimamaitsujai.

<sup>13</sup> Jushakam: “Yutai aidauk wakenum egkematin ainawai, wake duka yutai egkematna nuuwai”, tibauwa duka dekaske, nunak Apajuí mai emegkaktinai; tujash iyashia duka ashí pegkegchau iyashnum takanitai aina nuwi takamtiktai atí tusaik najanachbauwai, iyashik Apu Jesucristunui, tuja Apu Jesucristo iyashnak ni wakega dutiksag takamtiksatus wakegawai.

<sup>14</sup> Apajuí niina senchijinig Apu Jesucristun inankiuwa dutiksag jutiinashkam niina senchijinig inaantamkitnai.

<sup>15</sup> ¿Atumek dekatsjumek atumi iyashmia duka Cristo iyashiya nuninke duka? ¿Nunú Cristo iyashiya nuninke nu jukiish nuwa akiká takataiya nuna iyashijaish apatmainkai? Duka dutikmait sui.

<sup>16</sup> ¿Nuigtush dekatsjumek, makichik aentskesh nuwa akiká takataijai iyashnum tsaninakug, makichik iyash wega duka? Apajuí chichame agagbaunmash aikasag: “Jimag iyashia duka makichik iyash agtatui”, tawai.

<sup>17</sup> Tujash makichik aentskesh Apu Cristo nemajuk niijai ijunkug wakannumag makichik weawai.

<sup>18</sup> Tupanjatajum ashí pegkegchau iyashnum takanitai aina nu. Ashí tikich tudau aina duka iyashnak imatikag pegkegchau ematsui, tujash nuwá tsanijima duka niina iyashinak tudau takajak nuniawai.

<sup>19</sup> ¿Atumek dekatsjumek atumi iyashmia duka Wakani Pegkeji jega duka? Nunuwai Apajuí amasbau atumin pujugtamjum nu. Nunin asa iyashik atumdauchui.

<sup>20</sup> Wagki atumek Apajuí akikmaka sumakbau ainagme, nuadui atumi iyashmijai Apajuí ememattajum.

## 7

*Corintonmaya aidau nuwenbau pachisa iniibau shiig ujakbau*

<sup>1</sup> Jukimjai atum mina papí awetugkujum nuwenbau pachisam inintsamujum nunashkam. Nuna pachisnuk dekas imá pegkejak nuwenmainchau ainawai tajai.

<sup>2</sup> Tujash puyatjumaina duka kuashat tsanijinaidau asagmatai, makí makichik nuwentin amain ainawai. Nuwashkam nunisag makí makichik aishintin amainai.

<sup>3</sup> Aishmag nuwentin aidauk, nuwejai umigdaimain awa nunak dutiksag umimainai; nunisag nuwa aidaushkam aishijaig nunimain ainawai.

<sup>4</sup> Nuwa aishinna nuna iyashig niinuchui, duka niina aishinui; nunisag aishmag nuwenna nuna iyashishkam niinuchui, duka niina nuwenui.

<sup>5</sup> Nunin asantai iyashnum tsanitnumag pempeentunikjumek dakitdaimain ainatsjume. Untsu Apajuí mamiksá aajsata tabaunum shiig chichasá machik tupandaimainai. Nuna nunikajash wakegat au asantai Iwanch pegkegchaunum takamtijusai tuidau asag, wamkes ataktú ijunmain ainawai.

<sup>6</sup> Wi ashí juna taja nunak ju umiktajum tusan tatsujime, ayatak nunimain ainagme tusan tajime.

<sup>7</sup> Wika wakegajai ashí aishmag aidautigmek wiya juninuk amainaitjume tusan; tujash makí makichik Apajuí don susamu ajuinawai, duka makichik niimtin ajamu ai; tikichik, tikich niimtin ajuinawai.

<sup>8</sup> Tuja nuwenchau aidaunak, nuwa waje aidaunashkam wiya juninuk nuwenchau amainai tajai.

<sup>9</sup> Tujash aents iyashí wakega nuna depetuk pujumainchauk, nuwenati. Dekas pegkejai nuwenbauk, senchi wakegaku waitú pujumaina nu.

<sup>10</sup> Untsu nuwenau aidaunak wi tatsujai, Apu Jesús tawai: Nuwak aishinak idaimaitsui.

<sup>11</sup> Tuja nuwa aishin ukuakug nematsuk pujusti, nunimainchawaitkug aishijai epegtunia juwakti; nunisag aishmagshakam nuwenak idaimaitsui.

<sup>12</sup> Nuigtú tikich aidau wi tajai, nunak Apu Jesús tatsui: Makichik yatsut Cristo nemajin, nuwa Apajuí nemagchaun ayaakush, nuwa niijaig pujustatus wakeetaig, idaitsuk niijaig pujumainai.

<sup>13</sup> Tuja nuwa Apajuí nemajin, aishi Apajuí nemagchaunum detakuk niijaig pujustatus wakeataik aishinak ukukinmegka.

<sup>14</sup> Wagki aishmag Apajuí nemagchauwa duka, niina nuweg Apajuí nemajin asamtai, niinash Apajuí yaimainai. Nunisag nuwa Apajuí nemagchauwa dushakam, aishmag Apajuí nemajin asamtai niinashkam Apajuí yaimainai, nunin achagtaik dita uchijí aina duka Apajuí nemagchau uchijí aina nunin amain asamtai.

<sup>15</sup> Untsu Apajuin dekaskeapi tuchaujai nuwenamu, idaidaisami tusa imatjamak idaimainai, nunik agkan juwamainai, Apajuí dekaskeapi tuina nu aishmag nuniachkush nuwa aidushkam, Apajuik shiig agkan batsamsatnume tusa untsugmaku asamtai.

<sup>16</sup> Wagki ¿utugsamek dekaatame ame yaigmash nuwemish uwemainashit dusha? Nunisag ¿utusamek dekatame ame yaigmash aishumish uwemainashit dusha?

<sup>17</sup> Nunin asamtai makí makichkitigmin Apu wajuk waketan anenjauch amasajuita nunisjumeke pujustajum. Atum wajuk pujautigmina Apajuí untsugmakuita duka nunisjumeke amainaitjume. Junak ashí iglesianmaya aidauk nuniktinme tajai.

<sup>18</sup> Makichik aents pakají ajapjuamu pujai Apajuí untsukbauk, nunisag amainai; antsag pakamatsuk pujai Apajuí untsukbaushkam, pakamaktajai tumaitsui.

<sup>19</sup> Pakamamua duka wainkayai, pakamachbaushkam wainkayai. Dekas pegkeja duka, Apajuí chicham umiktajum tibauwa nuuwai.

<sup>20</sup> Makí makichik aentsuk, wajukunak Apajuish untsukuita nuninuk amainai.

<sup>21</sup> Inaku waitkatai pujamin Apajuí untsugmakuitkuig uyumakaipa. Untsu ame agkan wemain akuig, duka dekas kakanmamsata jünkitasam.

<sup>22</sup> Wagki inaku waitkatai pujaun, Apajuí untsukbauk agkan wajas Apu Cristunak umijin weawai. Aantsag agkan pujaun Apajuí untsukbaushkam, Apu Cristo inake weawai.

<sup>23</sup> Atumek Apajuí sumakbau ainagme; nunin asajum tikich aidau inaku waitkatai atajai tumaitsugme.

<sup>24</sup> Yatsug aidauh, atum wajuk pujautigmina Apajuí untsugmakajuita, duka nuninuk amainaitjume.

<sup>25</sup> Untsu aishinchau aidau dita chicham umimainji Apu tujutbauk atsugtawai; tujash wi anentaibaun tajai, Apajuí wait anenjuju asamtai tajim duka kajintsá antugtumain ainagme.

<sup>26</sup> Jutiik yamaiya juik tikima utugchatnum pujuinag dui, makí makichkitijum wajuk pujagme duka nunisjumeke pujustajum.

<sup>27</sup> Ame nuwennaitkumek nuwemik idaisaipa. Nuwem atsakuish nuwenatasamek anentaimtú wekayipa.

<sup>28</sup> Tujash ame nuwenkumesh tudau takaakum nuniatsme; nunisag nuwa agkanjam nemakush tudau takaak nuniatsui, nunin aig nuwenawajag utugchatnum jegainak waitmain asagmatai nuna tupanmain ainawai tusan tajai.

<sup>29</sup> Yatsug aidauh, juna tita tajime: Tsawantak ujumak juwatjamui, nunin asamtai yamai nagkamsag nuwentin nuwemik nuwenchauwa nunis pujumain ainawai.

<sup>30</sup> Atum butbaunum pujakjumes, dakujamunum pujumaina imaanisjum pujustajum; dakujaku pujautigmeshkam, butbaunum pujumaina nunisjum pujustajum; tuja waji-ijum samakjumes, atumdauchu anentaimtumaina nunisjum pujustajum.

<sup>31</sup> Aents ju nugka juiya wají aina nujai shiig aneas pujuidaush nu aina nujaig shiig aneas pujachua nunis pujustinme; wagki ju nugkanmaya wainainag duka megkaetanum au asamtai.

<sup>32</sup> Wika wakegajai duka uyumá pujuigpajum tusan. Wagki nuwenchauwa duka imá Apu takatjiya nunak ni shiig awajkata tabaunak uyumamain asamtai.

<sup>33</sup> Tujash nuwentin aina duka ju nugkanmaya wají aina nuna niina nuwe shiig awajkata tabaunak uyumainawai.

<sup>34</sup> Nunisag nuwa aishinna duka agkanjama nujaig betekchauwai. Agkanjama duka Apajuí takatjiya nuna imá uyumawai, iyashinish wakaninish pegkejam ata tabaunum; untsu aishinna duka ju nugkanmaya wají aina nunak uyumawai wajuk aishinash shiig awagmamainaita nuna.

<sup>35</sup> Wika junak atum shiig juwamainun tajime, nunimaitisugme tatsujime, ayatak shiig imagnis utugchat atsau Apu takajuinak pujustinme tusan tajime.

<sup>36</sup> Aishmag, ni nuwenamig tibaujuiya nu tsakagmatai, nuwenatjai takug, dekas aaja nuniamu niinish shiig juwamain anentaimkug, nuwenati, nu nuniamush tudauchui.

<sup>37</sup> Tuja tikich aents nuwentan dakitau asa, shiig agkan pujusan, wi wakegag nunisnuk Apajuin takagsatjai, tusa anentainish nunisag ebetmamag nuwenashtajai takush, pegkejan nuniaawai.

<sup>38</sup> Nawanjin aentsnum sujauk pegkejai, tuja ni nawanjin aentsnum sujatsu nu imá pegkejai.

<sup>39</sup> Nuwa aishintin aina duka aishi iwaaku pujaigkik, tikichnumag nemamaitsui; untsu aishi jakamtai agkan wajas ni wakegamunum nemamainai, tujash Apu Cristo nemagnujai.

<sup>40</sup> Tujash wi anentaimsanuk nuwa wajemeag ataktuk nematsuk imá shiig aneas pujumainai tajai. Wishakam Apajuí Wakaní ajutu asamtai anentaimsan tajai.

## 8

*Apajimtai dakumkamu aidau yutai anagkuamush yumainashit tusa iniimsamu*

<sup>1</sup> Apajuimtai dakumkamu anagkuaku kuntin maamun pachisan tajim duka ashí dekainaji. Tujash dekata duka emematnum ejekagtawai, untsu anenka duka eemtanum yaijatui.

<sup>2</sup> Makichik aentskesh dekauwa iman anenmamuk, eke dekatsui dekas dekamaina nunak.

<sup>3</sup> Tujash aents Apajuin anea nunak, Apajuí shiig wainui.

<sup>4</sup> Apajuimtai dakumkamu anagkuaku kuntin maamu yuwamua nu pachisaik dekainaji, apajimtai dakumkamu aina duka ju nugka juig wainak aina nu, imá makichki Apajuia duka, nuigtú tikichik atsawai.

<sup>5</sup> Ujumak aents aidau; nayaimpinmash, nugkanmash Apajuik ayawai tuinawai (nu tabaunmag kuashat apajuí, kuashat apu aidaush ayawai),

<sup>6</sup> tujash jutiinuk imá makichki Apajuik, ashí najankamu aina nuna Apají, jutiiskam niinuk ainaji, nuigtush iina Apujig Jesucristua duke, niinig ashí najaneaku ainawai, jutiishkam nigki najanamuitji.

*Aneenitajum tawa dusha wajukuita*

<sup>7</sup> Tujash ashí dekainatsui dekaskea nunak. Ujumak apajimtai aina nu ememattan unuimatkaju aajakaju asag, apajuimtai anagkuamu maamun dekainayatak yuwinak, ditá anentaimtajin kakaakchau asag ditak tsuwapmamainawai.

<sup>8</sup> Apajuik ii yuwamua nuna diisag imá pegkejak diigmatsui, tuja yutai yuwakuish nuní pegkejak wemaitsui, yuwachkuish nuní pegkegchawk wemaitsui.

<sup>9</sup> Tujash atum agkan anentaimkujum dutikajum nuna, dekaskeapi tabaujin kakaakchau aina nunú yuwak tudau weenum tusajum kuitamamkatajum.

<sup>10</sup> Ame nunú dekayatnum juga apajuimtai ijuntutainum ekeemsam yutaik, makichik yatsut anentaimtajin kakaakchauwa nunú waipak, niish nunú apajuimtai anagkua maamun wakeejuk yumainai.

<sup>11</sup> Ame dekayatnum nuniamin, yatsum Cristun imanis dekatsu nunú megkaemainai, Cristo niinish mantamdau aig.

<sup>12</sup> Aaja yatsum tudau takamtikakjum, imanis dekainatsu nu anentaimtaji emestakjumek, Cristo tudau takagkujum aniagme.

<sup>13</sup> Nunin asamtai wi yuwamujua nu mina yatsujun tudau emamainaitkuig, nejenak ajumaish yumaitsujai.

## 9

*Pablo ni pujutjin Corintonmaya aents aidau iwaintamu*

<sup>1</sup> Wika agkantaitjai apóstol asan, iina Apuji Jesusnash wainkauwaitjai, atumek wi chicham etsegbau antukjum Apu Cristui sujumankau ainagme.

<sup>2</sup> Tikich aidauk apostolchauwai tujutuinawai; tujash dekas atuminig nuninchauwaitjai, wagki atum Apu Jesusjai ijutkau pujajum nuuwai mina sellojuk nu iwaintawai dekas apostoloitag nunak.

<sup>3</sup> Mina chichama patatjuina nuna tajai:

<sup>4</sup> ¿Jutiik yutsuk, umutsuk batsamsati tibauk ainag?

<sup>5</sup> ¿Jutiish iina nuwe Jesusa nemajin ayaaku tamainchaukaitag, Cefas nuigtú tikich apóstol aidau, Apu Jesusa yachi aidaujai wajukena nunaish?

<sup>6</sup> ¿Wikik, imá Bernabejaig atum yaigchamu amainaitag?

<sup>7</sup> ¿Yaá suntaja ditak akikmakash yu yujaame? ¿Yaita uva ajakuitak nejen yutsuk idainush? ¿Yaita uwijan kuitamiatak muntsujin umutsuk idainush?

<sup>8</sup> ¿Junash wiki anentaimsanuk taja? ¿Juna pachis chicham umiktina nuwi tatsuak?

<sup>9</sup> Chicham umiktin Moisés agagbauwa nuig: "Toro trigon dajag pakak wekaga nuna nujig jigkatuawaipa", \* tawai. ¿Apajuí toron puyatjau asag tiuwait,

\* 9:9 Dt. 25.4.



<sup>10</sup> Jutiin pachipas taku tichaukaih? Nunak jutiin pachipas tu agajui. Wagki aents ajan ajama duka, ajakan juwaa dushakam jukkittajapi tusa dakainawai.

<sup>11</sup> Jutii, ajak wakannumia atumiin ajakbauwaitag nunin asa, shiig kuashat sega-mainaitjime jutii atsumamunum yayiatkatajum tusa.

<sup>12</sup> Tikich aidau atsumainakuig yayajume, jutiik aan nagkaemas yaigbau amainaitji.

Tujash jutiiik yayinkatajum tutsuk, ashí waitiakuish katsunbaiji, yamajam chichaman Cristo pachisa etsegbauwa nuna shiig antumainchau ainum tabaunum.

<sup>13</sup> Atumek dekagme jega Apajui ememattainum takaidauk, nuiyanak yujakaju aina duka, nunisag altarnum takaidaushkam nuiyanak anentag itaamun yuujakú ainawai.

<sup>14</sup> Dutiksag Apu Cristushkam, yamajam chichaman etsejuina nunak, chicham etsegbaun antuina nu yaigtinme tiuwei.

<sup>15</sup> Tujash midaush nunimain ajutaigkish yainkatajum tusanuk segachmaijime, juna agatjim junash sujustajum tusan segakun tatsujime. Wika chicham etsegbaunum eme anentaimsan akijuinachuish wegagag junisnuk jakatasa wakegajai.

<sup>16</sup> Wi yamajam chichama juna etsegkun ememamainjuk atsugtawai, wagki juka dekasa atsumamu asamtai umiktá tibau asan. ¡Wait anenmamain niimajai yamajam chichama juna etsegchaknuk!

<sup>17</sup> Nunin asamtai mina wakeetajui wiki nagkaman takasuitkunuk akiam amainaitjai, tujash nu umimain asamtai dutikag nunak Apajui dutikata tibau asan dutikajai.

<sup>18</sup> Nunin asan wi shiig juwamujua duka, yamajam chicham etsegbaunum akijuinatsaig wekaesá takata nuuwai, wi chicham etsegbaunum nunimain ajuta nunak pachitsuk idaiyu asan.

#### *Yamajam chicham etsegbaunum kakanmabau*

<sup>19</sup> Nuadui wika inaku waitkatai achayatkun, ashí aentsun inake wajasjai, kuashat aents Cristun nemagkatnume tabaunum.

<sup>20</sup> Judío aidaunum pujaknuk, wishakam judiok wegajai, ditashkam Cristo nemagkatnume tabaunum; nunak Moisés chicham umiktajum tibauwa nuna umiachiatkun chichaman umina nunin wegajai, ditashkam Cristun nemagkatnume tabaunum.

<sup>21</sup> Aantsanuk Moisés chicham umiktajum tibauwa nu atsgbau aidaujai pujaknuk wishakam nuninuk wegajai, Apajui chicham umiktajum tibauwa nuig agkanchauwaitkun, Cristo chicham umiktá tibauwa nuna umiajai, chicham umiktin atsgbau aidaush Cristo nemagkatnume tabaunum.

<sup>22</sup> Aents Cristun imatikas dekaskapai tuinachujui pujaknush, wishakam nuninuk wegajai, chicham ujakta tabaunum. Ashí nunin aina nujaig wishakam nuninuk wajasjai, aaja nuniamunum wajumkesh uwemjatnume tabaunum.

<sup>23</sup> Nunak yamajam chicham etsegkata tabaunum nuniajai, wishakam atak ditajai betek ijunjatasan.

<sup>24</sup> Atumek dekagme, dekapdayamunum tupikainakug ashí betek tupikainayatak, makichik wagaktata nu wajinak juwame. Nunin asamtai atumesh jukita takugmek kakaagtajum.

<sup>25</sup> Ashí aents tupikamunum dekapdaisatin akug, shiig kuitamamin ainawai, atsejutai besegtina nunú jukita tabaunum; untsu jutii kakanmamainag duka, atsejutai atakesh tuke atina nu jukita tabaunum nuninaji.

<sup>26</sup> Nuadui wika mamikjamunum jegantatus tupikauwama imaniajai. Nuniau asan maaniajai, tujash wainkan dasenum iyatsuk.

<sup>27</sup> Imatikau asan mina iyashjunak wi depetkin, wi wakegamun takamtikajai. Wi chichaman etsejukaitkun, wainka juwakaig tabaunum.

## 10

### *Israelnumia pachisa Cristo nemajuidau jintintuamu*

<sup>1</sup> Yatsug aidauh, iina muunji aajakajua nunú, ashí yujagmin wakentin ejakam weenak nayants kapantu tutainum katiajua nunú kajimatikijum tusan dakitajai.

<sup>2</sup> Nunikag ashí nunú aidauk yujagminum, nayantsanmash yamigbau juwakajui, nunik Moisesjai ijutkau wajasajui. <sup>3</sup> Nunisag ashí yutai wakannumiaya nunash yuwawajui,

<sup>4</sup> Tuja umutainash wakannumiaya nunak ashí uwajajui, wagki wakannumian kaya muunnumian umujakajua nunú uyunajakui, nunú kaya muunta duka Cristo aajakui.

<sup>5</sup> Tujash nuiya kuashat aidau Apajuin shiig awajkachajui, nunikaju asag uwegshunum jinaa utsaankajui.

<sup>6</sup> Ashí nu nunikajua duka jutii iwaintugmak nunikajui, waji pegkegchauwa nunú anen-taimtusa wakegá wekaemainchauwa nuna, dita wajukawajua nunikainum tabaunum.

<sup>7</sup> Nuadui atumek ujumak dita wajukawajua nunikjume apajimtai dakumkamuk emematmaitsugme. Nuna pachis agagbau tawai: "Ashí aentsuk yuwinak, umuinak pekaamsajui, nunikag wajajag nantsemawajui".

<sup>8</sup> Nunin asamtai tsanijinachagmi, ujumak dita wajukawajua nunikaik, nuní yujakmá makichik tsawantaik veintitrés mil aents jinawajui.

<sup>9</sup> Apu Cristo dekapasataaik wakeechagmi. Ujumak dita nuní yujakmag dapí ijinam asajui.

<sup>10</sup> Apajuish pegkegchau chichajigpajum. Ujumak aents Apajúi pegkegchau chichajú yujakmá Apajúi awemamu nayaimpinmaya aents ijinam asajui.

<sup>11</sup> Nunú iina muunji nunikajua duka, jutiin iwaintugmaji. Nuadui yamai tsawan inagnamunum batsatainag nunú aidautin, ditash nunikainum tusa aneentijamak agagbauwai.

<sup>12</sup> Nunin asamtai ni shiig ebetmamja pujajai tumamushkam kuitamamainai pegkegchau takasaig tabaunum.

<sup>13</sup> Atum pegkegchau anentaimektajum waitiajum nunak tikich aents aidaush nunisag waituinawai, tujash Apajuik betek umina ibau asa atum katsunmainchaunmag waittsati tusag idaitamsachagtai, ayatak ame pegkegchau anentaimektajum waitiam dusha wajuk katsunjam nagkaemainaitme nuna yaimektajui.

<sup>14</sup> Nuadui aneetaig yatsug aidauh, apajuimtai dakumkamu aina duka tujanjatajum.

<sup>15</sup> Junak atumek shiig anentaimektajum asagmin tajime, wi tajim juka atum anentaimektajum titajum.

<sup>16</sup> Copanum pegkeg yumig awa nunú ijunja see tusa umuinakuik, ¿Cristo achijam numpen ukajua nunú anentaimektajum nuninatsjik? pag puuká yuwinag dushakam, ¿Cristo jutiiní mantamdauwa nunú anentaimektajum nuninatsjik?

<sup>17</sup> Kuashat aentsuitku makichik paagak puuká yuwinag duka, jutiik makichik iyashkea nunin ainaji tusa iwainmamku nuninaji.

<sup>18</sup> Israel aidaushkam anentaimektajum diistajum, kuintinun maawag altarnum apeenakug nuiyanak nejen yuujakú ainawai, aatus nuninak Apajuuijai ijutkau aajakajui.

<sup>19</sup> Juna apatka taja junak, judiochu aidau kuintinun maawag apajuimtaijai dakumkamun anagkuina nunú imá pegkejai, nuniachkush dakumkamu aina nu imá pegkeg ainawai tusan tatsujai.

<sup>20</sup> Judiochu aidau apajuimtaijai aidau kuintinun maawag anagkuina nunak, iwanchin anagkuinawai, Apajuinak anagkuinatsui. Nunin asamtai dakitajai atumesh wakan pegkegchau aina nujai ijunkujum yawawajum tusan.

<sup>21</sup> Nuadui atumek copa Apu Cristunua nuiya uwagjum, ajuma dui copa iwanchdau umuu wajamaitsugme; antsagmek Apu Cristo mesajiyi nuiya yuwajum, ajuma dui wakan pegkegchau aina nuna mesajin yuu wajamaitsugme.

<sup>22</sup> Aaja nuniakuik Apu Cristo ekajeaku nunimainaitji, tujash jutiik ni senchigtina ibau ainatsji.

*Ashí ii takaamuk Apajúi shiig awajkatasa takamainaitji*

<sup>23</sup> Ashí dutikmainaitjai tujash ashí shiijak awajkagtumatsui, ashí dutikmainaitjai tujash duka ashí pegkegnumak yayjatmaitsui.

<sup>24</sup> Nunin asamtai makichikish niina pegkeg awagmamaina nuna egatsuk, tikichin pegkegnum yaimaina nuna egamain ainawai.

<sup>25</sup> Ashí neje sujutainmaya sumaka yuwakjumes, makichikish iniimsaigpajum, wainka anentaimektajum;

<sup>26</sup> wagki, ju nugka juka nuigtú ashí nugkanum ayá dushakam Apu Jesusdau ainawai.

<sup>27</sup> Makichik aents Cristun nemagchau yuwami tusa ipapamtai jegaagmesh, ashí yutai amainamuk yuwatajum makichikish iniimtsuk wainka anentaimektajum.

<sup>28</sup> Nuniagmin, tikich chichagtamak: Ju nejea juka kuintinun maa apajimtai anagkuamui tujamkuig yuwawaigpa, nu etsegkamtai dekau asam wainka anentaimektajum.

<sup>29</sup> Junak atumnak tatsujime, tikich wainak anentaimektajum tusan tajime.

Wi agkan anentaimektajum dutikag nuna tikich aents pegkegchaun aniawai tusa chicham patatam amainchawaitjai.

<sup>30</sup> Wi Apajuin see tusan yuwag nunak tikichik pegkegchaunak chichagtumatsui Apajuin see tusan yuwau asamtai.

<sup>31</sup> Nuadui yuwakjumes, ashí waji dutikakjumes, ashí Apajúi ememattsajum dutikatajum.

<sup>32</sup> Makichikish tikichik pegkegchau iwaintukaigpa, judío aidaukesh, judiochu aina dukesh, iglesia Apajuinu aina dukeshkam.

<sup>33</sup> Wi ashí dutikag nunak ashí tikich aidaunash shiig awajkata tabaunum nuniajai, mina shiig awajta nuna egatsuk, tikichin shiig awagma nuna egajai ditash uwemjatnume tau asan.

## 11

*Nuwa aidaush jega Apajuí ememattainum wainakush wajukmainaita*

<sup>1</sup> Wi Cristo pujutin diisan niina nemajag antsagmek, atumshakam mina pujutug diisjum Cristo nemagkatajum.

<sup>2</sup> Mina yatsug aidauh, eme anentajime, tuke minash kajimatjutsuk wi jintintuabiajim dutiksagmek betek umidau asagmin.

<sup>3</sup> Tujash ashí aishmag aina duka Cristui sumitkau aina nu dekaatajum tusan wakegajai, nuwa aina dushakam aishin sumitkau ainawai, untsu Cristuwai Apajuíyai sumitkauwa duka.

<sup>4</sup> Ashí aishmag aidau Apajuí aujak nuniachkush Apajuí chichamen etsejak buuken dukuauk Cristun eme anentus diyachu asa nuniawai.

<sup>5</sup> Tuja ashí nuwa aidau Apajuí aujak nuniachkush Apajuí chichamen etsejak buuken dukuachuk, aishin eme anentus diyachu asa nuniawai, intashin ashí awajú asa wajukmaina numamtuk wajau asa.

<sup>6</sup> Nuwa buuken dukuachuk, dekas imá pegkeg ashí intashinak awag ajapati. Untsu nuniamu datsan ataik jaanchi dukumakti.

<sup>7</sup> Aishmag aidauk Apajuí niimejai betek najanamu asa, Apajuí imanjiya nuna iwainawai, nunin asa buukenak dukumait sui. Untsu nuwak aishmagku imanjiya nuna iwainawai.

<sup>8</sup> Wagki aishmagnak nuwanmayan jukig najanachui, untsu nuwan aishmagnumian juki najanauwai.

<sup>9</sup> Aishmagkuk nuwa nigki pujumainchau asantai najanachbauwai, aishmag nigki pujumainchau asantai nuwak najanamui.

<sup>10</sup> Nunin asantai nuwak, ángel aidau iwaintukta tabaunum Apajuí aujukug nuniachkush Apajuí chichamen etsegkug buukenak dukumain ainawai.

<sup>11</sup> Tujash Apu Jesús nemagbaunmag aishmagkuk nuwajainchuk amait sui, antsag nuwashkam aishmagjainchuk amait sui.

<sup>12</sup> Duka dekaske, nuwak aishmagnumia najanamui, nunisag aishmagshakam nuwanmag akiinui; tujash duka ashí Apajuí najankamu ainawai.

<sup>13</sup> ¿Atumesh pegkejai tumainkaitjum nuwa buuken dukutsuk Apajuin aujkuish?

<sup>14</sup> Aishmag wajuku atí tibauwaita duka dekeinaji, nuniai aishmag intashin esagman tsakapaina duka datsanmainai.

<sup>15</sup> Untsu nuwa intashí tsakapauk eme anentsá diyam ainawai, ditak buuké jaanchi dukumain nuna intashí ejatkati tibau asa.

<sup>16</sup> Juna pachis makichik aentskesh jiyanitkata tuidauk dekamain ainawai, jutii aidau-tikesh, nuigtú iglesia Apajuinu aina dukesh tikich nunimain unuimatjamu atsujuina nuna.

*Jesu Cristo mantamnamuji anentaimtusa yuwamu shiig dutikashbau*

<sup>17</sup> Juna tajim junak eme anentsan tatsujime, wagki dekas pegkegnum ijunmaina nu, nuni pegkegchau etamainnum ijunu asagmin.

<sup>18</sup> Dekatkauk antukmajai, atum iglesia aidautijum ijunjum anuiyag ditash kanaidau tabaun, nunak dekas nuninap amainaita tajai.

<sup>19</sup> ¡Duka dekas ditash kanaamuk amainai, nuniemunum iwainmamain ainawai, yaita atum ainajum anuiyash dekas Jesusa nemajin aidaush!

<sup>20</sup> Aaja tupandaika batsatiakujum, Apu Jesús kashi yuwak, mina anentaimjutsajum yuwatajum tiuwa nu dutikami tusajum ijunjum duka dekas nuniatsume.

<sup>21</sup> Wagki nu yuwamunmag makí makichik kashi yuwatnujin itauk niyá eemak yuwinawai, nuniai tikichik yapajuinai, tikichik nampenawai.

<sup>22</sup> ¿Atumek jeenchau ainajum nuwi yuwakjum umumainaitjum duka? nuniachkugmesh ¿iglesia Apajuinu aina nu imanचाuch diyau asagmek yumainji atsujuina nu idatsagtasajum nuniajum? ¿Aniajum duish wajintajimki? ¿emegash anentaimtitjim? nunak makichikish dutikmaitsumijime.

*Jesús mina anentaimjutsajum yuwakjumek juni dutikatajum tibau*

(Mt. 26.26-29; Mr. 14.22-25; Lc. 22.14-20)

<sup>23</sup> Wika Apu Jesús tujutbauwa dutiksanuk atumnash jintintuabiajime: Apu Jesusak sujam asauwa nunú kashik pagkan juki,

<sup>24</sup> Apajuin see tii puuká chichaak: “Jujú jukijum yuwatajum, juka mina iyashjua nuna iwainawai atumiin wi mantamnattag nuna, juka tuke jutiksagmeké atin atajum mina anentaimjutsajum”, tiuwai.

<sup>25</sup> Aikasag, yuwá nagkankamunum copa juki chichaak: “Ju copa juka mina numpajui yamajam chicham apaamu atata nuna iwainawai, ju copanmaya tuke jutika umakjumek, mina anentaimjutsajum jutikatajum”, tiuwai. <sup>26</sup> Nunin asamtai tuke jutika ju pag yuwakjumek, ju copanmaya umakjumesh, ni mantamnamujiya nu etsegtakjum nuniagme Apu Jesús minitin asamtai.

*Jesucristo mantamnamuji anentaimtusa yuwamu imanchau diyamu*

<sup>27</sup> Tuja nuna makichik aentskesh wajuk dutiktaiyaita nuna shiig dutiktsuk pagkan yuwak, umutai Apu Jesusa copajiya nuiyan umauk, Jesusa iyashí, niina numpé anentaimtusa dutikamu asamtai tunaamak nuniawai.

<sup>28</sup> Nuadui eke pagkan yutsuk, copanmayanash umutsuk makí makichik anentaimas niimamain ainawai.

<sup>29</sup> Wagki Apu Jesusa iyashí tawa nunash wagka tawa nuna shiig dekatsuk yuwauk, umutnash umakug ni suwimak juwaku waittsatnujinak nuniawai.

<sup>30</sup> Nuadui atum ainajum anuiya kuashat jaush ainawai, kakaakchau waigkushkam, nuniai ni jauk kuashat jakaje.

<sup>31</sup> Nuniau asamtai: Iik anentaimsa niimakuik Apajuí suwimak suwamak amaitsuji.

<sup>32</sup> Tujash Apu Jesús suwimkan sujankug jintinjamak dutijamui, aents Apajuí nemagchau aidau suwimkan jukiagtin aina nujai suwimkan jukiinum tujamu asa.

<sup>33</sup> Nuadui mina yatsug aidauh, Jesús maamua nu anentaimtusjum yuwatasa ijunkugmek dakanistajum.

<sup>34</sup> Ni yapajauk niina jeenig yuwati, shiig ijunja takaachbaunum Apajuí suwimkan sujusai tau asa. Tikich tumain awa nunak anui taan ujaktajime.

## 12

*Apajuí don aidau sukagtusbau*

<sup>1</sup> Yatsug aidauh, wakannumian Apajuí don sukagta nuna pachis dekatnume tusan wakegajai.

<sup>2</sup> Atunek eke Cristo nemagtsuk batsamsagmek, wainmachujai betek apajuimtai dakumkamu chichachu aina nu emematujakuitjum duka dekagme.

<sup>3</sup> Nuadui yamai dekaatajum, makichik aents Apajuí Wakaní chichamtikbauk, Jesusnak pegkegchauk chichagmait sui. Tuja: “¡Jesusak Apui!” taushkam nigki tatsui, Wakaní Pegkeji chichamtikam tawai.

<sup>4</sup> Kuashat niimtin ainawai don aina duka; tujash Wakaní Pegkejiya duke nunak dutikawai.

<sup>5</sup> Makí makichik niimtin takamainuk awai; tujash makichik Apua nudauk.

<sup>6</sup> Apajuuya duke ashí wájí aina nunak, ashí aentsun makí makichik niimtinun takamtikmaina duka.

<sup>7</sup> Apajuik makí makichkitin Wakan takamtikagta nunak sukagtawai, tikich aidaujaish yainikti tabaunum.

<sup>8</sup> Wakanía duke sukagtawai yachameaja chichatan, nunú Wakanía duke sukagtawai shiig dekaa chichata nunashkam;

<sup>9</sup> tikichia nuna nu Wakanía duke suwawai dekaskeapi tutan, nunú Wakanía duke anenjauch aents jau etsagaumainnash suwawai,

<sup>10</sup> tikichin aents dutikmainchau iwainaktinun, tikichin Apajuí tabaun etsegtuktinun, tikichin wakan etegja dekatan, tikichin ii chichashtai aidau chichatan, tikichin nunú chichatai etsegtuktinun.

<sup>11</sup> Tujash ashí ju aina junak, Wakanía duke nigki dutikawai, ni wajuk wakegawa nunak makí makichik dutiksag suwawai.

<sup>12</sup> Iina iyashí kuashat akanjamu akushkam makichik iyashke, jutiish Cristujaig betekaitji.

<sup>13</sup> Nuadui ashí judío, griego, inaku waitkatai, agkan batsamin ainakuish makichik Wakanía duik yamigbau ainaji, ashí nunú aidautik Wakan susamu ainaji.

<sup>14</sup> Iyashik makichkichui, kuashat ijutkamui ajawai;

<sup>15</sup> nuiya dawé tumainai: “Wika uwejchau asan iyashnumiachuitjai”, takush çiyashnumiachu asag tumainait?

<sup>16</sup> Tuja kuwish tumainai: “Wika jiichu asan iyashnumiachuitjai”, takush çiyashnumiachu asag tumainait?

<sup>17</sup> Nuniachkush ashí iyashia nu ayatak jii ketkuish ¿utusaya antumainaita? Tuja ashí iyashia nu ayatak antutaiya duke akuish ¿tuwí kugkuasa dekaptaish amainaita?

<sup>18</sup> Tujash Apajuí, ashí ju iyashnum ijutkau aina nunak, ni wakegamujin diis makí makichik batsakui.

<sup>19</sup> Ayatak iyashnum ijutkau aina duke agtaish ¿tuwí iyashish amainaita?

<sup>20</sup> Dekaske, kuashtai iyashnum ijutkau aina duka, tujash iyashik makichik.

<sup>21</sup> Jiik, uwegnak: “Wika aminak atsumatsjame” tumaitsui. Aantsag buukshakam, dawenak: “Wika atumnak atsumatsjime” tumaitsui.

<sup>22</sup> Nunin ai iyashnum ijutkau aina nuiya, imanchau diyamua nu imá senchi atumnawai.

<sup>23</sup> Iyashnum ijutkau aina nuiya imanchau diyamua nu imá shiig kuitamnawai, tuja iyashnumia paan iwainamainchauwa duka shiig ejaká kuitamnawai,

<sup>24</sup> utsu iyash paan iwainamain aidauk dutiknatsui. Apajuí, iyashnum ijutkau aina nuiya imanchau diyamua nuna dekas puyatjus diistinme tusa aikauwai,

<sup>25</sup> numidau asag iyashnumag kanakag achagti, nuninak makí makichik iyashnum ijutkau aina duka pempeentunisag yainiktinme tusa dutikauwai.

<sup>26</sup> Aatus asantai iyashnum ijutkau aina nuiya makichik waitaik, ashí iyashnum ijutkau aina dushakam waituinawai, antsag iyashnum ijutkau aina nuiya makichik puyatjusa kuitamjinig, ashí iyashnum ijutkau aina dushakam shiig anenawai.

<sup>27</sup> Nunin asamtai, atumek Cristo iyashí ainagme nunin asajum makí makichik aidautigmek nunú iyashia nuwí ijutkau ainagme.

<sup>28</sup> Apajuí iglesianum takasagtinun apusauwai dekatkauk: Apóstol aina nuna, profeta aidau, maestro aidau, aents dutikmainchaun iwainakagtin aidau, aents jaidau etsagagtin aidau, yaimkatin aidau, takatan diistin aidau, chicham chichashtain chichaktin aidauashkam.

<sup>29</sup> Nunin asag ashí apostolak ainatsui, ashí profetakesh ainatsui, ashí maestrok ainatsui, antsag aents dutikmainchaunash ashí iwaidauk ainatsui.

<sup>30</sup> Antsag aents jaina nuna etsagagtin aidauk ashí don susamu ainatsui, chicham chichashtainash ashí chichainatsui, nunú chichataish ashí etsegtin ainatsui.

<sup>31</sup> Atumek don dekas iman aina nu jukitasajum imá senchi wakeejitajum.

Tujash wi dekas shiig pegkeja nuna jintintuattajime.

## 13

### *Dekas anenka nu*

<sup>1</sup> Wi tikich chicham aidau chichatan yacha amainaitjai, ángel aidau chichatn chichau akunush anentak atsugtakug, jiju nuniachkush platillo awatim ayatak tsantsantuwama numamtuk wajamainaitjai.

<sup>2</sup> Wi Apajuí tabaujin etsegtin amainaitjai, Apajuinu yaunchuk dekaachbau aajakua nunash ashí dekau, ashí dekamush ajutu, dekaskeapi tabau ajutu asamtai, muja aidauash yajá inagkemain akunush, anentak atsugtakug wainkayaitjai.

<sup>3</sup> Ashí mina wajig ajutuina nuna ujunauch aidau tinamkunush, mina iyashjun apeatnume tusan sujaknush, anentak atsugtakug wainkan dutikmainaitjai.

<sup>4</sup> Anenka duka: Katsunta nuna dekamtijamui, kakagchau atan, tikichdau diisá kajee wekaechatan, ememashtan, iman anenmamchatan;

<sup>5</sup> tutitjachu atan, imá iinuk anentaimtushtan, kakajus kajeshtan, kajegkagtukbautak pujushtan;

<sup>6</sup> pegkegchau takat aidaujaig shiig aneechui, dekaskea nujai shiig aneenai.

<sup>7</sup> Anentak ajamuk: Ashí waitiawai, ashí dekaskeapi tawai, ashí dakawai, ashí katsuntawai.

<sup>8</sup> Anenka duka tuke megkaekashtinai, tujash Apajuí tabauji etsegtutak nagkankatnai, chicham chichashtai chichatash megkaekatnai, unuimat aina dushakam nagkankagtin ainawai.

<sup>9</sup> Wagki machik dekainaji, machik Apajuí tamaush etsegtuinaji.

<sup>10</sup> Tujash shiig dekamu atina nu jegatnai, nunikmatai machik dekainag duka megkaejatnai.

<sup>11</sup> Wika uchi asanuk, chichaaknush, anentaimkunush, nunimainun takunush uchi wajuknaita nuniyajai. Tujash yamaik muun wajasan, uchi asan nunijakbaugnak ukukuiwaitjai.

<sup>12</sup> Yamaik espejonum tuujin waitayama numamtuk wainji, tujash jegatnai igkunisa wainiaktinaitag nunú. Yamaik machik wainji, tujash jegatnai Apajuí ni mina waitkauwa dutiksanuk wainkatnaitag nu.

<sup>13</sup> Yamaiya juik jujú kampakum awa juka megkaekashtin ainawai: dekaskeapi tabau, dakamua nu, anenka dushakam; tujash jujú aina nuig dekas wagaakua duka anenka nuuwai.

## 14

*Apajú chichame chichagkagtuta nu chicham antushtai chichamua nuna nagkae-sauwai*

<sup>1</sup> Anentak ajuttí tusajum kakanmamsatajum, nuniakjum imá senchi wakeetajum Apajú anenjauch wakannumian sujustí tusajum, tujash imá senchi Apajú tabau etsegtuta nunú.

<sup>2</sup> Chicham chichashtai chichaina nunak, aentsun aujuinatsui Apajúin aujak tawai, nuadui antuinatsui wajina tawa nunak, dekachbaun Wakan tabaun chichau asamtai.

<sup>3</sup> Tujash Apajú tabaun etsejuina duka, aents aidaun aujuí pegkegnum yaigta tabaunum, dutikak pegkegnum wakeemitkak anentainash ichichtawai.

<sup>4</sup> Chicham chichashtai chichá duka, imá niina yaimaina nunak tawai; untsu Apajú tabaun etseja duka iglesianash pegkegnum yayawai.

<sup>5</sup> Wakeemainaitjai ashí atumesh chicham chichashtai chichaktajum tusan, tujash imá senchi wakegajai Apajú tabaun etsegkatnume tusan. Juuwai dekas chicham chichashtai chichata nuna nagkaesauk. Tikich chichaman chichaina duka atsumainawai nunak taku tawai tusa etsegtumaina nuna, iglesiashkam pegkegnum yaigbau amain asamtai.

<sup>6</sup> Yatsug aidauh, wi anui taan Apajú iwaintugkamun atum dekamainun, Apajú tabau etsegmainun, jintinkagtumain aina nu dutikmainun, chicham chichashtaiyai augmainaitjim duka atumnak yaimpamait sui.

<sup>7</sup> Wagki kantamku umputai flauta nuniachkush arpa aina nunú wainak pachimkamun shiniagtaik, wájí kantamtaina makí makichik aina dusha tawa tusag dekamait sui.

<sup>8</sup> Nunisag trompetan umpua dushakam, maaniamunum shiyaktin umintsatnume tusa umputaiya nuna umpushtaik, maaniasag uminmain ainatsui.

<sup>9</sup> Atumshakam nunisjumek, chicham shiig antumainchaun aujtamkuish ¿wajuk dekaagmek nunap tujutua titagme? Nuniakug wainak chichá wekaemainai.

<sup>10</sup> Kuashat chicham ju nugka jui chichatai ayá duka, ashí ajuinawai wajintu taku tutaimpaya nunú.

<sup>11</sup> Tujash mina aujta nu, wajina takug tawa nuna dekachkunuk, tikich nugkanmayaya nunin wantinmainaitjai ya aujtawa nuig, niishkam antsag minaish tikich nugkanmayaya nunin wantinmainai.

<sup>12</sup> Nuadui atumek, don aidau wakannumia ajuttí tusa imá senchi wakegau asajum, nu aina nujai senchi takastajum iglesian pegkegnum yaimaina nunú.

<sup>13</sup> Nunin asamtai chicham chichashtain chichauk, Apajúin aujak segamainai ni tabaujin paan dekamituati tusa.

<sup>14</sup> Wi chicham chichashtaiyai Apajúin aujtaik, mina wakanjua duke Apajúinak aujuí, tujash wika dekatsuk juwajai.

<sup>15</sup> ¿Tujash wajukmainaitja? Apajúinak wakanjujai augmainaitjai, tujash antukan augmainaitjai, wakanjujai kantamainaitjai, tujash antukan kantamattajai.

<sup>16</sup> Wagki ame wakanminig Apajú see tutaish tikich ayatak antak eketa dusha, ame tame nuna dekachush ¿tutasaya “aatus atí” tumainaita?

<sup>17</sup> Ame Apajú see tabauk pegkeg amainai; tujash tikichnak pegkegnumak yaimait sui.

<sup>18</sup> Wika atumin nagkaesau chicham chichashtain chichag dui Apajúinak see taji.

<sup>19</sup> Tujash iglesianmag ayatak cinco chicham antumain aina nunak chichaktasan wakegajai, tikich aidaun jintinkunchakam, tikich chichamai diez mil chicham chichamaina nuna dutikt suk.

<sup>20</sup> Yatsug aidauh, uchi anentaimuk wajaigpajum. Dekas uchi anentaimu wajatajum pegkegchau anentaimtushtanum, tujash anentaimtanmag katsuaju ainayatkujum.

<sup>21</sup> Chicham umiktinum: “Ju aents aina junak, aents ditá chichashtain chichaaku aina nuwi ausattajai, dutikamash antugtukchagtatuí”, tiuwai Apu Apajú.

<sup>22</sup> Nuadui chicham chichashtai chichamua duka Apajú nemagchau aina nuna iwaintawai, Jesusai dekaskeapi tuina nudauchui; tujash Apajú tabau etsegbauwa duka Jesusai dekaskeapi tuina nudauwai, Apajú nemagchau aina nudauchui.

<sup>23</sup> Iglesia ijunjag ashí chicham chichashtai chichainamunum, Apajú dekaskeapi tuchau aidau nuniachkush Apajúinun dekachu aina nu wayá antukmag: Imaanuk tu batsatajama, tujamainai.

<sup>24</sup> Untsu Apajuí tabaun ashí etsejuinamunum, Apajuí dekaskeapi tuchau aidau nuniachkush Apajuinun dekachu aina nu wayá antuinakug, dekaskeap tuwinawa tusa, ditá pujutjinash diimainai.

<sup>25</sup> Nuniak ditá anentain uumkau aunash paan wainmamkag tikishmag Apajuin emematuinak, dekas Apajuik atumjai awai tujamainaitjume.

*Apajuik niina emematuinak ijunjag wainak pampaamunak dakitnai*

<sup>26</sup> Nuadui yatsug aidauh, atum ijunbaunmag makí makichik atum ainajum anuiya salmosan kantamai, tikich jintinkagtai, tikich Apajuí iwaintukbaun etsejai, tikich chicham chichashtain chichai, tikich nu chichakbaun nunak taku tawai tusa etsegtau amainai. Tujash ashí duka Jesusa nemajin aidautijum pempeentunisjumek pegkegnum yainikta tabaunum dutikatajum.

<sup>27</sup> Nuniamunum chicham chichashtain chichaidauk jimag nuniachkush kampatum amainai, tujash makí makichik chichak inagnakmatai chichatnume; nunitai makichik, nunak taku tawai tusa etsegtukti.

<sup>28</sup> Tujash nuna taku tawai tusa etsegmain atsutaik, iglesianmag chichamait sui, imá nigki Apajuin aujak chichamainai.

<sup>29</sup> Aantsag profeta aidauh ijunjagchik nuniachkush kampatumchikesh chichamainai. Nunitai tikich aidauk dekaskeash Apajuí tabaunash etseja tusa kuitamas diimain ainawai.

<sup>30</sup> Tuja nuwi aents antak pekaja nuiya, Apajuí dekamtikam makichik wajakí chichataik, nagkamas chichá duka itatkati.

<sup>31</sup> Wagki Apajuí tabauk makí makichik ashí etsegmain ainagme, makichik niyá ashimkamtai, duwi tikitchakam chichamainai; nuniamunum ashí tikich aidauh unuimagtinme nuninak ashí ichichmamjatnume tabaunum.

<sup>32</sup> Apajuí tabaun etsegkatin don ajuina duka, wajutí tumainaita tuja wajutiya tumainchauwaita nunak dita dekamain ainawai.

<sup>33</sup> Wagki Apajuik, agkan pujuta nuna Apajujiyai, nunin asa dakitnai pachimdaetanak. Ashí iglesia pegkejam aina duka nuna nunimain ainawai.

<sup>34</sup> Iglesia ijunjamunmag, nuwa aidauk bitat amainai, wagki ditak chichakainmegka tibauwai. "Nuwak aishin sumitkau atinme", chicham umiktinum tawa nunisag.

<sup>35</sup> Nuwa dekaatatus wakegakug, niina jeen aishin iniasti, wagki iglesia ijunjamunum nuwa chichamua duka maakchau asamtai.

<sup>36</sup> Ju adeagtajum Apajuí chichame etsegbauk atumiin nagkamnachui, nuigtush imá atumkechuitjume Apajuí chichame antukutigmek.

<sup>37</sup> Makichik aentskesh profeta anenmamuk nuniachkush Wakan dekamtijawai tuma-mushkam, Apu Jesús umiktajum tibaun wi agatjim juna dekaati.

<sup>38</sup> Tuja juna dekamainchau dekaapeauk niishkam nunisag dekaachbau juwakti.

<sup>39</sup> Nuadui yatsug aidauh, kakanmamsatajum Apajuí tabau etsejut don ajutí tusajum. Nuniakjumesh chicham chichashtain chichaina duka chichamait sui tiigpajum,

<sup>40</sup> tujash duka ashí dutikatajum shiig kuitamkajum nuigtush wainak pampautsuk makí makichik titinme.

## 15

*Cristo nantakbau*

<sup>1</sup> Yatsug aidauh, aneemtijatasan wakegajime, wi yamajam chicham etsegbau antukuitjum nuig ebetmamjajum batsatjum nuna;

<sup>2</sup> nunin asajum wi yamajam chichaman etsegbauwaitag nuig ebetmamjau akugmek uwemjattagme; nuniachkugmek dekaskeapi tiuwaitjum duka wainkayai.

<sup>3</sup> Wagki nagkamchaknuk wi dekauwaitag dutiksanuk atumnash jintintuawaitjime, Cristuk iina tudaujin jakauwai, Agagbaunum tawa nunisag;

<sup>4</sup> dutika ukusam kampatum tsawanta jui nantakiuwai, Agagbau tawa nunisag;

<sup>5</sup> nunik Cefasan wantintukui, nuwi pujus ni jintinaiji doce aajakajua nunashkam wantintukui.

<sup>6</sup> Duwi pujus quinientos inagkeas yatsut aidau juu tamawaik wantintukui, nuna wainkajuk kuashat yamaikish batsatui, untsu wajumchik jakaje.

<sup>7</sup> Duwi pujus Santiago wantintukui, nunik ashí ni apostolji aina nuna wantintukui.

<sup>8</sup> Nunik inagnamunum minash wantintugkauwai, uchi akiinatin tsawanji jegatsaig akiinama numamtuk wika wajakuitjai.

<sup>9</sup> Nuadui wika apóstol aina nuig imanchauwaitjai, wagki Apajuinu iglesian aintujakú asan apóstol tamak amaitsujai.

<sup>10</sup> Tujash Apajuí wait anenjujua dui, yamaik wi yaitja nunuwaitjai, ni wait anenjak jutijuuauwa duka minaig wainkachui, nuadui wika Apajuí yaintsamtai ditá nagkaesau takasjai.

<sup>11</sup> Wagki wi etsegbau nuniachkush dita etsegbaukesh antukjum Cristo dekaskeapi tiu ainagme.

### *Jakau aidau nantajagtin*

<sup>12</sup> Tujash Jutii Cristuk maa ukusbau nantakiuwai tusa etsegjinish, ¿wagka atum ainajum anuiyash jakaik nantagchatnaitji taush ainawa?

<sup>13</sup> Jakau nantagchagtin agtaik, Cristushkam nantakchau amainai.

<sup>14</sup> Cristo nantakchauwaitkuig, ii chicham etsejag juka wainak amainai; antsag atum Cristui dekaskeapi tajum dushakam wainak amainai.

<sup>15</sup> Nu nuninaitkuig, Apajuik wainka tsanumjaku tu yujamainaitji, Apajuik Cristo jakaun inankiuwai tusa etsegtuinag duka, wagki nunikchau aig tuidau asá, dekaskenun jakau aidaush nantagchagtin ainakuig.

<sup>16</sup> Jakau aidau nantagchagtin ainakuig, Cristush nantakchau amainai.

<sup>17</sup> Cristo nantakchauwaitkuig, atum niini dekaskeapi tajum dushakam wainkayai, nunin asajum tudaunumag batsatjume.

<sup>18</sup> Nunin ataik Cristui dekaskeapi tiaju jinawajua duka megkaejauwap ainawa.

<sup>19</sup> Jutii Cristo dakainag nunú, imá jui pujag duik pegkeg amainaitkuig, tikich aents aina nuna nagkaesau shiig aneasaik pujumaitsuji.

<sup>20</sup> Tujash dekaskenmag Cristuk nantakiuwai. Niiyai dekas jakau nantashtainmaya nagkamas nantakiuwa duka.

<sup>21</sup> Wagki makichik aentsua nuig jata wayauwa nunisag makichik aents nantakiuwa dui jakau aidaush nantajagtinai.

<sup>22</sup> Adagkaig ashí jainaji nunisaik Cristui ashí iwaaku pujutnaitji.

### *Nantamuk juni atinai*

<sup>23</sup> Tujash juka juni atinai: Nagkamchakug Cristo nantakiuwai; Cristo ataktú jui minitta duik, niina nemajin aidau jinawajua nu nantakiagtinai.

<sup>24</sup> Nuniemunum inagnamu atina duka, Cristo ashí apu aidaun, inamin aidaun senchigtin aina nuna senchijin depetuk Apajuin Apajiya nuna ashí idaitustinai ni inamjati tusa.

<sup>25</sup> Cristo Apu wajas inamak pujai, ashí niina shiwaji aidauk depetkamu atinai.

<sup>26</sup> Inagnamunum shiwag depetkamu atina duka, jata nuuwai.

<sup>27</sup> Wagki Apajuik Cristunak: "Ame ashí diístá", tusa idaitusui. Juna tiuwa nunak Apajuinash nigki Cristuk inawai tusag tatsui, Apajuí ashí wajiinak Cristun idaitusui.

<sup>28</sup> Ashí Cristo idaitusbau atina dui, Cristo Apajuí Uchijiya duke Apajuuyai sumimkatnai, ni ashí waji aidauk idaitusbau asa. Nunikmatai Apajuik ashí nigki diistinai.

<sup>29</sup> Nantamu atsutin aish, ¿jakau pachisjum yamimajum dusha waji jukitasagmea yamimagme? jakau aidau tuke nantagchagtin aish, ¿wagka dita pachisjumesh yamimagme?

<sup>30</sup> ¿Tujash wagka jutiish ashí tsawantaish ishamainnumash yujainaji?

<sup>31</sup> Yatsug aidauh, wika ashí tsawantai ishamainnum jamainnum wekaejai, nuniaknush atum Cristo Jesús iina Apujiya nu nemajuinajum nuna anentaimtakun shiig aneajai.

<sup>32</sup> ¿Wajina jukiwaitja efesonmaya kuntin kajena iman aina nujai maanikuitag duish? Jakau nantagchatnaitkuig: "Kashin jinatin asá, yuwawagmi, uwajagmi", tumainaitji.

<sup>33</sup> Tsanuamak aigpajum: "Aents pegkegchaujai tsaniamua nu pujut pegkeg unuimat-jamua nuna emeseawai".

<sup>34</sup> Dekas aneaku pujakjum tudauk takasaigpajum, wagki Atum ainajum anuiya ujumak Apajuin dekachush awai, junak datsaagtinme tusan tajime.

### *Jakau aidaush wajuk nantajagtina ainawa*

<sup>35</sup> Tujash juna iniimush amainai: "¿Jakau aidaush wajuk nantajagtinuk ainawa? ¿Wajuku iyashimkag midiagtinaita?"

<sup>36</sup> Anentainkachuh, jigkai ajaamua duka jaawai nunikmatai nuiya ajak tsapawai.

<sup>37</sup> Trigo ajaakuik tikich ajak akuishkama dukegkau ajatsuk, jigkayí ajataiyai.

<sup>38</sup> Dutikamun Apajuí wajuk wakedawa dutiksag tsapapawai, dutika makí makichik jigkainak waji ajakaita dutiksag suwawai.

<sup>39</sup> Nunisag neje aina dushakam betek ainatsui, aents aina nuna nejeesh ai, kuntin aina nuna nejeesh awai, namak aina nuna nejeesh ai, chigki aina nuna nejeesh awai.

<sup>40</sup> Aantsag nayaimpinmaya iyashish ai, nugkanmaya iyashish awai. Tujash nayaimpinmaya aina nuna shiigmajish ai, nugkanmaya aina nuna shiigmajish awai.



<sup>41</sup> Nunisag etsá etsantaijish ai, nantú etsantaijishá awai, tuja yaya aidau etsantaijish awai; yaya aidaukesh betek etsantuinatsui.

<sup>42</sup> Numamtuk atinai aents jinaw nantajagtina dushakam. Aents jakauk besegtin asamtai ukunui, untsu nantainakug iyash kaugchatnun iyashimak nantakiagtinaí.

<sup>43</sup> Aents jakauk atumnachau asamtai ukunui; nantainakug shiig pegkejan iyashimak nantakiagtinaí, iyash kakaachau ukusbauwa duka senchigtin waigkag nantakiagtinaí.

<sup>44</sup> Nugkaa yutuna duka, nugkaya iyashia nuuwai; nantaktina duka, wakannumia iyashia nuuwai. Awai nugkaa pujaku iyashimtai antsag wakannumia iyashimtaish.

<sup>45</sup> Aatus tawai Agagbaunmashkam: “Nagkamchaku aishmag najanamu Adán aajakua duka, iwaaku wajasui”. Untsu nagkanbaunum Adán aajakua nu Wakan pujatan sukagtin aajakui.

<sup>46</sup> Tujash nayaimpinmaya iyashia duchauwai dekatkauk, nugkanmaya iyashia nuuwai; dui atinai nayaimpinum pujustina duka.

<sup>47</sup> Nagkamchak aishmag aajakua duka, nugka júkí najanamu asa nugkaya aajakui, tikich aishmag aajakua duka, Apu Jesús nayaimpinmaya aajakui.

<sup>48</sup> Nugkaya iyash aina juka, aishmag nugkanmaya najanamua nunú iyash ajutjamainawai; untsu iyash nayaimpinmaya jukitnaitag duka, nayaimpinmaya aishmag aajakua nunú iyash jukitnaitji.

<sup>49</sup> Nunú aishmag nugka najanamu aajakua nuna niimé jukiwaitag nunisaik, nayaimpinmayaya nuna niimé jukitnaitji.

<sup>50</sup> Yatsug aidauh, juna tajime: Neje numpajaiya duka Apajú inamtaijinig wayashtinaí. Iina iyashi besena jushakam, tuke besechu atina nuig waimaitsui.

<sup>51</sup> Tujash Apajuinu yaunchuk dekaachbau aajakua nuna dekaatnume tusan wakegajai: Jutiik ashí jinashtinaitji, tujash ashí yapajinkau agtinaitji,

<sup>52</sup> waamak piit tsuwisaik niimtayama numamtuk, trompeta inagnamun shinuktina dui. Wagki trompeta shinuktina nu antamuik jakau aidauk nantajagtinaí ajumaish jakashtinun iyashimkag, nuniai jutií iwaaku aidautik iyashí yagpam agtinaitji.

<sup>53</sup> Dekas atumnawai iyash besena nu, ajumaish besegchatin atinme tusa; iyash jinin aina jushakam, ajumaish tuke jachau atinme tusa.

<sup>54</sup> Nunik iyash besena nu ajumaish besegchatnun iyashimkamtai, nunisag iyash jauwa jushakam ajumaish jachau atinun iyashimkamtaig, Agagbaunum:

“Jaamua duka depetkamu juwake”, tawa nu uminkatnai.

<sup>55</sup> “¿Jataiyah, tuwí ajutjamua, ame magkagtutaigmesh? ¿Ukumataiyah, tuwí ajutjamua, ame depetmataigmesh?”

<sup>56</sup> Jataiya nuna magkagtutaig tudauwa nuuwai, tudau senchijiya duka chicham umiktina nuuwai

<sup>57</sup> Tujash Apajuiya duke see tiyagmi,

iina Apuji Jesucristui depetmatan amasua dui.

<sup>58</sup> Nuadui mina yatsug aneetaig aidauwah, ebetmamjajum pujusjum Apu Jesusa takatjig tuke mijattsuk ematajum; wagki atumek dekagme, Cristunu takaajum duka wainkagmek takaatsjume.

## 16

### *Jerusalemnia Cristun nemajuidau susatin kuichik anentag ijumjamu*

<sup>1</sup> Jesusa nemajin pegkejam aidau yaigtin kuichik anentag ijumkugmek, galacianmaya iglesia aidau jintintuabiag dutiksagmek atumesh dutikatajum.

<sup>2</sup> Ashí tumigtin mákí makichkitijum wajupa kuichkish jikiugme nu akantsajum ukú pujutajum. Dutikamu asamtai wi taattag nuaduik kuichik ijumjata tabauk atsutí.

<sup>3</sup> Wi anui taan atum aents etegkawagmin cartan agajan susan Jerusalén awematjai, atum kuichik anenjauch ijumjajum nuna dekaatnume tusan.

<sup>4</sup> Nunimainaitkuig, wisha ditajai ijunjan wemainaitjai.

<sup>5</sup> Wi minaknuk, Macedoniaya atú minittajai, nuwi juakin atumin minittajai.

<sup>6</sup> Nuniknuk atumjai ujumak tsawan pujusta tajai, nuniachkunush yumi tepeatta nunak anui pujusnukeash inagkeakintag tajai, nunikan weakuish atum yainkamnujum tusan.

<sup>7</sup> Nuniau asan ayatak nagkaemaku wainká ukutnak dakitajai, dukapech tsawan atumiin pujusta tau asan, Apu Jesusash aatus wakegakuig.

<sup>8</sup> Tujash Éfeso pujuttajai fiesta Pentecostés inagkeakta tau asan,

<sup>9</sup> wagki waiti muun ujani ajutui shiig takamaina nu, kuashat shiwag ajutainigkishkam.

<sup>10</sup> Timoteo anui taakuish atumjai shiig aneas juwamaina nu dutikatajum, niishkam wi Apu Jesucristun takajag nunak takaju asamtai.

<sup>11</sup> Nunin asamtai makichkitigmekesh imanchau diisaigpajum; dekas yaigtajum, shiig agkan minash taa waitkati, wagki tikich yatsug aina nujai dakaku pujaji.

<sup>12</sup> Yatsug Apolon kuashtá segajai, tikich yatsug aina nujai atumin ijagtamsati tusan; tujash yamaikik anui minimainjig wakegamuk atsujuui, tuwig minimainji ajit dui minittawai.

*Inagnaku akatmabau*

<sup>13</sup> Aneaku pujustajum; nuniakjum dekaskeapi tabaugmia nuig ebetmamjatajum; wajuu, senchi atajum.

<sup>14</sup> Ashí atum takaajum duka, anenkai takastajum.

<sup>15</sup> Yatsug aidauh atumek dekaagme, Acayanmaya Estéfanos niina nuwe, uchijí aidaujai dekatkauk Apajui nemagkajua duka, nunikaju asag Jesusan dekaskeapi tuidau pegkejam aina nuna senchi yainawai.

<sup>16</sup> Nuadui atumek ju aents yaimainak takainak imaanina junin aina nu tabau antugkatajum.

<sup>17</sup> Shiig anejai Estéfanos, Fortunato, Acaico aatus tajutuawag atum yainmaina nuna dita kuashtat yaintuidau asagmatai.

<sup>18</sup> Dita minak wakanjuish ichichtujajui, aikasag atumnashkam ichichtamjajui. Aents junin aina nu puyatjusjum diimain ainagme.

<sup>19</sup> Iglesia asianmaya kumpamjamainawai. Aantsag Aquila ni nuwe Priscilajai ditá jeenig iglesia ijunaina dushakam Apu Jesusa daajin kumpamjamainawai.

<sup>20</sup> Ashí yatsug aidau kumpamjamainawai. Antsagmek atumesh makí makichkitijum pempeentunisjumek shiig anendaisajum kumpamdaiyatajum.

<sup>21</sup> Wi Pablon ju kumpamdaiyamunak mina uwejuui agatjime.

<sup>22</sup> Makichik aentskesh Apu Jesusan aneachuk, ¡nigki suwimkan jukittawai! Wagki Apu Jesusak wamak taattawai.

<sup>23</sup> Atumnash Apu Jesús wait anenjamjatnume.

<sup>24</sup> Wika atumnak Cristo Jesusan aneag dutiksanuk anejime.

Aatus atí.

## Pablo awentsaik carta agaja corintonmaya aidau awetimu

### *Kumpamkagtamu*

<sup>1</sup> Witjai Pabloitjai, minak Apajuí wakegau asa Cristo Jesusa etsegtukti tusa etegtua awetiuwai, yatsug Timoteojai pujusan atum iglesia Apajuinu aidautijum yaakat Corinto batsatjum nuna, ashí Jesusa nemajin aidautijum Acaya nugkanum batsatjum nunashkam,

<sup>2</sup> Apajuí iina Apajiya nunú, iina Apuji Jesucristujai wait anenjamag shiig agkan pujutan amastinme.

### *Pablo waitiamuji*

<sup>3</sup> Emematiagmi Apajuí, iina Apuji Jesucristo Apajiya nu, iina Apají wait anenkagtin, Apajuí ashí ichichmamtan sukagtina nunú,

<sup>4</sup> nigki ichichmamtanash sujamui ashí ii waitiamunmash, ashí tikich waitiagtaish ditashkam ichichkagtugtinme, Apajuí iina ichichmamtan amasua dutiksag tujamu asa.

<sup>5</sup> Wagki Cristo waittsauwa nunisaik jutiish kuashat waituinaji, nunisaik imá Cristuig kuashat ichichmabaush ajutjamji.

<sup>6</sup> Jutii waituinag duka, atumesh ichichmamja pujusjum uwemjatajum tabaunum nuninaji; tuja jutii ichichmabau ajutjamaina dushakam, atumesh ii waituinag junisjumek waitiakjumesh, ichichmamja pujusjum emamkesjum katsunjatajum tabaunum waituinaji.

<sup>7</sup> Atuminig ebetja dakamu ajutjamji, wagki dekanaji atumek jutii waituinag nunisjumek waitiakjumesh, jutii ichichmamainag nunisjumek ichichmamaidau asagmin.

<sup>8</sup> Yatsug aidauh, jutii Asia nugkanum batsamsaja kuashat utugchatnum waittsabiag nu dekaatajum tusan wakegajai. Jutiik tikima atsanja nagkaemainchaunum jegantú asaja, iwakuap pujuttaji tusa dakamainuk atsugtamsabi,

<sup>9</sup> nuniaku chicham dekaeuwaja mantamnati tibauwa nunin dekapmbiaiji; tujash nu dekamtijamabi iik kajintsá anentaimtumatsuk, Apajuí aents jakaunash inanna nuwi kajintsá anentaimtan;

<sup>10</sup> nuniau asajin Apajuí jutii iman ishamainnum pujajinish jiigmaki uwentijamjabi, nuniau asa yamaishkam dutijamsag agkanmitkagmasagké awai. Dutijamu asamtai nigkiap atakea duwish agkanmitkagmatnaita tusa dakamu ajutjamji;

<sup>11</sup> atumesh jutii pachijattsajum Apajuí aukagtakjuminig. Kuashat jutii pachijattsajum Apajuí segatkagtiagtaik, kuashat Apajuinashkam see tiagatui anenjauch Apajuí sujabau juinag nuna diisag.

### *Pablo Corinto wechamu*

<sup>12</sup> Wagki jutii eme anenmamag duka juuwai: Iina anentaimtajiya nu ujpaji Apajuí dekaskejiya nujash jutiish wajuk imagnisaish pujusbaiji ju nugka juish, tuja atumjai ijunja pujusmayag duish. Jutiik aents ditá yachajin iwainmamaina nunikchabiaji, Apajuí wait anenkagta nujai iwainmamkabiaiji.

<sup>13</sup> Wi papiin agatjamjim nuig, tikich waji pachisaik atum aukgumesh antukcham-nukesh agatjachbaijime, nuniau asamtai shiig ausampap dekawagtatua tajime,

<sup>14</sup> duka machik dekaugme, jutii aidautik atum eme anentam agtinaitag nunú, atumshakam antsagmek jutii eme anentam agtinaitjume tsawan Apu Jesús minitna dui.

<sup>15</sup> Nuna aaja kajintsá anentaimu asan, dekatkauk atumná taan wainkatjime tusan anentaimsabiajai, aaja nuniakun jimajá ijagsatjime tau asan;

<sup>16</sup> Macedonia nagkaemakun ijagsau asan, waketkunush awentsanuk ijagsatjime tusan. Nuna nuniakui atum minashkam wi Judea weakuish yainkamnujum tau asan.

<sup>17</sup> Wi nuna aaja nuniktajai tiuwaitag nunash ¿anentainkasnuk tiuwaitag? ¿Nuniachkunush wainak aents dutikachtinaitak dutikatjai tinu aina nuniaknuk taja?

<sup>18</sup> Tujash Apajuí tibuujinak betek umina nu dekgatjami jutii “dutikatjai tiuwaitku dutikashtajai” tatsug nunak.

<sup>19</sup> Wagki wi, Silvano, Timoteo aaja Jesucristo Apajuí Uchijiya nu pachisaja ujakbaijime. “Jesucristuk dutikatjai ti, ajuma dui dutikashtajai” tujakchuwai, ni tibuujinak imatiksag betek umiakui.

<sup>20</sup> Wagki Apajuí ashí anagkagtuamua duka, Cristui ashí uminkauwai. Nuadui Apajuí emematuinakuik: “Aatus atí”, tuinaji Cristo Jesús pachisa.

<sup>21</sup> Jutii aidautin, atumnashkam Apajuí etegtamawag Cristuwai ebetjamkauwai;

<sup>22</sup> Nuna dutijama niinu etamak selló awajtamkauwai, dutika eemtikak iina anentain Wakanin sujamsajui, ni anagtamamua nu jukitin asajin

<sup>23</sup> Tujash wi Corinto minichag nunak, anui taan atumin kakaakan chichagkun wake emeskaijim tusan nunikag nunak Apajuí dekgatawai. Nuna wi dekaskataik Apajuí suwimkan sujusti tajai.

<sup>24</sup> Jutiik atum dekaskapepi tajum duka iinuk emamaitsuji, jutiik wakegaji atum yaigtasa shiig aneamu ajutjamtinme tusa, dekaskapepi tabauwa nuig ebetmamjajum pujau asagmin.

## 2

<sup>1</sup> Tau asan, ataktuk wakettsankek ijagsashtajai ditan wake besemag anentaimtiká wekayig tusan juwakbaijai.

<sup>2</sup> Wagki atumin wi wake besemag anentaimtikaish, ¿yaki minash shiijash aneemtijusti wi atumin wake besemag anentaimtikaish?

<sup>3</sup> Nuadui ayatak agatjabiajime, wi anui taamtai atum mina shiig aneemtijumaina nu wake besemag sujusajum tabaunum; tujash kajintsan anentaibaijai ashí atum aidautigmek wi shiig aneakuig ashí shiig aneemainaitjum nunak;

<sup>4</sup> wagki senchi wake besemag anentaimkun, anentaijuish waitiakun kuashat negá negajai agajan awetibiajim nunak wake besemag anentaimjatnume tusanuk dutikachbaijai, ayatak atumin shiig senchi aneamu ajuta nuna dekatnume tabaunum dutikabaijai.

*Pablo tsagkugkagtugbau*

<sup>5</sup> Tujash makichik aents mina wake besemag anentaimtijuja nunak imá minakek dutijuache, ashí atumnash imatiksagkeap dutijamawaje taja nunak, nuní uwaekanuk tumaitsujai.

<sup>6</sup> Atum ainajum anuiya imá kuashtatijum nu aents suwimak susauwaitjum duka maake, anuig atí.

<sup>7</sup> Yamaik atumek tsagkujajum anentai ichichtugtatum, wake besemag ane anentaimkawa kakaakchaunum jegantai.

<sup>8</sup> Nuadui atum yaunchuk ni aneajakuitjum dutiksagmek aneamu iwaintuktatum tusan segajime.

<sup>9</sup> Duik juna pachisan agatjabiajime, dekaskataik tusan tabaunash ashí umikagtimash tusan dekapsatasan.

<sup>10</sup> Atum aidautijum ya tsagkujagme wishakam nunak tsagkujattajai. Nunak tsagkugmain ajusú asamtai tsagkujamjai atumi pachisan Cristo eemtin.

<sup>11</sup> Nunú aaja dutikachbaunum Satanás eteentugma tsanugmamaina nu shiig dekaidau asaja.

*Pablo yaakat Troas jegá shiig juwakchamu*

<sup>12</sup> Yamajam chichaman Cristo pachisan etsegkatasan yaakat Troas jegaa ai, Apu Jesús waitin ujatjimi;

<sup>13</sup> tujash yatsug Titon wainkachu asan shiig juwamainchau dekapeakun, ditanak akattsan ukuakun Macedonia nugkanum webaijai.

*Cristui depetmata awai*

<sup>14</sup> See tajai Apajuin, Cristui tuke depetbau etama dui, jutii chicham etsegbaushkam ashí yantamnum pampaag wegau asamtai, pegkeg kugkuina iman dekapenak kuashat dekaatatus wakegainawai.

<sup>15</sup> Jutii aidautik Cristo Apajuiyai iwaintama nuig incienso pegkejan kugkuwama iman ainaji. Nunú kugkuina duka dapampaewai uwemjatin aina nui, megkaejatin aina nuishkam.

<sup>16</sup> Nunin asamtai megkaejagtin aina duka Apajuí chichamenak jakau mejegama iman diinawai; untsu uwemjatin pujuta jukiagtin aina duka Apajuí chichamenak kugkuin pegkeja iman dekapenawai, ¿ya jujú chicham aidau etsegmainnash umintsash awa?

<sup>17</sup> Jutiik tikich aidau kuichkijinatasag Apajuí chichamen yapajiwag waitá etsejuina nuninuk ainatsji, dekaskenun Apajuí awemamu asá, Apajuí eemtin Cristo daajin etsejuinaji.

## 3

*Yamajam chicham apakbauwa nu pachisa etsegbau*

<sup>1</sup> Juna pachisan takuish, ataktú nigki chichagmamak tuu wekaewai tujutmain ainatsjume, çatsa tikich wajukena nunikaik jutiin chichamkagtuinak carta agagbau iwaintumainaitjim, nuniachkush atumek carta agajam sukagtumainaitjum?

<sup>2</sup> Atum ainagme jutii cartaji, iina anentai aina nui agagbau aidautigmek; nunin asagmin ashí aents carta agagbaun wainak augmaina dutika shiig dekagmainawai.

<sup>3</sup> Atum ainagme, Cristo papinum paan agagbauwa nuna aidautigmek, nunak tintai agatia dutijamachajui, jutii chicham etsegbau antukuitjum dui, Apajuí tuke pujuuwa nuna Wakanin dutijamawajui, kayanum agagbauwa dutiktuk iina anentai nejea nuwi dutikauwai.

<sup>4</sup> Apajuiyai kajintsá anentaimeidau asá, Cristo dutikauwa duka dekaskeapi tuinaji.

<sup>5</sup> Juka iina senchijinig imatika takainaji tumamaitsuji, jutii senchi takainag duka Apajuinunia minawai.

<sup>6</sup> Nigki unuitamjauwai yamajam chicham apakbauwa nuna etsejuinak yaimkatnume tujamu asa. Duka chicham umiktina duchauwai, Wakan takaamua nuuwei, wagki chicham umiktina duka jatanum ejekagtawai, untsu Wakania duka pujutan sukagtina.

<sup>7</sup> Chicham umiktin aidau kayanum agagbau iman aajakua nu takaamu jatanum ejekagtiuwa nunú, Moisesa yapiin winchamtin awajtusmatai, Israel aidauk Moisesa yapiinak diimainchau dekapsaji. Duka megkaekatnaitak nunikui.

<sup>8</sup> ¿Dekas aan nagkaemas iman tsaaptin amainchaukait Wakan jutiini takaamua nunú?

<sup>9</sup> Chicham umiktin takaajakbauwa duka bakujatmainaitak dekas iman aajakui; aan nagkaemas imanai dekas Apajuí aentsun bakumainchau ema nu etsejuinaku takainag duka.

<sup>10</sup> Yaunchuk iman aajakua duka, yamaik imanchauwai, dekas iman wagaakua duka yamajam chicham apakbauwa nuuwei.

<sup>11</sup> Wagki chicham umiktin megkaekatnaitak iman aajakua nuna nagkaesau tuke atinai yamajam chichama juka.

<sup>12</sup> Nuadui nunú dakaidau asaja shiig kajintsá chichagkagtuinaji.

<sup>13</sup> Moisés yapiin winchamtin wajasú asa, ju megkagun Israel aidau wainkainum tusa, jaanchi yapiin ejakua numamtukek jutiik wajainatsji.

<sup>14</sup> Tujash ditak dekamainchau dekapajui, nuadui yamai tsawanta jui yaunchuk chicham apakbau aajakua nuna aujuinakush antuinatsui, nunisag jaanch ejatkamua nunin juwatkejui, nunak imá Cristuk jujumainai.

<sup>15</sup> Moisés agagbauwa nuna yamai tsawanta jui aujuinakush, jaanchi ejatkamua nunin ditá anentainig ajuinawai

<sup>16</sup> Tujash Apu Jesusai sujumaniagtaik jaanch ejatkamua nunina nunak jujawai.

<sup>17</sup> Wagki Apu Jesusak Wakani, nunin asa Apu Jesusa Wakaní tuwí awa nuwi agkanbaetak awai.

<sup>18</sup> Nunin asa ashí jutii aidautinak, yapi ejatjamu atsau asamtai espejonum wainmam-tayama numamtuk awajtamji Apu Jesusa imanjiya nunú, nunin asajin yapagtama niya imanuk etamji Apu Jesús, nunak Wakania nu dutijamji.

## 4

<sup>1</sup> Jutiinak Apajuí wait anenjamag ju takatan amasú asamtai mijatatsji.

<sup>2</sup> Nuniaku uuká takaamu datsanmain aina duka ashí idaisau asaja, tsanumsaikish chichatsuk, Apajuí chichamesh yapajia etsegsuk, dekaskea duke paan etseju asá, aents aidash pegkeg anentaimtusa diyam Apajuí emtinish ainaji.

<sup>3</sup> Tujash jutii yamajam chicham etsejuinag nu ejakbauwa nuninaitkug, imá megkae-jatin aina nuig nuninai.

<sup>4</sup> Dita dekaskeapi tuinatsi nunak, Iwanch ju nugká apujiya nu antumainchau emamu asag nuninawai. Nuadui yamajam chicham Cristo pachisa etsegbauwa duka tsaaptin winchamtina imanai; duka Apu Apajuí niimega nunú asa.

<sup>5</sup> Chichagkagtuinag duka iinu pachisaik chichatsji, Jesucristo dekas Apua nu pachisa chichagkagtuinaji; tujash jutiik Jesucristo aneamunum, atumi inatigmia nunin ainaji tumamji.

<sup>6</sup> Wagki Apajuí, suwen tsaaptin wajasú tusa tsaaptin emauwa duke jutii anentainash tsaaptin awajsauwai, Apajuí imanjiya nunú Apu Jesucristo yapiin etsanta nuna tikich aidanash tsaaptinun iwaintukti tusa.

### *Kajintsá anentaibauwai pujamu*

<sup>7</sup> Jutiik, ichinak duwe najanamunum waji akik aidau egketiama dutikamu ainaji, nunak Apajuí niina senchiji muunta nuna iwainaktatus dutikauwai, duka iina senchijichui.

<sup>8</sup> Nuadui kuashat waitiamu ajutjamainakuish pimpiatsji, uyumamu ajutjamainakuish waugtuinatsji.

<sup>9</sup> Iina shiwaji aidau waitkagmagtaish imá iinakek Apajuik idaitamtsuji, suwimjamainakush mantamainatsui.

<sup>10</sup> Tuwí wegaji nuig, Jesusan maatatus utujujakú aina imatijamainaji; jutii diigmasag Jesusnash imatiksagkeap waitkajakú ainawa tusag dekatnume tabaunum.

<sup>11</sup> Nuadui jutiiik, Jesús pachisa etsegbaunum ni mantamdauwa nunisaik mantamnatasa umintá yujainaji, aaja nuniemunum Jesusa pujutji jutii iyashí jauwa nuish iwainakta tabaunum.

<sup>12</sup> Jutii mantamnamainnum yujasá chicham etsegakmunum, atumesh pujut tuke atina nu jukiú ainagme.

<sup>13</sup> Tujash agagbauwa nuwi: “Dekaskeapi tabau ajutu asantai chichakmajai” tawai, nuadui jutiihskam nunú wakanik ajutjamu asantai dutiksaik chichainaji.

<sup>14</sup> Dekainaji Apajuí Apu Jesusan inankiuwa dutiksag jutiiinash inantamkiag, atumjai ijupag niina pujutaijin jujamkiagtina duka.

<sup>15</sup> Ju ashí waitiamu ajutjama duka atum aneamunum imanika waituinaji, kuashat aents aidau Apajuí anentag wait anenjamu asag, aan kuashat aents Apajuinash see tuwinak niina imanjiya nunash dekatnume tabaunum.

<sup>16</sup> Nuadui iina iyashí muuntuch weak mijamtaishkam, iina wakaniya nu kashí kashinig senchimeakui mijamtsuji.

<sup>17</sup> Wagki jui waitiamu aina duka wamak nagkaebau ainawai, Apajuí imanji tuke atinum sujamsatna nuuwai waitiamu aina nuna nagkaesauwa duka.

<sup>18</sup> Nunin asantai jutiiik waji paan wainmain aina duka diischagmi, dekas wainchamu aina nu diisagmi, wagki waji wainainag juka megkaejatin ainawai; tujash wainchamu aina nuuwai tuke atina duka.

## 5

<sup>1</sup> Jutiiik, ju nugka juig jega jegamkamu tuke achauwa nunin ainaji; tujash dekainaji iina iyashí jega mamumaina numamtuk wajataish, Apajuí umigtamkamu jega tuke atin aents jegamkachbau nayaimpinum ajutjama nunú.

<sup>2</sup> Nuadui senchi wakegamu ajutjamji nayaimpinum yamajam iyashimka pujustinaitag nunú jukita tabaunum;

<sup>3</sup> nunika wisú aig tusa jaanch nugkutiamu numamtuk wajaktinaitji.

<sup>4</sup> Dekaskenum jega tuke achauwa nuninum pujusaja senchi waituinaku pimipiki batsatji, dui wisuwa nunin atasaike wakegainatsji, dekas yamajam iyashia nu anugjamu asajin iyash jauwa nunak pujuta nu emegkaktinai;

<sup>5</sup> nu nuniktinnak Apajuí umikui, nuadui nu jukitin asajin Wakaní Pegkejin emtikak amasui.

<sup>6</sup> Nuadui tuke kajintsá batsatainaji, wagki iina iyashiya jujai pujakuik, Apu Jesusjai atushat pujuinag nu dekaidau asaja.

<sup>7</sup> Yamaik dekaskeapi tabauwai pujuinaji, wainchayatku;

<sup>8</sup> tujash kajintsá anentaimji, nuniau asá wakegainaji jujú iyash ukuinaku Apu Jesusjai ijunja pujustasa.

<sup>9</sup> Nuadui iwaaku pujakuish, nuniachkuish niijai ijunja pujakuishkam ni shiig awajkata tabaunum kakanmamji.

<sup>10</sup> Wagki tsawan jegatnai ashí jutii aidauti Cristo eemtin ijunjatnaitag nunú, nunika ajin makí makichik aents nugká pujusá takasbauji pegkeg ataish, tuja pegkegchau ataishkam dutiksag sujamsatna nu.

### *Pablo pujutji*

<sup>11</sup> Nuadui Apu Jesús puyatjusa emematmaina nu dekau asaja, aents aidaush niini dekaskeapi titinme tusa imatjuinaji, jutiiinak Apajuí shiig dekgatamji, nunin asantai atumesh nuninuk anentaibau ajutjamainaitjume.

<sup>12</sup> Juka ataktú atumiin chichagmamku tatsuji; ayatak jutii eme anenkagtumainaitjum nu pachisa taji, nuniakjum aents aidau pegkeg anentaiyai takaak wajukmaina nuninak ememaina nu, wi dutikag nu ujakminjum tau asan.

<sup>13</sup> ¿Atumesh jutiiik pachimasa chichau asajinig, auk imaankau asag tu yujainawai tukagtuinajum? Imaankau asaja, juka Apajuí ememattasa taji, tujash imaankau asajaik chichagkagtuinatsji, juka atum yaigkagtasaja etsejuinaji.

<sup>14</sup> Cristo senchi anempa nu dekaidau asaja, niina chichameg wakesa etsejuinaji. Nigka ashí aents aidaunum mantamdauwa dui, ni nemajuinaku ashí pegkegchau takatak idaisau asá jakaujai betek ainaji.

<sup>15</sup> Cristuk ashí aentsnum mantamdauwai, nunin asamtai aents niina nemajuidauk, dita wakegamun takaa batsamtsuk, Cristo ditai mantamna nantakiuwa nudaun takamain ainawai.

<sup>16</sup> Nuadui jutiik yamai nagkamsaik makichik aentskesh ju nugkayati waininag nuni niimtinuk waintsuji, nuigtú yaunchuk Cristun wainkau aina nuni niimtinuk niish waintsuji.

<sup>17</sup> Nuadui aents Cristun nemajuidauk duik pujutinak idaiyinak, yamajam pujutan jukiaju asag, dekas yamajam aents ainawai.

<sup>18</sup> Ashí nu aina nunak imá Apajuik dutikawai, Cristun awetugma nijai igkumti-jamkauwa dui, dutijabau asa jutiinashkam, tikich aents aidaush, Apajuijai pujutjum iwajatajum tusa ujaktajum tujabiuwai.

<sup>19</sup> Cristunak ashí aents aidauk Apajuijai epegtuniatnume tusa Apajuik awemauwai. Dutikamu asa, iina tudauji aidaunash pachitjamtsuk idaitugmasui. Tuja jutiinak: Apajuijai pujutjum iwajatajum, tusa chichagkagtuktajum tujabiuwai.

<sup>20</sup> Nunin asamtai jutiin, Cristo mina chichameg wi tumainaitag dutiksagmek etseg-tugkatajum tusa awemamu asaja, Apajuí atumin tujaamaina nunak jutiin tujamiu asamtai, Cristo tawa dutiksanuk tajime: Pujutjum Apajuijai iwajatajum.

<sup>21</sup> Cristuk makichkish tudau aina nunak takaschauwai, nunikunak Apajuí jutií tudaujin niinak aents tudaujai betekak emauwai. Ni nunikbaujin iishkam uwemja nijai ijunjau asajin, yamaikish tudau ainajinig, pegkejan takauwa iman diigmaji.

## 6

<sup>1</sup> Jutiik Apajuí chichame etsegbaunum yaimin asaja segajime: Apajuí wait anenkagta-mun iwaintugmakua nu ayatak antukjum idaisaipajum tusan.

<sup>2</sup> Wagki Ni aatus tawai:

“Tsawan wi antugmain jegau asamtai untsugkumin aikmajame, dutikan tsawan uwemainjum jegagtamatai yaigmajame”.

Nu tsawantak yamaiya juuwai Apajuí aigmamainuk. ¡Yamaiya juuwai tsawan uwe-maina dushakam!

*Pablo waittsamuji*

<sup>3</sup> Makichkish pegkegchau iwaintuinatsji, ii takainag nuna pegkegchau chichajinum tuidau asaja.

<sup>4</sup> Ayatak dekas Apajuin inakempap ainawa tusa dekagmatnume tabaunum, waiti-akuish emamkesa, atsumakuish, utugchat akuish katsuntuinaji;

<sup>5</sup> asutamainakuish, achipak egkepainakuish, ijuntugmag jiyapainakuish, imanisaik takainaku, kanutskesh tuke tsawampabiaji, yujumkash yutsuk yujabiaji,

<sup>6</sup> nuniaku iwainmabaiji iina pujutinish pegkegchau atsugtabau, ii dekamushkam, wait anenkagtam, Wakani Pegkeji jutiini pujau asa dekaskenum anejatbauwa dushakam;

<sup>7</sup> chicham dekaskea nu etsetganum nuigtush jutiini Apajuí senchiji ajutjama nujai, jutií imagnisa pujuinaku tikich aidau chicham ujaku ii shiwaji aina nui ayamjumtash sujamji;

<sup>8</sup> eme anenjamush ainai, dakitjamaidaush ainawai, pegkegchau chichagtamainai, pegkejan chichagtamush ainawai, jutiik wait ainakuish, tujash dekaskenmag dekaskea nu chichau ainaji;

<sup>9</sup> wainchatai utugmaina dutijamiagtaish tikichik shiig waipainaji, jakattaku yujakuish iwaaku pujuinaji, suwimkan sujamainakush mantamainatsui;

<sup>10</sup> diismakek wake besemag ainaji, tujash tuke shiig aneasa pujuinaji, ujunauch ainakuish tikichik wiyakchamitkainaji, jutiinu atsugtamainakush ashí ajutjamainawai.

<sup>11</sup> Yatsug corintionmaya aidauwah, jutiik dekaskenum ii anentaibaujiya duka uutsuk ashí ujakbaijime.

<sup>12</sup> Jutiik makichkish atum uugkamuk atsugtami, tujash atumek uuká anentaimjume.

<sup>13</sup> Nunin asagmin (uchig anentsan tajime), wait aneasjum minash atum anentaibau ujatkatajum, wi atumin uutsuk tajim aikasjumek.

*Jutiik Apajuí jee ainaji*

<sup>14</sup> Atumek Jesusa dekaskeapi tuchau aina nujai ijunsa takata duka wakejumaitsugme, wagki ¿pegkeja dusha pegkegchajauish wajuk atuemainaita? ¿Nuigtush utugsaya tsaaptina dusha suwejaish apatdaimainaita?

<sup>15</sup> Cristuk Iwanchjaig ijunmaitsui. Nunisag Cristun nemajuidaushkam Cristun nemagchau aina nujaig ijunmaitsui.

<sup>16</sup> Jega Apajuí ememattaiya duka, apajuintai dakumkamu aina nujaig makichkish apaemait sui. Wagki jutiik Apajuí tuke pujuuwa nuna jee ainaji, nuadui Apajuí chichaak:

“Ditai pujustajai, nunikan ditajaig wetajai. Dita mina aentsug atinme, nuninakui wi dita Apajuiji atajai”, tiuwai.

17 Nuadui Apu Apajui:

“Tupanjatajum pegkegchaun takaina duka, nuniakjum kanaktajum pegkegchau aina duka takasaigpajum, nunikagmin wi atumnak jukitjime.

18 Wi atumin Apa atajai, tuja atum mina uchig, mina nawantug atajum, tiuwai Apu ashí senchigtina nunú”.

## 7

<sup>1</sup> Nu aatus anagtamamu aidau ajutjamaidau asamtai aneetaig yatsug aidauh, ashí pegkegchau aidau iina iyashin, wakannash pegkegchau etugtmain aina duka idaisagmi. Apajui ajantusa diinaku, aan nagkaemasa pegketasa kakanmamsagmi.

*Pablo shiig aneamu*

<sup>2</sup> Atumi anentaiminish jutiijaish shiig juwaktajum, wagki makichik aentskesh pegkegchau takagsachbaiji, makichkish pegkegchau etamainuk jintintuachbaijime, makichik aentskesh wainka inakuik waitkaschabaiji.

<sup>3</sup> Wika junak atumin bakutasan tatsujime, yaunchuk tibaijim dutiksanuk, atumek mina anentaijui pujagme, jaaknush iwaaku pujaknush atumjaig pujustasan wakegajai.

<sup>4</sup> Dekas uutsuk tajime, atumiin ememasa anentaibau ajutui, nuniakun kuashat ichichmamjai, ashí waitiamu ajutjamkuish shiig aneamu ajutui.

<sup>5</sup> Macedonia taabiag duik iina iyashig ayamtijashbaiji, ashí agaya aidauwaitkagmagmayi; pampanjamainaku ishankagtakuish waitbaiji.

<sup>6</sup> Tujash Apajui aents pimpikaju aidau ichichmatan suuwa nu, Titon awetugma jutiinash anentain ichichtamjai.

<sup>7</sup> Tujash imá ni taa duikik nunikchamjai, ni atumin waipak ichichmamjau asa, atum jutii waijatkatasata wakegamun, nuigtú wi waitiamu antukjum kuashat wake besemag batsatkujum, uyumatjuinajum nuna ujatkamtai antukan, nuní nagkaemasan shiig aneasmajai.

<sup>8</sup> Tuja wi papi agaja awemabiag nu wainkajum wake besemag anentainsauwaitjume, nunak wisha waittsabaijai, tujash yamaik waitiatsjai, wagki papiin agatjabaijim nu wainkajum ujumak tsawantai wake besemag pujusú asagmin.

<sup>9</sup> Yamaik shiig anejai, nunak atum wake besemag batsamsaujum dui nuniatsjai; atum wake besemag batsatkujum Apajuiyai ataktú wakitkiujum dui. Duka Apajui dutijamkui nunikugme, nuadui atumin pegkegchau awagmamaina duka dutikachjiapi taji.

<sup>10</sup> Apajui wake besemag anentaimtijama nunak pujutjin yapajia uwemjati tusa dutijamui, nuniau asamtai nu anentaimtaku waitú pujumainuk atsawai. Untsu nugkanmaya wake besemag awa duka jatanum ejekagtawai.

<sup>11</sup> Apajui wake besemjan itagtama duish wajukaugme nu diistajum, iwajuk yapajin-augme nunú! Atumiin utugchat awa nunú puyatjusum shiig dekaugme nuniakjum minashkam ayamjutkaugme. Kajeamush nuigtú ishamaush ajutjamsaje, nuniakjumesh mina waitkatasajum wakekaugme, nuniau asajum pegkegchaun takaa dusha suwimak susaugme. Nu ashí dutikaujum dui iwainmamkaugme, atumesh dekas nunú pegkegchau dakituinajum duka.

<sup>12</sup> Wi papiin agagmayag nunak aents pegkegchaun takasua nuna anentaimtusnukesh agagchabaijai. Nuniachkunush aents waitkasbaunakesh agatjachbaijai. Ayatak atum jutii puyatjusum antugkagtajum nuna Apajui eemtin iwainakatasan agatjamjime.

<sup>13</sup> Ashí nu aina duka ichichmamtan sujamsauwai, atum ichichmamjauwaitjum nunisag. Tujash nunú ichichmamjamua nuní nagkaemasa shiig aneasmajai, wagki Tito shiig dakujus pujau wainku, ashí dita aidauwap wakanin ichichmamtan susaje tusa.

<sup>14</sup> Wi atumin emematsan anentaimtamun Titonash ujakmajai. Nuna tija nunak pegkegchau juwakchajai. Ii ashí dekaskea nu pachisa atum emematts tibaijim nunisag Titoshkam dekaskenum waipakaje.

<sup>15</sup> Nigka atumnak nuní senchi anempajume, ni atumin segapakuish betek umijujakbau asa, nuigtú puyatjusum eme anentsá jukiwaitjum nuna aneaku asa.

<sup>16</sup> ¡Shiig aneamu ajutui, atumiin kajinmasan anentaimag dui!

## 8

*Jerusalemia Cristun nemajuidau kuichik susatin anentag ijumjamu*

<sup>1</sup> Yatsug aidauh, iglesia Macedonia batsata nuna Apajui wajuk wait anenjae nuna pachisan ujakatasan wakejajime.



<sup>2</sup> Ditak senchi waitiamunum batsatiatak, shiig aneamunum ujunauch ainayatkush, wiyakuch wajukmaina imaniasag wakejus kuashat anentag yaimkaje.

<sup>3</sup> Wi wainkau asan etsegjai, dita dutikmainji ajamun diisag wakejus, dita anentaimtusbaujin inagkeasag anenjauch susagmayi;

<sup>4</sup> ditak nagkabiag, Jesusa nemajuidau pegkejam aina nunú yaigmí taji tusag segatiagmayi.

<sup>5</sup> Wi anentaimtusbauwa nuna inagkeasag dutikawagmayi. Dekatkauk ashí ditá pujutinak Apu Jesucristun idaitusag, nuadui wi Apajuí wakegamun taja dutiksag umikagmayi.

<sup>6</sup> Nuadui Tito segaji, ni anui taa, atum tikich wait anenjamin ijumkujum nagkabauwaitjum nuna jukiti tusa.

<sup>7</sup> Atumek ashí wagaagme, dekaskeapi tutanmash, wamak chicham dekatnumash, unuimatnumash, wakejusa anenkai yaimat jutiini unuimajuitjum dutiksagmek, wait anenkagtusjum yaimjum nuishkam wagatajum.

<sup>8</sup> Wika ju dekas umiktajum tusan tatsujime. Ayatak tikich aidau wajuk shiig wakejus aikainawa nuna wainkatnume nuninak ditanu dekas anenka nunash iwainaktinme tusan dekapeakun tajime.

<sup>9</sup> Atumek dekamge iina Apu Jesucristo wait anenkagtamujiya duka, atumin anempamunum ujunauch wajasui wiyakchaitak, ni ujunauch webaunum dekas pegkeja nuna jukitnume tujamu asa.

<sup>10</sup> Wika junak atumin shiig awajtamaina nuna pachisan tajime. Tikich mijan nagkaemakmaya dui nagkamsajum ayatak ijumjata tabauk nagkamachbaijume dekas wakesa dutikata tabaush ajutjamsagmayi.

<sup>11</sup> Yamaishkam atum dutikmain ajutjamaina nu diisjum dutikatajum, nagkamchakjum wakeejusjum dutikami tusajum shiig iwainakuitjum dutiksagmek ematajum.

<sup>12</sup> Wagki, aents dekaskenum wakejus dutikatjai tusa, wajupa ajawa nuna diis anenjauch sukagta nuna shiig anentus Apajuik jujawai, Apajuik aents atsuja nunak segatsui.

<sup>13</sup> Junak tikich yayamu shiig aneenai atum waittsatajum tusan tatsujime, mai betek atsumamu ajutjamtinme tusan tajime.

<sup>14</sup> Yamaik atum dita atsumainakui yaimainuk kuashat ajutjamainawai; tikich tsawantin atum atsumtaish dita yaimpamain ainawai. Junak mai betekak atsumamush ajutjamtinme tusan tajime.

<sup>15</sup> Apajuí chichame chichaakushkam: “Kuashat jukiwu nudaush ampinjachui, tuja machik jukiunush tagagchawai”, tawai.

<sup>16</sup> See tajai Apajuin, wi atumin uyumajim dutiksag Titonash anentaimtan susau asamtai.

<sup>17</sup> Wi awemag juna juki, niishkam atumiin minitatus wakegau asa, wakejus minawai atumin waipaktatus.

<sup>18</sup> Titojai awemajai makichik yatsutan, ashí iglesia aidaush chicham yamagma juna shiig jintinkagtawai tusag wakejin agma nuna.

<sup>19</sup> Nuigtushkam ju iglesia aina juiyan juijai miniti tusa etegkawaje, anenjauch yaimkatna nuna ejegati tusag, nuniak Apu Jesús eme anentsá wakejusa takainag nuna yaimkati, nunitai jutii yaimkatasa wakegag nunash dekaawagtinme tuidau asag.

<sup>20</sup> Nunú yatsut atsumaidau yaigtinun, anentag kuashat kuichik ijumjamu juinag nuna pachisag, wainak augmatjamsainum tuidau asaja tuke kawemak yujainaji.

<sup>21</sup> Nuniaku utusaik pegkeja duke takasag tusa kakanmamainaji. Imá Apu Jesusa eemtinig iwainmamkatasa nunitsuk, aents aidaush jutii shiig takainamun wainkatnume tabaunum.

<sup>22</sup> Ditajai awemajai tikich iina yachi ashí wajiinum kuashtá dekapsamua nuna, nigka shiig kuitamas takauwai, yamai atuminish shiig kajinmas anentaimin asa wakegas minawai.

<sup>23</sup> Titon pachisan tajime, nigka mina kumpajui nunin asa wijai atuegak atumi yaimpaktatus takauwai. Tuja tikich yatsug jimaja nunak, iglesia aina nu awemainawai. Ditashkam Apu Cristun emematin ainawai.

<sup>24</sup> Iglesia aidau dekaatnume tabaunum, atum dita aneamugmish iwaintuktajum, jutiiik atum eme anentaimtuidau asaja tajime.

<sup>1</sup> Nunú pegkejam aidau yaigtin ijumnagti tibauwa nunak, ataktú pataknuak agatmaitsujime.

<sup>2</sup> Wagki, wika atum wakesajum dutikamugminak shiig dekagjime, nuniau asan Macedonia nugkanmaya aidaun ujaknush, atumí eme anentsan ujainajai. Nuniakun Acaya nugkanmaya aidaush tikich mijanae dui nagkamas, dita yaimkatnujinak umintsaje tajai. Nunú atum wakejusa dutikamun, Macedonianmaya antukag senchi wakekagmayi.

<sup>3</sup> Atum imaniagminig yatsug aidaun awetajime, wi atumin ememattsan chichag nuna wainak tu wekaguwa nunin diigsainum tusan, wi etsegtajim nunisjumek umintsajum asatajum tusan tajime.

<sup>4</sup> Macedonianmaya aidau wijai anui takamá, wi tajim nuninchaun waipainakuig, atum datsamain aig, ii atumiin kajinmasa chichakú asaja jutii datsamainaitji.

<sup>5</sup> Nuadui nunin ai tau asan, ju yatsug aidaun, atum emkajum wetajum, nunikjum yaimkatnun dita anagkagtuamun wakejus nagkamawagmaya nuna ijumjatnume yaigtajum tusan segainajai. Ijumja umisjum asatajum sujimayatku dutiktsuk, wakejusampap jutikainawa tumain atí.

<sup>6</sup> Jushakam adeagtajum: Ajakan machik ajauk machik juwaawai, kuashat ajakmakushkam kuashat juwaawai.

<sup>7</sup> Makí makichkitijum atum wajak susatajai tusagmea anentaimsaugme, dutiksagmek susatajum, junik anentaimiatkujum, nuniachkugmesh tikich apusata tujamainakui dutiktsuk. Apajuik ya wakejus suwawa nuna imá shiig aneawai.

<sup>8</sup> Apajuik senchigtina ibau asa kuashat ajitnume tujamu asa ashí anenjauch amainai; ditak, imatiksag ajuinamu asag, tikich atsumaina nunash ashí takat pegkeg aina nuwi yaigtinme tau asa.

<sup>9</sup> Agagbaunum chichaak:

“Ujunauch aidaun kuashat susaja nunak,

Apajuik tuke kajimatjukchatnai dita pegkeg dutikamujiya nunak”, tawai.

<sup>10</sup> Apajuuyai ajaka jigkayí ajakmatnun sukagta duka, nuigtú yuwatnunash sukagtinuk. Nunin asa tu atsumatjume ajakmatasagmesh nunak amastatui, nunik nigki tsapapak kuashat nejepitkak atum wakesajum yaimjum nunak, nuní nagkaemas kuashat sujamsattagme, tikichin pegkegnum yaigtinme tusa.

<sup>11</sup> Dutikamu asajum atumek ashí wajiinum wiyakchamitkamun atatjume, atumi tsagkagminig ashí yaimain ajutjamtinme tabaunum. Nuadui atum shiig aneasjum yaimat ijumjajum jutiiin awemajum nuna, yatsug waituidau aina nunú juinak, Apajuin see tiagtatui.

<sup>12</sup> Wagki jújú atum yaimkatin takaajum duka, ayatak Apajuí aentsji pegkejam aina nunú atsumaina nuigkik achattawai, Apajuí shiig kuashat see tabaunmash yaigtatui.

<sup>13</sup> Jújú yaibaun jukiag Apajuin emematiagtatui, atum yamajam chicham etsegbau antukjum Cristo dekaskeapi takujum iwainmamkujum dutikajum dui. Nuninak Apajuinash eme anentus emematiagtatui, atum dita wakejusa yayakjum, ashí tikich aidaush yayajum nuadui.

<sup>14</sup> Nuninak atumin anempas Apajuin aurtugmagtatui, Apajuí shiig kuashat wait anenkagtamujin atumin iwaintugmakaja dui.

<sup>15</sup> ¡See tajai Apajuin, chichamaikish tumainchaun shiig kuashat anenjauch sujamsauwa nuadui!

## 10

### *Pablo ni takaamuji ayamjusa chichaamu*

<sup>1</sup> Witjai Pabloitjai, Cristo kakagchauch nuigtú wait anenkagtin aajakua nunisnuk segajime. Mina chichagtuinak: Pablok jutiijai jui pujusag senchi ajankagtinuwe nuninaidak atushat kanaki papí agatjamkug kajeká senchi chichagkagtawai, tujutuinawai.

<sup>2</sup> Duwi segajime: Wi atumin wainkatasan taakun, jutii pachijatus aents wakegamun takainawai tukagtuina nuna, shiig titajai tusan umintsan pujajai.

<sup>3</sup> Dekaske, jutiiik aents ainaji, tujash pegkegchaujai maaninakuik, aents maanina nuninatsji.

<sup>4</sup> Wagki, maanitai takuinakag duka ju nugkanmaya ainatsui, duka Apajuí senchiji ashí pegkegchaunash tsaina nuuwai.

<sup>5</sup> Aentsú anentaimsa tutajji, ememainak Apajuí dekatan shiwagmaina dushakam ashí tsaigkaji, dutikaku ashí aentstí anentaimtaijiya duka Cristui sumimtikainaji niina umigkati tusa.

<sup>6</sup> Jutiiik umintsá pujaji ashí chicham umitan dakituina nunú suwimak susatasa, atum dekas betek umittajum nuniakjum.

<sup>7</sup> Atumek waji paan wainbauwa duke diyagme. Makichik aentskesh dekaskenun Cristunu anenmamuk, ni anentaimtuma nunisag adeagti, dita Cristunu aina nunisaik jutiishkam Cristunu ainag nuna.

<sup>8</sup> Wagki wi atumin nagkaesau ememasan witjai chicham etsegkata tibaunuk tumamkunush datsamatsjai; nunak Apu Jesús, atum niini dekaskeapi tajum nu megkaekaijum tusa yaigti tujutiu asamtai, minak nu ame emegkatkata tujutchauwai.

<sup>9</sup> Wi papiin agajan awetajim junak, uwakatasankesh aikasjime.

<sup>10</sup> Tujash awai mina pachittsag: Pablo carta agag awetugmakug najamnun tujamji, tujash taa pujakug chichamesh puyatjusa antugmainchauwe tujutuinaawai.

<sup>11</sup> Nuna aents aatus tujutuidaushkam dekaatnume: Wi papinum agakun timayag nunak, atushat pujusan anui taaknushkam imatiksasuk umiktatjai.

*Aents pegkejak nigki pachimasag chichachui*

<sup>12</sup> Jutiik, aents ditak emematmamas tikich aidaujaish apatuk niimas nujai betek ata tuina nuninuk ainatsji. Tujash ditak anentaimas, tikich aina nunin achainjash tusag nunina nunak shiig dekachiatak nuni yujainawai.

<sup>13</sup> Tujash jutiik, wainkaik imaanikaik emematmamaitsoji. Apajuiyai jutiish wajuk dutikmainaitji nuna tujamuk. Nigki jutiinak atum Corinto batsatjum anuish takasti tusa wakejutpaji.

<sup>14</sup> Nuadui yaunchuk atumin taachu asá wajukmaina nunikaik ii nunimaina nu inagkeakik dutikatsji. Jutiuyaitji dekatkau yamajam chicham Cristunua nu etsegku atumiin tautik.

<sup>15</sup> Jutiik ii takaschamu aig, tikich takasbaunmag ememamaitsoji. Ayatak wakeesa dakainaji atumjai aan kuashat takastasa. Atum Cristui dekaskeapi tajum nu aan nagkaemas ajutjamti tusa. Jutiik Apajui dutikata tujabauwa duka dutiksaik takainaji.

<sup>16</sup> Nuniaku atumi nagkaetamas atushat batsataidaush yamajam chicham ukaktasa wakegaji, tujash tikich chicham etsegkamunum waitsuk, tikich takasbaunum ememaig tuidau asaja.

<sup>17</sup> Makichik aentskesh eme anenmamjatatus wakegawk, Apu Jesús takasbaujiya nuna eme anenmainai.

<sup>18</sup> Wagki Apu Jesusa eemtin pegkeg wantina duka nigki emematmama duchauwai, ni Apu yana eme anentawa nuuwai dekas imanuk.

## 11

*Waitá etsejin aidaun pachis Pablo tibau*

<sup>1</sup> Wi imaanag wajukmaina nuniakuish katsuntsajum diigmainaitjume.

<sup>2</sup> Wagki wika Apajui akasmatajiya nuna juki u asan atumnak akaseajime. Atumek, wi makichik aishmagnum nemakti tusa anagmitkamua nunin ainagme, duka Cristui, nuwa aentsun adijkachua iman iwainakta tau asan.

<sup>3</sup> Tujash puyatajai, dapi Evan tsanujua dutiksag atumnash anentaimtagmin dekaskenunum imagnisjum Cristun nemagjum nu tsanugmainakui kanakaijum tusan.

<sup>4</sup> Makichik aentskesh atumin tajutjamawag, jutii Jesús pachisa jintintuawaitjim nuna yapajiwag jintinjamainak, Wakani Pegkeji jukiawaitjum nunash, tikich wakan jumainaitjume tujamainak, yamajam chicham etsegkamua nunash yapajia jintinjamainakuish shiig antugkatasajum wakegajume.

<sup>5</sup> Tujash apóstol ainaji tusag iman anenmamaina nuna nugkaanik anenmamtsujai.

<sup>6</sup> Wi shiig jintiaja chichaachkunush dekatjuig nuninchauwaitjai. Duka ashí ii takaamunum tuke iwaintibiajime.

<sup>7</sup> Atumin yamajam chichaman Apajuinun pachisan ukajnush akigkatajum tusanuk segachuitjime, ayatak yaigkan emtikata tau asan. ¿Nuna dutikauwaitag duiká tudau takasag?

<sup>8</sup> Wika tikich nugkanmaya iglesia aidau akigkagmatai, nunú kuichkia duik atumin yaigtasan wekaeyajai.

<sup>9</sup> Wi atumiin pujubiag dui atumaknush makichkitigminakesh waitkaschabiajime, yatsug macedonianmaya aidau taawag ashí wi atumamunak sujusagmayi. Atumin waitkasaig tusan kuitamamkabiag nunisnuk kuitamamkattajai atumin waitkasaig tabaunum.

<sup>10</sup> Cristo dekaskejiya nu dekas ajutu asamtai ememasan tajai, Acaya nugkanum batsamin aidaunak makichkish kuichik sujustajum tusanuk segashtinaitjai.

<sup>11</sup> ¿Wagka nunash taja? ¿atumin aneachu asanuk taja? Apajui dekawai atumin aneajim nunak.

<sup>12</sup> Tujash wi takaag junak, jutiksanuk emattajai, tikich aents aidau Apajuí awemamu ainaji tusag eme anenmamainak jutiya imanuk anenmamaina nu imijkata tabaunum.

<sup>13</sup> Wagki nunú aina duka wait apóstol ainayatak, Cristo apostolji wajukmaina numantuk wajainawai.

<sup>14</sup> Dita nunia duka anentai jegagchamnuakesh atsui, wagki Satanaschakam tsanumkug Apajuí aentsji nayaimpinmayaya iman weeta wajauwai,

<sup>15</sup> nuadui niina takajin aina dushakam pegkejan takauwa iman iwainmamainawai. Tujash nunú aidauk dita takasbaujiya dutiksaik suwam agtinai.

*Pablo waittsamu*

<sup>16</sup> Awentsanuk tajime, imaanjauwa nuninuk anentaimjuttsaigpajum, tujash nunin anentaimjutkugmek ayatak diigsatajum tuke imaanjaujai betek chichaktajai, wisha machik eme anenmamajtai.

<sup>17</sup> Wi emematmansan chichag nunak, Apu Jesús titá tujutbaun tatsujai. Nuadui imaanjaujai betek chichaajai.

<sup>18</sup> Tujash tikich ainawai ditak emematmamas chichaidaush. Nunin asantai wishakam wiki emematmansan chichaajai.

<sup>19</sup> Atumek shiig anentaimkau asajum, tikich anentainkachu chichaman etsejuinakuu shiig antujuinagme.

<sup>20</sup> Atumek inak etamaidaush, tsanugmajag jujutjamaidaush, wainak wajiin takagta-mainakuish, aentschau chichagtamaidaush, yapimin awatamaidaush shiig antugjume.

<sup>21</sup> Datsamayatkun tajime, jutiik tikima kakaakchauch asaja nu imanuk nunikchabijai. Tujash tikich ditak emematmamaina nunisnuk wishakam emematmamjai, imaanjaujai betek chichaakun nunak tajai.

<sup>22</sup> Dita hebreo aina wishakam nuninketjai, dita Israel aina wishakam nuninketjai, dita Abraham weantu aina nunisnuk, wishakam nunú weantuitjai.

<sup>23</sup> ¿Ditash Cristo takagnuk aina? Tujash witjai dekas ditan nagkaesaunuk, juna aaja takunuk tuke imaanjaujai betek chichaajai. Wika ditá nagkaesau takasuitjai, ditá nagkaesau achinkanush egkemauiwaitjai, ditá nagkaesau asutnauwaitjai, kuashta imania mantumain awajtukaju ainawai. <sup>24</sup> Cinco imania judío aidau achigkag treinta y nueveveya imania asutuawaju ainawai.

<sup>25</sup> Kampatuma imania numi suwimjuawajui, makichkia kayai tukuujaju ainawai, kampatuma imania lancha wi wegamu tepeauwai, nunikmatai jakemain wajakan, makichkia nayantsa ejapen tsawampajuitjai.

<sup>26</sup> Kuashtat wekaesauwaitjai, namak ishamainnum, kasa ishamain ayamunmash, mina pataag judío aidau, judiochu aidau kajegtuinakui. Nuigtú ishamain aidau yaaktanum, uwegshunum, nayantsanum weakun, tuja Cristo nemagnaitjai yatsut ainaji tusag tsanumaidaunum wekaekun.

<sup>27</sup> Senchi takasan yaweakun, kuashtá kanutsuk tsawaakun, yapajakun kitamakun, kuashtá yujumkan yutsuk wekaekun, tsetsekai waitiakun, jaanch atsuigtakuishkam waittsauwaitjai.

<sup>28</sup> Juna aaja imaniaknush tikichia duka, kashí kashinig ashí iglesianu uyumamuk tuke ajuta nuuwai.

<sup>29</sup> Makichik aentskesh jaakuig, wishakam najaimattsan diyajai. Makichik aentsnakesh pegkegchaun takamtikainakuig, wisha kajeajai.

<sup>30</sup> Wi ememamainaitag nunak, mina kakakchamujua nuwi ememamainaitjai.

<sup>31</sup> Apajuí, ii Apuji Jesucristo Apají nigki tuke ememattaya nu dekgatawai wi dekas taja nunak.

<sup>32</sup> Damasco jegaa ai, Apu Aretas tutaya nujai takau aidau, ashí yaakta waitijin achijatin aidaun dakamtijagmayi mina achigkagtatus.

<sup>33</sup> Tujash chagkinnum egketuawag, yaakat peegmagbau ventanajin detuawag ajuntu-awagmatai, uwemjauwaitjai achigkata tuinamun.

## 12

*Apu Jesús Pablo iwaintukbau*

<sup>1</sup> Dekaskenmag iik eme anenmamtak pegkegchauwai, tujash Apu Jesús mina iwaintugbaun wainkauwaitag nuna tajai.

<sup>2-3</sup> Wainjai makichik aents Cristo nemagnun, catorce mijan nagkaemawai kampatum nayaimpia nuwi iwakbau aajakua nu. Dekatsjai iyashijai jukimuashit atsa wakaninakeash jukiabia, nunak Apajuí dekawai. Tujash wainjai nu aentsua duka (iyashijai jukimuashit atsa wakaninakeash jukiabia, nunak Apajuí dekawai),

<sup>4</sup> paraíso iwakam antukui chicham tumainchaun, duka makichik aentskesh ujamainchau aajakui.

<sup>5</sup> Nu aentsua nuna wika emematmainaitjai, tujash wika emematmamaittujai, ayatak wi kakakchamujua nuwi emematmamjai.

<sup>6</sup> Tujash wi emematmamantasan wakegaknush anentainkachu wajukmaina nunimaittujai, dekaaska nuna tau asan, nunin aig nunak tatsujai; mina waituinak, chichamjunash antugtuina nuna nagkaesau anentaimjutsainum tabaunum.

<sup>7</sup> Tuja nu imanun iwaintugkauwa dui eme anenmami tujutu asa, mina iyashjui jagkia imanai ijutiuwai, tujash nunak Apajuí dutikati tima Satanasa inake dutijuauwai mina waitkagsatatus.

<sup>8</sup> Dutijuamtai Apu Jesusan kampatumá segajai: “Wi waitiag nuna emegkatjukti”, tusan.

<sup>9</sup> Tujash Apu Jesús chichagtak: “Amek, mina anenkajua nu ashí atsumame, wagki mina senchijua nunak kakaakchamua nuwi iwainajai”, tujutmayi. Nuadui shiig anejai wi kakakchawaitag dui, Cristo senchijua nu minai ajutti tabaunum.

<sup>10</sup> Nuadui shiig anejai kakaakchau weaknush, pegkegchaun chichagtuinakuish, atsumamu ajutkuish, waitkajuinakuish, utugchat ajutkuish Cristo nemagbaunum waitajai; wagki shiig kakaakchau dekapmamaknuk nuní senchi dekapmamjai.

*Pablo Cristo nemajuidau Corintonmaya uyumasa anentaimtamu*

<sup>11</sup> Wika anentainkachu wajukmaina nunikbaijai wiki emematmamkun; nunak atum wajukeagme nuniakjumin nunikbaijai. Wika atum emematam amain aajakuitjai, wagki wika wainkayaitkunush, apóstol ainaji tusa eme anenmamaina nuna nugkaan achau asan.

<sup>12</sup> Ashí wi waitiamu aidaunak emamkesan katsunjan, wainchatai aidaunash iwaintakun, aents dutikmainchau aidaun dutikakun, puyatjusa diimain aidaunash takasuitag nunú, wi dekaskenum apostoloitag nuna iwaintawai.

<sup>13</sup> Atumek makichik waji dutikachbaunmag tikich iglesia aina nujaig imanchaun juwakugme, wi yainkatajum tusan segachuitjim dui. Tujash nuna aajan segachuitjim dui tsagkugtugtajum tajime.

*Pablo kampatuma junash ijagsatjime tibau*

<sup>14</sup> Kampatuma junash ijagsatjime tusan umintsan pujajai, nuniaknush yamaishkam waitkaschattajime. Wika atumin ajutjamaina nunak egatsjai, imá atumnak wainkatasan wakejajime; wagki Aents uchigtin aina nuuwai uchijinu atinun kuichkin ijumaina duka, uchi aina duka apajinu atinnak dutikmaittui.

<sup>15</sup> Nunin asamtai wakanash ashí mina ajuta nujai yaigta tajime, nunisnuk ashí mina iyashjuish waittsattajai atum wakanmin megkaekajtum tusa aneamunum, wi atumin senchi anejaim nunisjumek minash anenmainaitjume.

<sup>16</sup> Wi atumin waitkaschawaitjim duka atumesh dekaagme. Nuniaig, tikich aidau chichagtuinak, shiig tsanumna dui tsanuak tu wekaewai tujutuinau.

<sup>17</sup> ¿Wisha tikich yatsug aidaun awetibiajim duiká tsanugbaijim?

<sup>18</sup> Titon segabijai atumiin minití tusan, dutikakun nijai tikich yatsutan awemabijai. ¿Titoká tsanugmajagmaya? Titojaig makichik wakanía duke ajutjamji, nuniau asa atumin yaimpaktatus wijai betek takaawai.

<sup>19</sup> Atum anentaimsagmek, tsagkugtugtinme tusag tuinatsush tautigmesh amainaitjume, tujash nuninchauwai. Jutiik Apajuí eemtin Cristo nemajin asaja tuinaji, ashí ii dutikainag duka, aneetaig yatsug aidauh, atum yaigta tabaunum dutikainaji.

<sup>20</sup> Nuniau asan puyatajai atumin wainkatasan takaman, wi anentaimtag nuninchau wainkachainjash, tuja atumshakam mina anentaimjutjum nuninchau waitkajum tusan. Puyatajai jiyaniakjum, tikichdau diisjum kajejkujum, kajeakjum, tupandaikajum, pegkegchau chichagdayakjum, chichaman patatdayinak, ememainak, wainak pachimdaekag batsatbaunum jegashtajash tusan.

<sup>21</sup> Nuigtushkam puyatajai wi ataktú ijagsattajim dui Apajuí atumiin datsamtan sujusmatai buutig tusan, atum ainajum anuiya yaunchuk nagkamas tudau takainak idaitsuk tsanijinainak ayatak tsumain aina nunak tunamatuk batsamtau asamtai.

## 13

*Anemtikaku inagnaku kumpamkagtamu*

<sup>1</sup> Yamai minittag nuuwai kampatuma juna ijagsattajim nu. Ashí tumain aina duka jinag nuniachkush kampatumkesh etsegtuinakun nunikti tumainaitjume.

<sup>2</sup> Yaunchuk wi jimaja jui ijagsatasan tajuawabiajim dui tibaijime, pegkegchau takaajum duka idaisatajum tusan. Yamai atushat pujusnush nunak agatjime, ataktú ijaaku minittag dui ashí yaunchuk tudaun takaak batsabiagmaya nunisag takaa batsatun wainkunuk tsagkujashtatjai,

<sup>3</sup> wagki atumek Cristo minai chichá nu dekapjustasajum egagme. Cristuk atumin dutijamatta duka kakaakchauchui; niina senchijinak atumiin iwainaktatui.

<sup>4</sup> Duka dekaske nigka kakaakchau wajasmatai yupichu achijaju ainawai, tujash yamaik Apajuí senchijijai pujawai. Jutiishkam nunisaik ni kakaakchau aajakua nuninuk ainaji, tujash Apajuí senchijin Cristujai ijunja pujuinaji atum yaigta tabaunum.

<sup>5</sup> Atumek niimastajum dekaskeapi tabaunmash ebetmamjagmeash pujajum; atumek dekapmamsatajum. ¿Atumek wainmamtsugmek Jesucristo atumiin puja duka? Apajuí dekapjabaunum megkaechakjumek.

<sup>6</sup> Atumesh utusagmek jutii kuashat dekapeam ainakuish megkaetsug nu dekaawajum tusa dakainaji.

<sup>7</sup> Nuniau asan Apajuin aujtajime pegkegchau takasajum tusan, nunak dekapkagtamua nuna nagkaikiu asan iwainmamkun nuniatsjai, ditak pegkejan takastinme tabaunum nuniajai, jutiiik megkaekauwa nunin ainayatkuish.

<sup>8</sup> Jutiik dekaskea nuna shiwagmamainuk makichkish takamaitsuji, dekaskea duke takamainaitji.

<sup>9</sup> Jutiik kakaakchau ainakuish shiig aneenaji atumek senchi asagmin; nuniaku Apajuí aujtajime shiig imagnis pujustinme tusa.

<sup>10</sup> Nuniau asan eke atumiin minitsuk juna papiin agajan awetajime, wi atumiin taakun najam tiijim tusan, Apu Jesusak atumin yaigtí tusa senchintijauwai, pegkegchau ematnume tujutchauwai.

*Ashimku akatmabau*

<sup>11</sup> Yatsug aidauh, inagnakun tajime, dakujusjum pujustajum, imagnisjum pujakjum ichichdaitajum, makichik anentaimekauk atajum, Apajuí shiig agkan pujutan sukagtin anenka nu atumjai atí.

<sup>12</sup> Makí makichkitijum pempeentunisjumek shiig anendaisajum kumpamdaiyatajum.

<sup>13</sup> Ashí Jesusa nemajin pegkejam aina nu kumpamjamainawai. Apu Jesucristo wait anenkagtamuji, Apajuí anenkajiya nu, Wakaní Pegkejiya dushakam ashí atum aidaujai atí.

Aatus atí.

## Pablo carta agaja galacianmaya aidau awetimu

### *Kumpamkagtamu*

<sup>1</sup> Witjai Pablo apóstol, aents aidaukesh etegka awemachbauwaitjai, Jesucristo nuigtú iina Apají Apajui Jesús jakaunak inankiuwa nujai awetiuiwai,

<sup>2</sup> ashí yatsug wijai batsata nujai, atum iglesia aidautijum Galacia batsatjum nuutigmin kumpamjime.

<sup>3</sup> Iina Apají Apajuiya nunú, Apu Jesucristujai wait anenjamag shiig agkan pujatan amastinme.

<sup>4</sup> Jesucristuk nigki jutii tudaujin mantamnatatus tsagkamankauwai, yamai ju nugka tudaunum batsatainag nuwi agkanmitkagmata tau asa, ii Apají Apajui wakega nunisag;

<sup>5</sup> nuadui, ¡Apajuiya duka tuke ememattai atin atí! Aatus atí.

### *Atsawai tikich chicham uwemtan sukagtumainuk*

<sup>6</sup> Atumnak Apajui untsugmakajui, Cristo wait anenjamag anentag amaamu jukitajum tusa, nuadui anentai jegatsjai tikich yamajam chichaman yapajia etsejuinakui nu antukjum wamkesjum Apajui idaisaujum duí.

<sup>7</sup> Dekaskenmag duka tikich yamajam chichamchauwai. Nunin aig tikich aidau pachimjupainawai yamajam chicham Cristo pachisa etsegbauwa nuna yapajiwag tsuwapaktatus wakegaidau asag.

<sup>8</sup> Tuja jutiikesh nuniachkush makichik ángel nayaimpinmayagkesh jutii jintintu-auwaitjim nuna yapajia tikich chicham yamagman jintinjamaidaunak, Apajui suwimkan sumainai.

<sup>9</sup> Duik timajim nunak awentsanuk tajime: Makichik aentskesh yamajam chicham antukuitjum nuna yapajia jintinjamaidaunak, Apajui suwimkan sumainai.

<sup>10</sup> Wi juna tajim nunak aentsun shiig awajkatasanuk tatsujai, wika Apajui shiig awajkata tabaunum takaajai. Aents aidaujai shiig juwakta tusanush egatsjai, wi aentsun shiig awajkatasan nuniaknuk Cristo inakeg amaitsujai.

### *Pablo takatji*

<sup>11</sup> Yatsug aidauh, ju shiig dekaatajum: Wi chicham yamagman etsejag junak aents anentaimsa tibaunakesh etsegsujai.

<sup>12</sup> Wika aentskesh jintinjuamtai antukan dekaachuitjai, aentsnumianakesh unuimagchauwaitjai, minak Jesucristo iwaintugkauwai.

<sup>13</sup> Atumek antukuitjume mina pujutug wajuku aajakuita judío aidau umitaijin umiakun pujusuitag duish, iglesia Apajuiinu aidau emegkaktasan aintujakuitag nunú.

<sup>14</sup> Wika judío aidau umitaijin umiakun pujusnuk mina pataag aidau wijai betek tsakakú aidaunak ashí wagagsan, mina muuntug aidau umitaiji aina nunak imatiksianuk betek umijakuitjai.

<sup>15</sup> Tujash Apajui wisha akiintsai wait anenjug minak etegtuauwai. Dutijauu asa,

<sup>16</sup> niina Uchijin iwaintugkauwai judiochu aidau yamajam chichaman etsekgati tujutu asa, dutijauamtaish aents aidaunak, wajukattaja tusanuk iniaschabaijai,

<sup>17</sup> Jerusalegkash wechabaijai, mina Jesús apóstol etatsai ditá apóstol emamu aidau batsata nuna wainkatasanuk, nunitsuk wamak Arabia nugkanum wenu waketsanuk Damasco jegauwaitjai.

<sup>18</sup> Jesús wantintugkamun kumpatum mijan nagkaemai, Jerusalén Cefasan wainkatasan jegaan, nijai quince tsawan pujusuitjai.

<sup>19</sup> Tujash nuig tikich apóstol aidaunak wainkachbaijai, imá Santiago Apu Jesusa yachiya nunak wainchabaijai.

<sup>20</sup> Wi agatjim junak, Apajui eemtinish dekaskea nuna tajai.

<sup>21</sup> Nunikan Siria nugkanum, Cilicia nugkanmash weuwaitjai.

<sup>22</sup> Yatsug iglesia Cristunu aidau Judea nugkanum batsatuk, minak igkuntsag waitu-jakchaju ainawai.

<sup>23</sup> Nunidau asag ayatak antujakajui: "Yaunchuk aintamajakua nu yamaik Jesusai dekaskeapi tabaun pachis etsejui ni emegkaktatus wakegajakua nuna" tabaun.

<sup>24</sup> Wi nunitai Apajui emematiajui.

## 2

<sup>1</sup> Catorce mijan inagkeakin, ataktú Jerusalén Bernabebai weakun Titon ayauwaitjai.

<sup>2</sup> Nunak Apajuí wetá tusa iwaintugkamtai wegabiajai. Nunikan wi judiochu aidaunum yamajam chichaman etsegkauwaitag nunash tuja yamai takaag nunash wainkan takatsjash tusan Jesusa nemajin aidau apuji aina nujai kanakan ijunjan chichasbaijai.

<sup>3</sup> Tujash Tito wijai wekagunakesh, griego aents aig pakamakti tichajui.

<sup>4</sup> Ujumak wainak Jesús nemagji tusag uumak jutii batsatbaunum wayawagmayi, jutii Cristo Jesusai agkanmagauwaitag nuna dekamawagtatus, nuigtú chicham umiktajum tusa waitkatai aajakuitag nui ataktú awagtamkitatus.

<sup>5</sup> Nunú aidauk machikish antugkachbaiji, wagki yamajam chicham dekaskea nu jutii etsegbau antukuitjum nunú atuminish nunisag ajutjamti tuidau asaja.

<sup>6</sup> Tuja Jesusa nemajin aidau apuji aina duka yamajam chicham umimainakesh tujutchagmayi, (dita wajukuk aajakú ainawa nunak puyatjatsjai, wagki Apajuí diismak ashí betekak ainaji).

<sup>7</sup> Ayatak dekagtuawagmayi Apajuí pakamakchau aidaunum yamajam chicham etsegkata tujutbauwa nuna, Pedron pakamaku aidaunum etsegkati tiuwa dutiksag.

<sup>8</sup> Apajuí Pedron judío apostolji emauwa duke, minashkam judiochu aidau apostolji etiuwai.

<sup>9</sup> Santiago, Cefas, Juan, Jesusa nemajin aidau apuji aina nu Apajuí mina wait anenjug sujusbauwa nuna dekagtuawag, mina Bernabejai uwegnum achigmainak, atueka takasagmi, atumek: Judiochu aidaunum takastajum, jutii judío aidaunum takasagtatji tujabiagmayi.

<sup>10</sup> Ayatak segapagmayi, Apajuí nemajin Jerusalén ujunauch batsata nu adeagtajum tusag, nunak wishakam shiig kuitamsan takastasan kakanmamsabiajai.

*Pablo Antioquía pujus Pedro jiyakbau*

<sup>11</sup> Tujash Cefas yaakat Antioquía taa yatsut bakumamainun nuní wekaekui, yapinum igkuan jiyakbaijai.

<sup>12</sup> Nagkamchakug judiochu aidaujai ijunag yu pujayatak, Santiago awemamu kawanawagmatai tupautan nagkama, ditajai ijunja yutanak idaisabi, pakamaku aina nuna ishamak.

<sup>13</sup> Pedro nunitai tikich judío Jesusa nemajin aidaushkam nunisag judiochu aidaujai ijuntuja yutanak idaisajui, nuniagtai Bernabeshkam dita tsanumaina nuninuk wajasmayi.

<sup>14</sup> Tujash yamajam chicham dekaskenum etsegna nuna betek umiinachun wainkan, aents tuwakbaunum Pedron chichagkun: “Ame judiowaitkum judiochu wajukmaina nunimum dusha, ¿wagka judiochu aidaush judío wajukena nuninuk emaktasamesh wakejame?”, tibaijai.

*Apajuik Jesucristui dekaskeapi tuidaun pegkeja takauwa iman diyawai*

<sup>15</sup> Jutiik dekas judío ainaji, nunin asaja judiochu aidau tudaugtin aina nuninchau ainaji.

<sup>16</sup> Dekainaji chicham umiktina nu umiamunum pegkeg ainagme tama amainchawaitag duka, ayatak Jesucristui dekaskeapi tabaunum pegkeg ainagme tama amainaitag nunú. Nuadui jutiishkam Jesucristui dekaskeapi tiu ainaji, Apajuí pegkeg ainagme tujamti tabaunum, chicham umiktina nu umiamunmachu; nunin asá makichkish chicham umiamunmag pegkeg ainagme tamak achatnaitji.

<sup>17</sup> Nunin asantai Cristo pegkejaitme tama atasa egainaku, jutiishkam tudauwaitag nu dekamauwaitji. ¿Duiká Cristo tudau takamtikagtinai tumainait? Duka makichkish nuninchauwai.

<sup>18</sup> Wagki wi juka umimaitsui tiuwaitkun, nunak awaksanuk umimainai takunuk, wiki bakumajai.

<sup>19</sup> Wagki chicham umiktina nuna umiktasa pujaknuk jakaujai betek wenu pujubaijai. Tujash yamaik Cristo achigbau aajakua nui mina tudaujuk nagkanjauwai.

<sup>20</sup> Nuniku asan wichauwaitjai iwaaku pujag nunak, Cristo minai puja nu minak iwamtijawai. Wi yamai iwaaku pujag nunak, Apajuí Uchijí mina anentu asa, minai mantamdauwa nunú dekaskeapi tabaunum pujajai.

<sup>21</sup> Apajuí wait anenkagtugbaujiya nunak dakitatsjai; wagki chicham umiktina nu umiamunum pegkeg ainagme tama asauwaitkuik, Cristuk wainak jakau amainai.

### 3



<sup>1</sup> ¡Galacianmaya anentainkachu aidauwah! Atum jutii Jesucristo achigbauwa nu pachisa etsegjin, paan achigbau wainkajum anentaimtumainaitjum imatiksajum anentaimtibiujum nunash, ¿yaa chicham dekaskea nuna umikai tusash tsanugmajaje?

<sup>2</sup> Juna aigkatnume tusan wakegajai: ¿Wakaní Pegkeji jukiwaitjum dusha Moisés chicham umiktajum tibaauwa nu umiamunmag jukiwaitjum, atsa Jesucristui dekaskeapi tabaunum jukichukaitjum?

<sup>3</sup> ¿Waa imá anentainkachush ainagme? ¿Wakaní Pegkeji yaimpasmatai pegkeg nagkamau ainayatkugmesh, wagka: Jutiik kakanmamainaitji Apajui wakegamu takastag takuik tajume?

<sup>4</sup> ¿Kuashat pegkeg takaidau asajum waitkam asauwaitjum duka wainkagmek waittsauwaitjum? Duka wainka waitkasbau ainatsjume.

<sup>5</sup> Apajui Wakaní Pegkejin atumin sujamas aents dutikmainchau aidaun atumin iwaintugma nunash, ¿Moisés chicham umiktajum tiuwa nu umiamunmag dutika, atsa chicham etsegbau antukjum dekaskeapi tau asagmin dutikatsuak?

*Apajui Abrahamjai chicham apakbau*

<sup>6</sup> Nunisag "Abrahamak Apajuiyai dekaskeapi tujakua dui, Apajuishkam pegkeg diisui".\*

<sup>7</sup> Nunin asantai jujú dekaatajum, Abraham weantu aina duka, Apajuiyai dekaskeapi tuina nu ainawai.

<sup>8</sup> Nuna pachis yaunchuk agagbau aajakua nuna dekau asa, judiochu aidaush dekaskeapi tiagtai Apajui pegkeg ainagme tama agtina nuna emtika Abrahaman yamajam chichaman ujaak: "Ashí nugkanmaya aents aidauk aminí pegkegnum yaigbau agtinai",† tiuwai.

<sup>9</sup> Nu aatus asantai Apajuiyai dekaskeapi tuina duka, Abraham dekaskeapi tiuwa nujai betek pegkegnum yaigbau ainawai.

<sup>10</sup> Tuja ashí aents chicham umiktina nuwi kajinas anentaimaidauk, bakumatnum batsatainawai. Wagki, agagbaunum: "Chicham umiktin papinum agagbauwa nuna aents imatiksag umiinachuk suwimkan jukitnume",‡ tawa dui.

<sup>11</sup> Nuadui juka paantai, Apajuik makichik aentsnakesh Chicham umiktin aajakua nuna umiau asantai pegkeg ainagme tatsui. Wagki agagbaunmag: "Pegkejan takaa duka imá dekaskeapi tabauwaik tuke pujutnai",§ tawai.

<sup>12</sup> Chicham umiktina duka Apajuin dekaskeapi tuidau tuke pujutnai tatsui, nuadui chicham umiktina nuig, "Aents chicham umiktina nuna imatiksag umiau, nu umiamua duik tuke pujutnai",\* tawai.

<sup>13</sup> Cristo jutiinak agkanmitkagbauwai chicham umiktina nu umiachbaunum suwimkan jumaina nunak. Ni iina ayamjutpakta tau asa suwimkan juwak mantamdauwai, nunisag agagbaunmashkam: "Aents maamua nu numinum nenam awa duka, Apajui aents tikima katsek tudaugtin dutikatajum tibau asa dutikam awai", tawai.

<sup>14</sup> Nunak Apajui Abrahaman pegkejan anagkuauwa nunash, judiochu aidaush Cristo Jesús dekaskeapi tabauwai, Apajui Wakaní Pegkejin anagtamauwa nunash jukitnume tabaunum nunikui.

*Chicham umiktina duka Apajui anagkagtuamujiya nunak emegkaumaittui*

<sup>15</sup> Yatsug aidauh, aents aidauti nunitaijiya nuna pachisan tajime: Makichik aents tikich aentsjai chichaman apainak papinum agajag nuni atí tusa firmamunak,† makichkish nuna esaktumainuk, nuigtú eketus dutikmainush atsawai.

<sup>16</sup> Apajui Abrahaman, niini akiinak weagtina nunash kuashat anagkuauwai. Agagbauwa nuig kuashat taku tumaina dutikag, "akiinkau aidau" tatsui, ayatak makichkin tawai: "Aminiya akiinai", jui dekanui makichkin tawa nu, nunak Cristun taku tawai.

<sup>17</sup> Wi tajim duka juuwai: Apajui Abrahamjai Cristun pachisag chichaman apakú aina nunak dutiksag kuitamkauwai, dutikamu asantai cuatrocientos treinta mijan nagkaemai chicham umiktin asauwa nuwish Apajui anagkagtuamua duka nunisag juwakui.

<sup>18</sup> Apajui anagtamauwa nunú chicham umiktina nu umiaku jumainaitkuig, ni anagtamauwa duka wainak amainai. Tujash Apajuik Abrahamnak anenjauch amastatjame tusa anagkuauwai.

<sup>19</sup> Aatus aish, ¿wajinma atsumnawa chicham umiktina dusha? duka ayatak aents aidau betek umiachbaujiya nunú iwaintukta tabaunum dutikamu aajakui, nunú nuniai

\* 3:6 Gn. 15.6. † 3:8 Gn. 12.3. ‡ 3:10 Dt. 27.26. § 3:11 Hab. 2.4. \* 3:12 Lv. 18.5. † 3:15 Chicham firma tawa juka iina chichamenig tumainchau asantai, nuigtush yapajias tumainchauwa dui jutiksaik ukuaji.

Apajuí Abrahaman “aminiya akiinatnai” tusa anagkuauwa nu akiinawuai. Chicham umiktina nunak Apajuí angelan Moisesan awetim ujakuí dutikam niishkam aents aidaun ujakuí.

<sup>20</sup> Tujash Apajuí makichkia nu Abrahaman anagkuauwa nunak tikich tití tusag atsumjachui, nigki igkua amastinaitjame tiuwai.

*Chicham umiktina duka Cristo dutikauwa dui nagkankauwai*

<sup>21</sup> ¿Nuna tawa nunash chicham umiktina duka Apajuí anagkaguamu aina nujaig betekchawwai takug tawa? Duka makichkish nuninchauwai; wagki Chicham umiktina nu pujutan sukagtumainaitkuig Chicham umiamunum pegkeg ainagme tama amainaitji.

<sup>22</sup> Tujash Agagbaunmag ashí aentsuk tudau achikbauwa nunin ainawai tawai, nunak ya aidauwa Jesucristun dekaskeapi tuinawa, nu Apajuí uwemat anagkaguamua nuna jukitnime tujamu asa.

<sup>23</sup> Nu eke dekaskeapi titina nu taatsaigkik, Chicham umiktina duka aentsun achijá chimpia epena numamtuk awajam asauwaitji, jutii dekaskeapi titina nu Cristo dakainaku batsatu asaja.

<sup>24</sup> Chicham umiktina duka, inak uchi aidaun kuitamama numamtuk kuitamjamajakui, Cristo taamtai niini dekaskeapi tuinak pegkejaitme tama agtinme tujamu asa.

<sup>25</sup> Tujash yamaik Jesusai dekaskeapi tuidau asaja, Chicham umiktina duka atsumnatsui.

<sup>26</sup> Cristo Jesús dekaskeapi tabaunum ashí atumek Apajuí uchijí wajasuitjume,

<sup>27</sup> wagki ashí Cristui yamimaku ainajum duka Cristunu ainajum nunú iwainmamkata tabaunum nunikuitjume. Nuniku asaja ni wajukea nuninaji.

<sup>28</sup> Nuniku asajum juka judiowai, juka griegowai, juka inataiyai, juka inashtaiyai, juka aishmagkui, juka nuwai tabauk atsawai, wagki Cristo Jesús nemagbaunmag ashí atum aidautigmek makichkia nunin ainagme.

<sup>29</sup> Atumek Cristunu asajum Abraham weantu ainagme, nunin asajum Apajuí anagkuauwa dushakam imatiksagmek jukitin ainagme.

## 4

<sup>1-2</sup> Juna titag tajime: Aents uchigtina nu wi jataik mina wajiignak mina uchig jukitin atí tabauwa nu tsakatuch akug inaka nujai betekak pujawai, dekaskenmag ashí wají aina duka niinu aig; nunin asamtai aents uchin kuitama nu niinu atina nunash kuitamjin ainawai apají tsawan mamiktugbauwa nu jegatí tusa.

<sup>3</sup> Nunisag jutiniash nagkaetamui, yaunchkek judío aidautish Cristo dekachu asaja uchijai betek, ju nugkanmaya unuimatjamu aina nu umiktasa achikbau inaku waitkamaina imatikam aajakuitji.

<sup>4</sup> Tujash Apajuí tsawan mamikiamujiya nu uminkamtaí niina Uchijin awemauwai, dutikam makichik nuwanum akiinawuai, nunik chicham umiktina nuna umiak pujusui;

<sup>5</sup> chicham umiak batsatutin agkanmitkagma Apajuí uchijí etamkata tujamu asa.

<sup>6</sup> Nuadui niina uchijí waigkú asajin Apajuí iina anentain niina uchijí Wakaniya nuna sujamsauwai, nunú ichachtamkui: ¡Mina Apajuí! tuinaji.

<sup>7</sup> Nunin asamtai amek inaku waitkataig atsume, Apajuí uchijiyaitme, nunin asam Cristo nemagbaunum Apajuí sujamsatna nu ameshkam jukitnaitme.

*Pablo Cristo nemajuidau puyatjusa anentaimtamu*

<sup>8</sup> Atumek yaunchkek Apajuí dekachu asagmek, apajuimtai dekaskechu aina nunú umijujakuitjume.

<sup>9</sup> Tujash yamaik atumek Apajuí dekaugme, nunisag Apajuí atumnash dekgamainawai, nunin aish, ¿wajuakeakjumea atumesh kakaakchau senchigtuchu aina dusha ataktú waketjukjum umigkujum waittsatasagmesh wakegagme?

<sup>10</sup> Atumek Moisés agagbaunum tsawan, nantu, mijan aina nuna pachis tibauwa nu, jutsu Apajuin shiig awagmatai tusa umiktasajum fiestamjume.

<sup>11</sup> Nuniakjumín puyatajai wi atumin imatika jintintuauwaitjim nunak wainkanuap takasja tusan.

<sup>12</sup> Yatsug aidauh, wi wajakauwaitag nuniktajum tusan segajime, wisha atum wajuakea-jum ankauwaitjai Chichaman umiakun pujusan. Nunak atum pegkegchau awajtuku asagmin tatsujime.

<sup>13</sup> Atumek dekaugme, wi yama nagkamchakun yamajam chichaman ujayajim nunak jaayatkun wekaesan ujayajime,

<sup>14</sup> Nunú jata mina iyashjuí ajutujakua nunú atumnak shiig antumainchau awajtibanume, nuniakuish dakitjuja idaitutsuk, ángel nuniachkush Cristo Jesús taamtai kuitamainaitjum imatijusjum kuitamjukuitjume.

<sup>15</sup> ¿Nunú imanika shiig aneejakú ainajum dusha utugkaugme? wagki atum nuniyujum nuna tajime, jiish ukuintaiyaitkuig jiim ukuinkajum sujumain awatuyujume.

<sup>16</sup> ¿Wi atumin dekaskea nuna ujakuitjim duiká atumi shiwajum wajasag?

<sup>17</sup> Nunú aents atumin senchi puyatjutpaina duka pegkeg anentaiyai nuninatsui. Ditak wakegainawai jutiiní datumtamag, dita iina puyatjutpaktinme tusag.

<sup>18</sup> Dekas tikich puyatjamua duka pegkejai, tujash pegkeg anentaiyai; nuna nuninuk tuke nuninuk amainai, wi atumjai pujuttag dui nunitsuk.

<sup>19</sup> Mina uchig aidauh, wika nuwa uchin najaimak waitama imanikan ataktú atumiin waitajai, atumesh Cristua imanuk atinme tabaunum.

<sup>20</sup> Wakegajai, utugkanuk yamaiya juik atumiin taan tikichin yapajian ausajim tusan. Utugkajimek tusan kuashat anentaimtajime.

*Agar Sarajai augmatbau*

<sup>21</sup> Chicham umiktina nu umiktasajum wakegautijum yamai tujuttajum: ¿Atumek antukchaukaitjum chicham umiktina nui juna tawa duka?

<sup>22</sup> Nu agagbaunmag, Abrahamak jimag uchijí ajujakui tawai, makichik uchijiya nu inakenia aajakui, tuja tikich uchijiya duka dekas niina nuwe inakchauwa nuiya aajakui.

<sup>23</sup> Inaka nuwi akiinawua duka aenstí akiinainag nunisag akiinawuai. Untsu agkanta nuwi akiinawua duka, Apajuí anagkuauwa nu uminbaunum akiinawuai.

<sup>24</sup> Juka atak nuniktin aajakua nuna iwainawai jimag nuwa aina juka, jimag chicham apakbau aajakua nuna iwainawai: makichkia duka muja sinainumia minawai, duka Agar niina uchijí inak agtin akiinkau aajakajua nuna dukujiyai.

<sup>25</sup> Tuja Agarak iwainawai muja Sinaí Arabia nugkanum yamai Jerusalén awa nuwi uchijí aidau batsamas chicham umiktajum tibaauwa nuna umiktatus waituinak batsata nuna.

<sup>26</sup> Tujash Jerusalén nayaimpinmayaya nunak Sara agkanta nu iwainawai, nuna uchijí aidautik jutii ainaji dekas Apajuí uchijí aidautik.

<sup>27</sup> Chicham agagbauwa nuwishkam:

“Nuwa uchin uchigmachuh,

shiig aneasta,

uchijum atsugtamú asamtai.

Shiig aneakum untsumkata,

amek uchi uchigmaku

najaimatash dekapsachú asam.

Nuwa idaisamu aina nunú

imá kuashat uchigtin agtinai,

nuwa aishintin aidaun nagkaesau”, tawai.

<sup>28</sup> Aatus asamtai yatsug aidauh, Apajuí Abrahaman Isaacan anagkuamu akiinawua numamtuk atumesh akiinawu asam, Apajuí uchijí ainagme.

<sup>29</sup> Tujash yaunchuk Abraham Sarajai wakegau asamtai, Agarai uchi akiinawuai. Tuja Wakan akiinati tima Isaac Sarai akiinawua nuna, Agarai akiinawua nu kajejujakua numamtuk, yamaishkam chicham umiktajum tibaun umiina nu, Jesucristun dekaskeapi tuina nuna kajejuinawai.

<sup>30</sup> Tujash ¿wajintua Agagbaunmash? Nuwig: “Nuwa inataiya duka uchijijai jiiaktá, wagki inataiya nuna uchijig, nuwa agkanta nuna uchijí jukiti tibaauwa nunak jumaitsui”, tawai.

<sup>31</sup> Nunin asamtai yatsug aidauh, jutiik inaku waitkataiya nuna uchijí ainatsji, agkanta nuna uchijí ainaji.

## 5

*Cristo agkan etabijaua nunisjumek pujustajum*

<sup>1</sup> Atumek chicham umiktajum tibaauwa nu umiktasajum waitú batsatutigmin, Cristo agkanmitkagmawajua nunisjumek agkan pujustajum. Ataktú chicham umiktin umiktasajum waitiujum duka waketjukigpajum.

<sup>2</sup> Antugtuktajum, wi Pablon tajime, atum pakamakjumesh Cristo yayamak achattagme.

<sup>3</sup> Ataktushkam tajime: Aents pakamauk chicham umiktina nuna ashí umiktatus nuniawai.

<sup>4</sup> Atum chicham umiktajum tibaauwa nu umiinaku pegkeg diyam ata tautigmek, Cristui kanaaku nuniagme. Nuniakjum Apajuí anentag amamaina dusha dakitjaugme.

<sup>5</sup> Tujash jutiik Wakaní Pegkeji yaimpasmatai, Cristo dekaskeapi tabaunum Apajuí pegkeg ainagme tujamtina nu dakainaji.

<sup>6</sup> Wagki pakamaku akush, pakamakchau akushkam Cristo Jesusai wainkayai, dekas Cristo Jesusai dekaskeapi tabaunum anenkai takaamua nuuwai dekas pegkejak.

<sup>7</sup> Atum shiig pujubiujum nunash, ¿ya chicham dekaskea duka umikaigpa tujabiaje?

<sup>8</sup> Aannak Apajuí atumí etegtamjauwa nu aikagmachaje.

<sup>9</sup> Duka levadura ujumak ajuntuamuitak, nanegbauwa nuna ashí wampushmitkama dutijamawaje.

<sup>10</sup> Wika atumnak Apu Jesusai kajintsá anentaimtajime, yapajiagmek anentaimainchau ainajum dui, tujash yaki ainta nunin ataish pachimjutpaina nuna Apajuí suwimkan susatnai.

<sup>11</sup> Yatsug aidauh, wi pakamaktajum tusan etsegku wekaeyatkunush ¿wagka waitkamash wekaeja? Nuna aatsa etsegku wekaetaik, Cristo cruznum achigbaun etsejag nunash dakittsag diimain ainatsui.

<sup>12</sup> Nunú pachimjutpá yujaina duka dekas juu tamawaik ashí tsupik ajapmain ainawai tajai.

<sup>13</sup> Yatsug aidauh, atumek agkan pujustinme tusa etegjamu ainagme. Tujash nunú agkan pujamu ajutjama dui iyash wakegamu takamtiktusuk, aneenisjum pempeentunisjumek yainiktajum.

<sup>14</sup> Chicham umiktin agagbauwa duka: “Tikich aidaush amek anenmamsam aneeta”, tawa nu imatiksaik umiamunum ashí chicham umiktinum awa duka uminui.

<sup>15</sup> Kuitamamkatajum, atumek pempeentunisjumek shiwagmagajum kajegdayakjum pempeentunisjumek pegkegchau awagdaikajum.

#### *Wakaní Pegkeji wakega nunisaik pujumain*

<sup>16</sup> Nuadui tajime: Wakaní Pegkeji wakega nunisjumek pujakjum, atumi iyashim pegkegchau wakega duka umigkaigpajum.

<sup>17</sup> Wagki iyash wakega nunak Wakaní Pegkeji dakitawai, nunisag Wakaní Pegkeji wakega nunashkam iyashik dakitawai. Aatus dakitjunidau asamtai atum wakegamua duka takamaitugme.

<sup>18</sup> Tujash Wakaní Pegkeji yaimpasmatai pegkeg aina duke takaakjumek, Moisés chicham umiktajum tibauwa nu umiktasagmek anentaimtumaitugme.

<sup>19</sup> Iyash pegkegchau wakegamu takaamu paan wantina duka ju ainawai: ekagmamua, tsanijinbau, Apajuí pegkegchau diyamu aina nu takaamu, ii pegkegchau wakegamua duke tunamatja pujugbau,

<sup>20</sup> apajuimtai dakumkamu emematbau, wawejatbau, shiwagmaga pujamu, tsuwat chichamtin, akasmamu, waa wamak kajeamu, jyaniamu, datumkagtamua, niish kanak-tatus anentaimin,

<sup>21</sup> pegkejan takaidau kajejamu, nampeamu, yuwa yuwakua wegamu, nuigtú tikich jumamtin aidaunashkam tibajime. Nunin aina nuna takaa pujuidauk Apajuí inamtajinig wayachagtin ainawai tusan.

<sup>22</sup> Untsu Wakaní Pegkeji pujugbau aidauk: Anejatnai, shiig aneenaí, shiig agkan anentaimas pujuwai, wamak kajeakchau, shiig awakagtin, wait anenkagtin, dekaskeapi tinu,

<sup>23</sup> kakagchau, ebetmamag pujú aina nuuwai. Ashí ju aina junak, chicham umiktajum timawa nuwish, nunin amaitui tatsui.

<sup>24</sup> Cristo Jesusdau aina duka, ditá iyashí wakegamu nuigtú senchi pegkegchau wakegamu aina nujái Cristo nemajuinak idaisaju ainawai.

<sup>25</sup> Nuadui Wakaní Pegkeji pujugbau aidautik ni wakega dutiksag takamtijusti tusa idaimamain ainaji.

<sup>26</sup> Emebau achagmi, shiwagmaetash shiwagmaetsuk, tikich pegkejan takainamu diisá pempeentuniki kajegdayá batsamchagmi.

## 6

### *Tikich aidaujaish pempeentunikjum yainiktajum*

<sup>1</sup> Yatsug aidauh, atum ainajum anuuya tudau takau wainkugmek, atum Wakaní Pegkeji takamtikbautijum yaigtajum esemamati. Nuniakjumesh senchi kuitamamkatajum, atumesh dita pegkegchaun takaina nu takasajum.

<sup>2</sup> Atumek pempeentunikjum yainiktajum utugchat ajamu wainkugmek, aaja dutik-dayakjum Cristo tibauwa nu umiktajume.

<sup>3</sup> Makichik aentskesh imanchauwaitak eme anenmamá wekaguk, nigki tsanuamak tu wekaewai.

<sup>4</sup> Makí makichik dita wajuk pujuinawa nuna niimamain ainawai dekas eme anenmamatus wakegaguk, tikichi pujutjin diigtsuk.

<sup>5</sup> Wagki makí makichik iina utugchatjig ajutjamainawai, nuniau asamtai imá iinuk uyumamainaitji.

<sup>6</sup> Apajuí chichamen jintinjamuk, atum jintinbautijum ashí wají pegkeg aina nujai yaigtajum.

<sup>7</sup> Atumek tsanumajaigpajum: makichkish Apajuinak tsanumain ainatsui. Aents ni ajakmamujin juu aina numamtuk, makí makichik dita takasbaujin dutiksag jukiagtinai.

<sup>8</sup> Aents ni pegkegchau wakegamujinak takasuk, nuiyanak juwak waittanum wegagtinai. Untsu Wakaní Pegkeji wakega nuna takasuk, nuiyanak pujut nagkanchaun jukiagtinai.

<sup>9</sup> Pegkeg takata duka mijatkachagmi; imaní batsatu asaja tsawan jegakuí Apajuí pegkeg aina nuna sujabau jukitnaitji.

<sup>10</sup> Tsawan eke awa juik ashí aentsuk titit awagmatsuk pegkegnum yaigtajum, tujash Cristo nemajuina nujai imá senchi yainiktasajum wakeetajum.

*Inagnaku ujaniamu*

<sup>11</sup> Yamaik wi mina uwejui letra muuntai agatjim ju diistajum.

<sup>12</sup> Aents aidaun shiig awajkatatus wakegaina nunú, pakamaktajum tusag imatjut-painawai, Cristo cruznum achigbauwa nuna etsejai waitkagsainum tuidau asag.

<sup>13</sup> Tujash pakamaku aina dukesh chicham umiktinum tawa nunak betek umiinatsui. Nuninayatak wakegainawai atum pakamakagmin wi tima ankaje tusag ememagtatus.

<sup>14</sup> Tujash wika wiki eme anenmamtanak wakegatsjai, iina Apuji Jesucristo cruznum achigbauwa nunak ememattasan wakegajai. Cristo numinum achijam jakauwa dui nugkanmaya aina nunak uyumatsjai, nuniau asan nugkanmaya aidaunak idaisauwait-jai.

<sup>15</sup> Wagki Cristo diismak pakamaku akush, pakamakchau akushkam wainkayai, dekas imana duka Cristo nemagbaunum yamajam aents weenag nuuwai.

<sup>16</sup> Atum Apajuinu aidautijum, jujú tawa jutiksagmek batsatutigminak, nuigtú Cristo nemajin mina pataag Israel aidautigminash, Apajuí wait anenjamag shiig agkan anentaimesa pujutan amastinme.

<sup>17</sup> Yamai nagkamsanuk makichkish utugchatan aputugsatnume tusanuk wakegatsjai, wagki Apu Jesusai bakumakun mina iyashjui esamkamug aidau ajutuina dui.

<sup>18</sup> Yatsug aidauh, iina Apuji Jesucristo makí makichik atumi wakanminish ajutjamt-inme.

Aatus atí.

## Pablo carta agaja efesonmaya aidau awetimu

### *Kumpamkagtau*

<sup>1</sup> Witjai Pablo, Apajú wakegau asa Jesucristo apostolji etiuwai, atum imagnisjum shiig Cristo Jesús nemajin pegkejam aidautijum Éfeso batsatutigmin kumpamjime.

<sup>2</sup> Atumnash Apajú iina Apajija nu, ii Apuji Jesucristua nujai wait anenjamaidau asag, shiig agkan pujutan amastinme.

### *Jesucristo nemagka pegkeg pujut juamu*

<sup>3</sup> Apajú emematiagmi, iina Apuji Jesucristun Apajija nu, nayaimpinmaya ashí pegkeg wakannumia aina nuna Cristui sujamsau asamtai.

<sup>4</sup> Apajuk nugkanash najantsuk Cristui etegtamjauwai pegkejam pegkegchauji atsubau niina emtinish atinme tusa. Wagki ni anempau asa,

<sup>5</sup> wi ju aidau nak mina uchig emaktin atajai Jesucristo ditai mantamnamtai tusa yaunchuk emtika niina waketajin etegtamjauwai.

<sup>6</sup> Nunak niina Uchijí aneetaijija nuna amasua dui Apajú wait anenkagtau muji dekas imana dui, emematjitnume tusa dutikauwai.

<sup>7</sup> Nuna dutikauwa dui Cristo nunpe ukaejamunum agkanbaetak ajutjamui nuigtú tudau aidau num tsagkugnamushkam; shiig kuashat wait anenjamu asa,

<sup>8</sup> nigki jutinash shiig kuashat yachametan, dekatnashkam sujamsauwai.

<sup>9</sup> Duik nagkamas, ni wagemujin dutikatjai tibau dekaachbau aajakua nuna dekamtijauwai. Nunak ni wait anenkagtau mujin Cristui pegkejan dutikatjai tiuwa nuna iwaintugmakui,

<sup>10</sup> dutikau asa ni tsawan mamikiamuji aina nu uminkamtai, nayaimpinum aina nuna, nugkanum aina nunashkam ashí Cristui ijumjatnai ni diísti tusa.

<sup>11</sup> Ii jukitna duka Cristui ajutjamainaji, nunak yaunchuk Apajú ni wajuk dutikatatus wakejukaya anentaimtujúta dutiksag dutikatnai.

<sup>12</sup> Nigka wakekauwai dekatkauk jutii aidauti Cristun dakastinme nuninak mina imanjua nuna emematjitnume tusa.

<sup>13</sup> Cristo chichame dekaskea nu etsegku uwemat awai tabau antukjum, atumesh Cristo dekaskeapi tuidau asagmin, Apajú niinu etamu asa Wakani Pegkeji anagtabauwa nuna amasajui. Dutijamau asamtai yamaik niinuap ainaji tusa dekainaji.

<sup>14</sup> Nunú Wakania nuuwai, Apajú sujabau jukiagtin asajin emtika amasmawua duka, jutiin ashí agkanmitkagma niina aentsji etamkatna dui, dutijamamtai ashí jutii Apajú senchigtin imana nu ememattinaitji.

### *Pablo Apajú see tibau*

<sup>15</sup> Nuadui atum imá Apu Jesusaig dekaskeapi tusajum ashí Jesusa nemajin aidaujaish aneeniamugmin pachis chichainamun antukan,

<sup>16</sup> mijattsuk Apajú aukun see tusanké ajai atumin pachisan,

<sup>17</sup> Segajai Apajuin iina Apuji Jesucristo Apají dekas imana nuna, wakan dekatan sukagtina nuna amastinme dutikam nu iwaintugmakui Apajú shiig dekaatajum tusan.

<sup>18</sup> Nuigtushkam segajai atumi anentaiminish tsaapmitkagmatnume, dutijamamtai niina aentsji wajasjum nayaimpinum atumdau atin dakainajum dushakam shiig dekamnujum tusan, nuigtú Jesusa nemajin pegkejam aidau wajiin shiig kuashat dekas shiig pegkeg jukitin ajuina dushakam,

<sup>19-20</sup> nuigtú niina senchijí nagkanmainchauwa dushakam jutii ni dekaskeapi tinu aidautin ajutjamji. Nu senchijí imana nunak Apajú Cristo jakaunak inankiuwa dui iwainakui, dutika nayaimpinum iwaká niina utsujin ekentsauwai,

<sup>21</sup> ashí wakan senchigtin aina nuna nagkaesau ema, inamin aidau, nugkaya apu aina nunash nagkaesau senchimitkauwai, yamaiya juish atak atina duishkam,

<sup>22</sup> dutika ashí najankamu aina nuna nuigtú iglesia aina nunashkam Apuji ema idaisauwai, ashí nigki diísti tusa.

<sup>23</sup> Dutikamu asá ni nemajin aidautik Cristo iyashí ainaji, ni jutii ashí jajutua awa nunisag ashí najankamu aina nuwish awai.

## 2

### *Apajú anenkajin uwemkau ainaji*

<sup>1</sup> Atumek yaunchkek atumi intimtaigminig, atumi tudaugminig jakau aajakuitjume,

<sup>2</sup> ju nugkanmaya aentsú nunitaiji aina nu dutiksagmek takaakjum, agkajunum wakan senchigtin inama nu wakegamuji umijukaitjume, yamai niina senchijijai Apajuin intimjuina nuwi inama nu.

<sup>3</sup> Yaunchuk pujukaitag duik ashí jutiishkam dita pujuina nunisaik pujukaitji, iina iyashí pegkegchau wakega nujai, ii wakegamua nu takaaku, ii anentaimtamua duke dutikainaku, nunin asaja dekaskenum tikich aina nujai betek Apajuí suimkajig jumain aajakuitji.

<sup>4</sup> Tujash Apajuik shiig senchi wait anenkagtina ibau asa, ni anenkajiya nujai shiig senchi anempajui,

<sup>5</sup> jutiik iina tudauji aina dui jakau batsamnutin Cristujai betekak pujutnak amasui. Dutikamu asajum niina wait anenkagtutinig uwentikam asauwaitjume.

<sup>6</sup> Nunika Cristo Jesusjai ijunjau asajin Apajuí nijai betek inantamkiuwai, dutijama nayaimpinum nijai ekepasui.

<sup>7</sup> Juna jutikauwa nunak atak tsawan atina dui ashí aents aidaun iwaintuktatus dutikauwai, niina shiig kuashat wait anenkagtutaiji niina pegkegjiya nujai jutiinu atinun Cristo Jesusai dutikauwa nuna.

<sup>8</sup> Wagki atumek dekaskeapi tabauwai wait anenjá uwentikjamu ainagme; nunak atum pegkeg takasbauwai dutikachui, Apajuí nigki anenjauch uwemtanak amasajui,

<sup>9</sup> duka ii pegkeg takasbauwai uwemat jukichu asaja, ii emematmamainuk makichkish atsugtamji.

<sup>10</sup> Wagki jutiik Apajuí najankamu asaja, Cristo Jesusjai ijunbaunum yamajam etamkauwai pegkeg aina nunak takainak pujustinme tusa, Apajuí emtika anentaimtjuja dutiksag.

*Cristo nemajuinaku agkan pujamu*

<sup>11</sup> Nunin asamtai atum judiochu aidautigmek, “pakamakchau” ainawai tama aajakuitjume, judío aidau aentsú iyashinian pakaji ajapjuawag, “pakamaku” ainaji tumamaina nunú.

<sup>12</sup> Nunin asamtai nunú tsawan aajakajua duik, Cristo dekachu asajum, Israel aina nujai kanakú aajakuitjume nuigtush Apajuí ditajai chicham aidaun apakag anagkauwa nuyiyash jumainchau aajakuitjume, nunú uwemainapita tusa dakamukesh atsugtamaidau asamtai Apajuigtuchu ju nugka juig pujukaitjume.

<sup>13</sup> Tujash yamaik Cristo Jesusjai ijutkau pujakjum, yaunchuk Apajuijai atushat aajakuitjum duka, Jesús numpen ukajua dui Apajuijai tikijuch wajasuitjume.

<sup>14</sup> Wagki Cristuwai jutiin agkan pujutan sukagtina duka, nunin asa judío aidau judiochu aidaujai shiwag batsamajakbauwa nunak, ni mantamdauwa dui tanish tesá akankamua nunin aajakua nuna tsaiaká makichik niina aentsji etamkajui,

<sup>15</sup> dutika chicham umiktajum tibauwa nuwi umiktin aina nunashkam inagnakui, judío aidau judiochu aidauunash niinu emakta tau asa, yamajam aents makichik atinme tusa. Aatus dutika shiig agkan pujutan amasajui.

<sup>16</sup> Jesucristuk cruznum achijam jakauwai, judío aidau judiochu aidaujai mai Apajuijai epegtuniatnume, nuninak makichik aents atinme yaunchuk shiwag batsamajakbauwa nunak idaiyinak tusa nunikui.

<sup>17</sup> Cristuk tauwai, nunik yamajam chicham shiig agkan pujuta nuna, Apajuí dekachu aajakuitjum nu aidautigmin, tuja jutií Apajuí dekau aidautinash ujakajui.

<sup>18</sup> Aatus Cristo dutikau asamtai judío aidauti, judiochu aidautigmeshkam makichik Wakania duke ajutjama nujai iina Apají Apajuijai dusha adigmainaitji.

<sup>19</sup> Nunin asajum atumek tikich nugkanmayagkesh, ijagkesh ainatsjume, duka nunitsuk Jesusa nemajin pegkejam aina nuninuk wajasú asajum Apajuí aentsji ainagme.

<sup>20</sup> Atumek, apóstol aidau nuigtú profeta aina nunú, Cristo Jesús kaya jegá ichichna imana nui ekeni jegamaina dutikamu ainagme.

<sup>21</sup> Ashí Cristo nemajuidauti nijai ijunainaku kanamainchau waigkaja ayatak kawenaji jega Apu ememattai pegkegma iman wajastag tabaunum.

<sup>22</sup> Nunin asamtai atumshakam, ashí niinig ijunainakjum, jega Apajuí ememattaiya iman ainagme; Apajuí, Wakani Pegkejiya nuwi pujugtamui asamtai.

### 3

*Pablo Apajuinu dekaachbau aajakua nu judiochu aidau dekamtikamu*

<sup>1</sup> Nunú aatus asamtai wi, Pablo, Cristo Jesusan takaju asan, atum judiochu aidautigmin pegkeg atina nu etsegbaunum achigkagmatai pujajai.

<sup>2</sup> Atumek dekau amainaitjume Apajuí wait anenkagtamujiya nuna mina atumin jintintuati tujutiwa duka.

<sup>3</sup> Yaunchuk dekaachbau aajakua nunak Apajuí mina iwaintugkau asamtai, atum-nashkam nuna pachisan ujumak agatjabiajime.

<sup>4</sup> Nunú aujkujum dekaattagme, yaunchuk dekaachbau aajakun Apajuí Cristui dutikauwa nuna mina dekamtijuuwa nunú.

<sup>5</sup> Nunak aents yaunchuk batsamajakua nunakesh dekamtikachui, tujash yamaiya juik, pegkejam apóstol aina nuna nuigtú profeta aidaunash Wakani Pegkeji dekamtikawaje.

<sup>6</sup> Nunú yaunchuk dekaachbau aajakua duka, yamajam chicham etsegbauwa nuna antukag, dekaskeapi tuidauk, judío aidaush judiochu aidaushkam betek uwemjatnume, nunikag makichik aents wajasag, Apajuí Cristo Jesusan nemajuidaun anagkuauwa nunash betek jukitnume tibau aajakua nuuwai.

<sup>7</sup> Nunin asamtai yamajam chichaman etsegkati tusa minak Apajuí anenjauch wait anenjug awetiuiwai, dutijua niina senchiji imana nunash sujusui.

<sup>8</sup> Wika ashí Apajuí nemajin pegkejam aina nujai apatkamak wainkayaitjai; tujash nunin aig Apajuí minak wait anenjug yamajam chichaman Cristo yainke makichkish shiig tumainchauwa nuna pachis judiochu aidaunash ujakti tusa awetiuiwai.

<sup>9</sup> Nuigtushkam Apajuí ashí waji aidaun najankauwa nunú, yaunchuk nagkamas dutikatjai tibau dekaachbau aajakua nu wajuk uminkae, nunú dekamtikata tujutiuiwai.

<sup>10</sup> Nunak Apajuí yachaji kuashat niimtina nujai iglesianum dutika nuna yamaik ashí wakan senchigtin aida, agkajunum inamin aina dushakam dekatnume tusa dutikauwai.

<sup>11</sup> Nunak Apajuik tuke atinun dutikatjai tusa anentaimtjua dutiksag ii Apuji Cristo Jesusai dutikauwai.

<sup>12</sup> Nunin asamtai yamaik Cristo dekaskeapi tabaunum ajankas kajinmasa Apajuiyai jegamaina duka agkan ajutjamji.

<sup>13</sup> Nuadui segajime, wi atumiin waitiag nu diisjum mijakajum tusan, nunitsuk dekas atumesh eme anenmamjatum.

*Pablo Apajuí segatgagaku emematbau*

<sup>14</sup> Nunú aatus asamtai iina Apajiya nunak tikishmatjan emematjai,

<sup>15</sup> nigka ashí niina aentsji aidaun nayaimpinum, nugkanmash batsata nunash Apajiyai.

<sup>16</sup> Nuniakun segatjime, Apajuí wait anenkagtugbau dekas imana nuna amastinme, dutijamawagmatai Wakani Pegkejiya nunú atumi anentaiminsh senchijimatnume,

<sup>17</sup> nunikjum Cristo dekaskeapi tau asagmin atumi anentaiminsh Cristo pujusti, nuniakui aneenitnum shiig ebetmamjajum pujakjum kakajus tsujamainchau aminjum tusan,

<sup>18</sup> nu nuniakjum ashí Apajuí aentsji aidautigmek dekamain ainagme ashí ni dutikamu aina duka, nuigtú Cristo anempamuji nagkanmainchauwa dushakam.

<sup>19</sup> Nuigtushkam segajai, nunú Cristo anenkaji makichkish tumainchau ashí tikich aidaun nagkaesauwa nuna dekatnume; nuninak ashí Apajuinua dusha ajitnume tusan.

<sup>20</sup> Nuadui Apajuí emematiagmi, ii waji dutikatasaya segaji nuniachkuish waji anentaimtaji nuna nagkaegas ashí pegkejan dutikmaina nu, nunak niina senchiji jutiini awa nujai dutikmainai.

<sup>21</sup> ¡Apajuí emematiagmi iglesia aidaulik Cristo Jesusa, sujamsau asamtai, nigki ajumaish tuke ememattai atin ati! Aatus ati.

## 4

*Wakannum ijutkau amaina nu*

<sup>1</sup> Wika Apu Jesús takagbaunum achinkan pujusan segajime, wait aneasjum Apajuí wajuk pujusti tusaya untsugmaku ainawa nunisjumek pujustajum tusan.

<sup>2</sup> Atumek ememachu nuigtush kakagchauch; utugchat akuish aneniamunum pempeentunisjumek katsunjajum emamkesjum iwajin atajum,

<sup>3</sup> nuniakjum kakanmamsatajum Wakani Pegkejiya nujai ijutkau pujakjum tikich aidauijash shiig agkan ijutkau pujustag tabaunum,

<sup>4</sup> wagki makichik iyash ainaji, tuja Wakani Pegkejiya dushakam makichki, nunin asamtai ashí atum aidautigmesh ni pegkejan yaijata duke dakagme, Apajuik aatus nuniktinme tusa untsugmaku asagmatai.

<sup>5</sup> Nunisag Apush makichki, dekaskeapi taji dushakam makichki, yamimamush makichki,

<sup>6</sup> Apajuishkam makichki, ashí niina nemajin aina nuna Apajiya nunú, nunin asa ashí niina nemajuina nuig nigki inamui, nunisag ashí ditaig awai.

<sup>7</sup> Tujash jutii aidautinak Cristo makí makichik wait anenjamag, don sujamsatatus wakekauwa dutiksag sujamsauwai.



<sup>8</sup> Nuadui agagbaunum chichaak:

“Nayaimpinum ni shiwajin depetuk achijá yajuak wakae, nunik aents aidaun don aidaun tinamkae”, tawai.

<sup>9</sup> ¿Wajuk takua nunash depetmak “wakae” tawa? Nunak, nugká taa maam nantaki ataktú wakatin asamtai tiuwai.

<sup>10</sup> Nunú nugká tauwa duke ashí nayaim aidaun nagkaegag wakauwai, nunik Apajui ashí najankamua nunak imá nigki diyawai.

<sup>11</sup> Nigki etegjauwai apóstol agtinun, profeta agtinnash, evangelista agtinnashkam, pastor agtinun nuigtú maestro agtinnashkam,

<sup>12</sup> aatus etegkeg umikui niina aentsji pegkejam aina nuiyan tikich aidaunash yaigtinme, dutikam Cristo nemajuidaush aan kuashat kawegtinme tusa,

<sup>13</sup> dutikamu asaja makichik dekaskeapi tabauwa duke ashí ajutjamtinme, nuniaku Apajui Uchijiya dusha shiig dekamain ainaji, imagnisa pujuinaku Cristujai betek agmi iina anentaimtajinish, aents aidaujaish shiig awagdaiyinaku.

<sup>14</sup> Nuninaku uchi aidau emetug anentaimchau asag waa wamak tibaujin yapa-jiak, tsanuamash dekaskeapi tuwama numamtuk, aents tsanumtan yacha aidau ashí dekaskechu waitan jintiina nu tsanuamak amaitsuji.

<sup>15</sup> Duka nunitsuk dekaskea duke chichainaku tikich aidaujaish aneenimainai, nu aaja nuninaku ashí ii takaamuji aina nujai Cristuwa imanuk amainaitji. Cristo nemajin aidautinak niyai jutii Apujiya duka.

<sup>16</sup> Cristuwai niina nemajin aina nuna ashí niinig ijumag shiig emetuk, makí makichik aina nu shiig ijunas takainak aan nagkaemas aneenitnum emkatnume tusa dutika duka.

*Cristo nemagku yamajam pujut juamu*

<sup>17</sup> Tuja juna tajim nunak, Apu Jesús tawa dutiksanuk tajime: Atumek Apajui nemagchau pujuina nunisjumek pujusaigpajum, wagki ditak wainak anentaimaina nunisag pujuinawai.

<sup>18</sup> Nu aents aidauk dekachu nuigtushkam antakchau ainawai, nunin asag Apajui pujutan sukagta nunash dekamain dekapenatsui.

<sup>19</sup> Nuninak datsantainchau waigkag, ashí pegkegchau takatnum idaimamsau asag, Apajui eemtin ashí pegkegchau aina nunash idaimainchau dekapenawai.

<sup>20</sup> Tujash atumek Cristui aaja pujutak unuimagchau ainagme,

<sup>21</sup> atumek dekaskenum Cristo pachisa etsegbau antuku ainagme, nunin asajum ni wajuk pujusti tusaya wakejutpawa nunisjumek pujakjum, Jesusdau dekaskea dushakam unuimamain ainagme.

<sup>22</sup> Nuadui atumek, yaunchuk pujujakuitjum dui pegkegchau wakeeta nu tsanugmakui idaimainchau takaajakuitjum duka idaisatajum,

<sup>23</sup> nunikjum wakannumash anentaimtanmash yapajinau yamajam atajum,

<sup>24</sup> nuigtushkam yamajam aents pegkeja nunak takau atajum. Apajui pegkeja nunak takastinme nuigtushkam dekaskenum pegkejam atinme tibau aidauash wajuku amainaita nunisjumek.

*Cristo nemajin aidau nunimain*

<sup>25</sup> Nunin asamtai waitjut aina duka idaisatajum, nuniakjum tikich aidaujaish dekaskea duke chichatajum, wagki ashí jutii aidautik Cristo nemagbaunmag makichik iyash asaja.

<sup>26</sup> Kajeakjumesh, tudauk takasaigpa, kajeakjumesh tuke etsag akapakigpajum,

<sup>27</sup> iwanch yunumtugmak pegkegchaun takamtijamsainum.

<sup>28</sup> Yaunchuk kasamajakú akush, yamaik kasamkaigka, dekas takastí pegkeg aina nuna, nuniak ajití tikich atsumaidau yaimaina dusha.

<sup>29</sup> Pegkegchau aidauk chichakaigpa, dekas chicham pegkeg tikichnash pegkegnum yaimaina nu chichatajum, antuidaunash shiig awagmamaina nunú.

<sup>30</sup> Apajui niina aentsji etamu asa Wakani Pegkejin amasua nu pegkegchau takaakjum wake besemag anentaimtikaigpajum, tsawan jegatai nuna diis ashí niinu aidauanak tudaunum tuke agkanmitkatna nu.

<sup>31</sup> Ashí kajeamu aina duka idaisatajum, senchi kajeamu, tsagkugchamin kajeamu, shinamu, pegkegchau chichagkagtam, nuigtú ashí pegkegchau aina dusha takasaigpa.

<sup>32</sup> Nuniakjum pegkeg atajum, tikich aidaujaish pempeentunisjumek wait anendaiyakjum, pempeentunisjumek tsagkugdaitajum, Apajui atumin Cristo nemaju asagmin tsagkugtamjajua dutiksagmek.

## 5

*Apajui uchiji aidauash wajuk pujumainaita nunisaik pujumain*

<sup>1</sup> Atumek Apajuí uchijí aneetai asajum, ni wajukuíta nuninuk atasajum kakanmamsatajum.

<sup>2</sup> Cristo jutii anempau asa nigki jutiini tsagkamankauwa nunisjumek tikich aidaush aneetajum, Cristo maamua duka kugkuin pegkejan kugkuwama iman Apajuinak shiig awajkauwai.

<sup>3</sup> Atumek Apajuí aentsji pegkejam asajum, ashí pegkegchau iyashnum takanitai aidau, mijamainchau wakegamu aina dushakam, nuigtú ashí pegkegchau aina nu pachisjumkesh chichá yujaigpajum,

<sup>4</sup> pegkegchau aidau augmatut, waínka anentainkas chichat, pegkegchaunum iwajut aidau idaisatajum duka pegkegchauwai, nu tu yujatsuk dekas Apajuí see titajum.

<sup>5</sup> Atumek shiig dekaagme, iyashnum tsanitai pegkegchau aina nuna takaa yujajin aidauk, nuniachkush pegkegchau aina nuna takaa pujú aidaushkam, nuniachkush utugsanuk wajijjinawag tusa imá nunak anentaimtú pujú (duka apajuimtai ememattaiya nuninai), aidauk Cristo Apajuíjai inamjatna nuig wayachagtinaí.

*Cristo tsaaptinijjai pujaku nunimain*

<sup>6</sup> Makichkish wainak chicham aina nujaig tsanuam aigpajum, wagki nunú timajin nuna takaidauk, Apajuinu suwimak ishamaina nuna juinawai Apajuí intimjuídaú asag.

<sup>7</sup> Nunin asamtai atumek aents nuna takaina nuninuk aigpajum.

<sup>8</sup> Atumek duikik suwenum pujujakuitjume, tujash yamaik Apu Jesusjai ijutkau pujakjum, tsaaptinnum pujagme. Nuniau asajum tsaaptinnum pujaush wajuk pujumainaita nunisjumek pujustajum.

<sup>9</sup> Wagki, nu Wakaní Pegkeji pujugtamu asa: Ashí wait anenkagtutan, pegkeja duke takatan, nuigtú dekaskea duke chichatnash sujamji,

<sup>10</sup> nunin asamtai shiig dekaatajum, Apu Jesusan shiig awagma nunú.

<sup>11</sup> Aents Apajuí nemagchau aidau pegkegchaun takaina duka takasaigpajum, dekas dita nuniamuji iwaintuktajum, dutikam dita takaamuji pegkegchauwa nuna dekaatnume.

<sup>12</sup> Dita pegkegchaun uuká takaina nu pachisaik tumaitsui, tikima shiig datsan asamtai,

<sup>13</sup> tujash ashí nunú aidau dekaamak paan weawai,

<sup>14</sup> wagki ashí paan wega duka tsaaptin iwainamu asa nuniawai, nuadui:

“Ame kanam duka shintagta, aents jinau aidanum pujaumesh nantaktá, nunikamin Cristo tsaaptin etamtatui”, tawai.

<sup>15</sup> Nuadui atum wajuk pujagme nu shiig kuitamsa diistajum, anentaimkas batsamtsuk shiig anentaimsa pujustajum.

<sup>16</sup> Tsawan waínka megkayigpa, wagki yamai tsawan batsatag juik, pegkegchau takaamu ayau asamtai.

<sup>17</sup> Anentainkachu wajukmaina nunitsuk, dekas Apu Jesús wakegamua nu dekatasajum kakanmamsatajum.

<sup>18</sup> Nampekaigpajum anentainkachua nunin ekagtau asamtai, dekas Wakaní Pegkeji takamtijusti tusajum idaimamsatajum.

<sup>19</sup> Nuniakjum pempeentunisjumek wakegat egketdaiyatajum salmo aidau, himno, wakannumia aina nu kantamkujum. Nu kantamkujum anentaiminish Apu Jesús ememattajum.

<sup>20</sup> Nuniakjum Apajuí iina Apajiya nunú, ashí waji aina nu pachisjum tuke see tusagmeké atajum, iina Apuji Jesucristo pachisjum.

*Aishmag nuwentin nuwa aishintin aidau batsamain*

<sup>21</sup> Cristo eme anentamunum, pempeentunisjumek sumimdaikatajum.

<sup>22</sup> Nuwa aishintin aidaushkam aishinig sumimain ainawai, Apu Jesusa nemagkaju imá niinig sumimkaju aina nunisag.

<sup>23</sup> Wagki aishmagkui nuwen nunikta tumainuk; Cristo iglesia niina iyashí ainag nunutin tujama nunisag, nunin asa jutiin Uwentijamnuk niyai.

<sup>24</sup> Iglesia Cristui sumima nunisag, aishintin aidaushkam niina aishinish sumitkau amainai ashí wajiinun.

<sup>25</sup> Nuwentin aidauh, atumi nuwem aneetajum Cristo iglesia aneau asa niini mantamdauwa nunisjumek,

<sup>26</sup> Cristuk nunak niina iglesijaiya nu, niina chichamen antukag umiagtai pegkeemtikata tau asa nunikui,

<sup>27</sup> dutika niina iglesijain shiig tsaaptin tsuwatnash antiakchau, makichkish pegkegchauji atsugbau, pegkejam iwainakta tau asa.

<sup>28</sup> Nunisag nuwentin aidaushkam nuwenak niina iyashí anentus aneemain ainawai. Ni nuwen aneak niina iyashinash dutiksag aneawai.

<sup>29</sup> Wagki makichkish niina iyashinak kajegchau ainawai. Ayatak shiig kuitamak ayujin ainawai, Cristo iglesian kuitama dutiksag,

<sup>30</sup> wagki jutiik niina iyashí ainaji.

<sup>31</sup> Nunin asamtai: “Aishmag nuwenkug apajin, dukujin ukuak, niina nuwejaig ijunmainai, nuniak nuwejai makichik iyash wegawai”, tawai.

<sup>32</sup> Jujú dekaskea nu dekamainchau aajakun taja nunak, Cristo iglesiajai makichik wega nuna pachisan tajai.

<sup>33</sup> Aatus asamtai atumshakam, makí makichik nuwentin aidautigmek nuwem aneetajum atumi iyashim anentsajum, tuja nuwashkam niina aishinak eme anentus diistí.

## 6

<sup>1</sup> Uchi aidauh, apa aidau umigkatajum Apu Jesusan shiig awagma dutiksagmek, nuuwai dekas pegkejak.

<sup>2</sup> Dekatkau chicham umiktinnun anagtamamu awa duka juuwai: “Amina apa dukujai eme anentsam diistá,

<sup>3</sup> jujú aaja dutikakum shiig aneasa dukap tsawan nugká pujamush ajutjamti”, tawai.

<sup>4</sup> Uchigtin aidauh, uchijum kajemainuk chichagkaigpajum, dutiktsuk chichagká esegajum jintintua tsakapagtajum, Apu Jesús wakega dutiksagmek.

<sup>5</sup> Achikbau aidauwah, atumi apujum ju nugkanmayaya nunú umigkatajum puy-atjusjum nuigtush ajantusjum shiig anentaiyai, Cristo takagmainaitjum imatiksajum takagsatajum,

<sup>6</sup> dita wajasá diigmakui shiig awajkata tabaunum nunitsuk, atumek Cristo inake asajum wakejusjum pegkeg anentaiyai Apajuí wakega dutiksagmek takagsatajum,

<sup>7</sup> Apu Jesusdau anentsajum shiig wakejusjum takastajum, aents aidauun anentsa dutiktsuk;

<sup>8</sup> wagki aents agkan aidauun, achikbau aidauwashkam, dita pegkeg takasbauwa dutiksag Apu Jesús akiktina nunú dekau asajum.

<sup>9</sup> Nunin asamtai inamin aidautigmesh, atumi inakem aina duka awantsagmek chichajigpajum. Adeagtajum atumin inapau, ditanash ina duka, nayaimpinum makichik Apu puja nunú, nigka aentsnak akanjag diyatsui.

*Cristo nemajin aidau wakan pegkegchau aidaujai maaniamu*

<sup>10</sup> Nuadui yatsug aidauh, Apu Jesusai ijutkau pujakjum niina senchijí dekas imana nujai ichichmamjatajum.

<sup>11</sup> Nuniakjum Apajuí maanitain ashí amasajua nujai ejaamaktajum, nunikjum atumshakam tajitkatajum Iwanch tsanugmainakuish.

<sup>12</sup> Wagki jutiik aents nejentin ukunchtin aina nujai maaniatsji, dekas wakan pegkegchau aina nuna apuji, wakan senchigtin aidau, wakan pegkegchau, aents ju nugkanmaya aidauun pegkegchau takamtikin, agkajunum batsamin aina nujai maanijai.

<sup>13</sup> Nuadui ashí maanitain Apajuí amasajua nunú jukitajum, nuniku asajum iwanch jetepakuish tajitkatajum, nu ashí nagkaikiu asajum nunisjumek atajum.

<sup>14</sup> Nunin asamtai tajitkaujum nunisjumek pujakjum, dekaskea nu akachumtaijai beteka nu jukitajum, nuniakjum pegkeg takaamu corazajai\* beteka dushakam jukitajum.

<sup>15</sup> Nuniakjum sapat wegamaka shiig uminmaina imanikjum umintsatajum, yamajam chicham agkan pujuta nu pachisa etsegkata tabaunum.

<sup>16</sup> Ju aina nuní nagkaemas dekaskepapi tabauwa nu ajutjamtinme, atum ejamaktin tantagjai beteka nu, Iwanch flecha ekeemak aketjamkui ikagnaktin.

<sup>17</sup> Nunisjumek uwemat atsejutajai beteka nu, nuigtú Apajuí chichame Wakani Pegkeji espadajiyá dushakam jukitajum.

<sup>18</sup> Atumek Apajuí aujut idaisaigpajum, tuke mijattsuk Apajuí segasjumké atajum Wakani Pegkeji yaimpasmatai. Aneaku pujustajum junik anentaimá pujutsuk ashí Cristo nemagkaju aina nu pachisjumesh Apajuí aujtustajum.

<sup>19</sup> Minash Apajuí segatjitajum, wi wajintu tumainaitja nunash Apajuí sujustí, ajankas yamajam chicham Apajuinu yaunchuk dekaachbau aajakua nuna pachisan dekamtikat-jai.

<sup>20</sup> Apajuí minak ju chicham etsegkata tusa awetiuwai, nunú etsegbaunum yamaik cadenayai jigkatjagmatai pujajai, nuniau asamtai minash Apajuí segatjitajum ishamkag-tutsuk niina pachisan etsegkatjai.

*Akatmabau*

\* 6:14 Corazak, maaniaku nugkurai jiju nuniachkush duwap najanamu aajakajui.

<sup>21</sup> Tíquico iina yachi anetaiya nu, nuigtú shiig imagnis Apu Jesusa takatjin yaimna nunú, ni anui taa ashí ujaktatui mina pachitus wajuk pujaja nunashkam.

<sup>22</sup> Nuadui ni jutii wajuk pujuinaji nuna pachis ujakpakti nuniak anentaimnash ichichtugmagtinme tusan awetajime.

<sup>23</sup> Apajuí iina Apajiya nu nuigtú Apu Jesucristujai shiig agkan pujutan, aneenitan, dekaskeapi tutanash yatsug aidaun susatnume.

<sup>24</sup> Apajuí wait anenkagtamujiya duka dekaskenum ashí iina Apuji Jesucristun aneena nui tuke atinai.

Aatus atí.

## Pablo carta agaja filiposnumia aidau awetimu

### *Kumpamkagtamu*

<sup>1</sup> Witjai Pablo, nuigtú Timoteojai Cristo Jesusa inake aidauti, ashí Apu Jesusai pegkeniu aidautijum obispo aidau, nuigtú diácono aidautijum Filipos batsatjum nuutigmin kumpamjime.

<sup>2</sup> Atumnash Apajuí iina Apajiya nu, ii Apuji Jesucristua nujai wait anenjamaidau asag, shiig agkan pujutan amastinme.

### *Pablo Jesucristo nemajuidau Apajuí aujtamu*

<sup>3</sup> Atumin anentaimtaknuk tuke see tusanké ajai mina Apajuijun.

<sup>4</sup> Ashí wi Apajuí aujag nuniaknush, ashí atumin pachisan shiig aneasan tuke segatjime;

<sup>5</sup> wagki, atum nagkamchakjum yamajam chicham antukjum yaintium dui nagkam-sajum, yamaikish tuke yainjum nuadui;

<sup>6</sup> Apajuí atumiin takat pegkejan nagkabauwa nunak, dutiksagkeap takamtijamá atatau tsawan Jesucristo minamu atina imanuish tajai.

<sup>7</sup> Wi ashí juna aajan atumin anentaimtajim duka pegkejai, wagki wika atumnak senchi aneajime; wi achinká pujakuish, chichaman dekagtuatatus apu jujuinakuish, nuigtú yamajam chichaman etsegkati tusagmesh yainjum nuadui.

<sup>8</sup> Wi atumin ashí aneajim nunak Apajuí shiig dekagtawai, Cristo Jesús jikamsá anejattaijin suja nujai aneajim nunak.

<sup>9</sup> Nuniau asan Apajuí aujkunush, atumi anenkajum aina nu aan nagkaemas, nuigtú aan nagkaemas unuimatash, ashí dekata dushakam ajutjabiagti tusan segatjime;

<sup>10</sup> nunikmatai dekas pegkeja nunú etegket dekaatajum tusan. Aaja nuniakjum pujutjuminish pegkeg makichkish tumainchau atajum, Cristo minamu tsawan atina duish;

<sup>11</sup> Jesucristo yaimpasagmatai kuashat pegkeg takaagmin tikich aidaush Apajuin eme anentus ememattinme tusan.

### *Minaig pujamua duka Cristuwai*

<sup>12</sup> Yatsug aidaush, mina utugchat aidau nagkaetukiaja nu dekaatajum tusan wakegajai, duka dekaskenum yamajam chichama nu aan nagkaemasa etsegbaunum yainkaje;

<sup>13</sup> nuniau asa wi achinkag duka, apú jeen aents batsatbaunmash, nuigtú ashí tikich aina nuish Cristo pachisan paan etsegbaunum yainkae.

<sup>14</sup> Nunin asamtai kuashat yatsug aidau, wi achinkamun wainkag Apu Jesusai ichichmamjag ishankagtutsuk chicham etsegta nuna wakekaje.

<sup>15</sup> Duka dekaske, ujumak aents aidau kajegkagtamunum, nuigtush shiwagmagata tabaunum Cristo pachis etsejuinawai, nuniinai tikich aidauk pegkeg anentaiyai etse-juinawai.

<sup>16</sup> Nuniinai ujumak aidau Cristo aneamunum etsegtuinawai, Apajuí yamajam chichama juna ayamjukti tusa mina jui apujtusa nuna dekagtuaidau asag;

<sup>17</sup> tujash tikich aidauk ditanunak anentaimtus nuninawai, wi jui achinkan pujag nuna aan nagkaemas utugchatan apujtugsagtatus.

<sup>18</sup> Tujash nunak puyatjatsjai, dekaskenum pegkeg anentaiyai etsejuinakush, nuni-achkush imá Cristunak pachis etsejuina dui shiig aneajai, nuigtush aan nagkaemas shiig aneamuk ajuttatui.

<sup>19</sup> Wagki wika dekajai atum Apajuí aujtugjum dui, Wakan Jesucristunua nu agkan-mitkajuatta nunak.

<sup>20</sup> Wi senchi wakegamug nuigtú dakamu ajuta duka, makichkinmakesh inatsam aig tusan imagnisan pujustag taja nuuwai; yamaishkam nunisnuk pujustag tajai, wi iwaaku pujutaish nuniachkunush jakamtaish minaiyan unuimajag Cristo imanjiya nunash shiig dekaatnume, tusan.

<sup>21</sup> Wagki minaig iwaku pujuta duka Cristo takagku pujuta nuuwai, untsu jaamua duka Cristujai tuke pujuttag nuuwai.

<sup>22</sup> Wi ju nugka jui pujaknuk, pegkeg takat aina nunak takastasan nunimainaitjai, nunin asamtai dekatsjai tutsu etegmainait.

<sup>23</sup> Wagki jimaja juuya etegkata tabauk minaig utugchatai: wakegajai jakan Cristujai pujustasan, nunú imá pegkeg asamtai;

<sup>24</sup> tujash pujusta tabauwa duka atum mina atsumjajum dui nunimainai.

<sup>25</sup> Nuna aaja dekau asan atumjaiyap pujuttaja tajai, atum dekaskeapi tabaunum shiig aneastina nuna yaigtin asan.

<sup>26</sup> Nunikjum wi ataktú atumiin taattag dui Cristo Jesusai dakujamu aan nagkaemas ajutjamtinme tusan.

*Yamajam chicham tawa nunisaik pujamu*

<sup>27</sup> Ayatak, atumi pujutjuminish yamajam chicham Cristunu tawa nunisjumek pujustajum, wi atumin wainkatasan taaknush, tuja atumjai pujachkunush ditak ebetmamjag makichik anentaiyaik shiig ijuntsag yamajam chicham dekaskeapi tabauwa nuna etsejuinak kakantuinawai tabaun antuktajai;

<sup>28</sup> makichkish atumi shiwajum aina duka ishamkaigpajum, nunú atum nuniamua nunú Apajuí ditanak suwimkan suwak, atumnak uwemtijamjatna nuna iwaintuinawai. Nunak Apajuí ashí dutikattawai.

<sup>29</sup> Wagki Apajuik atumnak ayatak Cristo dekaskeapi titinme tusa wakegatsui, Cristo nemajuinak waittsatnume tusa wakegawai;

<sup>30</sup> nuadui atumnash wi waitiamu wainkauwaitjum duke ajutjamainawai, nunisnuk yamai waitiag dusha antugtagme.

## 2

*Shiig aneenisa batsatbau*

<sup>1</sup> Cristo atumin tikich wakemitkatan senchijin amasua nujai nuigtú anentak atumiin ajutjamaina nujai tikich aidaush anentai ichichtugtajum, nuniakjum makichik Wakania duke ajutjamaina dui pempeentunisjumek wait anendaitajum;

<sup>2</sup> nuniakjum minash shiig anemtijustajum ashí ijutkau pujakjum, makichik anenka nuig ijunkujum, makichik anentaimta nuig, takastasa anentaimtamua dusha makichik anentaimtakjum.

<sup>3</sup> Makichkish shiwagmagata tabauwai takasaigpa, nuniachkugmesh ememamuikish, duka nunisuk ayatak imanchauch anenmamkujum makí makichkitijum tikich aidaush atumin nagkaetamsau diitajum.

<sup>4</sup> Makichkish imá ni wakegamujiya nuna egatsuk, ashí tikich aidau wakegamua nuna egaktinme.

*Cristo imanchau wajasú ashí nagkaekagtasu awajsamu*

<sup>5</sup> Atumnash Cristo Jesús anentaimajakua nuninuk anentaimtash ajutjamain ainawai;

<sup>6</sup> nigka Apajuí wajukuita ibau aajakuitak, Apajuikai betek atasag wakekachui;

<sup>7</sup> ni aajakbauwa nunak idaiyak jutijai betek wajas, ashí aents aidau inataijiya nunin wajasui;

<sup>8</sup> nunik aentsjai betek wajas nigki imanchauch wajasui,

nunik jaakush Apajuí umijak, cruznum jakauwai.

<sup>9</sup> Nunikmatai Apajuishkam imá niinak ememattai awasauwai,

dutika daajinash ashí tikich aidau daaji aina nuna nagkaesaun susauwai;

<sup>10</sup> nayaim batsamin aidaush, nugkanmayash,

nuigtú nugká initkenia aidaushkam imá Jesucristunak tikishmatug ememattinme tusa;

<sup>11</sup> nuninuk ashí nugkanmaya aidaush Jesucristo Apua nuna dekaatnume,

nunikag iina Apají Apajuia nunak ememattinme tusa.

<sup>12</sup> Nuadui mina aneetaig yatsug aidauh, wi atsakuish tuke umigtin agmaujum nunisjumek, yamai wi atushat pujag juish aan nagkaemasjum umigtuktajum. Atum uwemjamu dekaskea duke puyatjusjum kuitamkatajum;

<sup>13</sup> wagki Apajuia nuuwai wakeetan nuigtú ni wakega dutiksaik wakejusa takatan atumin amá duka.

<sup>14</sup> Ashí dutikatajum makichkish augmatnaisuk nuigtush jiyainitsuk;

<sup>15</sup> makichkish nuninai tama amainchau, bakumamainjish atsubau, Apajuí uchijí asajum pegkegchaush atsubau, aents pegkegchau besekú aina nuig, atum agkajunum yaya aidau etsantak nugkan tsaptin emama numamtin atajum.

<sup>16</sup> Chicham pujutan sukagtina nuanuig ebetmamjatajum, nuniau asagmin Cristo minakuish, atumiin ememas anentaimjatjai, wainkanuk wekaesachuapitja nuigtush wainkanuk takaschauwapitja tusan.

<sup>17</sup> Nuniau asan, dekaskeapi tabauwai atum takaamu ofrenda Apajuí sumaina numamtuk wajajum nujai betek atatuí wi mantamnamush, nunikmatai atumjai shiig aneakun dakujamu ajuttatuí.

<sup>18</sup> Nunin asamtai atumshakam shiig aneakjum wijai dakujustajum.

*Timoteo*

<sup>19</sup> Apu Jesús wakegakuig, Timoteon wamak atumiin awemata tajai, atum wajuk pujagme nuna dekaan shiig aneasthan.

<sup>20</sup> Wagki tikichik wi uyumag imatika atumdau pegkeg amaina nuna uyumauk atsawai.

<sup>21</sup> Wagki ashí tikich aidauk, Cristo Jesús wakega nuna egatsuk dita wakegamua nunak againawai.

<sup>22</sup> Tujash atumek dekgame Timoteo pujutji pegkeja duka, nuigtush wajuk wijai takasé yamajam chicham etsegbaunum, mina uchig yainmaina imatika.

<sup>23</sup> Nunin asamtai minash wajuk ajuttig nuna dekaan awematag tajai;

<sup>24</sup> Apu Jesusai kajintan anentaimjai nuniau asan wisha waamak minittajai.

#### *Epafrodito*

<sup>25</sup> Dutiskanuk yatsug Epafrodito awetitag tajime, mina takat atuetutaig, nuigtú yamajam chicham etsegbaunmash senchi takaak, nuigtú wi atsumamunmash yainka nuna.

<sup>26</sup> Nigka shiig senchi wakemayi atumin ashí waipakagtatus, nuniyatak shiig senchi waittsabi atum jaawai tabau antukchamkaijum nuna.

<sup>27</sup> Dekaskenmag jamayi, jatanum jeganmayi, tujash Apajúi niinak wait anenjabi, imá niinakek dutikache, minashkam wait anenjuje, wake besemag pujag nuna, nuní nagkaemas wake besemag pujusai tujutu asa.

<sup>28</sup> Nuadui wamkesan awetajime, atumshakam ataktú ni wainkajum shiig aneastajum, nuniakjumin wishakam wake besemjak pujushtajai, tusan.

<sup>29</sup> Shiig aneasjum Apu Jesusa daajin jukitajum, nuniakjum tikich niya junin aidaushkam aneasjum diistajum;

<sup>30</sup> wagki Cristo takagbaunum jatanum jeganmayi, niina pujutinak ishamainnum idaisabi atum mina yainmaina nuna ni yainkata tau asa.

### 3

#### *Dekas imana duka Cristo dekaata*

<sup>1</sup> Yatsug aidauh, atumek Apu Jesusai ijutkau pujakjum shiig aneasjum pujustajum. Wi agatjabiajim nunak awaskanuk tajim duka minaig tutitjakesh atsgutawai, juka dekas atuminish atsumnawai.

<sup>2</sup> Aents aidau yawá pegkegchau tsumaina numamtin yujas: Uwemjata takugmek pakamaktajum, tu yujaina nujaig kuitamamkatajum.

<sup>3</sup> Wagki jutii ainaji pakamaku aidautik, Apajúi Wakaní yaimpasmatai emematuinag nunuti, jutiiik Cristo Jesusai ememainaji, nuniaku iyashnumiag kajintsá anentaimtatsji.

<sup>4</sup> Nunú imá jutiiik kakanmamsa uwemainaitkuig, wi dekas imá mina takatjuig uwe-main aajakuitjai. Witjai dekas tikich aidau nagkaesan ashí chichamnash umikunuk.

<sup>5</sup> Minak akiinan ocho tsawan wegaig pakagtiu ainawai, wika Israel aentsuitjai, Benjamín weantuitjai, hebreo aina nuig witjai hebreonuk; tuja chicham umitnumag fariseowaitjai;

<sup>6</sup> Apajúi takatji akasmatkun iglesia aintujakuitjai, chicham umiktinum pegkeg takastajum tawa nu umitnumag makichkish nuninai tumainchau aajakuitjai.

<sup>7</sup> Tujash ashí ju aidau minai iman aajakajua nunak, Cristo aneamunum wainkan diiyajai.

<sup>8</sup> Ashí nunú aidau nak idaisauwaitjai, dutikakun pasuamu ukajá ajaptayama nunin anentajai, Cristo Jesús mina Apujua nunú shiig dekaata tabaunum,

<sup>9</sup> nuigtush niijai ijutkau atag tabaunum, chicham umiktina nu umiamuchui, Cristo dekaskeapi tabauwai, Apajúi pegkejan takauwa iman diigma dui.

<sup>10</sup> Wakegag nunak Cristo dekaatag taja nuuwai, niina senchijin nantakiuwa nunash dekapjatanan, ni waittsauwa nunisnuk waittsatanan, nuigtú ni jakauwa nunisnuk jakatanan,

<sup>11</sup> jakau aidau nantainakui wisha nantakmig tau asan.

#### *Jegantina nuig jegatsji*

<sup>12</sup> Wika ashí dutikajai takun tatsujai, nuigtush iman wajasjai tusanush tatsujai, tujash nui jegantasan wegajai, dekatkauk Cristo Jesús niinu etiu asamtai.

<sup>13</sup> Yatsug aidauh, wika nui jeganjai tusan tatsujai, ayatak yaunchuk takasbauwa nunak dekaskenum pachitsuk idaikun, jegantasan wegag nuna imá senchi takaajai;

<sup>14</sup> takasa ashimkata tibauwa nui jegantasan weajai, nunikan waji jukitnume tusa Apajúi nayaimpinum pujus Cristo Jesusai untsugmakua nuna jukitanan.

<sup>15</sup> Nunin asamtai, ashí wakannum katsujau aidautik duke anentaimain ainaji, tuja tikich yajá anentaimu ataish nunashkam Apajúi iwaintuktatui.

<sup>16</sup> Untsu nunimainaitag duka jutii dekauwaitag nunisaik umiaku pujumainaitag nuuwai.

*Jutiik nayaimpinmaya ainaji*

<sup>17</sup> Yatsug aidauh, wi wajukeya duke dakumkatajum, nuniakjum jutii pujuinag nunisag pujuina dusha diistajum.

<sup>18</sup> Wagki anui kuashat yujainawai, nuna pachisan kuashta imaania tibajime, yamaishkam awentsanuk buutkun tajime, aanú aidauk Cristo cruznum jakauwa nuna shiwaji ainawai tusan,

<sup>19</sup> ditak imá nugkanmayanak anentaimtuinawai, ditá apajuijig iyashí wakegamuji aina duke, dita ememamujiya duka ditá datsantí atina nuuwai, nunú aidau nagkanbauji atina duka megkaeta nuuwai.

<sup>20</sup> Nuninai, jutiiik nayaimpinmaya aents ainaji, nunin asaja nayaimpinmaya Uwentik-agtin Apu Jesucristo taati tusa dakainaji;

<sup>21</sup> ni jutii iyashí imanchau aina nunak yapagtugmatnai, niina iyashí imana ibauk etamkatatus. Nunak nigka senchigtina ibau asa, ashí waji aina nunak niinig sumimtikata tau asa dutikatnai.

## 4

<sup>1</sup> Nuadui mina yatsug aneetaig aidauwah, wika atumnak senchi aneajime, wi atumiin shiig aneamu ajuta duka, waji shiig pegkejan jumainaitag imanai. Nunin asantai, atum Apu Jesusai ebetmamjajum pujajum nunisjumek pujustajum.

<sup>2</sup> Evodia, Sintiquejai segainajai Apu Jesusa nemajuidau asag shiig chichasag pujustinme, tusan.

<sup>3</sup> Dutiksanuk aminashkam mina kumpag betek umin asamin segajame, aanú ubag aina nu yaigtá tusan, ditak wijai betek yamajam chicham etsegbaunum senchi takasagmayi Clementejai, nuigtú tikich aina nujai; nunú aidau daajig aents pujuta juki papinum agattaiya nui agatkamu ainawai.

*Imá Apu Jesusaig tuke dakujustajum*

<sup>4</sup> Tuke Apu Jesusaig dakujitajum. Awaksanuk tajime: ¡Dakujustajum!

<sup>5</sup> Atumí shiig awajkagtutaigmea dusha ashí aents aidauh wainkamu atí. Apu Jesús taatnuk namput wajaschae.

<sup>6</sup> Makichkish atumkek uyumá pujuigpajum, nunitsuk Apajuí aujkujum ashí iwaintuktajum nuniakjum see titajum.

<sup>7</sup> Apajuí agkanji, ashí dekatan nagkaega nunú, atumi anentaimnak nuigtú anentaimtagminash Cristo Jesusai kuitamjutpaktatjume.

<sup>8</sup> Nuigtushkam yatsug aidauh, ashí dekaseg aina nui, ashí ajantusa diita nui, ashí pegkeg takaamu aina nui, ashí ayatak pegkeg aina nuig, ashí kakagchau ata nui, ashí eme anentsá diyam atanum, nuigtú eme anentam amaina nui anentaimsatajum.

<sup>9</sup> Ashí wi jitintuauwaitjim nu takastajum, ashí wi takaamu nuigtú antukuitjum dushakam dutikatajum; nuniagmin Apajuí agkan pujatan sukagtina nu atumjaish atatuí.

*Filiposnumia anentag suwamu*

<sup>10</sup> Shiig senchi shiig anejai Apu Jesusai, ataktú mina uyumatjukujum dui, atum mina tuke uyumatjin agmaujum nunak dekajai, nuninaitkujum dutikmain atsau asantai ankaugme.

<sup>11</sup> Wika junak atsumau asan tatsujai, wika ajuta nujaig shiig aneasa pujatan unuimajuitjai.

<sup>12</sup> Wika ujunauch pujutnash dekajai, antsanuk kuashat ajutkagtamunum pujutnashkam dekajai; nunin asan ashí wajuk pujuinjaki nunash unuimajuitjai, shiig yuwa pujutnash, yapajayatku pujutnash, kuashat ajutkagtamunum pujutnash, atsumayatku pujutnash.

<sup>13</sup> Ashí nunak nunimainaitjai, Cristo senchimtijau asantai.

<sup>14</sup> Tujash atumek wi waitiamujua nui pegkeg dutikaugme.

<sup>15</sup> Atumshakam degagme filiposnumia aidauwah, nagkamchakun yamajam chichaman etsegkatasan Macedonia pujaun jiinkibiag nuig, makichik iglesiakesh minak yainkachagmayi, imá atumek yainkabiugme; <sup>16</sup> nuniau asajum wi Tesalónica pujaish awetugbaijume, nuigtush awentsagmekesh wi atumag nuna dutikati tau asajum.

<sup>17</sup> Wika junak anentag sujustinme tusan tatsujai, atumdau aan nagkaemas ajutjamtinme tusan tajime.



<sup>18</sup> Atum Epafroditowai awetugbajum nunak ashí imatixsanuk jukibiajai, yamaik wi atsumamun nagkaegas ajutui, duka pegkeg kugkuin apeamu Apajuin shiig awagma imanuyi.

<sup>19</sup> Nuadui mina Apajuijua nu, ashí atumin atsugtamjum nunak, niina wiyakchaji dekas imana nuna imatixsag Cristo Jesusai amaamu jukitnaitjume.

<sup>20</sup> Apajuí iina Apajiya nu, nigki tuke ememattai atí. Aatus atí.

*Inagnaku akatmabau*

<sup>21</sup> Ashí yatsug Cristo Jesusai pegkeniaju aina nunú kumpamjutuata. Antsag yatsug wijai batsata dushakam atumnash kumpamjamainawai.

<sup>22</sup> Nunisag ashí pegkejam aina dusha kumpamjamainawai, imá senchi Cesara jeenia aina nu.

<sup>23</sup> Iina Apuji Jesucristo wait anenkagtamujiya nu ashí atumi wakanminish ajutjamtinme.

Aatus atí.

## Pablo carta agaja colosasnumia aidau awetimu

### *Kumpamkagtam*

<sup>1</sup> Witjai Pablo Apajui wakegau asa Jesucristo apostolji etiuwai, nuniau asamtai yatsug Timoteojai jui pujusan,

<sup>2</sup> atum yatsug pegkejam, nuigtú imagnisjum Cristo umijin aidautigum Colosas batsatjum nuna kumpamjime; iina Apaji Apajui, nuigtú Apu Jesucristua nujai wait anenjamag atumnash shiig agkan pujutan amastinne.

### *Pablo Apajui see tabau*

<sup>3</sup> Atum pachisa Apajui aujkuik, tuke see tusaiki aji, iina Apuji Jesucristo Apajiya nunú, <sup>4</sup> atum Cristo Jesusai dekaskeapi tuinajum nu, nuigtú ashí Jesusa nemajin pegkejam aidaush anejum dusha antuku asaja;

<sup>5</sup> duka atumek yamajam chicham dekaskea nu etsegbaunum atum jukitin nayaimpinum ukugtamsamu ajutjamaina nu dekauwaitjum nu dakaidau asajum nuniagme;

<sup>6</sup> nunú yamajam chicham atumin tajutjamauwa duke ashí nugkanmash dapampaegak weawai. Ashí yantannum wantinui pujutin yapajinaina dui, atum yama nagkamchakjum Apajui dekaskenum wait anenkagtamuji antukuitjum dui nagkamas pujutjum yapajiau ainajum nunisag;

<sup>7</sup> junak Epafras iina aneetaiji jutiijai takau, Apu Cristo imajtikas takagna nu atumdau pegke amaina nuna jintinjamawajui.

<sup>8</sup> Nigki jutiinash, atumin Wakaní Pegkeji aneenitan amainakui aneniajum nunash ujpakmayi.

<sup>9</sup> Nuadui jutiishkam, dekaabiag dui nagkamsaik, atumek idaitsuk Apajui tuke aujtajime, nuniaku Apajui segatjime ni wakegamujiya nuna shiig dekamtijamamtai ashí yachamet wakannumia aina nunash dekaatajum tusan;

<sup>10</sup> Apu Jesusdau aidaush, wajak pujumaina ainawa nunisag ashí pegkeg aina nunak takainak shiig awagmainak, Apajuin aan nagkaemas dekaatume tau asan;

<sup>11</sup> nuigtushkam segatjime niina senchiji imana nujai senchimtijamatnume tusan, dutikamu asajum ashí katsunajum emamkesjum shiig ichichmamjajum;

<sup>12</sup> shiig anejasum atumesh iina Apaji see titajum, wagki ni umigtamkauwai ni inamtaiji tsaaptina nuiyan, niina aentsji pegkejam aidau susatnun anagkauwa nuna jukitnume tusa.

### *Jesucristui dekas wagaakuk*

<sup>13</sup> Apajui agkanmitkagmawai wakan senchigtin suwenum inamaina nuiyan, dutijama niina Uchiji anetaijiya nuna inamtaijin jujamkiajui,

<sup>14</sup> niini agkanbaetak ajutjamui nuigtú tudau aidaunum tsagkugnamushkam.

<sup>15</sup> Wagki niyai Apajui wainmainchauwa nuna niimen iwaidauk; niyai iwai, ashí waji aina nu eke najannatsaig pujujakú asa.

<sup>16</sup> Wagki ashí waji aina nunak Apajui niini najankauwai, nayaim aina nui ayá nunash, nuigtú nugkanmayanash, wainmain aina nunash, wainmainchauw aina nunashkam; inamin aidaunash, apu aidaunash, wakan pegkegchauw aina nuna apujinash, wakan senchigtin aidaush, ashí niini najankamu ainawai, niinu atí tusa.

<sup>17</sup> Cristuk ashí waji aina dusha eke atsaig pujujakui, nuniau asa ashí waji aina dushakam ni wajak dutikamuita nunisag ainawai;

<sup>18</sup> nuigtushkam nigki, iglesia niina iyashiya nuna Apujishkam. Nigkiyai nagkamtinish pujujakuk, nagkamas jakau aidaunmaya nantakiuwa dushakam, nunin asa ashí nu waji aina nuig niyai dekatkauwa duka;

<sup>19</sup> nuadui Apajui niina Uchiji Aentsmaga akiinawauw nunak ni senchigtina ibauk atí tusa wakekauwai;

<sup>20</sup> nunikmatai niini ashí waji aidau nugkanum, nayaimpinum aina nunashkam epegtua, Cristo cruznum numpeen ukajua dui agkanmitkata tau asa.

### *Cristo Apajui kumpaji etabiuwai*

<sup>21</sup> Atumshakam yaunchuk tsawan aajakua duik takanchbau Apajui shiwaji ajakuitjime anentaimtagminish, pegkegchauw aina nu takaakjum nuniautigmin yamaik epegtugmawaje;

<sup>22</sup> Cristo ju nugka jui pujus waitus jakauwa dui epegtugbauwai, niina pujutainish pegkejam aidau, nuigtush tsuwatjish atsubauw niina emtinish bakumamainush atsubauw iwaintamkata tau asa.

<sup>23</sup> Tujash nuna nuniktag tuinakug Jesusan dekaskeapi tiajua nuig shiig ebetmamjag, nuigtú yamajam chicham Jesusai uwemna nu pachisa etsegbaun antukajua nunak dakainak pujuina nunú iman amain ainawai, nunú chicham ashí nugkanum etsegnakua nunak wishakam etsegjai.

*Pablo judiochu aidaunum takaamu*

<sup>24</sup> Yamaik shiig anejai atumiin waitiakun, nuniakun Cristo niina iyashí iglesiaya nui waittsamu mina iyashjui atsugta nuna umiajai;

<sup>25</sup> nuniau asan niina takajin wajasuitjai, nunikmatai Apajuí atumiin pegkeg amaina nuna yaigtú nuniak ashí yantamnum chichaman etsegkati tusa awetiuwai;

<sup>26</sup> yaunchuk nagkamas anentaimtusbau dekaachbau aajakua nuna yamai niina aentsji pegkejam aina nuna iwaintuke;

<sup>27</sup> nunú aidaun, Apajuí niina imanji dekas imana nu dekaachbau aajakua nuna judiochu aidaun dekamtikatatus wakekauwai; duka Cristo atumin ajutjama nuuwai, niina imanji dakainajum nunú.

<sup>28</sup> Nunú Cristo pachisa etsegtauish, ashí aents aidauk chichagji, nuniaku jintinji ashí dekamu aina nunú, Cristo eemtinish shiig pegkeg iwainakta tuidau asaja;

<sup>29</sup> nuna dutikata tau asan, senchi takaajai niina senchiji minai takaa nujai.

## 2

<sup>1</sup> Wagki dekatajum tusan wakegajai shiig senchi atumiin takaag nunú, Laodiceanmaya aina nuish, nuigtú ashí tikich mina waitchau aina nuishkam;

<sup>2</sup> anentainish ichichmamag aneemis ijutkau pujuinak, Apajuinu, nuigtú Cristunu yaunchuk anentaimtusbau dekaachbau aajakú dekas ashí niinu imana nuna shiig dekaatnume tusan;

<sup>3</sup> ashí pegkeg yachamet nuigtú dekat aina dushakam imá Cristuig awai.

<sup>4</sup> Junak, makichkikesh chicham wakemain aidaun tujamainak tsanugmajainum tusan tajime.

<sup>5</sup> Wagki wi atumjai ijunja pujachkunush, mina wakanjuig atumjaig ijutkajai, nuniau asan shiig anejai atum Cristuí dekaskeapi tusajum niinig ebetmamjajum, imagnisjum pujuinajum nuna wainkun.

*Yamajam pujut*

<sup>6</sup> Nuadui, atumek Apu Cristo Jesús nemagkau aidautigmek ni wakega nunisjumek pujustajum;

<sup>7</sup> nuniakjum numí kagkapé inital akajau asa, kakajus katuemainchau wajas aama imanikjum Jesucristo dekaskeapi tabaunmash tsujamainchau wajasjum atajum, wajuk jintintuabijime nunisjumek, nuniakjum Apajuish see titajum.

<sup>8</sup> Kuitamamkatajum, makichkish dita yachameagbauji dekaskea imanun jintinjamainak tsanugmajainum, tujash nunak ditá muunji tujakbauwa nuna jintinawai ju nugkanmaya aina nuna, Cristo tawa nudauchui.

<sup>9</sup> Wagki, ashí Apajuinua duka Cristuí paan wainnawai;

<sup>10</sup> nunin asamtai atumnak niini ashí betek ajutjamjume, wakan pegkegchau aidau apuji, wakan senchigtin aidaun ashí nagkaesauwa nunú.

<sup>11</sup> Nuigtush niini pakamaku ainagme, aents dutikin aina nuninchau, nunú pakamamuk iyashnumia tudau idaibauwa nuuwai, nunú pakamamunak Cristo ditikauwai.

<sup>12</sup> Atum yamimaju ainajum dui Cristujai ukuntsau ainagme, nunisjumek niijai nantakiu ainagme, Apajuí ni senchijin jakau aidaunmayan inankiuwa nuanuig dekaskeapi tuidau asajum.

<sup>13</sup> Atumek tikich tsawan aajakua duik, wakannumag jakau aajakuitjume atum tudau takatajum idaichau asajum, tujash yamaik Apajuí pujutan amasaje, Cristo nemaju asagmin dutijamawag ashí tudaunak tsagkugtamjaje;

<sup>14</sup> dutika chicham umiktin aajakua nu umiachbaunum bakumamain aajakuitag nunak Apajuí juki, Jesucristo cruznum achinjauwa nui esakajui;

<sup>15</sup> dutika Apajuí ashí wakan pegkegchau aidau apujinash, nuigtú wakan senchigtin aina nuna senchijinash atanjauwai, Cristuí depetuk imanchau emak achijá ashí wainbaunum iwainakui.

*Tikichkesh juu umiktajum tujamain ainatsui tibau*

<sup>16</sup> Nuadui makichkish atum yuajum nuna, nuniachkush umajum nunakesh, nuniachkush nantu yamá takamtai, nuigtú tsawan ayamtai fiestamtai aina nuna diisagkesh augmatjamain ainatsui;

<sup>17</sup> ashí nuna dutikajakú aina nunak eke Cristo taachu asamtai ni taatna nuna iwainainak dutikajakú ainawai.

<sup>18</sup> Makichik aentskesh ememachua nunin wajasag uwemjatag takugmek ángel aidau ememattajum tujamainakuish antugkaigpajum, nu aidauk wainkachuitak wainkajai tuinawai ememainak, aentsú anentaimtaiji pegkegchau aina nunak anentaimaidau asag;

<sup>19</sup> Cristo niina nemajuidaun Apujiya nujaig ditak ijtukau ainatsui. Ni ashí iyashnak kuitamui ashí niinu aidaun ijumag, dutikau asa Apajuí anentaimtusbauwa dutiksag tsakatnash suawai.

<sup>20</sup> Atumesh Cristujai jakau ainayatkugmesh ¿wagka ju nugkanmaya pujuina nunikjumesh, ju umitai atí tibau aina nu:

<sup>21</sup> “Juka yuwawaigpa, apasmesh dekapsaigpa, antitash antigkaipa”, tawa nu umiktasagmesh pujugjume?

<sup>22</sup> Ashí nunú umiktin aina duka wájí aidau takaa takaa abuegama nuniktinai, aents aidau jújú umiktajum tusa jintiamu asag;

<sup>23</sup> nu aents jintiamu aina duka, jutsukaitai dekas yaijatmainuk tusa puyatjusa umimain ainawai, wagki Apajuí umigkuik, kakagchauch amainai nuigtush iyash senchi waitkamainai tuinawai, tujash duka makichkish iyash pegkegchau wakega nu idaitanmag yaijattsui.

### 3

<sup>1</sup> Nuadui atumek Cristujai nantakiu asajum, nayaimpinmaya wájí aidau egaktajum, Cristo Apajuí untsujin eketa nuiya.

<sup>2</sup> Nuniakjum nayaimpinmaya wájí aina nui anentaimtajum, nugkanmaya aina nui anentaimtsuk;

<sup>3</sup> Atumek Cristujai jakau asajum, Cristujai pujau asagmin yamajam pujut ajutjamjum nunak aentsuk wainmain ainatsui.

<sup>4</sup> Nunin asamtai, Cristo atumí pujutjumea nu wantinkatna dui, atumshakam niya imanuk wantinkatnaitjume.

#### *Yaunchuk pujujakbau yamaiya nujai*

<sup>5</sup> Ju nugkanmaya ashí atumiin ajutjamaina duka idaisatajum, tsanijinbau, pegkegchau aidau, katsunmainchau wakejut aidaush, pegkegchau wakejut, utugsag nu ajutia tusa senchi wakegat, nunin aina duka apajuimtai ainawai;

<sup>6</sup> nunú aidaun takainak intimaina nuanui Apajuí suimkeg minawai;

<sup>7</sup> yaunchuk pujujakuitjum duik atumshakam ju aidau takaajakú ainagme.

<sup>8</sup> Tujash yamaik ju aina duka ashí idaisatajum: magkagtumain kajeamu, kajet, pegkegchau takaamu, pegkegchau chichagkagtamu, chicham pegkegchau chichat.

<sup>9</sup> Pempeentunisjumeek tsanunijaigpajum. Yaunchuk takaajakbau aina duka idaisajum,

<sup>10</sup> yamajam aents wajasugme; nuniku asajum atumin najapau niimega ibau weakjum ni shiig dekaatajum.

<sup>11</sup> Nunin asamtai judío tabau, griego tabaush, pakamaku, pakamakchaush, tikich nugkanmaya tabaush, unuimagchau tabaush, inataiyai tabaush, agkantai tabaush atsawai, Cristuwai ashí nuigtú ashí nunú aidaunum awa duka.

<sup>12</sup> Nuadui Apajuí pegkejam atinme tusa anempas etegtamjau asamtai, shiig wait anenkagtín, pegkeg, ememachu, kakagchau, ebetmamjau atajum;

<sup>13</sup> pempeentunisjumeek tsagkugdajatajum, tikichjai wake besegdaikamu ajutjamkuish pempeentunisjumeek tsagkugdajatajum, iina Apu Cristo tsagkugtamtajauwa nunisjumeek atumesh tsagkugdajatajum.

<sup>14</sup> Ashí nu wájí aina nuig anenka nu ajutjamtinme, nuuwai dekas shiig ijuntsa pujutan sukagta duka.

<sup>15</sup> Atumi anentaiminish Cristunu shiig agkan pujuta nu ajutjamtinme, makichik iyash atinme tusa etegtamjau nunisag, Apajuik nuna aatus dutijamata tau asa makichik iyashik etamkauwai, nuadui atumek see titajum.

<sup>16</sup> Cristo chichamega nu atuminish shiig kuashat tuke ajutjamtinme, nuniau asamtai pempeentunisjumeek jintindaiyakjum nuigtú pegkeg wakegat egketdaiyatajum ashí yachamet aina nujai, nuniakjum atumi anentaiminish Apajuí wakena kantamjuatajum salmo aidau, himno aidau nuigtú Wakaní Pegkeji waketan amá nujaishkam kantamatajum.

<sup>17</sup> Ashí atum dutikajum nu nuigtú chichajum duka Apu Jesusa nemajin asajum nunimaina nu dutikatajum, Apajuí iina apajiya nunú Jesucristo dutikauwa nu pachisjum see takujum.

*Jesucristo nemajin aidau nunimainji*

<sup>18</sup> Nuwatkamu aidauwah, atumi aishumin sumimkatajum, juwai Apu Jesús nemajin asajum nunimainaitjum duka.

<sup>19</sup> Nuwentin aidauh, atumi nuwem aneetajum, nuniakjum najamnuk chichagkaipajum.

<sup>20</sup> Uchi aidauwah, apa dukujai ashí umigkatajum, wagki nuuwai Apu Jesusan shiig awagma nu.

<sup>21</sup> Uchigtin aidauwah, uchijum kajemtiká yujaigpajum, junik anentaimá pujuinum.

<sup>22</sup> Inak aidauwah, atumin apujum ju nugkanmaya aina duka ashí umigkatajum, wajas diigmakui shiig awajkata tabaunum takatsuk, dekas shiig anentaiyai Apu Jesús ajantusa diyamunum.

<sup>23</sup> Ashí takaajum duka shiig wakesajum dutikatajum, aentsdau takamaina nunitsuk, Apu Jesús takagku wajukmaina nunisjumek.

<sup>24</sup> Atumek dekagme Apu Jesús atum jukitnun amastina duka, wagki atumek Apu Cristo takagjume.

<sup>25</sup> Tujash pegkegchaun takaa duka, ni pegkegchau takasa dutiksaik akiam atatui, wagki aents akanjá diyamuk atsau asamtai.

#### 4

<sup>1</sup> Inamin aidauwah, atumi inakem shiig awagmakjum, inamin pegkeg atajum, atumek dekagme nayaimpinum makichik Apu ajutjama duka.

<sup>2</sup> Apajú mijattsuk aujukum aneaku batsamsajum, see tusagmeké atajum,

<sup>3</sup> nuniakjum jutii pachijattsagmesh Apajú aujkgagtustajum, Apu Jesusa chichame agkan etsegtumainnumash yaimpakti, dutijamamtai dekamtikawagmi Cristo pachisa yaunchuk dekaachbau yamai etsejuinag nu, nunú etsegbaunum achinkan pujajai, <sup>4</sup> nuna wajuk tumainaitja dutiksasuk titajai tau asan tajime.

<sup>5</sup> Yacha pujumaina imagnisa pujakjum Apajú nemagchau aidaush iwaintuktajum, tsawan wainka megkaetsuk.

<sup>6</sup> Atum augmabauk tuke pegkeg, wakejusa antumain atí, nuigtushkam dekau amainaitjume makí makichkish wajuk aimainaita dushakam.

#### *Inagnaku kumpamkagtamu*

<sup>7</sup> Tíquico iina yachi aneetaiya nu, shiig imagnis pujus yaimin, jutiijai atuegas Apu Jesusan takagna nu, mina pachittsag ujakpaktatjume.

<sup>8</sup> Duwi niina atumiin awemajai, jutii wajuk pujuinaji nuna ujpainak, anentaimnash ichichtamjatnume tusan awetajime,

<sup>9</sup> niijai minawai Onésimo, jutii yachi aneetai shiig imagnis pujuwa nu, dita ujakpaktatui ashí jui wajuk awa nunak.

<sup>10</sup> Aristarco, wijai achikam puja dushakam kumpamjamainawai, nunisag Bernabé iká yachi Marcosa dushakam kumpamjamainawai. Wi niina pachisan dutik jukitajum tibajim dutiksagmek atumiin minakuish jukitajum.

<sup>11</sup> Nuigtú Jesús Justo tutaiya dushakam kumpamjamainawai, jujú judío aina juke Apajú inamtai pachisa etsegbaunmag yaintuinawai, ditak mina anentaignash shiig senchi ichichtujagmayi.

<sup>12</sup> Dutiksag Epafra kumpamjamainawai, Cristo Jesusa inakega nu, niig atum aina annuke, nuniak Apajuin senchi aujtugmainawai, imagnis ebetmamag pujuinak, ashí Apajú wakegamua nunak takagsatnume tujamaidau asag.

<sup>13</sup> Atumin puyatjutpaina nunak wi wainjai, nuniak Laodicea pujuidaun antsag Hierápolis pujuina nunash uyumawai.

<sup>14</sup> Lucas, ampijatin jutii aneetaiya nunú, Demasjai kumpamjamainawai.

<sup>15</sup> Yatsug Laodicea batsata nunú kumpamjutuatajum, dutiksagmek Ninfas nuigtú iglesia niina jeen ijunaina dushakam kumpamjutuatajum.

<sup>16</sup> Jujú papi ausagmek, iglesia Laodicea awematajum, ditashkam ausatnume. Tuja laodiceanmaya awetimu atumin awetugmainakuish aikasjumek ausatajum.

<sup>17</sup> Arquipo ujaktajum: Takat Apu Jesusdaun jukiwa nuna puyatjus uniktí, tawai tsajum.

<sup>18</sup> Ju kumpamdayamunak, wi Pablon mina uwejuí agatjime. Wi achinkan pujag ju anenjatajum. Apajú wait anenkagtamujiya nu atumnash ajutjamtinme.

Aatus atí.

## Pablo nagkamchaku carta agaja tesalonicanmaya aidau awetimu

### *Kumpamkagtau*

<sup>1</sup> Witjai Pablo, nuigtú Silvano, Timoteo aaja atum iglesiatijum Tesalónica batsamin aidautigmin kumpamjime. Iina Apají Apajuiya nu Apu Jesucristujai wait anenjamag shiig agkan pujatan amastinme.

### *Tesalonicanmaya aidau pegkegnum iwainmamkagbau*

<sup>2</sup> Ashí atum pachisa Apajuí aujkuik tuke see tusaikí ainaji,

<sup>3</sup> nuniaku tuke pachisaikí ainaji iina Apají Apajuiya nuna emtin, atum dekaskeapi tabauwai takaakjum, anenkai takaajum nu, nuigtú mijamtsuk iina Apuji Jesucristo dekaidau asagmin.

<sup>4</sup> Yatsug Apajuí anetai aidauwah, ni atumnash etegtamjauwa duka dekainaji.

<sup>5</sup> Jutii yamajam chicham atumiin etsegkabiag duka, ayatak chichamaikik etsegkachi, nunitsuk Apajuí senchijish iwaintukmajime Wakaní Pegkeji jutiini takaa nujai shiig paan dekamtikaku. Atumek shiig dekadme, atumiin pujubiag duik, atumiin pegkeg amaina duke egabiag nunú.

<sup>6</sup> Atumek jutiinua nu, nuigtú Apu Jesusdauwa nujai dakumjume, nuniau asajum senchi waitiakjumesh shiig aneasjum chicham etsegbaush antuku ainagme Wakaní Pegkeji dakujatan amaidau asamtaí,

<sup>7</sup> nu nuniakjum ashí macedonianmaya, nuigtú acayanmaya dekaskeapi tiaju aina dusha iwaintukugme.

<sup>8</sup> Apu Jesusa chichamega duka atumiin nagkamna dapampaekae, nunak imá Macedonia, Acaya aina nuigkik nunikchae, ashí tikich nugkanmash pampagké, nuigtush dekainawai atum Apajuiyai dekaskeapi tajum nunashkam, nunin asamtaí jutii anui chichagkagtumainaitag duka makichkish atumnatsui.

<sup>9</sup> Wagki ditak etsejuinawai atum wajuk jutii jukagtukiwaitjume nuna pachisag, nuigtú Apajuí iwaaku dekaskea nu umigkatasajum apajuimtai idaisaujum nunashkam,

<sup>10</sup> nunikjum Apajuí niina Uchijin Jesusan jakaunmayan inankiuwa nu nayaimpinmaya minitna nu dakasta tuidau asajum, Apajuí suimkaji ishamain atina nui agkanmitkagmatna nunú.

## 2

### *Pablo Tesalónica takasbau*

<sup>1</sup> Yatsug aidauh, atumek dekadme, jutii atumiin ijasmayag duka wainkag nagkankachmayl.

<sup>2</sup> Nuigtushkam dekadme Filiposnum pegkegchau chichagkamu nuigtushkam waitkasbau aajakuitag duka, tujash kuashat utugchat ajutjamtaish, Apajuí ichichtamjabi yamajam chichaman etsegkatnume tujamu asa.

<sup>3</sup> Wagki jutii chichagkagtukmayag duka dewakaikish, pegkegchau anentaiyaikish, makichik aents tsanugtasaikish tichabaiji.

<sup>4</sup> Apajuí jutii anentainash ashí diigtamas, yamajam chichaman Cristo pachis etsegtukti tusa sujamsauwa nu etsejuinaji; duka aents shiig awajkata tabaunum nunitsuk, Apajuí iina anentainash shiig dekadme nu shiig awajkata tabaunum nuninaji.

<sup>5</sup> Jutii makichkish shiig anenjustinme tabaunum chichachuitag duka atumek dekadme, nuigtush kuichik jujuktasaikish chichachuitji. Junak Apajuishkam shiig dekawai.

<sup>6</sup> Makichkish eme anenjitnume tusaik egachuitji; atumdaukesh, nuniachkush tikich aidaukesh.

<sup>7</sup> Cristo apostolji asaja yaijatkatajum tusa atum segamainaitku, nuwa uchiji aidau shiig anentus kuitamama numamtuk, atumnak shiig anentsan kuitamkabaijime.

<sup>8</sup> Imatika aneedau asaja, ayatak yamajam chicham Apajuinua duke ujaktasaik wakegatsji, atumiin bakumatasaish wakegainaji wagki jutii aneetai wajasú asagmin.

<sup>9</sup> Yatsug aidauh, atumek aneakjume, atum aidautijum makichkish waitkat dakitau asaja wajuk takayaji, tsawai kashishkam takai takainakua pimpikijaish yamajam chicham Apajuinua nu etsejiag duka.

<sup>10</sup> Atum ainagme jutiinu dekau aidautigmek, nunisag Apajuishkam dekadme, atum Apajuí nemagkau aidautigmijai pujubiag duik pegkegchau aidauk takaachu asaja, makichkish nuninai tumainjish atsubau pujusbaiji.

<sup>11</sup> Jushakam dekadangme, uchigtin uchijin utuja numamtuk chichagkun, makí makichk-itigmin anentaimnash ichichtuyajime,

<sup>12</sup> dutikakun, Apajuí niina inamtaiji imana nui pujustinme tusa untsukbau aidaush wajuk pujumainaita nunisjumek pujustajum tuyajime.

<sup>13</sup> Nuadui jutiishkam Apajuik mijattsuk see taji, atum ii chichagkagtamua aents-dauchuapi Apajuí chichamempapi tusajum shiig antuku asagmin. Duka dekas Apajuí chichamegai. Nu chicham atumesh dekaskeapi tau asagmin pujutjumnash kuashat yapagtugmawajui.

<sup>14</sup> Yatsug aidaush, atumek iglesia Apajuinu Cristo Jesusdau aidau Judea batsata nu dakumjume, atumi nulkeminiag pempeentugmakiag waitkagmasaju aina dui, judío aidau nunú iglesia aidaun waitkasaju aina dutiksag.

<sup>15</sup> Nunú judío aina duke Apu Jesusnash maawajui, nuigtú profeta aidaunash, nuninak jutiinak jiiki ajapjamawajui, nuniau asag Apajuinak shiig awagmainatsui, nunisag ashí aents aidaunash shiwagmainawai;

<sup>16</sup> judiochu aidau uwemjatneme tusa chicham ujakta tajinish utugtmainawai, nunidau asag nuní nagkaemas tudaunak ikauntumainawai, nunidau asagmatai Apajuí shiig senchi suwimkan susatnai.

### *Pablo ataktú Tesalónica ijagsatasa wakekamu*

<sup>17</sup> Yatsug aidaush, ujumak tsawantai atumjai kanakuitag duik, atum wainchakuish tuke iina anentainig aneaku amaiji, nuniaku atum wainkatasaisa wakeyajui.

<sup>18</sup> Nuniau asan wi Pablon atumin ijagsatasan kuashtá wakekabajai, tujash Satanás utugtamtamtaí minichbaiji.

<sup>19</sup> ¿Tuwaita jutii dakamush, jutii shiig aneamu, jutii Apuji Jesús wakettsag taatta dui ememamu atinush? Nunú atum achagtaik, tikichik amainchau ainawai.

<sup>20</sup> Atumetjume jutii eme anenmantai, nuigtú iina dakujutai ainajum duka.

## 3

<sup>1</sup> Nuadui, katsunmainchau dekapeau asaja, Atenas juakmi timaiji,

<sup>2</sup> nuniaku iina yachi Timoteon awemabaiji, Apajuí takaju asa yamajam chicham Cristo pachisa etsegbaunum yimpauwa nuna, atum dekaskeapi tajum nuig ebetmamjatatum tusa ichichtamjatneme tusan,

<sup>3</sup> makichkikesh nunú waitiamu aina nujai pachimdaekainum tusan. Tujash atumek dekadangme nunú waji aina nuig waitmainaitag duka.

<sup>4</sup> Nuigtushkam atumjai pujuyag dui emtikan ujayajime, jutii waittsatin ainaji tusan, duka nunisag nagkaetamjume yamai wainjum nunú.

<sup>5</sup> Nuadui katsunmainchau dekapeau asan, awemabaijai atum dekaskeapi tajum nuna dekaati tusan, pegkegchaunum dekapkagtina nu pegkegchaun takamtiksachajeash tusan, nunikmatai ii takasbauwa nu wainak juakai tabaunum.

<sup>6</sup> Tujash Timoteo atuminia wakitki jutiini taa, yamajam chicham pegkeg aidaun atum dekaskeapi tajum nuna, nuigtú anentak ajutjamjum nunashkam; jutii shiig anenkagtusjum wajatkatasajum tuke pachijatjum nunash ujakpakmayi, jutii atum wainkatasa wakegag nunisjumek atumesh wakegajum nuna.

<sup>7</sup> Nuadui yatsug aidaush, ashí atsumamu nuigtú kuashat waitiamu ajutjamaina duka, atum dekaskeapi tabauk nunisjumek pujamu antuka ichichmamjabaiji.

<sup>8</sup> Atum Apu Jesusaig ebetmamjajum pujamu dekaawaja shiig yantsaptugmai.

<sup>9</sup> Dusha, ¿wajuk Apajuish see tumainaita atum pachisaish, niina eemtin ashí shiig aneamu egketkagtatum dusha?

<sup>10</sup> nuniau asaja tsawai kashijai Apajuí shiig senchi segaji, atumin ataktú igkugkan wainkatasan, nunikan atum dekaskeapi tayatkujum ashí nuniachbau ajutjamkujaish yagtasau.

<sup>11</sup> Wakegainaji Apajuí iina Apaji, Apu Jesusjai jutii atumiin minimaina nunash umigtamkati tusaja.

<sup>12</sup> Apu Jesús sujamsatneme aan nagkaemasjum ashí tikich aidaujaish pempeentuniki aneenta nuna, jutii atum aneamim aikasag,

<sup>13</sup> atumi anentaiminish ebetmamjau, makichkish nuninai tumainchau pegkejam iina Apaji Apajuiya nuna emtinish atajum, Apu Jesús niina aentsji pegkejam aidaujai minitna duish. Aatus atí.

## 4

*Pujut Apajuin shiig awagma nu*

<sup>1</sup> Nuadui yatsug aidauh, Apu Jesusa daajin puyatjusan segajime, Apajuin shiig awagma nunisjumek pujakjum kashi kashinig emtajum jutiinu unuimagbaijum nunisjumek.

<sup>2</sup> Wagki atumek deka gme Apu Jesús dutikata tibaun jintintuabaijum nu.

<sup>3</sup> Atumnak Apajuik imá midau pegkeg aina nunak takainak, tsanijintsuk pujustinme tusa wakejutpagme.

<sup>4</sup> Nuigtush makí makichik nuwentin aidauk niina nuwenak eme anentus diyak, pegkegchau takagtsuk pujumainai,

<sup>5</sup> nuninak aents Apajuí dekachu aidau senchi iyashi wakegamun takau aina nunitsuk,

<sup>6</sup> makichkish yachinak pegkegchau awajkaigka tsanutnash tsanujaigka; wagki Apu Jesusak ashí nunin aidauk suwimkan suawai, nunak duikish timaijum.

<sup>7</sup> Apajuik iinak pegkegchaun takaa pujutnume tujamchawai, pegkee pujustinme tusa untsugmakui.

<sup>8</sup> Nunin asantai, ju jintinkagtamun dakitauk aentsnakesh dakitak nuniatsui, Apajuí Wakaní Pegkejin sujamsauwa nuna dakitak nuniawai.

<sup>9</sup> Tujash yatsutjai pempeentuniki aneenita nunak agatjashtatjime; wagki pempeentuniki aneenitnak Apajuí jintinjamawaju asagmatai.

<sup>10</sup> Duka nunisjumek dutikagme, ashí yatsut Macedonia batsata nujaishkam. Tujash yatsug aidauh, segajime aneeniajum aan nagkaemasjum aneenitajum tusan;

<sup>11</sup> nuniakjum kakanmamsatajum shiig agkan pujustasajum, nuigtush atum dutikmain aina duke uyumakjum, atumi uwegmin takastajum jutii nuniktajum timaijum dutiksagmek,

<sup>12</sup> aatsa pujau asagmin Apajuí nemagchau aina dusha ajaantus diigmastinme, tikichdau niimjú pujachu asagmin.

#### *Apu Jesús taatnuji*

<sup>13</sup> Yatsug aidauh, jakau aina dusha wajukatna ainawa nunú dekatsuk juwakaijum tusa dakitaji, tikich aidau dakamuji atugbau asag wake besemag batsatina nunikaijum tusan.

<sup>14</sup> Wagki Jesusak jakauwap nantakiuwaita tusa dekaskeapi tuinag nunisag, Apajuishkam Jesukai dekaskeapi tuidau jinawajua nunash inanjatnai.

<sup>15</sup> Nuadui Apu Jesús tiuwa dutiksaik taji, jutii iwaaku batsatutik Apu Jesús minitta nuaduik, jakau aidau ukuakuik emjashtin ainaji.

<sup>16</sup> Apu Jesús nayaimpinmaya minak senchi untsamak akaikitnai, ángel aidau apujishkam arcángel untsumkatnai, Apajuí trompetajinash senchi umpuagtinai, nunitai Cristui dekaskeapi tuidau jinaw aidauwá nantajagtinai.

<sup>17</sup> Nuniku ai, iwaaku juwaku aidautik ditajai ijumja juwam agtinaitji yujagminum Apu Jesusjai agkajunum igkuniktasa, nunikaja Apu Jesusjai tuke pujutnaitji.

<sup>18</sup> Nuadui jujú chichama jujai tikich aidaujaish anentai ichichtunigtajum.

## 5

<sup>1</sup> Yatsug aidauh, tsawan aidau pachis nuigtú wajutik nuniktinaita nuna agatjuti tusagmek atsumatsjume.

<sup>2</sup> Atumek shiig deka gme, tsawan Apu Jesús wakitki minamuk, kasa kashi miniyama numamtuk atinai.

<sup>3</sup> Wajutiya aents aidau: Yamaik shiig agkan, nuigtush kajintsá batsatainaji, tiagtin ainawa, nuniai atinai dita waittsatnuji minittina duka, nuwa ejamtin uchigmatji jegamtai najaima numamtuk, nunak uwemtugchagtin ainawai.

<sup>4</sup> Tujash atumek yatsug aidauh, suwenmag batsatsugme, nunin asagmin, nunú tsawan Apu Jesús minamu atina duik, kasan pachiaichbau achiká juwajama numamtuk awagmak amaitsugme,

<sup>5</sup> wagki ashí atumek Jesucristo aentsji asajum pegkeg takaakjum tsaptinnum pujumaina numamtuk wajagme, jutii Jesucristo dekaskeapi tuidautik iwanchdau aidau pegkegchau takainak suwenum wajukmaina numamtuk wajaina nuninuk ainatsji.

<sup>6</sup> Nuadui Apajuí nemagchau aidau kashi kajiaku wajukmaina numamtuk wajaina nunitsuk shiig umintsá aneaku batsamsagmi,

<sup>7</sup> wagki kanuina duka dekainatsui waji nagkaemaktatua nunak, nampena dushakam kashi wajukmaina numamtuk wajainawai;

<sup>8</sup> tujash jutiik tsawai batsamaina numamtuk batsatu asaja aneaku batsamsagmi; suntag detsepen coraza ejabau aina numamtuk dekaskeapi tabaujai nuigtú anenkajai ejamakgami nuninaku uwemat jukimu dakainag nujai casco atsejumaina numamtuk wajakgami.



<sup>9</sup> Wagki Apajuik iinak suwimkan jukitin atinme tujamchauwai, ayatak Apu Jesucristui uwemtan jukitnume tujabijui,

<sup>10</sup> ni jutiini jakauwai, iwaaku batsatkush, jakau akushkam wijai ijutkau pujustinme tujamu asa.

<sup>11</sup> Nuadui pempeentunisjumek wakegat egketdayakjum nuigtú yainiktajum, atum takaajum dutikasmek.

*Pablo Cristo nemajin aidau chichagbau*

<sup>12</sup> Yatsug aidauh, segajime, atumin takainak Apu Jesús nemagtanum jintinjamaína duka ajantusjum diitajum.

<sup>13</sup> Dutikakjum eme anentsajum aneetajum, dita takatan dutikaina dui. Pempeentunisjumek shiig agkan batsamsatajum.

<sup>14</sup> Nuigtushkam yatsug aidauh segajime, daki aidauh chichagkatajum, junik dekapedaush wakemitkaktajum, kakaakchau aidauhkam yaigtajum, nuniakjum ebetmamajum ashí tikich aidaujaish pujustajum.

<sup>15</sup> Diyaku atajum makichkikesh tikichjai pegkegchaunum iikdaikainum; duka nunit-suk, pegkeja duke tuke dutikatasajum kakanmamsatajum atum ainajum nujaish nuigtú ashí tikich aidaujaishkam.

<sup>16</sup> Tuke shiig aneetajum.

<sup>17</sup> Nuniakjum mijamtsuk Apajuish tuke ausagmeké atajum.

<sup>18</sup> Ashí pachisjum Apajuí see titajum, wagki nuuwai ni wakegamuk, atum Cristo Jesusai dekaskeapi tuidautijum nunimainaitjum nu.

<sup>19</sup> Wakaní Pegkeji wakega duka umigtsukek idaisaigpajum.

<sup>20</sup> Apajuí tabaun etsegtuina dusha wainkaya nuninuk diisaigpajum,

<sup>21</sup> ashí shiig kuitamsa antukjum, pegkeja duke ebetjatajum.

<sup>22</sup> Ashí pegkegchau aina duka idaisatajum.

<sup>23</sup> Apajuíya duke, shiig agkan pujutan sukagtina nu atumnash pegkeemtijamiagti, ashí atumi wakanmin, anentaibaugmin nuigtú iyashminashkam, Apu Jesucristo taatta duish bakumamainchau atinme tusa.

<sup>24</sup> Apajuí dekas betek umina nunú atumnak etegtamjauwai, dutijabau asa nigki nunak umiktatui.

*Inagnaku kumpamkagtau*

<sup>25</sup> Yatsug aidauh, juti pachijattsajum Apajuí aujagtustajum.

<sup>26</sup> Ashí yatsug aidau shiig aneasjum kumpamatajum.

<sup>27</sup> Apu Jesusa daajin tajime, jujú papiik ashí yatsug pegkejam aidau aujtustajum.

<sup>28</sup> Iina Apuji Jesucristo wait anenkagtau nu atumnash ajutjamtinme.

Aatus atí.

## Pablo awentsaik carta agaja tesalonicanmaya aidau awetimu

### *Kumpamkagtamu*

<sup>1</sup> Witjai Pablo, nuigtú Silvano, Timoteo aajan atum iglesiatijum Tesalónica batsamin aidautijum iina Apají Apajuiya nujai, nuigtú Apu Jesucristujai ijutkau aidautigmin kumpamjime.

<sup>2</sup> Iina Apají Apajuiya nu, Apu Jesucristujai wait anenjamag shiig agkan pujutan amastinme.

### *Pablo Tesalonicanmaya aidau Apajuí aujtusbau*

<sup>3</sup> Yatsug aidauh, jutiik atum pachisa Apajuí tuke see tusaikí ainaji, nuuwai dutikmaina duka, wagki atumek aan nagkaemasjum dekaskeapi tuinakjum, pempeentunisjumek aan nagkaemasjum aneendau asagmin.

<sup>4</sup> Nuadui atum pachisa tikich iglesia Apajuinu aina nuish eme anentsá chichainaji, atum dekaskeapi tabaugmin aintamainakuish nuigtú waitiakjumesh emamkesjum katsunjajum nagkaejum dui.

<sup>5</sup> Nunú iwainawai dekaskenum Apajuí pegkejan takauwa nuna, nunin asa yamai waitiajum dui Apajuí niina inamtaijin awaintamawagtinai.

<sup>6</sup> Apajuik pegkeja nunak takauwai, nunin asa yamai atumin waitkagmaina nunak suwimkan susatnai,

<sup>7</sup> tuja atum waitiajum nunak, jutiijai betek ayamtan sujamsatnai. Nunak Apu Jesús nayaimpinmaya niina angelji senchigtin aina nujai, jii kegamunum egketkau minitna dui dutikatnai,

<sup>8</sup> nuniak suwimkan susatnai Apajuinu dekatan dakitjau aidau, nuigtú yamajam chicham Apu Jesús pachisa etsegbaun antugkachaju aina nunashkam.

<sup>9</sup> Nunú aidauk waittsagtinai tuke megkaetainum weenak, nuniau asag Apu Jesus-jaig tuke kanaak kanakagtinai, nuadui niina imanjinak nuigtú niina senchijinash wainkachagtinai,

<sup>10</sup> ni minitna nunú tsawantinig, niina aentsji pegkejam aidau emematuinam nuigtú ashí dekaskeapi tuidau puyattsá diyam atina nuna. Tuja atumek jutii etsegbau dekaskeapi tiu ainagme.

<sup>11</sup> Nuadui atum pachisa tuke Apajuí aujuinaji, atumin untsugmakajua nunisjumek pujamunum yaimpaktinme tusa nuigtú nigki niina senchijinash amastí dekaskeapi tabauwai ashí pegkeg aidau takamaina nuishkam tusaja.

<sup>12</sup> Atum aaja nuniamunum Apu Jesusa daajig eme anentam atalui, nuadui niishkam atumin eme anenjamsattawai, iina Apajuuji nuigtú apu Jesucristo wait anenjama nunisag.

## 2

### *Jesucristo taatnuji*

<sup>1</sup> Yatsug aidauh, iina Apuji Jesucristo ataktú wakitki taatnai, nunikmatai jutiik niijai ijunjatnaitji. Nuniktin asamtai segajime,

<sup>2</sup> kakajus anentain yapajinmainchau atinme tusan, nuigtush makichkish uwakeam aigpajum. "Apu Jesús taatnuk tsawantak jegae" wakan tujutne, chicham antukji, cartan jutii agagbauwa dutika tujamainakuish.

<sup>3</sup> Makichkish tsanuamak aigpajum; wagki eke nunú tsawan jegatsaig Apajuí shiwag-mamu atinai, nuniamunum aents tudau takamtikagtin wantinkatnai, megkaekatna nu,

<sup>4</sup> nunú aentsua duka ashí Apajuin adaiyina nuna shiwajiyai, nuniachkush ememattai atatus waketinai, nuniau asa juga Apajuí ememattainum wayá ekeemas: "Witjai Apajuinuk", titinai.

<sup>5</sup> ¿Aneaktsugmek wi atumjai pujusan juna pachisan tibaijim duka?

<sup>6</sup> Tuja yamaik atumek dekagme, nunú eke tsawan jegatsaig wantinkai tusa emetea duka.

<sup>7</sup> Wagki ni pegkegchau dutikatnuji dekamainchauwa nunak yamaikish takaawai, nuninaitak nuna yamai emetea nu agkaasti tabaunum awai.

<sup>8</sup> Nunikmatai aents pegkegchau takauwa nu wantinkatnai, nunitaman Apu Jesús niina wenin wakan jüna nujai maatnai, dutikak ni minamu tsaptin atina nujai tsaitinai;

<sup>9</sup> nunú aents pegkegchau takau wantinkatna duka, Satanasan takagsatatus minitnai, niina senchijijai wainchatai aidaun iwainak, nuigtú tsanumak aents dutikmainchau aidaunash dutiktinai.

<sup>10</sup> Nuniak ashí pegkegchau aina nujai tsanutnai megkajatin aina nunak, wagki ditak anentak dekaskea nu etsegbaun antukag dekaskeapi tuinak uwemaina nuna dakitjaju asagmatai,

<sup>11</sup> Nuadui Apajuik nunú tsanumak senchijin iwaina nuna dekaskeapi titinme tusa idaiwai;

<sup>12</sup> nunak ashí aents aidaun, ni chichame dekaskea nuna dekaskeapi tutan dakituinak, pegkegchaunak wakejus takasú aidaun, suwimkan susata tau asa dutikatnai.

#### *Uwemjatnume tusa etegjamu aidaun*

<sup>13</sup> Yatsug Apu Jesusa anetai aidauwah jutiik atum pachisa tuke Apajuí see tuinaji, wagki yaunchuk nagkamas Apajuí atumnak etegtamjajui, Wakaní Pegkeji yayasam chicham dekaskea nuna dekaskeapi tiagtai pegkemtikiajam uwemjatin atinme tusa.

<sup>14</sup> Nuadui Apajuí atumnak untsugmakajui jutii yamajam chicham etsegkauwaitag dui, iina Apuji Jesucristo imanjiya nui ditash pachinkatnume tujamu asa.

<sup>15</sup> Nuadui yatsug aidauh, ebetmamjatajum jutii jintiamu unuimajuitjum nuanuig, chichamai tiuwaitjim nu nuigtú cartayai timajim dushakam.

<sup>16</sup> Iina Apuji Jesucristo, nuigtú iina Apají Apajuiya nujai anempajua nu, wait anenjamag ichichmamat tuke atinun, nuigtú pegkeg dakamu ajutjamaina nunashkam sujamsajua duke,

<sup>17</sup> anentaim aidaunash ichichtugmagtinme, ashí chichainakush takainakush pegkeg aina nunak takastinme tujamu asa.

### 3

#### *Apajuí aujkgatustajum tusa segabau*

<sup>1</sup> Inagamun yatsug aidauh tajime, jutii pachijattsajum Apajuí aujkgatustajum, Apu Jesusa chichamega nu wamak ashí yantamnum dapampaejati, nuigtú shiig wakesa antamu atí atumiin wajukabia nunisag.

<sup>2</sup> Dutiksagmek Apajuí aujkgatustajum aents pegkegchau, nuigtú yajau aina nuish agkanmitkagmati, wagki ashí dekaskeapi tuinamu atsujuuidau asagmatai.

<sup>3</sup> Tujash Apu Jesusak betek uminai, ibau asa nigki ichichtamag, pegkegchaunmash kuitamjamkatnume.

<sup>4</sup> Apu Jesusaig kajintsá anentaimji atum dutikajum nui, nuigtú ii dutikatajum tibaijim nunash dutiksagkeap takasagtatua tusa.

<sup>5</sup> Apu Jesús yaimpaktinme Apajuí anejata nunisaik anejattanum, nuigtú Cristo waiiakush katsunjauwa nunisag katsunjatnume tabaunmashkam.

#### *Ashí takamain ainaji*

<sup>6</sup> Yatsug aidauh, iina Apuji Jesucristo daajin tajime, ashí yatsut aidaun takatsuk wainak batsataidauk tupanjatajum, jutii jintintuabaijim nunisag pujuinatsu nunú aidaun.

<sup>7</sup> Wagki atumek dekgame jutii wajukmaiji nunisjumek pujumainaitjum duka, jutiiik atumjai pujubiag duik wainkaik takaskek pujuchbaiji,

<sup>8</sup> makichik aentskesh akitskek yujuachbaiji. Duka nunitsuk tsawai kashijai ayamtsuk shiig senchi takabaiji atum ainajum anuiya makichkish waitkat dakitau asaja,

<sup>9</sup> jutiiik atum yayam amainchau asa nunishmaiji, ayatak jutii takaamun wainainak ditashkam nunisag takastinme tusa nunibiaji.

<sup>10</sup> Wagki wi atumjai pujubiag duik juna tibaijime: Ni takatan dakitauk yutanash yuwashti, tusan.

<sup>11</sup> Tujash antukmaji atum ainajum anuiya ujumak, takatsuk wainak yujasag tikichin waitká yujaidau tabaun.

<sup>12</sup> Nunú aents nunin aidaunak Apu Jesucristo daajin tajai, emetnag batsamas dita yuwatnujin takastinme tusan.

<sup>13</sup> Tujash atumek yatsug aidauh, pegkeg takata duka yawetjaigpa. <sup>14</sup> Makichik aentskesh wi cartanum tajim juna umiachuk mamikiatajum, dutikagmek niijaig ijunjaigpa, datsaagti.

<sup>15</sup> Tujash shiwagmá pujusaigpajum, ayatak yatsum anentsam chichagkata.

#### *Inagnaku akatmabau*

<sup>16</sup> Apu Jesús shiig agkan pujutan sukagtina duke, tuke shiig agkan pujutan atumnash amastinme ashí tsawan wajuku agtatua nuwishkam. Apu Jesús ashí atumjaish atí.

<sup>17</sup> Witjai Pabloitjai jujú kumpamkagtamunak mina uwejui agatjime, ashí cartan awemaknuk tuke jutikan agajai.

<sup>18</sup> Iina Apuji Jesucristo ashí atumnash wait anenjamjatnume.

## Pablo nagkamchaku carta agaja Timoteo awetimu

### *Kumpamkagtam*

<sup>1</sup> Witjai Pablotjai, Cristo Jesusan apostoljiyitjai, Apajui iina Uwemtijamna nu nuigtú Cristo Jesús jutii dakainag nujai chichaman etsegkati tusa awetiawai,

<sup>2</sup> Timoteoh, dekaskeapi tabaunmag dekas mina uchig asamin kumpamjame; Apajui iina Apajiya nu, nuigtú Cristo Jesús iina Apuji anentag, wait anenjamag, nuigtú agkan pujatan amastí.

### *Waitá jintinkagtin aina nujai kuitamamkatajum tibau*

<sup>3</sup> Wi Macedonia weakun, amek Éfeso juwakam, makichkikesh yapajia jintinkagtu-awaigpa titá tibaijame,

<sup>4</sup> wainka augmatbau aidau, nuigtú ditá muunji aajakú ezechamnun augmatiatgai antujú yujainum. Nunú wají aina duka jiyanan itaawai, Apajui takatji dekaskeapi tabauwai emtikmaina nuna.

<sup>5</sup> Wi ju nuniktajum taja nunak, anenkak anentai pegkegnum najaneati, anentaim-tashkam pegkeg, nuigtú dekaskenum dekaskeapi tabauwa dushakam, tusan tajai.

<sup>6</sup> Tujash ujumak aents nuna idaiyinak, kanakag wainak chichá yujainawai.

<sup>7</sup> Chicham umiktina nuna jintinkagtin atagtus wakegainawai; tujash dekaskenmag dekainatsui dita chichaina nunakesh, nuigtush antuinachiatk duka nuninai tuinawai.

<sup>8</sup> Chicham umiktin pegkeja duka dekainaji, tawa dutiksaik umiakui,

<sup>9</sup> juka dekainaji, chicham umiktina duka pegkejan takaina nudauchi, duka chichaman umichu, yajau, tudau aidau, eme anenkagtuchu, nugkanmayan anentaimtin, apaji main, dukuji main, magkagtin,

<sup>10</sup> tsanijimtan wekaetin, mai aishmagkuk dutikdayin, aentsun kasamak sujin aidau, wait aidau, dekas umiktatjai tusa tsanumin aidau, dekaskea nu jintiamun dakitin aina nudaawai,

<sup>11</sup> junak yamajam chicham imana nu jintinkagtawai, Apajui shiig anenkagtin mina kajitjus idaitugsamua nu.

### *Pablo takasbau*

<sup>12</sup> See tajai mina senchimtijuau Cristo Jesús iina Apujiya nuna, wagki mina betek umimainjun diigtus niina takatjin apujtusui,

<sup>13</sup> wi yaunchuk pegkegchau chichajujakú, niina nemajuidaunash ainkun waitkajakú aigkish. Tujash Apajui minak wait anenjujui, wagki wika eke dekaskeapi tujakchauwaitjai, nuigtush dekachu asan nunikuitjai.

<sup>14</sup> Tujash iina Apuji anentag wait anenkagta nu minaig imá kuashat ajuttsauwai dekaskeapi tabauwa nujai, nuigtú Cristo Jesusai anentak awa nujai.

<sup>15</sup> Juka chichamak dekaske, ashí dekaskeapi tumain ainawai: Cristo Jesusak ju nugka juig tauwai tudau aidau uwemtikatatus, nunú aina nuyag witjai dekatkauk.

<sup>16</sup> Tujash wi iman aigkish Apajui minak wait anenjujui, Jesucristo minai dekatkauk ashí wait anenkagtutajaiya nuna iwainakta tau asa, nuna wainainak tikichish niina dekaskeapi tuinak pujat nagkanchaun jukitnume tusa.

<sup>17</sup> Nuadui Rey tuke puju, jachau, wainchatai, Apajui makichkiuchia duke eme anentsá ajumaiya duish tuke ememattai atí. Aatus atí.

### *Pablo Timoteo chichagbau*

<sup>18</sup> Uchuchi Timoteoh, jujú chicham umikta tajame: Amina pachipas yaunchuk tujabiu aina nunismek shiig maanikta tajame,

<sup>19</sup> nuniakum ame dekaskeapi tame dutiksamek shiig anentaimsam pujustá, nuna nuninachu asag ujumak dekaskeapi tabaun megkaekaje.

<sup>20</sup> Nunak Himeneo, Alejandrojai nunikaje. Nunikmatai ditanak Satanasan idaitusmajai, pegkegchau chichashtan unuimagtinme tusan.

## 2

### *Apajui aujut pachisa tibau*

<sup>1</sup> Dekatkauk ju aidau dutikatajum tajime, segatajum, Apajuishkam ausatajum, mijattsuk segakjum, ashí aents aina nu pachisjum Apajui see titajum,

<sup>2</sup> nuniakjum rey aidau nuigtú ashí apu aidau pachisjumesch Apajuí aujtustajum, shiig agkan, tutitag atsamunum ashí Apajuí puyatjusa umijuinaku imagnisa batsamsagmi tusajum.

<sup>3</sup> Wagki juuwai pegkeja duka, nuigtú iina Apajuí Uwemtikagtina nunash shiig awagma duka,

<sup>4</sup> nunin asa nigka ashí aents uwemjatnume, nunikag dekaatnume dekaskea nuna tusa wakegawai.

<sup>5</sup> Wagki makichik Apajuik awai, nunisag Apajuí chichaman epegtugbaush makichik, duka Cristo Jesusai aentsmagauwa nunú,

<sup>6</sup> nunin asa nigki tsagkamankauwai ashí aentsun agkanmitkata tau asa; nunak, nuniktinji tsawan jegamtai Apajuí iwaintugmakui.

<sup>7</sup> Nuadui chichagkagtin nuigtú apóstol emamuitjai, (nunak Cristo daajin waitjutsuk tajai) Apajuí minak judiochu aina nuna maestroji etiuwai dekaskenum dekaskeapi tuta nuna jintintuati tusa.

#### *Aishmag aidau nuwa aidau pujtji*

<sup>8</sup> Nuadui, ashí yantamnum aishmag aidauk pegkejam anentaiyai, kajegdaitasuk nuigtush jiyantsuk, uwejin nayainpinum takuidiag Apajuí aujsatnume tusan wakegajai.

<sup>9</sup> Nunisag nuwa aidaushkam, jaanchjish ajantsá diyam amainun nugkugtinme, datsan amainchaun nuigtú pegkeg iwagmamja iwainmamkata tachamui, wakejumainun temashmatsuk, oro, kaya perla nuigtú jaanch akik aina ibaujai iwagmamtsuk,

<sup>10</sup> ayatak pegkeg aina nunak takainak, iwainmamkatnume nuwa Apajuí puyatjus umignush wajukuita nuna.

<sup>11</sup> Nuwak takamtak unuimagti, ashí nu aina nuig sumimak,

<sup>12</sup> nuwanak jintinkagtuati tatsujai, aishmagku wagagkig nunikta tumaitsui, takamtak atinme.

<sup>13</sup> Apajuik dekatkauk Adagkan najana dui Evan najanauwai;

<sup>14</sup> nuigtush Adagkak tsanuamak asachui, nuwa tsanuam asauwai, dutika tsanujam tudaun takasui.

<sup>15</sup> Tujash nuwak uchí uchigmau asa, ebetmamag dekaskeapi tusa, anenka takaak, pegké pujak uwemjattawai.

### 3

#### *Wajuku aidauwa obisposh amainaita*

<sup>1</sup> Juka chichamak dekaske: Obispo atatus wakega duka, pegkeg takata nuna wakegak nuniawai.

<sup>2</sup> Tujash obisposh amainai makichkish nuninai tuchatai, makichik nuwentin, ebetmamjau, shiig anentaimkau, eme anentsá diitai, jeenish shiig jukagtin, jintinkagtuatasash wakeyin,

<sup>3</sup> nampeta wekaetuchu, wainak shinú wekaechau, kuichkinak anentaimtú wekaechau, shiig awajkagtin, kakagchachau amainai,

<sup>4</sup> nuigtushkam jeenish shiig chichas pujú, uchijí aidaushkam chichama umin nuigtú pujutish pegkeg amain ainawai,

<sup>5</sup> wagki niina jeenigkish shiig chichasá pujutan dekachush, ¿utugsaya Apajuinu iglesia aina nunash kuitamainaita?

<sup>6</sup> Nunin asamtai, nui takastinuk yamá sujumankauk amaitsui, ememakmá Iwanch suwimak jutanum jegantua niish nunikai tabaunum.

<sup>7</sup> Dui atumnawai Apajuí nemagchau aidaush pegkegnum chichagtai atí tusa, nuniachkug wainka chichagtai nuigtush Iwanch pegkegchaunum takamtiksaí tabaunum.

#### *Wajuku aidauwa Diaconosh amainaita*

<sup>8</sup> Nunisag diácono aidaushkam ajantusa diitai amain ainawai, waitjus chichachu, nampeta wekaetuchu, takat pegkegchau aina nujai kuichkijinatatus wakegá wekaechau;

<sup>9</sup> nuigtushkam dekaskenum dekaskeapi tabau dekanauwa nunash pegkeg anentaiyai dekamain ainawai.

<sup>10</sup> Nunú aidauk dekatkauk dekapsamu amain ainawai, dutika makichkish nuninai tumainjish atsujuina nu diácono adaikam takamain ainawai.

<sup>11</sup> Nunisag diácono nuwe aidaushkam eme anentai amainai, chichaman tsanumá wekaechau, ebetmamjau, nuigtú ashí wají aidaunmash kajittsá diitai amainai.

<sup>12</sup> Diácono aidauk makichik nuwentin amainai, uchijí aidaujaishkam shiig chichas pujú nuigtú niina jeenishkam.

<sup>13</sup> Wagki diácono shiig takaina duka, eme anentsá diitai, nuigtú Cristo Jesusai dekaskeapi tabaun etseja dusha kajitsá antugtai amainai.

*Wait anenkagtamu dekaachbau aajakua nu*

<sup>14</sup> Junak wamak taan wainkatasan wakegayatkun agatjame,

<sup>15</sup> wi dukap megkaekuish, Apajuí tuke pujuwa nuna aentsji iglesia aina nuanuish wajuk pujumainaita nu dekata tajame. Dita ainawai dekaskea nuna etsejuinak ayamjin aina duka.

<sup>16</sup> Juka utujimsaish anentaimtumaitsui, shiig muun wait anenkagtamu dekaachbau aajakua duka:

Nigka aentsmaga wantinkauwai, Wakaní Pegkejishkam pegkegchauji atsujui tiuwai, ángel aidaushkam wainkamu, judiochu aidaunmash etsekgamu, nugkanmaya aidaush dekaskeapi tibau, nayaimpinum jukimu aajakui.

## 4

*Wainka jintinkagtamu*

<sup>1</sup> Tujash Wakaní Pegkeji paan tawai, tsawan nagkanbau atina duik ujumak aents aidauk dekaskeapi tabaunak idaisagtinai, wakan tsanujatin aina nuna nuigtú Iwanch-dau jintiamu aidaun antujuinak,

<sup>2</sup> duka tsanumin, wait aidau, datsaamsash anentaimchau aina nu jintiamu atinai,

<sup>3</sup> nuninak nuwentash nuwenawaigpa tiagtinaí, nuigtush yutai aidaun Apajuí najankauwa nunash, Apajuí nemajin dekaskea nuna dekau aidauk see tusa yumaina nuna.

<sup>4</sup> Wagki ashí Apajuí najankamua duka pegkejai, makichkish dakitmaitsui see tusa yuinakuik,

<sup>5</sup> wagki Apajuí chichame nuigtú Apajuí aujbauwa nu pegkemtikawai.

*Jesucristo shiig takajin ata*

<sup>6</sup> Ju yatsug aidau jintinkumek, Cristo Jesusa inake pegkeg atatme, chicham aina nuiya dekaskeapi tabaush shiig dekau nuigtú pegkeg jintiamu unuimajuitam nunismek atatme.

<sup>7</sup> Wainka augmattsamu aidau nuigtú jumamtin augmattsamu aina dusha dakitjata, nuniakum Apajuí puyatjusa umigtanum kakanmamjata,

<sup>8</sup> wagki iyash pegkeg atí tusa takamtikamua duka machik yaijatui, untsu Apajuí puyatjusa umigku takaamua nuuwai ashí wajiinum yaijata duka, wagki anagkagtuamua duka yamai pujag juigkechui atak atina imanuiyai.

<sup>9</sup> Juka chichamak shiig dekaske, nunin asantai ashí dekaskeapi tumain ainawai.

<sup>10</sup> Nuadui takainaji nuigtush wainak chichagtamainakuish kakanmamainaji, Apajuí iwaaku ashí aents dekaskeapi tuidaun uwemtikna nu dakaidau asaja.

<sup>11</sup> Jujú aidau umiktajum tita dutikakum jintintuata.

<sup>12</sup> Datsauch asam makichkish imanchauch diyam aipa, nunitsuk Apajuí nemajin aidau iwaintukta ame chichaamujum, ame wajuk pujame nu, ame anejatbaujum, dekaskeapi tabaugmesh, nuigtush tudau antiakchau pujakum.

<sup>13</sup> Wi eke taatsaig, uyumakta Apajuí chichame augbau, pegkegnum wakemitkagtuta nu nuigtú jintinkagtamu.

<sup>14</sup> Ame don jukiuwaitam nu takamtiksata, juna takastatui tutai anciano aidau buukmin achigmakag Apajuin aujtugmasajua nunú.

<sup>15</sup> Jujú waji aina nu uyumakta, nunú aina duka dutiksamek takastá, ame pegkeg takaam duka ashí wainkamu atí.

<sup>16</sup> Amek kuitamamkata nuigtú jintiamua dushakam, duka dutiksamek dutikata, nu aaja dutikakum ameshkam uwemjattame nuigtú amina antugtamaina dushakam.

## 5

*Tikich aidaujai nunimaina nu*

<sup>1</sup> Muun aidau chichagkumesh jiyakaipa, dutiktuk apa anentsam wakegat egketuata, dutiksamek datsauch aidaush, yatsum utugmaina dutikata;

<sup>2</sup> nuwa muunchakam duku utugmainaitam dutikata, tuja muntsujut aidaush, ame umaim anentsam diistá pegkegchau anentaimtutsuk.

*Nuwa waje pachisa tibau*

<sup>3</sup> Nuwa waje aidau dekaskenum ditá yaimainush atsujaina nu yaigtá.

<sup>4</sup> Tujash nuwa waje uchijí ajuinamuk, nuniachkush tijajigkesh ajuinamuk, nunú uchi ditanak ashí atsumamujinash yaimainai, uchuch asamtai ditan kuitamkamú asa. Nunuwai Apajuí emtinish pegkeja duka, nigka nuna dutikatnume tusa wakegawai.

<sup>5</sup> Tujash nuwa dekaskenum waje nigki juwakua duka, Apajuinak dakawai nuniak mijattusk tsawai kashishkam Apajuin aujak pujawai.

<sup>6</sup> Tujash nuwa waje iyashí wakegamun takaa puja duka, iwaaku pujakush jakauwa numamtainai.

<sup>7</sup> Jujú wají aina nu umiktajum tita, makichkish nuninai tumainchau atinme,

<sup>8</sup> wagki makichik aentskesh niina patayin yayatsu duka, niina jeenianakesh dutikachuk, dekaskapai tabaunak megkaewai, nuniau asa Apajuí nemagchawau nuna nagkaesau pegkegchau weawai.

<sup>9</sup> Nuwa waje agatbaunmag ayatak sesenta mijan ajamua nu agatjamu amainai, tujash makichik aishintin aajakajua nu,

<sup>10</sup> pegkeg takaamuji aidaush waitujakbau, uchijí aidaunash shiig tsakapaku aajakú, jeen minidaunash shiig anentus ju wajakú, Apajuí aentsji pegkejam aina nunash nawen nijatú wajakú, waituidaunash yaijakú nuigtush ashí pegkeg aidaunak takajakua nu.

<sup>11</sup> Tujash nuwa waje aidau agatbaunmag tsakat wajemeau aina duka agatjaipa, wagki ni wakegamujiya nunú Cristuig datupawai, dutikam nemaktatus wakegainawai,

<sup>12</sup> nuniak bakumamainai, ni nagkamak dekaskapai tibauwa nuna megkaegu asa.

<sup>13</sup> Nuigtushkam jegá nagkaematú yujainak dakí unuimainawai, imá dakinak unuimainatsui, chichaman yujajuinak, wainak pachinak chichamainchaun chichá yujainawai.

<sup>14</sup> Nuadui wakegajai, nuwa tsakat wajemeau aidaunak, nemaktinme nunikag uchi-jinawag jeenian uyumaktinme, nunidau asag shiwaja nu kakajus pegkegchaunum chichajam amainchau atinme tusan.

<sup>15</sup> Wagki ujumak nuwa waje aidauk kanakaje, nunikag yamaik Satanasan umi-juinawai.

<sup>16</sup> Makichik nuwa Apajuí nemagna nuna patayí waje aidau agtaik, ni yaimainai, iglesiaya nu kuashat takat ají tabaunum, dutikam iglesiak dekaskenum waje, makichkish yaimainji shiig atsujuina nuna yaimainai.

#### *Anciano aidau pachisa tibau*

<sup>17</sup> Anciano aidau shiig takaina duka eme anentsá diyaku shiig akikbau amainai, imá senchi chichaman etsejuinak nuigtú jintinkagtuina nu,

<sup>18</sup> wagki agagbaunum chichaak: "Toro trigon dajag pakak wekaga nuna nu jigkatuawaipa"\* tawai, nuigtú: "Aents takaa duka, akiam auwai" tau asamtai.

<sup>19</sup> Anciano pachis, jimag aentskesh nuniachkush kempatumkesh, pegkegchau takaamuji etsegtuinachkuig antugkaigpa.

<sup>20</sup> Tuja tudau idaitsuk takaa puja duka, ashí tikich aidaush antuinamunum jiyaktá, nuna wainkag tikich aidaush ishamkatnume.

<sup>21</sup> Juna wi; Apajuí, Cristo Jesús nuigtú ángel etejamu aina nuna emtin tajam ju dutiksamek umiktá, makichkia nu takum tikichia duka pachitsuk idaiyin aipa, nuigtush wait anentamugmekesh idaitsuk ashí dutikata.

<sup>22</sup> Makichik aentskesh shiig anentaimtsuk waugtukam uwegmin achikam Apajuí aajtusaipa, tikichi tudauji pachintukaim. Tupanjata ashí pegkegchau aidauk.

<sup>23</sup> Amek wakemin beseakum waa wamak jam nunin asam, yumik umutsuk machik vino uwagta.

<sup>24</sup> Ujumak aents aidau tudau takaamuji paan wainmainush awai eke chicham dekagmainnum jegachiatak, nuniai awai tikich pegkegchau takaamuji kakajus dekagmainchaush, tujash nunak pegkegchauji wantintai dekajuinawai.

<sup>25</sup> Nunisag pegkeg takaamua nu paan wantinush awai, tuja pegkegchawau dushakam nunisag uumkag amatsui.

## 6

<sup>1</sup> Ashí achikbau inam batsataidauk, niina apujin ashí eme anentus diimain ainawai, Apajuí daajin nuigtú jutii jintinkagtamua nuna pegkegchau chichagkainum tabaunum.

<sup>2</sup> Tuja apuji aidau Apajuí nemajin agtaik, dekaskapai tabaunum yachi wajasú asamtai ajantus diitnak idaimainchau ainawai. Nunitsuk, dekas shiig takagmain ainawai, wagki ni pegkeg takaamujin juina duka Apajuí nemajin nuigtú yatsut aneetai aina nu ainawai. Ju jintinkagtakum nuigtush etsekgata.

\* 5:18 Dt. 25.4.



*Waitá jintinkagtin aidau*

<sup>3</sup> Tuja makichik aentskesh, tikich wají pachis jintinkagtak, iina Apuji Jesucristo pegkeg jintiamua nujai betek jintiitsuk, nuigtush wait anenkagtamu jintiamua nujaish betek tachakug,

<sup>4</sup> nunú aents nunin aidauk dekachiatatak wainak ememainak tu yujainawai. Duka dita anentaimsa chichamujin pachisag jiyanitkatatus wakeyin ainawai. Nu jiyanitbaunmag kajegdayamu, shiwagmagamu, pegkegchau chichagdayamu, kajintsá anentaimtuniashbau,

<sup>5</sup> nuigtushkam inagmainchaun jiyanitú yujainawai, aents pegkegchaunak anentaimtin dekaskea nuna dekachu asag, Apajúi pachisa chichamunum wiyakchameautia nuninun anentaimainawai. Aents nunin aidauk tujanjata.

<sup>6</sup> Tujash shiig muun juamua duka Apajúi puyatjusa umigku iinu ajutkagta nujai shiig aneasa pujamua nuuwai.

<sup>7</sup> Wagki ju nugka juig makichkish takakuk taachuitji, nunisaik makichkish jukik wechatnaitji.

<sup>8</sup> Nuadui, ayamjumamain nuigtú ejamamainush ajutjamkuig, nujaig shiig aneasa pujumainaitji.

<sup>9</sup> Wagki wiyakchameatatus wakejuina duka wamak pegkegchau takatnum iyainawai, nuninak kuashat wakegainak waituinawai, nunú imanchau aidau pegkegchau ekagtuina nuna imatika uyumaidau asag, waittanum nuigtú megkaeta nuwi weenawai;

<sup>10</sup> wagki ashí pegkegchau aidau nagkamnamua duka kuichik imá senchi wakegamua nuuwai, nuadui ujumak aidau imanik wakegainak, dekaskeapi tabaun idaisaje; nunikag shiig senchi waituinawai.

*Dekaskeapi tau asa maaniamu*

<sup>11</sup> Tujash amek, Apajúi aentsji asam, ashí jujú wají aina duka takasaipa, nuniakum pegkeja duke takastá, Apajúi puyatjusa umigta nu, dekaskeapi tabau, anentak, waitiakmesh katsunjá pujakum imagnisa pujustá.

<sup>12</sup> Ame dekaskeapi tame nujai senchi kakaajam maanikta, pujut nagkanchau juki-uwaitam nunismek pujusam; aminak Apajuik aatus nunikti tusa etegtamauwai, nuadui ame dekaskeapi tabaugmia duka shiig etsegtumakuitme kuashat antuinamunum.

<sup>13</sup> Apajúi ashí wají aidau puwatan suuwa nu nuigtú Jesucristo Poncio Pilato emtinish niinun pegkejan etsegtumakua nuna emtin tajame,

<sup>14</sup> wi tajam ju umiktá, pegkegchauji atsubgau imagnisa pujusam iina Apuji Jesucristo minitta nu dakakum,

<sup>15</sup> Apajúi ni tsawan dakamuji uminkamtai ataktú Jesucristun ju nugka jui awematnai. Tuja imá nigkiyai Rey ashí rey aina nuna nagkaesau nuigtushkam nigkiyai Apu ashí apu aidaunash nagkaesauwa nu, imá nigkiyai eme anentsá ememattaiya duka.

<sup>16</sup> Nigkiyai jachauwa dushakam, tsaaptin adigmainchaunum pujuwa nu, makichkish wainchatai nuigtush wainmainchauwa nu, niina senchijish, ni inabaujish tuke atina nu ememattai atí. Aatus atí.

<sup>17</sup> Wiyakuch ju nugkanmaya aina dushakam ememachu atajum tita, ni wajiji aina nuiyanak dakasaigka, wagki nu wiyakchameuta duka dekaskechui, Apajúi ashí wají aidau shiig aneas pujustinme tusa kuashat sukagtna nui kajinas anentaimsatnume.

<sup>18</sup> Pegkeg aina duke takastajum tita, pegkeg aidau takatnum wiyakuch atinme, tsagka, nuninak ditanu ajuina nujai yaimkagtatus waketinme,

<sup>19</sup> aatus nuninak, dita atak jukitnujiya nuna kuashat ikaugkagtatui, nuigtush pujut nagkanchauwa nunash jukiagtinaí.

*Pablo inagnaku akatmamjamu*

<sup>20</sup> Timoteoh, takastá tibauwaitam nu shiig kuitamkam takastá. Nuniakum nugkanmaya wají aidau wainak augmatuina nu, nuigtú tsanumainak dekaskea nu dekainaji tuina dushakam antugkaipa,

<sup>21</sup> wagki nuna antujuinak, ujumak aents dekaskeapi tabaun idaisaje. Apajúi ashí atumnash wait anenjamjatnume.

## Pablo awentsaik carta agaja Timoteo awetimu

### *Kumpamkagtau*

<sup>1</sup> Witjai Pablo Apajui wakegau asa Jesucristo apostolji etiuwai, Cristo Jesusai pujat anagkagtauu juwamua nuna etsegkati tusa awetiuwai.

<sup>2</sup> Timoteoh, mina uchig anetaiju kumpamjame; Apajui iina Apajiya nunu, Cristo Jesus iina Apuji anentag, wait anenjamag nuigtu agkan pujutan amasti.

### *Pablo Apajui see tabau*

<sup>3</sup> Apajui see tajai, mina muuntug takajujakajua nunisnuk wishakam pegkeg anetaiyai takajag nuna, nuniau asan tuke pachiajame Apajui kashi tsawai aujkunchakam, <sup>4</sup> nuniakun ii kanaamunum ame buutu wajakbau aina nuna tuke aneaku asan, amina wainkan shiig aneastasan wakegajai,

<sup>5</sup> wagki dekasenum dekaskeapi tabau ajutjama nuna aneaku asan. Nunak dekatkauk amina dukuchjum Loida, amina duku Eunicejai ajujakajui, aminash dukeap ajutjamua tajai.

### *Yamajam chicham etsegbauk datsanmaitsui*

<sup>6</sup> Apajui don amasbau ajutjama nu paan iwainakta tajame, wi amina buukmin achikan Apajui segai jukiwaitam nunu.

<sup>7</sup> Wagki Apajui wakan sapija nunak sujamsachui; wakan senchigtina nuna, aneenitan, iik kuitamamkatnun sujamsauwai.

<sup>8</sup> Nuadui, iina Apuji Jesus pachisam nuigtu wi achinkan pujag nu pachisa chichatash datsaamipa. Duka nunitsuk, yamajam chicham etsegbauunum waitiakmesh Apajui senchin sujama nujai katsunjata,

<sup>9</sup> ni uwentijamag nuigtu mina aentsug pegkejam atinme tusa etegtamjauwa du. Nunak ii pegkeg takasbaunmakesh dutijamachui, ayatak ni yaunchuk anentag dutikatnuijn anentaimtusua nuna Cristo Jesusai sujamsauwai,

<sup>10</sup> tujash yamaik iina Uwentijamin Cristo Jesus tauwa du iwaintugmake, jata nuna senchijin depetuk yamajam chichama nujai pujutan tsaaptinun susa jachau awajsauwai.

<sup>11</sup> Nuadui minak nuna chichaman etsein ati tusa, apostol, nuigtu maestro etiuwai.

<sup>12</sup> Duwi wika ashí ju aidaunak waitiajai, tujash datsamatsjai; wagki, wi yana dekaskeapi tiuwaitja nuna dekau asan, nuigtush nigkiap senchigtina ibau asa, atak tsawan atina du midau atinnash kuitamjutua tau asan.

<sup>13</sup> Chicham dekaseg aidau minaiya antukuitam duke kuitamkata, dekaskeapi tabau nuigtu Cristo Jesusai ijutkau asa anentak ajutjama nujai.

<sup>14</sup> Wakaní Pegkeji iini pujutama nuna senchijin, kuitamkata pegkeja nuna jintinkagtuati tibauwaitam nu.

<sup>15</sup> Amek dekame, ashí Asia nugkanmaya aidau mina ukugkiaja duka; nunu aina nuiyag Figelo, Hermógenes aina nuuwai.

<sup>16</sup> Apu Jesus wait anenjati Onesiforon patayi aina nunak, wagki ni kuashta imania ichichtugmayi wi achinkan cadenayai jigkatjagmaitai egketaish datsamtsuk,

<sup>17</sup> nuniau asa Roma taamuik, shiig senchi egá egatkawa waitkabi.

<sup>18</sup> Apu Apajui yaigti Apu Jesusa tsawanji atina duish wait anenjamu ati tusa. Amek shiig dekame, ii Efeso pujajin wajupa yaimpakchabi duka.

## 2

### *Waitiakmesh katsunjata*

<sup>1</sup> Mina uchiju Timoteoh, amek senchi wajastá, Cristo Jesus anentag uwentijamu asam.

<sup>2</sup> Kuashat antuinamunum wi tabau antukuitam nunu, tikich Apajui nemagkau aidau kajittsá diyamua nu jintintuata, dutikam ditash tikich aidau jintinmainsash unuimagtinme.

<sup>3</sup> Amek senchi waittsata, Cristo Jesusa suntaji asam shiig umigbaunum.

<sup>4</sup> Suntagmagak puja duka, suntagchau pujuina nu pujutnak anentaimtuchu ainawai, apuji shiig awajkata tabaunum.

<sup>5</sup> Nunisag wasugkamin aidaushkam, dutik wasugkamata tibauwa dutiksag wasugkamchakug waji pegkegnak jumaitsu.

<sup>6</sup> Ajanum takaa duka, ni ajakma nuiya jukita takug, dekatkauk senchi takamainai.

<sup>7</sup> Juna taja nu anentaimtusta, Apu Jesus ashí dekatan amasti.

<sup>8</sup> Adeagta, Jesucristo David weantu aajakua nu, jakau aina nuiya nantakiuwa nuna pachisan yamajam chichaman etseguweg nunú,

<sup>9</sup> nu etsegbaunum achigkagmatai pujusan senchi waitiajai, magkagtin utugmaina dutijuawag cadenayai jigkatjagmatai, tujash Apajú chichamega duka jigkagchamui.

<sup>10</sup> Nuadui ashí katsuntajai Apajú etejamu aina nu aneamunum, ditashkam uwemat nagkanchau Cristo Jesusa imanjin awa nuna jukitnume tusan.

<sup>11</sup> Juka chichamak shiig dekaske:

“Nijjai jakau akuik, nunisaik nijjaig pujutnaitji.

<sup>12</sup> Waittsau ainakuik, nijjai inamjatnaitji.

Ni dakitjau akuik, dutiksaik dakitam atinaitji.

<sup>13</sup> Betek umichu ainajinish,

nigka betek uminai,

wagki ni tibaujina betek umina dui”.

*Makichik inak shiig takauwa nu*

<sup>14</sup> Jujú aidau anemtikjata dutikakum chichagkata Apajú eemtin, wainak chicham aina duka jiyanitú yujaijpajum tusam, duka makichkish yaijattsui, nuna nunina duka antuina nuna pegkegchau emainak tu yujainawai.

<sup>15</sup> Shiig kuitamka takastasam kakanmamsata, Apajú eemtinish pegkejan takau wantinkatasam, takatan takasú datsamainji atsuja numamtuk, chicham dekaskea nu shiig jintinkagtakum.

<sup>16</sup> Tupanjata nugkanmaya aidau wainka chichamjú wekaetai aina duka, wagki nuna tu wekaeguk aan nagkaemas pegkegchaunum wemain asamtai.

<sup>17</sup> Tuja dita jintinkagtamua duka kuchap ayatak wegkag wegama numamtuk wajawai, nunak Himeneo, Filetojai dutikainawai,

<sup>18</sup> dekaskea nuna tujanjang yujasag chichainak, jakau nantagtina duka nagkaemakne tuinak, ujumak aents aidau dekaskeapi tabaujin pachimjukaje.

<sup>19</sup> Tujash Apajú nagkamku tibauwa duka yapajinmaitsui nunisagke, duka agagbaunmag: “Apu Apajuik wainui niinu aina nunak”. Nuigtushkam: “Ashí aents apu Jesusan umijuidauk, pegkegchau aina nunak tujanjatnume”, tawai.

<sup>20</sup> Makichik jega muunta nuig takatai aidauk oro, jiju plata aina nujai najankamukek atsame, numí najanamush, duwé najanamushkam auwai; nuniai ujumak iman dutikatasa takatai ainai, tikich aina duka imanchaunum takatai ainawai.

<sup>21</sup> Nuadui, makichik aentskesh Jesucristo atsumtai atatus wakegakug ju wajú aina nuna shiig idaiyas pujumainai, takatai aidau pegkeg aina ibau wajasá, nunitai Jesuschakam oro najanamun apu takauwa numamtuk niinashkam takat pegkegnum apusatnai.

<sup>22</sup> Datsa asá iyashnumia senchi waketai aina duka ukuktá, nuniakum pegkeja duke takastá, dekaskeapi tabauwa nu, anentak, nuigtú agkan pujuta nu, ashí anentai pegkeg aidau Apu Jesusan umiujina nujai.

<sup>23</sup> Chicham imanchau nuigtú wainak aina duka pampantú wekayipa. Amek dekame nunú tudaibau aidauk jiyanitnum ejekagtina nu.

<sup>24</sup> Wagki Apu Jesusa inakeg jiyani wekaenuk amaitsui, nunitsuk ashí shiig awajkagtin, jintinkagtuatatus wakeyin, nuigtú emamkemas dekau amainai,

<sup>25</sup> kakagchau anentaiyai antakchau aina nunash esemainai, Apajuiyai atak wakitki dekaskea nunash dekachaintash,

<sup>26</sup> nuninak shiig dekawag Iwanch achiká tsanuam ni wakegamujin umiujinak batsata nunash agkanmagachajaintash tau asa.

### 3

*Tsawan nagkanbaunmash aentsush wajukua agtinaita nu pachisa tibau*

<sup>1</sup> Nuigtushkam jusha dekamainaitme: Tsawan nagkanbau agtina nuig, tsawan ishamain aidau midiajtinai.

<sup>2</sup> Wagki aents aidauk imá nigki anenmamin, imá niinunak anentaimtin, eme anentaimtumin, emebau, pegkegchau chichagkagtin, apajin dukujinash intimjin, see tuchau, Apajuinash anentaimtuchu,

<sup>3</sup> anejattsá diijatbaush atsujin, wait anenkagtuchu, kajemtin, chichaman tsanumin, ebetmamjachu, yajau, ashí pegkeg aidau shiwagbau,

<sup>4</sup> unumkagtin, esekachu, antakchau, Apajuinun nagkaesau niina shiig awagma nunak wekaetiagtin ainawai.

<sup>5</sup> Apajuin shiig puyatjus umigna iman iwainmabiagtina, tujash dita wajuk pujuinawa nu iwainatnai dekaskechua nuna.

Aents nunin aina duka tujanjata.

<sup>6</sup> Wagki nunú aina nuiyayai jega aidaunum wayawag, wainak nuwauch aidau tudaunak takainak iyashí ashí pegkegchaun wakega nuna takamtikin aidaun tsanú yujajin aina nu.

<sup>7</sup> Nunú nuwa aidauk tuke unuimasagké ainawai, nuninakush dekaskea nunak tuke dekamainchau ainawai.

<sup>8</sup> Janes Jambresjai Moisesan utugchatan aputusajua nunisag, nunú aents aidaush dekaskea nu etsegbaunum utugchatan apujuinawai. Ditak anentaimtajinig besekú, dekaskeapi tabaujinish tuke megkaegak megkaejau ainawai.

<sup>9</sup> Tujash nunak nuigtuk emachagtinai, wagki ashí aents aidauk dita anentainkachu yujas nuní yujainamunak dekajumu asag, nu jimag wajukawajua nunisag.

#### *Inagnaku Timoteo jintintuamu*

<sup>10</sup> Tujash amek mina jintinkagtutajua nu, mina pujutjua nu, wi takastasan anentaimtutajua nu, dekaskeapi tutajua dusha, wi waugtuchuitag nu, mina anenkag, utugchat katsuntanmash senchitag nu imatiksamek unuimajuitme,

<sup>11</sup> mina waitkajuinamush, nuigtú wi waitiamujush. Nuigtush dekauwaitme wi Antioquiá, Iconio, Listra aina nui waittsauwaitag dushakam; waitkajuinakuí wajuk waitin ayaja nu, tujash ashí nunú aidaunmag Apu Jesús agkanmitkajuauwai.

<sup>12</sup> Nunisag, ashí aents imá Cristo Jesusnak umiujinak pujustatus wakejuidashkam, waitkam agtinai,

<sup>13</sup> tujash aents pegkegchaun aidau, nuigtú tsanumin aina dushakam nuní nagkaemas pegkegchaun takaagtinai, nuninak tsanubiagtinai ditash tsanuinamu asag.

<sup>14</sup> Tujash amek, ashí unuimajuitam duke takastá, dekas nuninapi tiuwaitam nu. Amek dekame yanauwa unuimajuitme.

<sup>15</sup> Amek uchuch asamek Agagbau Pegkegma duka dekauwaitme, nunú aina nuuwai Cristo Jesús dekaskeapi tabaunum uwemna nuna dekamtijamaina nunú.

<sup>16</sup> Ashí Agagbauwa duka Apajuí tibauwa nuuwai, nunin asa atsumtaiyai jintinkagtaunum, anentai yapagkagtuata tabaunum, esekagtuata tabaunum, pegkeg takat aina nui jintinkagtuata tabaunum,

<sup>17</sup> Apajuí aentsji imagnis pujú ashí takat pegkeg aina nu takatnash shiig dekau atí tabaunum.

## 4

<sup>1</sup> Apajuí nuigtú Cristo Jesús inamjatatus jui taa, iwaaku aidaun, jakau aidaunash dita takasbaujin diijus titina nuna eemtin puyatjusan tajame,

<sup>2</sup> chicham etsegkata tusan; nuniakum ashí tsawantai titá anentai yapajiatnume, jiyaktá, pegkegnumash wakemitkakta dutikakum emamkesam jintintuata.

<sup>3</sup> Wagki tsawan jegatnai, chicham dekaskea nu jintiamu antutan dakitjagtina nu, nuninak egakagtinai kuashat maestro aidaun, dita pegkegchaun wakegaina nuninun jintinkagtaun igkugkagtatus.

<sup>4</sup> Nuniau asag dekaskea nu antutnak idaisagtinai, nuninak wainka augmatbau aina nuna antujiagtinai.

<sup>5</sup> Tujash amek, shiig ebetmamjam waitiakmesh katsunjata, nuniakum yamajam chicham etsegbauwa duke uyumakta, aajam takatjum umiktá.

<sup>6</sup> Wagki wi maam atatag duka namput wajaschae, nuigtú tsawan wi wetina dushakam tikijuch wajasé.

<sup>7</sup> Wika shiig senchi maanikjai, mina takatjunash ashimkajai, dekaskeapi tabaunash kuitamkajai.

<sup>8</sup> Nuigtushkam wi pegkeg takasbaunum corona jukitnuk kuitamkam ajutui, nunak Apu Jesús juez dekas pegkejan takauwa nu tsawan atina nui sujustinai; tujash imá minakek sujuschatnai, ashí ni minitnun aneas dakasu aina nunash susatnai.

#### *Timoteo ujakbau*

<sup>9</sup> Waamak taam waitkata,

<sup>10</sup> Demasak ju nugkaya wajiin imá senchi wakegau asa Tesalónica weak ukugkine; untu Crescente Galacia wemae, nuniai Tito Dalmacia wemae.

<sup>11</sup> Imá Lucasak wijaig pujawai. Minakum Marcos ayaktá, takatnum yainkati tusan atsumajai.

<sup>12</sup> Tiquiconak Éfeso awemamjai.

<sup>13</sup> Ame minakum capa\* takugtukta, Carpo jeen Troas ukukmayag nu, aiksamek papí aidaush, imá senchi pergaminu aina nu.

\* 4:13 "Capa" tawa duka Lc. 6.29 diistá.

<sup>14</sup> Alejandro jijú takauwe nu minak kuashat tsanumjutjæ; tujash Apu Jesús ni wajuk takasé dutiksag akikti.

<sup>15</sup> Ameshkam aujaig kuitamamkata, wagki jutii chichagkagtamunak shiig senchi dakitmayi.

<sup>16</sup> Nagkamchaku wi ayamjumkatasa chichaamunmag makichkish yainkachagmayi, ashí ukugkiagmayi; dita nunikaja nunak Apajuish pachitsuk idaisati tajai.

<sup>17</sup> Tujash Apu Jesús wijai au asa senchin sujusmayi, chicham etsegbauwa duka minai uminkati nunitai ashí judiochu aidaush antuktinme tau asa. Aatus agkanmitkajuabi león yuwata takui ayamjumaina numamtuk.

<sup>18</sup> Dutiksag Apu Jesús agkanmitkajuattawai ashí takat pegkegchau aina duish, nunik niina inamtaiji nayaimpinum jujuki kuitamjuktatui. Nigki tuke ememattai atin atí. Aatus atí.

*Akatmabau*

<sup>19</sup> Priscila, Aquila nuigtú Onesíforo ni patayí aidaujai kumpamjutuata.

<sup>20</sup> Erastok Corinto juwakmae, untsu Trófimo jau asantai Mileto ukukmajai.

<sup>21</sup> Yumi tepeatsaig minisam dekapsata. Eubulo, Pudente, Lino, Claudia, nuigtú ashí yatsut aidaushkam kumpamjamainawai.

<sup>22</sup> Apu Jesús amina wakanmijaish atí, ni wait anenkagtamujiya dusha ashí atuminish ajutjanti.

## Pablo carta agaja Tito awetimu

### *Kumpamkagtau*

<sup>1</sup> Witjai Pabloitjai, Apajui inakegaitjai nuigtush Jesucristo apostoljiyaitjai. Minak Apajui etegjamu aidau dekaskeapi tuina nuna, Apajui puyatjus umijin aidaush wajuk pujumaina ainawa nuna pachis chicham dekaskea nuna jintintuati tusa ni awetiuwai.

<sup>2</sup> Jutii dakamua duka pujut nagkanchauwa nuuwai, nunak Apajui, waitjuchua nu, nugkanash najantsuk anagtamauwai,

<sup>3</sup> nuna yamai ni dutikatnuji tsawan jegau asamtai, ni chichamen iwainake, Apajui iina Uwemtijamna nu mina etsegtugkata tusa idaitugsauwa nuna.

<sup>4</sup> Titoh, amek wijai betek Apajui dekaskeapi tau asam tuke mina uchijuitme: Apajui iina Apajiya nu nuigtú Cristo Jesús jutii uwemtijamna nujai anentag wait anenjamag shiig agkan pujutan amasti.

### *Obispo, anciano aidaush wajuku amainaita*

<sup>5</sup> Wika aminak utugchat iwagmain juwaka ju iwajata, nunikam maki makichik yaakat aina nui iglesia diistin aidau, anciano adajata wi tibaijam dutiksamek tusan Creta ukukbaijame.

<sup>6</sup> Ancianok, makichkish nuna nunikchama tusaish augmatchatai amainai, makichish nuwentin, uchiji aidaush Apajui nemajin, intimkichu nuigtú pegkegchau takau agmae tusaish augmatchatai.

<sup>7</sup> Wagki obispok, Apajuinun kuitamin asa, makichkish nuninai tuchatai amainai; ememachu, kajemtin wajaknuchu, nampetnash nampechu, wainak shinú wekaechau, kuichkinak anentaimitú wekaechau amainai.

<sup>8</sup> Nunitsuk, jeenish shiig jukagtin, pegkeg takatnak anentaimitin, ebetmamjau, pegkejan takau, pegkejam, shiig kuitamamak pujú,

<sup>9</sup> chicham dekaskea nu wajuk jintintuamuita nunak shiig dekau amainai, nunin asa chichaman dekaskechua nunin chichajuidaunash shiig jintintua dekaskeapi tumantikmainai.

### *Waitá jintinkagtin aidau pachisa tibau*

<sup>10</sup> Judío aina nuiyag kuashat antumtikmainchau ainawai, nunin asag wait chichaman chichainak aentsun tsanuinawai.

<sup>11</sup> Nunú aents aina duka itatmitkaktajum, jintimainchau ainayatak kuichik jukitag tabaunum makichik jeganum ashí batsata nunak, tumainchau jintintuinak pachimjú yujaidau asamtai.

<sup>12</sup> Cretanmaya aina nuiya makichik profeta chichaak: “Cretanmaya aidauk tuke wait, kuntinjai betek, yuu batsamin, daki aidau” tiuwai.

<sup>13</sup> Nunú tibauwa duka dekaske; nuadui najam jiyajatkata, dekaskeapi tabauji pegkeja nuna kuitamkatnume,

<sup>14</sup> nunidau asag antugkashtinme judío aidau augmattaijin, aents tibau aidau dekaskea nuwi datumkagtina nunashkam.

<sup>15</sup> Aents pegkeja duka, ashí anentaibaujinish pegkejai; utsu aents besekú aina duka, makichkish pegkejak atsgnai, wagki anentaimitajinig nuigtú dekatjinish besejú asag.

<sup>16</sup> Apajuinun dekauwa iman chichagmamainawai, tujash dita takaamujin wainak tuina duka wainnawai; ditak dakittsá diimain, yajau, makichkish pegkegnak takamainchau ainawai.

## 2

### *Dekas pegkeg aina nunú pachisa jintinkagtau*

<sup>1</sup> Tujash amek chicham dekas jintinkagtuamua dutiksamek chichagkagtukta.

<sup>2</sup> Anciano aidauk ebetmamjau, shiig anentaimek; dekaskenum dekaskeapi tinu, anejatin, waugtuchu amainai.

<sup>3</sup> Nunisag anciana aidaushkam, pegkejam aidau wajuk pujuinawa nunisag pujustinme, tsanumkagtuchu, umutai nampemain aidau tunamatjauchu, pegkeja jintinkagtin agtinme,

<sup>4</sup> nuninak jintintuatnume nuwa muntsujut aidau aishi aneetan, uchiji aidau aneetnash,

<sup>5</sup> shiig anentaimkau atanum, ayatak pegkejak atanmash, jega kuitamka pujut-numshakam, aishijaiash pegkeg nuigtú aishinig sumitkau atan, Apajuí chichamega nu pegkegchaunum chichajam ai tabaunum.

<sup>6</sup> Aikasmek datsauch aidaush pegkegnum wakemitkakta shiig anentaimkau atinme,

<sup>7</sup> nuniakum ameshkam iwainmamkata ashí takat pegkeg aina nu takatnum, jintiamu ayatak pegkeg ajantusa diimaina nu,

<sup>8</sup> chicham dekaskea nu, dakitmainchau; aaja nuniamin shiwagshakam datsaagti, nuninak jutiinash makichkish pegkegchau tujamainchau atinme.

<sup>9</sup> Achikbau aidaushkam jintintuata ditá apujinak ashí umigkatnume, nuninak shiig awajkatnume, wainak ai aimtau ainum,

<sup>10</sup> nuigtush kasagkainmegka, nunitsuk ashí kajittsá diyam amainun iwainmamkatnume, Apajuí iina Uwemtijamna nudau jintiamua nunash ashí eme anentus diistinme.

*Apajuí anentag wait anenkagtugbauji*

<sup>11</sup> Apajuí ni jutii wait anenkagtamujinak iwaintugmakui. Nunú ashí aents aina nunak uwemtikatatus wakejawai.

<sup>12</sup> Nunú, jintinjami pegkegchau aina nu, nugkanmaya wakegamu aina dushakam idaisá, yamai tsawanta juik shiig anentaimsa, pegkegnum pujuinaku nuigtú wait anenkagtaku pujumaina nuna,

<sup>13</sup> jutii shiig aneastinji Apajuinu nuigtú Jesucristo jutii Uwemtijamna nuna imanji wantinkatna nu dakainaku.

<sup>14</sup> Nigka nigki jutiií mantamnata tus tsagakamankauwai, ashí pegkegchau aina nuanui agkanmitkagmatatus; dutika pegkemtijami niina aentsji etamak ashí pegkeg aina nunak takamtijamsatau asa.

<sup>15</sup> Jujuwai jintinkagtumainaitam duka, wakemitkagkagtakum, ajantsuk najam chichagkagtukta. Makichkikesh imanchau diigmaisainum.

### 3

*Apajuí nemajin aidau nunimainji*

<sup>1</sup> Aneemtikjata apu inamin aina nui nuigtú nunú apu adajamu aina nuishkam sumimkatnume, nunik umiujinak ashí pegkeg aina nunak takastatus wakeyin atinme.

<sup>2</sup> Makichik aentsnakesh pegkegchau chichagkashtinme, wainak shinú wekaechau atinme, nunitsuk shiig awajkagtin ashí aents aidaunash kakagchajin iwaintuktinme.

<sup>3</sup> Wagki jutiishkam yaunchkek anentainkachu, intimkiu, megkaejá batsamsá, iyash pegkegchau wakega nu inaku waitkatai, nuigtú ashí pegkegchau aina nuna shiig anentin aajakuitji. Pegkegchaunum batsamsá, tikichdau pegkeg diigsá kajejuinaku, kajegtamaidaush pempeentunike kajejujakuitji.

<sup>4</sup> Tujash Apajuí iina Uwemtijamna nu iwaintugmakui niinu pegkeja nuna nuigtú ashí aents aneamua nunashkam,

<sup>5</sup> dutika jutii pegkeg takasbaush atsugtamaig wait anenjamu asa Jesucristo numpega nujai nijapak uwemtijamjauwai; dutijama yamajam etamak Wakani Pegkeji pujugtamui asamtai yamajam pujutan sujamsauwai,

<sup>6</sup> nuna jutii aidautin shiig kuashat amasajua nunak, Jesucristo iina Uwemtijamna nu Wakani Pegkejinash sujamsauwai,

<sup>7</sup> ni anentag pegkeg ainagme tujamatai pujut tuke atin jukitnun dakastinme tujamu asa.

<sup>8</sup> Jujú chichama juka dekaske, nuadui jujú jintinkagtamu aina nuna mijattsuk titi tusan wakegajai, ashí aents Apajuiai dekaskeapi tuina duka pegkeg takat aina nuna uyumaktinme tabaunum. Jujú jintinkagtamu aina duka pegkeg ainawai nuigtú ashí aentsnash pegkegnum yaimainai.

<sup>9</sup> Tujash imanchau aina duka jiyanitú wekayipa, ditá muunji aajakajun pachis tuina dushakam, kajegdaimain aina dushakam, chicham umiktina nu pachismesh jiyanitú wekayipa, wagki duka wainak ainawai nuigtush yaijattsui.

<sup>10</sup> Makichik aentskesh kanamainun chichá wekaekuig, chichagkata, tuja ataktú tamash antugtamchakuig jiiiktajum,

<sup>11</sup> dutikagmesh dekaatajum duka pegkegchau unuimatug nuigtush tunamag ni bakumaku suwimak jumainun tu wekaga nu.

<sup>12</sup> Artemasan nuniachkunush Tíquico awetittajame, nunikmataig wamak Nicópolis taam waitkata, yumi tepeatta nunak nuwi pujusan inagkeaktasan pujuttajai.

<sup>13</sup> Abogado Zenas Apolosjai, anui taa weenakuig, wajuk yaimainaitme dutiksamek yaigtá, makichkish atsumamui atsuigtinme.

<sup>14</sup> Atum dutikamun jutii yachi aina dushakam wainkag unuimagtinme pegkeg takat aina nuna, atsumamu aina nui yaimtan, nuninak tuke atsumtai agtinme.

*Inagnaku kumpamkagtamu*

<sup>15</sup> Ashi wijai batsata nunú kumpamjamainawai. Kumpamjutuata dekaskeapi tabaunum anejatuina nunú. Apajuí anentag wait anenkagtamua nu atuminish atí.



## Pablo carta agaja Filemón awetimu

### *Kumpamkagtau*

<sup>1</sup> Witjai Pabloitjai, Cristo Jesusan takaju asan achinkan pujusan yatsug Timoteojai kumpamjame anetaiju Filemogkah, jutiijai takatnum atuetai asamin;

<sup>2</sup> nuigtú iina umayí anetai Apia, Arquipo jutiijai takat atuetutaiya nuna, nuigtush iglesia amina jeemin ijunaina nunashkam.

<sup>3</sup> Apajuí iina Apajiya nunú, Apu Jesucristujai anentag wait anenjamag agkan pujutan amastinme.

### *Pablo see tibau*

<sup>4</sup> Mina Apajuijun aujkunuk amina pachisan tuke see tusanké ajai,

<sup>5</sup> wagki antugkamjame, Apu Jesús aneamugmin nuigtú dekaskeapi tabaugminash, nuniau asam ashí Apajuí aentsji pegkejam aidau aneam nunashkam.

<sup>6</sup> Apajuin segatjame wi dekaskeapi taja nunismek amesh dekaskeapi tame dui, Cristo aneau asá ashí pegkeg jutiini dutikmain ajutjama nuna dekaati tau asan.

<sup>7</sup> Shiig aneakun ichichmamjai ame anejatbaun antakun. Yatsujuh, Apajuí aentsji pegkejam aina dushakam aminig anentain ichichmamkaje.

### *Pablo Onésimo chichamjukbau*

<sup>8</sup> Nuadui, Cristo daajin, ju dutikata tumain ajutaig,

<sup>9</sup> ayatak anenkai segajame. Wi, Pablo, muun wajasuitkun Cristo Jesusa chichame etsegbaunum achinkan pujusan,

<sup>10</sup> Onésimo, wi cárcel pujusan Cristo pachisan etsejai antuk sujumankau asa mina uchijua imana nu, ataktú amina jeemin mina anú wait aneasam jukita.

<sup>11</sup> Yaunchuk tsawantaya duik amesh atsumainchauyi, tujash yamaik ameshkam wishakam atsumtai wajasé,

<sup>12</sup> nuniku asantai awagkin awetajame, mina utugtumainaitam dutiksag jukiti tusan,

<sup>13</sup> amina yaimpamaina nuna, jui pujusá mina yainkati, yamajam chicham etsegbaunum achinkan pujag nuna tumainaitkun.

<sup>14</sup> Tujash makichkish ame wakegatsminig dutiktanak wakekashmajai, ame mina yainbau wi takui dutikamu ai, dekas ame wakegamunum dutikamu atí tusan.

<sup>15</sup> Juna juniktasants ujumak tsawantai aminí kanakuitai, nunik ataktú ame jukim amijai tuke pujustatus,

<sup>16</sup> tujash achikbaujai betekchau, achikbauwa aan nagkaemas yatsut aneetai minaig wajasé, tujash aminig aan nagkaemasayai, aentstí nunitaiya nuninchau, Apu Jesús nemagbaunum yatsut wajasú asa.

<sup>17</sup> Nuadui, ame minash kumpag anenjakmek, mina utugtumainaitam dutiksamak jukita.

<sup>18</sup> Amina pegkegchau takagtamsau nuniachkush diwimjamkau akuish, minai idaisata.

<sup>19</sup> Wi Pablon junak mina uwejuí agatjame, wi akimaktatjai; ame pujut jukimunum mina diwimjam nuna tumainaitkun. <sup>20</sup> Aajan yatsujuh, iina Apuji nemagbaunum aminiyen pegkejan wainkatan wakegajai, nuniakum mina anentaijuish ichichtugta Cristo nemaju asam.

<sup>21</sup> Junak, dekas umiktatuapi tabaunum kajittsan agatjame, wagki wi segajam nu inagkeasmesh dutikattam nuna dekau asan.

<sup>22</sup> Wi kanagtin minash umigtukta, wagki atum Apajuí aujtugsagmin, atumjai ataktú wainmainnash sujustata dui.

### *Inagnaku kumpamkagtau*

<sup>23</sup> Epafras kumpamjamui, Cristo Jesús nemagbaunum wijai betek achinak egketa nunú,

<sup>24</sup> dutiksag Marcos, Aristarco, Demas, Lucas aatus mina yaintin aina dushakam.

<sup>25</sup> Apu Jesucristo anentag wait anenkagtaujiya nu atumí wakanminish ajutjamtinme.

## Hebreo aents aidau carta agaja awetimu

### *Apajuí niina Uchijin awemauwai*

<sup>1</sup> Apajuik yaunchuk iina muunji batsamajakajua nunak niina etsegtin aajakajua nuwi kuashtá au aujkawa inibiajui ni wajuk ausata tawa dutiksag.

<sup>2</sup> Tujash yamaik, ju tsawan inagnamunum batsatag ju tsawantaik niina Uchijin awetugma dui aujtamui, ashí wají aidauk ni najankamu asamtai ashí niinuk atí tusa idaitusua nuna.

<sup>3</sup> Niiyai Apajuí imanjiya nuna iwaina duka. Nigka Apajuí wajukuíta niishkam imanke. Ni chichame senchigtina dui ashí wají aidauk emetuk awai. Nuigtú iina tudaujinash nijatjamag pegkeg etami nayaimpinum Apajuí ekeemtaijin untsujin ekeemsauwai.

<sup>4</sup> Niiyai nayaimpinmaya aents aina nuna wagagkauk, nigki dekas Apu wagaaku ashí nayaimpinmaya aents aina nuna nagkaesau eme anentsá adaitaiya dushakam.

### *Apajuí Uchijiya nuuwai nayaimpinmaya aents aidau nagkaesauk*

<sup>5</sup> Apajuik makichkish ángel aina nunakesh:

“Amek mina Uchijuitme, wi yamai aentsnum akiinati tima akiinaw asam”,\* tichauwai. Nuigtush nayaimpinmaya aents aidauk:

“Wi niina apají atajai, ni mina uchig atí”,† tichauwai.

<sup>6</sup> Tikichnumshakam jutiksag, niina Uchijí makichkiuchia nuna pachis nugkanum awemak:

“Apajuí angelji aina duka ashí niinak ememattinme, tiuwai” tawai.

<sup>7</sup> Ángel aidau pachisag:

“Apajuik niina angelji aidauk tuke dasega nunin weu ainawai;

tuja takagtuinakush tuke jiiya nunin weu ainawai”,‡ tawai.

<sup>8</sup> Tujash Apajuik niina Uchijin pachisag:

“Apajuiyah, ame ekeemsa inamtaigmek ajumaish tuke atinai pegkeg aina duke takau asam.

<sup>9</sup> Amek pegkeg aina nu aneakum, pegkegchau aina duka dakitjaume.

Nuadui Apajuí, amina Apajuigmea nu etegtama shiig aneemtijamsauwai

kumpajum aina nuna nagkaesau”,§ tiuwai.

<sup>10</sup> Junashkam Uchijin tiuwai:

“Apuh, amek yama nagkamtinish nugka najankum nayaimpishkam najankauwaitme.

<sup>11</sup> Nunú najankamujum aina duka megkaejatnai

jaanch mamujá megkagama numamtuk,

tujash amek tuke pujutnaitme.

<sup>12</sup> Jaanch ninutia numamtuk awajkattame.

Yapajiakmeshkam jaanch yapagmamtayama numamtuk yapajiattame.

Tujash amek imanismek atinaitme, amina pujutjumshakam nagkankashtinai”.\*

<sup>13</sup> Apajuik makichkish ángel aina nunak:

“Ekeemsata mina untsujui, nunikamin wi amina shiwajum aidauk ashí depetukta-jame,

dutikan ikaunmamtai dui ame diisminum”,† tichauwai.

<sup>14</sup> Wagki, ashí ángel aina duka wakan Apajuin takajin ainawai, aents uwemjatin aina nuna yaihtí tusa ishimtai ditak ainawai.

## 2

### *Uwemat pachisa etsegkamu*

<sup>1</sup> Nuadui Cristo chichame antukbauwa duka, puyatjusa shiig aneaku amainaitji, Cristo nemajut tupanjaig tuidau asaja.

<sup>2</sup> Yaunchuk Apajuí niina angelji aina nuwi chicham umiktinun awetim susauwa duka senchigtin aajakui. Nunin asamtai nuna umitsuk tudaun takaidau dutiksaik suwimak suujakbauwai.

<sup>3</sup> Nunin aish, ¿jutiish wajuk Apajuí suwimkajush uwemtumainaita, uwemat dekas imana nu pachitsuk idaikuish? Nu uwemtanak dekatkauk Apu Jesús etsegkauwai, nunikmatai nuna antuku aidau jutiinash dekaske tusag ujjapakajui.

\* 1:5 Sal. 2.7. † 1:5 2 S. 7.14; 1 Cr. 17.13. ‡ 1:7 Sal. 104.4. § 1:9 Sal. 45.6-7. \* 1:12 Sal. 102.25-27. † 1:13 Sal. 110.1.

<sup>4</sup> Nuigtushkam Apajuí nuna shiig dekamtijamata tau asa, niina chichamen etsejuidau-nash yaigkui. Dutikam anentai jegagmainchau, aents dutikmainchau aidaun iwainag takaajakajui. Dutiksag Wakani Pegkejiya nujai ii yupichu dutikatnun ni wakejamua dutiksag makí makichik jutiinak amasajui.

*Cristo ashí apu aina nuna Apuji atinai*

<sup>5</sup> Nugka yamajam atak atin pachisa chichainag nunak, Apajuik ángel aina nunú diísti tusag idaituschauwai.

<sup>6</sup> Jushakam aatus agagbauwai:

¿Wajimpaya aentsush imatika kajimatmainchau anentaimtitnush? nuniachkush ¿wajuku asamtaiya aentsnum akiinaush ijagsatasamesh wakegame?

<sup>7</sup> Ujumak tsawantaik ángel aina nuní imanchauch emaume, tujash ataktú imanuk emam eme anentsá diítai awajsaume;

<sup>8</sup> dutikam ame najankamu aina duka ashí nigki idaitusume.\* Nunú ashí idaitusbau asa makichkish Cristo diyachbauk atsawai, nuninaitak eke ashí ni idaituschamuskaitai tumain wajas awai.

<sup>9</sup> Tujash Jesús ujumak tsawantai ángel aina nuní imanchauch emamuitak, ni waittsa jakamunum eme anentsá diítai wajasua duka wainji. Nunak Apajuí jutiin wait anenjamu asa, ashí aents aidaunum waitus jakati tima nunikui.

<sup>10</sup> Ashí wájí ni najankamu ayá duka niinuk ainawai. Nigka wakegawai ashí niina uchijí aidauk nayaimpinum pujustinme tusa. Nuna dutikata tau asa Apajuí Jesucristunak waittsati tiuwai, ni nunikbaunum ashí niina uchijí aidaunak pegkeg emak uwentikata tau asa.

<sup>11</sup> Wagki ashí aents pegkemtikamu aidauk, nuigtú pegkemtikagtina dushakam ashí Apajuinuk ainawai. Nuadui Jesús Apajuí Uchijiya duka, datsamatsui jutií aidautin pachipas, “mina yatsug ainawai” tujamtanmag.

<sup>12</sup> Nuna pachis agagbaunum chichaak:

“Apawah, amina pachisan yatsug aidaun ujaktajai, dutikakun ditajai ijuntsan kantamkun ememattajame”,<sup>†</sup> tawai.

<sup>13</sup> Junashkam:

“Wika imá Apajuiyaig kajintsan anentaimtatjai”,<sup>‡</sup> ataktushkam:

“Wika juig Apajuí uchijí aidaun sujusua nujai pujajai”,<sup>§</sup> tiuwai.

<sup>14</sup> Aentstí iyashtin numpentin ainag nuninuk wajas Jesuschakam akiinauwai, nunik jaak Iwanch niina senchijin jatanum inamajakua nuna depetkata tau asa.

<sup>15</sup> Nunik agkanmitkakui ashí aents iwanchin inake waig batsamas, jaamun ishamá batsamatman.

<sup>16</sup> Wagki nigka nayaimpinmaya aents aidaun ayamjuktatus minichui, nigka Abraham weantu aina nuna ayamjuktatus miniuwai.

<sup>17</sup> Nunin asa niina yachi aina nuninuk betek wajasui. Nunik ni dekas Sumo Sacerdote wajas Apajuin betek umijak, jutiinash wait anenjamjauwai, ni waitus mantamnamunum Apajuí aents aidau tudaujinash tsagkujati tau asa.

<sup>18</sup> Niishkam Iwanch pegkegchau takamtiksatas dekapeam asau asa, Iwanch deka-peam waituidaunak senchigtina ibau asa yaigtatui.

### 3

*Cristuk Moisesan nagkaesauwai*

<sup>1</sup> Nuadui yatsug aidauh, atum Apajuí mina aentsug pegkejam atinme tusa etejamu aidautigmek, Cristo Jesús Apajuí etegkamu, sumo sacerdoteya duke puyatjusjum anentaimtitajum. See tajai jutiishkam nigki dekaskeapi tuidau asaja ni pachisa etsegtuinag duí.

<sup>2</sup> Jesusak Apajuí takastá tibaunak imatiksag betek umikui, Moiseschakam antsag Apajuí tibaunak jega Apajuí ememattainum ashí betek umijakui.\*

<sup>3</sup> Nuadui Moisesa nagkaesau eme anentsá diimaina duka Jesusai, jega jegamkamuk eme anentsá diístuk, aents jegan jegamkauwa nu eme anentaíya numamtuk.

<sup>4</sup> Ashí jega aina nunak aents jegamainawai, antsag ashí wájí aina dushakam Apajuí najankamu ainawai.

<sup>5</sup> Moisesak Apajuí inake asa ashí Apajuí jeega nuig betek imatiksag takasui. Tuja ni takasua nunak Apajuí atak titina nuna iwainaktatus dutikauwai.

\* 2:8 Sal. 8.4-6. † 2:12 Sal. 22.22. ‡ 2:13 Is. 8.17. § 2:13 Is. 8.18. \* 3:2 Nm. 12.7.

<sup>6</sup> Untsu Cristuk Apajuí Uchijí betek umina ibau asa, jutii Apajuí jee ainag nuwi pujus yaimpaji. Jutii uwemjatnapitja tusa wakesa dakainag nuig ebetmamja pujuinakuik niina aentsji ainaji.

*Apajuí chichamen antugkachaju aina nu pachisa tibau*

<sup>7</sup> Nuadui Wakani Pegkeji tibau agagbaunum tawa ju:

“Yamai Apajuí tabau antakjumek,

<sup>8</sup> anentaimin utujimka juwakaigpajum.

Aents intimkiu aidau Apajuin uwegshunum dekapsajua numamtukek.

<sup>9</sup> Atumi muunjum aajakajua nunú dekapjusajui, wi ditan cuarenta mijadai yaigkan iniibaun wainainayatak.

<sup>10</sup> Nuninakui nunú weantu aidaunak kajegkan: ‘Ditak wainak anentaimainawai, nunidau asag wi taja nu dekatnash dakituinawai’.

<sup>11</sup> Nunidau asagmatai ditan senchi kajegkan chicham yapajimainchauwai:

‘Ditak wi ayamsatajum tusan nugkan anagkuauwaitag nuig wayachagtatui’, tijai”.<sup>†</sup>

<sup>12</sup> Yatsug aidauh, kuitamamkatajum, atum ainajum anuiyatijum pegkegchau anentaibau ajutjamsantai utujimsajum anentaimkujum, Apajuí tuke pujuuwa nunú tupanjajum.

<sup>13</sup> Duka nunitsuk kashí kashinig makí makichik pempeentunikjum anentai ichichtunigtajum, “yamai”, tibauwa nu tsawan eke au asantai. Atum ainajum anuiya tudau takainak Apajuí tupanjag antakchau waigkainum.

<sup>14</sup> Wagki Cristuwai pegkeg jukimu ajutjamaina duka, yama nagkamchaku niini kajijsá anentaimajakuitag nunitsaik nagkanbaunmash jagainakuik nunisag ajutjamtainai.

<sup>15</sup> Agagbauwa nuwi chichaak:

“Yamai Apajuí tabau antakjumek, anentaimin utujimka juwakaigpajum duik intimjukiaju aina nunisjumek”,<sup>‡</sup> tawai.

<sup>16</sup> ¿Ya Apajuí chichaamun antukaju ainayatkush intimjukiaju ainawa? Duka ashí aents Egipto batsatun Moisés jiijá agkanmitkakua nunú nunikajui.

<sup>17</sup> ¿Ya aidauna Apajuish cuarenta mijadaish kajegkash pujusuita? Nunak aents tudau takasaju uwegshunum jinawajua nuna dutikawajui.

<sup>18</sup> ¿Ya aidauna Apajuish chicham yapajimainchauwaish: Wi ayamsatajum taja nuig wayashtatjume, tiuwaita? Nunak aents chichaman intimkiajua nuna tiuwai.<sup>§</sup>

<sup>19</sup> Dita wayachajua nunak Apajuin dekaskeapi tuinachu asag nunikajua duka wainawai.

## 4

<sup>1</sup> Nuadui Apajuí ishamsa diimainaitji, minai wayajum ayamsatajum tusa anagtamam eke ajutjama dui, atum ainajum anuiyatigmekesh waimainchaunum juwakaig tabaunum.

<sup>2</sup> Jutii aidautish yamajam chicham etsegbau antukuitji, dita antukajua nunitsaik. Tujash ditak antuinakush wainkaya nunin diisajui, wagki Apajuuiyai dekaskeapi tuidau chichaman umikajua nunikchaju asag.

<sup>3</sup> Tujash jutii Apajuuiyai dekaskeapi tuidautik, Apajuí ayamsatajum tibauwa nuwi wayawagtinaitji. Nuna pachis Apajuí chichaak:

“Nunidau asantai ditan kajegkan chicham yapajimainchauwai, ditak wi ayamsatajum tiuwaitag nuig wayachagtatui tijai”,<sup>\*</sup> tawai.

Nunak Apajuik niina takatjinak yama nagkamas nugkan najanauwa duik inagnakuitak tiuwai.

<sup>4</sup> Tikich yantamnum agagbauwa nuwi, siete tsawanta nuna pachis:

“Apajuik ashí ni takamainjinak ashimak siete tsawanta jui ayamjauwai”,<sup>†</sup> tawai.

<sup>5</sup> Tuja agagbaunum awaksag chichaak: “Ditak wi ayamsatajum tiuwaitag nuig wayachagtatui tijai”,<sup>‡</sup> tawai.

<sup>6</sup> Tujash nunú ayamnagtina nuwi eke wayachush ainawai, nagkamchak Apajuí uwentik- agtugta tabaun chichaman antuku aidauk uwemjachajui ditá chicham umishtin.

<sup>7</sup> Nunikagmatai Apajuí ataktú makichik tsawantan mamikiae, “Yamaiya juna”. Yaunchuk nagkamas au aujtamkawa minimú ai pujus, David agagbau timag nuna awaksag chichaak:

“Yamai Apajuí tabau antakjumek, anentaiminig utujimkajum juwakaigpajum”,<sup>§</sup> tawa nu.

<sup>†</sup> 3:11 Sal. 95.7-11. <sup>‡</sup> 3:15 Sal. 95.7-8. <sup>§</sup> 3:18 Nm. 14.1-35. <sup>\*</sup> 4:3 Sal. 95.11. <sup>†</sup> 4:4 Gn. 2.2. <sup>‡</sup> 4:5 Sal. 95.11. <sup>§</sup> 4:7 Sal. 95.7-8.

<sup>8</sup> Wagki Josué Israel aents aidaun Apajuí ayamsatnume tiuwa nuna susau ataik,\* Apajuik tikich tsawannak mamikiachiu amainai.

<sup>9</sup> Nunin asamtai makichik tsawan shiig pegkeg juwawai, Apajuí nemajin aidau ayamjatna nu.

<sup>10</sup> Nuadui Apajuí ayamtan sukagta nuwi wayauk, ditá takataijinak idaiyinak ayamjaje, Apajuí ni takas ayamjauwa nunisag.†

<sup>11</sup> Duwi kakanmaminaitji dekas ayamtainum wayatasaja, makichikitgimesh chichaman intimkiu wajukawajua numamtuk wajakaig tabaunum.

<sup>12</sup> Apajuí chichamega duka senchigtinai pujutnash sukagtinai, nuigtush espada mai yantamejai etsakamua nuna nagkaesauwai. Iman asa wakannumash, anentaimat aina nunash anentainum shiig wayá pegkeg aunash, pegkegchau aunashkam dekamtijamji.

<sup>13</sup> Apajuí najanamu aina nuiyag niina uumjumainuk makichkish atsawai. Apajuí eemting ashí waji aina duka shiig paan ainawai, nunin asamtai Apajuí eemting ashí ii takasbauji tumamtinaitji.

### *Jesuai Sumo Sacerdote*

<sup>14</sup> Jesús Apajuí Uchijiya nuuwai, jutii Sumo sacerdoteji dekas iman nayaimpinum wayauwa duka. Nuadui niini dekaskeapi tuidautik ebetmamja nunisaik pujumainaitji.

<sup>15</sup> Wagki jutii Sumo sacerdotejiya nu, ii kakaakchau wegajinish wait anenjamainai. Nigka jutiijai betek pegkegchau takamtiksataasa dekapeam asauwai, tujash nigka makichkish tudaunak takaschauwai.

<sup>16</sup> Nuadui Apajuí anejatin ekeemtaijin eketa nunú kajintsá adijka ausagmi. Ni jutiiinak wait anenjamag ashí ii atsumamunmash yaimpatkatu.

## 5

<sup>1</sup> Ashí sumo sacerdote aina duka, aents aina nuiya etegka adaikamu aajakui, Apajuí eemtin ni anentag kuntin itaamun maa aentsun tudaujin segattí tusa.

<sup>2</sup> Tujash sumo sacerdotek nigkishkam pegkegchaun takamain asa, aents Apajuí umigtan shiig dekachu asag, wainak pegkegchaunum yujaidaunash wait anentus yaigtí,

<sup>3</sup> dutikakush niina tudaujiná tsagkugnagtatus kuntinun maa apeati, dutika dui aents aidau tudaujin tsagkugnagti tusa kuntinun maa apeati tibau aajakui.\*

<sup>4</sup> Jujú takat ajantusa diimaina junak makichik aentskesh nigki nagkamig takamaitsui. Junak Apajuí Aarogkan† etegkauwa dutiksag etegkamu aina nu takamain ainawai.

<sup>5</sup> Nunisag Cristushkam nigki wi sumo sacerdote atajai tusag naamkachui. Nunak Apajuí eme anentai awajsauwai, dutikak nigki:

“Amek mina Uchijuitme, wi yamai aentsnum akiinati tima akiinau asam”,‡ tiuwai.

<sup>6</sup> Nuigtushkam tikich agagbaunmashkam tawai:

“Ametme sacerdote dekas tuke atinmek, Melquisedec§ aajakua nujai betek”.

<sup>7</sup> Cristo ju nugka jui pujusua nuaduik, shiig senchi untsamak buutak negá negajai Apajuin segauwai. Ni jamaina nunak Apajuí senchigtina ibau asa agkanmitkajuati tusa. Nunitai Apajuik ni umigbau asa ayatak antugkauwai.

<sup>8</sup> Cristuk Apajuí Uchijiyaitak, waitiamunum Apajuí wakegamu umigtanak unuimajui.

<sup>9</sup> Ni juna imatikas betek umikú asa, uwemat tuke atina nuna sukagtin wajasui ashí niina umijuina nuna.

<sup>10</sup> Tuja Apajuí niinak sumo sacerdote atí tusa adaikauwai, Melquisedec aajakua nujai betek.

### *Cristo nemajut idaisajum tusa ujaniamu*

<sup>11</sup> Jujú pachisa tumainuk kuashat ajutjamji, tujash juní tawai tusaik shiig tumaitsui, atumek wamak antumainchau asagmin.

<sup>12</sup> Atumek Cristo nemagkajum dukap tsawan pujau asajum, jintinkagtin amainaitkujum, ataktú awagkijum Apajuinun shiig jintias dekas yupichuchin jintinjamatnume tusa atsumagme. Nuniau asajum uchi yamá akiintsau yutai katsugman yumainchau asa, muntsunak muntsuwama nunin ainagme.

<sup>13</sup> Ashí uchi muntsun muntsuaku aina duka, chicham pegkeg aidaunak jintiag chichaakuk amaitsui, wagki uchi asa.

<sup>14</sup> Tujash pegkeg takaamua nuna, pegkegchau takaamua nujai akanag dekatan unuimatjau aina nuuwai, muun yutai katsugman yuwina numamtin aidauk.

\* 4:8 Dto. 31.7; Jos. 22.4. † 4:10 Gn. 2.2. \* 5:3 Lv. 9.7. † 5:4 Ex. 28.1. ‡ 5:5 Sal. 2.7. § 5:6 Sal. 110.4.

## 6

<sup>1</sup> Nuadui nagkamchaku Cristo pachisa jintiamu aajakua duka ukuaku, nuni nagkaemas dekamain ainaji. Nunidau asaja pujut yapajita nu pachisa, tudau takaamu jatanum ejekagta nu idaiyat, Apajuiyai dekaskeapi tabauwa nu ataktú awagki dekaatasaik batsamtumaitsui.

<sup>2</sup> Yamimat pachisa jintinkagtau, Jesusa nemajuidau buuknum achiká Apajui segatut, jakau aidau nantajagtin, nuigtú Apajui suwimak tuke atinun sukagtustina nu pachisa dekaatasaishkam batsamtumaitsui.

<sup>3</sup> Ju pachisaishkam jintintuattajime Apajuish dutikati tujamkuig.

<sup>4</sup> Wagki Apajui chichame anenjauch sukagtusbauwa nuna dekaawaju ainayatak nuigtú Wakani Pegkejinash jukiu aidau,

<sup>5</sup> nuigtushkam Apajui chichame shiig pegkeja nunash wakejus antuku, tuja Apajui niina senchijin ju nugka jui inamjatna nunash shiig dekaawaitak,

<sup>6</sup> Apajui dekaskeapi tutan idaiyas, ataktú ni pegkegchau takaajakbaujinak waketjuki takaak, Cristo shiwagmaina duka, kakajus ataktú pujutinak yapajimaitsui. Wagki dita nuna nuninak, dita dekas Apajui Uchijin achijagmatai, tikich aidau Cristun dushikis chichagmaina numamtuk wajaidau asagmatai.

<sup>7</sup> Yumi yutug nugkan uchupjamtaig ajak tsapakug pegkejan nejeawai, nunikmatai juwaa duka Apajui yainken juwawai.

<sup>8</sup> Untsu ayatak jagkik ajanum tsapataik takatsuk idaiyin ainawai tikich tsawantin apea ajapatin asa.

<sup>9</sup> Tujash aneetaig aidauh, nu aaja takuiskam, atumek aents megkaemainai taji nuninuk ainatsjume. Wika atumnak shiig dekagjime, dekas pegkeg atum uwemjamujum ajutjamaina nunak.

<sup>10</sup> Apajuik pegkegchaunak takachua ibau asa, atum ni aneau asajum, emematts takagkujum, Apajui aentsji pegkejam aidaush yaigkuitjum nuna nuigtú yamaikish yaimainajum nunash kajimatkishtina.

<sup>11</sup> Nuadui maki makichik aidautijum wakesajum takaajum nunak, dutiksag emainak jegantinme tusa wakegaji atum dakainajum nuwi, nuniau asajum duka imatiksagmek jukitin ainagme.

<sup>12</sup> Duwi daki batsamtutsuk, Cristui dekaskeapi tabauwai emamkemas pujuinak, Apajui anagkagtuamua nuna jukitin aina nunisjumek pujustajum.

*Apajuik ni anagkagtuamujinak yapajichui*

<sup>13</sup> Apajui Abrahaman anagkuaowa nunak, niina nagkaesau adaisa tumain atsau asamtai, Apajui nigki adaimamas, chichajak:

<sup>14</sup> "Dekaskenum kuashat yaigatjame, dutikakun ame weantu aidaunak shiig kuashat uyujkatnaitjai", tiuwai.

<sup>15</sup> Tima Abraham emamkemas dakasu asa, Apajui niina anagkuaowa nunak imatiksag jukiuwai.

<sup>16</sup> Aents ni dutikatnugin anagdayinakug, ditá nagkaesauwa nuna adaisag anagdayin ainawai. Nunú iman antamunum tiu asag dekaskenmap dutikattawa tusag ukú ainawai.

<sup>17</sup> Nuadui Apajui anagkagtuamujin jukitin aina nuna shiig iwaintuktatus wakekauwai, ni anagkagtuamua nunak makichkish yapajitsuk imatiksag umiktin asa, nigki adaimamas dekas umiktatjai tiuwa nuna.

<sup>18</sup> Nu jimajan tiuwa nunak yapajimainchau asamtai Apajuik waitjuchua dui, dekas dutikattawapi tau asaja, shiig senchi ichichmmainaji Apajui ayamjutpasmatai kajinmasa ni anagkagtuamua nu jukittajapi tusa dakaidau asaja.

<sup>19</sup> Nunú dakamua nuuwai ii Apajuiyai kajinmasa anentaibaunum iina wakanin ichichtamuk, jiju ancla lanchan buchifmainchau ema ebetama numamtuk. Nu dakamua dui jega Apajui ememattainum jaanch ejaamu aajakua nu nagkaiki wayau ainaji.

<sup>20</sup> Jesús eemak wayauwa nunak, jutii wayatnun jintan ujatjamatus nuniku. Nuniau asa niyai sumo sacerdote tuke atin Melquisedec aajakua nujai betek.

## 7

*Jesusak sacerdote Melquisedecjai betekai*

<sup>1</sup> Melquisedecak yaakat Salemnumia rey, Apajui nayaimpinmayaya nuna sacerdotaji aajakui. Nuniau asa Abraham apu aidaujai maania depetmak wakettatman, Melquisedec jiintuki igkug pegkegnum yumigsauwai.

<sup>2</sup> Dutikam Abrahamak ashí ni maania depetka jukimujiya nuiyan diezmon susauwai. Melquisedec tawa nunak: "Rey pegkejan takau" taku tawai, nuigtú yaakat Salema Apuji aajakui tawa nunashkam: "Shiig agkan pujutan apuji" taku tawai.

<sup>3</sup> Melquisedecapajig, dukujish, ni weganbaujish, akiinamujish, jakamujishkam dekajuachbauwai, duka Apajuí Uchiji tuke sacerdotek pujutna numamtinuk aajakui.

<sup>4</sup> Anentaimtusjum diistajum, Melquisedec dekas iman aajakua nu. Iman asamtai Abrahamak apu aidaujai maania depetmaka, waji yajuakbaujin diezmo susauwai.

<sup>5</sup> Moisés chicham umiktajum tibauwa nuig, sacerdoté Leví weantu aidauinak ditá yachi aina nunú diezmo susati tibau aajakui, ditashkam Abraham weantu ainayatak.

<sup>6</sup> Tujash Melquisedecak Leví weantuchuitak, Abraham Apajuí anagkuamun juki-uwa nunú, diezmo suwamash jukiuwai. Dutikam Melquisedecshakam pegkegnum yumigsauwai.

<sup>7</sup> Juka ashí dekanaji, pegkegnum yumigkagtina duka, pegkegnum yumigsamua nuna nagkaesauwa nunú.

<sup>8</sup> Yamai jutii diezmo suwinag duka aents jinin aina nu suwinaji. Tujash Apajuí chichamen agagbauwa nuig, Melquisedec eke iwaaku pujauwa nuninun etsegtawai.

<sup>9</sup> Nunin asamtai Abraham Melquisedecan diezmon susauwa dui, sacerdoté Leví weantu aidauishkam diezmon ditashkam susajua nuninai.

<sup>10</sup> Melquisedec Abrahaman igkugtatus juintukiwa nuaduik Leví weantu eke akiinachu ainayatkush, Abragkai akiinkagtin asag, ditashkam nuig batsatua nunin aajakajui.

*Aarón weantu takasbauwa duka pegkejak etamchauwai*

<sup>11</sup> Israel aidau chicham umiktin susamua duka Leví weantu sacerdoté aina nu susamu aajakui aents aidau yaigtinme tusa. Tuja nunú sacerdoté aajakaju aina nu aentsun Apajuí eemtin pegkeg emamain agtaik, tikich sacerdotek atsumnamainchau aajakui, nuadui atsumnajui tikich sacerdoté Melquisedec aajakua ibauk Aarón weantua nuyichu.

<sup>12</sup> Wagki sacerdoté takataijiya duka yapajiamu asamtai, chicham umiktinnum tawa dushakam yapajiamu amainai.

<sup>13</sup> Tuja agagbaunum iina Apuji Jesucristun pachis tawa duka, tikich Israela uchiji aina nuiya aajakui tawai. Nuiyag makichkish altarnum takasti tusaik makichkish tichamu aajakui.

<sup>14</sup> Shiig dekanui, iina Apuji Jesusak Judá weantu aajakui, Moisesak sacerdoté aidau takastinjin tiuwa nunak Judá weantunmaya takamainnak makichkish tichauwai.

<sup>15</sup> Juka shiig paantai, makichik sacerdoté yamajam wantinka duka Melquisedec aajakua imana nu.

<sup>16</sup> Chicham umiktinnum Leví weantu aina duke takastin atinme tibauwa nuyichui, nigka sacerdoté senchigtin ajumaish wajukashtin tuke pujuwa nuuwai.

<sup>17</sup> Niina pachis Apajuí etsegtak: “Ametme sacerdoté tuke pujutnumek, Melquisedec aajakua nujai betek”, tiuwai.

<sup>18</sup> Nuadui yaunchuk umiktin aajakua duka idaisamui, aents aidauinak yaimainchau asamtai.

<sup>19</sup> Moisés chicham umiktajum tibauwa duka makichkish aentsnak pegkeg emachui, nunikmatai tikich nuna nagkaesau dekas pegkeg dakamu ajutjamui, nuadui Apajuyiaig jagainaji.

*Cristo dutikamua nuuwai tikich sacerdoté takasajua nuna nagkaesauk*

<sup>20</sup> Apajuik ni dutikatjai tibauwa nunak chicham yapajimainchauwai, tiuwai. Tikich sacerdoté aidauk imatika chichagkaik adaikachbau ainawai.

<sup>21</sup> Tujash Cristuk chicham yapajimainchauwai chichagká tibauwa nunú agagbaunum tawai:

“Apu Apajuí nigki adaimas, mina chichamjunak yapajiashtatjai, ametme sacerdoté tuke pujutnumek”, tiuwai.

<sup>22</sup> Nu aatus asamtai Jesús chicham apakbauwa nuuwai nagkamchaku chicham apakbau aajakua nuna nagkaesau dekas pegkeja duka.

<sup>23</sup> Tikich sacerdoté aidauk kuashat aajakajui tuke pujuchu asag.

<sup>24</sup> Tujash Jesusak tuke jakashtin asa, tikichnakesh ni takaa nunak inagkeatkishtinai.

<sup>25</sup> Nuadui niyai tuke atinun uwertikagtumainuk, jutii niini yunumka Apajuyiaish jējajinig. Nigka tuke pujuuwa ibau asa Apajuin segatjamui.

<sup>26</sup> Nunin asa dekas sumo sacerdoté ii atsumajakuitag duka Jesusai. Nigka pegkegmai, pegkegchaunash antiakchau, tudaugtin aidaujaish ijutkachu, iman asamtai Apajuí niinak dekas nayaimpia nuna yakiin apusauwai.

<sup>27</sup> Nigka tikich sumo sacerdoté aidau kashi kashinig kuntinun maa apeak, dekatkauk niina tudaujiná tsagkugnag, dui tikich aents aidau tsagkugnagtinjin apejakua nunin-chauwai. Jesusak makichkia mantamdauwai ajumaish tuke jakashtinun, nigki tsagkamankauwai.

<sup>28</sup> Moisés chicham umiktinun agajua nuiyan diisag sumo sacerdote atinun adayajakajua duka, aents kakaakchau aajakajui. Chicham umiktina nu nagkaemakui ai, Apajui chicham yapajimainchauwai, niina Uchijin sumo sacerdote atí, tusa adaikamua nuuwai dekas tuke pegkejak atinuk.

## 8

*Iina sacerdoteji Cristo nayaimpinum pujawai*

<sup>1</sup> Wi dekas imanun titasan tajim duka juuwai: Jutii sumo sacerdotejig, Jesús nayaimpinum Apajui ekeemtaiji utsujin eketa nuuwai.

<sup>2</sup> Nigka dekas jega pegkegmanum pujus sacerdotejai betek takaawai Apu Apajui umikbauwa nuwi, duka aents takaschamui.

<sup>3</sup> Ashí sumo sacerdote aajakajua duka, Apajuinu anentag itaamun maa apeati tusa adaikamu ainawai. Nunisag Jesuschakam jutii tudaujin mantamnak niina iyashinak Apajuin anentag susauwai.

<sup>4</sup> Nigka ju nugka jui pujakush sacerdotek amaitsui, juig kuashat sacerdote ayau asantai. Nunin asag chicham umiktinnum Apajui anentag susatajum tibauwa dutiksag takaidau asagmatai.

<sup>5</sup> Tujash juiya sacerdote aina duka, nayaimpinmaya waji aina nunú ayatak dakumká najanamunum wayawag takainawai. Dutiksag Moisesnash chichajak: "Ame mujanum pujamin jega Apajui ememattain iwaintukbaijam nuna niimejai betekuch najanata", tiuwai.

<sup>6</sup> Untsu jutii sumo sacerdoteji takasbauwa nu imá pegkejai. Nunin asa ni Apajui aents aidaujai chicham apakbauwa duka shiig pegkejai, nuigtush dekas pegkeg aidau anagtamauwa dui.

<sup>7</sup> Nagkamchaku chicham apakbauwa nu pegkeg aajakú ataik, ataktú chicham apakmi tabauk atsusú amainai.

<sup>8</sup> Tujash Apajuik nunú aents aidaujak pegkejak diischauwai, nuniku asa chichajak: "Apu tawai: Tsawan jegatnai, Israel aents aidaujai, Judá weantu aidaujai ataktú chichaman apaktinaitag nunú.

<sup>9</sup> Duka wi ditá muunji aidauin Egipto nugka batsatun jiijan, ditajai chichaman apakuitag nuna umikchagmatai idaisauwaitag nuninuk achattawai, tawai Apu Apajui.

<sup>10</sup> Nunú tsawan atina dui, wi Israel aidaujai chichaman apaktatjai, tawai Apu Apajui. Wi ditá anentaimtajin chicham umiktinnak egketjagatjai, dutikakun ditá anentainish agatjagatjai. Wi ditá Apajuiji atajjai, untsu dita mina aentsug agatui.

<sup>11</sup> Dutikamu asajum atum ijutkamukesh, yatsumkesh Apajui dekaati tusagmek jintintu-ashtin ainagme.

Wagki ashí piipich, ashí muun aidau nagkamas shiig dekajuawagtin ainawai.

<sup>12</sup> Wika dita pegkegchaun takaina nunak wait anenjan tsagkuujan, tudauji aidounash ajumaish adeagchatnun kajimatkitnaitjai", tawai.

<sup>13</sup> Apajui yamajam chicham apakbaun pachis tawa nunak, nagkamku chicham apakbauwa duka muuntuch wajasú asantai tawai, muuntuch wajasú asantai atsumnatsu duka megkaekatin asa nuniawai.

## 9

*Jega Apajui ememattai nugkanmaya nayaimpinmayajai pachisa tibau*

<sup>1</sup> Yamai dekaami, nagkamku chicham apakbau aajakua nuig, ju nugka jui jega Apajui ememattai pegkejam jegamkamu aajakua nuwish, Apajuish wajuk emematmainaita nu pachisa tibau aajakui.

<sup>2</sup> Nunú jegak juní umikbau aajakui: Dekatkau tesamua nunak "Pegkejam" tuujakajui, nuanuig candelabro\* jii ekeemaja pekatai, pag Apajui anagkuamu, mesanum patagbau aajakui. <sup>3</sup> Jaanch ejaamua nuna ukuujin tesamu aajakua nunak, "Shiig Pegkejam" tuujakajui.

<sup>4</sup> Nuanuig altar kugkuin incienso patai apetai ayatak orok najanamua aajakui, nuigtú kajun arca Apajuijai chicham apakbau ayatak orok epekbau aajakua nunú. Nunú arcaya nuna initken egkemajakui Aarogka ushujutaiji jeekú aajakua nu, chicham umiktin kayanum agagbauwa dushakam, nuigtú makichik ichinkauach ayatak orok najanamunum maná chimpianu aajakua dushakam. <sup>5</sup> Nunú kajun arcaya nuna awanken jimag aents nanamtin nayaimpinmaya dakumkamu, Apajui nuwi pujamujiya

\* 9:2 "Candelabro" tachakuish candelero tumainai. Nunak jii ekeemaja pekatain tawai.



nuna iwainajakajui. Nunú aidauk ditá nanapen kajun arca tutaiya nuna dukukag aajakajui. Tujash juna pachisnuk imatikanuk shiijak tichattajai.

<sup>6</sup> Ashí ju imatika umikbaunum sacerdote aidauk, kashí kashinig dekatkau tesamu Pegkejam tutainum wajajakajui, dita takastí tibauwa nuna umiktatus.

<sup>7</sup> Tujash nuna ukuujin tesamu shiig pegkejam tutaiya nuig, imá sumo sacerdotek makichik mijantin makichkia wajakui, kuntinun numpen takus. Nunik nunú numpa nuna Apajuin anagkuak, dekatkauk niina tudaujin tsagkugnagtatus segatmami, dui tikich aentsú tudaujinash segatujakui.

<sup>8</sup> Nuna Wakani Pegkeji shiig dekamtijamui. Dekatkau tesamunum sacerdote takainaigkish, tikich ukuunum tesamu Shiig Pegkejam tuujakbauwa nuig, tikich aents wayati tusaik tichamu aajakui.

<sup>9</sup> Ashí nuna dutikajakajua nunak, yamai tsawanta jui nuniktinun iwainak dutikawajui. Nuniau asag nunú jeganum batsamsag, kuntin Apajuí anentag anagkuamun maa apeanak Apajuin emematuinakush, dita anentaimtajinig agkantak anentaimajakchajui.

<sup>10</sup> Nu jeganum batsamas chicham umiktajum tibaun umiinak, ayatak yutai aidau, umutai aina nuna, Apajuí ememattasag yumin ikigmajakajua nujai takasajui. Ashí nunú aidaunak Apajuí eke yapajiachu asantai dutikajakajui.

*Jesucristo waitus mantamnamua nuuwai jutiin bakumamainchau etamuk*

<sup>11</sup> Tujash Cristo jui tauwa nuuwai yamaik sumo sacerdote, pegkeg aidau tuke atinun sukagtinuk. Ni sacerdotejai betekak jega pegkegmanum wayá takaa nuuwai dekas imá pegkejak. Duka aents aidau jeganakchbauwai, nunin asa ju nugka juiyachui.

<sup>12</sup> Cristuk chivo aidau, toro tsakat aina nuna numpeenakesh jukig wayachui. Nigka niina numpeenak juki Apajuí pujutai dekas shiig pegkegma nuwi makichkia wayauwai tuke atinun, nuniak jutiinash agkanmitkagbauwai tuke atinun.

<sup>13</sup> Duka dekaske; toro aidau, chivo aina nuna numpen jukiag, nuigtú baka tsakat altarnum apeamu yukuujuin jukiag, aentsú yukujakú ainawai pegkegchau iyashin ajamun pegkeeti nunik tsuwatchau wajastí tabaunum. Tujash nunak awankak dutikajakú ainawai.

<sup>14</sup> Aan nagkaemas Cristo numpega duka senchigtinai, nigka Wakan tuke pujuuwa nunú yayasam Apajuí eemtinish makichkish tsuwatji atsugbau nigki tsagkamanak mantamna numpen ukajua dui iina anentain pegkegchau takaaku jatanum jeganama nunash nijatjamjauwai, Apajuí iwaaku puja nunak umigkatnume tujamu asa.

*Cristo yamajam chichaman apakui*

<sup>15</sup> Cristuwa nuuwai yamajam chichaman apakua duka, wagki ni untsukbau aidau tuke atinun Apajuí anagkagtuauwa nunash jukitnume tujamu asa, Cristuk nagkamchaku chicham apakbau aajakua nuwi batsamas tudau takasbau aidaujin agkanmitkata tau asa jakauwai.

<sup>16</sup> Aents wi jakamtaig mina wajiignak, nu aents jukitin atí tusa papinum agaja umikbauwa duka, nuna umikua nu dekas jakamtaí senchigtin wemainai.

<sup>17</sup> Aaja chicham umikbau aig, nuna umikú iwaaku pujaigkik nu chichama duka wainkayai. Untsu papinum agag umikua nu jakamtaí, nu aents jukitin atí tibaujiya duka uminnai.

<sup>18</sup> Nunisag Apajuí yamá nagkamchak chicham apakbau aajakua dusha, numpajaichuk dutikachbau aajakui.

<sup>19</sup> Dutika chicham umiktina nuna ashí aents aidaun Moisés ujaká, nuadui toro tsakat maamu aidau numpen, chivo numpe aidaun yumijai pachimag, uwijá uje kapantaku emamun jukiag numí hisopo kanawen jigkawag, numpanum uchupig, chicham umiktin agagbaun pegashmatug uchupik, aents aidaunashkam dutiksag dutikauwai.

<sup>20</sup> Dutika chichajak: "Ju numpa juka Apajuí atumjai chichaman apaa nuuwai", tiuwai.

<sup>21</sup> Nuigtushkam Apajuí ememattai carpa jeganamua nuna numpen pegashmatug, dekatkau tesamu Pegkejam tutainum takatai aina nunashkam dutiksag pegashmatjauwai.

<sup>22</sup> Chicham umiktina nuig, numpajai ashí pegkeemtikmaina iman tibau aajakui. Numpajaichuk tudauk tsagkugnainchau asamtai.

*Cristo mantamnamua dui tsagkugnainchau awai*

<sup>23</sup> Aatus atumnajui nayaimpinmaya waji aidau dakumjá najankamu aina nu pegkeemtikata tabaunum. Tujash nayaimpinmaya waji aina duka, kuntin maamu numpen nagkaesau dekas pegkejan atsumawai.

<sup>24</sup> Cristuk juga tesamu Shiig Pegkejam tabaun aents umikajua nuig wayachui, duka dekas nayaimpinum awa nu dakumká najanamua aajakui. Nigka dekas nayaimpinum wayauwai. Yamaik awi Apajuijai pujus, jutiin Apajuin aujtugmaji yaimpakti tusa.

<sup>25</sup> Nigka wayachui kuashtá maam atasag, sumo sacerdote aidau makí makichik mijantin Apajuí ememattai pegkegma nuwi tikichi numpen takus waijakua nunikag.

<sup>26</sup> Ju aatus ataik yama nagkamchaku nugka najanamua dui nagkamnas mantamná pujumainai, tujash yamaik tsawan nagkanbau jegau asamtai Jesusak tauwai. Nunik tudaun depetkatatus ajumaish jakashtinun makichkia mantamdauwai.

<sup>27</sup> Tuja nunisag aents aidaushkam makichkia jakati tibau ainawai, nunik dui nagkaemamainai Apajuiyai dekgammatatus.

<sup>28</sup> Nunisag Cristushkam kuashtat aents aidau tudauijn utsankatatus makichkia jakauwai, tuja ataktú minitta duik tudaunak pachikchattawai, niina dakak batsatun uwentikatatus minau asa.

## 10

*Yaunchuk chicham umiktin aajakua duka aentsnak yaigchawai*

<sup>1</sup> Chicham umiktin Moisés agagbauwa duka Apajuí pegkeg aidau amastina nuna iwainajakui; tujash duka dekaskesh wajukuita nu aajakchawai, nunin asa makichkish aentsnak pegkegak emamainchau aajakui, Apajuin adjikatasag makí makichik mijantin kuntinun maawag apejakú aina nunak dutikainakush.

<sup>2</sup> Chicham umiktina nu dekaskenum tudaun nijag pegkeg emamu ainakug, nuwi takaina duka kuntin mautnak idaisag nuigtuk tudaunumak bakumamainchau anentaimain ainawai.

<sup>3</sup> Tujash nunú kuntin maamua duka ayatak ashí mijantin ditá tudauijnak anemtikajakui.

<sup>4</sup> Wagki toro numpe, chivo numpe aina duka aentsú tudauijnak jujumainchau asamtai.

<sup>5</sup> Nuadui Cristo nugká taatin asa Apajuin tiuwai:

“Kuntin maamu, tuja anentag itaamush dakitame.

Nuniau asam minak aentsú iyashijai betek etiume.

<sup>6</sup> Kuntin maa apeamu, nuigtú tudau tsagkugnagtasa anentag itaamu aidaushkam dakitame.

<sup>7</sup> Nuniau asamin wi amina chichagkun:

‘Apajuiyah, mina pachitus papinum agajajua nuna, ame wakegamu umiktasan jui pujajai’, tibaijame”.

<sup>8</sup> Nuna nagkamas takug: “Apajuik kuntin maamu, anentag itaamu, tudau tsagkugnagtasa kuntin maa apeamu aina nunak dakitawai, shiig awagmatsui tawai. Chicham umiktina nuwi dutikatajum tibauwa nunin aigkish”.

<sup>9</sup> Ataktú takushkam: “Wi, ame wakegam nuna umiktasan minajai” tiuwai. Nunak yaunchuk kuntin maajakbauwa duka emegkakum, yamagmauchia nu apusata taku tiuwai.

<sup>10</sup> Nuadui jutiinak Apajuí pegkemtijabaijai, Jesucristo Apajuí wakegamun umiak makichkia mantamna ajumaish jakashtinun nunikua dui.

<sup>11</sup> Ashí sacerdote aidauk kuntin maa apeamua nunak kashí kashinig dita dutikaitijnak dutiksag takaajakú ainawai, tudaunash makichkish utsanjamainchau aig.

<sup>12</sup> Tujash Jesucristuk tudau aidauun tsagkamankauwai, nunik tuke atinun makichkia mantamna Apajuí utsujin ekeemsauwai. <sup>13</sup> Nuwi yamaik dakak pujawai, “ni shiwaji aidauak ashí niinig Apajuí depetuk ikaunmakti” tusa.

<sup>14</sup> Nuna niina iyashin anentag Apajuin susauwa dui, midau atí tibau aina nunak tuke atinun pegkeemtiuwai.

<sup>15</sup> Dutiksag Wakani Pegkejiya dushakam shiig dekamtijamji nuniak:

<sup>16</sup> “Nunú tsawan atina dui wi ditajai chichaman apaktinaitag duka juuwai, tawai Apu Apajuí: Wi ditá anentain chicham umiktinnak egketjagatjai, dutikakun ditá anentaimtajinish agatjagatjai.

<sup>17</sup> Ditá pegkegchauji, tudauij aidauunash ajumaish adeagchatnun kajimatkitnaitjai”.

<sup>18</sup> Nuadui iina tudauijnak Apajuí tsagkugtamjau asamtai, tsagkugnagtasa kuntin mautak atsumnatsui.

*Apajuiyai jegamainaitji*

<sup>19</sup> Yatsug aidauh, yamaik Jesucristo numpen ukajua dui, Apajuí pujutajai shiig pegkegma nuwi waimainuk agkan ajutjamui,

<sup>20</sup> yamajam jintan Jesús ujatjabiuwa nuwi weenaku pujut tuke atinnum jegamaina nuna, nunak ní jatai jaanch ejaamu ichiinkau ajakua dui dutikauwai,

<sup>21</sup> Jesuai jutii sacerdoteji dekas senchigtin Apajuí jeen puja duka.

<sup>22</sup> Nuadui Apajuik dekaskenum, dekaskeapi tabauwai jegaantagmi, dekaskeap nuninaita tusa, iina anentaimtajinish pegkegchau atsau, iyashish yumi dekas pegkejai dijagbau amaina iman wajasá.

<sup>23</sup> Nunin asamtai ni anagkagtuamua nu dakaku pujuidautik ebetmamja batsamsagmi, dekaskeap uminkattawa tusaja, wagki Apajuik tibaujina imatiksga betek umin asamtai.

<sup>24</sup> Pempeentunisaikish wajuk yainimainaita nu egakagmi. Pegkeg takainaku nuni nagkaemasa aneenimaina nu.

<sup>25</sup> Apajuí ememattasa ijunbaunmag megkaekachagmi, ujumak taachush ainawai nuni unuimatjau asag, nuna nunin aidaush yaigtajum wakeetan jukitnume, wagki Cristo minitnujiya duka tikiju wajasú asamtai.

<sup>26</sup> Wagki Apajuí chichame dekaskea nunú dekau ainayatku, jutii wakeetajin pegkegchau takaaku Cristo shiwagmakui, nuigtú iina tudaujin tsagkugtamjatatus Cristo mantamdauwa nunik tudauun mantamnainu tikichik atsawai.

<sup>27</sup> Ayatak jii shiig ishainnum Apajuí niina shiwaji aidaun suwimkan susatna nunak dakainawai.

<sup>28</sup> Nuadui makichik aentskesh Moisés chicham umiktajum tibaun umikchamtaig, jimag aentskesh, nuniachkush kempatumkesh apu aidaun jegajagi, nunú aents chichaman umitsuk wainak takaawai tusag etsegtukagmataig, wait anentug tsagkugsuk maajakú ainawai.

<sup>29</sup> Tujash nuna nagkaesau, Apajuí Uchijiya nuna dakituinak, niina numpe ukajea-numun Apajuikai chichaman apak pegkeemtikiuwa nunash pegkegchau diinak, Wakan wait anenkagtina nunash pegkegchau chichajuidau asag shiig senchi suwimkanak jukiagtina.

<sup>30</sup> Apajuí chichaak: "Witjai aents tikichin pegkegchau awagbau suwimkan suwaunuk, nunin asan aents pegkegchaunak wi suwimkan susattajai", tawai. Junashkam: "Niina aentsji aidaunak Apajuí ni titinai", tawai.

<sup>31</sup> ¡Tikima shiig ishainmai, Apajuí iwaaku tuke pujuuwa nunú suwimak sukagtamuk!

<sup>32</sup> Tujash adeagtajum, nagkamchakjum Apajuí chichame dekaajum Cristui sujumankajum ashí utugchat, waitiamu akuish, katsunjá ichichmamjajum depetkauwaitjum nunú.

<sup>33</sup> Wagki atum ainajum anuiyatijum, tuwakbaunum pegkegchau chichagku waitkasbautigmesha ainagme, nuniagin tikich aidauk aents dutika waitkamu aina nujai ijuntsan waitstajai tusa anentaimsaush ainawai.

<sup>34</sup> Atumek Cristo nemajuidau achikam chimpijush wait anenjauwaitjume. Tuja atumi shiwajum wajiigmin yajutjamkagmataish, atumek shiig aneasjum pujagme, atum jukitnuk nayaimpinum dekas shiig pegkeg tuke atin ajutjamaina nu dekau asajum.

<sup>35</sup> Cristui kajintsá anentaimjum nunú megkaekaigpa, wagki atum jukitna duka shiig pegkeg ajutjamu asamtai.

<sup>36</sup> Atumek atsumagme waitiakjumesha ichichmamja pujusjum, Apajuí wakegamua nu takaakjum, ni anagtamamua nu jukitasajum.

<sup>37</sup> Agagbaunum chichaak:

"Minitna duka, megkaetsuk wamak minittawai.

<sup>38</sup> Mina aentsug pegkejan takaa duka imá dekaskeapi tabauwaik tuke pujutnai, untsu mina nemagtukuitak ataktú waketuudaunak shiig anentsashtinaitjai", tawai.

<sup>39</sup> Jutiik aents suwimka jukiagtin aidau Cristo nemagkau ainayatak ataktú waketuina nuninuk ainatsji, ayatak dekaskeapi tabauwai uwemtan jukiaju aina nuninuk jutiishkam ainaji.

## 11

### *Apajuiyai dekaskeapi tabau*

<sup>1</sup> Apajuiyai dekaskeapi tabauwa duka, dekaskenmap jukittaja tusa kajintsá dakamua nuuwai. Nuigtushkam wainchayatku dekas awapita tabauwa nuuwai.

<sup>2</sup> Juti muunji aajakajua duka, Apajuiyai dekaskeapi tudau asag, Apajuí eemtinish pegkeg wantinkajui.

<sup>3</sup> Apajuiyai dekaskeapi tau asaja dekaainaji, nugkanum nuigtú agkajunum ayá duka Apajuí chichameniap najaneakuita tusa. Yamai paan wainainag duka, waji wainajakchamu aajakui.

<sup>4</sup> Apajuiyai dekaskeapi tabauwai, Abelak kuntin dekas pegkejan maa apeak, Apajuin anentag susauwai Caidau nagkaesau. Dutikau asamtai Apajuik Abelnak ni dutikamujia nujai pegkeg diisui. Nunin asamtai Abel jakau aigkish, ni Apajuiyai dekaskeapi tiuwa duka yamaikish etsegtú awai.

<sup>5</sup> Enocshakam Apajuiyai dekaskeapi tau asamtai, Apajuí iwaakunak nayaimpinum jukiuwai, dutikamtai aents aidauk nuigtuk wainkachajui. Chicham agagbauwa nuwi: Enocak eke Apajuí juwacham pujusag, Apajuinak shiig awajkauwai, tawai.

<sup>6</sup> Wagki Apajuiyai dekaskeapi tabau atsu gkagtaigkik, nigka shiig awagmamait sui, nunin asamtai niina adijkatatus wakegaidauk, dekas Apajuik pujawapita tuja niijai ijutkau atatus egaidanash akiskek idaichauwapita tabaujiya nu ajumainai.

<sup>7</sup> Apajuiyai dekaskeapi tabauwai Noeshkam, waji nagkaemaktinun eke wainchayatak Apajuí ujakam niina umijak arcan najanauwai ni patayí aidaujai uwemjatnun. Nunú Apajuiyai dekaskeapi tau asa Noé uwemai ashí aents dekaskeapi tuinachuk bakumakajui, aatus nunikua dui dekaskeapi tabaujin pegkeg wantinkauwa dui ni jukitnujig ajusui.

<sup>8</sup> Apajuiyai dekaskeapi tabauwai Abrahamak Apajuí untsuam umijak jinkiuwai, ni nugkan aminu atí tusa suwam atina nuwi weak, tuwí jegattawa nunak dekatsuk.

<sup>9</sup> Apajuiyai dekaskeapi tabauwai, Abraham Apajuí nugka anagkuamua nuwi, tuke ikayajai betek duwapen aakmak pujusui. Nunisag nunikajui Isaac, tuja Jacobshakam, ditan Apajuí nugkan amastajame tusa anagkuauwa nuwi batsamsag,

<sup>10</sup> nunak Abrahamak nayaimpinmaya yaakat makichkish wajukmainchau Apajuí shiig anentaimtus umikbauwa imanui pujustinun dakak nunikui.

<sup>11</sup> Dekaskeapi tabauwai Abrahamshakam muuntuch wajasuitak Sarashkam kaga ai senchin jukiuwai uchig aidau ajuttinme tabaunum, wagki Apajuí anagtuama nunak betekap umiktatua tau asa.

<sup>12</sup> Abrahamak jamainjin jegas pujai ni nuwe makichkiuch uchigmakua nuiya weantu aidau nayaimpinum yaya dekapamainchauwa iman, nayantsa kaamatkaji dekapamainchauwa iman wajasajui.

<sup>13</sup> Ashí nunú aidauk Apajuí anagkuamua nunak jutsuk jinawajui. Tujash ditak Apajuiyai dekaskeapi tabauwai atushtanmaya waintayama numamtuk wainkag shiig aneasajui, ditak ju nugka juig tuke ijagka nunin asajaiyap ukuktinaitku batsatji tusa dekaamaidau asag.

<sup>14</sup> Nuna aatus anentaimajakajua dui shiig dekaji, ditak nugka pujumainun egainakuap nunijakajuita tusa.

<sup>15</sup> Wagki ditá nugkeen ukukiu aina nuna anentaimtú pujuinakug waketmainuk tsawantak ajujakajui.

<sup>16</sup> Tujash ditak nugka dekas pegkeja nuna wakegajakajui, duka nayaimpinum awa nuna. Nuadui Apajuí dita pujusagtinnak yaakat nayaimpinum awa nuna umigkauwai, dutikau asa Apajuik: Juka midau ainawai tutanmak datsamatsui.

<sup>17</sup> Dekaskeapi tabauwai Abrahamak, Apajuí dekapasatatus, uchijum Isaac maam emematjita tamash, ni uchiji makichkiuchia nuna maa Apajuí ememattatus wakekauwai, Apajuí Abrahaman anagkuak:

<sup>18</sup> "Ame weantu aidauk Isaac akiimua nuiya agtinai", tibau ayatak.

<sup>19</sup> Abrahamak, Apajuik senchigtina ibau asampap aents jakaunash inanmainaita tabaunum, uchiji mauwaitak Apajuí ataktú inaantukim jukiuwa numamtina nuna iwainawai.

<sup>20</sup> Apajuiyai dekaskeapi tau asa Isaac, niina uchiji Esaun tuja Jacobnashkam atak agtina nuna pegkeg pujutnum yumigsauwai.

<sup>21</sup> Apajuiyai dekaskeapi tabauwai Jacob jakattak pujus, makí makichik José uchiji aidaun ditá pujutjin agtina nuna pegkegnum yumigsauwai, nunik ushujutaijin ichichmamas wajas Apajuin emematiuwai.

<sup>22</sup> Apajuiyai dekaskeapi tabauwai Joseshkam jaak: Israel aidau Egipto batsatu jijnjatnun tiuwai, nuniak: Mina ukunchjuk jujutkitin atajum tiuwai.

<sup>23</sup> Apajuiyai dekaskeapi tabaunum Moisés akiinamtai, apaji dukujijai kempatum nantu uukajui uchi pegkejuch asamtai, nuninak rey uchi kajegtajum tibaunash ishambachaju ainawai.

<sup>24</sup> Apajuiyai dekaskeapi tabauwai Moisés muun wajasash: Faraogka nawanjin uchijiyaitjai tumamtanak dakitujakui.

<sup>25</sup> Nigka Apajuí aentsji waitkam batsataidaujai waittsatatus wakegau asa, ujumak tsawantai tudaun takaidaujai shiig aneetnak dakitjauwai.

<sup>26</sup> Nigka egiptonmaya waji aidaun juki shiig aneestatus wakeetsuk, Cristo atak taa waittsatnujin betek waittsatatus wakekauwai, Apajuiyap dekas pegkejan sujustatua tusa dekau asa.

<sup>27</sup> Apajuiyai dekaskeapi tabauwai, Moisesak Egipto nugkanmaya jinkiuwai rey kajektinjinash ishamsuk, ni dutikata tibaujiya nuig ebetmamjauwai Apajuí wainchataiya nunú niijai abanash dekapeau asa.

<sup>28</sup> Moisés Apajuiyai dekaskeapi tabaunum pascua fiestamauwai. Dutikak uwijá numpeen ditá waitijin numpeajajui. Dutikamu asantai ángel magkagtaushkam, makichkish Israela uchijí iwai aidaunak mautesuk ukukiuwai.

<sup>29</sup> Apajuiyai dekaskeapi tabauwai Israel aidauk nayants kapantu tutainum bukunum katimaina nunikag katiyajajui. Nuniai Egiptonmaya aidauk ditash nunisag katiagtakamag jakekajui.

<sup>30</sup> Apajuiyai dekaskeapi tabauwai, yaakat Jericon siete tsawantai Israel aidau tentea apainak, yaakat peegmagbaujin yumpuntua akaketkajui.

<sup>31</sup> Apajuiyai dekaskeapi tabauwai nuwa Rahab daagtin, akiká takatai aajakua duka, tikich aents intimkiu aina nu jinutaish nigka jakachui, Israel dekamatus yujaunash shiig anentus yajuak kuitamkau asa.

<sup>32</sup> ¿Nuigtush wajinak titaja? Gedeogkan, Baracan, Sansogkan, Jefté, David, Samuel, nuigtú tikich profeta aina nuna pachisa tita takunuk tsawantan atsumainaitjai.

<sup>33</sup> Apajuiyai dekaskeapi tabauwai tikich nugkanum inamin aidaunash maania depetuk utsaantuawajui, pegkeg aidaunash takasajui, Apajui anagkuamua nunash jukijajui, nunisag león aidaunash yukagtumainchau emakajui.

<sup>34</sup> Jii senchi kegmunum egkeamush esachaju ainawai. Espadayai maata tamash pisajakajui. Kakaakchau aidaushkam waju waigkag shiwajijai maaniawag depetkajui.

<sup>35</sup> Nuwa patayi jajukbau ataktú inaantuki suujakbaush ainawai.

Tujash tikichakam agkan juwatan dakituidau asag senchi waitkasa maamush ainawai, Apajuiyap wi jakamtaish inaantuki dekas pegkeg pujutan sujustatua tuidau asag.

<sup>36</sup> Nuigtushkam tikich aidauk, dushiksa chichajuinam, asutiam, jiju cadenajai jigkajam, achiká egkeam waittsajui.

<sup>37</sup> Tuja tikich aidauk kayai tukua tukuakua maamush ainai, serruchui tsupika maamu, espadayai kajegbaush ainawai. Ditak jeenchau yujasag, uwijan duwapen, cibra duwapejai nugkujakajui. Nuigtushkam ujunauch, senchi waitkainam wake besemag batsamajakajui.

<sup>38</sup> Nunú aents aidauk shiig pegkeg, aents pegkegchau aidaujai ijunag batsaamainchau aajakajui. Nunin asag senchi waitkainam, jiiinag uwegshunum shiyak, mujanum wajag yujas, kayanum waa ayaunum utsanawag kanuu, nuigtú nugka waanum kanuu wajajakú ainawai.

<sup>39</sup> Tujash ashí nunú aina duka Apajuiyai dekaskeapi tuinayatak, Apajui anagkuawajua nunak jukichaju ainawai.

<sup>40</sup> Apajuijutiinun dekas pegkejan umigtamkau asa, ditanak eke susachajui, jutiijai betek pegkeg emakta tau asa.

## 12

### *Jesús waittsamu diísá ichichmamaín*

<sup>1</sup> Nuadui jutiishkam, kuashat aents aidau Apajuiyai dekaskeapi tabaujin iwainmamkaju aina dui, ashí iina tutitag awajtama nu, tudau ebetjama awa dushakam idaisagmi, nuniaku ii jegantinnu weaku kuitamamsa wetayama numamtuk wajakagmi.

<sup>2</sup> Jesús diísagmi. Niini nagkannawai dekaskeapi tabauk, jutii dekaskeapi tabaush niinig nagkatkawai. Jesusak datsantan cruznum achijá maam waitiakush uyumatsuk atsanjauwai, ni shiig aneastinji daka nuna dekau asa, nunik Apajui ekeemtaiji untsujin ekeemsauwai.

<sup>3</sup> Nuadui Jesús nunikbauwa nu anentaimitusjum diístajum, nigki aents tudaugtin aidaunum waittsatjai tumami senchi waittsauwa nunú, nuadui pimpitash pimpitsuk, mijattsuk nemagkatajum.

<sup>4</sup> Atumek tudau depetkatasajum maaniajum duka tudaunum mantamnatasajum nuniatsjume.

<sup>5</sup> Atumek kajimatkiugme Apajui, uchijí aidaun chichajak agagbaunum:

“Uchijuh, Apu esetamatatus

jintinjamkuish dakitjaipa,

tuja ni chichagtamkuish mijakaipa,

<sup>6</sup> wagki Apua duka jintintui yana ni aneawa nuna,

suwimkanash suwawai ni uchijí emamujiya nuna”, tawa nu.

<sup>7</sup> Nuadui atumek Apajui jintinjamu asantai waitiagme, wagki Apajui ni uchiji asajin nunak dutijamui. ¿Ya aentsua uchijin pegkejan takastí tayatkush jintintsukesh idaimainaita?

<sup>8</sup> Tujash Apajuí ashí niina uchijí aidaun jintinta dutiksag atumnash jintinjamchakuig dekas shiig uchijig ainatsjume.

<sup>9</sup> Nuigtushkam jutii uchi aajakuitag duik, iina apají jintinjamu asamtai ajantusa dii-jakuitji. Nuní nagkaemasa dekas iina Apají nayaimpinmayaya nunú shiig umigmaitji, pujut jukita tau asá.

<sup>10</sup> Jutii apajig ujumak tsawantai jintinjamajakajui dita anentaibaujiya dutiksag. Tujash Apajuik iina dekas pegkeg etamaina nuna jintinjamji, ni pegkegma íbauk atinme tujamu asa.

<sup>11</sup> Dekaskenmag nunú suwimak juwag duikik shiijak aneemait sui wagki najabau asamtai. Tujash nuwi unuimaja inagkeakik, shiig agkan anentaimesa pujuta nunú nuigtú pegkeja duke takatchakam unuimagtatji.

*Apajuí wait anenkagtugbaun dakitin aidau*

<sup>12</sup> Nunin asamtai, atum pegkeg takatnum pimpikiujum nunú nuigtú jinta pegkeja nu nemagtanum kakaakchau wajasujum dushakam, kakanmamsajum ichichmamjatajum.

<sup>13</sup> Nuniakjum Cristo wakega duke takaakjum pegkegnum wekaesatajum, pegkeg dutikmain idaijum nu ataktú pegkeg takastajum.

<sup>14</sup> Ashí tikich aidaujaish shiig agkan pujustasajum kakanmamsatajum, nuniakjum pegkeke pujustajum, wagki nuna nuniachuk makichkish Apu Jesusnak wainkashtin ainawai.

<sup>15</sup> Nunin asamtai pepeemtunisjum kuitamdaikatajum makichik aentskesh Apajuí wait anenkagtamujiya nuna megkaekainum. Wagki aents kajegkagta duka ajak jatai asa kuashat aentsun pegkegchau emamaina numamtuk wajau asamtai.

<sup>16</sup> Makichkitigmekesh nuwa tsanijimtak pujugsaignajum, Apajuinu pegkeg aina dushakam dakitjaigpa. Esaú ni iwai asa ashí niinu pegkeg jumainjiya nuna yutajai yapajiuawa numamtuk wajakajum.

<sup>17</sup> Atumek duka dekagme, Esaú dutika sujukuitak Apajin pegkegnum yumigtusti tukamá dakitam asauwai, nunik senchi butkush ataktú awagki dutikmainuk atsgu-sauwai.

*Yamajam anagkagtuamu nayaimpinum jukitnaitag nunú imá pegkejai*

<sup>18</sup> Israel aidau muja Sinaí antitash antimainnum, jii kegaun, suwe wajasú, ikiyamjau, senchi dasentun adjikajua atumek nunikchaugme,

<sup>19</sup> nuigtushkam trompeta shinamush, Apajuí chichaamush antukchaugme. Nunú chichaamun antukaju aina duka: “Apajuik ataktú awenag chichakaigka”, tusag segaju ainawai,

<sup>20</sup> wagki katsunmainchau dekapedau Apajuí chichaak: “Ju muja juna kuntinkesh najakuig kayai tukujum nuniachkugmesh nagkikesh maatajum”, tau asamtai.

<sup>21</sup> Nunú mujanmag tikima ishain imaniau asamtai, Moisés chichaak: “Senchi ishamakun kujajai”, tiuwai.

<sup>22</sup> Tujash atumek muja Sión Apajuí tuke pujuuwa nuna yaaktaji nayaimpinmaya Jerusalegka nu adjikaugme, nuig nayaimpinmaya aents aidau shiig kuashat Apajuin emematuinak ijunag ainawai,

<sup>23</sup> nuigtushkam nagkamas iglesia aidau ditá daajig papinum agatkamu nayaimpinum ajuina dushakam, Apajuí ashí aentsú juezjiya nunak ijuntug batsatui. Nunisag Apajuí nemajin initaik jinawajua nuna wakaní aidaushkam pegkeemtikawajam awig batsatui,

<sup>24</sup> Jesús yamajam chichaman apaak chichamkagtukua dushakam jegantaugme, nuigtush Cristo numpeejai pegkeemtikbau ainag nuuwai Abela numpe aajakua nuna nagkaesau tawa nu.

<sup>25</sup> Nuadui kuitamamkatajum Apajuí aujtabauwa nu dakitjaijum. Apajuí jujú nugka jui chicham umiktajum tibaun antugkachaju aidauk, suwimkanak uwemtutsekek nagkankachajui. Nuní nagkaemasa jutii Apajuí nayaimpinum pujus aujtama nu antugchakuik suwimkak pegké uwemtumaitsuji.

<sup>26</sup> Nunú tsawantinig Apajuí chichaamujig nugkan pegakui, tujash yamai tujamji: “Ataktuk imá nugkanak pegatsuk, ashí nayaimpinashkam pegaktatjai”, tiuwai.

<sup>27</sup> Ju chicham “ataktú” tibaauwa dui, ashí tuke achatin najankamu aina juka, tuke atina nujaimpap yapajiam atinaita tusa dekainaji.

<sup>28</sup> Tuja Apajuí inamtaijiya nuwi batsamsatnaitag duka makichkish umuchiam achatin asamtai, see tiagmi Apajuí ju pachisa. Nuniaku shiig puyatjusa, eme anentsá emematiagmi, niina shiig awagma dutiksaik.

<sup>29</sup> Wagki iina Apajujiya duka jiijai betek asa, jii apea emegkauwama imanai.

## 13

*Apajuin shiig awagma nunú takaamu*

<sup>1</sup> Yatsut anendaisa pempeentuniki aneenita duka idaisaipajum.

<sup>2</sup> Aents atumi jeemin minidaush shiig anentsá awaita nunú kajimatkipajum. Aatus nunidauk dekatsuk ángel aidaun shiig anentus jukiajush ainawai.

<sup>3</sup> Aents achikam egketaidaush, atumin achigmakagmatai egkeemainaitam nu anentainsam yaigtajum. Aents waitkam batsataidaushkam, atumshakam dutiksaik waitkam amainaitjum nu anentainsajum yaigtajum.

<sup>4</sup> Atum nuwenamua duka eme anentsajum diistajum, nuniakjum pegkegchou takagdaitsuk pujustajum; wagki tsanijimtanak yujajuidaun nuigtú nuwennaitak tsanijimtan yujajuidaunash Apajuí suwimkan susatnai.

<sup>5</sup> Kuashat kuichik ajuttí tusagmek anentaimtú pujuigpa, ajutjamaina nujaig shiig aneasjum pujustajum. Wagki Apajuí chichagtamak: “Makichkish idaisashtinaitjame”, tujabiú asamtaí.

<sup>6</sup> Nuadui jutiik shiig kajintsá:

“Apui mina yainta duka dui puyatsajai.

Aents aidau mina dutijumaina nunak ishamatsjai” tumainaitji.

<sup>7</sup> Adeagtajum atumin Apajuí chichamen jintinjamajakú aina nu, nuniakjum wajak pujusaya dekaskeapi tiu ainawa nunisjumek atumshakam ainjatajum.

<sup>8</sup> Jesucristuk yauwa duish, yamaiya juish, atakea duishkam tuke nuninuk atinai.

<sup>9</sup> Tikichin antushtain pachimak jintinkagtuidauk antugkaigpajum. Dekas Apajuí wait anenjamjauwa nuanuig anentaimin ichichmamjatajum, yutai pachisa tibauwa nu umiktasa yujagtsuk, wagki nuna nunidauk makichkish pegkegnak jukichaju ainawai.

<sup>10</sup> Jutiik makichik altar ajutjamji, nuuyanak Apajuí ememattasa carpa jegamkamunum takaidauk yumainchau ainawai.

<sup>11</sup> Wagki kuntin maamua nuna numpeenak sumo sacerdote juki Apajuin anentag suwinak jega pegkejam Apajuí ememattainum wajakuí tudajuén tsagkugtugti tusag, dutikawag nejeenak jukiag yaakta ukukí apejakajui.

<sup>12</sup> Nunisag Jesuschakam yaakta ukukí waitus jakauwai, niina numpe ukajeamunum aents aidaun pegkeemtikata tau asa.

<sup>13</sup> Nuadui Jesusjai weenaku, ukukiagmi, nuniaku aents aidau dakitjag yaakta ukumtikiag waitkasajua nunisaik iishkam waittsagmi.

<sup>14</sup> Jutiinak ju nugka juig makichik yaakat ii dekas tuke pujustinuk atsgutamui. Ayatak egainaji yaakat atak atina nu.

<sup>15</sup> Nuadui Jesucristo yaimpasmatai Apajuí emematiagmi, duka iina wenin niina daaji adaisa ememattkuik iina Apajuí waji anentag sumaina numamtuk awagmainag nuuwai.

<sup>16</sup> Kajimatkipajum, pegkeg takaaku tikichjaish pempeentunikiaja yainita duka. Wagki nunú anenjauch sudaibau aina nuuwai, Apajuin shiig awagmaina duka.

<sup>17</sup> Apajuí chichame etsejin aina nu umigkatajum, nuniakjum ditaí sumimkatajum, wagki dita atumin diigmaku asagmatai, ditak Apajuí eemtinish etsegutmaktin asag, shiig aneas takastinme, nu nuniachbau ataik atumnash shiig yaimpakchagtatui.

<sup>18</sup> Jutií pachijattsajum Apajuí aujagstustajum, pegkeg anentaibau ajutjamu asamtaí kajintsá ashí pegkeg aina duke takaaku pujustasa wakegainaji.

<sup>19</sup> Apajuí mina pachittsajum imá senchi aujtugsatajum, wishakam wamak ataktú atumiin taan wainkatjime.

<sup>20</sup> Apajuí shiig agkan pujutan sukagtina nu, iina Apuji Jesús aents uwigjin shiig kuitamna imana nu jakaunak inankiuwai, niina numpeejai ajumaish tuke atinun chichaman apakua nuna,

<sup>21</sup> nunin asa atumnash pegkeg etamtinme ashí ni wakega duke takasminjum. Nigki ashí jutiinash ni wakega duke takamain etamti, Jesucristo dutikamua dui. ¡Imá Jesucristua duka tuke ememattai atí! Aatus atí.

*Inagnamu*

<sup>22</sup> Yatsug aidauh, segajime ujumak chicham atum ichichmamainun agatjamjim nuna shiig kuitamas antuktinme tusan.

<sup>23</sup> Atumesh dekaatajum: Yatsug Timoteo achikam egkeemaya duka yamaik jiinkine, wamak taamtaig wi atumin wainkatasan minakun ayaktatjai.

<sup>24</sup> Ashí Apajuí chichamen etsejin aina nu, nuigtú ashí Apajuí nemajin pegkejam aina dushakam kumpamjtuatajum. Yatsug italianmaya aidau atumnash kumpamjmainawai.

<sup>25</sup> Apajuí atumnash ashí wait anenjamjatnume.

## Santiago carta agagbau

### *Kumpamkagtamú*

<sup>1</sup> Witjai Santiagoitjai, Apajuí nuigtú Apu Jesucristo inakegaitjai. Israela uchijí doce aajakua nunú weantutijum pampagjum, ashí nugkanum batsatutigmin kumpamjime.

### *Yachamet Apajuinúmia mína nu*

<sup>2</sup> Mína yatsug aidaúh, senchi shiig aneestajum makí makichik dekapkagtamú aina nu igkuakjumesh,

<sup>3</sup> wagki atumek dekaeme, dekaskeapi tabaugmia nu dekapsamu atata dui, emamkesa katsunjá nagkaeta nu unuimajume.

<sup>4</sup> Tujash kakanmamsatajum emamkesa katsunta nui shiig katsuagtasajum, nuniku asajum imagnisa pujakjum, nuigtú nunimainuk atsugtamtinme.

<sup>5</sup> Atum ainajum anuiya dekaachmin dekaapeauk, Apajuin segatí, dutikamak ni susattawai; wagki Apajuik ashí wakejus suwawai makichkish dakittsuk.

<sup>6</sup> Tujash dekaskeapi tabauwai segatí, makichkish utujimtsuk; wagki utujima duka nayants tsukatak wajukeya numamtuk wajawai, nuniau asa dase umpuam mai waket wajama nuniawai.

<sup>7</sup> Nuna nuniawak, Apu Jesús makichik wajií sujamunakesh jukittajapi tusag anentaimait-sui,

<sup>8</sup> wagki yamai makichik wajiin anentaimtawai, nunik kashin tikichin, nunin asa niina pujutjinig ebetmamjauchui.

<sup>9</sup> Yatsut imanchauch anentamua duka, eme anenmamainai, Apajuí iman emamu asa,

<sup>10</sup> untsu wiyakchak, eme anenmamainai imanchauch emamu asa, wagki wiyakchak, dupá yagkuji megkaega numamtuk wajaidau asamtai.

<sup>11</sup> Etsa jiiinak senchi sukuam, dupa kagagmataig yagkujig kakegame, nunik niimé pegkejuch aajakuk megkagama numamtuk, wiyakchak ashí ni sujutajji aidaunak megkaekatnai.

<sup>12</sup> Shiig aneestinme aents utugchatan depetuk nagkaeguk, wagki utugchatan depetkau aina duka Apajuí pujut tuke atinun niina aneedau aidaun anagkuauwa nuna jukiagtinaí.

<sup>13</sup> Makichkitigmekesh pegkegchau wakegamu ajutjamkuig, Apajuuyap jutijawa tiig-pajum; wagki Apajuik pegkegchau takastasag anentaimchauwai nuigtush pegkegchau takastí tusash tuchauwai.

<sup>14</sup> Makí makichik pegkegchau wakegaina nunak, niina iyashí senchi wakegamua nu wagajam nuniawai.

<sup>15</sup> Nunú iyash pegkegchaun senchi wakega nui tudauk najaneawai, nunika tudau takasbaunum, jaamu jegawai.

<sup>16</sup> Mína aneetaig yatsug aidaúh, tsanumajaigpajum.

<sup>17</sup> Ashí pegkeg wainkauch juamu nuigtú ashí don pegkeja duka yakiya taawai, iina Apají nayaimpinmaya etsantin aidaun najankauwa nuiya; nunú aidaun yapajinin nuigtú bushapau weena nigka nuninchauwai.

<sup>18</sup> Nigka, niina waketajinig, chicham dekaskea dui pujutnak sujamsauwai, ni najankamu aina nuiyag dita dekatkau najankamua nunin agtinme tujamu asa.

### *Chicham tawa dutiksag takau aidau*

<sup>19</sup> Nuadui mína aneetaig yatsug aidaúh, ashí aents aidauk chichaman shiig antu-mainai, nuniak waugtuk aimchau nuigtush wamak kajecheu amainai;

<sup>20</sup> wagki kajea duka, Apajuí eemtinig pegkejan takaak nuniatsui.

<sup>21</sup> Nuadui, ashí pegkegchau nuigtú kuashat pegkegchau ayá duka idaisatajum, nuniakjum atum chicham antukuitjum nu emematsuk umiktajum; wagki nuuwai senchigtin atumin uwemtijamaina duka.

<sup>22</sup> Tujash chicham tawa dutiksagmek takau atajum, ayatak antin aigpa, atumek pempeentuniki tsanunijajum.

<sup>23</sup> Tujash chichaman antayatak nuna umiatsu duka, aents espejonum niimama nujai betekai,

<sup>24</sup> wagki niimen wainmamkauwaitak, weak kajimatui, wajuku niimtinna wainmamkae nuna.

<sup>25</sup> Tujash ni antukbaujin kajimattsuk, chicham umiktin agkanbaetan sukagtin pegkeja nuna shiig wainak dutiksag uniauk, ni dutikamujin shiig aneestinaí.



<sup>26</sup> Makichkikesh atum ainajum anuiya Apajuí umigna iman anenmabiatak, chichaman emetuachuk, nigki anentain tsanuak tu wekaewai, nunin asa ni Apajuin umigjai tawa duka wainkayai.

<sup>27</sup> Dekas Apajuí puyatjusa umigbau, nuigtú Apajuí iina Apají emtinish pegkegchaujish atsugbau iwainmabauwa duka juuwai: bitaik aidau, nuwa waje aidau waituinakui yayamua nu, nuigtú ju nugkanmaya pegkegchau aina dushakam takatsuk pujamua nunú.

## 2

### *Wiyakchash ujunauchish betek diistajum*

<sup>1</sup> Mina yatsug aidauh, Jesucristo iina Apuji dekas imana nui dekaskeapi tautigmek, makichkia nu eme anentakum tikichia duka junik diimaitjugme.

<sup>2</sup> Anentaimsagmi, atum ijunja batsatjumin makichik wiyakuch jaanch pegkejan iwagmama anillo oro patakumau wayawaintai, nuniai makichik ujunauch jaanch mamusuchin nugkuaju dushakam wayawaintai,

<sup>3</sup> nuniakuig jaanch pegkejan iwagmama nunú eme anentsajum: “Amek, ekeemtai pegkeja jui ekeemsata” takum, ujunauchia duka: “Amek anui wajastá, nuniachkumesh wi eketag jui tantam nugká pujustá” tumainaitjume.

<sup>4</sup> ¿Nunú atumek etegdaiyajum nu, pegkegchau anentaiyai dutikdaiyatsjumek?

<sup>5</sup> Mina aneetaig yatsug aidauh, antuktajum: ¿Apajuí etegkachukai ju nugkanmaya uju-nauch aina nuna, dekaskeapi tabaunum wiyakuch agtinme, nuninak niina inamtaijiya nuna niina aneen aidaun anagkuauwa nuna jukitneme tusa?

<sup>6</sup> Tujash atumek ujunauch aina duka inatsagme. ¿Wiyakuch aina duchaukai wainak waitkagmainak nuigtush ditak achigmakag jujamkiag chicham epegtainum ejetamaina nu?

<sup>7</sup> ¿Dita ainatsuk Cristo eme anentsa chichagtai atum nemagjum nuna pegkegchaun chichajuina nu?

<sup>8</sup> Chicham umiktin dekas iman agagbauwa nu dekaskenum umiakjum: “Tikich aidauh amek anenmamsam aneeta”, tawa nu umiakjumek pegkeg takagme.

<sup>9</sup> Tujash atum makichik aents eme anentakum tikich junik diiyakjumek, tudau takaagme, aaja nuniau asajum chicham umiktina nu umichu weagme.

<sup>10</sup> Wagki makichik aentskesh chicham umiktina nuiyan ashí umiayatak, makichkinum dewakug, chicham umiktina nuiyanak ashí umikchauwa nunin weawai.

<sup>11</sup> Wagki: “Tsanijinawaipa”, tiuwa duke: “Magkagtuawaipa” tiuwai. Nunin asamtai tsanijimchakmesh magkagtakmek, chicham umiktina nu intimjame.

<sup>12</sup> Atum chichajum dutiksagmek takastajum, chicham umiktin agkanmitkagtina nujai dekajam atinush wajukmaina ainawa nunisjumek.

<sup>13</sup> Wagki suwimak atina duik, wait anenkagtugchajuk, dutiksaik wait anentam achagtinai; wait anenkagtamua nuuwai suwimak jumaina nuna wagagsauwa duka.

### *Dekaskeapi tabauk takaamunum iwainamainai*

<sup>14</sup> Mina yatsug aidauh, ¿makichik aents dekaskeapi tabau ajutui tayatak, takaamujin iwainatsu dusha wajinma yaimainaita? ¿nunun dekaskeapi tajai tawa duká uwemtik-mainait?

<sup>15</sup> Makichik yatsug nuniachkush makichik umaakesh nugkumainji atsuju nuigtú tsawantai yuwá pujumainjish atsujag,

<sup>16</sup> atum ainajum anuiyatijum chichagkujum: “Shiig aneam wetá, nunikam jegaam jaanch nugkujam, yujumak shiig yuwata” tumainaitjum dusha, ¿wajinma yaimainaita?

<sup>17</sup> Nunisag dekaskeapi tabauwa dushakam, takaamu atsakug jakauwa numamtinai.

<sup>18</sup> Tujash tikichia nu chichaak: Aminak dekaskeapi tabau ajutjame, nuniai mina takaamu ajutui, iwaintugkacia dekaskeapi tabaugmia nu ame takatsuk, nuniamin wi iwaintuktage mina dekaskeapi tabaujua nuna wi takaamug aina nujai.

<sup>19</sup> Ame Apajuik dekas makichki tame duka, pegkeg tame; nunisag iwanch aidauhkam dekaskeapi tuinawai, nuniayatak ishamak kujainawai.

<sup>20</sup> Anentainkachuh, ¿dekatmek dekaskeapi tabauwa nu takaamu atsakug wainkaya duka?

<sup>21</sup> Iina apají Abraham aajakua nunak Apajuí pegkeg diisui, niina uchijí Isaacan maa ememattatus altarnum patainiuiwa dui

<sup>22</sup> ¿Wainjumek dekaskeapi tabauwa nujai dutikauwa nu, nuniku asa dekaskeapi tabaujiya duka ni dutikauwa dui pegkeg diijam asauwa duka?

<sup>23</sup> Aatus uminkauwai Apajuí chichame agagbauwa nui: “Abrahamak Apajuiyai dekaskeapi tujakui, nuniau asamtai pegkeg diisui”, nuigtush “Apajuí kumpaji” tutai aajakui tawa nu.

<sup>24</sup> Wainjumek, aentsuk ni dutika dui pegkeg diyam awa nu, ayatak dekaskeapi tabauwa nujai chu.

<sup>25</sup> Nunisag nuwa akiká takatai Rahab aajakua dushakam, dekamatus yujaun yajuak ikanag, tikich jintanum ishiakua dui Apajuí pegkeg diyam asauwai.

<sup>26</sup> Wagki wakan jiantaik iyashik jaawai, numamtuk jutii dekaskeapi tabaujiya nu, pegkeg aina nuna takamtijamchakuig jakauwa numamtin ainaji.

### 3

#### *Idai pachisa tibau*

<sup>1</sup> Mina yatsug aidauh, atum ainajum anuiyatigmek kuashat jintinkagtin atasagmek wakeyigpajum, wagki aents chichaman jintinkagtayatak betek umikchaju aidaun imá senchi suwimkan susatin asamtai.

<sup>2</sup> Ashí aentstik kuashat dewau ainaji, tuja makichik aentskesh ni tabaujiya nuna dewachuk, nunuwai dekas aents pegkeja duka, ashí niina iyashinash kuitamaina nu.

<sup>3</sup> Caballo aidauk itagkatnuji wenin apututaiyai umigtukti tusa, dutika ashí iyashí depetuka emataiyai. <sup>4</sup> Nuigtushkam barco aina nu anentaimsa diistajum; shiig muun akushkam dase senchi umpugká juwam auwai, dutiktaish timonji shiig piipich aig anunta nu tuwí wakegawa nui emauwai.

<sup>5</sup> Antsag iina iyashinishkam idaik piipichi, tujash waji muun aidau kuashat dutik-mainun chichauwai. Anentaimsa diistajum ikam muunta nuna jii yantsaji peemtuk ekemamaina imanai.

<sup>6</sup> Nuigtush idaik makichik jiiya numamtainai, nunin asa ashí pegkegchau ju nugka juiya aina nuna takamtijamji. Iina iyashii aina nuwi awai, nuninaitak ashí iyashnak pegkegchau etugtamji, nuigtush jii akejata numamtuk wajau asa suwimak tuke atina nuwi ejetami ashí iina pujutinash emegkaumainai.

<sup>7</sup> Aents aidauk dekaunawai ashí kuntin kajen aidau, chigki aidau, dapi aidau, nuigtú nayantsanmaya kuntin aidau unuinatnak;

<sup>8</sup> tujash makichik aentskesh idainak unuinamait sui. Duka makichkish itagmait sui, tsegas jataiya iman piyak au asa.

<sup>9</sup> Nunú idaiya duik Apajuí iina Apajuiya nu pegkeg chichagji, nuaduik aents aidau shi pegkegchau chichajuinaji, Apajuí niina niimejai betek najanamun aina nu.

<sup>10</sup> Makichik wenua duik pegkeg chichagdayamu nuigtú pegkegchau chichagdayamush jii nui. Yatsug aidauh, duka nuninuk amait sui.

<sup>11</sup> ¿Makichik yumi pukuni jiina nuish, yumi pegkejash yapaujaish jii nmainkaih?

<sup>12</sup> Mina yatsug aidauh, ¿higuerash aceitunanash nejemainkaih nuniachkush uvash higonash nejemainkaih? Nunisag yumi pukuni yapakú jiina nuig yumi pegkejak jii nmainkaih.

#### *Dekas yachameta nu*

<sup>13</sup> ¿Atum ainajum anuish, yaita yachash nuigtú dekaush? Nuninuk shiig pujak, emematsuk pujus ni yachajin takaamujiya nuna iwainakti.

<sup>14</sup> Tujash atum tikichdau diisá anentaimin kajeakjum shiwagmagata tabaunum waji dutikakjumek, eme anenmamainuk atsugtamjume, nuigtushkam dekaskea dusha atsugtamui.

<sup>15</sup> Wagki nu yachameta duka Apajuinumia minatsui, nu yachametak nugkanmayayai, aentsú anentaimtaijiya nu nuigtú Iwanchdauwa nu.

<sup>16</sup> Tuwí tikichdau diisá kajejamu nuigtú shiwagmagamu awa, nuwi pachimdaebau nuigtú ashí pegkegchau aidau takaamushkam awai.

<sup>17</sup> Tujash yachamet Apajuinumia ajamu aidauk, dekatkau pujutji ayatak pegkeg, nui tutitag wajachu, shiig awajkagtin, kakagchauch, wait anejatin wajasú, pegkeg aidau takau, betek anenkagtin, nuigtú waitjuchu ainawai.

<sup>18</sup> Agkan pujutnum kakanmamaina duka, agkan pujusá pegkeg takasbauji jukitnujin takaak nuniawai.

### 4

#### *Nugkanmayajai kumpamdaimainchau*

<sup>1</sup> ¿Tuwiya maaniamu aina dusha minawa nuigtú atumek pampandayamu aina dusha? Duka atum pegkegchau wakegakjum anentaimin waitiajum duwi aniagme.

<sup>2</sup> Atumek makichik waji wakegakjumes juwatsjume, tikichi wajiiji diigsajum kajeagme nuniakjum magkagtagme, nuniakjumes atum wakegamuk jumainchau dekapeakjum jiyaniagme, nuniakjum maaniagme. Tujash juwatsjume Apajui segachau asajum.

<sup>3</sup> Segakjumes juwatsjume, wagki pegkegchau anentaiyai segau asajum, atum pegkegchau wakegamu dutikata tau asajum.

<sup>4</sup> ¡Aents umichu aidauwah! ¿Atumek dekatsjume ju nugka juiyan imá senchi wakejuidauk Apajuin shiwaji wega duka? Makichik aentskesh nugkanmaya kumpaji atatus wakegauk, Apajui shiwaji najaneawai.

<sup>5</sup> ¿Nuniachkugmesh agagbaunum tawa duka wainkag anentaimtajum: “Apajui Wakanin amasua nu shiig senchi akastamas wakejutpawai tawa duka?”

<sup>6</sup> Tujash ni anentag sukagtamu imá muuntai. Nuadui agagbaunum: “Apajuik emebau aidau nak dakitus diyawai, tujash imanchauch aina nuna wait anentawai” tawai.

<sup>7</sup> Apajuiyaig sumimkatajum; Iwanch tsanugmakuish antugkaigpajum, nuniagminig weak ukugmaktatjume.

<sup>8</sup> Apajui adjikatajum, nuniagmin niishkam adjitamkattawai. Tudau aidauwah, tudau takatak idaisatajum; atum Apajui anentaimtayatkujum nugkanmayash anentaimtu wajautigmek, nuninuk idaikujum dekas imá Apajuik umigkatajum.

<sup>9</sup> Shiig aneasa dushit batsamtutsuk atumi tudaujum tsagkugtuga tusajum Apajui segakjum wake besemag batsamsajum senchi buuttajum.

<sup>10</sup> Nuniakjum Apu Jesús wika shiig tudauwaitjai titajum, tajumin ni dekas aents iman etamtatui.

<sup>11</sup> Yatsug aidauh, atumek pempeentunisjume pegkegchau chichagdaikaigpajum. Ni yachin pegkegchaun chichajuk nuigtú yachin chichaman patatuk, chicham umiktina nuna pegkegchaun chichajui, nuigtush chicham umiktina nuna chichaman patatak tawai, tujash chicham umiktina nunú chicham patatkumek chicham umiktina nuiya umitsuk juez weakum tame.

<sup>12</sup> Chicham umiktinun sukagtusua nu nuigtú jueza duka makichki, uwemtan sukagtumain nuigtú suwimkan sukagtumaina nu. Tujash amesh, ¿ya asamea tikichish chichamash patatush wekaeme?

### *Emebau aigpajum*

<sup>13</sup> Yamai atum ju tinu aidautijum antuktajum: “Yamai nuniachkuish kashin nu yaaktanun weagmi, nunika nui makichik mijan pujusá sujaku kuichik jukiagmi” tajume,

<sup>14</sup> kashinish tsawantash wajuku atatus duka dekachiatkujum. Wagki, ¿wajimpaita atumi pujutumish? Atumek tuke yujagmia nunin ainagme, yamaikik wantinak machik asa megkaegama nunin.

<sup>15</sup> Duka tutsuk aaja tumainaitjume: “Apu Apajui wakegakui pujuinakuik, ju nuniachkuish nunú dutikawagmi” tumain ainagme.

<sup>16</sup> Tujash duka ememasa chichaakjum tu yujagme; ashí nu ememasa tu wekaebauk pegkegchawai.

<sup>17</sup> Pegkeg takata nuna de kayatak takaatsu duka, tudau takaak nuniawai.

## 5

### *Wiyakuch waitkagkagtin aidau*

<sup>1</sup> Yamai atum wiyakuch aidautijum antuktajum. Buuttajum nuniakjum senchi unsumtajum, wajiijum megkaejamtai kuashat waittsagtin asajum.

<sup>2</sup> Atumin wajiigmik mamukaje, jaanchjum aidauunash mamuk amutjamkaje.

<sup>3</sup> Atumi orogmik, nuigtú kuichkigmishkam pushugkaje. Nunú pushugkaja nu atum bakumatnunak iwaintugmawai. Nunú atumi iyashminak jiyai apemaina numamtuk awajutgmaktatui, duka tsawan aidau nagkaniagtina dui dutikam atin ijumjau asajum.

<sup>4</sup> Aents aidau ajaka juwinak atumi ajagmin takasú aidau akikchamu unsumainawai, atum tsanujá akitsuk idaisamu asag; nunú juukaju aidau unsumaina nuna Apu ashí senchtina nu antawai.

<sup>5</sup> Atumek ju nugka juig shiig aneasa pujusugme atumin shiig awatama nu takaakjum, nunin asajum tsawan jegaku kuintin maam atin duwegama imanikugme.

<sup>6</sup> Atumek aents bakú ainagme, nuigtush utugchatji atsujuh main ainagme makichkish ayamjumamainchau aina nu.

### *Emankesa dakat*

<sup>7</sup> Nuadui yatsug aidauh, Apu Jesús taatnuji emamkesa dakastajum. Diistajum ajakan ajakbau wajuk dakawa yumi yutugti tusa nuigtushkam nugka pegkejan nejepati tusa.

<sup>8</sup> Nunisjumek atumshakam ebetmamjatajum, nuniakjum emamkesjum dakastajum Apu Jesús minitnuk tikiju wajasú asantai.

<sup>9</sup> Yatsug aidauh, pempeentunisjumek tutitag chichagdayá pujuigpajum, bakumaijum. Niiyai jutii juezjig, ni taatnuk namput wajaschae.

<sup>10</sup> Mina yatsug aidauh, atumshakam duik profeta aidau kuashat waituinakush, emamkemas pujusag, Apu Apajuí chichamenak etsejukajakua nuniktajum.

<sup>11</sup> Nuadui jutii shiig anentuinaji waituinakush ichichmamag katsuntuina duka. Atumek antukuitjume wajuk Job waitiakush katsunjauwaita nu, nuigtú inagnamunmash Apu Apajuish wajuk dutikauwaita nu, Apu Apajuik wait anenmain diijatak wait anenkagtinai.

*Ashí nagkaesauwa nu*

<sup>12</sup> Tujash ashí juna nagkaesauwa duka, mina yatsug aidauh, atum dutikatnuk Apajuí adaisagmek tiigpajum, nayaimpikesh, nugkakesh nuigtú tikich waji aina nu adaisagmekesh. Dutikatjai takumek “ehé” tita, nuigtú dutikashtatjai takumesh “atsá” tita, bakumamainnum jegantaijum.

*Apajuí augbau*

<sup>13</sup> ¿Atum ainajum anuiyash waitiaush atsuak? Nuninuk Apajuí ausati. ¿Dakujus pujaush atsuak? Nuninuk kantamak Apajuí emematti.

<sup>14</sup> ¿Atum ainajum anuiyash jaush atsuak? Nunin akuig iglesianmaya anciano aidau untsuktajum, dutikam Apu Jesusa daajin aceiteyai buuknum ukatuk Apajuí segattinme.

<sup>15</sup> Dekaskeapi tabauwai Apajuí augbauwa nu etsagagtatui jaa nunak, nunikmatai Apu Jesús inankittawai, tudau takasú akush tudauji tsagkujamu atatu. <sup>16</sup> Nuadui tudaujum aidau pempeentunisjumek etsegtumaktajum, nunikjum pempeentunisjumek Apajuí aultunistajum etsagagbau aminjum. Aents pegkejan takauwa nu Apajuí augbau imá senchigtinai nuniau asa kuashat dutikmainai.

<sup>17</sup> Elíasak jutii aents aidauti kakakchamu ajutkagtuina juninuk aajakui. Tujash shiig senchi Apajuin segauwai yumi yutugchati tusa, dutikam kumpatum mijan, nuigtú seis nantu yututsuk asauwai.

<sup>18</sup> Nunitai ataktú Apajuin segauwai, dutikam yumi yutugmatai ajak nugkanum tsapainuk nejekajui.

<sup>19</sup> Mina yatsug aidauh, makichkish atum aina anuiya dekaskea nuna idaiyas wekaegun tikichia nu awakeakug,

<sup>20</sup> dekaati nuna tunamajun awakea duka, jamainun uwemtika nuna, nuigtú kuashat tudau aidau tsagkugna nunashkam.

## Pedro nagkamchaku carta agagbau

### *Kumpamkagtamu*

<sup>1</sup> Witjai Pedro, Jesucristo apostoljiyitjai, atum Apajúi etegjamu aidautijum nugkem ukuakjum pampagjum tikich nugkanum Ponto, Galacia, Capadocia, Asia, Bitinia aina nui batsatutigmin kumpamjime,

<sup>2</sup> atum Apajúi iina Apají duik nagkamsa anentaimitusbauwa dutiksaik etejamu aidautigmin. Atumnak Wakania nujai pegkeemtijabaijui umigtuktinme tusa, nuigtú Jesucristo numpejai pegkeg etamkata tau asa. Anenjauch wait anenkagtamu nuigtú agkan pujamu kuashat ajutjamtinme.

### *Apajúi emematiagmi*

<sup>3</sup> Emematiagmi Apajúi, nuigtú iina Apuji Jesucristo Apajiya nu, ni shiig senchi wait anenkagtau asa Jesucristo jakau nantakiuwa dui ataktú akiinau ainagme, pegkeg ajutjamtina nuna dakastinme tujamu asa,

<sup>4</sup> nuninak besemainchau, tsupaemainchau, kagamainchau nayaimpinum jutiinu ukugtamsamu awa nuna jukitnume tujamu asa.

<sup>5</sup> Atum Apajuiyai dekaskeapi tabau ajutjamaina dui niina senchijin kuitamjamui, uwemat umikbau awa nuna jukitnume tujamu asa, nunak tsawan nagkanbau atina dui iwainaktinai.

<sup>6</sup> Nuadui atumek shiig aneajume, nunimainaitkuig yamai ujumak tsawantai kuashat niimtinai waitkasa dekapsamu amainaitjume.

<sup>7</sup> Atum aaja waitiamunum Apajuiyai dekaskeapi tusa anentaimitajum nu dekapsamu asamtai, Jesucristo taatna duwi dekas eme anentsá diyaaku, nuigtú ememattsá diyaam atinaitjume. Oronum pegkegchau peetkau ajapna ayatak orok juwakti tusa, jiyiyai apeamu shiig pegkejama nuna nagkaesau wegawai atum Apajúi dekaskeapi tajum duka.

<sup>8</sup> Atumek Jesucristo wainkachu ayatkujum aneagme; yamaikish wainchayatkujum dekaskeapi tabauwai shiig aneakjum tumainchau imana nui dakujagme;

<sup>9</sup> wagki atum dekaskeapi tajum nu inagnamunum atumi wakanim aidau uwemtijatna duka tikiju awajsau asajum.

<sup>10</sup> Profeta aidau etsegkajui atum anentag jukitnume tibau aajakua nuna, nunin asag shiig kuitamas aujujakajui nunú uwemtan pachis dekawagtatus.

<sup>11</sup> Cristo Wakaniya nu emtika profeta aidaun dekamtikawajui Cristo waittsatna nuna, nuigtú imanji atina nunashkam; dutikam tsawantan dekawagtatus nuigtú wajukenunum nuniktinna Wakaní Pegkeji ditai puja dusha mamiktawa nuna dekatasag wakegajakajui.

<sup>12</sup> Tujash Apajúi dekamtikawajui ditanu achatnun jutiinu atina nuna; nunú aidaun etsejujakajua nuna yamai yamajam chichaman nayaimpinmaya Wakaní Pegkeji awemama nuna senchijin etsejuinawai. Nunú waji aina nuna ángel aidaush wainkatatus wakejuinawai.

### *Pegké pujustinme tusa untsukbau aidau*

<sup>13</sup> Nuadui umintsá pujustajum atum dekajum nujai, nuniakjum ebetmamjajatum. Nuniakjum Apajúi wait anenjamu asa Jesucristo wantintai sujamsatna nunú ashí kajintsá dakastajum.

<sup>14</sup> Uchi shiig umina iman asajum, eke Apajúi dekachbaunum pegkegchau wakegamu takajakuitjum nunisjumkek pujusaigpajum.

<sup>15</sup> Duka nunitsuk, atumin untsugmaku pegkegma ibau asamtai, atumshakam pegkejam atajum, ashí atum wajuk pujagme nuishkam,

<sup>16</sup> wagki agagbaunum: “Wi pegkejam asamtai, atumshakam pegkejam atajum”, tawa dui.

<sup>17</sup> Atum Apajúi, Apawah takugmek, makichik aentsun imá senchi wait anentsuk, aents aidau wajuk dutikawaje dutiksag betek suuwa nu, ashí tsawantai ju nugka jui pujuttajum dui puyatjusum umigkatajum.

<sup>18</sup> Atumek atumi muunjum wainak pujujakajua nu pujut juki asajum nunisjumkek batsatutijum agkanmitkamuitjum duka dekagme, waji besen aidau oro, kuichik aina nujachiu,

<sup>19</sup> Cristo numpe shiig pegkeg uwig makichkish tsuwatji atsubau nuigtú tunamagchau aajakua imana nu,

<sup>20</sup> yaunchuk nugkash najaneatsaig nunikti tibau aajakui, tujash yamai tsawan nagkanbauwa jui atumi anempau asa wantintugmake.

<sup>21</sup> Cristo nunikbaunum atumek Apajuik dekaskeapi tajume, niina inanki nuigtú ememattai awajsauwa nui, nunin asamtai atumek dekaskeapi takujum Apajuinumiag dakagme.

<sup>22</sup> Yamaik atumek dekaskea nu umidau asajum pegkemtikbau ainagme, yachi aidaujai dekaskenum aneenitnume tabaunum, nuadui atumek pempeentunisjumek anentai pegkejai aneenitajum,

<sup>23</sup> wagki atumek ataktú akinau ainagme, jaka besen aina nujaichu, Apajuí chichame jachau iwaku tuke auwa nujai.

<sup>24</sup> Wagki agagbaunum tawai:

“Ashí iyashik tuke dupayai,

nuigtú ashí aentsú imanjiya duka, dupá yagkujijai betekai.

Dupag kagawai, nunitai yagkují iyawai;

<sup>25</sup> tujash Apu Apajuí chichamega duka tuke auwai”.

Juuwai yamajam chicham atumin etsegkamua nu.

## 2

<sup>1</sup> Nuadui idaisatajum ashí pegkegchau aidau, ashí waitjamu aidaush, tsanumat, tikichdau diigsá kajet, ashí wainka tsanumkagtut aidaushkam.

<sup>2</sup> Nuniakum uchi yamá akiintsau muntsun muntsuatatus senchi wakejuwama numamtuk, Apajuí chichame shiig pegkeja nu wakejitajum. Nujai wakanmin tsakaakjum uwemat jukimnujum.

<sup>3</sup> Apu Apajuinu pegkeja nu wakegakjumek.

*Kaya iwaku*

<sup>4</sup> Cristo, Kaya tuke pujuwa imana nujai ijutkau atajum, nunú kaya numamtina nuna Apajuí etegka tikichin nagkaesau emauwai, tujash aents aidauk dakitug idaisajui.

<sup>5</sup> Atumshakam nunisjumek kaya numamtin iwaku ainagme, nunin asagmin wakan-numag Apajuí ememattai jega jegamkam pegkegma iman etamjume, Jesucristo jutiini mantamna iina tudauji utsanjankau asamtai Apajuí shiig awagma dutiksaik iina wakaní susata tabaunum.

<sup>6</sup> Nuadui Apajuí chichame agagbauwa nui:

“Diistajum, wi yaakat Siognum\* apugjai makichik kayan

jegá ichichkatin etejamu, shiig pegkeja nuna;

niini dekaskeapi tauk makichkish wainkag juwakchatnai”,† tawai.

<sup>7</sup> Atum dekaskeapi tautigminak, nunú kaya duka shiig pegkejai; tujash niini dekaskeapi tuinatsu nuanuig:

“Kayá ekenag jegamin aidau, kaya pegkegchawai tusag dakitajua nunú, kaya dekas jegá ichichkatin apujtutia iman wajasé”.

<sup>8</sup> Nuigtushkam:

“Nunú kaya nunak kuashat aents tukumak iyajgtinai”, tawai.

Wagki tukumaina duka chichama umiinachu asag nuninawai, aatus nunikti tibau aina nu.

<sup>9</sup> Tujash atumek Apajuí niina aentsji atinun etegkauwa nu weantu ainagme, sacerdote rey takajin, Apajuí aentsji pegkejam, Apajuí sumaka jukimu. Jutiinak pegkegchau takainaku suwenum batsatjin tsaptin dekas imana nuna amasu, Apajuí takasbauji shiig pegkeja nuna etsegkatnume tujamu asa.

<sup>10</sup> Atumek yaunchkek Apajuí aentsji aajakchawaitjume, tujash yamaik Apajuí aentsji wajasugme. Yaunchkek Apajuí wait anenjachbau aajakuitjume, tujash yamaik wait anenjamjaje.

*Apajuí aentsji aidau*

<sup>11</sup> Anetaig aidauh segajime, ju nugka juig tikich nugkanmaya jeenchauwa numamtin ainajum nuutigmin, iina iyashí pegkegchau wakega duka idaisatajum; nunú aidauk iina wakanijai maaniau asamtai,

<sup>12</sup> Apajuí nemajuinatsu nujaj shiig kuitamamka pujustajum. Juti pegkegchau takauwa iman chichagtamaina dusha Apajuí ememattinme, tsawan uwemau atina nuaduish atum pegkeg takasbaun diigtamsag.

<sup>13</sup> Apu Jesús nemaju asajum ashí rey aina nuadui sumimkatajum, ni imá wagaku asamtai,

\* 2:6 “Siognum” tawa duka diistá Ro. 9.33. † 2:6 Is. 28.16.

<sup>14</sup> nuniachkugmesh gubernador aidaun, aents pegkegchau takaidaun suwimkan susati tusa awemamu aina dushakam nuigtú pegkejan takaidaunak eme anentus diísti tibuawu nu.

<sup>15</sup> Wagki juuwai Apajuí wakegamua duka: pegkejan takainak aents dekachu, shiig anentaimkachu aina nunash itatmitkaktinme tawa nu.

<sup>16</sup> Aents agkanmitkamush wajuku amainaita nunin atajum, tujash nunú agkan pujamu ajutjama dui pegkegchau takasta tachamunum, Apajuí inake asajum.

<sup>17</sup> Ashí ajantusjum diístajum. Yatum aidaush aneetajum. Apajuish eme anentsá diístajum. Reyshkam ajantusjum diístajum.

*Cristo waittsauwa nunisaik waitmain*

<sup>18</sup> Inak aidauwah, atumi apujum ashí ajantusa diyakjum sumimjuktajum; ayatak pegkeg nuigtú kakagchauch aina duke dutiktsuk, dakitmain pegkegchau aina dushakam.

<sup>19</sup> Atum pegkegchau takasbauk atsugtamaig waitkgmainakuish, Apajuí nemajin asajum katsunjatajum. Duka Apajuinak shiig awagmawai.

<sup>20</sup> ¿Wají imanaita ii pegkegchau takasbaunum suwimak juwayatku katsuntajai tabaush? Pegkeg amainai, ii pegkeg takamunum suwimak juwaku katsuntamuk, nu Apajuin shiig awagbau asamtai.

<sup>21</sup> Nuna nuniktinme tusa untsukbau ainagme, wagki Cristushkam jutiiní waittsauwai, atumnash ni wajukauwaita nunisag waittsatnume tusa iwaintugmak.

<sup>22</sup> Cristuk makichkish tudaunak takaschawwai, makichik aentsnakesh tsanugchawwai,

<sup>23</sup> nigka pegkegchau chichagmash, pegkegchaunakesh aimkachui. Imatika waitkamash, iikmakagkesh chichakchawwai, ayatak Apajuí dekaskenum pegkejan takauwa nuna idaitujaku.

<sup>24</sup> Nigki iina tudaunash niina iyashin jukiuwai numinum achinjuuwa dui, tudau takatnak idaiyinak, pegkeja nuna takastinme tujamu asa; niina iyashí tsupinjuuwa dui atumek tsagaju ainagme.

<sup>25</sup> Wagki atumek tuke uwig wagakujai betek aajakuitjume, tujash yamaik Jesucristo atumi wakanim aidaun kuitamaina nui wakitkiugme.

### 3

*Nuwenau aidau umimain*

<sup>1</sup> Nunisjumek atumshakam, nuwatkamu aidautigmek atumi aishum aina nuig sumimkatajum, Apajuí chichamega nuna dekaskeapi tachau akushkam, chicham ujachmaitak atum pujamun diisag wakekatnume,

<sup>2</sup> dekaskenum Apajuí umigkujum imagnisa pujamun waipainak.

<sup>3</sup> Atumek jaanch pegkeg iwajamu aina ibau nugkugjum awantak iwagmamjatasagmek wakemaitugme. Intashmesh tikich pegkeg diisatnume tsagmek iwagmaitugme, nuigtú oro aina imanjai iwagmamjatasagmesh wakemaitugme.

<sup>4</sup> Dekas iwagmamat shiig pegkeja duka anentainum nuigtú wakannumash kakagchauch shiig anentaimkau ata nuuwai, nuna Apajuik wakegas diyawai.

<sup>5</sup> Nuwa pegkejam duwik batsamajakajua dushakam, Apajuiaig kajinas anentaimaidau asag, imá aishinig sumimajakú ainawai.

<sup>6</sup> Sarashkam Abrahaman umijak: Mina apug, tujaku. Atumek niina nawanji asajum pegkeja nu takaakchau shiig puyatkas pujumain ainagme.

<sup>7</sup> Aishmag aidautigmeshkam nuwemjaig shiig antugdaikajum pujustajum, nuwak kakaakchau asamtai. Apajuishkam nuwanash wait anentau asa pujut nagkanchaun susauwai. Atum nuwemjai shiig pujushtak, Apajuishkam ni augmash antugtamkachag-tatui.

*Ashí Cristo nemajuidau nunimainji aidau*

<sup>8</sup> Inagnamun tajime, ashí atumek shiig anendaisa pujustajum, betek nuninuk anentaimkau, dekaskenum yatsut anendaisajum aneniakjum. Wait anenkagtin, nuigtú imanchauch atajum.

<sup>9</sup> Pegkegchau awajtamainakuish, pegkegchaunmag iikaigpajum, pegkegchau chichag-tamainakuish pegkegchauk chichagkaigpajum. Duka dutiktsuk pegkeg chichagkatajum, nuna nuninak pegkeg yumigkia nuna jukitnume tusa untsukbau ainagme.

<sup>10</sup> Wagki: "Ni pujutan aneas diyak, pegkeg tsawantan dakujus inagkeaktatus wakegauk, pegkegchau chichatnak idaisati, tsanumsá chichat aina nunashkam.

<sup>11</sup> Pegkegchauk tupanjata nuniakum pegkeja nu takastá, agkan pujuta nu egaktá nuniakum duke wejítá.

<sup>12</sup> Wagki Apu Apajuik pegkejan takaina nuna kuitamak,

dita Apajú augbaunash antujui;

untsu aents pegkegchaun takaina Apu Apajuik diitnash dakitawai".\*

<sup>13</sup> ¿Yaita dusha pegkegchau etamainush, atum pegkeja duke takagminish?

<sup>14</sup> Tujash atum pegkeg takaakjum waitiakjumek shiig aneestajum. Makichkish ishamaigpajum nuigtush uwakmamaigpajum;

<sup>15</sup> duka nunitsuk, atumi anentaiminish Cristo atumi Apujum anentsajum eme anentajum, nuniakjum tuke umintsau atajum atum ayamjumaktin, kakagchau nuigtú ajantsá diijatkejum, atum dakamu ajutjamaina nuna pachis tujamainakui ashí ujamaína nu,

<sup>16</sup> tujash pegkeg anentaiyai nuigtú eme anentsajum dutikatajum, atum Cristo nemaju asajum shiig pujajum nuna pegkegchau chichagtamainak wainak tsanumjuptaina nu datsagtinme.

<sup>17</sup> Wagki pegkeg takaaku waitiamu nu imá pegkejai, Apajuish aatus wakegakuig, pegkegchau takaaku waitmaina nu.

*Jesucristo iina iwaintugmak waittsamu*

<sup>18</sup> Wagki Cristushkam tudau aidaunum makichkia jakauwai, pegkejan takauwa nu pegkegchau takau aidaunum, Apajuiyai jujamkita tau asa. Iyashinig jaak waittsauwai tujash aneantui Wakaní Pegkejiya nuna senchijin,

<sup>19</sup> nunik aents jakau aidau wakaní tuke achikbaujai betek batsatbaunum wee chichaman etsegkauwai,

<sup>20</sup> yaunchuk Noé pujusmatai batsamajakú intimkiaju aina nuna, Apajú waugtutsuk arcan najantai dakajakua dui, nu nuniemunum ujumak aents, ocho yuminmag uwemjajui.

<sup>21</sup> Nunú yumia duka yamimainag nuna iwainawai, nu aaja nuniaku yamai uwemat juinag nu. Yamimamuk iyashnak pegkeg ematsui, ayatak anentaimtajuish pegkeg Apajú emtinish atajai tabauwa nuuwai; duka Jesucristo nantakiuwa dui uwemnwai,

<sup>22</sup> nigka nayaim waka, Apajú untsujin eketui; niinig sumimtikamui ángel aidau, wakan senchigtin aidaush, agkajunum inamin aina dushakam.

## 4

*Apajú don sujamsamu shiig kuitamka takamain*

<sup>1</sup> Cristo jutiini niina iyashin waittsau asamtai, atumshakam nujai betek nuniktasajum anentaimsatajum; wagki ni iyashin waittsauwa dui tudaunak inagnakui,

<sup>2</sup> wajupa tsawan pujumain awa nunak, niina iyashí senchi wakegamun takaa pujutsuk, Apajú wakegamua nunak takastinme tujamu asa.

<sup>3</sup> Kuashat tsawantai aents Apajú anentaimtuchu takaina nu takaajakuitjum duka idaisatajum, pegkegchau tunamatja pujujut aidau, iyash senchi wakegamu aina nu, nampeamu aidau, fiestanum nampeaku yuamu aidau, uma umakua weamu nuigtú apajuimtai dakitmain aina nu emematut aina dushakam.

<sup>4</sup> Nunú nuniatumun aents atumjai pegkegchau takajakú aidauk, atum ditajai ijunja pegkegchau takat dakitamu waipainak, waggag aninawa tusag pegkegchaun chichagta-mainawai.

<sup>5</sup> Tujash dita takasbaujinak etsegtumakagtin ainawai, iwaku aidaun nuigtú jakau aidaunash titin uminas puja nui.

<sup>6</sup> Nuadui yamajam chichama duka jakau aina nuish etsegkamui, ashí aents jau aina nunisag jakau ainakush, yamaik wakaninig Apajuijai tuke pujustin atinme tusa.

<sup>7</sup> Ashí wájí aina nu nagkankatnuk tsawantak tikiju wajasé, nuadui atumek shiig ebetmamja pujusjum, puyatjusjum Apajú aujú batsamtajum.

<sup>8</sup> Ashí ju aina nuig atumek pempeentunisjumek senchi aneenitajum, wagki anenka nuuwai kuashat tudau aidaunash tsagkugkagta duka.

<sup>9</sup> Atumi jeeminish pempeentunisjumek judaitajum augmatdaitsuk.

<sup>10</sup> Makí makichkitijum don jukiu ainajum nujai tikichish yaigtajum, shiig kuitamka takastajum Apajú anentag makí makichik niimtinun amasajua nu.

<sup>11</sup> Makichik aentskesh chichaakug Apajú chichame tawa dutiksag chichaktí, makichik aentskesh takaakug Apajú senchí suwa nujai takastí, dutikamunum Apajuiya nu eme anentam atí; nuniakjum Jesucristo yaimpasmatai ememattajum, Apajú senchigtin ajumaish tuke atina nu. Aatus atí.

*Cristo waittsauwa nunisaik waitmain*

\* 3:12 Sal. 34.12-16.



<sup>12</sup> Aneetaig aidauh, utugchat katsunmainchaunum jegakjumes anentai jegagcham-nuk anentaimtigpa, makichkish waji nagkaechataiya nunin nagkaetamu diisaigpajum.

<sup>13</sup> Duka nunitsuk, Cristo waittsauwa nunisjumek waitiau asajum shiig aneastajum, nuniau asajum ni imanjin wantinkatna duish shiig senchi aneakjum dakujusminjum.

<sup>14</sup> Cristo nemajin asagmin pegkegchau chichagtamainakuish atumek shiig aneastajum, shiig aneastajum Apajui Wakani imana nu atumin tuke pujau asamta.

<sup>15</sup> Nunin asamta atum ainajum anuiyag magkagtin, kasa, pegkegchau takau, tikich-dau niimjuinak waitu yujau aina nunikag waittsashti.

<sup>16</sup> Tujash makichkikesh Cristo nemaju asa waitiakug datsamigka, nunitsuk nu waitiamua dui Apajuin ememattinne.

<sup>17</sup> Apajui aentsji aidauti waittsatnuk yamaik nagkamnae, aatus nu jutiini waitiamu nagkamna aniaish, yamajam chicham Apajuinua nuna umiinatsu dusha, ¿wajuk nagkankatnuk ainawa?

<sup>18</sup> Pegkejan takaukesh tujiyatak uwema nuniaish, ¿Apajui anentaimtuchu nuigtú tudau aidauish wajuk juaktinuk ainawa?

<sup>19</sup> Nunin asamta, Apajui wakega dutiksag waituidauk, ditá wakaní aina nunak Apajui najankagtin betek umina nuna idaitumainai nuninak pegkeja nunak takamainai.

## 5

### *Anciano aidau dutikmaina nu*

<sup>1</sup> Anciano aidau atumjai pujuina nuna segajai, wishakam dita anciano aina nunin asan, Cristo waittsamu aidounash wainkauwaitjai, wishakam ni jui taak niina imanjin iwainaktina nuish pachinkatin asan.

<sup>2</sup> Apajuinu atumjai ijunaina nu kuitamkatajum, atumin idaitugmasua nu, duka shiig wakesajum dutikatajum; dutikata tujamkui nunitsuk, nuigtush kuichik anentaimtusa dutikawaigpa, Apajui wakega dutiksagmek dutikatajum.

<sup>3</sup> Atum kuitamjum nu atumdau asamta utugmaina dutikawaigpa, duka nunitsuk dita pegkeg iwaintukta tabaunum kakanmamsatajum.

<sup>4</sup> Nuniau asajum, pastor ashí nagkaekagtasua nu wantinkatna dui atsejutai duka najanamu kagama nuninchau tuke atina nu jukitnaitjume.

<sup>5</sup> Nunisjumek datsauch aidauwah, anciano aina nui sumitkau atajum; ashí pempeen-tunisjumek sumimdaimain ainagme imanchau anenmamsajum, wagki:

“Apajui emebau aidau nak dakitus diyawai, tujash imanchau aina nuna wait anentawai”, tau asamta.

<sup>6</sup> Nuadui imanchau iwainmamkatajum Apajui senchigtina nui, nuniagmin tsawan jegatai ni eme anentsá diitai etamti.

<sup>7</sup> Ashí atum uyumamuk Apajui idaitustajum, wagki ni atumnak kuitamjamu asamta.

<sup>8</sup> Aneaku niimkau atajum, atumi shiwajum iwanchia duka pegkegchaun takamtijam-satatus, ikamyawa kajeak shinuwama imatak teentugmawai;

<sup>9</sup> nuniau asamta dekaskeapi tabauwai tajitkatajum, ashí nugkanmaya atumi yatsum aidauish, atum waitiajum nunisag waituina nu dekaidau asajum.

<sup>10</sup> Tujash Apajui ashí wait anenkagtina nu, niina imanji tuke atina nui Jesucristui etegtamjauwai, dutijamau asa atum ujumak tsawan waittsa inagkeakiagminish Apajui pegkeg etabiagtatui, dutijama senchijin amastatui ebetmamag niini tsujamainchau atinne tusa.

<sup>11</sup> Nigki ajumaish tuke senchigtin atí. Aatus atí.

### *Inagnaku akatmabau*

<sup>12</sup> Junak Silvano, yatsut betek umina nu yaintsamta ujumak chichaman agatjajime atumesh anentaim ichichiagtajum, nuniakjum Apajui wait anenkagtamuji dekaskea nuig ebetmamjatajum tusan ujaktasan.

<sup>13</sup> Iglesia Babilonia awa nu, atumjai betek etejamua nunú nuigtú Marcos mina uchijua imana dushakam kumpamjainawai.

<sup>14</sup> Makí makichik pempeentunisjumek aneenisjum kumpamdaiyatajum. Ashí atum Cristunu aidautigminak shiig agkan anentaimsa pujut ajutjamtinne.

Aatus atí.

## Pedro awentsaik carta agagbau

### *Kumpankagtamu*

<sup>1</sup> Witjai Simón Pedro, inakaitjai nuigtush Jesucristo apostoljiyitjai, iina Apajuii Uwentijamin nuigtú Jesucristo pegkejan takauwa nu dekaskeapi tabau shiig pegkeg jutii ajutjama duke ajutjama asagmin atumnash kumpanjime.

<sup>2</sup> Iina Apají Apajui, iina Apuji Jesusjai anenjauch wait anenjamag shiig agkan pujutan amastinme. Atumek ni pachisjumesh shiig dekau asagmin.

### *Jesusan nemagkaju aidau pujumain*

<sup>3</sup> Apajui niina senchijin ashí iina pujutjin atsumamua nuna nuigtú nigki puyatjusa umigta nunash sujamsauwai; nigki niina imanji nuigtú ni takasbauji shiig pegkeja nunash dekatnume tusa etegtamjauwai.

<sup>4</sup> Nunú senchik ashí pegkeg tikichin nagkaesau aidaun ni anagtamauwa nunash sujamsauwai; dutikamu asag ju nugka jui pegkegchaw wakegat aina nunak agkanmagawag Apajui wajukuita imanuk atinme tujamu asa.

<sup>5</sup> Nuadui atumshakam kakanmamainaitjume dekaskeapi tabauwa nu, pegkeg takamua dusha ajití tabaunum; pegkeg takamua nu, dekata dusha ajiti;

<sup>6</sup> dekata nu, iik kuitamamta dusha ajití; iik kuitamamta nu, waugtackchaw ata dusha ajiti; waugtackchaw ata nu, Apajui puyatjusa umigta dusha ajiti;

<sup>7</sup> Apajui puyatjusa umigta nu, yatsut anendaisa anenita dusha ajiti; yatsut anendaisa anenita nu, aneenit ajiti.

<sup>8</sup> Ashí ju aidau ajutjamainakuig nuigtush takamtikamak, nuní senchi iina Apuji Jesucristo dekatnum yaimpakatjume, nuniau asajum atsumchataig nuigtú wainkagmek juwakchattagme.

<sup>9</sup> Tujash juna betek uminachuk aents wainmachujai betekai, nuniachkush atushat wainmachua nuninai, yaunchuk tudauji aajakua nuna Apajui tsagkujamunash aneachu asa.

<sup>10</sup> Nuadui yatsug aidauh, atumek Apajui untsukbau nuigtú etegkamua asajum nuig ebetmamata tabaunum kakanmamsatajum; wagki aaja nuniakjumek kakajus tudauk takaschattagme.

<sup>11</sup> Nuniau asajum shiig anentsá, iina Apuji Uwentikagtin Jesucristua nuna inamtaiji tuke atina nui awayam atatjume.

<sup>12</sup> Nuadui junak tuke aneemtiksanké atatjime dekagminkish, nuigtú dekaskea nu atumin ajutjamjum nui ebetmamjau ainagminig.

<sup>13</sup> Wi iwaaku pujag duik, tuke aneemtiksanké amainaitjim duka pegkejai.

<sup>14</sup> Wagki dekajai dukap pujutsuk jakattag nunak, iina Apuji Jesucristo dekamtiujama nunisnuk.

<sup>15</sup> Tujash ashí wi dutikmainnak dutiksan dekapstajai, wi jakamtaish nunú aina nunak, tuke aneaku atinme tau asan.

### *Cristo imanjin wainkaju aidau*

<sup>16</sup> Wagki iina Apuji Jesucristo ashí ni senchijijai minitna nu pachisa atum dekamtikauwaitag duka, aents anentaimsa augmattsamu aina nuninchauwai, duka iina jiin niina imanji wainkauwaitag nu tibaiji,

<sup>17</sup> ni Apají Apajuiya nu eme anentus nuigtú tsaaptin ema awajus, nu tsaaptin shiig pegkeja nuiya chichaman akupjak: "Juuwai mina uchig anetaijuk, wi etegkamua", tiuwa nu.

<sup>18</sup> Nu chicham nayaimpinmayag jutii antukbaiji, niiji muja pegkegma nui batsamsaja. <sup>19</sup> Nuigtushkam chicham dekaskea nuna profeta aidau tibauwa nu ajutjamji, nunú emamkesjum dekatajum, dita chichakbauwa duka lámpara ekemakam suwen tsaaptin emama numamtinai, nunin asa Cristo yaya etsawamak tsaaptin wegama imana nu atumi anentaiminish tsaaptin etamtatui.

<sup>20</sup> Tuja ashí dekatkau dekamainaitjum duka: Atak uminkatin chicham Agagbauwa duka, makichik aentskesh ni wajuk anentaimua nu tichamu ainawai,

<sup>21</sup> nu atak uminkatin tibauwa duka, makichikish aents wakegak tibau ainatsui, duka aents pegkejam Apajuiinu aajakajua nuna, Wakani Pegkejiya nu ujaam tiaju ainawai.

<sup>1</sup> Israelnumash wait profeta aidaush aajakajui, atum ainajum nuish maestro waitá jintin aidau agtina nunisag. Ditak dekamainchaun jintidiagtinaí ditá anentai pegkegchauwa nuiyan, aatus nuninak Apu Jesús ditan agkanmitkauwa nunash daki-tiagtinaí; nuninaí pachiachbau dita bakumatnuji jegajiagtinaí.

<sup>2</sup> Kuashat saetukagtinaí datsanmainun takaina nuna, nuninak dekaskea nunak pegkegchau chichajiagtinaí.

<sup>3</sup> Kuashat kuichik ajuttí tabaunum waitá jintinak jujutjabiagtinaí; tujash dita baku-matna duka yaunchuk nagkamas umigkamui, dutikamu asamtai dita megkaekatna duka dakas ajawai.

<sup>4</sup> Apajuik ángel aidau tunamakajunak tsagkuujachui, ayatak suwimak tuke atin suwea nui achijá utsauwai, tsawan jegatai suwimkan susata tau asa.

<sup>5</sup> Nuigtushkam Apajuik yaunchuk aents ju nugka jui batsamajakajua nunakesh tsagkugsuk, diluvio awetiuwai aents pegkegchau takau batsamajakajua nuna, ditikak Noé pegkejan chichagkagtujakua nunak, nuigtú siete aents aidaují uwemtijauwai.

<sup>6</sup> Aikasag yaakat aidau Sodoma nuigtú Gomorra aina nunak suwimkan suwak apekui, dutika yuku awajsauwai, nunak atak aents pegkegchau takaidau batsabiagtina dusha wainkatnume tusa iwainak dutikauwai,

<sup>7</sup> tujash Lotnak pegkejan takau asamtai uwemtijauwai, aents pegkegchaun takagtai anentaimak waitujakua nuna,

<sup>8</sup> wagki nunú aents pegkejan takau ditajai ijunag pujujakua duka, pegkejan anentaima nunak waitiau kashí kashinig pegkegchau takagtai wainak nuigtush antau asa.

<sup>9</sup> Apu Apajuik niina puyatjus umijuina nunú utugchatnum jegatai agkanmitkatnak dekawai, ditikak aents pegkegchau takaidaunak ayatak kuitamui tsawan jegatai suwimkan susamig tusa,

<sup>10</sup> nunak iyashí pegkegchau wakega nunak takainak, ni inabaujiya nunash wainkaya nunin diina nuna dutikatnai. Nunú aina duka antumtikmainchou nuigtush emebau asag, senchigtin wagaaku aina nu pegkegchau chichagtanash ishainatsui,

<sup>11</sup> nuninaí, ángel ditá nagkaesau dekas senchigtin aina dukesh, dita suwimak jukitnun pachisagkesh pegkegchauk chichajuinatsui Apu Apajuí eemtinish.

<sup>12</sup> Tujash nunú aents aidauk ditakesh antachiatak wají pegkegchau aidau chichainawai; ditak kuntin anentainchau ayatak akiinawag maam megkaega nuniktin ainawai,

<sup>13</sup> dita pegkegchau takasbaujin suwimkan juinak. Nunú aidauk pegkegchau nuigtú tsuwapaekau ainawai, nunin aidau atumjai ijunag yuinak shiig anenawai ditá pegkegchaují aina nujai.

<sup>14</sup> Nuwa aidauwash tsanijimat anentaiyai dii yujau ainawai, nunidau asag tudau takatnash yawetuinatsui, nunisag aents imagnis Cristun nemajuinatsu nunash tsanú yu-jainawai, pegkegchau aidau wakeeta nunak unuimatjau asag, tikima aents pegkegchau ainawai.

<sup>15</sup> Ditak pegkeg takatnak idaisag, Balaam Bosora uchijí nunikua nuna wejuinak dewakaje, duka pegkegchau takaamujin akiam atatus wakegajakui,

<sup>16</sup> nuniau ni pegkegchaujini gijyankauwai; makichik burro kijin aentsmitkatai, chichachuitak, aentstijai betek chichakui, ditikak profeta anentaimkas nuniamujin idaimitkasui.

<sup>17</sup> Nunú aidauk yumigmat kuyuuwa nunin ainawai, yujagmin dase umpui juwama numamtin, nunú aidau batsamsati tibauk shiig suwe kanchi wajas awa nuuwei.

<sup>18</sup> Ditak ememas chichainak nuigtush wainak chichau ainawai; nuninak wakegat pegkegchaun iyashnum takanitan anentain egketin ainawai, aents yamá pegkegchaujini idaiyas pujuina nuna.

<sup>19</sup> Nuninak anagkuinawai agkan pujuta nuna, pegkegchau takatnum achikbau ainayatak; wagki ashí achikbau aina duka depetkamu asa nuniawai

<sup>20</sup> Jutii Apuji Jesucristo Uwemtikagtina nuna nemajak, pegkegchau ju nugkanmaya takatan idaisauwaitak, ataktú dita takajakbaujin waketjuinakug, depetkamu weawai, nuniau asa yaunchuk aajakbaun nagkaesau pegkegchau weawai.

<sup>21</sup> Ditak imá pegkeg takat pegkeja nunak dekamainchaunas dekau aajabiatai, chicham pegkejam umiktin susamua nuna dekauwaitak idaiyina nunitsuk.

<sup>22</sup> Tujash ditai proverbionum dekas tawa duka uminui: “Yawak iyakbaujin pempeenti-nai, kuchi imaimush kuchan tadaetinaí”, tawa nu.

### 3

<sup>1</sup> Aneetaig aidauh, juuwai carta awentsanuk agatjim nu. Nunú mai agagbauwa nuig wakekajai, shiig anentaimtijatasan taja dui ayatak pegkegnak anentaimainak,

<sup>2</sup> profeta pegkejam aidau tibaauwa nuna adeagtinme, nuigtú chicham umiktinun Apu Uwentikagtin tibaun apóstol aidau sujamsamua nuna tusan.

<sup>3</sup> Dekas dekatkauk ju dekamain ainagme, tsawan nagkantina duik, iyash pegkegchau wakegamujin takamtikin aina nu, dushiktamas chichagtamainak

<sup>4</sup> tiagtinai: “¿Taatnaitjai tusa anagkagtuauwa dusha wajukae? Wagki iina muunji jinawagmataish, ashí wají nagkamsa najankamua duka yamaikish nunisag ainajama” tusag.

<sup>5</sup> Nunú aents aidauk, yaunchuk tsawan aajakua imanui nagkamas Apajuí nayaimpin najana niina chichamenig nugkan yuminmaya akankamu, yuminmag egketka nunak tuke aneas dekachu wajukmaina nuninawai.

<sup>6</sup> Yaunchuk Apajuí yumin yutumtikag ashí nugkan amugmatai, aents nui batsamajakui duka ashí jinawajui.

<sup>7</sup> Tujash nayaim, nugka yamai aina juka, niina chichamenig esaktin kuitamkam awai. Nunú jiiya nu apeatnai aents pegkegchau takau aidau suwimak suwamu tsawan jegatna dui.

<sup>8</sup> Tujash kajimatgigpa aneetaig aidauh, Apu Apajuiyai makichik tsawantak mil mijana nuninai, tuja mil mijanak makichik tsawanta nuninai.

<sup>9</sup> Apu Apajuik ni anagkagtuamujinak umitskek idaisashtatui, ujumak aents taashtina nunin anentaimtuina nunak, nuninaitak nigka waugtuk dutikchauwa dui, makichikish megkaekashtinme, ayatak pujutjin yapajiatnume tusa aniawai.

*Yamajam nayaim, yamajam nugka*

<sup>10</sup> Tujash Apu Jesús minamuk kasa pachichbau kashi miniyama numamtuk atinai; nu tsawantinig nayaim aidauk shiig ishamainun kedegtuk megkaegainai, nui ayá dushakam esakag yuku waigkagtinai, antsag nulkashkam ashí nui takasbau ayá dushakam esakagtinai.

<sup>11</sup> Ashí nunú aidauk aatus utsankagtin asamtai, atumek pegké pujakjum, puyatjusjum umigmaitjume,

<sup>12</sup> nuniakjum shiig senchi wakejusjum tsawan Apajuí minitnujiya nu dakastajum. Nu tsawantinig nayaim aidauk jiiyai apekbau atinai, tuja nui ayá dushakam jii keetai yumimeakag megkaejagtinai.

<sup>13</sup> Tujash jutiik, ni anagtamamu yamajam nayaim aidau nuigtú yamajam nugka nu dakainaji, ayatak pegkejak takaamu atina nu.

<sup>14</sup> Nuadui aneetaig aidauh, nunú nuniktina nu dakainakjum, kakanmamsatajum niina emtin shiig agkan pujakjum, pegkegchau atsugbau nuigtú nuninai tusaish tumainchau wantinkamnujum.

<sup>15</sup> Adeagtajum iina Apuji emamkemas dakama nunak, uwemjatnume tabaunum aniawai. Juna pachis iina aneetaiji yatsug Pabloskam, Apajuí dekat susamua dui agaje,

<sup>16</sup> ashí ni carta agagbauwa nuig juna pachis chichawai, nunú aina nuiya shiig antumainchaush aina nuna, aents dekachu aidau nuigtú ebetmamjachu aina nu yajupenawai, dutikag tikich agagbau aina nunash dutikaidau asag, dita bakumatnujin umigmamainawai.

<sup>17</sup> Nuadui aneetaig aidauh, atumek emtika dekau asajum kuitamamkatajum, aents pegkegchau aina nu tsanugmajagmatai wejajakjum, atum ebetmamja pujamu idaisajjum.

<sup>18</sup> Nunitsuk, dekas tsakagtajum anentag jukimua nui nuigtú iina Apuji Jesucristo Uwentikagtina nu dekatnum, nigki yamaish nuigtú tuke pujustin tsawan jegatna nuish ememattai atí.

Aatus atí.

## Juan nagkamchaku carta agagbau

### *Chicham pujutan sukagtin*

<sup>1</sup> Cristo chicham pujutan sukagtin yama nagkamtin aajakua nunú chichaamu antugkauwaitji, ni iwainaja takaamush iina jiin wainkauwaitji nuigtú ii uwejinish achikaish dekapasau ainaji.

<sup>2</sup> Nunú pujutan sukagtin aentsmaga akiina wantinkauwai nunikmatai wainkau aidauti juwai pujut tuke atinun sukagtina duka tusa etsegtuinaji, nigka yaunchkek niina Apaji Apajuijai pujujakua nunú wantintugmakui,

<sup>3</sup> juti wainkau aidauti nuigtush antuku aidauti etsejuinaji atumesh jutijai ijutkau atajum tau asaja; wagki jutiiik iina Apajijai ijutkaji nuigtú niina Uchiji Jesucristujaiishkam.

<sup>4</sup> Jujú aidauunak atumesh jutijai betek shiig aneasminjum tusan agatjime.

### *Apajuik tsaaptinai*

<sup>5</sup> Jujuwai chicham Jesucristo jintiamu antukuitag duka, nunú etsejuinaji, Apajuik shiig tsaaptinai iman asamtai niinig makichkish suwek atsuwai.

<sup>6</sup> Juti nijai ijutkau pujajai tayatku pegkegchau takata duke wekaetakuik, waitjaji, nuigtush dekaskea duke takaachu asa,

<sup>7</sup> tujash jutiiish ni tsaaptinnun puja nunisaik pujakuik, nijai betek tikich aidaujaish shiig anendaisa pempeentunisaik ijutkau amainaitji, nuniajin Apajui niina Uchiji Jesucristo numpega nujai ashí iina tudaujinash nijatjamag esakatjamui.

<sup>8</sup> Tujash minak tudauk atsugtawai tumamkuik, jutiiik tsanuunaku tumamji, dekaskea nu tumamchau asa.

<sup>9</sup> Nu tu wekaetsuk juti tudauji etsegtumajinig, iina tudaujinash tsagkugtamag nuigtú ashí pegkegchau aidauunash esaktugmagtatui, nigka betek umina ibau asa nuigtush pegkegnak takauwa dui,

<sup>10</sup> tuja wika tudaunak takachuitjai tumamkuik Apajuik waita nunin emaji, niina chichame aatus tujamtsaig tau asa.

## 2

### *Iina abogadojig Cristui*

<sup>1</sup> Mina uchuchig aidauwah, jujú aidauunak tudau takasainum tusan agatjime; tujash dewakjum makichkitigmekesh tudau takaakjumesh dekaatajum Apajui emtin iinu abogado pujutamji Jesucristo pegkejan takauwa nunú.

<sup>2</sup> Niiyai iina tudauji aidauun tsagkugtamjatatus jakauwa duka, tujash imá iinigkik nunikchauwai, ashí nugkanum aents batsata nuna tudaujinish jakauwai.

### *Chicham umiktina nui aneenitajum tibau*

<sup>3</sup> Nuadui ni chicham umiktajum tibauwa nu betek umiinakuik, ninuapitja tusa dekamainaitji.

<sup>4</sup> Tuja makichik aentskesh: "Wika niinak dekajai" tayatak, chicham ni umiktá tibauwa nuna umiachuk waitjak tu wekaewai dekaskenum tachau asa,

<sup>5</sup> tujash Apajui chichamen umia nuuwai, dekaskenum aan nagkaemas Apajui anenkajin deka duka; nuniaku dekamainaitji nijaimpap ijutkaji tusa.

<sup>6</sup> Aents Apajuijai ijutkau pujajai tauk, Jesús pujujakua nunisag pujumainai.

<sup>7</sup> Aneetaig aidauh, yamajam chicham umiktinnak agattsujime; yaunchuk chicham umiktin ajutamajakua nunak agatjime, jujú umiktin yaunchuk aajakua duka, chicham nagkamchakjum antukuitjum nuuwai.

<sup>8</sup> Nunin aig yamajam chicham umiktina nuna agatjime, nu chichama duka Cristui dekaseg aajakui nunisag atumnash ajutamtinme, wagki nunú chicham betek umiagmin atumi pujutjumin suwe awa duka tsaaptin wetai megkaekattawai.

<sup>9</sup> Makichik aentskesh tsaaptinnun pujajai tayatak tikich Cristo nemagnun kajejauk, eke suwenum pujau asa nuniawai.

<sup>10</sup> Ni yachi Cristo nemagnun anea duka tsaaptinnun pujawai, nuniau asa niini utugchat igkumainuk atsawai.

<sup>11</sup> Untsu niina yachi Cristo nemagnun kajeja duka eke suwenum pujawai, nuigtush suwenum wekaewai, nuniau asa dekatsui tuwí wegawa nunak, wagki suwe aina nu jiin ejatbau asa.

*Dekaskenum dekaskeapi tabau*

<sup>12</sup> Uchuchig aidauh, atumnak Jesucristo mantamnatum Apajuí atumi tudaugminak tsagkugtamjaju asagmatai agatjime.

<sup>13</sup> Atum uchigtin aidautigmin agatjime, wagki nagkamtinish tuke pujujukua nu shiig dekau asagmin. Atum datsauch aidautigminash agatjime, iwanch depetkau asagmin. Uchuchig aidauh atumin agatjime, wagki iina Apají Apajuuya nu dekau asagmin.

<sup>14</sup> Uchigtin aidautigmin agatjamjime, nagkamtinish pujujukua nu dekau asagmin. Atum datsauch aidautigminash agatjamjime, wagki senchi asajum Apajuí chichamega nu umiakjum iwanchish depetkau asagmin.

<sup>15</sup> Pegkegchau takat ju nugkanmaya aidaun, Apajuí nemagchau takaina duka takasaigpa, aents ju nugka juwiya pegkegchau takat aina nuna takaa pujuidauk Apajuinak aneatsui.

<sup>16</sup> Wagki ashí nugkanum ayá nu, iyash wakegamu aidau, diisá wakejut aidaush, nuigtú wiki iman achainjash tusa anentaimat aina dushakam Apajuinumia ainatsui, nugkanmaya ainawai.

<sup>17</sup> Ju nugka juka, nuigtú wakejumain aina dusha megkaejattawai; tujash Apajuí wakegamun takaina duka, tuke pujutin ainawai.

### *Anticristo*

<sup>18</sup> Uchuchig aidauh, tsawan nagkanbaunum batsatji, nuigtush atum anticristo wantinkatnai tabau antukuitjum nunisag yamaik kuashat anticristo aidau wantinjaje, nuniau asantai dekeinaji tsawan nagkanbaunmap batsatji tusa.

<sup>19</sup> Duka jutii ainag juyag jijnjaje, tujash dekaskenmag jutiinumia aajakchajui, wagki jutiiinumia aajakuitkug jutiijai batsamain ainawai, tujash jijnjaje jutiijaichu aina nuna iwainmamkata tuidau asag.

<sup>20</sup> Tujash atumek Cristo Wakani Pegkejin sujamsamu ajutjamjume, nunin asantai ashí waji aidauk dekagme.

<sup>21</sup> Junak dekaskea nu dekachu asagmin agattsujime, dekaskea duka dekagme, wagki makichikish waitnumiag dekaskek jijnmaitsui.

<sup>22</sup> ¿Yaita waitash, Jesusak Cristuchui tuina duchaukaih? Nuuwai anticristo, Apajuinash nuigtú niina Uchijinash dakita nu.

<sup>23</sup> Ashí aents Apajuí Uchijin dakitauk, Apajinash dakituinawai. Yaa dekas Jesusak Apajuí Uchijiyai tusa etsegtawa, nuuwai Apajuijai ijutkau aidauk.

<sup>24</sup> Atum nagkamchakjum antukuitjum duka nunisag atumnash ajutjamtinme. Atum nagkamchakjum antukuitjum nunú nunisag atumin ajutjamkuig, atumshakam nunisajumek Apajuijaish nuigtú niina Uchijijaish ijutkau atatjume.

<sup>25</sup> Nunuwai Cristo pujut tuke atinun anagtamamun amasua duka.

<sup>26</sup> Junak tsanugmagta tuidau asagmatai agatjime.

<sup>27</sup> Tujash atumnak Jesucristo Wakani Pegkejin sujamsajua nu ajutjamjume, dui atsumaitsugme yaki jintinjuawa tusagmek. Wakani Pegkeji atumin pujugtamjum nu waitchau dekaskea nuna ashí jintinjamattagme nunin asantai niijaig ijutkau atajum.

<sup>28</sup> Uchuchig aidauh yamaik niinig ijutkau atajum, ni minakuish, kajintsá datsamtsuk puyatkas igkugtag tabaunum.

<sup>29</sup> Atumek dekagme Jesucristo pegkejan takauwa duka, nuniau asajum deka-mainaitjume ashí pegkejan takaina duka Apajuí uchijimpap ainawa tusajum.

## 3

<sup>1</sup> Diistajum wajupa iina Apajuí anempatsji, imatijamu asa mina uchig aidau tujamji, nuadui jutii Apajuí uchijí ainaji; tujash Apajuí nemajuinatsu duka dekagmainatsui, wagki niinash dekachajua dui.

<sup>2</sup> Aneetaig yatsug aidauh, yamaik Apajuí uchijí ainaji, tujash ii wajuku agtinaitji duka eke wantintsuji; nuninayatku dekeinaji Jesucristo jui minak wantintugmaktina duik niya imanuk agtinaitag duka, nunikaja ni wajukuita duka imatiksaik shiig wainkatnaitji.

<sup>3</sup> Ashí aents Jesucristo dakaidauk, ni pegkegma imanuk atatus kakanmamui.

<sup>4</sup> Untsu aents tudau takaina duka, Apajuí takasaigpajum tibaauwa nuna umiinachu asag nuninawai. Tudau takata duka chicham umiachbaunum nuninui.

<sup>5</sup> Atumek dekagme Jesucristo jutii tudaujin jujutjamkita tau asa tajutjabauwa duka, nuigtush niinig tudauk atsawai.

<sup>6</sup> Ashí aents Jesucristujai ijutkau pujuidauk tudau takaaajakbaujiya nunisagkek takaa pujumaitsui; ashí tudau takaina duka wainkachu asa nuigtush dekachu asa nuniawai.

<sup>7</sup> Uchuchig aidauh, kuitamamkatajum makichik aentskesh tsanugmajainum. Pegkejan takaa duka pegkeg asa nuniawai, nunú aents aidauk Apajuí emtinish pegkeg ainawai, Jesucristo pegkeja imanuk.

<sup>8</sup> Tujash tudau takaa wekaga duka Iwanchdau asa nuniawai, wagki Iwanchia duka nagkamting tunamajui. Nuadui Apajui Uchijiya nu Iwanchi takatji aina nuna emegkakta tau asa tauwai.

<sup>9</sup> Makichkish Apajui uchijiya duka tudaunak takaa pujumaitsui, wagki Apajui pujutjiya nunu ajamu asa, tudaunak takaa takakuag wemaitsui, Apajui uchiji asa.

<sup>10</sup> Aatus iwainmamañawai Apajui uchiji aina nuna, nuigtú Iwanchi uchiji aina nunashkam. Ashí pegkejan takainatsu duka nuigtush tikich Cristo nemagkau aidaunash aneatsu duka Apajuinuchu ainawai.

*Chicham umiktina nui aneenitajum tibau*

<sup>11</sup> Jujuwai chicham etsegbau nagkamchakjum antukuitjum duka: Pempeentunisaik aneenita nu.

<sup>12</sup> Cañ wajkauwa nuninuk achagmi, nigka iwanch wakejamun umiau asa yachin mauwai. ¿Wajina dutikau asamtai mauwaita? Cañ niina takatjig pegkegchau asamtai, ni yachi imá pegkejan takau asamtai mauwai.

<sup>13</sup> Yatsug aidauh, aents Apajui nemagchau aidau kajegtamainakuish, kajegdaichatain nagkami kajegtamaina nuninuk anentaitgajum.

<sup>14</sup> Jutiik dekainaji jatanum batsatuti tuke pujutnum inagkeakbauwaitag nu, nuniau asá yatsut aidaujaish aneeninaji. Yachin aneatsu duka, jakaujai betek pujawai.

<sup>15</sup> Ashí aents yachin kajeja duka magkagtinjai betekai; nuigtush magkagtina nudaug, pujut tuke atina duka niinig atsujui.

<sup>16</sup> Jutiik Jesucristo iini mantamdauwa dui anenkak dekauwaitji, ni jutiini mantamnak waittsau asamtai jutiishkam nunisaik iina pujutjig tsagkaamainaitji tikich Jesucristo nemajuina nui.

<sup>17</sup> Makichik aents Apajui nemajin ju nugkanmaya ashí waji aidau ajamaitak, yachi atsumaun wainiatk yayachush, ¿wajuk Apajui anenkajish niina anentainish ajumainaita?

<sup>18</sup> Mina uchuchig aidauh, ayatak chichamaik, wenui aneenin achagmi, nunitsuk dekaskenum ii yainiamunum iwaintunikagmi.

<sup>19</sup> Aaja nuniaku dekamainaitji dekaskenum Apajuinuapitja tusa, nuniaku iina anentainish Apajuijai ijutkajapi tumainaitji,

<sup>20</sup> Jutiik iina anentai ii pegkegchau takasbaujin bakumamainun dekamtijamkui waituinaji, tujash Apajuijai juti anentai nagkaesau ashí dekgatama duka.

<sup>21</sup> Aneetaig aidauwah, iina anentain nu aaja anentaibau atsugtamú asamtai, juti bakumamainuk atsugtamjiapi tusa Apajuijai kajintsá anentaibau ajutjamui;

<sup>22</sup> nuniaku ashí ii segamua duka niiniya jukittaji, wagki ni chicham umiktajum tibauwa nu umiaku, nuigtú niina shiig awagma nu takaidau asaja.

<sup>23</sup> Jujuwai ni chicham umiktajum tibauwa duka: Niina Uchiji Jesucristo daajiya nui dekaskeapi tuinaku, nuigtú pempeentunisaik aneemaima nu, ni tujabauwa nunisaik.

<sup>24</sup> Ni chicham umiktajum tibauwa nuna umiidaug niini pujawai, nuigtú niishkam ditai pujawai. Jui dekainaji ni jutiini puja nu, Wakanin sujamsauwa dui.

## 4

*Apajui Wakaní nuigtú anticristo wakaní*

<sup>1</sup> Aneetaig yatsug aidauh, ashí aents aidau wakan tujutbaun tajai tuinakuish dekaskeapi tiigpa, nunitsuk dekapstajum wakan ditai awa dusha Apajuinuash ajá tusajum; wagki kuashat wait profeta aidau nugkanum jijnjaju asagmatai.

<sup>2</sup> Aaja dekamainaitjume yana Apajui wakanish ajawa duka: ashí aents Jesucristuk aentsmaga tajutjamauwai tuina nuuwai, Apajui wakaní ajuina duka,

<sup>3</sup> tuja ashí wakan Jesusak aentsmaga taachui tuina duka Apajuinuchui; duka anticristo wakaní ajawai, atum minawai tabau antukuitjum duka yamaik ju nugká jui wantinui.

<sup>4</sup> Uchuchig aidauh, atumek Apajuinu ainagme, nunin asajum depetmakugme; wagki atumiin puja nuuwai nugká puja nuna nagkaesauk.

<sup>5</sup> Ditak ju nugkanmaya ainawai; nuadui nugkanmayanak chichainawai, nuigtush nugkanmaya aidauk antujuinawai.

<sup>6</sup> Jutiik Apajuinu ainaji nunin asajin, Apajuin dekaina duke antugtamainaji; Tujash Apajuinuchu aina duka antugtamsuji. Aatsa dekamainaitji yaa wakan dekaskea dusha ajawa nuigtú wakan tsanumna dushakam.

*Apajuik anenkai*

<sup>7</sup> Aneetaig aidauh, pempeentunisaik aneediagmi, wagki anenkak Apajuinu asamtai. Ashí anejatuina duka, Apajui uchiji ainawai nuniau asa Apajuinash dekainawai.

<sup>8</sup> Anejattsu duka, Apajuinak dekatsui, wagki Apajuik anenkai.

<sup>9</sup> Aatus Apajuik ni anenkajinak jutiinak iwaintugmakui, niina Uchijí makichkiuchia nuna nugká awetugmauwa dui, ni pujutan susati tujamu asa.

<sup>10</sup> Anenkak aatus nagkamnuwai: duka jutii Apajuí aneamunum nunikchauwai, ni jutiinak anempajui, dutikak niina Uchijin awemauwai ni mantamnamunum jutii tudauji aidaunash tsagkugnagtinme tusa.

<sup>11</sup> Aneetaig aidauh, Apajuí jutiin aatus anempaju asamtai, jutiishkam pempeentunisaik aneenimainaitji.

<sup>12</sup> Makichik aentskesh Apajuinak tuke wainkachu ainawai, tujash pempeentuniki aneniajinig Apajuí jutiijai awai, nuniau asa ni anenkajinak aan nagkaemas jutiiin iwainakui.

<sup>13</sup> Aaja dekainaji jutii niijai ijutkau ainag duka, tuja niishkam jutiijai ijutka nu, niina Wakanin sujamsauwa dui.

<sup>14</sup> Jutii wainkauwaitji nuniku asá etsegtuinaji, Apaji ni Uchijin nugkanmayan Uwemti-jatnun awemauwa nunú.

<sup>15</sup> Makichik aentskesh Jesusak Apajuí Uchijiyai tawa nui Apajuik ijutkawai, nuigtú niishkam Apajuinum ijutkawai.

<sup>16</sup> Aaja dekau asaja Apajuí anempamush dekaskeapi tiu ainaji. Apajuik anenkai, nuigtú nu anenka nui pujauk, Apajuijai pujawai, nunisag Apajuí niinish pujawai.

<sup>17</sup> Nunú nuniemunum dekaskenum anenka duka jutiiin awai, tsawan suwimak sukagtau atina dui kajintsá anentaibau ajutjamti tabaunum, wagki ju nugka juig ni pujuakua nuniisaik pujusaju asaja.

<sup>18</sup> Anejatut abaunmag ishamamuk atsuwai. Dekas anejatbauwa nu ishamamunak emegkawai. Apajuí suimkaji ishamaina duka anejatuinachu asag nuninawai.

<sup>19</sup> Jutiik nig anenaji ni dekatkauk anempaju asamtai.

<sup>20</sup> Makichik aentskesh: “Wika Apajuin anejai” tayatak yachin kajejakug, waitjak tawai. Yachin waina nunakesh aneatsusha, ¿utugsaya Apajuí waitshu nunash aneemainaiti?

<sup>21</sup> Jutiinak ju chicham umiktin ajutjamji: Apajuin anea duka yachinashkam aneeti tibusauwa nu.

## 5

### *Dekaskeapi tabau nugkanmayanak depeteawai*

<sup>1</sup> Ashí aents Jesusak Cristui tusa dekaskeapi tuina nuuwai Apajuí uchijí aidauk. Apajuí aneakuik ni uchijí aidaushkam aneaku dutiknawai.

<sup>2</sup> Apajuí aneaku niina chichamesh betek umiakuik dekanui, tikich Apajuin nemajuina nunash anejapi tusaja.

<sup>3</sup> Apajuí aneamuk ni chicham umiktajum timawa nu imatiksaik umiamua nuuwai. Ni chicham umiktajum tujamawa duka kakajus umikchamna nuninchauwai.

<sup>4</sup> Wagki Apajuí uchijí aina duka nugka jui pegkegchau aina nunak depeteawai, nunú depetmamua duka jutii Apajuuyai dekaskeapi tuinag dui depetmainaji.

<sup>5</sup> ¿Yaita nugkanmaya pegkegchaun depetea dusha? Duka Jesusak Apajuí Uchijiyai tusa dekaskeapi tuina nuuwai.

<sup>6</sup> Jesucristuk yuminum yamimajua dui nuigtú cruznum numpen ukajua dui Apajuí Uchijiyai duka dekanauwai. Nunisag Wakaní Pegkeji dekasken chichauwa dushakam: “Jesucristuk Apajuí Uchijiyai” tusa etsegtawai.

<sup>7</sup> Jujú kempatuma juwai dekaske tusa etsegtuina duka:

<sup>8</sup> Wakania nu, yumi nuigtú numpa nu; jujú kempatuma juka nunak tuinawai.

<sup>9</sup> Aents etsegbaush antujuinaji, tujash Apajuí etsegbauwa nuuwai nuna nagkaesau imana duka, wagki duka Apajuí etsegbau asa, niina Uchijin sujamsamua nuna pachis tau asa.

<sup>10</sup> Apajuí Uchijiyai nuna dekaskeapi tauk, nigki nunak etsegtak nuniawai, Apajuuyai nuna dekaskeapi tachauk, wait emawai, wagki Apajuí niina Uchijin pachis etsegtukua nuna dekaskeapi tachau asa.

<sup>11</sup> Juuwai etsegtamua duka: Apajuí pujut tuke atinun sujamsamua nu, nunú pujutak niina Uchijin awai.

<sup>12</sup> Apajuí Uchijiyai ijutkau pujuidautik, pujut tuke atina nu ajutjamainaji. Untsu Apajuí Uchijiyai ijutkau pujuinachuk, pujut tuke atina duka atsujinawai.

### *Pujut tuke atin dekanu*

<sup>13</sup> Jujú aina junak Apajuí Uchijiyai nu dekaskeapi tuidau asajum, pujut nagkanchau jukiuwaitjum nunú aidautigmin dekaatnume tusan agatjime.



<sup>14</sup> Nuadui Apajuiyai kajinmasa anentaimaidau asaja, ni wakega dutiksaik segamak antugkagtawapi tusa dekainaji.

<sup>15</sup> Ii segamunash antugtawapi tusa dekainag nunisaik, ii sumamushkam dekas jukittajapi tumainaitji.

<sup>16</sup> Makichik yatsutkesh tudau jatanum ejekagtina nuna takaachu wainkugmek Apajui segattá, dutikam Apajui pujutan susattawai. Nunak tudau jatanum ejekagtuchua nuna pachisan tajai, wagki awai tudau jatanum ejekagtin, wika nuna takaidau Apajui segattajum tusanuk tatsujime.

<sup>17</sup> Ashí pegkegchau takaamua duka tudauwai, tujash tudau jatanum ejekagtachush awai.

<sup>18</sup> Dekainaji ashí aents Apajui uchijí wajasú aidauk tudaunak takaa pujumaitsu duka, wagki Jesucristo Apajui Uchijiya nu kuitabau asa, nuniau asamtai Iwanchik pegkegchau takastí tusag inamait sui.

<sup>19</sup> Jutiik Apajuinu ainag duka dekainaji, untsu ashí aents Apajui nemagchau aina duka wakan pegkegchau inatai ainawai.

<sup>20</sup> Nuigtushkam dekainaji Apajui Uchijí ju nugka jui tauwa duka, nunik ni dekamti-jabauwai Apajui dekas tuke pujuwa nuna. Jutiik Jesucristo dekaskea nujai ijuntsa pujuinaji, duka Apajui dekaskea nuuwai pujut tuke atinun sukagtina nu.

<sup>21</sup> Uchuchig aidauh, kuitamamkatajum apajuimtai aina nujaig.

## Juan awentsaik carta agagbau

### *Kumpamkagtau*

<sup>1</sup> Witjai anciano, ubajuh Apajuí etegkamu asamin nuigtú amina uchijum aidaujai kumpamjame, dekaskenum atumin aneau asan; nunak imá wikik dutikatsjame, ashí dekaskea nuna dekau aina dushakam anempainawai,

<sup>2</sup> dekaskeapi tabauwa nu jutiini ajutjamu asantai, nuigtush jutiinak tuke ajutjamtinai:

<sup>3</sup> Anentag sujamsamua nu, wait anenkagtau, nuigtú agkan pujamu Apajuí iina Apajiya nuda, nuigtú Jesucristo iina Apají Uchijiya nudaushkam, dekaskea nu nuigtú anenka dusha jutiinash ajutjamtinme.

### *Dekaskea nu anenka nujai tibau*

<sup>4</sup> Kuashat shiig aneasmajai ujumak uchijum aina nuiya iina Apají umiktajum tibauwa nunisag dekaskea nunak takaidau wainkan.

<sup>5</sup> Yamai ubajuh segajame, pempentunisaik aneeniagmi tusan; tujash junak yamajam umiktinun tumainaitjam dutikanuk agattsujame, nagkamchaku tibau ajutjama nunak tajame.

<sup>6</sup> Juuwai anenkak, ni umiktajum tibauwa nu umiaku pujamua nu. Juuwai umiktina duka: nagkamchakjum aneenisa pujustajum tabau antukuitjum nu.

<sup>7</sup> Wagki kuashat tsanumin aidau nugkanmag jijnjaje, Jesucristuk aentsmaga aki-inachui tuina nu. Nunuwai tsanumin nuigtú anticristo.

<sup>8</sup> Nuadui atumek kuitamamkatajum, atum takasbaunum jumain megkaekaijum; dekas kakanmamsatajum akigmamu betek jukita tabaunum.

<sup>9</sup> Makichik aentskesh Cristo jintiamua nuna uwaegak jintinkagtuina nujai Apajuik ijutkau atsui; untsu Cristo jintiamua nuwi nunisag ebetmamag puja nujai, iina Apají nuigtú niina Uchijish ijutkau awai.

<sup>10</sup> Makichik aentskesh atumin ijagtamak taa, nu jintiamua nuna betek tachakuig jeeminig awayawaipa nuigtush: ¡Shiig anentsam! jukipa.

<sup>11</sup> Wagki: ¡Shiig anentus! juwauk, ni pegkegchau takaa nui pachinui.

### *Akatmabau*

<sup>12</sup> Kuashat waji aidau pachisa agamainuk ajutui, tujash carta agatnak dakitajai. Dekas atumiin taan igkuasan aujsatasan dakajai, nuniamunum jutii shiig aneamu uminkati tusan.

<sup>13</sup> Wi yamai Apajuí nemajin aidaujai ijunja pujag juka, anuiyatijum Apajuí nemagkujum ijunjum nujai betekai, wi pujag juwiya Apajuí nemajin aidau kumpamjamainawai.

## Juan kumpatumá carta agagbau

### *Kumpamkagtau*

<sup>1</sup> Witjai anciano, aneetaiju Gayoh, dekaskenum aneau asan kumpamjame.

<sup>2</sup> Aneetaijuh, Apajuin segatjame ashí pegkejak ajutjama nunisag wakanminish nuigtú jamamtuchu pujamush ajutjamti tusan.

<sup>3</sup> Kuashat shiig aneasmajai, yatsut aidau kaunawag ame betek umiakum dekaskea dusha wajuk takaame nuna ujatkgmatai.

<sup>4</sup> Mina uchig aidau dekaskea nuna takainawai tabau antakun shiig aneag nuna nagkaesau shiig aneamuk atsugtawai.

### *Gayo ni jeen jukagtauji eme anentamu*

<sup>5</sup> Aneetaijuh, amek Cristo umikta tibauwa duka betek umikam weame, Cristo nemajin yatsut aidau atsumaidau wajuk yayame nuadui, imá senchi wainchataijum aidau dutikam dui.

<sup>6</sup> Nunú aidau iglesianum etsejuinawai, ame anejattsam yaimam nuna pachipas. Apajuin shiig awagma dutiksamek tuke yaita aents jintá weak atsumainjinish.

<sup>7</sup> Ditak Jesucristo aneamunum niina daaji pachisa etsegkagta tabaunum jiinjaje, nunú aidauk Apajuí anentaimtuchu aina nunú yaigbau atasag dakituinawai.

<sup>8</sup> Nuadui jutii ditanuk uyumamainaitji, chicham dekaskea nuna tikich aidanmash etsegkati tabaunum.

### *Diótrefes dakitkagtau*

<sup>9</sup> Juna pachisan wi iglesian agatjamjai, nuna Diótrefes dakitau asa jujutjamchau tabaun antajai, nigka imá mina chichamjunak antugtuktinme tusa wakegau asa.

<sup>10</sup> Nuniau asamtai, wi anui taan wainak chicham pegkegchaun jutiin tujamu tawa nuna titatjai, nuigtú nuna takush shiig juwachu asa, yatsut aidau kaunu jutanash dakitawai, nuna juwaunash aikawaipa tawai, dutikak iglesianmash jiiki ajapeawai.

<sup>11</sup> Aneetaijuh, aents pegkegchaun takaa duka dakumkaipa, dekas pegkeja nunú takastá. Aents pegkejan takaa nuuwai Apajuinuk, tujash aents pegkegchaun takaa duka Apajuinuk wainchau asa nuniawai.

<sup>12</sup> Ashí Demetrio pujutji pachisajag pegkejan etsegtuinawai, Apajuí chichame tawa imatiksag umiau asamtai. Jutiishkam dutiksaik etsegtuinaji, tuja atumek dekagme jutiiik dekaskea nu etsejin ainag nu.

### *Inagnaku kumpamkagtau*

<sup>13</sup> Kuashat juní inagkeasa tumainuk ajutui, tujash nunak jui agakun tutanak dakitajai,

<sup>14</sup> wagki wamak minin wainkata tau asan, nuniaku igkunisa chichasmí.

<sup>15</sup> Shiig agkan pujamu ajutjamti. Kumpajum aidau kumpamjamainawai. Ameshkam jutii kumpají aidau makí makichik kumpamjtuata.

## Judas carta agagbau

### *Kumpamkagtamu*

<sup>1</sup> Witjai Judas, Jesucristo inake Santiago yachiyaitjai, atum Apajui iina Apajiya nuna anetaiji etegjama aidautijum, Jesucristo kuitamsam batsatjum nuutigmin kumpamjime.

<sup>2</sup> Atumnash Apajui wait anenkagtamuji, shiig agkan pujuta nunu, anenka dushakam ajutjamtinme.

### *Wait jintiamu nuigtu maestro wait aidau*

<sup>3</sup> Aneetaig yatsug aidauh, shiig senchi wakemajai Apajui uwemat amasbau betek ajutjama nuna pachisan agatjatasan, tujash yamai dekas atsumamua nuna segata tajime, Apajui aentsji pegkejama aidau dekaskeapi tabaun sasauwa nu kuitamkatajum tusan.

<sup>4</sup> Wagki ujumak aents tsanumag wayawaje nunikag tsanugmajaje, duka yaunchuk nagkamas aatus suwimkan jukitnume tibau aina nu. Nunu aents aidauk pegkegchau ainawai, nunin asag Apajui anentag amasua dui agkantaitji tusag pegkegchaun takainak Apajuinash dakituinawai nigki imana nuna, nuigtu iina Apuji Jesucristunashkam.

### *Apaju suwimak sukagtustin pachisa etsegkamu*

<sup>5</sup> Juka atumek dekagminig aneentikjime, Apu Apajui niina aentsji Egipto nugkanum batsatun jiiuji, dutikauwaitak niina dekaskeapi tuinachunak ijinawai.

<sup>6</sup> Tuja angel aidau dita imanjin kuitamsuk, dita batsamtaijinash ukukiaju aidau nak tuke atinun achijá suwenum chimpiauwei, tsawan jegatai suwimkan susatatus.

<sup>7</sup> Nunú wajakawajua nunisag Sodoma, Gomorra nuigtu yaakat tikiju aina dushakam shiig pegkegchau aina nuna takainak nuigtu mai aishmagkuk dutikdaiyá batsamta, Apajui jii tuke kajinkashtina dui apek utsagkui, nunu dutikamua duka aents tudaun taká batsatuk jii ajubaish kajinkashtina nui suwimkan jukiagtina nuna iwaintugmaji.

<sup>8</sup> Nunisag nunu aents aidauk kajanum wajukmaina numamtuk, pegkegchau takainak dita iyashinak pegkegchau emainawai. Apajui senchigtina nunash pachitsuk idaiyinak, nayaimpinmaya senchigtin aina nunash pegkegchau chichajuinawai.

<sup>9</sup> Tuja arcángel Miguel, Moisesa iyashin jukitatus Iwanchjai maanitkush suwimak jukitujinak pachitsuk, ayatak: "Apu Apajui tujamti", tiuwai.

<sup>10</sup> Tujash nunu aents aidauk dekainachiatak pegkegchaun chichajuinawai. Ditak kuntin anentaimainachu asag dita wakegamunum pujuina numamtuk, dita pegkegchau wakegamujiya nunak wejuinak, ditak pegkegchau weenawai.

<sup>11</sup> ¡Wait anentuinajai ditanak! wagki Caín wajakauwa numamtuk wajaidau asagmatai, nuigtu Balaam wajakauwa nunisag kuichik jukita tabauwai pegkegchau takaina duwishkam, aantsag Coré ni chicham intimtinig jakauwa nuniktin asagmatai.

<sup>12</sup> Nunú aina duka datsanmainun atum Cristo nemajin aidautijum yatsut aneenisa fiestabaunum wayawag yuinak nuigtu umuinak shiig ané yujainawai, makichkish ajanas diijattsuk. Ditak pastor imá ditanunak uyumainawai, nunidau asag yumi yutugchatnaitak yujagkamin bukusea wajasun dase umpui yajá ajapama numamtuk wajainawai. Ditak ajak nejetinish nejeshtai ajakjintin tegai ajapama numamtuk ajapeam agtinai.

<sup>13</sup> Ditak nayants senchi tsukatak ayatak saunak jiiyama nuninawai, dita waji datsanmain takaamunum. Ditak yaya keeká wegau megkagama nuninawai, nunin aidau nak tuke atin shiig suwea nu umigkamu ainawai.

<sup>14</sup> Ju aents nunikagtinun pachis Enoc tiuwai, Adagkai nagkamas akiinak weamunum siete aajakua nu: "Apu Apajui, dekapamainchau angel aidaujai midau wainjai,

<sup>15</sup> ashí aents takasbaujin diijus titatus; nuniak pegkegchau takasu aidau tuja Apajuinash pegkegchau chichagkau aidau nash suwimkan susatatus", tiuwai.

<sup>16</sup> Ditak chichaman patá yujau, augmatkagtin, dita wakegamujin takaa yujajin, ememas chichá yujau, tikich aentsnash imanchau aig igkuawag, amek dekas pegke-jaitme tusa anetai egketuawag niinun jujukiagtatus auju yujajin ainawai.

### *Anentikaku chichagbau*

<sup>17</sup> Tujash atumek aneetaig aidauwah, iina Apuji Jesucristo apostolji aidau chichaman etsegkajua nu aneaku atajum,

<sup>18</sup> juna tujabaiju ainawai: "Tsawan nagkanbau atina duik, aents aidauk pegkegchau chichagkagtin aidau agtina, nuninak dita pegkegchau wakegamu aina nuna takaa batsabiagtina", tusag.

<sup>19</sup> Nunú ainawai atum Jesús nemajin aidautigmin datumtamak akaantamaina nu, nuadui yaunchuk pujujakbaujiya nunisag pujuidau asag Apajuí Wakanig atsujuinawai.

<sup>20</sup> Tujash atumek aneetaig aidauwah, atum dekaskeapi tabau pegkegma nuig ebet-mamjatajum, nuniakjum Wakaní Pegkeji tujama nunisjumek Apajuí aujsatajum.

<sup>21</sup> Apajuí anempajum nuig kuitamamkatajum, iina Apuji Jesucristo wait anenjamu asa pujut tuke atinun amastina nu dakakjum.

<sup>22</sup> Dita uwemjauwaitak utujimaidaush wait anentsajum yaigtajum.

<sup>23</sup> Tikich aidauk, jiiimaya jiiimaina dutikajum yaigtajum uwemjatnume, tikich aidaush puyatjusjum wait anenjatajum, nuniakjumesh kuitamamkatajum dita iyashin pegkegchau takasú aina duke atumesh takasaijum.

*Inagnaku Apajuí emematbau*

<sup>24</sup> Apajuí senchigtina nuuwai atumnak pegkegchau takasainum tusa kuitamjamainuk. Niina emtin dekas imana nui ijupagtina nunú tsawantinig, atumek shiig aneasti-naitjume, atumin bakugmamainuk makichkish atsutin asamtai.

<sup>25</sup> Apajuí makichkiuch, niina Uchijí iina Apujiya nuna awetugma uwemtijamjauwa duke emematiagmi, imá nigki senchigtinuk, yamaiya juishkam, atakea duishkam tuke atina nu.

Aatus atí.

## Iwainakbau

<sup>1</sup> Junak Apajuí Jesucristun iwaintukui, wají aidau waamak uminjatta nuna ni inake aidau iwaintukti tusa. Dutikam Jesucristo angelan awemauwai niina inaken Juagkan iwaintukti tusa;

<sup>2</sup> dutikamu asa, dekas ni ashí wainkamujin tiuwai, nuigtush Apajuí tibaun Jesucristo tiuwa nunash etsegtawai.

<sup>3</sup> Shiig aneasagtinaí ju agagbaun aujus, atak uminkatin tibauwa juna shiig dekaawag, nui agagbauwa nuna umiidauk; wagki tsawantak tikiju wajasú asamtai.

<sup>4</sup> Witjai Juagkaitjai, siete iglesia aidau Asia nugkanum awa nui batsatutigmin kumpamjime. Apajuí tuke pujuu, nuigtush tuke pujujú, jui taatna nunú, nuigtú siete Wakan ni ekeemtaijin emtin awa nujai; wait anenjamag shiig agkan pujutan amastinme;

<sup>5</sup> nuigtú Jesucristo dekaskea nuna etsejin, aents jakau aidau nantashain ni nagkamak nantakiuwa nu nuigtú ju nugka juiya rey aina nuna nagkaesau senchigtina dushakam. Cristo jutiinak anempaji nuniau asa niina numpejai iina tudaujinak nijatjamkauwai;

<sup>6</sup> dutjabau asa jutiinash rey aidau etamak nuigtú Apajuí niina Apajiyi nuna sacerdotéji aidau etamkajui; nuadui imá nigki ashí senchigtina nunú, ajumaish tuke ememattai atí. Aatus atí.

<sup>7</sup> ¡Cristinuk yujagminum pachitkau minitnai! Nunitai ashí wainkagtin ainawai nuigtú niina mau aidaushkam wainkagtinaí; nunikag ashí aents nugkanmaya aidauk buutiagtinaí. Dekaske, aatus atí.

<sup>8</sup> Witjai nagkamtinish tuke pujusunuk, atakea duish tuke pujutnunuk tawai Apu Apajuí ashí senchigtin, tuke pujuu, nuigtush tuke pujujú, jui taatna nunú.

### *Aentsmaga akiinauwa nu wainkamu*

<sup>9</sup> Witjai Juagkaitjai, Jesusa nemaju asan atumi yatsumitjai, atum waitiajum nunisnuk waitiaknush Jesusan nemaju asan emamkesan katsunjau asan atumjai betek Apajuí inamtaijin pujutnaitjai. Wika Apajuí chichame etsegbaunum nuigtú Jesús pachisa etsegtamunum achigkagmatai ajuntai Patmos tutainum pujubiajai.

<sup>10</sup> Apu Jesusa tsawanji tumig tsawagmatai Wakaní Pegkeji minai tajutmatai pujubiajai, nuniai mina ukujui makichik chicham senchi, trompeta umpuam shinuwama imatun antukmajai;

<sup>11</sup> nuniai chichaak: “Witjai nagkamtinish tuke pujusunuk wikitjai atakea duish tuke pujutnunuk. Agagta makichik papinum ame wainam nunú, dutikam siete iglesia aidau Asia nugkanum batsata nu awetita: Éfeso, Esmirna, Pérgamo, Tiatira, Sardis, Filadelfia, nuigtú Laodicea” tujutmayi. <sup>12</sup> Tujutkui: Yaki aujtawa tusan ayampá diikman, siete candelero oro aidau wainkabiajai.

<sup>13</sup> Nunú siete candelero aina nuna ejapen Aentsmaga Akiinau aajakua numamtin, jaanchin esagman nugkuaju dawe aatus nuntumag, akachumtai oron detsepega imaan akachumau wajattaman wainkabiajai.

<sup>14</sup> Intashishkam uwija uje shiig pujua imanuyi, nieveya iman, jüshkam jii kegak wajukeya imanibi;

<sup>15</sup> nawe aidaushkam bronce hornonum egkeam dewa wegama imanun etsanmayi, chichameshkan tuna uutama imatmayi.

<sup>16</sup> Uwejí untsujin siete yaya aidau takakuyi, weninia makichik espada mai yantamejai etsakamua iman jünmayi nuigtush yapig, etsa shiig senchi etsantama imanik etsanmayi.

<sup>17</sup> Imanun wainkan, ni wajamunum ayaumsan tuke jakaujai betek iyagbajai, nuniai ni uwejí untsujin achijak: Ishamkaipa Witjai nagkamtinish tuke pujusunuk, ajumaish tuke pujutnunuk;

<sup>18</sup> nuigtush iwaaku pujajai. Jakabiajai, tujash yamaik iwaaku pujajai nuniku asan ajumaish tuke pujutnaitjai, aatus atí. Wikitjai jatanash depetkaunuk nuigtush jinau aidau nash nantagtajum titinnuk.

<sup>19</sup> Agagta wají aidau wainkaum nunú, yamai aina nu, jujú nagkaemagmatai atak atina dushakam.

<sup>20</sup> Mina uwejuí untsuja nui siete yaya aidau wainkaum nu, nuigtú siete candelero oro aidau dekamainchau wainkaum duka juu ainawai: siete yaya aina duka ángel aidau, siete iglesia aina nuna diin ainawai, nuigtú siete candelero aidau wainkaum duka, siete iglesia aina nuuwai.

## 2

*Éfeso chicham agatjamu*

<sup>1</sup> Agatjata ángel iglesia Éfeso awa nuna diina nunú: Uwejí untsujin siete yaya aidaun takaku, candelero oro aina nui ejapena wekaga nunú, juna tawai:

<sup>2</sup> Atum takaam nunak wainjai, utugchatnum pujakjum senchi waitiajum nunashkam, nuniakjumesh emamkesjum nagkaejume. Pegkegchau aidaush dakitagme, nuigtush apóstol ainaji tuidaush dekapsajum waitjamu dekagjum nunashkam;

<sup>3</sup> nuniakum senchi waitiakmesh, mina anentu asam nuig ebetmamjam mijakchaume.

<sup>4</sup> Tujash aminí makichik dakitamu ajutui, nagkamchakum anentium duka idaisaum duí.

<sup>5</sup> Nuadui adeagta wajuakeakmea nunikume nunú, nunikam yapajinam nagkamchaku takaajakuitam nunú takastá; nuniachkugminig waamak tajuattagme, nunikan yapajinchakminig candelero jujuktatjame.

<sup>6</sup> Tujash pegkeja nu ajutjamui, wi nicolaíta aidau takatjin dakitag nunisjumek atumshakam dakitajum nunú.

<sup>7</sup> Ni antutaiji ajamuk antukti, Wakan iglesia aidaun tawa nuna. Depetmakunak Apajúi pujutai paraíso ejapen numi pujutan sukagtin waja nuna nejeen susattajai yuwati tusan.

*Esmirna chicham agatjamu*

<sup>8</sup> Agatjata ángel iglesia Esmirna awa nuna diina nunú:

Nagkamtinish tuke pujusu, ajumaish tuke pujutna nu, nuigtush maamu aajakú ataktú nantakí iwaaku puja nunú, juna tawai:

<sup>9</sup> Ame waitiamujum aina nunak wainjai, nuigtú ujunayaitam nunashkam, tujash amek wakannumag wiakchaitme, nuigtush judiowaitji tuidau pegkegchau chichagta-maina nunashkam; tujash duka Satanasa jee ainawai.

<sup>10</sup> Waittsattam duka makichkish ishankaipa. Atum ainajum anuiyan, Iwanch wakegamun taku aina nu achigmakag cárceel egkepattajume dekapjamsagtatus, dutijamantai diez tsawan waittsattagme, mantamainakuish minai dekaskeapi tabuk idaisaipa, nunikamin wi pujut nagkanchauwa nuna amastatjame.

<sup>11</sup> Antutaiji ajamuk, antukti, Wakan iglesia aidaun: Depetmakua duka jinum pujusag waittsashtinai, tawa nuna antuktinme.

*Pérgamo chicham agatjamu*

<sup>12</sup> Agatjata ángel iglesia Pérgamo awa nuna diina nunú: Espada mai yantamejai etsakamun takaka nu, aatus tawai.

<sup>13</sup> Ame takaam nunak wainjai, anui Satanás ekeemtaijin ekeemas inama nui pujam nunashkam; tujash minak nemagame. Antipas mina etsegtugna nuna, Satanás inama anui maawagmataish minai dekaskeapi tabaush idaisachume.

<sup>14</sup> Tujash ujumak waja aidau aminí dakitamu ajutui: Balaam Balacan jintintak: Israel aidau tunamamaina nuna, apajuijintai kuintin anagkuamu maamu aidaush yumainai, nuwash tsanijimainai tiuwa nuna, atum ainajum anuiya ujumak idaiyinachush ainawai.

<sup>15</sup> Nuigtush ajutjamui Nicolaíta aidau jintiamua nuna idaiyinachu.

<sup>16</sup> Nuadui pujutjum yapajiata, nuniachkugminig waamak tajuan, mina chichameg senchigtina nujai ditajai maaniattajai.

<sup>17</sup> Ni antutaiji ajamuk antukti, Wakan iglesia aidaun tawa nuna: Depetmakunak maná uukbauwa nuna susatnaitjai yuwati tusan, nuigtush kayauch pujuchin yamajam daa agagbaun susatnaitjai, nunak makichkish dekaínatsui imá jukiúwa duke dekaatnai.

*Tiatira chicham agatjamu*

<sup>18</sup> Agatjata ángel iglesia Tiatira awa nuna diina nunú:

Apajúi Uchijí, jii keegama imanun jiimkauwa nu, naweshkam bronce dewa wegama imanun nawemka nunú chichaak, juna tawai:

<sup>19</sup> Atum takaajum nunak wainjai, nuigtú mina anenjum nunashkam, minai dekaskeapi tabaugminash, atsumaidau yayajum nunashkam nuigtushkam waitiakjumesh emamkesjum katsunja nagkaejume; nuigtushkam takaajum duka nagkamchaku takajakuitjum nu inagkeasjum yamaik takaagme.

<sup>20</sup> Tujash ujumak pegkegchau takaajum nu dakitamu ajutui: Aanú nuwa Jezabel profetisayaitjai tusa, mina inakeg aidaun tsanuak, tsanijinmainai nuigtush apajuijintai kuintin anagkuamu maamu aidaush yumainai, tusa jintinkagtakuiush ayatak diyagme.

<sup>21</sup> Nuniakuish tsawantan susajai pujutjin yapajiati tusan. Tujash tsanijinat idaitanak dakitawai.

<sup>22</sup> Nuniau asamtai niina pegajinig jata susan aepsattajai, dutikakun niina tsanijibau aidaunash shiig senchi waittan susattajai, ni takaamun takaina nuna idaiyinachkuig.

<sup>23</sup> Nuigtush uchijí aidaunak kajenkattajai, dutikamtai ashí iglesia aidaush dekaawag-tatui; anentaibaunash, anentainash ashí wiki dekauwaitag nuna, dutikakun makí makichik takasbaujin diigsan susatnaitjai.

<sup>24</sup> Tuja atum aidaütijum nuigtú tikich aidau Tiatira batsatutigmek, nu nuwa jintinkagtamua duka umiatsjume, nuniau asajum, Satanasdau duikish dekaachbau jintinkagtajai tuina dusha unuimatjachu asagmin, atum tikich umimainnak amaschat-tajime.

<sup>25</sup> Tujash dekaskea nu dekauwaitjum duke kuitamkatajum, nuniagmin taatjai.

<sup>26</sup> Depetmakunak, nuigtush wi wakegamugnak takai takainakua nagkanbaunum jegaunak, wi ashí nugkanmaya aidaun apuji emaktatjai,

<sup>27</sup> mina Apag Apu etiuwa dutiksanuk. Dutikamu asag, ichinka najanin duwe najanamu jijui awatí tsaiyama numamtuk, awajkagtinai aents pegkegchau aidaunak;

<sup>28</sup> nuigtush yaya tuke tsawampauwa nuna susatnaitjai.

<sup>29</sup> Ni antutaiji ajamuk antukti, Wakan iglesia aidaun tawa nuna.

### 3

#### *Sardis chicham agatjamu*

<sup>1</sup> “Agatjata ángel iglesia Sardis awa nuna diina nunú:

Apajúi Wakaní sieteya imajin aja nunú, nuigtush siete yayan takaka nunú juna tawai: Ame takaam nunak wainjai, iwakui tama ame, tujash jaká pujame.

<sup>2</sup> Shintaagta, nunikam tikich aidau dutikmain megkaekattak awa nunú inantaita, wagki amina takatjumnak Apajúi eemtinish pegkegnak wainkachjai.

<sup>3</sup> Adeagta pegkeg jintiamu antukuitam nunú; nuniakum umiktá, nuigtush tudau takatash idaisata. Aneaku pujachkuminig, wi kasajai betek minittatjame, tujash waji horatinia minittaja duka dekashtatme.

<sup>4</sup> Tujash ujumak aents aidau ajutjamui Sardis, jaanchjin tsuwapachaju aidau; nu aidauk jaanch pujun nugkujag wijai yujasagtinai, Apajúi wakegamun takasaju asag.

<sup>5</sup> Pegkegchau takatan depetkauwa duka jaanch puju anugkuam atinai, nuigtush pujutá júkiu daaji papinum agattaiya nui, daaji agatjamunash tuke esakagchatnaitjai, ayatak mina Apajúi emtin nuigtú ángel aidau antuinamunum juka midauwai, titinaitjai.

<sup>6</sup> Ni antutaiji ajamuk antukti, Wakan iglesia aidaun tawa nuna”.

#### *Filadelfia chicham agatjamu*

<sup>7</sup> Agatjata ángel iglesia Filadelfia awa nuna diina nunú: Junak Pegkejam, Dekaskea nunú, Davita llavejin takaka nu, ni ujaimtaig makichikish epenmainchau, nuigtú epenmataish makichikish ujamainchauwa nunú, tawai:

<sup>8</sup> Ame takaam nunak wainjai, nuniau asan amina eemtimin waitin ujain idaisajai, nunak makichik aentskesh epenmaitsui; wagki atumek wajumchik ainayatkujum, mina chichamjush betek umigtakjum, mina daajush dakitjachugme.

<sup>9</sup> Nunin asantai, wisha judiwaitjai tusag anui wait aidau ijunaina duka Satanasdau asantai, atumi emtimin tikishmitkaktatjai, wi atumin aneajim nuna dekaatnume tusa.

<sup>10</sup> Ashí aents nugkanmaya aidauk utugchat, waitiamu ajiagtinai. Tujash amek mina chichamjuk betek umikú asamin ayamjuktatjame, waji horak utugchat ju nugká jui aents batsata nu dekapatsa tabaush minit nuniakuish.

<sup>11</sup> Wika wamak minittajai, nunin asantai ashí amina ajutjama duka shiig kuita-mkata, ame depetmakum asam corona jumaina nuna tikich atanjamki.

<sup>12</sup> Depetmakunak wi, jega mina Apag ememattaiya nui awayattajai, dutikamu asa nuig tuke pujutnai; dutikan mina Apajuiju daajin, nuigtush mina Apajuiju yaaktaji yamajam Jerusalegka nuna daajin, mina Apajuiju nayaimpinum puja nuiya akaikitna nuna, nuigtú mina daag yamagma nunashkam niini agagtinaitjai.

<sup>13</sup> Ni antutaiji ajamuk antukti, Wakan iglesia aidaun tawa nuna.

#### *Laodicea chicham agatjamu*

<sup>14</sup> Agatjata ángel iglesia Laodicea awa nuna diina nunú:

Junak ni tibaujinak betek umina nunú, waitjuchu dekaskea nuna etsejin, nuigtú nagkamchakush Apajuijai ashí najankauwa nunú chichaak:

<sup>15</sup> Ame takaam nunak wainjai, bichatnukesh atsume, sukutnukesh atsume. ¡Utusamek bichatin, nuniachkumesh sukutnukesh aam!

<sup>16</sup> Tujash amek papaapatu asamin, nuigtú bichatnukesh achau, sukutnukesh atsum dui iyakan ajapatnaitjame.



<sup>17</sup> Wagki ame chichaakum: Wika wiyakchaitjai makichkish atsumamuk atsugtawai tame; tujash amek Apajuí diismak shiig aneas pujuchu, waitin, ujunauch, wainmachu, nuigtú wisú pujam duka dekaamatsme.

<sup>18</sup> Nuadui wi tajame: Minai sumakta oro jinum apea ayatak orok awasamua nunú, nunikam wiakuch wajasminum, nuigtush jaanch puju aidau nugkugminum, ame wisú wetai datsantan dekagmawainum, nuigtushkam jiminis colirio egkeeta wainmakminum.

<sup>19</sup> Wika ashí wi aneamug aidaunak jiyaajai, dutikakun suwimkanash suajai, nunin asamtai pegkegchau idaikum Apajuí umíkgata.

<sup>20</sup> Wika waitinum wajasan untsumjai; nuniai makichik mina chichamjun antuk waitin ujatjakuig niini wayattajai, nunikan niijai ijunjan agkú yutain yuattajai.

<sup>21</sup> Depetmakunak, mina inamtaijui ekentsatnaitjai, wi depetmaku asan mina Apajuí ekeemsa inamtaijin eketag dutiksanuk.

<sup>22</sup> Ni antutaiji ajamuk antukti, Wakan iglesia aidaun tawa nuna.

## 4

### *Nayaimpinmaya emematbau*

<sup>1</sup> Ju nunikmatai niimkaman, nayaimpinmaya makichik waiti ujani atatman wainkabi-ajai, nagkamchakun chichaman antukag duka trompeta wajukeya imatuk mina aujtak: "Jui wakata, nunikamin ju nagkaemagmatai atak waji nagkaemagtin aina nuna wi iwaintuktajame", tujutmayi.

<sup>2</sup> Nuna taig, Wakaní senchijí minai tajutuabi, nunikmatai diikman nayaimpinum ekeemtai umikbaunum makichik ekeematman wainkabi-ajai.

<sup>3</sup> Nunú ekeemtainum eketa nuna niimeg, kaya jaspe tutai nuigtú cornalina tutai aina nujai betekmamtinuyi; nunú eketa nuna tentea arco iris amayi, kaya esmeralda tutaiya nuna niimejai betekmamtin.

<sup>4</sup> Nunú ekeemtaiya nuna tentea, veinticuatro ekeemtai aidau agmayi; nuanui veinticuatro anciano aidau jaanch puju aidaun nugkuinaju, corona oro aidaun atsejaku pekabiagmayi.

<sup>5</sup> Nunú ekeemtai ejapen awa nuiya peem aidau, chaajip aidau, chichamushkam jiniagmayi, nuigtú ekeemtai eemtin siete jii ekemagbau amayi, duka siete Wakan Apajuinu aina nuuwayi.

<sup>6</sup> Nuigtushkam ekeemtaiya nuna eemtin nayantsa numamtin vidrio\* saawiya iman wajas amayi.

Nuigtú ekeemtai ejapen awa nuna tentea cuatro iwaaku aidau wajagmayi, ukuujin, eemtinis kuashat jii ajamu aidau.

<sup>7</sup> Dekatkau iwaakua duka león niimtinuyi nuniai tikichia duka toro tsakata nuní niimtinuyi, kempatuma nuna yapig aentsú yapijai betekmamtinuyi, nuniai cuatroa duka ukukui nanamua nuninuyi. <sup>8</sup> Nunú cuatro iwaaku aina duka, makí makichik seis nanape ajiagmayi, jiishkam ashí iyashin ajiagmayi; nunú iman aidau tuke itattsuk tsawai, kashijai:

"¡Pegkegmai, pegkegmai, pegkegmai,†

Apu Apajuí ashí senchigtin,

tuke pujuu, nuigtush tuke pujujakú, jui taatna nunú!", awajiagmayi.

<sup>9</sup> Nunú iwaaku aidau Apajuí tuke pujuwa nu, ekeemtainum eketun emematuinak, eme anentus see tuinak ajumaish tuke pujutna nuna imatjagtai;

<sup>10</sup> veinticuatro apu aidau ekeemtainum eketa nuna emtin tikishmajag ajumaish tuke pujuwa nuna emematuinak, dita coronaji aidaun jukiag niina eemtin apujtuinak:

<sup>11</sup> "Apuh, iina Apajujiya ameketme ememattaim, nuigtush eme anentai,

nuigtushkam senchigtinaitam ibau asam.

Wagki ame ashí waji aidauk najankauwaitme,

dutikamu asag ame wakejusam najankauwaitam nunisag, ame wakegamunmag ainawai", awajiagmayi.

## 5

### *Uwig*

<sup>1</sup> Wainkabi-ajai ekeemtainum eketa nunú, uwejí untsujin makichik rollo\* mai yantamejai agagbau, sieteya imania achiamun takus ekeematman.

\* 4:6 "Vidrio" tawa duka botella saawiyama nuninai. † 4:8 Is. 6.2-3. \* 5:1 "Rollo" tawa juka, uwijá duwapé, chivo duwapé, asno duwapé aina jui agagbau pempeagbau aajakua nuna tawai.

<sup>2</sup> Nuigtú wainkabiajai makichik ángel senchigtin senchi untsamak: “¿Yaita dekas imanush, ju rollo achigbauwa juna kuwajug atimainush?” tusa iniimtatman.

<sup>3</sup> Tujash nayaimpinmayagkesh, nugkayagkesh, nugká initkeniagkesh nuna rollo atijá nui agagbauwa nuna diimainuk makichikish atsusmayi.

<sup>4</sup> Nuniakui wika senchi buutmai, wagki rollo atimainuk, nuna diisá augmainkesh atsusú asamtai.

<sup>5</sup> Nuniai anciano aina nuiya makichik chichagtak: “Buutipa, Judá weantua nuna Leogji, David weantua nu depetmake, nuniku asa niyai rollo sieteya imania achigbauwa nuna ukuitug ujamainuk”, tujutmayi.

<sup>6</sup> Takui diikman, ekeemtai ejapen cuatro iwaaku aidau, nuigtú anciano aidau ejapeam makichik Uwig maamu aajakua numamtin wajattaman wainkabiajai; ajibi siete kachují aidau, nuigtú siete jii aidau, nunú aina duka siete Wakan aidau Apajuinu ashí nugkanum ishiakbau aina nuna iwainawai.

<sup>7</sup> Nuniai, ekeemtainum uwejí untsujiin rollo takus eketa nuna Uwig jegantun jujukmayi.

<sup>8</sup> Nuna rollo jukimtai, cuatro iwaaku aina nunú, nuigtú veinticuatro anciano aina nujai Uwijá eemtin tikishmajagmayi; ashí nunú aidauk arpa nuigtú copa oro aidanum incienso aimjamu aidanun makí makichik takaku agmayi, duka Apajuí aentsji pegkejam aidau Apajuí augbauwa nu agmayi. <sup>9</sup> Nuninak yamajam kantamtain kantamainak: “Ameketme rollo agagbauwa nu jukim, sello aina dusha atimainmek.

Wagki amek maamu aajakuitme, nunin asam amina numpemin,

Apajuinu atinme tusam sumajatkauwaitme, ashí aents nugkanmaya aidau,

tikich chichaman chichaaku aidau nugka yaignumia nuigtú nugka muun aina nuiyashkam,

<sup>10</sup> nuigtushkam ditak rey aidau, sacerdote aidau emakume,

Apajuin takagsatnume tusam,

dutikamu asag nugkanum inamjagtatui”, wajagmayi.

<sup>11</sup> Nuna takui diikman, kuashat ángel aidau, nuigtú iwaaku aidau; anciano aidaushkam, nuigtush dekaapatash dekapamainchau aidau ekeemtaiya nuna tenteawag pampainamun antukbajjai,

<sup>12</sup> nuniai senchi jiikag chichainak:

“¡Uwig maamu aajakua,

nuuwai dekas wagaaku senchigtinuk, wiyakuch, yacha,

senchigtin, eme anentsá diitai, ememattai, tuke kantamjutai atinuk!” wajagmayi.

<sup>13</sup> Nuigtú ashí najankamu nayaimpinum, awa nunú, nugkanmaya, nuigtú nugká initkenia aidaush, nayantsanmayashkam, ashí wají aidau nui aina dushakam, senchi chichakag:

“¡Ekeemtainum eketa anú, Uwigjai

kantamjuinaku, eme anentsá ememattai

senchigtina ibau asamtai ajumaish tuke ememattai atin atí”, awajuidaun antukbajjai.

<sup>14</sup> Imatjiagtai cuatro iwaaku aina nu senchi aiká: “Aatus atí”, tiagmayi; nuniaig anciano aidaushkam tikishmatug, emematiagmayi ajumaish tuke pujutna nuna.

## 6

### *Siete sello aidau*

<sup>1</sup> Wainkabiajai siete sello aina nuiyan Uwig makichik ujattaman, nuigtush antukbajjai cuatro iwaaku aina nuiya makichik ipamat wajukeama imatuk: “¡Tantá diistá!”, tujutun.

<sup>2</sup> Takui diikman makichik caballo pujun wainkabiajai; nui entsatka duka makichik nagkí takakuyi, nuigtush corona susamuyi, nigka depetmaku asa ataktush depetmaktatus jiinkibi.

<sup>3</sup> Nunikmatai jimaja juna sellon Uwig ujaibi, nuniai iwaaku aina nuiya jimaja nu chichagtak: “¡Tantá diistá!”, tujutmayi.

<sup>4</sup> Taig tikich caballo kapantaku jiinkibi; nui entsatka duka senchi susamuyi ashí aents aidaun maanimitkati dutikamu asa pempee pempeentuniki mantamdaitinme nuninak agkan batsatbauk atsuti tusa, nuigtush espada esagman susami.

<sup>5</sup> Kampatum selloa juna Uwig ujaibi, nuniai iwaaku aina nuiya kampfutuma ju untsujuk: “¡Tantá diistá!”, tujutmayi. Tujutkui diikman, caballo bukusean wainkabiajai; nui entsatka duka balanza takakuyi.

<sup>6</sup> Nuniai cuatro iwaaku aina nuiya ejapenia chichaak: “Makichik tsawan takasbauwai makichik kilo trigon jukiagtinaí, tuja makichik tsawan takasbauwai kampfutum kilo cebada suwam agtinaí. Tujash aceite, vino aina duka emeskaipa”, taun antukbajjai.

<sup>7</sup> Cuatro selloa nuna Uwig ujaibi, nuniai iwaaku aina nuiya cuatroa nu untsujuk: ¡Tantá diistá!, tujutmayi.

<sup>8</sup> Tujutkui diikman caballo yampia wajas wajaun wainkambiajai, nui entsatka nuna daajig Jata tutaiyai, nunak Hades\* pataetakuyi; Caballonum entsatka duka senchi susamuyi, ashí aents nugkanmaya aina nuna jimaitukjiya nuna jimaituken maanintikak ijinati, nujantai, jataishkam, kuntin kajen nugká batsata nunashkam tusa.

<sup>9</sup> Cinco selloa nuna Uwig ujaibi, dutikamtai wainkambiajai, altara wakentin Apajúi chichame etsegbaunum, nuigtú pegkejan iwainmamaidau asamtai waitkasa maamu aidau wakani ijuntatman.

<sup>10</sup> Nunú aidau senchi untsukag: “Apuh pegkegmah, dekaskenum chichauwah, ¿wajupa asamea nugkanmaya iina mantamawajua dusha ikmatkagtuktatme?” awaji-agmayi.

<sup>11</sup> Nunú aidau nak jaanch puju aidau nak mákik makichik susagmayi, dutika: Ujumak tsawan ayamkujum dakastajum, atumin mantamawajua imatiksag yatsum aidau nash Apajúin takajagtai maawag betek awasatnume, timayi.

<sup>12</sup> Seis selloa nuna Uwig ujaibi, dutikamtai wainkambiajai senchi uugbaun; nuniai etsag bukusea, jakamunum jaanchin bukusea nugkuwajama iman wajasmayi, nantushkam kapantu numpa numamtin wajasmayi;

<sup>13</sup> nunisag nayaimpinmaya yaya aidaushkam, higuera nejee dase senchi pegam kakegama numamtuk nugká kakeyagmayi.

<sup>14</sup> Nayaimpishkam papi pempeaja jutayama numamtuk megkaekabi, ashí muja aidauk, ajuntai aidaujai pachimdaegak patamsabi.

<sup>15</sup> Imanitai nugkanmaya rey aidau, aents eme anentai aidau, wiakuch aidau, capitán aidau, senchigtin aidau, nuigtú ashí inatai aidau, inashtai aidaushkam, muja kaya waa aidauunum uumkagmayi;

<sup>16</sup> nunikag mujan, untsuinak: “Yutujatuam uujatkakia, Apajúi nayaimpinum ekeem-taijin eketa au waipakai, Uwig suwimkan sujamsai;

<sup>17</sup> wagki ni kajeká suwimak sukagtamuk tsawantak jegae, makichkish yamaik suwimkanak uwemtumain ainatsui”, wajagmayi.

## 7

### *144 mil nijayin agatkamu aidau*

<sup>1</sup> Nunú nagkaemakui ai, wainkambiajai cuatro ángel aidau, cuatro nugka najatamu aina nui kanajag, cuatro dase aina nunú nugkanum dasentak nayantsan, makichik numinakesh umpuini tusag emetuawag ijuntatman.

<sup>2</sup> Nuigtushkam wainkambiajai tikich ángel etsá jiiintaiya nuiya sello Apajúi tuke pujuwa nudaun takaku minittaman; nuniak cuatro ángel aina nuna senchi untsuká, senchin susami nugka, nayantsajai emeskatna nuna;

<sup>3</sup> dutika chichajak: “Yamaikik nugkak, nayantsak, numi aina dushakam emeskaigpau, iina Apajúi inake aina nuna nijayin eke selló awagmatsjinkik”, timayi.

<sup>4</sup> Nuniaig: “Ashí Israela uchijí weantu aidau dekapamak, ciento cuarenta y cuatro mil aidau nijayin selló awakamu ainawai”, tabaun antukbaijai.

<sup>5</sup> Judá weantunmaya doce mil,

Rubén weantunmaya doce mil,

Gad weantunmaya doce mil,

<sup>6</sup> Aser weantunmaya doce mil,

Neftalí weantunmaya doce mil,

Manasés weantunmaya doce mil,

<sup>7</sup> Simeón weantunmaya doce mil,

Leví weantunmaya doce mil,

Isacar weantunmaya doce mil,

<sup>8</sup> Zabulón weantunmaya doce mil,

José weantunmaya doce mil,

Benjamín weantunmaya doce mil.

### *Pujun nugkuinaju aidau kuashat tuwakbau*

<sup>9</sup> Nunú nagkaemakui ai diikman, ashí nugkanmaya aents aidau shiig kuashat, makichkish dekaapamainchau ditash chichaaku aidau, ditash niimtin aidau, yaaktanmaya aidaushkam ekeemtai pujá nuna emtin, nuigtú Uwijá emtin, jaanch pujun nugkuaju aidau dukan takuinasua ijunaidau wainkambiajai.

\* 6:8 Diistá Mt. 11.23.

<sup>10</sup> Nuninak senchi untsumkag:

“¡Uwemta duka ekeemtainum Apajuí eketa nudauwai, nuigtushkam Uwigdauwai!”, wajagmayi.

<sup>11</sup> Nuniai ashí ángel aidau ekeemtaiya nuna, anciano aidaunash, nuigtú cuatro iwaaku aina nunashkam tentea wajagmayi; nunú aina nujai ekeemtai eemtin tikishmajag nijayin nugkan antig pujusag Apajuin emematuinak:

<sup>12</sup> “¡Aatus atí!

Emematbau, niina imanjiya dushakam,

yachajishkam, see tutai, eme anentsá diitash,

senchijish, ichichmamta dushakam imá Apajuinuk atí, ajumaish tuke ememattai atin atí.

¡Aatus atí!”, wajagmayi.

<sup>13</sup> Nuna tiagmatai, anciano aina nuiya makichik, inintak: “Jaanch pujun nugkuaju aina aush zya ainawa, tuwiya kaunkaje?” tujutmayi.

<sup>14</sup> Tujutkui wi ayaakun: Apuh, ame dekam jama tibajai. Tai ni chichagtak: Juka shiig senchi waitiamu awa nuiya wakaje, nunú aidau Uwijá numpeen jaanchjin nijakag puju emakaje.

<sup>15</sup> Nuadui Apajuí ekeemtaiya nuna eemtin ijunainawai, nuigtush jega Apajuí ememattaiya nui kashi tsawaijai takajuinawai;

nuniagtai ekeemtainum eketa nunú niina tabernaculojin\* batsas kuitamkattawai.

<sup>16</sup> Dutikamu asag yapajamush atsujiagtinai, kitamamushkam, etsash sukuam achagtinai, seemakugkesh waittsashtin ainawai.

<sup>17</sup> Wagki Apajuí ekeemtaiji ejapen awa nui Uwig, waja nunú kuitamkagatui, dutikak yumi pukuni jinu pujuta sukagtina nuna amitnai, nuigtushkam Apajuí ashí negaiki aina nunak ujugtuktatui, tujutmayi.

## 8

### *Siete sello*

<sup>1</sup> Siete selloa nuna Uwig ujaibi, dutikamtai nayaimpik bitat wajas asabi jimaituk hora tumain.

<sup>2</sup> Nuniamunum wainkabiajai siete ángel aidau Apajuí emtin ijuntatman, nunú aidaun siete trompetan tinamkagmayi.

<sup>3</sup> Nuniai tikich ángel, incienso apetaim oro takus, altara eemtin wajasmay; nunikmatai kuashat incienso susabi, Apajuí aentsji pegkejam aina nu, Apajuí augbaujiya nujai ijumag altar oro, Apajuí ekeemtaijin eketa nuna eemtin awa nui patai apeati tusa.

<sup>4</sup> Dutikamtai ángel takakbauwa nuiya incienso, Apajuí aentsji pegkejam aidau Apajuí augbauwa nujai ijumnag bukuiti, Apajuí eketbaunum wamayi.

<sup>5</sup> Nuniai ángel incienso apetaim jukibi, dutika altarnum jii kegá nuna juki aimak nagkimá nulgá ajuagmayi; dutikam ipamat, pampaamu aidau, chaajip, nulgashkam uugmayi.

<sup>6</sup> Imatiagtai siete ángel aidau, siete trompeta takus ijuna dushakam umintsagmayi umpuajagtatus.

<sup>7</sup> Nagkamchak makichik ángel trompetan umpuagmayi, dutikamtai bicha, nuigtú jii numpajai pachimjamun nulgá nagkimá ajuabi; dutikam nugkanak jimaituk amaisattak numi aidaun apekmay, nuigtush dupa aidaunash apekmay.

<sup>8</sup> Nunikmatai jimag angela ju trompetan umpuagmayi, dutikamtai makichik muja muunta numamtinun kegaun nayants nagkimá ajugmayi; dutikam nayantsan jimaitukjin amaisattak numpa wajasmay.

<sup>9</sup> Nuniku asamtai nayantsanum iwaaku batsamin aidauk jinawagmayi, barco aidau nui yuajushkam ashí esakagmay.

<sup>10</sup> Kampatuma nu ángel trompetan umpuagmayi, dutikamtai nayaimpinmaya makichik yaya muun keeká antorchaya numamtin, namak aidau, yumi pukuni jinin aina nuna jimaituken amaisattak iyagmayi.

<sup>11</sup> Nunú yayak Yapau daagtinuyi, nunin asa yumi aina nuna jimaitukjin amaisattak yapau awasabi; nuniku asamtai kuashat aents nuna uwajajuk yapakag jinawagmayi.

<sup>12</sup> Nu nunikmatai cuatro angela nu trompetan umpuagmayi, nunikmatai etsa, nantu, yaya aina nuna jimaitukjin amaisagtatak emeskabi, besekaja nunisag suwe wajastinme tusa, dutikamu asa tres hora kashi tsawaishkam tsaaptinuk atsusmayi.

\* 7:15 Diistá Jn. 7.2.

<sup>13</sup> Nu nuniku ai wainkabiajai, nuigtush antukbaijai makichik ukukui\* nayaimpi ejapan nanaak minis, senchi untsumak: “Ae, ae, ae, shiig ishainmain atatui nugká batsata nudauk, kampatum ángel aidau trompeta umpuinatsu nunú umputaik” wajattaman.

## 9

### *Cincoa ju trompeta umpuagbau*

<sup>1</sup> Cinco angela nu trompetan umpuagmayi, dutikantai nayaimpinmaya makichik yaya nugká iyaittaman wainkabiajai; nuna waa muun ishainmain akaga nuna llavejin susabi.

<sup>2</sup> Dutikam waa muun ishainmain akaga nuna ujaibi; dutikam aja tsajutkau apeam bukuituwama imanik bukuiti jijnmayi, imaniak etsanak suwe awasabi, daseshkam waanmaya bukuita ibauk wajasmayi.

<sup>3</sup> Nunú bukuita nuiya langosta\* aidau titigki ijujattaiya iman aidau senchintikam jijnag nugkan pampankabi.

<sup>4</sup> Tujash nugkanmaya dupa aidaukesh, makichik numikesh emesjaigpa, ayatak aents Apajuinuchu aidau nijayin sellachbau aina nu ijutajum;

<sup>5</sup> tujash maawaigpa, ayatak cinco nantui najaimak waittsatta nu dutikatajum timayi. Tibau asag aentsuk titig ijum najaimama imaniagmayi.

<sup>6</sup> Imanidau asag nunú tsawantinig aents aidauk jakatagtus egakagtinayi, tujash igkuichagmayi; nuigtush jakatasash wakeyagmayi, tujash dita jamainuk atsusagmayi.

<sup>7</sup> Langosta† aidauk caballo aidau maanitnum weagtatus uminas aama nujai betek wajas agmayi, buuké aina nuig corona aidau oroa numamtin ajiagmayi; yapi aina duka aentsú yapiya numamtin agmayi;

<sup>8</sup> intashishkam nuwá intashiya numamtin ajiagmayi, nai aina dushakam leogka naiya numamtin ajiagmayi;

<sup>9</sup> iyashí aidauk jijua numamtin anugjamuyi, nanapenishkam caballo aidau maania-numun shimak kuashat carro aidau japiam tutugtuwama imatmayi;

<sup>10</sup> ujuké aina duka titigki ujukega nunin ajiagmayi, nuigtush ijujattajish ajiagmayi; nunin asag ujukega dui aentsun iju cinco nantui waitkasti tusa senchintikamuyi.

<sup>11</sup> Ditá reyjiya duka, waa muun ishainmain akaga nui ángel puja nuuyi; nuna daajig hebreo chichamaik “Abadón” tutaiyai, untsu griego chichamai “Apolión” tutaiyai.

<sup>12</sup> Nagkamchak ¡ae! tibuwa duka nagkaemakmayi, tujash eke miniagtatui jimag ¡ae! tibuwa nunú.

### *Seisa ju trompeta umpuagbau*

<sup>13</sup> Seis angela ju trompetan umpuagmayi, dutikantai altar oro cuatro kachují ajamu Apajuí eemtin awa nuiya chichamun antukbaijai;

<sup>14</sup> nuniai ángel trompeta takaka nuna chichajak: “Cuatro ángel aidau, namak muun Éufrates uwet jigkajam ijuna au atiata”, timayi.

<sup>15</sup> Tutai cuatro ángel aidau jigkajam ijuntatman atiawagmayi, ditanu hora, tsawan, nantu, mijan umintai nunikti tibau jegau asamtai, dutikam jimaituk ejesattak aents aidau injinati tusa.

<sup>16</sup> Suntag aidau caballonum entsatkau aidauk doscientos millones awai tabaun antukbaijai.

<sup>17</sup> Junak shiig paan wainkabiajai, caballo aidau, nuigtú entsatkau aidau, nu coraza kapantu jiiya numamtin aidau ajiagmayi, zafirowa numamtin wigka, nuigtú azufreya numamtin yagkú ajiagmayi. Caballo aina nuna buukeg león aidau buukega numamtin agmayi; nuigtush weniya nuiya jii, bukuitamu, azufre aatus jiiinagmayi.

<sup>18</sup> Jujú kampatum jata jii, bukuitamu, azufre aidau, nuna wenin jijnaina dui, aents aidau jimaitukea nuna amaisattak jinawagmayi.

<sup>19</sup> Caballo aidau senchijig wenin, ujuké aina nui ajibi; wagki ujuké aina nuig dapi buukejai betek ajiagmayi, nunin asamtai aentsnak dui emesiagmayi.

<sup>20</sup> Tujash tikich aents aidau nujantai jakachu aidauk, pegkegchau takaamujin idaiyas yapajintsuk, Iwanch aidau ememattanash idaitsuk, orojai dakumká najanamu aidau, jjuu platayai najanamu, broncejai najanamu, kayajai najanamu, numí aina nujai najankamu aidau emematiagmayi, wainmachu, antutnash antuchu, wekaetanash wekaechau aina nuna;

\* 8:13 “Ukukui” tawa nunak dewakag tiu amain ainawai, nagkamchaku agagbauwa nuig “ángel” tawai, jumamtinun tawai diistá 14.6. \* 9:3 “Langosta” tawa duka diistá Mt. 3.4. † 9:7 “Langosta” tawa duka diistá Mt. 3.4.

<sup>21</sup> nuigtush magkagtutnash, wawejattanash, tsanijimtanash, kasamtanash idaichagmayi.

## 10

### *Ángel papí piipich takakbau*

<sup>1</sup> Tikich ángel senchigtin nayaimpinmaya yujagminum pachitkau akaegun wainkabi-ajai, buukenig arco iris ajamu, yapig etsajai betek etsanmayi, nawe aina duka jii kegag wajukeyama imaniagmayi.

<sup>2</sup> Papí piipich pempeagbau ujakbaun takakuyi, nawe untsujiya duka nayants najama amayí, nuniak menajiya nunak nugká najama wajabi;

<sup>3</sup> nunik senchi untsamak león shinak wajukeyama imatuk nagkanaig, sieteya imania ipamat wajukeya imatuk paan antumainun chichakagmayi.

<sup>4</sup> Nunú sieteya imania ipamat wajukeya imatuk chichakagmatai agagta timajai; nuniai nayaimpinmaya chichagtak: “Sieteya imania ipamat wajukeya imatuk tiaja duka idaisata, agajaipa”, tujutmayi.

<sup>5</sup> Tuja ángel nayantsanum najama, nugkanmash najama wajaun wainkamiag nu, uwejí untsujiya nuna nayaimpinum takuibi;

<sup>6</sup> nunik, ajumaish tuke pujutin, nayaimpin ashí wají aidau nui ayá nunash, nugkanash ashí wají aidau nui ayá nujai, nayantsanash ashí wají nui ayá nujai najankauwa nuna daajin adaiyak: “Yamaik tsawantak jegae,

<sup>7</sup> siete angela nu trompetan umputai, Apajuí ni dutikatnujin ii dekaachbaun, niina inake profeta aidau etsegkajua duka uminkattawai”, timayi.

<sup>8</sup> Nayaimpinmaya chichaamun antukag duke ataktú awentsag aujtak: “Wetá, nunikam ángel nayantsanum, nugkanum najama papí piipich ujakbaun takus waja nu jukita”, tujutmayi.

<sup>9</sup> Tujutkui angelan jegaantan “Papí piipich pempeagbau sujustá”, tusan segabiajai: Tai ni chichagtak: “Jukita, nunikam yuata; wakeminig yapau awajtamsattawai, tujash weniminig dapá yumiji yumintska iman dekapjattame”, tujutmayi.

<sup>10</sup> Tujutkui, ángel piipich pempeagbau takakbaun jukin yuabiajai; nunikman dapá yumiji yumintska imanun wenujui dekapjamiajai, tujash yuwá ai wakejui yapau awajtusmayi.

<sup>11</sup> Nuniai ni chichagtak: “Ataktú awentsamek etsegkata, kuashat aents aina nui, nugka muun aina nuishkam, ditash chichaaku aina nuish, nuigtú rey aidau batsatbaunmash”, tujutmayi.

## 11

### *Jimag aents etsegbau atin*

<sup>1</sup> Nuna tujuti, makichik tagkanan dekapatia nuninun sujusmayi, dutika chichagtak: “Wetá, nunikam jega Apajuí ememattaiya nu, altar puja nujai dekapata, nuigtú wajupa aentsua nuish emematuinawa dushakam.

<sup>2</sup> Tujash jega Apajuí ememattaiya nuna agaajig dekapatsuk idaisata, duka judiochu aina nu idaitusbauwai; dita ju yaakat pegkegma nunak cuarenta y dos nantui batsamtusag najakag tsai batsamtiagtatui.

<sup>3</sup> Nuniakui wi jimag aentsun, jaanch wake besemag pujaku nugkutain nugkug yujasag, mil doscientos sesenta tsawantai mina pachitus etsegkatnun awemattajai”.

<sup>4</sup> Nunú jimag mina pachitus etsejuina duka, jimag olivo ainawai, nuigtush jimag candelero ashí nugkanmaya Apujiya nuna eemtin ijuna nuuwai.

<sup>5</sup> Duka makichik aentskesh pegkegchau awajkata tamak, ditá weninia, jii jiiinak niina shiwaji aina nunak apeká ijiniagmayi; nunin asagmatai makichik aentskesh niina pegkegchau awajkata tauk, nunisag jiniagmayi.

<sup>6</sup> Ditá senchijig nayaim epenmainush ajuinawai, chichaman etsejuinak yujagtata dui yumi yutujai tusag nuigtush yumi numpa emamaina dusha senchijig ajiagmayi nuigtú wajupa imania dutikata tuinawa dutiksag nugkanmaya aidaun jatan susa waitkamaina dushakam senchijig ajiagmayi.

<sup>7</sup> Chicham etsegbau ashinkamtaí, bestia waa muun ishamain akagaunmaya jiinki ditajai maaniattawai, nunik ditanak depetuk maawagtinuyi.

<sup>8</sup> Nuna iyashí aidauk yaakat muunta nuna ejapen plazanum tepeagmayi, nunú yaaktak ditá pegkegchauji pachittsa “Sodoma”, “Egipto” tutaiya nui, iina Apuji Jesucristo achijag maawajua nui.

<sup>9</sup> Ashí aents tikich nugkanmaya aidaush, makí makichik ditash niimtin aidaush, ditash chichaaku aidaush, nuigtú ashí nugkanmaya aidaushkam iyashinak ukutsuk kampakum tsawan jimaituk dii batsamtiagtinuyi.

<sup>10</sup> Nuninak ashí nugkanmaya aents aidaush nunú jakamtai shiig aneas dakujuinak, pempeentunikiag anentag wajichin sudaiyagtinuyi; wagki nu jimag profeta aina nunú chichagkagtiagtai, shiig tutitag dekapejakú asag.

<sup>11</sup> Tujash kampakum tsawan nuigtú jimaituk nagkaemai, Apajuí mayai awetim ditai egkemtujam nantakí wajantagmayi, nunikagmatai nuna wainkaju aidaush shiig senchi ishankagmayi.

<sup>12</sup> Imaninai nayaimpinmaya senchi untsuká: “Jui wakatajum”, timayi. Tama mai yujagminum pachiinak ditá shiwaji aidaush wainainaig wakagmayi.

<sup>13</sup> Nu nuniaig senchi uugbau asabi, imaniak kuashat jegan yumpuagmayi, nu uugbaunum siete mil aents jinawagmayi; nuniai tikich aidaush senchi ishankag, Apajuí nayaimpinum pujuuwa nuna emematiagmayi.

<sup>14</sup> Jimaja ju ¡ae! timauwa duka nagkaemakni, waamak kampakuma ju ¡ae! timauwa dusha minittawai.

### *Sieteya ju trompeta umpuagbau*

<sup>15</sup> Siete angela ju trompeta umpuagmatai, nayaimpinmaya senchi pampajagmayi, nuninak:

“Ashí nugkanmaya inamaina duka yamaik iina Apajuijini nuigtú Cristunu wajasé. Nigki ajumaish tuke inamin atinai”, wajagmayi.

<sup>16</sup> Imatiagtai veinticuatro anciano aidaush ditá ekeemtaiji aina nui Apajuí emtin peka-jushkam, tsuntsumawag nijayin nugkan antig Apajuí emematiagmayi;

<sup>17</sup> nuninak: See tajame, Apu Apajuí ashí senchigtinuh, ametme tuke pujuu nuigtú tuke pujujakumek, iman asam amina senchigmijai inamjatasam nagkamaume.

<sup>18</sup> Nuniau asamin ashí nugkanmaya aidaush kajekaje, tujash ame kajeamugmik nagkamnae, nuigtú jakau aidaush suwimak susattam dushakam tsawantak jegae, nuigtú amina inakem profeta aidaush, aentsjum pegkejam aidaush, amina umigtamin aidaush, eme anenchatai, eme anentai aidaush, akiktinaitam dushakam nuigtú nugkan emesena nu tsaiktinchakam jegae, wajagmayi.

<sup>19</sup> Nuniai jega Apajuí ememattaish ujanmayi nayaimpinum awa nunú; nunikmatai kajun arca tutai chicham apakbau aajakua nu, jega Apajuí ememattain auk paan wainnabi, nui agmayi peem aidaush, pampainamu, ipamat aidaush, uugbau, nuigtú senchi bicha kakegainamu.

## 12

### *Nuwa*

<sup>1</sup> Nayaimpinum anentai jegagmainchau wantinkabi: makichik nuwa etsaya imanun nugkuaju, nawe aina nuna wakentin nantu ajibi, buukenchakam corona doce yaya batsakbaun atsejaku.

<sup>2</sup> Ejamtin asa, uchigmaktatus najaimak waitiak senchi untsumayi.

### *Dragón*

<sup>3</sup> Nuigtushkam nayaimpinum tikich wantinkabi: makichik dragón muun kapantaku, ajibi siete buuké aidaush, nuigtú diez kachují aidaush, makí makichik buuké aina nuig corona ajiagmayi,

<sup>4</sup> ujuken nayaimpinmaya yaya aidaush jimaitukjin amaisattak amainun tajak juki nugká akakekmayi. Nunik dragón nuwa uchigmaktatus puja nuna eemtin wajanmayi, uchi yamá akiinunak yuatatus.

<sup>5</sup> Nuniai nuwak aishmagkun uchigmakmayi, ashí nugkanum niina senchijijai inam-jatna nuna; tujash uchijinak jujukiag Apajuí ekeemtaijin eketbaunum iwakagmayi.

<sup>6</sup> Nuwak uwegshunum tupikakmayi, nui pujumatai mil doscientos sesenta tsawantai yumainun susatnume tusa, Apajuí ni pujustinun umigkauwa nui.

<sup>7</sup> Nuniku ai nayaimpinum maaniamu asabi, Miguel niina angelji aidaushai dragogjai maaniagmayi. Dragogshakam ashí niina angelji aina nujai ijunag maaniagmayi;

<sup>8</sup> tujash depetkachmayi nuigtushkam dita pujumainuk nayaimpinmag atsusmayi.

<sup>9</sup> Nunikmatai dragón yaunchuk dapi tujakbau, Iwanch Satanás tutai, ashí nugkanum tsanumá wekaena nunak, ashí niina angelji aidauijii jiiikí nугká ajapawagmayi.

<sup>10</sup> Dutikamtai nayaimpinum senchi pampaidaun antukmaijai:

“Yamaik tsawan uwemat jegae,  
iina Apajuiji niina senchijijai inamjatta nunú,  
niina Uchijí Cristo inamjatta dushakam;  
wagki iina yachi aidaun tsawai kashijai iina Apajuiji eemtin tsanumjú wekaenuwe duka  
jiiikí ajapamu asamtai.

<sup>11</sup> Ditak Uwijá numpejai nuigtú,  
niina chichame etsegbauwa nujai depetmakaje,  
nuigtush ditá pujutinash puyatjukchaje  
jakagtatus uminas yujaidau asag.

<sup>12</sup> ¡Nuadui nayaim batsatutigmek shiig aneastajum! Tujash ¡Wait anentajime  
nugkanum, nayantsanum batsatainajum nunak!  
Wagki Iwanch tsawan piipich juwatka nuna dekau asa  
senchi kajeká atumin akaetugmakiu asamtai”, timayi.

*Dragón kajek nuwa ainjamu*

<sup>13</sup> Dragón nugkanum ajapamu asa, nuwa uchijin aishmagkun uchigmakua nuna ainmayi.

<sup>14</sup> Dutiktai nuwan, ukukui nanapen shiig muuntan jimajan susabi, dutikam nanaak uwegshunum weak dragognak ukukti, nunik nui kumpatum mijan jimaituk pujusmatai yutain susatnume tusa.

<sup>15</sup> Nunikmatai dragón, weninian yumin jiiikí makichik namakan najanabi nuwá amainag tajaká jukitú tusa.

<sup>16</sup> Tujash nuwanak nугka ayamjukmayi, nугka ujani dragón weninian yumin namaka najana awetimunak uwag amukmayi.

<sup>17</sup> Dutikamtai dragón nuwan senchi kajekgabi, nunik nuwá patayí weantu aidauijii maaniatatus wejibi, Apajui chicham umiktajum tibaun umiina nujai, nuigtush Jesusan pachis etsegtuina nujaishkam.

<sup>18</sup> Nunik dragogkak nayantsan uwetus wajanmayi.

## 13

*Bestia nayantsanmaya aidau*

<sup>1</sup> Wainkabaijai makichik bestia siete buuké aidau ajamun, nuigtú diez kachují aidau ajamu nayantsanmaya jiiintatman; kachují aina nuig corona ajiagmayi, untsu buuké aina nuig daaji, Apajui pegkegchau chichajin tabau agatkamuyi.

<sup>2</sup> Nu bestia wainkag duka ikamyawajai betekmamtinuyi, naweg chayú nawega numamtinuyi, untsu weniig leogka weniya nuninuyi. Nuna dragón niina senchijin nuigtú niina ekeemsa inamtaijiyi nunash susabi ni inamjati tusa.

<sup>3</sup> Wainkabaijai buuké aina nuia makichik, jakati tusa awatbauwa nuninun, tujash awatbauwa duka esamauwayi; nunikmatai aents ashí nugkanmaya aidauk puyatjukagmayi, nunikag bestia nemajiagmayi;

<sup>4</sup> nuninak, dragogkan emematiagmayi, bestian senchintikau asamtai, nuninak bestianash emematiagmayi, nuninak: “¿Yaita bestiaya imajush, ya niijaish maan-mainaita?”, awajiagmayi.

<sup>5</sup> Nuigtushkam idaitusmayi kuashat waji aidaun chichaktí, nuniak cuarenta y dos nantui pujus Apajuinash pegkegchau chichagkati tusa.

<sup>6</sup> Tibau asa Apajuinash, daaji pachisash, ni pujutinash, nuigtú ashí nayaimpinum batsamin aina nunash pegkegchau chichagmayi.

<sup>7</sup> Nuigtushkam Apajui nemajin aidauijii maaniati nuniak depetkati tibauyi. Nuigtushkam, ditash niimtin aina nuish, yaaktanmash, ditash chichaaku aidaunmash nuigtú ashí nugkanmash inamjati tusa idaitusbauyi.

<sup>8</sup> Dutikamu asamtai ashí nugkanum batsamin aidau, yama nугka najanamua duwi nagkamas, Uwig maamu aajakua nuna papiijin pujutan jukitnume tusa, daaji agatkashbau aina nunú aidau emematiagmayi.

<sup>9</sup> Ni antutajii ajamu aidauk antukti.

<sup>10</sup> “Ni achiká juwam amainuk, achiká jukimu agtatui, ni espadayai maam amainuk, espadayai maam agtatui”.  
Ju nuniamunum, Apajui aentsji pegkejam aidau waitiamu katsuntan, dekaskeapi tutan unuimamain ainawai.



*Bestia nugkanmaya jiinkimu*

<sup>11</sup> Nu nuniku ai, tikich bestia nugkanmaya jinin wainkabiajai, jimag kachuji Uwigdaujai betek ajibi, tujash dragón chichau wajabi.

<sup>12</sup> Nuniak nagkamchak bestia inamjati tusa susamua nudaun takabi, nuniau asa nugkanum aents batsamin aidaunak, “dekatakau bestia buuken awatbau esamauwa nu ememattajum”, timayi.

<sup>13</sup> Tusa kuashat wainchatain iwainabi, dutikak ashí aents wainainamunum nayaimpinmayan jiiin nugká ajuibi.

<sup>14</sup> Nuniak bestia emtin dutikati tibau asa wainchatai aidaun iwainak nugká batsatunak tsanubi, nuniau asa nugká batsatunak bestia niime dakumkajum najanatajum espadayai awatbau aajakú iwaku puja nunú timayi.

<sup>15</sup> Tima niimé dakumak najanawagmatai, bestia nugkanmaya jiinki nu mayain egketkabi, bestia dakumká najanamua nu chichaktí, nunik ashí aents niina emematuinatsu nunak kajegtí tusa.

<sup>16</sup> Nunik ashí aents eme anenchatai aidau, eme anentai aidau, wiyakuch aidau, uju-nauch aidau, inaku waitkashtai aidaush, inatai aidaushkam nijayinkesh, nuniachkush uwejí untsujinkesh marca apujtustajum;

<sup>17</sup> marca atsubgau aidau nuniachkush bestia daajigkesh atsubgau, daajiya nuna numerojigkesh atsubgau aidauk sumatnash sumamainchau, sujutnash sujumainchau atinme, timayi.

<sup>18</sup> Juka yachameta nujai dekamainai, ya shiijash antawa nu dekapagti bestia numerojiya nuna, juka aentsú numerojiyai. Nunú numerok seiscientos sesenta y seis, tawa juuwai.

**14***144 mil aidau kantamawagbau*

<sup>1</sup> Wainkabiajai Uwig muja Siognum wajattaman, nuigtú niijai ciento cuarenta y cuatro mil aents aidau, niina daaji, nuigtú niina Apají daaji, dita nijayin agatkamu aidaun.

<sup>2</sup> Nuniamunum nayaimpinmayan antukbajjai, yumi senchi uutama imatak, senchi chaajip wajukeama imatun, nuigtú pampamua dushakam arpa awatin aidau awatbau wajukea imatmayi.

<sup>3</sup> Nuigtú yamajam kantamtain kantamiagmayi, Apajuí ekeemtaijin eketa nuna eemtin cuatro iwaaku aina nu, nuigtú anciano aina nuna emtin wajantag, nunú kantamtai yamagma nunak makichkish tikichik unuimachagmayi, imá ciento cuarenta y cuatro mil uwemtikamua duke dekagmayi.

<sup>4</sup> Nunú aidauk makichkish tsuwapaekachu agmayi nuwa aina nujai antinikchau asag. Jujú aina duka Uwig tuwig wegawa nunitaish nemajin ainawai, jujú aina duka aents nugkanmaya aina nuiya nagkamchaku Apajuinu nuigtú Uwigdau ati tusa uwemtikamu ainawai.

<sup>5</sup> Nuigtushkam ditak pegkegchaujish atsubgau, waitjuamujish atsubgau asag, Apajuí eemtin ijuniagmayi.

*Kampatum ángel aidau etsejuinamu*

<sup>6</sup> Wainkabiajai tikich ángel, aents nugkaa batsata nui, ashí nugkanmash, makí makichik niimtin aina nuish, makí makichik chichaaku nuigtú yaakat batsata nuishkam yamajam chicham tuke auwa nuna etsegkatatus takaku nayaimpi ejapen nanamtatman;

<sup>7</sup> nuniak senchi untsamak: “Apajuí pyuatjusum ememattajum, wagki suwimak sukagtustina duka hora jegau asamtai; ememattajum nayaimpin, nugkan, nayantsan, yumi pukuni jiiinaina nunash najankauwa nunú”, timayi.

<sup>8</sup> Tai nuna ukujin tikich ángel patatkau: “¡Tsainkae, Tsainkae yaakat muun Babilonia munta duka! ¡Ashí nugkanmaya aidaunak vino ni pegkegchau takaamujiya nuna takamtikak, apajuimtai aina nu umigkatajum tusa jintinkagtauu asamtai!” wajabi.

<sup>9</sup> Nuniai ángel kampatuma ju patatkau midaushkam senchi untsamak: “Makichik aentskesh bestia emematuk, nuniachkush niime dakumkamua nunakesh emematak nijayinkish, uwejjinkesh marcamu aina nunak,

<sup>10</sup> Apajuí kajeká suwimkan susatnai, dutikak niinu ángel pegkejam aina dusha nuigtú Uwijash wainag jii azufrejai pachimjamua nui utsatnai.

<sup>11</sup> Dita waituina nuiya bukuiti jiina duka tuke ajumaish bukuitú atinai. Bestia emematiaju aidau, niime dakumkamujiya nunakesh, niina daajiya nujaigkish marcamu aina duka tsawaish, kashikesh ayamauk atsutginai”.

<sup>12</sup> ¡Nuadui Apajuí nemajin pegkejam aina duka, waituinakush emamkemas katsuntug batsamas, Apajuí chicham umiktajum tibauwa nuna umiinak, Jesusai dekaskeapi tumain ainawai!

<sup>13</sup> Antukbaijai makichik chichaman nayaimpinmaya tujuttatman: “Agagta: Shiig aneasgatui yamai nagkamas Apu Jesusjai ijutkau pujus jaina duka”. Tutai, Wakani Pegkeji chichaak:

“Ehé, dita takaak waituina nunak ayamsagtatui, wagki ashí dita takasbaunum akiam agtata dui, timayi”.

#### *Nugkanmaya yajubau*

<sup>14</sup> Niimkaman wainkabiajai makichik yujagkim pujun, nunú yujagmia nui Aentsmaga akiinauwa numamtin, oro atsejaku, hoz shiig etsakamun takaku ekeemtatman.

<sup>15</sup> Nuniai jega Apajuí ememattainmaya makichik ángel jiinkibi, nunik yujagminum eketa nuna senchi untsuká: “Pai, yamaik hora jegae, nugkanmaya ajak tsamak uminkae, hozjumjai tsupijam juuktá” timayi.

<sup>16</sup> Tama yujagminum eketa nunú, hozjijai tsupig ajak nugkanmayanak juukmayi.  
<sup>17</sup> Nunikmatai jega Apajuí ememattai nayaimpinum awa nuiya, tikich ángel hoz shiig etsakamun takus jiinkibi.

<sup>18</sup> Nuniai tikich ángel jii ekemamain senchijí ajamu altarnumia jiinkibi, nunik hoz etsakamun takaka nuna senchi untsuká: “¡Hoz etsakamu takakam dui nugkanum uva ajakbau tsamakaja aanú tsupijam juuktá!”, timayi.

<sup>19</sup> Tama angelchakam hozjijai nugká uva tsamakun tsupig yajuak, uva dajaja ijutainum chimpiabi, duka Apajuí suimkaji ishamaina nuna iwainabi.

<sup>20</sup> Dutikamtai uvanak yaaktan ukumtikiag ijujagmayi, tuja uva ijutainmaya numpa jiinkibi, nunik caballo weniya aatus amugmayi. Nuniak trescientos kilómetros tumain nugkan ukatkabi.

## 15

### *Ángel aidau sieteya imajin suwimak sukagtustin aidau*

<sup>1</sup> Wainkabiajai nayaimpinum tikich shiig anentai jegagmainchau wantinun: siete ángel aidau, inagnamunum jata atinun takuinakuyi. Nujai Apajuí ni kajekbaujinak inagnaktinuyi.

<sup>2</sup> Nuigtush wainkabiajai, nayantsa numamtin vidrio saawiya iman jijai pachimjamu atatman. Nui ijuniagmayi Apajuí arpa susamun takuinaku, bestia niime dakumkamua nunakesh emematchaju aidau, dakumkamunakesh, marcash atsburgau, daaji numerowai agatjashbau aina nunú.

<sup>3</sup> Nunú aidau, Moisés Apajuí inake aajakú kantamamua nuna kantabiagmayi nuigtú Uwijá kantamtaijijya nujai, nuninak:

“Shiig muuntai, anentai jegagmait sui,

ashí ame takasbau aina duka.

Apu Apajuí Ashí senchigtinuh;

ame takasbau aina duka pegkejai, dekaskenum aikame, amek ashí nugkanmaya aina nuna reyjiyaitme.

<sup>4</sup> ¿Apuh yaki ishamjamkashti? ¿Yaki emematjamchati?

Ameketme pegkegmamek.

Iman asamin ashí nugkanmaya aidauk kautjamak emematjabiagtatui, wagki ame dekas dutikaum duka ashí wantinjau asamtai”, wajagmayi.

<sup>5</sup> Juna tusa inagnaku, niimkaman nayaimpinum jega Apajuí ememattai ujjantatman wainkabiajai.

<sup>6</sup> Nunú jega Apajuí ememattai ujanmatai siete ángel aidau, siete jata aidaun takaku jünjagmayi, jaanch lino tsuwatchau winchamtin aidau nugkuaju, detsepega aatus akachumtai oro akachumau agmayi.

<sup>7</sup> Nuniai siete iwaaku aina nuiya makichik, siete ángel aina nuna, siete copa oro aidaun susabi, Apajuí tuke pujuwa nuna kajeti aimjamun.

<sup>8</sup> Jega Apajuí ememattaiya nunak Apajuí imanji, nuigtú senchijijya nu bukuiti akijuabi; imaniau asamtai siete ángel aidau, siete jata aidaun takuinaka nuna ashimtsaigkik makichkish nuig waimainchau agmayi.

## 16

### *Apajuí kajetí siete copanum aimjamu aidau*

<sup>1</sup> Antukbajjai juga Apajuí ememattainmaya senchi untsamak, siete ángel aina nuna chichajak: “Wetajum nunikjum siete copa aina nui Apajuí kajetí aimjamua nu nugká ukagtajum”, tabaun.

<sup>2</sup> Tama dekatkauwa nu ángel wee, copanum aimkamua nuna nugká ukagmayi. Dutikamtai aents aidau, bestia marcaji ajamu aidaun nuigtú niime dakumká najanamua nuna emematiaju aidauk kuchap jiintujam najaimainak senchi waitiagmayi.

<sup>3</sup> Nuniai tikich ángel copanum aimkamua nuna nayants ukagmayi. Dutikamtai nayantsak numpa wajasmayi, aents maamu numpega iman. Imanikmatai ashí nayantsanum iwaaku batsamin aina duka jinawagmayi.

<sup>4</sup> Nuniai ángel kempatuma ju copanum aimkamua nuna, namak aidaunum, yumí pukuni jiintaiji aina nui ukagmayi, dutikam numpa wajasagmayi.

<sup>5</sup> Nu ángel yumi dutikmain senchijí ajá nu chichaamun antukbajjai:

“Apuh, amek pegkeg takauwaitme, iman asam juka jutikaume.

Pegkegmah, tuke pujuu nuigtush tuke pujujukuitme,

<sup>6</sup> wagki ditak amina aentsjum pegkejam aidaun, nuigtú profetajum aidaunash mainak numpen ukajaju asagmatai, ameshkam dutiksamek numpa amame. ¡Dekaskenum ditak aatsa aikam amain ainawai!”

<sup>7</sup> Nuigtush altar puja nuiya, chichaak: “Apu Apajuí ashí senchigtinuh, amina suimkajum aina juka pegkejai, dekas ainawai”, tabaun antukbajjai.

<sup>8</sup> Nuniai ángel cuatroa ju, copanum aimkamua nuna etsan ukatjabi, dutikak senchin susabi jii kegama imaniak aents aidaun apeati tusa.

<sup>9</sup> Dutikamtai aents aidauk sukuinam senchi esagmayi, imaninak Apajuí senchigtin asa jatá dutika nuna adaisag pegkegchau chichajiagmayi, nunidau asag ditá tudaujinash idaiyinak Apajuinak emematchagmayi.

<sup>10</sup> Nuniai ángel cincoa ju, copanum aimkamua nuna bestia ekeemsa inamtaijin ukagmayi; dutikamtai niina inamtaijig suwe wajasmayi, nunikmatai aents aidauk iyashin najaimainak inayin esagmayi,

<sup>11</sup> imanik kuchapjin najaimainak Apajuí nayaimpinum pujuwa nuna pegkegchau chichajiagmayi, tujash pegkegchau takatnak idaichagmayi.

<sup>12</sup> Nuigtú ángel seisa ju copanum aimkamua nuna namak Éufrates muunta nui ukagmayi, dutikamtai namakak buku wajasmayi, rey aidau etsá minitainia aidau suntajijai mininak katiajagtina nunú.

<sup>13</sup> Nuniai wainkabajjai dragogka weninia, nuigtú bestia weninia, waitá etsegna nuna weniniashkam, kempatum wakan pegkegchau kuwauwa nuní niimtin aidau jiiinaidaun;

<sup>14</sup> duka wakan iwanchdau ainawai, nunin asag aentsush dutikmainchaun iwainag takainak, ashí nugkanmaya rey aina nuna yujajiagtinaí ijumjatatus, Apajuí ashí senchigtina nu, suwimak sugakgamu tsawan jegakuí maaniami tusag.

<sup>15</sup> Wika kasajai betekmamtuk minittajai, shiig aneasagtinai aneaku batsatuk, nuigtush jaachjin kuitamaidauk, wi minitaish wisú pujuinachu asag datsamamujish atsujiagtina dui.

<sup>16</sup> Dutika rey aidaunak ijumjabi hebreo chichamai nugka Armagedón\* tutaya nui.

<sup>17</sup> Nuniai ángel sieteya ju copanum aimkamua nuna dasenum ukagmayi, dutikamtai juga Apajuí ememattainum ekeemtai nayaimpinum awa nuiya, senchi untsamak: Ashimdaekae, timayi.

<sup>18</sup> Timatai ipamat, chaajip, peem aidaujai senchi pampaidiagmayi, imatbaunum nugkak senchi uugmayi, yama nagkamak aents batsamsauwa dui nagkamsash imanika uugchatain shiig senchi uugmayi.

<sup>19</sup> Imaniau asantai yaakat muunta duka kempatuma imajin kanakmayi, yaakat aidau nugka muunnum aina dushakam tsainkabi. Apajuí yaakat Babilonia pegkegchaujin kajimatjukchau asa, kajejuk suwimkan suak imatikabi.

<sup>20</sup> Ashí ajuntaik muja aidaujai megkaejagmayi.

<sup>21</sup> Nuigtushkam nayaimpinmaya bicha muun cuarenta kilo tumainun nagkaesau aentsnak kaketiagmayi; Nu suwimak ishamain imanitai, Apajuin pegkegchau chichajiagmayi.

## 17

*Akiká takaaku tuwagtaiya nu suwimak suamu atin*

\* 16:16 “Armagedón” Palestina nugkanum awai, nuanui Apajuí ashí senchigtina nunú inagnamunum Iwanch suntajin ijumjantai maaniatnai, tawai Apajuí chichame.

<sup>1</sup> Siete ángel aidau, siete copa aidau nuiya makichik tajuntu jun chichagtak: “Jui tantata, nunikamin akiká takaaku tuwagtaiya nu kuashat namak aidau num eketa nunú suwimak susatnun iwaintuktajame;

<sup>2</sup> nu nuwajai nugkanmaya rey aina duka pegkegchaun takasaje aantsag ashí nugkanum aents batsatina dushakam nujai takaninak namepejaje” tujutmayi.

<sup>3</sup> Nuna Wakan iwaintugkamtai, ángel uwegshunum jujukmayi, dutijuamtai bestia kapantaku, siete buuktin, diez kachují ajamu, ashí iyashin Apajuí pegkegchau chichagbau agatkamunum makichik nuwa ekeematman wainkabiajai.

<sup>4</sup> Nunú nuwak jaanch yamakaitkau kapantaku pachimjugbaun nugkuajuyi, nuigtush oro, kaya shiig pegkeg aidau, perla aidaujai iwagmamjauyi; nuigtushkam makichik copa oronum ashí dakitmain aidau, tsumain niina takanitaiji aidau piyakun takakuyi;

<sup>5</sup> tuja nijayinchakam chicham dekamainchau: “BABILONIA AKIKÁ TAKAAKU TUWAG-TAI, AKIKÁ TAKATAI AINA NUNA DUKUJÍ, NUIGTUSH ASHÍ PEGKEGCHAU DAKITMAIN APAJUIMTAI NUGKANUM AYÁ NUNASHKAM”, tusa agatjamuyi.

<sup>6</sup> Nunikmatai Apajuí aentsji pegkejam aina nuna numpen, Jesusa etsegtin asagmatai maawagbauwa nuna numpejai uwag nampeká ekeematman nuwan wainkabiajai.

Nuna wainkan senchi puyatkabiajai.

<sup>7</sup> Nuniai ángel chichagtak: “¿Wagka imanimesh puyatame?” “Ju nuwash wajukat-nuna aniawa, nunak wi shiig ujaktajame, nuigtú bestia siete buuktin, siete kachují ajamunum entsatka nuna pachisan.

<sup>8</sup> Bestia wainkaum duka duik pujujakui, tujash yamaik atsawai; nuninaitak waa muun ishamain akaga nuiya jünkittawai, nunik ni suwimak jukitnujin jegatatus. Ashí nugkanum batsatina nunú, yama nugka najannaigkish papi pujutan jukiu agattaiya nuish daaji agatkashbau aidauk, bestia pujujakú, tujash yamaik atsau, ajumaish achatna nuna wainkag senchi puyatkagtin ainawai.

<sup>9</sup> “Jui wainmainai yaki yachaita, yaki shiijash antawa nunú: Siete buukega duka, siete nujanum nuwa eketa nuuwai;

<sup>10</sup> nuigtú siete rey aina nuna iwainawai. Cinco rey aina duka megkaejaje, nunikmatai makichik inamui tuja makichik eke minatsui, tujash nu inamkug dukap tsawan pujus inamjashtatui.

<sup>11</sup> Bestia pujujakú, jakau asa atsa nunú ataktú rey wajas inamtai ocho rey atatu, duka siete rey aajakua nuiyagke, nunak suwimak tuke atina nui weak nuniktatui.

<sup>12</sup> “Diez kachují aidau wainkaum duka, diez rey aidau eke inamainatsu nuuwai, tujash nunú aidauk bestiajai ijunag makichik hora inamjagtinaí.

<sup>13</sup> Ditak makichik dutikata tabaunak anentaimtuidau asag, bestia inamjati tsag senchimitkawag ditá inamtaijinak idaitusagtatui.

<sup>14</sup> Dutikawajam Uwigjai maaniawagtatui, tujash Uwig ditanak depetkagtatui, wagki imá nigki Apu ashí apu aidau nagkaesauk nuigtushkam nigki Rey ashí rey aina nunash nagkaesauwa ibau asa; ditajai ijuna duka ni untsukbau ainawai, ni etegjamu nuigtush chichamenash betek umijin aidau”.

<sup>15</sup> Nuigtush ángel chichagtak: “Ame namak aidau num akiká takatai eketu wainkaum duka, ashí aents aidau, ashí nugkanmaya, ditash chichaaku aidau, nugka muunnumia aidau, ashí yaaktanmaya aina nu ainawai.

<sup>16</sup> Bestia diez kachují ajamu wainkaum aanú aidau akiká takatai nuna kajegkagtinaí, dutikawag yaaktan tsaikag ashí waji yajutuk wisú ukukiagtinaí; nuna nejenak yuawagtinaí dutikainak jiyai apekagtinaí;

<sup>17</sup> wagki nunak, Apajuí ni dutikata tibauwa nuna dutikatnume tusa ditá anentain apujtsajui, dutikamu asag shiig chichasag ditá inamtaijiya nunak, bestia idaitusaju ai, Apajuí tibauwa nunú uminkatnai.

<sup>18</sup> Ame nuwa wainkaum duka yaakat muunta nuuwai, ashí nugkanum rey aina nui inama nunú”, tujutmayi.

## 18

### *Babilonia tsaiqbau*

<sup>1</sup> Juna wainkan, tikich ángel senchigtin, niina tsaaptinjinig nugkanak tsawan awajus nayaimpinmaya akaegun wainkabiajai.

<sup>2</sup> Nuniak shiig senchi untsamak:

“¡Tsainkae, tsainkae yaakat Babilonia muunta duka!

¡Yamaik wakan pegkegchau aina nuna batsamtai, nuigtú chigki tsumain dakittsá diitai aidau batsamtai wajasé!

<sup>3</sup> Wagki ashí nugkanmaya aidauk vino nuwa pegkegchau takaamua nunak uwajaje;

nuigtush rey nugkanmaya aidaush nu nuwajai takanisaje, waji sujin nugkanmaya aidaushkam nunú nuwa senchi wakejamujiya nuna suwinak wiyakchameawaje”, timayi.

<sup>4</sup> Nuigtú tikichin nayaimpinmaya chichaamun antukbaijai, nuniak: “Mina aentsug aidautigmek, aanú yaaktanum pujutsuk jijnjatajum, dita tudau takaina nu takaakjum,

jata ditan ishamain minittata nunú atumesh jukijum;

<sup>5</sup> ditá tudaujig nayaimpinak antigke imaniku asamtai, Apajuí ditá pegkegchaujín suwimkan susagtatui.

<sup>6</sup> Aanú nuwa tikichin pegkegchau awajkauwa dutiksagmek, niishkam pegkegchau awajkatajum.

Nuigtush ni pegkegchau takasbaujiya nuna nagkaesau waitkastajum;

ni copanum tikich uwagtinun pachimjug umujuk amujakua nuanuig, nigka aan nagkaemasjum senchi pachimjugtajum.

<sup>7</sup> Dutikakjum ni ememas shiig aneas pujusua dutiksagmek,

ni senchi waitiak buuttinjiya dushakam susatajum, wagki ni anentaimsag:

Wika juig reinajai betek wajasan eketjai,

nuigtush wajechuitjai, nunin asan tuke waittsashtinaitjai tawai;

<sup>8</sup> tau asamtai makichik tsawanta duik ni ashí waitiamujig ajittawai:

Jaamují, buutbaují, yapajamují, inagnamunum jinum apeam atatuí;

wagki Apu Apajuí ashí senchigtina íbau asa,

niina suwimkan suwak dutikattawai”.

<sup>9</sup> Nugkanmaya rey aidau nunú nuwajai takanisaju aidauk, nijai wakegamun pujusaju asag buutiagtinaí, nuninak senchi niina anentaimtusag waitiagtinaí, esaak bukuitaun wainaidau asag;

<sup>10</sup> imanik waittai ishamainak ikaag ijunas:

“¡Wait anentajame, wait anentajame Babilonia ame yaakat muun senchigtin aajakuitkum,

makichik horaya duik suwimak juamu ajutjamsa dui!”, awajiagmayi.

<sup>11</sup> Wají sujin nugkanmaya aidaush buutiagtinaí, nuninak nuwa nuna anentaimtuinak waitiagtinaí, wagki ditá wajií sumagmainuk makichikish atsusú asamtai;

<sup>12</sup> wají sujutaijí aidauk oro, jiju plata tutai, kaya pegkeg aidau, perla aidau, lino dekas pegkeg, jaanch yamakaitkau, seda, jaanch kapantaku aidau, ashí numi kugkuin aidau, ashí wají elefante najai najanamun, ashí wají numi pegkeg aidaujai najankamu, cobre, hierro, nuigtú mármol;

<sup>13</sup> nuigtú canela, kugkuin aidau, incienso, mirra, olíbano, vino, aceite, harina dekas pegkeg aidau, trigo, bestia aidau, uwig aidau, caballo carro japitai aidau, nuigtú inatai aidau, aents aidaushkam, aajakajui.

<sup>14</sup> Nunin asamtai yaaktan chichajuinak:

“¡Ame wají shiig wakejin aayum duka,

yamaik atsugtamsae!

Ashí wajiíjum shiig pegkeg aidau ajutjamajakua duka

tuke igkugchatnaitme”, awajiagmayi.

<sup>15</sup> Nunú wajiin sujin aidauk, nuna suinak wiyakuch waigkú aina duka, nunú imanik waitiamun wainkag ishamainak ikaa ijuntsagtinaí, nunik anentain idajuk buutuínak:

<sup>16</sup> “¡Wait anentajai, wait anentajai yaakat muunta nunak!

jaanch lino najanamun,

jaanch kapantu nentetkaun nugkug,

oro, perla, kaya pegkeg aina íbaujai iwagmamnuwe nuna,

<sup>17</sup> ¡wagki makichik horaya duik íbau wiakchameamujíya duka esagkae!” tiagmayi.

Nuigtushkam ashí lanchá anuntin aidau, nui chimpimag yujau aidau, nui takau aidaush, ashí aents nayantsanum takau aina nujai ikaa ijuntsagmayi.

<sup>18</sup> Nunikag esaku bukuitamujin wainkag senchi untsumkag: “¿Tikich yaakat jujú yaakat muunta íbagjai betekmamtinuk atsawapita?”, wajagmayi.

<sup>19</sup> Tusag wake besemag dekapenak nugka yukuukuntun jukiag, buuken yukuajag senchi untsamak buutuínak:

“¡Wait anentajai, wait anentajai yaakat muunta nuna!

Ashí lanchagtín aidautinak nigki wiyakuch etamiajuitak makichik horaya duik esaké”, wajagmayi.

<sup>20</sup> “Nayaim batsatutigmesh, Apajuí aentsji pegkejam aidautigjum,

apóstol aidautigmesh,

nuigtú profeta aidautigmeshkam ju nuwa imania jujú diisjum shiig aneestajum.

Wagki Apajuú atumin iikmatjamak suwimkan suwak imatikau asamtai”, timayi.

<sup>21</sup> Nuna timatai, makichik ángel senchigtin, kaya deketai muunta numamtinun jukibi, dutika nayants ajugmayi, nuniak:

“Jujai betekak yaakat Babilonia muunta aushkam ajapeam atatu, nunikmataig ajumaish wainkashtin ainawai.

<sup>22</sup> Dutikamu asamin, aminiya arpa awatbauk,

pigkui umpuamush, trompeta umpuin aidau umpuamush, aents nui pujus takaush, yutain dekedaukesh tuke antuekashtinai.

<sup>23</sup> Nuigtush aminiya lámpara ekemamukesh wainnakchatnai tuja,

nuweniagtai fiestamainak pampainamukesh tuke antuekashtinai,

wagki amina wajiigmin sujutjamajakua duka,

nugkanmag dita wagaku aajakajui,

amina tunchigminig ashí nugkanmaya aents aidauk tsanujakuitme.

<sup>24</sup> Nuigtush niini profeta aina nuna numpe nuigtú,

aents pegkejam aidauun numpe wainnakui,

nuigtú ashí aents Apajuú umijin aidauun nugkanum maawajua nudaushkam”, timayi.

## 19

### *Nayaimpinmaya emematbau*

<sup>1</sup> Nunú nagkaemakmatai nayaimpinum kuashat ijunjag senchi pampainamun antuk-baijai, nuninak:

“¡Yajautsui!

Uwemat, senchi, eme anentut, nuigtú emematut aina duka, imá iina Apuji Apajuiya nudauek,

<sup>2</sup> wagki Apajuú suwimkan susa duka pegkejai nuigtush dekaske,

nuwa akiká takaaku tuwagtaiya nu ashí nugkanmaya aidauun,

ni takataijiya nuna jintintua pegkegchau emaku asamtai suwimkan susae.

Nuigtush niini ikmake niina inaken kajegkú aina nuna”, wajagmayi.

<sup>3</sup> Nunikag ataktushkam awentsag:

“¡Yajautsui!

Nuwa akika takaaku tuwagtai esaak bukuita duka ajumaish tuke megkaekashtinai”.

<sup>4</sup> Timatai veinticuatro anciano aidau cuatro iwaaku aidaujai, Apajuú niina ekeemtaijin eketun tikishmatjag tsuntsumawag nijayin nugkan antig pujusag emematuinak: “¡Ya-jautsui! Aatus atí”, tiagmayi.

<sup>5</sup> Nuna tiagtai nunú ekeemtaiya nuiya chichaak:

“¡Ashí niina inake aidautigmesh, eme anentsá diitai, eme anentsá diishtai aidautigmesh, iina Apajuijiya nu eme anentsajum ememattajum!” tabaun antukbaijai.

### *Uwig nuwenku yuamu atin*

<sup>6</sup> Nuigtushkam antukbaijai kuashat ijunag chichainak wajukmaina imatak, yumi uutama imatak, shiig senchi ipamat kedegtak wajukeya imatuinak:

“¡Yajautsui!

Wagki iina Apuji Apajuú ashí senchigtina nunú inabaun nagkamae,

<sup>7</sup> shiig aneasagmi nuniaku dakujusagmi nuninaku emematiagmi,

wagki Uwig nuwenbau tsawan jegau asamtai,

niina nuweg yamaik umintsae,

<sup>8</sup> nuniku asamtai lino dekas pegkejan tsuwatchau winchamtinun apegae,

wagki lino pegkeja duka, Apajuinu pegkejam aidau pegkeg takasbauji aina nuna iwainawai”, wajaidaun.

<sup>9</sup> Tutai ángel chichagtak: “Agagta: Shiig aneasagtinai Uwig nuwenku yuamunum ipaamu aidauk”. Nuigtushkam chichagtak: “Juka chichamak Apajuinu dekaskea nuuwai”, tujutmayi.

<sup>10</sup> Tujutkui ni wjamunum tikishmagbaijai niina ememattasan, nuniai: “Ankaipa wika Apajuú inakegaitjai. Ame, amina yatsum aidaujai Jesús chichakbau betek umijin ainajum wisha annuketjai. Dekas Apajuú emematta”.

Apajuú tabaun etsejuina duka Jesusa chichamenash etsejuinak nuninawai, tujutmayi.

### *Caballo pujunum entsatkau wainkamu*

<sup>11</sup> Nuniai nayaim ujanmatai caballo pujun wainkabajai, nui entsatka duka “Betek Umin” nuigtush “Dekaskea nu” daagtinuyi, nuigtushkam suwimkanash dekas dutiknuyi, aantsag maaniakush dekaskenum maaninuyi.

<sup>12</sup> Nuna jii aidauk, jii kegak wajukeama imanibi, buukenish kuashat atsejutaiji ajibi; nuigtush daaji agatjamush ajibi, tujash nunak imá nigki dekabí.

<sup>13</sup> Jaanch numpai numpeagbaun nugkuajuyi, duka: “Apajuí Chichame” daagtinuyi.

<sup>14</sup> Nayaimpinmaya suntag aidauk lino dekás shiig pegkeg puju tsuwatchau aidau nugkuinaju, caballo puju aidauun entsatkau saetus miniagmayi.

<sup>15</sup> Niina weninia makichik espada tsakatskatu empek jijnmayi, nuadui ashí nugkanmaya aidauk kajegká, niina senchijijai inamjatnuyi; Apajuí ashí senchigtina nu kajeká aents aidau suwimak ishamainun susatta nunash, nigki uva yumiji vino jiktasa neje najatia dutika dajagtinuyi.

<sup>16</sup> Ni nugkuagbaujinish, niina bakuinish: “REY ASHÍ REY AINA NUNA NAGKAESAU NUIGTUSHKAM APU ASHÍ APU AIDAUNASH NAGKAESAU”, tabau agatkamuyi.

### *Bestia achikbau*

<sup>17</sup> Nuigtú wainkabiajai makichik ángel etsanum wajas, ashí chigki agkajunum nanaak yujau aidau senchi untsuak: “Minitajum, nunikjum jui ijunjajum, Apajuí yutain kuashat umiká ju yuatajum,

<sup>18</sup> rey aina nuna neje, capitán aidau neje, senchi aidau neje, caballo aidau neje, nui entsamin aina nuna neje, ashí neje aidau, agkan aidau nuigtú inatai aidau, eme anenchatai, eme anentai aina juna neje aidau”, timayi.

<sup>19</sup> Nuniaig niimkaman wainkabiajai bestia, nugkanmaya rey aidau nuigtú nuna suntaji aidaujai, caballonum entsatka nujai nuigtú suntaji aidaujai maaniatatus tuwak ijuntatman.

<sup>20</sup> Nunittaman bestianak achikmayi wait profetaya nujai niina eemtin wainchatain iwainak, bestia marcajin jukiú aidau tsanujua nuna, nuigtush niime dakumkamujinash emematiu aidau, nu jimaja nunak jii azufrejai pachimjamu kee abaunum iwakunak ajuabi.

<sup>21</sup> Tikich aina nunak, caballo pujunum entsatka nuna weninia espada jiina nujai ijinabi, dutikamtai ashí nanamtin aidau nunú neje aina nuna yuawag ejemakgmayi.

## 20

### *Mil mijan*

<sup>1</sup> Wainkabiajai makichik ángel nayaimpinmaya waa muun ishamain akaga nuna llavejin nuigtú cadena muuntan takus akaegun.

<sup>2</sup> Nunik dragogkan achikmayi yaunchuk “dapi” tujakbau, Iwanch Satanás\* tutaiya nujai, dutika jigkagmayi mil mijadai pujustí tusa;

<sup>3</sup> dutika waa muun ishamain akaga nui ajua shiig epeni ukukmayi, jiinki ashí nugkanmaya aina nuna tsanujai tusa, nui pujus mil mijanan ejematai wajumchik tsawanchik atiatnuyi.

<sup>4</sup> Nuigtú wainkabiajai ekeemtai aidau, nui pekabiagmayi inamjatnume tusa senchi susamu aidau, nuigtushkam wainkabiajai Jesusan pachis nuigtú Apajuí chichamen etsejiagtai tsupika maamu aidau wakanin; bestianash emematchaju aidau, niime dakumkamunakesh, nuigtú nijayinish, uwejinish marca jukichaju aidau nantajag, Cristujai mil mijan inamjagtinuyi.

<sup>5</sup> Nunuwai dekatkau nantajú aidauk, tujash tikich jakau aidauk nantakchagmayi mil mijan jegamtai nantajagtin asag.

<sup>6</sup> Shiig aneasagtainai dekatkau nantamu atina dui nantakiú aidauk, ditak Apajuí aentsji pegkejam wajasú asag. Nunú aidauk ataktú jaamu atina nuig waittsachgtinai, ayatak Apajuí, Cristo sacerdoteji waigkagtainai nunikag mil mijadai inamjagtin ainawai.

### *Satanás depetkamu atina nu*

<sup>7</sup> Nunú mil mijan jegamtai, Satanás achikam puja nuna akupkatnai;

<sup>8</sup> dutikam jiinki ashí nugkanmaya aidau tsanuagtainai, Gog Magog aina nuiyan, maaniatnun ijumjatatus; nunú aidauk nayantsa kaamatkaji dekapamainchauwa ibau atinuyi.

<sup>9</sup> Nunikag ashí nugkan jamajag midiagmayi, nuninak yaakat Jerusalén pegkejam aidau batsamtai Apajuí anetajijya nuna tenteawagmayi; nuniagatman Apajuí nayaimpinmaya jiin ajuntug ashí apekmayí.

<sup>10</sup> Tuja Iwanch ditan tsanujakua nunak kucha jii azufrejai pachimjamua nui ajuabi, bestia nuigtú wait profeta egketbaunum, dutikam kashi tsawaijai ajumaish tuke waitú batsabiagtainai.

\* 20:2 “Satanás” diistá Mt. 4.1.

*Inagnamunum dekgamabau atin*

<sup>11</sup> Wainkabiajai makichik ekeemtai muuntan pujun, nui makichik ekeemtatman. Nuna emtinig nugkak nayaimpijai atsusagmayi, nuniku asag makichik yantamnumkesh wannakchagmayi.

<sup>12</sup> Wainkabiajai jakau aidaun, eme anentsá diitai, eme anentsá diishtai aidaujai Apajui ekeemtaijin eketa nuna eemtin ijuntatman; nunikmatai papí aidaun ujakmayi, tikich papinash ujakmayi papí pujutan jukiú agattaiya nuna; nunikmatai jakau aidaunak papinum dita takasbauji agakbau aina nuiyan diísá dutiksag suwimkanak sumayi.

<sup>13</sup> Nayants Jakeku aidaush nantajagmayi, jataiya dushakam nuigtú Hadeschakam jakau niini aidaunak susabi. Dutikawagmatai makí makichik dita takasbaujin diijus akanmayi.

<sup>14</sup> Jata nunak, nuigtú Hadesjai kucha jiiya nui ajugmayi. Nuuwai Apajuijai tuke kanaaku kanaamu atina duka.

<sup>15</sup> Aents pujutan jukitin agattaiya nui papinum daaji agatjashbau aidaunak nui utsawagmayi.

**21***Yamajam nugka yamajam nayaim*

<sup>1</sup> Wainkabiajai nayaim yamagman, nugka yamagmajai; wagki dekatkau najankamu nayaim, nugka, nayants aina duka atsusagmayi.

<sup>2</sup> Nuigtush wainkabiajai yaakat pegkejam yamajam Jerusalegka nu nayaimpinmaya Apajui puja nuiya akaetatman, duka nuwa aishinatin shiig iwagmamjauwa imanuyi.

<sup>3</sup> Nuniamunum nayaimpinmaya senchi untsunmun antukbaijai, nuniak: “Juajui aents aina duka Apajuijai ijunag pujustatui, nigka ditajai pujustatui. Nunitai dita niina aentsji agtinai, Apajuijai duke ditá Apajuijai atinai.

<sup>4</sup> Nuniau asa ashí ditá negaikinak ujuktutinai. Nuigtush atsutnai jaamu, buutbau, waitiaku untsubau, najaimamushkam, wagki nagkamchak waji aajakajua duka atsusaju asagmatai”, timayi.

<sup>5</sup> Nuniai ekeemtainum eketa nu chichaak: “Wi ashí waji aina nunak yamajam emajai”, nuigtú chichagtak: “Agagta, wagki ju chicham aina juka dekaske nuigtush dekas uminkatin ainawai”, tujutmayi.

<sup>6</sup> Nuigtú chichaak: “Yamaik ashimnake. Witjai nagkamtinish tuke pujusunuk atakea duish tuke pujutnunuk. Nagkamnamunmash nuigtú nagkanbaunmash wikitjai. Kitamaunak yumi pukuni jiina nu pujutan sukagtina nuna anenjauch susattajai uwagti tusan.

<sup>7</sup> Depetmakunak ashí waji aina nuna susatnaitjai, nunikan wi ditá Apajuijai atatjai, tuja dita mina uchig agtatui.

<sup>8</sup> Tujash sapig aidau, dekaskeapi tuchau, kajegkagtin, magkagtin, tsanijimtan wekaetin, wawejatín aidau, apajuijimtáin emematin, nuigtú ashí wait aidaujai kucha jii azufrejái pachimjamu kee awa nui chimpimawagtinaí, Apajuijai tuke kanaaku kanaamu atina nui”, timayi.

<sup>9</sup> Nuniai siete ángel aidau, siete copanum inagnamunum jata atin aimjamun takuinaku aajakajua nuiya makichik chichagtak: “Wegajai, wi Uwig nuwatkatna nuna iwaintuktajame”, tujutmayi.

<sup>10</sup> Nuniai Wakaní Pegkeji makichik muja yakí jiiitkaunum jujukmayi, dutika yaakat Jerusalén shiig pegkegma nuna iwaintugkabi, nayaimpinum Apajui puja nuiya akaetatman.

<sup>11</sup> Yaaktak Apajui etsantajinig etsanmayi, nunú etsanbaujiya duka makichik kaya shiig pegkeja imanuyi, kaya jaspe, vidrio saawiya iman.

<sup>12</sup> Peegmagbaujig muun yakí jiiikbauyi, nuigtú doce waiti ajibi, nunak doce ángel aidau kuitabiagmayi, nuigtushkam Israelan uchiji doce aajakajua nuna daaji agatkamuyi;

<sup>13</sup> Makí makichik yaakta yantame aina nuig, kampá kampatum waiti ajiagmayi.

<sup>14</sup> Yaakat peegmagbauwa duka doce kaya batsatuamuyi, nuig doce apóstol aidau Uwigdauwa nuna daaji agatkamuyi.

<sup>15</sup> Mina aujta duka yaakat peegmagbaujiya nuna ashí waitiji aina nujai dekaapatnun tagkana nuninun oro takakuyi.



<sup>16</sup> Yaaktak ashí yantamejai nuní nuninuk agmayi, esantiya duka wegkantijai betekayi. Ángel yaaktan tagkan takakbauwai dekaapabi, dutikam dos mil doscientos kilómetros\* ajibi. Esantí, yakinti, wegkantí aina duka betek agmayi.

<sup>17</sup> Nuigtushkam yaakat peegjamua nuna dupantinak sesenta y cinco metros dekaapabi, ángel aentstí dekaapatiamá dutiksag.

<sup>18</sup> Duka jaspeyai peegmagbauyi. Untsu yaaktak ayatak orokeyi, vidrio saawi tsuwatchauwa iman.

<sup>19</sup> Yaakat peegmaku kaya batsatuamua duka, ashí kaya shiig pegkeg aidauwai iwajamuyi. Nagkamchakuik kaya jaspe apujtuamuyi, jimaja duka zafiro; kempatuma ju ágata, cuatroa ju esmeralda,

<sup>20</sup> cincoa ju ónice, seisa ju cornalina, sieteya ju crisólito, ochoa ju berilo, nueveya ju topacio, dieza ju crisoprasso, onceya ju jacinto, doceya ju amatista.

<sup>21</sup> Doce waiti aina duka doce perla agmayi, makí makichik waiti aina duka makichik perlayaik takasbauyi. Untsu yaakta jintiya duka ayatak orokeyi, iman asa vidrio saawiya imanuyi.

<sup>22</sup> Nuanuig juga Apajuí ememattainak wainkachbaijai, wagki ditá jee Apajuí ememattaiya duka, Apu Apajuí ashí senchigtina nuna Uwigjai emematuidau asagmatai.

<sup>23</sup> Yaakta duka etsanak nantunakesh atsumchabi tsaahtin emati tusag; wagki Apajuí tsaahtinjia duke tsaahtin emau asantai, nuigtush Uwijá nuuyi niina lamparajig.

<sup>24</sup> Ashí aents uwemkaju aidauk nunú tsaahtina nui yujasagtina. Tuja ju nugka juiya rey aidauk ditanu wáji shiig pegkeg aidauk niina eme anentsag itajiahtina.

<sup>25</sup> Waitiji aidaushkam ashí tsawantai ujaimutak atinai, wagki kashik atsau asantai. <sup>26</sup> Ashí nugkanmaya aidaushkam ditá wiakchajia nuuyan, nuigtú wáji pegkeg aidauk itajiahtina.

<sup>27</sup> Nunú yaaktanmag aents pegkegchau tsumain aina nuna takau aidauk, wait aina dushakam wayachagtina. Uwijá papiijin pujutan jukiú agattaiya nui daaji agatkamu aina duke wayawagtina.

## 22

<sup>1</sup> Nuniku ai, ángel iwaintugkabi makichik namak pujuta sukagtin tsuwatchau, vidrio saawiya iman, Apajuí ekeemtaijin Uwigjai eketbaunmaya jiiintatman.

<sup>2</sup> Jintak yaakta ejapen nagkaemakuyi, nuniamunum mai namaka yantamega nui, numi pujuta sukagtin aatú amain makichik wajai tikich yantamen makichik wajabi, duka makichik mijantín doceya imania nejenuyi nantu nantutin nejeau asa; nuigtú numí duke aina duka ashí nugkanmaya aidau etsagagtasá takataiyayi.

<sup>3</sup> Nuigtushkam awig makichikish pegkegchau chichagdaiyamuk atsutnai. Apajuí ekeemtaiji nuigtush Uwijá ekeemtaijia dushakam nu yaaktanun atinai, nunin asantai niina inake aidaushkam niinak emematiagtina.

<sup>4</sup> Nunidau asag paan igkua wainiahtina, tuja ditá nijayinish Apajuí daaji agatkamu agtinai.

<sup>5</sup> Nu yaaktanmag kashik atsutnai. Lámpara ekemaktasaikish atsumnashtina, aantsag etsashkam atsumnashtina, wagki Apu Apajuí tsaahtin emau asantai, nunikmatai nui batsamas tuke inamá batsamtina.

### *Cristo taatnuk namput wajaschae*

<sup>6</sup> Ángel chichagtak: “Ju chichama juka betek uminkatnai nuigtush juka dekaskea nu ainawai. Apu, Apajuí profeta aidau Wakaní Pegkeji awetim dekamtikajakua nunú niina angeljin awemae, wáji aidau wamak nagkaemagtata nuna ni inake aidau iwaintukta tau asa”, tujutmayi.

<sup>7</sup> “¡Waamak minittajai! Shiig aneastina jujú papinum chicham tibauwa nuna umia duka”, tawai.

<sup>8</sup> Witjai juagkaitjai, jujú wáji aina nuna wainkaunuk antutnash antukunuk. Juna antukan tuja wainká wajakan, ángel mina iwaintuja nuna ememattasan tikishmatjabiajai.

<sup>9</sup> Nuniai ni chichagtak: “Nijah Ankaipa, wagki wishakam ame inakaitam annuketjai, amina yatsum profeta aina nunin, nuigtú ju papinumian chichaman umiina nuninuketjai, Apajuí emematta”, tujutmayi.

<sup>10</sup> Nuigtú chichagtak: “Jujú papinum chicham tibau agagbauwa juka uukmek idaisaipa, wagki tsawantak ashí jegau asantai.

\* 21:16 “Dos mil doscientos kilómetros” tawa duka, versión Lenguaje actual tawa nuuya jukimui, paan antumain ati tusa. Tuja versión Reina-Valera, tikich versión popular aina duka “doce mil estadios” tuinawai.

<sup>11</sup> “Pegkegchaun takaa duka nunisag pegkegchaunak takasti; nuigtú tsumain aidaun takaidauk nunisag tsumain aidaunak takasti, tuja pegkejan takaa dushakam nunisag pegkegnak takasti. Pegkeniwa duka nuni senchi pegketi”.

<sup>12</sup> “Nijah, wamak minittajai, nuniakun makí makichik takasaja dutiksaik akiktinun takuktajai.

<sup>13</sup> Witjai nagkamtinish tuke pujusunuk ajubaish tuke pujutnunuk, nagkamnamun-mash nuigtú nagkatkamunmash wikitjai”, timayi.

<sup>14</sup> Shiig aneasagtatui jaanchjin nijaina duka, numí neje pujutan sukagtina nunash yuwatin, nuigtush yaakta waitiji aina nuish wayatin asag.

<sup>15</sup> Tujash aents besekú aidaun, tunchi aidaun, tsanijimta yujajin aidaun, magkagtin aidaun, apajuimtain emematin aidaun, nuigtú ashí pegkegchau aidaun wakejus takau aidaun wayachagtinai agag batsamsagtinai.

<sup>16</sup> “Witjai Jesús, mina angeljun awemamjai ashí ju aidaun iglesia aidaun ujaktinme tusan. Witjai dekas atsamunum nagkamdaunuk David weantuitjai, nuigtushkam yaya tsawak etsantama numamtinaitjai”.

<sup>17</sup> Nuniaí Wakan nuigtú, Uwijá nuwega nujai: “Minitá”, tuinawai. Ni antaushkam “Minitá”, titi. Ni kitamauk minití, ni wakegauk yumi pujutan sukagtina nuna anenjauch uwagti.

<sup>18</sup> Ashí aents aidaun jujú papinum chicham tibau agagbau antuina nuna ujainajai: Makichik aentskesh, jujú wají aina nuna ekeauk, Apajuí niinashkam ni waittsatin aina nuna eketkattawai jujú papinum agagbauwa dutiksag.

<sup>19</sup> Nuigtushkam makichik aentskesh jujú papinum uminkatin agagbauwa juna emegkakunak, Apajuishkam numi pujutan sukagtina nuna nejenak susashtinai, nuigtushkam yaakat pegkejam jujú papinum pachisa agagbauwa nuishkam awayashtinai.

<sup>20</sup> Jujú wají aidaun pachis etseja nunú tawai: “Dekaskenum wamak minittajai”, Aatus atí. “Apu Jesusah, wamak minitá”.

<sup>21</sup> Apu Jesús wait anenkagtamujiya nu ashí atuminish atí. Aatus atí.